


Tĩrtũm kapẽr ã kagà
nyw



New Testament in Apinayé (BR:apn:Apinayé)

Tĩrtũm kapêr ã kagà nyw

New Testament in Apinayé (BR:apn:Apinayé)

copyright © 1999 Wycliffe Bible Translators, Inc.

Language: Apinayé

Translation by: Wycliffe Bible Translators, Inc.

Apinayé [apn], Brazil

Copyright Information

© 1999, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Apinayé

© 1999, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-21

PDF generated using Haiola and XeLaTeX on 11 Nov 2022 from source files dated 29 Jan 2022
383a4e22-34cd-505f-9cc2-2f9921e7aa9f

Contents

| | |
|-------------------------|-----|
| Matêwre | 1 |
| Makre | 102 |
| Rukre | 161 |
| Juâw | 267 |
| Atre | 342 |
| Rômân | 430 |
| Wam Korît | 481 |
| Sikûn Korît | 526 |
| Karatas | 554 |
| Epes | 572 |
| Pirîpos | 588 |
| Korosê | 598 |
| Wam Tesarôn | 609 |
| Sikûn Tesarôn | 618 |
| Wam Ximotre | 623 |
| Sikûn Ximotre | 636 |
| Xitre | 645 |
| Piremô | 651 |
| Eprêw | 653 |
| Xiakre | 688 |
| Wam Pêtre | 700 |
| Sikûn Pêtre | 713 |
| Wam Juâw | 720 |
| Sikûn Juâw | 730 |
| Hapuhâ Juâw | 732 |
| Jutre | 734 |
| Apokarîp | 739 |

Matêwre Matêwre kot tanhmã Jejus kot amnhĩ nhĩpêx to ho pa hã kagà

Matêwre na pre kagàja nhĩpêx. Kêp Jejus nhỹ hã hkrajê jahkre xwýnh na pre. Nê kêp Ijaew. Hixi hõ pê na Rewi. Tã na pre mê pamã kagàja nhĩpêx nê kamã Jejus kot pika hwýr wrýk nê kator nê tanhmã ri amnhĩ nhĩpêx to ho pa hã harê nê hã kagà. Nê kêp mê panhõ pahihiti mex o mex ã harê nê hã kagà. Æ na pre Matêwre mê pamã Jejus jarê nê hã kagà anê.

*Apraãw kanrêhã hkra nê htãmnhwýjê nhĩxi
Rukre 3.23-38*

¹ Amnepêm Jejus Kris kormã pika hwýr wrýk kêt ri hukkamã higêtjê nhĩxi na jajaja.

Wýj ri higêtjê hõ nhĩxi na pre kêp Tawi.

Nê Tawi xwýj ri higêt nhĩxi pê na pre Apraãw.

² Nê Apraãw kra na pre kêp Ijak.

Nê Ijak kra na pre kêp Jako.

Nê Jako hkra na pre kêp Juta mê htõjaja.

³ Nê Juta hkra na pre wa kêp Pere nê Jera.

Nê Pere mê Jera wa katorxà na pre kêp Tama.

Nê Pere hkra na pre kêp Erõ.

Nê Erõ hkra na pre kêp Ari.

⁴ Nê Ari hkra na pre kêp Amĩnatap.

Nê Amĩnatap kra na pre kêp Nasõ.

Nê Nasõ hkra na pre kêp Samõ.

⁵ Nê Samõ hkra na pre kêp Poas.

Nê Poas katorxà na pre kêp Raap.

Nê Poas kra na pre kêp Opex.

Nê Opex katorxà na pre kêp Rutre.

Nê Opex kra na pre kêp Jese.

⁶ Nê Jese hkra na pre kêp Pahihti Tawija.

Nê Tawi hkra na pre kêp Sarumãw.

Sarumãw katorxàja Uristi hprõ na pre. Tã nhũm pre Uristi ty nhũm Tawija hãmri mýrpê Uristi hprõ ho hprõ nê kamã hkra. Nhũm wa hkraja kêp Sarumãw.

⁷ Nê Sarumãw kra na pre kêp Ropã.

Nê Ropã hkra na pre kêp Apiasti.

Nê Apiasti kra na pre kêp Asti.

⁸ Nê Asti hkra na pre kêp Josapa.

Nê Josapa hkra na pre kêp Jorã.

Nê Jorã hkra na pre kêp Ojis.

⁹ Nê Ojis kra na pre kêp Jotã.

Nê Jotã hkra na pre kêp Akaj.

Nê Akaj kra na pre kêp Ejekis.

¹⁰ Nê Ejekis kra na pre kêp Manase.

Nê Manase hkra na pre kêp Amõ.

Nê Amō hkra na pre kêp Josis.

¹¹⁻¹² Nê Josis kra na pre kêp Jekonīs mē htōjaja.

Kormā mē htīr ri na pre Papirōn nhō xwŷnhjaja kot mē hkurê kaxār kaxyw mē hwŷr hprōt nē mē unē. Ijaew piitā unēnh pa nē ma akupŷm mē ō pyka hwŷr mē ho hapêx nhūm mē hpānhā Papirōn kamā pa ho pa. Jakamā nhūm Josis mē hkra Jekonīs mē htōjaja mē hipêêxā pyrā nē Papirōn kamā pa ho pa.

Nê Jekonīs kra na pre kêp Saraxi.

Nê Saraxi hkra na pre kêp Joropape.

¹³ Nê Joropape hkra na pre kêp Apiux.

Nê Apiux kra na pre kêp Eriakī.

Nê Eriakī hkra na pre kêp Ajo.

¹⁴ Nê Ajo hkra na pre kêp Satok.

Nê Satok kra na pre kêp Akī.

Nê Akī hkra na pre kêp Eriux.

¹⁵ Nê Eriux kra na pre kêp Eresa.

Nê Eresa hkra na pre kêp Matā.

Nê Matā hkra na pre kêp Jako.

¹⁶ Nê Jako hkra na pre kêp Juje.

Nê Juje hprō na pre kêp Marir.

Nê Marir Kra na pre kêp Jejus.

Mē kot kām: “Tirtūm kot mē pakaxyw ām xwŷnh” anhŷr xwŷnhnta na pre.

¹⁷ Nhūm Apraāw kanrēhā axte axpēn kanrēhā mē àptār nywjaja Tawija wŷr kêp 14. Nê Tawi nhīrō pē Papirōn hwŷr mē hapêx kêt ri axpēn kanrēhā mē àptār nywjaja māānēn kêp 14. Nê ra Papirōn kamā mē pa nhīrō pē axpēn kanrēhā Jejus pē Tirtūm kot mē pakaxyw ām xwŷnhnta wŷr māānēn kêp 14. Ā na pre Jejus Kris xwŷj ri higêtjê nhīxi anē.

Jejus Kris kator

Rukre 1.26-38, 2.1-7

¹⁸ Tā ā mē hixi jarēnh kot anhŷr kanrēhā na pre ā Jejus Kris kator anē. Nhūm pre kormā Jujeja Marir o hprō kaxyw. Nom kormā ho hprō hkêt ri nhūm htujarō. Kormā hkukrit tā nhūm Tirtūm Karō tanhmā ho nhūm htujarō. ¹⁹ Hāmri nhūm Jujeja harēnh ma nē tee ri hamaxpēr nē htŷx nhām mēhō kot kêp htū hā hkamnhīx. Juje kot tām amnhī nhīpêx nē tām hamaxpēr jakamā tee ri kot ho hprō hkukamā hamaxpēr. Nē hamaxpēr o:

—Nā pa mān ixte hturē hā. Nhām mēhō ra kot ā hipêx anhŷr kēnā. Nā kot paj ho ixprō hkêt nē. Nom kot paj ixkwŷjē mā ā kot amnhī nhīpêx anhŷr o amnhīrit kêt nē. Kot paj anē nhūm mē kuma nē ho kapēr punuj nhūm amnhī kamā hpījaām tŷx nē. Ja pymaj kot paj ixkatāt kôt hkaga kurê kumrēx. Nom ixkwŷjē hkàx ā hkaga. Anē.

²⁰ Nē ā hamaxpēr anhŷrja o ra gōr nē nō. Nhūm Tirtūm kapēr o mē wrŷk xwŷnhjê hō hwŷr wrŷ nē hwŷr axān kuri xa. Hāmri nē kām:

—Pa Juje? E ot pa awŷr tē. Kwa tee ri Marir o aprō hkukamā ajamaxpēr punuj kêt nē. Māmri ho aprō. Mēhō kot apē tanhmā ho hkêt. Tirtūm Karō na pre ā hipêx anē. Jakamā kwa tee ri ajamaxpēr kêt nē māmri ho aprō nē war apa. ²¹ Koja hkrare kato nē myre nē hprêk. Hāmri nē mē kot hkôt amnhī xunhwŷr xwŷnhjaja mē kot amnhī tomnuj piitā pē mē utār pa. Jakamā koja kato ka wa hā hixi mē nhūm kêp Jejus. Anē.

Nhùm pre ã Tirtùm kapër o mẽ wrÿk xwÿnhja kãm kapër anê. Ijaew kapër kãm Jejus jarênhja te kêp “Tirtùm kêp mẽ papytâr xwÿnh” anhÿr pyrâk. Jakamã nhùm Tirtùm kapër o mẽ wrÿk xwÿnhja Juje ôt kãm ã kãm Marir jarênh anê. ²²⁻²³ Nom kormã ã kãm kapër anhÿr xwÿj ri na pre ra Tirtùm nhÿ hã kapër xwÿnhjê hõja kukamã tanhmã harênh to nê hã kagã. Nê hã kagã ho: E mẽ inhma nê inhma tÿx nê ho apa. Koja nhÿrmã pyka já kamã mēhõ kormã hkukrit ã htujarõ. Nê hkra kato nê myre. Nhùm mẽ omu nê hã hixi mẽ nhùm kêp Emanuew. Anê.

Ijaew kapër kãm “Emanuew” jarênhja te kêp “Ota ra Tirtùm mẽ pahkõt pa ho pa” anhÿr jarênhja pyrâk. Jakamã nhùm pre Tirtùm nhÿ hã kapër xwÿnhja Jejus kukamã ã harênh anê nê hã kagã.

²⁴ Jakamã nhùm Tirtùm kapër o mẽ wrÿk xwÿnhja Juje mã kapër par mẽ nhùm hkrãkato. Hãmri nê kot kãm ujarênh xã hkõt Marir o hprõ. ²⁵ Nom kormã tanhmã ho hkêt nê ri o pa rãhã nhùm hkrareja kato. Hãmri nhùm wa hã hixi mẽ nhùm kêp Jejus nê mãänēn kêp Emanuew.

2

Kanhêti ho studa xwÿnhjê jarênh

¹ Nhùm pre Jejus Perěj kamã kato. Pika pê Jutej kamã. Pahi Eroxo kormã kot Jutej nhõ xwÿnhjê ho amnhÿptâr o pa ri nhùm õ pika kamã kato. Hãmri nhùm Tirtùmja kaxkwa kamã Kra kator jarênh xã hã kanhêti raxta õ nhõ nhùm pika hõ kamã kanhêti ho studa xwÿnhjaja omu. Kanhêtiya pumu nê hkÿnh nê axpēn mã:

—Kwa ga mẽ kanhêti raxti mÿj pumu. Mãn ra Ijaew nhõ pahi nywta kato nhùm kanhêti mÿj kêp ho amnhÿrit xã hã ajêt. Kwa pu mẽ ma hapêr o mõ nê nhÿri tokyx omu nã.

Anê hãmri nê amnhÿ to pikuprõnh pa nê ma hapêr o pa. Ma myt gjêx xã hwÿr hapêr o pa hã apkati sohtõ nê. Hãmri nê ra Ijaew nhõ pika hwÿr pøj nê krÿ pê Jerujarê hwÿr hapêr o mõ. Pahi Eroxo nhõ krÿja wÿr nhùm mẽ hapêr o mõ hãmri nê kamã pøj nê mẽ hkrare nywta ã krÿ nhõ xwÿnhjê kukjêr o mõ ² nê mẽ kãm:

—Pa? Ot pa mẽ apê Ijaew nhõ pahi nywreta pumunh kaxyw mõ. Ham kator xwÿnhja. Mẽ inhõ pika kamã na pa prem kaxkwa hkrax rùm kot ho amnhÿrit xã hã kanhêti raxta pumu. Hãmri nê nhÿri pahi nywre pumunh nê kutã mẽ ixkõn krã ho ixtēm nê ixkrÿ nê kãm mex o mex ã harênh kaxyw nêtãnh mẽ inhõ krÿ rùm hapêr o mõ. Kwa mẽ inhmã harê. Nhÿri na? Na pa mẽ inhmã omunh prãm tÿx kumrêx.

Anhÿr o hã mẽ hkukjêr o mõr jakamã nhùm mẽ piitã pahi nywja jarênh ma nê axpēn mã harênh o hprõt. ³ Nhùm pahi Eroxa harênh ma nê tee ri amnhÿ kukamã hamaxpêr. Pahi nyw kot mẽ ho amnhÿptâr ã hkamnhÿx nhùm já kêp omunj tÿx nê. Nhùm krÿ nhõ xwÿnhjaja ã hamaxpêr anhÿr ã omu nê tee ri amnhÿ kukamã hamaxpêr o ra kãm ma nê. ⁴ Hãmri nhùm pahi Eroxa amnhÿ wÿr hkwyjê hã karõ. Mẽ õ patre krãhtümjaja nê Tirtùm kapêr tüm o mẽ ahkre ho mẽ pa xwÿnhjaja nhùm amnhÿ wÿr mẽ hã karõ nê Tirtùm kot nhÿrmã mẽ hwÿr mẽnh mã xwÿnhja ã mẽ hkukjêr kaxyw. Nê mẽ kãm:

—E Tirtùm kot nhÿrmã mẽ pahwÿr mẽnh mã xwÿnhja ã na pa mẽ akukjêr kaxyw mẽ ato akuprõ. Kwa mẽ atõ inhmã harê. Koja nhÿrmã kator kaxyw nê nhÿri koja we kato? Xã jar mẽ panhõ krÿ kamã nã? Xã nhÿri krÿ hõ kamã? Anê.

⁵ Hāmri nhūm mē kuma nē kām:

—Nà mē panhō pika pē Jutej kamā koja xep kato. Krī pē Perēj kamāā. Na pre Tirtūm nh̄y hā kapēr o mē pa xw̄ynhja ra hkukamā mē panh̄gētjē mā tanhmā harēnh to nē hā kagā. Nē hā kagā ho:

⁶ Pa Perēj nh̄o xw̄ynhja? E mē anhō krī grire htā kamā koja nh̄ymā mē panhō Pahi Maatija kato. Koja mē pahpē Ijaewjē piitā mē pahto amnh̄iptār mex o pa. Jakamā mē anhō krī grire htā koja Ijaew piitā xpēn mā mex ā harēnh o pa.

Ā na pre Tirtūm kot mē pahw̄yr mēnh mā xw̄ynhta kukamā mē kām harē nē hā kagā anē. Anē.

⁷ Hāmri nhūm pahi Eroxo tee ri ā harēnh anh̄yrja ma hāmri nē amnh̄i w̄yr mē kot hā āhkujēr o mōr xw̄ynh̄jē hā karō. Nom nh̄yri Ijaew kàx ā. Hāmri nhūm mē ma hw̄yr mra nē agjē nhūm mē omu nē pahi nywta ā mē hkukja nē mē kām:

—E mē aprī hā inhmā pahi kator nywta jarē. Tanhmā na pre ra mē ate kanhēti pumunh ā mytwr̄y kute? Xà ham na ka prem omu nā amnepē mā? E mē aprī hā tanhmā inhmā harēnh to. Anē.

Hāmri nhūm mē ihōja kām:

—Nà na ra hā amgrā axkrut kaxyw. Na pa prem omu hāmri nē inhnojarēt nē man ixpa ho ixpa ry rax nē mē aw̄yr pōj. Anē.

⁸ Nhūm mē kuma nē mē kām:

—T̄y. Nom jar amrakati. Perēj kamā na xep kato. E mē māmri ma hw̄yr mō nē kamā hapēr. Hāmri nē nh̄yri omu nē akup̄yn ixw̄yr mō nē inhmā harē. Pa ijaxw̄yja ma hw̄yr mō nē omu nē mē apyrā nē kām mex o mex ā harē. Ijaxw̄yja inhmā omunh prām t̄yx kumrēx. Anē.

Nom hēx rom ā ri mē kām kapēr anē. Kot nh̄yri harēnh mar nē hā āmnēnh nhūm mē kot hp̄ir kaxyw nhūm hēx rom ā kām omunh prām t̄yx ā amnh̄i jarēnh anē. ⁹⁻¹⁰ Jakamā nhūm mē kuma hāmri nē kato nē ma Perēj w̄yr mōr kurē kumrēx. Hāmri nē kormā mē ō pika kamā mē pa ri kanhēti ho studa xw̄ynhta nhūm mē axte amnh̄i kukamā omu nē hk̄inh nē. Nhūm ma Perēj w̄yr mē hkukamā mō nhūm mē omunh pē ma hkōt pa rāhā hw̄yr pōj. Nhūm kanhētija pahi nywre nhōrkw̄y m̄yri ajēt. ¹¹ Jakamā nhūm mē ma hkōt mra nē ixkreja w̄yr pōj nē kapem xa. Hāmri nē mē kām kapēr nē mē hw̄yr agjē nē Jejus mē katorxàja wa omu. Hāmri nē Jejus kutā hkōn krā ho hkrī hpa nē kām kapēr nē kām:

—Pa Xugitre. Hēxta waa nē. Nà amex o amex. Kot kaj nh̄ymā axāptār hāmri nē apē mē inhō Pahi Maati. Nà ām hāmri na pa mē apumu nē ixk̄inh nē. Anē.

Hāmri nē ahp̄ynhā kām hk̄inh xà gō. Kām ōr kw̄y gō nē kām mēhkuxwa xà hk̄w̄y gō nē kām te kot rāmre kuxware pyrāk pē m̄iraja nhūm mē kām hk̄w̄y gō. Mē hk̄inh xà hā kàxpore xohtō nhūm prem kām ōr pa. ¹² Hāmri nē ra akup̄ym Jerujarē kamā pahi Eroxo w̄yr nojarēt. Nhūm kamāt nhūm mē gōr nē hikw̄y hāmri nē ra am̄yti. Nhūm Tirtūm mē hp̄imtir kām mē kām kapēr nē mē kām:

—Pa? E mē inhma. Kér ka mē akup̄ym pahi Eroxo w̄yr amrar nē kām mē hkrata jarēnh kēt nē. Ām kwarī ho kwarī. Nē kër ka mē pry hō hā m̄an ma mē anhō pika hw̄yr akup̄ym apa ho apa.

Anh̄y o mē kām kapēr jakamā nhūm apkati nhūm mē kànhmā hkrī hāmri nē Tirtūm kot mē kām hā karō xà hkōt ma akup̄ym mē ō pika hw̄yr pa kurē kumrēx nē akup̄ym pahi Eroxo w̄yr mrar kēt nē.

*Juje mē hprō wa kot Erox pymaj ma Jejus o mōr
Apokarip 12.1-6, 12.13-18*

¹³ Tā nhūm kanhēti ho studa xwŷnhjaja ma akupŷm hapêx hāmri nhūm Tirtūm axte Marir mjēn Juje hwŷr kapēr o mē wrŷk xwŷnhjê hō mē. Nhūm kê axte hpimtir kām hwŷr wrŷr nē kām kapēr nē kām:

—Pa Juje. E kwa kànhmā nhŷ. Na ra pahi Eroxja aprō pē hkrata ā amŷnē. Koja tokyx pōristi hkŷŷjaja mē anhō krī hwŷr pōj nē war apē hpīr kaxyw ri hapēr. Jakamā kwa wa tokyx akato nē ma pika pē Ejit wŷr amōr kurē kumrēx. Nē Ejit kamā apa rāhā pa nhŷrmā akupŷn amnē war amē. E kwa tokyx. Anē.

¹⁴ Hāmri nhūm kuma nē kànhmā nhŷ nē Marir mra nē war amnhī to akuprō nē ra nojarēt. Hāmri nē krīja pē Jejus o kato nē ma o mōr kurē kumrēx. Wa mōr rry nē hāmri nē Ejit wŷr pōj nē kamā pa ho pa.

¹⁵⁻²⁰ Rōm nhūm pahi Erox tee ri amnhī wŷr kanhēti ho studa xwŷnhjê kamā hamak o pa nom nhūm mē akupŷm hwŷr mrrar kêt nē. Jakamā nhūm mē kamā gryk nē hamaxpēr o:

—Tk. Kwa nà. Na mē ām inhmā hēx nē akupŷn ixwŷr mrrar nē nhŷri inhmā pahi nywta jarēnh kêt nē. Nà kwār mē māmri ā inhīpêx anē. Mē kot ixpē ho hpimxuure kaxyw ā. Nà kot paj mē kēp kupī nhūm mē rī amnhī pumu. Na xep prem kanhēti kot harēnh xāja pumunh ā ra hā amgrā pyxi nē hkōt mytwrŷ kēp 6. Jakamā mǎn mē hkrata ra hā amgrā axkrut kaxyw. Nà na pa ra ijamaxpēr. Kot paj Perēj kamā mē hkra myjaja ra mē hā amgrā axkrut xwŷnhjaja nē kormā mē hā amgrā axkrut kêt xwŷnh piitā mē himex pa. Jao ra mē kamā pahi nywta pī. Nà ixte hpīr mā kēnā. Koja hprêk nē ixpānhā Ijaew o amnhīptār kêt nē.

Anhŷr o hamaxpēr hāmri nē amnhī wŷr ō pōristi hkŷŷjê hā karō nē mē kām mē hkrajê hā amŷnē nē mē kām:

—E kēr ka mē ma Perēj wŷr mra nē kamā mē kēp mē hkra myrejaja ra mē hā amgrā axkrut xwŷnhjê nhīmex pa. Nē kormā mē hā amgrā axkrut kêt xwŷnhjaja mǎānēn mē himex par kumrēx. Nē Perēj pu hā ri krī hkryre hkōt mǎānēn ri ajapōj nē ā mē himex par anē. Anē.

Hāmri nhūm mē kuma nē ma mē hwŷr mrrar kurē kumrēx. Hāmri nē Perēj wŷr pōj nē mē kēp mē hkra myre piitā mē himex pa. Jakamā nhūm mē katorxā nē mē hipêêxājaja tee ri mē hkra htyk xwŷnhjê pumu nē hkaprī htŷx nē mŷr rūnh nē. Nom na pre Tirtūm nhŷ hā kapēr jarēnh o mē pa xwŷnh finat Jeremīstija ra amnepēm ā mē kot amnhī nhīpêx anhŷrja kukamā mē panhīgētjê mā mē harē nē hā kagā. Na pre mē kām Ijaew kurē xwŷnhjê pynēnh nē ma mē ō pika hwŷr mē ho hapêx par kaxyw. Hāmri nhūm mē panā Rrakewja te ra kot tee ri ja hā mē omunh nē tanhmā amnhī nhīpêx to pyrāk nhūm Jeremīstija tanhmā Ijaewjê jarēnh to nē hā kagā. Nē hā kagā ho:

Amnepēm Perēj kamā na pre mē panā Rrakewja hpījagri ho nōrja ā ra htyk kaxyw nē tee ri hkra kator mā xwŷnhhta kukamā hamaxpēr nē mŷr o nō. Nhūm hkŷŷjaja tee ri akupŷm tam hamaxpēr kaxyw kām kapēr. Tā jarāhā Rrakew kanrēhā hkra nē htāmnhwŷ nijaja ra urāk nē tee ri mē hkrare ho hamak xāj mŷr o pa. Mē kot mē kēp utār nē mē himex par jakamā nhūm mē tee ri mē ho hamak xāj mŷr o pa. Anē.

Nhūm pre finat Jeremīsjā mē hkukamā ā mē harē nē mē hā kagā anē. Tā ra jarāhā mēni piitā Rrakew pyrā nē hkrajê o hamak xāj mŷr o pa.

*Wa kot akupŷm wa ō pika hwŷr Jejus o mōr
Juāw 7.41-42*

Tã nhũm mytwrý grêre nê hapêx nhũm pahi Eroxy ty. Jakamã nhũm kamàt nhũm Jujeja gôr nê nõ. Nê kê ôt kãm axte amÿti. Nhũm Tirtũm kapêr o mē wrýk xwýnhja axte hwýr wrý nê kãm:

—Pa Juje? E na ra Marir pē hkra pīr mã xwýnhnta ty. Jakamã kwa wa mãmrī ma akupým mō. Ma akupým mē apē Ijaewjê nhō pika hwýr axãmnhīx aprō mē hkrata wa o mō.

Anhýr o kãm kapêr. Na pre ra amnepê m Tirtũm nhý hã kapêr o mē pa xwýnhjê hōja ja kukamã mē panhīgétjê mã ja jarê nê hã kagà. Nê hã kagà kot: “Ixpê Tirtũm kot paj nhýrmã Ejit rũm ma akupým ò pika hwýr ixkrata wa mē kumê.” Anhýr o kot hkukamã harênh nê hã kagà.

²¹ Jakamã nhũm Tirtũm kapêr o mē wrýk xwýnhja ã Juje mã karō anê hãmri nhũm kuma nê ma akupým wa o mō. Ma akupým mē ò pika hwýr wa o mō.

²² Tã ra akupým hpôx kaxyw htêp o mō. Hãmri nê pahi Eroxy kra Akêrawja ra hipéêxà mýr pē kot Jutej kamã mē ho amnhīptār hã harênh ma. Hãmri nê tee ri mē amnhī kukamã hamaxpêr nê kãm mē hwýr wa o mōr pyma nê.

Tã nhũm kamàt nhũm Juje ra gôr nê nõ nê kê axte amÿti. Nhũm kê axte Tirtũm kapêr o mē wrýk xwýnhja hwýr wrý nê akupým ò pika hkwy pē Jutej wýr mōr nê wa mē hkurê nê kãm:

—Pa Juje? E kêr ka Jutej wýr wa mē amōr kêt nê. Pãnhã nhãm mē anhō pika hō hwýr mãn mō nê kamã ri apa.

Anê nhũm kuma nê hpãnhã wa mē ma mē ò pika hkwy pē Garirej wýr wa mē juk nê ma mō. ²³ Nê kamã pōj nê krī pē Najare hwýr mō nê kamã amnhīm òrkwy nhīpêx nê kamã wa mē pa ho pa. Nhũm pre ra amnepê m Tirtũm nhý hã kapêr o mē pa xwýnhjê hōja ra ã mē kot amnhī nhīpêx anhýrja kukamã mē panhīgétjê mã mē harê nê hã kagà. Nê hã kagà kot:

Tirtũm kot mē pahwýr mēnh mã xwýnhnta koja kêp Najare nhō xwýnh. Anê.

3

Juãw Paxis kot Tirtũm kapêr jarênh o pa Makre 1.1-6; Rukre 3.1-14; Juãw 1.19-23

¹ Nhũm pre Juãw Paxisja ã amnhī nhīpêx anê. Nê pika pē Jutej kamã mē kãm Tirtũm kapêr jarênh o pa. No ãm krīm pa hkêt nê. ãm mē hpu hã krī pē amým ri kapôt ã ri mē kãm Tirtũm kapêr jarênh o pa. ²⁻³ Tirtũm nhý hã kapêr o pa xwýnh finat Ijais ra kot Juãw kukamã mē panhīgétjê mã tanhmã harênh to nê hã kagà xá hkôt. Na pre hkukamã hã kagà ho:

Koja nhýrmã mēhō mōn pōj. Kapôt ã mōn pōj nê mē kãm tanhmã mēmoj tã karō hto ho ri pa. Nê mē kãm: “Koja Tirtũm tokyx mē pahwýr mē panhō Pahihtija mē nhũm wrý nhũm mē piitã omu. Jakamã kwa mē tokyx kutêp tãm amnhī nhīpêx o ri apa. Te mē kot mēhō kutêp pry ho mexta pyrà nê amnhī nhī ho tãm amnhī nhīpêx nê tãm ajamaxpêr mex o ri apa. Kêr ka mē Pahihti kutêp ã amnhī nhīpêx anhýr o ri apa.” Anhýr o koja mē kãm ujarênh o pa. Anê.

Na pre finat Ijaisja Juãw Paxis kukamã ã mē kãm harênh anê nê hã kagà. Tã nhũm hã kagà xàja kôt nhũm Juãw Paxisja mōn pōj. Hãmri nê Ijais kot hkukamã harênh xá hkôt kapôt ã ri mē kãm ujarênh o pa nhũm mē kãm mar prãm xwýnhjaja ma hwýr mra. Nhũm mē kãm kapêr nê mē kãm:

—E koja Tirtũm tokyx kot mē pakaxyw ãm xwýnhja o amnhīrīt. Jakamã kwa mē tokyx kutêp amã amnhī tomnuj kaga hprãm xáj tãm amnhī nhīpêx o apa.

Anhýr o Jexus kutêp mē kãm kapêr o pa.

⁴ Juãw Paxisja hikàxpore hkêt jakamã na pre ê mex kêt nê pa. ãm mêmō mry pê kamer kî ho amnhîm ê nhîpêx nê hagjê nê hã pa. Nê mêmō mry hkã ho amnhî pre nê ri pa. Nê mêmō mex kur kêt nê ãm krit ku nê menh ôr o ri pa.

⁵ Jakamã nhûm kapôt ã ri mē kãm Tirtûm kapêr jarênh o pa nhûm mē kot mar kaxyw ma hwÿr mra. Pika pê Jutej kamã ri mē pa xwÿnhjaja. Nê Jutej kamã krî pê Jerujarê nhô xwÿnhjaja. Nê pyhti pê Jotãw mÿri mē pa xwÿnhjaja. Nhûm prem piitã harênh ma nê kot mar kaxyw ma hwÿr mra. ⁶ Hãmri nê kapêr ma nê Tirtûm noo mã mē kot amnhî tomnuj xwÿnh ã kãm amnhî jarê. Mē kot amnhî tomnuj kaga nê tam amnhî nhîpêx o pa hprãm xà ã kãm amnhî jarênh anê. Nhûm Tirtûm kaxkwa kamã hkrî htã mē kuma nê amnhî katut kôt mē kot amnhî tomnuj rênh pa nê axte kãm hamaxpêr kêt nê. Jakamã nhûm pre Juãw Paxisja Tirtûm mã gôx kãm mē hkrã kumrãr pa. Pyhti pê Jotãw kamã mē hkrã kumrã.

⁷ Tã nhûm Parijew mē Satusew nhô xwÿnhjaja mãänênh mē hkôt ma Juãw Paxis wÿr mra. Mē urak nê mē kêp Ijaew jakamã haxwÿja Juãw Paxis kot mē hkrã kumrãr kaxyw ma hwÿr mra. No ãm hkwyjê hkînhã mē kot amnhî tomnuj kaga hprãm xà kãm amnhî jarênh kêt nê. ãm amnhî krã hkôt hkwyjê hkôt hwÿr mra nê amnhî to kuma. Nom nhûm Juãw Paxisja ra hprî hã ã mē hamaxpêr anhÿrja kôt mē omunh mex nê. Jakamã mē kãm:

—Tk kwa nã. Kormã mē ate amnhî tomnuj pix o ri apa kênã. Xà kot paj mē ate amnhî tomnuj o apa rãhã mē akrã kumrã nhûm Tirtûm ja hã mē apumu nhûm ja kãm mex nê? Nã koja já kãm mex kêt nê. Koja ja mÿrapê nhÿrmã tanhmã mē atomnuj tÿx to ka mē tee ri umaj apimxur prãm kaprÿ. ⁸ Na htem amnhî tomnuj kaga nê tãm amnhî nhîpêx nê tam axpên nhîpêx. Jakamã e kwa mē ã amnhî nhîpêx o apa anê pa rî kormã mē akrã kumrã. ⁹ Na ka htem atÿx ri ajamaxpêr o: “Mê ixpê finat Apraãw kanrêhã htãmnhwÿ hkwy na pa mē. Jakamã koja Tirtûm ja hã mē ixpumu hãmri nê mē ixte amnhî tomnuj o ixpa tã nhûm ja hã tanhmã mē ixto hkêt nê. Koja mē ixto mex nê.” Anhÿr o atÿx ri amnhî kukamã ajamaxpêr. Nom ja kot anhÿr kêt. Mē apê Apraãw kanrêhã htãmnhwÿ htã mē ate urak nê tãm amnhî nhîpêxre hã. Kot kaj mē apê htãmnhwÿ htã amnhî tomnuj o ri apa hãmri nê Tirtûm noo mã te mē apê pikap kênre nhîkwÿ pix pyrãk. ¹⁰ Na ra Tirtûm mē ate amnhî tomnuj mÿrapê tanhmã mē ato kaxyw. Te ho mêmō nhô mêmō hpãr ô hkêt nhûm kot tee ri omunh nê krãhyr nê kuwy kamã mênh nê ho kaxãr par pyrãk o koja mē anhîpêx. Jao amnhî nê kuwy hwÿr mē arê ka mē kamã amnhî xà htÿx kamã ajamak rãhã ho ri apa. Anê.

Nhûm pre ã Juãw Paxisja Parijew mē Satusew nhô xwÿnhjê mã kapêr anê. ¹¹ Hãmri nê hpãnhã axte mē kot mar kaxyw hwÿr mē mrar xwÿnhjê mã kapêr nê mē kãm:

—E ra mē ate amnhî tomnuj kaga xwÿnhjaja. Na pa Tirtûm mã mē akrã kumrãr kaxyw gô pix o mē akrã kumrã. Nom koja tokyx ixpãnhã Tirtûm kot mē pakaxyw ãm mã xwÿnhhta tãm mē pahwÿr pøj. àhpumunh tÿx o kot ijakrenh par jakamã na pa hte ãm kukwak ri ixpa nê amnhî tã hã ixpijaãm o ri ixpa. Koja mē awÿr Tirtûm Karô rê nhûm mē akarô mã agjê. Ka mē ý hã tam amnhî nhîpêx o ri apa. Nom kormã mē kot tãm amnhî nhîpêx kêt xwÿnhjaja koja Tirtûm kot mē pahwÿr mênh xwÿnhja ja hã mē omu nê mē hipêx o te kuwy kot mêmōj to kaxãr par pyrãk o mē hipêx.

¹² —Na htem pur kãm harôj nhîkê nê ho grã nê hpãnhã kahtwÿ. Nê kahuk pa hãmri nê hkapi nhûm kôk apê nê prÿhkã ho htor pa. Nhûm mē hpãnhã hy

ho pa nê ixkre kamã gôj kãm unhwÿ. Ja pyrà nê koja tokyx Tirtûmja mê piitã mê kot tanhmã amnhî nhîpêx to ho pa hã mê omunh xã hkôt mê ho axkjê. Jakamã mê kot tâm amnhî nhîpêx o mê pa xwÿnhjaja koja ma amnhî wÿr mê ho api nhûm mê kuri mex rãhã nê pa ho pa. No mê kot amnhî tomnuj rãhã ho mê pa xwÿnhjaja koja jajê hkînhã tanhmã mê homnuj to. Nhûm mê ma kuwy raxja wÿr pa nê kamã amnhî xã htÿx kamã hamak rãhã nê pa ho pa.

Anhÿr o mê kãm kapêr.

*Juãw Paxis kot Jejus krã kumrãr
Makre 1.9-11; Rukre 3.21-22; Juãw 1.32-34*

¹³ Tã nhûm Jejus pika pê Garirej rûm kato nê ma Juãw Paxis wÿr mô. Juãw kot pyhti pê Jotãw kamã hkrã kumrãr kaxyw ma hwÿr mô. Hãmri nê omu nê kãm:

—Pa. E ot pa awÿr amnhî to tẽ. Ate mê kuxwar ixkrã kumrãr kaxyw. Anê.

¹⁴ Hãmri nhûm tee ri kuma nê kãm:

—Kwa nã. Aa ate amnhî tomnure hã kot pa kêt ri akrã kumrã. Nã ka kot kaj ixkrã kumrã. Anê.

¹⁵ Hãmri nhûm kãm:

—Kwa nã. Mãmri ixkrã kumrã Juãw Paxis. Tirtûm kãm ja prãm kênã kot ka kêt ri axtem nê ixkaga. Kot puj mê Tirtûm kãm hprãm xã hkôt tanhmã amnhî nhîpêx to ho ri papa. Anê.

Hãmri nhûm kuma nê kãm:

—Tõe. Nã kot paj akrã kumrã. Anê.

¹⁶ Hãmri nê pyhti hwÿr o wrÿ nê kamã hkrã kumrã. Hãmri nê wa akupÿm api nê gô mÿ ri ãm rãhã nhûm kaxkwa axkjê. Hãmri nhûm kurûm Tirtûm Karôja Jejus wÿr te tuuti pyrà nê ahpar mã hwÿr wrÿk o tẽ nê ïkre hã xa. Nhûm Jejus arî amnhî wÿr wrÿk o htêm kãm omunh o xa. ¹⁷ Hãmri nhûm Tirtûm kaxkwa rûm kãm kapêr nê kãm:

Pa? E apê ixkra mex na ka. ãm hãmri na ka hte ixkanrêhã ã amnhî nhîpêx mex anê. Inhmã ajapê kamã na ka ri apa ho apa. Anê.

4

*Satanasti tee kot amnhî tã Jejus kamã hamak
Makre 1.12-13; Rukre 4.1-13; mãânên Eprêw 2.18, 4.15*

¹ Tã nhûm Jejus Tirtûm Karô nhÿ hã ma kapôt ã ri pa. Satanasti kot amnhî tã kamã hamak kaxyw nhûm ma kapôt ã ri pa. ² Ri pa hã apkati xohtô nê. Ra hã arîgro pê 40. Nê kormã apkur kêt jakamã ra kãm prãm tÿx kumrêx nê ri pa. ³ Hãmri nhûm Satanastija nhÿhÿnh hwÿr tẽ nê hêx rom kãm kapêr nê kãm:

—Pa. E kwa mân ka ra amã prãm tÿx nê nã? Nom xep apê Tirtûm Kra jakamã apê mêmoj hihtÿx kêt. Tirtûm pyrà nê axãhpumunh o axãhpumunh kênã. Jakamã kwa kên nhîkwÿ mÿj mã anê kê amã pãwti hã amnhî jahkre ka aku nê tokyx ho amnhî xihtÿx. E kwa tokyx kãm akapêr. Anê.

⁴ Hãmri nhûm kuma nê kãm:

—Tk. Nã kot paj amar xã hkôt ã ri amnhî nhîpêx anhÿr kêt nê. Koja Tirtûm kãm inhmã mêmoj nhôr prãm nê inhmã mêmoj gô pa rî kormã kukrê. Kapêr ã kagã htûm kot ja jarênh kot:

Na htem mê apkur xã pix kukwak ri htîr nê pa hkêt nê. Na htem mãânên Tirtûm kapêr ma nê hkôt amnhî nhîpêx nê htîr nê pa. Anê.

—ã kapêr ã kagã kamã kot harênh kot anhÿr jakamã kot paj akapêr kôt ri ã amnhî nhîpêx anhÿr kêt nê. ãm kwarî ho kwarî. Anê.

⁵ Hāmri nhūm Satanastija tee ri kuma hāmri nē hpānhā ma Jerujarē hwÿr o mō. Nē Tirtūm mā amnhī jarēnh xā hā ixkre hprêk nhīmōk wÿr ho api nē kÿxpē hatur xā hā ām nhūm xa. Hāmri nē amnhī parpē kēn rūnh nhūkwÿ xwÿnhja pumunh o xa nhūm Satanasti kām:

⁶—E apē Tirtūm Kra jakamā kwa ja rūm ahpar mā ajarī nē ma tē nē pikap tēm. Kōja Anhīpēxāja apumunh mex nē ka tanhmā amnhī to hkēt nē. Kapēr ā kagā htūm kot harēnh kot:

Tirtūm kōja kapēr o wrÿk xwÿnh kwÿjē mā ajarē ka ajarī nē ahpar mā tē nhūm mē kÿx pē amÿ nhūm mēmoj akā hyr kēt nē. Anē.

—Ā kapēr ā kagā htūm kot ajarēnh anhÿr jakamā e tokyx ajarī. Anē.

⁷ Hāmri nhūm Jejus kuma nē kām:

—Tk kot paj ri ate inhmā karō xāja kōt ā amnhī nhīpēx anhÿr kēt nē. Kōja Tirtūm tām inhmā ijarī hā karō pa rī mar xā hkōt ijarī. No kot pa ri amar xā hkōt ijarī hkēt nē. Tirtūm kapēr ā kagā htūm kot ja jarēnh kot:

Kēr ka mē amnhī krā hkōt amnhī tā ixkamā ajamak kaxyw inhīxi jarēnh kōt tanhmā amnhī nhīpēx to hkēt nē. Anē.

—Ā kot ja nē kapēr kot anhÿr jakamā kwarī ho kwarī. Kot paj ri amar xā hkōt ijarī hkēt kumrēx. Tirtūm tām kot inhmā ā ixte amnhī nhīpēx anhÿr ā karōre hā. Anē.

⁸ Hāmri nhūm Satanasti tee ri kuma nē hpānhā ma nhÿri kēn prēeti hwÿr o tē nē himōk ā axte o xa. Hāmri nē kām pika piitā ahkre hpa. Nē mē hikukrēx piitā nhūm kām ahkre ho xa. Kāxpore nē mēmoj mex piitā nhūm kām ahkre nhūm Jejus piitā omunh o xa. ⁹ Hāmri nhūm kē Satanasti axte kām:

—E mān ka kam ri mēmoj mex mÿj piitā omunh pa. Piitā inhō na. Nom kot kaj ixkutā tēm nē inhmā inhmex o inhmex ā ijarē pa ama nē amā piitā ōr pa. Ka kam mēmoj piitā ho anhō nē ho amnhīptār o apa. Jakamā e kwa tokyx. Anē.

¹⁰ Hāmri nhūm kuma nē axte kām kapēr nē kām:

—Tk kwa ma nhÿhÿm tē Satanasti. Kot paj ri amā amex o amex ā ajarēnh kēt kumrēx. Tirtūm kapēr ā kagā htūm kot ja nē kapēr kām hihtÿx kēnā. Kapēr kot:

Kēr ka mē ixkapēr pix ma nē ixkutā pix mā akōnkrā ho akrī nē inhmā inhmex o inhmex ā ijarē. Kēr ka mē ā amnhī nhīpēx anhÿr o ri apa.

—Anhÿr o kot hā karō jakamā kot paj amā amex o amex ā ajarēnh kēt kumrēx. Anē.

¹¹ Hāmri nhūm tee ri amnhī tā kuma hāmri nē ma tē. Tee ri kām kapēr kaprÿja ā amnhī pumu hāmri nē hkaga nē ma tē. Hāmri nhūm Tirtūm kapēr o mē wrÿk xwÿnhjaja Jejus wÿr wrÿ nē tanhmā ho mex to nē kām ō nhūm kukrē nē akupÿm hihtÿx.

*Jejus kot Garirej kamā kapēr o pa
Makre 1.14-15; Rukre 4.14-15*

¹² Tā nhūm Juāw Paxisja mēmoj tā pahi Eroxo mā akir nhūm amnhī tā kuma nē gryk xāj haxā nhūm hkrī ho hkrī. Hāmri nhūm Jejusja harēnh ma nē ma akupÿm Garirej kamā krī pē Najare hwÿr ma akupÿm tē. ¹³ Hāmri nē ra pōj nom kamā ri pa hkēt nē. Nē hpānhā kurūm kato nē ma krī pē Kapanāu hwÿr tē. Gō rax pē Garirej mÿri na pre. Pika hkwy pē Jepurō mē Natari wa mē kamā na pre nhūm Jejus ma hwÿr tē. Hāmri nē kamā pa. ¹⁴ Nhūm ra amnepēm Tirtūm nhÿ hā kapēr jarēnh o mē pa xwÿnh finat Ijaisja Jejus kukamā ra mē panhīgētjē mā ā kot amnhī nhīpēx anhÿr ā harē nē hā kagā. Jejus kot ā mē

hwÿr mōr anhÿrja kukamā nhūm pre harē nē hā kagā. ¹⁵ Pika hkwȳ kamā mē pa xwÿnhjaja nhūm pre mē hkukamā mē harēnh mex nē. Nē pika pē Garirej kamā mē pa xwÿnhjaja nhūm pre määnēn mē hkukamā mē harē. Nē pyhti pē Jotāw mē gō xujanār wa hkaēx kām pika piitā kamā mē pa xwÿnhjaja. Nē krī pē Garirej kamā mē kēp Ijaew kēt xwÿnhjaja nhūm pre määnēn mē harē. Ā na pre finat Ijaisja mē hkukamā Tirtūm nhÿ hā mē piitā mē harē nē hā kagā anē. Jejus kot ma mē hwÿr mōrja kukamā nhūm ra hprī hā harē nē hā kagā. Nē hā kagāja o:

¹⁶ E. Kot paj mē amā mēmoj mex jarē ka mē inhma. Mē ate Tirtūm pumunh kēt jakamā te mē ate kamāt kō kamā ri apa pyrāk. Tā koja Tirtūm mē amā amnhī to amnhīrit ka mē hpānhā te mē ate hirā kamā ri apa pyrāk o amnhī nhīpēx nē ra hkōt amnhī xunhwÿr.

Anhÿr o mē hkukamā mē harē nē hā kagā. ¹⁷ Tā nhūm ra kot hkukamā mē kām ujarēnh xā hkōt nhūm Jejusja mē hwÿr mō nē mē kām Tirtūm kapēr jarēnh o ri mē hkōt pa. Nē mē kām tanhmā amnhī jarēnh to ho pa. Nom kormā hprī hā mē kām amnhī jarēnh kēt nē. Te ho nhām mēhō jarēnh pyrāk o mē kām amnhī jarē nē mē kām:

—E na ra Tirtūnja kot mē akaxyw ām xwÿnhhta mē nhūm mē awÿr wrÿ. Jakamā kwa mē tokyx tee ri ate amnhī tomnuj ā amnhī pumu nē ā ate amnhī nhīpēx anhÿr kaga nē hpānhā Tirtūm kōt mǎn amnhī nhīpēx o ri apa.

Anhÿr o mē kām kapēr o pa pē mē ahkre ho ri mē hkōt pa.

Jejus kot amnhī wÿr tep pynēnh xwÿnhjē hwÿr

Makre 1.16-20; Rukre 5.1-11

¹⁸ Tā nhūm Jejus ma gō rax pē Garirej mÿ ri pa nē gōx kām ja wa omu. Simāw Pētre mē htō Andreja nhūm wa gōx kām kryhti rēnh o wa xa. Hāmri nhūm Jejus wa hwÿr tē nē wa omu nē amnhī kōt wa kuwÿ nē wa kām:

¹⁹ —Pa. E kwa ma ixkōt mǎn war apa. Kot paj tanhmā war ajahkre hto ka wa ma mē kām ijarēnh o ri apa. Mē kot war amar nē ra ixkōt amnhī xunhwÿr kaxyw. Anē.

²⁰ Hāmri nhūm wa kuma nē kryhti re nē wa ma hkōt htēm kurē kumrēx.

²¹ Hāmri nhūm mē ma nhām axte mō nē ra jajē hwÿr kato. Jepetew mē hkra Xiakre mē Juāwja nhūm wa mē hwÿr kato. Nhūm mē ō pār kām kryhti ho mex o wa mē nhÿ. Hāmri nhūm mē hwÿr mra nhūm Jejus amnhī kōt ja wa kuwÿ nē wa kām:

—Pa Xiakre mē Juāw. E wa ma ixkōt mǎn wa apa. Anē.

²² Hāmri nhūm wa kuma nē hipēēxā mā amnhī jarē nē ma hkōt pa ho pa kurē kumrēx.

Jejus kot tanhmā amnhī nhīpēx to

Rukre 6.17-19

²³ Tā nhūm Jejus Garirej kamā Ijaew mā Tirtūm kapēr jarēnh o pa. Na pre hte Tirtūm kapēr o mē ahkre xā hā ixkre hwÿr agjē nē kamā mē kām Tirtūm kapēr jarēnh o hkrī nē mē kām:

—E mē tee ri ate amnhī tomnuj ā amnhī pumu nē hpānhā Tirtūm kōt mǎn amnhī nhīpēx o ri apa. Kot kaj mē ā amnhī nhīpēx anē nhūm ja hā mē apumu nē mē ato hkra kurē kumrēx. Anē.

Hāmri nē akupÿm mē kām mē ā xwÿnhjē ho mex. Ahpÿnhā tanhmā mē ā kute xwÿnhjaja nhūm akupÿm mē ho mex o pa. ²⁴ Jakamā nhūm mē piitā pikaja kamā ri axpēn mā harēnh o hprōt. Nē pika pē Sir kōt määnēn ma ri axpēn mā harēnh o hprōt. Nhūm mē piitā harēnh ma nē ma hwÿr mē

à xwÿnhjê ho mra. Ahpÿnhã ri tanhmã mê à kute xwÿnhjaja. Mê à htÿx xwÿnhjaja. Nê mê ĩ kamã mê htyk xwÿnhjaja. Nê mê hkrã pipãnh xwÿnhjaja. Nê mêkarômnuti kot Satanasti nhÿhã tanhmã ri mê ho xwÿnhjaja. Nhÿm prem mê hamÿ nê ma Jejus wÿr mê o mra nhÿm mê omu nê akupÿm mê ho mex pa. ²⁵ Jakamã nhÿm mê ohtô nê ma hkôt pa. Krĭ pê Garirej rÿm nê Tekap rÿm nê Jerujarê rÿm nê pika pê Jutej rÿm. Nê pyhti pê Jotãw nhĭkjê rÿm mê pa xwÿnhjaja. Nhÿm mê ã ohtô nê ma Jejus kôt omunh o pa anê.

5

Jejus kot tanhmã mê ahkre hto *Rukre 6.20-23*

- 1 Nhÿm Jejus amnhĭ kôt ri mê kot omunh o mê pa xwÿnhjê pumu hãmri nê mê ahkre kaxyw ma tē nê hixêt ã api nê himök ã nhÿ. Hãmri nhÿm mê ma hkôt mra nê pu hã hkrĭ pa. ² Hãmri nhÿm mê ahkre nê mê kãm:
- 3 E mê inhma. Kot kaj mê atô amnhĭ kaxyw tanhmã Tĭrtÿm mê wa inhmã ajamaxpêr to nê ajamaxpêr o: “Koja Tĭrtÿm inhĭhkô hã pa hkêt pa ixtÿx ri tanhmã amnhĭ tomnuj to ho ri ixpa rãhã ho ri ixpa.” Anhÿr o ajamaxpêr. Hãmri nhÿm Tĭrtÿm ã ajamaxpêr anhÿr ã apumu nhÿm ja kãm mex nê. Hãmri nhÿm apê hkra hã ato mex nê atãnopxar o akôt pa ho pa ka ajamakêtkati nê axãmnhĭx akĭnh nê ri apa.
- 4 Nê kot ka mê atô tanhmã amnhĭ tomnuj to. Hãmri nê tee ri ja hã amnhĭ pumu nê apijaãm nê akaprĭ nê. Nê akaprĭ xãj amÿr o nhÿ. Amÿr rax nê. Hãmri nhÿm Tĭrtÿm ja hã apumu nhÿm ja kãm mex nê. Jakamã nhÿm anê akaprĭ hta nê ato mex nê ka ajamakêtkati nê axãmnhĭx akĭnh nê ri apa.
- 5 Nê kot ka mê atô agryk tokyx anhÿr kêt nê. Nê kritpêm amnhĭ tã amã mê hkaprĭ ho ri apa. Hãmri nhÿm Tĭrtÿm ja hã apumu nhÿm ja kãm mex nê. Hãmri nhÿm ato mex nê ka ajamakêtkati nê axãmnhĭx akĭnh nê ri apa.
- 6 Nê kot ka mê atô amã Tĭrtÿm kãm hprãm xã hkôt amnhĭ nhĭpêx o ri apa hprãm nê. Nhÿm amnhĭ tã apumu nhÿm ja kãm mex nê. Hãmri nhÿm ato mex nê tanhmã akrã hto ka hkôt pix mã amnhĭ nhĭpêx o ri apa. Jao ajamakêtkati nê axãmnhĭx akĭnh nê ri apa.
- 7 Nê mê kamã mê axukaprĭ ho ri apa xwÿnhjaja na hte Tĭrtÿm ja hã mê apumu nhÿm ja kãm mex nê. Jakamã na hte mê hã mê apyrã nê mê akamã ukaprĭ ho pa. Jao mê ato mex nê ka mê ajamakêtkati nê axãmnhĭx akĭnh nê ri apa.
- 8 Nê kot ka mê atô ã ajamaxpêr anê nê ajamaxpêr o: “Nà kot paj ãm Tĭrtÿm kapêr kôt pix mã ri amnhĭ nhĭpêx o ri ixpa. ãm ja pix na inhmã hprãm.” Anhÿr o ajamaxpêr. Hãmri nhÿm Tĭrtÿm amnhĭ tã mê apumu nê mê ato mex nê. Ka mê ajamakêtkati nê axãmnhĭx akĭnh nê ri apa. Nê nhÿrmã Tĭrtÿm wÿr api nê kuri amex rãhã apa ho apa.
- 9 Nê kot ka mê atô mēhō wa kot xapēn kutã amnhĭ xãm xwÿnhhta xapēn tã wa omu nê wa kot tanhmã xapēn nhĭpêx tota nê tanhmã wa kãm akapêr to nê akupÿm tãm wa ãm. Hãmri nhÿm Tĭrtÿm ja hã apumu nhÿm ja kãm mex nê. Nê apê hkra hã ajarê ka ajamakêtkati nê axãmnhĭx akĭnh nê ri apa.
- 10 Nê koja mēhō mê ate Tĭrtÿm kapêr mar xã hkôt amnhĭ nhĭpêx o apa hã mê apumu nê hã tanhmã mê anhĭpêx kati hto. Tã nom koja Tĭrtÿm arĭ mê

ato mex nê. Mê apê hkra jakamã mê kot tanhmã mê anhîpêx hto htã ka mê ajamakêtkati nê axãmnhîx akînh nê ri apa.

¹¹⁻¹² —Kwâr mê mãmri ixtã mê ato kapêr rý mê ato hêx rý tanhmã ri mê atomnuj to. Kwâr mê mãmri ã mê anhîpêx anê. Nom kêr ka mê arî amnhî kaxyw inhmã ajamaxpêr tÿx rãhã pê ajamakêtkati nê axãmnhîx akînh nê ri apa. Kwâr mê mãmri ixtã ã mê anhîpêx anê nê mê amex kêt ã mê ajarê. Amnepê m na prem ã Tirtûm nhÿ hã kapêr jarênh xwÿnhjê nhîpêx anê. Jakamã koja mê urak nê ã mê anhîpêx anê. Hãmri nhÿm Tirtûm ja hã mê apumu nê amnhîm mê amex ã mê ajarê. Hãmri nê nhÿrmã kaxkwa kamã wa inhô krî kamã mê ato mex nê. Jakamã kêr ka mê ã amnhî kukamã ajamaxpêr anhÿr pê mãmri akînh nê ajamakêtkati nê axãmnhîx ri apa. Kwâr mê mãmri ã wa ixtã mê anhîpêx anê. Anê.

*Jejus krajaja te kot kaxwa mê kanê hpôk wa urak
Makre 9.49-50; Rukre 13.34-35*

¹³ Nhÿm Jesus arî mê kãm kapêr nê mê kãm:

—Nê mê ate ixkôt amnhî xunhwÿr xwÿnhjaja te mê ate kaxwa pyrãk. Kaxwaja mê apkur xã ho ành mã mex. No koja mêhõ tèn kamã pika hkwy mê nê ho ahkã. Hãmri tanhmã kot wem ho nê akupÿm ho mex? Nã koja akupÿm mex kêt nê. Æm mê kot hkapîr pix kaxyw koja mex. Ja pyrã nê kot ka mê atô ate inhmã tanhmã amnhî nhîpêx to ho apa hã amnhî jarênh tã gaa nê ri amã ixkôt amnhî nhîpêx prãm kêt nê. Hãmri nê ra te apê kaxwa mê pika pihkarta pyrãk. Kwa mê ixujarênh ma nê kãm ajamaxpêr tÿx rãhã ho ri apa.

¹⁴⁻¹⁶ —Nê te mê ate kanê hpôk pyrãk. Nê te mê ate hixêt prêk nhÿmök ã krî xãm pyrãk. Koja krîja hixêt prêeti nhÿmök ã xa nhÿm mê piitã omu. Nê kanêja. Xã na htem kanê hpôk nê poti ho hpro? Nã na htem hpôk nê kÿx pê mêmoj nhÿmök ã unhwÿ nhÿm mê piitã mê kãm hirã nhÿm mê hirã kamã mêmoj pumunh mex nê. Ja pyrã nê kot kaj mê tãm amnhî nhîpêx o ri apa nhÿm mê piitã ja hã mê apumunh kôt ra kaxkwa kamã Tirtûm mex ã harênh o pa. Anê.

*Jejus kot tanhmã Mojes kapêr jarênh to
Rukre 16.16-17*

¹⁷ Nhÿm Jesus arî mê kãm kapêr nê mê kãm:

—Nê amnepê m Mojes kot Tirtûm nhÿ hã Ijaewjê mã tanhmã mê kot amnhî nhîpêx to hã mê kãm karôja. Nê amnepê m Tirtûm nhÿ hã kapêr jarênh o mê pa xwÿnhjê kapêrja. Ixte mê kapêr o ijarêx kaxyw na pa pre mê awÿr ixwÿrÿk kêt nê. Jakamã kwa mê ri ã xpên mã ijarênh anhÿr kêt nê. Kêt ixprî hã ixte mê amã mê kapêr jarênh nhÿm mê ate mar mex kaxyw na pa pre kaxkwa rÿm mê awÿr wÿrÿ.

¹⁸ —Tirtûm kapêr ã kagã htûm kot mêmoj jarênhja. Koja ujarênh xã hkôt mêmoj tanhmã amnhî to hpar mê nhÿm ri kormã kaxkwa mê pika wa hapêx pa nhÿm kapêr ã kagãja mãânên hapêx. Nom nhÿm Tirtûm kapêr koja mêmojja pyrã nê aa hapêx kêt nê. Koja rãhã ho rãhã nê aa ihkjê ho tanhmã mênh to hkêt nê. Æm hãmri na pa ã mê amã harênh anê.

¹⁹ —Nê kot ka mê atô Tirtûm kapêr o pixire nê hirôp xa. Hãmri nê ra amnhî pyrã nê anhîo mã ja hã amÿnê. Apyrà nê kot hirôp ãm kaxyw ka kãm hã amÿnê. Kot kaj ã amnhî nhîpêx anê hãmri nê apê Tirtûm kra hkêt ã amnhî to amnhîrit. Nom kot ka kêt mê tãm amnhî nhîpêx o ri apa. Nê amnhî pyrã nê tãm mê kot amnhî nhîpêx kaxyw mê kãm akapêr o ri apa hãmri nhÿm Tirtûm ja hã apumu nê ato hkra nê ato mex nê.

20 —No Parijew nhõ xwýnhjaja nê Tirtüm kapêr tùm o mẽ ahkre ho mẽ pa xwýnhjaja. Mẽ kot Tirtüm kapêr kôt amnhĩ nhĩpêx mex ã amnhĩ jarênh tã no ãm hkôt ã amnhĩ nhĩpêx anhÿr kêt nê. Jakamã kot kaj mẽ hkôt amnhĩ nhĩpêx o ri apa hãmri nê mẽ uràk nê nhÿrmã Tirtüm mẽ wa inhõ krĩ kamã apa hkêt nê. Anê.

Mẽ gryk o mẽ pa xwýnhjê jarênh

Rukre 12.58-59; mãänên Rômân 12.19; Epes 4.26; Wam Ximotre 2.8; Xiakre 1.19-20

21 Nhùm Jejus arĩ mẽ kãm kapêr nê mẽ kãm:

—Nê amnepêm na prem mẽ panhĩgêjtê mã Tirtüm kapêr kwý jarênh o pa nê mẽ kãm:

Kêr ka mẽ axpên par kêt nê. Kot kaj mẽ mẽhõx pĩ nhùm mẽ ja mÿrapê atomnuj nê. Nê ma mẽ anhõ pahihti hwÿr ato tẽ nhùm mÿrapê tanhmã ato rÿ hkôt apĩ. Anê.

Ãm hãmri na prem mẽ kãm ja jarê. 22 Tã kot paj ixprĩ hã mẽ amã tanhmã harênh to ka mẽ inhma. Kot kaj mẽ mẽmoj tã anhĩõ kamã agryk. Hãmri nhùm Tirtüm tee ri ja hã apumu nhùm ja kãm mex kêt nê. Jakamã koja mẽ anhõ pahihti tanhmã ja hã mẽ ato japêr hã koja ja mex nê. Rÿ kot kaj mẽ tanhmã mẽhõ japrÿ hto. Ho hagrõ rÿ ho rop. Mÿrapê kop apu akwý kot apynênh nê anhõ pahihti hwÿr ato htêm nê ìhkram ajaxâr ronhÿx ja inhã mex nê. Rÿ kot kaj mẽ tanhmã anhĩõ mã akapêr punuj to nê kãm: “Tk. Ate ho warêhti hã. Te apê hagrõ pyrãk kênã.” Anhÿr o kãm akapêr. Tã kop apu Tirtüm ra ã akapêr anhÿrja mÿrapê mẽ kot amnhĩ xà htÿx kamã hamak tùm xãta wÿr amênh ronhÿx ja inhã mex nê. Ja pumaj kwa kêr ka mẽ ã axpên mã akapêr anhÿr kêt nê. Kêt mẽ axpên mã tãm akapêr pix o ri axpên kôt apa.

23 —Nê kêr ka mẽ tanhmã ate anhĩõ nhĩpêx hto kamã Tirtüm mã mex o mex ã harênh kêt nê. Kêr ka mẽ kãm amnhĩ jarênh o akrĩ hãmri nê ra mẽhõ kot mẽmoj tã akamã gryk xwýnh mã ajamaxpêr japêr. 24 Hãmri nê akato nê ma hwÿr atêm kurê kumrêx nê wa tãm axpên mã akapêr nê tãm akupÿm axpên xãm. Hãmri nê rĩ kormã ma akupÿm tẽ nê Tirtüm mã amnhĩ jarênh jatur xãm amê nê kãm mex o mex ã harê. Kêr ka mẽ ã amnhĩ nhĩpêx anhÿr o ri apa.

25-26 —Na htem tanhmã axpên nhĩpêx to hãmri nê kot tanhmã war axpên to xwýnhjê hõja ma õ pahi hwÿr tẽ nê kãm tanhmã kot ho xwýnhnta jarênh kaxyw nojarêt. Hãmri nhùm ra kamã gryk xwýnhnta kot pahi mã harênh kaxyw nojarêt ã harênh ma nê tee ri amnhĩ kukamã hamaxpêr nê ma hwÿr tẽ nê wa akupÿm tãm axpên xãm. Na htem ã amnhĩ nhĩpêx anê. Pahi kot wa harênh mar nê tanhmã axpên tã wa ho pymaj na htem ã amnhĩ nhĩpêx anê nê tokyx tãm akupÿm axpên xunhwÿ. No koja mẽ anhÿr kêt nhùm pahija wa harênh ma nê wa kot tanhmã axpên to xwýnhnta õ jaxã nhùm tee ri kãm kator prãm. Hãmri nê tanhmã amnhĩ to nê ra amnhĩ pãnhã kãm amnhĩrer pa nhùm pahihtija rĩ kormã pòristi mã anê nhùm kãm ure nhùm kato. Ja pyrã nê kêr ka mẽ Tirtüm tanhmã kot mẽ anhĩpêx to pymaj tokyx mẽ ate amnhĩ tomnuj kaga nê hkôt amnhĩ nhĩpêx rãhã ho ri apa. Anê.

Tanhmã mẽ pahte mẽ pahprõjê nhĩpêx to

Matêwre 19.3-9; Makre 9.43-47, 10.2-9; mãänên Rukre 16.18

27 Nhùm Jejus arĩ mẽ kãm kapêr nê mẽ kãm:

—Nê na pre finat Mojesja mẽ panhĩgêjtê mã Tirtüm kapêr tùm kwý jarê nê mẽ kãm: “Kêr ka mẽ amnhĩ prõ pix tãnopxar o ri apa. No mẽ kuhpa hã nhãm mẽhõ ho amnhĩkati ho ri apa hkêt nê.” Anê. ãm hãmri na pre mẽ kãm ja hã

karô. ²⁸ Tã kot paj ixprî hã mē amã tanhmã harēnh to ka mē inhma. Kot kaj mē nhãm mēhō pumu nē amã ho amnhikati hprãm mã ajamxpēr. Jao te ra ate ho amnhikati pyrãk o amnhî nhîpêx. Kormã ate ho amnhikati hkêt tâ ra hkukamã ajamxpēr jakamã te ra ate ho amnhikati pyrãk o amnhî nhîpêx. ²⁹ ã mē hamaxpēr punuj anhÿr xwÿnhjaja koja mē nhÿrmã ma mē kot amnhî xã htÿx kamã hamak tũm xãta wÿr ma mra nē kamã pa rãhã ho pa. Jakamã kêr ka mē nhãm mēhō pumu nē amã hkĩnh japêr hãmri nē te ate ano kaxàr nē mēnh nē axte ate omunh kêt pyrãk o amnhî nhîpêx. Jao hkãx ã rît nē ma nhÿhÿm atēm kurê kumrêx.

³⁰ —Nē kot kaj mē anhîhkra ho tanhmã amnhî tomnuj to kaxyw. Hãmri nē tee ri ja hã amnhî pumu nē te ate amnhî nhîhkra krãhÿr nē mēnh pyrãk o amnhî nhîpêx nē tanhmã amnhî tomnuj to hkêt nē. Mē ïhkra ho mē kot tanhmã amnhî tomnuj to ho mē pa xwÿnhjaja koja mē nhÿrmã ma mē kot amnhî xã htÿx kamã hamak tũm xãta wÿr ma mra nē kamã pa rãhã ho pa. Anê.

Mē pahte axpên kaga hkêt

³¹ Nhũm Jejus arî mē kãm kapêr nē mē kãm:

—Nē na pre finat Mojes mē panhîgêtjê mã Tirtũm kapêr tũm kwÿ jarê nē mē kãm: “Kot kaj mē atō aprô kaga kaxyw hãmri nē ate hkaga hã amnhî jarēnh ã kaga nhîpêx nē kãm agô nē rî kormã hkaga.” Anê. ãm hãmri na pre ã mē kãm Tirtũm kapêr tũm jarēnh anê. ³² Tã kot paj ixprî hã mē amã tanhmã harēnh to ka mē inhma. Kêr ka mē atÿx ri amã hprãm xã hkôt aprô kaga hkêt nē. Nom koja aprô akuhpa hã nhãm mēhō ho amnhikati ka harēnh ma hãmri nē amã ja hã hkaga hprãm nē mãmri kam nē hkaga. Ja tanhmã kute hkêt. Nom koja ã amnhî nhîpêx anhÿr kêt tâ ka amnhî krã hkôt hkaga. Hãmri nhũm mēhō apãnhã ho hprô nē o pa. Hãmri nē ra kot apê aprô ho amnhikati ho pa pyrãk o hipêx. Nē nija haxwÿja. Te arî kêp aprô htã akuhpa hã nhãm myja o amnhikati o pa pyrãk o amnhî nhîpêx. Anê.

Tãm mē pakapêr ã Jejus kot mē pamã karô

Xiakre 5.12

³³ Nhũm Jejus arî mē kãm kapêr nē mē kãm:

—Nē na pre finat Mojes mē panhîgêt nē pahpãmjê mã Tirtũm kapêr tũm jarēnh o: “Kêr ka mē Tirtũm mã mēmoj to anhÿr ã amnhî jarê hãmri nē amnhî jarēnh xã hkôt kãm tanhmã amnhî nhîpêx to. Nom kêr ka mē atÿx ri kãm tanhmã amnhî jarēnh to ho amnhî to axêx kêt nē. ãm akatãt kôt mē ate amnhî jarēnh to xã hkôt kãm tanhmã mēmoj to.” Anê. ãm hãmri na pre mē kãm ja jarê. ³⁴ Tã kot paj ixprî hã mē amã tanhmã harēnh to ka mē inhma. Kêr ka mēhō mã tanhmã amnhî jarēnh to. Tirtũm mã pix mã amnhî jarēnh kêt nhãm mēhō mã mãânēn tanhmã amnhî jarēnh to. Nē akatãt kôt kãm amnhî jarê. Na ka htem mē kot mē axêx kêt kôt mē apumunh kaxyw mēmoj nhîxi jarēnh kôt amnhî jarê. Nom kêr ka mē axte ã mēmo nhîxi hã amnhî jarēnh anhÿr kêt nē. Mēmoj tâ amnhî jarê nē akatãt kôt amnhî jarēnh kurê kumrêx. No mē kot axêx kêt kôt apumunh kaxyw mēmoj nhîxi hkôt amnhî jarēnh kêt nē. Tanhmãn kaxkwa nhîxi jarēnh kôt mēmoj tâ amnhî jarēnh kêt nē. Kaxkwa kêp Tirtũm krî xã maati kênã kot ka kêt mē axtem nē atÿx ri amnhî kaxyw hixi jarê. ³⁵ Rÿ mē kot axêx kêt kôt apumunh kaxyw pika nhîxi jarēnh kêt nē. Pika kêp Tirtũm par xãm xã kênã kot ka kêt mē atÿx ri amnhî kaxyw tanhmã hixi jarēnh to. Nē krî pê Jerujarêja mãânēn kêr ka mē ri amnhî kaxyw tanhmã

hixi jarênh to hkêt nê. Koja nhÿrmã Tirtûm mẽ awÿr Jerujarê hwÿr ixpê pahi maati hã inhmẽ pa kamã mẽ ato amnhÿptâr o ixkrÿ. Jakamã kêr ka mẽ ri atÿx amnhÿ kaxyw tanhmã hixi jarênh to ho ri apa hkêt nê.

³⁶ —Nê kêr ka mẽ kot axêx kêt kôt apumunh kaxyw mẽ ri tanhmã amnhÿ krã hkÿ jarênh to hkêt nê. Kot kaj mẽ anê nê âm tanhmã hã harênh to kaprÿ. Xà kot kaj mẽ ajamaxpêr pix o tanhmã amnhÿ krã hkÿ hto? Nà kot kaj mẽ ho anhÿr kêt nê. Jakamã mẽ ri atÿx tanhmã harênh to hkêt nê.

Nê mẽ atÿx ri mẽmo nhÿxi jarênh kôt mẽmoj tâ amnhÿ jarênh o apa hkêt nê. ³⁷ âm akatât kôt tâm amnhÿ jarênh kurê kumrêx. Jao mẽ kãm: “Tÿ. Nà kot paj ho anê.” Anhÿr o mẽmoj tanhmã ho. Rÿ mẽ kãm: “Nà kot paj ho anhÿr kêt nê.” Anhÿr o mẽmoj tanhmã ho hkêt nê. Âm akatât kôt tanhmã mẽmoj tâ amnhÿ jarênh to xà hkôt ho anhÿr kurê kumrêx. Mẽ kot Satanasti hkôt amnhÿ nhÿpêx o mẽ pa xwÿnh pixjaja na htem hêx rom mẽmoj nhÿxi jarênh kôt tanhmã amnhÿ jarênh to ho pa. Anê.

Mẽ pahte tanhmã axpên nhÿpêx to hã Jejus kot mẽ pamã karô

Rukre 6.27-30, 23.34; mãânên Atre 7.60; Rômân 12.14

³⁸ Nhũm Jejusja arÿ mẽ kãm kapêr nê mẽ kãm:

—Na prem amnepêm mẽ panhÿgêjtê mã Tirtûm kapêr tũm jarênh o: “Koja mẽhõ apê ano katôk nê hkapa hã koja mẽ anhõ pahija atã mã ho anê nê kêp no kapa. Rÿ koja mẽhõ apê axwa hõ hkwÿr hã koja atã mã ho anê nê atã kêp wa hõ hkwÿr.” Anhÿr o mẽ kãm hã karô. Âm hãmri na prem ã ja jarênh anê. ³⁹ Tã kot paj ixprÿ hã mẽ amã tanhmã ja jarênh to ka mẽ inhma. Koja mẽhõ tanhmã mẽ anhÿpêx to ka mẽ âm amnhÿ tâ omu nê tanhmã amnhÿ tâ ho hkêt nê. Koja anhÿnep akura ka âm omu nê tanhmã amnhÿ tâ ho hkêt nê. Te ate kãm ihkjê hpêr nhũm kot ihkjê kamã hkuranh pyrãk o amnhÿ nhÿpêx nhũm ja amã mex nê. No amnhÿ tâ tanhmã ho hkêt nê.

⁴⁰ —Nê koja mẽhõ anhÿnhkã hã awÿ nhũm mẽ anhõ pahija amã anê ka mãmrÿ kãm agõ nê tanhmã hã kãm nê hkêt nê. Te ate hkôt kry pê kãm anhÿnhkã hpakã ry jagênh xwÿnhhta nhõr pyrãk o amnhÿ nhÿpêx. Nom kêr ka mẽ kamã agryk kamã kãm ôr kêt nê.

⁴¹ —Nê koja mẽhõ ate kãm jênh tur nê hkôt ho amõr ryy kaxyw amã kapêr ka mãmrÿ kãm ho anê. Nê kot amã nhÿri hã karô xàja wÿr o pøj nom kamã kãm ôr kêt nê. Kãm ho hakrenh ryy nê rÿ kormã akupÿm kãm agõ.

⁴² —Nê koja mẽhõ ô mẽmoj kêt nê awÿr tê nê mẽmoj tâ awÿ ka mãmrÿ kãm agõ. Rÿ nhũm awÿr tê nê apê mẽmoj to ïpresta kaxyw ka mãmrÿ kãm ho ïpresta. Kêr ka mẽ ã axpên nhÿpêx anhÿr o ri apa. Anê.

Mẽ pamã axpên kÿnh ã Jejus kot mẽ pamã karô

Rukre 6.32-36; mãânên Rômân 12.14

⁴³ Nhũm Jejus arÿ mẽ kãm kapêr nê mẽ kãm:

—Nê na prem amnhÿ krã hkôt axtem nê tanhmã mẽ panhÿgêjtê mã mẽmoj jarênh to nê mẽ kãm: “Kêr ka mẽ amã mẽ akrãmnhwÿjê pix kÿnh nê tanhmã mẽ ho mex to. No kêt mẽ kot tanhmã mẽ ato xwÿnhjaja kêr ka mẽ mãmrÿ mẽ kamã axãhkurê ho ri apa.” Anhÿr o mẽ kãm karô. ⁴⁴ Nom pa kot paj mẽ amã Tirtûm kot tanhmã ja hã karô hto hã harê ka mẽ inhma. Kêr ka mẽ kot tanhmã ri mẽ atomnuj to xwÿnhjaja amnhÿ tâ tanhmã mẽ ho hkêt nê. Âm tanhmã mẽ ho mex to pix hkukamã mãn ajamaxpêr. Nê mẽ ho Tirtûm wÿr pix kukamã mãn ajamaxpêr. ⁴⁵ Na hte ã kaxkwa kamã Mẽpahpãm Tirtûmja amnhÿ nhÿpêx anhÿr o pa. Mẽ kot amnhÿ tomnuj xwÿnhjaja nê mẽ kot amnhÿ to mex xwÿnhjaja

nhùm hte mê ho hpimrààtã mê ho mex o axpên pyrâk. Jao hamê wa hwÿr na rē nê hamê wa hwÿr myyti rē nhùm hamê wa kãm hirã ho pa. Jakamã kêr ka mê urâk nê mê piitã tãm mê hipêx o axpên pyrâk. Mê kot amnhî tomnuj xwÿnhjê mê mê kot amnhî to mex xwÿnhjê mê ho apimrààtã mê ho mex o axpên pyrâk.

⁴⁶—Nê xât kaj mê amã mê piitã mê ho mex prãm kêt nê âm mê kot mê ato mex xwÿnh pixjaja ka mê amã mê ho mex prãm nhùm Tirtùm ja hã mê apumu nhùm ja kãm mex nê nà? Nà koja kãm mex kêt nê. Koja mêhõ ato mex kêt tâ kêr ka âm amnhî rom ho mex nê. Nhùm Tirtùm ja hã apumu nê amnhim amex ã ajarê. Mê kot amnhî tomnuj xwÿnhjaja na htem âm mê kot mê ho mex xwÿnh pixjaja nhùm mê amnhî xwar mê ho mex. No tãm mê kot amnhî nhîpêx xwÿnhjaja na htem mê piitã mê ho mex o axpên pyrâk. Mê kot tãm amnhî nhîpêx xwÿnhjaja nê mê kot amnhî tomnuj xwÿnhjaja nhùm mê ho hpimrààtã mê ho mex o axpên pyrâk.

⁴⁷—Nê na hte mê hkwÿjaja âm amnhî kwÿjê pix mã kapêr mex o pa. Nom mê piitã tãm mê hipêx kêt nê. Nom kêr ka mê ã amnhî nhîpêx anhÿr kêt nê. Kêr ka mê kurom mê piitã tãm mê hipêx o axpên pyrâk. Mê akwÿjê mê mê akwÿ hkêt xwÿnhjaja ka mê hipêx o axpên pyrâk. Nê tãm mê kãm akapêr o axpên pyrâk. ⁴⁸ Kaxkwa kamã Mêpahpãm Tirtùm pyrà nê mê kot amnhî tomnuj xwÿnhjê mê mê kot amnhî to mex xwÿnhjaja mê ho apimrààtã mê ho mex o axpên pyrâk. Na hte ã Tirtùmja mê panhîpêx anê. Anê.

6

Mê pahte mê kêp amrakati xwÿnhjê ho mex rãhã hã mê pamã karõ

¹⁻² Nhùm Jejus arî mê kãm kapêr nê mê kãm:

—Nê na htem mê piitã hkwÿjê noo mã tanhmã mê kêp amrakati xwÿnhjê ho mex to. Nom kãm mê hkaprî kamã tanhmã mê ho mex to hkêt nê. Âm hkwÿjaja kot ja hã mê omunh nê mê mex ã mê harênh pix kaxyw na htem krî hkôt ri mê kêp amrakati xwÿnh piitã mê ho mex o pa. Nê mê pikuprõnh xã hã ixkre kamã kuhê nê tanhmã mê ho mex to. Mê hkwÿjaja kot ja hã mê omunh nê amnhim mê mex ã mê ho jarkrar kaxyw. Jakamã koja nhÿrmã Tirtùmja axte ja hã mê kãm mêmoy mex nhõr kêt nê. Ra jar mê hkwÿjaja kot ja hã mê omunh nê amnhim mê mex ã mê harênh kênã. Jakamã kwa kêr ka mê ho mê urâk kêt nê. Nê tanhmã mêhõ ho mex to kaxyw nê akwÿjê no kuha hã mê hkãx ã tanhmã mê ho mex to. No kot kaj mê noo mã tanhmã mê ho mex to. Mê kot hã apumunh nê ato jarkrar kaxyw tanhmã mê ho mex to nhùm kaxkwa kamã Mêpahpãmja ja hã apumu nê mê hã tanhmã ato mex to hkêt nê. Koja âm hã apumu.

³—Ja pymaj kêr ka mê mê kêp amrakati xwÿnhjê mã mêmoy nhõr kaxyw hãmri nê mê piitã mê no hkãx ã tanhmã mê ho mex to. Hãmri nê nhãm ri ja hã mê kãm amnhî to jarkrar kêt nê. Aprõ mã rÿ akrajê mã rÿ akrãmnhwÿ mã hã amnhî jarênh kêt nê. ⁴ Kot kaj mê no hkãx ã tanhmã ho mex to no nhùm Tirtùm tapxipix apumunh o nhÿ. Hãmri nê ja hã ato mex rax nê ka amex nê apa. Anê.

Tanhmã mê pahte Tirtùm mã amnhî jarênh to hã mê pamã karõ

Rukre 11.1-13, 18.9-14

⁵ Nhùm Jejus arî mê kãm kapêr nê mê kãm:

—Nê mãânên ja. Na htem hakwa pix o amnhî mex ã amnhî jarênh xwÿnhjaja Tirtùm mã amnhî jarênh kaxyw nê mê kot Tirtùm kapêr o mê ahkre

xà hã ixkreja wÿr agjê. Nê mē piitã mē noo mã kãm tanhmã amnhĩ jarênh to. Rÿ gáp kuhé nê mē piitã mē noo mã kãm amnhĩ jarê. Tã mēmo kaxyw na htem mē noo mã Tirtûm mã amnhĩ jarê? Nã ãm mē kot ja hã mē omunh nê mē mex ã mē ho jarkrar pix kaxyw. Nê mē harênh o: “E mÿjti pumu. Na hte apkati mē ã Tirtûm mã amnhĩ jarênh anê. Kot amnhĩ to mex xwÿnh mân.” Anhÿr ã harênh kaxyw. Tã ra mē piitã mē kot ja hã omunh nê amnhĩm mex ã ho jarkrar jakamã koja Tirtûm axte ja hã tanhmã ho mex to hkêt nê. Ra pika ja kamã mē kot mē omunh nê mē mex ã mē harênh kênã. ⁶ No mē kajaja. Kêr ka mē urák nê ã amnhĩ nhĩpêx anhÿr kêt nê. ãm Tirtûm mã amnhĩ jarênh kaxyw nê akwÿjê no hkãx ã hitom wÿr agjê nê hitom kãm ahte kãm amnhĩ jarê. Hãmri nhÿm Tirtûm tapxipix ja hã mē apumu. Mē amã amnhĩ to amnhĩrit kêt tã mē apumu. Hãmri nê mē ato mex nê.

⁷ —Nê mē kêp Tirtûm kra hkêt xwÿnhjaja na htem sãnti mã amnhĩ jarênh kaxyw nê xatã kãm amnhĩ jarê. Nê xatã kàx pêê kãm amnhĩ jarê. Nê hamaxpêr o: “Kot paj xatã sãnti mã amnhĩ jarê nhÿm inhmar japêr.” Anhÿr o hamaxpêr jakamã xatã kãm amnhĩ jarê. No ãm htÿx ã hamaxpêr anhÿr kaprÿ. ⁸ Jakamã kwa kêr ka mē ho mē urák kêt nê. Tirtûm ra kot mē ate mēmoj tã hwÿr xata ra ja kukamã kot omunh mex kênã kot ka kêt mē xatã hã hwÿr o akuhê.

⁹ —Nê kêr ka mē kãm amnhĩ jarênh kaxyw nê amnhĩ krã hkôt tanhmã kãm amnhĩ jarênh to rÿ kãm amnhĩ jarênh o:

Pa Mëinhĩpêêxã maati pê kaxkwa kamã ri apa xwÿnh? Amex o amex Tirtûm.

¹⁰ Apê mē ijamãr mex xwÿnh maati na ka.

Na hte kaxkwa kamã mē kot ri amã tanhmã amnhĩ nhĩpêx to ho mē pa xwÿnhjaja akôt pix mã amnhĩ nhĩpêx o ri pa. Tã ijaxwÿja inhmã mē urák nê akôt pix mã amnhĩ nhĩpêx o ri ixpa hprãm.

¹¹ Nê kwa jarãhã mē inhmã mēmoj gô pa mē akukwak ri ho apku.

¹² Na pa hte tãhã amnhĩ tomnuj nê Tirtûm. Nom mē kot tanhmã ixtomnuj to xwÿnhjaja na pa hte ãm mē omu nê amnhĩ tã tanhmã mē ho hkêt nê. Nê ja ho ijamakêtkati nê axte kãm ijamaxpêr kêt nê. ã ixte amnhĩ nhĩpêx anhÿr jakamã kwa ja hã ixpumu nê ixpyrà nê ixte tanhmã amnhĩ tomnuj to hã ixpumu nê hã tanhmã ixto hkêt nê. ãm ho ajamakêtkati kurê kumrêx nê axte kãm ajamaxpêr kêt nê.

¹³ Nê kot paj nhÿrmã tanhmã amnhĩ tomnuj to kaxyw ka ja hã ixpumu nê ixte ã amnhĩ nhĩpêx anhÿrja nê ixto htÿx nê pa tanhmã amnhĩ tomnuj to hkêt nê. ãm mēmoj punuj pê ixpytãr rãhã ho apa Tirtûm. Tã ãm ja pix na hapêx. Anê.

—E kêr ka mē ã Tirtûm mã amnhĩ jarênh anê. Anê.

¹⁴ —Nê koja mēhõ tanhmã anhĩpêx to htã ka ho ajamakêtkati nê axte kãm ajamaxpêr pix o ri apa hkêt nê. Hã koja kaxkwa kamã Mëpahpãm maatija ja hã apumu nê apyrã nê tanhmã ate amnhĩ tomnuj to ho hamakêtkati nê axte kãm hamaxpêr kêt nê. ¹⁵ Nom kot kaj mē ã amnhĩ nhĩpêx anhÿr kêt nê. Nê tanhmã mē kot mē atota ã anohtÿx rãhã ho pa hãmri nhÿm Mëpahpãm maatija mē apyrã nê mē ate tanhmã amnhĩ tomnuj to ho hamakêtkati hkêt nê. ãm hã nohtÿx rãhã ho pa ho pa. Anê.

*Tanhmã mē pahte Tirtûm mã mex o mex ã harênh to
Rukre 18.11-12*

¹⁶ Nhÿm Jejus arĩ mē kãm kapêr nê mē kãm:

—Nê mê kot amnhî to jarkrar xwÿnhjaja na htem Tîrtûm mâ amnhî jarênh kaxyw hāmri nê tōhā ho apkur kêt rāhā kām amnhî jarênh jakamā hkuk kaprî nê hkwyjê hkôt pa. Tā mo kaxyw na htem ā mê noo mâ amnhî nhîpêx anê? ām mê apkur kêt rāhā Tîrtûm mâ amnhî jarênh ā mê omunh pix kaxyw. Tā ra jar pika ja kamā mê kot ja hā mê omunh jakamā koja Tîrtûm nhÿrmā ja hā tanhmā mê ho mex to hkêt nê. Jakamā kwa kêr ka mê ho mê urāk kêt nê. ¹⁷ Kêr ka mê tōhā Tîrtûm mâ amnhî jarênh ryy kaxyw axāpkur kaga hāmri nê amnhî krā kahō nê amnhî jaxwÿr mux nê akuk kînh nê ri akwÿjê hkôt apa. ¹⁸ Hāmri nê nhÿri mê hkāx ā ahte kām amnhî jarê nê kām mex o mex ā harê. Kot kaj mê ā mê hkāx ā amnhî nhîpêx anê nhÿm mê akwÿjaja mê axāpkur kaga hā mê apumunh kêt nê. Nhÿm Tîrtûm pix ja hā mê apumu. Hāmri nê nhÿrmā ja hā mê ato mex nê. Anê.

Kaxkwa kamā mēmoj mex

Rukre 12.33-34; mǎānēn Sikūn Ximotre 4.8; Wam Pêtre 1.4; Eprêw 10.34

¹⁹ Nhÿm Jejus arî mê kām kapêr nê mê kām:

—Nê mǎānēn ja. Kêr ka mê jar pika ja kamā akukrêx rûnh o apa hkêt nê. Kêt jar mê hikukrêx koja kritpēm mex kêt nê. Kot kaj mê ho akuprō nhÿm amnhôre apê homnu rÿ paratre apê homnu. Nê kâx o mê akukrêx nhÿm haxwÿja apê omnu rÿ nhÿm mēhō apê hkwy ho ahkî. ²⁰ Jakamā kêr ka mê akukrêx rûnh o apa hkêt nê. Kaxkwa kamā Tîrtûm kot mê akutêp mê akukrêx o pikuprōnhja na kêt mex kumrêx o jar mê hikukrêx jakrenh par. Jakamā kêr ka mê amā nhÿrmā kaxkwa kamā akukrêx mex prām xâj tām mê piitā tām mê hipêx nê mê ho mex o ri apa. Nê mê kamā axukapri nê. Nê Tîrtûm kôt ri amnhî nhîpêx mex nê. Hāmri nhÿm ā mê ate amnhî nhîpêx anhÿr ā mê apumu nê mê akutêp mê amā mēmoj mex kwÿ jaxwÿ. Kaxkwa kamā mo amnhôre nê mo paratre? Nê kamā mo mê ahkînh xwÿnh? ām kamā amrakati kumrêx. ²¹ Kot kaj mê jar akukrêx rûnh hāmri nê ām tanhmā apê homnu hto pix kukamā ajamaxpêr. Nom kot kaj mê apê Tîrtûm kra hā kaxkwa kamā akukrêx mā ajamaxpêr rāhā ho ra akînh nê ri apa.

²² —Nê kot kaj mê ixkapêr ma nê ixkôt amnhî nhîpêx hāmri nê tām amnhî nhîpêx. Nê tām xepên hipêx. Jao te hirā kamā arî mex pyrāk o amnhî nhîpêx.

²³ No koja mēhō ixkapêr ma nê ām kuma nê ixkwÿm ri amnhî nhîpêx o pa. Hāmri nê te kamāt kō kamā mēhō rîr mex kêt kot amnhî nhîpêx pyrāk o amnhî nhîpêx. E kêr ka mê ā amnhî nhîpêx anhÿr pymaj ixkapêr ma nê kām ajamaxpêr tÿx rāhā ho ri apa.

²⁴ —Nê kot kaj apyxi nê anhō patrāw hamēxkrut hāmri nê arîgro pyxi hā hamē wa kām axāpênh o amÿkry hkêt nê. Kot kaj anê nê hō gryk ā ihō kaga. Ja pyrā nê kot kaj mê jar akāxpore nê akukrêx pix mā ajamaxpêr nê amā hapê ho akwÿjê pé ho anhōxy ho ri apa. Nê gryk ā Tîrtûm kām hprām xā hkôt tanhmā ho mê ho mex to hkêt nê. Jakamā kwa kêr ka mê Tîrtûm pix mā mǎn ajamaxpêr rāhā nê. Jao akāxpore nê akukrêx pix kukamā ajamaxpêr o ri apa hkêt nê. Anê.

Mê pahte tee ri amnhî kukamā pajamaxpêr kêt ā mê pamā karō

Rukre 12.22-31; mǎānēn Piripos 4.6; Wam Pêtre 5.7

²⁵ Nhÿm Jejus arî mê kām kapêr nê mê kām:

—E. Kwa kêr ka mê tee ri mēmoj tā amnhî kukamā ajamaxpêr kêt nê. Tanhmān axāpkur xā rÿ axê ka mê tee ri hkukamā ajamaxpêr kêt nê. Mēmoj piitā hkukamā tee ri ajamaxpêr o ri apa hkêt nê. Tîrtûmja āhpumunh tÿx o

âhpumunh tÿx xwÿnh na. Na pre âhpumunh tÿx o mẽ anhÿpêx ka mẽ kukwak ri atÿr nê apa. Jakamã xà kot mẽ amã mẽ anhô ho pa kaxyw âhpumunh kêt? Nà ja kaxyw âhpumunh tÿx kênã. Kêp mẽ anhÿpêx xwÿnh jakamã mãânên kêp mẽ amã mẽ anhô xwÿnh. Nê kêp mẽ amã mẽ axê nhôr xwÿnh.

²⁶—Mãn ka htem kuwênhre pumu. Na hte tee ri amnhÿ xàpkur xà hkukamã hamaxpêr o hkaprÿ nê ri pa hkêt nê. Mẽ anhÿpêxã maati tãm na hte kãm ô ho pa. Tã kãm mẽ ajapê htÿx o kot kuwênhre jakrenh jakamã koja urak nê mẽ amã mẽ anhô rãhã ho pa.

²⁷—Nê xà kot kaj mẽ kritpêm atÿr prãm xàj ja pix kukamã ajamaxpêr rãhã nê ra ajamaxpêr kôt kritpêm atÿr nê apa? Nà kot kaj mẽ anhÿr kêt nê.

²⁸—Mãn ka htem akunÿ kamã pixôrã pumu. Na hte tee ri tanhmã kute hkukamã hamaxpêr o ra hkaprÿ nê harir kêt nê. ²⁹Tã nom muxre nê harir ka mẽ omu. Te ho amnepêm pahihiti Sarumãw xê mex pyrak nom mex o hakre.

³⁰Pixôrãreja koja mẽmo arÿgro hã htÿr nê mux nê harir tã mẽmo arÿgro hã ra grã pa nê hapêx. Kêp pixôrã pix nê hapêx tokyx anhÿr tã nhũm Tÿrtũm ho mex nê nhũm mux nê harir. No mẽ kajaja na hte mẽ ato mex o pixôrã ho mexta jakre. Jakamã kwa mẽmo kaxyw kot ka kêt mẽ tee ri amnhÿ xê hkukamã ajamaxpêr o ri akaprÿ nê apa? Kot kaj mẽ ã ajamaxpêr anhÿr jao kormã amnhÿ kaxyw Tÿrtũm mã ajamaxpêr tÿx kêt nê.

³¹—Kwa mẽ tee ri axàpkur xà hkukamã ajamaxpêr o ri akaprÿ hkêt nê. Nê tee ri amnhÿ kukamã tanhmã ajamaxpêr to ho ri akaprÿ hkêt nê. ³²Mẽ kot Tÿrtũm kôt amnhÿ xunhwÿr kêt xwÿnhjaja na htem ã ri hamaxpêr anhÿr o pa. Tã nom kêr ka mẽ ho mẽ urak kêt nê. Tÿrtũm ra kot mẽ panhô mẽmoj kêt kôt mẽ pahpumunh mex kênã. ³³Jakamã kêr ka mẽ hkôt ri tanhmã amnhÿ nhÿpêx to rãhã ho ri apa. Nê amã ja pix tãnopxar prãm. Hãmri nhũm Tÿrtũm amnhÿ tã mẽ apumu nê apkati mẽ mẽ amã mẽmoj nhôr o pa.

³⁴—Jakamã kwa kêr ka mẽ tee ri amnhÿ kukamã ajamaxpêr o akaprÿ nê apa hkêt nê. Tÿrtũm kot apkati mẽ mẽ pajamãr mex jakamã kêr ka mẽ jarãhã amnhÿ kukamã apkati mẽ ajamaxpêr kêt nê. Kê apkati mãn. ãm jarãhã pix mã mãn mẽ ate tanhmã amnhÿ nhÿpêx tota kukamã ajamaxpêr. Tÿrtũm kot mẽ pahpumunh mex o pa rãhã kênã. Anê.

7

Mẽ pahte axpên to pakapêr punuj kêt ã kot mẽ pamã karô

Rukre 6.37-38, 6.41-42; mãânên Rômãn 2.1-3; Wam Korÿt 4.5; Xiakre 4.11-12

¹Nhũm Jejus arÿ mẽ kãm kapêr nê mẽ kãm:

—Nê kêr ka mẽ atÿx ri amnhÿ krã hkôt tanhmã akwÿjê hõ kot amnhÿ tomnuj to hã harênh kêt nê. Kot kaj mẽ ã harênh anê nhũm Tÿrtũm ja hã mẽ apumu nê mẽ kajaja ã mẽ ajarênh anê. ²Na hte tanhmã mẽ pahte axpên nhÿpêx to hã mẽ pahpumunh kôt tanhmã mẽ panhÿpêx to. ³⁻⁵Jakamã kwa kêr ka mẽ mẽhõ kot tanhmã amnhÿ tomnuj to hã omu hãmri nê hã kãm kapêr tokyx anhÿr kêt nê. Akumrêx ate tanhmã amnhÿ tomnuj to hã amnhÿ pumu nê hkaga hãmri nê rÿ kormã ate mẽmoj tã omunh xwÿnhnta wÿr tẽ nê hã tanhmã kãm akapêr to. Kêr ka mẽ ã amnhÿ nhÿpêx anhÿr o ri apa.

—Nê xà koja mẽ akwÿjê hõ tanhmã amnhÿ tomnuj to grire. Ka ate amnhÿ tomnuj tÿx o hakrenh tã ã kot amnhÿ nhÿpêx anhÿr ã omu nê hã kãm akir nhũm amã ja mex nê nà? Nà koja amã ja mex kêt nê. Kot ka akumrêx ate tanhmã amnhÿ tomnuj tota kaga hãmri nê rÿ kormã anhÿo tanhmã kot amnhÿ tomnuj to grireta nê kãm akapêr nhũm ja amã mex nê.

6 —Nê xà na htem mê apkur xà mex jamý nê rop mã kurê? Nà na htem anhÿr kêt nê. Ja pyrà nê kër ka mê kot Tîrtûm kaga xwÿnhjê mã kapêr jarênh o ri apa hkêt nê. Anê.

Mê pahte mêmoj to presija hã amnhî to Tîrtûm wÿr

Makre 11.24; Rukre 11.5-13; Juãw 14.13-14; mãânên Wam Tesarôn 5.17; Xiakre 1.5-8, 4.1-3

⁷⁻¹¹ Nhûm Jejus arî mê kãm kapêr nê mê kãm:

—Nê xà kot we akraja kãm prãm nê tep ã awÿ ka axtem nê kagã hõ py nê kãm agõ? Rÿ nhûm krãhyre gre hã awÿ ka axtem nê makre hõ py nê kãm agõ? Nà na ka htem ã mê hipêx anhÿr kêt. Na ka htem kot mêmoj tâ mê awÿr xà hkôt kãm mêmoj gõ. Mê ate amnhî tomnuj tâ na ka htem akrajê ho mex o ri apa. Tã kaxkwa kamã Tîrtûmjja na hte mê ato mex o mê ate mê akrajê ho mex jakrenh. Kãm mê ajapê htÿx kôt na hte mê amã mêmoj mex nhõr o pa. Jakamã kot ka mê mêmoj tâ awÿ nhûm mê ama nê mê ate mêmoj tâ hwÿr xàta kôt amã kugõ. ãm xatã mê ate hã axàhwÿr o ri apaja nhûm mê amã hprãm xwÿnhnta gõ. ãm mêmoj tâ hwÿr rãhã ho ri apa nhûm mê ama nê mê amã mêmoj tanhmã hipêx to. Te ho mēhõ kãm tep xành nê teprēnhxã hpyr nê xatã gôx kãm rēnh o ãm pyrà nê xatã mêmoj tâ awÿ. Hãmri nhûm mê ama nê mê amã hprãm xwÿnhnta gõ. Te tep kanhêr xwÿnhnta jatã kot tep kanhêr pyrãk. Jao mê amã mêmoj prãm xwÿnhnta gõ.

¹² —Nê mê piitã mê kot tãm mê anhîpêxja na mê amã hprãm. Tã kër ka mê amnhî pyrã nê tãm mê piitã mê hipêx o ri apa. Mê kot tãm mê anhîpêx kêt tâ kër ka mê axãmnhîx mê kēp anhõxy hkêt nê tãm mê hipêx. Kot kaj mê ã axpēn nhîpêx anê nê finat Mojes mê Tîrtûm nhÿ hã mê kapêr o mê pa xwÿnhjê xujarênh xà hkôt axpēn nhîpêx mex o ri apa. Anê.

Pry pijakrut jarênh

Rukre 13.24; mãânên Piripos 3.19-21

¹³⁻¹⁴ Nhûm Jejus arî mê kãm kapêr nê mê kãm:

—Tîrtûm kapêrja mê kēp hihtÿx jakamã na htem ohtô nê hkôt amnhî xunhwÿr kêt nê. Na htem ãm hpÿnhre nê hkôt amnhî xunhwÿ nê hkôt amnhî nhîpêx. Jakamã te Tîrtûm nhõ krî hwÿr pry grireta ã hpÿnhre nê pa pyrãk. No nhûm Satanasti hkôt mê kot amnhî xunhwÿr xwÿnhjaja na htem Satanasti kôt pix mã tanhmã amnhî tomnuj to hprãm. Mê kãm mex jakamã nhûm mê amnhî nhîpêx o te pry krepak rax ã axpēn kôt mê ohtô nê pa pyrãk o amnhî nhîpêx. Axtem kuwy hwÿr pry krepakja nōr tâ nhûm mê htÿx kuwyja wÿr amnhî to pa. Jakamã Tîrtûm kapêrja mê apê hihtÿx tâ kër ka mê mãmrî hkôt amnhî xunhwÿ. Jao Tîrtûm nhõ krî hwÿr pry grireta ã mãn apa. Anê.

Mê kot amnhî to hêx xwÿnhjê jarênh

Rukre 6.43-44; mãânên Xiakre 3.9-12; Wam Juãw 3.10, 4.4-6

¹⁵ Nhûm Jejus arî mê kãm kapêr nê mê kãm:

—E kwa mê o kora. Mê akwÿjaja kot kēp Tîrtûm nhÿ hã kapêr jarênh xwÿnh ã amnhî jarênh tâ na htem ja hã amnhî to hêx. Nhûm htem kãm mê kapêr mar prãm nê. Te mê kapêr mex pyrãk tâ no nhûm htem ãm mê kãm amnhî to hêx pix o ri mê hkôt pa. Mê kot mar nê axtem nê Tîrtûm kapêr kwÿm tanhmã amnhî nhîpêx to kaxyw nhûm htem hêx rom tanhmã mê kãm kapêr to. Jakamã kwa mê o kora. Mê axkãm ajamak rom nê amnhî nê mê omunh mex nê. ¹⁶ Kër ka aprî hã mê piitã mê kot tanhmã amnhî nhîpêx to hã mê omu nê rî kormã tanhmã mê harênh to. Mê hamaxpêr punuj xwÿnhjaja kēp Tîrtûm

nhÿ hã kapêr jarênh xwÿnh kêt. No koja mẽ tãm hamaxpêr nê tãm amnhÿ nhÿpêx ka ja hã mẽ omu nê mẽ kêp Tirtùm nhÿ hã kapêr jarênh xwÿnh ã mẽ omunh kurê kumrêx. Na htem hprÿ hã mẽ kot tanhmã amnhÿ nhÿpêx to ho pa hã mẽ omu nê rÿ kormã tanhmã mẽ harênh to. ¹⁷ Na htem hamaxpêr punuj hãmri nê hkôt tanhmã amnhÿ tomnuj to. Nom koja mẽhõ hamaxpêr mex nê hãmri nê hkôt tãm amnhÿ nhÿpêx mex o pa. ¹⁸ Na htem tanhmã hamaxpêr to xà hkôt tanhmã amnhÿ nhÿpêx to ho pa.

¹⁹ —Nê koja mẽhõ õ pÿ hpâr ô hkêt japêr nhÿm tee ri omu hãmri nê krãhta nê kuwym kumê. Ja pyrã nê koja mẽhõ tanhmã amnhÿ tomnuj to ho pa nhÿm Tirtùm tee ri ja hã omu hãmri nê ã kot amnhÿ nhÿpêx anhÿr o paja mÿrapê kuwy hwÿr kumê. ²⁰ Jakamã kot kaj mẽ tanhmã mẽ kot amnhÿ nhÿpêx to ho pa hã akwÿjê pumu nê ra aprÿ hã tanhmã mẽ kute hã mẽ omunh kurê kumrêx. Mẽ kêp Tirtùm nhÿ hã kapêr xwÿnh ã mẽ omu rÿ mẽ kêp hkwyÿm ri kapêr xwÿnh ã mẽ omu. Anê.

Mê kot Tirtùm nhõ krÿ hwÿr gjêx mã xwÿnhjê jarênh

Rukre 13.25-27; mãanêñ Sikûn Korÿt 13.5; Wam Juãw 2.3-6

²¹⁻²³ Nhÿm Jejus arÿ mẽ kãm kapêr nê mẽ kãm:

—Nê Inhÿpêxã Tirtùm mẽ wa inhõ krÿja wÿr koja mẽ piitã gjêx kêt nê. ãm mẽ kot kapêr kôt amnhÿ nhÿpêx o mẽ pa xwÿnh pixjaja koja mẽ nhÿrmã ma hwÿr agjê. Na hte mẽ hkwyÿjaja ixto “Pahiiti” anhÿr ã ijarênh tã no ãm ixkôt ri amnhÿ nhÿpêx kêt nê. Jakamã koja mẽ nhÿrmã wa inhõ krÿ hwÿr àpir kêt nê. Kot paj nhÿrmã mẽ piitã mẽ htÿr ri tanhmã mẽ kot amnhÿ nhÿpêx to ho pa hã mẽ omunh xà hkôt tanhmã mẽ harênh to. Mẽ mex ã mẽ hkwyÿjê jarê nê mẽ kot amnhÿ tomnuj ã mẽ hkwyÿjê jarê. Hãmri nhÿm mẽ hkwyÿ kot ixkôt amnhÿ nhÿpêx o pa hkêt xwÿnhjaja kuwyta wÿr ma pa pymaj tee ri amnhÿ kukamã hamaxpêr hãmri nê tanhmã inhmã amnhÿ jarênh to nê inhmã: “Kwa Jejus. Xà ate ixpumunh kêt? Na pa pre amnepêñm ixtÿr ri pikap ixpare ri anhÿ hã aa mẽ kot mẽmoj pumunh kêt kwÿ ho anhÿr rax nê. Nê ixkwÿjê nê mẽkarõmnuti jano nê mẽ mẽ kãm akapêr jarênh o ri ixpa. Kwa xà ate ja hã ixpumunh kêt?” Anhÿr o inhmã amnhÿ jarê.

—Nom mẽ htÿr ri ã mẽ kot amnhÿ nhÿpêx anhÿr o pa htã ixkapêr kôt amnhÿ nhÿpêx kêt jakamã kot paj mẽ kuma nê ãm mẽ kuma nê amnhÿ nê mẽ hano nê mẽ kãm: “Tk kwa mẽ ma mra. Mẽ apê ixkwÿ hkêt. Mẽ ate ixkôt amnhÿ nhÿpêx o apare hã. ãm mẽ ate amnhÿ tomnuj xwÿnh na ka mẽ. E mẽ ma kuwy hwÿr amrar kurê kumrêx.” Anhÿr o kot paj amnhÿ nê mẽ hano. Hãmri nhÿm mẽ kot ixkôt amnhÿ nhÿpêx o mẽ pa xwÿnh pixjaja ma Tirtùm mẽ wa inhõ krÿ hwÿr gjêx pa. Anê.

Ixkre pijakrut jarênh

Rukre 6.46-49; mãanêñ Xiakre 1.22-25; Wam Juãw 2.3-6

²⁴ Nhÿm Jejus arÿ mẽ kãm kapêr nê mẽ kãm:

—E kot paj mẽ amã awjarê ka mẽ ixujarênh ma. Nà mẽ kot ixkapêr mar nê hkôt amnhÿ nhÿpêx o mẽ pa xwÿnhjaja te mẽ kot ixujarênh ja pyrãk. Mẽ kot amnhÿ nhÿpêx o te mẽhõ kot amnhÿ kukamã hamaxpêr mex nê aptÿx kãm amnhÿm õrkwÿ nhÿpêxja pyrãk. ²⁵ Koja mẽhõ aptÿx kãm amnhÿm hipêx nhÿm mẽmo arÿgro hã na wrÿk rax nê gõ htãm rax nê hanhi no nhÿm arÿ ãm tÿx nê xa. Tã kot kaj mẽ ixkôt amnhÿ nhÿpêx o ri apa hã kot kaj mẽ te ixkre ja pyrãk. Jao amex nê ajamakêtkati nê ri apa. Te ho gõ htãm kot ixkre janhir nhÿm arÿ ãm tÿxta pyrãk.

26-27 —No mē kot ixkapēr mar nē ām mar xwýnhjaja. Te mē kot mēhō kot amnhī kukamā hamaxpēr mex kēt nē htýx mōr nē gō mýri gyw rerek kām amnhīm ōrkwý nhīpēx pyrāk. Koja mēmo arīgro hā ōrkwý hā kōk xápēr týx nē na wrýk rax nē. Nē gō htām nē hanhi nē kēp grānh pa. Jakamā koja mēhō ixkōt amnhī nhīpēx kēt nē te kot ā kot amnhī nhīpēx anhýr xwýnhhta pyrāk. Jakamā kwa mē ixkapēr mar týx nē hkōt amnhī nhīpēx rāhā ho ri apa. Te mēhō aptýx kām ōrkwý xām xwýnhhta pyrāk. Anē.

28 Nhūm pre Jejusja ā mē kām ujarēnh ry anē nhūm mē amnhī jaēr pē kot tanhmā mē ahkre htoja mar o hkrī. 29 Hāmri nē axpēn mā harēnh o:

—Hēxta waa nē. Ām hāmri na ā mē pamā kapēr anē. āhpumunh týx kōt na hte ām hāmri tanhmā mē pamā ujarēnh to. Pēr ām Tirtūm kapēr tūm o mē ahkre xwýnhjē kurom āhpumunh týx kumrēx. Anē.

8

Kà nhy hkro xápēr o pa xwýnh jarēnh Makre 1.40-45; Rukre 5.12-16

1 Tā nhūm Jejus mē kām kapēr pa hāmri nē hixēt prēēta rūm akupýn wrý nē ma tē nhūm mē ohtō nē ma hkōt mra. 2 Hāmri nhūm mēhō my hkā nhy hkro xápēr o pa xwýnhja omu nē hwýr tē. Hāmri nē kutā hkōnkrā ho tēm nē hipō nē nhý nē amnhī to kuwý nē kām:

—Pa Pahihti. E ot pa awýr amnhī to tē. Akupým ate mē ixto mex kaxyw axāhpumunh týx jakamā kot ka amā akupým ixto mex prām nē māmri ixto mex. Anē.

3 Hāmri nhūm Jejus kuma nē hkā punuti hā ĩhkra xi. Amnhī kamā kahak kēt nē hā ĩhkra xi nē kām:

—Nā kot paj ato mex. E akupým akā mex. Anē.

Hāmri nhūm hkā akupým mex kurē kumrēx. 4 Hāmri nhūm Jejus kām:

—E kēr ka amnhī tā mē kām tanhmā ijarēnh to hkēt rāhā ma patre hwýr tē kē akupým akā mex ā apumu. Hāmri ka hpānhā amnepēm finat Mojes kot mē ate akupým amex ā Tirtūm mā tanhmā amnhī nhīpēx to hā karōta ka kām ho anē. Kē mē piitā akupým akā mex ā apumu. Anē.

Pōristi krāhtūm mā àpēnh xwýnh jarēnh Rukre 7.1-10

5 Tā nhūm Jejus ma krī pē Kapanaū hwýr mō. Hāmri nē hwýr pōj nhūm Rōm nhō xwýnh pē pōristi krāhtūmja omu nē hwýr tē. Kēp Ijaew kēt tā hwýr tē. Na pre kām àpēnh xwýnh kēp à htýx nē nō nhūm omu nē tee ri hkukamā hamaxpēr. Hāmri nē Jejus ra ō krī hwýr hpōx ā omu nē hwýr tē nē kām harē nē kām:

6 —Pa Jejus? E ot pa awýr tē. Inhmā àpēnh xwýnhja na ixpē à htýx nē. Ra ĩ kamā htyk pa nē nō. O mūj inhōrkwý kamā nō. Anē.

7 Nhūm Jejus kuma nē kām:

—Tý? Tōe. Nā pa ma akōt tē nē akupým amā ho mex. Anē.

8-9 Hāmri nhūm tee ri kuma nē kām:

—Kwa akīnhā ixpē Ijaew kēt jakamā ixte amnhī kuk ā xpijaàm. Ām ja rūm mán akapēr pix o akupým inhmā ho mex nà? Ixpē mē hkrāhtūm na pa hte inhō pōristi mā mēmoj tā karō nhūm mē inhmā xā hkōt inhmā mēmoj tanhmā ho. Na pa hte mē kām: “E mē ma mra nē ā amnhī nhīpēx anē.” Anē nhūm htem inhma nē ma mrrar kurē kumrēx. Rý pa mē kām: “E mē amnē ixwýr mra nē ā amnhī nhīpēx anē.” Anē nhūm mē inhma nē ixwýr mra. No

kêt ixrom axâhpumunh tÿx kôt na ka hte mē àja mǎ akapēr nhũm ama nē mē kēp hapôx nē ma mrrar kurê kumrêx. Jakamǎ kwa ãm ja rũm akapēr pix o akupÿm inhmǎ ho mex nà? Anē.

¹⁰ Hāmri nhũm Jejus amnhĩ jaēr pê kot kām ā kapēr anhÿrta ma nē hkĩnh nē. Hāmri nē hǎ hkôt ri mē mōr xwÿnhjê mǎ kām:

—Kwa xà na ka mēmyja kapēr ma? Mē pahkĩnh ā kēp Ijaew kêt tā mē arom amnhĩ kaxyw inhmǎ hamaxpēr tÿx nē. Aa mē atō urāk nē ā amnhĩ kaxyw inhmǎ ajamaxpēr tÿx anhÿr kêt tā nhũm mē arom kām àpēnh xwÿnh kaxyw ā inhmǎ hamaxpēr tÿx anē. ¹¹ Nà koja nhÿrmǎ mē hkwyjaja kēp Ijaew kêt tā ohtō nē pika piitǎ kurũm ma Tirtũm mē wa inhō krĩ hwÿr api nē hwÿr agjê. Nē wa ixkuri wa inhō krĩ kamǎ Ijaew pǎr krax pê Apraãw nē Ijak nē Jako mē pimràatǎ pa ho pa. Mē kēp Ijaew kêt tā mē ãhkō hǎ apkur mex o hkrĩ nhũm Tirtũm mē ho mex rax o pa. ¹² No pēr mē apē Ijaew kwÿjaja kot kaj mē hkôt hwÿr agjêx kêt nē. Tirtũm kām hwÿr mē agjêx prǎm tā ka mē axtem nē hkaga. Jakamǎ kot kaj mē ma kamǎt kō xihtÿx rax wÿr ajapêx nē mē kēp awry rax nē mē kot amnhĩ xǎ htÿx kamǎ hamak tũm xǎta kamǎ apa ho apa. Hāmri nē tee ri mē ixwÿr agjêx prǎm kaprÿ nē akapri xǎj mur nē amnhĩ kamǎ agryk tÿx nē. No ãm tee ri amnhĩ kamǎ agryk kaprÿ. Mē ate Tirtũm kapēr kaga nē hkôt amnhĩ xunhwÿr kêt jakamǎ kot kaj mē nhÿrmǎ ā amnhĩ nhĩpêx anē. Anē.

¹³ Nhũm pre ā Jejusja mē kām kapēr anē. Hāmri nē pôristi krǎhtũmta mǎ kām:

—E māmri ma akupÿm tē nē amǎ àpēnh xwÿnhhta pumu. Ra ate kaxyw inhmǎ ajamaxpēr tÿx jakamǎ na pa ra akupÿm amǎ ho mex. E akupÿm tē nē omu.

Anhÿr o kām kapēr rôm nhũm ra akupÿm kām mex kurê kumrêx.

Jejus kot ahpÿnhǎ mē à xwÿnhjê ho mex

Makre 1.29-31; Rukre 4.38-41

¹⁴ Tǎ nhũm Jejus ma Simǎw Pêtre nhōrkwÿ hwÿr tē nē hwÿr axà. Nhũm Simǎw Pêtre xupānhgêx ra à nē hkà kagro htÿx nē nō. ¹⁵ Hāmri nhũm Jejus hwÿr axà nē omu nē ãhkra hǎ kupy nhũm hkà hakry nē akupÿm hihtÿx kurê kumrêx. Jakamǎ kǎnhmǎ nhÿ nē mē kām mēō hǎ àpēnh o ri mra.

¹⁶ Tǎ nhũm ra awjakry. Ra kamǎtre ho mō nhũm mē piitǎ Jejus wÿr mē à xwÿnhjê ho mra. Nē mēkarōmnuti kot mē hwÿr gjêx xwÿnhjaja nhũm mē hwÿr mē o mra. Hāmri nhũm mē omu nē akupÿm mē piitǎ mē ho mex. Mē à xwÿnhjê ho mex nē mē hkwyjê nē mēkarōmnuti jano. ãm kapēr pix o mē nē mē hano nhũm mē kēp hapôj nē ma hapêx. ¹⁷ Na pre ra Tirtũm nhÿ hǎ kapēr xwÿnh finat Ijaisja ā amnhĩ nhĩpêx anhÿrja kukamǎ amnepēm mē kām harēnh o:

Tirtũm kot mē pahwÿr mēnh mǎ xwÿnhja koja nhÿrmǎ wrÿ nē mē pané mē paxǎ piitǎ rēnh pa nē akupÿm mē pahto mex pa. Anē.

Na pre ā finat Ijaisja Jejus kukamǎ harēnh anē. Tǎ nhũm wrÿ nē kot harēnh xǎ hkôt ā amnhĩ nhĩpêx anhÿr o pa.

Wa kām Jejus kôt amnhĩ xām prǎm xwÿnh wa harēnh

Rukre 9.57-62

¹⁸ Tǎ nhũm Jejus amnhĩ pu hǎ rīt nē tee ri hwÿr mē mrrar xwÿnhjê pumu hāmri nē hkôt mē pa ho mē pa xwÿnhjê mǎ kām:

—E ma pu mē pǎr mǎ agjê nē ma xarmǎ mō. Anē.

¹⁹ Hāmri nhũm mē nojarêt rôm nhũm Tirtũm kapēr tũm o mē ahkre xwÿnhjê hō Jejus wÿr tē nē kām:

—Pa mē ijahkre xwýnh? E pa ma akôt ri ixpa ho ixpa na. Anê.

²⁰ Hāmri nhūm kuma nē kām:

—Ko ka mā. Kam nē rī ma ixkôt ri apa. Nom kêr ka inhmar kumrêx. Xore na hte pika hkre kamā hikwý. Nē kuwênhre pī nhūmōk ā hikwý. No pa ixpê Tirtūm kot mē awýr inhmēnh xwýnh tā mry hkīnhā inhōrkwý hkêt. Na pa hte amarī nhām krī hwýr ixpa nē nhām hō hwýr ixpa. Tā xà kot ka ixpyrà nē ā amnhī nhīpêx anhýr o ri apa nà? Anê.

²¹ Hāmri nhūm pānhā hōja hwýr tē. Ra mē kot hkôt amnhī xunhwýr xwýnhjê hōja hwýr tē nē kām:

—Pa Pahihti. E pa amā amnhī jarē ka inhma. Kot paj ma akôt ixpa ho ixpa no ām kormā. Kojā nhýrmā inhīpêxà tanhmā amnhī to nē ty mán. Pa haxà hāmri nē rī kormā ma akôt ixpa ho ixpa. Anê.

²² Hāmri nhūm kuma nē kām:

—Kwa nà ri ā ajamaxpêr anhýr kêt nē. Ma ixkôt apa ho apa kurê kumrêx. Kê mēmoj inhnē ano kupyr rý apê āmnàr kêt nē. Kwār mē htír tūm nē mē pa hkêt mā xwýnhjaja mán axwakre kamā amā anhīpêxà jamār o pa nē haxà. Anê.

Jejus kot kôk o pīnhkrênh jarênh

Makre 4.35-41; Rukre 8.22-25

²³ Tā nhūm mē ra xarmā nojarêt nhūm Jejus mē hkôt mē pa ho mē pa xwýnhjaja pàr wýr agjê hāmri nē himô raxja ā ma xarmā mō. ²⁴ Hāmri nhūm Jejus ra ôtxwa nē ra gôr nē nō. Puh nhūm naja hkoko ho mō nē kôk xàpêr týx kumrêx. Nhūm gô kànhmā harī nē axpên tak týx nē. Xatā axpên tak nē pàr kre kamā axkapī nhūm ra àr o mō. Hāmri nhūm mē tee ri omu nē kām ma htýx kumrêx. Nē tee ri amnhī nhīpêx. No nhūm Jejusja htýx gôr nē nō. ²⁵ Hāmri nhūm mē hwýr hprôt nē kumra nē kām:

—Kwa Pahihti. Kot puj mē jarāhā pahtyk pa. Kwa tokyx kànhmā nhý nē ri tanhmā amnhī nhīpêx to wehe. Anê.

²⁶ Hāmri nhūm hkrākato nē kànhmā nhý nē kôk mā kapêr nē kām:

—E kwa hāmri anhīkrê. Anê.

Puh nhūm hpīnhkrênh pa nhūm gôja tām nōr kurê kumrêx. Hāmri nhūm Jejusja hkôt mē pa ho mē pa xwýnhjê hwýr apkjê nē mē kām:

—Hêxta waa nē. Kwa pêr ām kormā te mē ate amnhī kaxyw Tirtūm mē wa inhmā ajamaxpêr týx kêt pyrāk. Hā na ka mē amā ma xàj tee ri amnhī kukamā ajamaxpêr. Anê.

²⁷ Hāmri nhūm mē amnhī jaêr pē ā kot amnhī nhīpêx anhýrja ā omu nē tee ri hamaxpêr nē axpên pumunh pē omunh o kuhê. Hāmri nē axpên mā:

—Kokýy. Pêr Jejus kêp mē panhīō hkêt. Mē pahťō kot pu we te kot amnhī nhīpêx pyrà nē kôk mā pakapêr nhūm hpīnhkrênh kurê kumrêx? Nà Jejusja mē pakurom āhpumunh týx o āhpumunh týx. Anê.

Jejus kot wa nē mēkarōmnuti janor

Makre 5.1-20; Rukre 8.26-39

²⁸ Tā nhūm mē ra himô rax pē Garirejja ā rē nē pika pē Geras wýr pōj nē kamā mō. Hāmri nhūm ra mēhō myja wa hamêxkrut nē mē kutā tē. Ra mēkarōmnuti kot hamē wa hwýr gjêx xwýnhja wa. Mēkarōmnuti xohtō kot tanhmā wa ho jakamā nhūm wa oprê htýx nē hihtýx rax nē wa pa. Jakamā nhūm mē piitā kām wa uma nē amnhī nē mē htykjê jagjênh xà hā kēn kre kaêx kām wa kumē nhūm wa kamā pa ho pa. Jakamā nhūm wa Jejus kutā tē nē

amnhî wÿr omu hãmri nê amnhî nê tanhmã kãm kapêr to. Nom mēkarōmnuti nhÿ hã àmra kamã kãm kapêr nê kãm:

²⁹ —Pa Tirtùm Kra Jejus? Mo kaxyw na ka mē ixwÿr tē? Kwa tanhmã mē ixto hkêt nê. Ate tanhmã mē ixtomnu hto hã arġgrotã kormã katoore hã. Anê.

³⁰ Nhùm ra krĭ nhõ xwÿnhjê hkrit hagrô ohtô nê ri mē hpum pa. ³¹ Nhùm mēkarōmnuti mē omu hãmri nê amnhî to Jejus wÿ nê kãm:

—Kwa kot ka jahti wa nê mē ijapôx japêr nê mē kot amnhî xà htÿx kamã hamak tùm xàta wÿr mē ixrênh kêt nê. Hagrô hkwy müj wÿr mãn mē ixrê pa mē hpãnhã hwÿr mãn hãgê nà? Anê.

³² Hãmri nhùm mē kuma nê mē kãm:

—Tõe mē tãm mē hwÿr mãn mra. Anê.

Hãmri nhùm mē kuma nê myta wa kêp hapôj nê hagrô hwÿr mrar kurê kumrêx nê hpãnhã kãm gjêx pa. Hãmri nhùm hagrôta mēkarōmnuti pymaj amÿra nê ma hprôt nê himô hã hixêt prêk ã axpum rôrôk nê gôx kãm mrô nê pikaprâr pa. ³³ Hãmri nhùm hagrô jamâr o ri mē pa xwÿnhjaja tee ri omu hãmri nê ma akupÿm krĭm hprôt nê mē kãm awjarê. Nê myta wa akupÿm tãm hkrã hã harênh o hprôt. ³⁴ Hãmri nhùm krĭ nhõ xwÿnhjaja tee ri mē hkrit jarênh ma nê ma piitã Jejus wÿr mra nê hkaxpa. Hãmri nê amnhî nê kãm:

—E kwa mē ma amrar kurê kumrêx. Anê.

Hãmri nhùm mē kuma nê awjanã nê ma akupÿm pan rê.

9

ĭ kamã htyk xwÿnh jarênh

Makre 2.1-12; Rukre 5.17-26; Juãw 10.37-38

¹ Nhùm Jejus mē hkôt mē pa ho mē pa xwÿnhjaja awjanã nê ma akupÿm pâr wÿr mra nê gjêx pa nê akupÿm xarmã rê nê akupÿm Jejus nhõ krĭ hwÿr mō. ² Hãmri nê hwÿr pøj nhùm krĭ nhõ xwÿnh kwÿjaja mē omu nê ĭ kamã htyk xwÿnhja mÿ nê Jejus wÿr o tē. Nôr xà kamã nôr rãhã nhùm mē hã hije nê kumÿ nê hwÿr o tē. Hãmri nhùm amnhî tã mē omu. Ra mē kot hkrãmnhwÿta kaxyw kãm hamaxpêr tÿx ã mē omu nê ĭ kamã htyk xwÿnhnta mã kapêr nê kãm:

—Pa? Kwa tee ri amnhî kukamã ajamaxpêr kêt nê. Na pa ra apê tanhmã ate amnhî tomnuj to ho ijapêx pa. Kot paj axte kãm ijamaxpêr kêt nê. Anê.

³ Hãmri nhùm Tirtùm kapêr tùm o mē ahkre xwÿnhjaja tee ri ã kot kãm kapêr anhÿrja ã kuma nê xpên mã:

—Tk. Kwa mēhõ myti müj kêp Tirtùm kêt tã te ri kot amnhî nhĭpêx pyrãk ã amnhî nhĭpêx. Tirtùm pix na kot mē nê mē kot amnhî tomnuj o hapêx xwÿnh. Anê.

⁴ Hãmri nhùm Jejus amnhî tã mē kuma nê mē kãm:

—Kwa mē ã ajamaxpêr anhÿr kêt nê. ⁵ Ixte mē nê mē kot amnhî tomnuj o ijapêx par ã amnhî jarênh tã mē ate ja kôt ixpumunh kêt jakamã na ka mē ja kaxyw ixkôt ajamaxpêr kêt nê. Nom kot paj mē anoo mã akupÿm ĭ kamã htyk xwÿnhnta o mex ka mē apiitã hã ixpumu hãmri nê ixkôt ajamaxpêr kurê kumrêx. Ixpê Tirtùm kot mē awÿr inhmênh xwÿnhnta na pa. Ixte mē anê mē ate amnhî tomnuj rênh kaxyw na pre mē awÿr inhmê pa mē awÿr wrÿ. ⁶ Tã mē ate ja hã ixpumunh kaxyw kot paj mē anoo mã ja ho mex.

Anhÿr o mē kãm amnhî jarê hãmri nê ĭ kamã htyk xwÿnhnta mã kãm:

—E kãnhmã xa nê anôr xàta py nê ma akupÿm anhörkwÿ hwÿr tē. Anê.

⁷ Puh nhũm kànhmã ãm kurê kumrêx nê nõr xà py nê mẽ noo mã kato nê ma akupÿm òrkwÿ hwÿr tẽ. ⁸ Hãmri nhũm mẽ piitã no hapòx rũnh nê omunh o kuhê nê kamã no puma htÿx nê. Nê tee ri omu nê axpên mã:

—Kokÿÿ. Kwa aa mẽ pahte ã mēhō kot amnhī nhīpêx anhÿr ã omunh kêt tã jarãhã ja pumu.

Anhÿr o Jejus jarê hãmri nê ÿ hã Tirtũm mã mex o mex ã harê.

Jejus kot amnhī kôt Matêwre hwÿr

Makre 2.13-17; Rukre 5.27-32

⁹ Tã nhũm Jejus mẽ kêp kato nê hkôt mẽ pa xwÿnhjê mẽ nhũm mẽ ma mō. Hãmri nê pa ixpê Matêwre ixpumu. Ixte Rôm kãm mẽ ho amnhīptàr xwÿnh mã krī nhō xwÿnhjê pẽ kàxpore hkwy jamÿnh xwÿnh na pa pre. Nom mẽ kot ho tewên kryre htã ixte amnhĩm hkwy ho ixàrik prãm xaj na pa pre hte mẽ kãm ho rũnh nê harê. Jakamã nhũm mẽ piitã kãm ixkĩnh kêt nê. Tã pa pre mẽ kêp kàxpore jamÿnh xà hã ixkre kamã mẽ kêp hamÿnh o nhÿ nhũm Jejus mẽ hkwyjaja ijãnh mra nê ixpumu nê amnhī kôt ixwÿ nê inhmã:

—Pa? E axàpênhta kaga nê hpãnhã amnẽ mẽ ixkôt mãn tẽ nê ixkôt mãn ri apa ho apa. Anẽ.

Hãmri pa kuma nê ixàpênh kaga nê ma hkôt tẽ. Nê hpãnhã hkôt ixpa ho ixpa.

¹⁰ Hãmri nê mẽmo arĩgro hã amnhī nhōrkwÿ hwÿr Jejus nê hkôt mẽ pa ho pa xwÿnhjaja mẽ ixkrãmnhwÿ hkwyjê hwÿ. Nhũm mẽ piitã mra nê inhōrkwÿ hwÿr agjê nê ixkutã apkur o hkrī. Nê ixpyrà nê Rôm nhō pahi mã mẽ kêp kàxpore hkwy jamÿnh xwÿnh kwÿ haxwÿja ixwÿr mra nê mẽ ixkutã apkur o hkrī. ¹¹ Hãmri nhũm Parijew nhō xwÿnhjaja mra nê inhōrkwÿ kapem mẽ ixàpkur ã mẽ ixpumu. Nê tee ri mẽ ixkaêx ã Jejus pumu hãmri nê hkôt mẽ pa ho mẽ pa xwÿnhjê hwÿr agjê nê mẽ ixtã mẽ kãm akir nê mẽ kãm:

—Kwa mẽ kot jajê kutã apkur kêt tã mẽ akrãhtũmja axtem nê mẽ kutã apkur o nhÿ. Kwa nã mẽ kot amnhī tomnuj xwÿnh kênã. Jejus kot amnhī to mex ronhÿx mẽ kutã apkur kêt nê. Anẽ.

¹² Hãmri nhũm Jejus amnhī tã ã mẽ kapêr anhÿrja ma nê mẽ kãm:

—Tk. Nã ixte tãm mẽ unhwÿr kaxyw na pa mẽ kutã ixàpkur o nhÿ. Xà na hte tótõja mẽ mex xwÿnhjê hwÿr mra nê mẽ hkane? Nã ãm mẽ ã xwÿnhjê pix wÿr na hte mra nê tanhmã mẽ hkane hto. Ra mẽ ate ja pumunh mex. Tã ja pyrà nê na pa pre mẽ kot amnhī to mex xwÿnhjê hwÿr ixwÿrk kêt nê. Mẽ kot amnhī tomnuj xwÿnhjê pix wÿr na pa pre wrÿ. Ixte tãm mẽ unhwÿr kaxyw mẽ hwÿr wrÿ nê ã jajê kutã ixàpkur o inhÿr anẽ. ¹³ Ga mẽ ma mra nê Tirtũm kapêr ã kagã htũm kot ja jarênhja kamã harê nê ama. Harênh kot:

Na ka htem inhmã tanhmã amnhī jarênh to kaxyw hãmri nê inhmã mẽmoj gō nê tanhmã ixto mex to. Nom kêr ka mẽ ãm ja pix ho anhÿr kêt nê. Mẽ mãânên mẽ piitã tanhmã mẽ ho mex to ho ri apa. Anẽ.

—Ã Tirtũm kapêr ã kagã htũm kot ja jarênh kot anhÿr. Tã ja pyrà nê na pa pre mẽ kot amnhī tomnuj xwÿnhjê hwÿr wrÿ nê mẽ kamã ixukapri ho ixpa. Mẽ kot amnhī tomnuj kaga nê hpãnhã tãm amnhī nhīpêx kaxyw na pa pre ã mẽ hwÿr ixwÿrk anẽ. Tã ka mẽ ri atÿx amnhī krã hkôt ã ixto akapêr anẽ. Anẽ.

Mẽ kot mẽmoj tã Jejus kukjêr

Makre 2.18-20; Rukre 5.33-35

¹⁴ Tã nhũm Juãw Paxis kôt mẽ pa xwÿnhjaja Jejus wÿr mra nê mẽmoj tã hkukja nê kãm:

—Pa? E ot pa mẽ awÿr mra. Kwa mẽ inhmã mẽmoj jarê. Na pa htem tõhã Parijew nhõ xwÿnhjê pyrà nê ixàpkur kêt kãm Tirtùm mã amnhĩ jarê. Tã nom akõt mẽ pa ho mẽ pa xwÿnhjaja na htem àmnhĩx apkur o pa kamã kãm amnhĩ jarênh o pa. Kwa mo na htem mẽ ixpyrà nê tõhã apkur kêt kamã kãm amnhĩ jarênh kêt nê? Anê.

¹⁵ Hãmri nhùm mẽ kuma nê mẽ kãm:

—Nà mo kaxyw kot kêt mẽ apkur kêt rãhã kãm amnhĩ jarê? Mẽ hkaprĩre hã. Mẽ kot ixkõt pa ho pa hã amnhĩ pumunh jakamã na htem hkĩnh nê ixkõt pa. Kormã ixte mẽ kamã ixpa kênã kot kêt mẽ apkur kêt rãhã Tirtùm mã tanhmã amnhĩ jarênh to. Xà na htem hkrãmnhwÿ hã hkĩnh kaxyw hã akuprõ nê hkaprĩ nê apkur kêt o kamat nê mÿr o hkrĩ? Nà na htem anhÿr kêt nê. Na htem hã akuprõ nê hkĩnh nê hã apkur rũnh nê. Ja pyrà nê na hte ixkõt mẽ pa ho mẽ pa xwÿnhjaja ixkõt kormã àmnhĩx hkĩnh nê apkati mẽ apkur o pa. Nom koja mẽ kãm ixkurê xwÿnhjaja nhÿrmã tanhmã ixto hãmri nhùm mẽ hkaprĩ htyx nê rĩ kormã tõhã apkur kêt rãhã Tirtùm mã amnhĩ jarê. Anê.

Mẽ pahte Jejus kõt amnhĩ nhĩpêx

Makre 2.21-22; Rukre 5.36-39

¹⁶ Nhùm Jejus mẽ piitã mẽ kãm kapêr nê mẽ kãm:

—Mẽ kot amnhĩ tomnuj xwÿnhjaja ra mẽ kot amnhĩ nhĩpêx tùm o amnhĩ pyràk jakamã na htem tanhmã mẽ kot amnhĩ nhĩpêx nyw tota kaga. ¹⁷ Tã ixte amnhĩ nhĩpêx nywja te kot mẽ ate amnhĩ nhĩpêx tùm pyràk kêt jakamã na ka htem ixkapêr ma nê ãm ama. Kwa mẽ inhma nê mẽ ate amnhĩ nhĩpêx tùmja gryk ã ixkaga hkêt nê. Anê.

Mẽ hkra htyk nê mẽhõ ni kamrõ wa harênh

Makre 5.21-43; Rukre 8.40-56

¹⁸ Nhùm pre ã Jejus mẽ kãm kapêr anhÿr o xa. Rôm nhùm mẽõ pahitija tẽ nê mar o xa. Hãmri nê hamaxpêr o:

—Kokÿÿ. Jejusja ãm hãmri kêp pahi maati kumrêx. Hã na ri ã kapêr mex anê. E pa hwÿr tẽ nê ixkrare ho kuwÿ. Anê.

Hãmri nê hwÿr tẽ nê kutã hkõnkrã ho nhÿ nê kãm:

—Pa akupÿm mẽ ixto mex xwÿnh? E ot pa awÿr tẽ. Kwa ma ixkõt tẽ nê inhmã ixkra nire pumu nê tanhmã inhmã ho kê akupÿm inhmã htĩr. Na ham ixpê ty pa kaxyw amã ijamaxpêr nê man awÿr tẽ. Anê.

¹⁹ Hãmri nhùm kuma nê kãm:

—Tõe. Nà kot paj ma akõt tẽ. Anê.

Hãmri nê ma hkõt tẽ. Mẽ ixpê hkõt ixpa ho ixpa xwÿnhjê mẽ pa mẽ ma hkõt mõ. ²⁰⁻²¹ Nhùm mẽhõ ni kamrõ rãhã ho pa xwÿnhja ma mẽ ixkõt tẽ. Na pre hte hkamrõ hkryre rãhã ho pa hã amgrã pê 12 nê tee ri kãm amnhĩ mex prãm o pa. Jakamã Jejus jarênh ma nê amnhĩ kaxyw kãm hamaxpêr kurê kumrêx nê hamaxpêr o:

—Ma pa kop ma hwÿr tẽ nê kêp ê nhĩrê pix kupênh tã akupÿm inhmex japêr. Anê.

Hãmri nê ma mẽ ohtôjê kaêx kõt hwÿr tẽ. Nê katut kõt tẽ nê kêp ê nhĩrê kupê. ²² Hãmri nhùm Jejus ho hakêx nê amnhĩ tã omu nê kãm:

—Pa? Kwa tee ri amnhĩ kukamã ajamaxpêr kêt nê. Ate amnhĩ kaxyw inhmã ajamaxpêr tÿx jakamã na ka ra akupÿm amex. E mãmrĩ ajamakêtkati nê ri apa. Anê.

Hãmri nhùm akupÿm mex nê hkĩnh tÿx nê ma akupÿm tẽ. ²³ Hãmri pa mẽ ma htyk xwÿnh nhĩpêêxã hkõt mra nê òrkwÿ hwÿr agjê nê mẽ pikuprõnh xwÿnhjê

pumu. Nhũm mẽ ra mẽ hã htu rax nê. Nê omũj ri kaprĩ xaj pifti kakôr o hkrĩ nê omũj ri mur. Kax pê mur nê amnhĩ tak o hkrĩ. ²⁴ Hãmri nhũm Jejus mẽ hwyr axà nê mẽ omu. Nê ra kot my hkrata htyk ã omunh tâ kuri mẽ mỳr o mẽ hkrĩ xwỳnhjê mã kapêr nê mẽ kãm ãm ôt nê nõr ã harê nê mẽ kãm:

—Pa? Kwa mon ka mẽ ri akaprĩ nê amỳr o akrĩ? E mẽ ma mra. Na wa hkrata wa kêp htyk kêt nê. Na ãm gôr nê nõ. Anê.

Hãmri nhũm mẽ kot ra htyk ã omunh mex jakamã kuma nê ãm kuma. Nhũm mẽ hkwỳja axtem nê ri axpên mã hã hpêr o pikênh o hkrĩ. ²⁵ Hãmri nhũm kapôt mã mẽ hano nhũm mẽ hapôj nê kapôt ã kuhê. Hãmri nhũm Jejusja htyk xwỳnhta wỳr axà nê hpa hã kupy nê kànhmã ãm nhũm akupỹm htĩr nê kànhmã ãm kurê kumrêx. ²⁶ Hãmri nhũm mẽ piitã akupỹm htĩr kãm omu nê ma ri krĩ piitã hkôt ri mẽ kãm harênh o hprôt.

Wa nohkre xwỳnh wa harênh

Matêwre 20.29-34

²⁷ Tã nhũm Jejus kato nê ma tẽ. Pa mẽ hkôt ixpa ho ixpa xwỳnhjaja ma hkôt mỗ. Hãmri nhũm wa myja wa hamêxkrut. Hamê wa nohkre xwỳnh wa Jejus jarênh ma nê hã ajêt nê hkôt rôrôk o mỗ. Nê xatã amnhĩ to hwyr o hkôt rôrôk o mỗ nê kãm:

—Pa Jejus? E Tirtũm kot mẽ ixkaxyw axãm jakamã kwa wa ixpumu nê wa ixkamã axukaprĩ kêt wehe. Anê.

²⁸ Hãmri nhũm wa kuma nê wa hkukamã nhỹri ixkrem axà nhũm wa hkôt axà nê xa nhũm wa omu nê wa kãm:

—Pa? E xàn ka wa ra amnhĩ kaxyw inhmã ajamaxpêr tỳx nê na? Anê.

Hãmri nhũm wa kãm:

—Tỳ. Wa ixte amnhĩ kaxyw amã ijamaxpêr tỳx kênã. Anê.

²⁹ Hãmri nhũm wa kuma nê hamê wa no hã ãhkra xi nê wa kãm:

—Tôe. Nà war ate tanhmã amnhĩ kaxyw inhmã ajamaxpêr to xà hkôt kot paj war anhípêx. Anê.

³⁰ Hãmri nhũm wa akupỹm rĩt mex kurê kumrêx. Hãmri nê akupỹm kato nê ma htêm kaxyw nhũm wa kãm:

—E kêr ka wa nhãm mẽ kãm ixte war ato mex ã ijarênh kêt nê. ãm kwarĩ ho kwarĩ.

³¹ Anhỹr tã no nhũm wa kuma nê ãm kuma nê wa ma tẽ nê krĩ pu hã mẽ piitã mẽ kãm ri war amnhĩ tã harênh o mra.

Kapêr kêt xwỳnh jarênh

³² Tã nhũm Jejus ma axte nhỹhỹm mẽ ixto mỗ. Hãmri nhũm mẽhõ my mẽkarômnuti kot hwyr àr nê tanhmã ho nhũm kapêr kêt nê pa xwỳnhja nhũm mẽ Jejus wỳr o tẽ. ³³ Hãmri nhũm omu nê nê mẽkarômnuti jano nê kãm:

—E kêp akato nê ma tẽ. Anê.

Hãmri nhũm kuma nê kurũm kato nhũm akupỹm kapêr mex kurê kumrêx. Hãmri nhũm mẽ kot hã omunh xwỳnhjaja tee ri kot mẽkarômnuti janor ã omu nê kamã no pyrna nê. Nê axpên mã:

—Kokỹỹ. Aa mẽ pahte ã mẽhõ kot anhỹr pumunh kêt kumrêx tã na pu mẽ jarãhã ja pumu. Anê.

³⁴ Nom nhũm mẽ hkwỳ pê Parijew nhõ xwỳnhjaja axtem nê hã mẽ kãm kapêr o:

—Tk. Kot amnhĩ krã hkôt mẽ hanor kêt kênã. Mẽkarômnuti nhõ pahĩ nhỹ hã kot mẽ nê mẽ hanor kênã. Anê.

*Jejus kêp mē pakamā ukapri xwýnh
Makre 6.34; Rukre 10.2-3; Juāw 4.35*

³⁵ Tā nhūm Jejusja kri ho ohtō nē hkôt ri mē kām Tirtūm kapēr jarēnh o pa. Pa mē hkôt ixpa. Na pre hte nhýri kri hwýr pōj nē mē kot Tirtūm kapēr o mē ahkre xā hā ixkre hwýr mra nē hwýr agjé nē mē pikuprōnh xwýnhjê jahkre. Nē mē kām:

—E mē inhma. Tirtūm kām mē apiitā mē ato hkra hprām. Jakamā kwa mē ate amnhī tomnuj kaga hprām xāj hkôt amnhī xunhwý nē kapēr kôt amnhī nhīpêx. Jao amnhī nhīpêx nyw o amnhī nhīpêx o ri apa.

Anhýr o mē kām kapēr. Hāmri nē ahpýnhā ri tanhmā mē à kute xwýnhjê ho mex. Nhūm mē ohtō nē hkôt mar o pa. ³⁶ Hāmri nhūm mē omu nē kām mē hkapri nē. Na prem tee ri amnhī kukamā hamaxpēr o pa jao ra hkapri nē. Nhūm Jejus ja hā mē omu nē hamaxpēr o:

—Hêxta waa nē. Na mē mex kêt nē pa. Te mē kêp ôwêhti jamār xwýnh kêt kot amnhī nhīpêx pyrāk o htýx ri pa. Mēhō koja kām mē hkapri nē tanhmā mē ho mex to ho pa? Anē.

Hāmri nē mē kamā ukapri nē. ³⁷ Hāmri nē mē hā mē ixpê hkôt ixpa ho ixpa xwýnhjê mā kapēr nē mē inhmā:

—Nā na mē kormā ohtō rax nē Tirtūm kapēr mar kêt nē. No ām kormā mē ate mē kām kapēr jarēnh o apa kaxyw mē agrêre. Te pur rax kām ra harōj kamrêk par nē ām tā no ām kaxyw hikēnh xwýnhjaja grêre pyrāk. ³⁸ Jakamā kwa mē ho Tirtūm wý kê axte mē kaxyw mē akwýjê rê kê mē apyrā nē ma mē hkôt ri mē kām kapēr jarēnh o pa. Anē.

10

*Jejus kot mē ho 12 nē mē rēnh
Makre 3.13-19; Rukre 6.12-16*

¹⁻⁴ Tā nhūm Jejusja hkôt mē ixpa ho mē ixpa xwýnhjê ho 12 nē mē ixrê. Mē ixte ma kri piitā hwýr inhmrar nē ý hā mē ahkre nē tanhmā mē à kute xwýnhjê ho mex o ixpa kaxyw. Nē ý hā mē nē mēkarōmnuti janor o ixpa kaxyw nhūm mē ixrê. Na pre mē ixto 12 nē mē ixrê. Ā mē inhīxi kot anhýr.

Pêtre kumrêx na pre kuta. Hixi hō pē Simāw.

Nē hkôt htō Andreja ta.

Nē hkôt Jepetew kra Xiakreja ta.

Nē hkôt Xiakre htō Juāwja ta.

Nē hkôt Firiptija ta.

Nē hkôt Patoromewja ta.

Nē hkôt Tomasja ta.

Nē hkôt pa ixpê Matêwre nhūm pre mē hkôt ixta.

Ixpê pahi nhý hā kām mē kêp ixujamýnh xwýnh tā nhūm pre jajê hkôt ixta.

Nē ixkôt Apew kra Xiakre hōja ta.

Nē hkôt Tatewja ta.

Nē hkôt Simāw Jeroxja ta.

Nē hkôt Jut Kariotja ta.

Kormā kot mē kām Jejus kurê xwýnhjê nhīhkram ōr mā nhūm Jejus kot amnhī kukamā omunh mex tā mē hkôt amnhī kaxyw kuta.

Ā mē ixte ý hā mē ahkre o ixpa kaxyw mē ixrēnh xwýnhjê nhīxi kot anhýr.

Jejus kot mê kêp 12jê mã mê àpênh ã karô

Makre 6.7-13; Rukre 9.1-6, 10.1-12, 10.14; mãânên Atre 13.50-51, 18.6

⁵ Hâmri nhùm Jejus mê ixrênh pa nê ma mê hwÿr mê ixrênh kaxyw tanhmã mê inhmã kapêr to nê mê inhmã:

—E. Kêr ka mê ma mê piitã mê kãm ri ijarênh o apa. No âm kormã mê kêp Ijaew kêt xwÿnhjê nhô pika hwÿr apa hkêt nê. Rÿ mê kêp Samar nhô krî hwÿr ka mê apa hkêt nê. ⁶ Âm mê pahpê Ijaew nhô krî kôt pix mã mãn ri apa. Mê kot tee ri amnhî kukamã hamaxpêr o pa jakamã te mê kêp ôwêhti pikunor nê htÿx ri mex kêt nê pa pyrãk. ⁷ Jakamã kêr ka mê ma mê hwÿr apa nê ã mê hkôt ri mê kãm akapêr o apa anê nê mê kãm: “E kot kaj mê ate amnhî tomnuj kaga nê Tirtûm kôt amnhî xunhwÿ hãmri nhùm amnhî tã mê apumu nê mê ato hkra. Jakamã e kwa mê tokyx hkôt amnhî xunhwÿ.” Anê. Kêr ka mê ã mê kãm akapêr anhÿr o ri mê hkôt apa. ⁸ Hâmri nê akupÿm mê ã xwÿnhjê ho mex o ri apa. Nê mê htyk xwÿnhjaja ka mê akupÿm mê ho htÿr o ri apa. Nê mê hkânhy rûnh xwÿnhjaja ka mê akupÿm mê ho mex o ri apa. Nê mê kamã mêkarômnuti xwÿnhjaja ka mê nê mê hano. E kêr ka mê ã inhÿ hã mê ho mex o ri apa anê. Na pa amarî tanhmã mê ato ka mê inhmã amnhîrer kêt tã ra mê ate tanhmã mê ho mex to mã tãm. Tã kêr ka mê amnhî xwar amarî ri mê ho mex o ri mê hkôt apa. No ri mê ho mex pãnhã kãxpore hã axàhwÿr kêt nê.

⁹⁻¹⁰ —Nê kêr ka mê ma mê hwÿr apa kaxyw anojarêt hãmri nê amnhî kôt akukrêx rûnh o apa hkêt nê. Âm anhÿ kamã mê hwÿr apa. Nê akãxpore ho rax nê ho apa hkêt nê. Rÿ akawã kamã axê hkwyÿ rÿ aparkã hõ xàr nê ho amôr kêt nê. Rÿ kô hõ py nê ri ho apa hkêt nê. Âm anhô mrykã pix jamÿ nê ma ho apa. Kêr kê mê ate Tirtûm kapêr o mê ahkre nê mê ho mex xwÿnhjaja mãn amnhî pãnhã mê amã mê axãpkur xã gô ka mê kutã axãpkur o ri mê hkôt apa.

¹¹ —Nê kêr ka mê nhÿri krî hwÿr ajapôj nê kamã mêhõ kot amnhî to mex xwÿnh japêr. Nê ra omu hãmri nê kuri mãn pôj nê hkôt apikamênh tãmtã kurûm akupÿm ajapôj nê ma nhãm krî hõ hwÿr mra.

¹² —Nê kêr ka mê mêhõ nhôrkwyÿ hwÿr pôj nê mê kãm: “E ot pa mê awÿr mō. Nà koja Tirtûmja mê ato mex nê.” Anhÿr o mê kãm akapêr. ¹³ Koja mê ama nê amnhî wÿr awÿ ka mê amnhî tã mê omu nê mê kãm: “E koja Tirtûm mê ato mex nê ka mê ajamakêtkati nê ri axãmnhix apa.” Anhÿr o mê kãm akapêr. No koja mê amnhî nhôrkwyÿ nê mê akurê nhùm Tirtûm ja hã mê omu nê mê ho mex kêt nê.

¹⁴ —Nê koja nhÿri krî hõ kamã mê akaga nê akapêr mar kêt japêr. Ka mê tee ri amnhî tã mê kamã ama hãmri nê tokyx mê kurûm ajapôj nê ma akupÿm apa. Nê akupÿm anojarêt nê mê noo mã akuhê nê amnhî par ã awjagrô kapî nê ma apa. Mê kot Tirtûm kaga hã amnhî pumunh kaxyw ka mê ã mê noo mã amnhî nhîpêx anê. Hãmri nê ma nhÿhÿm hpãnhã apa. ¹⁵ Koja nhÿrmã Tirtûm mê kot amnhî tomnuj mÿrapê tanhmã mê ho. Na pre ã Sotô mê Komo nhô xwÿnhjê nhîpêx anê. Na prem amnhî tomnuj tÿx nê nhùm Tirtûm tee ri ja hã mê omu nê tanhmã hã mê homnuj tÿx to. Tã jar mê kãm ixkapêr mar prãm kêt nê mê kot ixkaga xwÿnhjaja koja ja hã mê omu nê kot Sotô mê Komo nhô xwÿnhjê nhîpêx o mê hipêx. No âm tanhmã mê ho htÿx o mê hakre. Anê.

Nhùm pre Jejus ã mê inhmã mê ixàpênh ã karô anê.

Jejus kot mê kêp 12jê hkukamã mê harênh

Makre 13.9-13; Rukre 12.11-12, mãânên Rukre 21.12-17; Wam Pêtre 3.13-17, 4.12-19; Rukre 6.40; Juãw 15.20; Rukre 12.2-9

¹⁶ Nhùm Jejus arî kot mê ixrênh xwÿnhjê mã kapêr nê mê inhmã:

—E kot paj ma mẽ hwÿr mẽ arê. Ma mẽ ate Tirtûm kapêr o mẽ ahkre ho ri mẽ hkôt apa kaxyw. Jakamã kot kaj mẽ te ôwêhti kot mry xoprê hwÿr amnhĩ to mrar nhûm kot hkwȳ hpar pyrãk o amnhĩ nhĩpêx. Koja mẽ hkwȳjaja mẽ ate mẽ ahkre ma nhûm ja mẽ kêp omnuj nê nhûm mẽ hã tanhmã mẽ anhĩpêx to. Tã nom kêr ka mẽ tee ri amnhĩ kukamã ajamaxpêr nê amã mẽ uma hkêt nê.

17 —E kwa mẽ o kora. Kêr ka mẽ ma mẽ hwÿr mra nê amnhĩ nê mẽ htãnopxar o ri apa. Koja mẽ hkwȳjaja mẽ akapêr ma nê kêp mẽ aprãm nõkati. Nê mẽ apynê nê ma mẽ utãr xwÿnhjê hwÿr mẽ ato mra nê mẽ kãm tanhmã mẽ ato hêx to. Hãmri nhûm mẽ mar xã hkôt mẽ atak. Tirtûm kapêr o mẽ ahkre xã hã ixkre kamã koja mẽ ã mẽ anhĩpêx anê.

18 —Nê koja mẽ ixtã tanhmã mẽ ato kaxyw mẽ apynê nê ma mẽ õ pahi hwÿr mẽ ato mra nê tanhmã kãm mẽ ato hêx to. Nom kwãr mẽ mamrĩ ã mẽ anhĩpêx anê. Koja mẽ ato anê ka mẽ kutã akrĩ nê mẽ kãm Tirtûm kapêr jarê. Ijaewjê mã nê mẽ kêp Ijaew kêt xwÿnhjê mã.

19 —Nê koja mẽ ma mẽ õ pahi hwÿr mẽ ato mra nê ã mẽ anhĩpêx anê nom kêr ka mẽ tee ri tanhmã mẽ kãm amnhĩ jarênh to hkukamã ajamaxpêr kêt nê. Koja Tirtûm Karõ tãm tanhmã mẽ akrã hto ka mẽ ô ri mẽ kãm akapêr mex nê. 20 Nê kot kaj mẽ amnhĩ krã hkôt ri mẽ kãm akapêr kêt nê. Tirtûm Karõ nhÿ hã kot kaj mẽ ô ri mẽ kãm tanhmã axujarênh to.

21-22 —Nê koja mẽ hkwȳjaja ixtã mẽ akamã gryk nê. Nê mẽ atã àmnênh pix o pa. Nê mẽ kot mẽ apar kaxyw mẽ akwȳjê hã amÿnê. Koja mẽ anhĩpêêxã hkwȳjaja mẽ apê mẽ hkra hã amÿnê. Nhûm mẽ akra hkwȳjaja mẽ apê mẽ hipêêxã hã amÿnê. Nhûm mẽ atõ hkwȳjaja mẽ apê mẽ htõ hã amÿnê. Nhûm mẽ akatorxajaja mẽ atã amÿnê. Hãmri nhûm mẽ apa. No ãm kwãr mẽ mãmrĩ ã mẽ anhĩpêx anê. ã mẽ kot mẽ anhĩpêx anhÿr tã kêr ka mẽ tee ri amnhĩ kukamã ajamaxpêr pê ixkaga hkêt nê. Mẽ ãm amnhĩ to htÿx rãhã ty. Hãmri nê akaxwÿnhja ma Tirtûm mẽ wa inhõ krĩ hwÿr axãpir kurê kumrêx nê wa ixkuri akupÿm amex nê atÿr tûm nê apa ho apa.

23 —Nê koja mẽ nhÿri krĩ hkwȳ kamã ixtã tanhmã mẽ anhĩpêx hto ka mẽ mãmrĩ mẽ kurûm ajapôj nê ma nhÿhÿm krĩ hõ hwÿr apa. Nê hpãnhã kamã mẽ kãm ri ijarênh o mẽ hkôt apa. Kot kaj mẽ kormã Ijaewjê nhõ krĩ piitã hwÿr apa hkêt ri pa akupÿn mẽ awÿr wrÿ. Kwa kêr ka mẽ ixkapêr mã ajamaxpêr tÿx rãhã ri apa.

24-25 —Mẽ ate ixkôt apa ho apa xwÿnh na ka mẽ. No pa na ixpê mẽ ajahkre xwÿnh. Jakamã koja mẽ kot tanhmã inhĩpêx to ho mããnen mẽ anhĩpêx. Koja mẽ nhÿrmã tanhmã inhĩpêx to nê mã ixkôt mẽ ato anê nê. Mẽ pahte amnhĩ nhĩpêxja kot axpên pyrãk. Jakamã koja mẽ ixpê Satanasti hã ijarê nê mããnen tanhmã mẽ ajarênh punuj to ho pa. Mẽ pahte amnhĩ nhĩpêxja kot axpên pyrãk jakamã koja mẽ panhĩpêx o axpên pyrãk.

26 —Tã nom kêr ka mẽ tee ri amnhĩ kukamã ajamaxpêr pê amã mẽ uma ho apa hkêt nê. Na htem piitã axpên pê tanhmã hamaxpêr punuj to ho hpimxur o pa nom tee ri ho pimxur prãm kaprÿ. Koja nhÿrmã mẽ hamaxpêr piitã amnhĩrit pa. Nê mẽmoj piitã ra hpimxur mex tã koja nhÿrmã amnhĩrit par kumrêx.

27 —Nê koja nhÿrmã mẽ piitã ixte amnhĩ nhĩpêx kôt ixpumu. Na pa ra mẽ hkãx ã mẽ amã ixujarênh rax nê. Tã kêr ka mẽ ma mẽ piitã mẽ kãm harênh o ri apa. Nê ra ixte mẽ hkãx ã ahte ixte mẽ amã mẽmoj jarênhta ka mẽ hpãnhã ma mẽ kãm harênh o ri apa kê mẽ apyrã nê harênh ma.

28 —E kêr ka mê amã mê kot tanhmã mê ato mã xwýnhjê pyrna ho apa hkêt nê. Mê kot mê apar mã tâ koja mê âm mê akrâhkã pix pa nom tanhmã mê akaxwýnh to hkêt nê. Tirtûmja tapxpix na hte mê hkrâhkã nê mê hkaxwýnh mê ho pimràatã kot amnhî xã htýx kamã hamak tûm xãta wýr mê rênh pumunh. Tã kot hwýr mê arênh pymaj kêr ka mê amã kapêr kwým ri tanhmã amnhî nhîpêx to pyrna ho ri apa.

29-31 —Nê Tirtûm kot mê pahto hapêx par pumunh tâ mãânên kot mê pajamãr mex. Mãn ka htem kuwênhre pumu. Na hte Tirtûm kuwênhre jamãr mex o pa. Mê piitã mê kot âm omunh tâ nom nhûm Tirtûm mê kurom hamãr mex pê mê htãnopxar rãhã ho pa. Tã kãm mê pajapê htýx o kot kuwênhre jakrenh jakamã kwa mê tee ri amnhî kukamã ajamãxpêr o ri akapri nê apa hkêt nê. Kojã Tirtûm mê pahtãnopxar rãhã ho pa. Kot mê panhi piitã omunh par. Nê ahpýnhã tanhmã mê pahkrã hkî kute hkôt mê pahpumunh par. Tã kot mê pahtãnopxar rãhã jakamã mo kaxyw kot kaj kêt mê ri amã mê uma ho apa? Anê.

Mê pahte Jesus kôt amnhî xunhwýr rý mê pahte hkaga jarênh

32 Nhûm Jesus arî kot mê hwýr mê ixrênh xwýnhjê mã kapêr nê mê inhmã: —E kwa mê mãmri akwýjê mã mê apê ixkwý hã amnhî jarênh o ri apa nê amã mê uma xaj tee ri amnhî nhîpêx kêt nê. Kot kaj mê kãm ra ate ixkôt amnhî xunhwýr ã amnhî jarê. Pa ja hã mê apumu hãmri nê mê apyrã nê kaxkwa kamã Inhîpêxã mã ra ate ixkôt amnhî xunhwýr ã mê ajarê. ³³ Nom kot kaj mê kot ixtã tanhmã mê ato pymaj apê ixkwý hã amnhî jarênh kêt nê. Pa ja hã mê apumu hãmri nê nhýrmã amnhî xwar Inhîpêxã mã mê apê ixkwý hkêt ã mê ajarê. Jakamã kwa mê mãmri mê kãm apê ixkwý hã amnhî jarênh o ri mê hkôt apa kê mê ama nê amnhî kaxyw inhmã hamãxpêr japêr. Anê.

Mê kãm Jesus ã hkwyjê kurê xwýnhjaja

Makre 8.34-35; Rukre 9.24, mãânên Rukre 12.51-53, 14.26-27; Apokarip 12.11

34 Nhûm Jesus arî kot mê hwýr mê ixrênh xwýnhjê mã kapêr nê mê inhmã: —Ra mê awýr ixwrýk tâ koja mê piitã ixkukwak ri hamakêtkati nê amnhîx ri pa hkêt nê. Kormã. Kojã mê akwýjaja ixkapêr ma nê mê apyrã nê amnhî kaxyw ixkôt hamãxpêr. Nhûm mê akwýjaja axtem nê kuma nê âm kuma. Hãmri nê ixtã tanhmã mê atomnuj to ho pa ka mê amnhî xã htýx kamã ajamak o ri apa.

35 —Kojã mê akrajaja ixtã mê apê mê hipêxã nê mê katorxã kutã amnhî xunhwý. Nhûm mê wýjjaja ixtã mê umregêxjê kutã amnhî xunhwý.

36 —Kojã mê ã mê akwýjaja ixtã mê akutã amnhî xunhwýr anê. Mê anhörkwý kamã mê akukwak ri pa htã ixtã mê akutã amnhî xunhwý.

37 —Nê mê amã mê anhîpêxã nê mê akatorxã japêê. Nê mê amã mê akrajê japêê. Tã nom kot kaj mê gryk ã ixkôt amnhî nhîpêx mex o ri apa hkêt hãmri nê apê ixkwý mã tãm kêt. ³⁸ Rý nhûm mê nhýrmã ixtã mê apar kaxyw ka mê tee ri amnhî kukamã ajamãxpêr nê mê kot mê apar pymaj ixkaga hã kot kaj apê ixkwý mã tãm kêt nê. ³⁹ Kojã mê nhýrmã ixpi pa mê anê ty. Tã mê ate ixkôt amnhî nhîpêx o apa xwýnhjaja. Kojã mê ixpyrã nê ixtã mê apar mã tâ kwa kêr ka mê amã atyk pymaj ixkaga hkêt nê. Kwãr mê mãmri tanhmã ixtã mê ato. Kot kaj mê nhýrmã Tirtûm mê wa ixri axte amnhî xã kamã ajamak kêt nê atir tûm nê amex rãhã apa ho apa. Nom kot kaj mê jar amã amex nê

apa hprâm xâj ixkaga hâMRI nê nhÿrmâ wa ixri atîr tûm nê apa ho apa hkêt nê. Anê.

Mê kot Jejus krajê ho mex xwÿnhjê jarênh

Matêwre 25.34-40; Makre 9.41; Juâw 13.20

⁴⁰ Nhûm Jejus arî kot mê hwÿr mê ixrênh xwÿnhjê mâ kapêr nê mê inhmâ: —E koja mêhõ nhÿri mê apumu nê mê apê ixkra hâ tanhmâ mê ato mex to nê te pa kot ixto mex pyrâk. Nê kot kaj mê tanhmâ pa ixto mex to nê te Tîrtûm o mex pyrâk.

⁴¹ —Nê kot ka mê nhÿri Tîrtûm nhÿ hâ mê kâM kapêr jarênh xwÿnhjê hõ tanhmâ ho mex to nhûm Tîrtûm hâ apumu nê nhÿrmâ hâ ato mex nê. Rÿ ka mê mêhõ kot Tîrtûm kôt amnhî nhîpêx xwÿnhjê hõ pumu nê tanhmâ ho mex to. Nhûm Tîrtûm hâ apumu nê mâânên hâ ato mex nê. Te ate mêhõ ho mexta pyrâ nê mâânên ato mex nê. ⁴² Nhûm mêhõ nhÿri mê kot ixkôt kormâ amnhî xâm nyw nê kormâ âhpumunh tohtuj anhÿr xwÿnhjê hõ pumu. Nê kâM kôr â omu nê hamaxpêr o: “Kwa Jejus kôt ri pa xwÿnh mÿj kâM kôr. Kormâ kot Jejus kôt amnhî xâm tÿx kêt tâ kêp hkwyÿ. E kot paj kâM gô hkwy kê ho ixkô.” Anê hâMRI nê kâM hkwy nhûm ho ixkô. HâMRI nhûm Tîrtûm hâ omu nhûm kot kâM gô pix nhôr nhûm kot ho hkôm tâ nhûm ja hâ ho mex rax nê. Anê.

Nhûm pre ã Jejus kot mê hwÿr mê ixrênh xwÿnhjê mâ kapêr ry rax anê. Mê ixpê 12jê mâ ã kapêr anê.

11

Juâw Paxis kot Jejus jarênh mar

Rukre 7.18-23, 7.5, mâânên Rukre 4.16-21

¹ Tâ nhûm Jejus ra kot mê hwÿr mê ixrênh xwÿnhjê mâ kapêr pa hâMRI nê kato nê ma krî pu hâ krî hkwyjê hkôt ri pa. Nê mê kâM Tîrtûm kapêr jarênh o ri mê hkôt pa.

² Nhûm Juâw Paxisja arî kêp prés nê mê hagiênh xâ kamâ hkrî. Nhûm pre hte hkôt mê pa ho mê pa xwÿnhjaja hwÿr mra nê kâM Jejus kot tanhmâ amnhî nhîpêx to ho pa hâ harê. HâMRI nhûm harênh ma nê tee ri hkukamâ hamaxpêr. HâMRI nê hkôt mê pa xwÿnh wa ho axkrut nê wa kuta ³ nê hwÿr wa kumê nê wa kâM:

—Kwa wa ma Jejus wÿr tē nê hkukja nê kâM: “Xâ ka na pre Tîrtûm mê ixwÿr amê nâ? Xâ kormâ axtem mêhõ na pa mê ri hamâr o ri ixpa?” Anhÿr o hkukja hâMRI nê tanhmâ kot amnhî jarênh to hâ ama nê man akupÿn ixwÿr tē nê inhmâ harê. Anê.

⁴ HâMRI nhûm wa kuma nê ma hwÿr tē. Nhûm Jejus kormâ tanhmâ mê à kute xwÿnhjê ho mex o xa. Mê nohkre xwÿnhjaja nhûm akupÿm mê ho mex. Nê mêkarômnuti kot mê hwÿr gjêx xwÿnhjaja nhûm mê nê mê hanor o âm râhâ nhûm Juâw kôt wa pa xwÿnhata wa hwÿr tēn pôj. Nê kormâ mê hâ omunh o wa xa. HâMRI nê kâM Juâw Paxis kapêr jarê nhûm wa kuma nê wa kâM:

—Tÿ. Nâ âm hâMRI na ja hâ ijarê. Ixpê mê ate ixkamâ ajamak o apa xwÿnhata na pa. Na ka wa kam ã ixte amnhî nhîpêx anhÿr ã ixpumu. Jakamâ wa ma akupÿm tē nê aprî hâ kâM ijarê. ⁵ Na pa hte akupÿm mê nohkre xwÿnhjê ho mex. Nê mê hkânhy xwÿnhjaja pa akupÿm mê hkâ ho mex. Nê mê hyk o mê pa xwÿnhjaja pa akupÿm mê hte ho mex. Nê mê htyk xwÿnhjaja pa akupÿm mê ho mê htîr. Nê mê kêp amrakati nê ri mê pa xwÿnhjaja pa mê kâM mêmoj mex jarênh o ri mê hkôt ixpa. ã na pa hte mê hipêx anhÿr o ri ixpa. Jakamâ e wa ma akupÿm Juâw wÿr tē nê ã kâM ijarênh anê. ⁶ Kê ijarênh ma nê ixkôt

hamaxpêr tÿx nê tee ri ixkukamâ hamaxpêr kêt nê. Koja â amnhî nhîpêx anê nê hamakêtkati nê ri pa. E wa tokyx ma akupÿm tē nê kām ā ijarēnh anê. Anê.

*Jejus kot tanhmā Juāw Paxis jarēnh to
Rukre 7.24-35*

⁷⁻⁹ Nhūm pre ā Jejus Juāw Paxis kôt wa pa ho wa pa xwÿnhja wa kām amnhî jarēnh anê nê akupÿm hwÿr wa kumē nhūm wa ma akupÿm hwÿr tē. Hāmri nhūm Jejus mē kot mar o kuhê xwÿnhjê mā tanhmā Juāw Paxisja jarēnh to nê mē kām:

—Na ka pre htem kapôt ā Juāw Paxis mar kaxyw ma hwÿr mra. Nom ē mex ā omunh kaxyw rÿ hpijaam kām tanhmā kapêr to hā mar kaxyw na ka prem hwÿr amrar kêt nê. Tirtūm nhÿ hā kapêr o pa jakamā na ka prem ate mar kaxyw ma hwÿr mra. Tirtūm nhÿ hā ixkukamā ijarēnh o pa xwÿnh na. Ixpê Tirtūm kot mē akaxyw ixām xwÿnh ā na hte ijarēnh o pa. Nê hprî hā ixkukamā mē amā ijarēnh to. Jakamā kapêrja mex o kot wam Tirtūm nhÿ hā kapêr jarēnh xwÿnhjê kapêr piitā hakrenh par. ¹⁰ Tirtūm kapêr ā kagā htūm kot Juāw kukamā tanhmā harēnh to nê harēnh kot:

Kot paj Ixkra hkukamā ma mē hwÿr harēnh xwÿnhja mē nhūm ma ri kutêp mē kām harēnh o pa. Mē kot mar nê kutêp tām amnhî nhîpêx o pa kaxyw.

—Anhÿr o Tirtūm Juāw Paxis kukamā harē nhūm prem hā kagā. Tā nhūm ixkukamā mē awÿr kumê. ¹¹ Juāw Paxisja na mex kumrêx. Na pre hprî hā ixkukamā tanhmā ijarēnh to ho pa. Tā nom ixkôt mē pa ho mē pa xwÿnhjê hkînhā na pre ixkôt pa ho pa hkêt nê. Jakamā ixkôt mē pa ho mē pa xwÿnhjaja kot ixkôt hprî hā ixkapêr mar o pa jakamā na mē mex o mē kot Juāw Paxisja jakrenh. Anê.

¹²⁻¹³ —Na pre finat Mojes kumrêx mē kām Tirtūm kapêr kwÿ hā kagā. Tā nhūm hpānhā Tirtūm nhÿ hā kapêr jarēnh xwÿnhjaja Mojes mÿr pē hkwy hā kagā. Nhūm prem kamā harē nê kuma nê hkôt amnhî nhîpêx o pa. Hāmri nhūm Juāw Paxisja mē mÿrpê kato nê tām Tirtūm kapêr o mē ahkre ho ri pa. Tā pa hpānhā ho mē ajahkre ho ri mē akôt ixpa nhūm mē ohtô nê inhma nê ixkôt amnhî xunhwÿ nê kām ixkapêr kôt pix mā amnhî nhîpêx o ri pa hprām nê.

¹⁴ —Amnepê mē na pre Tirtūm nhÿ hā kapêr jarēnh xwÿnhjaja mēhōja kukamā tanhmā harēnh to ho pa. Nê mē kām harēnh o: “Koja nhÿrmā mēhō te Eris kot amnhî nhîpêx pyrāk o amnhî nhîpêx nê mē awÿr mō. Nê mē amā Tirtūm kot mē awÿr mēnh mā xwÿnhja jarēnh o pa ka mē ama.” Anhÿr o mē kām mēhō jarē. Tā kot paj mē amā kot hkukamā harēnh xwÿnhhta nhîxi jarē ka mē inhma. Nā Juāw Paxisja kukamā na prem ā harēnh anhÿr o pa.

¹⁵ —E kot pa mē amā mē piitā htÿx ri tanhmā mē hamaxpêr to ho mē pa hā mē amā mē harē ka mē harēnh ma. ¹⁶ Te mēhprîre kot amnhî nhîpêx pyrāk o na htem amnhî nhîpêx. Mēhprîrejaja na htem mē ôrkwÿ kapem mēmoj to amnhîkati nê tee ri hkwyjê kot amnhî nhîpêx pumu nê mē kām:

¹⁷ Kwa na pa mē amā gre htā ka mē ixkutā anhōkrepōx kêt nê. Pa mē ja hā mē apumu nê hpānhā mē amā mē htyk jarē htā ka mē akapri nê amÿr kêt nê. Kwa mē ri ā amnhî nhîpêx anhÿr kêt nê. Anê.

—Mēhprîrejaja na htem ā xpên mā kapêr anê. Tā te mē ate mē urāk. Tirtūm kot mē awÿr ÿ hā kapêr jarēnh xwÿnhjê rēnh tā ka mē te mēhprîre kot amnhî nhîpêx pyrā nê mē ama nê ām mē ama nê mē hkôt amnhî nhîpêx kêt nê.

¹⁸ —Juāw Paxis na pre mē awÿr mō nê ixkînhā apkur mex o ri pa hkêt nê. Nê ixkînh ā wîhti ho hkōm kêt nê. Ka mē ja hā omu nê hkaga nê atÿx ri Satanasti

nhÿ hã tanhmã kot amnhÿ nhÿpêx to hã hkamnhÿx. Hãmri nê mēhprÿre kot amnhÿ nhÿpêxta pyrã nê hkôt amnhÿ nhÿpêx kêt nê.

¹⁹ Tã hãmri pa hpãnhã mē awÿr mō nê Juãw Paxis rom apkati mē ixãpkur mex o ri mē akôt ixpa. Nê kurom mē akutã wÿhti hkwȳ ho ixkōm o ri ixpa. Tã ka mē ja hã ixpumu nê atÿx ri ixãpkur rÿnh nê ixpipãnh o ri ixpa hã ixkamnhÿx nê ã axpên mã ixto akapêr anê. Nê mē kot amnhÿ tomnuj xwÿnhjê hkôt ri ixpa xwÿnh ã axpên mã ijarê. Á na ka htem axpên mã ijarênh anê. Jao te mē ate Juãw Paxis nhÿpêx pyrã nê ixkaga nê ixkôt amnhÿ nhÿpêx kêt nê. Na hte ã htÿx ri tanhmã mē hamaxpêr to ho mē pa xwÿnhjaja amnhÿ nhÿpêx anê. No tãm ri mē hamaxpêr xwÿnhjaja na htem ahpÿnhã wa ixte amnhÿ nhÿpêx ã wa ixpumu nê axpên mã wa ijarênh o: “Nã ahpÿnhã wa kot amnhÿ nhÿpêx tã no ãm hamê Tÿrtÿm nhÿ hã kapêr mex o pa. E pu mē wa urãk nê Tÿrtÿm kôt amnhÿ xunhwÿr.” Anhÿr o axpên mã wa ijarê. Anê.

Mê kot Tÿrtÿm kôt mē hamaxpêr kêt xwÿnhjê jarênh

Rukre 10.13-15

²⁰ Na pre hte Jejus krÿ piitã hkôt pa nê krÿ nhō xwÿnhjê mã kapêr nê mē kot amnhÿ tomnuj ã mē kãm kapêr. Korajÿ mē Pese nhō xwÿnhjê kumrêx mã kapêr nê mē kãm:

²¹⁻²² —E mē inhma. Amnepêm krÿ pê Sitō mē Xir wa kamã mē pa xwÿnhjaja na prem tanhmã amnhÿ tomnuj tÿx to ho pa nhÿm Tÿrtÿm tee ri ja hã mē omu nê mē kot amnhÿ tomnujta ã tanhmã mē ho. Tã kwa mē o kora Korajÿ mē Pesêj nhō xwÿnhjaja. Ra ixte mē amã aa mē ate mēmoj pumunh kêt kwÿ ho anhÿr rax tã ka mē omu nê ãm omu nê amnhÿ tomnuj kaga hkêt nê. Arÿ tanhmã amnhÿ tomnuj to ho ri apa. Mÿrapê kot kaj mē amex kêt nê. Kop apu Sitō rÿ Xir kamã mãn ixte mē kãm aa mē kot mēmoj pumunh kêt kwÿ ho anhÿr o ri ixpa ronhÿx mē omu nê mē arom amnhÿ kaxyw ixkôt hamaxpêr tÿx kurê kumrêx. Nê tee ri kot tanhmã kot amnhÿ tomnuj to hã amnhÿ pumu nê hkaprÿ nê hkaga hpa. No mē kajaja na pa hte tee ri mē amã aa mē ate mēmoj punuj kêt kwÿ ho anhÿr o ixpa kaprÿ. Ka mē ja hã ixpumu nê ãm ixpumu nê amnhÿ tomnuj kaga hkêt nê. Jakamã koja nhÿrmã Tÿrtÿm tanhmã mē atomnuj tÿx to. Nê tanhmã Sitō mē Xir wa kamã mē pa xwÿnhjê jarênh to nhÿm mē kot amnhÿ tomnuj mÿrapê amnhÿ xã htÿx kamã hamak rãhã ho pa. No mē kajaja mē ate amnhÿ tomnuj tÿx o mē hakrenh jakamã koja Tÿrtÿm mē hkÿnhã mē atomnuj tÿx kumrêx. Ka mē amnhÿ xã htÿx kamã ajamak rãhã ho ri apa kãm ga. Anê.

²³⁻²⁴ Nhÿm pre ã Jejus mē kãm kapêr anê. Nê hpãnhã Kapanaũ nhō xwÿnhjê mã kapêr nê mē kãm:

—No mē apê Kapanaũ nhō xwÿnhjaja. Kot kaj mē ajaxwÿja mē urãk nê amex kêt nê. Ra ixte mē amã aa mē ate mēmoj pumunh kêt kwÿ ho anhÿr rax nhÿm mē ate hã ixpumunh tã amnhÿ tomnuj kaga hkêt tã Tÿrtÿm mē wa inhō krÿ hwÿr akrã. No ãm hwÿr akrã kaprÿ. Kot kaj mē atō hwÿr axãpir kêt nê. Kop apu Sotō nhō xwÿnhjaja mãn kot ã ixte amnhÿ nhÿpêx anhÿr ã ixpumunh ronhÿx mē ra kot amnhÿ tomnuj kaga nê ixkôt amnhÿ xunhwÿr kurê kumrêx. No mē kajaja na ka mē ã amnhÿ nhÿpêx anhÿr kêt nê. Jakamã kot kaj mē nhÿrmã ma kuwy maatita wÿr ajapêx pa kãm ga. Anê.

Jejus kot ò Papaj mã amnhÿ jarênh

Rukre 10.21-22

²⁵⁻²⁶ Tã nhÿm Jejus Tÿrtÿm mã amnhÿ jarê nê kãm:

—Pa Papaj? Nà apê mê inhô Pahi Maati na ka. Pikap ri mê pa xwýnhjaja nê kaxkwa kamã mê pa xwýnhjaja apê mê ixpiitã mê inhô Pahi Maati na ka. Âm hãmri na ka hte amnhî nhîpêx mex o ri apa. Na ka hte mê àhpumunh tỳx ã mê kot amnhî to jarkrar xwýnhjê mã axàhpumunh tỳx o amnhîrit kêt nê. Âm mê àhpumunh kêt ã mê kot amnhî jarênh xwýnhjê pix mã na ka hte axàhpumunh tỳx o amnhîrit nhùm mê tapxipixjaja ja hã apumu. Nà âm hãmri. Âm hãmri na ka hte amã hprãm xà hkôt ã mê piitã mê hipêx anhÿr o ri apa Papaj. Jakamã mê kot amnhî to hkryre xwýnh pixjaja na htem hprî hã ate amnhî nhîpêx kôt apumunh o pa. Anê.

Nhùm pre ã Jejus Tirtùm mã amnhî jarênh anê. ²⁷ Hãmri nê hpãnhã mê kot mar o kuhê xwýnhjê mã kapêr nê mê kãm:

—Nà na pre ra Inhîpêêxãja inhîhkra kamã mêmoy piitã hagjênh pa. Ixte kãm ho amnhîptãr o ixpa kaxyw. Jakamã tapxipix na kot ixpê Kra hã ixpumunh par. No jar pika ja kamã mê pa xwýnhjaja na mê kot ja hã ixpumunh kêt. Nê papxipix na ixte Inhîpêêxã kot tanhmã amnhî nhîpêx to hã omunh par. Jakamã na pa hte ã amnhî nhîpêx o ri ixpa anê nê inhmã hprãm xà hkôt mê hkwyjê mã ho amnhîrit o ri ixpa. Jakamã nhùm mê ixpyrã nê Inhîpêêxã kot tanhmã amnhî nhîpêx to ho pa hkôt omu.

²⁸⁻³⁰ —Nê tee ri amnhî kukamã mê ajamaxpêr o ri apa xwýnhjaja te mê ate mêmoy pyti rax tur nê ahte ho apa pyrãk. Kwa mê ixkôt amnhî xunhwý nê ixte amnhî nhîpêx ã ixpumu. Ixte mê akamã ixukapri xwýnh na pa. Na pa hte mê akutã inhnojarêt rãhã ho ixpa. Jakamã kot kaj mê ixkôt amnhî xunhwý pa te ixte mê anê mêmoy pyti ho ixwryk pyrãk o mê anhîpêx nê tãm mê axunhwý ka mê tãm ajamaxpêr nê tãm amnhî nhîpêx o ri apa. Mo kaxyw koja ixkôt mê kot amnhî nhîpêx o pa xwýnhjaja tee ri amnhî kukamã hamaxpêr o pa? Nà na htem ixkamnãr rom hamakêtkati nê àmnhix ri pa ho pa. Anê.

12

*Jejus kêp arîgromnu hpãm
Makre 2.23-28; Rukre 6.1-5*

¹ Tã nhùm Ijaew nhô arîgromnu pê sapja kato. Hãmri nhùm Jejus mê hkôt ri mê ixpa ho mê ixpa xwýnhjê mê pa mê ma mê hpur kôt ri nhÿhÿm ri ixpa. Hãmri nê ra mê inhmã prãm nê mêmoy hy te kot harôj pyrãk xwýnhja kwý rê nê kugrã nê ma Jejus kôt hkanhar o mō. Mê ixpê Ijaew na pa htem axpên pur kãm ã amnhî nhîpêx anhÿr o ixpa. ² Hãmri nhùm mê ixkwý pê Parijew nhô xwýnhjaja kãm mêmoy tã Jejus o kapêr prãm jakamã ã mê ixte amnhî nhîpêx anhÿr ã mê ixpumu nê mê ixtã Jejus kukjêr kurê kumrêx nê kãm:

—Kwa Tirtùm kapêr tùm kot mê panhō arîgromnu hã mê pahte mê hpur kãm mêmoy nhîkênh nê mê pahkurê htã nhùm ri akôt mê pa ho mê pa xwýnhjaja axtem nê ã amnhî nhîpêx anhÿr o ri akôt pa. Mêmoy hyta rê nê akôt hkanhar o pa. Kwa mê kãm anê kê mê ã amnhî nhîpêx anhÿr kêt nê. Na htem arîgromnu hã mêmoy tã àpênh kêt kênã. Anê.

³⁻⁴ Hãmri nhùm mê kuma nê hprî hã mê kãm Tirtùm kapêr jarê nê mê kãm:

—Tk. Xàn ka htem Tirtùm kapêr ã kagã htùm kot pahî Tawi kot tanhmã amnhî nhîpêx tota kamã harênh nê mar kêt nê? Na pre hkôt ri mê pa xwýnhjê mê nhùm mê prãm xãj Tirtùm mã amnhî jarênh xà hã ixkre hwÿr agjê. Hãmri nhùm mê ô patre maati ja mê kãm prãm tỳx ã mê omu nê kãm mê hkapri nê mê kãm mêmoy gō. Mê kot Tirtùm noo mã pãwti jaxwÿr xwýnhhta gō nhùm mê kuku. Tirtùm kapêr ã kagã htùm kot ja nê mê hkurê htã nhùm mê kãm prãm

tỳx ã mē omu nē mē kamã ukapřĩ xàj mē kãm kugõ. ãm mē õ patre pix kot ja hkur kaxyw tã nhũm mē kãm kugõ nhũm mē kuku. Tã nom nhũm Tĩrtũm ja hã mē omu nhũm ja kēp omnuj kēt nē. Kot mē kamã ukapřĩ nē mē kãm õr ã omu nhũm ja kãm mex nē.

⁵—Mē panhõ arĩgromnu htã na hte patrejaja arĩ hã Tĩrtũm mã amnhĩ jarēnh xã hã ixkre kamã ãpēnh o pa. Tĩrtũm kapēr ã kagã htũm kõt na htem arĩgromnu htã nhũm mē arĩ hã apē nhũm Tĩrtũm pē jamnuj kēt nē. Kumã mē ãpēnh xwỳnh kēnã. ⁶ ãm hãmri na pa mē amã ja jarē. Tĩrtũm mã amnhĩ jarēnh xã hã ixkreta mex tã nom ixpē Tĩrtũm Kra jakamã inhmex o ixte ixkreta jakrenh. ⁷ Tĩrtũm kapēr ã kagã htũm kot ja harēnh kot:

Kēr ka mē inhmã amnhĩ jarēnh kaxyw nē ãm inhmã mēmoj nhõr pix pē inhmã amnhĩ jarēnh kēt nē. Mē mãānēn mē kamã axukapřĩ o ri apa pē inhmã amnhĩ jarē. Ja na kēt inhmã hprãm.

—ã harēnh kot anhỹr. Tã mē ate aprĩ hã ja mar ronhỹx ka mē ixkõt mē pa xwỳnhjē kot mēmo hy rēnh nē hkanhar o mõr ã mē omu nē ri tanhmã mē ho akapēr to hkēt nē. ãm mē kãm prãm ã mē omu nē mē kamã axukapřĩ nē.

⁸—Kēt pa na pre Tĩrtũm mē akaxyw ixãm nē mē awỹr inhmē. Jakamã papxpix na pa hte arĩgromnu hã tanhmã mē kot amnhĩ nhĩpēx to hã mē kãm karõ. Kwa mē jajē pumu nē mē kamã axukapřĩ kēt wehe. Kwãr mē mãmřĩ mēmo hyta rē nē hkanhar o ixkõt mõ. Anē.

*ĩhkra grã xwỳnh jarēnh
Makre 3.1-6; Rukre 6.6-11*

⁹ Nhũm pre ã Jesus Parijew nhõ xwỳnhjē mã kapēr anē hãmri nē Tĩrtũm kapēr o mē ahkre xã hã ixkre hwỹr tē nē axã. ¹⁰ Nhũm Parijew nhõ xwỳnhjaja tanhmã ho kapēr to kaxyw htãnopxar o kuhē. Jakamã nhũm ixkre kamã mēhõ my ĩhkra grã xwỳnhjaja mē pikupřõnh xwỳnhjē nhĩhkõ hã nhỹ nhũm Parijew nhõ xwỳnhjaja omu nē axpēn mã:

—Kwa pu mē jar pakuhē nē Jesus kot tanhmã amnhĩ nhĩpēx to hã omu. Xã koja arĩgromnu hã mũjti ho mex nã? Koja ho anē nē Tĩrtũm kapēr tũm kuhpa hã amnhĩ nhĩpēx. E pu mē kop xa nē hã omu. Anē.

Hãmri nē hã Jesus kujja nē kãm:

—E mē inhmã mēmoj jarē. Xã na htem arĩgromnu hã akupỹm mē ho mex nhũm Tĩrtũm kãm ja mex nē nã? Anē.

¹¹ Hãmri nhũm mē hamaxpēr kõt mē omunh mex nē mē kãm:

—Kwa tanhmã na htem arĩgromnu hã amnhĩ nhĩpēx to ho pa wehe? Xã koja we mē akřit õwēhti ahkrehti kamã tēm ka omu nē ãm omu nē arĩgro mex jamãr pē ho axãpir kēt nē? Nã kot kaj mē tee ri omu nē ho axãpir kurē kumrēx.

¹² Arĩgromnu hã mē ho mexja ja mex kēnã. Tĩrtũm mã mē pahpē panhĩja na mē pamex o mē hkrıt jakrenh jakamã kēr pu mē tee arĩgromnu htã pu mē hã tanhmã axpēn to mex to ho papa. Ja na Tĩrtũm kãm hprãm.

Anhỹr o mē kãm kapēr. ¹³ Hãmri nē hpãnhã myta mã:

—E anhĩhkra katãt. Anē.

Hãmri nhũm ĩhkra katãt nē mex kurē kumrēx. ¹⁴ Hãmri nhũm Parijew nhõ xwỳnhjaja tee ri ja hã omu nē Jesus kamã gryk nē. Arĩgromnu pē sap ã kot ho mex jakamã nhũm mē kamã gryk tỳx nē. Hãmri nē ma mra nē hapõj nē hã axpēn kujjēr o kuhē nē axpēn mã:

—Kwa ã kot amnhĩ nhĩpēx anhỹrja mỳrapē tanhmã kot puj wem ho? ã kapēr anhỹrja o te mē papamjaja mē pahte hkĩnhã mē kamã paxukapřĩ kēt pyrãk ã

mê pajarê. Koja mê pahkwýjaja kuma hãmri nê mê pahte amnhî nhîpêx kaga nê amnhî kaxyw hkôt pix mã hamaxpêr. Kwa tanhmã kot puj wem ja nê ho? Anhÿr o axpên kujêr o kuhê.

*Jejus kêp Tirtûm kot mê pahwÿr mênh xwÿnh â harênh
Makre 3.7-12*

¹⁵ Hãmri nhùm Jejus amnhî tâ Parijew nhô xwÿnhjê jamaxpêr kôt mê omu hãmri nê mê kêp kato nê hpãnhã ma nhÿhÿm krî hõ hwÿr ma tê. Nhùm mê ohtô nê omu nê ma hkôt mra nhùm mê omu nê akupÿm mê kãm mê à xwÿnh piitã ho mex. ¹⁶ Hãmri nê mê kãm:

—E na pa akupÿm mê ato mex. Nom kêr ka mê amnhî tâ ixto axãmra ho ri apa hkêt nê. Ixpê Tirtûm Kra hã mê kãm ijarênh kêt nê. Âm kwarî kumrêx.

Anhÿr o mê kãm kapêr. ¹⁷ Na pre ra amnepêm Tirtûm nhÿ hã kapêr xwÿnh finat Ijaisja Jejus kukamã mê kãm tanhmã harênh to nê hã kagã. Te Tirtûm tãm kapêr pyrãk o harê nê hã kagã. Nê hã kagã ho:

¹⁸ Ota ixkôt amnhî nhîpêx o pa xwÿnhnta xa. Pa na pa amnhî kaxyw âm. Inhmã hapêê. Na pa hte tanhmã kot amnhî nhîpêx to ho pa hã omu nê ixkînh tÿx nê. Kot paj hwÿr amnhî karô mê nhùm hwÿr axã nhùm ma ÿ hã pika piitã hkôt mê piitã mê kãm ijarênh o ri mê hkôt pa. Mê kot hprî hã ixte tanhmã amnhî nhîpêx to nê tanhmã ijamaxpêr to hã ixpumunh kaxyw.

¹⁹ Nom koja ri amnhî to àmra o pa hkêt nê. Rÿ kãm amnhî to rax prãm o mê kãm tanhmã amnhî nhîpêx to ho pa hkêt nê.

²⁰ Âm kapêr xukapri pix o koja mê hirerek xwÿnhjê mã kapêr o pa. Nê mê kot tee ri amnhî nhîpêx â amnhî pumunh xwÿnhjê kamã ukapri o pa. Nê mê kot htÿx ri amnhî nhîpêx o mê pa xwÿnhjê kutã nojarêt rãhã ho pa jakamã nhùm mê hpãnhã tãm amnhî nhîpêx o pa. Koja â amnhî nhîpêx anhÿr o ri mê hkôt pa rãhã ra akupÿm mêmoy piitã tãm haxwÿr pa.

²¹ â kot amnhî nhîpêx anhÿr o pa jakamã koja pika piitã hkôt mê pa xwÿnh kwÿjaja kukwak ri amnhî kaxyw Tirtûm kôt hamaxpêr nê hkôt amnhî xunhwÿ. Anê.

Na pre â finat Ijaisja Tirtûm nhÿ hã kormã Jejus wrÿk nê kator kêt ri tanhmã kot amnhî nhîpêx to ho pa hkukamã harênh nê hã kagã anê. Tã nhùm mê hwÿr wrÿ nê â mê hkôt amnhî nhîpêx anhÿr o pa.

*Jejus mê mêkarõmnuti wa harênh
Makre 3.20-30; Rukre 11.14-23, 11.31-32, 12.10*

²² Tã nhùm prem Jejus wÿr mêhõ myja o mô. Mêkarõmnuti kot hwÿr àr nê ho nohkre nê ho kapêr kêt xwÿnhnta nhùm mê hwÿr o mô. Hãmri nhùm omu nê nê mêkarõmnuti jano nê akupÿm ho mex kurê kumrêx nhùm akupÿm rît mex nê akupÿm kapêr mex nê. ²³ Hãmri nhùm mê amnhî jaêr pê omu nê kamã no puma nê hã axpên kujêr o:

—Kokÿÿ. Jejus na hte âm mê ho mex o mê ho mex o pa. Mãn kêp Tirtûm kot mê pahwÿr mênh mã xwÿnhnta na nã? â na hte â amnhî nhîpêx anhÿr o pa. Mãn kêp pahi finat Tawi kanrêhã tãmnhwÿta na nã? Anê.

²⁴ Nom nhùm Parijew nhô xwÿnhjaja â Jejus kot amnhî nhîpêx anhÿr â omu nê kêp mêkarõmnuti hkwy hã hkamnhîx. Jakamã mê kot hã axpêr kujêr â mê kuma nê mê kãm:

—Tk pêr hinhu nhîkôoti nhÿ hã na hte mê nê amnhî kwÿjê japôx o pa. Anê.

Hinhu nhĩkôôti nhĩxi hõ pê Satanasti nhũm prem ã Satanasti nhỹ hã Jejus kot amnhĩ nhĩpêx ã hkamnhĩx anê. ²⁵ Nhũm ra mẽ hamaxpêr kôt mẽ omunh mex jakamã mẽ kãm:

—Kwa mẽ inhma mẽ ate ixpê Satanasti hkwȳ hã ixkamnhĩx xwýnhjaja. Koja pika nhõ xwýnhjaja axpên kutã amnhĩ xunhwý nê axpu hãmri nê anhrã nê ma ahpýnhã ri pa. Hãmri nê amnhĩ krã hkôt ri tanhmã amnhĩ nhĩpêx to ho pa. Jakamã nhũm mẽ õ pahija mẽ hamãr kêt nê. Nê koja krĩ nhõ xwýnhjaja. Rý mẽ kot axpên to hkwȳ xwýnhjaja mẽmoj tã axpên kãm gryk nê axpên kutã amnhĩ xunhwý. Hãmri nê ahpýnhã awry hã pa nhũm mẽ õ pahija tee ri kãm mẽ hamãr prãm kaprý. Mo mẽ hkwȳjaja kot ri mẽ hamãr o pa? No koja pahija tãm amnhĩ nê amnhĩ kwýjê janor kêt nê. ²⁶ Tã ja pyrã nê ixte Satanasti nhỹ hã tanhmã amnhĩ nhĩpêx to ho ri ixpa ronhýx pa ri mẽ nê amnhĩ kwýjê janor kêt nê.

²⁷ —No mẽ akwýjaja? Xà Satanasti nhỹ hã na htem mẽ nê mẽkarõmnuti japõx o pa? Kêp apu pa ixte ý hã mẽ nê amnhĩ kwýjê japõx ronhýx mẽ akwýjaja ixpyrã nê ý hã mẽ nê amnhĩ kwýjê japõx o pa. Nã Tirtũm nhỹ hã mẽ ixte mẽ nê mẽ hapõx o ixpa kênã. Jakamã mẽ ate ã ijarênh anhýrja mex kêt. ²⁸ Tirtũm Karõ nhỹ hã ixte mẽ nê mẽ hapõx jakamã kwa mẽ ja hã ixpumu nê ixte mẽ ato amnhĩptãr kaxyw Tirtũm kot mẽ awýr inhmênh kôt ixpumu kêt wehe. Pa na ka htem ijamãr o apa.

²⁹ —Satanastija àhpumunh týx jakamã na htem tee ri kêp hkôt mẽ kot amnhĩ xunhwýr xwýnhjê pytãr kaxyw nhũm mẽ nê mẽ omunh mex nê. Tã nom ixàhpumunh týx o ixte Satanasti jakrenh par jakamã na pa hte kêp mẽ utã nhũm mẽ hpãnhã ixkôt ri amnhĩ nhĩpêx.

³⁰ —Ra mẽ amã ixkapêr mar prãm tã nom kormã ixkôt amnhĩ xunhwýr kêt nê. Kwa wem ma amnhĩ to amõr gri nê tokyx ixkôt amnhĩ xunhwý kêt wehe. Kot kaj mẽ anhýr kêt hãmri nê mẽ apê ixkutã amnhĩ xunhwýr xwýnh pyrãk o amnhĩ nhĩpêx.

³¹⁻³² —Nê koja mẽhõ ixkapêr ma nê kãm ixprãm kêt nhũm Tirtũm ixtã omu nom tokyx tanhmã ixtã ho hkêt nê. Koja kormã amnhĩ tã hamã. Karõ kot axte kãm ijarênh o amnhĩrit nhũm jatã kot mar nê kãm ixprãm nê ixkôt amnhĩ xãm prãm xàj nhũm kormã amnhĩ tã hamã. Nom koja Karõ xatã mẽ kãm tanhmã ixto amnhĩrit to htã nhũm mẽ kuma nê ãm kuma nê te mẽ kêp amnhĩ jamak pro pyrãk. Jao ra Karõ hã hpijaam kêt o amnhĩ nhĩpêx. Mýrapê koja Tirtũm nhýrmã amnhĩ xwar te kêp amnhĩ jamak pro pyrãk o mẽ hipêx nhũm mẽ tee kãm amnhĩ kaprĩ kaprý. Hãmri nê amnhĩ xã htýx kamã hamak o pa xãta wýr ma pa nê kamã pa rãhã nê pa ho pa. Anê.

Mẽ pajamaxpêr xà hkôt tanhmã ri mẽ pakapêr to Rukre 6.43-45

³³ Nhũm Jejus arĩ Parijew nhõ xwýnhjê mã kapêr nê mẽ kãm:

—Nê kot kaj mẽ atõ anhõ mẽmo pãr nhũm amã ô mex nê. Ô rax nê. Ka omu nê akĩnh nê amnhĩm mex ã harê. No koja apê ô hkêt ka tee ri omu nê mex kêt ã harê. Na htem ã amnhĩm mẽmo xõ hpãr pumunh kôt tanhmã kute hã harênh anê. Ja pyrã nê na htem tanhmã mẽ kot amnhĩ nhĩpêx to hã mẽ omunh kôt tanhmã mẽ harênh to. Mẽ kot amnhĩ tomnuj xwýnh ã mẽ harê rý mẽ kot amnhĩ to mex xwýnh ã mẽ harê.

³⁴⁻³⁵ —Nê koja mẽhõ hamaxpêr mex nê hãmri nê kapêr mex o pa. Nom koja hamaxpêr punuj nê kapêr punuj pix o pa. Nê htýx ri tanhmã amnhĩ tomnuj to ho pa. Na htem ahpýnhã amnhĩ jamaxpêr xã hkôt tanhmã kapêr to ho pa.

No mē kajaja na ka htem kagā xoprê jamaxpēr pyrāk o ajamaxpēr punuj pix o ri apa. Jao akapēr punuj nē. No tām ajamaxpēr o tām akapēr o ri apa hkēt nē. Na htem tanhmā hamaxpēr to xā hkôt tanhmā ri kapēr to ho pa. ³⁶⁻³⁷ Koja nhÿrmā Tirtūm mē piitā tanhmā mē kapēr to hā mē mar xā hkôt tanhmā mē harēnh to. Jakamā mē akapēr mex o mē apa xwÿnhjaja koja mē amex ā mē ajarē. Nom mē atÿr i akapēr punuj o mē apa xwÿnhjaja koja mē amex kēt ā mē ajarē. Hāmri nē mē akapēr punuj o apaja mÿrapê mē atomnuj tÿx nē. Anē.

Jejus kot Jōhti jarēnh

Makre 8.11-12; Rukre 11.29-32

³⁸ Hāmri nhūm Tirtūm kapēr tūm o mē ahkre xwÿnh mē Parijew nhō xwÿnh kwÿjaja mēmoj tā Jejus wÿ nē kām:

—Kwa Pahihti. Mē inhmā aa mē ixte mēmoj pumunh kēt ō ho anē. Kot paj mē omu hāmri nē Tirtūm kot mē ixwÿr amēnh ā apumunh kurē kumrēx. Jakamā e mē inhmā mēmoj to anē nā. Anē.

³⁹ Hāmri nhūm mē kuma nē mē kām:

—Tk. Pēr ām mē ajamaxpēr punuj pix o na ka htem apa. Ixpê Tirtūm kot mē awÿr inhmēnh xwÿnh tā mē ate ja hā ixpumunh kēt. Nē mē ate ja hā axpēn mā ijarēnh kēt tā ixte mē amā aa mēmoj pumunh kēt ō ho anhÿr kaxyw hā ixwÿ. Nā pa mē amā ho anhÿr kēt nē. Kormā. Ām amnepēm Jōhti kot tanhmā amnhī nhÿpēx toja pix kot paj mē amā harē.

⁴⁰ —Tirtūm nhÿ hā kapēr xwÿnh Jōhtija amnepēm na pre tep rax kumrēxja htīr rāhā kukrē. Nhūm ōxāhkre kamā htīr nē hkrī hā apkati axkrunēpxi hāmri nē htīr rāhā ōxāhkre rūm kato. Tā ixpê Tirtūm kot mē awÿr inhmēnh xwÿnh kot paj nhÿrmā kēn kre kamā ixtyk nē inhnōr ā apkati axkrunēpxi. Jōhti hkīnhā ixtyk kumrēx nē inhnōr ā apkati axkrunēpxi hāmri nhūm Tirtūm akupÿm ixto ixÿr.

⁴¹ —Nē koja nhÿrmā Tirtūm akupÿm mē htyk nē mē hikwÿ xwÿnh piitā akupÿm mē ho htīr hāmri nhūm mē piitā Inhÿpēēxā mē wa ixkutā hkrī pa wa tanhmā mē harēnh to. Tirtūm mē wa ixkuri mē htīr tūm nē mē pa ho mē pa mā xwÿnhjê hā mē hkwyjê jarē nē wa ixkuri mē pa ho mē pa hkēt xwÿnhjê jarē. Mē piitā ā ahpÿnhā mē harēnh anē. Amarī mē pa xwÿnhjaja nē mē ō pahijaja. Jakamā nhūm Nīnwe nhō xwÿnhjaja tanhmā wa inhmā mē ajarēnh to. Jōhti kot mē hwÿr mōr nē mē kām Tirtūm kapēr jarēnh o pa xwÿnhjaja nhūm mē tanhmā wa inhmā mē ajarēnh to nē wa inhmā: “Na pre Jōhtija man mē inhō krī hwÿr mō nē mē inhmā akapēr jarēnh o ri mē ixkōt pa. Pa prem kuma nē mē ixte amnhī tomnuj kaga nē akōt amnhī xunhwÿr kurē kumrēx Tirtūm. No or war akutā mē hkrī xwÿnh kwÿ ata mē na pre Akra Jejus tām mē hwÿr mō nē mē kām kapēr o ri mē hkôt pa nhūm prem mar tā mē ixkīnhā mē kot amnhī tomnuj kaga nē hkôt amnhī xunhwÿr kēt nē. Mē ixkurom mē kot Akra mar tā amnhī kaxyw kām hamaxpēr kēt nē.” Anhÿr o koja mē wa inhmā mē ajarē ka mē tee ri mē ama nē ra mē amā ma nē. Nom ām mē amā ma kaprÿ.

⁴² —Nē sur kām mē ō pahi nitita koja mē hpānhā tanhmā wa inhmā mē ajarēnh to nē wa inhmā: “Na pa pre inhmā pahi Sarumāw kot war anhÿ hā āhpumunh tÿx ā harēnh ma hāmri nē inhmā mar prām xāj ma awry hā ō pika hwÿr mō nē omu nē kapēr ma. Hāmri nē ma akupÿm inhō pika hwÿr mō nē ixkwÿjê mā āhpumunh tÿx ā harēnh o ri ixpa. Tā Akra Jejus na kot āhpumunh tÿx o pahi Sarumāw jakrenh tā or war akutā mē hkrī xwÿnh kwÿ ata mē. Mē kot kapēr mar tā ixkīnhā kām mar prām kēt. Na prem kuma nē ām kuma.” Anhÿr o koja wa inhmā mē ajarē. Hāmri nē ja hā mē amā akir ka mē tee ri

mar o akrî nê amnhî kamã agryk o akrî. Nom ãm amnhî kamã agryk kaprÿ. Anê.

Mêkarômnuti kot tanhmã mêhõ hto hã harênh

Rukre 11.24-26

⁴³ Nhùm Jejus arî Parijew nhõ xwÿnhjê mê Tirtûm kapêr tûm o mê ahkre xwÿnhjê mã kapêr nê mê kãm:

—Te mê ate ixte mêhõ nê mêkarômnuti japôx xwÿnhnta pyrãk. Nhùm te kêp kator nê ma htêm pyrãk. Nê nhÿri amgrã kamã ri pa pyrãk. Koja ja kêp omnuj nhùm tee ri kamã nhÿri hkôt xã japêr o pa. Nom tee ri hapêr o pa kaprÿ.

⁴⁴ Hãmri nê tanhmã amnhî kukamã hamaxpêr to nê hamaxpêr o: “E kot paj ma akupÿm mê kot nê ixkator xwÿnhnta wÿr tẽ nê axã nê kamã mãn ri ixpa.”

⁴⁵ Anhÿr o hamaxpêr hãmri nê ma akupÿm hwÿr tẽ. Nom kormã akupÿm hwÿr àr kêt ri nhùm kamã amrakati nê ri pa. Jakamã nhùm akupÿm hwÿr axã. Nom ahte hwÿr àr kêt nê. Amnhî kôt hkwyjê ho 7 nê hwÿr mê ho gjêx pa. Mê kêp 7jaja nê wamta mê nhùm mê piitã hwÿr gjêx pa. No mê kêp 7jaja na omnuj tÿx o kot wamta jakrenh jakamã nhùm mê kot hwÿr gjêx xwÿnhnta mê ÿ hã ra amnhî tomnuj tÿx nê oprê htÿx o pa. Wam pyxire kot hwÿr àrta nhÿ hã nhùm amnhî tomnuj o ri pa nom kawax pẽ oprê. Tã nhùm ra axte hwÿr mê ohtõ nê gjêxta nhÿ hã hãmri oprê htÿx kumrêx. Ja pyrã nê kot kaj mê tokyx ixkôt amnhî xunhwÿr kêt nê hãmri nê amnhî tomnuj tÿx pix o ri apa. Anê.

Jejus kot tanhmã hkwyjê jarênh to hã harênh

⁴⁶ Nhùm Jejus arî mê ahkre ho nhÿ. Rôm nhùm katorxã nê htõjaja nhÿhÿnh hwÿr mõn pøj. Nom kormã hwÿr gjêx kêt nê. Mê kot hã htu rax jakamã nhùm mê tee ri hwÿr gjêx kaxyw kormã kapôt ã hã mê omunh o kuhê. ⁴⁷ Hãmri nhùm mêhõja kapôt ã mê omu nê Jejus mã mê harê nê kãm:

—Kwa Pahihtî. Ota akatorxã mê atõjaja awÿr mõn pøj nê tee àr kaxyw. O mÿj mê kapôt ã kuhê. Anê.

⁴⁸⁻⁵⁰ Hãmri nhùm kuma nê kãm:

—Tõe. Nã kot pa ixkato nê mê omu. Inhmã mê hapêê. Nom kot kaj mê atõ Tirtûm kapêr ma nê hkôt amnhî xãm nê hkôt amnhî nhÿpêx. Hã kot kaj te apê ixtõ rÿ ixkatorxã pyrãk o pu mê axpên nhÿpêx o ri papa. Pa inhmã ixkatorxã nê ixtõjê japê pyrã nê mãânên inhmã mê ajapê nê. Anê.

13

Mêmo hy hkre xwÿnh jarênh

Matêwre 13.18-23; Makre 4.1-9; Rukre 8.4-8

¹ Hãmri nhùm Jejus mê kãm kapêr pa nê ixkre rûm kato nê ma himô rax wÿr tẽ nê gô mÿri mê kãm ujarênh kaxyw nhÿ. Pa mê ixpê hkôt mê ixpa ho ixpa xwÿnhjaja ma hkôt mra. ²⁻³ Hãmri nê gôta wÿr pøj nê mÿri ixkrî. Nhùm mê Jejus ã htu rax nê nhùm tee ri mê omunh o nhÿ. Hãmri nê hamaxpêr nê kãnhmã xa nê tẽ nê pàr krem axã nê pàr kre kamã mütûm awry rûm mê ahkre ho nhÿ nhùm mê piitã omunh nê mar mex o hkrî. Nhùm mê kãm ujarênh o mê ahkre ho nhÿ. Nom mê kãm tãm ujarênh kêt nê. Mê kot Tirtûm kapêr mar nê tanhmã hkôt amnhî nhÿpêx to ho paja nhùm hã kuxi nê mê kãm harênh o nhÿ nhùm mê amgrã kamã kÿx pẽ mar o hkrî. Nhùm mê kãm:

⁴—E mê inhma. Koja mêhõ ma pur mã mõi nê pur kãm mêmo hy ho ukapêr o ri pa. Nom nhùm hy piitã amex kãm rôrôk kêt nê. Koja hkwyja ahpÿnhã nhÿri rôrôk. Kwÿ aptÿx kãm rôrôk nhùm kuwênhre omu nê hwÿr mra nê hkrêr pa.

5—Nê koja kên kãm hkwy rôrôk nê ra higrôt kutã nojarêt nê higrôt pa. Nom nhùm kamã aptÿx nê kêp pika hkryre. ⁶ Jakamã nhùm higrôt nhùm hã myt ahpa nê arigro htÿx mê nhùm grã pa. Harê hkryre jakamã grã pa.

⁷—Nê koja mrônhi kamã hkwy rôrôk nê higrôt tâ no nhùm utÿja kêp amyta nhùm ô hkêt nê.

⁸—No kêt hirã kamã pika mex kãm rôrôk xwÿnhja hirã kamã rôrôk jakamã higrôt mex nê piitã ô rûnh nê. Kamã ô hkwy kêp 30 nê kamã hkwy kêp 60 nê kamã hkwy kêp 100. ã mê ujarênh kot anhÿr. ⁹ Kwa kêr ka mê ixujarênhja ma nê kãm ajamaxpêr tÿx rãhã ho apa. Anê.

Mêmo kaxyw Jejus kot mê ujarênh o mê ahkre

Makre 4.10-25; Rukre 8.9-15

¹⁰ Hãmri pa mê ixpê Jejus kôt mê ixpa ho ixpa xwÿnhja Jejus kot mê kãm ã ujarênh anhÿrja ã kuma nê tee ri hkukamã ijamaxpêr. Hãmri nê hã hkukja nê kãm:

—Kwa axujarênh ta pa mê ixprÿ hã hkôt mêmoj pumunh kêt nê. Mon ka hte ãm mê ujarênh pix o mê ahkre? Anê.

¹¹ Hãmri nhùm mê inhmã:

—Tôe. Nã kot paj mê amã harê. Tirtùm kãm mê ate aprÿ hã mar prãm jakamã kot paj ixprÿ hã mê amã harê. Mê kot amnhÿ tomnuj kaga nhùm Tirtùm kot ja hã mê omunh nê mê ho hkra. Ja na pa harê. No mÿjjaja mê akÿnhã kãm ja mar prãm kêt jakamã na htem ixujarênhja ma nê ãm kuma nê htÿx ri pa.

¹²—No kêt mê kajaja na ka mê ixkôt ri apa ho apa. Nê xatã ixkapêr mar o apa jakamã na ka mê aprÿ hã ixkapêr ma. Tã mê ate ixkôt amnhÿ nhÿpêx o apa jakamã na pa tanhmã mê akrã hto ka mê aprÿ hã mar mex o mô. No mê kot ixkapêr mar nê ãm mar xwÿnhja na mê akÿnhã inhmar tÿx kêt nê. Jakamã nhùm Tirtùm tanhmã mê hkrã hto nhùm mê hã no hkêt tokyx anê htÿx ri pa.

¹³ “Ixte mê kãm aa mê kot mêmoj pumunh kêt kwÿ ho anhÿr rax tâ nhùm mê omu nê ãm omu. Nê ixte amnhÿ nhÿpêxa nhùm mê kãm hkÿnh kêt nê. Nê mê kot ixkapêr mar tâ ãm inhma nê kãm hprÿ hã inhmar prãm kêt nê.”

—Jakamã na pa hte ã mê kãm mêmoj te ho tãm pyrã nê harê no ãm hã haxwÿ nê mê kãm ixujarênh anê.

¹⁴⁻¹⁵ —Na pre ra Tirtùm nhÿ hã kapêr o pa xwÿnh Ijaisja amnepê mē hkukamã tanhmã mê harênh to nê hã kagã. Mê kot inhmar nê ãm inhmar xwÿnhjê jarê nê tanhmã mê hkukamã mê harênh to nê mê harênh o:

Koja mê ujarênh mex mar pymaj amnhÿ jamak pro nê amnhÿ no hpro nê hkôt hamaxpêr kêt nê. Jakamã koja mê kãm mê kot amnhÿ nhÿpêx mex prãm kêt nê harênhja ma nê ãm kuma. Nê omu nê ãm omu. Mê kãm hprãm kêt jakamã koja mê ã amnhÿ nhÿpêx anê. ã mê kot amnhÿ nhÿpêx anhÿr kêt ronhÿx mê ra Tirtùm kapêr ma nê hkôt amnhÿ xunhwÿ. Hãmri nhùm amnhÿ tâ mê omu nê mê nê mê kot amnhÿ tomnuj rênh pa. Hãmri nhùm mê hkôt amnhÿ nhÿpêx mex nê kapêr mar mex o pa. Tã no nhùm mê ã amnhÿ nhÿpêx anhÿr kêt nê. Anê.

—ã Ijaisja mê hkukamã mê harê nê mê hã kagã anê.

¹⁶—No kêt mê kajaja na ka htem ano ho ixte tanhmã amnhÿ nhÿpêx to ho ixpa hã ixpumunh o ixkôt apa. Nê mê ajamak o ixkapêr mar o ri ixkôt apa.

¹⁷ Amnepê mē akukamã pahijaja nê Tirtùm nhÿ hã mê kãm kapêr o ri mê pa xwÿnhja na prem kãm ixpumunh prãm tÿx o pa. Nê mê kãm ixkapêr

mar prãm tÿx o pa. No ãm mē akĩnhã ixpumunh nē ixkapēr mar kēt rãhã htyk pa. Kormã ixwryk nē jar ixkator kēt jakamã na prem arĩ htĩr nē pa ri ixpumunh kēt rãhã ra htyk pa. ãm mē kapxipixjaja na ka mē mÿr pē ixte amnhĩ nhĩpēx ã ixpumunh nē ixkapēr mar o ixkõt apa. Tã mē kurom mē ate ano ho ixpumunh nē ajamak o ixkapēr mar o ixkõt apa jakamã kwa mē ja hã amnhĩ pumu nē tãm amnhĩ nhĩpēx o ri apa pē akĩnh nē ri apa. Anē.

Nhũm pre ã Jejus mē ixpē hkõt ixpa ho ixpa xwÿnhjē mã kapēr anē.

Jejus kot hprĩ hã mēmo hy jarēnh

Makre 4.13-20; Rukre 8.11-15

¹⁸ Hãmri nhũm Jejus mē ixpē hkõt ixpa ho ixpa xwÿnhjē mã hprĩ hã mē ujarēnhhta jarē nē mē inhmã:

—E kot paj ixprĩ hã mē amã mēmo hy ho ukapēr xwÿnh ã ixujarēnhhta jarē ka mē inhma. Nã mēmo hyta te kēp Tĩrtũm kapēr pyrãk. Nē ahpÿnhã mēmo hy rōrōk ã pikata te kēp mē apē panhĩ ahpÿnhã mē ate Tĩrtũm kapēr mar nē ahpÿnhã hkõt tanhmã amnhĩ nhĩpēx tota pyrãk. ¹⁹ Jakamã mē kot mar xwÿnh kwÿjaja te mē kot aptÿx kãm hy rōrōk nhũm kuwēnh kot hwÿr mraer nē hkrēr par xwÿnhhta pyrãk. Jao Tĩrtũm kapēr ma no nhũm Satanasti te kuwēnh kot hy krēr parta pyrã nē mē kot mar nē amnhĩ kaxyw hkõt hamaxpēr nē hkõt amnhĩ xunhwÿr pymaj hãmri ra tanhmã kapērja nē mē hkrã hto. Jakamã nhũm mē kuma nom ho hamakētkati tokyx anē nē axte kãm hamaxpēr kēt nē pa.

²⁰ —Nē mē kot mar xwÿnh kwÿjaja te mē kot kēnre kamã hy hkwy rōrōk nē higrõt nē grã par tokyx anhÿr xwÿnhhta pyrãk. Jao Tĩrtũm kapēr ma nē hkĩnh nē. Nē kãm mar prãm nē. ²¹ Tã nhũm mēhō Tĩrtũm nē tanhmã mē kãm kapēr to nhũm mē kuma nē Tĩrtũm kaga. Te mēmo hy higrõt nom ra grã par tokyx anhÿrta pyrãk.

²² —Nē mē kot mar xwÿnh kwÿjaja te mrōnhĩ kamã hy hkwy rōrōk nē higrõt nhũm mrōnhĩ kot kēp ãmnãr xwÿnhhta pyrãk. Jao mē kãm Tĩrtũm kapēr mar prãm tã mãanēn kãm mē hikukrēx rũnh nē mē hikãxpore rũnh prãm. Hãmri nē ãm ja pix kukamã hamaxpēr o pa. Nē ja gryk ã axte Tĩrtũm kapēr mã hamaxpēr nē hkõt amnhĩ nhĩpēx kēt nē.

²³ —Nē mē kot mar xwÿnh kwÿjaja te hirã kamã pika mex kãm hy hkwy rōrōk nē higrõt nē ô rũnhhta pyrãk. Jao ixkapēr ma nē amnhĩ krã him hagjēnh tÿx nē. Nē ixkõt ri amnhĩ nhĩpēx mex rãhã ho pa. Jakamã te mēmo hy ô rũnh nē ô mex pyrãk o amnhĩ nhĩpēx. E ã ixujarēnhja kot anhÿr. Anē.

Harōj kaãkre jarēnh

Matêwre 13.36-43; Makre 4.26-29

²⁴ Nhũm Jejus axte mē kot mar o hkrĩ xwÿnhjē mã awjarē nom hprĩ hã mē kãm ujarēnh kēt nē. Axte mē kãm mēmoj tã kuxi nē awjarē nē mē kãm:

—Nã nhÿrmã Tĩrtũm mē kot kormã htĩr ri tanhmã amnhĩ nhĩpēx to ho pa hã mē omunh xã hkõt ahpÿnhã tanhmã mē harēnh toja te mē ujarēnh ja pyrãk. Kojã mēhō harōj y mex o ukapēr kaxyw ma hpur mã mō. Hãmri nē hkre hpa nē ma akupÿm mō. ²⁵ Tã nhũm kamãt nhũm ra gōr nē nō. Hãmri nhũm kãm hkurē xwÿnhja ma kēp ihpur wÿr tē nē harōj mexta nhĩpy axtem nē kēp harōj kaãkre hkre. Harōj kaãkreja te kot harōj mex pyrãk nom mē kot hkur kēt. Tã nhũm kēp harōj y mex nhĩpy hkre hpa hãmri nē ma akupÿm tē.

²⁶ —Tã nhũm hamē higrõt nē anhĩpē ô. ²⁷ Nhũm kãm mē ãpēnh xwÿnhjaja tee ri harōj mex kaēx ã harōj kaãkreta pumu nē hpur nhō dōn wÿr tē nē kãm

harê nê kâm: “Kwa ate harôj mex pix kre htâ pêr hkaêx â harôj kaàkre mǎânên kato. Kwa tanhmâ na pre amnhî to nê hkaêx â kato?” Anê. ²⁸ Hâmri nhûm tee ri mê kuma nê mê kâm: “Nà mēhō kām ixkurê xwýnh na pre â inhîpêx anê.” Anê hāmri nhûm kām mē àpênh xwýnhnta kām: “Kwa xà kot paj mê tokyx ma hwýr mra nê nê harênh pa nê kurê nà?” Anê. ²⁹ Nhûm mê kām: “Nà kot kaj mê anê nê harôj mexta mê ho apimrààtâ ixpê harênh pa. ³⁰ Kwār māmri harôj mex mē hpimrààtâ ô hpa mân. Ka mê ri ma hwýr mra nê harôj kaàkre kumrêx jarênh pa nê axpên tâ harê ho ê nê ma o mra nê hpôk. Hâmri nê rî kormâ hpânhâ harôj mex jakâ nê ho akuprô nê ô ho mra nê ixkre kamâ haxwý.” Anê. Â mê ujarênh kot anhýr.

Anhýr o mê kām kapêr.

Jejus te kot mēmo hy hkryre pyrâk â harênh

Makre 4.30-32; Rukre 13.18-19

³¹⁻³² Hâmri nhûm Jejus arî mê kām amnhî tâ kuxi nê ujarênh o nhý. Nê tanhmâ mê kām amnhî tâ ujarênh to nê mê kām:

—Nà Tirtûm kot mê awýr ixte mê ato amnhîptâr kaxyw inhmênh â ijarênhja. Te ixte mēmo hy pixire nhûm mê kot hkre nhûm higrôt pyrâk. Koja gaa nê hprêk. Hâmri nê hpa anhgrâ nhûm kuwênhre hwýr mra nê hôptî kamâ amnhîm haê nhîpêx nê kamâ hikwý. Tâ kot paj nhýrmâ mēmo hy jarênhnta pyrâ nê ixpyxi htâ pika piitâ hkôt mê ho amnhîptâ nê mê omunh mex rāhâ ho ixpa. Anê.

Jejus te kot pāwti kaxkrit xà pyrâk â harênh

Rukre 13.20-21

³³ Nhûm Jejus arî mê kām amnhî tâ kuxi nê ujarênh o nhý nê mê kām:

—E kot pa hpânhâ mê amâ tanhmâ pāwti kaxkrit xà jarênh to ka mê inhma. Na hte mēnijaja pāwti nhîpêx kaxyw hāmri nê kaxkrit xà hkwy ho grire nê kupy nê trik xôm mê ho ahkâ. Hâmri nê ho pāwti nhîpêx. Kaxkrit xāja grire htâ pāwti piitâ ho kaxkrit mex nê. Tâ ja pyrâ nê ixpyxi htâ koja mê nhýrmâ pika piitâ hkôt ixkôt amnhî nhîpêx mex o pa.

Anhýr o mê kām amnhî jarê.

Jejus kot mê ujarênh pix kām mê ahkre hâ harênh

Makre 4.33-34

³⁴ Na pre â Jejusja mê ujarênh o mê ahkre ho pa anê. Âm mê ujarênh pix o mê ahkre ho pa. Te tām ujarênh pyrâk no âm mēmoj tâ haxwý rý amnhî tâ haxwý nê nê kām tanhmâ amnhî jarênh to. ³⁵ Â kot mê ahkre ho pa anhýr kukamâ na pre ra amnepêm Tirtûm nhý hâ kapêr o mê pa xwýnhjê hōja harê nê hâ kagâ. Te Jejus tām tanhmâ amnhî jarênh to pyrâk o hkukamâ harê nê hâ kagâ nê hâ hkagâ ho:

Kot paj mê kām ixujarênh pix kām mê ahkre ho ri ixpa. Mēmoj te ho tām pyrâ nê harê nom mēmoj tâ haxwý nê tanhmâ mê kām ixujarênh to. Nê aa mê kot mēmoj mar kêt xwýnh kwý kot paj mê kām harê kê mê kuma. Anê.

Jejus kot hprî hâ harôj kaàkre jarênh

Matêwre 13.24-30, 13.47-50

³⁶ Tâ nhûm Jejus mê kām ujarênh pa nê mê kure nê ma tēn ixkrem axà. Hâmri pa mê ixpê hkôt ixpa ho ixpa xwýnhjaja ma hkôt mra nê ixkrem agjê. Hâmri nê harôj kaàkre hâ ujarênhnta â hkukja nê kām:

—Kwa aprî hã mē inhmã harôj kaäkre jarênhta jarê nã. Na pa mē kormã ixprî hã mar mex kêt nê. Anê.

³⁷ Hãmri nhùm mē inhmã:

—Tõe pa ixprî hã mē amã harê. Æm paa.

Ixpê Tirtùm kot mē awÿr inhmênh xwÿnh te ixte mêmō hy mex o ukapêr xwÿnhhta pyrãk.

³⁸ Nê purta te kêp pika piitã pyrãk.

Nê harôj mexta te ra mē ate ixkôt amnhî xunhwÿr nê ixkôt amnhî nhîpêx o apa xwÿnhjê pyrãk.

Nê harôj kaäkreta te mē kot Satanasti hkôt amnhî nhîpêx o mē pa xwÿnhjê pyrãk.

³⁹ Nê kot harôj kaäkre hkre xwÿnhhta te Satanasti pyrãk.

Nê harôj jakâr xã hã arîgrota te Tirtùm kot ahpÿnhã tanhmã mē harênh to xã hã arîgrota pyrãk.

Nê mē kot harôj jakâr xwÿnhjaja te Tirtùm kapêr o wrÿk xwÿnhjê pyrãk.

⁴⁰ Mē ujarênhja kamã na prem harôj kaäkre kumrêx jarê nê hã hpök jarê. Ja pyrã nê koja nhÿrmã Tirtùm kot ahpÿnhã tanhmã mē harênh to xã hã arîgrota ã hãmri ã mē kot amnhî tomnuj o mē pa xwÿnhjê nhîpêx anê.

⁴¹ —Kot paj nhÿrmã kãm mē piitã mē ho amnhîptâr kaxyw hãmri nê kapêr o mē wrÿk xwÿnhjê mã anê nhùm mē ma mran wrÿ nê mē kot amnhî tomnuj xwÿnhjê pix o akuprô. Nê mē kot nhãm mē hkwyjê kot mē urãk nê tanhmã amnhî tomnuj to ho pa kaxyw mē kãm anhÿr xwÿnhjaja nhùm mē mãânên mē ho akuprô. ⁴² Hãmri nê mē ho pikuprônh pa nê te mē kot harôj kaäkreta nhîpêx pyrã nê kuwy kamã mē rênh pa. Hãmri nhùm mē kamã amnhî xã htÿx kamã hamak rãhã nê pa ho pa. Nê amnhî xã htÿx ã maj tee ri mÿr rãhã ho pa. Nê tee ri amnhî xã hã maj amnhî nham o axpên kamhar tÿx kaprÿ.

⁴³ —No ixkôt mē kot amnhî nhîpêx xwÿnhjaja koja mē mē kurom mex kumrêx nê pa. Kot paj mē ho mex rax nê nhùm mē mex rãhã nê pa ho pa. Tirtùm kot kormã pika nyw nhîpêx mã xwÿnhhta kamã nhùm mē mex kumrêx nê pa ho pa. E kêr ka mē ixujarênhja ma nê kãm ajamaxpêr tÿx rãhã ho apa. Anê.

Mê hikukrêx mex o hpimxur jarênh

Piripos 3.7

⁴⁴ Nhùm Jejus arî mē ixpiitã mē inhmã tanhmã ujarênh to. Nom hprî hã ujarênh kêt nê. Kê axte mêmōj tâ kuxi nê mē inhmã tanhmã ujarênh to nê mē inhmã:

—Mê ate ixkôt amnhî xunhwÿr xwÿnhjaja te mē apê mē hikukrêx mex ã pika japrôr xwÿnhhta pyrãk. Koja mēhõ mē hikukrêx mex jamÿ nê o tẽ nê nhÿri amnhîm ho amÿxu. Kaxyw kakwÿ nê kamã hagjê nê hity hpa nê ma akupÿm tẽ. Hãmri nhùm jãã nhùm mēhõ tèn kãm kato. Hã pikata kakwÿ nê kãm kato nê omu nê hkînh nê. Nê hamaxpêr o: “E pa ma tẽ nê inhörkwÿ kamã ixkukrêx piitã ho wênê hpa nê hpãnhã kãxpore jamÿ nê ho amnhîm mē hikukrêx mex ã pika japrô nê amnhîm mêmōj mexta o ixarîk pa.” Anhÿr o hamaxpêr nê akupÿm hity hpa nê ma akupÿm tẽ. Hãmri nê mêmōj mexta gryk ã õ mêmōj piitã ho wênê hpa. Hikukrêx nê örkwÿ nhùm piitã ho wênê hpa. Hãmri nê hpãnhã kãxpore jamÿ nê ma o tẽ nê amnhîm pikata japrô. Hãmri nê ma akupÿm hwÿr tẽ nê kamã mē hikukrêx mexta kwÿrÿnh pa nê ho õ kumrêx.

—Tã te mē ate mēhõ kot ã amnhî nhîpêx anhÿr xwÿnhhta pyrãk. Na ka mē urãk nê inhgryk ã amnhî tomnuj kaga hpa nê hpãnhã ixkôt amnhî nhîpêx. Te

mêhō kot mēmo mē hikukrêx mex gryk ā hikukrêx tūm piitā kaga hpar nē mē hikukrêx mex o hpimxur xā hā pikata japrōr pyrāk. Anē.

Mêhō kot kēn jaxênh japrōr jarênh

⁴⁵ Nhūm Jejus arī mē inhmā awjarē nē mē inhmā:

—Nē ja. Na htem kām hkīnh nē hamakêtkati nē ri hpa hprām xāj Tirtūm kōt amnhī xunhwý nē hkōt ri amnhī nhīpêx rāhā ho pa. Te mêhō my kām kēn jaxênh mex prām nē ma ri hapêr o pa xwýnhnta pyrāk. ⁴⁶ Nē ra nhýri omu nē ma tē nē prês ā mē hkukja. Nhūm mē kām hā ho ohtō nē harē nhūm ma akupým tē nē kām ho ō hprām xāj hikukrêx piitā ho wēnē hpa. Hāmri nē kaxpore jamý nē o tē nē amnhīm ho haprō. Kēn jaxênh mexta pix gryk ā hikukrêx piitā ho wēnē hpa nē hpānhā ho amnhīm haprō.

—Tā ja pyrā nē na ka htem amex nē ajamakêtkati nē axāmnhīx ri apa hprām xāj ixkōt amnhī xunhwý nē ixkōt pix mā amnhī nhīpêx o apa. Anē.

Kryhti jarênh

Matêwre 13.24-30, 13.36-43

⁴⁷⁻⁴⁸ Nhūm Jejus arī mē inhmā awjarē nē mē inhmā:

—E Tirtūm kot nhýrmā tanhmā mē harênh to xā hā arīgro kot paj ixprī hā tanhmā mē amā harênh to. Te ho mēmyjaja kot himō kamā kryhti rēnh pyrāk. Kōja mē gōx kām kumē nē akupým ho api nhūm kamā tep ohtō nē. Nhūm omu nē kýx pē amgrā kamā hkapī nē ahpýnhā ri tanhmā kamā kute kawrà. Nē kamā mex kawrà nē kawà kamā kugjē nē mē kot hkur kêtja nhūm nhām kurē. ⁴⁹ Ja pyrā nē Tirtūm kot ahpýnhā ri tanhmā mē kot amnhī nhīpêx to hā mē omunh xā hkōt tanhmā mē hipêx to kaxyw arīgrota ā mē hipêx anē. Kōja kapêr o mē wrýk xwýnhjaja mē kot hkōt amnhī xunhwýr xwýnhjē nē mē kot amnhī tomnuj o mē pa xwýnhjē kawrà hpa. ⁵⁰ Nē te mē kot tep mex nē tep punu kawrà nē nhām rēnhnta pyrāk o mē hipêx nē ma kuwy hwýr mē o mra nē kamā mē kurē. Nhūm mē tee ri amnhī xā htýx ā maj amýra nē tee ri amnhī nhīpêx kaprý. Anē.

Nhūm pre ā Jejusja axte mē ixpê hkōt mē ixpa ho mē ixpa xwýnhjē mā ujarênh anē. ⁵¹ Hāmri nē mē inhmā:

—E xàn ka mē atā aprī hā ixujarênhnta ma nà?

Anē pa mē kām:

—Tý. Nà na pa mē atā ixprī hā mar mex nē. Anē.

⁵² Hāmri nhūm mē inhmā:

—Tōe. Nā ām hāmri. Na ka xep mē ra ixte mē ahkre nywta mar mex nē. Nē mē akwýjaja mēānēn Tirtūm kapêr tūm mar mex nē. Te mē apē mêhō apkur xā rax pyrā nē mā na ho mē piitā mē hipêx o ri mē hkōt paja pyrāk. Ja pyrā nē kêr ka mē ma mē piitā mē hkōt Tirtūm mē wa ixkapêr o mē ahkre ho ri mē hkōt apa. Anē.

Najare nhō xwýnhjaja kot Jejus kaga hā mē harênh

Makre 6.1-6; Rukre 4.16-30; Juāw 1.11

⁵³ ā Jejus mē inhmā ujarênh par anē. ⁵⁴ Hāmri nē ma akupým Najare hwýr mō nē Tirtūm kapêr o mē ahkre xā hā ixkre hwýr tē nē axā nē mē ahkre ho nhý. Nhūm mē amnhī jaêr pē tanhmā kot mē ahkre hto hā kuma nē tee ri hkukamā hamaxpêr nē axpên mā:

—Tk. Kwa kêp mē panhīō htā tanhmā kot we amnhī to nē ā ahpumunh týx kōt mē pamā kapêr anē nē ri mē kām aa mē kot mēmoj pumunh kêt kwý ho anhýr o pa? ⁵⁵⁻⁵⁶ Na pre mē panoo mā hprêk nhūm mē pahte pahprī hā

hwjyê pumunh. Kêp pî kuprâr xwÿnh Juje mē hprō Marir wa hkraa. Nē kêp Xiakre nē Juje nē Simāw nē Jut mē htōō. Nē htōxjaja jar mē pakamā pa nhūm mē pahte mē piitā mē omunh mex kēnā kot kêt we mē kurom ā āhpumunh tÿx anē. Anē.

⁵⁷ Hāmri nē kamā gryk nē hkaga. Hāmri nhūm tee ri amnhī tā mē omu nē mē kām:

—Nā Tirtūm nhÿ hā kapēr jarēnh o mē pa xwÿnhjaja na htem krī hwÿy kamā kām mē mar prām nē. Nom ō krī kamā mē kot karāre rūm hprêk kām omunh xwÿnhjaja na htem kuma nē ām kuma. Anē.

⁵⁸ Tā mē kot amnhī kaxyw hkôt hamaxpēr kêt jakamā nhūm tee ri mē kām aa mē kot mēmoj pumunh kêt kwÿ ho anhÿr rax prām. No ām mē kām mēmoj to grēre nē ho anē.

14

Mē kot Juāw Paxis pīr ā mē harēnh

Makre 6.14-29; Rukre 9.7-9

¹ Tā nhūm pika pē Garirej kamā mēō pahihti Erox Jejus jarēnh ma ² nē tee ri hukamā hamaxpēr nē hā ō pôristi mā kapēr nē mē kām:

—Kwa pēr Juāw Paxis na nā? Ra ixte hā ixāmnenh nhūm mē kot hpīr tā mān tanhmā amnhī to nē akupÿm htīr. Nā pēr tām kēnā. Jakamā na hte aa mē kot mēmoj pumunh kêt kwÿ ho anhÿr o pa. Anē.

³⁻⁵ Na pre ra Erox htō pē hprōptān ho hprō. Tō arī htīr tā nhūm axtem nē kêp utā nē ho hprō. Hāmri nhūm Juāw Paxisja harēnh ma nē hā kām akir nē kām:

—Kwa Eroxis kêp atō hprō kēnā na ka kêt axtem nē kêp utā nē ho aprō. Kwa ja omnuy tÿx o omnuy tÿx. Anē.

Hāmri nhūm amnhī tā kuma nē kamā gryk nē kot hpīr kaxyw. Tā nom nhūm Ijaew kot axpēn mā kêp Tirtūm nhÿ hā kapēr jarēnh xwÿnh ā harēnh jakamā nhūm mē umaj hpīr kêt nē. Ām ho prēs nē haxā nhūm hkrī ho hkrī.

⁶ Tā nhūm jāā nhūm Erox kator ā arīgro kato nhūm mē hā akuprō nē hā hkīnh. Hāmri nhūm hprō nyw kra niti mē hwÿr axā nē ahte mē hipōk ri mē kām gre. Mē kot omunh nē kamā hkurē kaxyw nhūm mē noo mā hpijaam kêt nē mē kām grer o xa. Hāmri nhūm pahi Erox omu nhūm ja kām mex nē nhūm hkīnh nē kamā nopyma nē. ⁷ Hāmri nē kām:

—Nā ām hāmri na ka ā mē inhmā amnhī nhīpēx anē. Jakamā kwa māmri mēmoj tā ixwÿ. Amā mēmoj prām xā hkôt hā ixwÿ kot paj amā kugō. Ām hāmri na pa amā anē. E mēmoj na amā hprām? Anē.

⁸ Hāmri nhūm kuma nē kām:

—Ma Juāw Paxis krā na pa inhmā hprām. Inhmā hkrā krāhta nē pasiiti kamā axā nē ixwÿr o tē nē inhmā agō. Anē.

Ra katorxā kot kaxyw kām karō jakamā nhūm ā hā hwÿr anē. ⁹ Hāmri nhūm Eroxja tee ri kuma nhūm ja kêp omnuy nē. Nom ra mē pikuprōnh rax xwÿnhjê nhīpōk ri mē noo mā kot kām: “E māmri amā mēmoj prām xā hkôt hā ixwÿ pa amā kugō.” Anhÿr jakamā kām kot kêp nē hprām kêt nē. Hāmri nē Juāw Paxis wÿr ō pôristi hwÿr rē ¹⁰ nhūm mē ma mē hagjēnh xāta wÿr mra nē unē nē mut krāhta. ¹¹ Hāmri nē hkrā mÿ nē pasiiti kamā kuxā nē ma akupÿm nita wÿr o tē nē kām kugō nhūm kumÿ nē ma katorxā hwÿr o tē nē kām kugō.

¹² Hāmri nhūm Juāw Paxis kôt mē pa xwÿnhjaja tee ri mē kot hpīr ā harēnh ma nē ma hwÿr mra nē kumÿ nē ma o mōn haxā. Hāmri nē ma Jejus wÿr mra nē kām harē.

Jejus kot mē ho ohtô nē mē kām mē ô hā harēnh
Makre 6.30-44; Rukre 9.10-17; Juāw 6.1-14

¹³Hāmri nhūm Jejus Juāw Paxis jarēnh ma nē hkaprī nē. Nē ma himô nhīkjē hwŷr kapôt ā mōr kaxyw pàr krem axà nē ma mō. Pa mē hkôt ixpa ho ixpa xwŷnhjaja ma hkôt mra. Hāmri nhūm krī hkwy kamā mē pa xwŷnhjaja harēnh ma nē ohtô nē ma mē inhīkrep pikap mra. Nē ra amnhī to wa nē mē inhmōr xàja wŷr pōj nē mē ixkutēp hkrī. ¹⁴Jakamā pa mē mō nē mē hwŷr pōj nē mē omu. Hāmri nhūm Jejus mē omu nē kām mē hkaprī nē mē kām mē à xwŷnhjē ho mex pa.

¹⁵Tā nhūm ra myt ār kaxyw pa mē hkôt ixpa ho ixpa xwŷnhjaja tee ri mē omu nē Jejus wŷr mra nē kām:

—Kwa na ra amŷkry htŷx nē. Amnhī nē mē hano kê mē ma nhŷri krī hkwy hwŷr mra nē tokyx amnhūm mēmoj japrô nē kuku. Mo jar mē apkur xà hā mēô? Jar akunī pix kēnā. Anē.

¹⁶Hāmri nhūm mē inhma nē mē inhmā:

—Nā kot paj mē hanor kêt nē. Mē kajaja kot kaj mē kām ô nhūm mē apku. Anē.

¹⁷⁻²¹No nhūm mē ohtô rax kumrēx. Mēmyjaja kēp 5.000. Nē kaxyw mē hprô nē mē hkrajaja. Jakamā nhūm Jejus ā mē inhmā kapēr anē pa mē tee ri mē hkukamā ijamaxpēr nē kām:

—Kwa nā mē panhōja raxti hā. Mē panhō pāwti kēp sīk pix. Nē kaxyw tep grāja pijakrutre kēnā kot kêt mē piitā mē hipēx. Nā xà kot paj mē ma mra nē nhŷri mē kām mē mēmoj japrô nhūm mē kuku? Anē.

Hāmri nhūm mē inhmā:

—Nā pu mē kām mēmoj japrô kêt nē. Kot puj mē kām mē panhōta o anhrà. E mē kām anē kê mē ahpŷnhā ri hŷje nē hkrī hpa. Anē.

Hāmri pa mē kuma nē mē kām anē nhūm mē piitā hkrī hpa. Hāmri nhūm Jejus pāwti mē tepja jamŷ nē kaxkwa hwŷr rīt nē ho Tirtūm wŷ nē kām:

—Pa Papaj? Nā apē mē inhmā mē inhō ho apa xwŷnh jakamā amex o amex. Anē.

Hāmri nē mē kām ho hkry hpa nē hkôt mē ixpa ho mē ixpa xwŷnhjē mā kugô pa mē ô ri ho mē hipēx pa. Nhūm mē piitā apkur o hkrī. Mēôja grire htā nhūm Jejus tanhmā mē kām ho rax to nhūm mē ohtô rax kumrēx tā piitā kuku nē ho ôhy htu hpa nhūm arī mēô jakrēx prā. Hāmri pa mē akupŷm hakrēx o akuprô nē ho kawà ho 12 nē ho nyt pa.

Jejus kot gô krāhkā hā ām nē htēm ā harēnh
Makre 6.45-52; Juāw 6.15-21

²²⁻²³Tā nhūm Jejus mē ixpē hkôt ixpa ho ixpa xwŷnhjē mā anē pa mē akupŷm pàr mā agjē nē ma xarmā hkukamā mō. Hāmri nhūm mē kot mar o kuhē xwŷnhjē jano nhūm mē ma akupŷm hapēx. Hāmri nhūm Jejus kot Tirtūm mā amnhī jarēnh kaxyw ahte tē nē hixēt ā api nē himōk ā kām amnhī jarēnh o nhŷ.

Gaa nhūm ra kamàt nhūm arī ahte hixēt nhīmōk ā nhŷ.

²⁴Rôm pa mē pàr kām mē inhmōr xwŷnhjaja kormā himô nhīpōk ri mō. Pu nhūm kōk xāpēr tŷx mē ixkaxpa. Nē gô axpēn tak tŷx nē pa mē tee ri rrēmti ho gô rēnh nhīpēx nē tee ri axpēn pumu.

²⁵Tā nhūm krāhyre kà nhūm Jejus man mē ixkôt gô krāhkā hā xan tē ²⁶pa mē amnhī wŷr omu. No nhūm kormā hirā mex kêt jakamā pa mē ixprī hā omunh mex kêt nē. Hāmri nē tee ri omu nē mēkarô hā hkamnhīx nē umaj ixāmra rax nē. ²⁷Hāmri nhūm mē inhmā kapēr nē mē inhmā:

—Tk. Kwa mẽ amã ma hkêt nê. Pa na pa mẽ akôt tẽ. Anê.

²⁸ Hãmri nhũm Simãw Pêtre kuma nê kãm:

—Kwa xà ka na ka tẽ? Tôe apê mẽ inhõ Pahihti jakamã kwa amnhĩ wỳr ixwỳ pa apyrã nê gô krãhkà hã xa nê awỳr tẽ nà? Anê.

²⁹ Hãmri nhũm kãm:

—Tôe mamrĩ amnê ixwỳr tẽ. Anê.

Hãmri nhũm kuma nê pãr rũm kato nê hwỳr tẽ. Urak nê gô krãhkà hã hwỳr tẽ. ³⁰ Hãmri nê kormã htêp o htem mẽ kôk xapêrta kamã ama nê tee ri amnhĩ kukamã hamaxpêr pẽ ra àr o mỗ. Hãmri nê àmra kamã Jejus mã amnhĩ to akir nê kãm:

—Kwa tokyx ixto api Pahihti. Anê.

³¹ Hãmri nhũm hpa hã kupy nê ho àpir kurê kumrêx nê kãm:

—Kwa pêr ãm kormã ate amnhĩ kaxyw inhmã ajamaxpêr tỳx kêt. Mon ka we ixkamnãr rom mãmri man ixwỳr atêmrê hkêt nê? Anê.

³² Hãmri nhũm wa akupỳn mẽ ixwỳr tẽ nê wa axã. Hãmri nhũm kôk katat kôt pinhkrênh pa nhũm gô tãm nôr kurê kumrêx. ³³ Hãmri pa mẽ Jejus kot ã amnhĩ nhĩpêx anhỳrja ã omu hãmri nê kãm mex o mex ã harê nê kãm:

—Kwa ãm hãmri na hte amnhĩ pê Tirtũm Kra hã amnhĩ jarê. Nà apê Kra kênã. Anê.

*Jenêjare kamã Jejus kot akupỳm mẽ ho mex ã harênh
Makre 6.53-56*

³⁴ Tã pa mẽ ra himô hã rê nê Jenêjare hwỳr pøj. ³⁵ Hãmri nê ma kapê hã ri ixpa. Hãmri nhũm pika nhõ xwỳnh kwỳjaja Jejus pumu nê mẽ piitã mẽ kãm harênh o hprôt nê ahpỳnhã hwỳr nhỹhỹnh mẽ ã xwỳnhjê hã karô. Nhũm mẽ man mẽ ixwỳr mẽ o mra ³⁶ nê mẽ ho Jejus wỳ nê kãm:

—Pa? Kwa kê mẽ ã xwỳnhjaja akupỳm mex kaxyw apê axê kupê nà? Anê.

Hãmri nhũm mẽ kãm:

—Tôe. Kwãr mẽ mãmri mran hkupê. Anê.

Hãmri nhũm mẽ kuma nê xepên pãnhã hwỳr mra nê kêp ê pix kupênh tã ra akupỳm mex nê ma akupỳm mra.

15

*Parijew nhõ xwỳnh mẽ Tirtũm kapêr tũm o mẽ ahkre xwỳnhjê jarênh
Makre 7.1-13*

¹ Tã nhũm Parijew nhõ xwỳnh mẽ Tirtũm kapêr tũm o mẽ ahkre ho mẽ pa xwỳnhjaja Jerujarê rũm ma Jejus wỳr mra. Na htem mẽ ixkukamã mẽ inhĩgêjtê pyrã nê apkur kaxyw nê amnhĩ nhĩhkra kuhõnh ryy nê. Amnhĩ nhĩhkra htyk pix kuhõnh nê hkrĩ hkêt nê ãm amnhĩ nhĩhkra kuhõnh japjêê nê. Nê ô prat kuhõnh japjêê nê kormã apkur kaxyw hkrĩ. Tirtũm kot ja hã mẽ omunh nê mẽ mex ã mẽ harênh ã amnhĩ kamnhix jakamã na pre ã amnhĩ nhĩpêx anhỳr o pa. Jakamã nhũm mẽ ma Jejus wỳr mra. ² Hãmri nê omu nê kãm:

—Pa Jejus? E kwa mẽ inhmã mẽmoj jarê. Amnepêm mẽ panhĩgêjtaja na prem apkur kaxyw nê amnhĩ nhĩhkra kuhõnh japjê nê rĩ kormã apku. Tã pa htem arĩ ijaxwỳja ã amnhĩ nhĩpêx anê. No akôt mẽ pa ho mẽ pa xwỳnhjaja na htem mẽ ixpyrã nê ã amnhĩ nhĩpêx anhỳr kêt nê. Kwa mo na htem amnhĩ nhĩhkra tyk kuhõnh tokyx anê nê hkrĩ nê apku? Anê.

³ Hãmri nhũm mẽ kuma nê mẽ kãm:

—Tk. Na ka htem ãm mẽ panhîgêtjê hkôt pix mã amnhî nhîpêx o apa no Tirtûm kapêr kôt amnhî nhîpêx kêt nê. ⁴ Tirtûm na pre mẽmoj tâ mẽ pamã karô ho:

Kêr ka mẽ anhîpêêxã nê mẽ akatorxã wa hã apijaãm nê mẽ ho ajuta rãhã ho ri apa. Kot kaj mẽ ã amnhî nhîpêx anhîr kêt nê tanhmã mẽ kãm akapêr punuj to ho ri apa. Hã koja mẽ akwýjaja ja mýrapê mẽ apa. Anê.

—Na pre ã Tirtûmja mẽ pamã karô anê. ⁵ No mẽ kajaja na ka htem ã akwýjê mã karô anhîr kêt nê. ãm kapêrja kwým na ka htem mẽ kãm karô nê mẽ kãm: Kot kaj mẽ mẽmo arîgro hã akãxpore japêr nom kêr ka mẽ ho tanhmã akatorxã rý anhîpêêxã ho ajuta hto kaxyw wa kãm hkwy nhôr kêt nê. ãm ho ate wa ho ajuta hkêt ã wa kãm amnhî jarê hãmri nê Tirtûm mã amnhî jarênh xã hã ixkre hwýr o tê nê mẽ ixte tanhmã ixkreta ho mex to kaxyw mẽ inhã agô. Kot kaj mẽ ã amnhî nhîpêx anê nhùm Tirtûm ja hã mẽ apumu nhùm ja kãm mex nê. Kêr ka mẽ ã amnhî nhîpêx anhîr o ri apa.

—Anhîr o na ka htem mẽ kãm karô ho ri apa. ⁶ Nom Tirtûm kapêr tûm kot ã ja jarênh anhîr kêt. ãm amnhî krã hkôt na ka htem ã mẽ kãm karô punuj o ri apa anê. Te mẽ akapêrja mex o kot Tirtûm kapêr jakrenh pyrãk. ⁷ Mẽ ate Tirtûm kôt amnhî nhîpêx ã amnhî jarênh tâ ãm amnhî to axêx nê hkôt amnhî nhîpêx kêt nê. Na pre Tirtûm amnepêm mẽ akukamã tanhmã mẽ ajarênh to. Nhùm ý hã mẽ kãm kapêr jarênh xwýnh Ijaisja ô ri mẽ kãm mẽ ajarê nê hã kagã. Te Tirtûm tãm kot mẽ ajarênh pyrãk. ⁸ Na pre mẽ akukamã mẽ ajarênh o:

Mẽ kãm ixkînh ã mẽ kot amnhî jarênh tâ mẽ kãm ixkînh kêt. Na htem kãm ixprãm ã amnhî jarênh kaprý.

⁹ Mẽ kot ixkuhpa hã amnhî krã hkôt mẽmoj tâ hkwyjê mã karô ho pa jakamã na htem kot ixkôt amnhî nhîpêx o pa hã amnhî jarênh kaprý. Anê.

—Na pre ã Ijaisja Tirtûm nhý hã mẽ akukamã mẽ ajarê nê mẽ atã kagã anê. Anê.

Nhùm pre ã Jejus Parijew nhô xwýnhjê mẽ Tirtûm kapêr tûm o mẽ ahkre xwýnhjê mã kapêr anê.

Mẽmoj kot mẽ pahomnu hã harênh

Makre 7.14-23

¹⁰ Tã nhùm Jejus amnhî wýr mẽ kot mar o kuhê xwýnhjê hwý nê axte mẽ kãm kapêr nê mẽ kãm:

—E mẽ inhma nê inhmar týx nê. ¹¹ Na hte Tirtûm kapêr tûm o mẽ ahkre xwýnhjaja amnhî krã hkôt mẽ ate amnhî nhîhkra kuhônň japjê hã mẽ amã karô ho pa. Nê amnhî krã hkôt mẽ axãpkur xã hã tanhmã mẽ amã karô hto ho pa. Tirtûm kot ja hã mẽ apumunh kôt mẽ amex ã mẽ ajarênh kaxyw ã mẽmoj tâ mẽ amã karô anê. Nom na hte Tirtûm tanhmã mẽ kot amnhî nhîhkra kuhônň to hã mẽ omunh xã hkôt tanhmã mẽ harênh to hkêt nê. Rý mẽ axãpkur xã pumunh kôt mẽ mex ã mẽ ajarênh kêt nê. Ja tanhmã kãm kute hkêt. Na hte ã mẽ kot amnhî nhîpêx anhîr ã mẽ omunh xã hkôt mẽ mex ã mẽ harênh rý mẽ mex kêt ã mẽ harênh kêt nê. Na hte mẽmoj kur ã mẽ omu nê ãm mẽ omu nê hã tanhmã mẽ harênh to hkêt nê. ãm mẽ kapêr punuj rý mẽ kapêr mex ã mẽ mar kôt pix mã na hte tanhmã mẽ harênh to. Anê.

¹² Nhùm pre ã Jejus mẽ kãm kapêr anê pa mẽ hkôt mẽ ixpa ho mẽ ixpa xwýnhjaja kuma hãmri nê hwýr mra nê kãm:

—Kwa na ka ã më kãm akapër anê nhũm Parijew nhõ xwỳnhjaja tee ri ama nhũm ja më kêp omnuj nê. Anê.

¹³⁻¹⁴ Hãmri nhũm më inhma nê tanhmã më inhmã Parijew nhõ xwỳnhjê jarênh to nê hprĩ hã më hkukamã më harênh o:

—Tk. Kwâr mãmri më kêp omnuj. Më kot Tĩrtũm kapër tũm o më ahkre ho pa htã na htem hkõt amnhĩ nhĩpêx kêt. Jakamã te më nohkre xwỳnh kot amnhĩ nhĩpêx pyrãk. Kojã mëhõ nohkre htã amnhĩ kõt nhỹhỹm nohkre hõ ho mõ hãmri nê wa hamê pry pumunh kêt nê htỹx mõ hãmri nê nhỹri ahkrehti kamã tẽm. Tã Parijew nhõ xwỳnhjaja te kot wam htẽm xwỳnhnta pyrãk nhũm më kot më mar xwỳnhjaja te kot wam htẽm xwỳnh kõt hõ htẽmta pyrãk. Jakamã Parijew nhõ xwỳnhjaja më kot më mar o pa xwỳnhjê më kojã më hpimràatã nhỹrmã te ahkrehti kamã rôrøk par pyrãk o amnhĩ nhĩpêx nê mex kêt nê pa ho pa. Kojã kaxkwa kamã inhõ Papaj nhỹrmã amnhĩ nê më hanor pa.

—Inhõ Papaj te kêp mẽmo hy hkre ho pa xwỳnhnta pyrãk. Na htem mẽmo hy hkre nhũm higrõt hapõj nê higrõt mex nê. Hãmri nhũm më hwỳr mra nê omu nê nê mẽmoj nhĩgrõt punuj jarê nê kurê. Ja pyrã nê kojã nhỹrmã inhõ Papaj amnhĩ nê Parijew nhõ xwỳnhjê janor pa nhũm më mex kêt nê pa ho pa. Jakamã kwa kêt ka më hkõt ri amnhĩ nhĩpêx kêt nê. Anê.

Nhũm pre ã Jesus më ixte hkõt ixpa ho ixpa xwỳnhjê mã hprĩ hã Parijew nhõ xwỳnhjê hkukamã ã më harênh anê pa më mar o ixkrĩ. ¹⁵ Hãmri nhũm Simãw Pêtre tee ri Tĩrtũm kot më apkur xã hã më omunh xã hkõt tanhmã më harênh to hkêt ã harênh o. Nê ãm tanhmã më kapêr to pix ã më mar kõt tanhmã më harênh toja ma hãmri nê hã Jesus kukja nê kãm:

—Kwa mon ka ri ã ja jarênh anê Pahihti? Anê.

¹⁶ Hãmri nhũm kuma nê hprĩ hã më inhmã awjarê nê më inhmã:

—Kwa xãn ka më kormã aprĩ hã ja mar kêt nê? ¹⁷ E pa ixprĩ hã më amã harê ka më inhma. Nã na htem mẽmoj ku nhũm hte më hkrã hi hwỳr gjêx kêt nê. Na hte më õhy pix wỳr agjê nê gaa nê nhãm hapõj nê hapêx. Na htem më apkur xãja ku nê ÿ hã tanhmã amnhĩ tomnu hto hkêt nê. Jakamã na hte Tĩrtũm ja hã më omunh xã hkõt tanhmã më harênh to hkêt nê. ¹⁸ ãm më hkrã kamã më hamaxpêr punuj pix nhỹ hã më kot tanhmã amnhĩ tomnuj to jakamã na hte Tĩrtũm më hamaxpêr ã më omunh xã hkõt tanhmã më harênh to. ¹⁹ Kojã mëhõ tanhmã hamaxpêr punuj to nê ra hkõt amnhĩ tomnuj pix o pa. Na htem nhãm më hpar o pa nê më kêp ahkĩ nê amnhĩ to hêx nê më hakwa kamã nhãm axpẽn mã më hixi jarênh o pa. Nê nhãm më kêp mẽ hprõ ho amnhĩkati nê më hkupyry hwỳr mra nê mẽ ho amnhĩkati. Nê tanhmã ri axpẽn tomnuj to ho pa. ²⁰ Mẽ hamaxpêr punuj nhỹ hã na htem ã amnhĩ nhĩpêx anhỹr o pa. No na hte Tĩrtũm më kot amnhĩ nhĩhkra kuhõnh japjê hkêt ã më omunh xã hkõt më kot amnhĩ to mex xwỳnh ã më harênh kêt nê. Ja tanhmã kãm kute hkêt. Anê.

*Jesus kot Ijaew kêt xwỳnh ni kamã ukapri hã harênh
Makre 7.24-30*

²¹ Tã nhũm Jesus më inhmã kapêr pa hãmri nê më inhmã anê pa mẽ ma hkõt mõ. Ma Xir mẽ Sitõja wa pu hã ri ixpa. ²² Nhũm mëhõ nija omu nê hwỳr tẽ. Mẽ ixkĩnhã kêp Ijaew kêt tã hwỳr tẽ. Kanaã nhõ xwỳnh na pre. Tã Jesus wỳr tẽ nê kãm:

—Ka Pahihti Jejus? Apê Tirtüm kot më ixwÿr amênh xwÿnh jakamã xê ixujarênh ma nê ixkamã axukaprî hkêt wehe. Na mëkarômnutija tanhmã ixpê ixkra ho nhùm ixpê omnuy tÿx kumrêx. Anê.

²³ Hâmri nhùm Jejus kuma nê âm kuma nê kãm tanhmã nê hkêt nê. Jakamã pa më ixpê hkôt ixpa ho ixpa xwÿnhjaja kãm:

—Kwa hano kê ma akupÿm têê ri. Na âm ri më pahkôt xatã hkrata jarênh pix o ri pa. Anê.

²⁴ Nom nhùm kot amnhî tâ kamã hamak kaxyw tanhmã më inhmã hã kapêr to nê më inhmã:

—Nà âm Ijaewjê pix wÿr na pre Tirtüm inhmê. Te më kêp ôwêhti pikunor pyrâk o na htem htÿx ri amnhî nhîpêx o pa. Jakamã âm më hwÿr pix mã na pre inhmê. Na kormã inhmã tanhmã nhâm më hkwyjê jarênh to hkêt nê. Anê.

²⁵ Hâmri nhùm nitita tee ri amnhî tâ kuma nê hwÿr tê nê kutã hkônkrã ho htêm nê nhÿ nê kãm:

—Xê ma we ixkamã axukaprî hkêt wehe. Anê.

²⁶ Hâmri nhùm kãm:

—Nà kormã. Na pre Tirtüm më kêp Ijaewjê pix wÿr inhmê. Jakamã na pa kormã nhâm tanhmã më akwyjê ho mex to hkêt nê. Anê.

²⁷ Hâmri nhùm kãm:

—Ma âm hãmri na ka akapêr. Nom ixpê Ijaew kêt tâ më kuxwar âm ixto mex grire kêt wehe. Anê.

²⁸ Hâmri nhùm kuma nê kãm:

—Nà âm hãmri na ka â akra kaxyw inhmã ajamexpêr tÿx anê. Jakamã kot paj nê mëkarômnutita jano. Kojã axte tanhmã apê ho hkêt kumrêx.

Anhÿr o kãm kapêrja rôm nhùm hkraja akupÿm mex kurê kumrêx.

Jejus kot më à xwÿnhjê ho ohtô nê më ho mex â harênh

Makre 7.31-37

²⁹ Tã nhùm Jejus më inhmã anê pa më ixrohã krîja pê ixkato nê ma himô rax pê Garirej wÿr mô. Nê nhÿri gô mÿri hixêt wÿr mô nê hã api nê ixkrî.

³⁰ Hâmri nhùm më ohtô nê ma më ixkôt mra. Nê më à xwÿnhjaja nhùm më hamÿ nê Jejus wÿr më o mra. Na prem ohtô rax kumrêx. Ra ri më pa hkêt xwÿnhjaja nê më nohkre xwÿnhjaja nê më hyk o më pa xwÿnhjaja. Nê më kapêr kêt xwÿnhjaja nê ahpÿnhã ri tanhmã më à kute xwÿnhjaja nhùm më hamÿ nê ma Jejus wÿr më o mra nê kutã më haxwÿ. Hâmri nhùm më omu nê ahpÿnhã akupÿm më ho mex pa. ³¹ Jakamã na pre më kapêr kêt xwÿnhjaja akupÿm kapêr mex nê. Nê ri më pa hkêt xwÿnhjaja akupÿm mrar mex nê. Nê më hyk o më pa xwÿnhjaja akupÿm tãm ri mra. Nê më nohkre xwÿnhjaja akupÿm rît mex nê. Â ahpÿnhã akupÿm mex par anê. Hâmri nhùm më kot hwÿr më hamÿnh nê Jejus wÿr më o mrar xwÿnhjaja amnhî jaêr pê akupÿm më mex â më omu nê më kamã no puma nê hkînh nê. Hâmri nê Tirtüm mã mex o mex â harê nê axpên mã harênh o:

—Nà âm hãmri më panhõ Tirtümja âm mex o mex. Anê.

Jejus kot më ho 4.000 nê më kãm më ô hã harênh

Makre 8.1-10

³² Tã nhùm Jejus më ixte hkôt ixpa ho ixpa xwÿnhjaja amnhî wÿr më ixwÿ nê më ixkôt më mrar xwÿnhjê jahkre nê më inhmã:

—E. Ka më rî kam jajê pumu. Na pa ra inhmã më hkaprî nê. Na më pahkôt ri pa hã apkati axkrunêpxi nhùm ra më kêp mëôja hapêx pa. Kojã më apkur

kêt rãhã ma akupÿm mẽ õ krĩ hwÿr pa hãmri nẽ pry hã hirok nẽ rôrok o pa. Mẽ õ krĩ hwÿr awryy. Anẽ.

³³ Nhũm pre ã mẽ inhmã mẽ harẽnh anẽ pa mẽ tee ri kuma hãmri nẽ kãm:

—Kwa nom nhÿri kot pu mẽ kãm mẽmoj japró nhũm mẽ tokyx kuku? Ja kapôt pix kênã. Nẽ mẽ ohtõ griiã. Anẽ.

³⁴ Hãmri nhũm mẽ inhmã:

—No mẽ panhõ pãwtita? Tanhmã na arĩ kute nẽ hikwÿ? Anẽ.

Hãmri pa mẽ kãm:

—Nã ãm kęp 7 pix. Nẽ kaxyw tep kwÿ no ãm grêre. Kot mẽ ho dare kaxyw ã. Anẽ.

³⁵ Hãmri nhũm mẽ inhma nẽ mẽ ixkôt mẽ mrar xwÿnhjê mã anẽ nhũm mẽ hkrĩ pa. ³⁶ Hãmri nhũm pãwti mẽ tep grêreta jamÿ nẽ ho Tĩrtũm wÿ nẽ kãm:

—Pa Papaj. Nã apê mẽ inhmã mẽ inhõ ho apa xwÿnh jakamã amex o amex. ãm amex kumrẽx. Anẽ.

Hãmri nẽ mẽ kãm mẽmojta o hkry hpa nẽ mẽ inhmã kugõ pa mẽ ô ri ho xa nẽ ho mẽ hipêx pa. ³⁷⁻³⁸ Hãmri nhũm mẽ piitã apku nẽ õhy htu hpa. Nhũm prem mẽmyjaja kęp 4.000 nẽ kaxyw mẽnijaja nẽ mẽhprĩjaja. Mẽ ohtõ rax kumrẽx tã nhũm Jejus mẽõ ho mẽ hipêx pa. Hãmri pa mẽ hakrẽx o akupró nẽ ho kawã ho 7 nẽ ho nÿt. ³⁹ Hãmri nhũm Jejus ma akupÿm mẽ õ krĩ hwÿr mẽ hano pa mẽ pãr krem agjê hãmri nẽ ma ijaxwÿja mõ. Ma pika pẽ Makatã hwÿr mõ.

16

Parijew nhõ xwÿnh kwÿ kot aa mẽ kot mẽmoj pumunh kêt õ ho anhÿr ã Jejus wÿr ã mẽ harẽnh

¹ Tã pa mẽ ra hwÿr pøj nhũm Parijew mẽ Satusew nhõ xwÿnhjaja Jejus pumu nẽ hwÿr mra. Nẽ hêx rom kot kamã hamak kaxyw hwÿr mra nẽ kãm:

—Pa Jejus? E kwa mẽ inhmã aa mẽ ixte mẽmoj pumunh kêt õ ho anẽ nã? Pa mẽ ate ho anhÿr ã apumu nẽ Tĩrtũm kot mẽ ixwÿr amẽnh ã akôt ijamaxpër kurẽ kumrẽx. E kwa tokyx. Anẽ.

²⁻³ Hãmri nhũm mẽ kuma nẽ mẽ kãm:

—Tk. Nã kot paj mẽ amã ho anhÿr kêt nẽ. Mẽ ate hã ixpumunh nẽ ixkôt ajamaxpẽre kaxyw ã. Na ka htem kaxkwa kamã kakrã pumu nẽ axpën mã na wrÿk ã harẽ. Nẽ kaxkwa mex pumu nẽ axpën mã amgrã hã harẽ. Tã ixte tanhmã mẽ amã mẽmoj nhĩpêx to hã ixpumu nom Tĩrtũm kot mẽ awÿr inhmẽnh xwÿnh ã ixkôt ajamaxpër kêt nẽ. ⁴ ãm mẽ ajamaxpër punuj pix o na ka htem ri ajamaxpër o apa. Ixpê Tĩrtũm kot mẽ awÿr inhmẽnh xwÿnh tã ka mẽ ja hã ixkôt ajamaxpër kêt nẽ. Tã mẽ ate aa mẽmoj pumunh kêt kwÿ ixte mẽ amã ho anhÿr kaxyw ka mẽ inhmã hã karõ. Nã kot paj mẽ amã ho anhÿr kêt nẽ. Kormã. Kot paj ãm nhÿrmã te amnepêm Jõhti kot amnhĩ nhĩpêx pyrãk o amnhĩ nhĩpêx. E ja pix kot paj mẽ amã harẽ. Nom kot paj mẽ amã aa mẽ ate mẽmoj pumunh kêt õ ho anhÿr kêt nẽ. Anẽ.

Nhũm pre ã Jejus mẽ kãm kapër anẽ hãmri pa mẽ ixrohã mẽ kęp ixkato nẽ ma ixpa.

Jejus kot hkôt mẽ pa xwÿnhjê jahkre hã harẽnh

Makre 8.14-21

⁵ Tã pa mẽ Jejus mẽ ixrohã ma mõ nẽ pãr mã agjê nẽ ma xarmã akupÿm rẽ nẽ hikjê hã mõ. Hãmri nẽ tee ri mẽ ixàpkur xà japër nẽ axpën mã:

—Kwa na pu mẽ panhõ pãwti ho pajamakêtkati nẽ kure. Anẽ.

⁶ Hâmri nhûm Jejus mê inhma nê tanhmã mê inhmã Parijew mê Satusew nhô xwÿnhjê jarênh to. Nom pãwti hã kuxi nê mê inhmã mê harê nê mê inhmã:

—Kwa mê o kora. Kêr ka mê Parijew mê Satusew nhô xwÿnhjê mê kêp pãw kaxkrit xã hkwy hpyr kêt nê. Anê.

⁷ Hâmri pa mê tee ri kuma nê ixprî hã mar mex kêt nê. Nê arî kapërta ã axpên kukjêr o hkôt mô nê axpên mã:

—Kwa mê pahte mê panhõ pãwti rer jakamã mãn mê pahte mê õ pãw kaxkrit xã kwÿ hpyr nê mê pahkurê na? Anê.

⁸ Hâmri nhûm mê inhma nê mê inhmã:

—Hêxta waa nê. Mon ka mê ãm axpên mã mê panhõ pãwti hkêt pix jarênh o mô? Pêr kormã mê ate amnhî kaxyw inhmã ajamaxpêr tÿx kêt. ⁹ Jãã ixte mê anoo mã pãwti kêp 5 pix tã nhûm ixte ho mê kêp 5.000tajê nhîpêx par. Nhûm mê kot hkur nê ho õhy htu hpar nhûm mê ate mêõ jakrêx o apikuprõnh par nê ho kawà ho 12 nê ho hipu. ¹⁰ Nê ham pãwti kêp 7 o mê kêp 4.000 nhîpêx par nhûm mê kot hkur nê ho õhy htu hpar nhûm mê ate mêõ jakrêx o apikuprõnh raxja. ¹¹ Ra ixte mê anoo mã ja ho anhÿr o axkrut tã ka mê ra hã ano hkêt nê arî axpên mã mê paxàpkur xã pix jarênh o ixkôt mô. Na mê paxàpkur xaja na pa harênh kêt nê. Parijew mê Satusew nhô xwÿnhjê nhô pãwti kaxkrit xã pix na pa hã kuxi nê mê amã tanhmã harênh to. Anê.

¹² Nhûm pre ã mê inhmã kapêr anê hãmri pa mê atã kuma nê kãm:

—Nà na pa xep mê hãmri tã ama. Xep mê ixte Parijew mê Satusew nhô xwÿnhjê kapêr kôt amnhî nhîpêx nê na ka mê ixkurê nê ã mê harênh anê. Anê.

Jejus kot amnhî tã hkôt mê pa xwÿnhjê kukjêr ã harênh

Makre 8.27-30; Rukre 9.18-21

¹³ Tã pa mê axte Jejus kôt mô nê pika pê Sejarej Piripos kamã kormã mô nhûm Jejus amnhî tã mê ixkukja nê mê inhmã:

—E mê inhmã mêmoj jarê. Tanhmã na hte mê akwÿjaja axpên mã ijarênh to wehe? Anê.

¹⁴ Hâmri pa mê kãm:

—Nà na htem ahpÿnhã tanhmã ajarênh to. Na hte kamã mê hkwyjaja ajarênh o finat Juãw Paxis ã ajarê. Nhûm kamã mê hkwyjaja ato finat Eris ã ajarê nhûm mê hkwyjaja tõhã apê Tirtûm nhÿ hã akapêr o apa xwÿnhjê hõ akupÿm atîr ã ajarê. Nê tõhã finat Jeremîstija rÿ axtem hõ hã ajarê. ã na htem ahpÿnhã axpên mã ajarênh anê. Anê.

¹⁵ Hâmri nhûm mê inhma nê mê inhmã:

—No mê kajaja? Ixpê mêhõ hã na ka htem axpên mã ijarê? Anê.

¹⁶ Hâmri nhûm Simãw Pêtre kãm:

—Nà apê Tirtûm kot mê ixkaxyw axãm nê mê ixwÿr amênh xwÿnh na ka. Nê apê mê ixpiitã mê inhõ Pahi Maati na ka. ã na pa htem axpên mã ajarênh anê. Anê.

¹⁷ Hâmri nhûm kuma nê kãm:

—Nà ãm hãmri na ka ã ijarênh anê Simãw Pêtre. Nom amnhî krã hkôt na ka ã ijarênh anhÿr kêt nê. Tirtûm tãm kot amã ixto amnhîrît xã hkôt na ka ã ijarênh anê. ¹⁸ Nã akumrêx na ka ã ijarênh anê. Tã koja mê apyrã nê nhÿrmã mê kot ixkôt amnhî xunhwÿr xwÿnhjaja ma hkwyjê mã ja hã ijarênh o ri krî piitã hkôt pa. Hãmri nhûm mê hkwyjaja mê kuma nê mê apyrã nê ixkôt amnhî xunhwÿ. Hãmri nhûm mê kêp ixprãm nõkati xwÿnhjaja tee ri tanhmã mê kot

ijarēnh toja ma nē ã ijarēnh anhÿrja nē mē kām kapēr tā nom ho hkaprÿ. Ā koja ixkôt mē kot amnhī xunhwÿr xwÿnhjaja mē kām ijarēnh o pa anē. Jao te mē apē kēn nhūm ixte mē ato amnhīm inhōrkwÿ nhīpēx pyrāk. Tā akumrēx ate ã ijarēnh kot anhÿr jakamā kot paj te ixte akumrēx amÿnh nē ato ixtēm nē inhōrkwÿ nhīpēx kaxyw amnhīm akumrēx axām pyrāk o anhīpēx Simāw Pētre.

¹⁹—E kēr ka ma inhÿ hā tanhmā mē piitā mē kām ijarēnh to ho ri apa. Mē kot hprī hā amar kaxyw. Koja mē hkwÿjjaja ama nē amnhī kaxyw ixkôt hamaxpēr nē ixkôt amnhī xunhwÿ. Ka ja hā mē omu nē mē kām: “E ra mē ate Jejus kôt amnhī xunhwÿr jakamā kot ka mē nhÿrmā ty nē ma kaxkwa hwÿr api nē Tirtūm mē wa kuri amex kumrēx nē atūr tūm nē apa ho apa.” Anhÿr o mē kām ijarēnh o apa. No mē kot akapēr mar nē ãm mar nē ixkôt amnhī xunhwÿr kēt xwÿnhjaja ka mē kām: “No mē kajaja mē ate Jejus kôt amnhī xunhwÿr kēt jakamā kot kaj mē nhÿrmā Tirtūm mē Krata wa kuri atūr tūm nē apa ho apa hkēt nē.” Anhÿr o ã inhÿ hā mē kām akapēr anhÿr o ri mē hkôt apa. Jao te ate kaxkwa hwÿr saf pyr nē Tirtūm krajē mā kahē xā rēnh nē Tirtūm kra hkēt xwÿnhjē pē kahē pyrāk o amnhī nhīpēx o apa. Anē.

Nhūm pre ã Jejus Simāw Pētre mā kapēr anē. ²⁰Hāmri nē hpānhā mē ixpiitā mē inhmā kapēr nē mē inhmā:

—E. Kwa kēr ka mē kormā mē piitā mē kām Tirtūm kot mē awÿr inhmēnh ã mē kām ijarēnh o ri apa hkēt nē. Kormā. Anē.

Jejus kot amnhī kukamā amnhī jarēnh ã harēnh

Makre 8.31-33; Rukre 9.22

²¹Hāmri nhūm Jejus hprī hā amnhī kukamā tanhmā mē inhmā amnhī jarēnh to nē mē inhmā:

—Nā mē kajaja mē ate aprī hā ixpumunh mex. No mē pahkwÿjjaja kām hprī hā ijarēnh mar nē ixpumunh prām kēt. Ijaew krāhtūmjaja nē Tirtūm kapēr tūm o mē ahkre xwÿnhjaja nē patre krāhtūmjaja. Mē kām hprī hā ixpumunh nē kām ixkapēr mar prām kēt jakamā kot paj tokyx ma Jerujarē hwÿr mō nhūm mē kamā ixpynē nē ixtak rax nē ixpī. Nom kot paj ixtyk ã apkati axkrunēpxi nhūm Tirtūm akupÿm ixto ixtīr. Anē.

²²Hāmri nhūm Simāw Pētre tee ri kot ã mē kām amnhī jarēnh anhÿrja ã kuma nē hwÿr tē nē hpa hā kupy nē mē ixpē ho kato nē mē ixkàx ã o xa. Nē ã kot amnhī jarēnh anhÿrja nē kām kapēr nē kām:

—Kwa nā Pahihti. Ri ã amnhī jarēnh anhÿr kēt nē. Mo kot kēt mē ri axtem nē ã anhīpēx anē? Anē.

²³Hāmri nhūm kuma nē hwÿr apkjē nē omu nē kām:

—Tk. Te apē Satanasti kapēr pyrāk o na ka ã inhmā akapēr anē. Kot kaj ã akapēr anē hāmri nē ixkôt apa hkēt nē. Tirtūm kām hprām xā hkôt na ã mē kot inhīpēx anhÿr kaxyw kēnā. Tā ka Tirtūm jamaxpēr o ajamaxpēr kēt nē amnhī jamaxpēr o ã inhmā akapēr anē. Te apē ixpē axāmnār xwÿnh pyrāk o amnhī nhīpēx. Anē.

Jejus krajaja kot tanhmā amnhī nhīpēx to hā mē harēnh

Makre 8.34-9.1; Rukre 9.23-27; Juāw 12.24-26; määnēn Rōmān 15.1; Wam Korīt 10.23-24; Karatas 5.24; Piripos 2.4; Wam Pētre 4.1; Apokarip 2.10, 12.11

²⁴Nhūm pre ã Jejus Simāw Pētre mā kapēr anē hāmri nē hpānhā mē ixpē hkôt ixpa ho ixpa xwÿnh piitā mē inhmā kapēr nē mē inhmā:

—E kot kaj mē ixkôt amnhī xunhwÿr ã amnhī jarē hāmri nē määnēn amnhī jarēnh o: “Jesús kēp inhō Pahihti jakamā kot paj kapēr kôt pix mā amnhī

nhîpêx rãhã ho ri ixpa. Kwãr ixkwýjaja tanhmã hã inhîpêx hto.” Anhÿr o amnhî jarê.

25 —Koja mē ixtã mē atōx pî rÿ tanhmã mē atō hto ka ty. Tã nom koja akaxwÿnh ma ixwÿr àpir kurê kumrêx. Hãmri ka ixkuri atîr tûm nê amex rãhã nê apa ho apa. Nom kot kaj mē jar atîr prãm xaj ixkaga hãmri nê inhō krî hwÿr axàpir kêt nê.

26 —Nê koja mēhō hikukrêx rax gryk ã Tîrtûm kaga. Tã nhÿrmã ty hãmri nê amnhî kôt hikukrêx ô hpyr nê o môr kêt nê. Koja tee ri kuwy hwÿr môr pymaj amnhî nê hikukrêx rax o amnhî pãnhã amnhîrer prãm kaprÿ. Tanhmã koja amnhî to nê Tîrtûm mã amnhîre nê ma ô krî hwÿr api? Koja ã amnhî nhîpêx anhÿr kêt nê.

27 —Nê ixpê Tîrtûm kot mē awÿr inhmênh xwÿnh kot paj nhÿrmã kaxkwa rûm akupÿn mē awÿr wrÿ nhûm Tîrtûm kapêr o mē wrÿk xwÿnhjaja man ixkôt wrÿ. Hãmri pa inhō Papaj nhÿ hã ixte mē piitã tanhmã mē kot amnhî nhîpêx to hã mē omunh xà hkôt ahpÿnhã tanhmã mē harênh to. 28 ãm hãmri na pa ã mē amã amnhî jarênh anê. Kot paj nhÿrmã akupÿn ixte mē ato amnhîptâr kaxyw man mē awÿr wrÿ. Tã kot kaj mē akwÿjaja akupÿn ixwrÿyta kukamã tokyx ixte tanhmã ixte amnhî nhîpêx to hã ixpumu. Anê.

17

Jejus kot hixêt prêk nhûmök ã hirã kamã ãm ã harênh

Makre 9.2-13; Rukre 9.28-36; mãânên Sikûn Pêtre 1.16-18

1 Tã nhûm semãnja hapêx nhûm Jejus ma nhÿri hixêt prêk wÿr mô. Nê kaxyw Simãw Pêtre nê Xiakre nê Xiakre htô Juãwja nhûm ma amnhî kôt wa mē o mô. Nhûm wa mē mô nê hixêt prêk ã api nê himök ã kuhê. 2 Hãmri nhûm Jejus xep ra axtem nê xa. Axtem hkuk nhîrã htÿx nê xa. Te myyti nhîrã htÿx pyrãk. Nê ê haka htÿx kumrêx. 3 Hãmri nhûm xep ja wa kaxkwa rûm hwÿr wrÿ nê kuri kãm kapêr o xa. Mojes mē Erisja wa nhûm hwÿr wrÿ nê kuri xa. Tîrtûm amnepêm amnhî wÿr wa ho àpir tã wa akupÿn wrÿ nê Jejus mã kapêr o xa. 4 Hãmri nhûm Jejus kôt mē môr xwÿnhjaja wa mē omu nhûm Simãw Pêtre tanhmã hamaxpêr to nê Jejus wÿr tē nê kãm:

—Kwa Pahihti. Nã ãm hãmri na pu mē amnê mô. Kwa pu mē kritpê m jar axkamê nê tokyx panojarê têt nê. Pa mē amã pô nhîrõnh o axkrunêpxi nê hipêx. Amã hõ nhîpêx nê Mojes mã hõ nhîpêx nê Eris mã hõ nhîpêx ka mē kamã akrî. E kwa pa mē amã ho anê nã?

Anhÿr o kãm kapêr. Nom amnhî krã hkôt ã kapêr anê. 5 Hãmri nê kormã ã kãm kapêr anhÿr rô m nhûm ra kakrã jaka htÿxja wrÿ nê wa mē hkunor pa nhûm wa mē kamã kuhê. Nhûm kakrã kamã Tîrtûm mē kãm kapêr nê mē kãm:

—E ota Ixkra xa. Inhmã hapê ho inhmã hapê. E kêr ka mē kapêr mar tÿx rãhã ho ri apa. Anê.

6 Hãmri nhûm mē tee ri kuma nê kãm ma htÿx nê umaj pikap rôrök nê htu myÿrpê hikwÿ. 7 Hãmri nhûm Jejus mē hwÿr tē nê mē hã îhkra jaxwÿ nê mē kãm:

—E mē kãnhmã akuhê nê amã ma hkêt nê. Anê.

8 Hãmri nhûm mē kuma nê kãnhmã rît nê Jejus pix pumu nhûm ahte xa nhûm kuri wa ãm xwÿnhnta wa ra ma akupÿm api. 9 Hãmri nhûm mē kormã akupÿm hixêt nhûmök rûm mē ixwÿr wrÿk o mô nhûm Jejus mē kãm:

—E kêr ka mê ham ate mêmoj pumunh xwÿnhhta kormã nhãm mê kãm harênh kêt nê. Kot paj nhÿrmã ty nê akupÿm ixtÿr ka mê rÿ kormã mê kãm ja hã ijarênh o ri apa. Anê.

¹⁰ Hãmri nhÿm mê kormã akupÿn mê ixwÿr wrÿk o mō nhÿm mê Jejus mã: —Kwa mê inhmã mêmoj jarê. Na htem Tÿrtÿm kapêr tÿm o mê ijahkre xwÿnhhaja mê inhmã: “Eris kumrêx koja Tÿrtÿm mê pahwÿr kumê nhÿm Krisja kormã hapu hã wrÿ.” Anê. Na htem ã mê inhmã war ajarênh anê. Tã ka ra wrÿ nom kormã akukamã Erisja wrÿk kêt. Anê.

¹¹ Hãmri nhÿm mê kãm:

—Nà ãm hãmri na prem ã wa ijarênh anê. Na pre ra ixkukamã te Eris kot amnhÿ nhÿpêx pyrãk xwÿnhhta tê nê ixkutêp mê kãm ijarênh o pa. ¹² Tã nom nhÿm mê ja hã omunh kêt nê. Na prem axtem nê kãm hprãm xã hkôt tanhmã hipêx to nê kupÿ. Tã koja mê nhÿrmã ã hipêx anhÿr pyrãk o inhÿpêx. Anê.

¹³ Hãmri nhÿm mê ra hprÿ hã kuma nê axpên mã:

—Kwa Juãw Paxis pimràata na ã mê pamã harênh anê. Tapxipix na pre te Eris kot amnhÿ nhÿpêx pyrãk o amnhÿ nhÿpêx o pa. Tã tãm na mê pamã harê. Anê.

*Jejus kot mēhō hkra nē mēkarōmnuti kator ā harēnh
Makre 9.14-29; Rukre 9.37-43*

¹⁴ Tã nhÿm mê ra akupÿm ahpar mã man mê ixwÿr hpōx o mō nhÿm mê ohtō rax nê Jejus kutêp kuhê. Hãmri nhÿm mēhō myja mê omu nê mê kutã tē nê mê hkaxpa nê Jejus kutã hkōn krã ho tēm nê nhÿ nê hkra ho kuwÿ nê kãm:

¹⁵ —Pa Jejus. Kwa inhmã ixkra kamã axukaprÿ nê. Na hte mēkarōmnutija xatã tanhmã ixpê ho nhÿm hte ÿ hã mra nê rōrōk nê tōhã kuwy kamã rōrōk nê tōhã gōx kãm mran mrō nê ixpê homnuj tÿx nê. ¹⁶ Tã pa akôt mê pa ho mê pa xwÿnhjê hwÿr o tē nom nhÿm mê kot inhmã ho mex kaxyw tee ri tanhmã ho hkaprÿ. Kwa xã kot kaj akupÿm inhmã ho mex nã? Anê.

¹⁷ Hãmri nhÿm kuma nê mê ixte hkôt ixpa ho ixpa xwÿnhjê mã kapêr nê mê inhmã:

—Hêxta waa nê. Ra mê ate ixte Tÿrtÿm nhÿ hã mê ho mex ã ixpumunh o ixkôt apa ryy htã kormã ixpyrà nê ã mê hipêx anhÿr kêt nê. Nà kormã mê kaxyw Tÿrtÿm kôt mê ajamaxpêr tÿx kêt jakamã na ka mê tee mê ho mex kaxyw. Anê.

Hãmri nê myta mã kãm:

—E amnê ixwÿr akrata o tē pa omu. Anê.

¹⁸ Hãmri nhÿm kuma nê hwÿr o tē nhÿm omu nê nê mēkarōmnutija kator nhÿm akupÿm mex kurê kumrêx. ¹⁹ Hãmri pa mê ixte Jejus kôt ixpa ho ixpa xwÿnhhaja ja hã omu mê hkãx ã amnhÿ tã hkukja nê kãm:

—Kwa na pa mê axwakre kamã tee ri nê hanor prãm kaprÿ. Kwa mon pa mê apyrã nê nê hanor nhÿm kator nê ma htēm kêt nê? Anê.

²⁰⁻²¹ Hãmri nhÿm mê inhmã:

—Nà kormã mê ate mê kaxyw Tÿrtÿm kôt ajamaxpêr tÿx kêt. Nom kot ka mê kaxyw hkôt ajamaxpêr tÿx hãmri nê hkôt amnhÿ nhÿpêx kukwak ri mêmoj tã awÿ nhÿm mê ama nê mê ate mêmoj tã axãhwÿr xã hkôt mê amã tanhmã mêmoj nhÿpêx to. Te mê ate pÿ hpàr mÿj mã akapêr nê kãm: “Kwa amnhÿ jarê nê ma tē nê gō xujanãr kãm mãn mrō.” Anhÿr nhÿm kot amar nê amar xã hkôt ã amnhÿ nhÿpêx anhÿr kurê kumrêx pyrãk. Ja pyrà nê kot kaj mê amnhÿ kaxyw Tÿrtÿm kôt ajamaxpêr tÿx kukwak ri mêmoj tã awÿ nhÿm mê ama nê mê amã mêmoj tanhmã ho rÿ mê amã mêmoj gō. Anê.

Jejus kot htyk kukamã amnhĩ jarênh ã harênh

Makre 9.30-32; Rukre 9.43-45

²²⁻²³ Tã hãmri pa mẽ Jejus kôt ma mō nê nhÿri pika pê Garirej kamã kormã ixpa. Hãmri nhũm Jejus axte amnhĩ kukamã mẽ inhmã tanhmã htyk ã amnhĩ jarênh to nê mẽ inhmã:

—Nã koja mẽ tokyx mẽ kãm ixtã amÿnê nhũm mẽ ixpĩ. Mẽ kot ixpĩr tã kot paj ixtyk ã apkati axkrunêpxi nhũm Tirtũm akupÿm ixtõ ixtĩr. Anê.

Hãmri pa mẽ tee ri ã kot amnhĩ jarênh anhÿrja ã kuma nê ixkaprĩ htyx kumrêx.

Jejus kot Tirtũm nhõrkwÿ hwÿr àr

Rômãn 13.5-7; Wam Korĩt 10.32-11.1

²⁴ Tã pa mẽ Jejus kôt ma mō nê ra Kapanau hwÿr pøj. Hãmri nhũm mẽ kot Tirtũm mã amnhĩ jarênh xã hã ixkre ho mex kaxyw mẽ kêp kãxpore hkwy jamÿnh xwÿnhjaja mẽ ixpumu nê mẽ ixwÿr mra nê Simãw Pêtre mã kãm:

—Pa. Kwa xã na hte mẽ ajahkre xwÿnhja mẽ pahpê hkwyjê pyrã nê Tirtũm mã amnhĩ jarênh xã hã ixkre ho mex kaxyw kãxpore hkwy nhõr kêt nê nã? Anê.

²⁵ Hãmri nhũm mẽ kuma nê mẽ kãm:

—Tÿ kot mẽ kãm òr o pa kênã. Anê.

Hãmri nê ma mẽ ixkôt tẽ nê mẽ ixkôt mēhõ nhõrkwÿ hwÿr axã. Hãmri nê kot Jejus mã mẽ harênh mã tã nhũm ra hamaxpêr ã omu nê kumrêx kãm kapêr nê kãm:

—Kwa inhmã mẽmoj jarê Simãw Pêtre. Xã na hte pahi hkrajaja ò papaj mã kãxpore hkwy nhõr o pa nã? Xã na hte ãm hkra hkêt xwÿnh pixjaja kãm hkwy nhõr o pa? Anê.

²⁶ Hãmri nhũm kuma nê kãm:

—Nã mẽ kêp hkra hkêt xwÿnh pixjaja na hte kãm òr o pa. Anê.

Hãmri nhũm Jejus kãm:

—Tÿ. Nã ãm hãmri na ka ja jarê. Na hte pahi hkrajaja ò papaj mã kãxpore nhõr kêt nê. Mẽ kêp hkra kênã. Tã ixpê Tirtũm Kra jakamã mo kaxyw kot pa kêt òrkwÿ hwÿr inhgjêx kaxyw kãm kãxpore hkwy gõ? ²⁷ Tã nom kot paj òr kêt nhũm kãxpore hkwy jamÿnh xwÿnhjaja tee ri ja hã ixpumu nê axpên mã ixte amnhĩ tomnuj xwÿnh ã ijarê. Jakamã e ma gônhmã tẽ nê tep ò kanhê. Hãmri nê ho api nê apy nê hakwa jakjê nê kamã kãxpore htÿxre pumu. Nê apy nê man o tẽ nê pahpãnhã kãxpore jamÿnh xwÿnhnta mã agõ. Anê.

Nhũm pre ã Jejus Simãw Pêtre mã karõ anê nhũm kuma nê ma hwÿr tẽ nê kot kãm karõ xã hkôt ã amnhĩ nhĩpêx anê.

18

Mẽ kot amnhĩ to rũnh xwÿnhjê jarênh

Makre 9.33-37; Rukre 9.46-48; mããñen Piripos 2.3-7; Wam Pêtre 3.4, 5.5-6

¹ Tã mẽ ixte Jejus kôt ixpa ho ixpa xwÿnhjaja amnhĩ kukamã ijamaxpêr nê amnhĩ tã Jejus kukja nê kãm:

—Kwa mẽ inhmã mẽmoj jarê Pahihti. Nhÿrmã mẽ ixpê pahi nê anhĩhkõ hã mẽ ho amnhĩptãr o ri ixpata ã mẽ ixtõ kot paj we mẽ ho amnhĩptãr rax o ixkwÿjê jakre? Anê.

² Hãmri nhũm mẽ inhma nê amnhĩ wÿr mẽhprĩre hõ mã hpa ho apê nhũm hwÿr tẽ nê mẽ ixkuri xa. ³ Hãmri nhũm Jejus omu nê hã mẽ inhmã:

—E mẽ inhma. Kêr ka mẽ apê pahi pyrãk o tanhmã amnhĩ jarênh to ho ri apa hkêt nê. ãm te amarĩ ri mẽ apa pyrãk o amnhĩ nhĩpêx. Te mẽhprĩre kot

amnhî nhîpêx pyrâk. Kot kaj mê ã amnhî nhîpêx anhÿr o apa hkêt hãmri nê nhÿrmã inhîhkô hã mê ho amnhîptâr kêt nê. ⁴Jakamã kot kaj mê amã nhÿrmã inhîhkô hã mê ho amnhîptâr o apa hprãm. Hã kot kaj mê te mēhprîre kot amnhî nhîpêx pyrã nê amã amnhî to rûnh prãm kêt nê apa.

⁵—Nê kêr ka mê apê pahi kot amnhî nhîpêx pyrâk o tanhmã amnhî jarênh to ho apa hkêt nê. ãm te amarî ri mê apa pyrâk o amnhî nhîpêx. Jao nhÿri mēhprîjê hō pumu nê kamã axukapri nê kãm mēmoj tanhmã ho rÿ kãm mēmoj gō. Hãmri nê te pa ate tanhmã ixto mex to pyrâk o amnhî nhîpêx. Kot kaj mê ã amnhî nhîpêx anhÿr o apa hãmri nhÿm Tîrtûm ja hã mê apumu nê mê ate amnhî to rûnh kêt tâ mê ate amnhî to rûnh xwÿnh ã mê ajarê. E kot kaj mê amã amnhî to rûnh prãm hã kot kaj mê ã amnhî nhîpêx anhÿr o ri apa. Anê.

Mê kot amnhî tomnuj xwÿnhjê hkukamã mê harênh

⁶Nhÿm Jejus arî mê inhmã mēhprî jarê nê mê inhmã:

—Nê mēhprîre na htem amnhî kaxyw ixkôt hamaxpêr o pa. Tã koja mēhō inhnê tanhmã mê kãm kapêr to. Mê kot tanhmã amnhî tomnuj to hprãm xaj tanhmã mê kãm kapêr to ho pa. Hãmri nhÿm mê kuma nê mê kapêr xà hkôt tanhmã amnhî tomnuj to. Hã koja Tîrtûm ja hã omu hãmri nê kot inhnê tanhmã kãm kapêr to xwÿnhnta pumu nê homnuj tÿx nê. Te mê kot mēhō pynênh nê mut ã kēn pytî hō nhôr nê ma o htēm nê gō xupÿm kãm mēnh pyrâk o hipêx. Te ho ja pyrâk no ãm homnuj tÿx o hakre.

⁷—Nê koja mēhō inhnê tanhmã mê kot ixkôt amnhî xunhwÿr xwÿnhjê hō mã kapêr to. Kot tanhmã amnhî tomnuj to hprãm xaj tanhmã kãm kapêr to. Rÿ kot ixkaga hprãm xaj tanhmã kãm kapêr to. Hãmri nhÿm kuma nê mar xà hkôt ixkapêr kwÿm tanhmã amnhî tomnuj to. Tã koja Tîrtûmja ja hã omu nê mãânēn kot inhnê kēp ãmnâr xwÿnhnta pumu nê ã inhnê kãm kapêr anhÿrja mÿrapê homnuj tÿx kumrêx.

⁸⁻⁹—E kwa mê okora. Kot kaj mê anhîhkra ho tanhmã amnhî tomnuj to rÿ apar o tanhmã amnhî tomnuj to. Hã kêr ka mê axte ã amnhî nhîpêx anhÿr pymaj te mê ate amnhî pê krãhyr nê mēnh pyrâk o amnhî nhîpêx nê axte ã amnhî tomnuj anhÿr kêt nê. Rÿ ka mê ano ho mēmoj punuj pumu. Hã kêr ka kãm ajamaxpêr pix o apa pymaj te mê ate amnhî pê ano katôk nê kaxâr nê mēnh pyrâk o amnhî nhîpêx nê nhãm arîr kurê kumrêx. Kêr ka mê ã amnhî nhîpêx anhÿr o ri apa. Hãmri nê nhÿrmã ty nê ma Tîrtûm nhô krî hwÿr api. No kot ka mê arî akutã ano nê arî akutã apar nê arî akutã anhîhkra rãhã ri apa htã ho amnhî tomnuj o apa. Hãmri nê nhÿrmã ty nê ate amnhî tomnuj mÿrapê ma mê kot amnhî xà htÿx kamã hamak tûm xã hwÿr ma mô.

¹⁰⁻¹¹—Nê kêr ka mê mēhprîrejê kamã axukapri rãhã ho apa. Na hte kaxkwa kamã Tîrtûm kapêr o mê wrÿk xwÿnh kwÿjaja Tîrtûm mã mê hamâr mex o pa. Tã koja mēhō tanhmã kēp hō hto nhÿm mê hã omu nê ma tē nê Tîrtûm mã harênh kurê kumrêx. Anê.

ôwēhti pikunor jarênh

Rukre 15.3-7

¹²Nhÿm Jejus arî mê inhmã kapêr nê mê inhmã:

—E pa mê amã awjarê ka mê ixujarênh ma. Nã koja mēhō my hkrit ôwēhti xohtō nê. Nê apkati mê ma hamâr o pa. Hãmri nhÿm pyxire nê tanhmã amnhî to nê kēp akunok. Kwÿ kaga nê ma nhÿhÿm ahte tē nê kēp akunok. Hãmri nhÿm mytita ma akupÿm o mōr kaxyw hkwy ho pikuprōnh pa hãmri nê tee ri hkwy kaêx ã pikunor xwÿnhnta japêr nom nhÿri omunh kêt nê. Hãmri

nê tee ri hkukamã hamaxpêr nê ma hkwȳ ho mō nê nhÿri kure. Kutêp apkur kaxyw nhÿri kure hãmri nê ma akupÿm pikunor xwÿnh̄ta japêr o tē. ¹³ Hãmri nê hapêr ryy nê nhÿri hwÿr kato nê omu nê hkÿnh̄ nê. Hãmri nê kutu nê ma akupÿm o tē. Na hte pikunor kêt xwÿnh̄jê nhÿ hã hkÿnh̄ tã pikunor xwÿnh̄ta mã kato nê hkÿnh̄ tÿx nê. Krit sohtô htã nom ãm kãm ho pixi nê ho hpikunor prãm kêt. Æ mē ujarênh̄ kot anhÿr. ¹⁴ Ja pyrà nê Tirtûm kãm mēhō pyxi nê nhÿrmã ma kuwȳ wÿr mōr prãm kêt kumrêx. Mē piitã mē kot hkôt amnhÿ xunhwÿrja na kãm hprãm. Anê.

Jejus kôt mē pahtôjê hō kot mē pahtomnuj jarênh̄

¹⁵ Nhûm Jejus arÿ mē inhmã kapêr nê mē inhmã:

—Nê ja. Koja ixkôt mē atō rÿ mē atōx tanhmã atomnuj to. Hã kêr ka ma hwÿr tē nê kot tanhmã anhÿpêx to hã amnhÿ tã kãm akapêr. Nom kêr ka mē nhãm mēhō mã harênh̄ kêt nê. Æm tanhmã kot ato xwÿnh̄ta pix wÿr tē nê kumê war axpên mã akapêr nê war axpên ma. Nhûm ama nê akupÿm tãm anhÿpêx hã kêr ka akupÿm te ixkôt kêp atō rÿ atōx pyrãk o ka wa axpên nhÿpêx nê axte jam ajamaxpêr kêt nê. ¹⁶ Nom koja ama nê ãm ama rÿ tanhmã ato hkêt ã amnhÿ jarênh̄ japêr. Hã kêr ka ma akupÿm tē nê akupÿm amnhÿ kôt Kris kôt atō rÿ atōx o axkrut rÿ mē ho axkrunêpxi nê amnhÿ kôt hwÿr mē o mra kê mē axpên tã war ama. Amnepêm Tirtûm kapêr ã kagã htûm kot ja jarênh̄ o:

Kêr ka mē atō tanhmã axpên nhÿpêx to. Hãmri nê hã axpên mã akapêr kaxyw nê amnhÿ kôt akwÿjê ho axkrut rÿ ho axkrunêpxi nê akupÿm hwÿr mē o mra kê mē axpên tã war ama. Anê.

—Æ Tirtûm kapêr ã kagã htûm kot ja jarênh̄ kot anhÿr. ¹⁷ Jakamã kêr ka mē amnhÿ kôt akupÿm kot tanhmã ato xwÿnh̄ta wÿr mē o mra kê mē atã kuma. Hãmri nhûm arÿ mē kãm kot tanhmã ato hkêt ã amnhÿ jarê ka tee ri amnhÿ tã omu nê ikrêsti hwÿr tē nê Kris kwÿ hã mē pikuprônh̄ xwÿnh̄jê mã harê. Kê mē ama hãmri nê ja hã axte kot tanhmã ato xwÿnh̄ta mã kapêr. Nhûm mē mar kêt nê arÿ kot tanhmã ato hkêt ã amnhÿ jarê ka mē amnhÿ nê hanor kurê kumrêx. Hãmri nê te kêp Kris kôt mē atō rÿ mē atōx kêt pyrãk o hipêx.

¹⁸ —Nê koja mēhō ixkôt amnhÿ xãm nê Inhÿpêxã Tirtûm kôt ri amnhÿ nhÿpêx o pa. Ka mē ja hã omu nê inhÿ hã tanhmã kãm akapêr to nê kãm: “E ra ate Jejus kôt amnhÿ xãm jakamã kot kaj nhÿrmã Tirtûm mē wa kuri amex kumrêx nê atÿr tûm nê apa ho apa.” Anhÿr o kãm akapêr. Nom mē kot ixkôt amnhÿ xunhwÿr kêt xwÿnh̄jaja ka mē ã mē kãm akapêr anhÿr kêt nê. Æm inhÿ hã mē kãm: “No mē kajaja mē ate Jejus kôt amnhÿ xunhwÿr kêt jakamã kot kaj mē Tirtûm mē Krata wa kuri atÿr tûm nê amex nê apa hkêt nê.” Anê. Kêr ka mē inhÿ hã ã ahpÿnhã tanhmã mē kãm akapêr to ho apa anê.

¹⁹⁻²⁰ —Nê kot kaj mē Tirtûm mã amnhÿ jarênh̄ kaxyw te axkrutre rÿ axkrunêpxire htã axpên wÿr akuprô nom mē kapxipixjaja apikuprônh̄ kêt nê. Kot paj mē akaêx ã mē anhÿhkô hã mē amar o xa. Mē ate ano ho ixpumunh̄ kêt tã pa wa mē anhÿhkô hã mē amar o xa. Jakamã kot kaj mē axpên wÿr akuprô nê mēmoj tã Tirtûm wÿr nhûm kaxkwa kamã ja hã mē ama. Nê mē ate hã axãhwÿr xwÿnh̄ta nhûm mē amã tanhmã ho. Kêr ka mē ã ixkamnãr rom axãmnhÿx amnhÿ to Inhÿpêxã hwÿr anê. Anê.

Nhûm pre ã Jejus mē inhmã kapêr anê.

Mê pahte tanhmã axpên nhÿpêx to hã mē pamã karō

Matêwre 6.14-15; Rukre 17.3-4; määnên Epes 4.32; Korosê 3.13

21 Tã nhũm Simãw Pêtre Jejus wÿr tẽ nẽ mêmoj tã hkukja nẽ kãm:

—Kwa inhmã mêmoj jarê Pahihti. Xà koja akõt ixtõ rÿ ixtõx tanhmã inhîpêx to pa amnhî tã omu nẽ ãm omu nẽ amnhî tã tanhmã ho hkêt nẽ. Nhũm axte tanhmã ixto nẽ axte tanhmã ixto ho 6 tã pa ãm amnhî tã omu nẽ amnhî tã tanhmã ho hkêt nẽ. ãm ho ijamakêtkati nẽ axte kãm ijamaxpêr kêt nẽ. ãm amnhî tã hipêx anhÿr o 7 nhũm ja amã mex nẽ nã? Anê.

22 Hãmri nhũm kãm:

—Nã kot kaj ã amnhî tã hipêx anhÿr o 7 pix kêt nẽ. Koja mêhõ xatã tanhmã ato rãhã nẽ ka amnhî tã omu nẽ ajaxwÿja amnhî tã xatã tanhmã ho hkêt nẽ. ãm amnhî tã omu nẽ ãm omu nẽ tãm hipêx rãhã ho ri apa. Mãmrî ho anhÿr o apa rãhã nẽ aa jam anhÿrer kêt nẽ.

23 —E kot paj ixprî hã mẽ amã tanhmã ja jarênh to ka mẽ inhma. Tirtũm na hte xatã mẽ ate tanhmã amnhî tomnuj to hã mẽ apumu nẽ mẽ anê rênh o pa. Te kot pahi kot ã hkwyê nhîpêx anhÿr pyrãk. Koja mẽ õ pahija kãm mẽ àpênh xwÿnhjaja kot kêp kãxpore ho ïpresta hã mẽ omunh kaxyw nhÿ. 24 Hãmri nhũm mẽ hwÿr ja ho tẽ nẽ kutã ãm. Ra kot kêp hikãxpore ho ïpresta rax xwÿnhjaja. 25 Tã no ãm aa akupÿm kãm òr kêt nẽ ra kêp ho hapêx pa. Hãmri nhũm pahija tee ri amnhî tã omu nẽ hkwyê mã hã amÿnê nẽ mẽ kãm: “E. Mẽ ma o tẽ nẽ hprõ nẽ hkrajaja nẽ òrkwÿ nẽ hikukrêx merohã ho wênê hpa nẽ hpãnhã kãxpore py nẽ man inhmã o tẽ. Kot ixpê ixkãxpore ho ïpresta nẽ akupÿm inhmã òr kêt mÿrapê.” Anê.

26 —Hãmri nhũm kot ho ïpresta xwÿnhnta tee ri amnhî tã kuma nẽ kutã hkõnkrã ho nhÿ nẽ amnhî to hwÿr kãm hihtÿx nẽ kãm: “Kwa nã ri ixto anhÿr kêt nẽ pahihti. Ixkamã axukaprî nẽ hkêt wehe. Nã kot paj akupÿm amã kugõ kãm ga.” Anê.

27 —Hãmri nhũm amnhî tã kuma nẽ kãm hkaprî nẽ. Hãmri nẽ kãm: “Tõe. Nã kot paj ã anhîpêx anhÿr kêt nẽ. Kot paj anhõ kõt kaxõnh pa nẽ kumê ka mãmrî ma ajamakêtkati nẽ axãmnhix apa.” Anê. 28 Nhũm ã kãm kapêr anê nhũm kuma nẽ hkînh nẽ. Hãmri nẽ ma tẽ nẽ kato nẽ ixkre kapem pòristi hõ pumu. Na pre ra kêp kãxpore hkwy ho grire nẽ ho ïpresta nhũm kato nẽ omu. Hãmri nẽ hwÿr tẽ nẽ amnhî kînhã òkre hã kumÿ nẽ kãm: “Kwa tokyx akupÿm ate ixpê kãxpore ho ïpresta pãnhã inhmã agõ.” Anê. 29 Hãmri nhũm tee ri amnhî tã omu nẽ ra ham kot pahi kutã amnhî nhîpêxta pyrã nẽ kutã hkõnkrã ho nhÿ nẽ kãm: “Kwa nã. Kwa ri ixto anhÿr kêt nẽ. Nã kot paj hpãnhã amã kugõ. Kwa ixkamã axukaprî nẽ hkêt wehe.” 30 Anhÿr tã nom nhũm kuma nẽ ãm kuma nẽ hã amÿnê. Hã hkwyê mã amÿnê nẽ mẽ kãm: “E mẽ ma jahti ho tẽ nẽ haxã. Koja kot ixpê kãxpore ho ïpresta pãnhã inhmã kugõ nẽ ri kormã kato nẽ ri amnhî pumu.” Anê. Hãmri nhũm mẽ kuma nẽ ma o tẽ nẽ haxã.

31 —Hãmri nhũm hkwyjaja tee ri mar o kuhê nhũm mẽ kêp ja omnuj nẽ nhũm mẽ pahi hwÿr agjê nẽ kãm harê. 32 Hãmri nhũm tee ri harênh ma nẽ kamã gryk tÿx nẽ akupÿm amnhî wÿr hã karõ nhũm akupÿm hwÿr axã nhũm kãm: “Tk. Kwa na ka pre amnhî tomnuj tÿx nẽ. Ate amnhî to ixwÿr nhũm inhmã akaprî nẽ ixte anhõ kõt kaxõnh nẽ mênh tã 33 ka amnhî kînhã anhîõta kamã axukaprî hkêt nẽ ri ã hipêx anê.” Anê. 34 Hãmri nẽ kamã gryk nẽ hã ò pòristi mã amÿnê nhũm mẽ ma o tẽ nẽ haxã. Mẽ kot mẽ hagjênh xã hã ixkre kamã apkati mẽ tanhmã mẽ kot hipêx to kaxyw nhũm mẽ kãm hã amÿnê. Tanhmã mẽ kot hipêx to rãhã nhũm kot akupÿm kãxpore raxta nhõr par nẽ ri kormã kator kaxyw nhũm mẽ ma o tẽnh haxã. ã mẽ ujarênh kot anhÿr. Anê.

³⁵ Nhũm pre ã Jejus mē ixte hkôt ixpa ho ixpa xwýnhjê mã kapēr anē. Hāmri nē mē inhmā:

—Ja pyrà nē koja ixkôt mē atō rý mē atōx tanhmā mē atomnuj to ka mē amnhĩ tã omu nē ãm omu nē ho ajamakêtkati kurê kumrêx nē axte kãm ajamaxpēr kêt nē. Te pahi kot mēhō nhō kôt kaxõnh par nē axte kãm hamaxpēr kēêta pyrāk. No kot kaj mē ã amnhĩ nhĩpêx anhÿr kêt nhũm kaxkwa kamã inhō Papaj ja hã mē apumu nē te ho pahi tee ri kot amnhĩ tomnuj xwýnhhta kot amnhĩ nhĩpêx ã omunh nē hã ãmnênh nhũm mē kot apkati mē tanhmā omnuj tota pyrāk o mē anhĩpêx. Anē.

19

Jejus kot mē pahte axpên kaga nē mē pahkurê

Matêwre 5.31-32; Makre 10.1-12; Rukre 16.18; mãânên Wam Korît 7.10-16

¹ Tã nhũm Jejus mē inhmā kapēr pa nē mē inhmā anē pa mē ixrohã Garirej rũm ixkato nē pyhti pē Jotãw hã rē nē hpãnhã ihkjê hã ri ixpa. Pika pē Jutej kamã. ² Hāmri nhũm mē ohtô nē Jejus pumu nē man mē ixwÿr mra nhũm mē omu nē mē kãm akupÿm mē ã xwýnhjê ho mex. ³ Hāmri nhũm Parijew nhō xwýnh kwÿjaja hwÿr mra. Hêx rom kot kamã hamak nē tanhmã ho kapēr punuj to kaxyw hwÿr mra nē kãm:

—Pa? Kwa mē inhmā mēmoj jarê. Tanhmã na pre amnepê m finat Mojesja mē pahte mē pahprô kaga hã mē panhĩgêjtjê mã karô hto? Xã kot mē pahprô pahkwÿm ri tanhmã amnhĩ nhĩpêx to pu mē hkaga nhũm ja Tirtũm mã mex nē nã? Anē.

⁴ Hāmri nhũm mē kãm:

—Nã na ka mē aprĩ hã Mojes kot tanhmã ja jarênh to mar mex kêt nē. Ja kot anhÿr kêt. Amnepê m mēmoj piitã hkrax kãm na pre Tirtũm my nē nija wa hipêx. Axpên kaxyw wa hipêx. ⁵ Hāmri nē wa hkukamã tanhmã wa kot amnhĩ nhĩpêx to hã wa harê nē wa harênh o:

Koja mēmyjaja hprô kaxyw hãmri nē gryk ã katorxã mē hipêêxã wa hkaga nē ãm hprô kôt pix mã pa ho pa. Te wa tipxi nē ri wa pa pyrāk o amnhĩ nhĩpêx. Anē.

—Na pre ã Mojes Tirtũm nhÿ hã mē kãm ja jarênh anē. ⁶ Jakamã koja te wa tipxi nē ri wa pa pyrāk o axpên nhĩpêx o pa. Tirtũm tãm kot axpên mã wa ôr kênã kot kêt wa axtem nē ri htÿx ri hamaxpēr nē axpên kaga. Anē.

⁷ Hāmri nhũm mē kuma nē kãm:

—Tÿ. Nom finat Mojes na pre mē pakukamã mē panhĩgêjtjê mã ã ja hã karô anē nē mē kãm:

Kot kaj mē aprô kaga kaxyw hãmri nē ra kêp aprô hkêt ã hã kaga nhĩpêx nē kãm agô nē amnhĩ nē hano kê ma tē.

—Anhÿr o na pre mē kãm hã karô. Tã ka na ka mē ixte axpên kaga hkêt ã mē inhmã karô. Anē.

⁸ Hāmri nhũm mē kuma nē mē kãm:

—Tÿ no ãm mē kãm Tirtũm kapēr kôt amnhĩ nhĩpêx prãm kêt jakamã na pre ã mē kãm ja jarênh anē. No amnepê m mēmoj piitã hkrax kãm na prem ã amnhĩ nhĩpêx anhÿr o pa hkêt nē. ⁹ Jakamã kêr ka mē aprô kaga hkêt nē apa. Kot kaj mē hkaga nē hpãnhã nhãm mēhō ho aprô nhũm Tirtũm noo mã te ate wam aprô kamã nhãm aprô nyw o amnhĩkati pyrāk. Tirtũm pē ja omnuj tÿx nē. Rý koja mēhō hprô kaga ka hpãnhã ho aprô nhũm Tirtũm noo mã te ate wam mjên pē ho amnhĩkati pyrāk. Ja mãânên Tirtũm pē omnuj tÿx nē. Anē.

Nhũm pre ã Parijew nhõ xwýnhjê mã kapêr anê. ¹⁰ Hãmri pa mẽ ixte hkõt ixpa ho ixpa xwýnhjaja ã kapêr anhÿrja ã kuma nê kãm:

—Xà na hte mẽ mjên ra kãm mẽ hprõ hkĩnh kêt tâ hkaga hkêt nê arĩ hkõt pa ho pa nhũm hte Tĩrtũm mã ja mex nê nà? Jakamã kwa xà kot paj mẽ nhÿrmã ixprõ kaga pymaj ixprõ hkêt kumrêx nê ixpa ho ixpa nhũm ja mẽ inhmã mex nê nà? Anê.

¹¹ Hãmri nhũm mẽ inhmã:

—Nà ãm hãmri na ka mẽ ja jarê. No mẽ ate harênhja na mẽ piitã mẽ kãm mex kêt. Koa Tĩrtũm tãm amã aprõ hkêt ã ajarê ka rĩ aprõ hkêt nê ahte ajamakêtkati nê ri apa. ¹² Na htem piitã hprõ nê pa hkêt nê.

Na hte kamã tanhmã mẽ kute xwýnhjaja kormã hprĩre ri tanhmã kute mÿrapê kãm hprõ hprãm kêt nê pa.

Nê kamã tanhmã mẽ ho mÿrapê nhũm mẽ hkurê hkêt nê hprõ hkêt nê pa.

Nê kamã mẽ kãm Tĩrtũm mã tanhmã amnhĩ to ho pa pix prãm xaj kãm hprõ hprãm kêt nê pa.

Tã kot kaj mẽ jajê pyrã nê ã amnhĩ nhĩpêx anhÿr prãm nê rĩ kam nê aprõ hkêt nê apa. Anê.

Jejus kot amnhĩ nê mẽhprĩjê janor kêt ã harênh

Makre 10.13-16; Rukre 18.15-17

¹³ Tã nhũm Ijaew kwýjaja Jejus pumu nê hwÿr mẽ hkrarejê jamÿ nê mẽ o mra. Kot mẽ hã ãhkra jaxwÿr nê mẽ ho Tĩrtũm wÿr kaxyw hwÿr mẽ o mra. Hãmri pa mẽ ixte hkõt ixpa ho ixpa xwýnhjaja tee ri mẽ omu nê tanhmã nê mẽ kãm ixkapêr to nê mẽ kãm:

—Tk. Mo kaxyw na ka mẽ Jejus wÿr mẽ o mra? Kormã mẽ ràxre kênã. Kwa mẽ ma akupÿm mẽ o mra nà? Anê.

¹⁴ Hãmri nhũm Jejus mẽ inhma nê mẽ inhmã:

—Kwa nã mẽ ri inhnê mẽhprĩjê kurê hkêt nê. Kwãr mẽ mãmrĩ ixwÿr mẽ o mra. Anê.

Hãmri nê amnhĩ wÿr mẽ mẽ kãm hpa ho apê nhũm mẽ hwÿr mẽ o mra nhũm mẽ kuri kuhê nhũm mẽ omu nê mẽ hã mẽ inhmã:

—E mẽ jarejê pumu. Na htem hamakêtkati nê hkĩnh nê ri pa. Nê mẽ kãm amnhĩ to rũnh prãm kêt nê. Tã Tĩrtũm kôt mẽ kot amnhĩ nhĩpêx o mẽ pa xwýnhjaja te mẽ kot jajê pyrã nê kãm amnhĩ to rũnh prãm kêt nê pa. Anê.

¹⁵ Hãmri nê mẽ hã ãhkra jaxwÿ nê mẽ ho Tĩrtũm wÿ hãmri nê mẽ inhmã anê pa mẽ ma axte mẽ kurũm mō.

Kàxpore rũnh xwýnh jarênh

Makre 10.17-22; Rukre 18.18-23; mããnen Rômãn 3.19-20; Wam Ximotre 6.6; Xiakre 2.10

¹⁶ Tã nhũm Ijaew òja Jejus wÿr tẽ nê kãm:

—Pa mẽ ijahkre xwýnh? Kwa inhmã mẽmoj jarê. Tanhmã kot pa nhÿrmã Tĩrtũm ri ixtĩr tũm nê ixpa ho ixpa kaxyw amnhĩ nhĩpêx to wehe? Anê.

¹⁷ Hãmri nhũm kãm:

—Tk. Ra Tĩrtũm kot nhÿrmã mẽ atĩr tũm nê apa kaxyw mẽmoj tã mẽ amã karõ nhũm ate mar mex kênã kot ka kêt ri axte ja hã ixkukja. Nã Tĩrtũmja mex o mex jakamã kot kaj amã kuri atĩr tũm nê apa hprãm hã kot kaj kapêr kôt amnhĩ nhĩpêx no ri apa. Anê.

¹⁸ Hãmri nhũm kãm:

—No nhÿ kapêr kôt kot paj amnhĩ nhĩpêx o ri ixpa wehe? Anê.

Hãmri nhũm kãm:

—Na pre mẽ amã mẽmoj tã karõ ho:

Kêr ka mê axpên par kêt nê.
 Nê nhâm mê hprô ho amnhîkati hkêt nê.
 Nê mê kêp axâhkînh kêt nê.

Nê tanhmâ mê ho axêx to hkêt nê.

¹⁹ Nê anhîpêêxâ mê akatorxâ wa hâ apijaâm nê wa ho mex pê wa kutâ anojarêt o ri apa.

Nê amâ akwÿjê hâ ma ho te ka amâ amnhî tâ ma pyrâk o mê hipêx. Jao tãm mê hipêx o ri apa.

E kot kaj amâ nhÿrmâ Tirtûm kuri atîr tûm nê apa hprâm hâ kêr ka â amnhî nhîpêx anhÿr o ri apa. Anê.

²⁰ Hâmri nhûm kuma nê kâm:

—Ku nhûm. Ra â ixte amnhî nhîpêx anhÿr o ri ixpa kênâ. Nom te kormâ ixîr tûm nê ixpa kaxyw ixte tãm kêt pyrâk. Kwa axte inhmâ mêmoj jarê nâ? Anê.

²¹ Hâmri nhûm kâm:

—Nâ kormâ mêmoj pyxi nê arîk. Na ka amâ akukrêx rax prâm tÿx o amâ Tirtûm prâm jakre. Jakamâ ma akupÿm tê nê akukrêx rax o wênê hpa nê hpânâ kâxpore jamÿ nê ma mê kêp amrakati xwÿnhjê mâ ôr pa. Hâmri nê rî akupÿn ixwÿr tê nê rî ixkôt apa ho apa. Anê.

²² Hâmri nhûm kuma nê tee ri amnhî kukamâ hamaxpêr. Kâm hikukrêx rax japê nê kâm kamâ îhkra karo hprâm kêt nê. Hâmri nê tee ri Jejus kot â kâm hâ karô anhÿrja ma nhûm ja kêp omnuj nê nhûm ma akupÿm htêm kurê kumrêx.

²³ Hâmri nhûm Jejus tee ri omu nê mê inhmâ:

—Hêxta waa nê. Koja mê hikukrêx rûnh xwÿnhjaja ohtô nê kâm mê hikukrêx japê xâj Tirtûm mê wa ixri htîr tûm nê pa ho pa hkêt nê. Wa ixte amnhî nhîpêxja mê kêp hihtÿx. ²⁴ Mê kâm hikukrêx rûnh mâ îhkra karo hprâm kêt râhâ tee ri kâm Tirtûm kôt amnhî nhîpêx prâm kaprÿ. Te ho mêhō kot menh kagô hâ hkre nê kâm kagô katôk prâm kêt râhâ kâm guhkrax kâm âr prâm kaprÿta pyrâk. Anê.

Nhûm pre â Jejus mê inhmâ kapêr anê. ²⁵ Hâmri pa mê kuma nê tee ri amnhî kukamâ ijamaxpêr nê kâm:

—Kwa mê ixpiitâ mê inhmâ mê ixukrêx japê kênâ. Jakamâ xâ kot paj mê ixpiitâ nhÿrmâ war ari ixîr tûm nê ixpa ho ixpa hkêt nê nâ? Anê.

²⁶ Hâmri nhûm mê inhmâ:

—Nâ kot kaj mê amnhî krâ hkôt mê amâ mê akukrêx japêja mâ anhÿrer kêt nê. Âm Tirtûm pix na hte ja kaxyw tanhmâ mê akrâ hto ka mê amâ akukrêx japê hkêt nê. Jao ra mê apê Tirtûm mê wa ixri atîr tûm nê mê apa ho mê apa mâ xwÿnh. Anê.

²⁷ Hâmri nhûm Simâw Pêtre kâm:

—Kwa no we mê pajaja Pahihti? Na pa prem agryk â mêmoj piitâ hkaga hpa nê akôt ixpa ho ixpa. Jakamâ kot paj mê nhÿrmâ war ari ixîr tûm nê ixpa ho ixpa nâ? Anê.

²⁸ Hâmri nhûm kuma nê mê ixpiitâ mê inhmâ:

—Tÿ. Kot paj nhÿrmâ mêmoj piitâ ho nyw pa hâmri nê ixte mê ho amnhîptâr o ixkrî xâ maati kamâ nhÿ nê mê piitâ mê kot tanhmâ amnhî nhîpêx to hâ mê omunh xâ hkôt tanhmâ mê harênh to. Tâ mê kajaja mê ate ixkôt apa ho apa xwÿnhjaja kot kaj mê inhmâ Ijaew kot amnhî nhîpêx â mê omunh xâ hkôt ahpÿnhâ tanhmâ inhmâ mê harênh to. Mê mex â mê harê rÿ mê mex kêt â

mê harê. Kot kaj mê ã inhmã mê harênh anê. ãm hãmri na pa mê amã ixkapêr anê.

²⁹—Nê ka mê atô inhmã tanhmã amnhĩ nhĩpêx to ho apa kaxyw akwýjê re nê ma inhmã mêmoj to anhýr o ri apa. Tanhmãan anhörkwýr rý atô rý atôx re. Rý aprô nê akrajê re. Rý akatorxã mê anhĩpêxã wa are. Rý akukrêx piitã rer pa hãmri nê ma mê piitã mê kãm ixkapêr o mê ahkre ho ri mê hkôt apa. Hã kot paj mê apumu nê mê ato mex rax nê. Hãmri ka mê ma mê hkôt apa nê mê kãm ixkapêr jarênh o apa nhũm mê kot mê amar xwýnh kwýjaja mê ama nê kãm mê akĩnh nê. Nê ra mê ate akwýjê rer par tã mê tãmjaja te mê apê mê hkra rý mê htô rý mê htôx pyrãk o mê anhĩpêx nê mê ato mex o pa. Hãmri ka mê nhýrmã ty nê ma Tirtũm mê wa inhô krĩ hwýr api nê wa ixkuri amex kumrêx nê atũr tũm nê apa ho apa. ³⁰ Nom kwa kêr ka mê amnhĩ tã ja ma nê amnhĩ to rũnh xwýnh ã amnhĩ kamnhĩx kêt nê. Jar mê kot amnhĩ to rũnh ã amnhĩ to jarkrar xwýnhjaja koja mê nhýrmã amnhĩ to hkryre hã amnhĩ pumu. No jar mê kot amnhĩ to hkryre xwýnh ã amnhĩ jarênh xwýnhjaja koja mê nhýrmã amnhĩ to rũnh ã amnhĩ pumu. Anê.

20

Jejus kot nhýrmã hkrajê ho mex ã harênh Rômãn 9.14-16

¹ Nhũm Jejus arĩ mê ixte hkôt ixpa ho ixpa xwýnhjê mã awjarê nê mê inhmã:

—Nê kot paj nhýrmã tanhmã mê ato mex to. Te ixpê hpur nhô dõn kot amnhĩ nhĩpêx pyrãk o mê anhĩpêx. Koja pur nhô dõnja ihpur kãm mêmo xô ra hkã hpa nhũm omu hãmri nê kaxyw mê àpênh xwýnhjê japêr kaxyw ma gãm tẽ. Nê gáp xa nê mê kãm akir nhũm mê hã akuprô. ² Hãmri nhũm mê kãm: “E. Kot kaj mê jarãhã inhmã ixpur kãm apê. Kot kaj mê inhmã axàpênh o amýkry pa hpãnhã mê kot apkati pixi hã mê àpênh pãnhã mê kãm amnhĩrer xãja kôt mê amã amnhĩre.” Anê hãmri nhũm mê kuma nê kãm: “Tôe. Nà kot paj mê amã apê.” Anê nhũm pur wýr mê kurê nhũm mê ma kãm àpênh mã mra.

³—Tã nhũm arĩ kýx mã myt tẽ nhũm pur nhô dõn akupým gãm tẽ nhũm mê hkwýja arĩ kuhê. ⁴ Nhũm tee ri mê omu nê mê kãm: “Kwa mon ka mê axàpênh kêt nê arĩ akuhê? E. Mê ma wamtajê hkôt mra nê inhmã apê pa hpãnhã mê amã amnhĩrer mex nê.” Anê. ⁵ Hãmri nhũm mê kuma nê ma mê hkôt mra. Tã nhũm ra myt kaxkwa nhĩpók ri ajêt nhũm hpur nhô dõnja mã hkwýjê ho anê nê. Kê axte mê hkôt jajê jano nhũm mê ma mê hkôt mra. Tã nhũm ra myt ahpanh grire nhũm ma akupým kêwe gãm tẽ nê mã mê ho anê nê axte mê hkôt jajê rê.

⁶—Tã nhũm ra myt grire nhũm ma akupým kêwe gãm tẽ nê jajê pumu nhũm kê wem arĩ gáp kuhê. Hãmri nhũm tee ri mê omu nê mê kãm: “Kwa mon ka mê axàpênh kêt nê atýx gáp akuhê ho akuhê?” Anê. ⁷ Hãmri nhũm mê kãm: “Nà mêhõ kot mê inhmã mê ixàpênh ã karõre hã.” Anê. Hãmri nhũm mê kãm: “Tôe. Mê ma mê hkôt ixpur wýr mra nê inhmã mãn apê.” Anê hãmri nhũm mê kuma nê ma hkwyjê hkôt mra.

⁸—Tã nhũm ra kamãt. Hãmri nhũm hpur nhô dõnja kãm àpênh xwýnhjê krãhtũm wýr tẽ nê kãm: “E. Ma mê hwýr tẽ nê mê kãm anê kê mê àpênh kaga nê man akôt mra ka inhmã mê kãm amnhĩre. Nom kêr ka hapu hã mê mör xwýnhjê kumrêx mã amnhĩre nê wam mê mör xwýnhjê ho hapu nê mê kãm amnhĩre.” Anê. Hãmri nhũm kãm: “Tôe. Nà kot paj mê ho anê.” Anê. ⁹ Hãmri

nê ã mē kām amnhīrer anē. Hapu hã mē mrar xwýnhjê kumrêx mã amnhīre. Te mē kot kwýhtã àpênh o amýkry pyrãk o nhũm hpãnhã mē kām amnhīre. ¹⁰ Hãmri nhũm wam mē mrar xwýnhjaja ja hã mē omu nê hkĩnh nê. Hãmri nê htýx hamaxpêr o: “Nà kot paj xep kãxpore jamýnh rax o mē hakre. Ixãpênh rax o ixte mē hakrenh kênã.” Anhýr tã no nhũm mē piitã mē kām amnhīrer o axpên pyrãk. Ra pur nhõ dõn kot kãm hã karõ xã hkõt. ¹¹ Hãmri nhũm mē hamý nê tee ri hkre kamã omu nê we ra hpur nhõ dõnja kamã gryk nê. ¹² Hãmri nê hwýr mra nê kãm: “Kwa jajaja na mē amã àpênh o ore pyxi nê. No kêt mē pajaja na pa mē kwýhtã ixãpênh rax o kamãt. Arĩgro htýx kãm ixãpênh o ixãm o ixtã kamãt tã ka pêr ãm mē inhmã amnhīrer o axpên pyrãk. Kwa na ka mē ixtomnuj nê.” Anê. ¹³ Hãmri nhũm mē kuma nê mē kãm: “Tk. Nà na pa mē atomnuj kêt nê. Na pa kwýhtã tanhmã mē amã amnhīrer to xã jarê ka mē inhma nhũm ja mē amã mex nê ka mē ma hwýr axãpênh mã mra. ¹⁴ Kwa mē akãxpore jamý nê ma mra. ãm pa inhmã hprãm xã hkõt na pa ã mē amã amnhīrer anê. ¹⁵ Ixkãxpore jakamã kot paj nhãm inhmã mēhõ mã õr prãm xã hkõt kãm kugõ. Tã ka mē ã mē hã ixkamã agryk anê. E mē akãxporeja mý nê ma mra.” Anê. Nhũm ã hpur nhõ dõn mē kãm kapêr anê. ã mē ujarênh kot anhýr. Anê.

¹⁶ Nhũm pre ã Jejus mē inhmã ujarênh anê nê mē inhmã:

—Ja pyrã nê wam mē ate ixkõt amnhī xunhwýr xwýnhjaja nê hapu hã mē kot kormã ixkõt amnhī xunhwýr mã xwýnhjaja kot paj nhýrmã mē apiitã mē ato mex kumrêx o axpên pyrãk. Anê.

*Jejus kot htyk kukamã amnhī jarênh
Makre 10.32-34; Rukre 18.31-34*

¹⁷ Tã nhũm Jejus mē inhmã anê pa mē ixrohã ma Jerujarê hwýr mõ. Mē ohtõjê hkõt mõ. Hãmri nhũm Jejus mē ixpê 12jê mã anê nê mē ixkwýjê hkàx ã mē inhmã kapêr kaxyw ahte hapu hã mē ixto mõ. ¹⁸ Hãmri nê mē inhmã amnhī kukamã tanhmã amnhī jarênh to nê mē inhmã:

—E na pu mē ra Jerujarê hwýr mõ. Kamã koja mē pahkwýjaja inhīpêx kati nê. Koja mē patre krãhtũmjê mē Mojes kapêr o mē ahkre xwýnhjê nhĩhkram ijaxã nhũm mē kot ixpĩr kaxyw ixtã amýnê. ¹⁹ Koja mē kãm ixkurê xwýnhjaja ixpnê nê Rõm nhõ xwýnhjê nhõ põristijê hwýr ixto tẽ nê mē kãm tanhmã ixto hêx to. Hãmri nhũm mē kuma nê mē mar xã hkõt tanhmã inhīpêx to. Nhũm mē hkwyjaja ixtã hpêr o axkê nê ixtã akunha nhũm mē hkwyjaja ixto kapêr punuj nê tanhmã ijapry hto nê ixtak. Hãmri nê ma ixto tẽ nê pĩ kahpa hã inhõ nê ixpĩ. ã koja mē inhīpêx anê. Nom kot paj ixyk ã ixtã apkati axkrunêpxi nhũm Tirtũm akupým ixto ixtĩr. Anê.

Xiakre mē Juãw wa katorxã kot wa ho Jejus wýr ã harênh

Makre 10.35-45; mããnen Rõmãn 12.3, 12.10, 12.16; Epes 4.2; Piripos 2.3-8; Xiakre 4.6; Wam Pêre 5.3

²⁰ Tã nhũm Jepetew prõja amnhī kõt Jejus wýr hkra Xiakre mē Juãwja wa o tẽ. Kot wa ho Jejus wýr kaxyw hwýr wa o tẽ. Mē ixpyrà nê wa kot Jejus kõt pa ho pa xwýnhjê hõ na pre wa nhũm wa katorxãja Jejus wýr wa o tẽ. Hãmri nê kutã hkõnkrã ho tẽm nê nhý ²¹ nhũm kãm:

—Pa mo na? Anê.

Hãmri nhũm kãm:

—Ma ixkrata na pa ixte wa ho awýr kaxyw awýr wa o tẽ. Xê kot kaj nhýrmã ate mē piitã mē ho amnhĩptãr kaxyw nhý nhũm ixkrata wa akutã anhijê nê

wa kêp anhô kôwenatô nê akutã anhîjê nê wa ato nhÿ. Ja prãm xaj na pa ã wa ho awÿr anê. Anê.

²² Hãmri nhũm kuma nê Xiakre mê Juãw wa omu nê wa kãm:

—Nà na war akatorxàja htÿx ã war ato ixwÿr anê. Koja mê tokyx ipÿ kot paj amnhî xà htÿx kãm ijamak kãm ty. Tã xà koja mê ixpyrà nê ã war anhîpêx anê ka wa ixpyrà nê amnhî xà htÿx kamã ajamak rax kãm ty nà? Anê.

Hãmri nhũm wa kãm:

—Tÿ. Nà kot pa wa ijaxwÿja anê nê apyrà nê amnhî xà htÿx kãm ijamak kãm ty. Anê.

²³ Hãmri nhũm wa kãm:

—Nà ãm hãmri na ka wa amnhî jarê. War ate ixpyrà nê ixkôt amnhî xà htÿx kãm ajamak kãm atyk mã kênã. Tã nom war akatorxà kot war ato ixwÿrta ã kot paj tanhmã war amã nê hkêt nê. Kêt inhô Papaj tãm koja ixkaxyw mêhõ japêr nhũm inhîhkô hã nhÿ. No pa kot paj amnhî kaxyw mêhõ jarênh kêt nê.

Anhÿr o wa kãm kapêr. ²⁴ Hãmri pa mê ixte wa uràk nê Jejus kôt ixpa ho ixpa xwÿnhjaja wa katorxà kot ã wa ho Jejus wÿr anhÿrja ã kuma nê wa kamã inhgryk nê. Hãmri nê axpên mã ixkapêr o:

—Tk. Nà koja Juãw mê Xiakre wa nhÿrmã kêp ô kôwenatô nê mê pahto amnhîptâr kêt kumrêx. Anê.

²⁵ Nhũm Jejus mê inhma nê amnhî wÿr mê ixpiitã mê inhmã hpa ho apê nê mê inhmã:

—E mê amnê ixwÿr axkamê pa mê amã awjarê mân. Anê.

Hãmri pa mê hwÿr axkamê nhũm mê inhmã:

—E mê inhma. Na hte Ijaew kêt xwÿnhjê nhõ pahijaja ã amnhî nhîpêx anhÿr o ri pa nê amarî hkrî xà kamã hkrî ho hkrî. àhpumunh tÿx jakamã amarî ixkre hkre jakry kamã hkrî ho hkrî nê kãm mê àpênh xwÿnhjê pix mã mêmõ mê àpênh ã karõ. Na htem ã amnhî nhîpêx anhÿr o hkrî. Nê mê kot mex ã harênh kaxyw tanhmã mê ho mex to ho pa. ²⁶⁻²⁷ Tã no mê kajaja. Kêr ka mê ho mê uràk kêt nê. ãm te amarî ri mê apa pyràk o axpên nhîpêx o ri apa. Nê te mê apê mê kãm axàpênh xwÿnh pyràk o amnhî nhîpêx o ri mê hkôt apa. No kêr ka mê ho amnhîptâr mã ajamaxpêr o ri apa hkêt nê. ²⁸ Mê ate mêmõj tã pa ixkutã anojarê ho apa kaxyw na pa pre mê awÿr ixwÿrk kêt nê. Ixte amarî mêmõj to mê kamjaja mê akutã inhnojarê ho ixpa kaxyw na pa pre mê awÿr wrÿ. Nê mê ate ixkôt amnhî xunhwÿr xwÿnhjê nê ixtyk kaxyw na pa pre wrÿ. Anê.

Jejus kot no hkre xwÿnh wa ho mex ã harênh

Matêwre 9.27-31; Makre 10.46-52; Rukre 18.35-43

²⁹ Tã pa mê Jejus kôt kormã Jerujarê hwÿr ra Jeriko htêp o mõ. Hãmri nê kurũm ixkaton mõ nhũm mê ohtô nê mê ixkôt mra. ³⁰ Nhũm pry nhîhkjê hã no hkre xwÿnh wa àhwÿr o hkrî xwÿnhja wa amnhî wÿr mê inhmrar mar o nhÿ. Mê ohtô nê Jejus kôt mê mrar xwÿnhjê mrar ma nê mê kãm:

—Kwa mo na? Mêmõj wÿr na ka mê axohtô nê mra? Anê.

Hãmri nhũm mê wa kãm:

—Nà Jejus pê Najare nhõ xwÿnhnta kôt na pa mê mra. Anê.

Hãmri nhũm wa mê kuma hãmri nê kàx pê Jejus mã kapêr nê kãm:

—Pa Pahihti? E apê mê inhô Pahihti mex na ka. Te apê amnepê m anhîgêt pahihti Tawita pyràk. Jakamã kwa wa ixkamã axukaprî nê akupÿm wa ixto mex. Anê.

³¹ Hãmri nhũm Jejus kôt mê mör xwÿnhjaja wa kuma nê wa kãm:

—Tk. Kwa war akapêr kêt nê nhÿ nà. Anê.

Tã no nhÿm wa âm mē kuma nē xatã amnhĩ to kuwÿ. Kàx pē amnhĩ to kuwÿ. ³² Hāmri nhÿm Jejus wa kuma nē xa nē wa omu nē wa kām:

—Pa mo na? Tanhmã kot pa wa ato? Anê.

³³ Hāmri nhÿm wa kām:

—Nà akupÿm wa inhmã wa ixrīt mex prãm. Anê.

³⁴ Hāmri nhÿm kām wa hkaprĩ nē wa no htok nhÿm wa akupÿm rīt mex kurê kumrêx. Hāmri nē rīt mex ã amnhĩ pumu nē hkĩnh tÿx nē ma Jejus kôt hkwyjê hkôt mō.

21

Jejus kot Jerujarê hwÿr àr ã harênh

Makre 11.1-11; Rukre 19.28-40; Juãw 12.12-19

¹ Tã nhÿm Jejus kormã Jerujarê hwÿr kormã mō. Pa mē hkôt mō nē ra Petake hwÿr ixãhtêp o mō. Hixêt pē Oriwêhti kahti ri na pre krĩja xa. Jakamã pa mē wa hwÿr ixãhtêp o mō nhÿm Jejus mē ixte hkôt ixpa ho ixpa xwÿnhjê wa ho axkrut nē amnhĩ kukamã wa kumê. ² Nē wa kām:

—E wa ma krĩ mÿj wÿr mē ixkukamã wa tē. Nē wa hwÿr axà nē nhÿri jumênre mē hkra wa kām ê nē wa âm xwÿnh wa omu hāmri nē kām ê xa hpôt nē man akupÿn amnê hamê wa o tē. ³ Kojã mēhō ja hã war apumu nē hã tanhmã war amã kapêr to ka wa kām ã ijarênh anê nē kām: “Nà mē panhō Pahihti na hã karō pa wa hwÿr tē.” Anhÿr o wa kām ijarê. Hāmri nhÿm war ama nē war amã ör kurê kumrêx. E wa ma hwÿr tē. Anê.

⁴ Tirtÿm kapêr ã kagã htÿm ra kot ja kukamã harênh. Na pre ra Tirtÿm nhÿ hã kapêr xwÿnhjê hō ja jarê nē hã kagã ho:

⁵ Pa Jerujarê nhō xwÿnhjaja. Kwa mē tee ri amnhĩ kukamã ajamaxpêr ho amã ma hkêt nē. Ota mē anhō pahi nywta ra jumênre hã nhÿ nē mē awÿr hpôx o tē. Te kot amnhĩ to grire xwÿnh pyrãk o amnhĩ nhĩpêx nē tē.

⁶ Anhÿr o kot hkukamã harênh jakamã nhÿm Jejus amnhĩ kukamã ja wa kumê hāmri nhÿm wa ma hwÿr htêm kurê kumrêx. ⁷ Nē krĩta wÿr pøj nhÿm Jejus kot wa kām harênh xà hkôt nhÿm wa jumênreta pumu. Hāmri nē hamê wa kām ê xà hpôt nē ma Jejus wÿr wa o tē. Hāmri nē kaxyw amnhĩ xê hkwy hkwrÿ nē kām ho jumênre nywta kô kahty. Nē kām ho htÿx nē o xa nhÿm Jejus hã nhÿ nē hã mō. ⁸ Kormã Jerujarê hwÿr hixêt ã àpir o mō. Nhÿm mē kot omunh o kuhê xwÿnhjaja hkĩnh nē ma hkukamã pry ho mex kaxyw amnhĩ xê hkwyptyr ho mō. Nē pō hkwy jakã nē utyr o mō. ⁹ Nhÿm mē hkwyjaja Jejus kukamã mra nhÿm mē hkwyjaja hapu hã hkôt mra. Nē piitã kãx pē Tirtÿm mex o mex ã harênh o hkôt mō nē harênh o:

Ota Tirtÿm kot mē pahwÿr mênh xwÿnhnta ra pøj. Âm hāmri na mē pahwÿr wrÿ. Ja na mex kumrêx. Kêp mē panhō Pahihti mex na. Âm hāmri na pre Tirtÿm mē pahwÿr kumê. Tirtÿm mex kumrêx. Âm mex o mex.

Anhÿr o Jejus kôt Jerujarê hwÿr harênh o mō. Kot mē ho amnhĩptãr kurê kumrêx ã hkamnhix jakamã hkĩnh nē hkôt ã harênh anhÿr o mō. ¹⁰ Hāmri nhÿm krĩ nhō xwÿnhjaja tee ri mē kuma nē axpên mã:

—Kwa mēhō na we hpôx o mō nhÿm mē ã hkôt harênh anhÿr o mō? Anê.

¹¹ Hāmri nhÿm Jejus kôt mē mrrar xwÿnhjaja mē kuma nē mē kām:

—Nà Tirtÿm nhÿ hã kapêr jarênh xwÿnh pē Jejus na. Kêp Garirej kamã krĩ pē Najare nhō xwÿnhnta na. Anê.

*Jejus kot Tirtûm nhôrkwÿ hwÿr àr ã harênh
Makre 11.15-19; Rukre 19.45-48; Juãw 2.13-22*

¹²⁻¹³ Tã hãmri nhùm Jejus Jerujarê wÿr axà nê jumênre rùm wrÿ nê ma Tirtûm mã amnhî jarênh xà hã ixkre hwÿr tê nê axà. Hãmri nê tee ri mê kot tanhmã ixkre kamã amnhî nhîpêx to hã mê omunh o xa. Nhùm mê axtem nê môx nê ôwêhti nê tuuti ho wênê ho kuhê. Mê kot haprôr nê Tirtûm mã amnhî jarênh kaxyw kãm hpar nê ôr kaxyw mê kãm ho wênê ho kuhê. Nom axtem nê mê kãm hã ohtô rax kãm mê kãm ho wênê. Hãmri nhùm Jejus mê hwÿr axà nê tee ri mê omu nhùm ja kêp omnuj tÿx kumrêx. Hãmri nhùm mê hwÿr tê nê mê kot kâxpore ho pinhpanh xwÿnhjê pê mê ô mêsti rênh pa. Nê mê kot tuuti ho wênê xwÿnhjê pê hkrî xà hkujate nê rênh pa. Hãmri nê mê kãm:

—Tk. Kwa Tirtûm kapêr ã kagã htùm kot ixkreja jarênh kot:

Inhôrkwÿja ãm mê ate inhmã amnhî jarênh xà hã ixkre pix kaxyw na. Anhÿr o kot harênh tã ka mê axtem nê kamã ã amnhî nhîpêx anê. E kwa mê ajapôx tokyx anê. Anê.

Hãmri nê mê kator pa nhùm mê ma hapêx. ¹⁴ Hãmri nhùm mê no hkre xwÿnhjaja nê mê hyk o mê pa xwÿnhjaja mra nê agjê nê Jejus kutã kuhê nhùm mê omu nê akupÿm mê ho mex. ¹⁵⁻¹⁶ Hãmri nhùm mêhprî hkwÿjaja hwÿr mra nê kuri kãm mex o mex ã gre nê kãm grer o: Amex kumrêx Pahihti.

Tirtûm na pre mê ixwÿr amê.

Kot kaj te anhîgêt Tawi pyrà nê mê ixto amnhîptar o apa.

Anhÿr o kãm grer o kuhê. Hãmri nhùm patre krãhtùm mê Tirtûm kapêr tùm o mê ahkre ho mê pa xwÿnhjaja tee ri ã mê grer anhÿr ã mê kuma. Nê tee ri Jejus kot mê no hkre xwÿnhjê mê mê hyk o mê pa xwÿnhjê ho mex ã omunh o kuhê nê gryk nê Jejus wÿr tê nê kãm:

—Kwa na mêhprîjaja mê grer kãm ã ajarênh anê ka mê mar kêt nê? Mê grerja mexti hã. Anê.

Hãmri nhùm mê kãm:

—Tÿ ixte mê mar kênã. Tirtûm kãm hprãm xà hkôt na mê ã inhmã inhmex o inhmex ã ixtã grer anê. Tirtûm kapêr ã kagã htùm kot ã mê hkukamã harênh kot anhÿr. Mê harênh kot:

Koja mêhprîjaja Pahihti mã mex o mex ã grer o kuhê.

Anhÿr o kot mê hkukamã harênh kênã. Tã mân ka mê kormã kamã harênh kêt jakamã na ka mê ja jarênh mar kêt nê. Kwãr mê mãmri ã inhmex ã grer anê.

¹⁷ Anhÿr o mê kãm kapêr hãmri nê mê inhmã anê pa mê ixkreta rùm ijapôj nê ma akupÿm Petãn wÿr mra nê kamã amnhîm hikra.

*Jejus kot mêmo hpâr mã kapêr ã harênh
Makre 11.12-14; mãânên Xiakre 1.6*

¹⁸ Tã nhùm kwÿhtã nhùm Jejus kãnhmã nhÿ nê mê inhmã anê pa mê ixrohã ma akupÿm Jerujarê hwÿr mra. Hãmri nê kormã mô nhùm Jejus pry kahti ri ra kãm prãm nê. ¹⁹ Hãmri nê mêmo pî pê fikêhti jarênhja pumu nê kot ô hkwÿ rênh nê hkrêr kaxyw hwÿr màt. Hãmri nê tee ri ô japêr nhùm ô hkêt nê ãm hô pix harir. Hãmri nhùm tee ri omu nê kãm:

—E kot kaj axte axô hkêt kumrêx.

Anhÿrja o nhùm grã par kurê kumrêx. ²⁰ Hãmri pa mê ixte hkôt ixpa ho ixpa xwÿnhjaja omu nê Jejus mã:

—Kokÿÿ. Kwa tanhmã na we amnhî nhîpêx to nê grã kurê kumrêx? Anê.

21 Nhũm mẽ inhmã:

—Nà kot kaj mẽ ixpyrà nê fikêhti kot tanhmã amnhĩ nhĩpêx to kaxyw Tĩrtũm mã ajamaxpêr tỳx nê nhũm amã hprãm xà hkôt amã tanhmã hipêx to. Nom kêr ka mẽ ajamaxpêr kati ho tee ri hkukamã ajamaxpêr kêt nê. ãm kaxyw Tĩrtũm kôt ajamaxpêr tỳx nê nhũm mẽ amã tanhmã mẽmoj nhĩpêx to. ãm hãmri na pa mẽ amã ja jarê. No ãm ja pix kêt. Kot kaj mẽ mãânên hixêt mũj mã akapêr nê kãm: “E anhỹr xàta rũm akato nê ma tẽ nê gô rax kãm mrô.” Anê nhũm amar xà hkôt ã amnhĩ nhĩpêx anê.

22 —Nê kot kaj mẽ mẽmoj tã Tĩrtũm wỳ nê kaxyw kãm ajamaxpêr tỳx kãm hã awỳ nhũm amã mẽmoj prãm xwỳnhta gô. Anê.

*Mêhõ nhỹ hã Jejus kot mẽ ahkre hã harênh
Makre 11.27-33; Rukre 20.1-8*

23 Nhũm arĩgro hõ hã nhũm Jejus kêwe axte Tĩrtũm mã amnhĩ jarênh xà hã ixkreja wỳr axã nê kamã mẽ ahkre ho nhỹ. Mẽ kãm tanhmã mẽ kot amnhĩ nhĩpêx to nê nhỹrmã Tĩrtũm mẽ wa kuri htĩr tũm nê pa kaxyw tanhmã mẽ kãm kapêr to ho nhỹ. Hãmri nhũm Ijaew krãhtũmjê mẽ mẽ õ patre krãhtũmjaja hãmri hwỳr mra nê hêx rom mẽmoj tã hkukja nê kãm:

—Kwa mẽ inhmã amnhĩ jarê. Mêhõ nhỹ hã na ka hte ã amnhĩ nhĩpêx anhỹr o apa? Na ka hte akupỳm mẽ ho mex o apa nê tanhmã mẽ ahkre hto ho apa. Xà amnhĩ krã hkôt na ka hte ã amnhĩ nhĩpêx anê nà? Anê.

24 Hãmri nhũm mẽ kãm:

—Nà kot pa ixkumrêx mẽmoj tã mẽ akukja. Ka mẽ inhma nê tanhmã inhmã harênh to pa rĩ kormã mẽ amã amnhĩ jarê. 25-26 Finat Juãw Paxis ã kot paj mẽ akukja. Mêhõ nhỹ hã na pre hte mẽ hkrã kumrãr o pa? Xà amnhĩ krã hkôt nà? Xà Tĩrtũm nhỹ hã? E mẽ atõ inhmã ja jarê. Anê.

Hãmri nhũm mẽ kuma nê tee ri kot tanhmã kutã kãm harênh to hkukamã hamaxpêr pẽ axpên pumunh o kuhê nê axpên mã:

—Kwa tanhmã kot puj wem kãm ja jarênh to? Or mẽ kot mar o kuhê xwỳnhjaja na htem kêp Tĩrtũm nhỹ hã kapêr jarênh xwỳnh ã harê. Tã kot puj mẽ kãm kot amnhĩ krã hkôt kot mẽ hkrã kumrãr ã harê nhũm mẽ tee ri mẽ pama nê mẽ pakamã gryk tỳx nê. Nê mẽ paxêx rom ã mẽ pahte kãm pakapêr anhỹr ã mẽ pahpumu nê kên o mẽ pahtak o mẽ panhĩmex. No kot puj mẽ kãm Tĩrtũm nhỹ hã kot mẽ hkrã kumrãr ã harê hãmri nhũm mẽ pamã: “Kwa ã kot anhỹr kênã na ka prem kapêr ma nê hkôt ajamaxpêr kêt nê?” Anê. Jakamã kot puj mẽ ja pymaj tanhmã kãm harênh to hkêt nê. Kot puj mẽ ãm kãm aa te mẽ pahte ja jarênh mar kêt pyrãk o harê. Anê.

Mẽ kot tanhmã Jejus mã nê nhũm kot ta pãnhã tanhmã mẽ kãm nê pymaj nhũm mẽ tee ri kãm tanhmã nê hprãm kaprỳ o kuhê. 27 Hãmri nê kãm:

—Konên. Mẽ ixte mẽhõ nhỹ hã kapêr o pa hã omunhre hã. Anê.

Hãmri nhũm mẽ kuma nê mẽ kãm:

—Tk. Tõe kot pa xep ijaxwỳja mẽ amã tanhmã amnhĩ jarênh to hkêt nê. Ijaxwỳja ixte mẽhõ nhỹ hã ã ixte amnhĩ nhĩpêx anhỹr o ri ixpa hã amnhĩ pumunhre hã. Anê.

*Mêhõ my mẽ hkra wa pijakrut ã wa harênh
Matêwre 7.21-23; Rukre 7.29-30*

28 Hãmri nhũm Jejus axte Ijaew krãhtũmjê mẽ mẽ õ patre krãhtũmjê mã kapêr nê mẽmoj tã kuxi nê tanhmã mẽ kãm ujarênh to nê mẽ kãm:

—E pa mẽ amã awjarê ka mẽ inhma. Koja mẽhõ hkra my hamêxkrut. Hãmri nê hkra kot waja mã tanhmã kapêr to nê kãm: “E kêr ka jarãhã ma tẽ nê inhmã

pur kãm apê.” Anê. ²⁹ Hãmri nhũm kuma nê pur mã htêm kaga nê hitôt nê. Tãã no ãm hã ahtũmre nê tanhmã hamaxpêr to hãmri nê ma hwÿr tẽ nê kamã àpênh o xa. ³⁰ Hãmri nhũm wa hipêêxàja hpãnhã hkra kot hapu hwÿr tẽ nê mã kãm kapêr anê nê kãm: “E kêr ka ajaxwÿja atô hkôt tẽ nê wa inhmã apê.” Anê nhũm kuma nê kãm: “Tôe. Nà kot paj ma tẽ.” Anhÿr tã no ãm hõta kĩnhã htêm kêt nê.

³¹ —Jakamã e. Nhÿ hkra na pre hipêêxà kapêr ma nê hkôt amnhĩ nhĩpêx nê kapêr nhĩrôp ãm kêt nê? Xà kot waja nà? Xà kot haputa? E mẽ atô tanhmã inhmã wa harênh to. Anê.

Hãmri nhũm mẽ kuma nê kãm:

—Nà kot wata. Kot wata na hitôt tã tanhmã hamaxpêr to nê ma tẽ nê kãm apê. Anê.

Hãmri nhũm mẽ kãm:

—Tÿ ãm hãmri na ka harê. No mẽ kajaja te mẽ ate hkra kot haputa kot amnhĩ nhĩpêx pyrãk. Mẽ ate Tĩrtũm kapêr kôt amnhĩ nhĩpêx o apa hã amnhĩ jarênh tã hkwȳm ri amnhĩ nhĩpêx o apa. Te mẽ ate kot hapu kot hipêêxã mã àpênh ã amnhĩ jarênh tã kãm àpênh kêeta pyrãk. No kêt mẽ kot amnhĩ tomnuj o mẽ pa xwÿnh kwÿjaja na mẽ arom Tĩrtũm kapêr ma nê hkôt amnhĩ nhĩpêx. Jao ra tãm amnhĩ nhĩpêx o pa. Jakamã mẽ arom ma kaxkwa hwÿr pa kaxyw ra tãm nê. ãm hãmri na pa mẽ amã ixkapêr. ³² Na ka mẽ finat Juãw Paxis ã ixkukja. Juãw Paxisja na pre hte mẽ ate tãm amnhĩ nhĩpêx ã mẽ amã karô ho pa. Tã no ka mẽ ãm ama nê ãm ama nê aa kapêr kôt amnhĩ nhĩpêx kêt nê. Nom mẽ kot amnhĩ tomnuj o mẽ pa xwÿnh kwÿjaja mẽ arom kuma nê Tĩrtũm kôt amnhĩ nhĩpêx. Ka mẽ ja hã mẽ omu nê ãm mẽ omu nê mẽ urãk nê ã amnhĩ nhĩpêx anhÿr kêt nê. Anê.

Mẽ àpênh punu xwÿnhjê jarênh

Makre 12.1-12; Rukre 20.9-18

³³ Nhũm Jejus arĩ Ijaew krãhtũmjê mẽ mẽ ô patre krãhtũmjê mã kapêr. Nê mẽ kot tanhmã hipêx to hkukamã mẽ kãm tanhmã amnhĩ jarênh to. No ãm amnhĩ tã kuxi nê mẽ kãm awjarê nê mẽ kãm:

—Koja mēhō mẽ kot kãm pur kãm àpênh kaxyw hkwȳjê mã karô nhũm mẽ ma hwÿr mra nê kamã mẽmo hy hkre nê hkre pa. Hãmri nhũm hpur nhô dôn nhÿhÿm nojarêt nê kãm mẽ àpênh xwÿnhjê mã tanhmã hpur jarênh to nê mẽ kãm: “E or ixpur nô. Kê kamã mẽmoj kà hpa ka mẽ mãmrĩ kamã axujamÿnh pa nê ho axkjê. Nê ixkutêp inhmã inhô jaxwÿ nê mãmrĩ anhô tanhmã ho hprãm xà hkôt tanhmã ho.”

—Anhÿr o mẽ kãm kapêr hãmri nê ma nhÿhÿm mō. ³⁴ Tã nhũm ra pur kãm mẽmoj hkã pa nom nhũm hpur nhô dôn arĩ krĩ hō kamã hã ujahkre ho ri pa htã kuri kãm àpênh xwÿnhjê ho axkrunêpxi nê akupÿm mẽ hwÿr mẽ kurê. Mẽ kot mẽ kãm hkwȳ nhô nhũm mẽ ma kot kãm o mōr kaxyw nhũm ma mẽ hwÿr mẽ kurê. ³⁵ Nhũm mẽ ma hwÿr mō. Mōõ nê ra hwÿr pōj nhũm mẽ amnhĩ wÿr mẽ omu nê axtem nê mẽ homnuj nê. Nê mẽ unê nê ja tak nê ja pĩ nê hōja nhũm mẽ kên o htak hãmri nê amnhĩ nê wa hano nhũm wa ma akupÿm ÿ kamã mō. ³⁶ Hãmri nhũm mẽ ô patrãwja tee ri wa omu nê hamaxpêr o: “Kwa nã na mẽ ixpê inhmã mẽ àpênh xwÿnhjê homnuj tÿx nê. Nà kot paj axte mẽ hwÿr mẽ hkwȳjê rê. Nom hpãnhã mẽ ho ohtô nê mẽ kurê. Kê mẽ ohtô nê mẽ hwÿr mō nê tã inhmã inhô hkwȳ jamÿ nê man ixwÿr o mō.”

—Anhÿr o hamaxpêr hãmri nê mẽ hwÿr jajê rê nhũm mẽ ma akupÿm mẽ hwÿr mō. Nhũm mẽ amnhĩ wÿr mẽ ohtô hã nê mã mẽ ho anê nê mẽ hipêx

kati nê nhũm mē ȳ kamã ma õ patrãwja wÿr akupÿm mō. ³⁷ Hãmri nhũm tee ri mē omu nê hamaxpêr o: “Héxta waa nê. Tanhmã kot paj amnhĩ nhĩpêx to? Nã kot paj pêr mē hwÿr ixkraja mãn mē. Inhmã hapê htÿx tã kot paj mē hwÿr kumê kê ma mē hwÿr mō. Hãmri nhũm mē kêp ixkra hã omu nê tanhmã ixpê ho hkêt nê. Nê tã inhmã kãm inhõja kwÿ gō.” Anê.

—Hãmri nê mē hwÿr kumê nhũm ma mō. ³⁸ Tã hãmri ra mē hwÿr hpôx o mō nhũm mē amÿm amnhĩ wÿr omu nê kêp hkra hã omu nê axtem nê hã axpên mã amÿnê nê axpên mã: “E onêj hpur nhõ dõn krata tẽ. Koja nhÿrmã õ papaj mÿr pê amnhĩm hpur ã pykata pytà nê ho õ. Jakamã kwa pu mē hpĩr kurê kumrêx nê kêp hpur ho arĩk nê ho panhõ. E tokyj pu mē kupĩ ri.” Anê.

³⁹ —Hãmri nhũm ra tẽ nê mē hwÿr pøj nhũm mē unê nê hpur nê ho kato nê mã ho anê nê kupĩ. Æ mē ujarênh kot anhÿr. Anê.

⁴⁰ Nhũm pre ã Jejus mē kãm ujarênh anê. Hãmri nê hã mē hkukja nê mē kãm:

—E koja pur nhõ dõnja hkra jarênh ma hãmri nê tãm mē hwÿr mō hãmri nê tanhmã mē hipêx to wehe? Anê.

⁴¹ Hãmri nhũm mē kãm:

—Nã koja ma akupÿm mē hwÿr mō hãmri nê mē homnuj tÿx nê mē himex pa. Hãmri nê hpãnhã nhãm hpur ã mêmojjê rê nhũm mē tã katat kõt kãm ãpênh o pa. Anê.

⁴² Hãmri nhũm Jejus mē kãm:

—Tÿ ãm hãmri na ka ã mē harênh anê. Kot mē ho anhÿr mã tãm kênã. Mãn ka prem ra Tirtũm kapêr ã kagã htũm kot tanhmã ja jarênh toja ma? Harênh kot:

Mê kot kên o amnhĩm õrkwÿ nhĩpêx kaxyw nê kên maati pumu nê htÿx omnuj ã hkamnhĩx nê hkagata. Mê kot hkaga htã nhũm Tirtũm mē kurom mex o kot kên piitã hakrenh par ã omunh kurê kumrêx. Tirtũm kot kên maati mex ã harênh xwÿnhnta mē pamã mex o mex.

Æ Tirtũm kapêr ã kagã htũm kot ja jarênh kot anhÿr. ⁴³ Ja pyrã nê na pre ra Tirtũm amnhĩ kaxyw mē apê Ijaew xunhwÿ. Mê apê hkra nê hkõt mē ate amnhĩ nhĩpêx kaxyw amnhĩ kaxyw mē axunhwÿ. Tã ka mē axtem nê hkaga. Te mē kot kên maati pumunh nê mex kêt ã hkamnhĩx nê hkagata pyrãk. Jakamã koja mē apãnhã Ijaew kêt xwÿnh kwÿjê xunhwÿ nhũm mē arom hkõt amnhĩ nhĩpêx mex o pa. Jao ra mē kêp hkra nê. Anê.

⁴⁴ Nhũm pre ã Jejus mē kãm te kêp kên maati pyrãk o mē kãm amnhĩ jarênh anê. Hãmri nê axte amnhĩ tã kuxi nê mē kãm axte kên jarênh pyrãk ã amnhĩ jarê nê mē kãm:

—Nã kot kaj mē atõ ixkaga hãmri nê te mēhõ htÿx htêm nê kên pumunh kêt nê hã htêk nê tẽm pyrãk o amnhĩ nhĩpêx. Jao ixkutã amnhĩ xãm. Rÿ ka tanhmã ajamaxpêr to nê ixkaga nhũm te kên maati kot anhĩpy tẽm nê axôm par pyrãk o anhĩpêx ka mē amex kêt kumrêx. Anê.

⁴⁵ Nhũm pre ã mē kãm ujarênh kãm mē harênh anê. Hãmri nhũm patre krãhtũmjê mē Parijew nhõ xwÿnhjaja tee ri amnhĩ tã kuma ⁴⁶ nhũm ja mē kêp omnuj tÿx jakamã nhũm mē kãm unênh nê haxãr prãm nê. No mē ãm amnhĩ tã kãm mē kot mar o kuhê xwÿnhjê puma nê. Mê kurom Jejus kêp Tirtũm nhÿ hã kapêr xwÿnh ã hkamnhĩx jakamã nhũm mē kãm mē uma nê. Hãmri nê kormã tanhmã ho hkêt nê.

22

Pahi kot hkra hprô kaxyw hkwyjê hwÿr ã harênh

Rukre 14.15-24; mãânên Wam Korît 6.9-11; Epes 5.5-6; Apokarip 19.7-8

¹⁻²Tã nhùm Jejus axte mê kãm awjarê. Ijaew kot Tirtùm kaga hã mê kãm hã kuxi nê awjarê nê mê kãm:

—E pa mê amã ahpyñhã mê kot Tirtùm kapêr mar nê tanhmã amnhĩ nhĩpêx to xwÿnhjê jarê ka mê inhma. Te mê kot pahihtĩ kot hkra hprô kaxyw nhùm kot amnhĩ wÿr hkwyjê hwÿr nhùm mê kot harênh mar nê ahpyñhã tanhmã amnhĩ nhĩpêx to xwÿnhjaja kot amnhĩ nhĩpêx pyrãk. Koja pahihtija hkra hã hkĩnh nê hã apkur mex kaxyw amnhĩ wÿr hkwyjê hã karô. ³Hãmri nhùm kãm mê ãpênh xwÿnhjaja ra kot amnhĩ wÿr mê hã karô xwÿnhjê hwÿr mra nê mê kãm nojarêt nhùm mê kuma nê ãm mê kuma nê axtem nê mê kêp hitôt nê. Hãmri nhùm mê tee ri mê kuma nê akupÿm tẽ nê pahihtĩ mã mê harê.

⁴—Hãmri nhùm tee ri amnhĩ tã mê harênh ma nê hpãnhã mê hwÿr axtem kãm ãpênh xwÿnh kwÿjê rê nhùm mê ma mê hwÿr mra nê mê kãm: “Pa. E kwa mê tokyx. Na ra pahihtĩ mê akutêp mêô nhĩpêx pa. Na mê môx kwÿ hpa nê ho ãr mex nê. Nê mê akutêp mêmoj nhĩpêx par jakamã e kwa mê tokyx nã.” Anê. ⁵ã mê kãm kapêr anhÿr tã nhùm mê kuma nê ãm mê kuma nê ma ahpyñhã nhÿhÿm mra. Nhùm ja ma ãpênh mã mra nhùm ja ma ihpur kãm ãpênh mã ma tẽ nhùm ja ma nhÿhÿm mêmo to wênê ho tẽ. ⁶Nhùm mê hkwyjaja mê kãm ujarênh xwÿnhjê pynê nê mê htak o mê kupa.

⁷—Hãmri nhùm pahihtija mê harênh ma nê ãhkurê nê. Hãmri nê mê hwÿr pôrista hkwy rê nhùm mê ma mê hwÿr mra nê mê unê nê mê kupa nê mê ô krĩ hã hpók pa. ⁸Hãmri nhùm pahihtĩ kãm mê ãpênh xwÿnh kwÿjê mã kãm: “Kwa ra ixte mê kutêp mêô mex kwÿ xunhwÿr tã nhùm mê ixwÿr mrar kêt nê. Ixtÿx ho mê mex ã mê hkamnhĩx nê amnhĩ wÿr mê hã karô no mê mex kêt. Mê kot mê ixkutã apkur mã tãm kêt. ⁹E kwa mê ma krĩ hkôt axtem mê hkwyjê japêr o mra. Nê nhÿri mêhõ pumu nê kãm awjarê kê man ixwÿr tẽ nê ixkra hã hkĩnh nê mê ixkutã apku. Mê ã mê kãm axujarênh o amrar anê.” Anê.

¹⁰—Hãmri nhùm mê kuma nê ma mê hapêr o mra nê mê piitã mê kãm anhÿr o mra. Nhùm mê kuma nê wam tajê rom ma mê hkôt mrar kurê kumrêx. Mê kot amnhĩ to mex xwÿnhjaja nê mê kot amnhĩ tomnuj xwÿnhjaja hãmri piitã ma mê hkôt mra. Hãmri nê ixkreja wÿr mra nê hwÿr gjêx kaxyw nhùm mê kãm mê ê mex gô nhùm mê hagjê hãmri nê kormã mê apkur xã hã ixkre hwÿr agjê nê ho ñyt pa. ¹¹Hãmri nhùm pahihtija mê hwÿr axã nê mê piitã mê omu. Nhùm ja pixi nê axtem nê hkwyjê hkĩnhã mê kot kãm ê mex nhõrja jaxãr kêt rãhã axã nê apkur o nhÿ. ¹²Hãmri nhùm tee ri ja hã omu nê hwÿr tẽ nê kãm: “Pa. Tk. Kwa na htem ixkrem gjêx kaxyw nê mê kot mê kãm mê ê mex nhõr jagjê nê rĩ kormã hwÿr agjê nê apku. Tã mon ka akwyjê hkĩnhã haxãr kaga? Kwa na htem ã amnhĩ nhĩpêx anhÿr kêt nê.” Anhÿr o kãm kapêr nom nhùm kuma nê ãm kuma nê tanhmã kutã kãm nê hkêt nê. ãm htÿx apkur o nhÿ. ¹³Jakamã nhùm tee ri omu hãmri nê hã mê kot kãm ãpênh xwÿnhjê mã amÿnê nê mê kãm: “E mê hwÿr tẽ nê unê nê hpa nê hte hpre nê ma o tẽ nê kamãt kô kamã amê. Kê tee ri mur nê amnhĩ xã htÿx kamã hamak o amnhĩ nham o xpênh kamnhar tÿx kaprÿ ho nõ nê rĩ amnhĩ pumu.” Anê. Hãmri nhùm mê kuma nê kãm ho anê. ã mê ujarênh kot anhÿr. Anê.

¹⁴Nhùm pre Jejus ã mê kãm ujarênh anê hãmri nê mê kãm:

—Nà Tirtùm kot pahihitita pyrà nè amnhĩ wýr mẽ ho ohtô nè mẽ hwýr tã na hte mẽ piitã hkôt amnhĩ xunhwýr kêt nè. Jakamã na hte âm mẽ ho grêre nè amnhĩ wýr mẽ ho api. Anê.

Parijew nhô xwýnh kot Jejus kamã hamak ã mẽ harênh

Makre 12.13-17; Rukre 20.20-26; mãânên Rômân 12.1, 13.7

¹⁵⁻¹⁶ Tã nhũm Parijew nhô xwýnhjaja ã Jejus kot mẽ kãm ujarênh anhýrja ma hãmri mẽ kurùm kato nè tanhmã hkukamã axpên mã hã âmnhên to. Hãmri mẽ hwýr mẽ hkwyjê mẽ Erox kôt mẽ pa xwýnh kwýjê rê. Hêx rom mẽ kot mẽmoj tã hkukjêr kaxyw hwýr mẽ kurê nhũm mẽ ma hwýr mra mẽ omu mẽ kãm:

—Kwa Jejus. Nà âm hãmri na ka hte Tirtùm kapêr o mẽ ahkre mex o ri apa mẽ mẽ kamã akahak o apa hkêt nè. Mẽ kot tanhmã ato kapêr punuj to htã ka aprĩ hã mẽ ahkre mex o ri apa. ¹⁷ E kwa mẽ inhmã mẽmoj jarê. Rôm nhô pahihiti kot mẽ pahpê Ijaew mẽ pahte kãm kãxpore hkwy nhôr ã mẽ pamã karôta. Kwa xà ja amã mex nà? Xà kot pu mẽ mẽ kãm hkwy gõ? Nà xà kot pu mẽ kãm ôr kêt nè? E kwa mẽ inhmã tanhmã ja jarênh to. Anê.

¹⁸ Nhũm prem ã hêx rom àhkukjêr anhýr tã no nhũm ra mẽ hamaxpêr ã mẽ omu mẽ mẽ kãm:

—Tk. Kwa mon ka mẽ ã axêx rom ja hã ixkukjêr anê? ¹⁹⁻²⁰ E mẽ atô inhmã kãxpore htýxre hõ gõ pa omu. Anê.

Hãmri nhũm mẽ kãm ja gõ nhũm kupy nè kànhmã mẽ kãm kupê nè mẽ kãm:

—E mẽhõ nhĩxi nè mẽhõ karô na ja hã? Anê.

²¹ Hãmri nhũm mẽ kãm:

—Pahi Sesti karô nè hixi na hã. Anê.

Hãmri nhũm mẽ kuma mẽ mẽ kãm:

—Tý. Tô kêt ka mẽ mãmrĩ kãm hkwy nhôr o apa. Hã hkarô nè hã hixi. Tãm kot hipêx xwýnh jakamã ô na. No mẽ kajaja na pre Tirtùm mẽ anhĩpêx nhũm mẽ apê ô jakamã kwa kêt ka mẽ kapêr kôt pix mã ri amnhĩ nhĩpêx o ri apa. Anê.

²² Hãmri nhũm mẽ amnhĩ jaêr pê ã kot kãxpore jarênh anhýrja ma mẽ axte kãm tanhmã nè hkêt nè. Hãmri mẽ akryk omu hãmri mẽ ma akupým mra.

Akupým mẽ htĩr ã mẽ harênh

Makre 12.18-27; Rukre 20.27-40; Juãw 5.21, 6.39-40; mãânên Wam Korĩt 6.14, 15.12-28; Wam Tesarôn 4.13-18

²³ Tã nhũm Satusew nhô xwýnh kwýjaja mẽ kot akupým mẽ htĩr kêt ã mẽ hkamnhĩx kêt xwýnhjaja na pre mẽ. Na pre htem mẽ htyk mẽ mẽ hapêx kumrêx ã mẽ hkamnhĩx jakamã axpên mã tanhmã Jejus jarênh to mẽ axpên mã:

—E kwa pu mẽ hwýr mra mẽ mẽmoj xihitýx ã hkukja. Kê mẽ pama mẽ tee ri tanhmã mẽ pamã kapêr to hkukamã hamaxpêr kaprý. Kê mẽ piitã ja hã omu mẽ àhpumunh kêt ã omunh kurê kumrêx. E tókox pu mẽ hwýr.

Anhýr jakamã Parijew nhô xwýnhjê pyrà nè hêx rom ma hwýr mra mẽ hkukja mẽ mẽ kãm:

²⁴ —Pa Jejus? Kwa mẽ inhmã mẽmoj jarê. Na pre finat Mojesja Tirtùm nhỹ hã ã mẽ panhĩgêttjê mã karô anê. Mẽ hkra hkêt rãhã mẽ pa mẽ mẽ htyk xwýnhjaja nhũm mẽ harênh o:

Koja mẽhõ hprô mẽ mẽ kamã hkra hkêt rãhã pan ty. Hã koja hkôt htôja hpãnhã hprô ho hprô mẽ mẽ kamã hkra. Hãmri nhũm kato mẽ te kêp htô htyk xwýnhhta hkra pyràk. Anê.

Ã na pre Mojesja Tirtùm nhỹ hã mẽ mẽ kãm karô anê. ²⁵ Jakamã kwa ga mẽ ixujarênh ma. Koja mẽ kot axpên to htô xwýnhjaja kêp 7. Nhũm kot waja hãmri

hprō nê wa pa nhũm kamã hkra hkêt rãhã ty. Nhũm hkôt htõja hpãnhã ho hprō ²⁶ nê wa axpên to pa. Nhũm mãânên kamã hkra hkêt rãhã ty. Nhũm htõ hõta haxwýja hpãnhã tãm o hprō nê we wa axpên to pa grire nhũm haxwýja kamã hkra hkêt rãhã ty. Hãmri nhũm htõ hkwyjaja ni pyxi nê axpên pãnhã ho hprō hpa no mēhõ kamã hkra hkêt rãhã htyk pa. ²⁷ Hãmri nhũm mē hprõta mē hkôt amnhĩ to hitep nê ty. ²⁸ Tã Tĩrtũm kot akupým nhýrmã mē ho htĩr ronhýx nhý nhýx kēp nija mjên kumrêx? Ra piitã kot ho hprō kênã. E mē inhmã ja jarē. Anē.

²⁹⁻³⁰ Hãmri nhũm Jejus mē kuma nê mē kãm:

—Nã kaxkwa kamã mē kot amnhĩ nhĩpêxja axtem na. Mē htĩr ri mē kot Tĩrtũm kôt amnhĩ xunhwýr xwýnhjaja na htem ty hãmri nê Tĩrtũm nhõ krĩ kamã axte kãm hprō hprãm kêt nê pa. Jakamã hprō hkêt nê pa. Rý ni japêr nê mjên kêt nê pa. Nom ri kãm mjên rý hprō hprãm kêt nê pa. Hãmri nê Tĩrtũm kapêr o mē wrýk xwýnhjê pyrã nê axte htyk kêt nê. ãm htĩr tũm rãhã nê pa ho pa. Pêr mē ate Tĩrtũm kapêr ã kagã htũm mar mex kêt jakamã na ka mē ã ja hã ixkukjêr anē. Tĩrtũm àhpumunh týx o àhpumunh týx jakamã kumã mē ate mēmoj tã ixkukjêr xwýnhnta na tanhmã kēp kute hkêt. Ra ja kukamã àhpumunh týx kênã.

³¹⁻³² —Nom mē ate akupým mē htĩr kêt ã mē hkamnhĩxja kot paj ixprĩ hã mē amã harē. Amnepêm na pre Tĩrtũm pí hpókja kamã tanhmã Mojes mã kapêr to. Mãn ra mē ate mar. Na pre kãm:

Ixpê Apraãw nhõ Tĩrtũm na pa. Nê mãânên ixpê Apraãw kra Ijak mē htãmnhwý Jako wa õ Tĩrtũm na pa.

Anhýr o Mojes mã amnhĩ jarē nhũm kuma nê hã kagã. Kêp apu arĩ mē htyk rãhã nhýx pre ã mē harênh anhýr kêt nê. Nhýx pre mē harênh o: “Amnepêm Apraãw nê hkra nê htãmnhwý mē htĩr ri ixpê mē õ Tĩrtũm na pa pre.” Anhýr o nhýx pre mē harē. Nom na pre ã amnhĩ jarênh anhýr kêt nê. Mē pamã te Apraãwja mē htyk nê mē hapêx pyrãk. Nom nhũm prem ra Tĩrtũm ri ra akupým htĩr nê mex nê pa ho pa. Tã ka htem Tĩrtũm kapêr kwým ri akupým mē htĩr kêt ã mē harênh o apa.

Anhýr o Satusew nhõ xwýnhjê mã kapêr. ³³ Hãmri nhũm mē kot mar o kuhé xwýnhjaja amnhĩ jaêr pē kot mē ahkreja ma.

Tĩrtũm kapêr maati jarênh

Matêwre 10.37; Makre 12.28-34; Rukre 10.25-28; mãânên Wam Juãw 5.3

³⁴ Tã nhũm Parijew nhõ xwýnhjaja Satusew nhõ xwýnhjê jarênh ma. Mē kot tee ri kãm hamaxpêr o Jejus jakrenh prãm kaprý hã mē harênhja ma hãmri nê axpên wýr akuprõ nê Jejus wýr mra. Kot mē urãk nê hêx rom àhkukjêr nê hamaxpêr o hakrenh kaxyw hwýr mra. ³⁵ Hõja kēp Tĩrtũm kapêr tũm o mē ahkre o mē pa xwýnh jakamã hêx rom kamã hamak kaxyw kãm kapêr nê kãm:

³⁶ —Kwa Jejus. Ot pa mē awýr mra. Kwa mē inhmã mēmoj jarē. Na pre Tĩrtũm ahpýnhã mēmoj to 10 nê hã mē pamã karõ. Mē pahte hkôt amnhĩ nhĩpêx kaxyw hã mē pamã karõ. Tã nhý kapêr na mex o kot hkwy jakrenh wehe? Anē.

³⁷ Hãmri nhũm kuma nê mē kãm:

—Nã kot mē pamã hã karõ kot:

Kêr ka mē anhĩ piitã ho amã Tĩrtũm kĩnh týx o apa. Mē amã hkĩnh týx o mēmoj piitã hakrenh par o apa.

³⁸ E Tĩrtũm kot mē pamã hã karõ ja na mex o piitã hakrenh par. ³⁹ Nê hkôt ja:

Kêr ka mē amā akwỳjê hã ma ho te ka amā amnhĩ tã ma pyrāk. Jao ra tãm mē hipêx.

40 ã Tirtùm kapêr ã kagà htùm kot mē pamã hã karõ kot anhyr. ã mē pahte amnhĩ nhĩpêx anhyr o papaja na Tirtùm kãm hprãm tỳx kumrêx. Kot kaj mē ja wa hkõt amnhĩ nhĩpêx rãhã ho ri apa nê mãânên ra Tirtùm kot mē pamã mêmoy tã karõ xwỳnh piitã hkõt amnhĩ nhĩpêx. Ja na pre Mojes mē Tirtùm nhỹ hã kapêr xwỳnhjaja amnepêm Tirtùm nhỹ hã mē panhĩgêtjê mã hã karõ ho pa. Anê.

*Jejus kot amnhĩ tã mē hkukjêr ã harênh
Makre 12.35-37; Rukre 20.41-44; mãânên Rômãn 1.3-4*

41 Nhùm Parijew nhõ xwỳnhjaja arĩ Jejus mar o kuhê nhùm amnhĩ tã tanhmã mē hkukjêr to. Nom te nhãm mēhõ hã mē hkukjêr pyrāk o mē hkukja nê mē kãm:

42—E mē inhmã mêmoy jarê. Tanhmã na ka htem axpên mã Tirtùm kot mē akaxyw ãm mã xwỳnhnta jarênh to? Kêp mēhõ kanrêhã htãmnhwỳ koja wehe? Anê.

Hãmri nhùm mē kãm:

—Nã koja kato nê kêp pahi finat Tawi kanrêhã htãmnhwỳ koja.

43 Anê nhùm Jejus mē kuma nê mē kãm:

—Tỳ. ãm hãmri na ka mē harê. No mo na htem axpên mã kêp pahi Tawi hkanrêhã htãmnhwỳ pix ã harê nê mãânên kêp õ pahihti hã harênh kêt nê? Tawi na pre Tirtùm Karõ nhỹ hã tanhmã harênh to nê harênh o:

44 Na pre Tirtùm inhõ Pahihti mã ã kapêr anê nê kãm: “E amnê ixwỳr tē nê inhĩhkõ hã nhỹ nê inhmã mē ho amnhĩptar o akrĩ. Kot paj mē kot kãm akurê xwỳnh piitã mē unênh pa nê awỳr mē o mra nê anhĩhkram mē haxàr pa.” Anhyr o pre kãm kapêr.

45 ã Tawija Tirtùm kot Kris mã kapêr jarênh nê kêp õ pahi hã kagà anê. Mē kajaja na ka htem ãm kêp Tawi tãmnhwỳ pix ã axpên mã harênh o ri apa. No kêt Tawija na pre kêp õ Pahihti hã harênh o pa. Anê.

46 Hãmri nhùm mē kuma nê tee ri kot tanhmã kutã kãm kapêr to hkukamã hamaxpêr nê axte mêmoy tã hkukjêr kêt nê. Tanhmã kot mē amnhĩ to nê hamaxpêr o hakre? Na prem tee ri kãm hamaxpêr o hakrenh prãm kaprỹ. Jejus mêmoy piitã hkukamã àhpumunh tỳx o àhpumunh tỳx.

23

*Jejus kot tanhmã Parijew nhõ xwỳnhjê jarênh to
Makre 12.38-40; Rukre 11.43-46, 20.45-47*

1 Tã nhùm Jejus mē ixte hkõt ixpa ho ixpa xwỳnhjê mē mē kot mar o kuhê xwỳnhjê mã kapêr nê mē inhmã tanhmã Parijew nhõ xwỳnh mē Mojes kapêr o mē ahkre xwỳnhjê jarênh to nê mē inhmã:

2—Nã Parijew nhõ xwỳnh mē Tirtùm kapêr tùm o mē ahkre xwỳnhjaja na htem hprĩ hã Tirtùm kapêr ã kagà htùm mar mex nê. 3 Jakamã kêr ka mē mar tỳx nê mē kot ho mē ajahkre kõt amnhĩ nhĩpêx. No mē kot amnhĩ nhĩpêxja kêr ka mē hkõt amnhĩ nhĩpêx kêt nê. Mē kot Tirtùm kapêr tùm o mē ajahkre htã hkõt amnhĩ nhĩpêx kêt nê. 4 Te mē kot mēhõ kot mē katut ã mē kãm mē jênh pytĩ janhõr tã no ãm mē kuxwar hkwy htur kêt kot amnhĩ nhĩpêx pyrāk o na htem amnhĩ nhĩpêx o pa. Jao mē amã mêmoy tã karõ nê mē amã: “E kêr ka mē ã amnhĩ nhĩpêx anê nê ã amnhĩ nhĩpêx anê.” Anhyr pix o mē amã kapêr o pa. Nom mē tãmjaja amnhĩ kapêr kõt amnhĩ nhĩpêx kêt nê.

5—Na htem hkwyjê kot mê omunh nê mê kot amnhî to mex ã mê harênh kaxyw mê noo mã tanhmã amnhî nhîpêx to. Nê mê mê noo mã mê ê mex pix kãm pa. Nê amnhîm Tirtûm kapêr ã kagà htûm kwý hã kagà nê amnhî nhôkrã hã hanhò nê amnhî pa hã hanhò nê hã pa. Mê kot hã nohtýx rãhã hã mê hkamnhîx kaxyw nhûm htem ã amnhî nhîpêx anhÿr o pa. Nê mê kãm mê piitã mê kot amnhîm mê rûnh ã mê harênh o paja nhûm htem kãm hprãm.

6—Nê mê pahpê Ijaewjê nhô Tirtûm kapêr o mê ahkre xà hã ixkre kamã mê kot amnhî to rûnh xwýnhjê hkrî xà mex pix kamã kãm hkrî hprãm. Nê mêmoj tâ mê apkur xà mex ã arîgro hã nhûm htem ma mê apkur xà hã ixkre hwÿr akuprô nhûm mê kot amnhî to rûnh xwýnhjê hkrî xà mex pix kamã kãm hkrî hprãm. ⁷Nê nhÿri pry hã mra nhûm mê kot mê omunh nê mê kêp mê ahkre xwýnh maati hã mê hã hpijaãm kãm tanhmã mê kãm kapêr mex toja nhûm htem kãm hprãm. ã na hte Parijew nhô xwýnh mê Tirtûm kapêr tûm o mê ajahkre xwýnhjaja hêx rom mê anoo mã amnhî nhîpêx anhÿr o pa.

⁸⁻¹⁰—No mê kajaja. Kêr ka mê ho mê urak kêt nê. Kê mê axpên mã mê ajarênh o: “Pahi Maati” anhÿr o mê ajarênh kêt nê. Rý mê ajarênh o: “mê jahkre xwýnh maati” anhÿr o axpên mã mê ajarênh hkêt nê. Kêt paxipix na pre Tirtûm mê akaxyw ixãm jakamã paxipix na ixpê mê anhô Pahi Maati. Nê paxipix na ixpê mê ajahkre xwýnh maati. No mê kajaja ixkôt mê apê axpên to atôx nê atô na ka mê.

—Nê kêr ka mê ri axpên jarênh o: “Mêpahpãm” anhÿr kêt nê. Kêt kaxkwa kamã na Mêpahpãmja.

¹¹⁻¹²—Nê kot ka mê amnhî to rax prãm xà tanhmã amnhî to jarkrar to ho apa htã no nhûm akwýjaja ama nê ãm ama nê akôt hamaxpêr kêt nê. No kot kaj mê piitã mê kutã tanhmã anojarêt to ho apa nhûm mê amnhî tâ mê apumu nê axpên mã mê amex ã mê ajarê. Jakamã kot kaj mê amã mê piitã mê kot mê amex ã mê ajarênh prãm hãmri nê ri mê piitã mê kãm tanhmã amnhî nhîpêx to pê mê kutã anojarêt rãhã ho ri apa. Anê.

Jejus kot mê hkwyjê mã kapêr týx ã harênh

Makre 12.40; Rukre 11.39-52, 20.45-47

¹³⁻¹⁴Tã nhûm Jejus hpãnhã Parijew nhô xwýnh mê Tirtûm kapêr tûm o mê ahkre ho mê pa xwýnhjê mã kapêr. Nê mê kãm kapêr kãm hihtýx nê mê kãm:

—E mê apê Parijew nhô xwýnh mê Tirtûm kapêr tûm o mê ahkre xwýnhjaja. E mê inhma. Kot kaj mê amex kêt nê. Mê apê mê no kupyw xwýnh na ka mê. Nê mê amã Tirtûm kôt amnhî nhîpêx prãm kêt. Nê nhÿrmã atyk nê mê amã ô krî hwÿr axãpir prãm kêt. Nê akwýjaja kot hwÿr àpir pymaj na ka htem akwýjê nê tanhmã mê kãm axêx to ho apa. Mê kot mê apyrã nê Tirtûm kapêr kwým amnhî nhîpêx prãm xà na ka htem amnhî mê tanhmã mê kãm axêx to ho ri apa. Jao te mê ate mê kêp Tirtûm nhô krî hwÿr kahéxã kahé htýx pyrak o apa.

¹⁵—Nê mê akwýjaja kot mê akôt amnhî xunhwÿr nê mê akôt amnhî nhîpêx prãm xà na ka htem ma awry hã nhÿhÿm tanhmã mê kãm ri axujarênh to ho ri apa. Jakamã nhûm mêhò mê ama nê mê akôt amnhî xãm hãmri nê ra amnhî tomnuj týx o mê ajakre. Jakamã koja mê nhÿrmã mê apyrã nê ma mê kot amnhî xà htýx kamã hamak tûm xàta wÿr pa. Jakamã kwa mê o kora. Kot kaj mê amex kêt nê.

¹⁶—Hêxta waa nê. Mê apê Parijew nhô xwýnhjê mê mê apê Tirtûm kapêr tûm o mê ahkre xwýnhjaja kot kaj mê amex kêt kumrêx. Na ka htem mê kêp mê hikãxpore jamýnh prãm xà atýx ri tanhmã mê ahkre hto ho apa nê mê kãm: “Kot kaj mê ãm hãmri mêmoj tâ amnhî jarênh kaxyw hãmri nê Tirtûm mã

amnhî jarênh xâ hâ ixkre nhîxi jarênh kôt mêhõ mã amnhî jarê nhûm ama nê hamaxpêr o: 'Ko. Apu âm hāmri na inhmā amnhî jarê rý ko na apu âm amnhî to hêx.' Anhÿr o hamaxpêr. Nom kot kaj mê ixkreta ho mex kaxyw mê kām kâxpore hkwy gõ hāmri nê ate mê kām ôr xâta jarênh kôt âm hāmri mêmoj tâ mêhõ mã amnhî jarê. Hāmri nhûm ama nê hamaxpêr o: 'Nâ âm hāmri na â inhmā amnhî jarênh anê. Kot ixkre ho mex kaxyw kâxpore hkwy nhôr kôt â amnhî jarênh anê. Jakamā na amnhî to hêx kêt nê.' Anhÿr o hamaxpêr. Na ka htem â mê ahkre ho apa anê. ¹⁷ Nom mê ate mê ahkreta mex kêt. Pêr mê ajamaxpêr mexti hâ. Tirtûm mã amnhî jarênh xâ hâ ixkreta mex o ixkre ho mex kaxyw kâxpore nhôrta jakrenh. Tâ ka htem axtem nê mê kot kām kâxpore nhôrta mex o ixkre jakrenh â harê. No mê pahte âm hāmri mêmoj tâ amnhî jarênh nê aa papaxê kêt râhâ ho papaja na Tirtûm kām hprâm.

¹⁸—Nê na ka htem mê kêp mê hikukrêx jamÿnh prâm xaj â atÿx ri mê ahkre anê nê mê kām: "Kot kaj mê âm hāmri mêmoj tâ amnhî jarênh kaxyw nê Tirtûm mã mêmoj nhôr xâ hâ mêstija jarênh kôt mêhõ mã tanhmā amnhî jarênh to. Hāmri nhûm mê ama nê hamaxpêr o: 'Nâ âm hāmri na inhmā amnhî jarê rý ko na apu âm inhmā amnhî to hêx.' Anhÿr o hamaxpêr. Nom kot kaj mê Tirtûm mã mêmoj nhôr xâ hâ mêstija â kām mêmoj xi. Hāmri nê ra mê ate kām ôr xâta jarênh kôt âm hāmri mêmoj tâ mêhõ mã amnhî jarê. Hāmri nhûm ama nê hamaxpêr o: 'Nâ âm hāmri na â inhmā amnhî jarênh anê. Kot Tirtûm mã mêmoj nhôr â amnhî jarênh kôt kot amnhî jarênh anhÿr jakamā na amnhî to hêx kêt nê.' Anhÿr o hamaxpêr." Anê. Na ka htem â mê ahkre anê. ¹⁹ Mê ajamaxpêr kêt xwÿnh na ka mê. Tirtûm mã mêmoj nhôr xâ hâ mêstija na mex o mê kot hâ kām mêmoj nhôrta jakrenh. Tâ na ka htem axtem nê mê kot hâ kām mêmoj nhôrta mex o mêsti jakrenh â harê. ²⁰ Nom Tirtûm mã mêsti mê mê kot hâ kām mêmoj nhôrta te kot axpên pyrâk jakamā kot kaj mê mêstija jarênh kôt mêmoj tâ amnhî jarê nê mãânên mê ate hâ Tirtûm mã mêmoj xirja jarênh kôt amnhî jarê. Hamê wa kot axpên pyrâk jakamā hamê wa harênh pê amnhî to axêx kêt nê. Jakamā kêr ka mê mêmoj tâ amnhî jarênh kaxyw nê hamê wa harênh kôt âm hāmri mêmoj tâ amnhî jarê nê ho axêx kêt nê. ²¹ Tâ kot kaj mê âm hāmri amnhî jarênh â mêmoj tâ amnhî jarênh kaxyw nê Tirtûm mã amnhî jarênh xâ hâ ixkre hkôt hâ amnhî jarê nê mãânên Tirtûm kêp ixkre hpâm kôt hâ amnhî jarê. Jakamā kêr ka mê hamê wa harênh pê amnhî to axêx kêt nê.

²²—Nê kot kaj mê âm hāmri amnhî jarênh â mêmoj tâ amnhî jarênh kaxyw nê kaxkwa jarênh kôt amnhî jarênhja o mãânên kaxyw kaxkwa kamā Tirtûm krî xâ maati hkôt amnhî jarê. Nê mãânên Tirtûm kôt amnhî jarê. Jakamā kwa hamê wa harênh pê amnhî to axêx kêt nê.

²³—Hêxta waa nê. Mê apê Parijew nhô xwÿnh mê mê apê Tirtûm kapêr tûm o mê ahkre xwÿnhjaja kot kaj mê amex kêt nê. Mê ate mê no kupyr xwÿnh na ka mê. Na ka htem Tirtûm kapêr piitâ hkôt amnhî nhîpêx kêt nê âm hkwy kôt pix mã amnhî nhîpêx o ri apa. Na ka htem âm kapêr o hpÿnhre nê hkôt amnhî nhîpêx â amnhî pumu nê ate amnhî to mex xwÿnh â amnhî jarênh o apa. No Tirtûm kām hprâm xâ piitâ hkôt amnhî nhîpêx kêt nê. Mê ate tām mê hipêx nê mê ho mex nê mê kamā axukapri hâ kot mê amā karôja. Nê mê amā Tirtûm kînh â kapêr kôt amnhî nhîpêx hâ karôja ra mê ate mar tâ hkôt amnhî nhîpêx kêt nê. Mê ate kapêr piitâ hkôt amnhî nhîpêx ronhÿx ja mê amā mex o mex. ²⁴ Mê ate âm kapêr o hpÿnh nê hkôt amnhî nhîpêx jakamā te mê ate atÿx ri tanhmā axâpkur to ho mê akri pyrâk. Jao te mê axâpkur xâ hâ mêõ

kamã pure pumunh nê nê hanhir nê rênh tâ mããñên kamã kên rax pumunh tâ nê hanhir nê rênh kêt rãhã hkur pyrãk. Jao Tirtüm kapêr o hpÿnhre nê hkôt amnhî nhîpêx no piitã hkôt amnhî nhîpêx kêt nê. Pêr mē ajamaxpêr kêt tâ na ka htem atÿx mē ahkre ho ri apa.

25—Hêxta waa nê. Mē apê Parijew nhõ xwÿnh mē mē apê Tirtüm kapêr tùm o mē ahkre xwÿnhjaja kot kaj mē amex kêt nê. Mē ate mē no kupyr xwÿnh na ka mē. Nã mē apê Parijew nhõ xwÿnhjaja te mē ate mē kot apkur kaxyw prat kre kuhõnh punuj tâ mex ã harênh nê kamã apkur pyrãk o na ka mē. Jao ãm mē akrãhkã rüm pix mã mē amex. Nê mē noo mã te mē amex pyrãk no mē anhõxãhkre kaxwÿnh kãm mē ajamaxpêrja mex kêt. Mē akapêr prãm nê mē axãhkurê nê mē anhõxyÿ. 26 Mē ajamaxpêr mex kêt kênã. Kwa kêr ka mē tãm ajamaxpêr o tãm akwÿjê nhîpêx o ri apa. Nê axãmnhîx ri mē kêp amrakati xwÿnhjê mã mēmoj nhõr o ri apa. Kot kaj mē ã amnhî nhîpêx anê nhùm Tirtüm ja hã mē apumu nê amnhîm mē amex ã mē ajarê. No na ka htem amã mē amnhî to mex prãm xãj ãm tee ri amnhî kuhõnh japjê kaprÿ.

27—Hêxta waa nê. Mē apê Parijew nhõ xwÿnhjê mē mē apê Tirtüm kapêr tùm o mē ahkre ho mē apa xwÿnhjaja kot kaj mē amex kêt nê. Te mē ate mē htykjê jagjênh xã pyrãk. Na htem mē hagjênh xã ho mex o pa nom kamã mē hi nê ahpunuj pix. 28 Ja pyrã nê ã mē ate amnhî nhîpêx anhÿr. Kapôt rüm mē anhîja na mex. Te mē ate mē ho mex o apa pyrãk o na ka htem amnhî nhîpêx nhùm mē ãm akrãhkã pix pumu nom ãm mē akrã hi kaxwÿnh kãm mē ajamaxpêr punuj rãhã hã mē apumunh kêt nê. Mē ate tanhmã mē no kupyr to pix kukamã ajamaxpêr jakamã te mē ate mē htykjê jagjênh xã pyrãk.

29-30—Hêxta waa nê. Mē apê Parijew nhõ xwÿnh mē mē apê Tirtüm kapêr tùm o mē ahkre xwÿnhjaja kot kaj mē amex kêt nê. Mē ate mē no kupyr xwÿnh na ka mē. Na ka htem ma mē hã pika hwÿr apa nê Tirtüm nhÿ hã kapêr o mē pa xwÿnhjê hã pika ho mex. Nê mē kot amnhî to mex xwÿnhjê hã pika ho mex. Nê axpên mã mē harênh o: “Hêxta waa nê. Na pre amnepêm mē pakukamã mē panhîgêtjaja Tirtüm nhÿ hã mē kãm kapêr xwÿnhjê homnuj nê mē kupa. No kêt mē papajaja mē kamã ri papa ronhÿx pu prem mē urãk nê ã mē hipêx anhÿr kêt nê.” Anhÿr o axpên mã mē hkaprî ho ri apa. 31-32 Nom ãm amnhî to axêx. Mē ate ã amnhî nhîpêx anhÿr o apa kênã. ã mē ate amnhî nhîpêx anhÿr jao ra apê mē hkanrêhã mē hkra kumrêx ã amnhî to amnhîrit mex o apa. 33 Te mē ate kagã xoprê kot mē hkamnhar nê mē homnuj tÿx pyrãk jakamã koja Tirtüm nhÿrmã ma mē kot amnhî xã htÿx kamã hamak tùm xãta wÿr mē ajano ka mē ma hwÿr ajapêx. Hãmri nê tee ri amã ajapõx prãm kaprÿ nê rî amnhî pumu.

34—Kot paj nhÿrmã ma mē awÿr inhÿ hã ixkapêr jarênh o mē pa xwÿnh kwÿr rê. Nê inhÿ hã mē ahpunumh xwÿnh kwÿr rê. Nê ixkapêr o mē ahkre xwÿnh kwÿr rê. Nom kot kaj mē ãm mē kapêr ma nê apê mē hprãm nõkati nê tanhmã mē homnuj tÿx to ho apa. Nê ixpê mē hkwyjê hpar o apa. Jao pî kahpa hã mē hanhõr o mē hkwyjê hpa. Nhùm mē hkwyjaja Tirtüm kapêr o mē ahkre xã hã ixkre kamã mē ahkre ho hkrî ka mē omu nê mē unê nê ixkreja kamã mē htak. Hãmri nhùm mē apymaj nhãm ahpÿnhã krî hkwyÿ hwÿr hprõt nê mra. ã kot kaj mē inhÿ hã ixkapêr jarênh xwÿnhjê nhîpêx anhÿr o apa. 35-36 Na prem ra mē himex rax nê. Amnepêm panhî kator krax rüm Atãw kra Apewta na pre Tirtüm nhÿ hã kapêr o pa nhùm htõja kãm mar prãm kêt nê kupî. Tã nhùm Tirtüm axte mē hwÿr ÿ hã kapêr o mē pa xwÿnh kwÿjê rê nhùm prem mã mē ho anê nê mē hkwyjê nhîmex. Nhùm pre xatã mē hwÿr mē hkwyjê rê nhùm

mê xatã mê kupa. Apew rûm Parakis kra Jakaris wÿr na prem mê himex rûnh nê. Hâmri nhûm prem Tirtûm mã amnhî jarênh xà hã ixkre kamã Jakarisja pî. Tã mê kajaja mê ate mê urãk nê mê amã Tirtûm kapêr mar prãm kêt nê mê urãk nê amã Tirtûm nhÿ hã kapêr xwÿnhjê nhîmex prãm nê. Á mê ate mê anhîgêjtê pyrã nê mê hipêx anhÿr mÿrapê koja Tirtûm mê apê mê hkanrêhã mê hkra nê mê htãmnhwÿjaja mê ato hpimràatã tanhmã mê ato htÿx to ka mê amnhî xà htÿx kamã ajamak rãhã ho ri apa. Anê.

Jejus kãm Jerujarê nhõ xwÿnhjê japê htÿx ã harênh

Rukre 13.34-35; mãânên Rômãn 11.25-27

³⁷ Hâmri nhûm Jejus te ra kot Jerujarê nhõ xwÿnhjê pumunh nê mê kãm kapêr pyrãk o tanhmã kapêr to ho xa. Nê mê kãm:

—Hêxta waa nê Jerujarê nhõ xwÿnhjaja. Tirtûm kot xatã mê awÿr ÿ hã kapêr jarênh xwÿnhjê rênh nhûm mê kot mê akôt mê amã kapêr jarênh o pa htã ka mê kapêr mar kêt kumrêx. Nê axtem nê kên o mê htak o mê himex o apa. Á na ka htem amnhî tomnuj o apa anê. Tã nom arî inhmã mê ajamãr o ri ixpa hprãm. Te ho krãhyre kot nore hpro nê ho hikwÿ pyrãk o na pa inhmã mê anhîpêx prãm nê. Nom mê amã ixprãm nôkati nê mê ate ixkaga kumrêx.

³⁸ Mÿrapê koja Tirtûm mê anhõ krî jamãr kêt nê. ³⁹ Kot paj tokyx ty nê mê apiitã mê are nê ma akupÿm api ka mê axte ixpumunh kêt nê. Ám akupÿn ixwÿrÿk xà hã arîgrota pix ã koja mê akwÿjaja mê amÿrpê krî ja kamã ixpõx ã ixpumu. Hâmri nê mê akurom ixpumu nê hkînh tÿx nê. Nê tã ixkôt amnhî xunhwÿr kurê kumrêx. Hâmri nê axpên mã ijarênh o:

Ota Tirtûm kot mê pahwÿr mênh xwÿnhhta wrÿ. Nã ãm hãmri na mê pahwÿr wrÿ. Ja mex o mex. Koja mê ã axpên mã ijarênh anê. Anê.

24

Jejus kot mê pakukamã mêmoj jarênh

Makre 13.1-13; Rukre 21.5-19; mãânên Wam Ximotre 4.1-3; Sikûn Ximotre 3.1-9; Apokarip 6.1-17

¹ Tã nhûm Jejus Tirtûm mã amnhî jarênh xà hã ixkre rûm kato nê ma tẽ. Pa mê ixte hkôt ixpa ho ixpa xwÿnhjaja kormã ixkreja pumunh o ixkuhê nê kãm harê nê kãm:

—Kwa Pahihti. Hêxta waa nê. Ixkreja ãm mex kumrêx. Anê.

Hâmri nhûm mê inhmã:

² —Tÿ mex nom koja nhÿrmã mê kãm Tirtûm kurê xwÿnhjaja grãnh pa. Koja arî kên õ axkrutre nê axpên mÿnh nê nõr kêt nê. Koja piitã anghrà nê ahpÿnhã ri hikwÿ. Anê.

³ Hâmri pa mê kuma nê tee ri hkukamã ijamaxpêr. Hâmri nhûm Jejus ma tẽ nê hixêt pê Oriwêhti hã api nê hã nhÿ pa mê ma hkôt mra nê mê kot ã ixkre nhîpêx anhÿrta ã hkukja nê kãm:

—Kwa xà ãm hãmri koja mê ã ixkreta nhîpêx anê? Kwa mê inhmã aprî hã harê. Xà koja mê nhÿrmã ho anê nã? Xà koja mê tokyx ho anê? Nê akupÿn mê ixwÿr awrÿk nhûm mêmoj piitã hapêxja. Kwa mêmo koja we wÿj ri tanhmã amnhî nhîpêx to wehe? Anê.

⁴ Hâmri nhûm mê inhmã hprî hã tanhmã mêmoj kot amnhî nhîpêx to hkukamã ujarênh o nhÿ nê mê inhmã:

—Nã nhÿrmã mêmoj piitã hapêx kaxyw tanhmã amnhî nhîpêx toja kumrêx kot paj mê amã harê ka mê inhma. Nã koja mê ohtõ nê mê awÿr mra nê hêx

rom te pa ixte amnhî nhîpêx pyrâk o amnhî nhîpêx o mê akôt pa. ⁵ Nê mê amâ amnhî jarênh o: “E Tîrtûm na pre mê awÿr inhmê. Ixpê kaxkwa rûm ixwryk xwÿnhhta na pa.” Anhÿr o mê akôt mê amâ amnhî to hêx o pa. Jao ohtô nê mê nokupyr o pa.

⁶ —Nê koja mê nhÿri awry hâ axpên par o pa nê mê atâ axpên par o pa. Nom kêr ka mê harênh ma nê ri tokyx mêmoj piitâ hapêx â hkamnhîx kêt nêy. Kormâ mêmoj piitâ hapêx xâ hâ arîgroja kormâ. ⁷ Koja mêmoj piitâ hapêx kaxyw nhûm ahpÿnhâ ri pika piitâ hkôt mê pa xwÿnhjaja pika hō nhō xwÿnhjê kutâ kuhê nê pijapu ho kuhê. Jao ra axpên par o pa. Hâmri nhûm nhÿri pika hkwy httertet tÿx kumrêx. Nê mê hpur kâam mêôja hapêx nhûm mê kâam prâm tÿx nê pa. Jakamâ nhûm mê ohtô nê prâm xaj axkaprâ. ⁸ Nom ja kormâ mêmoj hapêx kaxyw krax pix na. Te ho mênijê hō hpjagri kaxyw nê kormâ kawax pê ôhy xâ pyrâk.

⁹ —Nê koja mê piitâ ixkôt mê akamâ gryk nê kâam mê akurê htÿx o pa. Nê mê awÿr mra nê ixtâ mê apynê nê mê atomnuj tÿx nê mê apa. ¹⁰ Jakamâ koja mê kot ixkôt amnhî xunhwÿr xwÿnh kwÿjaja mê umaj tee ri amnhî kukamâ hamaxpêr hâMRI nê ixkaga. Nê ixkôt mê kâam axpên tâ amÿnê nê axpên kâam gryk o pa. ¹¹ Nhûm nhÿri mê hkwyjaja Tîrtûm nhÿ hâ kapêr jarênh xwÿnh â amnhî to hêx o pa. Jao mê ohtô nê mê nokupyr o pa. ¹² Koja mê â amnhî nhîpêx anhÿrja o ra piitâ kâam axpên kamâ ukapri hkêt o pa. ¹³ Koja mê â ixtâ mê atomnuj o pa anê. Tâ nom kêr ka mê amnhî to htÿx nê ixkaga hkêt nê. Mê kot mê apar tâ ka mê kaxkwa kamâ akupÿm atîr kurê kumrêx.

¹⁴ —Nê kot kaj mê apê ixkwÿjaja ma krî piitâ hkôt Tîrtûm kapêr o mê ahkre ho apa. Mê kot amnhî tomnuj kaga nê ixkôt amnhî xunhwÿr nhûm Tîrtûm kot ja hâ mê omunh nê mê ho hkra hâ mê kâam harênh o ri mê piitâ mê hkôt apa. Kot kaj mê piitâ mê kâam ijarênh pa pa rî kormâ akupÿn mê awÿr wry. Anê.

Mê pahatomnuj tÿx xwÿnh maati hâ harênh

Makre 13.14-23; Rukre 21.20-24; määnên Sikûn Tesarôn 2.3-4

¹⁵ Nhûm Jejus arî mêmoj kukamâ mê inhmâ kapêr nê mê inhmâ:

—Amnepêm Tîrtûm nhÿ hâ kapêr xwÿnh finat Tânîewja na pre tanhmâ mê atomnuj tÿx xwÿnh maatija jarênh to. Tâ koja nhÿrmâ ra kot harênh xâ hkôt axtem nê Tîrtûm mâ amnhî jarênh xâ hâ ixkre hwÿr axâ nê Tîrtûm xâam xâ kamâ xa. Ka mê ja hâ omu hâMRI nê mê kot krî grânh par â hkamnhîx kurê kumrêx. ¹⁶ Koja â amnhî nhîpêx anê ka mê amÿm amnhî wÿr mê omu hâMRI nê ajapôj nê ma aprôt nê amrar kurê kumrêx. Mê apê jar pika pê Jutej kamâ mê apa xwÿnhjaja kaj mê omu hâMRI nê mê kot mê apar pymaj aprôt nê ma amrar kurê kumrêx. ¹⁷ Rÿ ka mê anhôrkwÿ hkrâmnênh o akri japêr nê amÿm amnhî wÿr mê omu nê akukrêx wÿr axâr nê hō hpyr mâ ajamaxpêr kêt nê. Âm wry nê aprôt nê ma atêm kurê kumrêx. ¹⁸ Rÿ ka mê apur kâam axâpênh o apa japêr nê amÿm mê omu hâMRI nê akupÿm anhôrkwÿ hwÿr xê jamÿnh kaxyw atêm kêt nê. Âm mê umaj aprôt nê ma atêm kurê kumrêx.

¹⁹ —No mê htujarô nê mê hkra karâre xwÿnhjaja koja mê kêp mêmoj omnuj tÿx nê. Tanhmâ kot mê amnhî to nê mê umaj hprôt tÿx? Nâ pika ja kamâ koja mê mex kêt o mex kêt. Mê kot amnhî tomnuj mÿrapê koja Tîrtûm tanhmâ mê homnuj tÿx to.

20 —Nê kwa kêr ka mê amnhî to Tîrtûm wý kê ã mê kot amnhî nhîpêx anhÿr xà hã arîgroja na wrÿk pê ã amnhî nhîpêx anhÿr kêt nê. Rÿ mê hkôt xà hã arîgro pê sap ã ã amnhî nhîpêx anhÿr kêt nê.

21 —Nê ã mê kot amnhî nhîpêx anhÿr ã arîgroja ã koja mê piitã amnhî xà htÿx kãm hamak tÿx kumrêx. Amnepêm Tîrtûm kot pika ho kator krax rûm amnê mê pa xwÿnhjaja kormã aa kot ã amnhî xà htÿx kamã hamak anhÿr kêt tã arîgroja ã koja mê amnhî xà htÿx kumrêx kamã ama. Hãmri nê axte pika ja kamã ã amnhî xà htÿx kumrêx kamã hamak anhÿr kêt nê. 22 Kop apu Tîrtûm kot mê kot amnhî xà htÿx kamã hamak xà hã arîgro hkwÿ ho gri hkêt ronhÿx ka mê apiitã apikaprâr pa. Ja pymaj koja mê amã ho gri. Kot ra amnhî kaxyw mê arênh xwÿnhjê japê xaj mê amã ho gri.

23-24 —Tã ã mêmoj kot amnhî nhîpêx anhÿr jakamã koja mêmojaja tanhmã mê amã ixto hêx to nê mê amã: “Ota ra Kris akupÿn wrÿ. Kwa mê hwÿr mra nê omu.” Anê. Rÿ mê amã: “Krisja krî mÿj kamã na raa. Kwa mê ma hwÿr mra nê omu.” Anhÿr o mê amã ixto hêx o pa. Rÿ mê awÿr mra nê mê amã amnhî to hêx nê mê amã: “E. Ot pa ixpê Kris ã mê awÿr wrÿ. Tîrtûm na mê awÿr inhmê pa wrÿ.” Anê. Rÿ mê amã: “E ixpê Tîrtûm nhÿ hã ixkapêr xwÿnh na pa mê awÿr mōn pōj.” Anhÿr o mê amã amnhî to hêx. Hãmri nê mê anokupyr kaxyw mê amã aa mê kot mêmoj pumunh kêt kwÿ ho anhÿr o pa. Tîrtûm kot amnhî kôt mê arênh xwÿnhjaja kãm mê ate ja hã mê omunh nê mê gryk ã ixkaga hprãm xaj koja mê ã mê anoo mã amnhî nhîpêx anhÿr o pa. Nom ãm ã amnhî nhîpêx anhÿr kaprÿ ka mê ixkaga hkêt nê.

25 —E kwa mê inhmar tÿx nê. Na pa ra ixprî hã ã mê kot amnhî nhîpêx anhÿrja kukamã ã mê amã mêmoj jarênh anê. Tã kêr ka mê amnhî nê ã mê kot amnhî to hêx anhÿr o mê pa xwÿnhjê pumunh mex o apa nê axkãm ajamak rom. 26 Rÿ koja mê tanhmã mê amã ixto hêx to nê mê amã: “Ota Tîrtûm kot mê pahwÿr mēnh xwÿnhnta kapôt ã mōn pōj. E mê tokyx ma hwÿr mra nê omu.” Anhÿr o mê amã ijarê ka mê ama nê ãm mê ama nê hwÿr amrar kêt nê. Rÿ nhÿm mê amã: “Ota hitom kãm xa. E mê mamrî hwÿr agjê nê omu.” Anê no ka mê ãm mê ama nê ãm mê ama nê hwÿr agjêx kêt nê. 27 Kot paj nhÿrmã akupÿn mê awÿr ixwrÿk kaxyw hãmri nê ixpimxur kãm ixwrÿk kêt nê. Koja pika piitã hkôt mê pa xwÿnhjaja anhîpê ixwrÿk kãm ixpumu. Te mê piitã anhîpê mê kot na haxênh pumunh pyrãk o kot kaj mê anhîpê apiitã ixpumu. 28 Te nhÿri mêmoj kro nê nōr nhÿm nhōnhnti kot omunh nê hã htor nê hpinphanh nhÿm mê piitã hã omunh pyrãk o kot paj amnhî nhîpêx. Anê.

Jeus akupÿn wrÿk xwÿj ri mêmoj kukamã harênh

Makre 13.24-31; Rukre 21.25-33; mãânēn Wam Tesarōn 4.16-17

29 Nhÿm Jeus arî mê ixte hkôt ixpa ho ixpa xwÿnhjê mã kapêr nê mê inhmã: —Nê kot paj akupÿn mê awÿr inhnojarêr nhÿm rî Tîrtûm kaxkwa kamã tanhmã mêmoj nhîpêx to. Kapêr ã kagã htÿm kot tanhmã ja kukamã harênh to nê harênh kot:

Koja Tîrtûm kaxkwa ho àk nhÿm kanhêti piitã rôrôk pa nhÿm myyti ahtyk nhÿm mytwrÿre urãk nê axte hpôk kêt nê. Anê.

30 Koja ã mêmoj amnhî nhîpêx anhÿr pa hãmri pa kaxkwa hã mê amã mêmoj nhô. Hãmri nhÿm pika piitã hkôt ri mê pa xwÿnhjaja piitã omu nê tee ri amnhî kukamã hamaxpêr o hkaprî nê mÿr rax kumrêx. No mê kajaja kot kaj mê omu hãmri nê akupÿn mê awÿr ixwrÿk nê mê ato amnhîptâr mã ajamaxpêr kurê kumrêx. Kot paj kakrã kamã hirã htÿx kãm akupÿn ixihtÿx kãm mê awÿr wrÿ. 31 Hãmri nê Tîrtûm kapêr o mê wrÿk xwÿnh maati mã anê nhÿm pifti

kakô hāmri nhūm hkwyjaja kuma nē ma mē awyr pika piitā hkôt anhgrā nē ma mra nē inhmā mē ato akuprō. Ixte amnhī kaxyw mē axunhwyr xwýnhjé o akuprō nē man akupýn ixwýr mē ato hapêx. Anē.

*Jejus kot mēmo pàr o ejêp jarēnh
Makre 13.28-31; Rukre 21.29-33*

³² Nhūm Jejus arī mē inhmā kapēr nē mē inhmā:

—E ka mē pī hpār mūj pumu. Na hte mēmo mytwrý hā rā nhūm mē omu nē ô hkukamā hamaxpēr kurē kumrêx. ³³ Ja pyrā nē koja ā ixte mēmoj jarēnh anhýr xwýnhja amnhī nhīpêx par mē ka mē omu nē akupýn mē awyr ixwryk mā ajamaxpēr kurē kumrêx. Kot paj te ra mē anhōrkwy kapem ixām pyrāk o amnhī nhīpêx. ³⁴ Nom akupýn ixwryk kêt ri koja ā mē kot mēmoj kot amnhī nhīpêx anhýr pumunh xwýnhjaja kormā piitā htyk kêt ri pa akupýn wrý.

³⁵ —Nē koja nhýrmā pika nē kaxkwa wa hapêx pa. Tā no ām ixkapêrja koja wa urāk nē aa hapêx kêt nē. Koja ām rāhā ho rāhā. Kot paj aa ihkjé ho tanhmā mēnh to hkêt nē. Anē.

*Mē pahte akupýn Jejus wryk xā hā arīgro pumunh kêt ā mē pajarēnh
Makre 13.32-37; Rukre 12.37, 17.26-30, 17.34-36; määnēn Wam Tesarōn 5.2*

³⁶ Nhūm Jejus arī mē inhmā kapēr nē mē inhmā:

—Nē ixte akupýn mē awyr ixwryk xā hā arīgroja mē ate omunh kêt. Nē kaxkwa kamā Tirtūm kapēr o mē wryk xwýnhjaja haxwýja kot ja pumunh kêt. Nē ijaxwýja ixpê Tirtūm Kra htā ixte ja hā amnhī pumunh kêt. Ām inhō Papaj pìx na kot ja pumunh.

³⁷ —Nē kot paj nhýrmā man akupýn mē awyr wrý. Akupýn mē awyr ixwryk xā hā arīgrota ā koja mē htýx ri amnhī tomnuj o pa. Te amnepēm Noehti kormā htūr ri mē pa xwýnhjaja kot htýx ri amnhī tomnuj o pata pyrāk. ³⁸ Na pre htem amnhī kaxyw Tirtūm mā hamaxpēr kêt nē. Ām jar mē kot amnhī nhīpêx pix kukamā hamaxpēr kôt pix mā amnhī nhīpêx o pa. Rôm nhūm Noehtija gô htām pymaj pàr rax nhīpêxta mā axā. ³⁹ Nhūm mē ja hā omu nē ām omu nē tanhmā ri amnhī kukamā hamaxpēr to hkêt nē. Hāmri nhūm naja mē haêr pē wrý nē wryk rax o mē hanhir pa. Tā akupýn ixwryk xā hā arīgroja ā koja mē htýx ri ā amnhī nhīpêx anhýr o paja o pa mē haêr pē naja pyrā nē akupýn wrý.

⁴⁰ —E kot paj mē amā nhýrmā akupýn ixwryk nē tanhmā mē anhīpêx to hā amnhī jarē. Te kot ja pyrāk. Koja mēmyjé hō wa hamêxkrut nē hpur kām àpēnh o xa. Nhūm hōja ra ixkôt amnhī xām nhūm hōja ixkôt amnhī xām kêt japêr. Hāmri pa amnhī wýr ra kot ixkôt amnhī xām xwýnhnta o api nhūm kot ixkôt amnhī xām kêt xwýnhnta hpur kām ahte arī xa. Hāmri nē tee ri hkràmnhwý japêr rīt o xa. ⁴¹ Rý nhūm mēnijé wa hamêxkrut nē harōj kahuk o xa. Nhūm hōja ra ixkôt amnhī xām nhūm hōja ixkôt amnhī xām kêt japêr. Hāmri pa amnhī wýr kot ixkôt amnhī xām xwýnhnta ho api nhūm kot ixkôt amnhī xām kêt xwýnhnta tee ri hkràmnhwý japêr rīt o xa hāmri nē hamaxpēr rax kumrêx. Kot paj nhýrmā akupýn wrý nē ā mē anhīpêx anē. ⁴² Tā mē ate akupýn ixpōx xā hā arīgro pumunh kêt jakamā kwa kêt ka mē ijamār rāhā ho ri apa. ⁴³ Na htem htýx ri nhýri tanhmā amnhī nhīpêx to ho pa nhūm mē kēp àhkính xwýnh mē òrkwy hwýr agjé nē mē kēp ahkī. ⁴⁴ Tā mē ate akupýn ixwryk xā hā arīgro pumunh kêt jakamā kwa kêt ka mē ixwakre kamā te mē apē mē òrkwy nhō ðōn kot amnhī nhīpêx pyrā nē atýx ri tanhmā amnhī tomnuj to ho apa hkêt

nê. Ixkutêp axkâm ajamak rom nê ri apa. Jao tãm ixkutêp amnhî nhîpêx rãhã ho ri apa. Anê.

Mê kãm mê àpênh mex xwýnhjê jarênh

Rukre 12.41-48

⁴⁵ Nhùm Jejus arî mê inhmã kapêr nê mê inhmã:

—E koja mê kãm àpênh xwýnhjê hõ àpênh mex o pa hãmri nhùm õ patrãw àpênh ã omu hãmri nê ma nhýhým mör kaxyw nê ìhkram mêmoj piitã haxàr pa nê kãm: “E kêr ka ixwakre kamã inhmã inhörkwý tânopxar mex nê. Nê inhmã mê àpênh xwýnhjê mã mê apkur xà nhör o apa.” Anhÿr o kãm mêmoj tã karõ hãmri nê kato nê ma nhýhým mō. ⁴⁶ Hãmri nhùm kot kãm àpênh mex xwýnhja wakre kamã kãm àpênh mex o pa. Jakamã nhùm õ patrãw akupÿn hpõx o mō nhùm amnhî wÿr harênh ma nê hkînh nê. Nê tee ri amnhî kukamã hamaxpêr o kãm uma hkêt nê. Kot wakre kamã kutêp kãm àpênh mex jakamã tee ri tanhmã amnhî kukamã hamaxpêr to hkêt nê. ⁴⁷ Jakamã nhùm õ patrãwja akupÿn pøj nê kot kãm àpênh mex ã omu nê hkînh nê. Hãmri nê kot kãm õ mêmoj piitã hamãr o pa kaxyw ìhkram haxàr pa. ⁴⁸ No koja axtem nê wakre kamã kãm àpênh mex kêt japêr. Nê hamaxpêr o: “Tk. Nã koja tokyx akupÿn mör kêt nê.” Anhÿr o hkamnhîx. ⁴⁹ Hãmri nê wakre kamã kãm mê àpênh xwýnhjê htak nê pipãnh pix o pa. Nê kãm kagõxyhti xành xwýnhjê kôt pix mã pa. ⁵⁰ Hãmri nhùm õ patrãwja haêr pè akupÿn pøj nê tee ri ja hã omu. ⁵¹ Hãmri nê kamã gryk tÿx nê tanhmã homnuj htÿx to nê kãm mê àpênh punuj xwýnhjê mê mê ho hpimràatã amnhî nê mê kator pa. Hãmri nê mê kot kapêr kwým amnhî nhîpêx xwýnhjê mê mê ho hpimràatã tanhmã mê homnuj to nê amnhî nê mê kator. Hãmri nhùm mê tee ri amnhî kukamã hamaxpêr nê mur nê tee ri amnhî nhîpêx. Tã kêr ka mê ixwakre kamã ho mê urak kêt nê. Mê kurom ixwakre kamã ixkapêr kôt amnhî nhîpêx mex rãhã ho ri apa. Anê.

25

Kormã mê mjên kêt xwýnhjê ho 10 nê mê harênh

Wam Tesarõn 5.1-3

¹ Nhùm Jejus arî mê inhmã kapêr nê mê inhmã:

—Nê mê ate Tîrtüm kôt amnhî nhîpêx o mê apa xwýnhjaja kêr ka mê akupÿn amnhî wÿr ixkãm ajamak rom nê ri apa. Nom mê kèp Tîrtüm prãm nõkati xwýnhjaja koja mê akînhã ãm htÿx tanhmã amnhî to pix kukamã hamaxpêr o pa. Te kormã mê mjên kêt xwýnhjaja kot amnhî nhîpêxta pyrak. E pa mê amã tanhmã mê harênh to ka mê inhma. Kojã kormã mê mjên kêt xwýnhjê kèp 10jaja ma hkrãmnhwÿ mjên mã xwýnhjê kutã pry hã mra. Amnhî kôt kanê jamÿ nê o mra nê kutêp pry nhîkrep hkrî. ²⁻⁴ Nhùm mê kèp 5jaja hkwyjê rom amnhî kukamã hamaxpêr mex nê kanê kaxyw amnhî kôt orti hkwy ho mō. No nhùm mê kèp 5 nê mê hkînhã ãm htÿx kanê pix jamÿ nê o mra. ⁵ Hãmri nê mê mjên mã xwýnhja kutêp axpên mã kapêr o hkrî. Nhùm tokyx htêm kêt nhùm mê kutêp hkrî nê gaa nê ra õtxwa nê gaa nê hikwÿ nê ra õt pa.

⁶ —Tã nhùm kôt ã kamãt hãmri nhùm mjên mã xwýnhnta hpõx o tẽ. Hãmri nhùm kot hkukamã harênh xwýnhja mê õt o mê hikwÿ xwýnhjê mã amÿra nê mê kãm: “Kwa mê hãmri. Ota mjên mã xwýnhnta tẽ. Mê tokyx kãnhmã akrî pu mê kutã mra.” Anê. ⁷ Hãmri nhùm mê hkrã hapøj nê kanê hpök. ⁸ Nom nhùm mê hkwyjê hkînhã õ kanê kaxyw orti ho pa hkêt xwýnhjaja ra mê kèp mê kanêja hkaprÿ hpa nhùm mê tee ri kot hpök kaxyw. Hãmri nê orti hkwy hã hkwyjê hwÿ nê mê kãm: “Xê mê inhmã orti ho inhõ kanê go.” Anê. ⁹ Nom

nhùm mē kēp nē nē mē kām: “Ma mē inhō kanê kamā orti grire kēnā kot pa kēt mē amā ho go. Xē mē tokyx ma mra nē nhÿri amnhīm hkwy japrō mē.” Anē. ¹⁰ Hāmri nhùm mē tee ri mē kuma nē ma amnhīm hkwy japrōr mā ma mra.

—Rôm nhùm mjēn mā xwÿnhnta mē hānh tē nhùm kanê kamā arī mē orti xwÿnhjaja omu nē hā jēt kurē kumrēx. Hāmri nē ma hkōt mōn mē pikuprōnh xā hā ixkreja wÿr wa hā hkīnh nē apkur kaxyw gjēx pa nhùm mē hā kahē. Mē gjēx xā hā oreja ra hwÿr hpōx jakamā nhùm mē hā kahē.

¹¹ —Tā nhùm ma mē kot orti japrōr mā mrrar xwÿnhjaja hāmri amnhī to hapu nē mra nē tee ri mē hā hakwakre kupē nē htatak nē tee ri mē kām akir nē mē kām: “Xē mē inhmā kahē xā mē pa mē awÿr agjē.” Anē. ¹² Hāmri nhùm hprō mā xwÿnhnta mē kuma nē mē kām: “Tk. Nā ixte mē apumunhre hā kot pa kēt mē amā kahē xā mē. Kwa mē ma akupÿm mra.” Anē. Ā mē ujarēnh kot anhÿr. Anē.

¹³ Nhùm pre ā Jejus mē inhmā ujarēnh anē. Hāmri nē mē inhmā:

—E kēr ka mē te kot amnhī kōt orti hkwy ho mōr xwÿnhjaja kot amnhī nhīpēx pyrāk. Mē ate akupÿn ixwÿrk xā hā arīgro pumunh kēt jakamā kēr ka mē apkati mē ixkamā ajamak rāhā ho apa. Anē.

Mē kām mē àpēnh xwÿnhjē jarēnh

Rukre 19.11-27

¹⁴ Nhùm Jejus arī mē inhmā kapēr nē mē inhmā:

—E kēr ka mē ixwakre kamā inhmā tanhmā amnhī nhīpēx mex to ho ri apa pa hpānhā mē amā amnhīrer mex nē. Mē ate tanhmā inhmā amnhī nhīpēx to ho apa xā hkōt kot paj mē amā amnhīre. Te mēhō my kot kām mē àpēnh xwÿnhjē nhīpēx pyrāk. Koja nhÿhÿm nojarēt nē kām mē àpēnh xwÿnhjē mā hikukrēx piitā hkaga hpa. Ōrkwy nē hpur nē hkrit. Ām mēmoj piitā mē kot wakre kamā kām hamār o pa kaxyw mē kām hkaga hpa. ¹⁵ Hāmri nē ahpÿnhā mē kām kàxpore hkwy gō. Mē kot kutēp kām tanhmā ho rūnh to kaxyw ahpÿnhā mē kām ōr pa. Kot kàxpore pumunh mex xwÿnhja mā nhùm ho 5.000 nē kugō. Nē kot hkōt kax pē omunh xwÿnhja mā nhùm ho 2.000 nē kugō. Nē kormā kot omunh tÿx kēt xwÿnhja mā nhùm ām ho 1.000 pix nē kugō. Hāmri nē mē kām amnhī jarē nē ma nhÿhÿm mō. ¹⁶ Hāmri nhùm kot ho 5.000 nē hamÿnh xwÿnhja kàxporeta py nē ma o mōr kurē kumrēx nē tanhmā ho àpēnh to ho mōr kām ra hipy axte ho 5.000 nē kumē. ¹⁷ Nhùm kot ho 2.000 nē hamÿnh xwÿnhja māānēn tanhmā ho àpēnh to ho mōr kamā ra hipy axte ho 2.000 nē kumē. ¹⁸ Nom nhùm kot ho 1.000 pix nē hpyr xwÿnhja wa hkīnh ā axtem nē ma o tē nē kām kakwy nē kamā haxā nē hity hpa nē ma akupÿm tē.

¹⁹ —Tā nhùm mē ō patrāwja akupÿn mōn pōj nē mē kām: “E mē amnē ixwÿr mra nē ixte mē amā kàxpore ho ixpigrānh xwÿnhnta jarē. Tanhmā na ka prem ixkutēp inhmā hipēx to?” Anē. ²⁰ Hāmri nhùm kot ho 5.000 nē hpyr xwÿnhnta kumrēx hwÿr tē nē kām: “E ota akàxporeta. Ate inhmā ho 5.000 pix nē ōr tā pa amā ho rax nē amā hipy axte ho 5.000 nē kumē nhùm ho axkamur nē ra ho 10.000. Tā ota.” Anhÿr o kām kapēr hāmri nē kām kugō ²¹ nhùm amnhīm hamÿ nē omu nē hkīnh nē. Hāmri nē kām: “Nā ām hāmri na ka inhmā ho anē. Ixte amā ho 5.000 pix nē ōr tā ka ra inhmā ho rax jakamā kot kaj apē inhmā mē àpēnh xwÿnhjē hkrāhtūm. E amnē ixwÿr axā pu mē apku nē pahkīnh.” Anē.

22 —Hâmri nhũm hpãnhã kot ho 2.000 nê hpyr xwÿnhnta hwÿr tẽ nê ô patrãwta mã kãm: “E ota akãxporeta. Ate inhmã ho 2.000 pix nê ôr tã pa amã ho rax nê amã hipy axte ho 2.000 nê kumê. Tã ota.” Anê.

23 Hâmri nhũm kuma nê amnhĩm hamÿ nê omu nê hkĩnh nê. Hâmri nê kãm: “Nã ãm hãmri na ka ã inhmã ho rax anê. Ixte amã ho 2.000 pix nê ôr tã ka inhmã ho rax jakamã kot kaj apê inhmã mē ãpênh xwÿnhjê hkrãhtũm. E amnê ajaxwÿja ixwÿr axã pu mē apku nê pahkĩnh.” Anê.

24 —Tã nhũm kot ho 1.000 pix nê hpyr xwÿnhnta hapu hã wa hkôt tẽ. Hâmri nê ô patrãw mã tanhmã kapêr to nê kãm: “Nã ra ixte apumunh tũm. Pêr axãhkurê pix kãm na ka hte apa. Nê amã akãxpore ho rax nê anhõ ho rax pix kukamã ajamaxpêr o ri apa. Nom mē pajaja mē ixãpênh rax pix kukwak ri na ka hte akãxpore rax nê apa. 25 Jakamã na pa inhmã apyma nê. Nê akãxporeta py nê ma o tẽ nê kaxyw kre nê kamã haxã. Tã ka akupÿn mōn pōj pa ajarênh ma hãmri nê hkapa nê man akupÿn amã o tẽ. Tã ota anhõ 1.000ta.” Anê.

26-27 Hâmri nhũm tee ri kuma nê kãm: “Tk. Kwa amã ixpyma nê ate ixpumunh mex anhÿr tã na ka ixte amã kãxpore nhõrta pyr nê ma ho atêm. Nê mē kot mē kêp kãxpore jamÿnh o kuhê xã kamã mē kãm ôr nhũm mē ixkutêp tanhmã inhmã ho rax to hkêt nê? Pêr ãm amã kaga nê ate amnhĩ tomnu pix o ri apa xwÿnh.” Anê. 28-30 Hâmri nê kêp kãxporeta py nê nhãm jam kugõ nê kãm: “E amÿ nê o tẽ nê kot inhmã ho 10.000 nê ôr xwÿnhnta mã agõ. Hãmri nê jahti pynê nê ma o tẽ nê kamãt kô kamã amê. Apênh mexti hã. Kojã tee amÿra nê amnhĩ xã htÿx kamã hamak xaj tee ri amnhĩ nham o axpên kamnhar tÿx kaprÿ nê rĩ amnhĩ pumu.” Anhÿr o kãm kapêr nhũm kuma nê hpa hã kupy nê ma o tẽ. Hãmri nhũm mē ô patrãwja mē ãpênh xwÿnhjê mã kãm: “E mē ate ixwakre kamã mē axãpênh mex xwÿnhjaja kot paj ã mē ato mex rax anê ka mē akĩnh nê. Nom mē kot inhmã mē ãpênh mex kêt xwÿnhjaja kot paj mē kêp mēõ mēmojta jamÿ nê nhãm mēhõm kugõ nhũm hkaprĩ nê.” Anê. ã mē ujarênh kot anhÿr. Anê.

Jejus kot nhÿrmã mē piitã tanhmã mē harênh to hã harênh

Matêwre 13.35-43, 13.47-50; mããnen Apokarip 20.11-15

31 Nhũm Jejus arĩ mē inhmã kapêr nê mē inhmã:

—Nê kot paj nhÿrmã akupÿn mē awÿr wrÿ nhũm Tirtũm kapêr o mē wrÿk xwÿnh piitã man ixkôt wrÿ. Kot paj wrÿ nê ixpê pahi maati hã ixkrĩ xã maati kamã inhmex nê nhÿ. 32-33 Hãmri nê Tirtũm kapêr o mē wrÿk xwÿnhjê mã anê nhũm mē ma krĩ piitã hkôt mē apiitã mē ato pikuprõnh pa nê akupÿn ixwÿr mē ato hapêx. Pa mē apumu nê tanhmã mē axunhwÿr to. Te ôwêhti jamãr o pa xwÿnh kot ôwêhti kaêx ã motre pumunh nê nhãm nê motre xunhwÿr parta pyrãk. 34 Hãmri nê ixupõk rũm mē ate ixkôt amnhĩ xunhwÿr xwÿnhjê mã ixkapêr nê mē amã: “E mē kajaja kot kaj mē amex kumrêx nê ri apa ho apa. Amnepêm kormã mēmoj piitã hkêt ri na pa pre Inhĩpêêxã mē wa mē akukamã tanhmã ijamaxpêr to nê mē amã mēmoj mex xunhwÿr rũnh nê. 35 Tã ka prem ajapõj hãmri nê ixkôt amnhĩ xunhwÿr nê tanhmã ixto mex to ho ri apa.

Na pa pre inhmã prãm nê ixpa ka prem ixpumu nê ixkamã axukaprĩ nê inhmã mēmoj gõ pa kuku.

Nê na pa pre inhmã kōr nê ixpa ka prem ja hã ixpumu nê inhmã gō pa ho ixkō nê akupÿm ixihitÿx.

Nê aa mē ate ixpumunh kêt tã ka prem nhÿri ixpumu nê amnhĩ nhõrkwÿ hwÿr ixwÿ.

36 Nê na pa pre ixê pynajti nê ri ixpa ka prem ja hã ixpumu nê inhmã axê gô pa haxà nê ri hã ixpa.

Nê na pa pre ixà nê inhîkwÿ ka prem ixwÿr mra nê ixkane nê tanhmã ixto mex to pa akupÿm inhmex.

Nhÿm prem ijaxà pa mē hagjênh xà kamã ixkrÿ ka prem ixwÿr mra nê tanhmã ixto mex to.

Ã mē ate ixto mex anhÿr o ri apa jakamã nhÿm inhô Papajja ixtã mē apumu. Tã koja ixtã mē ato mex rax nê.” Anê.

37 —Kot paj ã mē ate tãm amnhÿ nhÿpêx xwÿnhjê mã ixkapêr anê. Hãmri ka mē tee ri inhma nê amnhÿ tã ixkukja nê inhmã: “Kwa xà mē pajaja na pa prem ã ato mex anê? Nà mē ixte ã anhÿpêx anhÿr kãm amnhÿ pumunh kêt tã na ka ã mē ijarênh anê. Kwa nhÿri na ka pre amã prãm nê apa pa prem apumu nê amã mēmoj gô ka aku? Nê nhÿri na ka pre amã kôr nê apa pa prem amã gô hkwy ka ho ixkô? 38 Nê nhÿri na pa prem apumu nê amnhÿ nhôrkwy hwÿr awÿ? Rÿ ka pre axê pynajti nê apa pa prem amã inhÿnhkã gô ka hagjê? 39 Nê nhÿri na ka pre axà nê inhîkwÿ pa prem apumu nê akane? Nê nhÿri na prem ajaxà pa mē hagjênh xàja wÿr mra nê kamã tanhmã ato mex to? Nà mē pa hkêt.” Anhÿr o amnhÿ tã ixkukja. 40 Hãmri pa mē amã: “Nà mē kêp amrakati xwÿnhjaja na pre htem pa pyrãk. Tã ka prem mē kamã axukaprÿ hã tanhmã mē kutã anojarêt to ho ri apa jao te pa tanhmã ixto mex to ho apa pyrãk. ãm hãmri na ka prem ã mē ho mex anhÿr o ri apa.” Anê. Kot paj ã mē ate amnhÿ to mex xwÿnhjê mã ixkapêr anê.

41 —Hãmri nê hpãnhã apke rÿm mē kot ixkôt amnhÿ xunhwÿr kêt xwÿnhjê mã tanhmã ixkapêr to nê mē kãm: “No mē kajaja kot paj ixupôk rÿm mē unhwÿr xwÿnhhtajê hkÿnhã mē ato mex kêt nê. Amnepêm na pre Tÿrtÿmja Satanasti mē mē kot tanhmã kãm amnhÿ nhÿpêx to ho mē pa xwÿnhjê mē mē ho hpimràatã mē kaxyw kuwy rax kumrêxja nhÿpêx. Mē kot amnhÿ tomnuj tÿx mÿrapê nhÿrmã kamã amnhÿ xà htÿx kamã hamak rãhã nê pa ho pa kaxyw. Tã kot kaj mē ajaxwÿyja ma mē hkôt hwÿr ajapêx. Mē apê Satanasti hkôt mē ate amnhÿ nhÿpêx o apa xwÿnh jakamã kot kaj mē urãn ma hwÿr ajapêx pa. 42 Aa mē ate tanhmã ixto mex to hkêt. Na ka pre htem inhmã prãm nê ixpa hã ixpumu nom inhmã mēmoj nhôr kêt nê. Nê inhmã kôr nê ixpa hã ixpumu nom inhmã gô hkwy hkêt nê. 43 Nê nhÿri ahte ixpa hã ixpumu nom amnhÿ nhôrkwy hwÿr ixwÿr kêt nê. Nê ixê pynajre nê ixpa hã ixpumu nom inhmã axê nhôr kêt nê. Nê ixà nê inhîkwÿ hã ixpumu nom ixkane hkêt nê. Nê mē kot ijaxâr nhÿm arÿ ixkrÿ hã ixpumu nom ixwÿr amrar nê tanhmã ixto mex to hkêt nê. ã mē ate inhÿpêx anhÿr o apa jakamã e mē ma kuwy hwÿr apa kurê kumrêx.” Anê. Kot paj ã mē kãm ixkapêr anê. 44 Hãmri nhÿm mē tee ri inhma nê amnhÿ tã ixkukja nê inhmã: “Kwa nã ã mē ijarênh anhÿr kêt nê. Aa mē ixte ã anhÿpêx anhÿÿre hã. Nhÿri na pa prem tanhmã akute hã apumu? Nã aa mē ixte nhÿri ã ate amnhÿ nhÿpêx anhÿr ã apumunhre hã.” Anê.

45 —Koja mē ã inhmã amnhÿ tã aprãr anhÿr kaprÿ. Kot paj mē kãm: “Nà na ka pre htem mē kêp amrakati xwÿnhjê pumu nê ãm mē omunh o ri apa nê mē kamã axukaprÿ hkêt nê. ã mē hipêx anhÿr jao te pa ã inhÿpêx anhÿr pyrãk. Jakamã kwa mē tokyx ma kuwy hwÿr ajapêx kurê kumrêx.” Anê. Kot paj ã kuwy hwÿr mē hanor anê. 46 Hãmri nê hwÿr mē rênh pa nhÿm mē ma hwÿr hapêx nê kamã amnhÿ xà htÿx kãm hamak rãhã nê pa ho pa nê aa kator kêt kumrêx. No kêt mē ate tãm amnhÿ nhÿpêx o mē apa xwÿnhjaja kot kaj mē

kurom ma Tirtûm mē wa inhō krī hwÿr api nē kamā amex nē atīr tûm nē apa ho pa. Kot paj ā ahpÿnhā mē apiitā mē anhîpêx anē. Anē.

Nhûm pre ā Jejus akupÿn wrÿk ā amnhî kukamā mē inhmā ujarênh anē. Hāmri nē mē inhmā ujarênh pa.

26

Mē kot Jejus ā àmnênh ā amnhî jarênh

Makre 14.1-2; Rukre 22.1-2; Juāw 11.45-53

1 Tā nhûm Jejus mē ixte hkôt ixpa ho ixpa xwÿnhjê mā ujarênh pa nē mē inhmā:

2 —E kot puj mē axte pahtā apkati axkrut hāmri nhûm arîgro pê Pas kato. Jakamā koja mē piitā amnepêm Tirtûm kot Ejit nhō xwÿnhjê pê mē pakukamā mē panhîgêjtê kator mā hamaxpêr nē hā hkînh kaxyw Jerujarê hwÿr akuprō. Kamā koja mē ixpynê nē pî kahpa hā inhō nē ixpî. Koja mē tokyx ā inhîpêx anē. Anē.

Nhûm pre ā amnhî kukamā mē inhmā amnhî jarênh anē. ³ Rôm nhûm Jerujarê kamā patre krāhtûmjê mē Ijaew pigêjtaja patre maati Kajpasja nhōrkwÿ kamā axpên wÿr akuprō. ⁴⁻⁵ Ra mē kām Jejus pîr prām tā mē kām mē kot hkôt kapêr mar o pa xwÿnhjê pyma nē. Hāmri nē tee ri hamaxpêr nē axpên mā:

—Hêxta waa nē. Tanhmā kot puj wem ho nē kupîi? Kot puj mē pahkînh kām tanhmā ho nhûm mē hkînh xwÿnhjaja hā mē pakamā gryk tÿx nē. Pu mē hā axpu nē hā tanhmā axpên to. Jakamā kwa pu mē kormā tanhmā ho hkêt nē.

Anhÿr o axpên ma.

Mêhō ni kot Jejus krā gregrer ā harênh

Makre 14.3-9; Rukre 7.36-50; Juāw 12.1-8

6 Tā nhûm Jejus kormā krī pê Petān kamā Simāw nhōrkwÿ kamā apkur o nhÿ. Simāwja na pre hkā kro xāpêr tÿx o pa nhûm Jejus ra arîgro hō hā akupÿm hkā ho mex. Hāmri nē akupÿm ô krī hwÿr pōj nē ôrkwÿ hwÿr tē nē kuri apkur o nhÿ. ⁷ Hāmri nhûm mêhō nija hpôx ā omu nē hamaxpêr o:

—Ma koja pêr Jejusja pa hā apkati grêre hāmri nē ty. An pa ma hwÿr tē nē mêhkuxwa xā ho hkuxwa.

Anē hāmri nē kên jaka ho kàx kām mêhkuxwa xāja nhûm kumÿ nē ma hwÿr o tē. Hāmri nē ho hkrā gregrer nē hā hkapîr pa nē ho hkuxwa hpa. Mêhkuxwa xā hā kàxpore xohtō rax tā nhûm ā hā hkapîr par anē. ⁸ Hāmri pa mē ixte Jejus kôt ixpa ho ixpa xwÿnhjaja tee ri ā kot hipêx anhÿr ā omu nē axpên mā:

—Tk. Kwa na hā mêhkuxwa xāta kapîr pa. ⁹ Kop apu ma kot o htêm nē ho wênê nē hpānhā kàxpore ho rax kumrêx nē hamÿnh nē ho mē kêp amrakati xwÿnhjê nhîpêx par o nhÿx ja kām mex nē. Kwa mo na we ā amnhî nhîpêx anhÿr kêt nē? Anē.

¹⁰ Hāmri nhûm Jejus amnhî tā mē inhma nē mē inhmā:

—Kwa kot ixto mex kaxyw kênā na ka mē axtem nē ixtā kām akir. ¹¹ Mē kêp amrakati xwÿnhjaja koja mē arî mē akôt pa rāhā nē. Ka mē amā mēmo arîgro hā tanhmā mē ho ajuta hto hprām nē tanhmā mē ho ajuta hto nē mē kām mēmoj gō. No pa kot paj ri mē akôt ixpa ka mē ixto mex ry ho apa hkêt nē. Kot paj tokyx mē apiitā mē are. ¹² Ixtyk nhûm mē kot ijaxâr kukamā na ā ixkuxwa anē. Âm hāmri na ā inhîpêx anē. ¹³ Âm hāmri na pa mē amā kot ā

inhîpêx anhÿrja jarê. Koja mê krî piitâ hkôt axpên mã ijarênh ã kagâ kamâ ijarênh o pa nê kamâ nija kot ã inhîpêx anhÿr kamâ harê nê kuma. Anê.

Jut Kariot kot mê kãm Jejus ã àmnênh
Makre 14.10-11; Rukre 22.3-6

¹⁴ Tã nhùm Jut Kariotja. Kêp mê ixpê Jejus kôt ixpa ho ixpa xwÿnh pê 12 hõ htã ra tanhmã hamaxpêr to nê axtem nê Satanasti nhÿ hã ma patre krãhtùmjê hwÿr tẽ nê tanhmã Jejus o mê mar to nê mê kãm:

¹⁵ —E ot pa mê amã Jejus jarênh o tẽ. Xà kot paj mê amã hã amÿnê ka mê hpãnhã inhmã amnhîre nã? Anê.

Hãmri nhùm mê kuma nê hkÿnh nê. Hãmri nê kãm:

—Nà kot paj mê amã amnhîre.

Anê hãmri nê kãm kãxpore ho 30 nê ôr kurê kumrêx nhùm hamÿ nê hkÿnh nê kato nê ma tẽ. ¹⁶ Hãmri nê mê kãm Jejus pynênh kaxyw tânopxar o ri hkôt ri pa. Mê kot mar o ri pa xwÿnhjê hkãx ã unênh nê ma mê hwÿr o htêm kaxyw.

Jejus kot hkôt mê pa xwÿnhjê kutã apkur
Makre 14.12-21; Rukre 22.7-13; Juãw 13.21-30

¹⁷ Tã nhùm mê hkÿnh pê Pasja kato. Amnepêm kormã Ejit kãm mê pa ri na pre mê inhîgêtjaja ôwêhti hkrare hkwy hpa nê ho anê nê kuku. Tirtùm kot ja hã mê omunh nê Ejit nhõ xwÿnhjê nê mê kator kaxyw nhùm prem ã amnhî nhîpêx anê. Tã mê ixpê mê hkanrêhã mê htãmnhwÿjaja na pa htem arî amgrã mê arîgro pê Pasja ã axpên wÿr akuprõ nê jam ijamaxpêr pê mê urãk nê ôwêhti hkrare hkwy pa nê pãwti kaxkrit kêt kêm kuku. Jakamã pa mê ixte Jejus kôt ixpa ho ixpa xwÿnhja wa axkrut nê Jejus wÿr tẽ nê amnhî tã hkukja nê kãm:

—Kwa nhÿri kot paj we wa tẽ nê mê akutêp Pas ã mê panhõ hã apê? Anê.

¹⁸ Hãmri nhùm wa kãm:

—Nà wa mãmrî ma Jerujarêja wÿr wa tẽ. Nê krîm axã nê mēhõ myti pumunh kurê kumrêx nê kãm: “E Jejus na wa inhmê pa wa awÿr tẽ. Na awÿr hpêr mēnh o: ‘E na pa ra inhnojarêr. Jakamã nhÿri kot paj we ixkôt ri mê pa ho mê pa xwÿnhjê mê Pas ã axpên kutã apku?’ Anhÿr o awÿr hpêr mê.” Anê. E wa ã kãm akapêr anê kê war ama nê war amã ôrkwÿ nhîmök ã ixkre rax ô jahkre. Kamã ra kaxyw mê paxãpkur xã hã mēmoj piitãã. Ka wa omu hãmri nê mãmrî mê ixkutêp kamã mēmoj tã apê. Anê.

¹⁹ Hãmri nhùm wa kuma nê ma Jerujarê hwÿr tẽ. Nê hwÿr axã hãmri nê ra kot wa kãm mēmoj jarênh xã hkôt mēmoj piitã omu hãmri nê mê ixkutêp mēõ hã àpênh o wa xa.

²⁰ Tã nhùm kamãt pa mê Jejusja kôt ixkreta wÿr ixpõx pa nê hwÿr agjê nê ixãpkur kaxyw ixkrî. Mê ixte Jejus kôt ixpa ho ixpa xwÿnhjê pê 12jaja pa mê ixpiitã Jejus kutã ixãpkur o ixkrî. ²¹ Hãmri nhùm Jejus tanhmã mê inhîõ jarênh to nê mê inhmã:

—E pa mê amã mēmoj jarê ka mê inhma. Kot kaj mê atõ mê kãm ixkurê xwÿnhjê nhîhkram ijaxã. Anê.

²² Hãmri pa mê tee ri kuma nê ixkaprî htÿx nê. Hãmri nê axpên pãnhã amnhî tã hkukja nê kãm:

—Kwa xã pa? Nã pa hkêt. Kot paj ã anhîpêx anhÿr kêt kumrêx Pahihti.

Anhÿr o axpên pãnhã kãm amnhî tã aprã. ²³ Hãmri nhùm mê inhmã:

—Nã ãm hãmri na pa mê amã ixkapêr. Mê ate ixkutã guhkrax kãm anhõ pãwti ho mry kagõ nhek o akrî xwÿnhjê hõ kot kaj mê kãm ixtã amÿnê. ²⁴ Tirtùm kapêr ã kagã htùm ra kot ixkukamã harênh xã hkôt koja mê tanhmã

ixto rax nê ixpî. Nom kot mê kâm ixtâ àmnênh mã xwÿnhnta hêxta waa nê. Æ kot amnhî nhîpêx anhÿrja mÿrapê koja amnhî xâ htÿx kâm hamak rax kumrêx. Kop apu aa ô māmāj nhôxà hkre rûm kator kêt ronhÿx ja kâm mex nê. Anê.

²⁵ Hāmri nhûm Jut Kariot kot mê kâm hâ àmnênh mã xwÿnhnta hāmri amnhî tâ kuma nê kâm:

—Kwa xâ we pa Jejus? Xâ pa kot paj ã anhîpêx anê? Kwa nà pa hkêt. Anê.

Hāmri nhûm kâm:

—Tÿ. Ka ã ate inhîpêx anhÿr mã kênã. Anê.

Jejus kot amnhî kamrô pikapÿr kukamã harênh

Makre 14.22-26; Rukre 22.14-23; mãânên Wam Korît 11.23-26

²⁶ Tã nhûm Jejus pâwti hô py nê Tirtûm mã harê nê mê inhmã ho hkry nê ho mê inhîpêx pa nê mê inhmã:

—E na pa ã mê amã pâwti ho hkry nê mê amã ôr anê. Ja pyrà nê koja mê ã inhîpêx anê nê te ixto hkry hpar pyràk o inhîpêx pa amnhî xâ htÿx kamã ijamak kâm ty. Nom mê anê kot paj ty. E mê māmri aku.

Anhÿr o mê inhmã amnhî jarê pa mê kuma nê kot mê inhmã ho hkry xwÿnhja ku. ²⁷⁻²⁸ Hāmri nhûm hpânãhã kop py nê mã ho anê nê Tirtûm mã harê nê mê inhmã kugô nê mê inhmã:

—Mê kot ixpÿr xâ hã arîgroja ã koja ixkamrô axkapî. Nom koja mê amarî ixpÿr nhûm amarî ixkamrô hpikapÿr kêt nê. Æm paa. Pa kot paj mê anê mê îhkram amnhî jaxà nhûm mê ã inhîpêx anê nê ixpî. Koja ixkamrô axkapî nhûm Tirtûm omu nê ixkukwak ri mê ate ixkôt amnhî xunhwÿr xwÿnhjê nê mê ate amnhî tomnuj piitã te amnhî katut kôt rênh par pyràk o hipêx nê mê ato hkra. Ra amnepêm kot ã amnhî jarênh anhÿr xâ hkôt. Jakamã e mê ixkamrô pikapÿr mã ajamaxpêr pê wîhti ho akôm o axpên nhîpêx. ²⁹ Æm hāmri na pa ã mê amã amnhî jarênh anê. Kot paj axte wîhti ho ixkôm kêt rãhã nhûm nhÿrmã inhô Papaj akupÿn mê awÿr inhmê. Hāmri pu mê akupÿn ixwÿrÿk xâ hã arîgrota ã pahkîn rax kumrêx. No Æm axtem tanhmã hã pahkîn to. Anê.

Nhûm pre ã Jejus mê inhmã amnhî jarênh anê. Pa mê axpên pãnhã kopta py nê wîta kwÿ ho ixkô. ³⁰ Hāmri nê mê ixpiitã ho ixkôm pa nê Tirtûm mã mex ã gre. Hāmri nê ijapôj nê hixêt prêk pê Oriwêhti hwÿr ma mra.

Jejus kot Simãw Pêtre mã kapêr ã harênh

Makre 14.27-31; Rukre 22.31-34; Juãw 13.36-38

³¹ Tã nhûm Jejus tanhmã mê ixte hkôt ixpa ho ixpa xwÿnhjê jarênh to nê mê inhmã:

—E Tirtûm kapêr ã kagã htûmta kot tanhmã mê akukamã mê ajarênh to nê mê ajarênh kot:

Kot paj ôwêhti jamãr o pa xwÿnhja pî hāmri nhûm ôwêhti hpigrãnh pa nê ma anhrã nê ri mra.

Anhÿr o kot mê ajarênh. Te ho mê apê ôwêhti pyrà nê ã mê ajarênh anê. Tã kamàt ja kamã koja mê tanhmã inhîpêx to ka mê ixtã mê omu nê mê umaj ôwêhti pyrà nê apiitã ixkaga hpa nê ma aprôt nê mra. ³² Nê mê kot ixpÿr tâ kot paj akupÿm ixÿr. Hāmri nê ma akupÿm mê akukamã pika pê Garirej wÿr mô. Kamã kot puj mê axte axpên pumu. Anê.

³³ Hāmri nhûm Simãw Pêtre tee ri tanhmã mê kot amnhî nhîpêx to hkukamã amnhî jarênhja ma nê hkaprî nê kâm:

—Tk. Nà kot paj ã amnhî nhîpêx anhÿr kêt nê Pahihti. Koja pahkwÿja akaga japêr no pa kot paj aa akaga hkêt nê. Kot paj akôt ixpa rãhã nê. Anê.

³⁴ Hāmri nhûm Jejus kâm:

—Nà ra ixte akukamā ixàhpumunh mex. Koja apkati hkôt krāhyre hkàr kêt ri ka ra mē umaj ate ixkôt apa hkêt ā mē kām amnhī tā axàprār o axkrunēpxi kām ga. Kwa jam ajamaxpēr t̄yx nē. Anē.

³⁵ Hāmri nhūm tee ri kuma nē axte kām:

—Kwa nà. Mē kot ajaxàr nē apīr tā kot paj arī akôt ri ixpa nhūm mē pahto am̄yàr nē tanhmā panhīpēx to. Nà kot paj aa akaga hkêt nē.

Anh̄y r o kām amnhī jarē. Pa mē ijaxw̄yja ā kām amnhī jarēnh anē.

Jejus kot Tīrtūm mā amnhī jarēnh

Makre 14.32-42; Rukre 22.39-46

³⁶ Tā nhūm Jejus mē inhmā anē pa mē ma nh̄yri mē kot kām “Gesēm” anh̄y xw̄ynhja w̄y r mra. Hāmri nhūm mē inhmā:

—E mē jar ixkutēp akrī. Pa ma mūtūm tē nē Tīrtūm mā amnhī jarē m̄n. Anē.

³⁷ Hāmri nē mē ixkw̄ȳjē ho axkrunēpxi nē amnhī kôt mē kuw̄y. Simāw Pêtre nē Jepetew kra pijakrut pē Xiakre nē Juāwja wa nhūm amnhī kôt mē kuw̄y nhūm mē ma hkôt mra. Hāmri nhūm Jejus tee ri mē kot tanhmā hipēx tota kukamā hamaxpēr o hkaprī nē amnhī kamā kahak t̄yx nē. ³⁸ Hāmri nē mē kām:

—Hēxta waa nē. Na pa tee ri amnhī xà ht̄yx kamā ijamakja kukamā ijamaxpēr nē amnhī kamā ixkahak t̄yx o ra ixkaprī nē. Te ixkaprī kot xip̄ir o mōr pyrāk. Jakamā e mē jar anoht̄yx nē ixto Tīrtūm w̄y r o akrī kē tanhmā ixto pa mē kot tanhmā ixtoja kutā ixilht̄yx nē. Anē.

³⁹ Hāmri nē mē kurūm htēm grire nē Tīrtūm mā amnhī jarēnh kaxyw htu m̄y r pē tēm nē pikap nō nē kām:

—Kwa Papaj. Hēxta waa nē. Inhmā amnhī xà ht̄yx kām ijamak prām kêt kumrēx. Na pa tee ri amnhī kukamā ijamaxpēr nē amnhī kamā ixkahak t̄yx nē. Jakamā kot kaj amā inhnē ja ho ajapēx prām nē mām̄ri inhnē ho ajapēx nhūm mē kām ixkuré xw̄ynhja tanhmā ixto hkêt nē. R̄y ko. Kot kaj amā mē kot tanhmā ixto hprām kē mē mām̄ri tanhmā inhīpēx to. Nom pam inhmā hprām xà hkôt kêt. Anē.

⁴⁰ Hāmri nē kànhmā xa nē akup̄ȳm Simāw Pêtreja mē hw̄y r tē nē tee ri mē omu nhūm mē ra ôt pa nē hikw̄y. Nhūm mē omu nē Simāw Pêtre mā kām:

—Kwa Simāw Pêtre. E mē hāmri akrā hapōj. Kwa wem anoht̄yx grire ⁴¹ nē ixkutēp amnhī to Inhō Papaj w̄y r o akrī kē mē ixkôt tanhmā mē ato htā ka mē amā mē uma xàj ixkaga hkêt nē arī mē kutā amnhī to ht̄yx nē akuhē. Ā mē amā mē ate amnhī nhīpēx anh̄y r prām nom kormā mē amā maa.

⁴² Anh̄y r o mē kām kapēr hāmri nē akup̄ȳm tē nē axte Tīrtūm mā amnhī jarē nē kām:

—Kwa Papaj. Nà inhmā amnhī xà ht̄yx kām ijamak prām kêt. Na pa amnhī kukamā ijamaxpēr nē amnhī kamā ixkahak t̄yx kumrēx. Jakamā kot kaj amā inhnē ja ho ajapēx prām nē mām̄ri inhnē ho ajapēx kē mē kām ixkuré xw̄ynhja tanhmā ixto hkêt nē. Nom ko. Kot kaj amā mē kot tanhmā ixto hprām kē mē mām̄ri tanhmā inhīpēx to. Nom pam inhmā ja prām xà hkôt kêt. Anē.

⁴³ Hāmri nē kànhmā xa nē Simāw Pêtreja mē hw̄y r akup̄ȳm tē. Nē mē omu nhūm kē mē axte gōr nē hikw̄y. Ra mē ôt̄xwa ht̄yx nē axte gōr nē hikw̄y. Nhūm Jejus tē nē tee ri mē omunh o xa ⁴⁴ nom axte tanhmā mē kām nē hkêt nē. Ām awjanā nē akup̄ȳm tē nē kē wam kot Tīrtūm mā amnhī jarēnh xà hkôt axte kām amnhī jarē. ⁴⁵⁻⁴⁶ Hāmri nē akup̄ȳm mē hw̄y r tē nē mē kām:

—Kwa xàn ka mẽ arĩ gõr nê anhĩkwỹ? E mẽ tokyx akrã hapôj. Na mẽ ra mẽ kot ixwỹr mrar nê ixpynênh mã. Koja mẽ tokyx ixkutã mẽ kot amnhĩ xunhwỹr xwỹnhjaja mẽ kãm ixtã amỹnê. Ota ra kot ixtã mẽ kãm àmnênh xwỹnhnta tẽ. E mẽ tokyx kànhmã akrĩ pu mẽ kutã mra. Anê.

Mẽ kot Jejus pynênh ã harênh

Makre 14.43-50; Rukre 22.47-53; Juãw 18.2-11

⁴⁷ Nhũm Jejus mẽ kãm kapêr o ãm rãhã nhũm Jut Kariot pê mẽ inhĩõja hwỹr tẽ. Nê amnhĩ kôt mẽ ohtô nê hwỹr mẽ o tẽ nhũm mẽ wapohti nê kô jamỹ nê hkôt o mra. Patre krãhtũm mẽ Ijaew krãhtũmjaja kot Jejus wỹr mẽ rênh xwỹnhjaja nhũm mẽ man hkôt Jejus wỹr mra. ⁴⁸ Na pre ra Jut Kariot amnhĩ kukamã mẽ kãm amnhĩ jarênh o:

—Kot paj ixkumrêx hwỹr tẽ ka mẽ ixkôt hapu hã mra. Kot paj hwỹr tẽ nê kãm ixkapêr nê kahti hkôt kumỹ. Ka mẽ hã ixpumu nê hwỹr mra nê unênh kurê kumrêx. Ixte kahti hkôt mỳnh xwỹnhnta kot kaj mẽ unê. Anê.

⁴⁹ Hãmri nê Jejus wỹr tẽ nê kãm:

—Pa Jejus? Xàn ka kormã anhõt kêt nê xa?

Anê nê kahti hkôt kumỹ. ⁵⁰ Hãmri nhũm amnhĩ tã omu nê kãm:

—Kwa Jut. Ate tanhmã ixto kaxyw mã xwỹnh jakamã e kam nê mãmri tanhmã ixto. Anê.

Hãmri nhũm Jut kôt mẽ mrar xwỹnhjaja Jut kot kahti hkôt mỳnh ã omu nê hwỹr mra nê unênh kurê kumrêx. ⁵¹ Hãmri nhũm mẽ inhĩõja tee ri ja hã mẽ omu nê õ wapo kapa nê patre maati mã àpênh xwỹnh kot mẽ hkôt htêm xwỹnhnta mã ho apê. Nê kot ho hkrã nhĩpôn mã tã kuhpaw nê upòk rũm hamak nhĩkjê pix krãhta. ⁵² Hãmri nhũm Jejus omu nê nê kãm kapêr nê kãm:

—Kwa akupỹm awapota hkãm haxã nê amarĩ xa. Na htem wapo ho mẽ oprê ho pa nhũm mẽ amnhĩ xwar wapo ho mẽ kupa. ⁵³ Xã kot paj amnhĩ to Tirtũm wỹ nhũm ãm inhma nê tanhmã jajê pê ixpytãr to hkêt nê? Nã kot paj amnhĩ to kuwỹ nhũm ixwỹr kapêr o mẽ wrỹk xwỹnhjê rênh kurê kumrêx nhũm mẽ ohtô rax kumrêx nê wrỹ nê mẽ kêp ixpytã. ⁵⁴ Nom kot paj ã amnhĩ to hwỹr anhỹr kêt nê. Tirtũm kapêr ã kagã htũm kot amnepêm ixkukamã ã mẽ kot inhĩpêx anhỹr ã mẽ harênh jakamã kwãr mẽ mãmri Tirtũm kãm hprãm xã hkôt ã inhĩpêx anê. Anê.

⁵⁵ Hãmri nê hpãnã mẽ kot unênh xwỹnhjê mã kapêr nê mẽ kãm:

—Kwa na pa pre apkati mẽ Tirtũm mã amnhĩ jarênh xã hã ixkre kamã mẽ kãm ixujarênh o ixpa. Ka prem tokyx ixpynênh kêt tã jarãhã te ixte amnhĩ tomnuj xwỹnh pyrãk o inhĩpêx nê ixwỹr wapohti nê kô hã akapên nê ixwỹr tẽ.

⁵⁶ Tã nom ra Tirtũm kapêr ã kagã htũm kamã Tirtũm nhỹ hã mẽ kapêr xwỹnh kot mẽ akukamã mẽ ajarênh nê mẽ atã kagã xã hkôt na ka mẽ ri ã inhĩpêx anê. Anê.

Nhũm pre ã Jejusja amnhĩ tã mẽ kãm kapêr anê. Hãmri pa mẽ ixte hkôt ixpa ho ixpa xwỹnhjaja mẽ omu nê tee ri amnhĩ kukamã ijamaxpêr nê mẽ umaj ixprôt nê anhrã nê ma inhmrar kurê kumrêx.

Mẽ kot patre maati hwỹr Jejus o mõi ã harênh

Makre 14.53-65; Rukre 22.54-55, 22.63-71; Juãw 18.12-14, 18.19-24

⁵⁷ Nhũm pre Ijaew krãhtũmjê mẽ Tirtũm kapêr tũm o mẽ ahkre xwỹnhjaja ra patre maati Kajpas nhõrkwỹ hwỹr akuprõ nê Jejus kutêp hkrĩ. Hãmri nhũm mẽ kot unênh xwỹnhjaja ma mẽ hwỹr o tẽ. ⁵⁸ Hãmri nê mẽ hwỹr ho axã nê hkôt gjêx pa. Nhũm Simãw Pêtre mẽ hkôt hapu hã mẽ htãnopxar o tẽ nê kítare

hwÿr axà nê pôristi nhîhkô hã nhÿ. Hãmri nê tee ri Jejus kukamã hamaxpêr o nhÿ nê hamaxpêr o:

—Kwa tanhmã koja mē ixpê mē inhô Pahihti nhîpêx to? E pa jar amÿm tanhmã mē kot hipêx to hã mē omunh o nhÿ. Anê.

⁵⁹ Hãmri nhÿm patre krãhtÿmjê mē juistijaja kãm Jejus pîr prãm tÿx nê. Jakamã na prem Ijaew wa ho hamêxkrut nê axpên kôt tanhmã mē kãm ho hêx to nhÿm mē kot hã wa mar nê ra hpîr kaxyw mē pikuprôn xwÿnhjê kapi.

⁶⁰ Jakamã nhÿm prem axpên pãnhã mē hwÿr mra nê tanhmã ho hêx to. Nom axpên kôt harênh kêt nê. ãm ahpÿnhã tanhmã ri harênh to nom wahô wa axkrut nê axpên kôt harênh kêt nê. Jakamã nhÿm mē tee ri hã mē kuma.

Tã nhÿm ja wa mē hwÿr tē nê axpên kôt harê nê mē kãm:

⁶¹ —Nà na pre tanhmã Tîrtÿm mã amnhî jarênh xà hã ixkre jarênh to nê harênh o: “Kot paj nhÿrmã inhmã ixkreja grãnh par prãm nê kugrà hãmri nê ãm ixtã apkati axkrunêpxi pix nê akupÿm hipêx pa. Ja kaxyw ixãhpumunh tÿx.” Anhÿr o na amnhî jarê pa wa kuma.

⁶² Anhÿr o mē kãm ho hêx. Hãmri nhÿm patre maatija wa kuma nê kãnhmã xa nê Jejus mã kapêr nê kãm:

—Kwa xà ãm hãmri na wa ã ajarênh anê nà? Xàn ka pre ã amnhî jarênh anê? E mē inhmã tanhmã amnhî jarênh to. Anê.

⁶³ Nom nhÿm amarî mē kãm xa nê mē kãm tanhmã nê hkêt nê. Hãmri nhÿm patre maatija tee ri omu nê axte kãm kapêr nê kãm:

—Kwa aprî hã mē inhmã tanhmã amnhî jarênh to. Tîrtÿm noo mã amã ixkapêr jakamã kêr ka akatãt kôt mē inhmã amnhî jarê nê amnhî to axêx kêt nê. Xà apê Tîrtÿm Kra? Xà ka na pre Tîrtÿm mē ixkaxyw axãm? Kwa akatãt kôt mē inhmã amnhî jarê. Anê.

⁶⁴ Hãmri nhÿm tã hprî hã mē kãm amnhî jarê nê mē kãm:

—Tÿ. Nà ãm hãmri na ka ã ijarênh anê. Ixpê Tîrtÿm kot mē akaxyw ixãm xwÿnhnta na pa. Na pre mē awÿr inhmê pa mē awÿr wrÿ. Tã kot paj nhÿrmã axte kaxkwa rÿm amnê akupÿn kakrà kamã mē awÿr wrÿ. Hãmri nê Tîrtÿm xãhpumunh o ãhpumunh xwÿnhnta nhîhkô hã nhÿ hãmri nê pam tanhmã mē ajarênh to ka mē amnhî tã ixpumu nê inhma. Anê.

⁶⁵ Hãmri nhÿm patre maatija tee ri ã kot amnhî jarênh anhÿr ã kuma nê kamã gryk tÿx nê. Hãmri nê gryk xàj kêp patre maati hã ê kapa nê hkaxónh pa nê kumê nê hkwyjê mã kãm:

—Tk. Kwa mo kaxyw kot puj mē axte ri tanhmã kot amnhî tomnuj to hã harênh xwÿnh ô japêr? Tãm kot amnhî pê Tîrtÿm Kra hã amnhî jarênh ã amnhî to hêx nhÿm mē pahte mar kênã. ⁶⁶ Jakamã e kwa tanhmã kot puj mē hipêx to? Anê.

Hãmri nhÿm mē kãm:

—Nà ã kot amnhî jarênh anhÿr mÿrapê koja ty. Ra htyk mã tãm kênã. Anê.

⁶⁷ Hãmri nê tanhmã hipêx kati hto. Mē hkwyjaja hkuk kuhtô nê ìhkra ho htak nhÿm mē hkwyjaja ìhkra hpo ho htak nê hã hpêr o axkê nê kãm:

⁶⁸ —E apê Tîrtÿm Kra hã ate amnhî jarênh jakamã mãn urãk nê axãhpumunh tÿx. Jakamã e mē kot atak xwÿnhnta nhîxi jarê pa mē ama. Anê.

Simãw Pêtre kot Jejus kôt pa hkêt ã amnhî jarênh

Makre 14.66-72; Rukre 22.56-62; Juãw 18.15-18, 18.25-27

⁶⁹ Rôm nhÿm Simãw Pêtre arî kîtare kamã nhÿ. Hãmri nhÿm mē kãm ãpênh xwÿnh nitita omu nê hprî hã omunh kurê kumrêx. Hãmri nê kãm:

—Xê pêr apê Jejus kôt mē pa xwÿnhjê hõ na ka. Anê.

⁷⁰ Hâmri nhùm tee ri amnhĩ tâ kuma nê kãm mẽ uma xàj mẽ kãm amnhĩ tâ aprã nê kãm:

—Tk. Koký. Ixte mēhō my ata pumunhre hã. Anê.

⁷¹ Hâmri nê mẽ umaj kãnhmã xa nê tē nê kítare hwýr hakwakrem ahte mẽ hkãx ã xa. Tã nhùm hpãnhã hōja omu nê hã mẽ kãm:

—Xê ma pēr ãm hãmri na mẽ harê. Kêp Jejus kôt ri mẽ pa xwýnhjê hō na pēr. Anê.

⁷² Hâmri nhùm amnhĩ tâ kuma nê kãm:

—Tk. Nà mẽ ri ã amnhĩ krã hkôt ri ixto axêx anhýr kêt nê. Ixte aa mēhōta pumunh kêt kumrêx. Anê.

⁷³ Tã nhùm mẽ hkwýjaja hwýr mra nê kãm kapēr nhùm tanhmã mẽ kãm kapēr to nhùm mẽ kuma nê kãm:

—Kwa pēr ãm hãmri na mẽ ajarê. Apê Jejus kwý na ka. War akapēr kot axpên pyrãk kênã. Anê.

⁷⁴ Hâmri nhùm tee ri mẽ kuma mẽ kãm amnhĩ tâ aprãr kãm hihtýx nê mẽ kãm:

—Kwa nà. Na pa Tirtùm noo mã mẽ amã amnhĩ jarê. Kot paj amnhĩ to ixêx japêr nhùm inhma nê hã tanhmã ixto. Nà urãk ixpê Garirej nhō xwýnhre hã. Ixte mēhō mũj pumunh kêt kumrêx tâ ka mẽ xatã axpên kôt ixte hkôt ixpa ho ixpa xwýnh ã ixkamnhix o xa.

Anhýrja o ra mẽ kãm amnhĩ tâ aprãr o axkrunêpxi nhùm krãhyre hkãr kurê kumrêx. ⁷⁵ Hãmri nhùm Simãw Pêtre kuma nê ra Jejus kot hkukamã krãhyre hkãr kêt ri kot hã amnhĩ aprãr o axkrunêpxi hã harênhta mã hamaxpêr kurê kumrêx. Hãmri nê kãnhmã hakry hpar o tē nê hkaprĩ htýx kumrêx nê kítare pê kato nê tē nê awry hã xa nê mýr rax nê.

27

Mê kot pahihti Pirat wýr Jejus o htēm ã mẽ harênh

Makre 15.1; Rukre 23.1-2; Juãw 18.28-32

¹ Tã nhùm ra myt kator o mōr mẽ nhùm mẽ hkrãhtũmjê mẽ patre krãhtũmjaja axpên wýr pikuprõnh pa. Hãmri nê Jejus ã axpên mar o hkrĩ nê axpên mã:

—Nà kot puj mẽ hã amýnê kê mẽ kupĩ. Kêp Tirtùm Kra hã kot amnhĩ jarênh o amnhĩ to hêx kênã. Anê.

² Hãmri nê mẽõ pōristijê mã anê nhùm mẽ hpa hpre hpa nê ma pahihti Pirat wýr o tē. Pirat kêp Rôm nhō pahihti nhý hã mẽ ixpê Ijaewjê ho amnhĩptãr jakamã nhùm mẽ ma hwýr o tē nê ìhkram haxà.

Jut Kariot kot amnhĩ pĩr ã harênh

Atre 1.15-19

³ Rôm nhùm Jut Kariot tee ri mẽ kot Jejus pĩr kaxyw mẽ harênh ma nê hkaprĩ nê. Ra kot mẽ kãm hã ãmnênh tâ mẽ kot hpĩr kaxyw ã mẽ harênh ma nê tee ri amnhĩ kukamã hamaxpêr o hkaprĩ htýx nê. Hãmri nê hamaxpêr o:

—Hêxta waa nê. Mo na pa pre ri axtem nê ã amnhĩ nhĩpêx anê? Nà na pa pre amnhĩ tomnuj týx kumrêx. Anê.

Hãmri nê ra mẽ kot kãm kãxpore ho 30 nê òrta jamý nê ma akupým patre krãhtũmjê mẽ Ijaew pigêtjê hwýr o tē. Hãmri nê mẽ kot Tirtùm mã amnhĩ jarênh xa hã ixkreja wýr mẽ hwýr axà ⁴ nê nhýri mẽ omu nê mẽ hwýr tē nê mẽ kãm:

—E ota mẽ akãxporeta. Na pa ã mẽ amã Jejus ã ixãmnênh anhýrja o amnhĩ tomnuj týx nê. Kot tãm amnhĩ nhĩpêx o pa htã pa axtem nê ã mẽ amã hã

ixâmnênh anê. Jakamã e mĩ. Mẽ akupým akàxporeta jamý. Kot paj amnhĩm hamýnh kêt nê. Anê.

Hãmri nhũm mẽ tee ri kuma nê kãm:

—Koký. Nom ka na ka pre mẽ ixwýr tẽ nê ho mẽ inhmar kênã. Anê.

⁵⁻⁷ Hãmri nhũm tee ri mẽ kuma hãmri nê pikap kàxpore rênh pa nê ma tẽ nê kato. Hãmri nê hkaprĩ htýx kumrêx nê hamaxpêr o:

—Kwa tanhmã kot pa we amnhĩ to? Nà kot paj amnhĩ pĩ. Anê.

Hãmri nê krĩ pê kato nê ma mẽ kot pika kakwýnh nê ho amnhĩm poti nhĩpêx xà hã pika hwýr tẽ hãmri nê amnhĩ mut mã é nê ho amnhĩ pĩ. Hãmri nhũm patre krãhtũmjaja harênh ma nê tee ri kot kàxpore rênhta kawrà nê hã axpên kukja nê axpên mã:

—Kwa tanhmã kot puj wem ja ho? Jut kot mẽ pamã Jejus ã àmnênh nhũm mẽ pahte hpír xà hã kàxpore na. Jakamã kot puj mẽ ho Tirtũm mã amnhĩ jarênh xà hã ixkre ho mex kêt nê. Finat Mojes kot ja nê mẽ panhĩgêtjê kurê jakamã na htem mẽ hpar xà hã kàxpore ho ixkreta ho mex kêt nê. Jakamã kwa tanhmã kot puj mẽ ho? Anê.

Hãmri nhũm ja mẽ kãm:

—E na pa ra ijamaxpêr. Pu mẽ ho Jut kot amnhĩ pír xà hã pikata japrô hãmri nê kamã jar mẽ kêp mẽ pahkwý hkêt htyk xwýnhjê jagjênh o papa. Anê.

Hãmri nhũm mẽ kuma nhũm ja mẽ kãm mex nê. Jakamã nhũm arĩgro hõ hã nhũm mẽ ma hwýr mra nê haprô. ⁸ Hãmri nê hã hixi mẽ nhũm kêp “mẽ hkamrô pikapír xà kamã pika”. Mẽ kot Jejus pír xà hã kàxpore ho haprôr jakamã nhũm prem ã hã hixi mênh anê. Nhũm htem arĩ axpên mã ã hixi jarênh anhýr o pa. ⁹⁻¹⁰ Nhũm pre ra amnepêm Tirtũm nhý hã kapêr o pa xwýnh finat Jeremĩsti mẽ hkukamã hprĩ hã ja jarê nê hã kagã. Nê hã kagã o:

Koja Ijaew nhõ patrejaja mêmõ kot mẽ kãm mêmõ my hã àmnênh pãnhã kãm kàxpore ho 30 nê òr xwýnhja jamý. Hãmri nê ma o tẽ nê nhýri mẽ kot amnhĩm pika kakwýnh nê ho poti nhĩpêx o pa xà hã pika hkwy japrô. Ra Tirtũm kot inhmã mẽ harênh xà hkôt koja mẽ ã amnhĩ nhĩpêx anê. Anê.

ã finat Jeremĩsti kot Tirtũm nhý hã mẽ hkukamã mẽ harênh nê hã kagã anhýr xàja kôt nhũm prem ã amnhĩ nhĩpêx anê.

*Pahihti Pirat kot Jejus kukjêr ã harênh
Makre 15.2-5; Rukre 23.3-5; Juãw 18.33-38*

¹¹ Rôm nhũm mẽ pahihti Pirat wýr Jejus o tẽ nê hwýr ho axã nê kutã ãm nhũm xa nhũm Piratja omu nê kãm:

—E. Kwa inhmã amnhĩ jarê. Xà apê Ijaew nhõ pahi na ka nà? Xà ka na htem amnhĩ wýr ajamãr o pa? Anê.

Hãmri nhũm kãm:

—Tý. Nã ãm hãmri na ka ijarê. Anê.

¹² Hãmri nhũm mẽ hkrãhtũmjê mẽ patre krãhtũmjaja pahihti Pirat mã tanhmã ho kapêr punuj to. Nhũm amnhĩ tã mẽ kuma nom tanhmã kãm amnhĩ tã àprãr to hkêt nê. ¹³ Jakamã nhũm pahihti Pirat tee ri ja hã omu nê kãm:

—Kwa xà na ka ã mẽ kot ato kapêr anhýrja mar kêt nê nã?

¹⁴ Anhýr tã nom nhũm Jejus akryk xa nê axte tanhmã kãm nê hkêt nê. Hãmri nhũm Pirat tee ri kot ã amnhĩ nhĩpêx anhýr ã omu nê hamaxpêr o:

—Kokýý. Mẽ kot ho kapêr punuj tã nhũm ãm mẽ kuma nê te kãm mẽ uma hkêt pyrã nê tanhmã inhmã amnhĩ tã àprãr to hkêt nê. Anê.

*Pirat kot Jejus pîr kaxyw hã àmnênh ã harênh
Makre 15.6-15; Rukre 23.13-26; Juãw 18.39-19.16*

15-21 Tã nhùm Pirat kormã mê kot axpên mar xà hã ixkre kamã ÿr rãhã nhùm hprõja hwÿr hpêr mê nê kãm:

—Xê tanhmã mê kãm Jejusja ã axàmnênh to hkêt nê. Na pa kamàt ja kamã hkôt amÿti nê tee ri hkukamã ijamaxpêr. Kot amnhî to mex xwÿnh na. Aa tanhmã kot amnhî tomnuj to hkêt jakamã xê tanhmã mê kãm hã axàmnênh to hkêt nê. Kwarî. Anê.

Hãmri nhùm Piratja kuma nê hamaxpêr o:

—Nà ixte Ijaew krãhtÿmjê pumunh tÿm. Ijaew kwÿjaja kãm Jejus kînh nhùm mê hkrãhtÿmjaja kot mê hã Jejus kamã gryk nê. Jakamã ixte tanhmã mê kãm hã ixàmnênh to kaxyw na mê ã ixwÿr o htêm anê. Anê.

Na htem Pas nhô arîgrota hapôx mê nhùm pre htem Ijaew o amnhîptâr xwÿnhja mê kãm mê hagjênh xà kamã hkrî xwÿnhjê ho hpÿnh nê mê hapôj. Mê kãm hprãm xà hkôt nhùm mê kãm mê hapôj nhùm mê akupÿm kapôt ã hamakêtkati nê amnhîx pa. Jakamã nhùm ra mê hagjênh xà kamã mēhō my pē Parapasja hkrî. Na pre tanhmã amnhî tomnuj to nhùm mê mÿrapé unê nê haxà. Jakamã nhùm Ijaewjaja mê ho amnhîptâr xwÿnh Pirat wÿr akuprô nê kuhê nhùm mê kãm:

—E kot paj jarãhã mê amã mê hagjênh xà kamã mê hkrî xwÿnhjê hō mã inhÿre kê àmnhîx kato nê ri pa. Nhÿ kot paj mê amã kãm inhÿre? Xà Parapas nã? Xà mê akwÿ kot amnhîm ho mê anhō pahihtî Jejus pē Tirtÿm kot mê akaxyw ãm xwÿnhhta kot paj mê amã kãm inhÿre? Nhÿ wehe? E mê inhmã nhÿ jarê. Anê.

Pirat na pre mê inhō patre krãhtÿmjê pumunh mex nê. Ijaew kãm Jejus kapêr mar prãm tÿx ã nhùm mê hã kamã gryk tÿx nê hwÿr o mrrarja kôt nhùm mê omunh mex nê. Jakamã ã hã mê hkukjêr anê. Hãmri nhùm mēhpigēt mê patre krãhtÿmjaja kuma hãmri nê mê pikuprôn nê mê kuhê xwÿnhjê mã kãm:

—Kwa mê kãm anê kê mê pamã Parapas mã mãn ure nê mãmri Jejus Kris pî. E kwa mê tokyx kãm anê kê Parapas mã ure. Anê.

Hãmri nhùm mê mê kuma nê pahihtî Pirat mã kãm:

—Nà mê inhmã Parapas mã mãn anhÿre. Anê.

22 Hãmri nhùm tee ri mê kuma nê mê kãm:

—Kwa no mê ate Jejus pē Tirtÿm kot mê akaxyw ãm xwÿnh ã harênh xwÿnhhta? Tanhmã kot paj hipêx to? Anê.

Hãmri nhùm mê kãm:

—Apî ri. Tokyx pî kahpa hã anhô kê ty. Anê.

23 Hãmri nhùm tee ri mê kuma nê mê kãm:

—Tk. Kwa nã. Tanhmã kot amnhî tomnuj tore hã kot pa kêt ri pî kahpa kunhō nhùm ty. Anê.

Hãmri nhùm mê xatã àmra kamã kãm:

—Kwa pî kahpa hã mãn anhô kê ty. Kwa tokyx ã mê inhmã hipêx anê. Anê.

24 Hãmri nhùm tee ri ja nê tanhmã mê kãm kapêr to no nhùm mê mar kêt nê. Nhùm tee ri mê àmra mar o xa. Hãmri nê kãm Jejus pîr prãm kêt jakamã amnhîm gô hkwy janhi nê mê piitã mê noo mã amnhî nhîhkra kuhôn h o xa. Mê kot hã omunh xà hkôt kãm hpîr prãm kêt ã omunh kaxyw. Hãmri nê mê kãm:

—E na pa mê anoo mã ã amnhî nhîhkra kuhôn anê ka mê ja hã ixpumu. Nà inhmã hpîr prãm kêt. Tanhmã kot amnhî tomnuj tore hã. Mê kaxipixjaja

mê amã hpîr hprãm jakamã mê kam nê tanhmã ho. No pa kot paj tanhmã ho hkêt nê. ãm kwarî ho kwarî. Anê.

²⁵ Hãmri nhùm mê kuma nê kãm:

—Tõe. Nã ãm hãmri. Kot paj mê pamjaja amnhî tâ htykja nhô. Nê mê ixkra nê mê ixtãmnhwýjê mê amnhî to ixpimràatã amnhî tâ kunhò. Kê Tîrtùm kãm tanhmã hã mê ixtò hto hprãm nê mamrî tanhmã hã mê ixtò hto. Anê.

²⁶ Hãmri nhùm mê kuma nê mê kãm hprãm xã hkôt mê kãm Jejus ã amýnê nê mê kãm Parapas mã ure. Ra Parapas kot pahi Pirat pê ô pôristi kutã amnhî xãm nê kêp hõxpîrja mýrapê nhùm mê kot unênh nê haxã tâ Ijaew kãm hprãm xã hkôt akupým kãm ure. Hãmri nê ô pôristijê mã anê nhùm mê Jejus tak. Nê htak rax nê hãmri nhùm Pirat mê kãm hã amýnê nhùm mê kot pî kahpa hã nhôr o hpîr kaxyw ma o tẽ.

*Pôristi kot Jejus ã hpêr o pikênh ã harênh
Makre 15.16-20; Juãw 19.2-3*

²⁷ Tã nhùm pôristijaja mê kot pî kahpa hã Jejus nhôr kaxyw ma o tẽ nê pahîhti Pirat nhôrkwý kamã ixkre hõ hwýr ho axã. Nhùm pôristi ohtô nê hwýr akuprô nê hã pêr o pikênh kaxyw axpên mã:

—E kwa tokyj pu mê kãm pahi xê jaxã ri. Kêp pahi hã kot amnhî jarênh kênã. Anê.

²⁸ Hãmri nê kêp ê kapa nê hpãnhã kêp pahi hã mê ê kamrêk mexja py nê kãm haxã. ²⁹ Nê kãm pahi hã mê ahkã nhîpêx nê hkrãm haxã. Nom axtem akunî kamã mêmô mrô nhî te kot ronh kanêre pyrãk xwýnhja nhùm mê hikãx nê hkrãm haxã. Nê kãm pahi hã kô gô nhùm kupy nê o xa. Hãmri nhùm mê ho anhýr pa nê kutã hkôn krã ho rôrôk nê hkrî hpa nê hã pêr o pikênh kamã kãm:

—E ãm hãmri. Apê Ijaew nhô pahi punuti na ka. Anê.

³⁰ Hãmri nê kãnhmã kuhê nê hkuk kuhtô nê kêp kô pytä nê xatã ho hkrãx pê htak. Nhùm prem ã pêr o pikênh kãm hipêx anê. ³¹ Hãmri nê kêp pahi hã ê kapa nê akupým kãm ê jaxã nê mê kot pî kahpa hã nhôr kaxyw ho kato nê ma o tẽ.

*Pôristi kot pî kahpa hã Jejus nhôr ã harênh
Makre 15.22-32; Rukre 23.27-43; Juãw 19.17-25*

³² Nhùm pôristijaja Jejus o kato nê ma kapôt mã o tẽ. Nê kãm pî kahpa pytîja gô nhùm kumý nê mê hkôt o hkwý. Nom ra hirok tÿx nê nhùm mê tee ri ja hã omu nê mêhò kot ho ajuta kaxyw mê kot omunh xwýnhjê kapi ho xa. Hãmri nê Sirên nhô xwýnh Simãw kã htyk pumu nê unê nê kãm kot Jejus o ajuta kaxyw hã karô nhùm hwýr tẽ nê kêp pî kahpata mý nê hkôt kãm kumý nê o tẽ. ³³ Hãmri nhùm mê kên nhîxêt te kot mê hkrã hi pyrãk xwýnhhta wýr mê o pøj. Mê kapêr kãm na prem hixêtja jarênh o: “Korkot.” No mê pakapêr kãm Korkot jarênhja kêp “mê hkrã hi xã” nhùm mê ma hwýr Jejus o pøj. ³⁴ Hãmri nê mê kot pî kahpa hã nhôr kaxyw nhùm ã htÿx kumrêx kamã hamak pymaj kãm mêmô mê hkanexãja gô. Wîhti mê mêmô mry ma xã ho pihkãr nhùm mê kãm hkwý gô. Nom nhùm hkaki nê mê kot amnhî xã htÿx kamã hamak kêt xã hã omunh kurê kumrêx nê hkaga. Nhùm mê tee ri ja hã omu hãmri nê kêp ê kapa nê kumê nê pî kahpa hã kuxi nê prek o lhkra nê hpa o htÿx pa. Hãmri nê kãnhmã pî jarî nê ahkre kamã ãm nê ho htÿx nhùm kÿxpê ajêt. ³⁵ Hãmri nhùm pôristi hkwýjaja axpên mã ê hkwý ho pigrãnh kaxyw hã kênre ho jóka. ³⁶ Hãmri nê ho anhýr pa nê pikap Jejus jamãr o hkrî.

³⁷ Na htem mê hpar kaxyw nê tanhmâ mê kot amnhî tomnuj to hã kagã nê mê mÿri pî kahpa hã hanhô. Jakamã na prem tapti hõ py nê tanhmâ Jejus ã kagã hto nê hã kagã ho:

IJA EW NHÕ PAHI NA JA
HIXI PÊ JEJUS

Hãmri nê hwÿr ho api nê mÿri kunhõ. ã Jejus kot amnhî jarênh anhÿrja mÿrapê na prem kupî.

³⁸ Hãmri nhùm mê hpãnhã wa àhkînh xwÿnh wa ho axkrut nê mãânên pî kahpa hã wa kunhõ. Nê akutã ho Jejus nhîjê nhùm war ajêt.

³⁹ Tã nhùm pry hã mê mrrar xwÿnhjaja Jejus pumu nê hã hpêr o pikênh o mra nê kãm:

⁴⁰—Kwa ka na ka pre ate Tirtûm mã amnhî jarênh xã hã ixkre grãnh par nê atã apkati axkrunêpxi nê akupÿm hipêx par ã amnhî jarê. Nê apê Tirtûm Kra hã amnhî jarê. Nê axãhpumunh o axãhpumunh jakamã e kwa amnhî kapa nê wrÿ pa mê ja hã apumu. Kwa tokyx. Anê.

⁴¹ Nê patre krãhtûmjê mê Tirtûm kapêr tûm o mê ahkre o mê pa xwÿnh mê mê hkrãhtûmjaja piitã hwÿr mra nê hã hpêr o axkê. ⁴² Nê axpên mã harênh o: —E jahti na xep pre mê kamã ukapri ho pa nê tanhmã mê ho ajuta hto ho pa. Tã nom tãm tanhmã amnhî to nê wrÿk kêt nê. Kwa pu mê arî pakuhê nê kot amnhî kaxãr nê wrÿk kãm omu. Koja wrÿ pu mê omu nê kêp mê panhõ pahihtu hã hkôt pajamaxpêr kurê kumrêx. E tokyx wrÿ Jejus. Pa mê awrÿk kãm apumu. Nã kot kaj awrÿk rax nê. ⁴³ Na hte amnhî kaxyw Tirtûm mã hamaxpêr o pa. Nê kêp Kra hã amnhî jarênh o pa. Jakamã e. Kê Tirtûm tãm hwÿr tê nê kêp Kra hã akupÿm mê pahpê utã. Anê.

⁴⁴ Hãmri nhùm wa kot akutã hijê nê jêt xwÿnhnta wa haxwÿja mê mar xã hkôt mã ho kapêr anê.

Jejus tyk ã harênh

Makre 15.33-41; Rukre 23.44-49; Juãw 19.28-30; mãânên Eprêw 10.19-20

⁴⁵ Tã nhùm kaxkwa nhîpök ri myt ÿr mê nhùm te kamãt pyrãk nhùm kamãt kô rax kumrêx. Jao hã awry mê nhùm ra akupÿm myt katêr o mô. ⁴⁶ Hãmri nhùm Jejus kapêr kãm hihtÿx nê àmra htÿx kãm Tirtûm mã kapêr nê kãm:

—Inhõ Tirtûm inhõ Tirtûm. Kwa mon ka ixkaga? Anê.

Nom kapêr kamã kãm kapêr o:

—Eri Eri. Rãmã sapatani. Anê.

⁴⁷ Hãmri nhùm mê kot mar xwÿnhjaja kot Eri jarênh ã kuma nê htÿx ho finat Eris mã kapêr ã hkamnhîx. ⁴⁸ Nhùm Jejus par pê guhkrax kãm wîhti punure xa. Jakamã nhùm mê ã kapêr anhÿr ã kuma nhùm mêhõ kãm hkãpri nê. Hãmri nê mêmo rerek py nê o tê nê kaxyw pî rytija py nê ho hkanhwÿ. Nê akupÿn o tê nê ho wîhti nhek nê Jejus kot hkaôr kaxyw kãm kupê. ⁴⁹ Hãmri nhùm hkwyjaja tee ri ja hã omu nê nê kãm kapêr nê kãm:

—Tk. Kwa nhãm xa. Pu mê kop Eris jamã mãn. Koja hwÿr tê nê ho wrÿk japêr. Anê.

⁵⁰ Hãmri nhùm kamãt kô mê nhùm Jejus ra htyk kaxyw nê axte àmra htÿx nê hãmri nê ty. ⁵¹ Tykja kôt nhùm Tirtûm mã amnhî jarênh xã hã ixkre kamã hakwakre hã kupêxêja kÿj rûm ahpar mã axkjê nê amnhî kahê xã mênh kurê kumrêx. Utî rax tã axkjê nê amnhî kahê xã mê. Te Jejus htyk o te kot mê pahte hkôt amnhî xunhwÿr xwÿnhjê mã Tirtûm wÿr pry jakwa kre kahê xã mênh pyrãk o ã amnhî nhîpêx anê. Nhùm pika htetert tÿx kumrêx o kên rûnh kwÿ

ohtô nê hkrakrak pa. ⁵² Hâmri nhùm mē htyk ã pika kamã mē htykjê nhõrkwý ho ohtô nê mē hã axkjê nhùm mē hikwý xwýnhjaja akupým htír nê hapôj nê kuhê. Na prem kormã htyk kêt ri amnhî kaxyw Tirtùm kôt hamaxpêr. Tã nhùm Jejus ty nhùm mē ohtô nê akupým htír nê hapôj nê kuhê. ⁵³ Nom kormã nhýhým mrar kêt nê. Arî mē hã pika nhîpy Jejus akupým htír ã hamãr o kuhê. Tã nhùm Jejus apkati hõ hã akupým htír ã arîgrota ã nhùm mē rî kormã ma Jerujarê hwýr mra nê hwýr agjê nhùm mē ohtô nê akupým mē htír ã mē omu.

⁵⁴ Nhùm kormã Jejus htyk o mõrta ã nhùm pôristi krãhtùm mē pôristi hkwyjaja hãmri hparpê hamãr o kuhê nê htyk kãm omu. Nê pika htetert kamã ama nê mêmoj kot tanhmã amnhî nhîpêx toja pumu nê tee ri hamaxpêr nê kãm ma htýx kumrêx. Hãmri nê axpên mã:

—Hêxta waa nê. Pêr ãm hãmri na pre htyk xwýnhnta amnhî jarê. Kêp Tirtùm Kra kênã. Tã pu mē amarî pahtýx kupî. Anê.

⁵⁵⁻⁵⁶ Nhùm pre mênijaja ohtô nê amým Jejus tyk kãm omunh o kuhê. Marir Matarên nê Xiakre mē Juje wa katorxã Marir nê Xiakre hõ mē Juãw wa katorxãja nhùm mē kormã htyk kãm omunh o kuhê. Na prem Garirej rùm hkôt tanhmã ho ajuta hto ho hkôt Jerujarê wýr mõ.

Mê kot Jejus jaxàr ã harênh

Makre 15.42-47; Rukre 23.50-56; Juãw 19.38-42

⁵⁷ Tã nhùm ra myt grire nhùm krî pê Arimatej rùm hikãxpore rax xwýnh pê Jujeja tê. Nom axtem Juje hõ na pre. Ra kot Jejus kôt amnhî xãm jakamã kãm ho wrýk nê haxàr prãm nê. ⁵⁸ Hãmri nê ma pahi Pirat wýr tê nê î hã kuwý nê kãm:

—E ot pa awýr tê. Kwa inhmã htyk xwýnhnta gõ pa ma o tê nê haxà nà? Anê.

Hãmri nhùm kuma nê kãm harê nhùm ma o tê nê haxà. ⁵⁹ Kaxyw kupêxê mex õ py nê ho hkupu pa ⁶⁰ nê ma o tê nê õ kên kre kamã haxà. Na pre htyk kukamã kên kre kakwý nhùm mē kot kormã kamã mēhõ jaxàr kêt tã kamã na pre Jejus jaxà. Hãmri nê hã kên rax õ xãm nê ho hitom nê ma akupým tê. ⁶¹ Nhùm Marir Matarên mē Marir õja wa kên kreta kapem omunh o wa nhý.

Pôristi kot kên kre jamãr o kuhê ã harênh

⁶² Tã nhùm apkati nhùm mē inhõ arîgromnu pê sap kato. Hãmri nhùm Parijew nhõ xwýnhjê mē patre krãhtùmjaja ma pahi Pirat wýr mra nê kãm:

⁶³ —Kwa pahihti. Nã amnhî to hêx o pa xwýnhnta na pre kormã htír nê pa ri tanhmã amnhî jarênh to ho pa. Nê nhýrmã ty nê htyk ã apkati axkrunêpxi pix nê akupým htír ã amnhî jarê. ⁶⁴ Jakamã kwa hwýr anhõ pôristi hkwy rê kê mē ma hwýr mra nê hamãr mex o apkati axkrunêpxi. Kot ka anhýr kêt nhùm hkôt mē pa ho mē pa xwýnhjaja ma hwýr mra nê ho ahkî nê ma o mra nê nhýri haxà nê mē piitã mē kãm ra akupým htír ã harênh o hêx o pa. Te tãm kot amnhî kukamã amnhî jarênh pyrãk. Nom mē kot axte ã harênh anhýrja koja omnuj týx o tãm kot ã amnhî jarênh anhýrja jakre. Anê.

⁶⁵ Hãmri nhùm mē kuma nê mē kãm:

—Tõe. Nã koja mē ho anê. E mē ma hwýr amnhî kôt pôristi hkwy ho mra kê mē hakwakre kahê xã jamãr mex o kuhê. Anê.

⁶⁶ Hãmri nhùm mē kuma nê ma hwýr mra nê hakwakre hã kên raxta o htýx pa. Nê mēhõ kot omunh nê kahê mēnh pymaj menh ê ho hkukõ. Hãmri nê ho anhýr pa nê pôristi mã kãm:

—E Kêr ka mē jar kuri hamãr mex o akuhê. Kê mēhõ tê nê tanhmã ho hkêt nê. Anê.

28

*Jejus akupÿm htîr ã harênh
Makre 16.1-8; Rukre 24.1-12; Juãw 20.1-10*

¹ Tã nhũm apkati nhũm tòmîk. Hãmri nhũm Marir Matarênh mê Marir ôja kwÿhtã kãnhmã nhÿ nê ma akupÿm kên kreta wÿr wa tê. ² Puh nhũm pika htertet tÿx nê nhũm Tîrtũm kapêr o mê wrÿk xwÿnhja kên kre wÿr wrÿ nê nhãm hakwakre nê kên raxta mê nê hã nhÿ. ³ Hirã htÿx kãm nhÿ. Te na jaxênh pyrãk. Nê ê haka htÿx kumrêx. ⁴ Nhũm pòristijaja tee ri omu nê kãm ma htÿx nê htertet nê umaj pikap rôrôk pa nê te htyk pyrã nê hikwÿ. ⁵ Hãmri nhũm wa nita kên kre hwÿr pôj nê tee ri Tîrtũm kapêr o mê wrÿk xwÿnhja pumu. Nhũm wa kãm:

—Kwa wa amã ma hkêt nê. War ate Jejus pumunh kaxyw na ka wa tê. Mê kot pí kahpa hã nhôr xwÿnhja. ⁶ Nom jar amrakati. Na ra akupÿm htîr nê kato nê ma tê. E wa kam nê amnê axã nê nôr xã kaprÿ pumu. Anê.

Hãmri nhũm wa kuma nê tee ri kên kre kamã Jejus japêr nhũm kamã amrakati. ⁷ Hãmri nhũm Tîrtũm kapêr o wrÿk xwÿnh wa kãm:

—E wa tokyx ma akupÿm tê nê hkôt mê pa ho mê pa xwÿnhjê mã harê. Kojã ma Jejus mê akukamã akupÿm Garirej wÿr mô. Garirej kamã kot kaj mê axte axpên pumu. Ra kot mê amã amnhî jarênh xã hkôt. E kwa wa tokyx ma akupÿm mê hwÿr tê. Anê.

⁸ Hãmri nhũm wa kuma nê ma akupÿm hprôt nê htêm kurê kumrêx. Kãm ma htã hkînh nê. Nê ma Jejus kôt mê pa ho mê pa xwÿnhjê mã ujarênh kaxyw ma mê hwÿr hprôt nê wa tê. ⁹ Pu nhũm ra Jejus tãm wa kutã tê nê wa hkaxpa. Hãmri nê wa haêr pê wa kãm kapêr nê wa kãm:

—Pa? Nhÿhÿm na ka wa tê? Anê.

Hãmri nhũm wa omu nê hkînh tÿx kumrêx nê hwÿr hprôt nê hpar pê hkôn krã ho têm nê akutã hpar ã kumÿ nê kãm mex o mex ã harê nê kãm:

—Hêxta gàã nê. Ma amex kumrêx. Amex o amex. Anê.

¹⁰ Hãmri nhũm wa kãm:

—E war amã ma hkêt nê. Mamrî ma tê nê ixkôt mê pa ho mê pa xwÿnhjê mã ijarê kê mê ma Garirej wÿr mra. Kamã kot paj mê axte axpên pumu. Anê.

Pòristi kot kãxpore hprãm xaj Jejus o hêx ã harênh

¹¹ Rôm nhũm pòristi hkwÿjaja akupÿm tãm hkrã hãmri nê ma kên kreta rũm akupÿm krîm mra. Hãmri nê patre krãhtũmjê hwÿr mra nê mê kãm ujarênh pa. ¹² Hãmri nhũm mê tee ri mê kuma nê mēhpigêtjê ho akuprô nê mê hã axpên mar o hkrî. Hãmri nê axpên mar pa nê pòristi mã amnhîrer rax nê mê kãm:

¹³ —E mê amnhîm kãxpore jamÿ nê ma ri ã mê kãm amnhî jarênh anhÿr o apa. Nom kêr ka mê kãm amnhî to axêx nê mê kãm: “Na pa prem kên kre kapem ixtÿx gôr nê inhîkwÿ nhũm Jejus kôt mê pa ho mê pa xwÿnhjaja mra nê mê ixpê î ho ahkî nê ma o mra.” Anhÿr o mê kãm amnhî to axêx o apa. Mê ixte kãxpore ho mê amã amnhîrerta pãnhã. ¹⁴ Kojã pahihiti Piratja mê anhôt ã mê ajarênh ma nê hã tanhmã mê ato kaxyw hã kot paj mê axy pê tanhmã kãm ixkapêr to nhũm tanhmã mê ato hkêt nê. Jakamã e. Mê tee ri amnhî kukamã ajamaxpêr kêr nê. Mê mãmri ma mra nê ã mê kãm axujarênh anhÿr o ri apa. Anê.

¹⁵ Hãmri nhũm mê kuma nê mê kot amnhî to hêxta pãnhã kãxpore jamÿ nê ma mê mar xã hkôt mê piitã mê kãm Jejus kôt mê pa xwÿnhjê ho hêx o pa. Tã na htem arî jarãhã Ijaewjaja ã axpên mã mê harênh anhÿr rãhã ho pa.

*Jejus kot hkôt mē pa ho mē pa xwỳnhjê mã mē àpênh ã karõ
Makre 16.14-18; Rukre 24.36-49; Juãw 20.19-23; Atre 1.6-8*

¹⁶ Tã pa mē ixte Jejus kôt ixpa ho ixpa xwỳnh pē 11jaja hãmri akupỹm Jejus hũr ã harênh ma hãmri nē ma Garirej wỳr mra. Nhỹri Jejus kot mē inhmã mēmo hixêť prêk jarênhja wỳr.

¹⁷ Nē ra hwỳr ixpõx o mrar mē Jejus pumu. Tã nom nhũm mē ixkwỳjaja tee ri omu nē htỳx ho nhãm mēhõ hã hkamnhix. No kêt mē pajaja na pa prem ixprĩ hã omunh kurê kumrêx nē ixkĩnh tỳx nē. Nē ixkĩnh nē hwỳr ixprõt nē kãm:

—Pa Jejus? Hêxta waa nē. Amex o amex. Anē.

¹⁸ Hãmri nhũm mē inhmã:

—E na pre Tĩrtũm ã inhmã kapêr anē nē inhmã: “E kêr ka amnhĩ nhỹ hã mēmoj piitã tanhmã ho ho apa. Kaxkwa kamã nē pika kamã. Mamrĩ nhỹhỹm amnhĩ krã hkôt amã tanhmã amnhĩ to hprãm xã hkôt tanhmã amnhĩ nhĩpêx to ho ri apa.” Anē. Na pre mē akaxyw ã inhmã kapêr anē.

¹⁹ —Jakamã e. Kêr ka mē ma pika piitã hkôt ri mē kãm ijarênh o ri apa. Kê mē ixte mē nē tanhmã amnhĩ nhĩpêx to hã ijarênh ma hãmri nē ixkôt amnhĩ xunhwỳ nē ixkôt ri amnhĩ nhĩpêx o pa. Nē kêr ka mē ja hã mē omu nē Tĩrtũm mē wa inhmã mē hkrã kumrã. Wa ixkarõ nhỹ hã mē hkrã kumrã. Mē kot wa inhỹ hã pix mã tanhmã amnhĩ nhĩpêx to ho pa kaxyw.

²⁰ —Nē mē kãm anē kê mē ixkapêr piitã hkôt amnhĩ nhĩpêx rãhã ho pa. E kêr ka mē ma mē kãm ã ijarênh anhỹr o ri mē hkôt apa. Kot paj mē anhĩhkõ hã ri ixpa rãhã nhũm nhỹrmã pikaja hapêx o hapêx. Anē.

Na pre ã Jejus mē inhmã mē ixápênh ã karõ anē.

Matêwre kot Jejus jarênh nē hã kagãja ja kôt na hapêx.

Makre

Makre kot tanhmã Jejus kot amnhĩ nhĩpêx to ho pa hã kagà

Juãw Makre na pre kagàja nhĩpêx. Na pre hte ma hkwýjê hkôt mẽ kãm Jejus kot tanhmã amnhĩ nhĩpêx to hã harênh o ri pa. Na pre ra Simãw Pêtreja hprĩ hã Tirtũm kapêr o ahkre nhũm kuma nê mar týx nê. Hãmri nê mẽ pamã tanhmã Jejus ã kagà hto. Simãw Pêtre xô ri tanhmã kot amnhĩ nhĩpêx to hã kagà. Jejus kêp Tirtũm Kra hã hihtýx o hihtýx nê àhpumunh o àhpumunh ã nhũm pre harê nê hã kagà. Nê kêp mẽ pakutã nojarét xwýnh ã harê nê hã kagà. Á Juãw Makreja mẽ pamã Jejus jarê nê hã kagà anê.

Matêwre 3.1-10; Rukre 3.1-9; Juãw 1.6-8, 1.19-23

¹ Pa Kris kôt ixkrãmnhwýjaja. E kot paj mẽ amã tanhmã Jejus kot amnhĩ nhĩpêx to ho pa hã kagà ka mẽ kamã harê nê ama. Kêp Tirtũm Kra na. Tãm na pre mẽ pakaxyw ãm nê mẽ pahwýr kumê. Tã tãm kot mẽ pahwýr wrýk nê tanhmã amnhĩ nhĩpêx to ho paja kot paj mẽ amã ixprĩ hã harê nê hã kagà ka mẽ kamã harê nê ama.

Juãw Paxis kot Jejus kukamã harênh

² Kormã Jejus mẽ pahwýr wrýk xwýj ri na pre Tirtũm nhỹ hã kapêr o pa xwýnhjê hõ pê Ijaisja kukamã tanhmã harênh to nê hã kagà. Nê Jejus kukamã harênh o mör xwýnh Juãw Paxisja nhũm pre mãânênh hkukamã tanhmã harênh to nê hã kagà. Te Tirtũm tãm hamaxpêr pyrãk o harê nê harênh o:

E kot paj Ixkra hkukamã ma mẽ hwýr kot harênh xwýnhjê hõmê kê ma kutêp mẽ kãm harênh o ri pa. Kê mẽ kuma nê kutêp tãm amnhĩ nhĩpêx mex o pa.

³ Koja kukamã harênh xwýnhja ma kapôt ã ri hwýr mẽ mrar xwýnhjê mã harênh o ri pa. Nê kýx pê mẽ kãm kapêr nê mẽ kãm: “E mẽ inhma. Kojã Tirtũm tokyx mẽ pahwýr mẽ panhõ Pahihti mẽ nhũm wrý pu mẽ pahpiitã omu. Jakamã kwa mẽ tokyx kutêp tãm amnhĩ nhĩpêx. Te ho mẽ kot mẽhõ kutêp pry ho mex pyrãk o amnhĩ nhĩpêx. Nom pry kumrêx o mex kêt nê. ãm amnhĩ nhĩ ho tãm amnhĩ nhĩpêx nê tãm xpên nhĩpêx. Pahihtita kutêp. Mẽ pahte amnhĩ nhĩpêx tũmja te kot pry nhĩnur nê krã hakýx nê pry juk nhũm mẽ tee ri kot kãm hã mrar mex prãm kaprý pyrãk. Jakamã kot kaj mẽ Pahihti nyw kutêp ate amnhĩ tomnuj kaga nê tãm amnhĩ nhĩpêx nê tãm xpên nhĩpêx. Hãmri nê te mẽ kot pry nhĩnur o mex nê ho katat nhũm ra katat mux nê nõr pyrãk o amnhĩ nhĩpêx. E kwa kêr ka mẽ ã kutêp amnhĩ nhĩpêx anê.” Anhýr o koja mẽ kãm harênh o pa. Anê.

Na pre ã Tirtũm Juãw Paxis kukamã harênh anê nhũm ý hã kapêr xwýnh pê Ijaisja mẽ pamã hã kagà.

⁴ Tã ra kot harênh xã hkôt nhũm Juãw Paxisja tẽ. Hãmri nê kapôt ã ri mẽ kãm Tirtũm kapêr jarênh o pa nê mẽ kãm:

—Kwa mẽ tokyx amnhĩ tomnuj kaga nê tãm ri amnhĩ nhĩpêx. Kê Tirtũm ja hã mẽ apumu nê mẽ anê mẽ ate amnhĩ tomnuj rênh pa nê mẽ ato hkra. Pa mẽ piitã mẽ kot ra mẽ apê hkra hã mẽ apumunh kaxyw mẽ akrã kumrã. Anê.

⁵ Hāmri nhūm mē ohtô nē kot kapēr mar kaxyw ma nhÿhÿnh hwÿr kapôt mā mra. Pyka pē Jutej rūm nē Jutej kamā krī pē Jerujarē rūm nhūm mē ohtô nē hwÿr mra. Hāmri nē nhÿri omu nē kām:

—E ixte amnhī tomnuj kaga hprām xàj na pa awÿr amnhī to tē. Na pa hte amnhī tomnuj pix o ri ixpa. Tā tee ri ja hā amnhī pumu nē ixkaprī nē. Hāmri nē ra inhmā amnhī tomnuj kaga nē tām amnhī nhÿpêx prām nē.

Anhÿr ā amnhī jarē. Hāmri nhūm Tirtūmja kaxkwa kamā hkri htā mē kuma nē amnhī katut kôt mē kot amnhī tomnuj piitā rēnh pa nē axte kām hamaxpēr kēt nē. Jakamā nhūm Juāw Paxis gōx kām mē hkrā kumrā. Pyhti pē Jotāw kamā. ⁶ Juāw Paxisja hikāxpore hkēt jakamā na pre ē mex kēt nē pa. Ām mēmo mry pē kamer kī ho amnhīm ē nhÿpêx nē hagjē nē hā pa. Nē mēmo mry hkā ho amnhī pre nē ri pa. Nē mēō mex kur kēt nē ām kri kut nē menh ôr o ri pa. ⁷ Hāmri nē mē kām tanhmā Jejus jarēnh to ho pa nē mē kām:

—E mē inhma. Kojā tokyx Tirtūm kot mē pakaxyw ām xwÿnhhta mē pahwÿr wrÿ. Ahpumunh tÿx o kot ijakrenh jakamā na pa hte ām kukwak ri ixpa nē amnhī tā hā xpijaam rāhā ho ri ixpa. Te ixkrām ā xpijaam o amnhī nhÿpêx pyrāk. ⁸ Na pa hte gō pix o Tirtūm mā mē akrā kumrār o ri ixpa. Nom mē pahwÿr wrÿk mā xwÿnhja koja mē awÿr Tirtūm Karō rē nhūm mē akaxwÿnh mā agjē. Ka mē ŷ hā tām ri amnhī nhÿpêx rāhā ho ri apa. Anē.

Juāw Paxis kot Jejus krā kumrār ā harēnh

Matēwre 3.13-17; Rukre 3.21-22; Juāw 1.32-34

⁹ Tā nhūm Jejusja tām Juāw Paxis wÿr tē. Garirej kamā krī pē Najare rūm ma hwÿr tēn pōj. Hāmri nhūm Juāwja hkrā hkumrā. Pyhti pē Jotāw kamā hkrā kumrā. ¹⁰ Hāmri nē wa gōj rūm api nē mÿr ri kaxkwa pumunh o xa. Nhūm kaxkwa axkjē nhūm kurūm Tirtūm Karō te tuuti pyrā nē Jejus wÿr wrÿk o tē nē ikre hā xa nhūm amnhī tā omunh o xa. ¹¹ Hāmri nhūm Tirtūm kaxkwa rūm kām kapēr nē kām:

E apē Ixkra mex na ka. Ām hāmri na ka hte ixkanrēhā amnhī nhÿpêx mex o apa. Inhmā ajapē kamā na ka ri apa ho apa. Anē.

Jejus kot Satanasti kaga hā harēnh

Matēwre 4.1-11; Rukre 4.1-13; mātānēn Eprēw 2.18, 4.15

¹² Tā nhūm Tirtūm Karōja ma kapôt mā Jejus o mō ¹³ nhūm kapôt ā mry xoprē kaēx ā ri mrar o hā arġro pē 40. Hāmri nhūm Satanasti omu nē ma hwÿr tē nē ri hkôt pa. Kapôt ā ri hkôt hēx rom tanhmā kām kapēr to nhūm kot mar nē hkôt amnhī xām prām xàj ma hkôt pa. Nom nhūm Jejus hkaga kumrēx nhūm tee ri ho anhÿr kaprÿ nē ma akupÿm tē. Hāmri nhūm Tirtūm kapēr o mē wrÿk xwÿnhjaja Jejus wÿr wrÿ nē tanhmā ho mex to.

Jejus kot Tirtūm mā āpēnh krax ā harēnh

Matēwre 4.12-17; Rukre 4.14-15

¹⁴ Nhūm pre ra mē ixpē Ijaew o amnhīptār xwÿnh pē Eroxja Juāw Paxis kot mēmoj tā kām ākjēr mÿrapē nhūm pre ra unē nē haxā. Tā kot haxār jakānh pē nhūm Jejus ma akupÿm pyka pē Garirej wÿr mō nē kamā mē kām Tirtūm kapēr jarēnh o pa. Nē Tirtūm kot mē hwÿr mēnh ā amnhī jarēnh o pa. Nom te nhām mēhō jarēnh pyrāk o amnhī jarē ¹⁵ nē mē kām:

—E na Tirtūm kām mē ato hkra hprām nē. Jakamā na ra kot mē awÿr ām xwÿnhhta mē nhūm mē awÿr wrÿ. Kwa mē tokyx kapērja ma nē amnhī kaxyw hkôt ajamaxpēr. Hāmri nē ate amnhī tomnuj kaga nē Tirtūm kôt mān amnhī

nhîpêx o ri apa. Kot kaj mê ã amnhî nhîpêx anê nhùm Tîrtûm amnhî tâ mê apumu nê mê ato hkra. Anê.

Jejus kot amnhî kôt tep pynênh xwýnh wa hwýr ã harênh

Matêwre 4.18-22; Rukre 5.1-11

¹⁶ Tã nhùm Jejus ma Garirej kamã gô rax pê Garirej mýri mô. Hãmri nê Simãw mê htô Andreja wa hwýr kato nê wa omu. Wa kot tep pynênh xwýnh jakamã na pre wa gôx kãm kryhti rênh o xa nhùm Jejus wa hãnh tẽ nê wa omu.

¹⁷ Hãmri nê amnhî kôt wa kuwý nê wa kãm:

—E war amnê ixkôt tẽ nê ixkôt mãn apa. War apê tep kanhêr rax o ri apa xwýnh tâ kër ka war axápênhta kaga nê hpãnhã ixkôt apa ho apa. Kot paj tanhmã war akrã hto ka wa tep pynênh pãnhã ma ri mê hkôt mê kãm ixkapêr jarênh o ri apa. Mê ohtô nê mê kot war amar nê Tîrtûm kôt amnhî xunhwýr kaxyw. Jao kot kaj te war ate tep kanhêr rax nê Tîrtûm mã ôr pyrãk o amnhî nhîpêx.

Anhýr o wa kãm kapêr. ¹⁸ Hãmri nhùm wa kuma nê kryhti kaga nê ma hkôt pa ho pa kurê kumrêx. ¹⁹ Hãmri nê mê gô mýri mô nê Jepetew kra Xiakre mê htô Juãw wa hwýr kato nê wa omu. Nhùm wa kormã hipêêxã nhîhkô hã pãr kãm kryhti ho mex o wa nhý nhùm Jejus wa mê hwýr kato nê wa omu nê amnhî kôt wa kuwý. ²⁰ Hãmri nhùm wa kuma nê ma hkôt pa ho pa. Pãr kre kamã mê kãm àpênh xwýnhjê ri hipêêxã re nê ma Jejus kôt pa ho pa.

Jejus kot mêhõ nê mēkarõmnuti janor ã harênh

Rukre 4.31-37

²¹ Hãmri nhùm Jejus mê hkôt mê pa ho mê pa xwýnhjaja ma krî pê Kapanaũ hwýr mô hãmri nê hwýr pøj. Hãmri nhùm mê ixpê Ijaewjê nhõ arîgromnu pê sap kato nhùm Jejus ma Tîrtûm kapêr o mê ahkre xã hã ixkre hwýr tẽ nê hwýr axã. Hãmri nê kamã mê kot Tîrtûm kapêr mar kaxyw axpên wýr mê pikuprõnh xwýnhjê jahkre ho nhý. ²² Nê mê ahkre mex nhùm mê kuma nê tee ri hamaxpêr nê axpên mã:

—Hêxta waa nê. Pêr ãm hãmri na ã mê pamã mēmoj jarênh anê. Tîrtûm kapêr tùm o mê ahkre xwýnhjê rom àhpumunh týx kôt na hprî hã mê pajahkre mex nê. Anê.

²³ Hãmri nhùm mēhõ myja mê hwýr axã. Na pre ra mēkarõmnuti hwýr axã nhùm ý hã amnhî tomnuj o pa. Hãmri nê mê hwýr axã nê Jejus pumu nê kãm kapêr. Nom tãm kapêr kêt nê. Mēkarõmnuti nhý hã kãm kapêr. Kãx pê kãm kapêr nê kãm:

²⁴ —Pa Jejus? Kwa tanhmã mê ixto hkêt nê. Ixte apumunh mex. Apê Najare nhõ xwýnh tâ mããnênh apê Tîrtûm kot mê ixwýr amênh xwýnh maati na ka. Tîrtûm rùm na ka pre mê ixwýr wrý. Kwa xã kot kaj mê ixto ajapêx nã? Anê.

²⁵ Hãmri nhùm kãm:

—Tk. Kwa anhîkrê nê myta kurùm akator kurê kumrêx. Anê.

²⁶ Hãmri nhùm kuma nê àmra htýx kãm myja o àk týx nê kêp kato nê ma tẽ nhùm akupým mex. ²⁷ Hãmri nhùm mê piitã omu nê kamã no puma nê. Hãmri nê xatã axpên mã harênh o pa nê axpên mã:

—Kokýy. Jejus na pre àhpumunh týx kôt mēkarõmnuti jano nhùm kuma nê mê kurùm hapõx kurê kumrêx. Anê.

²⁸ Hãmri nhùm Garirej kamã mê piitã ri axpên mã harênh o pa.

Jejus kot akupým Simãw xupãnhgêx o mex ã harênh

Matêwre 8.14-15; Rukre 4.38-39

²⁹ Tã nhũm Jejus Xiakre mẽ Juãw mẽrohã Tĩrtũm kapẽr o mẽ ahkre xà hã ixkre rũm kato nẽ ma Simãw mẽ Andre wa òrkwỹ hwỹr mō. ³⁰ Hãmri nẽ mẽ hwỹr agjẽ. Nhũm Simãw xupãnhgêxja ra à nẽ hkà kagro htỹx nẽ nõ nhũm Jejus mẽ hwỹr axà nhũm mẽ kãm harẽ. ³¹ Hãmri nhũm mẽ kuma nẽ hwỹr axà nẽ omu nẽ hpa hã kupy nẽ kãnhmã ỹr nhũm hkà hakry nẽ akupỹm mex kurẽ kumrẽx. Hãmri nẽ kãnhmã xa nẽ tẽ nẽ mẽ kãm mẽmoj nhĩpẽx nhũm mẽ hkur o hkrĩ.

Jejus kot akupỹm mẽ hkwỹjẽ ho mex ã harẽnh
Matẽwre 8.16-17; Rukre 4.40-41

³²⁻³³ Tã nhũm myt axà nhũm mẽ ohtõ nẽ Simãw mẽ Andre wa òrkwỹ hwỹr mra nẽ hakwakrem Jejus ã akuprõ. Nẽ amnhĩ kõt mẽ à xwỹnhjẽ ho mra. Nẽ mẽkarõmnuti kot mẽ hwỹr gjẽx xwỹnhjaja nhũm mẽ hwỹr mẽ o mra. ³⁴ Hãmri nhũm Jejus mẽ omu nẽ akupỹm ahpỹnhã mẽ piitã mẽ ho mex pa. Nẽ mẽkarõmnutija nhũm mẽ kurũm mẽ hapõj. Mẽkarõmnuti kot kẽp Tĩrtũm Kra hã omunh tã no nhũm kapẽr nẽ mẽ hkurẽ nẽ mẽ hano nhũm mẽ kapẽr kêt rãhã mẽ kurũm hapõj nẽ ma mra.

Jejus kot Tĩrtũm mã amnhĩ jarẽnh ã harẽnh
Rukre 4.42-44

³⁵ Tã nhũm apkati nhũm kormã myt kator kêt ri nhũm Jejus kãnhmã nhỹ nẽ tẽ nẽ kato. Hãmri nẽ ma kapõt ã ahte nhỹhỹm tẽ nẽ nhỹri Tĩrtũm mã amnhĩ jarẽnh o nhỹ.

³⁶ Hãmri nhũm Simãw Pẽtre mẽ hkwỹjaja hkrã hapõj nẽ tee ri ixkre kamã hapẽr. Hãmri nẽ hapõj nẽ ma hpri jakop o mō. ³⁷ Hãmri nẽ hwỹr kato nẽ omu nẽ kãm:

—Pa. Kwa na mẽ piitã tee ri ajapêr. Anẽ.

³⁸ Hãmri nhũm mẽ kãm:

—Tõ ma pu mẽ mō. Nom kot puj mẽ akupỹm mẽ hwỹr pamõr kêt nẽ. Kot puj mẽ hpãnhã nhãm krĩ hkwỹ hkõt mãn ri pajapõj. Pa kamã mẽ kãm Tĩrtũm kapẽr jarẽ mãn. Ja kaxyw na pre mẽ awỹr inhmẽ. Krĩ piitã hkõt mẽ pa xwỹnhjaja kot kapẽr mar kaxyw. Anẽ.

³⁹ Hãmri nẽ mẽ ma axte Garirej kamã krĩ hkwỹ hkõt pa. Nẽ krĩ piitã hkõt Tĩrtũm kapẽr o mẽ ahkre xà hã ixkre kamã mẽ kãm Tĩrtũm kapẽr jarẽnh o pa. Nẽ mẽ kurũm mẽkarõmnuti japõx o pa.

Jejus kot akupỹm mẽhõ hkãmnu ho mex ã harẽnh
Matẽwre 8.1-4; Rukre 5.12-16

⁴⁰ Tã nhũm mẽhõ hkà hkro xapêr tỹx xwỹnhja Jejus wỹr tẽ. Hãmri nẽ hã hpiaaã kaxyw kutã hkõnkrã ho tẽm nẽ nhỹ nẽ kãm:

—Pa Pahihti. E ot pa awỹr amnhĩ to tẽ. Akupỹm ate mẽ ixto mex kaxyw axãhpumunh tỹx jakamã kot ka akupỹm amã ixto mex prãm nẽ mãmri akupỹm ixto mex. Anẽ.

⁴¹ Hãmri nhũm kuma nẽ kamã ukapri nẽ hã ỹkra xi nẽ kãm:

—Nã kot paj ato mex. E akupỹm akã mex.

⁴² Anhỹrja kõt nhũm akupỹm hkà mex kurẽ kumrẽx. ⁴³⁻⁴⁴ Hãmri nhũm Jejus kãm kapẽr kãm hihtỹx nẽ hano nẽ kãm:

—E kër ka amnhĩ tã akwỹjẽ mã tanhmã ijarẽnh to hkêt rãhã ma patre hwỹr tẽ kẽ akupỹm akã mex ã apumu. Hãmri ka amnepẽm Mojes kot mẽ ate akupỹm mẽ amex ã Tĩrtũm mã tanhmã amnhĩ nhĩpẽx to hã karõ xwỹnhnta ka kãm ho anẽ. Kẽ mẽ piitã akupỹm akã mex ã apumu. Anẽ.

⁴⁵ Hāmri nhūm kuma nē ma tē. Nom axtem nē ma mē piitā mē kām amnhī jarēnh o ri mra. Jejus kot kām karō xà kuhpa hā ma mē kām amnhī jarēnh o ri mra. Jakamā nhūm mē kuma nē piitā nhỹhỹnh Jejus wýr mra. Mē ohtō rax kumrēx nē hwýr mra nhūm tee ri mē noo mā nhỹri krīm pa mā. Hāmri nē ām kri pu hā ri pa htā nom nhūm mē arī ohtō nē hwýr mra.

2

*Jejus kot akupým ĩ kamā htyk xwýnh o mex ā harēnh
Matêwre 9.1-8; Rukre 5.17-26; Juāw 10.37-38*

¹ Tā nhūm Jejus hā apkati grêre nē hkôt mē pa ho mē pa xwýnhjê mērohā ma akupým Kapanaū wýr mō. Hāmri nē hwýr pōj nhūm mē piitā nhỹri mēhō nhōrkwý kamā hpōx kôt harēnh ma nē hā akuprō. ² Ra hā pikuprōnh rax nē ixkre nhītom pa. Nhūm mē hkwýjaja kapôt ā kuhê nhūm Jejus Tirtūm kapēr o mē ahkre ho nhỹ. ³ Hāmri nhūm mēmyjaja kēp kwat nē ĩ kamā htyk xwýnhja mý nē Jejus kot ho mex kaxyw hwýr o tē. ⁴ Hāmri nē tee ri hā mē pikuprōnh rax xwýnhjê pumu nē nhỹhỹnh kot hwýr o ar kaxyw tee ri amnhī kukamā ho ukapi ho pa. Hāmri nē hamaxpēr nē ixkre nhīmōk po hwýr ho api nē himōk kwý grà nē hkôt ĩ kamā htyk xwýnhhta nōr xà mērohā hkôt Jejus wýr haxà. ⁵ Hāmri nhūm mē kot kaxyw kām hamaxpēr týx ā mē omu nē ĩ kamā htyk xwýnhhta mā kapēr nē kām:

—Pa? Kwa tee ri amnhī kukamā ajamaxpēr kêt nē. Na pa ra anê ate amnhī tomnuj piitā ho ijapêx. Kot paj axte kām ijamaxpēr kêt nē. Anē.

⁶ Hāmri nhūm Tirtūm kapēr tūm o mē ahkre xwýnhjaja tee ri ā kapēr anhýrja ā kuma nē hamaxpēr o:

⁷ —Tk. Kwa pēr mēhō myti mŭj kēp Tirtūm kêt tā te kapēr pyrāk o amnhī nhīpêx nē mē nē mē kot amnhī tomnuj o hapêx ā amnhī jarē. Tirtūm pix kot mē nē mē kot amnhī tomnuj o hapêx kēnā. Anē.

⁸ Nom nhūm Jejus mē hamaxpēr kôt mē omunh mex nē. Mē kot Tirtūm pix kot mē nē mē kot amnhī tomnuj rēnh nē akupým mē ā xwýnhjê ho mex kôt mē hamaxpērja nhūm mē omunh mex nē mē kām:

—Kwa mē ā ajamaxpēr anhýr kêt nē. ⁹ Ixte mē nē mē kot amnhī tomnuj o ijapêx par ā amnhī jarēnh tā mē ate mē ano ho ja kôt ixpumunh kêt jakamā na ka htem ja hā ixkôt ajamaxpēr kêt nē. Nom kot paj mē anoo mā akupým myja o mex. Ka mē ja hā ixpumu hāmri nē ixkôt ajamaxpēr kurê kumrēx. ¹⁰ Ixpê Tirtūm kot mē awýr inhmēnh xwýnh na pa. Ixte mē anê mē ate amnhī tomnuj rēnh kaxyw na pre mē awýr inhmē pa wrý. Tā mē ate ja kôt ixpumunh kaxyw kot paj mē anoo mā mytija ho mex.

¹¹ Anhýr o mē kām kapēr hāmri nē ĩ kamā htyk xwýnhhta mā kapēr nē kām:

—E kànhmā xa nē anōr xà mý nē ma akupým anhōrkwý hwýr tē. Anē.

¹² Hāmri nhūm kuma nē kànhmā ām kurê kumrēx. Hāmri nē akupým mex ā amnhī pumu nē hkānh týx nē nōr xà mý nē mē noo mā kato nē ma akupým ōrkwý hwýr tē. Hāmri nhūm mē kot omunh xwýnhjaja amnhī jaēr pé omu nē no hapōx kaxyw nē hkôt omunh o kuhê nē kamā no pyma htýx nē. Nē tee ri omu nē axpēn mā:

—Hêxta waa nē. Aa mē pahte ā mēhō kot amnhī nhīpêx anhýr ā omunh kêt kumrēx tā jarāhā ja pumu. Nā Tirtūmja ām mex o mex. Anē.

*Jejus kot amnhī wýr Rewi hwýr ā harēnh
Matêwre 9.9-13; Rukre 5.27-32*

¹³ Hāmri nhūm Jejus mē ma mra nē akupŷm gō rax pē Garirej wŷr mra nē gō mŷ ri pa. Hāmri nhūm mē piitā omu nē hwŷr mra nē hā akuprō nhūm Tirtūm kapēr o mē ahkre ho nhŷ. ¹⁴ Hāmri nē mē kure nē axte hkōt mē pa ho mē pa xwŷnhjē mērohā ma axte mra nē nhŷri Apew kra Rewija pumu. Rōm kām mē ō pahihtī mā amnhī kwŷjē pē kàxpore hkwy jamŷnh xwŷnh na pre. Jakamā nhūm àpēnh o nhŷ nhūm Jejus hānh tē nē omu nē amnhī kōt kuwŷ nē kām:

—Pa? E kwa axàpēnhhta kaga nē hpānhā amnē mē ixkōt mān ri apa ho apa. Anē.

Hāmri nhūm kuma nē àpēnh kaga nē ma hkōt mō nē hkōt pa ho pa.

¹⁵ Hāmri nhūm mēmo arīgro hā nhūm Rewi nhō mē apkur xā hā mēō rax nē. Jakamā nhūm amnhī nhōrkwŷ hwŷr hkrāmnhwŷjaja nē Jejus mē hkōt mē pa ho mē pa xwŷnhjē hwŷ. Hāmri nhūm mē ma hkōt mra nē ōrkwŷ hwŷr agjē nē kuri apkur o hkrī. Nē māānēn mē kēp Rōm nhō pahi mā mē kēp kàxpore hkwy jamŷnh xwŷnh kwŷ nē mē ohtō nē mē kutā apkur o hkrī. ¹⁶ Hāmri nhūm Tirtūm kapēr tūm o mē ahkre xwŷnh kwŷ pē Parijew nhō xwŷnhjaja mra nē mē apkur ā mē omu. Nē tee ri mē hkaēx ā Jejus pumu nē hkōt mē pa ho mē pa xwŷnhjē hwŷr agjē nē hā mē kām akir nē mē kām:

—Kwa na htem mē kot amnhī tomnuj xwŷnhjē kutā apkur kēt tā ka mē Jejus mē apimràatā axtem nē mē kutā axàpkur o akrī. Mē ate amnhī to mex ronhŷx ka mē kutā axàpkur kēt nē. Anē.

¹⁷ Hāmri nhūm Jejus amnhī tā mē kapēr ma nē mē kām:

—Tk. Ixte tām mē unhwŷr kaxyw ixte mē kutā ixàpkur o inhŷr kēnā. Xà na hte tōtō mē mex xwŷnhjē hwŷr mra nē mē hkane? Nà na hte ām mē à xwŷnhjē pix kane ho pa. Ra mē ate ja pumunh mex. Ja pyrā nē na pa pre mē kot amnhī to mex xwŷnhjē hwŷr ixwrŷk kēt nē. Ām mē kot amnhī tomnuj xwŷnhjē pix wŷr na pa pre wrŷ. Ixte tām mē unhwŷr kaxyw mē hwŷr wrŷ nē jajē kutā ixàpkur o nhŷ. Mē ate amnhī tomnuj mā anhŷrer nē hpānhā tām amnhī nhīpēx o apa kaxyw na pa pre mē awŷr wrŷ nē mē akamā ixukapri ho ri mē akōt ixpa. Tā ka mē atŷx ā ixte mē kutā ixàpkur anhŷrja ā ixto akapēr anē. Anē.

Mē kot Tirtūm mā amnhī jarēnh kaxyw mēō kaga hā mē harēnh

Matēwre 9.14-17; Rukre 5.33-39

¹⁸ Juāw Paxis kōt mē pa xwŷnhjē mē Parijew nhō xwŷnhjaja na prem tōhā Tirtūm mā amnhī jarēnh kaxyw nē apkur kēt rāhā kamā kām amnhī jarē. Nom nhūm Jejus kōt mē pa ho mē pa xwŷnhjaja na prem kām amnhī jarēnh prām nē apkur kām amnhīx kām amnhī jarēnh o pa. Jakamā nhūm Ijaew kwŷjaja tee ri ja hā mē omu nē Jejus wŷr mra nē mē hā hkukja nē kām:

—Pa? Kwa aprī hā mē inhmā mēmoj jarē. Na hte Parijew nhō xwŷnhjē mē Juāw Paxis kōt mē pa xwŷnhjaja tōhā Tirtūm mā amnhī jarēnh kaxyw nē apkur kēt rāhā kām amnhī jarē. No akōt mē pa ho mē pa xwŷnhjaja na htem àmnhīx apkur o pa kamā kām amnhī jarēnh o pa. Kwa mo na htem mē urāk nē tōhā apkur kēt rāhā kām amnhī jarēnh kēt nē? Anē.

¹⁹ Hāmri nhūm Jejus mē kām:

—Tk. Mo kaxyw kot mē ā amnhī nhīpēx anē? Mē hkaprī hkēt kēnā. Mē kot ixkōt pa ho pa hā amnhī pumunh jakamā na htem hkīnh nē pa. Kormā ixte mē hkōt ixpa kēnā kot kēt mē Tirtūm mā kapēr kaxyw nē ho apkur kēt kamā kām amnhī jarē. Xà na htem hkrāmnhwŷ hā hkīnh kaxyw hā akuprō nē hkaprī nē apkur kēt nē mŷr o hkrī? Nà na htem hā akuprō nē hkīnh nē apkur rūnh nē. Ja pyrā nē na hte ixkōt mē pa ho mē pa xwŷnhjaja ixkōt kormā àmnhīx

hkĩnh nē apkati mē apkur kām kām amnhĩ jarēnh o pa. ²⁰ Nom koja mē kām ixkurē xwýnhjaja nhýrmā tanhmā ixto hāmri nhũm mē rĩ kormā hkaprĩ htýx kām ho apkur kēt rāhā Tĩrtũm mā amnhĩ jarē. Anē.

Nhũm pre ā Jejus mē kām hkõt ri mē pa ho mē pa xwýnhjē jarēnh anē hāmri nē axte mē kām kapēr nē mē kām:

²¹⁻²² —Mē kot amnhĩ tomnuj xwýnhjaja mē kot amnhĩ nhĩpēx tũm o amnhĩ pyrāk jakamā na htem mē kot amnhĩ nhĩpēx nyw kaga. Tā ixte amnhĩ nhĩpēx nywja te kot mē ate amnhĩ nhĩpēx tũm pyrāk kēt jakamā na ka htem inhma nē ām inhma. Kwa mē inhma nē mē ate amnhĩ nhĩpēx tũm gryk ā ixkaga hkēt nē. Anē.

Jejus kēp arĩgromnu hpām ā kot amnhĩ jarēnh

Matēwre 12.1-8; Rukre 6.1-5

²³ Tā nhũm mē ixpē Ijaew nhõ arĩgromnu pē sap kato nhũm Jejus mē hkõt mē pa ho mē pa xwýnhjaja ma nhýhým mō. Ma mē hpur kahti hkõt nhýhým mō nhũm hkõt mē pa ho mē pa xwýnhjaja ra kām prām nē. Hāmri nē prām xāj purta kamā amnhĩm mēmo hy te kot harōj pyrāk xwýnhnta kwý rē nē ma Jejus kõt hkanhar o mō. Mē ixpē Ijaewjaja na pa htem axpēn pur kām ixpa nē ā amnhĩ nhĩpēx anē. ²⁴ Hāmri nhũm Parijew nhõ xwýnhjaja mē hkõt mra nē tee ri ja hā mē omu nē Jejus wýr mra nē mē hā kām akir nē kām:

—Kwa jarāhā sap tā akõt mē pa ho mē pa xwýnhjaja mēmo hy hkwy rē nē akõt hkanhar o pa. Tĩrtũm kapēr ā kagā htũm kot mē panhõ arĩgromnu hā mē pahte mēmoj nhĩkēnh nē mē pahkurē kēnā. Kwa mē kām anē kē mē ā amnhĩ nhĩpēx anhýr kēt nē. Anē.

²⁵⁻²⁶ Hāmri nhũm Jejus mē kuma nē hprĩ hā mē kām Tĩrtũm kapēr tũm jarē nē mē kām:

—Kwa xān ka mē kormā Tĩrtũm kapēr ā kagā htũm kamā pahi Tawi kot tanhmā amnhĩ nhĩpēx to kamā harēnh nē mar kēt nē? Kormā Apiatar kēp patre maati ri na pre Tawi hkõt ri mē pa xwýnhjē mē prām xāj Tĩrtũm mā amnhĩ jarēnh xā hā ixkre hwýr agjē. Hāmri nhũm Apiatar mē kām prām týx ā mē omu nē mē kamā ukaprĩ nē mē kām mēmoj gō. Mē kot Tĩrtũm noo mā pāwti jaxwýr xwýnhnta nhũm mē kām kugō nhũm mē kuku. Tĩrtũm kapēr ā kagā htũm kot ja nē mē kurē htā nhũm mē kām prām týx ā mē omu nē mē kamā ukaprĩ xāj mē kām kugō. Patre pix kot ja hkur kaxyw tā nhũm mē kām kugō nhũm mē kuku. Tā nom nhũm Tĩrtũm ja hā mē omu nhũm ja kēp omnuj kēt nē. Patre kot mē kamā ukaprĩ nē mē kām õr nhũm ja hā omu nhũm ja kām mex nē. Anē.

Hāmri nē mē kām:

²⁷ —Na pre Tĩrtũm panhĩ kumrēx o kato nē kormā mē hkõkõt nē Tĩrtũm mā hamaxpēr o hkrĩ kaxyw arĩgromnu ho kato. No na pre arĩgromnu kumrēx o kato nē hpānhā kaxyw panhĩ ho kator kēt nē. ²⁸ Tā pa na pre Tĩrtũm mē akaxyw ixām nē mē awýr inhmē. Jakamā papxpix na pa hte arĩgromnu hā tanhmā mē kot amnhĩ nhĩpēx to hā mē kām karõ ho ri ixpa. Jakamā kwār mē māmri mēmojta rē nē ixkõt hkanhar o mō. Anē.

3

Jejus kot akupým ùkra grà xwýnh o mex ā harēnh

Matēwre 12.9-14; Rukre 6.6-11

¹ Tā nhũm mē ixpē Ijaewjē nhõ arĩgromnu pē sapja axte kato. Hāmri nhũm Jejus Tĩrtũm kapēr o mē ahkre xā hā ixkreja wýr tē nē axā nē kamā Tĩrtũm

kapēr o mē ahkre ho nhỹ. Nhũm mēhō my ĩhkra grà xwỳnhja mē ĩhkō hā mar o nhỹ. ² Nhũm Parijew nhō xwỳnhjaja kām mē hkrāhtũmjē mā Jejus o kapēr prām jakamā htānopxar o kuhē nē axpēn mā:

—E kwa pu mē jar pakuhē nē kot tanhmā amnhĩ nhĩpēx to hā omu. Xà koja jarāhā ĩhkra grà xwỳnh mũj o mex nà? Jarāhā arĩgromnu kēnā kot kēt kām ĩhkra ho mex. Kojā ho anē nē ra Tĩrtũm kapēr tũm nhĩrōp xa. E pu mē xa nē hā omu. Anē.

³ Hāmri nhũm Jejus ĩhkra grà xwỳnhnta pumu nē kām:

—Pa? E kànhmā xa nē amnē ixwỳr tē. Anē.

Hāmri nhũm kànhmā xa nē hwỳr tē nē mē piitā mē noo mā xa. ⁴ Hāmri nhũm Jejus mē kot omunh o hkrĩ xwỳnhjē hwỳr rĩt nē arĩgromnu hā tanhmā mē kot amnhĩ nhĩpēx to hā mē hkukja nē mē kām:

—E mē inhma. Tanhmā na htem arĩgromnu hā axpēn nhĩpēx to wehe? Xà kot ka mē arĩgromnu hā axà htỳx nē amex prām xàj ma mēhō hwỳr amnhĩ to tē nhũm apumu nē apkatim arĩgro mex jamār pē akane hkēt ka ty nhũm ja amā mex nē? Rỳ nhũm apumu nē tanhmā atomnuj to nē akupỳm amnhĩ nē ajano nhũm ja amā mex nē? Nà koja ā anhĩpēx anē nhũm ja amā mex kēt nē. E mē inhmā mēmoj jarē. Tanhmā na pre finat Mojesja Tĩrtũm nhỹ hā arĩgromnu hā mē pahte axpēn nhĩpēx ā mē pamā karō hto? Xà kot puj mē hā axpēn kām paxukapĩ rỳ hā mē pamā axpēn kurē ho papa? Xà kot puj mē hā mēmoj punuj pē mē utà rỳ kot puj mē ām arĩgro mex pix ā mē utār kaxyw arĩgro mex jamā? E mē atō inhmā ja jarē. Anē.

Ra kot hprĩ hā mē hamaxpēr ā mē omunh mex nē ā hēx rom mē hkukjēr anē. Nom nhũm mēhō tanhmā kutā kām nē hkēt nē. Mē ām piitā akryk mar pē omunh o hkrĩ. Mē kot tanhmā kām nē nhũm ta pānhā tanhmā mē kām nē pymaj nhũm mē tee ri kām tanhmā nē hprām nom akryk mar o hkrĩ. ⁵ Hāmri nhũm Jejus tee ri mē ukapĩ hkēt ā mē omu nē hkapĩ nē mē kamā gryk nē. Hāmri nē ĩhkra grà xwỳnhja mā kām:

—Tk. Mē kot tanhmā inhmā ujarēnh tore hā. E anhĩhkra katāt. Anē.

Hāmri nhũm ĩhkra katāt nē akupỳm mex kurē kumrēx. ⁶ Hāmri nhũm Parijew nhō xwỳnhjaja tee ri ā Jejus kapēr anhỹrja ā kuma nē kot sap ā akupỳm myta o mex ā omu nē kamā gryk tỳx nē. Nē hapōj nē ma pahĩ Erox kōt mē pa xwỳnhjē hwỳr mra nē mē kām harē nē tanhmā hā axpēn kukjēr to nē axpēn mā:

—Kwa tanhmā kot puj mē ho? Na ā kapēr anhỹrja o mē pahto kapēr punuj nē. Te hkinhā mē papamjaja mē kamā paxukapĩ hkēt pyrāk ā mē pajarē. Kojā mē pahkwỳjaja kuma hāmri nē mē pahte amnhĩ nhĩpēx kaga nē amnhĩ kaxyw hkōt pix mā hamaxpēr o pa. Ja pymaj kwa tanhmā kot puj mē ho? Anē.

Mē ohtō nē kot Jejus kapēr mar kaxyw hwỳr mrar ā mē harēnh

Matēwre 4.23-25; Rukre 6.17-19

⁷⁻⁸ Tā nhũm Jejus mē hkōt mē pa ho mē pa xwỳnhjē mērohā ma akupỳm gō rax wỳr mō nhũm mē ohtō nē omu nē ma hkōt mra. Pyka pē Garirej mē Jutej wa kurũm nē krĩ pē Jerujarē rũm nē pyka pē Itumēj rũm nē pyhti pē Jotāw nhĩkjē hā krĩ hkwy rũm nē krĩ hkwy pē Xir mē Sitō wa pu hā krĩ hkwy rũm ohtō nē ma hwỳr mra. Na prem ra harēnh ma nē nhỹhỹm mōr ā omu nē axpēn mā harēnh o:

—E kwa tokyj pu mē ma hwỳr mē ā xwỳnhjē o mō kē akupỳm mē ho mex. Anē.

Hāmri nē hwÿr mē o mra nē hā pikuprōnh rax nē. ⁹⁻¹⁰ Hāmri nhūm Jejus akupÿm mē à xwÿnhjê ho mex. Gô mÿri xa nē tanhmā mē ho mex to. Jakamā nhūm mē axte ohtō nē hwÿr mra nē piitā kot htok nē akupÿm mex kaxyw hwÿr axpēn nhīgā. Hāmri nhūm tee ri amnhī wÿr mē omu nē hkôt mē pa ho mē pa xwÿnhjê mā:

—Kwa mē ma mra nē amnē kanōre jēt mÿj kjēnh o tē nē jar inhmā anhō. Kē mē ixtā axpēn nhīgānh o ijanēnh japēr pa hwÿr axā nē amÿm mē ho hpÿnh nē akupÿm mē ho mex. Anē.

Hāmri nhūm mē kuma nē ma mra nē kām ja o tē nē kunhō. ¹¹ Na pre mēkarōmnuti hkwyja mē hkwyjê hwÿr agjê. Jakamā nhūm mē Jejus pumu nē mēkarōmnuti nhÿ hā kēp Tirtūm Kra hā omunh kurē kumrēx. Hāmri nē hā hpijaām kaxyw kutā hkōnkrā ho hkrī nē mēkarōmnuti nhÿ hā kām kapēr nē kām:

—Kwa apē Tirtūm Kra na ka. Anē.

¹² Hāmri nhūm tee ri amnhī tā mē kuma. Kām mēkarōmnuti ā kot harēnh anhÿr prām kēt nē. Ām mē piitā mē kot kapēr mar nē kot amnhī nhīpēx ā omunh pē kēp Tirtūm Kra hā omunhja na kām hprām. Jakamā nhūm mēkarōmnuti ā harēnh anē nhūm ja nē mē kām kapēr nē mē kām:

—Tk kwa nā kēr ka mē tanhmā ijarēnh to hkēt nē. Anē.

Jejus kot amnhī kaxyw mē kēp 12 rēnh ā harēnh

Matēwre 10.1-4; Rukre 6.12-16

¹³ Tā nhūm Jejus hkôt mē pa ho mē pa xwÿnh kwÿjê mā kām:

—E pu mē ma mō nē krāhakÿx mÿj ā api. Anē.

Hāmri nē mē ma hwÿr mō nē hā api ¹⁴ nhūm Jejus amnhī kaxyw mē ho 12 nē mē kurē. Mē kot ma ŷ hā Tirtūm kapēr o mē ahkre ¹⁵ nē ŷ hā mē nē mēkarōmnuti janor o pa kaxyw. ¹⁶ ā mē hixi kot anhÿr.

Na pre ja kēp Simāw no nhūm Jejus hpānhā hā hixi hō mē nhūm hpānhā māānēn kēp Pētre.

¹⁷ Nē hkôt Jepetew kra Xiakre mē htō Juāwja wa kuta.

Hāmri nē kot Simāw nhīpēx pyrā nē wa hā hixi hō mē nhūm wa hpānhā māānēn kēp Poanes. Wa kot amnhī prēprēk jakamā nhūm ā wa hā hixi mēnh anē.

¹⁸ Nē hō pē Andreja ta.

Nē hkôt Andre htō Firiptija ta.

Nē hkôt Patoromewja ta.

Nē hkôt Matēwreja ta.

Nē hkôt Tomasja ta.

Nē hkôt Arpēw kra Xiakreja ta.

Nē hkôt Tatewja ta.

Nē hkôt Simāw ōja ta.

Simāwja na pre kām mē ixpē Ijaewjê nhō pika pē Ijaew Kīnh tÿx nē. Jakamā na pre kām nhām pika hō nhō pahī kot mē ho amnhīptār prām kēt nē pa.

¹⁹ Nē hkôt Jut Kariotja ta.

Kormā kot mē kām Jejus kurē xwÿnhjê nhīhkram ōr mā nhūm Jejus kot amnhī kukamā omunh mex tā mē hkôt amnhī kaxyw kuta.

Ā mē kot ŷ hā mē ahkre o pa kaxyw mē rēnh xwÿnhjê nhīxi kot anhÿr.

Jejus mē mēkarōmnuti wa harēnh

Matēwre 12.22-32; Rukre 11.14-23, 12.10; Juāw 10.19-21

²⁰ Hāmri nhūm Jejus hkôt mē pa ho mē pa xwýnh kwýjê rênh pa nē ma amnhî kôt mēhō nhōrkwý hwýr mē o mō. Na prem apkur kêt ry rax nē ra kām prām tỳx nē nhūm ma mē apkur kaxyw amnhî kôt mē o mō. Hāmri nhūm axte mē à xwýnhjaja mē omu nē Jejus wýr pikuprōnh rax nhūm mē tokyx apkur kêt nē. ²¹ Hāmri nhūm Jejus katorxā nē htōjaja tee ri mē apkur kêt ā mē harēnh ma nē axpēn mā:

—Kwa mǎn ām ra tanhmā hkrā amnhî to nà? Hā na mē kot omunh kaxyw hā hpikuprōnh rax jakamā nhūm kormā apkur kêt nē. E tokyx pu mē ma hwýr mra nē omu nē mē kēp utā nē akupýn amnhî kôt o mō. Anē.

²² Rôm nhūm Tirtūm kapēr tūm o mē ahkre xwýnhjaja Jerujarē rūm Jejus wýr mōn pōj. Hāmri nē tanhmā ho kapēr punuj to. Kēp mēkarōmnuti hkwy hā hkamnhîx jakamā harēnh o:

—Tk pēr hinhu nhîkōōti nhý hā na hte mē nē amnhî kwýjê japōx o pa. Anē.

Hinhu nhîkōōti nhîxi hō pé Satanasti nhūm prem ý hā Jejus kot amnhî nhîpēx o pa hā hkamnhîx. ²³ Hāmri nhūm amnhî tā mē omu nē amnhî wýr mē kām hpa ho apē nē mē kām amnhî jarē. Nom amnhî tā kuxi nē mē kām mēmoj jarē nē mē kām:

—Kwa mē inhma mē ate xipē Satanasti hkwy hā ixkamnhîx xwýnhjaja. Xà na hte Satanasti mē nē amnhî kwýjê janor o pa? Nà na hte ā amnhî nhîpēx anhýr kêt nē. ²⁴ Na hte pika nhō xwýnhjaja axpēn kutā amnhî xunhwý nē xpu hāmri nē angrā nē ma ahpýnhā ri pa nē amnhî krā hkôt ri tanhmā amnhî to ho ri pa. Jakamā nhūm mē ō pahija mē hamār o pa hkêt nē. ²⁵ Nē krī nhō xwýnhjaja haxwýja. Mē kot axpēn to hkwy xwýnhjaja koja mēmoj tā axpēn kām gryk nē axpēn kutā amnhî xunhwý hāmri nē angrā nē ahpýnhā pa hāmri nhūm mē ō pahi tee ri kām mē hamār o pa hprām. Mo hkwyjaja kot kêt ri mē hamār o pa? Nom tām kot amnhî nē mē hanoore hā. Mē tāmjaja na prem axpēn kām gryk nē angrā nē ahpýnhā pa. ²⁶ Tā ja pyrā nē ixte Satanasti nhý hā tanhmā amnhî nhîpēx to ho ixpa ronhýx pa ri mē kurūm amnhî kwýjê japōx o ri ixpa hkêt nē. Mēkarōmnutijaja kēp Satanasti hkwy kēnā. Koja Satanasti ixte mē kurūm mē hapōx kaxyw tanhmā inhma nē hkêt nē. ²⁷ āhpumunh tỳx jakamā na hte mē kot hkôt amnhî xunhwýr xwýnhjē pumunh tỳx o pa nhūm mēhō tee ri kēp mē utār kaxyw. Tā ixāhpumunh tỳx o ixte hakrenh jakamā ixte kēp mē utārja inhma tanhmā kute hkêt. Na pa hte kēp mē utā nhūm mē hpānhā ixkôt amnhî nhîpēx o pa nhūm Satanasti tee ri mē hā xipumunh o pa kaprý.

²⁸ —Ām hāmri na pa mē amā ixkapēr. Kot kaj mē tanhmā amnhî tomnuj to ho apa. Nē amnhî tomnuj tỳx kumrēx rāhā ho apa. Rý tanhmā akapēr punuj to ho apa. Rý tanhmā Tirtūm o akapēr punuj to ho apa. Tā tee ri ja hā amnhî pumu nē akaprī nē ā ate amnhî nhîpēx anhýrja kaga nē Tirtūm kôt amnhî xunhwý. Hāmri nhūm amnhî tā mē apumu nē amnhî katut kôt mē ate amnhî tomnuj nē mē akapēr punuj rēnh pa nē axte kām hamaxpēr kêt nē. Koja ho hapēx par kumrēx. ²⁹ Nom koja Tirtūm Karō xatā mē amā ixto amnhîrīt tā ka mē ama nē ām ama nē te kēp amnhî jamak pro pyrāk o amnhî nhîpēx. Jao Tirtūm Karō hā apijaām kêt ā amnhî to amnhîrīt. Ja mýrapē koja Tirtūm nhýrmā amnhî xwar te mē apē amnhî jamak pro pyrāk o mē anhîpēx ka mē tee ri kām amnhî kaprī kaprý. Hāmri nē mē kot amnhî xā htỳx kamā hamak o pa htūm xā wýr ma apa nē kamā apa rāhā apa ho apa. Anē.

³⁰ Mē kot Satanasti nhý hā mē nē mēkarōmnuti janor o pa hā hkamnhîx jakamā nhūm pre Jejus ā mē kām kapēr anē.

*Jejus katorxà mē htōjē jarēnh**Matēwre 12.46-50; Rukre 8.19-21; määnēn Eprēw 2.11-12*

³¹ Rôm nhũm Jejus katorxà mē htōjaja hwÿr mra no âm kormā hwÿr gjêx kêt nē. Mē kot hā htu rax jakamā nhũm mē tee ri hwÿr gjêx kaxyw kormā kapôt ā kuhê. Hāmri nē mē kot mar o kuhê xwÿnhjê hō mā kapēr nē kām:

—Kwa ma tēn Jejus mā mē ijarē kē mē ixwÿr kato. Anē.

³² Rôm nhũm ixkre kamā mē hkrī xwÿnhjaja mē omu nē Jejus mā mē harē nē kām:

—Kwa Pahihti. Ota akatorxà mē atōjaja awÿr mra nē pōj nē tee ri awÿr gjêx mā nē kormā kapôt ā kuhê nē atā karō. Anē.

³³⁻³⁵ Hāmri nhũm mē kuma nē mē kām:

—Tōe pa ixkato nē mē omu. Inhmā mē hapêê. Nom kot kaj mē atō Tirtũm kapēr ma nē hkôt amnhī xām nē hkôt amnhī nhīpêx. Hā kot kaj te apē ixtō rÿ ixkatorxà kot amnhī nhīpêx pyrāk o pu mē axpēn nhīpêx. Pa te inhmā mē hapê pyrā nē inhmā mē ajapê nē. Anē.

4*Mēmo hy hkre xwÿnh jarēnh**Matēwre 13.1-9; Rukre 8.4-8*

¹ Tā nhũm Jejus axte gō jakàx ā mē ahkre ho nhÿ. Hāmri nhũm mē axte hā htu rax jakamā nhũm tee ri mē omu hāmri nē pàr krem axà nē gōx kām amÿm mē ahkre ho nhÿ. Nhũm mē piitā kÿxpê omunh nē mar mex o kuhê. ² Hāmri nhũm mē ahkre ho nhÿ. Nom mē ujarēnh pix kām mē ahkre. Mē kot Tirtũm kapēr mar nē tanhmā hkôt amnhī nhīpêx to ho paja nhũm hā kuxi nē mē kām hā ujarēnh o nhÿ nē mē kām:

³ —E mē inhma. Koja mēhō ma pur mā mō nē pur kām mēmo hy ho ukapēr o pa nom nhũm hy piitā amex kām rôrōk kêt nē. Koja ahpÿnhā rôrōk. ⁴ Koja hkwy aptÿx kām rôrōk nhũm kuwēnhre omu nē hwÿr mra nē hkrēr pa. ⁵⁻⁶ Nē koja kēn kām hkwy rôrōk hāmri nē higrôt kutā nojarēt nē higrôt pa. Nom nhũm kamā aptÿx nē kamā kēp pika hkryre jakamā nhũm higrôt nhũm hā myt ahpa nē arīgro htÿx mē nhũm grà pa. Harē hkryre jakamā grà pa. ⁷ Nē koja hkwy mrōnhī kamā rôrōk nē higrôt tā no nhũm utĵja kēp amÿtā nhũm ô hkēt nē.

⁸ —No koja hirā kamā pika mex kām hkwy rôrōk. Hāmri nē hirā kamā rôrōk jakamā higrôt mex nē piitā ô rax nē. Kamā ô hkwy kēp 30 nē kamā hkwy kēp 60 nē kamā hkwy kēp 100. Á mē ujarēnh kot anhÿr. ⁹ Kwa mē ama nē kām ajamaxpēr tÿx rāhā ho ri apa. Anē.

*Jejus kot hprī hā mēmo hy jarēnh**Matēwre 13.10-23; Rukre 8.9-15*

¹⁰ Hāmri nhũm mē Jejus xujarēnh mar pa nē anhrà nē ma akupÿm mra nhũm hkôt mē pa ho pa xwÿnh pê 12 mē hkwyjaja pix Jejus ri arīk. Hāmri nē ujarēnhnta ā hukĵja nē kām:

—Kwa mon ka hte ā mē kām axujarēnh anē Pahihti? Na pa mē ixprī hā amar mex kêt nē. Anē.

¹¹⁻¹² Hāmri nhũm mē kām:

—Nà kot paj ixprī hā mē amā harē. Tirtũm kām mē ate aprī hā mar prām jakamā kot paj ixprī hā tanhmā mē amā harēnh to. Nà mē kot amnhī tomnu kaga nhũm Tirtũm kot ja hā mē omunh xà hkôt mē ho hkra hā harēnhja na pa

hte mē kām harē. No mūjjaja mē akīnhā mē kām mar prām kēt jakamā na pa hte mē kām mēmoj tā haxwý nē awjarē nhūm mē ām ixujarēnh pix ma.

Na htem kuma nē ām kuma nē htýx ri hā pa. No kēp apu mē kām hprī hā mar prām ronhýx mē ra hprī hā kuma nē Tirtūm kōt amnhī xunhwý nhūm amnhī tā mē omu nē mē kot amnhī tomnuj o hapēx. Nom mē kām mar prām kēt. Anē.

¹³ Tā mē ate aprī hā ixujarēnhja mar mex kēt jakamā tanhmā kot kaj mē amnhī to nē ixujarēnh piitā ama? E kot paj ixprī hā mē amā mēmo hyta jarē ka mē inhma.

¹⁴ —Nā mēmo hyta te kēp Tirtūm kapēr pyrāk. Nē ahpýnhā rōrōk xā hā pikata te kēp ahpýnhā mē kot Tirtūm kapēr mar xwýnhjē kot mar nē ahpýnhā tanhmā amnhī nhīpēx to pyrāk. ¹⁵ Jakamā mē kot mar xwýnh kwýjaja hte kot aptýx kām hkwy rōrōk nhūm kuwēnh kot hwýr mrar nē hkrēr par xwýnhnta pyrāk. Jakamā na htem Tirtūm kapēr ma nom nhūm Satanasti te kuwēnh kot hy hkrēr parta pyrāk o mē hipēx. Nē mē kot amnhī kaxyw hkōt hamaxpēr nē hkōt amnhī xunhwýr pymaj tanhmā nē mē hkrā hto. Jakamā nhūm mē Tirtūm kapēr ma nom ho hamakētkati tokyx anē nē axte kām hamaxpēr kēt nē.

¹⁶ —Nē mē kot mar xwýnh kwýjaja te kot kēnre kamā hkwy rōrōk nē higrōt nhūm te hā myt apha nhūm grā par tokyx anhýr xwýnhnta pyrāk. Na htem Tirtūm kapēr ma nē hkīnh nē. Nē kām mar prām nē. Te hy higrōt tokyx anhýrta pyrāk. ¹⁷ Tā nhūm mēhō tē nē Tirtūm nē tanhmā mē kām kapēr to nhūm mē kuma nē hkaga. Rý nhūm mē Tirtūm ā tanhmā mē homnuj to nhūm mē tee ri amnhī tā mē omu nē hkaga. Te mēmo hy higrōt nē grā par tokyx anhýrta pyrāk.

¹⁸ —Nē mē kot mar xwýnh kwýjaja te kot mrōnhī kamā hkwy rōrōk nē higrōt nhūm mrōnhī kot kēp āmnār xwýnhnta pyrāk. Nē mē kām Tirtūm kapēr mar prām nē. ¹⁹ Nom määnēn kām hikukrēx rax nē hikāxpore rax prām jakamā ām ja pix kukamā hamaxpēr o ri pa. Jao ra gryk ā axte Tirtūm kapēr mā hamaxpēr nē hkōt amnhī nhīpēx kēt nē. Te mrōnhī kot higrōt pē āmnār nhūm ô hkēeta pyrāk.

²⁰ —No mē kot mar xwýnh kwýjaja te hirā kamā pika mex kām hy hkwy rōrōk nē higrōt nē ô raxta pyrāk. Na htem ixkapēr ma nē amnhī krā him hagjēnh týx nē. Nē ixkōt ri amnhī nhīpēx mex rāhā ho ri pa. Te mēmo hy hkre kamā ô hkwyja kēp 30 nē kamā kēp 60 nē kamā kēp 100ta pyrā nē Tirtūm kapēr kōt amnhī nhīpēx mex rāhā ho pa. E ā ixujarēnhja kot anhýr. Anē.

Kanē hpimxur ā harēnh

Rukre 8.16-18, 8.24-25; Matēwre 13.10-15, 25.14-30

²¹ Nhūm Jejus arī hkōt mē pa ho pa xwýnhjē jahkre nē mē kām:

—Xā na htem kanē hpōk nē poti ho hpro rý hitom kām par krak ri unhwý? Nā na htem hpōk hāmri nē kýx pē mēmoj nhīmōk ā unhwý. ²² Ja pyrā nē mē piitā kot hkwyjē pē tanhmā hamaxpēr punuj to ho hpimxur prām tā tee ri kot ho hpimxur prām kaprý. Kojā nhýrmā mē hamaxpēr piitā amnhī to amnhīrit pa. Nē mēmoj piitā ra hpimxur mex tā kojā nhýrmā amnhī to amnhīrit pa. Te mē kot kanē hpōk nē kýx pē unhwýr nhūm amnhīrit mex pyrāk. Ja pyrā nē na pa hte Tirtūm kapēr o ri xpimxur o ixpa hkēt nē. Na pa hte ixprī hā mē amā harēnh mex o ixpa. ²³ Kwa mē ixujarēnhja ma nē kām ajamaxpēr týx rāhā ho ri apa. Anē.

Nhūm pre ā Jejus mē kām kapēr anē. ²⁴ Hāmri nē mē kām:

—Nē kēr ka mē axpēn kām axukaprī ho ri tanhmā axpēn to mex to ho ri apa. Kēr kē Tirtūm ja hā mē apumu nē mē apyrà nē mē akamā ukaprī pē mē ato mex o pa. ²⁵ Koja mēhō inhmā tanhmā amnhī nhīpēx mex to pa ja hā omu nē kot inhmā àpēnh mexta pānhā ho mex nē. No koja inhmā àpēnh mex kēt pa ja hā omu nē hā ho mex kēt nē.

—Nē koja mēhō kām ixkapēr mar prām nom kormā hprī hā mar mex kēt tā arī mar o pa nē gaa nē mar tỳx o mō. No koja kuma nē âm kuma hāmri nē gaa nē hā no hkēt. Anē.

Pur kām mēmo hy hkre xwýnh jarēnh

Matêwre 13.24-30

²⁶ Nhūm Jejus arī hkôt mē pa ho mē pa xwýnhjē jahkre ho nhý nē mē kām:

—E pa mē amā tanhmā mē kot ixkapēr mar tỳx xwýnhjē jarēnh to ka mē inhma. Koja mēhō ixkapēr mar tỳx nē ra hkôt ri amnhī nhīpēx o pa. Hāmri nē hamaxpēr nyw o hamaxpēr o pa nē amnhī nhīpēx nyw o amnhī nhīpēx o pa. Te mē hpur kām mēhō kot mēmo hy hkre xwýnh kot amnhī nhīpēx pyrāk. Na hte hyja kre ho pa. ²⁷ Hāmri nē hkre hpa nē kamāt mē ôt o hikwý nē arīgro mē mēmoj tā àpēnh o pa. Rāhā nhūm mēmo hyja arī hikwý ho hikwý hkēt nē. Koja amnhī nhīpēx ô ho amnhī nhīpēx nē higrôt kato nē hprék. Kre xwýnh kot tanhmā kot amnhī nhīpēx to hā omunh kēt tā nhūm kām hprék.

²⁸ —Na hte hpōm hapōx o pa nē higrôt o pyka kahte. Hāmri nē hprék nē hô axpôt nē gaa nē hpānhā ô. Hāmri nē hkamrék pa nē xa. ²⁹ Hāmri nē mē kot hikēnh mā mex nē nhūm kot hkre xwýnhhta omu nē amnhīm hamýnh pa. Tā mē kot ixkapēr mar mex xwýnhjaja te mēmo hy ra higrôt kator nē hprék nē hô pipôt nē ô xwýnhhta pyrāk. Nē urāk nē amnhī nhīpēx ô ho amnhī nhīpēx o pa. Anē.

Jejus te kot mēmo hy pyrāk ā kot amnhī jarēnh

Matêwre 13.31-32; Rukre 13.18-19

³⁰⁻³² Nhūm Jejus arī mē ahkre ho nhý nē mē kām:

—Tirtūm kot mē awýr ixte mē ato amnhīptār kaxyw inhmēnh ā ijarēnhja. Te ixte mēmo hy pixire pyrāk. Koja mēhō mēmo hy hô pixire nē hkre nhūm ra higrôt. Nē gaa nē hprék. Hāmri nē hpa anhrà nhūm kuwēnhre hwýr mra nē hōptī kamā amnhīm haē nhīpēx. Mēmo hyta grire htā nhūm hkre nhūm higrôt nē ā amnhī nhīpēx anē. Tā kot paj nhýrmā urà nē ixpyxi htā kot paj pika piitā hkôt mē ho amnhīptā nē mē omunh mex rāhā ho ri ixpa. Anē.

Ā na pre Jejusja hkôt mē pa ho mē pa xwýnhjē mā amnhī tā kuxi nē ujarēnh anē. ³³ Mē kām ujarēnh kām mē ahkre ho pa. Te nhām mēmoj jarēnh pyrā nē amnhī tā haxwý nē harē. Mē kot tanhmā mar to hā mē omunh xa hkôt tanhmā mē kām ujarēnh to. ³⁴ Na pre âm ujarēnh pix kām mē kām kapēr mar prām kēt xwýnhjē mā amnhī jarēnh rāhā ho pa. No mē kot hkôt pa ho pa xwýnhjē mā nhūm hprī hā ujarēnh jarē nhūm mēhprī hā mar mex nē.

Jejus kot kōk o pīnhkrēnh ā harēnh

Matêwre 8.23-27; Rukre 8.22-25

³⁵ Tā nhūm amýkry nhūm Jejus arī pàr kre kamā nhý. Hāmri nē hkôt mē pa ho mē pa xwýnhjē mā kām: “E pu mē ma xarmā mō.” ³⁶ Anē hāmri nē mē kot mar o hkrī xwýnhjē re nē pàr mā agjē nē ma xarmā mō. Garirej rùm kato nē ma xarmā pika hô hwýr mō. Nhūm pàr kwýja ma mē hkôt mō. ³⁷⁻³⁸ Nhūm Jejus ra ôt xwa nē tē nē pàr kre kamā hkrā japar xa hā hkrā xi nē ra ôt tỳx nē nō. Nhūm kōk àpēr tỳx nē nhūm gō kànhmā harī nē axpēn tak. Ra ri xatā

axpĕn tak nĕ pàr kre kamā axkapī nhūm ra mĕ kĕp àr o mō. Hāmri nhūm mĕ tee ri amnhī nhīpĕx nĕ tee ri amnhī kukamā hamaxpĕr nĕ Jejus wŷr hprōt nĕ kumra nĕ kām:

—Kwa kànhmā nhŷ Pahihtī. Kot puj mĕ jarāhā pahtyk pa. Anĕ.

³⁹ Hāmri nhūm hkrākato nĕ kànhmā nhŷ nĕ kōk mĕ gōta pumu nĕ wa kām kapĕr o:

—E kwa wa anhīkrĕ. Anĕ.

Hāmri nhūm gō mĕ kōk hpinkrĕnh kurĕ kumrĕx.

⁴⁰ Hāmri nhūm Jejus hkōt mĕ pa ho mĕ pa xwŷnhjĕ mā kām:

—Hĕxta waa nĕ. Kormā mĕ ate amnhī kaxyw Tīrtūm mĕ wa inhmā ajamaxpĕr tŷx kĕt. Hā na ka mĕ ri amā ma nĕ tee ri amnhī kukamā ajamaxpĕr. Anĕ.

⁴¹ Hāmri nhūm mĕ amnhī jaĕr pĕ ā kot amnhī nhīpĕx anhŷr ā omu nĕ tee ri axpĕn pumunh pĕ omunh o kuhĕ. Hāmri nĕ axpĕn mā:

—Kokŷŷ. Jejus kĕp mĕ panhīō hkĕt. Mĕ pahtō kot pu te kot amnhī nhīpĕx pyrā nĕ kōk mā pakapĕr nhūm anhīkrĕ? Nā mĕ pakurom àhpumunh tŷx o àhpumunh tŷx. Anĕ.

5

Jejus kot mĕhō nĕ mĕkarōmnuti janor ā jarĕnh

Matĕwre 8.28-33; Rukre 8.26-34

¹ Tā nhūm Jejus mĕ hkōt mĕ pa ho mĕ pa xwŷnhjĕ mĕrohā mō nĕ xarmā Geras wŷr pōj. ²⁻⁴ Hāmri nĕ pàr rūm hapōj nhūm mĕhō myja Jejus pumu nĕ hwŷr tĕ. Mĕkarōmnuti kot hwŷr àr nhūm ŷ hā oprĕ htŷx kumrĕx. Hāmri nĕ hkwyjĕ hkàx ā kapōt ā mĕ hā pika kamā ri hkĕnh nĕ pa ho pa. Nhūm mĕ xatā kàx o hte hpre nĕ hpa hpre htā no nhūm kurĕ. ⁵ Nĕ kamàt kām nĕ arīgro hā àmra htŷx o mrar pĕ kĕn o amnhī tak o mra. Mĕ hā pyka kamā nĕ kapōt ā hixĕt ā amnhī tak tŷx rāhā ho mra. ⁶ Tā amŷm Jejus pumu nĕ hwŷr hprōt nĕ hā hpjjaam kaxyw kutā hkōn krā ho tĕm nĕ hparpĕ nhŷ. ⁷⁻⁸ Hāmri nhūm omu nĕ nĕ mĕkarōmnuti mā kapĕr nĕ kām:

—Kwa kurūm akato nĕ ma tĕ. Anĕ.

Hāmri nhūm kuma nĕ tanhmā myta o nhūm tām mĕkarōmnuti nhŷ hā Jejus mā kapĕr nĕ àmra kamā kām:

—Pa Tīrtūm Kra Jejus? Mo kaxyw na ka ixwŷr tĕ? Kwa tanhmā ixto hkĕt nĕ nà?

⁹⁻¹⁰ Anĕ nhūm kām:

—Tanhmā na anhīxi te? Anĕ.

Nhūm kām:

—Nā ixpĕ Mĕohtōhti. Mĕkarōmnuti ohtō nĕ kot ixwŷr gjĕx jakamā na htem ā inhīxi jarĕnh anĕ. Kwa nĕ mĕ ijanor kĕt nĕ nà? Anĕ.

¹¹⁻¹² Hāmri nhūm mĕkarōmnuti tām amnhī to kuwŷ nĕ kām:

—Kwa kĕr ka jahti nĕ mĕ ijapōx japĕr nĕ mĕ kot amnhī xà htŷx kamā hamak o mĕ pa htūm xàta wŷr mĕ ixrĕnh kĕt nĕ. Hagrō hkwy mŷj wŷr mām mĕ ixrĕ pa mĕ hpānhā hwŷr mām hagiĕ? Anĕ.

¹³ Hāmri nhūm mĕ kām:

—Tōe. Mĕ tām hwŷr mra. Anĕ.

Hāmri nhūm mĕmyta pĕ hapōx pa nĕ ma hagrō hwŷr mrar kurĕ kumrĕx nĕ mĕ kām gjĕx pa nhūm myja akupŷm tām hkrā. No nhūm hagrōja mĕkarōmnuti pymaj amŷra nĕ axkakhūm nĕ hprōt nĕ himō hā krā hixĕt ā axpum rōrōk nĕ gōx kām mrō nĕ hpikapràr pa. Ohtō rax kumrĕx. Kĕp 2.000 tā hpikapràr

pa. ¹⁴ Hāmri nhūm hagrô jamār o ri mē pa xwýnhjaja tee ri ja hā omu nē ma mē ō patrāw wýr akupým mē piitā mē kām harēnh o hprôt nē mra. Hāmri nē mē kām ujarēnh pa. ¹⁵⁻¹⁶ Nhūm mē tee ri mē kuma nē ma Jejus wýr mra nē hkaxpa nē kuri myta pumu. Nhūm ra akupým tām hkrā nē ê kamā tām amnhī nhīpēx nē nhý. Nhūm mē kot hā omunh xwýnhjaja mē kām ujarēnh pa nhūm mē kuma nē myta pumu hāmri nē tee ri amnhī kukamā hamaxpēr o kām Jejus puma nē. ¹⁷ Hāmri nē amnhī nē kām kapēr nē kām:

—Kwa mēmo kaxyw na ka mē ixwýr rē? Mē ma akupým amrar tokyx anē. Anē.

¹⁸ Hāmri nhūm mē kuma nē akupým pàr wýr agjē nhūm akupým mex xwýnhnta tee ri ja hā mē omu nē mē hkôt hkrā. ¹⁹ No nhūm Jejus kām:

—Nà kot kaj mē ixkôt amōr kēt nē. Ma akupým anhō krī hwýr mán tē nē mē kām Tirtūm kot akupým ato mex ā amnhī jarēnh o ri mē hkôt apa. Anē.

²⁰ Hāmri nhūm kuma nē ma akupým tē. Hāmri nē ō pyka pē Tekap kām mē kām Jejus kot tanhmā ho mex to hā harēnh ri mē hkôt pa nhūm mē amnhī jaēr pē kuma nē tee ri hkukamā hamaxpēr.

*Jejus kot akupým mēhō ho mex nē akupým mēhō ho htīr ā harēnh
Matêwre 9.18-26; Rukre 8.40-56*

²¹ Tā nhūm Jejus mē hkôt mē pa ho pa xwýnhjē mērohā akupým xarmā mō nē rē. Hāmri nē pàr nhō nē api nē gō mýri kuhē nhūm pika nhō xwýnhjaja Jejus pumu nē hā pikuprōnh rax nē. ²²⁻²³ Hāmri nhūm mēhō my pē Jajtija hwýr tē nē kutā hkōnkrā ho htēm nē nhý. Kēp Tirtūm kapēr o mē ahkre xā hā ixkre jamār xwýnh maati na pre. Nhūm hkra nija kēp ā htýx nē htyk kaxyw nē nō. Kormā nyw. Kormā hā amgrā pē 12 pix tā ra kēp htyk kaxyw. Hāmri nhūm Jajtija tee ri hkukamā hamaxpēr nē ma Jejus wýr tē nē hpar pē hkōn krā ho tēm nē ho hwýr kām hihtýx nē kām:

—Pa akupým mē ixto mex xwýnh maati. E awýr na pa tē. Na ra ixkra ixpē htyk kaxyw. Pa tee ri omu nē kaxyw amā ijamaxpēr nē awýr tē. Jakamā kwa ma ixkôt inhōrkwý hwýr tē nē inhmā omu nē hā anhīkra xi nē akupým inhmā ho mex. Anē.

²⁴ Hāmri nhūm kuma nē ma hkôt tē. Nhūm mē ohtō nē axpēn nhīgānh nē axpēn kujahēk o wa hkôt mra. ²⁵ Nhūm mēhō nija haxwýja wa hkôt tē. Na pre hte hkamrō hkryre rāhā ho pa hā ra hā amgrā kēp 12. ²⁶ Nē tōtō mā amnhīrer rax nē nhūm mē tee ri kot ho mex kaxyw nom xatā hkane kaprý. Hāmri nhūm ra hikāxpore kēp hapēx nhūm arī ām rāhā nē pa. ²⁷⁻²⁸ Hāmri nē tee ri amnhī kukamā hamaxpēr nē Jejus jarēnh ma nē hamaxpēr o:

—Ma kot paj ma hwýr tē nē kēp ē pix kupēnh tā akupým inhmex japēr. Ma kot paj ho anē.

Anhýr o hamaxpēr hāmri nē ma mē hkôt hwýr htēm kurē kumrēx. Nhūm mē ohtō raxja kaēx ā mē hkôt hwýr tē. Hāmri nē katut kót kēp ē nhīrē kupē. ²⁹ ām ē pix kupēnh tā akupým mex ā amnhī pumunh kurē kumrēx. ³⁰ Hāmri nhūm Jejus kot kēp ē kupēnh ā amnhī tā omu nē hēx rom xa nē mē ho hakēx nē amnhī tā mē kām kapēr nē mē kām:

—Kwa mē atō na ka ri amnhī kaxyw inhmā ajamaxpēr týx pē ixpē ixē kupē? Anē.

Hāmri nhūm mē piitā kuma nē tee ri axpēn pumu nē kām amnhī tā aprā.

³¹ Hāmri nhūm hkôt mē pa ho pa xwýnhjaja kām:

—Mē kot apē amnār griā kot ka kēt ri mēhō kot apē hkupēnh xwýnh ā ri mē hkukja. Kwa mán ām mēhō amarī apē hkupē. Anē.

³² Hāmri nhũm mẽ kām:

—Nà na amarĩ xipê hkupênh kêt nê. Na amnhĩ kaxyw inhmã hamaxpêr tỳx pê xipê hkupê. Tã na ixàhpumunh tỳx xà ho akupỹm mex. Nom ra ixte mẽhõ kot xipê hkupênh xwỳnhnta pumunh jakamã na pa ixêx rom ã amnhĩ tã ri mẽ hkukjêr anê. E kwa mẽ atõ inhmã amnhĩ jarê. Anê.

³³ Hāmri nhũm nija kuma nê tee ri kêp kot amnhĩ to hpimxur prãm. Hāmri nê hpijaàm nê hwỳr htetert o tẽ nê kutã hkõn krã ho tẽm nê nhỹ nê kãm amnhĩ jarê nê kãm:

—Ma pa na pa inhmã inhmex prãm xàj apê axê kupê. Tã na pa akupỹm inhmex. Anê.

³⁴ Hāmri nhũm kuma nê kãm:

—Tỳ. Nà ate amnhĩ kaxyw inhmã ajamaxpêr tỳx kôt ã ate amnhĩ nhĩpêx anhỹr jakamã na ka akupỹm amex. Kot kaj axte akamrô rãhã ho ri apa hkêt nê. E mãmri ajamakêtkati nê ma akupỹm anhõrkwỹ hwỳr tẽ. Anê.

Hāmri nhũm kuma nê hkĩnh nê ma akupỹm tẽ.

³⁵ Rõm nhũm Jajti mẽ ãpênh xwỳnhjaja õrkwỹ rũm ma õ patrãw kutã mra nê wa hkaxpa nê Jajti mã kãm:

—Kwa na ra akra apê ty. Mo kaxyw kot ka kêt amnhĩ kôt Jejus o mõi? Kwãr mãmri ma akupỹm awjanã nê tẽ. Anê.

³⁶ Hāmri nhũm Jejus mẽ kuma nê Jajti mã kãm:

—Kwa tee ri akra hkukamã ajamaxpêr kêt nê. ãm kaxyw inhmã mãn ajamaxpêr tỳx rãhã nê. Anê.

³⁷⁻⁴⁰ Hāmri nhũm mẽ axte mõi nê mẽ õrkwỹ hwỳr põi nê mẽ omu. Nhũm mẽ ra hã htu rax nê mỳr o hkrĩ. Hāmri nhũm Jejus mẽ hwỳr axà nê mẽ omu nê kot mẽ hkra htyk kumrêx ã omunh tã mẽ kãm:

—Kwa mẽ hāmri amỳr kêt nê. Na nireta htyk kêt nê. Na ãm gõi nê nõ. Anê.

Hāmri nhũm mẽ kot ra htyk ã omunh mex jakamã kuma nê ãm kuma nê axtem nê ri axpên mã hã hpêr o axkê. Hāmri nhũm Jejus mẽ hanor pa nê hitom kãm htyk xwỳnh wỳr àr kaxyw nê amnhĩ kôt Juãw nê Xiakre nê Simãw Pêtre nê kaxyw htyk xwỳnh katorxã nê hipêêxã pix amnhĩ kôt mẽ ho axà.

⁴¹ Hāmri nê htyk xwỳnhnta wỳr tẽ nê hpa hã kupy nê kãm kapêr nê kãm:

—Pa? E kwa kãnhmã nhỹ. Anê.

Nom amnhĩ kapêr kãm harê nê kãm:

—Tarit kũm. Anê.

⁴² Hāmri nhũm kãnhmã ỹr kurê kumrêx nê kãnhmã xa nê ri mra. Na pre ra hprêk nê ty. Na ra hã amgrã kêp 12 tã ty nhũm Jejus akupỹm ho htĩr nê kãnhmã ỹr nhũm kãnhmã xa nê ri mra. ⁴³ Hāmri nhũm kuri omunh xwỳnhjaja amnhĩ jaêr pê omu nê kamã no pyma nê hkĩnh tỳx kumrêx. Hāmri nhũm Jejus katorxã mẽ hipêêxãja wa kãm:

—E mãn ra kãm prãm nê. Wa tokyx kãm mẽmoj japêr kê kukrê. Nom kêr ka wa inhmar kumrêx. Kêr ka wa akupỹm ixte ho htĩr ã ri mẽ kãm ijarênh o ri apa hkêt nê. ãm kwarĩ ho kwarĩ. Anê.

6

Najare nhõ xwỳnhjaja kot Jejus kaga hã mẽ harênh

Matêwre 13.53-58; Rukre 4.16-30; Juãw 1.11

¹ Tã nhũm Jejus ma õ krĩ pê Najare hwỳr ma akupỹm mõi nhũm hkôt mẽ pa ho mẽ pa xwỳnhjaja ma hkôt mõi. ² Hāmri nê hwỳr põi. Nhũm mẽ õ arĩgromnu pê sap kator jakamã nhũm Jejus ma Tĩrtũm kapêr o mẽ ahkre xà hã ixkre hwỳr tẽ. Hāmri nê kamã mẽ ahkre ho nhỹ nhũm mẽ amnhĩ jaêr pê kapêr mex

ã kuma nê tee ri axpên pumunh pê hamaxpêr o hkrî. Jejus kêp mē hwý hã hkamnhîx nom nhũm mē kurom ãhpumunh tÿx nê kapêr mex jakamã nhũm mē kuma nê tee ri hamaxpêr o hkrî. Hãmri nê axpên mã:

3—Kwa kêp mē panhîõ htã tanhmã kot we amnhî to nê ã ãhpumunh tÿx kôt mē pamã kapêr anê nê ri mē kãm aa mē kot mēmoj pumunh kêt kwý ho anhÿr o pa? Mē panoo mã na pre hprêk. Kêp pî kuprãr xwýnh Juje mē hprõ Marir wa hkra na. Nê htõ Xiakre nê Juje nê Simãw nê Jutja ra mē pahte mē kêp htõ hã omunh mex. Nê htõxjaja jar mē pakamã pa nhũm mē pahte mē omunh mex kênã kot kêt we mē kurom ã ãhpumunh tÿx anê. Anê.

Anhÿr o axpên mã harê. Hãmri nê kamã gryk nê hkaga 4-6 nhũm tee ri amnhî tã mē õmu nê hamaxpêr o:

—Hêxta waa nê. Mē kãm amnhî kaxyw ixkôt hamaxpêr prãm kêt kumrêx. Anê.

Hãmri nê mē kãm:

—Nã Tirtũm nhÿ hã kapêr jarênh o mē pa xwýnhjaja na htem krî hwý kamã kãm mē mar prãm nê. Nom õ krî kamã mē kot karãre rũm hprêk o mõr kãm omunh xwýnhjaja na htem kuma nê ãm kuma. Anê.

Hãmri nhũm mē kot amnhî kaxyw hkôt hamaxpêr kêt jakamã nhũm tee ri mē kãm aa mē kot mēmoj pumunh kêt kwý ho anhÿr rax prãm kaprÿ. Nê ãm mē ã xwýnhjê ho grêre nê mē hã ãhkra jaxwý nê akupÿm mē ho mex. Hãmri nê mē kurũm kato nê ma krî hwý hkôt ri Tirtũm kapêr o mē ahkre ho pa.

Jejus kot mēmoj tã mē kêp 12jê mã karõ hã harênh

Matêwre 10.5-15; Rukre 9.1-6, 10.1-12; mããñen Atre 13.50-51, 18.6

7 Tã nhũm Jejus amnhî wÿr mē kot ÿ hã mē ahkre ho pa xwýnhjê pê 12jê hwý. Ra kot amnhî kaxyw mē rênh xwýnhjtaja nhũm amnhî wÿr mē kuwý. Hãmri nê axpên kaxyw mē ho axkrut nê mē kurê nê mē kãm mē ãpênh ã karõ nê ma mē hwýjê hwÿr mē kurê. Nê mē kãm:

—E kêr ka mē ma mē pahkwýjê hwÿr mra nê inhÿ hã Tirtũm kapêr jarênh o ri mē hkôt apa. Nê mē kurũm mēkarõmnuti japõx o ri mē hkôt apa. 8-9 Nom kêr ka mē amnhî kôt akukrêx rax nê ri apa hkêt nê. Nê kawã htu nê ho ri apa hkêt nê. Nê amnhî kôt axãpkur xã ho ri apa hkêt nê. Rÿ akãxpore rax nê ri ho apa hkêt nê. ãm mē anhõ kamis nê mē apar kã ho pixire nê agjê nê ri hã apa. Nê mē amnhî kaxpar xã hã mē anhõ kô pix o apa. Mē ã anhy kamã mē hkôt ri apa anê.

10—Nê kêr ka mē nhÿri krî hõ hwÿr põj. Nê apõx xã kamã mēhõ nhõrkwý kamã hkôt ri apikamênh tãmtã kurũm akupÿm ajapõj nê ma hpãnhã nhãm krî hõ hwÿr apa. Nom atÿx ri nhãm mē hwÿr amrar nê nhãm mē hwÿr amrar kêt nê.

11—Nê koja mē nhÿri mē akapêr kaga ka mē tee ri amnhî tã mē kamã ama hãmri nê tokyx mē kurũm ajapõj nê ma apa. Nê anojarêt nê mē noo mã akuhê nê amnhî par ã awjagrõ kapî. Mē kot Tirtũm kaga hã amnhî pumunh nhũm kot amnhî pyrà nê mē hkaga hã omunh kaxyw ka mē ã mē noo mã amnhî nhÿpêx anê. Hãmri nê hpãnhã ma nhÿhÿm apa.

12 Anhÿr o mē kãm mē ãpênh ã karõ. Nhũm mē kuma nê hapõj nê ma mē hwýjê hkôt pa. Ma krî piitã hkôt Tirtũm kapêr o mē ahkre ho ri mē hkôt pa nê mē kãm:

—E kwa mē tokyx amã ate amnhî tomnuj kaga hprãm xaj Tirtũm kôt mãn amnhî xunhwý. Anê.

13 Hāmri nē mē nē mēkarōmnuti jano. Nē akupŷm mē à xwŷnhjê ho mex kaxyw mēmo htwŷm o mē hkrā gregrer nē Jejus nhŷ hā akupŷm mē ho mex.

Mē kot Juāw Paxis pŷr ā mē harēnh

Matêwre 14.1-12; Rukre 9.7-9

14 Tā nhŷm mē piitā Jejus jarēnh ma nē axpēn mā tanhmā harēnh to ho pa. Nom ahpŷnhā tanhmā harēnh to. Na prem kamā harēnh o:

—Nā Juāw Paxis pimrāata na. Pēr akupŷm htŷr jakamā na hte ā mē kot aa mēmoj pumunh kêt kwŷy ho anhŷr o pa. Anē.

15 Nē kamā axtem harēnh o:

—Nā tām kêt. Pēr finat Eris na. Anē.

Nē kamā axtem harēnh o:

—Nā tām kêt. Pēr Tirtŷm nhŷ hā kapēr jarēnh xwŷnhjê hō na. Te kot amnepē mā mē kot Tirtŷm nhŷ hā tanhmā amnhŷ nhŷpêx to xwŷnhjê kot amnhŷ nhŷpêx pyrāk o kot amnhŷ nhŷpêx kēnā.

Anhŷr o ahpŷnhā harē. 16 Hāmri nhŷm Ijaew o amnhŷptār xwŷnh pē Erox āxipasja mē kot ā harēnh anhŷr ā mē kuma nē Juāw Paxis mā hamaxpēr kurē kumrêx. Hāmri nē mē kām:

—Nā pēr Juāw Paxista na. Ixte mē kām hā ixāmnēnh nhŷm mē kot inhmā mut krāhyr xwŷnhhta mān ra tanhmā amnhŷ to nē akupŷm htŷr. Anē.

17-20 Na pre ra pahi Erox āxipasja htō Pirip pē hprō Eroxis pytā nē ho hprō nhŷm hkra niti mē wa hwŷr ahpa. Hāmri nhŷm Juāw Paxisja tee ri ja hā pahihti Erox āxipasja pumu nē hā kām akir nē kām:

—Tk. Kwa Tirtŷm kēp ja omnuj. Ra kot ja nē mē pahkurē htā ka axtem nē ā amnhŷ nhŷpêx anē.

Anhŷr jakamā nhŷm hprō Eroxisja amnhŷ tā kuma nē kamā gryk tŷx nē. Nē kām hpŷr prām nē. No nhŷm pahi Erox āxipas kām hpŷr prām kêt nē. Juāw Paxis kot Tirtŷm kôt amnhŷ nhŷpêx nhŷm kot hā omunh mex jakamā kām hpŷr prām kêt nē. Juāw na pre hte xatā kām Tirtŷm kapēr jarēnh o pa. Nhŷm pahihti Erox āxipasja kormā hprŷ hā mar mex kêt tā hā hpijaam nē kām mar prām nē. Nom nhŷm hprō kām hpŷr prām jakamā nhŷm kēp mē kām hā amŷnē nhŷm mē ma o tē nē haxā nhŷm mex nē mē hagjēnh xā kamā hkrŷ ho krŷ.

21-24 Tā nhŷm jāā nhŷm pahi Erox āxipas kator ā arŷgro kato nhŷm mē piitā hwŷr mra nē hā akuprō nē hā hkŷnh nē hā apkur o hkrŷ. Ō kōwenatōjaja nē hkrāmnhwŷyaja nē krŷ hkwy kamā mēō pahijaja nhŷm mē ohtō nē hā akuprō nē hā hkŷnh. Hāmri nhŷm hprō Eroxis kra nitija mē hwŷr axā nē mē kām gre. Mē kot omunh nē kamā hkurē pix kaxyw mē noo mā hpijaam kêt nē ā mē kām grer anē. Hāmri nhŷm pahi Erox omu nhŷm ja kām mex nē nhŷm mē piitā hkŷnh nē kamā nopyma nē. Nē grer kām hpijaam kêt nē tanhmā mē kām grer to nhŷm mē omu nē kamā no pyma nē. Hāmri nhŷm pahi Erox āxipasja kām:

—Nā ām hāmri. Na ka mē inhmā agrer mex nē. Jakamā kwa māmrŷ mēmoj tā ixwŷ. Amā mēmoj prām xā hkôt inhmā mēmoj jarē pa amā kugō. Ām hāmri na pa amā amnhŷ jarē. Na pa Tirtŷm noo mā ā amā amnhŷ jarēnh anē. Ka mamrŷ ixkukrêx mex kwŷy hā ixwŷ pu axpēn mā ho axkjê. E mēmo na amā hprām? Anē.

Hāmri nhŷm kuma nē ma katorxā hwŷr tē nē kām harē nē kām:

—Xē mēmoj tā kot paj we kuwŷ? Anē.

Hāmri nhŷm kuma nē hamaxpēr o:

—Ma ām hāmri koja mē tā jarāhā inhmā Juāw Paxis pŷ. Anē.

Hāmri nē hkrata mā kām:

—Ma Juāw Paxis krā hā kot kaj awȳr kē mē amā kugō ka man ixw̄yr o tē. Anē.

²⁵ Hāmri nhūm kuma nē akup̄ym pahi hw̄yr axā nē kām:

—Ma Juāw Paxis krā kot kaj inhmā agō. Pasiiti kamā axā nē inhmā agō pa ma amnhīm o ixtēm kurē kumrēx. Ām ja pix na inhmā hprām. Anē.

²⁶ Hāmri nhūm tee ri kuma nē hkaprī nē. Nē hamaxpēr o:

—Hēxta waa nē. Inhmā hp̄ir prām kēt. Nom ra ixte ixkutā mē hkrī xw̄ynhjē noo mā inhmā kām mēmoj prām xw̄ynh nhōr ā amnhī jarēnh nhūm ixte kām ōr ā amnhī jarēnh nhūm mē piitā mē kot inhmar jakamā tanhmā kot pa we amnhī to nē kēp nē? Nā pa nē hkēt nē. Anē.

²⁷ Hāmri nē ō pōristijē mā kām:

—E mē ma Juāw Paxis w̄yr mra nē mut krāhta nē pasiiti kamā hkrā xā nē akup̄yn o tē nē kām agō. Anē.

Hāmri nhūm mē kuma nē ma mē hagjēnh xā hw̄yr mra nē Juāw w̄yr axā hāmri nē mut krāhta. ²⁸ Hāmri nē pasiiti kamā hkrā xā nē akup̄ym o tē nē kot hā hw̄yr xw̄ynh mā kugō nhūm kumȳ nē ma katorxā hw̄yr o tē nē kām kugō.

²⁹ Hāmri nhūm Juāw Paxis kōt mē pa ho mē pa xw̄ynhjaja tee ri harēnh ma nē hkaprī ht̄yx nē. Hāmri nē pahi Erox āxipas w̄yr mra nē ĩ hā kuw̄y nhūm mē kām kugō nhūm mē kumȳ nē ma o mra nē kēn kre kamā haxā.

Jejus kot mē ho 5.000 nē mē kām ō hā harēnh

Matēwre 14.13-21; Rukre 9.10-17; Juāw 6.1-14

³⁰ Tā hāmri nhūm mē kot Jejus nh̄y hā mē ahkre ho mē pa xw̄ynhjaja akup̄yn Jejus w̄yr mōn pōj nē kām amnhī jarē. Tanhmā mē kot mē ahkre hto ho pa nē tanhmā mē ho mex to ho pa hā kām amnhī jarēnh pa.

³¹ Tā nhūm mē piitā axpēn pānhā kot Jejus mar kaxyw mē hw̄yr mra nhūm mē kormā apkur kēt nē. Jakamā nhūm Jejus hkōt mē pa ho mē pa xw̄ynhjē mā:

—E ma pu mē awrā kapr̄y hw̄yr mō nē nh̄yri pahkrī nē pakōkōt nē apku.

³² Anē hāmri nhūm mē gōx kām kanōre w̄yr agjē nē ma ahte xarmā awrā kapr̄y hw̄yr mō. ³³ Nhūm krī hkwȳ nhō xw̄ynhjaja mē omu hāmri nē nh̄yh̄m mē mōr xā hā mē omunh kurē kumrēx. Hāmri nē krī hkwȳ rūm ma mē ĩhkre mra nē mē kām amnhī to wa nē pōj nē mē kutēp hkrī. ³⁴ Hāmri nhūm mē mō nē mē hw̄yr pōj nē kre kura nē kanōre nhō. Hāmri nhūm Jejus mē hw̄yr api nē mē omu nē hamaxpēr o:

—Hēxta waa nē. Na mē omnu nē pa. Te mē kēp ōwēhti jamār xw̄ynh kēt nē ht̄yx ri pa xw̄ynh kot amnhī nh̄ipēx pyrāk. Mēhō kot mē kamā ukaprī nē tanhmā mē ho mex to ho pa? Anē.

Hāmri nē mē kamā ukaprī nē xa nē Tirtūm kapēr o mē ahkre rax nē.

³⁵⁻³⁶ Tā nhūm myt ar kaxyw nhūm hkōt mē kot pa ho pa xw̄ynhjaja hw̄yr mra nē kām:

—Kwa hāmri na ra am̄ykry ht̄yx nē. Mē hano kē mē ma nh̄yri krī hkwȳ hw̄yr mra nē tokyx amnhīm mēmoj japrō nē kuku nē hikwȳ nē gōr. Mo jar kapōt ā mē apkur xā? Anē.

³⁷ Hāmri nhūm mē kuma nē mē kām:

—Kwa nā mē kamjaja mē kām mēmoj gō kē mē kuku. Anē.

Hāmri nhūm mē kuma nē tee ri hamaxpēr nē kām:

—Kwa mo mē kaxyw mē pakāxpore rax? Kot pu mē pakāxpore ho 200 nē ho mē kām mēmoj japrōr tā nom nhūm mē ām ho hkryre nē kuku nē ho ōhy htu hkēt nē. Mē ohtō rax kumrēx kēnā. Anē.

³⁸ Hāmri nhūm mẽ kām:

—Nà kot puj mẽ kām mẽmoj japrôr kêt nê. No mẽ panhõ pāwtita? Tanhmã na arĩ kute? E mẽ atõ tẽ nê omu nê akupÿn tẽ nê inhmã harê. Anê.

Hāmri nhūm ja ma tẽ nê omu nê akupÿn tẽ nê kām:

—Nà pāwti âm kêp 5 pix. Nê kaxyw tep âm pijakrutre. Anê.

³⁹ Hāmri nhūm Jejus kuma nê mẽ kām:

—Tõe. Mẽ kām anê kê mẽ ahpÿnhã ri hije nê hkrĩ. Anê.

⁴⁰ Hāmri nhūm mẽ piitã ahpÿnhã kêp 50 nê hije nê hkrĩ hpa.

⁴¹ Nhūm Jejus pāwti mẽ tepta jamÿ nê kànhmã kaxkwa hwÿr rĩt nê Tĩrtūm mã kupê nê kām harê nê kām:

—Pa Papaj? Nà ka na apê mẽ inhmã mẽ inhõ ho apa xwÿnh jakamã amex o amex. Anê.

Hāmri nê mẽ kām ho hkry hpa nê hkõt mẽ pa ho mẽ pa xwÿnhjê mã kugõ nhūm mẽ ô ri ho mra nê ho mẽ hipêx pa. Pāwti mẽ tepta nhūm mẽ ho mẽ hipêx pa. ⁴²⁻⁴⁴ Nhūm mẽ piitã apkur mex nê. Mẽõja mẽ kêp grire htã nhūm Jejus tanhmã mẽ kām ho rax to nhūm mẽ ohtõ rax tã piitã kuku nê ho õhy htu hpa. Memyjaja kêp 5.000 nê kaxyw mẽ hprõ nê mẽ hkrajaja nhūm mẽõja ho mẽ hipêx pa nhūm arĩ hakrêx prã. Jakamã nhūm Jejus kõt mẽ pa ho mẽ pa xwÿnhjaja akupÿm hakrêx o pikuprõnh pa nê ho kawã o 12 nê ho nÿt.

Jejus kot gõ krãhkã hã htẽm ã harẽnh

Matêwre 14.22-33; Juãw 6.15-21

⁴⁵⁻⁴⁶ Tã nhūm Jejus hkõt mẽ pa ho mẽ pa xwÿnhjê mã kām:

—E mẽ kanõre mã axã nê ma akupÿm ixkukamã krĩ pẽ Petsêj wÿr rê. Pa jajê jano hāmri nê ma tẽ nê nhÿri Tĩrtūm mã amnhĩ jarê nê rĩ ma mẽ akõt tẽ. Anê.

Hāmri nhūm mẽ kuma nê kanõre mã gjêx pa nê ma mõ nhūm Jejus mẽ kot mar xwÿnhjê janor pa nê ma hixêt prêk ã api nê Tĩrtūm mã amnhĩ jarẽnh o nhÿ.

⁴⁷ Tã nhūm kamãt nhūm arĩ ahte kÿxpê nhÿ. Nhūm hkõt mẽ pa ho mẽ pa xwÿnhjaja kormã kanõre kamã mõ. ⁴⁸ Hāmri nhūm Jejus amÿm mẽ omu nhūm kók ra mẽ kutã àpêr tÿx kumrêx nhūm mẽ tee ri amnhĩ nhĩpêx nê tee ri rrẽmti ho gõ rẽnh nhĩpêx o hkrĩ.

Tã nhūm ra krãhyre kã nhūm Jejus Tĩrtūm mã amnhĩ jarẽnh pa nê kànhmã xa nê ma mẽ hkõt tẽ. Nom kanõre kamã htẽm kêt nê gõ krãhkã hã xa nê mẽ hwÿr hpar o tẽ. ⁴⁹⁻⁵⁰ Hāmri nê mẽ hwÿr kato nê mẽ kamã hamak kaxyw hêx rom kot mẽ hakrenh mã. Nhūm mẽ amnhĩ wÿr omu nê mẽkarõ hã hkamnhix nê tee ri amnhĩ kukamã hamaxpêr nê umaj htertet nê àmra rax nê. Hāmri nhūm mẽ kām:

—Tk. Kwa mẽ amã ma hkêt nê. Pa na pa mẽ akõt tẽ. Anê.

⁵¹ Hāmri nê mẽ hwÿr kanõre hkrem axã nhūm kók xàpêr tÿxta hapêx. Hāmri nhūm mẽ Jejus kamã no puma nê tee ri hamaxpêr nê axpên mã:

—Kokÿÿ. Tanhmã na we amnhĩ to nê gõ krãhkã hã hpar o man mẽ pahkõt tẽ mẽ pahwÿr àr mẽ nhūm kók hapêx par kurê kumrêx. Anê.

Hāmri nê tee ri kot ã amnhĩ nhĩpêx anhÿrja kukamã hamaxpêr o hkrĩ. ⁵² Kormã mẽ kot hprĩ hã Jejus tanhmã kute hã omunh kêt jakamã. Tĩrtūm pyrã nê àhpumunh o àhpumunh ã omunh mex kêt jakamã tee ri pāwti grêre ho mẽ hipêx par nê gõ krãhkã hã htẽm nê kók o pinhkrẽnh ã omu nê tee ri ã kot amnhĩ nhĩpêx anhÿrja kukamã hamaxpêr.

Kenějare kamã Jejus kot akupÿm mẽ ho mex ã harẽnh

Matêwre 14.34-36

⁵³ Tã nhũm mẽ xarmã rê nẽ krĩ pẽ Jenějare hwÿr pøj. Hãmri nẽ kanõre nhõ
⁵⁴ nẽ api nẽ kuhê nhũm krĩ nhõ xwÿnhjaja Jejus pumunh kurê kumrẽx nẽ
axpẽn mã:

—Kwa pěr Jejusta na mõ. Nã tãm kẽnã. Anẽ.

⁵⁵ Hãmri nẽ hkĩnh nẽ ma kape hã mẽ à xwÿnhjê hkõt mrrar kurê kumrẽx nẽ
mẽ harir xã rãhã mẽ hamÿ nẽ akupÿm Jejus wÿr mẽ o mra. Nhÿri hpõx xã
kamã omu nẽ hwÿr mẽ o mra.

⁵⁶ Na pre htem ã Jejus nhĩpêx anẽ. Jakamã nhũm hte ma nhÿhÿm mra. Krĩ
rũnh kõt mra nẽ krĩ hkryre hkõt mra nhũm mẽ omu nẽ hwÿr mẽ à xwÿnhjê
ho mra nẽ mẽ ho kuwÿ nẽ kãm:

—Pa? Kwa kê jajaja akupÿm mex kaxyw apê axê pix kupê nà? Anẽ.

Hãmri nhũm mẽ kãm:

—Tõe. Nã kwãr mẽ mãmrĩ hkupê. Anẽ.

Hãmri nẽ mẽ kot kêp ê kupênh xwÿnh piitã akupÿm mex pa.

7

Mẽ higêt hkõt mẽ kot amnhĩ nhĩpêx xwÿnhjê jarẽnh

Matêwre 5.21-48, 15.1-20

¹⁻⁴ Tã nhũm Mojes kapêr o mẽ ahkre o mẽ pa xwÿnh kwÿjaja Jerujarê rũm
Jejus wÿr mõ. Hãmri nẽ hã akuprõ nẽ hkõt mẽ pa ho mẽ pa xwÿnhjê kot amnhĩ
nhĩpêx ã mẽ omunh o kuhê. Ijaew na prem mẽ hkukamã mẽ higêtjê kapêr
kõt ri tanhmã amnhĩ nhĩpêx to ho pa. Jakamã mẽ urak nẽ apkur kaxyw nẽ
xatã amnhĩ nhĩhkra kuhõnh japjê nẽ rĩ kormã apku. No mẽ amnhĩ nhĩhkra
grã pix kuhõnh nẽ hkrĩ nẽ apkur kêt nẽ. Kuhõnh japjê nẽ kormã hkrĩ nẽ
apku. Tĩrtũm kot ja hã mẽ omunh nẽ amnhĩm mẽ mex ã mẽ harẽnh ã amnhĩ
kamnhix jakamã na prem ã amnhĩ nhĩpêx anhÿr o pa. Nẽ nhÿri amnhĩm
mẽõ hkwy japrõ nẽ akupÿm õrkwy hwÿr o mra nẽ haxwÿ nẽ mẽ higêt pyrà
nẽ wÿr japjê rũnh kumrẽx nẽ rĩ kormã apku. Nẽ mẽ urak nẽ poti nẽ gøj nẽ
papêre hkre kahõnh japjê rũnh nẽ rĩ kormã kamã õ nhĩpêx. Mẽ higêt pyrà nẽ
ã amnhĩ nhĩpêx anhÿr o pa. Tĩrtũm kot ja hã mẽ omunh nẽ amnhĩm mẽ mex ã
mẽ harẽnh prãm xaj. Nom nhũm Jejus kõt mẽ pa xwÿnhjaja na prem ã amnhĩ
nhĩpêx anhÿr kêt nẽ. Na prem apkur kaxyw nẽ katat kõt amnhĩ nhĩhkra kuhõ
nẽ amnhix apkur o hkrĩ. Jakamã nhũm Parijew nhõ xwÿnh mẽ Tĩrtũm kapêr
tũm o mẽ ahkre xwÿnhjaja tee ri ã mẽ kot amnhĩ nhĩpêx anhÿr ã mẽ omu nẽ
mẽ hã Jejus kukja nẽ kãm:

⁵ —Pa Jejus? Kwa mẽ inhmã mẽmoj jarẽ. Amnepêm mẽ panhĩgêtjaja na
pre htem apkur kaxyw nẽ amnhĩ nhĩhkra kuhõnh japjê rũnh kumrẽx nẽ arĩ
kormã hkrĩn apku. Jakamã na pa htem mẽ urak nẽ ã amnhĩ nhĩpêx anẽ. No
akõt mẽ pa ho mẽ pa xwÿnhjaja na htem ho mẽ ixpyrà kêt nẽ. Kwa mo na
htem ã amnhĩ nhĩpêx anhÿr kêt nẽ? Anẽ.

⁶ Hãmri nhũm mẽ kuma nẽ mẽ kãm amnepêm Tĩrtũm nhÿ hã kapêr xwÿnh
pẽ Ijais kapêr jarẽ nẽ mẽ kãm:

—Nã ãm hãmri na pre finat Ijaisja amnepêm tanhmã mẽ ajarẽnh to. Te
Tĩrtũm tãm kapêr pyràk o mẽ ajarẽ nẽ mẽ ajarẽnh o:

Mẽ kãm ixkĩnh ã amnhĩ jarẽnh tã mẽ kãm ixkĩnh kêt. Na htem ãm kãm ixprãm
ã amnhĩ jarẽnh kapry.

7 Mē kot ixkapēr kuhpa hā amnhī krā hkôt mēmoj tā hkwýjê mā karō ho pa jakamā na htem ām kot ixkôt amnhī nhīpêx ā amnhī jarēnh kaprý. Anē. Ā na pre mē ajarēnh anē. ⁸⁻⁹ ām hāmri na pre mē ajarē. Na ka htem mē panhīgēt kapēr kôt pix mā amnhī nhīpêx o apaja gryk ā ra Tirtūm kapēr kaga hpa. Te mē akapēr mex o kot Tirtūm kapēr jakrenh pyrāk. ¹⁰ Na pre finat Mojes Tirtūm nhý hā mēmoj tā mē pamā karō ho:

Ker ka mē anhīpêxà nē mē akatorxà wa hā apijaām o ri apa. Jao wa kutā anojarēt rāhā nē. Nom kot kaj mē ho mex hkēt nē tanhmā mē kām akapēr punuj to hāmri nhūm mē akwýjaja ja mýrapê mē apa. Anē.

Na pre ā finat Mojesja Tirtūm nhý hā mē pamā karō anē. ¹¹ No mē kajaja na ka mē axtem nē tanhmā akwýjê mā ja hā karō hto nē mē kām: “Kot kaj mē mēmo arīgro hā akāxpore hkwý nom anhīpêxà ho ajuta kaxyw kām hkwý nhōr kêt nē. Ām wa kām ate ho ajuta kêt ā amnhī jarē hāmri nē Tirtūm mā amnhī jarēnh xā hā ixkre hwýr mām o tē nē mē ixte ixkre ho mex kaxyw mē inhmā agō. Kot kaj mē ā amnhī nhīpêx anē nhūm Tirtūm ja hā mē apumu nhūm ja kām mex nē. E kēr ka mē ā amnhī nhīpêx anhýr o ri apa.” Anhýr o na ka htem akwýjê mā karō. ¹² Jao mē kot mē hipêxà nē mē katorxà ho ajuta nē mē hkurē. ¹³ Te mē amā mē panhīgēt kapēr mex o kot Tirtūm kapēr jakrenh pyrāk o na ka htem amnhī nhīpêx. Jao te Tirtūm kapēr mex kêt pyrāk o hipêx nē mar kêt nē apa. Ā na ka htem Tirtūm kapēr kuhpa hā amnhī nhīpêx anhýr o ri apa. Anē.

Mē pajamaxpēr punuj kôt mē pahtomnu hā harēnh

Matēwre 15.10-20

¹⁴ Tā nhūm Jejus Parijew nhō xwýnhjê mē hkwýjê mā kapēr pa hāmri nē amnhī wýr ra mē kot mar o kuhé xwýnhjê mā hpa ho apé nē mē kām:

—E pa mē amā mēmoj jarē ka mē inhma nē inhmar mex nē. ¹⁵⁻¹⁶ Na hte Tirtūm kapēr tūm o mē ahkre xwýnhjaja amnhī krā hkôt mē ate amnhī nhīhkra kuhōnh japjê hā mē amā karō ho pa. Nē amnhī krā hkôt mē axāpkur xā hā tanhmā mē amā karō hto ho pa. Mē ate ā amnhī nhīpêx anhýr nhūm Tirtūm kot ja hā mē apumunh kôt amnhīm mē amex ā mē ajarēnh kaxyw nhūm htem ā mēmoj tā mē amā karō anē. Nom na hte Tirtūm tanhmā mē panhīhkra kuhōnh to hā mē pahpumu nē ām hā mē pa hpumu. Nē mēmo mē paxāpkur xā hā mē pahpumu nē ām hā mē pahpumu. Ja kām tanhmā kute hkēt. Na hte ja hā mē omunh xā hkôt amnhīm mē mex ā mē harēnh rý mē mex kêt ā mē harēnh kêt nē. Rý mē hakwa ho mēmoj kur ā mē omunh xā hkôt tanhmā mē harēnh to hkēt nē. Ām mē hakwa ho tanhmā kapēr to pix ā mē mar kôt na hte tanhmā mē harēnh to.

Anhýr o mē kām kapēr. ¹⁷ Hāmri nē mē kot mar o kuhé xwýnhjê re nē hkôt mē pa ho mē pa xwýnhjê mē mē amnhīm hikranh xā hā ixkre hwýr agjê. Hāmri nhūm hkôt mē pa ho mē pa xwýnhjaja tee ri Jejus kot tanhmā mē hakwa jarēnh to hā kuma nē hā hukja nē kām:

—Kwa mon ka ri mē inhmā ā ja jarēnh anē? Anē.

¹⁸ Hāmri nhūm mē kām:

—Kwa xàn ka mē kormā aprī hā ja mar mex kêt nē? E pa ixprī hā mē amā harē ka mē inhma. Nā mē apkur xā na hte mē hkrā hi kamā mē hamaxpēr wýr gjêx kêt nē. ¹⁹ Na hte ām mē ōhy pix wýr agjê nē gaa nē nhām hapōj nē hapêx. Na htem mē apkur xā nhý hā tanhmā amnhī tomnu to hkēt nē. Jakamā na hte Tirtūm mē apkur xā hā mē omunh xā hkôt tanhmā mē harēnh to hkēt nē. Anē.

Nhũm pre ã mẽ kãm kapẽr anhỹr o mẽ paxàpkur xà piitã mex ã harẽ. Jakamã na hte Tĩrtũm krajaja àmnhĩx mẽmoj piitã hkur o pa nẽ kãm mẽmoj kur pyma hkêt nẽ. Jakamã nhũm Jejus ã mẽ kãm kapẽr anẽ nẽ mẽ kãm:

²⁰ —Mẽ hkrã hi kamã mẽ hamaxpẽr punuj pix nhỹ hã na htem tanhmã amnhĩ tomnuj to. Jakamã na hte Tĩrtũm tanhmã mẽ hamaxpẽr to ho pa hã mẽ omunh xà hkôt tanhmã mẽ harẽnh to. Nom mẽ kot mẽmoj kur ã mẽ omunh xà hkôt rỹ mẽ ihkra kuhõnh japjẽ hã mẽ omunh xà hkôt tanhmã mẽ harẽnh to hkêt nẽ. Ja tanhmã kęp kute hkêt. ²¹⁻²² Nom koja mẽhõ hamaxpẽr punuj nẽ ra hkôt tanhmã amnhĩ tomnuj to.

Ja o axpẽn kamã hpijaam kêt nẽ.

Rỹ mẽhõx pĩ rỹ mẽ kęp ahkĩ.

Rỹ mẽ kęp mẽ hprõ rỹ mẽhkuprỹ ho amnhĩkati.

Rỹ ri axpẽn pẽ õxỹ.

Rỹ tanhmã hkwyjẽ homnuj to.

Rỹ tanhmã mẽ ho kapẽr punuj to.

Rỹ hẽx rom mẽ no kupyri o ri pa.

Rỹ mẽmoj tã amnhĩ to jarkrar o pa.

Rỹ axpẽn kukrẽx pumu nẽ kãm ho õ hprãm xaj hã õ xwỹnhhta kamã gryk.

Rỹ htỹx ri tanhmã amnhĩ nhĩpẽx to.

Mẽ hamaxpẽr punuj jakamã na htem ã ri amnhĩ nhĩpẽx anhỹr o pa. ²³ Tã ã kot kot amnhĩ nhĩpẽx anhỹr ã mẽ omunh xà hkôt na hte Tĩrtũm mẽ kot amnhĩ tomnuj xwỹnh hã mẽ harẽ. Anẽ.

Mẽhõ kot hkra kaxyw Jejus mã hamaxpẽr ã harẽnh

Matêwre 5.21-28

²⁴ Tã nhũm Jejus mẽ hkôt mẽ pa ho mẽ pa xwỹnhjaja nhỹhỹm nojarêt hãmri nẽ krĩ rũm hapõj nẽ ma krĩ pẽ Xir pu hã ri pa. Hãmri nhũm Jejus hkwyjẽ mã:

—E kwa pu mẽ tokyx ixkre mũj wỹr mõ mẽ kuri põj nẽ kamã amnhĩm hikra. Pu mẽ pahpõx tokyx anẽ kê krĩ nhõ xwỹnhjaja mẽ pahpõx ã mẽ pahpumunh kêt nẽ.

Anhỹr tã nom nhũm mẽ piitã mẽ harẽnh ma nẽ mẽ hã akuprõ. ²⁵⁻²⁶ Nhũm mẽhõ ni haxwỹja Jejus hpõx ã harẽnh ma nẽ ma hwỹr tẽ. Nom kęp Ijaew kêt axtem Gres nhõ xwỹnh na pre. Pika pẽ Sir kamã krĩ mẽ kot kãm “Wẽnĩs” anhỹr xwỹnh kamã na pre kato. Nhũm pre mẽkarõmnuti kęp hkra ni mã axã. Hãmri nhũm õ mã mãj tee ri omu nẽ ra Jejus hpõx ã harẽnh ma nẽ ma hwỹr tẽ. Hãmri nẽ hwỹr axã nẽ hparpẽ hkõnkrã ho htẽm nẽ nhỹ nẽ kãm:

—Xẽ Pahihti. Inhmã ixkra nẽ mẽkarõmnuti jano kê ma tẽ kê akupỹm inhmã mex. Anẽ.

²⁷ Hãmri nhũm kãm:

—Nã kormã. Na pre Tĩrtũm taxy kormã Ijaewjẽ pix wỹr inhmẽ. Jakamã na pa kormã nhãm mẽ akwỹjẽ hõ tanhmã mẽ ato mex to hkêt nẽ. Anẽ.

²⁸ Hãmri nhũm tee ri amnhĩ tã kuma nẽ kãm:

—Ma ãm hãmri na ka ja jarẽ. Ixpẽ Ijaew kêt tã nom mẽ kuxwar we ixto mex grire kêt wehe. Anẽ.

²⁹ Hãmri nhũm kãm:

—Nã ãm hãmri na ka ã akra kaxyw inhmã ajamaxpẽr tỹx anẽ. Jakamã kot paj nẽ mẽkarõmnutita jano. Koja axte tanhmã apẽ ho hkêt nẽ. E ma akupỹm hwỹr tẽ nẽ omu. Anẽ.

³⁰ Hāmri nhūm kuma nē ma akupŷm ōrkwŷ hwŷr tē nē omu. Nhūm ra mēkarōmnutija kēp kato nē ma tē nhūm akupŷm tām hkrā nē hkīnh nē par kām hkōkōt o nō.

Hamak kro nē kapēr krok xwŷnh jarēnh

Matēwre 15.29-31

³¹ Tā nhūm Jejus mē hkōt mē pa ho mē pa xwŷnhjaja krī pē Xir rūm hapōj nē akupŷm gō rax pē Garirej wŷr ma mra. Pyka pē Sītō jakre nē mō nē pyka pē Tekap jakre. ³² Hāmri nē kormā hpōx o mōr rōm nhūm mē amnhī wŷr Jejus pumu nē hwŷr mēhō myja o tē. Kapēr krok nē umar kēt xwŷnhhta nhūm mē wŷr o tē nē kām:

—Pa? Ot pa mē awŷr ixkrāmnhwŷta o tē. Kwa hā anhīhkra xi kē akupŷm mē inhmā mex. Anē.

³³ Hāmri nhūm omu nē hpa hā kupy nē mē kēp o kato nē nhŷri mē hkàx ā o xa. Nē akutā hamak kre kupē nē argōx mē nē ho ōhto htok. ³⁴ Hāmri nē kaxkwa hwŷr rīt nē htyk xā mēnh tŷx nē kām kapēr. Mē pakapēr kām kām: “E ajamak katēr nē anhōhto kaxkrit.” Anē. Nom kapēr kām kām: “Epata.” Anē.

³⁵ Hāmri nhūm hamak katēr nē ōhto kaxkrit kurē kumrēx nē tām kapēr nē tām ama. ³⁶⁻³⁷ Hāmri nhūm mē kot omunh xwŷnhjaja amnhī jaēr pē Jejus kot ho mex ā omu nē kamā no pyma nē. Hāmri nhūm mē kām:

—Kwa kēr ka mē akwŷjē mā ja hā ijarēnh kēt nē.

Anhŷr tā no nhūm mē kuma nē ām kuma nē ma mē piitā mē kām harēnh o ri hprōt nē mē kām:

—Kwa Jejus na mex o mex. Na hte mē ho mex o pa nhūm mē umar kēt xwŷnhjaja akupŷm tām ama nhūm mē kapēr kēt xwŷnhjaja akupŷm tām kapēr. Ām hāmri na hte ā mē hipēx anhŷr o pa. Nā ām mex o mex. Anē.

8

Jejus kot mē ho 4.000 nē mē kām mē ō hā harēnh

Matēwre 15.32-39

¹⁻² Tā nhūm arīgro hō hā nhūm mē ohtō nē nhŷri kapōt ā Jejus ā htu rax nē kot mē ahkre mar o kuhē hā apkati axkrunēpxi. Nhūm mē apkur xā hā mēōja ra mē kēp hapēx. Hāmri nhūm Jejus ja hā mē omu hāmri nē hkōt mē pa ho mē pa xwŷnhjē mā akir nē mē kām hpa ho apē nē mē kām:

—E mē amnē ixwŷr mra nē ixkapēr ma. Anē.

Nhūm mē hwŷr mra nē kuhē nhūm mē kām:

—Kwa na pa inhmā mē kot inhmar o kuhē xwŷnhjē kaprī nē. Na mē ra mē pahkōt ri pa hā apkati axkrunēpxi nhūm mē apkur xā hā mēōja mē kēp hapēx. ³ Mē ō krī hwŷr awry jakamā koja mē mēmoj kur kēt rāhā ma akupŷm pa hāmri nē pry hā hirof nē rôrōk o pa. Hāmri pa inhmā mē hkaprī nē. Anē

⁴ Hāmri nhūm mē kuma nē axte tee ri hamaxpēr nē kām:

—Kwa nā nhŷhŷnh kot puj kēt mē kām mēmoj to mra? Jar ām kapōt pix kēnā. Anē.

Hāmri nhūm mē kām:

⁵—Nā tanhmā na mē anhō pāwtija kute? Anē.

Nhūm mē kām:

—Ām kēp 7 pix. Nē kaxyw tep kwŷ no ām grēre. Anē.

⁶ Hāmri nhūm mē kuma nē mē kot mar o kuhē xwŷnhjē mā anē nhūm mē kuma nē hkrī pa. Hāmri nhūm pāwti jamŷ nē ho Tirtūm wŷr nē kām:

—Pa Papaj. Nà ka na apê mê inhmã mê inhõ ho apa xwýnh. Jakamã amex o amex. ãm amex kumrêx. Anê.

Hãmri nê mê kãm ho hkry pa nê hkôt mê pa ho mê pa xwýnhjê mã kugõ nhũm mê ho mê hipêx pa. ⁷Nhũm hpãnhã tepta py nê mã ho anê nê ho Tirtũm wý. Hãmri nê hkôt mê pa ho mê pa xwýnhjê mã kugõ nhũm mê mã ho anê nê hamý nê ho mê hipêx pa. ⁸⁻⁹Hãmri nhũm mê ohtõ rax kumrêx tã piitã apku nê õhy htu pa. Mêmýjaja kêp 4.000 nê kaxyw mê hprõjaja nê mê hkrajaja. Tã nhũm Jejus mê apkur xãja o mê hipêx pa. Nhũm hkôt mê pa ho mê pa xwýnhjaja hakrêx o akuprõ nê ho kawà ho 7 nê ho nyt. Hãmri nhũm Jejus ma akupým mê õ krĩ hwýr mê kot mar xwýnhjê jano nhũm mê ma akupým hapêx. ¹⁰Hãmri nhũm Jejus hkôt mê pa ho mê pa xwýnhjê mê ro hã kanõre hkrem agjê nê mê hkwym ma Tamanut wýr mõ.

Parijew nhõ xwýnh kwý kot mêmõj tã Jejus kamã hamak ã mê harênh Matêwre 12.38-42, 16.1-4; Rukre 12.54-59

¹¹Tã nhũm mê Tamanut wýr põj nhũm Parijew nhõ xwýnh kwýjaja Jejus pumu nê ma hwýr mra nê mêmõj tã kuwý nê kãm:

—Pa. Ot pa mê awýr mra. Kwa mê inhmã aa mê ixte mêmõj pumunh kêt õ ho anê. Pa mê ja hã apumu nê Tirtũm kot mê ixwýr amênh ã akõt ijamaxpêr kurê kumrêx. E tokyx. Anê.

Kot tee ri mê kãm mêmõj to anhýr kaxyw nê ho anhýr kêt nhũm mê kot hã omunh nê ma hkwyjê mã ho kapêr punuj kaxyw nhũm mê ã hêx rom kãm kapêr anê. ¹²Nhũm ra kãm mê kot amnhĩ kaxyw hkôt hamaxpêr kêt kãm ã kapêr anhýr mar kaga nê. Hãmri nê tee ri amnhĩ tã mê hamaxpêr ã mê omu nê htyk xã mênh týx nê mê kãm:

—Hêxta waa nê. Mê ajamaxpêr punuj pix o na ka htem ri ajamaxpêr o apa. Ixpê Tirtũm kot mê awýr inhmênh xwýnh tã ka mê ja hã ixkõt ajamaxpêr kêt nê. Nà mo kaxyw kot pa kêt mê amã mêmõj to anê? Kot paj ho anê ka mê omu nê ãm omu nê ixkõt ajamaxpêr kêt nê. Nà kot paj mê amã mêmõj to anhýr kêt nê. Anê.

¹³Hãmri nê mê kure nê hkôt mê pa ho mê pa xwýnhjê mērohã ma mra nê akupým kanõre hkrem agjê nê ma xarmã mõ.

Jejus kôt mê pa xwýnhjaja kot hprĩ hã omunh kêt ã mê harênh Matêwre 16.5-12; mããnênh Makre 6.52

¹⁴Tã nhũm mê kormã kanõre kamã xarmã mõr rôm nhũm Jejus kôt mê pa ho mê pa xwýnhjaja tee ri mê apkur xã japêr nê axpên mã:

—Kwa hêxta waa nê. Na pu mê panhõ pãwti re nê amnhĩ kôt o pamõr kêt nê. Nê ãm pixire nê o mõ. Anê.

¹⁵Hãmri nhũm Jejus tee ri mê kuma nê tanhmã hã mê kãm kapêr to. Nom mêmõj tã kuxi nê mê kãm awjarê nê mê kãm:

—Kwa oko kêr ka mê amnhĩ nê Parijew nhõ xwýnh mê Pahi Eroxo nhõ pãw kaxkrit xã pumunh mex nê. Anê.

¹⁶Hãmri nhũm mê kuma nê tee ri kapêrja kukamã hamaxpêr pê hã axpên kujêr o hkrĩ nê axpên mã:

—Kwa mo na ri ã mê pamã pãw kaxkrit xã jarênh anê? Mãn mê panhõ pãwti hkêt ã mê pahpumu hã na ri ã harênh anê nà? Anê.

¹⁷Hãmri nhũm Jejus mê kapêr ã mê kuma nê mê kãm:

—Kwa mon ka wem ãm xatã axpên mã mê panhõ pãwti hkêt jarênh pix o mõ? Xàn pa hte mê apyrã nê tee ri mê paxãpkur xã hkêt kukamã ijamaxpêr o ixpa? Nà inhmã ja tanhmã kute hkêt. ¹⁸Ra mê ano ho mê ate ixpumunh

mex tā kormā aprī hā tanhmā ixkute hā ixpumunh mex kêt. Nē mē ajamak o ixkapēr mar mex tā aprī hā mar tỳx kêt. Kwa wem ixte amnhī nhīpēx mā ajamaxpēr tỳx nē. E mē inhmā mēmoj jarē. ¹⁹ Jāā ixte mē kēp 5.000 mā pāwti kēp 5 nhīrēnhta. Tanhmā na ka prem hakrēx o akuprō nē ho kawà ho nýt to? E mē atō inhmā harē. Anē

Hāmri nhūm ja kām: “Na pa prem ho kawà ho 12 nē ho nýt.” Anē. ²⁰ Nhūm kuma nē mē kām:

—Tỳ na pre hakrēx ā kawà kēp 12. Tā ham ixte mē kēp 4.000 mā pāwti kēp 7 nhīrēnhta. Tanhmā na ka prem hakrēx ho akuprō nē ho kawà ho nýt to? Anē.

Nhūm ja kām: “Na pa prem ho 7.” Anē. ²¹ Hāmri nhūm kuma nē mē kām:

—Tỳ ra ixte mē anoo mā ā ja ho anhỳr o axkrut tā ka mē ra hā ano hkēt nē arī axpēn mā mē panhō pāwti hkēt pix jarēnh o ixkôt mō. Kormā mē ate ixāhpumunh tỳx ā ixpumunh kêt. Anē.

Jejus kot akupým nohkre xwýnh o mex ā harēnh

Juāw 9.1-7

²² Tā nhūm mē ma krī pē Pesēj wýr mō nē ra hwýr pōj. Hāmri nhūm krī nhō xwýnh kwýjaja mē omu nē Jejus wýr mēhō myja o tē. Ra nohkre nē rīt kêt nē pa xwýnhja nhūm mē hpa hā kupyn hwýr o tē. Hāmri nē ho kuwý nē kām:

—Pa Pahihti? Ot pa mē awýr ja ho tē. Kwa hā anhīhkra xi nē akupým mē inhmā no ho mex. Anē.

²³ Hāmri nhūm mē kuma nē nohkre xwýnhta pumu nē hpa hā kupy nē o tē nē krī pē ho kato nē nhýri mē hkàx ā o xa. Hāmri nē no hā argōx mē nē hā ihkra xi nē kām:

—E mán ka mēmoj pumu nà? Anē.

²⁴ Hāmri nhūm kuma nē hkrākato nē ri rīt hāmri nē kām:

—Tỳ na pa mēmoj pumu. Nom ixprī hā omunh mex kêt nē. Te mēmo pī hpār kwý ri mrar pyrāk. Anē.

²⁵ Hāmri nhūm axte no hā ihkra xi nhūm tā rīt mex nē. Ri hprī hā mēmoj piitā omunh mex nē. ²⁶ Hāmri nhūm Jejus akupým ōrkwý hwýr kumē nē kām:

—E kēr ka kape hā ri amrar kêt nē. Am ma ma akupým anhōrkwý hwýr atēm kurē kumrēx. Anē.

Jejus kot amnhī tā hkôt mē pa xwýnhjē kukjēr ā harēnh

Matéwre 16.13-20; Rukre 9.18-21

²⁷ Tā hāmri nhūm Jejus ma hkôt mē pa ho mē pa xwýnhjē mē mē ma mō. Ma krī pē Sejarej Piripos pu hā krī hkwy hkôt mō. Nē kormā pry hā mō nhūm Jejus amnhī tā hkôt mē pa ho mē pa xwýnhjē kukja nē mē kām:

—Kwa mē inhmā mēmoj jarē. Tanhmā na htem ahpýnhā ri axpēn mā ijarēnh to wehe? Anē.

²⁸ Hāmri nhūm mē kām:

—Nā na htem ahpýnhā tanhmā ajarēnh to. Na hte kamā mē hkwyjaja axpēn mā ato finat Juāw Paxis ā ajarē. Nē kamā mē hkwyjaja ato finat Eris ā ajarē nē mē hkwyjaja apē Tirtūm nhý hā kapēr o pa xwýnh ra htyk xwýnhjē hō hā ajarē. Ā na htem ahpýnhā axpēn mā ajarēnh anhýr o pa. Anē.

²⁹ Hāmri nhūm mē kuma nē mē kām:

—No we mē kajaja? Ixpē mēhō hā na ka htem axpēn mā ijarē? Anē.

Hāmri nhūm Simāw Pétre kām:

—Nā mē pajaja na pa htem apē Tirtūm kot mē ixkaxyw axām nē mē ixwýr amēnh xwýnh ā ajarē. Nē apē mē ixpiitā mē inhō Pahi Maati hā ajarē. Ā na pa htem axpēn mā ajarēnh anē. Anē.

³⁰ Hāmri nhūm kuma nē mē kām:

—Nà ām hāmri na ka htem ā ijarēnh anē. Ā ixte anhÿr. Kwa nom kwa kēr ka mē inhma. Kēr ka mē kormā ā akwÿjē mā ijarēnh anhÿr kēt nē. Anē.

Jejus kot amnhī kukamā amnhī jarēnh ā harēnh

Matēwre 16.21-23; Rukre 9.22

³¹ Tā nhūm Jejus amnhī kukamā hkôt mē pa ho mē pa xwÿnhjē mā tanhmā amnhī jarēnh to nē mē kām:

—Nà ra mē ate Tīrtūm kot mē akaxyw ixām ā ixpumunh mex. No mē pahkwÿjaja kām ja hā ijarēnh mar nē ixpumunh prām kēt. Ijaew krāhtūmjē mē Tīrtūm kapēr tūm o mē ahkre o mē pa xwÿnhjē mē patre krāhtūmjaja na mē kām ja hā ixpumunh prām kēt. Jakamā koja mē nhÿrmā ixpynē nē ixtak rax nē ixpī. Nom kot paj ixtyk ā ixtā apkati axkrunēpxi hāmri nhūm Tīrtūm akupÿm ixto ixtīr. Anē.

³² Hāmri nhūm mē kot hpīr ā amnhī jarēnh ma nē tee ri hkukamā hamaxpēr. Hāmri nhūm Simāw Pētreja hwÿr tē nē hkwÿjē pē ho kato nē mē hkāx ā o xa nē kām:

—Kwa nà Pahihti. Koja Tīrtūm anē mē omunh mex nē nhūm mē ā anhīpēx anhÿr kēt nē. Kwa ri ā kapēr anhÿr kēt nē. Anē.

³³ Hāmri nhūm kuma nē hwÿr apkjē nē pu hā hkôt mē pa ho mē pa xwÿnh piitā omu. Hāmri nē mē hamak mā Simāw Pētre mā kapēr nē kām:

—Tk. Kwa na ka ā inhmā akapēr anhÿrja o te Satanasti nhÿ hā akapēr pyrāk. Tīrtūm nhÿ hā na ka ā inhmā akapēr anhÿr kēt nē. Ām jar mē kām Tīrtūm kapēr mar prām kēt xwÿnhjē jamaxpēr o na ka ajamaxpēr nē ā inhmā akapēr anē. No Tīrtūm jamaxpēr o ajamaxpēr kēt nē. Anē.

Jejus krajaja tanhmā kot amnhī nhīpēx hto hā mē harēnh

Matēwre 6.24-28; Rukre 9.23-27; Juāw 12.24-26; määnēn Apokarip 2.10, 12.11

³⁴ Tā nhūm Jejus amnhī wÿr mē kot mar o kuhē xwÿnhjē mē hkôt mē pa ho mē pa xwÿnhjē mā anē nhūm mē hwÿr axkamē nē kuhē. Hāmri nhūm tanhmā mē ahkre hto nē mē kām:

—E mē inhma. Kot kaj mē ixkôt amnhī xunhwÿr ā amnhī jarē hā kot kaj mē määnēn amnhī jarēnh o: “Jejus kēp inhō Pahihti jakamā kot paj ām kapēr kôt pix mā amnhī nhīpēx rāhā ho ri ixpa. Kwār ixkwÿjaja tanhmā hā inhīpēx to pa arī hkôt amnhī nhīpēx rāhā ho ixpa.” Anhÿr o amnhī jarē.

³⁵ —Koja mē ixtā mē atōx pī rÿ ixtā tanhmā mē ato ka ty. Ate tanhmā ijarēnh to ho apa hā nhūm mē apī. Tā nom koja akaxwÿnh ma inhō krī hwÿr āpīr kurē kumrēx nē kamā atīr tūm nē amex rāhā nē apa ho apa. Nom kot kaj mē jar atīr prēm xāj ixkaga hāmri nē hwÿr axāpīr kēt nē.

³⁶⁻³⁷ —Nē koja mēhō hikukrēx gryk ā Tīrtūm kaga. Hāmri nē nhÿrmā ty nē ŷ kamā kuwy hwÿr ma mō nē amnhī kôt kukrēx ō hpyr nē o mōr kēt nē. Koja tee ri kuwy hwÿr mōr pymaj amnhī nē hikukrēx rax o amnhī pānhā amnhīrer prām kaprÿ. Tanhmā koja amnhī to nē Tīrtūm mā amnhīre nē ma ō krī hwÿr api? Koja ā amnhī nhīpēx anhÿr kēt nē.

³⁸ —Nē koja mēhō ixte mē ahkre hā inhma nhūm ja kēp omnuj japēr. Nhūm kot mē kām ixprām nōkati xwÿnhjē hkôt pa gryk ā ixkaga. Hā kot paj nhÿrmā mē ato amnhīptār kaxyw akupÿn wrÿ nē amnhī xwar kot ixkaga xwÿnhhta kaga. Ām hāmri na pa mē amā ja hā amnhī jarē. Kot paj nhÿrmā inhō Papaj nhÿ hā ixte mē ho amnhīptār kaxyw akupÿn wrÿ nhūm kapēr o mē wrÿk

xwýnhjaja man ixkôt wrý. Pa mẽ wrý hãmri nẽ ra mẽ kot ixkaga xwýnhjaja pa amnhĩ pyrã nẽ amnhĩ xwar mẽ hkaga hpa. Anẽ.

9

¹ Nhũm Jejus arĩ mẽ kãm kapẽr nẽ mẽ kãm:

—Ăm hãmri na pa mẽ amã amnhĩ jarẽ. Kot paj nhỹrmã akupỹn ixte mẽ ato amnhĩptar kaxyw mẽ awýr wrý kãm ga. Tã kot kaj mẽ akwýjaja kormã atũr ri ja kukamã tanhmã ixte amnhĩ nhĩpẽx to hã ixpumu. Anẽ.

Jejus hirã htýx kãm ãm ã harẽnh

Matêwre 17.1-9; Rukre 9.28-36; mããnẽn Sikũn Pêtre 1.16-18

² Tã nhũm arĩgro kẽp 6 nẽ hapẽx nhũm Jejus ma nhỹri hixêt prẽk wýr tẽ. Nẽ Simãw Pêtre nẽ Xiakre nẽ Juãwja nhũm ma amnhĩ kôt wa mẽ o mỗ. Nhũm wa mẽ ahte mỗ nẽ hixêt prẽk ã api nẽ himõk ã kuhê. Hãmri nhũm Jejus axtem nẽ xa. ³ Ra ê haka htýx kumrẽx nẽ xa. ⁴ Hãmri nhũm ja wa kaxkwa rũm hwýr wrý nẽ kuri kãm kapẽr. Finat Mojes mẽ finat Erisja wa wrý nẽ kuri kãm kapẽr o xa. Tĩrtũm amnepẽm amnhĩ wýr wa ho àpir tã nhũm wa akupỹn wrý nẽ kãm kapẽr. ⁵⁻⁶ Nhũm wa mẽ mex kumrẽx nẽ hirã htýx kãm kuhê nhũm Jejus kôt mẽ mỗr xwýnhjaja wa mẽ omu nẽ mẽ kamã no pyma nẽ. Nẽ tee ri mẽ kãm tanhmã kapẽr to hkukamã hamaxpẽr. Hãmri nhũm Simãw Pêtre hamaxpẽr nẽ Jejus mã kãm:

—Kwa Pahihtĩ. Nã ãm hãmri na pu mẽ amnẽ mỗ. Kwa pu mẽ kritpẽm jar axkamẽ nẽ tokyx panojarêt kêt nẽ. Pa mẽ amã pô nhĩrõnh o axkrunẽpxi nẽ hipẽx. Amã nẽ Mojes mã nẽ Eris mã hõ nhĩpẽx ka mẽ kamã akrĩ. Kwa xat pa mẽ amã ho anẽ nã? Anẽ.

⁷ Hãmri nhũm kakrã jaka htýx wrý nẽ wa mẽ hkunor pa nhũm wa mẽ kamã kuhê. Hãmri nhũm kakrã kamã Tĩrtũm mẽ kãm kapẽr nẽ mẽ kãm:

—Ota Ixkra xa. Inhmã hapê ho inhmã hapê. Kër ka mẽ kapẽr mar týx rãhã ho ri apa. Anẽ.

⁸ Hãmri nhũm mẽ kuma nẽ amnhĩ pu hã rĩt nhũm ãm Jejus pix mẽ kuri xa nhũm Mojes mẽ Erisja wa ra ma akupỹm api nhũm mẽ ãm Jejus pix pumu.

⁹ Hãmri nhũm mẽ ma akupỹm hkwyjé hwýr wrýk o mỗ nhũm Jejus mẽ kãm:

—Kwa kër ka mẽ ham mẽ ate mẽmoj pumunh xwýnhhta kormã nhãm mẽ kãm harẽnh kêt nẽ. Kojã mẽ mẽmo arĩgro hã ixpĩ hãmri nhũm Tĩrtũm akupỹm ixto ixtĩr ka mẽ rĩ kormã mẽ kãm ja hã ijarẽnh o ri apa.

¹⁰ Anẽ hãmri nhũm mẽ kuma nẽ mẽ kãm harẽnh kêt nẽ. Ăm axpẽn mã pix mã harẽ nẽ kot akupỹm htĩr ã amnhĩ jarẽnhja ã axpẽn kukjêr o pa nẽ axpẽn mã:

—Kwa mo na ri ã akupỹm htĩr ã amnhĩ jarẽnh anẽ? Tanhmã kot we amnhĩ to nẽ htyk tã akupỹm htĩr? Anẽ.

Hãmri nẽ tee ri hkukamã hamaxpẽr o hkôt pa.

Juãw Paxis te kot Eris pyrãk ã harẽnh

Matêwre 11.13-15, 17.10-13

¹¹ Hãmri nhũm mẽ kormã ahpar mã wrýk o mỗr mẽ nhũm Jejus kôt mẽ mỗr xwýnhjaja mẽmoj tã hkukja nẽ kãm:

—Kwa mẽ inhmã mẽmoj jarẽ. Na hte Tĩrtũm kapẽr tũm o mẽ ahkre xwýnhjaja mẽ inhmã: “Eris kumrẽx kojã Tĩrtũm mẽ pahwýr kumẽ nhũm Krisja hapu hã wrý.” Anẽ. Na htem ã mẽ inhmã war ajarẽnh anẽ. Tã ka na ka ra wrý nom nhũm kormã Erisja akukamã wrýk kêt nẽ. Anẽ.

¹²⁻¹³ Hãmri nhũm mẽ kãm:

—Nà ãm hãmri na htem mẽ amã ã ja jarẽnh anẽ. Na pre ra ixkukamã te kot Eris kot amnhĩ nhĩpêx pyrãk xwýnhnta tẽ nõ ixkutêp mẽ kãm ijarẽnh o pa. Nom mẽ kot ixkukamã ijarẽnh xwýnh ã omunh kêt jakamã na prem axtem nõ kãm tanhmã hipêx to hprãm xà hkôt tanhmã hipêx kati hton kupĩ. Tã koja mẽ ã hipêx anhýr pyrã nõ mã ixto anẽ nõ inhĩpêx kati nõ tokyx mẽ kãm ixprãm kêt xwýnhjaja ixpynẽ nõ xpi pa amnhĩ xà htýx kamã ijamak kãm ty. Tirtũm kapêr ã kaga htũm kot wa ijamẽ wa ixkukamã wa ijarẽnh xà hkôt. Anẽ.

Jejus kot mẽhõ hkra nõ mẽkarõmnuti janor ã harẽnh

Matêwre 17.14-21; Rukre 9.37-43

¹⁴Hãmri nhũm Jejus nõ Simãw Pêtre nõ Xiakre nõ Juãwja mẽ akupým hkwýjê hwýr hpõx o mra nõ amnhĩ kukamã hkwýjê pumu nhũm mẽ ohtó nõ mẽ hã akuprõ nõ mẽ kãm kapêr. Nhũm Tirtũm kapêr tũm o mẽ ahkre ho mẽ pa xwýnhjaja mẽmoj tã mẽ hkukjêr o kuhê. ¹⁵Jakamã nhũm Jejus mẽ hwýr hpõx o tẽ nhũm mẽ pikuprõnh xwýnhjaja amnhĩ wýr omu nõ hkĩnh nõ. Hãmri nõ kutã hprõt nõ kãm:

—Pa. Nà ãm hãmri na ka akupýn mẽ ixwýr tẽ. Anẽ.

¹⁶Hãmri nhũm mẽ kãm:

—Kwa mẽmoj tã na ka mẽ axpên mã axàkjêr o akuhê? Anẽ.

¹⁷⁻¹⁸Hãmri nhũm mẽhõ myja kãm:

—Nà ixkra hã na pa mẽ axpên mã ixkapêr. Na pre mẽkarõmnuti ixpê hwýr axà nõ tanhmã ixpê ho nhũm kapêr kêt nõ pa. Nhũm hte xatã tanhmã ixpê ho nhũm pykap amnhĩ rẽ nõ hakwa jamrô ho hikwý. Hãmri nõ ã htýx kamã ama nõ amnhĩ nham o axpên kamnhar týx kumrêx pẽ htýx pa nõ hikwý nõ ixpê omnuj týx nõ. Na hte ã mẽkarõmnuti nhý hã amnhĩ nhĩpêx anhýr o pa. Jakamã na pa ate inhmã ho mex kaxyw man o tẽ nõ tee ri ajapêr. Hãmri nõ ho akôt mẽ pa ho mẽ pa xwýnhjê hwý nhũm mẽ kot inhmã ho mex kaxyw tee ri tanhmã ho hkaprý. Anẽ.

¹⁹Hãmri nhũm Jejus kuma nõ hkôt mẽ pa ho mẽ pa xwýnhjê mã kãm:

—Hêxta waa nõ. Ra mẽ ate Tirtũm nhý hã ixte mẽ ho mex ã ixpumunh ryy htã ixpyrã nõ ã amnhĩ nhĩpêx anhýr kêt nõ. Mãn ka mẽ kormã kaxyw Tirtũm kôt ajamaxpêr týx kêt nõ. E amnẽ ixwýr akra ho tẽ pa omu. Anẽ.

²⁰Hãmri nhũm mẽ hwýr o tẽ nhũm mẽkarõmnuti Jejus pumu nõ tanhmã hkrata o htýx to nhũm pykap tẽm nõ hakwa jamrô nõ amnhĩ rẽnh o nõ.

²¹Nhũm Jejus omu nõ hipêêxã mã:

—Kwa tanhmã na ra kot amnhĩ nhĩpêx ã mytwrý kute? Anẽ.

Nhũm kãm:

—Nà hprĩre rũm na hte ã amnhĩ nhĩpêx anhýr o pa. ²²Na hte mẽkarõmnuti xatã ixpê hpĩr kaxyw kuwy kamã kurẽ nõ gôx kãm kurẽ. Kwa kot ka ate ho mex kukamã axãhpumunh japêr nõ wa ixkamã axukapri nõ akupým inhmã ho mex. Anẽ.

²³Hãmri nhũm Jejus kãm:

—Xãn ka tee ri ixte ho mex kaxyw ixkukamã ajamaxpêr? Nà ixte mẽmoj piitã ho anhýr kaxyw ixãhpumunh týx kẽnã. Kot ka mẽ atõ mẽmoj tã amnhĩ kaxyw ixkôt ajamaxpêr týx hã kot paj amã ho anẽ. Anẽ.

²⁴Hãmri nhũm kuma nõ kãm hkra mex prãm týx xàj kapêr týx nõ kãm:

—Nà na pa amnhĩ kaxyw akôt ijamaxpêr. Nom kot kaj tanhmã ixkrã hto pa akôt ijamaxpêr týx rãhã ho ri ixpa Pahihti. Anẽ.

²⁵ Rôm nhũm mẽ ohtô rax nê hwÿr kormã mra nhũm Jejus amnhĩ wÿr mẽ omu hãmri nê mẽkarõmnuti ja mã kapêr kurê kumrêx. Nê kãm kapêr kãm hihtÿx nê kãm:

—Pa mẽkarõmnuti. E apê mẽ ho mẽ kapêr kêt nê mẽ umar kêt o apa xwÿnh ã pa amã ixkapêr ka inhma. Kêr ka mẽ hkrata pê akato nê ma amõr o mō nê axte tanhmã ho hkêt nê. Anê.

²⁶ Hãmri nhũm tee ri kot kãm karõja ma nê gryk xaj xatã amÿra nê mẽ hkrata o htÿx kumrêx nhũm httertet tÿx o nō. Hãmri nhũm kêp kato nê ma tē nhũm te htyk pyrã nê nō nhũm mẽ tee ri omu nê ra htyk ã hkamnhĩx. ²⁷ Hãmri nhũm Jejus hpa hã kupy nê kãnhmã ãm nhũm akupÿm mex nê kãnhmã xa nê ri mra. Nê tãm kapêr o mra nê umar mex nê.

²⁸ Tã nhũm Jejus hkôt mẽ pa ho mẽ pa xwÿnhjê mẽrohã ma akupÿm amnhĩm hikranh xã hã ixkreja wÿr mra nê hwÿr agjê nê hkrĩ. Hãmri nhũm Jejus kôt mẽ pa ho mẽ pa xwÿnhjaja amnhĩ tã hkukja nê kãm:

—Kwa mẽ inhmã mẽmoj jarê Pahihti. Na pa mẽ tee ri axwakre kamã mẽ hkrata nê mẽkarõmnuti janor kaprÿ. Kwa mon pa mẽ apyrã nê ja ho anhÿr mex kêt nê? Anê.

²⁹ Hãmri nhũm mẽ kãm:

—Nà axtem na mẽkarõmnuti ja. Na htem mẽ nê hanor tokyx anhÿr kêt nê. Na htem ho Tirtũm wÿr tÿx nê rĩ kormã hano. Anê.

Jejus kot htyk kukamã amnhĩ jarênh

Matêwre 17.22-23; Rukre 9.44-45

³⁰⁻³¹ Tã nhũm Jejus mẽ hkôt ri mẽ pa ho pa xwÿnhjê mẽ krĩja rũm hapôj nê ma nhãm mō. Nê ma pyka pê Garirej kahti hkôt mō. Nom mẽ piitã mẽ hkãx ã mō. Jejus kormã kot amnhĩ tã tanhmã hkôt mẽ pa ho mẽ pa xwÿnhjê jahkre hto ho pa jakamã kãm mẽ hkãx ã mẽ o pa hprãm nê. Hãmri nê amnhĩ kukamã mẽ kãm tanhmã amnhĩ jarênh to nê mẽ kãm:

—E kot paj mẽ amã tanhmã amnhĩ jarênh to ka mẽ inhma nê inhmar tÿx nê. Koja mẽ kãm ixprãm kêt xwÿnhjaja tokyx mẽ kãm ixtã amÿnê nhũm mẽ ixpĩ. Kot paj ixtyk ã ixtã apkati axkrunêpxi hãmri nhũm Tirtũm akupÿm ixto ixĩr. Kwa kêr ka mẽ ja ma nê hã anohtÿx nê ho apa. Anê.

³² Hãmri nhũm mẽ tee ri ã kot amnhĩ jarênh anhÿrja ma nê axpên mã:

—Kwa mo na ri ã mẽ pamã amnhĩ jarênh anê? Nã kêp mẽ panhõ Pahi Maati hã kot amnhĩ jarênh kênã kot kêt mẽhõ kupĩ.

Anhÿr o axpên mã harênh o hkôt mō. Hãmri nê ã kot amnhĩ jarênh anhÿr mar prãm kêt jakamã hprĩ hã tanhmã hkukjêr to hkêt nê. ãm akryk hkôt mar o mō.

Mẽ kot amnhĩ to rũnh xwÿnh jarênh

Matêwre 18.1-5; Rukre 9.46-48

³³⁻³⁴ Tã nhũm Jejus mẽ hkôt mẽ pa ho pa xwÿnhjaja kormã ma krĩ pê Kapanau hwÿr mō nhũm hkôt mẽ pa ho mẽ pa xwÿnh pê 12jaja tanhmã amnhĩ kukamã hamaxpêr to hãmri nê axpên mã:

—Kwa mẽ pahtō kot puj we nhÿrmã pahpê pahi nê mẽ ho amnhĩptar rax o ri pahkwÿjê jakre?

Anhÿr o axpên kukjêr o Jejus kôt mō. Nê axpên mã: “Nà pa.” Nhũm mẽ hkwyjaja: “Nã kêt pa.” Anhÿr o hkôt mō. Hãmri nhũm Jejus mẽ mar o mō. Hãmri nhũm mẽ mō nê nhÿri amnhĩm hikranh xã hã ixkre hwÿr pōj nê hwÿr agjê nhũm mẽ kãm:

—Kwa mẽmoj tã na ka mẽ pry hã amnhĩ jarênh o mō? Anê.

Hāmri nhūm mē tee ri kuma nē hpijaam nē. Nē kām tanhmā amnhī jarēnh to hkēt nē. ³⁵ Jakamā nhūm Jejus nhỹ nē mē kām anē nhūm mē kuri hkrī pa nhūm mē kot mē kām mē ho amnhīptār rax prāmta ā mē kām kapēr nē mē kām:

—E mē inhma. Ka mē atō amā mē ho amnhīptār rax prām. Hā kēr ka te apē mē piitā mē kām amarī axapēnh xwýnh pyrāk o amnhī nhīpēx o mē hkōt apa. Jao mēmoj to mē kutā anojarēt rāhā nē. Anē.

³⁶ Hāmri nē amnhī wýr mēhprīre hō mā hpa ho apē nhūm hwýr tē nhūm kumý nē o nhỹ nē hā mē kām kapēr nē mē kām:

³⁷—E mē inhma. Kēr ka mē apē pahi pyrāk o tanhmā amnhī jarēnh to ho ri apa hkēt nē. Ām te amarī ri mē apa pyrāk o amnhī nhīpēx o ri apa. Jao nhỹri mēhprīre hō pumu nē kamā axukaprī nē kām mēmoj tanhmā ho rý kām mēmoj gō. Hāmri nē ā amnhī nhīpēx anhýr o te pa ate tanhmā ixto mex to pyrāk o amnhī nhīpēx. Nē kot ka mē atō pa tanhmā ixto mex to nē te ate Tirtūm o mex pyrāk o amnhī nhīpēx. E kēr ka mē amā amnhī to rūnh prām nē ā amnhī nhīpēx anhýr o ri apa. Anē.

³⁸ Hāmri nhūm Juāw nhỹhýnh tēn mē hwýr axā nē Jejus mā:

—Kwa Pahīhti. O mūj mēhō kēp mē pahkwý hkēt tā anhỹ hā mē nē mēkarōmnuti janor o pa. Pa mē tee ri ja hā omu nē kēp mē pahkwý hkēt jakamā pa mē ā kot amnhī nhīpēx anhýrja nē kām ixkapēr. Anē.

³⁹⁻⁴⁰ Hāmri nhūm kuma nē kām:

—Kwa nā nē tanhmā kām nē hkēt nē. Koja mēhō inhỹ hā aa mē kot mēmoj pumunh kēt kwý ho anē hāmri nē kēp mē panhīō nē ri mē pahkwým tanhmā mē ahkre hto ho pa hkēt nē. Ra mē pahkōt kot amnhī nhīpēx mā kēnā. Jakamā kwa mē ja nē tanhmā kām nē hkēt nē. Kwār māmri ā amnhī nhīpēx anē. Ja mex kēnā.

⁴¹—Koja mēhō nhỹri mē atō amā kōr ā apumu nē hamaxpēr o: “Kwa Jejus kōt ri pa xwýnh mūj kām kōr. E pa kām gō hkwy kē ho ixkō.” Anhýr o hamaxpēr nē apē ixkwý hā amā gō hkwy ka ho ixkō. Nhūm ām kot amā gō pix nhōr nhūm ate ho akōm tā nhūm Tirtūm atā omu nē ho mex rax nē. Anē.

*Mē pahte amnhī tomnuj pymaj tanhmā amnhī nhīpēx to hā mē pajarēnh
Matēwre 18.6-9; Rukre 17.1-2*

⁴² Nhūm Jejus arī hkōt mē pa ho mē pa xwýnhjē mā kapēr nē mē kām:

—Nē mē kot ixkōt amnhī xunhwýr tohtuj anhýr xwýnhjaja. Koja mēhō ma mē hwýr tē nē inhnē mē kām kapēr. Mē kot mē mar nē tanhmā amnhī tomnuj to hprām xāj hēx rom mē kām kapēr nhūm mē mar xā hkōt tanhmā amnhī tomnuj to. Hā koja Tirtūm ja hā omu nē kot inhnē tanhmā kām nē xwýnhhta pumu nē homnuj týx nē. Te mē kot mēhō pynēnh nē mut ā kēn pytūi hō nhōr nē ma o htēm nē gō xupým rax kām mēnh pyrāk o hipēx. Te ho ja pyrāk no ām homnuj týx o hakre.

⁴³⁻⁴⁷—E kwa mē o kora. Kot kaj mē anhīhkra rý apar o tanhmā amnhī tomnuj to. Hā kēr ka mē axte ā amnhī nhīpēx anhýr pymaj te ate amnhī pé anhīhkra rý apar krāhyr nē mēnh pyrāk o amnhī nhīpēx nē axte ā amnhī tomnuj anhýr kēt nē. Rý ka mē ano ho mēmoj punuj pumu. Hāmri nē kām ajamaxpēr pix o apa pymaj te ate amnhī pé ano katōk nē mēnh pyrāk o amnhī nhīpēx nē nhām arī kurē kumrēx. Kēr ka mē ā amnhī nhīpēx o apa rāhā nē. Hāmri nē nhýrmā ty nē ma Tirtūm mē wa inhō krī hwýr api. No kot ka mē arī akutā ano nē arī akutā apar nē arī akutā anhīhkra rāhā ri mrar tā tōhā

tanhmã ho amnhĩ tomnuj to. Hãmri nê nhÿrmã ty nê ma mẽ kot amnhĩ xã htÿx kamã hamak tũm xã pẽ kuwy maatita wÿr ma apa.

⁴⁸ Kuwyja kamã na htem mẽ kot amnhĩ tomnuj mÿrapẽ amnhĩ xã htÿx kamã hamak rãhã ho pa ho pa hãmri nê aa hapõx kêt nê.

⁴⁹ ã koja mẽ kot amnhĩ tomnuj o mẽ pa xwÿnh piitã amnhĩ nhĩpêx anhÿr rãhã nê pa ho pa. ⁵⁰ Jakamã kwa kër ka mẽ axpẽn to mex rãhã ho ri apa. Nom axpẽn kãm agryk nê tanhmã axpẽn nhĩpêx to ho ri apa hkêt nê. Anê.

Nhũm pre ã Jejus hkõt ri mẽ pa ho mẽ pa xwÿnhjê jahkre anê.

10

Mẽ pahte axpẽn kaga nê Jejus kot mẽ pahkurẽ

Matẽwre 5.31-32, 19.1-12; Rukre 16.18; mããnẽn Wam Korõt 7.10-16

¹ Tã nhũm Jejus mẽ hkõt mẽ pa ho pa xwÿnh mẽrohã ma pyka pẽ Jutej wÿr mõ. Hãmri nê pyhti pẽ Jotãw ã rê nê hpãnhã ma xarmã mõ. Nhũm mẽ axte mẽ hã akuprõ nhũm kê Jejus axte mẽ ahkre ho xa. ² Hãmri nhũm Parijew nhõ xwÿnh kwÿjaja hwÿr mra. Mẽ kot hêx rom kamã hamak nê mar nê tanhmã ho kapêr punuj to kaxyw hwÿr mra nê kãm:

—Pa. Ot pa mẽ mẽmoj tã akukjêr kaxyw awÿr mra. Kwa tanhmã na pre amnepêm finat Mojesja mẽ pahte mẽ pahprõ kaga hã mẽ panhigêtjê mã karõ hto? Xã koja mẽ pahprõ mẽ pakapêr hkwyãm tanhmã amnhĩ nhĩpêx to pu mẽ mÿrapẽ hkaga nhũm Tĩrtũm ja hã mẽ pahpumu nhũm ja kãm mex nê nã? Anê.

³ Hãmri nhũm mẽ kãm:

—Tanhmã na pre Mojes Tĩrtũm nhÿ hã ja hã mẽ amã karõ hto? Anê.

⁴ Nhũm mẽ kãm:

—Nã na pre harênh o:

Kêr ka mẽ aprõ kaga kaxyw hãmri nê ate hkaga hã amnhĩ jarênh ã kaga nê kãm agõ nê ri kormã hkaga. Anê.

Na pre ã mẽ inhmã ja hã karõ anê. Anê.

⁵ Hãmri nhũm mẽ kãm:

—Tÿ nom mẽ kãm Tĩrtũm kapêr kõt amnhĩ nhĩpêx prãm kêt jakamã na pre ã mẽ kãm ja jarênh anê. ⁶ Amnepêm mẽmoj piitã hkrax kãm na prem axpẽn kaga hkêt nê. Na pre Tĩrtũm wam myja nhĩpêx nê hpãnhã kãm hprõ nhĩpêx. Axpẽn kaxyw wa hipêx. ⁷ Jakamã na hte mẽmyjaja hprõ kaxyw nê gryk ã katorxã nê hipêxã wa hkaga nê ãm hprõ kõt pix mã pa ho pa. ⁸ Te wa tipxi nê ri wa pa pyrãk o axpẽn nhĩpêx o pa. ⁹ Tĩrtũm tãm kot axpẽn mã wa õr kênã kot kêt mẽhõ wa kot axpẽn kaga kaxyw tanhmã wa hipêx to rÿ tanhmã wa kãm kapêr to. Anê.

Nhũm pre ã Jejus mẽ kãm kapêr anê. ¹⁰ Hãmri nê hkõt mẽ pa ho mẽ pa xwÿnhjê mẽ akupÿm ixkrem agjê nhũm mẽ kãm:

—Kwa aprĩ hã mẽ inhmã mẽ kot axpẽn kaga hã mẽ harênhhta jarê pa mẽ ixpri hã kuma nã. Anê.

Hãmri nhũm mẽ kãm:

¹¹ —Nã kot kaj mẽ aprõ kaga nê hpãnhã nhãm mẽhõ ho aprõ nhũm Tĩrtũm noo mã te ate wam aprõ kamã nhãm aprõ nyw o amnhĩkati pyrãk. Tĩrtũm pẽ ja omnuj tÿx nê. Rÿ koja mẽhõ hprõ kaga ka hpãnhã ho aprõ nhũm Tĩrtũm noo mã te ate wam mjên pẽ ho amnhĩkati pyrãk. Ja mããnẽn Tĩrtũm pẽ omnuj tÿx nê.

¹² —Nê mẽnijaja. Kojã mẽhõ ni ra mjên kaga nê hpãnhã nhãm mẽhõ ho mjên. Ja mex kêt. Mjên krax kêp mjên kumrêx kênã kot kêt hkaga nê hpãnhã nhãm

hõ ho mjên. Koja anê nhùm Tirtùm noo mã te kot wam mjên kamã nhãm hõ ho amnhĩkati pyràk nhùm Tirtùm pê ja omnuj týx nê. Anê.

Jejus kot amnhĩ nê mēhprjê janor kêt ã harēnh

Matêwre 19.13-15; Rukre 18.15-17

¹³Tã nhùm Ijaew kwýjaja Jejus wýr mē hkrarejê jamý nê mē o mra. Kot mē hã ãhkra jaxwýr nê mē ho Tirtùm wýr kaxyw hwýr mē o mra. Hãmri nhùm hkõt mē pa ho pa xwýnhjaja tee ri ja hã mē omu nê mē kãm:

—Kwa mo kaxyw na ka mē Jejus wýr mē o mra? Kormã mē ràxre kênã. Mē ma akupým mē o mra nã? Anê.

¹⁴Hãmri nhùm Jejus ja hã mē kuma nê mē kãm:

—Kwa nã kwār mē mãmrĩ ixwýr mē o mra. Mē ri inhnê mēhprjê kurê hkêt nê. Anê.

Hãmri nê mē kãm hpa ho apê nhùm mē hwýr mē o mra nhùm mē kuri kuhê. Hãmri nhùm mē hã hkõt mē pa ho mē pa xwýnhjê mã kãm:

—E mē jarejê pumu. Na htem hamakêtkati nê hkĩnh nê ri pare. Mē kãm amnhĩ to rũnh prãm kêt nê ri pare. Tã Tirtùm kõt mē kot amnhĩ nhĩpêx o ri mē pa xwýnhjaja na htem mē urák nê kãm amnhĩ to rũnh prãm kêt nê ri pa.

¹⁵—Na hte jarejaja hipêêxã nê katorxã wa kapër ma nê wa hkõt ri amnhĩ nhĩpêx o ri pare. Tã ixpê Tirtùm kot mē awýr inhmēnh xwýnh na pa. Kot ka mē amã ixkõt amnhĩ xunhwýr prãm hã kot kaj mē jarejê kot amnhĩ nhĩpêx pyràk o amnhĩ nhĩpêx. Jao ixkapër ma nê ixkõt ri amnhĩ nhĩpêx mex o ri apa. Anê.

¹⁶Hãmri nê mēhprjêjê jamý nê mē hã ãhkra jaxwý nê mē ho Tirtùm wý nê kãm:

—Pa Papaj. E kër ka jarejê ho mex rãhã nê kê mē mex nê pa. Anê.

Hikãxpore rax xwýnh jarēnh

Matêwre 19.16-22; Rukre 18.18-23; mããnēn Wam Ximotre 6.6-10; Xiakre 5.1-

6

¹⁷Tã nhùm Jejus mē hkõt mē pa ho pa xwýnhjaja nhýri pry hã mō nhùm Ijaew krãhtũmja omu nê hwýr tē nê mēmoj tã hkukja nê kãm:

—Pa mē ijahkre xwýnh maati? E kwa inhmã mēmoj jarê. Nhýrmã Tirtùm ri ixtür tũm nê ixpa hprãm xãj mēmo kot pa we ho anhyr o ri ixpa? Ate amnhĩ to mex pix o ri apa xwýnh jakamã kwa inhmã tanhmã ja jarēnh to. Anê.

¹⁸Hãmri nhùm kãm:

—Xã ate ixpê Tirtùm kwý hã ixpumunh kõt na ka ixte urák nê amnhĩ to mex xwýnh ã ijarê? Tirtùm pix na kot amnhĩ to mex rãhã xwýnh jakamã kot kaj ã ijarēnh anê nê ixpê Tirtùm Kra hã ijarê. Jao urák nê ixte amnhĩ to mex xwýnh ã ijarê. Nã xãn ka ãm atýx ri amnhĩ krã hkõt ã ijarēnh anê?

¹⁹—Tirtùm mex o mex jakamã kot kaj amã nhýrmã kuri atir tũm nê apa hprãm hãmri nê ra kot mēmoj tã mē amã karõ xã hkõt amnhĩ nhĩpêx o ri apa. Ra ate mar mex kênã. Na pre mē amã:

Kër ka mē axãhkĩnh o ri apa hkêt nê.

Nê mē hpar kêt nê.

Nê tanhmã axêx kêt nê.

Nê axêx rom tanhmã mē nokupyr to hkêt nê.

Nê mē kęp mē hprõ ho amnhĩkati hkêt nê.

Nê anhipêêxã mē akatorxã wa hã apijaàm nê wa ho mex pê wa kutã anojarêt rãhã ho ri apa.

E kot kaj amā nhÿrmā Tirtūm kuri atūr tūm nē apa hprām hā kot kaj ā amnhī nhīpêx anhÿr o ri apa. Anē.

²⁰ Hāmri nhūm kuma nē kām:

—Kwa ixprīre ri ra ā ixte amnhī nhīpêx anhÿr o ri ixpa kēnā. Nom te ixtūr tūm nē ixpa kaxyw ixte kormā tām kêt pyrāk. Anē.

²¹ Hāmri nhūm kuma nē hprī hā omu nē kām hapê nē. Hāmri nē kām:

—Nā kormā mēmoj pyxire nē arī. Na ka amā akukrêx rax kīnh tÿx o Tirtūm jakre. Jakamā kēr ka ma akupÿm anhōrkwÿ hwÿr tē nē akukrêx rax o wēnē hpa. Nē kàxpore jamÿ hāmri nē ma mē kēp amrakati xwÿnhjē mā ōr o ri apa. Hāmri nē akupÿn tē nē arī ri ixkôt apa ho apa. Anē.

²² Hāmri nhūm kuma nē tee ri hikukrêx rax kukamā hamaxpēr. Kām hapê jakamā kām kām ĩhkra karo hprām kêt nē. Hāmri nē tee ri Jejus kot ā kām hā karō anhÿrja ma nhūm ja kām mex kêt nhūm awjanā nē hkaprī nē ma akupÿm tē. ²³ Hāmri nhūm Jejus tee ri omu nē hkôt mē pa ho mē pa xwÿnhjē mā kām:

—Hēxta waa nē. Koja mē hikukrêx rūnh xwÿnhjaja ohtō nē kām mē hikukrêx japê xài Tirtūm mē wa ixri htūr tūm nē pa ho pa hkêt nē. Wa ixte amnhī nhīpêxja mē kēp hihtÿx. Anē.

²⁴ Hāmri nhūm mē tee ri kapērja ma nhūm Jejus mē hamaxpēr kôt mē omunh mex jakamā axte tanhmā mē kām harēnh to nē mē kām:

—Nā Tirtūm mē wa ixte amnhī nhīpêxja na mē hikàxpore rūnh xwÿnhjaja pē ja hihtÿx. ²⁵ Mē kām hikukrêx rax mā ĩhkra karo hprām kêt rāhā tee kām Tirtūm kôt amnhī nhīpêx prām kaprÿ. Te ho mēhō kot menh kagō hā hkre nē kām kagō katōk prām kêt rāhā kām guhkrax kām ar prām kaprÿta pyrāk. Anē.

²⁶ Hāmri nhūm mē kuma nē tee ri amnhī kukamā hamaxpēr nē kām:

—Kwa no mē ixpiitā mē inhmā mē ixkukrêx japê kēnā. Jakamā xà kot paj mē ixpiitā nhÿrmā war ari ixtūr tūm nē ixpa ho ixpa hkêt nē? Anē.

²⁷ Hāmri nhūm mē kām:

—Nā kot kaj mē amnhī krā hkôt mē amā mē akukrêx japê mā anhūrer kêt nē. Ām Tirtūm pix na hte ja kaxyw tanhmā mē akrā hto ka mē amā akukrêx japê hkêt nē. Jao ra mē apē Tirtūm mē wa ixri atūr tūm nē mē apa ho mē apa mā xwÿnh. Anē.

²⁸ Hāmri nhūm Simāw Pêtre kām:

—Kwa Pahihti na pa prem agryk ā mēmoj piitā hkaga hpa nē akôt ixpa ho ixpa. Jakamā xà kot paj mē nhÿrmā war ari ixtūr tūm nē ixpa ho ixpa kêt nē nā? Anē.

²⁹ Hāmri nhūm kuma nē hkôt mē pa ho pa xwÿnh piitā mē kām:

—Nā ka mē atō inhmā tanhmā amnhī to ho apa kaxyw akwÿjê re nē ma inhmā tanhmā amnhī nhīpêx to ho ri apa. Anhōrkwÿ re rÿ atō rÿ atōx rÿ aprō nē akrajê re. Rÿ akatorxā nē anhīpêxā wa are. Rÿ akukrêx piitā rer pa hāmri nē ma ixkapēr o mē piitā mē hkre ho ri mē hkôt apa. ³⁰ Hā kot paj amnhī tā mē apumu nē mē atō mex rax nē. Hāmri ka mē ma mē kām ixkapēr jarēnh o mē hkôt apa nhūm mē kot mē amar xwÿnh kwÿjjaja mē ama nē kām mē akīnh nē. Nē ra mē ate akwÿjê rer par tā mē tāmjaja te mē apē mē hkra rÿ mē htō rÿ mē htōx pyrāk o mē anhīpêx. Jao tanhmā mē ato mex to ho pa.

—Nē koja mē kām ixprām kêt xwÿnhjaja ixtā tanhmā mē atomnuj to hā ka mē nhÿrmā ma Tirtūm mē wa inhō krī hwÿr api nē wa ixkuri amex nē atūr tūm nē apa ho apa. ³¹ Nom kēr ka mē ja hā amnhī pumunh kôt amnhī to rax xwÿnh ā amnhī to jarkrar kêt nē. Mē kot amnhī to rūnh xwÿnh ā amnhī jarēnh xwÿnhjaja koja mē nhÿrmā amnhī to rūnh kêt ā amnhī pumu. Nē mē

kot amnhĩ to hkryre xwýnhjaja koja mẽ nhÿrmã amnhĩ to rũnh ã amnhĩ pumu. Anẽ.

Jejus kot amnhĩ kukamã axte amnhĩ jarẽnh

Matêwre 20.17-19; Rukre 18.31-34

³² Tã nhũm Jejus hkõt ri mẽ pa ho mẽ pa xwýnhjê mã kapër pa hãmri nẽ ma Jerujarẽ hwÿr mẽ o mō. Ra kamã kãm hkurẽ xwýnhjaja kot hpĩr ã amnhĩ jarẽnh tã ma hwÿr mẽ o mō. Jakamã nhũm mẽ tee ri hkukamã hamaxpër o hkõt mō. Nhũm mẽ amarĩ mẽ hkõt mrrar xwýnhjaja haxwÿja kãm ma nẽ. Hãmri nhũm Jejus mẽ kęp 12ta o mō nẽ hkwÿjê hkãx ã amnhĩ kukamã tanhmã mẽ kãm amnhĩ jarẽnh to ho mō nẽ mẽ kãm:

³³ —E na pu mẽ ra Jerujarẽ hwÿr mō. Kot puj mẽ hwÿr pøj nhũm mẽ kãm ixkurẽ xwýnhjaja patre krãhtũmjẽ mẽ Tĩrtũm kapër tũm o mẽ ahkre xwýnhjê nhĩhkram ijaxã. Hãmri nhũm mẽ kãm Tĩrtũm kapër kõt amnhĩ nhĩpêx prãm kêt xwýnhjaja ixpĩr kaxyw mẽ kãm ixtã amÿnẽ ³⁴ nhũm mẽ mar xã hkõt tanhmã inhĩpêx kati hto. Nẽ mẽ hkwÿjjaja ixtã hpër o axkẽ nẽ ixtã akunha. Nẽ mẽ hkwÿjjaja tanhmã ijapry hto nẽ ixtã argõx rẽ nẽ ixtak hãmri nẽ ixpĩ. Koja mẽ ã inhĩpêx anẽ. Nom kot paj ixytk ã ixtã apkati axkrunẽpxi nhũm Tĩrtũm akupÿm ixto ixtĩr. Anẽ.

Xiakre mẽ Juãw wa kot amnhĩ to Jejus wÿr ã wa harẽnh

Matêwre 20.20-28; Rukre 22.24-30; mããnẽn Piripos 2.3-8; Wam Pêtre 5.3

³⁵ Tã nhũm Jepetew kra Xiakre mẽ Juãw wa tanhmã hamaxpër to nẽ Jejus mã kãm:

—Kwa mẽ ijahkre xwýnh. Pa wa amã mẽmoj jarẽ ka wa inhmã “ÿ” anẽ nã? Anẽ.

Hãmri nhũm wa kãm:

³⁶ —Ko wa mamrĩ inhmã mẽmoj jarẽ pa wa ama mãn. Anẽ.

³⁷ Hãmri nhũm wa kãm:

—Nã kot kaj nhÿrmã ate mẽ piitã mẽ ho amnhĩptar kaxyw nhÿ pa wa akutã anhĩjê. Nẽ wa papxipix ixpê anhõ kôwenatõ nẽ akutã anhĩjê nẽ ato nhÿ. Ja na pa wa inhmã hprãm. Anẽ.

³⁸ Hãmri nhũm wa kãm:

—Nã na ka wa ãm atÿx ri ã amnhĩ to ixwÿr anẽ. Koja mẽ tokyx ixpĩ pa amnhĩ xã htÿx kamã ijamak rax nẽ ty. Tã xã koja mẽ ixpyrà nẽ ã war anhĩpêx anẽ ka wa ixpyrà nẽ amnhĩ xã htÿx kamã ajamak rax kãm ty nã? Anẽ.

³⁹ Hãmri nhũm wa kãm:

—Tÿ. Nã kot pa wa ijaxwÿja anẽ nẽ apyrã nẽ amnhĩ xã htÿx kamã ijamak kãm ty. Anẽ.

Hãmri nhũm wa kãm:

—Nã ãm hãmri na ka wa ja hã amnhĩ jarẽ. War ate ixpyrà nẽ ixkõt amnhĩ xã htÿx kãm ajamak kãm atyk mã kênã. ⁴⁰ Tã nom war ate amnhĩ to ixwÿrta ã kot paj tanhmã war amã nẽ hkêt nẽ. Inhõ Papaj tãm koja ja kaxyw mẽhõ japêr nhũm inhĩhkõ hã nhÿ. No pa kot paj ri ja kaxyw mẽ atõ rênh kêt nẽ. Anẽ.

⁴¹ Hãmri nhũm wa urãk nẽ Jejus kõt mẽ pa ho mẽ pa xwýnh kwÿjjaja ã wa kot amnhĩ to hwÿr anhÿr ã wa kuma nẽ wa kamã gryk nẽ. ⁴² Jakamã nhũm Jejus mẽ piitã mẽ ho akuprõ nẽ mẽ kãm:

—E mẽ inhma. Na hte ljaew kêt xwýnhjê nhõ pahihtijaja ã amnhĩ nhĩpêx anhÿr o ri pa nẽ amarĩ hkrĩ xã kamã hkrĩ ho hkrĩ. àhpumunh jakamã amarĩ ixkre kre jakry kamã hkrĩ ho hkrĩ nẽ kãm mẽ àpênh xwýnhjê pix mã mẽmo mẽ àpênh ã karõ ho hkrĩ. Na htem ã amnhĩ nhĩpêx anẽ. Nẽ mẽ kot amnhĩm

mex ã harënh prãm xàj tanhmã mẽ ho mex to ho pa. ⁴³⁻⁴⁵ Tã no mẽ kajaja kêr ka mẽ atõ amã amnhĩ to rax prãm hãmri nẽ ho mẽ kot amnhĩ nhĩpêx pyrãk kêt nẽ. Mẽ piitã mẽ kutã anojarêt rãhã ho ri apa. Kêt paa. Mẽ ate inhmã axãpênh o apa kaxyw na pa pre mẽ awÿr ixwÿrk kêt nẽ. ãm pa ixte tanhmã mẽ amã amnhĩ nhĩpêx to ho ixpa kaxyw na pa pre mẽ awÿr wrÿ. Mẽ ate nhÿrmã kuwy wÿr apa pymaj mẽ anẽ ixyk kaxyw na pa pre mẽ awÿr wrÿ. Jakamã kot kaj mẽ atõ amã amnhĩ to rax prãm hã kêr ka ixpyrã nẽ akwÿjẽ kutã anojarêt rãhã ho ri apa. Hãmri nẽ inhmã te ate amnhĩ to rax o amnhĩ nhĩpêx pyrãk o amnhĩ nhĩpêx. Anẽ.

Jejus kot akupÿm Paximew o mex ã harënh

Matêwre 20.29-34; Rukre 18.35

⁴⁶ Tã nhũm Jejus mẽ hkõt mẽ pa ho mẽ pa xwÿnhjaja kormã Jerujarẽ hwÿr mõr ri ra krĩ pẽ Jeriko hkõt mõ. Hãmri nhũm mẽ ohtõ nẽ mẽ hã ajêt nẽ mẽ hkõt mõ. Nhũm mẽhõ myja pry nhĩhkrep nhÿ. Ximew kra Paximew nohkre xwÿnhja pry kamã ahwÿr o hkrĩ. ⁴⁷ Hãmri nhũm Jejus mẽ hkwÿjaja hwÿr htêp o mõ nhũm amnhĩ wÿr mẽ kuma nẽ mẽ kot Jejus nhĩxi jarënh o mõr ã kuma hãmri nẽ kãx pẽ kãm kapêr nẽ amnhĩ to kuwÿ nẽ kãm:

—Pa Jejus? Nã apẽ mẽ inhõ Pahihti mex kumrêx na ka. Te apẽ amnepêm anhĩgêt pahihti Tawĩ kot amnhĩ nhĩpêx pyrãk. Jakamã kwa we ixkamã axukapri nẽ akupÿm ixto mex kêt wehe. Ixte amnhĩ kaxyw akõt ijamaxpêr xwÿnh na pa. Anẽ.

⁴⁸ Hãmri nhũm Jejus kukamã mẽ mrar xwÿnhjaja kuma nẽ kãm:

—Tk. Kwa akapêr kêt nẽ nhÿ nã. Anẽ.

Tã nom nhũm ãm mẽ kuma nẽ xatã amnhĩ to kuwÿ. Kÿx pẽ amnhĩ to kuwÿ nẽ axte kãm:

—Kwa ixkamã axukapri nẽ akupÿm ixto mex Pahihti. Anẽ.

⁴⁹ Hãmri nhũm Jejus kuma nẽ xa nẽ hkõt mẽ pa ho mẽ pa xwÿnhjê mã kãm:

—E mẽ atõ hwÿr tẽ nẽ hpa hã apy nẽ amnẽ ixwÿr o tẽ. Anẽ.

Hãmri nhũm mẽ kuma nẽ nohkre xwÿnhhta mã kapêr nẽ kãm:

—E tee ri amnhĩ kukamã ajamaxpêr kêt nẽ. Na atã karõ. E tokyx kãnhmã xa. Anẽ.

⁵⁰ Hãmri nhũm mẽ kuma nẽ hkĩnh tÿx nẽ. Nẽ kãnhmã harĩ nẽ amnhĩ nẽ õ kajaati mẽ nẽ hwÿr htêm kurê kumrêx. ⁵¹ Hãmri nhũm Jejus kãm:

—Pa mo na? Tanhmã kot pa ato? Anẽ.

Hãmri nhũm kãm:

—Nã akupÿm inhmã ixrĩt mex prãm Pahihti.

⁵² Anẽ nhũm kãm:

—Tõe. Nã ra ate amnhĩ kaxyw inhmã ajamaxpêr tÿx jakamã kot kaj akupÿm arĩt mex kurê kumrêx. E mãmrĩ ma akupÿm tẽ. Anẽ.

Nhũm akupÿm rĩt mex ã amnhĩ pumu nẽ hkĩnh o hkĩnh. Hãmri nẽ Jejus ã ajêt nẽ ma hkõt hkĩnh nẽ tẽ.

11

Jejus kot Jerujarẽ hwÿr ar ã harënh

Matêwre 21.1-11; Rukre 10.28-40; Juãw 12.12-19

¹ Tã nhũm Jejus mẽ hkõt mẽ pa ho mẽ pa xwÿnhjê mẽ kormã Jerujarẽ hwÿr mõ. Hãmri nẽ krĩ pẽ Petake mẽ hõ pẽ Petãn wÿr ahtêp o mõ. Hixêt pẽ Oriwêhti kahti ri na pre krĩja wa xa. Jakamã nhũm Jejus hkõt mẽ pa ho mẽ pa xwÿnh wa ho axkrut nẽ mẽ amnhĩ kukamã wa kumẽ ² nẽ wa kãm:

—E wa ma krī mūj wŷr mē ixkukamā wa tē. Hāmri nē hwŷr pōj nē nhŷri jumēnre nyw mā ē nē ām xwŷnhhta pumu. Kormā mē kot hā hkrī hkēt kumrēx xwŷnhhta. ³Ka wa omu nē kām ē xā hpôt nē man akupŷn ixwŷr o tē. Koja mēhō war apumu nē hā tanhmā war amā kapēr to ka wa ā kām ijarēnh anē nē kām: “Nā mē panhō Pahihti na hā karō pa wa hwŷr tē.” Anhŷr o kām ijarē. E wa ma hwŷr tē. Anē.

⁴Hāmri nhūm wa kuma nē ma hwŷr htēm kurē kumrēx nē hwŷr pōj. Nhūm Jejus kot wa kām hā karō xā hkôt jumēnre nywreta pumu. ⁵Hāmri nē kām ē xā hpôt o xa nhūm kuri mē kuhē xwŷnhjaja tee ri hā wa omu nē wa kām:

—Kwa mo kaxyw na ka wa kām ē xā hpôt o xa? Kwa kot ka wa mē ixpē ho ahkī nā? Anē.

⁶Hāmri nhūm wa mē kām:

—Nā mē panhō Pahihti na wa inhmā hā karō pa wa hwŷr tē. Wa ixte ma hwŷr o ixtēm kaxyw. Anē.

Hāmri nhūm mē wa kām:

—Tŷ? Tôe wa māmri ma kām o tē. Anē.

⁷Hāmri nhūm wa ma akupŷm Jejus wŷr o tē. Hāmri nē kaxyw amnhī xē hkwŷ hkwŷr nē kām ho hkô kahty hpa nē kām ho htŷx nē o xa nhūm Jejus hā nhŷ nē mō. ⁸Nē kormā Jerujarē hwŷr hixēt ā àpir o mō. Nhūm mē kot omunh o kuhē xwŷnhjaja hkīnh nē ma hkukamā pry ho mex kaxyw amnhī xē hkwŷ hkwŷr nē ho kām uty. Nhūm mē hkwŷjaja nhŷri pō hkwŷ jakā nē o mra nē hkukamā kām uty. ⁹⁻¹⁰Nhūm mē hixēt ā api nē ahpar mā wrŷk o mō nhūm mē piitā kax pē Tirtūm mex o mex ā harēnh o hkôt mō. Nhūm mē hkwŷjaja kukamā mra nhūm mē hkwŷjaja hapu hā mra nhūm prem piitā hkôt Tirtūm mex o mex ā harēnh o mō. Nē harēnh o: E ota Tirtūm kot mē pahwŷr mēnh xwŷnhhta ra pōj. Nā ām hāmri na mē pahwŷr wrŷ. Ja mex kumrēx.

Kēp mē panhō Pahihti mex na. Koja mē panhīgēt pahi Tawi pyrā nē mē pahto amnhīptā nē mē pahto mex o pa.

Ām hāmri na Tirtūm mē pahwŷr kumē.

Tirtūm mex kumrēx. Ām mex o mex. Kukwak ri pix mā na pu htem pajamakētkati nē paxāmnhīx papa rāhā ho papa.

Anhŷr o Jejus kôt harēnh o mō. Kot mē ho amnhīptār kurē kumrēx ā hkamnhīx nē hkīnh nē ā hkôt kapēr anhŷr o mō. ¹¹Jao ra Jerujarē hwŷr pōj nhūm Jejus Tirtūm mā amnhī jarēnh xā hā ixkre hwŷr tēn axā. Nom nhūm ra amŷkry htŷx jakamā nhūm hwŷr axā nē ām hkre pumunh o xa hāmri nē akupŷm kato nē hkôt mē pa ho mē pa xwŷnh pē 12jē mē nhūm mē ma akupŷm Petān wŷr mra.

Jejus kot pī hpār pē fikēhti mā kapēr ā harēnh

Matēwre 21.18-22

¹²Tā nhūm apkati nhūm Jejus mē hkôt mē pa ho pa xwŷnhjē mērohā Petān rūm hapōj nē ma akupŷm Jerujarē hwŷr mra. Nhūm Jejus ra kām prām nē mō.

¹³Hāmri nē amŷm mēmo pī hpār hōptī rax pē fikēhti pumu nē hamaxpēr o:

—E pa hwŷr tē nē ô hkwŷ rē nē kuwô mân. Anē.

Hāmri nē hwŷr tē. Nhūm kormā ô kaxyw ô mytwŷr kator kêt jakamā nhūm ô hkēt nē ām hō pix nē xa. ¹⁴Hāmri nhūm hwŷr tē nē tee ri ô japēr nē ām hō pix pumu. Hāmri nē tee ri omu nē kām:

—E kot kaj axte axô hkēt kumrēx.

Anhŷr o kām kapēr nhūm hkôt mē pa ho mē pa xwŷnhjaja hā kuma.

*Jejus kot Tirtüm nhörkwÿ hwÿr àr ã harënh**Matëwre 21.12-17; Rukre 19.45-46; Juãw 3.13-22*

15-17 Tã nhÿm Jejus më hkôt më pa ho më pa xwÿnhjaja Jerujarë hwÿr agjë në Tirtüm mã amnhÿ jarënh xà hã ixkre hwÿr agjë. Nhÿm Jejus tee ri kamã më kuhê xwÿnhjë pumu. Nhÿm më ra ixkre kamã axtem në môx në ôwëhti në tuuti ho wënë ho kuhê. Ixkre hwÿr mrar xwÿnhjaja kot haprôr në Tirtüm mã amnhÿ jarënh kaxyw kãm hpar në ôr kaxyw më kãm ho wënë. Nom axtem në hã ohtô rax kãm më kãm ho wënë nhÿm më hkwyÿjaja më kãm më hikãxpore ho anhÿpa. Hãmri nhÿm Jejus më hwÿr axà në tee ri më kot ã amnhÿ nhÿpëx anhÿr ã më omu në më kãm akir në më kãm:

—Tk. Kwa Tirtüm kapër ã kagã htÿm kot ôrkwÿ jarënh kot:

Inhörkwÿja ãm pika piitã hkôt më piitã kot inhmã amnhÿ jarënh xà hã ixkre pix kaxyw na.

Anhÿr o kot harënh tã ka më axtem në kamã ã amnhÿ nhÿpëx anhÿr o akuhê. E kwa më ma mra në ajapôx tokyx anë. Anë.

Nhÿm pre ã më kãm kapër anhÿr pë më ahkre hãmri në ixkreja në më kator pa. ¹⁸ Hãmri nhÿm patre krãhtÿmjê më Tirtüm kapër tÿm o më ahkre xwÿnhjaja tee ri ã më hipëx anhÿr ã omu në kapër ma në kamã gryk tÿx në. Hãmri në më kot hã ãmnënh kaxyw tanhmã axpën mar to në axpën mã:

—Tk. Kwa na më ohtô në kãm mar prãm në. Koja më anë në gryk ã më pahkaga në axte më pakapër mar kêt në. Kwa pu më kupÿ ri. E tanhmã kot puj më ho nê kupÿ? Anë.

¹⁹ Tã nhÿm myt axà nhÿm Jejus më hkôt më pa ho pa xwÿnhjaja Jerujarë rÿm hapôj në ma nhÿri amnhÿm hikranh kaxyw mra.

*Më pahte tanhmã mëmoj tã Tirtüm wÿr to hã më pamã karô**Matëwre 6.14-15, 17.20; Makre 11.13; Juãw 14.13; mãänën Xiakre 1.6; Wam Juãw 3.22*

²⁰ Tã nhÿm apkati nhÿm Jejus më hkôt më pa ho më pa xwÿnhjaja Jerujarë hwÿr akupÿm mra. Hãmri në axte pÿ hpär pë fikëhtita pumu. Jejus ra kot kãm kapër xwÿnhhta pumu nhÿm ra grã pa në xa. ²¹ Hãmri nhÿm Simãw Pëtre Jejus kot tanhmã pÿ mã kapër toja mã hamaxpër në hã kãm:

—Kwa më ijahkre xwÿnh. Ga mëmoj müj pumu. Jãã ate fikëhti mã akapër xwÿnhhta na grã par kumrëx në xa. Anë.

²²⁻²³ Hãmri nhÿm kuma në më piitã më kãm:

—Tÿ nã ãm hãmri na pa më amã ixkapër. Kot kaj më mëmo kaxyw Tirtüm mã ajamaxpër tÿx pë mëmoj tã awÿnhÿm ama në amã hprãm xà hkôt tanhmã amã hipëx to. Ka më amnhÿ kaxyw Tirtüm mã ajamaxpër tÿx pë hixët müj mã akapër në kãm: “E xa në ma tã në gô xujanãr kãm mrô.” Anhÿr o kãm akapër nhÿm amar xà hkôt ã amnhÿ nhÿpëx anë në tãn kamã mrô. ²⁴ Kot kaj më mëmoj tã Tirtüm wÿr në kaxyw ãm pix mã ajamaxpër tÿx në nhÿm amã ho anë.

²⁵⁻²⁶ —Në kot kaj më Tirtüm mã amnhÿ jarënh kaxyw në ra mëhõ kot tanhmã ato mã ajamaxpër. Hãmri në ja ho ajamakëtkati kurê kumrëx në axte kãm ajamaxpër kêt në. ãm mëmoj nyw pix mã ajamaxpër o tãm amnhÿ nhÿpëx o apa. Hãmri nhÿm Tirtüm kaxkwa rÿm ja hã apumu në apyrã në ate tanhmã amnhÿ tomnuj to ho hamakëtkati në axte kãm hamaxpër kêt në. Anë.

*Mëhõ kapër kôt Jejus kot më ahkre hã më kot hkukjêr**Matëwre 21.23-27; Rukre 20.1-8*

²⁷ Nhũm mẽ akupỹm Jerujarē hwỳr agjê nhũm Jejus kê axte Tĩrtũm mã amnhĩ jarēnh xà hã ixkre hwỳr axà. Nhũm hkõt mẽ pa ho mẽ pa xwỳnhjaja hkõt hwỳr mra nê hkõt agjê nê kormã kamã kuhê. Hãmri nhũm Ijaew krãhtũmjê mẽ mẽ kot Tĩrtũm kapêr tũm o mẽ ahkre xwỳnh mẽ mẽ õ patre krãhtũmjaja Jejus pumu nê hwỳr mra nê hêx rom tanhmã kãm kapêr to. Na pre ra Jejus ixkreja nê mẽmoj to wênê xwỳnh mẽ kãxpore o mẽ hpinhpanh xwỳnhjê jano nhũm mẽ tee ri ja hã omu nê kamã gryk tỳx nê. Jakamã nhũm akupỹm mẽ hwỳr axà nhũm mẽ axte omu nê hwỳr mrrar kurê kumrêx ²⁸ nê kãm:

—Kwa mẽ inhmã amnhĩ jarê. Mêhõ nhỹ hã na ka hte ã amnhĩ nhĩpêx anhỹr o ri apa? Mêhõ na pre mẽ ixwỳr amê ka pre mõi? Nà xà amnhĩ krã hkõt na ka hte ã amnhĩ nhĩpêx anhỹr o ri apahti? E kwa mẽ inhmã amnhĩ jarê. Anê.

²⁹ Nhũm Jejus kot tanhmã mẽ hamaxpêr to hkõt mẽ omunh mex jakamã mẽ kãm:

—Nà kot pa ixkumrêx mẽmoj tã mẽ akukja. Ka mẽ inhmã harê pa rĩ kormã mẽ amã tanhmã amnhĩ jarēnh to. ³⁰ Finat Juãw Paxisja ã kot paj mẽ akukja. Mêhõ nhỹ hã na pre hte mẽ hkrã kumrãr o pa? Xà amnhĩ krã hkõt nà xà Tĩrtũm nhỹ hã? E mẽ atõ inhmã harê. Anê.

³¹⁻³² Hãmri nhũm mẽ kuma nê tee ri kot tanhmã kutã kãm harēnh to hkukamã hamaxpêr nê axpên mã:

—Kwa tanhmã kot puj mẽ kãm ja jarēnh to? Mẽ kot mar o kuhê xwỳnhjaja na htem Juãw Paxis kêp Tĩrtũm nhỹ hã kapêr jarēnh xwỳnh ã axpên mã harēnh o pa. Jakamã kot puj mẽ kãm kot amnhĩ krã hkõt mẽ hkrã kumrãr o pa hã harê nhũm mẽ tee ri mẽ pama nê mẽ pakamã gryk nê. Nê mẽ paxêx rom ã kãm mẽ pakapêr anhỹr ã mẽ pahpumu nê kên o mẽ pahtak o mẽ panhĩmex. No kot puj mẽ kãm Tĩrtũm nhỹ hã mẽ hkrã kumrãr ã harê nhũm mẽ pama nê mẽ pamã: “Kwa ã kot anhỹr kênã na ka prem kapêr mar tã ixkõt amnhĩ xunhwỳr kêt nê?” Anê. Nà kot puj pêr mẽ kãm tanhmã harēnh to hkêt nê. Kot puj mẽ ãm kãm aa te mẽ pahte ja jarēnh mar kêt pyrãk o harê. Anê.

Mẽ kot tanhmã kãm nê nhũm kot ta pãnhã tanhmã mẽ kãm nê pymaj nhũm mẽ tee ri tanhmã kãm nê hprãm kaprỹ ho kuhê.

³³ Hãmri nê Jejus mã kãm:

—Konên. Mẽ ixte mêhõ nhỹ hã kapêr o pa hã omunhre hã. Anê.

Hãmri nhũm mẽ kuma nê mẽ kãm:

—Tk. Tõe kot pa xep ijaxwỳja mẽ amã tanhmã amnhĩ jarēnh to hkêt nê. Ijaxwỳja ixte mêhõ nhỹ hã ã ixte amnhĩ nhĩpêx anhỹr o ri ixpa hã amnhĩ pumunhre hã. Anê.

12

Mẽ àpênh punuj xwỳnhjê jarēnh

Matêwre 21.33-46; Rukre 20.9-18

¹ Nhũm Jejus arĩ Ijaew krãhtũm mẽ mẽõ patre krãhtũm mẽ Tĩrtũm kapêr tũm o mẽ ahkre xwỳnhjê mã kapêr o xa. Nê mẽ kãm mẽ kot tanhmã hipêx to hkukamã mẽ kãm tanhmã amnhĩ jarēnh to. No ãm hã kuxi nê mẽ kãm awjarê nê mẽ kãm:

—Koja mêhõ hpur ã hkwyjê mã karõ. Mẽ kot kamã kãm àpênh kaxyw mẽ kãm karõ. Hãmri nhũm mẽ ma hwỳr mra nê kamã mẽmo hy hkre nê hkre pa. Hãmri nê pu hã kahê hpa nê pur kaêx kãm ixkre hprêk nhĩpêx. Mẽ kot himõk ã mẽ kot kêp àhkĩnh pymaj mẽ hapêr o hkrĩ kaxyw. Hãmri nê hipêx pa nhũm mẽõ patrãwja awry hã krĩ hõ hwỳr nojarêt nê mẽ kãm tanhmã hpur jarēnh

to nê mē kām: “E or ixpurta nō. Kê kamā mēmoj kà hpa ka mē māmri kamā awjamý nê ho axkjê. Hāmri nê ixkutêp inhō jaxwý nê māmri anhō tanhmā ho hprām xā hkôt tanhmā ho.”

—Anhýr o mē kām kapêr hāmri nê ma mō. ²Tā nhūm ra pur kām mēmoj hkà pa. Nhūm hpur nhō dōn arī krī hō kamā hā ujahkre ho pa htā kuri kām àpênh xwýnhjê hōja nhūm akupým mē hwýr kumê. Mē kot kām ô hkwy nhōr nhūm ma kot kām o mōr kaxyw ma mē hwýr kumê nhūm ma akupým mē hwýr mō. Mōō nê ra mē hwýr pōj. ³Hāmri nhūm mē omu nê axtem nê homnuj nê. Nê unê nê htak nê akupým hano nhūm ý kamā ma akupým mō. ⁴Hāmri nhūm ô patrāwja tee ri omu nê hpānhā ja mē nhūm ma mē hwýr mō. Mōō nê mē hwýr pōj. Hāmri nhūm kê wem omu nê mā ho anê nê. Unê nê htak nê hkrāx pē htak nê akupým hano nhūm wamta pyrā nê ma akupým ý kamā mō. ⁵Hāmri nhūm axpên pānhā kām mē àpênh xwýnh kwýjê rē nhūm mē axpên pānhā ma mē hwýr pa. Ma mē hwýr pa nê pōj nhūm mē te ho wamtajê mē hipêx pyrā nê mē hkwyjê pynê nê htak rax nê mē hano nê mē hkwyjê pa. ⁶Nhūm mē ô patrāw mē harênh ma nê tee ri amnhī kukamā hamaxpêr nê hamaxpêr o: “Héxta waa nê. Tanhmā kot paj we amnhī nhīpêx to nê inhōta kwý jamý? Nà kot paj mē hwýr ixkraja mē. Inhmā hapê htā kot paj mē hwýr kumê kê ma mē hwýr mō. Hāmri nhūm mē kēp ixkra hā omu nê tanhmā ixpê ho hkêt nê. Nê jatā inhmā kām inhōja kwý gō nhūm man ixwýr o tē. Nà kot paj anê.”

—Anhýr o hamaxpêr hāmri nê ma mē hwýr hkraja mē nhūm ma mē hwýr mō.

⁷—Tā mē hwýr hpōx o mō nhūm mē amým amnhī wýr omu nê kēp hkra hā omunh kurê kumrêx nê hā axpên mā amýnê nê axpên mā: “E. Nà onêj hpur nhō dōn krata tē. Koja nhýrmā ô papaj mýrpê amnhūm pur ā pyka pytā nê ho ô. Jakamā e pu mē kupī nê kēp hpur ho arīk nê ho panhō. E kwa tokyj pu mē kupī ri.” Anê.

⁸—Rōm nhūm ra mē hwýr hpōx o tē nê ra pōj nhūm mē unê nê pur nê ho kato nê ahkà kamā kupī. Ā mē ujarênh kot anhýr. Anê.

⁹Nhūm pre ā Jejus Ijaew krāhtūmjê mā ujarênh anê. Hāmri nê hā tanhmā mē hkukjêr to nê mē kām:

—E mē inhmā mēmoj jarê. Koja pur nhō dōnja tee ri mē kot hkra hpīr ā harênh ma hāmri nê tām mē hwýr mō hāmri nê tanhmā mē hipêx to wehe? Nà koja ma mē hwýr mō nê mē himex pa hāmri nê hpānhā nhām hpurta ā mēmojê rē. ¹⁰Mān ka prem ra Tirtūm kapêr ā kaga htūm kot ja jarênh ma nà? Harênh kot:

Na prem kēn o amnhūm ôrkwy nhīpêx kaxyw hāmri nê kēn maati pumu nê htýx omnuj ā hkamnhix nê hkaga. Mē kot hkaga htā nom nhūm Tirtūm mē kurom mex o kot kēn piitā hakrenh par ā omunh kurê kumrêx.

¹¹ām hāmri na pre ā mex ā omunh anê. Anê.

Ā Tirtūm kapêr ā kaga htūm kot harênh kot anhýr. Anê.

¹²Nhūm pre ā Jejus mē kām ujarênh kām mē harênh anê nhūm mē amnhī tā kuma. Tirtūm kapêr tūm o mē ahkre xwýnh mē mē ô patre krāhtūm mē Ijaew krāhtūmjaja nhūm mē kot mē kām kēn maati kaga xwýnhjê jarênh o te mē tām harênh pyrākja ma nhūm ja mē kēp omnuj nê. Jakamā nhūm mē kām unênh nê haxār prām nê. Nom amnhī tā kām mē kot mar o kuhê xwýnhjê puma nê.

¹³Jakamā na prem ma mra nê hapôj hāmri nê Jejus wýr Parijew nhō xwýnh mē pahi Erox kôt mē pa xwýnh kwýjê rē. Mē kot hêx rom mēmoj tā hkukjêr nhūm kot mē mar nê tanhmā Rōm nhō xwýnhjê nhō pahi Sesti kapêr kuhpa

hã ri tanhmã mẽ kãm nẽ nhũm mẽ kot mar kaxyw. ¹⁴ Jakamã nhũm mẽ ma hwÿr mra nẽ hẽx rom kãm kapẽr nẽ kãm:

—Kwa Jejus? Nã ãm hãmri na ka hte Tirtũm kapẽr o mẽ ahkre mex nẽ. Na ka hte mẽ kamã akahak o apa hkêt nẽ. Nẽ mẽ kot tee ri mẽ kot tanhmã ato kapẽr punuj to htã ka hte arĩ aprĩ hã mẽ ahkre mex o ri apa. E kwa mẽ inhmã mẽmoj jarẽ. Rõm nhõ pahihiti kot mẽ pahpẽ Ijaew mẽ pahte kãm kãxpore hkwy nhõr ã mẽ pamã karõta. Kwa xà ja amã mex nã? Xà kot pu mẽ kãm kugõ? Xà kot pu mẽ kãm õr kêt nẽ? E kwa mẽ inhmã harẽ. Anẽ.

¹⁵ Nhũm prem ã hẽx rom ja hã hkukjẽr anhÿr tã no nhũm Jejus mẽ hamaxpẽr ã mẽ omunh mex mẽ mẽ kãm:

—Tk. Kwa mon ka mẽ axẽx rom ja hã ixkukja? E mẽ atõ inhmã kãxpore htÿxre hõ gõ pa omu. Anẽ.

¹⁶ Hãmri nhũm ja kãm ja gõ nhũm kupy nẽ kãnhmã kupẽ nẽ mẽ kãm:

—E mẽhõ nhĩxi nẽ mẽhõ karõ na hã? Anẽ.

Anẽ nhũm mẽ kãm:

—Pahi Sesti karõ nẽ hixi na hã.

¹⁷ Anẽ nhũm mẽ kãm:

—Tÿ. Tõ kër ka mẽ mãmri kãm hkwy nhõr o apa. Hã hkarõ nẽ hã hixi. Tãm kot hipẽx xwÿnh jakamã õ na. No mẽ kajaja na pre Tirtũm mẽ anhĩpẽx nhũm mẽ apẽ õ jakamã kwa kër ka mẽ kapẽr kõt pix mã ri amnhĩ nhĩpẽx o ri apa. Anẽ.

Nhũm pre ã mẽ kãm kapẽr anẽ nhũm mẽ piitã mar o kuhẽ. Nhũm mẽ kot hẽx rom hkukjẽr xwÿnhjaja amnhĩ jaẽr pẽ ã kãxpore jarẽnh anhÿrja ã kuma nẽ axpẽn mã:

—Kwa mẽ paxẽx rom mẽ pahte hã hkukjẽr tã nhũm ãm hãmri mẽ pakutã mẽ pamã harẽ. Kwa tanhmã kot puj wem hkukjẽr to nhũm pahi Sesti kapẽr kwÿm ri mẽ pamã mẽmoj jarẽ? Anẽ.

Hãmri nẽ tee ri tanhmã hkukjẽr to hkukamã hamaxpẽr o kuhẽ.

Akupÿm mẽ htÿr xwÿnhjẽ jarẽnh

Matẽwre 22.23-33; Rukre 20.27-40; Juãw 6.21, 6.38-40; mããnẽn Wam Korĩt 6.14, 15.12-28; Wam Tesarõn 4.13-18

¹⁸ Tã nhũm Satusew nhõ xwÿnh kwÿjaja. Mẽ kot akupÿm mẽ htÿr mã hamaxpẽr kêt xwÿnhjaja na pre mẽ. Tã mẽ kot mẽ htyk nẽ mẽ hapẽx ã mẽ hkamnhix jakamã na prem axpẽn mã Jejus jarẽnh o:

—E kwa pu mẽ ma hwÿr mra nẽ mẽmoj xihtÿx ã hkukja kẽ mẽ pama nẽ tee ri tanhmã mẽ pamã kapẽr to hkukamã hamaxpẽr. Hãmri nhũm mẽ piitã ja hã omu nẽ ãhpumunh kêt ã omunh kurẽ kumrẽx. E tokyx ma pu mẽ hwÿr. Anẽ.

Hãmri nẽ ma hwÿr mra nẽ Parijew nhõ xwÿnhjẽ pyrã nẽ hẽx rom kãm:

¹⁹ —Pa Jejus? Kwa mẽ inhmã mẽmoj jarẽ. Na pre finat Mojesja Tirtũm nhÿ hã ã mẽ panhĩgẽtjẽ mã karõ anẽ. Mẽ hkra hkêt rãhã mẽ pa nẽ mẽ htyk xwÿnhjaja nhũm mẽ harẽnh o:

Koja mẽhõ hprõ hãmri nẽ kamã hkra hkêt rãhã pa nẽ ty. Hã koja hkõt htõja hpãnhã hprõ o hprõ nẽ kamã hkra. Hãmri nhũm kato nẽ te kẽp htõ htyk xwÿnhhta hkra pyrãk. Anẽ.

Na pre ã Mojes Tirtũm nhÿ hã ja hã mẽ kãm karõ anẽ. ²⁰ Jakamã kwa ga mẽ ixujarẽnh ma. Koa mẽmojjaja mẽ kot axpẽn to htõ xwÿnhjaja kẽp 7. Nhũm kot waja hprõ. Nẽ wa pa nhũm myja kormã hprõ kamã hkra hkêt rãhã ty. ²¹ Nhũm hkõt htõ hõta hpãnhã hprõ ho hprõ nẽ wa axpẽn to pa. Nhũm haxwÿja kamã hkra hkêt rãhã ty. Nhũm hkõt htõ hõta haxwÿja ho hprõ nẽ wa axpẽn to pa grire nhũm wamta wa urãk nẽ kamã hkra hkêt rãhã ty. ²² Hãmri

nhūm htō hwỳjaja piitā nija pyxi nē axpēn pānhā ho hprō nom mēhō kamā hkra hkēt rāhā htyk pa. Hāmri nhūm mē hprōta mē hkōt amnhī to hitep nē ty.
 23 Tā Tirtūm kot akupým nhýrmā mē ho htír ronhýx nhý nhýx kēp nija mjēn kumrēx? Ra piitā kot ho hprō kēnā. E kwa mē inhmā ja jarē. Anē.

24 Hāmri nhūm Jejus ā mē ujarēnh anhýrja ma nē mē kām:

—Tk. Nā mē ate Tirtūm kapēr ā kagā htūm mar mex kēt. Nē mē aprī hā tanhmā Tirtūm kute hā omunh kēt jakamā na ka mē ā tỳx ja hā ixkukjēr anē.

25 Kormā mē htír ri mē kot Tirtūm kōt amnhī xunhwýr xwýnhjaja na htem ty hāmri nē Tirtūm nhō krī kamā axte kām hprō hprām kēt pa. Rý ni japēr nē kām mjēn prām kēt nē pa. Hāmri nē Tirtūm kapēr o mē wrýk xwýnhjé pyrā nē axte htyk kēt nē. Ām htír tūm rāhā nē pa ho pa.

26 —Nom mē ate akupým mē htír kēt ā mē hkamnhīxja kot paj ixprī hā mē amā harē. Amnepēm na pre Tirtūm pī hpōk kamā tanhmā Mojes mā kapēr to. Mān ra mē ate mar. Na pre kām:

Ixpē Apraāw nhō Tirtūm na pa. Nē määnēn ixpē Apraāw kra Ijak mē htāmnhwý Jako wa ō Tirtūm na pa.

Anhýr o Mojes mā amnhī jarē nhūm kuma nē hā kagā. 27 Kēp apu arī mē htyk rāhā nhýx pre ā mē harēnh anhýr kēt nē. Nhýx pre mē harēnh o: “Amnepēm Apraāw nē hkra nē htāmnhwý mē htír ri ixpē mē ō Tirtūm na pa pre.” Anhýr o nhýx pre mē harē. Nom na pre ā amnhī jarēnh anhýr kēt nē. Mē pamā te Apraāwja mē htyk nē mē hapēx pyrāk. Nom nhūm prem ra Tirtūm ri akupým htír nē mex nē pa ho pa. Tā ka htem Tirtūm kapēr kwým ri akupým mē htír kēt ā mē harēnh o apa. Anē.

Tirtūm kapēr maati jarēnh

Matēwre 10.37, 22.34-40; Rukre 10.25-27; määnēn Wam Juāw 2.15, 5.3; Apokarip 2.4

28 Tā nhūm Tirtūm kapēr tūm o mē ahkre xwýnhjé hō mē hwýr tē nē mē kot axpēn mā kapēr ā mē omunh o xa. Hāmri nē Jejus kot tanhmā Satusew nhō xwýnhjé mā kapēr mex toja ma nē kām:

—Nā ām hāmri na ka ā mē kām ja jarēnh anē Pahihti. Kwa inhmā mēmoj jarē. Na pre Tirtūm ahpýnhā mēmoj to 10 nē mē pamā hā karō. Mē pahte hkōt amnhī nhīpēx o ri papa kaxyw hā mē pamā karō. Tā nhý kapēr na mex o kot hkwyjé jahkrenh wehe? Anē.

29 Hāmri nhūm kām:

—Nā Tirtūm kapēr xohtōō. Kapēr piitā hkōt mē pahte amnhī nhīpēx o papaja na kām hprām. No pixi na mē pahte hkōt amnhī nhīpēx o papaja nhūm kām hprām tỳx o kot hkwy jakrenh. Kapēr mex maati na ja. Na pre kapēr o: E mē apē Ijaew nhō xwýnhjaja. Ixpē mē anhō Tirtūm ā ixpīxi mex na pa.

30 Jakamā kēr ka mē amā ixkīnh tỳx o mēmoj piitā hakrenh pa. Jao mē anhī piitā ho amā ixkīnh tỳx kumrēx o ri apa.

31 Anhýr o na pre mē pamā karō. Nē hkōt ja:

Kēr ka mē nhām mē hipēx o te ka amā amnhī tā ma pyrāk o mē hipēx o ri apa. Jao tām mē hipēx rāhā ho ri apa. Anē.

E ja wa kumrēx na Tirtūm kām mē pahte hkōt amnhī nhīpēx o ri papa hprām tỳx nē. Anē.

32 Hāmri nhūm kuma nē kām:

—Nā ām hāmri na ka ja jarē Mējahkre xwýnh. Tirtūm pyxi mex kēnā.

33 Amnepēm na pre htem kām amnhī jarēnh kaxyw nē kām mēmoj gō nē rī kormā tanhmā kām amnhī jarēnh to. Tā nom kot puj mē ā ate harēnhhta kōt

amnhĩ nhĩpêx anhÿr o papa jao mẽ panhĩ piitã pamã Tirtũm kĩnh. Nẽ mẽ pamã hkĩnh o mẽmoj piitã hakrenh pa. Nẽ nhãm mẽ hipêx o te mẽ papamjaja pamã amnhĩ tã ma pyràk o mẽ hipêx. Jao tãm mẽ hipêx rãhã ho ri papa. Kot puj mẽ ã amnhĩ nhĩpêx anẽ nhũm Tirtũm kãm ja mex o mẽ pahte kãm mẽmoj nhõrta jakre.

Anhÿr o kãm kapêr. ³⁴Hamaxpêr mex pẽ ã Jejus mã kapêr anẽ nhũm kuma nẽ kãm:

—Nã ãm hãmri na ka ja jarẽ. Na ka ra mẽ kot Tirtũm kõt amnhĩ nhĩpêx o amnhĩ nhĩpêx nyw pumunh mex o mō. Nã te ate tokyx hkõt amnhĩ xãm kaxyw pyràk. Anẽ.

Hãmri nhũm mẽ kãm hkurẽ xwÿnhjaja tee ri wa kot axpẽn mã kapêr mar o kuhẽ nẽ axte kãm mẽmoj tã hkukjêr pyma nẽ. Ra tee ri mẽ kot hêx rom mẽmoj tã hkukjêr kaprÿ jakamã axte tanhmã hkukjêr to hkêt nẽ.

Jejus kêp pahi finat Tawi nhõ Pahihti hã harẽnh

Matêwre 22.41-46; Rukre 20.41-44; mããnẽn Rõmãn 1.3-4

³⁵Hãmri nhũm Jejus arĩ Tirtũm mã amnhĩ jarẽnh xã hã ixkre kamã amnhĩ tã mẽ ahkre. Nom te nhãm mẽhõ hã mẽ hkukjêr pyràk amnhĩ tã mẽ hkukja nẽ mẽ kãm:

—E mẽ inhmã mẽmoj jarẽ. Tirtũm kapêr tũm o mẽ ajakre xwÿnhjaja na htem tanhmã mẽ amã Tirtũm kot mẽ akaxyw ãm mã xwÿnh jarẽnh to nẽ mẽ amã harẽnh o: “Koja kêp pahi finat Tawi kanrêhã htãmnhwÿ koja.” Anhÿr o kot mẽ amã harẽ. ãm kêp kanrêhã htãmnhwÿ pix ã mẽ amã harẽnh o pa. No na pre pahi Tawija kêp kanrêhã htãmnhwÿ hã harẽ nẽ mããnẽn kêp õ pahihti hã harẽ. Tã nom nhũm Tirtũm kapêr tũm o mẽ ajahkre xwÿnhjaja na htem urã nẽ kêp pahihti hã mẽ amã harẽnh kêt nẽ. ãm kêp kanrêhã htãmnhwÿ pix ã harẽ. Kwa mo na htem Tawi pyrà nẽ kêp õ pahi hã harẽnh kêt nẽ? ³⁶Na pre Tawi tãm Tirtũm kapêr tũm kwÿ hã kagã nẽ tanhmã Tirtũm kot mẽ akaxyw ãm mã xwÿnhja jarẽnh to. Tirtũm Karõ nhÿ hã tanhmã harẽnh to. Tirtũm mex ã mẽ grer xãja kwÿ hã kagã nẽ hã kagã ho:

Tirtũm na pre inhõ Pahihti mã ã kapêr anẽ nẽ kãm: “E amnẽ ixwÿr tẽ nẽ inhĩhkõ hã nhÿ nẽ inhmã mẽ ho amnhĩptar o akrĩ. Kot paj mẽ kot kãm akurẽ xwÿnh piitã mẽ unẽn pa nẽ awÿr mẽ o mra nẽ anhĩhkram mẽ haxã pa.” Anhÿr o pre kãm kapêr. Anẽ.

³⁷—Na pre ã Tawi Tirtũm kot Kris mã kapêr jarẽnh nẽ kêp õ pahi hã kagã anẽ. Tã nom Tirtũm kapêr tũm o mẽ ajahkre xwÿnhjaja na htem kêp Tawi htãmnhwÿ pix ã ri axpẽn mã harẽnh o ri pa. No kêt Tawija na pre kêp õ Pahihti hã harẽnh o pa. Anẽ.

Nhũm pre ã Jejus mẽ kãm amnhĩ jarẽnh anẽ nhũm mẽ mar o kuhẽ xwÿnhjaja kuma nẽ hkĩnh nẽ. Nẽ kãm axte mar prãm nẽ.

³⁸Hãmri nhũm arĩ mẽ ahkre ho nhÿ nẽ mẽ kãm:

—Kwa mẽ o kora. Kêr ka mẽ Tirtũm kapêr tũm o mẽ ahkre ho mẽ pa xwÿnhjê kot amnhĩ nhĩpêx o amnhĩ nhĩpêx kêt nẽ. Mẽ omu nẽ ãm mẽ omu nẽ mẽ kot amnhĩ nhĩpêx kõt amnhĩ nhĩpêx kêt nẽ. Na htem piitã mẽ hã hpijaam kaxyw ê mex pix kãm ri pa. Nẽ mẽ kot amnhĩm mẽ rũnh ã mẽ harẽnh nhũm mẽ kot amnhĩ jarẽnh marja na htem kãm hprãm. ³⁹Nẽ Tirtũm kapêr o mẽ ahkre xã hã ixkre kamã mẽ kãm amnhĩ to rũnh xwÿnhjê hkrĩ xã mex pix kamã na mẽ kãm hkrĩ hprãm. Nẽ mẽmoj tã mẽ apkur xã hã arĩgro hã ma hkwyjê hkõt mẽ apkur xã hã ixkre hwÿr akuprõ nẽ kãm mẽ kot amnhĩ to rũnh xwÿnhjê hkrĩ xã mex pix kamã hkrĩ hprãm.

⁴⁰ —Ně mẽ kot mẽ mjên htyk xwỳnhjê ho mex o pa hã amnhĩ jarênh tã amnhĩ to hêx. Nê na htem axtem nê mẽ nokupyr kaxyw mẽ hwỳr mra nê mẽ kãm: “E ot pa awỳr ato ajuta kaxyw tẽ. Ra amjên apê htyk jakamã kot paj pam amã akukrêx jamãr o ixpa.” Anê hãmri nê mẽ kêp mẽ ôrkwỹ pytà nê amnhĩ mẽ kêp mẽ hikukrêx piitã ho hapêx. Te tãm kot mẽ hipêx o pa pyrãk nom tãm mẽ hipêx kêt nê. Nê te tãm amnhĩ nhĩpêx pyrã nê Tĩrtũm mã amnhĩ jarênh japijêê ho kuhê. Te mẽ kot Tĩrtũm mã ãm hãmri amnhĩ jarênh pyrãk tã hkwỳjaja kot ja hã mẽ omunh pix kaxyw nhũm mẽ ã kãm amnhĩ jarênh anê. Mỳrapê koja mẽ mex kêt nê. Koja Tĩrtũm tanhmã mẽ hipêx kati hto. Jakamã kwa kêr ka mẽ ã mẽ kot amnhĩ nhĩpêx anhỳr o mẽ pa xwỳnhjê kôt amnhĩ nhĩpêx o ri apa hkêt nê. ãm kwarĩ ho kwarĩ. Anê.

Kêp mjên htyk xwỳnh jarênh

Rukre 21.1-4

⁴¹ Nhũm Jejus arĩ Tĩrtũm mã amnhĩ jarênh xã hã ixkre kamã mẽ omunh o xa. Na pre hte Ijaew ixkreja o mex kaxyw ixkre jamãr xwỳnhjê mã hikãxpore hkwỳ nhõr o pa. Nhũm mẽ hikãxpore rũnh xwỳnhjaja hwỳr agjê nê kãxpore gjênh xã kamã hkwỳ ho rax nê hagjê nê ma akupỹm mra. ⁴² Tã nhũm mẽhõ ni pê mjên htyk xwỳnhjaja haxwỳja hwỳr axã. Kêp amrakati kumrêx. Nê hikãxpore tỳxre ãm pijakrutre htã kãxpore rũnh xwỳnhjê hpãnhã ixkreta wỳr tẽ. Nê kãm Tĩrtũm kĩnh xaj kãxpore gjênh xã kamã hamê kumê hãmri nê kato nê ma akupỹm tẽ. ⁴³ Hãmri nhũm Jejus amỹm ã kot amnhĩ nhĩpêx anhỳr ã omunh o xa nhũm ja kãm mex nê. Hãmri nê hkôt mẽ pa ho mẽ pa xwỳnhjê mã harê nê mẽ kãm:

—E mãn ka mênire htêm mũj pumu. Na pre mjên kêp ty nhũm kêp amrakati nê hikãxpore grire htã amnhĩ pê ôr pa. Kwỳjê rom kãm Tĩrtũm kĩnh xaj amnhĩ pê ôr pa. Apkur xã hã hikãxpore na. ⁴⁴ Kêt mẽ hkwỳjaja na hte hikãxpore hkwỳ pix o mra nê gjênh xã kamã hagjê nom arĩ mẽ hikãxpore rũnh. No nija na mẽ urãk nê kãm hikãxpore japê hkêt nê. Nê ho õxỳ hkêt nê ãmnhĩx piitã o tẽ nê ôr pa. Anê.

13

Jejus kot nhỹrmã mẽmoj piitã ho hapêx ã harênh

Matêwre 24.1-14; Rukre 21.5-9, 21.17-19; mããnên Wam Ximotre 4.1; Sikũn Ximotre 3.1

¹ Tã hãmri nhũm Jejus kôt mẽ pa ho mẽ pa xwỳnhjaja arĩ Tĩrtũm mã amnhĩ jarênh xã hã ixkre kaxwỳnh pumunh o kuhê nê hã Jejus mã:

—Hêxta waa nê. Ixkreja mex kumrêx Pahihti. Kên rũnh o mẽ kot hipêx jakamã mex o mex. Nê mẽ kot ri Tĩrtũm mã hkĩnh xã nhõr nêj haxwỳja piitã mex kumrêx. Anê.

² Hãmri nhũm mẽ kãm:

—Nà mex tã koja nhỹrmã mẽ kãm Tĩrtũm kurê xwỳnhjaja grành pa. Koja arĩ kên axkrutre axpên mỳnh nê nõr kêt kumrêx. Koja piitã anghrà nê ahpỳnhã ri hikwỹ.

Anhỳr o mẽ kãm kapêr. ³ Hãmri nê ixkreja rũm kato nê ma tẽ nê hixêp pê Oriwêhti hã api nê hã nhỹ. Tĩrtũm nhõrkwỹ kutã hixêtja nhũm hã api nê hã nhỹ. Hãmri nhũm Simãw Pêtre mẽ Xiakre mẽ Juãw mẽ Andreja ma hkôt mra. Ahte hkôt mra nê mẽ kot Tĩrtũm mã amnhĩ jarênh xã hã ixkre grành par ã hkukja nê kãm:

4—Kwa xà ãm hãmri koja mẽ ã ixkreja nhĩpêx anê? E aprĩ hã mẽ inhmã harê. Xà koja mẽ nhỹrmã kugrà nà xà koja mẽ tokyx ho anê? Kwa mẽmo koja we wjy ri tanhmã amnhĩ nhĩpêx to? Anê.

5-6 Hãmri nhũm mẽ kãm:

—Nà kot paj mẽ amã harê. Nom nhỹrmã mẽmoj piitã hapêx kaxyw tanhmã amnhĩ nhĩpêx to kumrêx kot paj mẽ amã harê ka mẽ inhma. Koja mẽ ohtõ nê mẽ apê ixkwjê hwyr mra nê hêx rom te pa ixte amnhĩ nhĩpêx pyrãk o amnhĩ nhĩpêx o pa. Nê tanhmã mẽ amã amnhĩ jarênh to nê mẽ amã: “E pa na pre Tirtũm mẽ awyr inhmê. Ixpê kaxkwa rũm ixwryk xwýnhhta na pa.” Anhỹr o mẽ akõt mẽ amã amnhĩ to hêx o pa. Nê mẽ amã: “E na pa mẽ ato amnhĩptãr kaxyw mẽ awyr wry.” Anhỹr o mẽ amã amnhĩ jarê. Nom kêr ka mẽ ama nê ãm mẽ ama. Mẽ kot amnhĩ to hêx xwýnh na mẽ. Kormã akupýn ixpõx xà hã arĩgroja kormã.

7—Nê koja mẽ nhỹri awry hã axpên par o pa. Nê mẽ atãã axpên par o pa. Nom kêr ka mẽ harênh ma nê ri tee ri tokyx mẽmoj piitã hapêx ã hkamnhĩx kêt nê. Mẽmoj piitã hapêx xà hã arĩgroja kormã.

8—Nê koja mẽmoj piitã hapêx kaxyw nhũm ahpýnhã ri pika piitã hkõt mẽ pa xwýnh piitã pika hõ nhõ xwýnhjê kutã amnhĩ xunhwý nê axpu nê axpên pa.

—Nê koja pika piitã hkõt tanhmã mẽ à kuteja mẽ hamý nhũm mẽ amnhĩ xà htýx kãm hamak o pa. Nhũm nhỹri pika httertet týx nê. Nê nhỹhýnh pika hkwy kamã mẽ pa xwýnhjaja prãm xáj pikaprãr pa. Tã nom kormã mẽ kot amnhĩ xà htýx kãm hamak xà hkrax pix na ja. Te mẽnjaja pijagri kaxyw nê kormã õhy xà hpýnh pyrãk. Koja mẽmoj piitã hapêx kaxyw nê ã amnhĩ nhĩpêx anê.

9—E pa hpãnhã mẽ kot Tirtũm mã amnhĩ jarênh xà hã ixkre grãnh par xwýr ri mẽmoj tanhmã kot hkukamã amnhĩ nhĩpêx to hã hã harê. Mẽ ate hã ixkukjêr xwýnhhta kot paj mẽ amã harê. Nà koja mẽ kãm ixkurê xwýnhjaja mẽ awyr mra nê ixtã mẽ apynê nê mẽ atomnuj nê. Nê ma mẽ pikuprõnh xà hã ixkre hwyr mẽ ato mra nê kamã mẽ kãm mẽ ato kapêr punuj nê nhũm mẽ kuma nê ma mẽ ato mra nê mẽ ajagjê. Mẽ ate ixkõt apa ho apa xwýnh ã ã mẽ anhiêx anê. Nê mẽ õ pahihiti hwyr mẽ ato mra nê mẽ kãm tanhmã mẽ ato kapêr punuj to. ¹⁰ Tã nom kwa kêr ka mẽ kutã akuhê nê mãmrĩ tãm mẽ kãm ijarênh o akuhê. ¹¹ Nom kêr ka mẽ kãm amnhĩ jarênh kukamã tee ri ajamaxpêr o ri amã mẽ uma hkêt nê akuhê. Rỳ mẽ ajamaxpêr o: “Héxta waa nê. Mẽ kot ixkukjêr ã arĩgrota ã tanhmã kot pa we ri mẽ kãm amnhĩ jarênh to?” Anhỹr o tee ri amnhĩ kukamã ajamaxpêr kêt nê. Koja Tirtũm Karõ tanhmã mẽ akra hto ka mẽ ý hã akatãt kõt tanhmã mẽ kãm amnhĩ jarênh to.

¹²—Nê mẽ atõ nê mẽ anhiêxã nê mẽ akrajaja koja mẽ ixtã mẽ atã amýnê nê ma pahĩ hwyr mẽ ato mra nê kãm mẽ ajarê nhũm mẽ kuma nê mẽ ajagjê nê mẽ akwýjê pa. ¹³ Koja mẽ piitã ixkõt mẽ akamã gryk nê ã kãm mẽ akurê ho pa anê. Nom mẽ kot ã mẽ anhiêx anhỹr mã tã kêr ka mẽ amnhĩ to htýx nê ixkaga hkêt nê. Mẽ kot mẽ apar tã ka mẽ kaxkwa kamã akupým atĩr kurê kumrêx. Hãmri nê mẽ kurom Tirtũm mẽ wa ixri atĩr tũm nê amex rãhã nê apa ho apa. Mẽ kot tanhmã mẽ ato htã mẽ apê akupým kaxkwa kamã atĩr tũm nê apa mã xwýnh jakamã kwa tee ri amnhĩ kukamã ajamaxpêr o ri apa hkêt nê. Anê.

Mẽ pahomnuj týx xwýnh maati hã harênh

Matêwre 24.15-28; Rukre 21.20-24; mããnên Sikũn Tesarõn 2.3-4; Apokariip 13.11-17

14-16 Nhũm Jejus arĩ mẽ kãm kapêr nê mẽ kãm:

—Nê koja nhỹrmã kot mẽ atomnuj tỳx kumrêx xwỳnh maatija axtem nê Tĩrtũm mã amnhĩ jarênh xà hã ixkreja kamã amnhĩ xãm. Hãmri ka mẽ ja hã omu nê mẽ kot krĩ grành par mã ajamaxpêr kurê kumrêx. Koja ã amnhĩ nhĩpêx anê ka mẽ amỹm amnhĩ wỳr mẽ omu hãmri nê ajapôj nê ma aprôt nê amrar kurê kumrêx. Mẽ apê jar pika pê Jutej kamã mẽ apa xwỳnhjaja mẽ omu hãmri nê mẽ kot mẽ apar pymaj ma aprôt nê amrar kurê kumrêx. Hixêr prêk wỳr ajapôj nê aprôt nê ma mra. Nê jar Jerujarê nhô xwỳnhjaja kê mẽ umaj haxwỳja hapôj nê ma hprôt nê ma mrar o mra. Nê kapôt ã ri mẽ pa xwỳnhjaja kê mẽ ê jamỹnh kaxyw akupỹm krĩ hwỳr gjêx kêt nê. ãm ma mẽ umaj hprôt nê mrar o mrar kurê kumrêx.

17 —Nê mẽ htujarô xwỳnhjaja nê mẽ hkra karàre xwỳnhjaja. Jajê pê koja mẽmoj omnuj tỳx nê. Tanhmã kot wem amnhĩ to nê hprôt tỳx? Nã pika ja kamã koja mẽ mex kêt nê. Mẽ kot amnhĩ tomnuj mỳrapê koja Tĩrtũm tanhmã mẽ homnuj tỳx to.

18-19 —Koja ã mẽmoj amnhĩ nhĩpêx anê hãmri nhũm mẽ piitã amnhĩ xà htỳx kãm hamak rũnh o pa. Tĩrtũm kot mẽ piitã mẽ ho kator krax rũm amnê mẽ pa xwỳnhjaja na mẽ kormã à htỳx kamã hamak rũnh kêt nê. Kormã amnhĩ xà kamã hamak kryre. No nhỹrmã mẽ hprôt xà hã arĩgrota ã koja mẽ amnhĩ xà htỳx kamã hamak rax kumrêx.

—Tã akupỹn ixte mẽ awỳr ixwrỳk xà hã arĩgrota ã kot pa mẽmoj punuj o ijapêx pa ka mẽ axte ã mẽmoj kot anhỹr pumunh kêt nê. Nom kormã akupỹn ixwrỳk xwỳj ri kot kaj mẽ amnhĩ xà htỳx kamã ajamak o apa. Jakamã kêr ka mẽ ã amnhĩ nhĩpêx anhỹrja kukamã amnhĩ to Tĩrtũm wỳ nê kãm: “Pa Tĩrtũm. Kwa kê mẽmoj ã amnhĩ nhĩpêx anhỹr kaxyw hãmri kê amgrã pê ã amnhĩ nhĩpêx anê. Koja na pê ã amnhĩ nhĩpêx anê nhũm omnuj tỳx nê.” Anhỹr o amnhĩ to awỳ.

20 —Mẽ hprôt xà hã arĩgrota ã koja Tĩrtũm kãm mẽ apê hkrajaja mẽ atyk par pymaj mẽ anê mẽmo punuta ã arĩgro hkwy grã nê mẽ akukamã mẽ amã ho grêre. Koja mẽ akamã ukapri xà ã mẽ anê hipêx anê.

21 —Nê koja ã mẽmoj amnhĩ nhĩpêx anhỹr kaxyw hãmri nhũm mẽ hêx o mẽ pa xwỳnhjaja ma mẽ awỳr mra nê hêx rom tanhmã mẽ amã kapêr to nê mẽ amã: “E ota ra Tĩrtũm kot mẽ pakaxyw ãm xwỳnhta pôj. Kwa mẽ tokyx hwỳr mra nê omu nê hkôt ri apa.” Anhỹr o mẽ amã hêx. Hãmri nhũm mẽ hkwyjaja tee ri mẽ kuma nê mẽ amã: “Nã tãm kêt. Jar mẽ ixkamã na. E mẽ tokyx amnê hwỳr mãn mra nê omu.” Anhỹr o mẽ amã hêx o pa. Nom kêr ka mẽ ama nê ãm mẽ ama nê mẽ hkôt amrar kêt nê.

22-23 —E kwa mẽ inhma. Na pa ra ixprĩ hã mẽmoj kot ã amnhĩ nhĩpêx anhỹrja kukamã mẽ amã tanhmã harênh to. Tã kêr ka mẽ axkãm ajamak rom nê ri apa. Koja mẽ kot amnhĩ to hêx xwỳnhjaja axpên pãnhã mẽ awỳr mra nê mẽ amã kêp Tĩrtũm kot mẽ akaxyw ãm xwỳnh ã amnhĩ to hêx. Nê mẽ hkwyjaja kêp Tĩrtũm nhỹ hã kapêr jarênh xwỳnh ã amnhĩ to hêx. Hãmri nê aa mẽ kot mẽmoj pumunh kêt kwỳ ho anhỹr o pa. Te Tĩrtũm nhỹ hã kot ho anhỹr pyrãk nom hêx rom mẽ apê Tĩrtũm kot amnhĩm mẽ arênh xwỳnhjê nokupy r kaxyw ã amnhĩ nhĩpêx anhỹr o pa. Anê.

Akupỹn Jejus wrỳk xà hã arĩgro jarênh

Matêwre 24.29-31; Rukre 21.25-28; mããnênh Sikũn Pêtre 3.10; Apokarip 1.7, 19.11-16

24-25 Nhũm Jejus arĩ mẽ kãm kapêr nê mẽ kãm:

—Tã koja mẽ kot amnhĩ xà htỳx kamã hamak xà hã arĩgrota hapêx nhũm Tĩrtũm ã mẽmoj nhĩpêx anê.

Koja kaxkwa ho àk tỳx nê nhũm myyti ahtyk.

Nhũm mytwrỳre axte hirã hkêt nê.

Nhũm kanhêti piitã axrê nê rôrôk pa.

²⁶ Hãmri pa man akupỳn pika hwỳr wrỳ nhũm mẽ piitã ixwrỳk kãm ixpumu. Kakrã kamã kot paj ixihitỳx o inhĩrã rax kãm akupỳn mẽ awỳr wrỳ. ²⁷ Hãmri nê ma krĩ piitã hwỳr Tĩrtũm kapêr o mẽ wrỳk xwỳnhjê rê nhũm mẽ ma mra nê amnepêm ixte amnhĩ kaxyw mẽ axunhwỳr xwỳnh piitã ho akuprô nê akupỳn ixwỳr mẽ ho mra. Anê.

Jejus kot mẽmo pĩ hpàr ã ejêp jarênh

²⁸ Nhũm Jejus arĩ mẽ kãm kapêr nê mẽ kãm:

—E ka mẽ pĩ hpàr mỳj pumu. Na hte mẽmo mytwrỳ hã rã nhũm mẽ omu nê ô hkukamã hamaxpêr kurê kumrêx. ²⁹ Ja pyrã nê koja mẽmoj ã amnhĩ nhĩpêx anhỳr mẽ ka mẽ akupỳn mẽ awỳr ixwrỳk mã ajamaxpêr kurê kumrêx.

³⁰ Koja akupỳn ixpôx kêt ri ã mẽ kot mẽmoj kot amnhĩ nhĩpêx anhỳr pumunh xwỳnhjaja kormã piitã htyk par kêt ri pa akupỳn mẽ awỳr wrỳ.

³¹ —Nê koja nhỹrmã pika nê kaxkwa wa hapêx pa. Tã no ãm ixkapêr koja wa uràk nê aa hapêx kêt nê. Koja ãm rãhã ho rãhã. Kot paj aa ihkjê ho tanhmã mênh to hkêt nê. Anê.

Mẽ pahte akupỳn Jejus wrỳk xà hã arĩgro pumunh kêt ã mẽ pajarênh

Matêwre 24.36-44; Rukre 12.37-40; mãânên Atrn 1.9-11; Wam Tesarôn 5.2; Sikũn Pêtre 3

³² Nhũm Jejus arĩ mẽ kãm kapêr nê mẽ kãm:

—Nom akupỳn ixwrỳk xà hã arĩgroja mẽ ate omunh kêt. Nê kaxkwa kamã Tĩrtũm kapêr o mẽ wrỳk xwỳnhjaja kot ja pumunh kêt. Nê pa ixpê Tĩrtũm Kra htã ijaxwỳja ixte ja hã amnhĩ pumunh kêt. ãm Mêpahpãm maatiya tapxipix kot ja pumunh.

³³ —Tã mẽ ate akupỳn ixwrỳk xà hã arĩgro pumunh kêt jakamã kwa kêr ka mẽ axkãm ajamak rom nê ri apa. Nê apkati mẽ amnhĩ wỳr ijapêr arĩt rãhã ho ri apa.

³⁴⁻³⁵ —E pa tanhmã mẽ amã akupỳn ixwrỳk xà hã arĩgro jarênh to ka mẽ inhma. Koja mẽhõ nhỹhỹm nojarêt hãmri nê kãm mẽ ãpênh xwỳnhjê mã mẽ ãpênh ã karõ nê òrkwỹ jamãr xwỳnh mã tanhmã kãm karõ hto. Hãmri nê òrkwỹ kahê xà jamãr xwỳnh mã kãm: “E kêr ka ixwakre kamã ijapêr arĩt rãhã ho ri apa.” Anê hãmri nê ma nhỹhỹm mō. Tã mẽ kot ijapêr rĩt rãhã ho mẽ pa xwỳnhjaja te kot ixkre kahê xà jamãr xwỳnh kot amnhĩ nhĩpêx pyrãk. Õ patrãwja akupỳn hpôx xà hã arĩgro hã omunh kêt jakamã na hte kahê xà jamãr rãhã ho pa. Koja apu axpêr kamãt nhũm akupỳn hpôx japêr. Rỳ kôt ã kamãt rỳ krãhyre kã nhũm akupỳn hpôx japêr. Rỳ kwỳhtyk nhũm akupỳn hpôx japêr. Tã uràk nê mẽ ate akupỳn ixwrỳk xà hã arĩgro pumunh kêt jakamã kêr ka mẽ ijamãr rãhã ho ri apa. Jao ixkutêp inhmã tanhmã amnhĩ nhĩpêx to rãhã nê. Ra ixte mẽ amã hã karõ xà hkôt. ³⁶ Kop ixkre kahê xà jamãr xwỳnhja tee ri ò patrãw kamã ama hãmri nê ra òtxwa nê htỳx òt o ỳr rôm nhũm haêr pê hwỳr hpôx ronhỹx ja kêp mex kêt nê. Ja pyrã nê kêr ka mẽ ixkutêp ixkôt amnhĩ nhĩpêx rãhã ho ri apa. Nom tee ri amnhĩ wỳr ixkãm ama hãmri nê axte inhmã ajamaxpêr kêt pê atỳx ri tanhmã amnhĩ tomnuj to ho apa hkêt nê.

³⁷—E ixte mẽ amã mẽmoj jarēnhja na pa hte ixkwỳjê piitã mẽ kãm harē. Jakamã kwa kēr ka mẽ akupỳn ixwryk ã ijapēr arīt rãhã ho ri apa. Anē. Nhũm pre ã Jejus amnhĩ kukamã mẽ kãm ujarēnh anē.

14

Mẽ kot Jejus pĩr kukamã hamaxpēr ã mẽ harēnh
Matêwre 26.1-5; Rukre 22.1-2; Juãw 11.45-53

¹ Tã nhũm Ijaew hkĩnhã ã arĩgro pē Pas wỳr apkati axkrut. Pas ã na hte mẽ ixpē Ijaewjaja amnepēm Tĩrtũm kot pika pē Ejit pē mẽ inhĩgēt nē mẽ ixpãmjê kator mã ijamaxpēr kaxyw axpēn wỳr akuprõ nē hã ixkĩnh. Na pa htem arĩgroja mã: “Pas” anē. Nē harēnh o: “Mẽ pahte pãw kaxkrit kēt kur ã arĩgro” anē. ² Jakamã nhũm mẽ inhõ patre krãhtũmjê mẽ Tĩrtũm kapēr tũm o mẽ ahkre xwỳnhjaja kãm Jejus pĩr prãm nē. Nom mẽ kãm hkõt kapēr mar o mẽ pa xwỳnhjê pyma nē. Nē tee ri hã amnhĩ jahkre nē axpēn mã:

—Hêxta waa nē. Tanhmã kot puj wem ho nē kupĩ? Kot puj mẽ pahkĩnh kãm tanhmã ho nhũm mẽ hkĩnh xwỳnhjaja hã mẽ pahpumu nē mẽ pakamã gryk tỳx nē. Pu mẽ hã axpu nē hã tanhmã axpēn to. Jakamã kwa pu mẽ kormã tanhmã ho hkēt nē. Anē.

Mẽhõ ni kot Jejus krã gregrer ã harēnh
Matêwre 26.6-13; Rukre 7.36-50; Juãw 12.1-8

³ Rõm nhũm Jejus Simãw nhõrkwỳ kamã kormã apkur o nhỹ. Krĩ pē Petãn kamã. Simãwja na pre hkã kro xãpēr tỳx o pa nhũm Jejus akupỳn ho mex. Jakamã akupỳm õ krĩ hwỳr põj nē kutã apkur o nhỹ. Hãmri nhũm mẽhõ nija harēnh ma nē mẽ hkuxwa xã hã kãx õ py nē ma hwỳr o tē. Nē mẽ hwỳr axã nē nhỹhỹnh kãx kahte nē mẽ hkuxwa xã ho hkrã gregrer pa. ⁴ Hãmri nhũm mẽ apkur o hkri xwỳnhjaja tee ri ã kot amnhĩ nhĩpēx anhỹr ã omu nē kamã gryk nē. Nē axpēn mã:

—Tk. Kwa na na hã mẽ hkuxwa xãta kapĩr par kumrēx. ⁵ Kop apu ma o htem nē ho wēnē nē hpãnhã kãxpore ho rax kumrēx nē hamỳnh nē ho mẽ kēp amrakati xwỳnhjê nhĩpēx par nhỹx ja kãm mex nē. Mo na ri ã amnhĩ nhĩpēx anhỹr kēt nē?

Anē nē hã kãm akir. ⁶ Hãmri nhũm Jejus mẽ kuma nē mẽ kãm:

—Tk. Kwa mẽ kãm axãkjer kēt nē. ãm hãmri na ã inhĩpēx anē. ⁷ Mẽ kēp amrakati xwỳnhjaja koja mẽ arĩ mẽ akõt pa rãhã nē. Ka mẽ amã mẽmo arĩgro hã mẽ ho ajuta hprãm nē tanhmã mẽ ho ajuta hto nē mẽ kãm mẽmoj gõ. No pa kot paj ri mẽ akõt ixpa ka mẽ ixto mex ry ho apa hkēt nē. Kot paj tokyx mẽ are. ⁸ Ixtyk nhũm mẽ kot ijaxàr kukamã na ã ixkrã gregrer anē. ãm hãmri na ã inhĩpēx anē. ⁹ ãm hãmri na pa mẽ amã ja jarē. Koja mẽ krĩ piitã hkõt axpēn mã ixte tanhmã mẽ anē amnhĩ nhĩpēx to hã ijarēnh o pa nē mããnēn kot ã inhĩpēx anhỹrja mããnēn harēnh o pa. Nhũm mẽ piitã kot tanhmã ixto mex to hã harēnh ma. Anē.

Jut Kariot kot mẽ kãm Jejus ã ãmñēnh kaxyw ã harēnh
Matêwre 26.14-16; Rukre 22.3-6; Juãw 13.21-30

¹⁰ Tã nhũm Jut Kariotja. Jejus kõt mẽ pa ho mẽ pa xwỳnh pē 12 hõ na pre. Tã axtem nē Satanasti nhỹ hã ma patre krãhtũmjê hwỳr tē nē axtem nē tanhmã Jejus o mẽ mar to nē mẽ kãm:

—E ot pa mẽ amã Jejus jarēnh o tē. Xã kot paj mẽ amã hã amỹnē ka mẽ hpãnhã inhãm amnhĩre nà? Anē.

11 Hāmri nhūm mē kuma nē hkīnh nē. Hāmri nē kām:

—Nà kot paj mē amā amnhīre. Anē.

Hāmri nhūm mē kuma nē kato nē ma tē nē Jejus pynēnh kaxyw htānopxar o hkôt ri pa.

Jejus kot ŷ hā kapēr o mē pa xwŷnhjē kutā apkur ā harēnh

Matēwre 26.17-19; Rukre 22.7-13

12 Tā nhūm arīgro pē Pas kato. Amnepēm mē inhīgētjaja na prem ôwēhti hkrare hkwy pa. Tirtūm kot ja hā mē omunh nē Ejit kām mē kām mē hkurē xwŷnhjē nhīhkra nē mē kator kaxyw na prem ā amnhī nhīpēx anē. Jakamā na pa htem arī mē ixpē mē hkanrēhā mē htāmnhwŷjaja Pas ā axpēn wŷr akuprō nē jam ijamaxpēr pē mē urāk nē ôwēhti hkrare hkwy hpa nē pāwti kaxkrit kēt kām kuku.

Jakamā nhūm Jejus kôt mē pa ho pa xwŷnh pē 12jaja Pas ā mē apkur xā hā Jejus kukja nē kām:

—Kwa nhŷri kot paj mē akutēp Pas ā mē panhō hā apē? Anē.

13 Hāmri nhūm mē kuma nē ja wa ho axkrut nē mē amnhī kukamā wa kumē nē wa kām:

—E wa ma Jerujarē hwŷr wa tē. Nē hwŷr axā nē mēhō myja pumunh kurē kumrēx. Nhūm amnhīm gō ru nē amnhī kre hā poti xām nē o tē ka wa omu nē hā ajēt nē ma ōrkwŷ hwŷr hkôt tē. 14 Hāmri nē ixkre nhō dōn pumu nē kām: “E Jejus na wa inhmē pa wa awŷr tē. Na awŷr pēr mēnh o: ‘Nhŷri kot paj we ixkôt ri mē pa ho pa xwŷnhjē mē Pas ā axpēn kutā apku?’ Anhŷr o na awŷr pēr mē.”

15 —Wa ā kām akapēr anē kē war ama nē war amā ōrkwŷ nhīmōk ā ixkre rax ō jahkre. Ra kamā kaxyw mē paxāpkur xā hā mēmoj piitāā. Ka wa omu nē māmri kamā mē ixkutēp mē panhō hā apē. Anē.

16 Hāmri nhūm wa kuma nē ma hwŷr tē. Nē krīm axā nē ra kot wa kām mēmoj jarēnh xā hkôt mēmoj piitā omu nē mē kutēp mē kām mēō hā āpēnh o wa xa.

Jejus kot mēhō kot mē kām hā àmnēnh ā harēnh

Matēwre 26.20-25; Rukre 22.21-23; Juāw 13.21-30

17 Tā nhūm kamātre nhūm Jejus mē hkôt mē pa ho pa xwŷnhjaja wa hkôt mō. 18 Hāmri nē kŷxpē ixkreja wŷr api nē hwŷr agjē nē apkur kaxyw hkrī hpa nē kormā apkur o hkrī nhūm Jejus mē kām:

—E pa mē amā mēmoj jarē ka mē inhma nē amnhī krām haxār tŷx nē. Kot kaj mē ixkutā axāpkur o akrī xwŷnhjē hō mē kām ixkurē xwŷnhjē mā ixtā amŷnē. Anē.

19 Hāmri nhūm mē tee ri kuma nē hkaprī htŷx nē. Nē axpēn pānhā amnhī tā hkukja nē kām:

—Kwa xā pa kot paj ā anhīpēx anē? Nà pa hkēt. Anē.

20 Hāmri nhūm mē kām:

—Nà mē apē 12jē hō kot kaj ā inhīpēx anē. Mē ate ixkutā guhkrax kām anhō pāwti ho mry kagō nhek o akrī xwŷnhjē hō kot kaj ixtā amŷnē. 21 Tirtūm kapēr ā kagā htūm kot ixkukamā harēnh xā hkôt koja mē tanhmā ixtō rax nē ixpī. Nom kot mē kām ixtā àmnēnh mā xwŷnhhta hēxta waa nē. Ā kot amnhī nhīpēx anhŷrja mŷrapē koja amnhī xā htŷx kām hamak rax kumrēx. Kop apu aa ō māmāj nhōxā hkre rūm kator kēt ronhŷx ja kām mex nē.

22 Anē nē kormā mē apkur o hkrī rōm nhūm pāwti hō py nē ho Tirtūm wŷ. Hāmri nē mē kām ho hkry nē mē piitā mē kām ōr pa nē mē kām:

—E na pa mẽ amã pãwti ho hkry nẽ mẽ amã kugõ. Ja pyrà nẽ koja mẽ ã inhĩpêx anẽ nẽ te ixto hkry hpar pyràk o inhĩpêx pa amnhĩ xã htýx kamã ijamak kãm ty. Nom mẽ anẽ kot paj ty. E mẽ mãmri aku. Anẽ.

²³⁻²⁴ Nẽ hpãnhã wĩhti hã kop py nẽ mã ho anẽ nẽ Tĩrtũm mã harẽ. Hãmri nẽ mẽ kãm kugõ nẽ mẽ kãm:

—E mẽ kot ixpĩr xã hã arĩgrota ã koja ixkamrõ axkapĩ. Nom koja mẽ amarĩ ixpĩr nhũm amarĩ hpikapĩr kêt nẽ. ãm paa. Pa kot paj mẽ anẽ mẽ ãhkram amnhĩ jaxã nhũm mẽ ã inhĩpêx anẽ. Koja ixkamrõ axkapĩ nhũm Tĩrtũm omu nẽ ixkukwak ri mẽ anẽ mẽ ate amnhĩ tomnuj piitã amnhĩ katut kõt rẽnh pa nẽ mẽ ato hkra. Ra amnepẽm kot ja hã amnhĩ jarẽnh xã hkõt. Jakamã e. Mẽ axpẽn pãnhã ixkamrõ pikapĩr mã ajamaxpẽr pẽ ixte mẽ amã kop kãm wĩhti nhõrta o akõm o axpẽn nhĩpêx. Anẽ.

Nhũm pre ã mẽ kãm amnhĩ jarẽnh anẽ nhũm mẽ piitã ho hkõm o axpẽn nhĩpêx. ²⁵ Hãmri nhũm mẽ kãm:

—ãm hãmri na pa mẽ amã amnhĩ jarẽ. Kot paj axte wĩhti ho ixkõm kêt rãhã nhýrmã Inhõ Papaj akupýn mẽ awýr inhmẽ. Hãmri pu mẽ ri kormã akupýn ixpõx xã hã arĩgrota ã pahkĩnh nẽ. Nom axtem tanhmã hã pahkĩnh to. Anẽ.

²⁶ Nhũm pre ã mẽ kãm kapẽr anẽ hãmri nhũm mẽ Tĩrtũm mã mex o mex ã gre hãmri nẽ hapõx pa nẽ ma hixêt pẽ Oriwẽhti hwýr mra.

Jejus kot Simãw Pẽtre hkukamã tanhmã harẽnh to

Matẽwre 26.31-35; Rukre 22.31-34; Juãw 13.36-38

²⁷ Tã nhũm Jejus hkõt mẽ pa ho pa xwýnhjẽ hkukamã tanhmã mẽ kãm ujarẽnh to nẽ mẽ kãm:

—E mẽ inhmã. Tĩrtũm kapẽr ã kagã htũm kot ã mẽ pajarẽnh kot anhýr. Kot paj õwẽhti jamãr o pa xwýnhja pi hãmri nhũm õwẽhti hpigrãnh pa nẽ ma anhgrã nẽ ri mra.

Anhýr o te ixpẽ õwẽhti jamãr xwýnh nhũm mẽ apẽ õwẽhti pyràk ã mẽ pajarẽnh. Tã kot puj mẽ ã amnhĩ nhĩpêx anẽ. ²⁸ Mẽ kot ixpĩr tã koja Tĩrtũm akupým ixto ixtĩr. Pa akupým ixtĩr nẽ ma mẽ akukamã pika pẽ Garirej wýr mõ. Kamã kot puj mẽ axte axpẽn pumu. Anẽ.

²⁹ Hãmri nhũm Simãw Pẽtre tee ri mẽ amnhĩ tã kuma nẽ kãm:

—Kwa nã. Ri ã mẽ ijarẽnh anhýr kêt nẽ Pahihti. Kot paj akaga hkêt nẽ. Jajaja koja anhgrã nẽ hprõt nẽ ma mrar japẽr no pa kot paj anhýr kêt nẽ. Anẽ.

³⁰ Hãmri nhũm kãm:

—Nã kot kaj anẽ Simãw Pẽtre. Koja apkati hkõt krãhyre hkãr kêt ri ka ra mẽ umaj ate ixkõt apa hkêt ã mẽ kãm amnhĩ tã axãprãr o axkrunẽpxi kãm ga. Kwa jam ajamaxpẽr týx nẽ. Anẽ.

³¹ Hãmri nhũm tee ri amnhĩ tã kuma kãm amnhĩ tã ãprãr kãm hihtýx nẽ kãm:

—Tk. Kwa nã. Kot paj ã amnhĩ nhĩpêx anhýr kêt nẽ. Koja mẽ tee akõt ixpĩr mã tã no pa ãm aa akaga hkêt kumrẽx. Kot paj akõt ixpa ho ixpa rãhã nẽ. Anẽ.

Hãmri nhũm hkõt mẽ pa ho mẽ pa xwýnh kwýjẽ piitã ã kãm amnhĩ jarẽnh anẽ.

Jejus kot Tĩrtũm mã amnhĩ jarẽnh

Matẽwre 26.36-46; Rukre 22.39-46

³² Tã nhũm Jejus ma nhýri mẽ kot kãm “Gesẽm” anhýr xwýnhja wýr hkõt mẽ pa ho pa xwýnhjẽ ho mõ. Hãmri nẽ mẽ kãm:

—E mẽ jar ixkutẽp akrĩ. Pa ma mũtũm tẽ nẽ Tĩrtũm mã amnhĩ jarẽ mãn. Anẽ.

³³ Hāmri nē amnhī kôt mē ho axkrunēpxi nē mē o mō. Simāw Pêtre mē Jepetew kra pijakrut pē Xiakre nē Juāwja nhūm amnhī kôt mē o mō. ³⁴ Hāmri nē amnhī kukamā mē kām hkurē xwýnhjaja kot tanhmā hipêx tota kukamā hamaxpēr o ra amnhī kamā kahak tỳx o ra hkaprī nē. Hāmri nē hkôt mē mrar xwýnhjē mā kām:

—Héxta waa nē. Na pa tee ri amnhī xà htỳx kamā ijamakja kukamā ijamaxpēr nē amnhī kamā ixkahak tỳx o ixkaprī nē. Te ra ixkaprīja kot ixpēr o mōr pyrāk. Jakamā e mē jar anohtỳx nē ixto Tirtūm wỳr o akrī kē tanhmā ixto pa mē kot tanhmā ixtoja kutā ixihỳtỳx nē. Anē.

³⁵ Hāmri nē mē kurūm htēm grire nē amnhī kamā kahak o Tirtūm mā amnhī jarēnh kaxyw htu mỳr pē htēm nē pikap nō nē kām:

³⁶—Kwa Papaj. Héxta waa nē. Inhmā amnhī xà htỳx kām ijamak prām kêt kumrēx. Na pa tee ri amnhī kukamā ijamaxpēr nē amnhī kamā ixkahak tỳx nē. Jakamā kot kaj amā inhnē ja ho ajapêx prām nē māmri ho ajapêx nhūm mē kām ixkurē xwýnhjaja tanhmā ixto hkêt nē. Rỳ ko. Kot kaj amā mē kot tanhmā ixto hprām kē mē māmri tanhmā inhīpêx to. Nom pam inhmā hprām xà hkôt kêt.

³⁷ Anhỳr o Tirtūm mā amnhī jarē hāmri nē kànhmā xa nē akupỳm Simāw Pêtreja mē hwỳr tē nē mē omu nhūm mē ra htỳx gōr nē hikwỳ. Hāmri nhūm tee ri mē omu nē Simāw Pêtre mā kām:

—Kwa Simāw Pêtre. E mē hāmri akrā hapôj. Kwa wem anohtỳx grire nē ixkutēp amnhī to Inhō Papaj wỳr o akrī ³⁸ kē mē ixkôt tanhmā mē ato htā ka mē amā mē uma xàj ixkaga hkêt nē arī mē kutā amnhī to htỳx nē akuhē. Ā mē amā mē ate amnhī nhīpêx anhỳr prām nom kormā mē amā maa. Anē.

³⁹ Hāmri nē akupỳm tē nē axte Tirtūm mā tanhmā amnhī jarēnh to.

⁴⁰ Nē akupỳm mē hwỳr tē nē mē omu nhūm mē axte ôt pa nē hikwỳ. Nhūm tē nē tee ri mē omu hāmri nē tanhmā mē kām nē hkêt nē. Ām awjanā nē ma akupỳm tē nē axte Tirtūm mā amnhī jarē. ⁴¹⁻⁴² Hāmri nē akupỳm mē hwỳr tē nē mē kām:

—Kwa xàn ka mē arī gōr nē anhīkwỳ? E mē tokyx akrā hapôj. Na mē ra ixwỳr mrar nē kot ixpynēnh mā. Koja mē tokyx ixkutā mē kot amnhī xunhwỳr xwýnhjaja mē kām ixtā amýnē. Ota ra kot ixtā mē kām ànnēnh xwýnhnta tē. E mē tokyx kànhmā akrī pu mē kutā mra. Anē.

Mē kot Jejus pynēnh ā mē harēnh

Matêwre 26.47-56; Rukre 22.47-53; Juāw 18.1-11

⁴³ Nhūm Jejus kormā mē kām kapēr o ām rāhā nhūm Jut Kariotja tē. Mē hkôt mē pa ho mē pa xwýnhjē hō htā nhūm ra amnhī kôt mē ohtō nē Jejus wỳr mē o tē nhūm mē wapohti nē kō jamý nē hkôt o mra. Patre krāhtūm mē Ijaew krāhtūmjē mē Tirtūm kapēr tūm o mē ahkre xwýnhjaja ra Jut kôt mē kurē nhūm mē man hkôt Jejusja wỳr mra. ⁴⁴ Na pre ra Jut Kariotja mē kām tanhmā amnhī jarēnh to nē mē kām:

—E kot paj nhỳri mē pahte unēnh mā xwýnhnta pumu nē hwỳr tē nē kahti hkôt kumý nē tanhmā kām ixkapēr to. Ka mē ixpumu nē hwỳr tē nē unē nē ma akupỳm o tē.

Anē hāmri nē ma hwỳr mē o tē. ⁴⁵ Nē Jejusja pumu nē hwỳr tē nē kām: “Pa mē ijahkre xwýnh.” Anē hāmri nē kahti hkôt kumý. ⁴⁶ Hāmri nhūm hkôt mē mrar xwýnhjaja omu nē Jejus wỳr mra nē unēnh kurē kumrēx. ⁴⁷ Hāmri nhūm Jejus kôt mē pa ho mē pa xwýnhjaja tee ri ja hā mē omu nhūm hōja ō wapo kapa nē patre maati mā àpēnh xwýnh kot mē hkôt htēm xwýnhnta mā wapo

ho apê. Nê kot ho hkrâ nhîpônã mã tã kuhpaw nê upôk rûm hamak nhîkjê krâhta. ⁴⁸⁻⁴⁹ Hâmri nhûm Jejus amnhî tã mã kot unênh xwýnhjê mã kãm:

—Kwa na pa pre apkati mẽ Tirtûm mã amnhî jarênh xà hã ixkre kamã mẽ kãm ixujarênh o ixpa ka prem tokyx ixpynênh kêt nê. Tã jarãhã te ixte amnhî tomnuj xwýnh pyrà nê ixwýr wapohti nê kô hã akapên nê ixwýr atêm rax nê. Nom ra mẽ ate tanhmã ixto kaxyw arîgro kator jakamã mẽ mãmri tanhmã amã ixto hprãm xà hkôt tanhmã ixto. Tirtûm kapêr ã kagã htûm kot mẽ akukamã ã mẽ ate inhîpêx anhýr ã mẽ ajarênh xà hkôt. Anê.

⁵⁰ Hâmri nhûm hkôt mẽ pa ho mẽ pa xwýnhjaja tee ri mẽ kot unênh ã mẽ omu hãmri nê mẽ umaj Jejus kaga nê ma hprôt pa nhûm ahte mẽ kuri xa. ⁵¹⁻⁵² Hâmri nhûm mẽ ma o tẽ. Nhûm kormã mêhõ nyw xwýnhja tee ri ja hã mẽ omu nê ma Jejus kôt tẽ. Nhûm mẽ amnhî kôt omu nê kot unênh kaxyw kahty xà hã upy nhûm mẽ umaj mẽ ðhkra kamã kahty xàja re nê ma hkênh nê hprôt nê tẽn akunok.

Ijaew nhõ patre maati kot Jejus kujêr ã harênh

Matêwre 26.57-68; Rukre 22.63-71; Juãw 18.12-14, 18.19-24

⁵³ Tã nhûm mẽ ma mẽ õ patre maati nhõrkwy hwýr Jejus o tẽ. Hâmri nhûm patre krãhtûmjê mẽ Ijaew krãhtûmjê mẽ Tirtûm kapêr tûm o mẽ ahkre xwýnhjaja òrkwy hwýr Jejus ã akuprõ. ⁵⁴ Hâmri nhûm Simãw Pêtre mẽ hkôt tẽ nê mẽ hkôt patre maati nhõ kítare hwýr axã nê amým hã mẽ omunh o xa. Nhûm ra pôristijaja kítare kamã amnhîm kuto nê hã ànhunh o hkrî nhûm mẽ hwýr tẽ nê mẽ ðhkõ hã ànhunh o nhý.

⁵⁵⁻⁵⁶ Rõm nhûm ixkre kamã mẽ pikuprõnh xwýnhjaja tee ri Jejus ã krî nhõ xwýnhjê kukja nê mẽ kãm:

—E mẽ atõ na ka pre Jejus kot tanhmã amnhî tomnuj to hã omu? Mẽ atõ mẽ inhmã harê pa mẽ ama nê Rõm nhõ xwýnhjê nhîhkram haxã kê mẽ pamã kupî. Anê.

Hâmri nhûm mẽ axpên pãnhã tanhmã harênh to. Tanhmã kot amnhî tomnuj to hã harênh to htã nom ri ho hêx jakamã axpên kwým ri tanhmã ri harênh to nhûm mẽ tee ri mẽ kuma nê mẽ kãm:

—Tk. Kwa mẽ axpên kwým ri tanhmã harênh to hkêt nê. Axpên kôt mãn ri tanhmã mẽ inhmã harênh to. Anê.

⁵⁷ Hâmri nhûm mẽ hkwyjaja kãnhmã kuhê nê axpên kôt tanhmã ho hêx to nê mẽ kãm:

⁵⁸ —Nã kot paj mẽ amã tanhmã kot amnhî nhîpêx to hã harê. Na pa prem ã kapêr anhýr ã kuma. Na pre tanhmã Tirtûm mã amnhî jarênh xà hã ixkreta jarênh to nê harênh o: “Kot paj ixkreja grãnh pa hãmri nê ixtã apkati axkrunêpxi nê akupým hipêx. Nom kot paj amnhî nhîhkra ho hipêx kêt nê.” Anhýr ã ã amnhî jarênh anê pa mẽ kuma.

⁵⁹ Anhýr o harênh tã nom axpên kôt harênh kêt nê. Arî axpên kwým ri harê. ⁶⁰ Hâmri nhûm mẽõ patre maati tee ri mẽ kot tanhmã ho kapêr toja ma nê mẽ aptãr tûmjê noo mã kãnhmã xa nê Jejus mã kãm:

—E na ka ra mẽ kot ã ajarênh anhýrja ma. Xà kot kaj tanhmã mẽ inhmã amnhî tã axãprãr to hkêt nê? Xà ãm hãmri na mẽ ajarê? E kwa mẽ inhmã tanhmã amnhî jarênh to. Anê.

⁶¹ No nhûm akryk xa nê tanhmã kãm nê hkêt nê. Hâmri nhûm tee ri ã kot amnhî nhîpêx anhýr ã omu nê axte kãm:

—Kwa mẽ inhmã amnhî jarê. Xà apê Tirtûm Kra na ka? Xà ka na apê Tirtûm kot mẽ ixwýr amênh xwýnh na ka? Anê.

62 Hāmri nhūm tā kām amnhī jarē nē kām:

—Tỳ. Ixpê tāmta na pa. Ra mē ate jarāhā tanhmā ijarēnh to kaxyw apikuprōnh tā nom kot paj nhỹrmā mē kamjaja tanhmā mē ajarēnh to ka mē amnhī tā ixpumu. Kot kaj mē Tirtūm kot mē ato amnhīptār xā kutā akrī hāmri pa hwyr tē nē ĩhkō hā nhỹ. Kakrā kamā kot paj hwyr tē nē ĩhkō hā nhỹ hāmri nē y hā tanhmā mē ajarēnh to ka mē amnhī tā ixpumu. Anē.

63-64 Hāmri nhūm tee ri ā kot amnhī jarēnh anhỹrja ā kuma nē gryk xàj amnhī xē kaxō nē mē aptār tūmjē mā kām:

—Kwa mo kaxyw kot puj mē axte ri ho tanhmā kot amnhī tomnuj to hā harēnh xwỹnhjē hō japēr? Ra tām kot amnhī pē Tirtūm Kra hā amnhī to hēx nhūm mē pahte pajamak o mar kēnā. E tanhmā kot puj mē ho? Anē.

Hāmri nhūm mē kām:

—Nā kot puj mē kupī. Ra htyk mā tām kēnā. E kwa tokyx pu mē ma Rōm nhō pahitī hwyr o tē kē mē pamā hā amỹnē kē mē kupī. Anē.

65 Hāmri nhūm mē hipēx kati rax nē. Nē hkuk kuhtō nē hpānhā no hpro nē htak nē kām:

—E mē kot atak xwỹnhjē nhīxi jarē. Apē Tirtūm Kra hā ate amnhī jarēnh jakamā mān urāk nē axāhpumunh tỳx. Jakamā e mē hixi jarē. Anē.

Nhūm prem ā hipēx anē hāmri nē pōristijē nhīhkram haxā nhūm mē htak rax o kuhē.

Simāw Pētre kot Jejus kōt pa hkēt ā kot amnhī jarēnh

Matēwre 26.60-75; Rukre 22.54-62; Juāw 18.15-18, 18.25-27

66-67 Rōm nhūm Simāw Pētre arī kītare kamā mē ĩhkō hā ānhunh o nhỹ. Hāmri nhūm mēo patre maati mā apēnh xwỹnh nitita mē hwyr kato nē xa. Hāmri nē hirā kamā hprī hā Simāw Pētre pumu nē omunh mex kurē kumrēx nē kām:

—Xē pēr apē Najare nhō xwỹnh Jejus kōt mē pa ho mē pa xwỹnhjē hō na ka. Anē.

68 Hāmri nhūm tee ri kuma nē ra kām ma nē. Nē kām amnhī tā aprā nē kām:

—Tk. Kokỹ. Ixte mēhō my ata pumunhre hā. Anē.

Hāmri nē kànhmā xa nē ma tē nē kītare hwyr kahē hkōt ā mē hkàx ā ahte xa nhūm krāhyre kà. 69 Nē gaa nhūm hpānhā mē kām apēnh xwỹnhjē hōja omu nē hā mē kām:

—Xē ma ām hāmri na harē. Kōt ri mē pa xwỹnhjē hō na pēr. Anē.

70 Hāmri nhūm amnhī tā kuma nē kām:

—Tk. Kwa nā. Mē ri ā amnhī krā hkōt ri ixto axēx anhỹr kēt nē. Aa ixte mēhō ata pumunh kēt kumrēx. Anē.

Hāmri nhūm mē hkwỹja gaa nē kē axte hprī hā omu nē kām:

—Kwa ām hāmri na mē ajarē. Apē Jejus hkwỹ na ka. Ajaxwỹja apē Garirej nhō xwỹnh kēnā. Anē.

71 Hāmri nhūm tee ri mē kuma nē kām ma htỳx nē. Hāmri nē mē kām:

—Kwa nā. Na pa Tirtūm noo mā mē amā amnhī jarē. Kot paj amnhī to ixēx japēr nhūm inhma nē hā tanhmā ixto. Nā uràn ixpē Garirej nhō xwỹnhre hā. Ixte mēhō mỳj pumunh kēt kumrēx tā ka mē xatā axpēn kōt ixte hkōt ixpa ho ixpa xwỹnh ā ixkamnhīx o xa.

Anhỹr o ra mē kām amnhī tā aprār o axkrunēpxi. 72 Hāmri nhūm axte krāhyre kà. Jao ra hkār o axkrut. Hāmri nhūm Simāw Pētre kuma nē Jejus kot ra hkukamā ā amnhī nhīpēx anhỹr ā harēnhja mā hamaxpēr kurē kumrēx. Krāhyre kormā hkār o axkrut kēt ri kot mē kām amnhī tā aprār o axkrunēpxi hā harēnhja mā hamaxpēr. Hāmri nē ra kànhmā hakry hpar o tē nē hkaprī htỳx kumrēx. Hāmri nē tee ri amnhī kukamā hamaxpēr nē amnhī mā:

—Hêxta waa nê. Æm hãmri na pre Jejus ijarê. Tã pa kot ijarênh xà hkôt ã amnhĩ nhĩpêx anê. Kwa mo na pa axtem nê ã mē kãm amnhĩ to ixêx anê? Anê hãmri nê hkaprĩ xaj mÿr rax nê.

15

Pirat kot Jejus kujjêr ã harênh

Matêwre 27.1-2, 27.11-14; Rukre 23.1-5; Juãw 18.28-38

¹ Tã nhũm myt kato nhũm mē axte Jejus ã axpên wÿr akuprô. Patre krãhtũmjê mē Ijaew krãhtũmjê mē Tirtũm kapêr tũm o mē ahkre xwÿnhjê mē Ijaew nhõ juistijaja nhũm mē piitã hã akuprô. Hãmri nê pôristi mã anê nhũm mē Jejus pa hpre nhũm mē ma Rôm nhõ xwÿnhjê nhõ pahi Pirat wÿr o tẽ. Piratja na pre hte Rôm nhõ xwÿnhjê nhõ pahi Sesti nhÿ hã Ijaew o amnhĩptãr o pa nhũm prem ma hwÿr o tẽ. ² Hãmri nê kutã ãm nê tanhmã kãm harênh to nê kãm:

—E ot pa mē awÿr jahti ho tẽ. Na hte mē inhmã hêx rũnh o pa. Mē ixte Pahihti Sesti kapêr kwÿm ri amnhĩ nhĩpêx prãm xaj tanhmã mē inhmã hêx to. Nê axtem nê mē ixte Sesti mã kãxpore hkwy nhõr kêt ã mē inhmã karô. Nê Tirtũm kot mē ixkaxyw kêp mē inhõ pahi hã ãm ã amnhĩ jarênh o pa. Na hte ã mē inhmã amnhĩ to hêx anhÿr o pa. Anê.

Hãmri nhũm Pirat mē kuma nê Jejus pumu nê tanhmã hkujjêr to nê kãm:

—E inhmã amnhĩ jarê. Xà ãm hãmri na mē ã ajarênh anê nã? Xà apê Ijaew nhõ pahi na ka? Xà ka na htem amnhĩ wÿr akãm hamak o pa? Anê.

Hãmri nhũm kãm:

—Tÿ. Nã ãm hãmri na ka ã ijarênh anê. Anê.

³ Hãmri nhũm patre krãhtũmjaja tanhmã kãm ho kapêr to. ⁴ Nhũm mē kuma nê axte hkukja nê kãm:

—Kwa na mē ã ajarênh anê ka mē ama nê ãm mē ama nê inhmã tanhmã amnhĩ tã axaprãr to hkêt nê. Anê.

⁵ Nom nhũm Jejus ãm akryk xa nê tanhmã axte kãm nê hkêt nê. Jakamã nhũm Pirat tee ri omunh pê hamaxpêr o nhÿ.

Pirat kot Jejus pÿr ã ãmnênh ã harênh

Matêwre 27.15-26; Rukre 23.13-25; Juãw 18.39–19.16

⁶ Na pre hte pahi Pirat arĩgro pê Pasja ã Ijaewjaja kãm hprãm xà hkôt mē hagjênh xwÿnhjê ho hpÿnh nê mē kãm ure. ⁷⁻¹⁰ Jakamã nhũm Ijaew kwÿjaja hwÿr mra nê kãm:

—Pa. Kwa xà kot kaj jarãhã mē inhmã mē hagjênh xwÿnhjê hõ mã anhÿre nã? Anê.

Hãmri nhũm mē kuma nê hamaxpêr o:

—E paj Jejus ã mē kuma nê kãm inhÿre. Mē piitã mē kãm kapêr mar prãm nhũm mēõ patre krãhtũmjaja pix kot mē hkôt kamã gryk nê ã ixwÿr o mrrar anhÿr kênã. Anê.

Hãmri nê mē kãm:

—Tÿ. Nã kot paj mē amã hõm inhÿre. Kwa xà kot pa mē amã mē anhõ “pahihti” jarênhja mã inhÿre nã? Anê.

¹¹ Hãmri nhũm patre krãhtũmjaja tee ri kuma nê mē kãm:

—Kwa mē kãm anê kê Parapas mã mãn ure. Anê.

Hãmri nhũm mē kuma nê Pirat mã kãm:

—Nã Jejus mã anhÿrer kêt nê. Parapas mã mãn anhÿre. Anê.

¹² Hãmri nhũm mē kãm:

—No mẽ ate mẽ anhõ pahi hã harēnh xwỳnhnta? Tanhmã kot paj ho? Anē.

¹³ Hãmri nhũm mẽ àmra kamã kãm hã amỳnē nē kãm:

—Kwa pĩ kahpa hã anhõ kē ty. Anē.

¹⁴ Hãmri nhũm tee ri mẽ kuma nē mẽ kãm:

—Tk. Kwa na. Tanhmã kot amnhĩ tomnuj tore hã kot pa ã hipêx anē.

Anhỹr tã nhũm mẽ xatã anhĩpê kãm kapêr kãm hihtỳx nē kãm:

—Kwa pĩ kahpa hã mản anhõ kē ty. Tokyx ã mẽ inhmã hipêx anē.

Anhỹr o kuhê. Kàx pê kãm anhỹr o kuhê. ¹⁵ Nhũm tee ri mẽ kuma hãmri nē mẽ kãm hprãm xà hkôt mẽ kãm Parapas mã ure. Nē pòristi hkwỳjê mã Jejus ã amỳnē nē mẽ kãm:

—Tõe. Mẽ mamrĩ hwỳr tẽ nē htak hãmri nē kapôt ã mẽ hpar xà hã pika hwỳr o tẽ nē pĩ kahpa hã anhõ. Anē.

Mẽ kot Jejus tak ã mẽ harēnh

Matêwre 27.27-32; Juãw 19.2-3

¹⁶ Tã nhũm pòristijaja akupỳm ixkreja wỳr Jejus o axà nē amnhĩ wỳr hkwỳjê hã karõ nhũm mẽ hwỳr agjê nē Jejus ã akuprõ. ¹⁷ Hãmri nē kêp pahi hã hpêr o pikēnh kaxyw kãm pahi hã mẽ ahkà nhĩpêx nē hkrãm haxà. Nom axtem nē akunĩ kamã mẽmo mrõ nhĩ te kot ronh kanêre pyràk xwỳnhja nhũm mẽ kãm hikàx nē hkrãm haxà. Hãmri nē kêp ê kapa nē pahi hã mẽ ê kamrêk õ py nē kãm haxà. ¹⁸ Hãmri nē kãm:

—E apê Ijaewjê nhõ pahi na ka. Anē.

¹⁹ Hãmri nē xatã axpên pãnhã hwỳr mra nē pĩ ho hkrãx pê htak nē hkuk kuhtõ nē hã hpêr o pikēnh pê hã hpijaam pyrã nē kutã hkõn krã ho hkrĩ.

²⁰ Hãmri nē kêp pahi xê kapa nē akupỳm kãm ê jaxà nē pĩ kahpa hã nhõr kaxyw ma o kato nē o tẽ.

²¹ Nom nhũm ra hirot tỳx nē nhũm mẽ tee ri omu hãmri nē mẽhõ kot ho ajuta kaxyw mẽ kot hkôt omunh o mõr xwỳnhjê kapi ho xa. Hãmri nē Sirēn nhõ xwỳnh Simãw hkã htykreja pumu. Aresãn mẽ Rupti wa hipêxã na pre. Nhũm htỳx hamakêtati nē mẽ kutã krĩm tẽ. Hãmri nhũm mẽ haê nē unê nē kãm Jejus o ajuta kaxyw hã karõ nhũm kãm pĩ kahpaja mỳ nē mẽ hkôt o tẽ.

Mẽ kot pĩ kahpa hã Jejus nhõr ã mẽ harēnh

Matêwre 27.33-44; Rukre 23.33-43; Juãw 19.17-27

²² Nhũm mẽ ra kên nhĩxet te kot mẽ hkrã hi pyràk xwỳnhja wỳr Jejus o pøj. Mẽ kot kãm “Korkot” anhỹr xwỳnhja wỳr. Mẽ pakapêr kãm na htem Korkotja jarēnh o: “Mẽ hkrã hi xà” anē. Jakamã nhũm mẽ ra hwỳr o pøj. ²³ Hãmri nē kot pĩ kahpa hã nhõr kaxyw wĩhti hkwỳ ho mẽ mẽmo mẽhkanexã pê mĩra ho ahkã. Kot ho kôm nē amnhĩ xà htỳx kãm hamak kêt kaxyw hipêx nē kãm kugõ nom nhũm hkaga nē ho hkôm kêt nē. ²⁴⁻²⁶ Hãmri nhũm myt kaxkwa nhĩpók wỳr tẽ nhũm mẽ pĩ kahpata ã Jejus xi nē prek o ìhkra ho htỳx nē hpar o htỳx. Nē hpãnhã kaxyw kakwỳ nē kãnhmã pĩ kahpa jarĩ nē kre kamã ãm nē hity hpa. Nhũm Jejus kỳx pê amnhĩ xà htỳx kumrêx kamã hamak o ajêt. Nhũm pòristi hõja tẽ nē tapti hõ py nē hã kagã ho:

IJAEWJÊ NHÕ PAHI NA JA

Hãmri nē Jejus wỳr ho api nē mỳ ri kunhõ. Hãmri nhũm hparpê pòristi hkwỳja axpên mã ê hkwỳ ho hpigrãnh kaxyw hã kênre ho jõka ho hkrĩ.

²⁷⁻²⁸ Tã nhũm mẽ wa kot amnhĩ tomnuj xwỳnh wa ho axkrut nē mã wa ho anē nē. Nē pĩ kahpa hã prek o wa ìhkra ho htỳx nē wa hpar o htỳx hãmri nē akutã ho Jejus nhĩjê nhũm wa ajêt.

²⁹ Hāmri nhūm mē kot omunh mā mrar xwýnhjaja Jejus pumu nē hā hpēr o pikēnh punuj nē hkrā ho apē nē kām:

—Kwa na ka pre ate Tirtūm mā amnhī jarēnh xā hā ixkre grānh par nē atā apkati axkrunēpxi nē akupým hipēx par ā amnhī jarēnh o apa. Nē axāhpumunh o axāhpumunh ā amnhī jarēnh o apa. ³⁰ Jakamā e kwa amnhī kapa nē wrý pu mā ja hā apumu. E kwa tokyx. Anē.

³¹ Nē patre krāhtūmjē mē Tirtūm kapēr tūm o mē ahkre xwýnhjaja piitā hwýr mra nē hā hpēr o pikēnh o kuhē. Nē axpēn mā kapēr o:

—E jahti na xep pre mē kamā ukapri ho pa nē tanhmā mē ho ajuta hto ho pa. Tā tām tanhmā amnhī to nē wrýk kēt nē. ³² Kwa pu mē arī pakuhē nē kot amnhī kaxār nē wrýk kām omu. Koja wrý pu mē omu nē kēp mē panhō pahihti hā hkôt pajamaxpēr kurē kumrēx. E tokyx wrý Jejus pa mē awrýk kām apumu. Nā kot kaj awrýk rax nē. Anē.

Hāmri nhūm akutā wa kot hijē nē jēt xwýnh wa haxwýja kām kapēr punuj o ajēt.

Jejus htyk ā harēnh

Matēwre 27.45-46; Rukre 23.44-49; Juāw 19.28-30

³³ Tā nhūm ra kaxkwa nhīpōk ri myt nhýr mē nhūm te kamāt pyrāk. Nhūm kamāt kō rax kumrēx o ra hā awry mē nhūm akupým myt katēr o mō. ³⁴ Hāmri nhūm Jejus àmra kamā Tirtūm mā kapēr nē kām:

—Inhō Tirtūm inhō Tirtūm. Kwa mon ka ixkaga? Anē.

Nom kapēr kām kapēr o:

—Eri Eri rāmā sapatani. Anē.

³⁵ Hāmri nhūm mē kot mar o kuhē xwýnhjaja kot Eri hā harēnh ma nē htýx ho finat Eris mā kapēr ā hkamnhīx. ³⁶ Hāmri nhūm ja hprōt nē mēmo rereeti py nē pī ho hkanhwý nē o tē nē ho wīhti nhek nē Jejus wýr o tē nē kot hkaôr kaxyw kām kupē. Hāmri nē hkwýjē mā kām:

—E hāmri pu mē jar hkāx ā pakuhē nē Eris jamā mǎn. Koja kuma nē hwýr tē nē o wrý nà? Anē.

³⁷ Nom nhūm Jejus ra htyk kaxyw nē àmra htýx nē ty.

³⁸ Hāmri nhūm Tirtūm mā amnhī jarēnh xā hā ixkre kamā hakwakre hā kupēxēja axkjē nē amnhī kahē xā mēnh kurē kumrēx. Utī rax tā kýj rūm ahpar mā axkjē nē amnhī kahē xā mē. Te Jejus htyk o mē pahte hkôt amnhī xunhwýr xwýnhjē mā Tirtūm wýr pry jakwa kre kahē xā mēnh pyrāk o ā amnhī kaxōnh anē. ³⁹ Nhūm pōristi krāhtūmjē hōja Jejus parpē kutā htyk kām omunh o xa. Hāmri nē tee ri omu nē hamaxpēr o:

—Hēxta waa nē. Ām hāmri na pre hte kēp Tirtūm Kra hā amnhī jarēnh o pa. Tā pa mē amarī kupī. Anē.

⁴⁰⁻⁴¹ Rōm nhūm mēni kwýjaja amým htyk kām omunh o kuhē. Na pre htem Garirej kamā Jejus mē hkôt mē pa ho mē pa xwýnhjē mā mē apkur xā hā àpēnh o mē hkôt pa nē mē hkôt Jerujarē hwýr mō. Marir Matarēn nē Xiakre mē Jojes wa katorxā Marirja. Nē Sarome. Nē mǎnēn mēni hkwýjaja nhūm mē amým Jejus htyk kām omunh o kuhē.

Mē kot Jejus jaxār ā harēnh

Matēwre 27.57-61; Rukre 23.50-56; Juāw 19.38-42

⁴² Nhūm prem arīgro pē sēsta hā Jejus pī nhūm ra amýkry htýx nē. Sap kukamā na pre htem Ijaewjaja amnhīm apkur xā hā mēō nhīpēx pa nhūm sap kato nhūm mēmoj to anhýr kēt nē. ⁴³ Jakamā nhūm Juje hō pē Arimatej

nhō xwŷnhja. Kêp Ijaewjê nhō juisti hō na pre. Nhũm mẽ piitã kãm hkĩnh nê axpên mã mex o mex ã harênh o pa. Na pre Tirtũm kot mẽ pahwŷr Jejus mênh kôt hamaxpêr o pa. Tã Jejus htyk ã omu hãmri nê hamaxpêr o:

—E pa ma pahi Pirat wŷr tẽ nê Jejus nhĩ hã kuwŷ. Inhmã uma htã kot paj ma hwŷr tẽ nê hã kuwŷ kê inhmã kugō pa ma o tẽ nê tokyx haxà. Kot paj ho anhŷr tokyx anhŷr kêt nhũm mẽ panhō arĩgromnu pẽ sapja wŷr ra myt axà hãmri pa haxàr kêt nê.

Anhŷr o hamaxpêr nê ma Pirat wŷr tẽ nê hã kuwŷ. ⁴⁴ Hãmri nhũm amnhĩ jaêr pẽ ra htyk ã harênh ma nê amnhĩ wŷr pôristi krãhtũmjê hō hã karō nê hã hkukja nê kãm:

—Kwa xà na ra Jejus ty? Anê.

Hãmri nhũm kãm:

—Tỳ na ra ty. Anê.

⁴⁵ Hãmri nhũm kuma nê Juje mã kãm:

—Tôe. Mamrĩ ma o tẽ nê haxà. Anê.

⁴⁶ Hãmri nhũm kuma nê akupŷm Jejus wŷr tẽ nê pôristi mã anê nhũm mẽ kãm ho wrŷ. Nhũm kumŷ nê kupêxê ho hkupu hpa nê o tẽ nê kên kre kakwŷnh kãm haxà. Hãmri nê kên rax o hitom mex nê ma akupŷm krĩm tẽ. ⁴⁷ Nhũm Marir Matarên mẽ Juje katorxà Marir ôja wa ma hkôt tẽ nê kot haxàr kãm omunh o xa. Kot mẽ hkuxwa xà ho gregrer kêt rãhã haxàr kãm omu.

16

Jejus akupŷm htĩr ã harênh

Matêwre 28.1-10; Rukre 24.1-12; Juãw 20.1-10

¹⁻² Tã nhũm apkati. Nom nhũm ra mẽ inhō arĩgromnu pẽ sap kator jakamã nhũm mẽ kormã akupŷm kênkreta wŷr mrrar kêt nê. Hãmri arĩgro mex jamãr pẽ kôkôt o hkrĩ. Hãmri nhũm axte apkati nhũm tòmĩk nhũm ra mẽ inhō arĩgromnu hapêx nhũm Marir Matarên mẽ Sarome mẽ Xiakre katorxà Marirja mẽ ma akupŷm kênkreta wŷr mra. Kormã kwŷhtãã. Kormã myt kator o mōr mẽ nhũm mẽ kãnhmã hkrĩ hãmri nê mẽ kot Jejus gregrer kaxyw mẽ hkuxwa xà hkwy jamŷ nê ma hwŷr o mra. ³ Hãmri nê kormã mōr ri tee ri amnhĩ kukamã hamaxpêr nê axpên mã:

—Xê gĩa nê. Mẽhō koja mẽ pamã nhãm kênkre nê hitom raxta xãm pu mẽ Jejus wŷr agjê nê gregrer? Utĩ rax kumrêx kênã. Anê.

⁴ Hãmri nê hwŷr pōj nê omu nhũm ra hitom xàja kàx ã nō nhũm mẽ tee ri omu. Utĩ rax tã ra kàx ã nō. ⁵ Hãmri nhũm mẽ kênkre hwŷr agjê nê upōk rũm mẽhō nyw pumu. Nhũm ê jakajre kamã nhŷ nhũm mẽ amnhĩ jaêr pẽ omu nê tee ri hamaxpêr. ⁶ Hãmri nhũm mẽ kãm:

—Kwa mẽ amã ma hkêt nê. Mẽ ate Najare nhō xwŷnh pẽ Jejus pumunh kaxyw na ka mẽ mra. Mẽ kot pĩ kahpa hã nhôr xwŷnhhta. Nom jar amrakati. Na ra Tirtũm akupŷm ho htĩr. E mẽ kam nê amnê agjê nê ano ho nōr xà kaprŷ pumu ⁷ nê tokyx ma akupŷm mra nê hkôt mẽ pa ho pa xwŷnhjê mã harê. Kojã ma Jejus mẽ akukamã akupŷm Garirej wŷr mō. Garirej kamã kot kaj mẽ axte axpên pumu. Ra kot mẽ amã amnhĩ jarênh xà hkôt. Kwa mẽ tokyx ma akupŷm mẽ hwŷr mra. Nê kwa kê Simãw Pêtreja harênh mar mex nê. Anê.

⁸ Hãmri nhũm mẽ kuma nê awjanã nê ma akupŷm hprôt. Nê tee ri hamaxpêr nê kãm ma xaj htetet tŷx jakamã kormã nhãm mẽhō mã harênh kêt nê.

*Jejus kot Marir Matarēn w̄yr kator ā harēnh
Juāw 20.11-18*

⁹ Nhūm semān nyw mā ār xā hā arīgro pē tōmīkja ā nhūm Jejus akup̄ym ht̄ir. Hāmri nē Marir Matarēn kumrēx w̄yr kato. Kot nē mēkarōmnuti ho 7 nē nē hanor xw̄ynhta kumrēx w̄yr kato. ¹⁰ Hāmri nhūm akup̄ym ht̄ir kām omu nē hkīnh t̄yx kumrēx. Nē ma akup̄ym tē nē Jejus krāmnhw̄jē mā harē. Nhūm mē hkaprī nē m̄yr o hkrī nhūm mē hw̄yr axā nē mē omu nē mē kām:

¹¹ —Xē mē am̄yr kēt nē. Na ra Jejus akup̄ym ht̄ir nē ham ixw̄yr kato pa inhno ho omu. Xē mē hāmri axte am̄yr kēt nē.

Anh̄yr tā nom nhūm mē ht̄yx ho amnhī krā hkôt kot ri ā harēnh anh̄yr ā hkamnh̄ix jakamā kuma nē ām kuma.

*Jejus kot hkwȳjē hw̄yr kator ā harēnh
Rukre 24.13-35*

¹² Tā nhūm Jejus axte ja wa hw̄yr kato. Kôt mē pa ho pa xw̄ynh wa ho axkrut nē wa hw̄yr kato. Na pre wa Jerujarē rūm kato nē akup̄ym wa ō krī hw̄yr mōr mē nhūm wa hw̄yr kato. Nom axtem tanhmā amnhī nh̄ip̄ex to nē wa hw̄yr kator jakamā nhūm wa tokyx hprī hā kēp Jejus ā omunh kēt nē. ¹³ Tā kēp Jejus ā omu hāmri nē akup̄ym Jerujarē hw̄yr mō nē hkwȳjē mā harēnh kurē kumrēx. Nom nhūm mē wa kuma nē ām wa kuma nē akup̄ym ht̄ir kôt hamaxp̄er kēt nē.

*Jejus kot hkwȳjē mā mēmoj tā karō hā harēnh
Matēwre 28.18-20; Rukre 24.44-49; Juāw 20.19-23; māānēn Atre 1.6-8*

¹⁴ Tā nhūm Jejus tā hkôt mē pa ho mē pa xw̄ynh pē 11 w̄yr kato nhūm mē kamā no pyma nē hkīnh t̄yx nē omunh o kuhē. Hāmri nhūm mē kām:

—Kwa hēxta waa nē. Marir Matarēn mē akw̄yta mē kot akup̄ym ix̄t̄ir kām ixpumunh nē mē amā ijarēnh tā ka mē ama nē ām mē ama. Pēr ām mē akrā h̄it̄yx jakamā na ka mē ama nē mē hkôt ajamaxp̄er kēt nē. Anē.

¹⁵ Hāmri nē mē kot tanhmā kām amnhī nh̄ip̄ex to ho pa hā mē kām karō nē mē kām:

—E kēr ka mē ma krī piitā hkôt mē kām ijarēnh o ri mē hkôt apa. Ixte tanhmā mē nē amnhī nh̄ip̄ex toja ka mē aprī hā mē kām ijarēnh o ri mē hkôt apa. ¹⁶ Nē mē kot mē akap̄er mar nē amnhī kaxyw ixkôt hamaxp̄er xw̄ynhjaja kēr ka mē hkrā kumrā nhūm mē nh̄yrmā Tirtūm mē wa ixri ht̄ir tūm nē mex rāhā nē pa ho pa. No mē kot amnhī kaxyw ixkôt hamaxp̄er kēt xw̄ynhjaja koja Tirtūm nh̄yrmā amnhī nē mē hano nhūm mē ma kuwy hw̄yr pa.

¹⁷ —Nē amnhī kaxyw ixkôt mē ajamaxp̄er xw̄ynhjaja kot kaj mē inh̄y hā tanhmā amnhī nh̄ip̄ex to ho ri apa. Aa mē kot mēmoj pumunh kēt kw̄y ho anē nē inh̄y hā inh̄ixi jarēnh kôt mē nē mēkarōmnuti janor o ri mē hkôt apa. Nē mē ate nhām mē kap̄er mar kēt tā inh̄y hā ho akap̄er mex o apa. Mē ate mar kēt tā ra ho akap̄er nhūm mē kot mē kap̄erta mar xw̄ynhjaja hprī hā mē amar mex nē. ¹⁸ Nē kot kaj mē nh̄yri at̄yx kagā xoprē hō hpyr tā no nhūm tanhmā mē ato hkēt nē. R̄y at̄yx mēmoj to mē hpar xā hkwȳ ho akōm tā no nhūm tanhmā mē ato hkēt nē. Nē inh̄y hā mē ā xw̄ynhjē hā mē anh̄ihkra jaxw̄y nhūm mē akup̄ym mex. Kot kaj mē amnhī kaxyw ixkôt mē ajamaxp̄er xw̄ynhjaja ā inh̄y hā amnhī nh̄ip̄ex anh̄yr o ri apa. Anē.

*Jejus kot akup̄ym kaxkwa hw̄yr āpir ā harēnh
Rukre 24.50-53; māānēn Atre 1.6-11*

19 Tã nhũm mẽ panhõ Pahihti Jejusja hkôt mẽ pa ho mẽ pa xwýnhjê mã kapēr pa hãmri nhũm Tirtũm ma akupỹm amnhĩ wýr kaxkwa hwýr ho api. Hãmri nhũm kaxkwa kamã Tirtũm nhĩhkô hã upôk rũm nhỹ. Kot ìhkô hã mẽmoj piitã ho amnhĩptàr kaxyw hkrĩ ho hkrĩ. 20 Hãmri nhũm hkôt mẽ pa ho pa xwýnhjaja ma akupỹm àpir kãm omu hãmri nẽ anhgrà nẽ ma krĩ piitã hkôt mẽ kãm Tirtũm kapēr jarēnh o pa nhũm Pahihti Jejus mẽ ìhkô hã pa ho pa. Nhũm mẽ ma ý hã hkwýjê mã aa mẽ kot mẽmoj pumunh kêt kwý ho anhỹr o ri mẽ hkôt pa nhũm mẽ ja hã mẽ omu nẽ axpēn mã mẽ harēnh o:

—Nà ãm hãmri na mẽ pamã Tirtũm kapēr jarēnh o pa nẽ ho hẽx kêt nẽ. ý hã mẽ kot aa mẽ pahte mẽmoj pumunh kêt kwý ho anhỹr o pa kēnã. Nà ãm hãmri na ã mẽ pamã kapēr jarēnh anhỹr o pa. Anẽ.

Ja kôt na Makre kot Jejus jarēnhja hapêx.

Rukre Rukre tanhmã Jejus kot amnhĩ nhĩpêx to ho pa hã kagà

Rukre na pre kagàja nhĩpêx. Kêp Ijaew kêt xwýnh na pre. Tã amnhĩ kaxyw Jejus kôt hamaxpêr. Na pre kêp tótô nê mẽ hkane ho pa. Nê Jejus nhỹ hã kapêr o pa xwýnhjê hõ pê Pawreja kôt pa ho pa. Tã tanhmã hamaxpêr to nê hkrãmnhwý Teopre mã kagàja nhĩpêx nê kamã tanhmã Jejus kot amnhĩ nhĩpêx to ho pa hã harê nê hã kagà.

Nê Jejus kêp Tĩrtũm nhỹ hã kapêr o pa xwýnh ã harê. Nê mẽ pahpyrà nê ì ho ì hã harê. Nê kêp mẽ pakamã ukapri xwýnh ã harê. Nê kêp mẽ pahte amnhĩ tomnuj o hapêx xwýnh ã harê. Á na pre Rukreja hkrãmnhwý Teopre mã Jejus jarê nê hã kagà anê. Nê mããnen mẽ pahpiitã mẽ pakaxyw harê nê hã kagà.

Rukre kot Teopre mã amnhĩ jarênh Atre 1.1-2

¹ Pa pahi Teopre. Xà amex? E ot pa awýr kagà nhĩpêx nê awýr kumê. Ixte amã Jejus jarênh kaxyw. Na prem ra ohtô nê jar mẽ pahkôt Jejus kot amnhĩ nhĩpêx o pa hã kagà rax nê. ² Jejus nhỹ hã Tĩrtũm kapêr jahkre ho mẽ pa xwýnhjaja na prem Jejus kot tanhmã amnhĩ nhĩpêx to hkrax kãm kot amnhĩ nhĩpêx o pa hã omunh o hkôt pa. Hãmri nê hprĩ hã mẽ inhmã harê nê hã kagà nhũm mẽ ohtô nê mẽ mar xà hkôt mẽ urã nê kot tanhmã amnhĩ nhĩpêx to ho pa hã kagà. ³ Tã pa mẽ harênh ma nê ijamaxpêr o:

—E kot paj ijaxwýja Jejus kot amnhĩ nhĩpêx kwý hã kagà. Nà kot paj ho anê. Anhýr o ijamaxpêr jakamã ot pa ra ixte amã hã kagà kaxyw.

⁴ Tã kêr ka kamã harê nê ixpyrà nê ama nê aprĩ hã harênh mar týx nê mẽ kot amã harênh xwýnhjê hkôt ajamaxpêr týx o apa. Ám hãmri na prem mẽ amã harê. E kot paj amã hkwý hã kagà. Ixpê akrãmnhwý Rukre kot paj ixpri hã amã harê nê hã kagà.

Tĩrtũm kapêr o wrýk xwýnh kot Juãw Paxis jarênh

⁵ Juãw Paxis nhĩpêêxà finat Jakarisja kumrêx kot paj amã harê. Kêp finat Apiasti kanrêhã htãmnhwý jakamã urak nê kêp mẽ apê Ijaew nhõ patre na pre. Pahihti Eroxa kormã kot mẽ anhõ pika kamã mẽ ho amnhĩptãr ri nhũm Jakaris kêp patre nê pa. Nê hprõ Ijapew mẽ wa kêp Parãw kanrêhã htãmnhwý. ⁶ Nê wa hamê na pre Tĩrtũm kôt tãm amnhĩ nhĩpêx o wa pa. Ám Tĩrtũm kapêr kôt pix mã ri amnhĩ nhĩpêx rãhã ho wa pa.

⁷ Nom Ijapewja tanhmã hkra xà kute jakamã nhũm wa hkra hkêt nê wa pa rãhã wa ra hpigêx týx nê.

⁸ Jakamã nhũm Jakaris ma mẽ kot Tĩrtũm mã amnhĩ jarênh xà hã ixkre hwýr tê. Kwýjê pyrà nê kot Tĩrtũm mã tanhmã amnhĩ nhĩpêx to kaxyw ma mẽ hpãnhã hwýr tê nê axã. ⁹⁻¹⁰ Hãmri nê kamã Tĩrtũm mã amnhĩ jarênh pê kãm mẽ hkuxwaxã ho xêt o xa. Nhũm Ijaew kwýjaja ixkreta wýr akuprõ nê kapem kutêp Tĩrtũm mã amnhĩ jarênh o kuhê. ¹¹ Pu nhũm kaxkwa rũm Tĩrtũm kapêr o mẽ wrýk xwýnhja wrý nê Jakaris kutã xa. Mẽ hkuxwa xà ho xêt xà hã mês kunĩhti xupòk rũm xa. ¹² Hãmri nhũm amnhĩ jaêr pê amnhĩ kutã omu nê akryk omunh o xa. ¹³ Hãmri nhũm kãm:

—Pa Jakaris? Kwa tee ri ajamaxpēr o amā ma hkēt nē. Na pre Tirtūm ate akra hā hwūr o apa hā ama nē hā apumu. Jakamā koja tanhmā aprō hkra xā ho ka kamā akra. Nhūm nō nē rax nē kato nē myre. Ka wa hā hixi mē nhūm kēp Juāw. ¹⁴ Koja kato ka wa omu nē akīnh tỳx kumrēx. Nhūm akwỳjaja haxwỳja ohtō nē war akra jarēnh ma nē war anhỹ hā hkīnh nē. ¹⁵ Koja kormā akra kator kēt ri nhūm Tirtūm Karōja hkarō hwūr axā. Hāmri nhūm kato nē gaa nē hprēk nē Tirtūm mā tanhmā amnhĩ nhĩpēx to ho pa. Tirtūm kām hprām xā hkōt pix mā tanhmā amnhĩ nhĩpēx to ho pa. Nom kēr ka inhmar kumrēx. Kē mēmoj to wīhti ho hkōm kēt nē pa. Nē kagōxyhti ho hkōm kēt nē pa. Ām kwarī ho kwarī. ¹⁶ Koja hprēk hāmri nē mē apē Ijaew mā Tirtūm kapēr jarēnh o mē hkōt pa. Nhūm mē ohtō nē kuma nē kot amnhĩ tomnuj kaga nē Tirtūm kōt amnhĩ xunhwūr nē hkōt amnhĩ nhĩpēx mex o pa.

¹⁷ —Tirtūm kot mē awūr mē apytār xwỳnh maati mēnh mā xwỳnh kukamā koja mē kām harēnh o pa. Te Tirtūm nhỹ hā kapēr jarēnh xwỳnh finat Eris kot amnhĩ nhĩpēx pyrāk o koja amnhĩ nhĩpēx. Nē urāk nē Tirtūm Karō nhỹ hā mē amā Tirtūm kapēr jarēnh o mē akōt pa. Jakamā nhūm mē akwỳjaja kuma hāmri nē amnhĩ tomnuj kaga hpa nē Tirtūm kōt pix mā amnhĩ nhĩpēx o pa. Nē tām mē hkrajē nhĩpēx o pa. Koja mē ā akra Juāwja kōt amnhĩ nhĩpēx anē. Jao Tirtūm kot mē awūr mēnh mā xwỳnhnta kutēp tām amnhĩ nhĩpēx o pa. Anē.

¹⁸ Nhūm pre ā Tirtūm kapēr o wrỳk xwỳnh Jakaris mā hkrata jarēnh anē. Hāmri nhūm tee ri kuma nē kām:

—Kwa xā we ām hāmri na ka ā inhmā ixkra jarēnh anē nà? Ra ixprō mē wa ijamē wa ixpigēx tỳx kēnā kot pa kēt wa ixkra. Anē.

¹⁹ Hāmri nhūm kām:

—Nā ām hāmri na pa ā amā harēnh anē. Ixpē Gapriew na pa ā awūr ixwrỳk nē Tirtūm nhỹ hā amā harēnh anē. Ixte Tirtūm nhũhkō hā ixkuhē xwỳnhjē hō na pa. Tām na awūr inhmē pa awūr wrỳ nē ā amā akra jarēnh anē. ²⁰ Tā ate ixkōt ajamaxpēr kēt jakamā kot kaj axte axumar kēt nē akapēr kēt rāhā nhūm akra kato. Koja kato ka ri kormā akupỹm akapēr nē akupỹm ama. Ate ixkōt ajamaxpēr kēt jakamā kot kaj ā amnhĩ nhĩpēx anē nē ri amnhĩ pumu. Ām hāmri na pa ā amā ixkapēr anē. Anē.

Nhūm pre ā Tirtūm kapēr o wrỳk xwỳnhja Jakaris mā kapēr anē. Jakamā nhūm tokyx ixkre rūm kator kēt nē.

²¹ Hāmri nhūm ixkre kapem mē kuhē xwỳnhjaja tee ri kamā ama nē axpēn mā:

—Tk. Kwa mo na we ri hitom kām ho anhỹr kām unē nē tokyx kator kēt? Anē.

²² Tā nhūm akupỹn mē hwūr kato. Nē tee ri kot mē kām kapēr kaxyw no ām ĩhkra pix o ri mē kām tanhmā ujahkre hto. Hāmri nhūm mē amnhĩ jaēr pē kot ā amnhĩ nhĩpēx anhỹr ā omu nē tee ri hkukamā hamaxpēr nē axpēn mā:

—Kwa tanhmā na we amnhĩ to? Mān hitom kām mēmoj tanhmā kute hā omu hā na ri ā amnhĩ nhĩpēx anē nà? Anē.

²³ Hāmri nhūm Jakaris ixkre kamā mēmoj tā àpēnh pa hāmri nē ma akupỹm ōrkwỹ hwūr tē.

²⁴⁻²⁵ Tā nhūm hprō Ijapewja htujarō. Hāmri nē amnhĩ tujarō hā amnhĩ pumu nē hkīnh tỳx nē. Nē hamaxpēr o:

—Hēxta gāà nē. Ma ām hāmri na pa pre ixkra hkēt nē amnhĩ kamā ixpijaàm o ri ixpa. Tā ra ixtujarō. Kot paj wa axte ri amnhĩ kamā ixpijaàm kēt nē. Ma ām hāmri na Tirtūm ā wa inhĩpēx anē. Na pa wa ixkīnh tỳx kumrēx. Anē.

Nhũm pre ã hamaxpēr anē hāmri nē arī ōrkwỹ kamā hkrī ho hkrī. Aa nhỹhỹm kator nē mōr kēt rāhā hā mytwrỹ kēp 5.

Tĩrtũm kapēr o wrỹk xwỹnh kot Marir mǎ hkra jarēnh

Matēwre 1.18-21

²⁶ Tã nhũm Ijapew ra htujarō hā mytwrỹ kēp 6 nhũm Tĩrtũm axte kapēr o wrỹk xwỹnh pē Gapriewja mē. Nhỹri Garirej kamā krī pē Najare hwỹr kumē nhũm ma hwỹr wrỹ. ²⁷ Mēhō pē Marir wỹr wrỹ. Nhũm ra Juje ho mjēn kaxyw. No ãm kormā hkukrit rāhā ho mjēn kaxyw. Jujeja Marir pyrā nē kēp pahi finat Tawi kanrēhā htãmnhwỹ na pre. ²⁸ Jakamā nhũm Gapriew Marir wỹr wrỹ nē kām:

—Pa Marir? E ot pa amā Tĩrtũm kapēr jarēnh kaxyw awỹr wrỹ. Kot akōt pa ho pa jakamā koja ato mex rax kumrēx. Anē.

²⁹ Hāmri nhũm amnhĩ tã kuma nē tee ri hamaxpēr nē hamaxpēr o:

—Xē mēmo na we ri ã inhmā kapēr anē? Tanhmā koja we Tĩrtũmja ixto mex rax to? Anē.

³⁰ Hāmri nhũm Gapriew kām:

—Kwa tee ri amnhĩ kukamā ajamaxpēr kēt nē. Tĩrtũm kām ajapēē. ³¹ Kot kaj atujarō nhũm akra kato nē myre. Ka hā hixi mē nhũm kēp Jejus. ³²⁻³³ Koja Tĩrtũm amā ho mex rax nē. Nē koja mē piitā mē kām kēp amnhĩ Kra hā ho amnhĩrit. Nē mē apē Ijaew o amnhĩptār kaxyw koja mē akaxyw ãm nhũm higēt pahi Tawi pyrā nē mē ato amnhĩptār o pa. Mē ate amnhĩ wỹr kamā ajamak o apa xwỹnhta koja. Tĩrtũm kām hprām xā hkōt koja mē ato amnhĩptār rāhā ho pa. Anē.

³⁴ Nhũm pre ã kām kapēr anē nhũm amnhĩ tã kuma nē tee ri amnhĩ kukamā hamaxpēr hāmri nē kām:

—Xē gàa nē. Tanhmā kot pa kēt we amnhĩ to nē ixtujarō? Kormā ixkukrit nē mo kormā inhmjēn? Mē. Xā Juje kot ixkamā hkra hkukamā na ka ã ri inhmā axujarēnh anē? Anē.

³⁵ Hāmri nhũm kām:

—Nã koja Tĩrtũm Karō tãm tanhmā ato ka ŷ hā tanhmā amnhĩ to hkēt tã atujarō. Jakamā koja akra kēp Tĩrtũm Kraa. ³⁶⁻³⁷ Na ra haxwỹja anã Ijapewja htujarō. Ra hpigēx tỹx nē aa hkra hkēt nhũm hkwyỹjaja kot axpēn mǎ ōhy kamā hkra hkēt kumrēx ã harēnh o pa htã ra htujarō. Tĩrtũm kot tanhmā mē ho nhũm mē htujarō tanhmā kēp kute hkēt. Jakamā nhũm tanhmā ho nhũm mjēn tãm htu nhũm ra htujarō hā mytwrỹ kēp 6. Tĩrtũm tãm kot mēmoj piitā tanhmā ho kaxyw ãhpumunh xihỹtỹx. Jakamā koja urāk nē mǎ ato anē nē ka kormā akukrit tã atujarō. Anē.

³⁸ Nhũm pre ã Gapriew Marir mǎ kapēr anē nhũm amnhĩ tã kuma nē kām:

—Ko. Kē māmri kām tanhmā ixto hprām xā hkōt māmri tanhmā inhĩpēx to. Inhmā Tĩrtũm kapēr kōt amnhĩ nhĩpēx prām. Kē māmri kām tanhmā ixto hprām xā hkōt tanhmā inhĩpēx to.

Anē nhũm kuma nē ma akupỹm api.

Marir kot Ijapew wỹr mōr ã harēnh

Rukre 11.27

³⁹⁻⁴⁰ Tã nhũm Marir amnhĩ tujarō hā amnhĩ pumu nē nã Ijapew wỹr hkra kurē kumrēx. Hāmri nē nojarēt nē ō krī rūm kato nē ma hwỹr mō. Ma Ijapew papxā hwỹr mō. Ijapew nhō krĩja pika pē Jutej kamā nhỹri hixēt kamā na pre. Nhũm ma hwỹr mō hāmri nē hwỹr pōj nē Ijapew wỹr axā nē omu nē kām:

—Ka? Xā wa amex? Anē.

⁴¹ Hāmri nhūm kuma nē kām:

—Ÿ ma wa inhmex na pa wa ixpa.

Anhÿrja kôt nhūm ôhy kamā hkraja haxwÿja te kot Marir kapēr mar nē amnhī nhīpēx pyrāk o htu kamā àxônĥ tÿx o nō. Hāmri nhūm Ijapew Tirtūm Karō nhÿ hā tanhmā Marir mā kapēr to. ⁴² Kàx pē kām kapēr nē kām:

—Xē gāà nē. Ra Tirtūm kot ato mex jakamā na ka akīnh rax o mē inhni hkwÿjē jakrenh pa. Anhōhy kamā akraja koja Tirtūm amā ho mex rax nē.

⁴³ Xē mon ka ā ixto mex nē ixwÿr amōr anē? Apē inhō Pahihti katorxā htā ixto mex nē ā ixwÿr amōr anē. Hēxta gāà nē. Ām hāmri na ka ixwÿr mō Marir. ⁴⁴ Na ka ixwÿr mōn pōj nē inhmā akapēr hāmri nhūm ixtu kamā ixkrare akapēr ma nē hkīnh xāj ixtu kamā ixkamnār tÿx o nō. ⁴⁵ Na ka pre Tirtūm kapēr o wryk xwÿnh kot amā kapērja ma nē hkôt ajamaxpēr tÿx nē. Jakamā kot kaj Tirtūm nhÿ hā akīnh nē ajamakētkati nē amex nē ri apa. Anē.

Marir kot Tirtūm mā mex o mex ā grer ā harēnh

Rukre 6.20-26

⁴⁶ Hāmri nhūm Marir Ijapew kot ā kām kapēr anhÿrja ma nē kām Tirtūm mex o mex ā gre nē grer o:

Tirtūm na mex o mex.

⁴⁷ Kēp ixkaprī xwÿnh na.

Kēp ixkaprī xwÿnh jakamā na pa inhmex nē ixkīnh nē ri ixpa.

⁴⁸⁻⁴⁹ Ixte amnhī to grire nhūm ja hā ixpumu nē ixkamā ukaprī nē ixto mex rax kumrēx.

Jakamā koja mē piitā axpēn kanrēhā axpēn mā ijarēnh rāhā ho pa. Tirtūm kot tanhmā ixto mex to hā ijarēnh rāhā ho pa.

Tirtūm na mex o mex nē hihtÿx o hihtÿx. Tā na ā inhīpēx anē.

⁵⁰ Ma na hte ā amnhī nhīpēx anē nē axpēn kanrēhā mē kot hā hpijaàm xwÿnhjē pumu nē mē kutā nojarēt rāhā ho pa.

Nē mē kamā ukaprī rāhā ho pa.

ā na hte mē hipēx mex anhÿr o pa.

⁵¹ Nē hihtÿx o hihtÿx jakamā na hte mē kot amnhī to jarkrar o ri mē pa xwÿnhjaja tanhmā mē ho nhūm mē axkaprā.

⁵² Nē pahihti hkwÿ kot kapēr mar nē ām mar xwÿnhjaja.

Na hte amnhī tā mē omu nē mē àpēnh nē mē hapōj nē mē hpānhā mē kot amnhī to hkryre xwÿnh kwÿ jagjē.

⁵³ Na hte mē kām kapēr kôt amnhī nhīpēx prām xwÿnhjē ho mex o pa nhūm mē mex nē pa.

No mē kām hprām kēt xwÿnhjaja nhūm tanhmā mē ho mex to hkēt nē.

⁵⁴⁻⁵⁵ ām hāmri na pre amnepē mā mē panhīgēt mā amnhī jarēnh xā hkôt mē pahpē Apraāw rūm axpēn kanrēhā hkrajaja mē pahto mex o pa.

Mē pahpē Ijaew mē pahte kām tanhmā amnhī nhīpēx to ho papa nhūm kām mē pajapē xāj mē pahto mex rāhā ho pa.

Nē mē pakamā ukaprī rāhā ho pa. Anē.

Nhūm pre ā Marir Ijapew mā Tirtūm mex o mex ā grer anē. ⁵⁶ Hāmri nē ri hkôt pa hā mytwrÿ axkrunēpxi nē ma akupÿm ō krī hwÿr mō.

Juāw Paxis kator ā harēnh

⁵⁷ Tā nhūm Ijapew hpjagri kaxyw ôhy xā nhūm hkrare kato nē myre.

⁵⁸ Hāmri nhūm omu nē hkīnh tÿx nē. Hāmri nhūm hkwÿjaja Tirtūm kot wa kamā ukaprī hā wa kām wa hkra myre nhōr ā harēnh ma nē wa ŷ hā hkīnh nē.

⁵⁹ Tã nhũm wa hkraja ra hã arĩgro pẽ 8 nhũm mẽ hkwyjaja kot my kwryt kã krãhyr kaxyw hwyr akuprõ. Tirtũm kot mẽ kãm hã karõ xã hkõt nhũm mẽ kot kãm õr ã amnhĩ to amnhĩrit kaxyw ã hipẽx anhỹr kaxyw. Na htem ã mẽ kẽp Ijaew krajẽ piitã mẽ hipẽx anẽ. Jakamã nhũm prem ã hipẽx anẽ hãmri nẽ hpãnhã tanhmã kot hã hixi mẽnh to kaxyw ri hã axpẽn kukja. Hãmri nẽ hipẽxã hkõt kot hã Jakaris mẽnh kaxyw. ⁶⁰ Hãmri nhũm katorxã tee ri axpẽn tã mẽ kuma nẽ mẽ kãm:

—Ma koja kẽp Jakaris kêt nẽ. Koja kẽp Juãw. Anẽ.

⁶¹ Hãmri nhũm mẽ tee ri kuma nẽ kãm:

—Kokỹ. Mo jar mẽ pahtõ pẽ Juãw kot kêt ri kẽp Juãw? Jar amrakati kẽnã kot ka kêt wa ri ã hã hixi rẽnã anẽ. Anẽ.

⁶² Hãmri nẽ hixi hã hipẽxã kukja. Nom nhũm arĩ umar kêt nẽ kapẽr kêt jakamã nhũm mẽ tanhmã ri kãm mẽ ãhkra nhĩpẽx to. ⁶³ Hãmri nhũm ãhkra ho kagã hã ahwỹ nhũm mẽ kãm ja gõ nhũm kupy nẽ hã mẽ kãm hixi nhĩpẽx. Nhũm mẽ kupy nẽ omu hãmri nẽ hixi pẽ Juãw kõt omu. Hãmri nẽ tee ri hixija kukamã hamaxpẽr. ⁶⁴ Rõm nhũm Jakaris akupỹm ama nẽ kapẽr mex kurẽ kumrẽx nẽ Tirtũm mã mex o mex ã harẽnã o xa. ⁶⁵⁻⁶⁶ Hãmri nhũm mẽ omu nẽ ma mẽ piitã mẽ kãm wa hkra jarẽnã o ri axpẽn kõt hprõt. Pika pẽ Jutej kamã hixêt kape hã krĩ hkõt nhũm mẽ ri mẽ piitã mẽ kãm harẽnã o hprõt. Tirtũm kot wa hkra kõt tãnopxar o pa nẽ ho mex ã harẽnã o hprõt. Hãmri nhũm mẽ kuma nẽ tee ri hkukamã hamaxpẽr nẽ axpẽn mã:

—Hẽxta waa nẽ. Tirtũm tãm na xep hte jare hkõt ri pa ho pa. Jakamã koja nhỹrmã hprẽk hãmri nẽ tanhmã koja we amnhĩ nhĩpẽx to ho pa wehee? Anẽ.

Jakaris kot Tirtũm nhỹ hã kapẽr ã harẽnã

⁶⁷ Hãmri nhũm Jakaris Tirtũm Karõ nhỹ hã Tirtũm mex o mex ã harẽnã o xa. Tirtũm kot mẽ kẽp Ijaew o mex ã harẽ nẽ mẽ kãm:

⁶⁸ Hẽxta waa nẽ. Nã Tirtũmja mex o mex. Na pre hte mẽ pahpãmjaja ãm hkõt pix mã amnhĩ nhĩpẽx o pa. Jakamã nhũm hte Tirtũm mẽ pahpẽ hkrajẽ kamã ukapri nẽ mẽ pahto mex o pa.

E kwa pu mẽ kãm mex o mex ã harẽnã rãhã nẽ.

⁶⁹ Ra kot mẽ pahwyr mẽ pahkapri xwỹnh pẽ mẽ panhõ pahihtĩ mẽnh mã. Ja kaxyw ãhpumunh xihtỹx o hihtỹx jakamã na pre ra mẽ pahwyr mẽnh ã amnhĩ jarẽ.

Koja kẽp amnepẽm Tirtũm mã tanhmã amnhĩ nhĩpẽx to ho pa xwỹnh Tawija hkanrẽhã htãmnhwỹ.

⁷⁰ Amnepẽm Tirtũm nhỹ hã kapẽr xwỹnhjaja na prem mẽ kãm Tirtũm kapẽr jarẽnã o pa nẽ mẽ kãm:

⁷¹ “Koja Tirtũm mẽ panẽ mẽ kãm mẽ pahkurẽ xwỹnhjẽ pumunh mex o pa.” Anẽ.

⁷² Tirtũm ra kot mẽ pahpãmjẽ mã amnhĩ jarẽnã xã hkõt kãm mẽ pakamã ukapri rãhã ho pa hprãm.

Koja aa ja ho anhỹr o hamakẽtkati hkêt nẽ.

⁷³⁻⁷⁵ Na pre ra mẽ pahpãm Apraãw mã mẽ pakukamã ã mẽ pahtã amnhĩ jarẽnã anẽ nẽ kãm: “Kot paj mẽ anẽ mẽ kãm mẽ akurẽ xwỹnhjẽ pumunh mex nẽ mẽ ãhkra nẽ mẽ ato ixkato. Jakamã kot kaj mẽ amnhĩ kamã amã mẽ uma hkêt nẽ axãmnhĩx ri ajamakẽtkati nẽ mẽ kamã apa. Nẽ kot kaj mẽ mãmri axãmnhĩx ri inhmã tanhmã amnhĩ nhĩpẽx to ho ri apa rãhã nẽ. Nẽ ixkõt amnhĩ nhĩpẽx o ri apa rãhã ty.” Anhỹr o na pre Tirtũm mẽ pakukamã mẽ pahtã amnhĩ jarẽ. Anẽ.

Nhũm pre ă Jakaris mē kām Tĩrtũm kapēr jarēnh anē. Hāmri nē hkrareja mỳ nē o xa nē kām:

⁷⁶—No ka Xugitre. Kot kaj aprēk hāmri nē apē Tĩrtũm maati nhỹ hã kapēr jarēnh o apa xwỹnh. Jakamã kot kaj Pahihti hkukamã mē piitã mē kãm harēnh o ri mē hkôt apa. Mē kot amar nē kutēp tãm amnhĩ nhĩpēx kaxyw.

⁷⁷—Tĩrtũm kot mē nē mē kot amnhĩ tomnui rēnh nē mē ho hkra hã harēnhja kot kaj mē hkôt mē kãm harēnh o ri apa.

⁷⁸—Na hte Tĩrtũm mē pakamã ukapri ho pa nē mē pakamã gryk tokyx anhỹr kēt nē. Jakamã koja mē pahwỹr mē pahkapri xwỹnhja mē. Kormã mē pahwỹr wrỹk kēt jakamã te mē pahte kamãt kô kamã tee ri mē paxãhkupēnh o ri papa xwỹnh pyrãk.

—Nom kãm mē pahwỹr wrỹkja o te ra myt kator nē mē pamã hirã nē mēmoj to amnhĩrit mex pyrãk o mē panhĩpēx. Ja kaxyw koja Tĩrtũm mē pahwỹr mē pahkapri xwỹnhhta mē nhũm man mē pahwỹr wrỹ nē mē pamã mē pahtyk puma xwỹnhjē mã Tĩrtũm kapēr o amnhĩrit o pa. Mē pahte mar nē ra pajamakētkati nē paxãmnhĩx ri papa nē pahtyk kaxyw.

⁷⁹—Mē kãm mē htyk puma xwỹnhjaja te kamãt kô kamã ri pa pyrãk. Tã koja mē pahkapri xwỹnhja wrỹ hāmri nē tanhmã mē hkrã hto nhũm mē te arĩgro hã ri mē pa xwỹnh kot amnhĩ nhĩpēx pyrãk o amnhĩ nhĩpēx. Jao hamakētkati nē axte kãm htyk puma hkēt nē ri pa. Anē.

Nhũm pre ă Jakaris Tĩrtũm Karõ nhỹ hã hkrare mã kapēr anē.

⁸⁰Tã nhũm Juãwja gaa nē aptãr. Nē Tĩrtũm kôt amnhĩ nhĩpēx o pa. Nom kormã kot Ijaew jahkre ho pa hkēt ri kapôt ă ri mē puhã pa.

Ă na pre Juãw kator nē amnhĩ nhĩpēx anhỹr o pa anē. Na pre kato nē hã mytwrỹ grēre hāmri nhũm Jejusja hkôt kato.

2

Jejus kator ă harēnh

Matêwre 1.18-25

¹⁻² Na pre ă Jejus kator anē. Nhũm pre Rõm nhõ xwỹnhjē nhõ pahi Sesti Akusja õ pika piitã hkôt mē ho kõta kaxyw. Aa kot mē ho kõta hkēt tã ra kot mē ho kõta kaxyw. Kormã pahi Sirēn haxwỹja kot pika pē Sir kamã mē ho amnhĩptãr ri nhũm pahi Sesti Akus kot mē ho kõta kaxyw. Jakamã kãm ăpēnh xwỹnhjē mã kapēr nē mē kãm:

—E kēr ka mē ho kõta kaxyw nē mē piitã mē hixi hã kagã hpa. Anē.

³Hāmri nhũm mē piitã ă kot mē hipēx anhỹr ă amnhĩ tã harēnh ma hāmri nē mē kot mē hixi hã kagã kaxyw piitã akupỹm papxã hwỹr ma hapēx. ⁴Nhũm pre Marir mjēn Juje haxwỹja ma krĩ pē Perēj wỹr mō. Garirej kamã õ krĩ pē Najare rũm kato nē ma hwỹr mō. Pika pē Jutej kamã na Perējja. Kamã na pre Juje nhĩgēt Tawija kato. ⁵Nhũm Juje kēp kanrēhã htãmnhwỹ jakamã na pre ma akupỹm hwỹr mē hkwyjē hkôt mō. Nē ma amnhĩ kôt kot ho hprõ mã xwỹnh Marir o mō. Arĩ htujarõ rax rãhã nhũm ma amnhĩ kôt o mō. ⁶Nhũm wa mōõ hāmri nē hwỹr pōj. Nhũm Marir hpijagri xã hã mytwrỹ mã ăr jakamã nhũm kamãt nhũm õhy xã. ⁷Nom nhũm Perēj wỹr mē hpõx nyw xwỹnhjaja ra ixkre piitã ho nyt pa nhũm wa tee ri hpijagri kaxyw amnhĩ to ukapi ho pa. Hāmri nē nhỹri mõx nhõrkwỹ punajre hwỹr axã nhũm Marir kamã hpijagri. Nhũm hkra kato nē myre. Kra kot wa na pre. Hāmri nhũm kumỹ nē kupexē ho hkupu hpa nē mõx xãpkur xã hã kõsti kaprỹ kamã kuxi nhũm hamakētkati nē gõr nē nõ.

ôwêhti jamār xwỳnhjê jarênh

⁸ Rôm nhùm ôwêhti jamār o mẽ pa xwỳnhjaja kapôt ã ri hkrit ôwêhti jamār o pa. Nhùm ra kamàt nhùm mẽ hamār o hkrĩ. ⁹ Pu nhùm kaxkwa rùm Tĩrtũm kapêr o wrỳk xwỳnhja wrỳ nê mẽ mỳri ajêt. Hãmri nê tanhmã amnhĩ to nê mẽ hpuhã ho hirã rax kumrêx. Nom nhùm Tĩrtũm tãm ã mẽ hipêx anê. Hãmri nhùm mẽ tee ri jawỳ Tĩrtũm kapêr o wrỳk xwỳnhja pumu nê kãm ma htỳx nê akryk omunh o hkrĩ. ¹⁰ Hãmri nhùm mẽ kãm:

—Pa? Kwa mẽ amã ixpyma hkêt nê. Ixte mẽ amã mẽmoj mex jarênh kaxyw na pa mẽ awỳr wrỳ. Kot kaj mẽ harênh ma nê akĩnh nê. Nom mẽ kapxipixjaja kaj mẽ akĩnh kêt nê. Koja mẽ piitã ja jarênh ma nê mẽ apyrã nê hkĩnh nê pa. ¹¹ Na ra ham mẽ akamã ukapri xwỳnhhta kato. Pahi Tawi nhõ krĩ mẽ mẽ anhõ krĩ pê Perêj kamã. Kêp mẽ apiitã mẽ anhõ pahihti na. Mẽ ate amnhĩ wỳr kamã ajamak o apa xwỳnh pê Kris na. Tãm na ham kato. ¹² E pa ixpri hã mẽ amã tanhmã harênh to ka mẽ inhma. Na kato nhùm katorxã kupêxê ho kupu hpa nê kôsti kamã kuxi nhùm nõ. Kwa mẽ tokyx ma hwỳr mra nê kêp mẽ anhõ pahihti hã omu. Anê.

¹³ Nhùm pre ã mẽ kãm ujarênh anê. Hãmri nhùm hkwyjaja wamta kôt ohtôo nê mẽ hwỳr wrỳ nê puhã harir. Hãmri nê Tĩrtũm mã mex o mex ã grer o harir. ¹⁴ Nê hã grer o:

Tĩrtũm maati na mex o mex.

Jakamã mẽ kãm hprãm xã kôt pix mã amnhĩ nhĩpêx o mẽ pa xwỳnhjaja koja amnhĩ tã mẽ omu nê tanhmã mẽ ho nhùm mẽ hamakêtkati nê ànnhix hkĩnh nê pa ho pa.

¹⁵ Anhỳr o grer o harir hãmri nê ma akupỳm kaxkwa hwỳr àpir pa nê akunok. Hãmri nhùm ôwêhti jamār xwỳnhjaja mẽ kapêr ma nê ma akupỳm àpir ã mẽ omu nê axpên mã:

—E tokyx pu mẽ krĩm nê Tĩrtũm kot mẽ pamã ho amnhĩrit xwỳnhhta japêr nê tokyx nhỳri omu. Kwa ma pu mẽ tokyx hwỳr nê omu. Anê.

¹⁶ Hãmri nhùm mẽ ma hwỳr mra. Hãmri nê krĩm agjê nê moux nhõrkwỳ wỳr agjê nê mẽ hkrareta pumu. Nhùm kôsti kamã nõ nhùm mẽ omu nê kuri Marir mẽ Juje wa omu. ¹⁷ Hãmri nê akupỳm hapôj nê ma mẽ piitã mẽ hkôt ri mẽ kãm harênh o pa. Ra Tĩrtũm kapêr o wrỳk xwỳnh kot mẽ kãm harênh xaja kôt nhùm mẽ ma mẽ kãm harênh o ri mẽ hkôt pa. ¹⁸ Nhùm mẽ amnhĩ jaer pê mẽ kot harênh ma nê tee ri hkukamã hamaxpêr. ¹⁹ Nom nhùm Marir mẽ kot kãm hkrax rùm tanhmã hkra jarênh to xãta kukamã pix mã hamaxpêr rãhã ho pa.

²⁰ Jakamã nhùm ôwêhti jamār xwỳnhjaja ma akupỳm hkrit wỳr mra. Tĩrtũm kapêr o wrỳk xwỳnh ra kot mẽ kãm ujarênh xã hkôt nhùm mẽ kot Jejus pumunh jakamã ma akupỳm hkĩnh nê Tĩrtũm mã mex o mex ã harênh pê hã grer o akupỳm mra.

*Mẽ kot Jejus ã hixi mẽnh ã harênh**Matêwre 1.21; Rukre 1.31*

²¹ Tã nhùm wa hkrareta ra hã arĩgro pê 8 nhùm mẽ hwỳr akuprô nê kãm my kwỳrt kã krãhta. Na hte Ijaew mẽ hkra myre piitã ã mẽ hipêx anê. Mẽ piitã mẽ kot Tĩrtũm mã õr ã mẽ omunh kaxyw. Jakamã nhùm mẽ kãm ho anê nê hpãnhã hã hixi mẽ. Marir kormã kot ho htujarô hkêt ri Tĩrtũm kapêr o wrỳk xwỳnh kot hkukamã kãm hixi jarênh xaja kôt nhùm mẽ hã hixi mẽ nhùm hixi kêp Jejus.

Mẽ kot Tĩrtũm mã Jejus nhõr pyrãk o hipêx

22-24 Tã nhũm Marir hpijagri ho hapêx. Jakamã nhũm Juje ma krī pē Jerujarē hwýr mē kot Tirtũm mã amnhĩ jarēnh xà hã ixkre hwýr amnhĩ kôt o mō. Na pre ra finat Mojes amnepēm Tirtũm nhỹ hã mē hkukamã mē hpãmje mã ja hã karō. Nē mē kãm hã karō ho:

Koja mē aprō hpijagri. Hãmri nē hpijagri ho hapêx ka mē ma Tirtũm mã amnhĩ jarēnh xà hã ixkre hwýr o mra nē hpãnhã Tirtũm mã mēmoj gō. Kãm tutre ho gō rỹ kãm tuuti hō ho axkrut nē agō kē patre hamý nē kãm kupa. Kot ja hã omunh nē hpijagri xwýnhnta akupým mex ã harēnh kaxyw.

Anhýr o kot mē kãm ja hã karō jakamã nhũm wa ma ã amnhĩ nhĩpêx anhýr kaxyw hwýr mō. Nē amnhĩ kôt Jejus mý nē o mō. Tirtũm kot mē kãm ja hã karō nhũm mē kot hã kagã xà hkôt. Na pre ra finat Mojes mē kãm ja jarē nē mē kãm:

Kot kaj mē akra my kot wa hãmri nē te mē ate Tirtũm mã òr kaxyw hipêx pyrãk o hipêx. Kē tãm amnhĩ nhĩpêx o pa nē ý hã tanhmã kãm amnhĩ nhĩpêx to ho pa.

Anhýr jakamã nhũm wa ra Jerujarē hwýr nojarêt nē amnhĩ kôt Jejus mý nē ma amnhĩ kôt o mō.

Simeãw kot Jejus kukamã harēnh

25-26 Rôm nhũm Jerujarē kamã Simeãwja. Tirtũm Karō nhỹ hã kot tanhmã amnhĩ to mex to ho pa xwýnh na pre. Na pre hte Tirtũm kapēr kôt pix mã tãm amnhĩ nhĩpêx o pa. Jakamã nhũm pre ra Tirtũm Karō ã kãm kapēr anē nē kãm:

—E inhma Simeãw. Kot kaj atĩr rãhã nhỹrmã Tirtũm kot mē akaxyw ãm mã xwýnhja ka ano ho omu nē rĩ kormã ty.

Anhýr o kãm kapēr jakamã nhũm kuma nē hkĩnh nē ãm pix kamã hamak o pa. Mē kēp Ijaew wýr wrýk nē mē ho mex mã xwýnhnta pix kamã hamak rãhã ho pa. ²⁷ Jakamã nhũm Jejus katorxã mē hipêxã purota wa Tirtũm mã amnhĩ jarēnh xà hã ixkreja wýr Jejus o axã nē kormã o xa. Finat Mojes kot mē kãm hã karō xà hkôt. Hãmri nhũm Tirtũm Karō mē hwýr Simeãwja mē nhũm ma mē hwýr tē nē axã. ²⁸ Hãmri nē wa hkrata pumu nē hkĩnh týx nē. Hãmri nē wa kēp kumý nē o xa nē hã Tirtũm mã mex o mex ã harē nē kãm:

²⁹⁻³² Pa Pahi Maati. E ot pa ixte amã tanhmã amnhĩ nhĩpêx to ho ixpa xwýnh ã amnhĩ jarē.

Nã ãm hãmri na ka pre ã inhmã jare hkukamã harēnh anē. Tã ate inhmã harēnh xà hkôt pa ra inhno ho omu. Kēp mē ixkamã ukaprí xwýnh ã omu. Nē kēp ate mē ixwýr mēnh xwýnh ã omu.

Nã koja te arĩgro hã myt hirã nē mēmoj piitã ho amnhĩrit mex pyrãk o koja mē inhĩpêx o pa. Jakamã koja hprêk hãmri nē ma Ijaew kêt xwýnhjē mã apē Tirtũm ã akapēr o amnhĩrit o pa nhũm mēhprĩ hã ajarēnh ma. Nē mē ixpē Ijaew kot paj mē ijaxwýja kuma nē hã ixpijaãm o ri ixpa.

Jakamã kot paj ixãmnhĩx ri tanhmã amnhĩ nhĩpêx to ho ri ixpa nē ixãmnhĩx ty. Ra ixte inhno ho ate inhmã harēnh xwýnhnta pumunh kēnã. Anē.

³³ Nhũm pre ã Simeãw Jejus jarēnh anē. Nhũm katorxã mē hipêxã purota wa amnhĩ jaēr pē kot ã harēnh anhýrja mar o xa. ³⁴⁻³⁵ Hãmri nhũm Simeãw wa ho Tirtũm wý nē kãm:

—E Tirtũm. Kēr ka ja wa ho mex nē. Wa ho mex o wa ho mex rãhã ho apa. Anē.

Hãmri nē Marir mã kapēr nē kãm:

—Na ãm hãmri na pre Tirtũm mẽ pakaxyw akrata xãm. Mẽ pahpẽ Ijaew kaxyw ãm. Jakamã koja hprẽk nẽ ma Tirtũm kapẽr o mẽ piitã mẽ ahkre ho ri mẽ hkõt pa. Nhũm mẽ kuma hãmri nẽ ahpỹnhã tanhmã hamaxpẽr to xã hkõt tanhmã hipẽx to. Jakamã nhũm mẽ hkwỹjaja kuma nẽ hkõt amnhĩ xunhwỹ nẽ hkõt amnhĩ nhĩpẽx o pa. Jao tãm hipẽx o pa. No nhũm mẽ hkwỹjaja kuma nẽ axtem nẽ kãm hkĩnh kêt nẽ. Hãmri nẽ tanhmã hipẽx to. Jakamã kot kaj tee ri ja hã mẽ omu nẽ akapri htỹx nẽ. Te mẽ kot wapo ho akanhwỹr nẽ akamã ho kaxkep nhũm apẽ omnuj tỹx pyrãk o kot kaj amnhĩ kamã ama nẽ mẽ omu. Anẽ.

ãnti kot Jejus pumunh ã harẽnh

Wam Ximotre 5.5

³⁶⁻³⁸ Rõm nhũm mẽhõ ni pẽ ãntija mẽ hwỹr axã nẽ Jejus pumu. Æntija Panuew kra na pre. Nẽ Ase hkwỹ na pre. Ni htã kẽp Tirtũm nhỹ hã kapẽr jarẽnh o pa xwỹnh. Na pre ra mjẽn no ãm kormã mjẽn nẽ pa hã amgrã pẽ 7 pix nhũm pre kẽp ty. Hãmri nhũm axte mjẽn kêt nẽ pa rãhã ra hpigẽx tỹx nẽ. Ra hã amgrã pẽ 84. Na pre hte Tirtũm mã amnhĩ jarẽnh xã hã ixkre hwỹr pa nẽ kãm amnhĩ jarẽnh rãhã ho pa. Nẽ kot kãm amnhĩ jarẽnh kaxyw nẽ apkur kêt rãhã kãm amnhĩ jarẽ. Nẽ arĩgro hã hwỹr pa nẽ kamãt kãm hwỹr pa. A na pre hte amnhĩ nhĩpẽx anhỹr rãhã ho pa anẽ. Jakamã mẽ hwỹr axã nẽ Jejus pumu nẽ hkĩnh nẽ. Hãmri nẽ hã Tirtũm mã mex o mex ã harẽ nẽ kãm:

—Hẽxta gãã nẽ Tirtũm. Æm hãmri na ka mẽ ixwỹr Jejus mẽ. Ma amex o amex. Anẽ.

Hãmri nẽ Ijaew kot amnhĩ wỹr mẽ kamã ukapri xwỹnh kamã hamak xwỹnhjẽ mã ra Jejus kator ã harẽnh o ri mẽ hkõt pa.

Marir mẽ Juje wa kot akupỹm Najare hwỹr mõi ã wa harẽnh

Matẽwre 2.19-23

³⁹ Tã nhũm Marir mẽ Juje wa Tirtũm kapẽr ã kagã htũm kõt Tirtũm mã amnhĩ jarẽnh xã hã ixkre kamã tanhmã amnhĩ nhĩpẽx to hpa hãmri nẽ kato nẽ ma akupỹm mõi. Ma Garirej kamã õ kri pẽ Najare hwỹr wa ma akupỹm mõi.

⁴⁰ Tã nhũm wa hkrata ra wa kãm hprẽkre ho mõi. Nẽ mex nẽ ahpumunh tỹx nẽ. Tirtũm kot tãnopxar nẽ mẽmoj to kutã nojarẽt rãhã ho pa jakamã nhũm mex nẽ hkĩnh nẽ pa.

Marir mẽ Juje wa kot tee ri Jejus japẽr ã wa harẽnh

Rukre 4.22

⁴¹ Nhũm pre hte Marir mẽ Juje wa amgrã mẽ hkwỹjẽ hkõt ma Jerujarẽ hwỹr pa. Mẽ kot arĩgro pẽ Pas ã hkĩnh kaxyw. Pas ã na hte mẽ kẽp Ijaew amnepẽm Tirtũm kot pika pẽ Ejit rũm mẽ hpãmjẽ katorja mã hamaxpẽr kaxyw axpẽn wỹr akuprõ nẽ hã hkĩnh. Jakamã nhũm wa ma mẽ hkõt hã hkĩnh kaxyw Jerujarẽ hwỹr hkwỹjẽ hkõt mõi. ⁴² Nhũm ra Jejus hprẽk o mõi. Ra hã amgrã pẽ 12 jakamã nhũm wa ma amnhĩ kõt o mõi. ⁴³⁻⁴⁴ Tã nhũm mẽ hkĩnh pa hãmri nẽ akupỹm nojarẽt nhũm Marir mẽ Juje wa ma hkwỹjẽ hkõt akupỹm mõi. Nhũm Jejus Jerujarẽ kamã ahte arik nẽ akupỹm wa hkõt mõi kêt nẽ. Nhũm wa htỹx wam ma hkwỹjẽ hkõt htẽm ã hkamnhĩx jakamã wa hapẽr kêt nẽ. Hãmri nẽ wa hapu hã hamakẽtkati nẽ mẽ hkõt mõi o mõi ã ra hã kamãt. Hãmri nẽ mẽ kot amnhĩm hikranh xãja wỹr mẽ hkõt põi nẽ tee ri mẽ hkaẽx ã hkra japẽr o ri mra nom omunh kêt nẽ. ⁴⁵ Jakamã nhũm apkati nhũm wa awjanã nẽ ma akupỹm Jerujarẽ hwỹr mõi nẽ kamã hapẽr o ri pa. ⁴⁶ Nom tokyx kãm kator kêt nẽ. Mẽ hkaẽx ã tee ri hapẽr o pa hã apkati axkrut. Nẽ nõ nhũm apkati

nhũm wa tā Tirtũm mã amnhĩ jarẽnh xà hã ixkreja wỳr hapêr o mō nê hwỳr axà. Hãmri nê omunh kurê kumrêx. Nhũm arĩ mẽ kot Tirtũm kapêr tũm o mẽ ahkre xwỳnhjê mar o mẽ kutà nhỹ. Nê mẽmoj tã ri mẽ hkukja nê tanhmã mẽ kãm ujarẽnh to. ⁴⁷ Nhũm mẽ kot mar xwỳnhjaja tee ri kapêr ã kuma nê àhpumunh tỳx ã omu hãmri nê akryk mar o hkrĩ. ⁴⁸ Hãmri nhũm Marir mẽ Jujpe mẽ hwỳr axà nê mẽ kuri wa hkraja pumunh kurê kumrêx. Hãmri nhũm katorxàja hwỳr tẽ nê kãm:

—Xê Jejus. Mon ka axtem nê ã ri amnhĩ nhĩpêx anê nê akupỳm wa ixkôt amõr kêt nê? Na pa wa mō nê mẽ pahkwỳjê hkôt pøj nê tee ri mẽ hkaêx ã ajapêr nê tee ri akukamã ijamaxpêr. Anê.

⁴⁹ Hãmri nhũm amnhĩ tã wa kuma nê wa kãm:

—Tỳ. Nom Inhĩpêxà nhõrkwỳ kamã ixàrik kênã na ka wa tee ri ixkukamã ajamaxpêr nê ijapêr o ri apa. Anê.

⁵⁰ Hãmri nhũm wa kuma nê ã kot amnhĩ jarẽnh anhỳrja kukamã tee ri hamaxpêr. ⁵¹ Hãmri nê mẽ ma akupỳm mō nê Najare hwỳr pøj nê kamã pa. Nhũm pre Jejus wa kapêr kôt ri amnhĩ nhĩpêx rãhã ho pa. Hãmri nhũm katorxàja hkrax rũm mẽ kot kãm tanhmã hkra kot amnhĩ nhĩpêx to hkukamã harẽnhja pix kukamã hamaxpêr rãhã ho pa.

⁵² Gaa nhũm Jejus ra àptâr o mō. Nê àhpumunh tỳx nê. Nhũm mẽ piitã ã kot amnhĩ nhĩpêx anhỳr ã omu nê kãm hkĩnh nê. Nhũm Tirtũm haxwỳja kãm hapê nê.

3

Juãw Paxis kot Tirtũm kapêr jarẽnh o pa hã harẽnh

Matêwre 3.1-10; Makre 1.1-8; Juãw 1.19-28

¹⁻² Tã nhũm kormã pahihti Tipeja mẽ ho amnhĩptâr o pa. Na pre ra mẽ ho amnhĩptâr ã amgrà pê 15. Nhũm Põn Piratja pahihti Xipe mã pika pê Ijaew nhõ xwỳnhjê ho amnhĩptã. Nhũm Eroxxja kãm pika pê Garirej nhõ xwỳnhjê ho amnhĩptã. Nhũm Eroxx tõ Firipja kãm pika pê Iturej nê hõ pê Takonit wa kamã mẽ pa xwỳnhjê ho amnhĩptã. Nhũm Risãnja kãm pika pê Apirẽn kamã mẽ ho amnhĩptã. Nhũm Anas mẽ Kajpasja wa kêp Ijaew nhõ patre maati.

Rõm nhũm Jejus mẽ Jakaris kra Juãwja wa ra hamê anhĩpê àptâr. Jakamã nhũm Tirtũm tanhmã Juãw mã kapêr to. Kormã kapôt ã ri pa ri nhũm kãm kapêr nê kãm tanhmã kot amnhĩ nhĩpêx to ho pa hã kãm karõ nê kãm:

—Pa Juãw. E inhma. Kêr ka ma mẽ kãm ixkapêr jarẽnh rãhã ho ri apa. Anê.

³ Hãmri nhũm kuma nê ma ri mẽ kãm kapêr jarẽnh o pa. Pyhti pê Jotãw mỳri mẽ piitã mẽ kãm harẽnh o ri pa nê hpãnhã ihkjê hã ri mẽ pa xwỳnhjê mã harẽnh o ri pa. Nê mẽ kãm:

—E kwa mẽ tokyx amã amnhĩ tomnuy kaga hprãm xàj tãm ri amnhĩ nhĩpêx. Kê Tirtũm ja hã mẽ apumu nê mẽ anê mẽ ate amnhĩ tomnuy o hapêx pa. Pa mẽ piitã mẽ kot mẽ apê Tirtũm kra hã mẽ apumunh kaxyw mẽ akrã kumrã.

Anhỳr o mẽ kãm kapêr o ri pa. ⁴⁻⁵ Na pre ra amnepêm mẽ hkukamã Tirtũm nhỹ hã kapêr o pa xwỳnh Ijais ra Juãw kukamã kot tanhmã amnhĩ nhĩpêx to hã harê nê hã kagã. Nê hã kagã ho:

Koja nhỹrmã mẽhõ mõn pøj. Kapôt ã mõn pøj nê mẽ kãm ujarẽnh o ri pa. Nê mẽ kãm ujarẽnh o: “E mẽ inhma. Koja Tirtũm tokyx mẽ pahwỳr mẽ panhõ pahihti mẽ nhũm wrỳ nhũm mẽ piitã omu. Jakamã kwa mẽ tokyx kutêp tãm amnhĩ nhĩpêx o apa. Te ho mẽ kot mẽhõ kutêp pry ho mex pyrãk o amnhĩ nhĩpêx. Jao tãm amnhĩ nhĩpêx. Nê tãm xypên

nhîpêx. Pahihtita kutêp. Mê pahte amnhî nhîpêx te kot pry nhînur pyrâk nhûm mê tee ri kot kâm hâ mrar mex prâm kaprÿ pyrâk. Hinur nê krâ hakÿx nê pry juk pyrâk o na mê pahte amnhî nhîpêxja. Jakamâ kot kaj mê ate amnhî tomnuj kaga nê tãm amnhî nhîpêx. Nê tãm axpên nhîpêx. Hâmri nê te mê kot pry nhînur o mex nê ho katât nhûm katât muux nê nôr pyrâk o kot kaj mê amnhî nhîpêx. Pahihti nywta kutêp. Kwa kêr ka mê â amnhî nhîpêx anê.

⁶ Kot kaj mê anê nhûm mê ohtô nê ja hâ mê apumu hâMRI nê mê apyrâ Tîrtûm kot mê ho hkra kaxyw amnhî to kuwÿ.” Anhÿr o mê kâm ujarênh o pa. Anê.

Nhûm pre â finat Ijaisja Juâw Paxis kukamâ mê kâm ujarênh anhÿr o pa. ⁷ Jakamâ nhûm âptâr nê Ijais kot ra hkukamâ harênh xâ hkôt ma Tîrtûm kapêr o mê ahkre ho pa. Nhûm prem kuma hâMRI nê kot mê hkrâ kumrâr kaxyw hwÿr amnhî to mra. Nhûm mê omu nê tanhmâ mê ahkre hto. Nê mê kâm kapêr kâm hihtÿx nê mê kâm:

—Tk. Kwa kormâ. Mê ate amnhî tomnuj pix o ri apa xwÿnh kêna. Xâ kot paj mê ate amnhî tomnuj râhâ mê akrâ kumrâ nhûm Tîrtûm ja hâ mê apumu nhûm ja kâm mex nâ? Nâ koja ja kâm mex kêt nê. Koja ja mÿrapê nhÿrmâ tanhmâ mê anhîpêx to ka mê tee ri umaj apimxur prâm kaprÿ.

⁸—Na htem amnhî tomnuj kaga nê hpânâ tãm amnhî nhîpêx. Nê tãm ri axpên nhîpêx. Jakamâ e kwa mê â amnhî nhîpêx anhÿr o apa. No na ka htem atÿx ri ajamaxpêr o: “Mê ixpê finat Apraâw kanrêhâ htâmnhwÿ jakamâ koja Tîrtûm ja hâ mê ixpumu hâMRI nê mê ixte amnhî tomnuj mÿrapê tanhmâ mê ixto hkêt nê. Koja âm mê ixto mex râhâ nê.” Anhÿr o atÿx ri amnhî kukamâ ajamaxpêr o apa. Nom ja kot anhÿr kêt. Mê apê Apraâw kanrêhâ htâmnhwÿ htâ urâk nê tãm amnhî nhîpêx o apare hâ. Kot ka mê apê kanrêhâ htâmnhwÿ htâ amnhî tomnuj o ri apa hâMRI nê Tîrtûm noo mâ te mê apê pikap kêne nhîkwÿ pix pyrâk.

⁹—Na ra Tîrtûm kot mê ate amnhî tomnuj mÿrapê tanhmâ mê ato kaxyw. Koja mê anhîpêx o te mêhõ nhõ mêmoj pâr ô hkêt nhûm kot tee ri omunh hâMRI nê krâhyr nê kuwy kamâ mênh nê ho xêt par pyrâk o mê anhîpêx. Jao amnhî nê kuwy hwÿr mê arênh pa ka mê kamâ amnhî xâ htÿx kamâ ajamak râhâ ho ri apa. Anê.

Nhûm pre â Juâw Paxisja mê kâm kapêr anê. ¹⁰ HâMRI nhûm mê kuma nê tee ri amnhî kukamâ hamaxpêr nê kâm:

—Kwa xô wehe? Xâ koja â mê inhîpêx anê? Kwa tanhmâ kot paj mê kot â mê inhîpêx anhÿr pymaj amnhî nhîpêx to wehe? Anê.

¹¹ HâMRI nhûm mê kâm:

—Nâ kêr ka mê axpên kâm axukapri ho ri apa. Nê mê kêp amrakati xwÿnhjê mâ amnhî kutâ mêmoj nhõr o ri apa. Nê mê anhînohkâ axkrut nê mêhõ hinôkâ hkêt xwÿnhjê mâ ho pyxi nê agô nê pyxi nê ho arîk. Nê mê axâpkur xâ ho anhõxÿ ho apa hkêt nê. Âm axâmnhîx ri mê kêp amrakati xwÿnhjê mâ amnhî kutâ mê kâm mêmoj to hkryre nê agô. E kêr ka mê â axpên nhîpêx anhÿr o ri apa. Anê.

¹² HâMRI nhûm Rôm kâm mê ô pahihti mâ mê piitâ mê kêp kâxpore hkwy jamÿnh xwÿnhjaja mê urâk nê hwÿr mra. Kot mê urâk nê mê hkrâ kumrâr kaxyw hwÿr mra nê kâm:

—No we mê pajaja? Tanhmâ kot paj wem amnhî nhîpêx to? Anê.

¹³ HâMRI nhûm mê kâm:

—Nà mẽ kajaja kër ka mẽ Rõm nhõ pahi kot mẽ amã mẽ ate mẽ kêp kàxpore hkwy jamýnh jarênh xà hkôt pix mã hamýnh o ri apa. No mẽ atýx ri amnhĩ krã hkôt amnhĩm hkwy jamýnh prãm xaj mẽ kãm hkre kamã ho rûnh nẽ mẽ kãm harênh o ri apa hkêt nẽ. Anẽ.

¹⁴ Hãmri nhũm hpãnhã pòristi hkwyjaja hwýr mra nẽ kãm:

—Kwa no we mẽ pajaja? Tanhmã kot paj wem ri amnhĩ nhĩpêx to ho ixpa? Anẽ.

Hãmri nhũm mẽ kãm:

—Nà kër ka mẽ anhõ pahihiti kot mẽ axàpênh pãnhã mẽ amã kàxpore nhõrta pix jamý nẽ ajamakêtkati nẽ axãmnhix ri ho amnhĩm axujapròr o ri apa. No mẽ akwyjaja kãm apyma nẽ mẽ amã kàxpore nhõr prãm xaj ri mẽ kãm tanhmã amnhĩ pyma hto ho ri apa hkêt nẽ. E kër ka mẽ ã amnhĩ nhĩpêx anhýr o ri apa. Anẽ.

Juãw Paxis kot tanhmã Jejus jarênh to hã harênh

Matêwre 3.11-12; Makre 1.7-8; Juãw 1.19-28; mããnhẽn Atre 19.4

¹⁵ Nhũm pre ã Juãw Paxisja mẽ kãm kapêr anẽ. Nhũm mẽ kuma nẽ htýx kêp Tirtũm kot mẽ pakaxyw ãm mã xwýnhnta ã hkamnhix. ¹⁶ Hãmri nhũm amnhĩ tã ã mẽ hamaxpêr anhýr ã mẽ omu hãmri nẽ mẽ kãm amnhĩ tã aprã nẽ mẽ kãm:

—Na pa hkêt. Na pa hte ãm Tirtũm mã gô pix o mẽ hkrã kumrãr o ri ixpa. No koja tokyx ixpãnhã Tirtũm kot mẽ pakaxyw ãm xwýnhnta tãm mẽ pahwýr pøj. àhpumunh týx o kot ijakrenh jakamã na pa hte ãm kukwak ri ixpa nẽ hã ixpijaãm o ri ixpa. Tirtũm kot mẽ pakaxyw ãm xwýnhnta koja mẽ awýr Karõ rẽ nhũm mẽ akaxwýnh mã agjê ka mẽ ý hã tãm ri amnhĩ nhĩpêx rãhã ho ri apa. Nom kormã mẽ kot tãm amnhĩ nhĩpêx hkêt xwýnhjaja koja ja hã mẽ omu hãmri nẽ mẽ hipêx o te kuwy kot mẽmoj to kaxàr par pyrãk o mẽ hipêx.

¹⁷ —Na htem pur kãm harøj nhĩkẽ nẽ ho grã nẽ hpãnhã kahtwý. Nẽ kahuk pa hãmri nẽ hkapi nhũm kòk apê nẽ prýhka ho htor nẽ ho hapêx pa. Nhũm mẽ hy ho pa nẽ ixkre kamã gøj kãm unhwý. Ja pyrã nẽ koja tokyx Tirtũm mẽ piitã mẽ kot tanhmã amnhĩ nhĩpêx to ho pa hã mẽ omunh xà hkôt mẽ ho axkjê. Mẽ kot tãm amnhĩ nhĩpêx o mẽ pa xwýnhjaja koja ma amnhĩ wýr mẽ ho api nhũm mẽ kuri mex nẽ hkĩnh rãhã nẽ pa ho pa. No mẽ kot amnhĩ tomnuj xwýnhjaja koja mẽ hkĩnhã tanhmã mẽ hipêx to nhũm mẽ ma kuwy raxja wýr pa nẽ kamã amnhĩ xà htýx kamã hamak rãhã nẽ pa ho pa. Anẽ.

¹⁸ Nhũm pre ã Juãw Paxis Tirtũm kapêr o mẽ ahkre anhýr o pa.

Juãw Paxis kot Jejus krã kumrãr ã harênh

Matêwre 3.13-17; Makre 1.9-11

¹⁹ Tã nhũm Ijaew nhõ pahi Erox ra htõ hprõ pẽ Eroxis pytã nẽ ho hprõ nhũm Juãw Paxisja harênh ma nẽ ma hwýr tẽ nẽ hã kãm akir. No ãm ja pix ã kãm àkjêr kêt nẽ. Mããnhẽn tanhmã kot amnhĩ tomnuj týx to ho pa hã kãm akir.

²⁰ Nhũm amnhĩ tã kuma nẽ kamã gryk týx nẽ amnhĩ tã mẽ kãm hã amýnẽ nhũm prem unẽ nẽ haxà. Jao amnhĩ tomnuj týx nẽ. ²¹ Nom kormã mẽ kot haxàr kêt ri nhũm Juãw Paxis Ijaew kwýjê krã kumrãr o xa. Rõm nhũm Jejusja hãmri tãm nhýhýnh hwýr tẽ nẽ kot hkrã kumrãr kaxyw kãm anẽ nhũm kuma nẽ hkrã kumrã. Hãmri nhũm Jejus gøj rùm api nẽ mẽ kormã gô mý ri Tirtũm mã amnhĩ jarênh o xa. ²² Pu nhũm kaxkwa kaxkjê nhũm kurũm Tirtũm Karõ te tuuti pyrã nẽ hwýr wrýk o tẽ nẽ ikre hã xa. Hãmri nhũm kaxkwa rùm Tirtũm kãm kapêr nẽ kãm:

Pa? E apê Ixkra mex na ka. Ām hāmri na ka hte ixkanrēhā amnhī nhīpêx o apa. Inhmā ajapê kamā na ka ri apa ho apa. Anē.

Jejus kukamā higêt nē hpāmjê nhīxi hā harēñh

Matêwre 1.1-17

²³ Tā nhūm Jejus Tirtūm mā kapēr o mē ahkre ho pa hkrax. Na pre ra hā amgrā pê 30 hāmri nē kām ho hkrax.

E kot paj hpānhā amā Jejus kukamā hpāmjê nhīxi jarē Teopre. Ijaewjaja na prem htýx ho Juje kēp Jejus nhīpêêxā kumrēx ā hkamnhīx nom kēp hipêêxā kumrēx kêt ām kēp hipêêxā puro na pre.

Jejus kēp Eri htāmnhwý na pre.

²⁴ Nē Eri kēp Matat kra na pre.

Nē Matat kēp Rewi hkra na pre.

Nē Rewi kēp Mewki hkra na pre.

Nē Mewki kēp Jānaj kra na pre.

Nē Jānaj kēp axtem Juje hō hkra na pre.

²⁵ Nē Juje kēp Matatis kra na pre.

Nē Matatis kēp Amōs kra na pre.

Nē Amōs kēp Naū hkra na pre.

Nē Naū kēp Eri hkra na pre.

Nē Eri kēp Nakai hkra na pre.

²⁶ Nē Nakai kēp Mate hkra na pre.

Nē Mate kēp axtem Matatis ō hkra na pre.

Nē Matatis kēp Semeī hkra na pre.

Nē Semeī kēp Juje hō hkra na pre.

Nē Juje kēp Jotre hkra na pre.

²⁷ Nē Jotre kēp Joanān kra na pre.

Nē Joanān kēp Rej kra na pre.

Nē Rej kēp Joropape hkra na pre.

Nē Joropape kēp Saraxi kra na pre.

Nē Saraxi kēp Neri hkra na pre.

²⁸ Nē Neri kēp axtem Mewki hō hkra na pre.

Nē Mewki kēp Axi hkra na pre.

Nē Axi kēp Kojā hkra na pre.

Nē Kojā kēp Ematā hkra na pre.

Nē Ematā kēp Erti hkra na pre.

²⁹ Nē Erti kēp Jojue hkra na pre.

Nē Jojue kēp Eries kra na pre.

Nē Eries kēp Jorī hkra na pre.

Nē Jorī kēp Matat hkra na pre.

Nē Matat kēp axtem Rewi hō hkra na pre.

³⁰ Nē Rewi kēp Simeāw kra na pre.

Nē Simeāw kēp Juta hkra na pre.

Nē Juta kēp axtem Juje hō hkra na pre.

Nē Juje kēp Janā hkra na pre.

Nē Janā kēp Eriakī hkra na pre.

³¹ Nē Eriakī kēp Merea hkra na pre.

Nē Merea kēp Mena hkra na pre.

Nē Mena kēp Matata hkra na pre.

Nē Matata kēp Natā hkra na pre.

Nē Natā kēp Tawi hkra na pre.

³² Nē Tawi kēp Jese hkra na pre.

Nē Jese kēp Opex kra na pre.

Nē Opex kēp Poas kra na pre.

Nē Poas kēp Sarā hkra na pre.

Nē Sarā kēp Nasō hkra na pre.

³³ Nē Nasō kēp Amīnatap kra na pre.

Nē Amīnatap kēp Amī hkra na pre.

Nē Amī kēp Ari hkra na pre.

Nē Ari kēp Erō hkra na pre.

Nē Erō kēp Pere hkra na pre.

Nē Pere kēp Juta hkra na pre.

³⁴ Nē Juta kēp Jako hkra na pre.

Nē Jako kēp Ijak kra na pre.

Nē Ijak kēp Apraāw kra na pre.

Nē Apraāw kēp Tera hkra na pre.

Nē Tera kēp Nako hkra na pre.

³⁵ Nē Nako kēp Jeruk kra na pre.

Nē Jeruk kēp Rakau hkra na pre.

Nē Rakau kēp Parek kra na pre.

Nē Parek kēp Epti hkra na pre.

Nē Epti kēp axtem Sara hō hkra na pre.

³⁶ Nē Sara kēp Kajnā hkra na pre.

Nē Kajnā kēp Apaxat kra na pre.

Nē Apaxat kēp Sēre hkra na pre.

Nē Sēre kēp Noehti hkra na pre.

Nē Noehti kēp Ramek kra na pre.

³⁷ Nē Ramek kēp Metujarē hkra na pre.

Nē Metujarē kēp Enok kra na pre.

Nē Enok kēp Jarate hkra na pre.

Nē Jarate kēp Marerer kra na pre.

Nē Marerer kēp axtem Kajnā hō hkra na pre.

Nē Kajnā kēp Enos kra na pre.

³⁸ Nē Enos kēp Set kra na pre.

Nē Set kēp Atāw kra na pre.

Nē Atāw kēp Tīrtūm kra na pre. Tīrtūm kot wam my pé Atāwja pika ho hipêx jakamā te kēp hkra pyrāk.

Ā Jejus kukamā hpāmjê nhīxi kot anhÿr.

4

Satanasti kot amnhī tā Jejus kamā hamak ā harēnh

Matêwre 4.1-11, 16.23; Makre 1.12-13, 8.33; määnēn Eprêw 2.18, 4.15

¹ Tā nhūm Jejus pyhti pé Jotāw rūm akupÿm ma mō. Hāmri nē Tīrtūm Karō nhÿ hā mēmōj kutā amnhī to htÿx nē. Jakamā nhūm nhÿhÿm ma kapôt wÿr o mō ² nhūm Satanasti omu nē ma hwÿr tē nē ri hkôt pa. Kapôt ā ri hkôt hêx rom tanhmā kām nē ho pa. Kot mar nē Tīrtūm kapêr nhīrôp ām prām xàj ma hkôt tanhmā kām kapêr to ho pa. Hāmri nē hkôt pa o hā arīgro pé 40 nhūm

Jejus kormã apkur kêt o hã arĩgro pê 40 nê hapêx nhũm ra kãm prãm tỳx nê.

³ Hãmri nhũm Satanasti kãm:

—Kwa mãn ka ra amã prãm tỳx kumrêx nã? Nom xep apê Tirtũm Kra jakamã mêmoj tanhmã apê kute hkêt. Kwa kên nhĩkwỹ mũj mã anê kê amã pãwti hã amnhĩ jahkre ka aku nê tokyx ho amnhĩ xihtỳx. E kwa tokyx kãm anê. Anê.

⁴ Hãmri nhũm kuma nê kãm:

—Tk. Nã kot paj akapêr mar xã hkôt tanhmã amnhĩ nhĩpêx to hkêt nê. Koja Tirtũm kãm inhmã mêmoj nhõr prãm nê inhmã mêmoj gõ pa arĩ kormã kukrê. Kapêr ã kagã htũm kot ja jarênh kot:

Na htem mẽ apkur xã pix kukwak ri htĩr nê pa hkêt nê. Na htem mããnên Tirtũm kapêr mar xã hkôt tanhmã ri amnhĩ nhĩpêx to ho pa ho htĩr nê mex nê pã. Anê.

Ã kapêr ã kagã kot ja jarênh kot anhỹr jakamã kot paj amar xã hkôt ã ri amnhĩ nhĩpêx anhỹr kêt nê. ãm kwarĩ ho kwarĩ. Anê.

⁵ Nhũm pre ã Jejus Satanasti mã kapêr anê nhũm tee ri kuma hãmri nê hpãnhã ma nhỹhỹm o mõ nê nhỹri kỳx pê mêmoj prêeti nhĩmõk ã o xa. Hãmri nê kãm pika piitã ahkre ho xa. Nê kãm mẽ hikukrêx piitã ahkre. Kãxpore nê mêmoj piitã nhũm kãm ahkre hpa nhũm anhĩpê omunh o xa. ⁶ Hãmri nhũm Satanasti kãm:

—E mãn ka kam ri mêmoj mũj piitã omu. Piitã inhõ na. Inhmã na pre Tirtũm piitã õr pa. Kot paj inhmã mẽhõ mã õr prãm nê kãm kugõ. ⁷ Tã amã kot paj kugõ. Jakamã e. Kwa tokyx ixkutã tẽm nê inhmã inhmex o inhmex ã ijarê pa ama nê ri amã piitã õr pa. E tokyx. Anê.

⁸ Hãmri nhũm kuma nê kãm:

—Tk. Kot paj amã amex o amex ã ajarênh kêt kumrêx. ãm kwarĩ ho kwarĩ. Amexti hã. Tirtũm kapêr ã kagã htũm kot ja nê kapêr kãm hihtỳx kênã. Kapêr kot:

Kêr ka mẽ ixkapêr pix ma. Nê ixkutã pix mã mãn akõnkrã ho akrĩ nê inhmã inhmex o inhmex ã ijarênh o ri apa. Kêr ka mẽ ã amnhĩ nhĩpêx anhỹr o ri apa.

Anhỹr o kot harênh jakamã kot paj ri amã amex o amex ã ajarênh kêt nê Satanasti. Anê.

⁹ Nhũm pre ã Jejus amnhĩ nê kãm kapêr anê. Hãmri nhũm tee ri kuma nê hpãnhã mã krĩ pê Jerujarê hwỹr o mõ. Nê mẽ kot Tirtũm mã amnhĩ jarênh xã hã ixkre hprêk nhĩmõk wỳr ho api nê kỳxpê hatur xã hã ãm nhũm xa. Nhũm amnhĩ parpê kên rũnh nhĩkwỹ pumunh o xa. Hãmri nhũm Satanasti kãm:

—E apê Tirtũm Kra jakamã kwa ja rũm ahpar mã ajarĩ nê ma tẽ nê pikap tẽm. Koja Anhĩpêxã apumunh mex nê ka tanhmã amnhĩ to hkêt nê.

¹⁰⁻¹¹ Kapêr ã kagã htũm kot ja jarênh kot:

Tirtũm koja kapêr o wrỹk xwỹnh mã ajarê ka ajarĩ nê ahpar mã tẽ nhũm mẽ kỳx pê amỹ nhũm mêmoj akã hyr kêt nê.

Ã kapêr ã kagã kamã ajarênh kot anhỹr jakamã e tokyx ajarĩ nê ma tẽn pikap ahto. Anê.

¹² Hãmri nhũm kuma nê kê axte amnhĩ tã kãm kapêr nê kãm:

—Tk. Kwa nã. Kot pa ri amar xã hkôt ã amnhĩ nhĩpêx anhỹr kêt nê. Koja Tirtũm tãm inhmã ijarĩ hã karõ pa rĩ mar xã hkôt ijarĩ no kot pa ri amar xã hkôt ijarĩ hkêt nê. Tirtũm kapêr ã kagã htũm kot ja jarênh kot:

Kêr ka mẽ amnhĩ krã hkôt amnhĩ tã ixkamã ajamak kaxyw inhĩxi jarênh kôt tanhmã amnhĩ nhĩpêx to hkêt nê.

Ā ja nê kapêr kot anhÿr jakamā ām kwarī ho kwarī. Kot paj ri amar xà hkôt ā amnhī nhīpêx anhÿr kêt nê. Tām kot inhmā ijarī hā karōre hā. Anê.

¹³ Nhūm pre ā Jejus Satanasti mā kapêr anê hāmri nhūm tee ri mēmoj piitā ho mar kaprÿ hāmri nê hkaga nê ma nhÿhÿm tē. Hāmri nê kot nhÿrmā axte hwÿr htēm nê kot mēmoj punuj o mar kaxyw kormā amnhīm hamār o ri pa.

Jejus kot Tirtūm kapêr o mē ahkre ho hkrax ā harēnh

Matêwre 4.12-17; Makre 4.14-15

¹⁴ Tā nhūm Jejus ma akupÿm Garirej wÿr mō. Nê Tirtūm Karō nhÿ hā àhpumunh tÿx nê hkwyjê mā kapêr jarēnh o ri pa. Nhūm mē kuma nê piitā pikaja kamā axpēn mā tanhmā harēnh to. ¹⁵ Na pre hte mē kot Tirtūm kapêr o mē ahkre xà hā ixkre hwÿr agjê nê kamā mē ahkre ho hkrī. Nhūm mē piitā kuma nê kām mar prām nê. Hāmri nê axpēn mā mex ā harēnh o ri pa.

Najare kamā mē kot Jejus kaga hā mē harēnh

Matêwre 13.53-58; Makre 6.1-6; Juāw 1.11

¹⁶ Tā nhūm Jejus ma akupÿm krī kamā àptār xàja wÿr ma mō. Najare hwÿr. Hāmri nê kamā pōj.

Nhūm Ijaew nhō arĭgromnu pē sap kato nhūm Jejus ma mē hkôt Tirtūm kapêr o mē ahkre xà hā ixkre hwÿr tē. Hāmri nê hwÿr axà nê mē kuri nhÿ. Hāmri nê kamā mē kām Tirtūm kapêr ā kagā htūm kamā harēnh kaxyw kànhmā xa ¹⁷ nhūm mē omu nê kām ja gō. Finat Ijais pē Tirtūm nhÿ hā kapêr xwÿnh kot Tirtūm kapêr kwÿ hā kagàja nhūm mē kām kugō. Hāmri nhūm kupy nê kamā kormā Tirtūm kot tanhmā mēmoj jarēnh to hō japêr o xa. Nê kām kato hāmri nê mē kām kamā harē. Nom amnhī tā kamā mē kām harēnh o xa nê mē kām:

¹⁸ Na pre ra Tirtūm Karōja ixto ixàhpumunh tÿx nê mē kēp amrakati xwÿnhjê hwÿr inhmē pa ra mō. Ixte mē kām mēmoj mex jarēnh o ixpa kaxyw. Nê Satanasti kot amnhī kôt mē unhwÿr xwÿnhjê hwÿr nhūm pre määnēn inhmē. Ixte mē nê Satanasti japōx o ixpa kaxyw. Nê mē kot hprī hā Tirtūm kapêr mar kêt xwÿnhjê hwÿr nhūm pre määnēn inhmē. Ixprī hā ixte mē kām kapêr jarēnh o ri mē hkôt ixpa kaxyw. Nê mē kot amnhī tomnuj o mē pa xwÿnhjê hwÿr nhūm pre määnēn inhmē. Ixte mē nê mē kot amnhī tomnuj rēnh pa nhūm mē hamakêtkati nê àmnhīx ri pa kaxyw. Ā na pre Tirtūm jajê piitā hwÿr inhmēnh anê pa ra man mōn pōj.

¹⁹ Nê amgrā ja kēp Tirtūm kot mē ato mex xà hā amgrāja nhūm ixte mē amā harēnh o ixpa kaxyw na pre inhmē pa mōn pōj. Anê.

²⁰ Nhūm pre ā Jejus Tirtūm kapêr ā kagā htūm kamā mē kām amnhī jarēnh anê. Hāmri nê akupÿm mē kām kagàja gō nê ho mē ahkre kaxyw akupÿm nhÿ nhūm mē piitā omunh pē mar o hkrī. ²¹ Hāmri nhūm mē kām tanhmā amnhī jarēnh to nê mē kām:

—E ra Ijais kot ā ixkukamā ijarēnh anhÿr xà hkôt na pa mē awÿr wrÿ nê mē anoo mā ā amnhī nhīpêx anhÿr o hkrax. Anê.

²² Hāmri nhūm mē amnhī jaêr pē ā kot amnhī jarēnh anhÿr ā kuma. Nê tee ri kuma nê axpēn pumunh pē hamaxpêr o hkrī. Jejus mē kurom àhpumunh tÿx nê kapêr mex tā nhūm mē ām kēp amnhī kwÿ pix ā hkamnhīx kām hihtÿx nê. Hāmri nê axpēn mā:

—Tk. Kwa kēp Juje hkra pix kēnā koja we ri ā amnhī jarēnh anê. Anê.

²³ Hāmri nhūm amnhī tā mē kuma nê mē kām:

—Nà na ka mē ixte amnhī jarēnh ma nom ixkôt ajamaxpēr kêt nē. Jakamā axpēn mā ijarēnh o: “Tk. Kêp mē pahkaprī xwýnh ro nhýx jar mē panhō krī kamā aa mē pahte mēmoj pumunh kêt kwý tanhmā mē pamā hipêx to pu mē hā omu. Te ra kot krī pē Kapanaū kamā mē kām mēmoj kwý ho anhyrta pyrāk. Pu mē omu nē hkôt pajamaxpēr kurē kumrêx.” Anhýr o ri axpēn mā ijarē. ²⁴ Kōja nhām krī hō kamā mēhō kêt Tirtūm kapēr jarēnh xwýnh ā amnhī jarē ka mē harēnh ma nē amā ma hwýr amrar nē mar prām nē. No kêt jar mē panhō krī kamā ixpē mē anhiō hā ā amnhī jarēnh anē ka mē amā inhmar prām kêt nē.

²⁵ —Kwa mē inhma. Amnepēm kormā finat Eris htír ri na pre mē hā na wrýk kêt ry rax nē. Jao hā angrā axkrunēpxi nē hkôt mytwrý pē 6. Nhūm mē ō hkêt nē pa. Ra mē kēp mēmoj grā pa nē hapêx nhūm mē kām prām týx kumrêx nē pa. Nhūm mē kēp mē mjēn týx xwýnhjaja kām prām xaj hiroto o pa. ²⁶ Tā nom Tirtūm mē ho mex kaxyw mē hwýr Eris mēnh kêt nē. Erisja mē urāk nē kēp Ijaew tā nhūm Tirtūm kot mē ho ajuta kaxyw mē hwýr mēnh kêt nē. Mē kot amnhī kaxyw Tirtūm kôt hamaxpēr kêt jakamā nhūm mē hwýr mēnh kêt nē. Axtem Ijaew kêt xwýnhjē hō hwýr na pre kumē. Nhām Sitō kamā krī pē Sarep kamā mjēn htyk xwýnhhta wýr. Tokyx kot tanhmā ho mex to kaxyw. Jakamā nhūm ma hwýr mō nē tanhmā kām kapēr to nhūm kuma nē amnhī kaxyw Tirtūm kôt hamaxpēr kurē kumrêx.

²⁷ —Nē finat Eriasti haxwýja. Eris pyrā nē kēp Tirtūm nhý hā kapēr o pa xwýnh tā amnhī kwý pē Ijaew tanhmā mē ho ajuta hto hkêt nē. Na prem ohtō nē hkā nhy nē hkro xápēr o pa. Jao ra omnuj týx nē. Tā nhūm Tirtūm kot akupým mē ho mex kaxyw mē hwýr Eriasti mēnh kêt nē. Amnhī kaxyw mē kot hkôt hamaxpēere hā. Ām Sir nhō xwýnh Namāja pix na pre Tirtūm Eriasti mā anē nhūm akupým ho mex. Kēp Ijaew kêt tā nhūm akupým ho mex. Tā ja pyrā nē na pa ām mē kot amnhī kaxyw ixkôt hamaxpēr pix xwýnhjē mā tanhmā amnhī nhīpêx to ho ri ixpa. No mē ate amnhī kaxyw ixkôt ajamaxpēr kêt xwýnhjē mā tanhmā ri amnhī nhīpêx to hkêt nē. Anē.

Nhūm pre ā Jejus mē kām amnhī jarēnh anē.

²⁸ Hāmri nhūm mē kuma nē kamā gryk týx nē axpēn mā hā amýnē nē axpēn mā:

—Tk. Kwa pu mē ixkre nē kator nē ma o tē nē kupī ri. Anē.

²⁹ Hāmri nē kaxyw kànhmā kuhē hpa nē hwýr hprōt nē unē. Mē kot ma o htēm nē hixêt prék jatur xā hā hkujaæk nhūm ahpar mā tēn htēm nē htyk kaxyw. Mē ō krīja hixêt prék nhīmōk ā na pre. Jakamā nhūm prem unē nē hatur xāta wýr o tē. ³⁰ Tā nom nhūm tanhmā amnhī nhīpêx to nē mē kēp akunok nē hpānhā nhām ma tē nhūm mē tee ri hapēr nom nhýri omunh kêt nē.

*Jejus kot mēhō nē mēkarōmnuti kator ā harēnh
Makre 1.21-28*

³¹ Tā nhūm Jejus ma akupým Garirej kamā krī pē Kapanaū hwýr mō. Nhūm mē ō arīgromnu pē sap kato nhūm ma mē kot Tirtūm kapēr o mē ahkre xā hā ixkre hwýr tē nē mē ahkre ho nhý. ³² Hāmri nhūm mē kot mar o hkrī xwýnhjaja kuma nē kām mar prām nē. Nē axpēn mā:

—Hēxta waa nē. Ām hāmri na ā mē pamā kapēr anē. Āhpumunh týx xā hkôt na hte ām hāmri mē pamā awjarē. Anē.

³³ Nhūm mēhō myja mē ihkō hā haxwýja mar o nhý. Mēkarōmnuti na pre ra hwýr axā nhūm ý hā tanhmā amnhī tomnuj to ho pa. Hāmri nē mē ihkō hā

Jejus mar o nhÿ nê ra àmra kamã tanhmã kãm kapêr to. Nom nhÿm tãm kãm kapêr kêt ãm kamã mēkarõmnutiija kãm kapêr. ³⁴ Nê kãm:

—Pa? Jejus pê Najare nhõ xwÿnh? Nà ate mē ixto ajapêx par kaxyw na ka mē ixwÿr mō. Ra ixte apumunh mex kênã. Apê Tirtÿm kot mē ixwÿr amēnh xwÿnh maatita na ka. Jakamã kwa tanhmã kot kaj mē ixto? Mo kaxyw na ka pre mē ixwÿr mō? Anê.

³⁵ Hãmri nhÿm kuma nê mēkarõmnuti kot kãm ã kapêr anhÿr ã omunh kurê kumrêx. Jakamã kutã kãm kapêr nê kãm:

—Tk. Kwa anhÿkrê nê kêp akato. Anê.

Hãmri nhÿm kuma nê myta o pika kura nê kêp kato nê ma tē. ãm ho pika kuranh pix nhÿm nō. Hãmri nê akupÿm kãnhmã nhÿ nê akupÿm mex. ³⁶ Hãmri nhÿm mē piitã omu nê kamã no pyrna nê. Hãmri nê xpên mã:

—Kokÿÿ. Na hte Jejus amnhÿ krã hkôt àhpumunh tÿx xà hkôt mēkarõmnuti mã kapêr nê mē hano nhÿm htem kuma nê mē kêp hapôx kurê kumrêx. Anê.

³⁷ Hãmri nhÿm mē mēõ pika kamã piitã ri xpên mã harēnh o pa.

Jejus kot Simãw Pêtre xupãnhgêx o mex ã harēnh

Matêwre 8.14-15; Makre 1.29-31

³⁸ Tã nhÿm Jejus Tirtÿm kapêr o mē ahkre xàja rÿm kato nê ma Simãw Pêtre nhõrkwÿ hwÿr tē. Nê mē hwÿr axà nhÿm Simãw Pêtre omu nê kãm upãnhgêx tanhmã kute hã harê nê kãm:

—Kwa Pahÿti. Tē nê inhmã ixupãnhgêx pumu. Na hkà kagro htÿx nê amnhÿ to àpêr o nō. Kwa tēn inhmã omu. Anê.

Hãmri nhÿm kãm:

—Tôe. Nà kot paj amã omu. Anê.

³⁹ Hãmri nê hwÿr tēn kuri xa nê kãm:

—Pa? E kwa akà hakry. Anê.

Hãmri nhÿm kuma nê hkà hakry nê akupÿm hihtÿx kurê kumrêx. Hãmri nê kãnhmã nhÿ nê mē kãm mēõ hã àpēnh o ri mra.

Jejus kot mē ho ohtô nê mē ho mex ã harēnh

Matêwre 8.16-17; Makre 1.32-34

⁴⁰ Tã nhÿm ra amÿkry htÿx mē nhÿm mē Jejus wÿr ahpÿnhã ri mē à xwÿnhjê ho mra. Nhÿm amnhÿ wÿr mē omu hãmri nê mē piitã ri mē hã ìhkra jaxwÿ nê akupÿm mē ho mex pa. ⁴¹ Nhÿm ra mēkarõmnuti mē hkwyjê hwÿr agjê nhÿm mē kurÿm mē hano nhÿm mē tee ri amnhÿ tã omu nê mē kêp hapôx kurê kumrêx. Hãmri nê mē kêp hapôx kaxyw nê àmra kamã kãm kapêr nê kãm:

—Kwa tanhmã kot pa wem amnhÿ nê ato? Héxta waa nê. Apê Tirtÿm Kra hã axàhpumunh tÿx kênã.

Anhÿr o kãm kapêr. ãm hãmri na prem ã harēnh anê. Kêp Tirtÿm kot mē pakaxyw ãm xwÿnh kênã. No nhÿm Ijaew nhõ pahijaja kot mē kapêr mar nê kêp mēkarõmnuti hkwy hã hkamnhÿx pymaj nhÿm Jejus amnhÿ nê mē kãm kapêr nê mē kãm:

—Kwa mē ri ã ijarēnh anhÿr kêt nê.

Anhÿr o mē kãm kapêr hãmri nê mē hano nhÿm mē hapôj nê ma mra.

Mêmo kaxyw Tirtÿm kot mē pahwÿr Jejus mēnh ã harēnh

Makre 1.35-39

⁴² Tã nhÿm apkati nê myt kator grire nhÿm Jejus kot Tirtÿm mã amnhÿ jarēnh kaxyw kãnhmã nhÿ nê kato nê ma nhÿhÿm kapôt mã tē. Hãmri nhÿm

krī nhō xwỳnhjaja hkrā hapôj nē tee ri hapêr nē ma hkôt hp̄ry jakop o mō. Nē nh̄yri hwỳr kato nē omu hāmri nē ma nh̄yh̄ym mōr nē kurē nē kām:

—Kwa Jejus. Kêr ka tokyx ma nh̄yh̄ym amōr kêt nē. Kritpêm mē ixkôt axkamē mân. Anē.

⁴³ Hāmri nh̄um mē kuma nē amnhī tā mē kām:

—Nà kot paj kritpêm mē akôt ixpikamēnh kêt nē. Kot paj ma krī piitā hkôt ri Tirtūm kapêr o mē ahkre ho ri mē hkôt ixpa. Tirtūm kot tanhmā mē ho hkra hto hā harēnhja kot paj mē hkôt ri mē kām harēnh o ri ixpa. Ja kaxyw na pre Tirtūm mē awỳr inhmē. Anē.

⁴⁴ Nh̄um pre ā mē kām amnhī jarēnh anē. Hāmri nē mē kēp kato nē ma Ijaew nhō pika piitā hkôt Tirtūm kapêr o mē ahkre ho ri pa. Ijaew nhō Tirtūm kapêr o mē ahkre xà hā ixkre kamā mē piitā ho mē ahkre ho ri pa.

5

Jejus kot amnhī kôt mē hkwyjê hwỳr ā harēnh

Matêwre 4.18-22; Makre 1.16-20

¹ Tā nh̄um Jejus ma gō rax pē Jenējare hwỳr mō. Hāmri nē hwỳr pōj nē gō mỳri Tirtūm kapêr o mē ahkre ho xa nh̄um mē ohtō nē pu hā mar o kuhê. Nē kot hprī hā mar nē hkôt omunh kaxyw hā axpēn nh̄igānh o kuhê. ² Hāmri nh̄um tee ri amnhī tā mē omu nē amnhī pu hā hakēx nē rīt nē gōx kām p̄ar kapr̄y hamēxkrut nē jētja wa omu. Nh̄um ô dōn wa gōx kām kryhti kuhōnh o xa. Nh̄um p̄ar hamē hkapr̄y nē ajēt nh̄um Jejus omu. ³ Hāmri nē hwỳr tē nē hōm axà nē ô dōn pē Simāwja mā anē nh̄um hkôt axà nē kii mē kēp p̄arja am̄ym kunhō nh̄um ajēt. Hāmri nh̄um p̄ar kre r̄um am̄ym mē ahkre ho nh̄y nh̄um mē piitā omu nē mar mex o kuhê.

⁴ Tā nh̄um mē ahkre hpa nē Simāw mā kām:

—E gō xup̄ym wỳr anhō p̄ar o axkamē nē axte anhō kryhti mē nē ho amnhim tep kwỳmnē. Anē.

⁵ Hāmri nh̄um tee ri kuma nē kām:

—Kwa na pa mē ra kamāt kām tee rēnh o apkati nē ho hōmnēnh kêt tā ka ri inhmā anē. Nom kot paj amar xà hkôt kop kumē. Anē.

⁶ Hāmri nē up̄ym wỳr p̄ar o axkamē nē htō Andre mē wa axte kryhti mē. Nē ām mēnh tipxi htā ho tep pynēnh rax kumrēx. Jakamā nh̄um kryhtija ra pikaxōnh kaxyw. ⁷ Hāmri nh̄um wa tee ri ho anē nē amnhī wỳr p̄ar ô ho mrar xwỳnhta wa kām akir. Jepetew kra Juāw mē Xiakreja wa nh̄um wa amnhī wỳr wa kām akir nh̄um wa hwỳr p̄ar ô ho tē hāmri nē mē kryhti hā hije nē p̄ar wỳr ho apl. Hāmri nē p̄arta hamē tep o ho nýt pa nē namē ho hipu mex nē. Jao nh̄yx gōnh mā wa axà. ⁸⁻¹⁰ Hāmri nh̄um mē amnhī jaêr pē tep xohtō raxta pumu nē kamā no pyma nē. Hāmri nh̄um Simāwja Jejus kutā hkōn krā ho tēm nē hipō nē nh̄y nē hā hp̄ijaam kamā kām kapêr nē kām:

—Kwa Pahiti. Kii tamū axkamē. Akīnhā ixte amnhī tomnuj tỳx xwỳnh na pa. Anē.

Hāmri nh̄um kuma nē ām kuma nē kām:

—Kwa nà tee ri amnhī kukamā ajamaxpêr kêt nē. Kot kaj jarāhā hpānhā tām amnhī nh̄ipêx o apa. Na ka ra tep pynēnh r̄unh o apa. Tā kot kaj ja kaga nē hpānhā ma ri mē hkôt Tirtūm kapêr o mē ahkre ho ri apa. Koja mē ohtō nē ama nē Tirtūm kôt amnhī xunhwỳ nē hkôt amnhī nh̄ipêx o pa. Jakamā kot kaj te ate tep pynēnh r̄unh nē Tirtūm mā ôr pyrāk o amnhī nh̄ipêx o apa. Anē.

Nh̄um pre ā Jejus Simāw mā kapêr anē. ¹¹ Hāmri nh̄um mē gō jakax ā p̄ar janhōr tỳx nē kamā hikukrēx piitā hkaga hpa nē ma Jejus kôt pa ho pa.

Jejus kot hkà nhy kro tỳx xwỳnh o mex ã harēnh

Matêwre 8.1-4; Makre 1.40-45

¹² Tã nhũm Jejus ma krĩ hõ hwỳr mō. Hãmri nhũm mēhō my hkà nhy hkro htỳx xwỳnhja omu nē hwỳr tē nē hã hpijaàm kaxyw kutã hkõnkrã ho nhỹ nē kãm:

—Pa Pahihti. E ot pa awỳr amnhĩ to tē. Kwa akupỳm ate mē ixto mex kaxyw axàhpumunh tỳx jakamã kot ka akupỳm amã ixto mex prãm nē mãmri akupỳm ixto mex. Anē.

¹³ Hãmri nhũm kuma nē hkà punuti hã ìhkra xi. Amnhĩ kamã kahak kêt nē hã ìhkra xi nē kãm:

—Nà kot paj ato mex. E akupỳm akà mex kurê kumrēx.

Anhỳrja kôt hãmri nhũm hkàja akupỳm mex pa. ¹⁴ Hãmri nhũm Jejus kãm:

—E kēr ka amnhĩ tã akwỳjē mã tanhmã ijarēnh to hkêt rãhã ma patre hwỳr tē kē akupỳm akà mex ã apumu. Hãmri ka amnepēm Mojes kot mē ate akupỳm amex ã Tirtũm mã tanhmã amnhĩ nhĩpēx to hã karõta ka kãm ho anē. Kē mē mē piitã akupỳm akà mex ã apumu. Anē.

Hãmri nhũm kuma nē kãm:

—Tõe. Nà kot paj anē. Anē.

Hãmri nē ma hwỳr htēm kurê kumrēx.

¹⁵ Hãmri nhũm mē piitã axpēn mã Jejus jarēnh o ri hprõt nhũm mē kot kapēr mar kaxyw ma hwỳr mra. Nē mē à xwỳnhjaja nhũm kot mē ho mex kaxyw nhũm mē hwỳr amnhĩ to mra. ¹⁶ Jakamã nhũm pre hte Jejus tōhã mē kēp hapõj nē ahte ma kapõt à Tirtũm mã amnhĩ jarēnh kaxyw mra. Nē kãm amnhĩ jarēnh pa hãmri nē ma akupỳm mē hwỳr mra.

Jejus kot ì kamã htyk xwỳnh o mex ã harēnh

Matêwre 9.1-8; Makre 2.1-12; Juãw 10.37-38

¹⁷ Tã nhũm Jejus ma Tirtũm kapēr o Ijaew jahkre ho pa. Jakamã nhỹri mēhō nhõrkwỹ kamã ho mē ahkre ho xa nhũm Parijew nhõ xwỳnhjē mē Tirtũm kapēr tũm o mē ahkre ho mē pa xwỳnhjaja kot mar kaxyw ma hwỳr mra. Na pre ra Garirej rũm mē hkwỳjaja ma hwỳr mra. Nē pika pē Jutej rũm mē hkwy haxwỳja ma hwỳr mra. Nē krĩ pē Jerujarē rũm. Á na prem ohtõ nē krĩ piitã kurũm kot mar kaxyw hwỳr akuprõ nhũm mē ahkre anē. Nē Tirtũm kot ho àhpumunh tỳx jakamã nhũm ý hã akupỳm mē à xwỳnhjē ho mex. ¹⁸ Hãmri nhũm hkwyjaja ì kamã htyk xwỳnh mý nē Jejus wỳr o tē. Nõr xà kamã nõr rãhã nhũm mē hã hije nē hwỳr o tē. Hãmri nē tee ri kot hwỳr ho àr kaxyw ri mē hkupu ho pa. ¹⁹ Nom nhũm mē ra ixkre ho nýt rax jakamã nhũm mē tee ri amnhĩ kukamã ho ukapi ho ri pa. Hãmri nē ra hamaxpēr nē ixkre nhĩmõk po hwỳr ho api nē ixkre nhĩmõk kwỳ grã nē hkõt ì kamã htyk xwỳnhhta jaxà. Nõr xà kamã nõr rãhã Jejus wỳr haxà nē mē hipõk ri ho wrỹ nē kutã kuxi nhũm nõ. ²⁰ Hãmri nhũm Jejus amnhĩ tã mē kot kaxyw kãm hamaxpēr tỳx ã mē omunh mex nē. Hãmri nē ì kamã htyk xwỳnhhta mã kapēr nē kãm:

—Pa? E na pa ra anē tanhmã ate amnhĩ tomnuj to ho apaja o ijpapēx pa. Kot paj axte kãm ijamaxpēr kêt nē. Anē.

²¹ Hãmri nhũm Parijew nhõ xwỳnhjē mē Tirtũm kapēr tũm o mē ahkre ho mē pa xwỳnhjaja tee ri kot ã kãm kapēr anhỳrja ã kuma nē axpēn mã:

—Tk. Kwa kēp Tirtũm kêt tã te ri kot amnhĩ nhĩpēx pyrãk o ri mē nē mē kot amnhĩ tomnuj o hapēx ã amnhĩ jarēnh o kuhê. Tirtũm pix na kot mē nē mē kot amnhĩ tomnuj o hapēx xwỳnh kēnã. Anē.

²² Nhũm mē ã axpēn mā Jejus jarēnh anē nhũm amnhī tā mē kuma nē mē hamaxpēr kôt mē omunh mex nē. Jakamā mē kām:

—Kwa mē ã ajamaxpēr anhÿr kēt nē. ²³ Ixte mē nē mē kot amnhī tomnuj o ijapēx par ã amnhī jarēnh tā mē ate ja kôt ixpumunh kēt jakamā na ka mē ixkôt ajamaxpēr kēt nē. Nom kot paj mē anoo mā akupÿm ī kamā htyk xwÿnhta o mex ka mē apiitā ja hā ixpumu hāmri nē ixkôt ajamaxpēr kurē kumrēx. ²⁴ Ixpē Tirtūm kot mē awÿr inhmēnh xwÿnhna na pa. Ixte mē anē mē ate amnhī tomnuj rēnh kaxyw na pre mē awÿr inhmē pa mē awÿr wrÿ. Tā mē ate ja kôt ixpumunh kaxyw kot paj mē anoo mā myja o mex. Anē.

Hāmri nē hpānhā ī kamā htyk xwÿnhja mā kapēr nē kām:

—E kånhmā xa nē anōr xā py nē ma akupÿm anhōrkwÿ hwÿr tē. Anē.

²⁵ Nhũm kånhmā ãm kurē kumrēx. Hāmri nē amnhī pumu nē hkīnh tÿx nē nōr xā py nē mē noo mā kato nē akupÿm ōrkwÿ hwÿr ma Tirtūm mā mex o mex ã harēnh o tē. ²⁶ Hāmri nhũm mē amnhī jaēr pē omu. Nē no hapōx kaxyw hkôt omunh o kuhē nē kamā no pyma nē. Nē tee ri omu hāmri nē axpēn mā:

—Kokÿÿ. Aa mē pahte ã mēhō kot amnhī nhīpēx anhÿr ã omunh kēt tā na pu mē jarāhā ja pumu. Anē.

Hāmri nē Tirtūm mā mex o mex ã harēnh o kuhē.

Jejus kot amnhī kôt Rewi hwÿr ã harēnh

Matêwre 9.9-13; Makre 2.15-17; Rukre 15.1-2

²⁷ Tā nhũm Jejus ma hkôt mē pa ho mē pa xwÿnhjē mērohā ma nhÿhÿm mō. Hāmri nē nhÿri Rewi pumu. Rewi nhīxi hō pē na Matêwre. Rōm kām mē ō pahihiti mā amnhī kwÿjē pē kàxpore hkwy jamÿnh xwÿnh na pre. Jakamā nhũm ujamÿnh xā hā ixkre kamā mē kēp hkwy jamÿnh o nhÿ nhũm Jejus mē hkôt mē pa o mē pa xwÿnhjaja hānh mra. Hāmri nhũm Jejus ãpēnh ã omu nē amnhī kôt kuwÿ nē kām:

—Pa? E kwa axāpēnhta kaga nē hpānhā amnē mē ixkôt mān tē. Nē ixkôt mān ri apa ho apa. Anē.

²⁸ Hāmri nhũm kuma nē ãpēnh kaga hpa nē ma hkôt mō nē hkôt pa ho pa.

²⁹ Hāmri nhũm mēmo arīgro hā nhũm Rewi nhō mē apkur xā hā mēō rax nē. Jakamā nhũm amnhī nhōrkwÿ hwÿr hkrāmnhwÿjaja nē Jejus mē hkôt mē pa ho mē pa xwÿnhjē hwÿ. Mē kot kutā apkur kaxyw nhũm amnhī kôt mē kuwÿ nhũm mē ma hkôt mra nē ōrkwÿ hwÿr agjē nē apkur o hkrī. Nē mē kēp Rōm nhō pahi mā mē kēp kàxpore hkwy jamÿnh xwÿnh kwÿjaja nē mē ohtō nē hwÿr akuprō nē axpēn kutā apkur o hkrī. ³⁰ Hāmri nhũm Parijew nhō xwÿnhjē mē Tirtūm kapēr tūm o mē ahkre ho mē pa xwÿnh kwÿjaja mra nē mē apkur ã mē omu nē tee ri mē hkaēx ã Jejus pumu hāmri nē Jejus kôt mē pa ho mē pa xwÿnhjē hwÿr agjē nē hā mē kām akir nē mē kām:

—Kwa mē kot amnhī tomnuj ho mē pa xwÿnhjē kutā mē apkur kēt tā ka mē apytār xwÿnhja mē apimrāatā axtem nē mē kutā axāpkur o akrī. Kwa mē ate amnhī to mex ronhÿx ka mē kutā axāpkur kēt nē. Anē.

³¹ Hāmri nhũm Jejus amnhī tā mē kapēr ã mē kuma nē mē kām:

—Tk. Nā ixte tām mē unhwÿr kaxyw na pa mē kutā ixāpkur o nhÿ. Xā na hte tōtōja mē mex xwÿnhjē hwÿr mra nē mē hkane? Nā ãm mē ã xwÿnhjē pix wÿr na htem mra. Ra mē ate ja pumunh mex kēnā. Ja pyrā nē na pa pre mē kot amnhī to mex xwÿnhjē hwÿr ixwÿryk kēt nē. Mē kot amnhī tomnuj xwÿnhjē pix wÿr na pa pre wrÿ. Ixte tām mē unhwÿr kaxyw na pa pre mē hwÿr wrÿ nē ã jajē kutā ixāpkur o inhÿr anē. ³² ãm mē kot amnhī tomnuj xwÿnhjē hwÿr na pa pre wrÿ nē mē kamā ixukapri ho ri ixpa. Mē kot amnhī tomnuj mā urer

ně hpānhā tām amnhī nhīpēx o pa kaxyw na pa pre mẽ hwỳr wrỳ. Tā ka mẽ atỳx ā ri mẽ ixto akapēr anē. Anē.

*Mě hpāmja kot amnhī nhīpēx gryk ā Jejus kaga hā mẽ harēnh
Matēwre 9.14-17; Makre 2.18-22*

³³ Tā nhūm Ijaew kwỳjaja Jejus wỳr mra nē kām:

—Pa? E ot pa mẽ awỳr mra. Kwa aprī hā mẽ inhmā mẽmoj jarē. Na hte Parijew nhō xwỳnhjē mẽ Juāw kōt mẽ pa xwỳnhjaja tōhā Tirtūm mā amnhī jarēnh kaxyw nē apkur kēt rāhā kām amnhī jarē. No akōt mẽ pa ho mẽ pa xwỳnhjaja na htem àmnhix apkur o pa kamā kām amnhī jarē. Kwa mo na htem mẽ urāk nē tōhā apkur kēt ri kām amnhī jarēnh hkēt nē? Anē.

³⁴ Hāmri nhūm mẽ kuma nē mẽ kām:

—Tk. Nā mo kaxyw koja mẽ apkur kēt rāhā kām amnhī jarē? Mě hkaprī hkēt kēnā. Mě kot ixkōt pa ho pa hā amnhī pumunh jakamā hkīnh nē pa. Kormā ixte mẽ kamā ixpa kēnā kot kēt mẽ Tirtūm mā amnhī jarēnh kaxyw nē apkur kēt rāhā kām amnhī jarē. Xà na htem hkrāmnhwỳ hā hkīnh kaxyw hā akuprō nē hkaprī nē apkur kēt nē mỳr o hkrī? Na htem hā akuprō nē hkīnh nē hā apkur rūnh nē. Ja pyrā nē na hte ixkōt mẽ pa ho mẽ pa xwỳnhjaja ixkōt kormā àmnhix ri hkīnh nē apkati mẽ apkur o pa. ³⁵ Nom koja mẽ kām ixkurē xwỳnhjaja nhỳrmā tanhmā ixto hāmri nhūm mẽ rī kormā ixtā hkaprī htỳx kām apkur kēt ri tanhmā amnhī nhīpēx to. Anē.

³⁶ Nhūm pre ā Jejus mẽ kām hkōt ri mẽ pa ho mẽ pa xwỳnhjē jarēnh anē hāmri nē mẽ kām:

—Nā mẽ kot amnhī tomnuj xwỳnhjaja mẽ kot amnhī nhīpēx tūm o amnhī pyrāk jakamā na htem mẽ kot amnhī nhīpēx nyw kaga. ³⁷⁻³⁹ Ixte amnhī nhīpēx nywja te kot mẽ ate amnhī nhīpēx tūm pyrāk kēt jakamā ka htem inhma nē ām inhma. Kwa mẽ ixkapēr ma nē mẽ ate amnhī nhīpēx tūm gryk ā ixkaga hkēt nē. Anē.

6

*Jejus kēp arīgromnu hpām ā harēnh
Matēwre 12.1-8; Makre 2.23-28*

¹ Tā nhūm Ijaew nhō arīgromnu pē sapja axte kato. Hāmri nhūm Jejus mẽ hkōt ri mẽ pa ho mẽ pa xwỳnhjē mẽ ma mẽ hpur kōt ri nhỳhỳm ri pa. Hāmri nhūm hkōt mẽ pa ho mẽ pa xwỳnhjaja ra kām prām nē mra hāmri nē prām xāj mẽmo hy te kot harōj pyrāk xwỳnhta kwỳ rē nē kugrā nē ma Jejus kōt hkanhar o mō. Ijaew kot amnhī nhīpēx xā hkōt. ² Hāmri nhūm Parijew nhō xwỳnhjaja kām mẽmoj tā Jejus o kapēr prām jakamā ā mẽ kot amnhī nhīpēx anhỳr ā mẽ omu nē mẽ hā Jejus kukjēr kurē kumrēx nē kām:

—Kwa Tirtūm kapēr tūm kot mẽ panhō arīgromnu hā mẽ pahte mẽ pahpur kām mẽmoj nhīkēnh nē mẽ pahkurē htā nhūm ri akōt mẽ pa ho mẽ pa xwỳnhjaja axtem nē mẽmo hyta kwỳ rē nē akōt hkanhar o mō. Kwa mẽ kām anē kē mẽ ā amnhī nhīpēx anhỳr kēt nē. Na htem arīgromnu hā ā amnhī nhīpēx anhỳr kēt nē. Anē.

³⁻⁴ Hāmri nhūm Jejus mẽ kuma nē hprī hā mẽ kām Tirtūm kapēr tūm jarē nē mẽ kām:

—Kwa xā na ka mẽ Tirtūm kapēr ā kaga htūm kamā pahi Tawi kot tanhmā amnhī nhīpēx tota kamā harēnh nē mar kēt nē? Na pre Tawija hkōt ri mẽ pa xwỳnhjē mẽ nhūm mẽ prām xāj Tirtūm mā amnhī jarēnh xā hā ixkre wỳr agjē nhūm patre maatija mẽ kām prām tỳx ā mẽ omu nē mẽ kām mẽmoj gō. Mě

kot Tirtüm noo mã päwti jaxwÿr xwÿnhnta nhũm mẽ kãm kugõ nhũm mẽ kuku. Tirtüm kapër ã kagà htũm kot ja nẽ mẽ kurẽ htã nhũm mẽ kãm prãm tÿx ã mẽ omu nẽ mẽ kamã ukapri xaj mẽ kãm kugõ. Patre pix kot ja kur kaxyw tã nhũm mẽ kãm kugõ nhũm mẽ kuku. Tã nhũm Tirtüm ja hã mẽ omu nhũm ja kęp omnuj kêt nẽ. Kot mẽ kamã ukapri nẽ mẽ kãm õr nhũm mẽ hã omu nhũm ja kãm mex nẽ. ⁵ Tã pa na pre Tirtüm mẽ akaxyw ixãm nẽ mẽ awÿr inhmẽnh jakamã papxpix na pa hte arĩgromnu hã tanhmã mẽ kot amnhĩ nhĩpẽx to hã mẽ kãm karõ ho ri ixpa. Ixpẽ arĩgromnu hpãm na pa. Anẽ.

Jejus kot ìhkra grà xwÿnh o mex ã harẽnh

Matêwre 12.9-14; Makre 3.1-6

⁶ Tã nhũm Ijaew nhõ arĩgromnu pẽ sapja axte kato. Hãmri nhũm Jejus Tirtüm kapër o mẽ ahkre xã hã ixkre hwÿr tẽ nẽ axã nẽ Tirtüm kapër o mẽ ahkre ho nhÿ. Nhũm mẽhõ myja upõk rũm ìhkra grà xwÿnhja mẽ ìhkõ hã mar o nhÿ. ⁷ Nhũm Parijew nhõ xwÿnhjẽ mẽ Tirtüm kapër tũm o mẽ ahkre ho mẽ pa xwÿnhjaja mẽ kãm mẽ hkrãhtũmjẽ mã Jejus o kapër prãm xaj htãnopxar o kuhẽ. Nẽ ìhkra grà xwÿnhnta pumu nẽ hã axpẽn mã:

—Kwa pu mẽ jar pakuhẽ nẽ Jejus tanhmã kot amnhĩ nhĩpẽx to hã omu. Xã koja jarãhã mũjti ho mex nã? Jarãhã arĩgromnu kẽnã kot kêt kãm ìhkra ho mex. Kojã anẽ nẽ Tirtüm kapër kwÿm ri amnhĩ nhĩpẽx. E pu mẽ kop pakuhẽ nẽ hã omu. Anẽ.

⁸ Nhũm Jejus ra kot mẽ hamaxpër kõt mẽ omunh mex jakamã amnhĩ wÿr myta mã hpa ho apẽ nẽ kãm:

—Pa? E kãnhmã xa nẽ amnẽ ixwÿr tẽ. Anẽ.

Hãmri nhũm kuma nẽ kãnhmã xa nẽ hwÿr tẽ. ⁹ Hãmri nhũm Jejus amnhĩ pu hã ri mẽ ho hakẽx nẽ mẽ kot mar o hkrĩ xwÿnhjẽ pumu nẽ mẽ kãm:

—E mẽ inhmã mẽmoj jarẽ. Tanhmã na htem arĩgromnu hã axpẽn nhĩpẽx to ho pa wehe? Xã kot ka arĩgromnu hã axã htÿx nẽ nõ hãmri nẽ amnhĩ mex prãm xaj mã mẽhõ hwÿr amnhĩ to tẽ. Hãmri nhũm ãm apumu nẽ apkatim arĩgro mex jamãr pẽ akane hkêt ka ty nhũm ja amã mex nẽ nã? Rÿ nhũm tanhmã atomnuj to nẽ akupÿm amnhĩ nẽ ajano nhũm ja amã mex nẽ nã? Nã koja ã anhĩpẽx anẽ nhũm ja amã mex kêt nẽ. Na ka htem ã amnhĩ nhĩpẽx anhÿr o apa hkêt nẽ. E mẽ inhmã mẽmoj jarẽ. Tanhmã na pre finat Mojesja Tirtüm nhÿ hã mẽ pamã arĩgromnu hã mẽ pahte axpẽn nhĩpẽx ã karõ hto? Xã kot puj mẽ axpẽn kãm paxukapri ho papa nã? Kot puj mẽ pamã axpẽn kurẽ ho papa? Xã kot puj mẽ hã mẽmoj punuj pẽ axpẽn pytã nã? Xã kot puj mẽ hã axpẽn pytãr pymaj arĩgro mex jamã? E mẽ atõ inhmã ja jarẽ. Anẽ.

Nhũm pre ã mẽ hkukjẽr anẽ. ¹⁰ Mẽ hamaxpër ã mẽ omunh mex pẽ ã mẽ hkukjẽr anhÿr o xa. Nom nhũm arĩ mẽhõ tanhmã kutã kãm nẽ hkêt nẽ. ãm akryk mar pẽ omunh o hkrĩ. Mẽ kot tanhmã kãm nẽ nhũm ta pãnhã tanhmã kot mẽ kãm nẽ pymaj nhũm mẽ tee ri kãm tanhmã nẽ hprãm nom akryk mar o hkrĩ. Hãmri nhũm Jejus tee ri mẽ omu hãmri nẽ myta mã kãm:

—Tk. Mẽ kot tanhmã inhmã kapër tore hã. E anhĩhkra katãt. Anẽ.

Hãmri nhũm ìhkra katãt nẽ akupÿm mex kurẽ kumrẽx. ¹¹ Hãmri nhũm mẽ kãm Jejus kurẽ xwÿnhjaja tee ri ja hã omu nẽ kamã gryk tÿx nẽ. Arĩgromnu hã kot ho mex jakamã nhũm mẽ kamã gryk tÿx nẽ. Nẽ hã axpẽn kukjẽr o kuhẽ nẽ axpẽn mã:

—Kwa ã kot amnhĩ nhĩpẽx anhÿr mÿrapẽ tanhmã kot puj wem ho? Na ã kapër anhÿrja o tanhmã mẽ pahto kapër punuj to. Te mẽ papamjaja mẽ pahte hkĩnhã pahkwÿjẽ kamã paxukapri hkêt pyrãk ã mẽ pajarẽ. Kojã mẽ

pahkwýjaja kuma hāmri nē mē pahte amnhī nhīpêx kaga nē amnhī kaxyw
ām hkôt pix mā hamaxpēr o pa. Jakamā kwa tanhmā kot puj mē ja nē ho?
Anē.

Jejus kot amnhī kaxyw mē ho 12 nē mē rēnh ā harēnh

Matêwre 10.1-4; Makre 3.13-19

¹² Tā nhūm arīgro hō hā nhūm Jejus ma kot Tīrtūm mā amnhī jarēnh kaxyw
ma hixêt prêk wýr tē nē hā api. Hāmri nē kām amnhī jarēnh o apkati.

¹³ Tā nhūm kwýhtā nhūm amnhī kôt kot ri mē o pa xwýnhjê hwý nē amnhī
kaxyw mē ho 12 nē mē kurê. Nē mē kām:

—E mē kajaja kot paj ma mē pahkwýjê hwýr mē arê ka mē ma inhý hā
Tīrtūm kapēr o mē ahkre ho ri mē hkôt apa. Kot kaj mē apê inhý hā mē ahkre
ho apa xwýnh. Anē.

¹⁴ Kot amnhī kaxyw mē rēnh xwýnhjê nhīxi na jajaja:

Simāw kumrêx na pre kuta nē axte hā hixi mē nhūm kêp Pêtre.

Nē Simāw Pêtre hkôt htō Andreja ta.

Nē hkôt Xiakre hta.

Nē hkôt Juāw ta.

Nē hkôt Firiptija ta.

Nē hkôt Patoromew ta.

¹⁵ Nē hkôt Matêwreja ta.

Nē hkôt Tomasja ta.

Nē hkôt Apew kra axtem Xiakre hōja ta.

Nē hkôt Simāw Jeroxja ta.

¹⁶ Nē hkôt Xiakre hō hkra Jutja ta.

Nē hkôt Jut Kariot ta.

Jut Kariotja na pre kormā kot mē kām Jejus kurê xwýnhjê nhīhkram ōr
mā. Nhūm kot amnhī kukamā omunh mex tā mē hkôt amnhī kaxyw
kuta.

Ā mē kot Jejus nhý hā mē ahkre o pa kaxyw mē rēnh xwýnhjê nhīxi kot anhýr.

Jejus xápênh ā harēnh

Matêwre 4.23-25

¹⁷ Tā nhūm Jejus akupým ý hā mē ahkre ho pa xwýnhjê mē hāmri hixêt
prêêta kurūm wrý nē nhýri hinur kām kuhê. Hāmri nhūm nhýhýnh mē kot
mar mā xwýnhjajaja hā akuprō. Kôt mē pa ho mē pa xwýnh kwýjajaja nē nhýhýnh
krī hkwy rūm mē hkwyjajaja. Pika pē Jutej kurūm mē hkwyjajaja. Nē krī pē
Jerujarē kurūm mē hkwyjajaja. Nē gō mý ri Xir mē Sitōja wa kamā mē pa xwýnh
kwýjajaja. Ām ahpýnhā ri nhýhýnh krī hkwy rūm mē kot mar mā xwýnhjajaja
hā pikuprōnh rax nē. ¹⁸⁻¹⁹ Mē kot kapēr mar nhūm kot akupým mē ho mex
kaxyw nhūm prem ma hwýr amnhī to pa. Mē hkwyjajaja tanhmā ri à kute.
Nhūm mē hkwyjajaja mēkarōmnuti kot mē hwýr gjêx xwýnhjajaja nhūm mē piitā
ma hwýr amnhī to pa. Na prem ra amnhī kaxyw kām hamaxpēr o:

—E pa ma hwýr tē nē ām hkupênh pix tā akupým inhmex japêr. Anē.

Hāmri nē ma hwýr mra nhūm mē omu nē Tīrtūm xāhpumunh týx o akupým
mē ho mex pa.

Jejus kot hkôt mē pa ho mē pa xwýnhjê jahkre hā harēnh

Matêwre 5.1-12

²⁰ Tā nhūm Jejus hkôt mē pa ho mē pa xwýnhjê jahkre nē mē kām:

E kot kaj mē atō amnhī kaxyw tanhmā inhmā ajamaxpēr to nē ajamaxpēr o:

“Nā ixkukrêx rax kêt tā na hte Tīrtūm ixkôt pa ho pa. Koja ixkôt pa hkêt

pa ixt̄x ri tanhmā amnhī nhīp̄ex to ho ri ixpa rāhā nē. Tirtūmjā mex kumrēx o kot mē hikukrēx raxta jakrenh par.” Anh̄ȳr o ajamaxp̄er. Hāmri nhūm Tirtūm ā ajamaxp̄er anh̄ȳr ā apumu nhūm ja kām mex nē. Hāmri nhūm apē hkra hā ato mex nē atānopxar o akōt pa ka ajamakētkati nē akīnh nē axāmnhīx ri apa.

21 Nē kot kaj mē atō amā Tirtūm kām hprām xā hkōt tanhmā amnhī nhīp̄ex to ho ri apa hprām t̄yx nē. Nhūm amnhī tā apumu nhūm ja kām mex nē nhūm ato mex nē. Nē tanhmā ato ka hkōt pix mā amnhī to mex o ri apa nē ajamakētkati nē akīnh nē axāmnhīx ri apa.

Nē kot kaj mē tanhmā amnhī tomnuj to. Hāmri nē tee ri ja hā amnhī pumu nē ajamaxp̄er. Nē apijaam nē akaprī xāj am̄ȳr o nh̄ȳ. Am̄ȳr rax nē. Hāmri nhūm Tirtūm ja hā apumu nhūm ja kām mex nē. Jakamā nhūm anē akaprī hta nē ato mex nē. Ka ajamakētkati nē akīnh nē axāmnhīx ri apa.

22-23 Nē kwār mē māmri ixtā tanhmā mē ato kap̄er punuj to nē tanhmā mē ato hēx to nē tanhmā ri mē atomnuj to ho pa. Kwār mē māmri ā mē anhīp̄ex anh̄ȳr o pa. Ka mē ām inhmā pix mā ajamaxp̄er rāhā ho apa pē ajamakētkati nē axāmnhīx ri apa. Kwār mē māmri ā mē anhīp̄ex anē nē mē amex kēt ā mē ajarēnh o pa. Amnepēm na pre Tirtūm nh̄ȳ hā kap̄er xw̄ynhjaja nhūm prem ā mē hip̄ex anē. Jakamā koja mē urāk nē ā mē anhīp̄ex anh̄ȳr o pa. Nhūm Tirtūm ja hā mē apumu nē amnhīm mē amex ā mē ajarē. Hāmri nē nh̄ȳrmā kaxkwa kamā wa inhō krī kamā mē ato mex rax nē. Ka mē akīnh nē ajamakētkati nē axāmnhīx ri apa. Jakamā kwār mē māmri pika jakamā ā ixtā mē anhīp̄ex anē. Anē.

Jejus kot arī mē kot mar xw̄ynhjē jahkre hā harēnh

Xiakre 5.1-5

24 Nhūm Jejus nhām hkōt mē pa ho mē pa xw̄ynhjē nhīhkō hā mē kot Tirtūm kōt amnhī nhīp̄ex o pa hkēt xw̄ynhjē hw̄ȳr apkjē. Nē mē omu nē tanhmā mē kām kap̄er to. Mē hikukrēx rūnh xw̄ynhjē kumrēx mā kap̄er nē mē kām:

E kwa mē o kora mē akukrēx rūnh xw̄ynhjaja. Na ka htem ām akukrēx rūnh pix mā ajamaxp̄er o ri apa nē gryk ā Tirtūm mā ajamaxp̄er o apa hkēt nē. Jao mē amā kap̄er mar prām kēt nē. Nē ām akukrēx rūnh mā ajamaxp̄er pē akīnh nē ri apikunhar o ri apa. Tā kot ka mē nh̄ȳrmā ty hāmri nhūm akīnh xāja apē hap̄ex.

25 Nē mē amā Tirtūm kōt ri amnhī nhīp̄ex prām kēt xw̄ynhjaja. Kot kaj mē nh̄ȳrmā akaprī ht̄yx kām tee ri amnhī to hw̄ȳr kapr̄ȳ kām ga. Koja mē amar kēt nē.

Nē mē at̄yx ri mē ate tanhmā amnhī tomnuj to hkukamā ajamaxp̄er nē apikunhar pē amnhī tomnuj o apa xw̄ynhjaja. Kot kaj mē nh̄ȳrmā ā mē ate amnhī nhīp̄ex anh̄ȳrja m̄yrapē mē kot amnhī xā ht̄yx kamā hamak o pa htūm xā hw̄ȳr ma apa. Hāmri nē kamā akaprī xāj am̄ȳr rāhā ho ri apa. Jakamā kwa mē o kora mē amā Tirtūm prām kēt xw̄ynhjaja. Kēr ka mē ixkap̄er ma nē axkām ajamak rom nē ri apa.

26 Amnepēm mē pakukamā mē pa xw̄ynhjaja na prem Tirtūm kap̄er o hkwȳjē jahkre ho pa. Nom axtem nē hkwȳm ri tanhmā mē kām ho hēx to nhūm mē kuma nhūm ja mē kām mex nē nhūm mē amnhīm mē mex ā mē harē. No ām mē mex kēt. Tā mē kajaja. Mē kot mē urāk nē axp̄en mā mē amex ā mē ajarēnh tā Tirtūm mā mē amex kēt. Jakamā kot kaj mē amex kēt nē. Anē.

Mē kām mē pahkurê xwÿnhjê jarênh

Matêwre 5.38-48; Rukre 23.34; mǎānēn Atre 7.60; Rōmān 12.14

²⁷ Hāmri nhūm Jejus hpānhā mē piitā mē ahkre nē mē kām:

—E mē ate inhmar xwÿnhjaja. Kêr ka mē kot mē atomnuj xwÿnhjaja amnhî tâ tanhmā mē ho hkêt nē. Ām mē ho mex pix o ri apa hkukamā mǎn ajamaxpêr.

²⁸ —Nē mē kot mē ato kapêr punuj xwÿnhjaja. Kêr ka mē amnhî xwar amnhî tâ tanhmā mē ho akapêr punuj to hkêt nē. Ām tām mē kām akapêr pê mē kām akapêr mex o ri apa. Nē mē kot tanhmā ri mē ato ho pa xwÿnhjaja ka mē ho mex pix o ri apa. Nē mē ho Tirtūm wÿr pix kukamā mǎn ajamaxpêr.

²⁹ —Nē koja mēhō anhînep akura ka ām omu nē tanhmā amnhî tâ ho hkêt nē. Te ate kām ihkjê pēr nhūm kot ihkjê kamā akuranh pyrāk o amnhî nhîpêx nhūm ja amā mex nē. No kêr ka mē amnhî tâ tanhmā mē ho hkêt nē.

—Nē koja mēhō apê anhînhkâ py ka tanhmā hā kām nē hkêt nē. Kwār māmri apê kupy. Ka mǎānēn te ate kry pê anhînhkâ hpakā ry jagjênh xwÿnhhta anhînhkâ hkôt kām ōr pyrāk o hipêx. Nom kamā agryk kām kām ōr kêt nē.

³⁰ —Nē koja mēhō kêp amrakati kumrêx nē awÿr tē nē mēmoj tâ awÿ. Ka anhō mēmoj japêr nē māmri kām mēmoj gō. Kêp anhōxy hkêt kamā kām mēmoj gō. Rÿ koja mēhō apê mēmoj to ahkî ka axāhkurê hkêt nē. Nē tanhmā hā ho hkêt nē. ³¹ Mē piitā mē kot tām mē anhîpêxja na mē amā hprām. Tā kêr ka mē amnhî pyrā nē tām mē piitā mē hipêx o ri apa. Mē kot tām mē anhîpêx kêt tâ kêr ka mē axāmhîx ri anhōxy hkêt nē tām mē hipêx o ri apa.

³² —Nom kot kaj mē amā mē piitā mē ho mex o apa hprām kêt japêr. Nē ām mē kot mē ato mex xwÿnhjê pix ka mē amā mē ho mex prām. Xā koja Tirtūm ja hā mē apumu nhūm ja kām mex nē? Nā koja kām mex kêt nē. Koja mēhō mē ato mex kêt tâ ka mē amnhî rom ho mex nē nhūm Tirtūm ja hā mē apumu hāmri nē mē amex ā mē ajarê. Mē kot amnhî tomnuj o mē pa xwÿnhjaja na htem ām mē kot mē ho mex xwÿnhjê pixjaja nhūm htem amnhî xwar mē ho mex o pa. No tām mē kot amnhî nhîpêx o mē pa xwÿnhjaja na htem mē piitā mē ho mex o pa. Mē kot tām amnhî nhîpêx xwÿnhjaja nē mē kot amnhî tomnuj xwÿnhjaja nhūm mē ho hpimraatā mē ho mex o axpên pyrāk o pa.

³³⁻³⁶ —Nē mē kot amnhî tomnuj xwÿnhjaja na htem ām mē kot mē ho mex xwÿnh pixjaja nhūm htem amnhî xwar mē ho mex o pa. No mē kajaja. Kêr ka mē māmri mē piitā mē kamā axukapri pix nē. Jao axāmhîx ri mē piitā mē kām mēmoj nhōr o ri apa. Nhūm Tirtūm ja hā mē apumu nē ja hā mē ato mex nē.

—Jakamā kêr ka mē amari mē kām akurê xwÿnhjê ho mex nē. Nē mē kamā axukapri nē. Nē mē piitā mē kām mēmoj nhōr o ri apa. Kê nhÿrmā Tirtūm maati mē hā mē amā mēmoj nhōr rax nē. Nē mē ate kot amnhî nhîpêx kôt amnhî nhîpêx xwÿnh ā mē ajarê. Tirtūm na hte mē kot amnhî tomnuj xwÿnhjê kamā ukapri ho pa. Jakamā kêr ka mē urāk nē ā mē hipêx anhÿr o ri apa. E kêr ka mē ā axpên nhîpêx anhÿr rāhā nē. Anê.

Mē pahte axpên to pakapêr punuj kêt ā mē pamā karō

Matêwre 7.1-5; mǎānēn Rōmān 2.1-3, 14.1; Wam Korūt 4.5; Xiakre 4.11-12

³⁷ Nhūm Jejus arî mē ahkre nē mē kām:

—Nē kêr ka mē atÿx ri amnhî krā hkôt tanhmā mē kot amnhî tomnuj to hā tanhmā axpên jarênh to ho ri apa hkêt nē. Kêr kê Tirtūm mē apyrā nē ā mē ajarênh anhÿr kêt nē.

—Nê kêr ka mê tanhmã mēhō kot ra atomnuj tota mã ajamaxpēr rāhã hkêt nê. Ām ho ajamakêtkati tokyx anê nê axte kãm ajamaxpēr kêt nê. Kêr kê Tirtũm ja hã mê apumu nê mê apyrã nê axte tanhmã mê ate amnhĩ tomnuj to mã hamaxpēr kêt nê.

³⁸—Nê kêr ka mê axpên kamã axukaprĩ pê tanhmã axpên to mex to ho ri apa. Kêr kê Tirtũm ja hã mê apumu nê mê apyrã nê mê akamã ukaprĩ pê tanhmã mê ato mex to ho pa. Na hte mê pahte axpên kamã paxukaprĩ hã mê pahpumunh xã hkôt tanhmã mê pakamã ukaprĩ to.

³⁹—Nom kêr ka mê atýx ri tanhmã axpên to akapêr to hkêt nê. Mê ate aprĩ hã axpên jamaxpēr kôt axpên pumunhre hã. Jakamã kot kaj mê atýx ri mēhō ho akapêr punuj hãmri nê te mê nohkre xwýnhjê hō kot mēmoj pumunh kêt tãa te kot no ho omunh nê tanhmã harēnh to pyrãk o amnhĩ nhĩpêx. ⁴⁰Tirtũmja tapxipix na kot mê pajamaxpēr kôt mê pahpumunh par. Mê axãhpumunh týx o mê pahte hakrenh kêt jakamã kwa kêr ka mê ãm hkôt pix mã amnhĩ nhĩpêx o ri apa. Kot kaj mê ã amnhĩ nhĩpêx anê hãmri nê gaa nê urãk nê mê piitã mê kamã axukaprĩ pix o ri apa. ⁴¹⁻⁴²Jao mēhō kot tanhmã amnhĩ tomnuj to hã omu hãmri nê tanhmã hã kãm nê tokyx anhýr kêt nê. Akumrêx ate tanhmã amnhĩ tomnuj to hã amnhĩ pumu nê hkaga hãmri nê rĩ kormã mēhōta hwýr tē nê kot tanhmã amnhĩ tomnuj to hã kãm akapêr to. Anê.

Mê pajamaxpēr xã hkôt mê pakapêr ã mê pajarēnh

Matêwre 7.16-20, 12.33-37

⁴³⁻⁴⁵Nhũm Jejus arĩ mê ahkre nê mê kãm:

—Nê koja mēmo pĩ hpār mex nê ô mex nê. Nom koja pãr punuj hãmri nê ômnuj nê.

—Nê na htem mēmo xô pumu nê hkôt tanhmã pãr kute hã omu. No na htem rãrãj pumu nê kēp akunĩ kamã mrônhi xô hã hkamnhĩx kêt nê. Na htem mēmo xý hpār pumu nê ô xãnhre hã hkamnhĩx kêt nê. Ja pyrã nê koja mēhō hamaxpēr punuj nê mããnēn hakwa ho kapêr punuj pix nê. Nê htýx tanhmã amnhĩ tomnuj to ho ri pa. Nom koja hãmaxpēr mex nê hãmri nê mããnēn hakwa ho kapêr mex o pa. Na htem ahpýnhã amnhĩ jamaxpēr xã hkôt tanhmã hakwa ho kapêr to ho ri pa. Anê.

Ixkre pijakrut jarēnh

Matêwre 7.24-27; mããnēn Xiakre 1.22-25; Wam Juãw 2.3-6

⁴⁶Nhũm Jejus arĩ mê hkôt mê pa ho pa xwýnhjê jahkre ho nhý nê mê kãm:

—Nê kot kaj mê ixpê mê anhō pahihiti hã ijarê hã kot kaj mê ixkapêr kôt amnhĩ nhĩpêx rãhã ho ri apa.

⁴⁷—E pa mê amã ixprĩ hã mê kot ixkôt amnhĩ nhĩpêx xwýnhjê kot amnhĩ nhĩpêx jarê ka mê aprĩ hã inhma. ⁴⁸Mê kot amnhĩ nhĩpêxja te mēhō hamaxpēr mex pê aptýx kãm amnhĩm ōrkwý nhĩpêx pyrãk. Koja aptýx kãm ōrkwý nhĩpêx nhũm mēmo arĩgro hã na wrýk rax nê. Nê gô htãm rax nê hanhi nom nhũm arĩ ãm týx nê xa. Tã kot kaj mê ixkôt amnhĩ nhĩpêx ã kot kaj mê te ixkre jarēnhja pyrãk. Jao amex nê ajamakêtkati nê ri apa. Te gô htãm kot ixkre janhir tã nhũm ãm týxta pyrãk. ⁴⁹Nom koja mēhō hamaxpēr mex kêt nê htýx mō nê gô mýri gyw rerek kãm amnhĩm ōrkwý nhĩpêx. Hãmri nhũm mēmo arĩgro hã na wrýk rax nê. Nê hã gô htãm rax nê ōrkwý janhi nê kēp grãnh pa. Tã koja mēhō ixkôt amnhĩ nhĩpêx kêt nê te ho mēhō kot gô mýri gyw rerek kãm ixkre nhĩpêxta pyrãk. Jao mex kêt nê pa. Jakamã kwa mê ixkapêr mar

tỳx nê te gô htâm kot ixkre janhir nê grành parta pyrâk o amnhĩ nhĩpêx o apa hkêt nê. Anê.

7

Jejus kot mēhō mā àpênh xwỳnh o mex ã harênh

Matêwre 8.5-13

¹ Tã nhũm Jejus mē kãm ujarênh pa hãmri nê ma akupỹm Kapanaũ hwỳr mō. ² Nê mōđ nê ra hwỳr pōj. Nhũm krĩ kamã pōristi krãhtũm mã àpênh xwỳnhja à htỳx nê nō. Ra htyk kaxyw nê nō nhũm ò patrãw tee ri omu nê kãm hapê jakamã tee ri hkukamã hamaxpêr o hkaprĩ nê. ³ Hãmri nê Jejus pōx ã harênh ma nê hwỳr Ijaew pigêt kwỳjê rê nê mē kãm:

—Kwa mē ma Jejus wỳr mra nê kãm ijarê kê tokyx man ixwỳr tē nê inhmã àpênh xwỳnhnta o mex. Anê.

⁴⁻⁵ Hãmri nhũm mē kuma nê ma hwỳr mra nê omu nê kãm:

—Pa. Na pōristi krãhtũm na awỳr mē inhmē pa mē mra. Mē pahkĩnhã kêp Ijaew kêt tã kãm mē pahkĩnh nê. Tãm na pre mē inhō krĩ kamã mē inhmã Tirtũm kapêr o mē ahkre xã hã ixkreja nhĩpêx. Tã na kãm àpênh xwỳnhnta kêp à htỳx nê nō nhũm apōx hã ajarênh ma nê man awỳr mē inhmē. Kwa ma hwỳr tē nê kãm ho mex nã? Anê.

⁶ Hãmri nhũm mē kuma nê mē kãm:

—Tôe. Ma pu mē hwỳr. Anê.

Hãmri nê ma mē hkôt tē. Hãmri nê kormã òrkwỳ htêp o htêm mē nhũm axte kutã hkrãmnhwỳ hkwỳ rê nhũm mē ma kutã mra. Hãmri nê mra nê mē hkaxpa nê Jejus pumu nê kãm:

—Pa? Kwa na pōristi krãhtũmta ã awỳr karō anê. Na mē inhmã: “E kêr ka mē mra nê nhỹri Jejus kaxpa nê kãm awjarê kê ãm ata rũm kapêr pix o inhmã à xwỳnhnta o mex. Kĩnh ã ixpê Ijaew kêt jakamã ixte amnhĩ kuk ã ixpijaam tỳx. Jakamã kot paj pam hwỳr ixtêm kêt nê. Kwa kãm anê kê ata rũm kapêr pix o inhmã akupỹm ho mex.” ⁷⁻⁸ Ixpê mē hkrãhtũm jakamã na pa hte inhō pōristi mã mēmoj tã karō nhũm mē inhmar xã hkôt inhmã mēmoj tanhmã hipêx to. Na pa hte mē kãm: ‘E mē ma mra nê ã amnhĩ nhĩpêx anê.’ Anê nhũm mē inhma nê ma mrar kurê kumrêx. Rỳ pa mē kãm: ‘E mē amnê ixwỳr mra nê ã amnhĩ nhĩpêx anê.’ Anê nhũm mē inhma nê ixwỳr mra. No kêt Jejus na hte ixrom tanhmã mē à kuteja mã kapêr nhũm kuma nê mē kêp hapôj nê ma mrar kurê kumrêx. Jakamã koja ata rũm kapêr pix o inhmã ho mex.” Anhỳr o awỳr karō. Jakamã na pa mē akutã mra nê akaxpa nê ã amã kapêr jarênh anê. Anê.

⁹ Hãmri nhũm Jejus amnhĩ jaêr pê mē kapêr ma nê hkĩnh nê. Hãmri nê hkôt mē kot mar o pa xwỳnhjê mã kãm:

—Kwa xã na ka mē ã kot ixwỳr karō xwỳnh jamaxpêr anhỳrta ã ama? Mē pahkĩnhã kêp Ijaew kêt tã mē arom amnhĩ kaxyw inhmã hamaxpêr tỳx nê. Aa mē atō uràk nê ate amnhĩ kaxyw ã inhmã ajamaxpêr tỳx anhỳr kêt tã nhũm mē arom kãm àpênh xwỳnh kaxyw inhmã hamaxpêr tỳx nê. Anê.

¹⁰ Nhũm pre ã mē kãm kapêr anê hãmri nhũm pōristi krãhtũm krãmnhwỳjaja kuma nê awjanã nê ma akupỹm hkrãhtũm nhõrkwỳja wỳr mra. Nhũm ra Jejus kãm àpênh xwỳnhnta akupỹm ho mex nhũm mex nê ri mra. Hãmri nhũm mē akupỹm pōj nê akupỹm mex ã omu.

Jejus kot akupỹm mēhō hkra ho htĩr ã harênh
Juãw 11.1-46

11 Tã nhũm Jejus ma krĩ pẽ Naĩ hwỳr hkõt mẽ pa ho mẽ pa xwỳnhjẽ mẽrohã mỗ nhũm mẽ ohtõ nẽ mẽ hkõt mra. 12 Nhũm mẽ ra Naĩ hwỳr hpõx o mỗ. Nẽ hwỳr agjẽ. Axpẽr kãm agjẽ nẽ mỗ nhũm kệp mjẽn htyk xwỳnhja mẽ kutã tẽ. Nhũm hkra myja ham kệp ty. Kra pyxi htã kệp ty nhũm mẽ kasãw kamã kuxã nẽ kumy nẽ kot haxãr kaxyw o mỗ nhũm katorxã mẽ hkõt mỳr o mỗ. Nhũm krĩnhõ xwỳnh kwỳjaja ma hkõt mỗ. Piitã hkaprĩ nẽ hkõt mỳr o mỗ. 13 Tã nhũm Jejus mẽ hkwỳja mẽ mỗ nẽ mẽ hkaxpa nẽ katorxã mỳr ã omu nhũm Jejus kãm hkaprĩ nẽ. Hãmri nẽ xa nẽ kãm:

—Pa? Kwa amỳr kêt nẽ. Anẽ.

14 Hãmri nẽ kasãwta wỳr tẽ nẽ hã ĩhkra xi nhũm mẽ kot mỳnh xwỳnhjaja omu nẽ amarĩ kãm o xa. Hãmri nhũm htyk xwỳnhhta mã kapẽr nẽ kãm:

—E kwa kãnhmã nhỹ. Anẽ.

15 Pu nhũm kãnhmã ỳr kurẽ kumrẽx. Nẽ kapẽr o nhỹ. Hãmri nhũm Jejus nita mã kãm:

—E ota akrata. Na akupỳm amã htĩr. Anẽ.

Hãmri nhũm akupỳm htĩr ã omu nẽ hkĩnh tỳx kumrẽx. 16 Hãmri nhũm mẽ kot omunh xwỳnhjaja amnhĩ jaẽr pẽ akupỳm hkra htĩr kãm omu nẽ ỳ hã haxwỳja hkĩnh nẽ. Nẽ Tĩrtũm mã mex o mex ã harẽ nẽ axpẽn mã:

—Kwa ãm hãmri na Tĩrtũm ã mẽ panhĩpẽx anẽ nẽ mẽ pahwỳr ỳ hã kapẽr jarẽnh xwỳnhhta mẽ nhũm mẽ pahwỳr mỗ. Tĩrtũm mẽ pakamã ukaprĩ jakamã na ã mẽ panhĩpẽx anẽ. Nã ãm hãmri na ã mẽ panhĩpẽx anẽ. Anẽ.

17 Hãmri nẽ piitã ma pikaja rũm mẽ kãm harẽnh o hprõt nhũm mẽ piitã harẽnh ma.

Juãw Paxis tee ri Jejus kukamã hamaxpẽr ã harẽnh

Matẽwre 11.2-6, 11.22; Rukre 4.16-21

18 Rõm nhũm Juãw Paxisja kệp prẽs nẽ hkrĩ nhũm hte hkõt mẽ pa xwỳnhjaja hwỳr mra nẽ kãm Jejus kot tanhmã amnhĩ nhĩpẽx to ho pa hã harẽ. Hãmri nhũm harẽnh ma nẽ tee ri hkukamã hamaxpẽr. Hãmri nẽ hkõt mẽ pa xwỳnh wa ho axkrut nẽ wa kuta 19 nẽ Jejus wỳr wa kumẽ nẽ wa kãm:

—Kwa wa ma hwỳr tẽ nẽ hkukja. Nẽ kãm: “Xà ka na pre Tĩrtũm mẽ ixwỳr amẽ nã? Nã xã kormã axtem hõ na pa mẽ kormã amnhĩ wỳr hamãr o ri ixpa?” Anẽ. E wa ma hwỳr tẽ nẽ ã hkukjẽr anẽ nẽ tanhmã kot amnhĩ jarẽnh to hã ama hãmri nẽ man akupỳn tẽ nẽ inhmã harẽ. Anẽ.

20-21 Hãmri nhũm wa kuma nẽ ma hwỳr tẽ. Nhũm Jejus kormã mẽ ho mex o xa. Mẽ nohkre xwỳnhjaja nhũm akupỳm mẽ no ho mex. Nẽ mẽkarõmnuti kot mẽ hwỳr gjẽx xwỳnhjaja nhũm mẽ nẽ mẽ hapõx o ãm rãhã nhũm wa ra hwỳr tẽ nẽ kormã hã mẽ omunh o xa. Hãmri nẽ kãm Juãw Paxis kapẽr jarẽ. 22 Hãmri nhũm wa kuma nẽ wa kãm:

—Tỳ. Nã ãm hãmri na ja hã ijarẽ. Ixpẽ mẽ ate ixkamã ajamak o apa xwỳnhhta na pa. Jakamã e. Wa kam nẽ tanhmã ixte amnhĩ nhĩpẽx to hã ixpumu hãmri nẽ ma akupỳm hwỳr tẽ nẽ aprĩ hã kãm ijarẽ. Mẽ nohkre xwỳnhjaja na pa akupỳm mẽ no ho mex. Nẽ mẽ hkãnhy xwỳnhjaja pa akupỳm mẽ hkã ho mex. Nẽ mẽ hyk o mẽ pa xwỳnhjaja pa akupỳm mẽ ho mex. Nẽ mẽ htyk xwỳnhjaja pa akupỳm mẽ ho htĩr. Nẽ mẽ kệp amrakati nẽ ri mẽ pa xwỳnhjẽ mã mẽmoj mex jarẽnh o ri ixpa. Na pa hte ã mẽ ho mex o ri mẽ hkõt ixpa anẽ. Jakamã e kwa wa ma akupỳm hwỳr tẽ nẽ ã kãm ijarẽnh anẽ. 23 Kẽ ijarẽnh ma nẽ arĩ amnhĩ kaxyw ixkõt hamaxpẽr tỳx rãhã nẽ. Kojã ã amnhĩ nhĩpẽx anẽ nẽ hamakẽtkati nẽ ri pa. Nẽ tee ri ijarẽnh kukamã hamaxpẽr kêt nẽ. E wa tokyx ma akupỳm hwỳr tẽ nẽ ã kãm ijarẽnh anẽ. Anẽ.

*Jejus kot Juāw Paxis mex ā harēnh**Matēwre 11.7-19*

²⁴⁻²⁵ Nhūm pre ā Jejus wa kām amnhī jarēnh anē nhūm wa kuma nē ma akupŷm Juāw Paxis wŷr tē. Hāmri nhūm Jejus mē kot mar o kuhē xwŷnhjē mā tanhmā Juāw Paxis jarēnh to nē mē kām:

—Na ka prem kapōt ā mar kaxyw ma hwŷr mra. Nom ē mex ā omunh kaxyw rŷ hpijaam kām tanhmā kapēr to hā mar kaxyw hwŷr amrar kēt nē.

²⁶ Kēp Tirtūm nhŷ hā kapēr xwŷnh jakamā na ka prem mar kaxyw ma hwŷr mra. Tirtūm nhŷ hā kot ixkukamā ijarēnh o pa xwŷnh na. Ixpē Tirtūm kot mē akaxyw ixām xwŷnh ā na pre mē amā ijarēnh o pa. Nē hprī hā tanhmā mē amā ijarēnh to. Jakamā na kapēr mex o kot wam Tirtūm nhŷ hā kapēr jarēnh o mē pa xwŷnhjē kapēr jakrenh. ²⁷ Tirtūm kapēr ā kagā htūm kot Juāw kukamā tanhmā harēnh to nē harēnh kot:

Kot paj Ixkra hkukamā ma mē hwŷr harēnh o pa xwŷnh mē kē ma ri hkukamā mē kām harēnh o ri pa. Kē mē kuma nē kutēp tām amnhī nhīpēx.

Anhŷr o Tirtūm Juāw Paxis kukamā harē nhūm mē hā kagā. Tā nhūm mē awŷr kumē. ²⁸ Juāwja mex kumrēx. Na pre hprī hā ixkukamā tanhmā ijarēnh to ho pa. Nom ixkōt mē pa ho mē pa xwŷnhjē hkīnhā ixkōt pa ho pa hkēt ām ixkukamā ijarēnh o pa. Jakamā ixkōt mē pa ho mē pa xwŷnhjaja na mex o kot Juāw Paxisja jakrenh. Mē kot ixkōt hprī hā inhmar o pa jakamā mē mex o kot hakrenh. Anē.

²⁹ Nhūm pre ā Jejus mē kām Juāw Paxis jarēnh anē. Mē kot Juāw mar o kuhē xwŷnh kwŷjaja na pre htem tanhmā amnhī tomnuj to ho pa. Tā Juāw kot mē kām Tirtūm kapēr jarēnh ma nē axpēn mā Tirtūm mex ā harē. Nē axpēn mā:

—Nā ām hāmri. Tirtūm kapēr na mex kumrēx. Anē.

Hāmri nē amnhī tomnuj kaga nē Tirtūm kōt amnhī xunhwŷ. Jakamā nhūm Juāw Paxis Tirtūm mā mē hkrā kumrā.

³⁰ No nhūm Parijew nhō xwŷnhjē mē Tirtūm kapēr tūm o mē ahkre ho mē pa xwŷnhjaja jajē hkīnhā Juāw Paxis kaga kumrēx. Jakamā nhūm mē hkrā kumrār kēt nē. Mē kot Tirtūm kapēr kaga jakamā na pre htem Jejus kapēr ma nē ām kuma. ³¹ Hāmri nhūm Jejus mē kām:

—E pa mē amā mē piitā htŷx ri hamaxpēr ā tanhmā mē harēnh to ka mē kot amnhī nhīpēx ā mē harēnh ma. ³² Te mē kot mēhprīre kot amnhī nhīpēx pyrāk. Mēhprīrejaja na htem ōrkwŷ kapem hije nē mēmoj to amnhīkati ho hkrī. Nē tee ri hkwŷjē kot amnhī nhīpēx pumu nē mē kām:

Kwa na pa mē amā gre htā ka mē ixkutā anhōkrepōx kēt nē. Pa mē ja hā mē apumu nē hpānhā mē amā mē htyk jarē htā ka mē akaprī nē amŷr kēt nē. Kwa mē ri ā amnhī nhīpēx anhŷr kēt nē.

Anhŷr o axpēn mā kapēr. Tā te mē ate mē urāk. Tirtūm kot mē awŷr ŷ hā kapēr xwŷnhjē rēnh tā ka mē te mēhprīre kot amnhī nhīpēxta pyrā nē mē ama ām mē ama nē mē hkōt amnhī nhīpēx kēt nē.

³³ —Juāw Paxis na pre mē awŷr mō nē ixpyrā nē apkur mex o ri pa hkēt nē. Nē ixpyrā nē wīhti ho hkōm kēt nē pa. Tā ka mē ja hā omu nē hkaga nē atŷx ri Satanasti nhŷ hā kot tanhmā amnhī nhīpēx to ho pa hā hkamnhīx nē ri harēnh o ri apa. Hāmri nē mēhprīre kot amnhī nhīpēx pyrā nē hkōt amnhī nhīpēx kēt nē. ³⁴ Tā pa Juāw pānhā mē awŷr mō. Nē kurom apkati mē ixāpkur mex o ri ixpa. Nē kurom wīhti hkwy ho ixkōm o ri ixpa. Ka mē ja hā ixpumu nē atŷx ri ixāpkur rūnh nē ixpipānh o ri ixpa hā ixkamnhīx nē ā axpēn mā ixto akapēr anhŷr o ri apa. Nē mē kot amnhī tomnuj xwŷnhjē hkōt ri ixpa hā

axpën mã ijarënh o ri apa. Æ na ka htem axpën mã ijarënh anë. Jao te mẽ ate Juãw Paxis nhîpêx pyrã nê ixkaga nê ixkôt amnhî nhîpêx kêt nê. Na hte ã htýx ri tanhmã mẽ hamaxpêr to ho mẽ pa xwýnhjaja amnhî nhîpêx anhÿr o ri pa.

³⁵—No tãm ri mẽ hamaxpêr o mẽ pa xwýnhjaja na htem ahpÿnhã Juãw mẽ wa ixte amnhî nhîpêx ã wa ixpumu nê axpën mã wa ijarënh o: “Nà ahpÿnhã wa kot amnhî nhîpêx tã wa hamê ãm hãmri Tirtùm nhÿ hã kapêr jarënh mex o pa. E pu mẽ wa uråk nê Tirtùm kôt amnhî xunhwÿ.” Anhÿr o axpën mã wa ijarënh o pa. Anë.

Parijew nhõ xwýnh pê Simãwre jarënh

Matêwre 26.6-13; Makre 14.3-9; Juãw 12.1-8

³⁶Tã nhùm Parijew nhõ xwýnh pê Simãwreja amnhî nhõrkwÿ hwÿr Jejus mẽ hkôt mẽ pa ho pa xwýnhjê mẽ kuwÿ. Mẽ kot kutã apkur kaxyw amnhî wÿr mẽ kuwÿ nhùm mẽ õrkwÿ hwÿr mra nê mẽ hwÿr agjê nê apkur kaxyw hkri. ³⁷Hãmri nhùm mẽhõ nija mẽ hwÿr axã. Na pre hte amnhî tomnuj pix o pa. Hãmri nê Jejus õ krî hwÿr hpõx nê Simãwre nhõrkwÿ kamã apkur ã harënh ma nê ma hwÿr tẽ. Mẽ hkuxwaxã hã à py nê ma hwÿr o tẽ. ³⁸Hãmri nê hwÿr axã nê Jejus pumu nê hwÿr tẽ nê pum xa. Nê tee ri tanhmã kot amnhî tomnuj to ho paja mã hamaxpêr nê hpjiaam nê hkaprî nê mÿr o xa. Hãmri nê Jejus kutã hkõn krã ho tẽm nê nhÿ nê no kagô ho hpar go. Hãmri nê amnhî krã kî ho hpar grã nê kupã hãmri nê hpãnhã mẽ hkuxwa xã ho kuxwa. Kãm hkînh xaj ã hipêx anë. ³⁹Hãmri nhùm Simãwre tee ri ja hã omu nê hamaxpêr o:

—Tk. Kwa jahti kot amnhî tomnuj pix o pa xwýnh tã mẽ ixwÿr axã nê ã Jejus nhîpêx anë nhùm amnhî nê hanor kêt nê. Kêp ãm hãmri Tirtùm nhÿ hã kapêr jarënh o pa xwýnh ronhÿx ja hã omu nê amnhî nê hanor kurê kumrêx. Anë.

⁴⁰Hãmri nhùm Jejus amnhî tã hamaxpêr ã omu nê hêx rom kãm kapêr nê kãm:

—E Simãwre. Pa amã awjarê ka inhma. Anë.

Hãmri nhùm kãm:

—Tõe. Mex. Mãmrî inhmã awjarê pa ama. Anë.

⁴¹Hãmri nhùm kãm:

—Nà koja mẽhõ my wa hamêxkrut. Nhùm hõja mẽhõ pê kàxpore ho rax kumrêx nê ho ìpresta. Nhùm hõja ãm kêp ho grire nê ho ìpresta. Hãmri nê wa hamê kàxpore ho hapêx pa. ⁴²Hãmri nê akupÿm kot kêp ho ìpresta xwýnhnta mã hpãnhã õr kaxyw tee ri amnhî kukamã hamaxpêr. Ra kot ho hapêx par jakamã tee ri amnhî kukamã hamaxpêr. Tã nhùm kot wa kãm ho ìpresta xwýnhnta wa hwÿr tẽ nê wa kãm: “Kwa wa tee ri amnhî kukamã ajamaxpêr kêt nê. Na pa ra war ate ixto tewën ã kagàta kaxõnh pa nhùm ja hapêx. Kot paj axte kãm ijamaxpêr kêt nê. Jakamã wa mãmrî ajamakêtkati nê axãmnhix ri apa.” Anhÿr o wa kãm kapêr. Æ mẽ ujarënh kot anhÿr. Anë.

Nhùm pre ã Jejus Simãwre mã ujarënh anë. Hãmri nê hã hkukja nê kãm:

—E nhÿ myja koja we kãm ho tewën xwýnhnta kînh tÿx nê wehe? Anë.

⁴³Hãmri nhùm kãm:

—Nà kot kêp ho rax nê ho ìpresta xwýnhnta koja kãm hkînh tÿx o hõta jakre. Anë.

Hãmri nhùm kãm:

—Tÿ. Nã ãm hãmri na ka ã harënh anë. ⁴⁴Tã mãn ka ni kot ã inhîpêx anhÿr xwýnhnta pumu. Na ka amnhî nhõrkwÿ hwÿr ixwÿ pa axã nom ka inhmã gô hkwy pa ho amnhî par kuhõnh kêt nê. Tã nhùm nija arom ã inhîpêx anë nê no kagô ho ixpar kuhõ nê amnhî krã kî ho grã ho nhÿ.

45 —Nē anhōrkwŷ hwŷr ixàrta ã ka ixkahti hkôt inhmŷnh nē xipār kêt nē. Tã kêt nija arom xatã ixpar pãr o nhŷ. 46 Nē ate orti ho ixkrã gregrer kêt tã nhŷm arom mē hkuxwaxã ho ixpar kuxwa ho nhŷ. Mēhkukwaxã hã kãxpore xohtô htã nhŷm àmnhŷx ho ixpar kuxwa ho nhŷ. 47 ãm hãmri na pa amã ja jarē. Nija kot amnhŷ tomnuj tŷx tã pa ra nē kot amnhŷ tomnuj o ijapêx pa. Ra kot amnhŷ tomnuj tŷx xwŷnh ã amnhŷ pumunh jakamã na amnhŷ kaxyw inhmã hamaxpêr pē kãm ixkŷnh nē ã inhŷpêx anē. No ka na ka hte uràk nē amnhŷ tomnuj tŷx o apa htã uràk nē tee ri ja hã amnhŷ pumunh kêt nē. Tã nita kŷnhã ate amnhŷ tomnuj kaga hkêt jakamã na ka ãm amã ixkŷnh grire. Anē.

Nhŷm pre ã Jejus Simãwre mã kapêr anē. 48-50 Hãmri nē nija mã kapêr nē kãm:

—E kãnhmã xa. Ra ate amnhŷ kaxyw inhmã ajamaxpêr jakamã na pa ra ate amnhŷ tomnuj piitã amnhŷ katut kôt rēnh pa. Kot paj axte kãm ijamaxpêr kêt nē. Jakamã mãmri ma ajamakêtkati nē axãmnhŷx anhōrkwŷ hwŷr tē. Anē.

Hãmri nhŷm mē kot axpēn kutã apkur xwŷnhjaja tee ri kot kãm kapêr anhŷrja ã kuma nhŷm ja mē kãm mex kêt nē. Jakamã nhŷm mē ri axpēn mã harēnh o:

—Tk. Kwa mēhō na hte ri kot Tirtŷm kot amnhŷ nhŷpêx pyrãk o amnhŷ nhŷpêx nē mē kot amnhŷ tomnuj o hapêx ã amnhŷ jarēnh o we ri pahti? Anē.

8

Mēnijē hkwȳ kot Jejus kôt pa hã mē harēnh

Makre 15.40-41, 16.9

1 Tã nhŷm Jejus ma mē piitã mē kãm Tirtŷm kapêr o mē ahkre ho ri mē hkôt pa. Krŷ rŷnh kamã nē krŷ hkryre kamã. Mē kot amnhŷ tomnuj kaga nē Tirtŷm kôt amnhŷ xunhwŷr nhŷm kot amnhŷ tã mē omunh nē mē ho hkra kaxyw nhŷm ri mē hkôt mē kãm harēnh o pa. Nhŷm ŷ hã mē ahkre ho mē pa xwŷnh pē 12jaja ma hkôt ri pa. 2 Nē mēni hkwȳjaja. Na pre ra Jejus mē hkwȳjē nē mēkarōmnuti japôj. Nē mē hkwȳjaja tanhmã mē ã kute xwŷnhjaja nhŷm akupŷm mē ho mex. Xwŷnhjaja nhŷm prem haxwŷja ma hkôt ri pa. Hō pē na pre Marir Matarēn nhŷm pre ra Jejus nē mēkarōmnuti ho 7 nē hapôj. 3 Nē Joanã. Joanã mjēn Kujahiti na pre kēp pahiti Erox mã mē àpēnh xwŷnhjē krãhtŷm. Nē Sujãnre. Nē kaxyw mēnijē ohtô nē Jejus kôt tanhmã mē ho ajuta hto ho mē hkôt pa. Jao mē hikãxpore ho mēmoj japrô nē ho mē kãm mē ò nhŷpêx o ri mē hkôt pa.

Mēmo hy hkre xwŷnh

Matêwre 13.1-9; Makre 4.1-9

4 Tã nhŷm mē ra krŷ piitã rŷm Jejus wŷr akuprô. Jakamã nhŷm mē ohtô rax kumrêx nhŷm Jejus mē kãm ujarēnh o nhŷ. No ãm hprŷ hã ujarēnh kêt nē. Mē kot Tirtŷm kapêr mar nē tanhmã hkôt amnhŷ nhŷpêx to nhŷm hã kuxi nē mē kãm hã ujarēnh o nhŷ. 5 Nē mē kãm:

—E mē inhma. Kojã mēhō ma pur mã mō nē pur kãm mēmo hy ho ukapêr o ri pa. Nom nhŷm piitã amex kãm rôrôk kêt nē. Kwŷ ahpŷnhã nhŷri rôrôk. Hãmri nhŷm hkwȳ aptŷx kãm rôrôk nhŷm kuwēnhre omu nē hwŷr mra nē hkrêr pa.

6 —Nē kēn kãm hy hkwȳ rôrôk nē higrôt kutã nojarêt nē higrôt pa. No nhŷm kamã aptŷx nē kamã kēp pika hkryre jakamã nhŷm higrôt nhŷm hã myt apha nē arŷgro htŷx mē nhŷm grã pa. Kamã kēn nhŷm amgo mex kêt jakamã nhŷm grã pa.

7 —Nē mrônhi kamā rôrôk xwÿnhja haxwÿja higrôt tâ no nhûm uti kēp amÿtâ nhûm ô hkêt nē.

8 —No hirā kamā pika mex kām rôrôk xwÿnhja. Hāmri hirā kamā rôrôk nē higrôt mex nē piitā ô rax nē. Piitā kamā ô kēp 100. Ā mē ujarēnh kot anhÿr. E kwa mē ixujarēnh ma nē kām ajamaxpēr tÿx rāhā ho ri apa. Anē.

9 Nhûm pre ā Jejus mē kām ujarēnh anē. Hāmri nhûm hkôt mē pa ho mē pa xwÿnhjaja kuma nē tee ri hkukamā hamaxpēr nē kām:

—Kwa na pa mē ixprī hā axujarēnh kôt mēmoj pumunh kêt nē. Aprī hā mē inhmā tanhmā harēnh to pa mē ixprī hā kuma nā? Anē.

10 Hāmri nhûm mē kām:

—Tōe. Nā kot paj mē amā harē. Tirtûm kām mē ate aprī hā mar prām jakamā kot paj ixprī hā mē amā harē. Mē kot amnhī tomnuj kaga nhûm Tirtûm kot ja hā mē omunh nē mē ho hkra. Ja na pa harē.

—No mÿjjaja na mē akīnhā kām mar prām nōkati. Jakamā na htem ixujarēnh ma nē ām kuma nē htÿx ri pa. Anē.

Jejus kot prī hā mēmo hy jarēnh

Matēwre 13.18-23; Makre 4.13-20

11 Hāmri nhûm Jejus hkôt mē pa ho mē pa xwÿnhjē mā:

—E kot paj ixprī hā mē amā mēmo hy ho ukapēr ā mē ujarēnhhta jarē ka mē inhma.

—Nā mēmo hyta te kēp Tirtûm kapēr pyrāk. Nē ahpÿnhā hy rôrôk ā pikata te kēp ahpÿnhā mē kot Tirtûm kapēr mar xwÿnhjē kot amnhī nhīpēx pyrāk.

12 Mē kot mar xwÿnh kwÿjjaja te kot aptÿx kām hy rôrôk nhûm kuwēnh kot hwÿr mrar nē hkrēr par xwÿnhhta pyrāk. Jao Tirtûm kapēr ma nhûm Satanasti te kuwēnh kot hy hkrēr parta pyrā nē mē kot amnhī kaxyw Tirtûm kapēr kôt hamaxpēr nē hkôt amnhī xunhwÿr pymaj tanhmā nē mē hkrā hto. Jakamā nhûm mē kapēr ma nom ho hamakētkati tokyx anē nē axte kām hamaxpēr nē hkôt amnhī nhīpēx kêt nē.

13 —Nē mē kot mar xwÿnh kwÿjjaja te kot kēnre kamā hkwy rôrôk nē higrôt nē grā par tokyx anhÿr xwÿnhhta pyrāk. Jao Tirtûm kapēr ma nē hkīnh nē. Nē kām mar prām nē. Tā nhûm mēhō tē nē Tirtûm nē tanhmā kām kapēr to nhûm mē kuma nē Tirtûm kaga. Te mēmo hy higrôt nē grā par tokyx anhÿrta pyrāk.

14 —Nē mē kot mar xwÿnh kwÿjjaja te kot mrônhi kamā hkwy rôrôk nē higrôt nhûm mrônhi kot kēp āmnār xwÿnhhta pyrāk. Jao kām Tirtûm kapēr mar prām nē. No ām määnēn kām hikukrēx rax nē hikāxpore rax prām xaj ām ja pix mā hamaxpēr o pa. Nē gaa nē ra gryk ā axte Tirtûm kapēr mā hamaxpēr nē hkôt amnhī nhīpēx kêt nē.

15 —Nē mē kot mar xwÿnh kwÿjjaja te hirā kamā pika mex kām hy hkwy rôrôk nē higrôt nē ô raxta pyrāk. Nē ixkapēr ma nē amnhī krā him hagjēnh tÿx nē ixkôt ri amnhī nhīpēx mex rāhā ho ri pa. Jakamā te ra mēmo hy hkreta ô rax mex pyrāk. E. Ā ixujarēnh kot anhÿr. Anē.

Kanē mē guhkrax wa harēnh

Makre 4.21-25

16 Nhûm Jejus arī mē kām ujarēnh o nhÿ nē mē kām:

—E mē inhma. Xā na htem kanē hpōk hāmri nē guhkrax o hpro rÿ par krak ri unhÿ? Nā na htem ā hipēx anhÿr kêt nē. Na htem hpōk nē kÿxpē kuhē xā kamā unhwÿ nhûm hirā mex o kuhē. Nhûm htem ixkrem agjē nē hirā kamā mēmoj pumunh mex nē. Ja pyrā nē na pa hte mē ate inhmar tÿx kaxyw ixprī hā mē amā awjarē. 17 Kormā mē ate mēmoj pumunh nē aprī hā mar kêt tā

kot kaj mẽ tokyx aprĩ hã omu mẽ ama. Te mẽmoj kot mẽ apê hpimxur pyrãk tã koja tokyx mẽ amã amnhĩ to amnhĩrĩt ka mẽ aprĩ hã omunh pa. Te mẽ ate kanê hpõk kãm aprĩ hã mẽmoj pumunh mexta pyrãk. ¹⁸ Jakamã kêr ka mẽ ixkapêr mar tỳx mẽ hkõt ajamaxpêr rãhã ho ri apa. Jao ixkapêr piitã mar tỳx mẽ. Nom kot ka mẽ mar tỳx kêt mẽ hã ano hkêt pa mẽ axte kãm ajamaxpêr o apa hkêt mẽ. Anê.

Jejus kot tanhmã katorxã mẽ htõjê jarênh to hã harênh

Matêwre 12.46-50; Makre 3.31-35; mãânên Eprêw 2.11-12

¹⁹ Nhũm Jejus arĩ mẽ ahkre ho nhỹ. Rõm nhũm katorxã mẽ htõjaja nhỹhỹnh hwỳr mõn pøj. No nhũm mẽ kot mẽ hã htu rax jakamã nhũm mẽ tee ri hwỳr gjêx kaxyw mẽ kormã kapõt ã kuhê. ²⁰ Hãmri nhũm mẽhõja mẽ omu mẽ Jejus mã mẽ harê mẽ kãm:

—Kwa Pahihti. Ota ra akatorxã mẽ atõjaja awỳr pøj mẽ tee ri awỳr gjêx mã. O mũj mẽ kormã kapõt ã kuhê. Anê.

²¹ Hãmri nhũm mẽ kuma mẽ mẽ kãm:

—Tõe pa ixkato mẽ mẽ omu. Inhmã mẽ hapêê. Nom kot kaj mẽ atõ Tirtũm kapêr ma mẽ hkõt amnhĩ xãm mẽ hkõt amnhĩ nhĩpêx. Hã kot kaj te apê ixtõ rỹ ixkatorxã kot amnhĩ nhĩpêx pyrãk o pu mẽ axpên nhĩpêx. Pa te inhmã mẽ hapê pyrã mẽ inhmã mẽ ajapê mẽ. Anê.

Jejus kot kòk mã kapêr ã harênh

Matêwre 8.23-27; Makre 4.35-41

²² Tã nhũm apkati hõ hã nhũm Jejus himõ rax ã rêr kaxyw nojarêt mẽ hkõt mẽ pa ho mẽ pa xwỳnhjê mã kãm:

—E kot puj mẽ jarãhã ma xarmã mõ. Anê.

Hãmri mẽ mẽ pàr mã gjêx pa mẽ ma xarmã mõ. Garirej rũm kato mẽ ma xarmã pika hõ hwỳr kormã mõ. ²³ Nhũm ra Jejus õtxwa mẽ pàr kre kamã gõr mẽ nõ. Pu nhũm kòk apêr tỳx mẽ nhũm gõ axpên tak tỳx mẽ kãnhmã harĩ. Nê pàr kre kamã pikapĩr rax nhũm pãrta mẽ kãm àr o mẽ nhũm mẽ tee ri amnhĩ nhĩpêx. No nhũm Jejus arĩ htỳx gõr mẽ nõ. ²⁴ Hãmri nhũm mẽ tee ri amnhĩ kukamã hamaxpêr mẽ kumra mẽ kãm:

—Kwa Pahihti kãnhmã nhỹ. Kot puj mẽ jarãhã pahtyk pa. Anê.

Hãmri nhũm kãnhmã nhỹ mẽ kòk mã kapêr mẽ kãm:

—E. Kwa hãmri anhĩkrê. Anê.

Hãmri nhũm hpinhkrênh par mẽ nhũm gõ tãm nõr kurê kumrêx. ²⁵ Hãmri nhũm Jejus hkwyjê hwỳr apkjê mẽ mẽ kãm:

—Kwa kormã te mẽ ate amnhĩ kaxyw Tirtũm mẽ wa inhmã ajamaxpêr tỳx kêt pyrãk. Anê.

Hãmri nhũm mẽ amnhĩ jaêr pê kot ã amnhĩ nhĩpêx anhỹr ã omu mẽ no hawênh rũnh mẽ tee ri axpên pumunh pê hamaxpêr o kuhê mẽ axpên mã:

—Kokỹy. Jejus kêp mẽ panhiõ hkêt. Mẽ pahtõ kot pu we te kot amnhĩ nhĩpêx pyrã mẽ we kòk mã pakapêr nhũm we pama anhĩkrê? Nã Jejus mẽ parom àhpumunh tỳx o àhpumunh tỳx. Jakamã na ã anê. Anê.

Jejus kot mẽhõ nê mẽkarõmnuti kator ã harênh

Matêwre 8.28-34; Makre 5.1-20

²⁶ Tã nhũm mẽ ra himõ nhĩhkjê hã krĩ pê Geras wỳr rê. Himõ nhĩkjê hã na pre pika pê Garirej. Nê Garirej nhĩkjê hã na Gerasja. Jakamã nhũm mẽ ra hwỳr rê. ²⁷⁻²⁹ Hãmri mẽ pàr kre rũm hapõj mẽ api mẽ mra nhũm mẽhõ myja mẽ kutã tẽ. Na pre ra hwỳr mẽkarõmnuti hkwy agjê nhũm mẽ y hã oprê htỳx mẽ

hkênh nê ri mra. Nê òrkwỹ kamã hkrĩ hkêt nê. ãm ri kapôt ã pa ho pa. Mê htykjê hã pika kamã kên kre kaêx kôt ri pa. Na pre ra krĩ nhô xwỹnhjaja xatã tee ri unê nê hkaxpre. Tee ri kãx o ri hkaxpre htã no nhũm amnhĩ nê rênh pa. Nhũm mêkarõmnutija tanhmã hkrã hto nhũm kapôt pix ã ri mra. Jakamã nhũm Jejus mê pãr rũm hapôj nê api nhũm mê omu nê mê kutã tê nê Jejus kaxpa. Nhũm amnhĩ wỹr omu nê nê tanhmã mêkarõmnuti mã kapêr to. Hãmri nhũm my xoprêja hwỹr tê nê kutã hkõn krã ho tẽm nê nhỹ. Hãmri nê kãxpêê amnhĩ tã kãm kapêr. Nom tãm kapêr kêt nê. Mêkarõmnuti nhỹ hã kãm kapêr nê kãm:

—Pa Tĩrtũm Kra Jejus? Kwa mo kaxyw na ka mê ixwỹr tê? Kwa tanhmã mê ixto hkêt nê. Anê.

³⁰ Hãmri nhũm mê kãm:

—Kwa tanhmã na mê anhĩxi kute? Anê.

Nhũm mê kãm:

—Nà mê ixpê Mẽohtõhti. Anê.

Mêkarõmnuti ra kot hwỹr ohtõ nê gjêx jakamã na prem ã kãm amnhĩ nhĩxi jarênh anê. ³¹⁻³² Hãmri nê Jejus mã:

—Kwa jahti nê mê ijapôj nê mê kot amnhĩ xà htỹx kamã hamak tũm xà hwỹr mê ixrênh kêt nê. Hagrô hkwy müj wỹr mãn mê ixrê pa mê hpãnhã hwỹr mãn hajê nà? Anê.

Hagrôja kii mê kêp amỹm hixêt ã ri apkur o pa nhũm mê ã Jejus mã mê hwỹr amnhĩ to hwỹr anê. Hãmri nhũm mê kãm:

—Tõe. Tô mê tãm hwỹr mãn mra. Anê.

³³ Hãmri nhũm mê kuma nê myta pê hapôj nê ma hagrôja wỹr mrar kurê kumrêx nê mê kãm gjêx pa. Hãmri nhũm myja akupỹm tãm hkrã. No nhũm hagrôja mêkarõmnuti pymaj amỹra nê axkahkũm nê hprôt nê himô hã krã hixêt ã axpum rôrôk nê gôx kãm mrõ nê pikaprãr pa. ³⁴ Hãmri nhũm hagrô jamãr xwỹnhjaja tee ri omu hãmri nê ma mê õ patrãw wỹr akupỹm mê piitã mê kãm harênh o hprôt nê mra. ³⁵⁻³⁶ Nhũm mê tee ri mê kuma hãmri nê ma kot Jejus pumunh mã hwỹr mra nê hkaxpa. Nê kuri myta pumu nhũm ra akupỹm tãm hkrã nê tãm amnhĩ nhĩpêx nê ê kamã mex nê nhỹ. Nhũm mê kot hã omunh xwỹnhjaja mê kãm ujarênh pa. Nhũm mê kuma nê tee ri amnhĩ kukamã hamaxpêr o ra kãm ma nê. ³⁷⁻³⁹ Hãmri nê amnhĩ nê Jejus mã kapêr nê kãm:

—E kwa mê tokyj ma akupỹm amrar kurê kumrêx. Anê.

Hãmri nhũm mê kuma nê awjanã nê ma akupỹm pãr wỹr mra nê agjê. Nhũm akupỹm mex xwỹnhhta mê hkôt hkrã nom nhũm Jejus kãm:

—Nà kot kaj mê ixkôt amõr kêt nê. Ma akupỹm anhõ krĩ hwỹr mãn tê nê Tĩrtũm kot tanhmã akupỹm ato mex to hã mê kãm amnhĩ jarênh o ri mê hkôt apa. Anê.

Hãmri nhũm kuma nê ma akupỹm krĩm tê nê ri mê kãm Jejus kot tanhmã ho mex to hã harênh ri mê hkôt pa.

Jejus kot wa ho axkrut nê wa ho mex ã harênh

Matêwre 9.18-26; Makre 5.21-43

⁴⁰ Tã nhũm Jejus mê ma akupỹm xarmã mô nê rê nê mê kutêp mê pikuprõnh xwỹnhjê pumu. Nhũm mê ra amnhĩ wỹr mê omu nê mê kutêp gô jakã ã pikuprõnh rax nê. Jakamã nhũm mê mê hwỹr pøj nhũm mê amnhĩ wỹr Jejus pumu nê hkĩnh nê. ⁴¹⁻⁴² Hãmri nhũm Jajti ma hwỹr tê. Ijaew nhô Tĩrtũm kapêr o mê ahkre xà hã ixkre jamãr xwỹnh na pre. Nhũm pre hkra ni pyxire. Hã amgrã pê 12. Tã ra kêp ã htỹx nê htyk kaxyw nê nô. Hãmri nhũm hipêêxaja

tee ri omu hāmri nē Jejus wýr tē nē kutā hkōnkrā ho tēm nē nhý nē ho kuwý nē kām:

—Pa akupým mē ixto mex xwýnh maati. E awýr na pa tē. Na ra ixkra ixpé htyk kaxyw. Pa tee ri omu nē kaxyw amā ijamaxpēr nē awýr tē. Kwa ma ixkót inhōrkwý hwýr tē nē inhmā omu nē tokyx inhmā ho mex nā? Anē.

Hāmri nhūm kuma nē ma hkót tē. Nhūm mē ohtō nē wa hkót pry hā mra nē expēn nhīgā nē expēn kujahēk o hkót mra. ⁴³ Hāmri nhūm mēhō nija haxwýja wa hkót tē. Na pre hte hkamrō hkryre rāhā ho pa hā ra amgrā kēp 12. Nhūm tōtō tee ri kot ho mex kaxyw hkane kaprý ho pa. ⁴⁴ Jakamā nhūm tee ri amnhī kukamā hamaxpēr hāmri nē Jejus jarēnh ma nē ma mē hkót hwýr htēm kurē kumrēx. Nom nhūm mē ohtō rax nē hkót mōr jakamā nhūm mē hkaēx kót hwýr tē nē hkatut kót kēp ē nhīrē kupē. Hāmri nē ām kēp ē pix kupēnh tā akupým mex. ⁴⁵ Hāmri nhūm Jejus kot kēp ē kupēnh ā amnhī tā omunh tā hēx rom mē ho hakēx nē mē omu nē mē kām:

—Kwa mē atō na ka ri amnhī kaxyw inhmā ajamaxpēr týx pē ixpé ixé kupé? Anē.

Hāmri nhūm mē piitā tee ri expēn pumu nē kām amnhī tā aprā. Hāmri nhūm Simāw Pētre kām:

—Mē kot apē amnār griā kot ka kēt ri mēhō kot apē hkupēnh xwýnh ā ri mē hkukja. Kwa mān ām mēhō amarī apē hkupē. Anē.

⁴⁶ Hāmri nhūm kām:

—Nā mēhōja amarī hkupēnh kēt nē. Na amnhī kaxyw inhmā hamaxpēr týx pē ixpé hkupé. Tā ixāhpumunh týx xāja kót na akupým mex. Nom ixte mēhō kot ixpé hkupēnh xwýnhja pumunh jakamā na pa ixēx rom ā amnhī tā ri mē hkukjēr anē. Kwa mē atō inhmā amnhī jarē. Anē.

⁴⁷ Hāmri nhūm mēhō nita kuma nē tee ri kēp kot amnhī to hpimxur prām kaprý. Hāmri nē hpijaam kām hwýr htertēt o tē nē kutā hkōn krā ho tēm nē nhý nē kām amnhī jarē nē kām:

—Ma pa na pa inhmā inhmex prām xāj apē axé kupé. Tā na pa akupým inhmex. Anē.

⁴⁸ Hāmri nhūm Jejus kuma nē kām:

—Tōe. Nā ra ate amnhī kaxyw inhmā ajamaxpēr týx kót ate ā amnhī nhīpēx anhýr jakamā na ka akupým amex. E māmri ajamakētkati nē ma akupým tē. Anē.

Hāmri nhūm kuma nē hkīnh nē ma akupým tē. ⁴⁹ Rōm nhūm Jajti mā àpēnh xwýnhjē hō ōrkwý rūm ma ō patrāw kutā tē nē wa hkaxpa nē Jajti mā kām:

—Kwa na ra apē akra ty. Jakamā mo kaxyw kot ka kēt amnhī kót hwýr Jejus o mō? Kwār māmri ma akupým tē. Anē.

⁵⁰ Hāmri nhūm Jejus kuma nē Jajti mā kām:

—Kwa tee ri akra hkukamā ajamaxpēr kēt nē. Kaxyw inhmā mān ajamaxpēr týx nē. Koja te ra apē htyk tā koja akupým amā htūr. Anē.

⁵¹⁻⁵³ Hāmri nhūm mē mō nē ōrkwý hwýr pōj nē hwýr axā nē mē omu nhūm mē ra htyk xwýnhnta ā htu rax nē. Nē omūj ri mur. Hāmri nhūm Jejus mē hwýr axā nē mē mýr ā mē omu nē mē kām:

—Kwa mē hāmri amýr kēt nē. Na nireta mē apē htyk kēt na ām gōr nē nō. Anē.

Hāmri nhūm ra mē kot htyk ā omunh mex jakamā kuma nē ām kuma nē axtēm nē ri expēn mā hā hpēr o axkē. Hāmri nhūm Jejus htyk xwýnhnta wýr hitom wýr ār kaxyw nē amnhī kót Juāw nē Xiakre nē Pētre nē kaxyw htyk

xwÿnh katorxà nê hipêêxàja. Jajê pix na pre amnhî kôt mê ho agjê. ⁵⁴ Hâmri nê htyk xwÿnhhta wÿr tē nê hpa hā kupy nê kām:

—Pa? Kwa tokyx kànhmā nhÿ. Anê.

⁵⁵ Hâmri nhÿm akupÿm htÿr nê kànhmā ÿr kurê kumrêx. Hâmri nhÿm Jejus mê kām:

—E kwa mê tokyx kām mēmoj japêr kê kukrê. Mān ra kām prām nê. Anê.

⁵⁶ Hâmri nhÿm katorxà mê hipêêxà wa amnhî jaêr pê akupÿm htÿr kām omu nê kamā no pyma ho hkÿnh tÿx nê. Hâmri nhÿm Jejus wa kām:

—E wa inhma. Kêr ka wa akupÿm ixte war amā ho htÿr ā ri mê kām ijarênh o ri apa hkêt nê. Ām kwarĭ ho kwarĭ. Anê.

9

Jejus kot mê ho 12 nê ahpÿnhā mê rênh ā harênh

Matêwre 10.1, 10.5-15; Makre 6.7-13; Rukre 10.1-12; mǎānēn Atre 13.49-50,

18.6

¹⁻² Tā nhÿm Jejus hkôt mê pa ho mê pa xwÿnh pê 12jê mā kapêr nê mê kām:

—E mê amnê ixwÿr mra nê ixkapêr ma. Na pa ra mê amā ixāhpumunh tÿx xā hkwyj gō. Jakamā kêr ka mê inhÿ hā ma ri akwÿjê hkôt tanhmā mê ho mex to ho ri mê hkôt apa. Mê à xwÿnhjê ho mex o ri mê hkôt apa. Nê mê hkwyjê nê mēkarōmnuti japôj. Nê mê piitā mê kām anê kê mê tokyx Tÿrtÿm kôt amnhî xunhwÿ kê mê ho hkra. ³ Nom kêr ka mê amnhî kôt akukrêx ho ohtō nê ri ho apa hkêt nê. Nê amnhî kaxpar xā hā kō ho apa hkêt nê. Nê kawā htur nê ho apa hkêt nê. Nê amnhî kôt axāpkur xā hā anhō ho apa hkêt nê. Rÿ akāxpore rax nê ho apa hkêt nê. Ām mê anhō kamĭs ho pixi nê haxà nê ri hā apa. Nê anhÿ kamā ā ri mê hkôt apa anê. Kê mê kot mê akapêr mar xwÿnhjaja tām mǎn mê amā mê anhō ho pa.

⁴ —Nê kêr ka mê nhÿri krĭ hō hwÿr pōj nê apōx xā kamā mēhō nhōrkwy kamā hkôt ri apikamēnh tāmtā kurÿm akupÿm ajapōj nê ma hpānhā nhām krĭ hō hwÿr apa. Nom atÿx ri nhām mê hwÿr amrar nê nhām mê hwÿr amrar kêt nê.

⁵ —Nê koja mê nhÿri mê akapêr kaga ka mê amnhî tā mê kamā ama nê tokyx mê kurÿm ajapōj nê ma nhām apa. Nê anojarêr nê mê noo mā akuhê nê amnhî par ā awjagrō kapĭ. Mê kot Tÿrtÿm kaga hā amnhî pumunh nhÿm Tÿrtÿm kot amnhî pyrā nê mê hkaga hā mê kot omunh kaxyw ka mê ā mê noo mā amnhî nhĭpêx anê. Hâmri nê ma hpānhā krĭ hō hwÿr apa. Anê.

⁶ Nhÿm pre ā Jejus mê kām mê àpênh ā karō anê. Nhÿm mê kuma hāmri nê hapōj nê ma mê hkôt pa. Ma krĭ piitā hkôt akupÿm mê à xwÿnhjê ho mex nê Tÿrtÿm kapêr o tanhmā mê ahkre hto ho ri mê hkôt pa.

Pahi Eroxx tee ri kot Jejus kukamā hamaxpêr ā harênh

Matêwre 14.1-12; Makre 6.14-29

⁷⁻⁸ Hâmri nhÿm pika pê Garirej kamā mê piitā Jejus jarênh ma nê ahpÿnhā ri tanhmā axpên mā harênh to. Mê hkwyjaja kêp finat Juāw Paxis akupÿm htÿr ā ri harê. Nhÿm mê hkwyjaja amnepêr mê hkukamā Tÿrtÿm nhÿ hā kapêr jarênh xwÿnhjê hō ra akupÿm htÿr ā harê. Nhÿm mê hkwyjaja kêp finat Eris ā axpên mā harê. Jakamā nhÿm pahihti Eroxxa mê kot ahpÿnhā tanhmā ri harênh toja ma nê tee ri hkukamā hamaxpêr. ⁹ Nê hamaxpêr o:

—Kwa mēhō na hte we ri ā amnhî nhĭpêx anhÿr o pa wehe? Nā finat Juāw Paxis kêt. Ra ixte amnepêr hā ixāmnēnh nhÿm mê kot inhmā mut krāhyr nê hpĭr kēnā. Kwa mēhō na hte we ri ā amnhî nhĭpêx anê?

Anhÿr o hamaxpêr hāmri nē kām omunh prām nē.

*Jejus kot mē ho ohtō nē mē kām mē ō hā harēnh
Matêwre 14.13-21; Makre 6.30-44; Juāw 6.1-14*

¹⁰ Tā nhūm Jejus nhÿ hā kapêr o mē pa xwÿnhjaja akupÿn hwÿr mran pōj nē mē kot ri tanhmā amnhī nhīpêx to ho pa hā kām amnhī jarē. Hāmri nhūm mē kuma nē ma krī pē Pesêj wÿr kormā mē o mō. ¹¹ Hāmri nhūm krī hkwy nhō xwÿnhjaja ra ma mē mōr ā mē harēnh ma nē ohtō nē ma mē hkōt mra nē nhÿri mē hkōt pōj. Nhūm Jejus amnhī kōt mē omu hāmri nē tanhmā mē ho mex to ho xa. Kōt mē à nē mē pa xwÿnhjaja nhūm akupÿm mē ho mex. Hāmri nē Tirtūm kapêr o mē ahkre nē mē kām:

—E kot kaj mē atō amā amnhī tomnuj kaga hprām xaj Tirtūm kōt amnhī xām nhūm amnhī tā apumu nē ato hkra. Hāmri ka ajamakêtkati nē amex nē axāmnhīx ri apa.

Anhÿr o mē kām kapêr pē mē ahkre ho xa.

¹² Tā nhūm myt àr kaxyw nhūm Jejus nhÿ hā mē ahkre ho mē pa xwÿnh pē 12jaja hwÿr mra nē kām:

—Kwa na ra kamāt o mō. Mē hano kê mē amnhī to krī hō japêr nē tokyx amnhūm mēmoj japrō nē kuku nē hikwÿ nē gōr. Mo mē panhō? ām jar kapōt pix kēnā. Anē.

¹³⁻¹⁴ Hāmri nhūm mē kuma nē mē kām:

—Kwa ka mē kamjaja mē kām mēmoj gō kê mē kuku. Anē.

Nhūm mē ohtō rax nē mē hkōt mra. Mēmyjaja kēp 5.000 nē kaxyw mē hprō nē mē hkrajaja. Jakamā nhūm mē kēp 12jaja Jejus kot ā mē kām kapêr anhÿrja ma nē tee ri mē hkukamā hamaxpêr nē kām:

—Kwa nā mo mē panhō rax? Mē panhō pāwti kēp sīk nē kaxyw tep grā axkrutre kēnā kot kêt we mē piitā mē hipêx pa. Xà kot paj mē ma mra nē nhÿri mē kām mē apkur xà japrō nhūm mē kuku? Anē.

Hāmri nhūm mē kām:

—Nā pu mē kām mēmoj japrōr kêt nē. Mē panhōta kot puj mē kām ho anghrà. E mē kām anē kê mē ahpÿnhā ri hije nē hkrī nē apku. Anē.

¹⁵ Hāmri nhūm mē kuma nē mē kām anē nhūm mē piitā hkrī pa. ¹⁶ Hāmri nhūm Jejus pāwti mē tepta jamÿ nē kànhmā kaxkwa hwÿr rīt nē kànhmā kupē nē Tirtūm mā harē nē kām:

—Pa Papaj? Apē mē inhmā mē inhō xwÿnh jakamā amex o amex. Anē.

Hāmri nē mē kām ho hkry hpa nē hkōt mē pa ho mē pa xwÿnhjē mā kugō nhūm mē ō ri ho xa nē ho mē hipêx par kumrêx. ¹⁷ Nhūm mē piitā apkur mex o hkrī. Mēōja mē kēp grire htā nhūm Jejus tanhmā mē kām ho rax to nhūm mē ohtō rax tā piitā kuku nē ho ōhy htu hpa. Nhūm arī mēō jakrêx prā nhūm Jejus kōt mē pa ho mē pa xwÿnhjaja akupÿm hakrêx o pikuprōnh pa nē ho kawā ho 12 nē ho nyt pa.

*Jejus kot amnhī tā hkōt mē pa xwÿnhjē kukjêr ā harēnh
Matêwre 16.13-19; Makre 8.27-29*

¹⁸ Tā nhūm arigro hō hā nhūm Jejus nhÿri ahte Tirtūm mā amnhī jarēnh o nhÿ nhūm hkōt ri mē pa ho mē pa xwÿnhjaja ma hwÿr mra. Hāmri nhūm amnhī wÿr mē omu nē amnhī tā tanhmā mē hkukjêr to nē mē kām:

—Kwa mē inhmā mēmoj jarē. Tanhmā na htem ahpÿnhā xepēn mā ijarēnh to wehe? Anē.

¹⁹ Hāmri nhūm mē kām:

—Nà na htem ahpÿnhã tanhmã ajarënh to. Na hte kamã më hkwyjaja ato finat Juãw Paxis ã ajarë. Nhùm kamã më hkwyjaja ato finat Eris ã ajarë nhùm më hkwyjaja tõhã apê Tirtùm nhÿ hã kapër jarënh xwÿnhjê hõ ra akupÿm htír ã ajarë. Æ na htem ahpÿnhã ajarënh anë. Anë.

²⁰ Hãmri nhùm më kuma nê më kãm:

—No më kajaja? Ixpê mëhõ hã na ka htem ixkamnhix? Anë.

Hãmri nhùm Simãw Pêtre kãm:

—Nà më pajaja na pa htem apê Tirtùm kot më ixkaxyw axãm nê më ixwÿr amënh xwÿnh ã ajarë. Nê apê më xpiitã më inhõ Pahi Maati hã ajarë. Æ na pa htem ajarënh anë. Anë.

²¹ Hãmri nhùm kuma nê më kãm:

—Tÿ. Nà ãm hãmri na ka htem ã ijarënh anë. Æ ixte anhÿr kënã. Nom kër ka më inhmar kumrëx. Kër ka më kormã ã akwÿjê mã ijarënh anhÿr o ri apa hkët nê. Anë.

Jejus kot amnhĩ kukamã amnhĩ jarënh

Matêwre 16.21; Makre 8.31-33

²² Nhùm Jejus arĩ hkõt më pa ho pa xwÿnhjê mã kapër nê hprĩ hã tanhmã më kãm amnhĩ jarënh to nê më kãm:

—Nà ãm hãmri na Simãw Pêtre ijarë. Më kajaja ra më ate ja hã ixpumunh mex. No më pahkwÿjaja na më akĩnhã më kãm ja hã ijarënh mar nê ja hã ixpumunh prãm kêt. Ijaew pigëtjaja nê Tirtùm kapër tùm o më ahkre o më pa xwÿnhjaja nê patre krãhtũmjaja më kãm ja hã ixpumunh prãm kêt. Jakamã koja më nhÿrmã ixpynê nê ixtak rax nê. Hãmri nê ixpĩ. Nom kot paj ixtyk ã apkati axkrunëpxi nhùm Tirtùm akupÿm ixto ixtír. Anë.

Jejus krajaja tanhmã kot amnhĩ nhĩpëx to hã më harënh

Matêwre 10.31, 16.24-28; Makre 8.34-9.1; Rukre 14.25-33; Juãw 12.24-26; mããnënh Karatas 5.24; Piripos 2.4; Wam Pêtre 4.1-2; Apokarip 2.10-12

²³ Nhùm pre ã Jejus amnhĩ kukamã hkõt më pa ho më pa xwÿnhjê mã amnhĩ jarënh anë hãmri nê hpãnhã më kot mar o kuhé xwÿnh piitã më kãm kapër nê më kãm:

—E kot ka më atõ ate ixkõt amnhĩ xãm ã amnhĩ jarë hãmri nê mããnënh ã amnhĩ jarënh anë nê amnhĩ jarënh o: “Jejus kêp inhõ Pahihti jakamã kot paj kapër kõt pix mã amnhĩ nhĩpëx rãhã ho ri ixpa. Kwãr ixkwÿjaja tanhmã hã inhĩpëx to.” Anhÿr o apkati më ã amnhĩ jarënh anë.

²⁴ —Koja më ixtã më atõx pĩ rÿ tanhmã më atõ hto ka ty. Tã koja akaxwÿnh ma inhõ krĩ mex wÿr àpir kurê kumrëx. Hãmri nê kamã atír tùm nê amex rãhã apa ho apa. Nom kot kaj më jar atír prãm xàj ixkaga hãmri nê hwÿr axàpir kêt nê.

²⁵ —Nê koja mëhõ hikukrëx rax gryk ã Tirtùm kaga. Hã koja nhÿrmã ty nê ÿ kamã kuwy hwÿr ma mõ nê amnhĩ kõt hikukrëx õ hpyr nê o mõr kêt nê. Kojã tee ri kuwy hwÿr mõr pymaj amnhĩ nê hikukrëx rax o amnhĩ pãnhã amnhĩrer prãm kaprÿ.

²⁶ —Nê koja mëhõ ixte më ahkre hã inhma nhùm ja kêp omnuj nhùm ixkaga japêr. Hã kot paj nhÿrmã akupÿn më ato amnhĩptàr kaxyw akupÿn wrÿ nê amnhĩ xwar kot ixkaga xwÿnhhta kaga. Æm hãmri na pa ã më amã amnhĩ jarënh anë. Kot paj nhÿrmã man akupÿn inhõ Papaj nhÿ hã ixte më ho amnhĩptàr kaxyw akupÿn wrÿ. Nhùm kapër o më wrÿk xwÿnhjaja man ixkõt wrÿ. Pa më wrÿ hãmri nê më kot ixkaga xwÿnhjaja pa amnhĩ pyrã nê më hkaga. ²⁷ Æm hãmri na pa ã më amã amnhĩ jarënh anë. Kot paj nhÿrmã

akupÿn ixte mē ato amnhĩptār kaxyw mē awÿr wrÿ. Tā kot kaj mē akwÿjaja kormā atĩr ri ja kukamā tanhmā ixte amnhĩ nhĩpēx to hā ixpumu. Anē.

Jejus kot kēn prēk nhĩmōk ā hirā kamā ām ā harēnh

Matēwre 17.1-8; Makre 9.2-8; mǎānēn Sikūn Pētre 1.16-18

²⁸ Tā nhĩm semānja hapēx nhĩm Jejus Simāw Pētre nē Xiakre nē Juāw wa mē kām kapēr nē mē kām:

—E pu mē ma hixēt prēk mÿj wÿr mō nē hwÿr api nē himōk ā Tĩrtūm mā amnhĩ jarē. Anē.

Hāmri nē ma amnhĩ kōt hwÿr mē o mō nē hwÿr mē ho api. ²⁹⁻³² Hāmri nhĩm Jejus Tĩrtūm mā amnhĩ jarēnh o xa. Nom nhĩm hkōt hixēt wÿr mē mōr xwÿnhjaja ōtxwa htÿx nē ra gōr nē hikwÿ. Pu nhĩm Jejus axtem hkuk nē xa. Nē ē haka htÿx nē xa. Hāmri nhĩm ja wa kaxkwa rūm wrÿ nē kuri kām kapēr o xa. Finat Mojes mē finat Erisja wa kuri kām kapēr o xa. Na pre ra amnepēm Tĩrtūm amnhĩ wÿr wa ho api. Tā nhĩm wa ra akupÿn wrÿ nē Jejus mā kapēr o xa. Mē hpimrāātā hirā htÿx kām axpēn mā kapēr o kuhē. Jejus kormā krĩ pē Jerujarē kapem mē kot hpĩr kēt ri nhĩm wa mē axpēn mā htyk kukamā harēnh o kuhē. Nhĩm wa kām:

—Nā Tĩrtūm jamaxpēr xā hkōt kot kaj ā amnhĩ nhĩpēx anē.

Anhÿr o Jejus tyk kukamā kām hamaxpēr o hiltÿx o wa xa.

Rōm nhĩm mē ōt xwÿnhjaja hkrā hapōj nē tee ri Jejus pumu. Nhĩm mex kumrēx nē hirā htÿx kām xa nhĩm mē omu nē kuri wa ām xwÿnhnta wa omu.

³³ Hāmri nhĩm Mojes mē Eris wa ra akupÿm nojarēt nhĩm Simāw Pētre tee ri ja hā wa omu nē Jejus mā kām:

—Kwa Pahihti. Nā ām hāmri na pu mē amnē mō. Kwa pu mē kritpēm jar axkamē nē tokyx panojarēt kēt nē. Pa mē amā pō nhĩrōnh o axkrunēpxi nē hipēx. Amā hō nhĩpēx nē Mojes mā hō nhĩpēx nē Eris mā hō nhĩpēx ka mē kamā akrĩ. E kwa pa mē amā ho anē nā? Anē.

Nhĩm amnhĩ krā hkōt ā kām kapēr anē. ³⁴ Hāmri nē kormā kām kapēr rōm nhĩm kakrā jaka tÿxja wrÿ nē mē hkunor nhĩm wa mē kamā kuhē. Hāmri nhĩm Simāw Pētre mē Juāw mē Xiakreja mē tee ri kakrā kot amnhĩ nhĩpēx ā omu nē kām ma nē. ³⁵ Hāmri nhĩm kakrā kamā Tĩrtūm mē kām kapēr nē mē kām:

—E ota Ixkra xa. Mē ate kamā ajamak o apa xwÿnhnta na. Inhmā hapēē. Kēr ka mē ām tapxipix kapēr mar tÿx o ri apa. Anē.

³⁶ Hāmri nhĩm mē kuma nē kǎnhmā rīt nē ām Jejus pix pumu nhĩm ahte xa. Nhĩm kuri wa ām xwÿnhnta wa ra ma akupÿm api nhĩm mē Jejus pix pumu.

Mē tapxipixjaja na prem ā Jejus kot amnhĩ nhĩpēx anhÿr ā omu nom taxy kormā nhām hkwÿjē mā harēnh kēt nē. Ām axpēn pix mā harēnh pē hkukamā hamaxpēr o ri Jejus kōt pa.

Jejus kot mēhō nē mēkarōmnuti janor ā harēnh

Matēwre 17.14-21; Makre 9.14-29

³⁷ Tā nhĩm apkati nhĩm mē ma akupÿm ahparmā hkwÿjē hwÿr wrÿk o mō. Nē mē hwÿr hpōx o mō nhĩm mē ra mē kutēp pikuprōnh rax nē kuhē. ³⁸ Hāmri nhĩm mēhō myja amnhĩ wÿr mē omu nē mē kutā tē nē mē hkaxpa nē Jejus pumu nē kām:

—Pa Jejus. Kwa ixkamā axukapri nē inhmā ixkra ho mex. Ām ixpē pyxire.

³⁹ Na hte mēkarōmnuti xatā ixpē tanhmā ho nhĩm ŷ hā amÿra nē mra nē rōrōk nē hakwa jamrō ho hikwÿ nhĩm tokyx kām urer kēt nē. Nhĩm ra ixpē

homnuj tỳx nē. ⁴⁰ Hāmri pa akôt mē pa ho mē pa xwỳnhjē hwỳr o tē nhũm mē kot inhmā ho mex kaxyw tee ri tanhmā ho hkaprỳ. Anē.

⁴¹ Hāmri nhũm kuma nē hkôt mē pa ho pa xwỳnhjē mǎ kām:

—Hêxta waa nē. Na ka mē ra ixte Tirtũm nhỹ hǎ mē ho mex ǎ ixpumunh o ixkôt apa ryy tǎ kormǎ ixpyrǎ nē ǎ mē hipêx anhỹr kêt nē. Mǎn ka mē kormǎ mē kaxyw Tirtũm kôt ajamaxpēr tỳx kêt nē. Anē.

Hāmri nē myta mǎ kām:

—E amnē ixwỳr akra ho tē pa inhno ho omu. Anē.

⁴² Hāmri nhũm hwỳr o tē nhũm mēkarõmnuti axte kêp ho pika kura nhũm amỹra nē tēm nē nõ. Hāmri nhũm Jejus omu nē nē mēkarõmnuti kator nhũm akupỹm mex nē kànhmǎ nhỹ. Hāmri nhũm akupỹm hipêxǎ mǎ kugõ. ⁴³ Hāmri nhũm mē amnhĩ jaer pê Jejus kot ǎ hipêx anhỹrja ǎ omu nē ri axpên mǎ harênh o:

—Kokỹỹ. Hêxta waa nē. Pēr ǎm Tirtũmja ǎm ǎhpumunh o ǎhpumunh. Anē.

Jejus kot htyk kukamǎ amnhĩ jarênh

Matêwre 17.22-23; Makre 9.30-32

⁴⁴ Hāmri nhũm Jejus hkôt mē pa ho mē pa xwỳnhjē mǎ kām:

—E kot paj mē amǎ tanhmǎ amnhĩ jarênh to ka mē inhmar tỳx nē. Na pa pre mē ate aa mēmoj pumunh kêt kwỳ ho anhỹr o ixpa pix kaxyw mē awỳr ixwryk kêt nē. Koja mē tokyx mē kām ixtǎ amỹnê nhũm mē ixpĩ. E kwa kër ka mē ja ma nē hǎ anohtỳx nē ho apa. Anē.

⁴⁵ Hāmri nhũm mē tee ri kot ǎ amnhĩ jarênh anhỹrja ma nē axpên mǎ:

—Kwa mo na pēr ri ǎ amnhĩ jarênh anê? Kêp mē panhõ Pahi Maati hǎ kot amnhĩ jarênh kênǎ kot kêt mēhõ kupĩ.

Anhỹr o axpên mǎ ri harênh o kuhê. Hāmri nē mē kām ǎ kot amnhĩ jarênh anhỹrja mar prǎm kêt jakamǎ hprĩ hǎ tanhmǎ hǎ hkukjêr to hkêt nē. ǎm akryk mar o kuhê.

Mē kot amnhĩ to rũnh xwỳnhjē jarênh

Matêwre 18.1-5; Makre 9.33-37; Rukre 22.24-27; mǎǎnên Piripos 2.3-9; Wam

Pêtre 5.5

⁴⁶ Tǎ nhũm Jejus kôt mē pa ho mē pa xwỳnhjaja tanhmǎ amnhĩ kukamǎ hamaxpēr to hāmri nē axpên mǎ:

—Kwa mē pahõtõ kot puj we nhỹrmǎ pahpê pahi nē mē ho amnhĩptǎr rax o pahkwỳ jakre? Anē.

Hāmri nē ja hǎ axpên kukjêr o Jejus kôt mō nē axpên mǎ: “Nǎ pa.” Nhũm mē hkwỳja: “Nǎ kêt pa.” Anhỹr o hkôt mō. ⁴⁷ Hāmri nhũm Jejus mē kuma nē mē hamaxpēr kôt mē omu. Hāmri nē xa nē amnhĩ wỳr mēhprĩjê mǎ hpa ho apê nhũm hwỳr tē nē kuri xa. ⁴⁸ Hāmri nhũm Jejus hkôt mē pa ho pa xwỳnhjē mǎ tanhmǎ harênh to nē mē kām:

—E mē inhma. Kêr ka mē apê pahi pyrǎk o tanhmǎ amnhĩ jarênh to ho ri apa hkêt nē. ǎm te amarĩ ri mē apa pyrǎk o amnhĩ nhĩpêx o ri apa. Jao nhỹri mēhprĩre hõ pumu nē kamǎ axukaprĩ ho kām mēmoj tanhmǎ ho rỳ kām mēmoj gõ. Hāmri nē te pa ate tanhmǎ ixto mex to pyrǎk o amnhĩ nhĩpêx. Nê kot ka mē atõ pa tanhmǎ ixto mex to nē te ate Tirtũm tanhmǎ ho mex to pyrǎk o amnhĩ nhĩpêx. Kot kaj mē ǎ amnhĩ nhĩpêx anhỹr o ri apa nhũm Tirtũm ja hǎ mē apumu nē mē ate amnhĩ to rũnh kêt tǎ nhũm tǎm mē ate amnhĩ to rũnh xwỳnh ǎ mē ajarê. E kot kaj mē amǎ amnhĩ to rũnh prǎm nē ǎ amnhĩ nhĩpêx anhỹr o ri apa. Anē.

Mêhō kot Jejus nhỹ hã tanhmã amnhĩ nhĩpêx to hã harênh

Makre 9.38-41

⁴⁹ Hãmri nhũm Jejus kôt mẽ pa ho pa xwýnhjê hō pê Juãwja nhỹhỹnh hwýr hpôx o tẽ nê kãm:

—Kwa Pahihti. O mũj mêhō kêp mẽ pahkwý hkêt tâ anhĩxi jarênh kôt mẽ nê mẽkarõmnuti janor o pa. Pa mẽ tee ri kot ã amnhĩ nhĩpêx anhỹr ã omu nê nê kãm ixkapêr. Kêp mẽ pahkwý hkêt kênã kot kêt ã mẽ hanor anhỹr o pa. Anê.

⁵⁰ Hãmri nhũm kuma nê kãm:

—Kwa nã ja nê tanhmã kãm nê hkêt nê. Koja mêhō mẽ pahkwým ri tanhmã mẽ ahkre hto hkêt nê kêp mẽ panhĩõõ. Ra mẽ pahkôt kot amnhĩ nhĩpêx o pa mã kênã. Jakamã kwa mẽ ja nê tanhmã kãm akapêr to hkêt nê. Kwãr mãmri ã amnhĩ nhĩpêx anhỹr o ri pa. Ja mex kênã. Anê.

Samar nhõ xwýnhjaja kot Jejus kaga hã mẽ harênh

Atre 8.14-15

⁵¹ Hãmri nhũm Jejus akupým kaxkwa hwýr àpir kaxyw ra hwýr apkati grêre ho mõi jakamã nhũm hamaxpêr o:

—E pa ma akupým Jerujarê hwýr mõi. Nã kot paj anê. Mẽ kot kamã tanhmã ixto mã tâ kot paj ma akupým mẽ hwýr mõi. Anê.

⁵² Hãmri nê amnhĩ kukamã mẽ hkwyjê rê nhũm mẽ ma mẽ hkukamã Samar nhõ krĩ kamã nhỹri mẽ kot amnhĩm hikranh xã japêr o mõi. ⁵³ Nom nhũm Samar nhõ xwýnhjaja kêp Jerujarê nhõ xwýnhjê hprãm nõkati jakamã Jerujarê hwýr mõi ã mẽ harênh ma nê amnhĩ nê mẽ hkurê. ⁵⁴ Hãmri nhũm mẽ tee ri amnhĩ tâ mẽ kuma nê awjanã nê akupým Jejus wýr mra nê kãm mẽ harê. Hãmri nhũm Juãw mẽ Xiakre wa mẽ harênh ma nê mẽ kamã gryk nê nê Jejus mã:

—Kwa Pahihti. Nã na mẽ axtem nê amnhĩ nê mẽ pahkurê. Jakamã e kwa pu mẽ kaxkwa rùm mẽ hipy kuwy hpôk kwý rê kê mẽ hkaxãr pa nã? Anê.

⁵⁵ Hãmri nhũm wa kuma nê wa kãm:

—Tk. Kwa nã wa ajamaxpêrja mex kêt. Pu mẽ ã ri mẽ hipêx anhỹr kêt nê. Koja Tirtũm kãm ja ho anhỹr prãm nê rĩ tãm tanhmã mẽ ho. No mẽ papajaja pu mẽ ri mẽ kamã pagryk xãj tanhmã mẽ hipêx to hkêt nê. Pu mẽ ã mẽ hipêx anê nê ra amnhĩ tomnuj tỳx nê. Kwa wa ri ã ajamaxpêr anhỹr kêt nê. Anê.

⁵⁶ Hãmri nê mẽ ma Samar rùm hapõj nê hpãnhã nhãm krĩ hõ hwýr pa.

Mẽ hkwyjaja kãm Jejus kôt pa hprãm ã mẽ harênh

Matêwre 8.18-22

⁵⁷ Tã nhũm Jejus mẽ kormã mõi ri nhũm mêhõja hwýr tẽ nê kãm:

—Pa Jejus? E kot paj ma akõt ixpa ho ixpa. Anê.

⁵⁸ Hãmri nhũm kuma nê kãm:

—Ko ka mã. Kam nê rĩ ma ixkõt ri apa ho apa. Nom kêr ka inhmar kumrêx nê rĩ kormã ixkõt apa. Na hte xore pika hkre kamã hikwý xã. Nê kuwênhre pĩ nhĩmõk ã hikwý xã. No pa na Tirtũm kot mẽ awýr inhmênh xwýnh tâ jajê hkĩnhã inhõrkwý hkêt. Na pa hte ãm nhãm krĩ hõ hwýr ixpa nê nhãm ixpa. Tã xã kot kaj ixpyrà nê ã amnhĩ nhĩpêx anhỹr o ri apa nã? Anê.

⁵⁹ Nhũm pre ã kãm kapêr anê hãmri nê nhãm mêhõja wýr apkjê nê kãm:

—Pa? No ka? Xã kot ka ma ixkõt apa ho apa nã? Anê.

Hãmri nhũm kãm:

—Tỳ no ãm kormã. Koja nhỹrmã inhĩpêxãja tanhmã amnhĩ to nê ty mãn. Pa haxã hãmri nê rĩ kormã ma akõt ixpa ho ixpa. Anê.

60 Hāmri nhūm Jejus kuma nē kām:

—Kwa nà ri ā ajamaxpēr anhyr kêt nē. Ma ixkôt apa ho apa kurê kumrêx. Kê mēmoj ano kupyr rý inhnê apê amnâr kêt nē. Kwâr mē htîr tûm nē mē pa hkêt mã xwýnhjaja mân axwakre kamã amã anhîpêxã jamâr o pa nhûm nhÿrmã ty kê mē amã haxà. Ka mãmrî ma Tîrtûm kapêr o mē ahkre ho ri mē hkôt apa. Kê mē ama nē mē hkwyjaja hkôt amnhî xunhwý nhûm mē ho hkra. Anê.

61 Nhûm pre ã kãm kapêr anê hāmri nhûm nhãm mēhõ myja haxwýja hwýr tē nē kãm:

—E. Pa kot pa ma akôt ri ixpa ho ixpa. Nom kormã. Pa ma akupým tē nē ixkwýjê mã amnhî jarê nē tanhmã amnhî to hpa mân. Hāmri nē mēmo arîgro hã ri kormã ma akôt ixpa ho ixpa. Anê.

62 Hāmri nhûm tee ri kuma nē kãm:

—Kwa nà. Kot kaj ã ajamaxpēr anê hāmri nē ixkôt apa htã te amnhî katut kôt arît rãhã ho ri apa pyrãk o amnhî nhîpêx. Kwa ã ajamaxpēr anhyr kêt nē ma ixkôt apa kurê kumrêx. Anê.

10

Jejus kot mē hwýr mē kēp 72 rēnh ã harēnh

Matêwre 10.1, 10.5-15; Makre 6.7-13; Rukre 9.1-6, 9.10-11; mãânēn Atre 13.50-51, 18.6

¹ Tã nhûm Jejus axte amnhî kaxyw mē ho 72 nē mē kurê. Hāmri nē mē ho axkrut kapēn nē ma nhÿhým krî hkwy hkôt amnhî kukamã mē kurê. Mē kot mē hkôt ri Tîrtûm kapêr o mē ahkre ho pa kaxyw. ² Hāmri nē mē kãm:

—Na mē ohtô rax nē kormã Tîrtûm kapêr mar kêt nē. No ãm kormã mē ate mē kãm harēnh o apa kaxyw mē agrêre. Te pur kãm harôj kamrêk pa nē ãm tã no ãm kaxyw hikēnh xwýnh grêre pyrãk. Jakamã kwa mē ho Tîrtûm wý kê axte mē kaxyw mē hkwyjê rê.

³ —E kot paj ma mē hwýr mē arê. Ma mē hkôt mē ate Tîrtûm kapêr o mē ahkre ho ri apa kaxyw. Jakamã kot kaj mē te ate ôwēhti kot mry xoprê hwýr amnhî to mrar nhûm kot hkwy hpar pyrãk o amnhî nhîpêx. Koja mē hkwyjaja mē ate mē ahkre ma nhûm ja mē kēp omnuj nē nhûm mē hã tanhmã mē anhîpêx to. Tã kêr ka mē tee ri amnhî kukamã ajamaxpēr nē amã mē uma hkêt nē.

⁴ —Nê kêr ka mē hwýr anojarêt nē amnhî kôt amrykã rý akawà rý aparkã hõ ho apa hkêt nē. ãm anhy kamã ma mē hwýr apa. Nê mē hwýr mra nhûm mē nhÿri pry hã mē atõ kaxpa nē amã kapêr o xa ka wa xapēn mã akapêr ry hkêt nē. Anojarêt kãm kãm akapêr krãnre nē mē hakre nē ma krîm apa.

⁵ —Nê kêr ka mē hwýr pøj nē nhÿri mē ôrkwy hwýr agjê nē mē kãm: “Xã kot paj mē ato Tîrtûm wý kê mē ato mex nē ka mē ajamakêtkati nē ri apa?” Anê.

⁶ Hāmri nhûm mē ama nhûm ja mē kãm mex japêr nhûm mē hkînh nē amã: “ÿ kam nē mãmrî mē ixto awý.” Anê. Hāmri ka mē ama nē tanhmã mē ho Tîrtûm wýr to. No koja mē apê ja kaga ka mē ho hwýr kêt nē.

⁷ —Nê kêr ka mē nhÿri mē ôrkwy kamã mē hwýr pøj hāmri nē mē hkôt ri apikamēnh tãmtã nē akupým mē kurûm ajapøj nē ma hpãnhã krî hõ hwýr apa. Nê mē axãmnhix mē kuri axàpkur o ri apa. Mēmoj to akôm o ri apa. Ra mē ate mē ho mex pē mē kãm Tîrtûm kapêr o mē ahkre ho apa kênã. Jakamã kwâr mē mãmrî amnhî pãnhã mē amã mē axàpkur xã gõ ka mē kuri mē apku.

8—Nê kêr ka mê nhÿri mê hwÿr pôj nhÿm mê ato mex nê. Nê mê amã mêmo mê apkur xà gô ka mê mãmri axãmnhix aku. Aa kormã mê ate mêmojta kur kêt tâ mãmri ajamakêtkati nê aku. No tee ri amnhî kukamã tanhmã ajamexpêr to hkêt nê.

9—Nê kêr ka mê ã mê kãm akapêr anê nê mê kãm: “Tirtÿm kãm mê ato hkra hprãm. Na hte amnhî wÿr mê awÿ.” Anê hãmri nê akupÿm mê kãm mê à xwÿnhjê ho mex. ã kot kaj mê mê kãm amnhî nhîpêx anhÿr o ri mê hkôt apa.

10—Nê kêr ka mê nhÿri mê hwÿr pôj nhÿm mê ãm mê apumu nê amnhî nhôrkwÿ hwÿr mê awÿr kêt japêr. Hãmri ka mê tee ri amnhî tâ mê omu hãmri nê ra ma nhãm apa kaxyw. 11 Hãmri nê anojarêt nê mê kãm: “E mê inhma. Tirtÿm kot mê pahwÿr mênh xwÿnhhta na mê awÿr wa inhmê pa wa mê awÿr mô. Wa ixte Tirtÿm kapêr o mê ajahkre kaxyw. Kãm mê ato hkra hprãm nhÿm wa ixte mê amã harênh kaxyw na pa pre wa ã mê awÿr inhmôr anê. Tã ka mê harênh ma nê wa ixkaga. Jakamã kot paj wa jar mê anhô kri kamã amnhî par kà hã awjagrô kapî. Mê ate Tirtÿm kaga hã amnhî pumunh nhÿm Tirtÿm kot amnhî pyrà nê mê akaga hã mê ate omunh kaxyw kot paj wa mê anoo mã ã amnhî par kà hã awjagrô kapîr anê. Kot kaj mê nhÿrmã tee ri ã amnhî nhîpêx anhÿrja mã ajamexpêr nê akapri htÿx kumrêx kãm ga. ãm hãmri na pa wa mê amã ja jarê.” Anhÿr o mê kãm akapêr nê mê kêp ajapôj nê ma hpãnhã nhãm kri hô hwÿr apa kurê kumrêx.

12—Koja nhÿrmã Tirtÿm mê kot amnhî tomnuj mÿrapê tanhmã mê ho. Na pre ra à kri pê Sotô nhô xwÿnhjê nhîpêx anê. Na prem amnhî tomnuj tÿx o pa nhÿm Tirtÿm tanhmã mê kot amnhî tomnuj tÿx ã tanhmã mê ho. Tã jar mê kot kãm ixkapêr mar prãm kêt nê mê kot ixkaga xwÿnhjaja. Koja Tirtÿm ixtã mê omu nê kot Sotô nhô xwÿnhjê nhîpêx pyrãk o mê hipêx nom tanhmã mê ho htÿx o mê hakre.

—E kêr ka mê ma kri hkwy hkôt apa nê ã mê kãm akapêr anhÿr o ri apa. Anê.

*Mê kot Tirtÿm kôt hamaxpêr kêt xwÿnhjê jarênh
Matêwre 11.20-24*

13-14 Tã nhÿm Jejus kri hkwy nhô xwÿnhjê mã kapêr o xa nê mê kot amnhî tomnuj ã mê kãm akir. Kri pê Korajî mê Pesêj nhô xwÿnhjê kumrêx mã kapêr nê mê kãm:

—E mê inhma. Amnepêr kri pê Sitô mê Xir wa kamã mê pa xwÿnhjaja na prem tanhmã amnhî tomnuj tÿx to ho pa nhÿm Tirtÿm mê omu nê hã mê homnuj tÿx nê. Tã kwa mê o kora Korajî mê Pesêj wa kamã mê apa xwÿnhjaja. Ra ixte mê amã mê ate mêmoj pumunh kêt o anhÿr rax o ixpa htã ka mê omu nê arî amnhî tomnuj o ri apa nê tokyx amnhî tomnuj kaga hkêt nê. Jakamã kot kaj mê amex kêt nê. Kop apu Sitô rÿ Xir kamã mãn ixte mê kãm aa mê kot mêmoj pumunh kêt kwÿ ho anhÿr o ri ixpa ronhÿx mê omu nê mê arom amnhî kaxyw ixkôt hamaxpêr kurê kumrêx. Nê tee ri tanhmã amnhî tomnuj to ho pa hã amnhî pumu nê hkapri nê ã amnhî nhîpêx anhÿr kaga hpa. No mê kajaja na pa tee ri mê amã tanhmã amnhî nhîpêx to ho ri ixpa kaprÿ. Ka mê ja hã ixpumu nê ãm ixpumu nê amnhî tomnuj kaga hkêt nê. Tã koja nhÿrmã Tirtÿm mê piitã mê kot amnhî tomnuj mÿrapê tanhmã mê hipêx to. Hãmri nê tanhmã Sitô mê Xir wa kamã mê pa xwÿnhjê jarênh to nhÿm mê kot amnhî tomnuj mÿrapê amnhî xà htÿx kamã hamak o ri pa. No mê kajaja mê ate amnhî tomnuj tÿx o mê hakrenh jakamã koja Tirtÿm mê hkÿnhã mê

atomnuj t̄yx o mē atomnuj t̄yx. Ka mē amnhī xà ht̄yx kamā ajamak rāhā ho ri apa ho apa. Anē.

¹⁵ Nhūm pre ā Jejus mē kām kapēr anē. Hāmri nē hpānhā Kapanaū nhō xw̄ynh̄jē mā kapēr nē mē kām:

—No mē apē Kapanaū nhō xw̄ynh̄jaja. Kot kaj mē ajaxw̄yja mē amex kēt nē. Mē ate amnhī tomnuj kagare pyrà nē Tirtūm nhō krī hw̄yr akra ho apa. Nom kot kaj mē atō hw̄yr axāpir kēt nē. Kot kaj mē ma kuwy maati hw̄yr ajapêx pa kām ga.

¹⁶ Anh̄yr o mē kām kapēr hāmri nē hpānhā hkôt mē pa ho mē pa xw̄ynh̄jē mā kapēr nē mē kām:

—Kot kaj mē Tirtūm kapēr o mē ahkre ho ri apa nhūm mēhō ama nē akapēr kôt amnhī nh̄pêx. Hā koja te pa kot ixkôt amnhī nh̄pêx pyràk o amnhī nh̄pêx. No koja amar kēt nē akaga hāmri nē te pa kot inhmar kēt nē ixkaga pyràk o amnhī nh̄pêx. Jao māānēn Tirtūm kaga.

Anē hāmri nhūm mē kuma hāmri nē anhrā nē axkrut kapēn nē ma ahp̄ynhā krī hkôt anhrā.

Mē hkīnh nē ri mē pa xw̄ynh̄jē jarēnh

Apokarip 3.5

¹⁷ Tā nhūm mē kēp 72jaja krī hkwy rūm akup̄yn Jejus w̄yr pōj. Piitā hkīnh nē hpōx pa. Hāmri nē kām:

—Kwa Pahiiti. Na pa prem anhy hā mē nē mēkarōmnuti japōx rax nē. Na pa prem mē nē mē hano nhūm mē ām mē kurūm hapōx kurē kumrēx. Anē.

¹⁸ Hāmri nhūm mē kuma nē mē kām:

—Tōe. Ixāhpumunh t̄yx o ixte Satanasti jakrenh jakamā na ka htem inh̄y hā mē hano nhūm mē tee ri mē akutā hiht̄yx prām. Hāmri nē te na haxēnh prēprēk pyràk o amnhī nh̄pêx nē mē kurūm hapōx kurē kumrēx pa ja hā mē omu. ¹⁹⁻²⁰ Mēkarōmnuti te kot kagā xoprē r̄y te kot makre pyràk. Tā ra ixte mē amē ixāhpumunh t̄yx xà hkwy nhōr jakamā na ka prem mē kām akapēr nhūm mē tee ri akutā tanhmā amnhī t̄yx to hprām. Tā koja Satanasti tee ri mē ate nh̄r̄mā Tirtūm mē wa ixri at̄ir t̄um nē āpa pymaj tanhmā mē ano kupyr to kapr̄y. Ra Tirtūm kot ō kagā kamā mē at̄ir t̄um nē mē apa kaxyw mē anh̄ixi hā kagā kēnā. Jakamā kwa mē jam ajamaxpēr o akīnh nē ajamakētkati nē ri apa. No kēt mēkarōmnuti kot mē akapēr mar nē mē kurūm hapōxta ā mē omunh xà hkôt pix mā akīnh nē ri apa hkēt nē. Anē.

Jejus kīnh kām kot Hipêxà mā amnhī jarēnh

Matêwre 11.25-27

²¹ Tā nhūm Tirtūm Karō tanhmā Jejus to nhūm ŷ hā hkīnh nē xa. Hāmri nē Tirtūm mā kapēr nē kām:

—Pa Papaj? Nā apē mē ixpiitā mē inhō Pahi Maati na ka. Pikap ri mē pa xw̄ynh̄jaja nē kaxkwa kamā mē pa xw̄ynh̄jaja apē mē ixpiitā mē inhō Pahi Maati na ka. Ām hāmri na ka hte amnhī nh̄pêx mex o ri apa. Na ka hte mē āhpumunh t̄yx ā mē kot amnhī jarēnh xw̄ynh̄jē mā axāhpumunh t̄yx o amnhīrīt kēt nē. Ām mē āhpumunh kēt ā mē kot amnhī jarēnh xw̄ynh̄jē pix mā na ka hte ja ho amnhīrīt nhūm mē tapxipixjaja ja hā apumu. Ām hāmri na ka hte amā hprām xà hkôt ā mē piitā mē hipêx anh̄yr o ri apa. Jakamā mē kot amnhī to hkryre xw̄ynh̄ pixjaja na htem ate amnhī nh̄pêx ā apumunh o pa.

²² —Na ka pre inh̄lhkra kamā mēmoj piitā haxār pa. Ixte ho amnhīptār o ri ixpa kaxyw. Jakamā kapxipix na ka hte ixpē akra hā ixpumunh par. No

jar ri mē pa xw̄ȳnhjaja na mē kot ja hā ixpumunh kēt. Nē mǎānēn papxpix na ixte ate tanhmā amnhī nhīpēx to hā apumunh par. Jakamā na pa hte ā amnhī nhīpēx anē nē inhmā hprām xā hkôt mē hkwȳjē mā ato amnhīrit o ri ixa nhūm mē ixpyrà nē ate tanhmā amnhī nhīpēx to ho apa hkôt apumu. Anē.

Jejus kôt mē pa xw̄ȳnhjaja kot hkôt omunh o pa hā mē harēnh

Matēwre 13.16-17

²³⁻²⁴ Nhūm pre Jejus ā Tirtūm mā amnhī jarēnh anē hāmri nē hpānhā hkôt mē pa ho mē pa xw̄ȳnhjē mā kapēr nē mē kām:

—E na ka htem ixkôt mē ano ho ixte tanhmā amnhī nhīpēx to hā ixpumunh o ri apa. Nē mē ajamak o ixkapēr mar o ri ixkôt apa. No amnepēm mē akukamā pahijaja nē Tirtūm nh̄ȳ hā kapēr jarēnh o ri mē pa xw̄ȳnhjaja kām ixpumunh prām t̄yx o pa htā mē akīnhā ixpumunh kēt rāhā htyk pa. Kormā ixwrȳk nē jar ixkator kēt jakamā na prem ixpumunh kēt rāhā ty. Nē mē kām ixkapēr mar prām tā mē akīnhā ixkapēr mar kēt nē. Ām mē kapxpixjaja na ka mē m̄yr pē ixte amnhī nhīpēx ā ixpumunh nē ixkapēr mar o ixkôt apa. Tā mē kurom mē ate ano ho ixpumunh nē ajamak o ixkapēr mar jakamā kwa mē ja hā amnhī pumu nē tām amnhī nhīpēx o akīnh nē ri apa. Anē.

Samar nhō xw̄ȳnh jarēnh

Matēwre 22.34-40; Makre 12.28-34; mǎānēn Wam Juāw 3.17-18

²⁵ Tā nhūm Tirtūm kapēr tūm o mē ahkre o mē pa xw̄ȳnhja Jejus w̄yr tē nē hēx rom kot kamā hamak kaxyw kām:

—Pa? E kwa inhmā mēmoj jarē. Tanhmā kot paj we nh̄yrmā Tirtūm ri ixit̄r tūm nē ixa kaxyw amnhī nhīpēx to wehe? Anē.

²⁶ Hāmri nhūm kām:

—Tanhmā na ka hte Tirtūm kapēr ā kagā htūm kot mē ht̄r tūm nē pa hā kagā kamā harēnh nē mar to? Anē.

²⁷ Hāmri nhūm kām:

—Nā harēnh kot:

Kēr ka mē anhī piitā ho amā Tirtūm kīnh o ri apa. Mē amā hkīnh t̄yx o mēmoj piitā hakrenh par o ri apa.

Nē kēr ka mē amā mē piitā hā ma ho te ka amā amnhī tā ma pyràk o mē hipēx o ri apa. Jao tām mē hipēx o ri apa. Anē.

Ā Tirtūm kapēr ā kagā htūm kamā ja jarēnh kot anh̄r. Anē.

²⁸ Hāmri nhūm Jejus kuma nē kām:

—T̄y. Nā ām hāmri na ka harē. Kot kaj ā mē hipēx anh̄r o ri apa nē nh̄yrmā Tirtūm mē wa ixri at̄r tūm nē apa ho apa. Anē.

²⁹ Hāmri nhūm kuma nom kām mē piitā mē ho mex prām kēt nē. Ām amnhī kw̄y p̄xjaja nhūm kām mē ho mex o pa hprām. Jakamā hēx rom kām:

—Kwa no mēmojaja kot pa we ri ā mē hipēx anh̄r o ri ixa? Xā mē pahkw̄y pē Ijaew p̄xjaja nā? Anē.

³⁰ Hāmri nhūm kuma nē tanhmā kām ujarēnh to. Nom hā kuxi nē kām awjarē nē kām:

—E pa amā awjarē ka inhma. Koja Ijaew nhō xw̄ȳnhja ma Jerujarē rūm Jeriko hw̄yr ahp̄ar mā ma mō. Mōō nhūm ra mē ahkīnh xw̄ȳnhjaja kutā mra. Hāmri nē pry kahti ri hw̄yr kato nē unē nē htak rax nē. Nē kēp ē hkwr̄ȳnh pa nē ma kurūm hprōt nē mra nē akunok nhūm mē kot htak o hkā rēnh rāhā ra htyk kaxyw nē nō. ³¹ Hāmri nhūm patreja tē nē omu. No ām omunh o hānh tē nē hkupu nē ma tē. Urāk nē kēp Ijaew tā ām omu nē tanhmā ho ajuta hto

hkêt nê hãnh omunh o tẽ nê hkupu nê ma tẽ. ³² Hãmri nhũm patre ho ajuta xwýnhja mãânên tẽ. Nê patre pyrà nê omu nê ãm omu nê hkupu nê ma tẽ. Uràk nê kęp Ijaew tã omu nê ãm omu nê hkupu nê ma tẽ.

³³ —Tã nhũm Samar nhõ xwýnhja mãânên mõ. Samar nhõ xwýnhjê mẽ Ijaew na prem kãm axpẽn kĩnh kêt tã nhũm mõ nê omu nê kamã ukapřĩ nê. Kęp Ijaew ã omunh tã tee ri omu nê kamã ukapřĩ nê. ³⁴ Hãmri nê hwýr tẽ nê omu nê kãm mẽ kot htak o hkã rênh xà kane nê kãm hkupu pa. Hãmri nê kãnhmã ãm nê hkrit jumẽnre hã kumẽ nê ma nhýri mẽ kot amnhĩm hikranh xà hã ixkre hwýr o mõ nê hwýr o pøj. Hãmri nê omunh mex o apkati. ³⁵ Hãmri nê akupým nojarêt nê kãxpore hkwy jamý nê o tẽ nê kot mẽ kãm õ xwýnhja mã kugõ nê kãm: “E kot paj hãmri ma mõ. Ota ixkãxporeta. Kêr ka inhmã à xwýnhta tãnopxar mex nê. Nê inhmã omunh mex kê akupým mex. Koja kãxporeja apê grire hã kot paj nhýrmã akupýn mõ nê axte hkõt amã hkwy gõ.” Anhýr o kãm kapêr nê ma akupým mõ. ã mẽ ujarênh kot anhýr. Anê.

³⁶ Nhũm pre ã Jejus kãm ujarênh anê. Hãmri nê kãm:

—E nhý na pre kãm mẽ kot htak xwýnhta kapřĩ ho te tãm kãm amnhĩ tã ma pyràk wehe? Anê.

Hãmri nhũm Tirtũm kapêr tũm o mẽ ahkre xwýnhta kãm:

—Nã kot kamã ukapřĩ xwýnhta na pre omu nê kamã ukapřĩ nê ho mex o te tãm kãm amnhĩ tã ma pyràk o hipêx. Anê.

³⁷ Hãmri nhũm Jejus kãm:

—Tý. Nã ãm hãmri na ka harê. Uràk nê kęp Ijaew kêt tã kamã ukapřĩ nê ho mex nê. Tã kêr ka uràk nê ã mẽ piitã mẽ hipêx anhýr o ri apa. Uràk nê mẽ kęp akwy hkêt tã mẽ kamã axukapřĩ ho ri apa. Anê.

Jejus kot Matre mẽ Marir wa hwýr mõi ã harênh

Rukre 12.29-31

³⁸ Tã nhũm Jejus krĩ rũm kato hãmri nê hkõt mẽ pa ho mẽ pa xwýnhjê mẽ mẽ ma nhãm krĩ hõ hwýr mõi. Mõi nê hwýr pøj. Hãmri nhũm Matre mẽ omu nê amnhĩ nhõrkwý hwýr mẽ kuwý nhũm mẽ ma hwýr mõi nê õrkwý hwýr pøj. ³⁹ Hãmri nhũm Jejus mẽ ahkre ho nhý nhũm Matre htõx Marirja arĩ hpar pẽ mar o nhý. ⁴⁰ Hãmri nhũm Matre mẽ hwýr axà nê omu. Nê tee ri àpênh rax kukamã hamaxpêr nê Jejus wýr tẽ nê kãm:

—Xê ma Pahihti. Kormã ixàpênh rax tã nhũm Marir ixto ajuta hkêt nê. ãm akapêr pix mar gryk ã ixkõt htêm nê ixto ajuta hkêt nê. Pa ahte mẽ panhõ hã ixàpênh o xa. Xà amã ja mex? Xê kãm anê kê tokyx ixkõt tẽ pa wa hã axkrut nê mẽ panhõ hã ixàpênh tokyx anê. Anê.

⁴¹ Hãmri nhũm tee ri kuma nê kãm:

—Kwa Matre. Na ka ãm mẽ panhõ pix kukamã ri ajamaxpêr nê gryk ã tee ri amnhĩ nhĩpêx. ⁴² ãm hãmri na Marir kãm ixkapêr mar prãm nê. Jakamã kot paj ri amnhĩ nê akõt hanor kêt nê. Anê.

11

Mẽ pahte tanhmã Tirtũm mã amnhĩ jarênh to hã mẽ pamã karõ

Matêwre 6.9-13, 7.7-11

¹ Tã nhũm apkati hõ hã nhũm Jejus nhýri Tirtũm mã amnhĩ jarênh o nhý. Nê kãm amnhĩ jarênh pa nhũm hkõt mẽ pa ho mẽ pa xwýnhjaja kot kãm amnhĩ jarênh ã omu nê hwýr mra nê kãm:

—Kwa Pahihti. Amnhĩ pyrà nê mẽ ixte Tirtũm mã amnhĩ jarênh kaxyw tanhmã mẽ ijahkre hto. Kêr pa mẽ apyrã nê tanhmã kãm amnhĩ jarênh to ho ri ixpa. Na pre finat Juãw Paxisja hkôt mẽ pa ho mẽ pa xwýnhjê mã ja jahkre nhũm mẽ kuma nê tãm kãm amnhĩ jarê. E kwa mẽ inhmã tanhmã ja jahkre hto nã? Anê.

² Hãmri nhũm mẽ kãm:

—Tôe. Nã kêr ka mẽ kãm amnhĩ jarênh kaxyw nê mãmrĩ amnhĩ krã hkôt tanhmã kãm amnhĩ jarênh to. Rý kãm amnhĩ jarênh o:

Pa Mëinhĩpêxã maati? Nã amex o amex Tirtũm.

Apê mẽ ijamãr mex xwýnh maati na ka.

³ Nê kwa kêr ka apkati mẽ mẽ inhmã mẽmo gõ pa mẽ akukwak ri ho ixãpkur o ri ixpa.

⁴ Nê na pa hte tõiã amnhĩ tomnuj nê Tirtũm. Nom mẽ kot tanhmã ixtomnuj to xwýnhjaja na pa hte ãm mẽ omu nê amnhĩ tã tanhmã mẽ ho hkêt nê. Nê ja ho ijamakêtkati kurê kumrêx. Æ na pa hte amnhĩ nhĩpêx anhÿr o ri ixpa.

Jakamã kwa kêr ka ja hã ixpumu nê ixpyrà nê ixte tanhmã amnhĩ tomnuj to hã ixpumu nê hã tanhmã ixto hkêt nê. Æm ho ajamakêtkati kurê kumrêx nê axte kãm ajamaxpêr kêt nê.

Nê kot paj tanhmã amnhĩ tomnuj to kaxyw japêr ka ja hã ixpumu nê ixte ã amnhĩ nhĩpêx anhÿrja nê ixto htýx nê pa ja ho anhÿr kêt nê.

E ãm ja pix na hapêx. Anê.

E kêr ka mẽ ã Tirtũm mã amnhĩ jarênh anhÿr o ri apa. Anê.

Mê pahte amnhĩ to Tirtũm wýr rãhã hã mẽ pamã karõ

Matêwre 7.7, 15.21-28; Makre 11.24; Rukre 18.1-8; Juãw 14.13-14; mããnên Rõmãn 12.12; Epes 6.18; Wam Tesarõn 5.17-18

⁵⁻⁶ Nhũm Jejus arĩ hkôt mẽ pa ho pa xwýnhjê jahkre ho nhÿ nê mẽ kãm:

—Nê ja. Kojã mẽ akrãmnhwýjê hõ. Nhũm kõt ã kamãt nhũm nhÿhÿnh awýr mõn põi. Ka anhõ mẽjoj kêt hãmri nê anhÿjuk ri akrãmnhwý hwýr tẽ. Hãmri nhũm ra amnhĩ tã kahê nê nõ. Ka tee ri omu hãmri nê hakwa krem xa nê kãm akapêr nê kãm: “Pa ixkrãmnhwý. Na ka mẽ ra gõr? Kwa kãnhmã nhÿ nê inhmã anhõ mẽmoj japêr. Na ra ham ixkrãmnhwýta mõn põi. Nê kãm prãm týx nê mõ nom kaxyw inhõ hkêt. Kwa kãnhmã nhÿ nê inhmã anhõ mẽmoj japêr nê inhmã hkwy pa ma o tẽ kê kukrê. Æm inhõ hkêt kumrêx. Æm hãmri na pa amã amnhĩ jarê. Kwa tokyj kãnhmã nhÿ nê inhmã mẽmoj japêr nã?” Anhÿr o kãm akapêr. ⁷ Hãmri nhũm ama nom kãm kãnhmã ýr prãm kêt nê. Nê amã: “Tk. Nã ra mẽ ixte amnhĩ tã kahê hpar nê inhÿkwý kênã kot pa kêt kãnhmã nhÿ nê amã mẽmoj japêr.” Anê. ⁸ Ka tee ri ama nê xatã kãm: “Kwa ã inhĩpêx anhÿr kêt nê ixkrãmnhwý. Kwa tokyx.” Anhÿr o xa. Nê xatã kãm anojarêt o xa. Hãmri nhũm ra kãm amar kaga hãmri nê tã kãnhmã nhÿ nê amã ate ho presija xwýnhta gõ. No ãm kêp akrãmnhwý hã ate hã axãhwýr tipxi hã amã õr kêt nê. Æm xatã ate ho presija htýx xwýnhja mã hamaxpêr nê tã kãnhmã nhÿ nê amã kugõ. Æ mẽ ujarênh kot anhÿr.

⁹⁻¹⁰ —Tã kêr ka mẽ ja pyrà nê amnhĩ to Tirtũm wýr rãhã ho ri apa nhũm ama nê ate mẽmoj tã hwýrta amã kugõ. Æm xatã ate hã axãhwýr o ri apa nhũm amã kugõ. Æm mẽmoj to hwýr rãhã ho ri apa nhũm ama hãmri nê amã mẽmoj tanhmã hipêx to. Te ho mẽhõ kãm tep xãnh nê gõx kãm xatã tep rênh xã rênh o ãm pyrà nê xatã mẽmoj tã hwýr o ri apa. Hãmri nhũm ama nê amã hprãm

xwÿnhnta gō. Te ho tep kanhêr xwÿnhnta tã kot tep ò kanhêr pyràk o anhîpêx nê amã mêmōj prãm xwÿnhnta gō. Anê.

Tirtûm kot hkrajê mã mêmōj mex nhôr ã harênh

Makre 7.9-11

¹¹ Nhũm Jejus arî hkôt mē pa ho mē pa xwÿnhjê jahkre nē mē kãm:

—Nê xà koja akra kãm tep xành nê hã awÿ ka ama nê axtem nê kãm kagã xoprê hō py nê agō? ¹² Rÿ nhũm krãhyre gre hã awÿ ka axtem nê kãm makre hō py nê agō? Nà na ka htem ã akrajê nhîpêx anhÿr kêt nê. Na ka htem mē kot mêmōj tã àhwÿr xà hkôt kãm mêmōj gō. ¹³ Mē kamjaja mē ate amnhî tomnuj o ri apa htã ka htem akrajê ho mex o ri apa. Tã kaxkwa kamã Tirtûmja na hte mē pahto mex o mē ate mē akrajê ho mexta jakrenh. Kãm mē pajapê htÿx kôt na hte mē pamã mêmōj mex nhôr o pa. Nê mãânên amnhî Karôja na hte mē pamã kugō. Jakamã kot kaj mē atō Karô hã awÿ nhũm ama nê awÿr kumê nhũm wrÿ nê akarō mã axà. ã na hte Tirtûm kãm mē pajapê xaj mē pamã mêmōj mex nhôr o pa anê. Anê.

Jejus mē Satanasti wa harênh

Matêwre 12.22-32; Makre 3.20-30

¹⁴ Tã nhũm Jejus nhÿri axte mēhō nê mēkarōmnuti kator. Na pre ra mēkarōmnuti tanhmã ho nhũm kapêr kêt nê pa. Hãmri nhũm Jejus omu nê nê kator nhũm akupÿm kapêr mex nê. Nhũm mē piitã amnhî jaêr pê omu nê no hawênh rûnh nê omunh o kuhê. ¹⁵ Nom nhũm mē hkwyjaja Jejus kot ã hipêx anhÿr ã omu nê htÿx ho kêp mēkarōmnuti hkwy hã hkamnhîx nê axpên mã harênh o:

—Tk pêr hinhu nhîkôoti nhÿ hã na hte mē nê amnhî kwÿjê japôx o pa. Anê.

Hinhu nhîkôoti nhÿi hō pê Satanasti nhũm prem Satanasti nhÿ hã Jejus kot ã amnhî nhîpêx anhÿr o pa hã hkamnhîx. ¹⁶ Jakamã nhũm mē hkwyjaja hwÿr mra nê kãm:

—Kwa mē inhmã aa mē ixte mêmōj pumunh kêt ò ho anê. Pa mē omu nê ate Tirtûm nhÿ hã tanhmã amnhî nhîpêx to ho apa hã apumunh kurê kumrêx. Anê.

Nom hêx rom mē kot kamã hamak kaxyw ã kãm kapêr anê. ¹⁷ Nhũm ra Jejus mē hamaxpêr kôt mē omunh mex jakamã mē kapêr ma nê mē kãm:

—Kwa mē inhma mē ate ixpê Satanasti hkwy hã ixkamnhîx xwÿnhjaja. Kojã pika nhô xwÿnhjaja axpên kutã amnhî xunhwÿ nê axpu hãmri nê angrã nê ma ahpÿnhã ri pa. Hãmri nê amnhî krã hkôt ri tanhmã amnhî to ho ri pa. Jakamã nhũm mē ò pahi mē hamãr o pa hkêt nê. Rÿ koja krî nhô xwÿnhjaja. Mē kot axpên to hkwy xwÿnhjaja mêmōj tã axpên kãm gryk nê axpên kutã amnhî xunhwÿ hãmri nê axpên pê angrã nê ahpÿnhã pa hãmri nhũm mē ò pahi tee ri kãm mē hamãr o pa hprãm. Mo ò krî kamã mē hkwy kot ri mē hamãr o pa? No na pre mē ò pahi tãm amnhî nê mē hanor kêt nê.

¹⁸ —Tã ja pyrã nê ixte Satanasti nhÿ hã tanhmã amnhî nhîpêx to ho ixpa ronhÿx pa mē nê amnhî kwÿjê janor o ri ixpa hkêt nê. Nhÿx Satanasti ixte mē nê mē hanor kaxyw tanhmã inhmã nê hkêt nê.

¹⁹ —No kêt mē akwyjaja? Xà Satanasti nhÿ hã na htem mē nê mē hapôx o pa nã? Kêp apu pa ixte ÿ hã mē nê mē hapôx ronhÿx mē akwyjaja ixpyrã nê ÿ hã mē nê mē hapôx o pa. Nà Tirtûm nhÿ hã mē ixte mē nê mē hapôx o mē ixpa kênã. Jakamã ã mē ate ijarênh anhÿr o apaja mex kêt. ²⁰ Tirtûm Karô nhÿ hã ixte mē nê mē hapôx o ri ixpa kênã. Jakamã kwa mē ja hã ixpumu

nē Tirtūm kot ixte mē ato amnhīptār kaxyw mē awȳr inhmēnh kōt ixpumunh kurē kumrēx kēt wehe. Pa na ka htem ixkamā ajamak o apa.

²¹⁻²² —Satanastija āhpumunh t̄yx jakamā na htem tee ri kēp mē kot hkōt amnhī xunhw̄ȳr xw̄ȳnhjē pytār kaxyw nhūm mē nē mē omunh mex nē. Nom ixāhpumunh t̄yx o ixte Satanasti jakrenh jakamā pa na pa hte kēp mē utā nhūm mē hpānhā ixkōt ri amnhī nhīpēx.

²³ —Mē amā ixkapēr mar prām tā na ka mē kormā ixkōt amnhī xunhw̄ȳr kēt nē. Kwa wem ma amnhī to amōr gri nē tokyx ixkōt amnhī xunhw̄ȳr kēt wehe. Kot kaj mē anh̄ȳr kēt nē hāmri nē te mē ate ixkutā amnhī xunhw̄ȳr xw̄ȳnh pyrāk o amnhī nhīpēx. ²⁴ Mē ate ixkōt amnhī xunhw̄ȳr kēt xw̄ȳnhjaja te mē ate mēhō nē mēkarōmnuti japōx xw̄ȳnh pyrāk. Nhūm te kēp kator nē ma mō nē nh̄yri amgrā kamā ri pa. Nhūm ja kēp omnuj nhūm tee ri kamā nh̄yri hkōkōt xā japēr o pa. Nom tee ri hapēr o pa nē hamaxpēr o: “E kot paj ma akup̄ym mē kot nē ixkator xw̄ȳnhhta w̄ȳr tē nē hw̄ȳr axā nē hkōt mān ixa.” Anē. ²⁵ Hāmri nē ma akup̄ym hw̄ȳr tē. Nom kormā akup̄ym hw̄ȳr ār kēt ri nhūm kamā amrakati nē pa. ²⁶ Jakamā nhūm ma akup̄ym hw̄ȳr tēn axā. Nom ahte ār kēt nē. Ra amnhī kōt amnhī kw̄ȳjē ho 7 nē hw̄ȳr mē ho agjē. Nē hw̄ȳr gjēx pa. Mē kēp 7jaja nē wamta mē nhūm mē piitā hw̄ȳr gjēx pa. No mē kēp 7jaja omnuj t̄yx o kot wamta jakrenh jakamā nhūm mē kot hw̄ȳr gjēx xw̄ȳnhhta mē ȳ hā amnhī tomnuj t̄yx o pa. Oprē ht̄yx nē. Wam pyxire nē kot hw̄ȳr ār nh̄y hā amnhī tomnuj o ri pa nom ām kawax pē oprē. Tā axte hw̄ȳr mē ohtō nē gjēxta nh̄y hā oprē ht̄yx kumrēx. Ja pyrā nē kot kaj mē tokyx ixkōt amnhī xunhw̄ȳr kēt nē hāmri nē ām amnhī tomnuj t̄yx pix o ri apa. Anē.

Mē hk̄inh nē mē pa xw̄ȳnhjē jarēnh

Rukre 8.19-21

²⁷ Nhūm pre ā Jejus mē ahkre anē nhūm mēhō nija kuma nē kām:
—Hēxta gāà nē. Mān akatorxā ā ate amnhī nhīpēx anh̄ȳr o apa hā apumu nē hk̄inh nē. Anē.

²⁸ Hāmri nhūm kām:

—T̄y. Nā kot anh̄ȳr kēnā. Nom kot ka mē atō Tirtūm kapēr ma nē hkōt amnhī nhīpēx hāmri nē ak̄inh rax o ixkatorxā kot ixpumunh nē hk̄inhhta jakre. Anē.

Jejus kot tanhmā Jōhti jarēnh to

Matēwre 12.38-42; Makre 8.12

²⁹ Tā nhūm mē ohtō nē Jejus ā akuprō nē mēmoj tā kuw̄ȳ nē kām:

—Pa. Kwa mē inhmā aa mē ixte mēmoj pumunh kēt ō ho anē pa mē omu. Anē.

Hāmri nhūm mē kuma nē mē kām:

—Tk. Kwa mē ajamaxpēr punuj pix o na ka htem ri ajamaxpēr o apa. Ixpē Tirtūm kot mē awȳr inhmēnh xw̄ȳnh tā ka mē ja hā ixkōt ajamaxpēr kēt nē. Tā mē ate aa mēmoj pumunh kēt kw̄ȳ ixte mē amā ho anh̄ȳr kaxyw hā inhmā karō. Nā kot paj kormā mē amā ho anh̄ȳr kēt nē. Kot paj nh̄yrmā te amnepēm finat Jōhti kot amnhī nhīpēx pyrāk o amnhī nhīpēx ka mē hā ijarēnh ma nē kormā ja hā ixpumu. ³⁰ Tirtūm nh̄y hā kapēr xw̄ȳnh pē Jōhtija amnepēm na pre tep rax kukrē. Tā nom nhūm ht̄ir rāhā ōxāhkre rūm kato nhūm mē omu nē Tirtūm kot mē hw̄ȳr mēnh ā omu. Tā kot paj nh̄yrmā Jōhti pyrā nē tanhmā amnhī nhīpēx to nhūm mē ja hā ixpumu nē Tirtūm kot mē awȳr inhmēnh xw̄ȳnh ā ixpumunh kurē kumrēx.

31 —Nē koja nhỹrmã Tĩrtũm akupỹm mē htyk nē mē hikwỹ xwỹnh piitã akupỹm mē ho htĩr hãmri nhũm mē piitã Inhĩpēēxã mē wa ixkutã hkrĩ. Pa wa mē piitã tanhmã mē harēnh to. Tĩrtũm mē wa ixkuri mē htĩr tũm nē mē pa ho mē pa mã xwỹnh ã mē hkwỹjē jarē. Nē wa ixkuri mē pa ho mē pa hkēt xwỹnhjē jarē. Mē piitã ã mē harēnh anē. Amarĩ mē pa xwỹnhjaja nē mē õ pahijaja. Hãmri nhũm sur kãm mē õ pahi niti Tĩrtũm mã tanhmã amnhĩ jarēnh to hãmri nē hpãnhã tanhmã mē ajarēnh to nē kãm mē ajarēnh o: “Na pa pre inhmã pahi Sarumãw kot anhỹ hã ãhpumunh tỹx ã harēnh ma hãmri nē inhmã mar prãm xàj ma awry hã õ pika hwỹr ixpa nē omu nē kapēr ma. Hãmri nē ma akupỹm inhõ pika hwỹr ixpa nē ixkwỹjē mã ãhpumunh tỹx ã harēnh o ixpa. Tã Akra Jejus na ãhpumunh tỹx o pahi Sarumãw jakrenh tã or war akutã mē hkrĩ xwỹnh kwỹ mũj na prem kapēr ma no ãm ixkĩnhã kãm mar prãm kēt nē. Na prem kuma nē ãm kuma.” Anhỹr o wa inhmã mē ajarē. Hãmri nē ja hã mē amã akir ka mē tee ri mar o akrĩ nē amnhĩ kamã agryk o akrĩ.

32 —Hãmri nhũm hpãnhã Nĩniwe nhõ xwỹnhjaja wa inhmã tanhmã amnhĩ jarēnh to. Jõhti kot mē hwỹr mōr nē mē kãm Tĩrtũm kapēr jarēnh o pa xwỹnhjaja nhũm mē tanhmã wa inhmã amnhĩ jarēnh to. Hãmri nē pahi nita pyrã nē wa inhmã tanhmã mē ajarēnh to nē wa inhmã: “Na pre Jõhti man mē inhõ krĩ hwỹr mō nē mē inhmã akapēr jarēnh o ri mē ixkõt pa. Pa prem kuma nē mē ixte amnhĩ tomnuj kaga nē akõt amnhĩ xunhwỹr kurē kumrēx Tĩrtũm. Nom or war akutã mē hkrĩ xwỹnh kwỹ mũj na pre Akra Jejus tãm mē hwỹr mō nē mē kãm kapēr o ri mē hkõt pa nhũm prem kuma no ãm mē ixkĩnhã amnhĩ tomnuj kaga nē hkõt amnhĩ xunhwỹr kēt nē. Mē kot Akra mar tã amnhĩ kaxyw kãm hamaxpēr kēt nē.” Anhỹr o koja mē wa inhmã mē ajarē ka mē tee ri mē ama nē amnhĩ kamã agryk tỹx nē. Jakamã e kwa ixte mē amã ã ixkapēr anhỹrja ma nē kãm ajamaxpēr tỹx rãhã ho ri apa. Anē.

Mē pajamaxpēr mex te kot kanē hpõk mex pyrãk ã harēnh

Matēwre 5.15, 6.22-23

33 Nhũm Jejus arĩ mē ahkre ho nhỹ nē mē kãm:

—Xã na htem kanē hpõk nē poti ho hpro? Nã na htem ho anhỹr kēt nē. Na htem hpõk nē kỹx pē mēmoj nhĩmõk ã unhwỹ nhũm mē piitã mē kãm hirã mex nhũm htem ixkrem agjē nē hirã kamã mēmoj pumunh mex o mra. 34 Ja pyrã nē kot ka mē atõ ixkapēr ma nē ixkõt amnhĩ nhĩpēx nē tãm amnhĩ nhĩpēx o ri apa. Nē tãm mē hĩpēx o ri apa. Jao te hirã kamã mē rĩt mex xwỹnhjaja kot amnhĩ nhĩpēx pyrãk. Nom koja mēhõ inhma nē ãm inhma nē ixkwỹm ri tanhmã amnhĩ nhĩpēx to ho pa. Jao te kamãt kõ kamã mē rĩt mex kēt xwỹnhjaja kot htỹx amnhĩ nhĩpēx o pa pyrãk o amnhĩ nhĩpēx.

35 —E kēr ka mē ã amnhĩ nhĩpēx anhỹr pymaj ixkapēr ma nē kãm ajamaxpēr tỹx rãhã ho ri apa. 36 Kot kaj mē ixkapēr ma nē ixkõt amnhĩ nhĩpēx. Hãmri nē te mē ate kanē hpõk mex nhĩrã kamã ri apa pyrãk o amnhĩ nhĩpēx. Jao aprĩ hã ixkapēr ma nē aprĩ hã ixte tanhmã amnhĩ nhĩpēx to hã ãxpumunh mex nē. Anē.

Jejus kot tanhmã Parijew nhõ xwỹnhjē jarēnh to

Matēwre 23.25-26

37 Tã nhũm Jejus ra mē ahkre pa. Hãmri nhũm Parijew nhõ xwỹnhja hwỹr tē nē kãm:

—Pa. E kwa ma ixkõt tē nē mē ixkutã apku. Anē.

Hãmri nhũm kuma nē kãm:

—Tôe. Nà kot paj ma akôt tē. Anē

Hāmri nē ma hkôt tē nē ōrkw̄y hw̄ȳr axà nē apkur kaxyw mē ĩhkô hā nh̄ȳ.
³⁸ No ām mē hkukamā mē hpām̄jē pyrā nē amnh̄i nh̄ihkra kuhōnh ryy hkêt nē.
 Ām amnh̄i nh̄ihkra htyk pix kuhōnh tokyx anē nē nh̄ȳ. Nē ō prat kuhōnh ryy
 hkêt rāhā apkur kaxyw nh̄ȳ. Jakamā nh̄um kot amnh̄i kôt hw̄ȳr xw̄ynhta tee
 ri ja hā omu nē hamaxpēr o:

—Tk. Kwa na hte mē ixte amnh̄i nh̄ip̄ex kôt amnh̄i nh̄ip̄ex mex kêt nē.

³⁹ Anē nh̄um Jejus amnh̄i tā hamaxpēr ā omu nē kām:

—Nà mē apē Parijew nh̄o xw̄ynhjaja te mē ate mē kot apkur kaxyw prat
 kre kuhōnh punuj tā mex ā harēnh pyrāk o amnh̄i nh̄ip̄ex. Nē ām mē akrā
 hkà r̄um pix mā na mē amex. Nē mē noo mā te mē amex pyrāk no ām mē
 anhōxāhkre kaxw̄ynh kām mē ajamaxpēr mex kêt. Ām mē akapēr prām. Nē
 mē axāhkurēē. Nē mē anhōx̄ȳy. ⁴⁰ Mē ate at̄yx ri amnh̄i nh̄ip̄ex o ri mē apa
 xw̄ynh kēnā. Kwa kēr ka mē ām akrāhkà pix r̄um amex nē ri apa hkêt nē. Mē
 m̄āānēn anhōxāhkre kaxw̄ynh kām ajamaxpēr mex o ri apa. Nē tām mē piitā
 mē hip̄ex o ri apa. ⁴¹ Kēr ka mē tām ajamaxpēr o tām mē hip̄ex o ri apa. Nē
 axāmn̄h̄ix ri mē kēp amrakati xw̄ynhjē mā mēmoj nh̄or o ri apa. Kot kaj mē ā
 amnh̄i nh̄ip̄ex anē hāmri nh̄um Tirt̄um ja hā mē apumu nē amnh̄im mē amex
 ā mē ajarē. No na ka htem mē amā mē amnh̄i to mex prām xāj tee ri amnh̄i
 kuhōnh japjē kapr̄y. Anē.

Jejus kot Parijew nh̄o xw̄ynhjaja mex kêt kukamā mē harēnh

Mat̄ewre 23.4, 23.7, 23.13-24, 23.27-38; Makre 12.38-39

⁴² Nh̄um Jejus ar̄i Parijew nh̄o xw̄ynhjē jahkre nē mē kām:

—Kwa mē okora Parijew nh̄o xw̄ynhjaja. Kot kaj mē amex kêt nē. Na ka
 htem Tirt̄um kapēr piitā hkôt amnh̄i nh̄ip̄ex o apa hkêt nē ām hkwȳ kôt pix mā
 amnh̄i nh̄ip̄ex o ri apa. Nē ām kapēr o hp̄ȳnhre nē hkôt amnh̄i nh̄ip̄ex hāmri
 nē hā amnh̄i pumu nē ate amnh̄i to mex xw̄ynh ā amnh̄i to jarkrar o ri apa.
 Nom Tirt̄um kām hprām xà piitā hkôt amnh̄i nh̄ip̄ex hkêt nē. Mē ate tām mē
 piitā mē hip̄ex o ri apa hā kot mē amā karōja. Nē mē amā Tirt̄um k̄inh ā kapēr
 kôt amnh̄i nh̄ip̄ex o ri apa hā karōja mē ate mar mex tā hkôt amnh̄i nh̄ip̄ex kêt
 nē. Mē ate kapēr piitā hkôt amnh̄i nh̄ip̄ex ronh̄yx ja mē amā mex kumr̄ex.

⁴³ —Kwa mē o kora. Mē piitā mē kot amnh̄im mē ate amnh̄i to rūnh xw̄ynh
 ā amnh̄im mē ajarēnhja na mē amā hprām. Nē mē piitā mē kot amnh̄im mē
 apē mē ahkre mex xw̄ynh maati hā mē ajarēnhja na mē amā hprām.

⁴⁴ —Kwa mē o kora. Kot ka mē amex kêt nē. Mē kot mē akapēr mar nē mē
 akôt amnh̄i nh̄ip̄ex xw̄ynhjaja te mē kot ht̄yx ri mē hā pika nh̄imōk ā ri mē pa
 xw̄ynh kot amnh̄i nh̄ip̄ex pyrāk. Jao mē ate amnh̄i to mex ā amnh̄i kamnh̄ix
 nom mē ate amnh̄i to mex kêt. Te mē kot pika mex ā hkamnh̄ix nē ht̄yx ri mē
 hā pika nh̄imōk ā ri mē pata pyrāk o na htem amnh̄i nh̄ip̄ex. Anē.

Nh̄um pre ā Jejus Parijew nh̄o xw̄ynhjē mā mē kot amnh̄i nh̄ip̄ex jarēnh anē.

Jejus kot Tirt̄um kapēr t̄um o mē ahkre xw̄ynhjē mā kapēr

Mat̄ewre 23.1-4, 23.13, 23.29-36

⁴⁵ Hāmri nh̄um Tirt̄um kapēr t̄um o mē ahkre ho pa xw̄ynhja kuma nē
 k̄anhmā xa nē kām:

—Kwa na ka ā Parijew nh̄o xw̄ynhjē jarēnh punuj anh̄ȳr jao m̄āānēn ā mē
 paja jarēnh anē nà? Mē ixte amnh̄i nh̄ip̄exja ām tipxi kēnā. Anē.

⁴⁶ Hāmri nh̄um kām:

—Tỳ. Māānēn mē kajaja. Kwa o kora mē apē Tirtūm kapēr tūm o mē ahkre xwýnhjaja. Kot kaj mē urāk nē amex kēt nē. Na ka htem mē kām mēmoj tā karō ho ri apa nē mē kām: “E kēr ka mē ā amnhī nhīpēx anē nē ā amnhī nhīpēx anē.” Anhÿr tā no ām mē kajaja amnhī kapērja kōt amnhī nhīpēx kēt nē. Te mē ate mēhō kot mē katut ā mē kām mē jēnh pytī janhōr tā mē ho ajuta nē hkwÿr htur kēēta pyrāk o na ka htem amnhī nhīpēx o ri apa.

47-49 —Na pre Tirtūm amnepēm mē pahpāmĵē hkukamā tanhmā mē harēnh to. āhpumunh tÿx xā hkōt tanhmā mē hkukamā mē harēnh to nē mē harēnh o: “Kot paj ma mē hwÿr inhÿ hā ixkapēr jarēnh xwýnhĵē rē. Nom koja mē omu nē ām mē omu nē kēp mē hprām nōkati nē tanhmā mē hipēx to ho pa. Nē ixpē mē hkwyĵē hpar o pa. Ā koja mē inhÿ hā ixkapēr jarēnh xwýnhĵē nhīpēx anē.” Anhÿr o mē hkukamā mē harē. Tā ā mē harēnh anhÿr xā hkōt nhūm prem ā mē hipēx anē nē mē hkwyĵē hpa nē mē hkwyĵē pynē nē mē hĵĵē.

—Amnepēm mē akukamā mē kot ā mē hipēx anhÿr nhūm mē ate mē ano ho ja hā mē omunh kēt tā ka htem arī mē hā pika ho mex o ri apa. Te mē amā mē hapē nē mē ho ajamak pyrā nē mē hā pika ho mex o ri apa. Nom mē amā mē hapē hā ho mex hkēt nē. Ām ra mē htyk nē hapēx nē mē amā Tirtūm kapēr jarēnh o pa hkētĵa ā na ka htem akīnh nē ā axēx rom mē hā pika ho mex anhÿr o ri apa.

50-51 —Na prem Tirtūm nhÿ hā kapēr jarēnh o mē pa xwýnhĵē nhīmex rax nē. Amnepēm panhī kator krax rūm finat Atāw kra finat Apewja na pre Tirtūm nhÿ hā kapēr o pa nhūm htō kām mar prām kēt nē kupī. Tā nhūm Tirtūm axte mē hwÿr ŷ hā kapēr jarēnh o mē pa xwýnh kwĵĵē rē nhūm prem mā mē ho anē nē mē hkwyĵē nhīmex. Nhūm pre xatā mē hwÿr mē hkwyĵē rē nhūm mē xatā mē kupa. Ā Apew rūm finat Jakaris wÿr na prem mē himex rax anē. Nē hpānhā Jakarisja nhūm prem Tirtūm mā amnhī jarēnh xā hā ixkre kamā kupī. Tā ka mē ajaxwĵja amā Tirtūm kapēr mar prām kēt nē mē urāk nē amā ŷ hā kapēr jarēnh o mē pa xwýnhĵē nhīmex prām. Tā ā mē pahpāmĵē mē ato hpimrāātā mē ate mē hipēx anhÿrja mÿrapē koja Tirtūm ja hā mē apē mē hkanrēhā mē htāmnhwĵjaja tanhmā mē ato htÿx to ka mē amnhī xā htÿx kamā ajamak o ri apa rāhā nē kām ga.

52 —Jakamā kwa mē o kora mē apē Tirtūm kapēr tūm o mē ahkre xwýnhjaja. Mē ajaxwĵja na ka htem Parijew nhō xwýnhĵē pyrā nē Tirtūm kapēr o mē ahkre ho apa. Nē aprī hā mar mex tā no ām amnhī kaxyw hkōt ajamaxpēr nē hkōt amnhī nhīpēx kēt nē. Hāmri nē mē kot mē amar o pa xwýnhĵē mā atÿx ri tanhmā mē ahkre hto nhūm htem mē ama nē mē apyrā nē amnhī kaxyw Tirtūm kōt hamaxpēr nē hkōt amnhī nhīpēx kēt nē. Mē kām hprī hā kapēr mar mex prām tā mē amar xā hkōt mē ate amnhī nhīpēx pyrāk o amnhī nhīpēx o pa. Nom mē kajaja na ka htem mē kām mē hamaxpēr mex nhōr kētĵa mÿrapē nhūm htem ā amnhī nhīpēx anhÿr o pa. Jakamā kwa mē o kora kot kaj mē amex kēt nē. Anē.

Nhūm pre ā Jejus mē kām kapēr anē. 53-54 Hāmri nē kato nē ma tē. Nhūm Tirtūm kapēr tūm o mē ahkre ho mē pa xwýnhĵē mē Parijew nhō xwýnhjaja hāmri kot tanhmā mē kām kapēr toja ma nē kamā gryk tÿx nē. Jakamā ma hkōt mra. Hēx rom mēmoj tā hkukĵēr o hkōt mra. Nē hā hkukĵēr kām hihtÿx o hkōt mra. Kot tanhmā mē kām ujarēnh to nhūm mē kot mar nē ra hā āmnēnh kaxyw ma hkōt āhkukĵēr o mra.

12

Mē pahte Tirtūm pé mē pajamaxpēr punuj o pahpimxur kêt

Matêwre 10.26-33

¹⁻³ Tã nhūm mē Jejus ã htu rax kumrêx nê hã axpên nhīgãnh o kuhê. No nhūm kormã mē kãm tanhmã kapêr to hkêt nê. ãm kormã hkôt mē pa ho mē pa xwýnhjê kumrêx mã kapêr nê mē kãm:

—Mē piitã kãm amnhĩ kwýjê pé hamaxpēr punuj o hpimxur hprãm tã koja nhýrmã mē hamaxpēr piitã amnhĩrit pa. Nê mēmoj piitã ra hpimxur mex tã koja nhýrmã piitã amnhĩrit pa. Nê mē kot kamãt kô kamã hpimxur pé mēmoj jarênh tã koja mē piitã nhýrmã kot mēmoj jarênh ta ma. Nê mē kot hitom kãm kawax pé axpên mã mēmoj punuj jarênh tã koja nhýrmã mē piitã mēmoj jarênh ta ma. Jakamã kwa kêr ka mē tanhmã Parijew nhõ xwýnhjaja kot amnhĩ nhípêx to ho pa hã mē omu nê ãm mē omu nê mē hkôt amnhĩ nhípêx kêt nê. Te mē kot kãm amnhĩ nhípêx pyrãk o amnhĩ nhípêx tã no ãm tãm amnhĩ nhípêx o pa hkêt. Na htem ãm htýx ri tanhmã amnhĩ to hêx to ho pa. Tã kêr ka mē urãk nê ã amnhĩ nhípêx anhýr kêt nê. Anê.

Mē pahte pahkwýjê pumaj Tirtūm kaga hkêt ã mē pamã karõ

Matêwre 10.28-31

⁴ Nhūm Jejus arĩ hkôt mē pa ho mē pa xwýnhjê mã kapêr nê mē kãm:

—E ixkrãmnhwýjaja. Kêr ka mē amã akwýjê puma rý nhãm mē hkwyjê puma ho ri apa hkêt nê. Koja mē apar tã ãm mē anhĩ pix pa nom tanhmã mē akarõ hto hkêt nê. ⁵ Tirtūmja tapxipix na hte mē i nê mē hkarõ ho hpimràatã mē kot amnhĩ xã htýx kamã hamak tũm xã hwýr mē kurê. Tã kêr ka mē ja pumaj Tirtūm kapêr kwým tanhmã ri amnhĩ nhípêx to ho apa hkêt nê.

⁶⁻⁷ —Nê Tirtūm kot mē pahto hapêx par pumunh tã mããnhn kot mē pajamãr pumunh mex. Mãnh ka htem kuwênhre pumu. Na hte Tirtūm hamãr mex o pa. Mē piitã mē kot ãm kuwênhre pumunh o pa htã nhūm Tirtūm mē kurom hamãr mex o pa. Nê htãnopxar rãhã ho pa. Nom kãm mē pajapê htýx o kuwênhre jakrenh jakamã kwa mē tee ri amnhĩ kukamã ajamaxpêr o ri akapri nê apa hkêt nê. Koja Tirtūm mē pahtãnopxar rãhã ho pa. Ra kot tanhmã mē pakute hã mē pahpumunh par. Nê ahpyñhã tanhmã mē pahkrã hkĩ kute hkôt mē pahpumunh par. Tã kot mē pahtãnopxar rãhã jakamã mo kaxyw kot kaj kêt mē ri amã mēhõ puma ho ri apa?

⁸ —Jakamã kwa mē mãmri mē kãm mē apê ixkra hã amnhĩ jarênh o ri apa nê amã mē uma xãj tee ri amnhĩ nhípêx o ri apa hkêt nê. Kot ka mē kãm ra mē ate ixkôt amnhĩ xunhwýr ã amnhĩ jarê. Pa ja hã mē apumu hãmri nê mē apyrã nê kaxkwa kamã Tirtūm kapêr o mē wryk xwýnhjê mã ra mē ate ixkôt amnhĩ xunhwýr ã mē ajarê. ⁹ Nom kot ka mē kot ixtã tanhmã mē ato pymaj apê ixkwý hã amnhĩ jarênh kêt japêr. Pa ja hã mē apumu hãmri nê nhýrmã amnhĩ xwar mē kãm mē apê ixkwý hkêt ã mē ajarê. Jakamã kwa mē mãmri mē kãm apê ixkwý hã amnhĩ jarênh o ri mē hkôt apa kê mē ama nê tanhmã inhmã hamaxpêr to. ¹⁰ Koja mē ama nê ãm ama nê kãm ixprãm kêt japêr. Hãmri nhūm Tirtūm ixtã mē omu nom tokyx ixtã tanhmã mē ho hkêt nê. Koja kormã amnhĩ tã mē hamãr o pa. Karõ kot axte mē kãm ijarênh o amnhĩrit nhūm mē hkwyjaja kot mar nê kãm ixprãm nê ixkôt amnhĩ xunhwýr kaxyw nhūm kormã amnhĩ tã mē hamãr o pa. Nom koja Karõ xatã mē kãm ixto amnhĩrit tã nhūm mē kuma nê ãm kuma nê te mē kot kêp amnhĩ jamak pro pyrãk o amnhĩ nhípêx o pa. Jao Karõ hã hpijaãm kêt mýrapê koja Tirtūm nhýrmã amnhĩ xwar te kot mē kêp amnhĩ jamak pro pyrãk o mē hipêx nhūm

mê tee kãm amnhĩ kaprĩ kaprÿ. Hãmri nê amnhĩ xà htÿx kamã hamak tũm xàta wÿr ma pa nê kamã pa ho pa. Jakamã kwa mê mãmri mê kãm mê apé ixkra hã amnhĩ jarênh o ri mê hkôt apa nê tanhmã mê kãm ijarênh to ho ri apa. ¹¹ Koja mê ama nê kãm mê amar prãm kêt japêr hãmri nê ixtã mê apynê nê tanhmã mê anhĩpêx to kaxyw. Nê Ijaew nhô Tĩrtũm kapêr o mê ahkre xà hã ixkre hwÿr mê ato mrar japêr. Rÿ mê ô pahi hwÿr mê ato mrar nê tanhmã kãm mê ato hêx to. Nom kêr ka mê mê kãm amnhĩ jarênh kaxyw nê tee ri amnhĩ kukamã ajamaxpêr o amã mê uma kêt nê. ¹² Koja Tĩrtũm Karô ja kaxyw mê amã mê ajamaxpêr mex gô hãmri ka mê ô ri mê kãm amnhĩ jarê. Jakamã kwa mê tee ri mê kãm amnhĩ jarênh kukamã ajamaxpêr o ri mê amã mê uma ho apa hkêt nê. Anê.

Mê hikukrêx rũnh pix kukamã hamaxpêr xwÿnhjê jarênh

Wam Ximotre 6.9-10; Xiakre 4.13-17, 5.1-6

¹³ Nhũm Jejus arĩ mê ahkre o xa nhũm mê mar o kuhê. Rôm nhũm mēhō myja hwÿr tē nê kãm kapêr nê kãm:

—Pa? Kwa ot pa awÿr amã mēmoj jarênh mã tē. Na pre inhĩpêêxã ty nhũm ixtô ixrom amnhĩm ô mēmoj piitã ho àrĩk pa. Ô pika nê hkrit nê hikukrêx nê am mēmoj piitã ho àrĩk par kumrêx. Kwa ma ixkôt tē nê kãm anê pa wa amnhĩm ho axkjê nà? Anê.

¹⁴ Hãmri nhũm kuma nê kãm:

—Tk. Kokÿ. Na pa pre mê amã mê mēmoj to ixpikjêr kaxyw mê awÿr ixwÿrk kêt nê. Anê.

¹⁵ Hãmri nê mê kot mar o kuhê xwÿnh piitã mê kãm kapêr nê mê kãm:

—Kwa kêr ka mê amã anhō mēmoj rũnh prãm o ri apa hkêt nê. Na htem mēmoj rũnh kukwak ri Tĩrtũm wÿr apir kêt nê. Mēmojta kêp pika pix nhô xwÿnh na.

¹⁶ Anhÿr o mê kãm kapêr hãmri nê mê kãm awjarê. Mê hkukrêx rax ã kuxi nê mê kãm awjarê nê mê kãm:

—Nà koja mēhō ô mēmoj rax nê. Nê hpur kãm ô rax nê. No am ô jaxwÿr xà hã ixkre kêp grire. ¹⁷ Hãmri nhũm tee ri hpur kãm ô rax kukamã hamaxpêr nê hamaxpêr o: “Kwa tanhmã kot pa amnhĩ to nê ja piitã nhÿri haxwÿ wehe? Inhmã amarĩ mê kêp amrakati xwÿnhjê mã hkwy nhôr prãm kêt. Kot paj am amnhĩm piitã ir pa nê kritpêem hkur o ixpa. Nom ixpê haxwÿr xà hã ixkreja ixpê grire.” Anê.

¹⁸ —Hãmri nê hamaxpêr o: “Nà na pa ra ijamaxpêr. Kot paj ixkre grireta grã nê hpãnhã rax ô nhĩpêx. Hãmri nê ixpur kãm inhōta jamÿ nê kamã ir pa. Nê ixapênh xà hã ixkukrêx piitã kamã haxwÿr pa. Nà kot paj ho anê.” Anê.

¹⁹ —Hãmri nê ra ixkreja grãnh pa nê hpãnhã rax ô nhĩpêx. Nê hipêx pa hãmri nê kamã hpur kãm ôta xir pa. Nê apênh xà hã hikukrêx piitã kamã unhwÿ. Hãmri nê omu nê hkĩnh nê. Nê hamaxpêr o: “Nà hãmri. Kot paj tokyx axte mēmoj tã ixapênh kêt nê. Ra inhō rax kumrêx kênã. Kot paj kritpêem ho ixapkur mex o ixpa. Nã am hãmri na pa amnhĩ kukamã ijamaxpêr mex pê ixkre rax nhĩpêx.” Anê. ²⁰ Tã nhũm Tĩrtũm tee ri ã kot amnhĩ nhĩpêx anhÿr ã omu nhũm ja kãm mex kêt nê. Hãmri nhũm hã kãm kapêr nê kãm: “Nà na ka atÿx ri anho rax mê akukrêx rax o apikuprõnh kaprÿ. Na ka am amnhĩ pix kukamã ajamaxpêr o apa pê ã amnhĩ nhĩpêx anê. Nom kot kaj kamã ja kamã ty nê anhÿ kamã ma mō nê amnhĩ kôt anhō mēmoj rax ô ho amōr kêt nê. Koja hpãnhã mēhō amÿr pê ho amnhĩptar pa ka rĩ amnhĩ pumu.” Anê. Nhũm ã Tĩrtũm kãm kapêr anê. Á mê ujarênh kot anhÿr.

21 —Mē kot amnhī nhō nē amnhī kukamā pix mā hamaxpēr o mē pa xwýnhjaja na htem myja pyrā nē Tirtūm mā hamaxpēr o pa hkēt nē. Jakamā koja mē nhýrmā ty hāmri nē hkukrēx pix kukamā hamaxpēr nē amnhī mā pix mā hamaxpēr o paja mýrapē Tirtūm mē wa ixri htír tūm nē mex nē pa ho pa hkēt nē. Mē kot amnhī nhō pix kukamā hamaxpēr xwýnhjaja nē amnhī kukamā pix mā mē hamaxpēr xwýnhjaja nē mē kamā ukaprī hkēt xwýnhjaja mē ō mēmoj rūnh tā koja mē nhýrmā ty hāmri nē amnhī kôt hō ho pixi nē o mōr kēt nē. Koja mē mēmoj piitā rer pa nē ma ý kamā ma mō. Jakamā kwa kēr ka mē jajē pyrā nē anhō mēmoj to anhōxy ho ri apa hkēt nē. Anē.

*Mē pahte tee ri amnhī kukamā pajamaxpēr kēt ā mē pamā karō
Matēwre 6.25-34; määnēn Wam Pētre 1.3-9*

22 Tā nhūm Jejus hpānhā tanhmā hkōt mē pa ho mē pa xwýnhjē jahkre hto nē mē kām:

—Kwa kēr ka mē tee ri amnhī kukamā ajamaxpēr o ri apa hkēt nē. Amnhī xāpkur xā rý axē ka mē tee ri hkukamā ajamaxpēr kēt nē. Nē mē ām mēmoj piitā hkukamā tee ri ajamaxpēr kēt nē. ²³ Tirtūm āhpumunh tỳx o āhpumunh tỳx xwýnh na. Na pre āhpumunh tỳx o mē anhīpēx ka mē kukwak ri atír nē apa. Tā xā kot mē amā mē anhō ho pa hkukamā āhpumunh kēt? Nà ja kukamā āhpumunh xihtỳx kēnā. Kēp mē anhīpēx xwýnh jakamā määnēn kēp mē amā mē anhō ho pa xwýnh. Nē kēp mē amā mē axē nhōr o pa xwýnh.

24 —Mān ka htem kuwēnhre pumu. Na hte tee ri amnhī xāpkur xā hkukamā hamaxpēr o hkaprī nē ri pa hkēt nē. Na hte Tirtūm tām kot kām ō ho pa. Tā kām mē pajapē htỳx o kuwēnhre jakrenh jakamā koja urāk nē mē pamā mē panhō mex o pa rāhā nē. ²⁵⁻²⁶ Jakamā kwa kēr ka mē mēmo arīgro hā axāpkur xā hkryre pumu nē ate amnhī pē hkrēr par nē amā prām o akaprī nē apa hkukamā tee ri ajamaxpēr kēt nē. Ām Tirtūm kamnār rom axānnhīx anhō hkryreta ku nē akīnh kām tanhmā amnhī nhīpēx to ho ri apa. Xā kot ka anhō mry grire pumu nē akaprīre nhūm ra tanhmā amā amnhī to rax to? Na htem ām tee ri mēmo hkukamā hamaxpēr o hkaprī nē pa kaprý. Jakamā kēr ka mē ā ri ajamaxpēr anhýr o akaprī nē apa hkēt nē.

27 —Mān ka htem akunī kamā pixōrāre pumu. Na hte tee ri tanhmā amnhī kute hkukamā hamaxpēr o hkaprī nē harir kēt tā muxre nē harir ka mē omu. Te ho amnepēm finat pahīhti Sarumāw xē mex pyrāk nom ām mex o kot hakrenh.

28 —Pixōrāreja arīgro ja hā htír nē muxre nē harir tā koja mēmo arīgro hā grā pa nē hapēx. Kēp pixōrā pix nē hapēx tokyx anhýr tā na hte Tirtūm ho mex nē nhūm mux nē harir. Nom mē pajaja na hte mē pahto mex o pixōrāre ho mexja jakrenh. Jakamā kwa mēmo kaxyw kot ka mē tee ri amnhī xē hkukamā ajamaxpēr o akaprī nē apa? Nà kot kaj mē anē nē amnhī kaxyw Tirtūm mā ajamaxpēr tỳx kēt nē.

29 —Kwa mē tee ri amnhī xāpkur xā hkukamā ajamaxpēr rāhā o ri akaprī nē apa hkēt nē. Nē mē tee ri amnhī kukamā tanhmā ajamaxpēr to ho ri akaprī nē apa hkēt nē. ³⁰ Mē kot Tirtūm kôt amnhī xunhwýr kēt xwýnhjaja na htem ā ri hamaxpēr anhýr o hkaprī nē pa. Tā kēr ka mē ho mē urāk kēt nē. Tirtūm kot mē panhō mēmoj kēt kôt mē pahpumunh mex kēnā. ³¹ Jakamā kēr ka mē ām hkōt ri amnhī nhīpēx rāhā nē. Nē amā ja pix kukamā ajamaxpēr o ri apa hprām. Hāmri nhūm amnhī tā mē apumu hāmri nē apkatī mē tām mē amā mēmoj nhōr o pa. Anē.

Kaxkwa kamā mẽ pakukrêx rax jarênh

Matêwre 6.19-21; mãânên Sikün Ximotre 4.8; Eprêw 10.34; Wam Pêtre 1.4

³² Nhũm Jejus arĩ mẽ kãm kapêr nê mẽ kãm:

—E mẽ ate ixkôt amnhĩ xunhwýr xwýnhjaja. Ra Tirtũm kot mẽ ato hkra jakamā kwa mẽ axãmnhĩx hkamnār rom ri tanhmā amnhĩ nhĩpêx to ho ri apa. Na hte mẽ apê hkra hā mẽ apumu nê hkĩnh nê. Kojā nhỹrmā kaxkwa kamā õ krĩ hwýr mẽ ato api ka mẽ kamā wa ixkuri amex nê atĩr tũm nê apa ho apa. Ja na mex o kot jar pika ja kôt mẽ õ mẽmoj rũnh nê pa xwýnhnta jakrenh. ³³ Jakamā kêr ka mẽ axãmnhĩx ri akukrêx kwý ho wênê nê hpãnhā kãxpore jamý nê mẽ kêp amrakati xwýnhjê mã ho apigrãnh o ri mẽ hkôt apa. Kot kaj mẽ ã amnhĩ nhĩpêx anê hãmri nê kaxkwa kamā akukrêx rax nê. Mo kaxkwa kamā mẽ àhkĩnh xwýnh kojā mẽ apê ho ahkĩ? Nê kamā mo amnhõre kot mẽ apê homnu? Kaxkwa kamā ja amrakati kumrêx. Jakamā Tirtũm kot mẽ amā mẽ akukrêx nhõr mã xwýnhnta kojā aa apê omnuj nê hapêx kêt kumrêx. ³⁴ Kot kaj mẽ jar pika ja kamā akukrêx rax hãmri nê tanhmā apê omnu hto pix kukamā ajamaxpêr rãhā ho ri apa. Nom kot kaj mẽ apê Tirtũm kra hā kot kaj mẽ jar akukrêx rax kêt tã kaxkwa kamā akukrêx pix kukamā ajamaxpêr rãhā ho ra akĩnh nê ri apa. Anê.

Mẽ pahte Jejus kutêp tanhmā amnhĩ nhĩpêx to hā mẽ pamā karõ

Matêwre 24.42-43; Makre 13.32-37; Rukre 21.34-36; mãânên Wam Tesarõn 5.4-8

³⁵ Nhũm pre Jejus arĩ mẽ ahkre nê mẽ kãm:

—E na pa pre ra mẽ apê ixkôt mẽ apa ho apa xwýnhjê mã tanhmā amnhĩ kukamā amnhĩ jarênh to. Ixytk nê akupým itĩr nê ma akupým ixàpir hãmri nê mẽmo arĩgro hā akupým mẽ awýr ixwrykja na pa pre ra mẽ amā ja hā amnhĩ jarê. Tã kwa kêr ka mẽ ixwakre kamā ixte mẽ amā ã amnhĩ jarênh anhyrja mã ajamaxpêr tỳx pê ixkôt amnhĩ nhĩpêx rãhā ho ri apa.

³⁶⁻³⁸ —Te mẽ õ patrãw mã mẽ àpênh mex xwýnhjaja kot amnhĩ nhĩpêx pyrãk o amnhĩ nhĩpêx o ri apa. Kojā mẽ õ patrãw ma mẽ kot xepên mã wa rer mã xwýnh pumunh mã ma nhỹhým tê. Hãmri nhũm kãm mẽ àpênh xwýnhjaja arĩ kutêp õrkwý kamā hkri. Axkãm hamak rom nê kutêp hkri. Akupým htêm nhũm mẽ kot amnhĩ wýr mar nê kãm kahê xà mẽnh tokyx anhyr kaxyw arĩ kutêp õt kêt nê hkri. Kôt ã kamãt nhũm akupým hpõx o htêm rý arĩgro hwýr hpõx o htêm nhũm mẽ kot amnhĩ wýr mar nê kãm kahê xà mẽnh tokyx anhyr kaxyw kutêp õt kêt nê hkri. Akupým hpõx ã omunh hãmri nê tokyx apkur kaxyw kãm õ nhĩpêx kaxyw. Kêr kê akupým pój nê ã mẽ kot amnhĩ nhĩpêx anhyr ã mẽ omu nê hkĩnh nê. Tã kêr ka mẽ àpênh xwýnhntajê pyrã nê ixwakre kamā inhmã ajamaxpêr rãhā ho ri apa. Jao ixkamã ajamak o apa ho ixkôt amnhĩ nhĩpêx mex rãhā nê. No kot paj akupým mẽ awýr wry hãmri ka mẽ àpênh xwýnhjê pyrã nê inhmã mẽmoj nhõr kêt nê. Kêt pa kot paj mẽ õ patrãwta kurom mẽ amā mẽmoj mex gõ.

³⁹ —Na htem mẽ kêp àhkĩnh pymaj amnhĩ nhõrkwý jamār rãhā ho pa. ⁴⁰ Ja pyrã nê mẽ ate akupým ixwryk xà hā arĩgro pumunh kêt jakamā kêr ka mẽ õrkwý nhõ dõnta pyrã nê ixkutêp axkãm ajamak rom rãhā nê ri apa. Jao tãm amnhĩ nhĩpêx rãhā nê. Anê.

Mẽ õ patrãw mã mẽ àpênh mex xwýnhjê jarênh

Matêwre 24.45

⁴¹ Nhũm pre ã Jejus hkôt mẽ pa ho pa xwỳnhjê jahkre anê. Hãmri nhũm Simãw Pêtre kuma nê kãm:

—Kwa Pahihiti. Xàn ka mẽ piitã mẽ kãm ã akapêr anê nà? Xà ãm mẽ papxipixjê mã? Anê.

⁴² Hãmri nhũm kãm:

—Nà ãm ixwakre kamã mẽ ate ixkôt tanhmã inhmã amnhĩ nhĩpêx to ho mẽ apa xwỳnh piitã mẽ amã na pa ã ixkapêr anê. Koja mẽ àpênh xwỳnhjê hõ ò patrãw mã àpênh mex o pa nhũm amnhĩ tã omu nê ma nhỹhỹm mõi kaxyw nê ìhkram mẽmoj piitã haxàr pa. Hãmri nê kãm: “E kër ka ixwakre kamã inhmã inhõrkwỹ htãnopxa. Nê mẽ àpênh xwỳnhjê mã ò mex kè mẽ apkur mex o pa.” Anê. Koja ã kãm mẽmoj tã karõ anê hãmri nê kato nê ma nhỹhỹm mõi. ⁴³ Hãmri nhũm kãm àpênh mex xwỳnhnta wakre kamã kãm àpênh mex o pa. Jakamã nhũm ò patrãw akupỹn hpõx o mõi nhũm amnhĩ wỳr harênh ma nê hkĩnh nê. Nê mẽmoj tã amnhĩ tã kamã kahak kêt nê. Rỳ tee ri wakre kamã kãm àpênh punuj ã amnhĩ pumu nê tee amnhĩ kukamã hamaxpêr kêt nê. Kot wakre kamã kutêp àpênh mex jakamã akupỹn hpõx ã harênh ma nê hkĩnh nê.

⁴⁴ —Jakamã nhũm ò patrãwja akupỹn pøj nê kot kãm àpênh mex ã omu nê haxwỳja hkĩnh nê. Hãmri nê kot kãm hamãr o pa kaxyw kãm mẽmoj piitã ìhkram haxàr pa. ⁴⁵ Nom koja kãm àpênh xwỳnhnta axtem nê wakre kamã kãm àpênh mex kêt nê. Nê tokyx akupỹn mõi kêt ã hkamnhĩx nê wakre kamã kãm mẽ àpênh xwỳnhjê htak nê pipãnh pix nê mẽ kãm gõ xành xwỳnhjê kôt pix mã pa japêr. ⁴⁶ Hãmri nhũm ò patrãw haer pè akupỹn pøj nê tee ri ã amnhĩ nhĩpêx anhỹr ã omu. Hãmri nê gryk tỳx nê tanhmã homnuj to. Hãmri nê kãm mẽ àpênh punuj xwỳnhjê mẽ mẽ ho pimràatã amnhĩ nê mẽ hanor pa. Tã kër ka mẽ ixwakre kamã ho mẽ urak kêt nê. Mẽ kurom ixkapêr kôt tãm amnhĩ nhĩpêx mex rãhã ho ri apa.

⁴⁷⁻⁴⁸ —Nê koja mẽhõ kormã Tĩrtũm kapêr mar kêt nê htỳx ri tanhmã amnhĩ tomnuj to ho pa. Hã koja Tĩrtũm ja hã omu nê nhỹrmã kot amnhĩ tomnuj o pata mỳrapê tanhmã ho nhũm amnhĩ xà htỳx kamã hamak tũm xà kamã pa. Nom akrãnhmã amnhĩ xà kamã hamak o pa. Aa kot Tĩrtũm kapêr mar kêt jakamã koja ãm akrãnhmã amnhĩ xà kamã hamak o pa. Nom koja mẽhõ kapêr mar mex tã ãm kuma nê hkôt amnhĩ nhĩpêx kêt nê. Nê xatã hirõp kuhê nê tanhmã amnhĩ tomnuj to. Hã koja Tĩrtũm tee ri ja hã omu nê nhỹrmã tanhmã homnuj tỳx to. Hãmri nhũm wantajê pyrã nê amnhĩ xà htỳx kamã hamak tũm xata kamã pa ho pa nom mẽ kĩnhã amnhĩ xà htỳx kamã hamak rãhã ho pa. Anê.

Jejus kot nhỹrmã mẽ kot amnhĩ tomnuj xà ho hapêx ã harênh

Matêwre 10.34-36

⁴⁹ Nhũm Jejus arĩ hkôt mẽ pa ho mẽ pa xwỳnhjê jahkre nê mẽ kãm:

—Nà ixte mẽ omnu xà piitã ho ijapêx par nê mẽ kot tanhmã amnhĩ tomnuj to piitã ho ijapêx par kaxyw na pa pre wrỳ. Tã ra ixte piitã ho ijapêx par o inhmõi ronhỹx ja inhmã mex kumrêx. Nom kormã. ⁵⁰ Kot paj amnhĩ xà htỳx kãm ijamak rax o mẽ kot amnhĩ tomnuj o ijapêx o hkraax. Hãmri nê nhỹrmã ho ijapêx pa. Na pa ra ixtyx kaxyw ixte amnhĩ kà xà kamã ijamak kukamã ijamaxpêr o ra amnhĩ kamã ixkahak nê ri ixpa. Tã kot paj ja ho ijapêx pa nê ixkĩnh tỳx kumrêx. Anê.

Mẽ kot Jejus ã axpên kutã amnhĩ xunhwỳr ã mẽ harênh

Matêwre 10.21, 10.34-35

⁵¹ Nhũm Jejus arĩ mẽ ahkre nê mẽ kãm:

—Nē ra mē awȳr ixwrȳk tā koja mē piitā ixkukwak ri hamakêtkati nē amnhī ri pa hkêt nē. Kormā. Koja mē akwýjaja ixkapēr ma nē mē apyrà nē amnhī kaxyw ixkôt hamaxpēr. No nhūm mē akwýjaja mē akínhā kuma nē am kuma. Hāmri nē ixtā tanhmā mē anhīpēx to ka mē ipyrà nē amnhī xā htyx kamā ajamak o ri apa.

⁵² —Nē koja tanhmān ixkre pyxi kamā mēmojaja ohtōn pa. Nhūm war axkrutre nē ixkôt amnhī xunhwý nhūm mē axkrunēpxi nē ixkwým ri amnhī nhīpēx nē ixkutā amnhī xunhwý. ⁵³ Nhūm mē hipéèxā hkra my mē wa ixtā axpēn kutā amnhī xunhwý. Nhūm mē katorxā hkra ni mē wa ixtā axpēn kutā amnhī xunhwý. Nhūm mē wýj umregēx mē wa haxwýja ixtā axpēn kutā amnhī xunhwý. Koja mē ā ixtā axpēn nhīpēx anhýr o pa. Anē.

Mē pahte amnhī tomnuj kaga nē Tirtūm kôt amnhī nhīpēx ā mē pamā karō Matēwre 5.25-26, 16.2-4

⁵⁴ Nhūm Jejus hpānhā mē kot hkôt amnhī xunhwýr kêt xwýnhjē mā kapēr nē mē kām:

—Kwa mē inhma mē ate ixkôt amnhī xunhwýr kêt xwýnhjaja. Na htem kaxkwa kamā na htyk rax pumu nē na wrȳk mā hamaxpēr kurē kumrēx. Hāmri nhūm na wrȳ. ⁵⁵ Nē amgrā pé kôk krihkritja nhūm htem kuma nē arīgro htyx mā hamaxpēr kurē kumrēx. Hāmri nhūm arīgro htyx nē. ⁵⁶⁻⁵⁷ ā na ka htem aprī hā mēmoj pumunh kôt mēmoj kukamā ajamaxpēr mex o ri apa anē. Nom nhūm Tirtūmja mē ate tanhmā amnhī tomnuj to mýrapē tanhmā mē ato kaxyw nhūm mē ate ja hā amnhī pumunh tā tokyx amnhī tomnuj kaga hkêt nē.

⁵⁸⁻⁵⁹ —Na htem tanhmā axpēn tomnuj to. Hāmri nhūm kot tanhmā war axpēn to xwýnhhta pahi hwýr htēm nē kām tanhmā kot ho xwýnhhta jarēnh kaxyw. Hāmri nhūm kamā gryk xwýnhhta kot pahi mā harēnh kaxyw ā harēnh ma nē hāmri tokyx hwýr tē nē wa tām akupým axpēn xām. Na htem ā amnhī nhīpēx anē. Pahi kot ja mar nē tanhmā mē ho pymaj na htem ā amnhī nhīpēx anē nē tokyx akupým tām axpēn xunhwý. No koja mē ā amnhī nhīpēx anhýr kêt nē nhūm pahija mē harēnh ma hāmri nē tanhmā kot hō ho xwýnhhta pyné nē haxā nhūm tee kām kator prām o hkrī kaprý. Hāmri nē tanhmā amnhī to nē amnhī pānhā kām amnhī rer pa nhūm pahihitja kormā mē kām anē nhūm mē kām ure nhūm kato. Ja pyrà nē kēr ka mē Tirtūm tanhmā kot mē anhīpēx to pymaj tokyx mē ate amnhī tomnuj kaga nē hkôt amnhī nhīpēx rāhā ho ri apa. Anē.

13

¹ Tā nhūm axtem mē hwýjaja Jejus wýr mra nē kām:

—Pa? Kwa xān ka ra Garirej nhō xwýnh kwýjē jarēnh ma nā? Na xep prem Jerujarē hwýr mra nē ham mē kot Tirtūm mā amnhī jarēnh xā hā ixkre kamā kām amnhī jarēnh kaxyw kormā kām mry hpar o kuhē nhūm xep pahititi Piratja mē harēnh ma nē mē hā amýné nhūm mē ma mē hwýr mra nē mē himex pa. Kwa mān mē kot amnhī tomnuj týx o mē pajakrenh ā na prem mē himex nā? Anē.

²⁻³ Hāmri nhūm mē kām:

—Nā mē kot amnhī tomnuj týx mýrapē mē kot mē himex kêt. Mē apiitā mē ate amnhī tomnuj o axpēn pyràk kēnā. Tā kot ka mē amnhī tomnuj kaga nē Tirtūm kôt amnhī xunhwýr kêt hā kot ka mē nhýrmā ty hāmri nē ō krī hwýr axāpir kêt nē. ⁴ No Jerujarē kamā ixkre prēkja mē kot kām “Siroe” anhýr

xwÿnhnta mẽ ho 18 nẽ mẽ hipy htem nẽ mẽ himex par xwÿnhhaja. Xà mẽ kot amnhĩ tomnuj tÿx mÿrapê na prem ty? Xà mẽ kot amnhĩ tomnuj tÿx o Jerujarê kamã arĩ mẽ hũr xwÿnhjê jakrenh? ⁵ Nà kot anhÿr kêt. Mẽ apiitã mẽ ate amnhĩ tomnuj o axpẽn pyrãk. Jakamã kot kaj mẽ ã amnhĩ nhĩpêx anhÿr kaga nẽ Tirtũm kôt amnhĩ nhĩpêx kêt nẽ hãmri nẽ mẽ urak nẽ nhÿrmã ty hãmri nẽ Tirtũm nhõ krĩ hwÿr axapir kêt nẽ. Jakamã kwa mẽ ixkapêr ma nẽ kãm ajamãxpêr tÿx rãhã ho ri apa. Anẽ.

Tirtũm kot mẽ pakamã gryk tokyx anhÿr kêt ã harênh
Rômãn 2.4; Sikũn Pêtre 3.8-9

⁶ Tã nhũm Jejus kê axte tanhmã mẽ ahkre hto. Nẽ Tirtũm kot tanhmã mẽ panhĩpêx to hã kuxi nẽ mẽ kãm awjarê nẽ mẽ kãm:

—Koja hpur nhõ dõn mẽmo pãr kre nhũm ra hprêk mex nẽ ô mã tãm nẽ. Tã aa ô hkêt ã ra hã amgrã axkrunêpxi. ⁷ Hãmri nhũm kot hkre xwÿnhja tee ri omu nẽ kãm àpênh xwÿnh wÿr tẽ nẽ kãm: “E kwa ma tẽ nẽ mẽmo pãr mũj krãhta nẽ amẽ. Mexti hã. Ra ô hkêt ã amgrã axkrunêpxi kênã. Koja pêr aa ô hkêt nẽ. Mo kaxyw kot kêt ô hkêt tã ô mex xwÿnh kaêx ã mẽ kêp àmnãr o kuhê? E hwÿr tẽ nẽ krãhta nẽ amẽ.” Anẽ. ⁸⁻⁹ Hãmri nhũm tee ri kot kãm hã karõja ma nẽ kãm: “Kwa nã kormã. Pa kop ixãmnhix pãr krax ã mẽmo japõk kwÿ kapĩ nẽ kop hamã mãn. Kê axte hã amgrã pyxi nẽ hapêx nẽ ô hkêt pa kormã krãhta nẽ kumẽ. Koja amgrã ja kamã amã ô japêr ka omu nẽ akĩnh nẽ.” Anẽ. ã mẽ ujarênh kot anhÿr. Anẽ.

Nhũm Jejus ã mẽ kãm ujarênh anẽ. Mẽ kot amnhĩ tomnuj tÿx o pa htã nhũm Tirtũm kot pur nhõ dõn mã àpênh xwÿnhnta pyrã nẽ mẽ kamã gryk tokyx anhÿr kêt ã nhũm ã hã kuxi nẽ mẽ kãm ujarênh anẽ.

Jejus kot arĩgromnu hã mẽhõ ho mex ã harênh
Rukre 14.1-6; Juãw 5.16-17

¹⁰ Tã nhũm mẽ õ arĩgromnu pẽ sap kato nhũm Jejus Ijaew pikuprõnh xà hã ixkre hwÿr axã nẽ kamã Tirtũm kapêr o mẽ ahkre ho nhÿ. ¹¹ Nhũm kamã mẽhõ ni hikõt rãhã nẽ pa xwÿnhja nhÿ. Na pre ra amnepêm mẽkarõmnuiti tanhmã ho nhũm katat nẽ ri mrar kêt kumrêx. ãm hikõt rãhã nẽ ri pa hã ra hã amgrã pẽ 18. ¹²⁻¹³ Hãmri nhũm Jejus omu nẽ amnhĩ wÿr kãm hpa ho apê nhũm hwÿr tẽ nhũm hã ãhkra xi nẽ kãm:

—E na ka ra akupÿm amex.

Anẽ nhũm akupÿm katat nẽ mex kurê kumrêx. Hãmri nẽ amnhĩ pumu nẽ hkĩnh tÿx nẽ Tirtũm mã mex o mex ã harênh o xa. ¹⁴ Nom nhũm mẽ pikuprõnh xà hã ixkre jamãr xwÿnh maatiija tee ri ja hã omu hãmri nẽ Jejus kamã gryk tÿx nẽ. Mẽ õ arĩgromnu hã akupÿm kot ho mex jakamã nhũm kamã gryk tÿx nẽ. Hãmri nẽ mẽ pikuprõnh xwÿnhjê mã kãm:

—Tk. Kwa semãn ã mẽ àpênh xà hã arĩgro xhohtëõ. Kêp 6. Kot kaj mẽ mãmrĩ tòmĩk nẽ sikũn nẽ tês nẽ kwata nẽ kĩa nẽ sêsta ja ã ka mẽ apê rÿ mãmrĩ Jejus wÿr amnhĩ to mra kê akupÿm tanhmã mẽ ato mex to. No sap ã kwarĩ. Sap kêp mẽ pahpê Ijaew nhõ arĩgromnu kênã. Na pu htem hã paxapênh kêt nẽ. Jakamã arĩgro ja hã kot akupÿm mẽ ato mexja mex kêt. Anẽ.

¹⁵ Hãmri nhũm Jejus kuma nẽ kãm:

—Kwa xà mẽ kajaja na ka htem sap ã axapênh kêt nẽ apa? Nà mẽ ate hã axapênh kênã. Xãn ka htem sap ã akrit kawar nẽ akrit moux ma mẽ ho apa nẽ mẽ hkõm kêt nẽ? Nà na ka htem ma mẽ ho apa nhũm htem ixkõ. Mot ka kêt mẽ ri axtem nẽ mẽ kot sap ã tanhmã amnhĩ toja nẽ mẽ kãm akapêr? ¹⁶ Ixte

ni ho mex xwÿnhnta mẽ pahpyrà nê kêp finat Apraãw kagrôt nyw ò na. Nhũm pre Satanasti te kot kãm ê nê ri o pa pyræk o hipêx jakamã nhũm ý hã hikôt nê ri paja ã ra hã amgrã kêp 18. Tã pa nê te ixte Satanasti ho ixkrihkrit nê ixte kêp utàr pyræk o hipêx nê akupÿm ho mex. Mo kot pa kêt ri omu nê ãm omu nê arĩgromnu hã ho mex kêt nê? Nã ixte arĩgro piitã hã akupÿm mẽ ho mex o ixpa xwÿnh kênã. Anê.

¹⁷ Hãmri nhũm mẽ kot kãm kapêr mar prãm kêt xwÿnhjaja kuma nê kamã gryk nê. Te ho mẽhprjê mã mẽ hamaxpêr nhõr pyræk o mẽ hipêx pyræk jakamã nhũm mẽ amnhĩ tã kuma nê kamã gryk nê. No nhũm mẽ kot ra ã amnhĩ nhĩpêx anhÿr o pa hã omunh xwÿnhjaja ja hã omu nê kãm hkĩnh nê.

Jejus te kot mẽmo hy pyræk ã harênh

Matêwre 13.31-33; Makre 4.30-32

¹⁸⁻¹⁹ Nhũm Jejus arĩ mẽ ahkre nê tanhmã mẽ kãm amnhĩ tã ujarênh to nê mẽ kãm:

—Nê Tĩrtũm kot mẽ awÿr ixte mẽ ato amnhĩptàr kaxyw inhmênh ã ijarênhja. Te ixte mẽmo hy pixire pyræk. Na htem hkre nhũm higrôt. Nê gaa nê rĩ hprêk. Hãmri nê pa anhrã nhũm kuwênhre hwÿr mra nê hõ pytĩ kamã amnhĩm haê nhĩpêx. Tã kot paj nhÿrmã mẽmo hy jarênhnta pyrã nê ixpaxi htã kot paj pika piitã hkôt mẽ ho amnhĩptã nê mẽ omunh mex rãhã ho ri ixpa. Anê.

Jejus te kot pãwti kaxkrit xà pyræk ã harênh

Matêwre 13.33-35

²⁰⁻²¹ Nhũm Jejus arĩ mẽ ahkre ho xa. Nom hprĩ hã amnhĩ jarênh kêt nê. ãm amnhĩ tã kuxi nê mẽ kãm awjarê nê mẽ kãm:

—E kot pa hpãnhã tanhmã mẽ amã pãwti kaxkrit xà jarênh to. Koja mẽnijê hõ ãm hkwy ho grire nê kupy nê kaxyw mẽmo xõm kãm kumê nê ho pihkãr pa nê ho pãwti nhĩpêx. Nhũm kaxkrit xaja grire htã pãwti piitã ho kaxkrit mex nê. Ja pyrã nê kot paj ixpyxi htã koja mẽ nhÿrmã pika piitã hkôt ixkôt amnhĩ nhĩpêx mex o pa. Anê.

Nhũm pre ã Jejus mẽ kãm amnhĩ tã pãw kaxkrit xaja xi nê harênh anê.

Kaxkwa hwÿr hakwa kre kahê xà jarênh

Matêwre 7.13-14, 7.21-23; Juãw 10.7-10

²² Tã nhũm Jejus arĩ krĩ pê Jerujarê hwÿr krĩ hkôt ri mẽ ahkre ho mẽ hkôt ri pa. ²³ Hãmri nhũm mẽhõ myja hwÿr tẽ nê mẽmoj tã hkukja nê kãm:

—Pa. Kwa inhmã mẽmoj jarê. Xà koja mẽ ohtõ nê nhÿrmã Tĩrtũm ri htĩr tũm nê papa ho nã koja mẽ grêre? Anê.

²⁴ Hãmri nhũm kuma nê mẽ kot mar o kuhê xwÿnh piitã kãm:

—Nã mẽ kot Tĩrtũm kôt amnhĩ xunhwÿr xwÿnhjê pix koja mẽ ò krĩ hwÿr agjê. Wÿr mẽ gjêx xaja ãm pixii nom koja mẽ ohtõ nê kãm hkôt wÿr gjêx prãm kêt nê. Na htem te hwÿr mẽ gjêx xà hõ japêr o pa pyræk. Nom pa na te ixpê hwÿr mẽ gjêx xà pixita pyræk. Jakamã kwa kër ka mẽ tokyx ixkôt amnhĩ xunhwÿr tÿx nê ixkôt ri amnhĩ nhĩpêx o ri apa. Na htem ohtõ nê kãm ixkôt amnhĩ xunhwÿr prãm kêt nê. Ixte amnhĩ nhĩpêxja mẽ kêp hihtÿx jakamã nhũm htem ixkaga.

²⁵ —Tã koja mẽ nhÿrmã ty nê tee ri kãm Tĩrtũm wÿr gjêx prãm kaprÿ. Kot paj te mẽ kêp kahê pyræk o mẽ hipêx nhũm mẽ kapõt ã kuhê nê tee ri amnhĩ tã ixpumu nê inhmã: “Kwa mẽ inhmã kahê xà mẽ pa mẽ awÿr agjê Pahihti.” Anê. Hãmri pa mẽ kãm: “Nã ixte mẽ apumunhre hã kot pa kêt ri mẽ amã kurê.” Anê.

26—Hāmri nhūm mẽ tee ri inhma nē inhmā: “Kwa nà ra ate mẽ ixpumunh mex kēnā. Na ka pre mẽ inhō krī kamā mẽ ijahkre ho ri apa nē mẽ ixkutā axàpkur o ri apa.” Anē. 27 Hāmri pa mẽ kām: “Tk. Ixte mẽ akutā ixàpkur tā mẽ ate ixkôt amnhī xunhwýyre hā. Jakamā e mẽ ma mra. Mẽ ate amnhī tomnuj pix o mẽ apa xwýnh jakamā kot kaj mẽ ixwýr agjêx kêt nē.” Anē. Kot paj ā mẽ kām ixkapēr anē.

28—Hāmri nhūm mẽ amým ri mẽ inhmex ā mẽ ixpumunh o kuhê. Kaxkwa kamā mẽ ixkīnh nē ri mẽ inhmex nē ixpa hā amým mẽ ixpumunh o kuhê. Apraāw nē Ijak nē Jako nē Tirtūm kapēr jarēnh o mẽ pa xwýnh piitā nhūm mẽ amým mẽ ixkīnh nē mẽ ixàpkur mex ā mẽ ixpumunh o kuhê. Hāmri nē tee ri mẽ ixwýr kām gjêx prām kaprý nē hkaprý nē mur nē amnhī krā hkī jarē nē amnhī kà nhē nē amnhī kamā gryk tỳx nē. No ām tee ri amnhī kamā gryk kaprý. Ā koja mẽ amnhī nhīpêx anē. 29 Nom Tirtūm kôt mẽ kot amnhī xunhwýr xwýnhjaja koja mẽ kurom pika piitā kurūm axpēn wýr akuprō nē Tirtūm wýr agjê nē kuri hkīnh nē apkur mex o hkrī. Mẽ akwýjaja nē pika piitā kurūm hohtō rax nē axpēn wýr akuprō nē hwýr agjê nē kuri apkur mex nē hkīnh nē pa ho pa.

30—Mẽ apē Ijaewjaja mẽ amā Ijaew kêt xwýnhjê hprām nōkati htā koja mẽ hkwýjaja mẽ akwýjê rom Tirtūm ri axpēn wýr akuprō nē hkīnh nē axpēn kutā apkur mex o hkrī. Jakamā kwa kot kaj mẽ urāk nē amā Tirtūm mẽ wa ixwýr agjêx prām hā kot kaj mẽ ixkôt amnhī xunhwý nē ixkapēr kôt amnhī nhīpêx mex o ri apa. Anē.

*Jejus kām Jerujarē nhō xwýnhjê japê hā harēnh
Matêwre 23.37-39*

31 Hāmri nhūm Parijew nhō xwýnh kwýjaja Jejus wýr mra nē kām:

—Pa. E ot pa mẽ awýr mra. Kwa kēr ka ma Jerujarē hwýr amōr kêt nē. Na ra mẽ hkīnh wýr pahi Eroxja pōj nē kot tanhmā ato kaxyw atā amnhī jarē pa mẽ kuma. Jakamā kwa mẽ hwýr amōr kêt nē. Nhām krī hō hwýr mām mō. Anē.

32 Hāmri nhūm mẽ kuma nē mẽ kām:

—Tk. Nà kot pa umaj nhām krī hō hwýr inhmōr kêt nē. Kot paj ma mẽ hkwýjê nē mẽkarōmnuti japōx pē mẽ hkwýjê ho mex o ma hwýr mō. Pahi Erox kām mẽ hpar pix prām. E mẽ māmri ma akupým hwýr mra nē ā kām ixkapēr jarēnh anē. No kot paj umaj nhýhým ixprōt nē ixtēm nē kēp ixpimxur kêt nē. Ra ixte ō krī hwýr inhnojarêt kēnā. Anē.

33 Hāmri nē mẽ kot mar xwýnhjê mā amnhī jarē nē mẽ kām:

—Kot paj tanhmā amnhī nhīpêx to ho ri ixpa rāhā Jerujarē hwýr mōn pōj nē kamā ty. Kamā na htem mẽ kot Tirtūm nhý hā kapēr jarēnh xwýnhjê nhīmex. Tā hwýr kot paj mō. Anē.

Nhūm pre ā Jejus mẽ kām amnhī jarēnh anē. 34 Hāmri nē te ra kot Jerujarē nhō xwýnhjê pumunh o ām nē mẽ kām kapēr pyrāk o kapēr nē mẽ kām:

—Hêxta waa nē mẽ apē Jerujarē nhō xwýnhjaja. Tirtūmja xatā mẽ awýr ý hā kapēr jarēnh o mẽ pa xwýnhjê rēnh tā ka mẽ kapēr mar kêt nē. Nē axtem nē kēn o mẽ htak o mẽ himex o apa. Na ka htem ā amnhī tomnuj o apa anē. Tā arī inhmā mẽ ajamār o ri ixpa hprām. Te ho krāhyre kot nore hpro nē ho hikwý pyrāk o na pa inhmā mẽ anhīpêx prām tā ka mẽ apē ixprām nōkati nē ixkaga. 35 Mýrapê koja Tirtūm mẽ anhō krī jamār kêt nē. Kot paj tokyx ty nē mẽ apiitā mẽ are nē ma akupým api ka mẽ axte ixpumunh kêt nē. Ām akupým ixwrýk xā hā arīgrotā pix ā koja mẽ akwýjaja mẽ amýr pē krī ja hwýr

ixwryk kãm ixpumu. Hãmri nẽ mẽ akurom ixpumu nẽ hkĩnh tỳx nẽ. Nẽ tã ixkõt amnhĩ xunhwý nẽ axpẽn mã ijarẽn o:

E ota Tirtũm kot mẽ pahwýr mẽn h xwýnhnta pøj. Nà ãm hãmri na mẽ pahwýr wrý. Na mex kumrẽx. Anẽ.

14

Jejus kot axte arĩgromnu hã mẽhõ ho mex ã harẽn

Rukre 13.10-17

¹ Tã nhũm sap nhũm Jejus ma Parijew nhõ xwýnhjẽ krãhtũm kutã apkur kaxyw òrkwý hwýr tẽ. Hãmri nhũm mẽ wa hã hturax nẽ Jejus apkur ã tãnopxar o kuhẽ. Mẽ kot amnhĩ nhĩpẽx kwým ri tanhmã amnhĩ nhĩpẽx to nhũm mẽ kot hã omunh nẽ ra hã ãmnhẽn kaxyw nhũm mẽ kuri htãnopxar o kuhẽ. ² Nhũm ixkreja kamã mẽhõ my hte hikot xwýnh mẽ kuri xa. ³ Hãmri nhũm Jejus omu nẽ hã Parijew nhõ xwýnhjẽ mẽ Tirtũm kapẽr tũm o mẽ ahkre xwýnhjẽ kukja nẽ mẽ kãm:

—Kwa mẽ inhmã mẽmoj jarẽ. Jarãhã na mẽ panhõ arĩgromnu pẽ sap. Tanhmã na pre finat Mojesja Tirtũm nhý hã mẽ pahte sap ã tanhmã amnhĩ nhĩpẽx to hã mẽ pamã karõ hto? Xà kot puj mẽ akupým mẽ ho mex nã? Kot puj mẽ ãm mẽ omu nẽ akupým mẽ ho mex kêt nẽ? E mẽ atõ inhmã ja jarẽ. Anẽ.

⁴ Hãmri nhũm mẽ kuma nẽ tanhmã kutã kãm nẽ hkêt nẽ. ãm akryk mar o kuhẽ. Mẽ kot tanhmã kãm nẽ nhũm kot ta pãnhã mẽ kãm tanhmã nẽ pymaj nhũm mẽ akryk mar o kuhẽ nẽ tanhmã kutã kãm nẽ hkêt nẽ. Hãmri nhũm tee ri mẽ omu hãmri nẽ myja ã ihkra xi nẽ akupým ho mex. Hãmri nẽ hano nhũm ma akupým mex nẽ hkĩnh nẽ ma tẽ. ⁵ Hãmri nhũm Jejus mẽ kãm:

—E mẽ inhma. Xà koja mẽ akra sap ã mẽ apẽ ahkrehti xupým kãm tẽm ka mẽ ãm omu nẽ arĩgro mex jamãr pẽ tokyx ho axãpir kêt nẽ? Nà kot kaj mẽ ho axãpir kurẽ kumrẽx. Rý koja akrit môx gyw mã axã xãt ka mẽ omu nẽ ãm omu nẽ arĩgro mex jamãr pẽ tokyx hkaxãr kêt nẽ? Nà kot kaj mẽ hkaxãr kurẽ kumrẽx. Na htem sap ã tanhmã mẽ ho mex to ho pa. Mẽ panhõ arĩgromnu htã pu htem hã tanhmã mẽ ho mex to. Jakamã na pa ã hã myta ho mex kurẽ kumrẽx anẽ nẽ ri arĩgro mex jamãr kêt nẽ. Anẽ.

⁶ Nhũm pre ã Jejus mẽ kãm amnhĩ jarẽn anẽ nhũm mẽ kuma nom kutã kãm mẽmoj jarẽn kêt nẽ. Ra kot akupým ho mex jakamã nhũm mẽ tanhmã hã kãm nẽ hkêt nẽ kuhẽ.

Mẽ pahte amnhĩ to hkryre hã mẽ pajarẽn

Matẽwre 23.6-14; Rukre 6.32-36; mããnẽn Xiakre 4.10; Wam Pẽtre 5.5-6

⁷ Hãmri nhũm mẽ apkur kaxyw mẽ hkrĩ xã hã hkrĩ hpa. Nhũm mẽ hkwyjaja hkwyjẽ pẽ amnhĩ to wa nẽ mẽ hkrĩ xã mex kãm hkrĩ hpa. Hãmri nhũm Jejus ja hã mẽ omunh o xa nẽ axte mẽ kãm mẽmoj jarẽ. No ãm mẽmoj tã kuxi nẽ mẽ kãm awjarẽ nẽ mẽ kãm:

⁸—Nà koja mẽ axpẽn mã mẽhõ rer kaxyw nẽ amnhĩ wýr mẽ atã karõ. Mẽ ate kutã axãpkur kaxyw. Hãmri kër ka mẽ hwýr mra nẽ axãpkur kaxyw nẽ kupĩp kãm akrĩ kurẽ kumrẽx. No kot kaj mẽ kẽp amnhĩ to wa nẽ mẽ hkrĩ xã mex pytã nẽ hã akrĩ nhũm ra kot amnhĩ to rax xwýnhjẽ hõja hapu hã mẽ akõt tẽn axã. ⁹ Hãmri nhũm ixkre nhõ dõn kot amnhĩ wýr mẽ awýr xwýnhnta mẽ hkrĩ xã mexta ã mẽ awý nẽ mẽ amã: “Kwa mẽ atõ kãnhmã xa nẽ kãm mẽ hkrĩ xã kaprã.” Anẽ. Hãmri ka nhãm xa nẽ kãm anhýr xãta gõ. Hãmri nẽ apijaãm kãm hpãnhã kupĩp kãm nhý. ¹⁰ Ja pymaj kër ka mẽ kupĩp kãm akrĩ kurẽ kumrẽx. Kẽ

ixkre nhõ dõnja tee ri ja hã mẽ apumu nẽ mẽ amã: “Tk. Kwa ixkrãmnhwýjaja. Mẽ kupĩp kãm akrĩ hkêt nẽ. Kwa mẽ mra nẽ jar mẽ hkrĩ xà mex ã mãn akrĩ.” Anẽ hãmri nhũm ja mẽ amã mex nẽ. Nhũm mẽ piitã kot mẽ ato mex ã mẽ atã omu ka mẽ ajaxwýja amnhĩ tã omu nẽ akĩnh nẽ ajamakêtkati nẽ akrĩ.

¹¹—Nẽ koja mẽhõ te amnhĩ to rax o hkwyjẽ jakrenh pyrãk o amnhĩ nhĩpẽx o ri pa hãmri nhũm Tirtũm ja hã omu nẽ tanhmã hã ho. Hãmri nhũm ra amnhĩ to grĩre hã amnhĩ pumunh o ri pa nẽ rĩ amnhĩ pumu. Nom koja mẽhõ amnhĩ to rax o hkwyjẽ jakrenh pyrãk o amnhĩ nhĩpẽx o ri pa hkêt nhũm Tirtũm ja hã omu hãmri nẽ tãm amnhĩm kot amnhĩ to rax xwýnh ã harẽ. Anẽ.

Mẽ pahte mẽ kęp amrakati xwýnhjẽ ho mex ã mẽ pamã karõ

¹² Nhũm pre ã Jeus mẽ ahkre anẽ hãmri nẽ hpãnhã mẽ apkur xà hã ixkre nhõ dõnja mã kapẽr nẽ kãm:

—Nà na ka hte amnhĩ wýr akwýjẽ pix wý. Atõjẽ hwý nẽ akrãmnhwýjẽ hwý. Nẽ mẽ hikãxpore rũnh xwýnhjẽ hwý. Nom nhýrmã mẽ kot amnhĩ xwar amnhĩ nhõrkwy hwýr awýr pix kaxyw na ka hte ã amnhĩ wýr mẽ hwýr anẽ. ¹³ No kêt amnhĩ wýr mẽ no kre xwýnhjẽ mãn wý. Nẽ mẽ hýk o mẽ pa xwýnhjẽ mãn wý. Nẽ mẽ hkrã pipãnh puro xwýnhjẽ mãn wý. Nẽ mẽ hpigẽx tỳx xwýnhjẽ mãn wý. Nẽ mẽ hĩrot nẽ àpẽnh kêt xwýnhjẽ mãn wý. Kêr ka amnhĩ wýr jajẽ mãn wý kẽ mẽ awýr mra nẽ akutã apku. ¹⁴ Mo mẽ kot amnhĩ xwar awýr kaxyw mẽ õ mẽmoj? Mẽ kęp amrakati. Tã kot kaj mãmri amnhĩ wýr mẽ awý nhũm Tirtũm mẽ hã apumu hãmri nẽ nhýrmã kot akupým mẽ ho hũr xà hã arĩgrota ã mẽ hã amã mẽmoj mex gõ nẽ ato mex nẽ. Hãmri ka akĩnh nẽ. Anẽ.

Tirtũm kutã mẽ paxãpkur xà maati jarẽnh

Matêwre 8.11, 25.1-10, 26.29; mããnẽn Apokariþ 19.9

¹⁵ Hãmri nhũm mẽ apkur kaxyw hkrĩ pa nhũm Jeus nhĩhkõ hã mẽ apkur o mẽ krĩ xwýnhjẽ hõja tanhmã Jeus mã kapẽr to nẽ kãm:

—Hẽxta waa nẽ. Kot puj mẽ nhýrmã Tirtũm nhõ krĩ hwýr api nẽ kutã paxãpkur o pahkrĩ nẽ pahkĩnh tỳx kumrẽx. Anẽ.

¹⁶ Hãmri nhũm kuma nẽ kẽ axte mẽ ahkre. Mẽ kot Tirtũm kutã apkur kaxyw kot amnhĩ wýr mẽ hwýrta ã nhũm mẽ ahkre. No ãm hã kuxi nẽ tanhmã mẽ kãm ujarẽnh to nẽ mẽ kãm:

—Koja mẽhõ amnhĩ wýr mẽ ho ohtõ nẽ mẽ kot kutã mẽ apkur mex kaxyw mẽ kuwý. ¹⁷ Hãmri nẽ mẽ hwýr kãm àpẽnh xwýnh mẽ nẽ kãm: “E ma tẽ nẽ mẽ kãm awjarẽ kẽ mẽ tokyx mra pa mẽ apku.” Anẽ. ¹⁸ Hãmri nhũm kuma nẽ ma mẽ hwýr mẽ kãm ujarẽnh o tẽ. Hãmri nẽ wamta mã anẽ nhũm kuma hãmri nẽ hitõt nẽ kãm: “Nà kot paj hwýr ixtẽm kêt nẽ. Na pa ham amnhĩm pika hkwy japrõ. Jakamã kot paj ma hwýr tẽ nẽ ixprĩ hã omu mãn. Kwa kêr ka kãm ijarẽ kẽ ixe tanhmã hã nẽ xà hkõt ã ixe amnhĩ nhĩpẽx anhýrja mã hamaxpẽr kêt nẽ.” Anẽ.

¹⁹—Hãmri nhũm kuma nẽ hpãnhã nhãm ja wýr tẽ nẽ kãm awjarẽ nhũm kuma nẽ haxwýja hitõt nẽ kãm: “Nà kot paj hwýr ixtẽm kêt nẽ. Na pa ham amnhĩm mõx o 10 nẽ haprõ. Jakamã kot paj ma hwýr tẽ nẽ ixprĩ hã ri omu mãn. Kwa kêr ka kãm ijarẽ kẽ tee ri tanhmã hamaxpẽr to hkêt nẽ. Ixe tanhmã hã nẽ xà hkõt ã ixe amnhĩ nhĩpẽx anhýr kêt.” Anẽ.

²⁰—Hãmri nhũm kuma nẽ hpãnhã ma ihõta wýr tẽ nẽ kãm awjarẽ nhũm kuma nẽ haxwýja hitõt nẽ kãm: “Nà kot pa hwýr ixtẽm kêt nẽ. Na pa kormã ham ixprõ. Kormã ixprõ nyw nẽ inhmã rer prãm kêt jakamã kot paj ma hwýr ixtẽm kêt nẽ.” Anẽ.

21 —Hāmri nhūm kām àpènh xwỳnhnta tee ri mẽ kuma nẽ awjanã nẽ ma akupỳm tẽ. Kot ma mẽ hwỳr mèn̄h xwỳnhnta wỳr ma akupỳm tẽ nẽ kām mẽ harẽ. Hāmri nhūm tee ri mẽ harèn̄h ma nẽ mẽ kamã gryk nẽ. Hāmri nẽ hpānhã mẽ kęp amrakati xwỳnhjẽ hwỳr kām àpènh xwỳnhnta mẽ. Mẽ hkrã pipānh puro xwỳnhjẽ hwỳr kumẽ. Nẽ mẽ hpigèx tỳx xwỳnhjẽ hwỳr kumẽ. Nẽ mẽ hirot nẽ àpènh hkèt xwỳnhjẽ hwỳr kumẽ nhūm ma mẽ kām ujarèn̄h o tẽ. Hāmri nẽ amnhĩ kôt mẽ kuwỳ nhūm mẽ kuma nẽ wamtajẽ rom hkõt mrar kurẽ kumrẽx. Hāmri nẽ agjẽ nẽ apkur kaxyw mẽ hkrĩ xà kamã hkrĩ hpa. 22 Hāmri nhūm kām àpènh xwỳnhja ò patrāw wỳr tẽ nẽ kām mẽ harẽ nẽ kām: “E ate mẽ hã karõ xàta kôt na mẽ ra hkrĩ hpa htã arĩ mẽ hkrĩ xà hkwy hkaprỹ.” Anẽ.

23 —Hāmri nhūm kuma nẽ kām: “Hèxta waa nẽ. Kèt ãm mẽ hkrĩ xàta hipu mex ronhỳx pa omu nẽ ixkĩnh nẽ. No ãm kormã piitã hipu hkèt. Kwa ka krĩ pu hã ri mẽ hapèr o mra. Nẽ nhỹri mẽ hkwyjẽ pumu nẽ mẽ haprõ nẽ man amnhĩ kôt mẽ o mra kẽ mẽ hkrĩxã ho hipu hpa. 24 No kèt wam ixte amnhĩ wỳr mẽ hwỳr xwỳnhntaja. Mẽ hitõt xwỳnhjaja kot paj axte amnhĩ wỳr mẽ hwỳr kèt nẽ.” Anẽ. Á mẽ ujarèn̄h kot anhỹr. Na hte ã Tirtũm amnhĩ wỳr mẽ piitã mẽ hwỳr anẽ. Anẽ.

Mẽ pamã Jejus kĩnh tỳx ã mẽ pamã karõ

Matèwre 10.37-38; Makre 8.34; Rukre 9.23-25; Juãw 12.26

25 Tã nhūm Jejus mẽ òrkwỹ rũm kato nẽ kormã Jerujarẽ hwỳr mō nhūm mẽ hohtõ rax nẽ hkõt mō. Hāmri nhūm Jejus xa nẽ mẽ ho hakèx nẽ mẽ omu nẽ mẽ kām:

26 —E kot ka mẽ atõ amã ixkõt amnhĩ xãm prãm nẽ ã amnhĩ nhĩpèx anẽ. Nẽ amã atõ nẽ atõx nẽ anhĩpèèxã nẽ akatorxã japè htỳx tã kèr ka amã ixkĩnh tỳx o wa mẽ hakrenh pa. Nẽ amã aprõ nẽ akrajẽ japè htỳx tã kèr ka amã ixkĩnh tỳx o wa mẽ piitã mẽ hakrenh pa. Nẽ amã ixkĩnh tỳx o amã amnhĩ japè jakre. Kèr ka mẽ atõ ixkõt amnhĩ xãm kaxyw nẽ ã amnhĩ nhĩpèx anẽ.

27 —Koja mẽ ixpĩ pa mẽ anè ty. Tã mẽ ate ixkõt amnhĩ nhĩpèx o mẽ apa xwỳnhjaja. Kojã mẽ ixtã mẽ apar mã tã kèr ka mẽ amã ixkĩnh tỳx o mẽ umaj ixkaga hkèt nẽ. Kwār mẽ māmri tanhmã ixtã mẽ ato. Kot kaj mẽ nhỹrmã Tirtũm mẽ wa ixri axte amnhĩ xà kamã ajamak kèt nẽ atĩr tũm nẽ amex rāhã apa ho apa. Nom kot kaj mẽ ixkĩnhã jar pika ja kamã amã amex nẽ apa hprãm xaj ixkaga hāmri nẽ nhỹrmã wa ixri atĩr tũm nẽ apa hkèt nẽ. Anẽ.

Mẽ pahte amnhĩ kukamã pajamxpèr mex ã mẽ pamã karõ

28 Nhūm Jejus arĩ mẽ kām kapèr nẽ mẽ kām:

—Kwa kèr ka mẽ ixkõt amnhĩ xunhwỳr kaxyw nẽ amnhĩ kukamã ajamaxpèr mex nẽ. Na htem amnhĩm òrkwỹ rũnh nhĩpèx kaxyw hāmri nẽ hkukamã hamaxpèr mex nẽ. Nẽ kaxyw krax mã kuhè xà hkukamã hamaxpèr. Nẽ kaxyw kỳx pè kām hikwỹ xàja kukamã hamaxpèr. Nẽ òkwaèja kukamã hamaxpèr. Nẽ hã pòja kukamã hamaxpèr. Á na htem amnhĩm òrkwỹ rũnh nhĩpèx kaxyw hkukamã hamaxpèr mex anẽ. 29 Nom kot kaj mẽ hkukamã ajamaxpèr mex kèt nẽ ãm kaxyw pĩ ho grèrè nẽ hakà. Rỳ ra hã axàpènh rax kurẽ ra amã ho anhỹr kaga nẽ hkaga hpa nẽ hatur xãm mèn̄h kèt nẽ. Hāmri nhūm mẽ hkwyjaja hānh mra nẽ omu nẽ atã hpèr o axkẽ. 30 Nẽ axpèn̄ m ri ajarèn̄h o: “E ga mẽ ixkre mũj pumu. Na pre hipèx xwỳnhja hkurẽ kām kaga nẽ hipèx par kèt nẽ.” Anhỹr o axpèn̄ mã ajarẽ. Ja pyrã nẽ kèr ka mẽ ixkõt amnhĩ xunhwỳr kaxyw nẽ amnhĩ kukamã ajamaxpèr mex nẽ. Nẽ ajamaxpèr o: “Nà mẽ kot Jejus ã tanhmã ixto htỳx tã kot paj hkaga

hkêt nê. Kot paj hkôt amnhî nhîpêx rāhā ho ri ixpa.” Anhÿr o amnhî kukamā ajamaxpêr. Hāmri nê rî kormā ixkôt amnhî xām. No kot ka mē umaj ixkaga hkukamā ajamaxpêr hāmri nê ixkôt amnhî xām kêt kurê kumrêx.

31—Nê koja krî hō kamā pahihiti nhō pôristi xohtô nê. Nê kutā nhām krî hō kamā pahihiti nhō pôristija grêre. Tā nhūm wa hpijapu kaxyw nhūm krî hō rūm pahihiti nhō pôristi xohtôja mē grêreta wÿr mra. Hāmri nhūm kutā krî hō kamā mē ô pôristi grêre nhō pahi nhÿ nê tee ri mē amnhî kukamā hamaxpêr nê hamaxpêr o: “Kwa koja apu krî hō rūm pôristi xohtô raxja nhūm inhō pôristi grêreja mē axpên kutā kuhê nê axpu nhūm mē inhnê mē himex. Nā inhō pôristi grêre kênā.” Anhÿr o hamaxpêr.

32—Hāmri nê pahi hōta wÿr ô kôwenatô mē. Kormā krî hō rūm mē hohtôtaja mē htêp kêt nhūm mē kutā kumê nhūm ma mē kutā tē. Hāmri nê awry hā mē hkaxpa nê mē ô pahihiti mā kām: “E na mē inhō pahihiti akutā inhmê pa tē. Na inhmā: ‘Ma tē nê mē kām awjarê. Kot puj pêr mē papijapu hkêt nê. Kwarî. Kot puj mē tām axpên xunhwÿ.’” Anhÿr o kapêr nê mē akutā inhmê pa tē.” ā mē ujarênh kot anhÿr. Ja pyrā nê na htem mēmoj kukamā hamaxpêr mex nê rî kormā tanhmā amnhî nhîpêx to.

33—Tā kër ka mē atō amā ixkôt amnhî xām prām hāmri nê pahita pyrā nê amnhî kukamā ajamaxpêr tÿx nê rî kormā tanhmā amnhî nhîpêx to. Kër ka ate inhmā tanhmā amnhî nhîpêx to ho apa kaxyw hāmri nê inhgryk ā te ate amā amnhî japê hkêt pyrāk o mēmoj piitā mā anhîhkra karo pyrāk o amnhî nhîpêx. Hāmri nê rî kormā ixkôt amnhî xām.³⁴⁻³⁵ No kot kaj mē amnhî kukamā ajamaxpêr kêt nê atÿx ri ixkôt amnhî xunhwÿr japêr. Hāmri nê mēmo arîgro hā mē kot ixtā tanhmā mē ato xwÿnhjê pymaj ra ixkaga mā. Hā kot kaj mē te mē ate kaxwa punu pyrāk o amnhî nhîpêx. Kaxwaja mē apkur xā kamā mex. Na htem amnhîm ho ô xānh nê kuku. Nom koja mēhō kamā pika hkwy mē nê ho ahkâ hāmri tanhmā kot mē ho nê akupÿm ho mex? ām mē kot hkapîr pix kaxyw koja mex. Ja pyrā nê kot ka mē atō ate inhmā tanhmā amnhî nhîpêx to ho apa hā amnhî jarênh tā gaa nê amā ixkôt amnhî nhîpêx prām nōkati. Hāmri nê ra te ate kaxwa punu kapîr mā tāmta pyrāk. E kwa mē mēmoj tā ixujarênhja ma nê mē urāk nê amnhî kukamā ajamaxpêr mex nê. Anê.

15

ôwêhti pikunor jarênh

Matêwre 18.12-14

1 Tā nhūm mē kot pahihiti mā hkwyjê pê kâxpore hkwy jamÿnh xwÿnhjê mē mē kot amnhî tomnuj xwÿnhjaja Jejus kapêr mar kaxyw hwÿr mra.
2 Hāmri nhūm Parijew nhō xwÿnhjê mē mē kot Tirtūm kapêr tūm o mē ahkre xwÿnhjaja mē hā Jejus punu. Hāmri nê kê wem axte axpên mā tanhmā ho kapêr punuj to nê axpên mā:

—Tk. Kwa na hte mÿjiti axtem nê mē kot amnhî tomnuj xwÿnhjaja amnhî wÿr mē kuwÿ nê tōhā mē kutā apku. Kwa mē kot amnhî tomnuj xwÿnh kênā kot kêt mē kutā apkur o pa. Anê.

3 Hāmri nhūm Jejus amnhî tā mē kuma nê tanhmā mē kām kapêr to. Nom hpri hā mē kām kapêr kêt nê. Kê ām amnhî tā kuxi nê mē kām ôwêhti pikunor jarê nê mē kām:

4—Koja mēhō ô ôwêhti xohtô nê. Nê ma nhÿri hamār o pa. Hāmri nhūm pyxire nê hkwy kaga nê ma nhÿhÿm ahte tē nê akunok. Hāmri nhūm ô dōnja

ma kot akupÿm piitã o mŕ kaxyw hkwÿ ho pikuprŕnh pa hãmri nê tee ri hkwÿ kaêx ã pikunor xwÿnhnta japêr. Hãmri nê ma hkwÿ ho mŕ nê nhÿri kure. Kot nhÿri kutêp apkur o ri pa kaxyw kure hãmri nê ma akupÿm pikunor xwÿnhnta japêr o tê. Hãmri nê hapêr ryy nê nhÿri hwÿr kato. ⁵Nê omu nê hkÿnh tÿx nê. Hãmri nê amnhÿ kre hã kumê nê ma akupÿm hkwÿ hwÿr o tê. ⁶Hãmri nê mê ðhkŕ hã kumê nê hkÿnh nê hkrãmnhwÿjê ho akuprŕ nê ðrkwÿ htã mê ðrkwÿ xwÿnhjê ho akuprŕ nê mê kãm: “Kwa na pre ixpê ixkriita ō akunok. Pa pre hapêr kãm ixihÿtÿx nê kãm ixkato nê omu nê ixkÿnh nê. Jakamã kwa wem mãânên inhÿ hã akÿnh.” Anê.

—Ã mê ujarênh kot anhÿr. ⁷Ja pyrã nê koja mê kot amnhÿ tomnuj tÿx xwÿnhjê hŕ tee ri amnhÿ pumu nê kot amnhÿ tomnuj kaga nê Tÿrtÿm kŕt amnhÿ xãm. Hãmri nhÿm kaxkwa kamã mê piitã ja hã omu nê hkÿnh tÿx nê. Te ho my kot ōwêhti hpikunor xwÿnh mã kator nê hkÿnh tÿxta pyrãk. Na hte Tÿrtÿm tãm mê kot amnhÿ nhÿpêx o mê pa xwÿnhjê pumu nê hkÿnh nê. Tã koja mêhŕ kot amnhÿ tomnuj tÿx tã ã amnhÿ nhÿpêx anhÿrja kaga nê Tÿrtÿm kŕt amnhÿ xãm hãmri nhÿm amnhÿ tã omu nê hkÿnh tÿx nê. Jakamã na pa hte mê akurom ã mê kot amnhÿ tomnuj xwÿnhjê hkŕt Tÿrtÿm kapêr o mê ahkre rãhã ho ri ixpa. Anê.

Nhÿm pre ã Jejus mê kot tanhmã ho kapêr punuj to xwÿnhjê mã amnhÿ jarênh anê.

Kãxpore pikunor jarênh

⁸Nhÿm Jejus arÿ mê kãm awjarê nê mê kãm:

—Nê ja. Koa mêhŕ ni hikãxpore kêp 10. ãpênh o arÿgro pê 10 pãnhã kãxpore kêp 10. Tã ho pyxi nê ho akunok. Hãmri nê tee ri hapêr nê hkaprÿ nê. Hãmri nê kanê hpŕk nê hitom kapŕnh pê hprÿ hã hapêr o ri pa nê kãm kato. ⁹Hãmri nê kupy nê hkÿnh nê hkrãmnhwÿjê ho akuprŕ nê ðrkwÿ htã mê ðrkwÿ xwÿnhjê ho akuprŕ nê mê kãm amnhÿ jarê nê mê kãm: “Xê na pre ixpê ixkãxpore hŕta akunok pa tee ri hapêr tã akupÿm kãm ixkato nê kupy nê ixkÿnh nê. Jakamã xê wem inhÿ hã mãânên akÿnh.” ã mê ujarênh kot anhÿr.

¹⁰—Ja pyrã nê koja mê kot amnhÿ tomnuj xwÿnhjê hŕ pyxire nê amnhÿ tomnuj kaga nê ixkŕt amnhÿ xãm. Hãmri nhÿm kaxkwa kamã mê piitã ja hã omu nê hkÿnh nê. Te mêhŕ ni kot kãxpore pikunor xwÿnh mã kator nê hkÿnhnta pyrãk. Anê.

Mê hkra pikunor jarênh

¹¹Nhÿm Jejus arÿ mê ahkre ho xa. Tÿrtÿm kãm mê piitã mê hapê htÿx ã mê ahkre ho xa. No kê ãm hã kuxi nê kê we tanhmã mê kãm ujarênh to nê mê kãm:

—Nê koja mêhŕ hkra my wa axkrut. ¹²Hãmri nhÿm kot hapu ō papaj wÿr tê nê kãm: “E papaj. Ot pa awÿr tê. Kot kaj nhÿrmã ty pa wa amÿr pê akukrêx o ixãrÿk. Jakamã e kwa tokyx atÿr ri amnhÿ kamã wa inhãmã ho axkjê pa inhŕ ho amnhÿptãr kurê kumrêx nã?” Anê. Hãmri nhÿm kuma nê wa kãm hikukrêx o axkjê. Kot wa mã hkwÿ gŕ nê kot hapu mã hkwÿ gŕ. ¹³Hãmri nhÿm kot haputa ãm ri hipêxã hkŕt pa hkrãnre hãmri nê kot kãm hikukrêx nhŕr jamÿnh pa nê ma nhÿhÿm o mŕ nê ho wênê hpa. Hãmri nê hpãnhã kãxpore jamÿ nê ma nhÿhÿm mŕ. Nhÿhÿm awry hã pika hŕ hwÿr ma mŕ. Mŕh hãmri nê krÿ hŕ kamã htÿx ri tanhmã amnhÿ tomnuj to ho ri pa. Hãmri nê gaa nê ra mê hkuprÿjê hã kãxpore ho hapêx pa. Nê kagŕxÿhti hã ho hapêx pa. Nê gaa hãmri nê hikãxpore hkêt nê ri pa.

14—Rôm nhùm pikaja kamã mẽ hã na wrỳk kêt ry rax nê. Nê gaa nhùm mẽ hpur kãm mẽ kêp mẽ apkur xà hã mẽõja hapêx pa. Jakamã nhùm mẽ hkra kot haputa kêp amrakati nê kãm prãm tỳx nê ri pa. Hãmri nê tee ri amnhĩ kukamã hamaxpêr. 15 Hãmri nê amnhĩ to krĩ nhõ xwỳnhjê mar o ri pa. Kot mẽ kãm tanhmã àpênh to nê hpãnhã apkur kaxyw. Hãmri nhùm mẽhõ kot kãm hkrit hagrõ jamãr kaxyw hã kumê nhùm ma hwỳr tê nê kãm hamãr o pa. Nom kot kãm hamãr o pata pãnhã ãm kãm mẽmoj nhõr kryre nhùm arĩ kãm prãm tỳx kumrêx.

16 Nê tee ri kot hagrõ kutã òta kur prãm nê tee ri omunh o pa. 17—Nê gaa hãmri nê tanhmã hamaxpêr to. Nê tee ri kot tanhmã amnhĩ tomnuj toja ã amnhĩ pumu nê hamaxpêr o: “Hêxta waa nê. Mãn mũtar inhõ krĩ kamã inhõ papaj mã mẽ àpênh xwỳnhjaja ixrom apkur mex o pa. àpkur mex nê nhùm mẽõ jakrêx prãr rũnh tã pa jar mẽ hkĩnhã prãm xàj ra ixtyk o mõ. 18 Nà kot paj ma akupỳm mõ. Hãmri nê inhõ papaj pumu nê ã kãm amnhĩ jarênh anê nê kãm: ‘Kwa Papaj. Na pa pre ixpê akra hã amnhĩ tomnuj tỳx kumrêx nhùm ja apê omnuj nê. Nhùm Tĩrtũm pê ja omnuj nê. 19 Jakamã na pa ixpê akra hã amã amnhĩ jarênh ã xpijaãm nê. Ixte tãm kêt kumrêx. Jakamã kwa xà kot pa amã mẽmoj tã ixàpênh o ri ixpa ka hpãnhã inhãm inhõ pa apku nà?’ Anhỳr o kot pa kãm amnhĩ jarê. Nà kot paj anê.”

20—Anhỳr o amnhĩ kukamã hamaxpêr hãmri nê ma akupỳm mõ. Mõõ nê ra hpõx o mõ. Nê kormã amỳm mõr ri nhùm õ papaj hwỳr rĩt nê omu nê amnhĩ kra hã omunh kur kumrêx nê hkĩnh nê ma kutã hprot nê tê. Omu nê kãm hkapri nê. Nê hwỳr hprot nê hkaxpa nê kahti hkõt kumy. 21 Hãmri nhùm kãm amnhĩ jarê nê kãm: “Kwa papaj. Na pa pre amnhĩ tomnuj nê nhùm ja apê omnuj nê. Nê Tĩrtũm pê ja omnuj nê. Jakamã ixte ixpê akra hã amã amnhĩ jarênh ã xpijaãm. Ixte tãm kêt kumrêx.” Anê. 22 Nom kormã kãm amnhĩ jarênh par kêt ri nhùm hipêxà kãm mẽ àpênh xwỳnhjê mã akir nê mẽ kãm: “E kwa mẽ atõ ma tê nê kãm ê mex õ py nê akupỳn ixkrata wỳr ho aprõt nê kãm haxà. Nê hpar kà nê ìhkra kamã kax nê amnê kãm hamỳ nê ho aprõt. 23 Nê akupỳm aprõt nê moux kra htwỳm mexta õ pumu nê unê nê apĩ. Nê mẽ ho anê pu mẽ ìxkra hã pahkĩnh nê apku. E mẽ amnhĩ prêprêk nê tokyx ã amnhĩ nhĩpêx anê. 24 Na pa pre ma ixpê mõr o te ixpê htyk pyrãk. Tã akupỳn mõ nê ìxwỳr pøj nê te akupỳm inhãm hũr pyrãk. Jakamã e mẽ tokyj.” Anhỳr jakamã nhùm mẽ hã moux kra pĩ nê ho anê nê hkĩnh nê hã apkur o hkri.

25—Rôm nhùm hkra kot wata kormã pur kãm htỳx àpênh o xa. àpênh o ãm tã akupỳn hpõx o tê. Hãmri nê amnhĩ kukamã mẽ kot ri mẽmoj tatak nê mẽ gre ma. 26 Hãmri nê tee ri hamaxpêr o tê nê òrkwỳ hwỳr pøj nê kormã kapem xa nê mẽ hã mẽ àpênh xwỳnhjê hõ kukja nê kãm: “Kwa mẽmoj tã na ka wem ã akĩnh rax anê?” 27 Anê nhùm kãm: “Nà mẽhõ hkêt. Atõ na akupỳn pøj nhùm anhĩpêxà omu nê hkĩnh tỳx nê. Nê mẽ inhãm anê pa mẽ hã moux kra htwỳm mexja pĩ nê hã ho anê nê hã ìxkĩnh nê hkur o ìxkrĩ.” Anê. 28 Hãmri nhùm tee ri htõ jarênh ma nê gryk tỳx nê. Hãmri nê gryk xàj kapem hkuk punuj o mẽ omunh o xa nê mẽ hwỳr àr kêt nê. Hãmri nhùm hipêxàja tee ri omu nê hwỳr kato nê tee ri kot mẽ hwỳr ho àr kaxyw ho anhỳr kaprỳ. 29 Hãmri nhùm kãm: “Tk. Kwa na pa hte amã ìxàpênh rũnh rãhã ho ri ixpa hã ra ìxtã amgrã xohtõ nê. Nê aa akapêr nhĩrõp tanhmã ìxãm to hkêt. Tã ka hte ìxpumunh nê akĩnh nê ìxtã mẽmoj tõx pĩr kêt nê. 30 Tã nhùm akra kot haputa apê akukrêx kwỳ jamỳnh pa nê ma o mõ nê axtem nê mẽ hkuprỳjê mã òr par tã akupỳn mõ nê

pôj. Ka omu nê akĩnh nê hã môx kra twýmta pĩ. Nà kot paj mẽ awýr ixàr kêt nê.” Anê.

—Hãmri nê gryk tỳx nê xa. ³¹Hãmri nhũm ô papaj tee ri kuma nê kãm: “Kwa nà ri ã akapêr anhýr kêt nê. Inhmã ajapê kênã. Na ka hte ixkôt apa ho apa rãhã nê. Nê ixkukrêx piitã kêp anhõo. ³²No atõja na pre te ixpê htyk pyrãk tã arĩ htĩr. Nê te pikunor pyrãk tã te ra akupým kator pyrãk jakamã na pa omu nê ixkĩnh nê. Nê inhmã hapê ho te mããnên inhmã ajapê pyrãk.” Anê.

—Ã mẽ ujarênh kot anhýr. Ja pyrã nê koja mēhõ te kot amnhĩ tomnuj tỳx o ri pa htã amnhĩ kaxyw Tĩrtũm mã hamaxpêr nê amnhĩ to kuwý nê hkõt amnhĩ xãm. Hãmri nhũm amnhĩ tã omu nê hkĩnh nê. Nê kãm hprãm nê. No mẽ kajaja. Mẽ apê Parijew nhõ xwýnhjê mẽ Tĩrtũm kapêr tũm o mẽ ahkre xwýnhjaja. Na ka htem mẽ kot amnhĩ tomnuj xwýnhjaja kot Tĩrtũm kapêr mar o kuhê hã mẽ omu nê Tĩrtũm kĩnhã akĩnh kêt nê. Nê te hkra kot wata jamaxpêr pyrãk o ajamaxpêr nê tee ri ja hã mẽ omu nê mẽ kamã agryk nê. Nê mẽ amã mẽ hprãm nõkati. Anê.

16

Mẽ panhõxý nê Jejus kot mẽ pamã karõ

¹Tã nhũm kê Jejus axte hkõt ri mẽ pa ho mẽ pa xwýnhjê jahkre. No ãm mẽmoj tã kuxi nê mẽ kãm tanhmã ujarênh to nê mẽ kãm:

—Nà koja mēhõ hikãxpore rax xwýnhja kãm àpênh xwýnh mã mẽmoj to wēnê ho pa kaxyw ãm. No nhũm kãm ho mex kêt nê. Axtem nê kêp amarĩ mẽ kãm mẽmoj to fiat par o mõ. Hãmri nhũm ra mēhõ kot ã amnhĩ nhĩpêx anhýr ã omu nê ma ô patrãw wýr tē nê kãm harê. ²Hãmri nhũm tee ri harênh ma nê amnhĩ wýr hã karõ. Hãmri nhũm hwýr tē nê axã nhũm kãm: “Pa. Kwa xã ãm hãmri na mẽ inhmã ajarê? Kwa nà mon ka ri axtem nê ã ixpê inhõ mẽmoj nhĩpêx anê? E inhmã ate mẽ kãm ho fiat par xwýnhjê nhĩxi hã kagã nê inhmã agõ hãmri nê ma tē. Kot ka axte inhmã axãpênh kêt nê rĩ amnhĩ pumu.” Anê.

³—Hãmri nhũm kuma nê tee ri amnhĩ kukamã hamaxpêr nê hamaxpêr o: “Hêxta waa nê. Tanhmã kot paj amnhĩ to? Ixihtýxre hã kot pa mēhõ mã pur ã apê. Nom inhmã amarĩ ri ixàhwýr o ri ixpa hprãm kêt. Ixte amnhĩ kuk ã ixpijaãm.” Anê. ⁴Hãmri nê tanhmã amnhĩ kukamã hamaxpêr to nê hamaxpêr o: “Nà kot paj amnhĩ wýr ixte mẽ kãm ho fiat xwýnhjê hã karõ. Nê mẽ kãm mẽ ô kõõta ahpar mã hkamê kê mẽ ãm inhõ patrãw mã hkwy pix gõ. Kêr kê mẽ amnhĩ tã ixpumu nê kãm ixkĩnh nê. Hãmri nê inhõ patrãw kot ixkaga hã ixtã harênh ma nê ixkamã ukapri japêr. Hãmri nê amnhĩ wýr ixwý pa ahpyñhã mẽ kutã ixãpkur o ri ixpa nhũm prãm ixpĩr kêt nê. Nà kot paj anê.” Anê.

⁵Hãmri nê amnhĩ wýr mẽ hã karõ nhũm mẽ hwýr mra. Nhũm mẽ omu nê ja mã kãm: “E tanhmã na ka pre inhõ patrãw pē mẽmoj to fiat to? E inhmã harê.” Anê. ⁶Hãmri nhũm kãm: “Na pa pre kêp orti hã ã ho 100 nê ho fiat. Ota hã kagãta. Tã pa kormã kãm amnhĩrer kêt nê.” Anê nhũm kuma nê kãm: “Tõe ka inhma. Kot paj amã anhõ kõt o gri ka ãm kãm ho 50 pix nê agõ pa ixte anhõ kõt ho ijapêx par pyrãk o anhĩpêx.” Anê. ⁷Hãmri nê hpãnhã nhãm ja mã kãm: “No ka. Tanhmã na ka pre kêp mẽmoj to fiat to?” Anê nhũm kãm: “Na pa pre kêp pãy hã xak o 1.000 nê ho fiat. Tã pa kormã hpãnhã kãm amnhĩrer kêt nê.” Anê nhũm kãm: “Tõe. Kot paj hãmri amã anhõ kõt o gri ka ãm kãm ho 800 pix nê agõ pa ixte anhõ kõt ho ijapêx par pyrãk o anhĩpêx.” Anê. Nhũm ã

mê hipêx anê. Hâmri nê hamaxpêr o: “E. Na pa mê kâm mê ò kôt o hkry pa. Koja mê amnhî tâ kâm ixkînh japêr.” Anê.

8—Hâmri nhûm ò patrâwja â kot mê hipêx anhÿr â harênh ma nê kâm: “Tk. Kwa ate pa ixkukamâ ajamaxpêr nê inhmâ mêmoj to anhÿr mex kêt tâ ka amnhî kukamâ ajamaxpêr mex pê â mê hipêx mex anê.” Anê. Â mê ujarênh kot anhÿr. Anê.

Nhûm pre â Jejus mê kâm ujarênh anê. Hâmri nê mê kâm:

—Tâ ja pyrà nê na hte mê kot Tirtûm kôt amnhî xunhwÿr kêt xwÿnhjaja âm amnhî pix kukamâ hamaxpêr mex o pa. Jao amnhî kaxyw pix mâ mê piitâ tanhmâ mê ho mex to ho pa. Mê kot amnhî tâ mê omunh nê mê kâm mê hkînh nê amnhî xwar tanhmâ mê ho mex to kaxyw nhûm htem â amnhî nhîpêx anhÿr o pa. Tâ mê ate ixkôt amnhî xunhwÿr xwÿnhjaja. Tirtûm kot tanhmâ mê ate amnhî kwÿjê ho mex to hâ amnhîm mê ajarênh kaxyw kër ka mê amnhî mê mê piitâ mê hkukamâ ajamaxpêr mex nê. Pê tanhmâ mê ho mex to ho ri apa. Â mê ate amnhî nhîpêx anhÿrja na mex. Nom kormâ mê ate â amnhî nhîpêx anhÿr kêt.

9—Hêxta waa nê. Mon ka htem mê urâk nê â axpên to mex anhÿr kêt nê? Kwa mê âpênh xwÿnhhta kot amnhî nhîpêx pyrà nê tanhmâ axpên to mex to o ri apa hkêt wehe. Jao akukrêx nê akâxpore ho anhôxÿ hkêt nê. Kër ka nhÿrmâ ty nê Tirtûm wÿr api nhûm ja hâ mê ato mex rax nê. Te ho kot ò patrâw mâ âpênh xwÿnhhta kot tanhmâ mê ho mex to xwÿnhjê hwÿr mrrar nhûm mê kot amnhî xwar tanhmâ ho mex tota pyràk.

10-11—Na hte Tirtûm tanhmâ mê pakute hâ mê pahpumunh mex nê. Koja mê amâ mêmoj gô ka mê kâm hprâm xâ hkôt ho anhôxÿ hkêt nhûm ja hâ mê apumu nê axte mê amâ mêmoj gô. Nom hpânâ mê amâ ôr rax o wanta jakre nê kugô. Nom kot ka mê ri mêmojta o anhôxÿ ho ri apa nhûm tee ri ja hâ mê apumu nê axte mê amâ mêmoj nhôr kêt nê. Koja mê amâ mêmoj gô ka mê ho anhôxÿ ho ri apa nhûm ja kêp homnuj nê.

12—Nê kot kaj mê jar Tirtûm kot mê amâ mêmoj nhôr xwÿnhjaja ho anhôxÿ ho ri apa. Hâ koja nhÿrmâ kaxkwa kamâ mê amâ mêmoj mex nhôr kêt nê.

13—Nê kot kaj apyxi nê anhô patrâw hamêxkrut nê arîgro pyxi hâ hamê wa kâm axâpênh o amÿkry hkêt nê. Kot kaj anê nê hō gryk â hō kaga. Ja pyrà nê kot kaj mê jar pika ja kamâ akâxpore nê akukrêx pix kukamâ ajamaxpêr o ri apa hâ kot kaj mê amâ hapê htÿx nê mê kêp ho anhôxÿ ho ri apa. Nê akukrêx rax gryk â Tirtûm kâm hprâm xâ hkôt akukrêx o tanhmâ axpên to ajuta hto ho ri apa hkêt nê. Ja pymaj kwa kër ka mê âm Tirtûm pix mâ mân ajamaxpêr râhâ ho ri apa. Jao te akukrêx nê akâxpore mâ axâmnhîx ri anhîhkra karo ho ri apa pyràk. Anê.

Nhûm pre â Jejus mê ahkre anê. ¹⁴Hâmri nhûm Parijew nhô xwÿnhjaja mar o kuhê. Na prem ra mê hikâxpore rax gryk â Jejus kaga. Jakamâ â kot mê kâm kâxpore jarênh anhÿrja ma nhûm ja mê kêp omnuj nê nhûm mê hâ hpêr o pikênh o kuhê. ¹⁵Hâmri nhûm amnhî tâ mê kuma nê mê kâm:

—Nâ na ka htem te mê ate tãm mê kot amnhî nhîpêx xwÿnh pyràk o amnhî nhîpêx nom ri mê kâm amnhî to axêx o ri apa. No nhûm Tirtûmja kot tanhmâ mê ate amnhî nhîpêx to nê tanhmâ mê ajamaxpêr to hkôt mê apumunh par. Nê hprî hâ mê anhôxÿ hâ mê apumu. Te mê ate tãm amnhî nhîpêx pyràk nom mê anhôxÿ kamâ na ka htem apa. Mêmoj te mex pyràk nhûm htem omu nê mex â hkamnhîx. No nhûm Tirtûm âhpumunh tÿx xâ hkôt hprî hâ mêmojta

pumu nhũm kệp omnuj nê. Mê akurom omnuj ã omunh kurê kumrêx. Na hte hprĩ hã mê ate amnhĩ nhĩpêx ã mê apumu. Anê.

Tĩrtũm kapêr aa hapêx kêt ã harênh

Matêwre 5.17-18

¹⁶ Nhũm Jejus arĩ mê ahkre nê mê kãm:

—Nê na pre finat Mojesja kumrêx mê kãm Tĩrtũm kapêr kwỳ hã kagà. Tã nhũm hpãnhã Tĩrtũm nhỹ hã kapêr jarênh xwỳnh kwỳjaja mãânên mê kãm hkwỳ hã kagà. Nhũm prem kuma nê mê hkôt amnhĩ nhĩpêx o ri pa. Tã nhũm finat Juãw Paxisja mê hpãnhã kato nê Tĩrtũm kapêr o mê ahkre ho ri pa. Tã pa hpãnhã ho mê ajahkre ho ri ixpa nhũm mê ohtô nê ixkôt amnhĩ xunhwỳ nê kãm ixkapêr kôt pix mã amnhĩ nhĩpêx o ri pa hprãm nê.

¹⁷ —Tĩrtũm kapêr tũmja mex o mex. Kojã aa hapêx kêt nê. Kojã nhỹrmã kaxkwa nê pika wa hapêx pa no nhũm Tĩrtũm kapêr tũmja aa hapêx kêt nê. Kojã rãhã ho rãhã nê aa ihkjê ho mênh kêt nê. Anê.

Mê pahte axpên kaga hkêt ã mê pamã karô

Matêwre 5.31-32, 19.9-12; Makre 10.2-12

¹⁸ Nhũm Jejus arĩ mê ahkre nê mê kãm:

—Nê kêt ka mê aprô kaga hkêt nê apa. Kot kaj mê hkaga nê hpãnhã nhãm hõ ho aprô nhũm Tĩrtũm noo mã te ate wam aprô kamã nhãm ho amnhĩkati pyrãk. Nhũm ja kệp omnuj nê. Rỳ ka ra mēhõ kot hprô kaga xwỳnhã ka hpãnhã ho aprô. Nhũm Tĩrtũm noo mã te ate wam mjên pê ho amnhĩkati pyrãk. Nhũm Tĩrtũm pê ja omnuj nê. Anê.

Hikàxpore rax xwỳnh mê kệp amrakati xwỳnh wa harênh

Rukre 6.20-26

¹⁹ Nhũm Jejus arĩ mê ahkre kamã mê kãm awjarê nê mê kãm:

—Kojã mēhõ kàxpore rax xwỳnh ê mex pix kãm ri pa. Nê apkati mê apkur mex o pa. ²⁰ Nhũm amrakati xwỳnh pê Rajareja hkã nhyre nê arĩ pry kamã àhwỳr o hkrĩ. Nhũm htem hamỳ nê ma o pa nê hikàxpore rax xwỳnh nhõrkwỳ jakwakrem haxwỳ. ²¹ Nhũm ô jakrêx kwỳ hkrêr prãm xaj hakwa krem àhwỳr o hkrĩ. Nhũm rop hwỳr mra nê hkã nhy kunhnwỳnh o kuhê.

²² —Tã nhũm Rajare ty nhũm Tĩrtũm kapêr o mê wrỳk xwỳnhjaja hwỳr wrỳ nê ma akupỳm kaxkwa hwỳr hkarô ho mô nê ho api. Hãmri nhũm kaxkwa kamã mê pahpãm Apraãw nhĩhkô hã hkĩnh nê apkur mex o hkrĩ.

—Tã nhũm hikàxpore rax xwỳnhã mãânên hkôt ty. Nhũm hkwỳjaja hã akuprô nê hã mur nê ma o tẽ nê haxà. ²³ Hãmri nhũm hkarô ma mê kot amnhĩ xà htỳx kamã hamak tũm xà pê kuwy maatita wỳr ma mô. Nê kamã amnhĩ xà htỳx kãm hamak rãhã ho pa. Hãmri nê amnhĩ xà hã maj kãnhmã rĩt nê kaxkwa kamã Apraãw pumu. Nhũm Rajare ra kuri mex nê nhỹ. ²⁴ Hãmri nhũm tee ri wa omu nê Apraãw mã akapêr nê kãm: “Kwa Apraãw. Kwa we ixkamã axukaprĩ nê ixwỳr Rajare mê kê ixwỳr tẽ nê ìhkrakrã ho gô htok nê ho inhõhto jakry. Na pa kuwy kamã amnhĩ xà htỳx kãm ijamak tỳx kumrêx.” Anê. ²⁵ Hãmri nhũm kuma nê kãm: “Tk. Nà kot pa awỳr mênh kêt nê. Na ka pre atĩr ri amex nê akĩnh nê ri apa. No nhũm Rajare akĩnhã hkã nhy rax nê amnhĩ xà htỳx kãm hamak rãhã ho ri pa. Tã ra jar inhĩhkô hã hkĩnh nê pa. Ka pre kurom amex nê apa htã kot kaj hpãnhã amnhĩ xà htỳx kãm ajamak rãhã ho ri apa. ²⁶ Nê pahkaêx kãm ahkaprỳ griã. Jakamã nhỹhỹnh kot kêt awỳr rê? Ka ajaxwỳja nhỹhỹnh kot ka kêt mê ixwỳr rê?” Anê.

27 —Nhũm ã kãm kapër anê nhũm tee ri kuma nê kãm: “Kwa tô ma inhõ krĩ hwÿr mãn amê kê ma ixkwÿjê hwÿr wrÿ. 28 O mÿj arĩ inhõ krĩ kamã ixtõ kêp 5 nê arĩ htĩr nê pa. Kê wa mê kãm awjarê kê mê amnê kuwy hwÿr pa pymaj tokyx amnhĩ tomnuj kaga nê Tĩrtũm kõt mãn amnhĩ xunhwÿ nê hkõt ri amnhĩ nhĩpêx o pa.” Anê.

29 —Hãmri nhũm Apraãw kãm: “Nà pa mê hwÿr mênh kêt nê. Ra mê kuri Tĩrtũm kapër jarênh xwÿnhjê mê Mojes kot Tĩrtũm kapër ã kagã kênã. Kê mê kamã harê nê ja ma nê rĩ tãm tanhmã amnhĩ nhĩpêx to.” Anê. 30 Hãmri nhũm tee ri kuma nê kãm: “Kwa nà. Kojã mê kagãja mar kêt nê. No kêt Rajare na pre ra htyk tã akupÿm htĩr jakamã kojã mê hwÿr wrÿ nê mê kãm awjarê nhũm mê akupÿm htĩr ã omu nê kapër ma hãmri nê amnhĩ tomnuj kaga kurê kumrêx. Kwa nã ã ri anhÿr kêt nê mê hwÿr amê hêxta waa nê.” Anê.

31 —No nhũm kãm: “Nà kojã mê Tĩrtũm kapër ã kagã mar kêt ã kojã mê mããñen Rajare tyk nê akupÿm htĩr nê mê hwÿr wrÿk nê kot mê kãm tanhmã ujarênh to hã mar kêt nê. Jakamã kwarĩ pa mê hwÿr mênh kêt nê. Kot paj ho anê nê ãm ixte mê hwÿr mênh kaprÿ pyrãk o amnhĩ nhĩpêx.” Anê. ã mê ujarênh kot anhÿr. Anê.

17

Mê kot Jejus nê mê no kupyr ã mê harênh

Matêwre 18.6; Makre 9.42; mããñen Rômãn 1.32; Sikũn Pêtre 2.1, 2.18

1-2 Tã nhũm Jejus hkõt mê pa ho mê pa xwÿnhjê jahkre ho nhÿ nê mê kãm: —E kot paj mê kot ixkõt amnhĩ xunhwÿr tohtuj anhÿr xwÿnhjê jarê ka mê inhma. Nã kojã mēhõ mê hwÿr tē nē inhnē mê kãm kapër. Mê kot mê mar nê amnhĩ tomnuj prãm xaj tanhmã mê kãm kapër to. Hãmri nhũm mê mar xã hkõt tanhmã amnhĩ tomnuj to. Hã kojã Tĩrtũm ja hã omu nê kot inhnē tanhmã kãm nê xwÿnhnta pumu nê ja hã homnuj tÿx nê. Te mê kot mēhõ pynênh nê mut ã kên pyfĩ hõ nhõr nê ma o htēm nê gõ rax kãm mênh pyrãk o kojã hipêx. Te ho ja pyrãk no ãm homnuj tÿx o ja jakre. Jakamã kwa mê ixkapër ma nê kãm ajamaxpër tÿx rãhã ho ri apa. Anê.

Mê pahte amnhĩ tã tanhmã mēhõ hto hkêt ã mê pamã karõ

Matêwre 18.21; Makre 11.25-26; mããñen Epes 4.32; Korosê 3.13

3 Nhũm Jejus arĩ mê ahkre nê mê kãm:

—Nê kojã ixkõt atõjê hõ tanhmã atomnuj to. Ka amnhĩ tã omu hãmri nê ma hwÿr tē nē ja hã kãm akapër nê kãm: “Kwa mon ka axtem nê ri ã inhĩpêx anê ixtõ? Kwa nã ri ã inhĩpêx anhÿr kêt nê.” Anê hãmri nhũm amnhĩ tã ama nê amã: “Nã na pa tee ri ixte tanhmã atota ã amnhĩ pumu nê ixkaprĩ nê. Nã kot paj axte ã ri inhĩpêx anhÿr kêt nê. Kwa kêr ka axte tanhmã ja mã ajamaxpër to hkêt nê. Te ate amnhĩ katut kõt mênh pyrãk o hipêx pu akupÿm tãm axpên nhĩpêx o papa.” Anê. Kojã ã amã kapër anê ka amnhĩ tã ama hãmri nê axte tanhmã kot atoja mã ajamaxpër kêt nê.

4 —Kojã arĩgro pyxi hã xatã tanhmã atomnuj to japër. Hãmri nê xatã tee ri ja hã amnhĩ pumu nê awÿr mra nê xatã amnhĩ tã amã kapër nê amã: “Pa ot pa awÿr tē. Na pa ra ixkaprĩ nê. Kwa ixte ã anhĩpêx anhÿrja pumu nê ãm omu. Kot paj axte hkêt nê.” Anÿr o xatã amã kapër. Nê ra axte tanhmã atomnuj to nê kê axte awÿr tē nê ã amnhĩ tã amã kapër anê. Nom kêr ka ama nê kamã agryk kêt nê. ãm xatã kãm: “Nã kot puj anê nê akupÿm tãm axpên nhĩpêx. Kot paj axte tanhmã ate ixtota mã ijamaxpër kêt nê. Kot puj ja ho pajapêx nê tãm

axpĕn nhĭpĕx o akupŷm papa.” Anhŷr o kĕr ka mĕ xatā axpĕn nhĭpĕx anhŷr rāhā ho ri apa nĕ aa jam anhŷrer kĕt nĕ. Anĕ.

Mĕ pahte mĕmoj tā Tĭrtŭm wŷr hā mĕ pajarĕnh

Matĕwre 17.20-21, 21.21-22; Makre 11.23

⁵Tā nhŭm Jejus nhŷ hā mĕ ahkre ho mĕ pa xwŷnhjaja hāmri kām:

—Kwa Pahihti. Tanhmā mĕ ixto pa mĕ amnhĭ kaxyw Tĭrtŭm kōt ijamaxpĕr tŷx rāhā ho ri ixpa. Anĕ.

⁶Hāmri nhŭm mĕ kām:

—Nā ra mĕ ate amnhĭ kaxyw hkōt ajamaxpĕr jakamā na ra amnhĭ tā mĕ apumu. Jakamā mĕ ate hkōt amnhĭ nhĭpĕx kukwak ri na ka htem mĕmoj tā awŷ nhŭm mĕ ate mĕmoj tā hwŷr xā hkōt mĕ amā tanhmā mĕmoj nhĭpĕx to. Te mĕ ate pĭ hpār mŷj mā akapĕr nĕ kām: “E amnhĭ jarĕ nĕ ma tĕ nĕ gō xujanār kām mān mrō.” Anĕ nhŭm kot amar nĕ amar xā hkōt ā kot amnhĭ nhĭpĕx anhŷrta pyrāk. Ja pyrā nĕ kot kaj mĕ ate Tĭrtŭm kōt amnhĭ nhĭpĕx o apa kukwak ri mĕmoj tā awŷ nhŭm mĕ ama nĕ mĕ amā mĕmoj tanhmā ho. Rŷ mĕ amā mĕmoj gō. Anĕ.

Te mĕ pahpĕ Tĭrtŭm mā paxāpĕnh xwŷnh pyrāk

⁷Nhŭm Jejus arĭ mĕ ahkre nĕ mĕ kām:

—Nĕ ja. Kot kaj mĕ amā mĕ āpĕnh xwŷnh kwŷjjaja nhŭm hō amā mĕmoj tā āpĕnh o pa ĕ ho anhŷr pa. Hāmri tanhmā kot kaj kām akapĕr to wehe? Xā kot kaj kām: “E hāmri axāpĕnhhta kaga nĕ tĕ nĕ nhŷ nĕ apku.” Anhŷr o kām akapĕr?

⁸Nā kot kaj kām anhŷr kĕt nĕ. Kot kaj kām: “E kwa tokyx tĕ nĕ hpānhā inhmā inhō hā apĕ. Kot pa ixāpkur pa ka ixpānhā nhŷ nĕ apku.” Anhŷr kām akapĕr. Kĕp amā āpĕnh xwŷnh jakamā ka ā kām akapĕr anĕ. ⁹Ja pyrā nĕ kot puj mĕ Tĭrtŭm kot mĕ pamā mĕmoj tā karō xā hkōt tanhmā kām amnhĭ nhĭpĕx to ho ri papa. Mĕ ō patrāwta pyrā nĕ kot tanhmā mĕ pamā karō hto xā hkōt pu mĕ amnhĭ nhĭpĕx.

—Xā na htem mĕ ō patrāw mā mĕmoj tā āpĕnh pa hāmri nĕ hkwyĕj mā amnhĭ to jarkrar o ri pa nĕ mĕ kām: “E ka mĕ ixpumu. Na pa hte inhō patrāw mā ixāpĕnh mex o mĕ hakre ka mĕ ja hā ixpumu. Hĕxta waa nĕ. Mon pa hte ri axtem ā amnhĭ nhĭpĕx anĕ?” Anhŷr o xā kot kaj mĕ kām amnhĭ to jarkrar o ri apa? Nā na ka htem ā amnhĭ nhĭpĕx anhŷr kĕt nĕ.

¹⁰—Tā pa hte mĕ ō patrāwta pyrā nĕ tanhmā mĕ amā mĕmoj tā karō hto ho ixpa. Jakamā kĕr ka mĕ inhma nĕ ixte mĕ amā mĕmoj tā karō xā hkōt tanhmā inhmā amnhĭ nhĭpĕx to ho ri apa. Hāmri nĕ hā amnhĭ to jarkrar pĕ amnhĭ jarĕnh o: “Ām hāmri na pa ā Jejus mā amnhĭ nhĭpĕx anĕ. Hĕxta waa nĕ. Ixpĕ Jejus mā tanhmā ixte amnhĭ nhĭpĕx to mex xwŷnh na pa.” Anhŷr o amnhĭ to jarkrar kĕt nĕ. Kĕt ām amnhĭ jarĕnh o: “Nā ixte kām tanhmā amnhĭ nhĭpĕx to ho ixpa xwŷnh pix na pa. Na hte mĕmoj tā inhmā karō pa kuma nĕ ŷ hā tanhmā kām amnhĭ nhĭpĕx to.” Anhŷr o amnhĭ jarĕnh o ri apa. No ri amnhĭ krā hkōt atŷx tanhmā amnhĭ to jarkrar to ho ri apa hkĕt nĕ. Anĕ.

Jejus kot mĕ ho 10 nĕ akupŷm mĕ ho mex ā harĕnh

Matĕwre 8.1-4

¹¹Tā nhŭm Jejus arĭ Garirej rūm pika pĕ Samar hkàx ā Jerujarĕ hwŷr kormā mō. ¹²Nĕ nhŷri krĭ hō htĕp o mōr mĕ nhŭm krĭ pu hā ri mĕ pa xwŷnhjaja kĕp 10 nĕ kutā mra. Mĕ hkānhy hkro htŷx xwŷnhjaja kutā mra nĕ hkaxpa nĕ amŷm kuhĕ nĕ omu. ¹³Hāmri nĕ kām:

—Pa Pahihti. Kwa mẽ ixpumu nẽ mẽ ixkamã axukaprĩ nẽ tanhmã mẽ ixto mex to. Anẽ.

¹⁴ Hãmri nhũm mẽ kãm:

—Tõe. Nã kot paj mẽ ato mex. E mẽ mãmrĩ awjanã nẽ ma akupỹm mẽ anhõ patrejê hwýr mra kẽ mẽ akupỹm mẽ akã mex ã mẽ apumu. Anẽ.

Hãmri nhũm mẽ kuma nẽ kapër mar xã hkõt awjanã. Kã nhy rãhã awjanã nẽ ma akupỹm patre hwýr mra. Nẽ kormã akupỹm hwýr pry hã mrar rãhã piitã hkã mex pa. ¹⁵ Hãmri nhũm ãm pyxi nẽ hkwyjê rom awjanã nẽ akupỹm Jejus wýr Tirtũm mã mex o mex ã harẽnh o hwýr tẽ. ¹⁶ Hãmri nẽ Jejus kaxpa nẽ kutã hkõnkrã ho tẽm nẽ nhý nẽ amnhĩ tã kãm kot ho mex ã kãm amnhĩ jarẽ. Kwýjê hkĩnhã kęp Ijaew kêt axtem kęp Samar nhõ xwýnh tã mẽ kurom akupỹn hwýr tẽ nẽ kãm mex o mex ã harẽ. ¹⁷⁻¹⁹ Hãmri nhũm amnhĩ tã kuma nẽ kãm:

—No mẽ akwýjaja? Ixte mẽ ato 10 nẽ mẽ ato mex tã ka ãm kapxipix awjanã nẽ akupỹn ixwýr tẽ. Akwýjê hkĩnhã apê Ijaew kêt tã akupỹm amnhĩ mex ã amnhĩ pumu hãmri nẽ mẽ kurom awjanã nẽ Tirtũm mã mex o mex ã harẽnh o ixwýr tẽ. Hêxta waa nẽ. Mo na hte ixkwýjaja apyrã nẽ amnhĩ kaxyw ixkõt hamaxpër kêt nẽ? E kãnhmã xa nẽ mãmrĩ ma ajamakêtkati nẽ akĩnh nẽ ma akupỹm tẽ. Anẽ.

Jejus akupỹn wrýk xã hã arĩgro jarẽnh

Matêwre 24.23-24, 24.37-44; Makre 13.32-37; mããnhẽn Wam Tesarõn 5.2-8; Sikũn Pêtre 3.3-10

²⁰⁻²¹ Tã nhũm Parijew nhõ xwýnh kwýjaja Jejus wýr mra nẽ omu nẽ kãm:

—Kwa mẽ inhmã mẽmoj jarẽ. Xã koja apu Tirtũm tokyx kot mẽ pahwýr mẽnh mã xwýnhnta mẽ nhũm mẽ pahwýr wrý nẽ mẽ pahto amnhĩptãr kurẽ kumrẽx nã kormã? Anẽ.

Hãmri nhũm mẽ kuma nẽ mẽ kãm amnhĩ jarẽ. Te ho nhãm mẽhõ jarẽnh pyrã nẽ mẽ kãm:

—Nã ra kot mẽ ho amnhĩptãr o pa kãnã. Nom nhýri hkrĩ xã kamã mẽ ho amnhĩptãr o hkrĩ hkêt nẽ. Na htem amnhĩ kaxyw hkõt hamaxpër nẽ hkõt amnhĩ xunhwý hãmri nhũm kęp mẽ õ pahihti hã mẽ ho amnhĩptãr o pa. Nẽ mẽ kãm mẽ hamaxpër mex gõ nhũm htem hkõt ri hamaxpër mex o pa. Anẽ.

²² Hãmri nẽ hpãnhã hkõt mẽ pa ho mẽ pa xwýnhjê mã kapër. Mẽ kot nhýrmã tee ri kamã hamak o pa hã mẽ kãm kapër nẽ mẽ kãm:

—Kot kaj mẽ nhýrmã tee ri amã tokyx akupỹn ixwrýk nẽ ixte mẽ ato amnhĩptãr prãm xaj tee ri inhmã anojarêt kaprý ho ri apa. Nẽ axpẽn mã ri ijarẽnh o: “Hêxta waa nẽ. Mo na we Pahihti tokyx akupỹn mẽ pahwýr wrýk kêt nẽ?” Anhýr o inhmã anojarêt o ri apa pẽ ixkamã ajamak rãhã ho apa.

²³ —Nẽ koja mẽ ra akupỹn ixwrýk ã tanhmã mẽ amã ixto hẽx to ho pa. Nhýri ixkuhẽ nhũm mẽ kot ixpumunh ã mẽ amã ixto hẽx o pa. Nom kêr ka mẽ ama nẽ ãm mẽ ama. ²⁴ Kot paj nhýrmã akupỹn mẽ awýr ixwrýk kaxyw nhũm mẽ pika piitã hkõt akupỹn ixwrýk kãm anhĩpẽ ixpumu. Te mẽ piitã mẽ kot anhĩpẽ na jaxẽnh pumunh pyrãk o kot kaj mẽ apiitã ixpumu. ²⁵ Nom kormã jar pika ja kamã ixpa ri koja mẽ ohtõ nẽ ixkaga pa amnhĩ xã htýx kamã ijamak kãm ty. Hãmri nẽ mẽmo arĩgro hã ma akupỹm kaxkwa hwýr api. Hãmri nẽ nhýrmã akupỹn mẽ awýr wrý.

²⁶ —Nã kot paj nhýrmã man akupỹn mẽ awýr wrý. Akupỹn ixwrýk xã hã arĩgrota ã koja jar pika ja kamã mẽ pa xwýnhjaja htýx ri tanhmã amnhĩ tomnuj to ho pa. Te amnepêm finat Noehiti hfir ri mẽ kot htýx ri tanhmã amnhĩ

tomnuj to ho pa pyrāk o koja mē amnhī nhīpêx o pa. ²⁷ Na prem amnhī kaxyw Tirtūm mā hamaxpêr o pa hkêt nê. Nê âm jar pika ja kamā mē kot amnhī nhīpêx pix kukamā hamaxpêr o ri paja o âm kôt pix mā tanhmā ri amnhī nhīpêx to ho pa. Rôm nhūm Noehti gô htām pymaj pâr raxja nhīpêx nê kām axā. Nhūm prem hā omu nê âm omunh o pa nê tanhmā ri amnhī kukamā hamaxpêr to hkêt nê. Tā nhūm nata mē haêr pê wrÿ. Hāmri nê wrÿk rax o ra pika piitā hanhi nhūm mē piitā pikaprâr pa.

²⁸ —Akupÿn ixwrÿk xā hā arġrota ā koja mē mǎânēn te amnepēm Sotō nhō xwÿnhjaja kot htÿx ri tanhmā amnhī tomnuj to pyrāk o amnhī nhīpêx. Finat Rohti kormā htġr ri mē kot htÿx ri tanhmā amnhī tomnuj to ho pata pyrāk o koja mē amnhī nhīpêx. Na pre hte Sotō nhō xwÿnhjaja âm pika ja kamā mē kot amnhī nhīpêx pix kukamā hamaxpêr o ri pa. Nê âm kôt pix mā ri amnhī nhīpêx o pa. Nê htÿx ri amnhī xâpkur xā pix kukamā hamaxpêr. Nê mē hpur kām ri âpênh pix kukamā hamaxpêr. Nê ri amnhī xujaprôr pix kukamā hamaxpêr nê xapên mā mēmoj to wēnê pix kukamā hamaxpêr. Nê amnhīm ôrkwÿ nhīpêx pix kukamā hamaxpêr. Á na prem pika ja kamā mē kot amnhī nhīpêx pix kukamā hamaxpêr o ri pa anhÿrja o amnhī kaxyw Tirtūm mā hamaxpêr o pa hkêt nê.

²⁹ —Tā nhūm Rohti mē ô krġ rŭm kator mē nhūm Tirtūm krġ nhō xwÿnhjaja kot amnhī tomnuj tÿx o paja mÿrapê mē himex pa. Jao kaxkwa rŭm mē hipy mēmo hpôk kwÿ rē nhūm mē hkaxâr pa. ³⁰ Tā akupÿn mē awÿr ixwrÿkja mē koja mē te Rohti nhō krġ kamā mē kot amnhī nhīpêx pyrā nê htÿx ri amnhī tomnuj pix o pa.

³¹ —Nê akupÿn ixwrÿyta ā ka mē anhôrkwÿ nhīmôk ā hkrāmnēnh o akrġ japêr nê akupÿn ixwrÿk kām ixpumu. Hāmri nê akukrêx wÿr axâr nê hō hpyr mē âjamaxpêr kêt nê. Rÿ ka mē apur kām axâpênh o akuhê japêr nê akupÿn ixwrÿk kām ixpumu. Hāmri nê akupÿm anhôrkwÿ hwÿr atēm mā ajamaxpêr kêt nê. Mo kaxyw kot ka kêt hwÿr tē? Kêt âm inhmā mē ajapê hā akupÿn mē awÿr ixwrÿk mā ajamaxpêr o akġnh nê ixpumunh o akuhê.

³² —Nê kêr ka mē Rohti prô kot tanhmā amnhī nhīpêx toja mā ajamaxpêr rāhā ho ri apa. Na pre Tirtūm kapêr nhġrôp xa nê amnhī katut kôt Sotōta wÿr rġt hāmri nê ā amnhī nhīpêx anhÿrja mÿrapê htyk kurê kumrêx. Tā kêr ka mē ho urāk nê amā akukrêx rax japê xâj ixkôt amôr kaxyw anhġtôt kêt nê.

³³ —Nê kwa kêr ka mē jar pika ja kamā tanhmā mē ate amnhī nhīpêx to pix kukamā ajamaxpêr o ri apa hkêt nê. Nê mē akukrêx rax pix kukamā ajamaxpêr kêt nê. Koja nhÿrmā ja piitā mē apê hapêx pa. Mē ate kām anhġhkra karo hpar pyrāk o piitā hipêx hāmri nhūm Tirtūm ja hā mē apumu nê hpānhā nhÿrmā mē amā mēmoj mex nhôr rax nê.

³⁴ —Nê kot paj kamât kām akupÿn ixwrÿk japêr nhūm nhÿri mēhō ra ixkôt amnhī xām xwÿnh mē mēhō kot ixkôt amnhī xām kêt xwÿnh wa par kām nôr japêr. Hāmri pa amnhī wÿr ra ixkôt kot amnhī xām xwÿnhnta o api nhūm kot ixkôt amnhī xām kêt xwÿnhnta arġ gôr nê nō. ³⁵ Rÿ pa arġro hā akupÿn ixwrÿk japêr nhūm mēnijê hō wa hamêxkrut nê harôj kahuk o âm japêr. Hāmri pa ra kot ixkôt amnhī xām xwÿnhja ho api nhūm kot ixkôt amnhī xām kêt xwÿnhja ahte arġ harôj kahuk o xa. Hāmri nê hamaxpêr mex kêt kumrêx o xa. ³⁶ Rÿ koja mēmyjê hō wa axkrut nê hpur kām âpênh o âm japêr. Pu pa amnhī wÿr kot ixkôt amnhī xām xwÿnhnta o api nhūm kot ixkôt amnhī xām kêt xwÿnhnta pur kām ahte arġ apênh o xa. Hāmri nê tee ri hkrāmnhwÿ hkukamā hamaxpêr o xa. Anê.

Nhũm pre ã Jejus hkôt mẽ pa ho mẽ pa xwýnhjê mã amnhĩ jarênh anê.
³⁷ Hãmri nhũm mẽ kuma nê kãm:
 —Kwa nhỹri koja mẽmoj ã amnhĩ nhĩpêx anê? Anê.
 Hãmri nhũm mẽ kãm:
 —Nà koja nhỹri mẽmojja ã amnhĩ nhĩpêx anê ka mẽ omunh kurê kumrêx.
 Te nhỹri mẽmoj kro nê nõr nhũm nhõnhti kot omunh nê hã htor nê hpinhĩpanh
 nhũm mẽ kot hã omunh kurê kumrêxta pyrãk. Anê.

18

Mẽ pahte Tirtũm mã amnhĩ jarênh rãhã ho papa hã mẽ pamã karõ

Rukre 11.5-8; mããnẽn Wam Tesarõn 5.17

¹ Tã nhũm Jejus hkôt mẽ pa ho mẽ pa xwýnhjê mã mẽmoj tã karõ. Mẽ kot tanhmã Tirtũm mã amnhĩ jarênh to hã mẽ kãm karõ. Mẽ kot xatã kãm amnhĩ jarênh o pa nê amnhĩ kaxyw kãm hamaxpêr rãhã ho pa kaxyw. No ãm hã kuxi nê tanhmã mẽ kãm hã ujarênh to nê mẽ kãm:

²—Koja nhỹri krĩ hõ kamã juistija kãm Tirtũm prãm nõkati. Nê mããnẽn kãm amnhĩ kwýjê hprãm nõkati htã kêp juisti nê tanhmã mẽ kãm kapêr to ho hkrĩ.
³ Jakamã nhũm mẽhõ ni pẽ mjên htyk xwýnh. Nhũm hte mẽhõ xatã tanhmã kêp õ mẽmoj to ho pa. Hãmri nhũm tee ri amnhĩ tã omu nê xatã juistita wýr mra nê kãm harê nê kãm: “Xê gãa nê. Na hte pahkwýjê hõja ixtomnuj rãhã ho pa. Xê ixtã tanhmã kãm akapêr to kê tãm inhĩpêx.” Anê. Nê xatã hwýr mra nê amnhĩ to kuwý nê xatã hwýr mra nê amnhĩ to kuwý. ⁴⁻⁵ No nhũm kuma nê ãm kuma. Kãm hkwyjê ho ajuta hprãm kêt jakamã ãm kuma. Tã nhũm xatã hwýr mra. Gaa nhũm rĩ kãm mar kaga nê. Hãmri nê hamaxpêr o: “Tk. Hêxta waa nê. Jahti na hte xatã ixwýr mra nê tanhmã inhmã amnhĩ jarênh to. Nê ãm xatã ixwýr mra. Nà na pa ra inhmã mar kagyk nê. E pa tokyx tanhmã nê kot tanhmã ho xwýnhta mã ixkapêr to. Inhmã Tirtũm pyma kamã rý inhmã ixkwýjê kaprĩ kamã pa tanhmã nê kãm nê hkêt tã kot pa anhýr kêt nhũm amnhĩ tã inhmã harênh pix nê pa ra mar kurê ixkrã tãtãk nê.” Anhýr o hamaxpêr. ã mẽ ujarênh kot anhýr.

⁶—Juisti tãm hamaxpêr kêt tã nhũm nija xatã hwýr mra nê amnhĩ to hwýr jakamã nhũm jatã tanhmã ho ajuta hto. ⁷⁻⁸ No kêt Tirtũmjã. Xãn ka htem mẽmoj tã awý nhũm juisti punutita pyrã nê mẽ ama nê ãm mẽ ama? Nà koja ã amnhĩ nhĩpêx anhýr kêt nê. Kot ka mẽmoj tã kãm amnhĩ jarê nhũm ama nê tanhmã amã mẽmoj to rý tanhmã amã amnhĩ nhĩpêx to. Juistita rom mẽ pakamã ukaprĩ xwýnh na. Tã kot paj nhỹrmã akupýn wrý nê mẽ apumu ka mẽ arĩ amnhĩ kaxyw hkôt ajamaxpêr mex pẽ kãm amnhĩ jarênh rãhã ho ri apa pa ja hã mẽ apumu nê ixkĩnh týx nê. Ja na inhmã hprãm. Anê.

Tanhmã mẽ kot Tirtũm mã amnhĩ jarênh to hã mẽ harênh

Matêwre 6.5-8; mããnẽn Wam Pêtre 5.5-6

⁹ Nhũm Jejus mẽ kot amnhĩ to mex o hkwyjê jakrenh ã amnhĩ to jarkrar o ri mẽ pa xwýnhjê pumu nê tanhmã mẽ kãm kapêr to. Nom mẽ kot amnhĩ to jarkrarta ã kuxi nê mẽ kãm awjarê nê mẽ kãm:

¹⁰—Koja mẽhõ wa hamêxkrut nê Tirtũm mã amnhĩ jarênh kaxyw wa tẽ. Ja kêp Parijew nhõ xwýnh nhũm hõja kêp mẽ õ pahi mã hkwyjê pẽ kãxpore hkwyjê jamýnh xwýnh. Nhũm wa Tirtũm mã amnhĩ jarênh xã hã ixkre hwýr wa tẽn axã. ¹¹⁻¹² Hãmri nhũm Parijew nhõ xwýnhta kumrêx tẽ nê nhỹri mẽ piitã mẽ noo mã Tirtũm mã amnhĩ jarê. Nê amnhĩ to jarkrar pẽ kãm amnhĩ jarênh o: “Pa Tirtũm. E ra ate ixpumunh mex. Na pa hte amnhĩ to mex pix o ri ixpa. Ra

ate ja hã ixpumunh mex. Na pa hte kàxpore hkwy jamýnh xwýnh něj rom tãm amnhĩ nhĩpêx. Nê semãn piitã hã ixàpkur kêt rãhã amã amnhĩ jarênh rãhã ho ixtã apkati axkrut. Nom ja pix kêt. Na pa hte mãânên ixàpênh pãnhã kàxpore jamý nê mẽ kot amã tanhmã amnhĩ nhĩpêx to ho pa xwýnhjê mã hkwy nhõr o ixa. Nê na pa hte ri ixãhkĩnh o ri ixa hkêt nê. Nê nhãm mẽ kêp mẽ hprõ ho amnhĩkati ho ri ixa hkêt nê. Na pa hte mẽ piitã mẽ kurom tãm amnhĩ nhĩpêx ã amnhĩ pumu nê ixkĩnh týx kumrêx. Hêxta waa nê. Mon pa hte ri ã amnhĩ to mex o ixa anê?” Anhýr o Tĩrtũm mã amnhĩ to jarkrar pê kãm amnhĩ jarênh o xa.

13—Hãmri nhũm hpãnhã mẽ kêp kàxpore hkwy jamýnh xwýnhnta haxwýja Tĩrtũm mã amnhĩ jarê. No ãm Parijew nhõ xwýnhnta rom ki hkwyjê pê awry nê ahte hipõ nê kãm amnhĩ jarê. Nê kãm amnhĩ jarênh pê amnhĩ tak nê mur nê kãm: “Kwa Tĩrtũm. Na pa hte amnhĩ tomnuj týx o ri ixa. Nê ixtýx ri amã prãm xã kuhpa hã tanhmã amnhĩ nhĩpêx to. Na pa tee ri ja hã amnhĩ pumu nê ixkaprĩ htýx nê. Æ inhãm amnhĩ nhĩpêx anhýr o ri ixa hprãm kêt tã pa hte ã amnhĩ nhĩpêx anhýr o ri ixa. Kwa xã kot ka ixkamã axukaprĩ nê amnhĩ katut kôt ixte amnhĩ tomnuj rênh pa Tĩrtũm?” Anhýr o kãm amnhĩ jarê.

14—Hãmri nhũm Tĩrtũm hamê wa kot kãm amnhĩ jarênh ma no ãm wamta ma nê ãm kuma. No kêt hkôt hõja ma hãmri nê kot kãm amnhĩ tã ãhwýr xã hkôt amnhĩ katut kôt kot amnhĩ tomnuj rênh pa nê ho hkra. Jakamã nhũm mex nê hkĩnh nê pa. Ra tãm hkrã hãmri nê hkĩnh nê ma htêm kurê kumrêx. Æ mẽ ujarênh kot anhýr. Æm hãmri na pa mẽ amã ja jarê. Kojã mēhõ Parijew nhõ xwýnhnta pyrã nê kot amnhĩ to mex xwýnh ã amnhĩ kamnhĩx hãmri nê Tĩrtũm kot amnhĩ katut kôt kot amnhĩ tomnuj rênh kaxyw amnhĩ to hwýr kêt nê. Kojã ãm kãm amnhĩ to jarkrar pix nê. Jakamã kojã Tĩrtũm te kot mar nê ãm mar pyrãk o hipêx. No kojã mēhõ kot kàxpore hkwy jamýnh xwýnhnta pyrã nê tee ri tanhmã amnhĩ tomnuj to hã amnhĩ pumu nê hkaprĩ nê. Hãmri nê amnhĩ to Tĩrtũm wý nhũm kuma nê tanhmã ho mex to. Anê.

Jejus kot amnhĩ wýr mēhprĩrejê hwýr ã harênh

Matêwre 19.13-15; Makre 10.13-16

15 Tã nhũm Jejus mẽ hkôt mẽ pa ho mẽ pa xwýnhjaja arĩ pry hã Jerujarê hwýr mõ nhũm Ijaew kwýjaja mẽ omu nê mẽ hkrare jamý nê Jejus wýr mẽ o mra. Kot mẽ hã ãhkra jaxwýr nê mẽ ho Tĩrtũm wýr kaxyw. Hãmri nhũm hkôt mẽ pa ho mẽ pa xwýnhjaja tee ri ja hã mẽ omu nê nê mẽ kãm kapêr nê mẽ kãm:

—Tk. Kwa mẽ ma akupým mẽ akrata o mra nã? Mo kaxyw na ka mẽ Jejus wýr mẽ o mra? Kormã mẽ rãxre kênã. Anê.

16 Hãmri nhũm amnhĩ tã mẽ kuma nê mẽ kãm:

—Tk. Kwa nã mẽ ri inhnê mēhprĩjê kurê hkêt nê. Kwãr mẽ mãmrĩ ixwýr mẽ o mra. Anê.

Hãmri nê amnhĩ wýr mẽ kãm hpa ho apê nhũm mẽ hwýr mẽ o mra nhũm mẽ kuri kuhê. Hãmri nhũm hkôt mẽ pa ho mẽ pa xwýnhjê mã kãm:

—E mẽ jareja mẽ omu. Na htem hamakêtkati nê hkĩnh nê ri pare. Nê kãm amnhĩ to rũnh prãm kêt nê ri pa. Tã Tĩrtũm kôt mẽ kot amnhĩ nhĩpêx xwýnhjaja na htem mẽ urãk nê kãm amnhĩ to rũnh prãm kêt nê ri pa.

17—Jarejaja na htem hipêêxã nê katorxã wa kapêr ma nê wa hkôt ri amnhĩ nhĩpêx mex o ri pa. Tã ixpê Tĩrtũm kot mẽ awýr inhmēnh xwýnh kot ka mẽ amã ixkôt amnhĩ xunhwýr prãm. Hã kot kaj mẽ te ho jarejê kot amnhĩ nhĩpêx

pyràk o amnhĩ nhĩpêx. Jao ixkapêr ma nê ixkôt ri tanhmã amnhĩ nhĩpêx mex to ho ri apa. Anê.

Kàxpore rax xwýnh jarênh

Matêwre 19.16-30; Makre 10.17-31; mãânên Wam Ximotre 6.6

¹⁸ Tã nhũm Ijaew nhõ pahihiti hõja Jejus wýr tẽ nê kãm kapêr nê kãm:

—Pa? Mẽ ijahkre xwýnh maati? Kwa inhmã mẽmoj jarê. Tanhmã kot pa we nhýrmã Tirtũm ri ixtĩr tũm nê ixpa kaxyw amnhĩ nhĩpêx mex to ho ri ixpa wehe? Anê.

¹⁹ Hãmri nhũm kãm:

—Xà ate ixpê Tirtũm kwý hã ixpumunh kôt na ka ixte uràk nê amnhĩ to mex xwýnh ã ijarê? Tirtũm pix na kot amnhĩ to mex rãhã xwýnh jakamã kot kaj ã ijarênh anhýr jao ixpê Kra hã ijarê. Nê uràk nê ixte amnhĩ to mex xwýnh ã ijarê. Nà xàn ka ãm atýx ri amnhĩ krã hkôt ã ijarênh anê?

²⁰ —Tirtũmja mex o mex xwýnh jakamã kot kaj amã nhýrmã kuri atĩr tũm nê apa hprãm hãmri nê ra kot mẽmoj tã mẽ amã karõ xà hkôt amnhĩ nhĩpêx o ri apa. Ra ate mar mex kênã. Na pre mẽ amã:

Kêr ka mẽ axpên pẽ axàhkĩnh hkêt nê.

Nê mẽ axpên par kêt nê.

Nê mẽ axpên to axêx o ri apa hkêt nê.

Nê mẽ axpên pẽ aprõ ho amnhĩkati hkêt nê.

Nê mẽ anhĩpêxà mẽ akatorxà wa hã apijaàm pẽ wa kutã anojarêt pix o ri apa.

E kot kaj amã nhýrmã Tirtũm kuri atĩr tũm nê apa hprãm hã kêr ka ã amnhĩ nhĩpêx anhýr o ri apa. Anê.

²¹ Nhũm pre ã Jejus kãm kapêr anê nhũm kuma nê kãm:

—Kwa ixprĩre ri ra ã ixte amnhĩ nhĩpêx anhýr o ri ixpa kênã. Nom ixte ixtĩr tũm nê ixpa kaxyw kormã ixte tãm kêt pyràk. Anê.

²² Hãmri nhũm Jejus kãm:

—Nà kormã mẽmoj pyxire nê arĩk. Na ka amã akukrêx rax japê htýx o Tirtũm jakre. Jakamã kêr ka ma akupým tẽ nê akukrêx o wênê hpa nê hpãnhã kàxpore jamý hãmri nê ma mẽ kêp amrakati xwýnhjê mã õr pa. Hãmri nê rĩ akupým ixwýr tẽ nê ixkôt apa ho apa. Anê.

²³ Hãmri nhũm kuma nê tee ri amnhĩ kukamã hamaxpêr. Kãm kukrêx rax japê nê kãm ãhkra karo hprãm kêt nê. Jakamã tee ri Jejus kot ã kãm hã karõ anhýrja ma nê awjanã nê ma akupým tẽ. ²⁴ Hãmri nhũm tee ri ja hã omu nê hã mẽ kot mar xwýnhjê mã kapêr nê mẽ kãm:

—Hêxta waa nê. Koja mẽ hikukrêx rũnh xwýnhjaja ohtõ nê kãm mẽ hikukrêx japê xàj Tirtũm mẽ wa ixri htĩr tũm nê pa ho papa hkêt nê. Wa ixte amnhĩ nhĩpêxja mẽ kêp hihtýx. ²⁵ Na htem kãm hikukrêx rax mã ãhkra karo hprãm kêt rãhã tee ri kãm Tirtũm kôt amnhĩ nhĩpêx prãm kapry. Te ho mẽhõ kot menh kagõ hã hkre nê kãm kagõ katõk prãm kêt rãhã kãm guhkrax kãm àr prãm kapryta pyràk. Anê.

Nhũm pre ã Jejus mẽ kãm kapêr anê. ²⁶ Hãmri nhũm mẽ kuma nê tee ri amnhĩ kukamã hamaxpêr nê kãm:

—Kwa nom mẽ ixpiitã mẽ inhmã mẽ ixkukrêx japê kênã. Jakamã xà kot paj mẽ ixpiitã nhýrmã war ari ixtĩr tũm nê ixpa ho ixpa hkêt nê nã? Anê.

²⁷ Hãmri nhũm mẽ kãm:

—Nà kot kaj mẽ amnhĩ krã hkôt mẽ amã mẽ akukrêx japêja mã anhũrer kêt nê. Tirtũm pix na hte ã mẽ kot amnhĩ nhĩpêx anhýr kaxyw tanhmã mẽ hkrã

hto nhũm mẽ kãm mẽ hikukrêx japê htỳx kêt nê. Jao mẽ kêp Tĩrtũm mẽ wa ixri htĩr tũm nê mẽ pa ho pa mã xwỳnh. Anê.

²⁸ Hãmri nhũm Simãw Pêtre kãm:

—Kwa Pahihti no mẽ pajaja? Na pa prem agryk ã mẽmoj piitã hkaga hpa nê akôt ixpa ho ixpa. Jakamã kot paj mẽ nhỹrmã war ari ixtĩr tũm nê ixpa ho ixpa nã? Anê.

²⁹ Hãmri nhũm kãm:

—Tỳ. Nà ka mẽ atô inhmã tanhmã amnhĩ nhĩpêx to ho apa kaxyw akwỳjê re nê ma inhmã tanhmã amnhĩ nhĩpêx to ho ri apa. Anhõrkwỳ re rỳ atô rỳ atõx rỳ aprõ nê akrajê re. Rỳ akatorxã nê anhĩpêêxã war are. Rỳ akukrêx piitã rer pa hãmri nê ma ixkapêr o mẽ piitã mẽ ahkre ho ri mẽ hkôt apa. ³⁰ Hã kot paj ja hã mẽ apumu nê mẽ ato mex rax nê. Hãmri ka mẽ ma nhỹhỹm apa nê nhỹri mẽ kãm ixkapêr jarênh o ri mẽ hkôt apa nhũm mẽ kot mẽ amar xwỳnh kwỳjaja mẽ ama nê ra kãm mẽ akĩnh nê. Nê ra mẽ ate akwỳjê rer par tã nhũm mẽ tãmjaja te mẽ apê mẽ hkra rỳ mẽ htõ rỳ mẽ htõx pyrãk o mẽ anhĩpêx nê tanhmã mẽ ato mex to ho pa. Hãmri ka mẽ nhỹrmã ty nê ma Tĩrtũm mẽ wa inhõ krĩ hwỳr api hãmri nê wa ixkuri amex kumrêx nê atĩr tũm nê apa ho apa. Anê.

Nhũm pre ã Jejus Simãw Pêtre mẽ hkwỳjê mã kapêr anê.

Jejus kot axte htyk kukamã amnhĩ jarênh

Matêwre 20.17-19; Makre 10.32-34

³¹ Tã nhũm Jejus mẽ kot ý hã kapêr jarênh o mẽ pa xwỳnh pê 12jaja mẽ hkwỳjê pê mẽ ho kato. Nê nhỹri mẽ hkàx ã mẽ o xa nê tanhmã mẽ kãm amnhĩ jarênh to nê mẽ kãm:

—Amnepêm Tĩrtũm nhỹ hã kapêr jarênh xwỳnhjaja na prem ixkukamã tanhmã mẽ kot inhĩpêx to hã ijarê nê ixtã kagã. Tã pu mẽ ra Jerujarê hwỳr mỗ. Kamã koja mẽ tanhmã ixtõ rax nê. Ra mẽ kot ixkukamã ijarênh nê ixtã kagã xã hkôt koja mẽ ixtõ anê. ³²⁻³³ Koja mẽ kãm ixkurê xwỳnhjaja ixpynê nê Rõm nhõ xwỳnhjê nhõ pōristi hwỳr ixtõ tê nê mẽ kãm ixtõ hêx nhũm mẽ kuma nê mẽ mar xã hkôt tanhmã inhĩpêx to. Nê mẽ hkwỳjaja ixtã hpêr o axkê nê akunha. Nê mẽ hkwỳjaja ixtõ kapêr punuj nê ijapry nê ixtã argõx rê nê ixtak. Hãmri nê ixpĩ. ã koja mẽ inhĩpêx anê. Nom kot paj ãm ixytk ã apkati axkrunêpxi nhũm Tĩrtũmja akupỹm ixtõ ixtĩr. Anê.

³⁴ Hãmri nhũm mẽ kuma nê tee ri htyk nê akupỹm htĩrja kukamã hamaxpêr no ãm hprĩ hã hkôt hamaxpêr kêt nê.

Jejus kot no hkre xwỳnh o mex ã harênh

Matêwre 20.29-34; Makre 10.46-52

³⁵ Tã nhũm Jejus mẽ kormã Jerujarê hwỳr Jerikoja têp o mỗ. Hãmri nhũm pry nhĩhkjê hã no hkre xwỳnhjã ãhwỳr o nhỹ. ³⁶ Hãmri nê amnhĩ wỳr mẽ mrar ma. Mê ohtõ nê Jejus kôt mẽ mrar xwỳnhjê mrar ma nê mẽ kãm:

—Kwa mẽmo ri? Mẽmoj wỳr na ka mẽ axohtõ nê mra? Anê.

³⁷ Hãmri nhũm mẽ kãm:

—Nà Jejus pê Najare nhõ xwỳnh kôt na pa mẽ mỗ. Anê.

³⁸ Hãmri nhũm mẽ kuma nê kàx pê Jejus mã kapêr nê kãm:

—Pa Jejus? Apê mẽ inhõ Pahihti mex na ka. Te apê amnepêm anhĩgêt pahihti Tawi kot amnhĩ nhĩpêx pyrãk. Jakamã kwa ixkamã axukapri nê akupỹm ixtõ mex kêt wehe. Ixte amnhĩ kaxyw akôt ijamaxpêr xwỳnhjê hõ na pa. Anê.

³⁹ Hãmri nhũm Jejus kukamã mẽ mrar xwỳnhjaja tee ri kuma nê kãm:

—Tk. Kwa akapër kêt nê nhỹ nà. Anê.

Tã no nhũm ãm mẽ kuma nê xatã amnhĩ to hwỳr o nhỹ. Kàx pè kãm kapër o nhỹ. ⁴⁰ Hãmri nhũm Jejus kuma nê xa nê amnhĩ wỳr hã karò nhũm mẽ hpa hã kupy nê hwỳr o tẽ nhũm kãm:

⁴¹ —Pa mo na? Tanhmã kot pa ato? Anê.

Nhũm kãm:

—Nà akupỳm inhmã ixrĩt mex prãm. Anê.

⁴² Hãmri nhũm kãm:

—Tõe. Nà ra ate amnhĩ kaxyw inhmã ajamaxpër tỳx jakamã kot kaj akupỳm ri rĩt. Anê.

⁴³ Hãmri nhũm akupỳm rĩt mex kurê kumrêx nê ja hã amnhĩ pumu nê hkĩnh tỳx nê. Hãmri nê ma Jejus kôt Tĩrtũm mã mex o mex ã harênh o mẽ hkôt tẽ. Hãmri nhũm mẽ kot hã omunh xwỳnhjaja haxwỳja Tĩrtũm mã mex o mex ã harênh o Jejus kôt mō.

19

Jakew kãm Jejus pumunh prãm ã harênh *Rukre 3.8, 3.12-13*

¹ Tã nhũm Jejus arĩ Jerujarê hwỳr mō nê Jeriko hwỳr pøj. Hãmri nê krĩ kahti hkôt pry hã mō. ² Nhũm mẽ ra hkôt htu rax nê hkôt omunh o mō. Jakamã nhũm Jakew pè Rõm nhõ pahi mã kwỳjê pè kàxpore hkwỳ jamỳnh xwỳnhjê krãhtũm xwỳnhjaja. Na pre hikàxpore rax nê. ³ Tã haxwỳja kãm Jejus pumunh prãm nê. Nom ãm hakooti nê hprĩhti jakamã tee ri kot omunh kaxyw amnhĩ nhĩpêx nhũm mẽ kệp ãmnàr rax nê. ⁴ Hãmri nhũm ra hamaxpër nê ma kukamã hprõt nê tẽ nê nhỹri pry mỳri pĩ xãm pumu nê hã api nê kutêp ajêt. Hãmri nhũm Jejus mō nê hapa. ⁵ Nê kãnhmã rĩt nê omu nê kãm:

—Pa Jakew. E kwa tokyx tẽn wrỳ pa ma akôt anhõrkwỳ hwỳr tẽ nê ari amnhĩm hikra. Anê.

⁶ Hãmri nhũm kuma nê hkĩnh nê. Nê wrỳk kurê kumrêx nê ma amnhĩ kôt nê o tẽ. ⁷ Hãmri nhũm mẽ kot omunh o kuhê xwỳnhjaja tee ri ja hã omu nhũm ja mẽ kệp omnuj nê nhũm mẽ axpẽn mã harênh o:

—Tk. Kwa nà. Jakew kot amnhĩ tomnuj xwỳnh tã nhũm Jejus ma hkôt tẽ nê kuri pøj. Anê.

⁸ Hãmri nhũm wa õrkwỳ hwỳr axà nê nhỹ nhũm Jakew Jejus mã amnhĩ jarênh o:

—E. Nà ra ixte pahihiti mã kàxpore jamỳnh xwỳnhhta na pa pre hte ho prês jakre nê amnhĩm hamỳnh rax nê. Tã kot paj akupỳm mẽ kãm õr pa. Na pa pre hte mẽ hkwỳjê pè ho 10 nê hamỳ. Tã kot paj hipỳ ho 40 nê kurê nê akupỳm mẽ kãm ho ixpigràn pa. ã kot paj mẽ hipêx anê. Nê ixkàxpore jakrêx kot paj ho axkjê nê mẽ kệp amrakati xwỳnhjê mã ho ixpigràn pa. Anê.

⁹ Hãmri nhũm kuma nhũm ja kãm mex nê. Jakamã nhũm kãm:

—Nà ãm hãmri. Ate pahkukamã panhĩgêt Apraãw pyrà nê jarãhã ate amnhĩ tomnuj kaga jakamã na ra jarãhã anhõrkwỳ hwỳr mẽ mex xà axà. Koja Tĩrtũm jarãhã amnhĩ katut kôt ate amnhĩ tomnuj rênh pa nê axte kãm hamaxpër kêt nê. ¹⁰⁻¹¹ Mẽ ate amnhĩ tomnuj xwỳnhjê hwỳr na pre Tĩrtũm inhmẽ pa wrỳ. Te nhỹri mẽ apikunor nhũm ixte mẽ ajapêr o ixpa kaxyw Tĩrtũm kot mẽ awỳr inhmênh nhũm ixwrỳk nê nhỹri ixte mẽ ajapêr o ixpa nê mẽ amã ixkator nê ixkĩnh nê ma akupỳm hwỳr mẽ ato inhmõrta pyràk. Anê.

Mē pahte Tirtūm mā tanhmā amnhī nhīpêx to

Matêwre 25.14-30

Hāmri nhūm mē ohtô nē Jejus mar o hkôt Jerujarē hwÿr mra. Na prem htÿx tanhmā kot amnhī nhīpêx to hā hkamnhīx o hkôt mō nē axpên mā:

—E ma pu mē hkôt. Koja Jerujarē hwÿr pōj hāmri nē kēp mē pahpê Ijaew nhō pahi nē mē pahto amnhīptār kurē kumrêx. E kwa ma pu mē hkôt. Anē.

¹² Nhūm Jejus mē hamaxpêr kôt mē omunh mex nē. Jakamā kot mē piitā mē ho amnhīptār xā hā arīgro hā mē kām amnhī jarēnh kaxyw. Kormā Jerujarē hwÿr ahtêp kêt ri mē kām amnhī jarēnh kaxyw. Nom hprī hā mē kām hā amnhī jarēnh kêt nē. Ām amnhī tā kuxi nē mē kām awjarē nē mē kām:

—Koja nhÿri krī hō kamā mēhō myja. Kot amnhī to rax o hkwyjê jakrenh xwÿnhja. Nē krī hō kamā krī piitā hkôt pahi nhō pahihitija hāmri harēnh ma nē amnhī wÿr kuwÿ. Kot ma hwÿr mōr nhūm ō krī kamā nē määnēn krī hkwy kamā kēp mē ō pahi kaxyw kot ām kaxyw nhūm hwÿr nojarêt. ¹³ Hāmri nē amnhī wÿr kām mē àpēnh xwÿnhjê ho 10 nē tanhmā mē hā karō hto. Nhūm mē hwÿr mra nhūm mē kām amnhī jarē nē mē piitā mē kām kàxpore hkwy gō. Ahpÿnhā mē kām hpÿnh nē kugō nē mē kām: “E ota ixkàxpore hkwyta. Kot kaj mē ixkutêp tanhmā ri inhmā ho rax to. Kêr pa mēmo arīgro hā akupÿn mō kē ra ixahā inhmā ho ohtô nē pa hamÿ.” Anhÿr o mē kām kapêr hāmri nē ma mō.

¹⁴ Hāmri nhūm ō krī nhō xwÿnhjaja ra kēp mē ō pahi kaxyw harēnh ma nhūm ja mē kēp omnuj nē. Nē mē kām hkÿnh kêt jakamā ma krī hō kamā kot mē kaxyw ām xwÿnhhta wÿr hkwy rē nhūm mē ma hwÿr mra nē hwÿr pōj. Hāmri nē kot mē kaxyw ām mā xwÿnhhta pumu nē kām: “Pa. E ot pa mē awÿr mra. Kwa na ka xep ra mē ixkaxyw mē inhīōja xām kaxyw. Kwa na mē inhmā jahti hkÿnhiti hā. Kwa mē ixkaxyw ām kêt nē nà?” Anhÿr o kām kapêr.

¹⁵ —Tā no nhūm ām mē kuma nē ām mē kuma nhūm mē awjanā nē mā akupÿm mra. Hāmri nhūm pahija mē kaxyw mē kām hkÿnh kêt xwÿnhhta xām nhūm ma akupÿm ō krī hwÿr mō. Mōō nē ra pōj hāmri nē amnhī wÿr kām mē àpēnh xwÿnhjê hā karō nē mē kām: “E no ixte mē amā kàxpore nhōr xwÿnhhta? Tanhmā na ka prem ixkutêp inhmā ho rax to? E mē inhmā agō pa omu.” Anē.

¹⁶ —Hāmri nhūm wamta kām: “Ota akàxpore ate inhmā ōr xwÿnhhta. Na ka pre inhmā ho pyxi nē agō pa kupy nē ho mēmo hy hkwy japrō nē hkre. Nhūm ō pa mē kām ho wēnē ho ri ixpa nē hpānhā kàxpore jamÿ nē hipy amā kurē nhūm ra kēp 10. Ota. E amÿ.” Anē.

¹⁷ —Hāmri nhūm kuma nē hkÿnh nē. Hāmri nē kām: “Nā ām hāmri na ka ā inhmā ho rax anē. Ixte amā ho pyxi nē ōr tā ka pre inhmā hamār mex nē nhūm kànhmā axkamē nē ra kēp 10. Tā ra ixpē krī hkwy kamā mē ō pahi jakamā kot ka inhmā krī ho 10 nē inhmā hamār o ri apa. Jakamā kwa māmri amnhīm kàxporeta o arīk.” Anē.

¹⁸ —Hāmri nhūm hpānhā hōja hwÿr tē nē kām: “E ota akàxporeta. Na pa pre ho mēmo hy hkwy japrō nē hkre nhūm ō pa mē kām ho wēnē nē hpānhā kàxpore jamÿ nē hipy amā kurē nhūm ra kēp 5. Tā ota. E amÿ.” Anē. ¹⁹ Hāmri nhūm kuma nē kām: “Nā ām hāmri. Hāmri na ka ā inhmā ho rax anē. Jakamā kot kaj hpānhā inhmā krī ho 5 nē ho amnhīptār o apa. E māmri amnhīm kàxporeta o arīk.” Anē.

²⁰⁻²¹ —Hāmri nhūm hpānhā hkôt hōta tē. Nom hkwyjê hkÿnhā ō patrāw mā tanhmā kàxpore ho rax to hkêt nē. Ām tanhmā hamaxpêr punuj to nē htÿx ri kot kēp ho ōxÿ nē amnhīm piitā hamÿnh par nē akupÿm kām hkwy nhōr kêt

ã hkamnhĩx. Jakamã tanhmã kãm ho rax to hkêt nê. Âm hkupu nê o tẽ nê nhÿri kutêp kuxi. Hãmri nhũm õ patrãw amnhĩ wÿr hã karõ nhũm hwÿr tẽ nê amnhĩ nê kãm kapêr punuj nê kãm: “Tk. Ota akãxporeta. Ixte amã tanhmã ho rax tore hã. Ixte amã ho rax ronhÿx ka amnhĩm piitã hamÿnh pa nê akupÿn inhmã hkwy nhõr kêt nê. Rÿ ixte tanhmã apê homnuj to ronhÿx ka hã inhmã akir. Jakamã na pa tanhmã amã ho rax to hkêt nê. Âm hkupu nê o tẽ nê ho amũxu nhũm arĩ akutêp hikwÿ. Tã ota.” Anhÿr o amnhĩ nê õ patrãw mã kapêr punuj nê. ²²⁻²³ Hãmri nhũm tee ri amnhĩ tã kuma. Kot amnhĩ to mex xwÿnh nê kãm mẽ àpênh xwÿnhjê ho mex o pa xwÿnh tã ã kãm àpênh xwÿnh kot kãm kapêr anhÿrja ma nê amnhĩ tã kamã gryk nê. Hãmri nê kãm: “Tk. Kwa xã ã ixte amnhĩ nhĩpêx anhÿr? Nã ixte ã amnhĩ nhĩpêx anhÿr kêt. ã ixte amnhĩ nhĩpêx anhÿr nhũm amã ixpuma ronhÿx ka pre amã ixpuma xaj ixkãxporeta py nê ixwakre kamã amnhĩ krã hkõt tanhmã inhmã ho rax to. Tã nhÿx pa pre ra akupÿn awÿr tẽ nê hamÿ. Nã na ka ã ijarênh anhÿr o axêx mã amnhĩ krã hkõt tanhmã inhmã ho rax to hkêt nê. Mÿrapê kot paj atomnuj tÿx nê ka rĩ amnhĩ pumu. Pêr âm ajamaxpêr punuj.”

²⁴—Nhũm pre ã kãm kapêr anê hãmri nê mẽ kot mar o kuhê xwÿnhjê mã kãm: “E mẽ atõ kêp kãxpore py nê wam kot ho 10 nê hamÿnh xwÿnhnta mã agõ.” Anê. ²⁵ Hãmri nhũm mẽ tee ri kuma nhũm ja mẽ kêp omnuj nhũm mẽ kãm: “Kwa nã ra hikãxpore rax kênã. Ra ate kãm ho 10 nê õr kênã.” Anê. ²⁶ Hãmri nhũm mẽ kãm: “ÿÿ nom tãã. Mãmrĩ kãm agõ. Koja mẽhõ inhmã àpênh mex pa amnhĩ tã omu nê kot inhmã àpênh mexta pãnhã ho mex nê. No koja inhmã àpênh mex kêt nê pa tee ri ja hã omu nê ho mex kêt nê. E mãmrĩ kãm agõ.” Anê. ²⁷ Hãmri nê hpãnhã mẽ kãm: “E hpãnhã mẽ kãm ixprãm nõkati xwÿnhhjaja. Ixte mẽ ho amnhĩptar mã tã mẽ kãm ixprãm nõkati xwÿnhhjaja. Mẽ ma mẽ hwÿr mra nê mẽ ho akuprõ nê akupÿn amnê ixwÿr mẽ o mra nê inhnoo mã mẽ himex pa.” Anê. ã mẽ ujarênh kot anhÿr. Anê.

Nhũm pre Jejus ã mẽ kãm ujarênh anê. Te tãm kêp patrãwta pyrã nê ã amnhĩ jarênh anê. Mẽ kot tanhmã amnhĩ nhĩpêx to ho pa hã mẽ omunh xã hkõt tanhmã mẽ hipêx to hã amnhĩ jarê.

Jejus kot Jerujarê hwÿr ar ã harênh

Matêwre 12.1-11; Makre 11.1-11; Juãw 12.12-19

²⁸ Nhũm Jejus kormã Jerujarê hwÿr mõ. ²⁹ Hãmri nê ra Petake mẽ Petãn wa htêp o mõ. Hixêt pê Oriwêhti kahti ri na krĩ wa xa. Jakamã nhũm Jejus hkõt mẽ pa ho mẽ pa xwÿnh wa ho axkrut nê amnhĩ kukamã wa kumê. ³⁰ Nê wa kãm:

—E. Wa ma krĩ mÿj wÿr mẽ ixkukamã wa tẽ. Nê wa hwÿr pøj nê nhÿri jumênre nyw mã ê nê âm ata pumu. Kormã mẽ kot hã hkrĩ hkêt xwÿnhnta. Ka wa omu nê kãm ê xã hpõt nê man akupÿn ixwÿr o tẽ. ³¹ Nhũm mẽhõ ja hã war apumu nê hã tanhmã war amã kapêr to ka wa kãm ã ijarênh anê nê kãm: “Mẽ panhõ Pahiti na hã karõ pa wa hwÿr tẽ.” Anhÿr o wa kãm ijarê. E wa ma hwÿr tẽ. Anê.

³² Hãmri nhũm wa kuma nê ma hwÿr htêm kurê kumrêx. Nê wa krĩm pøj nhũm Jejus kot wa kãm harênh xã hkõt jumênreta pumu. ³³ Hãmri nê kãm ê xã hpõt o xa nhũm õ dõnjaja mra nê hã wa omu nê wa kãm:

—Tk. Kwa mo kaxyw na ka wa ri mẽ ixpê mẽ ixkrit mã ê xã pôh o wa xa? Kwa xã kot kaj wa mẽ ixpê ho ahkĩ nã? Anê.

³⁴ Hãmri nhũm wa mẽ kãm:

—Nà mẽ panhõ Pahihti na wa inhmã anẽ pa wa tẽ. Wa ixte ma akupÿm kutã ho inhmõr kaxyw. Anẽ.

Hãmri nhũm mẽ wa kuma nẽ wa kãm:

—Tõe. Nà wa mãmrĩ ma kãm o tẽ. Anẽ.

³⁵ Hãmri nhũm wa ma akupÿm Jejus wÿr o tẽ. Hãmri nẽ kaxyw amnhĩ xẽ hkwy hopõj nẽ kãm ho hkõ kahty nẽ kãm ho htÿx nẽ o xa nhũm hã nhÿ nẽ mõ. ³⁶ Kormã Jerujarẽ hwÿr hixêt ã ãpir o mõ. Nhũm mẽ kot omunh o mrar xwÿnhjaja hkĩnh nẽ ma hkukamã kot pry ho mex kaxyw amnhĩ xẽ hkwyÿptyr o mõ. ³⁷ Hãmri nhũm mẽ hixêt ã api nẽ kormã ahpar mã wrÿk o mõ. Hãmri nhũm Jejus kõt mẽ pa ho pa xwÿnhjaja kãx pẽ Tirtũm mex o mex ã harẽnh o hkõt mõ. Ra mẽ kot hkõt pikamẽnh ry nẽ kot mẽ kãm aa mẽmoj pumunh kêt kwÿ ho anhÿr rax ã omunh jakamã hkĩnh nẽ nẽ Tirtũm mex o mex ã harẽnh o hkõt mõ. ³⁸ Nẽ harẽnh o:

E ota Tirtũm kot mẽ pahwÿr mẽnh xwÿnhhta na ra põj.

ãm hãmri na mẽ pahwÿr wrÿ. Na mex kumrẽx.

Kẽp mẽ panhõ Pahihti mex na. ãm hãmri na pre Tirtũm mẽ pahwÿr kumẽ. Tirtũmja mex kumrẽx. Mex o mex. Kukwak ri pix mã na pu htem pajamakẽtkati nẽ paxãmnhix ri papa rãhã ho papa.

Anhÿr o Jejus kõt harẽnh o mõ. Ra kot mẽ ho amnhĩptar kurẽ kumrẽx ã hkamnhix jakamã hkĩnh nẽ hkõt ã kapẽr o mõr anẽ. ³⁹ Hãmri nhũm Parijew nhõ xwÿnh kwÿjaja mẽ hkõt mra nẽ tee ri mẽ kuma hãmri nẽ Jejus mã kãm:

—Kwa Jejus. Mẽ kãm anẽ kẽ mẽ anhĩkrẽ nà? Anẽ.

⁴⁰ Hãmri nhũm mẽ kãm:

—Tk. Nà kot paj mẽ kãm anhÿr kêt nẽ. ã mẽ kapẽr anhÿrja na inhmã mar hprãm. Kwãr mẽ mãmrĩ Tirtũm mã mex o mex ã harẽnh o ixkõt mõ. Kot mẽ anhÿr kêt nhũm ra pikap kẽn nhĩkwÿ xwÿnhja tee ri ja hã mẽ omu hãmri nẽ tãm tanhmã amnhĩ nhĩpêx to nẽ mẽ hpãnhã tãm Tirtũm mã mex o mex ã harẽnh o hikwÿ. Jakamã kwãr mẽ mãmrĩ kapẽr anẽ. Anẽ.

Jejus tee ri kot Jerujarẽ hkukamã hamaxpẽr ã harẽnh

Rukre 23.27-31

⁴¹ Nhũm mẽ kormã Jerujarẽ hwÿr hpõx o mõ. Kormã hixêt rũm ahpar mã hwÿr wrÿk o mõ. Hãmri nhũm Jejus amÿm amnhĩ hkukamã Jerujarẽ nhõ xwÿnhjẽ pumunh o mõ nẽ mẽ hkukamã hamaxpẽr o hkaprĩ nẽ. Hãmri nẽ hkaprĩ xãj mÿr o mõ. ⁴² Hãmri nẽ te kot mẽ kuri mẽ omunh o ri pa pẽ mẽ kãm kapẽr pyrãk o mẽ kãm kapẽr nẽ mẽ kãm:

—Hẽxta waa nẽ Jerujarẽ nhõ xwÿnhjaja. Kot kaj mẽ amex kêt nẽ. Mẽ ate amnhĩ kukamã axãhpumunh mex ronhÿx ka mẽ ra mẽ kãm mẽ akurẽ xwÿnhjẽ pumaj ixkõt amnhĩ xunhwÿr kurẽ kumrẽx nhũm mẽ tee ri tanhmã mẽ ato mã. Ka mẽ ra ixkukwak ri amex nẽ ajamakẽtkati nẽ akĩnh nẽ ri apa ho apa. ⁴³⁻⁴⁴ Tirtũm tãm kot mẽ awÿr inhmẽnh tã ka mẽ amã ixprãm kêt nẽ. Jakamã koja nhÿrmã mẽ kãm mẽ akurẽ xwÿnhjaja mẽ awÿr mra nẽ mẽ anhõ krĩm hipõk pa. Hãmri ka mẽ amnhĩ wÿr mẽ omu nẽ tee ri ajapõx kaxyw nhũm mẽ awÿr agjẽ nẽ mẽ anhĩmex pa nẽ mẽ anhõ krĩa grãnh pa. Nẽ ahpÿnhã ri mẽ anhõrkwÿ grãnh pa. ã koja mẽ mẽmoj piitã grãnh par anẽ. Anẽ.

Jejus kot Tirtũm nhõrkwÿ hwÿr ãr ã harẽnh

Matẽwre 21.12-17; Makre 11.15-19; Juãw 2.13-22

⁴⁵⁻⁴⁶ Tã nhũm Jejus Jerujarẽ hwÿr axã nẽ jumẽnre rũm wrÿ hãmri nẽ ma Tirtũm mã amnhĩ jarẽnh xã hã ixkreja wÿr tẽ. Hãmri nẽ hwÿr axã nẽ tee ri kamã mẽ pa xwÿnhjẽ pumunh o xa. Nhũm mẽ ra axtem nẽ mõx nẽ õwẽhti nẽ

tuuti ho wênê ho kuhê. Mê kot haprôr nê Tirtûm mã hpar nê kãm ôr pê kãm amnhî jarênh kaxyw mê kãm ho wênê ho kuhê. Nê axtem nê mê kãm hã ohtô rax kãm mê kãm ho wênê. Hâmri nhûm Jejus mê hwÿr axà nê tee ri mê omu mê kãm akir nê mê kãm:

—Tk. Kwa na. Tirtûm kapêr ã kagà htûm kot ôrkwÿ jarênh kot: Inhôrkwÿja ãm mê ate inhmã amnhî jarênh xà hã ixkre pix kaxyw na. Anhÿr o kot harênh tâ ka mê axtem nê kamã ã amnhî nhîpêx anhÿr o apa. E mê ajapôj nê ma ajapêx tokyx anê.

Anhÿr o mê kãm kapêr hãmri nê ixkre nê mê kator nhûm mê ma hapêx pa. ⁴⁷Tã nhûm Jejus apkati mê Tirtûm mã amnhî jarênh xà hã ixkreja wÿr mra nê kamã mê ahkre ho hkrî. Hâmri nhûm mê ô patre krãhtûm mê Tirtûm kapêr tûm o mê ahkre xwÿnhjê mê mê kot amnhî to rûnh xwÿnhjaja kot mê ahkre ma nhûm ja mê kêp omnuj nê nhûm mê kãm hpîr prãm nê. ⁴⁸Nom nhûm amarî mê pa xwÿnhjaja mê kurom kãm mar prãm nê akryk mar o kuhê. Jakamã nhûm mê tee ri ja hã mê omu nê tanhmã mê kot hpîr to hkukamã hã axpên ma.

20

Mêhõ nhÿ hã Jejus kot mê ahkre hã harênh

Matêwre 21.23-27; Makre 11.27-33

¹ Nhûm arîgro hõ hã nhûm Jejus kê axte Tirtûm mã amnhî jarênh xà hã ixkreja wÿr axà nê mê ahkre ho nhÿ. Tanhmã mê kot amnhî nhîpêx to nê nhÿrmã Tirtûm mê wa kuri htîr tûm nê pa hã mê kãm kapêr o nhÿ. Hâmri nhûm Ijaew nhõ pahîê mê mê kot Tirtûm kapêr tûm o mê ahkre xwÿnhjê mê mê ô patre krãhtûmjaja hêx rom mar o kuhê. ²Hâmri nê kãm:

—Kwa mê inhmã amnhî jarê. Mêhõ nhÿ hã na ka hte ã amnhî nhîpêx anhÿr o ri apa? Na ka hte akupÿm mê ho mex o apa nê tanhmã mê ahkre hto ho apa. Xà amnhî krã hkôt na ka hte ã amnhî nhîpêx anê nà? Anê.

³Hâmri nhûm mê kãm:

—Nà ixkumrêx kot paj mêmêoj tâ mê akukja. Ka mê inhma nê inhmã harê pa rî kormã tanhmã mê amã amnhî jarênh to. ⁴Finat Juãw Paxisja ã kot paj mê akukja. Mêhõ nhÿ hã na pre mê hkrã kumrâr o pa? Xà amnhî krã hkôt nà xà Tirtûm nhÿ hã? E mê atô inhmã harê. Anê.

⁵⁻⁶Hâmri nhûm mê kuma nê tee ri kot tanhmã kutã kãm harênh to hkukamã hamaxpêr nê axpên mã:

—Kwa tanhmã kot puj mê kãm harênh to? Jar mê kot mar xwÿnhjaja na htem kêp Tirtûm nhÿ hã kapêr jarênh o pa xwÿnh ã harênh o pa. Tã kot puj mê kãm kot amnhî krã hkôt mê hkrã kumrâr o pa hã harê nhûm mê tee ri mê pama nê mê pakamã gryk tÿx nê. Nê mê paxêx rom mê pahte kãm pakapêr ã mê pahpumunh kurê kumrêx nê kên o mê pahtak o mê panhîmex. Nom kot puj mê kãm Tirtûm nhÿ hã mê hkrã kumrâr ã harê nhûm mê pamã kapêr o: “ã kot anhÿr kênã na ka prem kapêr ma nê ra ixkôt amnhî xunhwÿr kêt nê?” Anê. Nà kot puj mê kãm tanhmã harênh to hkêt nê. Kot puj mê ãm kãm aa te mê pahte ja jarênh mar kêt pyrãk o harê. Anê.

Mê kot tanhmã kãm nê nhûm kot ta pãnhã tanhmã mê kãm nê pymaj nhûm mê ãm tee ri kãm tanhmã nê hprãm kapry o kuhê.

⁷Hâmri nê kãm:

—Konên. Mê ixte mêhõ nhÿ hã kapêr o pa hã omunhre hã. Anê.

⁸Hâmri nhûm mê kuma nê mê kãm:

—Tk. Tõe kot pa xep ijaxwýja mẽ amã tanhmã amnhĩ jarẽnh to hkêt nẽ. Ijaxwýja ixte mẽhõ nhỹ hã ã ixte amnhĩ nhĩpêx anhỹr o ri ixpa hã amnhĩ pumunhre hã. Anẽ.

Mẽ àpênh punuj xwýnhjê jarẽnh

Matêwre 21.33-46; Makre 12.1-12

⁹ Nhũm Jejus arĩ Ijaew nhõ pahijê mã kapêr. Nẽ mẽ kot tanhmã hipêx to hkukamã mẽ kãm tanhmã amnhĩ jarẽnh to. No ãm amnhĩ tã kuxi nẽ mẽ kãm awjarê nẽ mẽ kãm:

—Koja mẽhõ hpur ã hkwýjê kot kamã kãm àpênh kaxyw mẽ kãm karõ. Hãmri nhũm mẽ ma hwýr mra nẽ kamã mẽmo hy hkre nẽ hkre pa. Hãmri nhũm ra hpur nhõ dõnja nhỹhỹm nojarêt nẽ kãm mẽ àpênh xwýnhjê mã tanhmã hpur jarẽnh to nẽ mẽ kãm: “E or ixpur nõ. Kê kamã mẽmoj hkã hpa ka mẽ mãmri kamã axujamỹn pa nẽ ho axkjê. Nẽ ixkutêp inhõ jaxwý nẽ mãmri mẽ anhõ tanhmã ho hprãm xã hkõt tanhmã ho.” Anẽ.

—Nhũm ã mẽ kãm kapêr anẽ hãmri nẽ ma nhỹhỹm mẽ.

¹⁰ —Tã nhũm ra hkã hpa. Nom nhũm hpur nhõ dõnja kormã krĩ hõ kamã ri hã ujahkre ho ri pa. Tã kuri kãm àpênh xwýnhjê hõja nhũm akupỹm mẽ hwýr kumê. Mẽ kot kãm kwý nhõr nhũm ma kot kãm o mõi kaxyw ma mẽ hwýr kumê nhũm ma mẽ hwýr mõi. Mõi nẽ mẽ hwýr pøj nhũm mẽ omu nẽ axtem nẽ unê nẽ htak nẽ akupỹm hano nhũm ma akupỹm ý kamã mõi. ¹¹ Hãmri nẽ pøj nhũm õ patrãwja tee ri omu nẽ hpãnhã ja mẽ nhũm ma mẽ hwýr mõi. Mõi nẽ mẽ hwýr pøj nhũm kê wem mã ho anẽ nẽ unê nẽ htak nẽ akupỹm hano nhũm wamta pyrà nẽ ma akupỹm ý kamã mõi.

¹² —Hãmri nhũm kê axte hkõt ja mẽ nhũm ma mẽ hwýr mããnen mõi. Ma mẽ hwýr mõi nẽ pøj nhũm mẽ te ho wamta wa hipêx pyràk o hipêx nẽ unê nẽ htak rax nẽ amnhĩ nẽ hano nẽ pur nẽ kapõt ã kumê. Hãmri nhũm ma akupỹm mããnen ý kamã mõi. ¹³ Nhũm mẽ õ patrãw tee ri mẽ omu nẽ hamaxpêr o: “Hêxta waa nẽ. Tanhmã kot paj amnhĩ nhĩpêx to? Nà kot paj mẽ hwýr ixkra mãn mẽ. Inhmã hapê htã kot paj mẽ hwýr kumê kê ma mẽ hwýr mõi. Hãmri nhũm mẽ kêp ixkra hã omu nẽ tanhmã ixpê ho hkêt nẽ. Nẽ tã inhmã kãm inhõja kwý gõ.” Anhỹr o hamaxpêr hãmri nẽ ma mẽ hwýr kumê nhũm ma mẽ hwýr mõi.

¹⁴ —Tã ra mẽ hwýr hpõx o mõi nhũm mẽ amỹm amnhĩ wýr omu nẽ kêp hkra hã omu nẽ hã axpên mã amỹnê nẽ axpên mã: “E onêj hpur nhõ dõn krata tẽ. Koja nhỹrmã õ papaj mýr pẽ amnhĩm pur ã pyka pytà nẽ ho õ. Kwa pu mẽ hpĩr kurê kumrêx nẽ kêp hpurja o panhõ. E tokyj pu mẽ kupĩ ri.” Anẽ.

¹⁵ —Hãmri nhũm tẽ nẽ mẽ hwýr pøj nhũm mẽ unê nẽ pur nẽ ho kato nẽ ma o tẽ nẽ kupĩ. Á mẽ ujarẽnh kot anhỹr. Anẽ.

Nhũm pre ã Jejus mẽ kãm ujarẽnh anẽ nẽ hã tanhmã mẽ hkukjêr to nẽ mẽ kãm:

—E koja hpur nhõ dõnja hkra jarẽnh ma hãmri nẽ tãm mẽ hwýr mõi nẽ tanhmã mẽ hipêx to wehe? ¹⁶ Koja ma mẽ hwýr mõi hãmri nẽ mẽ himex pa. Hãmri nẽ hpãnhã hpur ã nhãm mẽmojjê rẽ nhũm mẽ tã kãm hamãr mex o pa. Anẽ.

Nhũm pre ã Jejus mẽ kãm ujarẽnh anẽ hãmri nhũm mẽ kot mar xwýnhhtaja ujarẽnh kamã amnhĩ jarẽnh mar kurê kumrêx. Mẽ kot Tirtũm kot mẽ hwýr rẽnh xwýnhjê kapêr mar kêt nhũm mýrapê mẽ kãm mẽ hkurê xwýnhhaja kot mẽ kêp mẽ õ pika pytàr nẽ mẽ himex par ã amnhĩ jarẽnh ma nhũm ja mẽ kêp omnuj týx nẽ. Hãmri nẽ hêx rom Jejus mã kãm:

—Tk. Kwa nà nhỹx pre kêt pur nhõ dõnja ã mẽ hipêx anhỹr kêt nê. Anê.

¹⁷ Hãmri nhũm mẽ kuma nê mẽ omunh o xa. Nê mẽ omunh pê mẽ no kagàr mã mẽ kãm kapêr nê mẽ kãm:

—Nà ã mẽ hipêx anhỹr mã mẽ tãm kênã. Mãn ka prem ra Tirtũm kapêr ã kagà htũm kot ja jarênh ma. Harênh kot:

Mê kot kên o amnhĩm òrkwỹ nhĩpêx kaxyw nê kên maati pumu nê htỹx omnuj ã hkamnhĩx nê hkaga.

Mê kot hkaga htã Tirtũm mẽ kurom mex o kot kên piitã hakrenh par ã omunh kurê kumrêx. Anê.

Ã Tirtũm kapêr ã kagà htũm kot mẽ ajarênh te mẽ kot kên maati punuj ã hkamnhĩx nê hkaga xwỹnhjê jarênh pyrãk o ã mẽ ajarênh kot anhỹr. Anê.

¹⁸ Nhũm pre ã Jejus mẽ kãm te kêp kên maati pyrãk o mẽ kãm amnhĩ jarênh anê. Hãmri nê axte amnhĩ tã kuxi nê mẽ kãm axte kên jarênhnta pyrã nê mẽ kãm:

—Nà kot kaj mẽ atõ ixkaga hãmri nê te mẽhõ htỹx htêm nê kên pumunh kêt nê hã htêk nê tẽm pyrãk o amnhĩ nhĩpêx. Jao ixkutã amnhĩ xãm. Rỳ ka tanhmã amnhĩ to nê ixkaga nhũm te kên maati hõ htêm nê kot anhĩpy htêm nê axõm par pyrãk o anhĩpêx ka amex kêt nê. Anê.

¹⁹ Nhũm pre ã Jejus mẽ kãm ujarênh kãm mẽ harênh anê. Hãmri nhũm Tirtũm kapêr tũm o mẽ ahkre xwỹnhjê mẽ mẽ õ patre krãhtũmjaja kot mẽ kãm kên jarênh o te mẽ tãm harênh pyrãkja ma nhũm ja mẽ kêp omnuj tỹx nê. Jakamã nhũm mẽ kãm Jejus pynênh nê haxàr prãm nê. Nom amnhĩ tã kãm mẽ kot mar o kuhê xwỹnhjê puma nê.

Mê kot hêx rom Jejus kukjêr ã mẽ harênh

Matêwre 22.15-22; Makre 12.13-17; mããñn Rõmãn 12.1, 13.6-7

²⁰ Hãmri nhũm Tirtũm kapêr tũm o mẽ ahkre xwỹnhjê mẽ mẽ õ patre krãhtũmjaja Jejus tânopxar o kuhê. Hãmri nê ra amnhĩ wỹr mẽmy hkwy hã karõ nê mẽ kãm:

—E. Mẽ ma Jejus wỹr mra nê te mẽ ate hkõt amnhĩ xunhwỹr kaxyw pyrãk o amnhĩ nhĩpêx nê mẽmoj tã ri hkukja. Mẽmoj tã hkukjêr rax nê. Kêr kê Rõm nhõ pahĩ Sesti kapêr kwỹm ri tanhmã mẽ amã kapêr to ka mẽ ama nê man akupỹn mra nê mẽ inhmã harênh kurê kumrêx. Pa mẽ ama nê ma hwỹr mra nê hã unê nê ma Sesti nhỹ hã mẽ pahto amnhĩptãr xwỹnhnta wỹr o tẽ nê ìhkram haxã. Anê.

²¹ Hãmri nhũm mẽ kuma nê mẽ kãm:

—Tõe. Nà kot paj mẽ anê. Anê.

Hãmri nê ma hwỹr mra nê hêx rom kãm kapêr nê kãm:

—Pa Jejus? Nã ãm hãmri na ka hte Tirtũm kapêr o mẽ ahkre mex o ri apa. Na ka hte mẽ kamã akahak kêt nê. Nê mẽ kot tee ri tanhmã ato kapêr punuj to htã ka aprĩ hã mẽ ahkre mex o ri apa. ²² Kwa mẽ inhmã mẽmoj jarê. Rõm nhõ pahihtĩ kot mẽ pahte kãm kãxpore hkwy nhõr ã mẽ pahpê Ijaew mã karõta. Kwa xà we ja amã mex nã? Xà kot pu mẽ kãm kugõ nã xà kot pu mẽ kãm òr kêt nê? E kwa mẽ inhmã tanhmã harênh to. Anê.

²³ Nhũm prem ã hêx rom kãm kapêr anhỹr tã nhũm ra mẽ hamaxpêr ã mẽ omu nê mẽ kãm:

²⁴—E mẽ atõ anhõ kãxpore htỹxre japêr nê inhmã hõ gõ pa omu. Anê.

Hãmri nhũm mẽ kãm ja gõ nhũm kupy nê omu nê kãnhmã mẽ kãm kupê nê mẽ kãm:

—E mẽhõ nhĩxi nê mẽhõ karõ na ja hã? Anê.

Hãmri nhũm mẽ kãm:

—Pahi Sesti karō nē hixi na hā kēnā. Anē.

²⁵ Hāmri nhūm mē kuma nē mē kām:

—Ty. Tō kēr ka mē māmri kām hkwȳ nhōr o apa. Hā hkarō nē hā hixi. Tām kot hipēx xw̄ynh jakamā ō na. No mē kajaja na pre Tirtūm mē anhīpēx nhūm mē apē ō jakamā kwa kēr ka mē kapēr kōt pix mā ri amnhī nhīpēx o ri apa. Anē.

²⁶ Nhūm pre ā Jejus mē kām kapēr anē nhūm mē piitā mar o kuhē. Nhūm mē kot hēx rom kām kapēr mā xw̄ynhjaja amnhī jaēr pē ā kot kàxpore jarēnh anhīrja ma. Hāmri nē tee ri axte mēmoj tā hkukjēr nhūm kot pahi Sesti kw̄ym ri kot tanhmā harēnh to kaxyw ām tee ri tanhmā hkukjēr to kaprȳ. Hāmri nē axte tanhmā kām nē hkēt nē ām akryk omunh pē mar o kuhē.

Akup̄ym mē ht̄ir jarēnh

Matēwre 22.23-33; Makre 12.18-27; Juāw 5.21, 6.39; määnēn Wam Korīt 6.14, 15.12-28; Wam Tesarōn 4.13-18; Apokarip 20.4

²⁷ Tā nhūm Satusew nhō xw̄ynh kw̄yjaja. Mē kot akup̄ym mē ht̄ir mā hamaxpēr kēt jakamā mē htyk nē mē hapēx ā mē hkamnhīx. Jakamā na prem tanhmā axpēn mā Jejus jarēnh to nē axpēn mā:

—E kwa pu mē ma hw̄yr mra nē mēmoj xiht̄yx ā hkukja kē mē pama nē tee ri tanhmā mē pamā harēnh to hkukamā hamaxpēr. Hāmri nhūm mē piitā ja hā omu nē āhpumunh t̄yx kēt ā omunh kurē kumrēx. E ma pu mē hw̄yr.

Anē nē ma hw̄yr mra nē Parijew nhō xw̄ynhjē pyrà nē hēx rom ahkukja nē kām:

²⁸ —Pa Jejus? Kwa mē inhmā mēmoj jarē. Na pre finat Mojesja Tirtūm nh̄y hā mē panhīgēt mā ā karō anē. Mē hkra hkēt rāhā mē pa nē mē htyk xw̄ynhjaja nhūm mē harēnh o:

Koja mēhō hprō nē kormā kamā hkra hkēt rāhā pa nē ty. Hā koja hkōt htōja hpānhā hprōta o hprō nē kamā hkra. Hāmri nhūm kato nē te kēp htō htyk xw̄ynhta hkra pyràk. Anē.

Na pre ā Mojes mē kām karō anē. ²⁹ Jakamā kwa ga mē ixujarēnh ma. Koja mē kot axpēn to htō xw̄ynhjaja kēp 7. Nhūm kot waja mēhō ho hprō nē wa pa nhūm kamā hkra hkēt rāhā ty. Nhūm hkōt htō hōta hpānhā hprō ho hprō ³⁰ nē wa axpēn to pa. Nhūm määnēn ty. Kamā hkra hkēt rāhā ty.

³¹ —Nhūm htō hōta. Haxw̄yja hpānhā tām o hprō nē wa axpēn to pa grire nhūm haxw̄yja kamā hkra hkēt rāhā ty. Hāmri nhūm htō hkwȳjaja piitā nija pyxi nē axpēn pānhā ho hprō hpa. No ām mēhō kamā hkra hkēt rāhā ra htyk pa. ³² Hāmri nhūm mē hprōta mē hkōt amnhī to hapu nē ty. ³³ Tā Tirtūm kot akup̄ym nh̄yrmā mē ho ht̄ir ronh̄yx nh̄y nh̄yx kēp nija mjēn kumrēx? Ra piitā kot ho hprō kēnā. E mē inhmā ja jarē. Anē.

³⁴ Hāmri nhūm Jejus mē kām:

—Nā kaxkwa kamā mē kot amnhī nhīpēxja axtem na. Pika ja kamā na htem pa nē apt̄ar nhūm mē axpēn mā mē kure. Ja mex. ³⁵ No mē kot Tirtūm kōt amnhī xunhw̄yr xw̄ynhjaja na htem ty hāmri nē Tirtūm nhō krī kamā kuri axte kām hprō hprām kēt nē ri pa. R̄y ni japēr nē kām mjēn prām kēt nē ri pa. ³⁶ Hāmri nē Tirtūm kapēr o mē wr̄yk xw̄ynhjē pyrà nē axte htyk kēt nē. Ām ht̄ir tūm rāhā nē pa ho pa. Tirtūm ra akup̄ym kot mē ho ht̄ir jakamā koja mē kēp hkra nē kuri ht̄ir tūm nē mex nē pa ho pa nē axte kām hprō r̄y mjēn prām kēt nē ri pa.

³⁷ —Nom mē ate akup̄ym mē ht̄ir mā ajamaxpēr kēt ā harēnhja kot paj mē amā harē. Amnepēm na pre Tirtūmja pī hpōk kamā Mojes mā kapēr nē kām:

Ixpê Apraãw nhõ Tirtüm na pa. Nê mãänên ixpê Apraãw kra Ijak mē htãmnhwý Jako wa õ Tirtüm na pa.

Anhÿr o Mojes mã amnhî jarē nhüm kuma nê hã kagà. ³⁸ Kêp apu arî mē htyk rãhã nhÿx pre ã mē harēnh anhÿr kêt nê. Nhÿx pre mē harēnh o: “Amnepēm Apraãw nê hkra nê htãmnhwý mē htür ri ixpê mē õ Tirtüm na pa pre.” Anhÿr o nhÿx pre mē harē. Nom na pre ã amnhî jarēnh anhÿr kêt nê. Mē pamã te Apraãwja mē htyk nê mē hapêx pyrãk. Nom nhüm prem ra Tirtüm ri akupÿm htür nê mex nê pa ho pa. Tã ka htem Tirtüm kapêr kwÿm ri akupÿm mē htür kêt ã mē harēnh o apa. Anê.

³⁹ Nhüm pre ã Jejus mē kãm kapêr anê. Hãmri nhüm Tirtüm kapêr tùm o mē ahkre ho mē pa xwÿnh kwÿjaja kuma nê tee ri axte tanhmã kãm nê hprãm kaprÿ nê kãm:

—Tÿ. Nã ãm hãmri na ka ã ja jarēnh anê. Anê.

⁴⁰ Hãmri nhüm mē axte mēmoj tã hkukjêr kêt nê. Tanhmã kot wem amnhî to nê hamaxpêr o hakre? Na prem ãm tee ri kãm hamaxpêr o hakrenh prãm kaprÿ ho kuhê. Jejus kot mēmoj piitã hkukamã ãhpumunh tÿx o ãhpumunh tÿx.

*Jejus kêp pahi finat Tawi nhõ Pahihti hã kot amnhî jarēnh
Matêwre 22.41-46; Makre 12.35-37; mãänên Rômãn 1.3-4*

⁴¹ Tã nhüm Jejus kãnhmã xa nê amnhî tã tanhmã mē kot mar o kuhê xwÿnhjê hkukjêr to. Nom te nhãm mēhõ hã mē hkukjêr pyrã nê mē kãm:

—E kwa mē inhmã mēmoj jarē. Tirtüm kot mē akaxyw ãm mã xwÿnhã ã na pa mē akukja. Mo na htem axpên mã kêp finat pahi Tawi kanrêhã htãmnhwý pix ã harē nê mãänên kêp õ pahihti hã harēnh kêt nê? ⁴² Na pre Tawi Tirtüm kapêr kwÿ hã kagà nê tanhmã harēnh to. Tirtüm mex ã mē grer xàja kwÿ kamã harē nê hã kagà nê hã kagà ho:

Na pre Tirtüm inhõ Pahihti mã ã kapêr anê nê kãm: “E amnê ixwÿr tē nê inhîhkõ hã nhÿ nê inhmã mē ho amnhîptär o akrî.

⁴³ Kot paj mē kot kãm akurê xwÿnh piitã mē unênh pa nê awÿr mē o mra nê anhîhkram mē haxâr pa.” Anhÿr o pre kãm kapêr. Anê.

⁴⁴ Na pre ã Tawija Tirtüm kot Kris mã kapêr jarēnh anê. Mē kajaja na ka htem ãm kêp Tawi kanrêhã tãmnhwý pix ã ri axpên mã harēnh o ri apa. No kêt Tawi na pre kêp õ Pahihti hã harēnh o pa. Anê.

*Jejus kot tanhmã Tirtüm kapêr tùm o mē ahkre xwÿnhjê jarēnh to
Matêwre 23.1-12; Makre 12.38-40*

⁴⁵ Nhüm pre ã Jejus mē kãm kapêr anê nhüm mē piitã mar o kuhê. Hãmri nhüm hpãnhã hkõt mē pa ho mē pa xwÿnhjê mã kapêr nê mē kãm:

—Kwa mē o kora. Kêr ka mē Tirtüm kapêr tùm o mē ahkre xwÿnhjê kot amnhî nhîpêx o amnhî nhîpêx kêt nê. ãm mē omu nê ãm mē omu nê mē kot amnhî nhîpêx kôt amnhî nhîpêx o ri apa hkêt nê. ⁴⁶ Na htem mē piitã mē kot mē hã hpijaãm kaxyw mē ê mex pix kãm ri pa. Nê mē kãm mē piitã mē kot amnhîm mē rûnh xwÿnh ã mē harēnh o mē paja na mē kãm hprãm. Nê mē panhõ Tirtüm kapêr o mē ahkre xà hã ixkre kamã mē kãm amnhî to rûnh xwÿnhjê hkrî xà mex pix ã na mē kãm mē hkrî hprãm. Nê mēmoj tã mē hkînh ã arîgro hã nhüm htem mē apkur xà hã ixkre hwÿr akuprõ nê mē kãm mē kot amnhî to rûnh xwÿnhjê hkrî xà mex pix ã mē kãm mē hkrî hprãm. ã na htem amnhî nhîpêx anhÿr o pa.

⁴⁷ —Nê mē kêp mē mjên htyk xwÿnhjê ho ajuta ho pa hã amnhî jarēnh tã ãm amnhî to hêx nê axtem nê mē nokupyr pé mē kêp mē hikukrêx piitã ho

hapêx par o pa. Nê mê kêp mê ôrkwý pytä. Nê mê hêx rom te tãm mê kot amnhî nhîpêx pyrã nê Tirtûm mã amnhî jarênh japjêê ho kuhê. Mýrapê koja mê mex kêt nê. Kojã Tirtûm tanhmã ja hã mê hipêx to rax nê. Jakamã kwa kêr ka mê ã mê kot amnhî nhîpêx anhÿr xwÿnhjê hkôt amnhî nhîpêx o apa hkêt nê. ãm kwarĩ ho kwarĩ. Anê.

21

Kêp mjên htyk xwÿnh jarênh

Makre 12.41-44

¹ Nhûm Jejus kormã Tirtûm mã amnhî jarênh xã hã ixkre kamã mê omunh o xa. Na pre hte Ijaew piitã ixkreta ho mex kaxyw kãm mê hikãxpore hkwÿ nhôr o pa. Jakamã nhûm mê hikãxpore rûnh xwÿnhjaja hwÿr agjê nê kamã kãxpore gjênh xã kamã hkwÿ gjê nê ma akupÿm mra. ² Jakamã nhûm mêhõ ni pê mjên htyk xwÿnh haxwÿja hwÿr axã. Kêp amrakati kumrêx nê hikãxpore tÿxre ãm axkrutre htã mê hpãnhã hwÿr axã. Nê kãm Tirtûm kÿnh xaj hamê kamã kuxã hãmri nê kato nê ma akupÿm tẽ. ³⁻⁴ Hãmri nhûm Jejus arĩ omunh o xa. Kot ã amnhî nhîpêx anhÿr ã omunh o xa nhûm ja kãm mex nê. Hãmri nê hkôt mê pa ho pa xwÿnhjê mã harê nê mê kãm:

—E mãn ka mênire htêm mÿj pumu. Kêp amrakati nê hikãxpore ãm kêp grire htã amnhî pê ôr pa. Kwÿjê rom kãm Tirtûm Kÿnh xaj amnhî pê ôr par kumrêx. Apkur xã hã hikãxpore na. Mê hkwÿjaja na htem hikãxpore hkwÿ ho mra nê kugjê nom arĩ mê hikãxpore rax. No nhûm nire nêj mê kurom kãm hikãxpore japê hkêt nê. Nê ho ôxy hkêt nê ãmnhix piitã Tirtûm mã ôr pa. Anê.

Mê kot amnhî tomnuj xwÿnhjê hkukamã mê harênh

Matêwre 24.1-2; Makre 13.1-2

⁵ Tã hãmri nhûm Jejus kôt mê pa ho mê pa xwÿnhjaja kormã Tirtûm mã amnhî jarênh xã hã ixkre kaxwÿnh pumunh o kuhê nê axpên mã harê nê axpên mã harênh o:

—Hêxta waa nê. Ixkreja mex kumrêx. Kên rûnh o mê kot hipêx jakamã mex o mex. Nê mê kot ri Tirtûm mã hkÿnh xã nhôr nêj haxwÿja piitã mex. Anê.

Hãmri nhûm Jejus mê kuma nê mê kãm:

⁶ —Nã mex tã koja nhÿrmã mê kãm Tirtûm kurê xwÿnhjaja grãnh pa. Kojã arĩ kên ô axkrutre nê axpên mÿnh nê nôr kêt nê. Kojã piitã anghrã nê ahpÿnhã ri hikwÿ. Anê.

⁷ Nhûm pre ã mê kot hipêx anhÿrja kukamã mê kãm mê harênh anê nhûm mê tee ri hkukamã hamaxpêr nê kãm:

—Kwa xã koja mê ã hipêx anê? Kwa mê inhmã aprĩ hã mê kot ixkre grãnh parta jarê. Xã koja mê tokyx ho anê nã xã kormã? Kwa mêmo koja wÿj ri tanhmã amnhî nhîpêx to? Anê.

⁸ Hãmri nhûm mê kãm:

—Nã nhÿrmã mêmoj piitã hapêx kaxyw tanhmã amnhî nhîpêx to kumrêx kot paj mê amã harê ka mê inhma. Kojã mê ohtó nê mê apê ixkrajê hwÿr mra nê hêx rom te pa ixte amnhî nhîpêx pyrãk o amnhî nhîpêx o pa. Nê tanhmã mê amã amnhî jarênh to nê amnhî jarênh o: “E mê ixpumu. Pa na pre Tirtûm mê awÿr inhmê. Ixpê kaxkwa rûm ixwrÿk xwÿnh na pa.” Anhÿr o mê akôt mê amã amnhî to hêx o pa. Hãmri nê mê amã: “E ot pa ra mê ato amnhîptãr kaxyw mê awÿr wrÿ.” Anhÿr o amnhî jarênh o mê akôt pa. Nom kêr ka mê ãm mê ama nê ãm mê ama. ãm mê kot mê amã amnhî to hêx o pa kênã. Kormã akupÿn ixpôx xã hã arĩgrota kormã.

9 —Nē koja mē nhÿri awry hā axpēn par o pa. Nē mē atāā axpēn par o pa. Nom kēr ka mē harēnh ma nē ri tee ri tokyx mēmoj piitā hapēx kukamā ajamaxpēr kēt nē. Mēmoj piitā hapēx xā hā arīgrota kormā.

10 Koja mēmoj piitā hapēx kaxyw nhūm ahpÿnhā ri pika piitā hkôt mē pa xwÿnhjaja axpēn kutā amnhī xunhwÿ nē pijapu nē axpēn pa.

11 Nē koja pika piitā hkôt tanhmā ahpÿnhā mē à kute mē hamÿ nhūm mē amnhī xā htÿx kamā hamak o pa.

Nē koja pikaja tertet tÿx nē.

Nē koja mē nhÿri pika hkwy kamā prām xàj hpikaprār pa.

Nē koja kaxkwa kamā mēmoj tanhmā amnhī anhīpēx to nhūm pika nhō xwÿnhjaja tee ri omu nē kām ma htÿx kumrēx nē httert o kuhē.

Koja mēmoj ā amnhī nhīpēx anē pa rī kormā akupÿn mē awÿr wrÿ nhūm mēmoj piitā hapēx pa. Koja mēmoj ā amnhī nhīpēx anē.

12—E Tirtūm mā amnhī jarēnh xā hā ixkre grānh par xwÿj ri mēmoj tanhmā hkukamā kot amnhī nhīpēx to hā mē ate ixkukjēr xwÿnhja kot paj hpānhā mē amā harē ka mē inhma. Koja mē kām ixkurē xwÿnhjaja mē awÿr mra nē ixtā mē apynē nē tanhmā ixtā mē anhīpēx to. Nē ma mē pikuprōnh xā hā ixkreja wÿr mē ato mra nē kamā mē kām tanhmā mē ato kapēr punuj to. Nhūm mē kuma hāmri nē ma mē ato mra nē mē ajagjē. Mē ate ixkôt apa ho apa jakamā koja mē ā mē anhīpēx anē. Nē mē ō pahihti hwÿr mē ato mra nē mē kām tanhmā mē ato kapēr punuj to. ¹³Tā kēr ka mē kutā akrī nē axāmnhīx māmri tanhmā mē kām ijarēnh to ho akrī.

14 —Nom kwa kēr ka mē kām tanhmā amnhī jarēnh to hkukamā tee ri ajamaxpēr o ri mē amā mē uma hkēt nē. Rÿ mē ajamaxpēr o: “Hēxta waa nē. Tanhmā koja we mē kot ixkukjēr ā arīgrota ā pa we ri mē kām ixkapēr to?” Anhÿr o tee ri amnhī kukamā ajamaxpēr kēt nē. Ām amnhī kaxyw inhmā pix mā ajamaxpēr tÿx rāhā nē. ¹⁵Tanhmā mē kot mē anhīpēx to hā arīgrota ā kot paj tanhmā mē akrā hto ka mē inhÿ hā tanhmā mē kām amnhī jarēnh to. Hāmri nhūm mē amnhī tā mē ama nē axte tanhmā mē ato kapēr to hkukamā tee ri hamaxpēr o kuhē.

16—Nē koja mē anhīpēxā nē mē akatorxā nē mē atō nē mē akrāmnhwÿjjaja. Nē kaxyw krī hkôt mē akwÿjjaja ixtā mē atā amÿnē nē ma mē ō pahi hwÿr mē ato mra nhūm mē ajagjē nē mē akwÿjē pa. ¹⁷Koja mē piitā ixtā mē akamā gryk nē kām mē akurē nē. ¹⁸⁻¹⁹Nom mē kot ā mē anhīpēx anhÿr mā tā kēr ka mē amnhī to htÿx nē ixkaga hkēt nē. Mē kot mē apar tā ka mē kaxkwa kamā akupÿm atūr kurē kumrēx. Hāmri nē ā mē kot mē anhīpēx anhÿr xwÿnhjē rom Tirtūm mē wa ixri atūr tūm nē amex rāhā apa ho apa. Mē kot tanhmā mē ato htā mē ate kaxkwa kamā atūr tūm nē apa mā xwÿnh jakamā kwa kēr ka mē tee ri amnhī kukamā ajamaxpēr o ri apa hkēt nē.

20—Koja nhÿrmā nhÿhÿnh pōristi ohtō nē mra nē Jerujarē hwÿr pōj hāmri nē mē kām hipōk pa nē kuhē. Ka mē ja hā mē omu nē mē kot krīja grānh par mā ajamaxpēr kurē kumrēx. ²¹Koja mē ā amnhī nhīpēx anē ka mē amÿm amnhī wÿr mē omu hāmri nē ajapōj nē ma aprōt nē amrar kurē kumrēx. Mē apē jar pika pē Jutej kamā mē apa xwÿnhjaja ka mē omu nē mē kot mē apar pymaj ma aprōt nē amrar kurē kumrēx. Hīxēt prék wÿr ajapōj nē aprōt nē ma mra.

—Nē kē Jerujarē nhō xwÿnhjaja mē umaj haxwÿja hapōj nē ma hprōt nē ma mrrar o mra.

—Nē jar kapôt ā ri mē pa xwỳnhjaja kē mē akupỳm krī hwỳr gjēx kēt nē. Ām ma mē umaj hprôt nē mrar kurē kumrēx.

²²—Mē kot amnhī tomnuj mỳrapē koja Tirtūm ā mē hwỳr mē kām mē hkurē xwỳnhjē rēnh anē. Kapēr ā kagā htūm ra kot mē hkukamā ja jarēnh kot anhỳr. Jakamā koja mē nhỳrmā mē hkukamā mē harēnh xāja kôt ā mē hipēx anē.

²³—No mē htujarō xwỳnhjaja nē mē hkra karārē xwỳnhjaja koja mē kēp mēmoj omnuj tỳx nē. Tanhmā kot mē amnhī to nē hprôt tỳx? Nā pika ja kamā koja mē piitā mex kēt nē. Mē kot amnhī tomnuj mỳrapē koja Tirtūm ā mē hipēx anē. ²⁴Koja mē nhỳhỳnh krī hō rūm mē hwỳr mra nē mē unē nē mē hkamnhwỳr o mē kupa. Nē mē hkwyjē pynē nē ma nhỳhỳm ahpỳnhā mē ō pika hwỳr amnhī kôt mē o pa nhūm mē kamā mē hkôt pa ho pa. Koja mē kēp Ijaew kēt xwỳnhjaja Jerujarē o amnhīpta nē ā mē hipēx anē. Nē kamā pa ho pa rāhā nhūm Tirtūm nhỳrmā akupỳm nē mē kator pa. Tā koja mē nē mē kator parja o pa ra akupỳn mē awỳr inhnojareēt. Anē.

Nhūm pre ā Jejus mē kām mē kot Jerujarē grānh par xwỳnhjē hkukamā harēnh anē.

Akupỳn Jejus wrỳk xwỳj ri mēmoj kot tanhmā amnhī nhīpēx to Matēwre 24.29-35; Makre 13.24-31; mǎānēn Sīkūn Pētre 3.10; Apokarip 1.7

²⁵ Nhūm Jejus arī hkôt mē pa ho pa xwỳnhjē mā kapēr nē mē kām:

—Nē kot paj nhỳrmā akupỳn mē awỳr inhnojareēt nhūm kaxkwa kamā kanhēti nē myyti nē mytwrỳre axtem tanhmā ri amnhī nhīpēx to. Nhūm gō xujanār haxwỳja hkoko htỳx jao axpēn tak tỳx nē. Hāmri nhūm pika piitā hkôt mē pa xwỳnhjaja kuma nē omu nē nē kām ma htỳx nē mur nē htet nē tee ri amnhī kukamā hamaxpēr.

²⁶—Nē koja Tirtūm tanhmā kaxkwa ho àk to nhūm kanhēti piitā pikarēr pa. Hāmri nhūm pika hkôt ri mē pa xwỳnhjaja omu nē tee ri amnhī kukamā hamaxpēr o amnhī japrār pa nē hikwỳ. ²⁷⁻²⁸ Koja ā mēmoj amnhī nhīpēx anē ka mē ja hā omu nē akupỳn mē awỳr inhnojareēt mā ajamaxpēr kurē kumrēx. Hāmri nē mē kot ixkôt amnhī xunhwỳr kēt xwỳnhjē rom akīnh kām ijapēr arīt o akuhē.

—Nā kot paj akupỳn mē awỳr wrỳ. Kakrā kamā hirā htỳx kām akupỳn ixihitỳx kām mē awỳr wrỳ. Hāmri ka mē apiitā pika piitā hkôt ano ho ixpumu. Kot paj ā ixwrỳk anē hāmri nē mēmoj punuj piitā pé mē apytār pa. Jakamā ka mē ā mēmoj kot amnhī nhīpēx anhỳrja ā omu hāmri nē tokyx ixkôt axàpirta mā ajamaxpēr nē akīnh tỳx nē. Anē.

²⁹—E ga mē pī hpār mỳj pumu. ³⁰ Na hte mēmo mytwrỳ hā rā nhūm mē omu nē ō hkukamā hamaxpēr. ³¹ Ja pyrā nē koja ā mēmoj amnhī nhīpēx par anhỳr mē ka mē omu nē akupỳn mē awỳr ixwrỳkja mā ajamaxpēr kurē kumrēx. ³² Koja akupỳn ixpōx kēt ri mē kot ā mēmoj kot amnhī nhīpēx anhỳr pumunh xwỳnhjaja kormā piitā htyk kēt ri pa ra akupỳn wrỳ.

³³—Nē koja nhỳrmā pika nē kaxkwa wa hapēx pa. Tā no ām ixkapēr koja wa urāk nē aa hapēx kēt nē. Koja ām rāhā ho rāhā. Kot paj aa ihkē ho tanhmā mēnh to hkēt nē.

³⁴⁻³⁵—Nē kwa mē o kora. Mē axkām ajamak rom. Mē kot ixkôt amnhī xunhwỳr kēt xwỳnhjaja na htem kām tanhmā amnhī nhīpēx to hprām xā hkôt pix mā tanhmā amnhī nhīpēx to ho ri pa. Jao ām amnhī xàpkur xā nē amnhī to mex xā nē kàxpore pix kukamā hamaxpēr o pa. Nē htỳx ri tanhmā amnhī tomnuj to ho pa. Nē pipānh kām tanhmā amnhī to ho pa. Tā koja mē ā amnhī nhīpēx anhỳr o pa rāhā pa ra mē haēr pé akupỳn wrỳ nhūm mē tee ri ixpumu

ně kām ma htỳx kumrēx. Te tutre htỳx ri harôj kajyr o pa ně rapuuti hwỳr àr nhùm kot haé ně unēnh nhùm tee kām kator prām pyrāk. Koja mẽ ā amnhī nhīpēx anē. Nom kēr ka mẽ ho mẽ urāk kēt ně. Ām pa inhmā hprām xà hkôt pix mā tanhmā inhmā amnhī nhīpēx to rāhā ho ri apa.

³⁶—Tā kēr ka mẽ ā mẽ kot amnhī tomnuj o pa anhyrja kôt amnhī nhīpēx o apa pymaj amnhī to Tirtūm wỳr rāhā ho apa. Kē tanhmā mẽ ato hihtỳx to ka mẽ ý hā ho mẽ urāk kēt ně. Kēr pa nhỳrmā akupỳn wỳr ka mẽ ixpumu ně mẽ kurom amnhī kamā akahak kēt ně akīnh tỳx ně man ixwỳr mra. Anē.

Nhùm pre ā Jejus hkôt mẽ pa ho mẽ pa xwỳnhjē jahkre anē.

³⁷ Hāmri ně apkati mẽ Tirtūm mā amnhī jarēnh xà hā ixkre kamā mẽ pikuprōnh xwỳnhjē jahkre ho hkrī. Nhùm kamāt nhùm hkôt mẽ pa ho mẽ pa xwỳnhjē mẽ mẽ krī rùm hapôj ně ma hixēt prēk pē Oriwēhti hwỳr mra ně kamā amnhīm hikra ně hikwỳ. ³⁸ Nhùm kwỳhtā nhùm mẽ kànhmā hkrī ně ma akupỳm krīm mra ně ixkreja wỳr agjē. Hāmri nhùm mẽ piitā hā akuprō ně kot mẽ ahkre hā mar o hkrī.

22

Mě kot Jejus ā àmnēnh ā mẽ harēnh

Matēwre 26.14-16; Makre 14.1-2; Juāw 11.47-57

¹ Tā nhùm Ijaew kīnhā arīgro pē Pasja àhtēp o mō. Pas ā na htem amnepēm Tirtūm kot pika pē Ejit pē mẽ hpāmjē kator mā hamaxpēr kaxyw axpēn wỳr akuprō ně hā hkīnh. Na htem arīgroja jarēnh o: “Pas” anhyr ā harē. Nē mǎānēn harēnh o: “Mě pahte pāw kaxkrit kēt kur ā arīgro.” Anhyr o harē. ² Jakamā nhùm mẽ ō patre krāhtūmjē mẽ Tirtūm kapēr tūm o mẽ ahkre xwỳnhjaja ra kām Jejus pīr prām ně. No mẽ kām hkôt mẽ kot kapēr mar xwỳnhjē pyma ně. Nē tee ri kot tanhmā ho hkukamā hamaxpēr ně axpēn mā:

—Hēxta waa ně. Kwa tanhmā kot puj wem ho ně mẽ kēp kupī? Kot puj mẽ noo mā tanhmā ho nhùm mẽ hā mẽ pakamā gryk tỳx kumrēx. Anē.

Jut Kariot kot Jejus ā àmnēnh ā harēnh

Matēwre 26.14-16; Makre 14.10-11; Juāw 13.21-30

³⁻⁴ Tā nhùm Jut Kariotja. Jejus nhỳ hā mẽ ahkre ho pa xwỳnh pē 12 hō na pre. Tā axtem ně tanhmā hamaxpēr to ně Satanasti nhỳ hā ma mẽ ō patre krāhtūm mẽ Tirtūm mā amnhī jarēnh xà hā ixkre jamār xwỳnh krāhtūmjē hwỳr tē. Hāmri ně tanhmā Jejus o mẽ mar to ně mẽ kām:

—E ot pa mẽ amā Jejus jarēnh o tē. Xà kot paj mẽ amā hā amỳnē ka mẽ hpānhā inhmā amnhīre nà? Anē.

⁵ Hāmri nhùm mẽ kuma ně hkīnh ně. Hāmri ně kām:

—Nà kot paj mẽ amā amnhīre.

⁶ Hāmri nhùm mẽ kot kām amnhīrer ā harēnh ma ně hkīnh ně mẽ kām:

—Tōe. Nà kot paj mẽ amā ho anē. Anē.

Hāmri ně ma tē ně kato. Nē Jejus pynēnh kaxyw htānopxar o ri hkôt pa. Mě kot mar o pa xwỳnhjē hkàx ā nhỳri unēnh ně ma mẽ hwỳr o htēm kaxyw.

Jejus kot ý hā mẽ ahkre xwỳnhjē kutā apkur ā harēnh

Matēwre 26.17-25; Makre 14.12-21; Juāw 13.21-30

⁷ Tā nhùm Pasja kato. Amnepēm Ijaewjē nhīgētjaja na prem ōwēhti hkrare hkwy hpar o pa. Tirtūm kot ja hā mẽ omunh ně Ejit kām mẽ kām mẽ hkurē xwỳnhjē nhīhkra ně mẽ kator kaxyw nhùm prem ā amnhī nhīpēx anē. Jakamā

na htem arī mē kēp mē hkanrēhā mē htāmnhwýjaja arīgro pē Pas ā axpēn wýr akuprō nē mē kām hamaxpēr pē mē urāk nē ōwēhti hkrare hkwý hpa. Hāmri nē pāwti kaxkrit kēt kām kuku. ⁸ Jakamā nhūm Jejus ý hā mē ahkre ho mē pa xwýnhjē wa ho axkrut nē mē amnhī kukamā wa kumē. Simāw Pētre mē Juāwja nhūm wa mē amnhī kukamā wa kumē nē wa kām:

—E wa ma mē ixkukamā tē nē mē ixkutēp Pas ā mē panhō hā apē. Anē.

⁹ Hāmri nhūm wa kuma hāmri nē kām:

—Tōe. Nhýri kot paj we wa tē nē mē akutēp hā apē? Anē.

¹⁰ Hāmri nhūm wa kām:

—Nā wa māmri ma Jerujarē hwýr wa tē. Nē hwýr axà nē mēhō mytita pumunh kurē kumrēx. Nhūm amnhīm gō ru nē amnhī kre hā poti xām nē o tē. Ka wa omu nē hā ajēt nē ma hkôt ōrkwý hwýr tē. ¹¹ Hāmri nē ixkre nhō dōn pumu nē kām: “E jar na pa wa awýr tē. Jejus na wa inhmē pa wa awýr tē. Na awýr pēr mēnh o: ‘Nhýri kot paj ixkôt ri mē pa ho mē pa xwýnhjē mē axpēn kutā Pas ā apku?’ Anē. Na ā awýr hpēr mēnh anē.” Anē.

¹² —E ā kām akapēr anē kē war ama nē ra war amā ōrkwý nhīmōk ā ixkre rax ō jahkre. Kamā ra kaxyw mē paxāpkur xà hā mēmoj piitāā. Ka wa omu hāmri nē māmri mē ixkutēp kamā mēmoj tā apē. Anē.

¹³ Hāmri nhūm wa kuma nē ma krīm tē. Ma tē nē hwýr axà hāmri nē ra kot wa kām mēmoj jarēnh xà hkôt mēmoj piitā omu hāmri nē mē kutēp mēō hā àpēnh o wa xa.

¹⁴ Tā nhūm myt axà nhūm mē wa hkôt mō nē ixkreta wýr àpir pa. Hāmri nē apkur kaxyw hkrī hpa nhūm Jejus mē ĩhkō hā nhý. ¹⁵ Hāmri nē mē kām tanhmā amnhī jarēnh to nē mē kām:

—E na pa inhmā Pas ā mē anhīhkō hā ixāpkur prām nē. Kormā ixte amnhī xà htýx kām ijamak xwýj ri. ¹⁶ Kwa mē inhma. Kot paj axte mē akutā Pas ā ixāpkur kēt ry rax nē. Nom koja nhýrmā Tirtūm akupýn ixte mē ato amnhīptār kaxyw inhmē hāmri pu mē rī kormā axte arīgro mex maatija ā pahkīnh kām axpēn kutā paxāpkur rax nē. Anē.

¹⁷ Nhūm ā mē kām amnhī jarēnh anē nē hpānhā wīhti py nē o xa nē Tirtūm mā harē nē kām:

—Pa Papaj. Nā ām hāmri na ka hte mē inhnē mē kām mē ixkurē xwýnhjē pumunh mex nē mē ĩhkra pē mē ijapōj. Amex o amex. Anē.

Hāmri nē hpānhā hkôt mē pa ho mē pa xwýnhjē hō mā kugō nē kām:

—E mī. Apy nē mē axpēn pānhā hkwý ho ixkō. ¹⁸ ām hāmri na pa mē amā amnhī jarē. Kot paj axte wīhti ho ixkōm kēt rāhā nhūm nhýrmā Inhō Papaj akupýn mē awýr inhmē. Hāmri pu mē rī kormā akupýn ixpōx xà hā arīgrota ā pahkīnh rax nē. No ām ra axtem tanhmā hā mē pahkīnh to. Anē.

¹⁹ Hāmri nē hpānhā pāwti py nē mā ho anē nē Tirtūm mā harē. Hāmri nē ho hkry hpa nē mē piitā mē kām ōr pa nē mē kām:

—E na pa ā pāwti ho hkry nē mē amā ōr anē. Koja mē ā inhīpēx anē nē te mē kot ixto hkry hpar pyrāk o inhīpēx pa amnhī xà htýx kamā ijamak kām ty. Nom mē anē kot paj ty. Jakamā kēr ka mē ixwakre kamā tōhā axpēn wýr akuprō nē ixte mē ate amnhī tomnuj pānhā amnhīrer kaxyw mē anē ixtykja mā ajamaxpēr pē akīnh nē pāwti hkur o akrī. E mē māmri axāmmhīx aku. Anē.

Nhūm pre ā mē kām amnhī jarēnh anē nhūm mē mar pē pāwtita hkur o hkrī.

²⁰ Hāmri nē ra hkur pa. Hāmri nhūm Jejus axte kopta py nē mē kām:

—Mē kot ixpīr xà hā arīgro hā koja ixkamrō axkapī. Nom koja mē amarī ixpīr nhūm ixkamrō amarī hpikapīr kēt nē. Ām paa. Pa kot paj mē anē

mě ĩhkram amnhĩ jaxà nhũm mẽ ã inhĩpêx aně. Koja ixkamrô axkapĩ nhũm Tĩrtũm omu ně ixkukwak ri mẽ aně mẽ ate amnhĩ tomnuj piitã te amnhĩ katut kôt rěnh par pyrãk o hipêx ně mẽ ato hkra. Amnepêm kot ja hã amnhĩ jarěnh xà hkôt. Jakamã e mẽ ixkamrô pikapĩrta mã ajamaxpěr pě wĩhti hkwy ho ixkô. Aně.

Jejus ã mẽ kãm àmněnh xwỳnh jarěnh

Matěwre 26.21-25; Makre 14.18-21; Juãw 13.18-19

²¹ Nhũm Jejus arĩ mẽ kãm kapěr ně mẽ kãm:

—Ně kot mẽ kãm ixtã àmněnh mã xwỳnhnta na jar mẽ pahkaêx ã mẽ pakutã apkur o nhỹ. ²² Tĩrtũm kãm hprãm xà hkôt koja mẽ tanhmã ixto rax ně ixpĩ. Nom kot mẽ kãm ixtã àmněnh mã xwỳnhnta hěxta waa ně. ã kot inhĩpêx anhỹrja mýrapě koja amnhĩ xà htỳx kãm hamak rax kumrěx. Aně.

²³ Nhũm pre ã Jejus mẽ kãm amnhĩ jarěnh aně. Nhũm mẽ kuma ně tee ri axpěnh pumunh o hkrĩ. Hãmri ně ri axpěnh kukja ně axpěnh mã:

—Kwa nã mẽ pahťô kot pu we ã ri hipêx aně? Nã pa hkět.

Anhỹr o tee ri axpěnh kukjěr o hkrĩ.

Mě pamã amnhĩ to rũnh prãm kět ã mẽ pamã karô

Matěwre 20.20-28; Makre 10.35-45; mãăněnh Rômãn 12.3-5, 12.10, 12.16; Epes 4.2-4; Piripos 2.3-8; Xiakre 4.1-10; Wam Pětre 5.3

²⁴ Tã nhũm Jejus nhỹ hã mẽ ahkre ho mẽ pa xwỳnhjaja axpěnh mã tanhmã kapěr to ho hkrĩ ně axpěnh mã:

—Kwa mẽ pahťô kot puj wem nhỹrmã pahpě pahi ně mẽ ho amnhĩptãr rax o ri papa? Aně.

Hãmri ně mẽ axpěnh mã: “Nã pa.” Aně ně nhãnh axpěnh mã: “Nã kět paa.” Aně. Hãmri nhũm mẽ nětãnh axpěnh mã: “Nã kět pa kěnh.” ²⁵ Anhỹr o axpěnh mã kapěr o hkrĩ. Hãmri nhũm Jejus tee ri axpěnh tã mẽ kuma nhũm mẽ ã hamaxpěr anhỹrja kěj omnuj ně nhũm mẽ kãm tanhmã hã kapěr to ně mẽ kãm:

—E mẽ inhma. Na hte Ijaew kět xwỳnhjê nhô pahijaja ã amnhĩ nhĩpêx anhỹr o ri pa ně amarĩ hkrĩ xà kamã hkrĩ ho hkrĩ. àhpumunh tỳx jakamã na htem amarĩ ixkre hkre jakry kamã kãm mẽ àpěnh xwỳnhjê mã mẽmo mẽ àpěnh ã karô ho hkrĩ. Na htem ã amnhĩ nhĩpêx anhỹr o pa. Ně mẽ kot amnhĩm mex ã harěnh kaxyw tanhmã mẽ ho mex to ho pa. ²⁶⁻²⁷ Tã kěr ka mẽ ho mẽ urãk kět ně. Kět ãm te amarĩ ri mẽ apa xwỳnh pyrãk o axpěnh nhĩpêx. Ixpyrã ně amarĩ mẽmoj to mẽ kutã anjarět rãhã ho ri apa. No mẽ ate mẽ ho amnhĩptãr rax kukamã ajamaxpěr kět ně. ²⁸ Na prem axpěnh mã ixto hěx ně tanhmã ixto kapěr punuj to htã ka mẽ ama ně ãm mẽ ama ně arĩ ixkôt ri apa rãhã ně. ãm hãmri na ka htem arĩ ixkôt ri apa aně. ²⁹⁻³⁰ Kot paj amnhĩ tã mẽ ato mex rax ně. Na pre ra Tĩrtũm nhỹrmã ixte mẽ ato amnhĩptãr o ixkrĩ kaxyw ixãm. Tã ot pa amnhĩ pyrã ně mẽ pahkwỳ Ijaew kaxyw mẽ axunhwỳ ka mẽ nhỹrmã mẽ piitã mẽ ho amnhĩptãr o apa. Ně mẽ apě ixkrãmnhwỳ hã nhỹrmã ixkutã axãpkur o apa. Aně.

Jejus kot Simãw Pětre mã kapěr ã harěnh

Matěwre 26.31-35; Makre 14.27-31; Juãw 13.36-38

³¹ Tã nhũm Jejus Simãw Pětre mã kapěr ně kãm:

—Kwa Simãw. Na Satanasti kãm hprĩ hã ixtã mẽ apiitã mẽ kamã hamak prãm ně. Tanhmã kot mẽ akrã hto nhũm mẽ ate mẽ kãm ixkurě xwỳnhjê pumaj ixkaga hã kãm mẽ akamã hamak prãm tỳx ně. Jakamã ã kot mẽ

anhîpêx anhÿr kaxyw na pre ra amnhî to Inhõ Papaj ma nhũm kãm: “Tõe. Kam nê mãmri tanhmã mẽ kamã ajamak to.” Anê.

³²—Tã ate mẽ umaj ixkaga nê axte ate amnhî kaxyw inhmã ajamexpêr kêt pymaj na pa ra ato Inhõ Papaj wÿr kãm ixihýtÿx nê Simãw Pêtre. Jakamã kêr ka mẽmo arigro hã tee ri ixkaga hã amnhî pumu hãmri nê tokyx tãm akupÿm ixkõt amnhî xãm tÿx nê. Kêr kê nhÿrmã akwÿjê hõ tanhmã amnhî tomnuj to nê tee ri amnhî kukamã hamaxpêr ka ja hã omu hãmri nê kãm ate tanhmã amnhî tomnuj tota jarê. Kê mẽ ã ate amnhî nhîpêx anhÿr ã ajarênh ma nê apyrã nê tokyx akupÿm tãm ixkõt amnhî xãm tÿx kurê kumrêx. E kêr ka ã akupÿm ixkõt mẽ piitã mẽ hipêx anhÿr o ri apa Simãw Pêtre. Anê.

Nhũm pre ã Simãw Pêtre kot tanhmã amnhî nhîpêx to hkukamã kãm ujarênh anê. ³³Hãmri nhũm tee ri amnhî tã kuma nê kãm:

—Kwa nã Pahihti. Kot paj ri akwÿm tanhmã amnhî tomnuj to hkêt nê. Koja mẽ te ajaxã nê apî htã kot paj arî akõt ri ixpa ho ixpa nhũm mẽ pahto amÿrà nê tanhmã pahto. Anê.

³⁴Hãmri nhũm kuma nê kãm:

—Nã koja apkati hkõt krãhyre hkâr kêt ri ka ra mẽ umaj ate ixkõt apa hkêt ã mẽ kãm amnhî tã axãprãr o axkrunêpxi kãm ga. Anê.

Jejus kot hkwÿjê mã mẽmoj tã karõ

Matêwre 10.5-15; Rukre 9.1-3

³⁵Hãmri nhũm Jejus arî hkõt mẽ pa ho pa xwÿnhjê mã kapêr nê mẽ kãm:

—E wam ixte mẽ hwÿr mẽ arênhã ã na ka prem amnhî kõt aparkã hkwyê ho apa hkêt nê. Nê kawã jamãnh nê ho apa hkêt nê. Nê mrykã jamãnh nê amnhî kõt ho apa hkêt nê. ãm mẽ anhÿ kamã mẽ hwÿr apa hã na pa pre mẽ amã karõ. Tã xãn ka prem ã mẽ hwÿr apa anê nhũm mẽ amnhî wÿr awÿr kêt nê? Nã na na prem amnhî wÿr mẽ awÿr? Anê.

Hãmri nhũm mẽ kãm:

—Tÿ na prem amnhî wÿr mẽ ixwÿ. Mẽ ixte amnhî kõt mẽmoj to ixpa hkêt tã na pa prem amarî mẽ kutã ixãpkur mex o ri mẽ hkõt ixpa. Anê.

³⁶⁻³⁷Hãmri nhũm mẽ kãm:

—Tõe. Nã mẽ kot mẽ ato mex tã nom koja mẽ hpãnhã axtem hõ ho mẽ anhîpêx. Jakamã kêr ka mẽ akupÿm mẽ kãm ijarênh o apa kaxyw anojarêh hãmri nê anhõ mrykã rÿ akawã htu nê ma amnhî kõt ho apa. Nê awapo. Kot kaj mẽ awapo hkêt japêr hãmri nê apipro xã ho wênê nê amnhim hõ japrõ nê ma amnhî kõt ho apa. E kêr ka mẽ ã amnhî nhîpêx anê.

—Nê Tirtũm kapêr ã kagã htũm kot ra ixkukamã tanhmã ijarênh to nê kot ijarênh kot:

Koja mẽ hipêx o te mẽ kot amnhî tomnuj tÿx xwÿnh nhîpêx pyrãk. Anê.

ã mẽ kot inhîpêx anhÿr kukamã ijarênh kot anhÿr. Tã na mẽ ra ã inhîpêx anhÿr kaxyw. Anê.

³⁸Nhũm pre ã Jejus mẽ kãm kapêr anê nhũm mẽ kuma nê kãm:

—Ota mẽ panhõ wapohti hamêxkrut Pahihti. Anê.

Hãmri nhũm mẽ kãm:

—Tõe. Nã hãmri. Mẽ amnhim axi nê ho amnhim mẽmoj to anê. Anê.

Jejus kot Tirtũm mã amnhî jarênh

Matêwre 26.36-46; Makre 14.32-42

³⁹Tã nhũm Jejus kê axte krÿja rũm kato nê hixêh pê Oriwêhti hwÿr tẽ nê api nhũm hkõt mẽ pa ho mẽ pa xwÿnhjaja ma hkõt mra. ⁴⁰Hãmri nê nhÿri hixêh kahti ri hkrî nhũm Jejus mẽ kãm:

—E kwa kêr ka mē ixkutêp amnhĩ to Inhõ Papaj wÿr o akrĩ. Kê mē ixkõt tanhmã mē ato htã ka mē amã mē uma xaj ixkaga hkêt nê. Arĩ mē kutã amnhĩ to htÿx nê akuhê. Anê.

⁴¹ Hãmri nê mē kurũm htēm grire nê Tirtũm mã amnhĩ jarēnh kaxyw hkõn krã ho tēm nê nhÿ. ⁴² Hãmri nê kãm:

—Kwa Papaj. Nã na pa ra amnhĩ xã htÿx kukamã ijamaxpêr nê amnhĩ kamã ixkahak tÿx kumrêx. Inhmã amnhĩ xã kamã ijamak prãm kêt o ijamak prãm kêt. Jakamã kot kaj amã inhnê ho ajapêx prãm nê mãmri inhnê ho ajapêx nhũm mē kãm ixkurê xwÿnhjaja tanhmã ixto hkêt nê. Rÿ ko. Kot kaj amã mē kot tanhmã ixto hprãm hã kê mē mãmri tanhmã inhÿpêx to. Nom pam inhmã hprãm xã hkõt kêt. Anê.

Nhũm pre ã Jejus amnhĩ to Hipêêxã Tirtũm wÿr anê. ⁴³ Hãmri nhũm kuma nê hwÿr kapêr o wrÿk xwÿnhja mē nhũm hwÿr wrÿ nê kuri xa. Hãmri nê õxãhkre kaxwÿnh kãm tanhmã ho hihtÿx to. ⁴⁴ Nhũm kê axte amnhĩ to Hipêêxã hwÿr kãm hihtÿx nê. Tee ri amnhĩ kukamã hamaxpêr pê amnhĩ kamã kahak tÿx kumrêx. Jao hã gô rax nê te hkamrõ xãhãr pyrãk o pikap ahã. ⁴⁵ Hãmri nê kãnhmã xa nê akupÿm hkõt mē pa ho mē pa xwÿnhjê hwÿr tē nê mē omu nhũm mē ra õt pa nê hikwÿ. Mē kot tee ri Jejus kot mē kãm amnhĩ jarēnhja kukamã hamaxpêr o hkaprĩ nê õt pa nê hikwÿ. ⁴⁶ Hãmri nhũm Jejus tē nê tee ri mē omu nê mē kumra nê mē kãm:

—Kwa nã. Mē ri ã amnhĩ nhÿpêx anhÿr kêt nê. Kwa mē kãnhmã akrĩ nê amnhĩ to Inhõ Papaj wÿr kê mē ato mē axihtÿx. Hãmri nhũm mē tanhmã ixkõt mē ato ka mē inhÿ hã mē kutã amnhĩ to htÿx nê akuhê. Anê.

Mē kot Jejus pynênh ã mē harênh

Matêwre 26.47-56; Makre 14.43-50; Juãw 18.1-11

⁴⁷ Nhũm pre ã Jejus mē kãm kapêr anhÿr rôm nhũm hkõt pa ho pa xwÿnhjê pē Jut Kariotja amnhĩ kõt mē kot Jejus pynênh xwÿnhjê ho tē. Mē ho htēm rax nê. Hãmri nê kot Jejus kahti hkõt mÿnh kaxyw hwÿr tē ⁴⁸ nhũm amnhĩ tã omu nê kãm:

—Kwa Jut. Xã mē kahti hkõt mē hamÿnh nê mē hpãr o na htem mē kãm mē hã amÿnê? Anê.

⁴⁹ Hãmri nhũm hkõt mē pa ho mē pa xwÿnhjê hõja tee ri mē kot amnhĩ nhÿpêx ã mē omu hãmri mē õ wapota mã hamaxpêr kurê kumrêx nê Jejus mã:

—Kwa Pahihti. Xã kot paj mē panhõ wapohti py nê ho mē panê mē hkwÿ hpa? Anê.

⁵⁰ Hãmri nhũm hõta kuma nê mē kaxyw ja kapa. Nhũm mē õ patre maati mã àpênh xwÿnhja mē hkõt tē nhũm omu nê kãm wapo ho apê. Nê kot ho hkrã nhÿpõnh mã tã kuhpaw nê ho upók rũm hamak nhÿkjê pix krãhta. ⁵¹ Hãmri nhũm Jejus omu nê nê kãm kapêr nê kãm:

—Kwa nã ri ã amnhĩ nhÿpêx anhÿr kêt nê. Amarĩ xa. Anê.

Hãmri nê hamakja py nê akupÿm kãm hamak ã kuxi nê ho mex. ⁵²⁻⁵³ Hãmri nê mē kot unênh mã xwÿnhjê mã tanhmã kapêr to. Mē õ patre krãhtũmjê mē Tirtũm mã amnhĩ jarēnh xã hã ixkre jamãr xwÿnhjê krãhtũm mē Ijaew nhõ pahijê mē nhũm mē ho pimràãtã mē kãm kapêr nê mē kãm:

—Kwa na pa pre apkati mē Tirtũm nhõrkwÿ kamã mē kãm ixkapêr o ixpa ka prem tokyx ixpynênh kêt tã jarãhã te ixte amnhĩ tomnuj xwÿnhjê pyrãk o inhÿpêx nê ixwÿr wapo nê kô hã akapēn nê ixwÿr ã atēm rax anê. No ãm ra mē ate tanhmã ixto kaxyw arĩgro kator kēnã. Jakamã kot kaj mē mãmri

tanhmã amã ixto hprãm xà hkôt mãmrĩ tanhmã ixto. Satanasti nhỹ hã ã mē ate inhĩpêx anhỹr mã kênã. Anē.

Simãw Pêtre kot Jejus kôt pa hkôt ã kot amnhĩ jarênh

Matêwre 26.69-75; Makre 14.66-72; Juãw 18.15-18, 18.25-27

⁵⁴ Tã nhũm mē Jejus pynē nē ma o tē. Ma mē ò patre maati nhõrkwỹ hwỹr o tē. Nhũm Simãw Pêtre ma hapu hã mē hkôt hã mē omunh o tē. ⁵⁵ Nhũm mē patre maati nhõrkwỹ hwỹr Jejus o axã nē hkôt gjêx pa hãmri nhũm Simãw Pêtre kítare hwỹr axã nē mē kuri xa. Nhũm mē kítare kamã amnhĩm kuto nē hã ànhunh o hkrĩ nhũm ⁵⁶ mē ìhkò hã ànhunh o nhỹ. Hãmri nhũm mē kãm àpênh xwỹnh niti hirã kamã hprĩ hã omunh kurê kumrêx nē mē kãm:

—Xê pēr myti ja kêp Jejus kôt mē pa ho mē pa xwỹnhjê hõ na. Anē.

⁵⁷ Hãmri nhũm tee ri amnhĩ tã kuma nē kãm mē uma nē mē kãm amnhĩ tã aprã nē kãm:

—Tk. Kokỹ. Ixte mēhõ my ata pumunhre hã. Anē.

⁵⁸ Tã nhũm hpãnhã mēhõ myja kãm:

—Kwa nã. ãm hãmri na ajarê. Apê Jejus kôt ri mē pa xwỹnhjê hõ na ka.

Anē nhũm kuma nē kē axte kãm:

—Kwa mē ri ã amnhĩ krã hkôt ri ixto axêx anhỹr kêt nē. ãm ixte aa mēhõta pumunh kêt kumrêx. Anē.

⁵⁹ Tã nhũm ja haxwỹja axte omu nē kãm:

—Kwa ãm hãmri na mē ajarê. Apê Jejus kwỹ hõ na ka. Urak nē te apê Garirej nhõ xwỹnh pyrak kênã. Anē.

⁶⁰ Hãmri nhũm tee ri kuma nē mē kãm amnhĩ tã aprãr kãm hihtỹx nē mē kãm:

—Tk. Ixpê Garirej nhõ xwỹnh kêt. ãm ixte mēhõ mĩj pumunh kêt kumrêx tã ka mē ãm xatã hkôt ixpa ho ixpa xwỹnh ã ixkamnhĩx o akuhê.

Anhỹrja o ra mē kãm amnhĩ tã aprãr o axkrunêpxi mē nhũm krãhyre kã.

⁶¹ Hãmri nhũm Jejus arĩ ixkre kamã ãm tã Simãw Pêtre ho hakêx nē omu. Hãmri nhũm amnhĩ tã no pumu nē kot hkukamã kãm ã amnhĩ nhĩpêx anhỹr jarênhja mã hamaxpêr kurê kumrêx. Krãhyre hkâr kêt ri kot mē kãm amnhĩ tã aprãr o axkrunêpxi hã harênhja mã hamaxpêr nē kãnhmã hakry hpar o tē nē hkaprĩ htỹx nē. ⁶² Hãmri nē hkaprĩ xaj kítare pê kato nē tē nē awry hã xa nē mỳr rax kumrêx.

Mē kot Jejus tak ã mē harênh

Matêwre 26.67-68; Makre 14.65

⁶³ Hãmri nhũm mē kot Jejus pumunh o kuhê xwỹnhjaja hã hpêr o axkê nē htak o kuhê. ⁶⁴ Nē no hpro nē htak nē kãm:

—E atak xwỹnh nhĩxi jarê. Apê Tirtũm Kra hã ate amnhĩ jarênh jakamã mãn urak nē axãhpumunh tỹx. Jakamã e hixi jarê. Anē.

⁶⁵ Hãmri nē xatã haprỹ nē kãm kapêr punuj nē.

Mē kot mē hkrãhtũm wỳr Jejus o htêm ã mē harênh

Matêwre 26.57-68; Makre 14.53-65; Juãw 18.19-24

⁶⁶ Tã nhũm myt kator o mõi mē nhũm Ijaew nhõ pahijê mē patre krãhtũmjê mē Tirtũm kapêr tũm o mē ahkre xwỹnhjaja axpên wỳr pikuprõnh pa. Hãmri nhũm mē ma mē hwỹr Jejus o tē. ⁶⁷⁻⁶⁸ Nhũm mē omu nē tanhmã kot amnhĩ jarênh to hã hkukja nē kãm:

—Kwa mẽ inhmã amnhĩ jarẽ. Xà ka na apê Tirtũm kot mẽ ixkaxyw axãm xwýnhnta? Xà ka kot kaj Rõm nhõ xwýnhjê pê mẽ ixpytà nẽ mẽ ixto amnhĩptàr o apa? Anẽ.

Hãmri nhũm mẽ kãm:

—Nà kot paj tanhmã mẽ amã amnhĩ jarẽnh to ka mẽ ixkõt ajamaxpêr kêt nẽ. Ixte ãm hãmri mẽ amã amnhĩ jarẽnh tã ka mẽ inhma nẽ ãm inhma. Nẽ kot pa amnhĩ xwar mẽmoj tã mẽ akukja ka mẽ amnhĩ xwar inhmã tanhmã harẽnh to hkêt nẽ. ãm mẽ axêx rom mẽ ate ã ixkukjêr anhýr kênã. ⁶⁹Tã nom kot paj tokyx ma akupým Inhĩpêêxà Tirtũm wýr api. Hihtýx o hihtýx rãhã nẽ pa ho pa xwýnh na. Jakamã kot paj hwýr api nhũm amnhĩ nhĩhkõ hã inhýr pa upõk rũm mẽ apiitã mẽ ato amnhĩptàr o ixkrĩ. Hãmri nẽ nhýrmã paa tanhmã mẽ ajarẽnh to. Anẽ.

⁷⁰Hãmri nhũm mẽ tee ri kot ã amnhĩ jarẽnh anhýrja ma nẽ kãm:

—Tk. Kwa akatãt kõt mẽ inhmã amnhĩ jarẽ nã. Xà apê Tirtũm Kra na ka? Anẽ.

Hãmri nhũm mẽ kãm:

—Tý ixpê Kra na pa. Anẽ.

⁷¹Hãmri nhũm mẽ tee ri ã amnhĩ jarẽnh anhýrja ã kuma nẽ axpên mã:

—Kwa mo kaxyw kot puj mẽ axte mẽ hkwyjê japêr nhũm mẽ tanhmã kot amnhĩ tomnuj to hã harẽ? Tãm kêp Tirtũm Kra hã amnhĩ to hêx nhũm mẽ pahte pahpiitã mar kênã. E kwa tokyx pu mẽ ma Rõm nhõ pahihtĩ hwýr o tẽ kê mẽ pamã hã amýnẽ nẽ mẽ pamã kupĩ. Anẽ.

23

*Mẽ kot pahi Pirat wýr Jejus o htẽm ã mẽ harẽnh
Matêwre 27.1-2, 27.11-26; Makre 15.1-5; Juãw 18.28-38*

¹Tã nhũm mẽ Jejus o kato nẽ nhãm Pahihti Pirat wýr o tẽ. ²Hãmri nẽ kutã ãm nẽ tanhmã kãm ho hêx to nẽ kãm:

—E ot pa mẽ awýr jahti ho tẽ. Na hte mẽ inhmã hêx rũnh o pa. Mẽ ixte Pahihti Sesti kapêr kwým ri amnhĩ nhĩpêx prãm xaj tanhmã mẽ inhmã mẽmoj tã karõ hto ho pa. Nẽ axtem nẽ mẽ ixte Sesti mã kãxpore hkwy nhõr kêt ã mẽ inhmã karõ. Nẽ Tirtũm kot mẽ pakaxyw kêp mẽ panhõ pahi hã ãm xwýnh ã amnhĩ jarẽ. ã na hte mẽ inhmã amnhĩ to hêx anhýr o pa. Anẽ.

³Hãmri nhũm Pirat mẽ kuma nẽ Jejus pumu nẽ kãm:

—E kwa inhmã amnhĩ jarẽ. Xà apê Ijaew nhõ pahi na ka? Xà ka na htem amnhĩ wýr akãm hamak o pa? Anẽ.

Hãmri nhũm kãm:

—Nã ãm hãmri na ka ã ijarẽnh anẽ. Anẽ.

⁴Hãmri nhũm Pirat tanhmã hkukjêr to nẽ tee ri kot amnhĩ jarẽnh ã kuma hãmri nẽ patre krãhtũmjê mã kãm:

—Kwa mẽmo mýrapê kot pa tanhmã mẽ amã hã ixãmnhẽnh to? Kot tanhmã amnhĩ tomnuj tore hã. Nã kot pa kãm inhũre. Anẽ.

⁵Hãmri nhũm mẽ tee ri kuma nẽ kot mẽ kãm hã ãmnhẽnh prãm xaj hã kãm kapêr kãm hihtýx nẽ. Nẽ kãm:

—Kwa nã. Na pre hte pika pê Jutej kamã tanhmã mẽ kãm hêx to ho pa. Hãmri nhũm mẽ ra hã axpên kutã amnhĩ xunhwý nẽ hã pijapu rũnh o pa. Tã mããnhẽn Garirej kamã ã amnhĩ nhĩpêx anhýr o hkrax nẽ hpãnhã amnẽ mẽ pahwýr ã amnhĩ nhĩpêx anhýr kaxyw mõi anẽ. Anẽ.

Mē kot Erox w̄yr Jejus o htēm ā mē harēnh

Rukre 9.7-9

⁶Hāmri nhūm Pahi Pirat mē kuma nē mē kām:

—Kwa xà kēp Garirej nhō xw̄ynh na? Anē.

Hāmri nhūm mē kām:

—T̄y. Kēp Garirej nhō xw̄ynh kēnā.

⁷Anē nhūm mē kām:

—Tō mē ma pahihti Erox āxipas w̄yr m̄n o tē. Kēp Garirej nhō xw̄ynh̄jē nhō pahi na. Tā ra jar Jerujarē kamā ham pōj. No axtem ixpē Jutej kamā mē pa xw̄ynh̄jē nhō pahi jakamā kwa mē ma ō pahita w̄yr m̄n o tē kē tām tanhmā mē amā ho. Anē.

⁸Hāmri nhūm mē kuma nē ma pahi Erox āxipas w̄yr o tē. Na pre ra Erox āxipasja xatā Jejus jarēnh ma nē kām omunh prām nē. Kām aa kot mēmoj pumunh kēt ō ho anh̄r ā omunh prām t̄yx jakamā nhūm mē ma hw̄yr o tē nhūm omu nē hk̄nh nē. ⁹Hāmri nē tee ri mēmoj tā hkukja no nhūm akryk xa nē tanhmā kām nē hkēt nē. ¹⁰Hāmri nhūm mē ō patre krāhtūmjē mē Tirtūm kapēr tūm o mē ahkre xw̄ynh̄jaja kām ho kapēr punuj nē ho hēx kām hiht̄yx nē. ¹¹Hāmri nhūm pahi Erox āxipas mē kuma hāmri nē ō pōristi mē wa kām kapēr punuj nē hā hp̄er o axkē nē tanhmā ri hapr̄y to. Hāmri nē hā hp̄er o pikēnh kām kēp pahi hā mē ē mexja py nē kām haxà nē akup̄ym pahi Pirat w̄yr kumē.

¹²Na pre Pahi Pirat mē Pahi Erox āxipasja wa kām axpēn k̄nh kēt nē. Tā hāmri nhūm Erox āxipasja tee ri Jejus kot kām tanhmā amnh̄i jarēnh to hā mar prām x̄aj tee ri hkukamā hamaxpēr hāmri nē Pirat ā hpijaam kaxyw akup̄ym hw̄yr kumē. Hāmri nhūm amnh̄i tā omu hāmri nē wa ra akup̄ym kām axpēn k̄nh nē. Nē akup̄ym axpēn mā hp̄er o axkē nē pikunhar o pa pē akup̄ym axpēn to hkrāmh̄w̄y.

Pirat kot Jejus p̄r ā àmnēnh

Matēwre 27.15-26; Makre 15.6-15; Juāw 18.39–19.16; m̄ānēn Atre 3.13-14

¹³Tā nhūm Pirat akup̄ym amnh̄i w̄yr mē hā karō. Ijaew kw̄yjaja nē mē ō pahijaja nē mē ō patre krāhtūmjaja nhūm akup̄ym amnh̄i w̄yr mē piitā mē hā karō. ¹⁴Hāmri nhūm mē akup̄ym hw̄yr ḡjēx pa nē kuhē nhūm mē kām:

—E na ka mē ixw̄yr mytita o tē nē tanhmā inhmā harēnh to. Kot mē akw̄yjē mā tanhmā hēx to ho pa hā harē. Tā pa ra jar mē anoo mā tanhmā hkukj̄er to nē tee ri kot inhmā tanhmā amnh̄i jarēnh to hā kuma. Te kot amnh̄i to mex xw̄ynh pyrāk. Mē ate tanhmā ho akapēr to htā nom kot anh̄r kēt. Kot amnh̄i to mex xw̄ynh na. ¹⁵Pahi Eroxja ra ixpyrā nē tee ri tanhmā hkukj̄er to nom nhūm tanhmā kām nē hkēt nē. Nhūm tee ri ja hā omu nē akup̄yn ixw̄yr kumē. Jakamā kwa mēmo m̄yrapē kot paj mē amā hā am̄ynē nhūm mē amā kup̄i? Tanhmā kot amnh̄i tomnuj tore hā. ¹⁶Kot paj am mē kām anē kē mē htak nē kām ure kē māmri ma tē. Anē.

¹⁷Ar̄igro pē Pas ā na pre hte mē ō pahi mē kot mē ho prēs nhūm mē hkr̄i xw̄ynh̄jaja nhūm pre htem mē ho hp̄ynh nē mē kām ure. Jakamā na pre ā mē kām kapēr anē nē kot Jejus tak nē kām urer mā. ¹⁸⁻¹⁹Nom nhūm mē kuma nhūm ja mē kēp omnuj nē nhūm mē kām:

—Kwa nà. Ap̄i ri. Ap̄i nē mē inhmā Parapas mā m̄n anh̄ure. Anē.

Parapas na pre mē ō kr̄i kamā ō pōristi mē pahi Piratja mē kutā amnh̄i xām nē kēp ō pōristi hōxp̄i. M̄yrapē na prem ra haxà nhūm hkr̄i ho hkr̄i. Jakamā

nhũm mẽ Pirat kot kãm urer kaxyw ã kãm kapêr anê. ²⁰ Nom nhũm kãm Jejus mã urer prãm jakamã axte hã mẽ hkukja nê mẽ kãm:

—Kwa nom mẽmoj mýrapê kot paj mẽ kãm hã amýnê nhũm mẽ amã kupĩ?

²¹ Anhýr tã nhũm mẽ kuma nê ãm kuma. Nê xatã kãm:

—Kwa tokyx pĩ kahpa hã anhô kê ty. Anê.

²² Hãmri nhũm tee ri mẽ kuma nê mẽ kãm:

—Tk. Kwa nã. Tanhmã kot amnhĩ tomnuj tore hã kot pa kêt hã kunhõ nhũm ty. Nã kot paj ãm mẽ kãm anê kê mẽ htak nê kãm ure kê ma tẽ. Anê.

²³ Hãmri nhũm mẽ xatã hã kãm kapêr kãm hihtýx nê kãm:

—Kwa nã. Pĩ kahpa hã mãn anhô kê ty.

Anhýr o ãm xatã kàx pê ãmra kamã kãm hã amýnê. ²⁴ Hãmri nhũm Pirat tee ri mẽ kuma hãmri nê tã mẽ kãm hprãm xã hkõt mẽ kãm ã amýnê. ²⁵ Hãmri nê mẽ kãm Parapas mã ure. Ra kot pahi Pirat pê õ pòristi kutã amnhĩ xãm nê kèp hõx pĩr tã nhũm mẽ kãm hprãm xã hkõt akupým kãm ure. Hãmri nê mẽ Ihkram Jejus jaxã. Mẽ kãm hprãm xã hkõt ri mẽ kot tanhmã hipêx to kaxyw.

Mẽ kot pĩ kahpa hã Jejus nhõr ã mẽ harênh

Matêwre 27.31-43; Makre 15.21-32; Juãw 19.17-20, 19.27-31; mããnên Atre 7.59-8.1

²⁶ Tã nhũm pòristijaja Jejus o kato nê ma kapôt mã o tẽ. Nê kãm õ pĩ kahpa gõ nhũm amnhĩ kaxyw kumý nê o tẽ. Nom mẽ kot htak rax kurê nhũm hirot týx nê nhũm mẽ ja hã omu nê mẽhõ kot ho ajuta kaxyw mẽ hkapi ho xa. Hãmri nê Sirên nhõ xwýnh Simãw hkà htyk pumu. Nhũm pre htýx hamakêtkati nê mẽ kutã krĩm tẽ. Hãmri nhũm mẽ haêr pê unê nê kãm Jejus o ajuta kaxyw hã karõ nhũm kãm õ pĩ kahpaja mý nê mẽ hkõt o tẽ.

²⁷ Hãmri nhũm mẽ ohtõ nê Jerujarê rùm Jejus kõt mõ. Nhũm mẽni hkwyjaja omu nê kãm hkaprĩ xaj mýr o hkõt mõ. ²⁸ Hãmri nhũm mẽ mýr ã mẽ kuma nê mẽ ho hakêx nê mẽ omu nê mẽ kãm:

—Kwa nã Jerujarê nhõ xwýnhjaja. Mẽ amã ixkaprĩ xaj amýr kêt nê. Kêt mẽ kamjaja amã amnhĩ kaprĩ xaj mãn mur. Nê mẽ akrajê kamã axukaprĩ xaj mãn mur. ²⁹ Kojã mẽ nhýrmã mẽ apê mẽ anhõ krĩ grãnh pa ka mẽ apunuj nê amnhĩ xã htýx kamã ajamak o ri apa. Nê tee ri mẽ akrajê hkukamã tanhmã ajamaxpêr to nê ajamaxpêr o: “Hêxta gãa nê. Na ixkrajaja ixpê amnhĩ xã htýx kãm hamak o pa. Kép apu mẽ hkra hkêt xwýnhjê pyrà nê ixkra hkêt nê ixpa ro nhýx inhmã mex nê. Nhýx pa ixkĩnh nê.” Anhýr o kot kaj mẽ nhýrmã ajamaxpêr nom ã ajamaxpêr anhýr kaprý.

³⁰ —Nê kot kaj mẽ apiitã mẽmo punujta pymaj tee ri amã tokyx atyk nê ajapêx par prãm kaprý nê axpên mã akapêr o: “Hêxta gãa nê. Kot kên prêk mĩj mẽ panhĩpy rorõk nê tokyx mẽ panhĩmex par ronhýx mẽ pamã ja mex.” Anhýr tã no ãm tee ri ã ajamaxpêr anhýr kaprý. ³¹ Nom kêt pa. Aa ixte tanhmã amnhĩ tomnuj to hkêt tã nhũm mẽ ã inhĩpêx anê. Nom mẽ ate amnhĩ tomnuj mýrapê kojã mẽ nhýrmã tanhmã mẽ ato rax o ã mẽ kot inhĩpêx anhýrja jakrenh pa. Hêxta waa nê. Na pa mẽ akukamã ijamaxpêr nê ixkaprĩ htýx nê. Anê.

³² Tã nhũm mẽ ja wa ho hamêxkrut nê tanhmã wa kot amnhĩ tomnuj toja mýrapê Jejus kõt wa hpĩr kaxyw hkõt mããnên wa o tẽ. ³³ Jakamã nhũm mẽ ra kên nhixêt te kot mẽ hkrã hi pyràk xwýnhta wýr mẽ o pøj. Mẽ kot kãm “mẽ hkrã hi xã” anhýr jarênhja wýr mẽ o pøj. Hãmri nê Jejus pê é kapa nê pĩ kahpa hã kuxi nê prek o ihkra nê hpar o htýx pa. Hãmri nê kãnhmã pĩ kahpa xãm nê ho htýx nhũm xa. Hãmri nhũm mẽ hpãnhã wa kot amnhĩ tomnuj xwýnhnta mã

wa ho anê nê. Nê prek o wa ïhkra nê wa hpar o htÿx pa hãmri nê akutã ho Jejus nhÿê nê wa ãm nhÿm wa ajêt. ³⁴ Hãmri nhÿm Jejus kýx pê amnhÿ xã htÿx kumrêx kamã hamak o jêt rãhã mê ho Tÿrtÿm wÿ nê kãm:

—Kwa Papaj. ãm ixtã jajê pumu. Mê kot mêmoj mex pumunh kêt jakamã na mê ã inhÿpêx anê. Jakamã ãm ixtã mê omu nê mê kamã axukaprÿ nê. Anê.

Hãmri nhÿm hparpê pôristi hkwyjaja axpên mã ê hkwy ho pigrãnh kaxyw hã kênre ho jôka ho hkrÿ. ³⁵ Nhÿm mê ohtô rax nê Jejus parpê omunh o kuhê. Nhÿm mê ô pahijaja mê noo mã hã hpêr o axkê nê mê kãm:

—E jahti na pre te kêp mê pakaprÿ xwÿnh ã amnhÿ jarênh o ri pa. Nê Tÿrtÿm kot mê pakaxyw ãm xwÿnh ã amnhÿ jarênh o ri pa. Jakamã e kwa pu mê xa nê kot amnhÿ kaxãr nê wrÿk kãm omu. Anê.

³⁶ Nhÿm pôristi mãânên tanhmã hã hpêr o pikênh to. Nê hparpê kãm wÿhti punuti jahkre nê kãm:

—Kwa wrÿ nê mê ixkutã ja hkwy ho ixkô nã. Anê.

³⁷ Hãmri nê kãm:

—E apê Ijaew nhô pahi hã kot kaj amnhÿ kapa nê akupÿn wrÿ. Kwa tokyx pa mê ja hã apumu. Anê.

³⁸ Nhÿm pôristija tapti hõ py nê tanhmã hã kagã hto. Nê hã kagã ho:

IJAEW NHÔ PAHI NA JA

Anhÿr o hã kagã hãmri nê Jejus wÿr api nê mÿ ri kunhõ.

Wa kot Jejus nhÿê nê wa jêt xwÿnh wa harênh

Matêwre 27.44; Makre 15.32

³⁹ Hãmri nhÿm wa kot ïhkô hã jêt xwÿnhnta ô haxwÿja kãm kapêr punuj nê kãm:

—Kwa kot kaj apê Tÿrtÿm kot mê ixkaxyw axãm xwÿnh hã kot kaj amnhÿ kapa nê wrÿ. Nê mãânên amnhÿ kôt wa ixto wrÿ. Anê.

⁴⁰⁻⁴¹ Hãmri nhÿm ihôta kuma nê hã kãm akir nê kãm:

—Tk. Kwa amarÿ ajêt. Xã amã Tÿrtÿm pyma hkêt ã na ka ã kêp Krata mã akapêr anê? Nã koja kãm wrÿk prãm nê kot wrÿ. No pajamê pahte amnhÿ tomnuj mÿrapê koja mê pahpÿ. No tãm kot tanhmã amnhÿ tomnuj to hkêt tã nhÿm mê amarÿ ã hipêx anê.

⁴² Anhÿr o kãm kapêr hãmri nê Jejus mã kãm:

—Kwa Jejus. Kêr ka nhÿrmã mê ixto amnhÿptã hãmri nê inhmã ajamaxpêr nê ixkamã axukaprÿ nê ixto mex nê. Anê.

⁴³ Hãmri nhÿm kãm:

—Nã kot kaj jarãhã ma ixkôt kaxkwa hwÿr api nê hpãnhã ixkuri amex nê atÿr tÿm nê apa ho apa. ãm hãmri na pa ã amã ixkapêr anê. Anê.

Jejus tyk ã harênh

Matêwre 27.45-56; Makre 15.33-41; Juãw 19.28-30

⁴⁴ Tã nhÿm kaxkwa nhÿpök ri myt nhÿr mê nhÿm te ra kamãt pyrãk nhÿm kamãt kô rax kumrêx. Nê kamãt kô ho ra hã awry nê. Ja mê nhÿm akupÿm myt katêr o mō. ⁴⁵⁻⁴⁶ Nom nhÿm kormã kamãt kôta ã nhÿm Jejus ra htyk kaxyw nê ãmra kamã Tÿrtÿm mã kapêr nê kãm:

—E Papaj. Mãmrÿ ixkarô ho amnhÿptã.

Anhÿrja kôt hãmri ty. Pu nhÿm Tÿrtÿm mã amnhÿ jarênh xã hã ixkre kamã hakwakre hã kupêxêja axkjê nê amnhÿ kahê xã mênh kurê kumrêx. Utÿ rax tã kôt ã axkjê nê amnhÿ kahê xã mê. Te Jejus htyk o kot mê pahte hkôt amnhÿ xunhwÿr xwÿnhjê mã Tÿrtÿm wÿr pry jakwa kre kahê xã mênh pyrãk o ã amnhÿ nhÿpêx anê. ⁴⁷⁻⁴⁹ Hãmri nhÿm mê piitã mêmoj ã kot amnhÿ nhÿpêx

anhÿr ã omunh o kuhê xwÿnhjaja. Nê kaxyw Jejus krãmnhwÿjaja nhÿm mê amÿm omunh o kuhê. Nê Garirej rÿm mēni kot Jejus kôt mē pa ho mē pa xwÿnhjaja määnēn mē kuri amÿm hkaprī nē omunh o kuhê. Nhÿm pôristi krãhtÿmjê hōja ã mēmoj kot amnhī nhīpēx anhÿr ã omu nē tee ri hamaxpēr o:

—Hêxta waa nê. Pēr ãm hāmri na pre hte tām amnhī nhīpēx o pa. Tã pa mē amarī mē mar xà hkôt ixtÿx kupī. Anê.

Nhÿm ã hamaxpēr anhÿrja kôt Tirtÿm mã mex o mex ã harēnh o xa. Nhÿm amarī mē kuhê xwÿnhjaja määnēn mēmoj ã kot amnhī nhīpēx anhÿrta pumu nē tee ri hkukamã hamaxpēr o ra kãm ma htÿx nê. Hāmri nē awjanã nē ma akupÿm krīm mrar kurê kumrēx.

Mê kot Jejus jaxàr ã mē harēnh

Matêwre 27.57-61; Makre 15.42-47; Juãw 19.38-42

⁵⁰⁻⁵¹ Tã nhÿm axtem Juje pê Arimatej nhō xwÿnhja. Arimatejja pika pê Ijaew kamã na. Nhÿm Jujeja kot amnhī to mex jakamã Tirtÿm kôt amnhī nhīpēx o pa. Jakamã na pre hkwÿjê rom Tirtÿm kot mē pahwÿr Jejus mēnh xwÿnh ã omu nē hkôt hamaxpēr. Kêp Ijaew nhō pahi hō htã hkwÿjê hkôt hamaxpēr kêt nê. Jakamã nhÿm prem kot Jejus pīr ã amÿnê nhÿm tee ri harēnh ma nhÿm ja kêp omnuj nê. ⁵² Jakamã nhÿm Jejus ty nhÿm Juje ma pahī Pirat wÿr tē nê ĩ hã kuwÿ nê kãm:

—Pa? E ot pa awÿr tē. Kwa inhmã htyk xwÿnhhta gō pa ma o tē nê haxã. Anê.

⁵³ Hāmri nhÿm kuma nê kãm kugō nhÿm ma o tē nê haxã. Kaxyw kupēxê hō py nê ho hkupu nē ma o tē nê kēn kre kaprÿ kamã haxã. Mē kot kormã kamã mēhō jaxàr kêt nhÿm mē kamã Jejus jaxà. ⁵⁴ Arīgro pê sêsta hã nhÿm prem kupī nhÿm myt xàr o mōr mē nhÿm Juje ma o tē nê haxã. Ijaew kôt xà hã arīgromnuja wÿr haxã. ⁵⁵ Nhÿm Garirej rÿm mēni hkwy kot Jejus kôt pa xwÿnhjaja ma hkôt mra nē kot haxàr kãm omu. Mē hkuxwaxà ho gregrer kêt rãhã haxàr kãm omu. ⁵⁶ Hāmri nē ma akupÿm krīm mra nē kaxyw mē hkuxwaxà hkwy ho anê.

Tã nhÿm apkati nhÿm mē ò arīgromnu pê sap kator jakamã nhÿm mē kormã akupÿm hwÿr mrar kêt nê. Hāmri arīgro mex jamãr pê arī hkòkôt o hkrī.

24

Jejus akupÿm htīr jarēnh

Matêwre 28.1-10; Makre 16.1-8; Juãw 20.1-10

¹ Tã nhÿm apkati nhÿm tòmĭk. Hāmri nhÿm mēnijaja kwÿhtã kãnhmã hkrī nē ma akupÿm kēn kreta wÿr mē hkuxwaxà ho mra. ² Hāmri nē hwÿr àhtêp o mra nhÿm ra hakwakre kahê xà raxta kahê xà hkàx ã xa nhÿm mē tee ri omu. ³ Hāmri nē kēn kre wÿr agjê nē kamã tee ri Jejus japēr no nhÿm kamã amrakati. ⁴ Nhÿm mē tee ri axpēn pumunh pê hkukamã hamaxpēr.

Hāmri nhÿm Tirtÿm kapēr o wrÿk xwÿnh wa axkrut nē mē haēr pê mē hwÿr kato nē wa xa. Wa ê jaka nē hirã htÿx kãm wa xa. ⁵ Nhÿm mē tee ri wa omu nē kãm wa uma htÿx nê. Nē wa umaj hkōn krã ho rōrōk nē hkrī hpa. Nhÿm wa mē omu nē mē kãm:

—Kwa mon ka mē ri mē htykjê kamã ra akupÿm htīr xwÿnhhta japēr o ri apa? ⁶ Jar amrakati. Na ra akupÿm htīr. Kormã Garirej kamã pa ri kot mē amã amnhī jarēnh xà hkôt na ra akupÿm htīr. Mãn ka mē arī kot ã mē amã amnhī jarēnh anhÿrja ã anohtÿx japēr. ⁷ Mē kot unēnh nē pī kahpa hã nhōr

nhũm htyk nê htyk ã apkati axkrunëpxi hãmri nê akupÿm htÿr ã kot mē amā amnhĩ jarēnhhta mǎn ka mē arĩ hã anohtÿx japër.

⁸ Anhÿr o mē kām kapër nhũm mē kuma hãmri nê ra Jejus kot mē kām ã amnhĩ jarēnh anhÿrja mǎ hamaxpër kurē kumrëx. ⁹ Hãmri nê awjanā nē ma akupÿm krĩm hkĩnh nē mra. Nē hwÿr pøj nē mē kot Jejus nhÿ hã mē ahkre ho mē pa xwÿnhjê mǎ awjarê. Mē kēp 11 xwÿnhhtajê mē kaxyw hkwÿjê mǎ awjarê. ¹⁰ Mēni kot mē kām ujarēnh xwÿnhhtajê nhĩxi na pre Marir Matarēnh nhũm ja kēp Joanā. Nē Xiakre katorxà Marir òta. Nē kaxyw mēni hōja. Jakamā nhũm mē ma akupÿm Jejus nhÿ hã mē ahkre ho mē pa xwÿnhjê hwÿr mra nē mē kām awjarê. ¹¹ Nom nhũm mē kuma nē ãm mē kuma nē htÿx ho amnhĩ krǎ hkôt mē kot ri ã harēnh anhÿr ã mē hkamnhĩx nē ãm mē kuma. ¹² Nhũm Simāw Pêtre hamaxpër hãmri nē kànhmǎ xa nē ma kēn kreta wÿr hprôt nē htēm kurē kumrëx. Hãmri nē tee ri kēn kre kapry kamunh o xa nē kamā Jejus kupu xà pix pumu nē tee ri hkukamā hamaxpër hãmri nē ma akupÿm tē.

*Jejus kot Emau hwÿr wa mōr xwÿnh wa hwÿr kator ã harēnh
Makre 16.12-13*

¹³ Tǎ nhũm ra amÿkry ho mō nhũm Jejus kwÿjê hō wa hamēxkrut nē Jerujarē rŭm kato nē ma akupÿm wa ò krĩ pē Emau hwÿr wa mō. Jerujarē rŭm Emau hwÿr ahkrānre. ¹⁴ Jakamā nhũm wa hwÿr pry hã axpēn mǎ tanhmǎ Jejus jarēnh to ho mō. Kēn kre kamā mē kot haxàr nhũm ra ĩ pikunorja nhũm wa xpēn mǎ harēnh o wa mō. Nē tee ri hkukamā hamaxpër o wa mō. ¹⁵ Hãmri nhũm Jejus tǎm tē nē wa hã ajèt nē wa hkôt tē. ¹⁶ Nom nhũm wa hprĩ hã omunh kêt nē. Tÿx ho nhām mēhō hã hkamnhĩx nē wa arĩ axpēn mǎ harēnh o wa mō. ¹⁷ Hãmri nhũm Jejus hēx rom wa kām:

—Kwa mēmon ka wa axpēn mǎ harēnh o wa mō? Anē.

Hãmri nhũm wa hkaprĩ kamā kām harê. ¹⁸ Ihō pē Kroptija kām:

—Kwa xà na ka Jerujarē kamā ri apa htǎ kamā mē kot tanhmǎ amnhĩ nhĩpëx toja jarēnh mar kêt nē? Kurŭm amōr kēnǎ na ka ri mēmoj mar kêt nē ri apa. Anē.

¹⁹ Hãmri nhũm wa kām:

—Nǎ amrakati ixte mēmoj maare hǎ. Kwa mo na wehe? Kwa war aprĩ hǎ inhmǎ harê pa kuma. Anē.

Hãmri nhũm wa kām:

—Nǎ mē kot mē ixpē tanhmǎ Jejus pē Najare nhō xwÿnhhta to kēnǎ. Kēp Tirtŭm nhÿ hã kapër jarēnh o pa xwÿnh na pre. Nē Tirtŭm nhÿ hã tanhmǎ amnhĩ nhĩpëx to ho pa nhũm prem piitǎ amnhĩm mex ã harê. ²⁰ Tǎ nhũm mē panhō patre krǎhtŭmjê mē mē panhō pahijaja axtem nē mē kām hã amÿnē. Mē kot pĩ kahpa hǎ nhōr nhũm htyk kaxyw mē kām hã amÿnē. ²¹ Pa prem ixtÿx ho kēp Tirtŭm kot mē pahwÿr mēnh xwÿnh ã hkamnhĩx nē kot Rōm nhō xwÿnhjê pē mē ixpytǎr ã hkamnhĩx tǎ nhũm prem mē ixpē kupĩ. Jǎǎ na prem ã hipëx anē nē kupĩ. Na ra htyk ã apkati axkrunëpxi.

²²⁻²³ —Nē jarǎhǎ kwÿhtǎ mēni hkwÿjaja ma haxàr xà hǎ kēn kre hwÿr mra nē xep tee kamā hapër nē omunh kêt nē. Xep ãm Tirtŭm kapër o wrÿk xwÿnhja wa ho axkrut nē wa omu nhũm wa xa. Nhũm mē kām ra akupÿm htÿr ã harê nhũm mē akupÿn mē ixwÿr mra nē mē ijaêr pē mē inhmǎ harê. ²⁴ Hãmri nhũm mē ixkwÿjaja ma mē hpǎnhǎ kēn kreta wÿr mra nhũm ra mē kot harēnh xà hkôt tee ri kamā hapër nom nhũm kamā amrakati kumrëx. Anē.

²⁵ Hãmri nhũm Jejus amnhĩ tǎ wa kuma nē wa kām tanhmǎ amnhĩ jarēnh to nē wa kām:

—Hêxta waa nê. Pêr ãm mē ate mēmoj mā ajamaxpêr tỳx mex kêt kumrêx. Na pre ra Tirtûm nhỹ hã kapêr jarênh xwýnhjaja Tirtûm kapêr ã kagã htûm kamã ã kot amnhĩ nhĩpêx anhỹrja kukamã hprĩ hã harê nê hã kagã. Mē akukamã mē anhĩgêjtê mã harê nê hã kagã. Tã ka mē kormã aprĩ hã mar tỳx kêt nê. ²⁶ Kêt mē anê na Tirtûm kot ãm xwýnhhta ty. Tã ra akupỹm htĩr nê akupỹm kaxkwa hwýr àpir kaxyw. Kot mē ato amnhĩptãr kaxyw ra akupỹm hwýr àpir mã. ²⁷ Amnepêm na pre finat Mojesja tanhmã hkukamã mē anhĩgêjtê mã harênh to nê hã kagã. Nê hprĩ hã harênh o pa. Nhũm hpãnhã Tirtûm nhỹ hã kapêr jarênh o mē pa xwýnhjaja ma anê nê mē kãm harênh o pa. Anê.

Nhũm pre ã Jejus wa hkôt hprĩ hã wa kãm amnhĩ jarênh anhỹr o tẽ. Te ho nhãm mēhõ jarênh pyrãk nom tãm wa kãm amnhĩ jarênh o wa hkôt tẽ. No nhũm kormã wa hprĩ hã kêp Jejus ã omunh kêt nê.

²⁸⁻²⁹ Nhũm ã wa kãm amnhĩ jarênh anhỹr o mõr rãhã nhũm mē ra wa õ krĩ hwýr hpõx o mõ. Nhũm ra kamãtre nhũm Jejus te kot wa rer nê nhỹhỹm ma htêm kaxyw pyrãk o amnhĩ nhĩpêx nhũm wa tee ri omu nê kãm:

—Kwa xà kot kaj wa ixre nê ma tẽ? Ra kamãt o mõr kênã. Kwa ma wa ixkôt tẽ nê wa inhõrkwỹ kamã mãn wa ixri põj. Anê.

Hãmri nhũm wa kuma nê ma wa hkôt tẽ. ³⁰ Nê mē wa õrkwỹ hwýr põj nê hwýr agjê. Hãmri nê apkur kaxyw hkrĩ nhũm Jejus tãm pãwti py nê Tirtûm mã harê nê hpãnhã ho axkjê nê wa kãm kugõ. ³¹ Hãmri nhũm wa atã kêp Jejus ã omunh kurê kumrêx. Jao nhũm wa kêp akunok nhũm wa tee ýr xà kamã hapêr nhũm hkapyr mex nê xa. ³² Hãmri nhũm wa tee ri axpên pumu nê ri hkukamã hamaxpêr nê axpên mã:

—Hêxta waa nê. Xep tãm na. Tãm na pahkôt mõ nê pry hã hprĩ hã pamã Tirtûm kapêr ã kagã jarê pu hkôt pahkĩnh nê mar o mõ. Hêxta waa nê. Xep tãm na. Anê.

³³⁻³⁵ Hãmri nê wa kãnhmã xa nê kato nê ujanãr kurê kumrêx. Hãmri nê ma akupỹm Jerujarê hwýr wa hkwyjê hwýr tẽ. Nê mē hwýr põj nê axã. Nhũm Jejus nhỹ hã mē ahkre ho mē pa xwýnh pê 11jaja ra axpên wýr akuprõ nê hkrĩ. Mē hkwyjê mē axpên wýr akuprõ nê axpên mã tanhmã Jejus jarênh to ho hkrĩ. Hãmri nhũm wa mē hwýr axã nhũm mē wa omu nê wa kãm:

—Kwa na xep ra Jejus akupỹm htĩr nê Simãw Pêtre hwýr kato. Anê.

Hãmri nhũm wa mē kuma nê mē kãm:

—Tỳ na akupỹm htĩr kênã. Na pa wa ijaxwýja ham omu. Na pry hã wa ixtã ajêt nê ma wa ixkôt mõ nê wa inhõrkwỹ kamã põj. Hãmri pa mē ixãpkur kaxyw ixkrĩ nhũm pãwti py nê Tirtûm mã harê nê ho axkjê nê wa inhmã kugõ pa wa ixprĩ hã kêp Jejus ã omunh kurê kumrêx. Ixprĩ hã omunh jao nhũm wa ixpê hapêx. Anê.

Jejus kot hkwyjê piitã hwýr kator ã harênh

Matêwre 28.16-17; Makre 16.14; Juãw 20.19-23

³⁶ Nhũm mē kormã axpên mã Jejus jarênh o hkrĩ rôm nhũm tãm nhỹhỹnh mē hwýr axã nê xa. Mē haêr pê mē hwýr nhỹhỹnh axã nê mē kãm:

—Pa? Xãn ka mē arĩ akri? Anê.

³⁷ Hãmri nhũm mē amnhĩ jaêr pê omunh jao kãnhmã hakry hpar o mra. Jao hakryk kãm na htỳx kãm omunh o hkrĩ. ³⁸ Hãmri nhũm mē kãm:

—Kwa mon ka mē amã ixpyma kamã tee ri ixpumunh o akri? Kwa mē ixkarõ hã ixkamnhĩx nê amã ixpyma hkêt nê. ³⁹ Na pa akupỹn inhĩ ho mē awýr ixkato nê xa. Ga mē inhĩhkra kamã prek tatak xãja pumu. Nê ixpar kãm

omu. Kwa mẽ amã ixpyma hkêt nê. E mẽ mãmri mra nê anhĩkra ho ixkupê. Kêp apu ixkarô hpix ronhỹx ka mẽ inhĩ kupênh kêt nê. Mo mẽnkarôja i? Na na pa akupým ixtĩr nê inhĩ ho mẽ awýr ixkato. Anê.

⁴⁰ Hãmri nê mẽ kãm amnhĩ nhĩhkra hpê nê mẽ kãm amnhĩ par pê. ⁴¹ Tã nom nhũm mẽ arĩ akryk omunh o hkrĩ. Mẽ kot omunh nê hkĩnh fã tee ri omunh o hkrĩ. Hãmri nhũm tee ri ja hã mẽ omu nê mẽ kãm:

—E kwa mẽ inhmã mẽmoj japêr pa kukrê. Anê.

⁴² Hãmri nhũm mẽ kãm tep gôj kãm ãmta gô ⁴³ nhũm kupy nê hkur o nhỹ nhũm mẽ arĩ hã omunh o hkrĩ. Jao ra akupým htĩr ã omunh kurê kumrêx.

Jejus akupým nojarêr nê hkwyjê mã mẽmoj tã karô

Matêwre 28.18-20; Makre 16.15-18; mãânên Atre 1.6-8

⁴⁴⁻⁴⁵ Hãmri nhũm Jejus hprĩ hã mẽ kãm Tĩrtũm kapêr ã kagã htũm kot hkukamã harênh ã amnhĩ jarê nê mẽ kãm:

—Nã kormã ixytk kêt ri na pa pre ixprĩ hã mẽ amã amnhĩ kukamã amnhĩ jarê. Tĩrtũm kapêr ã kagã htũm kot tanhmã mẽ kot inhĩpêx to hkukamã ijarênhja. Na pre finat Mojes Tĩrtũm nhỹ hã ixkukamã tanhmã ijarênh to. Nê Tĩrtũm nhỹ hã kapêr jarênh o mẽ pa xwýnhjaja Mojes mýr pê haxwýja ixkukamã tanhmã ijarênh to. Nê Tĩrtũm mex o mex ã mẽ grer ã kagã xwýnhjaja haxwýja ixkukamã tanhmã ijarênh to. Jajê piitã na prem Tĩrtũm kapêr ã kagã htũm kamã ixkukamã ijarê. ⁴⁶ Nê ijarênh o: Tĩrtũm kot mẽ pakaxyw ãm xwýnh pê Krisja koja nhỹrmã ty. Nê htyk o apkati axkrunêpxi nê akupým htĩr.

Anhỹr o mẽ kot ijarênh. Tã pa ra mẽ kot ixkukamã ijarênh xã hkôt ã mẽ anê amnhĩ nhĩpêx anê.

⁴⁷ —No ãm Tĩrtũm kapêr ã kagã htũm kot papxipix ixkukamã ijarênh kêt. Kamã mãânên mẽ kajaja tanhmã mẽ akukamã mẽ ajarênh kute. Mẽ apê ixkôt amnhĩ xunhwýr xwýnhjaja ixwakre kamã tanhmã mẽ ate inhmã amnhĩ nhĩpêx to ho apa hkukamã tanhmã mẽ ajarênh kute. Nê mẽ ajarênh kot:

E mẽ ate ixkôt amnhĩ xunhwýr xwýnhjaja. Kêr ka mẽ ma pika piitã hkôt mẽ kãm Tĩrtũm kot mẽ awýr mẽnh xwýnhnta jarênh o ri mẽ hkôt apa. Mẽ kot mẽ amar mẽ amnhĩ tomnuj kaga nê Tĩrtũm kôt amnhĩ xunhwýr kaxyw. Kêr kê Tĩrtũm ja hã mẽ omu nê amnhĩ katut kôt mẽ kot amnhĩ tomnuj rênh pa. E kêr ka mẽ ma krĩ piitã hkôt mẽ kãm ã ja jarênh anhỹr o ri mẽ hkôt apa. Krĩ pê Jerujarê kumrêx kãm hãmri nê ri kormã pu hã krĩ kuhê xwýnh piitã hkôt ajapôj nê mẽ kãm harênh o ri apa. Anê.

Ã Tĩrtũm kapêr ã kagã htũm kot mẽ akukamã mẽ ajarênh kot anhỹr. ⁴⁸ Tã kêr ka mẽ ã mẽ kãm tanhmã ijarênh to ho ri apa anê. ⁴⁹ No ãm kormã. Kêr paj ma akupým kaxkwa hwýr api hãmri nê amnhĩ pãnhã mẽ awýr Tĩrtũm Karô rê mân. Tĩrtũm kot ixte amnhĩ nhĩpêx ã ijarênh xã hkôt kot paj amnhĩ pãnhã mẽ awýr kurê. Tã kêr ka mẽ kormã krĩ ja kamã kutêp apa. Kêr kê mẽ awýr wrý nê mẽ amã agjê ka mẽ ri kormã anhrã nê ma ý hã mẽ kãm ijarênh o ri mẽ hkôt apa. Anê.

Jejus kot akupým kaxkwa hwýr àpir ã harênh

Makre 16.19-20; mãânên Atre 1.9-11

⁵⁰ Tã nhũm Jejus Jerujarê rũm hkôt mẽ pa ho pa xwýnhjê kator nê ma krĩ pê Petãn wýr mẽ o mō. Nê kormã hwýr mẽ o mōr ri nhỹri mẽ o xa nê kãnhmã ĩhkra pẽ nê mẽ ho Tĩrtũm wý. ⁵¹ ã mẽ ho hwýr anhỹrja rôm nhũm Tĩrtũm amnhĩ wýr ho àpir o mō nhũm mẽ noo mã ma akupým tẽn api. ⁵² Hãmri nhũm mẽ kãm mex o mex ã harênh pê ma akupým àpir kãm omunh o kuhê. Nhũm ma

tě ně mẽ kęp kakrãm axà ně mẽ kęp akunok. Hãmri nhũm mẽ awjanã ně ma akupỹm Jerujarẽ hwỳr hkĩnh ně pa. ⁵³ Hãmri ně apkati mẽ Tĩrtũm mã amnhĩ jarẽnh xà hã ixkre hwỳr agjê ně kamã Tĩrtũm mã mex o mex ã harẽnh o hkrĩ rãhã ně.

Tã ãm ja pix ixkrãmnhwỳ Teopre. Ixpê Rukre na pa awỳr kagàja nhĩpêx ně kamã Jejus kot tanhmã amnhĩ nhĩpêx to hã harẽ ně hã kagà ně awỳr kumẽ.

Juāw

Juāw kot tanhmā Jejus kot amnhī nhīpêx to ho pa hā kagà

Juāw na pre kagàja nhīpêx. Na pre määnēn Wam Juāw nē Sikūn Juāw nē Hapuhā Juāw nē Apokarip nhīpêx. Juāw Paxis kêt axtem Juāw ō. Nē Jejus kôt mē pa ho mē pa xwýnhjê hō na pre. Nē ý hā mē ahkre ho pa xwýnhjê hō na pre. Nom kormā ā amnhī nhīpêx anhýr o pa hkêt ri na pre kêp tep kanhêr xwýnh. Nē kêp Jejus kràmnhwý mex na pre. Jakamā na pre kagàja nhīpêx nē kamā Jejus kot tanhmā amnhī nhīpêx hā harē nē hā kagà. Nē tanhmā kapêr to hā kagà.

Na pre Jejus kêp Tirtūm Kra hā harē nē hā kagà. Nē ām pix kukwak ri Tirtūm wa kuri mē pahūr tūm nē mē papa ho mē papa hā harē nē hā kagà. Ā na pre Juāwja mē pamā Jejus jarē nē hā kagà anē.

Jejus te kot Tirtūm pyrāk ā harēnh

Matêwre 1.23; Juāw 8.12, 8.58, 10.30, 20.28; määnēn Atre 10.36; Sikūn Korīt 4.4; Piriapos 2.6-11; Korosē 1.13-17, 2.9; Xitre 2.13; Eprêw 1.1-4; Wam Juāw 1.1-4, 5.20; Apokarip 1.17-18

¹ Amnepē mā kormā mēmoj kêt ri nhūm kot Tirtūm kapêr o amnhīrīt xwýnhja Tirtūm kôt pa ho pa. Te kêp urāk nē pa. Wa kot amnhī nhīpêxja ām tipxi. Nē wa àhpumunh ām tipxi. Nē wa hkarō määnēn ām tipxi. Ām wa tipxi rāhā nē pa ho pa. ² Kormā mēmoj kêt ri na pre Tirtūm kapêr o amnhīrīt xwýnhhta Tirtūm kôt ri pa ho pa. ³ Nē Tirtūm nhý hā na pre mēmoj piitā hā apē nē ho kato. Jao pyka ho kato nē kaxkwa ho kato nē gō xujanār o kato. Nē kamā mēmoj piitā Tirtūm nhý hā ho kator pa. Kop apu mēmoj to kator kêt ronhýx mēmoj amrakati kumrêx.

⁴ Nē Tirtūm o amnhīrīt xwýnhhta pix kukwak ri na hte mēmoj piitā htír nē pa. Nē ām pix kukwak ri na htem Tirtūm ri htír tūm nē pa ho pa. Nē te myyti kot mē pamā mēmoj piitā hirā ho pa pu mē kukwak ri mēmoj piitā omunh mexja pyrā nē na pre hte mē pahpiitā mē pamā mē pahte amnhī nhīpêx nyw nē mē pajamaxpêr nyw o amnhīrīt pu mē pahprī hā mar mex nē. ⁵ Ja kaxyw na pre wrý nē ri mē kām Tirtūm kapêr jarēnh o ri mē hkôt pa. Jao mē kot amnhī nhīpêx nyw jarē nhūm mē kot amnhī tomnuj xwýnhhaja tee ri kuma nē kām mar prām kêt nē. Nē tee ri kām kapêr o hapêx prām kaprý.

Juāw Paxis kumrêx kot tanhmā Jejus jarēnh to hā harēnh

Matêwre 3.1-3; Makre 1.1-4; Rukre 3.2-6

⁶ Tā nhūm kormā Jejus mē kām kapêr o pa hkêt ri nhūm Juāw Paxis kumrêx mō nē hkukamā Tirtūm nhý hā mē kām tanhmā harēnh to ho pa. ⁷ Mē kām mē kot amnhī nhīpêx nyw nhōr xwýnh pé Jejus Kris kukamā mē kām harēnh o ri mē hkôt pa. Mē kot mar nē amnhī kaxyw Jejus kôt hamaxpêr kaxyw. ⁸ No Juāw Paxisja na pre hte mē kām mē kot amnhī nhīpêx nyw nhōr o pa hkêt nē. Na pre ām kot mē kām ōr xwýnhhta kukamā mē kām harēnh o pa. ⁹ Jakamā na pre hte mē kām harēnh o ri pa nē mē kām harēnh o:

—E ot pa mē amā mēhō jarēnh o ri ixpa. Kot mē pamā mē pahte amnhī nhīpêx nyw nhōr xwýnhhta. Koja tokyx mē pakamā pōj pu mē omu. Koja pōj

ně mẽ piitā mẽ kām Tirtūm kapēr jarēnh o ri pa. Mě pahte pahprī hā mar mex kaxyw. Anē.

*Tirtūm kot mẽ ho hkra hprām xwýnhjé jarēnh
Rōmān 8.14; Karatas 3.26; Epes 1.5*

¹⁰ Tā nhūm Jejus man kot mẽmoj piitā ho kator xwýnhta wýr wrý nē mẽ hkôt ri pa. No nhūm mẽ kôp mẽmoj piitā ho kator xwýnh ā omunh kêt jakamā na prem kapēr ma nē ām kuma nē amnhī kaxyw hkôt hamaxpēr kêt nē. ¹¹ Na pre wrý nē mẽ pakamā ī ho kato. Kêp mẽ pahpiitā mẽ pahto kator xwýnh tā nhūm mẽ ohtō nē omu nē ām omu nē hkôt amnhī nhīpêx kêt nē. ¹² Na prem ām grêre nē kuma nē amnhī kaxyw hkôt hamaxpēr nē hkôt amnhī xunhwý. Hāmri nhūm amnhī tā mẽ omu nē mẽ kām:

—E nā ām hāmri. Ra mẽ ate amnhī kaxyw ixkôt ajamaxpēr nē ixkôt amnhī xunhwýr jakamā na ka mẽ ixkukwak ri apē Tirtūm kraa. Anē.

¹³ Na htem ā kêp Tirtūm kra hprām xāj Jejus kôt amnhī xunhwýr anē. No na htem mẽ katorxā nhōxā hkre rūm hapōx kôt kêp Tirtūm kra hkêt nē. Rý amnhī krā hkôt tanhmā amnhī nhīpêx to kukwak ri kêp hkra hkêt nē. Ām Tirtūm tām kot mẽ ho hkra pix kukwak ri na htem kêp hkra.

Jejus wrýk nē ī ho kator ā harēnh

Matêwre 1.20; mǎānēn Rōmān 1.2-4; Piripos 2.6-7; Eprêw 2.9, 4.15; Wam Juāw 4.2

¹⁴ Jakamā na pre Tirtūm o amnhīrit xwýnhta mẽ pahwýr wrý nē mẽ pakamā ī ho kato nē mẽ pakamā pa. Kêp Tirtūm Kra hā pixi mex na pre. Nē kot amnhī nhīpêxja te Tirtūm kot amnhī nhīpêx pyrāk. Urāk nē mex o mex. Nē urāk nē mẽ pakutā nojarêt xwýnh. Na pre hte katāt kôt Tirtūm kapēr jarēnh o ri mẽ hkôt pa. Pa prem kuma nē mex o mex ā omu.

¹⁵ Nhūm Juāw Paxis na pre hkukamā mẽ kām harēnh o ri pa nē mẽ kām:

—E ra ixte mẽ amā harēnh o ri ixpa xwýnhta na ra pōj. Te pa ixte wa nē ixkator pyrāk nom amnepê mā kormā ixkêt ri nhūm hťir rāhā nē pa ho pa. Ham ī ho kator tā kêp Tirtūm Kra jakamā urāk nē rāhā ho rāhā hā pa xwýnh na. Jakamā kot amnhī to rax o kot ijakrenh par. Anē.

¹⁶ Nē kêp mẽ pakutā nojarêt rāhā nē pa ho pa xwýnh jakamā na hte mẽ pahto mex rāhā pu mẽ kukwak ri pamex nē ri papa ho papa.

¹⁷ Na pre finat Mojesja mẽ panhīgêjtê mā Tirtūm kapēr jarēnh o ri mẽ hkôt pa nē mẽ kām:

—Na pre Tirtūm mẽ pahte tām amnhī nhīpêx o papa hā mẽ pamā karō. Jakamā kot puj mẽ kot mẽ pamā mẽmoj tā karō xā hkôt ā amnhī nhīpêx anhýr o papa nē ra tām amnhī nhīpêx o papa. Anē.

Nhūm pre Mojesja ā mẽ kām kapēr o pa anē. Hāmri nhūm mẽ kuma no ām tee ri kām Tirtūm kôt tām amnhī nhīpêx o pa hprām kaprý. Jakamā nhūm hpānhā Jejus Krisja wrý nē mẽ pamā kapēr ō ho kapēr o pa nē mẽ pamā:

—E mẽ ate Tirtūm kôt amnhī nhīpêx o apa hkêt tā nhūm arī kām mẽ ajapê nē. Nē kām mẽ ato mex prām. Jakamā kot kaj mẽ amnhī to awý nhūm tanhmā mẽ akrā hto ka mẽ ra tām ri amnhī nhīpêx o apa. Ām hāmri na pa ā mẽ amā ja jarēnh anē.

Anhýr o mẽ pamā Tirtūm kapēr jarēnh o pa. Tirtūm kapēr na mex o mex.

¹⁸ Nē aa mẽ pahtō mẽ pahte pano ho Tirtūm pumunh kêt. Ām Kraja pix na kot no ho omunh. Kaxkwa kamā kuri ri pa ho pa jakamā kot omunh mex. Nē te kot Hipêxāja pyrāk jakamā na pre wrý nē hprī hā tanhmā kute hā mẽ

pamã harênh o pa. Jakamã na pu mẽ ra pahpiitã Tirtũm kot amnhĩ nhĩpêx ã omu nê mar mex nê.

Juãw Paxis kot mẽ kãm Jejus jarênh o pa hã harênh

Matêwre 3.1-12; Makre 1.1-8; Rukre 3.15-17; mãânên Atre 19.4

¹⁹⁻²⁸ Na pre Juãw Paxis ma hkwyjê hkôt mẽ kãm Jejus jarênh o pa nhũm mẽ hkwyjaja kuma nê amnhĩ kaxyw Jejus kôt hamaxpêr nê hkôt amnhĩ xunhwýr. Hãmri nhũm Juãw Paxis ja hã mẽ omu nê Tirtũm mã mẽ hkrã kumrã. Pyhti pê Jotãw nhĩkjê hã krĩ pê Petãn tã ri mẽ hkrã kumrãr o pa. Hãmri nhũm krĩ pê Jerujarê kamã Ijaew krãhtũmjaja harênh ma nê ma hwýr hkwyjê rê. Mẽ kot tanhmã hkukjêr to nhũm kot mẽ kãm tanhmã amnhĩ jarênh to kaxyw. Jakamã nhũm mẽõ patre hkwyjê mẽ Tirtũm mã amnhĩ jarênh xã hã ixkre kamã mẽ ho ajuta xwýnh kwýjê mẽ Parijew nhõ xwýnh kwýjê mẽ nhũm mẽ ma hwýr mra. Juãw Paxis wýr mra nê omu nê kãm:

—Pa. E ot pa mẽ awýr mra. Kwa mẽ inhmã amnhĩ jarê. Apê mẽ atõ na ka we? Xã ka na apê Tirtũm kot mẽ ixkaxyw axãm mã xwýnhhta na ka nà? Xã ka na pa htem amnhĩ wýr akamã ijamak o ixpa? Anê.

Hãmri nhũm mẽ kuma nê mẽ kãm: “Nã pa hkêt.” Anê hãmri nhũm mẽ kãm:

—Tõ mãn xep apê amnepê mã Tirtũm nhý hã kapêr jarênh xwýnh pê finat Erisja. Hã na ka tanhmã amnhĩ to nê akupým atũr nê mẽ ixkôt apa nà? Anê.

Hãmri nhũm mẽ kãm:

—Nã ixpê Eris kêt. Anê.

Hãmri nhũm mẽ kãm:

—Tõ mãn xep apê finat Mojes kot mẽ kãm harênh o pa xwýnhhta na ka nà? Anê.

Hãmri nhũm mẽ kuma nê kê axte mẽ kãm:

—Nã ixpê tãm kêt. Anê.

Hãmri nhũm mẽ tee ri kot ã amnhĩ tã aprãr anhýrja ma nê kãm:

—Kwa apê jajê hõ hkêt tã na ka hte mẽ hkrã kumrãr o ri apa. Kwa na akatãt kôt mẽ inhmã amnhĩ jarê. Pa mẽ ama nê ma akupým mra nê mẽ kot awýr mẽ ixrênh xwýnhjê mã tanhmã ajarênh to. Tanhmã na ka hte mẽ kãm amnhĩ jarênh to ho ri apa? E kwa mẽ inhmã amnhĩ jarê pa mẽ ama. Anê.

Hãmri nhũm tã hprĩ hã mẽ kãm amnhĩ jarê. Amnepê mã mẽ hkukamã Tirtũm nhý hã kapêr jarênh xwýnh pê finat Ijais kot hkukamã tanhmã harênh to nê hã kagã xã hkôt nhũm mẽ kãm amnhĩ jarê nê mẽ kãm:

—Tõe. Nã kot paj ixprĩ hã mẽ amã amnhĩ jarê ka mẽ inhma. Amnepêm Tirtũm kapêr jarênh xwýnhjê hõ pê finat Ijaisja na pre hte mẽ kãm mẽhõ hkukamã harênh o ri pa. Mẽhõ kot mẽ panhõ Pahihti hkukamã htêm nê kapôt ã kutêp mẽ kãm harênh o pa xwýnhhta nhũm pre hkukamã harênh o ri pa. Nê mẽ kãm harênh o:

Koja nhýrmã mẽhõja kapôt ã mõi põi nê mẽ kãm tanhmã ujarênh to ho ri pa. Nê mẽ kãm ujarênh o: “E mẽ inhma. Koja Tirtũm tokyx mẽ pahwýr mẽ panhõ Pahihti mẽ nhũm wrý nhũm mẽ piitã omu. Jakamã kwa mẽ tokyx kutêp tãm amnhĩ nhĩpêx o ri apa. Te ho mẽ kot mẽhõ kutêp pry ho mex pyrãk o amnhĩ nhĩpêx o ri pa. Jao amnhĩ nhĩ ho tãm amnhĩ nhĩpêx nê tãm axpên nhĩpêx o ri apa. Pahihtita kutêp.”

—Anhýr o na pre hte finat Ijaisja kot Pahihti hkukamã harênh o ri pa xwýnhhta kukamã harênh anê. Tã paa. Pa na pre Ijaisja ã ixkukamã ijarênh anhýr o pa. Pa na pa hte ã Pahihti kutêp mẽ kãm harênh o ri ixpa anê. Tã ã ixte harênh anhýr xwýnhhta na ra mẽ pakamã pa ka mẽ kormã ja hã omunh kêt nê. Kukamã na pa hte mẽ piitã mẽ kot hkôt amnhĩ xunhwýr ã mẽ omunh

kaxyw gô pix o mẽ hkrã kumrãr o ri mẽ hkôt ixpa. Nom na pre ra mẽ pahwÿr Tirtũm kot mẽ pakaxyw ãm xwÿnhnta tãm mẽ pahwÿr wrÿ. Ahpumunh tÿx o kot ijakrenh jakamã na pa hte ãm kukwak ri ixpa nẽ amnhĩ tã hã xpijaãm o ri ixpa. Anẽ.

Juãw Paxis kot mẽ kãm Jejus jahkre hã harẽnh

Matêwre 3.11; Makre 1.10; Rukre 3.22

²⁹ Tã nhũm apkati nhũm Juãw Paxis amnhĩ wÿr Jejus pumu nẽ mẽ kot mar o kuhẽ xwÿnhjẽ mã ãhkra ho ahkre nẽ mẽ kãm:

—E. Onẽj Tirtũm kot mẽ pakaxyw ãm xwÿnhnta tẽ. Mẽ pahpẽ Ijaew na pu htem xatã pahte amnhĩ tomnuj pãnhã amnhĩrer kaxyw Tirtũm mã pahkrit ôwẽhti hkra nyw kwÿ hpa nẽ ho amnhĩ pãnhã kãm amnhĩrer o papa. No kêt htẽm nẽj koja nhÿrmã kãm mẽ pahpiitã mẽ pahte amnhĩ tomnuj pãnhã amnhĩrer pa. ³⁰ Na pa pre ra mẽ amã harẽnh o: “Te pa ixte wa nẽ ixkator nẽ ixtÿr nẽ ixpa pyrãk. Nom amnepẽm kormã ixkêt ri na pre htÿr rãhã nẽ pa ho pa. Nẽ ã ho wrÿk nẽ jar kator tã kẽp Tirtũm Kra jakamã urãk nẽ rãhã nẽ pa ho pa xwÿnh na. Jakamã kot amnhĩ to rax o kot ijakrenh par.” Anhÿr o pa pre mẽ amã harẽnh o ri ixpa ka prem inhma.

³¹ —Ixte mẽ amã ã harẽnh anhÿr tã ijaxwÿja kormã ixte kẽp Tirtũm Kra hã omunh kêt nẽ ãm hkukamã Tirtũm nhÿ hã mẽ amã ã harẽnh anhÿr o ri ixpa. Nẽ hkukamã Tirtũm mã mẽ akrã kumrãr o ri ixpa. Tã na pa kẽp Tirtũm Kra hã omu nẽ ã mẽ amã ahkre anẽ ka mẽ omu. Anẽ.

³²⁻³³ Nhũm pre ã Juãw Paxis mẽ kãm Jejus jahkre anẽ nẽ mẽ kãm:

—Nã Tirtũm na pre ixte mẽ akrã kumrãr o ixpa kaxyw inhmã hã karõ. Tã na inhmã kot mẽ pakaxyw ãm xwÿnhnta o amnhĩrit nẽ inhmã harẽnh o: “Koja nhÿrmã Ixkarõja mẽhõ hwÿr wrÿ nẽ kuri arik. Ka ja hã omu nẽ kẽp Ixkra hã omunh kurẽ kumrẽx. Koja amnhĩ xõ ri amnhĩ pyrã nẽ mẽ kãm Ixkarõ nhõr o pa nhũm mẽ hkarõ mã agjẽ.” Anhÿr o inhmã harẽ. Tã na pa ra omu. Na pre Tirtũm Karõ kaxkwa rũm te tuuti pyrã nẽ hwÿr wrÿk o tẽ nẽ ãkre hã xa. ³⁴ Pa ã kot hipẽx anhÿr ã omu nẽ kẽp Tirtũm Kra hã omunh kurẽ kumrẽx. Jakamã na pa ã mẽ amã ahkre nẽ mẽ amã harẽnh anẽ. Anẽ.

Juãw Paxis kôt pa xwÿnh wa kot Jejus kôt pa hã wa harẽnh

Atre 19.4

³⁵ Tã nhũm apkati nhũm Juãw Paxis axte Jejus pumu. Kot hkôt ri pa ho pa xwÿnh mẽ wa nhÿri xa nẽ omunh o xa. ³⁶ Nhũm ra mẽ hãnh tẽ nhũm Juãw Paxis omu nẽ hkôt ri pa xwÿnh wa kãm:

—E onẽj Tirtũm kot mẽ pakaxyw ãm xwÿnhnta tẽ. Nẽj koja mẽ pahte amnhĩ tomnuj pãnhã amnhĩre. Anẽ.

³⁷ Hãmri nhũm wa kuma nẽ omu nẽ ma hkôt tẽ nẽ hã ajêt. ³⁸ Nhũm wa omu nẽ wa kãm: “Pa mo na?” Anẽ nhũm wa kot kẽp mẽ ahkre xwÿnh ã omunh jakamã kãm:

—Nã wa ixte ma akôt ixtẽm nẽ nhÿri anhõrkwÿ pumunh mã na pa wa akôt tẽ. Anẽ.

³⁹ Hãmri nhũm wa kãm:

—Tõe. Nã wa kam nẽ rĩ ma ixkôt tẽ. Anẽ.

Hãmri nhũm wa kuma nẽ ma hkôt wa tẽ nẽ õrkwÿ hwÿr pøj nhũm ra amÿkry nhũm wa hkôt axã nẽ kuri ÿr o kamãt hãmri nẽ kato nẽ ma akupÿm tẽ. ⁴⁰ Kôt htẽm xwÿnhjẽ hõta na pre kẽp Andre. Simãw Pẽtre htõ na pre. Nẽ kaxyw hõja. Wa kumã na pre Juãw Paxis Jejus jahkre nẽ harẽ nhũm wa ma hkôt tẽ. Tã wa ra akupÿm wa tẽ. ⁴¹ Hãmri nhũm Andreja htõ Simãw wÿr tẽ nẽ kãm:

—Kwa na pa wa jarāhā Tirtūm kot mē pakaxyw ām xwýnh̄ta pumu. Ma pu hwýr ka wa ixwar ano ho omu nà. Anē.

Ijaew kapēr kām “Tirtūm kot mē pakaxyw ām xwýnh̄” anhýrja te kot Gres kapēr kām “Kris” anhýr jarēnh̄ pyrāk. Ijaew na prem ā Jeus jarēnh̄ anē nē harēnh̄ o: “Tirtūm kot mē pakaxyw ām xwýnh̄.” Anhýr o harē. ⁴² Jakamā nhūm ā Andreja htō mā harēnh̄ anē nē ma akupým hwýr o tē. Nē wa hwýr pōj nhūm wa omu. Wa kēp Juaw kra hā wa omu hāmri nē Simāw mā kapēr nē kām:

—Pa Simāw. Nà apē Simāw tā kot paj axte atā anhīxi hō mē. Kot kaj määnēn apē Septi. Anē.

Mē pakapēr kām Septija te kēp “kēn” jarēnh̄ pyrāk. No Gres kapēr kām te kēp “Pêtre” jarēnh̄ pyrāk. No Ijaew kapēr kām kēp “Septi.” Jakamā nhūm pre Jeus ā Simāw Pêtre hā hixi mēnh̄ anē.

Jeus kot amnhī kôt Firipti mē Natānaew wa hwýr ā harēnh̄

⁴³⁻⁴⁴ Tā nhūm apkati nhūm ra Jeus pyka pē Garirej wýr nojarēt nē nhýri Firipti pumu. Firiptija Andre mē Simāw Pêtre wa urāk nē krī pē Pesěj nhō xwýnh̄ na pre. Jakamā nhūm Jeus nhýri omu nē amnhī kôt kuwý nē kām:

—E kwa ma ri ixkôt apa ho apa. Anē.

⁴⁵ Hāmri nhūm kuma nē ma tē nē nhýri Natānaew pumu nhūm nhýri pī hpār parpē nhý nhūm omu nē kām:

—Kwa na pa jarāhā finat Mojes kot amnepēm mēhō hā kagā xwýnh̄ta pumu. Tirtūm kot mē pakaxyw ām xwýnh̄ta na. Tirtūm nhý hā kapēr jarēnh̄ o mē pa xwýnh̄jaja kot hkukamā harēnh̄ nē hā kagā xwýnh̄ta. Kēp Najare nhō xwýnh̄ nē määnēn kēp finat Juje hkra. E kwa tokyx pu hwýr ka ixkuxwar ano ho omu. Anē.

⁴⁶ Hāmri nhūm tee ri kot tanhmā harēnh̄ toja ma nē kām:

—Tk. Koký. Najare nhō xwýnh̄ piitā kot amnhī to mexti hā kot kêt we hō kēp Tirtūm kot mē pakaxyw ām xwýnh̄. Anē.

Hāmri nhūm kām:

—Kwa nà ā akapēr anhýr kêt nē. Ma ixkôt tē nē ixpyrà nē ano ho omu mán. Nē ri ā ri akapēr anē. Anē.

Hāmri nhūm kuma nē ma hkôt tē. ⁴⁷ Hāmri nhūm Jeus amnhī wýr wa omu nē kuri mē kuhē xwýnh̄jē mā Natānaew jarēnh̄ kurē kumrēx nē harēnh̄ o:

—E onēj Ijaew ōja mē pahwýr hpōx o tē. Ām hāmri na hte tām amnhī nhīpēx o pa. Na hte higēt finat jako kurom hēx rom ri tanhmā mē kām amnhī to hēt to ho pa hkêt nē. Na hte ām kapēr mex pix o ri kapēr o pa. Anē.

⁴⁸ Hāmri nhūm tee ri amnhī tā kuma nē kām:

—Kwa mēhō na pre ā amā ijarēnh̄ anē? Aa ixte nhýri apumunh̄ kêt kumrēx tā ka ri ām hāmri ā ijarēnh̄ anē. Anē.

Hāmri nhūm kām:

—Nà mēhō kot tanhmā inh̄mā ajarēnh̄ to hkêt. Ām pa na pa hte inh̄no ho apumunh̄ o ixpa. Kormā Firipti kot awýr htēm nē amā ijarēnh̄ kêt ri pa ra ixprī hā inh̄no ho apumu. Na ka kormā pīta parpē nhý pa apumu. Anē.

⁴⁹ Hāmri nhūm tee ri kot hprī hā harēnh̄ ā amnhī tā kuma nē kām:

—Kwa mē ijahkre xwýnh̄. Pēr ām hāmri apē Tirtūm Kra kumrēx jakamā na ka ā ijarēnh̄ anē. Xep ka na mē ixte amnhī wýr akām ijamak o ixpa xwýnh̄ta na ka. Nà ka na apē mē ixpē Ijaew nhō Pahihti. Anē.

⁵⁰ Hāmri nhūm Jeus kuma nē kām:

—Nà ãm hãmri na ka ixte pĩ hpar pê apumunh ã ajarẽnhja ma nẽ hkõt pix mã ixpẽ Tĩrtũm Kra hã ixpumu. Tã kot kaj ja nhĩrõ pê axte mẽmoj mex o kot ja jakrenh pumu. ⁵¹ Koja nhỹrmã kaxkwa axkjẽ nhũm Tĩrtũm kapẽr o mẽ wryk xwỹnhjaja kurũm axpẽn japa ka mẽ omu. Finat Jako pyrã nẽ mẽ omu. Ixte Tĩrtũm kot mẽ akaxyw ixãm xwỹnh wỳr koja mẽ ã wryk nẽ amnhĩ nhĩpẽx anẽ ka ja hã mẽ omu. Kwa jam ajamaxpẽr tỳx rãhã ho apa. Anẽ.

2

Jejus kot gõ ho mẽ kãm wĩhti nhĩpẽx ã harẽnh

¹ Tã nhũm apkati axkrut nẽ hapẽx nhũm Jejus arĩ Garirej kamã pa. Nhũm krĩ pê Kanã kamã axpẽn mã wahõj wa rer kaxyw nhũm Jejus katorxã ma mẽ hwỳr mõ. ² Hãmri nhũm mẽ amnhĩ wỳr Jejus mẽ hkõt ri mẽ ixpa xwỹnhjẽ wỳ pa mẽ ijaxwỳja ma mẽ hwỳr mõ nẽ ra mẽ hwỳr põj. ³ Hãmri nẽ mẽ hkõt wa hã ixkĩnh nẽ apku nẽ wĩhti hkwy ho ixkõm o ixkrĩ. Tã nhũm ra wĩhti mẽ kęp hapẽx nhũm Jejus katorxãja harẽnh ma nẽ Jejus mã harẽ nẽ kãm:

—Xẽ Jejus. Na xep ra mẽ kęp wĩhti hapẽx pa. Xàt ka tanhmã mẽ ho ajuta hto mẽ? Anẽ.

⁴ Hãmri nhũm kãm:

—Tõe. Kwa tee ri ajamaxpẽr kêt nẽ. Kot paj tanhmã mẽ kãm ho. Nom kot paj kormã ixpẽ Tĩrtũm kot mẽ akaxyw ixãm xwỹnh ã pa kormã amnhĩ to amnhĩrĩt kêt nẽ. Anẽ.

⁵ Hãmri nhũm katorxã kuma nẽ mẽ kãm mẽ ãpẽn xwỹnhjẽ hwỳr tẽ nẽ mẽ kãm:

—An koja Jejus mẽ awỳr tẽ nẽ tanhmã mẽ amã mẽmoj tã karõ hto ka mẽ ama nẽ kãm ho anhỹr kurẽ kumrẽx. Anẽ.

⁶ Nhũm mẽ kuri kẽn o poti kęp 6 nẽ kuhẽ. Piitã umpỳm rũnh kumrẽx. Koja hõ pyxi nẽ nỳt nẽ kamã gõ kęp 80 rit nẽ hkwy kamã kęp 100 rit. Ijaew na htem apkur kaxyw nẽ amnhĩ nhĩhkra kuhõnh japjẽ rũnh nẽ kormã apku. Nẽ apkur pa nẽ axte amnhĩ nhĩhkra kuhõ. ã mẽ kot xatã amnhĩ nhĩhkra kuhõnh jakamã nhũm pre htem amnhĩ ri ã poti rũnh kwỳ xunhwỳr anẽ. No nhũm ra hkapyr nẽ kuhẽ. ⁷ Hãmri nhũm Jejus tẽ nẽ omu mẽ ãpẽn xwỹnhjẽ mã kãm:

—E mẽ ma mra nẽ gõ ru nẽ ho poti kuhẽ mũj piitã ho nỳt pa. Anẽ.

Nhũm mẽ kuma nẽ ma mra nẽ ho nỳt pa. ⁸ Hãmri nhũm mẽ kãm:

—Nà hãmri. Pãnhã hõ kamã gõ hkwy janhi nẽ o tẽ nẽ mẽ anhõ patrãw mã agõ kẽ hkwy ho ixkõ nẽ kamã ama. Anẽ.

Hãmri nhũm mẽ mar xã hkõt kãm hkwy janhi nẽ hwỳr o tẽ nẽ kãm kugõ. ⁹⁻¹⁰ Nom nhũm gõja arĩ kęp gõ kumrẽx kêt nẽ. Jejus kot tanhmã ho jakamã nhũm ra hpãnhã kęp wĩhti. Jakamã nhũm mẽõ patrãw wỳr hkwy ho tẽ nẽ kãm kugõ nhũm hkaki nẽ kamã ama. Nom Jejus kot gõ ho hipẽx ã omunh kêt nẽ. ãm htyx ho wĩhti kumrẽx ã hkamnhĩx nẽ mex kumrẽx ã hkaki. Hãmri nẽ amnhĩ wỳr mjẽn nyw xwỹnh mã hpa ho apẽ nhũm hwỳr tẽ nhũm kãm:

—Kwa na htem wĩhti mex o wa nẽ mẽ kãm kugõ hãmri nhũm mẽ hpenh pa nhũm mẽ rĩ kormã hkõt omnu ho hapu nẽ mẽ kãm kugõ. Tã ka pẽr mẽ axtem nẽ wam mẽ kãm omnu nhõr pa hãmri nẽ kormã mex kumrẽxja o hapu nẽ mẽ kãm agõ. Kêt wĩhti ja na mex kumrẽx. ãm mex o mex. Anẽ.

Jejus kot gõ ho hipẽx ã omunh kêt jakamã nhũm ã kãm kapẽr anẽ. ãm mẽ ãpẽn xwỹnh pixjaja na prem ja hã omu. ¹¹ Nhũm Jejus kormã mẽ kãm aa mẽ kot mẽmoj pumunh kêt õ ho anhỹr kêt tã krĩ pê Kanã kamã ã mẽ kãm amnhĩ nhĩpẽx anhỹr o hkrax. Jao amnhĩ to rax o amnhĩ to rax ã mẽ inhmã amnhĩ to

amnhīrīt. Pa mē ixpê hkôt ri ixpa xwýnhjaja ā kot amnhī nhīpêx anhýr ā omu hāmri nē kēp Tirtūm kot mē pakaxyw ām xwýnh ā omunh kurê kumrêx.

¹² Tā nhūm Jejus hpānhā ma krī pē Kapanaū hwýr mō. Pa mē hkôt ri ixpa xwýnhjaja nē katorxā nē htōjaja pa mē ma ixpiitā hkôt mō. Hāmri nē hwýr pōj nē kamā mē hkôt ixpa hā ixtā apkati grēre nē ma hpānhā krī hō hwýr ixpa.

Jejus kot Tirtūm nhōrkwý hwýr àr ā harēnh

Matéwre 21.12-13; Makre 11.15-19; Rukre 19.45-46

¹³ Tā nhūm ra arīgro pē Pas ahtēp o mō. Pasja ā mē ixpê Ijaew na pa htem amnepēm Tirtūm kot pika pē Ejit rūm mē inhīgētjē kator mā ijamaxpēr kaxyw apxēn wýr akuprō nē hā ixkīnh. Jakamā nhūm Jejus ma hkwyjē hkôt krī pē Jerujarē hwýr mō. Pa mē ixpê hkôt ri ixpa xwýnhjaja pa mē ma hkôt ixpa. Hāmri nē hwýr pōj ¹⁴ nē Tirtūm mā amnhī jarēnh xā hā ixkre hwýr mra nē ixkre puhā kahēja wýr agjē. Nhūm mē kamā axtem nē mēmoj to wēnē ho kuhē. Mōx o wēnē nē ôwēhti ho wēnē nē tutre ho wēnē ho kuhē. Mē kot haprōr nē ho Tirtūm mā hkīnh xā kaxyw mē kām ho wēnē. Nē káxpore ho pinhpanh xwýnhjaja haxwýja mē kuri hkrī. ¹⁵ Hāmri pa mē Jejus kōt mē hwýr agjē nē ja hā mē omu hāmri nhūm Jejus pē ja omunj týx nē. Jakamā nhūm tee ri mē omu hāmri nē amnhūm mry hkā ho mē htak xā nhīpêx nē ho ixkreja nē mē piitā mē kator pa. Nē mōx nē ôwēhti nē mēmoj piitā kator pa. Nē káxpore ho pinhīpanh xwýnhjaja nhūm mē kēp mē ō mēsti rēnh pa nhūm mē hikáxpore pykap rōrōk pa nē anhrà nē hikwý. ¹⁶ Hāmri nhūm Jejus tutre ho wēnē xwýnhjē mā kām:

—Kwa mē anhō tutre jamý nē tokyx ma mra. Na htem Inhīpêxā nhōrkwý kamā mēmoj to wēnē hkēt nē. Kēp mē ujaarōr xā hā ixkre hkēt. E kwa mē tokyx ma mra. Anē.

Nhūm pre ā mē kām kapēr anē nhūm mē tee ri kuma hāmri nē ma mrar kurê kumrêx. ¹⁷ Pa mē hkôt mē ixpa ho ixpa xwýnhjaja ā kot mē hipêx anhýr ā omu hāmri nē ra Tirtūm kapēr ā kagā htūm kot ā amnhī nhīpêx anhýrja kukamā hā kagāta mā ijamaxpēr kurê kumrêx. Kagā kot amnepēm Jejus kukamā te ra ā kapēr anhýr pyrāk o harēnh. Nē harēnh kot:

Na pa hte Tirtūm nhōrkwý ho mex rāhā ho ixpa. Nhūm mēmoj punuj hwýr axā pa omu nhūm ja inhmā mex kēt nē.

Anhýr o kot hkukamā harēnh jakamā na pa mē ā Jejus kot mē hipêx anhýrja ā omu hāmri nē ra hkukamā hā kagāta mā ijamaxpēr kurê kumrêx.

Ijaew krāhtūmjaja kot Jejus kujjēr ā mē harēnh

¹⁸ Tā nhūm Ijaew krāhtūmjaja tee ri Jejus kot ixkreja nē mē kator ā omu hāmri nē hwýr mra nē kām:

—Pa. Kwa mon ka ri ā Tirtūm mā amnhī jarēnh xā hā ixkreja nē mē kator anē? Mēhō na we mē ixwýr amē ka ý hā ā mē hipêx anēhti? Nā xā Tirtūm na mē ixwýr amē? E mē inhmā aa mē ixte mēmoj pumunh kēt ō ho anē. Pa mē ja hā apumu hāmri nē Tirtūm kot mē ixwýr amēnh xwýnh ā apumunh kurê kumrêx. E kwa tokyx mē inhmā ho anē. Anē.

¹⁹ Hāmri nhūm mē kuma nē mē kām amnhī jarē. Nom amnhī tā kuxi nē mē kām awjarē nē mē kām:

—Nā kot paj aa mē ate mēmoj pumunh kēt ō ho pixi nē mē amā ho anē ka mē omu. Tirtūm nhōrkwý jaa. Kot kaj mē agrā pa ixtā apkati axkrunēpxi nē akupým hipêx ka mē ja hā ixpumu.

20-22 Anhÿr o mẽ kãm kapër. No ãm ixkreja jarënh kêt nê. Na pre ãm amnhĩ tâ kuxi nê ã mẽ kãm kapër anê. Mẽ kot hpír nhũm htyk ã apkati axkrunêpxi nê akupÿm htír ã mẽ kãm ã amnhĩ jarënh anê. Te mẽ kot Tĩrtũm mã amnhĩ jarënh xà hã ixkreta grãnh nhũm hã apkati axkrunêpxi nê akupÿm kot hipêx parã pyràk ã hã kuxi nê ã mẽ kãm amnhĩ jarënh anê. Jakamã nhũm mẽhpĩrĩ hã mar mex kêt nê. ãm tee ri kuma nê kãm:

—Tk. Kwa ixkre ja na prem hipêx kaxyw nê hã amgrã xohtô rax nê hipêx. Hã amgrã pê 46 nê hipêx par kênã kot ka kêt atã apkati axkrunêpxi pix nê akupÿm hipêx. Anê.

Mẽ kot hpĩrĩ hã mar kêt jakamã na prem ã kãm kapër anê. Pa mẽ hkôt mẽ ixpa ho ixpa xwÿnhjaja ã mẽ kãm kapër anhÿrja ã kuma nê hã inhnohtÿx rãhã ho ri ixpa. Tã nhũm mẽ kot Jejus pĩr nhũm hã apkati axkrunêpxi nê akupÿm htír nhõ arĩgrota ã pa mẽ kot ã amnhĩ jarënh anhÿrja mã ijamaxpêr kurê kumrêx. Nê axpên mã:

—Hêxta waa nê. Xep ãm hãmri na pre Pahihti amnhĩ kukamã ã amnhĩ jarënh anê. Mẽ kot hpĩr nhũm htyk ã apkati axkrunêpxi nê akupÿm htír ã amnhĩ kukamã amnhĩ jarënh mex nê. Te mẽ kot Tĩrtũm nhõrkwÿ grãnh par nhũm hã apkati axkrunêpxi nê akupÿm hipêx ã amnhĩ jarënh pyràk. ãm hãmri na pre amnhĩ kukamã ã amnhĩ jarënh anê. Anê.

Jejus kot mẽ pajamaxpêr kôt mẽ pahpumunh ã harënh

23 Tã nhũm Jejus mẽ hkôt mẽ ixpa ho ixpa xwÿnhjaja arĩ Jerujarê kamã ri ixpa ho ixpa. Nhũm ra arĩgro pê Pasja kato nhũm mẽ piitã hkĩnh kaxyw axpên wÿr akuprõ. Nhũm Jejus mẽ kãm aa mẽ kot mẽmoj pumunh kêt kwÿ ho anhÿr o ri mẽ hkôt pa. Nhũm mẽ omu nhũm mẽ hkwÿyaja Tĩrtũm kot mẽ pakaxyw ãm xwÿnh ã hkôt hamaxpêr tã no ãm hkôt hamaxpêr tÿx kêt nê. 24 Jakamã nhũm Jejus amnhĩ tã mẽ hamaxpêr ã mẽ omu nê hamaxpêr o:

—Nã mẽ kot ixkôt hamaxpêr kryre xwÿnhjaja koja mẽ hã apkati grêre nê ixto hamakêtkati nê htÿx ri pa. Anê.

25 Jejus kot mẽ pahte pahtÿx ri amnhĩ tomnuj o papa hã mẽ pahpumunh par. Nê pahtÿx ri pajamaxpêr punuj o papa hã mẽ pahpumunh par. Jakamã na pre ã mẽ harënh anê.

3

Jejus mẽ Nĩkotê wa kot axpên mã kapër ã wa harënh

Juãw 1.12-13; mããnên Wam Pêtre 1.23

1 Tã nhũm Parijew nhõ xwÿnhjê õ pê Nĩkotê. Mããnên kêp Ijaew krãhtũmjê hõ. 2 Jakamã na pre Jejus jarënh ma nê kãm omunh prãm nê. Hãmri nê hkwÿy pumaj kamãt kãm hwÿr tẽ nê omu nê kãm:

—Pa mẽ ijahkre xwÿnh. E ot pa awÿr tẽ. Ra mẽ ixte apumunh mex. Tĩrtũm na pre ate mẽ ijahkre ho apa kaxyw mẽ ixwÿr amê ka mẽ ixwÿr wrÿ. Mẽhõ koja apyrã nê aa mẽ inhmã mẽ kot mẽmoj pumunh kêt kwÿ ho anhÿr o pa? Nã amrakati kumrêx. Kop apu Tĩrtũm kot mẽ ixwÿr amênh kêt ronhÿx ka ã amnhĩ nhĩpêx anhÿr kêt nê. Anê.

3 Hãmri nhũm kuma nê tanhmã kãm kapêr to. No ãm amnhĩ tâ kuxi nê kãm awjarê nê kãm:

—Na htem piitã mẽ katorxã nhõxã hkre rũm hapôj. Tã Tĩrtũm kãm mẽ piitã axte mẽ hapôx prãm. Jakamã kot kaj mẽ akator o axkrut kêt nê hãmri nê nhÿrmã Tĩrtũm ri atĩr tũm nê apa ho apa hkêt nê. ãm hkrajê pix na htem kuri htír tũm nê pa ho pa. Jakamã kwa jam ajamaxpêr tÿx nê ri ho apa. Anê.

⁴ Hāmri nhūm Nīkotēja kuma nē tee ri ā kot kām kapēr anhŷrja kukamā hamaxpēr nē kām:

—Kwa ra ixàptār kēnā kot pa kêt tanhmā amnhī to nē akupŷm ixkatorxà nhòxà hkre hwŷr axà nē axte kurūm ixkato. Anē.

⁵⁻⁷ Hāmri nhūm Jejus kām:

—Nà na hte mē hkrarejaja mē katorxà nhòxà hkre rūm kagô hkôt hapôj hāmri nē kēp katorxà mē hipèèxà wa hkwyŷ. Jao wa kot amnhī nhīpèx kôt amnhī nhīpèx o pa. Ja pyrā nē ka mē atō amā apē Tirtūm kra hprām hā kot kaj amnhī to awŷ nhūm wa Ixkarōja akarō mā axà hāmri ka ra apē hkraa. Te ra axte akator pyrāk o amnhī nhīpèx. Nē te mē hkra kot katorxà nē hipèèxà wa kot amnhī nhīpèx kôt amnhī nhīpèx o pata pyrā nē apām Tirtūm kot amnhī nhīpèx kôt amnhī nhīpèx o ri apa. Nom koja Tirtūm mē wa Ixkarōja akarō mā àr kêt nē ka apē hkra hkêt nē. Jao te axte akator kêt pyrāk o amnhī nhīpèx. Jakamā na pa amā te ate akator pijakrut o amnhī nhīpèx pyrāk o amā ā ja jarēnh anē. Kwa jam ajamaxpēr tŷx rāhā ho ri apa. No ama nē tee ri amnhī kukamā ajamaxpēr kêt nē.

⁸—E pa ixprī hā amā ja jarē ka inhma. Na hte kôk kām nhŷhŷm àpēr prām xà hkôt àpēr o pa. Pu mē kamā ama no àm pano ho nhŷhŷnh mōr xà hkôt omunh kêt nē. Nē nhŷhŷm ma mōr xà hkôt omunh kêt nē. Ja pyrā nē na hte Tirtūm mē wa Ixkarōja mē hkaxwŷnh mā agjē nē mē ho Tirtūm kra nom nhūm mēhprī hā kot tanhmā mē ho hā amnhī tā omunh kêt nē. Anē.

⁹Hāmri nhūm Nīkotē ā Jejus kot kām kapēr anhŷr ā kuma nē tee ri hamaxpēr nē kām:

—Kwa na pa ixprī hā amar kêt nē. Anē.

¹⁰ Hāmri nhūm kām:

—Kwa mon ka hte Tirtūm kapēr tūm o Ijaew jahkre ho apa tā aprī hā ixkapēr mar kêt nē? ¹¹ Ixte mēmoj pumunh xà hkôt ixte mē amā harēnh o ixpa htā ka mē apē Ijaew krāhtūmjaja mē amā ixkapēr mar prām kêt nē. Ā mē ate anhŷr kumrèx. Kwa jam ajamaxpēr tŷx nē. ¹² Na pa ra Tirtūm kot jar tanhmā amnhī nhīpèx to hā harēnh o ixpa htā ka mē àm ama nē ixkôt ajamaxpēr kêt nē. Jakamā xà kot pa hpānhā mē amā kaxkwa kamā tanhmā kot amnhī nhīpèx to hā harē ka mē ama nē mar tŷx nē? Nà kot ka mē ama nē àm ama nē hkôt ajamaxpēr kêt nē. ¹³ Mēhō na we ra ma kaxkwa hwŷr api nē kamā mēmoj mex pumu nē man akupŷn mē awŷr wrŷ nē mē amā tanhmā harēnh to? Nà amrakati kumrèx. Ām paxipix ixpé Tirtūm kot mē akaxyw ixām xwŷnh na pa pre amnē kurūm mē awŷr wrŷ hāmri nē ixprī hā mē amā tanhmā harēnh to ho ri ixpa.

¹⁴—Amnepēm finat Mojesja kormā kapôt ā mē o pa ri na pre mē kām kàx o kagā karōja nhīpèx nē kŷxpé mē kām kunhō. Kagā kot mē hkamnhar wŷnhjaja kot hwŷr rīt nē omunh nē akupŷm mex kaxyw mē kām kunhō. Tā ixpé Tirtūm kot mē akaxyw ixām xwŷnh kot paj nhŷrmā kagā karōta pyrā nē kŷx pé pī kahpa hā ajēt. ¹⁵ Ka mē te mē kot kagā karō pumunh nē akupŷm mexta pyrā nē amnhī kaxyw inhmā ajamaxpēr nē ixkôt amnhī xunhwŷ hāmri nē nhŷrmā Tirtūm mē wa ixri atŷr tūm nē amex rāhā nē apa ho apa.

¹⁶—Tirtūm kām pika piitā hkôt mē apiitā mē ajapē htŷx. Nē mē ajapē xàj na pre ixpé Kra hā ixpyxi hā mē awŷr inhmē. Ka mē atō amnhī kaxyw ixkôt ajamaxpēr nē ixkôt amnhī xām. Hāmri nē nhŷrmā atyk tā nhūm Tirtūm akupŷm ato atŷr ka wa ixkuri atŷr tūm nē amex rāhā nē apa ho apa. Hāmri nhūm Tirtūm aa amnhī nē nhŷhŷm amēnh kêt kumrèx. ¹⁷ No mē ate amnhī

tomnuj mýrapê tanhmã ixte mẽ anhîpêx to kaxyw na pre mẽ awýr inhmênh kêt nê. Âm ixkukwak ri mẽ atír tũm nê mẽ amex rãhã apa ho apa hprãm xàj na pre mẽ awýr inhmê pa mẽ awýr wrý. ¹⁸ Jakamã kot ka mẽ atô amnhî kaxyw ixpê Tirtũm Kra hã ixkôt ajamaxpêr nê ixkôt amnhî xãm nhũm Tirtũm ixtã apumu nê ate amnhî tomnuj mýrapê tanhmã anhîpêx to hkêt nê. No kêt mẽ kot ixkôt amnhî xunhwýr kêt xwýnhjaja na Tirtũm ma mẽ kot amnhî xã htýx kamã hamak tũm xã hwýr mẽ pa mã xwýnhjê hã mẽ harê. Mẽ kot ixkôt amnhî xunhwýr kêt mýrapê. Anê.

Mẽ kot amnhî tomnuj o hpimxur prãm kaprý ã mẽ harênh

¹⁹ Nhũm Jejus arí Nîkotê mã kapêr nê kãm:

—Na pre Tirtũm amnê pika hwýr mẽ awýr inhmê. Mẽ ate amnhî tomnuj xwýnh ã amnhî pumunh kaxyw mẽ awýr inhmê. Tã nhũm mẽ ohtô nê amnhî tomnuj gryk ã kãm kapêr mar prãm kêt nê. Jao ixkaga nê kãm ixkapêr mar prãm kêt nê. ²⁰ Ra ixprî hã ixte mẽ kot tanhmã amnhî tomnuj to ho pa hã mẽ omunh mex jakamã mẽ kãm ixkapêr mar prãm kêt. Nê ixte mẽ kot tanhmã amnhî tomnuj to ho pa hã mẽ harênh pymaj ixkôt kãm pa hprãm hkêt nê. ²¹ No kêt mẽ kot ixkôt amnhî xunhwýr xwýnhjaja na mẽ kot amnhî nhîpêx o pa hã hpijaam kêt. Na htem àmnhîx ixkôt amnhî nhîpêx o pa. Jakamã koja mẽ piitã ja hã mẽ omu nê Tirtũm kot tanhmã mẽ hkrã hto nhũm mẽ ra kãm hkôt pix mã amnhî nhîpêx ho pa hprãm ã mẽ omunh kurê kumrêx. Anê.

Nhũm pre ã Jejus Nîkotêja mã kapêr anê.

Juāw Paxis kot Jejus jarênh o pa hã harênh
Juāw 1.19-28

²² Tã pa mẽ ixpê Jejus kôt ri ixpa ho ixpa xwýnhjaja Jejus kôt Jerujarê rũm ijaarôj nê pika pê Jutej kwý kamã ixpa. Jejus nhý hã Tirtũm mã mẽ hkrã kumrã o ri mẽ hkôt ixpa. ²³ Nhũm finat Juāw Paxis haxwýja mẽ ixpyrà nê mẽ hkrã kumrã o pa. Krî pê Sarî htã krî pê Enô mýri pyhti rax jakamã nhũm pre htem hwýr mra nhũm kamã mẽ hkrã kumrã. ²⁴ Kormã mẽ kot haxãr kêt ri nhũm kamã mẽ hkrã kumrã o pa.

²⁵ Rôm nhũm Ijaew hõja Juāw Paxis kôt mẽ pa ho mẽ pa xwýnhjê hwýr tẽ nê Juāw Paxis kot mẽ hkrã kumrã ã tanhmã mẽ hkukjêr to nhũm mẽ kuma nê tee ri hã axpên kukjêr o kuhê. ²⁶ Hãmri nê akupým Juāw Paxis wýr tẽ nê kãm: —Kwa mẽ ijahkre xwýnh. Pyhti pê Jotãw nhîkjê hã ate mēhõ pumunh nê tanhmã mẽ inhmã harênh to xwýnhnta kôt mẽ pa ho mẽ pa xwýnhjaja na xep htem apyrã nê mẽ hkrã kumrã o pa nhũm xep mẽ ra ohtô nê mẽ pahkaga nê mẽ hkôt pa. Kwa xã ja amã mex nã? Anê.

²⁷ Hãmri nhũm mẽ kuma nê mẽ kãm:

—Tý ja mex kênã. Tirtũm kãm hprãm xã hkôt na htem mẽ hwýr mra nhũm mẽ ixpãnhã mẽ hkrã kumrã. Nã ja mex. ²⁸ Ixpê Tirtũm kot mẽ pakaxyw ãm xwýnh kêt. Na pa pre ra mẽ amã ja hã amnhî jarê ka prem inhma. Âm hkukamã na pre Tirtũm amnê inhmê pa mō nê ã jar ri ixpa anê.

²⁹ —Te ixte mẽ umre kot amnhî nhîpêx pyrãk. Na htem axpên mã mẽ rer kaxyw nhũm mẽ umreja myta wýr tẽ nê hpa hã kupy nê ma ni hwýr o tẽ nê axpên mã wa kure. Hãmri nhũm hpãnhã mēhõja axpên tã wa hakre. Nhũm umreja wa kuri hkînh nê mar o xa. Tã te ixte mẽ umre kot amnhî nhîpêx pyrãk jakamã koja mẽ ma Tirtũm kot mẽ pakaxyw ãm xwýnhnta wýr mra nê kapêr ma pa mẽ harênh ma nê ixkînh nê. ³⁰ Na htem mẽ umre hã hkînh kêt nê. Mjên nyw xwýnhja ã na htem hkînh. Tã ja pyrà nê koja mẽ axte ixte mẽ kãm

Jejus jarënh mar kaxyw ixwÿr mñar kêt nê. ãm hwÿr koja mẽ hpãnhã mra nê tãm mar o kuhê. Ja mex kumrêx. ³¹ Jejus kêp kaxkwa rùm amnê mẽ pahwÿr wrÿk xwÿnh jakamã kot amnhĩ to rax o kot mẽ pahpiitã mẽ pajakrenh par. Mẽ papajaja mẽ pahpê pika nhõ xwÿnh jakamã Jejus kïnhã mẽ pahte mẽmoj piitã omunh tohtuj anhÿr. Nê pika nhõ xwÿnhjê jamaxpêr pix o pajamaxpêr o ri papa.

³² —Na hte Jejus mẽ kãm kaxkwa kamã kot mẽmoj pumunh xwÿnh kwÿjê jarënh o pa. Nê kamã kot mẽmoj mar xwÿnh kwÿ jarënh tã nhùm mẽ ohtô nê kuma nê ãm kuma. ³³ No mẽ kot mar nê amnhĩ kaxyw hkôt hamaxpêr xwÿnhjaja na htem kuma nê axpên mã harënh o: “Nà ãm hãmri na ã Tirtùm kapêr jarënh anê. Nà Tirtùm kapêr mex kumrêx.” Anhÿr o axpên mã harê.

³⁴ —Tirtùm na pre mẽ pahwÿr Jejus mẽ nhùm amnê mẽ pahwÿr wrÿ nê Tirtùm Karõ nhÿ hã mẽ pamã kapêr jarënh o ri mẽ pahkôt pa. ³⁵ Tirtùm kãm Krata japê htÿx kumrêx jakamã na pre ïhkram mẽmoj piitã haxàr pa nhùm urak nê hihtÿx o hihtÿx nê mẽmoj piitã ho amnhĩptâr o pa. ³⁶ Jakamã mẽ kot amnhĩ kaxyw hkôt hamaxpêr nê hkôt amnhĩ xunhwÿr xwÿnhjaja koja mẽ nhÿrmã wa kuri htÿr tùm nê mex rãhã nê pa ho pa. No mẽ kot hkaga xwÿnhjaja koja mẽ ã amnhĩ nhĩpêx anhÿr kêt nê. Koja Tirtùm mẽ kot amnhĩ xà htÿx kamã hamak tùm xàta wÿr mẽ rënh pa. Anê.

4

¹ Tã nhùm Parijew nhõ xwÿnhjaja Jejus jarënh ma. Nê hkôt mẽ pa xwÿnhjaja ohtô rax o Juãw Paxis kôt mẽ pa xwÿnhjê jakrenh ã mẽ harënh ma. Nê Jejus kot mẽ hkrã kumrãr rax o Juãw Paxis jakrenh ã harënh ma. ² Nom Jejus na pre mẽ hkrã kumrãr kêt nê. ãm mẽ ixte hkôt ri mẽ ixpa ho mẽ ixpa xwÿnhjaja na pa prem kãm mẽ hkrã kumrãr o ri ixpa. ³ Jakamã nhùm Jejus amnhĩ tã Parijew nhõ xwÿnhjê jarënh ma hãmri nê mẽ kêp kato nê hpãnhã ma akupÿm Garirej wÿr mō pa mẽ ma hkôt ixpa.

*Mêhõ ni kot amnhĩ nhĩpêx nyw o amnhĩ nhĩpêx ã harënh
Juãw 7.37-39; mããnêñ Apokarip 22.1, 22.17*

⁴ Tã pa mẽ mō nê kormã pyka pê Samar mã axà nê hkôt ixpa. ⁵ Hãmri nê krĩ pê Sika hwÿr ixpõx o mō. Amnepêm finat Jako kot hkra Jujê mã pyka nhõr xwÿnh tã krĩja xa pa mẽ ra hwÿr ixpõx o mō. ⁶ Nê amnepêm Jako kot gôm kakwÿnhhta wÿr pøj. Nhùm ra kaxkwa nhĩpõk ri myt nhÿr mẽ nhùm Jejus ra mñar ryy kurê hkëngrà nê. Hãmri nê gôm kakwÿnh mÿ ri tēm nê hkõkôt o nhÿ. ⁷⁻⁸ Hãmri pa mẽ kure nê mẽ ixàpkur xà japrõr kaxyw ma krĩm ijapêx.

Ròm nhùm Samar nhõ xwÿnh nija amnhĩm gō runh mã tē nhùm Jejus omu nê kãm:

—Kwa inhmã anhõ gōta kwÿ pa ho ixkõ. Anê.

⁹ Nhùm amnhĩ jaêr pê amnhĩ tã kuma. Ijaew na pre htem Samar nhõ xwÿnhjê kutã apkur rÿ mẽ hkôt ri pa rÿ mẽ ho mjên kêt nê. Rÿ mẽ kutã hkõm kêt nê. Tã nhùm Jejus ã gō hã nija wÿr anê nhùm tee ri amnhĩ tã kuma nê kãm:

—Xê pêr apê Ijaew tã axtem nê ri gō hã ixwÿ. Xà ate ixpê Samar nhõ xwÿnh ã ixpumunh kêt? Hãn ka ri hã ixwÿ. Anê.

¹⁰ Hãmri nhùm kuma nê kãm amnhĩ jarê. No ãm amnhĩ tã kuxi nê kãm kapêr nê kãm:

—Nà aprī hā ate ixpumunh ro nh̄ȳx ka kam gō hā ixw̄y pa amā hkwȳ. Inhō gō na axte mā. Tirtūm kām amarī mē amā ōr prām. Na htem ho ixkō hāmri nē mex nē h̄t̄ir tūm nē pa ho pa. Anē.

¹¹ Hāmri nh̄um tee ri kot ā ō gō jarēnh anh̄ȳrja ā kuma nē ht̄ȳx ho gōm kakw̄ynh kamā gō hā hkamnh̄ix nē tee ri hkukamā hamaxpēr nē kām:

—Xē tanhmā kot ka kēt amnh̄i to nē inhmā gōta kw̄y janhi? Mo kaxyw anhō gō janhir xā? Gōm kakw̄ynhta up̄ym rax kēnā kot ka kēt tanhmā amnh̄i to nē hkwȳ janhi. Nh̄ȳh̄ynh kot ka anhō gō jarēnh xw̄ynhta kw̄y janhi pa ho ixkō hāmri nē ixt̄ir tūm nē ixpa ho ixpa? ¹² Mē inhō gōm kakw̄ynhja amnepē mā mē panh̄igēt finat Jako nhō gōm kakw̄ynh na pre. Jako hkwȳjaja na prem hkakw̄y nh̄um kamā gō kato nh̄um pre htem hanhi nē ho hkōm o pa. Nē hkrajaja nē hkrit piitā ho hkōm o pa. Jakamā na pre mē ixpē hkanrēhā ht̄amnhw̄ȳjē mā hkaga. Tā xep axtem anhō gō. Mē kot ho hkōm nē h̄t̄ir tūm kaxyw na xep. Jakamā xē xā ate amnh̄i to rax o mē panh̄igēt Jako jakrenh mē? Anē.

¹³ Hāmri nh̄um Jejus kām:

—Nà mē anhō gōta na htem ho ixkō nē arī kām kōr o pa. ¹⁴ No ixte amā gō jarēnh xw̄ynhta kot ka hkwȳ ho ixkō hāmri nē axte amā kōr kēt kumrēx nē apa. Nh̄um te akaxw̄ynh kām hinore hprōt pyrāk o ka amnh̄i nh̄ip̄ex. Hāmri nē te hinore kamā gōja aa grā hkēt pyrā nē aa ajap̄ex kēt kumrēx. Nh̄ȳrmā atyk tā akup̄ym at̄ir nē at̄ir tūm nē amex rāhā apa ho apa. Anē.

¹⁵ Nh̄um nija kuma hāmri nē kām:

—Xōwehe? Xē tō tokyx inhmā anhō gōta kw̄y. Pa ho ixkō nē axte inhmā kōr kēt nē ixpa. Nē axte amnē amnh̄um gō janhir mā inhm̄rar kēt nē. Xē tokyx inhmā hkwȳ mē? Anē.

T̄ȳx gō kumrēx ā hkamnh̄ix nē ā hā àhw̄yr anē. ¹⁶ Hāmri nh̄um kām:

—Tō ma akup̄ym kr̄im tē nē amj̄en japrō nē man akup̄yn ixw̄yr wa tē. Anē.

¹⁷ Hāmri nh̄um tee ri kuma nē kām:

—Ma mo inhm̄j̄en? Inhm̄j̄en kēt na pa hte ri ixpa. Anē.

Hāmri nh̄um kām:

—T̄ȳ. Nà ām hāmri na ka ā amnh̄i jarēnh anē. ¹⁸ Na ka pre ra amj̄en kēp 5. Nē my mē ri war apa xw̄ynh ata te kēp amj̄en pyrāk nom kēp amj̄en kumrēx kēt. Anē.

¹⁹ Hāmri nh̄um amnh̄i jaēr pē kot ā kām kapēr anh̄ȳrja ma hāmri nē kām:

—Xē pēr aprī hā ate ixpumunh par pyrāk. Mān apē Tirtūm nh̄ȳ hā kapēr jarēnh o mē pa xw̄ynh̄jē hō mān ka mē? ²⁰ Xē inhmā mēmoj jarē. Nh̄ȳh̄ym kot paj wem axpēn kōt mra nē Tirtūm mā mex o mex ā harē? Amnepē mā mē panh̄igētjaja na prem hixēt m̄j̄ nh̄imōk ā api nē hā kām amnh̄i jarē nē kām mex o mex ā harē. No mē apē Ijaew na ka htem kr̄i pē Jerujarē pix kām mē ixte axpēn kōt m̄rar nē ā amnh̄i nh̄ip̄ex anh̄ȳr ā mē inhmā karō. Xā hixēt nh̄imōk ā mē ixte kām amnh̄i jarēnhja xā apē omnuj mē? Ma xā apē omnuj kēt? Anē.

²¹ Hāmri nh̄um Jejus kām:

—Nà kot kaj mē nh̄ȳrmā ām Jerujarē pix kām r̄ȳ hixēt m̄j̄ nh̄imōk pix ā axpēn w̄yr akuprō nē Tirtūm mā amnh̄i jarēnh kēt nē. ²² Mē apē Samar nhō xw̄ynhja mē ate Tirtūm mā mex o mex ā harēnh o apa htā aprī hā kot amnh̄i nh̄ip̄ex ā omunh kēt. Nē tanhmā hamaxpēr to ho pa hā omunh kēt. No mē ixpē Ijaew na pa mē arom kot tanhmā amnh̄i nh̄ip̄ex to nē tanhmā hamaxpēr to hā omunh mex. Mē inh̄iō kukwak ri koja Tirtūm mē kot hkōt amnh̄i xunhw̄yr xw̄ynh piitā nē mē kot amnh̄i tomnuj rēnh pa. ²³ Tā koja mē

piitā Mēpahpām Tirtūm mā mex o mex ā harēnh kaxyw nhỹhỹm pa hkēt nē. Koja mē nhỹri pa xā kamā mē ōpinh xā kaxwýnh kām ā kām amnhĩ jarēnh anhỹr o pa. Ja na Tirtūm kām hprām. No nhỹhỹm mrar nē nhỹri kuhē xā pix kamā kām amnhĩ jarēnhja nhũm kām hprām kēt nē.

²⁴—Nē Tirtūmja mē pahpyrà nē ĩ hkēt jakamā na te kaxkwa nē pika piitā hkôt pa ho pa. Jakamā na htem nhỹri pa nē ōpinh xā kaxwýnh kām amnhĩ kaxyw kām hamaxpēr nē kām mex o mex ā harē nhũm ra amnhĩ tā mē kuma. Ā mē kot amnhĩ nhĩpēx anhỹrja na kām hprām. Anē.

²⁵ Nhũm pre ā Jejus nija mā kapēr anē nhũm kuma nē kām:

—Ma koja xep nhỹrmā Tirtūm kot mē pakaxyw ām mā xwýnh pē Krisja mē pahwýr wrý hāmri nē hprĩ hā mē pamā mēmoj piitā ho amnhĩrit pu mē kuma. Anē.

²⁶ Hāmri nhũm kām:

—Kwa nhũm paa. Ixte amā ixkapēr xwýnhja ixpē Kris na pa. Jakamā na pa ixprĩ hā amā ā ixkapēr anē. Anē.

²⁷ Nhũm pre ā kām amnhĩ jarēnh anhỹrja rôm pa mē ixte hkôt ri mē ixpa ho ixpa xwýnhja ra ixujaprôr pa nē akupýn hwýr ixpôx o mra. Hāmri nē amnhĩ jaēr pē kot Samar nhõ xwýnh nita mā kapēr ā omu nē tee ri hkukamā ijamaxpēr nom tanhmā hā hkukjēr to hkēt nē. Nija kēp Samar nhõ xwýnh tā nhũm āmnhix kām kapēr o nhỹ. Pa mē omu nē ām omu nē tanhmā hā kām nē hkēt nē. ²⁸ Hāmri nhũm nita gôm kakwýnh mýr ri ō poti re nē ma akupým krĩm tē nē hkwyjē mā awjarē. ²⁹ Nē mē kām:

—Xē mē tokyx ma ixkôt gôm kakwýnh wýr mra nē mý ri mēhõ my mũj pumu. Tirtūm kot mē pahwýr mēnh mā xwýnhhta na. Aa kot nhỹri ixpumunh kēt tā kot hprĩ hā ixpumunh par. Ixte tanhmā amnhĩ nhĩpēx to hā ixpumunh par. Xē mē ma ixkôt mra nē ixpyrà nē kapēr ā ama. Anē.

³⁰ Hāmri nhũm mē kuma nē ma hkôt Jejus wýr mrar kurē kumrēx.

³¹ Rôm pa mē ixte Jejus kôt ri ixpa ho ixpa xwýnhja tee ri mē ixàpkur xā ho Jejus ma nē kām:

—E ota mē panhõta. Kwa mēmoj py nē aku mǎn.

³² Anhỹr tā nhũm mē inhma nē tanhmā mē inhmā amnhĩ jarēnh to. Nom amnhĩ tā kuxi nē amnhĩ jarē nē mē inhmā:

—Nà kormā. Inhõja axtem na. Mē ate inhõja pumunh kēt. Anē.

³³ Hāmri pa mē kuma nē tee ri hā axpēn kukja nē axpēn mā:

—Kwa mǎn ra mēhõ mē paxwakre kamā kām mēmoj to tē nhũm kukrē nà? Anē.

³⁴ Hāmri nhũm mē inhma nē mē inhmā:

—Nà mēhõ kot kēt ri inhmā mēmoj to mra pa kuku? Kot paj kot mē awýr inhmēnh xwýnhhta mā tanhmā amnhĩ nhĩpēx to hāmri nē te ra ixàpkur mex nē hā ixihýt mex pyrāk o amnhĩ nhĩpēx. Tā kot paj ā kām amnhĩ nhĩpēx anhỹr o ri ixpa rāhā ho ijapēx pa. Jao te ixàpkur rax pyrāk.

³⁵ Anhỹr o mē inhmā amnhĩ jarē. Hāmri nē ra Samar nhõ xwýnhja mē ixwýr mrar ā mē omu nē mē inhmā tanhmā mē harēnh to nom mē hā kuxi nē mē harē nē mē harēnh o:

—Kot kaj mē axte mē atā mytwrý kēp 4 hāmri nhũm ra mē apur kām mē anhõja hamýnh mā tām nē. Nom kormā. E ka mē pahwýr mē mrar xwýnh nēj pumu. Ra mē kot amnhĩ kaxyw ixkôt hamaxpēr nē ixkôt amnhĩ xunhwýr mā tām jakamā te mē apur kām ra mē anhõ jamýnh mā tām pyrāk. Jakamā ka mē atō ma mē hwýr mō nē mē kot amnhĩ kaxyw ixkôt hamaxpēr nē ixkôt amnhĩ

xunhwýr kaxyw mē kām ijarē. Hāmri nē te ate ixpur kām inhmā inhō jamýnh xwýnh pyrāk o amnhī nhīpēx.

³⁶—Jakamā koja mēhō kumrēx mē hwýr tē nē mē kām Tirtūm kapēr jarē hāmri nē te kēp ō pahi mā hpur kām ahkre ho pa pyrāk. Nhūm mē kot mar xwýnhjaja kuma nom kormā hprī hā mar týx kēt nē. Tā kot kaj mē atō wamta kōt mē hwýr tē nē mē kot ixkōt amnhī xunhwýr kaxyw aprī hā mē kām ijarēnh o mē hkōt apa hāmri nē te apē mē anhō pahi mā hpur kām axujamýnh xwýnh pyrāk. Hāmri nhūm mē hkwyjaja mē ama nē ixkōt amnhī xunhwý nē ixkōt ri amnhī nhīpēx o pa. Hā koja nhýrmā mē apyrā nē Tirtūm mē wa ixri mex rāhā nē htír tūm nē pa ho pa. Ka mē amnhī tā mē omu nē akīnh nē apa. Te mē kot mē hpur kām ahkre xwýnhjaja nē mē kot hamýnh xwýnhjaja mēō rūnh pumunh nē hkīnhnta pyrāk.

³⁷—Na htem tōhā ā mē pur kām mē àpēnh xwýnhjē jarēnh anē nē mē harēnh o: “Axtem mē ahkre xwýnhjaja nē axtem mē kot hamýnh xwýnhjaja.” Anē. Tā te mē ate mē ujarēnh ja pyrāk. ³⁸Na pa pre ra ma mē hwýr mē arē. Mē ate aprī hā mē kām ijarēnh nhūm mē kot mē amar nē amnhī kaxyw ixkōt hamaxpēr nē ixkōt amnhī xunhwýr kaxyw. Nom mē kajaja na ka prem akumrēx mē hwýr amrar nē mē kām ijarēnh kēt nē. Tirtūm kapēr jarēnh o mē pa xwýnhjaja na prem kumrēx mē hwýr mra nē ixkukamā mē kām ijarēnh o ri mē hkōt pa. Te mē kot hpur kām ahkre ho pata pyrāk. Tā kot kaj mē hpānhā mē kot amnhī kaxyw ixkōt amnhī xunhwýr kaxyw aprī hā mē kām ijarēnh o apa. Jakamā te mē ate mē hpur kām mēō jamýnh xwýnh kot amnhī nhīpēxta pyrāk. Anē.

Mē hkwy kot amnhī nhīpēx nyw o amnhī nhīpēx ā mē harēnh
Sīkūm Korīt 5.17; Wam Juāw 4.14

³⁹Rōm nhūm Samar nhō xwýnh kwýjaja nija kot mē kām amnhī jarēnh ma hāmri nē urāk nē amnhī kaxyw Jejus kōt hamaxpēr. Na pre ra amnhī tā tanhmā mē kām Jejus jarēnh to nē mē kām harēnh o:

—Ma aa kot nhýri ixpumunh kēt tā ra kot hprī hā ixpumunh par. Ixte tanhmā amnhī nhīpēx to hā ixpumunh par.

Anhýr jakamā nhūm mē kuma nē urāk nē amnhī kaxyw hkōt hamaxpēr kurē kumrēx.

⁴⁰Hāmri nē man mē ixwýr mra nē Jejus pumu nē amnhī wýr kuwý nē kām: —Pa. E kwa mē tokyx anojarēt kēt nē. Mē ma mē ixkōt mē inhō krī hwýr mō nē mē ixkōt ri apa grire nē arī ma mō. Anē.

Hāmri nhūm mē kuma nē mē kām:

—Tōe. Nā kot paj mē anē. Anē.

Hāmri pa mē ma mē hkōt mō nē mē ō krī kamā mē hkōt ri ixpa hā apkati axkrut. ⁴¹Nhūm Jejus mē kām Tirtūm kapēr jarēnh o ri mē hkōt pa nhūm mē axte ohtō nē kuma nē nita pyrā nē hkōt amnhī xunhwý. ⁴²Hāmri nē nita wýr mra nē kām:

—E nā ām hāmri. Akumrēx na ka mē inhmā Jejus o amnhīrīt. Pa mē akōt ma hwýr mra nē mē pam omu nē kapēr ā kuma. Jao apyrā nē amnhī kaxyw hkōt ijamaxpēr nē hkōt amnhī xunhwý. Pēr ām hāmri kēp pyka piitā hkōt mē pahte amnhī tomnuj pānhā amnhīrer mā xwýnhnta na. Anē.

Garirej nhō xwýnhjaja kot Jejus pumunh ā mē harēnh
Matēwre 13.57

⁴³Tā pa mē Jejus kōt Samar rūm ixkato nē ma pika pē Garirej wýr mō. Kamā Jejus nhō krī pē Najare htā pa mē hwýr inhmōr kēt nē. ⁴⁴Na pre ra Jejus mē inhmā tanhmā ō krī nhō xwýnhjē jarēnh to nē mē harēnh o:

—Tirtũm nhỹ hã kapêr jarênh o mẽ pa xwỳnhjaja na htem amnhĩ nhõ krĩ kamã mẽ kãm Tirtũm kapêr jarênh o pa nhũm mẽ kuma nê ãm kuma. Jakamã kot paj Najare hwỳr inhmõr kêt nê. Mẽ kãm ixkapêr mar prãmre hã.

⁴⁵ Anhỹr jakamã na pa prem hwỳr inhmõr kêt nê. Pãnhã nhãm krĩ hõ hwỳr mõ nê hwỳr pøj hãmri nhũm mẽ amnhĩ wỳr Jejus pumu nê hkĩnh nê. Na prem ra krĩ pê Jerujarê kamã arĩgro pê Pas ã mẽ hkĩnh kãm tanhmã kot amnhĩ nhĩpêx to ho pa hã omu. Jakamã amnhĩ wỳr omu nê hkĩnh nê.

Jejus kot mẽhõ hkra ho mex ã harênh

⁴⁶ Tã pa mẽ kormã Garirej kamã ixpa nê akupỹm krĩ pê Kanã hwỳr mõ. Kamã na pre Jejus mẽ kãm gõ ho wĩhti nhĩpêx. Jakamã pa mẽ akupỹm mẽ hwỳr mõ. Nhũm mẽõ pahi nhõ kôwenatôjê hõ hkra myja kêp à htỳx nê nõ. Nom Kanã kamã hkêt axtem krĩ hõ pê Kapanau kamã. ⁴⁷ Jakamã nhũm hipêêxàja tee ri hkra pumu hãmri nê ra Jejus kot Jutej rũm Kanã hwỳr hpõx ã harênh ma nê hkra kaxyw kãm hamaxpêr nê ma hwỳr mõr kurê kumrêx. Hãmri nê nhỹri omu nê hwỳr tẽ nê kãm kapêr kãm hihtỳx nê kãm:

—Pa. E ot pa awỳr tẽ. Na ra ixkra ixpê htyk kaxyw. Kwa ixkamã axukapri nê ma ixkõt mõ nê akupỹm inhmã ho mex. Anê.

⁴⁸ Hãmri nhũm kuma nê kãm:

—Kwa pêr ãm ixte mẽ amã aa mẽ ate mẽmoj pumunh kêt kwỳ ho anhỹr ã ixpumunh kõt pix mã na ka htem amnhĩ kaxyw ixkõt ajamaxpêr. Nom amarĩ amnhĩ kaxyw ixkõt ajamaxpêr kêt nê. Anê.

⁴⁹ Hãmri nhũm tee ri kuma nê kãm:

—Kwa tokyx. Kot kaj tokyx ixkõt amõr kêt koja ixpê ty. Anê.

⁵⁰ Hãmri nhũm kãm:

—Nà koja apê htyk kêt nê. Ra ixte akupỹm amã ho mex kênã. Mãmrĩ ma akupỹm mõ nê tokyx omu. Na ra akupỹm amã mex. Anê.

Hãmri nhũm kuma nê kaxyw hkõt hamaxpêr kurê kumrêx nê ma akupỹm hwỳr mõ. Nê mõr o apkati. ⁵¹ Nê kormã õ krĩ hwỳr hpõx o mõr ri nhũm ra kãm mẽ ãpênh xwỳnhjaja kutã mra nê nhỹri pry hã hkaxpa nê kãm:

—Pa. Kwa na ra akra hkà hakry nê akupỹm amã mex. Anê.

⁵² Hãmri nhũm mẽ kuma nê hkĩnh tỳx nê. Nê mẽ kãm:

—Kwa xô wehe? Mẽmo ore hã na pre we ra hkà hakry? Anê.

Nhũm mẽ kãm:

—Nà jãã na pre kaxkwa nhĩpõk ri myt nhỹ nhũm hkà hakry nê akupỹm amã mex kurê kumrêx. Anê.

⁵³ Hãmri nhũm mẽ kuma nê mẽ kãm:

—Hêxta waa nê. Kwa pêr ãm hãmri Jejus kot inhmã akupỹm mex ã harênh xà hã ore kamã na pre akupỹm inhmã mex. Nà ãm hãmri. Anê.

Hãmri nê amnhĩ kaxyw Jejus kõt hamaxpêr kurê kumrêx. Nhũm õrkwỹ kamã ri mẽ pa xwỳnhjaja urak nê amnhĩ kaxyw hkõt hamaxpêr.

⁵⁴ Nhũm Jejus ã kãm hkra ho mex anê. Na pre ra pika pê Garirej kamã mẽ kot mẽmoj pumunh kêt õ ho anhỹr o tipxi nê mẽ kãm gõ pix o wĩhti nhĩpêx. Tã ra pyka pê Jutej rũm akupỹm mẽ hwỳr mõ nê ã akupỹm mẽ hkrata o mex anê.

5

Jejus kot himõ mỳ ri akupỹm mẽhõ ho mex ã harênh
Juãw 7.23, 10.30-33

¹ Tã mẽ ixpê Ijaew mẽ ixte Tirtũm ã ixkĩnh kaxyw Jerujarê hwÿr akuprõ nhũm Jejus haxwÿja ma hwÿr mō. Pa mẽ hkõt mẽ ixpa ho mẽ ixpa xwÿnhjaja ma hkõt mō. ² Jerujarê kamã na himõja hikwÿ. Nhÿhÿnh mẽ kot krĩ hwÿr òwêhti ho gjêx xà htã hikwÿ. Himõja nhĩxi pẽ na Petes. Nẽ pu hã mẽ à xwÿnhjê nhĩkwÿ xà hã ixkre kęp 5. ³ Piitã kamã na pre hte tanhmã mẽ à kute xwÿnhjaja hikwÿ. Mẽ nohkre xwÿnhjaja nẽ mẽ hyk o mẽ pa xwÿnhjaja nẽ mẽ ì kamã mẽ htyk xwÿnhjaja. Æm ahpÿnhã tanhmã mẽ à kute xwÿnhjaja ixkre hkwÿja kamã akupÿm mex prãm xàj hikwÿ. ⁴ Na pre hte Tirtũm kapẽr o mẽ wrÿk xwÿnhja tōhã himō hwÿr wrÿ nẽ gō xok. Hãmri nhũm mẽ à xwÿnhjê hō kot amnhĩ to wa nẽ kumrêx hwÿr wrÿk nẽ kamã mrõr xwÿnhja akupÿm mex. Kwÿjê rom akupÿm mex kurê kumrêx. Jakamã nhũm pre hte mẽ à xwÿnhjaja akupÿm mex prãm xàj gō xok jamãr o hikwÿ. ⁵ Jakamã nhũm mẽhō myja ixkre hō kamã hikwÿ. Te omnuj nẽ arĩ hikwÿ hã amgrã sohtō rax nẽ. Ra hã amgrã kęp 38. ⁶ Jakamã nhũm Jejus mẽ hwÿr tẽ nẽ omu. Nẽ hprĩ hã omu nẽ hamaxpẽr o:

—Kwa mũj na hte omnuj nẽ ri pa hkêt ã amgrã sohtō rax nẽ. E pa akupÿm ho mex.

Anhÿr o hamaxpẽr hãmri nẽ kãm:

—Pa. E kwa inhmã amnhĩ jarê. Xà amã akupÿm amex prãm? Anẽ.

⁷ Hãmri nhũm kuma nẽ kãm:

—Ku nhũm. Inhmã tokyx akupÿm inhmex prãm tÿx kumrêx kênã. No mẽhō kot tokyx inhmÿ nẽ mẽ kęp ixto wa nẽ ixkumrêx gō xok kamã inhmrõr? Na pa tee ri ixkumrêx hwÿr ixtẽm nẽ inhmã inhmrõr prãm nhũm mẽ xatã ixpê amnhĩ to wa nẽ mra nẽ kamã mrõ. Anẽ.

⁸ Hãmri nhũm Jejus kãm:

—Tÿ? Tõe. E na ka akupÿm amex. E kãnhmã xa nẽ akupÿp py nẽ ma akupÿm anhõrkwÿ hwÿr tẽ. Anẽ.

⁹ Hãmri nhũm kuma nẽ ra akupÿm mex nẽ kãnhmã xa nẽ ri mra. Nẽ hkĩnh tÿx nẽ hikupÿp py nẽ ma akupÿm òrkwÿ hwÿr tẽ. Ijaew nhõ arĩgromnu pẽ sap ã nhũm Jejus kot akupÿm ho mex ¹⁰ nhũm ma akupÿm pry hã hikupÿp py nẽ o tẽ. Nhũm Ijaew nhõ pahi hkwÿja nhÿhÿnh mra nẽ tee ri kot sap ã hpyr nẽ o htẽm ã omu nẽ kãm:

—Tk. Kwa mẽ pahpê Ijaew na pu htem mẽ panhõ arĩgromnu hã paxàpênh kêt nẽ. Finat Mojes kot ja nẽ mẽ pahkurê htã ka axtem nẽ akupÿpta py nẽ nhÿhÿm o tẽ. Anẽ.

¹¹ Hãmri nhũm mẽ kuma nẽ mẽ kãm:

—Tÿ. Kot anhÿr tã kot ixto mex xwÿnhnta na ã inhmã kapẽr anẽ pa mar xà hkõt kupy nẽ akupÿm inhõrkwÿ hwÿr tẽ. Anẽ.

¹² Hãmri nhũm mẽ tee ri kuma nẽ kãm:

—Kwa mẽhō na we ã ri amã karō anẽ? Anẽ.

¹³ Nhũm kormã kot Jejus nhĩxi mar kêt jakamã kot mẽ kãm ahkre kaxyw hakêx nẽ tee ri hkwÿjê kaêx ã hapêr rÿt o xa. Nom nhũm mẽ ohtō nẽ pry hã mrar jakamã nhũm tee ri hapêr nhũm Jejus ra ma nhÿhÿm tẽ.

¹⁴ Tã nhũm hã ahtũmre nhũm Jejus Tirtũm mã amnhĩ jarênh xà hã ixkre hwÿr tẽ nẽ axã nẽ kot ho mex xwÿnhnta pumu nẽ kãm:

—Pa. E na ka ra akupÿm amex. Nom kwa kêr ka axte tanhmã amnhĩ tomnuj to ho ri apa hkêt nẽ. Kot kaj axte ã amnhĩ nhĩpêx anẽ hãmri nẽ apunuj tÿx o wam ate apunujta jakre kãm ga. Anẽ.

¹⁵ Hãmri nhũm kuma nẽ ma tẽ nẽ kato. Nẽ ma mẽ ò pahijê hwÿr tẽ nẽ mẽ kãm:

—E na pa ra kot ixto mex xwÿnhta nhĩxi ma. Xep kêp Jejus. Anê.

¹⁶ Hãmri nhũm mẽ hixi ma nê hã tanhmã axpên mã ho kapêr punuj to. Mẽ õ arĩgromnu hã kot mẽ ho mex o pa jakamã nhũm mẽ axpên jakwa kamã ri hixi ho rê nê nhÿri omu nê tanhmã hã kãm àkÿêr to. ¹⁷ Hãmri nhũm amnhĩ tã mẽ kuma nê mẽ kãm:

—Ku nhũm. Inhĩpêêxà Tĩrtũm na hte apkati mẽ tanhmã mẽ pahto mex to ho pa. Jakamã pa hte uràk nê ã mẽ ho mex rãhã ho ri ixpa anê nê aa mẽmo arĩgro hã ja ho anhÿr kaga hkêt nê.

¹⁸ Anhÿr o mẽ kãm amnhĩ jarê nhũm mẽ kuma nê kamã gryk tÿx nê. Nom mẽ õ arĩgromnu hã kot mẽ ho mexja pix mÿrapê kamã gryk kêt. Mãânên Tĩrtũm kêp hipêêxà hã harênhja mÿrapê nhũm prem kamã gryk tÿx kumrêx nê axpên mã:

—Tk. Kwa na ã amnhĩ jarênh anhÿr jao te kêp Tĩrtũm pyràk ã amnhĩ jarê. E kwa pu mẽ kupi ri. Anê.

Tĩrtũm Kra kot Hipêêxà nhÿ hã amnhĩ nhĩpêx ã harênh

Juãw 14.10-13

¹⁹ Hãmri nhũm Jejus axte mẽ kêp Ijaew nhõ pahijê mã kapêr nê mẽ kãm:

—Na pa hte amnhĩ krã hkôt tanhmã amnhĩ nhĩpêx to ho ri ixpa hkêt nê. Na pa hte Inhĩpêêxà kot tanhmã amnhĩ nhĩpêx to hã omunh xà hkôt uràk nê mẽ ho mex o ri ixpa. Kwa mẽ amnhĩ krã him ja jaxà nê kãm ajamaxpêr tÿx nê ho apa.

²⁰ —Inhĩpêêxà kãm ijapêê. Na hte inhmã kot tanhmã mẽ ho mex to piitã ho amnhĩrĩt. Ixte omunh nê uràk nê ÿ hã tanhmã mẽ ho mex to ho ri ixpa kaxyw. Jakamã kot paj ãm akupÿm mẽ à xwÿnhjê ho mex pix o ri ixpa hkêt nê. Kot paj mãânên mẽ kãm mẽmoj mex o ja jakrenh o anhÿr o ri ixpa ka mẽ hã ixpumu nê ixkamã ano puma ho apa.

²¹ —Nê Inhĩpêêxà kot akupÿm mẽ htyk xwÿnhjê ho htĩr jakamã kot paj uràk nê akupÿm mẽ htyk xwÿnhjê ho htĩr o ri ixpa. Anê.

Mẽ htĩr tũm nê mẽ pa mã xwÿnhjê jarênh

Juãw 3.16-17, 3.36, 6.27, 6.40, 6.60, 10.28, 17.2-3; Rõmãn 6.23; Karatas 6.8; Xitre 1.2; Wam Juãw 2.25, 5.11-13

²² Nhũm Jejus arĩ mẽ kêp Ijaew nhõ pahijê mã kapêr nê mẽ kãm:

—Koja nhÿrmã Inhĩpêêxà mẽ htĩr tũm nê mẽ pa ho mẽ pa mã xwÿnhjê jarênh kêt nê. Ja kaxyw na pre pa ixãm. ²³ Tã mẽ piitã mẽ kot ja hã ixpumunh nê ixtã hpijaãm o ri pa kaxyw na pre mẽ kaxyw ixãm. Te mẽ kot Inhĩpêêxà hã hpijaãmta pyrã nê pa ixtã hpijaãm o pa kaxyw. Jakamã koja mẽhõ ixtã hpijaãm kêt nê hãmri nê mãânên Inhĩpêêxà hã hpijaãm kêt ã amnhĩ to amnhĩrĩt. Tãm kot mẽ awÿr inhmênh kênã. ²⁴ Jakamã koja mẽhõ ixkapêr ma nê amnhĩ kaxyw kot mẽ awÿr inhmênh xwÿnhta kôt hamaxpêr nê ixkôt amnhĩ xãm. Hã koja nhÿrmã htyk tã ma mẽ kot amnhĩ xà htÿx kamã hamak o pa htũm xàta wÿr mõi kêt nê. Kojã Inhĩpêêxà akupÿm ho htĩr nhũm wa ixri htĩr tũm nê mex kumrêx nê pa ho pa. Jakamã koja mẽhõ ixkôt amnhĩ xãm hãmri nê ra kêp wa ixri htĩr tũm nê pa ho pa mã xwÿnh. Kwa mẽ jam ajamaxpêr tÿx rãhã ho apa.

²⁵ —No mẽ kãm ixkapêr mar prãm kêt xwÿnhjaja kêp Inhĩpêêxà mẽ wa ixri mẽ htĩr tũm nê mẽ pa mã xwÿnh kêt. Tã ixpê Tĩrtũm Kra jakamã koja mẽ ixkapêr ma nê ixkôt amnhĩ xunhwÿ. Hã kot paj amnhĩ tã mẽ omu nê mẽ htĩr tũm nê mẽ pa mã xwÿnh ã mẽ harê nhũm mẽ àmnhĩx ri hkĩnh nê pa ho pa. Kwa mẽ jam ajamaxpêr tÿx rãhã ho apa.

26—Nē Inhīpêêxà tām kêp mẽ ho mẽ htír xwỳnh. Tā ixpê Kra jakamā na pre amnhī pyrà nē ja kaxyw ixām.

27—Ra kot mẽ akaxyw ixām jakamā na pre määnēn ixte tanhmā mẽ ajarēnh to kaxyw ixām. Wa ixri mẽ atír tùm nē apa ho apa mã xwỳnhjê hā mẽ ajarēnh rỳ wa ixri mẽ atír tùm nē apa hkêt mã xwỳnhjê hā mẽ ajarēnh kaxyw. 28-30 Jakamā kot paj nhỹrmā ra mẽ htyk nē mẽ hikwỳ xwỳnh piitā mẽ kām ixkapēr nhũm mẽ inhma. Koja mẽ ixkapēr ma hāmri nē akupỳm htír nē pika rùm hapôx pa. Hāmri nhũm mẽ kot kormā htír ri Tirtùm kapēr kôt amnhī nhīpêx hkêt xwỳnhjaja mẽ kot amnhī tomnuj mỳrapê ma mẽ kot amnhī xà htỳx kamā hamak tùm xàta wỳr ma hapêx pa. Nom nhũm mẽ kot amnhī to mex xwỳnhjaja. Ra mẽ kot Tirtùm kôt amnhī nhīpêx jakamā koja mẽ ma Tirtùm mẽ wa ixwỳr api nē wa ixri mex nē hkính rāhā htír tùm nē pa ho pa.

—Kot paj ja kaxyw tanhmā mẽ apiitā mẽ ajarēnh to. Nom kot paj amnhī krā hkôt inhmā hprām xà hkôt tanhmā mẽ ajarēnh to hkêt nē. Kot paj Inhīpêêxà kot mẽ awỳr inhmēnh xwỳnhhta nhỹ hā àhpumunh tỳx xà hkôt tanhmā mẽ ajarēnh to. Jao âm hāmri mẽ ajarē. Kwa mẽ jam ajamaxpēr tỳx nē. No ã ixte mẽ amā amnhī jarēnh anhỹrja ma nē tee ri ajamaxpēr kêt nē. Anē.

Mẽ kot Jejus kêp Tirtùm Kra hā harēnh xwỳnhjê jarēnh

Juāw 8.18; Wam Juāw 5.6-8

31 Nhũm Jejus arī mẽ kêp Ijaew nhō pahijê mã kapēr nē mẽ kām:

—E na pa ra tanhmā mẽ amā amnhī jarēnh to. Nom kop âm papxipix ixte ã amnhī jarēnh anhỹr ronhỹx ka mẽ inhma nē ajamaxpēr o: “Ko. Na apu âm hāmri ã mẽ inhmā amnhī jarēnh anē rỳ apu âm amnhī to hêx.” Anhỹr o ajamaxpēr. 32 Nom papxipix na pa hte ã amnhī jarēnh anhỹr kêt nē. Inhīpêêxà haxwỳja na hte ã ijarēnh anē. Nē âm hāmri na hte tanhmā ijarēnh to ho pa. Tirtùmja hêx kêt. 33 No mẽ amā pika nhō xwỳnhjê pix kapēr mar prām jakamā na ka prem finat Juāw Paxisja wỳr akwỳjê rē nhũm mẽ ma hwỳr mra nē ixtā hkukja nhũm mẽ kām tanhmā ijarēnh to. Nē hprī hā mẽ kām ijarē. 34 No mẽ apê pika nhō xwỳnhjaja mẽ ate xapēn mã tanhmā ijarēnh toja na ixpê tanhmā kute hkêt. Koja mẽhō tanhmā ixto kapēr punuj to rỳ tanhmā ijarēnh mex to pa amnhī jarēnh ma nē tee ri amnhī kukamā ijamaxpēr o ixkaprī hkêt nē. Tā nom Juāw Paxis kapērja mẽ amā mex jakamā na pa ã mẽ amā harēnh anē. Ka mẽ ra kot tanhmā ijarēnh toja ma nē amnhī kaxyw ixkôt ajamaxpēr nē ixkôt amnhī xunhwỳ nē nhỹrmā ty nē ma mẽ kot amnhī xà htỳx kamā hamak tùm xàta wỳr apa hkêt nē.

35—Juāw Paxis na pre te kanê hpôk mex nē mẽmoj to amnhīrīt mex pyrà nē mẽ amā Tirtùm kapēr o amnhīrīt mex o pa. Ka prem te maripôtre kot kanê hā htu pyrà nē hwỳr akuprō nē mar o akuhê. Nom hkôt ajamaxpēr tỳx kêt nē. 36 Na pre hprī hā mẽ amā ijarēnh o ri pa.

—Tā pa pam mẽ awỳr wrỳ nē Inhīpêêxà nhỹ hā mẽ akamā aa mẽ ate mẽmoj pumunh kêt kwỳ ho anhỹr o ri ixpa. Mẽ ate ja hā ixpumunh nē Inhīpêêxà tām kot mẽ awỳr inhmēnh kôt ixpumunh kaxyw.

37—Nē Inhīpêêxàja määnēn ixpê Kra hā mẽ amā ixto amnhīrīt. Ra mẽ anhōpinh xà kaxwỳnh kām mẽ amā ixto amnhīrīt tã ka mẽ ama nē âm ama nē ixkôt ajamaxpēr kêt nē. 38 Mẽ amā mẽ ate hkôt amnhī nhīpêx o apa hprām kêt. Mẽ ate kapēr mar tỳx ronhỹx ka mẽ ixkapēr ma nē amnhī kaxyw ixkôt ajamaxpēr kurê kumrêx. Ixpê Tirtùm kot mẽ awỳr inhmēnh xwỳnh kênā.

39—Nē Tirtùm kapēr ã kagà htùm haxwỳja kot tanhmā ijarēnh to. Ka htem wa ixri atír tùm nē apa ho apa hprām xàj kamā harēnh rāhā ho ri apa. Nē kot

tanhmā pa ijarēnh to htā ka mē ixkapēr ma nē amnhī kaxyw ixkôt ajamaxpēr kêt nē. Anē.

Ijaew nhō pahijaja kot Jejus kaga hā mē harēnh

⁴⁰ Nhūm Jejus arī mē kēp Ijaew nhō pahijē mā kapēr nē mē kām:

—Nē pa na ixte Inhīpēxà mē wa ixri ixte mē ho mē htīr tūm nē mē pa mā xwýnh ā mē harēnh tā ka mē amnhī kaxyw ixkôt ajamaxpēr kêt nē. ⁴¹ Nom mē ate inhmex ā ijarēnh kêt tā ja ixpē tanhmā kute hkêt. Ām Inhīpēxà pix kot inhmex ā ijarēnhja na inhmā hprām. ⁴² Ra ixte mē apumunh mex. Mē amā Tirtūm kīnh kêt. ⁴³ Tām kot mē awýr inhmēnh tā ka mē ixpumu nē ixkaga nē ixkôt amnhī nhīpēx kêt nē. Nom koja mēhō amnhī krā hkôt mē awýr tē nē tanhmā mē ajahkre hto ka mē ama nē hkôt amnhī nhīpēx kurē kumrēx.

⁴⁴ —Ām pika nhō xwýnh pixjaja kot mē amex ā mē ajarēnhja na mē amā hprām. No Tirtūm kot amnhīm mē amex ā mē ajarēnhja mē amā hprām ā mē ate amnhī jarēnh tā mē amā ja prām kêt. Jakamā na ka htem ixkaga kumrēx. ⁴⁵⁻⁴⁶ Tā nom kot paj pam nhýrmā Tirtūm mā mē apē ixkwý hkêt ā mē ajarēnh kêt nē. Mo kaxyw kot pa kêt ri ā kām mē ajarēnh anē? Finat Mojes tām koja ja hā kām mē ajarē. Na ka htem tanhmā ajamaxpēr to nē ajamaxpēr o: “Kot paj finat Mojes kot mē inhmā tanhmā kapēr to hkôt amnhī nhīpēx o ri xpa hāmri nē nhýrmā Tirtūm ri ixtīr tūm nē inhmex nē xpa ho xpa.” Anhýr o ajamaxpēr nom hkôt amnhī nhīpēx kêt nē. Mojes na pre hte pa ijarēnh o pa. Tā mē ate kapēr kôt amnhī nhīpēx ronhýx ka mē amnhī kaxyw ixkôt ajamaxpēr nē ixkôt amnhī xunhwý. No mē ate ixkaga jakamā koja Mojes tām Tirtūm mā mē apē ixkwý hkêt ā mē ajarē. ⁴⁷ Mē ate Mojes kapēr kôt amnhī nhīpēx kêt jakamā kot kaj mē määnēn ixkôt amnhī nhīpēx hkêt nē. Anē.

Nhūm pre ā Jejus Ijaew nhō pahijē mā kapēr anē.

6

Jejus kot mē ho 5.000 nē mē kām mē ō hā harēnh

Matēwre 14.13-21; Makre 6.30-44; Rukre 9.10-17

¹⁻⁴ Tā nhūm ra arīgro pē Pas ahtēp o mō. Pasja ā mē ixpē Ijaewjaja na pa htem axpēn wýr akuprō nē hā ōwēhti hkra nyw kwý pa nē ī hkur o ixkrī. Amnepēm Tirtūm kot pika pē Ejit rūm mē inhīgētjē kator kaxyw nhūm prem nojarēt nē ā hkwy hpar nē ī hkur anē. Tā arī mē ixpē mē hkanrēhā mē htāmnhwýjaja jam ijamaxpēr pē ixkīnh kaxyw ā amnhī nhīpēx anē. Jakamā nhūm Jejus pār krem axà nē ma himō pē Garirej ā rēr kaxyw ma xarmā mō nē rē. Himōja nhīxi hō pē na Tipe nhūm hā xarmā mō nē rē. Pa mē hkôt xpa ho xpa xwýnhjaja ma hkôt xpa.

Hāmri nhūm pika nhō xwýnh kwýjaja Jejus ma mōr kām omu hāmri nē ma gō kape hā pikap mē inhīhkrep mra. Na pre ra Jejus mē kamā mē ā xwýnhjē ohtō nē akupým mē ho mex nhūm mē axte omu hāmri nē ma mē inhīhkrep gō mý ri hpar o pa.

Tā pa mē xarmā rē nē pār rūm ijapōj nē gō mý ri kýxpē ixkrī hpa.

⁵ Hāmri nhūm mē inhīhkrep mē mra xwýnhjaja mē ixwýr hpōx o mra nhūm Jejus amnhī wýr mē omu nē mē inhīō pē Firipti mā kapēr nē kām:

—Kwa Firip. Mēmoj kot puj mē pahwýr mē mōr nējējē mā ho anē nhūm mē kuku? Tanhmā kot puj mē amnhī to nē nhýri mē kām mēmoj japró nhūm mē kuku? Anē.

⁶ Ra tã̃m kot tanhmã̃ mẽ kãm õ hto hã amnhĩ pumunh mex tã̃ ã mẽ hã Firipti kamã hamak kaxyw mẽ hã hkukjêr anê. ⁷ Hãmri nhũm kuma nê tee ri mẽ hkukamã hamaxpêr nê kãm:

—Konên. Mẽ ohtô rax kumrêx kênã. Mo mẽ kaxyw mẽ pakãxpore rax? Kot pu mẽ pakãxpore ho 200 nê ho mẽ kãm mẽmoj japrôr tã nhũm mẽ ãm ho hkryre nê kuku nê ho õhy htu hkêt nê. Mẽ ohtô rax o mẽ ohtô rax kênã. Anê.

⁸⁻⁹ Hãmri nhũm mẽ inhĩõja kuma nê Jesus wÿr tẽ nê kãm kapêr. Simãw Pêtre htô Andreja hwÿr tẽ nê kãm:

—E ota mẽhõ hkrata amnhĩ kôt õ hwÿy ho mõ. No ãm grire. Na pãwti kêp 5 nê kaxyw õ tep axkrutre. No mẽ ohtô gri ã kot kêt mẽ hipêx pa. Anê.

¹⁰ Hãmri nhũm kuma nê hkôt mẽ ixpa ho mẽ ixpa xwÿnhjê mã kapêr nê mẽ inhmã:

—Tõe. Nã hãmri. E mẽ kãm anê kê mẽ hkrĩ pa. Anê.

Hãmri pa mẽ kãm anê nhũm mẽ põ kamã hkrĩ hpa. Na prem ohtô kumrêx. Mẽmyjê pixjaja kêp 5.000. Nê kaxyw mẽ hprõ nê mẽ hkrajaja. Na prem ohtô ho ohtô. Tã piitã hkrĩ pa. ¹¹⁻¹² Hãmri nhũm Jesus mẽhõ hkrata pẽ õ pãwti jamÿ nê o xa nê Tirtũm mã harê nê kãm:

—Pa Papaj. Na ka hte mẽ inhmã mẽ inhõ ho apa. ãm kapxipix amex o amex. Anê.

Hãmri nê mẽ inhmã pãwtija gõ pa mẽ ô ri mẽ hkrĩ xwÿnhjê mã õr o mra nê ho mẽ piitã mẽ hipêx pa. Pãwtija ãm hkryre htã nhũm Jesus tanhmã ho nhũm ra ohtô rax kumrêx. Jakamã pa mẽ ô ri mẽ kãm õr o mra nê ho mẽ piitã mẽ hipêx pa. Nhũm Jesus hpãnhã tep axkrutreta py nê mã ho anê nê Tirtũm mã harê hãmri nê amnhĩ xõ ri mẽ inhmã kugõ pa mẽ mã ho anê nê. Te ho pãwti nhĩpêx pyrã nê ho mẽ piitã mẽ hipêx. Hãmri pa mẽ xpiitã apku nê inhõhy htu nhũm arĩ mẽõ jakrêx kwÿ hprã. Hãmri nhũm Jesus mẽ inhmã:

—E kwa mẽ hkôt mra nê mẽõ jakrêx o akuprõ kê omnu hkêt nê. Anê.

¹³ Hãmri pa mẽ kuma nê ho akuprõ nê kawã o 12 nê ho nÿt. Pãwti hkryreja ãm kêp 5 pix tã nhũm Jesus tanhmã ho nhũm rũnh kumrêx. Jakamã pa mẽ hakrêx prãr o kawã ho 12 nê ho nÿt pa. ¹⁴ Hãmri nhũm mẽ inhĩhkrep mẽ mõr xwÿnhjaja amnhĩ jaêr pẽ Jesus kot mẽ kãm mẽõ ho rax ã omu nê ri xepên mã harênh o:

—Kokÿÿ. Tãm mãn pre finat Mojesja amnepêm mẽ panhĩgêtjê mã harênh o ri pa. Tã ra mẽ pahwÿr wrÿ nà? ¹⁵ Kwa pu mẽ kãm pakapêr kãm paxihÿtÿx nê ma akupÿm amnhĩ kôt o mõ nê amnhĩ kaxyw ãm kê mẽ pahto amnhĩptãr o pa. Anê.

Hãmri nhũm Jesus amnhĩ tã mẽ kapêr ma nhũm ja kêp omnuj nê. Jakamã nhũm mẽ kêp kato nê ma hpãnhã ahte nhÿri hixêt õ hwÿr tẽ.

*Jesus kot gô krãhkã hã htêm ã harênh
Matêwre 14.22-27; Makre 6.45-52*

¹⁶ Tã nhũm ra kamãtre pa mẽ Jesus kôt ri ixpa ho ixpa xwÿnhjaja mã akupÿm himõ hwÿr mra. ¹⁷ Nhũm kormã Jesus mẽ ixwÿr akupÿn htêm kêt jakamã pa mẽ tee ri kamã ama hãmri nê akupÿm pãr mã axã nê ma akupÿm Kapanau hwÿr xarmã ixrêr o mõ.

¹⁸ Pu nhũm ra kôk apêr tÿx nhũm gô xatã kãnhmã harĩ nê xepên wÿr mra nê xepên tak tÿx nê. ¹⁹ Pa mẽ kormã gô nhĩpòk ri mõ. Nê tee ri rrêmti ho gô rênh nhĩpêx kaprÿ nom kormã ixrêr kêt nê. Nê kormã inhmõr o ixtã 5 kirõm pix nê. Hãmri nhũm ra Jesus gô krãhkã hã hpar o mẽ ixkôt tẽ. Pa mẽ ixprĩ hã

amnhĩ wÿr omunh mex kêt nê ixtÿx mẽkarõ hã hkamnhĩx nê mẽ inhmã uma htÿx kumrêx. ²⁰Tã nhũm mẽ inhmã ixkapêr nê mẽ inhmã:

—Tk. Kwa mẽ amã ma hkêt nê. Pa na pa mẽ akôt tê. Anê.

²¹Hãmri pa mẽ kapêr ma nê ixkĩnh nê. Nê amnhĩ wÿr pàr kre hwÿr ho api nhũm axã pa mẽ xarmã ixrêr kurê kumrêx nê pàr kre rũm ijapõx pa.

Mẽ kot Jejus japêr mrrar ã mẽ harênh

²²Tã nhũm apkati nhũm xarpê mẽ kot Jejus wÿr mrrar nhũm kot mẽ kãm õ xwÿnhjaja tee ri hapêr o pa nê axpên mã:

—Kwa nhÿhÿm mãn pre we têê? Na pre hkôt ri mẽ pa xwÿnhjaja pix mẽ õ pàr kãm ma akupÿm xarmã mõi nom nhũm Jejusja mẽ hkôt htêm kêt nê. Na mãn kormã jar nhÿhÿm ri mrrar jakamã pu mẽ kormã omunh kêt nê. Anê.

²³Rôm nhũm Tipe rũm pàr kwÿja mẽ hwÿr põi. Jejus kot mẽ apkur xã ho Tĩrtũm wÿr nê mẽ kãm ho rax xã hã pikata wÿr nhũm mõi põi. ²⁴Hãmri nhũm mẽ amnhĩ wÿr omu nê tee ri pàr kãm Jejus mẽ hkôt mẽ ixpa ho mẽ ixpa xwÿnhjê japêr hãmri nê axpên mã:

—E kwa pu mẽ ma mẽ hkôt xarmã mõi nê Kapanaũ kamã mẽ hapêr. Anê.

Hãmri nê mẽ kãm amnhĩ jarê nê mẽ õ pàr kwÿ hwÿr agjê nê ma mẽ hkôt xarmã mõi rê. ²⁵Hãmri nê ra mẽ ixwÿr rê nê mẽ ixkôt põi nê mẽ ixkaêx ã Jejus pumu nê hwÿr mra nê kãm:

—Pa mẽ ijahkre xwÿnh. Kwa na pa prem tee ri xarpê ajapêr hãmri nê man akôt mõi rê. Kwa tanhmã na ka pre we amnhĩ to nê man tẽn rê? Anê.

²⁶Hãmri nhũm mẽ kãm:

—Nã mẽmo kaxyw na ka wem ri ijapêr o ri ixkôt apa? ãm jãã mẽ ate ixkutã axãpkur nê anhõhy htu jakamã na ka mẽ axte ixkutã axãpkur pix kaxyw ijapêr o ri apa. No ixte ã mẽ amã amnhĩ nhĩpêx anhÿr ã ixpumu nê ixpê Tĩrtũm Kra hã ixkôt ajamaxpêr kêt nê. Kwa mẽ ixpê Kra hã inhmã ajamaxpêr tÿx nê kêt wehe. Anê.

Jejus te kêp kaxkwa rũm mẽ paxãpkur xã maati pyrãk ã kot amnhĩ jarênh

²⁷Nhũm Jejus arĩ hwÿr mẽ mrrar xwÿnhjê mã kapêr nê mẽ kãm:

—Kwa kêr ka mẽ ri axãpkur xã pix kukamã ajamaxpêr o ri apa hkêt nê. Na htem mẽ apkur xã kukwak ri Tĩrtũm mẽ wa ixri htĩr tũm nê pa ho pa hkêt nê. No kot kaj mẽ amnhĩ kaxyw pa ixkôt ajamaxpêr nê ixkôt amnhĩ xunhwÿ. Hã kot kaj mẽ ixkukwak ri nhÿrmã atĩr tũm nê wa ixri amex nê apa ho apa. Te ixpê mẽ kot mẽ apkur xã hkur nê ý hã htĩr tũm nê pa ho pa xwÿnh pyrãk. Ja kaxyw na pre Inhĩpêêxã Tĩrtũm mẽ awÿr papxipix inhmê pa mẽ awÿr wrÿ. Anê.

²⁸Hãmri nhũm mẽ kuma nê kãm:

—Kwa tanhmã kot paj wem amnhĩ nhĩpêx to nhũm Tĩrtũm hã mẽ ixpumu nê mẽ ixto mex nê? Anê.

²⁹Hãmri nhũm mẽ kuma nê axte mẽ kãm amnhĩ jarê nê mẽ kãm:

—Nã kot kaj mẽ amnhĩ kaxyw pa Tĩrtũm kot mẽ awÿr inhmênh xwÿnh kôt ajamaxpêr hãmri nhũm ixtã mẽ apumu nê tanhmã mẽ akrã hto ka mẽ ajamakêtkati nê axãmnhĩx akĩnh nê tanhmã amnhĩ nhĩpêx to ho ri apa. Anê.

³⁰Hãmri nhũm mẽ kuma nê kãm:

—Tõe. Kwa axte mẽ inhmã aa mẽ ixte mẽmoj pumunh kêt õ ho anê. Pa mẽ ja hã apumu nê amnhĩ kaxyw akôt ijamaxpêr kurê kumrêx. E mẽmo kot ka mẽ inhmã ho anê? Kwa tokyx mẽ inhmã axte mẽmoj tanhmã ho pa mẽ omu.

³¹Amnepêm finat Mojes pyrã kot kapôt ã mẽ panhĩgêjtjê ho pa ri na pre hte

apkati mẽ mẽ kãm mẽõ mẽ kot kãm “manã” anhÿr xwÿnhnta gõ nhũm pre htem hkur o pa. Tirtũm kapër ã kaga htũm kot ja jarënh kot:

Na pre kaxkwa rũm mẽ hwÿr mẽ apkur xà rë nhũm mẽ hkur o pa. Anhÿr o kot harënh. Tã kot kaj Mojes mẽ apkati mẽ mẽ inhmã mẽ inhõ ho ri apa pa mẽ ja hã apumu mẽ rĩ kormã amnhĩ kaxyw akõt ijamaxpër japër. Anë.

³² Hãmri nhũm mẽ kãm:

—Xà Mojes na pre hte mẽ mẽ kãm kaxkwa rũm mẽ apkur xà rënh o pa? Nà tãm kêt. Inhĩpêêxà na pre hte mẽ hwÿr kurë nhũm mẽ hkawrà mẽ kuku mẽ kukwak ri hihtÿx mẽ htĩr mẽ pa. Tã nhũm ra mẽ awÿr hpãnhã pa ixpê Kra hã inhmẽ. Kwa mẽ ixkapër ma mẽ amnhĩ krãm haxàr tÿx mẽ. ³³ Na pre Tirtũm inhĩpêx o te amnepêm kot mẽ hwÿr kaxkwa rũm mẽ apkur xà rënhnta pyrã mẽ amnẽ pika hwÿr inhmẽ. Jakamã te ixpê kaxkwa rũm mẽ apkur xà maati wrÿk xwÿnhnta pyrãk. Mẽ ate amnhĩ kaxyw ixkõt ajamaxpër mẽ ixkõt amnhĩ xunhwÿr hãmri mẽ ixkukwak ri wa ixri atĩr tũm mẽ apa ho apa kaxyw. Anë.

³⁴ Nhũm pre ã Jejus mẽ kãm amnhĩ jarënh anë nhũm mẽ kuma nom hprĩ hã mar mex kêt mẽ. Æm htÿx ho axtem mẽ apkur xà mex pix ã harënh ã hkamnhĩx mẽ kãm:

—Kwa tó mẽ inhmã mẽ apkur xà maatita kwÿ gõ pa mẽ apkati mẽ hkur o ri ixpa. Anë.

³⁵ Hãmri nhũm mẽ kuma mẽ amnhĩ tã mẽ kãm:

—Nà mẽ apkur xà kumrëxja ãm paa. Te ixpê mẽ apkur xà maati pyrãk. Jakamã kot kaj mẽ atõ amnhĩ kaxyw ixkõt ajamaxpër mẽ ixkõt amnhĩ nhĩpêx o apa hã kot kaj mẽ akĩnh mẽ apa. Te ra axàpkur mẽ anhõhy htu mẽ akĩnh o ri apa pyrãk. Jao amnhĩ tã ixpumu mẽ akĩnh mẽ ajamakëtkati mẽ ri apa.

³⁶ —Ra mẽ ate ixpumunh mex tã kormã amnhĩ kaxyw ixkõt ajamaxpër kêt mẽ. Kwa mẽ ixkapër ma mẽ amnhĩ krãm haxàr tÿx mẽ. ³⁷ Tirtũm kot inhmã mẽ õr mã xwÿnhjaja koja mẽ ixpumu mẽ amnhĩ kaxyw ixkõt hamaxpër mex kurë kumrëx. Æ mẽ kot amnhĩ nhĩpêx anhÿr xwÿnhjaja kot paj aa amnhĩ mẽ mẽ hanor kêt mẽ.

³⁸ —Nẽ ixte amnhĩ krã hkõt kaxkwa rũm ixwrÿk mẽ inhmã hprãm xà hkõt tanhmã amnhĩ nhĩpêx to ho ixpa kaxyw na pa pre ixwrÿk kêt mẽ. Inhĩpêêxã kot mẽ awÿr inhmẽnh jakamã kãm hprãm xà hkõt pix mã na pa hte tanhmã amnhĩ nhĩpêx to ho ri ixpa.

³⁹ —Tã to na hte Inhĩpêêxã kãm hprãm? Nà kot inhmã mẽ õr mã xwÿnh piitã nhÿrmã wa ixkuri htĩr tũm mẽ mex mẽ pa ho paja na kãm hprãm. Jakamã nhÿrmã akupÿm mẽ htĩr ã arĩgrotã ã ixte akupÿm mẽ ho htĩr nhũm ixte ãm pixire mẽ ho ixpikunor kêtja na kãm hprãm.

⁴⁰ —Tã kot ka mẽ atõ ixpê Tirtũm Kra hã ixpumu mẽ amnhĩ kaxyw ixkõt ajamaxpër mẽ ixkõt amnhĩ xãm. Hã kot kaj nhÿrmã atyk tã pa akupÿm mẽ atĩr xà hã arĩgrotã ã akupÿm ato atĩr ka wa ixkuri atĩr tũm mẽ amex mẽ apa ho apa. Ja na Inhĩpêêxãja kãm hprãm. Anë.

Nhũm pre ã Jejus mẽ kãm amnhĩ jarënh anë. ⁴¹ Hãmri nhũm Ijaew nhõ pahijaja mẽ kuri mar o kuhẽ mẽ tee ri kêp kaxkwa rũm mẽ apkur xà maati pyrãk ã amnhĩ jarënh ma nhũm ja mẽ kãm mex kêt nhũm mẽ kamã gryk mẽ.

⁴² Jakamã axpën mã ri harënh o:

—Tk. Kwa mo na ri ã amnhĩ jarënh anë? Kêp mẽ panhĩõ kënã kot kêt ri kêp kaxkwa nhõ xwÿnh ã amnhĩ jarë. Kêp Juje mẽ Marir wa hkra na. Mẽ pahte katorxã mẽ hipêêxã wa omunh mex kënã kot kêt axtem mẽ kêp kaxkwa nhõ xwÿnh ã amnhĩ jarë. Anë.

⁴³ Hāmri nhūm amnhī tā mẽ kuma nē mẽ kām:

—Kwa mẽ ã ijarēnh anhýr kēt nē. ⁴⁴ Koja Inhīpēexà kot mẽ awýr inhmēnh xwýnhhta tanhmã mẽ hkrã hto nhūm mẽ ri kormã amnhī tā ja hã ixpumu nē amnhī kaxyw ixkôt hamaxpēr. Tã ã mẽ kot amnhī nhīpēx anhýr xwýnhhaja koja mẽ nhýrmã htyk tā pa akupým mẽ ho mẽ htír nhūm mẽ wa ixri htír tūm nē mex kumrēx nē pa ho pa.

⁴⁵ —Amnepēm Tirtūm kapēr jarēnh o mẽ pa xwýnhhaja na prem ã ja jarēnh anhýr o:

Koja Tirtūm mẽ hkrã kaxwýnh kãm tanhmã mẽ kãm kapēr o amnhīrit to ho pa.

Anhýr o harēnh. Jakamã mẽ kot Tirtūm kapēr mar nē hkôt amnhī nhīpēx xwýnhhaja koja mẽ mãânēn amnhī kaxyw pa ixkôt hamaxpēr nē ixkôt ri amnhī nhīpēx o pa.

⁴⁶ —Nē mẽ apē pika nhõ xwýnhjê hõ aa mẽ ate ixkīnhã ano ho Inhīpēexà pumunh kēt. ãm papxipix na ixte omunh. Kurūm na pa pre mẽ awýr wrý.

⁴⁷ Tã kot ka mẽ atõ amnhī kaxyw ixkôt ajamaxpēr. Hã kot kaj nhýrmã wa ixkuri atír tūm nē amex nē apa ho apa. Kwa mẽ jam ajamaxpēr týx nē.

⁴⁸ —Nē ixpē mẽ axàpkurxã maati jakamã pa na ixpē akupým mẽ ho mẽ htír xwýnh. ⁴⁹ Amnepēm mẽ panhīgētjaja kormã kapôt ã mẽ pa ri mẽ kot “manã” anhýr xwýnhhta kur o ri pata ã na prem kukwak ri htír tūm nē pa ho pa hkēt nē. Na prem ri pa nē gaa nē rī hpigēt nē htyk pa. ⁵⁰ Axtem kaxkwa rūm mẽ apkur xã maati jarēnh xwýnhhta pix kukwak ri na htem nhýrmã htyk tā akupým htír nē wa ixri htír tūm nē mex nē pa ho pa. ⁵¹ ãm paa. Pa na htem inhī hkwy hkrē hāmri nē wa ixri htír tūm nē mex nē pa ho pa. Na pa pre ra amnhī grõnh kôt mẽ awýr wrý. Jakamã ka mẽ atõ inhī hkwy hkrē hāmri nē nhýrmã atyk tā pa akupým ato atír ka Tirtūm mẽ wa ixri atír tūm nē amex nē apa ho apa. Anē.

⁵² Nhūm pre ã Jejus Ijaew mã amnhī jarēnh anē. No ãm mẽ kãm amnhī tā kuxi nē amnhī jaré. Jakamã nhūm mẽ tee ri kuma hāmri nē tanhmã hã axpēn mã kapēr to. Mē kot hprī hã mar kēt nē ãm mẽ kot ī hkwy hkrērja pix jarēnh mar jakamã tee ri hamaxpēr nē axpēn mã:

—Kwa tanhmã kot kēt we amnhī to nē mẽ pamã amnhī nhī hkwy gõ pu mẽ kuku? Anē.

⁵³⁻⁵⁴ Hāmri nhūm amnhī tā mẽ kuma nē mẽ kām:

—Nã mẽ kot inhī hkwy hkrēr nē ixkamrõ hkwy ho hkõm xwýnh pixjaja koja mẽ nhýrmã Tirtūm mẽ wa ixri htír tūm nē pa ho pa. Ixte akupým mẽ ho mẽ htír xã hã arīgrota ã kot paj mẽ ho mẽ htír nhūm mẽ wa ixri htír tūm nē mex nē pa ho pa. No kot kaj mẽ inhī hkwy hkrēr kēt nē ixkamrõ hkwy ho akõm kēt hāmri nē wa ixri atír tūm nē amex nē apa ho apa hkēt nē. Kwa mẽ jam ajamaxpēr týx rãhã nē. ⁵⁵ Kēt inhīja kēp mẽ apkur xã maati na. Nē ixkamrõja kēp mẽ hkõm xã maati na. Jakamã na htem inhī hkwy hkrē nē ixkamrõ hkwy ho ixkõ nē ra kēp wa ixri mẽ htír tūm nē mẽ pa ho mẽ pa mã xwýnh. ⁵⁶ Jakamã kot ka mẽ atõ inhī hkwy hkrē nē ixkamrõ hkwy ho ixkõ. Hāmri pa amnhī tā apumu nē akarõ mã axã ka te apē pa pyrãk o amnhī nhīpēx o apa. ⁵⁷ Inhīpēexà kot mẽ awýr inhmēnh xwýnhhta kukwak ri na pa hte ixtír tūm nē ixpa ho ixpa. Tã ja pyrã nē kot kaj mẽ inhī hkwy hkrē hāmri nē ixkukwak ri wa ixri atír tūm nē apa ho apa mã xwýnh.

⁵⁸ —Jakamã na pa ã mẽ amã ixpē kaxkwa rūm mẽ axàpkur xã maati hã amnhī jarēnh anē. Amnepēm mẽ panhīgētjaja na pre htem kapôt ã mẽõta kur o pa hāmri nē gaa nē hpigēt nē htyk pa. No kēt pa koja mẽ inhī hkwy hkrē hāmri nē mẽ kurom wa ixri htír tūm nē mex nē pa ho pa. Anē.

⁵⁹ Nhūm pre ã Jeŷus mē kām amnhī jarēnh anē. Kormã Kapanau kamã Tirtūm kapēr o mē ahkre xà hã ixkre kamã ã mē ahkre anhÿr o xa.

*Mē ohtô nē mē kot Jeŷus kaga hã mē harēnh
Sikūn Korīt 3.6; Sikūn Pētre 3.16*

⁶⁰ Hāmri nhūm mē kot Jeŷus kôt mar o mē pa xwÿnhjaja ohtô nē ã kapēr anhÿrja ma nē tee ri amnhī kukamã hamaxpēr nē hã axpēn mā:

—Tk. Kwa pēr kapērja ãm ri katii. Mēhō koja we kuma nē hkôt hamaxpēr nē hkamrô nē ĩ kur o ri hkôt pa? Nã mē piitã mē kãm ja mexti hã. Anē.

⁶¹ Hāmri nhūm amnhī tã mē kuma nē mē kãm:

—Kwa xà ixkapērja mē apē omnuj? ⁶² Nã kot paj nhÿrmã ma akupÿm kaxkwa hwÿr api. Ixpē Tirtūm kot mē akaxyw ixãm xwÿnh ã ma akupÿm hwÿr api. Hāmri ka mē ã ixte amnhī nhÿpēx anhÿr ã ixpumu nē ri kormã ixkôt amnhī xunhwÿr japēr. ⁶³ Na htem mēmoj kur kukwak ri kēp Tirtūm mē wa ixri htír tūm nē pa ho pa xwÿnh kēt nē. Rÿ amnhī krã hkôt tanhmã amnhī nhÿpēx to ho kēp wa ixri htír tūm nē pa ho pa mã xwÿnh kēt nē. Tirtūm mē wa Ixkarō tãm na hte mē hkarō mã agjē nē mē ho Tirtūm wa ixkuri mē htír tūm nē mē pa ho mē pa mã xwÿnh. Tã ŷ hã na pa ã mē amã ixkapēr anē. Nom mē amã amnhī tã kuxi nē amnhī jarē. Tã kot kaj mē ixkapēr ma nē ixkôt amnhī nhÿpēx. Hã kot kaj mē nhÿrmã wa ixri atír tūm nē amex nē apa ho apa. ⁶⁴⁻⁶⁵ No mē akwÿjaja na ka mē ixkapēr ma nē ãm ama nē ixkôt ajamaxpēr kēt nē. Jakamã na pa ã mē amã ixkapēr anē nē mē amã: “Koja Inhÿpēxãja tanhmã mē akrã hto ka mē ri kormã amnhī tã ixpumu nē amnhī kaxyw ixkôt ajamaxpēr.” Anhÿr o mē amã ixkapēr. Anē.

Nhūm ã Jeŷus mē kãm kapēr anē. Ra kot mē hkukamã mē omunh mex. Ra kot amnhī kaxyw mē kot hkôt hamaxpēr mã xwÿnhjē pumunh nē mãänēn mē kamã kot mēō pahi nhÿhkram haxàr mã xwÿnhja nhūm mãänēn ra kot amnhī kukamã omunh mex. Jakamã nhūm ã mē kãm kapēr anē. ⁶⁶ Hāmri nhūm mē kot hkôt kapēr mar o mē pa xwÿnh kwÿjaja tee ri kuma hāmri nē hkaga nē axte hkôt pa hkēt nē. ⁶⁷ Hāmri nhūm tee ri mē kot hkaga nē ma mē mraŷ ã mē omu nē mē ixpē hkôt ixpa ho ixpa xwÿnh pē 12jē mã kapēr nē mē inhmã:

—Pa? No mē kajaja. Xà kot kaj mē uràk nē ixkaga nē ma akupÿm mra nà? Anē.

⁶⁸ Hāmri nhūm Simãw Pētre kãm:

—Nã kot paj mē akaga hkēt nē. Kapxipix na htem amnhī kaxyw akôt hamaxpēr jao kēp Tirtūm mē war akuri htír tūm nē pa ho pa mã xwÿnh. ⁶⁹ Ka na pre Tirtūm mē ixwÿr amē. Jakamã na pa mē amnhī kaxyw akôt ijamaxpēr o ri ixpa. Nã kot paj mē aa akaga hkēt nē. Anē.

⁷⁰ Hāmri nhūm kuma nē kãm:

—Nã ixte amnhī kaxyw mē apē 12jē rēnh tã na ka mē atō akwÿjē hkĩnhã axtem nē Satanastı hkôt amnhī xãm. Anē.

⁷¹ Nhūm pre ã finat Jut Kariot kot mē inhō pahijē nhÿhkram haxàrja kukamã mē inhmã harēnh anē. Mē inhī ō na pre. Nē kēp Simãw Kariot kra na pre. Tã ra kot mē ĩhkram haxàr kaxyw nhūm Jeŷus kot amnhī kukamã omunh jakamã ã mē inhmã harēnh anē.

7

*Jeŷus tōjaja kot mē hkĩnh wÿr amnhī kôt hwÿr ã mē harēnh
Matēwre 10.36, 13.57-58*

¹ Tã nhũm Jejus arĩ Garirej kamã ri pa nẽ kormã akupỹm Jutej wýr mõi kêt nẽ. Jutej kamã Ijaew nhõ pahijaja ra kot hã àmnênh nhũm mẽ kot hpĩr ã harênh jakamã nhũm mẽ umaj kormã hwýr mõi kêt nẽ.

² Tã mẽ ixpẽ Ijaew mẽ ixte ixkre hkryre nhĩpêx nẽ hã ixkĩnh ã arĩgroja ra ahtêp o mõi. Mẽ ixkĩnhã ã na pa pre htem ixpiitã Jutej wýr axpên wýr akuprõ mẽ ahpýnhã ri amnhĩm ixkre hkryre nhĩpêx nẽ kamã ixkrĩ. ³ Jakamã nhũm Jejus tõiaja hwýr mra nẽ kãm nojarêt nẽ amnhĩ kót kuwý nẽ kãm:

—E kwa tokyx pu mẽ pahkwýjê hkôt. Ka mẽ kãm aa mẽ kot mẽmoj pumunh kêt kwý ho anhýr o ri mẽ hkôt apa kê mẽ kãm akapêr mar prãm xwýnhjaja ja hã apumu. ⁴ Na ka hte jar te apimxur pyrãk o amnhĩ nhĩpêx. E kwa tokyx ma pu mẽ hkôt. Anẽ.

⁵ Katorxã hkôt mẽ kêp Jejus tõi htã kormã amnhĩ kaxyw hkôt hamaxpêr kêt jakamã na prem ã kãm kapêr anẽ. ⁶ Hãmri nhũm mẽ kãm:

—Nã kormã. Kormã ixte mẽ kãm amnhĩ to amnhĩrit xã hã arĩgro kormã kator kêt. Jakamã kot ka mẽ amã mẽ hkôt amrar prãm nẽ mãmri ma mẽ hkôt mra. ⁷ Koja mẽ apumu nẽ kãm mẽ akurê hkêt nẽ. Nẽ mẽ akamã gryk kêt ka mẽ ri tanhmã amnhĩ nhĩpêx to ho mẽ hkôt apa. No pa kot paj mẽ hwýr mõi nẽ mẽ kãm mẽ kot amnhĩ tomnuj o pa hã mẽ harênh o ri mẽ hkôt ixpa nhũm mẽ tee ri amnhĩ tã inhma nẽ ixkamã gryk nẽ. ⁸ Jakamã mẽ mãmri ma mẽ hkôt mõi. Kot paj kormã. Kormã ixte mẽ kãm amnhĩ to amnhĩrit xã hã arĩgroja kormã kator kêt.

⁹ Anẽ nhũm mẽ tee ri kuma hãmri nẽ kure nẽ ma mẽ hkwyjê hkôt Jutej wýr mõi. Nhũm Jejus kormã Garirej kamã ri pa hã apkati grêre. ¹⁰ Hãmri nẽ kormã ma hapu hã mẽ hkôt mõi. Pa mẽ hkôt ri ixpa ho ixpa xwýnhjaja ma hkôt ixpa.

Mẽ kot ahpýnhã tanhmã Jejus jarênh to hã mẽ harênh

Juāw 7.37-44, 9.22, 10.19-21, 12.42-43

¹¹ Rõm nhũm ra mẽ ixpẽ Ijaew nhõ pahijaja mẽ hkĩnhja kamã mẽ pikuprõnh xwýnhjê kaêx ã Jejus japêr o ri mra. Nẽ hã axpên kukjêr o mra nẽ axpên mã:

—Kwa nok? Nhýri mãn wê? Anẽ.

¹² Nhũm Ijaew piitã tanhmã axpên mã Jejus jarênh to ho pa. Nẽ kamã mẽ hkwyjaja harênh o:

—Nã kot amnhĩ to mex o pa xwýnh na.

Anhýr o harênh o pa. Nẽ kamã mẽ hkwyjaja axtem nẽ harẽ nẽ harênh o:

—Tk. Kot mẽ no kupyr o pa xwýnh kênã. Anẽ.

¹³ Nom mẽ õ pahi pymaj mẽ piitã mẽ nom tanhmã harênh to hkêt nẽ. ãm axpên mã pix mã tanhmã harênh to ho pa.

Jejus kot mẽ hkĩnh xwýnhjê jahkre hã harênh

Makre 3.22; Juāw 5.16

¹⁴ Tã pa mẽ mẽ hwýr põi. Jejus mẽ pa mẽ hkôt ixpa ho ixpa xwýnhjaja mẽ hwýr põi. Kormã mẽ hkĩnhja hapêx kêt ri. Hãmri pa mẽ Jejus kôt Tirtũm mã amnhĩ jarênh xã hã ixkreja wýr mra nẽ agjê nhũm Jejus mẽ ahkre ho nhý.

¹⁵ Hãmri nhũm mẽ inhõ pahijaja tee ri kot tanhmã mẽ ahkre hto hã kuma nẽ hã axpên kukja nẽ axpên mã:

—Kwa mẽ pahkĩnhã kot Tirtũm kapêr o istuda hkêt tã ã mẽ ahkre anẽ. Anẽ.

¹⁶ Hãmri nhũm amnhĩ tã mẽ kuma nẽ mẽ kãm:

—Nã na pa hte amnhĩ krã hkôt tanhmã ri mẽ ajahkre hto hkêt nẽ. ãm kot mẽ awýr inhmênh xwýnhã nhý hã na pa hte ã mẽ ajahkre anhýr o ri mẽ akôt ixpa. ¹⁷ Tã kot kaj mẽ amã Tirtũm kãm hprãm xã hkôt amnhĩ nhĩpêx prãm hã

kot kaj mẽ ixte ÿ hã ixkapër ã ixpumunh kurê kumrêx. ¹⁸ Amnhĩ krã hkôt mẽ kãm kapër o ri mẽ pa xwýnhjaja na htem mẽ kot mẽ mar nê mẽ hã hpijaãm pix kaxyw tanhmã mẽ kãm kapër to ho ri pa. No kêt pa na mẽ ate ixkapër mar nê kot mẽ awýr inhmênh xwýnhhta ã apijaãm pix kaxyw na pa hte tanhmã mẽ amã ixkapër to ho ri ixa. Jakamã ãm hãmri na pa hte mẽ amã ixkapër o ri ixa.

¹⁹—Finat Mojes na pre mẽ panhĩgêttjaja kot tanhmã amnhĩ nhĩpêx to ho pa nhũm Tirtũm kot mẽ kãm hã karõ jarênh o ri mẽ hkôt pa htã ka mẽ hkôt amnhĩ nhĩpêx kêt nê. Tã ixte hkôt amnhĩ nhĩpêx kêt ã ixto axêx nê mẽ ate ixpĩr kaxyw ixtã amnhĩ jarênh ri apa. Anê.

²⁰ Hãmri nhũm mẽ ã Jejus kot mẽ kãm kapër anhýrja ma nê hêx rom kãm:

—Kwa mẽ ixtõ na pa apĩr mã ka ri ã mẽ ijarênh anê? Amrakati kênã. Kwa mãn ka akrã axpã nà? Hã na ka ã ri akapër anê. Anê.

²¹ Hãmri nhũm mẽ kãm:

—Nã ixte mẽ pahkôt xã hã arĩgro hã akupým mẽhõ myta ho mex jakamã na ka prem ja hã ixpumu nhũm ja mẽ apê omnuj nê. Nê te ixte mẽ pahkôt xã hã arĩgro hã ixpijaãm kêt xwýnh pyrãk ã ijarê. ²² Nom na ka htem ixpyrà nê mẽ panhõ arĩgromnu hã mẽmoj tã axápênh o ri apa. E pa mẽ amã mẽmoj jarê ka mẽ inhma. Na pre finat Mojes mẽ pamã mẽ pahte mẽ pahkra myre pé my kwryt kã jakãr ã mẽ pamã karõ. Kukamã higêttjaja kot kãm ja hã karõ xã hkôt. Jakamã na htem mẽ hkra myre hapôj nê hã semãn pyxi nê hapêx nhũm mẽ kêp mẽmy hkwrýt kã jakã. ²³ Mẽ pahkôt xã hã arĩgro hã hõ kator tãã nhũm mẽ hã semãn pyxi nê mẽ panhõ arĩgromnu hõ hã kêp my kwryt kã hkwy krãhta. Mojes kot Tirtũm nhỹ hã ja hã mẽ pamã karõ xã hkôt. Jao mẽ panhõ arĩgromnu hã apê. Tã pa pre mẽ apyrã nê arĩgromnu hã ixápênh pé akupým mẽhõ myta ho mex ka mẽ ja hã ixpumu nê axtem nê ixtýx ri ixte amnhĩ nhĩpêx o ixa xwýnh ã ijarê nê mẽ ate ixpĩr kaxyw ã amnhĩ jarê. ²⁴ Kwa mẽ amnhĩ krã hkôt tanhmã mẽ harênh to ho ri apa hkêt nê. ãm mẽ kot tanhmã amnhĩ nhĩpêx to ho pa hã mẽ omu nê ajamaxpêr o: “Kwa xã we Tirtũm kãm ja mex nã?” Anhýr o mãn kêt mẽ ajamaxpêr nê rĩ kormã tanhmã mẽ harênh to. Anê.

²⁵ Hãmri nhũm Jerujarê nhõ xwýnh kwýjaja ja hã kuma nê tee ri hukamã hamaxpêr. Hãmri nê hã axpên kukja nê axpên mã:

—Kwa xã tãm na mẽ panhõ pahijaja mẽ kot hpĩr kaxyw hã amýnê? ²⁶ Ota jar mẽ pakamã ri pa htã nhũm mẽ ãm omu nê kãm tanhmã nê hkêt nê. Mãn mẽ ãm hãmri kêp Kris ã hkamnhix jakamã kapêr ma nê ãm kuma nê kêp Kris ã tanhmã ho hkêt nê. Anê.

²⁷ Hãmri nhũm mẽhõja kuma nê kãm:

—Tk. Nã kêp Tirtũm kot mẽ pahwýr mẽnh xwýnhre hã. Kêp Najare nhõ xwýnh kênã. Mẽ pahte hipêêxã mẽ katorxã wa omunh mex. No kêt Tirtũm kot mẽ pahwýr mẽnh mã xwýnhhta koja xep mẽ pahwýr kato pu mẽ nhỹhýnh htêm xã hkôt omunh kêt nê. Anê.

²⁸ Rôm nhũm Jejus arĩ Tirtũm mã amnhĩ jarênh xã hã ixkreja kamã mẽ ahkre ho nhỹ. Jakamã mẽ kot axpên mã harênh ã amnhĩ tã mẽ kuma nê mẽ kãm:

—Xã mẽ ate aprĩ hã ixpumunh nê nhỹhýnh ixtêm xã hkôt ixpumunh? Nã mẽ ate ja hã ixpumunh kêt. Na pa pre amnhĩ hkrã hkôt mẽ awýr inhmõr kêt nê. Na pre mẽhõ mẽ awýr inhmê. Nom kot mẽ awýr inhmênh xwýnhjaja kormã mẽ ate omunh kêt. ²⁹ ãm papxipix na ixte omunh. Kurũm ixwryk xwýnh na pa. Kot mẽ awýr inhmênh nhũm kurũm ixwryk jakamã ixte ixprĩ hã omunh par. Anê.

³⁰ Hāmri nhūm mē hwỳjaja tee ri ā kot amnhī jarēnh anhỳrja ma nē ri axpēn mā harēnh o:

—Kwa Tirtūm kot mē pahwỳr mēnh ā kot amnhī to hēx kēnā. E kwa pu mē ā kot amnhī to hēx anhỳr ja ā unē nē haxà nà?

Anhỳr o axpēn mā hā amỳnē. Nom kormā mē kot unēnh nē haxàr xà hā arīgroja kormā kator kēt jakamā nhūm Tirtūmja nē mē omunh mex nē nhūm mē ām kām unēnh prām kaprỳ. ³¹ No nhūm mē hwỳjaja mē kurom kuma nē kēp Tirtūm kot mē pakaxyw ām xwỳnh ā omunh kurē kumrēx nē amnhī kaxyw hkôt hamaxpēr. Hāmri nē axpēn mā harēnh o:

—Kwa mām kēp Tirtūm kot mē pahwỳr mēnh mā xwỳnhnta mām nà? Mē pahthō kot pu urāk nē aa mē kām mē kot mēmoj pumunh kēt o anhỳr rax o ri papa? Amrakati kumrēx. Nā pēr tām kēnā. Anē.

Pôristi hwỳ kot Jejus pynēnh kaxyw ā mē harēnh

³² Nhūm prem ā axpēn mā Jejus jarēnh anhỳr o kuhē hāmri nhūm Parijew nhō xwỳnhjaja hā mē kuma. Hāmri nē patre krāhtūmjē mē mē ma Jejus wỳr mēō pôristi hwỳ rē nē mē kām:

—E mē ma Jejus wỳr mra nē unē nē man akupỳn o tē. Anē.

³³ Hāmri nhūm mē kuma nē ma hwỳr mra nē omu nom tokyx unēnh kēt nē. Kormā kapēr ā mar o kuhē. Nhūm Jejus arī mē kām kapēr o xa nē mē kām:

—Nā kot paj jar mē akôt ri ixpa hā mytwrỳ grēre hāmri nē ma akupỳm kot mē awỳr inhmēnh xwỳnhnta wỳr api. ³⁴ Ka mē tee ri jar ijapēr o ri apa nom nhỳri ixpumunh kēt nē. Nē ma inhmōr xàta wỳr kot kaj mē atō ma ixkôt amōr kēt nē. Anē.

³⁵ Hāmri nhūm mē tee ri ā kot amnhī jarēnh anhỳrja ma nē axpēn mā:

—Kwa nhỳhỹm koja we ma mō pu mē hkôt papa hkēt nē? Mām mē pahkwyjaja kot Gresjē kamā mē pa xwỳnhjē hwỳr koja ma mō nē hpānhā mē hkôt mē ahkre ho pa nà? Hā na ā mē pamā amnhī jarēnh anē? ³⁶ Mō na ri mē pahte tee ri hapēr o papa hā mē pajarē nē mē pahte hkôt pamrar kēt ā mē pajarē? Anē.

Tirtūm Karō te kēp gō nyw pyrāk ā harēnh

Juāw 4.13-14; Apokarip 22.1, 22.17

³⁷ Tā nhūm ra mē hkĩnhja hapēx kaxyw hitep xà hā arīgro maatija kato. Jakamā nhūm Jejus kànhmā xa nē kỳxpē mē hpikuprōnh xwỳnhjē mā kapēr nē mē kām:

—E te mē amā kōr o apa pyrāk xwỳnhjaja. Mē amnē ixwỳr akuprō. Kot kaj mē amnhī kaxyw ixkôt ajamaxpēr pa tanhmā mē ato ka mē apē Tirtūm mē wa ixri atūr tūm nē apa ho apa mā xwỳnh.

³⁸ —Kot kaj mē ja hā amnhī pumu hāmri nē ma mē kām ixkapēr jarēnh o ri mē hkôt apa. Te mē kām kōr nhūm mē ate mē kām gō hwỳ nhūm mē kot ho hkōm pyrāk o mē hipēx o ri mē hkôt apa. Hāmri nhūm mē ama nē mē apyrā nē amnhī kaxyw ixkôt hamaxpēr. Pa ixte tanhmā mē atoja pyrā nē tanhmā mē ho nhūm mē apyrā nē kēp wa ixri htūr tūm nē pa ho pa mā xwỳnh. Anē.

³⁹ Nhūm pre ā Jejus mē kām kapēr anē. No ām hā kuxi nē mē kām kapēr nē hprī hā harēnh kēt nē. Tirtūm Karō kot nhỹrmā mē kot amnhī kaxyw Jejus mā hamaxpēr xwỳnhjē karō mā gjēxja nhūm ā mē kām hā kuxi nē harēnh anē. No kormā akupỳm kaxkwa hwỳr àpir nē mex o mex nē hkrī hkēt jakamā kormā mē hwỳr Karō rēnh kēt nē.

Mě kot ahpÿnhã tanhmã Jejus jarēnh to hã mẽ harēnh

Juāw 7.11-13, 7.25, 10.19-21

⁴⁰ Hāmri nhũm mẽ kot Jejus mar o hkrì xwÿnhjaja ã kapēr anhÿrja ã kuma nē ahpÿnhã tanhmã harēnh to nē harēnh o:

—Kwa finat Mojes pyrà nē kēp Tirtũm nhÿ hã kapēr jarēnh o pa xwÿnh na nã? Anē.

⁴¹ Nhũm kamã mẽ hkwÿjaja mẽ kãm:

—Nà Tirtũm kot mẽ pakaxyw ãm xwÿnhnta na. Anē.

Nhũm kamã mẽ hkwÿjaja ja hã mẽ kuma nē mẽ kãm:

—Tk. Nà kēp Garirej nhõ xwÿnh kēnã kot kēt Tirtũm mẽ pakaxyw ãm.

⁴² Tirtũm kapēr ã kagã htũm kot kēp Garirej nhõ xwÿnh ã harēnh kēt. Kēp Pahi Tawi hkanrēhã hkagrõt nyw jakamã koja uràk nē Jutej kamã krì pē Perēj kamã kato. Jao koja uràk nē kēp Jutej nhõ xwÿnh.

Anhÿr o ri axpēn mã harē. Mě kot htÿx Jejus pika pē Garirej kamã kator ã hkamnhix jakamã ã axpēn mã harēnh anē. Nom pika pē Jutej kamã na pre kato. Krì pē Perēj kamã. Tã no nhũm mẽ hkwÿjaja ja hã mar kēt jakamã kēp Tirtũm kot mẽ pahwÿr mēnh xwÿnh kēt ã hkamnhix.

⁴³ Jakamã nhũm mẽ ã ahpÿnhã axpēn mã harēnh anē. ⁴⁴ Nhũm mẽ hkwÿjaja ra kot unēnh kaxyw tã tokyx unēnh kēt nē.

Pōristi kot Jejus pynēnh kēt ã mẽ harēnh

Matēwre 7.28-29

⁴⁵ Tã nhũm patre nhõ pōristijaja. Mě kot Jejus pynēnh mã hwÿr mrrar tã hāmri ã kapēr anhÿrja ã kuma nē tee ri hamaxpēr nē unēnh kēt nē. Nē awjanã nē ahte ÿ kamã ma akupÿm patre krãhtũmjē mẽ Parijew nhõ xwÿnhjē hwÿr mra. Hāmri nhũm mẽ omu nē mẽ kãm:

—Pa nok? Tanhmã na ka mẽ amnhĩ to nē unēnh nē ho amōr kēt nē? Anē.

⁴⁶ Hāmri nhũm mẽ kãm:

—Nà na pa mẽ unēnh kēt nē. Kapēr mex kēnã. Te kot mẽ pakapēr pyràk kēt jakamã pa mẽ tee ri kapēr ã kuma nē unēnh kēt nē. Anē.

⁴⁷ Hāmri nhũm Parijew nhõ xwÿnhjaja mẽ kuma nē mẽ kãm:

—Tk. Kwa mãn ka mẽ ra mẽ uràk nē tanhmã kot amnhĩ to hēx toja ma nē hkõt ajamaxpēr nã? ⁴⁸ Mě ixpē Parijew nhõ xwÿnhjaja nē mẽ panhõ pahijaja na pa htem hkõt ijamaxpēr kēt nē. ⁴⁹ No kēt mẽ kot mar nē hkõt hamaxpēr xwÿnhntijaja na htem mẽ ixkĩnhã finat Mojes kapēr mar kēt nē. ãm Jejus kapēr pix na htem kuma nē hkõt hamaxpēr. Mÿrapē koja Tirtũm tanhmã mẽ homnuj tÿx to nhũm mẽ rĩ amnhĩ pumu. Anē.

Nikotē kot Jejus xyr pē kapēr ã harēnh

Juāw 3.1-21

⁵⁰ Hāmri nhũm Nikotēja mẽ mar o xa. Mě uràk nē kēp Parijew nhõ xwÿnh tã na pre ra kamãt õ hã Jejus wÿr tē nē kãm kapēr. Jakamã tee ri hã mẽ kapēr ma hāmri nē yr pē mẽ kãm kapēr nē mẽ kãm:

⁵¹ —Tk. Kwa kormã mẽ pahte pahprĩ hã kapēr mar nē tanhmã kot amnhĩ nhĩpēx to hã omunhre hã. Na pre finat Mojesja Tirtũm nhÿ hã mẽ panhĩgētjē mã ja jarēnh o:

Kēr ka mẽ aprĩ hã mẽ kapēr ã mẽ ama nē mẽ kot amnhĩ nhĩpēx ã mẽ omu nē rĩ kormã tanhmã mẽ harēnh to.

Anhÿr tã ka mẽ kormã aprĩ hã Jejus kot amnhĩ nhĩpēx ã omunh kēt tã ra kot amnhĩ tomnuj xwÿnh ã harē. Anē.

⁵² Hāmri nhũm mẽ tee ri kuma nē mẽ kãm:

—Tk. Kwa xà we uràk nē apē Garirej nhō xwýnh hã na ka ã yr pē akapēr anē? Xà Tirtüm kapēr ã kagà htüm kot Garirej nhō xwýnhjê hō kēp ý hã kapēr jarēnh o pa xwýnh ã harēnh? Nà ã kot harēnh anhýr kēt. Anē.

⁵³Nhüm mē ã Nikotē mã kapēr anē hãmri nē angrà nē Tirtüm nhōrkwý rüm hapôj nē ma akupým òrkwý hwýr àhkuré ho mra.

8

Mêhō ni kot nhām mē mjên o amnhĩkati hã harēnh

Xiakre 2.10-13

¹Tã nhüm Jejus Tirtüm nhōrkwý kamã mē ahkre hpa hãmri nē kato nē ma hixét prék pē Oriwèhti hwýr tē. Hãmri nē hã api nē nhýri nō nē ra gōr.

²Tã nhüm apkati nē myt kator o mōr mē nhüm kãnhmã nhý nē akupým wrý nē Tirtüm mã amnhĩ jarēnh xà hã ixkre hwýr tē. No ãm kormã ixkre pu hã kahê hkre kamã nhý. Nhüm krí nhō xwýnhjaja omu nē hã htu rax nē nhüm tanhmã mē ahkre hto ho nhý. ³Hãmri nhüm Parijew nhō xwýnhjê mē Tirtüm kapēr tùm o mē ahkre ho mē pa xwýnhjaja hwýr mêhō nija o tē. Na ra ham mêhō pē mjên o amnhĩkati ho nō nhüm mē ja hã omu nē unē nē hpa hã kupy nē ma Jejus wýr hkjēnh o mō. Hãmri nē mē kot mar o kuhê xwýnhjê kutã ãm nhüm xa. ⁴Hãmri nhüm mē Jejus mã:

—E ot pa mē awýr jahti ho tē ka omu. Na ham mêhō pē mjên o amnhĩkati ho nō. Pa mē ja hã omu nē unē nē man awýr o tē. ⁵E tanhmã kot puj mē hipêx to? Na pre finat Mojes Tirtüm nhý hã mē panhigêtjê mã ja jarēnh o:

Koja mēnijê hō axtem nē nhām mêhō pē mjên o amnhĩkati ho nō ka mē ja hã omu nē apiitã ahpýnhã kēn rünh jamý nē ho htak o apí.

Anhýr o kot harēnh. No ka? Tanhmã kot kaj mē inhmã ja jarēnh to? Tanhmã kot paj mē hipêx to nhüm amã mex nē? E mē inhmã tanhmã mē ixte hipêx to jarē. Anē.

⁶Nhüm mē ã hêx rom nija ã Jejus kukjêr anē. Kot mē kot hpír nē mē kãm kapēr nhüm mē kot hã mar nē mē hkrãhtümjê hwýr mōr nē kãm kot Mojes kapēr kwým ri mē ahkre hã harēnh kaxyw nhüm mē hêx rom ã hkukjêr anē. Hãmri nhüm mē kuma nē tanhmã hã mē kãm nē hkêt nē. ãm htýx hikôt nē ãhkrãrà ho pyka kagà ho nhý. ⁷Nhüm mē tee ri omu nē axte hã hkukja nhüm kãnhmã xa nē mē kãm:

—Tõe. Nà kot ka mē atō aa tanhmã amnhĩ tomnuj to hkêt kumrêx ã amnhĩ pumu hãmri nē kam nē rĩ kaxyw kēn õ py nē akumrêx ho hkura. Kê akwýjaja rĩ kormã akôt hkwy jamý nē ho htak. Anē.

⁸Hãmri nē akupým hikôt nē pyka kagà ho nhý. ⁹Hãmri nhüm mē tee ri kapêrja kôt kuma hãmri nē mē kot mar o kuhê xwýnhjê rüm angrà nē ma mra. Mē piitã mē kot amnhĩ tomnuj xwýnh ã amnhĩ pumunh mexjakamã tee ri ã kot mē kãm kapēr anhýrja ma nē angrà nē ma akupým hpýnh nē axpên kôt mrar o xa. Mêhpigêt kumrêx nē hpãnhã mē nywjaja nhüm mē hpýnh nē ma axpên kôt mrar o ãm kãm hapêx. Nhüm Jejus mēnija pix wa ahte mē kot mar xwýnhjê kutã wa arík. ¹⁰Hãmri nhüm Jejus kãnhmã xa nē nita mã kapēr nē kãm:

—Pa? No mē kot ato kapēr xwýnhhta mē? Xà na mêhō kēn o akuranh kēt nē? Anē.

¹¹Nhüm kãm: “Ma amrakati.” Anē nhüm kãm:

—Tôe. Nà kot paj ijaxwỳja tanhmā ato hkêt nê. E mamrī ma akupỳm anhōrkwỳ hwỳr tē. No ām kêr ka axte ã amnhī nhīpêx anhỳr kêt nê. Ām kwarī ho kwarī. Anê.

Jejus kot hprī hā amnhī jarēnh

Juāw 1.4; Rōmān 13.12-14; Epes 5.8-14; Wam Tesarōn 5.5-8

¹² Tā nhūm arīgro hō hā nhūm Jejus axte Tīrtūm nhōrkwỳ hwỳr tē nê kamā mẽ ahkre ho nhỳ nê mẽ kām:

—Nà te ixpê mẽ piità mẽ ô kanê pyrāk. Na hte kanēja mẽ kām hirā mex nê nhūm mẽ kamā rīt mex o pa. Jao kamāt kô kamā ri pa hkêt nê. Ja pyrā nê na pa hte Tīrtūm kot amnhī nhīpêx o amnhīrīt mex o ri ixpa. Kot ka mẽ atō amnhī kaxyw inhmā ajamaxpēr nê ixkôt amnhī xām hāmri nê tanhmā amnhī tomnuj to ho apa hkêt nê. Ām Tīrtūm kām hprām xā kôt pix mā tanhmā ri amnhī nhīpêx to ho ri apa. Jao te ate kanê hpók nhīrā kamā arīt mex pyrā nê apê wa ixri atīr tūm nê apa ho apa mā xwỳnh. Anê.

¹³ Hāmri nhūm Parijeng nhō xwỳnhjaja tee ri ã kapēr anhỳr ã kuma nê kām:

—Tk. Kapxipix na ka ã amnhī jarēnh anê. Mēhō kot ã ate amnhī jarēnh anhỳrja kôt kot mẽ inhmā ajarēnhre hā. Jakamā kot paj mẽ ama nê ām ama. Anê.

¹⁴ Hāmri nhūm mẽ kām:

—Nà mēhō kot ã ijarēnh anhỳr kêt tā no ām hāmri na pa mẽ amā amnhī jarē. Ixê kêt. Mē arom ixte nhỳhỳnh ixwryk xā hā amnhī pumunh mex. Nê mẽ arom ma akupỳm nhỳhỳm ixàpir xā hā amnhī pumunh mex. Jakamā ām hāmri na pa ã mẽ amā amnhī jarēnh anê. ¹⁵ Na ka htem amnhī krā hkôt tanhmā ri ijarēnh to. No pa na pa kormā amnhī xwar tanhmā mẽ ajarēnh to hkêt nê. ¹⁶ Ixte tanhmā mẽ ajarēnh to ronhỳx pa ām hāmri mẽ ajarē. Nhỳx pa ām paxipix amnhī krā hkôt tanhmā mẽ ajarēnh to hkêt nê. Nhỳx määnēn Inhīpêxà pē kot mẽ awỳr inhmēnh xwỳnhhta inhīkô hā pa wa ām hāmri axpēn kôt tanhmā mẽ ajarēnh to. Mē ate amnhī to mex ã mẽ ajarē rỳ mẽ ate amnhī tomnuj ã mẽ ajarē. ¹⁷ Tīrtūm kapēr ã kagà htūm kot ja jarēnh kot:

Koja mēhō wa hamēxkrut nê tanhmā mẽmoj jarēnh to nê ām axpēn kôt harēnh o htipxi. Hā kot kaj mẽ wa ama nê ām hāmri wa kot harēnh kôt ajamaxpēr kurê kumrêx.

¹⁸ Anhỳr o kot harēnh. Tā pa ã amnhī jarēnh anê nhūm Inhīpêxà kot mẽ awỳr inhmēnh xwỳnhhta määnēn ã ijarēnh anê. Wa ixpijakrut tā ã wa ixte axpēn kôt amnhī jarēnh anhỳr jakamā kwa mẽ ixte tanhmā amnhī jarēnh toja ma nê ixkôt ajamaxpēr kêt wehe. Anê.

¹⁹ Nhūm pre ã Jejus mẽ kām kapēr anê. Hāmri nhūm mẽ kuma nê kām:

—No nhỳri na we anhīpêxà ja? Anê.

Hāmri nhūm mẽ kām:

—Nà mẽ ate Inhīpêxà pumunhre hā. Mē ate aprī hā ixpumunh ronhỳx ka mẽ määnēn aprī hā Inhīpêxà pumunh mex kurê kumrêx. Nom mẽ ate ixpumunh mex kêt jakamā na ka mẽ määnēn omunh mex kêt nê. Anê.

²⁰ Nhūm pre ã Jejus mẽ kām kapēr anê. Arī Tīrtūm mā amnhī jarēnh xā hā ixkreja kamā mẽ ahkre ho xa. Mē kot kàxpore gjēnh xā kuri mẽ ahkre ho xa. Nhūm mẽ kām hkurê xwỳnhjaja tee ri kot tanhmā mẽ ahkre htoja na nê kām unēnh nê haxàr prām nê. Nom kormā mẽ kot ã hipêx anhỳr ã arīgro kormā kator kêt jakamā nhūm Tīrtūmja nê mẽ omunh mex nê nhūm mẽ ām kām unēnh prām kaprỳ.

²¹ Hāmri nhūm Jejus arī mẽ kām kapēr o xa nê mẽ kām:

—Nà kot paj nhÿrmã mẽ arũm ixkato nẽ ma akupÿm api. Ka mẽ tee ri ijapêr nom nhÿri ixpumunh kêt nẽ. Hãmri nẽ mẽ ate amnhĩ tomnuj o apa rãhã ty nẽ mẽ atõ ixwÿr axapir kêt nẽ. Anẽ.

²² Hãmri nhũm Ijaew nhõ pahijaja tee ri ã kapêr anhÿrja ã kuma nẽ axpẽn mã hã hpêr o pikẽnh o kuhê nẽ axpẽn mã:

—Kwa mãn ra kot amnhĩ pĩr kaxyw ã na ri hkõt mẽ paxapir kêt ã mẽ pajarẽn anẽ nà? Anẽ.

²³ Hãmri nhũm amnhĩ tã mẽ kuma nẽ mẽ kãm:

—Nà mẽ kajaja mẽ apê pyka nhõ xwÿnh na ka mẽ. No pa na mẽ arom ixpê kaxkwa nhõ xwÿnh jakamã mẽ pajamxpêr kot axpẽn pyrãk kêt. ²⁴ Kot kaj mẽ ixpê kaxkwa rũm ixwÿrk xwÿnh ã ixpumu nẽ amnhĩ kaxyw inhmã ajamxpêr nẽ ixkõt amnhĩ xunhwÿr kêt hã kot kaj mẽ ate amnhĩ tomnuj o apa rãhã nhÿrmã atyk o mẽ kamjaja Tĩrtũm mã amnhĩ pãnhã amnhũre. Anẽ.

²⁵ Nhũm Jejus ã mẽ inhõ pahijê hukamã mẽ kot amnhĩ nhĩpêx jarẽn anẽ nhũm mẽ tee ri amnhĩ tã kuma nẽ kãm:

—Kwa mẽ atõ na ka we ri ã mẽ inhmã akapêr anẽ? Anẽ.

Hãmri nhũm mẽ kãm:

—Nà ra ixte mẽ amã amnhĩ jarẽn kênã. Xãn ka mẽ kormã aprĩ hã inhmar kêt nẽ? ²⁶ Kot paj nhÿrmã mẽ amã mẽ ate amnhĩ tomnuj piitã ho amnhĩrit pa. Na pa kot mẽ awÿr inhmẽn xwÿnhhta pix xõ ri tanhmã mẽ amã ixkapêr to ho ri ixpa. ãm hãmri na hte tanhmã mẽmoj jarẽn to. Na hte hẽx kêt nẽ. Anẽ.

²⁷ Nhũm pre ã Jejus mẽ kãm Hipêêxã kot mẽ hwÿr mẽnã ã harẽn anhÿr tã no nhũm mẽ Hipêêxã kêp Tĩrtũm ã hkõt hamaxpêr kêt nẽ. ²⁸ Jakamã nhũm mẽ kãm:

—Nà koja mẽ nhÿrmã pĩ kahpa hã inhõ ka mẽ rĩ kormã aprĩ hã ixpê Tĩrtũm rũm mẽ awÿr ixwÿrk xwÿnh ã ixpumu. Nẽ ixte amnhĩ krã hkõt ixkapêr o ri ixpa hkêt ã ixpumu. Nẽ ãm Inhĩpêêxã xõ ri ixprĩ hã ixkapêr o ri ixpa hã ixpumu. ²⁹ Ixte kãm hprãm xã hkõt pix mã tanhmã ri amnhĩ nhĩpêx to ho ri ixpa jakamã na hte ixtãnopxar mex o ixkõt pa ho pa. Kojã aa ixkaga hkêt nẽ. Anẽ.

³⁰ Hãmri nhũm mẽ hkwyã kuma nẽ hkwyjê rom kapêr kõt hamaxpêr

³¹ nhũm amnhĩ tã mẽ omu nẽ mẽ kãm:

—Nà ãm hãmri na ka mẽ tã ixkõt ajamxpêr. Tã kêr ka mẽ ixkõt amnhĩ xunhwÿ nẽ ixkapêr kõt pix mã ri amnhĩ nhĩpêx mex o ri apa. Hãmri pa ja hã mẽ apumu nẽ mẽ apê ixkwÿ kumrêx ã mẽ ajarê. ³² ãm hãmri na pa hte ã ixkapêr anhÿr o ri ixpa. Tã kot kaj mẽ ixkõt ri amnhĩ nhĩpêx o ri apa hãmri nẽ aprĩ hã inhmar tÿx nẽ. Nom na hte kormã mẽmoj kot amnhĩ tã mẽ ato htÿx pyrãk o mẽ anhĩpêx ka mẽ tee ri amnhĩ krã hkõt kãm anhũrer prãm kapÿr. Tã kot kaj mẽ ixkõt amnhĩ xunhwÿ nẽ ixkõt ri amnhĩ nhĩpêx hãmri nẽ Tĩrtũm nhÿ hã tãm amnhĩ nhĩpêx. Jao ÿ hã ate amnhĩ tomnuj mã anhũre. Anẽ.

³³ Nhũm pre ã Jejus mẽ kãm kapêr anẽ hãmri nhũm mẽ tee ri kuma nẽ kãm:

—Kwa mẽ ixpê mẽ pahpàr krax finat Apraãw kanrêhã htãmnhwÿ kênã. Na pre mẽmoj te kot amnhĩ tã ho htÿx pyrãk o hipêx kêt nẽ. Jakamã mẽmo kot we mẽ ixpê hkanrêhã htãmnhwÿjê ho htÿx ka we ri ã mẽ ijarẽn anẽ? Nã amrakati kênã. Tã kwa mon ka ã mẽ ijarẽn anẽ? Anẽ.

³⁴ Hãmri nhũm Jejus hprĩ hã mẽ kãm awjarê nẽ mẽ kãm:

—Kwa mẽ ixkapêr mã nẽ amnhĩ krãm haxãr tÿx nẽ. Nã mẽ kot amnhĩ tomnuj o mẽ pa xwÿnhjaja te mẽ kot amnhĩ tomnuj tãm ri kot amnhĩ tã mẽ ho htÿx pyrãk o mẽ hipêx. Jakamã nhũm mẽ urer kêt rãhã nẽ pa ho pa. Nẽ ã amnhĩ nhĩpêx anhÿr rãhã ho pa. ³⁵ Jakamã ixkĩnhã mẽ kêp Tĩrtũm kwÿ hkêt.

No pa na ixpê Tirtūm Kra jakamā māānēn ixpê hkwȳ na pa. ³⁶ Tā mē kajaja. Kot kaj mē ixpê Tirtūm Kra hā ixkôt amnhī xunhw̄ȳ hā kot pa tanhmā mē ato ka mē ixpyrā nē apē wa ixkw̄ȳȳ. Hāmri nhūm mē ate amnhī tomnuj te kot mē amā urer pyrāk o mē anhīpēx ka mē ra wa ixkôt amnhī nhīpēx o ri apa. Anē.

Mē kēp Tirtūm kra hkēt xw̄ynhjē jarēnh

³⁷ Nhūm Jejus arī mē kām kapēr nē mē kām:

—Nā ām hāmri na ka mē apē finat Apraāw kanrēhā htāmnhw̄ȳ hā amnhī jarē. Nom mē apē hkanrēhā htāmnhw̄ȳ htā urāk nē amnhī kaxyw Tirtūm kōt ajamaxpēr kēt nē. Jakamā na ka htem ixkapēr ma nē ām ama nē ixkaga. Nē axtem nē ixpīr mā. Kop apu Apraāw arī mē akamā pa ronh̄ȳx ā inhīpēx anh̄ȳr kēt nē. ³⁸ Na pa hte Inhīpēēxā hkōt pix mā ri amnhī nhīpēx o ri ixpa. No mē kajaja axtem nē mē ate nhām mē kapēr kōt amnhī nhīpēx jakamā na ka htem ixkīnhā Inhīpēēxā hkōt amnhī nhīpēx kēt nē. Anē.

³⁹ Hāmri nhūm mē tee ri amnhī tā kuma nē kām:

—Tk. Kwa mon ka ā mē ijarēnh anē? Mē ixte Apraāw kōt amnhī nhīpēx o ri ixpa kēnā. Anē.

Hāmri nhūm mē kām:

—Nā. Mē ate hkōt ri amnhī nhīpēx o apa ronh̄ȳx ka mē urāk nē Inhīpēēxā kapēr kōt amnhī nhīpēx. ⁴⁰ No na ka mē ra axtem nē ixpīr mā. Ām hāmri na pre Tirtūm inhmā awjarē pa ô ri tanhmā mē amā mēmoj jarēnh to ho ri ixpa htā ka mē ra axtem nē ixpīr mā. Kwa xā na pre Apraāwja ā mē hipēx anh̄ȳr o pa? Nā na pre ā mē hipēx anh̄ȳr kēt nē. ⁴¹ Mē ate hkōt amnhī nhīpēx xw̄ynhta axtem na. Kēp Apraāw kēt. Nē māānēn kēp Tirtūm kēt. Anē.

Hāmri nhūm mē tee ri kuma nē kām:

—Tk. Kwa nā ā mē ijarēnh anh̄ȳr kēt nē. Mē ixte Apraāw kōt amnhī nhīpēx xw̄ynh kēnā. Tā ka ri axtem nē ā mē ijarēnh anē. Mēhō hkōt kot pa kēt wem ri axtem amnhī nhīpēx o ri ixpa? Anē.

⁴² Hāmri nhūm mē kām:

—Nā mē ate Apraāw kōt amnhī nhīpēx ronh̄ȳx ka mē ixpumu nē urāk nē amā ixprām nē. Apraāw kot hkōt amnhī nhīpēx o pa xw̄ynhta tām kot mē aw̄ȳr inhmēnh nhūm mē aw̄ȳr ixwr̄ȳk kēnā. Na pa pre amnhī krā hkōt man mē aw̄ȳr ixwr̄ȳk kēt nē. Tām na pre mē aw̄ȳr inhmē pa wr̄ȳ. ⁴³ Kwa mon ka mē aprī hā ixkapēr mar mex kēt nē? Nā mē amā ixkōt amnhī nhīpēx prām kēt jakamā na ka mē tee ri ixkapēr ma nē aprī hā mar mex kēt nē. ⁴⁴ Mē ate hkōt amnhī nhīpēx xw̄ynhta Satanasti na. Aa tām kot amnhī nhīpēx kēt kumrēx. Kēp mē hpar o pa xw̄ynhjē hpām maati na. Nē kēp mē kām hēx o pa xw̄ynhjē pām maati na. Ā kot amnhī nhīpēx kot anh̄ȳr. Nē kām mē kapēr mex mar prām kēt o pa. Nē ām hēx pix o pa jakamā kēp mē hēx xw̄ynhjē pām. Ā kot amnhī nhīpēx anh̄ȳr xw̄ynh tā ka htem hkōt amnhī nhīpēx o ri apa.

⁴⁵ —Na pa hte kurom ām hāmri ixkapēr o ri ixpa. No mē kajaja mē apē hēx nhi xw̄ynh maatija hkra jakamā mē amā ixkapēr mar prām kēt. ⁴⁶ Xā na ka pre mē atō ixte tanhmā amnhī tomnuj to hā ixpumu? Nā amrakati. Ixte amnhī to mex o ri ixpa xw̄ynh na pa. Nē tām ixkapēr o ri ixpa xw̄ynh tā ka mē inhma nē ām inhma nē ixkōt ajamaxpēr kēt nē. Kwa mon ka mē ja hā ixpumunh nē ixkōt ajamaxpēr nē ixkōt amnhī xunhw̄ȳr kēt nē? ⁴⁷ Tirtūm krajaja na htem kapēr mar t̄yx nē hkōt amnhī nhīpēx o pa. No mē apē hkra hkēt jakamā mē amā kapēr mar prām kēt. Anē.

Mē kot Jejus kēp Satanasti hkwȳ hā harēnh

⁴⁸ Hāmri nhūm mē ã Jejus kot mē harēnh anhÿrja ma nē kamā gryk tÿx kumrēx. Hāmri nē kām:

—Tk. Kwa ate amnhĩ tomnuj o apa xwÿnhti kēnā. Ra Satanasti hkwy pē mēkarōmnuti tanhmā kot akrā hto jakamā na ka ã mē inhmā akapēr anē. Anē.

⁴⁹ Hāmri nhūm mē kām:

—Nā mēkarōmnuti kot tanhmā ixto hkēt. Na pa hte Inhĩpēêxā hā xpijaàm pix o ri ixpa. Tā mē ate ixkĩnhā hā apijaàm kēt jakamā mǎānēn pa ixtā apijaàm kēt nē. ⁵⁰ Na pa hte amnhĩ krā hkôt mē piitā mē kot ixtā hpijaàm prām xāj tanhmā mē kām ixkapēr to hkēt nē. No mē piitā mē kot ixtā hpijaàm o paja na Inhĩpēêxā kām hprām. Tā koja nhÿrmā amnhĩ nē ixtā mē hpijaàm kēt xwÿnhjaja mē kot amnhĩ xā htÿx kamā hamak tūm xāta wÿr mē rēnh pa.

⁵¹ —Nē kot ka mē atō wa ixkapēr ma nē ixkôt amnhĩ nhĩpēx. Hā kot kaj wa ixri atĩr tūm nē apa ho apa. Kwa mē ixkapēr ma nē amnhĩ krām haxār tÿx nē. Anē.

Nhūm pre ã Jejus Ijaew nhō pahijē mā kapēr anē. ⁵² Nhūm mē kuma nē kām:

—Kwa pēr ãm hāmri na ka hte Satanasti nhÿ hā ã mē htĩr tūm nē mē pa ho pa hā mē harēnh anhÿr o ri axēx o ri apa. Finat Apraāw na pre ri paa nē ty. Tā mē kot Tĩrtūm nhÿ hā kapēr jarēnh o mē pa xwÿnhjaja na prem urāk nē ri paa nē mǎānēn htyk pa. Tā ka axtem nē mē kot akapēr kôt amnhĩ nhĩpēx o mē pa xwÿnhjaja ari htĩr tūm nē pa ho pa hā mē harē. Nā na ka ãm mē inhmā mē ho axēx o xa. ⁵³ Na pre mē pahpām Apraāwja kot amnhĩ to rax tā ty nē hapēx. Nhūm mē kot Tĩrtūm nhÿ hā kapēr jarēnh xwÿnhjaja mǎānēn mē kot amnhĩ to rūnh tā htyk pa nē hapēx. Mē kot amnhĩ to rūnh tā htyk pa nē hapēx kēnā kot kēt mē tanhmā amnhĩ to nē ari htĩr tūm nē pa. ãm mē ixte akapēr mar nē atā xpijaàm pix prām xāj na ka ã mē inhmā mē htĩr tūm nē pa hā mē harēnh anē. Nom na ka ã mē harēnh anhÿr kaprÿ. Kot paj mē ri akapēr mar kēt nē. Anē.

⁵⁴ Hāmri nhūm mē kuma nē mē kām:

—Nā na pa hte amnhĩ krā hkôt mē ate ixtā apijaàm hprām xāj tanhmā mē amā ixkapēr to hkēt nē. Kot paj anē nē ãm ixtÿx ã amnhĩ nhĩpēx anhÿr kaprÿ. No Inhĩpēêxā tām kām mē apiitā mē ate ixtā apijaàm o apaja nhūm kām hprām. Mē ate Tĩrtūm kôt amnhĩ nhĩpēx o apa hā amnhĩ to axēx xwÿnhta tām na kām mē ate ixtā apijaàmja nhūm kām hprām. Tā ka htem ã amnhĩ nhĩpēx anhÿr kēt nē. Na ka htem ixkuk pumu nē axtem nē ixte Satanasti nhÿ hā mē amā ixēx o ri ixpa hā ijarē. ⁵⁵ Mē ate Inhĩpēêxā hkôt amnhĩ nhĩpēx ã amnhĩ jarēnh tā ãm amnhĩ to axēx o ri apa. No pa na pa hte mē arom ãm hāmri hkôt amnhĩ nhĩpēx mex o ri ixpa. ⁵⁶ Amnepēm mē pahpār krax Apraāwja na pre mē awÿr ixwrÿk kukamā ijarēnh ma nē mē arom inhÿ hā hkĩnh tÿx nē pa. Anē.

Nhūm pre ã Jejus mē kām amnhĩ jarēnh anē. ⁵⁷ Hāmri nhūm mē kuma nē tee ri kot mē kām tanhmā Apraāw jarēnh toja ma nē kām:

—Tk. Xā na ka pre finat Apraāwja ano ho omu? Nā kormā anyw kēnā. Apraāw amnepēm htyk nē hapēx kēnā kot ka kēt kot akukamā ajarēnh mar nē hkĩnh tÿx ã harē. Xàn ka pre ano ho omu? Kormā akator kēt ri na pre amnepēm htyk nhūm mē haxār kēnā. Nā na ka ãm mē inhmā amnhĩ to axēx. Te amnepēm mē hkukamā apa nē ate mē omunh nē mē harēnh pyrāk. Kwa akatāt kôt mē inhmā awjarē. Anē.

Jejus kēp rāhā ho rāhā xwÿnh ã harēnh

⁵⁸ Hāmri nhūm Jejus mē kām:

—Nà ixêx kêt. Ām hāmri na pa ā mẽ amā amnhĩ jarēnh anē. Amnepēm kormā Apraāw kator kêt ri na pa pre ixrāhā ho ixrāhā ixpa na pa. Ixrāhā ho ixrāhā ixpa xwýnh jakamā na pa pre hte inhno ho Apraāw pumunh mex o ri ixpa. Kwa mẽ ixkapēr ma nē amnhĩ krā him haxàr tỳx nē. Anē.

⁵⁹ Hāmri nhũm mẽ tee ri kot ā amnhĩ jarēnh anhỳrja ā kuma nē kamā gryk tỳx nē. Nē axpēn mā:

—Kwa tanhmā kot we amnhĩ to nē amnepēm rāhā nē pa ho pa xwýnh ā amnhĩ jarē? Tirtũm pix na rāhā ho rāhā pa xwýnh. Anē.

Hāmri nē kamā gryk xàj kēn rũnh kwý kawrà ho ri hprôt nē kot ho htak o hpir kaxyw. Nom nhũm ra amnhĩ tã mẽ omu nē mẽ kēp akunok nē Tirtũm mā amnhĩ jarēnh xà hā ixkreja rũm kato nē ma tē.

9

Jejus kot no hkre xwýnh o mex ā harēnh Makre 8.22-26

¹ Hāmri nhũm Jejus ma tē pa mẽ hkôt ri mẽ ixpa ho mẽ ixpa xwýnhjaja ma hkôt mra. Hāmri nē nhỹri no hkre xwýnh pumu. Katorxà nhōxà hkre rũm na pre no hkre nē kato. Hāmri nē ra hprék nē hpri kamā àhwýr o hkrĩ. ² Tã hāmri pa mẽ mra nē omu nē hā Jejus kukja nē kām:

—Kwa mẽmoj mýrapē na pre we myti nēj no hkre nē kato? Xà tãm kot tanhmā amnhĩ tomnuj to mýrapē nà? Xà katorxà rý hipéèxà kot amnhĩ tomnuj mýrapē na pre ā no hkre nē kator anē? Anē.

³ Hāmri nhũm mẽ inhmā:

—Nà mẽhō kot tanhmā amnhĩ tomnuj to mýrapē no hkre nē kator kêt. Ām Tirtũm kot ho mex nhũm mẽ kot ja hā omunh kaxyw na pre ā no hkre kator anē. Tã kot paj Tirtũm nhỹ hā no ho mex ka mẽ ja hā ixpumu. Na pa hte kormā jar pikap ri ixpa ri Tirtũm mā tanhmā amnhĩ nhĩpêx mex to ho ri ixpa.

⁴ Na htem arĩgro hā mẽmoj tã apē nhũm kamàt nhũm mẽ kām ure nē àpēnh kêt nē. Ja pyrà nē na pu htem kormā pahťur ri jar pikap ri papa ri Tirtũm mā tanhmā amnhĩ nhĩpêx to ho ri papa. Tã kot puj mẽ nhỹrmā ty hāmri nē axte jar ā amnhĩ nhĩpêx anhỳr kêt nē. Jakamā kwa kēr pu mẽ ri jar pikap ri papa ri kām tanhmā amnhĩ nhĩpêx mex to ho ri papa. ⁵ Na pa hte ā kām amnhĩ nhĩpêx anhỳr jao te kanê hirā mex pyrà nē ixpri hā mẽ kām Tirtũm kot amnhĩ nhĩpêx o amnhĩrit mex o ri ixpa. Anē.

⁶ Nhũm pre ā Jejus mẽ inhmā amnhĩ jarēnh anē. Hāmri nē kot nohkre xwýnhnta no o mex kaxyw hikôt nē argōx mẽ nē ho gyw kwý nhĩpêx nē kànhmā xa nē ho no kukō. ⁷ Hāmri nē kām:

—E ma gō gjēnh xà pē Siroe hwýr tē nē kamā amnhĩ no kuhō. Anē.

Mē pakapēr kām Siroeja mẽ kot kām: “Nhỹhým mẽnh xwýnh” anhỳr jarēnh pyrāk. Tã nhũm Jejus hwýr kumē nhũm ma hwýr tē. Hāmri nē kamā amnhĩ no hā gyw kuhōnh pa jao rĩt mex kurē kumrēx. Hāmri nē rĩt mex ā amnhĩ pumu nē hkĩnh tỳx nē ma akupým òrkwý hwýr tē. ⁸ Hāmri nhũm òrkwý kuri mẽ òrkwý xwýnhjaja nē mẽ kot pry kamā ahwýr o hkrĩ hā omunh xwýnhjaja amnhĩ jaēr pē ra rĩt mex ā omu nē tee ri hā axpēn kukja nē axpēn mā:

—Kwa pēr pry kamā àhwýr o hkrĩ xwýnhnta na nà? Anē.

⁹ Hāmri nhũm kamā mẽ hkwyjaja mẽ kām:

—Tỳ. Tãm na. Anē.

Nhũm kamā mẽ hkwyjaja mẽ kām:

—Nà tãm kêt. Axtem mẽhō na. Te kot urāk nom tãm kêt. Anē.

Anhÿr o ri axpĕn mā harĕ. Tā nhŭm tām mĕ kām amnhĭ jarĕ nĕ mĕ kām:

—Tÿ pa kĕnā. Pa na pa pre hte inhno hkre nĕ ri ixpa htā ra ixrĭt mex. Anĕ.

¹⁰ Hāmri nhŭm mĕ tee ri kuma nĕ kām:

—Kwa no tanhmā na ka we amnhĭ to nĕ ra arĭt mex?

¹¹ Anĕ nhŭm mĕ kām:

—Nā mĕ kot kām “Jejus” anhÿr xwÿnhnta na ixwÿr tĕ nĕ ixkaxyw gyw kwÿ kagō nĕ ho inhno kukō. Hāmri nĕ mĕ kot gō mā: “Siroe” anhÿr xwÿnhnta kamā ixte amnhĭ no kuhōnh kaxyw hwÿr inhmā anĕ pa ma hwÿr tĕ nĕ kamā amnhĭ no kuhō nĕ ixrĭt mex kurĕ kumrĕx. Anĕ.

¹² Hāmri nhŭm mĕ kuma nĕ kām:

—No nhÿhÿm na ato mex xwÿnhja ma tĕ? Anĕ.

Hāmri nhŭm mĕ kām:

—Konĕn. Ixte nhÿhÿm htĕm xā hkōt omunhre hā. Anĕ.

¹³ Hāmri nhŭm mĕ kuma nĕ ma Parijew nhō xwÿnhjĕ hwÿr o mō nĕ mĕ kām harĕ. ¹⁴ Nĕ mĕ kām:

—E ot pa mĕ awÿr jahti ho tĕ. Na xep Jejusja jarāhā akupÿm kām no ho mex. Mĕ panhō arĭgromnu htā nhŭm hā no ho mex. Anĕ.

¹⁵ Hāmri nhŭm mĕ tee ri mĕ kuma nĕ myta pumu nĕ kām:

—E mĕ inhmā amnhĭ jarĕ. Tanhmā na ka pre we amnhĭ to nĕ anohkre nĕ akrĭ htā ra ano mex nĕ? Anĕ.

Hāmri nhŭm mĕ kām:

—Nā na pre Jejus gyw o inhno kukō nĕ inhmā anĕ pa gō ho amnhĭ no kuhō nĕ ixrĭt kurĕ kumrĕx. Anĕ.

¹⁶ Hāmri nhŭm mĕ kuma nĕ tee ri Jejus ā axpĕn kukjĕr o kuhĕ nĕ axpĕn mā harĕnh o:

—Kwa mĕ panhō arĭgromnu hā kot ho mex jakamā kĕp Tĭrtŭm rŭm mĕ pahwÿr wrÿk xwÿnh kĕt. Ām kot amnhĭ tomnuj xwÿnh kĕnā. Anĕ.

Nhŭm mĕ hkwyjaja harĕnh o:

—Kwa nā. Kot amnhĭ tomnuj xwÿnh ronhÿx àhpumunh tÿx kōt no ho mex kĕt nĕ. Anĕ.

¹⁷ Hāmri nĕ hpānhā no mex xwÿnhnta mā kām:

—No ka? Ate kot ano ho mex xwÿnh ā amnhĭ tā harĕnh jakamā mĕhō hā na ka hkamnhĭx? Mĕhō na wehe? Anĕ.

Hāmri nhŭm mĕ kām:

—Konĕn. Mān kĕp Tĭrtŭm kapĕr jarĕnh o ri mĕ pa xwÿnh mān. Hā na ā inhno ho mex anĕ. Anĕ.

¹⁸ Hāmri nhŭm mĕ tee ri kuma nĕ axpĕn mā:

—Kwa pĕr aa nohkre hkĕt kĕnā. Na pre ām amnhĭ to hĕx o pa. E kwa pu mĕ amnhĭ wÿr katorxā nĕ hipĕĕxā wa hā karō kĕ wa man tĕ nĕ tanhmā mĕ pamā harĕnh to. Anĕ.

Hāmri nĕ wa hā karō ¹⁹ nhŭm wa mĕ hwÿr tĕn axā nhŭm mĕ wa kām:

—Pa. E mĕ inhmā mĕmoj jarĕ. Xā we wa akrata na ām ja nā? Xā tām na ka hte wa nohkre nĕ kator ā harĕ? Kwa tanhmā na we amnhĭ to nĕ ra rĭt mex? Anĕ.

²⁰ Hāmri nhŭm wa mĕ kām:

—ÿw wa ixkra kĕnā. Na pre wa ixpĕ nohkre nĕ kato. ²¹ Tā ra tanhmā amnhĭ to nĕ ra rĭt mex. No wa ixte kot ho mex xwÿnhnta pumunh kĕt. Kwa mĕ tām mān hkukja nĕ ama. Ra àptār kĕnā. Kĕ tām mān mĕ amā tanhmā amnhĭ jarĕnh to ka mĕ ama.

²² Anhÿr o mẽ kãm wa hkrata jarẽ. No ãm wa kãm mẽ uma nẽ ã mẽ kãm kapẽr anẽ nẽ mẽ kãm Jejus nhĩxi jarẽnh kêt nẽ. Na pre Parijew nhõ xwÿnhjaja ra Jejus nẽ mẽ kãm kapẽr nẽ mẽ kãm:

—Ka mẽ atõ Tirtũm kot mẽ pakaxyw Jejus xãm ã harẽ hãmri nẽ axte Tirtũm kapẽr o mẽ ahkre xà hã ixkreja wÿr agjêx kêt kumrêx nẽ rĩ amnhĩ pumu.

²³ Anhÿr o nẽ mẽ hkurê jakamã nhũm wa mẽ umaj ã mẽ kãm hkra jarẽnh anẽ nẽ kot ho mex xwÿnh nhĩxi jarẽnh kêt nẽ. ²⁴ Hãmri nhũm mẽ axte amnhĩ wÿr no mex xwÿnhnta ã karõ nẽ kãm:

—Kwa akatåt kõt mẽ inhmã amnhĩ jarẽ. Ate kot ano ho mex ã harẽnh xwÿnhnta na kot amnhĩ tomnuj pix o pa xwÿnh kênã kot kêt ano ho mex. Jakamã kwa Tirtũm noo mã akatåt kõt mẽ inhmã amnhĩ jarẽ nẽ axêx kêt nẽ. Anẽ.

²⁵ Hãmri nhũm mẽ kãm:

—Ko ixte ja hã omunh kêt. ãm ja pix na ixte omunh. Na pa pre inhno hkre nẽ ri ixpa htã ra ixrĩt mex nẽ. Anẽ.

²⁶ Hãmri nhũm mẽ tee ri kot amnhĩ jarẽnhja ã kuma nẽ kãm:

—No tanhmã na we mytita amnhĩ to nẽ amã ano ho mex? Anẽ.

²⁷ Hãmri nhũm tee ri axte mẽ kot hã hkukjêr ã mẽ kuma nẽ mẽ kãm:

—Kwa ra ixte mẽ amã ãm hãmri amnhĩ jarẽnh griã. Tã ka mẽ inhna nẽ ãm inhna nẽ arĩ hã ixkukja. Mãn ka mẽ amã hkõt amnhĩ xunhwÿr prãm hã na ka mẽ aprĩ hã ixkukja nà? Mẽ ate kot amnhĩ nhĩpêx ã aprĩ hã harẽnh mar nẽ hkõt amnhĩ xunhwÿr prãm xaj na ka mẽ aprĩ hã amã harẽnh prãm nẽ. Anẽ.

²⁸ Hãmri nhũm mẽ tee ri kuma nẽ kamã gryk nẽ. Nẽ hã kãm akir nẽ kãm:

—Tk. Ka na ka hte kapẽr kõt amnhĩ nhĩpêx. No kêt mẽ pajaja na pa htem finat Mojes kapẽr kõt pix mã amnhĩ nhĩpêx. ²⁹ Mojes mã na pre hte Tirtũm kapẽr o pa. Jakamã pa htem ãm hkõt pix mã amnhĩ nhĩpêx o ri ixpa. No ate kot ano ho mex ã harẽnh xwÿnhnta mẽ ixte omunh kêt. Nẽ mẽhõ nhÿ hã kot tanhmã amnhĩ nhĩpêx to ho pa xwÿnhja mẽ ixte omunh kêt. Anẽ.

³⁰ Hãmri nhũm tee ri mẽ kuma nẽ mẽ kãm:

—Kwa kot inhmã inhno ho mex nhũm ra ixrĩt mex tã ka mẽ tee ri hkukamã ajamaxpêr nẽ mẽhõ nhÿ hã kot ã amnhĩ nhĩpêx anhÿr o pa hã omunh kêt ã amnhĩ jarẽ. ³¹ Mẽ pahte Tirtũm kot amnhĩ nhĩpêx ã omunh mex. Kojã mẽhõ kot amnhĩ tomnuj xwÿnh mẽmoj tã kuwÿ nhũm kuma nẽ ãm kuma. No kêt mẽ kot hkõt ri amnhĩ nhĩpêx xwÿnhjaja. Nẽ mẽ kot kãm mex o mex ã harẽnh xwÿnhjaja na htem mẽmoj tã kuwÿ nhũm mẽ kuma nẽ mẽ kãm tanhmã mẽmoj nhĩpêx to rÿ mẽ kãm mẽmoj gõ. ³² Tã aa mẽ pahte mẽhõ kot mẽ no ho mex ã harẽnh mar kêt tã nhũm ã Jejus inhmã inhno ho mex anẽ. ³³ Kêp Tirtũm kwÿ hkêt ronhÿx pre inhno ho mex kêt nẽ. Anẽ.

³⁴ Hãmri nhũm mẽ kuma hãmri nẽ kãm:

—Tk. Kwa pẽr ãm akator kõt ate amnhĩ tomnuj o ri apa htã na ka ã mẽ inhmã akapẽr anẽ. Kwa ixkreja rũm akato nẽ ma atẽm kurê kumrêx.

Anhÿr o kãm kapẽr hãmri nẽ mẽ amnhĩ nẽ hano nhũm kato nẽ ma tẽ.

³⁵ Tã nhũm Jejus ra mẽ kot amnhĩ nẽ hanor ã harẽnh ma nẽ ma hapêr o tẽ nẽ nhÿri omu. Hãmri nẽ amnhĩ tã hkukja nom te nhãm mẽhõ hã hkukjêr pyrà nẽ kãm:

—Pa? Xãn ka ra Tirtũm kot mẽ awÿr mẽnh xwÿnhnta amnhĩ kaxyw hkõt ajamaxpêr nà? Anẽ.

³⁶ Hãmri nhũm kormã kot no ho omunh kêt jakamã kêp Jejus ã omunh kêt nẽ. Na pre kormã no hkre nẽ ãm kapẽr pix ma. Tã ra akupÿm rĩt mex nom

kormā no ho omunh kêt nê. Jakamā nhūm Jejus hwÿr tē nê ã kām kapēr anê nhūm omu nê kormā kēp Jejus ã omunh kêt nê kām:

—Tÿ kot kaj inhmā ahkre pa omu nê hkôt amnhī xām kurê kumrêx. Anê.

³⁷ Hāmri nhūm kām:

—Kwa paa. Ixte amā ixkapēr xwÿnhhta pa na pa. Anê.

³⁸ Hāmri nhūm kām:

—Kwa xôwehe Pahihti? Nà kot paj amnhī kaxyw akôt pix mā ijamaxpēr nê akôt pix mā amnhī nhīpêx o ri ixpa. Anê.

Hāmri nê kutā hkôn krā ho tēm nê nhÿ nê kām mex o mex ã harēnh o nhÿ.

³⁹ Hāmri nhūm Jejus kām:

—Nà ixte mē apiitā tanhmā mē ajarēnh to kaxyw na pa pre kaxkwa rūm man mē awÿr wry. Ahpÿnhā mē amā ixprām xwÿnhjê jarēnh nê ahpÿnhā mē kām ixprām kêt xwÿnhjê jarēnh kaxyw. Mē kām ixprām kêt xwÿnhjaja kot hprī hā Tirtūm kapēr mar mex kêt tā na htem htÿx ri kot mar mex ã amnhī jarēnh o pa. Jakamā te mē nohkre xwÿnhjaja kot amnhī nhīpêx pyrāk. Nom koja mē Tirtūm kapēr ma nê ixkôt amnhī xunhwÿr japêr. Hāmri nê te ra rīt mex pyrāk o amnhī nhīpêx. Jao ra hprī hā Tirtūm kapēr mar mex o pa. Anê.

⁴⁰ Nhūm pre ã Jejus kām kapēr anê. Nhūm Parijew nhō xwÿnh kwÿjaja kot kuri mar o kuhê xwÿnhjaja ã kapēr anhÿr ã kuma nê amnhī tā kām:

—Kwa nà. Xà we mē pajaja na ka ã mē inhnokre hā mē ijarēnh anê? Xà mē ixte ixprī hā Tirtūm kapēr mar mex kêt ã na ka mē ijarē nà? Anê.

⁴¹ Hāmri nhūm mē kām:

—ÿÿ kop apu mē ate aprī hā kapēr mar mex kêt ã amnhī jarēnh ronhÿx ja mē amā mex nê. Tā mē ate aprī hā mar mex ã amnhī to axêx o apa jakamā na ka mē ra amnhī tomnuj tÿx nê. Na hte Tirtūm ja hā mē apumu nê amnhīm mē ate amnhī tomnuj xwÿnh ã mē ajarē. Anê.

10

ôwêhti jarēnh

Matêwre 9.36, 12.11-12; Rukre 15.3-7

¹ Nhūm Jejus arī Ijaew mā kapēr nê mē kām:

—E pa mē amā awjarē ka mē inhma nê amnhī krā him haxàr tÿx nê ho apa. Mē hkrit ôwêhti kot paj mē amā harē ka mē inhma. Na hte ôwêhti jamār o pa xwÿnhjaja ôwêhti apkur kaxyw mē o pa hāmri nhūm kamāt nhūm akupÿm kahê hwÿr mē o pa. Kahê jakwakreja ãm pixii. Tā koja mēhō kahê xà hkôt hwÿr ãr kêt nê axtem nê tē nê nhÿhÿnh kahê hā api nê ôwêhti hwÿr ãr japêr nhūm mē omu nê kot hkwy ho àhkînh ã omunh kurê kumrêx.

²—No ôwêhti jamār o pa xwÿnhja na hte mē kurom katāt kôt kahê jakwakre rūm ôwêhti hwÿr agjê. ³ Nhūm kahê xà jamār xwÿnhja amnhī wÿr omu nê kām kahê xà rēnh kurê kumrêx nhūm axà. Na hte apkati mē ma nhÿhÿm apkur kaxyw mē o pa. Nê nojarêt nê mē kām akir. Ahpÿnhā tanhmā mē hixi kute hā mē omunh xà hkôt mē kām àkjêr o pa. Hāmri nhūm mē kuma nê hwÿr mra nê hā pikuprōnh pa nhūm mē ho hapój nê ma nhÿhÿm ri mē apkur kaxyw mē o pa. ⁴ Ma mē apkur kaxyw nhÿhÿm mē o pa. Nhūm ôwêhti ra kot kapēr mar mex jakamā ma ãmnhÿx ri hkôt apkur o pa.

⁵—Na hte hamār o pa xwÿnh pix kapēr ma nê hkôt pa nê nhām mēhō hkôt ri pa hkêt nê. Kot kapēr mar kêt jakamā tee ri kuma nê umaj axkakhūm nê hprôt nê ma mra. Na hte ôwêhti ã amnhī nhīpêx anê. Anê.

Jejus te kēp ôwêhti gjēnh xà hā hakwakre pyrāk

⁶ Nhũm pre ã Jejus mẽ kãm ujarẽnh anẽ. Nẽ ujarẽnhja kamã amnhĩ kwỳjẽ jarẽ nõ mããnẽn tãm amnhĩ jarẽ. Nom mẽ amnhĩ tã kuxi nõ mẽ kãm amnhĩ jarẽnh o te ho ôwêhti jarẽnh pyrãk nhũm mẽ tee ri kuma nõ mar mex kêt nõ.

⁷ Jakamã nhũm axte mẽ kãm awjarẽ nõ mẽ kãm:

—E pa ixprĩ hã mẽ amã ixujarẽnhta jarẽ ka mẽ inhma. Te ixpê ôwêhti jagjẽnh xã hã hakwakre pyrãk. Kwa mẽ ja ma nõ amnhĩ krã him haxàr tỳx nõ. ⁸ Na pre ra ixkukamã mẽ ohtõ nõ te ãm hãmri mẽ amã Tirtũm kapẽr jarẽnh pyrãk o mẽ akõt ri pa. Nom mẽ amã hêx o pa. Te mẽ kot ôwêhti o àhkĩnh xwỳnhnta kot amnhĩ nhĩpêx pyrãk. Nom na hte ôwêhtija ãm hamãr xwỳnh pix kapẽr ma nõ nhãm mẽhõ kapẽr mar kêt nõ. Ja pyrã nõ mẽ kot ixkõt amnhĩ xunhwỳr xwỳnhjaja na htem Tirtũm kapẽr o hêx o mẽ pa xwỳnhjẽ ma nõ ãm mẽ kuma nõ mẽ hkõt amnhĩ nhĩpêx kêt nõ. Na htem ãm ixkapẽr pix ma nõ ixkõt pix mã amnhĩ nhĩpêx o pa.

⁹⁻¹⁰ —Te ixpê ôwêhti gjẽnh xã hã hakwakre pyrãk. Na hte ôwêhti mẽmoj punuj pymaj kahẽ hwỳr agjẽ nõ kamã mex nõ kuhẽ. Nẽ kurũm hapõj nõ ma apkur o pa. Ja pyrã nõ mẽ kot ixkõt amnhĩ xunhwỳr xwỳnhjaja koja mẽ ixkukwak ri hkĩnh nõ mex nõ hamakêtkati nõ pa ho pa. Nẽ nhỹrmã Tirtũm mẽ wa ixri hũr tũm nõ pa ho pa. Ja kaxyw na pa pre man mẽ awỳr pika hwỳr wrỳ.

—No ôwêhti ho àhkĩnh xwỳnhjaja na htem amnhĩm ho ahkĩ nõ kupa nõ ma amnhĩm o pa. Tã mẽ kot Tirtũm kapẽr o hêx o mẽ pa xwỳnhjaja te mẽ kot jajaja kot amnhĩ nhĩpêx pyrãk. Anẽ.

*Jejus te kêp ôwêhti jamãr xwỳnh pyrãk
Eprẽw 13.20; Apokarip 7.17*

¹¹ —Nẽ ôwêhti jamãr mex xwỳnhja koja nhỹri mẽhõ kêp ôwêhti hõxpĩr kaxyw hwỳr htẽm ã omu nõ wa hã axpu. Nhũm ho àhkĩnh mã xwỳnhnta ôwêhti jamãr xwỳnh pĩ nhũm ôwêhti nõ ty. Tã ixkwỳjaja hamakêtkati nõ mex nõ pa kaxyw na pa pre amnhĩ grõnh kõt mẽ hwỳr wrỳ. Jakamã kot paj te ôwêhti jamãr xwỳnh kot amnhĩ nhĩpêx pyrãk o amnhĩ nhĩpêx.

¹²⁻¹³ —Nẽ na htem tõhã ôwêhti jamãr xwỳnh nhỹhỹm pa kaxyw nõ mẽhõ mã amnhĩre nhũm wakre kamã kãm hkrit jamãr o pa. Kãxpore pix prãm xàj kãm hamãr o pa. Jakamã koja nhỹhỹnh mry xoprẽ ra hwỳr kato nhũm amnhĩ wỳr omu nõ umaj ôwêhti re nõ ma hprõt nõ tẽ. Kãm ôwêhti japẽ hkêt ãm kãm hũr pix prãm xàj ôwêhti mã hamaxpẽr kêt nõ rer pa nõ ma tẽ. Nhũm mry xoprẽta ôwêhti hwỳr hprõt nõ hkwỳ pynẽ nhũm hkwỳ umaj axkakhũm nõ hprõt nõ ma mra. No kêt pa na te ixte ôwêhti mã hamaxpẽr kêt nõ kot rer nõ ma hprõt nõ htẽm xwỳnhnta pyrãk kêt. Kot paj aa ixkwỳjẽ rer kêt nõ. Kot paj mẽ hkõt ixpa ho ixpa rãhã nõ.

¹⁴⁻¹⁵ —Te ixte ôwêhti jamãr xwỳnh mex pyrãk jakamã na pa hte urãk nõ ahpỳnhã mẽ kot ixkõt amnhĩ xunhwỳr xwỳnhjẽ pumunh mex o ri mẽ hkõt ixpa. Te mẽ kêp ixkrit ôwêhti pyrãk nhũm te ixpê mẽ hamãr mex o ri mẽ hkõt ixpa nõ aa mẽ rer kêt xwỳnhnta pyrãk.

—Nẽ mẽ kot ixkõt amnhĩ xunhwỳr xwỳnhjaja ra mẽ ixte amnhĩ nhĩpêx kõt axpẽn pumunh mex. Nẽ mẽ inh mã axpẽn japêẽ. Te Inhĩpêẽxã mẽ wa inhmã axpẽn japẽ pyrãk. Tã kot paj nhỹrmã mẽ nõ tanhmã amnhĩ nhĩpêx to.

¹⁶ —Mẽ kot ixkõt amnhĩ xunhwỳr xwỳnhjaja piitã kêp Ijaew pix kêt. Koja Ijaew kêt xwỳnh kwỳjaja mããnẽn ixkapẽr ma nõ ixkõt amnhĩ xunhwỳ nõ ixkõt

amnhĩ nhĩpêx. Jao ra te kêp ixkrit ôwêhti pyrâk. Tã kot paj mẽ ho ixpimràa tã mẽ ho tipxi nê mẽ hamâr o ri mẽ hkôt ixpa.

17 —Nê mẽ kot ixkôt amnhĩ nhĩpêx o mẽ pa xwýnhjaja mẽ mex kaxyw na pa pre amnhĩ grônh kôt mẽ hwýr wrý. Jakamã kot paj nhýrmã mẽ nê ty. Tã inhmã mẽ nê ixyk puma hkêt jakamã na Inhĩpêêxã kãm ijapêê. Koja akupým ixto ixtír. 18 Kóp apu inhmã mẽ nê ixyk prãm kêt ronhýx mẽ kãm ixkre xwýnhjaja tee ri kãm ixpír prãm kaprý. Nom ixte mẽ kot ixkôt amnhĩ nhĩpêx xwýnhjê nê amnhĩ grônh kôt mẽ hwýr ixwrýk kênã. Jakamã kot paj arĩ mẽ kãm amnhĩ grônh kôt amnhĩ gô nê arĩ mẽ kãm xa nhũm mẽ ixpĩ. Nom kot paj akupým ixtír. Mêhõ koja tanhmã ixto nê ixpír o ixpĩ? Nã koja mêhõ ixpír o ixpír kêt nê. Inhĩpêêxã nhý hã kot paj nhýrmã ã amnhĩ nhĩpêx anê nê akupým ixtír. Anê.

Nhũm pre ã Jejus mẽ kãm amnhĩ jarênh anê. 19 Hãmri nhũm Ijaew tee ri ã kot amnhĩ jarênh anhýr ã kuma nê kê axte axpên kwým ri tanhmã harênh to ho kuhê. 20 Nê kamã mẽ hkwyjaja harênh o:

—Tk. Kwa mẽ mar kêt nê. Satanasti nhý hã na hte htýx ri ã mẽ pamã amnhĩ jarênh anhýr o pa. Anê.

21 Hãmri nhũm mẽ hkwyjaja mẽ kuma nê mẽ kãm:

—Nã kot anhýr kêt. Xà na htem Satanasti nhý hã ã kapêr mex anê nê ã mẽ no hkre xwýnhjê ho mex anê? Nã kot anhýr kêt. Satanastija ukaprĩre hã. Anê.

Ijaew nhõ pahijaja kot Jejus kaga hã mẽ harênh

Juaw 5.18, 8.59

22 Tã nhũm ra amgrã hapêx pa mẽ ixpê Ijaew akupým krĩ pê Jerujarê kamã axpên wýr akuprô. Axte mẽ ixte mẽ ixkĩnh kaxyw axpên wýr akuprô. Amnepêm mẽ inhĩgêtjaja kot akupým Tirtũm mã amnhĩ jarênh xã hã ixkre ho mex pa nê ho Tirtũm wýr mã hamaxpêr nê hã ixkĩnh ã arĩgroja ã pa mẽ hwýr akuprô. 23 Hãmri nhũm Jejus ma mẽ ixkôt Tirtũm mã amnhĩ jarênh xã hã ixkreta wýr tẽ no ãm hwýr ãr kêt nê. ãm ixkre hpu hã kahê xã kape hã ri pa. Mẽ kot kãm: “Pahi finat Sarumãw pa xã” anhýr xwýnhnta kamã ri pa. 24 Hãmri nhũm kê ra mẽ inhõ pahijaja omu nê hã akuprô nê hêx rom kãm kapêr nê kãm:

—Kwa tokyx aprĩ hã mẽ inhmã amnhĩ jarê. Xà apê Tirtũm Kra na ka nà? Xã ka na pre Tirtũm mẽ ixkaxyw axãm? Kwa aprĩ hã mẽ inhmã amnhĩ jarê pa mẽ ama. Mon ka hte aprĩ hã mẽ inhmã amnhĩ jarênh kêt nê? Na pa mẽ tee ri ate amnhĩ nhĩpêx ã apumu nê akukamã ijamaxpêr rũnh kumrêx o ri ixpa. Xã ãm hãmri apê Tirtũm kot mẽ ixkaxyw axãm xwýnhnta na ka? Anê.

25 Hãmri nhũm mẽ kãm:

—Tk. Ra ixte mẽ amã amnhĩ jarênh xohtô htã ka mẽ inhma nê ãm inhma. Na pa hte xatã Inhĩpêêxã nhý hã mẽ amã mẽ ate aa mẽmoj pumunh kêt kwý ho anhýr o ri ixpa ka mẽ ja hã ixpumu nê ãm ixpumu nê ixkôt ajamaxpêr kêt nê. 26 Mẽ apê ixkwý hkêt jakamã na ka mẽ ixkôt ajamaxpêr kêt nê. Te mẽ apê ixkrit ôwêhti pyrâk kêt. 27 Ixkwýjaja na te ho ôwêhti kot hamâr xwýnh kapêr mar nê hkôt ri pata pyrã nê ixkapêr ma nê ixkôt amnhĩ nhĩpêx o pa. Ixpê mẽ õ pahĩhti hã mẽ kot ixpumunh mex jakamã na htem ixkôt amnhĩ nhĩpêx mex o pa. Ixte ja hã mẽ omunh mex nê. 28 Kojã mẽ nhýrmã htyk tã no ãm ixkukwak ri akupým htír hãmri nê Tirtũm mẽ wa ixri htír tũm nê pa ho pa nê ãa hapêk kêt nhũm mêhõ ixpê mẽ utàr kêt nê. Te inhĩhkra hpo nhĩpók ri mẽ hkrĩ nhũm te mẽ hã inhĩhkra pikamýr pyrâk nhũm mẽmoj tee ri ixpê tanhmã mẽ ho hprãm kaprý. 29-30 Inhĩpêêxã tãm kot inhmã mẽ õr kênã. Hĩhtýx o kot mẽ piitã mẽ

hakrenh par jakamā koja mē inhīhkra po nhīpōk ri hkrī nē mǎānēn Inhīpēêxā nhīhkra hpo nhīpōk ri hkrī. Te ixpē Inhīpēêxā Tīrtūm pyrāk jakamā mēhō kot wa ixpē wa inhīhkra rūm mē utā? Nā amrakati kumrēx.

Anh̄ȳr o mē kām amnhī jarē. ³¹ Hāmri nhūm mē te kēp Tīrtūm pyrāk ā amnhī jarēnh ā kuma nē kamā gryk t̄yx nē. Hāmri nē kot kēn o htak kaxyw ra kaxyw hkwy kawrā ho ri hprōt. ³² Hāmri nhūm amnhī tā mē omu nē mē kām:

—Kwa ra ixte Inhīpēêxā nh̄ȳ hā mē amā aa mē ate mēmoj pumunh kēt kw̄y ho anh̄ȳr rax o ixpa. Jao tanhmā mē ho mex to pix o ri ixpa. Tā ka mē axtem nē ā inhīpēx anh̄ȳr kaxyw. Anē.

³³ Hāmri nhūm mē kām:

—Nā ā ate amnhī nhīpēx anh̄ȳr ja m̄yrapē hkēt. Kēt apē mē inhīō htā ri axtem nē te apē Tīrtūm pyrāk ā amnhī jarēnhja m̄yrapē na pa mē kēn o atak kaxyw. Na pu htem ā amnhī jarēnh anh̄ȳr o papa hkēt nē. Anē

³⁴ Hāmri nhūm mē kām:

—No ām hāmri ixte ā amnhī jarēnh anh̄ȳr kēnā. Tanhmā na Tīrtūm kapēr ā kagā htūm kot ja jarēnh to wehe? Na pre Tīrtūm Ijaew nhō pahijē mā kapēr nē mē kām:

E mē ate inh̄ȳ hā mē ho amnhīptār jakamā te mē apē pa ixpē Tīrtūm pyrāk. Anh̄ȳr o kot mē harēnh. ³⁵ Ām hāmri na Tīrtūm kapērja. Tām kot ā mē harēnh kot anh̄ȳr. Mē kot ȳ hā mē kām kapēr jakamā te mē kēp urāk ā mē harēnh anh̄ȳr kēnā. ³⁶ Tā tām kot ā mē harēnh anh̄ȳr tā hpānhā mē akaxyw pa ixpē Kra hā ixām nē mē aw̄ȳr inhmēnh nhūm ixwryk nē ixpē Kra hā amnhī jarēnh tā ka mē ja hā inhma nē ām inhma nē ixkōt ajamaxpēr kēt nē. Kwa mon ka mē ja hā ixpumunh nē ixkōt ajamaxpēr kēt nē? ³⁷ Kot paj Inhīpēêxā mē wa ixāhpumunh kōt mē amā aa mē ate mēmoj pumunh kēt kw̄y ho anh̄ȳr kēt ka mē ja hā ixpumu nē mē rī kam nē māmri ixkōt ajamaxpēr kēt nē. ³⁸ Mē amā ixkapēr mar prām kēt tā kwa ixte Tīrtūm pyrā nē aa mē ate mēmoj pumunh kēt kw̄y ho anh̄ȳr ā ixpumu nē Inhīpēêxā mē wa ixte amnhī nhīpēx tipxi hkōt ajamaxpēr. Anē.

³⁹ Hāmri nhūm mē kuma nhūm ja mē kēp omnuj t̄yx nē. Te kot Tīrtūm pyrāk ā amnhī jarēnhja nhūm mē kēp omnuj nē. Jakamā nhūm mē ra kot unēnh nē ixkre rūm ho kator nē kapōt ā mēnh nē kēn ho htak kaxyw nhūm kē axte mē kēp akunok nē ma nh̄ȳh̄m tē.

Jejus kot Jotāw nhīhkjē hā ri pa hā harēnh

⁴⁰ Tā nhūm Jejus ma tē nē pyhti pē Jotāw ā rē. Pa mē hkōt ri ixpa ho ixpa xw̄ȳnhjaja ma hkōt mō. Finat Juāw Paxis kot Tīrtūm mā wam mē hkrā kumrār o pa xāta w̄ȳr. ⁴¹ Hāmri nhūm mē ohtō nē mē ixw̄ȳr mra nē Jejus kapēr ma nē kot tanhmā amnhī nhīpēx to hā omunh o kuhē. Hāmri nē hā tanhmā axpēn mā kapēr to nē axpēn mā:

—Kwa ām hāmri na pre finat Juāw Paxisja mē pamā Jejus jarēnh o pa. Aa kot mē pamā mē pahte mēmoj pumunh kēt kw̄y ho anh̄ȳr kēt tā ām xatā hukamā mē pamā harēnh o pa. Kēp Tīrtūm Kra hā Juāw rom hiht̄yx o hiht̄yx ā harēnh o pa. Nē Tīrtūm kot mē pakaxyw ām xw̄ȳnh ā nhūm mē pamā harēnh o pa. Nā ām hāmri na pre ā mē pamā harēnh anē. Anē.

⁴² Hāmri nhūm mē ohtō nē amnhī kaxyw Jejus kōt hamaxpēr nē hkōt amnhī xunhw̄ȳ.

11

Rajare htyk jarēnh
Juāw 5.21-29, 6.40

¹ Rôm nhūm krī pē Petān kamā mēhō my pē Rajareja ra à htýx nē nō. Na pre htōx wa hamēxkrut. Hō kēp Matre nhūm hō kēp Marir. ² Marir na pre kormā arīgro hō hā kot Jejus o mex kaxyw mē hkuxwaxà ho hkuxwa nē amnhī kī ho hpar pōnh kaxyw. Nom kormā. Jakamā nhūm wa hkamyja wa kēp à htýx nē nō. ³ Hāmri nhūm wa tee ri hkukamā hamaxpēr nē ma krī hō hwýr Jejus wýr mēhō mē nhūm ma hwýr tē. Nē hwýr pōj nē omu nē kām:

—Pa Pahihti. E ot pa awýr tē. Na ra amā akràmnhwý japē htýx xwýnhta à htýx nē nō nhūm htōx wa tee ri hkukamā hamaxpēr nē awýr inhmē pa tē. Kwa tokyx pu ma hwýr tē ka akupým wa kām ho mex nà? Anē.

⁴ Hāmri nhūm kuma nē kām:

—Nà à htýx nē nōr tā koja akupým mex. Mē kot akupým mex ā harēnh mar hāmri nē Tirtūm mē wa ixtā hpijaam nē wa ixihýtýx o wa ixihýtýx ā wa ixpumunh kaxyw na ā à htýx nē nōr anē. Nē pa ixpē Tirtūm Kra hā akupým ho mex ā ixpumunh nē ixkót hamaxpēr kaxyw na ā à htýx nē nōr anē. Anē.

⁵ Na pre Jejus kām Rajare mē htōx wa mē hapē nē. ⁶ Tā à htýx ā harēnh ma nē hwýr mōr tokyx anhýr kēt nē. Pa mē arī amnhīm hikranh xà kamā ri ixpaja o ixtā axte apkati axkrut. ⁷ Hāmri nhūm rī kormā hwýr nojarēt nē mē inhmā:

—E ma pu mē jarāhā akupým Jutej kamā Rajare hwýr mō nē omu. Anē.

⁸ Hāmri pa mē tee ri ja hā kuma nē kām:

—Kwa ham mē panhō pahijaja kot kēn o atak o apír mā tā ka ra akupým mē hwýr akrà. Kwa pu mē hwýr pamōr kēt nē nà? Anē.

⁹ Hāmri nhūm mē inhmā:

—Nà koja mē kormā tanhmā ixto hkēt nē. Kormā ixte Tirtūm mā tanhmā amnhī nhípēx to jatur xām mēnhre hā. Te ixte kormā arīgro hā ixrīt mex nē ixpa pyrā nē kormā Tirtūm kot mēmoj tā inhmā karō xà hkót pix mā tanhmā amnhī nhípēx to ho ri ixpa. ¹⁰ Tā kot paj hatur xām kumē nhūm te myt àr nhūm ra kamāt kō pyrāk nhūm mē rī kormā tanhmā ixto nē xpi. Jakamā e ma pu mē hwýr. Koja mē tokyx tanhmā ixto hkēt nē. Anē.

¹¹ Hāmri nē mē inhmā Rajare jarēnh o:

—Na mē pahkràmnhwý Rajareta ra gōr nē nō. Tā kot puj mē ma hwýr mō pa kumra. Anē.

¹²⁻¹³ Ra htyk ā omunh tā ā mē inhmā harēnh anē. Pa mē kuma nē ixtýx ho ām ōt nē nōr ā hkamnhix nē kām:

—Kwa mān ra akupým amnhī kām hamak o mōr jakamā na ra amnhī krit nē gōr nē nō. Kwa pu mē awjanā nē hwýr pamōr kēt nē nà? Anē.

¹⁴ Hāmri nhūm mē inhma nē hprī hā mē inhmā harē nē mē inhmā:

—Nà na pre ty. ¹⁵ Nom kormā à nē hikwýta ā na pa hwýr inhmōr kēt nē. Tā kot paj ma hwýr mō nē hā mē amā ixāhpumunh týx ā amnhī to amnhīrīt. Ka mē ja hā ixpumu nē amnhī kaxyw ixkót ajamxpēr týx o ri apa. Ā mē ate amnhī nhípēx anhýr kaxyw na pa kormā à nē nōr ā hwýr inhmōr kēt nē. E ma pu mē hwýr. Anē.

¹⁶ Hāmri nhūm mē inhō pē Tomas pihpohti tee ri ā kapēr anhýrja ā kuma nē mē inhmā:

—Tōe ma pu mē hkót. Kē mē mamrī hkót mē pahto hpimràatā mē panhīmex pa ri. Anē.

¹⁷ Tã pa mẽ ma hkôt mẽ hwÿr mō nē ra Rajare nhō krī hwÿr ixpōx o mō hãmri nē harēnh ma. Ra htyk nhũm mẽ kot haxàr ã arĩgro pē kwat ã harēnh ma. ¹⁸⁻¹⁹ Nhũm Matre mẽ Marir wa hkamy ho hamak xàj arĩ mÿr o hkrĩ. Jakamã nhũm Ijaew kwÿjaja Jerujarē rũm ma wa hwÿr mra. Mẽ kot wa kãm kapēr nhũm tokyx akupÿm tãm wa hkrã kaxyw nhũm mẽ wa hwÿr mra. Wa ò krĩ pē Petãnja Jerujarē hwÿr ãm 3 kirôm pix jakamã nhũm mẽ ma wa hwÿr mra nē wa kuri wa kãm kapēr o hkrĩ. ²⁰ Rôm nhũm Matre Jejus hpōx o mōr ã harēnh ma nē kãnhmã xa nē man mẽ ixkutã tē. No nhũm Marir arĩ mÿr o nhÿ nē hkôt htēm kêt nē. ²¹ Hãmri nhũm Matre mẽ ixkutã tē nē mẽ ixkaxpa nē Jejus pumu nē mÿr kamã kãm kapēr nē kãm:

—Hêxta gàà nē Pahihti. Na pre ra wa ixkamy wa ixpê ty. Kop apu jar mẽ ixkôt ri apa ronhÿx pre htyk kêt nē. Xê mon ka pre we tokyx mẽ ixwÿr atēmre hkêt nē? ²² Tã na pa arĩ akôt ijamaxpēr tÿx nē. Kot kaj mẽmoj tã tanhmã Tirtũm wÿr to nhũm ama nē tanhmã amã mẽmoj to. Ra ixte ja hã apumunh mex kēnã. Anē.

²³ Hãmri nhũm Jejus kuma nē kãm:

—Kwa tee ri ajamaxpēr nē akaprĩ hkêt nē. Koja akamy akupÿm war amã htĩr kãm ga. Anē.

²⁴ Hãmri nhũm kuma nē kãm:

—Ma koja anē. Nhÿrmã Tirtũm kot mẽ piitã akupÿm mẽ ho htĩr xà hã arĩgrota ã koja akupÿm htĩr. Anē.

Kamy akupÿm htĩr ã harēnh mar tã Jejus kot akupÿm ho htĩr tokyx anhÿr ã hkamnhĩx kêt nē ã kãm kapēr anē.

²⁵⁻²⁶ Jakamã nhũm kãm:

—Nà pa na ixpê akupÿm mẽ ho mẽ htĩr xwÿnh. Jakamã mẽ kot amnhĩ kaxyw ixkôt hamaxpēr nē ixkôt amnhĩ xunhwÿr xwÿnhjaja koja mẽ htyk tã koja mẽ hkarō Tirtũm mẽ wa ixri htĩr tũm nē mex nē pa ho pa. Xà ate ja kaxyw ixkôt ajamaxpēr tÿx nà? Anē.

²⁷ Hãmri nhũm Matre kuma nē kãm:

—Xê nhũm. Apê Tirtũm Kra hã na pre mẽ ixkaxyw axãm. Ka na pa htem amnhĩ wÿr akãm ijamak o ixpa. Anē.

Hãmri nhũm Jejus kãm:

—Nà ãm hãmri na ka ã ijarēnh anē. E ma akupÿm tē nē atōx mã anē kē tokyx man ixwÿr tē pa omu. Anē.

²⁸ Hãmri nhũm kuma nē ma akupÿm tē. Hãmri nē Marir wÿr axà nē kãm Jejus jarē. Kôt mẽ hkrĩ xwÿnhjē hkãx ã kãm harē nē kãm:

—An xê hãmri amÿr kêt nē. Na ra mẽ pajahkre xwÿnhhta hpōx o mō nē mũtar nhÿ nē atã karō. Anē.

²⁹ Hãmri nhũm kuma nē kãnhmã xa nē ma mẽ ixwÿr htēm kurê kumrēx.

³⁰ Hãmri pa mẽ kormã krĩm ixpōx kêt nē. Arĩ Matreja Jejus wÿr htēm xà kamã arĩ ixkrĩ. ³¹ Jakamã nhũm Matre ma tē nē Marir mã Jejus jarē nhũm kato nē man mẽ ixwÿr tē. Hãmri nhũm Jerujarē rũm wa hwÿr mẽ mrar xwÿnhjaja omu nē htÿx kot hkamy hã pika pumunh nē mÿr kaxyw htēm ã hkamnhĩx nē man hkôt mra. ³² Hãmri nhũm Marir mẽ hkukamã mẽ ixwÿr tē nē Jejus pumu nē hpar pē tēm nē kãm kapēr pē hipō nē mÿr o nhÿ. Nē kãm:

—Hêxta gàà nē Pahihti. Na pre ra wa ixkamy wa ixpê ty. Kop apu jar mẽ ixkôt ri apa ronhÿx pre htyk kêt nē. Hô mon ka pre we tokyx man mẽ ixwÿr atēmre hkêt nē? Anē.

³³ Hãmri nhũm Jejus kuma nē mÿr ã omu. Nē hkôt mẽ mrar xwÿnhjaja mẽ mÿr ã mẽ omu nē kãm mẽ hkaprĩ nē. ³⁴ Hãmri nē mẽ kãm:

—Nhÿri na ka prem haxà? E mẽ hwÿr ixto tẽ pa omu. Anẽ.

Hãmri nhũm mẽ kuma nẽ ma hã pyka hwÿr mẽ ixto mō ³⁵ nhũm Jejus mẽ uràk nẽ hwÿr mÿr o tẽ ³⁶ nhũm mẽ ja hã omu nẽ axpẽn mã:

—Kwa mãn kãm hapẽ htÿx. Hã na ho ama nẽ hwÿr mÿr o tẽ. Anẽ.

³⁷ Nom nhũm mẽ hkwyjaja axtem nẽ mẽ kãm:

—Tk. Ra kot no hkre xwÿnhnta o mex tã mo na we tokyx man kormã htÿr ri hwÿr htẽm nẽ omunh nẽ akupÿm ho mex kêt nẽ? Anẽ.

Jejus kot akupÿm Rajare ho htÿr ã harẽnh

³⁸ Tã pa mẽ ra kẽn kre kamã mẽ kot Rajare jaxàr xàta wÿr ixpõx o mō nhũm Jejus hkaprì nẽ hwÿr tẽ nẽ omu. Nhũm prem ra kẽn rax o hitom ³⁹ nhũm omu nẽ mẽ kãm:

—E mẽ akwyjaja nhãm inhmã nẽ kahẽ xà mẽ. Anẽ.

Hãmri nhũm Matre kuma nẽ tee ri hamaxpěr nẽ kãm:

—Xẽ ma Jejus. Mẽ ri ã anhÿr kêt nẽ. Ra htyk ã arÿgro kęp 4 kẽnã. Mãn ra hkatõt nẽ hkro htÿx kumrẽx. Anẽ.

⁴⁰ Hãmri nhũm kuma nẽ kãm:

—Kwa ri ã ajamaxpěr anhÿr kêt nẽ Matre. Na pa ra amã ixkapěr nẽ amã ixkapěr o: “Kot kaj amnhĩ kaxyw ixkõt ajamaxpěr tÿx nẽ. Hã kot kaj Tÿrtũm mẽ wa ixihÿtÿx o wa ixihÿtÿx xàja pumu.” Anhÿr o amã ixkapěr. Jakamã kwa ja kaxyw Tÿrtũm mẽ wa ixkõt mãn ajamaxpěr tÿx nẽ hkêt wehe. Anẽ.

Hãmri nhũm kuma nẽ kãm:

—Ma ãm hãmri na ka inhmã akapěr. Ma kot paj kaxyw war amã ijamaxpěr tÿx nẽ. Anẽ.

⁴¹ Rôm nhũm mẽ kãm nhãm kẽn jakwa kre kahẽ xà mẽ. Hãmri nhũm Jejus Tÿrtũm mã amnhĩ jarẽnh kaxyw kànhmã kaxkwa hwÿr rÿt nẽ kãm:

—Pa Papaj. Nà na pa hte tanhmã mẽmoj tã awÿr to ka inhma nẽ tanhmã inhmã mẽmoj nhĩpẽx to. Amex o amex Papaj. ⁴² Na ka hte ã inhmã amnhĩ nhĩpẽx anẽ. Tã pa jajẽ noo mã ã amã ixkapěr anẽ. Ate inhmar nẽ tanhmã Rajare hto nhũm mẽ kot ja hã ixpumunh nẽ ixte anhÿ hã pix mã tanhmã amnhĩ nhĩpẽx to ho ri ixpa hã ixpumunh kaxyw. Nẽ ka ate mẽ hwÿr inhmẽnh ã apumunh kaxyw. Anẽ.

⁴³ Nhũm pre ã Tÿrtũm mã kapěr anẽ. Hãmri nẽ kÿx pẽ Rajare mã kapěr nẽ kãm:

—Pa Rajare. Kwa tokyx kànhmã nhÿ nẽ amnẽ mẽ ixwÿr tẽ nẽ akato. Anẽ.

⁴⁴ Puh nhũm akupÿm htÿr nẽ hkupu xà rãhã tẽ nẽ mẽ ixwÿr kato nẽ xa. Arÿ hkuk nẽ Ihkra nẽ hpar kupu rãhã mẽ ixwÿr kato nẽ xa. Hãmri nhũm Jejus mẽ kãm:

—Kwa mẽ atõ nẽ kupu xà hpõt kẽ ma akupÿm òrkwÿ hwÿr tẽ. Anẽ.

⁴⁵ Hãmri nhũm mẽ kot Marir mẽ Matre wa hwÿr mrrar xwÿnh kwÿjaja ã Jejus kot Rajare nhĩpẽx anhÿr ã omu nẽ amnhĩ kaxyw hkõt hamaxpěr nẽ hkõt amnhĩ xunhwÿr kurẽ kumrẽx. ⁴⁶ Nom nhũm mẽ hkwyjaja axtem nẽ omu nhũm ja mẽ kęp omnuj nẽ. Jakamã nhũm mẽ ma Parijew nhõ xwÿnhjẽ hwÿr mra nẽ mẽ kãm harẽ.

Mẽ kot Jejus pÿr ã amnhĩ grõnh

Matêwre 26.1-5; Makre 14.1-2; Rukre 22.1-2

⁴⁷ Hãmri nhũm Parijew nhõ xwÿnhjaja tee ri Jejus kot akupÿm Rajare ho htÿr ã harẽnh ma hãmri nẽ patre krãhtũmjẽ mẽ amnhĩ wÿr mẽ inhõ juisti ho akuprõ nẽ axpẽn mã Jejus o kapěr punuj pẽ hã axpẽn mar o hkrÿ. Hãmri nhũm mẽhõ mẽ kãm:

—Kwa tanhmã kot puj mẽ ho? Na ra mẽ kãm mẽmoj pumunh kêt kwý ho anhÿr rax o pa. ⁴⁸ Kot puj mẽ ãm omu nê tanhmã ho hkêt nhũm mẽ pahkwýjaja kot ã amnhĩ nhĩpêx anhÿr ã omu nê htýx ãm hãmri ã kot amnhĩ nhĩpêx anhÿr ã hkamnhĩx. Hãmri nê amnhĩ kaxyw hkôt hamaxpêr nê hkôt amnhĩ xunhwý. Jao ra amnhĩ kaxyw kêp mẽ õ pahihtti hã ãm. Koja mẽ ã amnhĩ nhĩpêx anê nhũm Rôm kamã pahihtija mẽ kot kator nê hpãnhã Jejus xãm ã harênh ma. Hãmri nê gryk xàj mẽ pahwýr õ pòristi hkwyè rê nhũm mẽ pahwýr mra nê mẽ panhĩmex pa nê Tirtũm nhõrkwý grãnh pa. Kwa tanhmã kot puj wem tokyx amnhĩ nê ho? Anê.

⁴⁹ Hãmri nhũm Kajpas mẽ kãm kapêr. Kajpasja na pre amgrãja kamã kêp mẽõ patre nhõ pahi maati. Jakamã mẽ kãm:

—Nà na pa ra ijamaxpêr. Kwa mẽ inhma. ⁵⁰ Nà kot puj mẽ hpĩr tokyx anê kê tapxipix ty pu mẽ arĩ mýrpe pahpiitã pajamakêtkati nê ri papa. Anê.

⁵¹ Nhũm pre ã mẽ kãm kapêr anê. Nom amnhĩ krã hkôt ã mẽ kãm kapêr anhÿr kêt nê. Arĩ kêp mẽõ patre krãhtũmjê nhõ pahi maati jakamã Tirtũm nhÿ hã Jejus kot Ijaew nê tykja kukamã ã harênh anê. Nom ja hã amnhĩ pumunh kêt nê. ⁵² Na pre Jejus mẽ ixpê Ijaew pix nê htyk kêt nê. Krĩ piitã hkôt Tirtũm krajê nê na pre ty. Mẽ piitã mẽ kot axpên to hkwyè nê ri axpên to pa kaxyw na pre mẽ nê ty. ⁵³ Hãmri nhũm ã Kajpas mẽ kãm kapêr anê nhũm mẽ inhõ pahijaja kuma nhũm ja mẽ kãm mex nê. Jakamã nhũm mẽ kot tanhmã Jejus ã ãmnênh to nhũm mẽ kot mẽ kãm tanhmã hpĩr to kaxyw ã axpên mar anhÿr o pa. ⁵⁴ Jakamã nhũm Jejus axte mẽ noo mã ri pa hkêt nê. Hãmri ma krĩ pê Epraĩ hwýr ma mõ. Pa mẽ hkôt ixpa ho ixpa xwýnhjaja ma hkôt ixpa. Epraĩa kapôt ã krĩ na pre. Jakamã pa mẽ ma hwýr mõ hãmri nê kamã ri ixpa.

⁵⁵ Tã nhũm arĩgro pê Pasja ra ahtêp o mõ. Amnepêm finat Mojes kot Ejit rũm mẽ panhĩgêjtê kator mã hamaxpêr kaxyw na pa pre htem hã ixkĩnh kaxyw Pas ã Jerujarê hwýr akuprõ. Na pa pre htem hwýr pøj nê kamã Tirtũm noo mã mẽ inhmex kaxyw tanhmã amnhĩ nhĩpêx to.

⁵⁶⁻⁵⁷ Jakamã nhũm ra Ijaew ohtõ nê ma Jerujarê hwýr pa. Nê kãm Jejus pumunh prãm xàj Tirtũm mã amnhĩ jarênh xà hã ixkre wýr mra nê hwýr agjê nê kamã hapêr nê axpên mã:

—Kwa nok? Xà koja mẽ hpakĩnh wýr mõi kêt nê nà? Anê.

Nhũm Parijew nhõ xwýnhjê mẽ mẽ inhõ patre krãhtũmjaja haxwýja hapêr o kuhê. Nom mẽ kot axtem nê unê nê haxàr kaxyw. Jakamã mẽ kãm hã karõ nê mẽ kãm:

—E kêr ka mẽ nhÿri Jejus pumu nê man mẽ ixwýr mra nê mẽ inhmã harênh kurê kumrêx. Anê.

12

Marir kot Jejus kuxwa hã harênh

Matêwre 26.6-13; Makre 14.3-9; Rukre 7.36-50

¹ Tã nhũm ra Pas wýr apkati grêre. Ra hwýr apkati kêp 6. Jakamã pa mẽ ma akupým krĩ pê Petãn wýr Jejus kôt mõ. Jejus kot akupým Rajare ho htĩr xwýnhnta mẽ õ krĩ hwýr pa mẽ akupým mõ nê Rajare nhõrkwý hwýr pøj nê mẽ hwýr agjê. ² Hãmri nhũm mẽ Jejus pumu nê hkĩnh nê. Nê mẽ inhmã mẽmoj mex nhĩpêx pa mẽ ixãpkur o ixkrĩ. Nhũm Rajare haxwýja mẽ ixkutã apkur o nhÿ. Nhũm htõx Matre mẽ inhmã mẽõ ho pa nê mẽsti hã unhwýr o xa. ³ Hãmri nhũm wa htõx Marir Jejus kukamã tanhmã hamaxpêr to nê hamaxpêr o:

—Ma kot paj tokyx mẽ kot mẽ ixpê hpĩr kukamã mẽ hkuxwaxà ho hkuxwa. Anê.

Hãmri nê kàx rax kãm mẽ hkuxwaxàja py nê o tẽ. Ra rit kahti hkôt hitep xà nhũm kupy nê hwỳr o tẽ. Mẽ kot mẽmo htwỳm o mẽ hkuxwaxà mex nhĩpêxja na pre hã kàxpore xohtô rax kumrêx. Jakamã nhũm kupy nê Jesus wỳr o tẽ nê hpar ã hkapĩr pa nê amnhĩ krã hkĩ ho hpar grà ho nhỹ nhũm ra ixkre kuxwa htỳx kumrêx. ⁴ Hãmri nhũm mẽ inhĩo pẽ Jut Kariotja. Kot kormã mẽ ìnkram Jesus nhõr mã xwỳnhta tee ri ã kot amnhĩ nhĩpêx anhỳr ã omu nhũm ja kęp omnuj nê ⁵ nhũm mẽ inhmã:

—Tk. Kwa pěr mẽ hkuxwaxà hã kàxpore xohtô rax kumrêx tã nhũm ri axtem nê Jesus par ã hkapĩr pa. Mo na ma o htẽm nê ho wẽnê nê hpãnhã kàxpore ho rax nê hpyr nê ho mẽ kęp amrakati xwỳnhjê nhĩpêx kêt nê? Kot ho wẽnê ronhỹx hpãnhã kàxpore ho rax kumrêx nê kupy nê ho mẽmoj japrõr rax o rax. Tã axtem nê amarĩ Jesus par ã hkapĩr pa. Anê.

⁶ Te kãm mẽ kęp amrakati xwỳnhjê japê pyrãk tã kãm mẽ hapê hkêt. ãm hêx rom ã kapêr anê. Na pre hte mẽ inhmã mẽ ixkàxpore jamỳ nê mẽ ixkôt mẽ inhmã hamãr o pa. Nom tõhã axtem nê mẽ ixpê hkwy ho ahkĩ nê ho amnhĩm mẽmoj japrõ. Jakamã Marir kot mẽ hkuxwaxà ho hapêx par ã omu nê tee ri hpãnhã kàxpore rax mã hamaxpêr nê kamã gryk nê ã mẽ inhmã kapêr anê.

⁷ Hãmri nhũm Jesus amnhĩ tã hamaxpêr ã omu nê kãm:

—Tk. Kwa tanhmã kãm akapêr to hkêt nê. Ixtyk nhũm mẽ kot ixkuxwa hkukamã na ã inhĩpêx anê. ⁸ Na hte mẽ kęp amrakati xwỳnhjaja mẽ akõt pa rãhã nê. Ka mẽ amã mẽmo arĩgro hã tanhmã mẽ ho ajuta hto hprãm nê rĩ mẽ ho ajuta nê mẽ kãm mẽmoj gõ. No kêt pa kot paj ri mẽ akõt ixpa ka mẽ ixto mex ry ho apa hkêt nê. Kot paj tokyx mẽ apiitã mẽ are. Jakamã ãm hãmri na ã inhĩpêx anê. Anê.

Patre krãhtũmjaja kot Rajare hã àmnênh ã harênh

⁹ Rõm nhũm Jerujarê nhõ xwỳnhjaja ra Jesus Petãn wỳr hpõx ã harênh ma nê kot omunh mã ma hwỳr mra. No ãm tapxipix pumunh mã hwỳr mrrar kêt nê. Mãânên kot akupỳm ho htĩr xwỳnhta pumunh mã nhũm mẽ ma hwỳr mra. ¹⁰⁻¹¹ Na pre ra Ijaew ohtô nê Jesus kot akupỳm Rajare ho htĩr ã harênh ma hãmri nê mẽ inhõ patre kaga nê Jesus kôt amnhĩ xunhwỳ. Jakamã nhũm patre krãhtũmjaja tee ri ja hã mẽ omu nê axpên mã:

—Nà kot puj mẽ Jesus pix pĩr kêt nê. Kot puj mẽ mãânên hkôt Rajare pĩ hãmri nhũm wa hixi hamẽ mẽ kęp hapêx japêr. Anê.

Jesus kot Jerujarê hwỳr àr ã harênh

Matêwre 21.1-11; Makre 11.1-11; Rukre 19.28-40

¹² Tã nhũm apkati nhũm Ijaew Jerujarê kamã mẽ hkĩnhja kryx nê Jesus ra mẽ hwỳr àhtêp o mõi ã harênh ma. ¹³ Hãmri nê axpên mã:

—Kwa ma pu mẽ mõi nê põ hkwy jakà nê kutã ho mra. Anê.

Hãmri nê hkwy jakà nê hamỳ nê ma kutã ho mra. Hãmri nê ra hkaxpa nê omu nê hkĩnh nê. Nê kãm: Pa. Nã ãm hãmri na ka mẽ ixwỳr mõi. Tĩrtũm na pre mẽ ixwỳr amê ka ã amõi anê.

Tĩrtũmjaja mex o mex. ãm hãmri na pre mẽ ixwỳr amê.

Kot kaj mẽ inhõ pahi hpãnhã mẽ ixto amnhĩptar o ri apa. Anê.

¹⁴ Hãmri nhũm Jesus nhỹri jumênre pumu nê hwỳr tẽ nê hã nhỹ nhũm mẽ pimràatã ma akupỳm Jerujarê hwỳr mõi. Tĩrtũm kapêr ã kagã htũm ra kot ja jarênh kot:

15 Pa Jerujarẽ nhõ xwýnhjaja. Kwa mẽ tee ri amnhĩ kukamã ajamaxpër ho amã ma hkêt nẽ.

Ota mẽ anhõ pahĩ nyw ra mẽ awýr jumẽnre hã nhỹ nẽ hpõx o tẽ. Anẽ.

16 No Jejus kõt mẽ ixpa ho mẽ ixpa xwýnhjaja pa mẽ ã kot amnhĩ nhĩpêx anhýrja ã omu nẽ tee ri hkukamã ijamaxpër nẽ axpën mã:

—Kwa mo na ri ã amnhĩ nhĩpêx anẽ nẽ jumẽnre hã nhỹ nẽ mẽ hkõt mõi? Anẽ.

Tã nhũm arĩgro hõ hã ty nẽ akupým kaxkwa hwýr api pa prem hã omu hãmri nẽ kormã Tirtüm kapër ã kagã htüm kot hkukamã ã harẽn h kot anhýrja mã ijamaxpër kurê kumrêx. Hãmri nẽ axpën mã harẽn h o:

—Kwa ãm hãmri na Tirtüm kapër ã kagã htüm kot ra ã Kraja jumẽnre hã ýr nẽ mẽ hkõt mõi ã hkukamã kot harẽn h anhýrta. Anẽ.

17 Hãmri nhũm Jejus kot Rajare mẽ kapër pẽ akupým ho htír ã omunh xwýnhjaja arĩ nhãm mẽ hkwyjê mã ujarẽn h o pa. 18 Nhũm mẽ kuma nẽ ma Jejus wýr omunh mã mra. 19 Hãmri nhũm Parijew nhõ xwýnhjaja tee ri ja hã mẽ omu nẽ axpën mã:

—Kwa na pu mẽ tee ri Jejus nẽ mẽ kãm pakapër kaprý nhũm mẽ pamar kêt nẽ ra piitã hkõt amnhĩ nhĩpêx o pa. Kwa nã. Anẽ.

Ijaew kêt xwýnhjê jarẽn h

20 Tã nhũm ra Gres kwýjaja Ijaew kõt hkĩnh kaxyw ma Jerujarẽ hwýr mẽ hkõt mra nẽ mẽ ãhkõ hã Tirtüm mã mex o mex ã harẽn h o hkõt mra. 21 Jakamã nhũm mẽ nhýri mẽ inhĩõ pẽ Firipti pumu nẽ hwýr mra. Firipti kęp pyka pẽ Garirej kamã krĩ pẽ Pesěj nhõ xwýnh nhũm Gres nhõ xwýnhjaja omu nẽ hwýr mra nẽ kãm:

—Pa. Kwa na pa mẽ inhãm Jejus pumunh prãm nẽ. Tanhmã kot pa wem amnhĩ to nẽ omu nẽ kãm ixkapër? Anẽ.

22 Hãmri nhũm mẽ kuma nẽ ma Andre hwýr mẽ o mra nẽ kãm mẽ harẽ. Hãmri nẽ wa ma Jejus wýr mẽ o mra nẽ kãm mẽ harẽ nẽ kãm:

—Pa Pahihti. Ota Gres nhõ xwýnhjaja kãm apumunh prãm nẽ awýr mõi. Mẽ pahkĩnh mẽ kęp Ijaew kêt tã mẽ kãm apumunh prãm nẽ. Anẽ.

Jejus kot amnhĩ kukamã amnhĩ jarẽn h

Matêwre 16.24-28; mããnẽn Apokarip 2.10, 12.11

23 Hãmri nhũm Jejus mẽ omu nẽ mẽ kãm tanhmã amnhĩ jarẽn h to. Kot mẽ ohtõ nẽ mẽ nẽ htyk nhũm mẽ kukwak ri Tirtüm wa kuri htír tùm nẽ pa ho pa hã mẽ kãm amnhĩ jarẽ nẽ mẽ kãm:

—Nã na ra ixtyk ã arĩgro hwýr apkati grẽre. Ixpê Tirtüm kot mẽ akaxyw ixãm xwýnh jakamã kot paj mẽ apiitã mẽ anẽ ty hãmri nẽ akupým ixtír nẽ ma kaxkwa hwýr akupým api. 24 Mẽ axohtõ nẽ nhýrmã Tirtüm mẽ wa ixri atír tùm nẽ apa ho apa kaxyw kot paj ã amnhĩ nhĩpêx anẽ. Kwa mẽ ã ixte amnhĩ jarẽn h anhýrja ma nẽ mẽ amnhĩ krãm haxàr týt nẽ ri hã apa. Te ixte mẽmo hy kot amnhĩ nhĩpêx pyrãk. Na htem pikap hagjê nhũm te htyk pyrã nẽ pika kaxwýnh kãm hikwý. Tã gaa nẽ higrõt nẽ hprêk nẽ ô. Nẽ ô rax kumrêx. Hyja pyxire nẽ hikwý htã kamã ô rax kumrêx. Nom koja mẽ hkre hkêt nẽ nhũm ô hkêt nẽ. Na hte ã mẽmo hyja amnhĩ nhĩpêx anẽ. Ja pyrã nẽ kot paj mẽ anẽ ixtyk kêt nẽ te mẽ kot mẽmo hy hkre hkêt nhũm hprêk nẽ ô hkéeta pyrãk ma mẽ ixkukwak ri Tirtüm mẽ wa ixri atír tùm nẽ apa hkêt nẽ. Jakamã kot paj mẽ anẽ ty nhũm mẽ ijaxà. Hãmri pa akupým ixtír ka mẽ axohtõ nẽ ixkukwak ri wa ixri atír tùm nẽ apa ho apa.

25 —Nē koja mē ixpī pa mē anē ty. Tā mē ate ixkôt amnhī nhīpêx o apa xwýnhjaja. Koja mē ixtā mē apar mā tā kwa kēr ka mē atyk pymaj ixkaga hkêt nē. Kwār mē māmri tanhmā ixtā mē ato ka mē nhýrmā Tirtūm mē wa ixri axte amnhī xā kamā ajamak kêt kumrêx nē atir tūm nē amex nē apa ho apa. No kot kaj mē ixkīnhā jar amā amex pix prām hāmri nē nhýrmā wa ixri atir tūm nē apa hkêt nē. ²⁶ Kot kaj mē ā ixkôt amnhī nhīpêx anhýr o ri apa hāmri nhūm mē kot inhīpêx pyrāk o mē anhīpêx. Hāmri ka mē nhýrmā ma ixkôt kaxkwa hwýr api nē kamā ixri atir tūm nē apa ho apa. Hāmri nhūm Inhīpêxā ixtā mē apumu nē mē ato mex kumrêx. Anē.

Tirtūm kot Jejus mā kapêr ā harēnh

Matêwre 3.17, 17.5

²⁷ Tā nhūm Jejus tee ri amnhī kukamā htyk mā hamaxpêr nē hkaprī htyx nē. Nē hkôt mē ixpa ho mē ixpa xwýnhjē mā amnhī jarē nē mē inhmā:

—Hêxta waa nē. Na pa tee ri amnhī kukamā ijamaxpêr. Nē tee ri amnhī xā htyx kamā ijamak kukamā ijamaxpêr pē ra amnhī kamā ixkahak nē. Nom ixte pika piitā hkôt mē kot ixkôt amnhī xunhwýr xwýnhjē nē ixytyk kaxyw ixwryk kēnā. Jakamā kot paj Inhīpêxā kot mē kēp ixpytār kaxyw tanhmā amnhī to hwýr to hkêt nē. Anē.

²⁸ Hāmri nē hpānhā Hipêxā mā kapêr nē kām:

—Pa Papaj. Ām mēmoj pixi na inhmā hprām. Kē mē piitā ixkukwak ri amex o amex ā apumu. Ja na kêt inhmā hprām týx kumrêx.

Anhýr o Tirtūm mā amnhī jarē. Hāmri nhūm kuma nē kaxkwa rūm kām kapêr. Kýxpē kām kapêr nē kām:

—Nā na pa pre ra ā mē kām amnhī to amnhīrit anē nhūm mē ja hā ixpumu. Tā kot paj axte akukwak ri amnhī to amnhīrit nhūm mē piitā axte inhmex o inhmex ā ixpumu. Anē.

²⁹ Nhūm pre ā Tirtūm Jejus mā kapêr anē. Hāmri nhūm mē kot mē ixkuri mar o kuhē xwýnhjaja kuma no ām hprī hā kot kām tanhmā kapêr toja mar mex kêt nē. Nē htyx ho ām mēmoj tā hkamnhīx. Jakamā nhūm mē hkwyjaja xpēn mā:

—Kwa mo na wehe? Na mǎn katōtōk nā? Anē.

Nhūm mē hkwyjaja mē kām:

—Nā na katōtōk kêt. Tirtūm kapêr o wryk xwýnh mǎn tanhmā kām kapêr to. Anē.

³⁰ Hāmri nhūm Jejus mē kām:

—Nā Tirtūm tām na inhmā kapêr. Nom pa ixte mar kaxyw inhmā kapêr kêt nē. Mē kajaja mē ate ixtā mar kaxyw na kýx pē ā inhmā kapêr anē. Anē.

Hāmri nē mē kām:

³¹ —E hāmri. Kot paj tokyx mē apiitā mē ate amnhī tomnuj pānhā amnhīrer kaxyw tanhmā amnhī nhīpêx to. Jao māānēn Satanasti pē hihtýx xā ho ijapêx.

³² Koja mē pī kahpa hā inhō pa kýxpē ajêt. Tirtūm kot mē awýr inhmēnh tā nhūm mē ā inhīpêx anē pa ty. Jakamā koja pika piitā hkôt mē ohtō nē ixkôt amnhī xunhwý nē amnhī kaxyw inhmā hamaxpêr rāhā ho pa. Anē.

³³ Mē ixte tanhmā htyk to hā harēnh mar kaxyw nhūm pre ā mē inhmā amnhī jarēnh anē. ³⁴ Hāmri nhūm mē kot mē ixkuri mar o kuhē xwýnhjaja tee ri kot htyk ā amnhī jarēnhja ma nē kām:

—Kwa mē ixte amnhī wýr kamā ijamak o ixpa xwýnhja htír tūm nē pa ho pa xwýnh na. Tirtūm kapêr ā kagā htūm kot ā harēnh kot anhýr tā ka ā ri mē kot apír nhūm atyk ā amnhī jarēnh anē. Ate Tirtūm kot mē ixwýr amēnh xwýnh ā

amnhī jarēnh tā ā ri atyk ā amnhī jarēnh anē. Kwa xà apē mē ixte amnhī wỳr kamā ijamak o xpa xwỳnh kêt? Anē.

³⁵ Hāmri nhūm mē kuma nē amnhī tā mē kām:

—Tỳ ixpē tām kēnā. Tā kot paj tokyx mē are. Jakamā kēr ka mē ixte arī mē akamā xpa ri ixkôt amnhī xunhwỳ nē amnhī kaxyw ixkôt ajamaxpēr o ri apa. Te ixpē kanē hpôk pyrāk jakamā na pa hte mē kām Tirtūm kapēr o mē ahkre o ri xpa. Nom kot paj kritpēm mē akôt xpa ry hkêt nē. Jakamā kwa kēr ka mē tokyx te mē kot kanē hpôk nhīrā kamā ri mē pa xwỳnh kot amnhī nhīpêx pyrā nē Tirtūm kôt amnhī nhīpêx o ri apa. Kormā mē akôt xpa ri. Kot paj tokyx ma mō nhūm te ra kamāt kô pyrāk. Na hte kamāt kô kamā mē pa xwỳnhjaja tee ri rīt mex mā nom rīt mex kêt nē. Nē mēmoj pumunh mex kêt nē. ³⁶ Jakamā kwa mē tokyx ixte arī mē akamā xpa ri amnhī kaxyw inhmā ajamaxpēr nē ixkôt amnhī xunhwỳ. Te ixpē kanē hpôk nhūm kamā mē arīt mex pyrāk. Jao ixpyrā nē te mē apē kanē hpôk nhīrā mex pyrāk o amnhī nhīpêx. Nē ixpyrā nē tām ri amnhī nhīpêx o apa. Anē.

Nhūm pre ā mē kām kapēr anē hāmri pa mē kēp ixkato nē ma nhām mō.

Mē hkwyjaja kot Jejus kôt hamaxpēr kêt ā mē harēnh

³⁷ Na pre hte Jejus mē noo mā mē kot aa mēmoj pumunh kêt kwỳ ho anhỳr rax o pa. Tā nom nhūm mē ohtō nē hā omu nē ām hā omu nē kēp Tirtūm kot mē pahwỳr mēnh xwỳnh ā hkôt hamaxpēr kêt nē. ³⁸ Nom ra mē hkukamā Tirtūm nhỹ hā kapēr jarēnh o pa xwỳnh pē finat Ijaisja mē hkukamā ja hā mē harē nē hā kagā. Nē hā kagāja o:

Pa Pahi Maati. Nà ra ixte mē kām ajarēnh o xpa ryy htā no nhūm mē inhma nē ām inhma.
Nē mē kot axihtỳx o axihtỳx ā ajarēnh mar tā no ām ajarēnh ma nē amnhī kaxyw akôt hamaxpēr kêt nē. Anē.

³⁹ Mē kām Tirtūm kapēr mar prām kêt jakamā na prem määnēn Jejus kēp Tirtūm kot mē pahwỳr mēnh xwỳnh hkôt hamaxpēr kêt nē. Nhūm pre finat Ijaisja axte mē hkukamā ja hā mē harē nē mē hā kagā. Nē hā kagā ho:

⁴⁰ Na pre Tirtūmja tanhmā amnhī nē mē hkrā hto nhūm mē hkôt hamaxpēr kêt nē.

Ra mē kot hihtỳx o hihtỳx ā omunh tā omu nē ām omu.

Nē mē kot kapēr mar tā amnhī tomnuj kaga hkêt nē.

Nē Tirtūm kot mē nē mē kot amnhī tomnuj o hapêx prām xàj hkôt amnhī xunhwỳr kêt nē. Anē.

⁴¹ Kormā Jejus mē hwỳr wrỳk kêt ri nhūm finat Ijaisja hpimtir kām kot amnhī to rax kumrêx ā omu nē hkukamā ā harēnh nē hā kagā anē.

⁴² Hāmri nhūm Ijaew krāhtūm kwỳjaja hkwyjê rom amnhī kaxyw Jejus kôt hamaxpēr nē hkôt amnhī xunhwỳ. Tā Parijew nhō xwỳnhjaja kot ā mē kot amnhī nhīpêx anhỳr ā mē harēnh mar pymaj ja hā amnhī to amnhīrīt kêt nē. Mē kot Tirtūm kapēr o mē ahkre xà hā ixkreja nē mē kator pymaj nhūm mē kām amnhī to amnhīrīt kêt nē. ⁴³ Na prem hamaxpēr o:

—Nà kot paj ja hā amnhī to amnhīrīt nhūm mē amnhī nē ixtomnuj nē. Hāmri nē amnhī pyrā nē axpēn mā inhmex ā ijarēnh kêt nē.

Anhỳr o mē umaj amnhī kukamā hamaxpēr o pa. Nom Tirtūm tām kot amnhīm mē mex ā mē harēnhja nhūm mē hkukamā hamaxpēr kêt nē.

Jejus kot Hipêxà nhỹ hā kapēr ā harēnh

⁴⁴ Nhūm Jejus axte mē kām kapēr nē kỳx pē kapēr nē mē kām:

—Nà koja mēhō amnhī kaxyw ixkôt hamaxpēr hāmri nē ixkôt pix mā hamaxpēr kēt nē. Māānēn amnhī kaxyw kot mē awȳr inhmēnh xwýnhja kôt hamaxpēr. ⁴⁵ Wa ixte amnhī nhīpēxja te tipxi pyrāk jakamā koja mē tanhmā ixte amnhī nhīpēx to hā xipumu nē te kot Tirtūm kot amnhī nhīpēx ā omunh pyrāk.

⁴⁶ —Nē te ixpē kanē hpōk nhūm inhīrā kamā mē apa pyrāk kaxyw na pre Inhīpēxà mē awȳr inhmē pa mē awȳr wrý. Ixte kapēr o mē ajahkre ho ri mē akôt ixpa kaxyw. Jakamā koja mēhō amnhī kaxyw ixkôt hamaxpēr nē ixkôt amnhī xām hāmri nē te kanē hpōk nhīrā kamā rīt mex o pa pyrāk o amnhī nhīpēx. Jao amnhī nhīpēx nyw o amnhī nhīpēx o pa. ⁴⁷⁻⁴⁸ No mē kot ixkapēr mar nē ām mar xwýnhjaja te māānēn Inhīpēxà kapēr mar nē ām mar pyrāk. Mýrapē koja mē nhýrmā ma kuwy hwýr pa nē mē kot amnhī tomnuj mýrapē kamā pa ho pa. Tā ho ā mē ate amnhī nhīpēx anhȳr o ri mē apa kaxyw na pa pre mē awȳr ixwrýk kēt nē. Ixte mē ate amnhī tomnuj pānhā amnhīrer par kaxyw na pa pre mē awȳr wrý.

⁴⁹ —Nē na pa hte amnhī krā hkôt tanhmā ri mē amā ixkapēr to ho ri ixpa hkēt nē. Ām kot mē awȳr inhmēnh xwýnhja nhý hā na pa hte tanhmā mē amā ixkapēr to ho ri mē akôt ixpa. ⁵⁰ Tā mē kot Tirtūm kapēr mar nē amnhī kaxyw hkôt hamaxpēr xwýnhjaja koja mē nhýrmā wa ixri htír tūm nē mex nē pa ho pa. Jakamā na pa hte tanhmā kot inhmā karō hto xà hkôt pix mā tanhmā mē amā ixkapēr to ho ri ixpa. Anē.

13

Jejus kot hkwȳjē hpar kuhōnh ā harēnh Rukre 22.24-27

¹ Tā nhūm ra Pas ā mē ixkīnhhta ahtēp. Pas ā na hte mē ixpē Ijaewjaja axpēn wýr akuprō nē hā ōwēhti hkra nyw pa nē ho anē nē hkur o ixkrī. Amnepēm Tirtūm kot pika pē Ejit rūm mē inhīgēxjē kator kaxyw nhūm mē nojarēt nē ā hkwȳ hpar nē ho anhȳr nē hkwȳ hkurta pyrāk. Na prem nojarēt nē mē hkra my kot wa mē kēp htyk pumaj ōwēhti hkra nyw kwý hpa nē ho anē nē ī hku. Jakamā nhūm arī mē ixpē mē hkanrēhā mē htāmnhwýjaja ā mē kot amnhī nhīpēx anhȳrja mā ijamaxpēr nē hā ixkīnh kaxyw mē urāk nē hkwȳ hpa nē kuku. Jakamā nhūm ra Pas ahtēp nhūm Jejus amnhī kukamā tanhmā hamaxpēr to kurē kumrēx. Ra ma akupým Hipéxà hwýr àpir xà hā arīgro hwýr apkati grēre. Jakamā nhūm akupým nojarēt ā amnhī pumu nē kām mē pahte hkôt amnhī xunhwýr xwýnhjē japē jakamā kām mē pajapē rāhā mē panē htyk mā. ² Tā nhūm myt axà pa mē Pas ā ixàpkur o ixkrī. Nhūm Simāw Kariot kra Jut Kariotja māānēn mē ixkutā apkur o nhý. Kēp mē ixkwý htā nhūm pre Satanasti tanhmā hkrā hto nhūm ra axtem nē kot mē kām Jejus kurē xwýnhjē nhīhkram haxàr kaxyw.

³⁻⁴ Tā pa mē kormā axpēn kutā ixàpkur kaxyw ixkrī hpa nhūm Jejus kànhmā xa nē hinōkà kapa nē toajti py nē ho amnhī krax pre. Kot amnhī to rax ā amnhī pumunh tā ja hā amnhī to jarkrar pē tanhmā ri mē inhnoo mā amnhī nhīpēx to ho pa hkēt. Kēp mē inhō pahi htā te kēp mē inhmā àpēnh xwýnh pyrāk o amnhī nhīpēx o pa. ⁵ Jakamā toajti py nē ho amnhī krax pre nē pasiiti hō py nē kamā gō hkwȳ ru nē ho mē ixpar kuhō nē toajti o mē ixpar grā ho mō. ⁶ Ā mē inhīpēx anhȳr o mō. Pē ra hpānhā Simāw Pētre hpar kuhōnh kaxyw nhūm tee ri amnhī tā omu nē kām:

—Tk. Kwa apê inhmã axapênh xwÿnh kêt kênã kot ka kêt ri axtem nê ixpar kuhõ Pahihti. Apê mê inhõ Pahi kênã kot ka kêt ã mê inhîpêx anê. Anê.

⁷ Hãmri nhũm kãm:

—Kwa nã. Kormã ate ja hã amnhĩ tã ixpumunh mex kêt. Nom kot kaj nhÿrmã aprĩ hã amnhĩ tã ixpumu. Anê.

⁸ Hãmri nhũm kãm:

—Nã nom kot kaj ãm ixpar kuhõnh kêt nê. Kwarĩ. Anê.

Hãmri nhũm Jejus kãm:

—Tõe. Kot paj apar kuhõnh kêt nê ka te apê ixkwÿ hkêt pyrãk. Anê.

⁹ Hãmri nhũm tee ri kuma nê kãm:

—Tõe mamrĩ ixpar kuhõ. Nom ixpar pix kuhõnh kêt nê. Mãânên inhĩhkra kuhõ nê ixkuk kuhõ. Inhmã ixte apyrãk prãm tÿx kumrêx kênã. Anê.

¹⁰ Hãmri nhũm Jejus kãm:

—Nã amÿkry hkõt mê wÿr xwÿnhjaja na htem mex nê axte wÿr kêt rãhã hikwÿ. Na htem ãm amnhĩ par pix kuhõ nê hikwÿ. Ja pyrã nê Tirtũm kot mê anê mê ate amnhĩ tomnuj ho hapêx par xwÿnhjaja te amÿkry hwÿr mê axwÿr nê amex pyrãk. Ka mê te mê kot amnhĩ par pix kuhõnh ta pyrã nê axte tanhmã amnhĩ tomnuj to hãmri nê Tirtũm mã amnhĩ jarênh kurê kumrêx kê anê amnhĩ katut kõt ate amnhĩ tomnujta mê nê ho hapêx. Na pre ra mê anê mê ate amnhĩ tomnuj o hapêx. No ãm mê apiitã hkêt. Ota arĩ mê anhõja pyxire nê arĩ amnhĩ tomnuj rãhã ri pa. Jakamã te wÿr kêt nê arĩ grã htyk rax kãm ri pa pyrãk. Anê.

¹¹ Nhũm pre ã Jejus mê inhmã kapêr anê. Ra kot hprĩ hã mê kot kãm hkurê xwÿnhjê mã õr mã xwÿnhja pumunh jakamã te wÿr kêt nê arĩ grã htyk rax kãm ri pa pyrãk ã ã harênh anê.

¹² Tã mê ixpar kuhõnh pa nê akupÿm hinõkã py nê haxã nê nhÿ hãmri nê mê inhmã:

—E mêmõ kaxyw na pa we ã mê apar kuhõnh anê? Kot paj ixprĩ hã mê amã amnhĩ jarê ka mê inhma. ¹³⁻¹⁴ Na ka htem ixto “mê ijahkre xwÿnh” nê ixto “pahihti” anhÿr o ijarênh o ri apa. ãm hãmri na ka htem ã axpên mã ijarênh anê. Ixpê mê ajahkre xwÿnh nê mãânên ixpê mê anhõ pahihti htã inhmã mê ate tanhmã axpên nhîpêx to ho apa hprãm xàj na pa ã mê apar kuhõnh anê. Tã kêr ka mê ixpyrà nê tanhmã axpên to mex to ho ri apa. ¹⁵ Jao amnhĩ kuxwar axpên to mex pê mêmõj to axpên kutã anojarêt rãhã ho ri apa. ¹⁶ Kwa mê ixkapêr ma nê kãm amnhĩ krãm haxãr tÿx rãhã ho ri apa. Mê ate amnhĩ to rax o ijakrenh kêt. Te ixpê mê anhõ patrãw nhũm mê ate inhmã tanhmã amnhĩ nhîpêx to ho apa xwÿnh pyrãk. Nê te ixte mêmõj tã mê amã karõ nhũm mê ate inhmar nê inhmã tanhmã mêmõj nhîpêx to pyrãk. Tã te ixpê mê anhõ patrãw pyrãk tã pa ã mê apar kuhõnh anê. Ka mê amnhĩ tã ixpumu hãmri nê amnhĩ xwar tanhmã axpên to ajuta hto ho ri apa. No ri axpên pumu nê ajamaxpêr o: “Tk. Nã ixte amnhĩ to rax o hakrenh kênã kot pa kêt ri tanhmã ho ajuta hto. Kê tãm mãn pa ixto ajuta.” Anhÿr o ajamaxpêr o ri apa hkêt nê.

¹⁷ —E na pa ã mê amã ixujarênh anê. Kot kaj mê inhma nê ixujarênh kõt ã axpên nhîpêx anhÿr o ri apa. Hã kot kaj mê akĩnh nê ri apa. Anê.

Jejus kot amnhĩ tã hã ãmnênh xwÿnh o amnhĩtã ã harênh

Matêwre 26.20-25; Makre 14.17-21; Rukre 22.21-23

¹⁸ Nhũm Jejus arĩ mê inhmã kapêr nê mê inhmã:

—Kot kaj mê apiitã mê akĩnh nê apa hkêt nê. Ixte mê arênh xwÿnhjaja mê apiitã mê apumunh mex. Jakamã na pa Tirtũm kot mê apiitã mê ate amnhĩ

tomnuj o hapêx par kêt ã mẽ anhîõja jarê. Tirtûm kapêr ã kagà htûm kot harênh kot:

Ixkutã apkur o ÿr xwýnhjê hõ koja axtem nê mẽ kot kãm ixkurê xwýnhjê nhîhkram ijaxã. Kêp ixkõt pa ho pa xwýnh tâ koja axtem nê ã inhîpêx anê.

Anhÿr o kot harênh. Tã koja tokyx ã inhîpêx anê. ¹⁹ Nom kormã kot ã inhîpêx anhÿr kêt ri na pa hkukamã mẽ amã harê. Jakamã koja ã inhîpêx anê ka mẽ ja hã ixpumu nê ra ixte amnhî kukamã mẽ amã amnhî jarênhhta mã ajamaxpêr nê ixpê Tirtûm rûm mẽ awÿr ixwrÿk xwýnh kõt ajamaxpêr tÿx kurê kumrêx.

²⁰ —Kwa mẽ ixkapêr ma nê amnhî krã kamã kãm ajamaxpêr tÿx o ri apa. Koja mẽhõ ixte mẽ hwÿr mẽ arênh xwýnhjê hã tanhmã mẽ ato mex to. Hãmri nê te pa kot tanhmã ixto mex to pyrãk. Nê koja mẽhõ tanhmã pa ixto mex to nê mãânên te kot mẽ awÿr inhmênh xwýnhhta tanhmã ho mex to pyrãk. Anê.

²¹ Nhûm pre ã Jejus mẽ inhmã kapêr anê. Hãmri nê tee ri amnhî kukamã hamaxpêr nê hkapri nê mẽ inhmã:

—Hêxta waa nê. Nã kot kaj mẽ atõ mẽ kot kãm ixkurê xwýnhjê nhîhkram ijaxã. Kwa mẽ amnhî krã kamã ixkapêrja mã ajamaxpêr tÿx nê. Anê.

²² Hãmri pa mẽ amnhî tâ kuma nê tee ri xspên pumunh o ixkrî. ²³ Ixpê Juãw na pa pre ixpê Jejus krãmnhwÿ mex ã ìhkõ hã ixapkur o inhÿr ²⁴ nhûm Simãw Pêtreja ixpumu nê inhmã nomgõr nê kawax pê inhmã:

—Kwa mẽ pahtõ nhîxi hã hkukja nà? Anê.

²⁵ Hãmri pa kuma nê Jejus mã kãm:

—Kwa Pahihtî. Mê ixtõ koja we ã anhîpêx anê? Anê.

²⁶ Hãmri nhûm mẽ inhmã:

—Nã kot paj pãwti hõ py nê guhkrax kãm ho mry kagõ nhek nê kot mẽ ìhkram ijaxãr mã xwýnhhta mã kugõ ka mẽ hkõt omu. Anê.

Hãmri nê kupy nê ho mry kagõ nhek nê Simãw Kariot kra Jut Kariotja mã kugõ nhûm kupy. ²⁷ Pyrja kõt nhûm Satanasti tanhmã hkrã hto. Hãmri nhûm Jejus te kot kãm amnhî to nojarêt pyrãk o amnhî tâ kãm kapêr nê kãm:

—E kwa tokyx nã. Anê.

²⁸⁻³⁰ Hãmri nhûm kuma nê kato nê ma kamãt kô kamã htêm kurê kumrêx. Hãmri pa mẽ ixapkur o ixkrî xwýnhjaja Jejus kot ã kãm kapêr anhÿrja ã kuma nê tee ri hkukamã ijamaxpêr. Hãmri nê kot ma mẽ hkînh ã mẽõ hkwy japrõr kaxyw ma htêm ã hkamnhix. Nhûm mẽ ixkwÿjaja axtem Jejus kot mẽ kêp amrakati xwýnhjê mã mẽmoj nhõr ã kãm karõ nhûm ma mẽ hwÿr htêm ã hkamnhix. Kêp mẽ inhmã mẽ ixkãxpore jamãr o pa xwýnh jakamã pa mẽ ã itÿx mẽmoj tâ hkamnhix anê.

Jejus akupÿm nojarêt nê mẽ kãm mẽmoj tâ karõ hã harênh

Matêwre 22.39-40; mãânên Wam Juãw 3.11-24

³¹⁻³² Hãmri nhûm Jejus mẽ inhmã:

—Nã kot kaj mẽ tokyx mẽmoj pumu nê Tirtûm mã mex o mex ã harê nê ijaxwÿja inhmã inhmex o inhmex ã ijarê. Kot kaj mẽ tokyx mẽmojta pumu kãm ga.

³³ —Te mẽ apê ixkra pyrãk tâ kot paj arî ri mẽ akõt ixpa grire hãmri nê ma akupÿm api. Kot kaj mẽ tee ri jar ijapêr o ri apa nom nhÿri ixpumunh kêt nê. Nê kormã tokyx ma ixkõt apa hkêt nê.

³⁴ —E kot paj axte mẽ amã mẽmoj tâ karõ. Kormã ixte mẽ amã ja hã karõ hkêt. Kêr ka mẽ amã xspên kînh o ri apa. Te pa inhmã mẽ ajapê pyrãk o xspên

nhîpêx rãhã ho ri apa. ³⁵ Kot kaj mẽ ã amnhî nhîpêx anê nhũm mẽ akwỳjaja ja hã mẽ apumu nê mẽ apê ixkwỳ hã mẽ apumunh kurê kumrêx. Anê.

Simãw Pêtre kot Jejus ã amnhî to hêx kukamã harênh

Matêwre 26.31-35; Makre 14.27-31; Rukre 22.31-34

³⁶ Nhũm Jejus ã kot mẽ ixrer nê ma nhỹhỹm môr ã amnhî jarênh anê hãmri nhũm Simãw Pêtre tee ri kot amnhî jarênh ma nê kãm:

—Kwa Pahihti. Nhỹhỹm kot kaj kêt mō pa mẽ akôt ixpa hkêt nê? Anê.

Hãmri nhũm kãm:

—Nã ma inhmôr xãta wỳr kot kaj mẽ kormã ma ixkôt apa hkêt nê. Nom kot kaj mẽ nhỹrmã ma ixkôt apa. Anê.

³⁷ Hãmri nhũm Simãw Pêtre kãm:

—Kwa mo kot pa mẽ omu nê tokyx ma akôt inhmrar kêt nê? Inhmã akôt ixyk pyma hkêt kênã. Kwãr mẽ mãmri atã ixpĩ. Inhmã ajapê htỳx kumrêx kênã. Anê.

³⁸ Hãmri nhũm Jejus kãm:

—Xã ãm hãmri na ka ã inhmã amnhî jarênh anê Simãw Pêtre? Xã amã ixkôt atyk pyma hkêt? Kwa o kora. Koja apkati hkôt krãhyre hkàr kêt ri ka ra mẽ umaj ate ixkôt apa hkêt ã amnhî tã axãprãr o axkrunêpxi kãm ga. Kwa amnhî krã kamã ixkapêrja mã ajamaxpêr tỳx nê. Anê.

14

Jejus kot Tĩrtũm nhõ krĩ jarênh

Eprêw 11.16

¹ Nhũm Jejus arĩ mẽ inhmã kapêr nê mẽ inhmã:

—Kwa ã ixte mẽ amã amnhî jarênh anhỹrja ma nê tee ri amnhî kukamã ajamaxpêr nê akapri hkêt nê. Arĩ amnhî kaxyw Tĩrtũm mẽ wa inhmã ajamaxpêr tỳx rãhã ho ri apa. ² Inhĩpêêxã nhõ krĩ kamã ixkre xohtõ. ãm hãmri na pa ã mẽ amã harênh anê. Tã kot paj ma akupỹm hwỳr api nê mẽ akutêp mã amã mẽ anhõrkwỳ ho mex. ³ Hãmri nê ho mex pa nê rĩ man akupỹn mẽ awỳr wrỳ. Hãmri nê ma akupỹm amnhî kôt mẽ ato ixãpir pa ka mẽ Tĩrtũm mẽ wa ixkôt apa rãhã apa ho apa. Jakamã kwa mẽ ri akapri nê apa hkêt nê. Anê.

Jejus te kêp Tĩrtũm wỳr pry pyrãk

Epes 2.18

⁴ —Nê ma nhỹhỹm inhmôr xãta ra mẽ ate harênh mar mex. Nê hwỳr pryja mããnên mẽ ate harênh mar mex. Anê.

⁵ Hãmri nhũm Tomas tee ri kuma nê kãm:

—Kwa mẽ ixte nhỹhỹm amôr xãta pumunhre hã kot pa kêt mẽ hwỳr pryja pumu. Anê.

⁶ Hãmri nhũm kãm:

—Kwa paa. Te ixpê Inhĩpêêxã hwỳr pry pyrãk. Na htem amnhî kaxyw inhmã hamaxpêr nê ixkôt amnhî xunhwỳ hãmri nê nhỹrmã ixkukwak ri pix mã ma Inhĩpêêxã mẽ wa inhõ krĩ hwỳr api. Ixkukwak ri pix mã na htem hprĩ hã Tĩrtũm kapêr ma. Nê ixkukwak ri pix mã na htem wa ixri htĩr tũm nê pa ho pa. ⁷ Kot kaj mẽ aprĩ hã ixpumu nê mããnên te aprĩ hã Inhĩpêêxã pumunh pyrãk. Tã ra mẽ ate tanhmã ixte amnhî nhĩpêx to hã ixpumunh mex jakamã mããnên te ra mẽ ate Inhĩpêêxã kot amnhî nhĩpêx ã omunh mex pyrãk. Anê.

Jejus mẽ Tĩrtũm wa kot amnhî nhĩpêx tipxi hã wa harênh

Juãw 1.1, 10.30; Pĩrĩpos 2.6; Korosê 2.9

⁸ Nhũm Jejus ã mẽ inhmã kapër anê nhũm Firipti kuma nê kãm:

—Kwa nom mẽ inhmã inhno ho Anhĩpêêxà pumunh prãm. Kot pa mẽ omu nê ixkĩnh týx kumrêx. Anê.

⁹ Hãmri nhũm Jejus kãm:

—Kwa na pa pre ra mẽ akôt ri ixpa ryy nê. Ka mẽ aprĩ hã ixpumunh mex nê. Kêt ra mẽ kot ixpumunh mex xwýnhjaja te mẽ kot mãânên Inhĩpêêxàja no ho omunh mex pyrãk. ¹⁰ Wa ixte amnhĩ nhĩpêxja ãm tipxi. Xà ate kormã amnhĩ krã hi mã ixkapër jaxàr týx kêt? Inhĩpêêxà mẽ wa ixte amnhĩ nhĩpêxja ãm tipxi. Nê kot axpên pyrãk. Jakamã na pa hte amnhĩ krã hkôt ri tanhmã amnhĩ nhĩpêx to ho ri ixpa hkêt nê. ãm Inhĩpêêxà nhỹ hã na pa hte ri tanhmã mẽ amã ixkapër to ho ri ixpa. Nê hihtýx xà ho tanhmã amnhĩ nhĩpêx to ho ri ixpa. Ka mẽ ja hã ixpumu nê te ano ho Inhĩpêêxà pumunh pyrãk. ¹¹ Kwa mẽ ixkapër ma nê hkôt ajamaxpër týx nê. Inhĩpêêxà mẽ wa ixte amnhĩ nhĩpêxja ãm tipxi. Nê kot axpên pyrãk. Rý ka mẽ tee ri ja kukamã ajamaxpër japër hãmri nê ixte aa mẽ ate mẽmoj pumunh kêt kwý ho anhyr ã mãn ixpumu nê ja hã wa ixte amnhĩ nhĩpêx tipxi kôt ajamaxpër.

¹² —Kwa mẽ ixkapër ma nê amnhĩ krã kamã amnhĩ krãm haxàr týx nê. Mẽ ate amnhĩ kaxyw ixkôt ajamaxpër xwýnhjaja kot kaj mẽ ixte tanhmã amnhĩ nhĩpêx to ho ixpa hã ixpumu nê ixkôt ã amnhĩ nhĩpêx anhyr o ri apa. Kot paj akupým Inhĩpêêxà hwýr api nê kuri ixpa ho ixpa. Ka mẽ ixwakre kamã ixihtýx xà ho tanhmã mẽ akwýjê mã amnhĩ nhĩpêx to ho ri apa.

¹³ —Nê kot kaj mẽ apê ixkwý hã tanhmã mẽmoj tã ixwýr to pa mẽ ama nê mẽ amã tanhmã mẽmoj nhĩpêx to. Mẽ kot omunh nê Inhĩpêêxà mex o mex ã omunh kurê kumrêx kaxyw. ¹⁴ Nà kot kaj mẽ apê ixkwý hã mẽmoj tã ixwý pa mẽ ama nê mẽ amã tanhmã mẽmoj to. Anê.

Jejus kot mẽ pahwýr Tirtũm mẽ wa Karõ rênh ã kot amnhĩ jarênh

Juãw 7.37-39, 16.7-17; Atre 2.1-4; mãânên Rõmãn 5.5; Wam Korõt 12.7-11; Epes 3.16; Wam Juãw 2.27

¹⁵ Nhũm Jejus arĩ mẽ inhmã kapër nê mẽ inhmã:

—Nà kot kaj mẽ amã ixkĩnh hã kot kaj mẽ ixkapër kôt pix mã ri amnhĩ nhĩpêx rãhã ho ri apa.

¹⁶ —Kot paj akupým kaxkwa hwýr api hãmri nê mẽ ato Inhĩpêêxà wý nhũm inhma nê mẽ awýr kot mẽ ato ajuta xwýnh maatita rē nhũm man mẽ awýr wrý nê mẽ akaxwýnh mã agjê. Hãmri nê mẽ akôt tanhmã mẽ ato ajuta hto ho pa rãhã ho pa. ¹⁷ Wa Ixkarõ koja mẽ awýr kurê nhũm mẽ amã agjê. Hãmri nê hprĩ hã mẽ amã Tirtũm kapër o amnhĩrĩt o mẽ akôt pa ka mẽ aprĩ hã mar mex nê. No mẽ kêp Tirtũm kra hkêt xwýnhjaja koja hprĩ hã wa Ixkarõ jarênh mar kêt nê. Mẽ kot wa ixkôt amnhĩ xunhwýr kêt jakamã koja mẽ hkarõ mã gjêx kêt nê. ãm mẽ ate ixkôt amnhĩ nhĩpêx o apa xwýnhjê pix wýr koja wrý nê mẽ awýr agjê nê mẽ akamã pa ho pa.

¹⁸ —Nê ixte mẽ arer nê ma inhmõr mã tã kot kaj mẽ te mẽ hã awrãre pyrã nê ahte atýx ri apa pyrãk kêt nê. Kot paj te pa akupýn mẽ awýr ixwýrk pyrã nê mẽ awýr wa Ixkarõ rē nhũm mẽ akãm agjê nê mẽ akamã pa ho pa.

¹⁹ —Nê koja tokyx mẽ kot amnhĩ kaxyw Tirtũm mã hamaxpër kêt xwýnhjaja axte ixpumunh kêt nê. No mẽ papajaja kot puj mẽ tokyx axte nhỹri axpên pumu.

—Nê kot paj akupým ixtĩr hãmri nê ixtĩr tũm nê ixpa ho ixpa ka mẽ ixkukwak ri ajaxwýja nhỹrmã Tirtũm mẽ wa ixri atĩr tũm nê apa ho apa.

20 —Tã koja wa Ixkarõ mẽ awÿr wrÿ nõ mẽ akarõ mã agjê ka mẽ aprĩ hã Tĩrtũm mẽ wa ixte amnhĩ nhĩpêx ã wa ixpumunh mex kurê kumrêx. Te wa ixte amnhĩ nhĩpêx tipxi pyrãk o ka mẽ hã wa ixpumu. Nê mãânên mẽ papajaja te ra mẽ pahtipxi nõ ri mẽ papa pyrãk ka mẽ hã amnhĩ pumunh mex kurê kumrêx.

21 —Nê mẽ kãm ixkĩnh xwÿnhjaja na htem ixkapêr ma nê hkôt amnhĩ nhĩpêx o pa. Jakamã nhũm Tĩrtũm ixtã mẽ omu nõ kãm mẽ hapê htÿx nõ. Pa mãânên amnhĩ tã mẽ omu nõ inhmã mẽ hapê htÿx nõ. Jakamã kot paj mẽ kãm amnhĩ to amnhĩrit nhũm te mẽ kot no ho ixpumunh pyrãk. Anê.

Nhũm pre ã Jejus hkôt mẽ ixpa ho mẽ ixpa xwÿnhjê mã amnhĩ jarênh anê. 22 Hãmri nhũm Jutre hõja. Jut Kariot kêt axtem Jutre hõja Jejus axte kot mẽ inhmã pix mã kot amnhĩ to amnhĩrit ã harênhja ma nê kãm:

—Kwa aprĩ hã mẽ inhmã mẽmoj jarê mẽ ijahkre xwÿnh. Mon ka mẽ kêp akwÿ hkêt xwÿnhjê mã axte amnhĩ to amnhĩrit kêt ã amnhĩ jarê? Nê ãm mẽ papxipix mã amnhĩ to amnhĩrit ã amnhĩ jarê? Anê.

23 Hãmri nhũm kãm:

—Nã mẽ amã ixkĩnh xwÿnhjaja na ka htem ixkapêr ma nê hkôt amnhĩ nhĩpêx. Nhũm Inhĩpêxã ja hã mẽ apumu nõ ixtã kãm mẽ ajapê htÿx nõ. Hãmri pa wa mẽ akôt ixpa ho ixpa. Jao mẽ amã amnhĩ to amnhĩrit mex o ixpa. 24 Na pa hte amnhĩ krã hkôt ri mẽ kãm ixkapêr o ixpa hkêt nõ. ãm Inhĩpêxã nhÿ hã na pa hte mẽ kãm ixkapêr o ri ixpa. Kot mẽ awÿr inhmênh xwÿnhnta nhÿ hã. Tã nhũm mẽ kãm inhmar prãm kêt jakamã na pa hte wa mẽ kãm mẽ apyrã nõ amnhĩ to amnhĩrit o ixpa hkêt nõ.

25 —E na pa kormã ixte mẽ akôt ri ixpa ri ã mẽ amã amnhĩ jarênh anê. 26 Tã koja Inhĩpêxã ixpãnhã mẽ awÿr wa Ixkarõ rê. Ixte hã mẽ amã ixãhwÿr xã hkôt. Hãmri nhũm man mẽ awÿr wrÿ nõ mẽ akaxwÿnh mã agjê nõ mẽ akôt ri tanhmã mẽ ato ajuta hto ho pa. Nê ra ixte ã mẽ amã ixkapêr anhÿrja koja hprĩ hã mẽ amã ho amnhĩrit mex nõ. Ka mẽ amnhĩ krã kamã kãm ajamaxpêr nõ hã ano htÿx nõ ho apa. Anê.

Jejus kêp mẽ pajamakêtkati nhõr xwÿnh

Rômãn 5.1; Karatas 5.22; Piriapos 4.7; Korosê 3.15

27 Nhũm Jejus arĩ mẽ inhmã kapêr nõ mẽ inhmã:

—Nê mẽ kêp ixkwÿ hkêt xwÿnhjaja na htem tee ri amnhĩ kukamã hamaxpêr o ri pa. Jao hkaprĩ nõ pa. No pa na pa hte mẽ kurom ijamakêtkati nõ ixkĩnh nõ ri ixpa ho ixpa. Tã kot paj tanhmã mẽ ato ka mẽ ixpyrã nõ ajamakêtkati nõ axãmnhix akĩnh nõ ri apa. Jakamã kwa mẽ ixte amnhĩ jarênh ma nê tee ri amnhĩ kukamã ajamaxpêr o amã ma ho ri apa hkêt nõ.

28 —Na pa pre ra mẽ amã ma ixãpir nõ nhÿrmã man akupÿn mẽ awÿr ixwrÿk ã mẽ amã amnhĩ jarê. Tã na pa ra ma akupÿm Inhĩpêxã hwÿr ixãpir mã. Kot amnhĩ to rax o kot ijakrenh. Kot paj akupÿm hwÿr api nõ kuri inhmex nõ ixpa ho ixpa. Tã ka mẽ amã ixkĩnh hã kot kaj mẽ ma akupÿm hwÿr ixãpir ã ijarênh ma nê inhÿ hã akĩnh nõ.

29 —Kormã ma akupÿm ixãpir kêt ri na pa ã mẽ amã amnhĩ kukamã amnhĩ jarênh anê. Kêr pa mẽmo arĩgro hã ma akupÿm api ka mẽ ja hã ixpumu nõ ajamaxpêr o: “Nã ãm hãmri na pre mẽ inhmã amnhĩ kukamã akupÿm Hipêxã hwÿr ãpir ã amnhĩ jarê.” Anhÿr o ajamaxpêr. Jao ixkôt ajamaxpêr tÿx rãhã ho ri apa.

30 —Kot paj tokyx axte tanhmã mẽ amã ixkapêr to hkêt nõ. Mẽ kêp ixkwÿ hkêt xwÿnhjê nhõ pahihiti Satanastija na ra kot tanhmã ixta kaxyw. Nom koja

tee ri tanhmā kām ixto hprām kaprÿ. Kurom ixihtÿx o ixihtÿx o ixte hakrenh par jakamā koja tanhmā ixto hkêt nê. ³¹ Kwār kām tanhmā ixto hprām xà hkôt tanhmā ixto pa omu. Inhmā Inhîpêêxà hkôt ixte amnhî nhîpêx prām jakamā kot paj jahti mā arî xa nhûm te tanhmā kot ixto pyrāk o inhîpêx nom tanhmā ixto hkêt nê. Mē ate inhmā Inhîpêêxà japê htÿx ā xipumunh kaxyw kot paj ā mē anoo mā amnhî nhîpêx anê. Nê mē ate ixte kām tanhmā amnhî nhîpêx to ho ri ixpa rāhā mē kot xipîr ā xipumunh kaxyw. E hāmri. Ma pu mē mō nê amnhî to Tîrtûm wÿ. Anê.

Nhûm pre ā Jejus hkôt mē ixpa ho mē ixpa xwÿnhjê mā kapêr anê. Pa mē kuma nê kânhmā ixkuhê nê inhnojarêt nhûm axte mē inhmā awjarê.

15

*Jejus te kêp mēmo krô pyrāk
Karatas 2.20; Wam Juāw 2.28*

¹ Nhûm Jejus arî mē inhmā kapêr nê mē inhmā:

—Nà te ixpê mēmo pî pê “uwa” anhÿr xwÿnhhta kahkô maati pyrāk. Nê Inhîpêêxaja te kot uwa hkre nê hamâr o pa xwÿnhhta pyrāk. ² Nê mē kot ixkôt amnhî xunhwÿr xwÿnhhaja te mē kot uwa kahkô rûm krô pyrāk. Na hte mē hkwyjaja htÿx ri kêp ixkwÿ hā amnhî jarênh ā amnhî to hêx. Jao te kot krôja rā htā ô hkêt pyrāk. Koja rā htā ô hkêt nê nhûm kot hamâr xwÿnhhaja tee ri omu nê kahkô nê krāhta nê kumê. No koja ô mex nê nhûm omu nê hkînh nê. Hāmri nê rā nê ô rax kaxyw tanhmā ho mex to. Tā na hte Tîrtûm uwa krô jamār xwÿnhhta pyrā nê ā mē ate ixkôt amnhî xunhwÿr xwÿnhjê nhîpêx anê. ³ No mē kajaja na ka prem mē kot ixkwÿ hā amnhî to hêx xwÿnhjê rom ixkapêr mar tÿx nê. Nê amnhî kaxyw inhmā ajamaxpêr nê ixkôt amnhî nhîpêx mex o apa. Jao te mē ate krô rā nê ô rûnh pyrāk o amnhî nhîpêx.

⁴ —Na hte krôja amnhî krā hkôt ô hkêt nê. Ām kahkô pix kukwak ri na hte rā nê ô. Ja pyrā nê kot kaj mē ixkukwak ri pix mā inhmā hprām xà hkôt ri tanhmā amnhî nhîpêx to ho apa. Jakamā kwa kêr ka mē ixkapêr pix măn mar o apa pa mē akôt ixpa ho ixpa. ⁵ Te ixpê kahkô nhûm te mē apê krô pyrāk jakamā kot kaj mē inhmā hprām xà hkôt tanhmā amnhî nhîpêx to ho ri apa nê te krô rā nê ô rûnh pyrāk o amnhî nhîpêx. No kot kaj mē amnhî krā hkôt ri amnhî nhîpêx o ri apa nê te krô grā nê ô hkêt pyrāk o amnhî nhîpêx.

⁶ Na hte uwa krô nhô dônja nhÿri hā krô grā pumu hāmri nê kahkô nê hakā nê ma o mra nê kuwy kamā kurê nê ho hxêt pa. Ja pyrā nê mē kot htÿx ri ixkôt amnhî xunhwÿr ā amnhî jarênh xwÿnhhaja koja mē nhÿrmā amnhî xà htÿx kamā hamak rāhā ho pa.

⁷ —Tā no mē kajaja. Kêr ka mē ixkapêr kôt pix mā amnhî nhîpêx rāhā ho ri apa. Te mē pahtipxi nê ri papa pyrāk o amnhî nhîpêx. Hāmri nê māmri amā hprām xà hkôt mēmoj tā Tîrtûm wÿ nhûm ama nê amā mēmoj tā ate hwÿr xāta kôt kugō. ⁸ Kot kaj mē Inhîpêêxà mē wa ixkapêr kôt amnhî nhîpêx o ri apa nhûm mē piitā ja hā mē apumu nê hamaxpêr o: “Hêxta waa nê. Jajaja na htem Tîrtûm kot amnhî nhîpêx o amnhî nhîpêx o pa. Măn Tîrtûmja mex o mex.” Anhÿr o hamaxpêr.

⁹ —Nê na pa hte Inhîpêêxà kām ijapê pyrāk o inhmā mē ajapê nê. Tā kêr ka mē amarî inhmā mē ajapê hā ri ixkôt amnhî nhîpêx mex o apa. ¹⁰ Na pa hte am Inhîpêêxà kapêr kôt pix mā ri amnhî nhîpêx o ri ixpa. Jakamā na pa hte kām ijapê hā ixkînh nê ri ixpa. Tā kêr ka mē ixpyrā nê ixkapêr kôt pix mā

tanhmā amnhī nhīpêx to ho ri apa. Nê ixpyrà nê inhmā mẽ ajapê hā amnhī pumu nê akīnh nê ri apa.

¹¹—E na pa ā mẽ amā ixkapêr anê. Mẽ ate inhmar nê ixpyrà nê axāamnhīx ajamakêtkati nê akīnh nê ri apa kaxyw. Tā kêr ka mẽ ā amnhī nhīpêx anê nê te pa ixte ā amnhī nhīpêx anhÿr pyràk. Anê.

Jejus kot mẽ pamā axpên kīnh tÿx ā mẽ pamā karô

¹² Nhūm Jejus arī mẽ inhmā kapêr nê mẽ inhmā:

—E kêr ka mẽ te inhmā mẽ ajapê pyràk o mẽ amā axpên japê ho mẽ amā axpên kīnh o ri apa. Jao axpên to mex o ri axpên kôt apa. ¹³ Kojā mẽhō kām hkrāmnhwÿ japê htÿx nê nhūm ra mẽhō mẽmo mÿrapê kot kêp hpīr mã nhūm tee ri hā omu nê nê kām amnhī mẽ nhūm kupī. Hāmri nhūm mẽ ja hā omu nê mẽ kām hkrāmnhwÿ japê htÿx ā nê htyk ā axpên mã harê.

¹⁴⁻¹⁵—E kot paj axte mẽ apê inhmā mẽ axapênh xwÿnh ā mẽ ajarênh kêt nê. Na hte mẽ ô patrāwjaja hpri hā kām mẽ apênh xwÿnhjê mã amnhī jarênh kêt nê. Na htem âm mẽ apênh pix ā mẽ kurê. Nom mẽ kajaja mẽ ate ixkapêr mar nê hkôt pix mã amnhī nhīpêx jakamā kot paj hpānhā mẽ apê ixkrāmnhwÿ hā mẽ ajarê. Na htem axpên to hkrāmnhwÿ nê ma nhÿhÿm pa kaxyw nê tanhmā amnhī kukamā hkrāmnhwÿ mã amnhī jarênh to. Tā mẽ apê ixkrāmnhwÿ jakamā na pa hte ā amnhī kukamā mẽ amā amnhī jarênh anê. Nom ja pix jarênh kêt nê. Na pa hte mãānēn Inhīpêêxā xô ri mẽ amā mẽmoj piitā ho amnhīrit o mẽ akôt ixpa.

¹⁶—Nê mẽ kajaja na ka prem ixpê mẽ akrāmnhwÿ kaxyw ixām kêt nê. Pa na pa pre amnhī kaxyw inhmā mẽ aprām. Ixkapêr kôt pix mã ri mẽ ate tanhmā amnhī nhīpêx to ho apa kaxyw. Te uwa krô ô rūnh nê aa grā hkêeta pyràk. Jakamā kot kaj mẽ mẽmoj tā Inhīpêêxā wÿ nhūm mẽ ama nê mẽ ate mẽmoj tā hwÿr xā hkôt amā kugô.

¹⁷—E. Kwa kêr ka mẽ amā axpên kīnh nê tanhmā axpên to ajuta hto ho axpên mã mẽmoj kutā anojarêt pix o mǎn kêt ri apa. Nà ja na kêt inhmā hpřam. Anê.

Mẽ kot Jejus kwÿjê kamā gryk xwÿnhjê jarênh

Matêwre 10.22; mãānēn Juāw 7.7, 17.14; Wam Juāw 3.13

¹⁸—Nê koja ixkwÿ hkêt xwÿnhjaja kām mẽ aprām nōkati. Tā kêr ka mẽ amnhī tā mẽ omu nê tee ri amnhī kukamā ajamaxpêr kêt nê. Ixkumrêx na prem kām ixpřam nōkati. Tā koja mẽ mã ixtā mẽ ato anê nê kām mẽ aprām kêt nê. ¹⁹ Mẽ apê mẽ hkwy rōnhÿx mẽ amnhī tā mẽ apumu nê kām mẽ ajapê nê. Nom apê mẽ hkwy hkêt. Ra ixte amnhī kaxyw mẽ arênh jakamā na htem tee ixtā mẽ apumu nê kām mẽ akīnh kêt o kām mẽ akurê nê. ²⁰ Kojā mẽ ixtā hpijaam kêt nê nê mãānēn mẽ atā hpijaam kêt nê. Nê mẽ anhīpêx o te mẽ kot pa ixpê mẽ anhō patrāw nhīpêx pyràk. Ka mẽ ixpyrà nê amnhī xā htÿx kām ajamak o ri apa. Na pa pre ra mẽ amā ja jarê. Nom koja mẽ akwÿjaja jajê rom te ra mẽ kot ixkapêr mar nê hkôt amnhī nhīpêxta pyrà nê mãānēn mẽ akapêr ma nê hkôt amnhī nhīpêx o pa. Kwa kêr ka mẽ ixkapêrja mã mǎn ajamaxpêr tÿx rāhā ho ri apa.

²¹—Kojā mẽ ixtā tanhmā mẽ anhīpêx to. Mẽ kot Tirtūm kapêr kôt amnhī nhīpêx kêt jakamā koja mẽ ā ixtā mẽ anhīpêx anê. Tirtūm kot mẽ awÿr inhmēnh kôt hamaxpêr kêt nê ā mẽ anhīpêx anê. ²² Ixwÿrk nê mẽ kām Tirtūm kapêr jarênh o ri ixpa htā nhūm mẽ inhma nê âm inhma nê ixkôt amnhī

nhĩpêx kêt nê. Jakamã koja mẽ kot amnhĩ tomnuj xwýnh ã amnhĩ to hpimxur kêt nê.

²³ —Nê koja mẽhõ kêp ixprãm nõkati nê mãânên te kêp Inhĩpêexà prãm nõkati pyræk. ²⁴ Na pa pre mẽ piitã mẽ hkôt aa mẽ kot mẽmoj pumunh kêt kwý ho anhýr o ri mẽ hkôt ixpa nhũm mẽ hã ixpumu. ãm papxipix na pa pre ã amnhĩ nhĩpêx anhýr o ri mẽ hkôt ixpa nhũm mẽ hã ixpumu. Kêp ãm mẽ kot ja hã ixpumunh kêt ronhýx prem axpên mã ijarêh: o: “Tk. Mẽ pahte mẽhõja nhýhýnh mẽ pahwýr hpóx ã omunhre hã kot puj kêt mẽ ri hã pahpijaãm o ri papa.” Anhýr o nhýx prem axpên mã ijarê. Tã ra mẽ kot ja hã ixpumunh mex tã axtem nê Inhĩpêexà mẽ wa mẽ kãm wa ixkurê nê. Jao mẽ kot amnhĩ tomnuj xwýnh ã amnhĩ to hpimxur kêt nê. ²⁵ No Tirtũm kapêr ã kagã htũm kot mẽ hkukamã mẽ harênh nê mẽ hã kagã nê kot mẽ hã kagã kot: Mẽmo tanhmã kute myrapê na htem kãm ixkurê? Nã ãm amarĩ na htem kãm ixkurê ho pa. Anê.

Tã ã ixtã kagã kot anhýr xã hkôt na htem ã kãm ixkurê anê. Jakamã koja mẽ mãânên ixtã kãm mẽ akurê nê. Nom kër ka mẽ arĩ mẽ kãm ixkapêr jarênh o ri mẽ hkôt apa nê tee ri amnhĩ kukamã ajamaxpêr kêt nê.

²⁶ —Nê tokyx ma akupým Inhĩpêexà hwýr ixãpir mã tã kot paj hwýr pøj nê aa mẽ ato ijamakêtkati hkêt nê. Kot paj amnhĩ pãnhã mẽ awýr wa Ixkarõ rê. Mẽ kot kãm: “Mẽ kutã nojarêh xwýnh maati” anhýr xwýnhnta kot paj mẽ awýr kurê nhũm ixpãnhã mẽ awýr wrý nê mẽ amã agjê nê hprĩ hã mẽ amã Tirtũm mẽ wa ixto amnhĩrit o ri mẽ akôt pa. ²⁷ Kot kaj mẽ ama hãmri nê ma mẽ piitã mẽ hkôt ri mẽ kãm ixkapêr jarênh o ri apa. Na pa pre ra mẽ kãm Tirtũm kapêr jarênh ryy ho mẽ hkôt ri ixpa ka mẽ ixkôt ri inhmar o apa ry nê. Jakamã kër ka mẽ ixwakre kamã arĩ mẽ kãm ixkapêr jarênh o ri mẽ hkôt ri apa. Anê.

16

1 Nhũm Jejus arĩ mẽ inhmã kapêr nê mẽ inhmã:

—Nê mẽ kot nhýrmã ixtã tanhmã mẽ anhĩpêx to nhũm mẽ ate tee ri amnhĩ kukamã ajamaxpêr nê mẽ umaj ixkaga pymaj na pa hte ã mẽ amã ixprĩ hã mẽmoj jarênh ry anê. ² Kot kaj mẽ kãm ixkapêr jarênh o ri apa nhũm mẽ hkwyjaja tee ri mẽ ama nhũm ja mẽ kêp omnuj nê. Nhũm mẽ Tirtũm kapêr o mẽ ahkre xã hã ixkreja rũm amnhĩ nê mẽ ajano nê mẽ akwýjê hpar o pa. Hãmri nê hamaxpêr o: “E pu mẽ axte mẽ hkwyjê pynê nê mẽ kupa. Tirtũm kãm ja mex kênã.” Anhýr o htýx hamaxpêr o pa. ³ Mẽ kot hprĩ hã Inhĩpêexà mẽ wa ixkapêr mar mex kêt nê ã htýx wa inhmã ja mex ã wa ijarênh anê. ⁴ Nom mẽ ate ixkôt amnhĩ xunhwýrta krax kãm na pa pre ã mẽ amã mẽ harênh anhýr kêt nê. Arĩ mẽ akôt ixpa kênã. Kot ka mẽ ixkôt apa rãhã amã mẽ uma hkêt nê. Tã pa ra akupým inhnojarêh nê ã mẽ amã mẽ harênh anê. Jakamã koja mẽ nhýrmã ã mẽ anhĩpêx anê ka mẽ amnhĩ tã mẽ omu nê ra ixte mẽ akukamã ã mẽ harênh anhýrja mã ajamaxpêr kurê kumrêx nê tee ri amnhĩ kukamã ajamaxpêr kêt nê. E kwa ixkapêrja mãn mẽ amnhĩ krã him haxãr týx nê ri hã apa. Anê.

Jejus mẽ Tirtũm wa hkarõ jarênh

⁵⁻⁶ Nhũm Jejus arĩ mẽ inhmã kapêr nê mẽ inhmã:

—E na pa ra kot mẽ awýr inhmênh xwýnhnta wýr ra akupým inhnojarêh ka mẽ ixte amnhĩ jarênh ã inhma nê akapri nê. Nê tee ri amnhĩ kukamã ajamaxpêr tã mẽ atõ aprĩ hã ma inhmõr xã ã ixkukjêr kêt nê. Rý inhmã: “Kwa mo kaxyw kot kaj kêt mẽ ixre nê ma akupým mõ? Xã we ja amã mex?” Anhýr

o mẽ atõ ixkukjêr kêt nê. ⁷ Kêt ma akupÿm ixàpirja mẽ amã mex kumrêx. Kop ãm akupÿm ixàpir kêt ronhÿx mẽ amã mẽmoj kutã nojarêt xwÿnhnta ixpãnhã mẽ awÿr wrÿk kêt nê. Tã kot paj ma akupÿm api nê amnhÿ pãnhã mẽ awÿr kurê. Jakamã kwa mẽ ja ma nê tãm ajamaxpêr o ri apa. ⁸ Koja ixpãnhã mẽ awÿr wrÿ hãmri nê mẽ kêp ixkwÿ hkêt xwÿnhjê mã mẽmoj to axkrunêpxi nê ho amnhÿrît. Koja mẽ kãm mẽ kot tanhmã amnhÿ tomnuj to xà ho amnhÿrît. Nê mãânên mẽ kãm tanhmã mẽ kot amnhÿ to mex to xà ho amnhÿrît. Nê mãânên Tirtùm kot nhÿrmã mẽ kot amnhÿ tomnuj mÿrapê tanhmã mẽ homnuj to xàta nhùm mãânên mẽ kãm ho amnhÿrît. Koja mẽ kãm ja piitã ho amnhÿrît.

⁹ —Jakamã koja mẽ ja kukamã tanhmã hamaxpêr to nê hamaxpêr o: “Kwa kot paj xep amnhÿ tomnuj kaga nê amnhÿ kaxyw Tirtùm Kra Jejus mã ijamaxpêr nê hkôt amnhÿ xãm kêt nhùm Tirtùm nhÿrmã ixte amnhÿ tomnuj mÿrapê tanhmã ixto. ¹⁰ Nã kot paj hkôt amnhÿ xãm hãmri nê ra urak nê Tirtùm kapêr kôt tãm ri amnhÿ nhÿpêx o ixpa. Na pre Jejus tãm ri amnhÿ nhÿpêx o pa nhùm Tirtùm amnhÿ wÿr ho api pa mẽ axte jar nhÿri omunh kêt nê. ¹¹ Na xep Tirtùm nhÿrmã kot ma kuwy hwÿr mẽ kêp Jejus kwÿ hkêt xwÿnhjê nhõ pahi maatija mẽnh ã ra amnhÿ kukamã hã amnhÿ jarê. Jakamã kwa arÿ ixpê hkwy jakamã kot paj tokyx Jejus kôt amnhÿ xãm kêt nhùm hkôt kuwy hwÿr inhmê.” Anhÿr o hamaxpêr. Koja ã wa Ixkarõja mẽ kêp ixkwÿ hkêt xwÿnhjê mã mẽmoj to amnhÿrît mex anê.

¹² —Nê na pa kormã mẽ amã mẽmoj piitã ho amnhÿrît kêt nê. Kormã mẽ ate aprÿ hã mẽmoj pumunh nê mar mã tãm kêt. ¹³ Tã koja ixpãnhã wa Ixkarõ mẽ awÿr wrÿ nê mẽ akarõ mã agjê hãmri nê hprÿ hã mẽ amã Tirtùm kot amnhÿ nhÿpêx o amnhÿrît o mẽ akôt pa ho pa. Nom koja amnhÿ krã hkôt tanhmã mẽ amã ho amnhÿrît to hkêt nê. Koja ãm Tirtùm pix xô ri mẽ amã ho amnhÿrît o mẽ akôt pa. Jao hprÿ hã mẽ amã ixkôt mẽ ate amnhÿ nhÿpêx nyw o mẽ amã amnhÿrît o mẽ akôt pa. Á koja hprÿ hã ra ixte mẽ amã ixujarênh xà hkôt axte mẽ amã mẽmoj to amnhÿrît mex o pa anê.

¹⁴ —Nê koja hprÿ hã mẽ amã pa ixto amnhÿrît o pa. Jao mẽ amã inhmex o inhmex ã ixto amnhÿrît o mẽ akôt pa. ¹⁵ Inhÿpêêxã mẽ wa ixkapêrja ãm htÿpxi. Tã koja wa Ixkarõ ixkapêr xô ri ã mẽ amã mẽmoj to amnhÿrît anê. Jao ra wa ijamê wa ixkapêr o amnhÿrît mex o pa. Koja ã wa mẽ apê ixkwÿ hã mẽ ato mex o pa anê. Anê.

Mê kot akupÿm Jejus tÿr ã omunh ã mẽ harênh

¹⁶ Nhùm Jejus arÿ mẽ inhmã kapêr nê mẽ inhmã:

—Nê kot paj tokyx mẽ ano pê akunok ka mẽ axte amnhÿ kaêx ã ixpumunh kêt nê. Nom kwa kêr ka mẽ tee ri ixkapêrja kukamã ajamaxpêr kêt nê. Kot paj ixtã apkati grêre ka mẽ axte ixpumu. Anê.

¹⁷⁻¹⁸ Nhùm pre ã Jejus hkôt mẽ ixpa ho mẽ ixpa xwÿnhjê mã kapêr anê. Pa mẽ tee ri ã kapêr anhÿr ã kuma nê xapên mã:

—Kwa mo na ri ã amnhÿ jarênh anê? Nê tokyx mẽ pano pê pikunor tã hã apkati grêre nhùm axte mẽ pahte omunh ã amnhÿ jarê nê akupÿm Hipêêxã hwÿr àpir ã amnhÿ jarê. Pêr kapêrja ãm ri katii. Anê.

¹⁹ Nhùm amnhÿ tã mẽ inhma nê mẽ inhmã:

—Kwa xà na ka mẽ kormã aprÿ hã ixkapêr ã inhmar kêt nê? ²⁰ Kot paj ty nhùm mẽ kêp ixkwÿ hkêt xwÿnhjaja ijarênh ma nê hkÿnh nê. No mẽ kajaja kot kaj mẽ akaprÿ nê amÿr o apa. Nê gaa nê akupÿm akÿnh nê. Kwa mẽ ixkapêrja ma nê kãm ajamaxpêr tÿx o apa. ²¹ Te mẽ ate mẽ hpÿjagri xwÿnh kot amnhÿ nhÿpêx pyrãk. Na htem õhy xà nê gaa nê ra õhy xà htÿx nê. Nê hkÿnh kêt nê tee

ri amnhĩ nhĩpêx o hikwỹ. Tã gaa nê hpijagri nhũm hkrare kato nhũm omu nê akupỹm hkĩnh nê axte õhy xà htỹx mã hamaxpêr kêt nê. ²² Tã ã mē ate amnhĩ nhĩpêx anhỹr kaxyw. Kot kaj mē akĩnh kêt nê ri apa. Tã kot paj akupỹm tokyx ixtĩr nê axte mē awỹr ixkato ka mē ixpumu nê akĩnh nê. Hãmri nê akĩnh rãhã ri apa ho apa. Nhũm mēhõ mē apumu nê tee ri tanhmã mē akĩnh nê mē ato kaprỹ ka mē arĩ akĩnh rãhã ri apa ho apa.

²³ —Nê ixte akupỹm kaxkwa hwỹr ixàpir nê amnhĩ pãnhã mē awỹr wa Ixkarõ rēnh nhũm mē awỹr wrỹk nê hprĩ hã mē amã mēmoj piitã ho amnhĩrĩt jakamã kot kaj mē axte amã mēmoj tã ixkukjêr prãm kêt nê. Anê.

*Jejus kwỹjaja kot àmnhĩx mēmoj tã Tĩrtũm wỹr
Matêwre 18.19-20; Juāw 14.13-14*

Nhũm Jejus arĩ mē inhmã kapêr nê mē inhmã:

—E kwa mē ã ixkapêr anhỹrja ma nê amnhĩ krã kamã kãm ajamaxpêr tỹx nê ho apa. Kot kaj mē apê ixkwỹ hã mēmoj tã Inhĩpêêxã wỹ nhũm mē ama nê mē ate hã axàhwỹr xà hkõt mē amã mēmoj tanhmã ho rỹ mē amã mēmoj gõ. ²⁴ Na ka mē kormã apê ixkwỹ hã mēmoj tã axàhwỹr kêt nê. Tã kêr ka mē amã mēmoj tã hwỹr prãm nê mãmri mēmoj tã hwỹr o apa. Kê mē ama hãmri nê tanhmã mē amã mēmoj nhĩpêx to ka mē amnhĩ tã omu nê akĩnh nê.

²⁵ —Nê na pa pre mē amã mēmoj jarēnh kaxyw nê mēmoj tã haxwỹ nê mē amã ixujarēnh rax nê. Nom kot paj axte ã mē amã ri ixujarēnh anhỹr kêt nê. Kot paj tã ixprĩ hã mē amã tanhmã Inhĩpêêxã jarēnh to ka mē aprĩ hã mar mex kurê kumrêx. ²⁶ Hãmri nê mē kamjaja mē apê ixkwỹ hã tanhmã amnhĩ to hwỹr to ho apa. Jakamã mo kaxyw kot pa kêt axte tanhmã mē ato hwỹr to? Kot kaj mē kamjaja amnhĩ to hwỹr jakamã arĩ ixte mē ato hwỹr kaxyw ixto presija hkêt nê.

²⁷ —Na ka mē ra amã ijapê nê. Nê ixte Inhĩpêêxã rũm mē awỹr ixwrỹk ã ixpumu. Jakamã nhũm Inhĩpêêxãja ixtã mããnen kãm mē ajapê nê. Tã kot kaj mē kamjaja mēmoj tã amnhĩ to hwỹr o apa nhũm mē ama nê kãm mē ajapê htỹx kãm mē amã mēmoj gõ.

²⁸ —Na pa pre Inhĩpêêxã rũm amnê mē awỹr wrỹ. Hãmri nê kãm hprãm xà hkõt tanhmã amnhĩ nhĩpêx to hpar o mō nê ra akupỹm hwỹr inhnojarêt kaxyw. Anê.

Nhũm pre ã Jejus mē inhmã amnhĩ jarēnh anê. ²⁹ Pa mē tã ixprĩ hã mar mex nê. Hãmri nê kãm:

—Tỹ. Nã na pa mē tã ixprĩ hã ate amnhĩ jarēnh ma. Ka amnhĩ tã haxwỹr nê axujarēnh kêt jakamã pa mē tã ixprĩ hã amar mex nê. ³⁰ Pêr ãm ate mēmoj piitã omunh par xwỹnh na ka. Jakamã ate mē ijamaxpêr piitã hkõt aprĩ hã mē ixpumunh par kumrêx kênã kot ka tanhmã mē ijamaxpêr to hã mē ixkukja. ãm hãmri na ka Tĩrtũm rũm awrỹk ã amnhĩ jarê. Anê.

³¹ Hãmri nhũm mē inhma nê mē inhmã:

—Xã ãm hãmri na ka mē ixkõt ajamaxpêr tỹx nê? ³² Kwa mē o kora. Kot kaj mē tokyx mē umaj ixre nê anhrã nê ma ahpỹnhã mē anhõ krĩ hwỹr mra. Mē kot ixkõt tanhmã mē anhĩmex to pymaj kot kaj mē ã amnhĩ nhĩpêx anê kãm ga. Kot paj ahte mē kãm ixãm pyrãk o amnhĩ nhĩpêx nom ahte ixãm kêt nê. Inhĩpêêxã aa kot ixrere hã.

³³ —E ixkukwak ri mē ajamakêtkati nê axãmnhĩx mē apa kaxyw na pa ã mē amã ixkapêr anê. Nom mē kêp ixkwỹ hkêt xwỹnhjaja koja nhỹrmã ixtã mē atomnuj tỹx o pa. Tã kêr ka mē amã mē uma nê tee ri amnhĩ kukamã

ajamaxpêr o ri apa hkêt nê. Nhÿrmã ixte mêmôj punuj piitã ho ijapêx par ã arÿgrota ã kot paj mê atã mê ho ijapêx par kumrêx. Anê.

17

Jejus kot amnhî to Tirtûm wÿr ã harênh
Rômãn 8.34; Eprêw 7.25

¹ Tã nhÿm Jejus mê inhmã kapêr pa nê hpãnhã kaxkwa hwÿr rît nê Tirtûm mã amnhî jarê nê kãm:

“Pa Papaj. E na pa ra amã hprãm xà hkôt tanhmã amã amnhî nhîpêx to hpar o mō nê akupÿm awÿr inhnojarêt kaxyw. Jakamã kot kaj ixpê Akra hã ma akupÿm amnhî wÿr ixto api. Mê kot ja hã ixpumunh nê amã amex o amex ã ajarênh o pa kaxyw. ² Na ra pyka piitã hkôt ri mê pa xwÿnh kwÿjaja amnhî kaxyw ixkôt hamaxpêr nê ixkôt amnhî xunhwÿ nom ka na ka pre inhmã mê agō. Ixte mê htîr tûm nê mê pa mã xwÿnh ã mê harênh kaxyw. Jakamã koja mê nhÿrmã ixkukwak ri pakuri htîr tûm nê pa ho pa. ³ Na mê ra ixkapêr mar mex nê. Nê ixpê Jejus Kris pê ate mê hwÿr inhmênh xwÿnhja kôt hamaxpêr mex nê. Nê apê Tirtûm ã am apyxi mex ã mãânêh akôt hamaxpêr mex nê. Nê amex o amex ã akôt hamaxpêr nê kãm akînh nê. Jakamã koja mê nhÿrmã pakuri htîr tûm nê pa ho pa. Nã koja mê anê.

⁴ Amnepê m amnê pyka ja hwÿr inhnojarêt nhÿm ate tanhmã ixte amnhî nhîpêx to hã inhmã karôta na pa ra hatur xãm mênh kaxyw. Na pa xatã mê kãm akapêr jarênh o ri mê hkôt ixpa. Jao ra mê kãm apê Pahi Maati hã apixi mex ã ajarê nê amex o amex nê axãhpumunh o axãhpumunh ã mê kãm ajarênh o ri xpa. ⁵ Jakamã e Papaj. Kêr ka tokyx ixpê akra hã ma akupÿm amnhî wÿr ixto api. Pa akupÿm awÿr pōj nê te amnepê m akuri ixpaja pyrà nê axte akuri ixpa ho ixpa.” Anê.

Jejus kot hkwyjê ho Tirtûm wÿr ã harênh

Nhÿm Jejus arî Tirtûm mã kapêr nê kãm:

⁶ “E Papaj. Nã ra ate pyka hkôt inhmã mê ôr xwÿnhjaja na pa ra mê kãm akapêr jarênh ryy ho ri mê hkôt ixpa nhÿm mê akapêr kôt pix mã amnhî nhîpêx o pa. ⁷ Tã ixte anhÿ hã tanhmã amnhî nhîpêx to ho ri ixpaja ra mê kot ja hã ixpumunh mex. ⁸ Na pa pre hte axô ri mê ahkre ho ri ixpa nhÿm mê amnhî kaxyw ixkôt hamaxpêr mex nê. Nê ate mê hwÿr inhmênh nhÿm mê hwÿr ixwÿrkja ã mê kot ixpumunh mex.

⁹⁻¹⁰ Tã ot pa mê ho awÿr o xa. Nom na pa mê kêp ixkwÿ hkêt xwÿnhjê ho awÿr kêt nê. Am ate inhmã mê ôr xwÿnhjê pix o na pa awÿ. Mê kêp akra jakamã mãânêh mê kêp ixkraa. Jakamã na htem pamã pamex o pamex ã pajarênh o ri pa.

¹¹ Axihtÿx o axihtÿx jakamã na ka pre amnhî xwar inhmã axihtÿx xã hkwy gō pa te ixte axihtÿx pyràk. Tã na pa ra akupÿm awÿr inhnojarêt kaxyw. Kot paj jar pyka hkôt ri ixpa ry hkêt nê. Nom ixkwÿjaja koja mê arî kamã pa jakamã kwa Papaj. Kêr ka inhmã mê omunh mex nê kê mê inhÿ hã tãm ri amnhî nhîpêx o pa. Nê pahpyrà nê te ixkre tipxi kamã mê htîpxi nê mê pa pyràk o axpên kôt pa.

¹² Kormã mê kamã ixpata ã ate inhmã axihtÿx xã hkwy nhôrta o pa mê htãnopxar mex o ri mê hkôt ixpa. Jakamã nhÿm mê ri ixkôt amnhî nhîpêx o pa. Am Jut Kariot pix koja mê hkînhã tanhmã amnhî tomnuj to nê hapêx.

No ãm ra akapêr ã kagà kot hkukamã ã kot amnhĩ nhĩpêx anhÿr ã harênh xàja kôt koja ã amnhĩ nhĩpêx anê nê hapêx.

¹³ Tã na pa ra akupÿm awÿr inhnojarêt kaxyw jakamã na pa ixte tokyx mẽ rer mã xwÿnhjê ho awÿr o xa. Kormã mẽ hkôt ri ixpa ri. Mẽ kot inhmar nê ixpyrà nê hkĩnh nê hamakêtkati nê ri pa kaxyw. ¹⁴ Na pa pre ra mẽ kãm akapêr jarênh ry nê nhũm mẽ ixpyrà nê akôt pix mã amnhĩ nhĩpêx o ri pa. Jakamã nhũm hte mẽ kêp ixkwÿ hkêt xwÿnhjaja tee ri ja hã mẽ omu nê axtem nê kãm mẽ hkurê nê. Nom mẽ kêp mẽ hkwy hkêt jakamã na htem ã mẽ kamã gryk anê.

¹⁵ Tã na pa ã mẽ ho awÿr anhÿr o xa. Nom mẽ kot amnhĩ tomnuj xwÿnhjê hkàx ã mẽ pa kaxyw na pa mẽ ho awÿr kêt nê. Koja mẽ arĩ mẽ hkôt ri pa. Nom mẽ urak nê amnhĩ tomnuj o pa pumaj na pa ã mẽ ho awÿr anê. ¹⁶ Mẽ kêp mẽ hkwy hkêt. Axtem mẽ kot amnhĩ nhĩpêx. Te mẽ kot mẽ pahte amnhĩ nhĩpêx pyrãk jakamã kê mẽ amarĩ mẽ hkôt pa htã mẽ kot amnhĩ nhĩpêx kôt amnhĩ nhĩpêx o pa hkêt nê. ãm pahkôt pix mã amnhĩ nhĩpêx o pa. ¹⁷ Akapêr pix na mex o mex jakamã koja mẽ hkôt amnhĩ nhĩpêx o pa nê gaa nê te pahte amnhĩ nhĩpêx pyrãk o amnhĩ nhĩpêx.

¹⁸ Na ka pre amnê mẽ hwÿr inhmẽ pa pre ixte mẽ kãm akapêr jarênh o ri ixpa kaxyw mẽ hwÿr wrÿ. Nê amnhĩ pyrã nê mẽ kot akapêr jarênh o mẽ hkôt pa kaxyw pa mẽ kurê nê ma mẽ hwÿr mẽ kurê. ¹⁹ Inhmã mẽ hapê jakamã kot paj amnhĩ grônh kôt nhãm mẽ kot axpên mã ri inhgrônh o pa xwÿnhjê mã amnhĩ gô. Amã hprãm xà hkôt. Ixkwÿjaja kot ja hã xpumunh nê ixpyrà nê amã hprãm xà hkôt pix mã tanhmã amnhĩ nhĩpêx to ho pa kaxyw.” Anê.

Jejus kot hkrajê piitã ho Tirtũm wÿr

²⁰ Nhũm Jejus arĩ Tirtũm mã amnhĩ jarê nê kãm:

“Tã na pa ã jajê ho awÿr anê Papaj. Nom ixkôt mẽ pa ho mẽ pa xwÿnhjê pix o na pa awÿr kêt nê. Mãânên mẽ ô ri nhÿrmã mẽ kot ixkôt amnhĩ xunhwÿr mã xwÿnhjaja na pa mẽ ho ixpimràã tã mẽ ho awÿ. ²¹ Kê mẽ pahpyrà nê te hamaxpêr tipxi pyrã nê ri axpên to pa. Nê pahte amnhĩ nhĩpêx kôt pix mã amnhĩ nhĩpêx o pa. Koja mẽ ã amnhĩ nhĩpêx anhÿr o pa nhũm mẽ kêp pahkwÿ hkêt xwÿnhjaja pahtã mẽ omu nê ate mẽ hwÿr inhmênã ã apumunh kurê kumrêx.

²² Nê koja mẽ ixkukwak ri panhÿ hã te pahpyrà nê hamaxpêr tipxi nê ri pa pyrãk o amnhĩ nhĩpêx o pa. ²³ Na pa htem te ixkre tipxi kamã mẽ ixtipxi pyrãk o axpên nhĩpêx o ri ixpa. Te pahte axpên nhĩpêxta pyrãk. Tã koja mẽ ixwakre kamã ã axpên nhĩpêx anhÿr o pa nhũm mẽ kêp pahkwÿ hkêt xwÿnhjaja ja hã mẽ omu nê hamaxpêr o: ‘Na pêr ãm hãmri na pre Tirtũm tãm mẽ pahwÿr Jejus mẽ. Kãm hapê htÿx tã mẽ pahwÿr kumê nhũm wrÿ nê amnhĩ xwar kãm hkwyjê japê nê.’ Anhÿr o koja axpên mã pajarênh o pa.

²⁴ Amnepêm amrakati ri pa pre amã ijapê hã ri ixpa. Tã ot pa jajê ho awÿ. Ka na ka pre inhmã mẽ agô. Tã ma awÿr inhmôr mã xàta wÿr na pa inhmã mẽ ãpir prãm nê. Koja mẽ nhÿrmã ma pahwÿr api pu mẽ pahpiitã pahpimràãtã pamã axpên japê hã ri papa ho papa.

²⁵ E Papaj. Amex o amex tã mẽ kêp ixkwÿ hkêt xwÿnhjaja na kormã ate mẽ hwÿr inhmênã xwÿnh ã ixkôt hamaxpêr kêt nê. Nom mẽ kot ixkôt amnhĩ xunhwÿr xwÿnhjaja na mẽ kurom ja hã ixkôt hamaxpêr mex nê.

²⁶ Na pa ra ixprī hã mē kãm akapêr o amnhîrît o ri ixpa. Tã kot paj axte mē kãm akapêr kwý jarê. Amã ijapêta pyrã nê mē kãm axpên kînh ã axpên to pa kaxyw na pa mē kãm hã karô. Kot paj inhî hã mē hkôt ixpa hkêt tâ koja Pahkarôja mē hwýr wrý nê mē hkarô mã agjê nê te pa mē hkôt ixpa pyrãk o mē hipêx. Ja na pa inhmã hprãm. Tã koja anê. Jakamã na pa ã mē ho awýr anê. Tã ãm ja pix Papaj.” Anê.
Nhũm pre ã Jejus ô Papaj mã mē inhnoo mã amnhî jarênh anê pa mē xpiitã hã kuma.

18

Mê kot Jejus pynênh ã mē harênh

Matêwre 26.47-56; Makre 14.43-50; Rukre 22.47-53

¹ Tã nhũm Jejus mē ixto Hipêêxã hwýr pa. Hãmri nê ixkreja rùm ma tē nê Jerujarê rùm kato nê ma gô pê Kirô hwýr tē pa mē hkôt ixpa ho ixpa xwýnhjaja ma hkôt mra. Nê gô hã rê nê hikjê hã mē kot mêmô pî hkô hkre xwýnhjaja wýr mra nê parpê ixkrî hpa. ² Na pre hte Jejus xatã hwýr amnhî kôt mē ixto pa ho kuhê. Jakamã nhũm Jut Kariot kot mē kãm ôr mã xwýnhhta ra kot hwýr mē ixpa ho ixkuhê xãta pumunh mex. ³ Jakamã pa mē hwýr pøj nê ixkrî hpa nhũm mē mē ixwýr mra. Jut Kariot mē pôristijaja. Rôm nhô xwýnhjê nhô pôristijê mē patre nhô pôristijaja nhũm mē mē ixwýr Jut Kariot kôt mra. Ijaew nhô pahijê nhý hã mē ixwýr mra. Piitã wapohti jamý nê pô hpôk nê kanê jamý nê mē ixwýr hpôk o kato. ⁴⁻⁵ Hãmri nhũm Jejus amnhî wýr mē omu nê kãnhmã xa nê ma mē kutã tē. Jut Kariot kot mē kãm ôr kaxyw nhũm amnhî tã omunh mex jakamã amnhî wýr mē omu nê ma mē kutã tē. Hãmri nê mē hkaxpa nê mē omunh o xa nhũm Jut Kariot mē kuri xa nhũm Jejus mē omu nê mē kãm:

—Pa. Mêmôj japêr na ka mē pô hpôk o ri apa? Anê.

Hãmri nhũm mē kãm:

—Nã Jejus pê Najare nhô xwýnh japêr o na pa mē ri ixpa. Anê.

Hãmri nhũm mē kãm:

—Tý ot pa xa. Pa na ixpê Jejus. Anê.

⁶ Hãmri nhũm mē kuma nê tee ri axpên pumu nê umaj katê ho axkamê nê kuhê. Nom katê ho pikamênh o ra rôrôk pa nê hikwý. ⁷ Hãmri nê kãnhmã kuhê hpa nhũm Jejus axte mē kãm:

—Kwa mē inhmã amnhî jarê. Mêhõ japêr o na ka mē apa? Anê.

Hãmri nhũm mē kãm:

—Jesús pê Najare nhô xwýnhhta japêr o na mē ri ixpa kênã. Anê.

⁸ Hãmri nhũm mē kãm:

—Kwa ra ixte mē amã amnhî jarênh kênã. Paa. Ijapêr o na ka mē ri apa. Jakamã kwa kêr ka mē ixkôt ri mē pa xwýnhhtaja tanhmã mē ho hkêt nê. Kê mē mãmrî anhrã nê ma mra.

⁹ Anhýr o mē inhnê mē kãm kapêr. Na pre ra ham Hipêêxã mã mē ixtã kãm amnhî jarê nê kãm:

—Kormã mē kamã ixpa ri ate inhmã ixihtýx xã nhôrta o na pa mē htãnopxar mex o ri mē hkôt ixpa.

Anhýr o mē ixtã kãm amnhî jarênh jakamã nhũm ã mē inhnê mē kot unênh mã xwýnhjê mã kapêr anê.

Simãw Pêtre kot mêhõ pê hamak krãhyr ã harênh

Matêwre 26.51-54; Makre 14.47; Rukre 22.49-51

¹⁰ Hãmri nhũm Simãw Pêtre tee ri Jejus ã mē omu hãmri nê ô wapo kapa nê jam ho apê nê ho hamak nhîkjê krãhta. Mawti jamak krãhta. Mawtija mēô

patre mā apênh xwÿnhjê hō na pre nhūm Simāw Pêtre hamak krāhta. ¹¹ Hāmri nhūm Jejus ja hā omu nē nē kām kapēr nē kām:

—Tk. Kwa nā amari xa nē akupÿm awapota hkām haxà. Ixte mē anē amnhī xà htÿx kamā ijamak kaxyw na pa pre Inhīpêxà rūm amnē mē awÿr pika hwÿr wrÿ. Kêt inhmā kām hprām xà hkôt pix mā na inhmā tanhmā amnhī nhīpêx to ho ixpa hprām. Jakamā kwār mē māmri tanhmā kām ixto hprām xà hkôt māmri tanhmā ixto. Anē.

Mē kot Anas wÿr Jejus o htēm ā mē harēnh

Matêwre 26.57-58; Makre 14.53-54; Rukre 22.54

¹² Tā nhūm pōristi mē mē hkrāhtūm nē mēō patre nhō pōristijaja Jejus pynē nē hpa hpre hpa ¹³ nē ma Anas wÿr o tē. Anasja Kajpas piinhō na pre. Nhūm Kajpas kormā amgrāja ā Anas pyrā nē kēp mēō patre maati. ¹⁴ Jakamā na pre ra Ijaew nhō pahijē mā Jejus jarēnh o:

—Nā kot puj mē Jejus pīr tokyx anē. Kē tapxipix ty pu mē arī mÿrpe pahpiitā pajamakētkati nē ri papa. Anē.

Jakamā nhūm mē Jejus pynē nē kormā ma patre maati hwÿr o tē.

Simāw Pêtre kot Jejus kôt pa hkêt ā kot amnhī jarēnh

Matêwre 26.69-75; Makre 14.66-72; Rukre 22.54-62

¹⁵ Hāmri pa ixpē Juāw mē ixkrāmnhwÿ Simāw Pêtre mē pa wa ma mē hkôt wa tē. Nhūm mē ra mē inhō patre maati nhōrkwÿ hwÿr Jejus o axà. Nhūm patre maati kot ixpumunh jakamā nhūm kām apênh xwÿnhja ixpumu nē inhmā anē pa mē hkôt axà. ¹⁶ Nom nhūm Simāw Pêtre arī kapôt ā hakwa krem xa. Hāmri pa omu nē akupÿm hwÿr tē nē mēhō niti kot hakwa kre jamār o ām xwÿnhja mā anē nhūm kām kahē xà mē nhūm mē ixkôt axà. ¹⁷ Hāmri nhūm nita hprī hā omu nē kām:

—Xêê. Pēr apē mē kot unēnh nē o mōr mÿj kôt ri mē pa xwÿnhjê hō na ka mē? Anē.

Hāmri nhūm kuma nē kām:

—Tk. Nā ixte mēhō myti ata pumunhre hā. Anē.

¹⁸ Hāmri nhūm ra kôt ā kamāt nē ra kryy nē nhūm mē apênh xwÿnh kwÿ mē mēō patre nhō pōristi hkwyjaja amnhīm kuto nē hā ànhunh o kuhê. Nhūm Simāw Pêtre mē omu nē mē hwÿr tē nē mē ìhkō hā ànhunh o xa.

Patre maati kot Jejus kujjêr ā harēnh

Matêwre 26.59-66; Makre 14.55-64; Rukre 22.66-71

¹⁹ Rōm nhūm Anasja hēx rom tanhmā Jejus kujjêr to nē kām:

—E kwa inhmā amnhī jarē. Tanhmā na ka hte we akôt mē pa ho mē pa xwÿnhjê jahkre hto ho apa wehe? Anē.

²⁰ Hāmri nhūm amnhī tā kām:

—Nā na pa hte mē piitā mē noo mā ri mē kām ixkapēr o ixpa. Tīrtūm kapēr o mē ahkre xà hā ixkre kamā nē Tīrtūm mā amnhī jarēnh xà hā ixkre kamā pa hte mē piitā mē noo mā ri mē kām tanhmā ixkapēr to ho ri ixpa. Na pa hte nhÿri ixpimxur pē ri mē kām tanhmā ixkapēr to ho ri ixpa hkêt nē. ²¹ Tā ka ixtā mē kot inhmar o kuhê xwÿnhjaja tanhmā ixtā mē hkukjêr to hkêt nē. Ām papxipix ri ixkukja. Kwa ixtā mē hkukja kē mē kot tanhmā ixkapēr mar to xà hkôt tanhmā amā ijarēnh to nā? Anē.

²² Hāmri nhūm patre nhō pōristi hōja kuma nē hwÿr tē nē kām:

—Tk. Kwa na htem ā patre maati mā kapēr anhÿr kêt nē. Na htem hā hpjiaam o kām kapēr. Tā na ka axtem nē ri ā kām akapēr anē. Anē.

Hãmri nê hinep hkura.

²³ Hãmri nhùm Jejus amnhĩ tã omu nê kãm:

—Kwa kot pa tanhmã mẽ amã amnhĩ to ixêx to ka mẽ hã inhma nê rĩ kormã tanhmã axpên mã ixto akapêr to rý hã ixtak. Nom ãm hãmri ixte mẽ amã amnhĩ jarênh tã ka axtem nê ri inhĩnep ixtak. Anê.

²⁴ Hãmri nhùm Anas tanhmã mar to hpa hãmri nê umre Kajpas wýr kumê. Na pre Kajpasja kormã hitom kãm ri tanhmã amnhĩ nhĩpêx to ho nhý nhùm Anas mẽ kãm anê nhùm mẽ kuma nê hwýr Jejus o tẽ nê ho axã. Arĩ hpa hpre rãhã hwýr o tẽ nê ho axã nhùm xa nê kãm amnhĩ jarê.

Simãw Pêtre kot axte Jejus kôt pa hkêt ã amnhĩ tã aprãr ã harênh

Matêwre 26.71-75; Makre 14.69-72; Rukre 22.58-62

²⁵ Nhùm Simãw Pêtre arĩ mẽ ìhkô hã ànhunh o xa nhùm mēhõja kãm kapêr nê kãm:

—Kwa pēr apê Jejus kôt ri mẽ pa xwýnhjê hõ na ka. Anê.

Hãmri nhùm kuma nê kãm:

—Tk. Koký ixte mẽhõ nēj pumunhre hã. Anê.

²⁶ Hãmri nhùm hpãnhã mẽõ patre maati mã àpênh xwýnhja mããnen omu. Simãw Pêtre kot kêp hamak krãhyr xwýnhta kwý na pre. Jakamã nhùm hprĩ hã omunh mex kurê kumrêx nê kãm:

—Kwa na ka na ka mũtar pĩ hkôta kamã mẽ ìhkô hã xa pa apumu. Anê.

²⁷ Hãmri nhùm tee ri kuma nê axte mẽ kãm amnhĩ tã aprãr kãm hihtýx nê. Jao ra mẽ kãm amnhĩ tã aprãr o axkrunêpxija mẽ nhùm krãhyre hkàr kurê kumrêx. Ra Jejus kot hkukamã harênh xã hkôt kêp hkwy hkêt ã amnhĩ tã aprãr o axkrunêpxi.

Jejus kot Pirat mã amnhĩ jarênh

Matêwre 27.1-2, 27.11-31; Makre 15.1-20; Rukre 23.1-5, 23.13-25

²⁸ Hãmri nhùm mẽ ixpê Ijaew hkrãhtũmjaja ra Kajpas rùm Jejus o kato nê ma Pirat wýr o tẽ. Piratja na pre te Rõmjê nhõ pahi pé Sesti mã mẽ ixpê Ijaew jamãr o pa nhùm mẽ ma hwýr o tẽ. Nhùm ra myt kator grire nhùm mẽ hwýr o tẽ nê òrkwy kapem o xa. Pirat kêp Ijaew kêt jakamã nhùm mẽ òrkwy hwýr gjêx kêt nê kapôt ã kuhê. Na hte Ijaew kormã Pas ã hkĩnh hãmri nê nhãm mẽ kêp Ijaew kêt xwýnhjê nhõrkwy hwýr gjêx kêt nê. Kojã mẽ hwýr agjê nê amnhĩ tomnu nê Pas ã apkur kêt nê. Jakamã nhùm mẽ Pirat wýr Jejus o tẽ no ãm hwýr o àr kêt nê. ãm ixkre kapem o xa. ²⁹ Hãmri nhùm Pirat mẽ hwýr kato nê omu nê hã mẽ hkukja nê mẽ kãm:

—Kwa tanhmã na we amnhĩ tomnuj to ka mẽ ixwýr o tẽ? Anê.

³⁰ Hãmri nhùm mẽ kãm:

—Nã kot amnhĩ tomnuj o pa xwýnh kênã. Jakamã na pa mẽ awýr o tẽ. Ate tanhmã kot amnhĩ tomnuj to hã harênh mar nê mýrapê tanhmã ho kaxyw. Anê.

³¹ Hãmri nhùm mẽ kuma nê mẽ kãm:

—Tk. Kwa mẽ kamjaja ma amnhĩ kôt o tẽ nê amnhĩ krã hkôt tanhmã ho. Mẽ ate tanhmã kot amnhĩ nhĩpêx to hã omunh xã hkôt. Anê.

Hãmri nhùm mẽ tee ri kuma nê kãm:

—Kwa amnepêm mẽ ixpê Ijaewjaja na pa pre htem kên o mẽ kot amnhĩ tomnuj xwýnhjê tak o mẽ kupa. Tã na ra Rõm nhõ pahihtija mẽ pamjaja mẽ ixte mẽ hpar nê mẽ ixkurê. Tapxipix kãm mẽ hpar ã àmnênh prãm. Jakamã kot kaj ý hã mẽ inhã tanhmã hã axãmnenh to kê mẽ kupĩ. Ra ja kaxyw mẽ kot mẽ ixkaxyw axãm kênã. Anê.

³² Rōm nhō xwŷnhjaja na htem mẽ kot amnhĩ tomnuj xwŷnhjê hpar kaxyw nê pĩ kahpa hã mẽ hanhō nê mẽ kupa. Nhũm Jejus amnhĩ kukamã tanhmã mẽ kot hpĩr to hã mẽ omunh mex jakamã ra hprĩ hã mẽ inhmã mẽ kot tanhmã hipêx to hã mẽ harê. Jakamã nhũm pre ã Ijaew Pirat kot mẽ kãm hpĩr prãm xàj ã kãm kapêr kãm xihtỳx anê. ³³ Hãmri nhũm mẽ kuma nê akupỳm òrkwŷ hwŷr axà nê amnhĩ wŷr Jejus ã karō nhũm hwŷr axà nhũm kãm:

—E kwa inhmã amnhĩ jarê. Xà apê Ijaew nhō pahi na ka? Xà ka na htem amnhĩ wŷr akãm hamak o pa? Anê.

³⁴⁻³⁶ Hãmri nhũm kãm:

—Tỳ ãm hãmri na ka ã ijarênh anê. Nom jar pika ja kamã ixpê mẽõ pahi hkêt. Axtem ixpê mẽõ pahi na pa. Mo kaxyw na ka ã ixkukjêr anê? Xà na pre mẽhō ixte mẽ anhō pahi Sesti kutã ixãm ã amã ijarê ka ama nê tee ri ixkukamã ajamaxpêr? Nà xà ãm hãmri amã Tirtũm kot Ijaew wŷr inhmênh ã ixpumunh prãm? Mo kaxyw na ka ã ixkukjêr anê? Anê.

Hãmri nhũm tee ri kuma nê kãm:

—Tk. Mo kot pa kêt ri axtem nê Tirtũm kot Ijaew wŷr amênh ã akukja? Mẽ apyrã nê ixpê Ijaew kêt kênã. Mẽ kot ixwŷr ato htêm xwŷnhjaja na mẽ ã ate amnhĩ jarênh anhŷr ã ajarênh anê. Nà mẽ akwŷjê mẽ mẽ anhō patre krãhtũmjaja na mẽ ã inhmã ajarênh anê. Jakamã e aprĩ hã inhmã amnhĩ jarê. Tanhmã na ka we amnhĩ tomnuj to nhũm mẽ ixwŷr ato tẽ? Anê.

Hãmri nhũm kuma nê kê axte kãm:

—Nà ixpê pyka ja kamã mẽ ò pahi hkêt. Kop ãm ixpê pyka ja kôt mẽ ò pahi ronhŷx ra ixkôt ri mẽ pa xwŷnhjaja tanhmã ixtã mẽ ato. Nom jar ixpê mẽ ò pahi hkêt. ãm axtem ixpê mẽ ò pahi na pa. ãm hãmri na pa ã amã amnhĩ jarênh anê. Anê.

³⁷ Nhũm ã kãm amnhĩ jarênh anê hãmri nhũm tee ri kuma nê kãm:

—Xà apê mẽ ò pahi hō na ka? Anê.

Hãmri nhũm kãm:

—Tỳ. Nà ãm hãmri na ka ã ijarênh anê. Na pa pre amnê pikaja wŷr wrŷy nê jar mẽ akamã ixkato nê mẽ akamã ixãptãr. Ixte tanhmã mẽ kãm ixkapêr to ho ri ixpa kaxyw na pa pre wrŷy nê mẽ akamã ixpa nê ãm hãmri mẽ kãm ixkapêr o ri ixpa. Na pa hte tãm ixkapêr o ri ixpa. Tã mẽ kot ixkapêr mar nê ixkôt ri amnhĩ nhípêx o mẽ pa xwŷnhjaja na htem ixpê mẽ ò pahihti hã ijarênh o pa. Anê.

³⁸ Hãmri nhũm Pirat kot tãm kãm kapêr ã amnhĩ jarênhja ã kuma nê kãm:

—Tk. Aa ixte pika ja kamã mẽhō pumunh nhũm tãm kapêr o pare hã. Anê. Hãmri nê kapêr ã kuma nê tee ri hkukamã hamaxpêr. Hãmri nê akupỳm Ijaew wŷr ho kato nê mẽ kutã o xa nê mẽ kãm:

—Kwa tanhmã kot amnhĩ tomnuj tore hã. ³⁹ E mẽ inhma. Na pa hte amgrã mẽ arĩgro pê Pas kãm mẽ amã mẽ hagjênh xà rũm mẽ akwŷjê ho hpŷnh nê mẽ hapôj nhũm mẽ hamakêtkati nê amnhĩx ri pa. Ka mẽ ja hã omu nê Pas ã akĩnh nê. Jakamã e. Pa mẽ amã mẽ anhō “pahihti” jarênhja mã inhũre. E na pa ra kãm inhũre. Anê.

⁴⁰ Hãmri nhũm mẽ tee ri ã kapêr anhŷr ã kuma nhũm ja mẽ kêp omnuj tỳx nê. Nhũm mẽ hã kàx pê gryk kamã kãm kapêr kãm hihtỳx nê kãm:

—Tk. Kwa nà kãm anhũrer kêt nê. Kêt Parapas mã mãn anhũre. Anê.

Parapasja na pre hte tanhmã amnhĩ tomnuj tỳx to ho ri pa nhũm prem mŷrapê unê nê haxà. Tã nhũm mẽ axtem nê Pirat kot kãm urer prãm xàj Jejus kaga.

19

Mê kot Jejus tak ã mê harênh

Matêwre 27.27-31; Makre 15.16-21; Rukre 23.20-25

¹ Tã nhũm Pirat akupÿm òrkwÿ hwÿr Jejus o axà nê ò pòristijê mã hà amÿnê nhũm mê hwÿr mra nê htao o kuhê. ² Hãmri nê kêp pahi hà hpêr o pikênh kaxyw kãm pahi hà mê ahkà nhípêx nê hkrãm haxà. Nom axtem mêmo mrònhĩ te kot ronh kanêre pyràk xwÿnhja nhũm mê hikãx nê hkrãm haxà. Nê kêp pahi hà mê ê kamrêk py nê kãm haxà. ³ Hãmri nê xatã hwÿr mra nê hinep htao nê hà hpêr o pikênh o xa nê kãm:

—E apê Ijaew nhõ pahi punuti na ka. Anê.

⁴ Hãmri nhũm Piratja akupÿm Ijaew wÿr kato nê mê kãm:

—E koja inhõ pòristi akupÿm mê awÿr ho kato ka mê omu. Na pa tee ri kot tanhmã amnhĩ tomnuj to hà hkukja. Pêr tanhmã kot amnhĩ tomnuj to hkêt kênã. Anê.

⁵ Hãmri nhũm Jejus kato nê arĩ pahi hà àhkà tu nê ê kamrêk jaxà nê o xa nhũm Pirat mê kãm:

—E kwa mê omu nê kamã axukapri hkêt wehe. Anê.

⁶ Hãmri nhũm patre krãhtũmjê mê mêõ pòristijaja tee ri ja hà kuma nhũm ja mê kêp omnuj nê. Hãmri nê hà kãm kapêr kãm hihtÿx nê kãm:

—Tk. Kwa nã pĩ kahpa hà mãn anhõ. Kê pĩ kahpa hà mãn ajêt nê ty. Anê.

Hãmri nhũm tee ri hà mê kuma nê mê kãm:

—Nã mê kam nê ma amnhĩm o tẽ nê mê kam amnhĩm ho anê. No pa kot paj ho anhÿr kêt nê. Mo mÿrapê kot pa kêt hà amÿnê nhũm mê kupi? Nã kwarĩ kot pa ho anhÿr kêt nê. Anê.

⁷ Hãmri nhũm mê tee ri kuma nê kãm:

—Kwa kêp Tirtũm Kra hà amnhĩ jarênh kênã. Mê inhĩgêtjaja na prem ã mê ixte amnhĩ jarênh anhÿrja nê mê inhmã kapêr pa htem ã amnhĩ jarênh anhÿr kêt nê. Koa mêhõ ã ri amnhĩ jarênh anê nhũm mê ja mÿrapê kupi. Anê.

⁸ Hãmri nhũm Pirat tee ri Jejus kêp Tirtũm Kra hà amnhĩ jarênhja ma nê kãm uma nê kãm tanhmã ho hprãm kêt nê. ⁹ Hãmri nê akupÿm òrkwÿ hwÿr ho axà nê axte hkukja nê kãm:

—Kwa aprĩ hà inhmã amnhĩ jarê. Nhÿhÿnh na ka pre mê ixwÿr mõ? Anê.

Nom nhũm axte tanhmã kãm nê hkêt nê. ãm arĩ akryk mar o xa. ¹⁰ Nhũm tee ri omu hãmri nê kãm:

—Kwa xã ate ixpumunh kêt? Inhÿ hà na htem mê kupa nê inhÿ hà akupÿm mê hapój. Tã ka pêr aprĩ hà inhmã tanhmã amnhĩ jarênh to hkêt nê ri akryk akuhê. Anê.

¹¹ Hãmri nhũm Jejus kãm:

—Nom Tirtũm nhÿ hà pix mã na ka hte ã amnhĩ nhípêx anê. Kêp ãm Tirtũm kãm ja prãm kêt ronhÿx ka tee ri tanhmã amã ixto hprãm hkapry. Tãm kot mê ixkaxyw axãm kênã. Tã mê kot awÿr inhmênh nê ri ixtyk ã ijarênh xwÿnh pè Ijaew nhõ pahijaja. Ra mê kot ixkaga jakamã na mê ã amã ijarênh anê. Jakamã mê kot amnhĩ tomnuj tÿx o ajakrenh. Anê.

¹² Hãmri nhũm Piratja tee ri ã kapêr anhÿr ã kuma nê kot kãm urer prãm nê. Hãmri nê akupÿm Ijaew wÿr kato nê hà mê kãm kapêr nhũm mê tee ri kot kãm urer kaxyw ã amnhĩ jarênhja ma nê kãm ja prãm kêt kumrêx. Jakamã kãxpêr nê kãm kapêr nê kãm:

—Kwa nã ra kêp mê inhõ pahi hà kot amnhĩ to hêx kênã. Kot mêhõ ã ri amnhĩ jarênh anê nhũm Rõm kamã mê panhõ pahi Sestija ja hà harênh ma

nê kamã gryk tỳx nê. Tã kot kaj kãm anhũre nhũm ajarênh ma nê akamã gryk nê. Anê.

¹³ Hãmri nhũm tee ri mẽ kuma hãmri nê ma pahi kot tanhmã mẽ harênh to xã hã kên pota wỳr ma tẽ nê hã nhỹ. Mẽ ixpê Ijaew kapêr kãm mẽ ixte kãm: “Kapata” jarênh xwỳnhta wỳr kot tanhmã Jejus jarênh to kaxyw ma hwỳr tẽ nê hã nhỹ nhũm mẽ hwỳr o tẽ.

¹⁴ Hãmri nhũm ra arĩgro pê sêsta. Mẽ ixpê Ijaewjaja mẽ ixte Pas ã amnhĩ tomnuj mỳrapê mry hkwy hpar nê Tĩrtũm kôt pix mã amnhĩ nhĩpêx ã amnhĩ jarênh xã hã arĩgroja kato. Jakamã nhũm kaxkwa nhĩpòk ri myt nhỹ nhũm Piratja mẽ kot Jejus kator ã harênh prãm xàj arĩ mẽ kãm ho mẽ õ pahi hã harê nê mẽ kãm:

—E ota mẽ anhõ Pahihtita. Anê.

¹⁵ Hãmri nhũm mẽ tee ri ã harênh anhỹrja ã kuma nê kãm:

—Kwa apĩ ri. Ma o tẽ nê pĩ kahpa hã anhõ kê tokyx ty.

Anê nhũm tee ri mẽ kuma nê mẽ kãm:

—Kwa nà. Kêp mẽ anhõ pahi kênã kot paj kêt ri axtem nê mẽ apê kupĩ. Anê.

Hãmri nhũm mẽ kãm:

—Nà kêp mẽ inhõ pahi hkêt. Pahi Sesti pix na kêp mẽ inhõ pahi. Anê.

Mẽ kãm Sesti hkĩnh kêt tã ã kãm Jejus htyk prãm xàj ri harênh anê. ¹⁶ Hãmri nhũm Pirat tee ri ja hã mẽ kuma nê tã Jejus ã pòristi mã karõ nê mẽ kãm:

—E mẽ mãmri ma o tẽ nê pĩ kahpa hã anhõ kê ty. Anê.

Hãmri nhũm mẽ kuma nê ma o tẽ.

Mẽ kot pĩ kahpa hã Jejus nhõ ã mẽ harênh

Matêwre 27.32-44; Makre 15.21-32; Rukre 23.26-43

¹⁷ Hãmri nhũm pòristija Jejus mã õ pĩ kahpa gõ nhũm kutu nê ma mẽ hkõt hkjênh o mẽ. Nhũm mẽ krĩ rũm ho kato nê ma hixêt prêk wỳr o tẽ. Hixêt prêkja mẽ kot harênh o: “Korkot” anê. No mẽ ixpê Ijaewjê kapêr kãm na pa pre htem harênh o “Mẽ hkrã hi xã” anhỹr xwỳnhta wỳr nhũm mẽ ma o tẽ nê hã ho api. ¹⁸ Hãmri nê pikap pĩ kahpa xi nê hã Jejus xi nhũm hã nõ nhũm mẽ prek o ãhkra ho htỳx nê hpar o htỳx. Hãmri nê kaxyw hkakwỳ nê hkakwỳnh pa nê kamã pĩ kahpata xãm nê hity hpa nhũm Jejus kỳx pê ajêt. Hãmri nhũm mẽ mããnên wa ho hamêxkrut nê pĩ kahpa hã wa kunhõ nhũm wa kuri ajêt. Wa kot tanhmã amnhĩ tomnuj to xwỳnhja wa ho akutã Jejus nhĩjê nhũm wa urãk nê kỳxpê ajêt.

¹⁹ Hãmri nhũm Piratja õ pòristi mã anê nhũm mẽ tap õ py nê hã tanhmã kagã hto nê kagã ho:

IJAEW NHÕ PAHI JEJUS NA JA

KÊP NAJARE NHÕ XWỠNH

²⁰ Nom mẽ ixpê Ijaew kapêr pix kãm hã kagã hkêt nê. Mããnên Gresjê kapêr kãm nê Raxijê kapêr kãm nhũm mẽ mããnên hã kagã nê Jejus mỳri kunhõ. Hãmri nhũm Ijaew kwỳjaja Jerujarê rũm hwỳr mra nê mẽ kot ã hã kagã nhĩpêx anhỹrta pumu nê kamã harê. Jerujarêja hixêt prêta wỳr jawỳ jakamã nhũm mẽ kurũm ohtõ nê hwỳr mra nê omunh o kuhê. ²¹ Hãmri nhũm patre hkrãhtũmjaja tee ri ã Jejus jarênh anhỹr ã kagãta pumu nhũm ja mẽ kêp omnuj nê. Jakamã nhũm mẽ ma Pirat wỳr mra nê kãm:

—Kwa mon ka ri hã mẽ kãm anê nhũm mẽ axtem nê ã ri kagã nhĩpêx anê? Kwa nà kêp mẽ inhõ pahi hkêt. ãm htỳx ri kot ã kot amnhĩ jarênh anhỹr o pa kênã. Kwa hã kagãja o anhĩpa nê hpãnhã hã kagã ho: “Kêp Ijaew nhõ pahi hã kot amnhĩ to hêx xwỳnh.” Anhỹr o hpãnhã hã hipêx nê anhõ nà? Anê.

²² Hāmri nhūm mē kuma nē mē kām:

—Tk. Nà pa ho ixpinhpanh kêt nē. Ra ixte hā kagà hpar kēnā. Anē.

Pôristijaja kot axpēn mā Jejus xê ho pigràn

Matêwre 27.35-36, 27.55-56; Makre 15.24; Rukre 23.34

²³ Hāmri nhūm pôristijaja kot axpēn mā Jejus xê o pigràn kaxyw amnhī tā haxwÿr o tē. Mē kēp 4 no nhūm Jejus xê kēp 5 jakamā nhūm mē amnhī kôt ho 4 nē haxwÿ nhūm pyxi nē hprā. ê rytita. Na pre hipêx muxre. Nhÿhÿnh hkayr xà pumunh kêt kumrêx. ²⁴ Jakamā nhūm mē omu nē kām hkĩnh nē. Hāmri nhūm hō kot amnhūm hpyr nē ho arĩk kaxyw nhūm mē hā kēnre ho jōka. Na pre ra Tĩrtūm kapēr ā kagà htūm kot mē hkukamā ja hā mē harēnh nē mē harēnh kot:

Na prem axpēn mā ixê o anhgrà nē hā kēnre ho jōka ho hkrĩ.

Anhÿr o kot mē hkukamā mē harēnh. Tā nhūm mē ra hkôt ā amnhī nhĩpêx anhÿr o hkrĩ.

Jejus kot Juāw nhĩhkram katorxà jaxàr ā harēnh

²⁵ Nhūm Jejus par pē katorxà xa. Nē htōx nē Kropti hprō Marir nē Marir Matarēn mē nhūm mē Jejus katorxà nhĩhkō hā Jejus pumunh o kuhê. Nhūm amnhī tā mē omu ²⁶ nē mē kuri pa ixpē Juāw pumu. Hāmri nē kēp ixkrāmnhwÿ mex ā ixtā katorxà mā kapēr nē kām:

—E ota Juāwta. Koja ixpānhā te kēp akra pyrāk o anhĩpêx nē tanhmā ato ajuta hto ho pa. Anē.

²⁷ Hāmri nē hpānhā pa inhmā kapēr nē inhmā:

—E Juāw. Kêr ka te kēp akatorxà pyrāk o inhmā hipêx mex o ri apa.

Anhÿr jakamā pa kuma nē kot inhmā hā karō xà hkôt inhōrkwÿ hwÿr haxà nē amnhī kôt ri ho ixa.

Jejus htyk ā harēnh

Matêwre 27.45-56; Makre 15.33-41; Rukre 23.44-49

²⁸ Tā nhūm Jejus ra amnhī pumu hāmri nē hamaxpēr o:

—Nà Inhĩpêxà kot mēmoj tā inhmā karōta na pa ra kām ho anhÿr o hitep xà xir kaxyw. Anē.

Hāmri nē kām kôr ā amnhĩ jarē. Nom ra hkukamā Tĩrtūm kapēr ā kagà htūm kot htyk kaxyw nē kām kôr kukamā harēnh jakamā nhūm ā amnhĩ jarēnh anē nē kapēr o:

Nà na pa ra inhmā kôr nē. Anē.

²⁹ Nhūm hpar pē guhkrax kām wĩhti punureta âm jakamā nhūm mē ā kot amnhĩ jarēnh anhÿrja ma nē kaxyw mēmo rerek py nē o tē nē kaxyw pĩ ryti hō py nē ho hkanhwÿ. Nē akupÿn o tē nē ho wĩhti mā haxà nē kām kupē.

³⁰ Nhūm hkaô nē hkaôr pa hāmri nē kapēr o:

E nà hāmri na pa ra mē piitā mē kot amnhĩ tomnuj pānhā amnhĩrer pa. Jao ra Inhĩpêxà kām hprām xà hkôt kām tanhmā amnhĩ nhĩpêx to jatur xām kumē.

Anhÿr o amnhĩ jarēnhja kôt ahpār mā hkrā nē ty.

Mē kot kô xwa ho Jejus kamnhwÿr ā harēnh

Wam Juāw 5.6-8

³¹ Nhūm ra sēsta nhūm apkati nhūm mē inhō arĩgromnu pē sap kaxyw. Sapja ā na hte mē ixpē Ijaew mē ixkĩnh pē Pas ā ixkĩnh rĩnh o ixa. Nhūm mē kām sap ā arĩ mē htyk nē mē harir xwÿnhjê pumunh prām kêt jakamā nhūm Ijaew krāhtūmjaja ma Pirat wÿr mra nē kām:

—Kwa pôristi mã anê kê mẽ tokyx mẽ hte hi kukê kê mẽ htyk tokyx anê. Kê mẽ tokyx mẽ o wrý nê ma mẽ o mra nê mẽ hagjê. Kormã sap kêt ri. Anê.

³² Hãmri nhùm mẽ kuma nê ò pôristijê mã anê nhùm mẽ ma mẽ hwýr mra nê akutã wa kot Jejus nhjê nê jêt xwýnhhta wa kumrêx wa hte hi hkwýr. ³³ Hãmri nê hpãnhã Jejus wýr tẽ nê omu nhùm ra htyk mex nê ajêt nhùm mẽ ja hã omu nê kêp hte hi hkwýnh kêt nê. ³⁴ Nhùm pôristi hõja kô xwa py nê ho ihkjê rùm hkanhwý nhùm hkamrô mẽ ì kagô ahkã nê hprôt nhùm mẽ hkwýja omunh o kuhê. ³⁵ Nê ixpê Juãw na pa pre ijaxwýja mẽ ìhkô hã xa nê ja hã omunh jakamã pa ã mẽ amã hã kagã anê. ãm hãmri na pa mẽ amã harê nê hã kagã. Mẽ ate kamã harênh nê harênh mar nê hkôt ajamaxpêr kaxyw. ³⁶ Na pre ra Tirtùm kapêr ã kagã htùm kamã ra hkukamã tanhmã kot mẽ pahwýr mẽnh xwýnhhta jarênh to nê hã kagã. Nê hã kagã kot:

Koja mẽ nhýhýnh hi hkwýnh kêt nê. Anê.

Tã nhùm mẽ ra hã kagãja kôt ã hipêx anê nê kêp hi hkwýnh kêt nê. ³⁷ Nê Tirtùm kapêr ã kagã htùmja mããnen ja hã harênh kot:

Mẽ kot hpír nê hkanhwýr xwýnhja koja mẽ hpar pê omunh o kuhê. Anê.

Tirtùm kapêr ã kagã htùm kamã ã Jejus tyk kukamã harênh kot anhýr.

Mẽ kot Jejus jaxàr ã mẽ harênh

Matêwre 27.57-61; Makre 15.42-47; Rukre 23.50-56

³⁸ Tã nhùm Juje pê Arimatej nhõ xwýnhja Jejus ra htyk ã omu nê ma Pirat wýr tẽ nê hã kãm kapêr. Kot ma o môr nê tokyx haxàr kaxyw. Na pre ra Jejus kôt amnhĩ xãm nom Ijaew krãhtùmjê pymaj mẽ kãm amnhĩ to amnhĩrit kêt nê. Jakamã nhùm ma Pirat wýr tẽ nê hã kãm kapêr nê kãm:

—Pa e ot pa awýr tẽ. Ixte mẽmoj tã amã ixkapêr kaxyw. Kot kaj apu inhmã “ý” anhýr japêr. Kwa xà kot pa ma Jejus o mõi nê haxà? Anê.

Hãmri nhùm kuma nê kãm: “Nã mãmrĩ ho anê.” Anê hãmri nhùm ma hwýr tẽ nê ho wrý nê kumý nê ma haxàr mã o mõi. ³⁹ Nhùm Nikotêja ma hkôt tẽ. Amnepê mã kot kamàt kãm Jejus wýr htêm nê wa axpên mã kapêr o ýr xwýnhhta. Jakamã ma Juje hkôt tẽ. Nê amnhĩ kôt mẽ hkuxwa xà hkwý ho mõi. ãm ho môr rax kumrêx. Ho 34 kir nê kutu nê o mõi. Mẽ hkuxwa xàja na pre mẽ kot mẽmo kuxwa xà mã “mĩra” nê “aroe” anhýr jarênhja nhùm kaxyw hkwý jakã nê ho ahkã nê ho mẽ hkuxwa xà nhípêx. Hãmri nê kutu nê ma Juje kot Jejus jaxàr nhùm kot ho hkuxwa kaxyw hkôt o mõi. ⁴⁰ Hãmri nhùm wa ho kupêxê kukõnh pa nê ho Jejus kupu. Mẽ ixpê Ijaew mẽ ixte mẽ htykjê jagjênh kaxyw ã mẽ hipêx anhýr xà hkôt nhùm wa ã hipêx anê nê haxà. ⁴¹ Nhùm ra mẽ kot pĩ kahpa hã nhôr xà tã mẽ kot mẽmo pĩ ho pa nê hkre xwýnh kwý kuhê. Nê kamã kên kre nyw. Kormã mẽ kot kamã mẽ htykjê hõ jaxàr kêt xwýnhhta. ⁴² Jakamã nhùm wa omu nê axpên mã:

—E kwa pu hwýr Jejus o tẽ nê kamã mãn tokyx haxà. Kêr pu kormã sap kêt ri ra tanhmã amnhĩ to hpa. Anê.

Hãmri nê hwýr kumý nê o tẽ nê kamã haxà nê hã hitom pa hãmri nê ma akupým krĩm wa tẽ.

20

Jejus akupým htĩr ã harênh

Matêwre 28.1-10; Makre 16.1-8; Rukre 24.1-12

¹ Tã nhùm sap tẽ nê hapêx nê hpãnhã semãn nyw krax xà pê tòmĩk. Hãmri nhùm Marir Matarên kwýhtã kãnhmã nhý. Kormã myt kator kêt ri kãnhmã

nhÿ nē ma kēn kreta wÿr tē. Nē hwÿr pōj nē tee ri hitom xà hã kēn rax pumu. Nhÿm ra nhām hakwa kre kuhpa hã ri hikwÿ nhÿm omu nē tee ri hkukamã hamaxpēr pē omunh o xa. ² Hãmri nē awjanã nē ma akupÿm hprōt nē nhÿri Simãw Pētre nē pa ixpē Jejus krãmnhwÿ mex ã wa ixpumu nē hkaprĭ kamã wa inhmã harē nē wa inhmã:

—Xē na pēr mē pahpē mē panhō Pahihti kapa nē nhÿhÿm ma o tē. Xē nhÿhÿm mǎn pre wem o tē? Anē.

³ Hãmri pa wa kuma nē hwÿr ixprōt kurē kumrēx. ⁴ Hãmri pa Simãw Pētre mã wa nē ixkumrēx hwÿr pōj. ⁵ Nom kormã kēn kre hwÿr ixàr kēt ri kormã hakwa krem inhĭkōt nē kaxwÿnh kām nōr xà kamã Jejus japēr ixrĭt o xa. Nhÿm kupēxē nhĭrē pix nō pa omu. ⁶ Hãmri nhÿm Simãw Pētre ixkōt tē nē ixrom krem àr kurē kumrēx nē kupēxē nhĭrēta pumu. ⁷ Nē hkrã kupu xà pumu nhÿm axtem hkrã muxre nē ahte nō. ⁸ Hãmri pa hkōt axà nē nōr xà kaprÿ pumu nē ijamaxpēr o:

—Héxta waa nē. Nà mǎn akupÿm htĭr. Hã na nōr xà hkaprÿ mex nē. Nà mǎn akupÿm htĭr kām ga. Anē.

⁹ Ra Tĭrtÿm kapēr ã kaga htÿm kot ja kukamã akupÿm htĭr ã harēnh tã pa wa kormã ixprĭ hã ja hã omunh kēt nē. Tã kēn kre kaprÿ pumu nē kām ijamaxpēr kurē kumrēx. ¹⁰ Hãmri nē wa ixkato nē awjanã nē ma akupÿm wa ixkwÿjē hwÿr wa tē.

*Jejus kot Marir Matarēn wÿr kator ã harēnh
Makre 16.9-11*

¹¹ No nhÿm Marir Matarēnja arĭ kēn kre kapem hkaprĭ nē mÿr o xa. Nē mÿr pē hikōt nē kēn kre kamu ¹² nē kamã Tĭrtÿm kapēr o wrÿk xwÿnh wa ho axkrut nē wa omu. Nhÿm wa ē jakajre kamã wa nhÿ. Nhÿm hōja hkrãm nhÿ nhÿm hōja htem nhÿ. ¹³ Hãmri nē wa Marir Matarēn mã kapēr nē kām:

—Kwa mon ka ri omu nē amÿr o xa? Anē.

Nhÿm kām:

—Xē nhÿm. Na prem ma nhÿhÿm mē ixpē mē inhō Pahihtija mÿ nē ma o tē nē hpānhã nhÿri kuxi. Anē.

¹⁴ Rōm nhÿm Jejus tām tē nē hkatut kōt xa nhÿm Marir Matarēn ho hakēx nē omu nom hprĭ hã omunh kēt nē. Omu nē htÿx ho axtem mēhō hã hkamnhĭx.

¹⁵ Hãmri nhÿm kām:

—Kwa mon ka ri amÿr o xa? Mēhō na ka ri hapēr arĭt pē amÿr o xa? Anē.

Hãmri nhÿm kuma nē htÿx ho pĭ hkre jamār xwÿnh ã hkamnhĭx nē kām:

—Xē xà ka na ka mē ixpē mē inhō Pahihti ho ahkĭ nē ma o tē nē nhÿri axi mē? Xē ka japēr nē akatāt kōt inhmã harē. Nhÿri inhmã nōr xà jarē pa ma hwÿr tē nē kumÿ nē man akupÿn o tē nē akupÿm kēn kre kamã kuxi. Anē.

¹⁶ Hãmri nhÿm Jejus kām hixi jarē nē kām:

—Kwa Marir Matarēn. Amnē ixpumu nē arĭ ã akapēr anē nà. Anē.

Hãmri nhÿm jatã hprĭ hã kuma nē ho hakēx nē amnhĭ jaēr pē hprĭ hã omu nē kām:

—Xē Pahihti. Xep ka na ka. Héxta gǎa nē. Anē.

Nom mē ixpē Ijaew kapēr kām Pahita jarēnh o: “Raponĭ” anē. Nhÿm ã kām kapēr anē hãmri nē axte ma nhÿhÿm kēp htēm pymaj hpa hã kupy. ¹⁷ Hãmri nhÿm kām:

—Kwa inhmã anhÿre. Na pa kormã ma akupÿm Inhĭpépéxã hwÿr ixàpir kēt nē. E tokyx ma akupÿm tē nē ixtō nē ixtōxjē mã ijarē. Na ka prem apē ixkrãmnhwÿ pix tã ra mē apē ixtō nē ixtōx na ka mē. Jakamã ma akupÿm mē hwÿr tē nē mē kām ijarē. Nē mē kām: “Na Jejus mē awÿr pēr mēnh o: ‘Kot paj

tokyx ma akupŷm Inhĩpêêxà Tĩrtũm wŷr api. Nom kêp pa Inhĩpêêxà pix kêt mãânên kêp mē Anhĩpêêxà na. Nē mãânên kêp mē anhō Tĩrtũm na.’ Anhŷr o mē awŷr pēr mē.” Anē. E ma akupŷm mē hwŷr tē nē tokyx ā mē kām ijarēnh anē. Anē.

¹⁸ Hāmri nhũm kuma nē ma akupŷm mē ixwŷr tē nē mē inhmā awjarē nē mē inhmā:

—Xē na pa ham mē panhō Pahihtita pumu. Na akupŷm mē pamā htĩr. Anē.

Hāmri nē mē inhmā kot tanhmā kām kapēr to hā harē pa mē kuma nē tee ri hkukamā ijamaxpēr.

Jeus kot hkwyjê hwŷr kator ā harēnh

Rukre 24.36-43

¹⁹ Tā nhũm tōmik nē kamāt pa mē Jeus kôt ixpa ho ixpa xwŷnhjaja axpēn wŷr akuprō hāmri nē Ijaew krāhtũmjê pymaj hakwakre kahē hpa nē axpēn mã ixkapēr o ixkrĩ. Nhũm Jeus mē ijaér pē nhŷhŷnh mē ixwŷr axà nē mē ixkuri xa nē mē inhmā:

—Pa. Xà kormā mē anhōt kêt? Anē.

²⁰ Hāmri nē mē inhmā amnhĩ nhũhkra kamā prek tatak xà jahkre nē hakŷx kôt mē kot hkanhwŷr xàja nhũm mē inhmā hahkre. Pa mē akupŷm htĩr kām omu nē ixkĩnh tŷx kumrêx. ²¹ Hāmri nhũm mē inhmā:

—E kwa kēr ka mē tee ri amnhĩ kukamā ajamaxpēr o amā ma ho ri apa hkêt nē. Na pre Inhĩpêêxàja mē awŷr inhmē pa pre wrŷ. Tā kot paj amnhĩ pyrà nē mē piitā mē hwŷr mē arē. Anē.

²² Hāmri nē mē ixkaxyw htyyxà mē nē mē inhmā Tĩrtũm mē wa Karō jarē nē mē inhmā:

—E koja Tĩrtũm mē wa Ixkarōja wrŷ nē mē akarō mã gjêx pa. ²³ Ka mē ŷ hā ma mē piitā mē hwŷr apa nē mē kām Tĩrtũm kapēr jarēnh o ri mē hkôt apa. Nē nhŷri mēhō pumu nē inhŷ hā kām: “Kot kaj Tĩrtũm kôt amnhĩ xām nhũm amnhĩ tā apumu nē anē ate amnhĩ tomnuj rēnh pa.” Anē. Ka mē ā kām akapēr anē nhũm mē ama nē hkôt amnhĩ xām nhũm Tĩrtũm amnhĩ tā omu nē nē kot amnhĩ tomnuj rēnh pa. Nom koja mē ama nē ām mē ama nē hkôt amnhĩ xām kêt japēr ka mē inhŷ hā kām: “Nà kot kaj Tĩrtũm kôt amnhĩ xām kêt nē nhũm anē ate amnhĩ tomnuj rēnh kêt nē.” Anhŷr o kām akapēr nhũm Tĩrtũm ho anē nē nē rēnh kêt nē. E kēr ka mē ā inhŷ hā amnhĩ nhĩpêx anhŷr o ri apa. Anē.

Nhũm pre ā Jeus mē inhmā kapēr anē hāmri nē kato nē ma nhŷhŷm tē.

Jeus kot Tomas mã kapēr ā harēnh

Matêwre 28.17

²⁴ No nhũm mē inhĩō pē Tomas pihpohtita kormā mē ixkĩnhā akupŷm Jeus htĩr kām omunh kêt nē. Na pre ma kape hā tē nhũm wakre kamā mē ixwŷr axà nē mē inhmā kapēr hāmri nē ma nhŷhŷm tē. Jakamā nhũm Tomas akupŷn mē ixwŷr tē nē axà pa mē kām harē nhũm tee ri mē inhma nē mē ixkôt hamaxpēr kêt nē. ²⁵ Nē mē inhmā:

—Nà kot pa ĩhkra kamā prek tatak xà pumu nē kamā inhĩhkra hkrā jaxà. Nē hakŷx kôt hkanhwŷr xàta pa mã ho anē nē omu nē kamā inhĩhkra hkrā jaxà nē rĩ kormā akupŷm htĩr kôt ijamaxpēr. Anē.

²⁶ Tā nhũm semān pyxi nē hapêx pa mē axte axpēn wŷr akuprō nē axte Ijaew krāhtũmjê pymaj amnhĩ tā kahē htŷx nē ixkrĩ. Nhũm Tomas tā mē ixkuri nhŷ. Hāmri nhũm Jeus axte nhŷhŷnh mē ixwŷr axà nē mē inhmā:

—Pa. Na ka mē rĩ akrĩ. Anē.

²⁷ Hāmri nē Tomas pumu nē hwŷr tē nē kām ĩhkra pē nē kām:

—E ota inhīhkra kamā prek tatak xàta. Māmri kamā anhīhkra hkrā jaxà. Nē hpānhā ijakýx kôt mē kot ixkanhwýr xà kamā mā ho anē nē haxà nē akupým itír kôt ixpumunh kuré kumrēx. Anē.

²⁸ Hāmri nhūm kuma nē kām:

—Nà pēr ām hāmri apē inhō Pahihiti Tirtūm na ka. Anē.

²⁹ Hāmri nhūm kām:

—Tý. Ām ano ho ixpumunh kôt pix mā na ka ixkôt ajamaxpēr. Tā no ām koja mē nhýrmā mē amýr pē mē pa xwýnhjaja mē akīnhā mē no ho ixpumunh kēt tā akupým itír ā ijarēnh mar pix tā ixkôt hamaxpēr. Ja na mex kumrēx. Anē.

Juāw kot tanhmā amnhī jarēnh to hā harēnh

Rōmān 15.4; Wam Juāw 5.13

³⁰ Na pre Jejus kormā mē ixto pa ri mē inhnoo mā mēmoj tanhmā hipêx to rax nē nom kot paj kagàja kamā piitā hā kagà hpar kēt nē. ³¹ Ām hkwy pix na pa mē amā hā kagà. Mē ate mē ixpyrà nē omunh nē kēp Tirtūm Kra hā kot mē pakaxyw ām xwýnh ā omunh nē hkôt amnhī xunhwýr kaxyw na pa ā mē amā harēnh nē hā kagà anē. Tā kot kaj mē amnhī kaxyw hkôt ajamaxpēr nē hkôt amnhī xunhwý hāmri nē nhýrmā atyk tā nhūm akupým mē ato mē atír ka mē ixpyrà nē kuri amex nē atír tūm nē apa ho apa. Tā pa ā mē amā mēmoj piitā harēnh nē hā kagà anē.

21

Jejus kot hkwyjé hwýr kator ā harēnh

Matēwre 26.32, 28.7, 28.10

¹ Tā nhūm Jejus axte hkôt mē ixpa ho mē ixpa xwýnh kwýjé hwýr kato. Himō pē Tipeja mýri. ² Pa mē ixpē 7 nē axpēn wýr akuprō. Na pre Simāw Pētre nē Tomas pihpohti nē Natānaew. Natānaewja Garirej kamā krī pē Kanā nhō xwýnh na pre. Nē wa pa wa ixpē Jepetew krata wa nē wa inhō wa pijakruuta wa. Pa prem wa mē nhýri axpēn wýr akuprō. ³ Hāmri nhūm Simāw Pētre mē inhmā:

—E pa jarāhā ma tep wýr tē nē hkwymnē. Anē.

Pa mē kuma nē kām:

—Tōe. Nà pa mē ijaxwýja ma akôt mō. Anē.

Hāmri nē mē ma himō rax pē Tipeja wýr mō nē kanōre mā agjé nē gôx kām kryhti rēnh o ixkuhē. Nom tee ri ho tep ōmnēnh kaxyw rēnh o ixkuhē nē hōmnēnh kēt nē ixtā apkati nhūm tep amrakati kumrēx.

⁴ Tā nhūm myt kato nhūm Jejus gō mýri xa. Pa mē ixpiitā omu no ām ixprī hā kēp Jejus ā omunh kēt nē. Tā no nhūm tām xa. ⁵ Hāmri nē mē inhmā kapēr nē mē inhmā:

—Pa. E mán ka mē ra tep kwýmnhēnh rax nē nà? Anē.

Hāmri pa mē kām:

—Tk. Nà mo tep? Amrakati kumrēx kēnā. Anē.

⁶ Hāmri nhūm mē inhmā:

—Xô wehe? Tōe. Axte mē axupôk rūm kryhti mē nē omu. Anē.

Hāmri pa mē mar xà hkôt ho anē nē kumē. Hāmri nhūm kamā tep hipu rax kumrēx nhūm utí rax nē. Pa mē tee ri ixte ho ixàpir kaxyw ri hkukjé. ⁷ Hāmri pa kēp Jejus ā omunh kuré kumrēx nē Simāw Pētre mā kām:

—Kwa pēr mē panhō Pahihiti na. Anē.

Hāmri nhūm inhma nē hkīnh týx nē akupým hinôka jaxà nē gôx kām mrō nē ma hwýr ho nana ho tē. ⁸ Hāmri pa mē hkôt kanōre kamā kryhti kjēnh o mō.

Ra amgrà hwỳr amgrire. Wỳr 100 met pix jakamā pa mẽ hwỳr ixpôx tokyx anê. ⁹ Nê pàr o hkre kura nê kuxi nê ijapôx pa nê Jejus wỳr ixprôt nê mra. Nhũm ra mẽ ixkutêp kuto nê par nhípêx nê nhỹhỹnh tep kwỳ par kām haxwỳ nê ho àr o nhỹ. Nê kaxyw pāwti nê amnhĩ ri haxwỳ nê o nhỹ. ¹⁰ Hāmri nê mẽ ixpumu nê mẽ inhmā:

—E mẽ amnê anhô tep o mra pu mẽ hkuxôt nê kuku. Anê.

¹¹ Hāmri nhũm Simāw Pêtre akupỹm pàr wỳr tẽ nê kryhti ho htỳx xà hpôt nê amgrà hwỳr hkjênh o mō. Kamā tep rũnh pix. Nê ohtô nê. Kamā kêp 153 nê hikwỳ htā nhũm nhỹhỹnh kryhti hkwỳ pikaxônkh kêt nê. ¹² Hāmri nhũm Jejus mẽ inhmā:

—E kwa mẽ tokyx mra pu mẽ apku. Anê.

Hāmri pa mẽ kuma nê hwỳr mra nê ixkrĩ pa. Hāmri nê tee ri omunh o ixkrĩ. Mẽ ixprĩ hã omunh mex kêt tâ kot ã mẽ inhmā amnhĩ nhípêx anhỹr ã omu nê kêp mẽ inhô Pahihti hkôt omunh kurê kumrêx jakamā hixi hã hkukjêr kêt nê. Âm akryk omunh o ixkrĩ. ¹³ Hāmri nhũm mẽ inhmā pāwti ho hkry pa. Nê hpānhã tep jamỳ nê mã ho anê nê ho hkry pa nê ho mẽ inhípêx pa pa mẽ ixàpkur o ixkrĩ.

¹⁴ Nhũm Jejus akupỹm htĩr kām ra ahpỹnhã mẽ ixwỳr hapôx o axkrunêpxi.

Jejus kot akupỹm tām Simāw Pêtre xãm

Atre 20.28-31; Wam Pêtre 5.1-4

¹⁵ Tã pa mẽ ra ixàpkur pa nê kànhmã ixkuhê nê gô mỳ ri mra. Hāmri nhũm Jejus Juāw hkra Simāw Pêtre mã tanhmã kapêr to. Nom ixpê Juāw nhũm kêp ixkra hkêt axtem Juāw ò hkra na pre. Jakamā nhũm Jejus kām kapêr nê kām:

—Kwa Simāw. Xà we amã ijapê ho ate pika hkôt mẽmoj piitã hakrenh par nà? Anê.

Hāmri nhũm kuma nê kām:

—Tỳ inhmā ajapê htỳx kênã Pahihti. Ra ate ja hã amnhĩ tã ixpumunh mex. Inhmā ajapêê. Anê.

Hāmri nhũm kuma nê kām:

—Tôe. Nà kêr ka inhmā mẽ kot ixkôt amnhĩ xunhwỳr xwỳnhjê jahkre mex o ri mẽ hkôt apa. Te ho ôwêhti hkrare jamār xwỳnh kot hamār mex o ri hkôt pata pyrāk. Anê.

Hāmri nhũm kām:

—Tôe. Nà kot paj amã mẽ ho anê. Anê.

¹⁶ Tã nhũm hã ahtũmre nhũm kê axte kām:

—Kwa Simāw. Xà we ãm hāmri na ka inhmā amnhĩ jarê. Xà we amã ijapêê nà? Anê.

Hāmri nhũm kām:

—Tỳ. Ra ate inhmā ajapê hã ixpumunh kênã. Anê.

Hāmri nhũm kê axte kām:

—Tôe. Kêr ka inhmā mẽ kot ixkôt amnhĩ xunhwỳr mã xwỳnhjê jahkre mex o ri mẽ hkôt apa. Te ho ôwêhti jamār xwỳnh kot ôwêhti jamār mex o hkôt pa xwỳnh kot amnhĩ nhípêx pyrāk. Anê.

Hāmri nhũm kām:

—Nà kot paj amã mẽ ahkre mex o ri mẽ hkôt ixpa. Anê.

¹⁷ Tã hāmri nhũm hã ahtũmre nhũm kê axte kām:

—Kwa Simāw. Xà we ãm hāmri na ka inhmā amnhĩ jarê? Xà we amã ijapê htỳx kumrêx nà? Anê.

Hāmri nhũm tee ri amnhĩ tã kuma nê hkaprĩ nê. Ra kot amnhĩ tã hkukjêr o axkrunêpxi jakamā nhũm hkaprĩ nê tee ri hamaxpêr. Hāmri nê kām:

—Kwa Pahihti. Ate mēmoj piitā omunh par. Nē ate inhmā ajapê htýx ā xpumunh par kēnā. Anē.

Hāmri nhūm kê axte kām:

—Tôe. Kêr ka inhmā mē kot ixkôt amnhī xunhwýr mã xwýnhjê jahkre mex o ri mē hkôt apa. Te ho ôwêhti jamār xwýnh kot hamār mex o ri pata pyrāk. Anē.

Hāmri nhūm kām:

—Nā kot paj amā mē ho anē Pahihti. Anē.

Simāw Pêtre tanhmā htyk to hkukamā harēnh

¹⁸ Nhūm Jejus arī Simāw Pêtre mã kapêr nê kām tanhmā htyk to hkukamā harēnh to nê kām:

—Kwa ixkapêr ma nê amnhī krā him haxār týx nê hā apa Simāw Pêtre. Nā kormā anyw ri na ka pre hte ma nhýhým apa kaxyw nê anojarêt hāmri nê anhñôhkā mex jagjê nê ma nhýhým amā apa hprām xā hkôt ri apa. Tā kot kaj apigêt nhūm mē apynê nê akahti hpre nê apa hpre nê ma nhýhým ato mō ka mē kām amnhī gō nê amnhī nê tanhmā mē kām nê hkêt nê. Amā mē hkôt amōr prām kêt tā māmri mē kām amnhī gō kê mē ma nhýhým ato mō. ¹⁹ Tā kêr ka arī ixkôt amnhī xām týx nê atír prām xaj mē umaj axte ixkaga hkêt nê. Hāmri nhūm mē apī nê tanhmā atyk to hā apumu nê amā Tirtúm kñh ā apumunh mex kurê kumrêx. Hāmri nê atā Pahi Maati Tirtúm mex o mex ā harê. Anē.

Nhūm pre ā Jejus Simāw Pêtre tyk kukamā kām ujarēnh anē. Hāmri nê kām:

—E kêr ka ixte amnhī to htýx nê amarī mē kām ixām nhūm mē kot ixpírja pyrā nê ā amnhī nhípêx anē. Anē.

Hāmri nhūm kuma nê kām:

—Tôe. Nā kot paj hāmri tā ā amnhī nhípêx anē Pahihti. Anē.

Juāw tyk kukamā tanhmā harēnh to hkêt ā harēnh

²⁰ Nhūm pre ā Jejus Simāw Pêtre mã tanhmā htyk to hkukamā harēnh anē. Hāmri nhūm kuma nê ixpê Juāw ā ixto hakêx nê ixpê Jejus kràmnhwý mex ā ixpumu. Kormā Jejus htyk kêt ri kamāt kām mē ixàpkur o ixkrīta ā na pa pre ìhkô hā ixàpkur o nhý nê kot mē kām ôr mã xwýnhta nhīxi hā hkukja.

²¹ Jakamā nhūm Simāw Pêtre ixto hakêx nê ixpumu nê ixtā Jejus kukja nê kām: —Kwa no pêr pahkôt mōr mŭj? Tanhmā koja we htyk to? Anē.

Hāmri nhūm kām:

²² —Nā kot paj amā tanhmā htyk to hkukamā harēnh hkêt nê. Kot pa inhmā arī kritpêm pa rāhā pa akupýn ixwrýk prām nhūm arī pa nê htyk kêt rāhā pa akupýn wrý. Kêr ka ri htyk kukamā tee ri tanhmā ajamaxpêr to hkêt nê. Am ixkôt pix mã ate amnhī nhípêx týx pix kukamā mán ajamaxpêr o ri apa.

²³ Anhýr o kām ijarēnh jakamā nhūm mē ixkwýjaja kot ā ijarēnh anhýrja ā kuma ma nê htýx nhýrmā ixyk kêt ā ixkamnhīx. Nê gaa nê rī piitā axpên mã ā ijarēnh anhýr o pa. Nom na pre ā ijarēnh anhýr kêt nê. Na kêt pre ijarēnh o: —Kot pa inhmā arī ri kritpêm pa rāhā pa akupýn ixwrýk prām nhūm arī pa nê htyk kêt rāhā pa akupýn wrý.

Anhýr o ijarê. Nom am hāmri ixyk kêt rāhā nhūm akupýn wrýk ā ijarēnh kêt nê.

Juāw kot Jejus kot tanhmā amnhī to hā kagā hpar kêt ā kot amnhī jarēnh *Juāw 20.30-31*

²⁴ E na pa mē amā Jejus kot tanhmā amnhī nhípêx to ho pa hā harê nê hā kagā. Ixpê hkôt ri ixpa ho ixpa xwýnhjê hō na pa am hāmri ā hā kagā anē. Ka

mě kamã harě ně ama ně ãm hãmri ixte kagà nhĩpêx kôt ixpumunh mex kurê kumrêx. ²⁵No na pre Jejus ãm ja pix o anhỹr o pa hkêt ně. Na pa ãm mẽ amã hkwy pix jarě ně hã kagà. Na pre tanhmã ri mẽmoj to rax kumrêx o ri pa. Nom kêp ãm ixte kot tanhmã ri amnhĩ nhĩpêx to piitã hã kagà hpar ronhỹx hã kagàja katutxô rax kumrêx. Jao te ra kaxkwa htêp o mōr pyrãk.

Tã ãm ja pix. Na hapêx.

Atre

Jejus nhỹ hã mẽ ahkre ho mẽ pa xwỳnhjaja kot tanhmã amnhĩ nhĩpêx to ho pa hã mẽ harênh

Rukre na pre kagàja nhĩpêx. Na pre kêp tôtô nê hkwỳjê kane ho pa. Nê Jejus nhỹ hã mẽ ahkre ho pa xwỳnh pê Pawre kôt pa ho pa. Hãmri nê hamaxpêr nê hkrãmnhwỳ Teopre mã kagàja nhĩpêx nê hwỳr kumê. Nê kagàja kamã Jejus nhỹ hã mẽ ahkre ho mẽ pa xwỳnh maati jaja kot Jejus mỳr pê tanhmã amnhĩ nhĩpêx to ho pa hã mẽ harê.

Nê Ijaew nhô patrejaja nê mẽ hkwỳ pê Parijew nhô xwỳnhjaja nê mẽ hkwỳ pê Satusew nhô xwỳnhjaja kot Tirtùm kapêr ã kagà htùm kamã harênh nê mar nê hkôt amnhĩ nhĩpêx tã Tirtùm Kra Jejus kôt amnhĩ nhĩpêx kêt ã mẽ harê. Mẽ kot kêp Tirtùm Kra hkêt ã hkamnhĩx jakamã na prem kãm mẽ kot hkôt amnhĩ xunhwỳr xwỳnhjê kurê nê. Tã nhũm Simãw Pêtre mẽ Pawre mẽ Jejus nhỹ hã mẽ ahkre ho mẽ pa xwỳnh kwỳjaja mẽ urak nê kêp Ijaew tã mẽ kurom Jejus hkôt amnhĩ xunhwỳ nhũm mẽ tee ri ja hã mẽ omu mẽ kamã gryk tỳx nê tanhmã mẽ hipêx to ho pa. Tã nom nhũm mẽ tee ri amnhĩ kukamã hamaxpêr nê Jejus kaga hkêt nê. Mẽ kot mẽ hipêx kati htã na prem arĩ Tirtùm Karô nhỹ hã mẽ piitã mẽ kãm tanhmã Jejus kot mẽ panê amnhĩ nhĩpêx to hã harênh o pa. Kam nê kapit 1 kamã wesik 8 japêr nê kamã harê. Hãmri nhũm Rukre ã mẽ kot amnhĩ nhĩpêx anhỳrja piitã hã kagà nê Teopre hwỳr kumê. Nê kãm mẽ harênh o:

Tirtùm Karô jarênh

Matêwre 28.16; Makre 16.14; Rukre 24.36; Juãw 20.19

¹ Pa Teopre? Xà amex? E ot pa axte awỳr kaga nhĩpêx nê kumê. Nà wam ixte awỳr kaga nhĩpêx nê mênhta kamã na pa pre amã Jejus kot tanhmã amnhĩ nhĩpêx to hã harê nê hã kagà. Kot tanhmã amnhĩ nhĩpêx to ho pa nê tanhmã mẽ ahkre hto ho paja krax rùm pa pre piitã hã kagà hpa nê awỳr kumê. ²⁻⁴ Kormã akupỳm kaxkwa hwỳr àpir xwỳj ri na pre ý hã mẽ ahkre ho pa kaxyw hkôt mẽ pa xwỳnh kwỳjê rê. Tã nhũm mẽ kãm hkurê xwỳnhjaja kupi nhũm amnhĩ xà htỳx kãm hamak rax kãm ty. Hãmri nhũm Tirtùm akupỳm ho htír. Nom nhũm ma akupỳm kaxkwa hwỳr àpir kurê kumrêx kêt nê. Na pre xatã mẽ kot ý hã mẽ ahkre ho mẽ pa xwỳnh maati jê hwỳr hapôj nhũm mẽ akupỳm htír kãm omu. Na pre hte nhỹri mẽ hwỳr hapôj nê tanhmã mẽ ahkre hto nê mẽ kãm:

—Na pre Tirtùm mẽ ato hkra nê tãm mẽ ate amnhĩ nhĩpêx o apa kaxyw mẽ axunhwỳ.

Anhỹ o mẽ ahkre hã arĩgro ho 40. Hãmri nê kormã mẽ kamã pa ri axte tanhmã mẽ kãm kapêr to. Tirtùm Karô nhỹ hã mẽ kãm kapêr nê mẽ kãm:

—E kêr ka mẽ krĩ ja kamã ri apa nê tokyx ma nhỹhỹm apa hkêt nê. Kê Inhĩpêxã Tirtùm mẽ awỳr amnhĩ Karô rê mãn. Ra ixte mẽ amã harênh xà hkôt koja mẽ awỳr kurê nhũm mẽ awỳr wrỳ nê mẽ akarô mã agjê ka mẽ rĩ kormã anhgrã nê ma nhỹhỹm krĩ hkôt ri mẽ kãm kapêr jarênh o ri mẽ hkôt apa.

⁵—Juãw Paxis na pre hte Tirtùm mã gôx kãm mẽ hkrã kumrãr o pa. Tã koja Tirtùm tokyx mẽ awỳr amnhĩ Karô rê. Kot ixpãnhã amnhĩ kaxyw mẽ ato mẽ amã ma hkêt kaxyw mẽ awỳr kurê. Koja hã apkati grêre nhũm mẽ awỳr kurê

nhũm ixpānhā mẽ awỳr wrỳ nē mẽ amā agjê nē mẽ akamā mẽ akôt pa ho pa. Ka mẽ rĩ kormā Jerujarē rũm ajapôj nē ma mẽ kām Tĩrtũm kapēr jarēnh o ri mẽ hkôt apa. Anē.

Jejus akupỹm kaxkwa hwỳr àpir ã harēnh
Makre 16.19; Rukre 24.50

⁶ Tã nhũm mẽ axte akuprō. Jejus nē ỹ hã mẽ ahkre ho mẽ pa xwỳnh maatiijaja nhũm mẽ hixêt pē Oriwēhti nhũmōk ã axte axpēn wỳr akuprō. Hãmri nhũm mẽ amnhĩ tã Jejus kukja nē kām:

—Kwa Pahihti mẽ inhmā mẽmoj jarē. Xà kot kaj tokyx apē Tĩrtũm kot mẽ ixwỳr amēnh xwỳnh ã amnhĩ jarē nē Rõm nhõ xwỳnhjê nē mẽ pahpē Ijaew kator nà? Hãmri pa mẽ pamjaja amnhĩ to amnhĩptār o ri ixpa. Anē.

⁷ Hãmri nhũm mẽ kām:

—Nã Inhĩpēexà pix na ã mẽmoj kot anhỹrja kukamā àhpumunh. Tapxipix na kot mẽmoj tanhmā ho hã arĩgro nē mẽmoj tanhmā ho hã mytwrỳ pumunh mex. No mẽ kajaja mo kaxyw kot ka mẽ amnhĩ katorta kukamā amnhĩ jarēnh ma? ⁸ Nã kot paj ãm mẽ amā mẽmoj to pyxire nē hkukamā harē. Koja Tĩrtũm tokyx mẽ awỳr amnhĩ Karō rē nhũm ixpānhā kot mẽ ato amnhĩptār kaxyw mẽ akarō mã agjê. Hãmri ka mẽ ma pyka piitã hkôt anhgà nē ma mẽ kām ixkapēr jarēnh o ri mẽ hkôt apa. Jar Jerujarē kamā nē pika pē Jutej kôt nē nhãm pika pē Samar kamā nē pika piitã hkôt mẽ kām ijarēnh o ri mẽ hkôt apa. Æ mẽ ate amnhĩ nhĩpēx anhỹr pix kukamā kot paj mẽ amā harē. Anē.

⁹ Nhũm pre ã Jejus mẽ kām kapēr anē hãmri nē mẽ kēp kànhmā àpir o tē nē mẽ noo mã ma kaxkwa hwỳr àpir o tē nē kakrām axà nē mẽ kēp akunok.

¹⁰ Hãmri nhũm mẽ tee ri hapēr o kuhē rāhā nhũm mẽhõ myja wa axkrut nē mẽ hwỳr wrỳ nē mẽ kutā wa xa. Wa é hakaj nē wa xa. ¹¹ Hãmri nē mẽ kām:

—Pa Garirej nhõ xwỳnhjaja? Kwa mo kaxyw na ka mẽ tee ri kaxkwa pumunh o akuhê? Tĩrtũm na akupỹm amnhĩ wỳr Kra Jejus o api ka mẽ àpir kām omu. E mẽ tee ri hkukamā ajamaxpēr kêt nē. Koja nhỹrmã man akupỹn mẽ awỳr wrỳ. Te mẽ arũm kaxkwa hwỳr àpirja pyrà nē akupỹn mẽ awỳr wrỳ ka mẽ omu. Anē.

Akupỹm Jerujarē hwỳr mẽ mrar ã mẽ harēnh
Rukre 24.52

¹² Tã nhũm Jejus nhỹ hã mẽ ahkre ho mẽ pa xwỳnh maatiijaja wa kuma nē awjanā nē ma akupỹm krĩm mra. Hixêt pē Oriwēhti rũm ma akupỹm Jerujarē hwỳr mra. Wỳr jawỳ nhũm mẽ akupỹm hpòx tokyx anē. ¹³ Hãmri nē akupỹm kỳx pē ixkreja wỳr api nē agjê. Na pre

Simāw Pētre nē

Juāw nē

Xiakre nē

Andrehti nē

Firipti nē

Tomas nē

Patoromew nē

Matēwre nē

Xiakre hõ pē Apew kraja nē

Simāw Jerox nē

Jut pē Xiakre hkraja.

Mē piitã Jejus nhỹ hã mẽ ahkre ho mẽ pa xwỳnh maatiijaja na pre mẽ. ¹⁴ Nē mãānēn mẽ hkôt mẽ hkwyjaja. Jejus katorxà Marir nē Jejus tōjaja nē Jejus kot

tanhmã mēni ho mex to xwýnh kwýjaja nhũm prem kýx pê ixkreja wýr Jejus nhỹ hã mẽ ahkre ho mẽ pa xwýnh maatijê hkôt gjêx pa. Hãmri nê xatã axpên wýr akuprô nê Tirtũm mã amnhĩ jarênh o hkrĩ.

*Tirtũm kot Jut Kariot pãnhã mēhõ xãm ã harênh
Matêwre 27.3-10; Juãw 15.27*

¹⁵⁻¹⁹ Tã nhũm mẽ kot Jejus kôt amnhĩ xunhwýr xwýnhjaja ra kêp 120. Jakamã nhũm mẽmo arĩgro hã axpên wýr akuprô nê hkrĩ. Nhũm Simãw Pêtre kãnhmã xa nê tanhmã mẽ kãm Jut Kariot jarênh to nê mẽ kãm:

—E Jejus kôt ixtô nê ixtôxjaja. Pa mẽ amã tanhmã finat Jut Kariot jarênh to ka mẽ inhma. Na pre axtem nê mẽ pahkwýjê mã Jejus ã amýnê nê hpãnhã kãxpore hkwý jamý nê o tẽ nê ho amnhĩm pyka hkwý japrô. Tã tanhmã amnhĩ to nê nhỹri ô pyka kamã tẽm nê amnhĩ tu katôk nê hkrêx kato nê ty nê hkamrô ho ô pyka xy hpa. Jakamã nhũm Jerujarê nhõ xwýnhjaja harênh ma nê pykaja ã hixi mẽ nhũm kêp “pyka kamrôhti.” No mẽ pahpê Ijaew kapêr kãm kêp “Ajetãm.” Amnepêm na pre Tirtũm Karô finat Tawi mã Jut Kariot kukamã tanhmã harênh to. Kormã kator nê kot tanhmã amnhĩ to hkêt tã nhũm ra hkukamã omu nê Tawi mã harê. Kot axtem nê mẽ kãm Jejus ã ãmnhênhja nhũm hkukamã omu nê Tawi mã harê nhũm kuma nê ô ri hã kagã. Tã nhũm kot hkukamã hã kagã hkôt nhũm ã Jejus nhĩpêx anê. Jut Kariotja mẽ panhĩõ na pre. Na pre Jejus mẽ pahpyrà nê amnhĩm kuta. Mẽ pahpyrà nê ý hã kapêr jarênh o pa kaxyw. Tã nhũm axtem nê ã hipêx anê.

²⁰ Nom na pre Tawi kot Tirtũm mex ã gre ã kagã kot ra hkukamã tanhmã harênh to. Kagã hkwý pê Sam kamã kot harênh kot:

Kot amnhĩ tomnuj xwýnhnta nhõrkwý koja hkaprýn kuhê ho kuhê nhũm mēhõj mýr pê kamã pa hkêt kumrêx. Kojã ãm arĩ hkaprýn kuhê ho kuhê.

Nom kot Jejus mã tanhmã amnhĩ nhĩpêx to ho paja kê mēhõ mýr pê ho amnhĩptã nê hpãnhã Jejus nhỹ hã mẽ ahkre ho pa. Anê.

Ã Tirtũm kapêr ã kagã htũm kot Jut Kariot kukamã harênh kot anhýr.

²¹ Jakamã e ixkwýjaja. Kot puj mẽ hpãnhã mẽ atõ xãm ka Jut mýr pê mẽ pahpê Jejus nhỹ hã mẽ ahkre ho ixpa xwýnhjê hkôt Jejus akupým htĩr ã harênh o apa. ²² E mẽ atõ na ka pre mẽ ixpyràn finat Juãw Paxis kot Jejus hkrã kumrãr ã omu? Nê Jejus kot ri tanhmã amnhĩ nhĩpêx to ho pa xã hkrax rũm ka mẽ ixkôt ri omunh o ri apa? Nê htyk kãm omu nê akupým htĩr kãm omu nê ma akupým kaxkwa hwýr ãpir kãm omu? E mẽ atõ na ka pre mẽ ixpyràn ã kot amnhĩ nhĩpêx anhýr ã omunh par o ri hkôt apa? ã mẽ ate kot amnhĩ nhĩpêx anhýr ã omunh o apa xwýnhjê hõ kot paj mẽ ata ka Jut Kariot mýr pê mẽ ixpyràn ma mẽ kãm Jejus akupým htĩr ã harênh o ri apa. Anê.

²³ Nhũm pre ã Simãw Pêtre mẽ kãm kapêr anê. Hãmri nhũm mẽ kuma nê axpên pumunh o hkrĩ hãmri nê Maxitre mẽ Jujere wa kãm hamaxpêr. Jujere na pre hixi axkrunêpxi. Na pre kêp Jujere nê kêp Pasapas nê kêp Justi. ²⁴⁻²⁵ Hãmri nhũm mẽ wa hã Tirtũm kukja nê kãm:

—Pa Tirtũm? Nã na pre finat Jut Kariotja Jejus kaga nê ty nê kot amnhĩ tomnuj mýrapê ma mẽ kot amnhĩ xã htýx kamã hamak tũm xãta wýr ma mō. Tã ot pa mẽ ixte mēhõ kot mýr pê mẽ ixpyrà nê Jejus nhỹ hã mẽ ahkre ho pa kaxyw mēhõ hã akukjêr kaxyw akuprô. Ate mẽ ixpiitã tanhmã mẽ ixte amnhĩ nhĩpêx to ho ixpa hã mẽ ixpumunh par Tirtũm. Ate mẽ ijamaxpêr kôt mẽ ixpumunh par nê mẽ ixte tanhmã amnhĩ nhĩpêx to hã mẽ ixpumunh par. Jakamã e. Ota Maxitre mẽ Jujereja wa nhỹ. Nhỹ kot kaj amnhĩm ata? Kot paj mẽ kên pijakrutja ã wa hixi xi nê ho ãk nê hõ py. Hãmri ka amã hprãm

xwýnhta ta. Kêr pa mē kēn pumunh kêt rāhā hō py nē hā hixi pumu nē amā hprām xwýnh kôt omunh kurē kumrēx. Anē.

²⁶ Nhūm prem ā Tirtūm mā kapēr anē hāmri nē kēnja o axkamur nē ho àk nē omunh kêt rāhā ja py nē omu nhūm hā Maxitre nhīxi nō. Jakamā nhūm Jejus nhỹ hā mē ahkre ho mē pa xwýnh maatiijaja amnhī kôt kumē nhūm mē akupým kēp 12.

2

*Tirtūm Karō kot mē hwýr wrýk ā harēnh
Rukre 24.49; Atre 4.31, 8.15, 10.44, 19.2*

¹ Tā nhūm mē hkīnh pē Pētekos kato nhūm mē kot Jejus kôt amnhī xunhwýr xwýnhjaja nhỹri axpēn wýr akuprō nē hā hkīnh. Pētekosja ā na pre hte Ijaew mē hpur kām mēō rūnh ā hkīnh kaxyw axpēn wýr akuprō nē hā hkīnh. Jakamā nhūm mē kot Jejus kôt amnhī xunhwýr xwýnhjaja haxwýja axpēn wýr akuprō. ² Hāmri nē kaxkwa kamā mēmoj ma. Nhūm mēmoj te kōk xāpēr tỳx krihkrit pyrāk o mē hwýr wrýk o mō nē mē pikuprōnh xā hā ixkreja wýr axā nhūm mē piitā kuma. ³ Hāmri nhūm mēmoj te kuwy jakrax pyrākja ahpýnhā mē hwýr anhrā nē mē hkrā nhīmōk ā hikwý. ⁴⁻¹³ Tirtūm Karō na pre. Tām mē hwýr wrýk jakamā ā ri mē hipēx anē. Hāmri nē kot mē ho amnhīptār kaxyw mē hkarōm gjēx pa nhūm mē ý hā tanhmā kapēr to ho kuhē. Nom mē kapēr o kapēr kêt nē. Axtem mē kapēr kwý ho kapēr. Tirtūm Karō kot tanhmā mē ho jakamā nhūm mē axtem mē kapēr kwý ho kapēr. Jao ahpýnhā mē kapēr kwý ho Tirtūm mā mex o mex ā harē. Na pre Ijaew kwýjaja ahpýnhā pyka hō kamā ri mē hkôt pa nē mē kapēr ma nē ho kapēr o pa. Tā akupým Jerujarē hwýr pan pōj nē kamā ri pa ho pa. Hāmri nē mēmojta ma nē ma Jejus kwýjē hwýr hprōt nē ahpýnhā mē kapēr ā mē kuma nē tee ri mē omunh o kuhē. Amnhī jaēr pē mē kuma nē tanhmā axpēn mā mē harēnh to ho:

—Kokýy. Garirej nhō xwýnhjaja kot mē pakapēr mar kêt tā ra tanhmā amnhī to nē ahpýnhā ri mē pakapēr o kapēr. Ahpýnhā mē pakapēr nē ahpýnhā mē panhō pyka htā nhūm mē ā ri mē pakapēr o kapēr anē.

Na pika pē Pat

nē Met

nē Erāw

nē Mēsopotām

nē Jutej

nē Kapatos

nē Pōt

nē As

nē Prik

nē Pāpir

nē Ejit

nē Sirēn wýr Ripja

nē krī pē Rōm

nē gō hipōk pē Kret

nē Arap.

Nē mē pahkwýjaja mē pahpē Ijaew kumrēx

nē mē pahkwýjaja amarī ri amnhī to Ijaew.

Ām ahpýnhā mē panhō pyka nē ahpýnhā ri mē pakapēr.

—Tā pu mē ahpýnhā mē pakapēr kām mē kapēr ma. Tirtūm mex ā mē kot axpēn mā harēnhja pu mē hā mē mar mex nē. Anē.

Nhũm prem ã axpẽn mã mẽ harẽnh anẽ nẽ tee ri mẽ omunh o kuhê. Amnhĩ jaêr pê amnhĩ kapêr kãm mẽ kapêr ma nẽ tee ri hamaxpêr nẽ axpẽn mã:

—Kokÿy. Tanhmã mãn pre wem amnhĩ to nẽ ra mẽ pakapêr ma nẽ mẽ pakapêr o kapêr? Anẽ.

Nhũm mẽ hkwyjaja axtem nẽ ri mẽ hã hpêr o axkê nẽ axpẽn mã:

—Tk. Âm mẽ pipãnh ã ã ri mẽ kot amnhĩ nhĩpêx anhÿr kênã. Anẽ.

Simãw Pêtre kot mẽ kãm ujarẽnh

Atre 3.12-26

¹⁴ Hãmri nhũm Simãw Pêtre ã mẽ kapêr anhÿrja ma hãmri nẽ kÿx pê mẽ kãm kapêr nẽ mẽ kãm:

—E Jerujarê nhõ xwÿnhjaja nẽ mẽ apê ixkwÿ Ijaew. Pa mẽ amã mẽmoj jarê ka mẽ inhma nẽ inhmar tÿx nẽ. ¹⁵ Na ka mẽ atÿx ri mẽ ixpipãnh ã mẽ ixkamnhĩx. Mẽ ixkrã pipãnh kêt. Kormã myt kaxkwa nhĩpôk wÿr htêm kênã. Na hte Ijaew kwÿhtã kagôxÿhti ho hkôm kêt nẽ. ¹⁶ Ja na pre Tirtũm amnepê mã ã mẽ ixte amnhĩ nhĩpêx anhÿrja kukamã mẽ ijarê nhũm ÿ hã kapêr o pa xwÿnh finat Joew mẽ ixkukamã hã kagã. Nẽ hã kagã ho:

¹⁷ Koja nhÿrmã mẽmoj piitã hapêx kaxyw pa mẽ piitã mẽ hwÿr Ixkarô rê nhũm ma mẽ hwÿr wrÿ nẽ mẽ hkarô mã agjê. Hãmri nhũm mẽ hkanrêhã mẽ hkra xãptãr nywjaja ma mẽ kãm ixkapêr jarẽnh o ri mẽ hkôt pa. Koja mẽ hpimtir kãm amnhĩ kukamã mẽmoj pumu. Nẽ mẽhpigêtjaja haxwÿja. Kot paj mẽ hpimtir kãm tanhmã mẽ kãm ixkapêr to.

¹⁸ Nẽ kot paj mẽ kot ixkôt ri tanhmã amnhĩ nhĩpêx to ho mẽ pa xwÿnhjê hwÿr Ixkarô rê nhũm mẽ ÿ hã ma mẽ kãm tanhmã ixkapêr jarẽnh to ho ri mẽ hkôt pa.

¹⁹ Kot paj kaxkwa kamã nẽ pyka kamã aa mẽ kot mẽmoj pumunh kêt kwÿ ho anẽ nhũm mẽ amnhĩ jaêr pê omu. Jao nhÿri mẽ hkamrô pumu nẽ kuwy pumu nẽ kuwy hkũm pumu hãmri nẽ tee ri amnhĩ kukamã hamaxpêr.

²⁰ Nẽ koja myyti ahtyk nhũm mytwrÿre haxwÿja te mry kamrô pyrãk. Pahihti Jejus akupÿn hpôx xã hã arÿgro xwÿj ri koja mẽmoj ã amnhĩ nhĩpêx anẽ. Akupÿn hpôx xã hã arÿgro koja mex kumrêx.

²¹ Tã koja mẽhõ mẽmoj kot ã amnhĩ nhĩpêx anhÿr ã omu nẽ amnhĩ kaxyw inhmã hamaxpêr nẽ amnhĩ to ixwÿ pa kuma nẽ ho ixkra nẽ mẽmoj punujta pê utã. Anẽ.

Na pre ã Tirtũm kapêr anẽ nhũm finat Joewja mẽ pamã hã kagã. ²² E pa mẽ amã tanhmã Jejus jarẽnh to ka mẽ inhma. Nã Najare nhõ xwÿnh na pre. Mẽ pahte Tirtũm nhÿ hã kot tanhmã amnhĩ nhĩpêx to ho pa hã omunh kaxyw na pre Tirtũm mẽ pahwÿr kumê nhũm ÿ hã mẽ panoo mã tanhmã amnhĩ nhĩpêx to ho pa. Nẽ aa mẽ pahte mẽmoj pumunh kêt kwÿ ho anhÿr o pa pu prem hã omu.

²³ —Tã ka prem tanhmã kaxyw ajamaxpêr punuj to nẽ apĩ. Tirtũm ra kot amnepê mã ja kukamã ja hã mẽ apumunh mex tã mẽ pahwÿr kumê ka mẽ axtem nẽ apĩ. Jao mẽ kot htÿx ri amnhĩ nhĩpêx o mẽ pa xwÿnhjê mã agô nhũm mẽ kupi. Pĩ kahpa hã kunhõ nhũm ty. No âm mẽ kajaja na ka prem mẽ kãm hã amÿnê nhũm mẽ ã mẽ amã hprãm xã hkôt hipêx anẽ nẽ mẽ amã kupi.

²⁴ —Tã nhũm Tirtũm akupÿm ho htĩr nhũm akupÿm htĩr o htĩr nhũm mẽ htykja tee ri kot amnhĩ kôt mẽnh prãm kaprÿ. ²⁵ Amnepêm na pre finat Tawija Jejus akupÿm htĩr kukamã harê. Te Jejus tãm kapêr pyrãk o kapêr nẽ kapêr o:

Na hte Pahi Maati ixkôt pa ho pa rãhã nê. Kot inhîhkô hã ixtãnopxar o pa jakamã kot paj inhmã ma hkêt nê ri ixãmnhîx ijamakêtkati nê ri ixpa.

26-27 Pa Tirtûm? Nã kot paj nhÿrmã ixytk tâ arî amnhî wÿr akãm ama. Kot kaj mẽ htykjê kamã ixkarô rer kêt nê. Ixte akapêr kôt amnhî nhîpêx mex o ri ixpa jakamã koja inhî kormã omnu nê hkro hkêt ri ka akupÿm ixto ixtîr. Jakamã na pa inhmã ixytk pyma hkêt nê ixkînh nê ijamakêtkati nê ri ixpa. Nê amnhî kînh jarênh rãhã ho ri ixpa.

28 Na ka pre akupÿm ixto ixtîr ã amnhî jarê pa ixtîr tûm nê ixpa ho ixpa kaxyw. Tã ate ixkôt ri apa rãhã jakamã pa ixkînh nê ri ixpa. Anê.

29 ã na pre mẽ panhîgêt finat Pahi Tawija Jejus htyk nê akupÿm htîr kukamã harênh anê. No tãm amnhî jarênh kêt nê. Tawija na pre ty nhûm mẽ haxã nhûm htem arî haxãr xã hã pika ho mex o pa. Tã tãm ã kot amnhî jarênh anhÿr ro nhÿx akupÿm htîr nhûm mẽ arî haxãr xã kapÿr ho mex o pa hkêt nê.

30 Pahi Tawî kêp Tirtûm nhÿ hã kapêr jarênh o pa xwÿnh jakamã nhûm Tirtûm kãm hkanrêhã htãmnhwÿ Jejusja kukamã harê nê kãm: Koja nhÿrmã akanrêhã atãmnhwÿjê hõ amÿr pê apyrã nê mẽ ho amnhîptâr o pa. ãm hãmri na pa amã ja jarê. Anê.

31 Nhûm pre ã Tirtûm Tawî mã mẽ pakaxyw ãm mã xwÿnhnta jarênh anê nhûm kuma. Nê mar tÿx jakamã hkukamã htyk nê akupÿm htîr ã harê nê hã kagã. Nê hã kagã ho:

Koja Tirtûm mẽ htykjê kamã hkarô rer kêt nê nhûm aa ï omnu nê hkro kêt. Anê.

ã na pre finat Tawija Jejus Kris kukamã harê nê hã kagã anê. 32 Kot harênh xwÿnh Jejusja tãm na pre Tirtûm akupÿm ho htîr pa mẽ pamjaja akupÿm htîr kãm omu. Hãmri nê mẽ ixte omunh xã hkôt ã mẽ amã harênh anê. Anê.

Nhûm pre ã Simãw Pêtre mẽ kãm Jejus jarênh anê. Hãmri nê mẽ kãm:

33 —Na pre Tirtûm akupÿm amnhî wÿr Kra Jejus o api. Hãmri nê kãm anê nhûm îhkô hã mẽmoj piitã ho amnhîptâr o hkrî. Hãmri nhûm Tirtûm kot kãm amnhî jarênh xã hkôt kãm amnhî Karô gô. Tã nhûm ra amnhî pyrã nê mẽ ixwÿr kurê nhûm jarãhã mẽ ixwÿr te kuwy jakrax pyrã nê mẽ ixwÿr wrÿ nê mẽ ixkarô hwÿr gjêx pa. Hãmri pa mẽ ÿ hã ahpÿnhã mẽ akapêr o ixkapêr ka mẽ inhma. Tã mẽ akwÿjaja axtem nê mẽ xpipãnh ã mẽ ixkamnhîx. 34 No finat Tawija na pre tãm kaxkwa hwÿr àpir ã amnhî jarênh kêt nê. Jejus kot ï ho kaxkwa hwÿr àpirja na pre harê nê harênh o:

Na pre Tirtûm inhõ Pahihti mã kapêr nê kãm:

35 “E jar inhîhkô hã nhÿ.

Pa amã mẽ kãm akurê xwÿnhjê gô ka mẽ ho amnhîptâr o akrî.” Anê.

ã na pre finat Tawija Tirtûm kapêr jarênh anê. Nom tãm ï rãhã kaxkwa hwÿr àpir ã amnhî jarênh kêt nê. Pahihti Jejus na pre ã hã harênh anê. 36 Jakamã kwa ixkwÿ Ijaew. Mê inhma nê inhmar tÿx nê. Mê ate Jejus ã axãmnhênh nhûm mẽ kot mẽ amã pî kahpa hã hpîr xwÿnhnta. Tãm na pre Tirtûmja kêp mẽ panhõ Pahihti kaxyw ãm. Nê kêp mẽ papytâr xwÿnh kaxyw mẽ pakaxyw ãm. Anê.

37 Nhûm pre ã Simãw Pêtre mẽ kãm ujarênh anhÿr o xa. Hãmri nhûm mẽ tee ri ujarênhja ma nê hkaprî nê. Nê tee ri amnhî kukamã hamaxpêr nê hamaxpêr o:

—Hêxta waa nê. Pêr ãm hãmri na pre Jejus mẽ pamã amnhî jarênh tã pu prem amnhî kaxyw hkôt pajamaxpêr kêt nê axtem nê kupî. Anê.

Hãmri nê amnhî tã mẽ hkukja nê Simãw Pêtre mã:

—Kwa ã kot anhÿr jakamã tanhmã kot paj mẽ amnhî nhîpêx to? Anê.

³⁸ Hāmri nhūm mē kām:

—Nà kêr ka mē tee ri ate amnhī tomnuj mā ajamexpēr nē akaprī nē. Hāmri nē Jejus Kris kôt amnhī xunhwỳ. Pa mē ja hā mē apumu nē Jejus nhỹ hā mē akrà kumrà. Hāmri nhūm Tirtūm ja hā mē apumu nē te amnhī katut kôt mē ate amnhī tomnuj piitā rēnh par pyrā nē axte kām hamaxpēr kêt nē. Hāmri nē mē ixkuxwar mē awỳr amnhī Karō rē. ³⁹ Kām mē awỳr rēnh prām. Mē amā nē mē akanrēhā mē akra nē mē atāmnhwỳjē mā nē mē kot kormā Tirtūm kapēr mar kêt xwỳnhjē mā. Ām mē kot amnhī to hwỳr xwỳnh piitā nhūm kām mē hwỳr rēnh prām. Anē.

⁴⁰ Nhūm pre ā Simāw Pêtre mē kām ujarēnh anē. Mē kām kapēr xihtỳx o kapēr ry nē. Hāmri nē mē kām:

—Koja nhỹrmā Tirtūm mē kot tanhmā amnhī tomnuj to ho mē pa xwỳnhjaja tanhmā mē homnuj tỳx to. Jakamā kwa mē tokyx mē ate amnhī tomnuj kaga kê tanhmā mē ato hkêt nē. Anē.

⁴¹ Hāmri nhūm mē hkwỳjaja kapēr mar tỳx nē amnhī kaxyw Jejus kôt hamaxpēr nē hkôt amnhī xunhwỳ. Mē ohtô rax nē hkôt amnhī xunhwỳ. Mē kēp 3.000 nē hkôt amnhī xunhwỳ. Hāmri nhūm mē kot Jejus nhỹ hā kapēr jarēnh o mē pa xwỳnhjaja mē hkrā kumrār pa. Mē kēp Jejus kwỳ hā amnhī to amnhīrit kaxyw mē hkrā kumrār pa. ⁴² Hāmri nhūm mē ra mē kot Jejus kôt amnhī nhĩpēx xwỳnhjē hkôt amnhī nhĩpēx o pa nhūm Jejus nhỹ hā mē ahkre xwỳnh maatijaja apkati mē Jejus kapēr o mē ahkre nhūm mē mar tỳx nē ra Jejus kôt amnhī nhĩpēx mex o mō. Nē gaa nē hkôt amnhī nhĩpēx mex o pa. Mē kām kapēr mar prām tỳx jakamā na pre htem xpēn wỳr akuprō nē xpēn kutā apku nē Tirtūm mā amnhī jarēnh o hkrī. Nē mē kām xpēn to mex pix prām o xpēn kôt pa ho pa.

Jejus kwỳ kot tanhmā amnhī nhĩpēx to hā mē harēnh
Atre 4.32-35

⁴³ Tā nhūm Jejus nhỹ hā mē ahkre ho mē pa xwỳnh maatijaja xatā Tirtūm nhỹ hā aa mē kot mēmoj pumunh kêt kwỳ ho anhỳr o ri krī nhō xwỳnhjē hkôt pa nhūm mē piitā ja hā mē omu. Amnhī jaēr pē mē omu nē mē kamā no puma ho tee ri tanhmā Tirtūm mā hamaxpēr to. ⁴⁴ Nhūm mē kot Jejus kôt amnhī xunhwỳr xwỳnh piitā mēmoj to xpēn kutā nojarēt o pa. Jao xpēn pē ri mēmoj to õxy hkêt nē pa. ⁴⁵ Jakamā nhūm mēhō kēp amrakati nhūm mē ja hā omu hāmri nē õ pyka hkwỳ ho wēnē rỳ mē hikukrēx kwỳ ho wēnē nē kàxpore jamỳ nē ma o mra nē mē kām kugō. Na pre hte ā mē kot Jejus kôt amnhī xunhwỳr xwỳnhjaja xpēn nhĩpēx anhỳr o pa. ⁴⁶ Hāmri nē apkati mē Tirtūm mā amnhī jarēnh xā hā ixkre hwỳr mra nē kām mex o mex ā harē. Nē hamakētkati nē amnhīx ri hkīnh kām xpēn nhōrkwỳ hkôt ri apkur o pa. ⁴⁷ Pē Tirtūm mā mex o mex ā harēnh o ri xpēn kôt pa. Ā mē kot amnhī nhĩpēx anhỳr o pa jakamā nhūm krī nhō xwỳnh piitā kām mē hkīnh nē. Nē mē hkwỳjaja apkati mē mē hwỳr mra nē mē hkôt axkamē nē mē urāk nē Jejus kôt amnhī xunhwỳ nhūm Tirtūm ja hā mē omu nē mē ho hkra. Jakamā nhūm mē ra ohtô rax kumrēx o mō.

3

Te grā xwỳnh jarēnh
Juāw 14.12-14; Atre 14.8-10

¹ Tā nhūm apkati hō hā nhūm Simāw Pêtre mē Juāw wa ma Tirtūm mā amnhī jarēnh xā hā ixkre hwỳr wa tē. Na pre hte myt àhpanh grire nhūm mē piitā

kot Tirtûm mã amnhĩ jarênh kaxyw hwÿr mra. Jakamã nhũm Simãw Pêtre mẽ Juãw wa haxwÿja ma hwÿr wa mra. ² Nhũm mēhōja hakwakrem hkrĩ. Katorxã nhōxã hkre rũm hte grã nē kator xwÿnhnta. Nē arĩ hkrĩ ho hkrĩ nē aa kãnhmã ãm nē ri pa hkêt nē. Nhũm hte hkrãmnhwÿjaja apkati mẽ hamÿ nē ma o pa nē Tirtûm mã amnhĩ jarênh xã hã ixkre jakwakrem hkrĩ nhũm mẽ hwÿr o hkrĩ. Hakwakreja mẽ kot kãm: “Mē gjêx xã mex” anhÿr xwÿnhnta kapem hwÿr mẽ mrar xwÿnhjê hwÿr o hkrĩ. ³ Tã nhũm Simãw Pêtre mẽ Juãw wa tē nē ixkreja wÿr wa àr o tē nhũm hte grã xwÿnhnta wa omu nē kãxpore hã wa kuwÿ ⁴ nhũm Simãw Pêtre omu nē kãm:

—E amnē wa ixpumu. Anē.

⁵ Hãmri nhũm kuma nē htÿx ho wa kot kãm kãxpore hkwy nhōr ã wa hkãmnhĩx nē wa omu ⁶ nhũm Simãw Pêtre kãm:

—Nã ixkãxpore hkêt. Nom kot paj Jejus Kris xàhpumunh xã ho tanhmã anhĩpêx to. E pa Jejus Kris pē Najare nhō xwÿnhnta nhÿ hã amã ixkapêr jakamã tokyx kãnhmã xa nē ri mra. Anē.

⁷ Hãmri nē upôk rũm hpa hã kupy nē kãnhmã ãm nhũm hte mex nē kãnhmã xa nē amnhĩ te karo ho ri mra. ⁸ Hãmri nē hte mex ã amnhĩ pumu nē hkĩnh tÿx nē. Nē hkĩnh xãj ma wa hkôt harĩ ho tē nē wa hkôt ixkrem axã. Tirtûm mã mex o mex ã harênh pē harĩ ho wa hkôt tēn axã. ⁹ Hãmri nhũm mẽ piitã amnhĩ jaêr pē akupÿm mex ã omu nē kamã no pyma nē. ¹⁰ Nē axpēn mã:

—Kokÿÿ mũjti na pre hte mẽ gjêx xã mex kamã mẽ hwÿr rãhã ho hkrĩ htã nhũm Tirtûm tanhmã ho nhũm kãnhmã xa nē ri mrar mex kurê kumrêx. Hêxta waa nē. Anē.

Simãw Pêtre kot mẽ kãm ujarênh

Rukre 24.46-47; Atre 2.14-36

¹¹ Hãmri nhũm hte mex xwÿnhja Simãw Pêtre mẽ Juãw wa hkôt ixkre hwÿr axã nē wa kuri xa. Nhũm mẽ piitã amnhĩ jaêr pē harênh ma nē hwÿr hprôt nē agjê nē omu. Mē kot ixkre nhĩkjê jarênh o: “Pahi Sarumãw nhō” anhÿr xwÿnh jarênhja wÿr nhũm mẽ hprôt nē hte mex xwÿnhnta kamã no pyma ho kuhê. Nē kuri Simãw Pêtre mẽ Juãw wa omu nē axpēn mã wa harênh o:

—Hêxta waa nē. Tanhmã na we wa amnhĩ to nē akupÿm kãm hte ho mex nhũm ri mra?

Anē nē wa kamã no pyma nē. ¹² Hãmri nhũm Simãw Pêtre mẽ kuma nē mẽ kãm:

—Pa ixkwÿjaja. Kwa mẽmo na ka mẽ ri mẽ ixkamã ano pyma ho akuhê? Xã wa ixãhpumunh tÿx xã ho na pa wa ho mex? Nã ja kot anhÿr kêt. Rÿ xã wa ixte Tirtûm kôt amnhĩ nhĩpêx mex o ixpaja o na pa wa ho mex? Nã mããnēn ja kot anhÿr kêt. ¹³⁻¹⁷ Mē ate omunh xwÿnhnta Jejus tãm kot ho mex kēnã. Kot amnhĩ kaxyw kãm hamaxpêr tÿx jakamã nhũm akupÿm ho mex ka mẽ omu.

—Finat Apraãw nē Ijak nē Jako mẽ hkwyjaja kot hkôt amnhĩ nhĩpêx o pa xwÿnh pē Tirtûmja. Tãm na pre akupÿm Kra Jejus o htĩr nē mex o mex ã harê. Mē ate hã axãmnhēnh nhũm mẽ kot hpĩr xwÿnhnta. Pahihti Pirat kot kãm urer kaxyw tã ka mẽ nē kãm akapêr kãm axihtÿx nē. Nom Jejus tãm kot amnhĩ nhĩpêx o pa xwÿnh na pre. Na pre hte amnhĩ nhĩpêx mex rãhã ho pa htã ka mẽ axtem nē hkaga. Nhũm pahihti Pirat mẽ ate kot kãm urer kêt ã axihtÿx nhũm kãm urer kêt nē õ pōristi mã kugõ nhũm mẽ amã kupĩ. Mē kajaja mẽ amã hprãm xã hkôt mẽ amã kupĩ. Tirtûm kot mẽ pahwÿr mẽnh tã ka mẽ axtem nē apĩ.

—Nom mẽ ate kēp Tirtûm Kra hã omunh kêt jakamã na ka prem ã hipêx anē. Mē kot mẽ ato amnhĩptãr xwÿnhjê mẽ na ka prem amarĩ apĩ. Na prem

mê axâmnênh xà hkôt mê amã pĩ kahpa hã kunhò nê ã hpĩr anê. Kêp akupÿm mê pahto mê pahťır xwÿnh tã ka prem axtem nê apĩ. No nhũm Tĩrtũm akupÿm ho hťır pa prem akupÿm hťır kãm omu.

18 —Amnepê m Tĩrtũm nhÿ hã kapêr jarênh o mê pa xwÿnhjaja na prem Tĩrtũm kot mê pakaxyw ãm xwÿnhja kukamã tanhmã harênh to nê hã kagã nê mê kãm harênh o pa. Kot amnhĩ xà htÿx kãm hamak kãm htykja kukamã nhũm pre htem harênh o pa. Tã ã Tĩrtũm kot kukamã harênh anhÿr xàja kôt ka mê ã hipêx anê nê apĩ.

19 —Jakamã kwa mê tee ri mê ate amnhĩ tomnuj ã amnhĩ pumu nê tokyx hkaga. Hãmri nê amnhĩ to Tĩrtũm wÿ kê mê anê mê ate amnhĩ tomnuj piitã amnhĩ katut kôt rênh pa. 20 Hãmri nê mê ato mex nê ka mê kukwak ri akĩnh nê ajamakêtkati nê axâmnhĩx ri apa. Koja nhÿrmã akupÿn mê pahwÿr Jejus mê. Ra kot mê pakaxyw ãm kênã.

21 —Nom koja tokyx akupÿn wrÿk kêt nê. Koja kormã kaxkwa kamã pa rãhã nhũm Tĩrtũm akupÿm kot mẽmoj piitã ho mex par mê nhũm rĩ kormã akupÿn mê pahwÿr wrÿ. Amnepê m Tĩrtũm nhÿ hã kapêr jarênh o pa xwÿnhjaja kot ja kukamã harênh nê hã kagã xà hkôt.

22 —Na pre finat Mojes haxwÿja Tĩrtũm nhÿ hã mẽ pahpãmjê mã tanhmã ja jarênh to nê harênh o:

Koja nhÿrmã mẽ panhõ Pahi Maati Tĩrtũmja te kot ra mẽ akaxyw pa ixãmja pyrã nê axte mẽ panhĩõ xãm. Mẽ panhĩõ koja. Koja nhÿrmã inhmÿr pê mõn pøj nê mẽ amã Tĩrtũm kapêr jarênh o pa. Ka mẽ kapêr ma nê mar tÿx nê kapêr kôt amnhĩ nhĩpêx o ri apa.

23 Koja mẽhõ kuma nê ãm kuma nê hkôt amnhĩ nhĩpêx kêt nê nhũm Tĩrtũm tee ri ja hã omu nê kêp hkra hkêt ã harênh kurê kumrêx. Anê.

24 ã na pre finat Mojesja mẽ kãm Jejus kukamã ujarênh anê. No ãm tapxipix na pre ã harênh anhÿr kêt nê. Tĩrtũm nhÿ hã mẽ kapêr o mê pa xwÿnh piitã na prem ã mẽ kãm harênh anhÿr o pa. Kot harênh o pa xwÿnh kot wa finat Sãmuewja nê hkôt mẽ hkwÿjê piitã ã Jejus kukamã hkwÿjê mã harênh anhÿr o pa.

25 —Tã mẽ pahpê mẽ hkamrô hkwy na pu mẽ. Mẽ pahpê mẽ hkanrêhã mẽ htãmnhwÿÿ. Mẽ pakaxyw na pre Tĩrtũm ã mẽ kãm kapêr anê. Nê Kraja kukamã finat Apraãw mã kãm:

Koja nhÿrmã akanrêhã atãmnhwÿjê hõ pyka piitã hkôt mẽ piitã mẽ ho mex o pa nhũm mẽ kukwak ri mex kumrêx nê ri pa. Anê.

26 ã kot Kra hkukamã harênh anhÿr tã mẽ pakumrêxjê hwÿr na pre kumê. Kot mẽ pahto mex nhũm mẽ pahte amnhĩ tomnuj kaga kaxyw nhũm mẽ pahpê Ijaew kumrêxjê hwÿr kumê. Anê.

Nhũm pre ã Simãw Pêtreja hte grã xwÿnh pumunh o mẽ kuhê xwÿnhjê mã ujarênh anê.

4

Simãw Pêtre mẽ Juãw wa kot mẽ àptãr tũmjê mã kapêr ã wa harênh Rukre 21.12-13

1-4 Nhũm Simãw Pêtre mẽ Juãw wa arĩ mẽ kãm Tĩrtũm kapêr jarênh o wa xa nê mẽ kãm:

—Nã na pre Jejus ty nhũm Tĩrtũm akupÿm ho hťır. Tã kot akupÿm ho hťır jakamã koja nhÿrmã urak nê akupÿm mẽ htyk xwÿnh piitã mẽ ho hťır pa. Anê.

Hāmri nhūm mē kot wa mar o kuhê xwýnh kwýjaja wa kuma nē wa hkôt hamaxpēr nē wa urà nē Jejus kôt amnhī xunhwý. Jakamā nhūm ra mē kot Jejus kôt amnhī xunhwýr xwýnhjaja ohtô rax kumrēx. Ra mē kēp 5.000.

Hāmri nhūm axtem mē hkwyjaja wa hwýr mra nē wa mar o kuhê. Mē ô patre nhô pôristi krāhtūm mē Satusew nhô xwýnh kwýjē mē nhūm mē ma Simāw Pêtre mē Juāw wa hwýr mra nē tee ri wa kot mē ahkre hā wa mar o kuhê. Nē mē kām akupým mē htír jarēnhja ma nē wa kamā gryk nē. Satusew nhô xwýnhjaja na pre htem akupým mē htír kôt hamaxpēr kēt jakamā nhūm wa akupým mē htír jarē nhūm mē tee ri wa kuma nē hamaxpēr punuj nē wa kamā gryk kato. Hāmri nē wa hā amýnē nhūm mē wa unē nē ma wa o tē nē mē hagjēnh xà kamā wa haxà. Ra myt grire nhūm mē wa haxà. Wa kot mē hagjēnh xà kamā hā apkati nhūm rī kormā mē kot ujarēnh ā tanhmā wa ho kaxyw.

⁵⁻⁶ Tā nhūm apkati nhūm mē ohtô nē wa ujarēnh ā wa mar kaxyw Jerujarē kamā axpēn wýr akuprô. Ijaew pigētjaja nē mē aptār tūm kwýjaja. Nē mē kot finat Mojes kapēr o mē ahkre ho mē pa xwýnhjaja. Nē mē ô patre maati Anas mē hkwyjaja. Nē Ijaew nhô juisti Kajpas mē Juāw ô mē Aresānja. Nhūm mē kot Simāw Pêtre mē Juāw wa mar kaxyw axpēn wýr akuprô. ⁷ Hāmri nē wa hā karô nhūm pôristi wa hwýr tē nē wa haprô nē ma mē hwýr wa o tē nē wa ho axà nē mē kutā wa ýr nhūm wa nhý. Hāmri nhūm mē wa omu nē wa kām:

—E mē inhmā amnhī jarē. Mēhō xàhpumunh xà ho na ka pre wa hte grā xwýnhhta ho mex? Mēhō na pre hwýr war amē ka wa ho mex? Anē.

⁸ Hāmri nhūm Simāw Pêtre mē kām awjarē. Tirtūm Karô kot kām hamaxpēr o hihtýx jakamā nhūm ý hā Ijaew pigētjē mē mē aptār tūmjē mā awjarē nē mē kām:

⁹ —Tôe mēhō kot ho mex xwýnhja ā mē ate wa ixkukjêr ¹⁰ jakamā kot paj mē amā harē ka mē ixte harēnhja ma. Wa ixpyrà nē mē apē Ijaew kêr ka mē wa ixkapēr mar týx nē. Jejus Kris pê Najare nhô xwýnhhta. Mē ate hpír nhūm Tirtūm kot akupým ho htír xwýnhhta. Tām na pre àhpumunh týx o akupým hte grā xwýnhhta o mex. ý hā ixte kaxyw kām ixkapēr nhūm tām akupým ho mex.

¹¹ Tirtūm kot mex o mex ā harēnh nē mē pakaxyw ām tā ka prem axtem nē hkaga. Nom Tirtūm kapēr ā kagā htūm kot ra mē akukamā ā mē ate amnhī nhīpēx anhýr ā mē ajarēnh nē mē ajarēnh kot:

Mē kot kēn o amnhīm ôrkwý nhīpēx kaxyw nē nhýri kēn maati pumu nē htýx omnuy ā hkamnhix nē hkaga. Mē kot hkaga htā nhūm Tirtūm mē kurom mex o kot kēn piitā hakrenh par ā omunh kurē kumrēx.

Anhýr o kot mē ajarēnh. Te mē ate kēn maati kaga xwýnh ā mē ajarēnh pyrāk. Tā ka mē ā mē kot mē akukamā mē ajarēnh anhýrja kôt te mē ate kēn maati kaga pyrā nē Jejus kaga nē apī. Tirtūm kot amnhīm mex o mex ā omunh nē harēnh tā ka prem axtem nē hkaga. ¹² Tapxipix na hte mē panē mē pahte amnhī tomnuj rē. Mēhō koja urāk nē àhpumunh týx o mē panē kurē? Mēhō koja ahpýnhā pyka piitā hkôt urāk nē ā mē panhīpēx mex anē? Nā ām amrakati kumrēx. Ām Jejus pix. Tapxipix na pre Tirtūm ja kaxyw ām jakamā tapxipix na kēp mē pahkaprī xwýnh maati. Anē.

¹³ Nhūm pre ā Simāw Pêtreja mē kām kapēr anē. Hāmri nhūm mē amnhī jaêr pê kuma nē axpēn mā:

—Kwa wa kām mē pahpyma wa hā hkwyjēt kēt kumrēx. Te ri wa htýx ri wa pa pyrāk tā wa hamaxpēr týx kumrēx. Mān wa kēp Jejus kôt mē pa ho mē pa xwýnh kwý jakamā na wa ā kapēr anē nā? Anē.

¹⁴ Hāmri nē tee ri kot tanhmā mēmoj tā wa kām àkjàr to hkukamā hamaxpēr. No nhūm hte grā xwýnh ra kot mē hwýr àr nē Simāw Pêtre wa kuri mex nē àm nhūm mē kot no ho omunh jakamā wa kām àkjàr kêt nē. ¹⁵ Hāmri nē wa kām anē nhūm wa mē kèp kato nē kapôt à xa nhūm mē tanhmā wa kām nē kaxyw wa hā xepēn ma nē xepēn mā:

¹⁶ —Kwa tanhmā kot puj mē wa ho? Ra jar Jerujarē kamā mē piitā mē kot akupým hte grā xwýnh ta mex à wa omunh kēnā kot puj kêt mē kām wa kot ho mex hkêt à wa harē. ¹⁷ Tā mē kot harēnh o hprôt pymaj kot puj mē axte Jejus jarēnh o pa nē wa hkurē. Kê hte grā xwýnh jarēnhja àm jar mē pakamā hapèx. Nà kot puj mē à wa kām karō anē. Anē.

¹⁸ Nhūm mē wa hā xepēn mar pa hāmri nē akupým wa hā karō nhūm wa akupým mē hwýr axā nhūm mē wa kām:

—E Simāw Pêtre mē Juāw wa. Wa māmri ma tē. Nom kēr ka wa mē ixkapēr mar kumrèx. Kēr ka wa axte ri tanhmā mē kām Jejus jarēnh to ho ri apa hkêt nē. Àm kwarī ho kwarī. Anē.

¹⁹ Hāmri nhūm wa tee ri mē kuma nē mē kām:

—Nà Tirtūm tām kot ja hā wa inhmā karō kēnā kot pa kêt wa mē akapēr ma nē harēnh o ixpa hkêt nē. ²⁰ Na pa pre wa Jejus kôt ri ixpa nē xatā kot tanhmā amnhī nhīpèx to hā omunh o hkôt ixpa. Nē xatā tanhmā mē ahkre hto hā mar o hkôt ixpa. Nē akupým htír kām omu. Jakamā tanhmā kot pa wa amnhī to nē mē kām ja jarēnh kêt nē? Nà kot pa wa mē akapēr mar xā hkôt à amnhī nhīpèx anhýr hkêt nē. Anē.

²¹⁻²² Hāmri nhūm mē kuma nē tee ri mē kot tanhmā wa ho kaxyw. Te grā xwýnh ta hte grā nē hkrī ho hā amgrā pē 40 tā ra akupým mex nhūm mē piitā ja hā omu nē hā xepēn mā Tirtūm mex o mex à harēnh o ri pa. Jakamā nhūm mē utār xwýnhjaja mē kuma nē kām mē uma nē. Hāmri nē mē umaj tanhmā Simāw Pêtre mē Juāw wa ho hkêt nē. Àm axte wa kot Jejus jarēnh o pa nē wa kām kapēr kām hihtýx nē wa hano nhūm wa ma tē.

Mē kot amnhī to Tirtūm wýr à mē harēnh

Matèwre 18.19-20

²³ Tā nhūm Simāw Pêtre mē Juāw wa ma akupým Jejus kôt htō nē htōxjé hwýr wa tē nē mē kām amnhī jarē. Nē patre krāhtūmjé mē mē àptār tūmjaja kot Jejus kapēr jarēnh nē wa hkurē kamā hihtýxja nhūm amnhī tā mē kām mē harē. ²⁴ Hāmri nhūm mē wa kuma nē amnhī to Tirtūm wýr kurē kumrèx nē kām:

—Pa Pahi Maati? Nà mēmoj piitā ho akator xwýnh ta na ka. Na ka pre kaxkwa ho akato nē pyka ho akato nē gō xujanār o akato. Hāmri nē kamā mēmoj piitā ho akator pa. ²⁵⁻²⁶ Amnepēm na pre mē inhígèt Tawija amā tanhmā amnhī nhīpèx to ho pa. Nē Akarō nhý hā akapēr kwý jarē nē hā kagà. Nē kagàja kamā mē kot Pahihti Jejus kutā amnhī xunhwýr xwýnhjé jarē nē mē hā kagà. Mē hkukamā mē hā kagà nē mē hā kagà ho:

Mēmo mýrapé na prem Ijaew kêt xwýnhjaja Tirtūm kutā amnhī xunhwý?

Nē Ijaew haxwýja. Mēmo mýrapé na prem htýx ri hamaxpēr o ri pa?

Nē pyka piitā hkôt pahijaja na prem Pahi Maati kutā amnhī xunhwýr pa.

Nē kot mē pakaxyw àm xwýnh Jejus Krisja nhūm mē määnēn kutā amnhī xunhwýr pa.

Nē mē kot hpír kaxyw mē kām hā amýnē.

Kwa mēmo mýrapé na prem axtem nē à amnhī nhīpèx anē? Anē.

Ā na pre finat Tawija Akarō nh̄y hā mẽ harē nē hā kagà anē Tirtūm. ²⁷ Ām hāmri na pre mẽ hkukamā mẽ hā kagà. Ra mẽ kot ā amnhī nh̄ipēx anh̄y kēnā. Krī ja kamā na prem ā amnhī nh̄ipēx anh̄y kaxyw xypēn w̄y akuprō. Pahi Eroxx nē pahi Pōn Pirat nē mẽ ixkw̄yja nē mẽ kēp Ijaew kēt xw̄ynhja xypēn w̄y akuprō nē Akra Jejus kutā amnhī xunhw̄y nē mẽ kot hp̄ir kaxyw hā am̄y nē. Kot tām amnhī nh̄ipēx o pa nh̄um ate mẽ ixkaxyw ām xw̄ynhja nh̄um mẽ axtem nē kutā amnhī xunhw̄y.

²⁸ —Nom amnepēm kormā mẽ ixkēt ri na ka pre mẽ hkukamā ā mẽ kot amnhī nh̄ipēx anh̄y ā mẽ omu. Mē kot tanhmā apē Akra Jejus to nē hp̄irta kukamā ka pre hā mẽ omu. Tā mẽ ixw̄y amē nh̄um prem kupī. No ām ajamaxpēr xā hkōt.

²⁹ —Tā ka mẽ omu. Na mẽ Jejus ā mẽ ixkamā gryk t̄yx nē tanhmā hā mẽ ixto xaxyw. Jakamā kot kaj mẽ ixpē amā tanhmā amnhī nh̄ipēx to ho ixpa xw̄ynhja ka tanhmā mẽ ixkrā hto pa mẽ inhmā mẽ uma hkēt nē mẽ hkōt ixpa ho ixpa. Mē kot tanhmā mẽ ixto hā mẽ ixkagrōnh tā pa mẽ inhmā mẽ uma hkēt nē ixamnh̄ix ri ixkīnh nē ri ixpa. Nē anh̄y hā mẽ kutā amnhī to ht̄yx nē arī mẽ kām akapēr jarēnh o ri mẽ hkōt ixpa. Mē kot Jejus ā tanhmā mẽ ixto ht̄ā.

³⁰ —Akra Jejus mex o mex jakamā kot paj mẽ āhpumunh t̄yx xā ho tanhmā mẽ piitā mẽ ho mex to ho ri mẽ hkōt ixpa. Mē ā xw̄ynhja akup̄ym mẽ o mex. Nē mẽ kot aa mẽmoj pumunh kēt kw̄y ho anē. Kē mẽ omu nē axāhpumunh o axāhpumunh ā apumunh mex kurē kumrēx. E ām ja pix na ra hapēx. Anē.

³¹ Nh̄um prem ā amnhī to Tirtūm w̄y anē. Puh nh̄um ixkreja mẽ kām htertet t̄yx nē nh̄um Tirtūm Karō axte tanhmā mẽ hkrā hto nh̄um mẽ ý hā kām mẽ uma hkēt nē. Ām amnhī to ht̄yx nē mẽ kām Tirtūm kapēr jarēnh rāhā ho ri mẽ hkōt pa.

Jejus kw̄yja tanhmā kot xypēn nh̄ipēx to hā mẽ harēnh

Atre 2.42-47

³²⁻³³ Nh̄um Jejus nh̄y hā mẽ ahkre ho mẽ pa xw̄ynh maatijsa. Na pre Tirtūmja mẽ ho mẽ kām ma hkēt jakamā nh̄um pre htem akup̄ym Jejus ht̄ir kōt mẽ kām harēnh o ri mẽ hkōt pa. Nh̄um Tirtūm mẽ kot Jejus kōt amnhī xunhw̄y xw̄ynh piitā mẽ kutā nojarēt rāhā ho pa nh̄um mẽ ra ohtō rax nē. Nē mẽ kām xypēn to mex pix prām o ri xypēn kōt pa. Mē ohtō htā te mẽ tipxi pyrāk. Nē xypēn pē mẽmoj to ōxy hkēt nē. Na pre htem xypēn mā mẽ hikukrēx nē mẽ apkur xā jarēnh o: “Inhō pix kēt mẽ pahpiitā mẽ panhō na.” Anh̄y o ri mẽmoj tā xypēn kutā nojarēt o ri pa. No kēt xypēn mā mẽmoj jarēnh o: “Tk. Nā ām inhō pix na.” Anh̄y o harēnh kēt nē. ³⁴⁻³⁵ Na pre htem tōhā ō ixkre hō ho wēnē. R̄y ō pyka hkwy ho wēnē nē k̄xpore jam̄y nē ma o mra nē Jejus nh̄y hā mẽ ahkre ho mẽ pa xw̄ynhje mā kugō nh̄um mẽ ham̄y nē mẽ kēp amrakati xw̄ynhje mā ho anhgrā. Hāmri nh̄um mẽ amnhīm ham̄y nē ho amnhīm awjaprō. Jakamā na pre hte mẽ hkwyja kām prām nē ri pa r̄y ē hkēt nē ri pa hkēt nē.

³⁶⁻³⁷ Jujere na pre ā amnhī nh̄ipēx anē nē mẽ kaxyw ō pika hkwy ho wēnē. Hāmri nē k̄xpore py nē o tē nē Jejus nh̄y hā mẽ ahkre xw̄ynh maatijsa mā kugō. Jujereja Ijaew nhō patre ho ajuta xw̄ynh na pre. Gō hipōk pē Sipre kamā na pre kato. Kēp Jujere htā no nh̄um Jejus nh̄y hā mẽ ahkre ho mẽ pa xw̄ynhja na prem kām: “Panāpe” Anē. Mē kapēr kām Panāpeja te kēp “mē hamaxpēr o mẽ hiht̄yx o pa xw̄ynh” anh̄y pyrāk. Jakamā nh̄um ō pika hkwy ho wēnē nē

kàxpore py nê o tē nê Jejus nhỹ hã mē ahkre xwýnhjê mã kugõ nhũm mē kupy nê mē kêp amrakati xwýnhjê mã ho anhgrà.

5

Ananĩs mē Sapire wa kot amnhĩ to hêx ã wa harênh Karatas 6.7; Eprêw 10.26-31

¹ Tã nhũm Ananĩs mē hprõ Sapire wa Jujere jarênh ma nê uràk nê õ pyka hkwý ho wênê. ² Hãmri nê kàxpore py. Nom na pre wa ra hã axpên ma. Jakamã nhũm Ananĩs Jujere kĩnhã kàxpore hkwý pix py nê o tē nê Jejus nhỹ hã mē ahkre xwýnh maati jê mã kugõ. Nom katàt kôt mē kãm õr ã amnhĩ jarênh kêt nê. Kot kàxpore ho pikjêr nê amnhũm hkwý ho àrik ã amnhĩ jarênh kêt nê. Æm mē kãm amnhĩ jarênh o hêx. Te piitã õr par pyràk o amnhĩ nhĩpêx nê mē kãm:

—E ota ixkàxporeta. Na pa wa inhõ pika hkwý ho wênê nê kàxpore hpy nê hpãnhã Jujere pyrã nê man mē awýr piitã o tē. Anê.

³ Hãmri nhũm Simãw Pêtre ra ã kot amnhĩ nhĩpêx anhýr ã omu hãmri nê kãm:

—Tk. Kwa mon ka axtem nê Satanasti kapêr ma nê hkôt amnhĩ nhĩpêx nê te akàxpore piitã õr pyrãk ã amnhĩ to axêx anê? Te ate piitã õr pyrãk tã no ãm hkwý pix gõ. Hêxta waa nê. Na ka axtem nê Tirtũm Karõ mã akàxpore nhõr par o axêx. ⁴ Anhõ pyka kênã. Nê hpãnhã kàxporeja anhõ kênã. Kot kaj amã tanhmã ho hprãm xã hkôt mãmrĩ tanhmã ho. Amã piitã ho axàrik prãm nê mãmrĩ piitã ho arik. Rý amã hkwý hpix nhõr prãm nê mãmrĩ hkwý pix gõ. No ri ate õr par pyrãk o amnhĩ to axêx kêt nê. Te ate mē inhmã pix mã axêx pyrãk nom mē inhmã pix mã hkêt. Na ka mãânên te Tirtũm mã axêx pyrãk. Anê.

⁵⁻⁶ Nhũm pre ã Simãw Pêtre Ananĩs mã kapêr anê nhũm kuma nê pykap tēm nê htyk kurê kumrêx. Hãmri nhũm mē ãptãr nywjaja hwýr tē nê kupêxê ho hkupu nê kumý nê ma o tē nê haxà. Hãmri nhũm mē kot ã kot amnhĩ nhĩpêx anhýr ã harênh ma xwýnhjaja tee ri harênh ma nê kãm na htýx nê.

⁷ Tã nhũm ra hã ahtũm nê. Ra hã 3 ore nê hapêx nhũm Ananĩs prõ Sapireja htýx hamakêtkati nê mē hwýr tē nê axà. Kormã mjên htyk ã harênh mar kêt nê hamakêtkati nê hkĩnh nê mē hwýr tē nê axà. ⁸ Hãmri nhũm Simãw Pêtre omu nê hêx rom hkukja nê kãm:

—Pa? E kwa inhmã mēmoj jarê. Tanhmã na prem war anhõ pykaja pãnhã war amã amnhĩrer to? Xã ãm hãmri na amjên mē inhmã harê nà? Anê.

Hãmri nhũm kuma nê mjên pyrã nê kãm ho hêx nê kãm:

—Ýy. Æm hãmri kot amã harênh kênã. Anê.

⁹ Hãmri nhũm Simãw Pêtre tee ri kuma nê kãm:

—Tk. Hêxta waa nê. Kwa mon ka war ajamê war akàxpore ho te Tirtũm mã axêx pyrãk? Mãn ka wa ajamaxpêr o: “Koja Tirtũm ja hã wa ixpumu nê ãm hã wa ixpumu nê tanhmã hã wa ixto hkêt nê.” Anhýr o mãn ka wa ajamaxpêr nã? Nom na ka wa ãm kãm axêx kaprý. Onêj ra mē kot amjên jaxàr xwýnhjaja akupýn hpõx o mra. Kojã mē anhĩpêx o te hipêx pyrã nê mãânên ato tē nê ajaxã ka rĩ amnhĩ pumu.

¹⁰ Anê nhũm kuma nê mjên pyrã nê pykap tēm nê htyk kurê kumrêx. Hãmri nhũm mē kot mjên jaxàr xwýnhjaja mra nê mē hwýr agjê nê omu nhũm ra htyk mex nê nõ nhũm mē kumý nê ma o tē nê mjên nhĩhkõ hã haxà. ¹¹ Hãmri nhũm mē piitã wa harênh ma nê kãm ma htýx nê. Mē kot Jejus kôt amnhĩ

xunhwÿr xwÿnhjê mē amarī ri mē pa xwÿnhjaja nhūm mē tee ri wa hkukamā hamaxpēr o kām ma htÿx kumrēx.

*Mē kot aa mēmoj pumunh kêt kwÿ ho anhÿr ā mē harēnh
Makre 16.17-20; Atre 19.11-12*

¹²⁻¹⁴ Na pre hte Jejus kôt mē kot amnhī xunhwÿr xwÿnhjaja xatā Tirtūm mā amnhī jarēnh xā hā ixkre hwÿr akuprō. Mē kot ixkre nhīkjê mā: “Pahi Sarumāw nhō” anhÿr xwÿnh jarēnhja wÿr nhūm pre htem akuprō. Nhūm mē piitā kām mē hkīnh nē mē ohtō nē mē hkôt akuprō nē mē urāk nē Jejus kôt amnhī xunhwÿ. Mēnijaja nē mēmyjaja. No nhūm mē hkwyja Ananīs mē Sapire wa kot amnhī nhīpēxja mā hamaxpēr nē kām mē hkôt mrar pyma nē. Kām mē hkīnh tā kām mē hkôt mrar pyma nē.

Nhūm pre hte Jejus nhÿ hā mē ahkre ho mē pa xwÿnhjaja aa mē kot mēmoj pumunh kêt kwÿ ho anhÿr o ri mē piitā mē hkôt pa. ¹⁵ Jakamā nhūm pre htem mē à xwÿnhjê jamÿ nē ma mē hwÿr mē o mra nē Simāw Pêtre kutêp pry kamā mē haxwÿ nē mē kām:

—E mē jar anhīkwÿ. Kê Simāw Pêtre ja kôt mē ajānh tē nē mē akupēnh o akupÿm mē ato mex rÿ nhūm hkarō pix mē atā harir ka mē akupÿm amex japêr.

Anhÿr o mē kām kapêr hāmri nhūm mē kupīp kām kutêp hikwÿ. ¹⁶ Nē Jerujarē pu hā krī hkwy kamā. Mē à xwÿnhjaja nē mēkarōmnuti kot tanhmā mē ho xwÿnhjaja nhūm pre htem mē hamÿ nē ma mē ĩhkrep mē o mra nhūm mē piitā akupÿm mex pa.

*Mē kot Jejus kwÿjê jagjēnh ā mē harēnh
Rukre 21.12-15; Juāw 15.26-27; Atre 4.1-22*

¹⁷ Tā nhūm mē ō patre maati mē hkrāmnhwÿ Satusew nhō xwÿnhjaja tee ri akupÿm mē mex ā mē harēnh ma nē xapēn mā:

—Tk. Kwa na mē ra ohtō nē Jejus gryk ā mē pahte mē ahkre kaga nē ām hkôt pix mā ri amnhī nhīpēx o pa. Anē.

Hāmri nē Jejus nhÿ hā mē ahkre maati xwÿnhjê kamā gryk nē ra tanhmā mē ho kaxyw. ¹⁸ Hāmri mē unē nē mē hagjê nhūm mē hagjēnh xā kamā hkrī hpa.

¹⁹ Tā nhūm kamāt nhūm Tirtūm kapêr o mē wrÿk xwÿnhja ma mē hagjēnh xā hwÿr mē hwÿr wrÿ nē mē hwÿr axā nē mē kām hakwakre kahē xā mē nē mē kator pa. Hāmri nē mē kām:

²⁰ —E mē ma akupÿm Tirtūm mā amnhī jarēnh xā hā ixkre hwÿr mra nē axte mē kām awjarē. Tanhmā mē kot amnhī nhīpēx to nē Jejus kôt amnhī nhīpēx nyw o amnhī nhīpēx ā mē kām hā karō kē mē ama. Anē.

²¹ Hāmri nhūm mē kuma nē ma akupÿm hwÿr hapēx kurē kumrēx. Nhūm myt kator o mōr mē nhūm mē hwÿr agjē nē mē kām Tirtūm kapêr jarēnh o kuhē.

Tā nhūm mēō patre maati mē hkôt ri mē pa xwÿnhjaja amnhī wÿr mē àptār tūm xwÿnhjê hwÿ nhūm mē piitā xapēn wÿr pikuprōnh pa. Hāmri nē htÿx arī Jejus kwÿjaja mē hagjēnh xā kamā mē hkrī hā mē hkamnhīx nē amnhī wÿr mē hā karō. ²² Nhūm pōristijaja ma kot mē haprōr kaxyw mē hagjēnh xā hā ixkre hwÿr mra nē tee ri kamā mē hapêr nhūm mē kamā amrakati. Hāmri nhūm mē akupÿm mē pikuprōnh xwÿnhjê hwÿr hprōt nē mē kām:

23 —Nà na pôristi hkwyjaja arī hakwakrem ixkre jamār mex nhūm hakwakre arī kahē htýx nē xa. Tā pa mē hwýr agjē nē tee ri hkre kamā mē hapēr nhūm mē kamā amrakati kumrēx. Anē.

24 Hāmri nhūm mē kuma nē tee ri hamaxpēr. 25 Rôm nhūm ja mē hwýr tēn axan mē kām:

—Kwa jāā mē ate mē hagiēnh xwýnhjaja na mē axte Tirtūm mā amnhī jarēnh xā hā ixkre kamā mē ahkre ho kuhē pa ham mē omu nē mē kurūm tē. Anē.

26 Hāmri nhūm patre nhō pôristi krāhtūmja kuma nē mē hwýr pôristi hkwy rē nhūm mē ma mē hwýr mra nē mē hwýr agjē nē kē axte mē unē nē akupým mē o mra. Nom tanhmā mē ho hkēt nē. Mē kot hkôt ri mē pikamēnh xwýnhjē pymaj mē ho mex nē mē o mō. Nē mē hā axpēn mā:

—Nà kot puj mē tanhmā mē ho nhūm mē ja hā mē pahpumu nē kēn o mē pahkapē nē tanhmā amnhī to nē hā mē panhūmex. Anē.

27 Hāmri nē mē ho mex nē akupým mē o mōn mē hwýr mē ho agjē nē mē pikuprōnh xwýnhjē kutā mē hkrī. Hāmri nhūm mēō patre maatija mē kām:

28 —Kwa ra mē ixte Jesus kapēr jarēnh nē mē akurē htā ka xep mē ām mē inhna nē arī mē kām harēnh o ri apa. Nē jar Jerujarē kamā mē piitā mē kām harē. Nē mē pajaja mē ixte Jesus pīr ā ka mē ri mē kām mē ijarēnh o apa. Anē.

29 Hāmri nhūm Simāw Pētre mē kuma nē mē amnhī tā mē kām kapēr nē mē kām:

—Tý kot kaj mē Tirtūm kapēr kuhpa hā mē inh mā mēmoj tā karō pa mē ama nē ām mē ama nē ām Tirtūm kapēr pix ma nē hkôt ri amnhī nhīpēx. 30 Amnepēm mē panhīgētjaja na prem Tirtūm kôt pix mā amnhī nhīpēx o pa. Tā ka prem axtem nē kēp mē kām Kra Jesus ā amýnē nhūm mē pī kahpa hā kunhō nē kupī. Nom nhūm Tirtūm akupým ho htír 31 nē kēp mē panhō Pahihti hā harē. Nē kēp mē pahkaprī xwýnh mex ā harē. Hāmri nē ra amnhī ri ýr nhūm ihkō hā mēmoj piitā ho amnhīptār o hkrī. Nhūm kām: “Koja Ijaew mē kot amnhī tomnuj kaga nē akôt amnhī xunhwý pa ja hā mē omu nē amnhī katut kôt mē kot amnhī tomnuj rēnh pa nē mē ho ixkra.” Anē. 32 Tā mē pajaja mē ixte Jesus htyk nē akupým htír ā omunh mex jakamā na pa hte Tirtūm Karō nhý hā ā mē amā harēnh anē. Karōja na pre Tirtūm mē ixte hkôt amnhī nhīpēx xwýnhjē hwýr kurē nhūm mē ixwýr wrý nē mē ixkarō mā agjē. Tā ý hā na pa htem ri ā harēnh anhýr o ri mē akôt ixpa. Anē.

33 Hāmri nhūm mē kuma nē mē kamā gryk týx nē. Nē mē kām mē himex prām nē mē kām mē hā amýnē. 34 Hāmri nhūm Kamariewtija tee ri ja hā mē omu hāmri nē kànhmā xa nē Jesus nhý hā mē ahkre xwýnh maatijē xyr pē hkwyjē mā kapēr. Parijew nhō xwýnh na pre. Nē kēp Tirtūm kapēr ā kaga htūm o mē ahkre ho pa xwýnhjē hō na pre. Nhūm mē piitā kām hkīnh nē. Jakamā nhūm kànhmā xa nē pôristi mā anē nhūm mē amnhī nē Jesus nhý hā mē ahkre ho mē pa xwýnhjē kator nhūm mē kapôt ā kuhē. 35 Hāmri nhūm Kamariewtija mē nē tanhmā mē kām kapēr to nē mē kām:

—E ixkwýjaja. Kwa kēr pu mē tanhmā mē ho hkukamā pajamaxpēr mex nē. 36 Mān arī mē ate finat Tetastija jarēnh ā anohtýx nē ho apa japēr. Mytwry hō hā na pre mē kām amnhī to rax ā amnhī jarēnh o pa. Hāmri nhūm hkôt ri mē pa xwýnhjaja ohtō nē. Mē kēp 400. Tā nhūm prem mē kēp Tetasti pī nhūm hkôt ri mē pa xwýnhjaja axpēn pē anhgrā nē ma hapēx.

37 —Tā nhūm mē kot mē piitā mē ho kōta xā hā arīgroja ā nhūm Garirej nhō xwýnh pē finat Jut haxwýja hkôt mē pa xwýnhjaja ohtō nē. Tā nhūm mē

mãânên mẽ kêp kupĩ nhũm hkôt ri mẽ pa xwỳnhjaja haxwỳja axpẽn pẽ anhrà nẽ ma hapêx.

³⁸—Jakamã kwa pu mẽ tanhmã jajê ho hkêt nẽ. Pu mẽ âm mẽ omu. Kojã mẽ amnhĩ krã hkôt ã ujarênh anhỹr o pa japêr hã kojã Tetasti mẽ Jut wa hkôt pa xwỳnhjê pyrã nẽ tokyx axpẽn pẽ anhrà nhũm Jejus jarênh o paja hapêx o hapêx. ³⁹Nom kojã mẽ âm hãmri Tĩrtũm nhỹ hã ã mẽ ahkre ho pa anhỹr japêr hã kot puj mẽ tee ri ja ho pajapêx mã. Jakamã kwarĩ. Kot puj mẽ tanhmã mẽ ho nẽ te mẽ pahte Tĩrtũm kutã amnhĩ xunhwỳr pyrãk. Anẽ.

Nhũm pre ã Kamariewti Jejus nhỹ hã mẽ ahkre ho mẽ pa xwỳnh maatiijê xyr pẽ hkwỳjê mã kapêr anẽ. ⁴⁰Hãmri nhũm mẽ kuma nẽ kãm:

—Tỳ nã âm hãmri na ka ã akapêr anẽ. Kot puj xep mẽ tanhmã mẽ ho hkêt nẽ. Anẽ.

Hãmri nẽ akupỹn mẽ hã karõ nhũm mẽ akupỹn mẽ hwỳr agjê. Hãmri nhũm mẽ pôristi mã mẽ hã amỹnê nhũm mẽ htak. Hãmri nhũm mẽ aptar tũmrejaja mẽ kãm:

—E mẽ mãmri ma akupỹm mra. Nom kêr ka mẽ axte mẽ kãm Jejus kapêr jarênh o ri apa hkêt kumrêx. Anẽ.

⁴¹Hãmri nhũm mẽ kãm ure nhũm mẽ ma mra. Kĩnh nẽ ma mra nẽ axpẽn mã:

—Nã kwãr mẽ Jejus ã mẽ pahtak nẽ tanhmã hã mẽ pahto. Kwãr mẽ mãmri ã hã mẽ pahto anẽ. Kot pu mẽ hkaga hkêt nẽ. Ra Tĩrtũm kot ja hã mẽ pahumunh mex kênã.

Anhỹr o axpẽn mã kapêr o axpẽn jamaxpêr o hihtỳx mex o pa.

⁴²Hãmri nẽ arĩ apkati mẽ hkwỳjê mã Jejus kapêr jarênh o mẽ ahkre ho mẽ hkôt pa. Tĩrtũm mã amnhĩ jarênh xã hã ixkre kamã nẽ nhãm mẽ òrkwỹ kamã ri mẽ ahkre ho pa. Tĩrtũm kot mẽ pakaxyw Jejus xãm ã mẽ kãm harênh o ri mẽ hkôt pa.

6

Mẽ kêp mẽ mjên htyk xwỳnhjê jarênh Wam Ximotre 3.8-9

¹Tã nhũm mẽ kot Jejus kôt amnhĩ xunhwỳr xwỳnhjaja ohtô rax kumrêx o mō. Mẽ piitã kêp Ijaew no nhũm mẽ hkwỳjaja axtem Gres kapêr o kapêr nhũm mẽ hkwỳjaja Ijaew kapêr o kapêr. Na pre hte Ijaew kapêr o kapêr xwỳnhjaja apkati mẽ mẽ kêp mẽ mjên htyk xwỳnhjê mã mẽo ho pa. No âm mẽ piitã mẽ hipêx o axpẽn pyrãk kêt jakamã nhũm Gres kapêr o mẽ kapêr xwỳnhjaja tee ri ã mẽ kot amnhĩ nhĩpêx anhỹr ã mẽ omu nẽ mẽ kamã gryk nẽ. Hãmri nẽ mẽ kãm:

—Kwa na ka htem amnhĩ kamã mẽ kêp mẽ mjên htyk xwỳnhjê mã mẽo ho rũnh nẽ agō. No mẽ ixkamã jajê mã na ka htem âm ho hkryre nẽ agō. Kwa mẽ ri ã mẽ hipêx anhỹr kêt nẽ. Mẽ hipêx o axpẽn pyrãk nã. Anẽ.

²Hãmri nhũm Jejus nhỹ hã mẽ ahkre xwỳnh maatiijaja mẽ hã mẽ kapêr ma hãmri nẽ mẽ piitã mẽ ho akuprõ nẽ mẽ kãm:

—Kwa kêr ka mẽ ja hã axpẽn mã axàkjêr kêt nẽ. E pu mẽ kot mẽ kêp mẽ mjên htyk xwỳnhjê mã ò ho pa kaxyw mẽ akwỳjê rê. No mẽ pajaja kot paj ja ho anhỹr o ri ixpa hkêt nẽ. Kot pa mẽ anẽ nẽ Jejus kapêr o ri mẽ ajahkre hkêt nẽ nhũm ja mex kêt nẽ. Jakamã mẽ atõ kot kaj mẽ akatã kôt mẽ kãm mẽ ò ho apa? ³E mẽ amnhĩ kamã mẽ ho 7 nẽ mẽ arê pu mẽ kêp mẽ mjên tyk xwỳnhjê mã ò ho pa kaxyw mẽ unhwỳ.

Tãm mẽ hamaxpêr xwỳnhjaja.

Nē mē ate axpēn mā mē mex ā mē harēnh xwỳnhjaja.

Nē Tirtūm Karō nhỹ hā mē kot amnhĩ nhĩpēx o mē pa xwỳnhjaja.

Ā mē kot amnhĩ nhĩpēx anhỹr xwỳnhjaja ka mē ho 7 nē arē pu mē kaxyw mē unhwỳ. ⁴ Nom mē pajaja kot paj mē akōt arĩ mē amā Tirtūm kapēr jarēnh o ri mē ajahkre pix tănopxar o ri iɣpa. Anē.

⁵ Hāmri nhūm mē kuma nhūm ja mē kām mex nē. Nhūm mē ma mra nē axpēn mā hkwyjē nhĩxi jarē hāmri nē mē ho 7 nē mē kurē. Ā mē hixi kot anhỹr.

Estewāw. Estewāwja na pre Jejus kōt amnhĩ nhĩpēx mex o pa. Tirtūm Karō kaxwỳnh mā ār nē ho amnhĩptār jakamā nhūm pre hte tām ri amnhĩ nhĩpēx o pa.

Nē kaxyw Firipti

nē Prokot

nē Nīkanō

nē Timā

nē Parmēnti

nē Nīkoraw. Nīkorawja krĩ pē āxiok nhō xwỳnh na pre. Kēp Ijaew kēt tā kām Tirtūm kīnh o pa. Tā ra mǎānēn Kra Jejus kōt amnhĩ xām.

⁶ Jakamā nhūm mē mē kēp 7tajē rē nē Jejus nhỹ hā mē ahkre xwỳnh maatiijē hwỳr mē o mra. Hāmri nhūm mē omu nē mē āpēnh ā mē unhwỳr kaxyw mē hā ĩhkra jaxwỳ nē mē ho Tirtūm wỳ. Hāmri nhūm mē kēp mē mjēn htyk xwỳnhjē mā mē ō ho pa nē mē piitā mē hipēx o axpēn pyrāk.

⁷ Tā nhūm mē ra ohtō rax nē Tirtūm kapēr ma nē hkōt amnhĩ nhĩpēx o pa. Jakamā nhūm Jerujarē kamā mē kot Jejus kōt amnhĩ xunhwỳr xwỳnhjaja ra ohtō rax kumrēx. Nē mē ō patre hkwy haxwỳja ohtō nē mē urāk nē amnhĩ kaxyw hkōt hamaxpēr nē hkōt amnhĩ xunhwỳ.

Mē kot Estewāw pynēnh ā mē harēnh

Rukre 21.14-15

⁸ Tā nhūm Estewāwja. Kot mē kēp mē mjēn htyk xwỳnhjē mā mē ō ho pa xwỳnhjē hōja. Tirtūm kot kutā nojarēt mex jakamā na pre hte ỹ hā āhpumunh tỳx o aa mēmoj pumunh kēt kwỳ ho anhỹr o ri mē hkōt pa. ⁹ Hāmri nhūm Ijaew kwỳjaja tee ri ja hā omu nhūm ja mē kēp omnuy tỳx nē nhūm mē hā kām akir. Urāk nē mē kēp Ijaew nē Jerujarē kamā ri mē hkōt pa htā ahpỳnhā mē ō pyka. Mē kot kām “Ripetat” xwỳnh kwỳ na pre mē. Nē ahpỳnhā mē ō krĩ.

Mē hkwyjaja kēp Sirēn nhō xwỳnh.

Nē mē hkwyjaja kēp Aresān nhō xwỳnh.

Nē mē hkwyjaja kēp Siris nhō xwỳnh.

Nē mē hkwyjaja kēp As nhō xwỳnh.

Ahpỳnhā mēō pika nē mē ō krĩ htā na prem Jerujarē kamā ri axpēn kōt pa ho pa. Tā Estewāw kot ā amnhĩ nhĩpēx anhỹr o pa hā omu nhūm ja mē kēp omnuy tỳx nē nhūm mē hā kām akir. ¹⁰ No nhūm Tirtūm Karō nhỹ hā hamaxpēr tỳx o mē kām kapēr nhūm mē kuma nē tee ri kutā tanhmā kām nē hprām kaprỳ.

¹¹ Hāmri nē ma mra nē tanhmā ho hēx to kaxyw amnhĩ kwỳjē rē nē mē kām hā amỳnē nē mē kām:

—E kēr ka mē krĩ nhō xwỳnhjē mā Estewāw o axēx nē tanhmā mē kām ho akapēr punuj to ho ri mē hkōt apa. Kē mē ama nē kamā gryk kato. Kot kaj mē ā amnhĩ nhĩpēx anē pa mē hpānhā mē amā amnhĩre. Anē.

Hāmri nhūm mē kuma nē ma mra nē hapōj nē ma krĩ nhō xwỳnhjē mā tanhmā ho hēx to ho ri mē hkōt pa nē mē kām:

—E mẽ amně akuprõ nẽ mẽ inhma. Kwa kêr ka mẽ Estewãwti kapêr mar kêt nẽ. Na hte finat Mojes mẽ Tirtũm wa ho kapêr punuj pix o ri pa. Pa mẽ ra kot wa ho kapêr punuj ã kuma. Anẽ.

¹² Hãmri nhũm mẽ kuma. Krĩ nhõ xwỳnhjê mẽ nẽ mẽ àptàr tũmrejê mẽ Tirtũm kapêr tũm o mẽ ahkre ho mẽ pa xwỳnhjaja nhũm mẽ tee ri mẽ kot Estewãw o hêxja ma nẽ kamã gryk nẽ. Hãmri nẽ ma hwỳr mra nẽ unẽ nẽ ma mẽ õ juisti hwỳr o tẽ. ¹³ Hãmri nhũm mẽ kãm ho hêx xwỳnhjaja mẽ hkõt mra nẽ juisti mã tanhmã ho hêx to nẽ mẽ kãm:

—E jahti na hte finat Mojes kot Tirtũm nhỹ hã mẽ pahte tanhmã amnhĩ nhĩpêx to hã karõ ho hêx rãhã ho pa. Nẽ Tirtũm mã amnhĩ jarênh xã hã ixkreja nhũm tanhmã ho hêx to pa mẽ kuma. ¹⁴ Na hte mẽ kãm: “Koja nhỹrmã Jejus pẽ Najare nhõ xwỳnh Tirtũm mã amnhĩ jarênh xã hã ixkreja grãnh pa kãm ga.” Anhỹr o mẽ kãm hêx o pa. Nẽ Mojes kot mẽ pahte amnhĩ nhĩpêx ã karõ nẽ mẽ pahkurê pa prem kuma. Anẽ.

¹⁵ Nhũm prem ã mẽõ juisti mã Estewãw o hêx anẽ. Hãmri nhũm mẽ kuma nẽ Estewãw wỳr rĩt nẽ hkuk pumu nhũm te kot Tirtũm kapêr o mẽ wryk xwỳnhjê kuk nhĩrã rax pyrã nẽ xa nhũm mẽ tee ri omu nẽ kamã no pyma nẽ.

7

Estewãw kot juistijê mã ujarênh

¹ Hãmri nhũm mẽ õ patre maatija Estewãw mã kapêr nẽ kãm:

—E mẽ inhmã amnhĩ jarê. Xã ãm hãmri na mẽ ri ã ajarênh anẽ nã? Anẽ.

² Hãmri nhũm kuma nẽ mẽ piitã mẽ kãm kapêr. Mẽ kãm kapêr ryy nẽ mẽ kãm:

—Tõe kot paj mẽ amã mẽ panhĩgêt finat Apraãw tanhmã harênh to ka mẽ inhma. Amnepêm na pre Tirtũm maatija Apraãw wỳr kato. Kormã pyka pẽ Mêsopotãm kamã pa ri. Kormã kot ma krĩ pẽ Arã hwỳr mõi kêt ri nhũm hwỳr kato nẽ kãm: ³ “E kêr ka mẽ anhõ krĩ pẽ akato nẽ akwỳjê re nẽ ma mõi. Kot paj ma nhỹhỹm hpãnhã pyka hõ hwỳr mẽ ato mõi.” Anẽ.

⁴—Hãmri nhũm kuma nẽ amnhĩ to akuprõ nẽ ma mõi. Õ pyka pẽ Katej pẽ kato nẽ ma krĩ pẽ Arã hwỳr mõi nẽ hpãnhã kamã pa. Tã nhũm hipêxã Terahti kêp ty nhũm Tirtũm amně jar mẽ panhõ pyka hwỳr kumê. Jar mẽ papapxã hwỳr kumê.

⁵—Nom nhũm kormã kãm pykaja nhõr kêt nẽ. Kormã kãm hkwy ho grire nẽ õr kêt nẽ. Na pre ãm kãm:

E kot paj nhỹrmã amã pykaja gõ. Amã nẽ akanrêhã akra nẽ atãmnhwỳjê mã kugõ ka mẽ kamã ri apa ho apa.

Anhỹr o kãm mẽ panhõ pika pẽ Kanaãja jarê. Apraãw kormã hkra hkêt ri nhũm ã kãm kapêr anẽ. ⁶ Hãmri nẽ kãm:

Koja akanrêhã atãmnhwỳjaja nhỹrmã ma nhỹhỹm pyka hõ hwỳr pa nẽ hpãnhã kamã pa. Mẽ õ pyka kamã pa hkêt tã nhãm pyka hõ kamã pa hãmri nẽ pika nhõ xwỳnhjê mã àpênh rũnh o pa nhũm pyka nhõ xwỳnhjaja mẽ hipêx kati rũnh o pa. Nẽ mẽ àpênh ã mẽ kãm amnhĩrer kêt nẽ. ãm mẽ homnuj o pa hã amgrã sohtõ rax kumrêx. Nhũm mẽ hã amgrã pẽ 400.

⁷ Nom kot paj mẽ hã mẽ homnuj tỳx nẽ. Akanrêhã atãmnhwỳjê hã mẽ homnuj tỳx nẽ nhũm mẽ rĩ kormã mẽ kurũm kato nẽ man akupỹn pa nẽ jar põi. Hãmri nẽ jar inhmã inhmex o inhmex ã ijarênh rãhã ho pa. Anẽ.

⁸ Hãmri nẽ kãm:

E pu axpën ma. Koja ka nê akanrêhâ akra nê atâmnhwÿjaja ka mē ixkôt ri amnhî nhîpêx o apa hâ kot paj mē ato ixkra. Tâ koja ja amâ mex japêr hâ kêr ka mē amnhî my kwyrÿt kâ hkwy jakâ. Nê koja mē akrajaja hapôj nê my ka mē mâ mē ho anê nê mē kêp mēmy kwyrÿt kâ hkwy jakâ. Mē piitâ mē kot mē apê ixkra hâ mē apumunh kaxyw kot kaj mē â amnhî nhîpêx anê.

Anhÿr o Apraâw mâ kapêr nhûm kuma nê mar xâ hkôt hkra Ijak my kwyrÿt kâ hkwy krâhta. Kormâ hkarâre ri. Kormâ hâ arîgro pê 8 pix ri nhûm kêp hkwy krâhta.

—Tâ nhûm Ijak hprêk nê hprô nê hkra. Hâmri nê mâ hkra Jako ho anê nê. Nhûm Jako hprêk nê mâ hkra pê 12jê ho anê nê mē piitâ mēmy kwyrÿt kâ hkwy jakâ pa. Â na pre mē pahpâr kraxjaja amnhî nhîpêx anhÿr o pa.

⁹—Jako hkrajê hō na pre kêp Juje. Nhûm Juje htôjaja hipêêxâ hkôt kamâ gryk nê axtem nê mē urojê mâ ho wênê nhûm mē kêp haprô nê ma pyka pê Ejit wÿr o mō. Amari Ejit nhô xwÿnhjê mâ âpênh o pa kaxyw. Tâ no nhûm Tirtûm arî tânopxar râhâ ho hkôt pa. ¹⁰ Hâmri nê Ejit kâ mē kot homnuj xwÿnhjê nhîhkra rûm hkapa nê tanhmâ hkrâ hto nhûm âhpumunh tÿx nê hamaxpêr mex nê. Jakamâ nhûm Ejit nhô xwÿnhjê nhô pahi Paraohitja omu nê kâ mē hkînh nê. Kot tâ mē amnhî nhîpêx nê âhpumunh tÿx kôt omu nê kâ mē hkînh nê. Hâmri nê amnhî ri kumê nhûm îhkô hâ âpênh o pa. Kâ mē ôrkwy pumu nê Ejit nhô xwÿnhjê ho amnhîptâr o pa.

¹¹—Rôm nhûm mē hpur kâ mē mēmoj nhîgrôt mex kêt nê nhûm mē kêp mē apkur xâ hâ mē ôja ra ri mē kêp kryre. Ejit kamâ nê jar Kanaâ kamâ nhûm mē apkur xâ hâ mē ôja mē kêp hapêx par o mō. Nhûm mē piitâ prâm xâj ra hiire nê kâ mē prâm tÿx o pa nhûm mē panhîgêtjaja hâmri prâm xâj tee ri amnhî âpkur xâ hâ mēmoj japêr.

¹²—Tâ nhûm Jakoja Ejit kâ mē arî mē apkur xâ hâ mē ô rax â harênh ma nê ma hwÿr hkra hkwyjê rê. Mē panhîgêtjaja nhûm ma mē hwÿr mē kurê nhûm mē ma mē hwÿr mra. Hâmri nê mē hwÿr pôj nê mē kêp mēmo hy hkwy japrô nê ma akupÿm o mra. Wam mē môrta â mē kêp mēmoj japrô nê ma akupÿm o mra.

¹³—Tâ nhûm mē kêp mēmo hy japrôr xwÿnhja hapêx nhûm mē axte akupÿm mē hwÿr mra. Hâmri nhûm mē htô Juje mē kâ mē amnhî to amnhîrit nê kêp mē htô hâ mē kâ mē amnhî jarê. Mē kot ra htyk â hkamnhîx tâ nhûm mē kâ mē amnhî jarê. Hâmri nhûm Paraohiti mē kêp Juje htô hâ mē harênh ma.

¹⁴—Tâ nhûm Juje amnhî wÿr hipêêxâ Jako mē htâmnhwÿjaja mē hâ karô nhûm mē piitâ ma Ejit wÿr hapêx. Mē kêp 75 nê ma Ejit kamâ Juje hwÿr hapêx hâmri nê kamâ pa ho pa.

¹⁵—Â kot anhÿr jakamâ nhûm Jakoja ma Ejit wÿr mō nê hpânhâ kamâ pa ho pa. Tâ hâmri kamâ ty. Nhûm hkrajê piitâ Ejit kâ mē pa hâmri nê gaa nê htyk pa. ¹⁶ Hâmri nhûm mē hkanrêhâ mē hkrajaja mē hamÿ nê ma akupÿm Kanaâ hwÿr krî pê Sikê hwÿr mē o pa nê kamâ mē hagjê. Na pre mē hkukamâ finat Apraâw kot Amôr krajê pê kênkre japrô nê kamâ hprô jaxâ. Jakamâ nhûm prem mÿr pê ma hwÿr mē o pa nê kamâ mē hagjê hâmri nê ma akupÿm Ejit wÿr pa.

¹⁷—Tâ gaa nê rî ohtô rax kumrêx o mō. Mē panhîgêtjaja ohtô rax kumrêx o mō. Hâmri nhûm Tirtûm kot Apraâw mâ mē ô pyka jarênh xwÿnhja nhûm kot mē kâ mē ôr kaxyw. ¹⁸ No nhûm Ejit nhô pahi kot Juje ho mex xwÿnhta na pre ra ty nhûm axtem hpânhâ hōja mē ho amnhîptâr o pa. Nê aa Juje jarênh mar

kêt nê. Kormã pahi xàr nyw kêt ri htyk jakamã nhùm mÿr pê harênh mar kêt nê. ¹⁹ Hãmri nê hkwyjê homnuj o pa. Tanhmã mẽ panhîgêjtê nhîpêx to ho pa. Nê mẽ kãm mẽ hkra my hapôx xwÿnhjê hã amÿnê. Mẽ hapôx nhùm mẽ kot pikap mẽ rênh nhùm mẽ htyk kaxyw nhùm mẽ kãm mẽ hã amÿnê.

²⁰ —Rôm nhùm finat Mojesja kato. Nê mexre. Hãmri nhùm katorxà Ejit nhô xwÿnhjê kot kêp hpîr pymaj ôrkwÿ kamã ri mẽ kêp ho hpimxur o pa hã mytwrÿ axkrunêpxi.

²¹ —Tã nhùm ra htÿxre nhùm katorxà mẽ hipêêxà wa tee ri hkukamã hamaxpêr hãmri nê mẽ kot wa kêp hpîr pymaj kumÿ nê ma o tẽ nê kaxyw à nhîpêx nê nhÿri gô nhîpôk ri pô kamã ho amÿxu. Tã nhùm Paraohiti hkra nija ra gôx mã wÿr mã tẽ nê ra omu hãmri nê amnhîm kumÿ nê ma o tẽ nê ho hkra. ²² Jakamã nhùm Mojes Ejit nhô xwÿnhjê kamã hprêk. Hãmri nê mẽ àhpumunh xà hã kagã pumunh pa. Nê hihtÿx nê mẽ kãm kapêr kãm hihtÿx mex o pa.

²³ —Tã hãmri ra hã amgrã pê 40 nê hapêx nhùm Mojes hamaxpêr nê ra kãm amnhî kwÿ pê Ijaewjê pumunh prãm nê ma mẽ hwÿr tẽ. ²⁴⁻²⁵ Hãmri nê htêm kôt ja wa omu. Nhùm Ejit nhô xwÿnhja Ijaewja homnuj o xa nhùm Mojes tẽn tee ri hã omu nê hamaxpêr o: “E pa ma wa hwÿr tẽ nê ixkwÿ mÿj ã Ejit nhô xwÿnhja pî kê ixkwÿjaja ja hã ixpumu nê Tirtùm kot mẽ hwÿr inhmênh ã ixpumu. Ixte Ejit nhô xwÿnhjê nê mẽ kator kaxyw mẽ ja hã ixpumunh kurê kumrêx.”

—Anhÿr o hamaxpêr hãmri nê wa hwÿr tẽ nê amnhîôja nê Ejit nhô xwÿnh pî. Tã no nhùm hkwyjaja kot hpîr ã harênh mar tã tanhmã amnhî kaxyw kãm hamaxpêr to hkêt nê. ²⁶ Nhùm apkati nhùm mêhôja war axkrut nê axte pijapu ho wa xa. Hamê wa kêp Ijaew. Jakamã nhùm Mojes akupÿm mẽ hwÿr tẽ nê tee ri axpên tã wa omu nhùm ja kêp omnuj nê. Hãmri nhùm wa hwÿr tẽ nê axpên nê wa kãm kapêr nê wa kãm: “Pa? Kwa war ajamê war apê Ijaew kênã na ka wa ri axtem nê ã axpên nhîpêx anê.” Anê. ²⁷ Hãmri nhùm kot amnhî kaxyw hkryx xwÿnhja kuma nê nhãm amnhî nê hkujate nê kãm: “Tk. Kwa xà apê mẽ inhô pahi hã na ka ã wa inhmã akapêr anê? Nà apê mẽ inhô pahi hkêt kênã. ²⁸ Kot kaj inhîpêx o te ate Ejit nhô xwÿnhja nhîpêx pyrã nê wa ixtô hpîr kêt nê.” Anê.

²⁹ —Hãmri nhùm tee ri kuma nê ra kãm ma nê Ejit rùm kator kurê kumrêx nê ma pyka pê Mijiã hwÿr mō nê kamã hpãnhã pa. Kamã hprô nê hkra. Nhùm hkra myja wa hamêxkrut.

³⁰ —Tã nhùm Mijiã kamã pa hã axte hã amgrã pê 40. Hãmri nê mẽmo arîgro hã kapôt ã krã hakÿx pê Sinai kape hã ri pa nhùm Tirtùm kãm kapêr. Nom nhùm Mojes omunh kêt nê. ãm utî kaôk kamã kuwy hpôk pix pumu. ³¹ Amnhî jaêr pê ã kot amnhî nhîpêx anhÿr ã omu hãmri nê amnhî tã hpri hã omunh kaxyw hwÿr tẽ nhùm Tirtùm kãm:

³² Pa Mojes? E ixpê Tirtùm na pa. Ixpê akukamã anhîgêt Apraãw nhô Tirtùm na pa. Nê ixpê Apraãw kra Ijak mẽ htãmnhwÿ Jako wa ô Tirtùm na pa. Anê.

Hãmri nhùm tee ri kuma nê kãm ma xàj htetet tÿx nê. Hãmri nê umaj axte pî hpôkja wÿr rît kêt nê. ãm nhãm hkrã nê rît o xa. ³³ Hãmri nhùm Tirtùm kãm: E kwa ixpê Tirtùm maati hã ixtã apijaãm ã aparkã kapa nê apar kênh nê xa.

³⁴ Na pa ra ixkra Ijaewjaja Ejit kãm mẽ omu. Na ra Ejit nhô xwÿnhjaja ixpê mẽ homnuj tÿx kumrêx rãhã ho pa nhùm mẽ amnhî xà hã maj tee ri amnhî nhîpêx. Pa ja hã mẽ omu nê inhmã mẽ hkaprî nê. Jakamã kot

paj Ejit nhō xwýnhjê nhĩhkra rŭm mē kator pa. E ka kot paj mē hwýr amē ka ma akupým mē hwýr mō nē mē kurŭm mē kator.

Anhýr o kām mē kaxyw karō. ³⁵ Ra Ijaew kot Mojes hkaga tā nhŭm mē kaxyw ām nē ma akupým kot mē hwýr mēnh kaxyw. Na prem ra omu nē hkaga. Te mē ate Jeus kagaja pyrā nē hkaga. Jakamā nhŭm pijapu xwýnhta tee ri amnhĩ tā omu nē kamā gryk nē amnhĩ nē kām kapēr nē kām: “Tk. Kwa xā apē mē inhō pahi hā na ka ā wa inhmā akapēr anē? Nā apē mē inhō pahi kēt.” Anhýr tā nhŭm Tirtŭm mē kaxyw tām xām. Kot mē ho amnhĩptār nē Ejit nhō xwýnhjê rŭm mē kator kaxyw. Ja kaxyw na pre pĩ hpōk kamā kām kapēr nē mē kaxyw ām.

³⁶ —Jakamā nhŭm Mojes ma akupým Ejit wýr mō nē mē kurŭm hkwyjê kator nē ma mē o pa. Na pre mē ho mex nē Tirtŭm nhỹ hā mē kām aa mē kot mēmoj pumunh kēt kwý ho anhýr o ri mē o pa. Ejit kamā nē määnēn mē kot gō xujanār mā: “Gō kamrêk” anhýr xwýnhta kamā. Nē kapôt ā mē kām ā amnhĩ nhĩpêx anhýr o mē o pa. Nē kapôt ā ri mē o pa ho ra hā amgrā pē 40.

³⁷ —Tā tām na pre mē panhĩgêjtê mā mēhō hkukamā mē kām tanhmā harēnh to nē mē kām harēnh o: “Koja Tirtŭm nhýrmā te ra mē akaxyw pa ixām pyrā nē inhmýr pē mē panhĩō xām. ý hā mē amā kapēr jarēnh o pa kaxyw nhŭm nhýrmā mē akaxyw ām ka mē omu.”

—Anhýr o ā Jeus kukamā harēnh anē. ³⁸ Na pre Mojes kapôt ā mē panhĩgêjtê ho pa nhŭm mē krā hakýx pē Sinaija wýr pa. Mē panhĩgêjtêja hāmri hwýr pa nhŭm Tirtŭm kapēr o mē wrýk xwýnhja mē kaxyw Mojes mā kapēr nhŭm ō ri mē kām awjarē nē hā kagā. Mē kot mar nē hkôt amnhĩ nhĩpêx nyw o amnhĩ nhĩpêx o pa kaxyw nhŭm mē kām Tirtŭm kapēr jarēnh o pa. Nē mē pajaxwýja. Mē pahte hkôt amnhĩ nhĩpêx nyw o amnhĩ nhĩpêx o papa kaxyw na pre mē pamā hā kagā. ³⁹ Tā nō nhŭm mē panhĩgêjtêja Mojes ma nē ām kuma nē hkaga kumrêx nē akupým Ejit wýr hkrā. ⁴⁰ Jakamā nhŭm Mojes kormā nhýri mē kaxyw Tirtŭm mā kapēr o ām rōm nhŭm mē wakre kamā htō Arāw wýr mra nē kām: “Kwa Mojes ra kot tanhmā amnhĩ to kēnā. Kot Ejit rŭm mē pakator nē mē pahto mōr tā ra nhýri arík nē tanhmā amnhĩ to. Jakamā e. Kwa hpānhā mē inhmā mēmo karō nhĩpêx pu mē ho panhō sānti kē tām ma akupým Ejit wýr mē pahto pa.” Anē.

⁴¹ —Hāmri nhŭm mē kuma nē mē kām kàx o mōx krare karō ho sānti nhĩpêx nē mē kām ām. Hāmri nhŭm mē axtem nē te ho Tirtŭm nhĩpêx pyrāk o hipêx nē kām ōwēhti hkwy pa nē kām haxwý nē hā apku. Hāmri nē ā amnhĩ nhĩpêx anhýr ā amnhĩ pumu nē hkĩnh nē. ⁴² Hāmri nhŭm Tirtŭm tee ri ja hā mē omu nhŭm ja kēp omnuj týx nē nhŭm mē hkaga hpa. Jakamā nhŭm prem amnhĩ krā hkôt ri myyti nē mytwýre nē kanhêti karō nhĩpêx nē te mē kot Tirtŭm nhĩpêx pyrāk o hipêx o pa. Hāmri nē amnhĩ kaxyw kumā pix mē hamaxpē o pa hā amgrā xohtō nē. Tā nhŭm Tirtŭm nhỹ hā kapēr jarēnh o mē pa xwýnhjêja tanhmā mē kām kapēr to nē mē hā kagā. Te Tirtŭm tām mē kām kapēr pyrāk o mē kām kapēr nē hā kagā kot:

Pa mē apē Ijaewjaja? E mē inhma. Amnepēm mē ate kapôt ā ri mē apa hā amgrā pē 40ta ā. Xā we inhmā na ka prem akrit kwý hpar o apa?

⁴³ Nā inhmā hkēt. Na ka prem axtem nē ri amnhĩ krā hkôt amnhĩm mēmo karō nhĩpêx nē hipêx o te mē ate pa inhĩpêx pyrāk. Pē kām akrit kwý hpar nē ōr o ri apa.

Mē anhō mēmo karō nhĩpêxta mē ate amnhĩm hā hixi pē Mōrok mēnh xwýnhja ka pre htem ā kamā amnhĩ kôt ho apa.

Nē amnhīm kanhēti karō nhīpēx nē hā hixi mē nhūm kēp Repā. Ka mē ixkuhpa hā wa kēp mē apām ā harēnh o ri apa.

Tā ā mē ate amnhī nhīpēx anhūrja mūrāpē kot paj pānhā nhūhūm mē arē.

Koja mē akutā amnhī xunhwūr xwūnhjaja mē apynē nē ma pyka pē Papirōn rūm hamū mē ato hapēx ka mē amarī mē kām axāpēnh rūnh o ri apa kām ga. Anē.

Ā na pre Tirtūm mē panhīgētjē mā kapēr anē nhūm ŷ hā kapēr jarēnh o pa xwūnhja mē kām hā kagā.

⁴⁴—Tā nhūm mē panhīgētjaja kormā kapōt ā ri pa ri amnhī kōt mry kà ho ixkre ho pa. Tirtūm mā kapēr xā hā ixkreja nhūm prem amnhī kōt ri o pa. Mē kot kām “Tirtūm nhōrkwū kaakre” anhūr xwūnhja. Tirtūm kot mē kām hā karō xā hkōt nhūm mē hipēx nē amnhī kōt ri o pa. Na pre Tirtūm hprī hā Mojes mā tanhmā kot hipēx to hā karō nhūm mē hkōt hipēx nē amnhī kōt ri o pa.

⁴⁵—Tā nhūm Mojes ty nhūm hpānhā Jojueja amnhī kōt mē o pa. Ma Tirtūm kot mē kām pyka mex nhōrta wūr Mojes mūr pē mē o pa. Hāmri nē hwūr mē o pōj nhūm Tirtūm mē nē mē kot ra kamā mē pa ho mē pa xwūnhjē japōj nhūm mē pānhā kamā pa ho pa. Nē amnhī kōt Tirtūm nhōrkwū kaakreta o pa. Rāhā nhūm finat Tawija mē hpānhā mē ho amnhīptā. ⁴⁶ Na pre Tirtūm Tawi kot tanhmā amnhī nhīpēx to ho pa hā omu nē kām hapē nē. Jakamā nhūm Tawi kām kapēr nē kām: “Pa Tirtūm? Kwa xā kot paj amā ixkre mex ō nhīpēx nā? Mē ixpē Ijaewjaja mē ixte kamā amā amex o amex ā ajarēnh o ixkrī kaxyw pa hipēx. Xā kot paj amā hipēx?” Anhūr tā no nhūm Tirtūm kormā kām ja prām kēt nē. ⁴⁷ Jakamā nhūm Tawi hkra Sarumāwja hipēēxā mūr pē hpānhā kēp mē ō pahi nē kām hipēx. ⁴⁸ Nom xā na hte Tirtūm maatija mē pahte kām panhīhkra ho ixkre nhīpēx xwūnh kamā hkrī? Nā kaxkwa kamā na hkrī xā. Na pre ra Tirtūm nhū hā kapēr jarēnh o pa xwūnhja Tirtūm kot tanhmā mē pajamār to ho pa hā kagā nē hā kagā ho:

⁴⁹ Na pa hte kaxkwa rūm pyka hkōt mē piitā mē hamār mex o ixkrī.

Tā tanhmā kot paj amnhī to nē mē ihkra ho mē kot inhmā ixkre nhīpēxta wūr axā nē kamā ixpa ho ixpa?

⁵⁰ Nā ixte mēmoj piitā ho ixkator xwūnh kēnā kot pa kēt ā amnhī nhīpēx anē. Anē.

Nhūm pre ā Tirtūm amnhī tā mē kām kapēr anē nhūm ŷ hā kapēr jarēnh xwūnhja ō ri mē pamā hā kagā.

⁵¹—E kwa mē inhma ixkwūwjaja. Mē akrā hihtūx kumrēx jakamā mē amā Tirtūm kapēr mar prām kēt. Na ka htem mē panhīgētjē pyrā nē amnhī nē Tirtūm Karō kaga nē kapēr mar kēt nē. ⁵² Na pre hte Tirtūm nhū hā kapēr o mē pa xwūnhjaja mē panhīgētjē hwūr mra nē mē kām kapēr jarēnh o ri mē hkōt pa. Tā nhūm mē hkaga nē mē hipēx kati ho pa. Na pre htem Jejus wrūx kukamā mē kām: “E koja nhūrmā kot Tirtūm kapēr mar nē hkōt amnhī nhīpēx mex rāhā xwūnh maatija mē pahwūr wrū.” Anhūr o mē kām harēnh o pa. Tā no nhūm mē kām ja mar prām kēt jakamā axtem nē hā mē hpar o pa. Mē kot mē kām Jejus jarēnh o mē pa xwūnhjē hpar o pa. Tā nhūm tām mē pahwūr wrū ka mē omu nē mē kot amnhī nhīpēxta pyrā nē hā amūnē nhūm prem mē amā kupī.

⁵³—Tirtūm kapēr o mē wrūx xwūnhjaja kot Tirtūm nhū hā tanhmā mē pahte amnhī nhīpēx to ho papa hā mē pamā karō nhūm mē ate mar tā mē apē hprām nōkati. Nē ama nē ām ama nē hkōt amnhī nhīpēx o ri apa hkēt nē. Anē.

Mē kot Estewāw pīr ā mē harēnh
Rukre 21.16-19, 23.34; Atre 22.20

⁵⁴ Hāmri nhūm juistijaja tee ri Estewāw xujarēnh ma nē kamā gryk tỳx nē kām kapēr punuj nē. ⁵⁵ Nom nhūm Tirtūm Karōja tanhmā hkrā hto nhūm kām mē uma hkēt nē. Hāmri nē kānhmā rīt nē kaxkwa pumunh o xa nē kamā Tirtūm rūm hirā rax pumu. Nhūm Jejus Tirtūm nhīhkō hā xa nhūm omu nē hkīnh nē mē kām:

⁵⁶ —Kokýy. Na kaxkwa axkjē nhūm kamā Tirtūm nhỹ pa omu. Nhūm kuri kot mē pahwỳr mēnh xwỳnh Jejusja xa. Hēxta waa nē. Nà na pa jarāhā wa omu nē ixkīnh tỳx kumrēx. Anē.

⁵⁷ Hāmri nhūm mē kuma nē kamā gryk tỳx nē. Hāmri nē kām mar prām kēt nē kēp amnhī jamak pro. Hāmri nē gryk xà àmra htỳx nē hwỳr hprōt ⁵⁸ nē unē nē krī pē ho kato nē ma o tē nē nhỹri o xa. Hāmri nē kēn o htak o hpīr kaxyw amnhī nhīnòkà hkwrỳ nē mēhō my pē Sawti mā kugō nhūm mē kām hamỳ. Hāmri nhūm mē kēn rūnh kwỳ jamỳ nē o mra nē Estewāw wỳr rēnh prēprēk o kuhē. Nē ho ī kamā htak nē hkrāx pē htak. ⁵⁹ Hāmri nhūm ra htyk kaxyw nē Jejus mā amnhī jarē nē kām:

—Pa Pahihti Jejus? E kōja ixkarō awỳr api ka ixto amnhīptā. Anē.

⁶⁰ Hāmri nē hkōn krā ho tēm nē nhỹ nē axte kām amnhī jarē nē mē kot hpīr xwỳnhjē nē kām kapēr nē kām:

—Kwa Pahihti. Mē kot ixpīr tā kwa tanhmā ixtā mē ho hkēt nē.

Anhỹr o mē nē Jejus mā kapērja kōt ra ty.

8

Mē kot Estewāw jaxàr ā mē harēnh
Atre 22.4, 26.9-11

¹⁻² Hāmri nhūm mē kot Jejus kōt amnhī nhīpēx xwỳnhjaja Estewāw wỳr mra nē htyk kām omu nē hkaprī nē. Nē mur nē kumỳ nē ma o mō nē haxà. Nom nhūm Sawtija mē kot hpīr ā omu nhūm ja kām mex nē.

Sawti kot Jejus kwỳjē nhīpēx kati ho pa hā harēnh
Atre 1.8

Tā nhūm Jerujarē kamā Ijaewjaja mē kot Jejus kōt amnhī xunhwỳr xwỳnhjē homnuj tỳx o pa. Hāmri nhūm mē tee ri amnhī kukamā hamaxpēr nē mē hkwyjaja mē umaj hapôj nē ma pika hkwy hkōt hpigrành pa. Mē hkwyjaja Jutej wỳr ma pa nhūm mē hkwyjaja Samar hwỳr ma pa. Ā na prem mē umaj nhỹhỹm hpigrành par anē. Ām Jejus nhỹ hā mē ahkre xwỳnh maati pixjaja na prem Jerujarē kamā arīk nē nhỹhỹm mōr kēt nē. Simāw Pētre nē Juāw nē Xiakre nē Andre nē Firipti nē Patoromew nē Matēwre nē Makre nē Tomas nē Xiakre hōja nē Simāw ô nē Maxitreja. Ām jajaja pix na prem arīk.

³ Nhūm Sawti haxwỳja Jejus kōt mē kot amnhī xunhwỳr xwỳnhjē homnuj o pa. Mē kot Jejus kaga hprām xà tanhmā mē hipēx to ho pa. Na pre hte mē òrkwy hwỳr agjē nē mē unē. Mēmýjē pynē nē mēnijē pynē nē ma mē o mra nē mē hagjēnh xà kamā mē hagjē. Mē uràk nē kēp Ijaew tā ā mē hipēx anhỹr o pa.

⁴ Tā nhūm mē umaj Jerujarē rūm pika hō hwỳr mē hpigrành xwỳnhjtaja amarī pika hkwy hkōt ri pa hkēt nē. Na prem ma mē piitā mē kām Jejus kapēr jarēnh o ri mē hkōt pa. Kēp Tirtūm kot mē pakaxyw ām xwỳnh ā harēnh rāhā ho ri mē hkōt pa.

Wajaga kot amnhĩ tā Firipti mar ā harēnh

Juāw 2.23-24

5-12 Tā nhũm Firipti haxwýja ma mō. Ma krĩ pē Samar hwýr mō nē kamā mē kām Tirtũm kot mē pakaxyw ām xwýnhhta jarēnh o pa. Samar kamā na pre wajaga Simāwti ri Samar nhō xwýnhjē hkôt mē no kupyri rāhā ho ri mē hkôt pa. Nē āhpumunh týx ā amnhĩ to jarkrar o ri pa. Jakamā nhũm mē kot amnhĩ nhĩpēx ā omu nē kamā no pyma nē. Nē htýx ho ām hāmri kot amnhĩ jarēnh ā hkamnhĩx. Jakamā nhũm pre mē kām tanhmā ri amnhĩ to hēx to ho pa pē mē no kupyri rāhā ho ri pa nhũm mē amnhĩ jaēr pē omu. Mē kot amnhĩ to hkryre xwýnhjaja nē mē kot amnhĩ to rũnh xwýnhjaja nhũm mē amnhĩ jaēr pē kot tanhmā amnhĩ nhĩpēx to hā omunh o hkôt pa. Nē ri axpēn mā harēnh o:

—Kokýy. Wajagaja āhpumunh týx kumrēx. Tirtũm nhỹ hā mǎn te ā amnhĩ nhĩpēx anhýr o pa nā? Mǎn pre Tirtũm kām āhpumunh xā hkwy gō nhũm ý hā ā amnhĩ nhĩpēx anhýr o pa. Anē.

Hāmri nē hkôt hamaxpēr o ri hkôt amnhĩ nhĩpēx o pa.

Tā nhũm Firipti mē ō krĩ hwýr mō nē mē kām Jejus Kris jarēnh o ri mē hkôt pa nē mē kām:

—Jejus kēp Tirtũm kot mē pahwýr mēnh xwýnh jakamā kot kaj mē amnhĩ kaxyw hkôt ajamaxpēr nē hkôt amnhĩ xunhwý nhũm Tirtũm hā mē apumu nē mē ato hkra. Anē.

Hāmri nē Tirtũm nhỹ hā akupým tanhmā mē kute xwýnhjē ho mex to ho pa. Mē ĩ kamā mē htyk xwýnhjaja nē mē hyk o mē pa xwýnhjaja nhũm mē ohtō nē akupým mē ho mex o pa. Nē mē hkwyjē nē mēkarōmnuti hkwy jano nhũm mē āmra htýx o mē hkaga nē ma mē kurũm hapōx nē mra. Ā Firiptija Jejus nhỹ hā mē ho mex o pa anē nhũm mē piitā ja hā omu nē kapēr ma nē hkĩnh nē. Nē kapēr mar týx nē hkôt hamaxpēr. Jao wajaga Simāwti kaga nē hpānhā amnhĩ kaxyw Jejus kôt pix mā hamaxpēr nē hkôt amnhĩ xunhwý. Hāmri nhũm Firipti ja hā mē omu nē mē hkrā kumrā. Mēmyjaja nē mēnijaja nē mē piitā mē hkrā kumrā. Ra mē kot Jejus kôt amnhĩ xunhwýr ā mē piitā mē kām amnhĩ to amnhĩrit kaxyw nhũm mē hkrā kumrār pa.

13 Hāmri nhũm wajaga Simāwti haxwýja Jejus kapēr ma nē mē urāk nē amnhĩ kaxyw hkôt hamaxpēr nē hkôt amnhĩ xām nhũm Firipti hkrā kumrā. Hāmri nhũm hkĩnh nē Firipti hkôt ri pa. Nē aa mē kot mēmoj pumunh kēt kwý ho anhýr o ri pa hā omu nē kamā no pyma ho hkôt ri pa. Nē kot Tirtũm nhỹ hā akupým mē ho mex ā omu nē tee ri hamaxpēr.

14 Tā hāmri nhũm Jerujarē kamā Jejus nhỹ hā mē ahkre xwýnh maatijaja Samar nhō xwýnhjē jarēnh ma. Ra mē kot Tirtũm kapēr kôt amnhĩ nhĩpēx ā mē harēnh ma nē hkĩnh nē. Hāmri nē ma mē hwýr Simāw Pētre mē Juāw wa kumē. 15-17 Hāmri nhũm wa ma mē hwýr wa mō nē pōj. Hāmri nhũm Firipti wa omu nē wa kām krĩ nhō xwýnhjē jarē nē wa kām:

—Nā na pa pre mē kām Jejus kapēr jarē nhũm mē inhma nē hkôt amnhĩ xunhwý. Jakamā pa pre mē hkrā kumrā. Nom na kormā Tirtũm Karōja mē hkarō mā gjēx kēt nē. Anē.

Hāmri nhũm wa mē harēnh ma nē mē himōk ā wa ĩhkra jaxwýr o ri mē hkôt mra. Ja kôt nhũm Tirtũm Karō mē hwýr wrý nē mē hkarō mā gjēx pa. 18-19 Hāmri nhũm wajaga Simāwja mē amnhĩ tā wa omunh o xa nē hamaxpēr o:

—Kokýy. Kwa wa kot mē hā ĩhkra jaxwýrja kôt na hte Tirtũm Karō mē hkarō mā agjē. Hēxta waa nē. Inhmā ā mē hipēx anhýr o ri ixpa hprām týx. E pa

ixkàxpore hkwy jamy nē o tē nē wa kām kugō kē wa tanhmā ixto pa wa urāk nē ā mē hipēx anhÿr o ri ixpa. Nā kot paj anē. Anē.

Hāmri nē wa hwÿr tē nē wa kām:

—E ota ixkàxporeta. Kwa amnhīm apy nē hpānhā tanhmā ixto pa war apyrā nē mē hā inhīhkra jaxwÿr o ri mē hkōt ixpa kē Tirtūm Karōja mē hkarō mā agjē. Inhmā ja ho anhÿr prām tÿx. Anē.

²⁰⁻²³ Hāmri nhūm wa tee ri ā kapēr anhÿrja ā omu nhūm Pētre kām:

—Tk. Kwa ajamaxpērja mex kēt. Xā na htem kàxpore ho Tirtūm mā amnhīrer pē ŷ hā mē ho hwÿr o pa nhūm Karō mē hwÿr agjē? Nā na htem kàxpore ho Tirtūm Karō japrōr kēt nē. Kot kaj wa ixpyrā nē ā mē hipēx anhÿr kēt nē. Ajamaxpērja mexre hā. Kormā ate Tirtūm kōt amnhī xām tÿx kēt jakamā na ka atÿx ā ri ajamaxpēr anē.

—Na ka ā wa ixte Tirtūm nhÿ hā mē hipēx anhÿr ā wa ixpumu nē amā wa ixpyrā nē ā mē hipēx anhÿr o ri apa hprām xaj ajamaxpēr punuj nē. Nhūm ajamaxpēr punuj te kot apa hā apyr ka tee ate kēp amnhī kjēnh pyrāk. Kwa tokyx ajamaxpēr punuj ā amnhī pumu nē akaprī nē tokyx hkaga. Hāmri nē amnhī to Tirtūm wÿ kē amnhī katut kōt ajamaxpēr punujja mē ka axte ā ajamaxpēr anhÿr kēt nē. Ā mē hamaxpēr punuj anhÿr xwÿnhjaja koja mē nhÿrmā ma kuwy hwÿr pa. Anē.

²⁴ Hāmri nhūm tee ri amnhī tā kuma nē hkaprī nē wa kām:

—Kwa xā wehe? Tō tokyx ixto Tirtūm wÿ kē ā ijamaxpēr anhÿrja mÿrapē hwÿr inhmēnh kēt nē. Anē.

²⁵ Tā nhūm Simāw Pētre mē Juāw wa Samar nhō xwÿnhjē mā Pahihti Jejus kapēr jarēnh pē ho mē ahkre hāmri nē ma akupÿm Jerujarē hwÿr mō. Ma pyka pē Samar hkōt mē kām Jejus kapēr jarēnh o ma akupÿm mō.

Firipti mē Exiop nhō xwÿnh wa harēnh
Ijais 53.7-8

²⁶ Hāmri nhūm Firipti arī Samar kamā arīk. Hāmri nhūm Tirtūm kapēr o mē wrÿk xwÿnhja hwÿr wrÿ nē kām:

—Pa? E ot pa awÿr wrÿ nē tē. Nā kēr ka tokyx akato nē ma mō nē Jerujarē rūm kānhmā Kas wÿr pry kahpēr ta nē hā juk nē ma hā mō. Kapōt ā pry nōrta kahpēr ta nē hā mō. E kwa tokyj.

Anhÿr o kām kapēr hāmri nē ma akupÿm tē nē kaxkwa hwÿr api. ²⁷ Hāmri nhūm Firipti kuma nē kato nē ma hwÿr mōr kurē kumrēx. Mōō hāmri nē pryja kahpēr ta nē hā mō.

Hāmri nhūm ra mēhō myja mō. Exiop nhō xwÿnh na pre. Exiop kamā mēō pahi na pre niti. Hixi pē na pre Kātatre. Nhūm pry hā mōr xwÿnhja kēp kām kàxpore jamār o pa xwÿnh. Exiop kamā te kēp mē ō kōwenatō pyrāk. Tā kot Tirtūm mā mex o mex ā harēnh kaxyw ma Jerujarē hwÿr mō. ²⁸ Hāmri nē akupÿm Exiop wÿr kormā mō. Ō pār kām nhÿ nē Tirtūm kapēr ā kagā htūm kamā kapēr o mō. Tirtūm nhÿ hā kapēr o pa xwÿnh pē Ijais kot Tirtūm kapēr ā kagā htūmja nhūm kamā kapēr o mō. ²⁹ Hāmri nhūm Tirtūm Karō Firipti mā harē nē kām:

—E mēhō mÿj wÿr aprōt nē tē nē hā ajēt nē ma hkōt tē. Anē.

³⁰ Hāmri nhūm kuma nē ma hwÿr hprōt nē hā ajēt nē kot kagā kamā kapēr ā kuma. Ijais kot Tirtūm kapēr ā kagā htūm kamā kapēr ā kuma nē kām:

—Pa? Mān ka aprī hā ate kamā akapēr xwÿnhnta ma nā? Anē.

³¹ Hāmri nhūm kām:

—Nà ixte maare hã. Mëhõ kot hprĩ hã inhmã harẽ pa ixprĩ hã kuma? Xàt ka ixwÿr api nẽ ixri nhÿ nẽ aprĩ hã inhmã harẽnh o ixkõt mõ nà? Anẽ.

Hãmri nhũm kuma nẽ hwÿr api nẽ ìhkõ hã nhÿ nẽ kagàta pumunh o nhÿ.

³² Nhũm hã kagà kot:

Na htem òwèhti par kaxyw nhũm amarĩ mẽ kãm akryk kuhê.

Nẽ mẽ kot kèp hkĩ jakār kaxyw nhũm ma anẽ nẽ amarĩ mẽ kãm akryk kuhê.

Tã na pre mëhõja òwèhti kot amnhĩ nhĩpèx pyràk o amnhĩ nhĩpèx.

Jakamã nhũm mẽ kot tanhmã hipèx to htã no nhũm arĩ mẽ kãm akryk xa.

Amnhĩ nẽ tanhmã mẽ kãm kapèr punuj to hkèt nẽ. ãm arĩ mẽ kãm xa.

³³ Na prem homnuy tÿx nẽ ri hipèx kati rax nẽ.

Aa kot tanhmã amnhĩ tomnuy to hkèt kumrèx tã nhũm mẽ ã hipèx anẽ nhũm

mëhõ yr pè tanhmã nẽ mẽ kãm kapèr to hkèt nhũm prem kupĩ.

Nhũm amnhĩ kanrèhã hkra hkèt rãhã ty. Jakamã kot puj mẽ hkrajè nhĩxi mar kèt nẽ. Kra hkèt rãhã htyk kènã. Anẽ.

³⁴ Nhũm pre ã Exiop nhõ xwÿnh Tirtũm kapèr ã kagà htũm kamã harẽnh anẽ. Hãmri nẽ tee ri ã kot mëhõ jarènh anhÿrja kukamã hamaxpèr nẽ hã Firipti kukja nẽ kãm:

—Kwa aprĩ hã inhmã mëhõja jarẽ. Mëhõ na prem ã hipèx rax anẽ? Xà kot kagà xwÿnhhta na prem ã hipèx anẽ nà xà nhãm mëhõ na prem ã hipèx anẽ? E kwa aprĩ hã inhmã harẽ pa ã mẽ kot hipèx anhÿr xwÿnh kõt omu. Anẽ.

³⁵ Hãmri nhũm kãm:

—Tõe kot paj amã harẽ. Nà Jejus na prem ã hipèx anẽ nhũm prem hã kagà. Anẽ.

Hãmri nẽ hprĩ hã kãm kot kamã harènh xwÿnhhta jarẽ. Jejus kot tanhmã mẽ panè amnhĩ nhĩpèx toja nhũm hprĩ hã kãm harènh o hkõt mõ.

³⁶ Hãmri nhũm wa kormã mõ nẽ pry htã himõ hãnh mõ nhũm Exiop nhõ xwÿnh omu nẽ Firipti mã kãm:

—E mÿj gõ mÿj nõ. Xà kot kaj kamã ixkrã kumrã nà? Anẽ.

³⁷ Nhũm kãm:

—Nà kot kaj amnhĩ kaxyw Jejus Kris kõt ajamaxpèr nẽ hkõt amnhĩ xãm hã kot paj akrã kumrãr kurè kumrèx. Anẽ.

Hãmri nhũm kãm:

—Tÿ. Kèp Tirtũm Kra kènã kot paj kèt amnhĩ kaxyw hkõt ijamaxpèr kèt. Anẽ.

³⁸ Hãmri nẽ pàr o mrrar xwÿnh mã anẽ nhũm pàr o nõ nhũm wa kato nẽ himõ hwÿr wrÿ nhũm Firipti hkrã kumrã. Kot Jejus kõt amnhĩ xãm ã hkrã kumrã.

³⁹ Hãmri nẽ wa akupÿm api nhũm Tirtũm Karõ Firipti mÿ nẽ ma nhÿhÿm o mõ nhũm Exiop nhõ xwÿnhja axte omunh kèt nẽ. Hãmri nẽ ma akupÿm papxã hwÿr mõ. Ra kot Jejus kõt amnhĩ xãm jakamã hkĩnh nẽ ma akupÿm mõ.

⁴⁰ Rôm nhũm Firipti krĩ pè Ajõt kamã pøj. Tirtũm Karõ kot Exiop nhõ xwÿnh pè kator nẽ tanhmã ho nẽ Ajõt wÿr o mõ hãmri nẽ kamã kumẽ. Hãmri nhũm mẽ kãm Jejus kot tanhmã mẽ panè amnhĩ nhĩpèx to hã harènh pè ma krĩ hõ hwÿr mẽ kãm ujarènh anhÿr o pa rãhã krĩ pè Sejarej wÿr mõ nẽ pøj.

9

Sawti kot Jejus kõt amnhĩ xãm ã harènh

Atre 22.6-11, 26.12-18

¹ Rôm nhũm Sawtija xatã Jerujarè kamã Pahihti Jejus kõt mẽ kot amnhĩ xunhwÿr xwÿnhjaja tanhmã mẽ homnuy tÿx to ho ri mẽ hkõt pa. Kãm mẽ

himex par prām jakamā na pre hte ã amnhī nhīpêx anhÿr pix o pa. Tã ra hamaxpêr nê ma patre maati hwÿr tē nê mē hã amnhī jarē nê kãm:

²—E ot pa awÿr tē. Kwa inhmã kagã nhīpêx pa kupy nê ma krī pē Tamas kãm mē pahpê Ijaew xàptàr tùmrejê hwÿr o mô nê mē kãm kugō. Kê mē kamã harē nê omu hãmri nê hkôt inhīhkra kamã Jejus kôt mē kot amnhī nhīpêx xwÿnhjê jagjê. Mēnijaja nê mēmyjaja. Hãmri pa mē unê nê man akupÿn awÿr mē o mô ka mē omu nê kam tanhmã mē hipêx to. Anê.

Hãmri nhùm kuma nhùm ja kãm mex nê. Hãmri nhùm kãm kagã nhīpêx nê kugō nhùm kupy nê hkôt mē pa xwÿnhjê mē ro hã ma Tamas wÿr mē hwÿr mōr kurê kumrêx.

³Mōō mē ra hpôx o mōr mē nhùm puh kaxkwa rùm hirã rax kumrêx wÿr nê hã ajêt nhùm hipôk ri xa. ⁴Hãmri nê tee ri omu nê kãm ma xàj pykap tēm nê akryk nō. Hãmri nhùm kaxkwa rùm mēhō kãm kapêr nê kãm:

—Pa Sawti? Hêxta waa nê. Kwa mon ka hte ixtomnuj tÿx o ri apa? Anê.

⁵Hãmri nhùm amnhī jaêr pē kuma nê kãm:

—Kwa mē atō na ka ã inhmã akapêr anê pahihtī? Anê.

Hãmri nhùm kãm:

—Kwa nhùm ixpê Jejus ixte amã ixkapêr kênã. Pa na ka hte ixpê ixkôt mē kot amnhī xunhwÿr xwÿnhjê nhīpêx kati ho apa. Jao te pa ate ixtomnuj tÿx pyràk. ⁶Nom kot kaj axte ã amnhī nhīpêx anhÿr kêt kumrêx. E kãnhmã xa nê mãmri ma krī hwÿr tē. Kot kaj hwÿr pōj nhùm mēhō awÿr tē nê mēmoj tã amã karō ka ama nê hkôt amnhī nhīpêx. Anê.

⁷Nhùm pre ã Jejus Sawti mã kapêr anê. Nhùm hkôt mē pa xwÿnhjaja mēmoja ma no ãm hprī mar nê mēmoj pumunh kêt nê. Hãmri nê tee ri hamaxpêr nê kãm ma xàj akryk kapêr kêt kumrêx nê kuhê. ⁸Hãmri nhùm Sawti kãnhmã xa nom rīt kêt nê tee ri rīt mã nhùm mē hpa hã kupy nê ma krīm o mô. ⁹Nê Tamas wÿr o pōj nê nhÿri mēhō nhōrkwÿ hwÿr ho axã nhùm kamã nohkê nê arī hkrī. Tee ri amnhī kukamã hamaxpêr o hkrī. Nê apkur kêt nê hkôm kêt o ra hã apkati axkrunēpxi.

¹⁰Tamas kamã na pre mēhō my pē Ananījsa pa. Kot Jejus kôt amnhī xunhwÿr xwÿnhjê hō na pre. Jakamã nhùm Jejus hwÿr kato nê kãm kapêr. Te hpimtir kãm hwÿr kator nê kãm kapêr pyrà nê kãm:

—Pa Ananīs? Anê.

Nhùm kãm:

—ÿ? Ot pa xa. Mo na Pahihti? Anê.

¹¹Nhùm Jejus kãm:

—E kêr ka akato nê ma mē kot kãm: “Pry katãt” anhÿr xwÿnhnta wÿr tē. Hãmri nê kamã Jut nhōrkwÿ japêr. Kamã na Tas nhō xwÿnh pē Sawtija hkrī. Na no hkre nê inhmã amnhī jarēnh o hkrī. Ka hwÿr axã nê omu. ¹²Ate hwÿr atēm nê inhÿ hã hã anhīhkra xir nhùm akupÿm rīt mex kaxyw na ato amÿti. Jakamã e ma hwÿr tē nê ã hipêx anê. Anê.

¹³Hãmri nhùm Ananīs tee ri kuma nê kãm Sawti puma ho amnhī kamã kahak nê. Hãmri nê kãm:

—Kwa nã Pahihti. Tãm na xep hte Jerujarê kamã mē kot amnhī kaxyw akôt mē hamaxpêr xwÿnhjê nhīpêx kati ho pa. Pa ra mē hã harēnh ma. ¹⁴Tã na xep ra jar Tamas wÿr pōj. Patre krãhtùm kapêr nhÿ hã kot mē ixpê akôt amnhī xunhwÿr xwÿnhjê pynēnh nê ma akupÿm hwÿr mē ixto mōr kaxyw. Tãn ka ri hwÿr ijano. Kwa nã ri ixto anhÿr kêt nê Pahihti. Anê.

¹⁵Nhùm Jejus kãm:

—Nà mamrī ma hwỳr tē. Ra ixte amnhī kaxyw ãm kênã. Jakamã koja ã mē anhīpêx anhýrta hpãnhã ma mē piitã mē kãm ixkapêr jarênh o pa. Mē apé Ijaew mã nê mē anhō pahī hkwyjê mã nê mē kêp Ijaew kêt xwýnhjê mã. Koja mē piitã mē kãm ixkapêr jarênh mex o ri mē hkôt pa. ¹⁶ Koja mē ixtã homnuj tỳx nê nhũm amnhī xà htỳx kamã hamak o pa. Nom kot paj ixprī hã mē kot tanhmã ixtã hipêx to hkukamã kãm ixujarênh pa nhũm amnhī kukamã amnhī jarênh ma. Ê tokyx mãmri ma axãmnhīx hwỳr tē. Anê.

¹⁷ Hãmri nhũm kuma nê kato nê ma Sawti hwỳr htêm kurê kumrêx. Hãmri nê ixkre hwỳr axã nê omu nê hkrã hã ìhkra xi nê kãm:

—Pa Jejus kôt ixtō Sawti? E na Pahihti Jejus awỳr inhmê pa awỳr tē. Pry kahti ri kot awỳr kator xwýnhta. Tã akupỳm arīt nhũm Tirtũm Karō kot akarō mã ãr kaxyw na awỳr inhmê pa tē. Anê.

¹⁸ Hãmri nhũm mêmoj te tep kã pyrãkja Sawti no rũm hapôj nê rôrôk nhũm akupỳm rīt mex kurê kumrêx. Hãmri nê kãnhmã xa nhũm Ananīs hkrã kumrã. Ra amnhī kaxyw Jejus kôt hamaxpêr ã hkrã kumrã. ¹⁹ Hãmri nhũm nhỹ nê apku nê akupỳm hihtỳx.

*Sawti kot Tamas kamã Jejus kapêr jarênh
Sikũn Korīt 11.22-23*

Nhũm Sawti Tamas kãm mē kot Jejus kôt amnhī xunhwỳr xwýnhjê hkôt amnhī xãm nê mē hkôt ri pa nê tokyx ma akupỳm môr kêt nê. ²⁰ Kormã mē hkôt ri pa nê Ijaew nhô Tirtũm kapêr o mē ahkre xà hã ixkre hwỳr mra nê kamã mē kãm Jejus kapêr jarê. Kêp Tirtũm Kra hã harênh o kuhê. ²¹ Hãmri nhũm mē amnhī jaêr pê ã harênh anhýrja ma nê tee ri hamaxpêr nê axpên mã:

—Kokýj. Kwa tãm na xep pre Jerujarê kamã amnhī kaxyw Jejus kôt mē kot amnhī xunhwỳr xwýnhjê homnuj tỳx o pa. Tã xep jar kot mē hkwyjê pynênh nê ma mē o môr nê Jerujarê kamã patre krãhtũmjê mã mē ôr kaxyw na pre man mē pahwỳr mō. Tã ra tanhmã hamaxpêr to nê axtem nê mē pamã Jejus kapêr jarênh o mē pajahkre ho pa. Anê.

²² Hãmri nhũm Sawti arī Tamas kãm Ijaew mã tanhmã Jejus jarênh to kamã hihtỳx o mē hkôt pa nê mē kãm:

—Nà Jejus Krisja na pre Tirtũm mē pakaxyw ãm nê mē pahwỳr kumê. ãm hãmri na pa mē amã ja jarê. Anê.

Hãmri nhũm mē kuma nê tee ri kutã tanhmã kapêr to hkukamã hamaxpêr.

²³ Tã ra hã apkati xohtô nê nhũm Tamas kãm Ijaew kwýjaja kot Sawti pír kaxyw hã axpên ma. ²⁴ Hãmri nhũm mēhōja hã ama nê Sawti hwỳr tē nê kãm mē harê nê kãm:

—Kwa Sawti kêr ka axkãm ajamak rom. Na mē pahkwýjaja atã amýnê. Na mē ra krī puhã kahê xà hã hakwakre piitã hamãr ho kuhê. Kot kaj nhỹhỹm akato nhũm mē apumu nê apynê nê apī. Anê.

²⁵ Jakamã nhũm kamãt nhũm Sawti hkôt ri mē pa xwýnhjaja kawã rax ô mý nê hwỳr o tē nê kãm ãm nhũm hwỳr axã nê nhỹ. Hãmri nhũm mē hkagrī nê kên o krī puhã kahêja nhĩrô pê ho wrý nhũm mē kêp kato nê ma mō.

*Sawti kot Jejus kwýjê hkôt pikamênh ã harênh
Karatas 1.15-24*

²⁶ Tã nhũm Sawti krī pê Tamas rũm kato nê ma akupỳm Jerujarê hwỳr mō hãmri nê hwỳr pôj. Hãmri nê mē kot Jejus kôt amnhī xunhwỳr xwýnhjê hkôt amnhī jarênh kaxyw mē hwỳr tē. Hãmri nhũm mē tee ri amnhī wỳr omu nê kot Jejus kôt amnhī xãm ã amnhī to hêx ã hkamnhīx hãmri nê amnhī kamã

kahak o amnhĩ nê hkurê nê mẽ piitã kãm uma nê. ²⁷ ãm Panãpe pix ãm hãmri kot Jejus kôt amnhĩ xãm kôt hamaxpêr. Hãmri nê ma hwÿr tẽ nê haprô nê ma Jejus nhÿ hã mẽ ahkre xwÿnh maatiã hwÿr o tẽ nê yr pẽ mẽ kãm kapêr nê mẽ kãm:

—Kwa ãm hãmri na Sawti amnhĩ jarê. Na ra mẽ pahpyrà nê Jejus kôt amnhĩ xãm. Na xep pre Tamas wÿr pry hã kormã mô nhũm xep Pahihti Jejus hwÿr kato nê kaxkwa rũm kãm kapêr nhũm kuma nê hkôt amnhĩ xãm. Jakamã nhũm xep ra axtem kôt amnhĩ nhÿpêx nyw o Tamas nhõ xwÿnhjê mã Jejus kapêr jarênh o ri mẽ hkôt pa. Ra amnhĩ kamã kãm mẽ uma hkêt nê ãmnhix ri mẽ kãm harênh o ri mẽ hkôt pa. Anê.

²⁸ Hãmri nhũm mẽ kuma nê amnhĩ kôt Sawti mẽ nhũm mẽ hkôt ri pa. Hãmri nê Jerujarê kamã mẽ piitã mẽ kãm Jejus kapêr jarênh o pa. Kãm Jejus kôt amnhĩ xunhwÿr kêt xwÿnhjê puma hkêt nê ãmnhix ri mẽ kãm kapêr jarênh o ri mẽ hkôt pa. ²⁹ Nê Ijaew kwÿ pẽ Gresjê kapêr o mẽ kapêr xwÿnhjê mã nhũm xatã mẽ kãm Jejus jarênh o ri mẽ hkôt pa. Kêp Tirtũm kot mẽ pakaxyw ãm xwÿnh ã harênh rãhã ho ri mẽ hkôt pa. No nhũm mẽ kãm mar prãm kêt nê ra kot Jejus ã hpÿr mã. ³⁰ Hãmri nhũm mẽ kot Jejus kôt amnhĩ xunhwÿr xwÿnh kwÿjaja mẽ harênh ma nê mẽ kêp ho kato nê ma krÿ pẽ Sejarej wÿr o mô. Hãmri nê kurũm ma akupÿm õ krÿ pẽ Tas wÿr kumê nhũm ma akupÿm mô.

³¹ Tã ra Sawti kot Jejus kôt amnhĩ xãm jakamã nhũm mẽ kãm mẽ hkurê xwÿnhjaja axte Jejus ã tanhmã hkwÿjê hto hkêt nhũm mẽ piitã hamakêtkati nê ãmnhix ri pa. Pika pẽ Jutej kamã nê Garirej kamã nê Samar kamã nhũm mẽ piitã hamakêtkati nê ãmnhix ri pa. Hãmri nê Tirtũm mã mex o mex ã harênh o ri pa. Nhũm Tirtũm Karõ tanhmã mẽ hkrã hto nhũm mẽ ra kapêr kôt amnhĩ nhÿpêx mex o mô. Hãmri nhũm mẽ ohtõ rax nê mẽ urak nê Jejus kôt amnhĩ xunhwÿr nê hkwÿjê hkôt axkamê.

Enejti akupÿm mex ã harênh

Atre 3.1-10

³² Tã nhũm Simãw Pêtreja ma mẽ kot Jejus kôt amnhĩ xunhwÿr xwÿnhjê mã Tirtũm kapêr jarênh o mẽ ahkre kaxyw ma krÿ piitã hkôt pa. Jakamã krÿ pẽ Rit wÿr mô ³³ nê hwÿr pøj nê kamã Enejti pumu. Nhũm ì kamã htyk pa nê kupÿp kãm hikwÿ rãhã hã amgrà pẽ 8. ³⁴ Hãmri nhũm Simãw Pêtre omu nê Jejus nhÿ hã kãm kapêr nê mẽ kãm:

—Pa Enejti? E na Jejus Kris akupÿm ato mex. Jakamã e kãnhmã xa nê akupÿpta py. Anê.

Hãmri nhũm akupÿm mex nê kãnhmã xa nê amnhĩ pumu nê hkĩnh o hkĩnh.

³⁵ Hãmri nhũm krÿja kamã nê krÿ hõ pẽ Sarõ kamã mẽ piitã harênh ma nê mẽ kot amnhĩ tomnuj kaga hpa nê hpãnhã Jejus kôt amnhĩ xunhwÿr nê hkôt amnhĩ nhÿpêx o pa.

Tapitre akupÿm hÿr ã harênh

Rukre 8.49-56; Atre 20.7-12

³⁶ Nhũm Tapitreja krÿ pẽ Jope kamã na pre pa. Gres kapêr kãm hixi pẽ Nokre. Mẽ kapêr kãm Nokreja te kêp “karà” anhyr jarênh pyrak. Na pre ra Tapitre pẽ Nokreja Jejus kôt amnhĩ xãm nê mẽ piitã mẽ ho mex o ri mẽ hkôt pa. Nê mẽ kêp amrakati xwÿnhjê kamã ukapri ho ri mẽmoj to mẽ kutã nojarêt o ri mẽ hkôt pa. ³⁷ Tã ra à htyx nê hãmri ty. Hãmri nhũm mẽ tee ri omu nê hkapri nê mÿr rax nê. Nê kumÿ nê kuhõ hãmri nê kormã haxar kêt ri kÿx pẽ ixkre kamã kuxi nê kuri mÿr o hkrÿ.

³⁸ Nhũm Simāw Pêtre kormā krī hō pê Rit kamā ri pa. Rit rūm Jope hwỳr jawỳ jakamā nhũm Jope kamā mẽ kot Jejus kôt amnhĩ xunhwỳr xwỳnhjaja Simāw Pêtre jarēnh ma hāmri nê hwỳr ja wa ho hamēxkrut nê wa kumē. Nhũm wa ma hwỳr tē nê hwỳr pōj nê omu nê kām:

—Pa? E jar na pa wa awỳr tē. Na Jejus kôt mẽ pahtōx Tapitre ham mẽ pahpê ty. Kwa tokyx kormā mẽ kot haxàr kêt ri ma wa ixkôt hwỳr tēn omu nà? Anē.

³⁹ Hāmri nhũm wa kuma nê ma wa hkôt htēm kurē kumrēx. Hāmri nê Jope hwỳr pōj nê mẽ hwỳr tē nhũm mẽ kỳx pê htyk nê nōr xwỳnhja wỳr ho api nhũm hwỳr axà. Nhũm kuri mẽ kēp mẽ mjên htyk xwỳnhjaja hkaprĩ nê mỳr o hkrĩ. Hāmri nhũm Simāw Pêtre mẽ hwỳr axà nhũm mẽ omu nê kām Tapitre kormā htĩr ri kot tanhmā mẽ ho mex to hā harē. Nê mẽ ê hkwy jamỳ nê kām kupē nê kām:

—Ga ja pumu. Tyk xwỳnhnta na pre mẽ inhmā hkay nê kugō. Na pre hte mẽ ixto mex o pa. Tā mẽ ixpê ty. Hēxta gàa nê. Na pa mẽ ixkaprĩ htỳx kumrēx. Anē.

⁴⁰ Hāmri nhũm mẽ kuma nê mẽ kator pa hāmri nê htyk xwỳnhnta ri hkōn krā ho nhỳ nê ho Tĩrtũm wỳ. Hāmri nê htyk xwỳnhnta mã kapēr nê kām:

—Pa Tapitre? E kwa kànhmā nhỳ. Anē.

Pu nhũm no amra nê Simāw Pêtre pumu nê kànhmā nhỳ. ⁴¹ Hāmri nhũm hpa hā kupy nê kànhmā ãm nê kapôt ã mẽ kuhê xwỳnhjê mã anē nhũm mẽ akupỳm wa hwỳr agjê nhũm mẽ kām:

—E ota. Na Tĩrtũm akupỳm mẽ amā ho htĩr. Anē.

Hāmri nhũm mẽ amnhĩ jaēr pē omu nê hkĩnh tỳx nê. ⁴² Hāmri nhũm Jope kamā mẽ piitā harēnh ma nê mẽ ohtō nê amnhĩ kaxyw Jejus kôt hamaxpēr nê hkôt amnhĩ xunhwỳ. ⁴³ Hāmri nhũm Simāw Pêtre Jope kamā ri pa hā apkati xohtō nê tokyx mẽ kurũm kato nê ma krī hō hwỳr mōr kêt nê. Na pre mry kà ho mēmoj nhĩpèx o pa xwỳnh pē Simāw ri pōj nê kuri pa hā apkati xohtō nê.

10

Konēre kot Simāw Pêtre hā karō hā harēnh Rukre 7.1-10

¹ Tā nhũm Ijaew kêt xwỳnh Konēre. Kêp Rōmjê nhō pōristi krāhtũm na pre. Ō pōristija pika pē Itar nhō xwỳnh na pre mẽ nhũm Konēre kēp mẽ hkrāhtũm. Krĩ pē Sejarej kamā. ² Konēreja kot amnhĩ to mex o pa xwỳnh na pre. Kêp Ijaew kêt tā na pre hte òrkwỳ kamā hkwyjê mẽ Tĩrtũm ã hpijaàm nê kām mex o mex ã harēnh o pa. Apkati mẽ kām amnhĩ jarē. Nê mẽ kēp amrakati xwỳnhjê mã kàxpore hkwy nhōr o pa. ³ Jakamā nhũm mēmo arĩgro hā ra myt japan grire nhũm mēmoj pumu. Te hpimtir kām kot omunh pyrà nê kaxkwa kamā Tĩrtũm kapēr o wrỳk xwỳnh pumu. Nhũm hwỳr wrỳ nê tanhmā kām kapēr to nê kām:

—Pa Konēre? Anē.

⁴ Nhũm tee ri omu nê kām ma htỳx kumrēx. Hāmri nê kām:

—Mo na? Anē.

Hāmri nhũm kām:

—Nà ate amnhĩ to Tĩrtũm wỳr o apaja nhũm ra amnhĩ tã ama nhũm ja kām mex nê. Nê ate mẽ kēp amrakati xwỳnhjê mã kàxpore hkwy nhōr o apaja nhũm ja mãânēn kām mex nê.

⁵ —Jakamā e inhma. Kêr ka ma Jope hwỳr amā mẽ àpēnh xwỳnh kwỳ rē kē mẽ ma hwỳr mra nê kamā mēhō pē Simāw Pêtre japrō nê man akupỳn awỳr o mō. ⁶ Simāw kot mry kà ho mēmoj nhĩpèx o pa xwỳnhnta nhōrkwỳ kamā na

hte pa. Ōrkwÿja gô mÿ ri na. E hwÿr mē arē kē mē ma hwÿr mō nē haprō nē man awÿr o mō kē amā mēmoj mex jarē ka ama. Anē.

⁷ Nhūm pre ā Tirtūm kapēr o wrÿk xwÿnhja Konēre mā kapēr anē hāmri nē kato nē ma akupÿm api. Hāmri nhūm kot mar xā hkôt jajē rē nē Simāw Pētre hwÿr mē kurē. Kām āpēnh xwÿnhjē ho hamēxkrut nē kaxyw ō pōristi hō. Pōristija na pre hte Konēre pyrā nē Tirtūm ā hpijaam o pa. ⁸ Jakamā nhūm mē kurē nē mē kām kapēr hāmri nē ma Jope hwÿr Simāw Pētre hwÿr mē kurē nhūm mē kato nē ma hwÿr mō. ⁹ Hāmri nhūm apkati nhūm kaxkwa nhÿpōki ri myt nhÿ nhūm mē hwÿr hpōx o mō.

Simāw Pētre tanhmā hpimtir to hā harēnh
Atre 11.5; Karatas 2.11-21

Rōm nhūm Simāw Pētre kot Tirtūm mā amnhÿ jarēnh kaxyw ixkre nhīmōk ā api nē himōk po hā kām amnhÿ jarēnh o nhÿ. ¹⁰ Hāmri nē ra kām prām nē nom nhūm mē kormā kām ō hā āpēnh jakamā nhūm arÿ ixkre nhīmōk ā Tirtūm mā amnhÿ jarē.

Hāmri nē Konēre pyrā nē te hpimtir kām kot mēmoj pumunh pyrā nē mēmoj pumu nhūm Tirtūm Konēre hkukamā tanhmā kām mēmoj to amnhÿrit to. No ām hā kuxi nē kām harēnh jakamā nhūm Simāw Pētre te hpimtir kām kot mēmoj pumunh pyrā nē mēmoj pumu. ¹¹ Nhūm kaxkwa katēr nhūm kurūm mēmoj te kot mē hpiro xā pyrāk xwÿnhja pyka hwÿr wrÿk o mō. Nē hatur xā piitā xapēn tā akuprō nē ajēt nē wrÿk o mō nhūm omu. ¹² Mē hpiro xāta kamā mēmo mry piitā hikwÿ. Mēmo mry hpar o ri pa xwÿnhjaja nē htu mÿr pē ri pa xwÿnhjaja nē mēmo āk kÿx pē htor o ri mrrar xwÿnh piitā mē hpiro xāja kamā hikwÿ nhūm omu. ¹³ Hāmri nhūm Tirtūm kām:

—Pa Simāw Pētre? Mān ka ra amā prām nē nā? E kānhmā xa nē axāmnhÿx māmrÿ mryta ō kapi nē apÿ nē ho anē nē aku. Piitā mē ate hkur mā mex. Anē.

¹⁴ Hāmri nhūm tee ri kuma nē kām:

—Kwa nā Pahi Maati. Mē ixpē Ijaew mē ixte mry piitā hkur kēt. Ām hkwȳ pix na pa htem kuku. No mry jaja aa mē ixte hō hkwȳ hkrēr kēt. Anē.

¹⁵ Hāmri nhūm Tirtūm kām:

—Nā kot anhÿr tā kot paj pam amā mēmoj jarē ka kamā anhōkre kahak kēt nē. Māmrÿ amnhÿm hō kapi nē apÿ nē ho anē nē axāmnhÿx hkwȳ hkre. Anē.

¹⁶ Nhūm pre ā kām mry hā karō anhÿr o axkrunēpxi. Simāw Pētre kot māmrÿ Ijaew kēt xwÿnhjē hkôt pa nē āmnhÿx ri mē kutā apkur nhūm Tirtūm kām ja mex nhūm kot hā amnhÿ pumunh kaxyw nhūm ā kām harēnh anhÿr o axkrunēpxi. Hāmri nhūm mē hpiro xāja ma akupÿm kaxkwa hwÿr āpir o mō nē akunok. ¹⁷ Hāmri nhūm Pētre te hkrākator pyrāk jao tee ri hpimtir kukamā hamaxpēr o nhÿ nē hamaxpēr o:

—Kwa mo kaxyw na Tirtūm ā inhmā ja hā karō anē? Anē.

Rōm nhūm Konēre kot hwÿr mē rēnh xwÿnhjaja ra hwÿr hpōx o mō. Ijaew kēt xwÿnhjtaja Simāw nhōrkwÿ hā mē hkukjēr o mō nē hwÿr pōj nē hakwakrem kuhē. ¹⁸ Hāmri nē ōrkwÿ nhō xwÿnhjē mā kām:

—Pa na ka mē arÿ akrÿ? E Simāw Pētre hwÿr na pa mē mō. Xā jar na hte pa nā? Anē.

Hāmri nhūm mē kām: —Tÿ. Omūj kÿx pē ixkre nhīmōk ā na nhÿ. Anē.

¹⁹ Nhūm Simāw Pētre arÿ kot mēmoj pumunhta kukamā hamaxpēr o nhÿ nhūm Tirtūm Karō kām mē hpōx xwÿnhjē jarē nē kām:

—E Simāw Pētre. Ota Ijaew kēt xwÿnhjaja axkrunēpxi nē ajapēr o mō nē ra anhōrkwÿ hwÿr pōj. ²⁰ Mē hwÿr wrÿ nē mē kot amā mēmoj jarēnh ma nē

māmri axàmnhîx ma mẽ hkôt mō. Tanhmã ajamaxpêr to hkêt nê. Pa na pa awÿr mẽ kumẽ nhũm mẽ mō. Anê.

²¹ Hāmri nhũm kuma nê mẽ hwÿr wrÿ nê mẽ omu nê mẽ kãm:

—Pa? Xà pa na ka mẽ ijapêr o mō? E ot pa xa. Kam nê mẽ inhmã mẽmoj jarê pa mẽ ama. Mẽmo kaxyw na ka mẽ ixwÿr mō? Anê.

²² Hāmri nhũm mẽ kãm:

—Nà mẽ inhō patrãw Konêre na awÿr mẽ inhmẽ pa mẽ mō. Na hte tãm amnhî nhîpêx o pa. Nê Tirtũm ã hpijaam nê kãm mex o mex ã harênh o pa. Nhũm mẽ inhō krî kamã Ijaew kãm hkînh nê. Tã na Tirtũm kapêr o wrÿk xwÿnhja ham hwÿr wrÿ nê kãm ajarê. Kot amnhî wÿr atã karō nhũm ate hwÿr amôr nê kãm axujarênh kaxyw kãm ajarênh jakamã nhũm mẽ ixte ajaprôr kaxyw awÿr mẽ inhmẽ pa mẽ man awÿr mō. Anê.

²³ Hāmri nhũm mẽ kuma nê mẽ kãm:

—Tõe nà na pa mẽ ama. E mẽ agjê nê akrî nê jar mẽ ixri nō kê apkati pu mẽ ri ma akupÿm mō. Anê.

Hāmri nhũm mẽ kuma nê mẽ hwÿr agjê.

Tã nhũm apkati nhũm mẽ akupÿm nojarêt nhũm Simãw Pêtre ma mẽ hkôt mō. Nhũm Jope kamã mẽ kot Jejus kôt amnhî xunhwÿr xwÿnh kwÿjaja ma mẽ hkôt mō. Nhũm mẽ mōr o kamãt.

²⁴ Hāmri nhũm apkati nhũm mẽ Sejurej wÿr hpôx o mō. Nhũm ra Konêre mẽ kutêp amnhî wÿr hkwÿjê ho akuprô nhũm mẽ Simãw Pêtre kutêp ôrkwÿ kamã akuprô nê hkrî. ²⁵ Hāmri nhũm mẽ hwÿr pôj nê mẽ hwÿr ãr kaxyw nhũm Konêre amnhî wÿr omu nê kãnhmã xa nê kutã tẽ nê hpar pẽ hkônkrã ho tẽm nê nhÿ. ²⁶ Hāmri nhũm tee ri ja hã omu nê pa hã kupy nê kãnhmã ãm nê kãm:

—Kwa kãnhmã xa. Ixpê Tirtũm kêt tã ka ri ã inhîpêx anê. Anê.

²⁷ Hāmri nê hkôt ôrkwÿ hwÿr axà nê kutêp mẽ pikuprônã xwÿnhjê pumu nê mẽ kãm:

²⁸ —Pa na ka mẽ arî akrî? E mãn ra mẽ ate mẽ ixpê Ijaew kot amnhî nhîpêx ã mẽ ixpumunh mex. Na pa htem mẽ apê axtem nhô xwÿnhjê hkôt ri ixpa hkêt nê. Nê mẽ anhôrkwÿ hwÿr inhgjêx kêt nê. Tã ham Tirtũm inhmã mẽ ixte ã amnhî nhîpêx anhÿr o ixpaja nê ixkurê nê inhmã: “Kot paj pam mẽ hkwÿjaja mex ã mẽ harê ka mẽ kamã anhôkre kahak kêt nê.”

²⁹ —Anhÿr jakamã ka xep pre ixtã karô pa inhîtôt kêt nê man mẽ awÿr inhmôr kurê kumrêx. E mẽ inhmã mẽmoj jarê pa mẽ ama. Mẽmo kaxyw na ka mẽ ixtã karô? Anê.

³⁰ Hāmri nhũm Konêre kãm:

—Nà jãã na pa pre jar inhôrkwÿ kamã Tirtũm mã amnhî jarênh o nhÿ. Ra myt xãpanh grire pa kãm amnhî jarê. Hāmri nhũm Tirtũm kapêr o wrÿk xwÿnh ixwÿr wrÿ nê hirã rax kãm xa. ³¹ Hāmri nê inhmã: “Pa Konêre? E na hte Tirtũm ate kãm amnhî jarênhma mar o hkrî. Nê ate mẽ kêp amrakati xwÿnhjê ho mex o apaja nhũm hã apumu.

³² Jakamã e ma Jope hwÿr amã mẽ àpênh xwÿnh kwÿ rê kê mẽ ma hwÿr mō nê kamã Simãw Pêtre japrô nê man akupÿn awÿr o mō. Mry kã ho mẽmoj nhîpêx o pa xwÿnh Simãw nhôrkwÿ kamã na hte pa. Ôrkwÿja gô mÿ ri na.” Anê.

³³ —Ã kot inhmã kapêr anhÿr jakamã na pa kuma hāmri nê awÿr jajê rênh kurê kumrêx. Tã ka mẽ hkôt man mẽ ixwÿr mō nê ã apôx anê. ãm hāmri na ka mẽ hkôt mō. Mẽ apê Ijaew kot amnhî nhîpêx kuhpa hã amnhî nhîpêx nê axàmnhîx man mẽ ixwÿr mō. Tã ot pa mẽ Tirtũm noo mã ixkrî. Kam nê māmri ÿ hã mẽ inhmã mẽmoj jarê pa mẽ ama. Anê.

Simāw Pêtre kot Konëre mā ujarënh

³⁴ Hāmri nhūm Simāw Pêtre Konëre kot kām amnhī jarënhja ma nê mē kām awjarë nê mē kām:

—Nā ām hāmri na Tirtūm mē akukamā tanhmā inhmā kapër to. Xep kām mē ixpê Ijaew pix japê hkêt. Kām mē pahpiitā mē pajapê nê mē panhîpêx o axpên pyrāk. ³⁵ Koja ahpÿnhā pyka piitā hkôt mēhō mē ixpyrà nê kêp Ijaew kêt tãā hkôt amnhī xām nê hā hpijaam pê kām mex o mex ā harê nê tām amnhī nhîpêx. Hāmri nhūm Tirtūm ja hā omu nhūm ja kām mex nê.

³⁶ —Na pre ra mē ixpê Ijaew mā tanhmā Kra Jejus Kris jarënh to. Jejus kot mē panê htyk kukwak ri na hte mē ixte hkôt amnhī xunhwÿr xwÿnhjê ho hkra. Tā ra määnën ā mē apê Ijaew kêt xwÿnhjê mā ā amnhī jarënh anê nê Jejus htyk kukwak ri mē ate mē ixpyrà nê hkôt amnhī xunhwÿr xwÿnhjê ho hkra. Jakamā Jejus Krisja kêp mē pahpiitā mē panhō Pahilti.

³⁷⁻³⁸ —Mān ka prem ra harënh ma. Mē ixpê Ijaew nhō pika pê Jutej kumrêx kām na pre Juāw Paxisja Jejus kukamā mē kām harê nê mē hkrā kumrār o pa. Mē piitā mē kot amnhī tomnuj kaga nê Tirtūm kôt amnhī xunhwÿr ā mē omunh xā hkôt mē hkrā kumrā. Jejusja krī pê Najare kamā na pre hprêk. Tā hwÿr na pre Tirtūm amnhī Karō mē nhūm wrÿ nê hkarō mā axā nê hkôt pa ho pa. Jakamā nhūm àhpumunh o àhpumunh nê ma krī piitā hkôt tanhmā mē ho mex to ho ri mē hkôt pa. Pika pê Garirej kumrêx kamā mē piitā ri mē kām Tirtūm kapër jarënh o pa. Nê mēkarōmnuti kot Satanasti nhÿ hā tanhmā mē ho xwÿnhjaja nhūm mē nê mēkarōmnuti japōx o pa. Ā na pre Tirtūm nhÿ hā amnhī nhîpêx anhÿr o pa.

³⁹ —Tā Jejus nhÿ hā hkrajê jahkre ho mē ixpa xwÿnhjaja na pa prem kot ri tanhmā amnhī to ho pa hā omunh par o ri hkôt ixpa. Mē ixpê Ijaew nhō pyka kamā nê mē inhō krī pê Jerujarê kamā kot ri tanhmā amnhī nhîpêx to ho paja pa prem piitā omunh o hkôt ri ixpa. Tā nhūm prem axtem nê mē ixpê pī kahpa hā kunhō nê kupī. ⁴⁰ Hāmri nhūm htyk o apkati axkrunêpxi nhūm Tirtūm akupÿm ho htîr nê akupÿm mē ixwÿr kumê pa prem akupÿm htîr kām omu. ⁴¹ No nhūm mē piitā akupÿm htîr kām omunh kêt nê. Ām mē ixwÿr pix na pre kato nê mē ixkutā apku pa mē papxipixjaja akupÿm htîr ā omu. Hāmri nhūm Tirtūm mē ixte ma mē piitā mē kām akupÿm htîr ā harënh o ri ixpa kaxyw mē ixrê. ⁴²⁻⁴³ Amnepê m Tirtūm nhÿ hā kapër jarënh o mē pa xwÿnhjaja na prem Jejus kukamā tanhmā hā kagā hto nê mē kām harënh o pa. Nê mē kām:

Koja nhÿrmā mēhōja man mē pahwÿr wrÿ nê mē panê tanhmā amnhī nhîpêx to. Ka mē atō amnhī kaxyw hkôt ajamaxpêr nê hkôt amnhī xām hā koja Tirtūm ja hā apumu nê mēhō kot tanhmā mē panê amnhī nhîpêx to xwÿnhhta kukwak ri amnhī katut kôt ate amnhī tomnuj rënh pa nê axte kām hamaxpêr kêt nê. Anê.

Na pre Tirtūm nhÿ hā kapër jarënh o mē pa xwÿnhjaja Jejus kukamā ā harënh nê hā kagā anê. Tā koja Jejus nhÿrmā akupÿn wrÿ hāmri nê mē htyk xwÿnhjê nê arī mē htîr xwÿnhjê mē pahto pimrãatā tanhmā mē pajarënh to. Mē pahte tanhmā amnhī nhîpêx to ho papa hā mē pahpumunh kôt tanhmā mē pajarënh to. Hāmri nê Tirtūm mē wa kuri mē pahÿr tūm nê mē papa ho papa mā xwÿnhjê jarê nê määnën wa kuri mē htîr tūm kêt xwÿnhjê jarê. Mē pahpiitā tanhmā mē pajarënh to kaxyw na pre Tirtūm mē pakaxyw Jejus xām. Tā ā kot mē pajarënh anhÿrja kukamā na pre mē ixte mē amā tanhmā harënh

to ho ixpa kaxyw mẽ awỳr mẽ ixrẽ. Mẽ ate kapẽr mar nẽ tokyx Jejus kõt amnhĩ xunhwỳr kaxyw. Anẽ.

⁴⁴Nhũm Simāw Pêtre ã mẽ kãm ujarẽnh anhỹr rôm nhũm Tĩrtũm mẽ kot mar o hkrĩ xwỳnhjẽ hwỳr amnhĩ Karõ rẽ nhũm mẽ hwỳr wrỳ nẽ mẽ hkarõ mã gjẽx pa. ⁴⁵⁻⁴⁶Hãmri nhũm mẽ Tĩrtũm mã mex o mex ã harẽnh o hkrĩ. No ãm mẽ kapẽr kãm harẽnh kêt nẽ. Mẽ kapẽr kwỳ hõ ho kãm mex o mex ã harẽ. Aa mẽ kot mẽ kapẽr mar kêt tâ ra ho kapẽr mex nẽ. Jakamã nhũm Jope rũm mẽ kot Simāw Pêtre hkõt mẽ mõi xwỳnhjaja. Ijaew kwỳ kot ra Jejus kõt amnhĩ xunhwỳr xwỳnhjaja amnhĩ jaẽr pẽ ja hã mẽ omu nẽ axpẽn mã:

—Hẽxta waa nẽ. Mẽ kệp Ijaew kêt tâ nhũm Tĩrtũm kot mẽ panhĩpẽx pahpyrà nẽ mẽ hwỳr amnhĩ Karõ rẽ nhũm mẽ hwỳr wrỳ nẽ mẽ kãm agjẽ. Nà ãm hãmri na mẽ pahpyrà nẽ ã mẽ hipẽx anẽ. Anẽ.

Hãmri nhũm Simāw Pêtre mẽ kuma nẽ mẽ kãm:

⁴⁷—Kwa pu mẽ hkrã kumrãr kurẽ kumrẽx. Ra Tĩrtũm Karõ kot mẽ pahpyrà nẽ mẽ hkarõ mã gjẽx kênã kot kêt mẽhõ mẽ nẽ tanhmã mẽ pahpẽ ãmnàr to. Ra mẽ kot mẽ pahpyrà nẽ Jejus kõt amnhĩ xunhwỳr kênã. Anẽ.

⁴⁸Hãmri nẽ Konẽre mẽ hkwỳjẽ mã kãm:

—E kot paj mẽ ate Jejus Kris kõt amnhĩ xunhwỳr ã mẽ akrã kumrã. Anẽ.

Hãmri nẽ mẽ hkrã kumrãr pa nhũm mẽ Simāw Pêtre mã kãm:

—Kwa kormã anojarêt kêt nẽ. Kritpêm ri mẽ ixkõt ri apa hã atã apkati grẽre nẽ kormã ma akupỳm mõi. Anẽ.

Hãmri nhũm mẽ kuma nẽ mẽ hkõt ri pa hã apkati grẽre hãmri nẽ nojarêt nẽ ma akupỳm mõi.

11

Simāw Pêtre kot hkwỳjẽ mã Konẽre jarẽnh

Atre 10.1-48

¹⁻²Hãmri nhũm Simāw Pêtre ma akupỳm mõi. Jutej kamã krĩ pẽ Jerujarẽ wỳr ma akupỳm mõi hãmri nẽ põi. Hãmri nhũm Jutej kamã Jejus nhỹ hã mẽ ahkre xwỳnh maatijẽ mẽ mẽ kot Jejus kõt amnhĩ xunhwỳr xwỳnhjaja Ijaew kêt xwỳnhjẽ jarẽnh ma. Konẽre mẽ hkwỳ kot mẽ urak nẽ Jejus kõt amnhĩ xunhwỳr ã mẽ harẽnh ma. Jakamã nhũm Simāw Pêtre akupỳm mẽ hwỳr põi nhũm mẽ omu nẽ mẽ hã àhkukjẽr kurẽ kumrẽx. Hãmri nhũm mẽ hkwỳjaja mẽ hã kãm akir nẽ kãm:

³—Kwa mẽ pahpẽ Ijaew pyrà nẽ mẽ kot amnhĩ my kwrýt kà jakàr kêt tâ ka mẽmo hwỳr mẽ hwỳr mõi mẽ kuri põi nẽ mẽ kutã apku. Anẽ.

⁴Hãmri nhũm Pêtre tee ri mẽ kuma hãmri nẽ hprĩ hã mẽ kãm amnhĩ jarẽ. Nẽ tanhmã Tĩrtũm kot kãm Ijaew kêt xwỳnhjẽ jarẽnh to hã mẽ kãm harẽ nẽ mẽ kãm:

⁵—Kwa mẽ ã ri ajamaxpẽr anhỹr kêt nẽ. E pa mẽ amã amnhĩ jarẽ ka mẽ inhma mãn. Nà na pa pre jãã Jope kamã Tĩrtũm mã amnhĩ jarẽnh o nhỹ nẽ te ixpimtir kãm mẽmoj pumunh pyràk. Nhũm mẽmojja te mẽ hpiro xà pyrà nẽ kaxkwa rũm ixwỳr wrỳk o mõi pa ixprĩ hã omu. ⁶Nhũm kamã mry piitãã. Mry xoprẽ nẽ mry xuwapõ nẽ mry hpar o ri pa xwỳnhjaja nẽ mry htu mỳr pẽ ri pa xwỳnhjaja nẽ àk. Nẽ mẽ pahte hkur xwỳnhjaja nẽ mẽ pahte hkur kêt xwỳnhjaja. ⁷Kamã mry piitã pa omu. Hãmri nhũm Tĩrtũm inhmã: “Pa Simāw Pêtre? Mãn ka ra amã prãm nẽ nà? E kànhmã xa nẽ axamnhĩx mãmrĩ mryta õ kapi nẽ apĩ nẽ ho anẽ nẽ aku. Piitã mẽ ate hkur mã mex.” Anẽ.

8 —Pa tee ri kuma nē kām: “Kwa Pahi Maati. Mē ixpê Ijaewjaja mē ixte mryja piitā hkur kêt. Ām hkwȳ hpix na pa htem kuku. No ja hkwȳ aa mē ixte hō hkwȳ hkrēr kêt.” Anē. 9 Nhūm inhmā: “Nā nom kot anhÿr tãã. Kot paj pam amā mēmoj jarē ka kamā anhōkre kahak kêt nē. Jakamā e māmri amnhūm hō kapi nē apī nē ho anē nē axāmnhīx hkwȳ hkrēr.” Anē.

10 —Na pre ā Ijaew kêt xwÿnhjê hwÿr inhmōr kukamā inhmā karō ho axkrunēpxi anē. Nom hā kuxi nē inhmā mē pahte mry kur kēeta jarē. Hāmri nhūm mē hpiro xāja ma akupÿm kaxkwa hwÿr api nē kakrām axā nē akunok. 11 Hāmri nhūm Ijaew kêt xwÿnhjaja mē ixwÿr axkrunēpxi nē mra nē pōj. Konēreja Sejarej rūm ixwÿr mē rēnh xwÿnhjaja nhūm mē mra nē ixwÿr pōj. 12 Hāmri nhūm Tirtūm Karō ma mē hkôt inhmē. Mē kēp Ijaew kêt tā nhūm ixāmnhīx ma mē hkôt ixpa kaxyw mē hkôt inhmē pa ma mē hkôt mō. Nhūm Jope kamā mē kot Jejus kôt amnhī xunhwÿr xwÿnh kwÿjaja kēp 6ja ma mē ixkôt mō. Pa mē mō nē Sejarej kamā Konēreja wÿr pōj. 13 Hāmri nhūm mē ixpumu nē mē inhmā amnhī jarē. Tirtūm kapēr o wrÿk xwÿnh kot hwÿr wrÿk nē ōrkwȳ hwÿr ār nē tanhmā kām kapēr toja nhūm inhmā harē. Na xep pre kām: “E kēr ka ma Jope hwÿr amā mē āpēnh xwÿnh kwÿjê rē kē mē ma hwÿr mō. Hāmri nē kamā Simāw Pētre japrō nē man akupÿn awÿr o mō kē tanhmā mē amā ujarēnh to. 14 Kōja mē amā tanhmā mē apē Tirtūm kra hprām xāj tanhmā mē ate amnhī nhīpēx to hā mē amā karō ka mē ama nē mar tÿx nē hkôt amnhī nhīpēx. Ka mē anhōrkwȳ kamā akwÿjê mē apimrãatā ama nē mar tÿx nē. Hāmri nē kot mē amā hā karō xā hkôt amnhī nhīpēx nhūm Jejus mē ate amnhī tomnuj pē mē apytār pa.” Anē.

—Na xep pre ā Tirtūm kapēr o wrÿk xwÿnhja kām ijarēnh anē. Jakamā nhūm ixwÿr jajē rē pa ma mē hkôt mō. 15 Hāmri nē kormā mē kām tanhmā Jejus jarēnh to. Tanhmā kot mē panē amnhī nhīpēx to hā harē. Nē kormā mē kām ixujarēnh o ixām rōm nhūm Tirtūm Karō te wam kot mē panhīpēxta pyrā nē mē hwÿr wrÿ nē mē hkarō mā gjēx pa. 16 Pa ja hā mē omu nē Pahihti Jejus kot akupÿm kaxkwa hwÿr nojarēt nē tanhmā mē pamā kapēr tota mā ijamaxpēr kurē kumrēx. Na pre mē pamā: “Finat Juāw Paxis na pre hte gō ho mē hkrā kumrār o pa. Tā kōja Tirtūm ta hpānhā mē awÿr amnhī Karō rē nhūm mē akarō mā agjê.” Anē.

—Ā na pre Pahihti Jejus akupÿm nojarēt nē mē pamā kapēr anē. Jakamā pa ā kot mē hipēx anhÿr ā mē omu nē ā kapēr anhÿrja mā ijamaxpēr kurē kumrēx. 17 Na pu prem Pahihti Jejus Kris kôt amnhī xunhwÿr nhūm Tirtūm ja hā mē pahpumu nē mē pahwÿr amnhī Karō rē. Tā te kot mē panhīpēxta pyrā nē māānēn Ijaew kêt xwÿnhajtjê hwÿr kurē nhūm mē hkarō mā agjê. Mē kēp Ijaew kêt tā nhūm mē pahpyrā nē mē hwÿr kurē nhūm mē hkarō mā agjê. Tirtūm tām kot amnhī krā hkôt mē hwÿr rēnh kēnā kot pa kêt mē nē tanhmā kēp ixāmnār to. Anē.

18 Nhūm pre ā Simāw Pētre mē kām amnhī jarēnh anē nhūm mē kuma nē tām hamaxpēr nē hkīnh nē. Nē axte mē hā tanhmā kām nē hkēt nē. Ām mē hā Tirtūm mā mex o mex ā harē. Hāmri nē axpēn mā:

—Nā ām hāmri. Mē kēp Ijaew kêt tā na prem Jejus kôt amnhī xunhwÿr nhūm Tirtūm kot mē panhīpēxta pyrā nē amnhī katut kôt mē kot amnhī tomnuj rēnh pa. Nhÿrmā wa hkuri mē pahpyrā nē htīr tūm nē pa ho pa kaxyw nhūm ā mē hipēx anē. Nā ām hāmri na ā kot mē panhīpēx pyrā nē mē hipēx anē. Anē.

ãxiok kamã Jejus kwỳ jarënh
Atre 4.36-37

19 Tã ra mẽ kot kën o Estewãw kapër o hpĩr xwỳj ri mẽ kot ã hipêx anhÿrta pyrã nẽ mẽ kot Jejus kôt amnhĩ xunhwỳr xwỳnhjaja omnuj tỳx o pa. Jakamã nhũm mẽ hkwỳjaja mẽ umaj ma ahpỳnhã krĩ hkwỳ hkôt pigrãnh pa. Wẽnĩs wỳr nẽ Sipre hwỳr nẽ ãxiok hwỳr nhũm mẽ ma ahpỳnhã krĩ hkwỳ hkôt anhrã nẽ kamã pa ho pa. Nẽ mẽ kãm tanhmã Pahihti Jejus kot mẽ panê amnhĩ nhĩpêx to hã harënh o ri mẽ hkôt pa. No ãm kormã Ijaew pix mã harënh o pa.

20 Tã hãmri nhũm mẽ hkwỳjaja Sipre mẽ Sirën rũm ãxiok hwỳr pan pøj. Hãmri nẽ kamã mẽ kęp Ijaew kêt xwỳnhjê mã Pahihti Jejus kot amnhĩ nhĩpêx jarënh o pa. ã mẽ kot amnhĩ nhĩpêx anhÿr jakamã na mẽ ra ahpỳnhã ri mẽ kãm harënh o ri pa. Ijaew mã nẽ mãânën Ijaew kêt xwỳnhjê mã ²¹ nhũm mẽ ma mẽ hkôt ri Pahihti Jejus nhỹ hã mẽ kãm kapër jarënh o ri mẽ hkôt pa. Hãmri nhũm mẽ ohtô nẽ amnhĩ nhĩpêx tũm kaga hpa nẽ hpãnhã amnhĩ kaxyw Jejus kôt hamaxpër nẽ hkôt amnhĩ xunhwỳ.

22 Hãmri nhũm Jerujarë kamã Jejus kwỳjaja mẽ harënh ma nẽ mẽ hwỳr Panãpe mẽ. ãxiok hwỳr mẽ hwỳr kumê. Ma mẽ hwỳr mõi nẽ Jejus kôt mẽ hamaxpër o hihtỳx kaxyw. ²³ Hãmri nhũm ma mẽ hwỳr mõi nẽ mẽ hwỳr pøj nẽ mẽ omu. Tĩrtũm kot mẽ ho mex ã mẽ omu hãmri nẽ mẽ ý hã hkĩnh nẽ. Nẽ mẽ kãm:

—Nã ãm hãmri na ka mẽ ra Jejus kôt amnhĩ xunhwỳ nẽ hkôt amnhĩ nhĩpêx mex o ri apa. Tã kër ka mẽ ãm kapër kôt pix mã ri amnhĩ nhĩpêx rãhã ho ri apa nẽ aa hkaga hkêt nẽ. Anê.

24 Panãpeja na pre tãm amnhĩ nhĩpêx o pa. Nẽ amnhĩ kaxyw Jejus kôt pix mã hamaxpër mex o pa. Nẽ Tĩrtũm Karõ hkôt amnhĩ nhĩpêx rãhã jakamã na pre hte ý hã mẽ kãm Pahihti Jejus kot mẽ panê tanhmã amnhĩ nhĩpêx to hã harënh o ri mẽ hkôt pa. Hãmri nhũm mẽ kuma nẽ ohtô nẽ Jejus kôt amnhĩ xunhwỳ.

25 Tã nhũm Panãpe ãxiok rũm kato nẽ kot Sawti japrõr kaxyw ma krĩ pẽ Tas hwỳr mõi. ²⁶ Hãmri nẽ hwỳr pøj nẽ Sawti pumu nẽ haprõ nẽ ma akupỳm amnhĩ kôt ãxiok hwỳr o mõi. Hãmri nẽ kamã mẽ kot Jejus kôt amnhĩ xunhwỳr xwỳnhjê hkôt wa ri pa hã amgrã pyxi nẽ hapêx. Nẽ mẽ ho ohtô nẽ ri mẽ kãm Jejus kapër o mẽ ahkre ho ri mẽ hkôt pa. Jakamã nhũm krĩ nhõ xwỳnhjaja mẽ kot Jejus kôt amnhĩ nhĩpêx xwỳnhjê pumu nẽ mẽ hã mẽ hixi rẽ nẽ mẽ harënh o: “Kris tõi nẽ htõxjaja” anhÿr o mẽ harê. ãxiok kumrêx kãm na prem ã mẽ kot Jejus kôt amnhĩ xunhwỳr xwỳnhjê jarënh anê. Jakamã nhũm mẽ piitã ã mẽ harënh anhÿr o pa.

27 Tã nhũm Panãpe mẽ Sawti wa kormã ãxiok kamã paja rôm nhũm Tĩrtũm nhỹ hã kapër jarënh xwỳnh kwỳjaja mẽ hwỳr mran pøj. Jerujarë rũm mẽ hwỳr mran pøj. ²⁸ Hãmri nhũm mẽ piitã mẽ kot mẽ kapër mar kaxyw mẽ hwỳr akuprõ. Jakamã nhũm hõ pẽ Akapõja kãnhmã xa nẽ tanhmã mẽ kãm ujarënh to. Tĩrtũm Karõ nhỹ hã mẽmoj kukamã mẽ kãm awjarê nẽ mẽ kãm:

—Kwa okora kër ka mẽ axkãm ajamak rom. Kojã tokyx pika piitã hkôt mẽ apkur xã hã mẽõja mẽ kęp hkryre nẽ mẽ piitã mẽ hipêx kêt nẽ. Anê.

Tã nhũm gaa nẽ ujarënh xàja kôt mẽmoj ã amnhĩ nhĩpêx anê. Kormã Pahihti Krawti kot mẽ ho amnhĩptar ri nhũm mẽmoj ã amnhĩ nhĩpêx anê. No nhũm kormã ã amnhĩ nhĩpêx anhÿr kêt ri nhũm Akapõja kukamã ã mẽ kãm ujarënh

anê. ²⁹ Hāmri nhūm mẽ kuma nê tee ri Jutej kamã Jejus kôt mẽ hkwyjê hkukamã hamaxpêr nê axpên mã:

—E kwa pu mẽ Jutej kamã Jejus kôt mẽ pahtõ nê pahtõxjê mã pahkàxpore hkwy gõ kē mẽ ho amnhīm awjaprõ nê hkur o pa. Anê.

Hāmri nê mẽ kaxyw kàxpore hkwy ho akuprõ. Nhūm mẽ hikàxpore hkryre xwýnhja ãm mẽ kãm ho hkryre nê kugõ nhūm mẽ hikàxpore rũnh xwýnhja mẽ kãm ho rũnh nê kugõ. ³⁰ Jakamã nhūm mẽ ho hpikuprõnh pa nê Panãpe mẽ Sawti wa kot mẽ hwýr o mõi nê mẽ kãm õr kaxyw wa kãm kugõ. Hāmri nhūm wa hamý nê ma Jutej kamã Jerujarê hwýr mẽ hwýr o mõi. Hāmri nê hwýr põi nê mẽ kot Jejus kapêr o mẽ ahkre xwýnhjê mã kugõ. Hāmri nhūm mẽ kãm Jejus kôt mẽ htõ nê htõxjê mã o anghrà nhūm mẽ hamý nê hkĩnh nê ho amnhīm awjaprõ.

12

Mẽ kot Simãw Pêtre pynênh nê haxàr ã mẽ harênh

Matêwre 18.19-20

¹ Tã nhūm mẽ õ pahi Eroxa õ pōristi mã Kris kwýjê hã amýnê nhūm mẽ mẽ hipêx kati nê nhūm mẽ amnhĩ xà htýx kamã hamak o pa. ² Juãw tõi Xiakreja nhūm mẽ pahi Erox nhý hã unê nê hkanhwýr o kupĩ. ³ Hāmri nhūm Ijaew kãm ja mex jakamã nhūm pahi Erox hpãnhã mẽ kãm Simãw Pêtre hã amýnê nhūm unê nê haxà. Mẽ kot pãwti kaxkrit kêt kur ã mẽ hkĩnh xà hã arĩgro pê Pasja ã nhūm prem unê. ⁴ Na pre Erox Simãw Pêtre hkukamã hamaxpêr o:

—Nà koja mẽ hkĩnh hapêx pa Ijaew nom kupĩ nhūm rĩ amnhĩ pumu. Anê.

Hāmri nhūm pōristi kot Simãw Pêtre jamãr xwýnhja kêp 16. Nhūm mẽ axpên pãnhã kêp 4 kapên nê hamãr rãhã ho kuhê. ⁵ Nhūm arĩ mẽ hagjênh xà kamã hkrĩ ho hkrĩ. Hāmri nhūm Kris kôt htõ nê htõxjaja harênh ma nê tee ri hkukamã hamaxpêr hāmri nê axpên wýr akuprõ nê ho Tirtũm wýr rãhã ho hkrĩ.

Tirtũm kapêr o wrýk xwýnh kot Simãw Pêtre kator ã harênh

⁶ Tã nhūm ra mẽ hkĩnh hapêx nhūm kamãt. Hāmri nhūm pahi Erox kot tanhmã Simãw Pêtre ho xà hã arĩgroja wýr nhūm kamãt nhūm pōristijaja arĩ mẽ hagjênh xà kamã hamãr mex o kuhê. Nhūm kuri wa hamêxkrut nê akutã hijê nê hamãr o nõ. Kàx o akutã kãm ê nê wa ho nõ nhūm wa hkaêx kãm htýx gõi nê nõ. Nhūm ja wa hakwa krem mãânênh hamãr o xa. ⁷ Puh nhūm Tirtũm kapêr o wrýk xwýnhjê hõja mẽ hwýr axà nê wrýhtak rax kãm xa. Hāmri nê Simãw Pêtre grêk nê kumra nê kãm:

—Pa Simãw Pêtre? E kwa tokyj kãnhmã xa pu mõi. Anê.

Hāmri nhūm hkrãkato nê omu nê kãnhmã ãm kurê kumrêx nhūm kaxprexã hã kãxja axrê nê pykap rõiok nê hikwý. No nhūm kuri pōristi wa nõr xwýnhhta wa mar kêt nê. Wa arĩ õt týx nê nõ. ⁸ Hāmri nhūm Tirtũm kapêr o wrýk xwýnhja Simãw Pêtre mã:

—E tokyx anhõ kamĩs jaxà nê amnê ixkõt tẽ pu pakato nê ma tẽ. Anê.

⁹ Hāmri nhūm kamĩs nê hparkã jaxà nê ma hkõt tẽ. No ãm kormã amnhĩ pumunh mex kêt nê. Te hpimtir kãm ã kot amnhĩ nhĩpêx anhýr pyrãk ã amnhĩ kamnhĩx. ¹⁰ Hāmri nhūm wa hakwakrem pōristi wa kot hamãr o wa ãm xwýnhja hãnh wa tẽ nê wa hakre nê hpãnhã ihõja wa hãnh wa tẽ no nhūm mẽ õt týx nê hkrĩ nê wa omunh kêt nê. Nhūm wa hakwakre nhĩtep xà hkõt wa tẽn kato nê hpãnhã krĩ nê kahê xà hã hakwakreja wýr wa tẽ. Hāmri nhūm tãm wa kãm amnhĩ kahê xà mẽ nhūm wa kato nê pry hã tẽ. Ja kôt nhūm Tirtũm

kapēr o wrÿk xwÿnhja akunok nhÿm Simāw Pêtre axte omunh kêt nê. ¹¹ Hāmri nê hprī hā amnhī pumunh kuré kumrêx nê hamaxpēr o:

—Kwa te ixpimtir kām ā ixte amnhī nhîpêx anhyr pyrāk tā xep ixpimtir kêt. Tirtÿm na ixwÿr kapēr o wrÿk xwÿnhja mē nhÿm ixwÿr wrÿ nê mē kēp ixkator. Pahi Erox ra kot ixpīr nhÿm ixkwÿ Ijaew kām ja prām tā nhÿm mē kēp ixkator. Nā ām hāmri na Tirtÿm ā mē kēp ixkator anê. Anê.

¹² Hāmri nê Marir nhōrkwÿ hwÿr htēm kuré kumrêx. Juāw Makre katorxa Marirja nhÿm ōrkwÿ hwÿr tē nhÿm mē ra kamā hpikuprōnh rax nê ho Tirtÿm wÿr o hkrī nhÿm tām mē hwÿr tē. ¹³ Hāmri nê kormā kapôt ā hakwa krem mē kām kahê xā tatak o xa nhÿm ixkre kamā mē kām āpēnh xwÿnh Rotreja kuma nê hwÿr tē. ¹⁴ Hāmri nhÿm kām kapēr nhÿm amnhī jaêr pē kuma nê hkīnh nê. Nê kormā kām kahê xā mēnh kêt ri ma akupÿm tē nê mē kot ho Tirtÿm wÿr xwÿnhjê hwÿr axā nê mē kām:

—Xê pēr Simāw Pêtre na tē nê kapôt ā hakwakrem xa nê inhmā kapēr.

¹⁵ Hāmri nhÿm mē tee ri kuma nê kām:

—Kwa arī mē hagjēnh xā kamā hkrī kēnā. Mān ka tanhmā amnhī krā amnhī to hā na ka ri atÿx ā akapēr anê. Anê.

Hāmri nhÿm mē kām:

—Ma tanhmā kot pa kêt ri ixkrā amnhī to? ām hāmri na pa mē amā harê. Mē kam nê mra nê omu. Anê.

Nom nhÿm mē kuma nê ām kuma nê kām:

—Nā tām kêt. Kaxkwa rÿm Tirtÿm mā hamār o pa xwÿnh mān amā kapēr nom tām kêt. Anê.

¹⁶ Rōm nhÿm Simāw Pêtre arī hakwakre tatak o xa. Hāmri nhÿm mē jatā hwÿr mra nê kām kahê xā mē nê amnhī jaêr pē omu nê hkīnh nê. ¹⁷ Hāmri nhÿm kànhmā mē kām ihkra hpē nê mē ho hpinhkrēnh pa nê mē kām:

—Nā Tirtÿm na ixwÿr kapēr o wrÿk xwÿnhja mē nhÿm ixwÿr wrÿ nê pôristi pē ixkator. Anê.

Hāmri nê mē kām:

—E kēr ka mē Xiakre nê Jejus kôt mē pahtō nê pahtōxjê mā ijarê kē mē ijarēnh mar kuré kumrêx. Nom kot paj ixkato nê ma krī hō hwÿr mō. Anê.

Hāmri nê mē kēp kato nê ma mō.

¹⁸ Tā nhÿm apkati nhÿm pôristi kot hamār o hkrī xwÿnhjaja hkrā hapôj nê tee hapêr nê nhÿri omunh kêt nê. Hāmri nê tee ri amnhī kukamā hamaxpēr o kām ma htÿx kumrêx nê axpēn mā:

—Kwa tanhmā na pre we amnhī to nê mē pahpê akunok? Tanhmā koja we pahi Erox hā mē pahkukja pu mē harēnh to? Anê.

¹⁹ Hāmri nhÿm pahi Erox hpikunor ā harēnh ma nê nextem pôristi hkwyjê mā anê nhÿm mē mra nê tee ri mē hagjēnh xā kamā hapêr nom nhÿri omunh kêt nê. Hāmri nhÿm Erox mē kot hamār xwÿnhjê kamā gryk tÿx kumrêx nê amnhī wÿr mē hā karō nê mē kām:

—Kwa nok? Mē ate hamār rāhā ho akuhê hā ixte mē amā karō htā nhÿm tanhmā amnhī to nê akunok. Nā kot paj mē anhmex ka mē rī amnhī pumu. Anê.

Hāmri nhÿm mē tee ri kām amnhī tā āprār kaprÿ nhÿm mē hā amÿnê nhÿm mē ho kator nê ma mē o mra nê mē himex. Hāmri nhÿm pahi Erox Jutej rÿm kato nê ma Sejarej wÿr mō nê hpānhā kamā pa ho pa.

*Pahi Erox tanhmā htÿk to hā harēnh
Wam Pêtre 1.24-25*

²⁰ Krī pē Xir mē Sito wa kamā mē pa xwýnhjaja na pre htem pahi Eroxo nhō pyka hwýr pa nē mē kēp amnhīm apkur xā hā mēō japrōr o pa. Tā nhūm Eroxo kot mēmoj mýrapē mē kamā gryk jakamā nhūm mē tee ri mē kēp ujaprōr kaxyw mē hwýr mra nom nhūm mē kām mēmoj kwý ho wēnē hkēt nē. Hāmri nhūm mē tee ri amnhī kukamā hamaxpēr nē pahi Eroxo nhō kōwenatō Pratója wýr mra nē kām:

—E awýr na pa mē mra. Kwa mē ixyr pē pahi Eroxo mā tanhmā akapēr to kē ama nē mē ixkamā gryk kēt nē. Pa mē axte mē awýr mra nē mē apē mēmoj kwý japrōr o ri ixpa. Anē.

²¹ Hāmri nhūm mē kuma nē hwýr tē nē mē yr pē tanhmā kām kapēr to nhūm kuma hāmri nē kot tanhmā mē kām kapēr to kaxyw mē kām arīgro hta.

Tā nhūm ra kot arīgro hyr xwýnhta kato nhūm Eroxo kēp pahi hā ē mex jaxā nē tē nē kēp pahi hā mē hkrī xā kamā nhý nē tanhmā mē kām kapēr to. ²² Mē kām kapēr ryy nē. Hāmri nhūm mē kuma nē hēx rom kām mex o mex ā harē. Nē kýx pēē axpēn mā harē nē harēnh o:

—Kwa pahi Eroxo kēp mē panhīō hkēt. Pēr kaxkwa rūm Mēpahpām na pre mē pahwýr wrý nē ā mē pamā kapēr mex anē. Anē.

Hāmri nē te kēp Tirtūm pyrāk o hipēx nē kām mex o mex ā harē. Nom hēx rom ā harēnh anē. Kot mē mar nē kām mē hkīnh nē akupým mē kām mēmoj to wēnē hprām xāj nhūm mē hēx rom ā axpēn mā mex ā harēnh anē. ²³ Hāmri nhūm mē kuma nhūm ja kām mex nē nhūm hkīnh nē mē mar o nhý nē kēp Tirtūm pyrāk ā harēnhja nē tanhmā mē kām nē hkēt nē. Jakamā nhūm tee ri amnhī tā omu nē hwýr kapēr o wrýk xwýnhjē hō mē nhūm hwýr wrý nē tanhmā ho nhūm ōhy kamā kutōj rax nē htyk tokyx anē.

Panāpe mē Sawti wa akupým āxiok hwýr mōr ā wa harēnh

Atre 11.27-30

²⁴ Tā nhūm mē ra ohtō nē Tirtūm Kra Jejus kot tanhmā mē panē amnhī nhīpēx to hā harēnh ma nē hkōt amnhī xunhwý.

²⁵ Hāmri nhūm Panāpe mē Sawti wa ra Kris kōt htō nē htōxjē mā kàxporeta jamý nē ma Jerujarē hwýr o mō nē mē kām kugō. Hāmri nē ma akupým āxiok hwýr nojarēt nē war amnhī kōt Juāw Makre o mō. Hāmri nē mē ma mō nē akupým mē hwýr pōj.

13

Tirtūm kot Panāpe mē Sawti wa hyr

Atre 9.15-16; Rōmān 1.1

¹ Āxiok kamā Kris kōt mē kot axpēn to htōjaja kot Tirtūm nhý hā kapēr o mē ahkre ho pa xwýnhjē nhīxi ā kot anhýr. Na pre Panāpe nē Sawti nē Simeāw kà htyke nē Rusti pē Sirēn nhō xwýnh nē pahi Eroxo krāmnhwý Mānahēja.

² Jakamā nhūm prem mēmo arīgro hā axpēn wýr akuprō nē Tirtūm mā mex o mex ā harēnh kaxyw apkur kēt rāhā kām amnhī jarēnh o hkrī. Hāmri nhūm Tirtūm Karō mē kām tanhmā kapēr o amnhīrit to nē mē kām:

—E kēr ka mē Panāpe mē Sawti war ata nē wa kot inhmā tanhmā amnhī nhīpēx to ho pa kaxyw wa ām. Anē.

³ Hāmri nhūm mē kuma nē wa hyr kurē kumrēx nē wa himōk ā mē ĩhkra jaxwý nē wa ho Tirtūm wý. Hāmri nē wa kot Tirtūm mā tanhmā amnhī nhīpēx to ho pa kaxyw wa kumē nhūm wa ma mō.

Wajaga kot Jejus nē hkrāmnhwý kurē hā harēnh

Atre 8.9-24

4-5 Tã nhũm Tirtũm Karõ krĩ pẽ Serêw wÿr Panãpe mẽ Sawti wa kumẽ nhũm wa ma hwÿr mõ. Nẽ amnhĩ kõt Juãw Makre ho mõ. Kot tanhmã wa ho ajuta hto ho wa hkõt pa kaxyw. Hãmri nẽ wa mẽ mõ nẽ Serêw wÿr pøj nẽ pãr krem axã nẽ ma gõ hipõk pẽ Sipre hwÿr mõ. Hãmri nẽ gõ hipõk ã krĩ pẽ Saramĩn wÿr pøj nẽ Ijaew nhõ Tirtũm kapẽr o mẽ ahkre xã hã ixkre hwÿr tẽ nẽ kamã Jejus kot mẽ panẽ tanhmã amnhĩ nhĩpẽx to hã mẽ kãm harẽnh o wa xa.

6-8 Tã nhũm mẽ krĩja rũm kato nẽ hpãnhã gõ hipõk kõt mõ nẽ hatur xã kamã krĩ pẽ Papos wÿr pøj. Hãmri nẽ kamã wajaga Pajejus pumu. Gresjẽ kapẽr kãm hixi pẽ Erĩm. Erĩm haxwÿja kęp Ijaew. Na pre hte hẽx rom te kęp Tirtũm nhÿ hã kapẽr jarẽnh o pa xwÿnh pyrãk o amnhĩ nhĩpẽx nẽ ma mẽ kãm ujarẽnh o ri mẽ hkõt pa. No ãm mẽ kãm amnhĩ to hẽx o pa. Gõ hipõkja ã pahi Sejupaw hkrãmnhwÿ na pre. Pahi Sejupawja ãhpumunh tÿx jakamã na pre Panãpe mẽ Sawti wa harẽnh ma nẽ kãm wa kapẽr mar prãm nẽ wa kot kãm Tirtũm kapẽr jarẽnh kaxyw amnhĩ wÿr wa kuwÿ. Nom nhũm hkrãmnhwÿ wajaga Erĩmja kãm wa hkĩnh kêt nẽ wa nẽ kãm kapẽr kãm hihtÿx nẽ kãm:

—Kwa nã wa kapẽr mar kêt nẽ. Kot kaj war ama nẽ wa urãk nẽ amnhĩ kaxyw Jejus kõt ajamaxpẽr nẽ hkõt amnhĩ xãm. Kwarĩ wa kapẽr mar kêt nẽ. Anẽ.

9 Hãmri nhũm Sawti ra axtem pãnhã hixi. Ra hpãnhã kęp Pawre. Nhũm Tirtũm Karõ ra hkarõ mã àr jakamã nhũm ÿ hã wajagata pumu nẽ wa nẽ hkrãmnhwÿ mã kapẽr ã kãm akir nẽ kãm:

10 —Tk. Kwa pẽr apẽ Satanasti hkwy hã na ka ã wa inhnẽ kãm akapẽr anẽ. Na ka hte mẽmoj punuj pix kukamã ajamaxpẽr nẽ mẽmoj mex nẽ mẽ no kupyw o apa. Tirtũm kapẽr mex kumrẽx tã ka axtem nẽ nẽ mẽ hkurẽ ho ri apa. 11 ã ate amnhĩ nhĩpẽx anhÿrja mÿrapẽ koja Tirtũm tanhmã ato ka ano hkre nẽ arĩt kêt o atã apkati xohtõ nẽ kãm ga. Anẽ.

Hãmri nhũm no hkre kurẽ kumrẽx nẽ tee ri rĩt kaxyw no pikrar pÿnh o xa nom mẽmoj pumunh kêt nẽ. Hãmri nẽ mẽhõ kot hpa hã hpÿr nẽ òrkwÿ hwÿr ho mõr kaxyw ri amnhĩ pu hã mẽ hapẽr pẽnh o xa. 12 Hãmri nhũm hkrãmnhwÿ pahihtija tee ri ja hã omu nẽ amnhĩ kaxyw Jejus kõt hamaxpẽr nẽ hkõt amnhĩ xãm kurẽ kumrẽx. Hãmri nẽ Pawre mẽ Panãpe wa kot tanhmã Tirtũm kapẽr jarẽnh to hã wa kuma nẽ hamaxpẽr o:

—Hẽxta waa nẽ. Aa ixte ã mẽhõ kapẽr kot anhÿr mar kêt tã pa jarãhã kuma. Nã ãm hãmri na Jejus jarẽnhja. Anẽ.

Pawre mẽ Panãpe ãxiok õ hwÿr wa mõr ã wa harẽnh

Atre 13.38

13 Tã nhũm Pawre mẽ Panãpe mẽ Juãw Makre wa mẽ krĩ pẽ Papos rũm kato nẽ hpãnhã ma pyka hõ hwÿr mõ. Pãr kãm ma pyka pẽ Pãpir wÿr mõ nẽ kamã krĩ pẽ Perke hwÿr pøj. Hãmri nhũm Juãw Makre tanhmã hamaxpẽr to nẽ tee ri axte wa hkõt mõr kukamã hamaxpẽr hãmri nẽ wa hkaga nẽ awjanã nẽ ma akupÿm Jerujarẽ hwÿr ahte mõ. 14 Jakamã nhũm Pawre mẽ Panãpe wa ahte Perke rũm kato nẽ hamũ pika pẽ Pisit kãm krĩ pẽ ãxiok wÿr mõ nẽ hwÿr pøj. Nhũm Ijaew nhõ arĩgromnu pẽ sap kato nhũm wa Tirtũm kapẽr o mẽ ahkre xã hã ixkre hwÿr wa tẽ nẽ hwÿr axã nẽ nhÿ. 15 Hãmri nhũm mẽhõ mẽ kãm Tirtũm kapẽr ã kaga htũm kwÿ kamã harẽnh o xa. Mojes mẽ Tirtũm nhÿ hã kapẽr o mẽ pa xwÿnh kot kapẽr ã kaga hkwy kamã nhũm mẽ kãm kamã harẽnh o xa. Hãmri nẽ kamã harẽnh pa nhũm mẽ ahkre xwÿnhja Pawreja wa omu nẽ wa hwÿr mẽhõ mẽ nhũm wa hwÿr tẽ nẽ wa kãm:

—E na mẽ ijahkre xwýnhjaja war ate mẽ inhmã axujarênh prãm nẽ mãmrĩ mẽ inhmã mẽmoj jarênh kaxyw nhũm mẽ war atã anẽ. Anẽ.

¹⁶Hãmri nhũm wa kuma nhũm Pawre kãnhmã xa nẽ mẽ hpinhkrênh kaxyw mẽ kãm kãnhmã ìhkra nhũm mẽ omu nẽ hpinhkrênh pa nhũm mẽ kãm awjarẽ. Amnhĩ kwý pẽ Ijaewjê mẽ mẽ kêp Ijaew kêt xwýnhjê kãm Tirtũm kĩnh xwýnhjê mã nhũm mẽ kãm awjarẽ. Nẽ mẽ kãm kapêr ryy nẽ. Tirtũm kot tanhmã mẽ hkukamã Ijaew nhĩgêt nẽ pãmjê nhĩpêx to hã mẽ kãm awjarẽ nẽ mẽ kãm:

—E kot paj mẽ amã awjarẽ ka mẽ inhma. ¹⁷Nã mẽ ixpê Ijaew nhõ Tirtũmja amnepêm na pre mẽ ixpê Ijaew pãmjê rê. Kormã Ejit kãm mẽ pa ri nhũm amnhĩ kaxyw mẽ kurê nẽ mẽ ho ohtô rax kumrêx. Hãmri nẽ mẽ kaxyw hihtýx jakamã Ejit rũm mẽ kator pa. ¹⁸Hãmri nẽ mẽ ho mex ryy ho mẽ hkôt pa. Mẽ kot kapôt ã ri pa hã amgrã pẽ 40 kamã mẽ kot htýx ri tanhmã amnhĩ nhĩpêx to ho pa htã nhũm mẽ kamã ukapri ryy ho mẽ hkôt pa. ¹⁹⁻²⁰Na pre mẽ kãm pyka pẽ Kanaã kamã mẽ pa xwýnhjê nhĩmex pa. Kanaã kamã mẽ pa xwýnhjaja ahpyñhã axpên kaxyw mẽõ krĩ pẽ 7ja nhũm mẽ kãm mẽ ho hapêx pa. Hãmri nẽ hpãnhã mẽ inhĩgêjtjê mã pykaja o hpigrãnh pa. Mẽ ixpê Ijaew nhĩgêjtjê mã ho hpigrãnh pa nhũm mẽ kamã pa hã amgrã xohtô nẽ. Hã amgrã pẽ 450. Tã nhũm Tirtũm hpãnhã mẽ kãm juisti hkwy rê nẽ mẽ kaxyw mẽ unhwý nhũm mẽ ho pa. Tã nhũm hpãnhã Sãmuew mẽ ho amnhĩptã nẽ mẽ o pa. Kêp Tirtũm nhỹ hã kapêr jarênh o pa xwýnhjê hõ nhũm Tirtũm mẽ kaxyw ãm.

²¹—Tã nhũm mẽ ixpãmjaja axpên ma nẽ ra te krĩ hkwy kamã mẽ urak nẽ mẽõ pahi kot Sãmuew pãnhã mẽ ho amnhĩptãr o pa hprãm xaj amnhĩ to Tirtũm wý nẽ kãm: “Pa Tirtũm. Kwa mẽ ixkaxyw pahi hõ xãm kê mẽ ixto amnhĩptãr o pa nã. Ja na mẽ inhmã hprãm týx kumrêx.”

—Anhỹr o amnhĩ to hwýr jakamã nhũm mẽ kuma nẽ mẽ kaxyw Sawti xãm. Kisti hkra na pre. Nẽ mẽ inhĩgêt Pëjamĩ kanrêhã htãmnhwý na pre. Hãmri nhũm Tirtũm mẽ kaxyw ãm nhũm kêp mẽõ pahi nẽ mẽ ho amnhĩptãr o pa hã amgrã pẽ 40. ²²Tã nhũm Tirtũm kator nẽ hpãnhã mẽ kaxyw Tawi xãm. Hãmri nẽ harênh o: “Nã Jese hkra Tawija na hte inhmã hprãm xã hkôt amnhĩ nhĩpêx mex o pa.” Anẽ.

²³—Tã Jejus kêp Tawi hkanrêhã htãmnhwý na pre. Kukamã na pre Tirtũm mẽ ixpê Ijaew nhĩgêjtjê mã harê nẽ harênh o: “Koja nhỹrmã Tawi hkanrêhã htãmnhwýjê hõ mẽ ate amnhĩ tomnuj pẽ mẽ apytã.” Anhỹr o hkukamã mẽ kãm harê. ²⁴No nhũm kormã Jejus kot mẽ ixpê Ijaewjê mã amnhĩ to amnhĩrit kêt ri nhũm Juãw Paxis kumrêx hkukamã mẽ ixwýr mō nẽ mẽ inhmã Tirtũm kapêr jarênh o ri mẽ ixkôt pa. Nẽ mẽ ixte amnhĩ tomnuj kaga nẽ hpãnhã tãm amnhĩ nhĩpêx o ipxa hã mẽ ixpumunh kôt mẽ ixkrã kumrãr ã mẽ inhmã karõ ho pa.

²⁵—Tã mẽ kãm kapêr o pa ryy nẽ ra hatur xãm mênh kaxyw nẽ amnhĩ tã tanhmã mẽ inhmã kapêr to nẽ mẽ inhmã: “Na ka mẽ ixpumu nẽ atýx Tirtũm kot mẽ akaxyw pa ixãm ã ixkamnhix nom pa hkêt. Kot mẽ pakaxyw ãm mã xwýnhta kukamã na pa pre mō. Tãm kot amnhĩ to rax o ijakrenh. Nẽ kot amnhĩ to mex o kot ijakrenh. Jakamã na pa hte ãm kukwak ri ipxa nẽ amnhĩ tã hã ixpijaãm o ipxa.” Anẽ.

—Na pre ã Juãw Paxisja mẽ inhmã Jejus jarênh anhỹr o pa.

²⁶—Tã kwa mẽ inhma mẽ apê Apraãw kanrêhã htãmnhwýjaja nẽ mẽ apê Ijaew kêt xwýnh kãm Tirtũm kĩnh xwýnhjaja. E mẽ apiitã ixkapêr ma nẽ kãm ajamaxpêr týx rãhã ho ri apa. Nã mẽ pahpiitã mẽ pakaxyw na Tirtũm kapêrja. Kot mẽ pahte amnhĩ tomnuj pẽ mẽ papytãr ã amnhĩ jarênhja mẽ ixpê Ijaew

pix kaxyw kêt. Mě pahpiitã mẽ pakaxyw na. Mě pahpiitã mẽ pahte ja mar nê hkôt amnhĩ nhĩpêxja na Tirtũm kãm hprãm. ²⁷ Nom Jerujarê nhõ xwýnhjê mẽ mẽ ãptâr tũmrejaja na prem Jejus kêp Tirtũm kot mẽ pakaxyw ãm xwýnh ã harênh mar tâ hkôt hamaxpêr kêt nê. Na pre htem mẽ inhõ arĩgromnu pê sap ã akuprõ nê axpên mã Tirtũm kapêr ã kagã htũm kamã ujarênh o hkrĩ. Kagãja kamã Tirtũm nhỹ hã mẽ kapêr o mẽ pa xwýnhjaja kot hprĩ hã Jejus jarênh nê hã kagã nhũm mẽ kot mar tâ hprĩ hã mar tỳx kêt nê. Jakamã na prem axtem nê mẽ mẽ kãm hã amýnê. Tirtũm nhỹ hã kapêr jarênh xwýnhjaja kot mẽ hkukamã mẽ harênh xaja kôt nhũm mẽ kot hpĩr kaxyw mẽ mẽ kãm hã amýnê.

²⁸⁻²⁹ Kot tanhmã amnhĩ tomnuj to hkêt tâ nhũm mẽ amari hã pahi Pirat wý. Kot mẽ mẽ kãm hã ãmnênh nhũm õ põristijaja kot hpĩr kaxyw nhũm mẽ mẽ hã kuwý nhũm mẽ mẽ kãm kupĩ. Ra Tirtũm kapêr ã kagã htũm kot mẽ hkukamã mẽ harênh xã hkôt. Hãmri nhũm mẽ mẽ kot hkôt pa ho pa xwýnhjaja pĩ kahpa nê ho wrý nê ma o tẽ nê kên kre kamã haxã. ³⁰ Tã nhũm Tirtũm akupým ho htĩr ³¹ nhũm xatã hkôt mẽ pa ho pa xwýnhjê hwýr hapõj. Kormã htyk kêt ri ra Garirej rũm Jerujarê hwýr hkôt mẽ pa ho mẽ pa xwýnhjê hwýr xatã mẽ hwýr hapõx o pa. Jao hã arĩgro xohtõ nê nhũm prem piitã omu. Tã mẽ tãmjaja na htem mẽ ixpê Ijaew mã harênh o pa.

³²⁻³³ —Amnepêm Tirtũm na pre mẽ ixpê Ijaew nhĩgêjtê mã tanhmã Kra Jejus jarênh to. Kormã mẽ pahwýr wrýk kêt ri tanhmã mẽ mẽ kãm harênh to. Jakamã ra kot hkukamã harênh xã hkôt nhũm pre mẽ pahwýr wrý nê tanhmã mẽ panê amnhĩ nhĩpêx to. Tã mẽ ate harênh mar kaxyw na pa wa man mẽ awýr mõ. Amnepêm finat Tawi na pre Tirtũm kapêr kwý hã kagã. Tirtũm mex ã mẽ grer xã pê Sam 2ja kamã hã kagã. Te Tirtũm tãm Jejus mã kapêr pyrãk o hã kagã nê hã kagã ho:

Apê Ixkra na ka.

Tã mẽ piitã mẽ mẽ kot apê Ixkra hã apumunh kurê kumrêx kaxyw na pa jarãhã mẽ mẽ kãm ato amnhĩrĩt. Anê.

Nhũm pre ã Tirtũm Jejus mã kapêr anê nhũm Tawi õ ri mẽ pamã hã kagã.

³⁴ —Amnepêm na pre Tirtũm tanhmã Kra Jejus kukamã harênh to. Mẽ kot hpĩr nhũm kot akupým ho htĩr kukamã hã amnhĩ jarê. ĩ hkro pymaj kot mẽ htykjê pê hkaxãr nê akupým ho htĩr ã nhũm hkukamã hã amnhĩ jarê. Te Kraja mã amnhĩ jarênh pyrã nê amnhĩ jarênh o:

E kot paj ato mex rax nê. Ixte Tawi mã amnhĩ jarênh xã hkôt.

Anhýr o hkukamã harênh xã hkôt akupým ho htĩr nhũm axte htyk kêt ã harê.

³⁵ —Nê kagãja nhãm hõ hõ kot tanhmã Jejus jarênh kute. Te Jejus tãm Tirtũm mã kapêr pyrã nê harênh o:

Ixpê Akra hã ixte akapêr kôt ri amnhĩ nhĩpêx rãhã ho ixpa jakamã kot kaj ixpumunh mex pa inhĩ hkro hkêt nê. Anê.

Tirtũm kapêr ã kagã htũm kot ã Jejus jarênh kot anhýr. ³⁶ Nom ã Tawi jarênh anhýr kêt nê. Tawi na pre Tirtũm kapêr kôt amnhĩ nhĩpêx mex o pa hãmri nê ty nhũm prem mẽ panhĩgêjtê nhĩhkõ hã haxã hãmri nhũm ĩ hkro nê hapêx.

³⁷ —Tã no Jejusja Tirtũm kot akupým ho htĩr jakamã nhũm Tawi pyrãn ĩ hkro nê hapêx kêt nê.

³⁸ —E mẽ inhmar tỳx nê ixkwýjaja. Kra Jejus pix kukwak na hte Tirtũm amnhĩ katut kôt mẽ mẽ pahte amnhĩ tomnuj rê. ³⁹ Jakamã kot kaj mẽ mẽ ãm Mojes kapêr kôt pix mã ri amnhĩ nhĩpêx nhũm Tirtũm tee ri ja hã mẽ apumu nê amnhĩ katut kôt mẽ ate amnhĩ tomnuj rênh kêt nê. Jejusja tapxipix na pre htyk o Tirtũm mã mẽ mẽ pahte amnhĩ tomnuj piitã hpãnhã amnhĩrer pa.

40-41 Amnepê m na pre Tirtûm kapêr nhÿ hã kapêr xwÿnhjê hõja mē kãm Tirtûm kapêr jarê nê hã kagã. Te Tirtûm tãm mē kot kapêr ã hpêr o pikênh xwÿnhjê mã kapêr pyrà nê mē kãm:

E kot paj aa mē ate mēmoj pumunh kêt õ ho anê.

Nhûm mēhõ mē amã harê ka mē harênh ma nê ãm ama.

Nhûm mē kot omunh mex xwÿnhjê hõ kot hprî hã mē amã harênh tã ka mē ãm ama nê hkõt ajamaxpêr kêt nê.

Hãmri nê tee ri tanhmã kãm ajamaxpêr to ho ri apa. Anê.

Ã Tirtûm mē kãm kapêr anhÿr jakamã kwa mē o kora. Apu mē kajaja na pre ã mē ajarênh anê rÿ ko. Anê.

42 Nhûm pre ã Pawre mē kãm ujarênh ryy anê. Hãmri nê Panãpe mē wa ixkreta rûm kator kaxyw nhûm mē kot mar o hkrî xwÿnhjaja tee ri ma wa mór ã wa omu nê ma wa hkõt mra nê wa kãm:

—Kwa war axujarênhja na mex kumrêx. Mē inhmã axte mar prãm. Xà koja axte sap kato ka wa akupÿn mē ixwÿr wa tē nê axte mē inhmã awjarê? Anê.

Hãmri nhûm wa mē kãm:

—Tõe. Nã kot paj war anê. Anê.

43 Hãmri nê wa ma tē nhûm mē hkwÿja ma wa hkõt mra. Ijaew kwÿjaja nê Ijaew kêt xwÿnh kãm Tirtûm Kînh xwÿnhjaja nhûm mē ma wa hkõt mra. Hãmri nhûm wa pry hã mē kãm kapêr o mō. Tirtûm kot mē kutã nojarêr rãhã ho pa nhûm mē kot amnhî tã omunh nê hkõt amnhî nhîpêx tÿx rãhã ho pa nê hkaga hkêt ã mē kãm kapêr o mō.

44 Tã nhûm axte sap nhûm krî nhõ xwÿnh piitã axte Tirtûm kapêr mar kaxyw ixkre wÿr akuprõ. Ijaewjaja nê Ijaew kêt xwÿnhjaja. 45 Hãmri nhûm Ijaew kwÿjaja tee ri mē amnhî wÿr Ijaew kêt xwÿnhjê pumu nê mē hã Pawre mē Panãpe wa kamã gryk nê. Mē kãm Ijaew kêt xwÿnhjaja kot Tirtûm kapêr mar prãm kêt jakamã mē hã wa kamã gryk nê. Hãmri nê Pawre kapêr ma nê xatã kãm kapêr punuj nê kãm:

—Tk. Kwa na ka Tirtûm kapêr jarênh o axêx. Ja kot anhÿr kêt. Anê.

46 Nom nhûm wa kãm mē uma hkêt nê. Wa ãm Tirtûm Karõ nhÿ hã amnhî to htÿx nê wa mē kãm kapêr. Nê amnhî tã tanhmã mē kãm kapêr to nê mē kãm:

—Nã wa ixpyrà nê mē apê Ijaew jakamã na pa mē akumrêxjê mã Tirtûm kot mē pakaxyw Jejus xãm ã harê. Tã ka mē ama nê ãm ama nê te mē ate hkaga pyrà nê ã wa inhmã akapêr anê nê wa ixte kapêr o ixêx ã wa ijarê. Pêr ãm mē ate mē amã Tirtûm mē Kra wa kuri mē atîr tûm nê mē apa hprãm kêt. Jakamã kot paj wa mē apê ixkato nê hpãnhã ma Ijaew kêt xwÿnhjê mã Jejus kapêr jarênh o ri mē hkõt ixpa. 47 Tirtûm kapêr ã kagã htûm ã kot mē ixte amnhî nhîpêx anhÿrja kukamã mē ijarê nê mē ijarênh o:

Mê ate Ijaew kêt xwÿnhjê mã ixkapêr jarênh o ri apa kaxyw na pa pre mē kaxyw mē arê.

Jakamã koja pyka piitã hkõt mē pa xwÿnhjaja ohtõ nê mē akapêr ma nê ixkra hkõt amnhî xunhwÿ.

Koja mē ã amnhî nhîpêx anê pa ja hã mē omu nê mē ho ixkra. Anê.

Tirtûm kot ã ja kukamã mē ijarênh anhÿr jakamã kot paj wa mē apê ixkato nê mē apãnhã ma Ijaew kêt xwÿnhjê mã Tirtûm kapêr jarênh o ri mē hkõt ixpa. Anê.

48 Hãmri nhûm Ijaew kêt xwÿnhjaja amnhî tã wa kapêrja ma nê hkînh nê Tirtûm kapêr mex o mex ã harê. Hãmri nhûm ra Tirtûm kot nhÿrmã amnhî

ri mē htīr tūm nē mē pa ho mē pa kaxyw mē rēnh xwýnhjaja amnhī kaxyw Pahihti Jejus kōt hamaxpēr nē hkōt amnhī xunhwý.

⁴⁹ Tā nhūm pika pē āxiok kamā mē piitā Tirtūm kapēr jarēnh ma. ⁵⁰ Nom nhūm Ijaew xāptār tūmrejaja kām Pawre mē Panāpe wa hkīnh kēt jakamā na prem krī hkōt mē kot amnhī to rūnh xwýnhjē mā wa ho kapēr punuj o pa. Mē ō pahi mē mēni kot amnhī to rūnh xwýnhjaja nhūm mē kām tanhmā wa ho kapēr to nhūm mē kuma nē mē hkōt hamaxpēr. Mēnijaja kām Tirtūm prām tā amnhī kaxyw Jejus kōt hamaxpēr kēt jakamā tanhmā mē kot Pawre mē Panāpe wa ho hēx toja ma nē hkōt hamaxpēr nē wa kamā gryk nē. Jakamā nhūm mē ohtō nē tanhmā wa hipēx to nē amnhī nē wa hano. ⁵¹ Hāmri nhūm wa mē kēp kato nē xa nē mē kot Tirtūm kapēr kaga hā amnhī pumunh kaxyw mē noo mā wa hparkā kapa nē nē awjagrō kapī nē ma wa tē. Hāmri nē ma krī pē Ikōn wýr hpānhā wa mō. ⁵² Hāmri nhūm āxiok kamā mē kot Jejus kōt amnhī xunhwýr xwýnhjaja hkīnh nē ri pa. Tirtūm Karō kot mē hkarō mā gjēx jakamā nhūm mē hkīnh nē ri pa ho pa.

14

Pawre mē Panāpe wa kot Ikōn wýr mōr ā wa harēnh Matéwre 10.34-35

¹ Hāmri nhūm Pawre mē Panāpeja wa āxiok rūm kato nē hpānhā ma krī pē Ikōn wýr wa mō. Hāmri nē hwýr pōj nē Ijaew nhō Tirtūm kapēr o mē ahkre xā hā ixkre hwýr wa tē nē kamā mē kām Jejus jarēnh o nhý. Mē kām harēnh kām hihtýx jakamā nhūm mē hkwyjaja wa kuma nē amnhī kaxyw hkōt hamaxpēr nē hkōt amnhī xunhwý. Ijaew kwýjaja nē mē kēp Ijaew kēt xwýnh kwýjaja nhūm mē ohtō nē Jejus kōt amnhī xunhwý.

² Tā nhūm mē hkwyjaja kām Jejus jarēnh mar prām kēt nē. Hāmri nē kato nē ma Ijaew kēt xwýnh kwýjē hwýr mra nē tanhmā mē kām Pawre mē Panāpe wa ho hēx to nē wa ho kapēr punuj nē nhūm mē mar xā hkōt wa kamā gryk nē. ³ Nom nhūm wa tokyx kator nē ma mōr kēt nē arī Tirtūm Karō nhý hā amnhī to htýx nē mē kām Tirtūm kapēr jarēnh o ri mē hkōt pa. Nē kēp mē kutā nojarēt xwýnh ā harēnh o pa. Nē ý hā mē kām aa mē kot mēmoj pumunh kēt kwý ho anhýr o ri mē hkōt pa. Jakamā nhūm mē hkwyjaja ja hā wa omu nē wa kapēr ma nē hamaxpēr o:

—Kwa ām hāmri na wa Tirtūm kēp mē pakamā ukapri xwýnh ā harē. Pēr ý hā wa kot ā amnhī nhīpēx anhýr o pa kēnā. Anē.

⁴ Hāmri nhūm Ijaew kēt xwýnh kwýjaja wa hkōt hamaxpēr nē wa hkōt amnhī xunhwý. No nhūm mē hkwyjaja wa hkōt hamaxpēr kēt nē. Ra mē kot Ijaew kwý kot tanhmā wa ho kapēr punuj toja ma nē mē hkōt hamaxpēr jakamā nhūm krī nhō xwýnhjaja axpēn kwým ri tanhmā wa hkōt hamaxpēr to ho pa. Jao axpēn kwým ri wa hkōt hamaxpēr o pa.

⁵ Tā nhūm wa hkōt hamaxpēr kēt xwýnhjaja axpēn wýr akuprō nē wa hā amýnē. Ijaew kwýjaja nē Ijaew kēt xwýnh kwýjaja nē mē ō pahijaja nhūm mē kot kēn o wa htak o wa hpīr kaxyw wa hā amýnē. ⁶ Hāmri nhūm wa amnhī tā ama nē mē kēp kato nē hpānhā ma pika hō hwýr mō. Ma Rikōn kām krī hkwy hwýr hpānhā mō. Risti wýr nē Tepe wýr nē pu hā krī hkwy hwýr wa mō. ⁷ Wa mō nē pōj nē ma mē kām Jejus kot tanhmā mē panē amnhī nhīpēx to hā harēnh o ri mē hkōt pa.

*Te grà xwỳnh jarēnh**Atre 3.1-10*

⁸ Nhūm Risti kamā mēhō my hte grà nē hkrī xwỳnhja. Katorxà nhōxà kre rūm hte grà nē kator jakamā ri pa hkēt nē arī hkrī xà kamā hkrī ho hkrī. ⁹ Jakamā nhūm Pawre mē kām ujarēnh o xa nhūm kuri mar o nhỹ. Hāmri nē hamaxpēr o:

—Nà pēr Tirtūm àhpumunh o àhpumunh. Mān kot ixto mex kaxyw àhpumunh tỳx. Nà koja ixto mex. Anē.

Hāmri nhūm Pawre ā hamaxpēr anhỹr ā omu ¹⁰ nē kàx pē kām kapēr nē kām:

—E kwa kànhmā xa. Anē.

Hāmri nhūm kuma nē kànhmā ām kurē kumrēx nē ri mra. Nē amnhī te kamā hamak o ri mra nē hkīnh tỳx kumrēx. ¹¹ Hāmri nhūm kuri mē kuhē xwỳnhjaja Pawre kot ā hipēx anhỹrja ā omu nē htỳx wa kēp kaxkwa kamā mēhpām ā wa hkamnhīx nē hkīnh nē axpēn mā:

—Kwa pēr mēpahpām na wa. Mēpahpām Jupti mē Mēkurtija na wa panhī hā amnhī jahkre nē mē pahwỳr wrỳ. Nā ām hāmri na wa mē pahwỳr wrỳ. Anē.

Nom mē kapēr pē Rikaōn o axpēn mā kapēr jakamā nhūm Pawre mē Panāpe wa mē mar kēt nē. Wa kot mē kapēr mar kēt jakamā ā mē kot wa harēnh anhỹrja mar kēt nē htỳx wa xa. ¹² Nhūm mē ā wa kēp mēhpām ā wa harēnh anē nē hkīnh tỳx nē. Panāpeja nhūm prem kēp mē hpām Jupti hā hkamnhīx no Pawreja nhūm prem kēp mēhpām Mēkurti hā hkamnhīx. Pawreja Mēkurti pyrā nē kapēr japjē rūnh jakamā nhūm mē kēp hā hkamnhīx. ¹³ Na prem krī htā mēhpām Juptija mā amnhī jarēnh xà hā ixkre nhīpēx nē hkarō nhīpēx. Hāmri nē hwỳr akuprō nē kām mex o mex ā harē nē amnhī to hwỳr o pa. Jakamā nhūm Jupti nhō patrejaja Pawre mē Panāpe wa kēp mēhpām ā wa harēnh mā hāmri nē wa hā hkwỳjē mā kām:

—Kwa pu mē wa kām mōx kwỳ hpa nē pixōrā hkwỳ rē. Hāmri nē wa kām wa mex o wa mex ā wa harē nē wa kēp mēpahpām ā amnhī to wa kuwỳ. Wa kēp mēpahpām kēnā. Anē.

Hāmri nē ra ā wa hipēx anhỹr kaxyw ¹⁴ nhūm wa tee ri mē kot amnhī nhīpēx ā mē omu nhūm ja wa kēp omnuj tỳx nē. Jakamā nhūm wa amnhī pē hinōkà kaxōnh pa nē mē kutā hprōt nē ā mē kot wa hipēx anhỹrja nē mē kām kapēr kām hihtỳx nē. ¹⁵ Nē mē kām:

—Kwa mē ri ā wa inhīpēx anhỹr kēt nē. Wa ixpē mēapām kēt kēnā kot ka kēt mē ā wa inhīpēx anē. Nom mēapāmja na ka htem ām amnhī to hwỳr kaprỳ nē kām mex o mex ā harēnh kaprỳ o ri apa. Tā mē ate ā amnhī nhīpēx anhỹr kaga nē hpānhā Tirtūm kōt amnhī xunhwỳr nē amnhī to pix wỳr o apa kaxyw na pa pre wa mē awỳr mō nē pōj. Tirtūmja mē ate mē apām jarēnhhta rom htūr o htūr. Na pre mēmoj piitā ho kato. Kaxkwa ho kato nē pyka ho kato nē gō xujanār o kato. Nē kamā ri mēmoj piitā ho kator pa.

¹⁶ —Amnepēm mē pa xwỳnhjaja na pre htem amnhī krā hkōt pix mā tanhmā ri amnhī nhīpēx to ho pa nhūm Tirtūm ja hā mē omu nē ām mē omu nē tanhmā mē ho hkēt nē. ¹⁷ Mē pahte amnhī tā omunh kaxyw na hte amarī tanhmā mē pahto mex to ho pa. Na hte mē pahwỳr na rē nhūm mē pahpur go mex nē. Nhūm mē pamā tanhmā mē pahpur kām mēmo hyja to nhūm ra mē pamā ô rūnh nē. Pu htem hamỳ nē ho paxàpkur mex nē pahkīnh nē ri papa. Tirtūm pix kukwak ri na pu htem ā amnhī nhīpēx anhỹr o ri papa. Anē.

¹⁸ Nhūm pre ā Pawre mē kot wa kām mōx parja nē mē kām kapēr kām hihtỳx anē. No nhūm mē kuma nē ām kuma nē wa kām mry hkwỳ hpar kaxyw

wa hã hihtýx nê. Jakamã kritpê m nhýx prem wa kãm hkwy pa. Tã tanhmã hamaxpêr to nê hkaga nê wa kãm hpar kêt nê.

Mê kot Pawre pîr ã àmnênh ã mê harênh
Sikûn Ximotre 3.10-11

¹⁹ Tã nhũm Ijaew kwýjaja mê hwýr mran pøj. Krî pê ãxiok mê Ikôn rũm ma mê hwýr mran pøj nê mê kãm Pawre ho hêx o mê hkôt pa nhũm mê kuma nê axtem nê Pawre kamã gryk kato. Hãmri nê mê kot hpîr kaxyw kên runh kwý jamý nê ho htak prêprêk o kuhê. Hãmri nhũm amnhî xà htýx kamã ama nê tẽm nê akryk nõ nhũm mê omu nê htýx ho ra htyk ã hkamnhîx. Hãmri nê hwýr tẽ nê hpa hã kupy nê ma hkjênh o mô nê krî pum kumê nê ma akupým mra. ²⁰ Hãmri nhũm Jejus kôt mê kot axpên to htôjaja tee ri ã mê kot hipêx anhýr ã omu nê hkaprî htýx nê hwýr hprôt nê omu nê mýr o kuhê. Hãmri nhũm te htyk pyrã nê nõr tã Jejus nhý hã akupým hihtýx mex nê kãnhmã nhý hãmri nê ma akupým mê hkôt krîm tẽ.

Tã nhũm apkati nhũm Panãpe mê wa krîja rũm kato nê ma wa mô. Pãnhã ma krî pê Tepe hwýr wa mô.

Pawre mê Panãpe akupým ãxiok wýr wa môr ã wa harênh

²¹⁻²² Tã nhũm wa ma Tepe hwýr mô nê pøj. Hãmri nê kamã mê kãm Jejus tanhmã kot mê panê amnhî nhîpêx to hã harênh o ri mê hkôt wa pa nhũm mê wa kuma nê ohtô nê Jejus kôt amnhî xunhwý.

Tã nhũm wa kato nê awjanã nê ma akupým pika pê Pisit wýr wa mô. Nê kamã krî hkwy hkôt ri ra mê kot Jejus kôt amnhî xunhwýr xwýnhjê jahkre ho ri mê hkôt pa. Krî pê Risti nê Ikôn nê ãxiokja kôt. Nê mê ahkre kamã Jejus kôt mê ho mê hihtýx o wa pa nê mê kãm:

—E ra mê ate Jejus kôt amnhî xunhwýr jakamã koja mê kãm Jejus kurê xwýnhjaja tee ri ja hã mê apumu nê hã tanhmã mê anhîpêx to. Tã kër ka mê ãm amnhî tã mê omu nê ãm mê omu nê Jejus kaga hkêt nê. Nê arî hkôt amnhî nhîpêx mex o ri apa rãhã nhýrmã ma ô krî hwýr api nê Tirtũm wa kuri amex kumrêx nê atîr tũm nê apa ho apa. Anê.

²³ Hãmri nê ahpýnhã krî piitã hkôt ri mê kot pastô nhý hã mê ahkre kaxyw mê hkwyjê rê nê mê kaxyw mê unhwý nê mê ho Tirtũm wý. àpkur kêt rãhã mê ho kuwý nê kãm:

—Pa Tirtũm? E jajê pumu. Mê kot krî ja kamã pastô nhý hã akrajê jahkre ho pa kaxyw na pa wa mê unhwý. Jakamã e kër ka mê kutã anojarêt rãhã ho ri mê hkôt apa. Anê.

Hãmri nê wa mê kêp kato nê ma hpãnhã nhýhým wa mô. ²⁴ Pyka pê Pisit kamã mô nê hpãnhã nhãm pyka pê Pãpir kôt mô. Wa ma mê kãm tanhmã Jejus kapêr jarênh to ho mê hkôt mô. ²⁵ Hãmri nê krî pê Perke hwýr wa pøj nê kamã mê kãm Jejus kot tanhmã amnhî nhîpêx to hã harê hãmri nê mê kurũm kato nê axte mô. Pãnhã ma krî pê Atari hwýr wa mô. ²⁶ Hãmri nê hwýr pøj nê hpãnhã kurũm akupým ãxiok wýr wa mô. Pãr rax kãm ma akupým mô. ãxiokja kamã na pre wa nojarêt nhũm Jejus kôt wa htô nê wa htôxjaja wa ho Tirtũm wý nê ma krî hkwy hwýr wa kumê. Wa kot ma mê hkôt tanhmã Jejus kot mê panê amnhî nhîpêx to hã harênh o wa pa kaxyw wa kumê. Jakamã nhũm wa ra ja ho anhýr pa nê akupým mê hwýr wa mô. ²⁷ Hãmri nê wa akupým pøj nê Jejus kôt mê kot axpên to htô nê htôxjê ho akuprô nê mê kãm amnhî jarê nê mê kãm:

—Nà ãm hãmri na pa wa ra ixkàhkĩnh pê akupÿn mẽ awÿr pøj. Na pre Tirtũm wa ixkutã nojarêt rãhã ho wa inhũhkõ hã pa. Jakamã pa pre wa ma ÿ hã Ijaew kêt xwÿnhjê mã Jejus jarênh o ixpa nhũm mẽ hkwyjaja wa inhma nê hkõt amnhĩ xunhwÿ.

²⁸ Anhÿr o wa mẽ kãm kapêr hãmri nê wa tokyx ma nhÿhÿm krĩ hõ hwÿr axte mör kêt nê. War arĩ äxiok kamã Jejus kõt wa htõ nê htõxjê hkõt ri pa.

15

Jerujarê kamã Jejus kwÿ hpikuprõnh ã mẽ harênh

Matêwre 23.1-4; Karatas 2.1-5, 5.1-16

¹ Tã hãmri nhũm Ijaew kwÿjaja äxiok wÿr Jejus kwÿ pê Ijaew kêt xwÿnhjê hwÿr mõn pøj. Pika pê Jutej rũm mẽ hwÿr pøj nê tanhmã mẽ ahkre hto ho pa. Nom axtem nê Tirtũm kapêr kuhpa hã mẽ ahkre nê mẽ kãm:

—Kot ka mẽ amã Jejus kõt amnhĩ xunhwÿr prãm hãmri nê mẽ ixpyrà nê finat Mojes kot mẽ pamã karõ xà hkõt amnhĩ my kwÿrÿt kà kwÿ jakã nê ri kormã hkõt amnhĩ xunhwÿ. Kot kaj mẽ ã amnhĩ nhĩpêx anhÿr kêt nê nhũm Tirtũm tee ri ja hã mẽ apumu nê amnhĩ katut kõt mẽ ate amnhĩ tomnuj rênh nê mẽ ato hkra hkêt nê. Anê.

² Hãmri nhũm Pawre mẽ Panãpe tee ri mẽ kapêr anhÿrja ma nhũm wa kêp ja omnuj tÿx nê. Hãmri nhũm wa mẽ kãm:

—Tk. Kwa kot anhÿr kêt. Na hte Tirtũm mẽ pahte amnhĩ my kwÿrÿt kà jakãr ã mẽ pahpumunh kõt mẽ pahto hkra hkêt nê. Anê.

Hãmri nê tee ri mẽ kapêrja nê mẽ kãm kapêr no nhũm mẽ ãm wa kuma nê wa hkõt hamaxpêr kêt nê. Nê arĩ ã mẽ ahkre anhÿr o mẽ hkõt pa. Jakamã nhũm mẽ ja hã axpên mã kapêr rax nê. Hãmri nhũm Jejus kwÿ pê Ijaew kêt xwÿnhjaja amnhĩ tã Pawre mẽ Panãpe wa hkukja nê wa kãm:

—Kwa xà kot paj mẽ apyrã nê amnhĩ my kwÿrÿt kà jakã nhũm Tirtũm kãm ja mex nê nã? Kwa wa ma akupÿm Jerujarê hwÿr mõ nê ja hã Jejus nhÿ hã mẽ ahkre xwÿnh maatiijê mẽ mẽ kot Jejus kwÿ jahkre xwÿnhjê kukja nê hã mẽ ama. Nê ota mẽ ixkwÿjaja koja ma war akõt mra. Kê mẽ tanhmã mẽ amã ja jarênh to ka mẽ ama nê man akupÿn mẽ ixwÿr mra nê tanhmã mẽ inhmã mẽ kapêr jarênh to. Anê.

Hãmri nhũm wa mẽ kãm: “Tõe. Nà kot paj mẽ anê.” Anê. ³ Hãmri nê wa mẽ ma Jerujarê hwÿr mõ. Ma pyka pê Wẽnĩs mẽ Samar hkõt ma hwÿr mõ. Hãmri nê nhÿri Jejus kõt mẽ htõ nê htõxjê pumu nê mẽ kãm Ijaew kêt xwÿnhjê jarê. Mẽ hkwyjaja mẽ urak nê Jejus kõt amnhĩ xunhwÿr ã mẽ harênh o mõ. Hãmri nhũm mẽ harênh ma nê mẽ ÿ hã hkĩnh nê. ⁴ Hãmri nhũm mẽ ra Jerujarê hwÿr Jejus kõt mẽ htõjê hwÿr mõn pøj. Hãmri nê mẽ ahkre xwÿnhjê mẽ Jejus nhÿ hã mẽ ahkre xwÿnh maatiijê pumu nhũm mẽ haxwÿja amnhĩ wÿr mẽ omu nê hkĩnh nê. Nê tanhmã mẽ ho mex to nê mẽ kãm kapêr mex nê. Hãmri nhũm Pawre mẽ Panãpe wa mẽ kãm amnhĩ jarê. Tirtũm kot wa ìhkõ hã wa hkõt pa nhũm wa ÿ hã kot Ijaew kêt xwÿnhjê mã kapêr o pa nhũm mẽ hkwyjaja kot wa mar nê Jejus kõt amnhĩ xunhwÿr ã nhũm wa mẽ kãm amnhĩ jarê. ⁵ Nhũm Jejus kwÿjê kamã mẽ kêp Parijew nhõ xwÿnh kwÿjaja. Mẽ kêp Parijew tã hkwyjê rom Jejus kõt amnhĩ xunhwÿ. Jakamã nhũm mẽ tee ri Pawre mẽ Panãpe wa kot Ijaew kêt xwÿnhjê jarênh ma nê kãnhmã kuhê nê wa kãm:

—Kwa kê mẽ pahpyrà nê amnhĩ my kwÿrÿt kà jakã nê finat Mojes kot Tirtũm nhÿ hã mẽ pamã mẽmoj tã karõ hkõt amnhĩ nhĩpêx o pa. No kot mẽ ã amnhĩ nhĩpêx anhÿr kêt nhũm ja mẽ pahpê omnuj nê. Anê.

⁶ Hāmri nhūm Jejus nhý hã mẽ ahkre xwýnh maatijë mẽ mẽ hkwyjê jahkre xwýnhjaja mẽ kuma nê hapôj nê nhýri akuprô. Ijaew kêt xwýnh kot Jejus kôt amnhî xunhwýr xwýnhjaja kot tanhmã amnhî nhîpêx to hã axpên mar kaxyw nhýri akuprô. ⁷ Hāmri nê mẽ hã axpên mar ryy nê. Hāmri nhūm Simãw Pêtre tã kãnhmã xa nê mẽ kãm:

—Nà na pre Tirtūm mẽ pahkapi nê Ijaew kêt xwýnhjê kaxyw pa ixta. Ixte mẽ kãm Jejus kot tanhmã mẽ panê amnhî nhîpêx to hã harênh o ri mẽ hkôt ixpa nhūm mẽ kot inhmar nê hkôt amnhî xunhwýr kaxyw nhūm mẽ kaxyw ixta. Ra mẽ ate ja hã ixpumunh mex. ⁸⁻⁹ Tirtūm kot tanhmã ri mẽ pakute hkôt mẽ pahpumunh par jakamã te kot ra mẽ panhîpêxta pyrà nê mãănê Ijaew kêt xwýnhjê nhîpêx. Mẽ kot mẽ pahpyrà nê amnhî kaxyw Jejus kôt hamaxpêr jakamã nhūm Tirtūm te ra mẽ panhîpêx pyrà nê amnhî katut kôt mẽ kot amnhî tomnuj rê nê mẽ ho hkra. Hāmri nê mẽ hwýr amnhî Karô rê nhūm mẽ hkarô mã agjê. Tirtūm tãm kot amnhîm mẽ rênh kênã.

¹⁰ —Tã xà mẽ pahpê Ijaew na pu htem wam Tirtūm kot finat Mojes mã kapêr kôt amnhî nhîpêx mex o papa? Nà na pu htem hkôt amnhî nhîpêx mex kêt nê. Nê mẽ panhîgêjtaja na xep prem haxwýja hkôt amnhî nhîpêx mex o pa hkêt nê. Mẽ pahpiitã mẽ pahpê hihtýx kênã. Tã Ijaew kêt xwýnhjaja kot hkôt amnhî nhîpêx o pa hã ka mẽ ra mẽ kãm karô kaxyw. Kwa kot kaj mẽ anê nhūm Tirtūm tee ri ja hã mẽ apuma nhūm ja kêp omnuj nê. Kãm ja prãm kêt. ¹¹ Kwa mẽ ã mẽ kãm hã karô anhýr kêt nê. Mẽ panhõ pahihtu Jejus na hte mẽ pahpiitã mẽ pakutã nojarêt o axpên pyràk. Jakamã Ijaew kêt xwýnhjaja nê mẽ pahpê Ijaewjaja kot puj mẽ amnhî kaxyw hkôt pajamaxpêr nê hkôt amnhî xunhwý. Hāmri nhūm Tirtūm ja hã mẽ pahpumu nê mẽ panhîpêx o axpên pyrà nê Jejus kukwak ri amnhî katut kôt mẽ pahte amnhî tomnuj rê nê mẽ pahto hkra. No na hte mẽ pahte amnhî my kwýrjt kã jakar rý finat Mojes kapêr kôt amnhî nhîpêx ã mẽ pahpumunh kôt mẽ pahto hkra hkêt nê. Anê.

¹² Nhūm pre ã Simãw Pêtre mẽ kãm kapêr anê. Hāmri nhūm hpãnhã Panãpe mẽ Pawreja mẽ kãm amnhî jarê. Tirtūm kot tanhmã wa ho nhūm wa kot Ijaew kêt xwýnhjê hwýr wa môr ã amnhî jarê. Nê Tirtūm nhý hã mẽ kãm aa mẽ kot mẽmoj pumunh kêt kwý ho anhýr o ri mẽ hkôt pa hã mẽ kãm amnhî jarê nhūm mẽ piitã akryk wa mar o hkrî nê wa ujarênhta hkukamã hamaxpêr.

¹³ Hāmri nhūm Simãw Pêtre mẽ Panãpe wa mẽ kãm ujarênh pa hāmri nhūm Xiakre wa hpãnhã kãnhmã xa nê mẽ kãm kãnhmã ìhkra pê nê mẽ kãm:

¹⁴ —E pa ijaxwýja mẽ amã ixkapêr ka mẽ inhma. Nà na pu mẽ ra Simãw Pêtre kapêr ma. Tirtūm kot wam amnhî kaxyw Ijaew kêt xwýnh kwýjê rênh ã mẽ harênhja pu mẽ ra kuma. ¹⁵ ãm hāmri na ã mẽ harênh anê. Amnepêm Tirtūm kapêr nhý hã mẽ kapêr o mẽ pa xwýnhjaja na prem ra ja kukamã Tirtūm kot tanhmã mẽ hipêx to hã amnhî jarênh kukamã hã kagã. Te ho tãm kot kãm kapêr pyrà nê hã kagã ho:

¹⁶ Amnepêm finat Tawija na pre hte inhmã amnhî kwýjê ho amnhîptar o pa. Mẽ kêp Ijaewjaja nhūm pre inhmã mẽ ho amnhîptar o pa.

Hāmri nhūm mẽ gaa nê axpên pê angrã nê ahpýnhã ri pa.

Tã ixpê Tirtūm kot paj nhýrmã ma mẽ hwýr wrý nê axte mẽ ho akuprô nê tãm mẽ unhwýr pa.

¹⁷ Jakamã Ijaewjê kukwak ri koja Ijaew kêt xwýnh kwýjaja mãănênh ixkôt amnhî xunhwý.

Pa te ixte Ijaewjê nhîpêx pyrà nê mẽ ho ixkra.

18 Ā mē hkukamā ijamaxpēr anhÿr xà hkôt.

19 Anhÿr o mē harēnh jakamā nhūm ra mē hwÿjaja mē higēt kot amnhÿ nhÿpēx kaga hpa nē hpānhā Tirtūm kôt amnhÿ xunhwÿ. Jakamā kwa kēr pu mē axte ja nhÿjuk ri mē kām mēmoj tā karō hkēt nē. Ja pix na mex. 20 Ām ja pix kot puj mē kām hā karō nē hā kagā nē mē hwÿr kumē:

Mē kot sānti hā mē ō hkur nē kot puj mē hkurē.

Nē mē kot mēmo mry hpar nē hkamrō runh kēt rāhā hkur nē mē hkurē.

Nē mē kot mēmo mry kamrō kur nē māānēn mē hkurē.

Nē mēmyjaja kot amnhÿ prō pix tānopxar ā mē kām karō.

Nē mēnijaja haxwÿja kot amnhÿ mjēn pix tānopxar ā mē kām karō.

—Ām ja pix kot puj mē kām hā kagā nē mē kām hā karō. 21 Mē panhigētjē mā finat Mojes kot ā mē kām karō anhÿrja na htem arÿ krÿ piitā hkôt ā mē kām hā karō anē. Mē panhō arÿgromnu pē sap ā na htem arÿ ri Tirtūm kapēr o mē ahkre xà hā ixkre kamā ā mē kām hā karō anē. Anē.

*Mē kot Ijaew kēt xwÿnhjē hwÿr kagā mēnh ā mē harēnh
Karatas 5.1*

22 Hāmri nhūm mē Xiakre kapēr mar o hkrÿ. Jejus nhÿ hā mē ahkre ho mē pa xwÿnh maatijaja nē mē kot hwÿjē jahkre xwÿnhjaja nē Kris kwÿjē piitā Xiakre kapēr ma nhūm ja mē kām mex nē. Jakamā nhūm mē axpēn mā:

—Tōe. Nā ām hāmri na Xiakre ā Ijaew kēt xwÿnhjē jarēnh anē. Nā ja mex. Pu mē ā āxiok nhō xwÿnhjē mā ja hā kagā anē hāmri nē mē hwÿr kumē. Koja Pawre mē Panāpeja wa kupy nē ma akupÿm mē hwÿr o mō nē mē kām kugō. E mē pahtō kot puj mē ma wa hkôt mē hwÿr mō? Anē.

Hāmri nhūm mē kuma nē Siras mē Jut Pasapas wa kuta. Jejus kôt mē kot axpēn to htō nē htōxjaja kot axpēn mā hamē wa kot amnhÿ to mex xwÿnh ā wa harēnh jakamā nhūm mē ma Pawre mē Panāpe wa hkôt mōr kaxyw wa kuta.

23 Hāmri nē āxiok kamā Kris kwÿ pē Ijaew kēt xwÿnhjē kaxyw kagā nhÿpēx nē kamā ā mē kām kapēr anē nē mē kām:

Pa? āxiok mē Sir mē Siris kamā Ijaew kēt xwÿnhjaja? Xà mē amex? Mē ixpē Jejus kôt mē atōjaja na pa mē awÿr kagāja nhÿpēx nē mē awÿr kumē. Mē ixpē Jejus kôt mē kot amnhÿ xunhwÿr xwÿnhjē jahkre ho ixpa xwÿnhjaja nē Jejus nhÿ hā mē ahkre ho mē pa xwÿnh maatijaja pa mē awÿr kumē.

24 Na xep ra ja rūm mē ixkwÿjaja ma mē awÿr mō nē mēmoj tā tanhmā mē amā karō hto. Mē ate amnhÿ my kwÿrÿt kà jakār nē amnepēm mē inhigēt Mojes kapēr kôt amnhÿ nhÿpēx o apa hā mē amā karō. Ka xep mē tee ri ja kukamā ajamaxpēr. No mē pajaja na pa prem mē awÿr mē rēnh kēt nē. Ām amnhÿ krā hkôt na prem mē awÿr mō nē ā mē amā ja hā karō anē.

25 Tā pa tee ri mē harēnh ma nhūm ja mē ixpē omnuj tÿx nē. Jakamā na pa mē jar akuprō nē mē akaxyw mē inhÿōja wa kuta. Wa kot ma Panāpe mē Pawre wa hkôt mē awÿr wa mōr nē mē amā mē ixkapēr jarēnh kaxyw. Panāpe mē Pawreja mē inhmā wa hapē htÿx. 26 Na hte mē amā Pahihti Jejus Kris kapēr jarēnh o pa kaxyw wa amnhÿ grōnh kôt mē amā harēnh o pa.

27 Tā pa mē akupÿm mē awÿr wa kumē nē wa hkôt mē pahtō Jut mē Siras wa kumē. Mē ixte mē amā kagā kamā mē ixkapērja nhūm wa kot hprÿ hā mē amā harēnh kaxyw pa mē wa hkôt mē awÿr wa kumē.

28-29 E ja pix nē kot paj mē akurē:

Kēr ka mē sānti hā mē ō hkur kēt nē.

Nē mēmo mry kamrô kur kêt nē. Jao mēmo mry pa nē hkamrô runh kêt rāhā hkur kêt nē. Kamrô runh pa nē rī kormā tanhmā ho nē aku.

Nē kēr ka mē amyjaja amnhī prô pix tânopxar o apa.

Nē mē anijaja ajaxwýja amnhī mjên pix tânopxar o apa.

E âm ja pix kot paj mē amā hā karô. Tirtüm Karô kām ja mex. Nē mē inhmä mãânên ja mex. Kot kaj mē ā amnhī nhîpêx anhÿr o ri apa nē amex nē apa.

Tā âm ja pix. Mē ixpê Jejus kwýjê jahkre xwýnhjê mē Jejus nhÿ hā mē ahkre xwýnh maatiêj mē pa mē mē awÿr kagâja nhîpêx nē kumê. E kēr ka mē amex nē akînh nē ri axpên kôt apa. Âm ja pix na hapêx. Anê.

Nhüm prem ā kagâ kamā mē kām mēmoj tâ karô anê. ³⁰ Hāmri nē Jut wa mē kām kugô nē ma āxiok wÿr wa mē kumê nhüm wa mē ma akupÿm hwÿr o mô. Jut nē Siras nē Pawre nē Panāpeja nhüm wa mē ma akupÿm mē hwÿr o mē mô. Môð hāmri nē mē hwÿr pôj. Hāmri nē Jejus kwýjê ho akuprô nē mē kām kagâja gô ³¹ nhüm mē kupy nē kamā harê nē kuma. Kamā mē kot mē kām mēmoj tâ karô kamā harê nē kuma nē ÿ hā hkînh nē akupÿm tām hamaxpêr.

³² Jut mē Siras wa kêp Tirtüm nhÿ hā kapêr o pa xwýnh na pre wa. Jakamā na prem mē hwÿr môn pôj hāmri mē kām tanhmā ujarênh to ho pa. Mē kot Jejus kôt pix mã hamaxpêr o pa kaxyw mē kām ujarênh o pa nē mē kām:

—E kēr ka mē māmri Jejus kôt amnhī nhîpêx mex rāhā ho ri apa nē aa hkaga hkêt nē. Anê.

³³ Hāmri nē mē hkôt ri pa hā apkati xohtô nē. Hāmri nē wa akupÿm Jerujarê hwÿr nojarêr nē mē kām amnhī jarê nhüm mē wa kuma nē wa kām:

—Tôe. Nà wa māmri ma akupÿm mô. Koja Tirtüm war apumunh mex nē ka wa ma akupÿm amex nē akà hkînh pê akwýjê hwÿr akato. Anê.

³⁴ Hāmri nhüm wa nojarêr tâ nhüm Siras tanhmā hamaxpêr to nē hitôt nē mē kuri arîk nhüm Jut Pasapas pix ma akupÿm hkwýjê kot mē hwÿr wa mēnh xwýnhjê hwÿr mô.

³⁵ Hāmri nhüm Pawre mē Panāpe wa Siras pyrâ nē kormā āxiok kamā pa. Hāmri nē Jejus kôt mē htô hkwýjê mē pimràatâ mē ahkre ho pa. Tirtüm kapêr o mē hkôt mē ahkre ho pa.

Pawre mē Panāpe wa kot axpên pê pikjêr ā wa harênh

Atre 13.13; Korosê 4.10

³⁶ Hāmri nhüm Pawre mē Panāpe war arî mē hkôt ri pa hā apkati xohtô nē. Tā nhüm Pawre hamaxpêr nē Panāpe mã:

—Kwa ma pu ma akupÿm ra pahte krî hkwy hkôt mē kām Jejus jarênh o papa xwýnhjê hkôt akupÿm mô. Pu ma mē hwÿr mô nē Jejus kôt pahtô nē pahôtôxjê kot tanhmā ri amnhī nhîpêx to hā mē omu. Anê.

³⁷ Hāmri nhüm kuma nē kām:

—Tôe. Nà pu ma mô. Nom kēr pu ma amnhī kôt Juāw Makre ho mô kê axte pahto ajuta ho pahkôt mô. Anê.

³⁸ Hāmri nhüm Pawre tee ri kuma nhüm ja kêp omnuj nē nhüm kām:

—Tk. Kwa na pre pahkôt pa htâ Pāpir kamā tanhmā hamaxpêr to nē pahkaga nē ma akupÿm Jerujarê hwÿr mô. Jakamā kwarî koja axte pahkôt môr kêt nē. Anê.

³⁹ Hāmri nhüm Panāpe tee ri hā hihtÿx no nhüm kêp hkaga kumrêx. Jakamā nhüm wa ja hā axpên pê axkjê nē ma ahpÿnhā mô. Nhüm Panāpe amnhī kôt Juāw Makre ho mô nē wa ma pâr kām gô hipôk pê Sipre hwÿr wa mô. ⁴⁰ Nhüm

Pawre axtem amnhĩ kôt Siras wỳ nē ma wa mō. Hāmri nē wa nojarēt nhũm Jejus kôt wa htōjaja wa ho Tirtũm wỳ nē kām:

—Pa Tirtũm. E koja Pawre mē Siras wa ma krĩ hkwỳ hkôt mē kām akapēr jarēnh o ri wa pa. Jakamā kēr ka wa htānopxar o ri wa hkôt apa. Anē.

Hāmri nhũm wa kato nē ma krĩ hkôt ri Jejus kapēr o mē ahkre ho wa pa. ⁴¹ Wa ma pyka pē Sir mē Siris kôt Jejus kôt mē htō nē mē htōxjē pununh nē Jejus kôt mē ho mē hihtýx o wa pa kaxyw.

16

Ximotre kot Pawre mē Siras wa hkôt ri pa hã harēnh

Wam Ximotre 1.1-2; Sikũn Ximotre 1.5; Piripos 2.19-22

¹⁻³ Tã nhũm Pawre mē Siras wa ma akupým krĩ pē Tepe hwýr wa mō nē hwýr pōj nē hpānhã kurũm ma Risti hwýr mō. Hāmri nē wa hwýr pōj nē kamã Ximotre pumu. Ximotre na pre ra katorxã pyrà nē Jejus kôt amnhĩ xãm nhũm mē kot Jejus kôt axpēn to htō xwýnhjaja kãm hapē nē. Nē kot Jejus kapēr kôt amnhĩ nhĩpēx mex o pa hã axpēn mã harē.

Krĩ pē Risti mē Ikõn kamã nhũm prem ã axpēn mã Ximotre jarēnh anhýr o pa. Jakamã nhũm Pawre mē Siras wa mō nē mē hwýr pōj nē Ximotre kot amnhĩ nhĩpēx ã omu nhũm Pawre kãm war amnhĩ kôt o mōr prãm nē. Nom Ximotre hkamrõ pihkãr na pre. Katorxã kēp Ijaew nhũm hipēexã kēp Gres jakamã nhũm ã Ximotre hkamrõ pihkãr anē. Nhũm Ijaew kot katorxã hkôt kēp Ijaew ã omunh jakamã nhũm Pawre hamaxpēr nē mē kaxyw kēp my kwýrýt kã krãhta nē arĩ kormã mē hwýr amnhĩ kôt o mō. ⁴ Hāmri nē mē ma krĩ hkwỳ hkôt mō. Mōõ nē Ijaew kēt xwýnhjaja ra kot amnhĩ kaxyw Jejus kôt hamaxpēr xwýnhjê jahkre ho mē hkôt pa. Ra Jerujarē kãm mē kot Jejus kwýjê jahkre ho pa xwýnhjê mē Jejus nhý hã mē ahkre xwýnh maatijaja mē kot mē kãm mēmoj tã karõta nhũm mē ma mē kãm harēnh o ri mē hkôt pa. ⁵ Hāmri nhũm mē kuma nē ra Jejus kôt amnhĩ nhĩpēx mex o mō. Hāmri nhũm apkati mē krĩ nhõ xwýnh kwýjaja mē urãk nē Jejus kôt amnhĩ xunhwý. Jakamã nhũm mē ra ohtō rax o mō.

Pawre tanhmã hpimtir to hã harēnh

Rõmãn 15.18-21

⁶ Tã nhũm Pawre mē Siras mē Ximotre mē ma pyka pē As wýr nojarēt. Mē kot mē kãm tanhmã Jejus jarēnh to ho pa kaxyw mē hwýr nojarēt tã nhũm Tirtũm Karõ kormã mē nē mē hkurē. Jakamã nhũm mē hpānhã ma pyka hkwỳ pē Prik mē Karatas wa hkôt pa. Ixpē Rukre na pa pre mē hã ajēt nē ma mē hkôt ixpa ho ixpa. ⁷ Hāmri nē mē pyka pē Mĩs ã mō nē hpānhã ma Pitĩn wýr inhmõr mã tã no nhũm Tirtũm Karõ axte kē mē nē mē ixkurē. ⁸ Jakamã pa mē arĩ Mĩs jakãr ã mō nē gõ xujanãr mý ri krĩ pē Tõx wýr pōj.

⁹ Tã nhũm kamãt pa mē xpiitã gõr nē inhĩkwý nhũm Pawre tanhmã hpimtir to. Nhũm xep pika pē Masetõn nhõ xwýnhja mē amnhĩ wýr hwýr kãm hihtýx o xa nhũm hprĩ hã omu nē kapēr ma. Nhũm xep pre kãm:

—Pa Pawre? Kwa amnē Masetõn wýr mē ixwýr mō nē tanhmã mē ijahkre hto. Anē.

¹⁰ Hāmri nhũm Pawre hkrãkato nē mē inhmã hpimtir jarē. Pa mē kuma nē axpēn mã:

—Tõ kwa tokyx pu mē hwýr. Tirtũm kot mē hwýr mē parēnh kēnã. E pu mē ma mē hwýr mō nē mē kãm Jejus jarēnh o mē ahkre. Anē.

Hāmri nē amnhĩ to akuprõ nē mē hwýr inhnojarēt kurē kumrēx.

Ritre kot Jesus kôt amnhî xãm ã harênh

Piripos 1.1

¹¹ Hãmri pa mẽ ma Masetôn wÿr mō. Tōx rŭm ma pàr kãm hwÿr mō. Hãmri nê gō nhîpōk pê Samōtas wÿr pōj nhŭm mẽ hã pàr nhō. Hãmri nhŭm apkati pa mẽ axte mō nê Masetôn kamã krî pê Nêap wÿr pōj. ¹² Hãmri nê pàr rŭm ijpapōj nê hpãnhã kurŭm hamŭ krî pê Piripos wÿr ixpar o mō. Piriposja Masetôn kamã krî maati na. Rôm nhō xwÿnhjaja na prem ho kato. Jakamã pa prem ma hwÿr mō nê pōj nê tokyx axte kurŭm nhÿhÿm inhmōr kêt nê. ¹³ Hãmri nhŭm sap kato pa mẽ axpên mã:

—Kwa pyhti mÿri mãn hte Ijaewjaja axpên wÿr akuprō nê Tirtŭm mã amnhî jarênh o hkrî nã. E kwa pu mẽ hwÿr nê gō mÿri mẽ hapêr o ri papa. Anê.

Hãmri nê ma hwÿr mra nê mẽ hapêr o ri ixpa nhŭm ãm mẽni pixjaja axpên wÿr akuprō. Pa mẽ omu nê mẽ kuri ixkrî nê mẽ kãm Jesus kapêr jarênh o mẽ ahkre o ixkrî. ¹⁴ Nhŭm mẽ kot mẽ inhmar o hkrî xwÿnhjê hō pê Ritreja. Krî pê Xijaxir nhō xwÿnh na pre. Nê kêp kupêxê mex o wênê xwÿnh. Na pre hte kãm Tirtŭm prãm o pa. Jakamã nhŭm Pawre kot mẽ ahkre ho ÿrja rôm nhŭm Pahihti Jesus tanhmã Ritre hkrã hto nhŭm hprî hã Pawre kapêr mar tÿx nê. ¹⁵ Hãmri nê amnhî kaxyw Jesus kôt hamaxpêr nê hkôt amnhî xãm kurê kumrêx. Őrkwÿ kamã hkwÿjê mẽ nhŭm mẽ hkôt amnhî xunhwÿr pa. Jakamã pa mẽ kêp Jesus kwÿ hã mẽ hkrã kumrã. Mẽ piitã mẽ kot mẽ kêp Tirtŭm kra hã mẽ omunh kaxyw. Hãmri nhŭm Ritre amnhî kôt mẽ ixwÿ nê mẽ inhmã:

—An kot kaj mẽ ixte Jesus kôt amnhî xãm tÿx ã ixpumu hã kot kaj mẽ ma ixkôt mō nê hpãnhã inhōrkwÿ kamã pōj nê apa. Anê.

Pa mẽ kuma nê ma hkôt mō.

Mê kot Pawre mẽ Siras wa haxàr ã mẽ harênh

Makre 1.23-26, 1.34

¹⁶ Tã nhŭm arġgro hō hã pa mẽ Tirtŭm mã amnhî jarênh kaxyw axte pyhti mÿri mẽ pikuprōnh xaja wÿr mō. Hãmri nê pry kamã mẽ kãm ãpênh xwÿnh nija pumu. Ra mẽkarōmnuti kot tanhmã hkrã hto nhŭm ÿ hã ãhpumunh tÿx xwÿnhja. Nhŭm hte mẽkarōmnuti nhÿ hã mẽ kãm mẽmo hkukamã tanhmã ujarênh to ho pa. Jakamã nhŭm ò patrãwjaja kukwak ri ujamÿnh rŭnh pê hkĭnh nê pa. ¹⁷ Jakamã pa mẽ mō nhŭm nija mẽ ixpumu nê mẽ ixtã ajêt nê ma mẽ ixkôt mō. Hãmri nê mẽ kãm mẽ ijarênh o mẽ ixkôt mō nê mẽ kãm:

—Xê mẽ mran jajê pumu. Na htem Tirtŭm maati mã tanhmã amnhî nhîpêx mex to ho pa. Tirtŭm kot mẽ ate amnhî tomnuj pê tanhmã mẽ apytãr to hã mẽ amã ujarênh kaxyw na mẽ awÿr mra. Anê.

¹⁸ Nê ãm xatã mẽ kãm mẽ ijarênh o mẽ ixkôt paja o ra hã apkati xohtō nê. Tã nhŭm Pawre ra kãm mar kaga nê nê mẽkarōmnuti mã kapêr nê kãm:

—Tk. Kwa kêp akato nê ma tē. Pa Jesus Kris nhÿ hã amã ixkapêr ka inhma nê kêp akato nê ma atēm kurê kumrêx. Anê.

Hãmri nhŭm kuma nê kêp kato nhŭm akupÿm tãm hkrã. ¹⁹ Jakamã nhŭm ò patrãwjaja tee ri ja hã omu nê gryk tÿx nê axpên mã:

—Kwa ra mẽkarōmnutijaja kêp kator jakamã koja axte mẽmoj kukamã tanhmã ujarênh to hkêt nê. Pu mẽ kukwak ri axte paxujamÿnh kêt nê. Anê.

Hãmri nê Pawre mẽ Siras wa kamã gryk tÿx nê. Hãmri nê wa unê nê ma mẽ kot axpên mar xã hã ixkre hwÿr wa hkĭnh o tē ²⁰ nê mẽ kot mẽ ho amnhîptãr xwÿnhjê mã tanhmã wa ho hêx to nê mẽ kãm:

—Kwa mẽ amñê Ijaewja wa omu. Na hte wa mẽ panhõ krī kamā hêx pix o pa nhũm mẽ tee ri wa kapêr ma nê wa kamā gryk tỳx nê. ²¹ Mẽ ixte amnhĩ nhĩpêx te kot axpên pyrāk kêt tâ nhũm wa mẽ kot amnhĩ nhĩpêx o mẽ pajahkre kaxyw nhỹhỹnh mẽ pahwỳr mō. Nom mẽ pahpê Rõm nhõ xwỳnhjaja axtem mẽ pahte amnhĩ nhĩpêx kênã kot pu kêt wa kuma nê wa kapêr kôt amnhĩ nhĩpêx. Anê.

²² Hãmri nhũm mẽ kuma nê piitã wa kamā gryk tỳx nê. Hãmri nhũm mẽ ho amnhĩptâr xwỳnhjaja wa kêp wa ê kaxõnh o hkapa nê wa hã mẽ õ pôristi mã amỳnê nê mẽ kãm:

—E mẽ ma wa o tẽ nê mẽ htak xà ho wa htak. Anê.

²³ Hãmri nhũm mẽ kuma nê ma wa o tẽ nê wa htak rax nê. Hãmri nê wa haxà nê mẽ hagjênh xà jamãr xwỳnh mã kãm:

—E kêr ka ja wa omunh mex nê kê wa kator kêt nê. Anê.

²⁴ Hãmri nhũm mẽ kuma nê wa o tẽ nê ixkre jatur xà kamã wa haxà nê wa kator pymaj hamẽ wa htem pĩ jaxà nê ho htỳx nhũm wa arĩ hte tỳx nê nhỹ.

²⁵ Tã nhũm kamãt. Nê kôt ã kamãt nhũm wa Tĩrtũm mã amnhĩ jarẽ nê mex o mex ã wa grer o wa nhỹ nhũm wa urāk nê mẽ hagjênh xwỳnhjaja wa mar o hkrĩ. ²⁶ Puh nhũm pyka mẽ kãm htertet tỳx nê nhũm mẽ hã ixkreja amnhĩ to àpêr tỳx nê amnhĩ kahê xà rênh pa. Nhũm mẽ hagjênh xwỳnhjê kaxpre xà piitã mẽ nê pirênh pa. ²⁷ Hãmri nhũm mẽ hamãr o kuhê xwỳnhja pika tertet kamã ama nê hkrākato. Hãmri nê mẽ hã ixkre jakwakre kahê xà rênh parja pumu nê mẽ hagjênh xwỳnhjaja hapõx par ã mẽ hkamnhĩx nê tee ri amnhĩ kukamã hamaxpêr. Hãmri nê pahi kot mẽ hã hpĩr pymaj õ wapo kapa nê ra tãm kot ho amnhĩ pĩr kaxyw. ²⁸ Hãmri nhũm Pawre tee ri ja hã omu nê kãx pẽ kãm amỳra nê kãm:

—Kwa amnhĩ pĩr kêt nê. Ot pa mẽ arĩ ixpiitã ixkuhê. Na pa mẽ ixtõ ixkator nê ixprõt kêt nê. Anê.

²⁹ Hãmri nhũm kuma nê kanê hã ahwỳ nê kuwy nê mẽ hwỳr axà nê mẽ piitã mẽ omu. Hãmri nê Pawre mẽ Sirasja wa omu nê wa hwỳr kãm ma ho htertet o tẽ. Hãmri nê wa hã hpijaam kaxyw wa kutã tẽm nê hkõnkrã ho nhỹ. ³⁰ Hãmri nê kãnhmã xa nê wa ho kato nê ixkre kapem wa o xa nê wa kãm:

—Kwa tanhmã kot pa amnhĩ nhĩpêx to kê Tĩrtũm war apyrã nê ixte amnhĩ tomnuy pẽ ixpytã? Anê.

³¹ Hãmri nhũm wa kãm:

—Nà kot kaj amnhĩ kaxyw Jejus Kris kôt ajamaxpêr nê hkôt amnhĩ xãm nhũm Tĩrtũm ja hã apumu nê amnhĩ katut kôt ate amnhĩ tomnuy piitã rênh pa. Nhũm anhõrkwỹ kamã akwỳjaja apyrã nê Jejus kôt amnhĩ xunhwỳr nhũm ã mẽ hipêx anê. Anê.

³² Hãmri nê wa ma hkôt õrkwỹ hwỳr tẽ nê hpri hã mẽ kãm Tĩrtũm kapêr jarẽ nhũm mẽ wa mar o hkrĩ. ³³ Hãmri nhũm mẽ hagjênh xà jamãr xwỳnhja wa kãm wa htak xà kuhê. Kormã kamãt kô hkwy kamã wa kãm kuhõ nê hkane. Hãmri nhũm wa mẽ kot Jejus kôt amnhĩ xunhwỳr par ã mẽ omu nê mẽ hkrã kumrã. Mẽ hamãr xwỳnh mẽ hkwyjê mẽ hkrã kumrãr pa. ³⁴ Hãmri nhũm mẽ kot amnhĩ kaxyw Tĩrtũm kôt hamaxpêr jakamã piitã hkĩnh nê. Hãmri nhũm mẽ hamãr xwỳnhja õrkwỹ hwỳr Pawre mẽ Siras wa o tẽ nê wa kãm õ nhũm wa apku nhũm ma akupỳm mẽ hagjênh xà hwỳr wa o tẽ nê akupỳm wa haxà.

*Mẽ kot Pawre mẽ Siras wa kãm urer ã mẽ harênh
Atre 22.25-29*

³⁵ Hāmri nhūm apkati nhūm krī pytār xwýnhjaja mẽ õ pôristi mã anê nhūm mẽ hagjênh jamār xwýnh wýr tē nē kām:

—E na mẽ papytār xwýnhjaja ate Pawre mẽ Siras wa kām anhūrer nhūm wa māmri ma akupým htēm kaxyw hã karõ. Anê.

³⁶ Hāmri nhūm mẽ kuma nē wa hwýr axà nē wa kām:

—E na krī pytār xwýnhjaja ixte war akator kaxyw war atã inhmã karõ. Jakamã e wa māmri axãmnhix ma mõ. Anê.

³⁷ Hāmri nhūm Pawre kām:

—Nã wa ixte tanhmã amnhĩ tomnuj to hkêt tã nhūm mẽ kot wa ixpynênh nē wa ixtak. Wa ijaxwýja wa ixpê Rõm nhõ xwýnh tã nhūm prem axtem nē mẽ piitã mẽ noo mã wa ixtak nē wa ijaxà. Mẽ kot amarĩ Rõm nhõ xwýnh tak nē mẽ hagjênh kêt tã nhūm mẽ ã mẽ noo mã ã wa inhĩpêx anê. Kormã wa ixte tanhmã amnhĩ tã ixãprãr to hkêt tã nhūm mẽ ã wa inhĩpêx anê. Jakamã kwarĩ kot kaj mẽ no hkàx ã wa ixkator kêt nē. Kê mẽ kot wa ijaxàr xwýnhjaja tãm man mra nē wa ixkator pa war arĩ ma mõ. Anê.

³⁸ Hāmri nhūm pôristija kuma nē ma akupým mẽ hwýr mra nē mẽ kām wa kapêr jarê. Hāmri nhūm mẽ tee ri mẽ urãn wa kêp Rõm nhõ xwýnh ã wa harênh ma nē kām ma htýx nē. ³⁹ Hāmri nē ma wa hwýr tē nē wa hwýr axà nē wa kām:

—Pa? E māmri war akato nē axãmnhix ma mõ. Na pa prem war anhĩpêx kati rax nē. Tã kêr ka wa axte ja mã ajamaxpêr hkêt nē. Kê ja ãm jar mẽ pakamã hapêx. Anê.

Hāmri nē wa kator nē wa kām:

—E kwa wa mẽ inhõ krī pê akato nē ma nhýhým mõ. Anê.

⁴⁰ Hāmri nhūm wa kuma nē kato nē ma akupým Ritre nhõrkwý hwýr wa tē. Hāmri nē Jejus kôt wa mẽ htõjê pumu nē wa mẽ kām amnhĩ jarê nē mẽ kām:

—E kot paj hāmri wa mã mõ. Nom kêr ka mẽ arĩ Jejus Kris kôt amnhĩ nhĩpêx mex rãhã ho ri apa nē aa hkaga hkêt nē. Anê.

Hāmri nē wa mẽ kurùm kato nē ma krī hõ hwýr wa mõ.

17

Tesarõn kamã mẽ kot wa kamã gryk ã mẽ harênh

Wam Tesarõn 1.1, 2.13-14

¹⁻² Tã nhūm Pawre mẽ Sirasja wa ma krī hkwy hkôt pa. Piripos rùm ma Apiporip mẽ Apõrõn kôt wa mõ hāmri nē ra Tesarõn wýr wa pøj. Na pre hte Pawre nhýri pøj nē Ijaew nhõ Tirtùm kapêr o mẽ ahkre xà hã ixkre hwýr agjê nē kamã mẽ kām Jejus kapêr jarênh o kuhê. Jakamã nhūm wa mõ nē Tesarõn wýr pøj nē ixkre hwýr mẽ hwýr tē nē mẽ kām ujarênh o xa. Nē mẽ kãm ujarênh o hã arĩgromnu pê sap o axkrunêpxi. ³ Nê hprĩ hã mẽ kãm tanhmã Tirtùm kapêr jarênh to nē mẽ kãm:

—Nã Tirtùm kapêr ã kagã htùm kot mẽ pakaxyw ãm xwýnh jarênh. Amnhĩ xà htýx kamã hamak kãm htyk hāmri nē akupým htĩr ã nhūm kot hkukamã harênh. Tã na pre Jejusja ã amnhĩ nhĩpêx anê. Tãm kêp Krisja. Tirtùm kot mẽ pakaxyw ãm xwýnhhta na. Anê.

⁴ Hāmri nhūm mẽ hkwyja kuma nē wa hkôt hamaxpêr nē wa urak nē Jejus kôt amnhĩ xunhwý. Ijaew kwýjê nē Ijaew kêt xwýnh kwýjaja nē mẽni kot amnhĩ to rũnh xwýnh kwýjaja nhūm mẽ ohtõ nē amnhĩ kaxyw Jejus kôt hamaxpêr nē hkôt amnhĩ xunhwý. ⁵ Tã nhūm Ijaew kwýjaja tee ri hkwy kot wa hkôt amnhĩ xunhwýr ã mẽ omu nē mẽ hã Pawre mẽ Siras wa kamã gryk

tÿx nê. Hâmri nê ma mra nê wa kaxyw mē kot amnhī tomnuj tÿx xwÿnh kwÿjê ho akuprô nê mē kām wa hā amÿnê. Jakamā nhūm mē ma kapēr punuj pē wa hapēr o ri mra nhūm mē piitā mē omu nê mē kuma. Hâmri nhūm mē wa hapēr o ra Jasāw nhōrkwÿ hwÿr mra. Nê mē kot Pawre mē Siras pynēnh nê ma mē utār xwÿnhjê hwÿr wa o htēm kaxyw mē kēp kahê xā mē nê mē hwÿr agjê. ⁶Hâmri nê tee ri ōrkwÿ kamā wa hapēr nhūm wa kamā amrakati. Jakamā nhūm mē Jasāw mē kot Jesus kōt axpēn to htō xwÿnh kwÿjê pynê nê ma mē kot mē ho amnhīptār xwÿnhjê hwÿr mē o mra. Hâmri nê mē kām tanhmā Pawre mē Siras wa ho hēx to. Ām kapēr punuj kām kax pē mē kām wa harē nê mē kām:

—Kwa na hte Pawre mē Siras wa pyka piitā hkōt mē kām ri mēmoj to hēx o pa. Tā wa ra mē panhō krī hwÿr pōj nê jar mē pamā ri tanhmā hēx to ho ri mē pahkōt pa. ⁷Jasāw nhōrkwÿ kamā na pre wa pōj nhūm amnhī wÿr wa kuwÿ. Na hte wa hkōt mē hamaxpēr xwÿnhjaja pahīhti Sesti kapēr kwÿm ri kuhpa hā kapēr o pa nê axtem nê mēō pahi pē “Jesus” anhÿr xwÿnhja kapēr kōt amnhī nhīpēx o pa. Anê.

⁸Hâmri nhūm mē kot mē ho amnhīptār xwÿnhjê mē krī nhō xwÿnhjaja mē kuma nê gryk tÿx kumrēx. ⁹Hâmri nê Jasāw mā kām:

—E kot paj mē apē mē akāxpore hkwÿ jamÿ. Ka mē ajapōj nê ma mē panē Pawre mē Siras wa hano nhūm wa kato nê ma mō pa rī akupÿm mē amā kugō. Anê.

Hâmri nê mē kēp mē hikāxpore hkwÿ jamÿ.

Pawre mē Siras kot Perej wÿr mōr ā wa harēnh

¹⁰Tā nhūm ra kamāt nhūm mē kot Jesus kōt axpēn to htōjaja hāmri Pawre mē Sirasja wa ma krī pē Perej wÿr wa kumē. Hâmri nhūm wa kato nê ma hwÿr mō nê hwÿr pōj. Hâmri nê Ijaew nhō Tirtūm kapēr o mē ahkre xā hā ixkre hwÿr htēm kurē kumrēx nê wa axā. ¹¹Perej kamā Ijaew na pre te mē kot Tesarōn kamā Ijaew pyrāk kēt nê. Mē kurom mē kām Tirtūm kapēr mar prām nê. Jakamā nhūm pre Pawre mē Siras Tirtūm kapēr o mē ahkre ho pa. Apkati mē mē ahkre mex o pa nhūm mē wa kuma nê hkÿnh nê. Nê Tirtūm kapēr ā kagā htūm kamā wa kot mē ahkreta japēr nê kamā omu nê axpēn mā wa harēnh o:

—Nā ām hāmri na wa ā Tirtūm kapēr o mē pajahkre anē. Tirtūm kapēr ā kagā htūm hkōt na hte wa mē pajahkre. Anê.

¹²Hâmri nê ohtō nê Jesus kōt amnhī xunhwÿ. Ijaew kwÿ nê Ijaew kēt xwÿnh kwÿ nê mēni kot amnhī to rūnh xwÿnhjaja nhūm mē ohtō nê Jesus kōt amnhī xunhwÿ.

¹³Tā nhūm Tesarōn kām Ijaewjaja Pawre jarēnh ma. Kot Perej nhō xwÿnhjê mā Tirtūm kapēr jarēnh o pa hā harēnh ma. Hâmri nê ma mē hwÿr mra nê mē kām tanhmā ho hēx to nhūm krī nhō xwÿnhjaja mē kuma nê ra Pawre kamā gryk tÿx nê. ¹⁴Jakamā nhūm Jesus kōt mē htōjaja mē harēnh ma nê mē umaj Pawre kator nê ma gō xujanār wÿr o mō. No nhūm Siras mē Ximotre wa Perej kamā mē kuri arīk. ¹⁵Hâmri nhūm mē hkwÿjaja ma Pawre o mō. Ma krī pē Atenas wÿr o mō. Hâmri nê hwÿr o pōj nê kamā kure. Hâmri nê ra akupÿm Perej wÿr nojarēt nhūm Pawre mē kām:

—E kēr ka mē ma akupÿm mō nê Siras mē Ximotre wa kām ijarē kē war amnhīm nojarēt nê tokyx man ixkōt wa mō. Anê.

Pawre kot Atenas nhō xwÿnhjê mā kapēr ā harēnh Rōmān 1.18-20

¹⁶ Tã nhũm Pawreja kormã Atenas kamã pa. Siras mẽ Ximotre wa kamã hamak o ri kormã kamã mẽ kot amnhĩ nhĩpêx ã mẽ omunh o pa. Na pre Atenas nhõ xwýnhjaja sãnti ho ohtõ rax nẽ mẽ õ krĩ kamã unhwý nhũm Pawre ri omunh o ri kuhê ho pa. Na pre htem ahpýnhã mẽmo karõ nhĩpêxja o te Tĩrtũm nhĩpêx pyrà nẽ kutã hkõn krã ho rõrõk nẽ hkrĩ nẽ kãm mex o mex ã harẽnh o pa. Hãmri nhũm Pawre tee ri ja hã mẽ omunh o ri mẽ hkõt pa nẽ hkaprĩ nẽ. ¹⁷ Hãmri nẽ ma amnhĩ kwýjê nhõ Tĩrtũm kapêr o mẽ ahkre xã hã ixkre hwýr pa nẽ kamã mẽ ahkre ho kuhê. Ijaewjê mẽ Ijaew kêt xwýnh kot Tĩrtũm ã hpĩaam xwýnhjê mã nhũm Tĩrtũm kapêr jarẽnh o kuhê. Nẽ apkati mẽ mẽ kot mẽmoj to wẽnê xã hwýr mra nẽ mẽ ujárprõr xwýnhjê mã Tĩrtũm kapêr jarẽnh o kuhê. ¹⁸ Hãmri nhũm mẽ mar o pa. Atenas nhõ xwýnhjaja na prem axpẽn kõt amnhĩ nhĩpêx o pa hkêt nẽ. Mẽ hkwýjaja kêp Epikure hkõt amnhĩ nhĩpêx xwýnh. Nẽ mẽ hkwýjaja axtem kêp Etok kõt amnhĩ nhĩpêx xwýnh. Hãmri nhũm Pawre mẽ kãm Jejus kot tanhmã mẽ panê amnhĩ nhĩpêx to hã harẽnh o pa nẽ akupým hũr ã harẽnh o pa. Hãmri nhũm mẽ tee ri kuma nẽ hã axpẽn kukjêr o kuhê nẽ axpẽn mã:

—Tk. Kwa mo na hte myti ata harẽnh o pa? Anê.

Nhũm mẽ hkwýja mẽ kãm:

—Ko. Axtem mẽpahpãm õ na hte tanhmã harẽnh to. Anê.

¹⁹⁻²¹ Atenas nhõ xwýnhjê mẽ axtem krĩ hõ nhõ xwýnhjaja na prem kãm mẽ ujarẽnh nyw mar prãm nẽ. Jakamã nhũm prem mẽmoj jarẽnh nyw ma hãmri nẽ ãm axpẽn mã harẽnh pix o ri pa. Tã ra Pawre xujarẽnh nyw ma nẽ ma amnhĩ kõt mẽ kot axpẽn mar xã hã ixkre hwýr o tẽ. Ixkre pẽ Areopja wýr nhũm prem amnhĩ kõt o tẽ nẽ kãm:

—E kwa aprĩ hã mẽ inhmã ate mẽmo jarẽnh nywta jarẽ pa mẽ ama. Mẽ inhmã mar prãm. Anê.

²² Hãmri nhũm mẽ kuma nẽ mẽ kãm ujarẽnh o xa. Mẽ kot axpẽn mar xã hã ixkre kamã Atenas nhõ xwýnhjê mã awjarê nẽ mẽ kãm:

—E nã na ka htem anhõ mẽmo karõ nhĩpêx xohtõta ã apijaam pẽ kãm amnhĩ jagrer o ri apa. Pa hte ja hã mẽ apumunh o mẽ akõt ixpa. ²³ Na pa ra mẽ anhõ sãnti piitã hkõt omunh o ri ixpa nẽ o mũj hõ kuhê xã kapryja wýr ixkato. Nhũm himõk ã mẽmo karõ nhĩpêx amrakati nom ã hã kagã kot:

MËPAHPÃM PUMUNH KÊT KUHÊ XÃ NA JA

Ã mẽ ate hã kagã kot anhýr. Mẽ ate omunh kêt tã ka htem arĩ hã apijaam o ri apa. No pa na ixte mẽhõja jarẽnh mar mex. Tã kot paj mẽ amã harê ka mẽ inhma.

²⁴ —Mẽpahpãm mẽ ate omunh kêt ã amnhĩ jarẽnhta Tĩrtũm na. Tãm na pre pyka ho kato nẽ kamã mẽmoj piitã ho kator pa. Gõ ho kato nẽ mry ho kato nẽ panhĩ ho kato. ãm mẽmoj piitã ho kator par kumrêx. Na hte pika kamã nẽ kaxkwa kamã mẽmoj piitã ho amnhĩptar mex rãhã ho pa. Jakamã mẽmo kaxyw kot puj mẽ jar kãm õrkwý nhĩpêx? Tãm kêp mẽmoj piitã ho kator xwýnh jakamã kot mẽmoj to presija hkêt. ²⁵ Kêp mẽmoj piitã hpãm jakamã mẽmoj piitã õ na. Jakamã tanhmã kot pu wem amnhĩ to nẽ kãm mẽmoj gõ? Tãm kot mẽmoj piitã ho kator nẽ ho hũr nẽ kot mẽmoj piitã õr kênã kot puj kêt mẽ amnhĩpyrà nẽ kãm mẽmoj gõ. ²⁶ Na pre mẽ pahkukamã ahpýnhã mẽ pahpiitã mẽ papapxã jarê nẽ mẽ pakator hã arĩgro jarê. Na pre mẽ pahpãm kot wa Atãwja nhĩpêx. Jakamã nhũm Atãw kêp mẽ pahpiitã mẽ pahpãr krax.

²⁷ —Tã mẽmo kaxyw na pre ã Tĩrtũm mẽ panhĩpêx mex anê? Nã ãm mẽ pahte amnhĩ kaxyw hkõt pajamxpêr nẽ hkõt amnhĩ xunhwýr kaxyw na pre

mê panhîpêx. Ja mê pahpê hihtÿx kêt. Koja mēhō kām Tirtūm prām nhūm amnhî tā omunh kurê kumrêx.

²⁸—Nê Tirtūm pix kukwak ri na pu htem pahtîr nê tanhmā amnhî nhîpêx to ho ri papa. Mê akwÿ kot kagā jahkre xwÿnhja na pre ja hā kagā nê hā kagā ho: “Mê pahpê mēpahpām kra na pu htem papa.” Anê. Ā hā kagā kot anhÿr.

²⁹—Tā ka prem amnhūm mēmo karō nhîpêx. ôr o hkwy nhîpêx nê prat o hkwy nhîpêx nê kên o hkwy nhîpêx. Hāmri nê hipêx pa nê ho mēpahpām ā harê nê ri hā apijaam o apa. No mê ām amnhî krā hkôt mê ate hipêx. Tirtūm te kot ja pyrāk kêt.

³⁰—Amnepēm mê pa xwÿnhjaja na prem mê apyrā nê ā mēmoj nhîpêx anhÿr o pa nhūm Tirtūm ja hā mê omu nê ām mê omu nê hā tanhmā mê hipêx to hkêt nê. Kormā mê kot kapêr mar kêt jakamā nhūm pre ja hā mê omu nê ām mê omu. Tā na ra mê pahte mēmo karō nhîpêx o mēpahpām nê mê pamā kapêr. Mê pahte hpānhā amnhî kaxyw ām kôt pix mā pajamaxpêr o papaja na kām hprām. ³¹Koja nhÿrmā tanhmā mê pahte amnhî nhîpêx to ho papa hā mê pahpumunh kôt tanhmā mê pajarēnh to. Nê amnhî ri mê htîr tūm nê mê pa ho pa xwÿnhjê jarê nê amnhî ri mê pa hkêt xwÿnhjê jarê. Na pre ra ā mê harēnh anhÿr kaxyw arîgro hta. Arîgrota ā kot hprî hā kām tanhmā mê pajarēnh to kaxyw na pre ra Jesusja xām. Kaxyw na pre akupÿm ho htîr. Nê akupÿm ho htîr jao kot nhÿrmā kām tanhmā mê pajarēnh to xwÿnh ā ho amnhîrit. Anê.

³²Nhūm pre ā Pawre mê kām Tirtūm kapêr jarēnh anê nhūm mê mar o kuhê. Kot mê kām Jesus tyk nê akupÿm htîr ā harê nhūm mê mar o kuhê. Nhūm mê hkwyjaja kuma nê ām kuma nê axtem nê ri hā akunha. Nom nhūm mê hkwyjaja mê kurom mar tÿx nê Pawre mā kām:

—E kwa mê inhmā ja mar prām. Apkati hō hā ka axte mê inhmā ja jarê pa mê ixprî hā mar mex nê. Anê.

³³Hāmri nhūm Pawre akupÿm nhÿri hpôx xā hā ixkre hwÿr ma tē. ³⁴Hāmri nhūm Xiônîs pê Areop kām mê kām kapêr xwÿnh nê mēhō ni pê Tāmaris nê mê hkwyjaja kapêr mar tÿx nê amnhî kaxyw Jesus kôt hamaxpêr nê hkôt amnhî xunhwÿ. Hāmri nê Pawre kôt pa.

18

Pawre Korît wÿr mōr ā harēnh Wam Korît 1.1-3

¹Tā nhūm Pawre krî pê Atenas rūm kato nê ma krî pê Korît wÿr mō nê pōj.
²Hāmri nê nhÿri Akirti pumu. Haxwÿja kēp Ijaew. Krî pê Pôt kamā na pre kato. Tā ma pyka pê Itar wÿr mō nê Itar kamā krî pê Rôm kamā hpānhā pa. Pa ho pa htā nhūm mê ô pahihiti Krawti tanhmā hamaxpêr to hāmri nê mê amnhî nê Ijaew piitā mê hanor pa. Jakamā nhūm Akirti kato nê hprō Prisire mê wa ma Korît wÿr mō. Hāmri nê hwÿr pōj nê kamā pa ho pa. Jakamā nhūm Pawre Korît wÿr pōj nê wa omu ³nê wa kuri pōj nê wa hkôt ri pa. Nê Siras mê Ximotre wa kamā hamak pê wa îhkô hā āpēnh o pa. Wa urāk nê kupêxé pytî ho ixkre nhîpêx nê ho wēnhô ho ri wa hkôt pa. ⁴Hāmri nhūm sap kato nhūm ma Tirtūm kapêr o mê ahkre xā hā ixkre hwÿr pa nê kamā mê kām Tirtūm kapêr jarēnh o hkrî. Ijaew mê Ijaew kêt xwÿnhjê mā nhūm mê kām ujarēnh o hkrî. Nê mê kām Jesus kot mê panê tanhmā amnhî nhîpêx to hā harê.

⁵Tā nhūm Siras mê Ximotre wa ma Masetōn rūm Pawre wÿr mōn pōj. Jakamā nhūm Pawre axte ixkre nhîpêx ā āpēnh kêt nê. Pānhā apkati mê

Ijaewjê jahkre ho pa. Mě kām tanhmā Jejus jarēnh to ho ri mẽ hkôt pa. Kêp Tirtüm kot mẽ pakaxyw âm xwýnh ã harēnh o ri mẽ hkôt pa. Xatã mẽ kām ujarēnh o pa. ⁶ Nom nhũm mẽ kām mar prãm kêt nê kamã gryk kato nê kām kapêr punuj nê. Nhũm Pawre tee ri amnhĩ tã mẽ kuma nê mẽ kãm:

—E ixte mẽ amã Jejus kot mẽ panê tanhmã amnhĩ nhĩpêx to hã harēnh tã ka mẽ amã mar prãm kêt nê. Nã mẽ kam nê mẽ mãmri ate amnhĩ tomnuj kãm ty nê arĩ kam amnhĩ pumu no âm amnhĩ tã tanhmã inhmã nê hkêt nê. Ra mẽ ate Tirtüm kapêr kaga kênã. Nã kot paj mẽ akaga nê ma hpãnhã Ijaew kêt xwýnhjê hkôt ri mẽ kãm ja jarēnh o ri ixpa. Anê.

Hãmri nê kànhmã xa nê hinòkã kapa nê ho apê. Mẽ kot hkaga hã amnhĩ pumunh kaxyw nhũm mẽ noo mã ã amnhĩ nhĩpêx anê. ⁷ Hãmri nê ixkre rùm kato nê hijuk ri Ijaew kêt xwýnh pê Xijutre nhòrkwy hwýr tẽ nê hpãnhã Xijutre hkôt pa ho pa. Xijutre kêp Ijaew kêt tã amnhĩ kaxyw Tirtüm mã hamaxpêr rãhã ho pa.

⁸ Tã nhũm Ijaew ò pê Kriptija hkwyjê rom amnhĩ kaxyw Pahihti Jejus kôt hamaxpêr nê hkôt amnhĩ xãm. Kêp Ijaew nhò Tirtüm kapêr o mẽ ahkre xã hã ixkre kamã mẽ ahkre xwýnh na pre. Jakamã òrkwy kamã hkwyjê mẽ mẽ hpimràatã Pahihti Jejus kôt amnhĩ xunhwýr pa. Nê krĩa kamã ra Ijaew kêt xwýnh ohtò nê Kripti pyrà nê amnhĩ kaxyw Jejus kôt hamaxpêr nê hkôt amnhĩ xunhwý. Jakamã nhũm Pawre mẽ kêp Jejus kwý hã mẽ piitã mẽ hkrã kumrà.

⁹ Tã nhũm kamãt nhũm Pawre gôr nê nõ nê amýti nhũm kêwe Pahihti Jejus axte hwýr kato nê kãm kapêr nê kãm:

—Pa Pawre? E kwa kër ka mãmri axãmnhĩx ri atar mẽ kãm ijarēnh rãhã ho ri apa nê amnhĩ kamã akahak o ri mẽ hkôt apa hkêt nê. ¹⁰ Kot paj atãnopxa nhũm mēhõ tanhmã ato hkêt nê. Krĩ ja kamã koja mẽ ohtò nê ixkôt amnhĩ xunhwý. Anê.

¹¹ Nhũm pre ã Pahihti Jejus Pawre hpimtir kãm kãm kapêr anê. Jakamã nhũm Korit kãm arĩ ri mẽ hkôt pa ryy nê. Arĩ mẽ hkôt pa hã amgrã pyxi nê hkôt mytwrý kêp 6. Jao Tirtüm kapêr o mẽ ahkre ho ri mẽ hkôt pa.

¹² Tã nhũm Korit nhò xwýnhjê nhò pika pê Gres kamã mẽ ho amnhĩptar xwýnh nyw Gartija. Korit kãm pa jakamã nhũm Ijaew xàptar tùmrejaja Pawre pynê nê ma hwýr o tẽ nê kãm tanhmã ho hêx to. ¹³ Jakamã nhũm Ijaew pikuprõnh xã hã ixkre kamã mẽ kãm kapêr xwýnh Sostenesja Garti mã Pawre o hêx nê kãm:

—Kwa jahti na hte mẽ ixpê Ijaew kot amnhĩ nhĩpêx kwým ri mẽ ahkre ho pa. Jao mẽ ixte axtem nê tanhmã Tirtüm kôt ri amnhĩ nhĩpêx to ho ri ixpa kaxyw mẽ inhmã karõ ho pa. Nom mẽ ixte amnhĩ nhĩpêx kuhpa hã mẽ inhmã karõ. Anê.

¹⁴ Hãmri nhũm ra Pawre kot Garti mã amnhĩ jarēnh mã tã nhũm Garti amnhĩ to wa nê hã mẽ kãm kapêr nê mẽ kãm:

—Tk. Kwa kot tanhmã amnhĩ tomnuj tore hã. Kot tanhmã amnhĩ tomnuj to nhũm mẽ ate inhmã harēnh ronhýx pa arĩ mẽ ama nê tanhmã mẽ amã hipêx to. ¹⁵ No xep âm kot mẽ axàptar tùmrejaja kot amnhĩ nhĩpêx kuhpa hã pix mã kot amnhĩ nhĩpêx o pa kênã. Nê mẽ ate mẽ ahkre kuhpa hã kot ri mẽ ahkreja pix mýrapê na ka mẽ kamã agryk nê ã inhmã ho akapêr anê. Nã kot paj ja hã tanhmã ho hkêt nê. Ka mẽ kam nê amnhĩ krã hkôt tanhmã ho hprãm xã hkôt tanhmã ho. Anê.

¹⁶ Hãmri nê amnhĩ nê mẽ hano. ¹⁷ Hãmri nhũm mẽ tee ri kuma nê ra Sostenes kamã gryk nê. Kot Garti mã tanhmã Pawre jarēnh to htã nhũm

kuma nê ãm mar jakamã nhũm mẽ hã Sostenes kamã gryk. Hãmri nê unê nê Garti noo mã htak o xa. Nê htak rax nê. Nom nhũm hã mẽ omu nê ãm mẽ omu nê nê tanhmã mẽ kãm nê hkêt nê.

Pawre kot akupÿm ãxiok wÿr mōr ã harēnh

¹⁸ Tã nhũm Pawre arĩ Korĩt kamã mẽ hkôt pa nê gaa nê nojarêt nê Jejus kôt htôjê mã amnhĩ jarê nê mẽ kãm:

—E kot paj ma akupÿm pika pè Sir wÿr mō. Anê.

Hãmri nê mẽ kêp kato nê ma hwÿr mō. Nê ma amnhĩ kôt Akirti mẽ hprō Prisire wa o mō. Mōō nê krĩ pè Sēnkrej wÿr pōj. Nhũm Pawre amnhĩ kukamã mẽmoj tã tanhmã Tĩrtũm mã amnhĩ jarēnh to nê amnhĩ jarēnh xà hkôt amnhĩ krã hkēnh pa. Ijaew kot amnhĩ nhĩpêx xà hkôt ã amnhĩ nhĩpêx anê. Hãmri nê mẽ pàr wÿr agjê nê Sēnkrej rũm kato nê ma Sir wÿr mō. ¹⁹⁻²¹ Mōō nê krĩ pè Epes wÿr pōj. Hãmri nhũm Pawre mẽ hkwÿjaja pàr rũm hapōj nê krĩ hwÿr agjê nê Ijaew nhō Tĩrtũm kapēr o mẽ ahkre xà hã ixkre hwÿr mra nê hwÿr agjê nhũm Pawre mẽ kãm Tĩrtũm kapēr jarēnh o nhÿ. Hãmri nhũm mẽ kuma nê kãm mar prãm nê. Nê kãm:

—Kwa anojarêt kêt nê. Kritpēm mẽ ixkôt ri apa ryre nê Tĩrtũm kapēr o mẽ ijahkre. Mẽ inhmã ja mar prãm.

Anhÿr tã no nhũm mẽ kãm:

—Nã kot paj ma mō. Nom koja Tĩrtũm nhÿrmã akupÿn mẽ awÿr inhmẽ pa man akupÿn mẽ awÿr mō nê axte kapēr o mẽ ajahkre. Anê.

Hãmri nê ma mō. Ma Epes rũm pàr kãm mō. Nom nhũm Akirti mẽ Prisireja wa Epes kamã arĩk nê hpãnhã kamã pa ho pa.

²² Tã nhũm Pawre krĩ pè Sejarej wÿr pōj. Hãmri nê hpãnhã kurũm ma akupÿm Jerujarê hwÿr mō. Kot Jejus kôt htôjê pumunh mã ma mẽ hwÿr mō. Hãmri nê mẽ hwÿr pōj nê mẽ omu nê tanhmã mẽ kãm amnhĩ jarēnh to nê mẽ kêp kato nê ma akupÿm ãxiok wÿr mō. ²³ Hãmri nê hwÿr pōj nê kamã mẽ hkôt ri pa ryy nê mẽ kurũm kato nê hpãnhã ma akupÿm pyka pè Prik mẽ Karatas wa hwÿr mō. Nê kamã mẽ kot Jejus kôt amnhĩ xunhwÿr xwÿnhjê jahkre ho pa. Mẽ kot Jejus kôt amnhĩ nhĩpêx tÿx rãhã ho pa kaxyw mẽ hkôt mẽ ahkre mex o ri mẽ hkôt pa.

Apor kot Epes kãm Tĩrtũm kapēr jarēnh

Epes 1.1-2; Wam Korĩt 3.6-9

²⁴ Tã nhũm Epes wÿr Ijaew ò pè Aporja mō nê hwÿr pōj. Krĩ pè Aresãn kamã na pre kato. Na pre hte amnhĩ kaxyw Tĩrtũm kôt pix mã hamaxpēr nê kapēr ã kagà htũm mar tÿx nê. Jakamã mẽ kãm harēnh mex o pa nhũm mẽ piitã kãm mar prãm nê. ²⁵ Nom kormã Jejus jarēnh jatur xà mar kêt jakamã ãm mẽ kãm hkrax pix jarēnh o pa. Juãw Paxis kot tanhmã mẽ ahkre htoja nhũm mar tÿx nê. Nê tanhmã kot mẽ hkrã kumrãr to ho paja nhũm mããnhēn mar tÿx nê. Jakamã na pre hte mẽ kãm ja pix jarēnh o pa. No Jejus kêp Tĩrtũm kot mẽ pahwÿr mẽnh xwÿnh ã harēnhja nhũm kormã mar kêt nê. Tã Epes wÿr mō nê pōj. ²⁶ Hãmri nê Ijaew nhō Tĩrtũm kapēr o mẽ ahkre xà hã ixkre hwÿr axà nê kamã mẽ kãm ujarēnh o nhÿ. Amnhĩ kamã kahak kêt nê ãmnhix ri mẽ kãm ujarēnh mex nê. Hãmri nhũm Prisire mẽ Akirti wa kot mẽ kãm ujarēnh ã kuma nê war axpēn mã:

—Kwa mãn kormã Jejus jarēnh piitã mar kêt. E pu amnhĩ kôt panhōrkwÿ hwÿr o tē nê pahprĩ hã kãm harēnh jatur xàm kumẽ kê hprĩ hã mar pa. Anê.

Hãmri nê war amnhĩ kôt kuwÿ nê hprĩ hã kãm ujarēnh jatur xàm kumẽ nhũm hprĩ hã harēnh piitã mar tÿx nê.

²⁷ Tã ra pyka pê Gres wÿr nojarêt nê Jejus kôt htôjê mã amnhî jarê nhÿm mē kuma nhÿm ja mē kãm mex nê. Hãmri nê Gres kamã Jejus kôt mē htôjê mã kagã nhîpêx. Apor kot mē hwÿr amnhî kôt o mōr nê mē kãm ôr nhÿm mē kot omunh nê kamã harênh nê ho mex kaxyw mē kãm hipêx. Hãmri nê hipêx pa nê kãm kugô nhÿm kupy nê mē kurÿm kato nê ma mē hwÿr mō. Hãmri nê mē hwÿr pōj. Gres nhô xwÿnh kwÿjaja na prem ra Jejus kôt amnhî xunhwÿ. Tÿrtÿm kot mē kutã nojarêt jakamã nhÿm mē ra hkôt amnhî xunhwÿ. Jakamã nhÿm Apor mē hwÿr pōj hãmri nê mē ïhkô hã tanhmã mē ho ajuta hto ho pa. ²⁸ Nê xatã Ijaew mã tanhmã Jejus jarênh to kamã hihtÿx o mē hkôt pa nê mē kãm:

—Nã Jejusja tãm na pre Tÿrtÿm mē pakaxyw ãm. Tÿrtÿm kapêr ã kagã htÿm kamã ã harênh kot anhÿr. Anê.

19

Pawre akupÿm Epes wÿr mōr ã harênh Rukre 3.15-16

¹ Tã nhÿm Apor kormã Korït kãm pa ri nhÿm Pawre ma akupÿm Epes wÿr mō. Ma krãhakÿx kôt akupÿm hwÿr mō. Hãmri nê hwÿr pōj nê mē kot Jejus kôt amnhî nhîpêx o mē pa xwÿnhjê pumu. Nhÿm mē kormã Jejus jarênh jatur xã mar kêt nê. ² Jakamã nhÿm Pawre mē hwÿr mō nê mē omu nê Tÿrtÿm Karô hã mē hkukja nê mē kãm:

—Kwa mē ate Jejus kôt amnhî xunhwÿr xã hã arïgrota ã xã na pre Tÿrtÿm Karô mē akarô mã agjê? Anê.

Hãmri nhÿm mē kuma nê kãm:

—Nã mē ixte Tÿrtÿm Karô jarênh mar kêt. Anê.

³ Hãmri nhÿm mē kãm:

—No mēmoj kôt na prem mē akrã kumrã? Anê.

Nhÿm mē kãm:

—Nã Juãw Paxis kot mē hkrã kumrãr o paja kôt na prem mē ixkrã kumrã. Anê.

⁴ Hãmri nhÿm Pawre mē kãm:

—Nã Juãw Paxis na pre Ijaew mã kapêr o: “Kot kaj mē mē ate amnhî tomnuj kaga nê hpãnhã tãm amnhî nhîpêx pa hã mē akrã kumrã.” Anhÿr o mē kãm kapêr o pa. Nê mē kãm Jejus jarênh o: “Koja tokyx mēhō ixkôt hapu hã mē pahwÿr kato nê tanhmã amnhî nhîpêx to ho pa. Ka mē omu nê amnhî kaxyw hkôt ajamaxpêr nê hkôt amnhî xunhwÿ.” Anê. Tã Jejusja na pre ã mē kãm harênh anhÿr o pa. Anê.

⁵ Nhÿm pre ã Pawre mē kãm Juãw Paxis mē Jejus wa harênh anê nê hpãnhã Jejus nhÿ hã mē hkrã kumrã. ⁶ Hãmri nê hpãnhã mē hã ïhkra jaxwÿ nhÿm Tÿrtÿm Karô mē hwÿr wÿr nê mē hkarô mã gjêx pa. Hãmri nhÿm mē ÿ hã ahpÿnhã axtem mē kapêr kwÿ ho kapêr nê ÿ hã Tÿrtÿm mex o mex ã harênh o kuhê. ⁷ ã mē kot amnhî nhîpêx anhÿr xwÿnhjaja kêp 12.

⁸ Tã nhÿm Pawre Epes kãm Ijaew nhô Tÿrtÿm kapêr o mē ahkre xã hã ixkre hwÿr mrar ã mytwÿr axkrunêpxi. Amnhî kamã kahak kêt nê hprî hã Ijaew mã hprî hã Jejus jarê nê mē kãm:

—E pa mē amã Jejus jarê mē inhma. Nã Tÿrtÿm kot mē pahwÿr mēnh xwÿnhta na. Nê mē pahte kamã pajamak o papa xwÿnhta na. Jakamã kot ka mē amnhî kaxyw hkôt ajamaxpêr nê hkôt amnhî xunhwÿ nhÿm Tÿrtÿm ja hã mē apumu nê mē ato hkra. Anê.

Hāmri nhūm mē hkwỳjaja kuma nē hkôt hamaxpēr kurê kumrēx. ⁹ Nom nhūm mē hkwỳjaja kuma nē ām kuma nē Jejus o kapēr punuj nē. Mē piitā mē noo mā kuhē nē ho kapēr punuj tỳx nē. Nhūm Pawre tee ri ja mē omu hāmri nē mē kurūm kato. Mē pikuprōnh xà hā ixkreta rūm kato nē hpānhā nhām mē kot kām “Xirān kot mē ahkre xà hā ixkre” anh̄r xwỳnhja wỳr hpānhā mō. Nē amnhī kôt mē kot Jejus kôt amnhī xunhwỳr xwỳnhjē ho pa nē hpānhā ixkreta kamā mē ahkre ho pa. Apkati mē hwỳr mra nē mē ahkre. ¹⁰ Jao hā amgrà axkrut. Jakamā nhūm pyka pē As kamā mē piitā Pahihti Jejus jarēnh ma. Ijaew nē Ijaew kêt xwỳnhjaja nhūm mē piitā harēnh ma.

Wajaga hkwỳ jarēnh

¹¹ Tā nhūm Pawre Tirtūm nh̄y hā mē kām aa mē kot mēmoj pumunh kêt kwỳ ho anh̄r o ri mē hkôt pa. ¹² Jakamā nhūm pre htem hwỳr mra nē kēp ê hkwỳ jamỳ nē ma mē à xwỳnhjē hwỳr o mra nē mē hā haxwỳ nhūm mē akupỳm mex. Nē mēkarōmnuti kot tanhmā mē ho ho pa xwỳnhjē hā nhūm prem määnē mē hā ê kwỳ jaxwỳ nhūm mēkarōmnutija mē kurūm hapōj nē ma mrar kurē kumrēx nhūm mē akupỳm tām hkrā.

¹³⁻¹⁴ Tā nhūm mēō patre maati Sewahtija hkra my kēp 7 nē piitā kēp wajaga. Hāmri nē mē kām Pawre pyrā nē mē nē mēkarōmnuti japōx o pa hprām nē. Jakamā kormā Jejus kôt amnhī xunhwỳr kêt tā mē kot ý hā Pawre pyrā nē mēhō nē hkwỳ janor kaxyw nē kām:

—E Pawre kot Jejus jarēnh o ri pa xwỳnhta nh̄y hā kot paj amā ixkapēr. Jakamā e kwa tokyx myta rūm akato nē ma tē. Anē.

¹⁵ Hāmri nhūm mēkarōmnutija mē kuma nē ām mē kuma nē mē kām:

—Tk. Mē apē Jejus mē Pawre wa hkwỳ hkêt tā mē nē ā mē inhmā akapēr anh̄r o apa. Nà Jejus mē hkwỳ pixjaja na htem Tirtūm nh̄y hā mē kēp mē ijapōx o pa. Mē apē mē hkwỳ hkêt kēnā. Nà pa ixkatoore kaxyw ā. Anē.

¹⁶ Hāmri nhūm mēkarōmnuti kot tanhmā ho xwỳnhta mēkarōmnuti nh̄y hā wajagajē pynē nē mē htak rax o kēp mē ê kaxōnh pa nhūm mē tee ri amnhī nh̄ipēx. Hāmri nē hkēnh nē ōrkwỳ rūm hapōj nē ma umaj hprōt nē mra.

¹⁷ Hāmri nhūm Epes kamā mē piitā ā kot mē hipēx anh̄r ā mē harēnh ma nē tee ri hamaxpēr nē kām ma nē. Ijaew nē Ijaew kêt xwỳnhjaja nhūm mē piitā tee ri kām hamaxpēr o pa. Nē Pahihti Jejus mā mex o mex ā harē. ¹⁸ Jakamā nhūm mē kot Jejus kôt amnhī xunhwỳr nyw xwỳnhjaja piitā tanhmā amnhī jarēnh to. Nē mē hkwỳjaja amnhī jarēnh o:

—Nà kormā ixte Jejus kôt amnhī xām kêt ri na pa pre ā amnhī tomnuj anh̄r o ri ixpa. Tā Jejus kôt amnhī xām hāmri nē axte ā amnhī nh̄ipēx anh̄r kêt nē. Anē.

Nhūm mē hkwỳjaja kēp wajaga htā mē urāk nē Jejus kôt amnhī xunhwỳ hāmri nē amnhī jarēnh o:

—Nà ijaxwỳja kormā Jejus kôt amnhī xām kêt ri na pa pre hte nē mē no kupyri nē mē y pix o ri mē hkôt ixpa. Tā Jejus kôt amnhī xām hāmri nē axte ā amnhī nh̄ipēx anh̄r kêt nē. Pānhā axtem amnhī nh̄ipēx nyw o amnhī nh̄ipēx o ri ixpa. Anē.

¹⁹ Hāmri mē ō wajaga xāhpumunh xà hā kagā jamỳ nē ma o mra nē kaxyw kuto nē kamā rēnh pa nē mē piitā mē noo mā ho xēt pa. Wajaga xāhpumunh xà hā kagāja ā kàxpore xohtō rax kumrēx tā nhūm mē Jejus gryk ā hamỳ nē o mra nē ho hxēt pa nhūm hapēx. ²⁰ Hāmri nhūm krī nhō xwỳnhjaja ā mē kot amnhī nh̄ipēx anh̄r ā mē omu nē ohtō rax nē mē urāk nē Jejus kôt amnhī xunhwỳ.

*Pawre kot Rôm wÿr hkrà hã harênh**Rômân 1.13-15, 15.22-29*

²¹ Tã nhùm Pawre ra akupÿm Jerujarê hwÿr nojarêt nê hamaxpêr o:

—E kot paj ixkato nê hpãnhã ma Masetôn mẽ Gres wa hkôt ma akupÿm Jerujarê hwÿr mō. Ma mẽ kot Jejus kôt amnhĩ xunhwÿr xwÿnhjê pumunh o mẽ hkôt mō. Hãmri nê Jerujarê hwÿr pōj nê kamã tanhmã amnhĩ to hpa hãmri nê hpãnhã ma Rôm wÿr mō. Anê.

²² Hãmri nê hkôt ho ajuta ho wa pa xwÿnh Ximotre mẽ Eras wa kãm amnhĩ jarê nê wa kãm:

—E kêr ka wa ma ixkukamã Masetôn wÿr wa mō. Kot paj kormã jar As kamã ixpa grire hãmri nê ma war akôt mō pu mẽ hamũ ma Jerujarê hwÿr mō. Anê.

Hãmri nhùm wa kuma nê kato nê ma hkukamã Masetôn wÿr mō.

*Mẽ kot sãnti hã Pawre mã àkjêr ã mẽ harênh**Sikũn Korit 1.8-9*

²³ Rôm nhùm Epes nhõ xwÿnhjaja tee ri Pawre kot tanhmã Pahihti Jejus jarênh to hã kuma nhùm ja mẽ kêp omnuj nê. Nhùm mẽ Jejus ã kamã gryk tÿx nê. ²⁴ Na prem amnhĩ kaxyw Tirtũm kôt hamaxpêr kêt nê. Na prem axtem sãnti ho mẽ hpãm nê amnhĩ to hwÿr pê hã hpijaam nê kãm mex o mex ã harênh o pa. Mẽ õ sãntija ni Xiãnre na pre. Nhùm mẽ kãm ixkre nhĩpêx nê kamã hkarõ nhĩpêx xãm. Hãmri nê hwÿr akuprõ nê hã hkĩnh nê hkarõ hã hpijaam nê kãm mex o mex ã harê. Nhùm pre hte Temêtja Xiãnre nhõrkwÿ karõ hkryre hkwy nhĩpêx nê mẽ kãm ho wênê ho pa. Prat o hipêx nê ho wênê ho pa. Jao ra hã mẽ ãpênh xwÿnhjê mẽ nhùm mẽ kot haprõr xwÿnhjê kukwak ri kãxpore jamÿnh rũnh o pa.

²⁵ —Jakamã nhùm Pawre mẽ hwÿr mō nê pōj nê mẽ kãm Mẽpahpãm Tirtũm jarênh o ri mẽ hkôt pa nhùm Temêt tee ri kuma nhùm ja kêp omnuj nê. Hãmri nhùm hamaxpêr nê mẽ kot urak nê Xiãnre nhõrkwÿ karõ hkryre nhĩpêx nê ho wênê ho pa xwÿnhjê ho akuprõ nê mẽ kãm:

—E kwa mẽ inhma. Na pu htem mẽpanã Xiãnre nhõrkwÿ karõ hkryre pãnhã kãxpore jamÿnh rũnh o papa. ²⁶ Tã mãn ka mẽ ra ham hpõx xwÿnh Pawreja pumu nê kapêh na. Na hte jar mẽ panhõ kri kamã nê As piitã hkôt mẽ kãm mẽpanã Xiãnre karõ nê mẽ kãm kapêr o pa. Xep mẽ pahte mẽ hkarõ nhĩpêxja kêp mẽpanã kumrêx kêt ã mẽ kãm harênh o pa nhùm xep mẽ ohtõ nê kuma nê ra hkôt hamaxpêr.

²⁷ —Kwa ja mex kêt. Koja mẽ kapêr ma nê hkôt amnhĩ nhĩpêx hãmri nê axte mẽ pahte ixkre karõ hkryre nhĩpêx xwÿnhnta japrõr kêt nê. Hãmri nê mẽ paxãpênh o kapêr punuj nê. No ãm ja pix omnuj kêt. Koja mẽpanã Xiãnre mã amnhĩ jarênh xã hã ixkreja kaga hpa. Nê haxwÿja karõja kaga. Mẽ piitã kãm hapê kênã. As kamã nê pyka piitã hkôt mẽ piitã kãm hapê nê hwÿr mra nê amnhĩ to hwÿr o pa. Kêp mẽpanã mex kumrêx tã koja mẽ Pawre kapêr gryk ã hkaga hpa nê axte kãm hamaxpêr kêt nê. Hãmri pu mẽ axte mẽ kukwak ri pakãxpore rax nê papa hkêt nê. Kwa tanhmã kot puj mẽ amnhĩ nhĩpêx to? Anê.

²⁸ Hãmri nhùm mẽ tee ri ã kapêr anhÿr ã kuma nê Pawre kamã gryk tÿx kumrêx. Nê gryk xàj kàx pêê kapêr nê xatã kapêr tÿx kãm kapêr punuj nê. Nê kapêr o:

—Xiãnre na mex kumrêx. Kêp mẽ pahpê Epes nhõ xwÿnhjê nã maati na.

Anhÿr o kàxpêê kapêr o kuhê. ²⁹ Hāmri nhūm krī nhō xwÿnh piitā mẽ kuma nē mẽ hwÿr hprōt nē haxwÿja gryk nē kàxpêê mẽ hkōt ā harēnh anhÿr o kuhê. Hāmri nē gryk xàj Pawre hkōt ri wa pa xwÿnhja wa unē nē ma mẽ kot axpēn mar xā hā ixkre hwÿr wa hkjēnh o tē. Masetōn nhō xwÿnh wa kēp Gajore mẽ Aristakja nhūm mẽ wa unē. ³⁰ Hāmri nhūm Pawre mẽ kot wa unēnh ā mẽ omu nē tee ri wa hkukamā hamaxpēr nē mẽ hkōt hprōt nē mẽ kām tanhmā kapêr to kaxyw nom nhūm mẽ kot Jejus kōt amnhī xunhwÿr xwÿnhjaja ja nē kām kapêr kām hihtÿx nē. ³¹ Hāmri nhūm As kamā mẽ kot mẽ ho amnhīptār xwÿnh kwÿjaja ā mẽ kot amnhī nhīpēx anhÿr ā mẽ omu nē Pawre hwÿr hpēr mẽ. Mē kām hkīnh jakamā kot mẽ hkōt htēm nhūm mẽ kot hpīr pymaj hwÿr hpēr mẽ nē mẽ hkōt htēm nē hkurē kamā hihtÿx nē.

³² Rōm nhūm mẽ piitā mẽ kot axpēn mar xā hā ixkre hwÿr pikuprōnh pa nē kàx pē kapêr punuj o kuhê. Nom axpēn kōt kapêr kēt nē. Ām axpēn kwÿm ri kàx pē tanhmā kapêr punuj to ho. Nhūm mẽ hkwÿjaja hprī hā mẽ mar kēt tā amarī amnhī krā hkōt kàx pē kapêr punuj nē. ³³ Nhūm Ijaew kwÿjaja tee ri ja hā mẽ omu nē axpēn mā:

—Tk. Kwa okora. Kojā mẽ nā Xiānre hā gryk hāmri nē tanhmā mẽ pahpê Ijaew to nà? Anē.

Hāmri nē hamaxpēr nē mẽ hwÿr amnhīō pē Aresānja mẽ nē kām:

—Kwa ma mẽ hwÿr tē nē mẽ kām tanhmā mẽ pahpē axāprār to. Pawre kēp mẽ pahkwÿ htā tām na mẽ kām mẽ gryk jaxā. No mẽ papajaja na pu mẽ kām mẽ gryk jaxār kēt nē. Anē.

Hāmri nhūm mẽ kuma nē mẽ hwÿr tē nē xa nē tee ri kot mẽ ho hpīnhkrēnh kaxyw kànhmā mẽ kām ĩhkra pēr kaprÿ. ³⁴ Nhūm mẽ omu nom hpīnhkrēnh kēt nē arī kàx pēê kapêr punuj ā 2 or. Nē kàx pē kapêr o:

—Mēpanā Xiānreja mex o mex. Kēp mẽ pahpê Epes nhō xwÿnhjē nā mex na. Anē.

³⁵ Tā nhūm mẽ ō pahi nhō kōwenatō jatā tanhmā Epes nhō xwÿnhjē ho hpīnhkrēnh to hāmri nē ja nē mẽ kām kapêr nē mẽ kām:

—Kwa mẽ anhīkrē. Mē piitā kot Xiānre mex o mex ā omunh kēnā. Nē mẽ pahpē kām amnhī jarēnh xā hā ixkre jamār xwÿnh ā mẽ kot mẽ pahpumunh mex. Nē kaxkwa rūm karō kot mẽ pahwÿr tēm nhūm mẽ pahpē hamār o papa xwÿnh ā nhūm mẽ kot mẽ pahpumunh mex. ³⁶ Jakamā mēhō kot kēt we mẽ pahpē hamār xwÿnh kēt ā mẽ pajarē? Ra mẽ piitā mẽ kot ja hā mẽ pahpumunh jakamā kwa mẽ anhīkrē nē ri ā akapēr anhÿr kēt nē. ³⁷ No mẽ ate wa unēnh nē amnhī kōt wa ho atēm xwÿnhhta wa. Wa kot tanhmā mēpanā Xiānre ho kapêr punuj to rÿ kēp ō ixkre kamā àhkīnh kēt tā ka mẽ amarī wa unē nē amnē amnhī kōt wa o tē.

³⁸ —Kwa kē Temēt mẽ hkwÿjaja kām tanhmā wa ho kapêr to hprām nē ma pahihiti hwÿr wa o tē nē kumā mām tanhmā wa ho kapêr to. Mēmoj tā axpēn mā mẽ kapêr xā hā arīgrota āā. ³⁹ Rÿ ka mẽ amā mẽmoj jarēnh prām nē arīgroja ā mām rī kormā mẽmoj jarē. ⁴⁰ No jarāhā mẽ ate amnhī nhīpēxja te mẽ ate pahihiti kutā amnhī xunhwÿr nē ho akapēr punuj pyrāk. Kojā Rōm nhō xwÿnhjē nhō pahi mẽ ajarēnh ma hāmri nē mẽ ate kamā agryk ā amnhī kamnhīx. Hāmri nē mẽ atā ixkukja pa tanhmā kām mẽ ajarēnh to? Mēhō nhÿ hā na ka mẽ ā apikuprōnh nē amnhī nhīpēx anē? Nā amnhī krā hkōt na ka mẽ akuprō nē ā amnhī nhīpēx anē. Anē.

⁴¹ Hāmri nē mẽ kām kapêr pa nē mẽ hano nhūm mẽ anhgrā nē ma akupÿm ōrkwÿ hwÿr hapēx.

20

Pawre ma Masetõn mẽ Gres wa hwÿr mõi ã harẽnh

¹ Hãmri nhũm Pawre ra nojarêt. Jerujarẽ hwÿr mõi mã nom kormã pika pê Masetõn kumrẽx wÿr mõi nẽ kurũm ma akupÿm Jerujarẽ hwÿr mõi mã. Hãmri nẽ nojarêt nẽ mẽ kot Jejus kõt amnhĩ xunhwÿr xwÿnhjẽ ho akuprõ nẽ mẽ kãm amnhĩ jarẽ nẽ mẽ kãm:

—E kot paj ma mõi. Nom kêr ka mẽ arĩ ixwakre kamã Tirtũm kapër kõt amnhĩ nhĩpẽx mex rãhã ho ri apa nẽ aa hkaga hkêt nẽ. Anẽ.

Hãmri nẽ mẽ kãm:

—E mẽ mãmrĩ ixwa kre kamã axãmnhĩx ajamakêtkati nẽ ri apa. Anẽ.

Hãmri nẽ kato nẽ ma Masetõn wÿr mõi. ² Nẽ hwÿr põi nẽ kamã krĩ hkwy hkõt mõi nẽ nhÿri mẽ kot Jejus kõt amnhĩ xunhwÿr xwÿnhjẽ pumu nẽ Tirtũm kapër o mẽ ahkre. Mẽ kot hkõt amnhĩ nhĩpẽx mex nẽ kãm hprãm xã hkõt pix mã amnhĩ nhĩpẽx kaxyw mẽ kãm kapër o ri mẽ hkõt pa. Hãmri nẽ kato nẽ ma mõi nẽ pyka pê Gres wÿr põi. ³ Nẽ kamã mẽ hkõt pa hã mytwrÿ axkrunẽpxi hãmri nẽ akupÿm pyka pê Sir wÿr nojarêt. Nẽ ma pãr kãm hwÿr mõi kaxyw nẽ amnhĩ tã Sir kamã Ijaew kwÿ kot tanhmã harẽnh to hã amnhĩ jarẽnh ma. Na prem ra hã axpẽn mã amÿnẽ nẽ axpẽn mã:

—E koja amnẽ mẽ pahwÿr mõi pu mẽ nhÿri omu nẽ hpĩr kurẽ kumrẽx. Anẽ.

Hãmri nhũm Pawre amnhĩ tã mẽ kapër ma nẽ pãr kaga nẽ mẽ hwÿr mõi kêt nẽ. Hãmri nẽ awjanã nẽ Jerujarẽ hwÿr Masetõn kamã pa. ⁴ Nhũm Jejus kõt htõ hkwyjaja ma hkõt mõi. ã mẽ hixi kot anhÿr.

Perej nhõ xwÿnh Sopatõja. Piro hkra na pre.

Nẽ Tesarõn nhõ xwÿnh Aristak mẽ Sikũn wa.

Nẽ Tepe nhõ xwÿnh Gajoreja.

Nẽ As nhõ xwÿnh Xikitre mẽ Torow wa.

Nẽ Ximotreja.

Jajaja na prem ma Pawre hkõt Jerujarẽ hwÿr mõi. ⁵ Nẽ pa ixpẽ Rukre ixte mẽ amã ja jarẽnh nẽ hã kagã xwÿnhja na pa axte Pawre hã ajêt nẽ hkõt mõi. Jakamã nhũm jajaja piitã ma wa ixkukamã Tôx wÿr mõi nẽ kamã wa ixkãm hamak o pa.

⁶ Tã pa wa ma krĩ pê Piripos rũm ixkato nẽ pãr kãm ma mẽ hkõt mõi. Arĩgro pê Pas jakãnh mẽ ma mẽ hkõt mõi.

Tã wa ixtã arĩgro pê 5 nẽ mẽ hkõt Tôx wÿr põi nẽ kamã mẽ omu nẽ mẽ hkõt ixpa hã ixtã ù semãn.

*Pawre kot akupÿm Exik o htĩr ã harẽnh
Juãw 5.21; Atre 9.36-43*

⁷ Tã nhũm sap nẽ kamãt pa mẽ kot Jejus kõt amnhĩ xunhwÿr xwÿnhjẽ hkõt akuprõ nẽ axpẽn kutã apku nhũm Pawre mẽ kãm kapër. Ra apkati hkõt mẽ inhnojarêt kaxyw jakamã nhũm mẽ kãm Tirtũm kapër jarẽnh ryy nẽ. Ra kõt ã kamãt nhũm arĩ mẽ kãm harẽnh o nhÿ. ⁸⁻⁹ Ixkre hprẽk axpẽn nhĩpy axkrunẽpxi nhĩtep xã kamã na pa prem akuprõ nẽ mar o ixkrĩ. Ixkreja kamã kanẽ ohtõ nẽ hpõk o harir. Jakamã nhũm Pawre arĩ mẽ kãm ujarẽnh o nhÿ nhũm mẽhõ xãptãr nyw Exikja ra õtxwa htÿx nẽ mẽ ixkuri õt o nhÿ. Janere hã õt o nhÿ. Tã ra gõi nẽ janere pê kato nẽ ahparmã tẽ nẽ pykap tẽm. Pa mẽ tee ri omu nẽ ahparmã hwÿr ixprõt nẽ wrÿ nẽ omu nhũm htyk mex nẽ nõ. Kÿj rũm ahpar mã htẽm ryy jakamã htyk mex nẽ nõ. Hãmri nhũm hkwyjaja tee ri

omu nê hkaprî htÿx nê kumÿ nê mÿr o hkrî. ¹⁰ Hâmri nhùm Pawre mē ixkôt wrÿ nê hwÿr tē nê htyk ā omu nê kumÿ nê mē kām:

—E mē amÿr kêt nê. Ra htyk tā koja Tirtüm akupÿm mē pamā ho htÿr.

Anhÿrja kôt nhùm akupÿm htÿr. ¹¹⁻¹² Hâmri nhùm mē akupÿm htÿr ā omu nê hkînh tÿx kumrêx. Hâmri pa mē akupÿm kÿx pê ixkre hwÿr api nhùm Pawre mē inhmā pawti hkwy nhîrê nê mē inhmā kugō pa mē Jejus kot mē panê htyk mā ijamaxpêr pē kuku. Hâmri nhùm Pawre axte mē kām kapêr o ÿr rāhā nhùm myt kato pa mē kēp anhrā nê ma ixpa.

Pawre Mîrêt wÿr mōr ā harênh

¹³ Hâmri pa mē inhnōjarêt nhùm Pawre mē ixte hkôt mē inhmōr xwÿnhjê mã:

—E kêr ka mē ma pâr kām ixkukamā mō. Kot paj ahte ma kÿx pê mē akôt ixpar o Asôt wÿr mō. Hâmri nê hwÿr pōj nê mē anhō pâr mã axā pu mē ma pahpimrāatā ma hamū mō. Anê.

¹⁴ Hâmri pa mē kuma nê ma mō nê mēmo arîgro hā Asôt kamā xpên wÿr pōj. Hâmri nhùm Pawre mē ixkôt pâr wÿr axā pa mē ma krî pē Mîtirên wÿr mō. ¹⁵ Nê hwÿr pōj nê kurūm kormā mō nhùm apkati pa mē gō hipōk pē Kiw jakrenh o mō. Nê hakre nê mō nhùm apkati pa mē gō hipōk pē Sām wÿr pōj nê hā pâr nhō. Hâmri nhùm apkati pa mē axte mō nê Mîrêt wÿr pōj. ¹⁶ Nom nhùm ra Pawre nojarêt nê. Kām tokyx As rūm kator nê Jerujarê hwÿr mōr nê tokyx hpōx prām nê. Kām mē hkînh pē Pêtekos xwÿj ri hwÿr hpōx prām jakamā nojarêt tÿx pa mē Epes wÿr inhmōr kêt nê.

Pawre kot Epes kamā Kris kwÿjê mã amnhî jarênh

¹⁷ Tā pa mē Mîrêt wÿr pōj nhùm Pawre amnhî wÿr Epes wÿr Jejus kwÿ jahkre ho mē pa xwÿnhjê hā karō. ¹⁸ Hâmri nhùm mē man mē ixwÿr mō nhùm Pawre mē omu nê mē kām amnhî jarê nê mē kām:

—Nā ixte mē amā amnhî jarênh kaxyw na pa mē atā karō. Ra mē ate tanhmā ixte amnhî nhîpêx to hā ixpumunh mex. Wam mē awÿr As wÿr ixpōxta ā ka prem aprî hā ixpumunh mex nê. ¹⁹ Na pa pre mē akôt ri mē amā tanhmā amnhî nhîpêx to ho ri ixpa. Te ixpê mē amā ixâpênh xwÿnh pyrāk. Nê Pahihti Jejus mã tanhmā amnhî nhîpêx to ho ri mē akôt ixpa. Nê ixkwÿ Ijaew kwÿ kot Jejus kapêr kaga hā mē omu nê ixkaprî nê inhmÿr o ixpa. Nhùm prem Jejus ā ixtomnuj pa amnhî xā htÿx kamā ijamak o ri mē hkôt ixpa. ²⁰ Nom arî ri Tirtüm kapêr o mē ajahkre ho ri mē akôt ixpa rāhā nê aa hkaga hkêt nê. Mē anhōrkwy kamā nê mē ahkre xā hā ixkre kamā. Mē ate tām amnhî nhîpêx prām xāj pa pre ā mē ajahkre mex anhÿr rāhā ho ri mē akôt ixpa.

²¹—Nê mē ixpê Ijaewjê mē mē apê Ijaew kêt xwÿnhjê mē pa pre mē ajahkre ho xpên pyrāk. Mē apiitā mē ate amnhî tomnuj kaga nê hpānhā Tirtüm kôt amnhî nhîpêx kaxyw. Nê amnhî kaxyw mē panhō Pahihti Jejus Kris kôt ajamaxpêr kaxyw na pa pre mē akôt ri mē ajahkre rāhā ho ri ixpa.

²²—Tā ra Tirtüm Karō kot akupÿm Jerujarê hwÿr inhmênh jakamā pa kormā hwÿr mō. Kot paj hwÿr pōj nhùm krî nhō xwÿnhjaja Jejus ā ixtomnuj nê nom tanhmā mē kot ixtoja kukamā ixte ixprî hā ixâhpumunh kêt. ²³ Ja pix na ixte omunh. Na pa hte nhÿri pōj nhùm htem Jejus ā ixpynê nê mē haggênh xā kamā ijagê nê tanhmā inhîpêx to. Tirtüm Karō na pre ra ā mē kot inhîpêx anhÿrja kukamā inhmā mē harê. Jakamā ixte amnhî kukamā amnhî tā ixâhpumunh mex. Kot paj xep akupÿm Jerujarê hwÿr pōj nhùm mē

ixpumu nē Jejus ā tanhmā inhīpêx to. ²⁴ Tā no pa amnhī kamā ixkahak kêt o inhmā mē uma hkêt nē. Koja mē kām xipīr prām nē māmri xipī. Inhmā ixtyk pyma hkêt. Ām mēmoj pixi na inhmā hprām. Ra Pahihti Jejus kot mēmoj tā inhmā karō xāja na inhmā kormā ixtīr ri hatur xām mēnh prām. Tīrtūm kām mē pajapê hā kot mē pahto mex prām xāj mē pahwūr Kra Jejus mēnh nhūm mē panē tanhmā amnhī nhīpêx to hā harēnhja na inhmā mē piitā mē kām harēnh jatur xām mēnh prām.

²⁵ —Tā e ixkrāmnhwājaja. Na pa pre mē akôt mē ajahkre rāhā ho ri ixpa. Mē ate Jejus kôt amnhī nhīpêx mex rāhā ho ri apa kaxyw. Tā kot puj pēr mē axte axpēn pumunh kêt nē.

²⁶⁻²⁷ —Na pa pre ra mē amā Tīrtūm kapēr piitā harēnh pa. Mē ate mar tīx nē hkôt pix mā amnhī nhīpêx o apa kaxyw. Jakamā koja mē anhō krī nhō xwýnhjê hō amnhī kaxyw Jejus kôt hamaxpēr prām kêt nē rī tām. Kwār māmri kot amnhī tomnuj kamā ty nē arī tām amnhī pumu no ām kē amnhī tā tanhmā inhmā nē hkêt nē.

²⁸ —E mē ate Kris kwý jahkre ho apa xwýnhjaja. Kēr ka mē amnhī pumunh mex o ri apa. Nē mē kot Jejus kôt amnhī xunhwūr xwýnhjê jamār mex o ri apa. Ja kaxyw na pre Tīrtūm Karō mē kaxyw mē axunhwūr. Tīrtūm Kra Jejus kot htyk o Tīrtūm mā mē pahte amnhī tomnuj piitā hpānhā amnhīer pa jakamā kēr ka mē kām mē omunh mex o ri mē hkôt apa. Te ôwēhti jamār xwýnh kot ôwēhti jamār mex o ri pata pyrāk.

²⁹ —Kot paj ma mō nhūm mēmojjaja ixpānhā mē awūr pōj nē mē ate Jejus kaga hprām xāj tanhmā mē amā hēx to ho ri mē akôt pa. ³⁰ Nē mē akwýjjaja mē urā nē tanhmā hamaxpēr punuj to nē mē ate Jejus kaga hprām xāj hēx rom tanhmā mē amā kapēr to ho ri mē akôt pa. ³¹ Jakamā kwa mē o kora. Kēr ka mē axkām ajamak rom nē ri apa. Kē jajaja nhýrmā ā mē amā kapēr anē ka mē ama nē mē hkôt ajamaxpēr kêt nē. Mē ate mē mar nē mē hkôt ajamaxpēr pymaj na pa pre mē akôt ri mē ajahkre ho ri ixpa hā ixtā amgrā axkrunēpxi. Arīgro hā nē kamāt kām mē ajahkre rūnh o ri ixpa. Nē mē ate mē amā mē hēx xwýnhjê hkôt amnhī xunhwūr pymaj mē ajahkre pē te inhmūr pyrāk o ri mē akôt ixpa.

³² —E kot paj Tīrtūm nhīhkram mē ajagjēnh pa. Koja mē atānopxar o ri mē akôt pa nē mē akutā nojarēt rāhā ho pa. Hāmri ka mē ām hkôt pix mā amnhī nhīpêx. Jao Jejus kaga hkêt nē. Hāmri nhūm nhýrmā Tīrtūm mē pahpê hkrajē piitā tanhmā mē pahto mex to.

³³ —Na pa pre mē akôt ixpa ry htā no ām aa mēmoj tā mē awūr kêt nē. Mē axē hkwý hā mē awūr rý mē akāxpore hā mē awūr o ri ixpa hkêt nē. ³⁴ Na pa pre amnhī pa kukwak ri amnhīm ixujaprōr pē ixāpuk o ri mē akôt ixpa. Nē ixkôt mē pa xwýnhjê mā ixujaprōr o ri ixpa. Ra mē ate ja hā ixpumunh mex.

³⁵ —Tā mēmo kaxyw na pa pre ā mē akôt amnhī nhīpêx anhūr o ri ixpa? Nā mē ate ja hā ixpumunh nē ixpyrā nē ā amnhī nhīpêx anhūr o ri apa kaxyw. Nē ixpyrā nē tanhmā mē kute xwýnhjê ho ajuta hto ho ri mē apa kaxyw. Na pre Pahihti Jejus ja jarēnh o: “Koja mēhō amā mēmoj gō ka amnhīm apy nē akīnh nē. Nom kot kaj kam nhām mēhō mā mēmoj gō hāmri nē akīnh tīx o ate mēhō mā mēmoj nhōrta jakre.” Anē.

³⁶ Na pre ā Pawre mē kām ujarēnh anhūr pa hāmri pa mē ra inhnojarēt. Hāmri nhūm mē piitā hkōnkrā ho hkrī pa nhūm Pawre mē ho Tīrtūm wý. ³⁷⁻³⁸ Hāmri nhūm mē piitā kām Pawre hkīnh tīx jakamā mūr rax o kuhē. Tee ri kot axte mē kot axpēn pumunh kêt ā mē kām amnhī jarēnhja ma nē hkaprī

htÿx nê. Nê hkaprî xàj kahti hkôt hamÿ nê mur. Hâmri nê ma Jerujarê hwÿr hkujaêk kaxyw mê ixkôt pâr wÿr hkaprî nê mê ixkôt mÿr o mō.

21

Pawre kot Jerujarê hwÿr hpôx ā harênh

¹ Tā pa mê gō mÿri Jejus kôt mê ixtōjê re nê pâr krem agjê nê axte mō. Ma gō hipôk pê Kosti hwÿr ixkatāt kôt mō nê hā ajêt. Hâmri nhûm apkati pa mê axte hamû mō nê hpānhā gō hipôk pê Roxti hwÿr mō nê hwÿr pōj nê hā pâr xi. Hâmri nê hpānhā axte krî pê Patar wÿr mō. ² Hâmri nê hwÿr pōj nê pâr rûm ijapôj nê pâr ô pumu. Nhûm ra pyka pê Wênîs wÿr nojarêt pa mê hwÿr agjê nê ma kamā axte mō. ³ Mōō nê amÿm amnhî kukamā gō hipôk pê Sipre pumu. Hâmri nê upôk rûm hakrenh mā mō nê pyka pê Sir wÿr mō nê kamā Xir hwÿr pōj nê hā pâr nhô. Pâr pām kot krî kamā pâr kukrêx rer kaxyw pa mê kormā hā ajêt nê tokyx axte nhām inhmôr kêt nê. ⁴ Hâmri pa mê kutêp api nê krî kamā mê kot Jejus kôt axpên to htô nê htôx xwÿnhjê japêr o mō. Hâmri nê nhÿri mê omu nê mê hkôt ri ipxa ho ixtā ũ semān. Nhûm prem Tirtûm Karô nhÿ hā Pawre mā kapêr nê kām:

—Kwa Pawre mê inhma. Kot ka Jerujarê hwÿr pōj nhûm xep mê kām akurê xwÿnhjaja tanhmā anhîpêx to. Tirtûm Karô na ā akukamā mê inhmā ajarênh anê. Jakamā kwa hwÿr amôr kêt nê. Na pa mê tee ri akukamā ijamaxpêr. Anê.

⁵ Hâmri nhûm amnhî tā mê kuma nê âm mê kuma nê Jerujarê wÿr hkrā kamā hihtÿx nê. Jakamā nhûm semān hapêx pa mê axte inhnojarêt. Axte Jerujarê hwÿr kormā inhmôr kaxyw inhnojarêt. Nhûm Jejus kôt mê ixtōjaja mê kot mê ixkujaêk kaxyw piitā pâr wÿr mê ixkôt mō. Mê hprô nê mê hkrajê mê nhûm mê pimràatā mê ixkôt mō. Hâmri pa mê pâr wÿr pōj nê gō mÿ ri ixpiitā ixkônkrā ho ixkrî hpa nê amnhî to Tirtûm wÿ. ⁶ Hâmri nê mê kām amnhî jarênh pa nê mê noo mā pâr krem agjê nê ma axte mō nhûm mê awjanā nê ma akupÿm ôrkwÿ hwÿr hapêx. Hâmri pa mê kurûm kormā ma Jerujarê hwÿr mō. ⁷ Mōō nê krî pê Poremax wÿr pōj nê hā ajêt. Hâmri nê pâr rûm ijapôj nê axte krî kamā Jejus kôt mê ixtō nê mê ixtôxjê japêr o mō nê nhÿri mê omu nê mê kuri amnhûm hikra.

⁸ Tā nhûm apkati pa mê axte mō. Pānhā ma krî pê Sejurej wÿr mō. Hâmri nê hwÿr pōj nê Firipti kuri pōj. Firiptija kormā nyw ri mê kot Jerujarê kamā mê mjên htyk xwÿnhjê mā mê apkur xā nhôr ho pa kaxyw mê ho 7 nê mê unhwÿr xwÿnhjtajê hō na pre. Tā hpānhā kêp Tirtûm kapêr jarênh o pa xwÿnh. ⁹ Nhûm hkrā nijaja kêp kwat. Piitā mjên kêt nê hkukrit rāhā pa. Mê kêp Tirtûm nhÿ hā kapêr o mê pa xwÿnh na pre mê. Jakamā pa mê mê kuri pōj. ¹⁰ Hâmri nê mê hkôt ri ipxa hā ixtā apkati grêre nhûm Akapô Jutej rûm man mê ixwÿr mōn pōj. Kêp Tirtûm nhÿ hā kapêr jarênh o pa xwÿnh na pre. ¹¹ Hâmri nê mê ixwÿr pōj nê Pawre pumu nê hkukamā kot tanhmā harênh to kaxyw hwÿr tēn kêp hprexā kapa nê ho amnhî te hpre nê ho amnhî pa hpre nê xa. Hâmri nê mê inhnoo mā Tirtûm Karô nhÿ hā mê kot tanhmā hipêx to hkukamā kām awjarê nê kām:

—E kot kaj Jerujarê hwÿr pōj nhûm Ijaew xàptâr tûmjaja apumu nê ā anhîpêx anê nê apa hpre nê ate hpre hāmri nê Ijaew kêt xwÿnhjê nhîhkram ajaxā. Koja mê ā anhîpêx anê. Anê.

¹² Hāmri pa mē tee ri ã ujarēnh anhyrja ma nē Pawre kamā ixkahak t̄yx nē ixkaprī nē inhm̄r o ixkrī. Nē xatā kot mē hw̄yr mōr nē kām ixkapēr kām ixiht̄yx nē kām:

—Kwa mē ixkapēr ma Pawre. Mē hw̄yr amōr kēt o mē hw̄yr amōr kēt. Anē.

¹³ Hāmri nhūm mē inhm̄a:

—Tk. Kwa mē am̄yr kēt nē. Na pa mē apumu nē ixkaprī nē. Nā kot paj ma mē hw̄yr mō. Kwār mē mām̄rī Pahihti Jejus ã tanhmā ixto r̄y hā xipī. Ixte amnhī kamā ixkahak kēt. Anē.

¹⁴ Hāmri pa mē tee ri mē hw̄yr mōr nē hkurē kapr̄y nē kām:

—Tōe. Nā kam nē Tirtūm kām hprām xā hkōt mām̄rī mē hw̄yr mō r̄y mē hw̄yr amōr kēt nē. Anē.

¹⁵ Tā pa mē ra inhnojarēt nē amnhī to ixpikuprōnh pa nē ma Pawre hkōt Jerujarē hw̄yr tā ma mō. ¹⁶ Hāmri nhūm Sejarej kamā Jejus kōt mē ixtō hkwȳjaja ma mē ixkōt mō. Pa mē mōō nē Jerujarē hw̄yr pōj. Hāmri nhūm mē ixkōt mē mōr xw̄ynhaja mē ixto mō nē Mēnasō nhōrkwȳ hw̄yr mē ixto pōj. Mēnasōja Sipre kamā na pre kato. Tā hpānhā Jerujarē hw̄yr ahpa nē kamā ri pa ho pa. Na pre ra Jejus kōt amnhī xām ã hā amgrā xohtō nē. Tā pa mē kuri pōj.

Pawre mē Xiakre wa harēnh

Atre 15.3-21; Wam Kor̄t 9.19-22, 10.32-33

¹⁷ Tā pa mē Jerujarē hw̄yr pōj nhūm Jejus kōt mē ixtōjaja mē ixpumu nē hk̄nh nē. ¹⁸ Hāmri nhūm apkati pa mē ma Pawre hkōt Xiakre hw̄yr mō. Nhūm mē kot Tirtūm kapēr o mē ahkre xw̄ynh piitā ra kuri akuprō nē mē ixkutēp hkrī. ¹⁹ Jakamā nhūm Pawre mē hw̄yr axā nē mē kām tanhmā amnhī nhīpēx to ho pa hā amnhī jarē nē mē kām:

—Pa na ka mē rī akrī. E ot pa axte mē apumunh mā mō. Ixte mē amā amnhī jarēnh ã amnhī jarēnh kaxyw. Nā na pa pre ma Ijaew kēt xw̄ynh̄jē hkōt ixpa nē mē kām Jejus kot mē panē tanhmā amnhī nhīpēx to jarēnh o ri mē hkōt ixpa. Nhūm Tirtūm inhīhkō hā ixkutā nojarēt mex jakamā nhūm prem inhma nē ohtō rax nē mē pahpyrā nē Jejus kōt amnhī xunhw̄y. Anē.

²⁰⁻²⁵ Hāmri nhūm mē Ijaew kēt xw̄ynh kw̄ȳjaja kot Jejus kōt amnhī xunhw̄yr ã mē harēnh ma nē mē ŷ hā hk̄nh nē mē hā Tirtūm mā mex o mex ã harē. Hāmri nē Pawre mā kām:

—Nā na pa prem ra mē harēnh ma. Hāmri nē mē kām kagā nhīpēx nē mēmoj tā mē kām karō nē mē hw̄yr kumē. Mē kot omunh nē kamā harēnh nē hkōt amnhī nhīpēx o pa kaxyw.

Na pa prem kagāja kamā mē kot sānti nhō hkur nē mē hkurē.

Nē mry kamrō hkur nē mē hkurē.

Nē mēmo mry hpar nē hkamrō runh kēt rāhā hkur nē mē hkurē.

Nē mē kot amnhī prō pix t̄nopxar kaxyw mē kām hā karō.

Nē mēnijaja kot amnhī mj̄en pix t̄nopxar kaxyw mē kām hā karō.

Nē nhām mē kot axp̄en to amnhīkati nē mē hkurē.

Ā na pa prem ja hā kagā nē mē hw̄yr mēnh anē. Jakamā e mē inhma. Na ra mē pahpē Ijaew kw̄ȳjaja ohtō rax kumrēx nē mē pahpyrā nē Jejus kōt amnhī xunhw̄y. Mān ka pre mē harēnh ma. Na htem Jejus kōt amnhī nhīpēx o pa jao māānēn Tirtūm nh̄y hā Mojes kapēr kōt amnhī nhīpēx mex o pa. Tā nh̄yri mē kot tanhmā ato hēx to hā ajarēnh ma. Na ka xep hte Ijaew kēt xw̄ynh̄jē nhō krī kamā pōj hāmri nē mē ō krī kamā Ijaew kw̄ȳjē pumu nē mēmoj nē tanhmā mē kām akapēr to ho ri apa. Nom Ijaew kēt xw̄ynh̄jē mā ka xep hte ã mēmoj

nê akapêr anhÿr kêt nê. Ām Ijaew mā pix mā ka xep hte mē kot finat Mojes kapêr kôt amnhī nhīpêx nê mē hkurê ho ri apa. Nê mē panhīgēt kot amnhī nhīpêx kuhpa hā mē kot mē hkra my kwÿt kâ jakâr nê ka xep hte mē hkurê ho ri apa. Nê mē kot mē panhīgēt kôt amnhī nhīpêx nê ka xep hte māânēn mē hkurê ho ri apa. Mē kēp Ijaew tā ka xep pre hte ā mēmoj nê mē hkurê anhÿr ho ri apa. Na prem jar ā Ijaewjê mā ato hêx o pa anê nhūm mē kuma nê mē hkôt hamaxpêr kurê kumrêx. Jao ra ate mē pahpê Ijaew kot amnhī nhīpêx kôt amnhī nhīpêx kêt ā akamnhīx.

—Tā ra mē kot apôx ā ajarēnh mar jakamā tanhmā kot kaj we mē kām amnhī tā axâprâr to? Nê tanhmā kot kaj we mē noo mā amnhī nhīpêx to kē mē arī mē pahte amnhī nhīpêx kôt ate amnhī nhīpêx o apa hā apumu? E na pa mē ra ijamaxpêr. Kot ka ā amnhī nhīpêx anê. Na ra jar mē pahkwÿjaja kēp kwat nê Tirtūm mā tanhmā amnhī jarēnh to jatur xām mēnh kaxyw amnhī krā hkēnh mā. Jakamā e kēr ka ma mē hkôt tē nê mē urāk nê amnhī krā hkēnh nê kam nê mē ate amnhī krā kēnhata pānhā amnhīre. Kot kaj ā mē hkôt amnhī nhīpêx anê hāmri nhūm mē pahkwÿjaja arī mē pahte amnhī nhīpêx o ate amnhī nhīpêx o apa hā apumu nê mē kot ato hêx ā apumunh kurê kumrêx. Nê arī ate finat Mojes kapêr kôt amnhī nhīpêx o ri apa hā apumu. Anê.

²⁶ Hāmri nhūm Pawre mē kuma nê mē kām:

—Tôe. Nā ām hāmri na ka mē inhmā awjarê. Nā kot paj ā amnhī nhīpêx anê. Anê.

Jakamā nhūm apkati nhūm ma mē kēp 4tajê o mō nê mē mex kaxyw tanhmā amnhī nhīpêx to. Hāmri nê Tirtūm mā amnhī jarēnh xā hā ixkre hwÿr mra nê agjê nê mē ô patre mā mē amnhī jarê nê kām:

—E ot pa mē awÿr mra. Na pa prem ra mēmoj tā tanhmā Tirtūm mā amnhī jarēnh to. Tā kot paj mē axte ixtā ū semān hāmri nê hatur xām mēnh kaxyw akupÿn awÿr mra nê amā mēmoj gō ka mē inhmā Tirtūm mā agō nê hkôt kām mē ijarê. Nê pa kot paj mē xpiitā hpānhā amā amnhīre. Anê.

Mē kot Pawre pynēnh ā mē harēnh

Atre 24.12

²⁷ Tā nhūm semānja hapêx kaxyw nhūm pika pē As rūm Ijaew kwÿjaja ma mra nê Tirtūm mā amnhī jarēnh xā hā ixkre hwÿr agjê. Hāmri nê kamā Pawre pumu nê kamā gryk tÿx nê hwÿr hprôt nê unê nê tanhmā hkwyjê mā ho hêx to nê ho kapêr punuj nê. Nê mē kām:

²⁸ —E mē amnê mra nê jahti pumu. Na hte krī piitā hkôt ri mē pahkwÿjê mā tanhmā ri hêx to ho pa. Tirtūm nhÿ hā finat Mojes kapêr nhūm mē kām ho kapêr punuj o pa. Nê mē pahte Tirtūm mā amnhī jarēnh xā hā ixkreja nhūm hte māânēn tanhmā mē kām ho kapêr punuj to. Mē pahpÿrā nê kēp Ijaew tā mē pahpê hkwy ho kapêr o pa. Tā ra axtem nê amnhī kôt Tirtūm nhō ixkre hwÿr Ijaew kêt xwÿnh kwÿjê ho agjê. Mē kot hwÿr gjêx kêt kumrêx tā nhūm axtem nê amnhī kôt mē ho agjê. Anê.

²⁹ Na pre krīja kamā Ijaew kêt xwÿnh Topīja Pawre hkôt pa nhūm mē omu. Kēp Epes nhō xwÿnh nhūm mē kot pry ā Pawre hkôt pa hā omu. Tā hā ahtūm nê Tirtūm mā amnhī jarēnh xā hā ixkre kamā Pawre pumu nê htÿx amnhī kôt Topī ho ar ā hkamnhīx nê ā mē kām harēnh anê. ³⁰ Hāmri nhūm mē kuma nê Pawre kamā gryk tÿx nê. Nê hwÿr hprôt nê unê nê ixkre rūm ho kato nê kēp hakwa kre kahê. ³¹⁻³² Hāmri nê ma o tē nê htak rax nê. Ra mē kot htak o hpīr mā tā nhūm mēhōja pōristi krāhtūm wÿr hprôt nê kām awjarê nê kām:

—Kwa o mŭj mē ra kot axpēn nh̄imex kaxyw pijapu ho kuhê. Anê.

Hāmri nh̄um tee ri kuma nē pôristi hkwyjê mā anê nē mē ma mē hwÿr hprôt kurê kumrêx. Nh̄um mē ari Pawre htak tâ amnh̄i wÿr mē omu nē mē umaj kām ure. ³³ Hāmri nh̄um pôristi krãhtũm Pawre hã amÿnê nh̄um pôristijaja unê nē kàx o mē hkaxprexà ho axkrut nê ho hkaxpre pa. Hāmri nh̄um mē hkrãhtũm Pawre hã mē hkukja nē mē kãm:

—Kwa mē atô inhmã jahti jarê. Tanhmã na hixi te? Tanhmã na we amnh̄i tomnuj to hã na ka mē ã hipêx anê? Anê.

³⁴ Hāmri nh̄um mē kuma nē piitã anhîpê kãxpê kãm tanhmã harênh to. Nom axpēn kwÿm tanhmã ri kãm harênh to. Hāmri nh̄um tee ri hprî hã kot mē mar kaxyw hāmri nê pôristi mā anê nh̄um mē kēp Pawre ho kato nê ma mē àpênh xà hã ixkre hwÿr o tē. ³⁵⁻³⁶ Hāmri nh̄um Ijaew kwÿ ohtô nê pry hã axpēn nh̄igãnh o hkôt mra. Nê gryk xàj kapêr punuj týx o mē hkôt mô nê kàx pē pôristi mā kapêr nē mē kãm:

—Kwa mē apih̄ti ri. Mexti hã. Mēmo kaxyw na ka mē ri amã hapê ho apahti? Anê.

Jakamã nh̄um pôristija tee ri mē kuma hāmri nē mē kot tanhmã ho pymaj kumÿ nê kÿx pē mē kēp kupê nê o mô. Jao ixkreja wÿr mē àpir xà hã ho àpir o mô. ³⁷ Nê kot ho àr kaxyw tâ nh̄um Pawre mē hkrãhtũm mā kãm:

—E pa amã mēmoj jarê ka inhma. Anê.

Mē kapêr o kãm kapêr hāmri nh̄um amnh̄i jaêr pē kuma nē kãm:

—Kwa xà na ka mē ixpyrà nê Gresjê kapêr o akapêr? ³⁸ Na pa ixtýx apê Ejit nhô xwÿnh pē mē hpar o apa xwÿnhã ã akamnh̄ix. Ham na pre mē inhô pahih̄ti kutã amnh̄i xãm nê kot hkurê kaxãr kaxyw mē ho ajuta xwÿnhjê ho 4.000 nê mē hkurê nê ma kapôt ã mē o pa. Nom tãm na xep Gresjê kapêr o kapêr kêt nê. Anê.

³⁹ Hāmri nh̄um Pawre kãm:

—Nà ixpê Ejit nhô xwÿnhã kêt. Ixpê Ijaew na pa. Pyka pē Siris kamã krî rax pē Tas kamã na pa pre ixkato. E xà kot paj ixkôt mē môr xwÿnh nêj mã ixkapêr nã? Anê.

⁴⁰ Hāmri nh̄um kãm:

—Tôe. Kam nê mãmri tanhmã mē kãm akapêr to. Anê.

Hāmri nh̄um mē àpir xàta ã kÿx pē mē mÿri xa nê kãnhmã mē kãm ìhkra pē nh̄um mē omu nê hpinhkrênh pa nh̄um mē kãm amnh̄i jarê.

22

Pawre kot kãm hkurê xwÿnhjê mã amnh̄i jarênh

Atre 9.1-19, 26.1-23

¹⁻² Nh̄um Pawre amnh̄i kwÿ Ijaew kapêr o mē kãm kapêr nē mē kãm:

—E ixkwÿjaja. Pa mē amã amnh̄i jarê ka mē inhma. Anê.

Hāmri nh̄um kot mē kapêr o kapêr ma nê hpinhkrênh pa nê akryk mar o kuhê nh̄um mē kãm:

³ —Nà ixpê mē anhîo na pa. Ijaxwÿja ixpê Ijaew. Pyka pē Siris kamã krî pē Tas kamã na pa pre ixkato no ãm jar Jerujarê kamã na pa pre ixãptãr. Kamariew na pre hte ijahkre ho pa. Finat Mojes kot Tirtũm nhÿ hã mē panhîgêtjê mã kapêrja nh̄um pre hprî hã ho ijahkre ho pa. Na pa pre mē apyrã nê inhmã Tirtũm kôt amnh̄i nhîpêx prãm nê.

⁴ —Jakamã na pa pre mē pahkwÿ kot Jejus kôt amnh̄i xunhwÿr xwÿnhjê japêr o ixpa nê nhÿri mē kãm ixkato nê mē unê. Mēmyjê pynê nê mēnijê pynê. Hāmri nê mē kot mē hpar kaxyw mē hagiênh o ri ixpa. ⁵ Na pa pre ã mē hipêx

o ri ixpa anê. Mê panhõ patre maati nê mê àptàr tùmrejaja ra mê kot ja hã ixpumunh mex. Mê tãmjaja na prem krî pê Tamas kãm mê pahkwýjê kaxyw kagã nhîpêx nê inhmã kugõ pa kupy nê ma mê hwýr o mô. Ixte mê õ krî kamã Jejus kwýjê pynênh par nê man akupýn Jerujarê hwýr mê ho inhmõr nhùm mê kot tanhmã mê ho kaxyw.

6—Tã ra myt aha pa mê hwýr ixãhtêp o mô. Puh nhùm kaxkwa rùm hirã rax kumrêxja ixwýr wry nê ixtã ajêt pa hipók ri xa. ⁷Hãmri nê umaj pykap tèm nhùm mêhõ kapêr nê inhmã: “Pa Sawti? Hêxta waa nê. Kwa mon ka hte axtem nê ixtomnuj týx o ri apa?” Anê. ⁸Hãmri pa kãm: “Kwa mê atõ na ka ri ã inhmã akapêr anê pahihiti?” Anê nhùm inhmã: “Ixpê Najare nhõ xwýnh Jejus. Pa na ka hte ixpê ixkõt mê kot amnhî xunhwýr xwýnhjê homnuj týx o ri apa. Jao te pa ixtomnuj pyràk.”

⁹—Anhýr o inhmã kapêr nhùm ixkõt mê pa xwýnhjaja kuma no ãm hprî hã mar mex kêt nê. ãm hirã raxta pix pumu. ¹⁰Tã pa kãm: “No tanhmã kot pa we amnhî to Pahihiti?” Anê nhùm inhmã: “E kãnhmã xa nê mãmrî ma Tamas wýr mô. Kot kaj hwýr pøj nhùm mêhõ awýr tẽ nê mêmoy tã amã karõ ka ama nê hkõt amnhî nhîpêx.” Anê.

¹¹—Nhùm pre ã inhmã kapêr anê. Hãmri pa hirã rax pumunh o ixãm kurê ra inhno hkre nê ixrît kêt nhùm ixkõt mê pa xwýnhjaja ixpa hã ixpy nê ma Tamas wýr ixto mô nê ixto pøj.

¹²—Tã nhùm Tamas nhõ xwýnh pê ãnãnistî ixwýr tẽ. Na pre hte Tirtùm kapêr ã kagã htùm kõt amnhî nhîpêx mex nhùm Tamas kamã Ijaew piitã kãm hkînh nê axpên mã mex ã harê. ¹³Jakamã nhùm ixwýr tẽ nê inhmã: “Pa Jejus kõt ixtõ Sawti? E akupým rît.” Anhýrja kõt pa akupým ixrît mex kurê kumrêx nê omu. ¹⁴Hãmri nhùm inhmã: “Nã mê panhigêjtê nhõ Tirtùm na amnhî kaxyw ata. Ate kapêr mar nê hkõt tanhmã amnhî nhîpêx to ho apa kaxyw. Nê ate kaxkwa kamã Kra mex pumunh nê kapêr mar kaxyw. Tã ka xep ham hirã rax kamã omu nê kapêr ma. ¹⁵Jakamã kër ka ma mê piitã mê kãm ate omunh xwýnhja jarênh o ari mê hkõt apa. Nê mê kãm kapêr jarênh o mê ahkre ho ri apa. ¹⁶E tokyx kãnhmã xa nê Jejus mã amnhî jarê nê hkõt amnhî xãm kê anê ate amnhî tomnuj rênh pa. Hãmri pa apê hkwy hã akrã kumrã ka ma mê kãm kapêr jarênh o ri apa.” Anê.

—Nhùm pre ã ãnãnistî inhmã kapêr anê.

¹⁷—Tã pa man akupýn jar Jerujarê hwýr mê awýr mô. Hãmri nê jar Tirtùm mã amnhî jarênh xã hã ixkre kamã kãm amnhî jarênh o ixãm rôm axte mêmoy pumu. ¹⁸Nhùm Jejus axte ixwýr kato nê xa nê inhmã kapêr nê inhmã: “E inhma. Jerujarê nhõ xwýnhjaja kãm ixkapêr mar prãm kêt jakamã kot kaj mê kãm ixkapêr jarê nhùm mê amar kêt nê. Jakamã kwa tokyx akato nê hpãnhã ma nhýhým mô.” Anê.

—Hãmri pa tee ri ã kapêr anhýrja ã kuma nê kãm: ¹⁹“Kwa nã koja mê inhma Pahihiti. Ra mê kot ixte amnhî nhîpêx ã ixpumunh mex. Ixte amnhî nhîpêx tũmta kõt mê kot ixpumunh mex. Na pa pre hte krî piitã hkõt mra nê Tirtùm kapêr o mê ahkre xã hã ixkre kamã mê kot akõt amnhî kaxyw hamaxpêr xwýnhjê pynê nê mê htak nê mê hãgênh xã kamã mê hãgê nhùm mê kot ja hã ixpumunh mex. ²⁰Nhùm mê kot akapêr jarênh o pa xwýnh Estewãw pirta pa pre hã mê omu nhùm ja inhmã mex pa mê kãm mê hinõkã jamýnh o hã mê omunh o xa. Na pa pre ã amnhî nhîpêx anhýr o ri ixpa. Tã hpãnhã akõt amnhî xãm hãmri nê akõt amnhî nhîpêx o ri ixpa. Jakamã koja mê ixte amnhî nhîpêx nyw ã ijarênh ma nê kãm ixkapêr mar prãm nê.” Anê.

21 —Pa pre ã Jejus mã amnhĩ jarênh anê nhũm inhmã: “Nà. Kêr ka mãmrĩ krĩja rũm akato nê ma nhỹhỹm mō. Kot paj hpãnhã ma Ijaew kêt xwỹnhjê hwỹr amê ka hpãnhã ma mē hwỹr mō nê mē hkôt mē kãm ixkapêr jarênh o ri apa.” Anê.

22 Nhũm pre Pawre ã amnhĩ hkwyjê mã amnhĩ jarênh anê nhũm mē arĩ mar o kuhê rãhã Ijaew kêt xwỹnhjê jarênh ma nê kamã gryk tỹx nê. Ijaew kêt xwỹnhjaja kot mē urak nê Tĩrtũm kapêr marja nhũm mē kãm hprãm kêt jakamã nhũm Pawre ã mē harênh anê nhũm mē kuma nê kamã gryk tỹx kumrêx. Nê gryk xaj kapêr punuj nê kapêr o:

—Kwa mē mãmrĩ apĩhti ri. ãm hpĩr mã htãmti kênã. Anê.

23 Hãmri nê gryk xaj amnhĩ nhĩnôkã hkwrỹ nê ho apê nê pyka jamỹ nê kãnhmã ri ho ahkapê.

Pawre kot pôristi krãhtũm mã amnhĩ jarênh

Atre 16.35-39

24 Hãmri nhũm pôristi krãhtũmja tee ri ã mē kot amnhĩ nhĩpêx anhỹr ã mē omu nê mē kapêr ma nê pôristijê mã kapêr nê mē kãm:

—Kwa tanhmã na we jahti amnhĩ tomnuj to nhũm mē ã kamã gryk tỹx anê? E mē tokyx ixkre hwỹr ho axà nê mē htak xà ho htak kê mē pamã tanhmã amnhĩ jarênh to. Anê.

25 Hãmri nhũm mē kuma nê ho axà nê htak kaxyw kormã hpre ho xa. Hãmri nhũm pôristi krãhtũm nhõ kôwenatôja mē hkôt axà nê hã mē omunh o xa nhũm Pawre omu nê amnhĩ tã kãm kapêr nê kãm:

—Kwa kormã ixte tanhmã mē amã amnhĩ jarênh to hkêt tã ka mē ixtak kaxyw. Ixpê Ijaew tã mãânên ixpê Rôm nhõ xwỹnh kênã. Xà na htem ã Rôm nhõ xwỹnhjê nhĩpêx anê? Anê.

26 Hãmri nhũm tee ri ã amnhĩ jarênh anhỹrja ã kuma nê pôristi krãhtũmja hwỹr hprôt nê kãm:

—Kwa taxy pu mē tanhmã ho hkêt nê. Xep kêp Rôm nhõ xwỹnh kênã. Anê.

27 Hãmri nhũm tee ri kuma nê Pawre hwỹr axà nê kãm:

—Kwa xà ãm hãmri na ka amnhĩ jarê? Xà apê Rôm nhõ xwỹnh na ka? Anê.

Hãmri nhũm kãm:

—Tỹ. ãm hãmri ixte mē amã amnhĩ jarênh kênã. Ixpê Rôm nhõ xwỹnh na pa. Anê.

28 Hãmri nhũm kãm:

—Kwa pa na pa pre amnhĩ to Rôm nhõ xwỹnh prãm xaj amnhĩ pãnhã mē kãm amnhĩrer rax nê. Anê.

Nhũm Pawre kãm:

—Tỹ nom pa na pa pre amnhĩ pãnhã mē kãm amnhĩrer kêt nê. Inhĩpêêxa hkôt ixpê Rôm nhõ xwỹnh na pa. Anê.

29 Hãmri nhũm mē kuma nê tee ri hamaxpêr o kãm ma nê. Nê kãm ma ho hkaga kurê kumrêx. Nhũm mē hkrãhtũm nhõ pahija mãânên kãm ma nê. Kêp Rôm nhõ xwỹnh tã nhũm mē axtem nê kot unênh nê kax o hkaxpreja mã hamaxpêr nê kãm ma nê. Na htem ã Rôm nhõ xwỹnhjê nhĩpêx anhỹr kêt nê. Na htem tanhmã mē hkukjêr to nê hprĩ hã mē kuma nê rĩ kormã tanhmã mē hipêx to.

Pawre kot Ijaew xãptãr tũmrejê mã amnhĩ jarênh

Matêwre 23.27-28

30 Tã nhũm apkati nhũm pôristi krãhtũmja Ijaew kwỹ ho akuprô. Mêõ patre maati nê patre krãhtũmja nê mē ãptãr tũmrejaja nhũm kot mē kãm tanhmã

Pawre jarēnh to kaxyw mē ho hpikuprōnh pa. Hāmri nē Pawre pē hkaxpre xà ré nē ma mē hwýr o tē nē mē kutā ýr.

23

¹ Hāmri nhūm mē omu nē mē kām amnhī jarē nē mē kām:

—E ixkwýjaja. Pa mē amā amnhī jarē ka mē inhma. Na pa hte Tirtūm nom tām amnhī nhīpēx o ixpa nē mē pahpē Ijaew mē pahte amnhī nhīpēx kwým ri tanhmā amnhī nhīpēx to hkēt nē. Anē.

² Hāmri nhūm mē ō patre maati ānānīsti kuma nē kamā gryk nē. Axtem ānānīsti hō na pre. Hāmri nē ā Pawre kot amnhī jarēnh anhýrja ā kuma nē kamā gryk nē. Hāmri nē mē kot mar o kuhē xwýnhjē mā kām:

—Kwa mē atō hakwap hkurahti ri. Tām kot amnhī nhīpēxti hā. Na ām mē pamā amnhī to hēx o xa. Anē.

³ Hāmri nhūm Pawre kuma nē hwýr rīt nē omu nē kām:

—Nā ka koja Tirtūm akura kām ga. Te ate finat Mojes kot ý hā kapēr kót amnhī nhīpēx pyrāk tā ri axtem nē ri mē kot ijakwap ixkuranh kaxyw ri mē kām ixtā amýnē. Anē.

⁴ Hāmri nhūm kuri mē kuhē xwýnhja tee ri ā kām kapēr anhýrja ā kuma nē kām:

—Kwa kēp patre maati kēnā kot ka kēt ri ā kām akapēr anē. Anē.

⁵ Hāmri nhūm amnhī jaēr pē ja hā kuma nē kām:

—Kwa ixte ja hā omunh kēt jakamā na pa ā ixtýx kām ixkapēr anē. Ixte kēp patre maati hā omunh ronhýx pa ā kām ixkapēr anhýr kēt nē. Tirtūm kapēr ā kagā htūm kot ja nē mē pamā kapēr kēnā. Mē pahte tanhmā mē panhō pahi ho kapapēr punuj to nē mē pamā kapēr. Tā pa ām ixtýx ā kām ixkapēr anē. Anē.

⁶⁻⁸ Hāmri nē hprī hā mē kot mar o hkrī xwýnhjē pumu. Nhūm mē kamā Satusew nhō xwýnh kwý nē Parijew nhō xwýnh kwý. Satusew mē Parijew nhō xwýnhjaja na htem axpēn kwým ri tanhmā mē htykjē jarēnh to. Satusew nhō xwýnhjaja na htem mē htyk nē mē hkarō mē ro hā mē hapēx o mē hapēx ā mē hkamnhīx. Nē Tirtūm kapēr o mē wrýk xwýnh kēt ā mē harēnh o pa. No Parijewjaja na hte mē kurom mē htyk nē akupým mē htír ā mē hkamnhīx nē Tirtūm kapēr o mē wrýk xwýnh ā mē hkamnhīx. Nhūm Pawre kot ja hā mē omunh jakamā tanhmā hamaxpēr to hāmri nē mē kām kapēr. Na pre Parijew nhō xwýnhjē pyrā nē mē htyk nē akupým mē htír kót hamaxpēr nē Tirtūm kapēr o mē wrýk xwýnh kót hamaxpēr. Jakamā mē omu nē kàx pē mē kām kapēr nē mē kām:

—Nā ijaxwýja ixpē Parijew nhō xwýnh. Nhūm inhīpēxà haxwýja kēp Parijew nhō xwýnh. Jakamā na pa hte mē apē Parijew nhō xwýnhjē pyrā nē mē htyk nē akupým mē htír kót ijamaxpēr. Tā ām ja pix mýrapē na ka mē ixpyné nē ā inhīpēx anē. Anē.

Hāmri nhūm Parijew mē Satusew nhō xwýnhjaja kuma nē ja hā axpēn kām gryk nē. Nē hā axpēn mā akir. ⁹ Hāmri nē ra axpēn mā ākjēr rax nē. Hāmri nhūm Parijew kwý pē Mojes kapēr o mē ahkre ho mē pa xwýnhjaja kànhmā kuhē nē mē kām Pawre hā āprār kām hihtýx nē mē kām:

—Kwa pēr tanhmā kot amnhī tomnuj tore hā. Mān ām hpimtir kām na pre ā ri kaxkwa kamā mēmoj mar anē. Rý apu Tirtūm kapēr o wrýk xwýnh kām tanhmā kapēr to nhūm pre Tamas wýr pry kamā mar o xa rý ko. Anē.

¹⁰ Hāmri nhūm Satusew nhō xwỳnhjaja tee ri Tirtūm kapēr o mẽ wrỳk xwỳnh kot kām kapēr ā harēnhja ma nē hā xpēn mā àkjēr rax nē. Hāmri nhūm pōristi krāhtūmja tee ri mẽ kot xpēn mā àkjēr ā mẽ omu hāmri nē pōristi mā kām:

—Kwa mẽ Pawre hwỳr tē nē mẽ kēp utā nē ma akupỳm o tē nē haxà. Kot ka mẽ ho anhỳr kēt nhūm mẽ tanhmā hamaxpēr to nē gryk xàj xpēn nhīhka kamā hkaxōnh pa. Anē.

Hāmri nhūm mẽ kuma nē hwỳr tē nē mẽ kēp utā nē akupỳm o tē nē ixkre hwỳr ho axà.

Jeus kot Pawre jamaxpēr o hihtỳx ā harēnh
Atre 18.9-10

¹¹ Tā nhūm kamàt nhūm Jeus tām Pawre hwỳr kato nē kām:

—Pa Pawre? Kwa tee ri amnhī kukamā ajamaxpēr o amnhī kamā akahak kēt nē. Kot kaj te ra ate jar Jerujarē kamā mẽ kām ijarēnh ta pyrà nē ma krī pē Rōm wỳr mō nē krī nhō xwỳnhjē mā ijarē. Anē.

Mẽ kot Pawre hā àmnēnh ā mẽ harēnh
Sikūn Ximotre 4.18

¹²⁻¹³ Tā nhūm apkati nhūm Ijaew kwỳjaja xpēn wỳr akuprō. Měmyjaja kēp 40 nē axte hkōt mẽ hkwỳjaja xpēn wỳr akuprō. Mẽ kot Pawre pīr kaxyw hā xpēn mar kaxyw hā akuprō nē hā xpēn mā amỳnē nē xpēn mā:

—Tōe. Nà kot puj mẽ hpīr kaxyw amnhī jagri htỳx o paxàpkur kēt rāhā kupī nē rī kormā apku nē ixkō. Nà kot puj mẽ ho anē. Ra Tirtūm noo mā mẽ pahte ja hā amnhī jarēnh kēnā. Anē.

¹⁴ Hāmri nē mẽ ma mẽ ō patre krāhtūmjē mẽ mẽ àptār tūmrejē hwỳr mra nē mẽ kām hā amnhī jarē nē mẽ kām:

—Ot pa mẽ amā amnhī jarēnh mā mra. Nà kot paj mẽ tã Pawre pī. Kot paj mẽ kormā hpīr kēt ri ixàpkur kēt rāhā kupī. Ra mẽ ixte Tirtūm noo mā ja hā amnhī jarēnh xà hkōt. ¹⁵ Jakamā e mẽ inhma. Kēr ka mẽ axēx rom pōristi krāhtūm mā anē kē apkati kē man mẽ awỳr Pawre ho tē. Te mẽ ate aprī hā hkukjēr kaxyw pyràk o kām axēx. Kojā mẽ kormā mẽ awỳr ho hpōx kēt ri pa mẽ unēn kupī. Anē.

¹⁶ Hāmri nhūm Pawre tāmnhwỳ mẽ kot ā hā amnhī jarēnh anhỳrja ma hāmri nē ma pōristi xàpēnh xà hā ixkrej wỳr Pawre hwỳr hprōt nē kām mẽ harē.

¹⁷ Hāmri nhūm kuma nē amnhī wỳr pōristi krāhtūm nhỳ hā mẽ hamār xwỳnh ā karō nē kām:

—Kwa ma mẽ akrāhtūm wỳr ixtāmnhwỳta o tē kē kām mẽmoj jarē nà? Anē.

¹⁸ Hāmri nhūm kuma nē ma hwỳr o tē nē kām:

—E Pawre na inhmā anē pa awỳr htāmnhwỳ ho tē. Kot tanhmā amā ujarēnh to kaxyw. Anē.

¹⁹ Hāmri nhūm omu nē hpa hā kupy nē o tē nē ahte mẽ hkàx ā o xa nē kām:

—E māmri inhmā mẽmoj jarē pa ama. Měmo na ka te inhmā harēnh kaxyw? Anē.

²⁰⁻²¹ Hāmri nhūm kām:

—Nà Ijaew xàptār tūmrejaja na mẽ kot inhīgēt Pawre pīr kaxyw hā amnhī jarē pa amā harēnh o tē. Kojā xep mẽ hā awỳ. Xep apkati nhūm ate ma mẽ hwỳr mẽ hkukjēr xà hā ixkre hwỳr ho amōr nhūm mẽ kot hprī hā kot amnhī nhīpēx ā hkukjēr kaxyw. Nom kojā mẽ àm amā amnhī to hēx. Kojā xep mẽ kēp 40 nē pry kamā kutēp amūxu nē kuhē. Na mẽ ra hā xpēn mar pa nē xpēn mā: “Kot puj mẽ paxàpkur kēt rāhā Pawre pī nē rī kormā apku nē ixkō.”

Anhÿr o amnhĩ jarẽ pa mẽ kuma. Jakamã na mẽ kormã ate mẽ hwÿr mẽnh kaxyw akãm ama. Kwa mẽ hwÿr ho amõr kêt nẽ. Anẽ.

²² Hãmri nhũm kuma nẽ kãm:

—Tõe. Nà na pa ra ama. Mãmri ma akupÿm tẽ. Nom kêr ka inhmar kumrẽx.

Kêr ka nhãm mẽhõ mã ja jarẽnh kêt kumrẽx. ãm kwarĩ ho kwarĩ. Anẽ.

Hãmri nhũm kuma nẽ kato nẽ ma akupÿm tẽ.

Mẽ kot Ijaew pymaj nhÿhÿm Pawre mẽnh ã mẽ harẽnh

²³⁻²⁴ Tã nhũm põristi krãhtũmja amnhĩ wÿr ÿ hã põristi jamãr o mẽ pa xwÿnh wa ho hamẽxkrut nẽ wa hã karõ nẽ wa kãm:

—E wa inhma. Kojã kõt ã kamãt ka wa ma krĩ pẽ Sejarej wÿr Pawre ho mõ kê hkã hkĩnh pẽ pahihiti Peris wÿr pøj.

Nẽ amnhĩ kõt põristi ho 200 nẽ o mõ.

Nẽ kê mẽ kęp 70 nẽ kawar ã hkrĩ nẽ mẽ akõt mõ.

Nẽ kê mẽ kęp 200 nẽ wapo jamÿ nẽ mẽ akõt o mõ.

Kê mẽ ã ohtõ rax anẽ.

Nẽ Pawre kot kawar ã ÿr nẽ mõr kaxyw ka mẽ kãm hõ ho mõ.

E kêr ka mẽ ã axohtõ nẽ hkõt amõr anẽ kê hkã hkĩnh pẽ pahihiti Peris wÿr pøj. Anẽ.

²⁵ Hãmri nẽ pahihiti Peris mã kagã nhĩpẽx nẽ kamã kãm Pawre jarẽ nẽ kãm:

²⁶ Pa pahihiti Peris? Xà amex? Ixpẽ Kraw Risas na pa awÿr kagã mẽ.

²⁷ E ot pa awÿr Ijaew pẽ Pawre mẽ. Na pre hkwÿja kot hpĩr kaxyw unẽnh tã pa mãânẽn kęp Rõm nhõ xwÿnh ã harẽnh ma hãmri nẽ hwÿr inhõ põristi rẽ nhũm mẽ hwÿr hprõt nẽ mẽ kęp utã. ²⁸ Hãmri nẽ Ijaew xàptãr tũmrejẽ hwÿr o tẽ. Mẽ kot inhãmã tanhmã kot amnhĩ tomnuj to hã harẽnh kaxyw.

²⁹ Tanhmã kot amnhĩ tomnuj to nhũm mẽ kot haxãr rÿ hpĩr ronhÿx ja mex nẽ. No xep ãm kot mẽ higêtjẽ kot amnhĩ nhĩpẽx kõt amnhĩ nhĩpẽx kêt pix mÿrapẽ na mẽ kamã gryk.

³⁰ Tã pa mẽ kot hpĩr kaxyw hã mẽ harẽnh ma nẽ mẽ umaj awÿr kumẽ. Hãmri nẽ kamã mẽ gryk xwÿnhjẽ mã ajarẽ. Jakamã kojã mẽ mẽmo arĩgro hã awÿr pøj nẽ tanhmã kot amnhĩ nhĩpẽx to hã amã harẽ ka kam ja hã mẽ ama nẽ tanhmã ho.

Tã ãm ja pix na pa amã harẽ. Ixpẽ Kraw Risas na pa awÿr kagãja mẽ. Tã mãn ka arĩ ixte amã harẽnhja ma. Anẽ.

³¹ Tã nhũm kamãt nhũm mẽ hkrãhtũm kot mẽ kãm karõ xà hkõt nhũm põristijaja ma Pawre o mõ. Hãmri nẽ krĩ pẽ ãxipãt wÿr pøj nẽ kamã amnhĩm hikra.

³² Nhũm apkati nhũm mẽ kot mẽ hkõt pykap mõr xwÿnhjaja mẽ õ pahi kot mẽ kãm hã karõ xà hkõt awjanã nẽ ma akupÿm mõ nhũm kawar ã mẽ mõr xwÿnh pixjaja ma Pawre ho mõ. ³³ Hãmri nẽ mõ nẽ Sejarej wÿr pøj nẽ pahihiti Peris nhĩhkram Pawre jaxã nẽ kãm kagãja gõ nẽ awjanã nẽ ma akupÿm hapẽx.

³⁴ Hãmri nhũm Perisa kagãja py nẽ omu. Nẽ omunh pa nẽ Pawre mã kãm:

—E inhãmã amnhĩ jarẽ. Tanhmã na anhõ pyka hixi te? Anẽ.

Nhũm kãm:

—Kęp Siris. Anẽ.

³⁵ Nhũm kãm:

—Tõe. Kê mẽ kot ato kapẽr xwÿnhjaja pøj pa kormã ixprĩ hã mẽ kot tanhmã ajarẽnh to ma mãn. Anẽ.

Hãmri nẽ õ põristi mã anẽ nhũm mẽ ma Pawre o tẽ. Ma pahi Erox htyk xwÿnh nhõrkwÿ hwÿr o tẽ nẽ kamã haxã nhũm hkrĩ ho hkrĩ.

24

Ijaew kot tanhmā Pawre ho kapēr punuj to hā mẽ harēnh
Rukre 21.12-13; Atre 25.7

¹ Tā nhūm arīgro kēp 5 nē hapēx nhūm Ijaew kwýjaja Sejarej wýr pōj. Mē õ patre maati ānānīsti nē Tetur nē kaxyw mẽ àptār tūmrejaja nhūm mẽ ma hwýr mō nē pōj. Tetur kēp axiwōkat ā mẽ yr pē kapēr xwýnh jakamā nhūm mẽ kot tanhmā Pawre o kapēr punuj to kaxyw pahī Peris wýr amnhī kōt o mō. ² Hāmri nhūm mẽ amnhī wýr Pawre hā karō nhūm pōristi haprō nē mẽ hwýr o tēn ho axā. Hāmri nhūm Teturja pahihtī Peris mā Pawre kot tanhmā amnhī tomnuj to hā harē nē kām:

—E pahihtī inhma. Nā na ka hte tām mẽ inhīpēx nē mẽ ixto mex o apa. Jakamā nhūm hte nhām pika hkwy nhō xwýnhjaja mẽ ixkurē kaxār kaxyw mẽ ixwýr hprōt kēt nē. Pa htem ixpiitā akukwak ri ijamakētkati nē ixāmnhīx inhmex nē ixpa. ³ Nē mẽ ixkīnh rāhā ho ixpa. Hēxta waa nē. Mē ixpiitā inhmā akīnh. ⁴ E kot paj amā awjarē ka inhma. Kot paj ixujarēnh o hakotre ka inhma nē tokyx ma akupým tē. ⁵ Nā Pawre na hte amnhī tomnuj pix o pa. Kēp Jejus pē Najare nhō xwýnhnta kōt amnhī nhīpēx o mẽ pa xwýnhjē nhō pahī na. Jakamā na hte pyka piitā hkōt mẽ ixpē Ijaew tanhmā axpēn kaxyw mẽ ixkryx to ho pa. ⁶ Jāā na pre Tīrtūm mā amnhī jarēnh xā hā ixkre hwýr amnhī kōt mẽ kēp Ijaew kēt xwýnh kwýjē ho agjē nē mẽ ixpē ixkreja omnu kaxyw mā tā pa mẽ omu nē unē. ⁷ Tā nhūm pōristi krāhtūm Risasja mẽ ixpē utā ⁸ nē awýr mẽ ixte tanhmā amā harēnh to xwýnhjē rē. Tā ot pa mẽ ixkrī. Nē ota Pawre nhý. Kam kot amnhī nhīpēx ā hkukja kē tanhmā amā amnhī jarēnh to ka ama nē ixte amā harēnh xā hkōt tanhmā mar to. Anē.

⁹ Hāmri nhūm Ijaew hkwy haxwýja kām:

—Nā ām hāmri na ā amā harēnh anē pahihtī. Anē.

Pawre kot pahihtī mā amnhī jarēnh
Rukre 21.14-19

¹⁰ Hāmri nhūm pahihtī Peris Pawre mā anē nhūm kot kām amnhī tā àprār kaxyw kānhmā xa nē kām:

—Nā na ka ra inhō pyka kamā mẽ ixto amnhīptār mex o atā amgrā xohtō nē pahihtī. Jakamā na pa pre ate ixkapēr mar kaxyw ā ajarēnh ma nē ixkīnh nē.

¹¹ —E kot paj amā amnhī jarē ka inhma. Ham na pa pre Jerujarē hwýr mō nē pōj. Na pa hwýr ixpōx ā ixtā arīgro pē 12 pix. Kam nē ixtā ixkwýjē kukja nē mẽ ama. Ixte Tīrtūm mā amnhī jarēnh xā hā ixkre kamā Tīrtūm mā mẽ mex o mex ā harēnh kaxyw na pa pre hwýr mō. ¹² No na pa pre nhýri axpēn kaxyw tanhmā ri mẽ hkryx to hkēt nē. Nē mẽ ixte Tīrtūm mā amnhī jarēnh xā hā ixkre kamā rý kapēr o mẽ ahkre xā hā ixkre kamā rý nhýri pry kamā tanhmā axpēn kaxyw ri mẽ hkryx to hkēt nē. Ām amrakati ho amrakati. ¹³ Mē kot ā ri ijarēnh anhýrja amrakati kumrēx. Mēhō kot ā ixte amnhī nhīpēx anhýr ā ixpumunh kēt tā na htem amnhī krā hkōt amā ijarēnh o hēx. ¹⁴ Na htem mẽ ixte Jejus kōt amnhī nhīpēx xwýnhjaja mẽ ixte amnhī nhīpēx mẽ kēt ā mẽ ijarē nom kot anhýr kēt. Ām mẽ inhīgētjē nhō Tīrtūm kapēr nywja kōt na pa hte amnhī nhīpēx mẽ o ri ixpa rāhā nē. Nhūm ixkwýjaja htýx axtem kapēr õ hkōt ixte amnhī nhīpēx o ixpa hā ixkamnhīx no ām kapēr õ hkēt. Ijaxwýja na pa hte mẽ urāk nē finat Mojes kapēr ā kagā mar o ixpa. Nē Tīrtūm nhý hā mẽ kapēr o mẽ pa xwýnh kot kapēr ā kagāja pa hte mẽ urāk nē hkōt amnhī nhīpēx mẽ o ri ixpa. ¹⁵ Nē mẽ urāk nē Tīrtūm kot nhýrmā akupým mẽ ho htír kōt pa

hte ijaxwýja ijamaxpēr tỳx nē. Mē htyk xwýnh piitāā. Mē kot amnhī to mex xwýnhjē mē mē kot amnhī tomnuj xwýnhjē mē mē ho hpimràatā akupým mē ho htírja kôt pa hte mē urāk nē ijamaxpēr tỳx o ri ixpa. ¹⁶ Jakamā na pa hte tām amnhī nhīpēx rāhā nē. Tirtūm noo mā nē mē piitā mē noo mā tām ri amnhī nhīpēx mex rāhā nē.

¹⁷ —Tā na pa pre pyka hkwý hkôt ri ixpa hā ixtā amgrā xohtō nē. Hāmri nē ma akupým Jerujarē hwýr ixkwýjē hwýr mō. Amarī ixte mē kām kaxpore hkwý nhōr kaxyw pa akupým mē hwýr mō. Nē māānēn Tirtūm mā mēmoj nhōr kaxyw. ¹⁸ Hāmri nē mē ixte amnhī nhīpēx xā hkôt pa mē amnhī to mex pa nē ma tēn Tirtūm mā amnhī jarēnh xā hā ixkre hwýr axā nhūm mē kamā ixpumu. Nom na pa pre ri ixkreja kamā tanhmā amnhī tomnuj to hkēt nē. Rý tanhmā ixkapēr punuj to hkēt nē. Na pa pre am ģm inhgrēre nē akryk ixkuhē nhūm mē ixpumu. ¹⁹ Pika pē As rūm Ijaew kwýjaja na prem ixkre kamā ixpumu. Nar mē tāmjaja mān awýr mra nē tanhmā amā ijarēnh to.

²⁰ —Nē jar mē kot ixto kapēr xwýnhjaja. Na pa pre mē aptār tūmrejē mā amnhī jarēnh pa nhūm mē inhma nē tanhmā inhmā nē hkēt nē. Kam nē ja hā mē hkukja nē mē ama. ²¹ Rý ko. Koja apu mē amā ģm ja pix ā ijarēnh japēr. Na pa pre mē kām ixkapēr nē mē kām: “Na pa hte mē htyk nē akupým mē htír kôt ijamaxpēr tỳx nē. Tā ja pix mýrapē na ka prem ixpynē nē ā inhīpēx anē.” Anhýr o mē kām ixujarēnh jakamā nhūm apu mē hkwýjaja kēp ja omnuij nē. Jakamā koja apu mē amā ja hā ijarēnh japēr. Nom ja pix jarē. Anē.

Ā na pre Pawreja pahi Peris mā amnhī jarēnh anē.

Peris mē hprō wa kot Pawre mar ā wa harēnh

²² Tā nhūm pahihti Peris kot mē kot Jejus kôt amnhī xunhwýr xwýnhjē kot amnhī nhīpēx ā mē omunh mex jakamā hāmri Pawre mar pa nē ho kapēr xwýnhjē mā kām:

—Nā hāmri. Na pa ra mē ama. E mē mamrī ma mra. Kē pôristi krāhtūm Risasja mō nē pōj pa wa ixprī hā mē ate tanhmā harēnh toja ma nē ri kormā tanhmā Pawre jarēnh to. Anē.

²³ Hāmri nē hpānhā pôristi pytār xwýnh mā Pawre jarē nē kām:

—E mē ma akupým ixkre hwýr o tē nē kamā hamār o apa. No ģm kwār māmri āmnhīx ri ixkre kamā tanhmā amnhī to ho ri pa. Nē kē hkrāmhwyjaja māmri hwýr mēmoj to mra kē kuku. Anē.

Hāmri nhūm mē kuma nē ma o tē nē akupým ixkre hwýr ho axā nhūm kamā pa ho pa.

²⁴ Tā ra hā apkati grēre nhūm Peris mē hprō wa ma Pawre hwýr tē. Prō haxwýja kēp Ijaew. Hixi pē na pre Turujire. Jakamā nhūm wa ma Pawre nhōrkwy hwýr wa tē. Nhūm Peris Pawre hā karō nhūm kato nē wa hwýr tē nē wa kām awjarē. Tanhmā wa kot amnhī to nē amnhī kaxyw Jejus Kris kôt hamaxpēr nē hkôt amnhī xām prām xāj hprī hā wa kām harē. ²⁵ Nē wa kām:

—Nā na htem Jejus Kris kôt amnhī nhīpēx nē tām ri amnhī nhīpēx o pa. Kām tanhmā amnhī tomnuj to hprām tā ho anhýr kēt nē. Nē arī Jejus kot amnhī nhīpēx kôt amnhī nhīpēx o pa. Koja Tirtūm nhýrmā mē pahpiitā mē pahte tanhmā amnhī nhīpēx to ho papa hā mē pahpumunh xā hkôt tanhmā mē pajarēnh to. Mē pahte tām amnhī nhīpēx xwýnh ā mē pajarē rý mē pahte amnhī tomnuj xwýnh ā mē pajarē. Anē.

Nhūm pre ā Pawre Peris mē Turujire wa kām kapēr anē. Hāmri nhūm Peris tee ri ujarēnhja ma nē kām ma nē. Kot amnhī tomnuj o pa xwýnh ā amnhī pumu nē ā kām kapēr anhýrja mar pyma nē. Hāmri nē Pawre mā kām:

—E hāmri. Nà na pa wa ra ama. Mamrī ma akupÿm tēn axà. Kot paj mēmo arīgro hā mēmoj to anhyr kēt nē axte amnhī wÿr atā karō ka axte tanhmā wa inhmā axujarēnh to. Anē.

²⁶ Nē htÿx hamaxpēr o:

—Nà kot paj mēmo arīgro hā axte amnhī wÿr hā karō kē ixwÿr tē nē ixte kator prām xāj inhmā amnhīrer japēr. Anē.

Hāmri nē xatā amnhī wÿr hā karō htā no nhūm aa kot kator kaxyw tanhmā kām nē hkēt nē.

²⁷ Tā nhūm amgrā axkrut nē hapêx nhūm Pos Pesti pahi Peristi hpānhā kēp mē ō pahi nē mē ho amnhīptā. Jakamā nhūm Peris akupÿm ō krī hwÿr nojarēt nē Pawre mā ĩhkra karo hkēt rāhā ma mō. Na pre hamaxpēr o:

—Nà kot paj Pawre kator nhūm Ijaew ja hā ĩjarēnh ma nē ixkamā gryk nē. Nà kwār mē hagiēnh xā hā ixkre kamā hkrī ho hkrī. Kot paj kator kēt nē. Anē.

Hāmri nē kām ĩhkra karo hkēt rāhā ma akupÿm ō krī hwÿr mō. Jakamā nhūm Pawre arī ixkre kamā kēp prēs nē hkrī ho hkrī.

25

Pawre Rōm wÿr hkrā ā harēnh

¹ Tā nhūm pahi nyw Pos Pesti krī pé Sejurej wÿr mōn pōj. Hāmri nē kamā ri pa hā apkati axkrunēpxi pix nē ma Jerujarē hwÿr mō. ² Hāmri nē hwÿr pōj nhūm Ijaew kwÿjaja omu nē hwÿr mra nē kām Pawre ho kapēr nē hā hwÿr kurē kumrēx. Mēō patre krāhtūmjē mē Ijaew xāptār tūmrejaja nhūm mē hwÿr mra nē kām:

³ —Pa pahihti? E ot pa mē awÿr mra. Kwa xā kot ka Pawre hā karō kē man awÿr mō ka jar kot tanhmā amnhī tomnuj to hā hkukja nē ama? Anē.

No ām hēx rom ā hā kām kapēr anē. Kot hā karō nhūm mē kot pry hā hpīr kaxyw nhūm mē hēx rom ā kām kapēr anē. ⁴ Hāmri nhūm mē kuma nē mē kām:

—Tk. Kwa ra Sejurej kamā kēp prēs nē hkrī kēnā kot pa kēt amnhī wÿr hā karō. Kot pa tokyx ma akupÿm hwÿr mō. ⁵ Jakamā kēp ka mē axāptār tūmjaja ma ixkōt mra. Hāmri nē Sejurej kamā inhmā tanhmā kot amnhī tomnuj to hā harēnh to pa mē ama nē rī kormā tanhmā harēnh to. Anē.

⁶ Hāmri nē mē kamā pa hā apkati grēre nē ma akupÿm Sejurej wÿr mō. Hāmri nē hwÿr pōj nhūm apkati nhūm mē hkukjēr xā hā ixkre hwÿr tē nē mē kot mē mar xā hā mē hkrī xā kamā nhÿ nē amnhī wÿr Pawre hā karō.

⁷ Nhūm mē hwÿr o tē nē ŷr nhūm hkwÿ kot Jerujarē rūm mē mōr xwÿnhjaja kām hipōk nē pahi Pos Pesti mā tanhmā ho kapēr to nē ho kapēr punuj tÿx nē. Kot tanhmā amnhī tomnuj to ho pa hā ho kapēr o kuhē. Nom mē kot ā kot amnhī nhīpêx anhyr ā omunh kēt tā ām amnhī hkrā hkōt ri tanhmā ho hēx to. ⁸ Jakamā nhūm Pawre tee ri amnhī tā mē kot ho hēxja ma nē kānhmā xa nē Pos Pesti mā amnhī tā aprā nē mē kām:

—Nà aa ixte ā amnhī nhīpêx anhyr kēt. Na pa finat Mojes kot Tirtūm nhÿ hā kapēr nhīrōp ixām nē hkwÿm ri tanhmā amnhī nhīpêx to hkēt nē. Nē mē ixte Tirtūm mā amnhī jarēnh xā hā ixkre kamā ri tanhmā ixtÿx ri amnhī nhīpêx to hkēt. Nē pahihti Sesti kapērja pa pre hirōp ixām nē tanhmā amnhī tomnuj to hkēt nē. Aa ixte ā amnhī nhīpêx anhyr kēt kumrēx. Anē.

⁹ Hāmri nhūm Pos Pesti kuma nē tanhmā hkukamā hamaxpēr to nē hamaxpēr o:

—Kwa nhÿ krī kamã kot pa we Pawre kot inhmã tanhmã amnhĩ jarēnh toja ma nhũm Ijaew ja hã kãm ixkĩnh japēr? Nã mẽõ krī pē Jerujarē hwÿr kot paj akupÿm mẽ hwÿr o mẽ nē kamã mãn hkukja nē kuma. Nã ja na mex. Nã kot paj anē. Anē.

Hãmri nē Pawre mã kãm:

—E xã kot puj ma akupÿm Jerujarē hwÿr mẽ pa kamã axte mẽ kot ajarēnh ma nē tanhmã ajarēnh to nã? Anē.

¹⁰ Hãmri nhũm kãm:

—Nã jar ixte pahihiti Sesti nhÿ hã mẽ kot mẽ hkukjēr xã hã ixkre kamã inhÿr nē amnhĩ jarēnh kēnã. Jar na htem mẽ hkukja nē tanhmã ri mẽ mar to. Na pa pre tanhmã ixkwÿjē ho hkēt nē. Mẽmo kaxyw kot pa akupÿm mẽ hwÿr mẽ nē axte mẽ kãm amnhĩ jarē? ¹¹ Kop apu pa tanhmã ixte amnhĩ tomnuj to ronhÿx mẽ mãmri ja hã ixpĩ pa mẽ kēp tanhmã ri amnhĩ to hkēt nē. Nom mẽ kot ixto hēx pix o ã ijarēnh anhÿr kēnã. Jakamã mẽmo mÿrapē kot kaj mẽ ïhkram ijaxã? E Rõm kãm pahi maati Sesti hwÿr mãn inhmē pa kumã mãn amnhĩ jarē. Anē.

Pahi Sesti kēp pyka piitã hkõt mẽ ho amnhĩptār xwÿnh maati jakamã nhũm Pawre kot mar kaxyw hwÿr hkrã. ¹² Hãmri nhũm Pos Pesti kuma nē ma tē nē hã õ kōwenatõjē ma. Hãmri nē hã axpēn mar pa nē akupÿm hwÿr tē nē kãm:

—Tõe. Nã kot paj pahi maati Sesti wÿr amē. Ra hwÿr akra kēnã. Anē.

Pos Pesti kot Akrip mã Pawre jarēnh

¹³ Tã nhũm apkati grēre nē hapēx nhũm pahi hõ pē Akripja ma Pos Pesti hwÿr mẽ. Tõx Perēnis mẽ wa mẽ. ¹⁴ Hãmri nē wa hwÿr pøj nē kuri wa pa hã apkati grēre nhũm Pos Pesti wa kãm Pawre jarē nē wa kãm:

—E pa war amã mẽhõ jarē. Na pre pahi Perisja mẽ hagjēnh xã kamã mẽhõ jaxã nē kormã kator kēt ri nhũm mẽ ãpēnh nē kator pa hpãnhã ãpēnh o amnhĩptã. ¹⁵ Tã ra ma Jerujarē hwÿr mẽ nhũm Ijaew nhõ patre krãhtũmjē mẽ mẽ ãptār tũmrejaja inhmã ho kapēr punuj rax nē. Nē ixte mẽ kãm hpĩr kaxyw inhmã hã ãmnēnh kãm hihtÿx nē. ¹⁶ Nom pa mẽ kēp ja kaga nē mẽ kãm: “Nã mẽ ixpē Rõm nhõ xwÿnhjaja na pa htem ã mẽ hipēx anhÿr kēt nē. Na pa htem mẽ kot ho kapēr xwÿnh noo mã tanhmã hkukjēr to nhũm tanhmã amnhĩ tã ãprãr to pa htem kuma nē rĩ kormã tanhmã mẽ ho. No na pa htem kormã mẽ kot tanhmã amnhĩ jarēnh to hkēt ri tanhmã mẽ ho hkēt nē.” Anē.

¹⁷ —Jakamã nhũm prem kaxyw Sejarej wÿr pøj nhũm apkati pa hã mẽ hkukjēr kurē kumrēx. Nē mẽ kot mẽ hkukjēr xã hã mẽ hkrĩ xã kamã nhÿ nē ixte hkukjēr kaxyw amnhĩ wÿr Pawre hã karõ. ¹⁸ Na pa pre ijamaxpēr o: “Mãn pre tanhmã amnhĩ tomnuj tÿx to hã na mẽ inhmã harēnh kaxyw.”

¹⁹ Anhÿr ã hkamnhix tã te kot amnhĩ to mex xwÿnh pyrãk. ãm kot mẽ hkõt amnhĩ nhĩpēx kēt pix ã nhũm mẽ inhmã harē. Nē kaxyw mẽhõ htyk xwÿnh jarē. Mē kot kãm “Jejus” anhÿr xwÿnhja na xep hte mẽ kãm akupÿm htĩr ã harēnh o pa. ãm ja pix na prem inhmã harē. ²⁰ Pa tee ri ixte nhÿri ixpĩ hã tanhmã mẽ kot harēnh to hã mẽ mar kaxyw hkukamã ijamaxpēr. Hãmri nē hã Pawre kukja nē kãm: “Xã kot puj ma akupÿm Jerujarē hwÿr mẽ pa axte akwÿ kot tanhmã ajarēnh to ma nē rĩ kormã tanhmã ajarēnh to nã?” ²¹ Anhÿr tã no nhũm akupÿm Jerujarē hwÿr mōr kaga kumrēx nē amnhĩm Rõm kãm pahi maati Sesti jarē. Ixte ma hwÿr mēnh nhũm kot kãm amnhĩ jarēnh nhũm kot mar nē tãm tanhmã harēnh to kaxyw. Jakamã pa kormã ixte hwÿr mēnh kaxyw amnhĩ xã hã akupÿm mẽ hagjēnh xã kamã haxã nhũm arĩ hkrĩ ho hkrĩ. Anē.

²² Hāmri nhūm Akrip kuma nē kām:

—Xōwehe? Kwa na pa inhmā tanhmā kapēr to mar prām nē. Anē.

Hāmri nhūm kām:

—Tōe. Nà kē apkati pa hā karō ka tanhmā kapēr mar to. Anē.

²³ Jakamā nhūm apkati nhūm Akrip mē htōx Perēnīs wa pahi hā mē ē mex jagjē nē ma mē hkukjēr xā hā ixkre hwūr wa tē. Pōristi krāhtūm kwījē mē Sejarej kamā mē kot amnhī to rūnh xwūnh kwījē mē nhūm mē hwūr akuprō. Nhūm mē piitā Akrip mē htōx wa kēp pahi hā wa ē mex ā wa omu nē wa kamā no pyma nē. Hāmri nhūm Pos Pesti Pawre hā karō nhūm mē haprō nē ma mē hwūr o tē. ²⁴ Hāmri nhūm Pos Pesti omu nē Akrip mē htōx mē mē kot mar o hkri xwūnhjē mā kām:

—E pahihti Akrip mē mē apikuprōnh xwūnhjaja. Ota Pawre xa. Jerujarē kamā nē jar Sejarej kamā na pre hkwījaja inhmā ho kapēr rax nē. Hāmri nē ixte hpīr kaxyw inhmā hā àmnēnh kām hihtyx nē. ²⁵ Nom mēmoj mýrapē kot pa kēt kupī? Tā nhūm amnhīm pahi maati Sesti jarē pa ma hwūr mēnh kaxyw. ²⁶⁻²⁷ Nom na htem amarī pahi maati Sesti hwūr mē rēnh kēt nē. Na htem kām mē kot tanhmā amnhī tomnuj to hā kagā nē hwūr kagā mē ro hā mē kurē. No jahti kot tanhmā amnhī tomnuj toja na ixte omunh kēt. Te inhmā tanhmā kot amnhī tomnuj to hkēt pyrāk. Jakamā na pa mē awūr o tē. Mē ate kapēr mar nē kot tanhmā amnhī tomnuj to hā inhmā harēnh nhūm ixte hā kagā nē pahi Sesti hwūr mēnh kaxyw. Jakamā e mē kam nē hkukja nē ama nē tanhmā mar to. Anē.

26

Pawre kot pahihti Akrip mā amnhī jarēnh

Atre 8.3, 9.1-19, 22.1-21

¹ Hāmri nhūm Akrip Pos Pesti kot tanhmā Pawre jarēnh toja ma nē Pawre mā kām:

—E māmri mē inhmā amnhī jarē pa mē ama. Anē.

Hāmri nhūm kuma nē kām amnhī jarēnh kaxyw kànhmā kām ĩhkra pē nē kām:

²⁻³ —Hēxta waa nē. Nà na pa amā amnhī jarēnh kaxyw nē ixkīnh nē pahi Akrip. Ra ate mē ixpē Ijaew kot amnhī nhīpēx ā mē ixpumunh mex. Nē mē ixte tanhmā amnhī nhīpēx to hā mē ixte axpēn kukjēta ate hā mē ixpumunh mex. Jakamā na pa amā amnhī jarēnh kaxyw nē ixkīnh nē. E tokyx anojarēt kēt nē inhma. Pa amā ixujarēnh jatur xām kumē ka aprī hā inhma. ⁴ Nà ixkwījaja ra mē kot ixte amnhī nhīpēx ā ixpumunh mex. Ixpīre rūm ixpapxā kamā nē määñēn Jerujarē kamā ixte tanhmā amnhī nhīpēx to ho ixpaja mē kot hā ixpumunh mex. ⁵ Ixpē mē hkwy pē Parijew nhō xwūnh kwījē hā mē kot ixpumunh. Koja ma apu ja hā amā ijarēnh japēr rý ko. Mē ixpē Parijew nhō xwūnhjaja na pa htem amnepēm finat Mojes kot Tirtūm nhý hā mē inhīgētjē mā mēmoj tā karō xā hkōt amnhī nhīpēx mex o ixkwījē jakre.

⁶ —Amnepēm na pre Tirtūm mē inhīgētjē mā tanhmā amnhī jarēnh to. Kot nhýrmā mē piitā akupým mē ho htīr ā amnhī jarē. Tā ixte ja kōt ijamaxpēr pix mýrapē na prem kot hā amā ixto kapēr kaxyw awūr ixto mō. ⁷ Mē ixpē Ijaew nhīgēt piitā na prem Tirtūm kapēr kōt hamaxpēr o ri pa. Kot nhýrmā akupým mē ho htīr ā amnhī jarēnh kōt hamaxpēr tỳx o pa. Amnepēm finat Jako mē hkra pē 12jaja na prem hkōt hamaxpēr. Nē ixpē mē hkanrēhā mē htāmnhwý na pa hte ijaxwýja ja kōt ijamaxpēr tỳx rāhā ho ri ixpa. Tā ām mēmoj pixi mýrapē na ixkwījaja ā amā ixto kapēr punuj anē. ⁸ Mē kot ixpyrā nē ja kōt

hamaxpēr ā amnhī jarēnh tā nhūm pre Tīrtūm akupŷm Kra Jejus o htīr nom nhūm mē ixkīnhā ja kōt hamaxpēr kēt. Nom Tīrtūm kēp akupŷm mē pahto pahťir xwŷnh kēnā.

9—Amnepēm kormā Jejus kōt ijamaxpēr kēt ri na pa pre ijaxwŷja mē urāk nē akupŷm htīr kōt ijamaxpēr kēt nē. Nē ixtŷx ijamaxpēr o: “Kot paj Jejus pē Najare nhō xwŷnh kōt mē kot amnhī xunhwŷr xwŷnhjē nhīpēx kati ho ixa nhūm Tīrtūm ja hā ixpumu nhūm ja kām mex nē.”

10—Anhŷr jakamā pa pre hte tanhmā mē homnui tŷx to ho ri ixa. Jao Jerujarē kamā mē inhō patre krāhtūmjē nhŷ hā mē unē nē mē hagjēnh xā kamā mē hagjēnh o ixa nhūm mē kot mē himex kaxyw mē hā inhmā amnhī jarē nhūm ja inhmā mex nē. Pa mē harēnh ma nē ixkīnh nē. 11 Pa pre hte xatā tanhmā mē hipēx to nē mē kot Jejus kaga hprām xāj mē hipēx kati rūnh nē. Tīrtūm kapēr o mē ahkre xā hā ixkre piitā kamā pa pre hte ā mē hipēx anē. Nē mē kamā inhgryk tŷx jakamā ma krī hkwy hkōt mē hapēr o ri ixa. Ā na pa pre mē hipēx anhŷr o ri ixa.

12—Tā axte ixte mē hkwyjē pynēnh nē mē hagjēnh kaxyw ma Tamas wŷr mō. Mē inhō patre krāhtūmjē nhŷ hā ma mē hwŷr mō. 13 Hāmri nhūm ra kaxkwa nhīpōk ri myt nhŷ pa kormā pry hā inhmōr ri kaxkwa rūm mēmo nhīrāja pumu. Nhūm hirā htŷx o myt jakre nē ixtā ajēt pa ixkōt ri mē pa xwŷnhjē mē hipōk ri ixkuhē. 14 Hāmri nē mē inhmā ma xāj pykap ixrōrōk pa nhūm kaxkwa rūm mēhōj inhmā kapēr. Mē ixpē Ijaew kapēr o kapēr nē inhmā: “Pa Sawti? Hēxta waa nē. Kwa mon ka hte axtem nē ixtomnui tŷx o ri apa? Nom na ka tee ri ā amnhī nhīpēx anhŷr kaprŷ.” Anē. 15 Hāmri pa tee ri kuma nē kām: “Kwa mē atōh na ka ā inhmā kapēr anē?” Anē.

—Hāmri nhūm inhmā: “Ixpē Jejus na pa amā ixkapēr. Pa na ka hte ixpē ixkōt mē kot amnhī xunhwŷr xwŷnhjē homnui tŷx o apa ho te pa ixtomnui tŷx pyrāk. 16 E kānhmā xa. Ate inhmā tanhmā amnhī nhīpēx to ho apa kaxyw na pa amā amnhī to amnhīrīt. Jarāhā ate ixpumunh xā hkōt ate mē kām ma ijarēnh nē mē kām ixkapēr jarēnh o mē ahkre ho ri mē hkōt apa kaxyw na pa amnhī kaxyw ata. Kot paj nhŷrmā axte awŷr ixkato nē tanhmā amā ixkapēr to ka inhma nē ma mē kām ixkapēr jarēnh o ri mē hkōt apa. Ja kaxyw na pa amnhīm ata.” Anhŷr o inhmā kapēr. 17 Hāmri nē inhmā: “E kot paj Ijaew mē Ijaew kēt xwŷnhjē hwŷr amē nē anē mē omunh mex nē nhūm mēhō apīr kēt nē. 18 Kēr ka ma mē hkōt mē kām ixkapēr jarēnh o ri apa kē mēhprī hā kuma. Mē kot amnhī tomnui kaga nē amnhī kaxyw ixkōt hamaxpēr nē ixkōt amnhī xunhwŷr kaxyw. Hāmri nhūm Tīrtūm ja hā mē omu nē ixkukwak ri amnhī katut kōt mē kot amnhī tomnui piitā rēnh pa nē axte kām hamaxpēr kēt nē. Hāmri nē mē ho hkra. Koja mē ā amnhī nhīpēx anē hāmri nē axte Satanasti nhŷ hā tanhmā amnhī nhīpēx to hkēt nē. Pānhā Tīrtūm kōt pix mā amnhī nhīpēx o pa.” Anē.

19—Ā na pre Pahihti Jejus inhmā kapēr anē. Tā kot kaxkwa rūm inhmā ixāpēnh jarēnh ā karōja pa pre mar tŷx nē hkōt amnhī nhīpēx rāhā ho ri ixa pahi Akrip. 20 Jakamā na pa pre ma mē hkōt mē kām kapēr jarēnh o ri ixa. Tamas kumrēx hwŷr nē hpānhā Jerujarē hwŷr nē hpānhā pika pē Jutej piitā hkōt Ijaew mā kapēr jarēnh o ri ixa. Tā hpānhā Ijaew kēt xwŷnhjē mā harē. Na pa hte mē kām ixkapēr o: “Kwa mē ate amnhī tomnui kaga nē hpānhā Tīrtūm kōt amnhī xunhwŷ. Hāmri nē hkōt pix mā amnhī nhīpēx o ri apa. Mē piitā mē kot apē hkwy hā mē apumunh kaxyw.” Anē.

21 —Ăm ja pix mÿrapê na pre ixkwÿjaja ixpynê. Tÿrtÿm mã amnhÿ jarênh xà hã ixkre kamã ixpynê nê ra mẽ kot ixpÿr kaxyw. ²²⁻²³ Nom na hte Tÿrtÿm ixtãnopxa nê ixto ixihtÿx mex rãhã ho pa pa arÿ mẽ kãm harênh o ri ixpa. Mẽ kot amnhÿ to rÿnh xwÿnhjê mã nê mẽ kêp amrakati xwÿnhjê mã nê mẽ piitã mẽ kãm harênh o ri ixpa. Finat Mojes mẽ Tÿrtÿm nhÿ hã kapêr jarênh o mẽ pa xwÿnhjaja kot ra hkukamã tanhmã harênh to xà hkôt pa hte mẽ kãm harênh o ri ixpa. Nê mẽ kãm: “Tÿrtÿm kot mẽ pakaxyw ãm xwÿnhnta na pre amnhÿ xà htÿx kamã hamak kãm ty. Tã nhÿm Tÿrtÿm akupÿm ho htÿr. Kumrêx na pre akupÿm ho htÿr jakamã kumrêx na pre tanhmã mẽ kãm kapêr to ho ri mẽ hkôt pa. Mẽ kot amnhÿ kaxyw hkôt hamaxpêr nê hkôt amnhÿ xunhwÿr xwÿnh piitã urak nê nhÿrmã Tÿrtÿm mẽ wa ò krÿ kamã htÿr tÿm nê pa ho pa hprãm xaj mẽ harênh o pa. Mẽ ixpê Ijaew nê mãânên mẽ apê Ijaew kêt xwÿnhjaja nhÿm pre ã mẽ pajarênh anê.” Anhÿr o pa hte mẽ kãm harênh o ri mẽ hkôt ixpa pahi Akrip. Anê.

24 Nhÿm Pawre kormã kot mẽ kãm amnhÿ jarênh par kêt ri nhÿm Pos Pesti tee ri tanhmã Jejus jarênh to hã kuma nê kàx pê kãm kapêr nê kãm:

—Kwa na ka akraã axpã nã? Pêr ate kagã pumunh tÿx kurê akraã pipãnh pyrãk o ri atÿx ã ri mẽ inhmã axujarênh anê. Anê.

25 Hãmri nhÿm kãm:

—Nã ixkrã pipãnh kêt. Ăm hãmri na pa mẽ amã awjarê. ²⁶ Jerujarê kamã na prem Jejus pí nhÿm mẽ piitã omu. Tã nhÿm akupÿm htÿr hãmri nê hpimxur pê ri pa hkêt nê. Na pre mẽ ohtô nê akupÿm htÿr kãm omu. Pahi Akrip ra kot ja mar mex jakamã na pa ixãmnhÿx ã mẽ amã harênh anê.

27 Anhÿr o kãm kapêr hãmri nê pahi Akrip wÿr rÿt nê kãm:

—Kwa pahi Akrip. Xà Tÿrtÿm nhÿ hã kapêr jarênh o mẽ pa xwÿnhjaja kot Jejus kukamã tanhmã harênh toja kôt na ka hte ajamaxpêr? Nã ra hkôt ajamaxpêr kênã. Ra ixte ajamaxpêr kôt apumunh mex. Anê.

28 Hãmri nhÿm tee ri kuma nê kãm:

—Tk. Kwa xà kot kaj ã inhmã akapêr anê pa ama nê apyrã nê amnhÿ kaxyw Jejus kôt ijamaxpêr? Nã na ka ixte ã ate Jejus jarênh anhÿrja kôt ijamaxpêr ã ixkamnhÿx kaprÿ. Anê.

29 Hãmri nhÿm Pawre kãm:

—Ko. Kot kaj ixpyrã nê amnhÿ kaxyw hkôt ajamaxpêr pa ixkÿnh nê. Nom kaxipix kêt. Mẽ apiitã mẽ ate inhmãr o akrÿ xwÿnhjaja mãânên. Mẽ ate mẽ ixpyrã nê Jejus kôt amnhÿ xunhwÿr na inhmã hprãm. Ăm ixpyrã nê mẽ apê prês pix na inhmã hprãm kêt. Anê.

30 Hãmri nhÿm pahi Akrip nê htôx Perênÿs nê pahi Pox Pesti nê mẽ hkôt mẽ mör xwÿnhjaja kãnhmã kuhê nê ma mrar kaxyw. ³¹ Nê nojarêr nê Pawre hã axpên mã:

—Kwa tanhmã kot amnhÿ tomnuj to hkêt kênã kot kêt mẽ haxã rÿ kupÿ. Anê.

32 Hãmri nhÿm Akripja Pos Pesti mã kãm:

—Kwa kop apu kot amnhÿ kaxyw pahi maati Sesti hwÿr hkrã hkêt ronhÿx pu mẽ ra kator. Anê.

27

Mẽ kot Rôm wÿr Pawre mẽnh ã mẽ harênh

Atre 23.11, 25.12

1 Tã nhÿm mẽ pyka pê Itar wÿr pahi maati Sesti hwÿr Pawre mẽnh kaxyw. Itar kamã mẽ ò krÿ maati na pre kêp Rôm. Jakamã nhÿm Pawre mẽ mẽ kot mẽ

hagjênh xà kamā mẽ hkrī xwýnh mẽ ho hpimrààtā ma mẽ o mra nê pôristi krāhtüm Jurti nhĩhkram mẽ haxàr pa. Kot ma Ròm wýr mẽ o mör kaxyw. Jurtija kèp Itar kamā mẽ õ pahi maati hā pôristi krāhtüm nhùm prem ma mẽ kām mẽ o mör kaxyw ìhkram mẽ hagjênh pa. Ixpê Rukre na pa pre inhmā Pawre hkôt inhmör prām nê mẽ hā ajét nê mẽ hkôt mõ.

²Tā pa mẽ ra inhnojarét nhùm Aristak haxwýja ma mẽ ixkôt mõ. Pyka pè Masetõn nhõ xwýnh na pre. Õ krī pè na pre Tesarõn. Jakamā nhùm ma wa ixkôt mõ. Hāmri nhùm pàrja nojarét. Atamìx rùm pàr nhùm ra As wýr nojarét pa mẽ hwýr inhgjêx pa nê ma kamā mõ. ³Hāmri nhùm apkati pa mẽ krī pè Sito hwýr pøj nê hā pàr xi. Nhùm pôristi krāhtüm Jurtija Pawre ho mex jakamā pa mẽ Sito hwýr pøj nhùm Pawre mã anê pa mẽ ixkato nê ma ixkrāmnhwýjê hwýr mra nê mẽ kutā apku nê ma akupým pàr wýr mra.

⁴Tā pa mẽ axte mõ. Nom nhùm kòk mẽ ixkuta àpêr tỳx jakamā pa mẽ umaj juk nê gò hipòk kupu ho mõ. Gò hipòk pè Sipreja pa mẽ upòk rùm ma hkupu ho mõ nhùm mẽ inhnê kòk pè àmnàr mex nê. ⁵Hāmri pa mẽ mõõ nê pyka pè Siris mẽ Pāpir wa hakrenh o mõ nê pyka pè Ris kamā Mira hwýr pøj nê hā pàr xi nê ijapòx pa. ⁶Hāmri nhùm pôristi krāhtümja Aresānrir rùm pàr pumu nhùm ra Itar wýr nojarét. Pa mẽ hwýr inhgjêx kuré kumrêx hāmri nê ma kamā axte mõ. ⁷Hāmri nhùm pàrja kòk kutā tee ri mör prèprék kaxyw nê àm amnhĩm hprī nê mör à apkati xohtò nê pa mẽ tokyx ixpòx kêt nê. Tā Sito hwýr ixāhtêp o mõ nom nhùm kòk mẽ ixkutā hihtỳx rax kumrêx. Jakamā pa mẽ juk nê gò hipòk pè Kret jatur xà jahpa nê ma kape hā mõ nhùm mẽ inhnê kòk pè àmnàr mex nê. Hāmri pa mẽ ma Sarmõn jakrenh o mõ ⁸nhùm pàr kòk kutā amnhĩm hprī nê kape hā mẽ. Pa mẽ mõ nê jatā Rasej tā pàr nhĩkwý xà mex wýr pøj nê kamā pàr xi. ⁹Nom pàr kot amnhĩm hprī nê mör jakamā nhùm ra kòk xàpêr tỳx nê kamā kry htỳx ã mytwrý mẽ ixtā kato. Mytwrýja ã mẽ kot kòk xàpêr tỳx pymaj nhỹhỹm pàr kām mram kêt. Jakamā nhùm Pawre tokyx mẽ inhmör nê pàr nhõ xwýnhjê mã kapêr kām hihtỳx nê mẽ kām:

¹⁰—Kwa pu mẽ jar kòk xàpêr tỳx jamār o ri papa nà. Kê kòk mẽ kry htỳxja hapêx pu mẽ rì kormā axte mõ. Kot puj mẽ anhyr kêt nê kòk xàpêr tỳx kām mõ nhùm nhỹri pàrja mẽ pahpê axà nhùm gò mẽ apê mẽ akukrêx o hapêx pa. Pu mẽ pajaxwýja axkaprā.

¹¹Anhyr o mẽ kām kapêr tā no nhùm mẽ kuma nê àm kuma. Pàr pām mẽ pàr o mra xwýnh wa nojarét tỳx nê kapêr ma nê àm kuma. Nhùm pôristi krāhtüm wa nojarét ã wa kuma nê haxwýja Pawre mar kêt nê. ¹²Nhùm mẽ kot pàr nhĩkwý xà mex jarênhja mẽ kot mex ã harênh tā mẽ kèp omnuj nê. Hā na wrýk nê kòk xàpêr tỳx nhùm mẽ kèp omnuj tỳx nê. Jakamā nhùm mẽ piitā Pawre rom ra nojarét nê. Mẽ kām tokyx krī pè Wênĩs wýr hpòx prām jakamā nojarét tỳx nê. Gò hipòk pè Kret kamā na Wênĩsja. Nê kamā kòk xàpêr tỳx kêt jakamā nhùm mẽ hwýr nojarét nê axpên mã:

—E kwa pu mẽ tokyx Wênĩs wýr mõ nê kamā mãn kòk xàpêr tỳx japêx jamār o papa. Anê.

Hāmri nê piitā hwýr nojarét.

Kòk kot pàr o àpêr tỳx ã harênh

¹³Tā nhùm kahpa hkôt kòk xàpêrja katāt kòt kawax pè apê nhùm mẽ kamā ama nê axpên mã:

—E hāmri. Tokyx pu mẽ mõ. Anê.

Jakamã pa mẽ pàr o htýx xà ho api nê axte mō. Ma gō hipōk pē Kret jakàr ā mō. ¹⁴ Puh nhũm na wrý nê kōk àpêr týt kumrêx. Mē kot kãm “kōk xàpêr týt maati” anhýr xwýnhja gō hipōk rũm mẽ ixto àpêr týt kumrêx o mō. ¹⁵ Hãmri nê mẽ ixkutã àpêr týt nhũm pàr tee ri kutã hkarôt. Pa mẽ kormã Wēnıs wýr ixpōx kêt ri ra ho awjanã nhũm amnhĩ krã hkôt kōk kôt mō. ¹⁶⁻¹⁷ Hãmri nê mō nê gō hipōk pē Krawti jahpa nê hakàr ā mō nhũm mẽ inhnê kōk pē amýtã nhũm amnhũm hprĩ nê kawax pē apê. Hãmri pa mẽ pàr krare kot mẽ ixkôt mōr xwýnhja pa mẽ kumý nê pàr rax kãm kumê. Ra kamã gō rax tã pa mẽ ixkarôt týt nê nê hkapĩr pa nê ho api nê pàr rax kãm kumê nê ho htýt. Hãmri nê hpãnhã kōk xàpêr týt pymaj pàr rax kaxpre hpa. Hãmri nê kōk kot pykahti grã maati pē Sirteja wýr pàr mẽnh nhũm kot amnhĩ to pykahti xãm o htēm pymaj nhũm mẽ kot ho mrrar xà hã kupêxê rax o wrý nhũm pàr amnhĩ krã hkôt ma kōk kôt mō.

¹⁸ Tã nhũm apkati nhũm kōk arĩ mẽ ixpê pàr o àpêr týt nê arĩ na wrýk rax rãhã nê. Jakamã pa mẽ pàr àr pymaj nê mẽ hikukrêx kwý gōx kãm rēnh pa. Kaxkritre nê àr kêt kaxyw.

¹⁹ Tã nhũm apkati pa mẽ hpãnhã pàr kre kamã ri nê hikukrêx kwý rê nê gōx kãm kurê. ²⁰ Nhũm kōk arĩ àpêr týt kumrêx ā apkati xohtōo nê. Nê na wrýk rax rãhã jakamã pa mẽ kanhêti pumunh kêt nê myt pumunh kêt o mẽ ixtã apkati xohtō rax kumrêx. Hãmri nê tee ri ahkapi nê tee ri amnhĩ kukamã ijamaxpêr. Nê ixytk par pix kukamã ijamaxpêr o ixkaprĩ nê ixkrĩ.

²¹ Hãmri nê mẽ inhmã ma xaj ixãpkur kêt ryy nê. Hãmri nhũm Pawre tee ri ja hã mẽ ixpumu nê pàr nhō xwýnh wa kãm kapêr nê wa kãm:

—Kwa na pa pre tee ri Kret kãm man mẽ pamōr nê war amã ixkapêr. Kop apu mütar mãn mẽ kuri arĩ ri mẽ hkôt mẽ papa ronhýx pu mẽ pajamakêtkati nê paxãmnhĩx ri papa. Tã nhýx pu mẽ ri mẽ hikukrêxja gōx kãm rēnh par kêt nê. ²² Nom kwa kêr ka mẽ tee ri amnhĩ kukamã ajamaxpêr kêt nê. Kot puj mẽ pahtō pahtyk kêt nê. Âm pãrja pix koja axà nê hapêx. ²³ Ixpê Tirtũm krajé hō na pa. Na pa hte kãm tanhmã amnhĩ nhĩpêx to hō ri ixpa. Jakamã na pre kamãt ja kamã ixwýr kapêr o wrýk xwýnhjê hō mẽ nhũm ixwýr wrý nê inhmã awjarê ²⁴ nê inhmã: “Pa Pawre? Kwa tee ri amnhĩ kukamã ajamaxpêr o amã ma hkêt nê. Kot kaj akã hkĩnh pē ma Itar kamã Rôm wýr mō nê pōj nê pahi maati Sesti pumu nê kãm amnhĩ jarê. Jakamã koja Tirtũm akôt mẽ mōr xwýnh piitã omunh mex nê ka mẽ atō tanhmã amnhĩ to hkêt nê.” Anê.

²⁵ —Ā kot inhmã kapêr anhýr jakamã kwa mẽ amnhĩ to htýt nê tee ri amnhĩ kukamã ajamaxpêr kêt nê. Tirtũm kapêr o wrýk xwýnh kot inhmã ujarēnh xà hkôt koja Tirtũm ā mẽ panhĩpêx anê. Ixte ja hã omunh mex kēnã. ²⁶ Koja xep kōkja nhýri gō hipōk ā pàr krakrak pa. Nom mẽ papajaja kot puj mẽ pahkã hkĩnh pē hwýr pahpōx pa. Anê.

²⁷ Tã pa mẽ mōo nê ā inhmōr anhýrja ā ixtã semãn axkrut nê ra gō rax pē Ariax kôt axà. Kamãt kãm hkôt axà nhũm kōkja arĩ pàr o apêr týt rãhã ho mō. Hãmri nhũm kôt ā kamãt nhũm pàr o mrrar xwýnhja ra pàr kot pykahti grã htêp ā hkamnhĩx. ²⁸ Jakamã nhũm mẽ gō xupým pumunh xà ho gō pumu nhũm upým kêp 36 met. Hãmri nhũm hã ahtũmre nê axte omu nhũm ra hpãnhã kêp 27 met pix. Jao ra pàr kot gō kokwe htêp o mōr ā omu. ²⁹ Hãmri nê kot kēn kuranh nê hã pikrakrak pymaj katê rũm ho htýt xà ho 4 nê gōx kãm kurê nhũm arĩ ajêt. Hãmri nhũm mẽ tokyx kãm arĩgro hprãm o arĩgro mã nojarêt o hkrĩ. ³⁰ Hãmri nhũm pàr kãm mẽ àpēnh xwýnhjaja tanhmã hamaxpêr to nê hêx rom pàr krare ho wrýk o tē. Mē kot mẽ ixrer nê ahte xarmã mōr nê rêr nê

tokyx gô hipôk wÿr hpôx kaxyw. No ãm hêx rom te mē kot axte pâr krā rûm ho htÿx xà hō mēnh kaxyw pyrâk o amnhî nhîpêx nē kaxyw ho wrÿk o tē. ³¹ Nom nhûm Pawre mē hamaxpêr ã mē omu hãmri nē pôristi mē mē hkrâhtûm mǎ mē harē nē mē kām:

—Kwa koja mÿjjaja mē pare nē ahte pâr krare kamā xarmā mōn rē ka mē apikaprâr pa kām ga. Anē.

³² Hãmri nhûm mē tee ri kuma nē mē hwÿr hprôt nē mē kêp pâr krare pé hkaxpre xà jakà nhûm gôx kām tēm nē ma gô hkôt hkaprÿn mō.

³³ Tã hãmri nhûm ra myt kator o mō nhûm Pawre akupÿm mē piitã mē ho mē hamaxpêr o hihtÿx kaxyw mē kām:

—Kwa na ka mē tee ri amnhî kukamā ajamaxpêr o akaprî nē axâpkur kêt o atã semãn axkrut. ³⁴ E pu mē mēmoj krē nē ho amnhî xihhtÿx. Kot puj mē pahtho pahtyk kêt nē. ãm hãmri na pa mē amã ixkapêr. Anē.

³⁵ Hãmri nē mēmoj py nē mē noo mǎ Tirtûm mǎ harē nē hkur o xa ³⁶ nhûm mē ja hã omunh xà hkôt akupÿm tãm hamaxpêr o mō. Hãmri nē amnhîm mēō hkwy jamÿ nē kumē kuku. ³⁷ Pâr kām mē inhmôr xwÿnhjaja na pa prem ixpê 276. ³⁸ Tã pa mē ra ixâpkur pa. Hãmri nē pâr kaxkrit kaxyw mē apkur xà hã mēmoj y jakrêxja gôx kām hkaprî pa.

Pâr mē kêp pikrakrak ã harēnh

³⁹ Tã nhûm ra myt kator mex nē nhûm mē amnhî kukamā gô hipôk pumu nē axpēn mǎ:

—Kwa nhÿ pika na mÿj wehe? Anē.

Hãmri nē nhÿri hakàx ã amnhîm nôr xà mex pumu nē hwÿr pâr o môr kaxyw hã axpēn ma. ⁴⁰ Hãmri nē kaxyw pâr o htÿx xà jakà nhûm axrē nē gôx kām rôrôk pa. Nē pî ho pâr o juk xà nhô xē xàja nhûm mē mãânēn krâhta. Hãmri nē akupÿm mrrar xà hã kupêxê nhô nhûm kôk ho hikot nē ma gô jakàx wÿr o mō. ⁴¹ Nom nhûm pâr kormã hakàx pé awry hã môr ri amnhî to kokwe kura nē pyka nhîmôk ã nô nhûm mē tee ri kot hkaxâr nē akupÿm gô xupÿm mǎ mēnh kaxyw. Nom nhûm gô kot pâr nhîxô htak tÿx kurē nhûm mē ixpê pikrakrak par o mō. ⁴² Jakamã nhûm pôristijaja tee ri omu hãmri nē ra mē kêp prêsjê nhîmex kaxyw. Mē kot gôx kām rôrôk nē gô hipôk wÿr hpa ho nana nē mē kêp pikunor pymaj kot mē himex kaxyw. ⁴³ Nom nhûm mē hkrâhtûmja kām Pawre pîr prãm kêt jakamã ja nē mē hkurē nē mē inhmã:

—E mē ate apa ho gô rēnh mex xwÿnhjaja. Akumrêx mra nē mrô nē ho nana ho mra nē rē. ⁴⁴ No mē ate apa ho nana punuj xwÿnhjaja kêr ka mē tapti rÿ pâr kukrêx ô mÿ nē hã ajêt nē hã ma mōn rē. Anē.

Hãmri pa mē ã amnhî nhîpêx anē nē ixpiitã ixkà hkînh pé ixrêr pa.

28

Gô hipôk pé Maw kamã mē pa hã mē harēnh Makre 16.17-18

¹ Tã pa mē ixpiitã ixkà hkînh pé ixrêr pa. Nhûm gô hipôk ã mē pa xwÿnhjaja mē inhmã gô hipôk nhîxi jarē nhûm xep kêp Maw. ² Nhûm Maw nhô xwÿnhjaja mē ixto mex nē. Nhûm axte na wrÿk rax nē nhûm kry htÿx kumrêx nhûm mē ixkamã ukaprî nē mē inhmã kuto nē mē inhmã kapêr mex nē. ³ Hãmri nhûm Pawre kuwy kaxyw ri pî kawrà ho mra nē kuwy hwÿr o tē nē hã haxwÿr o xa. Hãmri nhûm kagã xoprê ô wēnēn xihhtÿxja kuwy kagro pymaj pî rûm kato nē îhkra hã kunha nē hã âpêr o ajêt. ⁴⁻⁵ Hãmri nhûm Pawre omu nē amnhî nē

ho apê nê kuwy kamã kumê nhũm kamã tẽm nê xêt pa. Hãmri nhũm gô hipôk nhô xwýnhjaja tee ri ja hã omu nê axpẽn mã:

—Kwa ga mẽmyti mũj pumu. Mãn kệp mẽ hpar o pa xwýnh na. Hã na kagã õ wẽnẽn xihýtýxta kunha. Nà koja ty nê rĩ amnhĩ pumu. Ra hkã hkĩnh pẽ gô rũm mẽ pahwýr rêt tã koja tã ty kãm ga. Anê.

⁶ Hãmri nhũm mẽ tee ri kot tanhmã amnhĩ to hã hkamnhĩx nê hamãr o kuhê. à htýx nê ìhkra hikot rý htyk kurê kumrêx ã hkamnhĩx tã nhũm tanhmã amnhĩ kamã hamak to hkêt nê. ãm htýx ri hkĩnh nê kapêr nê hpikunhar o ri mra. Hãmri nhũm mẽ tee ri omu nê axpẽn mã:

—Kwa tanhmã kot amnhĩ tore hã. Kệp mẽ hpar o pa xwýnh kêt. Mãn kệp kaxkwa kamã mẽpahpãmjê hõ nã? Hã na kagã kunha nhũm tanhĩ to hkêt nê. Anê.

⁷ Nhũm gô hipôk ã mẽ õ pahihtĩ pẽ Puptija. Õrkwý hã jawý jakamã nhũm amnhĩ kôt mẽ ixwý pa mẽ ma hkôt mỗ nê kuri hkôt ixpa ho ixtã apkati axkrunẽpxi nhũm mẽ ixto mex nê. ⁸ Nhũm ra Pupti nhĩpêxã kệp à nê nõ. Kà kagro htýx nê haók. Hãmri nhũm Pawre hwýr tẽ nê omu nê hã ìhkra xi nê ho Tirtũm wý nhũm akupým ho mex kurê kumrêx. ⁹ Hãmri nhũm gô hipôk nhô xwýnhja harênh ma nê Pawre hwýr mẽ à xwýnh piitã o mra nhũm mẽ omu nê Tirtũm nhỹ hã akupým mẽ ho mex pa. ¹⁰⁻¹¹ Hãmri nhũm gô hipôk nhô xwýnhjaja mẽ ixto mex rax nê.

*Pawre axte Rõm wýr nojarêt ã harênh
Rõmãn 1.10-12, 15.30-32*

Tã pa mẽ gô hipôta kamã ixpa hã mytwrý axkrunẽpxi. Hãmri nhũm kôk xápêr týxta hapêx pa mẽ axte inhnojarêt nê ma mỗ. Pàr õ kamã hpãnhã mỗ. Aresãnrir rũm pãrja pa mẽ hpãnhã kamã mỗ. Mẽ kot kãm “sãnti pihpo” anhýr xwýnhhta kamã. Na pre gô hipôk kamã haxwýja kôk xápêr týx hapêx jamãr xa hã hikwý htã ra axte nojarêt. Hãmri nhũm gô hipôk nhô xwýnhja ma mẽ inhmõr xã hã mẽ inhmã mẽ ixãpkur xã hkwy nhõr rax nê. Hãmri pa mẽ pàr wýr inhgjêx pa nê ma kamã mỗ. ¹² Mỗ nê Sirakus wýr pøj nê hã pàr xi. Hãmri nê krĩja kamã mẽ ixtã apkati axkrunẽpxi nê axte mỗ. ¹³ Mỗ hãmri nê Rekre hwýr pøj nê hã pàr xi. Hãmri nê kamã mẽ ixtã apkati. Nhũm ra kahpa hkôt kôkja kawax pẽ ãpêr mex jakamã pa mẽ ma hkôt mỗ. Nê mẽ ixtã apkati axkrut nê Potew wýr pøj nê hã pàr xi. ¹⁴ Hãmri nê pàr rũm ijapøj nê krĩ kamã Jejus kôt mẽ ixtõ nê htõx kwýjê pumu nhũm mẽ amnhĩ wýr mẽ ixwý. Pa mẽ ma mẽ hkôt mra nê mẽ hkôt ri ixpa hã ixtã ù semãn. Hãmri nê ma Rõm wýr hpãnhã ixpar o mỗ. ¹⁵ Hãmri nê kormã amým inhmõr ri nhũm Rõm kãm Jejus kôt mẽ ixtõ nê ixtõxjaja mẽ ijarênh ma nê man mẽ ixkutã mra. Ma krĩ pẽ Prasxi Apja mẽ “Wẽn Pijakrunẽpxi” anhýr xwýnh jarênhja wa hwýr mẽ ixkutã mra. Hãmri pa mẽ axpẽn kaxpa nhũm Pawre mẽ omu nê hkĩnh nê. Nê mẽ hã Tirtũm mã amnhĩ jarê nê kãm:

—Pa Tirtũm? Nã ãm hãmri na ka mẽ ixkutã jajê rê. Na pa mẽ omu nê ixkĩnh nê. Nã amex o amex Tirtũm. Anê.

¹⁶ Hãmri pa mẽ ma mẽ hkôt Rõm wýr mẽ pøj. Jatã Itar kãm Rõm wýr pøj. Hãmri nhũm pòristi krãhtũm Pawre mã:

—E kot paj mẽ hagjênh xã kamã ajaxàr kêt nê. Kot kaj amã nhỹri ixkre kamã apa hprãm nê mãmri kamã apa. Nom koja pòristi hõ akôt pa ho pa.

Anhýr jakamã nhũm nhỹri ixkre kamã pahihtĩ Sesti kot mar kaxyw kamã hamak o pa.

*Pawre kot Rôm kamã tanhmã amnhĩ nhĩpêx to hã harênh**Atre 17.5-6*

¹⁷ Tã nhũm Pawre Rôm kamã hã apkati axkrunêpxi nê amnhĩ wÿr Ijaew xaptãr tũmrejê hwÿ nhũm mê hã akuprô nhũm mê kãm amnhĩ jarê nê mê kãm: —E ixkwÿjaja. Pa mê amã amnhĩ jarê ka mê inhma. Nã na pa pre mê panhĩgêjtê kapêr nhĩrôp tanhmã ixãm to hkêt nê rÿ ixte tanhmã mê pahkwÿjê hõ hto hkêt tã nhũm mê pahkwÿjaja amarĩ ixppynê. Jerujarê kamã ixppynê nê Rôm nhõ xwÿnhjê nhĩhkram ijaxã. ¹⁸ Hãmri nhũm mê ixte amnhĩ nhĩpêx ã ixkukja nê tee ri mê kot mêmoj mÿrapê ixpĩr kaxyw tanhmã ixkukjêr to kaprÿ. Jakamã nhũm mê kãm ixkator prãm nê. ¹⁹ Nom nhũm mê pahkwÿjaja kãm ja mex kêt jakamã pa pre jar pahĩ maati Sesti kot ixte kãm amnhĩ jarênh ã inhmar kaxyw amnhũm harê nê man hwÿr mõ. Kot paj tanhmã kãm mê pahkwÿjê ho ixkapêr punuj to hkêt nê. Æm ixte amnhĩ tã tanhmã mar to hpix kaxyw na pa hwÿr mõ.

²⁰ —Tã pa amnhĩ wÿr mê awÿ. Ixte mê amã amnhĩ jarênh kaxyw. Mê pahkaprĩ xwÿnhnta. Mê pahte kormã kamã pajamak o papa xwÿnh Jejusta. Æm ixte amnhĩ kaxyw hkôt ijamaxpêr pix mÿrapê na prem ã kãx o ixkaxpre anê. Anê.

²¹ Hãmri nhũm mê kuma nê kãm:

—Nã jar tanhmã ajarênh kute hkêt. Na pre Jutej kamã mê pahkwÿjaja tanhmã ajarênh to hã kagã nê mê ixwÿr mênh kêt nê. Nê ham mê kurũm mê hpôx xwÿnhjaja na prem tanhmã mê inhmã ajarênh to hkêt nê. ²² No na xep hte pyka piitã hkôt mê kãm mê ate Jesus kôt amnhĩ xunhwÿr xwÿnhjê kurê nê. Na pa pre mê ajarênh ma nê mê inhmã axujarênh mar prãm nê. Anê.

²³ Hãmri nhũm mê kot mar kaxyw arĩgro hta.

Tã nhũm mê kot arĩgro hyr kato nhũm mê Pawre nhõrkwÿ hwÿr pikuprõnh rax nê nhũm mê kãm awjarê. Mê kãm ujarênh ry nê. Nê ho kamãt. Nê mê kãm:

—Nã mê pahte amnhĩ wÿr kamã pajamak o papa xwÿnh Jejusta. Kot kaj mê atõ amnhĩ kaxyw hkôt ajamaxpêr nê hkôt amnhĩ xãm nhũm Tĩrtũm ja hã apumu nê ato hkra. Anê.

Nhũm pre ã mê kãm kapêr anê. Nê finat Mojes kot Tĩrtũm nhÿ hã Jesus kukamã tanhmã hã kagã htoja nhũm mê kãm harê. Nê Tĩrtũm nhÿ hã kapêr jarênh o mê pa xwÿnhjaja kot tanhmã hã kagã htoja nhũm mê kãm harê.

²⁴ Hãmri nhũm mê hkwÿjaja kuma nê hkôt hamaxpêr nê amnhĩ kaxyw Jesus kôt hamaxpêr nê hkôt amnhĩ xunhwÿ. No nhũm mê hkwÿjaja kuma nê Æm kuma nê kãm axte mar prãm kêt nê.

²⁵⁻²⁹ Jakamã kãnhmã kuhê nê nojarêt nhũm Pawre mê kãm:

—Nã amnepêm na pre Tĩrtũm finat Ijaisti mã tanhmã kapêr to. ÿ hã kot mê panhĩgêjtê mã tanhmã kapêr jarênh to kaxyw. Tĩrtũm Karõ nhÿ hã kot mê kãm kapêr nê tanhmã mê harênh to kaxyw. Te Tĩrtũm tãm mê kãm kapêr pyrãk mê kãm kapêr. Nê Æm hãmri tanhmã mê pahkwÿjê jarênh to. Na pre mê kãm:

E Ijaisti. Kêr ka ma akwÿjê hkôt ri mê kãm tanhmã ixkapêr jarênh to ho ri apa.

Nê mê kãm: “Kot kaj mê ajamak o axumar tÿx tã aprĩ hã ixkapêr mar kêt nê. Nê mê ano ho arĩt tÿx tã aprĩ hã ixte amnhĩ nhĩpêx ã ixpumunh kêt nê. Mê amã ixkapêr mar prãm kêt jakamã te mê ate mar pymaj amnhĩ jamak pro pyrãk o amnhĩ nhĩpêx o ri apa.

Ně mẽ amã ixte amnhĩ nhĩpêx ã ixpumunh prãm kêt jakamã te mẽ ate ixte amnhĩ nhĩpêx ã ixpumunh pymaj te mẽ anomnhõt pyrãk o amnhĩ nhĩpêx o ri apa.

Jao amnhĩ kaxyw ixkõt ajamaxpěr kêt ně.

Kop mẽ amã ixkapěr mar prãm ronhỹx ka mẽ aprĩ hã inhmar tỳx ně.

Ně aprĩ hã ixte amnhĩ nhĩpêx ã ixpumunh mex ně.

Jao amnhĩ tomnuj kaga hpa ně ixkõt amnhĩ xunhwỳ.

Pa ja hã mẽ apumu ně mẽ ato mex ně.

Tã ka mẽ ã amnhĩ nhĩpêx anhỹr kêt ně.” Anhỹr o kěr ka mẽ kãm ixkapěr jarěnh o ri mẽ hkõt apa Ijaisti. Aně.

Na pre ã Tĩrtũm mẽ panhĩgếtjẻ kaxyw Ijaisti mã kapěr anẻ nhũm ô ri mẽ kãm ujarěnh o pa ně mẽ pamã hã kagã. Jakamã kwa mẽ okora. Kěr ka mẽ jajẻ pyrã ně ã amnhĩ nhĩpêx anhỹr hkết ně. Kwa mẽ inhma ně inhmar tỳx ně. Ijaew kêt xwỳnhjaja kot kapěr marja na ra Tĩrtũm kãm hprãm ně. Jakamã koja mẽ hwỳr mẽ kot kapěr jarěnh o mẽ pa xwỳnh kwỳjẻ rẻ nhũm mẽ hkõt mẽ kãm ujarěnh o pa nhũm mẽ kuma ně mẽ akurom kãm mar prãm ně. Anẻ.

Hãmri nhũm mẽ kuma ně hapỏx pa ně ma akupỹm axpẻn mã tanhmã kapěr jarěnh to ho mra. ³⁰ Hãmri nhũm pahi maati Sesti tokyx amnhĩ wỳr Pawre hwỳ ně tanhmã mar to hkết nhũm ỏrkwỹ kamã kẻp prẻs ně pa ho hã amgrã axkrut. Nẻ tãm ỏrkwỹ pãnhã mẽ kãm amnhẻre. Nhũm pre krĩ nhỏ xwỳnhjaja ohtỏ nẻ hwỳr mra nhũm amnhĩ wỳr mẽ omu ně hkẻnh ně. ³¹ Na pre hte amnhĩ wỳr mẽ kuwỳ ně mẽ kãm Tĩrtũm kapěr jarěnh o hkrĩ. Mẻ kot Tĩrtũm Kra Pahihti Jeus Kris kỏt amnhĩ xunhwỳr nhũm Tĩrtũm kot ja hã mẽ omunh ně amnhĩ katut kỏt mẽ kot amnhĩ tomnuj rẻnh par ně mẽ ho hkra hã mẽ kãm ujarěnh o hkrĩ. Nẻ mẽ kot hkỏt amnhĩ xunhwỳr xwỳnhjẻ jahkre. Tanhmã mẽ kot Jeus kỏt amnhĩ nhĩpêx mex to ho pa hã mẽ kãm karỏ ho hkrĩ. Hãmri nhũm mẽhỏ ja nẻ tanhmã kãm kapẻr to hkết ně.

Tã ãm ja pix Teopre. Ixpẻ Rukre na pa awỳr kagãja nhĩpêx ně kumẻ. Nẻ kamã amã tanhmã mẽ pahkwỳjẻ jarěnh to. Tã ãm ja pix na hapẻx.

Römän Pawre kot Röm kām Jesus kōt hkwyjê hwyr kagà nē mēnh

Kagà ja na pre Pawre hipêx. Kêp Jesus nhỹ hã mē ahkre ho pa xwýnh na pre. Na pre hte mry kà ho ixkre nhĩpêx nē mē kām ho wēnê ho mē hkōt pa pē mē piitã mē kām Tirtüm kapêr jarênh o pa. Tã krĩ pē Röm kamã mē kot Jesus kōt amnhĩ xunhwýr xwýnhjê hwýr kagàja nhĩpêx nē mē hwýr kumê. Kormã ma mē hwýr mōr nē mē omunh kêt ri.

Nē Jesus kêp Tirtüm mã tanhmã mē pajarênh to xwýnh ã nhũm pre mē kām harê nē hã kagà. Jesus kot mē pahte amnhĩ tomnuj pãnhã mē panê htyk jakamã na hte Tirtüm mē pahte hkōt amnhĩ xunhwýr ã mē pahpumu nē Jesus kukwak ri mē pahte amnhĩ to mex xwýnh ã mē pajarê.

Nē Tirtüm Karō nhỹ hã mē kot amnhĩ nhĩpêx nyw nē hamaxpêr nyw o pa hã nhũm Pawre mē kām karō nē hã kagà. ã na pre mē kām mēmoj jarê nē hã kagà anê. Nē hã kagà ho:

¹ Pa Röm nhō xwýnhjaja? Xà mē amex? E ot pa mē awýr kagà nhĩpêx nē kumê. Tirtüm na pre mē akaxyw ixãm. Ixte mē amã Jesus kot tanhmã mē panê amnhĩ nhĩpêx to hã harênh o ri ixpa kaxyw. Na pre ixpê Pawre hã ixpumu nē ixãm. Jakamã na pa ã mē awýr kagà nhĩpêx nē mēnh anê. Ixte Jesus nhỹ hã mē ahkre ho ri ixpa xwýnh na pa. Na pa hte kām tanhmã amnhĩ nhĩpêx to ho ri ixpa. Tã ã mē awýr kagà nhĩpêx nē mēnh anê.

² Amnepê m na pre Tirtüm nhỹ hã kapêr jarênh o ri mē pa xwýnhjaja mē pakukamã mē panhĩgêjtê mã Jesus kukamã tanhmã harênh to ho ri pa. Nē mē kām kapêr jarênh o mē hkōt pa nē mē kām:

—Koja nhỹrmã Tirtüm mē pahpiitã mē panê tanhmã kot amnhĩ nhĩpêx to mã xwýnh mē nhũm mē hpiitã hpri hã harênh ma nē omu. Anê.

Nhũm prem ã Jesus kukamã mē kām harênh anhýr o ri mē hkōt pa. Tirtüm kapêr ã kagà htüm kamã harênh xà hkōt tanhmã mē kām harênh to. ³ Tirtüm Kra Jesus Krisja na pre mē kām harênh o ri mē hkōt pa. Mē panhō Pahihtĩ na. Kêp Tirtüm Kra htã na pre mē pahpyrà nē ĩ ho amnhĩ nhĩpêx nē wrý nē katorxã nhōxã hkre rüm kato. Jakamã kêp Tirtüm Kra pix kêt mããnên katorxã hkōt kêp higêt Tawi hkanrêhã htãmhwy.

⁴ Kêp Tirtüm Kra htã nhũm prem axtem nē tanhmã hamaxpêr to nē kupĩ. Nom nhũm Tirtüm kêp amnhĩ Kra hã akupým ho htĩr. Jakamã na pu htem harênh ma nē kām pajamaxpêr o:

—Jesus kêp Tirtüm Kraa. Mē kot kêp hpĩr tã nhũm akupým ho htĩr. Jakamã nhũm Tirtüm pyrà nē hihtýx o hihtýx. Anê.

⁵ Tã ã Tirtüm kot Kra nhĩpêx anhýrja ri na mããnên pa ixto mex nē mē akaxyw ixãm. Jakamã na pa hte ma krĩ piitã hkōt mē kām tanhmã Jesus Kris jarênh to ho ri mē hkōt ixpa. Ijaew mã nē Ijaew kêt xwýnhjê mã. Mē kot harênh mar nē amnhĩ kaxyw kām hamaxpêr nē kapêr kōt pix mã amnhĩ nhĩpêx mex kaxyw. ⁶⁻⁷ Nē mē apê Röm nhō xwýnhjaja. Na ka prem Jesus kōt amnhĩ xunhwý nhũm Tirtüm ja hã mē apumu nē mē ato hkra nē mē apê Jesus mē wa hkwy hã mē ajarê. Mē ate hkōt amnhĩ nhĩpêx kaxyw nhũm pre ã mē ajarênh anê.

Tā ot pa kagā nhīpēx nē mē awȳr mēnh kaxyw. Tirtūm kot mē ato hkra xw̄ynh̄jē hw̄yr. Tirtūm kām mē ajapēē.

Na pa hte mē ato mē panhīpēēxā maati Tirtūm mē Pahihti Jejus Kris wa hw̄yr rāhā ri ixpa. Nē mē ato wa hw̄yr o:

—Kwa kēr ka wa Rōm kamā war akrajē pumunh mex nē mē kutā anojarēt rāhā nē. Kē mē hamakēt̄kati nē amnhīx ri tanhmā amnhī nhīpēx to ho ri pa. Anē.

Pawre kot Rōm nhō xw̄ynh̄jē pumunh prām ā amnhī jarēnh

Atre 28.15-16; Rōmān 15.22-29

⁸ Nē na ka prem amnhī kaxyw Jejus Kris mā ajamxpēr nē hkōt amnhī xunhw̄y nhūm krī piitā hkōt mē pa xw̄ynh̄jaja mē ajarēnh ma. Nē mē ate amnhī nhīpēx nyw ā mē ajarēnh ma nē xpēn mā tanhmā mē ajarēnh to ho pa. Nē mē ajarēnh o:

—Kwa na xep Rōm kām mē hkwȳjaja amnhī kaxyw Jejus mā hamaxpēr t̄yx nē. Nē hkōt amnhī nhīpēx mex rāhā ho ri pa. Anē.

Pa ā mē kot mē ajarēnh anhȳrja ma nē ixkīnh t̄yx nē. Nē Tirtūm mā mē anhȳ hā ixkīnh ā amnhī jarēnh o ri ixpa. ⁹ Na pa hte mē ato hw̄yr rāhā ho ri ixpa. Nē nh̄yri mē kām Tirtūm Kra Jejus kapēr jarēnh o ri ixpa nē mē amā ijamaxpēr nē mē ato kuw̄y. Nē tanhmā Tirtūm mā amnhī nhīpēx to ho ixpa pē mē amā ijamaxpēr nē mē ato kuw̄y. Tirtūm kot ja hā ixpumunh mex. ¹⁰ Na pa hte tanhmā kām amnhī jarēnh to kaxyw nē mē akaxyw amnhī to kuma nē kām:

—Pa Tirtūm? Na pa ra inhmā ma Rōm w̄yr inhmōr nē kamā akōt ixkw̄yē pumunh prām t̄yx kumrēx. Xā kot ka tokyx mē hw̄yr inhmē nā? Anē.

¹¹ Na pa ra inhmā mē awȳr inhmōr prām t̄yx nē. Na pre Tirtūm Karō tanhmā ixkrā hto pa ŷ hā kapēr ā kagā mar t̄yx nē. Nē hkōt mēmoj mex pumunh rax nē. Tā ra inhmā ma mē awȳr inhmōr nē amnhī xō ri mē amā harēnh prām nē. Mē ate inhmar nē aprī hā Jejus Kris kōt amnhī xunhw̄yr t̄yx nē hkōt amnhī nhīpēx mex rāhā ho ri apa kaxyw. ¹² Kot paj nh̄yrmā ma mē awȳr mō. Nē mē awȳr pōj pu mē xpēn pumu nē pahkīnh nē. Mē pahte amnhī kaxyw Jejus Kris mā pajamaxpēr mex o papa hā xpēn pumu nē pahkīnh nē. Nē mē pahpiitā hkōt amnhī nhīpēx mex o ri papa.

¹³ E ixkw̄yjaja. Xatā ixte mē awȳr ixkrā htā nhūm mēmoj xatā tanhmā ixpē am̄tār to pa kormā jar ixpa. Nom kot paj nh̄yrmā ma mē awȳr mō. Mē ate ja hā inhmar kaxyw na pa ā Tirtūm noo mā mē amā amnhī jarēnh anē. Na pa pre krī hkwȳ kamā mē apē Ijaew kēt xw̄ynh kw̄yē hw̄yr ixpa. Nē mē kām Jejus kot mē panē tanhmā amnhī nhīpēx to hā harēnh o ri mē hkōt ixpa. Nhūm mē hkwȳjaja inhma nē hkōt amnhī xunhw̄y. Ja kaxyw na pa inhmā ma mē anhō krī hw̄yr inhmōr prām nē. Mē akwȳjaja kot ixkapēr mar nē mē apyrā nē Jejus kōt amnhī xunhw̄yr kaxyw. ¹⁴ Na pre ra Tirtūm ixte kapēr o mē ajahkre ho ixpa kaxyw mē piitā mē kaxyw ixām. Tanhmā ri mē kute xw̄ynh̄jē kaxyw. Mē kām ma ho mē pa xw̄ynh̄jē mē mē kām ma hkēt o mē pa xw̄ynh̄jē mā. Nē mē kot kagā pumunh xw̄ynh̄jē mē mē kot kagā pumunh kēt xw̄ynh̄jē mā. Mē piitā mē kaxyw na pre ixām. Ixte mē kām Jejus kot tanhmā mē panē amnhī nhīpēx to hā harēnh o ri mē hkōt ixpa kaxyw. ¹⁵ Jakamā na pa ra inhmā mē apē Rōm nhō xw̄ynh̄jē hw̄yr inhmōr prām nē. Ixte mē anhō krī kamā mē piitā mē kām ja jarēnh o ri ixpa nhūm mē kot inhmar nē mē pahpyrā nē Jejus kōt amnhī xunhw̄yr kaxyw.

Jejus kot mē panē htyk ā harēnh
Sikūn Ximotre 1.6-12

16 Nê Jejus kot mê panê htyk ã harênhja ãm hãmri na. Harênhja mex o mex. Na htem kuma nê kãm hamaxpêr nê amnhî kaxyw hkôt hamaxpêr nê hkôt amnhî xunhwÿ. Hãmri nhùm Tirtûm ja hã mê omu nê mê nê mê kot amnhî tomnuj o hapêx pa nê mê ho hkra. Nom mê ixpê Ijaew nhô xwÿnhjê pix kêt. Mãânên mê apê Ijaew kêt xwÿnhjaja nhùm kãm mê pajapê ho xapên pyrâk. Jakamã na pu htem Jejus kôt amnhî xunhwÿ nhùm Tirtûm ja hã mê pahpumu nê mê pahto hkra. Ja kaxyw âhpumunh tÿx o âhpumunh tÿx. 17 Æm mê kot amnhî kaxyw Jejus mã hamaxpêr xwÿnh pixjaja na hte mê ho hkra. Kapêr ã kagã htûm kot tanhmã ja jarênh to nê harênh kot:

Na hte Tirtûm mê kot amnhî kaxyw Kra mã hamaxpêr ã mê omunh xã hkôt mê ho hkra nhùm mê amnhî kaxyw kãm hamaxpêr rãhã ho pa. Jao ra ô ri tãm amnhî nhîpêx o pa. Anê.

*Mê pahpiitã mê pahte amnhî tomnuj xwÿnh ã mê pajarênh
Atre 14.15, 17.22-29; Apokarip 9.20-21*

18 Nê mê kot amnhî tomnuj o ri mê pa xwÿnhjaja na hte Tirtûm axtem tanhmã mê harênh to. Na htem Tirtûm kapêr ma nom amnhî tomnuj gryk ã ãm kuma. Nê mê hkwyjaja kot kapêr mar pymaj kapêr ô ho mê kêp ãnnâr rãhã ho ri pa nhùm Tirtûm ja hã mê omu nhùm ja kêp omnuj nê. 19-20 Te mê kot Tirtûm kot amnhî nhîpêx ã omunh kêt pyrâk o amnhî nhîpêx tã mê kot omunh mex. Tirtûm kot mêmoj to kator krax rûm ra kot mê pamã amnhî to amnhîrit mex. Pu mê pano ho omunh kêt tã no ãm kot amnhî nhîpêx kôt ra kêp Tirtûm ã omunh mex nê. Nê kêp mêmoj piitã ho kator xwÿnh ã omunh mex nê. Nê mex o mex ã omu nê hihtÿx o hihtÿx hã omu. Tirtûm kot amnhî nhîpêx kot amnhîrit mex nhùm mê kot omunh mex tã hkôt amnhî xunhwÿr kêt nê. Nê axtem nê hamaxpêr o:

—Tk. Tirtûm kot inhmã amnhî to amnhîritre hã kot pa kêt ri hkôt amnhî nhîpêx. Kot pa inhno ho omu nê ri kormã hkôt amnhî nhîpêx japêr. Anê.

Ra mê kot amnhî nhîpêx ã omunh mex tã ri ã hamaxpêr anê. Jakamã nhùm Tirtûm tee ri ja hã mê omu nhùm ja kêp omnuj tÿx nê. 21 Mê kot amnhî nhîpêx ã omunh mex tã amnhî kaxyw tanhmã kãm hamaxpêr hto hkêt. Rÿ arî hamaxpêr japêr nê kãm:

—Nã Tirtûm. Æm hãmri amex kumrêx. Æm amex o amex. Apê Tirtûm ã ãm apixi mex kumrêx na ka. Æm hãmri na ka hte mê ixto mex o apa.

Anhÿr o amnhî kaxyw kãm kapêr kêt nê. Nê ãm htÿx tanhmã hamaxpêr punuj to pix o ri pa. Te kamãt kô kamã ri mê pa xwÿnhjê kot amnhî nhîpêx pyrã nê mêmoj mex pumunh kêt nê.

22 Mê kot âhpumunh tÿx ã amnhî to jarkrar o ri pa htã no ãm te mê hkrã kanhîn kêt nê mê hamaxpêr kêt pyrâk o amnhî nhîpêx. 23 Jakamã na htem amnhîm mêmo karô nhîpêx. Mêmo htyk mã xwÿnhjê hõ karô nhîpêx. Tanhmãn panhî karô rÿ mêmo mry karô rÿ mêmo kuwênh karô. Rÿ mêmo kagã karô nhîpêx. Hãmri nê ho ô sãnti nê te ri ho Tirtûm nhîpêx pyrâk o hipêx. Jao hpar pê hkôn krã ho rôrôk nê amnhî to kuwÿ nê kãm amnhî jagrer pê kãm mex o mex ã harê. Tirtûmja sãnti rom htîr o htîr tã nhùm mê axtem nê sãnti gryk ã hkaga nê ã amnhî nhîpêx o pa anê. 24 Jakamã nhùm tee ri ã mê kot amnhî nhîpêx anhÿr ã mê omu nê amnhî pyrã nê mê hkaga nê ãm mê omu. Jakamã nhùm mê ãm amnhî krã hkôt tanhmã ri amnhî tomnuj to ho pa. Nê xapên kãm ri tanhmã hpijaàm kêt to. Æ na htem htÿx ri amnhî tomnuj anhÿr o pa.

²⁵ Tirtūm kapērja ām hāmri htā nhūm mē axtem nē te amnhī pum rēnh pyrāk o hipēx nē kām hamaxpēr kēt nē. Nē hpānhā ri mē hēx xwýnhjē kapēr pix ma nhūm ja te mē kām mex pyrāk. Na htem ā amnhī nhīpēx anē hāmri nē axtem nē Tirtūm kot mēmoj nhīpēx pix parpē rōrōk nē amnhīm mex o mex ā harē. Nom kot hipēx xwýnh Tirtūm parpē mān ā amnhī nhīpēx anhýr kēt nē. Nom kot mēmoj nhīpēx xwýnhhta mex o mex jakamā koja mē kot hkōt amnhī nhīpēx xwýnhjaja jajē rom kām mex o mex ā harēnh tūm rāhā ho ri pa. ²⁶ No mē kot amnhī tomnuj xwýnhjaja na hte Tirtūm amnhī pyrā nē mē hkaga nhūm mē htýx amnhī krā hkōt ri tanhmā amnhī tomnuj to ho ri pa. Jao mēni hkwyjaja axtem nē axpēn gryk ā mjēn kaga nē axpēn nhīo ho mjēn. ²⁷ Nhūm mēmy hkwyjaja māānēn axtem nē amnhī kwýjē my gryk ā hprō kaga nē axpēn nhīo ho hprō. Na htem ā axpēn kamā hpijaam kēt o pa anē. Mýrapē koja mē ā pix kām amnhī xā htýx kamā hamak o pa. ²⁸ Na htem amnhī tomnuj gryk ā Tirtūm mā hamaxpēr kēt nhūm tee ri amnhī tā mē omu nē hamaxpēr o:

—Mē kām amnhī tomnuj pix prām jakamā kwār mē māmri ā amnhī nhīpēx anē. Kot paj axte ja nē tanhmā mē kām ixkapēr to hkēt nē. Anē.

Jakamā nhūm mē arī htýx ri amnhī krā hkōt tanhmā amnhī tomnuj to ho ri pa rāhā nē.

²⁹ Hāmri nē mēmoj punuj pix mā hamaxpēr.

Nē kām amnhī mex pix prām mā hamaxpēr.

Nē kām axpēn tomnuj pix prām.

Nē mēmoj tā axpēn kām gryk pix prām.

Nē mē kām axpēn par pix prām.

Nē mēmoj tā ri kām axpēn mā àkjēr prām.

Nē mēmoj tā kām axpēn mā hēx prām.

Nē kām axpēn kaxyw tanhmā hamaxpēr punuj to pix prām.

Nē kām tanhmā axpēn to kapēr punuj to pix prām.

³⁰ Nē kām mēmoj tā axpēn to hēx pix prām.

Nē kām Tirtūm prām kēt o ri pa.

Nē mēmoj tā axpēn mā àkjēr o ri pa.

Nē mēmoj tā amnhī to jarkrar rāhā ho ri pa.

Nē tanhmā amnhī tomnuj to pix kukamā hamaxpēr. Nhūm mē katorxā nē mē hipēxā tee ri ja nē tanhmā mē kām kapēr to no nhūm mē mar kēt kumrēx.

³¹ Ā mē kot amnhī nhīpēx anhýr o ri mē pa xwýnhjaja na hte Tirtūm kām mēmoj mex nhūm mē kēp omnuj nē nhūm Tirtūm kēp mēmoj omnuj nhūm mē kām mex nē. Nē axpēn mā mēmoj tanhmā ho hā amnhī jarēnh tā ho anhýr kēt nē. Nē axpēn kām ukapri ho ri pa hkēt nē. ³² Tirtūm kapēr ā kaga htūm kot tanhmā mē hkukamā mē harēnh to nē mē harēnh kot:

Ā mē kot amnhī nhīpēx anhýr o ri mē pa xwýnhjaja koja mē nhýrmā ty hāmri nē amnhī xā htýx kamā hamak rāhā ho ri pa ho pa. Anē.

Nhūm mē kot amnhī tā ja mar týx tā aa amnhī tomnuj kaga hkēt nē. Arī ā amnhī nhīpēx anhýr o pa rāhā nē. Nhūm mē hkwyjaja mē kot amnhī tomnuj ā mē omu nē mē urak nē ā amnhī nhīpēx anhýr o ri mē hkōt pa nhūm mē amnhī pyrā nē mē omu nē hkīnh nē. Na htem ā amnhī nhīpēx anhýrja gryk ā Tirtūm kaga nhūm tee ri amnhī tā mē omu nē amnhī pyrā nē mē hkaga nē ām mē omu. Jakamā nhūm mē amnhī tomnuj týx pix rāhā ho pa.

2

Mē kot amnhī tomnuj xwŷnhjē hkukamā mē harēnh

Matēwre 7.1-5; Sikūn Tesarōn 1.6; Eprēw 9.27; Sikūn Pētre 2.4, 3.7; Jutre 6-14; Apokarip 6.15, 20.11

¹ Nē kot ka mē atō ā mē kot amnhī tomnuj anhŷr xwŷnhjē kot amnhī nhīpēx ā mē harēnh ma nē ā ajamaxpēr anē nē ajamaxpēr o:

—Tk. Mē kot amnhī tomnuj pix o ri pa xwŷnh kēnā. No pa na ā ixte amnhī nhīpēx anhŷr o ri ixpa hkēt. Mē kurom ixte tām amnhī nhīpēx o ri ixpa xwŷnh na pa.

Anhŷr o amnhī jarē. Kwa nā mē ā ajamaxpēr anhŷr kēt nē. Mē pajaxwŷja na pu htem tōhā mē urāk nē tanhmā amnhī tomnuj to. Tā ka mē ā mē kot amnhī tomnuj ā mē harēnh anē nē te ka ate amnhī jarēnh pyrāk. ² Tirtūm kapēr ā kagā htūm kot mē kot amnhī tomnuj o ri mē pa xwŷnhjē jarēnh kot: Mē kot amnhī tomnuj mŷrapē koja mē nhŷrmā amnhī xā htŷx kamā hamak rāhā ho ri pa. Anē.

Ām hāmri ā mē harēnh kot anhŷr. ³ Mān ka mē atō tanhmā amnhī kukamā ajamaxpēr to nē ajamaxpēr o:

—Nā koja Tirtūm nhŷrmā amnhī nē kuwy hwŷr mē kot amnhī tomnuj xwŷnhjē rē. No pa koja hwŷr inhmēnh kēt nē. Anē.

Kwa mē ā ajamaxpēr anhŷr kēt nē. Kot ka mē ā amnhī kukamā ajamaxpēr anhŷr tā tōhā mē urāk nē tanhmā amnhī tomnuj to. Jakamā koja Tirtūm mē urāk nē hā tanhmā mē ato. ⁴ Kot kaj mē atō tanhmā amnhī tomnuj to hāmri nē ām ja hā amnhī pumu nē ajamaxpēr o:

—Ixte amnhī tomnuj xwŷnh tā na hte Tirtūm ja hā ixpumu nē ām ixpumu nē hā tanhmā ixto hkēt nē. Kēp mē ixkamā ukapri xwŷnh jakamā na hte gryk tokyx anhŷr kēt nē. Jakamā kot paj arī tanhmā amnhī tomnuj to ho ri ixpa nē aa jam inhūer kēt nē. Tirtūm kot ja hā tanhmā ixtore kaxyw hā.

Anhŷr o ajamaxpēr. No ām ja kot anhŷr kēt. Na hte Tirtūm kormā amnhī tā mē pajamā. Mē pahte amnhī tomnuj kaga nē hpānhā hkōt amnhī xunhwŷr kaxyw na hte kormā amnhī tā mē pajamā. Jakamā na kormā tanhmā ate amnhī tomnuj tota ā tanhmā ato hkēt nē.

⁵ Mē akrā hihtŷx jakamā mē amā hkōt amnhī xunhwŷr prām kēt. Na ka htem tanhmā amnhī tomnuj to pix kukamā ajamaxpēr o ri apa. Nē gaa nē ra anhŷr kumrēx. Nhūm Tirtūm tee ri ja hā mē apumu nhūm ja kēp omnuj tŷx o mō. Jakamā koja nhŷrmā tanhmā mē ajarēnh to nē gryk tŷx kām tanhmā mē atomnuj tŷx to. Ām hāmri na hte mē pahte amnhī nhīpēx ā mē pahpumunh xā hkōt ahpŷnhā tanhmā mē panhīpēx to.

⁶ Koja nhŷrmā mē pahpiitā kormā mē pahtŷr ri mē pahte amnhī nhīpēx ā mē pahpumunh xā hkōt tanhmā mē panhīpēx to. Mē kot amnhī to mex o ri mē pa xwŷnhjaja nhūm mē ho mex nē. Nē mē kot amnhī tomnuj o ri mē pa xwŷnhjaja nhūm mē homnuj nē. Koja nhŷrmā mē pahpiitā mē pahto hpimrāātā ā mē panhīpēx anē. ⁷ Mē kot hkōt tām ri amnhī nhīpēx o pa pē kām Tirtūm kot amnhīm mē mex ā mē harēnh prām xwŷnhjaja koja nhŷrmā amnhīm mē mex ā mē harē. Hāmri nhūm mē kuri htŷr tūm nē hkīnh nē mex kumrēx nē pa ho pa. ⁸ Nom mē kot amnhī mā pix mā ri hamaxpēr o ri mē pa xwŷnhjaja. Nē mē kot tanhmā amnhī tomnuj to gryk ā Tirtūm kapēr kaga xwŷnhjaja koja kām mē hkīnh kēt nē tanhmā mē homnuj tŷx to. ⁹ Mē kot amnhī tomnuj xwŷnh piitā koja mē nhŷrmā amnhī xā htŷx kamā hamak rāhā nē pa ho pa. Ijaew

kumrêxjaja nê hpânâ Ijaew kêt xwÿnhjaja nhÿm mē amnhî xà htÿx kamâ hamak râhâ nê pa ho pa. Mē kot amnhî tomnuj tÿx o paja mÿrapê.

10 No kêt tām mē kot amnhî nhîpêx xwÿnhjaja koja Tîrtûm mē ho mex rax râhâ ho pa ho pa. Nê amnhîm mē kot amnhî to mex xwÿnhjê hâ mē harê. Nê tanhmâ mē ho mex to nhÿm mē kamâ amnhî krit nê pa ho pa. Hamakêtkati nê hkînh nê ãmnhîx ri pa ho pa. Ijaew kwÿ kumrêxjaja nê mãânên Ijaew kêt xwÿnh kwÿjaja nhÿm mē mex nê hamakêtkati nê hkînh nê ãmnhîx ri pa ho pa.

11 Koja Tîrtûm nhÿrmâ ahpÿnhâ mē pahte amnhî nhîpêx ã mē pahpumunh xà hkôt tanhmâ mē pajarênh to pê tanhmâ mē panhîpêx to. Mē ixpê Ijaewjaja nê mē apê Ijaew kêt xwÿnhjaja nhÿm ã mē pahpiitâ mē panhîpêx anê.

12 Amnepê m na pre finat Mojes mã tanhmâ kapêr to nhÿm kuma nê ô ri hâ kagâ hpa. Mē ixpê Ijaew ri na kapêr ã kagâja. Ra mē ixte mar tÿx jakamâ koja mē ixtô ra kapêr mar tÿx tâ hkôt amnhî nhîpêx kêt hāmri nhÿm Tîrtûm tee ri amnhî tâ omu nê ã amnhî nhîpêx anhÿrja mÿrapê nhÿrmâ ma mē kot amnhî xà htÿx kamâ hamak tûm xàta wÿr kumê. Kot kapêr mar tÿx tâ hkôt amnhî nhîpêx kêt mÿrapê nhÿm ã hipêx anê. No kêt mē apê Ijaew kêt xwÿnhjaja mē ixkînhâ mē ari Tîrtûm kapêr ã kagâ hkêt jakamâ koja mē ate kapêr nhîrôp mē akuhê hâ mē apumunh kôt tanhmâ mē anhîpêx to hkêt nê. Koja hpânâ mē ate tanhmâ amnhî tomnuj to ho apa mÿrapê mē kot amnhî xà htÿx kamâ hamak o pa tûm xàta wÿr mē arê.

13 Na hte mē kot kapêr mar ã mē omunh xà hkôt amnhîm mē kot amnhî to mex xwÿnh ã mē harênh kêt nê. ãm mē kot kapêr kôt amnhî nhîpêx ã mē omunh xà hkôt pix mã na hte amnhîm mē kot amnhî to mex xwÿnh ã mē harê.

14 No mē hkwyjaja kormâ kot kapêr mar kêt tâ te ra mē kot mar mex pyrâk o amnhî nhîpêx. Jao amnhî krâ hkôt tām ri amnhî nhîpêx kurê kumrêx. Te kot Ijaew pyrâ nê Tîrtûm kapêr mar tÿx nê hkôt amnhî nhîpêx o ri pata pyrâk.

15 Na htem amnhî krâ hkôt tanhmâ amnhî nhîpêx mex to. Te Tîrtûm kapêr kot mē hkrâm gjêx pyrâk o amnhî nhîpêx o pa. Jakamâ tee ri tanhmâ amnhî tomnuj to hâ amnhî pumu nê hkaprî nê. Nê tām amnhî nhîpêx ã amnhî pumu nê hkînh nê.

16 Tâ koja nhÿrmâ Tîrtûm Jejus Kris mã anê nhÿm kuma hāmri nê mē piitâ kormâ mē htîr ri tanhmâ mē kot amnhî nhîpêx to hâ mē omunh xà hkôt tanhmâ mē harênh to. Nê mē hamaxpêr kôt mē omunh mex xà hkôt tanhmâ mē harênh to. Mē papajaja mē pahte xapên jamaxpêr kôt xapên pumunh kêt tâ Jejus kot mē pajamaxpêr kôt mē pahpumunh par.

Tâ na pa hte mē kām Jejus kot tanhmâ amnhî nhîpêx to hâ harênh o ixpa pê ã mē kām ixujarênh anhÿr o ri ixpa.

*Pawre kot hkwyjê mã kapêr
Rômân 3.19-20*

17 Nê ixpyrâ nê mē apê Ijaew kwÿjaja na ka mē axtem nê Ijaew kêt xwÿnhjê mã tanhmâ amnhî to jarkrar o ri apa nê mē kām:

—Nà mē ixpê Ijaew ri Tîrtûm kapêr ã kagâ jakamâ ãm mē papxipixjaja na hte Tîrtûm amnhîm mē inhmex ã mē ijarê. Nê ãm mē papxipixjaja na hte mē ixtô hkra. 18 Nê mē papxipixjaja na mē ixte Tîrtûm kām hprâm xà hkôt mēmoj pumunh par nê mē kot amnhî to mex xà pumunh par nê mē kot amnhî tomnuj xà pumunh par. Mē apê Ijaew kêt xwÿnhjê rom mē ixte mēmoj piitâ omunh par kumrêx. Anê.

19-20 Nê amnhî jarênh o:

—Nà te mē ixpē mē nohkre xwỳnhjē pa hā mē hamỳnh nē ri mē ho ixpa xwỳnh pyrāk. Jakamā Ijaew kēt xwỳnh pē htỳx ri mē pa xwỳnhjaja na pa htem mē kām Tirtùm kapēr tùm o mē ahkre mex o ri ixpa. Kormā mē kot hprī hā mar kēt jakamā na pa htem ho mē ahkre ho ri mē hkôt ixpa. Mē kurom mē ixte mar par kēnā.

²¹ Anhỳr ā amnhī jarēnh nē mē ate kapēr o mē ahkre ho apa htā hkôt amnhī nhīpēx kēt nē.

Nē mē ate mē kot axpēn pē àhkính nē mē hkurē htā no ãm mē kamjaja axpēn pē axàhkính o ri apa.

²² Nē mē amā sânti hkính kēt ā amnhī jarēnh tā axtem nē hwỳr agjē nē hpar pē kàxpore nhīkwỳ xwỳnh o axàhkính o ri apa.

Nē mē kot axpēn prō ho amnhīkati nē mē hkurē ho apa htā mē kamjaja ā ri amnhī nhīpēx anhỳr o ri apa.

²³ Nē mē ate Tirtùm kapēr ā kagà mex o mex ā harēnh tā hkôt amnhī nhīpēx hkēt nē. Jakamā nhùm mē akwỳjaja ja hā mē apumu nē mē apyrā nē Tirtùm ā hpijaam kēt o pa.

²⁴ Tirtùm kapēr ā kagà htùm kot tanhmā mē ate amnhī nhīpēx ā mē ajarēnh to nē mē ajarēnh kot:

Mē kēp Ijaew kēt xwỳnhjaja na htem Ijaew kot htỳx ri amnhī nhīpēx o ri mē pa hā mē omu nē mē ý hā tanhmā Tirtùm o kapēr punuj to ho ri pa. Anē.

²⁵ Mē pahpē Ijaew na pu htem mē pahkrajaja mē hapōx kôt kormā mē hkryre ri pu htem mē kēp mēmy kwrýt kà jakà. Finat Mojes kot Tirtùm nhỹ hā mē panhīgētjē nā hā karō xà hkôt na pu htem ā mē hipēx anē. Mē pahte Tirtùm mā mē pahkrajē nhōr ā amnhī to amnhīrit kaxyw. Jakamā na pu htem arī Mojes kapēr kôt ā mē hipēx anē nhùm Tirtùm kām ja mex nē. Nom kot pu mē kapēr kwỳm ri tanhmā amnhī nhīpēx to ho papa nhùm ja kēp omnuy tỳx nē hāmri pu mē tee ri mē pahkrajē my kwrýt kà jakàr kaprỳ. Na hte Tirtùm ā mē pahkrajē nhīpēx anhỳr ā mē pahpumunh kôt amnhīm mē pamex ā mē pajarēnh kēt nē. Nom mē pahte kapēr kôt amnhī nhīpēx mex o papa pē mēmy kwrýt kà jakàrja nhùm kām mex nē. ²⁶ Ijaew kēt xwỳnhjaja kot ā mē hkrajē nhīpēx anhỳr kēt tã ra mē hkwỳjaja Tirtùm kapēr ma nē hkôt amnhī nhīpēx o ri pa. Jao te mē kot amnhī my kwrýt kà jakàr pyrāk o amnhī nhīpēx. Jakamā nhùm Tirtùm ja hā mē omu nē mē kām:

—Nà ãm hāmri. Mē ate amnhī my kwrýt kà jakàr kēt tã mē apē ixkra na ka mē. Anē.

²⁷ Mē kot amnhī jakàr kēt tã Tirtùm kapēr kôt amnhī nhīpēx mex o ri pa nhùm amnhī tã mē omu nē mē arom amnhīm mē kot amnhī to mex xwỳnh ā mē harē. Mē kot amnhī jakàr kēt tãā.

No mē kajaja mē ate Tirtùm nhỹ hā Mojes kapēr ā kagà mar tỳx tã hkôt amnhī nhīpēx kēt nē. Ja mỳrapē koja ja hā mē apumu nē Ijaew kēt xwỳnhjē kính mē ate amnhī tomnuj xwỳnh ā mē ajarē. Ra mē ate amnhī jakàr tã mē ate amnhī tomnuj xwỳnh ā mē ajarē.

²⁸ Nē kot ka mē atō tanhmā amnhī to jarkrar to nē amnhī jarēnh o:

—Nà ixpē Ijaew jakamā na hte Tirtùm mē kot inhmy kwrýt kà krāhyr kôt ixto kraa. Anē.

Nom xà na hte Tirtùm ā mē pahte amnhī nhīpēx anhỳr ā mē pahpumunh kôt mē pahto hkra? Nà kot anhỳr kēt. Na htem ãm htỳx ā amnhī to jarkrar anhỳr kaprỳ ho pa.

²⁹ Nē Tirtūm Karō kot mē hkarō mā gjēx xwýnhjaja kēp Tirtūm kra jakamā na htem Tirtūm kām hprām xà hkôt amnhī nhīpēx. Nom ri amnhī krā hkôt tanhmā amnhī nhīpēx to ho pa hkēt nē. Rý htýx hamaxpēr o:

—Nà kot paj Mojes kapēr ā kagā hkôt amnhī nhīpēx nhūm Tirtūm ja hā xipumu nē amnhīm inhmex ā ijarē nē ixto hkra.

Anh̄r o hamaxpēr kēt nē. Na htem hamaxpēr o:

—Nà ra Tirtūm Karō kot ixkarōm àr jakamā ixpē hkra nhūm amnhīm inhmex ā ijarē. Jakamā kot paj ām kôt pix mā ri amnhī nhīpēx o ri ixpa rāhā ty. Kwār māmri ixkwýjaja amnhīm inhmex kēt ā ijarē. Anē.

Kēr ka mē ā ajamaxpēr anh̄r o ri pa. Ā mē hamaxpēr anh̄r na mex o mex.

3

¹ Nē mǎn ka mē ra tee ri tanhmā amnhī kukamā ajamaxpēr to nē ajamaxpēr o:

—Kwa mo kaxyw na pa ixpē Ijaew? Mon pa pre we ixpē Ijaew kētre hkēt nē? Mē kēp Ijaew kēt xwýnhjaja kot amnhī jakār kēt tā nhūm Tirtūm mē pahpyrà nē mē ho hkra. Anē.

Kwa mē ā ri ajamaxpēr anh̄r kēt nē. ² Mē pahpē Ijaew na pre Tirtūm Ijaew kēt xwýnhjē rom mē pahto mex rax nē. Na pre amnepē mā mē panhīgēt mā tanhmā kapēr to. Mē pahpiitā mē pahte mar nē hkôt amnhī nhīpēx kaxyw. Nom Ijaew kēt xwýnhjē nhīgēt mā ā kapēr anh̄r kēt nē. Ām mē pahpē Ijaew nhīgēt pix mā kapēr. Jakamā mē pahpē Ijaew mā ja mex kumrēx. ³ Nom kot kaj mē atō ja ma nē ajamaxpēr o:

—Nà Tirtūm kot mē ixto mex mā mē ixtā amnhī jarēnh tā no nhūm xep mē inhīgēt kwýjaja hkôt amnhī nhīpēx kēt nē. Na xep prem kapēr kwým ri amnhī tomnuj o pa. Jakamā ko. Koja Tirtūm mē ixpē mē hkanrēhā mē htāmnhwýjaja tanhmā mē ixto mex to japēr ko. Anē.

⁴ Kwa mē ri ā ajamaxpēr anh̄r kēt nē. Tirtūm na hte mē pahpiitā mē pakurom mēmoj tā amnhī jarēnh o hēx kēt nē. Tā ra kot tanhmā mē pahtā amnhī jarēnh to xà hkôt koja ā mē pahto mex anē. Kapēr ā kagā htūm kot mēhō tanhmā Tirtūm mā kapēr to nē harēnh kot:

Pa Tirtūm. Nà ām kapxipix na ka hte mēmoj tā amnhī jarēnh xà hkôt amnhī nhīpēx o ri apa.

Jakamā na htem ām axpēn mā axēx ā akapēr ā ajarēnh kaprý. Anh̄r o harē.

⁵ No kot ka mē atō atýx ajamaxpēr nē ajamaxpēr o:

—Xà koja Tirtūm tanhmā mē ixte amnhī tomnuj to hā mē xipumu nē gryk? Nà koja gryk kēt nē. Jakamā kot paj arī amnhī tomnuj o ri ixpa. Kē mē piitā ja hā xipumu nē ixrom Tirtūm tapxipix kot amnhī to mex o pa xwýnh ā harēnh o pa. Nà ja mex. Jakamā kot paj arī amnhī tomnuj rāhā ho ri ixpa nhūm mē Tirtūm pix mā mǎn kot tām amnhī nhīpēx xwýnh ā harē. Hāmri nhūm Tirtūm amnhī tā xipumu nē tanhmā ixto hkēt nē. Koja tanhmā ixto japēr hāmri nē ixpyrà nē amnhī tomnuj nē. Anē.

Kot kaj mē ā ajamaxpēr anē nē ām amnhī krā hkôt ā ajamaxpēr anh̄r kaprý. Nom ā ajamaxpēr anh̄rja Tirtūm jamaxpēr kôt kēt. ⁶ Kwa mē ri ā ajamaxpēr punuj anh̄r kēt nē. Tirtūm kot mē pahpyrà nē aa kot amnhī tomnujre hā. Kop ām mē pahpyrà nē tanhmā kot amnhī tomnuj to ronhýx tanhmā kot we amnhī to nē mē pahte amnhī tomnuj xwýnh ā mē pajarē? Nhýx mē pahpyrà nē ā amnhī jarēnh anē. Nà ā mē ajamaxpēr anh̄rja mex kēt.

⁷⁻⁸ E pa ixprĩ hã mẽ amã ja jarẽ ka mẽ inhma. Kot kaj mẽ atõ amnhĩ kukamã ajamaxpẽr o:

—E kot paj mãmri ri mẽmoj tã ixêx o ri ixpa kê mẽ ixêx nhi hã ixpumu nẽ ixrom Tĩrtũm pix mã mãn kot amnhĩ to mex ã harẽ. Nẽ ãm pix mã mãn hêx kêt xwýnh ã harẽ. Hãmri nhũm Tĩrtũm amnhĩ tã ixpumu nẽ mẽ ã mẽ kot harẽnh anhỹrja ma nhũm ja kãm mex nẽ nhũm hkĩnh nẽ. Jakamã ixêx o ri ixpaja ã tanhmã ixto hkêt nẽ. Ra mẽ kot ixrom tãm kot amnhĩ nhĩpêx o pa xwýnh ã harẽnh jakamã nhũm ixêx nhita ã tanhmã ixto hkêt japêr. Jakamã kot paj ixte amnhĩ tomnuj o ri ixpaja mã inhũrer kêt nẽ. Kêr kê mẽ ja hã ixpumu nẽ ixrom Tĩrtũm tapxipix kot amnhĩ to mex xwýnh ã harẽ.

Anhỹr o ajamaxpẽr nom mẽ ajamaxpẽrja kot anhỹr kêt. Na hte akwýjaja pa ixpẽ Pawre ixêx o ixpa hã ri axpẽn mã ijarẽ no na pa hte ixêx o ri ixpa hkêt nẽ. ã mẽ ajamaxpẽr anhỹr o ri apa xwýnhjaja koja Tĩrtũm mẽ atomnuj tỳx nẽ kãm ga.

Mẽ mẽ pahte amnhĩ tomnuj xwýnh ã mẽ pajarẽnh

Wam Korũ 6.9; Karatas 3.22; Xĩtre 3.3

⁹ Tã tanhmã kot puj mẽ pahpẽ Ijaew amnhĩ jarẽnh to? Xà kot pu mẽ pahte amnhĩ to mex o Ijaew kêt xwýnhjẽ jakrenh ã amnhĩ jarẽ? Nã mẽ pahte ã amnhĩ nhĩpêx anhỹrẽ hã. Mẽ pahpẽ Ijaew nẽ Ijaew kêt xwýnhjaja. Mẽ pahpiitã mẽ pahte amnhĩ tomnuj o axpẽn pyrãk. Na pa pre ra mẽ amã ja jarẽ. ¹⁰ Tĩrtũm kapêr ã kagã htũm kot ja jarẽnh kot:

Mẽhõ na we aa kot amnhĩ tomnuj kêt kumrêx nẽ pa?

¹¹ Nẽ mẽhõ na we kot mẽmoj mex piitã omunh par?

Nẽ mẽhõ na kãm Tĩrtũm prãm?

¹² Nã amrakati kumrêx. Na mẽ ra piitã hkaga hpa.

Nẽ kapêr kwým ri tanhmã amnhĩ tomnuj to ho pa.

Ãm mẽhõ pyxire nẽ amnhĩ to mex o ri pa hkêt kumrêx.

¹³ Na htem kapêr punuj pix o ri pa.

Jakamã Tĩrtũm noo mã mẽ kot amnhĩ nhĩpêxja te kot mẽmoj tyk nẽ hkro punuj pyrãk.

Na htem ãm ri hêx pix kukamã ri hamaxpẽr o pa. Tanhmã mẽ hêx to xàja te kêp kagã xoprẽ nhõ wenẽn xihtỳx pyrãk.

¹⁴ Nẽ na htem mẽ piitã mẽmoj nhĩxi ho ri axpẽn mã mẽ hixi jarẽnh o pa. Nẽ ri tanhmã axpẽn japrý hto ho pa.

¹⁵ Nẽ tanhmã kapêr mã gêt kãm mẽ kãm kapêr to.

¹⁶ Nẽ tanhmã mẽ hkwyjẽ homnuj to. Jakamã nhũm mẽ piitã ri hkaprĩ nẽ mex kêt nẽ pa.

¹⁷ Nhũm htem ãm axpẽn mã mẽ gryk xà pix o kapêr o pa.

¹⁸ Nẽ Tĩrtũm ã hpijaãm kêt o pa. Na htem kapêr ma nẽ ãm kuma nẽ kãm hkĩnh kêt o pa.

Ã na htem amnhĩ nhĩpêx anhỹr rãhã ho pa. Anẽ.

Ã Tĩrtũm kapêr ã kagã htũm kot mẽ pajarẽnh anhỹr. ¹⁹ Mẽ pahpẽ Ijaew ra mẽ pahte ja jarẽnh mar tỳx. Tĩrtũm kapêr ã kagã htũm kwý na. Na hte ã mẽ kot amnhĩ tomnuj xwýnhjẽ jarẽnh anẽ. Nẽ mããnẽn mẽ papajaja. Mẽ pahpẽ Ijaew na hte ã mẽ pajarẽnh anẽ. No ãm mẽ papaxipix hkêt. Krĩ piitã hkõt ri mẽ pa xwýnhjaja nhũm ã mẽ harẽnh kot anhỹr. Ijaew kêt xwýnhjaja nẽ mẽ pahpẽ Ijaew. Mẽ pahpiitã mẽ pahte amnhĩ tomnuj xwýnh jakamã mẽmo kaxyw kot pu mẽ pahte amnhĩ tomnuj kêt ã ri amnhĩ to jarkrar o papa? Kot puj mẽ ã

amnhî jarênh anhÿr kaprÿ. Jakamã koja Tirtûm mẽ pahpiitã mẽ pahte amnhî tomnuj mÿrapê tanhmã mẽ panhîpêx to. ²⁰ Mẽ pahtô koja mẽ pahte kapêr kôt pix mã amnhî nhîpêx o papa hã mẽ pajarê? Nê mẽ pahtô mã koja mẽ pamã kapêr nê mẽ pamã:

—Nà na ka hte akatât kôt ixkapêr kôt pix mã amnhî nhîpêx mex nê. Âm hãmri na ka hte ã amnhî nhîpêx anhÿr o apa.

Anhÿr o mẽ pahtô mã kot we ã kapêr anê? Nà aa kot mẽ pahtô mã kapêr anhÿr kêt. Na pu htem âm kapêr ma nê tee ri amnhî kukamã pajamaxpêr. Mẽ pahte amnhî tomnuj ã amnhî pumunh kaxyw na pre mẽ pamã kapêr ã kagã htûmjã gô. Mẽ pahtô mẽ pahte kapêr ã kagã hkôt amnhî nhîpêx mex o papa hkêt kênã kot kêt ri amnhîm mẽ pahte amnhî to mex xwÿnh ã mẽ pajarê.

Tanhmã Tirtûm kot mẽ pahto hkra to hã harênh

Atre 17.30-31; Karatas 2.16-21; Piripos 3.7-9; Xitre 3.5; Xiakre 2.10

²¹ Nê na hte Tirtûm mẽ pahte kapêr kôt amnhî nhîpêx ã mẽ pahpumunh kôt amnhîm mẽ pahte amnhî to mex xwÿnh ã mẽ pajarênh kêt nê. Jakamã mēhō kukwak ri koja we ã mẽ pajarênh anê? Nà nhām mēhō kot tām amnhî nhîpêx rāhã ho pa hã omunh pix kukwak ri koja ã mẽ pajarênh anê. Tã mēhō kukwak ri kot ã mẽ pajarênh anhÿr xwÿnhnta na pre ra mẽ pamã ho amnhîrit. Amnepêm Tirtûm kapêr ã kagã htûm kamã na pre mēhō hkukamã tanhmã harênh to. Nê Tirtûm nhÿ hã mẽ kapêr jarênh o pa xwÿnhjaja haxwÿja kukamã tanhmã harênh to ho pa. ²² Jejus Krisja na prem hkukamã harênh o pa. Tãm na pu htem hkôt amnhî xunhwÿ nê amnhî kaxyw kãm pajamaxpêr rāhã ho papa nhûm Tirtûm ja pix ã mẽ pahpumunh kôt amnhîm mẽ pahte amnhî to mex xwÿnh ã mẽ pajarê. Mẽ kot Jejus kôt amnhî xunhwÿr xwÿnh piitãã. Mẽ ixpê Ijaew nê mẽ apê Ijaew kêt xwÿnhjaja. Mẽ pahpiitã mẽ pahte axpên pyrāk jakamã kot puj mẽ pahtô Jejus kôt amnhî xãm nhûm Tirtûm Kra Jejus kot amnhî to mex pix o pa kukwak ri mẽ pahpumu nê amnhîm pajarênh o:

—Nà âm hãmri. Ra kot ixkra Jejus kôt amnhî xãm jakamã ra inhmã te Jejus kot amnhî nhîpêx pyrã nê amnhî to mex o pa. Anê.

²³ No mẽ pahtô na mẽ pahte Tirtûm mẽ Jejus wa urāk nê amnhî nhîpêx mex rāhã ho ri papa? Nà amrakati kumrêx. Mẽ pahpiitã mẽ pahte amnhî tomnuj xwÿnh kênã. ²⁴ Tã Tirtûm kot mẽmoj tã mẽ pakutã nojarê rāhã jakamã na hte Jejus Kris kukwak ri amarî amnhîm mẽ pahte amnhî to mex xwÿnh ã mẽ pajarênh o pa. Mẽ pahte Jejus kôt amnhî xunhwÿr xwÿnh piitãã nhûm ã mẽ pajarênh anê. Ra Jejus kot htyk o mẽ pahte amnhî tomnuj piitã hpānhã amnhîrer par jakamã na hte Tirtûm Jejus kukwak ri amarî mẽ pahte amnhî to mex xwÿnhjê hã mẽ pajarê. Te mẽ pahte amnhî tomnuj kêt kumrêx pyrāk mẽ pajarê. ²⁵⁻²⁶ Na pre mẽ pahwÿr Jejus mẽ nhûm mẽ pahwÿr wrÿ nê mẽ panê ty nê htyk o mẽ pahte amnhî tomnuj piitã hpānhã amnhîrer pa. Jakamã kot pu mẽ pahtô amnhî kaxyw hkôt pajamaxpêr nhûm Tirtûm ja hã mẽ pahpumu nê Kra kukwak ri amnhî katut kôt mẽ pahte amnhî tomnuj piitã rēnh pa. Jao te aa mẽ pahte amnhî tomnuj kêt kumrêx pyrāk ã mẽ pahpumu.

No kêt amnepêm kormã Jejus wrÿk nê mẽ panê htyk kêt ri mẽ pa xwÿnhjaja. Tanhmã na pre Tirtûm mẽ kot hkôt amnhî xunhwÿr xwÿnhjê nhîpêx to? Kormã Jejus mẽ panê htyk kêt ri mẽ pa xwÿnhjaja tanhmã na pre mẽ hipêx to? Nà na pre mẽ hkwÿjaja amnhî kaxyw Tirtûm kôt hamaxpêr nê hkôt amnhî xunhwÿ nhûm amnhî tã mẽ omu nê amnhîm mẽ harênh o:

—Nà ãm hãmri. Koja nhÿrmã Ixkra ma mẽ hwÿr wrÿ nẽ mẽ nẽ ty nẽ htyk o mẽ kot amnhÿ tomnuj pãnhã amnhÿrer pa. Jakamã koja mẽ tãmjaja amnhÿ tomnuj pãnhã amnhÿrer kêt nẽ. Anẽ.

Tã nhÿm Jejus tãm mẽ pahwÿr wrÿ nẽ mẽ pahpiitã mẽ panê ty. Jakamã nhÿm Tirtÿm ra mẽ pahte hkôt amnhÿ xunhwÿr xwÿnhjaja Kra kukwak ri amnhÿ katut kôt mẽ pahte amnhÿ tomnuj piitã rênh pa. No na hte amarÿ ã mẽ panhÿpêx anhÿr kêt nẽ. ãm Jejus tyk pix kukwak ri na hte ã mẽ panhÿpêx anẽ. ãm hãmri na hte ã mẽ panhÿpêx mex anẽ. Na hte tãm mẽ panhÿpêx rãhã ho pa. ²⁷ Jakamã kot puj mẽ ã pajamaxpêr anẽ nẽ pajamaxpêr o:

—Nà na pa hte amnhÿ to mex rãhã o ri ixpa. Amnhÿ to mex o mẽ piitã mẽ hakrenh pa.

Anhÿr o pajamaxpêr kêt nẽ. Koja mẽhõ ã hamaxpêr anẽ nẽ ãm amnhÿ jarênh o hêx. Na hte Tirtÿm mẽ pahte amnhÿ to mex ã mẽ pahpumunh kôt amnhÿm mẽ pahte amnhÿ to mex xwÿnh ã mẽ pajarênh kêt nẽ. Mẽ pahte amnhÿ to mex rãhãre hã. Nom na pu htem amnhÿ kaxyw Jejus mã pajamaxpêr nẽ hkôt amnhÿ xunhwÿ nhÿm ja hã mẽ pahpumu nẽ ri kormã amnhÿm mẽ pamex ã mẽ pajarê.

²⁸ E pa axte tanhmã mẽ amã ja jarênh to ka mẽ aprÿ hã inhma. Mẽmoj pumunh kôt na hte Tirtÿm mẽ pahte amnhÿ to mex xwÿnh ã mẽ pajarênh wehe? Xà mẽ pahte kapêr tÿm kôt amnhÿ nhÿpêx o ri papa hã mẽ pahpumunh kôt? Nà na hte ja hã mẽ pahpumunh kôt ã mẽ pajarênh anhÿr kêt nẽ. Mẽ pahte hkôt amnhÿ nhÿpêx rãhã ho papare hã. ãm mẽ pahte amnhÿ kaxyw Kra Jejus kôt pajamaxpêr nẽ hkôt amnhÿ xunhwÿr ã mẽ pahpumunh kôt pix mã na hte mẽ pahte amnhÿ to mex xwÿnh ã mẽ pajarê. Ja pix ã mẽ pahpumunh kôt na hte ã mẽ pajarênh anẽ.

²⁹ Nẽ xà Tirtÿm kêp mẽ ixpê Ijaew pix nhõ Tirtÿm pix na? Nà kêp mẽ ixpix nhõ Tirtÿm kêt. Kêp mẽ ixpê Ijaew nhõ Tirtÿm nẽ mãânên kêp mẽ apê Ijaew kêt xwÿnhjê nhõ Tirtÿm.

³⁰ Nẽ Tirtÿm ãm pyxi mex. Axtem hõ kêt. Na hte mẽ pahpiitã mẽ panhÿpêx o axpên pyrãk. Jakamã na hte mẽ kot amnhÿ kaxyw Jejus kôt hamaxpêr o mẽ pa xwÿnhjê pumu nẽ mẽ kot amnhÿ to mex xwÿnh ã mẽ harê. Mẽ ixpê Ijaew nẽ mãânên mẽ apê Ijaew kêt xwÿnhjaja.

³¹ Tã koja mẽhõ htÿx hamaxpêr o:

—Nà ixte amnhÿ kaxyw Jejus kôt ijamaxpêr mex o ixpa nhÿm Tirtÿm kot amnhÿm inhmex ã ijarênh jakamã kot paj axte kapêr kôt amnhÿ nhÿpêx kêt nẽ. Kot paj ãm amnhÿ krã hkôt amnhÿ nhÿpêx o ri ixpa. Ra Tirtÿm kot ixto hkra kênã.

Anhÿr o ajamaxpêr japêr. Kwa mẽ ã ri ajamaxpêr anhÿr kêt nẽ. Na htem amnhÿ kaxyw Jejus kôt hamaxpêr hãmri nẽ kãm hkôt amnhÿ nhÿpêx prãm rãhã nẽ pa ho pa.

4

Apraãw kot amnhÿ kaxyw Tirtÿm kôt hamaxpêr

Karatas 3.6-18; Xiakre 2.23

¹ Nẽ mẽ panhÿgêf finat Apraãwja kêp mẽ pahpê Ijaew pàr krax. Tã mẽmoj tã na pre Tirtÿm omu nẽ kot amnhÿ to mex xwÿnh ã harê? ² Xà kot kãm tanhmã amnhÿ nhÿpêx to hã karõ xà hkôt amnhÿ nhÿpêx mex ã omunh xà hkôt nhÿm pre ã harênh anẽ? Nà ja kôt kêt. Kop apu ja kôt ã kot harênh anhÿr ronhÿx Apraãw amnhÿ tã omu nẽ Tirtÿm mã amnhÿ to jarkrar nẽ kãm:

—Pa Tirtūm? E mǎn ka ixpumu. Na pa hte akapēr kôt amnhī nhīpêx mex o ri ixpa.

Anh̄yr o nh̄yx pre kām amnhī to jarkrar. No na pre tanhmā kām amnhī to jarkrar to hkêt nē. ³Tā mēmoj tā omunh xà hkôt na pre Tirtūm amnhīm mex ā harē? Nà Tirtūm kapēr ā kagà htūm kot tanhmā Apraāw jarēnh to kot:

Na pre Apraāw amnhī kaxyw Tirtūm kôt hamaxpēr nē hkôt amnhī xām nhūm amnhī tā omu nē amnhīm mex ā harē. Anē.

⁴Mē ō patrāwjaja na htem kām mē āpēnh xwýnhjaja āpēnh mex ā mē omunh xà hkôt mē kām amnhīre. ⁵No Tirtūm na hte ā mē panhīpêx anh̄yr kêt nē. Na hte mē pahte tām amnhī nhīpêx ā mē pahpumunh kôt amnhīm mē pahte amnhī to mex xwýnh ā mē pajarēnh kêt nē. Ām mē pahte amnhī kaxyw Kra Jejus kôt pajamaxpēr nē hkôt amnhī xunhwýr ā mē pahpumunh kôt pix mā na hte amnhīm ā mē pajarēnh anē. Ra mē pahte amnhī tomnuj o ri papa htā hpānhā amnhī kaxyw Jejus kôt pajamaxpēr xwýnh pixjaja na hte ā mē pajarēnh anē.

⁶Jakamā na hte mē pamā amnhī jarēnh o:

—Ixte mē amex ā mē ajarēnh tā no ām mē ate amnhī to mex kôt mē apumunh kôt na pa ā mē ajarēnh anh̄yr kêt nē. Ām mē ate amnhī kaxyw Ixkra mē wa ixkôt ajamaxpēr nē wa ixkôt amnhī xunhwýr ā mē apumunh kôt na pa hte ā mē ajarēnh anē. Anē.

Pu mē ā kot pamā kapēr anh̄yr ā amnhī tā kuma nē pahkīnh nē. Pahi finat Tawī na pre haxwýja ja jarēnh o:

⁷Na hte Tirtūm amnhī katut kôt mē pahte amnhī tomnuj piitā rēnh pa nē axte kām hamaxpēr kêt nē.

Jakamā pu mē ja hā amnhī pumu nē pahkīnh nē.

⁸Nē amnhī kukamā pajamaxpēr o: “Hêxta waa nē. Na pa pre amnhī tomnuj o ixpa nē tee ri ja hā amnhī pumu nē ixkaprī nē.

Hāmri nē amnhī to Tirtūm wý nhūm inhma nē ixte amnhī tomnuj o hapêx pa nē axte kām hamaxpēr kêt nē.

Nā ām hāmri. Ja mex kumrêx.” Anē.

⁹Tā mē kot ja hā amnhī pumunh nē hkīnh xwýnhjaja mēmojaja na mē? Xà mē kot amnhī my kwrýt kà jakār xwýnh pix kwýjaja na pre pahi Tawija ā mē harēnh anē nā? Nà mē tapxipixjaja kêt. Māānēn mē kot amnhī jakār kêt xwýnh kwýjaja. Tanhmā na pre ra Tirtūm kapēr ā kagà htūm kot finat Apraāw jarēnh to? Na pre harēnh o:

Na pre Apraāw amnhī kaxyw Tirtūm kôt hamaxpēr nē hkôt amnhī xām nhūm amnhī tā omu nē amnhīm mex ā harē. Anē.

¹⁰Xà Apraāw ra kot amnhī my kwrýt kà krāhyr nhīrō pē na pre Tirtūm amnhīm mex ā harē? Nà kormā kot amnhī krāhyr kêt ri na pre ā harēnh anē.

¹¹Kormā kot amnhī krāhyr kêt ri kām kapēr nē kām:

—E ate amnhī kaxyw inhmā ajamaxpēr nē ixkôt amnhī xām ā ixte apumunh kôt na pa amnhīm amex ā ajarē.

Anh̄yr o kām kapēr hāmri nē rī kormā kām tanhmā amnhī krāhyr to hā kām karō nhūm kuma nē mar xà hkôt amnhī my kwrýt kà hkwy krāhta. Kot Tirtūm mā amnhī nhōr ā amnhī to amnhīrīt kaxyw ā amnhī nhīpêx anē.

Nom kormā amnhī krāhyr kêt ri na pre Tirtūm amnhīm mex ā harē. Tā Ijaew kêt xwýnhjaja kot amnhī jakār kêt tā mē hkwyjaja Apraāw pyrā nē amnhī kaxyw Tirtūm mā hamaxpēr nē kām amnhī nhōr jakamā Apraāw te kēp mē hpār krax maati pyrāk. ¹²Nē māānēn mē pahpē Ijaew. Kot puj mē pahō amnhī kaxyw Tirtūm kôt pajamaxpēr nhūm amnhī tā mē pahpumu nē mē pamex ā mē pajarē. No ām mē pahte amnhī jakār ā mē pahpumunh kôt

ã mẽ pajarēnh anhÿr kêt nē. Æm Apraãw pyrà nē amnhĩ kaxyw Tĩrtũm kôt pajamaxpēr pix ã mẽ pahpumunh kôt na hte mẽ pamex ã mẽ pajarē. Kormã Apraãw kot amnhĩ my kwryt kã krãhyr kêt ri ra kot amnhĩ kaxyw Tĩrtũm mã hamaxpēr jakamã kēp mẽ pahpē Ijaew mẽ pahte urak nē amnhĩ kaxyw Tĩrtũm mã pajamaxpēr xwÿnhjē hpār krax maati. Ijaew kêt xwÿnhjē pyrà nē kēp mẽ pahpār krax maati.

*Tĩrtũm kot Apraãw mã mẽmoj mex jarēnh
Karatas 3.22*

¹³ Amnepēm na pre Tĩrtũm Apraãw mã tanhmã kapēr to nē kãm:

—E koja nhÿrmã akanrēhã akra nē atãmnhwÿjaja amÿrpē apyrã nē krĩ piitã hkôt mẽ kēp mẽ õ pahi. Anē.

Tã tanhmã Apraãw kot amnhĩ nhĩpēx to hã omunh xà hkôt na pre ã kãm kapēr anē? Xà kot kãm tanhmã amnhĩ nhĩpēx to hã karõ nhũm kot hkôt amnhĩ nhĩpēx mex ã omunh xà hkôt na pre hkĩnh nē ã kãm kapēr anē? Nã kot anhÿr kêt. Mē pahpō kot pu we Tĩrtũm kapēr xà hkôt pix mã amnhĩ nhĩpēx mex rãhã ho ri papa? Mē pahpē hihtÿx kēnã. Æm kot amnhĩ kaxyw Tĩrtũm kôt hamaxpēr nhũm kot amnhĩ tã omunh nē amnhĩm mex ã harēnh kôt pix mã na pre ã kãm kapēr anē. ¹⁴ Kop apu kot kãm tanhmã kapēr to nē kãm:

—E Apraãw. Kot kaj ixkapēr piitã ama nē hkôt amnhĩ nhĩpēx mex rãhã ho ri apa. Hã koja nhÿrmã akanrēhã akra nē atãmnhwÿjaja kēp krĩ piitã hkôt mẽõ pahihti.

Anhÿr o kãm kapēr ronhÿx ãm kãm ã kapēr anhÿr kaprÿ. Apraãw aa kot kapēr piitã hkôt amnhĩ nhĩpēx mex o pare hã. Kop apu ã kãm kapēr anhÿr ronhÿx pre kuma nē tee ri amnhĩ kukamã hamaxpēr nē hamaxpēr o:

—Kwa nã. Ra ixte Tĩrtũm kôt amnhĩ xãm tã tanhmã kot pa amnhĩ to nē kapēr piitã hkôt amnhĩ nhĩpēx mex rãhã ho ri ixpa? Kot paj tee ri inhmã ã amnhĩ nhĩpēx anhÿr o ixpa hprãm kaprÿ. Jakamã koja nhÿrmã ixkanrēhã ixkra nē ixtãmnhwÿjaja kēp mẽ õ pahi hkēt nē pa. Hēxta waa nē. ¹⁵ Kojã Tĩrtũm ixte kapēr kwÿm ri tanhmã ixte amnhĩ tomnuj to hã ixpumu nē tanhmã ixtomnuj to. No mẽhõ kot we kapēr piitã hkôt amnhĩ nhĩpēx mex rãhã ho pa? Nã amrakati kumrēx.

Anhÿr o nhÿx pre hamaxpēr. ¹⁶ No na pre Tĩrtũm ã kãm kapēr anhÿr kêt nē. Ra kot hprĩ hã mẽ pahte amnhĩ nhĩpēx ã mẽ pahpumunh mex kēnã. Na pre ãm kãm:

—E ate amnhĩ kaxyw ixkôt ajamaxpēr nē ixkôt amnhĩ xãm jakamã kot paj amarĩ ato mex nē. Anē.

Tĩrtũm na hte mẽmoj tã amnhĩ jarēnh o amnhĩ to hēx kêt nē. Na hte mẽmoj tã amnhĩ jarēnh xà hkôt tanhmã mẽmoj nhĩpēx to ho ri pa. Jakamã koja mẽ pahte Apraãw pyrà nē amnhĩ kaxyw hkôt pajamaxpēr xwÿnh piitã mẽ pahpō mex nē.

Nē xà na pre ã mẽ pamã kapēr anē nē mẽ pamã:

—E kot kaj mẽ ixkapēr kôt pix mã ri amnhĩ nhĩpēx o ri apa hã kot paj mẽ ato mex rax nē.

Anhÿr o mẽ pamã kapēr? Nã na pre ã mẽ pamã kapēr anhÿr kêt nē. Na pre mẽ pamã:

—Kot kaj mẽ finat Apraãw pyrà nē amnhĩ kaxyw ixkôt ajamaxpēr nē ixkôt amnhĩ xunhwÿ hã kot paj mẽ ato mex nē.

Anhÿr o mẽ pamã kapēr. Tã Apraãw kumrēx kot mẽ pakukamã amnhĩ kaxyw hkôt hamaxpēr jakamã te kēp mẽ pahpiitã mẽ pahte urak nē ã amnhĩ nhĩpēx anhÿr xwÿnhjē pãr krax maati pyrãk.

¹⁷ Amnepēm na pre Tirtūm tanhmā Apraāw mā kapēr to. Kot tanhmā kām kapēr toja Tirtūm kapēr ā kagā htūm kamā na. Na pre kām: Kot kaj apē ahpŷnhā ri mē urojē hpār krax. Anē.

Kormā Apraāw kra hkēt tā nhūm hkra hkukamā ā kām kapēr anē. Hāmri nhūm kuma nē hkōt hamaxpēr kurē kumrēx nē hamaxpēr o:

—Hēxta waa nē. Ra ixprō mē wa ijamē wa ixpigēt tŷx nē wa ixkra hkēt kumrēx. Kot paj wa tanhmā amnhī to nē tokyx ty. Tā ra Tirtūm kot ixkra nē ixtāmnhwŷjē hkukamā ā inhmā mē harēnh anhŷr kēnā. Jakamā kot pa xep wa ixpigēt tŷx tā tanhmā amnhī to nē ixkra. Nā kot pa xep wa anē. Nē koja ixkraja tanhmā amnhī to nē ixpē htyk japēr tā koja Tirtūm akupŷm inhmā ho htŷr. Nā koja inhmā ho anē. Ra kot inhmā ixkra nē ixkanrēhā ixtāmnhwŷ sohtō jarēnh kēnā. Anē.

¹⁸⁻¹⁹ Na pre ra hpigēt tŷx nē. Ra hā amgrā pē 100 nē hkurē kēt nē pa. Nhūm hprō määnēn hpigēx tŷx nē. Nē ōhy kamā hkra hkēt kumrēx. Kormā wa hkra hkēt tā nhūm Tirtūm Apraāw mā hkra nē htāmnhwŷ sohtō hā harē. Nē kēp mē urojē sohtōjē pār krax ā kām harē. Hāmri nhūm kuma nē amnhī kaxyw hkōt hamaxpēr tŷx kurē kumrēx. ²⁰ Nē ā amnhī nhīpēx anhŷr rāhā ho pa. Na pre war amnhī kra hā amnhī jarēnh ma nē tee ri amnhī kukamā hamaxpēr kēt nē. Ām Tirtūm tām kot wa kām wa hkra jarēnh pix mā hamaxpēr pē amnhī kaxyw kām hamaxpēr tŷx o ri wa pa. Nē hamaxpēr o:

—Nā ra wa ixpigēt tŷx kumrēx tā koja xep Tirtūm wa inhmā wa ixkra hō gō. Nā koja wa inhmā kugō. Hēxta waa nē. Ām hāmri Tirtūmja mex o mex. ²¹ Nā kot wa inhmā wa ixkra jarēnh xā hkōt koja wa inhmā kugō. Ja kaxyw ahpumunh o ahpumunh. Tirtūmja hēx kēt. Anē.

²² Hāmri nhūm Tirtūm ā hamaxpēr anhŷr ā omu nē amnhīm mex ā harē. Nē kot kām amnhī jarēnh xā hkōt wa kām wa hkraja gō.

²³ Nom na pre amnhīm Apraāwja pix mex ā harēnh kēt nē. ²⁴ Kot puj mē pahōtō urāk nē amnhī kaxyw hkōt pajamaxpēr nhūm amnhī tā mē pahpumu nē ra kot Apraāw jarēnhā pyrā nē amnhīm mē pamex ā mē pajarē. Na pre mē panhō Pahihiti Jejus ty nhūm Tirtūm akupŷm ho htŷr. Tā mē papajaja na pu prem amnhī kaxyw Jejus kōt pajamaxpēr nhūm Tirtūm ja hā mē pahpumunh kōt mē pahte amnhī to mex xwŷnh ā mē pajarē. ²⁵ Na pre mē pahwŷr Kra Jejus mē nhūm mē pahwŷr wrŷ. Tā nhūm mē axtem nē kupī nom nhūm amarī htyk kēt nē. Na pre htyk o mē pahte amnhī tomnuj pānhā amnhīrer pa. Ja kaxyw na pre Tirtūm mē pahwŷr kumē. Jakamā nhūm prem kupī nhūm akupŷm ho htŷr. Tā mēmo kaxyw na pre Tirtūm ā mē pahwŷr Kraja mēnh nhūm mē panē htyk anē nhūm akupŷm ho htŷr? ām kot kukwak ri amnhīm mē pahte amnhī kaxyw hkōt pajamaxpēr xwŷnhjaja mē pahte amnhī to mex xwŷnh ā mē pajarēnh pix kaxyw.

5

Tirtūm kot mē pahōtō hkwy hā harēnh

Matēwre 5.12; Sikūn Korīt 4.8, 5.18-21; Xiakre 1.2-4; Wam Pētre 4.12, 5.9

¹ Nē na pu prem amnhī tomnuj o ri papa nhūm Tirtūm ja hā mē pahpumu nhūm ja kēp omnuj nē. Jakamā nhūm Jejus amnhī grōnh kōt wrŷ nē mē panē ty. Nhūm Tirtūm htykja kukwak ri mē pahōtō hkwy. Mē pahte amnhī kaxyw hkōt pajamaxpēr nē hkōt amnhī xunhwŷr ā mē pahpumu hāmri nē ā mē panhīpēx anē pu mē ra pahpē hkwy hā papa. ² Na pre Jejus Tirtūm mā mē pajarēnh o:

—E jajē pumu. Na mē ra amnhī kaxyw pamā hamaxpēr nē pahkôt amnhī xunhwý. Anē.

Hāmri nhūm kuma nē mē pahto mex nē mē pakutā nojarēt rāhā ho pa. Tā kot puj mē pahpē hkrājaja nhýrmā pano ho Tirtūm mex o mex xwýnhja pumu. Jakamā na pu htem amnhī kukamā ā pajamaxpēr anhýr o pahkīnh nē papa nē pajamaxpēr o:

—Hēxta waa nē. Kot paj nhýrmā inhno ho Tirtūm mex o mex ā omu nē kuri ixpa ho ixpa. Nā ām hāmri. Inhmā omunh prām tỳx kumrēx. Anē.

³⁻⁴ Nē na htem Jejus ā mē pahptomnuy nē pu mē pahpunuy nē ri papa. Pamex kēt nē tā tee ri amnhī kukamā pajamaxpēr o ri pahkaprī nē papa hkēt nē. Kwār mē māmri ā mē panhīpēx anē. Pu mē pahpunuy kurē Jejus kôt amnhī xunhwýr tỳx o kormā mō. Nē mē umaj hkaga hkēt nē. Arī amnhī wýr kamā pajamak o papa. Jao amnhī kaxyw kumā pix mā kām pajamaxpēr tỳx rāhā pahkīnh nē ri papa.

Kot puj mē ā amnhī nhīpēx anhýr o ri papa nhūm Tirtūm ja hā mē pahpumu nhūm ja kām mex nē. Hāmri nhūm ja kaxyw tanhmā mē pahto paxihtỳx to pu mē pahpunuy tā hkôt pajamaxpēr tỳx rāhā nē.

⁵ Nē ra mē kot Jejus ā tanhmā mē panhīpēx to htā pu mē amnhī kaxyw tee ri kām pajamaxpēr kaprý hkēt nē. Ra kot mē pamā amnhī Karō nhōr nhūm kot mē pahkarō mā gēx kēnā kot pu kēt mē ri tee ri amnhī kaxyw kām pajamaxpēr kaprý. Na hte Karōja mē pahkarō kamā mē pamā Tirtūm kapēr jarēnh o amnhīrīt nē kām mē pajapē htỳx ā harēnh o amnhīrīt rāhā nē.

⁶ Amnepē mā na pre mē piitā amnhī tomnuy o ri pa nē tee ri kām amnhī to mex rāhā hprām kaprý. Mēhō kot we ja kaxyw tanhmā mē hkrā hto? Jakamā nhūm Tirtūm ja hā mē omu hāmri nē mē kaxyw Kra Jejus mā kām:

—E inhma. Ka kot kaj mē kot tanhmā amnhī tomnuy to ho paja ā ma mē hwýr wrý. Ixte mē nē atyk kaxyw agrōnh kôt mē hwýr amēnh jakamā kot kaj wrý nē mē kām ixkapēr jarēnh o ri mē hkôt apa. Rāhā nhūm mē hkwýjaja apī ka mē piitā mē nē ty. Anē.

Hāmri nhūm kuma nē kām:

—Tōe. Nā kot paj amā hprām xā hkôt ā amnhī nhīpēx anē. Anē.

Hāmri nē man amnhī grōnh kôt mē pahwýr wrý. ⁷⁻⁸ Xā koja mēhō kām xpēn japē xāj xpēn nē ty nā? Xā kot mēhō tām kot amnhī nhīpēx xwýnh tā nhūm mē kot hpīr kaxyw nhūm hkrāmnhwýja kām hapē nē. Nē nē amnhī grōnh kôt mē kām xa nhūm mē kupī nhūm nē ty? Nā kot apu nē htyk japēr ko. No mē papajaja. Na pu htem mēhō hkrāmnhwýta kīnhā arī amnhī tomnuy rāhā ho ri papa htā nhūm Tirtūmja arī kām mē pajapē nē. Nē kām mē pajapē xāj mē pahwýr Kris mē nhūm mē panē ty. Arī mē pahte amnhī tomnuy rāhā ho papa tāā. Na pre ā Tirtūmja kām mē pajapē hā ā mē pahwýr mēnh anē. ⁹ Na pre ty nhūm hkamrō hkwý axkapī nhūm Tirtūm ja hā omunh xā hkôt tām amnhīm mē paxunhwý. Tā Jejus kukwak ri koja ma mē kot amnhī xā htỳx kamā hamak tūm xāta wýr mē parēnh kēt nē. Mē pahpē hkwý kēnā kot kēt hwýr mē parē.

¹⁰ Nom kormā mē pahpē hkwý hkēt ri na pu prem te ra kutā amnhī xunhwýr pyrāk o amnhī nhīpēx. Tā nhūm Kra mē panē ty pu mē hkôt amnhī xunhwý. Jakamā nhūm Tirtūm Jejus tyk kukwak ri mē pahto hkwý. Nē ra akupým Kra ho htūr jakamā kot puj mē pahte hkôt amnhī xunhwýr xwýnhjaja nhýrmā wa urāk nē wa kuri pahtūr tūm nē pamex kumrēx nē papa ho papa.

11 Nē mē pahpê kuwy rax wÿr mē papa mā xwÿnh kêt jakamā na pu htem pahkĭnh nē pajamakêtkati nē ri papa. Nom ja pix ā na pu htem ā amnhĭ nhĭpêx anhÿr kêt nē. Mē pahpê Tĭrtŭm krāmnhwÿ jakamā na pu htem mĕānēn pahkĭnh nē ri papa. Pahihti Jejus Kris kot mē panê htyk ā omunh xā hkôt na pre Tĭrtŭm mē pahte hkôt amnhĭ xunhwÿr xwÿnhjê ho hkwy jakamā na pu htem pahkĭnh nē pajamakêtkati nē ri papa.

*Atāw mē Kris wa harēnh
Wam Korĭt 15.20-22, 45-49*

12-13 Nē amnepēm na pre Tĭrtŭm finat Mojes mā tanhmā kapēr to. Hāmri nhŭm kuma nē Ijaew kot tanhmā amnhĭ nhĭpêx to ho pa kaxyw mē kām mēmojta ā karō nē mē kām hā hkagā. Mē kot kamā harēnh nē mar nē Tĭrtŭm kôt amnhĭ nhĭpêx kaxyw. Hāmri nhŭm mē tee ri ā kot mē kām mēmoj tā karōja ma nē tanhmā axpēn mā kapēr to nē axpēn mā:

—Kwa na pu htem ā amnhĭ nhĭpêx anhÿr kêt nē. Na pu htem ām amnhĭ tomnuj tÿx kumrêx o ri papa nē amnhĭ to mex kêt kumrêx. Anē.

Ām hāmri na prem ā amnhĭ jarēnh anē. Mē pahpiitā mē pahte amnhĭ tomnuj xwÿnh kēnā. My kot wa pē finat Atāwja kumrêx na pre tanhmā mē pahte amnhĭ tomnuj to ho hkrax. Mÿrapē na pre htĭr tŭm nē ri pa ho pa hkêt nē. Na pre ri pa nē gaa nē ri hpigēt tÿx nē ty. Tā mÿr pē ri mē papa xwÿnhjaja na pu htem urāk nē tanhmā amnhĭ tomnuj to ho ri papa. Mÿrapē na pu htem ri papa nē gaa nē Atāw pyrā nē pahtyk pa. Tĭrtŭm kot mē pahtā Atāw mā kapēr xā hkôt. 14-19 Jakamā na prem kormā Mojes kator xwÿj ri pika piitā hkôt ri pa nē gaa nē haxwÿja htyk pa. Mē kot amnhĭ tomnuj mÿrapē ty. Atāw pyrā nē Tĭrtŭm kot mēmo xō nē hkurē xwÿnhhta krēr kêt tā urāk nē tanhmā amnhĭ tomnuj to ho ri pa. Hāmri nē mÿrapē ty.

Na pre ā Atāwja mē pahpiitā mē pamā Tĭrtŭm kapēr nhĭrōp ām nē amnhĭ tomnuj o hkrax anē nē mēmo xōta krē. Jao te mē pahpiitā mē pahte urāk nē kumē hkur pyrāk o mē panhĭpêx. Mÿrapē nhŭm htem arĭ pika piitā hkôt hapōj nē kormā hprĭre htā ra Atāw pyrā nē tanhmā amnhĭ tomnuj to ho ri pa. Jakamā nhŭm Tĭrtŭm Atāw kot tanhmā amnhĭ tomnuj to hā omunh xā hkôt mē pakukamā hamaxpēr o:

—Nā koja mē Atāw pyrā nē amnhĭ tomnuj o ri pa. Mÿrapē kot paj ma mē kot amnhĭ xā htÿx kamā hamak tŭm xāta wÿr mē rēnh pa. Anē.

Tā Jejus Kris mē Atāw wa harēnhja kot axpēn pyrāk jakamā na hte Atāw kanrēhā hkra nē htāmnhwÿjaja Atāw kot amnhĭ nhĭpêx kôt amnhĭ nhĭpêx o ri pa rāhā nē. Urāk nē amnhĭ tomnuj rāhā ho ri pa. Nhŭm axtem Jejus kôt mē kot amnhĭ xunhwÿr xwÿnhjaja Jejus kôt amnhĭ nhĭpêx rāhā ho ri pa. Te mē kēp hkanrēhā hkra nē htāmnhwÿjê pyrā nē urāk nē tām amnhĭ nhĭpêx. Na htem ā ahpÿnhā amnhĭ nhĭpêx anhÿr o ri pa. Na pre Jejus mē pahte amnhĭ tomnuj pānhā amnhĭrer par kaxyw mē panē ty. Jakamā mē pahte hkôt amnhĭ xunhwÿr xwÿnhjaja na hte Tĭrtŭm ja hā mē pahpumunh kôt mē pahto hkra. Kot puj mē nhÿrmā pahtyk tā nhŭm akupÿm mē pahto mē pahtĭr pu mē wa kuri pahtĭr tŭm nē papa ho papa.

Atāw kot Tĭrtŭm kapēr nhĭrōp ām jakamā na hte Tĭrtŭm mē pahpiitā mē pahte amnhĭ tomnuj xwÿnh ā mē pajarē. Nom nhŭm Jejus Atāw rom kot Tĭrtŭm kapēr mar nē hkôt amnhĭ nhĭpêx rāhā jakamā na hte Tĭrtŭm mē pahte hkôt amnhĭ xunhwÿr xwÿnhjaja amnhĭm mē pahte amnhĭ to mex xwÿnh ā mē pajarē.

Nhũm Atãw kot Jejus kĩnhã Tĩrtũm kapẽr nhĩrõp ãm mýrapê na hte mýr pê mê pa xwýnhjaja ohtõ nê pa nê gaa nê Atãw pyrà nê htyk pa. Hãmri nê kormã hĩr ri amnhĩ to mex o pa hkêt mýrapê ma mê kot amnhĩ xã htýx kamã hamak tũm xãta wýr ma hapêx. Tã nhũm Tĩrtũmja mex o mex jakamã na hte Jejus Kris mê wa mê pakamã ukapri nê. Jakamã na pre mê pahwýr Jejus mê nhũm mê pahwýr wrý hãmri nê htyk o mê pahte amnhĩ tomnuj pãnhã amnhĩre. Nhũm Tĩrtũm ã kot amnhĩ nhĩpêx anhýr kukwak ri mê pahte hkõt amnhĩ xunhwýr xwýnhjaja amarĩ tanhmã mê pahto mex to ho ri pa. Atãw kot amnhĩ tomnuj pix pumunh kõt na pre Tĩrtũm mê pahpiitã mê pahte amnhĩ tomnuj xwýnh ã mê pajarê. Tã nhũm Jejus mê pakamã ukapri nê mê panê ty nhũm Tĩrtũm ja hã omunh xã hkõt ra mê pahte amnhĩ kaxyw hkõt pajamaxpêr xwýnhjaja te mê pahte aa tanhmã amnhĩ tomnuj to hkêt pyràk o mê panhĩpêx. Na hte amarĩ ã mê panhĩpêx anê.

Nê Atãw kot amnhĩ tomnuj mýrapê na htem piitã ri pa nê tanhmã amnhĩ to nê ty rý ri pa nê gaa nê wejre nê ty. No na pre Jejus Krisja aa kot amnhĩ tomnuj kêt kumrêx tã amarĩ mê panê ty. Jakamã nhũm Tĩrtũm ra kukwak ri mê pahte hkõt amnhĩ xunhwýr xwýnhjê kutã nojarêt rãhã nê mê pakukamã hamaxpêr o:

—Nã mê kot Ixkra hkõt amnhĩ xunhwýr xwýnhjaja na pa mê omunh pa. Tã kot paj Ixkrata kukwak ri tãm mê unhwý nhũm mê nhýrmã wa ixri mex nê hĩr tũm nê pa ho pa. Anê.

²⁰⁻²¹ Nê na pre Tĩrtũm tanhmã finat Mojes mã kapêr to. Mê piitã mê kot amnhĩ tomnuj o ri mê pa hã amnhĩ pumunh kaxyw. Hãmri nê mê kot kapêr mar nê hkõt amnhĩ nhĩpêx o pa kaxyw tanhmã mê kaxyw Mojes mã kapêr to. Nhũm kuma nê amnhĩ xõ ri mê kãm hã kagã nê mê kãm harênh o ri mê hkõt pa. No nhũm prem kapêr ma nê ãm kuma nê hkwým pix mã ri tanhmã amnhĩ tomnuj to ho pa. Nê pika piitã hkõt ja arĩ rãhãã. Ja mýrapê koja mê nhýrmã ty nê ma mê kot amnhĩ xã htýx kamã hamak tũm xãta wýr ma pa. Nom Tĩrtũm arĩ kãm pika piitã hkõt mê papa xwýnhjê japê nê. Mê pahte amnhĩ tomnuj o papa tã nhũm kãm mê pahto mex prãm nê. Jakamã na pre mê pahwýr Kra Jejus Kris mê nhũm mê pahwýr wrý. Mê panê htyk o kot mê pahte amnhĩ tomnuj pãnhã amnhĩrer kaxyw. Tã kukwak ri kot puj mê pahte amnhĩ kaxyw hkõt pajamaxpêr xwýnhjaja nhýrmã Tĩrtũm mê wa kuri pahĩr tũm nê pa mex nê papa ho papa.

6

Mê kot mê pahkrã kumrãr ã mê harênh

Sikũn Korĩt 5.17; Karatas 2.19-20, 5.24, 6.14; Epes 4.17-24; Korosê 3.1-11;

Wam Pêtre 4.1-6

¹ Nê mê pahte arĩ tõhã tanhmã amnhĩ tomnuj to htã nhũm Tĩrtũm arĩ kãm mê pajapê nê. Nê arĩ mê pakutã nojarêt rãhã nê. Jakamã xã kot kaj mê atõ ã harênh anhýrja ma nê atýx ri ã ajamaxpêr anê nê ajamaxpêr o:

—Nã Tĩrtũm kãm ijapê nê kot ixkutã nojarêt rãhã ho ri pa jakamã mo kaxyw kot pa Jejus kõt amnhĩ nhĩpêx o ri ixpa? Nã kot paj ho anhýr kêt nê. Anê.

Ka ã mê atõ atýx ri ajamaxpêr anhýr japêr. Kwa xã ajamaxpêrja mex? Nã mex kêt. ² ã ajamaxpêr anhýrja mê hamaxpêr mex xã hkõt kêt. Ra mê pahte Jejus kõt amnhĩ xunhwýr nê mê pahte amnhĩ tomnuj kaga jakamã nhũm mê pahte amnhĩ tomnujja te ra mê pahpê hapêx pyràk. Jakamã kot puj mê arĩ

tanhmā amnhī tomnuj to ho ri papa hkêt nê. ³ Mēmo kaxyw na htem Tirtūm mā mē pahkrā kumrā? Nā mē pahte ra Jejus kôt amnhī xunhwȳr ā amnhī to amnhīrit kaxyw. Te Jejus htyk nhūm mē pahte amnhī tomnujja haxwȳja hkôt htyk nê hapêx par pyrāk o amnhīrit kaxyw. Jakamā na pu htem pajamaxpêr o:

—Nā kot paj axte tanhmā amnhī tomnuj to ho ri ixpa hkêt nê. Anê.

⁴ Na htem Tirtūm mā gōx kām mē pahkrā kumrā nhūm mē pahte amnhī nhīpêx tūmja te mē kot Jejus kôt haxwȳja haxār pyrāk. Hāmri nhūm mē akupȳm mē pahto api. Te Tirtūm hihtȳx o hihtȳx o kot akupȳm Kra Jejus ho htīr pyrāk. Te mē pahtyk tā nhūm akupȳm kot mē pahto mē pahtīr pyrāk. Pānhā mē pahte amnhī nhīpêx nyw o amnhī nhīpêx kaxyw. ⁵ Nhūm mē pahte amnhī nhīpêx tūmja te Jejus kôt htyk nê hapêx par pyrāk. Nê mē pahte amnhī nhīpêx nywja te Jejus akupȳm htīr pyrāk o amnhī nhīpêx.

⁶ Amnepēm na pu pre htem amnhī tomnuj rāhā ho ri papa. Te mē kām mē àpēnh xwȳnhjaja kot mē ō patrāw mā àpēnh rāhāta pyrāk. Tā nhūm Kris mē panê ty. Kot mē panê mē pahte amnhī tomnuj pānhā amnhīrer nê ho hapêx par kaxyw mē panê ty. Jakamā te mē pahte amnhī tomnuj mē pajamaxpêr punujja te pī kahpa hā Jejus kôt harir nê htyk nê hapêx par pyrāk. Pānhā mē pahte amnhī nhīpêx nyw pix o amnhī nhīpêx kaxyw. Nê mē pajamaxpêr nyw pix o pajamaxpêr papa kaxyw. ⁷ Na hte mē htyk xwȳnhjaja axte tanhmā amnhī tomnuj to hkêt nê. Tā kēr pu mē urāk nê axte ā amnhī nhīpêx anhȳr kêt nê. ⁸ Na pu prem Jejus kot mē panê htyk ā harēnh ma nê pajamaxpêr o:

—Nā ra Jejus kot mē panê htyk jakamā kot paj ixte amnhī nhīpêx tūm kaga hpa nê hpānhā kot amnhī nhīpêx kôt pix mā ri amnhī nhīpêx o ri ixpa. Te ra ixtyk nê axte tanhmā ixte amnhī tomnuj to ho ri ixpa hkêt pyrāk. Jao amnhī nhīpêx nyw pix o amnhī nhīpêx o ri ixpa. Anê.

⁹ Nê Jejus htyk nhūm Tirtūm akupȳm ho htīr jakamā koja axte htyk kêt nê. Ra mē pahte ja mar mex. ¹⁰ Na pre ām htyk tipxi htā htykja o mē pahpiitā mē pahte amnhī tomnuj pānhā amnhīre. Tā ra akupȳm htīr o htīr nê kaxkwa kamā Tirtūm mā tanhmā amnhī nhīpêx to ho ri pa. ¹¹ Tā mē papajaja kot puj mē ā kot amnhī nhīpêx anhȳrja ma nê ā pajamaxpêr anê nê pajamaxpêr o:

—Nā ām hāmri. Te ixte Jejus pyrā nê ra ixtyk pyrāk jakamā kot paj axte amnhī tomnuj o ri ixpa hkêt nê. Te ixte Jejus pyrā nê akupȳm ixtīr nê ām Tirtūm kôt pix mā amnhī nhīpêx o ri ixpata pyrāk o kot paj hpānhā amnhī nhīpêx o ri ixpa. Anê.

¹² Jakamā kot ka mē atō nhȳrmā tanhmā amnhī kukamā ajamaxpêr punuj to japêr hāmri nê ajamaxpêr o:

—Nā inhmā ā amnhī tomnuj anhȳr prām nê. Omnuy tā kot paj ho anê. Nā ixte ho anhȳr mā kēnā.

Anhȳr o ajamaxpêr japêr tā kwa mē ā ajamaxpêr anhȳr kêt nê.

¹³ Kêt Tirtūm mā mǎn amnhī gō nê hkôt amnhī nhīpêx o ri apa. Hāmri nê amnhī krā kamā mēmoj mex pix mā ajamaxpêr nê tām akapêr. Nê mē kot amnhī to mex xwȳnhjê kôt pix mā mǎn ri apa.

Na ka pre htem akapêr punuj nê.

Nê ajamaxpêr punuj nê.

Nê mē kot amnhī tomnuj o mē pa xwȳnhjê hkôt ri apa.

Nê kagōxȳhti japrō nê ho akōm o ri mē hkôt apa.

Tā ra hpānhā Tirtūm mā amnhī gō nê axte ā amnhī nhīpêx anhȳr kêt nê.

¹⁴ Amnepēm na pu prem tanhmā mē pahte amnhī nhīpēx to ho papa hkukamā pajamaxpēr nē pajamaxpēr o:

—Nà kot paj Tirtūm kapēr kōt pix mā mān ri amnhī nhīpēx o ri ixpa nē amnhī to mex o ri ixpa nhūm Tirtūm ja hā ixpumu nē amnhīm inhmex ā ijarē. Nà kot paj anē.

Anhūr tā no ām tee ri mē pamā hkōt amnhī nhīpēx o ri papa hprām kaprū nē arī ri kapēr kwīm tanhmā amnhī nhīpēx to ho ri papa. Tā ra hpānhā axtem pajamaxpēr o:

—Nà Tirtūm kot ixkutā nojarēt rāhā ho pa xwūnh. Tā ra ixte hkōt amnhī xām jakamā koja tanhmā ixto pa hkōt amnhī nhīpēx mex o ri ixpa. Nà koja ixto anē.

Anhūr jakamā ra amnhī kaxyw kām pajamaxpēr tūx o mēmoj punuj kutā amnhī to htūx nē.

*Mē pahte Tirtūm mā tanhmā amnhī nhīpēx to hā mē pajarēnh
Juāw 8.34*

¹⁵ Tā ā kot anhūr jakamā tanhmā kot puj wem pajamaxpēr to? Xà kot pu mē ā pajamaxpēr anē nē pajamaxpēr o:

—Nà na hte Tirtūmja ixte kapēr kōt amnhī nhīpēx o ixpa hā ixpumunh kōt amnhīm inhmex ā ijarēnh kēt nē. Ām kēp ixkutā nojarēt rāhā nē amarī amnhīm inhmex ā ijarēnh xwūnh jakamā kot paj arī amnhī tomnuj rāhā nē aa ja kaga hkēt nē.

Anhūr o kot puj mē pajamaxpēr? Nà kot puj mē ā pajamaxpēr anhūr kēt nē. Ā mē pajamaxpēr anhūrja mex kēt. ¹⁶ Kōja mēhō nhūri kot amnhī tomnuj tūx xwūnhjē hō pumu nē kām amnhī jarēnh japēr nē kām:

—E inhma. Kot paj ām akōt pix mā tanhmā amnhī nhīpēx to ho ri ixpa. Jakamā e inhmā mēmoj tā karō pa ama nē amā tanhmā ho ho ri ixpa.

Anhūr o kām kapēr japēr. Hāmri nē ā amnhī nhīpēx anhūr tā amnhī tomnuj pix o ri pa. Tā ā mē kot amnhī nhīpēx anhūr o mē pa xwūnhjaja koja nhūrmā ty hāmri mē kot amnhī xā htūx kamā hamak tūm xāta wūr ma hapēx.

No koja mēhō Tirtūm mā amnhī jarēnh nē kām:

—Pa Tirtūm. E kot paj ām akapēr kōt pix mā ri amnhī nhīpēx o ri ixpa.

Anhūr o kām amnhī jarē nē hkōt amnhī nhīpēx mex o pa. Nē tām amnhī nhīpēx o ri pa. Hāmri nē nhūrmā ty nē ma ō krī hwūr api nē Jejus mē Tirtūm wa kuri htūr tūm nē mex rāhā nē pa ho pa.

¹⁷ Tā mē kajaja na ka xep prem tee ri mē amā mē ate amnhī tomnuj mā anhūrer prām tā nhūm te tām kot amnhī tā mē ato htūx pyrāk o mē anhīpēx ka mē tee ri kām anhūrer prām kaprū. Tā nhūm Tirtūm tanhmā mē akrā hto ka mē kapēr ma nē amnhī kaxyw hkōt ajamaxpēr tūx nē ām hkōt pix mā amnhī nhīpēx. Pa ja hā mē ajarēnh ma nē mē anhū hā ixkīnh nē. Nē Tirtūm mā ixte mē ajarēnh mar nē mē anhū hā ixkīnh ā amnhī jarē. ¹⁸ Na pre Tirtūm tanhmā mē akrā hto ka mē amnhī tomnuj mā anhūrer pa nē hpānhā hkōt pix mā amnhī nhīpēx.

¹⁹ E kot paj ixprī hā tanhmā mē amā ja jarēnh to. Te ixte ixkrajē jahkre pyrāk o kot paj mē amā awjarē. Nà amnepēm na ka prem ajamaxpēr punuj kōt amnhī tomnuj o ri apa. Nē gaa nē ra amnhī tomnuj pix kukamā ajamaxpēr. Tā kēr ka mē arī ā amnhī nhīpēx anhūr kēt nē. Pānhā tām ri ajamaxpēr o ri apa. Jao gaa nē ra Tirtūm kām hprām xā hkōt tām amnhī nhīpēx mex nē. ²⁰ Na ka prem tee ri amā amnhī tomnuj mā anhūrer prām kaprū. Te tām kot amnhī tā mē ato htūx nē amnhī kōt mē ato pa pyrāk

o mẽ anhîpêx. ²¹ Xân ka prem â amnhî tomnuj anhÿr o apa nê akînh nê ajamakêtkati nê ri apa? Nâ na ka prem akînh nê apa hkêt nê. Tâ na ka prem Jejus kôt amnhî xunhwÿ nê tee ri ate tanhmâ amnhî tomnuj to hâ amnhî pumu nê akaprî nê apijaam nê. Â mẽ kot amnhî tomnuj anhÿr o pa xwÿnhjaja na htem ja mÿrapê ty nê ma mẽ kot amnhî xâ htÿx kamâ hamak tûm xâta wÿr pa. ²² No na pre ra Tirtûm tanhmâ mẽ akrâ hto ka mẽ amnhî tomnuj kaga hpa. Te Tirtûm tam kot hpânâ amnhî tâ mẽ ato htÿx nê amnhî kôt mẽ ato pa pyrâk ka mẽ ra âm hkôt pix mã amnhî nhîpêx mex o ri apa. Nê hpânâ amâ kapêr kôt pix mã amnhî nhîpêx mex prâm. Nê hkôt pix mã amnhî nhîpêx hprâm. Jakamâ kot kaj mẽ nhÿrmâ kuri amex kumrêx nê atîr tûm nê ri apa ho apa.

²³ Na hte mẽ kâm âpênh o ri mẽ pa xwÿnhjaja mẽ kâm mẽmoj tâ apê nê âpênh pa nê hpânâ amnhîrer xâ jamÿ. Ja pyrâ nê koja mẽ kot amnhî tomnuj xwÿnhjaja nhÿrmâ ty hâmri nê ma mẽ kot amnhî xâ htÿx kamâ hamak tûm xâta wÿr ma pa.

No mẽ pahte amnhî kaxyw Jejus Kris kôt pajamxpêr xwÿnhjaja na hte Tirtûm ja hâ mẽ pahpumu nê mẽ pajarênh o:

—Nâ âm hâmri. Jajaja koja nhÿrmâ Ixkra mẽ wa Ixkuri mex kumrêx nê htîr tûm nê pa ho pa. Hêxta waa nê. Nâ âm hâmri koja mẽ anê. Anê.

Xâ tâm mẽ pahte amnhî nhîpêx â mẽ pahpumunh kôt na hte â mẽ pajarênh anê? Nâ âm mẽ pahte Kra Jejus Kris kôt amnhî xunhwÿr â mẽ pahpumunh kôt pix mã na hte â mẽ pajarênh anê.

7

Mê pahte amnhî tomnuj kot axte amnhî tâ mẽ pahto htÿx kêt â harênh Rômân 8.2, 10.4; Karatas 4.1; Epes 2.2; Korosê 3.7

¹ E Jejus kôt ixkwÿjaja. Nâ Tirtûm kot mẽ pakaxyw tanhmâ Mojes mã kapêr tota na ka mẽ ra mar tÿx nê. Na pu htem kormâ pahtrî ri hkôt amnhî nhîpêx o ri papa. Tâ ty hâmri nê axte hkôt amnhî nhîpêx kêt nê. Ra mẽ ate ja mar tÿx. E pa mẽ amâ ja hâ ejêp jarê ka mẽ inhma. ² Nâ finat Mojes kot Tirtûm nhÿ hâ mênijaja kot tanhmâ amnhî nhîpêx to ho pa hâ mẽ kâm karôja. Koja mẽhõ ho mjên hâmri nê âm kôt pix mã ri pa ho pa nê aa hkaga hkêt nê. No koja nhÿrmâ mjên kêp ty nhùm ahte ri pa. Hâmri nê kâm axte mẽhõ ho mjên prâm nê mâmri axte mẽhõ ho mjên. Ja tanhmâ kute hkêt. ³ Nom koja wam mjên arî htîr japêr nhùm hprõ tanhmâ hamaxpêr to nê hkaga nê hpânâ nhâm mẽhõ ho mjên. Hâ koja Tirtûm pê ja homnuj nê. Nom koja mjên ra kêp ty nhùm mÿrpê axte kâm mẽhõ ho mjên prâm nê mâmri ho mjên. Ja na Tirtûm pê homnuj kêt. Ra wam mjênja htyk kênâ. Â Tirtûm kot Mojes mã mẽ pakaxyw mẽmoj tâ karô kot anhÿr.

⁴ Tâ ja pyrâ nê na pu prem amnepêm pajamxpêr o:

—Ixte Tirtûm kapêr kôt pix mã amnhî nhîpêx o ri ixpa jakamâ nhùm Tirtûm ja hâ ixpumu nê amnhîm inhmxex â ijarê. Anê.

Tâ pu mẽ ra tanhmâ pajamxpêr to nê hpânâ pajamxpêr õ ho pajamxpêr o:

—Nâ na xep hte Tirtûm mẽ ixte kapêr kôt amnhî nhîpêx â mẽ ixpumunh kôt amnhîm mẽ inhmxex xwÿnh â mẽ ijarênh kêt nê. Mẽ ixte hkôt amnhî nhîpêx mex o ri ixpare hâ. Kêt âm Kris kot mẽ inhnê htyk nhùm mẽ ixte amnhî kaxyw hkôt ijamxpêr nê hkôt amnhî xunhwÿr pix â mẽ ixpumunh kôt na hte mẽ inhmxex â mẽ ijarê. Âm ja pix â mẽ ixpumunh kôt na hte mẽ ixto hkra

nê mê ixkutâ nojarêt o pa. Kra Jejus pix kukwak ri na hte ã mê inhîpêx anhÿr o pa. Anê.

Å mê pajamaxpêr nyw kot anhÿr. Jakamã te mê pahte mêhõ kot mjên nyw xwÿnh gryk ã axte mjên htyk xwÿnh mã hamaxpêr kêeta pyrãk o na pu htem amnhî nhîpêx o papa. Jao Kris kapêr kôt pix mã amnhî nhîpêx o ri papa. Nê Tirtüm noo mã tãm ri amnhî nhîpêx. Nê axte mê pahte amnhî tomnuj kukamã tanhmã pajamaxpêr to hkêt nê.

⁵Nê annepê mã mê pahte amnhî krã hkôt tanhmã mê pahte amnhî nhîpêx to ho ri papata ã na pu prem amnhî tomnuj pix o ri papa. Ra mê pahte Tirtüm kapêr mar tÿx tâ kuma nê ãm kuma nê ri papa nê ri hkôt amnhî nhîpêx kêt nê. Mÿrapê nhÿm Tirtüm tee ri ja hã mê pahpumu nê mê pahtyk nê ma mê kot amnhî xã htÿx kamã hamak tÿm xã hwÿr papa mã xwÿnhjê hã mê pajarê.

⁶Nê annepê m na pu pre htem ã pajamaxpêr anhÿr o:

—Nà kot paj Tirtüm kapêr kôt pix mã amnhî nhîpêx o ri ixpa nhÿm amnhî tâ ixpumu nê ixte amnhî tomnuj kêt xwÿnh ã ijarê.

Anhÿr o pajamaxpêr no ãm tee ri ã pajamaxpêr anhÿr kaprÿ. Nê arî tanhmã amnhî tomnuj to ho ri papa. Tã hpãnhã te Jejus Kris kôt pahtyk pyrãk o amnhî nhîpêx nê hpãnhã Karõ nhÿ hã tãm amnhî nhîpêx. Jao ra tee ri mê pamã Tirtüm kapêr kôt amnhî nhîpêx prãm kaprÿ hkêt nê. Ra Tirtüm Karõ nhÿ hã amnhî nhîpêx nyw o amnhî nhîpêx mex o ri papa.

Tirtüm kapêr ã kagã htÿm kot tanhmã mê pajarênh to

Römân 3.20, 5.20; Karatas 3.23-24

⁷Tã Tirtüm mê pahte kapêr kôt ri amnhî nhîpêx ã mê pahpumunh kôt amnhîm mê pamek ã mê pajarênh kêt jakamã mêmõ kaxyw na kapêr ã kagã htÿmja? Nã mê pahte mar nê pahprî hã Tirtüm noo mã mê kot amnhî tomnuj xã jarênh mar nê omunh mex kaxyw na. Na hte mê pahkwÿjê kukrêx kÿnh o pamã ho panhõ hprãm nê mê pamã karõ. Å kot mêmõj punuj piitã nê mê pamã karõ kot anhÿr. Tã mê pahte ja mar kêt ronhÿx pu mê Tirtüm kêp ja homnuj ã harênh mar kêt nê. ⁸Tã ra mê pahte harênh mar nê kêp ja homnuj ã harênh ma. Mê pamã axpên kukrêx kÿnh o ho pamã panhõ hprãmja mãânên kêp ja homnuj ã harênh mar tâ nom aa hkaga hkêt nê arî pamã axpên kukrêx kÿnh o pamã ho panhõ hprãm tÿx rãhã ho ri papa. Kop ãm Tirtüm kapêr kêt ronhÿx pu mê kot amnhî tomnuj xãja aa mar kêt kumrêx nhÿm te mê pamã amrakati pyrãk. ⁹Annepê mã ixte Tirtüm kapêr mar kêt ri na pa pre ixtÿx ri amnhî kukamã ijamaxpêr o ri ixpa nê ijamaxpêr o:

—E kot paj nhÿrmã Tirtüm ri ixtÿr tÿm nê inhmex nê ixpa ho ixpa.

Anhÿr tâ hpãnhã pamã axpên kukrêx kÿnh o ho pamã panhõ hprãm nê kapêrta ma nê ja hã amnhî pumunh kurê kumrêx. Hãmri nê tee ri amnhî kukamã ijamaxpêr nê ijamaxpêr o:

—Hêxta waa nê. Nã ã ixte amnhî nhîpêx anhÿr o ixpa jakamã kot paj nhÿrmã ty nhÿm Tirtüm akupÿm ixto ixtÿr pa kuri ixtÿr tÿm nê ixpa ho ixpa hkêt nê. Hêxta waa nê. Ixte amnhî tomnuj xwÿnh na pa. Kot paj nhÿrmã ty nhÿm Tirtüm ma mê kot amnhî xã htÿx kamã hamak tÿm xãta wÿr amnhî nê inhmê. Anê.

Hãmri nê ixkaprî nê tee ri amnhî kukamã ijamaxpêr o ri ixpa. ¹⁰Tã hpãnhã axtem ijamaxpêr o:

—Nà kot paj Tirtüm kapêr kôt pix mã mãn ri amnhî nhîpêx o ri ixpa hãmri nê nhÿrmã ixtyk tâ hwÿr api nê kuri ixtÿr tÿm nê inhmex nê ixpa ho ixpa. Nã kot paj anê.

Anhÿr ã ijamaxpêr tâ no ãm tee ri inhmã hkôt amnhî nhîpêx o ixa hprãm kaprÿ. Na pa pre xatã kapêr nhîrôp ixkuhê nê tee ri ja hã amnhî pumu nê ijamaxpêr o:

—Kwa tanhmã kot pa amnhî nhîpêx to nê ãm Tîrtûm kôt pix mã ri amnhî nhîpêx? Na pa hte tee ri inhmã ã amnhî nhîpêx anhÿr prãm tÿx kaprÿ. ãm ixte amnhî tomnuj pix o ri ixa xwÿnh jakamã ãm hãmri koja amnhî nê kuwyta wÿr inhmê. Nã koja ixto anê. Hêxta waa nê. Tanhmã kot paj we ja nê kãm ixkapêr to? Anê.

¹¹ No mêhõ koja Tîrtûm kapêr kôt amnhî nhîpêx mex o ri pa? Na pu htem pahpiitã tee ri pamã ho anhÿr prãm kaprÿ. Mê pahpê hihtÿx kumrêx jakamã na pa pre ixtÿx ixte Tîrtûm kuri ixtîr tûm nê ri ixa hã amnhî kukamã amnhî jarênh kaprÿ. ãm xatã kapêr nhîrôp ixkuhê nê amnhî tomnuj pix o ri ixpaja mÿrapê koja mê kot amnhî xã htÿx kamã hamak tûm xata wÿr amnhî nê inhmê. ¹² Kot anhÿr tâ tanhmã kot puj mê Tîrtûm kapêr ã kagã htûmta jarênh to? Nã kot mê pamã mê pahte amnhî nhîpêx ã karôta mex kumrêx. Mex o mex. ¹³ Mex kumrêx tâ na htem kuma nê tee ri kãm hkôt amnhî nhîpêx hprãm kaprÿ. Jao nhÿrmã ty nê ma kuwy hwÿr pa. Kêt pa na pa pre ra mar nê omunh mex tâ hkôt amnhî nhîpêx mex kêt nê. Jao ra ixte amnhî tomnuj xwÿnh ã amnhî pumu. Na pa pre tee ri inhmã hkôt amnhî nhîpêx o ri ixa hprãm tâ no ãm xatã kapêr nhîrôp ixkuhê nê hkwÿm ri amnhî nhîpêx rãhã ho ri ixa. Tã ra tee ri ja hã amnhî pumu nê amnhî kukamã ijamaxpêr o:

—Nã na pa hte ãm tee ri inhmã Tîrtûm kôt amnhî nhîpêx prãm kaprÿ no ãm ho anhÿr kêt nê. ãm ixte amnhî tomnuj pix o ixa xwÿnh na pa. Ja mÿrapê koja Tîrtûm amnhî nê ma kuwy hwÿr inhmê. Nã koja ixto anê. Anê.

*Mê pahte mê pamã amnhî tomnuj kaga hprãm kaprÿ hã mê pajarênh
Karatas 5.17*

¹⁴ Nê Tîrtûm kapêr ã kagã htûmta Tîrtûm kapêr na. Nê Tîrtûm kînhã ãm inhî pix na pa ri ixa jakamã tanhmã kot pa amnhî to nê kapêr kôt ri amnhî nhîpêx mex o ri ixa? ¹⁵ Inhmã tãm ixte amnhî nhîpêx prãm tâ no ãm amnhî tomnuj pix o ri ixa. Mêmoj ixpê omnuj tâ pa hte ra hkôt tanhmã amnhî tomnuj to ho ri ixa. Hãmri nê ja hã amnhî pumu nê tee ri amnhî kukamã ijamaxpêr o:

—Hêxta waa nê. Mon pa hte axtem nê ã amnhî nhîpêx anhÿr o ri ixa? Mêmoj ixpê omnuj nhûm inhmã ho anhÿr prãm kêt tâ ra ho anê. Nhûm mêmoj mex nhûm inhmã ho anhÿr prãm tâ ho anhÿr kêt nê. Mon pa hte axtem nê ã amnhî nhîpêx anhÿr o ri ixa? Anê.

¹⁶ ã ixte amnhî nhîpêx anhÿr o ri ixa htã ra Tîrtûm kapêr mexta ma hãmri nê ra ijamaxpêr o:

—Nã Tîrtûm kapêrja mex kumrêx tâ pa tee ri inhmã hkôt amnhî nhîpêx mex hprãm kaprÿ ho ri ixa. Hêxta waa nê. Anê.

¹⁷ Inhmã amnhî tomnuj prãm kêt tâ arî ixkaxwÿnh kãm ijamaxpêr punuj nhÿ hã ã amnhî nhîpêx anhÿr o ri ixa. ¹⁸ Nê inhmã tãm amnhî nhîpêx prãm tâ no ãm tee ri ã inhmã amnhî nhîpêx anhÿr prãm kaprÿ. Tanhmã kot pa amnhî to nê tãm amnhî nhîpêx o ri ixa? Na pa tee ri inhmã ja ho anhÿr prãm kaprÿ. Ixte amnhî tomnuj xwÿnh na pa. Nê aa ixte amnhî to mex kêt kumrêx xwÿnh. ¹⁹ Inhmã mêmoj mex kôt pix nê amnhî nhîpêx prãm tâ no ãm ã amnhî nhîpêx anhÿr kêt nê. Nê ãm hkwÿm ri tanhmã amnhî tomnuj to ho ri ixa. Mêmoj ixpê omnuj tâ pa hkôt amnhî nhîpêx o ri ixa. ²⁰ Ixte Tîrtûm kapêr kôt amnhî nhîpêx kêt jakamã na pa hte ã amnhî tomnuj anhÿr

o ri ixpa. Měmoj ixpě omnuj pa inhmā ho anhÿr prām kêt tā ra hkôt amnhĭ nhĭpěx. Ixte Tĭrtŭm kapěr kôt amnhĭ nhĭpěx kêt jakamā ā amnhĭ nhĭpěx anhÿr o ri ixpa. ²¹Ně mēmoj mex nhŭm inhmā hkôt amnhĭ nhĭpěx prām tā ra hkŵym ri amnhĭ nhĭpěx. Ā ixte amnhĭ nhĭpěx anhÿr xwŷnh na pa. ²²Ně inhmā Tĭrtŭm kapěr mar ně hkôt ri amnhĭ nhĭpěx prām tā ²³nom ixte amnhĭ tomnuj xwŷnh jakamā hkôt amnhĭ nhĭpěx kêt ně. Na pa tee ri ja hā amnhĭ pumu ně amnhĭ kukamā ijamaxpěr o:

—Nā kot paj axte amnhĭ tomnuj kêt ně. Kot paj ām amnhĭ to mex pix kukamā ijamaxpěr o ri ixpa.

Anhÿr tā no ām arĭ amnhĭ tomnuj o ri ixpa ně amnhĭ to mex kêt. Ixte amnhĭ tomnuj xwŷnh jakamā na pa hte ā amnhĭ nhĭpěx anhÿr rāhā ho ri ixpa ně tee ri inhmā amnhĭ tomnuj kaga hprām kaprŷ. ²⁴Héxta waa ně. Na pa ixkaprĭ htŷx ně ri ixpa. Ā ixte amnhĭ nhĭpěx anhÿr o ri ixpaja mŷrapé kot paj nhŷrmā ty ně ma mē kot amnhĭ xā htŷx kamā hamak tŭm xāta wŷr ma mō. Mēhō kot tanhmā ixkrā hto pa ā amnhĭ nhĭpěx anhÿrja kaga? ²⁵Nā mē panhō Pahihti Jejus Krisja pix. Tām koja ixte amnhĭ tomnuj kutā tanhmā ixto ixihtŷx to. Jakamā na pa axte tee ri amnhĭ kukamā ijamaxpěr kêt ně. Pānhā ixkĭnh ně ri ixpa ně Tĭrtŭm mā kām:

—Pa Tĭrtŭm. Nā ām hāmri amex o amex. Aně.

Tā ra ixte Jejus Kris kôt amnhĭ xām jakamā koja tām tanhmā ixto ixihtŷx to pa rĭ kormā Tĭrtŭm kapěr kôt amnhĭ nhĭpěx mex o ri ixpa. No kot pa pam amnhĭ krā hkôt amnhĭ tomnuj rāhā ho ri ixpa. Ā ixte anhÿr xwŷnh na pa.

8

Tĭrtŭm Karō kot mē pahto tām mē pahte amnhĭ nhĭpěx xwŷnh ā harěnh Karatas 5.16-26

¹Ně Jejus Kris kěp mēmoj punuj kutā mē pahto mē paxihtŷx xwŷnh jakamā mē pahte hkôt amnhĭ xunhwŷr xwŷnhjaja na pu htem ŷ hā amnhĭ tomnuj o ri papa hkêt ně. Jao mē pahte kuwy hwŷr papa mā xwŷnh kêt. ²Te ra mē pahtyk nhŭm Tĭrtŭm kot akupŷm mē pahto mē pahŷr pyrāk jakamā nhŭm Karōja mē pahkarō mā agjē pu mē ŷ hā tām amnhĭ nhĭpěx o ri papa. Te tām kot amnhĭ nhĭpěx pyrāk o amnhĭ nhĭpěx nhŭm Karō mēmoj punuj piitā kutā mē pahto mē paxihtŷx. Kěp mē pajamaxpěr punuj kutā mē pahto mē paxihtŷx xwŷnh jakamā kot puj mē nhŷrmā mē kot amnhĭ xā htŷx kamā hamak tŭm xāta wŷr papa hkêt ně.

³Nom kormā mē pahte Jejus kôt amnhĭ xunhwŷr kêt ri na pu prem tee ri pamā Tĭrtŭm kapěr piitā hkôt amnhĭ nhĭpěx prām kaprŷ nhŭm mē pahpé hihtŷx kumrěx. Jakamā tanhmā koja Tĭrtŭm amnhĭ to ně amnhĭ mā mē pamex xwŷnh ā mē pajarě? Na pre tee ri amnhĭ tā mē pajamā hāmri ně mē pahwŷr Kraja mē nhŭm man mē pahwŷr wrŷ ně mē pahpyrā ně ĭ ho mē pakamā kato. Nom mē parom aa tanhmā amnhĭ tomnuj to hkêt kumrěx ně ri pa. Tā mē kot hpĭr tā nhŭm amarĭ htŷk kêt ně. Na pre htŷk o mē pahte amnhĭ tomnuj piitā hpānhā amnhĭrer pa. Jakamā tām kěp mē pajamaxpěr punuj kutā mē pahto paxihtŷx xwŷnh. Na pu htem hkôt amnhĭ xunhwŷ hāmri ně kukwak ri amnhĭ tomnuj o ri papa hkêt ně. ⁴Pānhā Tĭrtŭm kot amnhĭ nhĭpěx kôt amnhĭ nhĭpěx o ri papa ně axte mē pahte amnhĭ nhĭpěx tŭm kôt amnhĭ nhĭpěx kêt ně. Hāmri hpānhā Tĭrtŭm Karō kot amnhĭ nhĭpěx kôt pix mā amnhĭ nhĭpěx. Ně hamaxpěr kôt pix mā pajamaxpěr. Ja kaxyw na pre Tĭrtŭm mē pahwŷr Kraja mē nhŭm wrŷ ně mē pahpiitā mē paně ty.

⁵ Nē mē kot amnhī krā hkôt tanhmā amnhī nhīpēx to ho ri mē pa xwýnhjaja na htem htýx ri tanhmā hamaxpēr to xà hkôt amnhī nhīpēx o ri pa. No kêt Tirtüm Karō kot mē pahkarō mā gjēx xwýnhjaja na pu htem mē kurom te Jejus jamaxpēr pyrāk o pajamaxpēr o papa.

⁶ Nē mē kot amnhī krā hkôt amnhī nhīpēx xwýnhjaja koja mē nhýrmā ty nē ma kuwy hwýr pa nē kamā pa ho pa. No mē pahte Tirtüm Karō hkôt amnhī nhīpēx xwýnhjaja kot puj mē pajamaxpēr nyw o pajamaxpēr nē amnhī nhīpēx nyw o amnhī nhīpēx. Jao paxàmnhīx ri pajamakêtkati nē ri papa. Nē nhýrmā ty hāmri nē Tirtüm mē Jejus wa kuri akupým pahťir tùm nē pamex kumrēx nē papa ho papa.

⁷ Nē mē kot amnhī krā hkôt ri amnhī nhīpēx xwýnhjaja kām Tirtüm kīnh kêt. Nē kām kapēr ma prām kêt jakamā tanhmā kot mē amnhī to nē hkôt amnhī nhīpēx? ⁸ Koja mēhō amnhī krā hkôt kām hprām xà hkôt pix mā amnhī nhīpēx hāmri nhūm Tirtüm tee ri ja hā omu nē hkīnh kêt nē. ⁹ No mē papajaja na pu htem mē urāk nē ā amnhī nhīpēx anhýr kêt nē. Ra Tirtüm Karō kot mē pahkarō mā gjēx jakamā na pu htem hkôt pix mā amnhī nhīpēx hprām. No koja Tirtüm Karō mēhō kaxwýnh mā àr kêt nē nhūm kēp hkra hkêt nē.

¹⁰⁻¹¹ Tā mē papajaja. Mē pahte amnhī tomnuj mýrapê koja mē pakrāhkàja nhýrmā ty. No nhūm Tirtüm ra kot amnhīm mē pahte amnhī to mex xwýnh ā mē pajarēnh nhūm Kris Karō kot mē pahkarō mā gjēx jakamā koja mē pahkarōja htyk kêt nē. Mē pakrāhkà pix koja ty nhūm mē pahkarōja ma kaxkwa hwýr àpir kurē kumrēx. Tā nhūm nhýrmā Tirtüm akupým mē pakrāhkà ho hťir nē akupým mē pahkarōja mē pakrāhkām hagjê pu mē wa kuri pahťir tùm nē papa ho papa. ¹² Jakamā e kwa ixkwýjaja. Kēr pu mē axte ri mē pajamaxpēr tùm kôt amnhī nhīpēx o ri papa hkêt nē. ¹³ Kot puj mē arī ā amnhī nhīpēx anhýr o ri papa hāmri nē nhýrmā ty nē ma mē kot amnhī xà htýx kamā hamak tùm xàta wýr papa. Jakamā kēr pu mē mēmo arıgıro hā pamā tanhmā amnhī tomnuj to hprām hāmri nē amnhī kukamā pajamaxpēr o:

—Nà inhmā ā amnhī nhīpēx anhýr prām tā kot paj Tirtüm Karō nhý hā ja kutā amnhī to htýx nē ho anhýr kêt nē. Anē.

Kot puj mē ā pajamaxpēr anē hāmri nē nhýrmā kuwy wýr papa hkêt nē. Pānhā Tirtüm mē Jejus wa kuri pamex nē pahťir tùm nē ri papa ho papa. ¹⁴ Mē kot Tirtüm Karō hkôt amnhī nhīpēx xwýnhjaja kēp Tirtüm kraa.

¹⁵ Nom amnepēm kormā mē pahte hkôt amnhī xunhwýr kêt ri. Nē kormā mē pamā kapēr mar prām kêt ri nhūm kot amnhī tā mē pahpumunh nē tanhmā mē pahto pumaj na pu prem pamā uma ho ri papa. Tā hkôt amnhī xunhwý nhūm Karōja mē pahkarō mā gjēx jakamā na pu htem ra pamā uma hkêt nē ri papa. Karō kot mē pahpê Tirtüm kra hā mē pajarēnh jakamā pu mē amnhī kamā kot tanhmā mē panhīpēx to puma hkêt nē ri papa. Nē paxàmnhīx pajamakêtkati nē kām amnhī jarē nē kām amnhī jarēnh o:

—Pa Inhīpēxà maati? Ot pa ixpê akra hā amā amnhī jarēnh kaxyw amnhī kaxyw amā ijamaxpēr. Anē.

Jao ra mē pamā uma hkêt nē ri papa. ¹⁶ Karō kot mē pahkarō mā gjēx nhūm mē pahte amnhī tā omunh jakamā na pu htem pajamaxpēr o:

—Nà Tirtüm Karō kot ixkarō mā àr jakamā ixpê hkra na pa. Anē.

*Nhýrmā mēmoj piitā akupým mex par ā harēnh
Sikūn Korīt 4.16-18; Korosē 3.4; Wam Pêtre 4.13*

¹⁷ Nē mē kām Tirtūm prām kēt xwýnhjaja na htem te mē kot Tirtūm Kra Jejus nhīpêx pyrāk o mē panhīpêx pu mē pahpunuj nē ri papa. Nom kot puj mē nhýrmā Tirtūm mex o mex xwýnhja kuri pamex kumrêx nē papa. Mē pahpê hkra jakamā kot puj mē Kra Jejus pyrā nē ō krī kamā kuri pamex kumrêx nē ri papa ho papa. ¹⁸ Jar Jejus ā mē pahpunuj nē ri papa htā kot puj mē nhýrmā kuri pamex kumrêx nē papa ho papa. Hāmri nē mē pamex o pamex ā amnhī pumu nē jar pika ja kamā tanhmā mē pahpunuj toja mē axte pajamaxpêr kēt kumrêx.

¹⁹ Nē pika hkôt Tirtūm kot mēmoj ho kator xwýnhjaja na htem Tirtūm kot mē pahto mex par jatur xām mēnh ā arīgro jamār rāhā ho pa. āk nē mry nē pī nē gō nē mēmoj piitā mē pajamār o pa. Te kot mē pakukamā hamaxpêr o:

—Kwa mēmo arīgro hā koja Tirtūm hkrajê piitā ho amnhīrīt nē mē ho mex par jatur xām kumē pu mē ja hā mē omu? Hēxta waa nē. Inhmā tokyx ja hā mē omunh prām tỳx. Koja tokyx ā mē hipêx anē pa ixkīnh tỳx kumrêx.

Anhýr o hamaxpêr pyrāk. ²⁰ Mēmo kaxyw na hte mryja ā mē pakukamā hamaxpêr anē? Nā amnepê mē Tirtūm kot mēmoj piitā ho katorta ā nhūm pre piitā mex o mex. Pī nē mry nē gō. Mēmoj piitā mex kumrêx rāhā nē. Aa grā nē htyk kēt kumrêx. Tā Atāw kot amnhī tomnuj mýrapê nhūm ra ý hā mēmoj piitā homnu par jakamā na hte mēmoj htīr nē pa nē gaa nē ty nē hapêx. Nē mē pahpur kām ahkagrôt punuj hapôj. Atāw kot amnhī tomnuj mýrapê nhūm Tirtūm kapêr xā hkôt ā mēmoj omnu hpar anē. ²¹ Nom koja arī rāhā ho rāhā hkêt nē. Koja nhýrmā Tirtūm akupým mēmoj piitā ho mex pa nhūm mex o mex nē axte grā rý axte htyk nē hapêx kēt nē. Nē axte omnu nē hikwý hkêt nē. Koja mē pahpyrā nē mex o mex. Jakamā na htem Tirtūm kot mē pahto mex par jatur xām mēnh xā hā arīgro jamār rāhā ho pa. ²² Te mēhō ni hpijagri kaxyw ôhy xā htỳx nē tokyx kām hpijagri hprām xāj àmra ho nōr pyrāk o amnhī nhīpêx pē mē pahto mex jatur xām mēnh ā arīgrota jamār o pa.

²³ Nē mē papajaja na pu htem tanhmā pahpunuj to nē jajê pyrā nē te amnhī kamnhêr o ri papa pyrāk. Rý tanhmā paxā kute nē ri papa. Rý pamā prām nē paxāa nē ri papa. Nē tanhmā mē pahpunuj to nē ri papa. Jao te pī nē gō nē mryja pyrā nē amnhī tā Tirtūm kot mē pahto mex par jatur xām mēnh ā arīgro jamār rāhā ho ri papa.

Na pre Tirtūm mē pahwýr Karō rē nhūm mē pahkarō mā agiê nē mē pakukamā Tirtūm tanhmā kot mē pahto mex to hā mē pamā ho amnhīrīt nē mē pamā ho amnhīrīt o:

—Koja nhýrmā Tirtūm mē ato mex par jatur xām kumē nē mē piitā mē kām mē apê hkra hā mē ato amnhīrīt. Hāmri nē mē amā mē anhī nyw gō ka mē axte axā nē ri apa nē atyk kēt nē. Hāmri nē Tirtūm ri amex kumrêx nē ri apa ho apa. Nā kot kaj mē nhýrmā ā amnhī nhīpêx anē. Anē.

Ā Tirtūm Karō kot mē pakukamā mē pajarênh anhýr jakamā na pu htem amnhī tā kot mē pahto mex jatur xām mēnh pix jamār o ri papa. ²⁴ Nom na kormā ā mē pahto mex anhýr kēt nē. Kormā mē pamā mē panhī nyw nhōr kēt nē. Nom ra kot mē pahto hkra jakamā pu mē ja hā amnhī pumu nē pajamaxpêr o:

—Nā ra Tirtūm kot ixto hkra jakamā koja nhýrmā määnēn inhmā inhī nyw gō. Nā koja inhmā kugō.

²⁵ Anhýr o pajamaxpêr tā kormā. Na pu htem kormā amnhī tā hamār rāhā ho ri papa nē aa hkaga hkêt nē papa.

Mē pahte Tirtūm Karō nhý hā Tirtūm mā amnhī jarênh

²⁶ Nē na pu htem Tirtūm mā amnhī jarēnh kaxyw nhūm hte Karōja mē pahto ajuta pu mē ŷ hā pakatāt kōt kām tanhmā amnhī jarēnh to. No kot puj mē amnhī krā hkōt kām amnhī jarēnh mex kēt nē. Na pu htem ja kaxyw tee ri amnhī kukamā pajamaxpēr o:

—Kwa tanhmā kot pa Tirtūm mā amnhī jarēnh to? Tanhmā kot pa mēmoj tā ixàhwÿr to rÿ amnhī to hwÿr to? Nà kot paj amnhī krā hkōt ja ho anhÿr mex kēt nē. Hēxta waa nē. Anē.

No nhūm Tirtūm Karō ra kot mē pahkarō mā gjēx jakamā na hte tanhmā mē pahkrā hto pu mē ŷ hā kām amnhī jarēnh mex nē pakatāt kōt mēmoj tā kuwÿ. Te Karōja tanhmā mē pakute hā mē pahpumunh nē mē pakamā ukapri xāj tām mē pahto hwÿr pyrāk.

²⁷ Jakamā pu mē ŷ hā tanhmā Tirtūm mā amnhī jarēnh to nhūm mē pamar kurē kumrēx. Ra kot mē pajamaxpēr kōt mē pahpumunh par kēnā. Nhūm ra Karō kot mē pahkarō mā gjēx jakamā na pu htem kām hprām xà hkōt kām amnhī jarē nē tanhmā amnhī to paxàhwÿr to.

Tirtūm kot mē pamā mēmoj piitā ho mex ā harēnh

Römān 8.37; Piriṗos 1.12; Wam Pētre 5.10

²⁸ Nē mē pamā Tirtūm kīnh xwÿnhjaja. Tirtūm kot mē pahto hkra xwÿnhjaja. Koja mēmoj mē pakamā tanhmā amnhī to htā kēr pu mē ām ja hā amnhī pumu nē tee ri amnhī kukamā pajamaxpēr kēt nē. Koja te mē pahpē omnuj pyrāk tā koja nhÿrmā hpānhā mē pamā mex nē. Koja Tirtūm nhÿrmā tanhmā mē pamā mēmojta o mex to. ²⁹ Amnepē mā mēmoj piitā hkēt ri na pre Tirtūm mē pakukamā tanhmā mē pajarēnh to nē mē pajarēnh o:

—E kot paj nhÿrmā mē kot Ixkra Jejus kōt amnhī xunhwÿr xwÿnhjē ho ixkra jakamā nhūm mē Jejus pyrā nē kēp ixkraa. Nē urāk nē ixkapēr kōt amnhī nhīpēx o pa. Jao pa ra ixkra xohtō nē. Nà ja na inhmā hprām. Anē.

³⁰ Tā pu htem pajapōj nē ri papa. Hāmri nē kapēr ma nē amnhī kaxyw Kra Jejus kōt pajamaxpēr nē hkōt amnhī xunhwÿ. Hāmri nhūm Tirtūm ja hā mē pahpumu nē pahto hkra nē amnhīm mē pamex xwÿnh ā mē pajarē nē mē pahto mex nē. Nē te ho Kra Jejus nhīpēx pyrāk o mē panhīpēx. Jao nhÿrmā wa kuri mē pahūr tūm nē papa ho papa mā xwÿnh ā mē pajarē.

Mēhō kot Tirtūm pē aa mē papytār kēt ā harēnh

Römān 5.1

³¹ Tā ā Tirtūm kām mē pajapē nē mē pahto mex kot anhÿr. Ā kot mē panhīpēx mex anhÿr jakamā ra mē pahkōt pa ho pa rāhāā. Jakamā mēhō koja ĩhkra pē mē pahpytā? Nē mēhō koja tanhmā ri kēp mē pahto? Nà koja kēp mē papytār rÿ tanhmā kēp mē pahto hkēt nē. ³² Tirtūm kām Kra Jejus japē htÿx tā na pre mē pahpē nē hkēt nē mē pahwÿr kumē. Te kot mē pamā ōr pyrāk o hipēx nhūm mē pahwÿr wrÿ nē mē panē ty. Tā ra Tirtūm kot mē pamā ōr jakamā koja māānēn kām mē pahte Kra hkōt amnhī xunhwÿr xwÿnhjē japē nē mē pahto mex rāhā ho ri pa. Nà koja ā mē pahto mex anē.

³³ Jakamā mēhō koja kām mē pahte amnhī tomnuj xwÿnh ā mē pajarē? Ra tām kot mē pahto hkra nē mē pahte amnhī to mex xwÿnh ā mē pajarēnh kēnā kot kēt mēhō kām tanhmā mē pahto kapēr punuj to nhūm mē kuma. Koja mē tee ri kām tanhmā mē pahto kapēr to kaprÿ. ³⁴ Na pre ra Jejus Kris mē pahte amnhī tomnuj pānhā amnhīre kaxyw mē panē ty nhūm Tirtūm akupÿm ho htūr. Hāmri nhūm ma akupÿm kaxkwa hwÿr api nē Pahi Maati krī xā kamā Tirtūm nhūkhō hā hkrī ho hkrī. Nē Tirtūm mā mē pakutā nojarēt rāhā ho kuri

hkrî ho hkrî. Jakamã mēhō koja kēp mē kot amnhî xã ht̄yx kamã hamak t̄um xata w̄yr mē pajano? Nã amrakati kumrēx.

³⁵ Nē Krisja kaxkwa kamã Tirt̄um nh̄ihkō hã hkrî ho hkrî htã mãânēn jar mē pahkôt pa ho pa. Kãm mē pajapê ht̄yx jakamã kot puj mē tanhmã pahpunuj to htã nh̄um ar̄i kãm mē pajapê nē mē pahkôt pa ho pa.

R̄y nh̄um mē kot hkôt amnhî xunhw̄yr kêt xw̄ynh̄jaja tanhmã hã mē pahto htã nh̄um ar̄i kãm mē pajapê kamã mē pahkôt pa ho pa.

R̄y mē pamã prãm nē ri papa. R̄y mē paxê hkêt nē pamã kry nē ri papa htã nh̄um ar̄i kãm mē pajapê kamã mē pahkôt pa ho pa.

R̄y ra mē kot hã mē panh̄imex kaxyw r̄y hã mē pahpar kumrēx. Tã nh̄um ar̄i kãm mē pajapê kamã mē pahkôt pa ho pa rãhã nē.

Kãm mē pajapê kamã mē pahkôt pa ho pa rãhã jakamã pu mē tee ri amnhî kukamã pajamxp̄er kêt nē. Ām hkôt paxãmnh̄ix ri pajamakêtkati nē ri papa ho papa. ³⁶ Tirt̄um kap̄er ã kagã ht̄um te mē papajaja mē pahte kãm tanhmã amnhî jarēnh to pyrã nē mē pajarēnh kot:

Pa Tirt̄um. Na htem atã mē ixtomnuj t̄yx o pa.

Nē ra mē kot mē inh̄imex kaxyw.

Nē mē inh̄ip̄ex o te mē kot ôwēhti ho mōr nē hpar kaxyw tanhmã hip̄ex to pyrãk.

Jakamã na pa mē ra ixtyk kaxyw.

Anh̄yr o kot mē pajarēnh. ³⁷ Tã kwãr mē ã mē panh̄ip̄ex anē. Ar̄i Kris kãm mē pajapê kamã mē pahkôt pa ho pa rãhã jakamã mē kot tanhmã mē pahto htã pu mē ar̄i amnhî kaxyw kãm pajamxp̄er t̄yx rãhã ho ri papa. Nh̄um ar̄i mē kutã mē pahto paxiht̄yx pu mē ar̄i mē kãm pakuhê.

³⁸ Mēmoj koja tanhmã mē pahto nh̄um Tirt̄um tee ri ja hã mē pahpumu nē kãm mē pajapê hkêt nē? Nã amrakati kumrēx. Coja mēhō r̄y mēmoj mē pahpê ãmn̄ar kêt nē. Na hte jar pika ja kamã Kris kãm mē pajapê kamã mē pahkôt pa ho pa. Nē kot puj mē nh̄yrmã ty nh̄um ar̄i kãm mē pajapê kamã mē pahkôt pa ho pa rãhã nē. Jakamã koja mēkarō r̄y mēkarōmnuti r̄y jar pika ja kamã mē kãm Tirt̄um prãm kêt xw̄ynh̄jaja mē pahpê ãmn̄ar kêt nē. R̄y mēmoj tanhmã kute. R̄y kormã hapu hã mēmoj tanhmã kute. Coja mēmoj piitã tee ri tanhmã kēp mē pahto htã nh̄um Kris ar̄i kãm mē pajapê kamã mē pahkôt pa ho pa rãhã nē nh̄um mēmoj tee ri mē pahpê ãmn̄ar kapr̄y. ³⁹ Nē koja k̄yj r̄um mēmoj wr̄y nē tanhmã kēp mē pahto japêr. R̄y pyka r̄um mēmoj kato nē tanhmã kēp mē pahto japêr. R̄y kuwy r̄y kók xap̄er t̄yx tanhmã kēp mē pahto. Tã nh̄um mē panhō Pahihti Jejus Kris ar̄i kãm mē pajapê kamã mē pahkôt pa ho pa rãhã nē. Te Tirt̄um kãm mē pajapê pyrãk o kãm mē pajapê ht̄yx kãm mē pahkôt pa ho pa rãhã jakamã nh̄um mēmoj tee ri mē pahpê ãmn̄ar kapr̄y.

9

Ijaew jarēnh

Atre 3.25; Römân 3.1-2

¹⁻² Nē na pa tee ri ixkw̄y Ijaew kot tanhmã amnhî nh̄ip̄ex to ho pa hã mē omu nē ixkapr̄i nē. Ixpyrã nē mē kēp Ijaew tã ixk̄inhã amnhî kaxyw Kris kôt hamaxp̄er kêt jakamã nh̄um Kris tee ri kãm mē hamakêtkati nē ãmnh̄ix ri mē pa hprãm kapr̄y. Pa tee ri mē hkukamã ijamaxp̄er nē ixkapr̄i nē ri ipxa. Nē aa ixkapr̄i ixp̄e kator kêt kumrēx. Mē kot inh̄mã mē hk̄inh kêt ã amnhî tã ijarēnh tã inh̄mã mē hk̄inh kênã. Ām hãmri na pa ã amnhî jarēnh anē. Tirt̄um Karō kot ja hã ixpumunh mex nē inh̄mã:

—Nā ãm hāmri na ka amã mē hkĩnh ã amnhĩ jarē. Anē.

³ Mē kēp ixkwý na mē. Mē ixpār kraxja ãm pixi mex. Tã nhũm mē ixkĩnhã amnhĩ kaxyw Kris kôt hamaxpēr kēt jakamã kop ãm Tirtũm kot mē nē kuwy hwýr pa inhmēnh ronhýx ja inhmã mex. Nhýx pa kãm:

—Kwa Tirtũm. Amnhĩ nē kuwy hwýr ixkwýjē rēnh kēt nē. Inhmã mē hapē htýx kumrēx. Mē hpãnhã pa mãn mē nē hwýr inhmē nã.

Anhýr o nhýx pa kãm ixkapēr. Nom kot paj amnhĩ to ã ixãhwýr anhýr kaprý. Tirtũm kot mē kamã ukaprĩ htã no nhũm mē amnhĩ kaxyw Kris mã hamaxpēr kēt jakamã tanhmã koja amnhĩ to nē mē hpãnhã pa mē nē kuwy wýr inhmē nhũm mē ixrom kuri htír tũm nē pa ho pa? Mē kot hkôt amnhĩ xunhwýyrehã. ⁴ Mē ixpē Ijaew nhĩgétjaja na pre Tirtũm amnepē mã mē ho mex rax nē. Nē kãm mē ho hkra hprãm nē. Nhũm prem tanhmã kot amnhĩ nhĩpēx mex to hã no ho omunh o pa. Nē hirã htýx kãm ri pa hã omu nhũm mē kãm:

—E kot kaj mē ixkapēr ma nē ixkôt amnhĩ nhĩpēx o ri apa. Hã kot paj mē akôt ixpa ho ixpa nē mē ato mex nē ka mē axpēn kanrēhã axãmnr rax nē. Hãmri pa mē amã pika mex gō ka mē kamã ajamakētkati nē axãmnhĩx ri apa ho apa.

Anhýr o mē kãm kapēr. Hãmri nē mē kaxyw Mojes mã tanhmã kapēr to nē mē kaxyw kãm mēmoj piitã hã karō. Mē kot tanhmã amnhĩ tomnuj to hãmri nē tee ri ja hã amnhĩ pumunh nē tanhmã amnhĩ to Tirtũm wýr to nhũm kot mē mar nē mē nē ja ho hapēx par kaxyw. Finat Mojes kot amnhĩ xō ri mē kãm ujarēnh nhũm mē kot mar nē hkôt amnhĩ nhĩpēx mex o ri pa kaxyw. ⁵ Mē ixkukamã mē ixpãmjaja. Apraãw nē Ijak nē Jako kanrēhã mē hkra nē mē htãmnhwýjaja na pre mē. Mē hwýr na pre Tirtũmja Kra Jejus Kris mē nhũm mē hwýr wrý nē mē kamã ĩ ho ĩ ho kator jakamã haxwýja kēp Ijaew na pre. Kēp Mēpahpãm nē mex o mex nē hihtýx o hihtýx tã Ijaew wýr wrý nē mē kamã kato. Hãmri nhũm Ijaew kēt xwýnhjaja harēnh ma nē tee ri hamaxpēr nē hamaxpēr o:

—Hēxta waa nē. Kēp ãm Jejus mē papa kamã mãn kator ronhýx mē pamã mex kumrēx. Anē.

⁶ No nhũm kormã Ijaew hwýr wrýk kēt ri nhũm Tirtũm ra kot mē ho hkra kaxyw mē hã amnhĩ jarē nhũm mē hkwýja kãm ja prãm kēt nē hkaga. Tã xã na pre Tirtũm kot mē ho hkra hã amnhĩ jarēnh ã amnhĩ to hēx? Nã aa hēx kēt kēnã kot kēt ri mēmoj tã amnhĩ jarē nē hã amnhĩ to hēx. Jakamã na pre mē hkwýjaja hkwýjē rom hkaga hkēt nē nhũm amnhĩ tã mē omu nē mē ho hkra. Nom mē piitã mē ho hkra hkēt nē. Mē hkwýjaja kot hkaga jakamã nhũm ãm mē hkwýjē pix o hkra.

⁷ Nē finat Apraãwja na pre hkanrēhã hkra nē htãmnhwý sohtō nē. Tã xã na pre Tirtũm htãmnhwý piitã mē ho hkra hã amnhĩ jarē? Nã mē piitã ã mē harēnh anhýr kēt nē. ãm mē hkwýjē pix na pre mē ho hkra hã mē harē. Apraãw kra Ijak kôt hkanrēhã htãmnhwý pixjaja nhũm kot mē ho hkra hã mē harē.

⁸⁻⁹ Nē Apraãw kormã hprō kamã hkra hkēt ri na pre kãm ãpēnh xwýnh kamã hkra nhũm kato nē myre nē hixi pē Ismael. Nom kēp Apraãw prō kumrēx kamã hkra hkēt. Prō kuprý kamã hkra na pre. Tã nhũm Tirtũm kãm hkra kumrēx kukamã harē nē kãm:

—E kot paj ma tē hãmri nē mēmo arĩgro hã akupýn awýr tē nhũm ra aprō hpjagri nhũm war akra myre. Anē.

Tã nhũm hprō Saraja htujarō. Nē gaa nē hpjagri nhũm hkraja myre. Hixi pē Ijak. Kēp Apraãw prō kamã hkra jakamã Tirtũm nom kēp Apraãw kra

kumrêx. Jakamâ hkra Ijak kanrêhâ htâmnhwÿjaja na pre Tîrtûm kot mē ho hkra hâ mē harē. Ra kot Apraāw mā ja hâ amnhî jarēnh xâ hkôt.

¹⁰ Tâ nhûm Ijakja hprêk nê Repek o hprô. Nê gaa nê ra haxwÿja wa hkra nhûm hkraja wa ahpo nê kato nê wa hamē my. Kot wa pê Ejau nhûm kot hapu pê Jako. ¹¹⁻¹² Nom nhûm kormâ wa kator kêt ri nhûm Tîrtûm wa hkukamâ tanhmâ wa harēnh to. âhpumunh xâ hkôt wa katorxâ mā wa harē nê kām:

—E kot paj amâ warakra wa hkukamâ tanhmâ wa harēnh to ka inhma. Nâ koja wa kato nê gaa nê hprêk hāmri nhûm kot haputa amnhî to rax o kot wa jakre. Anê.

Kot wata koja kot hapu kînhâ amnhî to grire nê ri pa nhûm ā wa hkukamâ wa harēnh anê. Kām wa kot tanhmâ amnhî nhîpêx to hprām xâ hkôt ā wa harēnh anê. Kormâ wa kot tanhmâ amnhî tomnuj to rÿ tanhmâ amnhî to mex to hâ kot wa omunh kêt tã kām hprām xâ hkôt ā wa hkukamâ wa harēnh anê. ¹³ Tîrtûm kapêr ā kagâ htûm kot wa harēnh nê wa hâ kagâ kot:

Ejau rom Jako kanrêhâ hkra nê htâmnhwÿ pixjaja na pre Tîrtûm amnhîm mē ho hkra. Anê.

¹⁴ Mân ka mē Tîrtûm kot ā wa harēnh anhÿrja ma nê ajamaxpêr o:

—Tk. Kwa ja nexti hâ. Mo na pre hamē wa hkanrêhâ wa hkra nê wa htâmnhwÿ piitâ ho hkra hkêt nê? Anê.

Kwa mē ā ajamaxpêr anhÿr kêt nê. Tîrtûm na hte kām hprām xâ hkôt tanhmâ mē panhîpêx to ho pa pu mē kot tanhmâ mē panhîpêx to hâ omu nê âm omu nê amnhî tã tanhmâ kām nê hkêt nê. ¹⁵ Na pre finat Mojes mā amnhî jarēnh o:

Inhmâ hprām xâ hkôt na pa hte mē omu nê tanhmâ mē kamâ ixukaprî hto ho ri ixpa.

Nê inhmâ hprām xâ hkôt na pa hte ahpÿnhâ tanhmâ mē hipêx to ho ri ixpa. Anhÿr o kām amnhî jarē. ¹⁶ Nom tanhmâ mē pahte amnhî nhîpêx to hâ mē pahpumunh kôt na hte mē pakamâ ukaprî hkêt nê. Âm tãm kām hprām xâ hkôt na hte tanhmâ mē pakamâ ukaprî hto ho pa. ¹⁷ Amnepê mā Ejit kām mē ô pahihiti Paraohiti hwÿr na pre Mojes mē nhûm ma hwÿr mô nê kām tanhmâ Tîrtûm kapêr jarēnh to nê kām:

—E Tîrtûm na awÿr inhmê pa mô. Tãm na pre apê Ejit nhô xwÿnhjê nhô pahî kaxyw axâm. Akrâ hihtÿx tã nhûm mē kaxyw axâm. Tã ra xatâ âhpumunh tÿx o tanhmâ anhîpêx to. Krî piitâ hkôt ri mē pa xwÿnhjaja kot atã harēnh mar nê âhpumunh o âhpumunh ā omunh kaxyw. Tã ixte amâ ja jarēnh kaxyw na pre awÿr inhmê pa man awÿr mô. Anê.

¹⁸ Ā na hte Tîrtûm kām hprām xâ hkôt tanhmâ mē panhîpêx anhÿr to ho pa. Jao mē hkwÿjê kamâ ukaprî ho pa. No mē hkwÿjaja nhûm tee ri mē hkrâ hihtÿx ā mē omu nê âm mē omu nhûm mē amnhî krâ hkôt ri tanhmâ amnhî tomnuj to ho ri pa.

Tîrtûm kêp mē pakamâ ukaprî xwÿnh ā harēnh

¹⁹ Nê kot kaj mē atô Tîrtûm kot ā mē hipêx anhÿrja ā harēnh ma nê tanhmâ hâ ixkukjêr to nê inhmâ:

—Kwa na xep hte Tîrtûm ahpÿnhâ tanhmâ mē hipêx to. Nê mē hkwÿjê kamâ ukaprî ho pa nê mē hkwÿjaja mē hkrâ hihtÿx ā mē omu nê âm mē omu nê mē kamâ ukaprî hkêt nê. Jakamâ kwa mo na hte mē kot amnhî tomnuj xwÿnh ā mē harê? Tãm kot ā mē hipêx anhÿr kênâ kot kêt mē kot amnhî tomnuj xwÿnh ā mē harē.

Anhÿr o ajamaxpêr japêr. ²⁰ Kwa mê ri ã atÿx Tirtûm jarênh anhÿr kêt nê. E pa mê amâ ejêp jarê ka mê inhma. Xà kot mêhõ gyw kwÿ ho amnhîm poti nhîpêx nhûm tee ri amnhî tâ omu nê amnhî tâ tanhmâ kâm kapêr to nê kâm: “Tk. Kwa mon ka ri ã inhîpêx anê?” Anhÿr o amnhî tâ kâm kapêr? Nà koja kâm tanhmâ nê hkêt nê. ²¹ Hipêx xwÿnh kâm hprâm xà hkôt kot ã hipêx anhÿr kênâ kot kêt amnhî tâ kâm akir. Koja amnhîm gyw kwÿ kakwÿ nê ho poti ho akkrut nê hipêx. Nê hô ho muxre. Ho mex kumrêx nhûm xa. Nhûm ihõja mã ho anê nê hipêx no ãm wamta kînhã ho hanhàjti nhûm omnajti nê xa. No ãm tãm kot hamê wa hipêx prâm xà hkôt wa hipêx kênâ.

²² Tã na hte ã Tirtûm mê panhipêx anê. Te poti pynajre pyrã nê mê pahkwÿjê nhîpêx nhûm mê kâm kapêr mar prâm kêt nê htÿx ri tanhmâ amnhî tomnuj to ho ri pa. Hãmri nhûm amnhî tâ mê omu nê te amnhî nê mê rênh kaxyw pyrãk o mê hipêx no ãm kormã hamaxpêr o:

—Nà kot paj nhÿrmã mê kot amnhî tomnuj mÿrapê mê ho ijpêx pa nhûm mê piitã ja hã ixpumu nê inhmã ixãhpumunh o ixãhpumunh ã ijarê. Nê inhmã mêmoj punuj piitã hkînh kêt kumrêx ã axpên mã ijarê. Anê.

²³ Nom na hte jajê rom mê pahkwÿjê nhîpêx o te poti mexta nhîpêx pyrã nê amnhî kaxyw mê paxunhwÿ nê mê pahto hkra kaxyw. Nê mê pajarênh o:

—Nà koja mê amnhî kaxyw Ixkra Jesus mã hamaxpêr nê hkôt amnhî xunhwÿ pa ja hã mê omu nê mê kamã ixukapri ho ri ixpa. Nê mê ho mex pê mê kutã inhnojarêt rãhã ho ri ixpa. Hãmri nhûm mê nhÿrmã Ixkra mê wa ixri htÿr tûm nê mex nê pa ho pa. Kot paj ã mê ho mex anê nhûm mê amnhî tâ ixpumu nê inhmã inhmx o inhmx ã ijarênh o pa. Anê.

Ã na hte Tirtûm ahpÿnhã mê pahpiitã mê panhipêx anê.

²⁴ Nê na hte mê ixpê Ijaew pix o hkra hkêt nê. Na hte mãânên mê apê Ijaew kêt xwÿnhjê ho hkra. ²⁵ Amnepê mã mê kâm kapêr jarênh o ri mê pa xwÿnhjê hô pê finat Ojejja na pre te Tirtûm tãm kot Ijaew kêt xwÿnhjê jarênh pyrã nê mê harênh o:

Amnepêm na pa pre mê ho ixkra hkêt tâ kot paj mê hkwyjê ho ixkra.

Na pa pre mê kamã ixukapri hkêt tâ pa ra inhmã mê hapê nê.

²⁶ Nê ixte mê kêp ixkra hkêt ã mê harênh tâ kot paj ra mê kêp ixkra hã mê harê.

Ixpê mêõ Tirtûm kot paj ã mê harênh anê. Anê.

²⁷ Hãmri nhûm finat Ijais Ojei pãnhã tanhmã Ijaew jarênh to. Ijaisja Tirtûm nhÿ hã kapêr jarênh o ri pa xwÿnhjê hô na pre. Jakamã nhûm Tirtûm kâm tanhmã mê ijarênh to nhûm kuma nê ô ri mê ixkukamã mê inhîgêxjê mã ujarênh o pa nê hã kagã. Nê hã kagã ho:

Ijaew na mê ohtô rax kumrêx.

Te gó xujanâr mÿri pykahti grã hkryre xohtô pyrãk.

Tã koja mê piitã ixkôt amnhî xunhwÿr kêt nê.

Koja mê ãm grêre nê amnhî kaxyw inhmã hamaxpêr nê ixkôt amnhî xunhwÿ. Jakamã mê tapxipixjaja koja hkwyjê rom nhÿrmã inhõ krî hwÿr api.

²⁸ No mê kot amnhî kaxyw inhmã mê hamaxpêr kêt xwÿnhjaja kot paj tokyx tanhmã mê harênh to.

Mê kot amnhî tomnuj mÿrapê tanhmã mê harênh to nhûm mê ma mê kot amnhî xà htÿx kamã hamak tûm xãta wÿr ma pa.

Nà kot paj tokyx ã mê hipêx anê.

Anhÿr o mê harê. ²⁹ Nom nhûm kormã ã mê harênh anhÿr kêt ri nhûm ra wam tanhmã mê harênh to nê mê harênh o:

Amnepêṁ Sotō mẽ Komo kamā mẽ pa xwýnhjaja na prem amnhĩ tomnuj tỳx rāhā ho ri pa.

Mýrapê nhũm Tĩrtũm xāhpumunh o àhpumunh xwýnhja tee ri ja hā mẽ omu hāmri nê kaxkwa rũm mẽ ô krĩ wa hĩpy mẽmoj pōôta rē.

Nhũm mẽ hā rôrôk nê mẽ ho hkaxàr pa nhũm mẽ hapêx.

Tā na pu htem mẽ uràk nê amnhĩ tomnuj o ri papa.

Jakamā kop ām Tĩrtũm kot mẽ pahkwýjé kamā ukapřĩ kêt ronhỹx pu mẽ ra mẽ uràk nê pahpiitā pajapêx pa. Anê.

Ijaew kwý kot Jejus kôt amnhĩ xunhwýr kêt ā mẽ harēnh

Römān 10.1-4

³⁰ Nê Ijaew kêt xwýnhjaja na prem Ijaew pyrà nê kām Tĩrtũm prām kêt tā Jejus jarēnh ma nê Ijaew rom amnhĩ kaxyw hkôt hamaxpēr nê hkôt amnhĩ xunhwý. Hāmri nhũm Tĩrtũm ja hā mẽ omu nê mẽ ho hkra nê mẽ kot amnhĩ to mex xwýnhjê hā mẽ harē. ³¹⁻³² Hāmri nhũm Ijaew tee ri mẽ kot Jejus kôt amnhĩ xunhwýr ā mẽ omu nhũm ja mẽ kām mex kêt nê. Hāmri nhũm mẽ hamaxpēr o:

—Tk. Kwa ra mẽ ixte finat Mojes kapēr kôt amnhĩ nhĩpêx mex o ri mẽ ixpa xwýnh jakamā koja Tĩrtũm ja hā mẽ ixpumu nê mẽ ixte amnhĩ to mex xwýnhjê hā mẽ ijarē nê mẽ inhnê mẽ ixte amnhĩ tomnuj rēnh pa. No kot paj mẽ Ijaew kêt xwýnhjê pyrà nê Jejus kôt amnhĩ xunhwýr kêt nê. Ām kwarĩ ho kwarĩ.

Anhỹr ā amnhĩ jarē. No ām ā mẽ hamaxpēr anhỹrja mex kêt. Na prem htỳx Tĩrtũm noo mā kot amnhĩ to mex ā amnhĩ jarēnh kapřy nê arĩ ri tanhmā amnhĩ tomnuj to ho ri pa. Te pry kamā kēn nōr nhũm mẽ kot nhām nê mẽnh kaxyw hkamnār nê ho amnhĩ par krā hi kukēnh pyrāk o na htem amnhĩ nhĩpêx. Jao amnhĩ krā hkôt tanhmā amnhĩ nhĩpêx to ho pa hprām xāj te Jejus kapērja nhām amnhĩ nê rēnh pyrāk o hipêx. Jakamā koja mẽ Tĩrtũm nhō krĩ hwýr àpir kêt nê. ³³ Tĩrtũm kapēr ā kagā htũm kot ja jarēnh kot:

E mẽ inhma. Kot paj nhỹrmā Ijaewjé hwýr mẽhō mẽ nhũm mẽ hkôt kapēr o pa.

Nom koja mẽ kapēr mar kêt nê. Koja mẽ kuma nê ām kuma.

Te pry kamā kēn nōr nhũm mẽ kot nhām pry nê mẽnh kaxyw hkamnār nê ho amnhĩ par krā hi kukēnh pyrāk o koja mẽ amnhĩ nhĩpêx.

No te mẽ kot nhām pry nê mẽnh kaxyw hkamnār kêt pyrāk xwýnhjaja koja mẽ kurom nhỹrmā ma Tĩrtũm nhō krĩ hwýr api.

Hāmri nê hkĩnh nê pa ho pa. Anê.

Nom kēn kumrēx jarēnh kêt nê. Na prem Jejus ā kuxi nê ā harēnh anê. Ijaew te mẽ kot kēn nhĩpêx pyrāk o Jejus nhĩpêx nê amnhĩ kaxyw hkôt hamaxpēr kêt nê axtem nê hkaga nê ām kamā gryk pix o ri pata ā nhũm mẽ harē. No mẽ kot amnhĩ kaxyw hkôt hamaxpēr ronhỹx Jejus te kēn kot mẽ kēp àmnār pyrāk kêt nê. Jakamā ā mẽ harēnh kot anhỹr.

10

¹ Hêxta waa nê. Ijaxwýja ixpê Ijaew. Mẽ kēp ixkwý jakamā kēp apu mẽ kot amnhĩ kaxyw Jejus mā hamaxpēr nê hkôt amnhĩ xunhwýr ronhỹx pa ixkĩnh tỳx kumrēx. Inhmā mẽ kēp Tĩrtũm kra hprām tỳx kumrēx kēnā. Inhmā ja prām xāj na pa hte mẽ ho Tĩrtũm wýr rāhā ho ri ixpa. ² Ra ixte mẽ omunh mex. Mẽ kām Tĩrtũm mā tanhmā amnhĩ nhĩpêx to hprām tā no ām mẽ kot hprĩ hā

kapēr mar kêt. Jakamā na htem tee ri tanhmā kām amnhī nhīpêx to ho ri pa hprām kaprÿ. ³ Nhūm pre Tirtūm tee ri amnhī tā mē omu nē hamaxpēr o:

—Koja mēhō amnhī kaxyw Ixkra Kris kôt hamaxpēr nē hkôt amnhī xām pa ja hā omu nē kot amnhī to mex xwÿnh ā harē nē ho ixkra kurê kumrêx. Nom na hte Ijaew ohtō nē ā amnhī nhīpêx anhÿr kêt nē.

Anhÿr o mē harē. Ām hāmri na ā mē harēnh anē. Na htem ām axtem nē hamaxpēr o:

—Tk. Kot paj amnhī kaxyw Kris kôt ijamaxpēr nē hkôt amnhī xām kêt nē. Kot paj ām pam amnhī krā hkôt tām ri amnhī nhīpêx o ri ixpa. Mē ixpê Ijaewjē mē ixte amnhī nhīpêx xā hkôt. Hāmri nhūm Tirtūm ja hā ixpumu nē amnhīm inhmxē ā ijarē. Nom kot paj Kris kôt amnhī xām kêt nē. Ām kwarī ho kwarī.

Anhÿr ā amnhī jarē. ⁴ Nom na htem ām htÿx ri amnhī krā hkôt amnhī to mex o pa hā amnhī kamnhīx kaprÿ. Koja mē tee ri kām finat Mojes kapēr kôt amnhī nhīpêx o ri pa hprām kaprÿ. Jejus tapxipix na pre tām amnhī nhīpêx mex rāhā ho pa. Na pre Tirtūm kapēr kôt amnhī nhīpêx mex o ri pa nē aa kapēr ō nhūrōp ām nē hkwÿm ri tanhmā amnhī tomnuj to hkêt nē. Kot amnhī tomnuj kêt xwÿnh ā ām pixi mex na. Jakamā tapxipix kukwak ri na hte Tirtūm amnhīm mē pahte amnhī to mex xwÿnh ā mē pajarē.

Tirtūm kām mē pahpiitā mē pahto hkra hprām ā harēnh

⁵ Nē amnepēm na pre finat Mojes Tirtūm nhÿ hā Ijaew mā tanhmā ujarēnh to nē hā kagā. Nē mē kām ujarēnh o:

—E kot kaj mē atō Tirtūm nhÿ hā ixujarēnh ma nē hkôt amnhī nhīpêx mex o ri apa nē hkwÿm ri tanhmā amnhī nhīpêx to hkêt nē. Hā koja Tirtūm hā apumu nē amnhīm ate amnhī to mex xwÿnh ā ajarē ka nhÿrmā kuri atir tūm nē amex nē apa ho apa. Anē.

⁶ Ā mē kām kapēr anhÿr tā mē pahte Mojes kapēr xā hkôt amnhī nhīpêx o papaja na mē pahpē hihtÿx kumrêx. Tirtūm kapēr tūm na. Kapēr ā kagā kamā kôt mē pamā mē pahte tanhmā amnhī nhīpêx to hā karōja ohtō rax kumrêx jakamā pu mē tee ri pamā piitā hkôt amnhī nhīpêx prām kaprÿ. Nhūm Tirtūm tee ri amnhī tā mē pajamā hāmri nē mē pahwÿr Kra Jejus mē. Jakamā na pu htem amnhī kaxyw hkôt pajamaxpēr nē hkôt amnhī xunhwÿ nhūm Tirtūm hā mē pahpumu nē kukwak ri mē pahto hkra kurê kumrêx. Kra kukwak ri kot mē pahto hkra kaxyw kot mē pahwÿr mēnh nhūm mē kot hpīr nhūm akupÿm ho htīr jakamā na pu htem harēnhja ma nē pajamaxpēr o:

—Nā na xep pre Jejus ixto ixpê Tirtūm kra. Anē.

Nom xā na hte Tirtūmja ā mē pamā kapēr anē nē mē pamā:

—E kot kaj mē ma kaxkwa hwÿr api nē Kris japrō nē man amnhī kôt akupÿn o wrÿ pa ja hā mē apumu nē mē ato ixkra.

Anhÿr o mē pamā kapēr? Nā na hte ā mē pamā kapēr anhÿr kêt nē. Tanhmā kot puj mē amnhī to nē ā amnhī nhīpêx anē? ⁷ Rÿ xā na hte ā mē pamā kapēr anē nē mē pamā:

—E na pre Krisja ty. Jakamā mē kam nē ma hwÿr mra nē akupÿm amnhīm ho htīr. Hāmri pa ja hā mē apumu nē mē ato ixkra.

Anhÿr o mē pamā kapēr? Nā na hte ā mē pamā kapēr anhÿr kêt nē. Tanhmā kot pu mē amnhī to nē akupÿm ho htīr? Ja pyrā nē na hte Tirtūm mē pamā mēmoj tā karō pu mē kām ho anhÿr nhūm ja hā mē pahpumunh kôt mē pahto hkra hkêt nē. ⁸ Ām mē pahte amnhī kaxyw Jejus kôt pajamaxpēr nē hkôt amnhī xunhwÿr ā mē pahpumunh kôt pix mā na hte mē pahto hkra. Hāmri nē mē pahwÿr Karō rē nhūm mē pahkarō mā gjêx jakamā mē pahte Tirtūm

kām hprām xà hkôt amnhī nhīpêx o papaja na mẽ pahpê hihtÿx kêt. Te kapêr ra mẽ pahkrā hi kaxwÿnh kām hikwÿ pyrāk o pu mẽ piitā mẽ kām harēnh o ri mẽ hkôt papa. Jakamā na pa hte mẽ piitā mẽ kot amnhī kaxyw Jejus kôt hamaxpêr kaxyw tanhmā mẽ kām harēnh to ho ri mẽ hkôt ixpa nē mẽ kām:

9—Kot ka mẽ atō Jejus kêp anhō Pahihti hā harē nē Tirtūm kot akupÿm ho htir kôt ajamaxpêr. Hā koja Tirtūm ja hā apumu nē anē ate amnhī tomnuj o hapêx nē ato hkra. Ām ja pix ā mẽ pahpumunh kôt na hte mẽ pahto hkra. Anē.

10 Nē na pu htem mẽ pahkrāhi kaxwÿnh kām amnhī kaxyw Jejus mā pajamaxpêr. Nē mẽ pajakwa ho kêp mẽ panhō Pahihti hā harē. Hāmri nhūm Tirtūm ja hā mẽ pahpumu nē amnhīm mẽ pahte amnhī to mex xwÿnh ā mẽ pajarē nē mẽ pahto hkra. 11-13 Tā mẽ pahte amnhī kaxyw Jejus kôt pajamaxpêr nē hkôt amnhī xunhwÿr xwÿnhjaja kot puj mẽ pahkīnh nē papa ho papa. Mē pahpiitāā. Ijaew nē Ijaew kêt xwÿnhjaja. Mē pahpiitā mẽ panhō Pahi Maatija ām pyxi mex na. Jakamā koja Ijaewjê hō rÿ Ijaew kêt xwÿnhjê hō amnhī to kuwÿ nhūm kuma nē ho hkra. Kapêr ā kagā htūm kot ja jarēnh kot:

Mē kām kêp Tirtūm kra hprām xwÿnhjaja koja mẽ amnhī to Tirtūm wÿ nhūm mẽ kuma nē Jejus kot mẽ nē htyk kukwak ri mẽ nē mẽ kot amnhī tomnuj o hapêx nē mẽ ho hkra nhūm mẽ hkīnh nē pa. Anē.

14-15 Xà na htem kormā amnhī kaxyw Kris mā hamaxpêr kêt rāhā amnhī to Tirtūm wÿ nhūm mẽ kuma nē mẽ ho hkra? Nā tanhmā kot wem amnhī to nē amnhī kaxyw kām hamaxpêr kêt rāhā amnhī to kuwÿ? Na hte Tirtūm ma mẽ hwÿr mẽ hkwyjê rē nhūm mẽ ma mẽ hwÿr mra nē Tirtūm kapêr o mẽ ahkre ho ri mẽ hkôt pa. Nhūm mẽ hkwyjaja mẽ kuma nē amnhī kaxyw Jejus kôt hamaxpêr nē amnhī to Tirtūm wÿ. Kapêr ā kagā htūm kot ja jarēnh kot: Koja mẽmoj mex jarēnh xwÿnhjaja ma mẽ hwÿr mra.

Nē mẽ hwÿr hpōx o mō nhūm mẽ amÿm amnhī wÿr mẽ omu nē hkīnh nē. Anē.

16 Tā ra mẽ piitā kot kapêr mar tā piitā amnhī kaxyw hkôt hamaxpêr kêt nē. Jakamā nhūm finat Ijais tee ri ja hā mẽ omu nē Tirtūm mā mẽ harēnh o:

Pa Pahi Maati. Kwa ra mẽ kot akapêr mar tÿx tā akôt amnhī nhīpêx kêt nē.

Mē kām akapêr kôt amnhī nhīpêx o pa hprām kêt. Na htem ām grêre nē akôt amnhī xunhwÿr nē akôt amnhī nhīpêx o ri pa. Anē.

17 Kot anhÿr tā ām mẽ kot Kris kapêr jarēnh mar kôt pix mā na htem amnhī kaxyw hkôt hamaxpêr. Koja mẽ harēnh mar kêt tā tanhmā koja wem amnhī to nē amnhī kaxyw hkôt hamaxpêr nē hkôt amnhī xunhwÿr? 18 Mān ka mẽ atō atÿx ā ajamaxpêr anhÿr o:

—Ko mān Ijaew kormā Jejus kot mẽ panē tanhmā amnhī nhīpêx to hā harēnh mar kêt jakamā na mẽ kormā hkôt amnhī xunhwÿr kêt nē.

Anhÿr o ajamaxpêr. Nom ja kot anhÿr kêt. Ijaew piitā ra mẽ kot harēnh mar kēnā. Tirtūm kapêr ā kagā htūm kot ja hā mẽ harēnh kot:

Na prem ma mẽ piitā mẽ kām ja jarēnh o ri mẽ hkôt pa nhūm mẽ piitā kuma. Anē.

19 Tā mān ka prem ra ja ma nē atÿx ajamaxpêr o:

—Kot anhÿr tā no mān kormā hprī hā Jejus jarēnh mar kêt jakamā mẽ hkôt amnhī xunhwÿr kêt nē. Anē.

Nom ja haxwÿja kot anhÿr kêt. Ra mẽ kot hprī hā harēnh mar mex tā kuma nē ām kuma nē amnhī kaxyw kām hamaxpêr kêt nē. No mẽ apē Ijaew kêt xwÿnh kwÿjaja na ka mẽ kurom harēnh ma nē amnhī kaxyw hkôt ajamaxpêr

nê hkôt amnhî xunhwÿr kurê kumrêx. Hâmri nhûm Ijaew tee ri ja hã mẽ apumu nê mẽ akamã gryk tÿx nê. Nom ra Tirtûm kot ã mẽ hkukamã mẽ kot amnhî nhîpêx anhÿr ã mẽ omunh nê mẽ harênh kot anhÿr kênã. Na pre finat Mojes mẽ kãm tanhmã hã kagã hto. Te Tirtûm tãm kot mẽ hã kagã pyrà nê kapêr ã kagã htûm kamã kot mẽ harênh kot:

Mê ate mẽ kamã mẽ akahak o apa xwÿnhjaja.

Mê kot htÿx ri amnhî nhîpêx o mẽ pa hã mẽ ate mẽ harênh tã no kot paj mẽ arom amnhîm mẽ kot amnhî to mex xwÿnhjê hã mẽ harê.

Kot kaj mẽ tee ri ja hã mẽ omu nê mẽ kamã agryk tÿx kumrêx.

Nê mãânên pa ixte mẽ ho mex ã ixpumu nê mẽ hã ixkamã agryk nê. Anê.

²⁰ Nê finat Ijais na pre haxwÿja ã mẽ harênh anê. Na pre kãm amnhî kwÿ pê Ijaew pyma hkêt nê xatã Tirtûm nhÿ hã tanhmã mẽ kãm Ijaew kêt xwÿnhjê jarênh to ho pa. Te Tirtûm tãm kot mẽ harênh pyràk o mẽ kãm:

Nà Ijaew kêt xwÿnhjaja kot Tirtûm japêr kêt tã koja tãm mẽ kãm amnhî to amnhîrit nhûm mẽ hkôt amnhî xunhwÿ.

Mê kot kormã amnhî kaxyw kãm hamaxpêr kêt tã koja tãm mẽ kãm amnhî to amnhîrit. Anê.

²¹ ã Ijaew kêt xwÿnhjê jarênh kot anhÿr. Nê axte mã tanhmã Ijaewjê jarênh to kot:

Te mẽ katorxã kot tanhmã hkrajê ho mex to kaxyw tee ri amnhî wÿr mẽ kãm àkjêr pyràk o na hte Tirtûm Ijaewjê nhîpêx o pa.

Jao tee ri kãm tanhmã mẽ ho mẽ mex to hprãm tã no nhûm mẽ amnhî tã kuma nê ãm kuma nê hkôt amnhî nhîpêx kêt nê. Anê.

11

Tirtûm kot Ijaew kamã ukaprî hã harênh

Matêwre 13.10-17

¹ Tã ra Ijaew kot Tirtûm kaga jakamã mãn ka mẽ atõ mẽ harênh ma nê ajamaxpêr o:

—Mãn pre Tirtûm tee ri amnhî tã mẽ omu nê amnhî pyrà nê mẽ hkaga.

Anhÿr o ajamaxpêr. Nom na pre mẽ hkaga hkêt nê. Ijaxwÿja ixpê Ijaew na pa. Mẽ urak nê ixpê Ijaew pãr krax pê finat Apraãw kanrêhã htãmnhwÿ Pêjamî kanrêhã hõ na pa. Tã xã na pre Tirtûm ixkaga? Nà kot ixkaga hkêt.

² Amnepêm kormã mẽmoj piitã hkêt ri na pre mẽ ixpê Ijaew hkukamã mẽ ixto hkra hã amnhî jarê. Tã nhûm amgrã xohtõ nê hapêx nhûm mẽ hapôj hãmri nê Tirtûm kôt amnhî nhîpêx o pa hkêt nê. Hãmri nhûm finat Erisja tee ri mẽ kot amnhî nhîpêx ã mẽ omunh o pa nê Tirtûm mã tanhmã mẽ harênh to nê mẽ hã kagã. Nê hã kagã ho:

³ Kwa Tirtûm. Mẽ ixte amã amnhî jarênh xã hã mẽsti hkwy na prem ra hkrakrak pa. Nê anhÿ hã akapêr jarênh o ri mẽ pa xwÿnh kwÿ nhîmex rax nê. ãm papxipix na pa arî ixtîr nê ri ixpa nom nhûm mẽ ra kot ixpîr kaxyw ixtã amnhî jarê. Anê.

⁴ Tã tanhmã na Tirtûm kutã kãm kapêr to? Na pre kãm:

Nà kapxipix na ka arî atîr kêt nê. Arî mẽ ohtõ nê apyrã nê amnhî kaxyw ixkôt hamaxpêr. Mẽ ohtõ. Arî mẽ kêp 7.000 nê akwÿjê rom ri sãnti Paaw kutã hkõnkrã ho hkrî nê kãm mex ã harênh kêt nê. Anê.

⁵ Tã arî ã jarãhã mẽ kot ã amnhî nhîpêx anhÿr kênã. Tirtûm kãm Ijaew japê jakamã mẽ kamã ukaprî. Jakamã nhûm ra mẽ hkwyjaja mẽ pahpyrà nê amnhî kaxyw Kris kôt hamaxpêr nhûm Tirtûm mẽ ho hkra. ⁶ Nom mẽ kot

amnhī to mex ā mē omunh xā hkôt mē ho hkra hkêt nē. Amarī kām mē hapê htūm xā hkôt na hte mē ho hkra. Kop apu mē kot amnhī to mex ā mē omunh xā hkôt kot mē ho hkra ronhỹx amarī mē ho hkra hkêt nē. Nhỹx mē kot tanhmā amnhī nhīpêx to ho pa hā mē omunh xā hkôt pix mā mē ho hkra.

⁷ Ijaew piitā Tirtūm kot amnhīm mē mex ā mē harēnh prām tā no ām mē grēne nē hamaxpēr xā hkôt Jejus kôt amnhī xunhwỹ. Na htem ohtō rax nē kapēr ma nē ām kuma nē tee ri kot amnhīm mē mex ā mē harēnh prām xāj amnhī krā hkôt tanhmā amnhī nhīpêx to ho ri pa. Nom ra mē kot Jejus kaga jakamā ā amnhī nhīpêx anhỹr kaprỹ. Mē kot hkaga jakamā te ri mē hamak kro nē Tirtūm kapēr mar kêt pyrā nē pa. ⁸ Tirtūm kapēr ā kagā htūm kot mē harēnh kot:

Tirtūm na hte mē kām kapēr mar prām kêt xwỹnhjê pumu nē ām mē omu nhūm htem htỹx ri pa ho pa. Nē Tirtūm mā hamaxpēr kêt o ri pa. Mē kot kapēr mar tā hprī hā mar tỹx kêt nē. Nē mē kot kapēr ā kagā kamā harēnh tā hprī hā mar tỹx kêt nē. Jakamā na htem amnhī kaxyw hkôt hamaxpēr kêt o pa.

Tā na htem arī jarāhā ā amnhī nhīpêx anhỹr o ri pa. Te mē nohkre nē mē hamak kro xwỹnh kot amnhī nhīpêx pyrāk. Anē.

⁹ Nē amnepēm na pre pahi finat Tawija amnhī kwỹ Ijaew jarēnh o:

Na htem htỹx ri hkīnh kām apkur o pa.

Te tutre kām prām nē kot rapuuti hwỹr àr nē tee ri kām kator prām kaprỹ pyrāk.

Ja pyrā nē mē kot Tirtūm kapēr mar kêt mỳrapê koja Tirtūm tanhmā mē ho nhūm mē tee ri kām mex prām kaprỹ.

¹⁰ Te mē nohkre xwỹnhjaja tee ri mē hpa nhīpêx o pa pyrāk.

Nē omnuy nē à nē ho gjêx o ri pa pyrāk o amnhī nhīpêx o ri pa.

Anhỹr o mē harē. ¹¹ Tā arī Ijaew Jejus kaga nē kām kapēr mar prām kêt jakamā xā na Tirtūm tee ri ja hā mē omu nē mē hkaga kumrêx? Nā kot mē hkaga hkêt. Ām mē tāmjaja kêp Jejus prām nōkati jakamā nhūm tee ri ja hā mē omu nē mē hpānhā Ijaew kêt xwỹnhjê mā amnhī to amnhīrit nē mē hkwyjê ho hkra. Jakamā koja Ijaew kwỹjaja ja hā mē omu nē tee ri hamaxpēr nē hamaxpēr o:

—Kwa na xep Ijaew kêt xwỹnh kwỹjaja Jejus kôt amnhī xunhwỹ nhūm Tirtūm ja hā mē omu nē mē ho hkra. Kwa mon pu prem axtem nē ri Jejus kaga? E pu mē kuxwar amnhī kaxyw hkôt mām pajamaxpēr nē hkôt amnhī xunhwỹ kêt Tirtūm ja hā mē pahpumu nē Ijaew kêt xwỹnhjê pyrā nē mē pahto hkra. Hāmri nē amnhī mā mē pahte amnhī to mex xwỹnh ā mē pajarē. Anē.

Ā Ijaewjaja hamaxpēr anhỹr kaxyw na pre Tirtūm Ijaew kêt xwỹnhjê mā amnhī to amnhīrit. ¹² Hāmri nhūm mē amnhī tā omu nē hkīnh nē pa. No nhūm Ijaew kwỹjaja. Mē kām Jejus prām nōkati ho mē pa xwỹnhjaja mē hkīnhā hkaprī nē pa. Tā koja mē nhỹrmā amnhī kaprī hā amnhī pumu nē amnhī kīnh kêt ā amnhī pumu hāmri nē Tirtūm kôt amnhī xunhwỹr nē amnhī kaxyw Kra Jejus Kris mā hamaxpēr japēr. Koja mē ā amnhī nhīpêx anē hāmri nē Ijaew kêt xwỹnhjê pyrā nē hkīnh nē ri pa. Hāmri nhūm Tirtūm ja hā mē omu nē Ijaew kêt xwỹnhjê mē mē ho hpimràatā mē ho mex rax nē nhūm mē hkīnh nē hamakêtkati nē pa ho pa.

Tirtūm kot Ijaew kêt xwỹnhjê ho hkra hā harēnh

¹³ E kot paj hpânhã mẽ apê Ijaew kêt xwÿnhjê mã ixkapêr nê mẽ atã kagà. Na pre Jejus ma mẽ awÿr inhmê. ŷ hã ixte mẽ ajahkre ho ri mẽ akôt ixpa kaxyw. Pa pre ma krî hkwȳ kamã mẽ akwÿjê hwÿr mō nê ixkînh kãm mẽ kãm kapêr jarênh o ri mẽ hkôt ixpa. Nhũm mẽ hkwȳjaja inhma nê amnhĩ kaxyw Jejus kôt hamaxpêr nê hkôt amnhĩ xunhwÿ. ¹⁴ Tã koja apu ixkwÿjaja mẽ harênh mar japêr. Ijaew tee ri mẽ apê Ijaew kêt xwÿnhjê jarênhja ma hãmri nê ra amnhĩ kamã gryk japêr. Jao mẽ apyrã nê Jejus kôt amnhĩ xunhwÿ nê nhÿrmã kuri htîr tũm nê mex nê pa ho pa. ¹⁵ Kormã mẽ kot amnhĩ kaxyw kãm hamaxpêr kêt jakamã na pre Tirtũm hpânhã mẽ apê Ijaew kêt xwÿnhjê mã amnhĩ to amnhîrit. Ka mẽ ra krî piitã hkôt axohtō nê hkôt amnhĩ xunhwÿ nê hkôt amnhĩ nhîpêx mex o ri apa. Tã koja Ijaewjaja nhÿrmã amnhĩ kaxyw Tirtũm mã hamaxpêr nê mẽ apyrã nê Jejus kôt amnhĩ xunhwÿr japêr. Hãmri nê te mēhō hkra kēp htyk nhũm hkaprî htã nhũm hkraja tanhmã amnhĩ to nê akupÿm kãm htîr nhũm kot omunh nê hkînh tÿx kumrēxta pyrãk o amnhĩ nhîpêx. Jao Tirtũm mẽ kot hkôt amnhĩ xunhwÿr ã mẽ omu nê hkînh nê. Pu mẽ pahpimràatã urãk nê pahkînh nê ri papa.

¹⁶ E pa mẽ amã mẽ ujarênhja ã ejêp kwÿ jarê. Koja mẽmo pî hpàr jarê mex nê hã koja pàr mex nê xa. Ja pyrã nê Ijaew pàr krax finat Apraãwja kumrēx na pre amnhĩ kaxyw Tirtũm mã hamaxpêr nhũm ho hkra. Jakamã koja nhÿrmã hkanrêhã htãmnhwÿjaja urãk nê amnhĩ kaxyw kãm hamaxpêr nhũm mã mẽ ho anê nê mãânên mẽ ho hkra nhũm mẽ mex nê pa. Te kot mẽmo pî hpàr jarê mexja nhÿ hã pàr mexta pyrãk.

¹⁷ Nê na htem akunĩ kamã mẽmo pî hpa jakã nê hamÿ nê ma amnhĩ kôt o mra. Nê ixkre kapem ra mẽ kot mẽmo pî hkreja hpa jakãr nê rēnh xwÿnh xwakre kamã wam pî hpa jakãr xwÿnhnta nhô nê axpēn tã hkaxpre nê gaa nê axpēn jamÿnh mex nê grã hkêt nê. Nê arĩ htîr mex nê. Te kēp hpa kumrēx pyrãk. Tã Ijaew kwÿ kot amnhĩ kaxyw Jejus kôt hamaxpêr xwÿnhjaja te mẽ kēp ixkre kapem pî hparta pyrãk. No mẽ hkwȳjaja mẽ kot Jejus kaga xwÿnhjaja te mẽ kēp mẽ kot kēp hpa jakãr nê rēnhnta pyrãk. Jakamã nhũm Tirtũm te mẽ kot pàr pē hpa jakãr nê rēnhnta pyrãk o mẽ hipêx nê mẽ hkaga. Nê axtem te mẽ kot mẽmoj pàr pa jakãr nê hpânhã kamã axtem pî hpa janhōr nê hã hkaxpreta pyrãk o mẽ apê Ijaew kêt xwÿnhjê nhîpêx nê mẽ amã amnhĩ to amnhîrit. Ka mẽ ra amnhĩ kaxyw Jejus mã ajamaxpêr nê hkôt amnhĩ xunhwÿ nhũm Tirtũm mẽ ato mex nê.

¹⁸ Tã kēr ka mẽ arĩ Ijaew o mex o ri apa. Tanhmã ri mẽ hipêx to mã ajamaxpêr to hkêt nê. Rÿ ajamaxpêr o:

—Nã ãm hãmri na Tirtũm mẽ hkaga nê ãm kãm mẽ papxipixjê japê.

Anhÿr o ajamaxpêr kêt nê. Ijaew te ixkre kapem pî hpàr mexta pyrãk. No mẽ kajaja te mẽ ate akunĩ rũm pî hpa kot ixkre kapem pàr mex pix kukwak ri htîr nê hã harirra pyrãk. Kêt akunĩ rũm pî hpa jakãr kukwak ri na hte ixkre kapem parta htîr nê kuhê hkêt nê. Kop apu parta mex kêt ronhÿx ra akunĩ rũm hpaja grã pa. Ja pyrã nê Ijaew kukwak ri kot kaj mẽ nhÿrmã Tirtũm ri atîr tũm nê apa ho apa. Jakamã kwa kēr ka mẽ ate amnhĩ to rũnh o mẽ hakrenh ã amnhĩ to jarkrar kêt nê. ¹⁹ Mãn ka mẽ atō ajamaxpêr o:

—Ra Tirtũm kot Ijaew kaga nê hpânhã mẽ pajaja mẽ ixto hkra jakamã mãn kãm mẽ ijapê ho mẽ hacre. Ra mẽ hpânhã mẽ ixto hkra kēnã. Anê.

²⁰ Nã ãm hãmri na pre Tirtũm Ijaew kwÿ kaga. Mẽ kot Jejus kôt amnhĩ xunhwÿr kêt mÿrapê na pre te mẽmo pî hpa jakãr nê rēnhnta pyrãk o mẽ hipêx. Ka mẽ ra mẽ kurom amnhĩ kaxyw hkôt ajamaxpêr jakamã nhũm Tirtũm te

kot akunī kamā pī hpa jakār nē ho htēm nē ixkre kapem pī hpār mex ā hanhōr nē hā hkaxpre pyrāk o mē anhīpēx. Nom kwa kēr ka mē ja hā amnhī pumu nē ri hā Ijaewjē mā amnhī to jarkrar kēt nē. Ām amnhī to mex nē Tirtūm kapēr kōt amnhī nhīpēx mex o ri apa. No kot kaj mē ā amnhī nhīpēx anhūr kēt nhūm amnhī tā mē apumu nē ra kot Ijaew kwý nhīpēxta pyrā nē tanhmā mē ato nē mē akaga.

²¹ Ā Ijaew jarēnh kot anhūr. Te mē kēp pār mex pyrāk. Tā nhūm mē kot Jejus kōt amnhī xunhwūr kēt jakamā nhūm Tirtūm te kot pī hpa jakār nē rēnhā pyrāk o mē hipēx nē mē homnuj nē. Kot kaj mē urāk nē ā amnhī nhīpēx anē nhūm mā mē ato anē nē. ²² Ijaew kot Jejus kōt amnhī xunhwūr kēt jakamā nhūm Tirtūm mē hpānhā mē apē Ijaew kēt xwýnhjē mā amnhī to amnhīrīt. Tā ka mē Ijaew rom amā Jejus prām nhūm Tirtūm ja hā mē apumu nē amnhī pyrā nē kām mē aprām nē mē akamā ukaprī rāhā nē pa ho pa. Tā kwa mē okora. Kēr ka mē hkōt pix mā amnhī nhīpēx o ri apa rāhā ty. Kot kaj mē hkaga nhūm amnhī tā mē apumu nē te Ijaew kot hkaga xwýnhjē nhīpēx pyrāk o mē anhīpēx nē mē akaga.

²³ Koja Ijaew nhūr mā Jejus kōt amnhī xunhwūr japēr nhūm Tirtūm ja hā mē omu nē mē ho hkra. Te mē kot pār pa jakār nē rēnh nhūm grā par xwýnh nhūm kot akupým amnhīm hamýnh nē ixkre kapem pār wūr o htēm nē akupým hā hanhōr nē hā hkaxpre ho htýx nhūm kukwak ri akupým htūrta pyrāk. Ja kēp tanhmā kute hkēt. Kot ā hipēx anhūr kaxyw āhpumunh týx. ²⁴ Mē apē Ijaew kēt xwýnhjaja te mē ate akunī kamā pī hpa jakār nē ixkre kapem pār ā hanhōr nē hā kaxpreta pyrāk. Jao Jejus kōt amnhī xunhwý nhūm mē ato hkra kurē kumrēx. No Ijaew te mē kēp ixkre kapem pārtā pyrāk jakamā Tirtūm kot akupým hanhōrta tanhmā kēp kute hkēt. Kēp Tirtūm kēnā kot tanhmā kēp kute. Jakamā koja mē hkōt amnhī xunhwý nhūm amnhī tā mē omu nē mē ho hkra kurē kumrēx.

*Tirtūm kot mē piitā mē kamā ukaprī hā harēnh
Matēwre 23.37-39; Rukre 21.24; Juāw 10.16*

²⁵ E kot paj mē amā mēmoj to amnhīrīt ka mē inhma. Nā na pa ra mē amā Ijaew krā xihtýx xwýnhjē jarē ka mē harēnh ma. Ra mē kot Jejus kaga hā mē harēnhja. Tā koja mē ā amnhī nhīpēx anhūr o pa rāhā hkēt nē. Na hte Tirtūm kormā amnhī tā mē apē Ijaew kēt xwýnhjē jamār o pa. Amnepēm na pre amnhī kaxyw mē akukamā tanhmā mē akwýjē jarēnh to. Tā kot kaj mē kot tanhmā mē ajarēnh to xwýnh piitā Jejus kōt amnhī xunhwūr pa nhūm rī Ijaew amnhī to hapu nē kormā hkōt amnhī xunhwý. Ā mē kot amnhī nhīpēx anhūr kaxyw. Jakamā kwa kēr ka mē ri ja hā amnhī to jarkrar o ri mē hkōt apa hkēt nē. Mē pahpyrā nē mē kot Jejus kōt amnhī xunhwūr mā xwýnh kēnā. ²⁶ Koja Tirtūm nhūr mā Ijaew piitā ho hkra. Kapēr ā kagā htūm kot mē harēnh kot:

Nhūr mā kot mē ate amnhī tomnuj pē mē apytār mā xwýnhja Ijaew ō koja.

Jako hkanrēhā htāmnhwýjē hō koja.

Koja nhūr mā wrý nē mē ate amnhī tomnuj pē mē apytā nē mē ate amnhī tomnuj o hapēx pa. Anē.

Anhūr o kot harēnh. ²⁷ Nē māānēn ja:

Kot paj mē nē mē kot amnhī tomnuj o ijpēx pa.

Amnepē mā ixte mē hkukamā mē hā amnhī jarēnh xā hkōt. Anē.

²⁸ Nom arī mē kām Jejus mar prām kêt jakamā te mē kot kutā amnhī xunhwÿr pyrāk o amnhī nhīpêx. Tā ā mē kot amnhī nhīpêx anhÿrja ri ka mē kamjaja mē hpānhā mē apê Tirtūm kra. Nom nhūm Tirtūm arī kām mē hapêé. Na pre amnepê mā kot tanhmā mē ho mex to hkukamā tanhmā mē hā amnhī jarēnh to. Mē hpār kraxjê mā tanhmā mē hā amnhī jarēnh to. Finat Apraāw mē Ijak mē Jajoka mā mē hkanrêhā mē htāmnhwÿjê hā tanhmā amnhī jarēnh to.

²⁹ Na hte Tirtūm mēmoj tā tanhmā amnhī jarēnh to nē ām hāmri hā amnhī jarē nē amnhī jarēnh xā hkôt tanhmā hipêx to. No na hte mēmoj tā amnhī jarēnh tā gaa nē ho hamakêtkati hkêt nē. Rÿ hpānhā axtem tanhmā hipêx to hkêt nē. Na hte mēmoj tā amnhī jarēnh xā hkôt tanhmā hipêx to. Tā ra amnepê mā kot Ijaew o mex ā amnhī jarēnh jakamā koja nhÿrmā mē ho mex rax nē ā mē hipêx anhÿrja o hamakêtkati hkêt nē.

³⁰ No mē kajaja mē apê Ijaew kêt xwÿnhjaja. Amnepê mē na ka prem ajaxwÿja Tirtūm kôt amnhī nhīpêx kêt nē. Tā nhūm mē akamā ukapri nē kām mē ajapê nē. Ka mē ra harēnh ma nē hkôt amnhī xunhwÿ nē hkôt amnhī nhīpêx mex nē. No ām Ijaew kukwak ri. Mē kot kapêr kôt amnhī nhīpêx o pa hkêt jakamā nhūm Tirtūm mē hpānhā nhām mē amā amnhī to amnhīrit nē mē ato mex rax nē. Jakamā te Ijaew kukwak ri mē amex nē ri mē apa pyrāk.

³¹ Tā koja nhÿrmā kot mē anhīpêxta pyra nē Ijaew ho hkra. Nē mē apyrā nē mē kamā ukapri nē. Mē kot mē apyrā nē amnhī kaxyw Kra hkôt hamaxpêr xwÿnhjaja nhūm mē apyrā nē mē ho hkra nē mē ho mex nē. ³² Mē apê Ijaew kêt xwÿnhjaja nē mē ixpê Ijaew mē pahte xypên pyrāk. Na pu htem pahpiitā Tirtūm kapêr piitā hkôt amnhī nhīpêx rāhā ho ri papa hkêt nē. Tā kot puj mē tee ri ja hā amnhī pumu nē amnhī to kuwÿ nhūm mē pama nē amari mē pakamā ukapri nē mē pahto mex nē.

*Pawre kot Tirtūm mex o mex ā harēnh
Epes 3.20; Korosê 1.16; Wam Korî 2.9, 2.16*

³³ Tirtūmja àhpumunh tÿx o àhpumunh tÿx. Nē ukapri ho ukapri nē mex o mex. Mē pahtō na pu urāk nē ā amnhī nhīpêx anhÿr o papa? Nā amrakati kumrêx. Nē mē pahtō na pahte Tirtūm jamaxpêr kôt omunh? Nā mē pahte hamaxpêr kôt omunh kêt. ³⁴ Kapêr ā kagā htūm kot ja jarēnh kot:

Mē pahte Tirtūm jamaxpêr kôt omunh kêt.

Nē kot pu mē pahtō mēmoj tā hakre hkêt nē.

Mē parom àhpumunh o àhpumunh xwÿnh kēnā.

³⁵ Nē mē pahtō kot puj we kām pakapêr nē kām: “Kwa Tirtūm. Ra ixte amā mēmoj nhōrta pānhā kwa amnhī xwar inhmā mēmoj gō.” Anē.

Nā mēmoj piitā ō kēnā kot puj kêt ri ā kām mēmoj nhōr ā amnhī jarēnh anē. Anē.

³⁶ Tām na pre amnhī kaxyw mēmoj piitā ho kator pa. Nē ām pix kukwak ri na mēmoj piitā htîr nē pa. Jakamā kwa pu mē kām mex o mex ā mān harēnh rāhā ho ri papa.

12

Mē pahte Tirtūm mā amnhī nhōr ā mē pajarēnh

Wam Korî 6.20; Epes 4.1; Pîripos 4.8-9; Korosê 1.10; Wam Tesarōn 4.1-3; Wam Pêre 2.11

¹ Kwa Jejus kôt ixkwÿjaja. Tirtūm na hte mē pahto mex nē mē pakamā ukapri rāhā jakamā na pa ā mē amā ixkapêr anē. Kwa mē tokyx kām amnhī jarē nē kām amnhī gō. Te mē ate kām hkînh xā nhōr pyrāk o amnhī nhīpêx nē

kām amnhī gō. Jao mẽ amā kapēr kōt pix mā amnhī nhīpêx o ri apa hprām ā kām amnhī jarē. Nē kām hprām xā hkōt pix mā tanhmā amā amnhī nhīpêx to ho ri apa hprām ā kām amnhī jarē. Kot kaj mẽ ā kām amnhī jarēnh anē nhūm amnhī tā mẽ ama nē hkīnh nē. Ā mẽ pahte kām amnhī jarēnh anhŷrja na kām mar prām.

² Nē kēr ka mẽ kām Tirtūm prām kēt xwŷnhjaja kot amnhī nhīpêx o ri amnhī nhīpêx o ri apa hkēt nē. Nē mẽ amnhī to Tirtūm mǎn wŷ kē mẽ amā mẽ ajamaxpēr mex jagjê. Koja mẽ ama nē mẽ amā hagjê ka mẽ ra aprī hā hamaxpēr xā hkōt mẽ pahte amnhī to mex xā pumunh mex nē. Na pu htem hkōt amnhī nhīpêx o ri papa nhūm amnhī tā mẽ pahpumu nē hkīnh nē. Pu mẽ pajaxwŷja ŷ hā pahkīnh nē ri papa.

*Kris kwŷjaja kot tanhmā axpēn nhīpêx to hā mẽ kām karō
Rōmān 12.1-11; Epes 4.11-16; Wam Pêtre 4.10-11*

³ Nē na pre Tirtūm ixto mex nē. Nē mẽ akaxyw ixām. Ixte mẽ amā Kra Jejus kot tanhmā mẽ panē amnhī nhīpêx to hā harēnh o ri mẽ akōt ixpa kaxyw. Tā na pa ā kagàja kamā mẽ amā harēnh anē.

Jakamā kwa kēr ka mẽ amnhī to jarkrar o ri mẽ kām apa hkēt nē. Ām kwarī ho kwarī. Rŷ atŷx ri ajamaxpēr o:

—Nā pa na ixte amnhī to mex o ixte ixkwŷjê piitā mẽ hakrenh par.

Anhŷr ā amnhī to jarkrar o ri mẽ hkōt apa hkēt nē. Kēt mẽ ām amnhī jarēnh o:

—Na pa pre amnhī kaxyw Jejus kōt ijamaxpēr nhūm Tirtūm ixpumu nē ixto hkra. Jakamā na pa hte Jejus Kris pix kukwak ri tām amnhī nhīpêx o ri ixpa. No amnhī krā hkōt ā amnhī nhīpêx anhŷr kēt nē. Anē.

⁴ E pa mẽ amā mẽmoj jarē ka mẽ inhma. Nā mẽ panhŷja pyxi htā kamā mẽmoj xohtōō. Na kamā mẽ pano nē mẽ pajakwa. Nē kamā mẽ pajamak nē mẽ pahte. Na pu htem mẽ pano ho rīt nē mẽ pajakwa ho pakapēr. Nē mẽ pajamak o ri ama nē mẽ pahte ho ri mra. ⁵ Ja pyrā nē Kris kōt mẽ pahte amnhī xunhwŷr xwŷnhja ām pyxi tā hkōt mẽ pahte amnhī xunhwŷr xwŷnhjaja mẽ paxohtōō. Jakamā na pu htem ahpŷnhā tanhmā axpēn to mex to ho ri papa. Jao Kris kōt axpēn to pahtō nē pahtōx o papa.

⁶ Tirtūm na hte mẽ pahpê hkwy hā ahpŷnhā mẽ pamā tanhmā mẽmoj tā karō to nē kaxyw mẽ pahto mẽ paxihtŷx. Tā kēr pu mẽ ra kot mẽ pamā mẽmoj tā karō xā hkōt kām amnhī nhīpêx rāhā ho ri papa. Jakamā koja mēhō ate Tirtūm kapēr jarēnh o ri apa kaxyw axām nē amā anē ka Tirtūm kamnār rom mẽ kām kapēr jarēnh mex o ri mẽ hkōt apa.

⁷ Rŷ ate akwŷjê mā tanhmā axāpēnh to ho ri apa kaxyw axām ka mẽ kām axāpēnh mex o ri mẽ hkōt apa.

Rŷ ate Tirtūm kapēr ho mẽ ahkre ho ri apa kaxyw axām ka ho mẽ ahkre mex o ri apa.

⁸ Rŷ ate Tirtūm kapēr o ri Jejus kōt mẽ akwŷjê jamaxpēr o hihtŷx o ri apa kaxyw axām ka mẽ kām kapēr jarēnh pē mẽ ho mẽ hihtŷx mex o ri mẽ hkōt apa.

Rŷ ka mẽ atō akurêx rax japēr nē ate mẽ kēp amrakati xwŷnhjê mā mẽmoj nhōr o ri apa kaxyw axām ka axāmnhīx ri mẽ kām mẽmoj nhōr o ri mẽ hkōt apa.

Rŷ ate akwŷjê ho amnhīptār kaxyw axām ka mẽ ho amnhīptār mex o ri apa.

Rÿ ate tanhmã mẽ akwÿjê ho mex to nê mẽmoj to mẽ kutã anojarê to ri apa kaxyw axãm ka akĩnh kãm ã mẽ hipêx anhÿr rãhã ho ri apa nê tanhmã akapêr punuj to hkukamã ri ajamaxpêr o ri mẽ hkôt apa hkêt nê.

⁹ Nê kêr ka mẽ apiitã amã axpên kĩnh kãm xpên to mex rãhã ho ri apa nê ri axêx rom amã axpên kĩnh ã amnhĩ jarênh o ri apa hkêt nê. Nê mẽ kot amnhĩ tomnuj xã piitã hkaga hpa nê hpãnhã mẽ kot amnhĩ to mex xã pix pyr tÿx nê hkôt amnhĩ nhĩpêx rãhã ho ri apa. ¹⁰ Nê mẽ apê Kris kwÿ hã amã axpên Kĩnh kãm tãm axpên nhĩpêx o ri apa. Nê mẽ akwÿjaja mẽ kot amnhĩ to mex xwÿnh ã mẽ harênh o ri mẽ hkôt apa. No mẽ ri atÿx ajamaxpêr o:

—Nà koja mẽhõ ixkumrêx ixte tãm amnhĩ nhĩpêx xwÿnh ã ijarê pa rĩ kormã amnhĩ xwar tãm kot amnhĩ nhĩpêx xwÿnh ã harê.

Anhÿr o ajamaxpêr kêr nê. Kêr ka akumrêx tãm kot amnhĩ nhĩpêx xwÿnh ã harê.

¹¹ Nê kêr ka mẽ Tirtũm mã mẽmoj to anhÿr kaxyw nê kamã amã kaga hkêt kãm tanhmã kãm mẽmoj to ho ri apa. Jao akĩnh kamã kãm ho anhÿr mex nê. ¹² Nê mẽ nhÿrmã Tirtũm kot kaxkwa kamã mẽ ato mex rax kukamã ajamaxpêr nê akĩnh rãhã kãm mẽmoj to anhÿr o ri apa.

Nê kêr ka mẽ tanhmã amnhĩ to rÿ nhũm mẽhõ tanhmã mẽ ato ka mẽ akapri nê ri apa htã no ãm tee ri amnhĩ kukamã ajamaxpêr o Tirtũm kaga hkêt nê. Arĩ amnhĩ to hwÿr rãhã ho ri apa. ¹³ Nê koja Kris kôt atõjê hõ kêp amrakati ka mẽ ja hã omu nê anhõ mẽmoj japêr nê mãmri kãm hkwy gõ. Nê amnhĩ wÿr awÿ nê tanhmã ho mex to.

¹⁴ Nê mẽ kot tanhmã mẽ atomnuj to xwÿnhjaja kêr ka mẽ amnhĩ tã mẽ omu nê agryk nê wajaga kot tanhmã amã ho kaxyw hwÿr atêm nê kãm tanhmã hã axãmnhênh to hkêt nê. Kêr ãm ho Tirtũm pix wÿ nê kãm:

—Pa mẽ ijamãr mex xwÿnh maati. Nà na ixkwÿjê hõja ã inhĩpêx anê. Tã nom kêr ka ixtã tanhmã homnuj to hkêt nê. ãm tanhmã ho mex to.

Anhÿr o mãn mẽ ho awÿ.

¹⁵ Nê koja akwÿjê hõ mẽmoj tã hkĩnh nê. Ka omu nê urak nê ÿ hã akĩnh nê. No koja mẽmoj tã hkapri nê mÿr o nhÿ ka omu nê ra urak nê ÿ hã akapri nê.

¹⁶ Nê kêr ka mẽ piitã mẽ hipêx o axpên pyrak o ri apa. Te mẽ ate amnhĩ to rax o akwÿjê jakrenh o te mẽmoj kamã akahak o amnhĩ nhĩpêx pyrak kêr nê. Nê axãhpumunh tÿx o ate mẽ piitã mẽ hakrenh par pyrak o ri amnhĩ nhĩpêx o ri apa hkêt nê.

¹⁷ Nê koja mẽhõ tanhmã ato htã ka ãm amnhĩ tã omu nê tanhmã amnhĩ tã ho hkêt nê. Nê mẽ piitã mẽ noo mã tãm ri amnhĩ nhĩpêx o ri apa.

¹⁸⁻¹⁹ Nê kêr ka mẽ tãm ri axpên mã akapêr rãhã ho ri apa.

Nê kot kaj akrãmnhÿ mẽ wa tanhmã axpên nhĩpêx to. Hãmri ka wa akupÿm tãm axpên xãm kaxyw kãm akapêr tã nhũm ama nê ãm ama nê akaga. Ka ãm amnhĩ tã omu nê kamã agryk kêr nê. Koja Tirtũm tãm tanhmã atã ho. Kapêr ã kaga htũm kot ja jarênh kot:

Kêr ka mẽ amnhĩ tã tanhmã kot ato xwÿnh to hkêt nê. Pa kot paj mẽ atã tanhmã ho. Anê.

Nê harênh kot:

²⁰ Kêr ka mẽ amã mẽ kãm mẽ akurê xwÿnhjê o mex pix o ri apa.

Kê mẽ kãm prãm ka ja hã mẽ omu nê mẽ kamã axukapri nê mẽ kãm mẽmoj kwÿ gõ kê mẽ kuku.

Rÿ nhũm mẽ kãm kôr ka mẽ kãm gõ hkwy kê mẽ ho ixkõ.

Kot kaj mẽ ã amnhĩ tã mẽ hipêx mex anê nhũm mẽ tee ri amnhĩ tã mẽ apumu nê amnhĩ kamã hpijaam jao mẽ atã amnhĩ kamã gryk nê. Anê.

²¹ Nom kot kaj mẽ amnhĩ tã tanhmã mẽ homnuj to hãmri nê ajaxwýja urak nê amnhĩ tomnuj nê. Ja pymaj kêr ka mẽ amnhĩ rom tãm mẽ hipêx. Hãmri nhũm mẽ amnhĩ tã mẽ apumu nê mẽ apyrã nê tãm mẽ anhĩpêx japêr.

E kêr ka mẽ ã axpên nhĩpêx o ri apa anê.

13

Mê pahto amnhĩptãr xwýnhjê jarênh

Matêwre 22.21; Xitre 3.1; Wam Pêtre 2.13-17

¹ Nê kêr ka mẽ kot mẽ ato amnhĩptãr xwýnhjê kapêr ma nê kapêr kôt ri amnhĩ nhĩpêx rãhã ho ri apa. Tĩrtũm kot mẽ pakaxyw mẽ unhwýr kênã. Mẽ kot mẽ pahto amnhĩptãr o pa kaxyw na hte mẽ unhwý. ² Jakamã koja mẽhõ mẽ kapêr ma nê ãm kuma nê hkôt amnhĩ nhĩpêx kêt nê hãmri nê te kot Tĩrtũm kapêr mar nê ãm mar pyrak o amnhĩ nhĩpêx. Hãmri nhũm Tĩrtũm tee ri ja hã omu nê nhỹmã tanhmã hã ho.

³ Xã na hte tãm mẽ kot amnhĩ nhĩpêx xwýnhjaja kãm mẽ kot mẽ ho amnhĩptãr xwýnhjê puma ho pa? Nã na htem kãm mẽ uma hkêt kãm ri pa. ãm mẽ kot amnhĩ tomnuj xwýnh pixjaja na amnhĩ kamã kãm mẽ uma ho pa. Tã ka mẽ amã mẽ kot mẽ ato amnhĩptãr xwýnhjê puma hprãm kêt xwýnhjaja kêr ka mẽ kapêr ma nê hkôt amnhĩ nhĩpêx kê amnhĩ tã mẽ apumu nê hkĩnh nê. Nê amnhĩm mẽ ate amnhĩ to mex xwýnh ã mẽ ajarê. ⁴ Tĩrtũm nhỹ hã mẽ panhõ pahĩ kot mẽ pahto amnhĩptãr jakamã na htem mẽ kãm mẽ pahto mex prãm nê. Nê kot pu mẽ pahtõ axtem nê tanhmã amnhĩ tomnuj to hãmri nhũm tee ri ja hã pajarênh ma nê tanhmã hã mẽ pahto. ãm hãmri na hte ã mẽ pahto amnhĩptãr xwýnhjaja mẽ panhĩpêx anê. Tĩrtũm kãm hprãm xã hkôt. ⁵ Jakamã kwa mẽ kapêr ma nê hkôt ri amnhĩ nhĩpêx mex rãhã ho ri apa. Nom amã kot tanhmã ato pix pymaj hkôt ri amnhĩ nhĩpêx kêt nê. Mããnên ã amnhĩ kukamã ajamaxpêr anê nê ajamaxpêr o:

—Nã Tĩrtũm kot mẽ ixkaxyw unhwýr jakamã na pa hte kapêr ma nê hkôt amnhĩ nhĩpêx mex o ri ipxa.

Anhýr o ajamaxpêr.

⁶ Nê mẽ pahto amnhĩptãr xwýnhjaja kot Tĩrtũm nhỹ hã tanhmã mẽ panhĩpêx to ho pa jakamã na pu htem mẽ ãpênh pãnhã mẽ kãm amnhĩre. Mẽ pahpiitã axpên kaxyw kãm kãxpore ho hkryre nê kugõ. Tanhmã kot ho mẽ pamã mẽmoj to mex to kaxyw. ⁷ Jakamã kêr ka mẽ hã apijaam o ri apa kamã mãmrĩ mẽ kãm kãxpore hkwy ho hkryre nê õr o ri apa. Mẽ kot hã áhwýr xã hkôt.

Mê pahte tanhmã axpên nhĩpêx to hã mẽ pamã karõ

Matêwre 22.39-40; Karatas 5.13-15; Wam Juãw 3.11-24

⁸ Nê kêr ka mẽhõ ho tewên japêr nê tokyx kãm amnhĩre. Nê mẽ amã axpên kĩnh o aa ho ajamakêtkati hkêt nê. Jao mẽmoj to axpên kutã anojarêt rãhã ho ri apa. Kot kaj mẽ ã axpên nhĩpêx anê nê Tĩrtũm kapêr piitã hkôt amnhĩ nhĩpêx mex o ri apa.

⁹ Amnepê mã na pre finat Mojesja Tĩrtũm nhỹ hã Ijaew mã mẽmoj tã karõ nê mẽ kãm:

Kêr ka mẽ aprõ pix tãnopxa nê nhãm mẽnijê hõ kamã ri akurê ho apijaam kêt o apa hkêt nê.

Nê mẽ anijaja mẽ amjên pix tãnopxa nê nhãm ri mẽmyjê hõ kamã akurê ho apijaam kêt o ri apa hkêt nê.

Nē mē ri axpēn par kêt nē.

Nē mē ri axpēn pê axàhkīnh o ri apa hkêt nē.

Nē mē amā ri axpēn kukrēx kīnh o ri amā ho anhō hprām o ri apa hkêt nē.
Anē.

Nē määnēn ja:

Kēr ka mē nhām mē axpēn nhīpēx o te ka amā amnhī tā ma pyrāk. Jao tām axpēn nhīpēx o ri apa. Anē.

Ā kot mē kām hā karō kot anhÿr. Kot puj mē ā pamā pahkwÿjē kīnh anē nē määnēn wam finat Mojes kot mēmoj tā mē panhīgētjē mā karō hkôt amnhī nhīpēx o ri papa rāhā nē. Jao axpēn par kêt nē. Nē axpēn pê paxàhkīnh kêt nē. Nē axpēn kutā panojarēt rāhā nē. ¹⁰ Kōja mēhō kām amnhī tā ma pyrāk o hkwyjē nhīpēx nē mē ho mex pix o pa. Jakamā kot kaj mē amā ri axpēn kīnh nē mēmoj to axpēn kutā anojarēt pix nē. Jao Tirtūm kapēr piitā hkôt amnhī nhīpēx mex o ri apa.

¹¹ Amnepē mā mē pahte amnhī kaxyw Jejus kôt pajamaxpēr xā hā arīgrota ā na pre kormā akupÿn mē pahwÿr hpōx xā hā arīgro kormā hwÿr awry rax nē. Tā ra hwÿr ahtēp o mō. Kōja tokyx akupÿn mē pahwÿr wrÿ nē ma akupÿm kaxkwa hwÿr mē pahto api. Jakamā kwa kēr pu mē arī hamār rāhā ho ri apa. Jao tanhmā amnhī tomnuj to kaxyw nē pajamaxpēr o:

—Kwa kōja Jejus tanhmā amnhī to nē jarāhā akupÿn wrÿk japēr. Tā kot pa ri ā amnhī nhīpēx anē nhūm wrÿ nē tee ri ja hā xpumu pa amnhī kamā xpijaam tÿx nē. Nā kot paj ā amnhī tomnuj anhÿr kêt nē. Anē.

Hāmri nē Jejus kamā ajamak pê kutēp Tirtūm kapēr kôt pix mā ri amnhī nhīpēx mex rāhā ho ri papa.

¹² Na pu htem kamāt kām gōr nē arīgro jamār pê kamā pajamak o panhīkwÿ. Arīgro te kēp Jejus akupÿn wrÿk pyrāk. Jakamā kwa pu mē kamā pajamak pê kām panojarēt rāhā ho ri papa nē amnhī nē tanhmā mē omnu xā kute pumunh mex o ri papa. Te ho pōristi kot amnhī nē mē kot kām mē hkurē xwÿnhjē pumunh mex pyrāk o Jejus kutēp tām amnhī nhīpēx o ri papa. Na pre tanhmā mē pahkrā hto pu mē ŷ hā tām ri amnhī nhīpēx. Tā kēr pu mē arī ā amnhī nhīpēx anhÿr o ri papa nē te mē pahte arīgro hā mē pa xwÿnhjē kot amnhī nhīpēx pyrāk o amnhī nhīpēx. ¹³ Kot puj mē ā amnhī nhīpēx anē nē mē piitā mē noo mā tee ri tanhmā mē pahte amnhī tomnuj to mā pajamaxpēr kêt nē. Jao amnhī kamā pahpijaam nē ri papa hkêt nē. Nē pajamakētkati nē paxāmnhix ri papa. Te ho hirā kamā ri mē pa xwÿnhjē kot amnhī nhīpēx pyrā nē ām ri paxāmnhix tām amnhī nhīpēx o ri papa.

Nē mē pahprō pix tānopxar o ri papa.

Nē mē pahpipānh nē ri papijapu ho ri papa hkêt nē.

Nē mēmoj tā axpēn mā paxākjēr hkêt nē.

Nē mēmoj tā axpēn kām pagryk kêt nē.

¹⁴ Nom kot puj mē axtem nē ā amnhī tomnuj anē nē mē pahte amnhī nhīpēx tūm kôt pix mā amnhī nhīpēx. Tā kēr pu mē ā amnhī nhīpēx anhÿr pumaj hpānhā amnhī to Pahiiti Jejus Kris wÿ nē kām:

—Pa Jejus. Nā kormā jar apa ri na ka pre mē kot tanhmā amnhī tomnuj to kutā axihtÿx o axihtÿx nē aa tanhmā amnhī tomnuj to hkêt nē. Tā inhmā apyrā nē ixte amnhī tomnuj kutā ixihtÿx o ixihtÿx o ixpa hprām. Anē.

Jao mē pajamaxpēr tūmja te ra kot amnhī tā mē pahto htÿx kêt pyrāk o pu mē amnhī nhīpēx o ri papa.

14

*Mē pahte Kris kôt pahkwýjê mã paxàkjêr kêt ã mē pamã karõ
Matêwre 7.1-5; Römän 2.1; Wam Korî 10.23-33; Xiakre 4.11*

¹ Nê koja mēhõ kormã Jejus kôt amnhî xãm nyw ri kormã hkôt hamaxpêr tohtuj anê. Hãmri nê htýx tanhmã hamaxpêr to nê mēmoj mex kaga. Ka mē ja hã omu nê ãm omu nê hã tanhmã kãm nê hkêt nê. Kwãr mãmri ã amnhî nhîpêx anê. Koja gaa nê rî hprî hã Tirtüm kapêr mar týx nê hãmri nê hkôt mēmojta pumunh mex nê. ² Jakamã koja Jejus kôt akwýjê hõ mē apkur xã piitã hkur pymaj tanhmã hõ kute hã harê nê hkaga nê hamaxpêr o:

—Nã kot pa ja hkur kêt nê. Kot pa apu kuku nê hkur o amnhî tomnuj nê. Anê.

Kwãr mãmri ã hamaxpêr anê nê hkur kêt nê. Nom mē pahte Jejus kôt amnhî xunhwýr týx xwýnhjaja na pu htem paxãmnhîx Jejus kamnãr rom mēmoj piitã kuku. Nom mē pahkínhã ham mē kot hkôt amnhî xunhwýr xwýnhjaja kormã kapêr piitã mar kêt jakamã kwãr mē mãmri anê nê mēmoj kur kêt nê. ³ Nom kêr ka mē ri tanhmã hã mē kãm akapêr to hkêt nê. Rý mē kãm:

—Kwa mē ixpyrà nê mēmoj piitã aku.

Anhýr o mē kãm akapêr kêt nê. Ano ho ãm hã mē omu.

Nê mē ate mēmoj piitã hkur kêt xwýnhjaja kêr ka mē ajaxwýja mē ixte mēmoj piitã hkur ã tanhmã mē inhmã axàkjêr to hkêt nê. Mē ixte mēmoj piitã hkur o ixpa hã mē ixpumu nê ãm hã mē ixpumu nê hã tanhmã mē inhmã axàkjêr to hkêt nê. Rý hã mē inhmã:

—Kwa nã kot kaj mē ja kur o amnhî tomnuj nê.

Anhýr o mã mē inhmã akapêr kêt nê. Ano ho ãm ja hã mē ixpumu. Mē pahte ahpýnhã tanhmã paxàpkur to htã Tirtüm kot mē pahte Kra Jejus kôt amnhî xunhwýr xwýnh piitã mē pahto hkra kênã. ⁴ Jakamã kwa mēmoj tã tanhmã axpên mã axàkjêr to ho ri apa hkêt nê. Koja Kris kôt atõjê hõ axtem tanhmã hamaxpêr to ka mē tee ri ja hã omu nê tanhmã hã kãm nê hkêt nê. Rý ajamaxpêr o:

—Tk. Na hte ã ri amnhî nhîpêx anhýr o pa. Ja omnuj. Pa na pa hte ã amnhî nhîpêx anhýr kêt nê.

Anhýr o ri axpên kukamã ajamaxpêr hkêt nê. Mē pahpê Tirtüm kêt kênã kot pu kêt mē ã ri axpên kukamã pajamaxpêr anê. Tirtüm pix na hte tanhmã mē pajarênh to xwýnh. àhpumunh o àhpumunh xwýnh jakamã koja tanhmã mē hkrã hto nhüm mē rî kormã tãm hamaxpêr pê àmnhîx ri tanhmã amnhî nhîpêx to ho pa.

⁵ Nê koja Jejus kôt atõjê hõ mēmo arîgromnu jarê nê hã àpênh kêt nê. Ka mē apê hkwyýja tee ri ja hã omu nê ajamaxpêr o:

—Nã arîgro piitã mē pamã mex kênã. Kot paj mãmri arîgro piitã hã apê.

Anhýr o ajamaxpêr japêr. Nom kêr ka mē ja hã axpên mã tanhmã axàkjêr to hkêt nê. Na pu htem ahpýnhã pamã tanhmã mē pahte amnhî nhîpêx to hprãm xã hkôt tanhmã amnhî nhîpêx to. No tanhmã ri hã axpên mã paxàkjêr to ho ri papa hkêt nê. ⁶ Kêt mē kot arîgromnu jarênh xwýnhjê mē mē pahte arîgro piitã mex ã harênh xwýnhjaja mē pahpiitã mē pahpê Tirtüm kraa. Jakamã mē pahpiitã na pu htem pajamaxpêr o:

—Na pa hte Tirtüm kãm hprãm xã hkôt ã amnhî nhîpêx anhýr o ri ixpa. Anê.

Nê mē pahte mēmoj piitã hkur xwýnhjaja nê mē kot mēmoj kwý hkur kêt xwýnh piitã mē pahpê Tirtüm kraa. Mē pahpiitã mē pamã kãm hprãm xã hkôt

amnhî nhîpêx prâm jakamã na pu htem paxàpkur kaxyw nê Tîrtûm mã amnhî jarê nê kãm:

—Pa mē ijamār mex xwÿnh maati. Nã ãm hãmri na ka hte apkati mē mē inhmã mē inhõ ho apa. Amex o amex Tîrtûm.

Anhÿr o kãm amnhî jarê. Hãmri nê kormã hkamnâr rom paxàmnhîx ri tanhmã mēõ kuteta ku. ⁷⁻⁸ Mē pahpê Tîrtûm kra jakamã na pre ra mē pakukamã tanhmã mē pajarênh to. Mē pakukamã pahtyk ã arîgro jarê nê mē pahte pahtîr ri tanhmã ri amnhî nhîpêx to ho papa hkukamã hamaxpêr. No mē papajaja na pu htem amnhî krã hkôt tanhmã mē pahte amnhî nhîpêx to kukamã paxàhpumunh kêt. ⁹ Jakamã na pre Kris ja hã mē pahpumu nê tãm mē pakaxyw amnhî to kêp mē panhõ Pahihti nê mē panê ty. Hãmri nê akupÿm htîr. Kêp mē panhõ Pahihti hã akupÿm htîr. Kêp mē pahte hkôt amnhî xunhwÿr xwÿnhjê nhõ Pahihti kaxyw. Jakamã kêp ra mē pahkwÿ htyk xwÿnhjê nhõ Pahihti nê mãânên kêp arî mē pahtîr xwÿnhjê nhõ Pahihti. ¹⁰ No mē papajaja mē pahpê Kris kôt mē pahkwÿjê nhõ pahi hkêt jakamã kêr mē Kris kôt akwÿjê hõ tanhmã amnhî nhîpêx to hã omu hãmri nê tanhmã ho akapêr to hkêt nê. Rÿ ajamaxpêr o:

—Kwa na ã amnhî nhîpêx anê. Inhmã ja mex kêt.

Anhÿr o ajamaxpêr kêt nê. Kojã nhÿrmã Tîrtûm tãm mē pahpiitã tanhmã mē pahte amnhî nhîpêx to hã mē pahpumunh xã hkôt tanhmã mē pajarênh to. Nom kêr pu mē papajaja amnhî hkrã hkôt ã axpên jarênh anhÿr kêt nê. ¹¹⁻¹² Kot puj mē nhÿrmã pahpiitã Tîrtûm kutã pahkrî nê kãm tanhmã amnhî jarênh to. Kormã mē pahtîr ri tanhmã mē pahte amnhî nhîpêx to ho papa hã kãm pahprî hã amnhî jarê. Kê mē pama nê tanhmã mē pajarênh to. Kapêr ã kagã htum kot mē pakukamã mē pajarênh kot:

Kojã nhÿrmã mē piitã ixpê mē õ pahi hã ixkutã hkõn krã ho rôrôk nê hkrî nê inhmã inhmex o inhmex ã ijarê.

Nê mē piitã ixpê Tîrtûm ã ixpyxi mex ã ijarê. ãm hãmri na pa ã mē hkukamã mē harênh anê. Anê.

*Mê pahte Kris kôt pahkwÿjê ho mex ã mē pamã karõ
Wam Korît 8.9-13*

¹³ Nê kwa kêr ka mē akwÿ kot Jejus kôt amnhî xunhwÿr tohtuj anhÿr xwÿnhjaja tanhmã mē kot amnhî nhîpêx to ho pa hã mē omu nê ja nê tanhmã mē kãm akapêr to hkêt nê. ãm mē noo mã tãm ri amnhî nhîpêx rãhã ho ri apa. Mē kot ja hã mē apumunh nê mē akôt amnhî nhîpêx kaxyw. No kot ka mē kot tanhmã amnhî nhîpêx toja ã kãm akapêr nhum ama nê tee ri amnhî kukamã hamaxpêr nê hkaprî nê.

¹⁴ E kot pa hpãnhã mē paxàpkur xã hã tanhmã mē panhõ jarênh to. Ixte Pahihti Jejus jamaxpêr xã hkôt tanhmã ijamaxpêr to ho ri ixpa jakamã kot paj ixkatãt kôt mē amã tanhmã mē panhõ jarênh to nê ãm hãmri harê. Nã mē paxàpkur xãja ãm pixi nê omnu hkêt. Piitã mex o mex. Nom kojã mēhõ tee ri mēmo mē apkur xã hõ pumu nê hamaxpêr o:

—Nã kot paj ja hkur kêt nê. Kot paj apu kuku nê ho amnhî tomnuj nê. Anê.

Hãmri nê hkur kêt nê. Tã kwãr mãmrî ã hamaxpêr anê nê hkur kêt nê. Nom na ãm amnhî krã hkôt Tîrtûm kêp ja omnuj ã hkamnîx. Kêp omnuj kêt. Ra kot mēmo mē paxàpkur xã piitã mex ã harênh. ¹⁵ Tã kot kaj mē kot mēmoj kur kêt xwÿnhnta py nê o tẽ nê kot hkaga xwÿnh noo mã hkur o xa nhum apumu nê tee ri hamaxpêr nê hkaprî nê. Jakamã kot ka mē ã noo mã amnhî nhîpêx anhÿrja o ho mex kêt nê. Kwa mē ã ri axpên nhîpêx anhÿr hkêt nê. Kot ka

mē ā axpēn nhīpēx anē nē te amnhī pix kukamā ajamaxpēr pyrāk o amnhī nhīpēx. Jao akwýjé ho mex kukamā ajamaxpēr kēt nē. Kris kām mē hapé htýx kót mē kot amnhī tomnuj pānhā amnhīrer kaxyw ra nē htyk kēnā kot ka kēt mē axtem nē ri ā mē noo mā mē kot mēmoj kur kēeta kur anē. Rý koja apu tee ri kot mēmoj kur kēeta kur ā mē apumu nē tanhmā amnhī tomnuj to. Jao Kris kaga japēr. Jakamā kwa mē ā mē noo mā mēmojta kur kēt nē. ¹⁶ Mēmo mē apkur xāja mex tā nhūm mē akwýjé hō kām mex kēt japēr ka mē noo mā hkur kēt nē. Nē tanhmā hā kām nē hkēt nē. Kot kaj mē anē nhūm Kris kra hkēt xwýnhjaja tee ri ja hā mē apumu nē tanhmā axpēn mā mē apé Kris kwýjé ho kapēr punuj to. ¹⁷ Mē pahpé Tirtūm krajaja na pu htem paxāpkur xā nē pahkōm xā pix kukamā pajamaxpēr o ri papa hkēt nē. Na pu htem amnhī mē pahkwýjé mex kukamā pajamaxpēr. Nē mē pahte tām amnhī nhīpēx kukamā pajamaxpēr. Nē tām axpēn nhīpēx kukamā pajamaxpēr. Kot puj mē ā amnhī nhīpēx anē nhūm Tirtūm Karō ja hā mē pahpumu nē mē pahto mē pahkīnh nē. Pu mē pahkīnh nē pajamakētkati nē ri axpēn kót papa. ¹⁸ Tā kot puj mē ā Kris mā tanhmā amnhī nhīpēx to ho ri papa anē nhūm Tirtūm ja hā mē pahpumu nhūm ja kām mex nē. Nē Kris kót mē pahkwýjé mā haxwýja ja mex nē.

¹⁹ Jakamā kēr pu mē tām axpēn mā pakapēr o ri papa. Nē pajamakētkati nē axpēn kót ri pajapōj. Nē Kris kót tanhmā axpēn to paxihtýx to ho ri papa. ²⁰ No kot ka mē axāpkur xā gryk ā akwý hukamā ajamaxpēr kēt nē atýx ri mēhō noo mā mēmoj kur japēr. Kēp omnuj tā ka mē ām amnhī pix kukamā ajamaxpēr nē noo mā hkur japēr. Hāmri nhūm ja hā mē apumu nē ra kot Tirtūm kaga mā. Ra kēp hkra jakamā kwa mē noo mā mē kot mēmoj punuj ā harēnh xwýnhhta kur kēt nē. Nom mē paxāpkur xāja piitā mex. Tirtūm kot mē pamā ōr jakamā piitā mē panhōō. Tā koja akwýjé hō Tirtūm kēp mēmoj omnuj ā hkamnhīx tā ka mē noo mā aku nē ho amnhī tomnuj nē. ²¹ Kēr pu mē pahkwýjaja tanhmā kot amnhī tomnuj to pymaj pu mē pahte amnhī nhīpēx kukamā pajamaxpēr mex o papa. Mēmo mēō nē mēmo kagō pé wíhtija. Tirtūm kot mē pamā mēmoj piitā ōr tā no nhūm mē pahkwýjaja kēp ja omnuj nē pu mē noo mā hkur rý ho pahkōm kēt nē. Mēmo mury nē mēmo wíhti pu mē noo mā hkur rý ho pahkōm kēt nē.

²² Nē kēr ka mē atō mēmoj krēr kaxyw nē hukamā ajamaxpēr o:

—Nā kot paj ja krē. Tirtūm kām ja mex kēnā. Anē.

Hāmri nē māmri Tirtūm kamnār rom axāmnhīx akrē. Kām ja mex kēnā kot ka kēt ri tee ri hkrēr kaxyw hkukamā ajamaxpēr nē hkaga. ²³ No kot kaj mē atō mēmoj to anhýr kaxyw nē tee ri amnhī kukamā ajamaxpēr nē ajamaxpēr o:

—Ko kot paj apu ja ho anē nhūm Tirtūm hā ixpumu nhūm ja kēp omnuj nē rý ko. Anē.

Hāmri nē tee ri amnhī kukamā ajamaxpēr. Tā ra ā amnhī nhīpēx anē nē akrē rý mēmoj to anē. Hāmri nhūm Tirtūm tee ri ā ate amnhī nhīpēx anhýr ā apumu nhūm ja kēp omnuj nē. Ate hkamnār rom mēmoj to anhýr kēt nē amarī amnhī krā hkót ho anhýr jakamā ho amnhī tomnuj nē.

15

*Mē pahte amnhī pix kukamā pajamaxpēr kēt ā mē pamā karō
Makre 10.45; Wam Korī 10.24; Pirīpos 2.3-5*

¹ Nē kēr pu mē pahte ra Jejus kót amnhī xunhwýr týx xwýnhjaja amnhī kót kormā mē kot Jejus kót amnhī xunhwýr totuj janhýr xwýnhjē jamār mex

nê. Jao mẽ kamã pagryk tokyx anhÿr kêt nê. Ām mẽ kutã panojarêt pix o papa. Jao ra amnhĩ pix kukamã pajamaxpêr kêt nê. ² Määnên amnhĩ mẽ Kris kôt mẽ pahkwÿjê hkukamã mân mẽ pajamaxpêr. Jao mẽ kot tãm amnhĩ nhĩpêx kaxyw mẽ ho mex o ri papa. ³ Kris na pre jar pa ri amnhĩ pix kukamã hamaxpêr kêt nê. Na pre määnên õ Papaj kukamã hamaxpêr. Jakamã Tirtüm kapêr ã kagã htüm kot kãm kapêr jarênh kot:

Pa Papaj. Na hte mẽ pahkurê xwÿnhjaja ixto kapêr punuj nê. Nom määnên ã ato kapêr o pa anê. Anê.

⁴ Mẽ pakaxyw na Tirtüm kapêr ã kagãja. Mẽ pahte kamã harênh nê mar nê amnhĩ kaxyw hkôt pajamaxpêr tÿx o ri papa kaxyw. Jakamã na pu htem tanhmã pahpunuj to htã kapêr kwÿ ma nê pahkĩnh nê. Jao tee ri amnhĩ kukamã pajamaxpêr o ri pahkaprĩ hkêt nê. Ām nhÿrmã Tirtüm kot mẽ pahto mex kukamã pajamaxpêr o akupÿm paxihtÿx nê pahkĩnh nê ri papa. Mẽ pahkĩnh nê ri papa kaxyw na Tirtüm kapêr ã kagãja. ⁵⁻⁶ Na pu htem Tirtüm kamnàr rom pahkĩnh nê. Nê axpên kamã paxukaprĩ ho ri papa. Jakamã na pa hte tanhmã mẽ ato Tirtüm wÿr to nê kãm:

—Pa Tirtüm. Apê mẽ ijamãr xwÿnh maati na ka. Nê apê mẽ inhõ Pahihti Jejus Kris nhõ Papaj na ka. Nà xep ra Rôm nhõ xwÿnh kwÿjaja kãm akapêr kôt amnhĩ nhĩpêx prãm jakamã kwa tanhmã mẽ hkrã ho mex to kê mẽ hamakêtcati nê ajamaxpêr kôt hamaxpêr rãhã ho ri akôt pa. Hãmri nhùm mẽ amnhĩ tã apumu nê piitã amex o amex ã ajarê.

Anhÿr o pa hte mẽ ato kuwÿ.

Ijaew kêt xwÿnhjê jarênh

Ātre 10.34; Rômân 9.24; Karatas 3.28

⁷ Nê kwa kër ka mẽ amã axpên tã ma ho ri apa. Te ho Kris kãm mẽ pahta mata pyrãk. Jao axpên to mex pix o apa. Kot kaj mẽ ã axpên nhĩpêx anê nhùm mẽ piitã axpên tã mẽ apumu nê mẽ anhÿ hã Tirtüm mã mex o mex ã harê.

⁸ Annepêm Tirtüm Ijaew mã tanhmã Kris jarênh to. Kormã pika hwÿr wrÿk kêt ri nhùm hkukamã nhÿrmã mẽ hwÿr wrÿk nê mẽ kamã kator ã harê.

Tã nhùm mẽ hwÿr wrÿ nê mẽ kamã kato. Ijaew hkanrêhã htãmnhwÿjê kamã kato nê mẽ ho mex o ri mẽ hkôt pa. Mẽ kot amnhĩ tã omunh nê ã hamaxpêr anhÿr kaxyw. Nê hamaxpêr o:

—Annepêm Tirtüm kot mẽ panhigêt mã hkukamã harênh xã hkôt na mẽ ixwÿr Kraja mẽ nhùm wrÿ nê mẽ ixto mex o ri pa. Nã ãm hãmri na pre mẽ ixwÿr kumê.

Anhÿr o hamaxpêr kaxyw. ⁹ Nê mẽ apê Ijaew kêt xwÿnhjaja mẽ ajaxwÿja mẽ ate tanhmã kot amnhĩ nhĩpêx to hã harênh mar nê Tirtüm mã mex o mex ã harênh kaxyw. Nê Tirtüm kot mẽ akamã ukaprĩ hã mẽ ate amnhĩ tã omunh nê mex o mex ã harênh kaxyw na pre wrÿ. Tirtüm kapêr ã kagã htüm kot tanhmã mẽ ixpê Ijaew jarênh to nê määnên tanhmã mẽ apê Ijaew kêt xwÿnhjê jarênh to nê mẽ pajarênh kot:

Kot paj Ijaew kêt xwÿnhjê jamak mã amã amex ã ajarênh o ri mẽ hkôt ixpa. Nê amex ã inhgrer o ri mẽ hkôt ixpa. Anê.

¹⁰ Nê ja:

Kwa mẽ apê Ijaew kêt xwÿnh mẽ mẽ apê Ijaew. Kër ka mẽ apiitã Tirtüm nhÿ hã akĩnh nê ri apa. Anê.

¹¹ Nê määnên ja:

E kër ka mẽ apê Ijaew kêt xwÿnhjaja nê krĩ piitã hkôt mẽ apa xwÿnhjaja mẽ apiitã Tirtüm mã mex o mex ã harênh o ri apa.

Anhÿr o kot harênh. ¹² Nê Tîrtûm nhÿ hã kapêr o pa xwÿnh finat Ijais haxwÿja Ijaew mã Jejus jarênh o:

Koja nhÿrmã Jese kanrêhã htãmnhwÿjê hõja mẽ pahwÿr kato.

Hãmri nê mẽ pahpê Ijaew mẽ Ijaew kêt xwÿnhjê ho amnhÿptâr o pa.

Jakamã nhùm mẽ amnhÿ kaxyw hkôt hamaxpêr o pa. Anê.

¹³ Nê na pa hte tanhmã mẽ ato Tîrtûm wÿr to ho ri ixpa nê kãm:

—Pa Tîrtûm. Kwa kêr ka Rôm nhõ xwÿnhjê ho mex kê mẽ amnhÿ kaxyw Akra hkôt hamaxpêr mex o ri pa. Jao hkôt hkÿnh nê hamakêtkati nê ri axpên to pa. Nê kê Akarõ mẽ ho mẽ hihtÿx o pa kê mẽ amnhÿ kaxyw amã mãn hamaxpêr tÿx rãhã ho ri pa. Anê.

Pawre kot hprÿ hã amnhÿ jarênh

Sikûn Pêtre 1.12-13

¹⁴ E Kris kôt ixkwÿjaja. Nà ra ixte mẽ ajarênh mar mex. Nà ka xep htem amnhÿ to mex o ri apa. Nê mẽmoj to axpên kutã anojarêt rãhã ho ri apa. Nê mẽ kot tanhmã Tîrtûm kapêr kôt amnhÿ nhÿpêx to xãja ka mẽ omunh mex nê ho axpên jahkre ho ri apa. ¹⁵ Tã ot pa kagã ja kamã mẽ amã ixujarênh kãm ixihtÿx nê. Tîrtûm nhÿ hã. Ra mẽ ate mẽmoj mar mex tã pa axte mẽ amã harê. Mẽ ate mar tÿx nê hã anohtÿx kaxyw. Nã ã ixte amnhÿ nhÿpêx anhÿr kaxyw na pre Tîrtûm mẽ akaxyw ixãm. ¹⁶ Ixte Jejus Kris mã mẽ apê Ijaew kêt xwÿnhjê mã kapêr jarênh o ri mẽ akôt ixpa kaxyw. Nê mẽ ato hwÿr o ri ixpa kaxyw. Tã pa hte krÿ hkwy kamã ã mẽ akwÿjê mã harênh anhÿr o ri mẽ hkôt ixpa. Nê Jejus jarênhja pa hte mẽ hkôt mẽ kãm harênh o ri ixpa. Mẽ kot mar nê hkÿnh kãm hkôt amnhÿ nhÿpêx mex kaxyw. Hãmri nhùm Tîrtûm Karõ mẽ kãm mẽ hamaxpêr nyw jagjê nhùm Tîrtûm hã mẽ omu nhùm ja kãm mex nê nhùm hkÿnh nê hamaxpêr o:

—Nã ãm hãmri. Koja mẽ nhÿrmã wa ixri htÿr tûm nê mex nê pa ho pa. Anê.

¹⁷ Tã na pa ixte Jejus Kris nhÿ hã Tîrtûm mã tanhmã amnhÿ nhÿpêx to ho ixpa hã amnhÿ pumu nê ixkÿnh nê. ¹⁸⁻¹⁹ Na pa hte ÿ hã mẽ apê Ijaew kêt xwÿnhjê mã Tîrtûm kapêr jarênh o ri mẽ akôt ixpa. Nê mẽ anoo mã tanhmã ri Kris kot mẽ amã amnhÿ nhÿpêx to hã harê. Nê mẽ amã aa mẽ kot mẽmoj pumunh kêt kwÿ ho anhÿr o ri mẽ akôt ixpa. Tîrtûm Karõ nhÿ hã. Nhùm hte mẽ akwÿjaja amnhÿ jaêr pê omu nê kamã no puma nê. Hãmri nê mẽ pahpyrà nê Jejus kôt amnhÿ xunhwÿ. Nom pa hte ã amnhÿ nhÿpêx anhÿr ã amnhÿ pumu nê ri hã amnhÿ to jarkrar kêt nê. ãm ixte Kris pix nhÿ hã mẽ kãm ixkapêr ã mẽ kãm amnhÿ jarênh o ri mẽ hkôt ixpa. Tã pa ra Jerujarê rûm Irir wÿr krÿ piitã hkôt mẽ kãm Kris kapêr jarê. Tîrtûm Karõ kot tanhmã ixto hihtÿx to jakamã pa mẽ piitã mẽ kãm harênh mex nê. ²⁰ Na pa hte mẽ hwÿr inhnojarêt nê ã ijamaxpêr anê nê ijamaxpêr o:

—Kormã mẽ kot Kris jarênh mar kêt xwÿnhjê hwÿr kot paj mõ. Nom ra mẽ kot harênh mar xwÿnhjê nhõ krÿ hwÿr inhmõrja inhmã prãm kêt. Anê.

²¹ Tîrtûm kapêr ã kagã htûm kot kapêr mar kêt xwÿnhjê jarênh kot:

Kormã mẽ kot Tîrtûm kapêr mar kêt xwÿnhjaja koja mẽ kuma nê hprÿ hã mar tÿx nê. Anê.

Pawre kot Rôm wÿr hkrã hã amnhÿ jarênh

Römân 1.8-15

²² Hêxta waa nê. Inhmã mẽ apumunh prãm tÿx nê Rôm kãm Jejus kôt ixkwÿjaja. Na pa hte xatã mẽ awÿr ixkrã nom kormã mẽ awÿr inhmõr kêt nê. Kormã ixte krÿ hkwy kamã mẽ kãm Kris jarênh o ri ixpa jakamã kormã

mē awyr inhmōr kêt nē. ²³ Na pa ra xatā mē awyr ixkrā hā ixtā amgrā xohtō nē. Tā ra jar mē kām Kris kot mē panē tanhmā amnhī nhīpēx toja jarēnh pa. ²⁴ Jakamā kot paj tokyx ma mē awyr mō. Hāmri nē mē awyr pōj pu mē axpēn pumu nē pahkīnh nē axpēn mā pakapēr o papa. Pa mē akōt ri ixpa tāmtā hamū pyka pē Espānhā wyr ma mō. Nē kot paj inhnojarēt ka mē ixto Tirtūm wyr nē inhmā ixāpkur xā hkwy gō pa ma mē hwyr pry hā hkur o mō.

²⁵⁻²⁶ No na pa kormā mē awyr inhnojarēt kêt nē. Kot paj ja rūm awjanā nē akupym Jerujarē hwyr mō. Kamā Kris kōt mē pahkwýjaja kēp amrakati nē ri pa nhūm pika pē Gres mē Masetōn kamā Kris kōt mē pahkwýjaja mē harēnh ma nē mē kām kàxpore hkwy ho akuprō nē mē kaxyw inhmā kugō. Tā kot paj ma mē hwyr o mō nē mē kām kure nē rī kormā ma mē awyr mō. ²⁷ Jerujarē kamā Kris kōt mē pahkwýjaja Ijaew na mē. Mē kumrēx na prem Kris kōt amnhī xunhwý. Hāmri nhūm mē hkwyjaja ma mē apē Ijaew kēt xwýnhjē mā kapēr jarēnh o ri mē akwy hkōt pa. Hāmri nhūm pika pē Gres kamā mē pa xwýnhjaja mē kapēr ma nē mē urāk nē Kris kōt amnhī xunhwýr kurē kumrēx. Jakamā amnhī xwar kām nhām krī hō kamā Kris kōt mē pahkwýjē ho mex prām nē. Hāmri mē kām kàxpore hkwy ho akuprō nē mē kaxyw inhmā kugō.

²⁸⁻²⁹ Tā kot paj ma Jerujarē hwyr mē kām o mō nē mē kām kure hāmri nē awjanā nē rī kormā ma Rōm wyr mē awyr mō. Hāmri nē mē awyr pōj pu mē axpēn pumu nē pahkīnh nē. Nē axpēn mā Jejus Kris mex o mex ā harē nē kām tanhmā amnhī jarēnh to ho papa. Jao pahkīnh nē papa. Tā pa hpānhā hamū ma Espānhā wyr mō.

³⁰ Nē na pu prem Jejus Kris o panhō Pahihti. Jao te mē pahpē hkōt axpēn to pahtō nē pahtōx pyrāk o axpēn nhīpēx. Nē Karō nhý hā pamā axpēn kīnh nē. Jakamā kwa Jejus kōt ixkwýjaja. Kēr ka mē ixpē mē atō hā ixto Tirtūm wyr kām axihtyx nē. ³¹ Kēr pa ma pyka pē Jutej kamā Jerujarē kamā Kris kōt mē pahkwýjē hwyr mō nē mē kām kàxporeta gō nhūm mē omu nē Ijaew kēt xwýnhjē kot mē kām ōr ā mē omunh tā tee ri hamaxpēr kêt nē. Ām hkīnh kām māmri āmnhīx hamý nē ho amnhīm awjaprō.

Nē kēr ka mē ixto awý kē inhnē mē kēp mē pahkwý hkēt xwýnhjē pumunh mex nē.

³² E kēr ka mē ā ixto Tirtūm wyr anē. Kē ixte ma Jerujarē rūm ma Rōm wyr pār kām inhmōrta ā kē xpumunh mex nē. Pa inhmex pē mē kurūm ma mē awyr mōn pōj pu mē tokyx axpēn pumu nē pahkīnh nē. Pa mē ate tanhmā amnhī nhīpēx to ho ri apa hā mē apumunh o mē akōt ri ixpa nē ixkīnh nē.

³³ Tā ām ja pix. Kē Tirtūm mē akōt pa ho pa. Tām na hte tanhmā mē pahto pu mē ý hā pajamakētkati paxāmnhīx ri pahkīnh nē ri papa.

16

Pawre kot ahpýnhā hkrāmnhwýjē mā kapēr

¹ Ku nē määnēn ja. Ot pa mē awyr Kris kōt pahtōx Pepreja mē awyr kumē. Na hte krī pē Sēnkrej kamā Kris kōt mē pahkwýjē tanhmā mē ho mex to ho ri mē hkōt pa. ² Nē määnēn pa na hte tanhmā ixto mex to. Tā kē mēmo arīgro hā mē awyr pōj ka mē kēp Kris kōt mē pahtōx ā omu nē ho mex nē tanhmā ho ajuta hto.

³ Nē kēr ka mē atar Kris kōt ixkrāmnhwýjē mā ijarē. Na pa hte mē kām ijamaxpēr rāhā ho ri ixpa. Nē Akirti mē hprō Prisireta ka mē wa kām ijarē. Na pre hte wa inhīkhō hā Jejus Kris mā tanhmā amnhī nhīpēx mex to ho wa pa. ⁴ Jao wa amnhī grōnh kōt mē kām ixkurē xwýnhjē pē ixpytā. Pa amnhī tā

wa omu nē inhmā wa hkīnh nē. No ām papxipix inhmā wa hkīnh kêt nē. Na pre Ijaew kêt xwýnh kwý pê Kris kwýjaja ixtā wa harēnh ma nē haxwýja kām wa hkīnh nē.

⁵ Nē na hte Kris kwýjaja wa ōrkwý kamā axpēn wýr akuprō. Mē kot Tirtūm mā amnhī jarēnh nē kapēr ā kagā hkwy mar kaxyw axpēn wýr akuprō. Tā kēr ka mē mē kām ijarē.

Nē Kris kôt mē pahtō Epēnre mā ijarē. Kēp ixkrāmnhwý mex na. Inhmā hkīnh. Kumrēx na pre jar pika pê As kamā amnhī kaxyw Kris kôt hamaxpēr nē hkôt amnhī xām.

⁶ Nē Kris kôt mē pahtōx Marir ka mē kām ijarē. Na xep hte tanhmā mē ato mex to rūnh o pa.

⁷ Nē Kris kôt mē pahtō ārōhti mē Jūhti wa kām ijarē. Ixpyrà nē wa kēp Ijaew na wa. Kormā ixte Kris kôt amnhī xām kêt ri na pre wa kumrēx hkôt amnhī xām. Na hte Jejus nhý hā mē ahkre ho mē pa xwýnhjaja wa kot Kris kapēr jarēnh mex ā wa harē. Tā ā amnhī nhīpēx anhýrja mýrapē na pre mē hkwyjaja wa unē nē wa haxā pa prem ixpimràatā ixpē prēs nē mē hagiēnh xā kamā ixkrī.

⁸ Nē Kris kôt mē pahtō āprite mā ka mē ijarē. Kēp Kris kôt ixkrāmnhwý mex na.

⁹ Nē Kris kôt mē pahtō Upānre mā ijarē. Na hte ixpyrà nē Kris mā tanhmā amnhī nhīpēx to ho ri pa.

Nē Kris kôt mē pahtō Etaki mē ijarē. Kēp ixkrāmnhwý mex na.

¹⁰ Nē Kris kôt mē pahtō Apes ka mē kām ijarē. Na prem ra Kris ā hipēx punuj nē no nhūm mē kutā amnhī to htýx nē Kris kaga hkêt nē.

Nē Aristopti nhōrkwý kamā hkwyjē mā ijarē.

¹¹ Nē Kris kôt mē pahtō Erojāwti mā ijarē. Ixpyrà nē kēp Ijaew na.

Nē Nasisti nhōrkwý kamā Kris kwýjaja ka mē kām ijarē.

¹² Nē Kris kôt mē pahtōx Xiripere mē Xiripos wa kām ijarē. Wa kēp Pahihti Jejus mā tanhmā amnhī nhīpēx mex to xwýnh na wa.

Nē Kris kôt mē pahtōx Pesixti mā ijarē. Haxwýja kēp ixkrāmnhwý na. Na hte Pahihti Jejus mā tanhmā amnhī nhīpēx mex to ho ri pa.

¹³ Nē Kris kôt mē pahtō Rupti mā ijarē. Na hte Kris kôt amnhī nhīpēx mex o ri pa. Nē katorxā mā ijarē. Na pre te ixpē hkra nhīpēx pyrāk o inhīpēx.

¹⁴ Nē Kris kôt mē pahtō Asīnre mā nē Prekōxti nē Emes nē Patopas nē Emas mē. Jajē piitā mē pahkwý kot mē hwýr pikuprōnh xwýnhjē mē mē ho apimràatā mē kām ijarē.

¹⁵ Nē Kris kôt mē pahtō Pirorti mā nē mē pahtōx Juure mē Nērew wa nē htōxja nē mē pahtō Orīpti wa mē kām ijarē. Nē mē pahkwý kot mē hwýr pikuprōnh xwýnhjē mē mē ho apimràatā mē kām ijarē.

E kēr ka mē jajē piitā mē kām ijarē. Na pa hte mē kām ijamaxpēr rāhā ho ri ixa.

¹⁶ Nom mē tapxipixjaja kêt. Ā mē apiitā mā na pa hte ijamaxpēr rāhā ho ixa.

Nē ota jar Kris kwýjaja mē awýr hpēr mē.

¹⁷ Kwa ixkrāmnhwýjaja. Na ka mē ra aprī hā Tirtūm kapēr mar týx nē. Tā kēr ka mē amnhī nē mē kot Tirtūm kapēr o hēx xwýnhjē pumunh mex o apa. Mē kām axpēn nē mē ato hpigrành par prām. Nē mē ate Kris kaga nē hpānhā mē kot amnhī nhīpēx o amnhī nhīpēxja mē kām hprām jakamā kwa mē amnhī nē mē omunh mex nē axkām ajamak rom. ¹⁸ Na htem ā amnhī nhīpēx anhýr

o Pahihti Kris mã tanhmã amnhĩ nhĩpêx to ho pa hkêt nê. Æm amnhĩ hkrã hkôt tanhmã ri hkwýjê jahkre hto ho pa. Kot mê no kupyw kaxyw tanhmã mê kãm hêx to ho ri mê hkôt pa. Te mê ahkre mex pyrãk tâ mê ahkre mex kêt nê. Jakamã nhũm htýx ri mê pa xwýnhjaja mê kot mê ahkreja ma nhũm te mê kãm mex pyrãk. Jakamã kwa mê okora mê amnhĩ nê mê omunh mex nê.¹⁹ Na ka htem mê kurom Kris kôt amnhĩ nhĩpêx mex nê nhũm xep mê piitã mê apumu nê xepên mã ja hã mê ajarênh o ri pa. Pa mê ajarênh ma nê ixkĩnh nê. Tã kêr ka mê arĩ ajamaxpêr mex rãhã ho ri ajamaxpêr o apa. Nê amnhĩ nhĩpêx mex rãhã nê. No tanhmã ajamaxpêr punuj to ho ri amnhĩ tomnuj o ri apa hkêt nê. Æ mê ate amnhĩ nhĩpêx anhýrja na inhmã hprãm.

²⁰ Nê na hte Satanasti mê hkwýjaja mê ate Jejus kaga hprãm xàj mê akôt tanhmã ri mê anhĩpêx to ho ri pa htã kêr ka mê amnhĩ tâ mê omu nê tee ri amnhĩ kukamã ajamaxpêr kêt nê. Koja gaa nhũm Tirtũm mê hipêx o te mê kot kagã xoprê hkrã xôm nê hpĩr pyrãk o mê hipêx. Jakamã ã mê kot mê anhĩpêx anhýr tâ koja Tirtũm mê amã mê ajamakêtkati xàja gõ. Tapxipix na kot mê pajamakêtkati xã nhõr kaxyw ãhpumunh týx.

Nê na pa hte mê ato Pahihti Jejus wý nê kãm:

—Pa Pahihti. Kwa kêr ka Rõm kãm akwýjê pumu nê mê ho mex nê mêmoj to mê kutã anoarêt rãhã ho ri apa. Anê.

²¹ Nê ota mê pahtõ Ximotreja mê awýr hpêr mê. Na hte inhĩkhõ hã Kris mã tanhmã amnhĩ nhĩpêx to ho ri pa. Nê ixtõ Rusti mê Jasãwti mê Sosipa wa mê haxwýja mê awýr hpêr mê.

²² Nê kot inhmã ixkapêr ã kagã xwýnh Testi haxwýja mê awýr hpêr mê. Kêp Kris kôt mê pahtõ na. ²³ Nê Kris kôt mê pahtõ Gajre haxwýja mê awýr hpêr mê. Örkwý kamã na hte Kris kwýjaja xepên wýr akuprõ nê kamã Tirtũm mã amnhĩ jarê nê kapêr ã kagã kamã harê nê mar o hkrĩ. Örkwý kamã na pa pre pøj.

Nê mê pahtõ Eras haxwýja mê awýr pêr mê. Na hte jar krĩ ja kamã Rõm nhõ pahihti mã õ kãxpore jamãr pê ho mêmoj to anhýr o pa.

Nê Kris kôt pahtõ Kwatre haxwýja mê awýr hpêr mê. E jajaja piitã na mê awýr hpêr rê.

²⁴ E kê Pahihti Jejus Krisja mê akutã nojarêt rãhã ho pa.

Pawre kot Tirtũm mex o mex ã harênh

Epes 1.3, 3.20-21; Wam Ximotre 1.17; Eprêw 13.20; Jutre 24-25

²⁵ Nê kwa kêr pu mê Tirtũm mã mex ã harênh rãhã ho ri papa.

Nê ixte mê amã Jejus Kris jarênhã ã ka prem ama nê hkôt amnhĩ xunhwý. Tã koja mê ato mê axihtýx ka mê hkôt axihtýx kãm hkôt ri amnhĩ nhĩpêx mex o ri apa. Amnepêm na pre Tirtũm mê apê Ijaew kêt xwýnhjê ho hkra kaxyw hã amnhĩ jarênh kêt nê. Kormã ja ho hpimxur ryy nê. ²⁶ Tã ã mê anhĩpêx anhýrja o amnhĩrit nê ý hã mê kapêr jarênh o ri pa xwýnhjê mã kapêr nê mê kãm:

—E Jejus kot tanhmã amnhĩ nhĩpêx to ho pata kêr ka mê piitã mê kãm hã kagã kê mê pyka piitã hkôt kamã harê nê kuma. Nom kê Ijaew pixjaja mar kêt nê. Kê pika piitã hkôt kamã harê nê kuma. Panhĩ nê kupê nê kupê hkã htykre nê mê hkã haka nê mê hkã kamrêkjaja. Kê mê piitã Jejus jarênh ma nê amnhĩ kaxyw hkôt hamaxpêr nê hkôt amnhĩ xunhwý. Hãmri nê hkôt amnhĩ nhĩpêx mex o ri pa. Anê.

Nhũm pre ã mê pakaxyw mê kãm kapêr anê nhũm prem kuma nê hã kagã.

²⁷ Nà Tirtũmja tapxipix na àhpumunh tỳx xwỳnh ã ãm pyxi mex. Nẽ tapxipix kęp mẽ pahpiitã Mẽpahpãm. Tã kêr pu mẽ Jejus Kris kot mẽ panê htyk ã omunh xã hkõt Tirtũm pix mã mex o mex ã mãn harẽnh rãhã ho papa.

Tã ãm ja pix. Ixpê Pawre na pa ã mẽ awỳr ixpêr mẽnh anẽ. Na hapêx.

Wam Korit Pawre kot Korit kām Jejus kôt hkwyjê hwyr kagà nē mēnh

Pawre na pre kagàja nhîpêx. Jejus nhÿ hā kapêr jarēnh o pa xwÿnhjê hō na pre. Na pre hipêx nē ma krī pê Korit kām Jejus krajê hwyr kumê. Nē kagàja kamā mē kām tanhmā mēmoj tā karō hto. Na pre mē kot àhpumunh tÿx ā amnhî to jarkrar o pa nē mē kām kapêr. Nē tanhmā amnhî tomnuj to nē mē kām kapêr. Nē mē hprō nē mē mjēn xwÿnhjaja tanhmā wa kot axpēn nhîpêx to hā mē kām karō. Nē mē kot Tirtūm mā mex o mex ā harēnh kaxyw axpēn wÿr mē pikuprōnh nē tanhmā amnhî nhîpêx to hā nhūm mē kām karō. Ā na pre Pawre mē kām mēmoj tā karō nē hā kagà anē. Nē mē kām:

¹ Pa Korit kām Jejus kôt ixkwÿjaja. Xà mē amex? Ot pa mē awÿr kagàja nhîpêx nē kumê. Ixpê Pawre na pa Kris kôt mē pahtō Sostenes mē wa awÿr ixpêr mē. Tā kagàja nhîpêx nē mē awÿr kumê. Tirtūm na pre ixte Jejus Kris nhÿ hā mē ajahkre ho ri ixpa kaxyw ixām. ²Tā ot pa mē awÿr kagà nhîpêx nē mēnh mā. Korit kām ixpyrà nē mē apê Tirtūm krajê hwyr.

Tirtūm kot amnhî kaxyw mē axunhwÿr jakamā na ka prem amnhî tomnuj kaga nē Kris kôt amnhî xunhwÿ nē hkôt amnhî nhîpêx mex o ri apa. Krī piitā hkôt mē kot amnhî to Jejus Kris wÿr o mē pa xwÿnhjê pyrà nē. Mē panhō Pahihti Jejus Krisja ām pixi mex na.

³ Nē Tirtūm kēp Mēpahpām maati nē Jejus Kris kēp mē panhō Pahihti jakamā na pa hte mē ato wa hwÿr rāhā o ri ixpa nē mē ato wa hwÿr o:

—Kwa Tirtūm mē Jejus wa. Kēr ka wa Korit nhō xwÿnhjê kutā anojarēt rāhā ho wa ri apa. Nē mē ho mex rāhā nē. Kē mē amnhî tā war apumunh kôt ri hamakêtkati nē hkînh nē àmnhîx tanhmā ri amnhî nhîpêx to ho ri pa. Anē.

*Tirtūm kot Jejus Kris kukwak ri mē pahto mex ā harēnh
Sikūn Pêtre 1.2; Wam Tesarōn 5.23-24*

⁴ Nē mē ate amnhî kaxyw Jejus Kris kôt ajamaxpêr o ri apa jakamā na hte Tirtūm mē ato mex nē. Tā pa hte kām amnhî jarēnh kaxyw nē kām mē ajarēnh o:

—Pa Tirtūm. Ām hāmri na ka pre Korit nhō xwÿnh kwÿjê ho akra. Nà ja mex o mex. Anē.

⁵ Nē ra mē ate Kris kôt amnhî xunhwÿr jakamā na ka mē ra amex kumrêx nē ri apa. Nē aprī hā Kris kot amnhî nhîpêx pumunh mex nē aprī hā akwÿjê mā harēnh o ri mē hkôt apa. ⁶ Na pa pre mē awÿr mō nē mē amā Kris kot amnhî nhîpêx ā harēnh o ri mē akôt ixpa. Ka prem inhma nē hkôt amnhî xunhwÿr tÿx kurê kumrêx. ⁷ Jakamā nhūm Tirtūm mē ate kām tanhmā amnhî nhîpêx to ho apa kaxyw mē ato mē axihtÿx. Nē kaxyw mē amā mē ate axpēn to mex xā piitā mē amā kugō. Mē ate Jejus kot akupÿn mē pahwÿr wrÿk jamār pē hapêr arit o apa pē tanhmā kām axpēn nhîpêx to ho apa kaxyw. ⁸ Koja Tirtūm tanhmā mē akra hto ka mē hkôt pix mā ri amnhî nhîpêx rāhā nhūm Pahihti Jejus Krisja akupÿn mē pahwÿr wrÿ. Hāmri nē mē ate amnhî nhîpêx ā mē apumu nē mē ajarēnh o:

—Nà ām hāmri na hte jajaja amnhî to mex pix o ri pa. Anē.

⁹ Nē koja Tirtūm ra kot amnhī jarēnh xā hkôt mē ato mex nē. Ra kot mē ate Pahihti Jejus Kris kôt apa kaxyw amnhīm mē axunhwyr jakamā koja ra kot amnhī jarēnh xā hkôt mē ato mex rāhā nē.

*Mē pahte mēmoj tā axpēn pē pahpigrānh kēt ā mē pamā karō
Rōmān 15.5-6; Sikūn Korit 13.11; Epes 4.1-6; Piripos 2.1-4; Wam Pētre 3.8*

¹⁰⁻¹¹ E Kris kôt ixkwýjaja. Na ka xep htem mēmoj tā axpēn mā axākjēr pix o ri apa nhūm pre Krojre hkwyjaja amnē ixwyr pōj nē inhmā mē ajarē. Kwa nā mē ā amnhī nhīpēx anhýr kēt nē. Kēr ka mē axpēn kôt ri amnhī nhīpēx rāhā ho ri apa. Nē axpēn kôt ri ajamaxpēr rāhā nē. Te ixkre tixpi kamā mē ri apa pyrāk o mān kēt mē axpēn nhīpēx o ri xpēn kôt apa. Nē mē axpēn kutā anojarēt rāhā ho ri apa. No mēmoj tā axpēn mā axākjēr pē axpēn pē apigrānh kēt nē. Na pa Pahihti Jejus Kris nhý hā mē amā ā ja hā karō anē.

¹² Nē na ka xep htem ahpýnhā ri mē apē mē ixkwý hā amnhī jarēnh o ri apa. Jao mē akwýjaja pa ixkôt ri amnhī nhīpēx xwýnh ā amnhī jarē. Nē mē akwýjaja axtem Apor kôt ri amnhī nhīpēx xwýnh ā amnhī jarē. Nē mē akwýjaja axtem Simāw Pētre hkôt amnhī nhīpēx xwýnh ā amnhī jarē. Nē mē akwýjaja axtem Kris kôt amnhī nhīpēx o ri apa xwýnh ā amnhī jarē. Ā na ka xep htem ahpýnhā amnhī jarēnh anhýr o ri pa.

¹³ Kwa nā ka mē ā ahpýnhā amnhī jarēnh anē nē te mē ate Kris o apigrānh pyrāk o hipēx. Kwa mon ka hte mē akwýjaja apē ixkwý hā amnhī jarē? Xā pa na pa pre pī kahpa hā ajēt nē mē anē ty? Nā Kris pix na pre mē panē hā ajēt nē ty. Xā mē apē pa ixkwý hā amnhī jarēnh kaxyw na prem mē akrā kumrā? Nā mē apē Kris kwý hā amnhī jarēnh kaxyw na prem ā mē anhīpēx anē. Mē kot ja hā mē apumunh xwýnhjaja kot mē apē Kris kwý hā mē apumunh kaxyw. Tā na ka xep htem axtem nē ā ri ahpýnhā mē kām amnhī jarēnh anhýr o ri apa.

¹⁴⁻¹⁵ Kop ām ixte amnhī kôt mē axunhwyr prām ronhýx pa mē ato mē axohtō nē mē akrā kumrā nē mē amā: “E ra mē apē ixkwý na ka mē.” Anē. Nom na pa pre ā mē amā ixkapēr anhýr kēt nē. Ām hāmri na pa pre ām mē ato grēre nē mē akrā kumrā. Ām Kripti mē Gajre wa pix. ¹⁶ Ku nē xep māmānēn Estepti nē kaxyw mē hkwyjaja. Ām jajē pixjaja. Nom ko apu axte mē hkwy ko. Ixte mē hkrā kumrār xwýnhjē mā ijamaxpēr týx kēt. ¹⁷ Na pre Kris ixte mē hkrā kumrār o ri ixpa kaxyw ixām kēt nē. Ām ixte mē kām kapēr jarēnh o ri mē hkôt ixpa pix kaxyw na pre ixām.

Nē na pa hte amnhī krā hkôt ri ixujarēnh o ri mē akôt ixpa hkēt nē. Kot pa ā amnhī nhīpēx anē nhūm mē ixkapēr mex ā inhma nē pa ixkôt amnhī xunhwý. Ja pymaj na pa hte amnhī krā hkôt ri tanhmā ixujarēnh to ho ri ixpa hkēt nē. Na pa hte ām ixprī hā Kris kot tanhmā mē panē amnhī nhīpēx to hā harēnh o ri mē hkôt ixpa. Mē pahpiitā mē panē htyk ā harēnhja pa hte mē kām harē. Mē kot hprī hā mar nē hkôt amnhī xunhwýr kaxyw. Jao amnhī krām mē ujarēnh mexta jagjēnh nē hā no htýx kaxyw. Pa ja hā mē omu nē ixkīnh nē ijamaxpēr o:

—Na htem ixkapēr ma nē Jejus kôt amnhī xunhwýr kurē kumrēx. Nā ām hāmri na pa hte mē kām ixkapēr kapry ho ri ixpa hkēt nē. Anē.

¹⁸ No kēt mē pahte Tirtūm kot mē pahto hkra xwýnhjaja ra mē pahte Kris pī kahpa hā mē panē htyk ā harēnh mar nē pahkīnh nē papa xwýnh na pu mē. Jakamā na pu htem pajamaxpēr o:

—Nà ãm hãmri na Tirtũm Kraja htyk kukwak ri mẽ ixto mex mẽ mẽ ixto hkra. Mẽ ujarẽnhja mex kumrẽx. Anẽ.

No kêt mẽ kęp hkra hkêt xwỳnhjaja na htem tee ri Kris tyk ã harẽnh ma mẽ hamaxpẽr o:

—Tk. Tanhmã kot kêt we amnhĩ to mẽ mẽ panẽ ty? ãm amarĩ mẽ kot amnhĩ krã hkõt pĩ kahpa hã nhõr mẽ hpĩr kẽnã. Anẽ.

Tirtũm kra hkêt xwỳnhjẽ jarẽnh

Matẽwre 11.25-26; Wam Korit 3.19

¹⁹ Nẽ Tirtũm kapẽr ã kagã htũm kot mẽ kęp hkra hkêt xwỳnhjẽ jarẽnh kot: Mẽ kot htỳx ri ãhpumunh tỳx ã amnhĩ to jarkrar o pa htã kot paj mẽ kęp ja ho ijpãx pa nhũm mẽ ã amnhĩ jarẽnh anhỳr kaprỳ. Anẽ.

²⁰ Jakamã mẽ ãhpumunh tỳx ã mẽ kot amnhĩ to jarkrar xwỳnhjaja mẽ mẽ kot Mojes kapẽr o mẽ ahkre ho ri mẽ pa xwỳnhjaja mẽ mẽ kapẽr rũnh xwỳnhjaja. Mẽ kot Tirtũm Kra hkõt amnhĩ xunhwỳr kêt jakamã te mẽ ãhpumunh kêt pyrãk. Tirtũm kra hkêt xwỳnhjaja kot mẽ ãhpumunh tỳx ã mẽ harẽnh tã no ãm Tirtũm noo mã te mẽ ãhpumunh kêt pyrãk. Nẽ te htỳx ri mẽ kot amnhĩ nhĩpẽx o pa pyrãk. ²¹ Tirtũm ãhpumunh o ãhpumunh jakamã na pre ra mẽ hkukamã hamaxpẽr o:

—Nà kot paj mẽ ãhpumunh tỳx ã mẽ omunh xã hkõt mẽ ho ixkra hkêt mẽ. ãm mẽ kot ixkra Jesus kot mẽ mẽ htyk ã harẽnh mar mẽ amnhĩ kaxyw hkõt hamaxpẽr pix ã mẽ omunh xã hkõt kot paj mẽ ho ixkra. Anẽ.

²²⁻²⁴ No Ijaewjaja kãm amnhĩ krã hkõt pix mã amnhĩ nhĩpẽx prãm jakamã na pa hte mẽ ixpẽ Jesus kwỳjaja mẽ hwỳr mra mẽ mẽ kãm Kris kapẽr jarẽnh o ri ixpa nhũm mẽ inhma mẽ ãm mẽ inhma. Nẽ te mẽ kot mẽ inhmar kêt pyrã mẽ mẽ inhmã:

—Tk. Nà kot paj mẽ tokyx axujarẽnh kõt amnhĩ nhĩpẽx kêt mẽ. Kot kaj mẽ inhmã mẽ ixte aa mẽmoj pumunh kêt õ ho anẽ pa mẽ ja hã apumu mẽ axihtỳx ã apumu mẽ rĩ kormã hkõt amnhĩ nhĩpẽx.

Anhỳr o inhmã kapẽr. Tã no pa mẽ kãm ã amnhĩ nhĩpẽx anhỳr kêt mẽ. ãm Kris kot mẽ panẽ pĩ kahpa hã htykja pix pa htem mẽ kãm harẽnh o ri ixpa. Ja kamã nhũm mẽ hkwỳjaja mẽ inhma mẽ ãm mẽ inhma mẽ Kris xihitỳx kêt ã ãm amarĩ htyk ã harẽ. No mẽ hkwỳjaja. Tirtũm kot amnhĩ kaxyw mẽ unhwỳr xwỳnhjaja na htem mẽ kurom mẽ inhma mẽ ra mẽ inhmar tỳx kurẽ kumrẽx. Nẽ mẽ inhmã kapẽr o:

—Nà ãm hãmri na Krisja Tirtũm pyrã mẽ hihitỳx o hihitỳx. ãm hãmri na ka ã harẽnh anẽ. Anẽ.

No Ijaew kêt xwỳnhjaja na Ijaew pyrã mẽ kãm amnhĩ krã hkõt amnhĩ nhĩpẽx o pa hprãm kêt mẽ. Nẽ mẽ kãm mẽ ãhpumunh tỳx pix prãm o pa. Jakamã na pa htem mẽ kãm Kris kapẽr jarẽnh o ri mẽ hkõt ixpa nhũm mẽ hkwỳjaja mẽ inhma mẽ Ijaew kwỳjẽ pyrã mẽ ãm mẽ inhma mẽ mẽ inhmã:

—Tk. Nà na ka htem ãm ri axẽx o ri apa. Kot pa mẽ akapẽr mar kêt mẽ. Kot paj mẽ axãhpumunh tỳx ã mẽ apumu mẽ rĩ kormã mẽ ama mẽ mẽ akõt amnhĩ nhĩpẽx.

Anhỳr tã pa mẽ ãm arĩ Kris kot mẽ panẽ htykja pix pa mẽ kãm harẽnh o ri mẽ hkõt ixpa. Nhũm mẽ hkwỳjaja mẽ inhma mẽ mẽ inhmã:

—Nà mẽ axãhpumunh kêt jakamã na ka htem atỳx ri ã ja jarẽnh anẽ.

Anhỳr tã no nhũm mẽ hkwỳjaja. Tirtũm kot amnhĩ kaxyw mẽ unhwỳr xwỳnhjaja na htem mẽ inhma mẽ mẽ inhmã kapẽr o:

—Nà ãm hãmri na ka mẽ ã Krisja jarënh anë. Tirtüm pyrà nê àhpumunh o àhpumunh kënë. Anë.

²⁵ Tirtüm mẽ Jesus wa mẽ pakurom àhpumunh o àhpumunh nê hihtýx o hihtýx.

Tirtüm mẽ parom hihtýx o hihtýx ã harënh

Matêwre 11.25; Sikün Korit 12.7-10; Xiakre 2.5

²⁶ E Kris kôt ixtò nê ixtòxjaja. Amnepê mã Tirtüm kot amnhim mẽ axunhwýrta ã tanhmã na ka prem amnhĩ nhĩpêx to ho ri apa? Nà na ka prem axohtò nê jar mẽ noo mã axàhpumunh kêt nê ri apa. Nê mẽ apê pahi hkêt nê ri apa. Mẽ axohtò nê amnhĩ to hkryre nê ri apa. ²⁷ Tã nhüm Tirtüm amnhĩ kôt mẽ ate amnhĩ to hkryre xwýnhjê xunhwý. Koja nhýrmã kot tanhmã mẽ pahpiitã mẽ pajarënh to xà hã arigrota kato hãmri nhüm mẽ àhpumunh týx ã amnhĩ to jarkrar xwýnhjaja Tirtüm kot mẽ kurom mẽ pahto hkra hã mẽ pahpumu hãmri nê tee ri amnhĩ kukamã hamaxpêr nê amnhĩ kamã hpijaãm týx nê. Nê mẽ hihtýx ã amnhĩ to jarkrar xwýnhjaja haxwýja. Nhüm Tirtüm kot mẽ kurom mẽ pahto hkra hã mẽ pahpumu nê tee ri amnhĩ kukamã hamaxpêr nê amnhĩ kamã hpijaãm týx nê.

²⁸ Na hte Tirtüm amnhĩ kaxyw mẽ kot amnhĩ to hkryre xwýnhjê xunhwý. Nê mẽ kot mẽ kamã kahak o pa xwýnhjê xunhwý. Jar pyka ja kamã mẽ hkwy kot mẽ hkaga htã nhüm Tirtüm amnhĩ mã mẽ unhwý. Mẽmo kaxyw na hte ã amnhim mẽ unhwýr anë? Nà mẽ kot nhýrmã tee ri mẽ àhpumunh týx ã amnhĩ jarënh xwýnhjê pumunh nê axpên mã mẽ harënh o:

—Kwa mẽ pahte mẽ àhpumunh týx ã mẽ harënh tã nhüm Tirtüm mẽ pahpyrà nê amnhĩ kaxyw mẽ unhwýr kêt nê. Nà te mẽ àhpumunh kêt pyràk.

Anhýr o axpên mã mẽ harënh kaxyw na pre Tirtüm amnhim mẽ kot amnhĩ to hkryre xwýnhjê xunhwý. ²⁹ Jakamã kot puj mẽ nhýrmã Tirtüm mã amnhĩ to jarkrar pè tanhmã kãm amnhĩ jarënh to hkêt nê. Rý kãm:

—Kwa ga ixpumu Tirtüm. Na pa hte ã amnhĩ nhĩpêx anë nê ã amnhĩ nhĩpêx anë. Kwa ja hã ixpumu nê ixtò akra nà?

Anhýr o amnhĩ to hwýr kêt nê. ³⁰ ãm Jesus pix kukwak ri na hte Tirtüm mẽ pahto hkra. Tãm na pre Tirtüm noo mã amnhim mẽ paxunhwý. Mẽ pahte urak nê pahpê hkra kaxyw. Jakamã na pu htem ãm pix kukwak ri amnhĩ nhĩpêx mex o ri papa. Nhüm mẽ pamã àhpumunh týx xà hkwy gõ. Tã ra kot mẽ pahte amnhĩ tomnuj pè mẽ papytãr jakamã kot puj mẽ nhýrmã pahtyk tã no ãm akupým pahtür nê Tirtüm mẽ wa kuri pahtür tüm nê pamex kumrêx nê papa ho papa. ³¹ Tã ã Jesus kot mẽ panhĩpêx kot anhýr jakamã Tirtüm kapêr ã kagã htüm kot ja jarënh kot:

Kot ka mẽ amã mẽmoj tã jarkrar prãm nom kêr ka mẽ kamjaja amnhĩ to jarkrar kêt nê. Mẽ panhõ Pahihti ra kot mẽ panë tanhmã amnhĩ nhĩpêx toja pix ã tanhmã ho jarkrar to ho ri apa. Anë.

2

Pawre kot tanhmã Kris jarënh to hã harënh

Sikün Korit 4.1-7; Wam Pêtre 3.15

¹⁻² E Kris kôt ixtò nê ixtòxjaja. Amnepê mã ixte mẽ awýr inhmõrta ã na pa pre inhnojarët nê ijamaxpêr o:

—Kot paj ma mẽ hwýr mõ nê mẽ kãm Kris kapêr jarë. Kot amnhĩ grõnh kôt mẽ inhnê htykja pa mẽ kãm harë. ãm ja pix jarënh o ri mẽ hkôt ixpa. Nom kot paj mẽ kapêr japjê xwýnhjê pyrà nê mẽ kãm ixkapêr japjê hkêt nê. Rý mẽ

uràk nê te ixàhpumunh tỳx o ri ixkapêr jappjê pyràk o ri mē kām ixkapêr jappjê hkêt nê. Kot paj âm ixkatat kôt ri mē kām tanhmā Jejus jarēnh to pix o ri mē hkôt ixpa.

Anh̄yr o mē akukamā ijamaxpêr. Hāmri nê ma mē awỳr mō nê mē awỳr pōj nê mē amā Jejus kot mē panē htyk nê akupỳm htírja pix jarēnh rāhā ho ri ixpa. ³ Na pa pre tee ri amnhī kukamā ijamaxpêr nê ijamaxpêr o:

—Hêxta waa nê. Tanhmā kot pa we mē kām Tirtūm kapêr jarēnh to nhūm mē inhmar tỳx nê hkôt amnhī xunhwỳr kurê kumrêx wehe? Kot paj amnhī krā hkôt mē kām harēnh kêt nê. Ja kaxyw ijamaxpêr tỳx kêt kênā. Kot paj amnhī krā hkôt mē kām harē nhūm mē âm inhma nê hkôt amnhī xunhwỳr kêt nê. Nà kot paj Tirtūm nh̄y hā mē kām tanhmā ixkapêr to kē tām tanhmā mē hkrā hto kē mē inhma nê hkôt amnhī xunhwỳr japêr.

Anh̄yr o ijamaxpêr. ⁴ Nê mē ate inhmar kaxyw na pa pre ixêx rom tanhmā mē ano kupyr to ho ri ixpa hkêt nê. Rỳ mē pajaja mē ixàhpumunh xà hkôt tanhmā mē amā ixkapêr to hkêt nê. Na pa pre âm Tirtūm Karō nh̄y hā mē amā awjarê. Mē ate mar nê hihtỳx o hihtỳx ā omunh kaxyw. ⁵ Jakamā na ka prem Tirtūm xihtỳx ā omu nê amnhī kaxyw hkôt ajamaxpêr kurê kumrêx. No pa ixàhpumunh tỳx ā ixpumunh kôt ixkôt ajamaxpêr kêt nê. Na ka prem ixkapêr ma nê ajamaxpêr o:

—Nà Tirtūm na mē parom àhpumunh o àhpumunh nê hihtỳx o hihtỳx.

Anh̄yr o ajamaxpêr kôt ajamaxpêr kurê kumrêx.

Tirtūm Karō kot mē pamā àhpumunh xà nhōr ā harēnh

Matêwre 7.6; Juāw 14.22, 16.13-15; Xiakre 3.13-18

⁶ Nê na hte Tirtūm kra hkwỳjaja Tirtūm kot amnhī nhīpêx ā omunh mex. Nê hamaxpêr ā omunh mex. Jakamā na pa hte mē ahkre jappjê ho mē hkôt ixpa. Nom jar pika ja kamā mē pajamaxpêr tỳx xà ho mē ahkre hkêt nê. Rỳ pika piitā hkôt mē utār xwỳnhjê jamaxpêr tỳx xà ho ri mē ahkre ho ri ixpa hkêt nê. Koja nh̄ymā mē àhpumunh xàja mē kêp hapêx pa. ⁷ Jakamā na pa hte âm Tirtūm xàhpumunh xà pix o mē ahkre o ri ixpa.

Amnepê mā kormā mēmoj piitā hkêt ri na pre Tirtūm amnhī kukamā amnhī jarēnh o:

—Mê kot amnhī kaxyw Ixkra hkôt mē hamaxpêr o mē pa xwỳnhjaja kot paj mê ho ixkra nhūm mē mex kumrêx nê pa ho pa.

Anh̄yr o mē harê. Nom mē kot hkôt amnhī xunhwỳr kêt xwỳnhjaja nhūm kormā mē kām ja ho amnhīrit kêt nê. Tā ja na pa hte ra mē kām harēnh rāhā ho ri mē hkôt ixpa nhūm mē Tirtūm kām mē pahto hkra hprām hā harēnh ma.

⁸ Nom pika piitā hkôt mē ho amnhīptār xwỳnhjaja na mē kormā ja mar kêt nê. Kêp apu mē kot mar ronh̄y prem pī kahpa hā mē panhō Pahihti nhōr nê hpīr kêt nê. Mex o mex tā nhūm prem axtem nê ā hipêx anê. ⁹ Mē kot mēmoj mex pumunh kêt tā Tirtūm kapêr ā kagā htūm kot mēmoj mex jarēnh kot:

Na pre Tirtūm mē kām hkīnh xwỳnhjê kutêp mēmoj mex kwỳ jaxwỳ nhūm mex o mex nê mē ahā hikwỳ.

Aa mēhō kot mēmoj mex o mexja pumunh kêt.

Nê aa mēhō kot ā mēmoj kot anh̄yr pumunh kêt.

Nê aa ā mēmoj mex kot anh̄yr kukamā hamaxpêr kêt.

Tā nhūm Tirtūm mē kutêp hkwỳ jaxwỳ.

Anh̄yr o kot harēnh tā no nhūm mē kot hkôt amnhī xunhwỳr kêt xwỳnhjaja ā kapêr anh̄yrja mar kêt nê. ¹⁰ Mē pamā na pre Tirtūm ja ho amnhīrit. Na pre ra mē pamā Karō gō nhūm mē pamā gjêx o mē pamā mēmoj to amnhīrit

mex nê. Tîrtûm Karôja àhpumunh tÿx o àhpumunh tÿx. Nê kot hprî hã Tîrtûm jamaxpêr pumunh par. ¹¹ No mê papajaja na pu htem axpên jamaxpêr kôt axpên pumunh kêt nê. Na pu htem papam amnhî jamaxpêr â amnhî pumu. Ja pyrà nê Tîrtûm Karô pix na hte Tîrtûm jamaxpêr pumunh. ¹² No mê pahpê hkrajaja na hte mê pahkarôja pix mê pakamã pa hkêt nê. Na hte mãânên Tîrtûm Karôja mê pakamã pa nê mê pamã tanhmã mêmoj to amnhîrit to ho mê pahkôt pa. Nê Tîrtûm kot mê pakutêp mêmoj mex jaxwÿrja nhûm ja kukamã mê pamã harênh o amnhîrit.

¹³ Jakamã na pa htem amnhî krã hkôt ri mê kãm ixujarênh kêt nê. Âm Tîrtûm Karô nhÿ hã na pa hte ixprî hã mê kãm kapêr jarênh o ri mê hkôt ixpa. Ra Tîrtûm Karô kot mê amã gjêx xwÿnhjê mã pa ÿ hã ixkapêr. ¹⁴ No mê kãm Tîrtûm Karô kapêr mar prãm kêt xwÿnhjaja na htem Tîrtûm kot amnhî nhîpêx pumu nê hprî hã omunh kêt nê. Mê kãm kapêr mar prãm kêt jakamã na htem ri kot tanhmã mê pahto mex to hã harênh ma nê hamaxpêr o:

—Tk. Kwa mo kaxyw na htem ri â Tîrtûm jarênh anê? Tanhmã kot we amnhî to nê mê pahto mex? Nà kot anhÿr kêt. Anê.

¹⁵ Nom mê pahpê Tîrtûm kra hkwy hã mê pahte Karô kapêr mar mex xwÿnhjaja na pu hte mê kurom Tîrtûm kot amnhî nhîpêx â omunh mex nê. Nê Karô xô ri mar mex nê nhûm mê kot Karô kapêr mar kêt xwÿnhjaja tee ri â mê pahte amnhî nhîpêx anhÿr â mê pahpumu. Nom hprî hã mê pahte Tîrtûm kôt amnhî nhîpêx pumunh kêt nê. ¹⁶ Tîrtûm kapêr â kagã htûm kot ja jarênh kot:

Mêhõ na kot Tîrtûm jamaxpêr pumunh?

Nê mêhõ na pre we kãm hamaxpêr gõ?

Nà amrakati kumrêx. Tapxipix na àhpumunh tÿx o àhpumunh tÿx. Anê.

Tã mê papajaja mê pahte Tîrtûm Karô kapêr mar tÿx xwÿnhjaja na pu htem Kris xô ri pahprî hã hamaxpêr kôt omunh mex nê.

3

Mê kot Tîrtûm mã tanhmã amnhî nhîpêx to xwÿnhjê jarênh

Wam Korîit 14.20; Karatas 5.16-21; Epes 4.14; Eprêw 5.11

¹ E Kris kôt ixtõ nê ixtõxjaja. Pa mê amã mêmoj jarê ka mê inhma nê kãm ajamaxpêr. Nà amnepê mã kormã mê ate Kris kôt amnhî nhîpêx tohtuj anhÿrta â tanhmã na ka prem amnhî nhîpêx to ho ri apa wehe? Na ka prem arî ajamaxpêr tûm kôt pix mã amnhî nhîpêx. Kormã mê ate Tîrtûm Karô hkôt amnhî nhîpêx mex kêt jakamã na ka pre htem mêhprîre kot amnhî nhîpêx pyràk o amnhî nhîpêx. Nê mê urak nê kormã mêmoj piitã omunh kêt nê. Jakamã na pa pre mê amã ixujarênh kaxyw nê te mê ate kormã Tîrtûm kapêr mar kêt xwÿnhjê pyràk o mê anhîpêx nê mê amã tanhmã ixujarênh to. ² Mê hkarare na htem mê hkã kagô pix kaô nê kormã mê apkur xã mex kur kêt nê. Ja pyrà nê na pa pre te ixte mê ato hpîjaôr pyrà nê mê amã Tîrtûm kapêr piitã harênh par kurê kumrêx kêt nê. Âm mê amã hkwy pix jarê ka prem ama nê Jejus kôt amnhî xunhwÿ. Tã na pa hte arî mê amã hkwy pix jarênh o ri ixpa nê kormã piitã ho mê ajahkre jatur xãm mênh kêt nê. ³ Na ka htem arî te mê apê Kris kwÿ hkêt pyràk o amnhî nhîpêx o apa. Nê mêmoj kôt axpên kãm agryk axpên mã axâkjêr o apa. Â amnhî nhîpêx anhÿr jao arî mê ate amnhî nhîpêx tûm kôt amnhî nhîpêx rãhã nê.

⁴ Na hte mê akwÿjaja amnhî jarênh o: “Ixpê Pawre hkwy na pa.” Anê. Nê mê akwÿjaja amnhî jarênh o: “Pa na ixpê Apor kwÿ na pa.” Anê. Kwa na

ka htem ã amnhĩ jarēnh anh̄yr o te mē apē Kris kw̄y hkēt pyrāk. ⁵ Apor mē pa ãm wa ixte Tirtūm kapēr o mē ajahkre xw̄ynh pix na pa wa. Wa ixpē mē anhō pahihiti hkēt kēnā kot ka kēt mē axtem nē mē apē ahp̄ynhā wa ixkw̄y hā amnhĩ jarē. Na pa pre wa mē amā Tirtūm kapēr jarēnh o ri mē akōt ixpa ka prem wa inhma nē amnhĩ kaxyw hkōt ajamaxpēr t̄yx nē. Nē hkōt amnhĩ xunhw̄y nom wa pa wa ixkōt amnhĩ xunhw̄y kēt nē. Na pa wa ãm Tirtūm kapēr o mē ajahkre nom amnhĩ kōt mē axunhw̄yr kēt nē.

⁶⁻⁹ E pa ixprĩ hā mē amā war amnhĩ jarē ka mē inhma. Te wa ixpē Tirtūm pur kām wa ixāpēnh xw̄ynh pyrāk no mē kajaja te mē apē hpur pyrāk. Na htem hpur karē nhūm hirā nhūm mē kamā ahkre ho pa. Ja pyrā nē na pa pre ixkumrēx mē aw̄yr ixpa nē mē amā Tirtūm kapēr jarēnh o ri mē akōt ixpa. Te mē kot pur kām ahkre ho ri pata pyrāk. Tā nhūm Apor ixpānhā ma mē aw̄yr pa nē te mē kot pur karēta pyrāk o mē anh̄ipēx nē mē amā Tirtūm kapēr o mē ajahkre mex o ri pa. Xà na hte pur karē xw̄ynhja r̄y kamā ahkre xw̄ynhja tām tanhmā mēmo hy hto nhūm ra higrōt nē hprēk nē ô? Nà na htem ãm ahkre hpa nhūm arĩ hikw̄y. Nhūm Tirtūm tām tanhmā hyta to nhūm higrōt nē hprēk nē ô. Ja pyrā nē na hte Tirtūm mē ho hkra nē tanhmā mē ho nhūm mē amnhĩ kaxyw hkōt hamaxpēr t̄yx nē hkōt amnhĩ nh̄ipēx mex o pa. Nom mē kām harēnh o pa xw̄ynhta kōt amnhĩ xunhw̄yr kēt nē.

Nē na hte pur karē xw̄ynh r̄y kamā ahkre xw̄ynhja tām tanhmā hyta to nē ho ht̄ir kēt nē. Tirtūm pix na hte tanhmā ho nhūm higrōt. Ja pyrā nē na pa hte Tirtūm kapēr o mē ajahkre o ri mē akōt ixpa nom pa tanhmā mē ato ka mē apē Tirtūm kra nē ri apa hkēt nē. Tanhmā kot pa mē ato ka mē apē hkra? Tapxipix na kot mē pah̄to hkra kaxyw ahp̄umunh. Nē tapxipix na hte tanhmā mē pahkrā hto pu mē kām hprām xà hkōt amnhĩ nh̄ipēx mex o ri papa.

Nē pur karē xw̄ynh mē pur kām ahkre xw̄ynhja wa. Hamē wa àpēnh mex jakamā koja hamē wa kot pur kām àpēnh pānhā amnh̄im ujam̄ynh rax nē. Ja pyrā nē kot paj mē ixte Tirtūm kapēr o mē ajahkre ho ri mē akōt ixpa xw̄ynhja nhūm Tirtūm nh̄yrmā mē ixāpēnh pānhā mē inhmā amnh̄irer mex nē.

Nē te mē ate Tirtūm nhō ixkre pyrāk. ¹⁰ Nē pa te ixpē Tirtūm mā ixkre hā ixāpēnh xw̄ynh pyrāk jakamā na pre Tirtūm mē akaxyw tanhmā ixto pa mē amā tanhmā kot amnhĩ nh̄ipēx to hā harēnh o ri mē akōt ixpa. Te ixte ô ixkre kaxyw ãm xà maati xām pyrāk o mē anh̄ipēx. Jao mē amā kapēr jarēnh o ri mē akōt ixpa. Mē ate amnhĩ kaxyw hkōt ajamaxpēr nē hkōt amnhĩ xunhw̄yr kaxyw. Tā na ka prem hkōt amnhĩ xunhw̄y nhūm ixpānhā Tirtūm kapēr o mē ahkre ho mē pa xw̄ynh kw̄ȳjaja mē aw̄yr mra nē mē amā kapēr jarēnh jatur xām kurē. Nē hprĩ hā ho mē ajahkre ho ri mē akōt pa. Te ho mē kot ixkre krax nh̄ipēx pyrāk o mē anh̄ipēx.

Nē kwa mē ate mē ahkre o mē apa xw̄ynhja kēr ka mē akatāt kōt mē ahkre mex rāhā ho ri mē hkōt apa.

¹¹ Nē Jejus Kris tapxipix na pu htem hkōt amnhĩ xunhw̄y nhūm mē panē mē pah̄te amnhĩ tomnuj o hapēx. Jakamā te kēp k̄ypē ixkre nh̄imōk ã nōr xà maaita pyrāk.

¹² Nē na htem tōhā ixkre nh̄ipēx kaxyw nē p̄i ht̄yx jakā nē ho hipēx nhūm kritpēm mē kām mex ry nē kuhē. No na htem tōhā nojarēt kām ixkre hā apē nē p̄i rerek o hipēx nhūm mē kām mex ry hkēt nē. Koja rôr nhyre hw̄yr mra nē mē kēp hapōk nē homnu. Ja pyrā nē na hte Tirtūm kapēr o mē ahkre ho ri mē pa xw̄ynh kw̄ȳjaja te mē kot katāt kōt p̄i ht̄yx o ixkre nh̄ipēxta pyrā nē

katàt kòt mē ahkre ho ri mē hkòt pa. No nhūm mē hkwyjaja axtem nē te mē kot pī rerek o ixkre nhīpēxta pyrāk o amnhī nhīpēx nē htýx ri Tirtūm kapēr kwým ri tanhmā mē ahkre hto ho pa. Jao hkwyým ri amnhī nhīpēx rāhā ho ri pa.

¹³ Nē koja mēhō pī htýx pix o amnhīm ōrkwý nhīpēx hāmri nhūm mēmo arīgro hā tanhmā amnhī to nē kēp pôr. No ām hā pōja pix xēt pa nhūm kām hikwý xā nē ōkwa ēja arī piitā mex nhūm ixkre hpām axte hā pô janhōr o nyw. No koja pī rerek o hipēx nhūm mēmo arīgro hā kēp pôr hāmri nē piitā kēp kaxār pa. Ja pyrā nē koja nhýrmā Krisja akupýn mē pahwýr wrý hāmri nē mē pahte kām tanhmā amnhī nhīpēx to ho papaja piitā hā mē pahpumunh kòt tanhmā mē pajarēnh to. Koja mē pahkwýjaja mē pahte mē kot pī htýx o ixkre nhīpēxta pyrā nē Tirtūm mā mē pahte amnhī nhīpēx mex o mē papa xwýnhjē xāpēnh pumu nē mē pahte amnhī to mex xwýnh ā mē pajarē. Hāmri nē hpānhā mē kot pī rerek o ixkre nhīpēxta pyrā nē mē kot kām amnhī nhīpēx mex kēt xwýnhjē pumu nē mē kot amnhī to mex kēt xwýnh hā mē harē.

¹⁴ Nē pī htýxja na hte tanhmā amnhī to nē hpōr no ām arī mex nē kuhē nhūm mē piitā arī mex ā omu. Ja pyrā nē koja Krisja mē kot kām tanhmā amnhī nhīpēx mex to ho mē pa xwýnhjē pumu nē mē kot tanhmā kām amnhī nhīpēx to hpānhā mē kām amnhīre nhūm mē piitā mē kot amnhī to mex ā mē omu. ¹⁵ No pī rerekja na hte pôr nē kaxār pa. Ja pyrā nē mē kot Kris mā amnhī nhīpēx mex hkēt xwýnhjaja koja Tirtūm mē kām amnhīrer kēt nē. Nom arī mē kēp hkra jakamā koja mē arī kuri htír tūm nē pa. No ām mē kot Tirtūm mā amnhī nhīpēx mex kēt jakamā koja mē hkwyjē hkīnh ā amnhīm mēmoj mex kwý jamýnh kēt nē. Te mēhō nhōrkwý kēp hpōr nhūm mē hkukrēx kwý jamýnh kēt nē ý kamā kurūm hapōx pyrāk.

¹⁶⁻¹⁷ E pa mē amā mēmoj jarē. Ra mē ate mar tā mān ka mē ra tanhmā amnhī to nē hā ano hkēt rý ko. Nā te mē pahpē Tirtūm nhōrkwý pyrāk. Tirtūm nhōrkwýja ō na. Tā mē pahpē hkra nhūm Karō kot mē pakaxwýnh mā gjēx jakamā te mē pahpē ōrkwý pyrāk. Jakamā mē kot kapēr kwým ri mē ajahkre o ri mē pa xwýnhjaja te mē kot Tirtūm nhōrkwý grānh xwýnh pyrāk. Koja mē nhýrmā amnhī xā htýx kamā hamak o pa.

Mē pahte amnhī to jarkrar kēt ā mē pamā karō

Wam Korit 1.10-25

¹⁸ Nē kot kaj mē atō axāhpumunh týx o amnhī to jarkrar o ri apa japēr. Kwa mē jam anhūre nē axte ri ā amnhī nhīpēx anhýr kēt nē. Nē te mē ate amnhī nē axāhpumunh týx xāja nhām rēnh par pyrāk o amnhī nhīpēx. Mē paxāhpumunh xāja pika kamā mē āhpumunh pix jakamā kēr ka mē te amnhī nē nhām rēnh pyrā nē hpānhā Tirtūm xāhpumunh xā hkòt pix mā amnhī nhīpēx o ri apa. ¹⁹ No pika kamā mē āhpumunh xwýnhjaja Tirtūm noo mā te mē hkrā pipānh nē htýx ri pata pyrāk. Tirtūm kapēr ā kagā htūm kot mē harēnh kot: Pika ja kamā mē āhpumunh týx ā mē kot amnhī to jarkrar xwýnhjaja Tirtūm noo mā te mē kot amnhī to hēx o pa pyrāk. Anē.

²⁰ Nē mēānēn mē harēnh kot:

Mē kot amnhī xāhpumunh týx ā amnhī to jarkrar o ri mē pa xwýnhjaja na hte Tirtūm mē omu nē mē kot ā amnhī jarēnh anhýr kaprý hā mē harē. Anē.

²¹⁻²² Jakamā kwa kēr ka mē axte mē apē ixkwý rý mē apē Apor kwý hā amnhī jarēnh o ri apa hkēt nē. Mē apē wa ixkwý hkēt kēnā. Nē mē apē nhām mēhō hkwy hkēt. Mē pahpiitā mē pahpē Kris kwý na pu mē.

Nē kot puj mē nhỹrmā pahtyk tã akupỹm pahtĩr nē Tĩrtũm mē Jejus wa kuri pamex nē pahtĩr tũm nē ri papa. Jakamā kwa mē tee ri amnhĩ kukamā ajamaxpēr kēt nē.

Nē jarāhā mẽmoj piitā mẽ panhõõ. Nē kormā mẽmoj kot amnhĩrit kēt xwỹnhjaja haxwỹja mẽ panhõ na. Ām mẽmoj piitā mẽ panhõ jakamā te mẽ pahpē mẽmoj piitā mẽõ pahi pyrāk. ²³ No mẽ papajaja axtem Kris kēp mẽ panhõ Pahihti. Nē Tĩrtũm kēp Kris nhõ Pahihti.

4

Tĩrtũm pix kot tanhmā mẽ pajarēnh to xwỹnh ā harēnh Eprēw 13.17

¹ Nē mẽ pajaja mẽ ixpē mẽ anhõ pahi hkēt. Ām mẽ ixte Kris mã tanhmā amnhĩ nhĩpēx to ho ixpa xwỹnh pix jakamā Tĩrtũm kormā kapēr kwỹ ho amnhĩrit kēta na pa htem mẽ amā ho amnhĩrit o ri mẽ akõt ixpa. Ja kaxyw na pre mẽ ixunhwỹ. ² Na pre Kris tanhmā mẽ inhmā kapēr to nē mẽ inhmā: —E kēr ka mẽ ixkapēr pix o mǎn mẽ ahkre ho ri mẽ hkõt apa. Anē.

³⁻⁴ Kumā pix mã ixte amnhĩ nhĩpēx o ri ixpa jakamā koja tapxipix ixte kām amnhĩ nhĩpēx ā ixpumunh kõt tanhmā ijarēnh to. Ixte kām amnhĩ nhĩpēx mex ā ijarē rỹ ixte kām amnhĩ nhĩpēx mex kēt ā ijarē. Ām tapxipix koja tanhmā ijarēnh to. No koja nhām mẽhõ rỹ mẽ atõ ā ijarēnh anē pa ama nē ām ama. Rỹ papam tanhmā kām ixte amnhĩ nhĩpēx mex to hā kām amnhĩ jarēnh japēr hāmri nē ām ixtỹx kām ā amnhĩ nhĩpēx anhỹr ā amnhĩ jarēnh kaprỹ. Pahihti Kris pix kot hprĩ hā mẽ pahte amnhĩ nhĩpēx kõt pahpumunh jakamā tapxipix koja tanhmā mẽ pajarēnh to.

⁵ Jakamā kwa kēr ka mẽ ri mẽ kot Tĩrtũm mã tanhmā amnhĩ nhĩpēx to hā mẽ omunh xā hkõt tanhmā mẽ harēnh to hkēt nē. Koja nhỹrmā Pahihti Krisja akupỹn mẽ pahwỹr wrỹ nē rĩ tām tanhmā mẽ pahte amnhĩ nhĩpēx to hā mẽ pahpumunh xā hkõt tanhmā mẽ pajarēnh to. Nē mẽ kot hpimxur pē tanhmā amnhĩ tomnuj to ho mẽ pa xwỹnhjaja nhũm mẽ piitā mẽ noo mã mẽ kām ja ho amnhĩrit nhũm mẽ ja hā mẽ omu. Nē mẽ pahpiitā mẽ pajamaxpēr xā ho amnhĩrit nhũm mẽ piitā hprĩ hā ja hā axpēn pumu. Hāmri nhũm Tĩrtũm rĩ kormā mẽ pahte kām tanhmā amnhĩ nhĩpēx mex to ho pa xwỹnhjē jarē.

⁶ E Jejus kõt ixkwỹjaja. Nà na pa ā mẽ amā Apor mẽ wa amnhĩ jarēnh anē. Mē ate inhmar nē Tĩrtũm kapēr ā kagā hkõt tanhmā wa ijarēnh to kaxyw. Kot kaj mẽ ā amnhĩ nhĩpēx anē hāmri nē ahpỹnhā tanhmā mẽ ixte Kris kapēr jarēnh xwỹnhjē jarēnh to hkēt nē. Nē axpēn mã mẽ ijarēnh o:

—Nà tām kot Kris kapēr jarēnh mex o kot hkwỹjē jakrenh jakamā kot paj hkõt pix mã mǎn ri ixpa.

Anhỹr o axpēn mã mẽ ixtõ jarēnh kēt nē. Kot kaj mẽ ā mẽ ixtõ jarēnh anē nē te mẽ ixtõ jarkrar pyrāk o amnhĩ nhĩpēx. ⁷ Kwa mẽhõ na pre mẽ amā tanhmā ri mẽ ijarēnh to ka mẽ mar xā hkõt ā mẽ ijarēnh anē? Nē mẽ ixkapēr mex ā mẽ ixkwỹjē jarē nē mẽ ixkapēr mex kēt ā mẽ ixkwỹjē jarē. Nà na ka mẽ ām amnhĩ krā hkõt ā mẽ ijarēnh anē nom Kris xāhpumunh xā ho ā mẽ ijarēnh anhỹr kēt nē. Ām mẽ ixte Tĩrtũm kapēr o mẽ ajahkre xwỹnhjaja na pa prem mẽ amā mẽmoj jarē ka mẽ ama nē mẽ inhỹ hā hkõt axāhpumunh mex nē. No amnhĩ krā hkõt mẽ axāhpumunh kēt kēnā kot ka kēt mẽ ā ahpỹnhā tanhmā mẽ ixtõ jarkrar anhỹr to ho ri apa.

⁸ Te mẽ ate Apor mẽ wa ixrom Tĩrtũm kapēr mar par nē hkõt amnhĩ nhĩpēx mex pyrāk. Te wa ixrom mẽ ate Jejus nhĩhkõ hā mẽ ho amnhĩptār pyrāk.

Hêxta waa nê. Kop apu âm hāmri mē ate îhkô hā mē ho amnhîptâr ronhÿx pa ijaxwÿja mē apyrâ nê â amnhî nhîpêx anê. Hāmri nê ixkînh tÿx kumrêx.
⁹ Nom ja kot anhÿr kêt.

Jejus nhÿ hā mē ahkre xwÿnhjê jarênh
Sîkûn Korîit 4.8-10; Eprêw 12.1

Nê mē ixpê Jejus nhÿ hā mē ajahkre ho mē ixpa xwÿnhjaja te Tîrtûmja axtem tanhmā mē inhîpêx to pyrâk pa mē inhmex kêt nê ixpa. Te mē ixte gyw kām amnhî rênh nhûm mē kot mē ixkamā ôkre kahak pyrâk o na htem mē inhîpêx. Jakamā na hte mē hkwyjaja mē ixpumu nê mē ixkapêr ma nê âm mē inhma nê axpên mā mē ijarênh o:

—Tk. Kot mē ahkreja mexti hā. Kwa pu mē himex ri.

Anhÿr jakamā te ra mē ixtyk nê mē inhîkwÿ nhûm mē piitâ mē ixtâ htu nê mē ixpununh nê ma pa pyrâk o amnhî nhîpêx. Jakamā na htem mē ixte mē ahkre ma nê âm kuma nê ma pa. Nom Tîrtûm kapêr o mē wrÿk xwÿnhjaja na htem ja hā mē pahpumu nê axpên mā mē pajarênh o:

—Kwa mē kot Jejus â mē hipêx kati htâ nhûm mē arî hkôt amnhî nhîpêx mex nê aa hkaga hkêt nê. Hêxta waa nê. Nâ âm hāmri na htem â amnhî nhîpêx anhÿr o pa. Anê.

¹⁰ Na hte mē kot mē ixkapêr mar xwÿnh kwÿjaja kām mē ixkînh kêt nê tanhmā mē ixto kapêr punuj to. No mē kajaja nhûm mē â mē ato kapêr anhÿr kêt nê. Na htem mē ixkrâ pipânh â mē ijarê no mē kajaja nhûm mē Kris nhÿ hā mē axâhpumunh tÿx â mē ajarê. Nê mē ixte Tîrtûm kapêr kôt amnhî nhîpêx mex kêt â mē ijarê no mē kajaja na htem Tîrtûm kôt mē ate amnhî nhîpêx mex â mē ajarê. Nê mē kot mē ixkamā ôkre kahak tÿx tâ mē akamā ôkre kahak kêt nê mē kām mē akapêr mar prâm nê. ¹¹ Na pa htem arî Kris â ixpunuj nê ixpa. Nê mē inhma prâm nê mē inhma kô nê ri ixpa. Nê mē ixê pikaxônhre nê ri ixpa. Nhûm htem Kris â mē ixtak rûnh nê. Pa mē inhôrkwyî hkêt nê nhâm ri ixpa nê nhâm ri ixpa. Na pa htem arî â amnhî nhîpêx anhÿr o ri ixpa. ¹²⁻¹³ Nê ixâpkur xâ kaxyw ixâpênh rûnh o ri ixpa. Nhûm hte mē kām Jejus prâm kêt xwÿnhjaja mē ijapry ho pa htâ pa mē amnhî kurom mē kām ixkapêr mex nê mē kām:

—E kê Tîrtûm mē ato mex nê ka mē amex nê apa. Anê.

Nê mē kot mē inhîpêx kati htâ pa htem mē kutâ amnhî to htÿx nê arî mē hkôt ixpa. Na htem te mē kot ahpunuj nhîpêx pyrâk o mē inhîpêx nê mē ixwÿr mrar kêt nê. Â na htem mē ixte Jejus nhÿ hā mē ahkre o mē ixpa xwÿnhjê nhîpêx anê.

Pawre te kêp mē hpâm pyrâk â kot amnhî jarênh
Wam Tesarôn 2.11-12

¹⁴⁻¹⁵ E Kris kôt ixkwÿjaja. Na pa â mē amâ kagâ nê mēnh anê. Nom mē ate inhmar nê amnhî kamâ apijaam kaxyw kêt. Inhmâ mē ajapê jakamâ na pa â mē amâ ixkapêr nê hā kagâ nê mēnh anê. Na mē ra ohtô nê ixpânhâ mē awÿr pa nê mē amâ Tîrtûm kapêr o mē ajahkre. Nom ixkumrêx na pa pre mē amâ kapêr jarê ka prem inhma nê Kris hkôt amnhî xunhwÿ nê amnhî kaxyw hkôt ajamaxpêr tÿx nê. Jakamâ paxipix te ixpê mē apâm nhûm te mē apê ixkra pyrâk. ¹⁶ Jakamâ kwa mē ixte amnhî nhîpêx kôt ixpumu nê ixkôt mân kêt mē amnhî nhîpêx o ri apa. ¹⁷ Â mē ate amnhî nhîpêx anhÿr kaxyw na pa pre ijamaxpêr nê ma mē awÿr Ximotre mē. Haxwÿja Kris kôt te kêp ixkra pyrâk. Nê inhma hapêê. Na hte jar Kris mē tanhmā amnhî nhîpêx mex to ho

pa. Tã pa pre mẽ awÿr kumẽ. Koja ma mẽ awÿr mō mẽ pōj mẽ mẽ amã Kris kapẽr jarẽnh o ri mẽ akõt pa. Nẽ mẽ amã tanhmã ijarẽnh to mẽ mẽ amã:

—Nã Pawre na hte Jejus Kris jamaxpẽr kõt hamaxpẽr o pa. Nẽ kot amnhĩ nhĩpẽx kõt amnhĩ nhĩpẽx o pa. Nẽ krĩ piitã hkõt mẽ kot urak mẽ ã amnhĩ nhĩpẽx o pa anhyr kaxyw mẽ ahkre mex o pa. Anẽ.

¹⁸ Nẽ na xep mẽ akwÿjaja te ra àhpumunh tÿx pyrà mẽ tanhmã ijarẽnh to mẽ ijarẽnh o:

—Pawreja akupÿn mẽ pahwÿr mōr ã amnhĩ jarẽnh tã koja akupÿn mōr kêt mẽ kãm ga. Æm kapẽr kati xwÿnh na.

¹⁹ Anhyr ã ijarẽnh tã koja Tirtũm kãm tokyx ma mẽ awÿr inhmōr prãm hã kot pa ma mẽ awÿr inhmōr kurẽ kumrẽx. Hãmri mẽ pōj mẽ ixprĩ hã ã mẽ kot ixto kapẽr anhyr xwÿnhhtajẽ pumu. Nẽ mẽhō kot ã mẽ kãm ijarẽnh anhyr xwÿnhhta ã ahkukja. ²⁰ Tirtũm krajaja na htem hkõt pix mã amnhĩ nhĩpẽx jakamã na htem hkõt tanhmã amnhĩ nhĩpẽx to hã mẽ omu mẽ rĩ kormã kęp hkra hã mẽ harẽ. Tã kot paj nhÿrmã mẽ awÿr pōj mẽ ã ixto kapẽr anhyr xwÿnhjẽ pumu mẽ ixprĩ hã mẽ kot amnhĩ nhĩpẽx ã mẽ omu mẽ rĩ kormã tanhmã mẽ harẽnh to. Jao Tirtũm nhÿ hã mẽ kot mẽ ajahkre hã mẽ omu rÿ amnhĩ krã hkõt mẽ kot mẽ ajahkre hã mẽ omu mẽ rĩ kormã tanhmã mẽ harẽnh to. ²¹ Jakamã kwa mẽ tokyx ixkutẽp tãm amnhĩ nhĩpẽx o ri apa. Kẽr pa mō mẽ mẽ awÿr pōj mẽ mẽ ate tãm amnhĩ nhĩpẽx ã mẽ apumu mẽ ixkĩnh mẽ. Nẽ mẽmoj tã mẽ amã ixakjẽr kêt mẽ. Nẽ mẽ amã ixkapẽr mex pix o ri mẽ amã ixkapẽr. Te mẽ hipẽxã kot hkrajẽ mã kapẽr mex pyràk o mẽ amã ixkapẽr mex mẽ. Hãmri pu mẽ axpẽn pumu mẽ pahkĩnh mẽ.

5

Mẽhō kot tanhmã amnhĩ tomnuj to hã harẽnh

Sikũn Korit̄ 2.5-11

¹ Nẽ kwa na pa pre tee ri mẽ anhĩõja jarẽnh ma mẽ ixkaprĩ htÿx mẽ. Na xep hte amnhĩ tomnuj tÿx pẽ nã puro hã hpijaam kêt o pa. Kwa mẽ pahpẽ Kris kwÿjaja mẽ pahte ã amnhĩ nhĩpẽx anhyr kêt nhũm mẽ kot Kris kõt amnhĩ xunhwÿr kêt xwÿnhjaja haxwÿja ã amnhĩ nhĩpẽx anhyr kêt tã nhũm ra mẽ anhĩõja kot Kris kõt amnhĩ xãm tã ã amnhĩ nhĩpẽx anẽ. Kwa ja omnuj tÿx kumrẽx. ² Na xep ri ã amnhĩ nhĩpẽx anhyr o pa ka mẽ ja hã omu mẽ ã omu mẽ mẽ ã tanhmã kãm mẽ hkêt mẽ. Amarĩ hã omunh o ri hkõt apa. Mẽ ate Tirtũm kõt axàhpumunh tÿx ã amnhĩ jarẽnh tã no ãm ja hã omu mẽ ãm hã omu mẽ ãm tanhmã kãm mẽ hkêt mẽ. Kwa nã. Mẽ tee ri kot ã amnhĩ nhĩpẽx anhyrja ã omu mẽ akaprĩ mẽ hkêt wehe. Nẽ mẽ tokyx amnhĩ mẽ hano kê mẽ akõt Tirtũm mã amnhĩ jarẽnh xã hã ixkre hwÿr axte mrrar kêt mẽ.

³⁻⁵ Ixte mẽ apẽ awry htã ã kot amnhĩ nhĩpẽx anhyr ã harẽnh ma mẽ hkukamã tanhmã ijamaxpẽr to. Nã ra ixte mẽ awÿr ixpōx ronhÿx pa mẽ ato akuprõ. Pahihti Jejus nhÿ hã mẽ ato akuprõ mẽ mẽ amã kot amnhĩ tomnuj xwÿnhhta jarẽ mẽ mẽ anẽ hanor kurẽ kumrẽx. Jakamã e kër ka mẽ mãmri ã amnhĩ mẽ hipẽx anẽ. Mẽ panhõ Pahihti Jejus nhÿ hã amnhĩ mẽ hano mẽ te Satanasti mã rer pyràk kê tee ri ja hã amnhĩ pumu mẽ tokyx kãm urer japẽr. Hãmri mẽ akupÿm tãm amnhĩ nhĩpẽx. Kẽ nhÿrmã Pahihti akupÿn mẽ pahwÿr wrÿ nhũm ma mẽ pahkõt õ krĩ hwÿr api.

⁶ Mẽ ate Tirtũm kapẽr jarẽnh mar mex ã amnhĩ jarẽnh tã kormã amnhĩ mẽ ã kot amnhĩ nhĩpẽx anhyr xwÿnhhta janor kêt mẽ. Kwa mẽ tokyx amnhĩ mẽ hano. Na htem pãwti nhĩpẽx kaxyw mẽ kamã kot ho hikot xã ho hkryre mẽ

kamã kurê nê gaa nê rî ho piitã hikot pa. Ja pyrã nê kot ka mê amnhî nê kot amnhî tomnuj xwÿnh̄ta janor kêt nê hãmri nê gaa nê ra urak nê apiitã ã amnhî nhîpêx anhÿr o ri apa.

⁷ Kwa mê tokyx amnhî nê hano. Kêr ka mê arî amnhî to mex pix o ri axpên kôt apa nê tãm ri amnhî nhîpêx o ri axpên kôt apa. Na pre ra Jejus Kris mê pahte amnhî to mex o papa kaxyw mê panê ty. Mê pahpiitã mê panê ty. ⁸ Jakamã na pu htem ãm amnhî to mex pix o ri papa. Nê tãm amnhî nhîpêx o ri papa. Jao tanhmã amnhî tomnuj to ho ri papa hkêt nê.

⁹ Nê wam ixte mê awÿr kagã nê mênhta kamã na pa pre mê amã:

—Kêr ka mê nhãm mê kot mênijê kamã hpijaãm kêt o mê pa xwÿnhjê hkôt ri apa hkêt nê. ãm ri mê hkãx ã apa.

Anhÿr o mê amã hã karõ. ¹⁰⁻¹¹ Nom na pa pre mê piitã ã mê nê mê akurê anhÿr kêt nê. ãm mê kêp Kris kwÿ hã amnhî jarênh tã ã ri amnhî tomnuj anhÿr xwÿnh̄ pixjaja na pa pre mê nê mê akurê. Koja mêhõ kêp Kris kôt mê pahtõ rÿ mê pahtõx ã amnhî jarênh tã mê kamã hpijaãm kêt o ri pa ka mê ja hã omu nê hkôt ri apa hkêt kurê kumrêx.

Nê mê kãm nhãm mê hkukrêx kÿnh o kãm ho õ hprãm o ri mê pa xwÿnhjaja.

Nê sãnti kutã hkõn krã ho rôrõk nê hkrî nê kãm mex ã harênh o ri mê pa xwÿnhjaja.

Nê mê kot axpên to kapêr punuj o ri mê pa xwÿnhjaja.

Nê mê pipãnh o ri mê pa xwÿnhjaja.

Nê axpên pê ri mê àhkÿnh o mê pa xwÿnhjaja.

Koja mêhõ kêp Kris kwÿ hã amnhî jarênh tã ã amnhî nhîpêx anhÿr o ri pa ka mê nê ja hã mê omu nê hkôt ri apa hkêt kumrêx. Nê mê kutã axapkur kêt nê. ãm mê hkãx ã ri mra.

No mê kêp Kris kwÿ hkêt xwÿnhjê nê na pa pre ã mê akurê anhÿr kêt nê. Mê piitã ã mê kot amnhî nhîpêx anhÿr o pa kênã. Na htem axpên kãm hpijaãm kêt o ri pa.

Nê mê kãm axpên kukrêx kÿnh o kãm ho õ hprãm o ri pa.

Nê sãnti kutã hkõn krã ho rôrõk nê hkrî nê kãm amnhî jagrer pê amnhî to hwÿr o pa.

Nê mê axpên pê àhkÿnh pix o pa.

Kris kwÿ hkêt xwÿnhjaja na htem ã amnhî nhîpêx anhÿr o pa. Tã tanhmã kot ka wem amnhî to nê mê hkãx ã ri apa? Mê piitã ã mê kot amnhî nhîpêx anhÿr kênã. Kot puj mê nhÿrmã Tirtûm nhõ krî mex wÿr api nê rî kormã mê hkãx ã ri papa.

¹²⁻¹³ Nê mê kêp Kris kwÿ hkêt xwÿnhjaja na pa hte mê kot amnhî tomnuj ã mê omu nê ãm mê omu nê tanhmã hã mê kãm nê hkêt nê. Tirtûm tãm koja nhÿrmã ja hã tanhmã mê hipêx to. No koja Kris kôt mê pahtõ rÿ mê pahtõxjê hõ tanhmã amnhî tomnuj to ho pa pu mê pahtõ ja hã omu nê nê tanhmã kãm pakapêr to kurê kumrêx. Tirtûm kapêr ã kagã htûm kot ja jarênh kot:

Kêr ka mê amnhî nê Kris kôt akwÿjê hõ kot tanhmã amnhî tomnuj to ho pa xwÿnhjê jano. ã harênh kot anhÿr.

6

*Mê pahte Kris kwÿjê ho pakapêr kêt
Matêwre 5.38-40*

¹ Nē na ka xep htem Kris kôt atō rỳ atōxjê hō mē ka wa tanhmā axpēn tomnuj to nē axtem nē juisti hwỳr axpēn to mra. Mē apyrà nē kēp Kris kwỳ hkēt tā ka htem ma hwỳr amnhī to mra nhūm war axpēn tā war ama nē tanhmā war ajarēnh to. Kwa mon ka htem axtem nē ā Kris kwỳ hkēt xwỳnhjê hwỳr mē amnhī to amrar anē? Kēt mē Kris kôt anhīō hwỳr mǎn kēt mē amnhī to mra nē kumǎ mǎn amnhī jarē kē axpēn tā war ama nē axpēn tā tanhmā war amā kapēr to.

² Ra mē ate ja mar tỳx tā hkôt amnhī nhīpēx kēt nē. Mēmoj ām grire htā ka wa tokyx akupỳm hā tām axpēn xām kēt nē. Rỳ Kris kôt war atōjê hō hwỳr wa amnhī to atēm nhūm akupỳm tām axpēn tā war axām kēt nē. Ām axtem nē mē kēp Kris kôt mē atō hkēt xwỳnhjê hwỳr amnhī to mra. Kwa mē ā amnhī nhīpēx anhỳr kēt nē. Mē pahpē Kris kwỳjaja kot puj mē nhỳrmā Kris nhīkhō hā mē kēp hkwȳ hkēt xwỳnhjê tanhmā mē harēnh to. ³ Nē Tirtūm kapēr o mē wryk xwỳnhjaja kot puj mē mǎānēn nhỳrmā tanhmā mē harēnh to ho pahkrī. Jakamā kwa mǎmrī ā mē pahte amnhī nhīpēx anhỳrja kukamā akupỳm tanhmā axpēn xunhwỳr to ho apa. Mēmoj tā mē atōjê hō wa kot tanhmā axpēn to hā wa omu nē tokyx akupỳm axpēn tā wa kām akapēr kē wa tokyx akupỳm tām axpēn nhīpēx. Ā mē kot axpēn nhīpēx anhỳr o paja na kēt mex. ⁴ No na ka xep htem arī Kris kôt mē akwỳ hkēt xwỳnhjê hwỳr axpēn to mra nē mē kām amnhī jarē. Kwa mē ri ā amnhī nhīpēx anhỳr kēt nē. ⁵ Mē tokyx tee ri ja hā amnhī pumu nē amnhī kamā apijaām kēt wehe. Xà mē akamā Kris kôt mē atōjê hō pixire nē kot tām akupỳm mē axunhwỳr kaxyw amrakati kumrēx? ⁶ Na ka xep htem mēmoj tā axpu. Kris kôt mē atōjê hō mē mēmoj tā axpu nē ra mē kēp Kris kwỳ hkēt xwỳnhjê hwỳr amnhī to mra. Kot tām akupỳm mē unhwỳr xwỳnhjê hwỳr amnhī to mra.

⁷ Mē apijapu ho apa jakamā na ka mē amnhī tomnuj tỳx nē. Hāmri nē te mē apē Kris kwỳ hkēt xwỳnhjê pyrà nē mē hwỳr amnhī to mra. Kwa kwār Kris kôt anhīō mǎmrī apē ahkī rỳ tanhmā anhīpēx to. Ka mē ām amnhī tā omu kē tapxipix tanhmā amnhī tomnuj to. ⁸ Ja mex tā mē ate ā amnhī nhīpēx anhỳr kēt. Na ka htem axpēn pē ahkī. Mē ate Kris kôt axpēn to atō nē atōx tā axtem nē ā axpēn nhīpēx anē. Te mē apijaām kēt pyrāk o amnhī nhīpēx o ri apa. ⁹⁻¹⁰ Mē kot tanhmā amnhī tomnuj to xwỳnhjaja koja mē nhỳrmā ma Tirtūm nhō krī mex wỳr àpir kēt nē. Ra mē ate ja jarēnh mar tỳx.

Mēmyjê hō kot nhām mēnijê hō ho amnhī kati xwỳnhjaja.

Nē mēnijê hō kot nhām mēmyjê hō ho amnhī kati xwỳnhjaja.

Nē mēnijaja axtem nē mē kot amnhīō ho mjēn o ri mē pa xwỳnhjaja.

Nē mēmyjaja haxwỳja axtem nē amnhīō ho hprō ho ri mē pa xwỳnhjaja.

Nē mē àhkīnh o ri mē pa xwỳnhjaja.

Nē mē kām nhām mē hkukrēx kīnh o kām ho ō hprām o ri mē pa xwỳnhjaja.

Nē ri mē pipānh o mē pa xwỳnhjaja.

Nē ri axpēn to kapēr punuj o mē pa xwỳnhjaja.

Nē mē kot amnhī to sānti hwỳr o mē pa xwỳnhjaja.

Ā mē kot amnhī nhīpēx anhỳr xwỳnhjê piitā koja mē Tirtūm nhō krī hwỳr àpir kēt nē.

¹¹ Kormā mē ate Kris kôt amnhī xunhwỳr kēt ri na ka pre mē akwỳjaja ā amnhī nhīpēx anhỳr o ri apa. Tā amnhī kaxyw Jejus kôt ajamaxpēr nē hkôt amnhī xunhwỳ. Hāmri nhūm Tirtūm Karō mē Pahihti Jejus Krisja wa mē anē mē ate amnhī tomnuj piitā rēnh pa nē mē apē Tirtūm kra hā mē axunhwỳ nē amnhīm mē ate amnhī to mex xwỳnhjê ā mē ajarē.

Mē pahte tām amnhī nhīpêx o papa hā mē pamā karō

Matêwre 5.27; Rômân 12.1-2; Epes 5.3; Korosê 3.5; Wam Tesarôn 4.1-8

¹² Nē na ka hte mē akwýjaja amnhī jarēnh o:

—Nà na pa hte pa inhmā tanhmā amnhī nhīpêx to hprām xà hkôt amnhī krā hkôt amnhī nhīpêx o ri ixpa. Anē.

Mē ate ā amnhī jarēnh anhūr tā no ām mē ate amnhī jarēnhja mex kêt. Mēmoj piitā mē pamā mex kêt. Na pu htem pamā hprām xà hkôt mēmoj to anē nē gaa nē ra ho amnhī pyrā nē ho anhūr pix o papa. Nē gaa nē kām panhūrer kêt kumrêx. Jao ra pahpipānh pix o ri papa. Rý paxêx pix o ri papa. Rý paxàhkīnh pix o ri papa. Jakamā kēr pu mē pamā tanhmā amnhī nhīpêx to hprām xà hkôt tanhmā amnhī nhīpêx to ho papa hkêt nē. Ām amnhī mē amnhī kaxyw Jejus mā pajamaxpēr pix nē.

¹³ Nē na htem amnhī jarēnh o:

—Nà kot paj inhmā prām nē māmri mēmoj ku. Nē inhmā nhām mēhō kamā xpijaam kêt prām nē māmri ā amnhī nhīpêx anē. Ja tanhmā inhmā kute hkêt. Anē.

Tā koja nhūr mā Tirtūm mē panhīja o hapêx pa. Na pre mē pahte nhām mē kamā pahpijaam kêt o papa kaxyw mē panhīpêx kêt nē. Ām mē pahte mē panhīpêx xwýnh maatija mā tanhmā amnhī nhīpêx mex to ho papa pix kaxyw na pre mē panhīpêx.

¹⁴ Nē na pre Pahihtija ty nhūm Tirtūm akupým ho htír. Ja pyrā nē kot puj mē nhūr mā mē pajaxwýja ty nhūm akupým mē pahto mē pahťír. Ja kaxyw tapxipix pix na àhpumunh týx o àhpumunh týx. ¹⁵ Na pu htem Kris kôt amnhī xunhwýr kôt pahpê hkwy nē te pahpê í pyrāk. Jakamā kwa mē ja hā anohtýx nē axte nhām mē hkuprýjê hwýr amrar nē mē ho amnhīkati hkêt nē. Tirtūm kēp ja omnuj. Te mē pahte Kris nhī pyrāk jakamā kot kaj mē ā amnhī nhīpêx anhūr jao te Kris tām kot ā amnhī nhīpêx anhūr o pa pyrāk. Kwa ja mex kêt. Xà kot we Krisja ā amnhī nhīpêx anē? Nà koja ā amnhī nhīpêx anhūr kêt nē.

¹⁶ Tirtūm kapēr ā kagā htūm kot ja jarēnh kot:

Kot ka mē atō mēnijē hō ho aprō nhūm kēp aprō kumrêx. Hāmri nē te ra war atipxi pyrāk o axpēn nhīpêx. Anē.

Ā kot aprō mē wa ajarēnh anhūr jakamā kwa kēr ka mē atýx ri nhām mē hkuprýjê hwýr apa hkêt nē. Kot kaj mē ā amnhī nhīpêx anē nē Tirtūm noo mā te ate aprō kuhpa hā hkuprýta o aprō pyrāk. Te wam aprōta kuhpa hā war atipxi pyrāk. ¹⁷ Na pu htem Pahihti Jejus Kris kôt amnhī xunhwý nhūm amnhī tā mē pahpumu nē mē pamā Karō gō nhūm mē pamā agjē. Pu mē ra Karōja kôt te ra Jejus mē wa pahtipxi nē ri papa pyrāk o axpēn nhīpêx. Jao Kris jamaxpēr mē mē pajamaxpērja te wa kot axpēn pyrāk. Nē Kris kot amnhī nhīpêx mē mē pahte amnhī nhīpêxja te kot axpēn pyrāk.

¹⁸ Jakamā kwa kēr ka mē amnhī prō pix tănopxar o ri apa. Nē mē anijaja amjén pix tănopxar o ri apa. No mē nhām mēmyjē ho amnhīkati ho ri apa hkêt nē. Nē mē amyjaja nhām mēnijē ho amnhīkati ho ri apa hkêt nē. Kot ka mē nhām mēmoj tanhmā omnuj kute ho anē no ām amnhī nhī homnu hkêt nē. Nom kot kaj mē nhām mēnijē ho amnhīkati rý nhām mēmyjē ho amnhīkati hāmri nē ra amnhī nhī homnu hpa. ¹⁹ Mē panhī kamā na hte Tirtūm Karō agjē nē kamā hkrī. Tirtūm na pre mē pahwýr kurē nhūm mē pahkarō mā agjē pu mē te mē pahpê ōrkwy pyrāk. Jakamā na pu htem amnhī krā hkôt pahťýx ri mēmoj tanhmā ho ho papa hkêt nē. Ām Tirtūm jamaxpēr xà hkôt pix mā na pu htem tanhmā mēmoj nhīpêx to ho papa. ²⁰ Na pre ra Jejus mē

pahte amnhĩ tomnuj pãnhã amnhĩrer kaxyw mẽ pahpiitã mẽ panê ty. Te htyk o amnhĩm mẽ pajaprôr pyrãk o mẽ panhĩpêx. Jakamã kwa kër pu mẽ ãm hkôt pix mã mãn ri amnhĩ nhĩpêx rãhã ho ri papa. Kê mẽ pahkwýjaja ja mã mẽ pahpumunh kôt Tirtũm mã mex o mex ã harênh o ri pa.

7

*Mẽ mjên mẽ mẽ hprô wa kot axpên to mex ã mẽ pamã karô
Epes 5.22; Korosê 3.18; Eprêw 13.4*

¹ Nê ota mẽ ate ixwýr kagã nê mẽnhta na pre ixwýr pôj pa omu. Nê kamã mẽ ate mẽ aprô mã ixkukjêr xwýnhhta pa kamã harê nê omu. Tã kot paj mẽ amã tanhmã harênh to ka mẽ inhma.

Nà kot ka mẽ amyjê hõ amã aprô hkêt nê ahte ri apa hprãm nê kam nê aprô hkêt apa. Ja tanhmã kute hkêt. Nom kër ka mẽ hkupryjê ho presija ho ri apa hkêt nê. ² Na htem tõhã kãm hprô hprãm kêt nê ri pa nê gaa nê mẽ hkupryjê hõ pumu rý mẽ kêp mẽ hprôjê hõ pumu nê kamã hpijaãm kêt o ri pa. Ja pymaj kër ka mẽ amyjaja mãmrĩ aprô nê mẽ anijaja mãmrĩ amjên.

³ Nê mẽ anijaja. Koja mẽ amjên akamã hkurê ka mẽ mãmrĩ kãm amnhĩ gõ kê mẽ anĩ. Nê mẽ amyjaja mããnên. Koja mẽ aprô mẽ akamã hkurê ka mẽ mãmrĩ mẽ anĩ. ⁴ ãm ka amã tanhmã amnhĩ nhĩpêx to hprãm xã hkôt pix mã amnhĩ nhĩpêx kêt nê. Mããnên amã aprô kot kãm tanhmã amnhĩ nhĩpêx to hprãm xã hkôt mããnên hkôt kãm amnhĩ nhĩpêx.

⁵ Nê kot kaj mẽ mẽmo arĩgro mã amã Tirtũm mã amnhĩ jarênh ryy hprãm japêr. Hãmri nê aprô mã:

—E kot puj jarãhã axpên to amnhĩkati hkêt nê. Kot puj ãm Tirtũm pix mã amnhĩ jarênh o amýkry. Anê.

Hãmri nê mãmrĩ ã amnhĩ nhĩpêx anê. No kwa kër ka mẽ ãm ja ho anhýr o apkati pixi nê kãm anhũre. Nhũm jãã ka mẽ amã axpên to amnhĩkati hprãm nê mãmrĩ tanhmã axpên nhĩpêx to. No kot kaj mẽ ã amnhĩ nhĩpêx anhýr kêt o mã atã apkati xohtõ nê gaa nê ra akurê xaj axtem nê Satanasti jamaxpêr o ajamaxpêr. Jao nhãm mẽhõ ni hwýr mra nê aprô kuhpa mã kamã akurê ho kamã apijaãm kêt. Rý nhũm mênijaja nhãm mẽmyjê hõ hwýr mra nê mjên kuhpa mã kamã hkurê ho war axpên kamã hpijaãm kêt.

⁶ E mẽ ate ja mã ixkukjêr jakamã na pa ã ixprĩ mã mẽ amã ja jarênh anê. Ka mẽ akwýjaja mã aprô hprãm nê mãmrĩ aprô nê ri apa. Nê mẽ akwýjaja mã aprô hprãm kêt nê mãmrĩ aprô hkêt nê ri apa. Nom kot pa paa mẽ amã mẽ aprô mã ixãmnhên kêt nê. Ka mẽ kam amnhĩ krã hkôt ajamaxpêr xã hkôt tanhmã amnhĩ nhĩpêx to. ⁷ Na pa hte ixprô hkêt nê ri ixpa nom inh mã ja mex pa hte ahte ixpa.

Mẽ mjên kêt nê mẽ hprô kêt xwýnhjê jarênh

Nê kormã mẽ aprô hkêt xwýnhjaja. Ka mẽ ixpyrà nê aprô hkêt nê ri apa ronhýx inh mã ja mex nê. Na hte mẽmy hkwyjaja hprô kêt nê ri pa nhũm Tirtũm ja mã omu nê tanhmã mẽ ho nhũm mẽ mex nê ri pa nê mênijê kamã hkurê ho mẽ kamã hpijaãm kêt o ri pa hkêt nê. No na hte mẽ hkwyjaja hprô hkêt nê ri pa nê gaa nê ra hkurê xaj mênijê kamã hpijaãm kêt. ã mẽ ate amnhĩ nhĩpêx anhýr pymaj kër ka mẽ amã aprô hprãm nê mãmrĩ aprô. Tirtũm mã ja mex kênã.

⁸ E mẽ aprô hkêt nê mẽ amjên kêt xwýnhjaja. Nê ra mẽ apê mẽ aprô htyk rý mẽ amjên htyk xwýnhjaja. Pa mẽ amã mẽmoj jarê. Nà kot kaj mẽ ixpyrà nê mẽ aprô hkêt nê ri apa rý mẽ amjên kêt nê ri apa nhũm ja inh mã mex nê.

⁹ No kot ka mē atō ra akurē japēr nē māmri aprō rý māmri amjēn. Ja määnēn tanhmā kute hkēt.

*Mē pahte axpēn kaga hkēt ā mē pamā karō
Matēwre 5.31, 19.3-9; Makre 10.2*

¹⁰ E kot paj hpānhā ra mē ate axpēn to amjēn nē axpēn to aprō xwýnhjē mā ixkapēr. Nom kot paj amnhī krā hkōt tanhmā ixkapēr to hkēt nē. Pahihti Jejus Kris kapēr xā hkōt kot paj mē amā ixkapēr. Jakamā e kēr ka mē anijaja mē amjēn kaga hkēt nē. ¹¹ Nom kot kaj mē tanhmā ajamaxpēr to nē hkaga japēr hāmri nē ahte ri apa nē axte nhām mēhō ho amjēn kēt nē. Rý tee ri amnhī kukamā ajamaxpēr nē māmri akupým amjēnta wýr tē nē akupým hkōt ri apa. No kēr ka mē axte nhām mēhō ho amjēn kēt nē.

Nē ra mē amyjaja kēr ka mē ajaxwýja ā amnhī nhīpēx anē nē mē aprō kaga hkēt nē. E kēr ka mē ā amnhī nhīpēx anhýr o ri apa.

¹² Nē mē ate ixwýr kagā mēnh kamā axpēn tā ixkukjēnta kot paj hpānhā mē amā harē. Na Pahihti Jejusja ja hā tanhmā inhmā nē hkēt nē. Ām amnhī krā hkōt kot paj mē amā tanhmā harēnh to ka mē inhma.

Ka mē amyjē hō ra Kris kōt amnhī xām nom nhūm aprō kormā hkōt amnhī xām kēt japēr. Nom koja kām arī ri akōt pa hprām ka hkaga hkēt nē. Kē arī ri akōt pa. ¹³ Nē mē anijaja. Ka mē ajaxwýja ra apē Kris kwý hā ri apa nhūm amjēn kēp hkwý hkēt tā arī ri akōt pa hprām nē arī ri akōt pa ka hkaga hkēt nē.

¹⁴ Kēp Kris kwý hkēt tā koja akōt Kris kwýjē hkōt ri pa. Rý mē aprō kēp Kris kwý hkēt tā koja akōt Kris kwýjē hkōt ri pa. Jao Tirtūm kapēr mar o pa nē gaa nē apyrā nē hkōt amnhī xām japēr. Nē mē akra kēp Kris kwý hkēt xwýnhjaja haxwýja mē akōt Kris kwýjē hkōt ri pa nē Tirtūm kapēr mar o pa nē gaa nē akōt Jejus kōt amnhī xunhwýr japēr.

¹⁵ Nom koja aprō kēp Kris kwý hkēt ā kām akaga hprām nē rī tām māmri akaga. Rý amjēn kēp Kris kwý hkēt ā kām akaga hprām nē rī tām māmri akaga. Kēr ka mē kot akaga nē tee ri kām tanhmā akapēr to hkēt nē. Kwār māmri akaga ka ahte ajamakētkati nē axāmnhix ri apa. Mē pajamakētkati nē mē pamex nē ri papaja na Tirtūm kām hprām.

¹⁶ No koja amjēn kēp Kris kwý hkēt tā kām mē akaga hprām kēt nē ka mē hkaga hkēt nē. Rý aprō kēp Kris kwý hkēt tā ka mē kam hkaga hkēt nē. Koja arī ate amnhī nhīpēx ā apumunh o ri akōt pa nē gaa nē rī apyrā nē Kris kōt amnhī xām japēr. ¹⁷ Jakamā kot ka mē aprō rý amjēn ra Kris kōt ahte amnhī xām. Hāmri nē wa arī ri axpēn kōt ri apa ho apa. Na pa hte krī piitā hkōt Jejus kōt mē pahkwýjē mā ā ixujarēnh anhýr o ri ixpa. Tā kēr ka mē ā amnhī nhīpēx anhýr o ri apa.

Kris kōt amnhī xunhwýr kēt ri tanhmā mē pakute hā mē pajarēnh

¹⁸ Ja pyrā nē kot kaj mē ra amy kwrýt kà jakār japēr. Tā ra Kris kōt amnhī xām nē arī arāhā ri apa. Rý amnhī jakār kēt rāhā hkōt amnhī xām japēr nē arī arāhā ri apa. Mo kaxyw kot ka kēt amnhī jakā? ¹⁹ Tirtūm na hte mē pahte amnhī my kwrýt kà jakār ā mē pahpumunh kōt tanhmā mē pajarēnh to hkēt nē. Rý mē pahte amnhī jakār kēt ā mē pahpumunh kōt määnēn tanhmā mē pajarēnh to hkēt nē. Ām mē pahte hkōt amnhī nhīpēx pix ā mē pahpumunh kōt na hte tanhmā mē pajarēnh to. ²⁰ Jakamā kēr pu mē pahte Kris kōt amnhī xunhwýr kēt ri tanhmā mē pakuteja arī rāhā ri papa. ²¹ Ka mē akwýjaja ate nhām mē kām mē axāpēnh o apa htā Jejus kōt amnhī xunhwý. Tā kēr ka mē

māmri mẽ kām axàpênh o ri apa. Nom koja anhõ patrãwja amnhĩ nê mẽ ajano ka mẽ māmri ma mra nê amnhĩ mã tanhmã axàpênh to ho ri apa.

²² Nê koja mēhõ Kris kõt amnhĩ xãm. Tanhmãn kēp mẽ õ patrãw rỳ kot mẽ kãm mẽ àpênh xwỳnhjê hõ. Tã Kris kõt amnhĩ xãm hãmri nê arĩ amnhĩ nhĩpêx tũm kõt ri amnhĩ nhĩpêx o pa hkêt nê. Ra Kris kõt amnhĩ nhĩpêx nyw o amnhĩ nhĩpêx o pa. Jao ra tanhmã amnhĩ tomnuj to hkêt nê. Te kot õ patrãw punuj kaga nê hpãnhã õ patrãw mex kapêr kõt amnhĩ nhĩpêx pix o pa pyrãk.

²³ Na pre Jejus mẽ pahte amnhĩ tomnuj piitã hpãnhã amnhĩrer kaxyw mẽ panê ty. Te htyk o kot amnhĩm mẽ pajaprõr pyrãk o mẽ panhĩpêx. Jakamã kwa kēr ka mẽ jar mẽ anhõ patrãw kõt pix mã amnhĩ nhĩpêx o ri apa hkêt nê. Mẽ mãânên Tirtũm kapêr kõt amnhĩ nhĩpêx o ri apa. ²⁴ Jakamã kēr pu mẽ pahte Kris kõt amnhĩ xunhwỳr kêt ri tanhmã mẽ pakuteta pu mẽ arĩ rãhã ri hã papa.

Ra mẽ pahte amnhĩ jakà rỳ mẽ pahte amnhĩ jakàr kêt.

Rỳ ra mẽ pahte nhãm mēhõ mã paxàpênh o papa rỳ amnhĩ mã paxàpênh o papa.

Rỳ ra mẽ pahprõ nê ri papa rỳ mẽ pahprõ hkêt nê ri papa.

Pu mẽ pahte Kris kõt amnhĩ xunhwỳr kêt ri tanhmã mẽ pakuteta ãm arĩ rãhã hã ri papa. Jao Tirtũm kãm hprãm xã kõt pix mã amnhĩ nhĩpêx o ri papa.

Mẽ hprõ nê mẽ mjên kêt xwỳnhjê jarênh

Matêwre 19.10-12

²⁵ Nê mẽ ate ixwỳr kagã mēnhta kamã na ka mẽ mãânên kormã mẽ hprõ hkêt xwỳnhjê hã ixkukja. Tã kot paj mẽ amã tanhmã mẽ harênh to. Nom Pahihti Jejus Kris na pre ja hã tanhmã inhmã nê hkêt nê. ãm pa kot paj ãm amnhĩ krã hkõt tanhmã hã mẽ amã ixkapêr to. Na pre Pahihti mẽ akaxyw tanhmã ixkrã hto pa hte ý hã tanhmã mẽ amã mẽmoj tã karõ hto ho ri ixpa. Jakamã e mẽ inhma nê inhmar tỳx nê.

²⁶⁻²⁷ Nã ra mẽ kãm mẽ pahkurê xwỳnhjaja Kris ã mẽ pahtomnuj o pa jakamã koja ixpyrà nê mẽ hprõ hkêt rãhã mẽ pa xwỳnhjaja ahte ri pa nhũm ja mex nê. Nhũm mẽ umaj amnhĩ pix tânopxar o ri pa. Nê mẽ aprõ xwỳnhjaja kēr ka mẽ kãm mẽ pahkurê xwỳnhjê pymaj mẽ aprõ kaga hkêt nê. ãm pix tânopxar o ri apa.

²⁸ Tã kot ka mẽ atõ amã aprõ hprãm nê māmri aprõ. Ja mãânên tanhmã ixpê kute hkêt. Nê mẽ anijaja mẽ amã amjên prãm nê māmri amjên. Ja tanhmã ixpê kute hkêt. Nom kot ka mẽ akwỳjê pyrã nê aprõ rỳ amjên. Nê gaa nê akra. Hãmri nê tanhmã mẽmoj kute kamã ka tee ri wa mẽ amnhĩ kukamã ri ajamxpêr o ri apa. Ja pymaj na pa hte mẽ amjên kêt nê mẽ aprõ hkêt ã mẽ amã awjarê.

²⁹ Nê Kris tokyx akupỳn mẽ pahwỳr wrỳk kaxyw jakamã kwa ra mẽ aprõ nê apa xwỳnhjaja. Kēr ka mẽ amnhĩ prõ nê amnhĩ kra pix kukamã ajamxpêr o ri apa hkêt nê. Te ho mẽ hprõ hkêt nê mẽ pa xwỳnhjaja kot amnhĩ nhĩpêx pyrã nê Kris kutêp kumrêx mã ajamxpêr pê tanhmã amnhĩ nhĩpêx to ho apa nê arĩ kormã aprõ nê akrãjê ho hapu nê tanhmã mẽ kutã anojarêt to ho apa.

³⁰ Kris kot tokyx akupỳn mẽ pahwỳr wrỳk jakamã kwa mẽ ri amỳr o ri mẽ apa xwỳnhjaja. Kēr ka mẽ kutêp tee ri amnhĩ kaprĩ pix mã ajamxpêr o akaprĩ nê ri apa hkêt nê. Nê mẽ akĩnh nê ri apikunhar o ri mẽ apa xwỳnhjaja kēr ka mẽ Kris kutêp amnhĩ kĩnh xã pix mã ajamxpêr o ri apa hkêt nê. Nê ri mẽ axujaprõr o ri mẽ apa xwỳnhjaja kēr ka mẽ Kris kutêp tanhmã axujaprõr to pix kukamã ri ajamxpêr kêt nê. ³¹ Nê mẽ apê mẽ ate mẽmoj to wēnê ho ri

mē apa xwŷnhjaja Kris kutêp ãm ri mē akukrêx pix kukamã ajamaxpêr kêt nê. Koja mē panhõ pika piitã hkôt mē pakukrêxja nê mēmoj piitã arĩ rãhã hkêt nê. ³² Jakamã kot kaj mē akukrêx pix kukamã ajamaxpêr nê amnhĩ pix kukamã ajamaxpêr nhũm ja apê omnuj nê. Kris kwŷ pê mē hprõ hkêt xwŷnhjaja na htem Pahihti Jejus Kris kãm hprãm xã hkôt pix mã kãm tanhmã amnhĩ nhĩpêx to ho ri pa hprãm. Jao ãm pix kutã tanhmã nojarêt to rãhã ho ri pa. ³³ No kêt ra mē hprõ nê mē pa xwŷnhjaja na htem hprõ pix kukamã kãm tanhmã amnhĩ nhĩpêx to ho pa hprãm. Jao pix kukamã amnhĩ nhĩpêx o pa. ³⁴ Mē kãm Tirtũm kapêr kôt amnhĩ nhĩpêx prãm tã no ãm mãânên kãm hprõ kapêr mar nê hkôt kãm tanhmã amnhĩ nhĩpêx to ho ri pa hprãm.

Nê mēnijaja kot Jejus kôt amnhĩ nhĩpêx nê kormã mē mjên kêt xwŷnhjaja na htem kãm Pahihti Jejus kãm hprãm xã hkôt pix mã kãm tanhmã amnhĩ nhĩpêx to ho pa hprãm. Nê ãm pix mã hamaxpêr o pa. Nê ãm hkôt pix mã amnhĩ nhĩpêx o pa. No ra mē mjên nê mē pa xwŷnhjaja na htem arĩ ri mē hikukrêx tãnopxar o pa. Nê mjên mã hprãm xã hkôt tanhmã kãm amnhĩ nhĩpêx to ho pa. Jakamã tanhmã kot wem amnhĩ to nê Jejus kãm prãm xã hkôt pix mã amnhĩ nhĩpêx o pa?

³⁵ E ixte mē ato ajuta kaxyw na pa ã mē amã ixkapêr anê. Jakamã na pa mē ate mēhõ ho aprõ nê mē akurê hkêt nê. ãm mē ate Tirtũm kapêr kôt pix mã amnhĩ nhĩpêx o apa hã na pa mē amã karõ. Mē ate kumã pix mã ajamaxpêr o ri apa pix kaxyw. Nê kumã pix mã tanhmã ri amnhĩ nhĩpêx to ho apa kaxyw na pa mē amã tanhmã mēmoj tã karõ hto.

Mē kot mē hprõ mã xwŷnhjê jarênh

³⁶ E kot paj hpãnhã mē ate mēhõ ho aprõ mã xwŷnhjê mã ixkapêr ka mē ixkapêr ma. Nã kot kaj mē atõ ate ho aprõ mã xwŷnhã kukamã ajamaxpêr o:

—Nã kot paj ho ixprõ hkêt nê. Inhmã hkĩnh tŷx tã kot paj ho ixprõ hkêt nê. Kot paj ãm ixprõ hkêt nê ahte ri ixpa. Anê.

Hãmri nê ahte ri apa. Tã ra tee amnhĩ kurê kamã ama nê ajamaxpêr o:

—Hêxta waa nê. Mon pa pre ho ixprõ hkêt nê ahte ri ixpa? Anê.

Hãmri nê mãmrĩ ma hwŷr tē nē kãm amnhĩ jarē nē ho aprõ. Ra ate aprõ hkêt nê ahte ri apa hã amnhĩ jarênh tã no ãm mãmrĩ ho aprõ. Ja tanhmã kute hkêt kēnã. ³⁷ Nom kot kaj ho aprõ hkêt ã amnhĩ jarē nē mãânên akurê hkêt nē ri apa. Hãmri nē mãmrĩ ho aprõ hkêt nē ri ahte ri apa. Ja mãânên tanhmã kute hkêt. ³⁸ Kot ka ho aprõ nē war amex nē apa. Rŷ kot ka ho aprõ kêt nē mãânên amex kumrêx nē ri apa. Ja na mex o ate mēhõ ho aprõ nē ho apata jakrenh.

Mē kēp mē mjên tyk xwŷnhjê jarênh

³⁹ E kot paj hpãnhã mē apê mē amjên tyk xwŷnhjê mã ixkapêr. Nã koja amjên arĩ htĩr ri ka ãm hkôt pix mã axkamē nē hkaga hkêt nê. No koja nhŷrmã apê ty hãmri ka tee ri amnhĩ kukamã ajamaxpêr hãmri nē amã axte amjên prãm nē mãmrĩ axte amjên. Nom kwa kêr ka mē amnhĩ pyrã nê Kris kôt akwŷjê hõ pix o amjên. No mamrĩ nhãm mēhõ ho amjên kêt nê. ⁴⁰ No kot ka mē axte amjên kêt nê ahte ri apa hãmri nē axãmnhix ri ajamakêtkati nê apa. No na pa ãm amnhĩ krã hkôt mē amã ã ja jarênh anê. Mãn Tirtũm Karõ mã mãânên ja mex nê.

8

Sānti hã mē apkur xà jarēnh

Rômān 14.13-23; Wam Korit 10.14-22, 13.2; Karatas 5.13; Wam Pêtre 4.8; Wam Juāw 3.18

¹ Nē mē ate ixwýr kagà mēnh̄ta kamā na ka prem mǎānēn sānti hã mē apkur xà hã ixkukja. Tã kot paj mē amā tanhmā ja jarēnh to ka mē inh̄ma.

Nà na hte Kris kôt pahkwý hkēt xwýnh̄jaja mēmo karō ho sānti nh̄pēx mǎ mēo hkwy nh̄pēx nē hwýr o mra. Hāmri nē hpar pē haxwý nē kutà hkōn krā ho rōrōk nē hkrī nē kām mex o mex ā harē nē kām amnh̄i jagrer pē amnh̄i to kuwý. Hāmri nē kām amnh̄i jagrer pa nē akupým amnh̄im mēōta jamý nē ma o mra nē hkwyjē mǎ ho wēnē. Na htem ā amnh̄i nh̄pēx anh̄yr o pa. Tã na ka prem kagàta kamā mē ate mē kēp mēo japrōr nē hkur ā ixkukja. Nà ra mē ate sānti pumunh mex. Ām mē kot ĩhkra pix o hipēx ā omunh mex jakamā na pu htem hã pamā mē apkur xàta hkur prām nē māmri paxāmnh̄ix ri kuku. Ja tanhmā Tirtüm pē kute hkēt. Ra mē pahte ja pumunh mex. Tã nom kwa kēr pu mē ja hã Kris kôt mē pahkwýjē mǎ amnh̄i to jarkrar o ri papa hkēt nē. Nē ja hã mē kurom paxāhpumunh týt ā mē kām amnh̄i to jarkrar hkēt nē. Kot pu mē ā amnh̄i nh̄pēx anh̄yr o mē hamaxpēr o hihtýt hkēt nē. Kēr pu mē ām mē kamā paxukapri pē tanhmā mē ho mex to ho papa. Nē Kris kôt mē hamaxpēr o hihtýt o papa. Ā mē pa hte amnh̄i nh̄pēxja na Tirtüm kām hprām. ² No koja mēhō mēmoj pumunh týt ā amnh̄i to jarkrar o ri pa nē ām tee ri ā amnh̄i jarēnh anh̄yr kapry. ³ No koja mēhō āhpumunh týt kēt tã kām Tirtüm kīnh nh̄um amnh̄i tã omu nē kām hapē nē ho hkra. Kēt ja na mex o mex.

⁴ E kot paj ixpri hã mē amā tanhmā sānti hã mē apkur xàta jarēnh to ka mē inh̄ma. Nà Mēpahpāmja pixii. Axtem hō hkēt. Nom mē kot sānti nh̄pēxta ām mē kot ĩhkra o hipēx jakamā htir kēt. Ra mē pahte ja jarēnh mar týt nē omunh mex. ⁵ Na htem ohtō nē ri sānti kēp Mēpahpām ā hkamnh̄ix o pa. Kaxkwa kamā mēmo karō nh̄pēxja nē pika kamā mēmo karō nh̄pēxja nh̄um htem kēp Mēpahpām ā harēnh ho pa. Nom ja kot anh̄yr kēt. ⁶ Mēpahpāmja ām pixi ho pixi mex. Mē panhō Tirtümja. Tām na pre mēmoj piitā ho kator pa. Jakamā na pu htem kapēr kôt pix mǎ amnh̄i nh̄pēx o ri papa.

Nē mē panhō Pahihti haxwýja pixii. Pahihti Jejus Krisja. Na pre Tirtüm nh̄ihkō hã mēmoj piitā ho kator pa. Na pu htem ja hã omunh xà hkōt ri pamex nē ri papa. Ra mē pahte ja jarēnh mar týt nē omunh mex. Jakamā na pu htem paxāmnh̄ix ri mēmoj piitā hkur o papa. Tirtüm kot mēmoj piitā ho kator par kēnā. ⁷ Tã no ām ham mē kot Kris kôt amnh̄i xunhwýr xwýnh̄jaja na htem mē pahkīnh̄ā kām sānti hã mē apkur xà hkur puma nē. Ham mē kot sānti kaga nē amnh̄i kaxyw Kris kôt amnh̄i xunhwýr jakamā kormā Tirtüm kôt amnh̄i nh̄pēx tohtuj anē. Jakamā na htem tee ri sānti hã mē apkur xàja pumu nē hamaxpēr o:

—Nà kot paj ja kur kēt nē. Kot paj anē nh̄um apu Tirtümja pē ja omnuj nē. Anē.

⁸ Nom na kēt hte Tirtüm mē paxāpkur xà hã mē pahpumunh kôt mē pahte amnh̄i to mex xwýnh̄ ā mē pajarēnh kēt nē. Kot puj mē mēmoj ku rý mēmoj kur kēt nē nh̄um ja hã mē pahpumunh kôt tanhmā mē pamex ā pajarēnh to hkēt nē. Jakamā na pu htem māmri paxāmnh̄ix ri mēmoj tã mē apkur xà hkur o papa nē tanhmā amnh̄i to hkēt nē. ⁹⁻¹⁰ Nom kwa mē okora. Kēr ka mē sānti mǎ amnh̄i jarēnh xà hã ixkre hwýr agjēx nē kamā axāpkur hkēt nē. Kot kaj

mê atô ã amnhî nhîpêx anê nhûm mēhō kormã kot Kris kôt amnhî xãm tohtuj anhÿr xwÿnhja ja hã mē apumu nē tee ri hamaxpêr. Axàhpumunh tÿx ã ate amnhî jarēnh tã sãnti nhōrkwÿ kamã axàpkur o nhÿ nhûm ja hã apumu nē tanhmã amnhî nhîpêx to wehe? Koja ja kēp omnuj tã apyrã nē tē nē axã nē mē kutã apku. Hãmri nē apkur pa nē tee ri amnhî kukamã hamaxpêr o:

—Hêxta waa nē. Kwa mon pa axtem nē ri ã mēmojja kur anê? Nã na pa anê nē ra amnhî tomnuj tÿx nē. Anê.

Hãmri nē hkaprî nē pa. ¹¹ Ate axàhpumunh tÿx ã amnhî jarēnh tã amnhî kôt atōja mex kukamã ajamaxpêr kêt nē. Kris ra mÿrapê htyk tã nhûm ã ate sãnti hã mēō hkur ã apumu nē tee ri hamaxpêr o Jejus hkôt amnhî nhîpêx mex kêt nē. ¹² Kormã kot Kris kôt amnhî xãm tÿx kêt tã tee ri ja hã mē apumu nē hamaxpêr mex kêt nē. Jakamã ka Kris noo mã amnhî tomnuj nē. ¹³ Tã ã ixte Kris kôt ixkwÿjê nhîpêx anhÿr pymaj koja ixtōjê hō kãm mēmoj kur pyma nē. Nê htÿx ho Tirtûm kēp omnuj ã hkamnhîx. Pa ja hã omu nē ijaxwÿja axte hkur kêt nē. Ixte mex ã omunh tã no ãm kot tee ri ja hã ixpumunh nē hamaxpêr o:

—Kwa Tirtûm kēp ja mex kêt tã nhûm Pawreja ri kuku. Jakamã kot paj ijaxwÿja uràk nē kuku. Omnuj tãã.

Anhÿr o hamaxpêr pymaj kot paj uràk nē mēmota kur kêt nē. Na pa hte ã Kris kôt ixtōjê mex kukamã ri ijamaxpêr anhÿr o ixpa.

9

Pawre kot amarî Tirtûm kapêr o mē ahkre hã amnhî jarēnh

Atre 9.1-18, 20.33-35; Sikûn Korîit 11.7-9

¹ Nê ixte Jejus nhÿ hã mē ahkre ho mē pa xwÿnhjê hō jakamã na pa hte Tirtûm kapêr o mē ajahkre ho ri ixpa. Na pa pre inhno ho mē panhō Pahihti Jejus pumu nē mē amã harēnh o ri mē akôt ixpa ka prem inhma nē hkôt amnhî xunhwÿ. ² Mē hkwÿjaja kot axpên mã ixpê Jejus nhÿ hã mē ahkre xwÿnh kêt ã ijarēnh tã mē kajaja mē ate ja hã ixpumunh mex. Ixte mē amã mē ujarēnh mexja jarēnh nhûm mē ate mar nē hkôt amnhî xunhwÿrja kukwak ri na ka mē apê Jejus kwÿy. ³ Jakamã koja mē atã ixto kapêr japêr kot paj ã mē kãm mē ajarēnh anê. ⁴ Nê ixte Jejus nhÿ hã kapêr jahkre o ixpa xwÿnh jakamã kot paj inhmã Kris kwÿjê kutã amarî ixàpkur prãm nē mãmri mē kutã apku. Ja tanhmã kute hkêt tã kot paj ã amnhî nhîpêx anhÿr kêt nē. Kot paj ixàpkur kaxyw nē amnhî pãnhã amnhîre nê ri kormã apku. Na pa hte ã amnhî nhîpêx anhÿr o ri mē akôt ixpa. ⁵ Rÿ kot pa ixkwÿjê pyrã nê inhmã Kris kôt ixkwÿjê hō ho ixprō hprãm nê mãmri ho ixprō. Nê wa ma krî piitã hkôt Kris kwÿjê kukwak ri ixàpkur o ixpa hprãm nê wa mãmri ã amnhî nhîpêx anhÿr o ixpa. Ja mex kênã. Na hte ã Simãw Pêtre mē Jejus tō kot hapujaja amnhî nhîpêx anhÿr o pa nhûm ja tanhmã kēp kute hkêt. No ãm mē hkînhã ixprō hkêt na pa hte ri ixpa.

⁶ Nê ixkwÿjaja na htem apkur xã hpãnhã àpênh o pa hkêt nē. Na htem Jejus nhÿ hã kapêr jarēnh o ri pa nhûm hte Jejus kwÿjaja mē kãm mē apkur xã gō nhûm mē amarî hkur o pa. Tã no pa na pa hte Panãpe mē wa ã amnhî nhîpêx anhÿr kêt nē. Na pa hte wa mry kã ho ixkre nhîpêx nē mē kãm ho wēnê nê hpãnhã amnhîm awjaprō. Na pa hte wa ã amnhî pa kukwak ri iuxjaprōr nê ho ixàpkur o ri ixpa anê.

⁷ Mē kãm pur kãm harôj jamÿnh o mē pa xwÿnhjaja na htem amarî hkwy jamÿ nê ho apkur o pa. Nê motre jamãr o mē pa xwÿnhjaja haxwÿja amarî hkã kagô janê nê ho hkôm o pa. Nê pôristijaja na hte mē ò pahija mē àpênh

pānhā mẽ kām amnhīrer o pa. Jajê piitā na htem mẽ àpēnh pānhā mẽ kām amnhīrer o pa. Ja pyrā nē te ixpē mẽ amā ixàpēnh o ixpa xwýnh pyrāk jakamā ixte mẽ ajahkreta pānhā kot ka mẽ inhmā inhō ho apa nhūm ja määnēn mex nē. ⁸ No ām papxipix na pa hte ja mex ā harēnh kēt nē. Tirtūm kapēr ā kagā htūm haxwýja kot ja mex ā harēnh. ⁹ Kamā na pre finat Mojesja Tirtūm nhý hā harēnh kot:

Koja akrit amā àpēnh o pa ka omu nē ho mex nē. Kām ò mex nē.

Anhýr o kot harēnh. Xà na pre Tirtūmja ām mẽ pahkrit pix kukamā ukaprī nē ā harēnh anē nā? Nā kot anhýr kēt. ¹⁰ Määnēn mẽ pahpē panhī kaxyw na pre ā ja jarēnh anē. Mē pahte mẽ hpur kām paxàhkre xwýnhjaja nē mẽ pahte kamā paxujamýnh o papa xwýnhjaja. Jajê kaxyw mẽ pahte pur kukwak ri amarī paxàpkur o ri papa kaxyw ā pre ā ja jarēnh anē. ¹¹ Tā ja pyrā nē na pa hte mẽ awýr mō nē mẽ amā Tirtūm kapēr jarēnh o ri mẽ akôt ixpa. Nē mẽ akôt ho mẽ ajahkre ho ri ixpa ka htem inhmā ixàpēnh ta pānhā amnhīrer kēt nē. Ixkwýjaja kot Tirtūm kapēr o mẽ ajahkre hpānhā mẽ ate mẽ kām amnhīrer tā pa inhmā amnhīrer kēt nē. Na pa pre mẽ ajahkreta pānhā mẽmoj tā mẽ awýr kēt nē. Ām nhām ixàpēnh òta kukwak ri na pa hte ixàpkur o ri ixpa.

¹² Nē na hte mẽ ixkwýjaja mẽ awýr mra nē Tirtūm kapēr o mẽ ajahkre o ri mẽ akôt pa. Hāmri nē hpānhā mẽ apkur xà hā mẽ awý ka mẽ kām mẽmoj gō. No kēt pa na pa hte mẽ urāk nē ixàpkur xà hā mẽ awýr kēt nē. Kot pa apu hā mẽ awý ka mẽ tanhmā ixto akapēr to nē expēn mā ijarēnh o:

—Pēr ām mẽ pahte kām amnhīrer pix kaxyw na hte Pawre mẽ pahwýr mra nē mẽ pamā Jejus Kris kot tanhmā mẽ panē amnhī nhīpēx to hā harēnh o pa. Pēr ām apkur xà pix prām xàj ā kot mẽ pamā ujarēnh anhýr o pa. Jakamā kot puj mẽ kuma nē ām kuma.

Anhýr o axpēn mā ijarēnh pymaj na pa hte mẽ ajahkre hpānhā mẽmoj tā mẽ awýr kēt nē. Na pa hte ām mry kà ho ixkre nhīpēx nē ho wēnē nē ja pix kukwak ri ixàpkur o ri ixpa. Nē amarī ri mẽ ajahkre ho ri mẽ akôt ixpa.

¹³ Nē Tirtūm mā amnhī jarēnh xà hā ixkre kamā mẽ àpēnh xwýnhjaja na htem hwýr mẽ mrar xwýnhjaja mẽ àpēnh pānhā mẽ kām amnhīre. Nē mẽ kot mẽ kām Tirtūm mā mẽmoj nhōr o kuhē xwýnhjaja na htem määnēn mẽ àpēnh pānhā mẽ kām amnhīre. ¹⁴ Nē Pahihti Krisja na pre ja hā mẽ pakukamā pahtā karō kot:

—Kēr ka mẽ kot tanhmā mẽ amā ijarēnh to ho ri mẽ pa xwýnhjē mā amnhīrer o ri apa. Anē.

¹⁵ Tā no na pa hte aa mẽmoj tā ixàhwýr kēt nē. Nē mẽ ate inhmā amnhīrer kaxyw pa mẽ amā ja jarēnh kēt nē. Aa ixte mẽmoj tā mẽ awýr kēt. Kot paj apu anē nē ixpijaam nē. Rý kot pa apu anē nē mẽ akukwak ri ixàpkur o ri ixpa hāmri nhūm mẽ akwýjaja ja hā ixpumu nē hā ijarēnh o:

—Tk. Na hte amarī mẽ pajahkre o ri pa hkēt nē. Ām mẽ apkur xà pix prām xàj na hte ā mẽ pajahkre ho pa anē. Anē.

Jakamā na pa hte mẽmoj tā mẽ awýr kēt nē. ¹⁶ Ixte mẽ amā mẽ ujarēnh mexja jarēnh o ri ixpa htā na pa hte ja hā amnhī to jarkrar o ri ixpa hkēt nē. Pahihti Jejus na pre ja hā inhmā karō pa hte kām ho anhýr o ri ixpa. Kot paj kām ho anhýr kēt nē ixpunuj nē ri ixpa. ¹⁷ Kēp ām amnhī krā hkôt mán tanhmā mẽ amā ixujarēnh to ho mẽ akôt ri ixpa ronhýx pa hpānhā ixàmnhix kàxpore hā mẽ awýr. No ām ā ixte amnhī nhīpēx anhýr kēt. Tirtūm tām kot inhmā ja hā karō jakamā na pa hte amarī ixàmnhix ri mẽ amā kapēr jarēnh o mẽ ajahkre ho ri mẽ akôt ixpa nē mẽmoj tā ixàhwýr o ri ixpa hkēt nē. ¹⁸ Ixte

amarî ri mê amã mê ujarênh mexta jarênh o ri ixpaja na inhmã hprãm. Ja na inhmã mex. Na pa hte ã amnhî nhîpêx anhÿr o ri ixpa nhũm ja inhmã mex pa ixkînh nê ri ixpa. Jakamã na pa hte hpãnhã ixãhwÿr kêt nê. Nê inhmã mêmoj prãm o ri ixpa hkêt nê. ¹⁹ Nê nhãm mê kãm tanhmã ixãpênh to ho ixpa hkêt tâ pa hte mê piitã tanhmã mê kãm amnhî nhîpêx to ho ri ixpa. Pê mê kãm Jejus kapêr jarênh o ri ixpa. Jakamã na mê ra ohtô nê ixujarênh ma nê amnhî kaxyw Jejus kôt hamaxpêr nê hkôt amnhî xunhwÿ.

Pawre kot tãm mê piitã mê hipêx o pa hã amnhî jarênh

Wam Korîit 10.33

²⁰ Nê na pa hte Ijaewjê hwÿr ixpa nê mê kot amnhî nhîpêx kôt amnhî nhîpêx o ri mê hkôt ixpa. Ixte mê kurom Tîrtũm kot finat Mojes mã mêmoj tâ karô hkôt amnhî nhîpêx o ixpa hkêt tâ mê hkôt ri ixpa nê mê urak nê hkôt amnhî nhîpêx o ri ixpa. Mê kot ja hã ixpumunh nê ixte mê kãm Jejus jarênh mar nê ixpyrà nê amnhî kaxyw hkôt hamaxpêr kaxyw.

²¹ Tã pa hpãnhã mê kêp Ijaew kêt xwÿnhjê hwÿr ixpa nê mê kot amnhî nhîpêx kôt amnhî nhîpêx o ri mê hkôt ixpa. Mê kot ja hã ixpumunh nê ixkapêr mar nê ixpyrà nê amnhî kaxyw Jejus kôt hamaxpêr kaxyw. Tîrtũm mê Kris wa hamaxpêr xã hkôt na pa hte ahpÿnhã mê kot amnhî nhîpêx xwÿnhjê hwÿr mra nê ã amnhî nhîpêx anhÿr o ri mê hkôt ixpa.

²² Nê na pa hte kormã mê kot Kris kôt amnhî xunhwÿr tohtuj anhÿr xwÿnhjê hkôt ri ixpa nê te ixte ho mê urak nê kormã hkôt amnhî xãm nyw pyrãk o amnhî nhîpêx o ri mê hkôt ixpa. Mê kot ja hã ixpumunh nê ixkapêr mar nê hkôt amnhî nhîpêx mex kaxyw. ã na pa hte mê piitã mê hkôt ri ixpa nê mê hkôt amnhî nhîpêx o ri ixpa anê. Mê kot ja hã ixpumunh nê inhmar nê ixpyrà nê Kris kôt amnhî nhîpêx tÿx kaxyw. ²³ Mê kot mê ujarênh mex mar kaxyw na pa hte mê piitã mê hkôt ã amnhî nhîpêx anhÿr o ri ixpa. Tîrtũm kot mê ho hkra nê mê ho mex kaxyw. Nê mããnen pa kot mê hã ixto mex kaxyw.

Pawre kot htÿx ri amnhî nhîpêx kêt ã kot amnhî jarênh

Sîkũn Ximotre 4.7; Eprêw 12.1-3

²⁴ Mê hprôt xwÿnhjaja na htem hprôt tÿx no nhũm mêhõ pixi nê wam hkwyjê re nê wam tẽn pój nhũm htem ja hã omu nê kãm mê hkînhxã gõ. Ja pyrà nê kêr ka mê apiitã tãm amnhî nhîpêx mex rãhã ho ri apa kê Tîrtũm mê apumu nê nhÿrmã ja pãnhã mê amã mêmoj mex gõ.

²⁵ Nê mê hprôt xwÿnhjaja na htem mê hkînhxã hpÿr prãm xaj mê hprôt xã hã arîgro hwÿr apkati mê hprôt o kuhê. Prôt tÿx prãm xaj. Tã mê hprôt xã hã arîgrota ã nhũm hkwyjê pê amnhî to wa nê amnhîm hkînhxã py. Nom koja hkînhxaja kritpêm kãm mex ry hkêt nê. Koja gaa nê hapêx tokyx anê. Tã nom kot puj mê Tîrtũm kapêr kôt amnhî nhîpêx mex o ri papa. Nê mê hprôt xwÿnhjê kot hkînhxã hpÿr prãm xaj apkati mê hprôt o kuhêta pyrà nê apkati mê hkôt amnhî nhîpêx mex o ri papa. Hãmri nhũm amnhî tã mê pahpumu nê nhÿrmã mê pamã hkînhxã mex õ gõ. No ãm jar hkînhxã kurom koja aa mê pahpê hapêx kêt nê. Koja mê pamã mex rãhã ho rãhã.

²⁶ Nê na hte mê hprôt xwÿnhjaja htÿx ri tanhmã hprôt to ho pa hkêt nê. Na htem hkwyjê pê amnhî to wa kaxyw hprôt nê nhÿri mê àhuk xãta pix pumunh pê hwÿr hprôt nê mra hãmri nê kamã ahtwÿ. Nê kamã àhuk pix kukamã hamaxpêr o hprôt tÿx nê mra. Ja pyrà nê na pa hte apkati mê Tîrtũm kôt pix mã amnhî nhîpêx o ri ixpa. Nhÿrmã kot inhmã mêmoj mex nhõr kaxyw.

Nē mē pijapu mex xwýnhjaja na htem htýx ri nhýhýnh axpēn tak kēt nē. Na htem nhýhýnh kot mē htak o mē rēnh xà pix kamā mē htak o mē rēnh kukamā hamaxpēr pē kamā mē htak. Ja pyrà nē na pa hte ixtýx ri tanhmā amnhī nhīpēx to ho ri ixpa hkēt nē. Na pa hte Tirtūm mā ijamaxpēr pē tanhmā amnhī nhīpēx to rāhā ho ixpa. Kot nhýrmā inhmā mēmoj mex nhōr kaxyw. ²⁷ No na pa hte ixtýx ri amnhī ijamaxpēr xà hkōt tanhmā amnhī nhīpēx to ho ri ixpa hkēt nē. Kot pa ā amnhī nhīpēx anē nē ixte mē kām Jejus kapēr jarēnh o ri ixpa htā ām ri ixtýx ri ā amnhī nhīpēx anhýr kaprý nhūm Tirtūmja tee ri ja hā ixpumu nē inhmā mēmoj mex nhōr kēt nē.

10

Ijaew kot amnhī nhīpēx

Rōmān 15.4; Eprēw 3.8-11; Jutre 5

¹ E Kris kōt ixkwýjaja. Kot paj mē amā amnepē mā mē ixpē Ijaew hkukamā mē inhīgētjaja tanhmā mē harēnh to ka mē inhma. Mē kot pahi finat Mojes kōt ri mē pa xwýnhjaja kot paj mē amā harē. Mē pahte mē urāk nē pahtýx ri amnhī nhīpēx pymaj kot paj mē amā tanhmā mē harēnh to ka mē inhma. Mān ka mē arī mē harēnh ā anohtýx japēr. Na prem piitā pika pē Ejit kamā pa htā kurūm kator pa. Hāmri nē ma kapōt ā kakrā pumunh o hkōt pa ho pa. Pry hkēt jakamā nhūm pre Tirtūm tanhmā kakrā hto nhūm ma mē hkukamā pa nhūm mē omu nē hkōt pa. Hāmri nē ra gō xujanār mē kot kām: “Gō kamrēk” anhýr xwýnhja wýr pōj nē tee ri rēr prām xāj amnhī kukamā hamaxpēr. Hāmri nhūm Tirtūm mē kām hkōt ā ho amgrā nhūm mē hkōt mex pē rēr pa nē axte kakrā hkōt pa ho pa. ² Finat Mojes kot mē o pa jakamā nhūm prem kēp hkwy hā amnhī jarē nē kām amnhī jarēnh o:

—Na kot paj mē akapēr ma nē akōt ri amnhī nhīpēx o ixpa. Anē.

Te mē pahpē Kris kwý hā amnhī jarēnh kaxyw mē kot gōx kām mē pahkrā kumrār nhūm mē pahte Kris mā amnhī jarēnhhta pyràk. ³ Na prem kapōt ā ri pa nhūm Tirtūm tām kaxkwa rūm mē hwýr mē apkur xà rē nhūm mē hkawrā nē ho apkur o pa. ⁴ Tā ra kōr xāj hirod nhūm Tirtūm tanhmā mē kām kēn prēkja to nhūm kurūm mē kām gō axkapī nhūm mē ho ixkō nē akupým hihtýx. Ā Krisja mē hkōt mē ho mē hihtýx o pa anē. Mē kot no ho omunh kēt tā nhūm mē hkōt mē ho mē hihtýx o pa.

⁵ Tā no nhūm mē ohtō nē Tirtūm kōt amnhī nhīpēx kēt nē. Kot mē ho mex kumrēx tā nhūm mē ām amnhī tā omu nē ām omu nē kapēr kōt amnhī nhīpēx kēt nē. Ām kapēr kwým ri tanhmā amnhī tomnuj to ho pa nhūm tee ri amnhī tā mē omu nē tanhmā mē ho nhūm mē hkwyja hpikaprār pa. Hāmri nhūm arī mē htír xwýnhjaja kapōt ā mē hagjēnh pa nē axte ma pa.

⁶ Jakamā kwa kēr pu mē kot ā amnhī nhīpēx anhýr ā mē harēnh ma nē hā pano htýx nē ho papa hāmri nē ho mē urāk kēt nē. Mē urāk nē pahtýx ri tanhmā amnhī nhīpēx to ho ri papa hkēt nē.

⁷ Nē na pre mē hkwyjaja sānti kutā hkōn krā ho rōrōk nē hkrī nē kām amnhī jagrer pē amnhī to kuwý. Tirtūm kapēr ā kagā htūm kot mē kot amnhī nhīpēx anhýr ā mē harēnh kot:

Na prem sānti kutā apkur o hkrī nē kām amnhī jagrer o hkrī nē gaa nē pipānh pix o pa. Jao axpēn kamā hpijaàm kēt o pa.

Anhýr jakamā kwa kēr pu mē ā mē kot amnhī nhīpēx anhýrja ā pano htýx nē ho mē urāk hkēt nē.

⁸ Nê na pre mê hkwÿjaja htÿx ri mjên nê hprô kuhpa hã nhãm ri mê kamã hpijaam kêt o pa. Mÿrapê nhũm arÿgro pixi hã mê ohtô rax kumrêx nê axkaprã. Mê kêp 23.000 nê pikaprãr pa. Tã ã Tÿrtũm kot mê panhÿpêx anhÿr pymaj kêr pu mê ja hã pano htÿx nê ho mê urãk kêt nê. Æm kwarÿ ho kwarÿ.

⁹ Nê na pre mê hkwÿjaja axtem nê htÿx ri tanhmã axpên mã Tÿrtũm jarênh to nê harênh o:

—Nã Tÿrtũmja gryk tokyx anhÿr kêt jakamã kwa pu mê ã amnhÿ tomnuj anhÿr o papa. Kojã mê pahpumu nê tanhmã mê pahto hkêt nê.

Anhÿr tã nhũm tee ri ja hã mê kuma nê mê omu nhũm ja kãm mex kêt nê nhũm mê hwÿr kagã xoprê nhô wenên xihtÿx kwÿ rê nhũm mê hwÿr mra nê mê hkamnhar o mê hkwÿjê pa. Tã ã kot mê panhÿpêx anhÿr pymaj kwa kêr pu mê ja hã pano htÿx nê mê urãk nê amnhÿ tã Tÿrtũm kamã pajamak o papa hkêt nê. Kwarÿ ho kwarÿ.

¹⁰ Nê na pre mê hkwÿjaja axtem nê Tÿrtũm o kapêr punuj nê nhũm tee ri amnhÿ tã mê kuma nê mê hwÿr kapêr o wrÿk xwÿnh mê nhũm ma mê hwÿr wrÿ nê ÿ hã mê hkwÿjê nhũmex. Tã ã kot mê panhÿpêx anhÿr pymaj kwa kêr pu mê ja hã pano htÿx nê ho mê urãk nê Tÿrtũm o pakapêr punuj kêt nê.

¹¹ Na pre mê ixpê Ijaew nhÿgêtjaja ã htÿx ri amnhÿ nhÿpêx o pa anê. Tÿrtũm kapêr ã kagã htũm kot ã mê kot amnhÿ nhÿpêx anhÿr piitã harênh par. Mê panhô ejêp kaxyw. Mê pahte kamã harênh nê mê harênh mar tÿx nê mê urãk nê ã amnhÿ nhÿpêx anhÿr kêt kaxyw. Ra Jejus akupÿn mê pahwÿr wrÿk xã hã arÿgro hkukamã grêre jakamã kwa kêr pu mê kutêp mê kurom kapêr kôt pix mã ri amnhÿ nhÿpêx mex rãhã ho ri papa.

Mê pahte mêmoj punuj nê amnhÿ to htÿx ã mê pamã karô

Matêwre 4.1, 6.9-13; Wam Korîit 1.8; Sikũn Pêtre 2.9; Jutre 24

¹² Tã kêr ka mê ã Ijaew kot amnhÿ nhÿpêx anhÿr ã mê harênhja ma nê ã ajamaxpêr anhÿr kêt nê. Rÿ mê ajamaxpêr o:

—Nã mêmoj piitã kutã ixihtÿx kênã kot pa hkêt mê urãk nê ã amnhÿ nhÿpêx anhÿr o ri ixpa.

Anhÿr o mê ajamaxpêr kêt nê. Kot kaj mê ã amnhÿ jarênh anê nê ra mê urãk nê tanhmã amnhÿ tomnuj to.

¹³ Nê na prem kapôt ã pare ri omnuj nê ri pa. Nhũm mêkarômnuti tanhmã mê hkrã hto nhũm mê tanhmã amnhÿ tomnuj to ho pa. Ja pyrã nê na hte arÿ mê pahte amnhÿ tomnuj hprãm xaj tanhmã mê pahkrã hto ho pa. Mê pahpiitã ã mê pahto anhÿr o ri mê pahkôt pa. Nom nhũm Tÿrtũm ra kot mê pamã amnhÿ jarênh xã hkôt mê panê omunh mex rãhã ho pa. Jakamã na pu htem tanhmã amnhÿ tomnuj to hkukamã pajamaxpêr nhũm ja hã mê pahpumu nê mê panê mêkarômnuti mã kapêr. Nê kutã mê pahto paxihtÿx nê pu mê ÿ hã amnhÿ tomnuj kêt nê. Nê ãm kôt pix mã amnhÿ nhÿpêx mex o ri papa.

Mê kot sãnti mã mêmoj nhôr xwÿnhjê jarênh

Wam Korîit 8.1-13; Karatas 4.8; Apokarip 9.20

¹⁴ Jakamã e Kris kôt ixkwÿjaja. Kêr ka mê amnhÿ kaxyw sãnti hkôt ajamaxpêr o ri apa hkêt nê. Nê amnhÿ to hwÿr kêt nê. Æm kwarÿ ho kwarÿ.

¹⁵ E mê axãhpumunh tÿx ã amnhÿ jarênh jakamã kot paj mê amã mêmoj jarê ka mê aprÿ hã inhmar tÿx japêr. ¹⁶ Nã na pu htem tãhã Jejus kot mê panê htyk mã pajamaxpêr kaxyw axpên wÿr akuprô. Hãmri nê mêmo kagô hkwÿ ru nê Tÿrtũm mã mex ã harê nê mêmoj o pahkôm pê Jejus kot mê panê hkamrô

pikapir mā pajamexpēr. Nē hpānhā pāwti hō py nē expēn mā ho hkry nē mē kot Kris pīr nē ī kamā hkamnhwyr nhūm mē panē htykja mā pajamexpēr pē kuku. ¹⁷ Pāwtita ām pixire htā pu htem expēn mā ho hkry nē pahpiitā kuku. Mē pahpē Kris kwý hā mē pahte amnhī jarēnh nhūm mē pahkwý kot ja hā mē pahpumunh kaxyw. Te mē pahtipxi nē ri mē papa pyrāk nē pāwti pixire htā pu mē pahpiitā kuku.

¹⁸ E kot paj hpānhā mē amā amnepē mā Ijaew kot tanhmā amnhī nhīpēx to jarē ka mē inhma. Na pre htem Tirtūm mā mex ā harēnh nē kām amnhī nhōr ā kot amnhī tā mē omunh kaxyw nhūm prem tanhmā amnhī nhīpēx to. Jao kām mē apkur xā hkwy gō nē kām mex o mex ā harē. Hāmri nē amnhī mā mēmojta kwý xā nē hkur o hkrī. Jao ra Tirtūm mā mex o mex ā harē nē kām kēp hkra hā amnhī jarē.

¹⁹ Nom mē kot sānti mā mēmoj nhōr xwýnhjaja na htem kām mēmo mē apkur xā hkwy gō nom ām kām ōr kaprý. Tanhmā kot we amnhī to nē amnhī tā mē omu? Mo rīt kaxyw no? Ām mē ihkra ho mē kot amnhīm hipēx kēnā. Jakamā na htem ām kām mē apkur xā hkwy nhōr kaprý. ²⁰ Mē kot sānti mā mēmoj nhōr xwýnhjaja na htem Tirtūm mā ōr kēt nē. Mēkarōmnuti mā na htem kugō. Jakamā kot kaj mē urāk nē sānti mā mēmoj gō nē apē mēkarōmnuti hkwy hā amnhī to amnhīrīt nē apē hkwy hā ri apa. Jakamā nē ate sānti mā mēmoj nhōrta na inhā hprām kēt kumrēx. ²¹ Kot kaj mē panhō Pahīhti Jejus kot mē panē htyk ā mēmoj kagō hkwy ho ixkō hāmri nē ma mra nē hpānhā sānti pē mēkarōmnuti hā mēmoj to ixkō. Hāmri nhūm Tirtūmja tee ri ja hā mē apumu nhūm ja kēp omnuj týx nē. Rý ka mē Pahīhti Jejus kot mē panē htyk ā pāwti hkwy hku nē hpānhā ma mra nē sānti pē mēkarōmnuti hā mēmoj hku. Hāmri nhūm Tirtūm kēp ja omnuj týx nē. Mē pahte ā amnhī nhīpēx anhýrja na expēn kuhpa hā. ²² Jakamā kot ka mē ā amnhī nhīpēx anē nē te ra mē amā mēkarōmnuti hkīnh nē māānēn amā Tirtūm kīnh pyrāk o amnhī nhīpēx. Nē te Tirtūm kurom mē kajaja mē axāhpumunh týx pyrāk o amnhī nhīpēx. Nhūm tee ri amnhī tā mē apumu nē mē akamā gryk týx nē. Kwa mē okora. Koja Tirtūm akamā gryk ka amex kēt kumrēx.

*Mē pamā Kris kōt mē pahkwýjē hkīnh pē mē ho mex ā mē pamā karō
Matéwre 20.28; Rōmān 14.1–15.7; Pīripos 2.1–4*

²³ Nē na htem tōhā amnhī jarēnh o:

—Nā kot pa inhā mēmoj to anhýr prām nē ixāmnhīx ā amnhī nhīpēx anhýr o ri ixpa. Anē.

Tā no ām mēmoj piitā mē pamā mex kēt. Na htem kām mēmoj to anhýr prām xā hkōt mēmoj piitā tanhmā ho ho ri pa nē tanhmā amnhī tomnuj to. Hāmri nhūm mē hkwyjaja ja hā mē omu nē mē urāk nē tanhmā ri amnhī tomnuj to. Jao Kris kōt amnhī xunhwyr týx kēt nē. ²⁴ Jakamā kwa kēr pu mē amnhī pix kukamā pajamexpēr pē tanhmā amnhī nhīpēx to ho papa hkēt nē. Māānēn amnhī kwýjē hkukamā pajamexpēr pē tanhmā mē ho mex to ho ri papa pē tām ri amnhī nhīpēx o papa.

²⁵ Nē kot kaj mē amnhī xāpkur xā japrōr kaxyw ma nhýhým mra nē māmri axāmnhīx ri amā mēmoj prām xā hkōt mēmoj japrō. Nom kēr ka mē axujaprōrja kēp sānti xāpkur xā hā mē hkukjēr kēt nē. Ām axāmnhīx ri mē kēp mēmoj japrōr o ri apa. ²⁶ Tirtūm kapēr ā kagā htūm kot ja jarēnh kot: Pika piitā hkōt mēmoj piitā kēp Tirtūm nhō na. Anē. Jakamā mē māmri axāmnhīx ri mēmoj piitā haprō nē mēmoj piitā hkur o apa.

²⁷ Tã koja mẽ kêp Kris kwỳ hkêt xwỳnhjê hô ate kutã axàpkur kaxyw amnhĩ wỳr awỳ ka amã hwỳr amõr prãm nê mãmrĩ ma hwỳr mõ. Nhũm mẽmoj to amã anhõ ka axàmnhĩx ri mãmrĩ aku. No ri tee ri amnhĩ kukamã ajamaxpêr nê tanhmã hã hkukjêr to hkêt nê. Rỳ kãm:

—Kwa xà we mryja sãnti hã mẽ apkur xà na nà?

Anhỳr o hã mẽ hkukjêr kêt nê. ãm mãmrĩ axàmnhĩx hkur o akrĩ. ²⁸⁻²⁹ Nom koja Kris kõt mẽ kot amnhĩ xãm tohtuj anhỳr xwỳnhjê hô mẽ awỳr axà nê tee ri ja hã apumu nê amã:

—Kwa sãnti hã mẽ apkur xà na ka ri mẽ kutã hkur o akrĩ.

Anhỳr o amã kapêr ka ama nê hkaga kurê kumrêx nê hkur kêt nê. Amã mex tã Kris kõt atõja kêp omnuj jakamã ka hkaga nê hkur kêt nê. No kot ka ãm ama nê arĩ hkur o anhỳr japêr. Kot amã harênh xwỳnhhta kêp omnuj tã ka arĩ noo mã hkur japêr. Nhũm ja hã apumu nê tee ri Tĩrtũm kapêr kukamã tanhmã hamaxpêr to. Hãmri nê apyrã nê kuku nê gaa nê tee ri amnhĩ kukamã hamaxpêr nê amnhĩ mã:

—Hêxta waa nê. Sãnti nhõja mex kêt tã pa ri kuku. Kwa na pa pêr hkurja o amnhĩ tomnuj nê. Hêxta waa nê. Anê.

Hãmri nê tee ri amnhĩ kukamã hamaxpêr o hkaprĩ nê. ã kot amnhĩ nhĩpêx anhỳr pymaj koja mẽhõ ã mẽmo mẽ apkur xà nê amã kapêr anê ka ama nê hkaga kurê kumrêx. Jao amnhĩ pix kukamã ajamaxpêr kêt nê. Mããnhẽn Kris kõt atõ nê atõxjê mex kukamã ajamaxpêr. Nom koja amã kêp sãnti hã mẽ apkur xà hã harê ka ama nê ã ajamaxpêr anhỳr japêr nê ajamaxpêr o:

—Nà kêp omnuj tã kot paj mamrĩ kuku. Ja inhmã mex kênã. ³⁰ Ra ixte Tĩrtũm mã harênh nê ixàmnhĩx hkur o inhỳr kênã kot kêt ã nê inhmã kapêr anê. Anê.

Kwa mẽ ã ajamaxpêr anhỳr kêt. Kot kaj mẽ ã ajamaxpêr anê hãmri nê Kris kõt atõ rỳ atõx mex kukamã ajamaxpêr kêt nê.

³¹ Jakamã kêr ka mẽ tãm tanhmã amnhĩ nhĩpêx to ho ri apa. Nê axàpênh mex nê. Kêr kê mẽ piitã ja hã mẽ apumu nê mẽ apumunh kõt amnhĩm Tĩrtũm mex ã harê. ³² Nê kêr ka mẽ piitã mẽ noo mã tãm ri amnhĩ nhĩpêx o apa. Ijaew noo mã nê Ijaew kêt xwỳnhjê noo mã. Nê Jejus kwỳjê noo mã. Mẽ piitã mẽ noo mã tãm ri amnhĩ nhĩpêx rãhã ho ri apa. Mẽ kot tee ri mẽmoj tã mẽ apumunh nê hpijaãm pymaj ka mẽ tãm ri mẽ piitã mẽ noo mã tanhmã amnhĩ nhĩpêx mex to ho ri apa. ³³ Na pa hte ã amnhĩ nhĩpêx anhỳr o ri ixpa. No na pa hte pa amnhĩ pix kukamã ijamaxpêr kêt nê. Mẽ piitã mẽ mex kukamã na pa hte ijamaxpêr o ri ixpa. Pé tanhmã amnhĩ nhĩpêx to ho ri ixpa. Mẽ kot ja hã ixpumunh nê ixpyrã nê Jejus kõt amnhĩ xunhwỳr nê ãm kõt pix mã ri amnhĩ nhĩpêx o pa kaxyw.

11

¹ Na pre hte Kris ã ã amnhĩ nhĩpêx anê nê mẽ piitã mẽ mex kukamã hamaxpêr rãhã ho ri pa. Tã na pa hte uràk nê ã amnhĩ nhĩpêx anê. Jakamã kwa kêr ka mẽ ixpyrã nê ã amnhĩ nhĩpêx anhỳr o mãn ri apa.

Mênijaja mẽ mjên ã hpijaãm ã mẽ kãm karõ

Epes 5.22; Wam Pêtre 3.1-6

² Nê na ka xep htem arĩ ra ixte tanhmã mẽ amã ixkapêr toja mã ajamaxpêr tỳx o ri apa. Na pa pre Kris kõt mẽ pahtõ nê mẽ pahtõxjaja axpên wỳr pikuprõnh nê tanhmã amnhĩ nhĩpêx to hã mẽ amã karõ ka prem inhma nê

mē urāk nē ā amnhī nhīpēx anē. Ām hāmri na ka htem ā amnhī nhīpēx anhūr o apa. Ja na inhmā mex.

³ Na pa pre krī hō kamā mēnijaja kot amnhī krā hpro hā mē amā mē harē. Ka prem inhma nhūm mē akwūyja kām ja mex nē nhūm mē akwūyja tee ri ja kukamā ajamxpēr. No mēmo kaxyw na hte mēnijaja amnhī krā hpro? E kot paj ixprī hā mē amā ja jarē ka mē inhma. Nā Tirtūm kēp Kris jamār xwūnh nhūm Kris kēp Tirtūm mā mē inhmyjē jamār xwūnh. No mē anijaja mē amjēn kēp Kris mā mē ajamār xwūnh. Na hte mēnijaja ohtō nē ra mē mjēn ā amnhī to amnhīrit kaxyw amnhī krā hpro nē ri pa. No mē inhmyjaja na pa htem ā amnhī nhīpēx anhūr kēt nē. Na pa htem amarī ixkrā hkēnh nē ixpa. ⁴ Jakamā na pa htem Tirtūm kapēr mar xā hā ixkre hwūr xpēn wūr akuprō nē Tirtūm nhī hā mē anijē mā kapēr jarēnh o ixkuhē. Rū Tirtūm mā tanhmā mē pajarēnh to. No ām amnhī krā hpro hkēt rāhā kām mē ajahkre rū kām mē pajarē. Kot pa mē amnhī krā hpro nē te mē apē ixprōjaja mē apē mē ijamār xwūnh ā mē ajarēnh pyrāk. Jao te mē ixte mē ijamār xwūnh Kris ā ixpijaām kēt pyrāk o amnhī nhīpēx. ⁵ No mē anijaja mē ixte Kris mā mē ajamār xwūnh jakamā na ka htem Tirtūm nhī hā mē inhmā kapēr jarēnh rū kām mē pajarēnh kaxyw nē amnhī krā hpro. Mē ixte Kris mā mē ajamār xwūnhjē hā apijaām kaxyw ā amnhī nhīpēx anē nē mē amnhī krā hpro. Kot ka mē ā amnhī nhīpēx anhūr kēt nē te mē ate mē ixtā apijaām kēt pyrāk o amnhī nhīpēx nhūm mē amjēn tee ri ja hā apumu nē hpijaām nē. Te ate amnhī krā hkēnh nē ri apa nhūm tee ri apumunh nē hpijaām pyrāk. ⁶ Kot kaj mē amnhī krā hkēnh nē ri apa nē amnhī kamā apijaām nē ri apa. Mē anijaja na ka htem akrā hki japjē nē kamā amex nē ri apa. No kot ka mē amnhīm akrā hkēnh nē apunuj nē amnhī kamā apijaām nē ri apa. Jakamā kēr ka mē Tirtūm mā amnhī jarēnh kaxyw nē amnhī krā hpro. Nom kot ka mē amjēn ā apijaām kēt nē ri apa hprām japēr nē mamrī amnhīm akrā hkēnh nē ri amnhī kuk ā apijaām kēt nē ri apa.

⁷ No mē inhmyjaja na pa htem amnhī krā hpro hkēt nē. Te mē ixpē Tirtūm pyrāk nhūm mē anijaja te mē apē Tirtūm kra pyrāk o na pu htem xpēn nhīpēx. Tirtūm krajaja na htem mēmoj tā Tirtūm mā karō hkēt nē. Ja pyrā nē mē anijaja na ka htem mē inhmyjē mā mēmoj tā karō kamā axihtūx o apa hkēt nē. Na ka htem mē ixtā apijaām kām mēmoj tā mē ixwūy.

⁸ Amnepē mā Tirtūm kot mēmoj to kator krax rūm na pre myja kumrēx nhīpēx hāmri nē kēp ōkwa i hō kapa nē ho kām hprō nhīpēx. No na pre nija kumrēx nhīpēx nē ōkwa i ho kām mjēn nhīpēx kēt nē. ⁹ Myja mā na pre hprō nhīpēx. No nija mā mjēn nhīpēx kēt nē. ¹⁰ Jakamā kēr ka mē anijaja amjēn ā apijaām ā amnhī to amnhīrit kaxyw hāmri nē mē inhmā Tirtūm nhī hā tanhmā akapēr jarēnh to kaxyw rū kām amnhī jarēnh kaxyw hāmri nē amnhī krā hpro nē akuhē. Hāmri nhūm Tirtūm kapēr o mē wryk xwūnhjaja ja hā mē apumu nē hkīnh nē tee ri mē akukamā hamxpēr kēt nē.

¹¹⁻¹² Nē wam ni kator xwūnhnta na pre myja rūm kato. Tā na pa htem jarāhā mē inhmyjaja hpānhā mē anijē rūm ijapōj. Tirtūm jamaxpēr xā hkōt. Tām na pre ā mē pahte amnhī nhīpēx anhūr kaxyw ā mē panhīpēx anē. Tā mē ixpē Pahihti Kris kwūy hā mē inhmyjaja nē mē anijaja na pu htem ri ahte papa hkēt nē. Na pu htem xpēn kutā pamā xpēn hkīnh o papa nē mēmoj to xpēn kutā panojarēt o ri papa. Nē xpēn to presija ho papa. Na hte mē anijaja mē amjēn o presija ho apa. Nē mē amyjaja na ka htem mē aprō ho presija ho apa. Tā kēr ka mē anijaja mē amjēn ā apijaām o ri hkōt apa. ¹³ Jakamā kwa mē kot amnhī

krā hproja kukamā ajamexpēr t̄ȳx nē. Xà mẽ anhõ krī kamā mẽnijaja mẽ mjên ã hpijaam ã amnhĩ to amnhĩrīt kaxyw amnhĩ krā hpro nà? Koja mẽ ja kaxyw ã amnhĩ nhĩp̄ex anh̄ȳr jap̄er kē mẽ rī mẽ anoo mã Tirtũm mã amnhĩ jarēnh kaxyw nē kup̄e xē hkwȳ ho amnhĩ krā hprõ nē rī kām amnhĩ jarē. Nom koja mẽ ã amnhĩ nhĩp̄ex anh̄ȳr kēt nhũm mẽmyjaja tee ri ja hã mẽ omunh nē ho kap̄er hkēt jap̄er hãmri kē mẽ rī amnhĩ krā hpro hkēt nē ri pa.

¹⁴ Mē kot mẽ pahte amnhĩ nhĩp̄ex ã mẽ pahpumunh nē hk̄inh kaxyw na pu htem tanhmã amnhĩ nhĩp̄ex to ho ri papa. Na htem mẽ pahkrã hk̄i jarēnh o: “Koja mẽmyjaja hkrã hk̄i jap̄jē nē ri pa nē ra kamã omnajti.” Anh̄ȳr jakamã na pa htem amnhĩ krã hk̄ēnh nē ri ixpa. ¹⁵ No mẽ anijaja na htem mẽ ajarēnh o: “Mẽnijaja na htem hkrã hk̄i jap̄jē nē ri pa nē kamã muxti.” Anh̄ȳr jakamã na ka htem akrà hk̄i jap̄jē nē ri apa. Mē ak̄i te kēp mẽ akrà hpro xà pyrãk. Na ka htem ã amnhĩ nhĩp̄ex anh̄ȳr o apa.

¹⁶ E na pa ra mẽ amã krī hkwȳ kamã Kris kw̄ȳ nijaja kot mjên ã hpijaam ã amnhĩ to amnhĩrīt kaxyw tanhmã amnhĩ nhĩp̄ex to hã mẽ harē. Tã koja mẽhõ nija tee ri ja ma nhũm ja kēp omnuj jap̄er. Nhũm amnhĩ jarēnh o:

—Kēt. Kot paj tanhmã inhmã amnhĩ nhĩp̄ex to hprãm xà hk̄õt tanhmã ri amnhĩ nhĩp̄ex to ho ri ixpa. Koja inhmjên ja hã ixpumu nē hpijaam nē rī tãm. Anh̄ȳr ã amnhĩ jarē kã mẽ tee ri ã kot amnhĩ jarēnh anh̄ȳrja ã ama nē kãm: —Kwa nà ã ri ajamexpēr anh̄ȳr kēt nē. Na hte Kris kw̄ȳjaja ã hamexpēr anh̄ȳr kēt nē. Anē.

Jeus tyk mã mẽ pajamexpēr pē tanhmã mẽ pahte amnhĩ to hã mẽ pajarēnh Matêwre 26.26-30; Makre 14.22-26; Rukre 22.19-20

¹⁷ Nē na ka xep htem Tirtũm mã amnhĩ jarēnh xà hã ixkre hw̄ȳr axp̄ēn w̄ȳr akuprõ nē kamã amnhĩ to mex kēt nē. Na ka htem tanhmã amnhĩ tomnuj to pa tee ri mẽ ajarēnh ma nē ixkaprĩ nē. Nē amnhĩm mẽ amex ã mẽ ajarēnh kēt nē. ¹⁸ Na ka xep htem axp̄ēn w̄ȳr akuprõ nē mẽmoj tã axp̄ēn mã akir nē axp̄ēn pē anhgrã. Nē ahp̄ȳnhã mẽmoj mã ajamexpēr jao ra mẽ amã axp̄ēn k̄inh kēt nē. Na pa tee ri ã mẽ ajarēnh anh̄ȳrja ma nē ixkaprĩ ht̄ȳx nē. ¹⁹ Xà na hte Tirtũm ahp̄ȳnhã tanhmã mẽ pahte amnhĩ anhĩp̄ex to hã mẽ pahpumunh k̄õt kãm mẽ pajapē hkēt ã amnhĩ jarē? Nà na hte ã amnhĩ nhĩp̄ex anh̄ȳr kēt nē. Kãm mẽ pajapē ho axp̄ēn pyrãk kēnã.

²⁰ Nē na hte Kris kw̄ȳjē piitã tōhã axp̄ēn w̄ȳr akuprõ nē Jeus tyk mã hamexpēr kaxyw pãwti hkwȳ hku. Tã mẽ kajaja na ka xep htem ja kaxyw axp̄ēn w̄ȳr akuprõ nom axtem nē Jeus tyk mã ajamexpēr pē axãpkur kēt nē. ãm mẽ axãpkur pix kukamã ajamexpēr nē axtem nē axãpkur r̄unh o akrĩ.

²¹ Jao amnhĩ pix kukamã ajamexpēr. Mē akw̄ȳjaja wam m̄rar nē hp̄ox nē mẽ apkur xà hã mẽ hkrĩ xw̄ȳnhjaja na xep htem hkwȳjē rom mẽõta pinh pa. Nē w̄ihtija nhũm mẽ mããnēn hpenh pa nē axtem nē ho axp̄. Jakamã nhũm mẽ akw̄ȳjaja kot amnhĩ to hapu nē hp̄ox xw̄ȳnhjaja mẽmojta ã hprãr pa. ²² Kwa mon ka mẽ amã hprãm nē anhõrkwȳ kamã axãpkur kēt nē? Mē kot Tirtũm mã amnhĩ jarēnh xà hã ixkre kamã na htem apkur r̄unh hkēt nē. Ka mẽ ã amnhĩ nhĩp̄ex anē nhũm mẽõ hkēt xw̄ȳnhjaja amnhĩ to hapu nē mra nē mẽõ hã prã nē amnhĩ kamã hpijaam nē. Kwa xà kot pa ã mẽ ate amnhĩ nhĩp̄ex anh̄ȳr ã mẽ ajarēnh ma nē ixk̄inh nē mẽ ate amnhĩ nhĩp̄ex mex ã mẽ ajarē? Nà kot paj ã mẽ ajarēnh anh̄ȳr kēt nē.

²³ Pahihti Jeus na pre ja hã tanhmã inhmã kap̄er to nē inhmã:

—Kēr ka mẽ tōhã axp̄ēn w̄ȳr akuprõ nē axãpkur pē ixtyk mã m̄an mẽ ajamexpēr pē ã amnhĩ nhĩp̄ex anē nē ã amnhĩ nhĩp̄ex anē. Anē.

Jakamā kot paj ixprī hā amnhī xō ri mē amā kot tanhmā inhmā kapēr tota jarē ka mē inhma. Nà Jejus kormā htyk kêt ri Jut Kariot ra kot pôristi mā hā àmnênh kaxyw nhùm kamāt nhùm Jejus mē y hā mē ahkre xwýnhjê mē apkur kaxyw hkri hpa. Hāmri nhùm Jejus pāwti hō py nē o xa ²⁴ nē Tirtūm mā harē nē kām:

—Pa Papaj. Nà am hāmri na ka hte mē inhmā mē inhō mex o apa. Anē.

Nē hpānhā pāwja o hkry pa nē ho mē kot y hā mē ahkre ho mē pa xwýnhjê nhîpêx pa nē mē kām:

—E na pa ā pāwti ho hkry nē mē amā ōr anē. Koja mē ā inhîpêx anē nē te mē kot ixto hkry hpar pyrāk o inhîpêx pa amnhī xā htýx kamā ijamak kām ty. Nom mē anē kot paj ty. Jakamā e kēr ka mē ixwakre kamā tōhā axpên wýr akuprō nē ixte mē ate amnhī tomnuj pānhā amnhîrer kaxyw mē anē ixtyk mā ajamaxpêr pē akînh nē pāwta kur o akrī. E mē māmri axāmnhîx aku. Anē.

²⁵ Hāmri nē hpānhā kop kām wîhtita py nē o xa nē mē kām:

—E kop kām wîhtija te kêp Tirtūm kot mē atā amnhī jarēnh nyw xā jarēnh pyrāk. Ixtyk kukwak ri koja mē ato hkra. Kot paj ty nhùm ixkamrō mē anē axkapī. Jakamā e. Mē kopja kamā wîhti ho akôm o axpên nhîpêx. Nē ho akôm pē ixte mē anē ixtyk mā ajamaxpêr. Anē.

²⁶ Tā ā kot amnhī jarēnh anhÿr jakamā na pu htem axpên wýr akuprō nē pāwti hkwy hku nē mēmo kagō hkwy o ixkō. Nē ho pahkôm pē axpên mā Jejus tyk jarēnh o pahkri. Tā kēr pu mē arī ā amnhī nhîpêx anhÿr o ri papa rāhā nhùm Jejus akupÿn mē pahwýr wrý. ²⁷ Jakamā kot kaj mē tōhā mēmo arîgro hā kot mē panē htykja mā ajamaxpêr kaxyw axpên wýr akuprō. Hāmri nhùm mē anhîō mē awýr axà nē nhÿ. Nom axtem nē Jejus tyk mā hamaxpêr kêt japêr. Nē htýx pāwti kur o nhÿ. Nē hkôt amarī mēmo kagō ho hkôm o nhÿ. Koja ā htyk mā hamaxpêr kêt rāhā amnhī nhîpêx anē nē te Jejus o kapêr pyrāk o amnhī nhîpêx. Te ho kapêr o:

—Nà Jejus amarī htyk nhùm hkamrō amarī hpikapîr kēnā. Na pre mē panē htyk kêt nē.

Anhÿr o ho kapêr pyrāk. ²⁸ Jakamā kwa kēr ka mē ate pāwta kur kaxyw nē taxy kormā tanhmā ate amnhī nhîpêx to mā ajamaxpêr nē ajamaxpêr o:

—Kwa mǎn pa Tirtūm kapêr kôt amnhī nhîpêx mex rāhā ho ri ixpa nà?

Anhÿr o mǎn ajamaxpêr. Hāmri nē ate hkôt amnhī nhîpêx mex ā amnhī pumu nē amarī axāmnhîx aku. No kot ka mē kormā mēmoj punuj kaga hkêt nē arī ri ho anhÿr o pa hāmri nē kām ajamaxpêr nē hkur kêt nē. Rÿ tanhmǎn tee ri tanhmā ate amnhī tomnuj tota mā ajamaxpêr nē akapri nē. Hāmri nē tokyx Tirtūm mā amnhī jarē nē amnhī to mex prām xaj amnhī to awý hāmri nē arī kormā axāmnhîx pāwtita ku. ²⁹ Koja mēhō mē akôt axà nē mēmoj kukamā hamaxpêr pē htýx pāwti nhîrēnhta ō py hkur o nhÿ. Hāmri nhùm Tirtūm tee ri ja hā omu nē hā tanhmā ho. ³⁰ Na ka mē ra axohtō nē ā amnhī nhîpêx anē nē atýx ri mēmoj kukamā ajamaxpêr pē pāwta ku. Jejus kot mē panē htykja mā ajamaxpêr kêt pē atýx tanhmā ajamaxpêr to pē hkwy hkur o akrī. Mýrapê na ka mē ra ja hā axà nē ri apa. Nē mē akwýjaja ra htyk rax nē. ³¹ Nom kot ka mē axpên wýr akuprō hāmri nē akupÿm tām axpên kôt ajamaxpêr nē axpên kôt amnhī nhîpêx nē rī kormā pāwtita ku. Hāmri nhùm Tirtūm ja hā mē apumu nē tanhmā mē ato hkêt nē. ³² Na hte mē pahte tanhmā amnhī tomnuj to hā mē pahpumu nē hā tanhmā mē pahto. Mē pahte ja hā amnhī pumunh nē axte ā amnhī nhîpêx anhÿr kêt kaxyw na hte ā mē pahpê hkrajê nhîpêx anē. Jakamā kot puj mē nhÿrmā mē kêp hkra hkêt xwýnhjê hkôt

kuwyta wÿr ma papa hkêt nê. ³³ Jakamã e Kris kôt ixtô nê ixtôxjaja. Kêr ka mê axte Pahihti Jejus tyk mã ajamaxpêr kaxyw axpên wÿr akuprô. Hâmri nê ra axpên wÿr apikuprôn h pa hã axpên pumu nê rî kormã pâwti hkwÿ hku nê hkur pê Jejus kot mê panê htyk mã ajamaxpêr o akrî. ³⁴ Nê ka mê atô ra amã prãm japêr nê anhôrkwÿ kamã apku nê rî kormã mê hkôt tê. Jao ra anhôhy htu nê ajamakêtkati nê akwÿjê jamâr o nhÿ. Kê mê hpôx pa ka mê atipxi nê Pahihti Jejus tyk mã ajamaxpêr pê hkur o akrî. Hâmri nhûm Tirtûm ja hã mê apumu nê hkîn h nê tanhmã mê ato hkêt nê.

Na ka prem mê ate inhmã kagã nê mênhta kamã mêmoj tâ ixkukjêr rax nê. Tã na pa ra kagã ja kamã mê amã hkwÿ jarênh rax nê. Nom kot paj piitã harênh par kêt nê. Kot paj âm mê amã hkwÿ pix jarê. Hâmri nê nhÿrmã ma mê awÿr mô nê mê apumu nê kormã axte mê amã harênh jatur xãm kumê.

12

Mê kot Tirtûm kapêr o hêx xwÿnhjê jarênh

Rômãn 12.6-8; Wam Korîit 14.29; Wam Pêtre 4.10-11; Wam Juãw 4.1-2

¹ Nê kot paj hpãnhã mê amã tanhmã Tirtûm Karô jarênh to ka mê inhma. Tanhmã kot mê pahkrã hto nhûm mê pahte ahpÿnhã tanhmã kãm amnhî nhîpêx to ho papaja kot paj mê amã harê. ² Amnepê mã kormã mê ate Kris kôt amnhî xunhwÿr kêt ri na ka prem sânti hkôt ri amnhî nhîpêx o ri apa. Kapêr kêt tâ ka prem hkôt ri amnhî nhîpêx rãhã ho ri apa. Te kot mê ano kupyrr pyrãk ka mê kãm mex o mex ã harênh o ri apa. Nê kãm amnhî jagrer pê amnhî to hwÿr o ri apa. Æ na ka prem amnhî nhîpêx anhÿr o ri apa. ³ Tã ra hpãnhã Tirtûm kôt amnhî xunhwÿ.

Na htem ohtô nê Tirtûm nhÿ hã kapêr jarênh o pa hã amnhî jarênh tâ no âm mê hkwÿjaja ja hã amnhî to hêx. Tã kot paj ixprî hã mê amã tanhmã mê harênh to. Koja mêmô mê kãm Tirtûm nhÿ hã kapêr jarênh o pa hã amnhî jarê hã koja Jejus o kapêr punuj o pa hkêt nê. Koja harênh o:

—Jesús kêp mê panhõ Pahihti jakamã kwa pu mê hkôt amnhî xunhwÿ nê hkôt amnhî nhîpêx o ri papa.

Anhÿr o harê. Koja mêmô ã mê amã kapêr anê ka mê ama nê mê kot Tirtûm nhÿ hã kapêr jarênh o pa xwÿnh ã omunh kurê kumrêx. No koja mê amã ã kapêr anhÿr kêt nê ka mê ama nê Tirtûm kapêr o hêx o pa hã omunh kurê kumrêx.

Tirtûm Karô kãm mê pahte axpên to mex prãm ã harênh

Rômãn 12.6; Epes 4.7; Wam Pêtre 4.10

⁴ Nê ahpÿnhã kot tanhmã mê panhîpêx to xwÿnhja âm pixii. Kêp Tirtûm Karô. Na hte mê pahkarô mã agjê nê ahpÿnhã tanhmã mê pahte axpên to mex kaxyw tanhmã mê panhîpêx to. Kot tanhmã mê panhîpêx to xãja ohtôô. Mê pahte ahpÿnhã ri tanhmã kãm amnhî nhîpêx to nê tanhmã axpên to mex to ho ri papa kaxyw na. Tirtûm Karô na hte ja kaxyw tanhmã mê pahkrã hto.

⁵ Nê mê pahte kãm tanhmã amnhî nhîpêx to ho papa xwÿnhja haxwÿja âm pixii. Kêp Pahihti Jejus. Tã na pu htem ahpÿnhã kãm tanhmã amnhî nhîpêx to ho ri papa.

⁶ Nê kot mê pahto ajuta nhûm mê pahte ahpÿnhã tanhmã axpên to mex to ho papa xwÿnhja haxwÿja âm pyxii. Kêp Tirtûm. Na pu htem ahpÿnhã tanhmã hkôt axpên xunhwÿr tÿx to kaxyw tanhmã axpên to mex to ho papa.

⁷ Nê Karôja na hte ahpÿnhã tanhmã axpên kaxyw mê panhîpêx to pu mê axpên to ajuta mex o ri papa.

- 8 Jakamã na pu hte mẽ pahkwýjaja Tirtüm Karõ nhý hã ma mẽ pahkwýjê mã Tirtüm kapër jarënh o ri mẽ hkõt papa.
Nẽ mẽ pahkwýjaja ma ý hã paxàhpumunh mex pẽ ma ri kapër o mẽ ahkre ho mẽ hkõt papa.
- 9 Nẽ mẽ pahkwýjaja Karõ nhý hã Tirtüm kot tanhmã mẽ pahto ajuta hto kaxyw hkõt pajamaxpër týx nẽ.
Nẽ mẽ pahkwýjaja akupým mẽ à xwýnhjê ho mex o papa nhũm mẽ akupým mex nẽ pa.
- 10 Nẽ mẽ pahkwýjaja aa mẽ kot mẽmoj pumunh kêt kwý ho anhýr o ri mẽ hkõt papa.
Nẽ mẽ pahkwýjaja Tirtüm kapër mar týx nẽ ô ri mẽ kãm harënh o mẽ hkõt ri papa.
Nẽ mẽ pahkwýjaja Tirtüm Karõ nhý hã tanhmã mẽ kot amnhĩ nhípêx to hã mẽ omunh o papa. Rý pahprĩ hã mẽkarõmnuti nhý hã mẽ kot amnhĩ nhípêx ã mẽ omunh o papa.
Nẽ mẽ pahkwýjaja nhãm mẽ kapër mar kêt tâ ra mẽ kapër o pakapër.
Nẽ mẽ pahkwýjaja mẽ kapër o pakapërja ma nẽ mẽ kot mar kêt xwýnhjê mã harë. Kormã aa pahte mar kêt tâ ra pahprĩ hã mar mex nẽ mẽ kãm harë.
- 11 Æ na hte Tirtüm Karõ kãm hprãm xà hkõt tanhmã mẽ panhípêx to pu mẽ ahpýnhã ý hã ã axpën nhípêx anhýr o ri axpën kõt papa.

*Te mẽ pahpê Kris nhĩ pyrãk ã mẽ pajarënh
Rõmãn 12.3-8; Epes 1.22-23, 4.11-16; Korosê 3.15*

12 E pa hpãnhã mẽ amã mẽ panhĩ kamã tanhmã mẽmoj jarënh to ka mẽ inhna nẽ hã anohtýx nẽ. Mẽ panhĩja ãm pixi htã no ãm kamã mẽmoj xohtõõ. Kamã mẽ pahte nẽ kamã mẽ pahpa nẽ kamã mẽ pajakwa. Nẽ mẽ panhĩnhu nẽ mẽ pano. Æ mẽ panhĩ kamã mẽmoj xohtõ kot anhýr. Ja pyrã nẽ Kris nhĩja ãm pixi htã te mẽ pahpê ì kamã mẽmoj xohtõta pyrãk. Mẽ pahkwýjaja te mẽ pahpê hte pyrãk. Nẽ mẽ pahkwýjaja te mẽ pahpê ìhkra pyrãk. Nẽ mẽ pahkwýjaja te mẽ pahpê no pyrãk.

13 Mẽ pahpê Kris kwýjaja axpën kaxyw mẽ paxohtõõ. Mẽ ixpê Ijaewjaja nẽ mẽ apê Ijaew kêt xwýnhjaja. Nẽ amari ri mẽ kãm mẽ axapënh o mẽ apa xwýnhjaja nẽ amnhĩ mã ri mẽ axapënh o mẽ apa xwýnhjaja. Æ ahpýnhã mẽ paxohtõ kot anhýr tâ nhũm Tirtüm Karõ te mẽ pahpê Kris nhĩ pixi pyrãk o mẽ panhípêx. Nhũm Krisja mẽ pahpiitã mẽ pamã Karõ gõ nhũm mẽ pahkarõ mã agjê. Pixi htã mẽ pahpiitã mẽ pahkarõ mã agjê.

14 Nẽ mẽ panhĩja pixi tâ kamã tanhmã mẽ pakute xàja ohtõõ. Tã Kris nhĩja te kot mẽ panhĩja pyrãk. Urãk nẽ kamã mẽ paxohtõõ. Jakamã na pu htem ahpýnhã tanhmã kãm amnhĩ nhípêx to ho ri papa. Karõ kot tanhmã amnhĩ kaxyw mẽ panhípêx to xà hkõt.

15 Nẽ kop ãm mẽ pahparja kapër ronhýx tee ri mẽ panhĩhkra pumu nẽ amnhĩ mã:

—Hëxta waa nẽ. Kêp ãm ixpê mẽ ìhkra ronhýx pa inhmex nẽ ijarir. No ãm ixpê mẽ hpar pix jakamã pẽr ãm mẽ hkĩnhã ixpê mẽ hkwy hkêt ãm ixpê mẽ hatur xà pix na pa.

Anhýr o amnhĩ jarënh japêr. Nom ja kot anhýr kêt. Axtem nhýhým kot mẽ pahto pa kaxyw na mẽ pahparja. Nẽ axtem mẽmoj tâ mẽ paxapënh rý mẽmoj jamýnh kaxyw na mẽ panhĩhkraja. Na pu htem hamẽ wa ho presija rãhã ho papa. Ja pyrã nẽ kot puj mẽ pahkwýjê hõ mẽ parom Tirtüm Karõ nhý hã

mëmoj tâ àpênh tỳx ã omu nê hkĩnhã mē pahte amnhĩ to warê hkêt ã amnhĩ jarênh o papa hkêt nê.

¹⁶ Nê mē pajamakja kapêr ronhỹx kapêr o:

—Hêxta waa nê. Kêp apu ixpê mē no ronhỹx pa inhmex nê ijarir. No ãm ixpê mē umar xà pix jakamã pêr ãm ixte ho warê hkêt kumrêx.

Anhỹr o amnhĩ jarênh japêr. Nom ja kot anhỹr kêt. Hamê wa mex kênã. Axtem ho mē paxumar kaxyw na mē pajamakja. Nê axtem ho mē parit kaxyw na mē panoja. ¹⁷ Kêp ãm mē pano pix ronhỹx pu mē parit pix nê paxumar kêt nê ri papa. Rỳ kêp ãm pajamak pix ronhỹx pu mē paxumar pix nê parit kêt nê mē paxupâr kêt nê ri papa. ¹⁸ Mē panhĩja pixi htã kamã hikukrêx sohtôô. Na pre Tirtũm amnhĩ krã hkôt kamã mëmoj piitã hipêx nê hanhõ. ¹⁹ Kêp ãm mē panhĩja kamã ãm mëmoj pixi ronhỹx pu mē pamex kêt nê papa. ²⁰ Tã no ãm kot anhỹr kêt. Mē panhĩja ãm pixi htã kamã hikukrêx sohtôô. ²¹ Jakamã na hte mē panoja amnhĩ nê mē panhĩhkra mã kãm:

—Tk kwa ma tē. Ixte ato presijare hã.

Anhỹr o kãm kapêr kêt nê. Rỳ mē pahkrãja amnhĩ nê mē pahpar mã kãm:

—Tk kwa ma tē. Na pa ato presija hkêt nê.

Anhỹr o kãm kapêr kêt nê. Ja pyrà nê kot puj mē nhỹri Kris kôt panhĩõ pumu nê pamex o pahte hakrenh ã amnhĩ jarênh kêt nê. ²² Nê mē panhĩ kamã mëmoj kwỳ te hirerek pyràk tâ no pu mē arĩ pamã hapê nê. Ja pyrà nê kêt pu mē kormã mē kot Kris kôt amnhĩ xunhwỳr tohtuj anhỹr xwỳnhjaja pu mē pamã mē hkĩnh kãm tanhmã mē kutã panojarêt to ho ri papa.

²³⁻²⁴ Nê na pu htem mē panhĩ kamã mē pakukrêx kwỳ hã pahpijaãm nê hpro nê ri ho papa. Nê hkwy hã pahpijaãm kêt nê hpro hkêt nê ho ri papa. Nê hkwy mē pahpê omnajti htã pu mē ho mex nê ri ho papa. Tirtũm kot ã mē panhĩpêx anhỹr jakamã na pu htem mē pakamã mē pakukrêx kwỳ mē pahpê omnajti htã pu mē ho mex nê ri ho papa. Ja pyrà nê kêt pu mē Tirtũm kôt mē pahtõ nê mē pahtõx piitã ho mex o ri papa. Nê tãm mē hipêx. Mē pahkwỳjaja muxre nê mē pahkwỳjaja omnajti htãã. Tanhmã mē kute htã pu mē kêp mē Jejus kôt mē pahtõ nê mē pahtõx ã mē ho mex o ri apa.

²⁵ Nê na hte mē panhĩ kamã mē pahpar nê mē panhĩhkra nê piitã axpên kôt àpênh mex o pa. No na hte mē pahparja nhỹhỹm ma mra nhũm ihõja hkwy m nhỹhỹm ma mrar kêt nê. Na hte wa axpên kôt àpênh mex o pa. Ja pyrà nê kêt pu mē pahpê Tirtũm krajaja axpên kôt amnhĩ nhĩpêx rãhã ho ri papa. Nê axpên to mex rãhã ho ri papa. No ri axpên kwỳm ri tanhmã amnhĩ nhĩpêx to ho ri papa hkêt nê.

²⁶ Na pu htem tõhã nhỹhỹnh panhĩ kamã paxà nê ri papa. Pahkrã tãtãk rỳ pakatut gêk. Jao te mē panhĩ piitã kamã mē paxà pyràk. Nê nhỹhỹnh akupỹm pamex nê te panhĩ piitã hkôt akupỹm pamex pyràk. Ja pyrà nê koja Kris kôt panhĩõ nhỹhỹnh ã nê ri pa. Rỳ tanhmã amnhĩ to nê ra hkaprĩ nê ri pa pu mē ja hã omu nê ý hã hkaprĩ nê papa. No koja mëmoj tâ hkĩnh nê pa pu mē ja hã omu nê ý hã pahkĩnh nê papa.

Te mē pahpê Kris nhĩ pixi pyràk ã mē pa jarênh

²⁷ Nê mē pahpê Kris kwỳjaja te mē pahpê Kris nhĩ pixi pyràk. Ahpỹnhã mē pahte tanhmã amnhĩ nhĩpêx to ho papa htã mē pahpê Kris kwỳ jakamã te mē pahpê ã pixi pyràk.

²⁸ Nê mē pahte Kris kôt tanhmã pahkwỳjê ho ajuta hto ho papa kaxyw na pre Kris ahpỹnhã tanhmã mē paxunhwỳr to.

Mē pahkwýjaja mē pahte ý hã nhãm mē kãm kapēr jarēnh o papa kaxyw mē paxunhwý.

Nē mē pahkwýjaja mē pahte ý hã tanhmã kapēr jarēnh to ho ri papa kaxyw mē paxunhwý.

Nē mē pahkwýjaja Tirtüm kapēr jarēnh o mē ahkre ho ri mē papa kaxyw mē paxunhwý.

Nē mē pahkwýjaja mē pahte aa mē kot mēmoj pumunh kêt kwý ho anhÿr o ri papa kaxyw mē pa xunhwý.

Nē mē pahkwýjaja akupÿm mē à xwýnhjê ho mex o mē papa kaxyw mē pa xunhwý.

Nē mē pahkwýjaja mē kapēr o mē hihtÿx o mē papa kaxyw mē pa xunhwý.

Nē mē pahkwýjaja mē pahte tanhmã mē ho ajuta ho ho ri papa kaxyw mē pa xunhwý.

Nē mē pahkwýjaja nhãm mē kapēr ô ho mē pakapēr o mē papa kaxyw mē pa xunhwý.

Å na pre ahpÿnhã mē pahpê hkwýjê piitã mē paxunhwÿr anê. ²⁹ No na pu htem pahpiitã axpēn kôt Tirtüm kapēr o mē ahkre ho ri papa hkêt nê.

Nē mē pahpiitã ý hã tanhmã pakapēr to ho ri papa hkêt nê.

Nē mē pahpiitã kapēr jarēnh o ri papa hkêt nê.

Nē mē pahpiitã aa mē kot mēmoj pumunh kêt kwý ho anhÿr o ri papa hkêt nê.

³⁰ Nē mē pahpiitã akupÿm mē à xwýnhjê ho mex o ri papa hkêt nê.

Nē mē pahpiitã mē kapēr ô ho ri pakapēr o ri papa hkêt nê.

Nē mē pahpiitã ri mē kapērja ma nê pakapēr kãm pahkwýjê mã harēnh o ri papa hkêt nê.

Na pu htem ahpÿnhã tanhmã Kris kôt mē pahkwýjê ho ajuta hto ho ri papa.

³¹ Tã kēr pu mē pahpiitã pamã axpēn kīnh pē tanhmã axpēn to mex to ho ri papa. Ja na mex o kot mēmoj piitã hakrenh par. E kot paj ixprĩ hã tanhmã mē amã ja jarēnh to ka mē inhma.

13

*Mē pahte axpēn kamã paxukaprĩ ho papa hã mē pamã karõ
Juãw 13.31-35; Karatas 5.13-15; Korosẽ 3.12-14*

¹ Kot pa ma mē piitã ahpÿnhã mē kapēr kãm mē kãm Tirtüm kapēr jarēnh o ri ixpa japēr. Åm mē piitã mē kapēr o ixkapēr mex o mē kãm harēnh o ri ixpa japēr. Nē Tirtüm kapēr o mē wrÿk xwýnhjê kapēr o mē ahkre ho ri ixkwýjê hkôt ixpa japēr. Tã inhã mē hkīnh kêt kãm ixte mē ahkre ho ri ixpa ronhÿx mē inhma nê am inhma. Nhüm ixkapērja te ixte rat tatak pyrãk o pa tee ri Tirtüm kapēr o mē ahkre kaprÿ ho ri mē hkôt ixpa nhüm Tirtüm tee ri inhã mē hkīnh kêt ã ixpumu nê inhã:

—Nã amã mē hkīnh kêt jakamã na ka tee ri ixkapēr o mē ahkre kaprÿ. Anê.

² Rÿ kot paj Tirtüm xãhpumunh tÿx o mē kãm kapēr pimxur kwý jarēnh o ri ixpa japēr. Rÿ Tirtüm mē kurom inhã mēmoj to amnhĩrit pa omu nê mē kãm harēnh o ri ixpa japēr. Rÿ pa Tirtüm kot amnhĩ nhĩpêx piitã omunh par japēr. Rÿ ixte amnhĩ kaxyw hkôt ijamaxpēr tÿx kôt ý hã kēn krã hprék ô mã ixkapēr nhüm kot inhmar nê inhmar xã hkôt nhãm pikamēnh japēr. Tã inhã ixkwýjê hkīnh kêt kãm ã amnhĩ nhĩpêx anê nhüm Tirtüm tee ri ja hã ixpumu nê inhã:

—Nà amã mē hkīnh kêt jakamã te axàhpumunh tỳx kêt kumrēx pyrāk. Na ka tee ri ã mē kãm ixkapēr jarēnh anhỹr o ri apa kaprỹ. Anē.

³ Rỳ pa mē kēp amrakati xwỳnhjē mã ixkukrēx nhōr par japēr. Rỳ Kris ã mē kãm amnhĩ grōnh kôt mē kãm xa nhũm mē hã ixpĩr japēr. Tã inhmã mē hkīnh kêt kãm ã amnhĩ nhĩpēx anē nhũm Tĩrtũm tee ri ja hã ixpumu nē inhmã:

—Nà ã ate mē kãm amnhĩ nhĩpēx anhỹr o ri apa htã amã mē hkīnh kêt jakamã na ka tee ri ã mē kãm amnhĩ nhĩpēx anhỹr kaprỹ. Anē.

⁴ Kot puj mē pamã axpēn kīnh hã kot puj mē kritpēm mē piitã mē kãm pahprĩ ho papa.

Jao axpēn kãm pagryk tokyx anhỹr kêt nē.

Nē pamã axpēn to mex pix prãm.

Nē mēmoj tã axpēn kamã pagryk kurē kumrēx kêt nē.

Nē mēmoj tã amnhĩ to jarkrar o ri papa hkêt nē.

Kot puj mē pamã axpēn kīnh hã kot puj mē ã amnhĩ nhĩpēx anhỹr o ri papa hkêt nē.

⁵ Nē kot puj mē axpēn kamã paxukaprĩ ho papa hã kot puj mē tãm axpēn nhĩpēx rãhã ho papa. Jao amnhĩ pix kukamã pajamaxpēr o ri papa hkêt nē. Nē mē pagryk tokyx anhỹr kêt nē. Rỳ axpēn kãm pagryk tokyx anhỹr hkêt nē. Rỳ koja mēhō tanhmã mē panhĩpēx kati hto pu mē ãm amnhĩ tã omu nē axte kot tanhmã mē panhĩpēx tota mã pajamaxpēr kêt nē.

⁶ Nē kot puj mē pamã axpēn kīnh o papa hã kot puj mē tee ri mēhō kot tanhmã amnhĩ tomnuj to hã omu nē pahkaprĩ nē. Rỳ tanhmã kot amnhĩ to mex to hã omu nē pahkīnh nē.

⁷ Nē kot puj mē pamã axpēn kīnh o papa hã kot puj mē arĩ Tĩrtũm kot mē pahto mex par jatur xã mēnh xã hã arĩgro jamãr rãhã ho ri papa. Nē mē kot Kris ã tanhmã mē pahto hto pu mē tee ri amnhĩ kukamã tanhmã pajamaxpēr to hkêt nē. ãm mē kutã amnhĩ to htỳx nē mē kãm pakuhē nē arĩ amnhĩ kaxyw Tĩrtũm mã pajamaxpēr tỳx rãhã nē.

⁸ Nē kot puj mē pamã axpēn kīnh o papa hãmri nē aa mē pahte ã amnhĩ nhĩpēx anhỹrja mã panhũrer kêt nē. Nē arĩ mē pamã axpēn kīnh rãhã ho papa ho papa. Jar pika ja kamã mē pahte Tĩrtũm nhỹ hã mē kãm kapēr jarēnh o ri papa htã kot puj mē nhỹrmã ma ò krĩ hwỳr api hãmri nē kuri axte ã kãm amnhĩ nhĩpēx anhỹr kêt nē. Mo kaxyw kot puj mē axte ri mēhō mã kapēr jarē? Kot puj mē ò krĩ hwỳr api nē ra mē pahpiitã paxàhpumunh o axpēn pyrāk.

Nē na pu htem tōhã mē kapēr ò ho pakapēr o ri papa. Nom kot puj mē nhỹrmã Tĩrtũm nhō krĩ hwỳr api hãmri nē kuri axte nhãm ri mē kapēr o pakapēr kêt nē.

Nē na pu htem jar mē pahkwỳjaja mē paxàhpumunh mex kôt Tĩrtũm kapēr jarēnh o ri papa. Tã kot puj mē nhỹrmã ò krĩ hwỳr api hãmri nē axte ã amnhĩ nhĩpēx anhỹr kêt nē. ãm mē pamã axpēn kīnh pixja kot puj mē arĩ ò krĩ kamã mē pamã axpēn kīnh tũm rãhã papa ho papa. ⁹ Jar mē pahpiitã mē paxàhpumunh tohtuj anhỹr o pakapēr jakamã na pu htem kormã Tĩrtũm kapēr jarēnh tohtuj anhỹr o ri papa. ¹⁰ Tã kot puj mē nhỹrmã ò krĩ hwỳr api nē kuri paxàhpumunh jatur xãm mēnh pa. Jakamã nhũm jar mē paxàhpumunh tohtuj anhỹr xwỳnhnta mē pahpē hapēx.

¹¹ E pa mē amã ja hã ejēp jarē ka mē inhma. Nà amnepē mã ixprĩre ri na pa pre ixtỳx ri mēhprĩjē kot amnhĩ nhĩpēx o amnhĩ nhĩpēx nē mē hamaxpēr o ijamaxpēr. Nē mē kapēr mex kêt o ixkapēr o ri ixpa. Tã ra ixaptàr hãmri nē mē ãptàrjē jamaxpēr o ijamaxpēr o ri ixpa. Te ra mē pahte kaxkwa kamã mē

paxàhpumunh jatur xàm mēnh parta pyrāk mē aptàrjê jamaxpēr o ijamaxpēr o ri ixpa.

¹² Ja pyrā nē na pu htem kormā Tirtūm kot amnhī nhīpēx ā omunh tohtuj anhyr. Te mē pahte amnhī pumunh xà pynajre kamā pahprī hā amnhī pumunh mex kêeta pyrāk. Nom kot puj mē nhỹrmā ō krī hwyr api hāmri nē pahprī hā paxàhpumunh jatur xàm kumē. Te Tirtūm kot hprī hā tanhmā mē pakute hā mē pahpumunh parja pyrāk.

¹³ E arī mē pahte Tirtūm kōt amnhī nhīpēx o papa xàja na axkrunēpxi. Mē pahte hkōt amnhī nhīpēx o papa rāhā ho papa kaxyw. Wamta na ja: Kēr pu mē arī amnhī kaxyw Tirtūm mā pajamaxpēr mex rāhā ho ri papa. Nē hkōt ja: Kēr pu mē arī Tirtūm kot mē pahto mex par jatur xà mēnh xà hā arīgro jamār rāhā ho papa. Nē hkōt ja: Kēr pu mē arī pamā axpēn kīnh pē tanhmā axpēn to mex to rāhā ho papa. Ja na mex o kot wamta wa hakrenh. E kēr pu mē ā amnhī nhīpēx anhyr rāhā ho ri papa.

14

*Tirtūm Karō kot mē pahto mē paxihtyx ā harēnh
Wam Korit 12.7-11, 12.27-31*

¹ E kēr ka mē arī amā axpēn Kīnh pē axpēn to mex rāhā ho ri apa nē aa jam anhyrer nē ho ajamakētkati hkēt nē. Nē amnhī to Tirtūm Karō mān amnhī to awy kē mē amā tanhmā mē ajamaxpēr to ka mē ahpynhā tanhmā axpēn to mex to ho ri axpēn kōt apa. Nē kēr ka mē ā ajamaxpēr anē nē ajamaxpēr o:

—Inhmā mē hkīnh o ri ixpa hprām tyx. Nē Tirtūm Karō kot tanhmā ixto nhūm ixte ahpynhā tanhmā mē ho ajuta hto ho ixpaja pa määnēn inhmā ho anhyr prām. Nē kot tanhmā ijakwa hto nhūm ixte ahpynhā mē kapēr ō ho ixkapērja pa määnēn inhmā ho anhyr hprām. No kēt ixte Tirtūm nhỹ hā mē kām kapēr jarēnhja na inhmā ho anhyr prām tyx kumrēx. Anē.

²⁻⁴ Mē pakamā mē kapēr ō ho Tirtūm mā kapēr xwynthjaja na htem Tirtūm Karō nhỹ hā ām kumā pix mā kapēr ōta o kām kapēr nhūm tapxipix mē kuma. No mē papajaja na pu htem tee ri mar o pahkrī nom mar kēt nē. Ām kapēr xwynthta pix koja mē pakurom amnhī ma. Nom koja mē pakapēr kām Tirtūm mā amnhī jarē pu mē mar mex nē. Nhūm mē pakapēr kām Tirtūm nhỹ hā mē pamā kapēr jarē pu mē pahprī hā kuma. Jaō mē pamā kapēr kōt amnhī nhīpēx prām nē. Nē mēmoj jā pahkaprī nē ri papa htā mē kuma nē amnhī kaxwynth kām amnhī to paxihtyx.

⁵ Mē apiitā mē ate nhām mē kapēr ō ho Tirtūm mā amnhī jarēnhja na mex. Nom mē ate mē akapēr o mē akwýjē mā Tirtūm kapēr jarēnh o ri mē apaja na mex o wamta jakre. Kot ka mē nhām mē kapēr ō ho Tirtūm mā amnhī jarē nhūm mē akwýjaja mē amar kēt jakamā ka mē ā akapēr anhyrja o Kris kōt mē ho mē hamaxpēr o hihtyx kēt nē. Ām kaxpīx amnhī ma. Rý koja kapēr ōja mar mex xwynthjē hō amar japēr nē mē akapēr kām akwýjē mā harē. Hā koja ja mex nē. Nom kot kaj mē apiitā ma mē kapēr kām mē kām Tirtūm kapēr jarēnh o ri apa nhūm mē piitā hprī hā amar mex nē. Nē amar xà hkōt Tirtūm kapēr kōt amnhī nhīpēx mex nē. ⁶ Jakamā e Kris kōt ixtō nē ixtōxjaja. Kot paj apu nhỹrmā ma mē awyr mō hāmri nē nhām mē kapēr ō ho mē amā ixkapēr japēr ka mē inhmar kēt nē. Nom kot paj mē akapēr o mē amā ixkapēr ka mē apiitā aprī hā inhmar mex nē. Pa Tirtūm nhỹ hā mē amā mēmoj jarē rý tanhmā kot amnhī nhīpēx toja pa mē amā harē. Rý Karō nhỹ hā mē amā mēmoj jarēnh o ā mē amā Tirtūm kapēr jarēnh anē ka mē aprī hā inhmar mex

nē. ⁷ Nom mē kapēr ō ho mē kapēr o mē akôt ri mē pa xwÿnhjaja te mēhō kot htÿx ri wiorāwti kakrēnh xwÿnh pyrāk. Koja htÿx ri hkakrēnh o xa nhūm mē tee ri kot greer mar mā. Rÿ nhūm mēhō htÿx ri pifti kakôr o xa nhūm mē tee ri mēmo mē greer mar mā.

⁸ Pōristijaja na htem amarī ri tanhmā amnhī nhīpēx to ho pa nhūm mē hkrāhtūmja mē kām pifti kakō nhūm mē kuma nē mē pijapu mā hamaxpēr kurē kumrēx nē hwÿr hprôt. Nom koja kawax pē hkakō rÿ htÿx ri tanhmā hkakôr to nhūm mē kuma nē ām kuma. ⁹ Ja pyrā nē kot kaj mē kapēr ō ho akwÿjē mā akapēr nhūm mē ama nē ām mē ama. Ka te ām mē kām ajakwa momok pyrāk o axām o amnhī nhīpēx.

¹⁰ Nē ahpÿnhā mē pakapēr sohtōō. Na htem ahpÿnhā mē kapēr o amnhī kwÿjē mā kapēr nē xapēn mar mex nē. ¹¹ Nom koja mēhō nhÿhÿnh pika hō rūm ixwÿr mō nē mē kapēr o inhmā kapēr pa mar kēt nē. Nē amnhī xwar kutā ixkapēr o kām ixkapēr nhūm ixpyrā nē inhmar kēt nē. ¹² Jakamā kot kaj mē amā Tirtūm Karō xihtÿx xā ho amā tanhmā kām amnhī nhīpēx to ho apa hprām hā kot kaj mē amnhī to awÿ nē kām:

—Kwa amnhī kôt ijamaxpēr o axihtÿx Tirtūm. Pa anhÿ hā ixkapēr o ma Kris kôt ixkwÿjē ho mē hamaxpēr o ixihtÿx o ri mē hkôt ixpa. Kē mē akapēr ma nē Kris kôt amnhī xunhwÿr tÿx nē. Nē hkôt amnhī nhīpēx mex o ri pa. Anē.

¹³ Nē kēr ka mē nhām mē kapēr ō ho Tirtūm mā amnhī jarēnh xwÿnhjaja amnhī to Tirtūm Karō wÿ nē kām:

—Ixte mē kapēr ō ho ixkapēr tā ixte amnhī mar kēt. Jakamā kwa tanhmā ixto ijamaxpēr mex to pa amnhī mar mex nē ixkapēr kām ixprī hā Kris kôt ixkwÿjē mā ja jarē kē mē inhmar tÿx nē. Anē.

¹⁴ Nom kot paj nhām mē kapēr ō ho Tirtūm mā mex ā harēnh tā amnhī mar kēt nē. Te ixpimtir kām ixkarō pix kapēr pyrāk. No kot paj pam amnhī krā hkôt ixkapēr o kām mex ā harē hāmri nē ra amnhī mar mex nē. ¹⁵ Nā ja na inhmā mex jakamā kot paj nhām mē kapēr ō ho Tirtūm mā mex ā harē nē kām gre. Nē määnēn ijamaxpēr xā hkôt ixkapēr o määnēn kām mex ā harē nē kām gre. Nā ja na inhmā mex. ¹⁶ Nom kot paj mē ma mē kot Tirtūm kapēr mar xā hā ixkre hwÿr mra nē kamā Tirtūm mā mex ā harē. Tā pa nhām mē kapēr ō ho kām ixkapēr japēr. Ka mē ate inhmar o akrī xwÿnhjaja tee ri inhma. Jakamā tee ri inhma nē ixkôt Tirtūm mā akapēr kēt nē. Rÿ kām:

—Nā ām hāmri na ā amex ā ajarēnh anē Tirtūm.

Anhÿr o kām akapēr kēt nē. Mē ate inhmaare hā kot ka mē ā kām akapēr anē. Jakamā kot paj ri mē akamā mē kapēr ō ho ixkapēr kēt nē. Ām mē akapēr pix o mē anom Tirtūm mā mex ā harē. ¹⁷ Kot paj mē kapēr ō ho Tirtūm mā mex o mex ā harēnh mex tā ka mē mēmo mē kapērja aprī hā mar kēt jakamā inhmar pē Tirtūm kôt amnhī xunhwÿr tÿx kēt nē.

¹⁸ Na pa hte tōhā mē arom nhām mē kapēr ō ho Tirtūm mā amnhī jarē. Nom nhÿri ahte nhÿ nē ā kām amnhī jarēnh anē. Ām hāmri na pre Tirtūm ja kaxyw tanhmā ixto pa hte ā amnhī nhīpēx anhÿr o ri ixpa.

¹⁹ Tā na pu htem Tirtūm mā mex o mex ā harēnh kaxyw nē ma mē kot kām amnhī jarēnh xā hā ixkreta wÿr xapēn wÿr mra pa mē pikuprōnh xwÿnhjē kapēr o mē kām ixkapēr. Nom kot paj nhām mē kapēr ō ho mē kām ixkapēr ry rax kumrēx tā no nhūm mē inhmar kēt nē. Nom kot paj mē kapēr o ām ixkapēr krānre htā no nhūm mē inhmar mex kurē kumrēx. Ja na inhmā mex.

²⁰ Kwa mē ixkapēr ma nē mar tÿx nē. Nē mēhprīrejē jamaxpēr o ajamaxpēr

kêt nê. Ām Kris kôt mē àptàr tūmjê jamaxpēr o mǎn kêt mē ajamaxpēr o ri apa. Ām mēmoj pixire hkôt kot kaj mē ām hāmri te mēhprījê jamaxpēr pyrāk o ajamaxpēr. Mēhprījaja na htem mēmoj punuj kukamā hamaxpēr kêt nê. Na htem ām htýx pa. Tā kēr ka mē urāk nê mēmoj punuj kukamā ajamaxpēr o ri apa hkêt nê.

²¹ Amnepēm na pre Tirtūm tanhmā Ijaewjê mā kapēr to. Mē kapēr o mē kām kapēr tā no nhūm mē kuma nê ām kuma. Jakamā nhūm tee ri ja hā mē omu nê amnhī tā tanhmā mē harēnh to. Tanhmā mē harēnh toja Tirtūm kapēr ā kagā htūm kamā na. Kot mē harēnh kot:

E kot paj ma mē hwýr axtem pika hō rūm pōristi hkwȳ rē kē mē ma mē hwýr mra nê mē unē. Hāmri nê amnhī kapēr o mē kām kapēr nhūm mē tee ri mē kuma no ām hkôt mēmoj pumunh kêt nê.

Koja mē ā mē hipēx anhýr tā nhūm mē arī kām ixkapēr mar nê amnhī kaxyw ixkôt hamaxpēr prām kêt nê. Anē.

Tirtūm kapēr ā kagā htūm kot ā mē harēnh kot anhýr. ²² Jakamā kot kaj mē Tirtūm mā amnhī jarēnh xā hā ixkre hwýr akuprō nê mē kapēr ō ho Tirtūm mā amnhī jarēnh japēr. Nhūm Kris kôt amnhī xunhwýr kêt xwýnhjaja mē akôt agjê nê hkrī nē tee ri mē akapēr ma nê Kris kôt amnhī xunhwýr kêt nê. Tanhmā kot mē amnhī to nē hkôt amnhī xunhwýr? Mē kot akapērta maare hā. No kot ka mē akapēr o Tirtūm nhý hā mē kām akapēr nhūm mēhprī hā amar mex nê. Jao tanhmā hamaxpēr to nê mē apyrā nê Kris kôt amnhī xunhwýr japēr. ²³ Nom kot ka mē apiitā nhām mē kapēr ō ho Tirtūm mā mex ā harē nhūm amarī ri mē pa xwýnhjaja mē awýr agjê nê mē akapēr ā mē ama nē hā mē apumu. Hāmri nê tee ri hamaxpēr nê mē akra pipānh ā xpēn mā mē ajarē. ²⁴ Nom koja mē awýr agjê ka mē akatāt kôt mē amnhī kapēr o Tirtūm kapēr jarēnh o akuhē nhūm mēhprī hā mē amar mex nê. Hāmri nê amnhī kapēr o akapēr ma nē hamaxpēr ō:

—Hēxta waa nê. Xep ixte amnhī tomnuj xwýnh na pa. Nā ām hāmri na mē Tirtūm kapēr jarē. Nā ām hāmri na kêt ja. Anē.

²⁵ Hāmri nê mē amā tanhmā kot amnhī tomnuj to hā amnhī jarēnh pa hāmri nê hkaga nê Jejus kôt amnhī xunhwý. Nē hkōnkrā ho htēm nê hkrī nê Tirtūm mā mex o mex ā harē. Hāmri nê mē amā:

—Nā ām hāmri na hte Tirtūm mē akamā pa ho pa. Anē.

*Tirtūm nhōrkwȳ kamā mē pahte tanhmā amnhī nhīpēx to hā mē pamā karō
Atrē 2.42, 5.12-13; Eprēw 10.25*

²⁶ E Jejus kôt ixkwýjaja. Kot paj hpānhā axtem mē amā mēmoj tā karō. Mē kot Tirtūm mā amnhī jarēnh xā hā ixkre kamā tanhmā mē ate amnhī nhīpēx to hā karō ka mē inhma.

Nā kēr ka mē xpēn wýr akuprō nē akrī ka mē atō amā Tirtūm mā mex ā harēnh ā mē greer o agrer prām hāmri nē māmri kām ho gre. Hāmri nē agrer pa kē apānhā mēhō kànhmā xa nē Tirtūm kapēr kwý ho mē ajahkre. Nē ho anhýr pa nhūm hpānhā mēhō kànhmā xa nē Tirtūm kot tanhmā ho mex to hā mē amā amnhī jarē. Nē amnhī jarēnh pa hāmri nhūm mēhō nhām mē kapēr ō ho mē amā ujarēnh japēr. Hāmri nē ujarēnh pa kē mēhō hpānhā mē akapēr o hprī hā mē amā kapērta jarē.

E kēr ka mē xpēn wýr akuprō nē Kris kôt xpēn to axihtýx kaxyw ā xpēn pānhā amnhī nhīpēx anē.

²⁷ Nē ka mē atō amā nhām mē kapēr ō ho mē kām akapēr prām japēr. Nom kēr ka mē axohtō nē ā mē kām amnhī nhīpēx anhýr kêt nê. Ām mē atō wa

axkrutre rÿ axkrunēpxire nē mē kapēr ō ho mē kām akapēr. Hāmri nē axpēn pānhā akapēr pa kē mēhō kot hprī hā mē kapēr ōta mar japēr nē mē apānhā xa nē mē akapēr o mē kām harē kē mēhprī hā mar mex nē. ²⁸ Nom koja ja kaxyw mēhō amrakati japēr ka mē kapēr ō ho akapēr kēt nē. Ām kapxipix nhÿri ahte Tirtūm mā akapēr.

²⁹ Nē kē Tirtūm nhÿ hā kapēr jarēnh xwÿnhjē hō wa axkrut rÿ axkrunēpxi nē mē ajahkre ka mē aprī hā mar o akrī. Hāmri nē mar pa nē tanhmā mē harēnh to. Ām hāmri Tirtūm nhÿ hā kapēr ā mē harē rÿ ho hēx ā mē harē.

³⁰ Nē koja mēhō Tirtūm nhÿ hā mēmoj jarēnh o xa. Rôm nhūm Tirtūm mē kaxyw mē atō mā ajamaxpēr kwÿ gō. Ka kapēr o ām xwÿnhhta mā kānhmā anhīkra pē kē apumu nē anhīkrē. Hāmri ka hpānhā xa nē mē kām tanhmā ajamaxpēr tota jarē. ³¹ Nom kēr ka mē anhīpē mē kām akapēr hkēt nē. Ām axpēn pānhā Tirtūm kapēr o axpēn jahkre nē ho axpēn jamaxpēr o axihtÿx. Ja mex. ³²⁻³⁴ Nom kēr ka mē axpēn wÿr akuprō nē apiitā anhīpē atÿx ri akapēr kēt nē. Ja na Tirtūm kēp hprām nōkati. Mē ate axpēn pānhā axpēn mā akapērja na kām hprām. Jakamā kē mē kot Tirtūm nhÿ hā mē kapēr jarēnh o pa xwÿnhjaja taxy axpēn jahkre hā axpēn jamā. Nhūm mēhō kumrēx kapēr pa hāmri ka hpānhā mē kām akapēr.

Nē kē mēnijaja amarī mē ahkreja mar o hkrī. Ijaew kot amnhī nhīpēx xā hkōt. Jakamā kwa mē anijaja. Kēr ka mē amarī akryk mē mar o akrī nē axpēn mā akapēr o akrī hkēt nē. ³⁵ No kot kaj mē tee ri mēmoj ma nē mar mex kēt japēr tā hā axpēn kujjēr kēt nē. Ām akryk arī mar o akrī. Hāmri nē akupÿm anhōrkwÿ hwÿr tē nē rī kormā hā amjēn kujja. Nom kot ka mē apikuprōnh xā hā ixkre kamā axpēn mā akapēr o akrī nhūm mē amjēnjaja tee ri ja hā mē apumu nē hpijaam nē.

³⁶ E na pa ā Tirtūm mā amnhī jarēnh xā hā ixkre kamā tanhmā mē pahte amnhī nhīpēx to hā mē amā karō anē. Tā te mē apē ja mex kēt pyrāk. Kwa mon ka wem ja ma nhūm mē apē omnuj nē? Xā mē ate Tirtūm kapēr mar mex o ijakrenh kōt na ka mē ā ajamaxpēr anē? Xā na pre Tirtūm mē akumrēx mā kapēr? Hā na ka mē ā ajamaxpēr anē? Rÿ xā mē kapxipix mā na pre kapēr? Hā na ka mē ixkapēr ma nhūm mē apē omnuj nē? Nā ixkumrēx na pa pre mē awÿr inhmōr nē mē amā Tirtūm kapēr jarēnh kēnā kot ka kēt mē axtem nē ā ajamaxpēr anē. ³⁷ Kot kaj mē atō ā ajamaxpēr anhÿr japēr nē ajamaxpēr o:

—Nā na pre Tirtūm tanhmā inhmā kapēr to pa ō ri mē kām ixujarēnh mex o ri ixpa.

Anhÿr o ajamaxpēr. Rÿ ajamaxpēr o:

—Nā na pre Tirtūm Karō mē kaxyw tanhmā ixto pa ŷ hā tanhmā mē ho mex to ho ri ixpa.

Anhÿr o ajamaxpēr. Kot kaj mē ā ajamaxpēr anē hāmri nē māānēn pa ā ixte amnhī nhīpēx anhÿr ā ixpumunh mex kurē kumrēx. Amnhī pyrā nē ixte Tirtūm nhÿ hā mē kām ixkapēr xwÿnh ā ixpumunh nē hā ijarēnh kurē kumrēx. ³⁸ Nom koja ja hā ijarēnh kēt ka mē ja hā omu hāmri nē tanhmā kot mē amā kapēr toja ma nē ām ama.

³⁹ E Kris kōt ixtō nē ixtōxjaja. Kēr ka mē amnhī to Tirtūm Karō wÿ kē ma mē ate mē kām Tirtūm kapēr jarēnh o ri apa kaxyw mē ato mē axihtÿx.

Nē koja mēhō kām nhām mē kapēr ō ho kapēr prām ka mē ja nē kām akapēr kēt nē. Kwār māmrī ā amnhī nhīpēx anē. ⁴⁰ Nom kēr ka mē ate Tirtūm mā amnhī jarēnh xā hā ixkre kamā axpēn pānhā axpēn mā akapēr nom anhīpē kām akapēr hkēt nē.

15

*Kris akupÿm htír kumrëx ā harënh
Atre 2.23-36, 10.39-41; Wam Korit 6.14*

¹ E Kris kôt ixkwÿjaja. Kot paj axte më amā Jejus kot më panê tanhmā amnhī nhīpëx to hā harē ka më inhma. Na pa pre ra më amā ja jarē ka më ama nē hkôt amnhī xunhwÿ. Nē hkôt amnhī nhīpëx mex o ri apa. ² Na pa pre më amā harē ka më amnhī kaxyw kām ajamaxpër tÿx nē nhūm Tirtūm më ato hkra. Tā ka htem arī kapër kôt amnhī nhīpëx mex o ri apa. Koja mëhō kot Tirtūm kapër mar tā amnhī kaxyw hkôt hamaxpër kêt nē nhūm Tirtūm tee ri amnhī tā omu nē ho hkra hkêt nē.

³ Na pa pre amnhī krā hkôt më amā tanhmā Kris jarënh to hkêt nē. Ixte kapër mar xā hkôt na pa hte amnhī xō ri më amā tanhmā harënh to ho ri ixpa. Jejus jarënhja na mex o kot më ujarënh piitā hakrenh par kumrëx. Tā tām kot paj më amā harē. Na pre Krisja më pahte amnhī tomnuj pānhā amnhīrer kaxyw më panê ty. Tirtūm kapër ā kagā htūm kot hkukamā harënh xā hkôt. ⁴ Hāmri nhūm më kēn kre kamā haxā nhūm kamā nōr o apkati. Nē axte hā apkati. Hāmri nhūm Tirtūm akupÿm ho htír. Kapër ā kagā htūm kot hkukamā harënh xā hkôt. ⁵ Tā nhūm Simāw Pêtre kumrëx akupÿm htír ā omu nhūm hpānhā Jejus nhÿ hā më ahkre ho më pa xwÿnh maatiijaja haxwÿja omu. ⁶ Hāmri nhūm më kot hkôt më pa xwÿnh pê 500 jakrenh xwÿnh piitā anhīpê haxwÿja akupÿm htír kām omu. Na pre ra më hkwyjaja ty nhūm më hkwyjaja arī htír nē pa. ⁷ Jakamā nhūm prem ra akupÿm htír kām omu. Hāmri nhūm hpānhā Xiakreja omu. Nhūm hpānhā ŷ hā më ahkre o më pa xwÿnh piitā omu. Akupÿm htír kām omu. ⁸ Tā pa na pa pre ijaxwÿja amnhī to hapu nē akupÿm htír kām omu. Te ixpê më hkra kot hapu pyrā nē amnhī to hapu nē omu. Na pre kaxkwa kamā inhmā kapër o xa pa ixpri hā omu. ⁹ No më kot ixpyrà nē Kris nhÿ hā më ahkre ho më pa xwÿnh maati hkwyjaja na më mex o kot ijakrenh. Na pa pre hte më hkīnhā amnhī tomnuj tÿx nē. Jao Kris pê hkrajê homnuj tÿx o ri ixpa. Tā hkôt amnhī xām hāmri nē tee ri ā amnhī nhīpëx anhÿr ā amnhī pumu nē amnhī kamā xpiijaam tÿx nē. Jakamā na pa hte Kris nhÿ hā kapër jarënh o ixpa hā amnhī pumu nē ixte hkôt amnhī xām kêt ri tanhmā ixte amnhī nhīpëx toja mā ijamaxpër nē xpiijaam nē. ¹⁰ Na pa pre amnhī tomnuj tÿx o ixpa htā nhūm Tirtūm arī kām ijapê nē. Nē ixkamā ukapri nē. Pa pre hkôt amnhī xām nhūm ixto hkra pa ra kām tanhmā amnhī nhīpëx to mex rāhā ho ixpa. Jakamā na hte tee ri amnhī tā xipumu nē tanhmā hamaxpër to hkêt nē. Rÿ hamaxpër o:

—Hēxta waa nē. Inhmā Pawre japê nē ixte ho mex tā nhūm ixkôt amnhī nhīpëx kêt kumrëx.

Anhÿr o tee ri hamaxpër kêt nē. Na pa hte kām tanhmā amnhī nhīpëx to ho ixpa rūnh o ŷ hā më kapër o pa xwÿnh kwÿjê jakre ho ixpa. Nom amnhī krā hkôt më ahkre hkêt nē. Ja kaxyw na pre Tirtūmja ixto ixihÿtÿx pa ŷ hā kām tanhmā amnhī nhīpëx to ho ri ixpa nhūm ja hā xipumu nē hkīnh nē.

¹¹ Nē Jejus jarënhja ām pixii. Axtem hō hkêt. Nē ŷ hā më ahkre ho më pa xwÿnhjê kapërja nē pa ixte më amā harënhja kot axpën pyrāk. Harënh tipxi. Kris kot më pahte amnhī tomnuj mÿrapê më panê htyk nhūm Tirtūm kot akupÿm ho htír ā wa harënhja na pa hte pix jarënh o ri më akôt ixpa. Ka prem inhma nē amnhī kaxyw hkôt ajamaxpër tÿx nē.

*Tirtūm kot akupÿm më pahto më pahtír ā harënh
Rukre 20.37*

- 12 Nē kwa ra ixte mē amā Kris htyk nē akupŷm htūr ā harēnh tā ka xep mē akwŷjaja axtem nē mē htyk nē akupŷm mē htūr kēt ā mē hkamnhīx o ri apa.
- 13 Kwa mē ajamaxpērja mex kēt. Kēp apu ām hāmri mē ate ā mē harēnh anhŷr ronhŷx pre Kris haxwŷja akupŷm htūr kēt nē. Nhŷx pre htyk o ty.
- 14 Nē kēp apu Kris akupŷm htūr kēt ronhŷx pa mē ām mē amā kapēr jarēnh o ixpa kaprŷ. Ka mē ajaxwŷja amnhī kaxyw hkôt ajamaxpēr kaprŷ.
- 15 Nē kēp ām akupŷm mē htūr kēt ronhŷx pa mē ixte mē amā Tīrtūm kapēr jarēnh o ri ixpa xwŷnhjaja mē amā ho ixēx o ri ixpa. Na pa htem mē amā Tīrtūm ra kot akupŷm Jejus o htūr ā harēnh o mē akôt ixpa. Tā kēp apu akupŷm mē htūr kēt ronhŷx pa mē ām mē amā harēnh o ixēx.
- 16 Nē kēp apu akupŷm mē htūr kēt ronhŷx pre Kris haxwŷja akupŷm htūr kēt nē. Nhŷx pre ām amarī tyn hapēx.
- 17 Nē Kris amarī htyk nē hapēx ronhŷx kot pu mē ri amnhī kaxyw hkôt pajamaxpēr nē hkôt amnhī xunhwŷr kaprŷ.
- Nē Kris amarī htyk nē hapēx ronhŷx pre Tīrtūm Jejus kukwak ri mē panē mē pahte amnhī tomnuj o hapēx kēt nē. Nhŷx pu mē pahpiitā nhŷrmā ma kuwy hwŷr pajapēx pa.
- 18 Nē kēp apu Kris htyk nē hapēx ronhŷx ra mē kot amnhī kaxyw hkôt hamaxpēr tā ra htyk xwŷnhjaja ma mē kot amnhī tomnuj mŷrapē kuwyta wŷr hapēx.
- 19 Nē kēp apu Kris htyk kumrēx nē hapēx ronhŷx pu mē kormā pahtyk kēt xwŷnhjaja tee ri amnhī wŷr kamā pajamak o ri papa kaprŷ. Nē pahpē hkra hā amnhī jarēnh kaprŷ. Jao pahkaprī htŷx o mēmoj piitā hakrenh par kumrēx nē ri papa.

Kris kumrēx akupŷm htūr ā harēnh

Atre 26.23; Sīkūn Korīt 4.14; Piriṗos 3.10-11; Wam Tesarōn 4.15-18;

Apokarip 20.1-15

²⁰ Nā mē htyk nē nhŷrmā akupŷm mē htūr kēt ā mē harēnhja kot anhŷr kēt. Ra Tīrtūm kot akupŷm Kris o htūr jakamā koja māānēn hkra htyk xwŷnhjaja nhūm mē piitā Jejus pyrā nē nhŷrmā akupŷm mē ho htūr pa. Jakamā na pu htem Kris akupŷm htūrja mā pajamaxpēr nē amnhī kukamā pajamaxpēr o:

—Nā ra Tīrtūm kot akupŷm Jejus o htūr jakamā koja urāk nē nhŷrmā akupŷm mē pahte hkôt amnhī xunhwŷr xwŷnh piitā mē pahto mē pahūr. Nā koja ā mē panhīpēx anē. Ja kaxyw āhpumunh tŷx kumrēx xwŷnh kēnā. Anē.

²¹ Nē amnepēm na pre Tīrtūm my kot waja nhīpēx. Hāmri nhūm kot tanhmā amnhī tomnuj to ho ra mē htykja o hkrax. Tā nhūm wamta kôt my hōta wamta rom amnhī to mex o mē htyk tā akupŷm mē ho htūr o hkrax. ²²⁻²³ Tā mē pahpē wam my pē Atāw kanrēhā tāmnhwŷ jakamā kot puj mē urāk nē nhŷrmā ty. No ām māānēn mē pahpē Kris kraa. Kris kumrēx na pre akupŷm htūr. Tā koja nhŷrmā akupŷn mē pahwŷr wrŷ hāmri nhūm Tīrtūmja kot hipēx pyrā nē akupŷm mē pahto mē pahūr. Mē pahte hkôt amnhī xunhwŷr ā mē pahpumunh kôt akupŷm mē pahto mē pahūr pa. No ām kormā.

Kris nhŷrmā kot mē htyk o hapēx ā harēnh

Juāw 11.25; Rōmān 6.23; Wam Korīt 15.54; Sīkūn Ximotre 1.10; Eprēw 2.14;

Apokarip 20.14

²⁴⁻²⁸ Nē koja Kris arī mē ho amnhīptār rāhā nhūm Tīrtūm mē kot kutā amnhī xunhwŷr xwŷnhjē pē mē hihtŷx xā ho hapēx pa. Kapēr ā kagā htūm kot ja jarēnh kot:

Koja nhÿrmã Tirtÿm Kris kot kã m mē ho amnhÿptãr kaxyw ãm. Anē. Jakamã Jejus tapxipix koja mē ho amnhÿptãr o pa. Koja Tirtÿm pix mē ho amnhÿptãr kêt nē. Nom koja pahi hkwyjê hō axte nhãm mē ho amnhÿptãr kêt kumrêx.

Tã mē kot mēkarõmnuti hkõt kãm tanhmã amnhÿ to ho mē pa xwÿnhjaja koja Tirtÿm ma amnhÿ nē kuwy hwÿr mē rēnh pa. Nē mēhtykja o hapêx nhũm mēhō axte htyk kêt kumrêx. Jakamã koja Jejus Kris mēmoj punuj piitã ho hapêx nē Mēpahpãm Tirtÿm nhÿhkram akupÿm mēmoj piitã haxãr pa. Tirtÿm jamaxpêr xã hkõt ã mēmoj to anhÿr par anē hãmri nē ïhkram mēmoj jaxãr pa. Nē mãânēn tãm kãm amnhÿ gō. Jakamã nhũm Tirtÿm tapxipix mēmoj piitã ho amnhÿptãr pa.

Mē htyk xwÿnhjê jarēnh

²⁹ Nē na hte mē pahkwÿjaja kormã kēp Tirtÿm kra hkêt tã Jejus kôt mē kot amnhÿ xunhwÿr nē mē htyk xwÿnhjê mã hamaxpêr o pa. Hãmri nē mē kãm nhÿrmã axte mē omunh prãm xãj mē urãk nē Jejus kôt amnhÿ xunhwÿ nhũm mē hkrã kumrã. Tã akupÿm mē htÿr kêt ronhÿx mē ãm ã pajamaxpêr anhÿr kaprÿ. ³⁰ Nē paa. Na pa hte ma mē kãm Tirtÿm kapêr jarēnh o ri mē hkõt ixpa. Nhũm mē hkwyjaja ja hã inhna nē ixkamã gryk nē ixtã amÿnē pa mē mÿrapê ixpunuj nē ri ixpa. No ãm amnhÿ to htÿx nē arÿ ri mē kãm Kris kapêr jarēnh o ri mē hkõt ixpa. Tã kēp ãm nhÿrmã akupÿm ixtÿr mã kêt ronhÿx pa tee ri ã amnhÿ nhÿpêx anhÿr o ri ixpa kaprÿ. ³¹ Na htem apkati mē ixtã tanhmã ãmnēnh to ho ri pa. ãm hãmri na pa mē amã ã mē harēnh anē. Nom na pa hte tee ri amnhÿ kukamã ijamaxpêr o ri ixkaprÿ nē ixpa hkêt nē. Mē kot ixpÿr mã tã pa hte mē ate Pahihti Jejus Kris kôt amnhÿ nhÿpêx mex ã mē apumunh kôt ixkÿnh nē ri ixpa. Nhũm te ixkamã mēmoj kêt pyrãk pa hte ri ixpa. ³² Na pa hte jar Epes kamã mē oprê xwÿnhjê kutã amnhÿ to htÿx pē mē kãm Jejus kapêr jarēnh o ri mē hkõt ixpa nhũm mē kãm mar prãm kêt jakamã hã ixtomnuj tÿx nē. No nhÿrmã ixyk nē akupÿm ixtÿr mã kêt ronhÿx pa mē kēp Kris kwÿ hkêt xwÿnhjê jamaxpêr o ijamaxpêr nē mē urãk nē ijamaxpêr o: Ixte ixyk ã arÿgro pumunh kêt jakamã kot paj mãmrÿ mēmoj piitã hkur o ri ixpa.

Nē mãmrÿ mēmoj piitã ho ixkõm o ri ixpa.

Nē mãmrÿ mēmoj piitã ri tanhmã ho ho ri ixpa.

Ixyk nē axte ixte ã amnhÿ nhÿpêx anhÿr o ixpare kaxyw ã.

Anhÿr o nhÿx pa ijamaxpêr o ixpa. Kēp ãm Tirtÿm kot akupÿm mē pahto mē pahtÿr mã kêt ronhÿx pu mē ã mē kēp Kris kwÿ hkêt xwÿnhjê jamaxpêr anhÿrja kôt pajamaxpêr pix o ri papa. No ãm ja kot anhÿr kêt.

³³ Na htem mēmoj jarēnh o:

—Mē kot htÿx ri amnhÿ tomnuj xwÿnhjê hkõt ri mē pa xwÿnhjaja koja mē gaa nē mē kot amnhÿ nhÿpêx kôt amnhÿ nhÿpêx o ri pa. Anē.

ãm hãmri na ã mē harēnh anhÿrja. Jakamã kwa mē okora. Kêr ka mē ã amnhÿ nē mē kot amnhÿ nhÿpêx anhÿr o mē pa xwÿnhjê pumunh mex o ri apa.

³⁴ Kwa mē tokyx mē ate tanhmã amnhÿ tomnuj to hã amnhÿ pumu nē axte ã amnhÿ nhÿpêx anhÿr kêt nē. Nē mē ate Tirtÿm kot akupÿm mē ho htÿr kêt ã harēnh xwÿnhjaja. Te mē ate Tirtÿm kot amnhÿ nhÿpêx ã omunh kêt pyrãk. Tã mē ate tokyx ja hã amnhÿ pumunh nē amnhÿ kamã apijaãm kaxyw na pa ã mē amã ixkapêr anē.

*Mē panhī nyw jarēnh**Rukre 20.34-36; Rōmān 8.10-11; Sikūn Korīt 5.1; Piripos 3.20-21*

³⁵ Nē mān ka mē atō akupŷm mē htūr ā mē harēnh ma nē tee ri mē hkukamā ajamaxpēr nē hā ri tanhmā axpēn kukjēr to nē axpēn mā:

—Kwa tanhmā koja we Tirtūm akupŷm hkra htyk xwŷnhjē ho htūr to? Ra mē htyk nē mē ī katōk nē hapēx par mā kēnā. Tanhmā kot wem amnhī to nē akupŷm htūr? Nē tanhmā koja we mē ī nywja kute wehe? Anē.

³⁶ Nā na ka mē atŷx ri ā ajamaxpēr anē nē tee ri mē hkukamā ajamaxpēr. E kot paj ixprī hā ja hā ejēp jarē ka mē inhma. Nā na htem mēmo y hkre. Te mē kot mē htyk jaxār pyrāk o hipēx nē hkre nhūm hikwŷ nē gaa nē higrōt hapōj. Nom te kēp mēmo yta pyrāk kēt. ³⁷ Ām hy pix na htem hkre. No higrōt kre hkēt nē. Rŷ tanhmān pār nywja kre hkēt nē. Ām hy pix na htem hkre. Tā nhūm higrōt hapōj nē hprēk nē gaa nē ō. ³⁸ Tirtūm na hte hamaxpēr xā hkōt tanhmā ho nhūm higrōt hapōj nē hprēk nē ō. Tā ja pyrā nē kot puj mē Tirtūm jamaxpēr xā hkōt pahtyk tā koja akupŷm mē pahto mē pahtūr nē mē pamā mē panhī nyw gō.

³⁹ Nē mēmo hy piitā te kot axpēn pyrāk kēt. Ahpŷnhā na. Ja pyrā nē ahpŷnhā ri mēmoj piitā ī. Na axtem mē panhī nē axtem mry nhī nē axtem āk nhī nē axtem tep nhī. Mēmoj piitā ahpŷnhā ri ī.

⁴⁰⁻⁴¹ Nē kaxkwa kamā haxwŷja mēmoj piitā ahpŷnhā no ām muxre. Myytija mex. Nē mytwrŷreja axte mā no ām haxwŷja mex. Nē kanhēti haxwŷja mex. Haxwŷja axte mā. Kamā hkwy hpōk kryre nē kamā hkwy hpōk rūnhti no ām piitā mex.

Nē jar pika ja kamā haxwŷja mēmoj piitā mex. No ām te kot kaxkwa kamā mēmoj jarir xwŷnhja mex pyrāk kēt. Axtem na raa.

⁴² Tā koja mē panhī nywja haxwŷja axte mā. Te kot panhī htūm pyrāk kēt. Na htem ty nhūm mē ma mē o mra nē mē hagjē. Nhūm mē hikwŷ nē gaa nē ī rerek nē hapēx. Tā koja Tirtūm akupŷm tanhmā mē pahto mē pahtūr to pu mē hpānhā pamex kumrēx. Hāmri nē axte mā mē panhī nyw mex o mex jakamā koja axte htyk nē ī rerek kēt nē.

⁴³ Na htem ty nhūm mē hagjē nhūm htyk xwŷnhnta tanhmā amnhī to hkēt nē amarī hikwŷ. Omnuj nē ī nhenhek nē hikwŷ. Tā koja Tirtūm akupŷm mē ho mē htūr nē mē kām mē ī nyw gō nhūm mē hpānhā mex kumrēx nē hihtŷx nē Tirtūm nhō krī kamā pa ho pa.

⁴⁴ Mē htyk nhūm mē kot mē hagjēnh xwŷnhjaja na htem arī ī htūm ā hikwŷ. Ām jar pika ja pix kām ri mē papa kaxyw na mē panhī htūmja. No mē panhī nywja axtem Tirtūm nhō krī kamā ri mē papa kaxyw jakamā koja mē panhī nywja axte mā. Tirtūm Karō koja mē pamā kugō.

*Mē panhī nyw te kot Kris nhī pyrāk ā harēnh**Rukre 20.34-36*

⁴⁵⁻⁴⁶ Nē Tirtūm kapēr ā kagā htūm kot Atāw jarēnh kot:

Na pre Tirtūm my kot wa Atāwja nhīpēx. Jakamā Atāw kēp pika nhō xwŷnh na pre. Anē.

Ā Atāw jarēnh kot anhŷr. Ja pyrā nē na pu htem pakatorxā nhōhy rūm pajapōj nē Atāw pyrā nē pahpē pika nhō xwŷnh. Tā nhūm Atāwja pa nē gaa nē hpigēt nē ty. Jakamā kot puj mē urāk nē papa nē gaa nē ty. Nom nhūm Krisja Atāw kurom kēp akupŷm mē ho mē htūr xwŷnh jakamā kot puj mē pahpē hkwyjaja Atāw pyrā nē nhŷrmā mē pahtyk tā nhūm Kris akupŷm mē pahto mē pahtūr.

Hāmri nhūm Tirtūm Karō mē pamā mē panhī nyw gō pu mē axte pahtyk kêt nē. Pānhā axte mā mē pahpē kaxkwa nhō xwýnh.

⁴⁷ Nē Atāw na pre Tirtūm pika ho hipēx nē ho htír nhūm ri pa. Nom Kris na pre Atāw rom kaxkwa rūm mē pahwýr wrý. ⁴⁸ Tā mē pahpē pika nhō xwýnhjaja te mē pahpē Tirtūm kot wam my nhīpēx xwýnhhta pyrāk. No mē pahte kaxkwa hwýr ma papa mā xwýnhjaja te mē pahte kaxkwa rūm my kot mē pahwýr wrýk xwýnh Krista pyrāk. ⁴⁹ Tā kormā mē pahpē pika nhō xwýnh jakamā te mē pahpē my pika ho hipēx xwýnhhta nhī pyrāk. Nom kot puj mē nhýrmā ty hāmri nē hpānhā te pahpē kaxkwa rūm my kot mē pahwýr wrýk xwýnhhta nhī pyrāk.

*Axte mē pahtyk kêt kumrēx ā mē pajarēnh
Juāw 11.25; Sikūn Korit 5.4; Wam Tesarōn 4.13-18*

⁵⁰ Nē kot puj mē panhī htūm rāhā Tirtūm nhō krī hwýr paxàpir kêt nē. Panhī htūm na hte ty nē rerek nē hapēx. Jakamā koja Tirtūm Karō mē pamā mē panhī nyw gō pu mē rī kormā ma ō krī hwýr pajapēx pa nē kamā papa ho papa.

⁵¹⁻⁵² E mē inhma. Na pre kormā Tirtūm mē amā mēmoj to amnhīrīt kêt tā ra inhmā ho amnhīrīt. Jakamā kot paj ý hā mē amā harē ka mē inhma. Nā kot puj mē pahpiitā mē pahtyk kêt nē. Koja nhýrmā Tirtūm kapēr o mē wrýk xwýnhjē hōja mē pamā pifti kakō. Mē pajaēr pé hkakō. Hāmri nhūm Tirtūm kra ra mē htyk nē mē hikwý xwýnhjaja akupým ī nyw o htír kurē kumrēx. Nē kormā mē pahtyk kêt xwýnhjaja kot pu mē mē pahtyk kêt ri mē urāk nē panhī nyw kurē kumrēx. Hāmri pu mē pahpiitā pahtír o pahtír tūm nē papa. ⁵³ Koja Tirtūm mē panhīpēx o te mē pahte paxē htūm o papinhīpanh nē hpānhā paxē nyw jagjēnh pyrāk. Jao mē panhī htūm o hapēx nē hpānhā mē pamā mē panhī nyw gō pu mē axte pahtyk kêt kumrēx nē ri papa ho papa. ⁵⁴ Tirtūm kapēr ā kagā htūm kot ja jarēnh kot:

Na ra Tirtūmja mēhtyk ho hapēx pa. Anē.

Te ra kot ho hapēx par pyrāk o ā harēnh kot anhýr. No ām kormā. Jakamā kot puj mē nhýrmā panhī nyw nē ri papa nē mē pahtō axte pahtyk kêt kumrēx.

⁵⁵ Mē pahtykja te mē kot makre par nhūm axte kot mē hkamnhwýr kēlja pyrāk. Urā nē koja Tirtūm akupým mē pahto mē pahtír pu mē axte pahtyk kêt nē. Nē axte ri pamā ma hkēt nē papa. Nē axte paxā hkēt nē. ⁵⁶ Tirtūm kapēr ā kagā htūmja ā mē pakukamā mē pajarēnh kot anhýr. Mē pahte amnhī tomnuj xwýnh jakamā kot puj mē nhýrmā ty. ⁵⁷ Nom nhūm Tirtūm àhpumunh týx o àhpumunh týx jakamā na hte Pahihti Jejus Kris kukwak ri mē pahte hkōt amnhī xunhwýr xwýnhjē nē mē pahte amnhī tomnuj rēnh pa. Pu mē nhýrmā mē pahtyk tā nhūm akupým mē pahto pahtír.

*Mē pahte Jejus mā tanhmā amnhī nhīpēx mex to hā mē pamā karō
Karatas 6.9; Korosē 1.10*

⁵⁸ Jakamā e kwa Jejus kōt ixkwýjaja. Kēr ka mē arī Pahihti Jejus kōt mān amnhī xunhwýr týx rāhā ho ri apa. Nē kapēr kōt pix mā ri amnhī nhīpēx rāhā nē kām tanhmā amnhī nhīpēx mex to ho ri apa. Kot kaj mē ā amnhī nhīpēx anē hāmri nē kām tanhmā amnhī nhīpēx to kaprý ho ri apa hkēt nē. Ām hāmri kām mēmoj to anhýr mex rāhā ho ri apa.

16

*Mê kêp amrakati xwÿnhjê jarênh**Atre 11.27-30; Rômân 15.25-27; Sikûn Korîit 8.1-24, 9.1-5; Wam Ximotre 6.18*

¹ Nê na pa pre krî pê Karatas kamã tanhmã Jerujarê kamã Kris kwÿjê jarênh to. Ijaew kwÿ kot mê pahpyrà nê Jejus kôt amnhî xunhwÿr ã mê harê nê mê kêp amrakati hã mê harê hãmri nê mê kãm:

—E. Kwa kêr ka mê kãm mê akãxpore hkwy ho akuprô nê ma mê hwÿr amê.

Anhÿr o mê kãm ixkapêr. Jakamã kwa kêr ka mê urãk nê mê kaxyw mê kãm kãxpore hkwy ho akuprô. ² Mê panhõ arîgromnu pê sap ã hkwy ho akuprô. Kot kaj mê akãxpore rax japêr nê mê kaxyw hkwy ho rax nê axi. Nom kot kaj akãxpore grire japêr nê mê kaxyw mê kãm ho grire nê agõ. Kêr pa mêmõ arîgro hã ma mê awÿr mõ ka mê ra mê kaxyw ho apikuprõnh rax nê.

³ Nê ma mê kot mê kãm ho mör mã xwÿnhjaja ka mê ixkutêp mê akwÿjê rê. Kêr pa pøj nê mê omu hãmri nê mê kaxyw kagã nhîpêx nê kamã mê harê. Nê mê kãm kugõ nhüm mê ma Jerujarê hwÿr kãxpore mê ro hã amnhî kôt o mõ nê mê kãm kugõ. Mê kot kamã harênh nê mar hãmri nê mê kamjaja mê ate mê kaxyw mê rênh ã mê ajarênh ma. ⁴ Rÿ kot ka mê amã mê hkôt inhmênh prãm nê mãmri mê hkôt inhmê pa ma mê hkôt mõ.

*Pawre kot amnhî kukamã amnhî jarênh**Atre 19.21-22*

⁵ Nom kot paj tokyx mê awÿr inhmör kêt nê. Kot paj ja rüm ixkato nê hpãnhã ma pika pê Masetõn wÿr mõ. Hãmri nê mê hkôt ixpa grire nê ma kormã mê awÿr Korîit wÿr mõ. ⁶ Hãmri nê pøj nê mê akõt ri ixpa ryy nê. Nê ixtã amgrã pixi nê hapêx nê rî kormã ma axte nhãm krî hõ hwÿr mõ. Nê inhojarêrã ka mê ixto Tirtüm wÿ nê inhmã ixãpkur xã hkwy gõ pa ma mê hwÿr pry hã hkur o mõ. ⁷ No ixte mê awÿr ixpõx nê tokyx mê akurüm ixkator nê hpãnhã ma nhãm krî hõ hwÿr inhmörja na inhmã hprãm kêt. Jakamã koja Tirtüm kãm ja mex pa arî ri mê akõt ri ixpa hã ixtã mytwrÿ xohõt nê tokyx ma nhãm inhmör kêt nê. ⁸ Kot paj kormã jar Epes kamã ri ixpa rãhã nhüm mê hkînh pê Pêtekos kato nê hapêx pa rî kormã ma Masetõn wÿr mõ. ⁹ Na pa hte jar kormã mê kãm Jejus kapêr jarênh o ri mê hkõt ixpa nhüm mê ohtõ nê inhmar o pa. Mê kãm mar prãm. Tã no nhüm mê hkwyjaja ohtõ nê mê kêp ja omnuj nê nhüm mê hã ixkamã gryk nê ixtomnu o pa.

*Mê kot Ximotre ho mex ã mê harênh**Hapuhã Juãw 5*

¹⁰ Nê kwa koja Ximotre mêmõ arîgro hã mê awÿr pøj ka mê omu nê ho mex nê. Nê mê amnhî nhörkwÿ hwÿr awÿ kê mê akutã apkur o pa. Na hte ixpyrà nê Pahihti Jejus mã tanhmã amnhî nhîpêx to mex o pa. ¹¹ Kormã mê pahkînhã nyw tã kêr ka mê tee ri ja hã omu nê ri axpên mã tanhmã harênh to hkêt nê. Mê ãm akapêr mex pix o kãm akapêr. Nê koja akupÿn nojarêrã ka mê pry hã kãm akur xã hkwy gõ kê mex pê man akupÿn ixwÿr mõ pa tokyx omu. Kot paj jar mê pahkwÿjê mê akupÿn hpõx kamã ijamak o ixpa.

¹² Nê na pa hte xatã jar mê pahõtõ Aporja ma mê awÿr mör kaxyw mê awÿr hano. Kot jar mê pahõtõ hkwyjê mê ma mê awÿr mör kaxyw. Nom kormã. Kojã xep mê jar tanhmã amnhî to hpa nê rî kormã ma mê awÿr mõ.

*Kagã jatur xã kamã Pawre kot mêmõj tã karõ**Epes 6.10-12; Sikûn Ximotre 1.7; Wam Pêtre 5.8-9*

¹³ E kwa kêr ka mê arĩ amnhĩ wÿr Jejus kamã ajamak rãhã ho ri apa. Nê hamãr pê kutêp tãm amnhĩ nhĩpêx o ri apa. Nê amnhĩ kaxyw hkôt ajamaxpêr tÿx rãhã nê.

¹⁴ Nê mê amã axpên kĩnh pê tanhmã axpên to mex to.

¹⁵ Mãn ka mê ra Estepti mê hkwÿjê jarênh ma. Mê hkumrêxjaja na prem pika pê Gres kamã Kris kôt amnhĩ xunhwÿ. Tã xep mê ra Kris kôt hkwÿjê ho mex o ri mê hkôt pa. ¹⁶ Kêr ka mê ã mê kot amnhĩ nhĩpêx anhÿr xwÿnhjê kapêr ma nê hkôt ri amnhĩ nhĩpêx o ri apa. Mê kot Kris mã mê ajamãr xwÿnh piitã kêr ka mê kapêr ma nê mê hkôt ri amnhĩ nhĩpêx mex nê.

¹⁷ Nê ota Estepti nê Akajkre nê Putunatreta na mê ra jar pøj. Pa mê Sostenes mê wa mê omu nê wa ixkĩnh nê. Te ixte mê apumunh nê ixkĩnh tÿxta pyrãk. ¹⁸ Na xep prem ma mê awÿr mō nê tanhmã mê amã kapêr to ka prem mê ama nê akĩnh nê. Tã mê ra amnê ixwÿr mō nê tanhmã inhmã kapêr mex to pa mê kuma nê ijaxwÿjaja ixkĩnh nê. Kwa kêr pu mê ã mê kot mê panhĩpêx anhÿr xwÿnhjê ho mex o papa.

¹⁹⁻²⁰ Nê ota jar pika pê As kamã Kris kôt mê pahkwÿjaja piitã mê awÿr hpêr mê. Nê Akir mê hprō Prisireja wa. Nê wa ôrkwÿ kamã mê kot Tirtũm mã amnhĩ jarênh kaxyw mê pikuprõnh xwÿnh piitã mê awÿr hpêr mê.

Nê kêr ka mê nhÿri axpên pumu nê mê apê Kris kôt mê ate axpên to atō nê atōx ã axpên mã akapêr mex nê akĩnh nê.

²¹ E kot paj kagã jatur xã kamã inhĩhkra ho mê amã amnhĩ nhĩxi nhĩpêx ka mê omu. Kojã inhmã ixkapêr ã kagã xwÿnhhta ja hã kagã hkêt nê. Pa kot paj hipêx. Ixpê Pawre na pa ã amnhĩ nhĩxi nhĩpêx anê ka mê omu.

²² Nê kwa kêr ka mê arĩ amã Pahihiti Jejus kĩnh o ri apa. Kojã mēhō kãm hkĩnh kêt hã kojã Tirtũm ja hã homnuj tÿx kumrêx.

E “maranat.” Mê pakapêr kãm na htem maranat jarênh o: “Kwa tokyx akupÿn mê ixwÿr wrÿ Pahihiti.” Anê.

²³ E kê Pahihiti Jejus Krisja mê ato mex nê mê akutã nojarêt rãhã ho pa.

²⁴ Ixpyrà nê mê apê Jejus Kris kwÿ jakamã na pa hte inhmã mê akĩnh nê.

Tã ãm ja pix. Ixpê Pawre na pa ã mê awÿr kagã nhĩpêx nê mēnh anê.

Sikûn Korîit

Pawre wam Korîit kâam Jejus kôt hkwyjê hwÿr kagà nê mênh kôt kagà hõ mênh

Pawre na pre kagàja nhîpêx. Kêp mry hkà ho ixkre nhîpêx nê ho wênê ho pa xwÿnh na pre. Tã hpãnhã kêp Jejus nhÿ hã hkrajê jahkre ho pa xwÿnh. Jakamã na pre kagàja nhîpêx nê Korîit kãm mê kot Jejus kôt amnhî xunhwÿr xwÿnhjê hwÿr kumê. Na pre ra mê hwÿr wamta nhîpêx nê kumê. Wam kagà nhîxi pê Wam Korîit. Tã axte hkôt ja nhîpêx nê mê hwÿr mênh jakamã kagà nhîxi pê Sikûn Korîit.

Na pre Korîit kãm Jejus kôt mê htôjê hõ axtem nê nã puro kamã hpijaam kêt o pa nhûm Pawre tee ri harênh ma nê mê hwÿr wam kagàta mê nê kamã tanhmã mê kot hipêx to hã mê kãm karô. Tã kagà ja kamã axte tanhmã hã mê kãm karô hto.

Na pre ra Korîit wÿr mê kêp Kris nhÿ hã mê ahkre hã amnhî to hêx xwÿnhjaja mê hwÿr pøj nê tanhmã mê kãm kapêr jarênh to ho mê hkôt pa. Nê tanhmã mê kãm Pawre ho hêx to. Jakamã nhûm kagàja kamã tanhmã mê kãm amnhî tã àprâr to nê kãm mê hkînh tÿx ã amnhî jarê. Á na pre Pawre mê kãm mêmoj jarênh nê hã kagà anê. Nê mê kãm hã kagà ho:

1 Pa Korîit kãm Tîrtûm krajaja. Xà mê apiiã mê amex na ka mê apa? E ot pa mê awÿr kagà nhîpêx nê kumê. Mê amã nê mê anhô pika pê Gres kamã Tîrtûm krajê mê mê ato ixpimràãtã mê awÿr hipêx nê kumê. Ixpê Pawre na pa hte Tîrtûm jamaxpêr xà hkôt ma Jejus Kris nhÿ hã krî piitã hkôt hkrajê jahkre ho ri ixpa. Tã Kris kôt mê pahtô Ximotre mê wa mê awÿr hipêx nê kumê.

2 E kê Mêpahpãm Tîrtûm mê Pahihti Jejus Kris wa mê ato mex rãhã ho pa. Nê mêmoj to mê akutã nojarêt rãhã ho pa. Ka mê wa kukwak ri ajamakêtkati nê amex nê ri akînh nê apa ho apa.

Pawre kãm amnhî xà htÿx kamã hamak pyma hkêt ã harênh

Rômân 1.11-12; Korosê 1.11; Sikûn Tesarôn 2.16

³⁻⁴ Nã Tîrtûm kêp mê panhõ Pahihti Jejus Kris nhîpêxã na. Nê kêp Mêpahpãm maati jakamã na hte mê pakamã ukapri nê tanhmã mê pahto mex to ho pa. Kot puj mê mêmoj tã tanhmã amnhî to nê pahkapri nê ri papa nhûm ja hã mê pahpumu hãmri nê hamaxpêr pix o akupÿm mê pahto mê paxihtÿx. Mêmoxaxyw na hte ã mê pahto mex anê? Nã mê pahte amnhî tã omunh nê amnhî pyrãk mê hkapri nê ri mê pa xwÿnhjê jamaxpêr o hihtÿx o mê hkôt papa kaxyw. Ja kaxyw na hte mê pajamaxpêr o hihtÿx. Jakamã kwa pu mê kãm mex o mex ã mân harênh rãhã ho papa.

⁵ Na htem tãhã ixto Kris nhîpêx pyrã nê tanhmã ixto pa amnhî xà htÿx kamã ijamak o ri ixpa. Tã nhûm Tîrtûm inhîpêx o te Kris nhîpêx pyrã nê hamaxpêr pix o tanhmã ixkrã hto pa mê kutã amnhî to htÿx nê arî mê hkôt ixpa. ⁶⁻⁷ Na pa hte mê amã Kris kapêr jarênh o ixpa. Mê ate inhmar nê hkôt amnhî nhîpêx kaxyw. Jakamã na hte mê kãm Tîrtûm kapêr mar prãm kêt xwÿnhjaja tãhã mê atã ixtomuj nê pa amnhî xà htÿx kamã ijamak o ri ixpa. Tã kwâr mê mãmri ã inhîpêx anê. Mê ate Jejus kôt amnhî xunhwÿr tÿxja na inhmã hprãm. Na htem tanhmã Kris ã inhîpêx to nhûm Tîrtûm mê hã ixpumu nê tanhmã ixkrã hto pa inhmã amnhî xà htÿx kamã ijamak pyma hkêt nê ixpa. Nê arî mê hkôt

mě kām kapēr jarēnh rāhā ho ri ixa. Na hte Tirtūm amarī ā inhīpēx anhūr kēt nē. Mē ate ā kot inhīpēx anhūr ā ixpumunh nē ixyprā nē amnhī kaxyw kām ajamaxpēr tỳx kaxyw na hte ā inhīpēx anē. Mē ate ja hā ixpumunh nē ā ajamaxpēr anhūr kaxyw nē mē ajamaxpēr o:

—Nā kot pa nhūr mā Pawre pyrā nē tōhā mē mýrapē amnhī xā htỳx kamā ijamak o ixa. Hāmri nhūm Tirtūm ja hā ixpumu nē te ho Pawre nhīpēx pyrā nē tanhmā ixto pa inhmā amnhī xā htỳx kamā ijamak pyma hkēt nē ixa. Nā koja ā inhīpēx anē.

Anhūr o mē ajamaxpēr kaxyw na hte Tirtūm mē kutā ixto ixihtỳx. Mē ate ja hā ixpumunh nē akupỳm tām ajamaxpēr pē Karō nhỳ hā amnhī to axihtỳx kaxyw. Jakamā na pa tee ri mē akukamā ijamaxpēr kēt nē.

Tirtūm kēp mē papytār xwỳnh ā harēnh

⁸ E Kris kôt ixkwỳjaja. Kot paj ixprī hā mē amā tanhmā amnhī jarēnh to ka mē inhma. Na pa pre ma pika pē As wỳr mō nē mē kām Jejus kapēr jarēnh o ri mē hkôt ixa. Hāmri nhūm mē hkwỳjaja ja hā ixtomnuj tỳx nē pa amnhī xā htỳx kamā ijamak pē mē hkôt ixa. Kironhỳx pa pre mē kamā ty. ⁹ Na pa pre tee ri amnhī kukamā ijamaxpēr o:

—Koja pēr mē ixpī. Tanhmā kot pa we amnhī to nē tokyx mē kēp amnhī pytā? Kot paj tee ri inhmā mē kēp amnhīptār prām. Tirtūm pix na ja kaxyw mē kutā àhpumunh tỳx. Rỳ nhūm mē kot ixpīr tā nhūm kot akupỳm ixto ixtīr kaxyw tapxipix na àhpumunh tỳx. Nā kot paj amnhī kaxyw tapxipix mā māj ijamaxpēr o ri ixa nhūm amnhī tā ixpumu nē hkīnh nē. Ā ixte amnhī nhīpēx anhūr o ixpaja na kām hprām. Anē.

¹⁰ Tā nhūm pre ā inhīpēx anē nē xatā mē kēp ixpytār o ixkôt pa. Koja ā mē kēp inhīpēx anhūr rāhā ho pa. Nā ā kot inhīpēx anhūr mā kēnā.

¹¹ Nom kwa kēr ka mē apiitā arī ixto Tirtūm wỳr rāhā ho ri apa kē mē ama nē mē kām ixkurē xwỳnhjē kutā ixto ixihtỳx rāhā ho pa. Nē ixto mex rāhā nē. Hāmri nhūm mē ohtō nē kot mē kēp tanhmā ixpytār to hā ixtā omu nē ixtā kām mex o mex ā harē.

Pawre kot mē kām amnhī tā aprār ā harēnh *Wam Korìt 2.1-5*

¹² Nē na xep pre atar Kris kôt mē pahkwỳjaja tanhmā ixto kapēr punuj to nē Jejus kot mē awỳr inhmēnh kēt ā mē amā ixto hēx. Nē ijakwa nhīkē ho inhmā mē akīnh nē ijakwa nhīkē ho mē ato ixkapēr punuj ā ijarēnh o ri pa. Nom ixte ā amnhī nhīpēx anhūr kēt. Aa ixte tanhmā mē ano kupyw to hkēt. Ām hāmri na pa mē amā amnhī jarē nē tām mē amā ixkapēr o ri ixa nē tām ri mē anhīpēx o ri ixa. No ijamaxpēr tūm kôt tanhmā mē anhīpēx to hkēt nē. Ām Tirtūm kot mēmoj to mē pakutā nojarēt ā omunh xā hkôt pix mā na pa hte ý hā mē ato mex o ri ixa. Ijamaxpēr nyw o. Na pa hte Tirtūm pyrā nē mē piitā mē ho mex nē. No mē kajaja ixpyrān mē apē hkra jakamā na pa hte mē ato mex kumrēx o ri ixa. ¹³ Na pa hte mē amā kagā hkwy nhīpēx nē ixprī hā mē amā tanhmā mēmoj jarēnh to. Mē ate kamā harēnh nē mar mex kurē kumrēx kaxyw. No na pa hte mē amā tanhmā ixēx to rỳ tanhmā mē ano kupyw to hkēt nē. ¹⁴ Ā ixte amnhī nhīpēx anhūr o ri ixa htā kormā mē apiitā ja hā ixpumunh mex kēt nē. Nē Jejus kot mē awỳr inhmēnh ā ixpumunh mex kēt nē. Jakamā na hte mē akwỳjaja ixto akapēr punuj o pa. Tā kot kaj mē nhūr mā ām hāmri Jejus kot mē awỳr inhmēnh ā axpēn mā ijarē pa mē ama nē

ixkînh nê. Hâmri nhûm nhÿrmã mẽ panhõ Pahihti Jejus mẽ pahwÿr akupÿn wrÿ pa kãm mẽ ajarê nê kãm:

—E Pahihti. Jajê mã na pa pre akapêr jarênh o ixpa nhûm mẽ inhma nê akôt amnhî xunhwÿr kurê kumrêx nê tãm amnhî nhîpêx mex o pa.

Anhÿr o kãm mẽ ajarê. Hâmri nê ã mẽ ate amnhî nhîpêx anhÿr ã mẽ apumunh kôt ixkînh nê. Ka mẽ ajaxwÿja akînh pê tanhmã kãm ijarênh to ho akuhê.

Pawre hêx kêt ã kot amnhî jarênh

Wam Korîť 16.5-6

¹⁵⁻¹⁶ Nê na pa pre ra mẽ awÿr ixkrà. Ixte ma mẽ awÿr inhmôr nhûm mẽ ate ixpumunh nê akînh ã mẽ akamnhîx nê mẽ awÿr ixkrà nê ijamaxpêr o:

—Nã ma Masetôn wÿr inhmôr xwÿj ri kot paj ma Korîť kumrêx wÿr mō. Hâmri nê Kris kôt ixkwÿjê pumu nê rî kormã hamū Masetôn wÿr mō. Nê mẽ kamã ri ixpa tãmtã awjanã nê akupÿn Korîť wÿr mō nê axte mẽ omu. Jao Tirtûm kapêr o mẽ ahkre ho axkrut nhûm mẽ amnhî tã ixpumu nê hkînh nê. Hâmri pa akupÿm Jutej wÿr inhnojarêť nhûm mẽ pry hã ixãpkur xã hã inhmã mẽmoj kwÿ nhôr japêr.

Anhÿr o ijamaxpêr. ¹⁷ Tã kormã jar tanhmã amnhî nhîpêx to ho ixpa ka xep mẽ tee ri amnhî wÿr ixkãm ama nê axpên mã ijarênh o:

—Kwa Pawre kot ra mẽ pahwÿr nojarêť ã amnhî jarênh tã amnhîm nojarêť kêt kumrêx. Mãn pre ãm mẽ pamã amnhî to hêx nã? Ra kot mẽ pamã amnhî jarênh tã tokyx hpôx kêtêre hã. Anê.

¹⁸ Kwa mẽ ri ã inhmã ajamaxpêr anhÿr kêt nê. Na pa pre mẽ amã ixêx kêt nê. Na pa hte Tirtûm noo mã ãm hãmri mẽmoj jarênh o ri ixpa nê mẽ amã mẽmoj jarênh o ixêx kêt nê. Nã ãm hãmri na pa pre ma mẽ awÿr inhmôr ã amnhî jarê.

¹⁹ Na pa pre ra Ximotre mẽ Siras mẽ wa mẽ amã Jejus Kris jarênh o ri mẽ akôt ixpa. Jejus kêp Tirtûm Kra hã harê nê kot amnhî nhîpêx te kot Tirtûm kot amnhî nhîpêx pyrãk ã harênh o ri ixpa. Jejus haxwÿja amnhî to hêx kêt. Kot mẽmoj tã amnhî jarênh xã hkôt na hte ãm hãmri tanhmã amnhî nhîpêx to. Tã ã kot amnhî nhîpêx anhÿrja kôt na pa inhmã ixte amnhî nhîpêx o ixpa hprãm nê. ²⁰ Ra Tirtûm Jejus Kris kukwak ri kot mẽ pahto mex ã amnhî jarênh jakamã na pu htem axpên mã harênh o:

—Koja Tirtûm Jejus kukwak ri mẽ pahto mex rax nê. Ra kot mẽ pahtã amnhî jarênh xã hkôt. Nã Tirtûm mex o mex. Anê.

Tirtûm kot mẽ pa hwÿr Karō rênh ã harênh

Rômãn 8.14; Epes 1.13

²¹ Nã Tirtûmja mex o mex. Kot mẽ pahpê hkra kaxyw amnhîm mẽ paxunhwÿr jakamã na hte tanhmã mẽ pahkrã hto pu mẽ Kris kôt amnhî nhîpêx mex o papa.

²² Na pu htem Kris kôt amnhî xunhwÿ nhûm Tirtûm ja hã mẽ pahpumu nê mẽ pahwÿr Karō rê nhûm mẽ pahwÿr agjê. Mẽ piitã mẽ kot mẽ pahpê hkra hã mẽ pahpumunh kaxyw. Te mẽ kot tanhmã mẽ hikukrêx kagã hto nhûm mẽ kot kêp õ dôn ã omunhta pyrãk. Tã koja Tirtûm Karō mẽ pakamã hrÿ pu mẽ ja hã amnhî pumunh kôt Tirtûm kot nhÿrmã mẽ pahto mex rax ã amnhî tã omunh kurê kumrêx. Ra kot mẽ pahto mex tã koja nhÿrmã mẽ pahto mex rax o wam kot mẽ pahto mex raxta jakre.

Pawre kãm mẽ kãm ãkjêr prãm kêt ã kot amnhî jarênh

Wam Korîť 4.21; Sikûn Korîť 10.1-2

²³ E Kris kôt ixtō nē ixtō_xjaja. Kot paj kormā ma mē awȳr inhmōr kêt ri ixpr̄i hā mē amā tanhmā amnh̄i jarēnh to ka mē ixte amnh̄i jarēnh ma. Tirtūm tām mē arom kot ijamaxpēr kôt ixpumunh mex jakamā kot paj noo mā ixpr̄i hā mē amā tanhmā amnh̄i jarēnh to ka mē inhma.

Na pa pre ra mē awȳr inhnojarēt tā no ām tee ri amnh̄i kukamā ijamaxpēr nē ijamaxpēr o:

—Nà kot paj taxy kormā ma mē hw̄ȳr inhmōr kêt nē. Kot paj tokyx mē hw̄ȳr mōn pōj nē kot amnh̄i tomnuj xw̄ȳnhnta ā mē kām akir nē nē tanhmā mē kām ixkapēr to. Hāmri nh̄um mē amnh̄i tā inhma nē hkapr̄i nē tee ri amnh̄i kukamā hamaxpēr. Ā mē kot amnh̄i nh̄ipēx anh̄ȳr pymaj kot paj kormā mē hw̄ȳr inhmōr kêt nē.

Anh̄ȳr o ijamaxpēr. ²⁴ Inhmā ma mē awȳr inhmōr nē tanhmā mē ate amnh̄i nh̄ipēx to hā axte mē amā karō kamā ixiht̄yx prām kêt. Mē akw̄j̄jē rom ra mē ate Kris hkôt amnh̄i xunhw̄ȳr t̄yx kēnā. Tā mē ate hkôt amnh̄i nh̄ipēx mex o akīnh nē apaja na inhmā hprām.

2

¹ Na pa pre ma mē awȳr mō nē mēmoj tā mē amā akir nē nē tanhmā mē amā ixkapēr to ka prem inhma nē akapr̄i nē ri apa. Tā inhmā akup̄ym mē awȳr inhmōr nē axte mē amā ixākjēr prām kêt jakamā na pa kormā mē awȳr inhmōr kêt nē. ² Kot kaj mē akīnh nē apa pa ijaxw̄j̄ja ixkīnh nē ixpa. No kot paj ma mē awȳr mō nē mēmoj tā mē amā akir ka mē tee ri inhma nē akapr̄i nē. Pa mē apumu nē ijaxw̄j̄ja ixkapr̄i nē.

³ Ja pymaj na pa pre wam ixte mē awȳr kagā mēnhnta kamā mēmoj nē tanhmā mē amā ixākjēr to. Mē ate kamā harēnh nē mar nē tokyx kormā mē awȳr inhmōr xw̄j̄j̄ ri tanhmā mē ate amnh̄i tomnuj tota kaga nē tām amnh̄i nh̄ipēx kaxyw. Kēr pa mēmo arīgro hā ma mē awȳr mōn pōj nē mē ate tām amnh̄i nh̄ipēx o apa hā mē apumu nē ixkapr̄i hkêt nē ixkīnh nē. Ka mē ajaxw̄j̄ja ixpumu nē akīnh nē. ⁴ Jakamā na pa pre ā mē amā kagāta nh̄ipēx nē mē awȳr mēnh anē. Nē kamā mēmojta nē tanhmā mē amā ixākjēr to. Na pa pre ixkapr̄i ht̄yx nē tee ri mē akukamā ijamaxpēr o inhm̄ȳr rax pē mē amā mēmojta ā kagā. No ām nē akapr̄i kaxyw na pa pre mē amā hipēx kêt nē. Ām mē ate kamā harēnh nē inhmar nē ajamaxpēr o:

—Hēxta waa nē. Nà Pawre na kām mē pahkīnh t̄yx kumrēx. Hā na pre mē pahte tanhmā amnh̄i tomnuj to hā mē pajarēnh ma nē tee ri mē pakukamā hamaxpēr pē kagāja kamā hā mē pamā akir nē mē pahw̄ȳr kumē. Nà kām mē pahkīnh t̄yx kām na ā mē pamā kapēr kām hiht̄yx anē.

Anh̄ȳr o ajamaxpēr kaxyw na pa pre hipēx nē mē awȳr kumē.

*Mē kot axte amnh̄i tomnuj mā hamaxpēr kêt ā mē kām karō
Rukre 17.3-4; Wam Korit̄ 5.1-13; Karatas 6.1-2*

⁵⁻⁹ Nē wam kagāta kamā na pa pre mē amā mē akw̄j̄jē hō kot nā kaakre kamā hpijaam kēeta pa mē amā tanhmā hā karō hto. Ra mē ate harēnh mar tā nē kām akapēr kêt nē. Tā mē ate inhmar nē nē tanhmā kām akapēr to nē amnh̄i nē hanor kaxyw na pa pre mē awȳr kagāja mē. Hāmri nē ijamaxpēr o:

—Ko. Koja mē ixkapēr mar xā hkôt amnh̄i nē hanor japēr. Anē.

Tā ka xep prem kamā harē nē ama nē tee ri ja hā amnh̄i pumu nē akapr̄i nē. Nē ixpyrā nē apijaam nē. Hāmri nē ijamaxpēr xā hkôt amnh̄i nē hanor kām axiht̄yx nē. Ām hāmri na ka prem ā hipēx anē. Nh̄um xep tee ri ja hā amnh̄i pumu nē hkapr̄i nē hkapr̄i xāj ri m̄ȳr o pa. Jao ra ā amnh̄i nh̄ipēx anh̄ȳrta kaga

nē akupŷm tām amnhī nhīpēx. Tā ra ā kot amnhī nhīpēx anhŷr jakamā kwa mē tokyx akupŷm amnhī wŷr awŷ kē axte mē awŷr mra nē mē akōt pa. Ra kot amnhī tomnujta kaga jakamā kēr ka mē axte kām ajamaxpēr kēt nē. Akupŷm tām kām akapēr kē tokyx akupŷm tām hamaxpēr nē hkīnh nē pa. Kot kaj mē tokyx ā hipēx anhŷr kēt nē nhūm tee ri amnhī kukamā hamaxpēr nē hkaprī nē pa. Ja pymaj kwa mē amā hkīnh ā kām amnhī jarē nē akupŷm tām kām akapēr pē tām hipēx o ri apa. Kē amnhī tā mē apumu nē akupŷm hkīnh nē tām hamaxpēr. ¹⁰ E kēr ka mē axte kot tanhmā amnhī tomnuj tota mā ajamaxpēr kēt nē. Kwarī ho kwarī. Kot kaj mē ā hipēx anē pa ijaxwŷja ma hipēx anē. No pa na pre tanhmā ixtomnuj to hkēt nē. Ām Jejus kapēr kwŷm na pre ri ā amnhī nhīpēx anē. Tā ra kot amnhī tomnujta kaga jakamā kot paj Jejus nhŷ hā akupŷm tām hipēx nē kot amnhī tomnujta o ijamakētcati tokyx anē nē axte kām ijamaxpēr kēt nē. Mē apiitā mē amex nē ri nē apa kaxyw. Jakamā kēr ka mē ajaxwŷja mē amex nē apa kaxyw ā amnhī nhīpēx anē nē axte kām ajamaxpēr kēt nē. ¹¹ Kwa mē tokyx ja ho ajamakētcati. Kē Satanasti tee ri ja hā mē apumu nē mē amā mē ate tanhmā amnhī tomnuj to hprām xāj tee ri tanhmā ri mē ato ho pa kaprŷ. Kēr pu mē Satanasti kot amnhī nhīpēx kōt amnhī nhīpēx o ri papa hkēt nē. Ra mē pahte Tirtūm kapēr kuhpa hā tanhmā kot amnhī nhīpēx to ho pa hā omunh mex kēnā.

Pawre kot Xitre japēr o pa hā harēnh

¹² Nē na pa pre ja rūm ixkato nē ma Tōx wŷr mō. Ixte mē kām Kris jarēnh o mē hkōt ixpa kaxyw ma mē hwŷr mō. Nhūm Pahihti Kris ixkukamā tanhmā mē hkrā hto jakamā pa pre mē hwŷr pōj nhūm mē piitā kām ixujarēnh mar prām nē. Pa pre mē kām Tirtūm kapēr jarēnh ryy ho mē hkōt ixpa. ¹³ Na pa pre Xitre ra mē hwŷr ixkukamā hpōx ā hkamnhīx tā nhŷri omunh kēt nē. Hāmri nē ijamaxpēr o:

—Hēxta waa nē. Inhmā Korīt kām Jejus kwŷjē jarēnh mar prām. Na pa tee ri mē hkukamā ijamaxpēr o ixpa. Nom kormā Xitre mē kurūm akupŷn hpōx kēt. Mān kormā Masetōn kamā pa.

Anhŷr o ijamaxpēr hāmri nē mē kām amnhī jarē nē ixkato nē ma Masetōn wŷr krī hkwy hkōt hapēr o mō. Tā ra hwŷr ixkato nē omu.

Te mē pahpē mēhkuxwa xā pyrāk ā mē pajarēnh

Epes 5.2; Piripos 4.18

¹⁴⁻¹⁶ Nā Tirtūmja mex o mex. Na hte mē pahto mex rāhā ho pa. Nē mē kot mē panē amnār xwŷnhjaja nhūm hte tanhmā mē ho pu mē ma paxamnhīx ri mē hkōt mē kām Kris kapēr jarēnh o ri papa. Te mē pahte mē hkuxwa xā ho ri mē hkuxwa ho papa pyrāk. Mē pahte Kris kōt amnhī nhīpēx jakamā Tirtūm mā te mē pahkuxware nē ri mē papa pyrāk. Nē te mē kām Kris jarēnh o ri papa pē te mē hkuxwa xā ho mē hkuxwa ho ri mē hkōt papa pyrāk. Nhūm hte mē hkwyjaja mē pama nē kām mar prām nē. Nē mē paxujarēnhja haxwŷja te kot mē hkuxwa xā kuxwa mex nhūm htem hpār nē kām ho amnhī kuxwa hprām pyrāk. Jao kām mē pamar prām nē Kris kōt amnhī xunhwŷ. No nhūm mē hkwyjaja axtem nē mē kēp mē pamar prām nōkati. Mē kumā Tirtūm kapērja te kēp wenēn kuxŷ htŷx nhūm mē kot hpār nē htyk pymaj amŷm kuhē pyrāk. Jao kapēr kaga nē kēp amŷm amnhī xunhwŷ.

Nē na pu htem amnhī krā hkōt mē kām Kris kapēr jarēnh o ri papa hkēt nē. Ām Tirtūm nhŷ hā pix mā tanhmā harēnh to ho papa.

Pawre kot katāt kōt Tirtūm kapēr o mē ahkre hā harēnh

17 Na hte mẽ kot mẽ kệp Kris nhỹ hã mẽ ahkre hã amnhĩ to hêx xwỳnhjaja te Tirtũm kapêr o wênê pyràk o mẽ hkôt pa. Jao kàxpore hprãm xàj amnhĩ krã hkôt tanhmã mẽ kãm harênh to nhũm htem mẽ kuma nê hpãnhã tanhmã mẽ kãm amnhĩrer to. Nom pa na pa hte ã amnhĩ nhĩpêx anhỹr kêt nê. Nê mẽ uràk nê amnhĩ krã hkôt Tirtũm kapêr jahkre ho ixa hkêt nê. Tirtũm kot mẽ akaxyw iãm jakamã na pa hte ixkatàt kôt Kris nhỹ hã amarĩ mẽ amã kapêr jarênh o ri mẽ akôt ixa. No mẽ uràk nê kàxpore prãm xàj mẽ amã harênh kêt nê. Tirtũm kot ja hã ixpumunh mex.

3

1 Mẽ kệp Kris nhỹ hã mẽ ahkre hã amnhĩ to hêx xwỳnhjaja na htem nhỹhỹm nojarêt nê mẽ kot mar xwỳnhjê mã:

—E kot paj ma nhãm krĩ hõ hwỳr mỗ nê Tirtũm kapêr o mẽ ahkre. Jakamã kwa mẽ kaxyw inhmã kagã nhĩpêx nê kamã ixte Tirtũm kapêr o mẽ ajahkre mex xwỳnh ã ijarê nê hã kagã. Hãmri nê inhmã agõ pa ma amnhĩ kôt o mỗ nê mẽ kot inhmar mã xwỳnhjê mã kugõ kê mẽ kamã harê nê ijarênh ma nê kãm ixkapêr mar prãm nê.

Anhỹr o na htem amnhĩ to mẽ hwỳr o pa. No pa na inhmã ã amnhĩ nhĩpêx anhỹr prãm kêt. Inhmã nhãm mẽ kãm amnhĩ to jarkrar prãm kêt. Mẽ ate ja hã ixpumunh mex. Ra mẽ piitã mẽ kot ixkatàt kôt ixte Tirtũm kapêr jarênh mex ã ixpumunh mex jakamã mo kaxyw kot pa ri amnhĩ kôt kagã jamỹ nê ho ixa? Nà kot pa amnhĩ kôt hõ ho inhmõr kaxyw hã ixàhwỳr kêt nê. ²⁻³ Mẽ kajaja te mẽ apê inhõ kagã pyràk. Na ka prem ixte mẽ ajahkre ma nê Jesus kôt amnhĩ xunhwỳr kurê kumrêx. Hãmri nhũm Tirtũm mẽ amã amnhĩ Karõ rê nhũm mẽ amã agiê ka mẽ ỹ hã amnhĩ nhĩpêx nyw o amnhĩ nhĩpêx o apa. Hãmri nhũm mẽ akwỳjaja amnhĩ jaer pê mẽ ate amnhĩ nhĩpêx nyw ã mẽ apumu nê mẽ atã xpên mã ijarênh o:

—Hêxta waa nê. Pêr ãm hãmri na pre Kris mẽ hwỳr Pawre mẽ. Na pre ma mẽ hwỳr mỗ nê mẽ kãm Tirtũm kapêr o mẽ ahkre nhũm mẽ kuma nê amnhĩ tomnuj kaga hpa nê hpãnhã Tirtũm kapêr kôt amnhĩ nhĩpêx nê tãm ri amnhĩ nhĩpêx o pa. ãm hãmri na hte Pawre mẽ ahkre mex o pa. Hêxta waa nê.

Anhỹr o mẽ atã ijarênh jakamã mo kaxyw kot pa kagã hkwy jamỹ nê amnhĩ kôt ho ixa? Nà mẽ kajaja te mẽ apê inhõ kagã pyràk.

⁴ Na pa pre Jesus kôt amnhĩ xãm nhũm Tirtũm ja hã ixpumu nê tanhmã inhmã kapêr o amnhĩrit to nê inhmã:

—E Pawre. Kêr ka ma mẽ kãm ixkapêr jarênh o ri mẽ hkôt apa.

Anhỹr jakamã na pa hte Tirtũm kamnàr rom ã amnhĩ nhĩpêx anhỹr o ri mẽ hkôt ixa. ⁵ Nom amnhĩ krã hkôt mẽ ahkre hkêt nê. Tanhmã kot pa we amnhĩ to nê amnhĩ krã hkôt mẽ kãm kapêr o mẽ ahkre mex nê? Nà Tirtũm pix na hte ja kaxyw tanhmã ixkrã hto pa ô ri mẽ ahkre ho ri ixa.

Tirtũm kapêr nyw jarênh

⁶ Nê Tirtũm na hte tanhmã ixkrã hto pa Karõ nhỹ hã mẽ piitã mẽ kãm kapêr nyw jarênh o ri ixa. Amnepêm Tirtũm kot Ijaew mã mẽmoj tã karõ xwỳnhnta. Mojes kot kapêr tũm jarênh o pa xwỳnhnta mex tã no nhũm mẽ tee ri hkôt kãm amnhĩ nhĩpêx prãm o pa. Nê xatã kamã harê nê omunh tã tee ri kot hkôt kãm amnhĩ nhĩpêx prãm. Tã mẽ kot hkôt amnhĩ nhĩpêx kêt mỳrapê na prem pikaprãr pan hapêx. No kêt Tirtũm kapêr nywja. Jejus jarênhja. Na hte Tirtũm Karõ tanhmã mẽ pahkrã hto pu mẽ Jejus kôt amnhĩ nhĩpêx o ri papa. Jao

mē pahpē pahtīr tūm nē papa mā xwýnh. No na hte nhām mē hkwyjaja kām harēnhja mar prām kēt nē amnhī jarēnh o:

—Nà kot paj amnhī krā hkôt ā amnhī nhīpēx anē nē ā amnhī nhīpēx anē nhūm Tirtūm ja hā ixpumu nē itīr tūm nē ixpa mā xwýnh ā ijarē.

Anhūr tā no ām ā amnhī jarēnh anhūr kaprý. Tirtūm Karō nhī hā mē kot amnhī to mex o mē pa xwýnh pixjaja koja mē htīr tūm nē pa ho pa.

⁷ Nē Tirtūm kapēr tūmta na pre Mojes mē kām harēnh kaxyw nhūm mēmoj tanhmā amnhī nhīpēx to rax kumrēx. Naja hkrakrak nē haxēnh nē kamā kamāt kō htyk. Hāmri nhūm Tirtūm mē kot hkôt amnhī nhīpēx kaxyw kēn po hā mē kām mēmoj tā karō nhūm Mojes kumý nē mē hwýr o wrý nē mē kām kamā harē. Tirtūm kot hirā htýx kamā kām kapēr nhūm kuri mar o ām jakamā urāk nē ý hā hkuk nhīrā htýx kumrēx nē mē kām kapēr jarēnh o xa. Jakamā nhūm mē tee ri kot hprī hā omunh mex kaxyw no ām nom gēk týx nē. Tā gaa nhūm hkuk kām hirāja amnhīm hprī nē hapēx o mō. Na pre ā Tirtūm Ijaewjē mā kapēr tūm nhōr anē. Hāmri nhūm Mojesja ô ri mē kām kamā harē nē harēnh pa hāmri nē mē kām:

—E kēr ka mē Tirtūm kapēr mar týx nē hkôt amnhī nhīpēx mex rāhā ho ri apa. Kēr ka mē nhýrmā atyk tā ké akupým mē ato mē atīr ka mē ô krī kamā kuri atīr tūm nē amex nē apa ho apa. Anē.

Hāmri nhūm mē kuma nē kām:

—Tōe. Nà kot paj mē hkôt pix mā ri amnhī nhīpēx mex rāhā ho ri ixpa.

Anhūr ā amnhī jarēnh tā no ām hkôt amnhī nhīpēx kēt nē nhūm Mojes tee ri mē kot amnhī nhīpēx ā mē omu nē mē kām:

—Nà mē ate Tirtūm kapēr kôt amnhī nhīpēx kēt jakamā kot kaj mē nhýrmā ty nē Tirtūm pē awry rax kumrēx nē ri apa. Anē.

⁸ Tā na hte Tirtūm jarāhā axtem tanhmā mē pamā kapēr to. Pānhā kapēr nyw o kapēr nē mē pamā:

—Kot kaj mē Ixkra Jejus kôt amnhī xunhwý pa hā mē apumu nē mē ato ixkra. Hāmri nhūm Ixkarō mē amā agjē. Anē.

Kapēr ja na mex kumrēx o kot kapēr tūm jakrenh. ⁹ Kapēr tūmja mex tā nhūm htem hkôt amnhī nhīpēx kēt nē. Jakamā na htem ty nē Tirtūm pē awry rax ā ri pa. No kapēr nywja na tūmta rom mex o mex. Na hte Tirtūm mē pamā kapēr nywja jarēnh o:

—Kot paj tanhmā mē akrā hto ka mē amnhī to mex pix o ri apa. Jao ixkôt ri amnhī nhīpēx mex o ri apa. Anē.

¹⁰ Nē kapēr tūmja te kot kanē hpôk kryre pyrāk. No kapēr nywja mex o kot tūm jakrenh jakamā te kot mēmo hpôk rūnh o kanē hpôk kryre jakrenh pyrāk. Jakamā nhūm mē kot hirā rax kām ri mrar gryk ā hpôk grire nhīrā kamā mrar kēt pyrāk. ¹¹ Tirtūm kapēr tūm te kot Mojes kuk pyrāk. Na pre kamā hirā rax tā gaa nē amnhīm hprī nē kamā hirā hapēx o mō. Nē gaa nē hapēx. No kēt Tirtūm kapēr nywja te kot Tirtūm nhīrā htýx rāhā ho rāhāta pyrāk. Koja urāk nē aa hapēx kēt kumrēx.

Ijaewjē jarēnh *Rômān 11.7-10*

¹² Nē Tirtūm kapēr nywja mex o mex jakamā na pa hte ixāmnhīx mē kām harēnh o ri ixpa. ¹³ Te ixte Mojes kot amnhī nhīpēx pyrāk kēt. Na pre hte Mojes ixkīnhā āmnhīx Ijaewjē mā Tirtūm kapēr jarēnh o ri pa hkēt nē. Mē kot hkuk kām hirāta ra hapēx o mōr ā omunh nhūm hpījaam pymaj na pre kupēxē puroore ho amnhī kuk pro nē ri mē hkôt pa. ¹⁴ Jakamā nhūm prem

hprî hã hkuk kãm hirã pumunh mex kêt nê. Nê Tirtŭm kapêr ã kagã htŭmjã nhŭm prem mãânên hprî hã mar mex kêt nê. Mê hkrã hihtýx jakamã te mê kot amnhî jamak pro nê mêmoj mar mex kêt pyrãk jakamã mê kot mar tã hprî hã mar kêt nê. Nê hkôt ri amnhî nhîpêx mex kêt nê. No mê kot Kris kôt amnhî xunhwýr xwýnhjaja na hte Tirtŭm amnhî tã mê omu nê te mê nê mê hamak hpro xãta rênh par nê rênh pyrãk o mê hipêx nhŭm mēhprî hã kapêr mar týx nê.

¹⁵ Tã na hte Ijaewjaja arî jarãhã Mojes kot Tirtŭm kapêr ã kagã htŭm kamã harênh o pa. Nom arî mê hkrã hihtýx jakamã te mê kot amnhî jamak pro nê kamã harênh o pa pyrãk o amnhî nhîpêx jakamã kormã hprî hã mar kêt nê. ¹⁶ Tã koja mê hkwýjaja Pahihti Jejus Kris kôt amnhî xunhwý nhŭm amnhî tã omu nê te kot mê hamak nê hpro xã hpyr nê mēnh pyrãk o mê hipêx nhŭm mēhprî hã kapêr nyw mar týx nê. ¹⁷ Pahihti mê Karõja wa htipxi jakamã na hte mê pakamã agjê nê hprî hã mê pamã kapêr o amnhîrit o pa. ¹⁸ Ra mê pahte Pahihti Kris kôt amnhî xunhwýr jakamã te mê pahte mê kot amnhî jamak pro xwýnh kot amnhî nhîpêx pyrãk kêt. Nhŭm Pahihti Karõja tanhmã mê panhîpêx to pu mê ra hkôt amnhî nhîpêx mex o mō. Jakamã na htem mê pahte amnhî nhîpêx nyw pumunh kôt Tirtŭm kot tãm amnhî nhîpêx ã omunh kurê kumrêx. Kormã mê pahte hkôt amnhî nhîpêx mex kumrêx kêt tã ra hkôt amnhî nhîpêx mex o mō. Jao te tãm kot amnhî nhîpêx pyrãk o amnhî nhîpêx o mō.

4

Jejus kapêr te kēp kanê pyrãk ã harênh

Wam Korît 2.1-5; Sikŭn Korît 1.12; Wam Tesarõn 2.1

¹ Nê na pre Tirtŭm ixto mex nê tanhmã kãm ixãpênh to hã inhmã karõ. Ixte ma mê kãm kapêr jarênh o ri mê hkôt ixpa kaxyw. Jakamã na pa hte ixãmnhîx mê hkôt mê kãm harênh o ri ixpa. ² Nhŭm mê hkwýjaja axtem nê ixêx o ri ixpa hã ijarênh tã ixte ã amnhî nhîpêx anhýr kêt. Na pa hte amnhî tomnuj o ri ixpa hkêt nê. Mê hkwýjaja kot mê no kupyw mê kãm Tirtŭm kapêr o hêx o pa htã pa na pa hte ã amnhî nhîpêx anhýr kêt nê. Ixprî hã mê kãm harênh o ixpaja na inhmã hprãm jakamã na pa hte ixkatãt kôt harênh o ri mê hkôt ixpa. Mē piitã mê kot ixêx kêt kôt ixpumunh mex kaxyw. Tirtŭm kot ixêx kêt kôt ixpumunh mex. ³ No nhýrmã mê htyk nê ma kuwy hwýr mê pa mã xwýnh pixjaja na htem hprî hã ixkapêr mar mex kêt nê. ⁴⁻⁶ Satanasti tãm kēp mê hpãm. Kēp mê kãm Tirtŭm kapêr mar prãm kêt xwýnh piitã mê hpãm. Jakamã na pa hte mê kãm tanhmã Jejus jarênh to. Kēp Tirtŭm Kra hã harê nê te kot Tirtŭm kot amnhî nhîpêx pyrãk ã harênh o ri ixpa. Hãmri nhŭm Satanasti tee ri ja hã ixpumu nhŭm ja kēp omnuj nê. Jakamã nhŭm tanhmã Tirtŭm nê mê hkrã hto nê te mê hamak pro pyrãk o mê hipêx. Mē kot hprî hã Jejus jarênh mar nê hkôt amnhî xunhwýr pymaj nhŭm ã nê mê hipêx anê. Jejus jarênh te kēp kanê hpòk mex pyrãk jakamã mê kot mar kêt xwýnhjaja te kamãt kô kamã ri mê pa pyrãk. No nhŭm Satanasti tãm kot nê mê no kupyw jakamã nhŭm htem ã ri kamãt kô kamã mê pa pyrãk o amnhî nhîpêx anê.

Amnepê mã kormã mēmoj kêt ri nhŭm kamãt kô pix. Tã nhŭm Tirtŭm tanhmã kapêr to nê kapêr o:

—E kê hirã kato. Anê.

Hãmri nhŭm ra kapêr xã hkôt hirã kator kurê kumrêx. Tã ja pyrã nê na pa pre kamãt kô kamã ixtýx ri ixpa pyrãk nhŭm Tirtŭm te kot inhmã kanê hpòk

nhūm hirā pyrāk o inhīpēx pa mex o mex ā omunh kurē kumrēx. Hāmri nē Jejus Kris kot amnhī nhīpēx ā omu nē te Tīrtūm kot amnhī nhīpēx ā omunh pyrāk. Wa kot amnhī nhīpēx te kot axpēn pyrāk.

Nē na pa hte pam tanhmā amnhī jarēnh to ho ri ixpa hkēt nē. Ām Jejus Krisja pix na pa hte harē. Tapxipix na kēp mē panhō Pahihti. Jakamā hkīnhā te ixpē mē amā ixāpēnh xwŷnh pyrāk o na pa hte mē amā kapēr jarēnh o ri mē akōt ixpa.

Pawre te kēp poti grāre nhīpēx pyrāk ā harēnh

Wam Korīt 2.4-5; Sikūn Korīt 11.23, 12.9

⁷ Nē Tīrtūm ixrom hihtŷx o hihtŷx. No pa na hkīnhā ixihtŷx kēt. Te ixpē poti grāre nhīpēx pyrāk jakamā na pa hte Tīrtūm xihtŷx xwŷnh pix nhŷ hā mē kām kapēr jarēnh o ri mē hkōt ixpa. Nhūm htem inhma nē ām hāmri ixte ŷ hā ixkapēr ā ixpumunh kurē kumrēx. No pa ixte amnhī krā hkōt ixkapēr ā jarēnh kēt nē.

⁸ Na pa hte mē hkōt mē kām Jejus jarēnh o ri ixpa nhūm mē hkwyjja tōhā inhma nē ja hā inhīpēx kati nē pa amnhī xā htŷx kamā ama. Nom nhūm Tīrtūm mē kutā tanhmā ixkrā hto pa inhmā amnhī xā kamā ijamak pyma hkēt nē arī mē kām kapēr jarēnh o ri mē hkōt ixpa. Nē amnhī kaxyw Jejus kōt pix mā ijamaxpēr tŷx rāhā pē tee ri amnhī kukamā ijamaxpēr o ri ixpa hkēt nē.

⁹ Nē mē kām ixkurē xwŷnhjaja ohtōō. Na htem xatā Jejus ā tanhmā ixtomnuj to htā pa kormā ixtyk kēt nē. Na pa hte Tīrtūm kamnār rom arī mē hkōt ixpa nhūm Tīrtūm ixkōt pa ho pa. ¹⁰ Na htem Jejus pyrā nē ixpīr kaxyw tanhmā inhīpēx to. No ām ko. Kojā mē nhŷrmā ixpī rŷ ko. Ixte amnhī kukamā ixāhpumunh kēt. Kot paj ām arī ixtīr ri mē kām Jejus jarēnh o ri mē hkōt ixpa. Kōr kē mē hkwyjja ixkapēr ma nē axpēn mā tanhmā Jejus jarēnh to nē harēnh o:

—Nā pēr ām hāmri na pre Jejus akupŷm htīr nē tanhmā hkwyjē ho mex to. Ām hāmri na hte Pawre ja hā harē. Anē.

¹¹ Mē kot Jejus ā ixpīr mā tā pa arī mē kām akupŷm htīr ā harē. Tīrtūm na hte ja kaxyw tanhmā ixkrā hto pa arī mē kām harēnh o ri mē hkōt ixpa. ¹² Na pa pre ra mē amā harē ka prem inhma nē Jejus kōt amnhī xunhwŷr kurē kumrēx nē amnhī nhīpēx nyw o amnhī nhīpēx o ri apa. Jakamā ixpyrā nē mē apē atīr tūm nē apa mā xwŷnh. Nhūm htem piitā mē ate Jejus kōt amnhī xunhwŷr ā mē apumu. Tā nhūm mē kot Jejus ā ixpīr kaxyw. Nom kwār mē māmri ixpī. Ja inhmā tanhmā kute hkēt. Mē kot ixpīr mā tā kot paj arī Jejus kapēr jarēnh o ri ixpa rāhā ty. Ra mē kot ixkapēr mar nē Jejus kōt amnhī xunhwŷr xwŷnhjaja mē pahpyrā nē kēp htīr tūm nē pa ho pa mā xwŷnh kēnā. ¹³ Jakamā kwār mē māmri ixpī. Na pa hte arī amnhī kaxyw Tīrtūm kōt ijamaxpēr mex rāhā nē. Amnepē mā na pre Pahi finat Tawija tanhmā Tīrtūm kapēr jarēnh to nē harēnh o:

Ām hāmri na Tīrtūm kapērja. Hēx kēt jakamā na pa hte mē kām harēnh rāhā ho ri ixpa. Anē.

Tā pa hte Tawī pyrā nē mē piitā mē kām Tīrtūm kapēr jarēnh o ri ixpa. Tīrtūm kot mē pamā tanhmā mēmoj to hēx to hkēt. ¹⁴ Ra kot amnhī jarēnh xā hkōt akupŷm Pahihti Jejus o htīr jakamā kot puj mē nhŷrmā urāk nē ty nhūm akupŷm mē pahto mē pahtīr nē ma war amnhī wŷr mē pahto api.

¹⁵ Amnepēm na pa pre ma mē awŷr mō nē mē akōt mē amā Tīrtūm kapēr jarēnh o ri ixpa. Ka prem inhma nē Jejus kōt amnhī xunhwŷ nē ixpyrā nē

Tirtûm mã mex o mex ã harê. Jakamã kwãr mẽ mãmrĩ Jejus ã tanhmã inhĩpêx to. Koja mẽ gaa nê rĩ mẽ hkwyjaja mẽ pahpyrà nê Jejus kôt amnhĩ xunhwý nê Tirtûm mã mex o mex ã harê.

Pawre tee ri amnhĩ kukamã hamaxpêr kêt ã kot amnhĩ jarênh

Rômân 8.17; Sikûn Korîť 1.7; Wam Pêtre 1.3-9, 4.12-16, 5.10

¹⁶ Jakamã na pa tee ri amnhĩ kukamã ijamaxpêr o ixkaprĩ nê ixpa hkêt nê. Mẽ kot Jejus ã tanhmã ixtomnuj to htãã pa hte ixãmnhĩx kapêr jarênh o ri ixpa. Ra ixpigêt nê ixirek o inhmôr tâ inhõpinh xã kaxwýnh kãm ijamaxpêr o Jejus kôt amnhĩ nhĩpêx mex o mō. ¹⁷ Mẽ kãm ixkurê xwýnhjaja na htem Jejus ã inhĩpêx kati htã ã inhĩpêx anhÿr japjê hkêt nê. Nom kot paj nhÿrmã ty nhũm Jejus akupÿm ixto ixtir pa Tirtûm mẽ wa kuri inhmex kumrêx nê ixpa ho ixpa. Mẽ kot ixtomnuja na mẽ ho apkati grêre no kot paj nhÿrmã Tirtûm mẽ Krata wa kuri inhmex kumrêx nê ixtir tũm nê ri ixpa ho ixpa. Jao rãhã ho rãhã.

¹⁸ Jakamã na pa tee ri mẽ kot tanhmã ixtomnuj tota kukamã ijamaxpêr o ri ixpa hkêt nê. Ja koja tokyx hapêx. Na pa hte ãm nhÿrmã Tirtûm nhõ krĩ kamã inhmex nê ixkĩnh rãhã ri ixpaja pix kukamã ijamaxpêr o ri ixpa.

5

Mẽ panhĩ nyw jarênh

Piripos 3.21; Sikûn Pêtre 1.13-14

¹ Nê mẽ panhĩja te kot tyrti hõ ho ixkre pyrãk. Na htem tyrti hõ ho ixkre nhĩpêx nhũm gaa nê hapêx. Tã mẽ panhĩja na hte urãk nê hapêx tokyx anê. Na pu htem ri papa nê gaa nê pawej nê ty. Tã nhũm Tirtûm hpãnhã mẽ pahpê hkrajê mã mẽ panhĩ nyw gõ pu mẽ kuri õ krĩ kamã pamex kumrêx nê pahÿr tũm nê papa ho papa. ²⁻³ Na pu htem jar pahpunuj nê papa. Nê mẽ paxã nhi nê mẽ pahkaprĩ nê. Mẽ panhĩ htũmja te kot mẽ paxê htũm pyrãk jakamã na pu htem ty nê te paxê htũm kwryñh nê hpãnhã nyw jagjênh pyrãk o amnhĩ nhĩpêx. Tã na pu htem amnhĩ kukamã panhĩ nywja mã pajamaxpêr o ri papa. Kot pu mẽ kaxkwa kamã pahkarõ pix nê ri papa hkêt nê. Mẽ panhĩ nyw ã kot puj mẽ ri papa ho papa.

⁴ Nê na pu htem jar pahpunuj nê pamex kêt nê ri papa. Nê tokyx mẽ pahtyk nê panhĩ htũm o pajapêx nê hpãnhã panhĩ nyw ã mẽ papa hprãm. Tã koja Jejus tokyx akupÿn wrÿk japêr pu mẽ pahtyk kêt rãhã tokyx panhĩ nywta o panhĩ nyw. Nom koja tokyx akupÿn wrÿk kêt japêr pu mẽ nhÿrmã ty nhũm Tirtûm akupÿm mẽ pahto mẽ pahÿr nê mẽ pamã mẽ panhĩ nyw gõ pu mẽ ho panhĩ nyw. ⁵⁻⁶ Na pre ra Tirtûm mẽ panhĩ nyw kukamã hamaxpêr nê mẽ pahÿr tanhmã amnhĩ jarênh to. Nê mẽ pahwÿr Karõ rê nhũm mẽ pahkarõ mã agjê pu mẽ ja hã amnhĩ pumu nê pahkĩnh nê pajamaxpêr o:

—Nã ra Tirtûm kot ixwÿr amnhĩ Karõ mênh nhũm ixkarõ mã ãr jakamã koja mããnên nhÿrmã inhmã inhĩ nyw gõ. Kormã inhĩ htũm kamã ixpa nê Pahihti Jejus mẽ wa õ krĩ kamã ixpa hkêt tâ koja nhÿrmã inhmã inhĩ nywja gõ pa inhĩ nyw o wa kuri ixpa ho ixpa. Nã koja ã inhĩpêx anê.

Anhÿr o pajamaxpêr pê pahkĩnh nê papa.

⁷ Nê mẽ pahte jar pano ho nhÿri Jejus pumunh kêt tâ no ãm panhõpinh xã kaxwýnh kãm kãm pajamaxpêr mex nê. ⁸ Jakamã na pu mẽ tee ri amnhĩ kukamã pajamaxpêr o papa hkêt nê. Na pu htem ãm tokyx mẽ pahtyk nê ma Pahihti Jejus nhõ krĩ hwÿr paxãpir jamãr o papa. Õ krĩja kêp mẽ papapxã kumrêx jakamã na pu htem ma hwÿr paxãpir pix kukamã pajamaxpêr rãhã nê. ⁹ No ãm mẽ pamã ja pix prãm kêt. Na pu htem mããnên pamã Jejus mã

hprām xà hkôt nh̄yri tanhmā kām amnhī nh̄ipêx to ho ri papa hprām o papa. Jar mē panhī htūm rāhā r̄y mūtār kuri ō krī mex kām mē panhī nyw ā tanhmā kām amnhī nh̄ipêx to ho ri papaja na mē pamā hprām.

¹⁰ Nē na hte Krisja jar mē pahte tanhmā amnhī nh̄ipêx to hā mē pahpūmūn o hkrī. Mē pahte tām amnhī nh̄ipêxja nē mē pahte amnhī tomnuja nh̄ūm hte hā mē pahpūmūn rāhā ho hkrī. Tā koja nh̄yrmā kot mē pahte tanhmā amnhī nh̄ipêx to hā mē pahpūmūn kôt tanhmā mē panh̄ipêx to. Mē pahte tām amnhī nh̄ipêx o ri papa xw̄yñhaja koja ra mē panē htyk kukwak ri mē pahto mex nē. No mē kot amnhī tomnuj o mē pa xw̄yñhaja koja mē homnuj t̄ȳx nē. Jakamā na pa inh̄mā kām hprām xà hkôt pix mā amnhī nh̄ipêx o ipa hprām nē.

Mē pajamaxpēr nyw jarēnh

Rōmān 6.4-6; Sikūn Korīt 4.2; Epes 4.22-24; Korosē 3.9-10

¹¹ Nē Tirtūm kot hprī hā mē pahpūmūn rāhā ho hkrī jakamā inh̄mā kām hprām xà hkôt pix mā amnhī nh̄ipêx o ri ipa hprām. Mān ka mē ra ja hā ixpūmūn mex nē r̄y ko. Mē piitā mē kot hkôt amnhī xunhw̄ȳr prām xāj na pa hte mē kām kapēr jarēnh o ri ipa. ¹² Nom ixte ja hā amnhī to jarkrar o ri ipa hkēt. Ām mē ate inh̄mar nē mē kēp Kris nh̄y hā mē ahkre hā amnhī to hēx xw̄yñh̄jē mā tanhmā ijarēnh to kaxyw na pa ā mē amā amnhī jarēnh anē. Mē kot Tirtūm kapēr jahkre mex kumrēx ā amnhī to jarkrar tā na htem hkôt amnhī nh̄ipêx kēt nē. Tā mē ate aprī hā ixte Tirtūm kapēr kôt amnhī nh̄ipêx mex ā ixpūmūn nē tanhmā mē kām ijarēnh to kaxyw na pa ā te ixte amnhī to jarkrar pyrāk o mē amā amnhī jarēnh anē. ¹³⁻¹⁴ Mē kot ixkrā pipānh ā ijarēnh tā Tirtūm na mē akaxyw ixām pa hte mē amā kapēr jarēnh o ri mē akôt ipa. Ixkrā pipānh kēt. Ixte Tirtūm kām hprām xà hkôt tanhmā amnhī nh̄ipêx to xw̄yñh na pa. Tā mēmo kaxyw na pa hte ā kapēr jarēnh rūnh anh̄ȳr o ri mē akôt ipa? Nā inh̄mā mē akīnh kēnā. Mē ate Tirtūm kôt tām amnhī nh̄ipêx prām xāj na pa hte ā mē amā kapēr jarēnh anh̄ȳr rāhā nē. Kris na pre tanhmā ixto pa inh̄mā mē akīnh nē. Te tām kām mē ajapē pyrāk. Na pre Kris amnhī grōnh kôt mē pahpiitā mē nē ty. Tirtūm kot mē pahte amnhī tomnuj m̄yrapē tanhmā mē pahto pymaj nh̄ūm mē pahpiitā mē panē ty. Jakamā te mē pahpiitā Jejus kôt mē pahtyk pyrāk o na pu htem amnhī nh̄ipêx. Jao te mē pahte amnhī nh̄ipêx tūmja mē pahpē hapēx par pyrāk o pu mē amnhī nh̄ipêx nyw o amnhī nh̄ipêx o ri papa. ¹⁵ Mē pajamaxpēr nyw o tām mē pahte amnhī nh̄ipêx o papa kaxyw na pre Jejus mē panē ty. Jakamā na pu htem axte amnhī pix kukamā ri pamā mēmoj prām o ri papa hkēt nē. Na pu htem māānēn Tirtūm kām hprām xà hkôt tanhmā kām amnhī nh̄ipêx to ho ri papa. Ja kaxyw na pre Tirtūm akup̄ym Kris o ht̄ir pu mē kukwak ri pajamaxpēr nyw o amnhī nh̄ipêx o papa. ¹⁶ Jao mē piitā mē hkrā hkā hā mē omūn xà hkôt pix mā tanhmā mē harēnh to hkēt nē. Mē kot amnhī tomnuj ā mē harēnh r̄y mē kot amnhī to mex ā mē harēnh kēt nē. Amnepē mā na pa pre ā Kris jarēnh anē nē harēnh o:

—Nā Krisja na hte mē pahte amnhī nh̄ipêx kôt amnhī nh̄ipêx kēt nē. Ām ri kot mē pahte amnhī nh̄ipêx kw̄ym ri amnhī nh̄ipêx jakamā kot amnhī tomnuj t̄ȳx xw̄yñh na.

Anh̄ȳr ā harēnh o ipa. Tā axte ā harēnh anh̄ȳr hkēt nē. Kot amnhī tomnuj xw̄yñh kēt jakamā na pa hte hpānhā hkôt pix mā tanhmā kām amnhī nh̄ipêx to ho ri ipa.

*Mê pahpê Tîrtûm kràmnhwý hã mê pajarênh
Rômân 5.1, 5.10; Epes 6.20; Korosê 1.20*

¹⁷ Nê koja mêhō Kris kôt amnhî xãm nhûm kot amnhî nhîpêx tûmja kêp hapêx nhûm hpãnhã kot amnhî nhîpêx nyw pix o amnhî nhîpêx nê hamaxpêr nyw pix o hamaxpêr. ¹⁸ Tîrtûm na hte tanhmã mê pahto pu mê ã amnhî nhîpêx anhÿr o ri papa. Na pu prem pamã hkurê htã nhûm Kris kukwak ri mê pahte hkôt amnhî nhîpêx xwýnhjê ho hkràmnhwý. Hãmri nê tanhmã mê pahte amnhî nhîpêx to hã mê pamã karō nê mê pamã:

—E kêr ka mê ma krî piitã hkôt ri mê kãm ixkapêr jarênh o ri apa kê mê ama nê mê apyrã nê Kris kôt amnhî xunhwý. Pa ja hã mê omu nê ixte mê anhîpêx pyrã nê mê ho ixkràmnhwý. Anê.

¹⁹ Jakamã na pa hte ma mê kãm kapêr jarênh o ri mê hkôt ixpa nê mê kãm:

—E pa mê amã mêmoj mex jarê ka mê inhma. Nã na pre Krisja mê pahte amnhî tomnuj mÿrapê mê panê ty. Nê htyk o Tîrtûm mã mê pahpãnhã amnhîrer par kumrêx. Jakamã na ra Tîrtûmja Kris kukwak ri kãm mê pahpiitã mê pahto hkràmnhwý prãm. Kojã kukwak ri mê pahte amnhî tomnuj piitã ho hamakêtkati nê axte kãm hamaxpêr kêt kumrêx. Kãm mê pahto hkràmnhwý hprãm jakamã koja ã mê panhîpêx anê. Jakamã e kwa mê tokyx Kris kôt amnhî xunhwý kê Tîrtûm kot inhîpêx pyrã nê mê ato hkra nê mê ato hkràmnhwý.

Anhÿr o mê kãm harênh o ri mê hkôt ixpa. ²⁰ Kris kot mê apiitã mê awÿr inhmênh jakamã na pa hte ý hã mê amã kapêr jarênh o ri mê akôt ixpa nê mê amã:

—E Tîrtûm kãm mê ajapê jakamã na mê awÿr inhmê pa mō. Jakamã kwa mê tokyx amnhî tomnuj kaga nê hkôt amnhî xunhwý. Kê amnhî tã mê apumu nê mê ato hkràmnhwý. Anê.

²¹ Krisja aa kot tanhmã amnhî tomnuj to hkêt kumrêx tã nhûm pre Tîrtûmja te mê kot amnhî tomnuj tÿx kumrêx xwýnh pyrãk o hipêx. Tã mêmo kaxyw na pre ã hipêx anê? Nã mê panê kênã. Mê pahte hkôt amnhî xunhwÿr nhûm kot mê panhîpêx o te aa mê pahte amnhî tomnuj kêt kumrêx xwýnh pyrãk o mê panhîpêx kaxyw na pre ã mê panê Krata nhîpêx anê.

6

¹ Tã kot ã Kra nhîpêx anhÿr jakamã kwa mê ixkapêr ma nê mar tÿx nê. No mê ama nê ãm mar kêt nê. Tîrtûm kãm mê pajapê htÿx jakamã mê pakutã nojarêt rãhã ho pa. Kumã na pa hte ã mê amã kapêr jarênh anhÿr o ri mê akôt ixpa. ² Amnepê mã na pre Ijaew mã kapêr nê mê kãm:

Na ka prem amex kêt nê ri apa nê amnhî to ixwÿ pa pre mê ama nê mêmojta pê mê apytã nê mê ato mex nê. Anê.

Jakamã kwa mê inhma. Tîrtûm kãm mê ate amnhî tomnuj pê mê apytãr prãm tÿx jakamã kwa mê tokyx amnhî to awÿ kê ã kêp mê apytãr anê.

*Mê kot Kris ã tanhmã Pawre nhîpêx to hã mê harênh
Sikûn Korî 4.7, 11.23-33; Korosê 1.10*

³⁻⁴ Nê mê kot Tîrtûm kapêr mar nê hã ixtomnuj tã pa hte amnhî katut kôt mê kot tanhmã ixtomnuj toja rê nê ho ijamakêtkati tokyx anê. Nê arî mê kãm kapêr jarênh rãhã ho ri mê hkôt ixpa. Mê kot mar nê ãm mar nê hkaga pymaj na pa hte ã amnhî nhîpêx anhÿr rãhã nê. Mê kot ja hã inhîpêx punuj tã pa arî mê kãm harênh o ri mê hkôt ixpa. ⁵ Mê kot Kris ã ixtak nê ijagjênh nê tanhmã ixto kaxyw ixtã htu htã pa hte mê kutã amnhî to htÿx nê ixkuhê. Na pa pre hte

Tirtùm mã mẽ kãm kapër jarënh rax nê. Jao tōhã inhôt kêt nê inhôt_{xwa} ho ri mẽ hkôt ipxa. Nê tōhã inhmã prãm tỳx nê ri ipxa. Tã no ãm arĩ mẽ kãm kapër jarënh rãhã nê. ⁶ Inhmã tanhmã ixte amnhĩ tomnuj to hprãm kêt. Inhmã Tirtùm kot amnhĩ nhĩpêx kôt pix mã amnhĩ nhĩpêx prãm. Nê inhmã inhgryk tokyx anhÿr prãm kêt. ãm inhmã mẽ piitã mẽ hkĩnh kãm mẽ ho mex pix prãm. ã na pa hte Tirtùm Karõ nhÿ hã amnhĩ nhĩpêx anhÿr o ri mẽ hkôt ipxa. Mẽ kot ja hã ixpumunh nê ra Tirtùm kapër ma nê hkôt amnhĩ xunhwÿr kaxyw. ⁷ Na pa hte ixkatãt kôt mẽ kãm ixkapër mex pix nê. Tirtùm xihtỳx xwỳnhja nhÿ hã ri mẽ kãm kapër jarënh jao tãm amnhĩ nhĩpêx nê tãm ri ijamaxpër o ri mẽ hkôt ipxa. Jakamã na htem ja hã ixpumu nê ixte Tirtùm kapër jarënh ma nê hkôt amnhĩ xunhwÿ. ⁸ Na hte mẽ hkwỳjaja kãm ixkĩnh nê nhũm mẽ hkwỳjaja axtem kãm ixkurê nê. Nê mẽ hkwỳjaja amnhĩm inhmex ã ijarê nhũm mẽ hkwỳjaja axtem axpën mã tanhmã ixto kapër punuj to. Mẽ kot ixêx nhi hã ijarënh tã pa hte ixkatãt kôt mẽ kãm ixkapër o ri ipxa. Nom kwãr mẽ mãmrĩ tanhmã ri ixto kapër to. Ja tanhmã inhmã kute hkêt. ⁹ Na hte mẽ hkwỳjaja ixkamã ôkre kahak nê pika piitã hkôt axpën mã tanhmã ijarënh to ho pa. Mẽ kãm ixpĩr prãm tã no pa arĩ ixtĩr nê ipxa. Mẽ kot Jejus ã ixtomnuj tỳx tã kormã ixpĩr kêt nê pa ri ixtĩr nê ipxa. ¹⁰ Ixte Kris ã amnhĩ xã htỳx kamã ijamak o ri ipxa htã arĩ ixkĩnh nê ipxa. Nê ixkãxpore hkêt tã nhũm mẽ ohtõ nê ixte mẽ kãm Jejus kapër jarënh kukwak ri mex nê pa. Nê ixkukrêx rax kêt tã nhũm Tirtùm ixto mex nê pa inhmex nê ipxa. Tã kot paj nhÿrmã õ krĩ kamã kuri inhmex kumrêx nê ixtĩr tùm nê ipxa ho ipxa. Jakamã na pa hte arĩ mẽ kãm Jejus kapër jarënh o ri mẽ hkôt ipxa. ¹¹ E Korîť kãm ixkrãmnhwỳjaja. Na pa ixprĩ hã mẽ amã amnhĩ nhĩpêx jarënh par kumrêx. ¹² Inhmã mẽ akĩnh tỳx tã te mẽ amã ixkĩnh kêt pyràk. ¹³ Kwa te mẽ ate ixto mẽ akatut nê akuhê pyràk o inhiêpêx kêt nê. Amnhĩ pyrà nê amã ixkĩnh nê hkêt wehe. Te mẽ apê ixkra pyràk o na pa ã mẽ amã ixkapër anê.

Te mẽ pahpê Tirtùm nhõrkwỳ pyràk ã mẽ pajarënh

Wam Korîť 10.20-22, 15.33; Epes 5.3-14; Sikùn Ximotre 2.4; Xiakre 4.4-5;

Wam Pêtre 2.11, 4.1-6

¹⁴ Nê kër ka mẽ kot Kris kôt amnhĩ xunhwÿr kêt xwỳnhjê mẽ mẽ mẽmoj tã tanhmã axpën mar to hkêt nê. Rỳ mẽhõ ho amjên rỳ mẽhõ ho aprõ hkêt nê. Ahpỳnhã mẽ pajamaxpër kênã. Tanhmã kot we mẽ hamaxpër nyw xwỳnhjaja nê mẽ hamaxpër tùm xwỳnhjaja amnhĩ to nê axpën kôt hamaxpër nê ri axpën kôt pa? Nã koja mẽ ã amnhĩ nhĩpêx anhÿr kêt nê. Ahpỳnhã mẽ pajamaxpër. Na hte hirã htỳxja kamãt kô mẽ pihkãr kêt nê. ¹⁵ Xã na hte Kris mẽ Satanasti wa axpën kôt hamaxpër? Nã wa kot axpën kôt hamaxpër kêt. Ahpỳnhã wa hamaxpër nê ahpỳnhã wa kot amnhĩ nhĩpêx. Nê ahpỳnhã hirã nê ahpỳnhã kamãt kô. Nê mẽ pahpê Kris kwỳjaja nê mẽ kêp hkwỳ hkêt xwỳnhjaja ahpỳnhã mẽ pajamaxpër nê ahpỳnhã mẽ pahte amnhĩ nhĩpêx. ¹⁶ Na pu htem Tirtùm mã amnhĩ jarënh xã hã ixkre kamã sãnti xunhwÿr nê amnhĩ to hwÿr pê kãm mex o mex ã harënh kêt nê. Axtem na sãntija. Mẽ panhõ Tirtùmja sãnti rom htĩr tùm rãhã nê pa ho pa xwỳnh. Nê mẽ papajaja te mẽ pahpê Tirtùm nhõrkwỳ pyràk. Kapër ã kagã htùm kot ja jarënh kot: Ixkrajaja te kêp inhõrkwỳ nhũm ixpê õ dõn pyràk. Te ixpê inhõrkwỳ kamã ipxa xwỳnh pyràk jakamã kot paj ixkrajê kamã ri ipxa ho ipxa. Ixpê Mẽhpãm na pa. Anê.

¹⁷⁻¹⁸ ã Tirtùm xihtỳx xwỳnhja kot amnhĩ jarënh anhÿr jakamã na hte mẽ kot amnhĩ tomnuj xwỳnhjê nê mẽ pahkurê ho:

Kêr ka mē hkôt ri apa hkêt nē. Kwarī ho kwarī.

Nē mē hkôt ri amnhī nhīpêx o apa hkêt nē.

Kot kaj mē ixkapêr ma nē ixkôt amnhī nhīpêx hā kot paj amnhī wÿr mē awÿ
nē mē ato ixkra.

Nē pa kot paj ixpê Mēapām maati. Anē.

7

¹Tā ā Tirtūm kot mē pahto hkra nē mē pahkôt pa ho pa hā amnhī jarēnh kot
anhÿr jakamā kwa ixkrāmnhwÿjaja. Kêr pu mē kapêr ma nē tanhmā amnhī
tomnuj to hkêt nē. Nē mēmoj punuj kukamā pajamaxpêr kêt nē. Nē ām kapêr
kôt pix mā amnhī nhīpêx mex rāhā nē.

Pawre kot Korît nhō xwÿnhjê nhÿ hā hkīnh ā harēnh

²Nē kwa Kris kôt ixtō nē ixtōxjaja. Kêr ka mē tee ri amnhī tā tanhmā inhmā
ajamaxpêr to hkêt nē. Na pa pre tanhmā mē atō hto hkêt nē. Rÿ tanhmā mē
atō hto ka mē ja hā ixpumu nē ixkôt tanhmā amnhī tomnuj to hkêt nē. Rÿ pa
pre ixêx rom tanhmā mē anokupyr to ho ri ixpa hkêt nē. Kwa mē amā ixkīnh
nē tokyx ixkôt ajamaxpêr kêt wehe. ³Mē ate inhmar nē amnhī tā apijaām
kaxyw na pa ā mē amā ixkapêr anhÿr kêt nē. Inhmā mē akīnh kēnā. Na pa
pre inhmā mē akīnh ā amnhī jarēnh rax nē. Inhmā ri mē akôt ixpa rāhā ho
ixpa hprām. Rÿ ka mē nhÿrmā apiitā apikaprār par japêr pa inhmā mē akôt
ixtyk prām nē. ⁴Na pa hte ra mē amā ijamaxpêr pē ixkīnh nē ixpa. Nā kot
kaj mē ixkapêr ma nē Jejus kôt amnhī nhīpêx mex nē. Tā kêt ka mē ā amnhī
nhīpêx anhÿr rāhā nē. Na pa hte jar ra amnhī xā htÿx kamā ijamak o ri ixpa
htā no ām mē amā ijamaxpêr nē ixkīnh nē.

⁵Nē na pa pre amnē Masetōn wÿr kormā Xitre japêr o mō. Hāmri nē
Masetōnja wÿr pōj nē hapêr pē mē kām Jejus kapêr jarēnh o ri mē hkôt ixpa.
Hāmri nhūm mē kām ixkurē xwÿnhjaja Kris ā inhīpêx punuj nē hā inhmā
àkjêr pix o pa. Hāmri nē ma Masetōn kamā krī piitā hkôt ri mē kām ixto
kapêr punuj nē pa amnhī tā mē mar o ri mē hkôt ixpa. Nē mē kajaja mē
ate Kris kaga nē nhām mē hamaxpêr kôt amnhī nhīpêx pymaj na pa pre tee
ri mē akukamā ijamaxpêr o ri mē hkôt ixkaprī nē ixpa. ⁶Tā Tirtūm kēp mē
hkaprī xwÿnhjê pumunh nē akupÿm mē ho mē hkīnh xwÿnh jakamā na pre
ixkaprī hā ixpumu nē ixwÿr Xitre mē. Pa pre omu nē akupÿm ixkīnh nē tām
ijamaxpêr. ⁷No ām Xitre pumunh kôt pix mā ixkīnh kêt. Na pre ixwÿr pōj nē
tanhmā inhmā mē ajarēnh to nē mē ate tanhmā ho mex to hā mē ajarē. Nē
mē amā ixpumunh prām tÿx ā mē ajarē. Nē Kris kôt mē atōta hpijaām kêt o
pa nhūm ixte kaga kamā hā mē amā ixàkjêr nhūm mē ate ja hā omunh nē ra
amnhī kamā apijaām o akaprī htÿx ā mē ajarē. Nhūm Tirtūm kôt inhnē mē
kām ixkurē xwÿnhjê pumunh mex kaxyw mē ate ixto hwÿr ā mē ajarē. Na
pre ā inhmā mē ajarēnh anē pa kuma nē mē anÿ hā ixkīnh tÿx kumrêx.

⁸⁻⁹Nē wam ixte mē amā kagata nhīpêx kêt ri na pa pre tee ri mē ate amnhī
nhīpêx ā mē ajarēnh ma nē mē akaxyw hipêx. Nē kamā mē ate hpijaām kêt
xwÿnhhta kot tanhmā amnhī nhīpêx to hā omunh nē ām omunh o arī hkôt apa
hā kagata kamā mē amā akir hāmri nē Xitre mā kugō nhūm kupy nē ma mē
awÿr o mō. Tā ka xep prem kamā harē nē ama nē amnhī kamā apijaām nē.
Nē akaprī nē ajamaxpêr o:

—Hêxta waa nē. Ām hāmri na Pawre ā mē ijarēnh anē. Na pa mē ā amnhī
nhīpêx anē nē amnhī tomnuj tÿx nē. Anē.

Tā nhūm Xitre akupŷn ixwŷr pōj nē inhmā mē ajarē. Pa mē ajarēnh ma nē tee ri ijamaxpēr nē ijamaxpēr o:

—Hêxta waa nē. Mon pa pre axtem nē ā ri mē kām ixākjēr anē? Nā na xep prem kagāta kamā harē nē kuma nē hkaprī htŷx nē. Anē.

Tā ām hāmri na pa pre ā mē akaxyw hipēx nē mēmoja tā mē amā ixākjēr anē. Na ka xep prem kamā harē nē ama nē tee ri ajamaxpēr o ra akaprī nē. Nom Tirtūm kām hprām xā hkôt na ka prem ja hā amnhī pumu nē ā akaprī anē. Tā xep ra akupŷm tām amnhī nhīpēx nē akupŷm Tirtūm kôt amnhī nhīpēx mex nē. Jao akupŷm akīnh nē ri apa. Jakamā ām hāmri na pa pre mē awŷr wam kagāta mēnh nē mēmoj tā ā mē amā ixākjēr anē.

¹⁰ Koja Tirtūm krajē hō tanhmā amnhī tomnuj to. Hāmri nē tee ri ja hā amnhī pumu nē amnhī kamā hpijaām nē akupŷm Tirtūm kôt tām amnhī nhīpēx. Hāmri nē akupŷm mex nē tām hamaxpēr pē hkīnh nē ri pa. Nē axte tee ri amnhī kukamā hamaxpēr hkēt nē. Ja na Tirtūm kām hprām. Tā koja mē kēp hkra hkēt xwŷnhjē pyrā nē tanhmā amnhī tomnuj to nē ra hpijaām japēr. Nom hkwyjaja kot ja hā omunh pix mŷrapē hpijaām nē arī Tirtūm kôt amnhī nhīpēx kēt japēr. Hā koja nhŷrmā ty nē Tirtūm kra kot akupŷm hkôt tām amnhī nhīpēx xwŷnhjē kīnhā Tirtūm pē awry rax kumrēx nē ri pa.

¹¹ Mē pahte Tirtūm kapēr kwŷm ri tanhmā amnhī nhīpēx to hā tee ri amnhī pumunh nē amnhī kamā hpijaām nē akupŷm tām amnhī nhīpēxja na Tirtūm kām hprām. Tā na ka xep ā amnhī nhīpēx anē. Wam ixte mē awŷr kagā mēnhnta na ka xep prem kamā kapēr ixte nā puro kamā hpijaām kēt xwŷnhnta ā mē amā ixākjēr tota kamā akapēr nē ama. Hāmri nē tee ri mē ate kormā kot amnhī tomnuj ā kām axākjēr kēt ā amnhī kukamā ajamaxpēr nē amnhī kamā apijaām nē. Nom Tirtūm kām hprām xā hkôt. Mē ate jam ajamaxpēr pē amnhī kamā apijaāmja na kām hprām. Tā ka mē hpijaām xwŷnhnta kamā agryk nē kām akapēr o:

—Kwa mē pahpē Jejus kwŷjaja mē pahte ā amnhī nhīpēx anhŷr kēt tā ka ā amnhī nhīpēx anē. Nā na ka amnhī tomnuj tŷx kumrēx. Kot kaj ā amnhī nhīpēx anē pa mē hā apumu nē gaa nē apyrā nē ā amnhī tomnuj anē. Kwa ja kaga nē axte ā amnhī nhīpēx anhŷr kēt nē. Nē akupŷm Tirtūm kôt amnhī xām tŷx nē hkôt amnhī nhīpēx rāhā ho ri apa. Anē.

Hāmri nhūm krī nhō xwŷnhjaja ja hā mē ajarēnh ma nē mē apē jamnuj ā mē apumunh kurē kumrēx. Ām hāmri na ka prem ā kām akapēr anē.

¹² Nē ixte mē awŷr kagā nē mēnhnta kamā na pa pre nā puro kamā hpijaām kēt xwŷnhnta mā tanhmā ixākjēr to hkēt nē. Rŷ nā purota mā tanhmā ixākjēr to hkēt nē. Na pa pre mē apē Kris kwŷjē hwŷr kagā nhīpēx nē kamā tanhmā mē amā hpijaām xwŷnhnta ā karō hto. Mē ate kamā harēnh hāmri nē inhŷ hā amnhī nē hanor nhūm Korīt nhō xwŷnh piitā kot ā mē ate amnhī nhīpēx anhŷr ā mē apumunh kaxyw. Nē mē ate Tirtūm nom ā hipēx anhŷr jao mē amā ixkīnh pē ixkapēr kôt ā hipēx anhŷr ā amnhī pumunh kaxyw.

¹³ Tā nhūm Xitre ixwŷr pōj nē tanhmā inhmā mē ajarēnh to. Na xep pre mē awŷr nojarēt nē tee ri amnhī kukamā hamaxpēr. Mē ate kagāta kamā harēnh nē ijarēnh mar nē kamā agryk pymaj tee ri amnhī kukamā hamaxpēr. Tā ma mē awŷr mōn pōj nē mā amā kugō. Ka xep prem kamā harē nē ama nē hkôt amnhī nhīpēx kurē kumrēx nhūm mē ate amnhī nhīpēx ā mē apumu nē hkīnh nē. Hāmri nē tām hamaxpēr. Tā ra akupŷn ixwŷr mō nē inhmā mē ajarē pa mē ajarēnh ma nē ijaxwŷja ixkīnh nē. ¹⁴ Na pre kormā mē awŷr nojarēt pa

kâm tanhmã mê amex ã mê ajarênh to. Tã nhûm xep ma mê awÿr môn pôj nê mê apumu nê hamaxpêr o:

—Nã pêr ãm hãmri na pre Pawre inhmã mê mex ã harê. Mê mex kênã. Anê.

¹⁵ Tã nhûm pre mê arûm kato nê ra man akupÿn ixwÿr môn pôj nê inhmã mê ajarênh o:

—Na pa pre ma mê hwÿr mô nê mê kãm ixkapêr o ri mê hkôt ixpa nhûm mê ixkapêr ma nê ixkôt amnhî nhîpêx kurê kumrêx nê ixto mex nê. Kormã ixte mê hwÿr inhmôr kêt tã mê harênh ma nê inhmã mê hkînh nê. Tã pa ma mê hwÿr mô nhûm mê ixto mex rax nê pa ra inhmã mê hkînh tÿx kumrêx. Anê.

¹⁶ Æ inhmã mê ajarênh anê pa mê ajarênh ma nê ixkînh tÿx nê. Æm hãmri na ka htem mêmoj tã amnhî jarênh xà hkôt tanhmã amnhî nhîpêx to ho apa.

8

*Mê kot Kris kôt mê hkwÿjê pê õxÿ hkêt ã mê kãm karô
Atre 11.27-30; Rômân 15.25-27; Wam Korîit 16.1-4*

¹ E Kris kôt ixkwÿjaja. Kot paj hpãnhã mê amã jar Masetôn kamã tanhmã Jejus kwÿjaja kot amnhî nhîpêx to hã mê harê ka mê harênh ma. Na hte Tirtûm mê kutã nojarêt nhûm mê mex nê pa. ² Mê hkwÿjaja kot Kris ã mê hipêx kati nhûm mê kot amnhî xà htÿx kãm hamak o pa htã hkînh nê hamakêtkati nê ri pa. Nê mê hkàxpore hkryre htã ho õxÿ hkêt nê pa. Na htem amnhîx ri mê kêp amrakati xwÿnhjê mã hkwÿ nhôr o pa.

³⁻⁴ Tã na prem Jerujarê kamã Kris kôt mê pahkwÿjê jarênh ma. Mê kêp amrakati hã mê harênh ma nê kãm mê hkaprî nê. Nê mê kãm mê hwÿr mêmoj rênh nê mê ho ajuta hprãm nê. No ãm pa ixte mê kãm hã karô xà hkôt kêt. Mê tãmjaja mê hamaxpêr xà hkôt na prem ã hamaxpêr anê nê mê kaxyw kàxpore ho pikuprôn h rax nê. Hãmri nê inhmã kugô nê inhmã:

—Kwa na pa prem Jerujarê kamã Kris kôt mê pahkwÿjê jarênh ma nê mê inhmã mê hkaprî nê mê kãm mê ixkàxpore hkwÿ ho akuprô. Jakamã e amy nê ma mê hwÿr o mô nê mê kãm agô kê mê tokyx ho amnhîm awjaprô nê kuku. Anê.

⁵ Pa mê kuma nê ixTÿx ho ãm kàxpore grire hã hkamnhîx nê ijamaxpêr o:

—Kwa mo mê hikàxpore rax koja mê ri ho akuprô nê mê kãm kugô? ãm mê hikàxpore hkryre kênã.

Anhÿr o ijamaxpêr tã no nhûm mê kaxyw ho rax nê ho akuprô. Mê hikàxpore hkryre htã mê kãm ôr rax nê. Hãmri nê inhmã amnhî jarênh o:

—Na pa mê ra Pahihti Jejus Kris mã amnhî gô. Mê ixte tanhmã kãm amnhî nhîpêx to ho ri ixpa kaxyw. Jakamã e tanhmã mê inhmã mêmoj tã karô hto. Kot pa mê ama nê akapêr kôt amnhî nhîpêx. Ja na pa mê inhmã hprãm nhûm Tirtûm haxwÿja kãm ja prãm. Anê.

⁶ Na pa pre ã mê kot amnhî nhîpêx anhÿr ã mê omu nê mê apê Korîit nhô xwÿnhjê mã ijamaxpêr kurê kumrêx. Hãmri nê Xitre mã mê ajarê. Na pre mê awÿr mô nê mê amã Jerujarê nhô xwÿnhjê jarê. Mê ate mê kãm kàxpore hkwÿ ho apikuprôn h kaxyw. Tã pa pre jam ijamaxpêr nê ra akupÿm mê awÿr mên h mã nê kãm:

—Kwa ma akupÿm Korîit wÿr mô nê mê kãm anê kê mê ra kot amnhî jarênh xà hkôt Jerujarê nhô xwÿnhjê kaxyw kàxpore hkwÿ ho akuprô nê tokyx mê hwÿr kumê. Ra mê kãm Kris kôt mê hkwÿjê hkînh ã amnhî jarênh kênã. E kwa tokyj. Anê.

⁷ Na ka htem amnhī to mex o ri apa. Nē amnhī kaxyw Kris hkôt ajamaxpēr t̄yx nē. Nē ma mē kām Tirtūm kapēr jarēnh mex o ri mē hkôt apa. Nē mē ajamaxpēr mex nē. Nē mē piitā mē ho mex o ri apa. Nē mē amā ixkīnh o ri apa. Jakamā kwa kēr ka mē axāmnhīx mē kēp amrakati xw̄ynh̄jē mā mē akāxpore hkwȳ nhōr o apa. Jao mē amā Tirtūm kīnh t̄yx ā amnhī to amnhīrīt. ⁸ Ixte ā mē amā ja hā karō anh̄r tā hā mē atā ixh̄it̄yx kēt nē. Ām mē kamā axukaprī hkôt mē ate mē kām axāmnhōr o apa kaxyw na pa ā mē amā ixkapēr anē. Masetōn kamā mē pahkw̄yjaja kot amnhī nh̄ip̄exta pyrā nē. ⁹ Ra mē ate Jesus Kris kām mē pajapē hā kot tanhmā amnhī nh̄ip̄ex to hā mar mex. Amnepēm na pre kaxkwa kamā mex kumrēx nē ri pa ho pa nhūm mēmoj piitā kēp ō htā nhūm rer pa nē mē pahw̄yr wr̄y nē mē pakamā kēp amrakati nē ri pa. Hikāxpore hkēt nē ri pa. Tā mēmo kaxyw na pre ā mēmoj mex piitā rer par nē mē pahw̄yr wr̄yk anē? Ām kō mē pahto mex pix kaxyw. Kot mē pahto mex nhūm mē pahte kukwak ri mē paxāmnhīx ri mē pajamakēt̄kati nē mē papa kaxyw na pre ā amnhī nh̄ip̄ex anē. Mē pahte nh̄yrmā urāk nē kaxkwa kamā pamex kumrēx nē ri papa ho papa kaxyw.

¹⁰ E kwa kēr ka mē tokyx kāxpore hkwȳ ho apikuprōnh pa nē Jerujarē nhō xw̄ynh̄jē hw̄yr amē. Mē akumrēxjaja na ka prem ham amgrā hap̄exta kamā ra mē kaxyw ho apikuprōnhja krax. Mē amā mē ho mex prām xāj ham ho hkrax tā no ām kormā hatur xām mēnh nē mē hw̄yr mēnh kēt nē. ¹¹ Kwa mē tokyx ja ho ajap̄ex nā. Na ka prem ate ho anh̄r krax ā akīnh pē kāxpore hkwȳ ho apikuprōnh o apa. Tā kēr ka mē arī akīnh rāhā ho apikuprōnh par jatur xām amē. No mē ri at̄yx tanhmā ajamaxpēr to hkēt nē. R̄y mē ajamaxpēr o:

—Nā kormā. Kot paj nh̄yrmā ixkāxpore rax nē rī kormā mē hw̄yr hkwȳ mē.

Anh̄r o mē ri ajamaxpēr hkēt nē. Mē ate tanhmā akāxpore hkre kamā kute hā omunh xā hkôt mē kām hkwȳ pix gō. ¹² Kēr ka mē axāmnhīx akīnh kām mē kām ho akuprō. Ate amnhī kāxpore pumunh xā hkôt. Ka mē akāxpore rax nē mē kām ho rax nē agō. R̄y mē akāxpore grire nē mē kām ho grire nē agō. Ja na kēt mex. ¹³ No mē ate mē kām ōr par nhūm mē arom mē hikāxpore rax nē ri paja mex kēt. ¹⁴ Nom ra mē akāxpore rūnh jakamā kwa mē amnhī kutā mē kām hkwȳ ho hkryre nē ho akuprō kē mē apyrā nē hikāxpore nē ri pa. Kēr ka mē nh̄yrmā tanhmā amnhī to nē axā nē nhūm akāxpore apē hap̄ex nhūm mē ajarēnh ma nē amnhī kuxwar mē ato ajuta nē mē amā hkwȳ ho akuprō nē mē aw̄yr kumē. Ka mē akāxpore ho axpēn pyrā nē ri apa. ¹⁵ Amnepēm Tirtūm kot kaxkwa rūm Ijaewjē hw̄yr mēō rēnh nhūm mē kot apkati mē amnhīm hkawrā nē ho apkur o pata ā na pre Tirtūm kapēr ā kagā htūmja ā mē harēnh anē nē mē harēnh kot:

Na pre mē hkra sohtō xw̄ynh̄jaja mē apkur xā hkawrā rūnh nē. Nē gōj kām unhw̄y nē kuku nē piitā ho ōhy htu. Nhūm mē hkra grēre xw̄ynh̄jaja haxw̄yja hkwȳ kawrā no ām ho hkryre nē hkawrā. Nē gōj kām unhw̄y nē kuku nē haxw̄yja ho ōhy htu hpa. Na pre htem apkati mē ā amnhī nh̄ip̄ex anh̄r o pa. Anē.

Ja pyrā nē kēr ka mē akāxpore ho axpēn pyrāk o ri ho apa.

Xitre mē hkrāmnhw̄yjē jarēnh

¹⁶ Nē Xitre na pre ixpyrā nē kām mē ato ajuta hprām nē. Na pre inhmā mē atā amnhī jarē pa pre kuma nhūm ja inhmā mex nē pa ixkīnh nē. Nē ijamaxpēr o:

—Nā ām hāmri na Tirtūm tanhmā Xitre hkrā hto nhūm ā hamaxpēr mex anē. Anē.

17 Tã pa ma akupÿm mẽ awÿr mör ä hukja nhũm inhma nẽ hkĩnh nẽ mẽ awÿr nojarët kurê kumrëx. Nom kormã ixte kãm mẽ ajarënh kêt ri nhũm tãm amnhĩ kukamã hamaxpër nẽ mẽ awÿr hkrã. 18 Tã na ra nojarët kaxyw. Kot paj ma hkôt Kris kôt mẽ pahtôjê hõ mẽ kê ma hkôt mõ. Kôt ixte mënň xwÿnhnta na hte mẽ kãm Tirtũm kapër jarënh mex nẽ nhũm htem amnhĩm mex ä harê. 19 Na pre jar Jejus kwÿjaja kot ma ixkôt Jerujarê hwÿr kãxpore hkwy ho mör kaxyw nhũm prem amnhĩm mẽ kurê. Tã koja Xitre mẽ wa mẽ awÿr mõn pøj ka mẽ kãm kãxporeta gõ nhũm man akupÿn o mõ pa wa ri kormã ma Jerujarê hwÿr mẽ kãm o mõ. Mẽ kot hamÿnh nẽ mẽ pamã mẽ hkĩnh ä kot amnhĩ tã mẽ pahpumunh kaxyw. Nẽ Tirtũm mã mex o mex ä harënh kaxyw. 20-21 Nom kãxpore rax nhũm ixte mẽ hwÿr o inhmör nhũm mẽ kot hã ixkamnhĩx pymaj kot paj ma amnhĩ kôt Kris kôt mẽ pahtôta o mõ. Ixte Xitre hkôt mẽ awÿr mënň xwÿnhnta pa ma amnhĩ kôt o mõ. Nom ixãhkĩnh o ixpare hã. Tirtũm kot ja kôt ixpumunh mex tã kot paj ma amnhĩ kôt o mõ.

22 Nẽ ot pa ma Xitreta wa hkôt axte mẽ awÿr ja mẽ. Kêr kê mẽ axkrunëpxi nẽ ma ixkukamã mẽ awÿr mõ. Ixte wa hkôt mënň xwÿnhnta ixte kot amnhĩ nhĩpëx ä omunh mex. Na hte kãm mẽ piitã mẽ ho ajuta ho pa hprãm nẽ. Tã mẽ ajarënh ma nẽ inhmã mẽ ajarënh o:

—Nã koja mẽ Jerujarê nhõ xwÿnhjê mã kãxpore nhõr rax nẽ kãm ga. Mẽ kot amnhĩ to mex kënëã. Anẽ.

Jakamã ra mẽ awÿr hkrã. Tã koja ma Xitre wa hkôt mõ nẽ mẽ ato ajuta ka mẽ tokyx kãxpore ho apikuprõnh pa.

23 Nẽ koja mēhõ tanhmã Xitre hã mẽ akukjêr to ka mẽ kêp ixkrãmnhwÿ mex ä harê. Nẽ kot inhĩkõ hã mẽ ho ajuta mex o pa hã harê. Na pre ra jar Kris kwÿjaja mẽ akaxyw kuta nẽ ma mẽ awÿr kumê. Jakamã koja ma mẽ awÿr mõ nhũm Kris kôt mẽ pahtôjê hõ wa pijakrutja wa ma hkôt mõ. Na hte wa haxwÿja Kris kôt amnhĩ nhĩpëx mex o pa. 24 Koja mẽ awÿr pøj ka mẽ omu nẽ mẽ ho mex nẽ. Nẽ mẽ amã mẽ hkĩnh nẽ. Kê krĩ piitã hkôt Kris kôt mẽ pahkwÿjê piitã mẽ hã mẽ ajarënh ma nẽ axpën mã mẽ amex ä mẽ ajarê. Nẽ mẽ ajarënh o:

—Për ãm hãmri na pre Pawreja mẽ pamã Korìt kãm mẽ pahkwÿjê jarê. Na xep pre Xitre mẽ hkwyta ma mẽ hwÿr mõ nhũm mẽ ho mex rax nẽ. Ra Pawre kot mẽ pamã mẽ harënh xã hkôt. Anẽ.

9

Mẽ kot kãxpore ho pikuprõnh ä mẽ harënh

1-2 Kwa ixkrãmnhwÿjaja. Kot paj Jerujarê nhõ xwÿnhjê kaxyw mẽ atã ixihitÿx kêt nẽ. Ra mẽ amã mẽ ho ajuta hprãm jakamã na pa pre Masetõn kamã Kris kôt mẽ pahkwÿjê mã mẽ ajarënh o:

—Pika pẽ Gres kamã Kris kôt mẽ pahkwÿjaja na prem ham amgrã hapëxta kamã Jerujarê kamã mẽ pahkwÿjê jarënh ma nẽ kãm mẽ ho ajuta hprãm. Anẽ.

Hãmri nhũm mẽ ajarënh ma nẽ mẽ apyrã nẽ kãm tanhmã mẽ ho ajuta hto hprãm. 3-4 Tã ot pa mẽ awÿr Xitre mẽ hõta wa mẽ ho ixpimràatã wa mẽ kumê. Mẽ kot kãxpore hã mẽ akukjêr kaxyw. Kêr pa mytwrÿ hõ hã ma Masetõn nhõ xwÿnh kwÿjê mẽ mẽ awÿr mõ nẽ ra ixte mẽ kãm kãxpore hkwy ho mẽ apikuprõnh ä mẽ ajarënh kôt mẽ ate ho apikuprõnh rax ä mẽ apumu nẽ ixkĩnh nẽ. Nom kot pa mõ nẽ tee ri hapër nẽ te ixte Masetõn nhõ xwÿnhjê mã mẽ ato ixëx pyrã nẽ ixpijaam nẽ. Ka mẽ ajaxwÿja amnhĩ kamã apijaam nẽ. 5 Ä mẽ

pahte amnhī nhīpêx anhÿr pymaj na pa ã mē amā kagàja nhīpêx nē Xitre mā òr nē ma amnhī kukamā mē awÿr mēnh anē. Nē hkòt wa mōr mā xwÿnhnta mē ho ixpimràatāā amnhī kukamā wa mē kumē. Tā kē mē awÿr pōj nē mē amā kagàja gō ka mē kamā harē nē ama nē tokyx kàxpore ho apikuprōnh jatur xàm amē. Kēr pa mē hapu hā mē awÿr mō ka mē ra mē ixkutêp ho apikuprōnh pa nē mē kām agō nē ajamakêtkati nē apa. No pa ixte mē amā mē ate ho apikuprōnh kaxyw mē atā ixihÿtÿx kêt. ⁶ Na htem piitā ã hamaxpēr anhÿr o pa nē hamaxpēr o:

—Kot ka apur rax nē kamā anhō rax nē. Nom kot ka apur grire nē kamā anhō grire.

Anhÿr o hamaxpēr jakamā kēr ka mē apiitā ajamakêtkati nē Jerujarē nhō xwÿnhjē mā kàxpore nhōr mex nē. Kēr ka mē ho apikuprōnh pa nhūm rax nē. Te mēhō ihpur rax nē kamā ò raxta pyrāk. Kē Tirtūm ã mē ate amnhī nhīpêx anhÿr ã mē apumu nē nhÿrmā mē ato mex nē. ⁷ Nom kēr ka mē anhōxÿ kamā mē kām òr kêt nē. Mē pahte pahkīnh kām panhōxÿ hkêt kām mē kēp amrakati xwÿnhjē mā mēmoj nhōr o papaja na Tirtūm kām hprām. ⁸⁻⁹ Koja mē hā mē apumu hāmri nē amnhīm mē amex ã mē ajarēnh rāhā ho pa. Mē kām Tirtūm kīnh xwÿnhjaja na htem àmnhīx ri mē kēp amrakati xwÿnhjē mā mēmoj nhōr o pa. Te Tirtūm kot amnhī nhīpêx pyrāk. Na hte àmnhīx ri mē pamā mēmoj nhōr o pa. Mē pahwÿr na rē nhūm wrÿ. Nhūm mē pamā mē paxàpkur xà nhōr o pa. Nē tanhmā mē pahto pu mē paxà hkêt nē pajamakêtkati nē paxàpēnh o papa. Nē pamex nē ri papa. Panhō rūnh nē ri papa. Jakamā kwa pu mē urāk nē paxàmnhīx ri mē kēp amrakati xwÿnhjē mā mēmoj nhōr o papa.

¹⁰ E pa ixprī hā mē amā ja jarē ka mē inhma. Nà na hte ã Tirtūm mē pamā mē paxàpkur xà nhōr o pa anē. Kot kaj apur kām ahkre nhūm tanhmā amā mēmo hyta nhīpêx to nhūm amā hapōx mex nē amā ò rūnh nē ka anhō rax nē. Nē hkwy ho axàpkur o apa nē axte hkwy hkre. Tā kēr ka mē ã Tirtūm kot mē ato mex anhÿr ã amnhī pumu hāmri nē urāk nē axàmnhīx ri mē kēp amrakati xwÿnhjē mā axàmnhōr pé mē ho mex o ri apa. Nhūm Tirtūm mē hā mē apumu nē mē amā mēmoj nhōr rāhā nē. Ka mē amnhī pyrā nē mē kēp amrakati xwÿnhjē mā hkwy nhōr o apa. ¹¹ Koja Tirtūm mē ato mex rax nē ka mē anhō mēmoj rax nē. Ja o amnhī xwar mē kēp amrakati xwÿnhjē kaxyw kàxpore hkwy jaxwÿ. Kēr pa mē amā hkwy jamÿ nē ma Tirtūm kòt mē pahkwÿjē mā o mō nē mē kām kugō kē mē omu nē hkīnh nē. Nē mē atā Tirtūm mā mex o mex ã harē. ¹² Hāmri nē mē akukwak ri mex nē ri pa. Nē xapēn mā Tirtūm mex o mex ã harēnh o ri pa. ¹³ Koja mē amnhī tā mē apumu nē hkīnh nē. Hāmri nē Tirtūm mā amnhī tā tanhmā mē ajarēnh to nē kām:

—Pa Tirtūm. Nà àm hāmri na pre Korīt kām akòt mē ixkwÿjaja amnhī jarē. Na htem akòt pix mā amnhī nhīpêx mex o ri pa. Jao mē ixpē òxÿ hkêt nē mē inh mā kàxpore hkwy nhōr rax nē. àmnhīx ri hamakêtkati nē mē inh mā hkwy nhōr rax nē. No àm mē papxipix na htem ã mē inhīpêx anhÿr kêt nē. Na htem mē kēp amrakati xwÿnh piitā ã mē hipêx anhÿr o pa. Àm hāmri na ka pre tanhmā mē hkrā hto nhūm mē anhÿ hā ã amnhī nhīpêx anhÿr o pa. Amex o amex Tirtūm. Anē.

¹⁴ Hāmri nē mē ato hwÿr o:

—Pa Tirtūm. Àm hāmri na hte Korīt nhō xwÿnhjaja amnhī pyrā nē mēmoj to mē ixkutā nojarēt o pa. Jakamā aa mē ixte amnhī tā mē inhno ho mē omunh kêt tā mē inh mā mē hkīnh nē. Kwa kēr ka mē ixtā mēmoj to mē kutā anojarēt rāhā ho apa Tirtūm.

Anhÿr o mē ato kuwÿ. ¹⁵ Tîrtûmjaja mex o mex. Nom na hte mē pahto mex pē mē pamā kâxpore nhôr kêt nē. Kra Jejusja na pre mē pamā kugō. Kām mē pajapē ho mē pahwÿr kumē nhûm mē pahwÿr wrÿ nē mē pahpiitā mē pahte amnhî tomnuj pānhā amnhîrer kaxyw mē panē ty. Ja na mex o kot mē pamā kâxpore nhôr jakrenh. Mēhō koja urāk nē ā mē panē htyk anē? Nā amrakati ho amrakati. Ām Jejus pix na pre ā amnhî nhîpêx anē.

10

*Pawre kēp Tîrtûm Karō nhÿ hā kapēr xwÿnh ā harēnh
Epes 6.10-20; Wam Tesarōn 5.8*

¹ E Kris kôt ixkwÿjaja. Nā ixpē Pawre kot paj mē akwÿ kot tanhmā ixto kapēr to xwÿnhjē mā amnhî jarē ka mē apiitā inhma. Nā na hte Kris mē pakamā gryk tokyw anhÿr kêt nē. Na hte mē pahto mex japjē nē. Tā inhmā urāk nē ā mē anhîpêx anhÿr prām nē. No na hte mē akwÿjaja axpēn mā tanhmā ixto kapēr punuj to nē ri axpēn mā:

—Pawre na hte nhÿri krî kamā pa nē mē pamā kagā nhîpêx nē mē pahwÿr kurē nē kamā mēmoj tā mē pamā kapēr kām hihtÿx nē hā mē pamā akir. Tā amnē mē pahwÿr mō hāmri nē te kām mē pahpyma pyrāk o mē pamā kapēr o pa.

Anhÿr o ijarē. ² Nom inhmā mē awÿr inhmōr nē mēmoj tā mē amā ixākjēr prām kêt tā kot paj nhÿrmā mē awÿr mō ka mē tanhmā amnhî tomnuj to ho apa japēr. Pa ja hā mē apumu nē hā mē amā akir kām ga. ³ Na pa htem jar pika ja kamā Tîrtûm kwÿ hkêt xwÿnhjē kaēx ā ri ixpa nom mē urāk nē amnhî krā hkôt tanhmā amnhî nhîpêx to ho ixpa hkêt nē. Nē mē urāk nē amnhî krā hkôt tanhmā ijamaxpēr to ho ixpa hkêt nē. Na pa htem Tîrtûm Karō nhÿ hā āhpumunh xā ho amnhî nhîpêx o ri ixpa. ⁴ Nē Tîrtûm xāhpumunh tÿx xā ho mē kām kapēr jarēnh o ri ixpa. Mē kot mar nē hkôt amnhî nhîpêx kaxyw. Nē āhpumunh tÿx o na pa htem mē kot Tîrtûm kôt amnhî xunhwÿr pymaj mē kēp āmnār xwÿnhjaja tanhmā mē nē mē ho. ⁵ Na htem htÿx ri tanhmā Tîrtûm nē hkwÿjē mā kapēr to ho pa. Amnhî kaxyw hkôt mē hamaxpēr kêt kaxyw tanhmā nē mē kām kapēr to. Na pa htem ja hā mē omu nē Tîrtûm xāhpumunh tÿx xā ho tanhmā mē kām ixkapēr to nhûm mē tee ri inhma nē axte mē kēp āmnār kêt nē. Pa mē kām Tîrtûm kapēr jarē nhûm mē ohtō nē kuma nē Kris kôt amnhî xunhwÿ nē hkôt amnhî nhîpêx o pa. ⁶ Tā mē kajaja kot kaj mē Tîrtûm kôt amnhî nhîpêx mex tā mē atō ra kapēr nhîrōp xa nē tanhmā amnhî tomnuj to. Pa ja hā apumu rÿ hā ajarēnh ma nē hā amā akir. ⁷ Mē ate Tîrtûm kot mē awÿr inhmēnh kêt ā axpēn mā ijarēnh tā kot kaj mē atō ām hāmri apē Kris kwÿ hā amnhî pumu nē ra māānēn pa ixpē hkwy hā ixpumunh kurē kumrēx. Mē apyrā nē ixpē hkwy kēnā. ⁸ Na pa pre ma mē awÿr mō nē tanhmā mē amā amnhî jarēnh to nē mē amā:

—Tîrtûm na pre mē awÿr inhmē pa mō. Ixte ŷ hā mē amā kapēr jarēnh o ri mē akôt ixpa kaxyw. Anē.

Tā pa hte arî ā amnhî jarēnh anhÿr o ri ixpa. Ām hāmri na pre Tîrtûm mē awÿr inhmē pa hte ām hāmri mē amā kapēr jarēnh o ri mē akôt ixpa. Na pa hte Tîrtûm nhÿ hā mē amā ixkapēr nē kapēr o ixēx o amnhî to jarkrar kêt nē. Ixte tanhmā mē atomnuj to ho ri ixpa kaxyw na pre Tîrtûm mē awÿr inhmēnh kêt. Mē amā ixkapēr mex nhûm mē ate inhmar nē Kris kapēr kôt amnhî nhîpêx mex o apa kaxyw na pre mē awÿr inhmē. ⁹ E kwa Kris kôt ixkwÿjaja. Na pa hte mē amā ixpuma kaxyw mē awÿr kagā rēnh kêt nē. Mē ate kamā harēnh

nē tee ri amnhī kukamā ajamaxpēr o amnhī kamā amā ma kaxyw kēt. ¹⁰ Mē akamā mē kām ixkīnh kēt xwýnhjaja na htem ijarēnh o:

—Pawre na hte awry hā pa nē mē pahwýr kagà rēnh nē kamā te kēp pahi ho amnhī nhīpēx pyrā nē mēmoj tā mē pamā kapēr kām hihtýx nē. Tā mē pahwýr pōj hāmri nē kapēr kaxyw nom kapēr kām hihtýx o kapēr kēt nē. Jakamā mo kaxyw kot puj mē hwýr mra nē kapēr ma?

Anhýr o ijarē. ¹¹ Nom ā ixte anhýr kēt. Kwa mē inhma. Kot paj nhýrmā ma mē awýr mō hāmri nē te kagà ja kamā mē amā ixkapēr pyrāk o mē amā ixkapēr nē ixkapēr xihtýx o mē amā ixkapēr kām ga.

¹² Na hte mē akwýjaja kot amnhī to mex o mē ajakrenh ā amnhī to jarkrar o ri pa. No ām amnhī krā hkôt pix mā na htem ā ri amnhī jarēnh anē. Na hte Tirtūm ā mē harēnh anhýr kēt nē. ¹³ Tā inhma mē urāk nē ā amnhī jarēnh anhýr prām kēt. Ām ixte Tirtūm kot tanhmā inhma karō hto xà hkôt amnhī nhīpēx o ixpaja na inhma hprām. Tā mē kajaja mē awýr na pre inhmē. ¹⁴ Ra kot mē awýr inhmēnh jakamā ixkumrēx na pa pre mē awýr mō nē mē akôt ri mē amā tanhmā Kris jarēnh to ho ri ixpa. Tirtūm kām nhýhým ixpa hprām xà pix wýr na inhma ixpa hprām.

¹⁵ No kēt mē kot amnhī krā hkôt htýx ri Tirtūm kapēr jahkre o mē pa xwýnhjaja na htem nhýri krī kamā mē kot Kris kôt amnhī xunhwýr ā mē harēnh ma nē mē hā amnhī to jarkrar o ri pa. Te tām kot mē hwýr mōr nē mē kām ujarēnh nhūm mē kot mē mar xà hkôt Kris kôt amnhī xunhwýr pyrāk. Nē mē hā amnhī to jarkrar o:

—E na pa pre ma mē hwýr mō nē mē kām Tirtūm kapēr jarē nhūm mē inhma nē hkôt amnhī xunhwýr kurē kumrēx. Ixkukwak ri na prem ā amnhī nhīpēx anē. Anē.

Nom ā amnhī nhīpēx anhýrja ā amnhī to hēx. No pa na pa hte ho mē urāk kēt nē. Koa Tirtūm ma nhýri krī hwýr ixkwýjē hō mē nhūm ma hwýr mō nē mē kām Kris kapēr jarē. Hāmri nhūm mē kuma nē Kris kôt amnhī xunhwý. Pa mē harēnh ma nē mē ý hā ixkīnh nē nom pa ixkukwak ri mē kot hkôt amnhī xunhwýr ā amnhī to jarkrar kēt nē. Ixte mē hwýr ixpa nē mē kām ixujarēnhre hā kot pa hkēt mē hā amnhī to jarkrar. Ām Tirtūm kām nhýhým ixpa hprām xà pix wýr na pa hte ixpa nē mē kām kapēr jarē. Jakamā kot kaj mē nhýrmā Kris kôt amnhī nhīpēx mex o ri apa pa ja hā mē apumu nē mē are nē hpānhā ma krī hō hwýr Kris kot mē hwýr inhmēnh xà hō hwýr mō. Ka mē ja hā ixto Tirtūm wýr o apa. ¹⁶ Kot paj mē anhō krī kamā mē piitā mē kām Jejus kapēr jarēnh pa hāmri nē hpānhā ma krī hkwy hkôt ijpōx o ri ixpa nē kamā mē kām harēnh o ri mē hkôt ixpa. Kormā aa mē kot mar kēt kumrēx xwýnhjē mā harēnh o ri mē hkôt ixpa. Na pa hte ā mē hwýr ixpa nē mē kām ixujarēnh anē. Jakamā nhūm mē ja hā ixpumu nē mē kot Tirtūm kapēr mar xwýnhjē pix wýr ixpa hā ijarēnh kēt nē.

¹⁷ Nē Tirtūm kapēr ā kagà htūm kot mēmoj tā mē kot amnhī to jarkrar ā harēnh kot:

Kér ka mē kamjaja amnhī mex ā amnhī to jarkrar kēt nē. Ām Tirtūm pix mā mán mex o mex ā harēnh o ri ho jarkrar o ri apa. Anē.

¹⁸ Kot pu mē Tirtūm noo mā amnhī to mex ā amnhī to jarkrar nē ām amnhī to jarkrar kaprý. Nom kōja Tirtūm tām ja hā mē pahto jarkrar nē ām hāmri mē pahte amnhī to mex xwýnh ā pahto jarkrar.

11

Jejus kot mē hwÿr mē rēnh ā amnhī to hêx xwÿnhjê jarēnh

Matêwre 7.15; Rômân 16.17; Karatas 1.6-9; Korosê 2.8; Sikûn Pêtre 2.1

¹ E kot paj te mē hkrā pipānh xwÿnh kot htÿx ri amnhī jarēnh pyrāk o tanhmā mē amā amnhī to jarkrar to. Kwa mē inhma nē ixkamā agrÿk kêt nē. No mē ixkapēr kumrēx mān ma. ² Inhmā mē akīnh. Te ho Mēpahpām Tirtûm kām mē akīnhhta pyrāk. Te mē apē mēhō kukrit kām my hkīnh nē kot ho mjēn prām xwÿnhhta pyrāk. Kām mēmyjē piitā mē hkīnh kêt ām kām pix kīnh. Ja pyrā nē kēr ka mē amā Kris kīnh o nhām amā mē hkīnh xwÿnhjê jakre. Te ho mēhō ni kot kām myta pix kīnh nē kām ho mjēn prām xwÿnhhta pyrāk. Ja na pa inhmā hprām. ³ Ra mē amā Kris kīnh tÿx o apa nē hkôt amnhī nhîpêx mex o ri apa htā nhûm mē kot amnhī krā hkôt htÿx ri Tirtûm kapēr jahkre ho mē pa xwÿnhjaja tee ri ja hā mē ajarēnh ma nē axpēn mā mē ajarēnh o:

—Kwa nā ja mex kêt. Koja mē Pawre kapēr ma nē ām kuma nhûm ja mex nē. No mē pahkôt mē kot amnhī nhîpêxja na mē pamā mex. Ja na kêt mē pamā mex o mex. Anē.

Hāmri nē ra kot Kris nē tanhmā mē amā hêx to kaxyw. Te amnepē mā kagā kot mē panā kot wa pê Ewa mā hêx nhûm kot mar nē hkôt amnhī nhîpêxta pyrāk. ⁴ Na pa pre ra mē awÿr mō nē mē amā tanhmā Jejus jarēnh to. Nē tanhmā mē amā Tirtûm Karō jarēnh to. Nē tanhmā wa kot mē pahto hkra hto hā mē amā wa harē ka prem inhma nē mar tÿx nē. Tā nhûm ra mē kot htÿx ri Tirtûm kapēr jahkre xwÿnhjaja ixpānhā mē awÿr mō nē Jejus kapēr kwÿm ri tanhmā mē amā ujarēnh to nē mē amā harēnh o hêx rāhā ho pa. Nē Tirtûm Karōja nhûm mē amā tanhmā ho hêx to. Nē ixte mē amā Tirtûm kapēr jarēnh kwÿm ri ixpānhā tanhmā mē amā harēnh to ho pa. Na ka prem mē ama nē ām hāmri harēnh ā hkamnhîx. Kwa kēr ka mē ri mē ujarēnh piitā mar nē hkôt amnhī nhîpêx kêt nē. Mē kot Jejus jarēnh tā no ām katāt kôt harēnh kêt nē. Ām ri ho hêx o pa. Ka htem ama nē ām hāmri harēnh ā hkamnhîx nē mē amā mē mar prām nē. Mē kot mē amā harēnh o hêx o pa htā ka mē ama nē ra mē hkôt amnhī nhîpêx kaxyw. Kwa mē ri ā amnhī nhîpêx anhÿr hkêt nē. ⁵ Kris kot mē awÿr mē rēnh ā mē kot amnhī jarēnh tā amnhī to hêx. Ka prem ama nē ām hāmri mē kot mē amā harēnh ā mē hkamnhîx. Nom na pre Krisja mē awÿr mē rēnh kêt nē. Kêt pa na pre mē awÿr inhmē. ⁶ Mē hkīnhā ixkapēr krór pyrāk tā no ām ixte Tirtûm kapēr mar tÿx. Nē kot amnhī nhîpêxja na ixte omunh par. Ra mē ate ja hā ixpumunh mex.

⁷ Na pa pre mē akôt ri mē amā Jejus jarēnh o ri ixpa no ām hpānhā mēmoj tā mē awÿr o ri ixpa hkêt nē. Xā amarî ixte mē amā harēnh nē hpānhā mēmoj tā mē awÿr kêtja mē apē omnuj? ⁸⁻⁹ Kormā ixte mē amā Tirtûm kapēr jarēnh o ri ixpata ā na pa pre hte tōhā kâxpore ho presija no ām aa hā mē awÿr kêt nē. Jar Masetôn kamā Kris kôt mē pahkwÿjaja na prem ixwÿr hkwy rēnh o pa pa ho ixâpkur xā japrôr o ri mē akôt ixpa. Mē kumā ixte Tirtûm kapēr jarēnh o ri ixpa hkêt tā pa hte mē kukwak ri mē akôt ho ixâpkur o ri ixpa. Tā kot paj arî ā mē akôt ixpa nē ā amnhī nhîpêx anē nē mēmoj tā mē awÿr o ri ixpa hkêt nē. ¹⁰ Ja inhmā mex. Jakamā kot paj amarî mē anhō pika pê Gres kām ā mē amā Tirtûm kapēr jarēnh o ixpa anē nē mēmoj tā mē awÿr kêt nē. Ām hāmri na pa ā mē amā amnhī jarēnh anē. Kris pyrā nē ixêx kêt kênā. ¹¹ Xā we inhmā mē akīnh kêt kôt na pa hte ā mē amā Tirtûm kapēr jarēnh pānhā mē awÿr kêt anē? Nā inhmā mē akīnh jakamā na pa hte kapēr jarēnh pānhā mē awÿr o ri ixpa hkêt nē. Inhmā mē akīnh tÿx kênā. Tirtûm kot ja hā ixpumunh mex.

¹² No mê kot amnhî krâ hkôt htÿx ri Tirtûm kapêr jahkre xwÿnhjaja na htem mê ajahkre hpânâ kâxpore hâ mê awÿr pix o pa. Nê mê amâ tanhmâ amnhî to hêx to nê mê amâ:

—Nâ mê ixte Pawre kot amnhî nhîpêx pyrâk. Mê ixte amnhî nhîpêxja kot axpên pyrâk.

Anhÿr o mê amâ amnhî to hêx. Nom ixte ho mê urâk kêt kumrêx. Mê ixte amnhî nhîpêx kot axpên pyrâk ronhÿx pa mê urâk nê kâxpore hâ mê awÿr o ri ixpa. Nom ixte â amnhî nhîpêx anhÿr kêt. Kot paj aa â amnhî nhîpêx anhÿr o ixpa hkêt nê. ¹³ Â mê kot amnhî nhîpêx anhÿr xwÿnhjaja na pre Tirtûm mê awÿr mê rênh kêt nê. Mê kot Kris nhÿ hâ mê ahkre xwÿnh â amnhî jarênh tâ âm amnhî to hêx. ¹⁴ Mê ô pahi Satanastija te mêmoj mex jarênh pyrâk tâ no âm na hte mê pano kupyr pê mê pamâ tanhmâ hêx to ho mê pahkôt pa. Te kot mêmoj mex â âm hâmri kot harênh pyrâk tâ no âm ho hêx. ¹⁵ Tâ hkôt mê kot amnhî nhîpêx xwÿnhjaja na htem urâk nê te tãm mê kot amnhî nhîpêx xwÿnhjê pyra nê mê pahwÿr mra nê tanhmâ mê pamâ hêx to. Satanasti pyra nê mê pano kupyr kaxyw tanhmâ mê pamâ hêx to. Nom koja Tirtûm nhÿrmâ mê pahatâ mê homnuj tÿx kumrêx nhûm mê rî amnhî pumu.

Tanhmâ mê kot Kris â Pawre nhîpêx to â mê harênh

Atre 9.23-25

¹⁶ E kot paj axte te ixtÿx ri amnhî to jarkrar pyrâk o mê amâ tanhmâ amnhî jarênh to ka mê inhma nê ixkamâ agryk kêt nê. ¹⁷ Pahihti Kris nhÿ hâ kot paj mê amâ amnhî jarênh kêt âm amnhî krâ hkôt kot paj mê amâ amnhî jarê.

¹⁸ Na htem ohtô nê mê ate mê hâ apijaam kaxyw tanhmâ mê amâ amnhî to jarkrar to ho pa. Tâ kot paj mê urâk nê amnhî krâ hkôt mê amâ amnhî to jarkrar ka mê inhma. ¹⁹ Mê ate amnhî xâhpumunh tÿx â amnhî jarênh tâ ka htem htÿx ri mê kot amnhî to jarkrar o ri mê pa xwÿnhjê kapêr ma nê mê hkôt ajamaxpêr nê mê hkôt amnhî nhîpêx kurê kumrêx. ²⁰ Mê kot Kris nhÿ hâ mê ahkre hâ amnhî to hêx xwÿnhjaja mê pakurum mê kot amnhî to rax xwÿnh â amnhî jarênh jakamâ na htem mêmoj tâ mê amâ karô ho pa.

Nê mê kâm hprâm xâ hkôt nhÿhÿm mê arê nê nhÿhÿm mê arê.

Nê mê apa pix kukwak ri apkur o pa.

Nê mêmoj tâ mê ajakwap mê atak o pa.

Â mê kot mê anhîpêx anhÿr tâ ka te mê ate atûm kêt pyra nê atÿx ri mê kapêr ma nê mê hkôt amnhî nhîpêx o ri apa. ²¹ Tâ ixte mê urâk nê â mê anhîpêx anhÿr kêt tâ kot paj mê urâk nê mê amâ tanhmâ amnhî to jarkrar to ka mê inhmar japêr. Te ixtÿx ri amnhî jarênh pyrâk o kot paj mê amâ amnhî jarê nom âm hâmri mê amâ amnhî jarê. ²² Mê kot Jesus nhÿ hâ mê ahkre hâ amnhî to mê hêx xwÿnhjaja na htem mê amâ tanhmâ amnhî to jarkrar to nê mê amâ:

—E mê inhma. Mê ixpê Ijaew na pa mê. Mê arom mê ixpê finat Apraaw kanrêhâ htâmnhwÿ jakamâ kwa mê ixkapêr ma nê mê ixkôt amnhî nhîpêx. Anê.

Nom ijaxwÿja ixpê Ijaew tâ pa hte mê urâk nê ja hâ amnhî to jarkrar hkêt nê. ²³ Nê mê kot Kris kapêr jarênh mex o pa hâ amnhî jarênh tâ pa na pa hte harênh mex o mê hakre. Te ixkrâ pipânh pyrâk o â mê amâ amnhî jarênh anhÿr tââ.

E pa mê amâ tanhmâ amnhî jarênh to ka mê inhma. Nâ na pre Kris â mê kâm ixkurê xwÿnhjaja mê kot amnhî to jarkrar xwÿnhjê hkînhâ Kris â ixpynênh nê ijagjênh xohtô nê. Nê mê hkînhâ tôhâ ixtak rûnh kumrêx. Pa mê hkînhâ xatâ mê kot tanhmâ ixto hâ kritpêm ronhÿx pa pre ty. ²⁴ Na pre

Ijaew krähtümjaja Kris ä ixkatut kām ixtak rünh nē. Nē ixtak xàja pī hā mry kà janhôr o ixtak. Nē ixtak kaxyw nē ixtak xà jatur xà kamā kàx xwa gixre janhô nē ho ixtak rünh o ixkatut kà rè. Ixtak o 39 hāmri nē rī kormā mē kot ixpīr pymaj inhmā ure. Na pre htem nhÿri ixpynē nē ä inhîpêx anē. Na prem ä inhîpêx anhÿr o 5 wēs.

²⁵ Nē na prem ra mē kot ixpīr kaxyw nē kēn rünh kwÿ jamÿ nē ho ixtak o kuhê. Nē Rôm nhô xwÿnhjaja haxwÿja pī ho ixtak rax kumrêx. Ä inhîpêx anhÿr o axkrunêpxi.

Nē na pa pre hte gô xujanâr kām nhÿhÿm Jejus jarênh o ri ixpa kaxyw pâr kām mē hwÿr ixpa nhÿm pârja tanhmā amnhî to nē agjê. Kritpê m nhÿx pre hte gôja ixpī. Pa pre ä amnhî nhîpêx anhÿr o axkrut. Tā arîgro hō hā kē axte pâr ô mā axà nē ma axte krî hō hwÿr mō. Nhÿm kē pârta axte mē ixpê axà nhÿm gôja nhÿx kē axte ixpī. Pa pâr jakà hā kumÿ nē hā ijê t o amÿkry. Nē ho apkati. Tā nhÿm nhÿhÿnh pâr ôja mō nhÿm kamā mē môr xwÿnhjaja ixpumu nē ixwÿr pâr o mō nē amnhî wÿr ixto api nē ma amnhî kôt ixto mō.

²⁶ Na pa pre amnhî xà htÿx kamā ijamak o ri ä mē kām Kris kapêr jarênh o ri ixpa anē. Kironhÿx pre gô tàmja ixpī. Nhÿm mē àhkîn nhî xwÿnhjaja kironhÿx prem määnen ixpī. Nē Ijaew nē Ijaew kêt xwÿnhjaja tōhā tanhmā ixtomnuj to ho pa. Pa pre krî hkwy hwÿr ixpa rÿ kapôt ä ixpa nhÿm mē ixtā amÿnê. Pa pre gô xujanâr kām pâr kām ri ixpa nē nhÿx kamā ty. Nhÿm mē kêp Kris kwÿ hā amnhî to hêx xwÿnhjaja haxwÿja tanhmā ixtomnuj to pa mē ý hā amnhî xà htÿx kamā ijamak o ri ixpa. Ä na prem Kris ä inhîpêx anhÿr o pa.

²⁷ Nē na pa Jejus kapêr jarênh o ri ixpa kurê ixkēngrà nē ri ixpa. Nē tōhā inhôt kêt ä ixtā apkati. Nē tōhā inhmā prām nē inhmā kôr nē ri ixpa. Nē tōhā ixê mex kêt nē inhmā kry nē ri ixpa. ²⁸ Na pa hte Kris kapêr jarênh o ri ixpa pē ä amnhî nhîpêx anē. Nom ja pix kêt. Na pa hte krî piitā hkôt Kris kwÿjê hkukamā tee ri ijamaxpêr nē ijamaxpêr o:

—Hêxta waa nē. Mân mē arî Kris kôt amnhî nhîpêx mex japêr rÿ ko. Mân mē ra kapêr kwÿm ri tanhmā amnhî tomnuj to rÿ ra hkaga.

Anhÿr o ijamaxpêr o ixpa.

²⁹ Nē na hte mēhō Tirtüm kapêr nhîrôp xa nē tanhmā amnhî tomnuj to pa tee ri omu nē ixkaprî htÿx kumrêx. Koja mēhō tanhmā Tirtüm nē mēhō mā kapêr to nhÿm kuma nē Tirtüm kôt amnhî nhîpêx kêt pa tee ri ja hā omu nē nē kêp àmnâr xwÿnhnta kamā inhgryk tÿx kumrêx.

³⁰ E Kris kôt ixkwÿjjaja. Na pa ä mē amā amnhî jarênh anē. Te ixte amnhî to ijarkrar pyrâk no àm mē ate ixirerek xwÿnh ä ixpumunh pix kaxyw. ³¹ Àm hāmri na pa ä mē amā amnhî jarênh anē. Ixêx kêt. Pahihti Jejus nhîpêêxâ Tirtüm kôt ja hā ixpumunh mex. Tirtümja mex o mex. Koja mex o mex tùm nē pa rāhā ho pa. Tām kot ixirerek ä ixpumunh mex. ³² Kormā krî pē Tamas kām ixpare ri na pre mē ô pahi Arêtja mē kām ixtā amÿnê nhÿm pôristijaja krî hpu hā kahê xà nhô hakwakre piitā kām hipôk pa nē ixkām hamak o kuhê. Pa tee inhmā nhÿhÿnh ixkator nē ma mē umaj ixprôt nē ixtêm prām nē ixirerek xwÿnh ä amnhî pumunh kurê kumrêx. ³³ Tā nhÿm Kris kôt mē pahkwÿjjaja hamaxpêr nē kawâ rax mÿ nē o tē nē inhmā àm pa hwÿr axà nē kamā nhÿ. Hāmri nhÿm mē pâr nhôr o kahê nhîrô pē ixto wÿr pa ixkato nē mē kêp amÿxu nē amnhîm ixprî nē ma tē nē mē kêp akunok. Ä na pre Tirtüm ixirerek xwÿnh ä inhmā ixto amnhîrît anē.

12

Tirtūm kot Pawre mā mẽmoj to amnhĩrĩt ā harēnh

¹ E Kris kōt ixkwýjaja. Nà inhmā amnhĩ to jarkrar hprām kêt tā kot paj tanhmā mẽ amā amnhĩ jarēnh to ka mẽ inhma nē hā ixtā apijaam japēr. Na hte Tirtūm tōhā inhōt kām ixkarō mā tanhmā kapēr to. ²⁻³ Amnepē mẽ amgrā hō hā na pre tanhmā ixkrā hto nē ō krĩ hwýr amnhĩ wýr ixto api. Na pre ra hā amgrā pē 14 ān. Apu inhĩ rāhā ixto api rý apu ām ixkarō pix o api rý ko. Ixte ja hā amnhĩ pumunh mex kêt. Tirtūm pix kot ja hā ixpumunh. ⁴ Na pre ixto api pa pōj nē ō krĩ kamā axtem tanhmā mẽ kapēr to hā mẽ kuma. Na prem mẽmoj mex kumrēx jarē pa kuma nē ixkĩnh nē. Nē inhmā mar prām nē. Hāmri nē ijamaxpēr o:

—Hêxta waa nē. Mẽmoj jarēnhja mex kumrēx. Nà kot paj akupým wrý nē ixkwýjē mẽ harē kē mẽ ixpyrā nē kuma. Nà kot paj anē.

Anhýr tā nhūm Tirtūm Karō ja nē ixkurē nē inhmā:

—Nà kēr ka mẽ kām ja jarēnh kêt nē. Ām kapxipix kot kaj ama nē ri hā apa.

⁵ Anhýr jakamā pa pre paxipix mẽ arom mẽmojja pumu nē kuma nom kot paj ri hā amnhĩ to jarkrar kêt nē. Kot paj ām Jejus pix tanhmā harēnh to ho ri ixpa. Jao ixrom mex o mex ā harē. Nē ixrom hihtýx o hihtýx nē āhpumunh o āhpumunh ā harēnh o ri ixpa.

⁶ Nē ixte Tirtūm nhō krĩ hwýr ixàpirja ām hāmri ixte hā amnhĩ jarēnh tā kot paj ja hā amnhĩ to jarkrar o ri ixpa hkêt nē. Mē ate ja hā inhmar kōt inhmex ā ijarēnhja na inhmā hprām kêt. Nom kot ka mẽ ixte tām amnhĩ nhĩpēx ā ixpumu nē tām ixkapēr ā inhma hāmri nē rĩ kormā inhmā inhmex ā ijarē. Ā mẽ ate amnhĩ nhĩpēx anhýrja na inhmā hprām. ⁷ Na pre Tirtūm inhōt kām inhmā mẽmoj mex kwý jarēnh rax nē. Hāmri nē hpānhā inhmā:

—E na ka akwýjē rom inhō krĩ hwýr api nē mẽ kurom mẽmoj mex pumunh rax nē. Tā ate ja hā amnhĩ pumunh nē ma mẽ kām hā amnhĩ to jarkrar o ri apa pymaj kot paj Satanastĩ mẽ anē nhūm inhma nē tanhmā atomnuj to ho pa. Nom ijamaxpēr xā hkōt koja ā anhĩpēx anē.

Anhýr jakamā nhūm tanhmā inhĩpēx to pa inhmex kêt nē ixpa. Te mrōnhĩ rax nhýhýnh kot ixkamnhwýr nhūm inhmā tee ri hkaxàr prām kapry nē ý hā ho inhýjēx rāhā nē ixpaja pyrāk. ⁸ Tā pa tee ri ja hā amnhĩ pumu nē amnhĩ to Jejus wý nē kām:

—Kwa Pahihti. Na pa ra mẽmojta nhý hā ixpunuj nē ixirerek nē ixpa. Kwa inhnē ata pa akupým ixihitýx nē ijamakētkati nē ri ixpa nà?

Anhýr o amnhĩ to hwýr o axkrunēpxi. ⁹ Hāmri nhūm inhmā:

—Nà kot paj anē hyr kêt nē. Kot paj ām akutā inhnojārēt rāhā ho ri akōt ixpa. Ka axirerek nē apa htā ixihitýx xwýnh ā ixpumunh kōt ixkamnār rom tanhmā inhý hā amnhĩ nhĩpēx to ho ri apa. Anē.

Ā inhmā kapēr anhýr jakamā na pa ixpunuj nē ri inhĩrot nē ixpa htā ixrom hihtýx xwýnhata nhý hā ixkĩnh nē ixpa. Nē kurom ixirerek xwýnh pix ā amnhĩ to jarkrar o ri ixpa. ¹⁰ Jakamā kot paj Kris ā ixpunuj nē ri ixpa htā ixkĩnh nē ijamakētkati nē ri ixpa. Kwār mẽ māmri hā tanhmā ixto kapēr to nē tanhmā hā inhĩpēx to pa amnhĩ xā htýx kamā ijamak o ri ixpa. Nē ixpē amrakati nē inhĩrot nē ri ixpa htā Kris nhý hā tanhmā kām amnhĩ nhĩpēx mex to rāhā ho ri ixpa.

Pawre kot tee ri mẽ hkukamā hamaxpēr ā harēnh

11 Tã mēmo kaxyw na pa ã mē amã amnhĩ jarēnh anē? Nã mē ate ixtã apijaam kêt jakamã na pa ã mē amã amnhĩ jarēnh anē. Mē kēp Kris nhỹ hã mē ajahkre xwýnh ã amnhĩ to hēx xwýnhjaja na ka htem ixrom kot amnhĩ to rũnh xwýnh ã mē harē nē mē hã apijaam o ri apa. Nom ixte amnhĩ to grire xwýnh tã mē kot amnhĩ to rũnh o ijakrenh kêt. 12 Na pa pre mē akamã ri ixpa nē Tirtũm nhỹ hã aa mē ate mēmoj pumunh kêt kwý ho anhỹr xax o ri mē akôt ixpa. Nē ý hã akupým mē à xwýnhjê ho mex. Nē mē nohkre xwýnhjê no ho mex. Na pa pre hte ã mē amã mēmoj nhĩpêx anhỹr o ri mē akôt ixpa. Amnhĩ xã htýx kamã ijamak o ri ixpa htã Tirtũm xihkýx xã ho amnhĩ to htýx nē ã mē amã mēmoj to anhỹr o ri mē akôt ixpa. Mē ate omunh nē Tirtũm àhpumunh týx ã omunh kurê kumrêx kaxyw. Nē ixpê Kris nhỹ hã mē ajahkre hã ixpumunh kurê kumrêx kaxyw na pa pre ã mē amã amnhĩ nhĩpêx anhỹr o ri mē akôt ixpa. 13 Xãn pa pre nhãm krĩ hkwy kamã Kris kôt mē pahkwýjê ho mex tã mē kajaja tanhmã mē ato mex to hkêt nē? Nã na pa pre hte mē anhĩpêx o axpēn pyrãk. ãm mēmoj pixire na pa pre mē urãk nē mē awýr kêt nē. Nhãm krĩ hkwy kamã ixpata ã na pa pre mēmoj to presija nhũm prem inhmã òr o pa. Tã pa pre mē mō nē mē akôt ixpa nē mēmoj to presija htã hã mē awýr kêt nē. Kwa mē ã ixte amnhĩ jarēnh anhỹrja ma nē ixkamã agryk kêt nē.

14 Tã ot pa ra akupým mē awýr inhnojarêr kaxyw. Na pa pre mē awýr inhmōr o axkrut. Tã ra axte mē awýr inhnojarêr kaxyw. Kot paj mē awýr mō nē mē akôt ixpa nom te wam ixtēmta pyrã nē mēmoj tã ri mē awýr kêt nē. ãm mē amã ixkĩnh pix na inhmã hprãm. Mē apiitã te mē apê ixkra pyrãk. Na hte mē hkrarejaja mē katorxã nē mē hipêêxã mã ujaaprōr o pa hkêt nē. Mē hipêêxã nē mē katorxã na hte hkrare mã kot mēmoj to presija xã hkôt kãm haprōr o pa nom mēmoj tã hwýr kêt nē. Ja pyrã nē kot paj mē apê ixkra pyrãk ã mēmoj tã mē awýr kêt nē. 15 Kot kaj mē mēmoj to presija japêr nē inhmã harē pa ixãmnhĩx ixkĩnh kãm mē amã ixkãxpore piitã òr par pyrãk o amnhĩ nhĩpêx. Nē mē amã tanhmã amnhĩ nhĩpêx to ho ixpa rãhã ixtýkja na inhmã hprãm. Inhmã mē akĩnh týx kumrêx tã mē kajaja mē amã ixkĩnhja mē atã hkwy jêt kêt kumrêx. 16 Ixte amnhĩ mã mēmoj tã mē awýr kêt tã na hte mē akwýjaja ixêx rom ixte nhãm mē kēp amrakati xwýnhjê mã kãxpore hã mē awýr o ixpa hã ixkamnhĩx.

17 Kwa tanhmã na pa pre ri mē ano kupyw to? Xã ja kaxyw na pa pre mē awýr ixkrãmnhwýta wa kumê? 18 Na pa pre Xitre hã ixihkýx nē mē awýr kumê. Nē Kris kôt mē pahtōja pa Xitre hkôt kumê nhũm wa ma mē awýr mō. Tã xã na pa pre Xitre tanhmã mē ano kupyw to? Nã na pa pre ã mē anhĩpêx anhỹr kêt nē. Tã wa ixte amnhĩ nhĩpêx nē wa ijamaxpêrja kot axpēn pyrãk. Nã na pa hte urãk nē mē ano kupyw o ri ixpa hkêt nē. 19 Mãn ka mē axpēn mã mē ijarēnh o: —Nã Pawre mē hkwyjaja mē kãm amnhĩ to rũnh xwýnh prãm jakamã na ã Pawre kagãja kamã mē pamã amnhĩ tã àprãr anē.

Anhỹr o mē ijarēnh japêr nom mē inhmã amnhĩ tã tanhmã ixàprãr to hprãm kêt. ãm mē inhmã mē akĩnh nē mē ato mex prãm jakamã na pa htem tanhmã mē amã amnhĩ nhĩpêx to ho ri ixpa. Na pa Tirtũm noo mã Kris nhỹ hã ã mē amã mē amnhĩ jarēnh anē.

20 Tã kot paj jatã ma mē awýr mō ka mē akwýjaja tanhmã amnhĩ tomnuj to japêr.

Mēmoj tã axpēn mã axàkjêr o apa.

Rý mēmoj tã axpēn kãm agryk.

Rý axpēn kãm agryk tokyx anhỹr o apa.

Rỳ axpên pê anhõxỳ.

Rỳ axpên to akapêr punuj o apa.

Rỳ mê ajakwa kamã nhãm mê hixi ho rêr o ri apa.

Rỳ amnhĩ to rûnh prãm xàj anhmã amnhĩ nhĩpêx to ho apa.

Kot kaj mê ã amnhĩ nhĩpêx anhÿr o ri apa pa ja hã mê apumu nê ixkaprĩ htỳx kumrêx ka mê tee ri amnhĩ tâ ixpumu. ²¹ Xà kot paj mê awÿr mō nê mê apumu ka mê akwÿjaja arĩ mê aprō kuhpa hã nhãm mēnijê ho amnhĩkati ho ri apa? Rỳ arĩ tanhmã ajamaxpêr punuj to ho apa? Rỳ atỳx ri apijaàm kêt o apa? Kot ka mê arĩ ã amnhĩ nhĩpêx anê pa ja hã mê apumu nê ixkaprĩ xàj inhmÿr rax nê. Nê mê anhÿ hã Tirtûm noo mã ixpijaàm tỳx kumrêx.

13

Pawre kot tanhmã amnhĩ kukamã mê kãm karō hto

¹ Tirtûm kapêr ã kagã htûm tanhmã mê kot amnhĩ tomnuj to xwÿnhjê jarênh kot:

Koja mēhõ tanhmã amnhĩ tomnuj to nhũm mēhõ pyxi nê ã amnhĩ nhĩpêx anhÿr ã omu nê awÿr tē nē amã harē ka mê ama nē ãm ama nē hkôt ajamaxpêr kêt nê. No koja mēmojaja axkrut rỳ axkrunêpxi nê hã omu nê awÿr mra nê axpên kôt amã harē ka mê ama nê mê hkôt ajamaxpêr kurê kumrêx. Anê.

Tã ra mê awÿr inhmōr o axkrut tâ kot paj akupÿm mê awÿr mō nê mê apumu. ² Hapu hã mê awÿr inhmōrta ã na pa pre mê akwÿ kot tanhmã amnhĩ tomnuj to hã mê omu nê hã mê kãm akir nê mê kãm:

—Kot kaj mê amnhĩ tomnuj kaga nê tãm amnhĩ nhĩpêx kêt kot paj nhÿrmã akupÿm mê awÿr mō nê ã mê ate amnhĩ nhĩpêx anhÿr ã mê apumu nê hã mê atomnuj tỳx kumrêx kãm ga. Anê.

Jakamã kot paj mê ma mê awÿr mō nhũm mê akwÿjaja arĩ mê ate amnhĩ tomnuj o apa hã inhmã mê ajarē pa mê atã mê kuma nê tanhmã mê ato htỳx nê. ³ Kot kaj mê ja hã ixpumu nê aprĩ hã ixte Kris nhÿ hã ixkapêr xwÿnh ã ixpumunh tỳx kurê kumrêx. Kris ixrom hihtỳx o hihtỳx. Na pre ra mê ate amnhĩ tomnuj o apata mÿrapê tanhmã mê anhĩpêx to. Tã kot kaj mê kormã ã ate amnhĩ nhĩpêx anhÿrja kaga hkêt hã koja tee ri ja hã mê apumu nê mê anhĩpêx kati nê. ⁴ Amnepêm na pre Krisja te hihtỳx kêt pyrà nê ãm arĩ mê kãm xa nhũm mê unê nê pĩ kahpa ã kunhō nê kupĩ. Tã nhũm Tirtûmja àhpumunh tỳx o akupÿm ho htĩr nhũm akupÿm htĩr o htĩr nê Tirtûm nhÿ hã hihtỳx o hihtỳx ã amnhĩ to amnhĩrĩt. Ja pyrà nê wam mê awÿr inhmōrta ã na pa pre hte mê akamã te Kris kormã htyk kêt ri hihtỳx kēeta pyrà nê mê akôt ixpa. Tã kot paj ma akupÿm mê awÿr mō hãmri nê te Kris ra akupÿm htĩr nê hihtỳx o hihtỳxta pyrà nê Tirtûm xihtỳx xã ho tanhmã mê kot amnhĩ tomnuj xwÿnhjê nhĩpêx to. Hãmri nhũm mê amnhĩ tâ ixpumu nê Tirtûm nhÿ hã ijamaxpêr tỳx ã ixpumunh kurê kumrêx.

⁵ Kwa mê aprĩ hã tanhmã mê ate amnhĩ nhĩpêx to hã amnhĩ pumu. Xãn ka htem ãm hãmri amnhĩ kaxyw Jejus Kris kôt ajamaxpêr o ri apa nã? Kot kaj mê apê hkwy hã koja mê akaxwÿnh kãm mê akamã hkrĩ rãhã nê. Nom koja mê akaxwÿnh kãm mê akamã hkrĩ hkêt ka mê ãm apê hkwy hã amnhĩ jarênh kaprÿ. ⁶ No pa na ixte ja hã amnhĩ pumunh mex. Ixpê Jejus kwÿ na pa. Ra ixkamã hkrĩ nê ixkôt pa ho pa jakamã ixpê hkwy na pa. Tã mê ate ja hã ixpumunh mexja na inhmã hprãm. Na pa hte ixpê Jejus kwÿ hã amnhĩ jarênh kaprÿ hkêt nê.

⁷ Nê na pa hte mê ato tanhmã Tîrtûm wÿr to ho ri ixpa nê mê ato hwÿr o:

—Pa Tîrtûm. Kwa tanhmã Korîṭ nhõ xwÿnhjê hkrã hto kê mê tanhmã amnhî tomnuj to ho pa hkêt nê.

Anhÿr o mê ato kuwÿ. Mëmo kaxyw na pa hte ã mê ato hwÿr anê? Ixte mê ajahkre mex ã amnhî to amnhîrit kaxyw kêt. ãm mê ate amnhî to mex rãhã ho ri apa kaxyw. Kot kaj mê ã amnhî nhîpêx anhÿr o ri apa hãmri nhùm axpên mëhõ më awÿr môn pøj nê tanhmã më amã më ijarênh to nê më ijarênh o:

—Kwa Pawre më hkwÿjaja na htem Tîrtûm kapêr kwÿm ri Korîṭ nhõ xwÿnhjê jahkre ho pa.

Anhÿr tâ pa amnhî tâ më kuma nê ãm më kuma. ⁸ Na pa hte Tîrtûm kapêr kutã amnhî xunhwÿr kêt nê. Na pa hte ãm më ate hkôt amnhî nhîpêx o ri apa hã më amã karõ kamã ixihÿtÿx rãhã ho ri më akôt ixpa. ⁹ Jakamã kot kaj mê hkôt amnhî nhîpêx mex o apa pa ja hã më apumu nê ixkînh nê. Më kot axpên mã ixirerek ã ijarênh o pa htãã. ã më ate amnhî nhîpêx anhÿr o apa kaxyw na pa hte mê ato Tîrtûm wÿr o ri ixpa nê kãm:

—Pa Tîrtûm. Kwa tanhmã Korîṭ nhõ xwÿnhjê hkrã hto kê më kot amnhî tomnuj kaga hpa nê hpãnhã akapêr kôt pix mã mãn amnhî nhîpêx rãhã nê. Anê.

¹⁰ Tã pa kormã më awÿr inhmõr xwÿj ri ã amnhî kukamã kagã nhîpêx nê mënh anê. Më ate kamã harênh nê mar nê tokyx akupÿm tãm amnhî nhîpêx kaxyw. Kot pa më awÿr mõ nê Pahihti nhÿ hã më ate amnhî tomnuj ã më amã akir. Nom inhmã ã mëmoj tâ më amã ixãkjêr anhÿr prãm kêt. ãm ÿ hã kapêr o më ajahkre mex nhùm më ate inhmar nê hkôt amnhî nhîpêx rãhã ho apaja na inhmã hprãm.

¹¹ E Kris kôt ixkwÿjaja. ãm ja pix. Kwa kêr ka më ixkapêr mar tÿx nê hkôt amnhî nhîpêx mex nê. Nê Tîrtûm kôt pix mã ri tanhmã amnhî nhîpêx to ho apa rãhã ho apa. Nê tãm ri amnhî nhîpêx. Nê axpên kôt ajamakêtkati nê akînh nê axãmnhîx ri apa. Kot kaj mê ã amnhî nhîpêx anhÿr o apa nhùm Tîrtûm më akôt pa ho pa. Kãm më pajapê htÿx kumrêx. Kêp më pamã më pahkînh nê më pajamakêtkati jagjênh xwÿnh.

¹²⁻¹⁴ Nê ota jar Kris kôt më pahkwÿjaja pa më ixpimràãtã më awÿr ixpêr më. Më ixpiitã më inhmã më akînh tÿx jakamã na pa më awÿr ixpêr më.

Nê kê Pahihti Jesus Kris mëmoj to më akutã nojarêṭ rãhã ho pa. Nhùm Tîrtûm arî kãm më ajapê rãhã ho pa. Nhùm Karõ tanhmã më akrã hto ka më axpên to mex pix kukamã mãn ajamaxpêr o apa.

Tã e ixkwÿjaja. ãm ja pix. Ixpê Pawre na pa më awÿr kagãja nhîpêx nê ã mënh anê.

Karatas

Pawre kot Karatas kamã Jesus kôt hkwyjê hwÿr kagà nê mēnh

Pawre na pre kagàja nhîpêx nê pika pê Karatas kamã Kris kwÿjê hwÿr kumê. Na pre ra Ijaew kwÿjaja mē hwÿr mra nê Tirtûm kapêr kwÿm ri mē ahkre ho pa nê mē kãm:

—Kot kaj mē amnhî kaxyw Jejus Kris kôt ajamaxpêr hãmri nê mãânēn mē ixpê Ijaew nhîgêt kot amnhî nhîpêx kôt amnhî nhîpêx. Kê Tirtûm ja hã mē apumu nê mē ato hkra. Anê.

Nom ã mē kapêr anhÿrja kot anhÿr kêt. Mē pahte amnhî kaxyw Jejus Kris kôt pajamaxpêr nê hkôt amnhî xunhwÿr pix ã mē pahpumunh kôt na hte Tirtûm mē pahto hkra. Tã nhûm prem ã mē kãm ho hêx anhÿr o pa nhûm Pawre tee ri ã mē kapêr anhÿrja ã mē harênh ma nhûm ja kêp omnuj nê. Jakamã nhûm Karatas nhô xwÿnhjê mã kagàja nhîpêx nê mē hwÿr kumê. Nê kamã hprî hã Tirtûm kot mē ho hkra kaxyw tanhmã amnhî nhîpêx to hã mē kãm harê nê hã kagà. Nê mē kãm:

1-2 Pa Karatas nhô xwÿnhjaja? Xà mē amex? Ixpê Pawre na pa mē awÿr ixpêr mē nê mēmoj tã mē amã karô.

Mêpahpãm Tirtûm mē Jejus Kris na pre wa mē akaxyw ixãm. Ixte wa ÿ hã ma ri mē akôt mē ajahkre o ri ixpa kaxyw. Na pre Jejus ty nhûm Tirtûm akupÿm ho htîr. Hãmri nhûm wa mē akaxyw ixãm. Pyka ja kamã na pre mēhō mē akaxyw ixãm kêt nê. Tirtûm mē Jejus Kris na pre wa ixãm. Jakamã na pa ã mē awÿr kagà nhîpêx nê mēnh anê. Mē apê Tirtûm krajê hwÿr.

Nê ota jar krî ja kamã ixpyrà nê Kris kôt mē pahkwÿjaja mē awÿr hpêr mē.

³E kê Mêpahpãm Tirtûm mē Pahihti Jejus Kris wa mēmoj to mē akutã nojarêt rãhã ho pa. Nê mē ato mex rãhã nê. Ka mē wa ÿ hã akînh nê ajamakêtkati nê axãmnhîx ri apa.

⁴Nã na pre Krisja amnhî grônh kôt mē pahwÿr wrÿ nê mē panê ty. Mē pahte amnhî tomnuj pãnhã amnhîrer kaxyw mē panê ty. Mêpahpãm Tirtûm kãm hprãm xà hkôt. Tã mēmo kaxyw na pre ã mē panê amnhî nhîpêx anê? Nã pika ja kamã mē kot amnhî nhîpêxja omnuj tÿx jakamã nhûm amnhî grônh kôt te mē kot amnhî tomnuj pê mē papytâr pyràk o mē panhîpêx nê ã mē panê htyk anê. ⁵Jakamã kwa kêr pu mē Tirtûm mã mex o mex ã mãn harênh o ri papa. Nã kot puj mē ã amnhî nhîpêx anhÿr rãhã ho ri papa.

Mê ujarênh pixi ãm hãmri hã harênh

Rômân 16.17; Sikûn Korî 11.3-4; Epes 4.14; Korosê 2.8; Sikûn Pêtre 2.1-3

⁶Kwa ixkrãmnhwÿjaja. Na pa pre mē ate tanhmã amnhî nhîpêx to hã mē ajarênh ma nê ixkaprî nê tee ri mē akukamã ijamaxpêr. Na pre Tirtûmja Kris kukwak ri mē ato mex nê. Nê mē ate hkôt amnhî nhîpêx o apa hprãm xà te kot amnhî wÿr mē awÿr pyràk o mē anhîpêx ka mē hkôt amnhî xunhwÿ. Tã xep tanhmã mē ajamaxpêr to nê ra hkaga kaxyw. Ra axtem mē ujarênh ôja ma nê gryk ã Tirtûm kaga kaxyw. Pa tee ri mē ajarênh ma nê ixkaprî nê. Kwa mon ka mē axtem nê ri ã amnhî nhîpêx anhÿr mã? ⁷Jejus jarênh pix na ãm hãmri. Mo mē ujarênh mex ô kot ka kêt mē ama nê hkôt amnhî nhîpêx? Nã amrakati kumrêx. ã mē amã ujarênh anhÿr xwÿnhjaja na htem Kris kapêr

o pihkàr rùnh kumrëx o pa nê katàt kôt harënh kêt nê. Ka xep mē ama nê ajamaxpër kati rùnh nê.

⁸ Na pa pre ma mē awÿr mō nê ãm hãmri mē amã Jejus kot tanhmã mē panë amnhĩ nhĩpëx to hã harë ka prem inhma. Tã koja mēhō mē awÿr mō nê mē amã nhãm mē ujarënh ò jarë nhùm Tirtùm ja hã omu nê nhÿrmã ma mē kot amnhĩ xà htÿx kamã hamak tùm xà hwÿr kumë nhùm ma hwÿr mō nê aa kator kêt nê. Mē pahtō rÿ Tirtùm kapër o wrÿk xwÿnhjê hō koja ã amnhĩ nhĩpëx anë nhùm ja hã omu nê ma kuwy pë himōta wÿr amnhĩ nê kumë. ⁹ E kot paj axte mē amã ja jarë ka mē aprì hã inhma. Koja mēhō mē awÿr mō nê mē ate hkôt amnhĩ xunhwÿr xwÿnhhta kwÿm ri tanhmã mē amã ujarënh to. Hã koja Tirtùm omu nê nhÿrmã ma mē kot amnhĩ xà htÿx kamã hamak tùm xà hwÿr kumë nhùm ma hwÿr mō nê kamã pa ho pa nê aa kator kêt kumrëx.

*Tirtùm pix kãm Pawre hkĩnh hprãm ã kot jarënh
Juaw 5.44; Atre 26.9-20; Karatas 2.6*

¹⁰ Nê koja mēmojaja ixkapër ma nê kãm mar prãm kêt o kãm ixkĩnh kêt japër nê mãmri kãm ixkĩnh kêt. Tirtùm kãm ixkĩnhja pix na inhmã hprãm. Kop apu mē piitã kãm ixkĩnhja mãn inhmã hprãm ronhÿx pa Kris nhÿ hã kapër jarënh o ri ixpa hkêt nê.

*Tirtùm kot Pawre mã Kra Jejus o amnhĩrĩ ã harënh
Sikũn Korĩt 1.12; Wam Tesarõn 2.4*

¹¹⁻¹² E Jejus kôt ixkrãmnhwÿjaja. Nã ixte mē ujarënh mex jarënh o ixpaja na pre jar pika ja kamã mēhō amnhĩ krã hkôt inhmã harënh rÿ inhmã ahkre hkêt nê. Jejus Kris tãm na pre ixwÿr kato nê inhmã ho amnhĩrĩt. Jakamã mex o kot pika jakamã mē ujarënh piitã hakrenh par. ¹³⁻¹⁵ E kot paj ixprì hã mē amã tanhmã amnhĩ jarënh to ka mē inhma. Tanhmã Tirtùm kot amnhĩ kaxyw ixãm to hã pa mē amã amnhĩ jarë. Nã na pre kormã ixkêt ri ixkukamã hamaxpër nê amnhĩm ixta nê amnhĩ kaxyw ixãm nê kot ixto mex ã ixtã amnhĩ jarë. Tã pa pre ixkato nê gaa nê ixãptàr nom kormã Jejus Kris kôt amnhĩ xãm kêt nê. Na pa pre axtem nê inhmã mē ixpë Ijaew kot amnhĩ nhĩpëx kôt pix mã amnhĩ nhĩpëx o ri ixpa hprãm nê. Nhùm pre ixpyrà nê arì mē nywjaja haxwÿja kãm mē hkôt pix mã ri amnhĩ nhĩpëx o pa hprãm nê. No inhmã mē hkôt amnhĩ nhĩpëx mex o mē hakrenh par prãm jakamã na pa pre mē inhìgèt kôt amnhĩ nhĩpëx mex kumrëx o ri ixpa. Mē kapër piitãã hkôt amnhĩ nhĩpëx mex nê. Tã ã amnhĩ nhĩpëx anhÿr o ixpa kaprÿ. Na pa pre axtem nê mē kot Tirtùm Kra Jejus Kris kôt amnhĩ xunhwÿr xwÿnhjê nhĩpëx kati ho ri mē hkôt ixpa nê inhmã mē himex prãm tÿx kumrëx. ã na pa pre amnhĩ nhĩpëx anhÿr o ri ixpa. Ra mē ate ja hã ixpumunh mex.

¹⁶⁻¹⁷ Tã pa pre ma Tamas wÿr mō. Kamã tanhmã Kris kwÿjê nhĩpëx to kaxyw ma mē hwÿr mō. Hãmri nê kormã mē hwÿr ixãhtëp o inhmōr mē nhùm Tirtùm tanhmã ixto nê inhmã Kra Jejus o amnhĩrĩt pa jatã omu. Kêp Tirtùm Kra hã pa ixprì hã omu. Nhùm inhmã kapër nê ixte kãm tanhmã amnhĩ nhĩpëx to ho ri ixpa kaxyw ixãpënh ã inhmã karō nê Ijaew kêt xwÿnhjê hwÿr inhmë. Ixkwÿ Ijaew wÿr inhmënh kêt nê. Na pre inhmã:

—E kêr ka ma Ijaew kêt xwÿnhjê hkôt ri mē kãm ixkapër jarënh o ri apa.

Anhÿr jakamã pa pre kuma nê hkôt amnhĩ xãm kurë kumrëx nê ã amnhĩ nhĩpëx anhÿr o ri ixpa. Jao tanhmã ixte kêp hkwÿjê nhĩpëx tota kaga nê ma pyka pë Arap wÿr mō. Nom tanhmã amnhĩ tã Jejus kwÿjê kukjêr to hkêt nê. Nê Jerujarë hwÿr inhmōr nê Jejus nhÿ hã mē ahkre xwÿnh maatijaja tanhmã amnhĩ tã mē kukjêr to hkêt nê. ãm Tirtùm kot inhmã hã karō xà hkôt ma Arap

wýr mō nē kamā kapōt ā ri ixpa. Kamā na pre Tirtūmjia inhmā Jejus Kris kot tanhmā amnhī nhīpēx to ho amnhīrit o pa. Hāmri nē inhmā kapēr pa amnhī tā kuma hāmri nē ma akupým Tamas wýr mō.

¹⁸ Tā nhūm ra amgrā axkrunēpxi nē hapēx pa Tamas rūm ixkato nē ma Jerujarē hwýr Simāw Pētre hwýr mō. Hāmri nē kuri pōj nē hkōt ixpikamēnh ā ixtā semān axkrut. ¹⁹ Nom mē kot Jejus nhý hā hkwýjē jahkre ho mē pa xwýnh maati hkwýjē hō pumunh kēt kumrēx. Ām Simāw Pētre mē Pahihti Jejus tō Xiakreja pix wa omu. ²⁰ Ām hāmri na pa ā amnhī jarēnh anē. Tirtūm kot ja hā ixpumunh mex. ²¹ Tā pa pre mē kurūm ixkato nē hpānhā ma pika hkwý hkōt ijapōx o mē hkōt ixpa. Ma pika pē Sir mē Sirisja wa hwýr mō.

Mē kot amnhī jaēr pē Pawre kot amnhī nhīpēx nyw ā omunh ā mē harēnh

²² Nom Jutej kamā Kris kwýjaja na prem kormā ixpumunh kēt nē. Ām Simāw Pētre mē Xiakre pix na pre wa ixpumu. ²³ Na pre ra mē hkwýjaja tanhmā hkwýjē kot axpēn mā ijarēnh toja ma. Na prem ijarēnh o:

—Kwa Jejus ā mē panhīpēx kati htýx o pa xwýnhnta na pre tanhmā hamaxpēr to nē hpānhā mē kām Jejus kapēr jarēnh o ri mē hkōt pa. Mē kot amnhī kaxyw hkōt hamaxpēr kaxyw. Ra kot Jejus nē mē pahkurē htā hpānhā mē kām kapēr jarēnh o ri mē hkōt pa. Anē.

²⁴ Hāmri nhūm Kris kwýjaja amnhī jaēr pē ijarēnh ma nē inhý hā hkīnh nē. Nē ixtā Tirtūm mā mex o mex ā harē.

2

Pawre kot Kris kwý hkrāhtūmjē mā amnhī jarēnh
Atre 15.1-11

¹⁻² Tā nhūm amgrā pē 14 nē hapēx nhūm Tirtūm akupým Jerujarē hwýr inhmē pa ma akupým mō. Panāpe nē Xitre mē pa mē mō nē mē hwýr pōj. Hāmri nē Kris kwý hkrāhtūmjē hwýr mra nē mē kām amnhī jarē. Mē tapxipixjē mā amnhī jarē nē ixte Ijaew kēt xwýnhjē mā Jejus kapēr jarēnh o ixpa hā amnhī jarē. Na pa pre ra amnhī kukamā ijamaxpēr o:

—Koonēn. Kot pa apu mē kām amnhī jarē nhūm mē inhma nē ixte Tirtūm kapēr kwým ri mē ahkre ho ixpa hā ixkamnhīx rý hā inhmā akir. Na pa hte Ijaew kēt xwýnhjē mā Kris jarēnh o ixpa no ām mē ixpē Ijaew pyrā nē finat Mojes kapēr kōt mē kot amnhī my kwryt kà jakār ā mē kām karō hkēt nē. Ām mē kot Kris kōt amnhī xunhwýr pix kaxyw na pa hte mē kām hā karō ho ixpa. Tā kot paj Kris kōt mē ixkrāhtūmjē mā ja hā amnhī jarē nhūm mē inhma nē tanhmā hamaxpēr to nhūm ja mē kēp omnuj japēr nhūm mē tanhmā amnhī to nē ixte Kris kapēr jarēnh o ixpaja nē ixkurē. Jakamā nhūm ra ixte mē kām Kris kapēr jarēnh o ixpa nhūm mē kot inhmar xwýnhjaja ijarēnh ma nē tee amnhī kukamā hamaxpēr o ra hkaprī nē pa.

Anhýr o ijamaxpēr. ³ Tā na prem ixte amnhī jarēnhja ma nē ja nē tanhmā inhmā nē hkēt nē. Pa mē kām amnhī jarēnh pa nhūm mē inhma nhūm Ijaew kēt xwýnhjaja kot amnhī jakār kētja nhūm mē kām mex nē. Mē kēp tanhmā kute hkēt nē. Nhūm Ijaew kēt xwýnh Xitre ixkōt pa nhūm mē kot omunh tā kot mē ixpyrā nē amnhī my kwryt kà krāhyr ā kām karō hkēt nē.

⁴ Tā nhūm mē kēp Jejus kwý hā amnhī jarēnh o hēx xwýnhjaja mē ixtā akuprō. Nom hēx rom mē ixte Kris kōt amnhī nhīpēx ā mē ixpumunh pix kaxyw. Hāmri nē ixkapēr ma nē Xitre hā inhmā akir nē inhmā:

—Kwa na pre Xitre Jejus kôt pix mã amnhĩ xãm nom finat Mojes kot mẽ pahpê Ijaew kot amnhĩ nhĩpêx ã karô hkôt amnhĩ nhĩpêx kêt nê. Kwa ja mex kêt. Na htem Jejus kôt amnhĩ xunhwý nê mãânên finat Mojes kapêr kôt amnhĩ nhĩpêx. Jakamã kwa kãm anê kê amnhĩ my kwryt kà krãhta. Finat Mojes kot mẽ panhĩgêtjê mã hã karô xã hkôt.

⁵ Anhÿr tâ pa prem mẽ kuma nê ãm mẽ kuma. Kot pa ri mẽ kãm ja hã karô hkêt nê. ãm Jejus kapêr kôt pix mã kot puj mẽ amnhĩ nhĩpêx o papa nê finat Mojes kapêr mẽ Jejus kapêr o papihkãr kêt nê. Kot puj mẽ anhÿr o Jejus kapêr o ahkã nhũm ja mex kêt nê. Jejus kapêr kãm mo mẽ kot mẽmy kwryt kà jakãr ã mẽ kãm karô? Amrakati. Jakamã na pa pre ãm mẽ pano kupyro o mẽ pa xwýnhjtajê kapêr ma nê ãm mẽ kuma.

⁶ Tã pa pre ra Ijaew kwý pê Jejus kôt ixkwý hkrãhtũmjê mã amnhĩ jarênh pa. Tanhmã ixte Ijaew kêt xwýnhjê mã Jejus kapêr jarênh to hã mẽ kãm amnhĩ jarê nhũm mẽ inhma nhũm ja mẽ kãm mex nê. Jakamã Ijaew kêt xwýnhjaja kot mẽ ixpê Ijaew pyrà nê finat Mojes kapêr kôt amnhĩ nhĩpêxja nhũm mẽ tanhmã mẽ kaxyw inhmã hã karô hto hkêt nê. Tĩrtũm na hte mẽ kêp mẽ hkrãhtũm ã mẽ omunh xã hkôt mẽ hkwýjê rom tanhmã mẽ ho mex to hkêt nê. Na hte mẽ pahpiitã mẽ panhĩpêx o axpên pyràk. Jakamã na pa hte ijaxwýja Jejus kôt mẽ ixkrãhtũmjaja kot amnhĩ to rax o ijakrenh ã tanhmã ijamaxpêr to hkêt nê. ⁷ Na pa pre mẽ kãm amnhĩ jarênh pa nhũm mẽ inhma nê axpên mã:

—Nã ãm hãmri na pre Tĩrtũm ahpÿnhã Pawre mẽ Simãw Pêtre wa kãm wa ãpênh ã karô nê Ijaewjê hwýr Simãw Pêtre mẽ nê axtem Ijaew kêt xwýnhjê hwýr Pawre mẽ. Wa kot ahpÿnhã mẽ hkôt mẽ kãm Jejus kapêr jarênh o ri pa kaxyw. Nã ãm hãmri na hte wa ã amnhĩ nhĩpêx anhÿr o pa. Nã ja mex. Anê.

⁸ Ra Tĩrtũm kot Ijaew wýr Simãw Pêtre mẽnh tâ hpãnhã Ijaew kêt xwýnhjê kaxyw pa ixãm. ý hã wa ixte mẽ kãm Jejus kapêr jarênh o ri mẽ hkôt wa ixpa kaxyw. ⁹ Jakamã nhũm mẽ ixkrãhtũm Xiakre mẽ Simãw Pêtre mẽ Juãwja ixte mẽ kãm amnhĩ jarênh ma nê hkĩnh nê. Tĩrtũm kot ixto mex nê Ijaew kêt xwýnhjê hwýr inhmênh ã ixte amnhĩ jarênhja ma nê hkĩnh nê. Hãmri nê Panãpe mẽ wa inhmã kapêr nê wa inhmã:

—Nã ãm hãmri. Kot puj xep mẽ anê. Ka mẽ Panãpe wa kot kaj wa ma Ijaew kêt xwýnhjê hkôt mẽ kãm Jejus kapêr jarênh o ri apa. No mẽ pajaja kot paj mẽ axtem mẽ pahkwý Ijaew kôt harênh o ri ixpa. Æ kot puj mẽ ahpÿnhã mẽ hwýr papa anê. ¹⁰ Nom kêr ka wa inhmar kumrêx. Kêr ka wa mẽ ixpyrà nê Kris kôt mẽ pahkwýjê pê amrakati xwýnhjê ho mex o ri apa. Mẽmoj to mẽ kutã anojarêt rãhã ho ri apa.

Anhÿr o wa inhmã kapêr pa wa mẽ kuma nê mẽ kãm:

—Tõe. Nã kot paj wa anê. Ra ã wa ixte amnhĩ nhĩpêx anhÿr kaxyw kênã. Anê.

*Pawre kot Simãw Pêtre mã ãkjêr ã harênh
Atre 10; Römãn 3.21-31, 6.1-14*

¹¹⁻¹⁴ Tã nhũm Simãw Pêtreja man mẽ ixwýr krĩ pê ãxiok wýr mõ. Nê jar mẽ ixkôt ri pa. Ixpyrà nê kêp Ijaew tâ Kris kôt Ijaew kêt xwýnhjê hkôt pa nê mẽ kutã apkur o pa. Ixpyrà nê ãmnhĩx ri mẽ kutã apkur o ri mẽ hkôt pa. Ijaew kêt xwýnhjaja kot amnhĩ my kwryt kà jakãr kêt jakamã na pa htem mẽ kutã ixãpkur kêt nê. Tã ra mẽ ixte Kris kôt amnhĩ xunhwýr jakamã ja mẽ ixpê tanhmã kute hkêt. Na pa htem ixãmnhĩx mẽ hkôt ixpa nê mẽ kutã apku. Ra

mē ixte Kris kôt amnhī xunhwÿr kēnā kot pa hkēt ri mē hkôt ixpa hkēt. Na pa htem ixāmnhīx mē hkôt tanhmā amnhī nhīpēx to ho ri ixpa.

Tā nhūm Xiakre kot mē ixwÿr mē rēnh xwÿnhjaja haxwÿja mē ixwÿr mō. Mē ixpyrà nē mē kēp Ijaew tā mē ixpyrà nē Kris kôt amnhī xunhwÿ. Jakamā ra mō nē mē ixwÿr pōj. Hāmri nhūm Simāw Pētre mē omu nē mē umaj axte Ijaew kēt xwÿnhjē kutā apkur kēt nē. Axtem nē ōja py nē o tē nē mē hkāx ā ahte apkur o nhÿ. Hāmri nhūm ra mē ixri Ijaew kwÿ pē Kris kôt mē pahkwÿjaja ja hā omu nē piitā urāk nē ā amnhī nhīpēx anē nē Simāw Pētre ri Ijaew kēt xwÿnhjē hkāx ā apkur o hkrī. Nhūm ixkôt pa xwÿnh Panāpeja haxwÿja ja hā mē omu nē mē urāk nē ā amnhī nhīpēx anē nē mē hkāx ā apku. Hāmri pa tee ri ja hā mē omu nhūm ja inhmā mex kēt nē. Na prem ā amnhī nhīpēx anhÿr o Tirtūm kapēr ā kagā htūm kamā mē ujarēnh mex kwÿm ri amnhī nhīpēx. Jakamā pa ā mē kot amnhī nhīpēx anhÿrja nē Simāw Pētre mā ixkapēr. Mē piitā mē noo mā xa nē ā kot amnhī nhīpēx anhÿrja nē kām ixkapēr nē kām:

—Tk. Kwa nā Simāw Pētre. Ri ā amnhī nhīpēx anhÿr kēt nē. Pahpē Ijaew tā kormā pahkwÿjaja hpōx kēt ri ka hte ixpyrà nē axāmnhīx Ijaew kēt xwÿnhjē kutā axāpkur o ri apa. Tā amnhī wÿr mē pahkwÿjē pumu nē axtem nē mē hkāx ā axāpkur o akrī. Kwa nā na ka ā amnhī nhīpēx anē nē ra axtem amnhī nhīpēx. Te ate mē kām akapēr nē mē kām: “Kot kaj mē ixpyrà nē amnhī my kwÿrÿt kà jakā pa rī mē akôt ri ixpa nē mē akutā ixāpkur o ixpa.” Anhÿr pyrāk. Kwa ja mex kēt.

15 —Mē pahpē Ijaew na pu htem mē kēp Ijaew kēt xwÿnhjē jarēnh o: “Mē kot mē pahte amnhī nhīpēx kôt amnhī nhīpēx kēt xwÿnhjaja.” Anē. 16 Tā mē pahpē Ijaew tā na hte Tirtūmja mē pahte mē panhīgēt kot amnhī nhīpēx kôt mē pahte amnhī nhīpēx ā mē pahpumunh kôt mē pahto hkra hkēt nē. Ra mē pahte ja pumunh mex. Ām mē pahte amnhī kaxyw Jeus Kris kôt pajamaxpēr ā mē pahpumunh kôt pix mā na hte mē pahto hkra. Kot pu mē amnhī kaxyw hkôt pajamaxpēr nhūm ja hā mē pahpumunh kôt pix mā mē pahto hkra.

17 —Mē pahpē Kris kwÿ jakamā na hte Tirtūm amnhīm mē pamex ā mē pajarē nē mē pahte amnhī tomnuj xwÿnh kēt ā mē pajarē. Jakamā na pu htem paxāmnhīx ri Ijaew kēt xwÿnhjē kot Kris kôt amnhī xunhwÿr xwÿnhjē hkôt ri papa ho papa. Ra Tirtūm kot mē pahpyrà nē amnhīm mē mex ā mē harēnh kēnā. Tā koja mēhō kormā ja mar kēt nē tanhmā hā mē pajarēnh to nē mē pajarēnh o: “Tk. Ra mē kot amnhī kaxyw Kris kôt hamaxpēr tā axtem nē Ijaew kēt xwÿnhjē hkôt ri pa. Jakamā arī mē kot amnhī tomnuj xwÿnh kēnā.” Anhÿr o mē pajarēnh japēr. Nom ām mē pahte amnhī tomnuj xwÿnh ā mē pajarēnh kaprÿ. Na pu htem Kris kôt amnhī nhīpēx nē ra tām amnhī nhīpēx mex o papa. 18 No kot pu mē hkôt ri amnhī nhīpēx o papa htā tanhmā pajamaxpēr to nē pahte amnhī nhīpēx tūm o awjanā hāmri nē amnhī tomnuj tÿx kumrēx.

19 —Tā tanhmā kot puj wem amnhī to nē mē panhīgēt kot amnhī nhīpēx piitā hkôt amnhī nhīpēx mex o ri papa? Na pu htem pajamaxpēr o: “Kot paj ā amnhī nhīpēx anē nē ā amnhī nhīpēx anē nhūm Tirtūm ja hā ixpumu nē amnhīm inhmex ā ijarē.” Anhÿr o pajamaxpēr. Hāmri nē finat Mojes kot mē panhīgētjē mā kapēr piitā hkôt ri mnhī nhīpēx o papa nom tōhā hkwyūm ri tanhmā amnhī tomnuj to. Jakamā nhūm Tirtūm ja hā mē pahpumunh kôt mē pamex ā mē pajarēnh kēt nē. Kapēr ā kagā htūm kot ā ja jarēnh kot anhÿr. Nom kot puj mē amnhī kaxyw Kris kôt pajamaxpēr nhūm ja hā mē pahpumunh kôt amnhīm mē pamex ā mē pajarē. Hāmri pu mē Tirtūm kôt

amnhî nhîpêx o ri papa nê axte mê pahpê Ijaew nhîgêjtê kot amnhî nhîpêx kôt amnhî nhîpêx hkêt nê. Te ra mê pahtyk nê axte hkôt amnhî nhîpêx kêt pyrâ nê pânâ Tîrtûm kapêr kôt pix mâ ri amnhî nhîpêx o ri papa.

²⁰ —Nê na prem pî kahpa hâ Kris nhô nê kupî nhûm mê pahte amnhî tomnuj te îhkô hâ jêt nê haxwýja htyk pyrâk. Jakamâ na pu htem amnhî tomnuj kaga nê Kris kôt amnhî xunhwý nhûm Karô mê pahkarôm agjê pu mê te Jesus Kris kot amnhî nhîpêx pyrâk o amnhî nhîpêx o papa. Jao hpânâ mê pahte amnhî nhîpêx nyw pix o amnhî nhîpêx o ri papa. Kris kâm hprâm xâ hkôt pix mâ tanhmâ ri amnhî nhîpêx to ho papa. Kris kêp Tîrtûm Kra htâ kâm mê pajapê kamâ mê panê htyk jakamâ na pu htem amnhî kaxyw kôt pix mâ pajamaxpêr râhâ ho papa.

²¹ —Âm hâmri na pre Tîrtûm mê pahto mex kumrêx nê mê pahwýr Krisja mê nhûm mê pahwýr wry nê mê panê ty. Tâ na pa pre kapêrja ma nê mar tÿx nê hâ ri ixpa nê ho ijamakêtkati hkêt nê. Tâ kop apu Tîrtûm kot mê pahte mê panhîgêjtê kot amnhî nhîpêx o amnhî nhîpêx â mê pahpumunh kôt mê pamex â mê pajarênh ronhÿx pre Krisja âm mê panê htyk kaprÿ. Mo kaxyw nhÿx pre mê panê ty? Anê.

Â na pa Simâw Pêtre mâ ixkapêr anê nhûm mê piitâ apkur pê hâ inhmar o hkrî.

3

*Mê pahte amnhî krâ hkôt pahpê Tîrtûm kra hkêt â mê pajarênh
Karatas 5.16-23; Epes 2.8; Piripos 3.9; Sikûn Ximotre 1.9; Xitre 3.4-7*

¹ Kwa Karatas nhô xwýnhjaja. Te ri mê ajamaxpêr kêt kumrêx pyrâk. Amnepê mâ mê awýr inhmôrta ã na pa pre mê amâ tanhmâ Kris htykja jarênh to. Pî kahpa hâ mê panê htyk â harê ka mê aprî hâ inhma. Tâ nhûm amâ kapêr jarênh o mê hêx xwýnhjaja ixpânâ mê awýr mra nê tanhmâ mê amâ ujarênh to ka mê ama nê mê ajamaxpêr o apihkâr rax nê. Jao axte Kris tyk mâ ajamaxpêr kêt nê. ² E mê inhmâ mêmoj jarê. Mêmoj tâ mê apumunh kôt na pre Tîrtûm mê awýr amnhî Karô rê nhûm mê awýr agjê? Xâ mê anhîgêt kot amnhî nhîpêx kôt mê ate amnhî nhîpêx â mê apumunh kôt? Nâ na pre ja hâ mê apumunh kôt mê awýr rênh kêt nê. Na ka prem Kris jarênh ma nê amnhî kaxyw hkôt ajamaxpêr nhûm ja hâ mê apumunh kôt mê awýr kurê nhûm mê awýr agjê.

³ Na pu htem amnhî krâ hkôt tanhmâ amnhî nhîpêx to ho pahpê Tîrtûm kra hkêt nê. Tîrtûm Karô pix kukwak ri na pu htem pahpê hkra. Tâ ka mê axtem nê ajamaxpêr o:

—Nâ Tîrtûm ra kot ixto hkra jakamâ kot paj arî ri mê inhîgêt kot amnhî nhîpêx kôt amnhî nhîpêx o ixpa râhâ nê inhmex kumrêx nê ri ixpa. Anê.

Kwa â mê ajamaxpêr anhÿrja mex kêt. ⁴ Mê akwý kot Kris â mê atomnuj tâ ka mê amnhî xâ htÿx kamâ ajamak o ri apa htâ Kris kaga hkêt nê. Tâ ra axtem nê mê kapêr o mê hêx xwýnhjê jamaxpêr kôt ajamaxpêr o te Kris â amnhî xâ kamâ ajamak kaprÿ pyrâk. Kwa nâ mê ri mê hkôt ajamaxpêr kêt nê. ⁵ Na pre Tîrtûm mê awýr amnhî Karô rê nhûm mê awýr agjê nê mê amâ aa mê ate mêmoj pumunh kêt kwý ho anhÿr o ri mê akamâ pa ho pa. Xâ mê anhîgêt kot amnhî nhîpêx kôt mê ate amnhî nhîpêx â mê apumunh kôt na pre â mê amâ amnhî nhîpêx anê? Nâ ja kôt kêt. Âm mê ate Kris kapêr mar nê amnhî kaxyw hkôt ajamaxpêr â mê apumunh kôt pix mâ na pre â mê amâ amnhî nhîpêx anê.

Tirtüm kot amnhî tâ finat Apraãw pumunh kôt mex ã harênh

Rômân 4.1-25; Xiakre 2.23

⁶ Nê mê ixpê Ijaew pâr krax finat Apraãw na pre amnhî kaxyw Tirtüm kôt hamaxpêr nhüm amnhî tâ omu nê kâm:

Nà ate amnhî kaxyw inhmâ ajamaxpêr tÿx jakamã na pa amnhim amex ã ajarê. Amex kumrêx Apraãw.

⁷ Anhÿr o kâm kapêr jakamã mê pahte urák nê amnhî kaxyw hkôt pajamaxpêr xwÿnhjaja te mê pahpê Apraãw támnhwÿ pyrâk. ⁸ Nê mê apê Ijaew kêt xwÿnhjaja. Na hte Tirtüm mê pahto hpimrâk tâ mê pahte amnhî kaxyw kâm pajamaxpêr ã mê pahpumunh kôt amnhim mê pamex ã mê pajarê nê mê pahto hkra. Amnepêr na pre Apraãw mã kapêr nê kâm:

E ate amnhî kaxyw ixkôt ajamaxpêr jakamã kot paj akukwak ri pyka piitã hkôt mê piitã mê ho mex nê.

Anhÿr o kâm kapêr jao mãânên mê apê Ijaew kêt xwÿnhjê jarê. ⁹ Jakamã mê pahte Apraãw pyrã nê amnhî kaxyw Tirtüm kôt pajamaxpêr xwÿnhjaja kot puj mê pahpiitã urák nê pamex kumrêx nê papa ho papa.

Tanhmã Tirtüm kot mê panê pî kahpa hã jêt xwÿnh nhîpêx to hã harênh

Rômân 4.14, 7.10; Wam Korî 15.56

¹⁰ Nê koja mêhõ hamaxpêr o:

—E kot paj finat Mojes kapêr kôt ri amnhî nhîpêx o ri ixpa nhüm Tirtüm ja hã ixpumu nê amnhim inhmex ã ijarê nê ixto hkra. Anê.

No ãm ja kot anhÿr kêt. Tirtüm kapêr ã kagã htüm kot ja jarênh kot: Ixte amnhim mê mex ã mê harênh kaxyw mê kot Mojes kapêr kôt amnhî nhîpêx xwÿnhjaja koja mê ãm mêmoj pixire nê hirõp kuhê. Rÿ mêmoj pixire nê hkôt amnhî nhîpêx kêt pa ja hã mê omu nê hã mê homnuj tÿx kumrêx.

Anhÿr jakamã tanhmã kot pu mê amnhî to nê Mojes kapêr piitã hkôt amnhî nhîpêx nê aa ho pixi nê hirõp pakuhê hkêt? Nà kot puj mê ho anhÿr kêt nê. Kot puj mê tee ri pamã ja ho anhÿr prãm kaprÿ. Jakamã Tirtüm kot amnhim mê mex ã mê harênh kaxyw mê kot ã amnhî nhîpêx anhÿr mã xwÿnhjaja koja mê mex kêt nê.

¹¹ Na hte Tirtüm mê kot finat Mojes kapêr kôt amnhî nhîpêx o mê pa hã mê omunh xã hkôt mê mex ã mê harênh kêt nê. ãm mê kot amnhî kaxyw hkôt hamaxpêr xwÿnh pixjaja na hte ã mê harênh anê. Kapêr ã kagã htüm kot mê harênh kot:

Mê kot amnhî kaxyw ixkôt hamaxpêr xwÿnhjaja na pa hte mê mex ã mê harênh o ixpa. Mê tapxipixjaja koja mê nhÿrmã Ixkra mê wa ixri mex kumrêx nê htÿr tùm nê pa ho pa. Anê.

¹² Nom na htem amnhî kaxyw Tirtüm mã hamaxpêr pê finat Mojes kapêr kôt amnhî nhîpêx o pa hkêt nê. Mojes kapêr ã kagã kot ja jarênh kot:

Mê kot ixkapêr piitã hkôt amnhî nhîpêx mex o mê pa xwÿnh pixjaja koja mê htÿr tùm nê pa ho pa. Anê.

¹³ Tã kot pu mê ãm kapêr o pixire nê hirõp pakuhê hãmri nê mÿrapê pahÿr tùm nê papa hkêt nê. Nê hpãnhã mê kot amnhî xã htÿx kamã hamak tùm xãta hwÿr ma papa. Ja pymaj na pre Krisja ï ho mê pahwÿr wrÿ nê mê pahte amnhî tomnuj mÿrapê mê panê ty. Tirtüm kot mê pahte amnhî tomnuj mÿrapê tanhmã mê pahto pymaj ã mê panê hÿk anê. Jakamã nhüm Tirtüm mê pahte amnhî tomnuj ã mê pahpumunh kôt mê pakuhpa hã Kraja homnuj nê. Kapêr ã kagã htüm kot ja jarênh kot:

Pî kahpa hã jêt xwÿnhnta na pre Tirtüm homnuj tÿx kumrêx. Anê.

Mē kot amnhī kaxyw Kris kôt mē hamaxpēr xwýnhjē jarēnh

¹⁴ Tā ā Jejus Kris kot mē panē amnhī nhīpēx anhýr kukwak ri na pre Tirtūm kot Apraāw nhīpēx pyrā nē mē ixpē Ijaew pix o mex kēt nē. Māānēn mē apē Ijaew kēt xwýnhjē ho mex nē. Jakamā koja mēhō. Ijaew ō rý Ijaew kēt xwýnhjē hō amnhī kaxyw Kris kôt hamaxpēr nhūm Tirtūm hā omu nē ho hkra nē hwýr Karō mē nhūm kām axā.

Tirtūm kot finat Mojes kukamā mē pahto mex ā harēnh

Rōmān 3.19-20, 5.20-21, 11.32; Eprēw 6.13-18

¹⁵ E ixkrāamnhwýjaja. Kot paj ixprī hā mē amā ja jarē ka mē inhma. Nā koja mēhō wa hamēxkrut nē mēmoj tā axpēn ma. Pika hā war axpēn ma rý mēmoj tā war axpēn ma. Hāmri nē wa hā axpēn mar pa nhūm ja ām hāmri nē ām rāhāā. Koja nhām mēhō tē nē axtem tanhmā harēnh to hkēt nē. ¹⁶ Ja pyrā nē na hte ā Tirtūm mēmoj tā amnhī jarēnh anē. Na hte mēmoj jarē nhūm arī rāhāā. Na hte jarāhā mēmoj jarē nhūm jāā nhūm axtem hijuk ri mēmoj jarēnh kēt nē. Na hte ām kapēr pýnh nē. Tā na pre Apraāw mā hkanrēhā htāmnhwýjē hō kukwak ri Apraāw o mex ā amnhī jarē. Tāmnhwý piitā kukwak ri ho mex ā amnhī jarēnh kēt nē. Ām kanrēhā htāmnhwý Krisja pix kukwak ri ā Apraāw o mex ā kām amnhī jarēnh anē.

¹⁷ E kot paj hpānhā axtem tanhmā mē amā harēnh to. Na hte Tirtūm kot mēmoj tā amnhī jarēnh xā hkôt tanhmā mēmoj to ho pa rāhā nē. Ā na pre finat Apraāw mā kot ho mex ā amnhī jarēnh anē. Tā ra hā amgra pē 430 nē hapēx nhūm hpānhā finat Mojes mā kapēr. Kot mar nē amnhī xō ri Ijaew mā harēnh o ri mē hkôt pa kaxyw. Tā no nhūm ra kot Apraāw mā mēmoj jarēnh ta arī hā no htýx rāhā nē aa ho hamakētkati hkēt nē. Nē kot Mojes mā tanhmā kapēr toja nē Apraāw mā tanhmā kapēr toja nhūm hamē wa ho hamakētkati hkēt nē. Nhūm wa hamē arī rāhā ho rāhā. ¹⁸ Tā mē ano kupyr o ri mē pa xwýnhjaja na htem htýx tanhmā mē amā harēnh to nē mē amā harēnh o:

—Kwa kot puj mē Mojes kapēr kôt amnhī nhīpēx o papa hkēt nē nhūm Tirtūm tee ri ja hā mē pahpumu nē mē pahto mex kēt nē. Anē.

Nom ja kot anhýr kēt. Kop apu ā kot anhýr ronhýx Tirtūm ra wam kot tanhmā Apraāw mā kapēr tota ra ho hamakētkati. Nom na hte arī kām hamaxpēr rāhā nē ho pigrānh nē ho hapēx kēt nē. Na pre Apraāw mā kām: Kot kaj amnhī kaxyw ixkôt ajamaxpēr hā kot paj ato mex kumrēx. Anē. Tā kot ho mex ā amnhī jarēnhja arī rāhāā. Na hte arī mē kot amnhī kaxyw hkôt hamaxpēr xwýnhjē ho mex nē. Nom mē kot Mojes kapēr kôt amnhī nhīpēx o pa hā mē omunh xā hkôt mē ho mex kēt nē. Ām mē kot amnhī kaxyw hkôt hamaxpēr xwýnhjē pixjaja na hte mē ho mex.

Mo kaxyw na Mojes kapēr ā kagā?

Rōmān 3.20, 5.20, 7.7

¹⁹⁻²⁰ Tā mo kaxyw na Mojes kapēr ā kagāja? Nā mē pahte tanhmā amnhī tomnuj to ho papa hā amnhī pumunh nhūm Tirtūm kot ā mē pahte amnhī nhīpēx anhýrja nē mē pahkurē kaxyw. Na pre Mojes Tirtūm nhý hā mēmoj nē mē pahkurē. Mē pahte axpēn pē paxāhkīnh nē mē pahkurē. Nē mē pahte axpēn mā paxēx o ri papa nē mē pahkurē. Ā mēmoj nē mē pahkurē anē. Mē pahprī hā kapēr mar nē tām amnhī nhīpēx o papa kaxyw. Ja kaxyw na pre Tirtūm Ijaew kaxyw Mojes mā kapēr gō. Na pre kaxkwa rúm kapēr o wrýk xwýnhjaja kumrēx kām harē nhūm kuma nē Ijaew mā hā kagā. Jakamā na htem harēnh o: “Mojes kapēr” anhýr o harē.

Tā Apraāw kanrēhā htàmnhwý Krisja kormā kator kêt ri nhùm Ijaew Mojes kapêr ma nê hkôt ri amnhî nhîpêx o pa. Tā nhùm Krisja kator o Mojes kapêr o hapêx. Ra Tirtûm kot Kris kukamā ho mex ā amnhî jarênh xā hā arîgrota kator mē nhùm Mojes kapêr hapêx.

No na pre Tirtûm Ijaew mā ujarênh kaxyw tām mē kām ujarênh kêt nê. Kapêr o wrýk xwýnhjê mā na pre harê nhùm mē amnhî xô ri Mojes mā mē kaxyw kām awjarê. Kot mē ô ri mē kām harênh kaxyw. No Apraāw mā na pre Tirtûm tām kapêr. Na pre hwýr kapêr o wrýk xwýnhjê hō mēnh kêt nê. Tām kot kām kapêr jakamā kapêrja na mex o Ijaew kaxyw Mojes mā kapêr jakrenh.

²¹ Nê na pre Tirtûm tanhmā mē pamā kapêr o amnhîrît to nê mē pamā:

—E kot paj amnhî kaxyw ixkôt mē ajamaxpêr ā mē apumunh kôt pix mā mē amex ā mē ajarê.

Anhýr o mē pamā kapêr. Tā xā na pre kapêrja nhîjuk ri axte amnhî jarê nê amnhî jarênh o:

—E kot paj mē ate Mojes kapêr kôt amnhî nhîpêx mex o apa hā mē apumunh kôt mē amex ā mē ajarê.

Anhýr o mē pamā kapêr? Xā na hte mēmoj jarê nhùm jāā nhùm ra hijuk ri axtem mēmoj jarê? Nā Tirtûm kapêr ām hpýnh kênā. Kop ām mē pahte Mojes kapêr kôt amnhî nhîpêx o papa hā mē pahpumunh kôt mē pamex ā mē pajarênh ronhýx mē pamā:

—Ām ja pix ā mē apumunh kôt kot paj mē amex ā mē ajarê. Anê.

²² Nom na pre ā kapêr anhýr kêt nê. Kapêr ā kagā htûm kot ja jarênh o: Mē apiitā mē ate amnhî tomnuj o mē apa xwýnh na ka mē.

Anhýr jakamā tanhmā kot puj mē amnhî to nê Mojes kapêr kôt amnhî nhîpêx mex o papa? Mē pahpiitā mē pahte amnhî tomnuj xwýnh kênā. Mē pahte kapêr piitā hkôt amnhî nhîpêx kêt jakamā koja Tirtûm ja hā mē pahpumunh kôt mē pamex ā mē pajarênh kêt nê. Koja ām mē pamā kapêr o:

—Kot kaj mē amnhî kaxyw Jejus Kris mā ajamaxpêr pa ja hā mē apumunh kôt mē amex ā mē ajarê nê mē ato ixkra nê mē ato mex o ri ixpa. Anê.

Mojes kapêr te kêp Kris xwýj ri mē hamār xwýnh pyrāk ā harênh Rômān 10.4; Karatas 4.1

²³ Nê kormā Kris kot mē pahwýr wrýk nê mē panê htyk xwýj ri na pre Ijaew Mojes kapêr ma nê hkôt amnhî nhîpêx o ri pa. Nhùm kapêrja te kot amnhîm mē unênh nhùm mē kot hkôt pix mā amnhî nhîpêx o ri pa pyrāk. Na prem Tirtûm kot mē mex ā mē harênh prām xàj ām pix ma nê hkôt amnhî nhîpêx o pa. Nom kapêr piitā hkôt amnhî nhîpêx mex kêt nê. ²⁴ Te mēhprîre nhùm Mojes kapêr te kêp mē hamār xwýnh pyrāk. Mēhprî jamar xwýnhjaja na htem mēhprîjê pumu nê tām mē kot amnhî nhîpêx kaxyw tanhmā mē ahkre hto ho mē hkôt pa. Ja pyrā nê na pre Ijaew tām amnhî nhîpêx o pa kaxyw Mojes kapêr ma nê hkôt amnhî nhîpêx o ri pa. Jejus Kris kutêp ā amnhî nhîpêx anhýr o ri pa. Tā nhùm Jejus tām kaxkwa rūm wrý pa mē ixkwý pixjaja mē ixkwýjê rom amnhî kaxyw hkôt ijamaxpêr. Hāmri nhùm Tirtûm ja hā mē ixpumunh kôt mē inhmex ā mē ijarênh kurê kumrêx.

Jejus kukwak ri mē pahpê Tirtûm kra ā mē pajarênh Juāw 1.12; Rômān 8.14; Êpes 1.5

²⁵⁻²⁶ Tā ra mē ixte amnhî kaxyw Kris kôt ijamaxpêr jakamā na pre Tirtûm mē ixto hkra pa mē ra te ixpê hkra xāptār pyrāk o amnhî nhîpêx nê kapêr kôt amnhî nhîpêx mex o ri ixpa. Jao Mojes kapêr kaga. Te mēhprîre ra mē ahkre

kamã mẽ àptàr nê kot mẽ ahkre xwýnh kaga pyràk. Hãmri pa mẽ ixpê Tìrtùm kra xàptàrjaja hãmri axte Mojes kapêr kôt amnhĩ nhĩpêx hkêt nê.

²⁷ Tã mẽ kajaja na ka pre mẽ ixpyrà nê amnhĩ kaxyw Kris kôt ajamaxpêr nhùm mẽ akwý kot mẽ apê Jejus kwý hà mẽ apumunh kaxyw nhùm mẽ akrã kumrà. Hãmri ka mẽ Jejus kot amnhĩ nhĩpêx kôt pix mã amnhĩ nhĩpêx o ri apa. ²⁸ Tã ra mẽ pahpê Jejus Kris kôt amnhĩ xunhwýr xwýnh jakamã na hte Tìrtùm ahpýnhã ri tanhmã mẽ pakute hkôt mẽ pahpumunh kêt nê. Mẽ pahpê Ijaew rý mẽ pahpê Ijaew kêt xwýnhjaja. Rý mẽ pahpê nhãm mẽ kãm paxàpênh xwýnh rý amnhĩ mã mẽ paxàpênh xwýnh nhùm hte ja hà mẽ pahpumunh kôt tanhmã mẽ pajarênh to hkêt nê. Rý mẽ anijê hkôt rý mẽ inhmyjê hkôt mẽ pahpumunh kôt tanhmã mẽ pajarênh to kêt nê. ãm mẽ pahte Jejus Kris kôt amnhĩ xunhwýr ã mẽ pahpumunh kôt pix mã na hte ã mẽ pahpumunh o pa anê.

²⁹ Nê na pre Tìrtùm Apraãw mã hkanrêhã htãmnhwý Jejus Kris o mex ã amnhĩ jarê. Tã Kris kêp mẽ panhõ Pahihti jakamã pu mẽ Tìrtùm noo mã uràk nê te mẽ pahpê Apraãw tãmnhwý pyràk. Jakamã koja Apraãw nhĩpêxta pyrà nê mẽ pahto mex rax nê.

4

Mojes kapêr te axte mẽ pahpynênh kêt pyràk ã harênh Rômãn 7.1, 8.14-17; Karatas 3.23

¹ E kot paj axte mẽ amã tanhmã mẽhprĩjê jarênh to ka mẽ inhma. Kojã mẽhõ ra hkra mã mẽmo hikukrêx nhõr kaxyw. Hikukrêx nê õ pika. Õ mẽmoj piitã õr kaxyw. No nhùm hkraja kormã hprĩre nê hamaxpêr mex kêt jakamã nhùm kormã hprêk jamãr o pa. Nhùm hkraja arĩ te kãm àpênh o pa xwýnh kot amnhĩ nhĩpêx pyrà nê amnhĩ krã hkôt ri amnhĩ nhĩpêx o pa hkêt nê. Kormã hipêexã kapêr kôt ri amnhĩ nhĩpêx o pa. Nhùm hipêexãja kot kãm õ mẽmoj piitã õr kaxyw no ãm kormã hprêk jamã. ² Tã kormã hkraja hprĩre ri nhùm hipêexã tanhmã amnhĩ to nê ty. Nom nhùm hkraja mýr pê kormã õ mẽmoj o amnhĩptãr kêt nê. Kormã hprĩre jakamã nhùm hipêexã mýr pê kot kãm hamãr o pa xwýnhja kormã kãm hamãr o pa. Tã nhùm hipêexã kot kãm amgrã jarênh xwýnhhta kato nhùm tãm mẽmoj piitã ho amnhĩptã. Ra àptàr mex nê hamaxpêr mex nê amnhĩm ho amnhĩptãr pa. ³ Tã Ijaew na prem ã amnhĩ nhĩpêx anê. Amnepêr kormã mẽ kot Mojes kapêr kôt ri amnhĩ nhĩpêx o pata ã na prem te mẽhprĩre hamaxpêr kêeta pyràk. Te kormã mẽ àptàr kêt pyrà nê jar pika ja kamã mẽ kot amnhĩ nhĩpêx tùm kôt pix mã amnhĩ nhĩpêx o pa. Mẽ kot amnhĩ nhĩpêx tùm te kot amnhĩm mẽ unênh nê mẽ kãm ê pyràk o mẽ hipêx nhùm mẽ hkôt pix mã amnhĩ nhĩpêx o ri pa. ⁴ Tã nhùm Tìrtùm kot Kra hkukamã mẽ pahwýr mênh xà hà arĩgrota kato hãmri nhùm mẽ pahwýr kumê nhùm mẽ pahwýr wrý nê mẽ pahpyrà nê mẽhõ nhõhy rùm kato. Nê mẽ pahpyrà nê gaa nê hprêk nê mẽ ixpê Ijaew rom Mojes kapêr piitã hkôt amnhĩ nhĩpêx mex kumrêx o ri pa. ⁵ Jao te kot Mojes kapêr pẽ mẽ papytãr pyràk o mẽ panhĩpêx pu mẽ hpãnhã pahpê Tìrtùm kra kaxyw. ⁶ Tã mẽ ixpê Ijaew kwýjaja nê mẽ apê Ijaew kêt xwýnh kwýjaja ra mẽ pahpê Tìrtùm kra jakamã na pre mẽ pahwýr Kra Jejus Karõja rê nhùm mẽ pamã agjê. Hãmri nê mẽ pamã kapêr o:

—Ra mẽ apê Tìrtùm kra jakamã kêr ka mẽ kãm amnhĩ jarênh kaxyw nê kãm: “Pa Papaj” anê. Kêr ka mẽ ã kãm akapêr anê. Anê.

7 Jakamā na pu mē ra te pahpē mē kām paxàpēnh xwýnh pyrāk kêt nē. Ra mē pahpē Tirtüm kra jakamā na hte mē panhîpêx o te Kra Jejus nhîpêx pyrā nē mē pahto mex nē.

Mojes kapēr kôt mē kot amnhî nhîpêx xwýnhjê jarēnh

Sikün Korît 11.3-4; Korosē 2.16-19; Eprêw 6.1; Wam Pêtre 1.14

8 Nē amnepē mā kormā mē ate amnhî kaxyw Jejus kôt ajamexpēr kêt ri na ka prem Tirtüm jarēnh mar kêt nē. Am atyx ri sânti mā mex ā harē nē kām amnhî jagrer o ri apa. Nē amā mēmoj kînh nē amā hprām xàj tanhmā amnhî to hwýr to ho ri apa. Te mē kām mē àpēnh o mē pa xwýnhjaja kot amnhî nhîpêx pyrā nē sânti mā tanhmā amnhî nhîpêx to ho ri apa. Nom sântija kēp Tirtüm kêt.

9 Tā ka prem Tirtüm jarēnh ma nē hkôt amnhî xunhwý nhūm amnhî tā mē apumu. Tā tām kot amnhî kaxyw mē paxunhwýr jakamā kwa mon ka mē ra axtem nē akupým sânti hkôt amnhî nhîpêx kaxyw? Nā mē ajamxpērja mex kêt. Sânti nhîpêxta tanhmā koja amnhî to nē mē ato ajuta? ām mē kot îhkra ho hipêx pix jakamā hihtýxti hā. Amarî kuhê xà kamā kuhê ho kuhê xwýnh kênā. Tā te kot akupým amnhî kôt mē arēnh kaxyw pyrāk o mē anhîpêx ka mē ra axtem nē akupým hkôt amnhî nhîpêx kaxyw. Kwa nā mē ā ri amnhî nhîpêx anhýr kêt nē.

10 Nē na ka htem amnhî kukamā ajamxpēr o:

—Na pre hte Ijaewjaja Mojés kapēr xà hkôt arîgro hkwý hā axtem tanhmā amnhî nhîpêx to nē mēmo mytwrý hā tanhmā amnhî nhîpêx to nē mēmo amgrā hā tanhmā amnhî nhîpêx to. Tā kot paj mē urāk nē ā amnhî nhîpêx anhýr o ixa. Kê Tirtüm ja hā xpumu nē inhmex ā ijarē. Anē.

Kwa mē ā ajamxpēr anhýr kêt nē. Mon ka htem axtem nē ri ā ajamxpēr anē? Na hte Tirtüm ā mē pahte amnhî nhîpêx anhýr ā mē pahpumunh kôt mē pamex ā mē pajarēnh kêt nē. 11 Na pa ja hā mē ajarēnh ma nē tee ri mē akukamā ijamxpēr. Te ixte Tirtüm kapēr o mē ajahkre kaprý ho ri ixa pyrāk.

Karatas nhō xwýnhjaja kot Pawre ho mex ā mē harēnh

Wam Korît 9.21-23

12 Kwa ixkrāmnhwýjaja. Ixpê Ijaew tā te ixpê Ijaew kêt pyrāk o amnhî nhîpêx o ri mē apê Ijaew kêt xwýnhjê hkôt ri ixa. Jao Kris kapēr gryk ā mē inhîgêttaja kot amnhî nhîpêx kaga nē axte hkôt amnhî nhîpêx kêt nē. Tā kwa mē ixpyrā nē ā amnhî nhîpêx anē. Wem ma amnhî to amōr gri kêt wehe. Wam ixte mē awýr inhmōrta ā na pa pre mē amā Tirtüm kapēr jarēnh o ri mē akôt ixa ka prem inhma nhūm ja mē amā mex nē ka mē ja hā tanhmā ixto hkêt nē. 13 Na pa pre ixāā nē mē awýr mō nhūm ixāja ixto htýx nē pa tokyx ixkator nē ma akupým mē arūm inhmōr kêt nē arî mē amā Tirtüm kapēr jarēnh o ixa. 14 Kormā ixā nē tanhmā ixkote htā ka prem ja hā xpumu nē ixto mex nē ixkamā anhōkre kahak kêt nē. Na ka prem te ixto Jejus Kris nhîpêx pyrāk o inhîpêx. Nē te ixto Tirtüm kapēr o wrýk xwýnh nhîpêx pyrāk o inhîpêx. 15 Jao mē amā ixkînh nē ā inhîpêx anē nē mē amā ixto mex pix prām. Nē nhýri xpumu nē ixkamā axukapri nē inhmā akapēr o:

—Hêxta waa nē. Anopxāā. Inhmā amnhî no kaxār nē amā òr prām nom tanhmā kot pa mē amnhî to nē hkapa nē amā kugō? Anē.

Nē mē amā inhmā mēmoj mex pix nhōr prām. Tā ra tanhmā ajamxpēr to nē axtem nē te mē amā ixkînh kêt pyrāk o inhîpêx.

Mē no kupyř xwŷnhjaja kot mē hamaxpēr o pihkār ā mē harēnh

¹⁶ Nē na pa pre ām hāmri mē amā Tirtūm kapēr jarēnh o ri mē akōt ixpa. Nom ra mē amā mar prām kēt jakamā na ka mē axtem nē inhīpēx o te ixte mē akutā amnhī xām pyrāk. ¹⁷ Mē amā Tirtūm kapēr o mē hēx xwŷnhjaja te mē kām mē akīnh pyrāk o mē anhīpēx no ām mē kām akīnh kēt. Na htem mē amex kaxyw tanhmā mē amā kapēr to hkēt nē. Ām mē ate mē mar nē mē gryk ā ixkaga nē mē hkōt ri amnhī nhīpēx o apa pix prām xāj na htem mē akōt tanhmā mē amā hēx to ho pa. ¹⁸ Pa mē harēnh ma hāmri nē mē kamā inhgryk o ā mē amā mē harēnh anhŷr kēt nē. Koja mēhō mē awŷr mra nē ixwakre kamā rŷ inhnoo mā mē amā mēmoj mex jarē nhūm ja inhmā mex nē. No nhūm mē amā mē hēx xwŷnhjaja axtem nē mē ajamexpēr o pihkār pix kaxyw na htem mē awŷr mra nē mē amā ā ujarēnh o pa anē.

Paure kot tee ri mē hkukamā hamaxpēr ā harēnh

¹⁹ Te mē apē ixkra pyrāk jakamā na pa hte mē ate amnhī nhīpēx ā mē apumu nē tee ri ijamaxpēr nē ixkaprī htŷx nē. Te nhŷhŷnh ixā htŷx nē ixte amnhī xā htŷx kamā ijamak o ri ixpaja pyrāk. Rŷ te mē hpjagri ho mē hikwŷ xwŷnh ōhy xā htŷxta pyrāk. Mē ate Kris kōt amnhī nhīpēx mex o apa hprām xāj na pa hte ā amnhī nhīpēx anhŷr o ri ixpa. ²⁰ Hēxta waa nē. Kop apu ra mē awŷr ixpōx nē mē akōt ixpa ronhŷx pa ixkīnh tŷx kumrēx. Nhŷx pa ra ixprī hā mē amā ixkapēr ka mē inhma. Nē amnhī tā inhmā mē akīnh tŷx ā mē akamā inhgryk kēt ā ixpumunh kurē kumrēx. No kagā pix kām ixkapērja ka mē kamā harē nom aprī hā inhmar mex kēt nē. Na pa tee ri mē akukamā ijamaxpēr o ixkaprī htŷx nē ixpa.

Mojes kapēr kōt mē kot amnhī nhīpēx xwŷnhjē jarēnh

Eprēw 12.18-29

²¹ Kwa mē amā arī Mojes kapēr kōt amnhī nhīpēx o ri mē apa hprām xwŷnhjaja. Mān ka mē kormā aprī hā Mojes kapēr piitā mar par kēt jakamā na ka mē amā hkōt amnhī nhīpēx prām. E pa ixprī hā mē amā tanhmā harēnh to ka mē inhma. ²² Nā Tirtūm kapēr ā kagā htūm kot finat Apraāw jarēnhja. Na pre hkra myja wa hamēxkrut. Prō Sara kamā ja nē kot amnhīm haprōr nhūm ri kām āpēnh o pa xwŷnh Aga kamā ja. ²³ Kām āpēnh xwŷnh kamā ja na pre mē pahpiitā mē pahpyrā nē amarī kato. No hprō Sara kamā ja. Sara na pre ra hpigēx tŷx nē. Ra hkamrō hkēt ryy nē pa htā nhūm Tirtūm kot wa hkra hkukamā wa kām ujarēnh xā hkōt nhūm Apraāwja htu nhūm wa hkrata kato. Tirtūm kot hkukamā wa kām harēnh xā hkōt nhūm kamā hkra nhūm kato.

²⁴⁻²⁵ Tā wa nita ā wa harēnh kot anhŷr. Na pre Tirtūm mēmoj jarē. Te ho wa urāk o wa harē no ām hā kuxi nē ā wa harēnh anē. Jakamā ni wa harēnhja te kot Tirtūm kapēr pijakruuta pyrāk. Wam ni Agata te kot hixēt prēk pē Sinai nhīmōk ā Tirtūm kot Mojes mā kapērta pyrāk. Hixētja pika pē Arap kamā na pre. Jakamā nhūm Tirtūm Ijaew kaxyw Mojes mā kapēr nhūm kuma nē amnhī xō ri mē kām hā kagā. Tā na hte arī jarāhā mē hkwŷjaja hamaxpēr o:

—E kot paj mē panhīgēt finat Mojes kapēr kōt amnhī nhīpēx o ri ixpa nhūm Tirtūm ja hā ixpumu nē amnhīm inhmex ā ijarē nē ixto hkra.

Anhŷr o hamaxpēr no ām ā hamaxpēr anhŷr kaprŷ. Ā mē hamaxpēr anhŷr xwŷnhjaja te mē kēp Apraāw mā āpēnh xwŷnh Aga hkra pyrāk. Nē krī pē Jerujarē kēp Ijaew nhō krī jakamā haxwŷja te kēp Agata pyrāk. Nhūm krī nhō xwŷnhjaja haxwŷja te mē kēp Aga hkrata pyrāk. Na htem htŷx Tirtūm kot mē omunh nē mē ho hkra hprām xāj Mojes kapēr kōt amnhī nhīpēx o pa hā

amnhĩ jarēnh kaprÿ. Jakamā haxwÿja te mē kēp mē kām mē àpēnh o pa xwÿnh pyrāk.

Jejus kôt mē kot amnhĩ kaxyw hamaxpēr xwÿnhjē jarēnh

²⁶ Nē hapu hā Tirtūm kapēta. Apraāw prō kumrēx Saraja te kēp kaxkwa kamā Jerujarē ōja pyrāk. Krī ja kamā mē pa mā xwÿnhjaja te mē kēp mē kām mē àpēnh xwÿnhjē pyrāk kēt. Ra mē kot amnhĩ kaxyw Kris mā hamaxpēr nē hkôt amnhĩ xunhwÿr jakamā na htem hamaxpēr o:

—Ixte amnhĩ kaxyw Kris mā ijamaxpēr nē hkôt amnhĩ xām jakamā na Tirtūm ixpumu nē amnhīm inhmex ā ijarē nē ixto hkra. Anē.

Ām hāmri na mē ā wamtajē rom hamaxpēr anē. Tā ā mē hamaxpēr anhÿr xwÿnhjaja te mē kēp Sara hkra pyrāk.

²⁷ Tirtūm kapēr ā kagā htūm kot ja jarēnh kot:

E kormā akra hkēt nē apa htā kēr ka māmri akīnh nē ri apa.

Nē kormā apijagri hkēt tā kēr ka akīnh tÿx nē ri apa.

Kormā amjēn kot akamā hkra hkēt nē te kot akaga pyrāk tā kot kaj akra nē akanrēhā atāmnhwÿ xohtō rax nē.

Mē ohtō rax o ra amjēn kot nhām hprō hō kamā hkrata jakre. Anē.

Ā kapēr kot anhÿr o mē kot amnhĩ kaxyw Kris kôt hamaxpēr xwÿnhjē hkukamā mē ohtō hā mē harē.

²⁸ E ixkrāmnhwÿjaja. Te mē apē Ijak kanrēhā htāmnhwÿ pyrāk. Koja mēhō amnhĩ kaxyw Kris kôt hamaxpēr hāmri nē te kēp Apraāw mē hprō Sara wa hkra Ijak kanrēhā htāmnhwÿ pyrāk. Na pre Tirtūm amnepē mā kormā Ijak kator kēt ri ra hkukamā hamaxpēr nē Apraāw mā harē. Nē mē papajaja nhūm Tirtūm Ijak pyrà nē mē pakukamā mē pamā hamaxpēr nē amnhīm mē paxunhwÿr ā amnhĩ jarē. Tā ra mē ate amnhĩ kaxyw Kris kôt ajamaxpēr jakamā te mē apē Ijak kanrēhā htāmnhwÿ pyrāk.

²⁹ Nhūm Apraāw kot Aga kamā hkra Ismaewja na pre hprō kumrēx kamā hkrata pumu nē kām hkīnh kēt nē kamā gryk pix o pa. Nē tanhmā hipēx to pē ri haprÿ ho ri hkôt pa. Tā mē kot amnhĩ krā hkôt amnhĩ to Tirtūm kra hprām xwÿnhjaja na htem ā mē pahte Kris kôt amnhĩ xunhwÿr xwÿnhjē nhīpēx anhÿr o pa. Na htem Tirtūm kot mē pahto hkra hā mē pahpumu nē Ismaew kot Ijak nhīpēx pyrà nē mē pakamā gryk pix o pa. Nē tanhmā mē pahptomnuj to pē mē pahto kapēr o ri pa. ³⁰ Tā no ām kwār mē māmri ā mē panhīpēx anē. Koja mē pahpyrà nē nhÿrmā Tirtūm nhō krī hwÿr àpir kēt nē. Tirtūm kapēr ā kagā htūm kot mē harēnh kot:

Na pre Tirtūm Apraāw mā kapēr nē kām: “E kēr ka amnhĩ nē ate haprōr nhūm kot amā àpēnh o ri pa xwÿnh mē hkrata wa hano. Koja hkrata amÿr pē amnhīm mēmoj to àrīk kēt nē.

Ate aprō kumrēx kamā akrata pix koja hōja rom amÿr pē mēmoj piitā ho amnhīptār pa.” Anē.

³¹ Tā te mē pahpē àpēnh xwÿnh kamā hkrata pyrāk kēt. Te mē pahpē Apraāw prō kumrēx kamā hkrata pyrāk. Te Tirtūm kot Ijak kukamā hamaxpēr pyrāk o na pre mē pakukamā hamaxpēr.

5

¹ Nē Kris kot mē pahte amnhĩ nhīpēx tūm pē mē papytār jakamā kwa ixkrāmnhwÿjaja. Kēr ka mē arī ate amnhĩ nhīpēx tūm kôt amnhĩ nhīpēx kēt nē. Ra Kris kot ja pē mē papytār nhūm mē paxāmnhīx ri papa kēnā.

Mě pahpê Tirtüm kra hprãm xàj tanhmã mẽ pahte amnhĩ nhĩpêx to Juãw 8.32, 8.36; Korosê 2.20

² E mẽ inhma. Kot kaj mẽ atõ Tirtüm kot ato hkra hprãm xàj amnhĩ my kwryt kã krãhta hã kot kaj mẽ ãm amarĩ ã amnhĩ nhĩpêx anhÿr kaprÿ. Na hte Tirtüm ja hã mẽ omu nê ãm hã mẽ omu. Kot kaj ã amnhĩ nhĩpêx anê nhũm Krisja ãm ate amnhĩ tomnuj mÿrapê anê htyk kaprÿ pyrãk o amnhĩ nhĩpêx. ³ Hãmri nhũm Tirtüm tee ri ja hã mẽ apumu nê te kot ã mẽ amã kapêr anhÿr pyrã nê mẽ amã kapêr o:

—E ra amã apê Kris kwÿ hprãm xàj amnhĩ my kwryt kã krãhyr jakamã kot kaj mããnên Mojes kapêr piitã hkõt amnhĩ nhĩpêx o ri apa.

Anhÿr o mẽ amã kapêr pyrãk.

⁴ Nom kot kaj mẽ atõ amnhĩ kukamã ajamaxpêr o:

—Nã kot paj Mojes kapêr piitã hkõt amnhĩ nhĩpêx o ri ixpa nhũm Tirtüm ja hã ixpumu nê inhmex ã ijarê nê ixto hkra kãm ga. Anê.

No ãm ja kot anhÿr kêt. Na hte Tirtüm ã mẽ pahte amnhĩ nhĩpêx anhÿr ã mẽ pahpumunh kõt mẽ pahto hkra hkêt nê. Jakamã kot kaj mẽ ã amnhĩ nhĩpêx anê nê te ate Kris kutã amnhĩ xãm pyrãk nhũm Tirtüm ato mex kêt nê. ⁵ Nom kot kã mẽ axtem ajamaxpêr o:

—Ra ixte amnhĩ kaxyw Kris kõt ijamaxpêr nê hkõt amnhĩ xãm jakamã koja Tirtüm hã ixpumu nê inhmex ã ijarê. Karõ ra kot ã inhmã ja ho amnhĩrĩt anhÿr kênã.

Anhÿr o ajamaxpêr. ãm hãmri ã mẽ ajamaxpêr anhÿrja. ⁶ Jakamã mẽ pahpê Kris kõt amnhĩ xunhwÿr xwÿnhjê kamã ra mẽ kot amnhĩ my kwryt kã jakãr xwÿnhjaja nhũm mẽ pahkwÿyja ã amnhĩ nhĩpêx anhÿr kêt nê. Tã nhũm Tirtüm ja hã mẽ pahpumu nhũm ja tanhmã kêp kute hkêt. Na hte mẽ pahte amnhĩ my kwryt kã jakãr ã mẽ pahpumu nê ãm hã mẽ pahpumu. No kot pu mẽ Jejus Kris kõt amnhĩ nhĩpêx mex o ri papa. Nê amnhĩ kaxyw hkõt pajamaxpêr tÿx o ri papa. Nê mẽ pamã axpên kĩnh pê tãm ri axpên nhĩpêx o ri papa. Ja na kêt Tirtüm kãm hprãm.

⁷ Ra mẽ ate Kris kõt amnhĩ nhĩpêx mex o ri apa htã nhũm mẽ hêx xwÿnhjaja mẽ awÿr mra nê tee ri ã mẽ ate amnhĩ nhĩpêx anhÿr ã mẽ apumu nê tanhmã mẽ amã Tirtüm kapêr o hêx to. Ka mẽ amã nê axte Tirtüm kõt amnhĩ nhĩpêx mex hkêt nê. ⁸ No ãm ã mẽ kot mẽ amã mẽ ujarênh anhÿr xwÿnhjaja na pre Tirtüm mẽ awÿr mẽ rênh kêt nê. Tirtüm kot amnhĩ wÿr mẽ awÿr xwÿnh kênã kot kêt axtem nê mẽ awÿr kapêr o mẽ amã hêx o mẽ pa xwÿnhjê rê.

⁹ Nê koja mẽhõ pixi nê tanhmã amnhĩ tomnuj to nhũm mẽ piitã ja hã omu nê urãk nê kãm tanhmã amnhĩ tomnuj to hprãm. ¹⁰ No kêt mẽ apê Kris kwÿ na ka mẽ. Ixte ja hã mẽ apumunh mex. Kot kaj mẽ axte ixkapêr ma nê akupÿm Kris kõt amnhĩ nhĩpêx mex o ri apa. Nã kot kaj mẽ ã amnhĩ nhĩpêx anê nê axte mẽ kot mẽ apê ãmnrã xwÿnhjê kapêr mar nê mẽ hkõt amnhĩ nhĩpêx kêt nê. Koja Kris mẽ atã mẽ homnuj tÿx kumrêx nhũm mẽ rĩ amnhĩ pumu.

Pawre kot mẽ kot amnhĩ jakãr ã mẽ kãm karõ hkêt ã harênh

¹¹ Nê na hte Tirtüm kapêr o mẽ hêx xwÿnhjaja tanhmã mẽ amã ixto hêx to ho pa. Ixte mẽ kãm Tirtüm kot mẽ ho hkra kaxyw mẽ kot amnhĩ my kwryt kã jakãr ã mẽ kãm karõ hã ixto ri hêx o pa. Nom ixte anhÿr kêt ixkrãmnhwÿyja. Kop apu ixte mẽ kãm ja hã karõ ho ixpa ronhÿx Ijaew krãhtümjaja ja hã ijarênh ma nhũm ja mẽ kãm mex nê nhũm mẽ axte Kris ã tanhmã inhĩpêx to hkêt nê. Nom ixte ja hã mẽ kãm karõ hkêt. ãm ixte mẽ kãm Kris kot mẽ panê pĩ kahpa hã htyk jarênh pix mÿrapê na htem ixkamã gryk nê.

¹² Hêxta waa nê. Mê kot mê amâ hêx o pa pê mê ajamaxpêr o pihkâr xwÿnhjaja kop mê âm mê anhõ krî rûm hapôx nê ma nhÿhÿm hapêx ronhÿx pa ixkînh tÿx kumrêx.

Mê pahte axpên to mex o papa hã mê pamã karõ

Wam Korî 13; Eprêw 13.3, 13.16; Wam Pêtre 1.22; Wam Juãw 3.11

¹³⁻¹⁴ Kwa ixkrãmnhwÿjaja. Nà na pre Kris amnhî kaxyw mê parê. Axte mê pahte amnhî nhîpêx tûm kôt amnhî nhîpêx kêt kaxyw. Ra kot â mê pahte amnhî nhîpêx anhÿr pê mê papytâr jakamã kêr ka mê amnhî tâ ja ma nê axte atÿx ri amâ hprãm xã hkôt tanhmã amnhî nhîpêx to ho ri apa hkêt nê. Mê âm amâ axpên kînh pix o ri axpên kôt apa. Nê nhãm mê hipêx o te ka amâ amnhî tâ ma pyrãk o mê hipêx. Jao mê piitã tãm mê hipêx o ri apa. Kot kaj mê â amnhî nhîpêx anê nê te mê ate wam Tirtûm kapêr piitã hkôt amnhî nhîpêx pyrãk. ¹⁵ No kot kaj mê axtem nê axpên kãm axoprê ho ri apa hãmri nê te ra mê ate axpên to ajapêx par o amôr pyrãk o amnhî nhîpêx. Te mry xoprê kot axpên par o pata pyrãk. Kwa mê â amnhî nhîpêx anhÿr hkêt nê. Mê âm axpên to mex pix nê mê axpên kãm axukaprî ho ri axpên kôt apa.

Mê pahte amnhî nhîpêx nyw jarênh

Matêwre 26.41; Rômãn 8.1-11

¹⁶ Nê kwa kêr ka mê amnhî to Tirtûm Karõ wÿ kê mê amâ mê ate amnhî nhîpêx nyw jagjê ka mê axte ate amnhî nhîpêx tûm kôt amnhî nhîpêx hkêt nê. Âm mê ate amnhî nhîpêx nyw kôt pix mã mân amnhî nhîpêx o ri apa. ¹⁷ Tirtûm Karõ kot amnhî nhîpêxja nê mê pahte amnhî nhîpêx tûmja wa kot axpên pyrãk kêt. Te wa kot axpên kutã amnhî xãm nê wa pijapu pyrãk. Jakamã kot puj mê pahte amnhî nhîpêx tûm o amnhî nhîpêx nê Tirtûm Karõ mã hprãm xã hkôt amnhî nhîpêx hkêt nê. ¹⁸ No kot puj mê Tirtûm Karõ hkôt amnhî nhîpêx nê ra jar pika ja kamã mê kot amnhî nhîpêx kôt ri amnhî nhîpêx kêt nê. Ra axtem mê pahte amnhî nhîpêx nyw o amnhî nhîpêx. ¹⁹ Jar mê kot amnhî nhîpêx tûmta mex kêt. Ra mê piitã mê kot ja pumunh mex.

Na htem htÿx ri hkwyjê kamã hpjiaãm kêt o pa.

Jao mêmyjaja hprõ kuhpa hã nhãm mênijê ho amnhîkati.

Nhûm mê hprõjaja mê mjên kuhpa hã nhãm mêmyjê ho amnhîkati.

Nê mêmy hkwyjaja axtem nê mêmyjê hkwy ho amnhîkati.

Nê mêni hkwy haxwÿja axtem nê mênijê hkwy ho amnhîkati.

²⁰ Nê mê kãm mêmoj mê hikukrêx japê htÿx o kãm Tirtûm kînh jakre.

Nê mêmoj kaxyw ma wajaga hwÿr amnhî to pa.

Nê hkwyjê kamã oprê ho ri pa.

Nê mêmoj tâ axpên kãm gryk pix nê.

Nê mêmoj to axpên pê ôxy nê.

Nê mêmo myrapê axpên pê anhgrã nê amÿm ahpÿnhã ri pa.

²¹ Nê mêmoj tâ axpên kamnhîx rãhã ho ri pa.

Nê xapã nê mê grer kãm ri axpên kãm hpjiaãm kêt o ri pa.

Â na htem mê kot amnhî nhîpêx tûm kôt amnhî nhîpêx o ri mê pa xwÿnhjaja amnhî nhîpêx anê. Â mê kot amnhî nhîpêx anhÿr xwÿnhjaja koja mê Tirtûm nhõ krî hwÿr gjêx kêt nê. Ra ixte mê amâ ja jarênh tâ pa axte mê amâ harê. Mê ate hã ano htÿx rãhã ho ri apa kaxyw. ²² No mê kot amnhî nhîpêx nywja axtem na.

Tirtûm Karõ hkôt mê kot amnhî nhîpêx nyw o amnhî nhîpêx xwÿnhjaja na htem axtem kãm axpên kînh nê.

Nē hkīnh nē ri hamakêtkati nē àmnhīx ri axpēn kôt pa.

Nē gryk tokyx anhÿr hkêt nē. Ām axpēn to mex pix o ri axpēn kôt pa.

Nē tām axpēn nhīpēx.

Nē kot mēmoj tā amnhī jarēnh xà hkôt tanhmā mēmoj to.

²³ Nē axpēn mā kapēr mā hprī ho ri axpēn mā kapēr.

Nē mēmoj punuj piitā nē amnhī to htÿx o ri pa.

Ā na hte mē kot Tirtūm Karō hkôt amnhī nhīpēx o mē pa xwÿnhjaja Karō nhÿ hā amnhī nhīpēx nyw o amnhī nhīpēx anhÿr o pa. Jao määñēn Mojes kapēr kwÿm ri amnhī nhīpēx hkêt nē. Jakamā koja mēhō mē pahte amnhī nhīpēx nyw nē tanhmā mē pahkurē hto hkêt nē. ²⁴ Tā mē pahpē Jejus Kris kwÿ jakamā na pu mē pahte amnhī nhīpēx tūmja nhīpēx o te mē pahte amnhī nē hpÿr pyrà nē axte hkôt amnhī nhīpēx kêt nē.

*Tirtūm Karō hkôt mē pahte amnhī nhīpēx ā mē pamā karō
Epēs 4.23-24; Korosē 3.10*

²⁵ Tā ra Tirtūm Karō kot mē pahto hkra jakamā kwa kēr pu mē ām kôt pix mā amnhī nhīpēx nyw o amnhī nhīpēx o ri papa. ²⁶ Kot puj mē ā amnhī nhīpēx anē hāmri nē mēmoj tā mē pahkwÿjē mā amnhī to jarkrar o ri papa hkêt nē. Kot puj mē ā amnhī nhīpēx anē nhūm mē pakamā gryk nē. Jakamā kēr pu mē ā amnhī nhīpēx anhÿr o ri papa hkêt nē.

6

Mē pahte tanhmā axpēn to ajuta hto hā mē pamā karō

Matēwre 18.15-17; Rukre 17.3-4; Sikūn Tesarōn 3.14-15; Xiakre 5.19-20

¹⁻³ Kwa ixkrāmnhwÿjaja. Mē apē Tirtūm Karō hkôt amnhī nhīpēx o ri mē apa xwÿnhjaja. Koja Kris kôt akwÿjē hō tanhmā amnhī tomnuj to ka mē ja hā omu nē ā amnhī nhīpēx anhÿrja nē kām akapēr. Nom kēr ka mē kamā agryk kamā kām tanhmā nē hkêt nē. Ām kām akapēr mā aprī ho kām akapēr nē akupÿm tām ām. Nom kwa kēr ka mē amnhī pumunh mex nē urāk nē ā amnhī tomnuj anhÿr kêt nē.

Kot ka mē atō ā kot amnhī nhīpēx anhÿr ā omu nē ām omu nē nē tanhmā kām akapēr to hkêt nē. Nē ajamaxpēr o:

—Tk. Kwār māmri ā amnhī nhīpēx anē. Pa ja nē tanhmā kām ixkapēr to hkêt nē. Kurom ixte amnhī nhīpēx mex o ri ixpa kēnā.

Anhÿr o ajamaxpēr japēr. Kwa mē ā ajamaxpēr anhÿr kêt nē. Kot kaj mē ā ajamaxpēr anē nē nē kām akapēr kêt nē hāmri nē te ate amnhī to mex ā amnhī jarēnh kaprÿ pyràk.

Nē kēr ka mē axpēn to ajuta mex o ri axpēn kôt apa. Jao Kris kôt amnhī nhīpēx mex nē.

⁴⁻⁵ Nē na htem piitā amnhīm àpēnh pix tānopxar o pa. Jakamā kēr ka mē amnhī tānopxar pē tām amnhī nhīpēx rāhā ho ri apa. Hāmri nē ja hā amnhī pumu nē akīnh nē. Nom kwa kēr ka mē ate amnhī nhīpēx mex o akwÿjē jakrenh ā mē kām amnhī to jarkrar o ri apa hkêt nē.

⁶ Nē kēr ka mē kot Tirtūm kapēr o mē ajahkre xwÿnhjē ho mex nē mē kām mēmoj nhōr o ri apa.

⁷ Koja Tirtūm nhÿrmā mē pahÿr ri mē pahte amnhī nhīpēx ā mē pah-pumunh kôt tanhmā mē pajarēnh to. Hāmri pu mē tee ri amnhī kukamā pajamaxpēr nom amnhī nē tanhmā kām paxēx to hkêt nē. Koja mēhō kām amnhī to hēx nē te tām kot amnhī mā hēx pyràk nom kot puj mē Tirtūm mā

amnhĩ nê tanhmã paxêx to hkêt nê. ⁸ Jakamã kot kaj mẽ amnhĩ krã hkôt tanhmã ri amnhĩ nhĩpêx to rãhã ho apa hãmri nê nhỹrmã ty nê Tĩrtũm pẽ awry rax ã ri apa. Nom kot kaj mẽ Tĩrtũm Karõ mã hprãm xã hkôt pix mã amnhĩ nhĩpêx nê nhỹrmã ty nhũm Tĩrtũm akupỹm ato atĩr ka kuri amex nê ajamakêtkati atĩr tũm nê ri apa ho apa.

Mẽ pahte xepẽn to mex rãhã hã mẽ pamã karõ

Atre 20.35; Wam Korõt 15.58; Xitre 3.14; Eprẽw 13.3, 13.16; Xiakre 1.27

⁹ Jakamã kwa kêr ka mẽ arĩ tãm ri amnhĩ nhĩpêx nê tãm axpẽn nhĩpêx o ri axpẽn kôt apa nê jam anhũrer kêt nê. Mẽ ã amnhĩ nhĩpêx o ri apa anhỹr rãhã ty nhũm Tĩrtũm nhỹrmã ja hã mẽ ato mex rax nê. ¹⁰ Tã kêr pu mẽ arĩ Kris kôt pahtõjê ho mex rãhã ho ri papa. Nom mẽ tapxipixjê ho mex kêt nê. Pu mẽ mẽ piitã mẽ ho mex o axpẽn pyrãk.

¹¹ E ixte mẽ amã kagã nhĩpêx nê mẽnh nhũm mẽ ate ja hã ixpumunh kaxyw kot paj pam kagã jatur xã hã inhĩkra ho inhĩxi nhĩpêx ka mẽ ixte inhĩxi hã kagã rũnhita pumu.

Jejus kot mẽ panê htyk ã Pawre kãm harênh prãm ã harênh

Wam Korõt 1.22-24, 2.1-2

¹² Nê mẽ amã Tĩrtũm kapêr o mẽ hêx xwỹnhjaja na htem hamaxpêr o:

—Nã kot paj Karatas nhõ xwỹnhjê mã Kris pĩ kahpa hã htyk ã harênh o ri ixpa hkêt nê. Kot pa anê nhũm mẽ ixpê Ijaew kwỹjaja ja hã inhma nê hã tanhmã inhĩpêx to. Ja pymaj kot paj mẽ kãm tanhmã harênh to hkêt nê. Kot paj ãm mẽ kot amnhĩ my kwryt kã jakãr pix ã mẽ kãm karõ kê mẽ ixkapêr xã hkôt ã amnhĩ nhĩpêx anê. Pa hã mẽ omu nê ma ixkwỹjê mã mẽ hã amnhĩ to jarkrar o ri ixpa. Anê.

¹³ Te mẽ kot finat Mojes kapêr kôt ri amnhĩ nhĩpêx pyrãk tã no na htem ã amnhĩ nhĩpêx anhỹr kêt nê. Ra mẽ kot amnhĩ jakãr tã no ãm Mojes kapêr piitã hkôt amnhĩ nhĩpêx hkêt nê. ãm hkwy hkôt pix mã amnhĩ nhĩpêx o pa. Nom kot kaj mẽ ama nê mẽ urak nê amnhĩ jakã nhũm mẽ ja hã mẽ apumu nê hkĩnh nê. Nê ma ri mẽ hkwyjê mã mẽ atã amnhĩ to jarkrar o ri pa nê mẽ kãm:

—E Karatas nhõ xwỹnhjaja na pa prem mẽ kot amnhĩ my kwryt kã jakãr ã mẽ kãm karõ nhũm mẽ inhma nê mẽ pahpyrà nê ã amnhĩ nhĩpêx anê. Anê.

¹⁴ No pa na pa hte ã mẽ kãm mẽmoj tã karõ anhỹr o ri ixpa hkêt nê. ãm Tĩrtũm kot mẽ pahto hkra kaxyw mẽ panhõ Pahihti Jejus Kris kot mẽ nê htykja pix na pa hte mẽ kãm harê. Ra kot inhne htyk jakamã te pa ixte kuri ijêt nê ixyk pyrãk. Jakamã ra jar pika ja kamã mẽ kot amnhĩ nhĩpêxja te ixpê htyk nê hapêx pyrãk pa axte hkôt amnhĩ nhĩpêx kêt pyrãk.

¹⁵ No mẽ kot amnhĩ my kwryt kã jakãr xwỹnhjaja nê mẽ kot amnhĩ jakãr kêt xwỹnhjaja na hte Tĩrtũm ja hã mẽ omu nê ãm mẽ omu. ãm mẽ pahte amnhĩ nhĩpêx nyw o amnhĩ nhĩpêx o ri papaja pix na kãm hprãm. ¹⁶ Kot kaj mẽ ã amnhĩ nhĩpêx anhỹr o ri apa nê apê Tĩrtũm kra mex nhũm mẽ ato mex rax nê. Nê mẽmoj to mẽ akutã nojarêt rãhã nê. Ka mẽ axãmnhĩx ajamakêtkati nê ri apa ho apa.

¹⁷ Nê na prem Kris ã ixtak rax nê nhũm ixkatut ã ixtak xã arĩ rãhã nê pa hte hã ixpa. Ixte Jejus Kris mã tanhmã amnhĩ nhĩpêx to xwỹnh ã ixto amnhĩrit xã na. Jakamã kê mẽhõ axte Jejus kot mẽ awỹr inhmênh ã tee ri ixpumu nê tanhmã hã ixkukjêr to hkêt nê.

¹⁸ E ixkrãmnhwỹjaja. Kê Pahihti Jejus Kris mẽmoj to mẽ akutã nojarêt nê mẽ ato mex rãhã ho pa. Nã koja mẽ ato anê.

Ãm ja pix na hapêx. Ixpê Pawre na pa ã mẽ amã kagà nhĩpêx nẽ mẽ awỳr mẽnh anẽ.

Epes

Pawre kot Epes kãm Jejus kôt hkwyjê hwÿr kagà nê mênh

Pawre na pre kagàja nhîpêx. Jejus nhÿ hã hkrajê jahkre o pa xwÿnhjê hô na pre. Jakamã na pre krî pê Epes kãm Kris kwÿjê hwÿr hipêx nê kumê. Epes nhô xwÿnhjaja Ijaew kêt xwÿnh na pre mê. Nhùm pre ra Pawre ma mê hwÿr mô nê mê kãm Tirtùm kapêr jarênh o ri mê hkôt pa nhùm mê hkwyjaja kuma nê Jejus kôt amnhî xunhwÿr.

Na pre hte Pawre ma krî piitã hkôt ri Tirtùm kapêr jarênh o ri mê hkôt pa. Hãmri nhùm mê hkwyjaja Jejus ã unê nê krî pê Rôm wÿr kumê nê kamã haxà nhùm arî hkrî ho hkrî. Nom amari hkrî hkêt nê. Na pre hte mê kot hwÿr mrrar xwÿnhjê mã Tirtùm kapêr jarê. Nê krî hkwyjê hkôt Jejus kôt hkwyjê mã kagà nhîpêx nê mê hwÿr kurê. Jakamã na pre Epes kamã hkwyjê hwÿr kagàja nhîpêx nê mê hwÿr kumê.

Nê kagàja kamã hprî hã mê kot Jejus kôt amnhî xunhwÿr xwÿnhjê kot tanhmã amnhî nhîpêx to ho pa hã mê kãm karô. Ra mê kot hkôt amnhî xunhwÿr jakamã te mê htipxi nê ri mê pa xwÿnh kot amnhî nhîpêx pyrãk o amnhî nhîpêx o pa hã mê kãm hã karô. Nê jar pika hkôt te mê kêp Kris nhî pyrã nê pa hã mê harê. Æ na pre Pawre mê kãm mêmoy jarê nê hã kagà anê nê mê kãm:

¹ Pa Epes kãm Kris kôt ixkwÿjaja. Xã mê amex na ka mê apa? E ot pa mê awÿr kagà nhîpêx nê kumê. Ixpê Pawre na pa hipêx nê mê awÿr kumê. Ixpê Jejus Kris nhÿ hã mê ahkre ho mê ixpa xwÿnh na pa. Tirtùm kãm hprãm xã hkôt. Tã pa ã mê awÿr kagà nhîpêx nê mê awÿr mênh anê. Mê apê Tirtùm krajê hwÿr. Na ka xep htem Jejus Kris kôt amnhî nhîpêx mex o ri apa. Æm hãmri na ka htem ã amnhî nhîpêx anê.

² E kê Mëpahpãm Tirtùm mê Pahihti Jejus Kris wa mê ato mex nê mêmoy to mê akutã nojarêt rãhã ho pa. Ka mê wa ÿ hã axãmnhix ajamakêtkati nê akînh pê tanhmã amnhî nhîpêx to ho ri apa.

Tirtùm kot mê pakukamã amnhîm mê parênh ã harênh

Rômãn 8.28-30; Wam Korît 1.21-22; Wam Tesarôn 1.4; Sikûn Tesarôn 2.13; Wam Pêtre 1.2

³ Na hte mê panhõ Pahihti Jejus Kris nhîpêxã Tirtùmja mê pahto mex rãhã ho pa. Mê pahpê Kra Kris kwÿ hã mê pahpumunh kôt tanhmã mê pahto mex to ho pa. Ra wa Karôja mê pahkarô mã gjêx jakamã te ra mê pahte kaxkwa kamã wa kuri mê pamex nê mê papa pyrãk. Tã ra mê pahte jar pika ja kamã paxãmnhix pajamakêtkati mê pamex nê ri papa jakamã kwa kêr pu mê amnhîm ãm mex o mex ã harênh rãhã nê.

⁴⁻⁵ Amnepê mã kormã mêmoy kêt ri na pre Tirtùm mê pakukamã amnhîm mê parê. Kris kukwak ri amnhîm mê parê. Tã mêmoy kaxyw na pre ã mê pakukamã mê parênh anê? ãm mê pahte kapêr kôt pix mã amnhî nhîpêx o ri papa kaxyw. Jao tãm kot amnhî nhîpêx pyrã nê noo mã tãm amnhî nhîpêx o ri papa. Kãm mê pajapê jakamã na pre mê pakukamã tanhmã hamaxpêr to nê hamaxpêr o:

—Nà Ixkra Jejus Kris koja nhÿrmã ma mẽ hwÿr wrÿ nẽ mẽ nẽ ty. Tã mẽ kot mẽ nẽ htyk ã harẽnh mar nẽ amnhĩ kaxyw hkõt hamaxpër xwÿnhjaja kot paj mẽ ho ixkra. Nà kot paj ã mẽ hipêx anẽ. Anẽ.

⁶ No mẽ papajaja tanhmã mẽ pahte amnhĩ nhĩpêx mex to hã mẽ pahpumunh kõt na pre ã mẽ pahto hkra hã mẽ pajarẽnh anhÿr kêt nẽ. ãm Kra Kris pix kukwak ri na pre ã mẽ pajarẽnh anẽ. Kãm Kra japê jakamã na hte mẽmoj to mẽ pahpê hkwy hã mẽ pakutã nojarêt rãhã ho pa. Jakamã na pu htem amnhĩ tã kãm mex o mex ã harẽnh o papa.

⁷⁻⁸ Na pre Krisja mẽ panẽ htyk o Tirtũm mã mẽ pahte amnhĩ tomnuj pãnhã amnhĩre. Nhũm Tirtũm ã kot amnhĩ nhĩpêx anhÿr ã omunh xã hkõt mẽ pahte hkõt amnhĩ xunhwÿr xwÿnhjẽ nẽ mẽ pahte amnhĩ tomnuj rẽnh pa. Kojã aa tanhmã hã mẽ pahto hkêt nẽ. Pu mẽ axte amnhĩ amnhĩ tomnuj o papa hkêt nẽ. Hẽxta waa nẽ. Kãm mẽ pajapê htÿx kumrẽx jakamã na pre ã mẽ pahto mex rax anẽ. ãm mex o mex nẽ ãhpumunh o ãhpumunh.

⁹⁻¹⁰ Amnepêm na pre hamaxpër o:

—Nà na pa ra kaxkwa ho ixkato nẽ kamã mẽmoj piitã ho ixkato. Nẽ pika ho ixkato nẽ kamã mẽmoj piitã ho ixkato. Tã koja nhÿrmã Ixkra Kris mẽmoj piitã ho amnhĩptar o pa. Kaxkwa kamã nẽ pika piitã hkõt mẽmoj piitã ho amnhĩptã nẽ tapxipix inhÿ hã kêp mẽõ Pahihti. Kojã ã amnhĩ nhĩpêx anhÿr xã hã arĩgro kato nhũm ã amnhĩ nhĩpêx o pa anẽ. Nà ja na inhmã hprãm. Anẽ.

ã Tirtũm amnhĩ kukamã hamaxpër anhÿrja kõt na pre Kris kêp mẽ panhõ Pahihti hã harẽ. Tã nhÿrmã mẽ pahto amnhĩptar kaxyw koja mẽ pakaxyw ãm. Amnepêm ri mẽ pa xwÿnhjẽ mã kot kormã ja ho amnhĩrit kêt tã ra jarãhã mẽ pamã ho amnhĩrit.

¹¹ Kris kukwak ri na pre amnhĩm mẽ parẽ. Ra kot mẽ pakukamã mẽ pahtã amnhĩ jarẽnh xã hkõt. ¹² Tã mẽ ixpê Ijaew kwÿ kumrẽx mẽ ixte Kris kõt amnhĩ xunhwÿr jakamã koja mẽ piitã mẽ inhÿ hã Tirtũm mã mex o mex ã harẽnh o ri pa.

¹³ Nẽ mẽ kajaja na ka prem mẽ ixpyrà nẽ Tirtũm kapër ma nẽ ajaxwÿja hkõt amnhĩ xunhwÿ. ãm hãmri na Tirtũm kapërja. Tã ka prem ama nẽ hkõt amnhĩ xunhwÿ. Hãmri nhũm amnhĩ tã mẽ apumu nẽ kot inhĩpêx pyrà nẽ mẽ anẽ mẽ ate amnhĩ tomnuj piitã rẽnh pa nẽ mẽ ato hkra. Hãmri nẽ mẽ awÿr Karõ rẽ nhũm mẽ awÿr wrÿ nẽ mẽ akarõ mã agjẽ nẽ mẽ akamã pa ho pa. Kris kukwak ri na pre mẽ awÿr kurẽ. Amnepê mã na pre mẽ pakukamã hamaxpër o:

—Kojã mẽ Ixkra hkõt amnhĩ xunhwÿ pa ja hã mẽ omu nẽ mẽ ho ixkra nẽ mẽ hwÿr Ixkarõ rẽ. Hãmri nhũm mẽ hkarõ mã agjẽ nẽ mẽ kamã hkrĩ ho hkrĩ.

¹⁴ Anhÿr jakamã na pre mẽ pahwÿr kurẽ nhũm mẽ pahwÿr wrÿ nẽ mẽ pahwÿr agjẽ nẽ mẽ pakamã hkrĩ ho hkrĩ. Pu mẽ ja hã amnhĩ pumu nẽ pajamaxpër o:

—Nà ra Tirtũm kot ixwÿr Karõ mẽnh jakamã na ixkarõ hwÿr axã nẽ kamã hkrĩ ho hkrĩ. Tã koja ra kot mẽ ixtã amnhĩ jarẽnh xã hkõt ja hã ixto mex nẽ. Ra kot ixto hkra kẽnã. Jakamã koja nhÿrmã ma amnhĩ wÿr ixto api pa kuri inhmex kumrẽx nẽ ixpa ho ixpa. Hãmri nẽ kukwak ri axte tanhmã amnhĩ tomnuj to ho ri ixpa hkêt nẽ. Anẽ.

Jakamã koja mẽ piitã ã kot mẽ ho mex anhÿr ã amnhĩ tã kamã ama nẽ amnhĩ tã omu nẽ kãm mex o mex ã harẽnh rãhã ho pa.

Pawre kot Epes nhõ xwýnhjê ho Tirtüm wýr ã harênh

Piripos 1.9; Korosê 1.9-12; Wam Tesarõn 5.23; Sikün Tesarõn 1.11, 2.16;

Eprêw 13.20

¹⁵ Nê na ka xep htem amnhî kaxyw Kris kôt ajamaxpêr tÿx pê amã Tirtüm krajê piitã mê hkính o mê ho mex o apa. Na pa pre mê ajarênh ma nê ixkính tÿx nê. ¹⁶⁻¹⁸ Nê xatã mê ato Tirtüm wýr o ri ixpa nê mê ato hwýr o:

—Pa Mëinhîpêxã maati Tirtüm. Nã amex o amex. Ka na ka pre mê ixwýr mê inhõ Pahihti Jejus Krisja mê nhüm mê ixwýr wrý nê hprî hã mê inhmã ate tanhmã amnhî nhîpêx to ho apa hã ato amnhîrît. Tã Epes kãm akrajaja na xep htem akôt pix mã ri amnhî nhîpêx rãhã ho ri pa. ãm hãmri na htem ã amnhî nhîpêx anê.

—Nê kwa Tirtüm. Kê Akarõ tanhmã mê hkrã hto kê mëhprî hã akapêr mar tÿx rãhã ho pa. Jao ra ate mê ixkukamã mê ixtã tanhmã mê ixto mex to hã amnhî jarênhja kê mê kãm hamaxpêr tÿx rãhã ho pa. Nê ate nhýrmã mê ixpê akrajaja mê xpiitã tanhmã mê ixto mex to jarênhja kê mê kãm hamaxpêr tÿx pê hkính rãhã ho pa ho pa.

¹⁹⁻²⁰ —Nê kê mê axãhpumunh o axãhpumunh ã ate akupým Akra Kris o htír ã apumunh mex nê Tirtüm. Na ka pre axãhpumunh xã ho akupým ho htír nê ma akupým anhõ krî hwýr ho api nê amnhî nhîhkõ hã ýr nhüm arî hkrî ho hkrî. Apyrà nê kot mê ixto amnhîptär kaxyw. ã axãhpumunh xã htÿx kot anhýr. Tã kê akrajê piitã ja hã apumu nê axãhpumunh tÿx o ate tanhmã mê ixto ajuta hto ho apa hã apumu.

Anhýr o na pa hte mê ato hwýr o ri ixpa.

²¹ Nê Krisja àhpumunh tÿx o mëkarõmnuti piitã hakrenh. Nê hihtÿx o mê hakrenh jakamã krî nhõ xwýnhjê mã te mê àhpumunh tÿx kêt pyrãk o na htem htÿx ri amnhî nhîpêx o pa pyrãk. Nê Krisja hihtÿx o pika piitã hkôt pahi piitã mê hakrenh par kumrêx. Nê hihtÿx o kot pika piitã hkôt mëmoj piitã mê hakrenh par. Jakamã mëhõ koja we tanhmã kot amnhî nhîpêx to hã kãm karõ rý kãm hamaxpêr gõ? Nã amrakati kumrêx. Ra kot ã amnhî nhîpêx anhýr rãhã nê pa ho pa xwýnh kênã. Nê hihtÿx o hihtÿx rãhã nê pa ho pa xwýnh. Nê àhpumunh o àhpumunh rãhã nê pa ho pa xwýnh. Nê hihtÿx o kot jar pika ja kôt mê pajakrenh par nê hihtÿx o Tirtüm nhõ krî kamã mê mëmoj piitã hakrenh par. Tã koja mëmoj piitã ho amnhîptär rãhã htír tùm nê pa ho pa.

Kris te kêp mê pahkrã pyrãk ã harênh

Rõmãn 12.4; Wam Korît 12.12; Epes 4.16; Korosê 3.25

²² Na pre Tirtümja Kra Kris nhîhkram mëmoj piitã haxàr pa. ý hã kot nhýrmã ho amnhîptär o pa kaxyw. Jakamã kot mê pahto amnhîptär xwýnh ã kêp mê panhõ Pahihti. Nê te kêp mê pahkrã pyrãk. Nê mê papajaja te mê pahpê ì pyrãk jakamã na pu htem hkôt ri amnhî nhîpêx o papa. ²³ Na hte mê panhîja mê pahkrã kamã mê pajamaxpêr xã hkôt tanhmã amnhî nhîpêx to. Ja pyrà nê na pu htem mê pahkrã pyrãk xwýnh Krisja kapêr ma nê hkôt tanhmã ri amnhî nhîpêx to ho ri papa.

Koja mëhõ ãm hkrã pix nê ì hkêt nê pa hãmri nê mex kêt nê. Na htem hkrã nê mãänên ì nê pa nê mex nê. Ja pyrà nê na hte Kris mê pahte hkôt amnhî nhîpêx o papa hã mê pahpumu nê hkính nê mex nê pa. Pu mê pajaxwýja hkôt ri amnhî nhîpêx ã amnhî pumu nê pahkính nê pamex nê papa ho papa.

2

*Tanhmā Tirtūm kot mē pahto hkra hto ā harēnh
Wam Korūt 6.11; Xitre 2.11–3.7*

¹ Nē amnepē mā na pu pre htem Tirtūm kàx ā tanhmā amnhī tomnuj to ho ri papa. ² Nē jar mē kot amnhī nhīpēx o amnhī nhīpēx. Jao amnhī tomnuj pix o ri papa. Nē mēkarōmnuiti nhō pahi Satanasti kapēr kōt pix mā ri amnhī nhīpēx rāhā nē. Na pre hte tanhmā mē pahkōt mē pahto ho pa. Mē pahte tanhmā amnhī tomnuj to kaxyw mē pamā mē pajamexpēr punuj jagjē. Pu mē amnhī tā omunh kēt tā ŷ hā amnhī tomnuj o papa. Satanastija kēp mē kot Tirtūm kapēr kwým ri amnhī nhīpēx o mē pa xwýnhjē nhō pahihti na. Tā pu pre htem pahtýx ri hkōt amnhī nhīpēx pix o ri papa. ³ Mē pahpiitā tanhmā amnhī tomnuj to hprām xà hkōt pix mā tanhmā amnhī nhīpēx to. Nē mēmoj punuj kukamā pajamexpēr nē ra hkōt ā amnhī tomnuj anē. Ā na pu prem nmhī nhīpēx anē nhūm Tirtūm ja hā mē pahpumu nhūm ja kām mex kēt nē. Jakamā nhūm tee ri mē pakukamā hamaxpēr nē hamaxpēr o:

—Hēxta waa nē. Na htem ixkapēr kwým ri tanhmā amnhī tomnuj to rāhā ho pa. Ā mē kot amnhī nhīpēx anhýr o mē pa xwýnhjaja koja mē nhýrmā ixri htír tūm nē mex nē pa ho pa hkēt nē. Ixkīnhā mē kot amnhī tomnuj xwýnh jakamā tanhmā kot mē amnhī to nē ixri htír tūm nē pa ho pa? Nā mē kot amnhī tomnuj mýrapē koja mē nhýrmā ma amnhī xà htýx kamā hamak tūm xāta wýr ma hapēx pa. Nā koja mē anē. Hēxta waa nē. Inhmā ma hwýr mē pa prām kēt tā ra ma hwýr mē pa kaxyw.

Anhýr o hamaxpēr. ⁴⁻⁵ Nē amnepēm kormā mē pahte amnhī tomnuj o papata ā te mē pahte amnhī xà htýx kamā pajamak tūm xà hwýr pryta ā mē papa pyrāk. Nom Tirtūm kām mē pajapē nē mē pakamā ukapří jakamā na pre mē pahto mex rax nē. Nē akupým Kris o htírja ri te ra mē pahte amnhī xà htýx kamā pajamak tūm xà hwýr pryta nē mē pahto ujanār pyrāk o mē panhīpēx. Mē pakamā ukapří nē kām mē pajapē ho ā mē panhīpēx anē. Amari ā mē panhīpēx anē nē mē panē mē pahte amnhī tomnuj rēnh pa. Jakamā kot puj mē pahte Kra hkōt amnhī xunhwýr xwýnhjaja nhýrmā amnhī xà htýx kamā mē hamak tūm xāta wýr papa hkēt nē. ⁶ Ra Tirtūm akupým Jejus Kris o htír jakamā te ra Jejus kōt akupým mē pahpē hkwyjē ho mē pahtrír pyrāk. Jakamā te ra ō krī kamā ĩhkō hā mē pamex kumrēx nē pahkrī pyrāk. ⁷ Mēmo kaxyw na pre Tirtūm kām mē pajapē hkōt ā mē pahwýr Jejus Kris mēnh nhūm mē panē htyk anē? Nā kām mē pajapē htýx ā mē pahte pahprí hā amnhī tā omunh kaxyw na pre ā mē pahwýr mēnh anē. Tā kot puj mē nhýrmā kaxkwa kamā hwýr pōj nhūm mē pamā amnhī jarēnh o:

—E mē amnē ixpumu. Inhmā mē ajapē htýx jakamā na pa pre mē akamā ixukapří xàj ma mē awýr Ixkra Jejus Krisja mē nhūm amnhī grōnh kōt mē awýr wrý nē mē anē ty. Inhmā mē ajapē htýx jakamā na pa pre ā mē awýr mēnh nhūm mē anē htyk anē. Inhmā mē apē ixkrajē japē xàj na pa pre ā mē ato mex rax anē.

Anhýr o mē pamā kapēr hāmri nē mē pahto mex rāhā ho pa. ⁸⁻⁹ Xà na pu prem pahpē hkra hprām xàj amnhī krā hkōt mē papamjaja kām tanhmā amnhī to mex to nē kām:

—E kwa Tirtūm. Na pa ā amnhī to mex anē nē ā amnhī to mex anē. Jakamā kwa ja hā ixpumu nē ixto akra nà?

Anhýr o na pu prem amnhī to kuwý? Nā na pu prem ā amnhī to hwýr anhýr kēt nē. Na pu prem amnhī kaxyw hkōt pajamexpēr nē hkōt amnhī xunhwý

nhũm ja pix ã mẽ pahpumunh kôt mẽ panê mẽ pahte amnhĩ tomnuj rê nê mẽ pahto hkra. Kãm mẽ pajapê nê mẽmoj to mẽ pakutã nojarêt rãhã ho pa jakamã na hte ã mẽ panhĩpêx mex anê. Jakamã na pu htem amnhĩ tã omu nê pajamaxpêr o:

—Nã na xep hte Tĩrtũmja mẽ pahte tanhmã amnhĩ nhĩpêx to ho papa hã mẽ pahpumunh kôt mẽ pahto hkra hkêt nê. ãm mẽ pahte amnhĩ kaxyw kãm pajamaxpêr ã mẽ pahpumunh kôt pix mã na hte mẽ pahto hkra. Anê.

¹⁰ Nê Tĩrtũm tapxipix na hte tanhmã mẽ pahto pu mẽ amnhĩ to mex rãhã ho papa. Nom kormã kot mẽ pahto hkra hkêt ri na pu prem ã amnhĩ nhĩpêx anhỹr kêt nê. Tã Jejus Kris kôt amnhĩ xunhwỹ nhũm Tĩrtũm ja hã mẽ pahpumu nê mẽ pamã mẽ pahte amnhĩ nhĩpêx nyw jagjê pu mẽ ý hã tãm amnhĩ nhĩpêx o ri papa. Amnepêm tanhmã kot mẽ pakukamã hamaxpêr to xã hkôt. No na hte tanhmã mẽ pahte amnhĩ krã hkôt amnhĩ nhĩpêx to hã mẽ pahpumunh kôt mẽ pahto hkra hkêt nê.

Tĩrtũm krajaja te kot axpên to htõ nê htõx pyrãk
Karatas 3.28; Korosê 1.21-23

¹¹ E mẽ apê Ijaew kêt xwỹnhjaja. Na ka htem mẽ akatorxã nhõhy rũm ajapôj hãmri nê mẽ ixpê Ijaew pyrã nê amnhĩ my kwrýt kã jakãr kêt nê. Jakamã na pre ixkwỹjaja mẽ akurom amnhĩ jakãr ã amnhĩ to jarkrã o ri pa nê amnhĩ jarênh o:

—Ra mẽ ixte amnhĩ my kwrýt kã jakãr ã mẽ ixpumunh kôt na hte Tĩrtũm mẽ ixto hkra. Tã Ijaew kêt xwỹnhjaja kot mẽ ixkĩnhã amnhĩ jakãr kêt jakamã mẽ kêp hkra hkêt. Nê mãânên mẽ kêp mẽ pahkwỹ hkêt.

Anhỹr o mẽ ajarênh o pa. ¹² ãm hãmri na prem mẽ apê mẽ ixkwỹ hkêt ã mẽ ajarê. Na pa prem mẽ akurom amnhĩ my kwrýt kã jakã nê mẽ akurom Kris kamã ijamak o ri xpa. Jakamã nhũm Tĩrtũm kot mẽ ixto mex ã amnhĩ jarê pa mẽ mẽ apyrã nê tee ri amnhĩ kukamã ijamaxpêr o ri xpa hkêt nê. Nê mẽ akurom amnhĩ kaxyw Tĩrtũm mã ijamaxpêr. Nã ãm hãmri na prem mẽ apê mẽ ixkwỹ hkêt ã mẽ ajarê. ¹³ Te Tĩrtũm kãx ã ri mẽ apa pyrãk tã ka mẽ arĩ ã amnhĩ nhĩpêx anhỹr kêt nê. Jejus Kris kot mẽ panê htyk nhũm mẽ ate hkôt amnhĩ xunhwỹr jakamã ra mẽ apê hkwỹy. Jao arĩ hkãx ã ri apa hkêt nê. Te mẽ ixpê Ijaew kwỹ pyrã nê hpãnhã kuri ra ri apa pyrãk. ¹⁴ Jakamã na pu htem Kris kukwak ri ra axpên nhĩpêx nyw o axpên nhĩpêx o ri papa. Mẽ ixpê Ijaewjaja nê mẽ apê Ijaew kêt xwỹnhjaja na pu htem te ra ixkre tipxi kamã ri papa pyrãk. Nom amnepêm na pu prem ã axpên nhĩpêx anhỹr kêt nê. Mẽ pahte amnhĩ nhĩpêx tũmja ahpỹnhã na pre. Na pu prem pamã axpên kurê nê axpên kãx ã ri papa. Nê nhỹri axpên pumu nê te pahte axpên pumunh kêt pyrã nê nhãm parĩt o ri mra. Tã nhũm Kris mẽ panê htyk o mẽ pahte amnhĩ tomnuj piitã hpãnhã amnhĩrer pa. Mẽ ixpê Ijaew nê mẽ apê Ijaew kêt xwỹnhjaja. Nê htyk o te ra kot mẽ pahte axpên nhõrkwỹ hwỹr axpên wỹr o papa pyrãk. Jao mẽ pamã axpên kurê ho hapêx nê hpãnhã tãm axpên kaxyw mẽ paxunhwỹ pu mẽ hpãnhã axpên to mex rãhã ho ri papa. ¹⁵ Amnepêm Mojes kot Tĩrtũm nhỹ hã mẽ ixpê Ijaew mẽ ixte tanhmã amnhĩ nhĩpêx to ho xpa hã karõja. Na pa prem mẽ apê Ijaew kêt xwỹnhjaja mẽ ate Tĩrtũm kôt amnhĩ nhĩpêx kêt ã mẽ apumu nê mẽ akamã inhgryk nê. Nê axpên mã mẽ ajarênh o:

—Nã mẽ pahkĩnhã mẽ kot Mojes kapêr kôt amnhĩ nhĩpêx kêt jakamã koja Tĩrtũm mẽ ho hkra hkêt nê.

Anhÿr tā nhūm Kris mē pahwÿr wrÿ nē mē pahpiitā mē panē htyk o mē pahte hkôt amnhī xunhwÿr ā mē pahpumunh kôt pix mā mē pahto Tirtūm kra. Jakamā pa mē axte mē ate Mojes kapēr kôt amnhī nhīpēx kēt ā mē apumunh kôt mē apē Tirtūm kra hkēt ā mē ajarēnh kēt nē. Hāmri nē mē ixpē Ijaew nē mē apē Ijaew kēt xwÿnhjaja pu mē axte axpēn kām pagryk o ri papa hkēt nē. Ra te ixkre tipxi kamā mē pahte axpēn kôt ri papa pyrāk.

¹⁶ Kris na pre pī kahpa hā mē panē htyk o ā mē panhīpēx anē nē mē pahte axpēn kôt amnhī nhīpēx o papa kaxyw mē paxunhwÿ. Nom Tirtūm jamaxpēr xā hkôt ā mē panhīpēx anē. Jakamā na pu htem arī pamā axpēn kurē ho papa hkēt nē. ¹⁷ Na pre Kris mē pahwÿr wrÿ nē ā mē panhīpēx anē. Mē apē Ijaew kēt xwÿnhjaja mē ate kormā Tirtūm kapēr mar kēt xwÿnhjaja nē māānēn mē ixpē Ijaew mē ixte kapēr mar mex xwÿnhjaja nhūm pre akupÿm tām mē pahte axpēn kôt amnhī nhīpēx o papa kaxyw mē paxunhwÿ. ¹⁸ Hāmri nhūm Tirtūm mē pahwÿr amnhī Karō rē nhūm mē pahkarō mā agjē. Kris kukwak ri pix mā mē pahwÿr kurē pu mē ŷ hā paxamnhīx ri kām tanhmā amnhī jarēnh to ho ri papa. ¹⁹ Hāmri nē te mē pahpē nhām axpēn kaxyw mē urojē pyrā nē axpēn kāk ā ri papa hkēt nē.

*Te mē pahpē Tirtūm nhōrkwÿ pyrāk ā mē pajarēnh
Wam Korīt 3.16; Sikūn Korīt 6.16; Wam Pētre 2.5*

²⁰ Nē mē pahpē Jejus kwÿ jakamā te mē pahte ixkre tipxikamā ri papa pyrāk. Nē te mē pahpē ixkre nhīpēx mex pyrāk. Nē Kris te kēp ixkre hkrax mā kuhē xā nē kÿxpē kām nōr xā maatija pyrāk. Nē mē kot Jejus nhÿ hā mē ahkre xwÿnhjaja nē mē kot Tirtūm nhÿ hā kapēr o ri mē pa xwÿnhjaja te mē kēp ixkre nhōkwa ēja pyrāk. Nē mē papajaja te mē pahpē ixkre nhīmōk ā pōja pyrāk. ²¹ Ixkre mā kuhē xā nē kÿxpē kām nōr xā maati kukwak ri pix mā na hte ōkwa ē nē hā pōja kÿxpē mex nē axpēn tā harir. Ja pyrā nē ām Kris kukwak ri pix mā na pu htem te ixkre tipxi kamā ri papa pyrāk o axpēn nhīpēx mex o ri papa. Te mē pahpē mē kot ixkre rax kumrēx nhīpēx o mōr nhūm muxre nē ām xwÿnhnta pyrāk.

²² Na htem amnhīm ōrkwÿ nhīpēx nē hipēx pa nē hwÿr agjē nē kamā pa ho pa. Ja pyrā nē na hte Tirtūm Karōja mē pahpē hkrajē karō mā agjē nē mē pakamā pa ho pa. Te mē pahpē Tirtūm nhōrkwÿ pyrāk. Mē ixpē Ijaew nē mē apē Ijaew kēt xwÿnhjaja Tirtūm mā te mē pahpē ōrkwÿ pyrāk.

3

*Pawre kot Ijaew kēt xwÿnhjē mā mēmoj to amnhīrīt ā harēnh
Rōmān 15.14-21; Korosē 1.24-29*

¹ Tā te mē pahpē Tirtūm nhōrkwÿ pyrāk jakamā na pa hte jar mē hagjēnh xā kamā mē ato hwÿr rāhā ho ixkrī. Na pa pre hte ma mē apē Ijaew kēt xwÿnhjē hwÿr ixpa nē ixprī hā mē amā Jejus kapēr jarēnh o ri mē akôt ixpa. Mÿrapē na prem ixpynē nē ijaxā pa arī jar ixkrī ho ixkrī. Nom arī amnhī kaxyw Tirtūm mā ijamaxpēr tÿx pē mē ato hwÿr rāhā ho ixkrī. ² Na pre kām ijapē hā mē apē Ijaew kēt xwÿnhjē kaxyw ixām. Ma ixte ri mē akôt ixpa nē mē amā kapēr jarēnh o ri mē akôt ixpa kaxyw. Ra mē ate ja hā ijarēnh mar mex. ³ Na pre mē pahto hpimrāātā tanhmā mē pahto mex to hā inhmā amnhī to amnhīrīt pa pre omu. Mē kajaja nē mē pajaja. Pika piitā hkôt mē piitāā tanhmā mē ho mex to. Na pre kormā kot mēhō mā ja jarēnh kēt tā inhmā ho amnhīrīt pa pre omu. Tā kagā ja kamā kot paj mē amā hkwy ho grēre nē ho amnhīrīt nē

mē amā hā kagā ka mē ixpyrà nē kamā harē nē ama. ⁴ Jao aprī hā mar mex nē. ⁵ Amnepēm mē pahkēt ri mē pa xwýnhjē mā Tirtüm kot ja ho amnhîrît kêt tâ nhüm Karō mē ixkwýjê kumrêx mā ho amnhîrît. ý hā kapêr o ri mē pa xwýnh mē mē ixpê Jexus nhý hā mē ajahkre o mē ixpa xwýnhjê kumrêx mā ho amnhîrît. Mē ixte kām tanhmā amnhî nhîpêx to ho ixpa xwýnhjê mā ho amnhîrît pa prem omu. ⁶ Na pre mē inhmā tanhmā mē ato amnhîrît to pa prem ja hā mē apumu nē mē akukamā ijamaxpêr o:

—Nā ām hāmri koja xep Ijaew kêt xwýnhjaja mē ixpê Ijaew pyrā nē Tirtüm kapêr ma nē Jexus Kris kôt amnhî xunhwý nhüm Tirtüm ā mē kot amnhî nhîpêx anhÿr ā mē omu nē mē ixpyrà nē mē ho hkra nē mē ho mex o pa. Anē.

⁷ Tā nhüm Tirtümja mē awýr inhmē. Ixte mē amā ja jarēnh o ri mē akôt ixpa nhüm tokyx mē ate mar kaxyw. Na pre ixto mex nē kām hprām xā hkôt mē akaxyw ixām nē ixte ý hā kām tanhmā amnhî nhîpêx to ho ixpa kaxyw ixto ixihýtýx nē mē awýr inhmē. ⁸ Tā mo kaxyw na pre mē akaxyw ixām? Te ixte ja kaxyw inhmex kêt pyrāk. Ixkwýjaja ja kaxyw mex o kot ijakrenh tā nhüm pre ixpumu nē tanhmā hamaxpêr to nē mē akaxyw ixām nē mē awýr inhmē. Ixte mē amā mēmoj mex kumrêx jarēnh o ri mē akôt ixpa kaxyw. Na pre inhmā:

—Kêr ka ma Ijaew kêt xwýnhjê hwýr mō nē mē kām Jexus Kris kapêr jarēnh o ri mē hkôt apa. Nē mē kām: “Kot kaj mē Jexus Kris kôt amnhî xunhwý hāmri nē kukwak ri amex nē apa.” Anē. ⁹ Koja mē apê Ijaew kwýjê pyrā nē amnhî kaxyw Ixkra Kris kôt hamaxpêr nē hkôt amnhî xunhwý pa hā mē omu nē mē ho ixkra. Kormā aa ixte mē kām ja hā amnhî to amnhîrît kêt tâ pa akumrêx mā harē. E ma mē hkôt ri mē kām ā ijarēnh anhÿr o ri apa kē mē ijarēnh ma.

Anhÿr o mē pahto kator xwýnh maatija inhmā kapêr. ¹⁰ Tā mēmo kaxyw na hte mē pahto hpmirāatā mē pahto hkra? Nā kaxkwa kamā kapêr o mē wryk xwýnh pytār xwýnhjaja nē mēkarōmnuti kot mē pahte amnhî nhîpêx nyw o papa hā mē pahpumunh kôt axpēn mā tanhmā Tirtüm jarēnh to kaxyw. Nē harēnh o:

—Kokýý. Tirtüm àhpumunh týx o àhpumunh týx jakamā na hte tanhmā mē hipêx to nhüm mē tām amnhî nhîpêx mex o pa. Nā Tirtüm àhpumunh o àhpumunh nē hihtýx o hihtýx. Anē.

Koja mē ate amnhî to mex o apa hā mē apumu nē ā axpēn mā Tirtüm jarēnh anē.

¹¹ Amnepēm kormā mēmoj kêt ri na pre Tirtüm mē pakukamā mē pahtā tanhmā amnhî jarēnh to hāmri nē Jexus kukwak ri ā mē panhîpêx anē. Jao mē piitā mē kām àhpumunh o àhpumunh ā amnhî to amnhîrît. ¹² Tā pu mē ra Jexus kukwak ri amnhî kamā pamā Tirtüm pyma hkêt nē. Kām mē pajapê kēnā kot pu kêt mē ri amnhî kamā pamā uma ho papa. Kot puj mē paxāmnhîx ri kām amnhî jarēnh rāhā ho ri papa. Te ra pahte hwýr paxāpir nē pano ho omunh nē kām pakapêr o pakuhê pyrāk. ¹³ Jakamā kwa kêr ka mē kot mē atā tanhmā ixtomnuj to hā ijarēnhja ma nē tee ri ixkukamā ajamaxpêr hkêt nē. Kwār mē māmri tanhmā inhîpêx to. Ām ixte mē amā amnhî jarēnh ma nē axpēn mā ijarēnh o:

—Héxta waa nē. Mān Pawre kām mē pajapê hā na pre amnhî grōnh kôt mē pamex kaxyw mē pahwýr mra nē mē pamā Tirtüm kapêr jarēnh o pa. Mē kot ja hā tanhmā hipêx kati hto htā nhüm jam urer kêt nē. Anē.

*Kris kām mē pajapê kamā tanhmā mē panē amnhî nhîpêx to
Juāw 3.16; Wam Juāw 3.1*

¹⁴ Nē na pa hte mē ato Mēpanhīpêêxà maati hwÿr kām ixihtÿx o ixa. ¹⁵ Kêp mē pahte hkôt amnhī xunhwÿr xwÿnhjê nhō Pahi Maati mex kumrêx na. Kra hkwyjaja ra kaxkwa kamā kuri htūr tūm nē pa ho pa nē arī pyka ja kamā mē pahpê hkwyjaja kormā jar papa. Nom te mē pahpiitā mē pahte ixkre tipxi kamā Tirtūm kôt ri papa pyrāk. ¹⁶ Jakamā na pa hte mē ato hwÿr o:

—Pa Tirtūm. Nà amex o amex. E ot pa Epes nhō xwÿnhjê ho awÿr o ixkrī. Kwa kê Akarō mē kām axāhpumunh xā hkwy gō kê mē akôt ri amnhī nhīpêx rāhā ho pa.

¹⁷ —Nē kê mē amnhī kaxyw Kris kôt hamaxpēr tÿx o pa. Te mēmo pī hpār jarê kot pika kaxwÿnh kām pimānh nē pika jamÿnh tÿxta pyrāk. Nhūm kōk xāpēr tÿx tā tee kot kām mēnh prāmta pyrāk. Kê mē pī hpār jarê kot pika jamÿnh pyrā nē kām axpēn kīnh o pa. Jao mēmoj to axpēn kutā nojarēt rāhā ho pa.

¹⁸⁻¹⁹ —Nē kê krī piitā hkôt mē akrajê pyrā nē amnhī tā Kris kām mē hapê htÿx o mē hapê htÿx ā amnhī pumu. Jao urāk nē mē kām axpēn kīnh tÿx o pa. Nē kê mē ate amnhī nhīpêx pix o amnhī nhīpêx rāhā ho pa. Nē ajamaxpēr pix o hamaxpēr rāhā ho pa. Jao te mēmo pī hpārta pyrā nē akôt hihtÿx nē. Anē.

²⁰ Kot puj mē ā amnhī to Tirtūm wÿr anē nhūm mē pama nē ra āhpumunh tÿx xā ho ā mē panhīpêx anē. Ra kot mē pakamā pa ho pa kēnā. ²¹ ā Tirtūm Jejus Kris kukwak ri mē pahpê hkrajê nhīpêx anhÿr jakamā kwa pu mē pahpê hkra xwÿnhjaja kêr pu mē kām mex o mex ā harēnh rāhā ho papa. Nà kot puj mē ā kām anhÿr o papa.

4

Te ixkre tipxi kamā axpēn kôt ri mē papa pyrāk

Rōmān 15.5; Piripos 2.1-4; Korosē 3.12-17; Wam Pêtre 3.8

¹ Nē ra mē kot Kris ā ijaxār nhūm ixrkrī htā pa ā inhmā mē akīnh xāj mē amā ixkapēr nē hā kagā anhÿr o ixkrī. Kwa kêr ka mē Tirtūm kot amnhī nhīpêx kôt amnhī nhīpêx mex rāhā ho ri apa. Ja kaxyw na pre amnhī kôt mē awÿ ka prem hkôt amnhī xunhwÿ.

² Nē kêr ka mē amā amnhī to rax o akwÿjê jakrenh prām o ri apa hkêt nē. Nē mē agryk tokyx anhÿr kêt nē. Ām axpēn kām axukaprī pix o mǎn ri axpēn kôt apa. Kê mēhō tee tanhmā ri mē ato htā ka mē kamā agryk tokyx anhÿr kêt nē. Ām mē amā ri axpēn hkīnh pix o mǎn ri axpēn kôt apa. ³ Ra Tirtūm Karō kot mē pahkarō mā gjêx par jakamā te mē pahte ixkre tipxi kamā axpēn kôt ri mē papa pyrāk. Jakamā kêr ka mē axpēn to mex pix kukamā mǎn kêt ajamaxpēr o ri axpēn kôt apa. Nē tām axpēn nhīpêx. Jao ajamakêtkati nē axāmnhīx ri axpēn kôt ri apa ho apa. ⁴ Te mē pahte ixkre tipxi kamā ri axpēn kôt papa pyrāk jakamā mē pahpiitā mē pahkarō kamā Tirtūm Karōja hkrī ho hkrī. Jakamā kot puj mē nhÿrmā ma ō krī hwÿr api nē kamā mē pamex rāhā papa ho papa.

⁵ Nē mē panhō Pahihtija ām pixii. Na pu prem pahpiitā amnhī kaxyw hkôt pajamaxpēr jao ra mē pahpê hkraa. Tā mē pahpê Kris kwÿ hā amnhī to amnhīrit kaxyw na prem Tirtūm mā mē pahkrā kumrā. Ā mē panhīpêx anhÿr o axpēn pyrāk o mē panhīpêx o pa anē.

⁶ Nē Tirtūm haxwÿja ām pixii. Kêp mē pahpiitā mē panhīpêêxà maati na. Na hte mē pahpê hkrajê mā āhpumunh xā hkwy gō pu mē ŷ hā kām tanhmā

amnhĩ nhĩpêx to ho papa. Nhũm hte mẽ pahkarō kamā pa ho pa. Jakamā te mẽ pahte ixkre tipxi kamā ri axpên kôt papa pyrāk.

Kris kot ahpÿnhā tanhmā mẽ pahto mex to hā harēnh

Rômān 12.3-8; Wam Korīt 12.1-12; Wam Pêtre 4.10-11

⁷⁻⁸ Nē Tĩrtũm kapêr ā kagā htũm kot Kris jarēnh kot:

Na pre mẽ kot kutā amnhĩ xunhwÿr xwÿnhjē pytār pa nē ma akupÿm kaxkwa hwÿr api.

Tā arĩ jar pika hkôt mẽ pahpê hkwyjē mã tanhmā mẽ pahto paxihtÿx to ho pa.

Na hte Krisja tanhmā mẽ pahte ahpÿnhā kām amnhĩ nhĩpêx to ho papa kaxyw tanhmā mẽ pahto paxāhpumunh to. Kām hprām xā hkôt. ⁹ Tĩrtũm kapêr ā kagā htũm kot akupÿm kaxkwa hwÿr àpir ā harēnh. Ām tapxipix na pre ā pika hwÿr wrÿk nē akupÿm kaxkwa hwÿr àpir anē. Na pre ty nhũm mẽ haxā. Hāmri nhũm akupÿm htĩr nē kato nē ma akupÿm api. Tapxipix na pre ā amnhĩ nhĩpêx anē. ¹⁰ Tā akupÿm kaxkwa hwÿr àpir xwÿnhhta na hte kaxkwa kamā nē pika hkôt amnhĩm mẽmoj piitā tanhmā ho ho hkrĩ. ¹¹ Na pre ahpÿnhā tanhmā mẽ pahto mex to. Ahpÿnhā mẽ pahte tanhmā kām amnhĩ nhĩpêx to ho papa kaxyw na pre mẽ paxunhwÿ.

Nē mẽ pahkwÿjaja mẽ pahte krĩ piitā hwÿr pamrar nē ŷ hā hkrajē mã kapêr jarēnh o papa kaxyw mẽ paxunhwÿ.

Nē mẽ pahkwÿjaja mẽ pahte krĩ pixi kamā Tĩrtũm nhÿ hā hkrajē jahkre ho ri mẽ hkôt papa kaxyw mẽ paxunhwÿ.

Nē mẽ pahkwÿjaja mẽ pahte pahprĩ hā mẽ piitā mẽ kām tanhmā mẽ kot amnhĩ nhĩpêx to nē Jejus kôt amnhĩ xunhwÿr ā mẽ kām harēnh o papa kaxyw mẽ paxunhwÿ.

Nē mẽ pahkwÿjaja mẽ pahpê pastō kaxyw mẽ paxunhwÿ.

Nē mẽ pahkwÿjaja mẽ pahte mẽ kām Tĩrtũm kapêr ā kagā jarēnh o mẽ ahkre ho papa kaxyw mẽ paxunhwÿ.

¹² ā kot puj mẽ pahpiitā ahpÿnhā Kris mã tanhmā amnhĩ nhĩpêx to ho ri papa anē. Kot puj mẽ ā mẽ hipêx anhÿr o ri papa nhũm mẽ pamar tÿx nē. Nē gaa nē mẽ pahpyrā nē Tĩrtũm mã amnhĩ nhĩpêx mex o pa. Pu mẽ pahpiitā hkôt amnhĩ nhĩpêx mex o papa. ¹³ Nē gaa nē mẽ pahpiitā mẽ pahpê Tĩrtũm kra hā Jejus kot amnhĩ nhĩpêx kôt omunh mex nē. Nē amnhĩ kaxyw hkôt pajamaxpêr tÿx nē. Jao te ra hkôt mẽ paxāptār mex pyrāk. Nē te kot amnhĩ nhĩpêx pyrāk o amnhĩ nhĩpêx.

¹⁴ Mēhprĩreja na htem nhām hamaxpêr nē nhām hamaxpêr o pa. Te kōk xāpêr nē nhām mẽmoj to mrar nē nhām mẽmoj to mrar pyrāk. Nom kêr pu mẽ ho mẽ urāk kêt nē. Ām Kris kôt pix mã pajamaxpêr tÿx o papa. Jakamā nhũm mẽ tee ri mẽ pahte hkwyjē ri tanhmā amnhĩ tomnuj to hprām xā tanhmā mẽ pahto kaprÿ. Nom kêr pu mẽ mẽ mar kêt nē. Ām pakatāt kôt mẽ āptār kot amnhĩ nhĩpêx o amnhĩ nhĩpêx o papa. Jao Kris kôt axpên to paxihtÿx o papa. ¹⁵ Tām axpên mã pakapêr nē pamā axpên kĩnh o axpên mã paxêx kêt nē. Kwa kêr pu mẽ ā amnhĩ nhĩpêx anhÿr o mãn papa. Jao te mẽ pahkrā Kris kot amnhĩ nhĩpêx pyrāk o amnhĩ nhĩpêx mex o mō.

¹⁶ Nē mẽ panhĩ kamā tanhmā mẽ pakuteja piitā na hte mẽ pahkrā kamā mẽ pajamaxpêr xā hkôt axpên kôt ahpÿnhā tanhmā axpên to ajuta hto. Te ixkre pixi kamā mẽ pahte axpên kôt tanhmā axpên to ajuta hto ho ri papa pyrāk.

*Kris kôt mē pahte amnhī nhīpēx nyw ā mē pamā karō
Korosē 3.5-11; Wam Pêtre 4.7*

¹⁷ E kot paj Pahihti nhỹ hã mē amã mēmoj jarē nē nē mē amã ixkapēr kãm ixihtỹx nē ka mē inhma. Nã kēr ka mē axte mē kēp Tirtũm kra hkēt xwỹnhjē kot amnhī nhīpēx o amnhī nhīpēx o ri apa hkēt nē. Na htem htỹx ri tanhmã hamaxpēr punuj to ho ri amnhī tomnuj o pa. ¹⁸ Jao Tirtũm mã hamaxpēr kēt nē pa. Kãm hamaxpēr prãm kēt kumrēx nē pa. Te mē kot omunh nē nhãm hkrã pyrãk o amnhī nhīpēx. Rỹ te mēhō wa kot axpēn kãm gryk kãm axpēn nhīpēx pyrãk o hipēx. Jao te kamãt kō kamã ri pa pyrã nē Tirtũm kot amnhī nhīpēx pumunh kēt nē pa. Jakamã koja mē nhỹrmã kuri htĩr tũm nē pa hkēt nē. ¹⁹ Na htem tanhmã amnhī tomnuj to htã amnhī kamã hpijaãm kēt nē pa. Nē axpēn kamã hpijaãm kēt rãhã ho pa. Ām amnhī pix kukamã hamaxpēr nē tanhmã amnhī tomnuj to ho ri pa. ²⁰⁻²¹ Nom Jeus Krisia ā kot amnhī nhīpēx anhỹr kēt. Mē kurom tãm kot amnhī nhīpēx mex o pa xwỹnh nē tãm kapē o pa xwỹnh na. Na pa pre ma mē awỹr mō nē ixprĩ hã mē amã ja hã harē ka prem inhma nē inhmar tỹx nē. ²² Na pa pre mē amã:

—Kwa mē ri axte amnhī nhīpēx tũm kôt amnhī nhīpēx o ri apa hkēt nē. Ja na omnuj tỹx. Na ka prem ā amnhī nhīpēx anē nē ajamaxpēr punuj pix o ri apa. Jao amnhī tomnuj rãhã nē. Tã kēr ka mē amnhī nē awry hã mēnh pyrã nē axte ā amnhī tomnuj anhỹr o ri apa hkēt nē.

²³ —Nē kēr ka mē axte mē ajamaxpēr tũm nē mē ate amnhī nhīpēx tũm kôt ri amnhī nhīpēx kēt nē. Nē mē ajamaxpēr nyw nē mē ate amnhī nhīpēx nyw kôt pix mã ri amnhī nhīpēx o ri apa. Te mē kot mē ē htũm kwryñh nē rēnh nē hpãnhã nyw jagjēx nē ri hã pata pyrã nē ām amnhī nhīpēx nyw kôt pix mã amnhī nhīpēx o ri apa. ²⁴ Mē ajamaxpēr nyw nē mē ate amnhī nhīpēx nywja axtem na. Te Tirtũm jamaxpēr nē kot amnhī nhīpēxta pyrãk. Jakamã kwa kēr ka mē kãm hprãm xã hkôt pix mã tanhmã amnhī nhīpēx to ho ri apa. Jao kãm amnhī nhīpēx mex o ri apa. Nē kapēr kôt ri amnhī nhīpēx. Anē.

Na pa pre ā mē amã ixkapēr anē. Tã kēr ka mē arĩ ixkapēr kôt pix mã amnhī nhīpēx. ²⁵ Mē pahpē Kris nhĩ jakamã te pahte ixkre htĩpxi kamã axpēn kôt amnhī nhīpēx pyrãk jakamã kwa mē axte axpēn mã mēmoj to axēx kēt nē. Nē amarĩ axpēn xō ri axpēn mã mēmoj to axēx kēt nē. Ām tãm axpēn mã mēmoj jarēnh o ri apa.

²⁶ Nē kot kaj mē mēmoj tã agryk japēr. Rỹ mēhō kamã agryk rỹ amarĩ agryk japēr. Tã kēr ka ho ajapēx tokyx anē agryk japjē hkēt nē. Kēr kē kormã kamãt kēt ri ka akupỹm tãm akrã nhũm ja amã mex nē. ²⁷ Nom kot ka mē arĩ kamã agryk o ri apa nhũm mēkarōmnuti nhō pahi Satanastija ja hã mē apumu nē te mē ate amnhī tomnujta ā mē apynēnh pyrãk o mē anhīpēx. Ka mē ra hkôt tanhmã amnhī tomnuj to. Ja pymaj kēr ka mē agryk japjē hkēt nē. Satanasti kãm hprãm xã hkôt ā amnhī nhīpēx anhỹr kēt nē.

²⁸ Nē mē axãhkĩnh o mē apa xwỹnhjaja kēr ka mē axte mē kēp axãhkĩnh hkēt nē. Mēmoj tã apē nē hpãnhã kãxpore jamỹ nē ho amnhĩm awjaprō. Nē mē kēp amrakati xwỹnhjē mã mēmoj japrōr o ri apa. Kēr ka mē ate amnhī nhīpēx tũmã pãnhã ā amnhī nhīpēx nyw o amnhī nhīpēx anhỹr o ri apa.

²⁹ Nē kēr ka mē amã axpēn kĩnh kamã tãm axpēn mã akapēr o ri apa. Nē akapēr mã agēt kãm ri axpēn mã akapēr kēt nē. Ām axpēn mã akapēr mã aprĩ ho axpēn mã akapēr. Nē mē amã axpēn kĩnh nē mē amã axpēn to mex pix prãm xãj tãm axpēn mã ri akapēr o ri apa.

³⁰ Tirtūm na pre mē pahwyr amnhī Karō rē nhūm mē pahpē hkra hā mē pahkarō mā agjē nē mē pakamā hkrī ho hkrī. Koja mē pakamā hkrī ho hkrī rāhā nhūm nhŷrmā Tirtūm amnhī wyr mē pahto api pu mē kuri pahtir tūm nē papa ho papa. Jakamā kwa kēr ka mē tanhmā amnhī tomnuj to ho amnhī kamā Tirtūm Karō mā hkaprī jagjēnh kēt nē. Nē kām hpijaam jagjēnh kēt nē. Koja mē pahte amnhī tomnuj ā mē pahpumu nē mē pahkaga hkēt tā tee ri ja hā mē pahpumu nē hkaprī nē. Jakamā kēr pu mē ām kām hprām xā hkôt pix mā tanhmā ri amnhī nhīpēx to ho ri papa.

³¹ Nē kēr ka mē axte ri axāhkurē ho ri apa hkēt nē. Nē agryk kām axpēn mā tanhmā akapēr punuj to hkēt nē. Rŷ axpēn japyr ho ri apa hkēt nē. Nē atŷx ri axpēn tā apēr o apikēnh kēt nē. Nē ri axpēn tā mē kām axamnēnh kēt nē. ³² Kēt mē ām axpēn to mex pix nē axpēn kām axukaprī ho ri apa. Nhūm mēhō tanhmā mē ato ka mē ām amnhī tā omu nē tanhmā ho hkēt nē tanhmā kot atoja ho ajamakētcati kurē kumrēx. Tirtūm na pre Kris kukwak ri mē pahte amnhī tomnuj grānh pa nē axte kām hamaxpēr kēt nē. Tā kēr ka mē urāk nē mēhō kot tanhmā atomnuj tota tokyx ho ajamakētcati nē axte kām ajamaxpēr kēt nē.

5

¹ Nē koja mēhō kām hkra japē nhūm amnhī tā omu nē hkīnh nē. Hāmri nē nhŷrmā hkra nē amnhī pyrā nē kām hapē nē. Ja pyrā nē Tirtūm kām mē pahpē hkwyjē japē jakamā kēr pu mē amnhī pyrā nē pamā pahkwjē hkīnh tŷx o papa. ² Kris haxwŷja kām mē pajapē jakamā na pre htyk o mē panē mē pahte amnhī tomnuj pānhā amnhīrer pa. Kēp Tirtūm Kra htā amnhī mex pix kukamā hamaxpēr kēt nē ā mē panē amnhī nhīpēx anē. Tā ā kām mē pajapē anhŷr jakamā nhūm Tirtūm ja hā omu nhūm ja kām mex nē. Te ho mē hkuxwa xā mex kuxwa pyrāk. Jakamā kēr pu mē amnhī tā omu nē urāk nē pamā axpēn kīnh o axpēn to mex o mān ri papa.

Mē pahte amnhī tomnuj kaga hā kot mē pamā karō

Sikūn Korīt 6.14–7.1; Korosē 3.16-17; Wam Juāw 1.5-10, 2.15

³ Nē mē pahpē Tirtūm kra jakamā kēr pu mē pahprō pix tānopxar o ri papa nē nhām mēnijē hō kamā pahpijaam kēt o ri papa hkēt nē.

Nē kēr pu mē amnhī pix kukamā pajamaxpēr kēt nē. Ām ja ho anhŷr hkēt kumrēx. Mē pahpē Tirtūm kra kēnā kot pu kēt axtem nē ā amnhī nhīpēx anhŷr o ri papa. Tirtūm krajaja na htem ā amnhī nhīpēx anhŷr kēt nē.

⁴ Nē määnēn mē pakapērja. Kēr pu mē ri tanhmā axpēn mā pakapēr punuj to hkēt nē. Nē ri axpēn japyr hkēt nē. Nē amnhī krā hkôt pahtŷx ri tanhmā pakapēr to hkēt nē. Ām tām axpēn mā pakapēr mex nē axpēn mā Tirtūm mex o mex ā harēnh o ri papa.

⁵ Nē Tirtūm kapēr kōt amnhī nhīpēx kēt xwŷnhjaja nē axpēn kām mē hpijaam kēt xwŷnhjaja nē amnhī pix kukamā mē hamaxpēr o pa xwŷnhjaja. Ā mē kot amnhī nhīpēx anhŷr xwŷnhjaja kēp Tirtūm mē Kris wa hkra hkēt. Na htem ā amnhī nhīpēx anhŷrja gryk ā wa kām hamaxpēr kēt nē.

⁶ Nē koja nhŷrmā mēhō mē awyr mō nē mē ate tanhmā amnhī tomnuj to prām xāj hēx rom amā kapēr nē mē amā:

—Kwa mon ka hte mē ixpyrā nē ā amnhī nhīpēx anhŷr kēt nē? Ja mex kēnā. Anē.

Koja ā mē amā kapēr anē ka mē ama nē ām ama. Ā mē kot amnhī nhīpēx anhŷr xwŷnhjaja koja Tirtūm nhŷrmā ja hā mē homnuj tŷx kumrēx. ⁷ Jakamā

kwa kêr ka mẽ ate ho mẽ kot amnhĩ nhĩpêx pyrâk pymaj mẽ hkôt ri apa hkêt nê. Kwarĩ ho kwarĩ.

Mẽ pahte amnhĩ nhĩpêx nyw jarênh

Juâw 1.4, 3.19, 8.12, 12.35; Rômân 13.12; Wam Tesarôn 5.5; Wam Juâw 1.5

⁸ Amnepêm kormã mẽ ate Tirtüm kôt amnhĩ xunhwÿr kêt ri na ka prem te kamât kô kamã ri apa pyrã nê atÿx ri tanhmã amnhĩ tomnuj to ho ri apa. Tã ra Jejus kôt amnhĩ xunhwÿ hãmri nê te hirã kamã mẽ apa xwÿnh pyrâk. Jakamã kwa kêr ka mẽ hpãnhã Tirtüm kãm hprãm xã hkôt pix mã mãn ri amnhĩ nhĩpêx o apa. Ra mẽ apê hirã kamã mẽ apa xwÿnh kênã. ⁹ Kot kaj mẽ ã amnhĩ nhĩpêx anê nê tãm amnhĩ nhĩpêx mex nê tãm akapêr o apa. ¹⁰ Jao Tirtüm kãm hprãm xã hkôt pix mã amnhĩ nhĩpêx o ri apa ¹¹⁻¹² nê te kamât kô kamã ri mẽ pa xwÿnhjaja kot amnhĩ nhĩpêx pyrâk o amnhĩ nhĩpêx kêt nê. ã mẽ kot amnhĩ nhĩpêx anhÿr xwÿnhjaja na htem hpimxur pê tanhmã amnhĩ tomnuj tÿx to ho pa. Nom kot paj ixprĩ hã mẽ amã tanhmã mẽ kot amnhĩ tomnuj to hã mẽ harênh kêt nê. Kot pa mẽ amã harê nê xpijaãm tÿx nê. Ixte harênh mã xwÿnhja omnuju. Tã kêr ka mẽ urâk nê ã amnhĩ nhĩpêx anhÿr kêt nê. ãm mẽ noo mã tãm ri amnhĩ nhĩpêx o ri apa. ¹³ Mẽ kot ja hã mẽ apumunh nê tee ri tanhmã kot amnhĩ tomnuj to hkukamã hamaxpêr kaxyw. Jao amnhĩ tomnuj kaga japêr. ¹⁴ Te mẽ kot kanê hpôk rax kãm mẽmoj piitã omunh mexta pyrâk. Tirtüm kapêr ã kagã htüm kot ja jarênh kot:

Nê amã Tirtüm prãm kêt xwÿnhjaja te ra mẽ atyk nê mẽ anhĩkwÿ pyrâk.

Nê te kamât kô kamã mẽ anhôt nê mẽ anhĩkwÿ pyrâk.

Jakamã kwa te mẽ akrã hapôx nê kãnhmã mẽ akrĩ pyrâk o amnhĩ nhĩpêx nê Tirtüm kôt amnhĩ xunhwÿ.

Kê Kris tanhmã mẽ akrã hto ka mẽ te myt kato nhũm mẽ ate arĩgro hã ri apa pyrâk o amnhĩ nhĩpêx. Anê.

Tirtüm krajaja kot tanhmã amnhĩ nhĩpêx to hã mẽ kãm karô

Korosê 4.5; Sikün Ximotre 4.2

¹⁵ Nê kwa kêr ka mẽ amnhĩ pumunh mex o ri apa. Nê mẽ ri htÿx ri mẽ kot amnhĩ nhĩpêx xwÿnhjê hkôt amnhĩ nhĩpêx kêt nê. Nê ãm amnhĩ to mex pix o ri apa. ¹⁶ Na htem ra Kris ã mẽ pahomnuj o pa pu mẽ pamex kêt nê ri papa. Tã nom kêr pu mẽ apkati mẽ arĩ Tirtüm mã tanhmã amnhĩ nhĩpêx to ho papa mã panhÿrer kêt nê.

¹⁷ Nê ãm Tirtüm pix mã amnhĩ jarênh o ri papa nê kãm:

—Pa Tirtüm. Inhmã akôt pix mã amnhĩ nhĩpêx prãm jakamã kwa ixte amã mẽmoj to anhÿr kaxyw ixkrãm ijamaxpêr mex jagjê nê ho amnhĩrĩt mex pa tanhmã amã amnhĩ nhĩpêx to ho ri ixpa.

Anhÿr o amnhĩ to kuwÿ. Nom kêr pu mẽ pahÿtÿx ri pajamaxpêr kôt tanhmã kãm amnhĩ nhĩpêx to hkêt nê.

¹⁸ Nê kêr pu mẽ ri pahpipãnh o papa hkêt nê. Kwarĩ ho kwarĩ. Kot puj mẽ ã amnhĩ nhĩpêx anê nê te kagôxyhti kot amnhĩ tã mẽ pahkaxpre pyrâk o mẽ panhĩpêx pu mẽ tee ri pamã hkaga hprãm kaprÿ. Te kot amnhĩm mẽ pahto arĩk pyrâk o mẽ panhĩpêx nhũm ja mex kêt nê. Na htem pipãnh kãm hamaxpêr mex kêt nê ãm htÿx ri tanhmã amnhĩ nhĩpêx to ho pa. Tã kêr pu mẽ ã amnhĩ nhĩpêx anhÿr hkêt nê ãm Tirtüm Karô pix hkôt mãn ri amnhĩ nhĩpêx o ri papa.

¹⁹ Nê kêr pu mẽ axpên wÿr akuprô nê pahkĩnh kãm Tirtüm mã mex o mex ã harênh pê ho pagrer o pahkrĩ. ²⁰ Nê mẽ pamex nê ri papa rÿ pahpunuj nê ri papa htã arĩ kãm mex o mex ã harênh rãhã ho ri papa. Kêp Mẽpanhĩpêexã

maati jakamã mẽ pahpê Pahihti Jejus Kris kwý hã pu mẽ kãm mex ã harênh rãhã ho papa nê aa ho pajamakêtkati hkêt nê.

²¹ Nê kër ka mẽ Kris ã apijaãm rãhã o ri apa. Jao axpên kôt ajamaxpêr nê axpên kôt ri amnhĩ nhĩpêx mex o ri apa.

Tanhmã mẽ hprô nê mẽ mjên kot axpên nhĩpêx to hã mẽ kãm karô

Wam Korût 11.3; Korosê 3.18-19; Wam Pêtre 3.1-7

²² Nê kër ka mẽ anijaja mẽ amjên ã apijaãm o ri apa. Nê mẽ hamaxpêr mex ã mẽ omu nê mẽ hkôt ri amnhĩ nhĩpêx o ri apa. Te mẽ ate Pahihti Kris kapêr kôt amnhĩ nhĩpêx o ri apata pyrãk. ²³ Kris kêp mẽ pakamã ukapri xwýnh nê kêp mẽ papytãr xwýnh jakamã te kêp mẽ pahpiitã mẽ pahkrã pyrãk. Nê mẽ papajaja te mẽ pahpê i pyrãk. Jakamã na pu htem pahpê ija te mẽ pahkrã kot tanhmã hamaxpêr to xã hkôt amnhĩ nhĩpêx o papaja pyrãk. Ja pyrã nê kër ka mẽ anijaja mẽ amjên jamaxpêr mex ã mẽ omu nê mẽ hkôt amnhĩ nhĩpêx mex nê. ²⁴ Mẽ pahpê Kris kwý jakamã na pu htem hkôt amnhĩ nhĩpêx mex o ri papa. Ja pyrã nê kër ka mẽ amjên kôt amnhĩ nhĩpêx mex o ri apa.

²⁵ Nê mẽ amyjaja. Kër ka mẽ amã aprô hã ma ho ri apa. Te ho Kris kot mẽ pahtã ma ho pata pyrãk. Na pre kãm mẽ pajapê xaj amnhĩ grônh kôt mẽ pahwýr wrý nê mẽ panê ty. Tã kër ka mẽ urãk nê ã amã aprô hã ma ho apa anê. ²⁶ Na pre Kris kãm mẽ pajapê xaj mẽ pahte amnhĩ tomnuj pẽ mẽ pahpytã. Te mẽhõ my kãm mẽhõ ni hkĩnh nê mẽmoj punuj pẽ utãr nê ho hprôta pyrãk. Nhũm te mẽ kot axpên mã wa rer kaxyw nhũm nija ma gõx mã htêm nê wýr nê amnhĩ to mex nhũm mẽ kot axpên kaxyw wa ho mexta pyrãk. Hãmri nê te ra axpên mã wa rer nhũm wa kot axpên kôt pa ho pata pyrãk.

Ja pyrã nê na pre Jejus kãm mẽ pajapê nê kãm amnhĩ kuri mẽ papa ho mẽ papa hprãm xaj mẽ pahwýr wrý nê mẽ pahte amnhĩ tomnuj pẽ mẽ pahpytã nê mẽ pamã Tirtũm kapêr jarênh o pa. Tã mẽ pahpê hkrajaja na pu htem kapêr ma nê hkôt amnhĩ nhĩpêx o papa ho amnhĩ tomnuj kaga. Te gõx kãm mẽ paxwýr nê mẽ pahte amnhĩ nê amnhĩ grã htyk kuhõnh par pyrãk. Jao Tirtũm kapêr kôt pix mã amnhĩ nhĩpêx o ri papa. Te ra paxwýr nê amnhĩ nê tanhmã mẽ pahte amnhĩ tomnuj to grãnh par pyrãk. Nê te mjên mã xwýnh wýr nê amnhĩ to mex pyrãk.

²⁷ ã mẽ pahte amnhĩ nhĩpêx anhýr jakamã te mẽ pamex nê ri papa pyrãk. Hãmri nhũm Krisja ja hã mẽ pahpumu nê kãm mẽ pajapê htýx nê. Jakamã koja nhýrmã akupýn wrý nê ma akupým amnhĩ kôt mẽ pahto api pu mẽ kuri pa htír tũm nê papa ho papa.

²⁸ Nê xã mẽ amyjaja mẽ amã amnhĩ japêê? Nã mẽ amã amnhĩ japê ho na ka htem amã amnhĩ tã ma ho apa. Tã kër ka mẽ aprô nhĩpêx o te ka amã amnhĩ tã mata pyrãk. Jao tãm mẽ hipêx o ri apa. Te war apixire nê war apa pyrãk o wa axpên nhĩpêx. Kot kaj mẽ tanhmã hipêx to nê te ate amnhĩ nhĩ tanhmã hipêx to pyrãk. ²⁹⁻³⁰ Na htem amnhĩ nhĩ ho mex pix o pa nê kamã gryk kêt nê. Nê kãm prãm nê apku. Nê kãm kór nê ixkõ. Nê nhýhýnh ã nê amnhĩ kane. Na pu htem ã amnhĩ to mex o ri papa anê. Ja pyrã nê te mẽ pahpê Kris nhĩ pyrãk jakamã na hte mẽ pahto mex o pa. Te mẽ pamã mẽ papa mẽ pahte amnhĩ nhĩ hã mata pyrãk. ³¹ Tirtũm kapêr ã kagã htũm kot ja jarênh kot:

Koja mẽmyjê hõ hprô kaxyw hãmri nê hipêêxã nê katorxã wa òrkwý kaga nê ãm hprô kôt pix mã hpãnhã ri pa ho pa. Te wa tipxi nê ri pa pyrãk o wa axpên nhĩpêx o pa. Anê.

³² Na pre Tirtũm ã ja jarênh anê. Kapêrja mex tã amnepê mã mẽ pa xwýnhjaja na prem hprĩ hã mar týx kêt nê. Na prem htýx mẽ mjên kot tanhmã mẽ hprô

nhîpêx to pix ã hkamnhîx no ãm ja pix kêt. Määnên te mê pahpê Kris nhî pyrà nê tãm mê pahte amnhî nhîpêx nê axpên nhîpêx o papa hã ã mê pajarênh kot anhÿr. Te ixkre tipxi kamã mê pahte Kris kôt mê papa pyràk o ã mê pajarênh anê.

³³ Jakamã kwa kêr ka mê amyjaja mê amã mê aprõ japê ho ri apa. Te ka amã amnhî tã ma pyràk o mê hipêx. Jao tãm mê hipêx. Nê mê anijaja kêr ka mê ajaxwÿja mê amjên ã apijaàm o ri apa.

6

*Mê hkrajaja kot tanhmã hipêêxà nê katorxà nhîpêx to hã mê kãm karõ
Korosê 3.20-21*

¹ Nê mê apê mê hkrajaja kêr ka mê anhîpêêxà nê mê akatorxà wa kapêr ma nê hã ano htÿx nê wa hkôt ri amnhî nhîpêx rãhã ho ri apa. Mê amã Pahihti Kris kôt amnhî nhîpêx prãm xaj ã amnhî nhîpêx anhÿr o ri apa. Kot kaj mê ã amnhî nhîpêx anhÿrja o amnhî nhîpêx mex o ri apa. ²⁻³ Tirtüm kapêr ã kaga htüm kot ja jarênh kot:

Kêr ka mê anhîpêêxà nê mê akatorxà wa kapêr ma nê wa hkôt ri amnhî nhîpêx. Kot kaj mê ã amnhî nhîpêx anê nê amex nê kritpêm atir nê ri apa ry nê.

Anhÿr jakamã kot kaj mê amã kritpêm atir nê ri apa hprãm hã kêr ka mê ã amnhî nhîpêx anhÿr o ri apa. Kormã mê aprÿre htã ã amnhî nhîpêx anê. E kêr ka mê ã mê anhîpêêxà nê mê akatorxà nhîpêx anhÿr o ri apa.

⁴ Nê mê apê mê hipêêxà nê mê katorxà kêr ka mê akrajê gryk kaxyw mê kãm apêr o apikênh hkêt nê. Tãm mê kãm akapêr nê Pahihti Jejus kapêr o mê ahkre ho ri apa. E kêr ka mê ã akrajê nhîpêx anhÿr o ri apa.

*Mê pahte mê panhõ patrãw kapêr kôt amnhî nhîpêx ã mê pamã karõ
Korosê 3.22–4.1; Wam Ximotre 6.1-2; Xitre 2.9-10; Wam Pêtre 2.18-25*

⁵ Nê mê ate mê kãm mê axápênh o mê apa xwÿnhjaja kêr ka mê anhõ patrãw kapêr ma nê hkôt amnhî nhîpêx mex o ri apa. Te mê ate Kris kapêr mar nê hkôt amnhî nhîpêx pyràk. Jao mê hã apijaàm rãhã nê. ⁶ Nom kêr ka mê ãm mê noo mã pix mã ri mê kãm axápênh mex kêt nê. Määnên mê wa kre kamã mê kãm axápênh mex rãhã nê. Ja na Tirtüm kãm hprãm. Mê apê Tirtüm Kra Kris mã tanhmã amnhî nhîpêx to ho apa xwÿnh jakamã kêr ka mê anhõ patrãw mã axápênh mex o ri apa. ⁷ Nê mê akÿnh kãm mê kãm axápênh mex nê. Te mê ate Pahihti mã akÿnh kãm tanhmã kãm amnhî nhîpêx to pyrà nê mê kãm tãm amnhî nhîpêx pè axápênh mex o ri apa. ⁸ Kot puj mê amnhî kaxyw Tirtüm mã pajamaxpêr pè pahkÿnh kãm tãm amnhî nhîpêx o ri papa nhüm Pahihti ja hã mê pahpumu nê nhÿrmã ja hã mê pahto mex rax nê. Mê pahpê hkrajê piitãã. Mê pahte mê kãm paxápênh xwÿnhjaja nê amnhî mã mê paxápênh xwÿnhjaja nhüm nhÿrmã mê pahpiitã mê pahte tãm amnhî nhîpêx xwÿnhjê ho mex rax nê.

*Mêõ patrãwajaja kot tanhmã kãm mê àpênh xwÿnhjê nhîpêx to
Korosê 4.1*

⁹ Nê mê apê mê õ patrãwajaja kêr ka mê amã mê àpênh xwÿnhjê ho mex nê mê àpênh ã mê kãm axakÿr o ri apa hkêt nê. Tãm mê hipêx. Kaxkwa kamã mê panhõ Pahi Maatija mãäänên kêp mê õ Pahi Maati jakamã ã mê hipêx mex anhÿr o apa. Tãm na kãm mê pahpiitã mê pajapê ho axpên pyràk. E kêr ka mê ã mê hipêx anhÿr o ri apa.

Tanhmā mē pahte Satanasti kutā amnhī to ht̄yx to hā mē pamā karō

Rōmān 16.20; Sikūn Korīt 10.3-5; Wam Tesarōn 5.8-11; Xiakre 4.7; Wam Pētre 5.8-11

¹⁰ E kot paj hpānhā tanhmā mē pahte mēkarōmnuti nhō pahi Satanasti kutā amnhī to ht̄yx to jarē ka mē inhma. Kēr ka mē Pahihti nhỹ hā kutā amnhī to ht̄yx rāhā nē apa. Ate tanhmā amnhī tomnuj to hprām xāj tanhmā kot ato htā ka Tirtūm xiht̄yx o anhōpinh xā kaxw̄ynh kām kutā amnhī to ht̄yx nē. Rỹ koja ate mēmoj mex o anh̄yr nē tanhmā ato ka mē amnhī tā hamaxpēr ā omu nē ām omu nē arī Tirtūm xiht̄yx nhỹ hā tām ajamaxpēr mex rāhā ho ri apa.

¹¹ Na hte pōristijaja pijapu kaxyw hāmri nē amnhī nē kàx o mē ē jagjē nhūm mē tee ri kām mē hkamnhw̄yr prām hkaprỹ. Tā ja pyrà nē koja Satanasti mē ate kapēr kōt tanhmā amnhī nhīpēx to hprām xāj tanhmā mē ato ka mē amnhī tā hamaxpēr ā omu hāmri nē Tirtūm xiht̄yx nhỹ hā kutā amnhī to ht̄yx nē. Jao mē ate amnhī nhīpēx nyw pix o amnhī nhīpēx nē mē ajamaxpēr nyw pix o ajamaxpēr. Kot kaj mē ā amnhī nhīpēx anē nhūm Satanasti tee ri tanhmā kām mē ato hprām hkaprỹ.

¹² Mē pahpē Tirtūm kra jakamā mē kot mē pakutā amnhī xunhw̄yr xw̄ynh maatijaja axtem na mē. Mē kēp mēkarōmnuti jakamā mē pahkīnhā mē ī hkēt. Ām mē hkarō kaxkrit pix na mē. Na htem kōk kōt tanhmā amnhī tomnuj t̄yx to ho pa. Nē mē hiht̄yx. Na htem arī jar pika ja kamā mē kēp Tirtūm kra hkēt xw̄ynh̄jē ho amnhīptā nhūm htem mē hkōt ri ht̄yx tanhmā ri amnhī tomnuj t̄yx to ho pa. Nom amnhī tā mē omunh kēt nē. ¹³ Jakamā kwa kēr ka mē Tirtūm kot mē akarō mā amnhī Karō jagjēnh xw̄ynhta kōt pix mā amnhī nhīpēx o apa. Jao mē ate amnhī nhīpēx nyw kōt pix mā mǎn ri mē amnhī nhīpēx. Kēr kē mēkarōmnuti tee ri kām tanhmā mē ato hprām kaprỹ ka mē arī Tirtūm Karō xiht̄yx nhỹ hā kutā amnhī to ht̄yx rāhā ho apa.

¹⁴ Jakamā kwa kēr ka mē axkām ajamak rom nē te ho sōrdat kot pijapu kaxyw ē jagjēnh pyrāk o amnhī nhīpēx. Na htem amnhī nē mōx kà ho mē ē jagjē nē mē hpre xā ho amnhī pre hpa. Nē hipy kàx o mē hinō kà jagjē. Hāmri nē ri kormā ma mē kām mē hkurē xw̄ynh̄jē kutā mra nē axpu. No mē kajaja kēr ka mē kurom amnhī krām Tirtūm kapēr jaxār t̄yx nē hkōt pix mā ri ajamaxpēr rāhā ho ri apa. Nē hkōt ri amnhī nhīpēx mex nē. Jao te sōrdat pijapu kaxyw kot amnhī nhīpēxta pyrāk.

¹⁵ Na hte sōrdatjaja hpar kà jagjē nē aa hopōx kēt nē. Ām rāhā gōr nē hikw̄ỹ. Jao ra mē kutā pijapu kaxyw amnhī grōnh rāhā gōr nē hikw̄ỹ. Tā kēr ka mē ma mē kām Jejus kot tanhmā mē panē amnhī nhīpēx to hā harēnh o apa kaxyw nē sōrdat pyrā nē amnhī grōnh kōt ma mē hw̄yr apa nē amnhī kamā akahak kēt nē.

¹⁶ Nē sōrdatjaja na htem amnhī nē amnār xā hā kàx po jamỹ nē ho kuhē nhūm mē tee ri kām mē hkamnhw̄yr prām kaprỹ. Ja pyrà nē koja Satanasti tanhmā mē ato ka mē Tirtūm kēp mē anhō pahi hā hiht̄yx o kot Satanasti jakrenhja mā ajamaxpēr kurē kumrēx nē ām hkōt pix mā amnhī nhīpēx. Na hte Satanasti te kot mē pahw̄yr krur rēnh pyrāk o mē panhīpēx. Jao xatā mē pahte Tirtūm kaga hprām xāj tanhmā mē pahto. Nē mē pahte Tirtūm mā tanhmā amnhī nhīpēx to pymaj xatā tanhmā mē pahto kaprỹ. Pu mē amnhī tā omu hāmri nē Tirtūm Karō xiht̄yx nhỹ hā Tirtūm kōt pix mā amnhī nhīpēx.

¹⁷ Nē na hte sōrdatjaja kàx o mē hkrājapap jagjē nē pijapu kaxyw mē kutā mra nhūm mē tee ri mē hkrā jayr prām kaprỹ. Ja pyrà nē kēr ka mē amnhī kaxyw Tirtūm kōt pix mā ajamaxpēr rāhā ho ri apa. Nē ra kot mē ato hkra

mã ajamaxpër rãhã nê. Kê Satanasti tee ri kãm mẽ akrã kamã mẽ amã mẽ ajamaxpër punuj jagjênh prãm hkapyrÿ.

Nê sõrdatjaja na htem mẽ kutã wapo jamÿ nê ho kuhê. Nom mẽ papajaja mẽ panhõ wapoja na axtem kêp Tirtûm kapêr. Na hte Tirtûm Karõ mẽ pahkrã kamã kapêr o amnhîrit pu htem pix mã pajamaxpêr o papa nhùm Satanasti tee ri kãm mẽ pahkrãm mẽ pajamaxpêr punuj jagjênh prãm kaprÿ. Te mẽ papijapu nhùm mẽ pahte amnhî nê ho pakrihkrit pyrãk o hipêx.

¹⁸ ã Satanasti pẽ mẽ pahte amnhî nê amnhî nhîpêx kot anhÿr. Jakamã kêr pu mẽ amnhî to Tirtûm pix wÿr o ri papa kê Satanasti kutã mẽ pahto paxihtÿx pu mẽ hkõt tanhmã amnhî tomnuj to hkêt nê.

Nê kêr pu mẽ mẽmoj to anhÿr kaxyw nê ra Tirtûm Karõ nhÿ hã amnhî to Tirtûm wÿ. Nê kãm amnhî jarênh rãhã ho papa nê aa ja ho pajamakêtkati hkêt nê. Nê Tirtûm krajê piitã mẽ ho hwÿr rãhã ho ri papa.

¹⁹ Nê kwa kêr ka mẽ mãânên ixto Tirtûm wÿr rãhã nê. Kot tanhmã ixto nhùm ixãmnhîx ixte mẽ kãm kapêr jarênh mex o ri mẽ hkõt ixpa kaxyw. Mẽ kot ja hã tanhmã ixto htã pa arî ixãmnhîx mẽ kãm harênh mex o ri mẽ hkõt ixpa. Nê ixprî hã mẽ kãm Jêsus kot tanhmã mẽ panê amnhî nhîpêx to hã harê. Kormã mẽ kot hprî hã ja mar mex kêt. ²⁰ Tã ixte mẽ kãm ja jarênh kaxyw na pre Tirtûm mẽ hwÿr inhmê nhùm prem hã ijaxã pa arî mẽ hagjênh xã kamã ixkrî ho ixkrî. Jakamã kwa mẽ ixto Tirtûm wÿ kê tanhmã ixto ixihtÿx to pa arî mẽ kãm kapêr jarênh o ixkrî. Ja na Tirtûm kãm hprãm nê ijaxwÿja inhmã ja prãm.

*Kagã jatur xã
Korosê 4.7-8*

²¹ Nê ot pa mẽ awÿr Xikitre mẽ. Kot paj mẽ amã kagãja nhîpêx pa nê kãm kugõ nhùm kupy nê ma mẽ awÿr o mõ. Hãmri nê mẽ awÿr o pøj nê mẽ amã kugõ nê mẽ amã tanhmã ijarênh to ka mẽ ijarênh ma nê akînh nê. Xikitre na hte Pahihti mã tanhmã amnhî nhîpêx mex to o pa. Kris kõt mẽ pahtõ na. Nê inhmã hapêê. ²² Tã ot pa mẽ awÿr kumê. Kê mẽ awÿr pøj nê mẽ amã ijarê ka mẽ kam ama nê akupÿm tãm akrã nê tee ri ixkukamã ajamaxpêr kêt nê. ²³ E ixkrãmnhwÿjaja. Kê Mẽpahpãm Tirtûm mẽ Pahihti Jêsus Krisja wa tanhmã mẽ akrã hto ka mẽ ajamakêtkati nê axãmnhîx ri apa. Nê mẽ amã axpên kînh o ri axpên kõt apa. Nê mẽ apiitã wa hkõt ajamaxpêr mex o ri apa. ²⁴ E mẽ amã mẽ panhõ Pahihti Jêsus Kris kînh rãhã ho apa xwÿnhjaja. Kê Tirtûm mẽ ato mex nê mẽmoj to mẽ akutã nojarêr rãhã ho pa.

Tã ãm ja pix na hapêx. Ixpê Pawre na pa mẽ awÿr kagãja nhîpêx nê kumê.

Piripos

Pawre kot Piripos kamā Jejus kôt hkwýjê hwýr kagà nê mēnh

Pawre na pre kagàja nhîpêx. Jejus nhÿ hã mē ahkre o mē pa xwýnhjê hō na pre. Na pre Jejus ā mē kām hkurê xwýnhjaja unê nê ma krî pê Rôm wýr kumê nê kamā haxà nhūm mē haggjēnh xà kamā hkrî ho hkrî. Tã nhūm arî hkrî rãhã Piripos kamā Jejus kôt hkwýjê hwýr kagàja nhîpêx nê kumê. Na prem Pawre jarēnh ma nê kām ukapri nê. Jakamā axpēn kaxyw kàxpore hkwý ho akuprō nê hwýr kumê. Hãmri nhūm omu nê hkînh nê amnhî tã kagàja nhîpêx nê kamā mē kām amnhî jarē nê mē hwýr kumê. Kot amnhî xà htýx kamā hamak o hkrî htã arî hwýr mē mrar xwýnhjê mã Tirtūm kapēr jarēnh rãhã ho hkrî hã amnhî jarē. Nê kām Jejus kot amnhî nhîpêx kôt pix mã amnhî nhîpêx o pa hprãm ā amnhî jarē. Nê kām Jejus jamaxpēr kôt pix mã hamaxpēr prãm ā amnhî jarē. Ā na pre Pawre kagàja kamā mē kām amnhî jarēnh anê. Nê mē kām:

¹ Pa Piripos kamā Jejus Kris kôt ixkwýjaja. Xà mē amex na ka mē apa? E ixpê Pawre na pa mē amã kagàja nhîpêx nê kamā mē amã amnhî jarē nê mē awýr kumê. Nhūm Ximotre haxwýja kām ja mex nê. Wa ixpê Jejus mã tanhmã amnhî nhîpêx to ho wa ixpa xwýnh jakamã na pa wa mē awýr hipêx nê kumê. Mē ate Tirtūm kapēr o mē ajahkre xwýnhjê hwýr nê mē kām mē ate tanhmã amnhî to xwýnhjê hwýr nê mē ate mē mar o akrî xwýnhjê hwýr. Mē apê Kris kôt wa ixtō nê wa ixtōxjê ho ixpimràatã mē awýr hipêx nê kumê. ² E kê Mēpanhîpêxà maati Tirtūm mē Pahihti Jejus Kris wa mēmoj to mē akutã nojarêt rãhã nê ka mē axãmnhîx ri ajamakêtkati nê ri apa ho apa.

*Pawre kot Piripos nhō xwýnhjê ho Tirtūm wýr ā harēnh
Epes 1.15-19; Korosê 1.9-12*

³ Na pa hte xatã mē amã ijamaxpēr o ixkrî nê mē panhō Tirtūm kot tanhmã mē ato mex toja pa kām ijamaxpēr nê ixkînh nê ixkrî. ⁴ Nê Tirtūm mã mē ajarēnh nê mē ato kuwý. Ixkînh kām mē ato kuwý.

⁵ Wam ixte mē awýr inhmōrta ā na pa pre mē amã Jejus kot mē panê tanhmã amnhî nhîpêx to hã harēnh o ri mē akôt ixpa. Ka prem inhma nê hkôt amnhî xunhwýr týx nê hkôt amnhî nhîpêx o ri apa. Jakamã inhma axpēn kaxyw ri kàxpore hkwý nhōr o apa. Te ham mē ate ixwýr mēnhta pyrãk pa pre mē akukwak ri amnhîm ho ixujaprōr o ri ixpa pê nhãm ri mē kām Jejus jarēnh o ri mē hkôt ixpa. Na pa hte arî jam ijamaxpēr rãhã ho ixkînh nê ixkrî. Nê Tirtūm mã mē ate ixtō mex ā kām mē ajarēnh o ixkrî.

⁶ Nê na pa pre ma mē awýr mō nê mē amã Jejus jarē ka prem inhma nê hkôt amnhî xunhwý nhūm Tirtūm ja hã mē apumunh mex nê. Hãmri nê mē ate hkôt amnhî to htýx kaxyw tanhmã mē ato mē axihtýx to. Tã koja arî mē ato mē axihtýx rãhã nhūm Jejus Kris nhÿrmã akupýn mē pahwýr wrý. Koja ā mē ato mex anê. ⁷ Na hte tanhmã ixto mex tota pyrã nê tanhmã mē ato mex to ho pa nê mē akutã nojarêt rãhã ho pa.

Nê kormã mē kot ijaxàr kêt ri pa pre ma mē piitã mē kām Jejus jarēnh o ri ixpa. Nê ãm hãmri mē kām harê. Mē kot mar nê hkôt amnhî xunhwýr týx kaxyw pa pre mē hkôt harēnh rãhã ho ri ixpa. Ka prem ja kaxyw inhma

kàxpore hkwy gō pa pre ho amnhīm ixujaprōr pē mē hkōt ri mē kām harēnh o ri ixa. Tā nhūm prem jar Rōm kamā ijaxà pa arī ixkrī htā ka mē axte ixwyr hkwy mē. Jakamā na pa hte mē amā ijamaxpēr rāhā ho ixkrī nē inhmā mē akīnh tỳx nē. ⁸ Te Jejus Kris kām mē ajapē htỳx pyrāk. Tirtūm kot ja hā xpumunh mex.

⁹⁻¹⁰ Na pa hte mē ato kuwỳ nē kām:

—Pa Tirtūm. E Piripos nhō xwỳnhjē pumu. Na mē ra kām axpēn kīnh o axpēn kōt pa. Kwa tanhmā mē hipēx to kē mē arī kām axpēn kīnh tỳx pix nē. Jao axpēn to mex rāhā ho pa. Nē tanhmā mē hkrā hto kē mē amnhī krām akapēr jaxār tỳx nē. Jao tām amnhī nhīpēx mex nē hamaxpēr mex o ri pa. Nom kormā mē kot ja pumunh tohtuj anhÿr. Tā kēr ka tanhmā mē ho kē mē ā amnhī nhīpēx anhÿr rāhā Jejus Kris akupÿn mē ixwyr wrÿ.

Anhÿr pa hte mē ato hwÿr o ixa. ¹¹ Nà koja Jejus Kris mē akaxwỳnh kām mē ato mē axihtỳx ka mē ÿ hā axihtỳx pē tām ri amnhī nhīpēx nē tām axpēn nhīpēx o ri axpēn kōt apa. Nhūm mē piitā ja hā mē apumu nē axpēn mā Tirtūm mex o mex ā harē.

*Pawre kām Kris kōt amnhī nhīpēx prām ā harēnh
Atrē 28.30-31; Epes 6.19-20; Sikūn Ximotre 2.9*

¹² E Kris kōt ixtō nē ixtōxjaja. Kot paj mē amā tanhmā amnhī jarēnh to ka mē inhma. Na prem ra Jejus ā ixtomnuj tỳx nē hā ijaxà pa amnhī xà htỳx kamā ijamak o ixkrī. Nom mē kot ā inhīpēx anhÿr tā pa hte arī ixkrī xà kamā mē kām Jejus jarēnh o ixkrī. Jakamā na mē ra ohtō nē tanhmā kot mē panē amnhī nhīpēx to hā harēnh ma. ¹³ Pōristi kot inhīhkō hā ixtānopxar xwỳnhjē mē ixwyr mē mrar xwỳnh piitā ixte Kris kapēr jahkre ho ixa pix ā mē kot ijaxār ā ijarēnh ma. ¹⁴ Nē jar Kris kōt mē pahtō nē mē pahtōxjaja haxwÿja ijarēnh ma nē ohtō nē ixpyrà nē Kris nhÿ hā amnhī to htỳx nē arī hkwyjē mā kapēr jarēnh rāhā ho pa. Ixpyrà nē kām mē uma hkēt nē mē kutā amnhī to htỳx pē mē kām harēnh rāhā ho pa.

¹⁵⁻¹⁸ Nē na pre mē hkwyjaja ixte mē amā Kris jarēnh o ixa hā ijarēnh ma nē hā ixkamā gryk nē axtem hamaxpēr nē ixwakre kamā gryk kām mē kām Kris kapēr jarēnh o pa. Na htem hamaxpēr o:

—E kot paj ma Pawre kot ra mē hwÿr mōr xwỳnhjē hwÿr mō nē kot ra mē kām Jejus kapēr jarēnh nhīpy axte mē kām harēnh o ri mē hkōt ixa. Hāmri nhūm mē inhma nē inhgryk ā Pawre kaga. Hāmri nhūm mē hagiēnh xà kamā arī hkrī tā tee ri mē hā ijarēnh ma nē hkaprī nē rī amnhī pumu. Nà kot paj anē.

Anhÿr o hamaxpēr tā pa mē harēnh ma nē ixkaprī hkēt nē. Mē kot mē amā hprī hā Kris kapēr jarēnh kēnā kot pa kēt tee ri mē harēnh ma nē ixkaprī. Kwār mē māmri ri ixkamā gryk kām kapēr jarēnh o ri pa. Pa mē harēnh ma nē ixkīnh nē. Nom na hte mē hkwyjaja jajē rom kām ixkīnh kām mē kām Kris kapēr jarēnh o pa. Nē tām hamaxpēr pē mē kām harēnh o pa. Ra mē kot xpumunh mex jakamā nhūm Tirtūm kot jar mē hwÿr inhmēnh nhūm ixte ām hāmri mē kām kapēr mex jarēnh o ri ixkrī hā xpumunh mex. Jakamā kwār mē māmri tanhmā inhmā hamaxpēr to xà hkōt mē ujarēnh mexja jarēnh o pa. Mē kām ixkīnh kām harē rÿ ixkamā gryk kām ri harēnh o pa. Ām hāmri Kris kapēr jarēnh o pa jakamā pa mē harēnh ma nē ixkīnh nē.

¹⁹ Nē ra mē ate ixto Tirtūm wÿr o apa jakamā koja Karōja ixkaxyw tanhmā jar Rōm kamā pahihti nhīpēx to nhūm tokyx ixkator japēr. Pa ixāmnhix ijamakētkati nē ri ma mē akōt ixa. ²⁰ Nom inhmā Jejus kām hprām xà hkōt

pix mã tanhmã amnhĩ nhĩpêx to ho ixa hprãm. Jakamã koja mẽ ixkator pa ixkĩnh nê arĩ kãm tanhmã amnhĩ nhĩpêx to ho ri ixa. Nom koja mẽ tanhmã hamaxpêr to nê xipĩ pa mẽ kutã mẽ kãm amnhĩ to htỳx nê ixãm rãhã nhũm mẽ xipĩ pa ijamakêtkati nê ty. Kê mẽ ja hã xipumu nê ixtã Kris mex o mex ã harê. Æm Jejus kãm hprãm xã hkôt pix mã na inhmã amnhĩ nhĩpêx prãm. ²¹ Tã kot paj tanhmã amnhĩ to nê arĩ ixtĩr japêr hã kot paj ãm kôt pix mã amnhĩ nhĩpêx rãhã ho ixa. Nom koja mẽ tanhmã hamaxpêr to nê hã xipĩ pa ty nhũm Tĩrtũm ma kaxkwa hwỳr ixkarõ ho àpir kurê kumrêx. Pa Tĩrtũm mẽ Krata wa kuri inhmex o inhmex nê wa kuri ixa ho ixa. ²²⁻²³ Tã nhỹ na we inhmã mex o hõ jakrenh wehe? Na pa tee ri amnhĩ kukamã ijamaxpêr. Inhmã tokyx ixtyk nê Kris kuri ixa hprãm. Ja na inhmã hprãm o inhmã hprãm. Nom ko. Kot pa arĩ ixtĩr nê arĩ mẽ kãm Jejus kot tanhmã mẽ panê amnhĩ nhĩpêx to hã harênh rãhã ho ri ixa. Ko. Ja mããnên inhmã mex. ²⁴ No mẽ amã na arĩ ixtĩr nê xipaja mẽ amã hprãm ²⁵ jakamã kot paj pêr tokyx ixtyk kêt nê. Kot paj arĩ ri mẽ amã Kris kôt mẽ ato mẽ axihtỳx o ri mẽ akôt ixa. Jao ãm ho hkrãnre ka mẽ ra amnhĩ kaxyw kãm ajamaxpêr nê hkôt amnhĩ xunhwỳr tỳx nê. Jao akĩnh nê apa. ²⁶ Tã kot paj nhỹrmã akupỳm ixtĩr rãhã mẽ awỳr mõ ka mẽ xipumu nê akĩnh nê. Jejus Kris kot akupỳm ixkator ã akĩnh nê. Hãmri nê ixtã Jejus mã mex o mex ã harê.

*Mê pahte Jejus ã pahpunuj tã mẽ pahte amnhĩ to htỳx ã mẽ pamã karõ
Rukre 6.22; Sikũn Korĩt 2.14-16; Xiakre 1.12; Jutre 3*

²⁷ Jakamã e kêr ka mẽ Jejus Kris kapêr kôt pix mã amnhĩ nhĩpêx. Nê axpên kôt axpên to axihtỳx pê mẽ kãm Jejus kot tanhmã mẽ panê amnhĩ nhĩpêx to hã harênh o ri apa kê mẽ ama nê mẽ pahpyrà nê hkôt amnhĩ xunhwỳ. E kêr ka mẽ ã amnhĩ nhĩpêx anhỳr o ri apa. Kêr pa nhỹrmã mẽ hagjênh xãja rũm ixkator japêr nê nhỹri ja hã mẽ ajarênh ma rỳ ma mẽ anhõ krĩ hwỳr mõ nê ja hã mẽ apumu nê ixkĩnh nê. ²⁸ Nom kwa kêr ka mẽ amã mẽ kot Kris ã tanhmã mẽ ato xwỳnhjê pyma hkêt nê. Mẽ kot tanhmã mẽ anhĩpêx kati hto htã kêr ka mẽ kutã amnhĩ to htỳx nê mẽ hkôt apa. Kêr kê mẽ amnhĩ tã mẽ apumu nê tee ri hamaxpêr hãmri nê axpên mã:

—Kwa mẽ pahte Kris ã tanhmã mẽ hipêx to htã na htem amnhĩ to htỳx nê arĩ mẽ pamã harênh o ri pa. Pêr mẽ kãm mẽ pahpyma hkêt. Mãn hte Tĩrtũm tanhmã mẽ ho nhũm mẽ ã hã kãm mẽ pahpyma hkêt nã? Kwa tanhmã kot puj mẽ ho nhũm mẽ Jejus kapêr jarênh o pata kaga? Nã kot puj mẽ ãm tee ri hã tanhmã mẽ ho kaprỳ. Mãn ãm hãmri na htem nhỹrmã Tĩrtũm kuri htĩr tũm nê pa ho pa hã amnhĩ jarênh o pa nã? Anê.

Koja mẽ ã mẽ ajarênh anê. Tĩrtũm kot mẽ ato mẽ axihtỳx ã mẽ apumunh kôt. ²⁹ Na pre tanhmã mẽ ato ka mẽ Kris kôt amnhĩ xunhwỳ. Tã mẽ kot tanhmã hã mẽ anhĩpêx to htã na hte Tĩrtũm mẽ kutã tanhmã mẽ ato ka mẽ ã hã amnhĩ to htỳx nê apa. ³⁰ Ijaxwỳja na pa hte amnhĩ xã htỳx kamã ijamak o ixkrĩ. Na pre htem Jejus ã ixtomnuj o pa ka prem ja hã ijarênh ma nê hã xipumu. Tã ota kê mẽ ra axte tanhmã hã inhĩpêx to. Pa kê amnhĩ xã htỳx kãm ijamak o ixkrĩ ka mẽ ijarênh ma. Tã xep mẽ xipyrã nê Kris ã amnhĩ xã htỳx kamã ajamak o apa. Nom kwa kêr ka mẽ tee ri amnhĩ kukamã ajamaxpêr o akapri nê apa hkêt nê.

2

*Jejus kãm mẽ pajapê xãj tanhmã kot amnhĩ nhĩpêx to hã harênh
Rõmãn 15.5-6; Epes 4.1-6; Piripos 2.18*

¹ Nē ra mē pahte Jejus kôt amnhī xunh̄w̄yr jakamā pu mē tee ri amnhī kukamā pajamexpēr o pahkaprī nē ri papa hkêt nē. Ām kām mē pajapēja mā pajamexpēr rāhā ho pahkīnh nē pajamakêtkati nē ri papa. Nhūm Karō mē pahkarō mā agjē nē mē pahto mex nē mēmoj to mē pakutā nojarēt o ri mē pakamā pa. ² Tā kēr ka mē axpēn mar mex nē mēmoj tā axpēn mā axākjēr o ri apa hkêt nē. Te ri ixkre pixi kamā mē atipxi nē axpēn kôt amnhī nhīpēx pyrāk. Nē Tirtūm kām hprām xā hkôt pix mā ajamexpēr o ri apa. Nē mē amā axpēn kīnh o ri apa. Kot kaj mē ā amnhī nhīpēx anē pa ja hā mē apumu r̄y hā mē ajarēnh ma nē ixkīnh t̄yx kumrēx.

³ Nē kwa kēr ka mē axpēn pumu nē ā ajamexpēr anh̄yr kêt nē. Mē ajamexpēr o:

—Tk. Kot pa ri tanhmā jahti ho ajuta hto ho ixpa hkêt nē. Ixte amnhī to rax o hakrenh kēnā kot pa hkêt ri ho ajuta. Kē tām m̄an tanhmā ixto ajuta hto.

Anh̄yr o ajamexpēr kêt nē. Kêt nh̄yri mēhō pumu nhūm tanhmā kute ka hā omu nē ajamexpēr o:

—Hēxta waa nē. Kwa tanhmā kot pa we ho ajuta htoo?

Anh̄yr o ajamexpēr hāmri nē ajamexpēr xā hkôt tanhmā ho ajuta hto.

⁴ Jao Jejus pyrā nē mēmoj to axpēn kutā anojarēt o ri apa. No ri amnhī pix kukamā ajamexpēr o apa hkêt nē. ⁵ Kēr pu mē te Jejus tanhmā hamaxpēr toja pyrāk o pajamexpēr o ri pa.

⁶ Kēp Tirtūm Kra kumrēx jakamā te urāk tā xā na pre ja hā amnhī pumu nē amnhī pix kukamā ā hamaxpēr anē nē hamaxpēr o:

Te ixte Tirtūm pyrāk jakamā mēmoj piitā inhō na. Jakamā kot paj jar kaxkwa kamā inhmex nē ixkīnh nē ixpa ho ixpa nē aa rer nē nh̄yh̄ym inhmōr kêt kumrēx. Anh̄yr o na pre hamaxpēr? Nā na pre ā hamaxpēr anh̄yr kêt nē.

⁷⁻⁸ Kām mē pajapê xāj na pre kaxkwa kamā mēmoj mex piitā rer pa nē man mē pahw̄yr wr̄y nē mē pahpyrā nē ī ho katorxā nhōhy rūm kato.

Kēp mē panhō Pahihti htā te kēp mē panhīō nē te kot amnhī to grire pyrāk o amnhī nhīpēx o ri pa.

Nē Tirtūm kām hprām xā hkôt pix mā amnhī nhīpēx o pa.

Nē ām kôt pix mā amnhī nhīpēx o pa rāhā nhūm prem kupī nhūm arī mē kām xa nē tanhmā amnhī tā mēhō hto hkêt nē.

Na prem hipēx kati nē. Te kēp mē kot amnhī tomnuj t̄yx xw̄ynh̄jē nhīpēx pyrāk o hipēx nē pī kahpa hā kunhō nē kupī.

Tā no nhūm mē kēp tanhmā amnhīmmuj to hkêt nē arī mē kām xa. Mē panē na pre ā amnhī nhīpēx anē.

⁹ Hāmri nhūm Tirtūm ā kot amnhī nhīpēx anh̄yr ā omu nē akup̄ym ho ht̄ir nē akup̄ym amnhī w̄yr ho api.

Nē mex o mex ā harē.

Nē kot nh̄yrmā mē pahpiitā mē pahto amnhīpt̄ar kaxyw mē pakaxyw ām.

¹⁰ Jakamā kot puj mē nh̄yrmā pahpiitā Jejus kutā pahkōnkrā ho rōrōk nē pahkrī hpa nē kax pēē kām mex o mex ā harē.

Mē pahpiitāā. Kaxkwa kamā mē pa xw̄ynh̄jaja nē pika piitā hkôt mē papa xw̄ynh̄jaja.

Nē mē htyk xw̄ynh̄ piitā koja mē akup̄yn ht̄ir pu mē pahpimrāātā Jejus kutā pahkōnkrā ho parōrōk nē pahkrī hpa nē kām mex o mex ā harē.

¹¹ Nē kām:

Pa Pahihti Jejus. Nā ām hāmri na apē mē inhō Pahi Maati hā apyxi mex na ka.

Jakamã mẽ ixtõ kot paj mẽmoj tã tanhmã amã karõ hto? Nà kot paj mẽ ixtõ ã amnhĩ nhĩpêx anhÿr kêt nê. Anê.

Kot puj mẽ nhÿrmã ã Jejus mã pakapêr anê.

Jao mãânên Tirtũm hihtÿx o hihtÿx nê àhpumunh o àhpumunh ã omu. Nê mex o mex ã omu.

Te mẽ pahpê kanhêti pyrãk ã mẽ pajarênh

Matêwre 5.14-16

¹²⁻¹³ Tã kwa ixkrãmnhwÿjaja. Inhmã mẽ akĩnh. Kwa kër ka mẽ arĩ Tirtũm kõt amnhĩ nhĩpêx mex rãhã nê. Te ixte mẽ akamã ixpare ri mẽ ate amnhĩ nhĩpêx mexta pyrãk o ixwakre kamã amnhĩ nhĩpêx mex o ri apa. Na pre ra Tirtũm mẽ panê mẽ pahte amnhĩ tomnuj rê nê tanhmã mẽ pahto pu mẽ ÿ hã kapêr kõt amnhĩ nhĩpêx o ri papa. Jakamã kwa kër pu mẽ axte tanhmã amnhĩ tomnuj to ho papa hkêt nê. Nê mẽ pahte Tirtũm kapêr kwÿm ri amnhĩ nhĩpêx pymaj ãm hkõt pix mã amnhĩ nhĩpêx o ri papa.

¹⁴ Nê kër ka mẽ mẽmoj to anhÿr kaxyw nê agryk kãm tanhmã ri ho hkêt nê. Nê mẽmoj tã axapênh kaxyw nê ri hã axpên mã akapêr kati kamã ho anhÿr kêt nê. ¹⁵⁻¹⁶ Mẽ kot amnhĩ tomnuj xwÿnhjaja na htem ã amnhĩ nhĩpêx anhÿr o pa. No kêt mẽ kajaja. Mẽ ate mẽ hkõt apa htã kër ka mẽ hkõt amnhĩ nhĩpêx kêt nê. Mẽ kurom mẽ apê Tirtũm kra jakamã kër ka mẽ hkõt pix mã amnhĩ nhĩpêx o ri apa. Nê tanhmã amnhĩ tomnuj to rÿ tanhmã ajamexpêr punuj to hkêt nê. Mẽ kot amnhĩ tomnuj xwÿnhjaja te ri kamãt kó kamã ri mẽ kêp àhkĩnh o ri mẽ pa xwÿnhjê kot amnhĩ nhĩpêx pyrãk. Tã kot kaj mẽ hkõt tãm ri amnhĩ nhĩpêx o apa nê te ate kanhêtija kamãt kó kamã hirã ho harir pyrãk o amnhĩ nhĩpêx. Jao mẽ kãm Tirtũm kapêr jarênh o ri mẽ hkõt apa. Mẽ kot amar nê apyrã nê nhÿrmã kuri htir tũm nê pa ho pa kaxyw. Kot kaj mẽ ã amnhĩ nhĩpêx anê nhũm nhÿrmã Jejus Kris akupÿn mẽ pahwÿr wrÿk ã arĩgrota ã pa mẽ apumu nê ixkĩnh nê. Nê ixkĩnh kãm Jejus mã mẽ ajarê nê kãm mẽ ajarênh o:

—Kwa Pahihti. E jajê pumu. Na pa pre mẽ kãm akapêr jarênh o ri mẽ hkõt ixpa nhũm mẽ inhmar tÿx nê nê akapêr kõt amnhĩ nhĩpêx o ri pa. Jakamã na pa pre mẽ kãm akapêr jarênh kaprÿ hkêt nê.

Anhÿr o kãm mẽ ajarê. ¹⁷ Na pa pre mẽ akõt mẽ amã Tirtũm kapêr jarênh o ri ixpa ka prem inhma nê hkõt amnhĩ xunhwÿ. Jakamã te ixte Tirtũm mã mẽ ato ixkĩnh xã nê kãm mẽ anhõr pyrãk.

Nê koja jar Rõm nhõ pahihtija tanhmã ixto hkêt japêr. Rÿ tanhmã ixto. Nom kwãr mẽ mãmrĩ tanhmã kãm ixto hprãm xã hkõt tanhmã ixto rÿ ixpĩ. Koja mẽ ã ixte mẽ anhĩpêx anhÿr ã ixpĩ pa ixkĩnh nê. Nê tanhmã ijamexpêr to hkêt kãm ty. Jakamã na pa ra ã mẽ kot inhĩpêx anhÿrja kukamã mẽ amã amnhĩ kĩnh ã amnhĩ jarê ka mẽ inhma. ¹⁸ Tã kër ka mẽ ixpyrã nê ajaxwÿja ixtã akĩnh nê apa.

Ximotre mẽ Eparoxit wa harênh

¹⁹ Nê koja Pahihti Jejus kãm ja prãm hã kot paj ma mẽ awÿr Ximotre mẽ nhũm ma mẽ awÿr mō nê ri mẽ akõt pa nê tanhmã mẽ ate amnhĩ nhĩpêx to hã mẽ apumu. Hãmri nê man akupÿn ixwÿr mō nê inhmã mẽ ajarê pa mẽ ajarênh ma nê ixkĩnh nê tee ri mẽ akukamã ijamexpêr o ixkrĩ hkêt nê. ãm tãm mẽ akukamã ijamexpêr o ixkrĩ. ²⁰ Ximotre tapxipix na ixpyrã nê kãm mẽ akĩnh nê kãm mẽ ato ajuta hprãm. Na hte mẽ ajarênh rãhã ho pa. ²¹ Nom jar mẽ piitã Ximotre kĩnhã amnhĩ mex pix kukamã hamexpêr o pa nê kãm Jejus Kris kõt tanhmã amnhĩ nhĩpêx to ho pa hprãm kêt nê.

²² Ximotre te kêp ixkra pyrâk. Na hte ixkôt pa nê ixpyrà nê Jejus mã tanhmã amnhĩ nhĩpêx mex to ho pa. Pa pre wa ijamê mê kãm mê ujarênh mex jarênh o wa ri mê hkôt ixpa. ²³ Tã koja mê tanhmã ixtã axpên mar to. Apu mê kot ixpîr ã amnhĩ jarê rÿ ixkator ã amnhĩ jarê. Pa tanhmã amnhĩ tã mê mar to nê rî kormã ma mê awÿr Ximotre mê kê ma mê awÿr mô nê mê amã tanhmã ijarênh to.

²⁴ Nê koja Pahihti Jejus kãm ja mex pa ijaxwÿja ma mê awÿr mô pu mê axte axpên pumu.

²⁵ Nê kot paj tokyx ma akupÿm mê awÿr Kris kôt mê pahtô Eparoxit mê. Na ka prem kãm kãxpore gô nhùm man ixwÿr o mô nê inhmã kugô. Hãmri nê jar inhmã àpênh rax nê ixpyrà nê mê ujarênh mexja jarênh o pa. ²⁶⁻²⁷ Tã ra à htÿx nê. Kironhÿx pre mê pahpê ty. Tã nhùm Tirtûm omu nê kamã ukapri nê. Nê mãânên pa ixkamã ukapri nê. Nê tee ri ixte à htÿx ã omunh nê ixkapri htÿx pymaj akupÿm inhmã ho mex nhùm ra akupÿm mex nê ri pa. Hãmri nê kãm mê apumunh prãm nê. Mê ate à htÿx ã harênh mar nê akapri hã mê ajarênh ma nê tee ri mê akukamã hamaxpêr. ²⁸ Jakamã inhmã akupÿm tokyx mê awÿr mênh prãm. Tã koja mêmô arîgro hã mê awÿr pôj ka mê omu nê akînh nê tãm ajamaxpêr. Pa ijaxwÿja jar ixkînh nê tãm ijamaxpêr. ²⁹⁻³⁰ Na ka prem ixwÿr amê nhùm man ixwÿr mô nê jar ixri mê kãm Kris kapêr jarênh o ri mê hkôt pa rãhã nhÿx hã ty nom kot amnhĩ kamã kahak kêt. Jakamã kê akupÿm mê awÿr pôj ka mê omu nê akînh nê. Nê kahti hkôt amÿ nê ho mex nê. Kêp Kris kôt mê pahtô mex kênã. Á na htem Kris mã mê kot tanhmã amnhĩ nhĩpêx to ho mê pa xwÿnhjê nhĩpêx mex anhÿr o pa.

3

Mêmoj tã mê pahpumunh kôt Tirtûm kot tãm mê paxunhwÿr ã harênh Piripos 2.18, 4.4

¹ E Kris kôt ixtô nê ixtôxjaja. Kris kêp mê panhō Pahihti jakamã kwa mê jam ajamaxpêr nê akînh rãhã ho ri apa.

Na pa ra mê amã mêmoj jarênh rax nê. Nê hã kagà rax tã kormã inhmã ja ho anhÿr kaga hkêt nê. Kot paj axte mê amã hkwy hã kagà. Mê ate hã ano htÿx nê ho apa kaxyw. ² Jakamã e kwa mê okora. Kêr ka mê amnhĩ nê mê kot Tirtûm kapêr o hêx xwÿnhjê pumunh mex o ri apa. Na htem tanhmã mê amã kapêr ho pa nê mê amã:

—Kot kaj mê ixpê Ijaewjê pyrã nê amnhĩ my kwÿt kà jakà hãmri nê apê Tirtûm kra. Anê.

³ Nom ja kot anhÿr kêt. Mê pahte amnhĩ jakâr kôt mê pahpê Tirtûm kra hkêt. Á kot anhÿr ronhÿx pu mê amnhĩ krã hkôt tanhmã amnhĩ nhĩpêx to ho pahpê hkra. Nom ja kot anhÿr kêt. Mê ate amnhĩ jakâr kêt tã mê ixpyrà nê amnhĩ kaxyw Jejus Kris mã ajamaxpêr jakamã mê ixpyrà nê mê apê Tirtûm kra na ka mê. Na ka htem mê ixpyrà nê Karō nhÿ hã kãm mex o mex ã harênh o ri apa nê mê ixpyrà nê Jejus kukwak ri akînh nê ri apa. Nom na pu htem pahpê hkra kaxyw amnhĩ jakâr kêt nê. ⁴ Kop ãm amnhĩ krã hkôt mê pahte amnhĩ to Tirtûm kra ronhÿx pa ra amnepêm amnhĩ to hkra nê ri ixpa. Na pa pre ixpê hkra hprãm xàj amnhĩ krã hkôt tanhmã ri amnhĩ nhĩpêx to rax o ixpa nom ã amnhĩ nhĩpêx anhÿr kaprÿ. E pa ja hã mê amã amnhĩ jarê ka mê ijarênh ma.

⁵ Na pa pre ixkato nê kormã ixtã semãn pixire nhùm mê ixpê Ijaew ã inhmy kwÿt kà krãhta. Nom pa ã mê kot inhĩpêx anhÿr kôt ixpê Tirtûm kra hkêt

nē. Nē inhīpêêxà hkôt ixpê finat Pējamī kanrêhã htàmnhwý jakamã ixpê Ijaew mex na pa. Nē Ijaew kapêr o ixkapêr o ri ixpa. Nom ja kôt ixpê Tirtüm kra hkêt. Nē määnên ixpê Parijew nhõ xwýnh jakamã na pa pre Tirtüm kot finat Mojes mã mẽ pakaxyw mẽmoj tâ karõ kôt pix mã amnhī nhīpêx o ixpa hprãm. ⁶ Jao tee ri mẽ kot Jejus kôt amnhī nhīpêx xwýnhjê pumu nē mẽ homnuj tỳx o ri ixpa. Na pa pre ijamaxpêr o: “Nà mũjjaja na htem mẽ ixkwým ri amnhī nhīpêx o pa.” Anê nē mẽ hipêx kati ho ri ixpa. Nē ijamaxpêr o: “Ra ixte finat Mojes kot Tirtüm nhý hã kapêr piitã hkôt amnhī nhīpêx mex jakamã na pa hte tanhmã ri amnhī tomnuj to ho ri ixpa hkêt nē.” Anê.

⁷ ã na pa pre ixpê Tirtüm kra hprãm xàj amnhī nhīpêx anhÿr o ixpa. Tã nom ãm ã amnhī nhīpêx anhÿr hkapyr. Na htem ã ri amnhī nhīpêx anhÿr kôt kêp Tirtüm kra hkêt nē. Tã pa hpãnhã amnhī kaxyw Kris kôt ijamaxpêr nhũm ixto hkra kurê kumrêx.

⁸ Ra ixte Jejus Kris kôt amnhī xãm jakamã Jejus kêp inhõ Pahihti pa inhmã kapêr kôt pix mã amnhī nhīpêx o ri prãm. No hkrax rùm ixte amnhī nhīpêx tùmja na pa ra Jejus gryk ã hkaga hpa. Te ixte mẽmoj punuj pyr nē amnhī katut kôt mênh nē axte kãm ijamaxpêr kêt pyràk. Jao amnhī kaxyw Jejus kôt pix mã ijamaxpêr o ri ixpa. ⁹ Nom kormã ã ijamaxpêr anhÿr kêt ri na pa pre ixtỳx ri ijamaxpêr o:

—Nà ixte Mojes kot Tirtüm nhý hã kapêr kôt amnhī nhīpêx o ixpa jakamã koja Tirtüm ja hã ixpumun nē ixto hkra.

Anhÿr tã nom ja kot anhÿr kêt. Na htem amnhī krã hkôt tanhmã ri amnhī nhīpêx to ho pa nhũm Tirtüm ãm ja hã mẽ omu nē ãm hã mẽ omu nē mẽ ho hkra hkêt nē. Nom koja mẽ Kris kôt amnhī xunhwý nhũm ja hã mẽ omu nē mẽ ho hkra kurê kumrêx. Jakamã ixte Kris kôt amnhī xãm ã ixpumunh kôt pix mã na pa pre ixto hkra nē inhmex ã ijarê. ¹⁰ Hãmri pa ra inhmã Kris kôt pix mã amnhī nhīpêx o ri ixpa hprãm. Na pre ty tâ akupým htír nē hihtỳx nē àhpumunh tỳx o tanhmã amnhī nhīpêx to ho pa. Tã ijaxwýja inhmã urãn ã amnhī nhīpêx anhÿr prãm. Nē inhmã urak nē amnhī xã htỳx kutã amnhī to htỳx nē ixpa hprãm. Mẽ kot hã ixpír mã tâ pa urak nē Tirtüm kapêr kaga hkêt nē ãm kôt pix mã amnhī nhīpêx o ri ixpa rãhã urak nē hã ty. Ja na inhmã ho anhÿr prãm. ¹¹ Kê Tirtüm kot hipêxta pyrà nē akupým ixto ixtír pa wa kuri ixtír tùm nē ixpa ho ixpa. ¹² Inhmã Kris kôt pix mã amnhī nhīpêx o ixpa hprãm tỳx kumrêx. Kormã ixte hkôt amnhī nhīpêx o inhmõr nē kormã hatur xãm mênh kêt tã inhmã tokyx hatur xãm mênh prãm. Na pa ã inhmã amnhī nhīpêx anhÿr prãm tỳx kumrêx.

Nē na pa hte ixte amnhī tomnuj kêt ã amnhī to jarkrar o ri ixpa hkêt nē. Na pa hte arĩ tõhã tanhmã amnhī tomnuj to nom inhmã ã amnhī nhīpêx anhÿr prãm kêt. Nē na pa kormã ixprĩ hã Kris kot amnhī nhīpêx mar o inhmõr nē hatur xãm mênh kêt tã inhmã hkôt amnhī nhīpêx o inhmõr nē tokyx hatur xãm mênh prãm. Ja kaxyw na pa Jejus Kris amnhī kaxyw ixta. ¹³ Na pa hte mẽ akurom paxpix ixte Jejus kãm hprãm xã hkôt amnhī nhīpêx o ixpa hã amnhī to jarkrar kêt nē. Nom ra ixte tanhmã amnhī tomnuj to ho ixpata pa axte kãm ijamaxpêr kêt nē. Te amnhī katut kôt ixte rênh par pyràk o hipêx nē axte kãm ijamaxpêr kêt nē. Nē Jejus kãm hprãm xã hkôt pix mã amnhī nhīpêx prãm xàj amnhī kaxyw kãm ijamaxpêr o ri ixpa.

¹⁴ Koja nhÿrmã Tirtüm ixpê Kris kwý hã amnhī wýr ixwý nē inhmã:

—E amnê ixwýr api Pawre. Kot kaj jarãhã amnê mẽ ixwýr api.

Anhÿr o nhÿrmã inhmã kapër jakamã na pa hte amnhĩ tã ãm pix jamãr rãhã ho ixpa. Pê ra Jejus kot amnhĩ nhĩpêx piitã omunh par o mō. Nã kot paj gaa nê hkôt pix mã amnhĩ nhĩpêx mex o ri ixpa. ¹⁵ Kwa kër pu mē pahpiitã ã pajamxpêr anê. Jao amnhĩ wÿr hamãr pê hkôt pix mã amnhĩ nhĩpêx o ri papa. Mē pahpiitã mē pahpê Kris kwÿ kênã. Nom kot ka mē atō ja kaxyw tee ri amnhĩ kukamã ajamxpêr nê ajamxpêr o:

—Nã tanhmã kot paj we amnhĩ to nê Jejus kôt amnhĩ nhĩpêx mex rãhã o ri ixpa? Ja kaxyw ixãhpumunh tÿxre hã. Anê.

Hãmri nê ã ajamxpêr anhÿr o apaja apê hihtÿx japêr. Hã koja Tirtüm hprĩ hã tanhmã amã ja kukamã harênh to nê kaxyw ato axihtÿx ka ixpyrà nê hkôt pix mã ri amnhĩ nhĩpêx o apa. ¹⁶ Jakamã kër pu mē ãm Tirtüm kãm hprãm xã hkôt pix mã tanhmã kãm amnhĩ nhĩpêx to ho papa. Ra mē pahte hkôt amnhĩ nhĩpêx o papa xãja kôt pix mã arĩ amnhĩ nhĩpêx rãhã ho papa.

¹⁷ E Kris kôt ixtō nê ixtōxjaja. Na pa ra mē anoo mã Jejus kôt tãm ri amnhĩ nhĩpêx o ri ixpa. Tã kër ka mē ja hã ixpumu nê ixpyrà nê hkôt amnhĩ nhĩpêx o ri apa. Hãmri nê nhÿri mē kot ixpyrà nê ã amnhĩ nhĩpêx anhÿr xwÿnhjê hō pumu nê urak nê ã amnhĩ nhĩpêx anê. ¹⁸⁻¹⁹ Jejus kot mē pamã mē pahte amnhĩ tomnuj mÿrapê pĩ kahpa hã mē panê htykja nhùm mē ra ohtō nê hprĩ hã mar tã hkôt amnhĩ xunhwÿr kêt nê. Mē kãm ã kot amnhĩ nhĩpêx anhÿrja ã mar prãm nõkati. Jakamã te mē kãm Jejus kurê xwÿnh pyrak. Na htem hã hpijaam kêt kãm tanhmã ri amnhĩ tomnuj to ho pa. Nê kãm amnhĩ mex pix prãm. Nê tanhmã amnhĩ tomnuj to nê ja hã amnhĩ pumu nê hkĩnh nê. Nom tee ri ja hã amnhĩ pumu nê hkaprĩ nê ri pa hkêt nê. Tã ã mē kot amnhĩ nhĩpêx anhÿr jakamã koja mē nhÿrmã ma mē kot amnhĩ xã htÿx kamã hamak o pa tùm xata wÿr hapêx. Nã koja mē ã amnhĩ nhĩpêx anê. Ra ixte mē amã ja hã mē harênh rax tã pa axte mē amã mē harê. Inhmã mē hkaprĩ hkôt na pa hte xatã mē amã ja hã mē harê. ²⁰ Kêt mē papajaja mē kurom mē pahpê kaxkwa nhō xwÿnh nom kormã. Kojã nhÿrmã Jejus Kris akupÿn mē pahwÿr kaxkwa rüm wrÿ. Mē papytãr xwÿnh maati Pahihtija akupÿn wrÿ hãmri nê ma akupÿm amnhĩ kôt mē pahto api. Jakamã na pu htem arĩ pahkĩnh pê amnhĩ wÿr kamã pajamak rãhã ho ri papa. ²¹ Na pu htem jar pyka ja kamã Jejus kĩnhã paxirerek nê pahpunuj nê ri papa. Nom koja nhÿrmã akupÿn mē pahwÿr wrÿ hãmri nê amnhĩ pyrã nê mē pamã mē panhĩ nyw gō pu mē urak nê paxihtÿx kãm pahtür tùm nê papa ho papa. ã kot mē panhĩpêx anhÿr kaxyw ãhpumunh o ãhpumunh. Tã koja ãhpumunh tÿx kãm mēmoj piitã ho amnhĩptãr pa. Pu mē pahpiitã hkôt amnhĩ nhĩpêx mex rãhã ho ri papa.

4

*Pawre kot mēmoj tã mē kãm karō
Epes 4.3; Piripos 2.2; Korosê 3.15*

¹ E Kris kôt ixtō nê ixtōxjaja. Inhmã mē ajapêê. Na pa hte mē ato ijamak o ixkrĩ nê mē amã ijamxpêr nê ixkĩnh nê. Nê jar mē pahkwÿjê mã mē ajarênh o ri ixkrĩ. E kwa kër ka mē arĩ Pahihti kapêr kôt pix mã mân amnhĩ nhĩpêx mex rãhã ho ri apa.

² Nê wa ka Ewox mē Sïxika wa. Na ka xep hte wa mēmoj tã axpên kamã agryk rãhã ho ri apa. Kwa wa ã amnhĩ nhĩpêx anhÿrja mã anhÿre nê tãm axpên nhĩpêx. Pahihti Kris kôt war ate axpên to war atōx kênã kot ka kêt wa axtem nê mēmoj tã axpên kamã agryk o ri apa.

³ Nē ka Xikitre. Apē ixkràmnhwỳ mex jakamā kēr ka axpēn tā wa nita wa kām akapēr kām axihtỳx nē kē war ama nē akupỳm tām axpēn nhīpēx. Na pre wa ra Kremēn mē hkwỳjē mē hpimràatā ixpyrà nē Jejus kot tanhmā mē panē amnhī nhīpēx to hā harēnh o ri pa. Tirtūm nhō kagā kamā mē hixi piitā hkwỳ. Mē pahtūr tūm nē mē papa mā xwỳnhjaja ra Tirtūm nhō kagā kamā mē panhīxi jaxwỳr par.

⁴ Nē kēr ka mē apē Pahihti hkwỳ hā akīnh nē ri apa. Mē ate ā amnhī nhīpēx anhỳr o apaja na pa inhmā hprām tỳx jakamā kot paj axte mē amā harē. Kwa kēr ka mē akīnh nē ri axpēn kōt apa.

⁵ Pahihti Jejus ra akupỳn mē pahwỳr nojarēt jakamā kēr ka mē kutēp mē piitā ri mē ho mex o ri mē hkōt apa.

⁶ Nē kēr ka mē tee ri amnhī kukamā ajamaxpēr o ri apa hkēt nē. Arī amnhī to Tirtūm wỳr rāhā nē. Kot ka mē mēmo arīgro hā apē amrakati japēr nē tee ri ja hā amnhī pumu nē amnhī to awỳ kē mē ama nē mē amā mēmoj gō. Rỳ mē ate mēmoj tā hwỳr xwỳnhnta tanhmā mē amā hipēx to ka mē amnhī tā omu nē kām:

—Nā ām hāmri na ka ā inhīpēx anē nē inhmā ja gō Tirtūm. Amex o amex.

Anhỳr o kām amnhī jarē. ⁷ Kot kaj mē ā amnhī to hwỳr anhỳr o ri apa nhūm tanhmā mē akrā hto ka mē mē apē Jejus Kris kwỳ hā ajamakētkati nē axàmnhīx ri apa. Hāmri nē mēmoj tā tee ri amnhī kukamā ajamaxpēr o ri akaprī nē apa hkēt nē. Ām akīnh rāhā ri apa. Tirtūm kot tanhmā mē pahto nhūm mē pajamakētkati nē ri mē papaja mē pahte amnhī tā omunh kēt. Ām tapxipix kot ā mē panhīpēx anhỳr kukamā àhpumunh tỳx.

⁸ E Kris kōt ixtō nē ixtōxjaja. Nā ixkapēr ā kagā jatur xà na ja. Kwa kēr ka mē ixujarēnh mar tỳx nē hkōt amnhī nhīpēx o apa.

Nē kēr ka mē axápēnh mex pix kukamā ri ajamaxpēr o apa.

Nē mēmoj mex pix kukamā ri ajamaxpēr.

Nē axpēn mā akapēr mex pix kukamā ri ajamaxpēr.

Nē akatāt kōt akapēr xàptār pix o axpēn mā akapēr hkukamā ri ajamaxpēr o ri apa.

Nē tām ri amnhī nhīpēx hkukamā mǎn ajamaxpēr o ri apa.

Nē mē piitā ri mē ho mex o apa hkukamā ajamaxpēr.

Nē mē akapēr mex pix kukamā mǎn ajamaxpēr o ri apa.

E kēr ka mē ā amnhī nhīpēx anhỳrja kukamā ajamaxpēr rāhā ho ri apa.

⁹ Nē mē akōt ixpare ri na pa pre Kris kōt amnhī to mex pix nē tām ixkapēr o ri ixpa. Tā kēr ka mē ixpyrà nē ā amnhī nhīpēx anē. Kojā Tirtūm ja hā mē apumu nē mē akōt ri pa ho pa. Kēp mē pamā mē paxàmnhīx pajamakētkati xà nhōr xwỳnh na.

*Mē kot Pawre hwỳr mēmoj mēnh nhūm kot omunh nē hkīnh ā harēnh
Sikūn Korūt 11.7-9; Piripos 1.5*

¹⁰ Nē amnepēm na ka prem xatā tanhmā ixto mex to ho ri apa. Tā axte ā inhīpēx anhỳr prām nom mē apē awry nē ixpa jakamā ka xep prem tee ri tanhmā ixto mex to hkukamā ajamaxpēr kaprỳ. Tā jar mē kot ijaxār ā ijarēnh ma nē ixwỳr Eparoxit mē nhūm man ixwỳr mō nē inhmā kàxporeta gō. Mē amā ijarē hā ixwỳr amē pa omu nē ixkīnh tỳx nē. Nē ixkīnh kām Tirtūm mā mē ajarē. Ām hāmri na ka prem ixwỳr amē.

¹¹⁻¹² Nē na pa hte tanhmā ixkute htā arī ixkīnh nē ijamakētkati nē ri ixpa. Jakamā kot pa mēmo arīgro hā ixpē amrakati nē inhmā prām japēr tā no ām tee ri amnhī kukamā ijamaxpēr o ri ixkaprī hkēt nē. Arī ixkīnh rāhā ixàmnhīx

ri ixpa. Rỳ pa inhõ mẽmoj rax japêr nê mãânên ixkĩnh nê ixàmnhĩx ri ixpa. Na pa pre tõhã inhõ rax nê ixpa. Nê tõhã inhõ hkêt nê ixpa. Tã arĩ ixkĩnh rãhã nê ixpa ho ixpa. ¹³ Na hte Kris mẽmoj piitã hkukamã ixto ixihtỳx pa ỳ hã mẽmoj kutã ixihtỳx nê ixpa. Jao mẽmo arĩgro hã inhmã prãm tỳx nê ri ixpa htã ỳ hã kutã ixihtỳx nê ixàmnhĩx ri ixpa. ¹⁴ Tã jar ixpunuj nê ixkrĩ ka mẽ ijarênh ma nê ixwỳr kàxpore hkwy rê. Æm hãmri na ka prem ixwỳr arê. ¹⁵ Amnepêm na pa pre mẽ anhõ pika pê Masetõn rùm ixkato nê mẽ piitã mẽ kãm Jejus kot tanhmã mẽ panê amnhĩ nhĩpêx to hã harênh o ri ixpa ka mẽ xatã ixwỳr kàxpore hkwy rê pa ho amnhĩm ixujaprõr o ri mẽ hkõt ixpa. Mẽ apê Piripos kamã Kris kõt ixtõ nê ixtõx pixjaja na ka prem ã inhĩpêx anê. Krĩ hkwy kamã Kris kõt mẽ pahkwỳjaja na mẽ akĩnhã ã inhĩpêx anhỳr kêt nê. Æm mẽ kapxipix na ka pre ã ixto mex anê. ¹⁶ Tesarõn kamã xpare ri na pa pre ixpê amrakati kumrêx nê ri mẽ hkõt ixpa ka mẽ xatã ixwỳr kàxpore hkwy rê pa pre ho amnhĩm ixujaprõr rãhã ho ri mẽ hkõt ixpa. ¹⁷ Nom mẽ ate ixwỳr hkwy rênh kaxyw mẽ akamã ijamak o ri ixpa hkêt nê. Rỳ ijamaxpêr o:

—Ko. Koja Piripos nhõ xwỳnhjaja ijarênh ma nê kãm ixkaprĩ nê ixwỳr kàxpore hkwy rênh japêr.

Anhỳr o mẽ akukamã ijamaxpêr kêt nê. Nom ra mẽ ate ixwỳr hkwy rênh jakamã koja Tĩrtũm ja hã mẽ apumu nê mẽ ato mex nê. Æ mẽ pahte xepên kutã panojarêt anhỳrja na kãm hprãm.

¹⁸ Tã nhũm Eparoxitja ham mẽ arũm kato nê man ixwỳr mõ nê inhmã kàxporeta gõ. Kwa na ka mẽ inhmã õr rax nê. Koja tokyx ixpê hapêx kêt pa kritpêm ho ixàpkur o ixkrĩ. Tã ot pa ho kõta nê tanhmã hkre kamã kute pumunh xã hkõt hã kagã nê mẽ awỳr kumê. Nã mẽ ate ixwỳr axàmnhõrta na Tĩrtũm omu nê ixtã mẽ apumu nhũm ja kãm mex kumrêx. Te mẽ kot mẽ hkuxwaxã hpãr nhũm mẽ kãm mexta pyrãk nhũm ja kãm mex nê. ¹⁹ Nã koja Tĩrtũm mẽ apê Jejus Kris kwỳ hã mẽ amã mẽ ate mẽmoj to presija xã nhõr rãhã ho pa. Mẽmoj piitã kêp õ kênã.

²⁰ E kêr pu mẽ Mẽpanhĩpêêxã maati Tĩrtũm mã mex o mex ã harênh rãhã o papa. Ja na inhmã hprãm.

²¹⁻²² Nê ot pa mẽ jar ixpiitã mẽ apê Jejus Kris kõt mẽ ixkwỳjê hwỳr kagàja kamã mẽ xpêr mẽ. Mẽ ixpyrà nê mẽ apê Tĩrtũm kra hã. Pa nê Kris kõt mẽ pahõtõ nê mẽ pahõtõxjaja. Nê Rõm nhõ pahi mã mẽ àpênh xwỳnh kot Kris kõt amnhĩ xunhwỳr xwỳnhjaja mãânên. Æm jar mẽ ixpê Tĩrtũm krajê piitã pa mẽ awỳr xpêr mẽ.

²³ E kê Pahihtĩ Jejus Kris mẽmoj to mẽ akutã nojarêt rãhã nê. Jao mẽ ato mex o pa.

Tã ãm ja pix. Ixpê Pawre na pa mẽ awỳr kagàja nhĩpêx nê kumê.

Korosê Pawre kot Koros kamã Jejus kôt hkwyjê hwÿr kaga nê mênh

Pawre na pre kagàja nhîpêx. Jejus nhÿ hã hkrajê jahkre o mē pa xwÿnhjê hō na pre. Tã nhūm mē kēp Jejus kra hkēt xwÿnh kwÿjaja Jejus ã unē nê haxã nhūm arî hkrî ho hkrî. Hãmri nê krî pē Koros kamã Jejus krajê mã kagà nhîpêx nê mē hwÿr kumē. Koros kamã Jejus kwÿjê kamã Ijaew kwÿ nê kamã Ijaew kêt xwÿnh kwÿ nhūm Pawre mē ho hpimràatã mē hwÿr kumē. Kormã mē hwÿr mōr nê mē omunh kêt tãã. Nê kagàja kamã mē kot tanhmã Jejus o hêx to ho pa xwÿnhjê jarēnh to. Jejus kēp Tirtūm Kra hkēt ã mē kot ho hêx xwÿnhjê jarē nê mē nê mē kãm kapēr. Mē kot mē hkôt amnhî nhîpêx kêt kaxyw mē kãm kapēr nê hã kagà nê mē hwÿr kumē nê mē kãm:

¹ Pa Koros kamã Kris kôt ixkwÿjaja. Xà mē amex na ka mē apa? Ixpê Pawre na pa mē awÿr kagàja nhîpêx nê mē awÿr kumē. Kris kôt mē pahtō Ximotre mē wa kumē. Ixte Jejus Kris nhÿ hã mē ahkre ho mē ixpa xwÿnhjê hō na pa. Tirtūm kãm hprãm xã hkôt. ² Tã pa mē awÿr kaga nhîpêx nê kumē. Mē apê Kris kôt mē ixtō nê ixtōx na ka mē. Na ka xep htem Kris kapēr kôt amnhî nhîpêx mex o ri apa. E kē Tirtūm mē apê hkra hã mē akutã nojarêt rãhã nê. Ka mē amex nê ajamakêtkati nê axãmnhîx ri tanhmã amnhî nhîpêx ho ri apa.

*Koros nhō xwÿnh kwÿjaja kot Jejus kôt amnhî xunhwÿr ã mē harēnh
Wam Tesarōn 1.2-5*

³⁻⁴ Na pa ra Ximotre mē wa mē ajarēnh ma. Mē ate amnhî kaxyw Jejus Kris kôt ajamaxpēr tÿx nê hkôt amnhî nhîpêx mex o apa hã mē ajarēnhja ma. Nê mē kot Tirtūm kôt amnhî xunhwÿr xwÿnh piitã mē amã mē hkînh ã mē ho mex o apa hã mē ajarēnhja ma nê wa ixkînh nê. Jakamã na pa wa Pahihti Jejus Nhîpêxã Tirtūm mã amnhî jarēnh kaxyw nê kãm mē anhÿ hã wa ixkînh ã amnhî jarē. ⁵ Na pre Epas ma mē awÿr mō nê mē amã Jejus kot tanhmã mē panê amnhî nhîpêx to hã harēnh o mē akôt pa. ãm hãmri kot mē amã harēnhja. Tã ka xep prem ama nê amnhî kaxyw hkôt ajamaxpēr nê hkôt amnhî xunhwÿ. Hãmri nê amnhî wÿr Jejus jamãr o ri apa. Koja nhÿrmã akupÿn mē pahwÿr wrÿ nê amnhî pyrà nê ma akupÿm kaxkwa hwÿr mē pahto api nê mē pahto mex kumrêx o mē pahkôt pa ho pa. Tã ka xep htem amnhî kaxyw hkôt ajamaxpēr tÿx nê ã kot amnhî nhîpêx anhÿr kutêp amnhî wÿr kamã ajamak rãhã nê. Nê mē amã mē kot Tirtūm kôt amnhî xunhwÿr xwÿnhjê hkînh tÿx nê.

⁶ Na hte Tirtūm ãm hãmri mē pahto mex pix rãhã ho pa. Nê mēmoj to mē pakutã nojarêt rãhã nê. Tã wam mē ate harēnh marta ã ka mē hkôt amnhî xunhwÿr kurê kumrêx nê ri kapēr kôt axpēn kôt amnhî nhîpêx mex pix o ri apa. Jao hkôt pix mã amnhî nhîpêx mex nê. Tã na hte pika piitã hkôt ri mē pa xwÿnh kwÿjaja mē apyrã nê Jejus jarēnh ma nê hkôt amnhî xunhwÿ. Nê mē apyrã nê axtem hkôt pix mã amnhî nhîpêx nê kapēr kôt amnhî nhîpêx mex o ri pa.

⁷ Nê mē awÿr mōrta ã na pre Epasja mē amã Tirtūm kapēr jarēnh o ri mē akôt pa ka prem ama nê amnhî kaxyw hkôt ajamaxpēr nê hkôt amnhî xunhwÿ. Epasja wa ixpyrà nê kot Kris mã tanhmã amnhî nhîpêx to ho pa xwÿnh. Nê wa inhmã hapêe. Na pre katãt kôt mē amã Tirtūm kapēr jarēnh

pa. Kot mēmoj to mē pakutā nojarêr rāhā hā harēnh o ri mē akôt pa. ⁸Tā man akupÿn wa ixwÿr mōn pōj nē wa inhmā tanhmā mē ajarēnh to. Tirtūm Karō nhÿ hā mē amā Kris kôt atō nē atōx piitā mē hkīnh o ri apa hā mē ajarē. Pa wa mē ajarēnh ma nē wa ixkīnh tÿx kumrēx.

Pawre mē Ximotre wa kot Koros kām hkwyjê ho Tirtūm wÿr ā wa harēnh

Epes 1.15-23, 3.14-21; Piripos 1.9; Wam Tesarōn 5.23-24; Sikūn Tesarōn 1.11, 2.16

⁹Nē na pre Epas akupÿn wa ixwÿr pōj nē wa inhmā tanhmā mē ajarēnh to. Mē ate amnhī kaxyw Jejus kôt ajamaxpēr o apa nē mē amā Kris kôt akwyjê piitā mē hkīnh o ri apaja nhūm wa inhmā mē ajarē. Pa wa mē ajarēnh ma nē mē ato Tirtūm wÿr rāhā o jar mē haggēnh xā kamā ixkrī. Nē arī mē ato hwÿr rāhā ho ixkrī. Nē mē ato hwÿr o:

—Pa Tirtūm. Ot pa Ximotre mē wa Korosē nhō xwÿnhjê ho awÿr kaxyw amā mē harē. Kwa tanhmā mē hamaxpēr to kē mē amā hprām xā hkôt pix mā amā tanhmā amnhī nhīpēx to ho pa. Nē Akarō nhÿ hā hprī hā akapēr ma nē am hkôt pix mā tanhmā amnhī nhīpēx to ho pa. Anē.

¹⁰Na pa hte wa ā mē ato Tirtūm wÿr anhÿr rāhā ho ixkrī. Kot kaj mē ā amnhī nhīpēx anhÿr o ri apa nē Jejus kot amnhī nhīpēx o amnhī nhīpēx mex o ri apa. Nē aprī hā Tirtūm kot amnhī nhīpēx ā omunh mex o mō. Jao mēmoj to xypēn kutā anojarēt pix o ri apa hprām. Hāmri nhūm Tirtūm ja hā mē apumu nē hkīnh nē. ¹¹Tirtūmja mē pakurom mēmoj piitā kaxyw āhpumunh o āhpumunh. Nē mēmoj piitā kaxyw hihtÿx o hihtÿx. Jakamā na pa hte wa mē ato hwÿr o:

—Pa Tirtūm. Kwa tanhmā Koros nhō xwÿnhjê ho kē mē axihtÿx nhÿ hā mēmoj punuj kutā amnhī to htÿx nē. Mē kot Jejus ā tanhmā mē ho nhūm mē kot amnhī xā kamā hamak tā kē mē tee ri amnhī kukamā hamaxpēr o hkaprī nē ri pa hkēt nē. Am anhÿ hā mē hkurē xwÿnhjê kutā amnhī to htÿx nē hkīnh kām ri pa ho pa. Anē.

Na pa hte wa ā mē ato hwÿr anē.

¹²Na pre ra Tirtūm amnhī ri mē pakutēp mēmoj mex kwÿ jaxwÿ. Mē pahpē hkrajē mā haxwÿ. Tā ka mē ŷ hā tām amnhī nhīpēx o apa jao mē ate mēmoj mex jamÿnh mā tām. Ō krī nhīrā rax kumrēx kamāā. Jakamā kwa mē kot Jejus ā tanhmā mē pahto htā kēr pu mē arī Tirtūm mā mex o mex ā harēnh rāhā ho ri papa.

¹³Nē Satanasti kēp kamāt kō kamā mē kot amnhī tomnuj ho mē pa xwÿnhjê pām. Tām na hte mē ho amnhīptār o pa nē hkôt na pu prem amnhī nhīpēx o papa rāhā nhūm Tirtūm tee ri ja hā mē pahpumu. Hāmri nē kām kēp mē papytār prām xāj mē pahwÿr Kra japē htÿx kumrēx xwÿnhja mē. Nhūm mē pahwÿr wrÿ nē mē panē htyk o mē pahte amnhī tomnuj pānhā kām amnhīre. Tā pu prem hkôt amnhī xunhwÿ nhūm Tirtūm hā mē pahpumu nē mē panē mē pahte amnhī tomnuj o hapēx pa. Te kot amnhī katut kôt rēnh par pyrāk. Jao Satanasti pē mē pahpytā nhūm hpānhā Jejusja tām kēp mē pahto amnhīptār o pa xwÿnh.

¹⁴Ra htyk o mē pahte amnhī tomnuj piitā hpānhā amnhīrer jakamā na pu htem hkôt amnhī xunhwÿ nhūm mē pahte amnhī tomnuj o hapēx pu mē axte Satanasti hkôt ri amnhī nhīpēx kēt nē. Am Jejus kôt pix mā amnhī nhīpēx o ri papa.

Kris mē Tirtūm wa kot amnhī nhīpēx te wa kot xypēn pyrāk ā harēnh

Juāw 1.1-5; Korosê 2.9; Eprēw 1.1-14

15 Nê Krisja te kot Tirtûm pyrâk. Mê pahte pano ho Tirtûm pumunh kêt tâ Kra Kris kot amnhî nhîpêx â harênh mar kôt määñên Tirtûm kot amnhî nhîpêx â omunh mex nê. Amnepê mâ kormâ mêmoj kêt ri nhûm Jejus pa ho pa râhâ nê. Jakamâ kot amnhî to rax o Tirtûm kot mêmoj to katorja piitâ hakrenh par kumrêx. 16 Na pre hipêêxâ Tirtûm nhÿ hâ mêmoj piitâ ho kator pa. Kaxkwa kamâ nê pika hkôt mêmoj piitâ ho kator pa. Nê kaxkwa kamâ mê pahte pano ho mêmoj pumunh par xwÿnhjaja nhûm pre ho kato. Nê kamâ mê pahte pano ho mêmoj pumunh kêt xwÿnhjaja nhûm pre määñên ho kato. Nê kapêr o wrÿk xwÿnhjaja nê mê hkrâhtûmjaja nhûm pre mê ho kato. Nê pika kamâ mê ho amnhîptâr xwÿnhjaja nhûm pre mê piitâ mê ho kator pa. Kâm hprâm xâ hkôt Tirtûm nhÿ hâ mêmoj piitâ ho kator pa.

17 Tâ na hte arî kaxkwa kamâ nê pika hkôt mêmoj piitâ hamâr râhâ ho pa. Kêp apu kot hamâr kêt ronhÿx mêmoj piitâ akupÿm hapêx pa.

18 Nê tãm na hte mê pahpê hkrajê ho amnhîptâr o pa. Te kêp mê pahkrâ nhûm te mê pahpê î pyrâk jakamâ na pu htem kapêr kôt pix mâ amnhî nhîpêx o papa. Kumrêx na pre akupÿm htîr ò htîr jakamâ kot amnhî to rax o mêmoj piitâ hakrenh par.

19 Nê na pre Tirtûm â hamaxpêr anê nê hamaxpêr o: “Nà Ixkra mê wa ixte amnhî nhîpêxja te kot axpên pyrâk. Nê wa ixihÿx määñên te kot axpên pyrâk. Nê wa inhmex xâ mê wa ixâhpumunhja te kot axpên pyrâk. Â wa ixte amnhî nhîpêx kot anhÿr. Wa ixte amnhî nhîpêxja na mex kumrêx.” Anê.

20 Tâ Jejus kot pî kahpa hâ mê panê tyk nê hkamrô pikapîr kukwak ri na hte Tirtûm mê kot hkôt amnhî xunhwÿr xwÿnh piitâ mê ho hkra nhûm mê hamakêtkati nê amnhîx pa ho pa. Kaxkwa kamâ nê pika piitâ hkôt mê kot Jejus kôt amnhî xunhwÿr xwÿnhjaja na htem â amnhî nhîpêx mex anhÿr o pa. Â Jejus kot mê panê htyk anhÿr jakamâ kot amnhî to rax o kot mêmoj piitâ hakrenh par.

Jejus kêp tãm mê paxunhwÿr xwÿnh â harênh

21 Nê mê papajaja na pu prem pamâ Tirtûm prâm kêt o ri papa. Te hkâx â ri papa pyrâ nê kutâ amnhî xunhwÿ nê pajamaxpêr punuj nê tanhmâ amnhî tomnuj to pix o ri papa. 22 Tâ Jejus kôt amnhî xunhwÿ nhûm amnhî tâ mê pahpumu. Hâmri nê ra mê panê htyk jakamâ amnhî tâ mê pahpumu nê Tirtûm noo mâ tãm mê paxunhwÿ. Te aa mê pahte tanhmâ amnhî tomnuj to hkêt pyrâk o mê panhîpêx nê tãm mê paxunhwÿ. Pu mê arî pahpê Tirtûm kutâ amnhî xunhwÿr xwÿnh kêt nê hpânhâ pahpê hkrâmnhwÿy. 23 Na pre Tirtûm mê pahte amnhî kaxyw Kra Kris kôt pajamaxpêr nê hkôt amnhî xunhwÿr â mê pahpumunh kôt â mê pahto mex anê. Tâ kêr pu mê arî hkôt amnhî nhîpêx o ri papa nê aa hkaga hkêt nê. Mê kot Kris â tanhmâ mê pahto htâ pu mê arî hkôt amnhî nhîpêx mex râhâ ho ri papa.

Kormâ mê kot jar ijaxâr kêt ri na pa pre hte mê kâm â harênh anhÿr o ri mê hkôt ixpa. Tâ ka prem Jejus jarênh ma nê hkôt amnhî xunhwÿr kurê kumrêx. Nhûm krî piitâ hkôt ri mê pa xwÿnh kwÿjaja mê apyrâ nê harênh ma nê hkôt amnhî xunhwÿy nê hkôt amnhî nhîpêx o pa.

Pawre kêp Ijaew kêt xwÿnhjê mâ Jejus jarênh xwÿnh â harênh Epes 3.1-13

24 Nê ixte mê amâ Kris kot tanhmâ mê panê amnhî nhîpêx to hâ harênh o ixpaja â na prem tanhmâ ixto htÿx nê pa amnhî xâ htÿx kâm ijamak o ri ixpa. Tâ arî Tirtûm kâm hprâm xâ hkôt â amnhî nhîpêx anhÿr jakamâ na pa ixkînh

nê jar ixkrî. Ixte Kris kwÿjê kaxyw amnhî xà kamã ijamak tÿx o ixkrî. Te mê apê Kris nhî pyrâk xwÿnhjê mãã. Tã pa te ixpê Kris kot amnhî nhîpêx pyrâk o mê akaxyw amnhî xà htÿx kãm ijamak o ixkrî.

²⁵ Na pre Tirtûm mê apê Ijaew kêt xwÿnhjê kaxyw ixãm. Ixte mê amã kapêr piitã harênh par nhûm mê ate mar nê hkôt amnhî nhîpêx mex o ri apa kaxyw. ²⁶ Na pre kormã mêhõ mê awÿr mör nê mê amã harênh kêt nê. Tã ra Tirtûm kãm mê ate mar prãm nê. Kãm mê apê Ijaew kêt xwÿnhjê mê mê pahpê Ijaew xwÿnhjê japê o axpên pyrâk. Nom na pre amnepêm ri mê pa xwÿnhjê mã kormã ja hã amnhî to amnhîrit kêt nê. Tã ra jarãhã mê pahpê Kris kwÿjê mã ja ho amnhîrit. Mããnen kãm mê apê Ijaew kêt xwÿnhjê japê hã amnhî to amnhîrit. ²⁷ Mê apê Ijaew kêt tã na ka prem Kris kôt amnhî xunhwÿ nhûm Tirtûm Karõ mê akarõ mã agjê nê mê akamã pa ho pa. Ka mê ra hkôt amnhî nhîpêx jakamã kot kaj mê ixpyrà nê nhÿrmã kuri afir tûm nê amex rãhã ho apa ho apa. Ja na mex kumrêx. Tã ja na Tirtûm kãm mê ate mar prãm nê mê akaxyw ixãm. ²⁸ Jakamã na pa pre Ximotre mê wa mê apiitã mê amã Kris kot mê panê tanhmã amnhî nhîpêx to hã harênh kãm ixihÿtÿx o ri mê akôt ixpa. Nê kapêr o mê ajahkre ho ri mê akôt wa ixpa. Nê jar mê hagjênh xà kamã krî piitã hwÿr kagã nhîpêx nê mê hwÿr kurê. Mê kot kamã harênh nê mar nê amnhî tomnuj kaga nê hpãnhã Kris kôt amnhî xunhwÿr nê ãm kôt pix mã amnhî nhîpêx o pa kaxyw. Kêr pa nhÿrmã kãm mê ate inhmar nê hkôt amnhî xunhwÿr xwÿnhjê jahkre nê kãm:

—E Pahihti. Ota akwÿjaja. Na htem akôt amnhî nhîpêx mex rãhã ho ri pa. Anê.

²⁹ ã ixte kãm mê piitã mê harênh anhÿrja na inhã hprãm. Ja kaxyw na pre Jejus ixto ixihÿtÿx. Jakamã na pa hte Tirtûm nhÿ hã tanhmã kapêr o mê ahkre hto ho ri mê hkôt ixpa. Jao mê ho Tirtûm wÿr o ri ixpa nê mê kãm kagã nhîpêx nê mê hwÿr kurê nê kamã kapêr o mê ahkre o ri ixpa.

2

Pawre kot Jejus kapêr o Koros nhõ xwÿnhjê o hihÿtÿx ã harênh Epes 3.14-19; Piriapos 1.9

¹ E kot paj mê amã tanhmã amnhî jarênh to ka mê inhma. Na pa hte mê ato Tirtûm wÿr rãhã ho ixkrî. Mê kajaja nê krî pê Ratisej kamã Jejus kôt mê pahkwÿjaja. Kormã ixte mê apumunh kêt tã pa hte mê ato Tirtûm wÿr kãm ixihÿtÿx ãhã ho ixkrî. ² Mëmo kaxyw na pa hte ã mê ato hwÿr anê? Nê mëmo kaxyw na pa hte mê amã kagã nhîpêx nê mê awÿr kurê? Nã ãm mê ate kamã harênh nê mar nê Jejus kapêr kôt axpên to axihÿtÿx o ri apa kaxyw. Nê mê amã axpên kïnh o ri apa kaxyw. Pê te mê ate ixkre tipxi kamã axpên kôt amnhî nhîpêx o ri apa pyrâk. Jao aprî hã Tirtûm kot amnhî nhîpêx pumunh mex nê amnhî kaxyw hkôt ajamaxpêr tÿx nê. Kot kaj mê ã amnhî nhîpêx anê nê Kris kot amnhî nhîpêxta pumunh pa. Na pre Tirtûm tokyx mê kãm Kris o amnhîrit kêt tã ra mê pamã ho amnhîrit. ³ Tirtûm kot amnhî nhîpêx nê kapêrja na pu htem Kris nhÿ hã pahprî hã omunh nê mar mex nê. ⁴ Jakamã koja mëmojaja mê awÿr mra hãmri nê hêx rom Tirtûm kapêr kwÿm ri tanhmã mê amã mëmoj jarênh to. Te mê ãhpumunh tÿx pyrâk o mê amã harê no ãm mê ãhpumunh kêt. Ka mê ama nê ãm mê ama nê Kris kaga hkêt nê.

⁵ Nê kormã arî Jejus ã ijaxãr nê ixkrî nê kormã mê akôt ixpa hkêt tã ot pa hte mê amã ijamaxpêr rãhã ho ixkrî. Nê ra tanhmã mê ajarênh mar to. Na ka xep htem Kris kôt amnhî nhîpêx tÿx o ri apa. Te ahkrõ pê kukryt mut kuxêeti kot

pĩ kupu htýxta pyræk. Nê ka xep htem arĩ amnhĩ kaxyw Kris mã ajamaxpêr týt o ri apa. Pa mẽ ajarênh ma nê ixkĩnh týt nê.

⁶ Na ka prem Pahihti Jejus Kris kôt amnhĩ xunhwýr pa. Tã kêr ka mẽ arĩ hkôt amnhĩ nhĩpêx mex rãhã ho apa. Kêp mẽ panhõ Pahihti kênã. ⁷ Jakamã mẽ ãm kôt pix mã amnhĩ xunhwýr týt nê aa hkaga hkêt nê. Te mẽmo pĩ hpãr jarêja pika kaxwýnh kãm pimãnh nê kot pika jamýnh týtta pyræk. Nhũm kók xapêr týt tã tee kot mẽnh kaxyw pyræk. Tã kêr ka mẽ pĩ hpãra pyrã nê hkôt amnhĩ xunhwýr týt nê hkôt amnhĩ nhĩpêx mex o ri apa. Ra Epas kot mẽ ajahkre ho pa xã hkôt. Nê amnhĩ krãm Kris kapêr jaxãr týt nê aa ho ajamakêtkati hkêt nê. Pê akĩnh kãm Tirtũm mã mex o mex ã harênh rãhã ho ri apa.

⁸ Nê kwa kêr ka mẽ kot hêx rom mẽ amã tanhmã kapêr to ho mẽ pa xwýnhjaja ka mẽ amnhĩ nê mẽ omunh mex nê. Nê mẽ kapêr mar hkêt nê. Mẽ ate Kris kaga hprãm xãj na htem tanhmã mẽ amã hêx to ho ri mẽ akôt pa. Te amnepêm mẽ kot Tirtũm kapêr kwým ri tanhmã mẽ ahkre hto xwýnhjê pyræk. Hinhu hikôoti kapêr kôt na htem tanhmã mẽ amã hêx to nom Kris nhỹ hã mẽ amã kapêr kêt nê. Jakamã kwa mẽ amnhĩ nê mẽ omunh mex nê.

⁹ Nê Kris mẽ Tirtũm wa kot amnhĩ nhĩpêx kot axpên pyræk. Nê wa hamaxpêr kot axpên pyræk. ¹⁰ Tã kêr pu mẽ pajaxwýja wa hamaxpêr o pajamaxpêr nê wa kot amnhĩ nhĩpêx o amnhĩ nhĩpêx. Jakamã kwa mẽ kot Tirtũm kapêr kwým ri tanhmã mẽ kapêr to xwýnhjê kot amnhĩ nhĩpêx o amnhĩ nhĩpêx kêt nê. Nê mẽ kapêr ma nê ãm mẽ ama. Kris na hihtýt o hihtýt o kot mẽkarõmnuti nhõ pahi piitã mẽ hakrenh par. Nê hihtýt o hihtýt o kot Tirtũm kapêr o mẽ wrýk xwýnhjê piitã mẽ hakrenh par. Nê ãhpumunh o ãhpumunh o kot mẽmoj piitã hakrenh par jakamã kêr ka mẽ kapêr kôt pix ma nê hkôt pix mã ri amnhĩ nhĩpêx o ri apa.

*Mẽ pahte amnhĩ nhĩpêx nyw jarênh
Rõmãn 6.3; Karatas 5.24*

¹¹ Nê na hte ixkwý Ijaewjaja mẽ hkra nhỹrmã hprêk nê Tirtũm kôt amnhĩ nhĩpêx ã mẽ harênh kaxyw mẽ kêp mẽmy kwyrýt kã jakã. Tã mẽ kajaja. Mẽ apê Ijaew kêt xwýnhjaja na pre Kris mẽ anhipêx o te mẽ kot amnhĩ jakãrta pyræk. Jao te kot mẽ anê mẽ ate amnhĩ nhĩpêx tũm jakãr par pyræk o mẽ anhipêx ka mẽ ra amnhĩ nhĩpêx nyw o amnhĩ nhĩpêx o apa. Nhũm htem mẽ ate amnhĩ nhĩpêx nyw ã mẽ apumu nê mẽ ate Jejus kapêr kôt amnhĩ nhĩpêx ã mẽ apumunh kurê kumrêx. ¹² Tã na pu htem jarãhã mẽ pahte Tirtũm kôt amnhĩ nhĩpêx o papa hã amnhĩ jarênh kaxyw amnhĩ jakãr kêt nê. Na pu htem hpãnhã amnhĩ kaxyw Tirtũm xihtýt o hihtýt xwýnhja kôt pajamaxpêr. Kot mẽ panê pahte amnhĩ tomnuj rênh par kôt pajamaxpêr hãmri nhũm mẽ gõx kãm mẽ pahkrã kumrã. Te mẽ pahte gõx kãm mẽ pahte amnhĩ nhĩpêx tũm rer par pyræk o amnhĩ nhĩpêx. Te Jejus htyk nhũm mẽ kot haxãr nhũm nõr nhũm mẽ pahte amnhĩ tomnuja ãhkõ hã nõr nê hapêx par pyræk. Tã pu htem ra gõj rũm pahkrã hapõj. Te Tirtũm kot akupým Kris o htĩr pyræk. Jao ra mẽ pahte Kris kôt amnhĩ nhĩpêx nyw o amnhĩ nhĩpêx o papa hkrax ã amnhĩ to amnhĩrit. ¹³ Amnepêm kormã mẽ pahte Jejus kôt amnhĩ xunhwýr kêt ri na pu prem ri amnhĩ tomnuj to nê tanhmã pajamaxpêr punuj to ho ri papa. Tirtũm noo mã te ra mẽ pahtyk pyræk. Tã Tirtũm te akupým Kris kôt mẽ pahto pahĩr pyræk o mẽ panhipêx nê mẽ panê mẽ pahte amnhĩ tomnuj piitã ho hapêx nê axte kãm hamaxpêr kêt kumrêx. ¹⁴ Te mẽ pahte tanhmã amnhĩ tomnuj to ho papa nhũm Tirtũm kot ja hã mẽ pahpumunh nê mẽ pahte amnhĩ tomnuj

piitã hã kagà hpar pyrãk. Nê kot kagàja pyr nê Kris nhĩhkò hã pĩ kahpa hã nhòr pyrãk. Jao te kot mē pahte amnhĩ tomnuj ã kagàta hkaxònh nê rēnh par pyrãk o hipêx. ¹⁵ Hãmri nhũm Krisja pĩ kahpa hã htykja o mēkaròmnuti mē mē ò pahi Satanasti wa mē ho hirerek pa. Jao hihtỳx o kot mē hakrenh par ã amnhĩ to amnhĩrĩt. Te mē kot kutã amnhĩ xunhwỳr xwỳnh piitã mē noo mã mē ho krihkrit par nê ma akupỳm ò krĩ hwỳr hkĩnh nê grer o mòrta pyrãk.

¹⁶ Nê koja mēmoja mē awỳr mra nê tee ri mē ate mēmoj kur o akrĩ hã mē apumu nê mē amã:

—Kwa na hte Tĩrtũm kòt mē kot amnhĩ xunhwỳr xwỳnhjaja ja kur kêt nê. Nê ja ho hkòm kêt nê. Nê mē panhõ arĩgromnu pē sap ã ri mēmoj tã àpēnh kêt nê. Nê mytwrỳ nyw ã mēmoj tã àpēnh kêt nê. Na htem ã Tĩrtũm ã hkĩnh o pa anê. Tã ã mē ate mē ixkòt amnhĩ nhĩpêx anhỳr kêt jakamã mãn mē apē Tĩrtũm kra hkêt nã. Anê.

Tã nom kēr ka mē kapēr ma nê ãm ama. ¹⁷ Amnepēm kormã mē pahte Kris kòt amnhĩ xunhwỳr kêt ri na pu prem ã amnhĩ nhĩpêx anhỳr o papa. Tã Jejus kòt amnhĩ xunhwỳ hãmri nê axte ã amnhĩ nhĩpêx anhỳr kêt nê. Pãnhã kapēr pix ma nê hkòt pix mã amnhĩ nhĩpêx o ri papa.

Mē pahte mē kot Tĩrtũm kapēr o mē hêx xwỳnhjê mar kêt ã mē pamã karõ

¹⁸ Nê koja mēmoja mē awỳr mra nê hêx rom tanhmã mē amã amnhĩ jarēnh to nê mē amã:

—Na pre Tĩrtũm ãm mē papxpix mē inhmã amnhĩ to amnhĩrĩt. Jakamã kwa mē ixkapēr ma. Kot kaj mē inhmar kêt nê hãmri nê mē amex kêt nê apa.

Anhỳr o mē amã kapēr japēr ka mē ama nê ãm mē ma. Rỳ nhũm mē amã:

—Tĩrtũm mē parom kot amnhĩ to rax o kot mē pahpiitã mē pajakrenh par jakamã kwa mē tanhmã amnhĩ to hwỳr to hkêt nê. Kot ka mē anê nhũm mē ama nê mē akamã gryk nê. No kêt mē amnhĩ to kapēr o wrỳk xwỳnhjê mãn wỳ. Koja mē ama nê mē akamã gryk kêt nê tanhmã mē amã mēmoj nhĩpêx to. Anê.

Koja mē ã mē amã kapēr anê ka mē ama nê ãm mē ama. Te ho mē àhpumunh tỳx kãm mē kot ã mē amã kapēr anhỳr pyrãk no ãm mē kapērja mex kêt. Na htem amnhĩ krã hkòt te amnhĩ to rax pyrãk o ã mē amã kapēr jao mē hamaxpēr tũm o hamaxpēr o ri pa. No mē apyrã nê mē hamaxpēr nyw o hamaxpēr kêt nê. ¹⁹ ãm mē kot Tĩrtũm kapēr kwỳm ri mē ahkre jakamã mē kēp Jejus kwỳ hkêt. No mē papajaja mē pahpê Jejus kwỳ na pu mē. Nhũm Jejus kēp mē panhõ Pahihti jakamã na hte tanhmã mē pahto paxihtỳx to pu htem kukwak ri tanhmã axpēn to ajuta hto ho ri papa. Nê hkòt axpēn to paxihtỳx o ri papa. Mē pahpiitã mē pahte hkòt amnhĩ nhĩpêx mex o ri papa kaxyw. Tĩrtũm kãm hprãm xã hkòt.

Mē pahte amnhĩ krã hkòt tãm amnhĩ nhĩpêx kêt ã mē pajarēnh

Karatas 3.1-5, 5.1-9; Epes 2.8; Pĩripos 3.9

²⁰⁻²¹ Nê wam mē pahte amnhĩ nhĩpêx tũm nê mē pajamaxpēr tũmta te kot Kris kòt htyk nê mē pahpê hapêx par pyrãk jakamã na pu htem arĩ hkòt amnhĩ nhĩpêx kêt nê. Nê mēkaròmnuti hkòt amnhĩ nhĩpêx kêt nê. Tã no nhũm xep ra mēhõja mē awỳr mō nê hêx rom mēmoj nê tanhmã mē amã kapēr to nê mē amã:

—Kwa mē ja jamỳnh kêt nê. Nê ja hkur kêt nê. Nê ja kupēnh kêt nê.

Anhỳr o mēmoj nê mē akurê ho pa. Xep mē ã mēmoj nê mē akurê anê ka xep mē ama nê mē hkòt amnhĩ nhĩpêx. Kwa nã mon ka mē ri axtem nê mē hkòt amnhĩ nhĩpêx? ²² Tĩrtũm kot mēmoja nê tanhmã mē pahkurê htore

hã. Æm mẽ kot amnhĩ krã hkôt mẽmoj nê mẽ akurê ka mẽ ama nê mẽ hkôt amnhĩ nhĩpêx. Mẽmoj kur nê mẽ akurê xwýnhãta na htem kuku nhũm hapêx kurê kumrêx. Mo koja we Tirtũm omu nhũm kêp omnuj? Nã ja kot anhÿr kêt kênã. Mẽ Æm amnhĩ krã hkôt mẽ kot ja nê mẽ akurê. ²³ Tã Æ mẽmoj nê mẽ akurê anhÿr xwýnhjaja na ka htem nhÿri mẽ omu nê mẽ kapêr ma nê atÿx ajamaxpêr o:

—Nã te Tirtũm kôt amnhĩ nhĩpêx mex o pa pyrãk. Te mẽ àhpumunh tÿx pyrãk o Æ mẽ inhmã mẽmoj jarênh anê. Anê.

No Æm mẽ kot mẽmoj jarênhja kot anhÿr kêt. Æ mẽ kot amnhĩ nhĩpêx anhÿr xwýnhjaja kêp Tirtũm kra hkêt. Na htem Æm amnhĩ krã hkôt mẽmoj nê mẽ akurê ho pa. Nê hã amnhĩ to jarkrar o ri pa. Mẽ ate ja hã mẽ mar nê mẽ kot amnhĩ to rũnh Æ mẽ hkamnhix kaxyw. Na htem kot amnhĩ tomnuj pymaj tanhmã amnhĩ nhĩ hto ho pa. No Æm ri Æ amnhĩ nhĩpêx anhÿr kaprÿ. Nê Æm htÿx Tirtũm kapêr o mẽ wrÿk xwýnhjê hwÿr kaprÿ ho pa.

3

Mẽ pajamaxpêr nyw nê mẽ pahte amnhĩ nhĩpêx nyw jarênh

Rômãn 6.4-11

¹ Nê na pre Tirtũm akupÿm Kris o htÿr nhũm mẽ pahte hkôt amnhĩ xunhwÿr jakamã te Tirtũm kot Kris nhĩpêx pyrã nê akupÿm mẽ pahto mẽ pahÿr pyrãk o mẽ panhĩpêx. Jakamã kwa kêr pu mẽ axte pahte amnhĩ nhĩpêx tũm kôt amnhĩ nhĩpêx kêt nê. Te Kris pyrã nê ra kaxkwa hwÿr paxàpir nê kamã ri papa pyrãk o amnhĩ nhĩpêx. Jao pajamaxpêr nyw pix o pajamaxpêr nê pahte amnhĩ nhĩpêx nyw pix o amnhĩ nhĩpêx o ri papa. Te Kris kot amnhĩ nhĩpêx pyrãk. Na pre akupÿm kaxkwa hwÿr api nê Tirtũm nhĩhkô hã mẽ ho amnhĩptãr xã kamã hkrĩ ho hkrĩ.

²⁻³ Nê ra mẽ pahte Kris kôt amnhĩ xunhwÿr jakamã te jar pika hkôt pajapêx par nê Tirtũm wa kuri kaxkwa kamã pamex nê papa ho papa pyrãk. Jakamã kwa kêr pu mẽ pahte amnhĩ nhĩpêx nyw mã mãn pajamaxpêr rãhã ho papa. Nê axte mẽ pahte amnhĩ nhĩpêx tũm mã pajamaxpêr kêt nê.

⁴ Kris kêp akupÿm mẽ pahto mẽ pahÿr xwýnh. Koja nhÿrmã akupÿn mẽ pahwÿr wrÿ hãmri nhũm Tirtũm te ho mex raxta pyrãk o mẽ panhĩpêx nê mẽ pahto mex rax kumrêx.

Mẽ pahte akupÿm amnhĩ nhĩpêx tũm o paxujanãr kêt Æ mẽ pamã karô

Epes 4.17-5.2

⁵ Jakamã kwa kêr ka mẽ axte ate amnhĩ nhĩpêx tũm kôt amnhĩ nhĩpêx kêt nê. Te ra mẽ apê htyk nê hapêx par pyrã nê axte kãm ajamaxpêr kêt nê.

Jakamã axte ri axpên mjên rÿ axpên prô ho amnhĩkati hkêt nê.

Nê nhãm ri mẽmyjê hõ rÿ mênijê hõ ho amnhĩkati hkêt nê.

Nê mẽ amã tanhmã amnhĩ tomnuj to hprãm kêt nê.

Nê mẽ amã akukrêx rax prãm kêt nê. Kot ka mẽ Æ amnhĩ nhĩpêx anê nê gaa nê akukrêx rax gryk Æ axte Tirtũm mã ajamaxpêr kêt nê.

⁶ Æ mẽ kot amnhĩ nhĩpêx anhÿr xwýnhjaja Tirtũm kãm mẽ hprãm kêt. Koja nhÿrmã tanhmã ja hã mẽ homnuj tÿx to. ⁷ Amnepêm kormã mẽ ate Kris kôt amnhĩ xunhwÿr kêt ri na ka prem Æ amnhĩ nhĩpêx anhÿr o ri apa. ⁸⁻⁹ Tã kêr ka mẽ axte Æ amnhĩ nhĩpêx anhÿr kêt nê.

Nê mẽ ri axpên kãm agryk o ano hkã karôt o axpên pumunh kêt nê.

Nê mẽ axpên kamã axãhkurê hkêt nê. Ri tanhmã axpên tomnuj to ho apa hkêt nê.

Rỳ axpên jakwa kamã mëmoj ma nê ri axpên xô ri tanhmã ri axpên mã ho axêx to ho ri apa hkêt nê.

Nê më akapêr mã agêt o ri më kãm akapêr kêt nê.

Nê më ri mëmoj to axpên mã axêx hkêt nê.

Ã më ate amnhî nhîpêx anhÿr tũmta ra më apê hapêx par kênã.

Mê pahte amnhî nhîpêx nyw kôt amnhî nhîpêx ã më pamã karô

Rômãn 12.2; Epes 4.23; Wam Pêtre 2.11

¹⁰ Nê na ka më ra më ate amnhî nhîpêx nyw o amnhî nhîpêx o ri apa. Jao ra më pahto kator xwÿnh maatija kôt amnhî nhîpêx mex o mô. Kot kaj më gaa nê ri hkôt amnhî nhîpêx mex kumrêx o ri apa. Kãm hprãm xà hkôt.

¹¹ Nê më pahpê Kris kwÿjaja ahpÿnhã na pu më. Na më pakamã Ijaew nê Ijaew kêt xwÿnhjaja. Nê më pakamã panhî nê kupê. Nê më kãm àpênh xwÿnhjaja nê më kot amnhî mã ri àpênh xwÿnhjaja. Ãm ahpÿnhã më pahpê Kris kwÿjaja më pahte anhÿr tâ na hte Tirtũm tanhmã më pakute hkôt më pahpumunh kêt nê. Na hte më panhîpêx o axpên pyrã nê më pahpiitã më pakamã pa ho pa pu htem pahpimràatã hkôt ri amnhî nhîpêx o papa.

¹² Nê Tirtũm kãm më pajapê nê kãm më pajapê xài më pakukamã amnhim më parê. Mê pahte kãm tanhmã amnhî nhîpêx to ho ri papa kaxyw më pakukamã më parê.

Jakamã kêr ka më axpên kamã axukaprî ho ri axpên kôt apa.

Nê axpên to mex pix o ri axpên kôt apa.

Nê më amã amnhî to rax o axpên jakrenh prãm kêt nê.

Nê më ãm amnhî pix kukamã ri ajamaxpêr kêt nê. Amnhî më nhãm më hkukamã ajamaxpêr o ri apa.

Nê më ri agryk tokyx anhÿr kêt nê.

¹³ Nê koja mëhõ tanhmã më ato ka më amnhî tâ omu nê tanhmã amnhî tâ ho hkêt nê. Ãm ja ho ajamakêtkati kurê kumrêx nê axte kãm ajamaxpêr o ri apa hkêt nê. Ra Jesus kot më panê më pahte amnhî tomnuj piitã rênh par kênã kot pu kêt më amnhî tâ tanhmã mëhõ hto. Tã kêr ka më axpên to mex o ri apa nê amnhî tâ tanhmã axpên to ho ri apa hkêt nê.

¹⁴ E kêr ka më ã axpên nhîpêx anhÿr o ri apa. No ãm ja pix kêt. Nê më mãânên amã axpên kÿnh pê axpên kutã anojarêt rãhã nê. Kot kaj më ã amnhî nhîpêx anê nê mãânên ra ixte mëmoj tâ më amã karôta ka më ho anhÿr mex kurê kumrêx. Mê pamã axpên kÿnhja na mex kumrêx o kot mëmoj piitã hakrenh par.

¹⁵ Nê kêr ka më Kris kukwak ri anhõxàhkre kaxwÿnh kãm akÿnh nê ajamakêtkati nê tãm ri axpên nhîpêx o ri axpên kôt apa. Te ixkre tipxi kamã më ate axpên kôt ri amnhî nhîpêx pyrãk. Ã më pahte amnhî nhîpêx anhÿr o papa kaxyw na pre Tirtũm amnhî wÿr më pahwÿ. Mê pahte hkôt amnhî xunhwÿr kaxyw.

Nê kêr ka më Tirtũm mã amnhî jarênh kaxyw nê kãm Kra Jesus ã akÿnh ã amnhî jarênh o ri apa.

Mê pahte Tirtũm mã mex ã pagrer ã më pamã karô

Epes 5.19

¹⁶ Nê kêr ka më Kris kapêr piitã hkôt amnhî nhîpêx mex nê. Nê kapêr o axpên jahkre mex o ri axpên kôt apa. Tirtũm kot amnhî nhîpêx o axpên jahkre ho ri axpên kôt apa. Nê kãm agrer o ri apa. Kãm mex o mex ã agrer o ri axpên kôt apa. Nê kãm kukwak ri akÿnh ã amnhî jarênh o kãm gre.

17 Nê kêr ka mê Mēpahpām Tīrtūm mā amnhī jarēnh o:

—Pa Tīrtūm. Nā ām hāmri na ka pre mê ixwÿr Akra Jejus mê nhūm mê ixwÿr wrÿ nê mê inhnê ty.

Anhÿr o kām amnhī jarē. Hāmri nê ām Pahihti Jejus kot amnhī nhīpêx kôt pix mā tanhmā ri amnhī nhīpêx to rÿ ām kôt pix mā tanhmā akapêr to ho ri apa.

Tanhmā mê pahte axpēn nhīpêx to hā mê pamā karō

Epes 5.22–6.9

18 Nê mê anijaja. Tīrtūm kot myja kumrêx nhīpêx nê hkôt kām hprō nhīpêx jakamā kêr ka mê amjēn ā apijaam o apa. Nê mê hamaxpêr mex ā mê omu nê mê hkôt ri amnhī nhīpêx mex nê. Ā mê ate amnhī nhīpêxja na Tīrtūm kām hprām.

19 Nê mê amyjaja kêr ka mê amā mê aprō japê nê. Te amā amnhī tā ma pyrāk o mê hipêx o ri apa. Jao tanhmā mê homnuj to hkêt nê.

20 Nê mê apê mê hkrajaja kêr ka mê anhīpêxà nê akatorxà wa hā apijaam nê wa kapêr ma nê wa hkôt ri amnhī nhīpêx. Ā mê ate amnhī nhīpêx anhÿrja na Tīrtūm kām hprām. Kojā ā mê ate amnhī nhīpêx anhÿr ā mê apumu nê hkīnh nê.

21 Nê kêr ka mê apê mê hipêxà nê mê katorxà mê akra gryk kaxyw mê kām apêr o apikēnh kêt nê. Kot kaj mê ā mê hipêx anê nhūm mê tee ri amnhī tā mê ama nê hkaprī nê.

22 Nê mê ate mê kām tanhmā amnhī nhīpêx to ho ri mê apa xwÿnhjaja kêr ka mê anhō patrāw kapêr ma nê hkôt amnhī nhīpêx. Nê mê noo mā mê kām tanhmā amnhī nhīpêx mex to nê määnēn mê wa kre kamā mê kām tanhmā amnhī nhīpêx mex to. Nom mê kot axàpēnh ā apumunh nê hā kām akīnh pix kaxyw axàpēnh mex kêt nê. Määnēn mê amā Pahihti Kris kīnh ā akatāt kôt mê kām mēmoj tā axàpēnh mex nê. Mê noo mā nê määnēn mê wakre kamā.

23 Nê mê akīnh kām mê kām axàpēnh mex o ri apa. Te mê ate Pahihti mā akīnh kām tanhmā kām amnhī nhīpêx to pyrā nê tām amnhī nhīpêx o tām mê kām axàpēnh mex o ri apa. 24 Te mê anhō patrāw pix mā axàpēnh pyrāk nom kumā pix mā hkêt. Määnēn mê panhō Pahihti Krisja mā. Jakamā kot kaj mê ā amnhī kaxyw Tīrtūm mā ajamxpêr pē akīnh kām anhō patrāw mā mēmoj tā apê nhūm Pahihtija ja hā mê apumu nê nhÿrmā mê ato mex rax nê. 25 E kêr ka mê ā mê anhō patrāw mā axàpēnh mex o ri apa anê. No kot kaj mê kapêr kwÿm amnhī krā hkôt ri tanhmā amnhī nhīpêx to nhūm Tīrtūm tee ri ja hā mê apumu hāmri nê nhÿrmā tanhmā hā mê anhīpêx to. Na hte ā mê kot amnhī tomnuj xwÿnhjē piitā mê hipêx anê nê mê hipêx o axpēn pyrāk. Jakamā kwa kêr ka mê anhō patrāw mā axàpēnh mex rāhā ho ri apa.

4

1 Nê mê apê mê ō patrāw kêr ka mê kot mê amā mê àpēnh xwÿnhjē ho mex nê tanhmā mê homnuj to hkêt nê. Mê urāk nê kaxkwa kamā mê anhō Patrāw maatija hkrī. Kot mê pahte tanhmā amnhī nhīpêx to nê tanhmā mê pajamxpêr to hā mê pahpumunh rāhā jakamā kêr ka mê noo mā mê ho mex rāhā ho ri apa.

E kêr ka mê apiitā ā axpēn to mex anhÿr o ri apa.

Mē pahte Tīrtūm mā amnhī jarēnh rāhā hā mê pamā karō

Matêwre 7.7; Rukre 11.1-8; Atre 1.14; Epes 6.18

² Nē kēr ka mē xatā Tirtūm mā amnhī jarēnh rāhā ho ri apa. Nē tanhmā mēhō kot amnhī nhīpēx to hā harēnh ma nē ho Tirtūm wỳ. Nē mē ate kām amnhī jarēnh kamā kām mex o mex ā harē. ³⁻⁴ Nē määnēn ixto awỳ kē mē tokyx ixkator japēr. Pa ixāmnhīx mē kot kormā Kris jarēnh mar kēt xwỳnhjē mā harēnh o ri mē hkōt ixpa. Ā ixte amnhī nhīpēx anhỳrta ā na prem ixpynē nē ijaxā pa kormā jar ixkrī. Jakamā kwa mē māmri ja hā ixto Tirtūm wỳr o apa.

Mē pahte apkati mē mē pahkwỳjē mā Jejus jarēnh ā mē pamā karō
Epes 5.16

⁵ Nē kēr ka mē kēp Kris kwỳ hkēt xwỳnhjē hkōt nhỹhỹm ri apa nē tām ri Tirtūm kapēr kōt amnhī nhīpēx o mē hkōt ri apa.

⁶ Nē kē mēhō awỳr tē nē tanhmā Jejus ā akukjēr to ka amā hkīnh ā aprī hā kām awjarē. Ahpỳnhā tanhmā mē kot hā akukjēr to xā hkōt tanhmā mē kām harēnh to kē mēhprī hā mar mex nē.

Pawre kot Koros wỳr Xikitre mē Ones wa mēnh ā harēnh
Epes 6.21-22

⁷⁻⁸ Nē ot pa mē awỳr mē pahtō Xikitre mēnh mā. Kot ma mē awỳr ixte mē amā ixkapēr ā kagā nhīpēx o mōr kaxyw. Na hte ixkōt Tirtūm mā amnhī nhīpēx o ri pa. Inhmā hapēē. Tā kot paj mē awỳr kumē kē ma mē awỳr mō nē hprī hā mē amā ijarē. Mē ate ijarēnh mar nē tām ajamaxpēr nē akīnh kaxyw. ⁹ Mē akwỳ Onesti hkōt koja ma mē awỳr mō. Määnēn Kris kōt kēp mē pahtō hā mē pamā hapē xwỳnh na. Na hte Tirtūm kapēr kōt amnhī nhīpēx mex rāhā ho ri pa. Tā Xikitre mē koja wa ma mē awỳr mō. Hāmri nē mē awỳr pōj nē jar tanhmā mē ixte amnhī nhīpēx to hā mē ijarē ka mē ama.

Kris kōt mē hkwỳ kot mē hwỳr hpēr mēnh ā mē harēnh

¹⁰ Nē ota Aristakja ixpyrā nē kēp prēs nē hkrī. Tā mē awỳr hpēr mē. Nē Panāpe htō Juāw Makreja määnēn mē awỳr hpēr mē. Na pa pre ra mē amā Juāw Makre jarē. Tā koja mēmo arīgro hā akupỳn mē awỳr mōr japēr ka mē omu nē ho mex nē.

¹¹ Nē Jejus Justija määnēn mē awỳr hpēr mē. Jajaja mē ixpyrā nē kēp Ijaew. Tā mē tapxipixjaja na htem ixpyrā nē mē ixpē Ijaew kwỳjē rom mē kām Tirtūm kapēr nyw o mē ahkre ho ri mē hkōt pa. Tirtūm kot Kra Kris kōt mē kot amnhī xunhwỳr xwỳnhjē ho hkra hā harēnh nywja na htem mē kām harēnh o ri mē hkōt pa. Pa ja hā mē omu nē ixkīnh nē. ¹² Nē mē anhīō Epasja määnēn mē awỳr hpēr mē. Na hte Jejus Kris mā tanhmā amnhī nhīpēx mex to ho pa. Nē mē ato Tirtūm wỳr rāhā ho pa nē mē ato hwỳr o:

—Pa Tirtūm. E kwa tanhmā Koros kamā akrajē ho kē mē akōt amnhī xunhwỳr tỳx nē. Nē amā hprām xā hkōt pix mā amnhī nhīpēx o ri pa. Nē amnhī kaxyw Kris kōt pix mā hamaxpēr tỳx rāhā nē. Anē.

¹³ ām hāmri na hte mē ato hwỳr o pa. Nom mē kapxipix o hwỳr kēt nē. Määnēn krī pē Ratisej kamā nē krī pē Jerop kamā Kris kōt mē pahtōjē ho hwỳr o ri pa. Mē ate Tirtūm kōt amnhī nhīpēx mex o apa kaxyw. Ixte ja hā omunh mex.

¹⁴ Nē jar mē pahtō tōtō Rukre mē Tēmtija wa määnēn mē awỳr hpēr mē. Tōtō Rukreja kēp ixkrāmnhwỳ mex na.

¹⁵ Nē kēr ka mē krī pē Ratisej kamā Kris kōt mē pahkwỳjē mā ijarē. Nē Nīpare mā nē ōrkwỳ hwỳr mē pikuprōnh nē Tirtūm mā mex o mex ā harēnh o mē hkrī xwỳnhjē mā määnēn ijarē.

¹⁶ Nê e kêr ka mē ixte mē awÿr kagà mēnhja kamã harēnh pa nê hpãnhã krĩ pê Ratisej kamã Kris kôt mē pahkwýjê hwÿr amê kê mē apyrà nê kamã harê nê piitã kuma. Nê mē kãm anê kê ra ixte mē hwÿr kagà mēnh xwÿnhnta kê mē amã kugô ka mē kuxwar kamã harê nê ama.

¹⁷ Nê kêr ka mē Akip mã ijarê kê ra Tirtũm kot kãm mēmoj tã karô xwÿnhnta kê ho anhÿr jatur xãm kumê. Kêp hkra hã kê tãm kãm àpēnh jatur xãm kumê.

¹⁸ Tã ãm ja pix. E paj pam amnhĩ nhĩhkra ho hatur xà hã kagà. Mē ate ixte mēmoj tã kagà pumunh nê hkôt inhmã ajamaxpēr kaxyw. Nê ixte mē awÿr mēnh ã ijarēnh mar kaxyw. Kwa kêr ka mē arĩ ixpê prês ã ixto Tirtũm wÿr rãhã ho ri apa.

E kê Tirtũmja mēmoj to mē akutã nojarêr nê mē ato mex nê ka mē amex nê ajamakêtkati nê apa ho apa. Tã ãm ja pix. Ixpê Pawre na pa mē awÿr kagàja nhĩpêx nê ã mē awÿr mēnh anê.

Wam Tesarõn Pawre kot Tesarõn kamã Jejus kõt hkwyjê hwyr kagà nê mênh

Pawre na pre kagàja nhîpêx. Kêp Jejus nhÿ hã mê ahkre ho pa xwÿnhjê hõ na pre. Jakamã na pre kagàja nhîpêx nê ma krî pê Tesarõn kamã Jejus kõt hkwyjê hwyr kumê. Tesarõn kamã Jejus ã kãm mê hkurê xwÿnhjaja na prem Jejus ã mê homnuj o pa nhũm mê amnhî xà htÿx kamã hamak o pa. Hãmri nhũm Pawre mê harênh ma nê kagàja nhîpêx nê mê hwyr kumê. Kot mê kãm mê hamaxpêr o hihtÿx kaxyw mê kot arî Jejus kõt amnhî nhîpêx mex o pa nê aa hkaga hkêr ã mê kãm karõ. Nê nhÿrmã Jejus akupÿn kaxkwa rũm mê pahpê hkwyjê hwyr wrÿk nê ma akupÿm amnhî kõt mê pahto àpirja nhũm mê kãm harê. Æ na pre mê kãm mêmoj jarê nê hã kagà anê nê mê kãm:

1 Pa mê apê Tesarõn kamã Jejus kwÿ hã axpên wÿr mê apikuprõnh xwÿnhjaja? Xà mê amex na ka mê apa? Ixpê Pawre na pa mê awÿr kagàja nhîpêx nê mê awÿr kumê. Siras mê Ximotre mê pa mê awÿr kumê. Mê pahpê Mëpanhîpêxà maati Tirtũm mê Pahihti Jejus Kris wa hkwy jakamã na pa htem mê ato Tirtũm wÿr rãhã ho ri ixpa. Kot mê akutã nojarêr rãhã nhũm mê ajamakêtkati nê axãmnhix mê apa kaxyw.

2-3 Nã mêmoj kêt. Na pa htem mê amã ijamaxpêr nê mê anhÿ hã ixkÿnh nê ixpa hãmri nê mê awÿr kagàja mê. Na pa htem mê ato Tirtũm wÿr rãhã ho ri ixpa nê kãm mê ajarênh o:

—Pa Tirtũm. E mãn ka Tesarõn kamã akrajê pumu. Æm hãmri na ka pre tanhmã mê hkrã hto nhũm mê akõt amnhî nhîpêx mex o pa. Na htem amnhî kaxyw akõt hamaxpêr tÿx nê. Jao mê piitã mê kamã ukapri kamã tanhmã mê ho ajuta hto ho pa. Nhũm mê kãm mê ixkurê xwÿnhjaja Pahihti Jejus Kris ã tanhmã mê ho ho pa htã nhũm mê tee ri amnhî kukamã hamaxpêr o hkapri nê Jejus mê war akaga hkêr nê. Arî war anhÿ hã amnhî to htÿx nê Pahihti Jejus kutêp tanhmã kãm amnhî nhîpêx to ho pa. Æm hãmri na htem ã amnhî nhîpêx anê Tirtũm. Na pa htem mê kot ã amnhî nhîpêx anhÿrja mã ijamaxpêr nê ixkÿnh nê.

Anhÿr o pa htem mê ato kuwÿ. 4 E Kris kõt ixkwÿjaja. Nã Tirtũm kãm mê ajapê jakamã na pre amnhim mê arê. Kot mê ato hkra nhũm nhÿrmã kuri mê amex nê atÿr tũm nê apa ho apa kaxyw. Ra mê ixte ja hã mê ajarênh mar mex.

Mê piitã mê kot Tesarõn nhõ xwÿnhjê jarênh mar ã mê harênh

5 Nê na pa prem ma mê awÿr mõ nê mê amã Jejus jarênh o mê akõt ixpa. Kot mê panê tanhmã amnhî nhîpêx to hã harênh o ri mê akõt ixpa. Nom pa mê amnhî krã hkõt mê amã ixujarênh kêt nê. Æm Tirtũm Karõ nhÿ hã na pa prem hihtÿx xà ho tanhmã mê amã ixkapêr to ka prem mê inhma nê mê ixkõt ajamaxpêr kurê kumrêx. Na pa prem tãm amnhî nhîpêx o ri ixpa ka mê ja hã mê ixpumunh o ri mê ixkõt apa. 6 Tã Jejus kõt amnhî xunhwÿ nê hkõt amnhî nhîpêx mex nê. Nê mê ixkõt amnhî nhîpêx mex nê. Mê kot Jejus ã tanhmã mê ato htã ka htem Tirtũm Karõ nhÿ hã akÿnh nê hkõt amnhî nhîpêx mex rãhã ho ri apa. 7 Tã nhũm pika pê Masetõn mê Gres wa kamã Jejus kõt mê pahkwÿjaja ã mê ate amnhî nhîpêx anhÿr ã mê ajarênh ma nê mê apyrã nê ã amnhî nhîpêx anhÿr o pa. 8 Na ka prem tanhmã Jejus kot mê panê amnhî

nhîpêx to hã harênh o ri mē hkôt apa nhūm mē piitã mē akapêr ma. Nom mē tapxipixjaja mar kêt nē. Na mē ra ohtô nē mē ajarênh ma nē mē apyrã nē ma mē kãm Jejus jarênh o pa. Ra mē ate Jejus kôt amnhî xunhwÿr ã amnhî jarênh o ri apa nhūm mē piitã kot mē amar jakamã mē pajaja na pa htem mē kãm ã mē ajarênh anhÿr kêt nē. Mo kaxyw? Ra mē kot mē ajarênh mar mex kênã. ⁹ Na pa htem nhÿri krî hō hwÿr pōj nhūm mē ixpumu nē ra mē tãmjaja mē inhmã mē ajarênh kurê kumrêx. Nē mē ajarênh o:

—Kwa Tesarôn kamã Kris kôt mē pahkwÿjaja na xep kãm mē akînh nē. Amnepêm na pre htem amnhîm sãnti nhîpêx nē kêp mēhpãm ã harê nē amnhî to hwÿr o pa. Tã ka xep prem ma mē hwÿr mō nē mē kãm Tirtūm kapêr jarê nhūm mē ama nē Tirtūmja sãnti rom ãm hãmri hã omunh kurê kumrêx. Hãmri nē gryk ã sãnti kaga hpa nē Tirtūm kôt amnhî xunhwÿr nē hkôt pix mã amnhî nhîpêx mex o pa. ¹⁰ Nē amnhî wÿr Tirtūm Kra kamã hamak rãhã ho ri pa. Anê.

Am hãmri na ka htem amnhî wÿr kamã hamak rãhã ho apa. Na pre ty nhūm Hipêexã Tirtūm akupÿm ho htūr. Tã koja nhÿrmã akupÿn mē pahwÿr kumê nhūm akupÿn mē pahwÿr wrÿ. Hãmri pu mē ãm pix kukwak ri mē kot amnhî xã htÿx kãm hamak o pa htūm xãta wÿr papa hkêt nē.

2

Pawre kot amnhî jarênh

Sîkūn Korîť 1.12, 4.1-6

¹⁻² Nē kormã mē awÿr mē inhmōr kêt ri na pa prem kormã Piripos nhō xwÿnhjê mã Tirtūm kapêr jarênh o ri mē hkôt ixpa. Nom nhūm mē hkwyjaja kãm mē inham prãm kêt nē. Na prem Jejus ã mē inhmã kapêr punuj nē mē inhîpêx kati pa prem amnhî xã htÿx kamã ijamak o mē hkôt ixpa. Na ka prem ja hã mē ijarênh ma. ã mē kot mē inhîpêx anhÿr tã pa mē tee ri amnhî kukamã ijamaxpêr pê Tirtūm kapêr jarênh kaga hkêt nē. Na pa prem arî mē kãm Jejus kot tanhmã mē panê amnhî nhîpêx to hã harênh o ri mē hkôt ixpa. Tã mē awÿr inhnojarêť nē Tirtūm nhÿ hã amnhî to htÿx nē ma mē awÿr mō. Hãmri nē mē amã tanhmã Jejus jarênh to ho ri ixpa. Ka prem mē inhma hãmri nē axohtô nē hkôt amnhî xunhwÿ. ³ Nom pa prem ixêx rom tanhmã mē amã ixkapêr to hkêt nē. Rÿ mē inhmã mēmoj prãm xaj mē ano kupyř pê mē amã ixkapêr kêt nē. ⁴ Rÿ mē ate mē ixkapêr mar nē mē inhmex ã mē ijarênh kaxyw pa tanhmã mē amã ixkapêr to hkêt nē. Am Tirtūm kot mē inhamar nē tapxipix mē inhmex ã mē ijarênh pix prãm xaj na pa prem mē amã kapêr jarênh o ri mē akôt ixpa. Tirtūm tapxipix na hte tanhmã mē pakute hkôt mē pahpumunh rãhã ho pa. Tãm na pre mē ixte kapêr jarênh o ri ixpa kaxyw mē ixunhwÿ.

⁵ Xãn pa prem mē ijakwa nhîkjê ho mē ate tãm amnhî nhîpêx ã mē ajarê hãmri nē mē ijakwa nhîkjê ho mē ato ixkapêr punuj nē? Nã na pa prem ã amnhî nhîpêx anhÿr kêt nē. Na pa prem ixkatãť kôt mē ate amnhî nhîpêx ã mē apumunh kôt tanhmã mē ajarênh to ho ri ixpa.

Nē xã mē ate mē ixkapêr mar nē akînh nē hpãnhã mē inhmã amnhîrer kaxyw na pa prem mē awÿr mō nē mē amã Jejus kapêr o mē ajahkre? Nã na pa prem kãxpore prãm xaj mē amã ixkapêr kêt nē. Tirtūm kot ja kôt mē ixpumunh mex.

⁶ Rÿ xã mē ate mē inhmex ã mē ixto jarkrar kaxyw na pa prem mē awÿr mō? Nã mããnên ja kaxyw kêt. ã mē ate mē ijarênh anhÿr prãm xaj na pa htem Tirtūm kapêr o mē ajahkre ho ri ixpa hkêt nē.

7 Rỳ xàn pa pre mẽ awỳr mỗ nễ mẽ amã amnhĩ jarẽnh o:

—E mẽ ixte Jejus nhỹ hã ixkapẽr o ixa xwỳnh jakamã kot paj mẽ amã tanhmã ixkapẽr to ka mẽ inhma nễ hpãnhã mẽ inhmã amnhĩre.

Anhỳr o mẽ amã ixkapẽr? Nà na pa pre ã mẽ amã ixkapẽr anhỳr kêt nễ. Na pa prem te mẽ katorxà kot hkrajê nhĩpêx pyràk o mẽ anhĩpêx nễ amarĩ mẽ ajahkre ho ixa nễ mẽmoj tã mẽ awỳr kêt nễ.

8 Mễ inhmã mẽ akĩnh jakamã na pa prem mẽ amã ixprĩ hã Tĩrtũm kapẽr piitã harẽnh par o mẽ akõt ixa nễ mẽ kot ja hã tanhmã mẽ ixto pymaj tee ri amnhĩ kukamã ijamaxpẽr o ri ixkaprĩ hkêt nễ. ãm ixàmnhĩx ri tanhmã Jejus kot mẽ panẽ amnhĩ nhĩpêx to hã harẽnh o mẽ akõt ixa. 9 Mễ apẽ mẽ ixkwỳ jakamã na pa prem tanhmã mẽ amã ixkapẽr to hpãnhã mẽ ixàpkur xà rỳ mẽmoj tã mẽ awỳr kêt nễ. Na pa prem mẽ pamjaja mẽmoj tã ixàpẽnũ pẽ mẽ amã ixkapẽr o ri ixa. Nễ ixàpẽnũ rũnh kumrêx. Arĩgro hã nễ kamàt kãm. Mãn arĩ mẽ ate ã mẽ ixte amnhĩ nhĩpêx anhỳrja ã anohtỳx japẽr ko. 10 Na pa prem tãm amnhĩ nhĩpêx o mẽ akõt ixa. Tĩrtũm kãm hprãm xà hkõt. Jao tanhmã amnhĩ to mex to rãhã ho ri ixa ka prem amnhĩ tã mẽ ixpumu. Nhũm Tĩrtũm haxwỳja ja hã mẽ ixpumu. 11 Na pa pre mẽ apẽ mẽ ixkra pyràk mẽ anhĩpêx o ri mẽ akõt ixa. 12 Jao mẽ amã ixkapẽr mex nễ. Nễ mẽ akaprĩ nễ apa xwỳnhjaja pa prem akupỳm mẽ ajamaxpẽr o mẽ axihtỳx hãmri nễ mẽ apiitã mẽ amã ixkapẽr nễ mẽ amã:

—Kwa kêr ka mẽ Tĩrtũm kõt amnhĩ nhĩpêx mex rãhã ho ri apa nễ aa hkaga hkêt nễ. Anễ.

Tĩrtũm tãm na pre amnhĩ wỳr mẽ pahwỳ pu prem hkõt amnhĩ xunhwỳ. Tã koja nhỹrmã amnhĩ wỳr mẽ pahto api pu mẽ Kra Jejus kukwak ri wa kuri pamex kumrêx nễ ri papa ho papa. Jakamã kwa kêr ka mẽ hkõt amnhĩ nhĩpêx mex rãhã ho ri apa.

*Jejus kwỳjaja kãm Jejus kõt amnhĩ xunhwỳr hkêt xwỳnhjê pyna hkêt
Atre 17.1-9*

13 Nễ ma mẽ awỳr mẽ inhmõrta ã na pa prem mẽ amã Tĩrtũm kapẽr jarẽnh o ri mẽ akõt ixa ka prem mẽ inhma nễ mẽ ixte amnhĩ krã hkõt mẽ ixkapẽr ã mẽ ixkamnhĩx kêt nễ. Na ka prem ãm hãmri mẽ ixte Tĩrtũm kapẽr jarẽnh ã mẽ ixpumunh kurẽ kumrêx nễ amnhĩ kaxyw hkõt ajamaxpẽr nễ Jejus mẽ Hipêêxã wa hkõt amnhĩ xunhwỳ. Jakamã na pa hte mẽ amã ijamaxpẽr nễ mẽ anhỹ hã ixkĩnh nễ. Hãmri nễ Tĩrtũm mã mẽ anhỹ hã ixkĩnh jarẽnh o ri ixa. Nà na ka htem arĩ Tĩrtũm kapẽr kõt amnhĩ nhĩpêx mex nễ. 14 Nhũm hte mẽ akwỳjaja tee ri ja hã mẽ apumu nễ Jejus ã mẽ atomnuj nễ. Nom mẽ kapxipixjaja ã mẽ anhĩpêx anhỳr kêt nễ. Jutej kamã Ijaew kwỳjaja na prem mẽ apyrã nễ Jejus kõt amnhĩ xunhwỳ nhũm mẽ hkwỳjaja tee ri ja hã mẽ omu nễ hã mẽ hipêx kati ho pa.

15 Amnepêm Ijaew na prem Tĩrtũm nhỹ hã mẽ kãm kapẽr o mẽ pa xwỳnhjê homnuj nễ mẽ hkwỳjê hpar o pa. Hãmri nhũm hpãnhã mẽ hkanrêhã mẽ htãmnhwỳjaja mẽ urak nễ Pahihti Jejusja pĩ. Tã jarãhã mããnẽn ã Jejus ã mẽ panhĩpêx anễ nhũm Tĩrtũm tee ri mẽ pahtã mẽ omu nhũm ja kêp omnuj tỳx kumrêx nhũm mẽ pahtã mẽ kamã gryk nễ.

Na hte mẽ apẽ Ijaew kêt xwỳnhjê ho hkra nhũm Ijaew kãm ja prãm kêt 16 jakamã na htem mẽ akwỳ kot Tĩrtũm kõt amnhĩ xunhwỳr pymaj mẽ anễ mẽ ixkurẽ nễ mẽ inhmã:

—Kwa Ijaew kêt xwỳnhjê mã Tĩrtũm kapẽr jarẽnh kêt nễ. Ja mex kêt. Anễ.

Mē ate Jejus kōt amnhī xunhwȳr nē nhȳrmā Tirtūm wa kuri atīr tūm nē apaja mē kām hprām kēt jakamā na htem ā mē anē àmnār o pa anhȳrja o amnhī tomnuj nē. Mē kot amnhī tomnuj tȳx o mē pa xwȳnh jakamā na Tirtūm mē kamā gryk nē. Koja nhȳrmā mē kot amnhī xā htȳx kamā hamak tūm xā hwȳr mē rēnh pa.

*Pawre akupȳm Tesarōn nhō xwȳnhjē hwȳr hkrā hā harēnh
Atre 17.10-13*

¹⁷ Nē ma mē awȳr mē inhmōr tā mē anhō krī kamā mē kēp Kris kwȳ hkēt xwȳnhjaja na pre mē ixpumu nē mē anē mē ijano pa prem ijapōj nē hpānhā ma nhȳhȳm krī hō hwȳr ixpa. Nom arī mē amā ijamaxpēr rāhā nē mē ato ijamak o ri ixpa nē xatā akupȳm mē awȳr ixkrā. ¹⁸ Na pa prem inhmā akupȳm mē awȳr inhmōr prām tȳx nē. Ixpē Pawre na pa pre xatā mē awȳr ixkrā htā nhūm Satanasti tanhmā mē anē ixpē amnār to pa kormā mē awȳr inhmōr kēt nē. Ām tee ri inhmōr prām kaprȳ. ¹⁹⁻²⁰ Mē inhmā mē akīnh tȳx. Mē ate Tirtūm kōt amnhī nhīpēx mex jakamā koja nhȳrmā Pahihti Jejus akupȳn mē pahwȳr wrȳ pa mē akuri xa nē kām mē ajarēnh o:

—Pa Pahihti. E Tesarōn nhō xwȳnhjē pumu. Na ka pre mē hwȳr inhmē pa mē hwȳr mō nē mē kām ajarē nhūm prem inhma nē amnhī kaxyw akōt hamaxpēr tȳx nē akōt amnhī xunhwȳ. Tā na htem akōt tām amnhī nhīpēx rāhā hō pa.

Anhȳr o kām mē ajarē nē mē anhȳ hā ixkīnh tȳx kumrēx.

3

*Pawre kot Tesarōn wȳr Ximotre mēnh ā harēnh
Atre 17.14-15, 18.5*

¹⁻⁵ Nē kormā mē akōt ixpa ri na pa pre Kris kwȳ hkēt xwȳnhjaja kot Kris ā tanhmā mē atomnuj to hkukamā mē amā mē harē ka prem mē inhma. Na htem ā Kris ā mē pahkurē xwȳnhjaja mē panhīpēx anhȳr o pa. Tā nhūm prem ā mē anhīpēx anē pa mē ajarēnh ma nē tee ri mē akukamā ijamaxpēr nē xapēn mā mē ajarēnh o:

—Hēxta waa nē. Kwa mē kot Jejus ā tanhmā mē homnuj toja mȳrapē mǎn mē tee ri amnhī kukamā hamaxpēr nē Jejus kaga rȳ ko. Mǎn ra Satanasti tanhmā mē kām Jejus o hēx to nhūm mē kuma nē tanhmā hamaxpēr to nē hkaga. Kwa mǎn pu prem ām mē kām Tirtūm kapēr jarēnh kaprȳ nā? Anē.

Hāmri nē tee ri mē akukamā ijamaxpēr nē mē awȳr Ximotre mēnh kaxyw nē kām:

—Mǎn ra Tesarōn nhō xwȳnhjaja Jejus ā tanhmā mē homnuj to nhūm mē amnhī xā htȳx kamā hamak o ra tee ri amnhī kukamā hamaxpēr. Kwa ma mē hwȳr mō nē ja hā mē omu. Hāmri nē mē kot Kris kōt amnhī xunhwȳr tȳx kaxyw mē hamaxpēr o axihtȳx. Hāmri nē akupȳn wa ixwȳr mō nē wa inhmā tanhmā mē harēnh to. Kot paj Siras mē wa akutēp jar Atenas kamā wa arīk. Anē.

Hāmri nē mē awȳr kumē. Ximotre na hte Siras mē wa inhīhkō hā mē kām Tirtūm kapēr jarēnh o pa. Nē Kris kot tanhmā mē panē amnhī nhīpēx toja nhūm wa inhīhkō hā mē kām harēnh o pa. Tā pa pre mē awȳr kumē nhūm ma mē awȳr mō pa Siras mē wa Atenas kamā kutēp arīk.

Ximotre akupȳn mōr nē Pawre mā mē harēnh

⁶ Tā nhūm ra ham akupȳn mē arūm wa ixwȳr mō nē wa inhmā tanhmā mē ajarēnh to pa wa mē ajarēnh ma nē ixkīnh nē. Na ka xep htem arī amnhī

kaxyw Kris kôt ajamaxpêr tÿx rãhã nê. Jao mẽ amã mẽ piitã mẽ hkĩnh nê tanhmã mẽ ho mex to ho ri apa. Nê arĩ mẽ inhmã ajamaxpêr nê ixpyrà nê mẽ amã mẽ ixpumunh prãm o ri apa. ⁷ Nã ãm hãmri na ka htem ã amnhĩ nhĩpêx anê. Na pa wa ra jar ixpunuj nê ixpa nê Kris ã amnhĩ xà htÿx kamã ijamak tã mẽ ajarênh ma nê tãm ijamaxpêr. ⁸ Tesarõn nhõ xwÿnhjaja kot Kris ã tanhmã mẽ anhiipêx to htã ka mẽ arĩ hkôt amnhĩ xunhwÿr tÿx rãhã nê. Pa wa mẽ ajarênh ma nê mẽ anhyã hã ixkĩnh pê tanhmã Pahihti Jejus mã amnhĩ nhĩpêx to ho ri ixpa. ⁹ Nã na pa hte wa mẽ anhyã hã ixkĩnh nê. Nê xatã Tirtũm mã mẽ ajarê nê kãm:

—Pa Tirtũm. Nã ãm hãmri na ka pre amnhĩ kôt Tesarõn kãm akwÿjê xunhwÿr tÿx nê nhũm htem akôt amnhĩ nhĩpêx mex rãhã ho pa. ãm hãmri na ka hte ã mẽ hipêx anê. Na pa hte mẽ kot amnhĩ nhĩpêx mã ijamaxpêr o ri ixpa nê ixkĩnh nê.

Anhyr o kãm mẽ ajarê. ¹⁰⁻¹¹ Nom kãm ja pix jarênh kêt nê. Na pa hte wa mããnen arĩgro hã nê kamãt kãm amnhĩ to Mẽpanhiipêexã Tirtũm mẽ Pahihti Jejus Kris wa hwÿr kãm ixihÿtÿx rãhã ho ixpa nê wa kãm:

—Kwa Tirtũm mẽ Jejus wa. Na pa wa ra inhmã Tesarõn wÿr inhmõr nê mẽ pahkwÿjê pumunh prãm tÿx nê. Kormã mẽ kot akapêr jatür xã mar kêt. Tã wa inhmã akupÿm mẽ hwÿr wa inhmõr nê mẽ kãm akapêr jatür xãm mẽnh prãm. Mẽ kot mar nê akôt amnhĩ nhĩpêx mex o pa kaxyw. Kwa xatã ka wa akupÿm mẽ hwÿr wa inhmẽ nã? Anê.

Na pa hte wa ã amnhĩ to wa hwÿr rãhã ho ixpa anê. Tã koja wa akupÿm mẽ awÿr wa inhmẽ pa wa ma mẽ awÿr inhmõr kurê kumrêx. ¹² Koja Tirtũm tanhmã mẽ akrã hto ka mẽ amã axpên kĩnh pê tanhmã axpên to ajuta hto ho ri apa. Æ mẽ mẽ amã akwÿjê hã ma ho te mẽ kam amã amnhĩ tã ma pyrãk o ri apa. Æ kot kaj mẽ apiitã axpên nhĩpêx anê. Te wa inhmã mẽ akĩnh pê tanhmã mẽ ato mex to pyrãk. ¹³ Koja Tirtũm ja kaxyw tanhmã mẽ akrã hto ka mẽ tãm ajamaxpêr mex nê. Kêr kê Jejus nhÿrmã akupÿn wrÿ. Mẽ kot hkôt amnhĩ xunhwÿr xwÿnhjê mẽ ro hã akupÿn wrÿ. Hãmri ka mẽ Mẽpanhiipêexã Tirtũm kutã amnhĩ kukamã ajamaxpêr nê tãm mẽ ate amnhĩ nhĩpêx ã amnhĩ pumunh kôt akĩnh nê apikunhar o kuri akuhê. No ri tee ri amnhĩ kamã ajamaxpêr nê ajakwamnajre nê akuhê hkêt nê.

4

*Tirtũm kãm mẽmoj prãm ã harênh
Rõmãn 13.11-14; Epes 5.3-14*

¹ E Jejus kôt ixkwÿjaja. Na pa prem ma mẽ awÿr mõ nê Tirtũm kapêr o mẽ ajahkre ho ri mẽ akôt ixpa. Mẽ ate mar nê Tirtũm kãm hprãm xà hkôt tanhmã amnhĩ nhĩpêx to kaxyw. Ka prem mẽ inhma nê hkôt amnhĩ nhĩpêx mex o ri apa. Tã kot paj axte ja hã tanhmã mẽ amã karõ hto. Pahihti Jejus nhÿ hã axte mẽmoj tã mẽ amã karõ. Jakamã kwa kêr ka mẽ arĩ Tirtũm kapêr kôt pix mã ri amnhĩ nhĩpêx mex nê ÿ hã amnhĩ to htÿx pê ã amnhĩ nhĩpêx anhyr o ri apa. ² Na pa prem ra Jejus nhÿ hã mẽ amã mẽmoj tã karõ. Mẽ ate hkôt amnhĩ nhĩpêx prãm xaj mẽ amã hã karõ ka prem mẽ inhma. ³ Nã mẽ pahte tãm amnhĩ nhĩpêx o papaja na Tirtũm kãm hprãm. No kêt mẽ pahtÿx ri nhãm mẽnijê ho amnhĩkati o papaja na kãm hprãm kêt. ⁴ Jakamã kwa kêr ka mẽ amyjaja aprõ pix tãnopxar o ri apa. No mẽ ri nhãm mẽnijê ho amnhĩkati ho ri apa hkêt nê. Nê mẽ anijaja kêr ka mẽ amjên pix tãnopxar o ri apa. No mẽ ri nhãm mẽmyjê ho amnhĩkati ho ri apa hkêt nê. ⁵ Jejus kwÿ hkêt xwÿnhjaja

kot ht̄ȳx ri kām hprām xā hkôt mēnijê hw̄ȳr mrar nē mē ho amnh̄ikati ht̄ā kēr ka mē ho mē urāk kēt nē. Kwarī ho kwarī. ⁶ Ā mē kot amnh̄i nh̄ip̄ex anh̄ȳr xw̄ȳnhjaja koja Tirtūm nh̄ȳrmā mē homnuj t̄ȳx kumrēx. Na pa prem ra mē amā ja jarē ka prem mē inhma. Jakamā kwa kēr ka mē ā amnh̄i nh̄ip̄ex anh̄ȳr o ri apa hkēt nē. ⁷ Xā na pre Tirtūm ā mē pahte amnh̄i nh̄ip̄ex anh̄ȳr kaxyw amnh̄i w̄ȳr mē pahw̄ȳr nē mē pahto hkra? Nā ja kaxyw na pre mē pahto hkra hkēt nē. Ām mē pahte tām amnh̄i nh̄ip̄ex o ri papa kaxyw nē tām ri axp̄en nh̄ip̄ex o ri papa kaxyw na pre mē pahto hkra. ⁸ Jakamā kot kaj mē atō ja hā mē inhma nē ām mē inhma nē arī ā amnh̄i nh̄ip̄ex anē. Hāmri nē mē pajaja mē ixkap̄er nh̄irōp axām kēt nē. Tirtūm kap̄er nh̄irōp kot kaj xa. Nē māānēn kot mē pahw̄ȳr Karō mēnh xw̄ȳnhja kap̄er nh̄irōp kot kaj xa.

⁹ Nē mē amā axp̄en k̄inh pē axp̄en to mex o apa hprām xāj na pre Tirtūm tanhmā mē amā kap̄er o amnh̄irīt to ka htem ā axp̄en nh̄ip̄ex anh̄ȳr o ri apa. Jakamā kot paj mē axte ja hā tanhmā mē amā nē hkēt nē. ¹⁰ Na ka mē ra amā axp̄en k̄inh pē te mē kam amā amnh̄i tā ma pyrāk o axp̄en nh̄ip̄ex o ri apa. Nē pika pē Masetōn kamā Kris kōt mē akw̄ȳjaja ka mē māānēn amā mē hk̄inh pē ā mē hip̄ex anē. Tā kēr ka mē arī ā amnh̄i nh̄ip̄ex anh̄ȳr rāhā nē. ¹¹ Kot kaj mē ā amnh̄i nh̄ip̄ex anē hāmri nē ajamakēt̄kati nē axāmh̄ix axāp̄enh̄ pix t̄anop̄xar o ri apa. Jao mē hakwa kamā nhām tanhmā mē hixi jarēnh̄ to ho ri apa hkēt nē. Nē ām amnh̄i pix t̄anop̄xar o ri apa. Nē amnh̄i pa kukwak ri axāp̄k̄ur kaxyw amnh̄im axāp̄enh̄ mex o ri apa. Na pa prem ra ā ja hā mē amā karō anē. ¹² Kot kaj mē ā amnh̄i nh̄ip̄ex anē hāmri nē amā prām xāj axāhw̄ȳr o ri apa hkēt nē. Nh̄um Kris kw̄ȳ hkēt xw̄ȳnhjaja mē ate amnh̄i nh̄ip̄ex ā mē apumu nē axp̄en mā mē ate tām amnh̄i nh̄ip̄ex xw̄ȳnhjē hā mē ajarēnh̄ kurē kumrēx.

Kris kw̄ȳ htyk xw̄ȳnhjē jarēnh̄

Mat̄ewre 24.29-31; Wam Korīt 15.51-58

¹³ E Kris kōt ixkw̄ȳjaja. Na ka xep mē tee ri Kris kōt akw̄ȳ htyk xw̄ȳnhjē hkukamā ajamaxp̄er. Jakamā kot paj ixprī hā tanhmā mē amā mē harēnh̄ to ka mē inhma. Nā Kris kw̄ȳ hkēt xw̄ȳnhjaja na htem tȳ nh̄um mē hk̄w̄ȳjaja tee ri mē hkukamā hamaxp̄er o hkaprī nē. Mē htyk nē ma Jejus w̄ȳr āpir kēt jakamā na htem mē m̄ȳr pē hkaprī ht̄ȳx nē pa. No mē papajaja na pu htem ho mē urāk kēt nē. ¹⁴ Jejus na pre tȳ nh̄um Tirtūm akup̄ȳm ho ht̄ir. Tā ra ā kot hip̄ex anh̄ȳr jakamā koja nh̄ȳrmā Jejus akup̄ȳn wr̄ȳ nē mē kot hkōt amnh̄i xunhw̄ȳr nē htyk xw̄ȳnhjē karō nh̄um man amnh̄i kōt kaxkwa rūm mē o wr̄ȳ. Na pu htem ā ja kōt pajamaxp̄er anē. ¹⁵⁻¹⁶ Na pre Pahihti Jejus inh̄mā hkōt mē pahkw̄ȳ htyk xw̄ȳnhjē jarēnh̄ o:

—Kot paj nh̄ȳrmā akup̄ȳn mē aw̄ȳr wr̄ȳ ka mē ate ixkōt amnh̄i nh̄ip̄ex xw̄ȳnh̄ piitā ma ixkutā axāpir o mō. Nom kot kaj mē arī at̄ir nē apa xw̄ȳnhjaja akumrēx axāpir kēt nē. Kormā. Koja Tirtūm kap̄er o mē wr̄ȳk xw̄ȳnh̄ krāht̄umja Tirtūm mā pifti kakō. Kakōr t̄ȳx pa ixkw̄ȳ htyk nē hikw̄ȳ xw̄ȳnhjē mā ixkap̄er nē ixāmra kamā mē kumra. Nh̄um mē hkarō akup̄ȳn mē hw̄ȳr wr̄ȳ nē mē kām gj̄ex pa. Hāmri nh̄um mē akup̄ȳm ht̄ir nē k̄anh̄mā hkrī hpa nē ma kumrēx ixkutā āpir o mō. ¹⁷ Hāmri ka mē ate ixkōt amnh̄i xunhw̄ȳr xw̄ȳnh̄ arī mē at̄ir nē apa xw̄ȳnhjaja ka mē hā ajēt nē mē atipxi nē ma ixkutā axāpir o mō pu mē kakrā kamā axp̄en kaxpa. Hāmri nē mē pahpimrāātā ma kaxkwam api nē inhō krī hw̄ȳr pōj. Kaj mē Tirtūm mē wa ixkuri amex kumrēx nē at̄ir t̄um nē apa ho apa. Anē.

18 ã Pahihti Jejus inhmã mẽ pakukamã mẽ pajarēnh anē. Jakamã kwa kêr ka mẽ tee ri mẽ pahkwỳ htyk xwỳnhjê hkukamã ajamaxpēr hkêt nē. Æ ixujarēnh anhÿrta ã anohtÿx pē expēn jamaxpēr o axihtÿx o ri expēn kôt apa.

5

Mẽ pahte akupÿn Jejus wrÿk xã hã arÿgro pumunh kêt ã harēnh

Matêwre 24.32–25.13; Wam Pêtre 3.8-13

1-2 Nē mẽ pahte Jejus akupÿm wrÿk xã hã arÿgro pumunh kêt jakamã kot paj mẽ amã tanhmã hã kagã hto hkêt nē. Koja nhÿrmã akupÿn mẽ pahwÿr nojarêt hãmri nē te kot mẽ ahkÿnh xwỳnh kot amnhĩ nhĩpêx pyrã nē mẽ pajaēr pē mẽ pahwÿr wrÿ. 3 Jakamã koja kormã wrÿk kêt ri nhũm Kris kwỳ hkêt xwỳnh kot amnhĩ wÿr kamã hamak kêt xwỳnhjaja hãmri mex nē pa hã amnhĩ pumu nē hkÿnh nē pa. Nē expēn mã kapēr o:

—Nã koja Tirtũm tanhmã mẽ pahto hkêt nē. Arĩ mẽ pamex nē ri mẽ papa kēnã. Nã kot puj mẽ paxãmnhÿx ri pajamakêtkati nē ri papa ho papa.

Anhÿr o expēn mã kapēr rôm nhũm puh Jejus mẽ haēr pē akupÿn wrÿ. Hãmri nē ma mẽ kot amnhĩ xã htÿx kamã hamak o pa htũm xã hwÿr mẽ rēnh pa nhũm mẽ tee ri kêp hpimxur prãm kaprÿ. Te mẽ htujarō xwỳnh kot amnhĩ nhĩpêx pyrãk. Na htem mex nē pa htã hpijagri kaxyw ôhy xã htÿx kumrêx nē tee ri kãm ôhy xã hkêt prãm kaprÿ ho hikwÿ. 4 Nom mẽ kajaja kot kaj mẽ urã nē amnhĩ jaēr pē akupÿm wrÿk kãm omu nē tee ri amnhĩ kukamã ajamaxpēr o akaprĩ hkêt nē. 5 Mẽ pahpê Jejus kwỳ jakamã na pu htem kapēr kôt ri tãm amnhĩ nhĩpêx o ri papa. Jao te mẽ pahte mẽ kêp Jejus kwỳ hkêt xwỳnhjê kot amnhĩ nhĩpêx pyrãk kêt. 6 Na htem mẽ pahkÿnhã akupÿn wrÿk kukamã hamaxpēr kêt nē. Te htÿx ri mẽ ôt rãhã ho hikwÿ pyrãk. Nom mẽ papajaja na pu htem akupÿn wrÿk kamã pajamak o papa pē kãm tanhmã amnhĩ nhĩpêx mex to rãhã ho ri papa. 7 Te kot ja pyrãk. Na htem kamãt kãm gōr nē mẽmoj mã hamaxpēr kêt nē htÿx hikwÿ. Nē mẽ hkwÿjaja kamãt kãm axpã nē htÿx ri tanhmã amnhĩ tomnuj to ho pa. Jao hamaxpēr mex kêt nē. Tã mẽ kêp Jejus kwỳ hkêt xwỳnhjaja hte mẽ urãk nē htÿx ri tanhmã amnhĩ tomnuj to ho pa nē akupÿn Jejus wrÿk mã hamaxpēr kêt nē. 8 No kêt mẽ papajaja. Mẽ pahte hkôt amnhĩ xunhwÿr xwỳnhjaja. Kêr pu mẽ ho mẽ urãk kêt nē. Satanasti kãm mẽ pahte amnhĩ tomnuj prãm tã mẽ pahte kãm hprãm xã hkôt amnhĩ nhĩpêx pymaj kêr pu mẽ mẽmoj punuj pē amnhĩ to htÿx rãhã ho ri papa.

Nē amnhĩ kaxyw Jejus kôt pajamaxpēr tÿx rãhã nē.

Nē mẽ pamã mẽ piitã mẽ hkÿnh pē mẽ kutã panojarêt rãhã ho ri papa.

Nē nhÿrmã Tirtũm mẽ hkra Jejus wa kuri pahtÿr tũm nē papa ho papa hkukamã mãn pajamaxpēr rãhã o ri papa.

Kot puj mẽ ã amnhĩ nhĩpêx anē hãmri nhũm Satanasti tee ri mẽ pahte amnhĩ tomnuj prãm xaj mẽ pahkrãm pajamaxpēr punuj jagjênh kaprÿ.

9 Xã na pre Tirtũm mẽ pakamã gryk kãm mẽ kot amnhĩ xã htÿx kamã hamak tũm xã hwÿr mẽ pajanor kaxyw mẽ parê? Nã na pre ja kaxyw mẽ parēnh kêt nē. Æm Pahihti Jejus Kris kukwak ri kot amnhĩ katut kôt mẽ pahte amnhĩ tomnuj rēnh par nē mẽ pahto hkra kaxyw na pre mẽ parê.

10 Tã mẽmo kaxyw na pre Krisja mẽ panê ty? Nã nhÿrmã Tirtũm mẽ wa kuri mẽ pamex kumrêx nē pahtÿr tũm nē papa ho papa hprãm xaj na pre mẽ panê ty. Jakamã koja nhÿrmã akupÿm amnhĩ kôt ma mẽ pahto àpir kaxyw akupÿn mẽ pahwÿr wrÿ pu mẽ amnhĩ kaxyw hkôt pajamaxpēr xwỳnh piitã ma hkôt kaxkwa hwÿr api hãmri nē Tirtũm wa kuri pamex nē pahtÿr tũm nē

papa ho papa. Kormā mẽ pahūr ri mẽ papa xwỳnhjaja nẽ ra mẽ htyk nẽ hikwỳ xwỳnhjaja nhũm akupỳm mẽ ho htūr. Hāmri nẽ mẽ pahto hpmirràatā amnhĩ kòt mẽ pahto àpir pa. Mẽ pahte hkòt amnhĩ xunhwỳr xwỳnh piitā koja Jejus nhỹrmā akupỳn wrỳ nẽ ã mẽ panhĩpêx mex anẽ.

¹¹ Tã ã kot anhỹr jakamā kwa kër ka mẽ jam ajamaxpër o apa pẽ axpẽn jamaxpër o hihtỳx o ri axpẽn kòt apa. Nẽ Jejus kòt axpẽn jamaxpër o hihtỳx o ri axpẽn kòt apa. Ra ã mẽ ate axpẽn nhĩpêx anhỹr tã kër ka mẽ arĩ ho anhỹr rãhã ho ri apa nẽ aa hkaga hkêt nẽ.

*Tĩrtũm kapër o mẽ pajahkre xwỳnhjê jarẽnh
Karatas 6.6; Wam Ximotre 5.17-19*

¹² Nẽ kwa Kris kòt ixkwỳjaja. Na hte mẽ kot Tĩrtũm kapër o mẽ ajahkre xwỳnhjaja mẽ ajahkre mex pẽ Tĩrtũm mã mẽ ajamār mex o pa. Na htem ã mẽ anhĩpêx mex anhỹr rãhã ho ri mẽ akòt pa. Tã kwa kër ka mẽ amnhĩ tã mẽ omu nẽ mẽ kapër mar tỳx nẽ. ¹³ Nẽ mẽ hã apijaam pẽ tanhmã mẽ ho mex to ho apa.

Nẽ kwa kër ka mẽ tãm axpẽn nhĩpêx nẽ axamnhĩx ri ajamakêtcati nẽ axpẽn kòt ri apa ho apa.

*Mẽ pahte tanhmã Kris kòt mẽ pahkwỳjê nhĩpêx to hã mẽ pamã karõ
Epes 4.1-6*

¹⁴ Nẽ koja Kris kòt mẽ anhĩõ kãm kaga nẽ pa ka mẽ ja hã omu nẽ kãm anẽ kê ã amnhĩ nhĩpêx anhỹr kêt nẽ. Kê hpãnhã amnhĩ xàpkur xã kaxyw àpẽn h o pa.

Nẽ mẽ kãm ma ho mẽ pa xwỳnhjaja ka mẽ kãm mẽ hamaxpër o axihtỳx o ri mẽ hkòt apa.

Nẽ kormã amnhĩ kaxyw Jejus kòt mẽ hamaxpër tohtuj anhỹr xwỳnhjaja ka mẽ tanhmã Jejus kòt mẽ ho mẽ axihtỳx to kê mẽ hkòt amnhĩ nhĩpêx mex o pa.

E kër ka mẽ ã mẽ axpẽn nhĩpêx anhỹr o ri apa nẽ axpẽn kamã agryk tokyx anhỹr kêt nẽ.

¹⁵ Nẽ koja mẽhõ tanhmã atomnuj to ka mẽ ãm omu nẽ amnhĩ tã tanhmã ho hkêt nẽ. ãm ho mex o ri apa. Nẽ mẽ piitã tanhmã mẽ ho mex to hpix kukamã ajamaxpër rãhã nẽ.

¹⁶ Æ mẽ pahte amnhĩ nhĩpêx anhỹr o papaja na Tĩrtũm kãm hprãm.

Mẽ pahpê hkra hã pahkĩnh rãhã papaja na kãm hprãm.

¹⁷ Nẽ mẽ pahte Tĩrtũm mã amnhĩ jarẽnh rãhã ho papaja na mããnẽn kãm hprãm.

¹⁸ Nẽ tanhmã mẽ pakute htã arĩ Tĩrtũm mã mex o mex ã harẽn h o papaja na mããnẽn kãm hprãm. Mẽ pahkĩnh nẽ papa kamã kãm mex o mex ã harẽ.

Rỳ mẽ pahpunuj nẽ papa htã arĩ kãm mex o mex ã harẽ. Rỳ nhũm mẽhõ tanhmã mẽ panhĩpêx to htã pu mẽ arĩ kãm mex o mex ã harẽ.

Æ mẽ pahte amnhĩ nhĩpêx anhỹr o papaja na Tĩrtũm kãm hprãm.

Mẽ pahte tanhmã Tĩrtũm Karõ nhĩpêx to hã mẽ pamã karõ

¹⁹ Nẽ koja Tĩrtũm Karõ mẽ amã mẽmoj tã tanhmã kapër o amnhĩrit to ka mẽ ama nẽ hkòt amnhĩ nhĩpêx kurê kumrêx. Rỳ mẽhõ mã tanhmã akapër to kurê kumrêx. No kër ka mẽ ama nẽ ãm ama nẽ atỳx ri hã apa hkêt nẽ. ²⁰ Rỳ nhũm mẽhõ Tĩrtũm Karõ nhỹ hã tanhmã mẽ amã kapër to ka mẽ ama nẽ agryk nẽ tanhmã ho akapër punuj to hkêt nẽ. ²¹ Kojã Tĩrtũm kapër kòt tanhmã mẽ amã mẽmoj jarẽn h to nẽ ãm hāmri Tĩrtũm Karõ nhỹ hã harẽn h ã amnhĩ jarẽ. Ka mẽ

ama nê hkõt amnhĩ nhĩpêx. ²² No koja Tĩrtũm kapêr kwỳm ri tanhmã mẽmoj jarênh to hãmri nê Tĩrtũm Karõ nhỹ hã ja jarênh kêt nê. Ấm amnhĩ krã hkõt harê. Ka mẽ tee ri ama nê amnhĩ krã kamã kapêr xir tỳx kêt nê. Jao hkõt amnhĩ nhĩpêx kêt nê.

Tanhmã Pawre kot mẽ ho Tĩrtũm wỳr to hã harênh

Wam Tesarõn 3.3, 16

²³ Nê na pa hte mẽ ato Tĩrtũm wỳr o ri ixpa nê kãm:

—Pa Tĩrtũm. Nà ate mẽ inhmã mẽ ijamakêtkati xà nhõr jakamã na pa htem anhỹ hã ixàmnhĩx ijamakêtkati nê ri ixpa. Jakamã kwa kêr ka tanhmã Tesarõn kamã akwỳjê ho kê mẽ amnhĩ to mex rãhã ri pa. Jao tãm amnhĩ nhĩpêx nê tãm ri hamaxpêr rãhã nhũm Pahihti Jejus Kris akupỳn mẽ ixwỳr wỳr.

Anhỹr o mẽ ato kuwỳ. ²⁴ Tã koja ã mẽ anhĩpêx anê. Ra kot amnhĩ jarênh xà hkõt. Ấ mẽ anhĩpêx anhỹr kaxyw na pre amnhĩm mẽ arê.

Kagà jatur xà

²⁵ E Kris kôt ixkwỳjaja. Kwa kêr ka mẽ amnhĩ xwar ixto Tĩrtũm wỳr o apa.

²⁶ Nê kêr ka mẽ atar Kris kôt mẽ pahkwỳjê piitã mẽ kãm mẽ ijarê.

²⁷⁻²⁸ Nê kê Pahihti Jejus Kris mẽ akutã nojarêr rãhã ho pa. Ixte Pahihti nhỹ hã ã mẽ amã ixkapêr nê hã kagà anhỹr jakamã kêr ka mẽ atar Kris kwỳjê piitã mẽ kãm kamã harê kê mẽ piitã ixkapêr ma.

Tã ãm ja pix na hapêx. Ixpê Pawre na pa ã mẽ amã kagà nhĩpêx nê mẽ awỳr mẽnh anê.

Sikûn Tesarôn **Pawre kot Tesarôn kamã Jejus kôt kwýjê hwýr wam** **kagà nê mēnh kôt hō kagà nê mēnh**

Pawre na pre kagàja nhîpêx nê ma Tesarôn kamã Jejus kôt hkwýjê hwýr kumê. Na pre hte Tesarôn kamã mē kãm Jejus ã mē hkurê xwýnhjaja Jejus ã tanhmã mē homnuj to nhùm mē amnhî xà htýx kamã hamak o pa. Hãmri nhùm Pawre mē harênh ma nê kagàja nhîpêx nê mē hwýr kumê. Nê kamã mē kãm mē hamaxpêr o hihtýx. Nê mē kot arî Tirtûm kôt amnhî nhîpêx mex o pa nê hamaxpêr kôt hamaxpêr o pa hã mē kãm karō. Nê nhýrmã Jejus akupýn kaxkwa rûm mē pahpê hkrajê hwýr wrýk nê pika ho hapêx par ã mē kãm harê. Æ na pre Pawre mē kãm kagàja kamã mē kãm ujarênh anê. Nê mē kãm:

1 Pa Tesarôn nhō xwýnh kot Tirtûm kapêr mar kaxyw axpên wýr mē apikuprōnh xwýnhjaja? Xà mē amex na ka mē apa? Ixpê Pawre na pa axte mē awýr kagà nhîpêx nê kumê. Siras mē Ximotre mē pa mē awýr kumê. Nà mē pahpê Mēpanhîpêêxã maati Tirtûm mē Kra Jejus Kris kwý na pu mē. ² Jakamã na pa htem mē ato wa hwýr rãhã ho ri ixpa. Wa kot mē akutã nojarêr rãhã ka mē ajamakêtkati nê apa kaxyw. Nê mēmoj to mē akutã wa nojarêr rãhã ho pa kaxyw.

*Tirtûm kot nhýrmã hkrajê nhîpêx kati xwýnhjê homnuj týx ã harênh
Wam Pêtre 4.12-19*

³ Nê na ka htem amnhî kaxyw Tirtûm mã ajamaxpêr týx mex o ri apa. Nê axpên kutã anojarêr rãhã nê. Na pa htem ã mē ate amnhî nhîpêx anhýrja mã ijamaxpêr nê mē anhý hã ixkînh nê Tirtûm mã mē anhý hã ixkînh ã amnhî jarê. ⁴ Nê nhýhým ixpa nê nhýri krîm agjê nê kamã Tirtûm kôt mē pahkwýjê mã mē ato amýra nê mē kãm:

—E pa mē amã Tesarôn kamã Kris kwýjê jarê ka mē inhma. Nà mē õ krî kamã mē hkwýjaja na htem Kris ã mē hipêx kati ho pa nhùm htem amnhî xà htýx kamã hamak pé mex kêt nê pa. Tã nom tee ri amnhî kukamã hamaxpêr o Jejus kaga hkêt nê. Na htem arî hkôt amnhî nhîpêx mex rãhã ho pa. Anê.

⁵ Æ mē ate mē kutã amnhî nhîpêx anhýr o apaja na hte Tirtûm hã mē apumu nê hkînh nê pa. Nê mē akukamã hamaxpêr o:

—Mê kot Ixkra Jejus ã tanhmã mē hipêx to ho pa htã ãm hãmri na htem mē kutã amnhî to htýx o pa nê mē umaj wa ixkaga hkêt nê. Na htem ã amnhî nhîpêx anê nê mē kêp ixkra hã amnhî to amnhîrit mex nê. Nà koja mē nhýrmã wa ixri mex kumrêx nê htîr tûm nê pa ho pa.

Anhýr o hamaxpêr. ⁶ Nê mē kot Kris ã mē anhîpêx punuj xwýnhjaja koja Tirtûm nhýrmã mē atã mē homnuj týx nê nhùm mē amnhî xà htýx kamã hamak rãhã ho pa. Æm hãmri koja ã mē atã mē hipêx anê. ⁷⁻¹⁰ Koja Pahihti Jejusja nhýrmã man akupýn pika hwýr hirã htýx kãm wrý nhùm Tirtûm kapêr o mē wrýk xwýnh xihtýx xwýnhjaja man hkôt wrý. Koja mē wrý hãmri nê mē kot amnhî tomnuj xwýnhjê homnuj týx kumrêx. Jao ma mē kot amnhî xà htýx kamã hamak tûm xãta wýr mē rênh pa nhùm mē kamã htîr tûm nê amnhî xà htýx kamã hamak rãhã ho pa ho pa. Koja ã Pahihtija amnhî nê mē kot hkôt amnhî xunhwýr kêt xwýnhjê rênh anê nhùm mē pahkînhã Tirtûm mē Krata wa kuri mex nê pa hkêt nê. Nê mē pahkînh ã wa mex o wa mex nê wa hihtýx

o wa hihtÿx ã wa omunh kêt nê. Koja Pahihti Jejus nhÿrmã akupÿn wrÿ nê ã mê panê mê hipêx anê. Koja wrÿ pu mê amnhÿ kaxyw hkôt pajamaxpêr xwÿnhjaja amnhÿ wÿr omu nê pahkÿnh nê. Hâmri nê amnhÿ nhÿ nyw ã amnhÿ pumu nê kãm:

—Hêxta waa nê. Amex o amex Pahihti. Na ka pre mê inhnê ty hãmri nê mê inhmã mê inhnÿ nyw gô. Kot paj mê Tÿrtûm mê war ari inhmex kumrêx nê ixtÿr tûm nê ixpa ho ixpa. Æm hãmri na ka ã mê ixto mex anê. Nà amex kumrêx o amex kumrêx Pahihti. Anê.

Æ kot puj mê pahpê hkwyÿjaja amnhÿ tã kãm mex o mex ã harênh anê. Ra mê ate mê ixkapêr mar nê hkôt amnhÿ xunhwÿr jakamã kot kaj mê ixpyrà nê ã kãm mex o mex ã harênh anê.

Pawre kot Tesarôn nhô xwÿnhjê ho Tÿrtûm wÿr ã harênh

11-12 Nê na pa htem mê ato Tÿrtûm wÿr rãhã ho ixpa nê kãm:

—Pa Tÿrtûm? E Tesarôn kãm akrajaja na pa mê ho awÿ. Na ka hte Akra Pahihti Jejus Kris mê wa mê ho mex rax o apa. Jao amnhÿm mê arê nhÿm mê ra kãm amnhÿ to mex prãm nê. Na htem amnhÿ kaxyw Jejus mã hamaxpêr rãhã pê mêmoj to axpên kutã nojarêt o pa. Jakamã kwa tanhmã mê hkrã hto kê mê akôt ã amnhÿ nhÿpêx anhÿr rãhã ho pa. Kêr ka mê kot akôt amnhÿ nhÿpêx o pa hã mê omu nê akÿnh nê mê kãm mê mex ã mê harê. Nhÿm mê ate tanhmã mê ho mex to hã amnhÿ tã apumu hãmri nê mê amnhÿ pyrà nê amã amex o amex ã ajarênh rãhã ho pa. Anê.

2

Kot amnhÿ tomnuj tÿx kumrêx xwÿnh maati jarênh

Matêwre 24.23-25; Makre 13.14-23; Rukre 21.20-24; Wam Juãw 2.18-19; Apokarip 13.1-18

¹ Nê koja nhÿrmã mê panhõ Pahihti Jejus Kris akupÿn wrÿ pu mê ma kutã api nê kakrã kamã hkaxpa. Jakamã kwa Jejus kôt ixkwÿjaja. ² Koja mêhõ mê awÿr mõ nê mê amã Jejus ra akupÿn wrÿk ã harênh japêr. Rÿ tanhmã mê amã Jejus hpôx xã hã arÿgro jarênh o hêx to nê mê amã:

—Kwa na ra Jejus akupÿn nojarêt. Koja tokyx akupÿn mê pahwÿr wrÿ. Semãn ja kamã rÿ ko. Apu hõ hã koja apu wrÿ rÿ ko.

Anhÿr o harê. Nê Tÿrtûm Karõ nhÿ hã ã kot mê amã harênh anhÿr ã amnhÿ jarê rÿ nhãm mêhõ kot ã kãm harênh anhÿr ã harê. Rÿ pa ixte harênh nê hã kagã hã ijarê. Nom kwa kêr ka mê kapêr ma nê ãm ama nê hkôt ajamaxpêr kêt nê. Rÿ ama nê tee ri amnhÿ kukamã ajamaxpêr kêt nê. Koja mêhõ ã mê amã Jejus tokyx wrÿk ã harênh anê nê ãm amnhÿ krã hkôt ã harênh anhÿr o hêx. Nom Tÿrtûm Karõ nhÿ hã rÿ pa inhÿ hã rÿ nhãm Kris kôt mê panhÿõ nhÿ hã ã harênh anhÿr kêt nê. ³⁻⁴ Jakamã kêr ka mê ãm mê kot harênh o hêxja ma nê hkôt ajamaxpêr kêt nê. Kormã Pahihti Jejusja akupÿn nojarêt kêt. E kot paj ixprÿ hã mê amã ja jarê ka mê inhma. Nà kormã Pahihti akupÿn nojarêt kêt ri koja mê ohtõ rax kumrêx nê Tÿrtûm kutã amnhÿ xunhwÿr nê kãm hkurê ho pa. Nê amnhÿ tomnuj tÿx o pa. Hãmri nhÿm ra kot amnhÿ tomnuj tÿx kumrêx xwÿnh maati ja amnhÿ to amnhÿrit. Nom na pre ra Tÿrtûm tanhmã kot hipêx to hkukamã hã amnhÿ jarê. Koja xep gaa nê ma mê kot amnhÿ xã htÿx kamã hamak tûm xãta wÿr kumê nhÿm kamã amnhÿ xã htÿx kamã hamak o pa rãhã nê pa ho pa.

Tã nom kormã Pahihtija akupÿn wrÿk nê ma hwÿr mênh kêt ri koja mê piitã omu nê kêp Mêhpãm maati pixi hã harênh kaxyw mê kêp mê õ sãnti piitã

hkrakrak pa. Nê mê kot mêmo karô ho amnhî pâm â harênh xwÿnhja nhûm piitâ hkrakrak pa. Hâmri nê axtem nê Tîrtûm mâ amnhî jarênh xâ hâ ixkre jatur xâ kamâ hitom wÿr axâ nê kamâ nhÿ nê hêx rom mê piitâ mê kâm kêp Tîrtûm â amnhî to hêx nê mê kâm:

—E mê amnê ixpumu. Ixpê mê anhô Tîrtûm na pa. Pa kot kaj mê inhmâ inhmex o inhmex â ijarê. No kêr ka mê anhô sânti ho apâm o apa hkêt nê. Kwarî ho kwarî. Âm paxipix ixpê Mêapâm maati nê paxipix ixpê mê anhô Tîrtûm.

Anhÿr o amnhî to hêx. ⁵ Na pa pre arî mê akôt ixpa rî â mê amâ harênh anê. Mân arî mê ate ja hâ anohtÿx rÿ ko. ⁶ Nom kormâ â kot amnhî nhîpêx anhÿr xâ hâ arîgrota kormâ kator kêt. Mêhō kormâ kot kêp àmnâr jakamâ nhûm kormâ kator kêt nê. Ra mê ate kêp àmnâr xwÿnhja jarênh mar. Tâ koja hpôx xâ hâ arîgro kato nhûm kêp àmnâr xwÿnhhta kâm pry kaprâ nhûm rî kormâ mô. ⁷ Nom na hte ra hpimxur pê Tîrtûm nê mê piitâ mê hkurê ho pa. Mê kot Tîrtûm kôt amnhî xunhwÿr pymaj tanhmâ nê mê ho ho pa. Nom kormâ kêp àmnâr xwÿnhja kêp àmnâr jakamâ nhûm hte mê noo mâ tanhmâ mê ho hkêt nê. Tâ koja Tîrtûm nhÿrmâ kêp àmnâr xwÿnhja mâ anê nhûm kuma nê kâm ure nhûm rî kormâ amnhî to amnhîrit nê mê piitâ mê noo mâ mô nê Tîrtûm nê tanhmâ mê kâm hêx to ho pa. ⁸⁻¹² Koja kato nê Satanasti mê wa mê piitâ tanhmâ mê nokupyr to ho ri mê hkôt pa. Nê hêx rom mê kâm aa mê kot mêmoj pumunh kêt kwÿ ho anhÿr o ri pa. Koja wa hêx rom te Tîrtûm kot amnhî nhîpêx pyrâk o â amnhî nhîpêx anê. Hâmri nhûm mê kot Jejus kôt amnhî xunhwÿr kêt xwÿnhjaja ja hâ wa omu nê wa hkôt hamaxpêr kurê kumrêx. Nê âm hâmri wa kapêr â wa hkamnhîx. Kop apu ra mê kot Tîrtûm kapêr mar nê hkôt amnhî xunhwÿr ronhÿx ra Tîrtûm amnhî tâ mê omu nê mê ho hkra. Nom koja mê kâm kapêr mar prâm kêt nê. Âm wa kot amnhî to hêx o wa pa xwÿnhhta kôt pix mâ koja mê kâm amnhî nhîpêx prâm.

Ja mÿrapê koja Tîrtûm tee ri ja hâ mê omu hâmri nê mê nê wa kot amnhî tomnuj tÿx xwÿnhhta wa omunh kêt nhûm wa tanhmâ mê kâm amnhî nhîpêx to nhûm mê wa omu nê wa hkôt hamaxpêr kurê kumrêx. Hâmri nê wa gryk â Tîrtûm kaga jakamâ nhûm nhÿrmâ mê kot amnhî xâ htÿx kamâ hamak tûm xâja wÿr mê rênh pa.

Koja Satanasti mê kot amnhî tomnuj tÿx kumrêx xwÿnh maatita â hêx rom tanhmâ mê no kupyr to anhÿr o pa râhâ nhûm Pahihtî Jejusja hirâ rax kâm akupÿn mê pahwÿr wrÿ. Hâmri nê kot amnhî tomnuj tÿx kumrêx xwÿnh maatita â amÿnê nhûm mê kâm hpîr kurê kumrêx nhûm hapêx. Koja â amnhî nhîpêx anê.

Tîrtûm kot tanhmâ mê pahto mex to hâ harênh

Rômân 8.28-30; Wam Tesarôn 2.13, 5.23-24

¹³ Nê amnepê m kormâ mêmoj kêt ri na pre Tîrtûm amnhîm mê arê. Mê ate kapêr mar nê hkôt amnhî xunhwÿr nhûm kot mê ato hkra kaxyw mê arê. Kâm mê ajapêê. Na pre mê awÿr amnhî Karô rê nhûm mê akarô mâ agjê nê tanhmâ mê ajamaxpêr to ka mê ÿ hâ tâm amnhî nhîpêx râhâ ho ri apa. Na pa htem ja hâ mê amâ ijamaxpêr nê mê anhÿ hâ ixkînh kâm Tîrtûm mâ mê ajarênh o ri ixpa. ¹⁴ Na pre mê awÿr mê ixrê. Mê ixte mê awÿr ixpa nê mê amâ tanhmâ Jejus kot mê panê amnhî nhîpêx to hâ harênh o ixpa kaxyw. Mê ate mê inhmar nê Jejus kôt amnhî xunhwÿr nhûm Tîrtûm kot Pahihtî Jejus Kris o mex pyrâ nê tanhmâ mê ato mex to kaxyw. ¹⁵ Jakamâ kwa kêr ka mê ra mê ixte wam mê awÿr kagâ mênhta kamâ harê nê mar tÿx nê. Nê mê akôt

mê ixpa ri tanhmã mê ixte mê ajahkre htoja mã ajamaxpêr mex nê hã ano htýx nê hkôt amnhî nhîpêx rãhã ho ri apa. Jao Jejus kôt amnhî nhîpêx mex o ri apa Kris kôt ixkwýjaja.

¹⁶ Mêpanhîpêêxã maati mê Pahihti Jejus Kris wa kãm mê pajapê htýx kumrêx. Na hte wa tanhmã mê pajamaxpêr o hihtýx to ho pa pu mê wa ý hã tãm pajamaxpêr o ri papa. Nê wa ý hã nhýrmã wa kuri pamex nê pahtrî tũm nê papa hkukamã pajamaxpêr kaprý ho papa hkêt nê. ¹⁷ Na pa htem mê ato wa hwýr o ixpa nê wa kãm:

—Pa Tirtũm mê Jejus wa? Kwa kêr ka wa tanhmã Tesarôn kamã akrajê mã mê hamaxpêr o hihtýx to kê mê war anhý hã tãm amnhî nhîpêx nê tãm hamaxpêr. Jao kapêr mex rãhã nê pa ho pa. Anê.

3

Tanhmã mê pahte axpên to Tirtũm wýr to hã kot mê pamã karô Korosê 4.2-4

¹ Nê kwa Kris kôt mê ixtô nê ixtôxjaja. Kêr ka mê amnhî xwar mê ixto Tirtũm wýr rãhã ho ri apa. Mê ixte krî piitã hkôt mê kãm Jejus jarênh o ri mê hkôt ixpa nhũm mê kot mê inhmar nê amnhî kaxyw Jejus kôt hamaxpêr kaxyw. Jao mê apyrã nê hkôt amnhî nhîpêx mex o pa kaxyw. ² Nom koja mê piitã ã amnhî nhîpêx anhýr kêr nê. Mê hkwyjaja kãm Jejus jarênh mar prãm kêt jakamã kwa mê ixto Tirtũm wý kê mê inhnê mê omunh mex nê nhũm mê Jejus ã tanhmã mê ixto hkêt nê.

³ Nê koja Pahihti tanhmã mê akrã hto ka mê ajamaxpêr mex nê ý hã hkôt amnhî xunhwýr týx o ri apa. Jakamã nhũm Satanasti mê ate amnhî tomnuj hprãm xãj tee ri tanhmã mê anhîpêx to kaprý nhũm Pahihti mê anê omunh mex nê. Ra kot mê atã amnhî jarênh xã hkôt. ⁴ Koja ã mê anê hipêx anê ka mê ý hã tanhmã mê ixte mêmoj tã mê amã karô xã hkôt amnhî nhîpêx mex o ri apa. ⁵ Tã kê Pahihti tanhmã mê akrã hto ka mê Tirtũm pyrà nê mê piitã mê kamã axukaprî ho ri apa. Nê Pahihti Kris pyrà nê mêmoj punuj kutã amnhî to htýx nê. Jao hkôt amnhî nhîpêx mex rãhã ho ri apa.

Mê kãm kaga xwýnhjê jarênh Wam Korî 4.12; Epes 4.28; Wam Tesarôn 4.9-12

⁶ E kot paj hpãnhã Kris kôt mê pahkwý kãm kaga xwýnhjê jarê ka mê inhma. Pahihti Jejus nhý hã kot paj mê amã tanhmã mê harênh to. Nã koja mê akwýjaja kãm kaga nê amnhîm mêmoj tã àpênh kêt japêr. Nê mê ixte mê axàpênh mex o apa hã mê amã karôja kuhpa hã amnhîm mêmoj tã àpênh kêt japêr. Koja mê ã amnhî nhîpêx anê ka mê ja hã mê omu hãmri nê mê hkôt ri apa hkêt nê. ⁷⁻⁸ Xã mê pajaja na pa prem ma mê awýr mô nê mê akôt inhmã kaga nê mêmoj tã ixàpênh kêt nê ri ixpa? Nã na pa prem mê apa kukwak ri ixàpkur pymaj ixàpênh rũnh nê amnhî pa pix kukwak ri ixàpkur o ri ixpa. Na ka prem mê inhmã mêmo mê apkur xã ho mra pa prem amarî amnhîm hamýnh nê hkur kêr nê. Na pa prem hpãnhã mê amã amnhîre nê kormã kuku. Tã kêr ka mê ã amnhî nhîpêx anhýr o ri axpên kôt apa nê amnhî pa pix kukwak ri apku. Nê mê amã kaga hã nhãm akwýjê hpa kukwak ri axàpkur o ri apa kêr nê. ⁹ Na pa prem amnhî pa pix kukwak ri ixàpkur o ri mê akôt ixpa. Mê ate ja hã mê xpumunh nê mê ixpyrà nê ã amnhî nhîpêx anhýr kaxyw. Nom mê ixte Jejus mã tanhmã mê ajahkre hto nhũm mê ate mê inhmar nê hpãnhã mê inhmã mê ixàpkur xã nhôrja Jejus mã tanhmã kute hkêt tã pa prem ã amnhî nhîpêx anhýr kêr nê. Mê ate ja hã mê xpumunh nê mê ixpyrà

nē ā amnhī nhīpēx anhÿr kaxyw na pa prem amnhī pa pix kukwak ri ixâpkur o ri mē akôt ixpa. ¹⁰ Na pa prem mē amā ja hā karō ho:

—Koja mēhō kām kaga nē àpēnh kêt nē ka mē ja hā omu nē kām ō hkêt nē. Kwār māmri apkur kêt nē kām prām nē ri pa nē amnhī pumu. Anē.

¹¹ Tā xep ra mē akwÿjaja ā amnhī nhīpēx anē nē kām kaga nē àpēnh kêt nē amarī ri pa. Nē xep htÿx ri axpēn jakwa kamā nhām mē hixi ho rēr o ri pa.

¹² Kwa mē inhma Jejus kôt ixkwÿjaja. Kot paj Pahihti Jejus nhÿ hā mē amā mē kot ā amnhī nhīpēx xwÿnhjē jarē ka mē inhma nē mē inhmar tÿx nē. Kēr ka mē kām kaga xwÿnhjē mā anē kē mē jam ure nē hpānhā àpēnh mex o pa. Jao mē apyrā nē amnhī pa kukwak ri apkur o pa. Kēr ka mē ā mē kām ixkapēr jarēnh anē.

¹³ Nē kwa kēr ka mē axpēn to mex o apata kaga hkêt nē.

¹⁴ E na pa mē ā Tirtūm nhÿ hā mēmoj tā mē amā karō nē hā kagā anē. Tā koja mēhō kamā harē nē kuma nē ām kuma nē hkôt amnhī nhīpēx kêt ka mē ja hā omu nē hkôt ri apa hkêt nē. Tokyx kot ja hā amnhī pumunh nē amnhī tā hpijaam kaxyw. ¹⁵ Nom arī Kris kôt kēp mē akwÿ jakamā kēr ka mē arī kēp mē atō rÿ atōx ā tām hipēx nē kām akapēr mex o ri apa. Nom te ho kēp mē akwÿ hkêt pyrāk o kām akapēr kêt nē.

Tanhmā Pawre kot mē ho Jejus wÿr to hā harēnh

¹⁶⁻¹⁸ Nē na pa hte mē ato Pahihti Jejus wÿr rāhā ho ixpa. Kot mē pamā mē pajamakētkati xā nhōr jakamā na pa htem mē ato kuwÿ nē kām:

—Pa Pahihti? Kwa kēr ka Tesarōn kamā akwÿjē pumu nē mēmoj to mē kutā anojarēt rāhā ho ri mē hkôt apa. Kē mē hamakētkati nē àmnhīx pa ho pa. Anē.

Tā ām ja pix. Ixpē Pawre na pa kagā jatur xā kamā inhīhkra ho amnhī nhīxi nhīpēx. Na hte kagā nhīpēx xwÿnh inhmā ixkapēr ā kagā. Nē hā kagā hpa pa hpānhā hatur xā kamā pam inhīxi nhīpēx. Tā na hapēx.

Wam Ximotre Pawre kot Ximotre hwÿr kagà nê mênh

Pawre na pre kagàja nhîpêx. Kêp Jejus nhÿ hã hkrajê jahkre ho pa xwÿnhjê hõ na pre. Nê Ximotre kêp Pawre ho ajuta ho hkôt pa xwÿnh na pre. Tã hpãnhã krî pê Epes kamã arîk nê Tirtûm kapêr o Jejus kôt hkwyjê jahkre ho pa. Hãmri nhûm Pawre krî hõ kamã pa nê kagàja nhîpêx nê hwÿr kumê. Nê kamã kãm mêmôj tã karô. Na pre ra Epes kamã mê hkwyjaja Tirtûm kapêr o hêx o mê ahkre ho pa nhûm Pawre mê harênh ma nê kagàja kamã Ximotre mã tanhmã mê harênh to. Nê kot Tirtûm kapêr o Jejus kwÿjê jahkre mex xwÿnhjê xunhwÿr kaxyw kãm karô. Nê Tirtûm kãm hprãm xã hkôt pix mã mê ahkre ho pa hã kãm karô nê hwÿr kagà nê kumê. Nê kãm:

1 Pa Ximotre? Xà amex? Ixpê Pawre na pa awÿr kagà nhîpêx nê kumê. Ixte Jejus Kris nhÿ hã mê ahkre ho ixpa kaxyw na pre Mêpapytãr xwÿnh Tirtûm mê Jejus Kris wa ixta nê ixãm. Jejus kamã na pu htem pajamak rãhã ho ri papa.

2 Nã ra ate ixkapêr mar xã hkôt Jejus kôt amnhî xãm jakamã te apê ixkra pyrãk Ximotre. Jakamã na pa hte ato Mêpanhîpêexã maati Tirtûm mê panhõ Pahihti Jejus Kris wa hwÿr o ixpa nê ato wa hwÿr o:

—Pa Tirtûm mê Pahihti wa. E Ximotre ho na pa war awÿr kaxyw. Kwa kër ka wa kamã axukapri nê kutã war anojarêr rãhã ho wa ri apa. Kot kaj wa ã ho mex anê nhûm war anhÿ hã hamakêtkati nê amnhîx pa ho pa.

Anhÿr o na pa hte war ato kuwÿ

Tirtûm kapêr o mê ahkre xwÿnhjê jarênh

Rômãn 16.17; Wam Ximotre 6.3; Sikûn Ximotre 2.23; Xitre 1.5-16

3 Nê na pu pre wa Epes kamã papa tã pika pê Masetôn wÿr panojarêr nê tee ri Epes kamã Tirtûm kapêr ho hêx o mê ahkre xwÿnhjê kapêr ma. Jakamã na pa pre amã:

—E Ximotre kêr ka Masetôn wÿr ixkôt amõr kêt nê. ãm jar Epes kamã arîk nê ixwakre kamã Tirtûm kapêr o mê hêx xwÿnhjê mã akapêr nê ã mê hêx anhÿrja nê mê hkurê ho ri mê hkôt apa.

Anhÿr o amã harê hãmri nê Epes kamã are nê ma Masetôn wÿr ahte mõ. 4 Mê hêx xwÿnhjaja amnepêm panhîgêjtaja kot tanhmã amnhî nhîpêx to nê tanhmã ujarênh toja nhûm htem mê kãm harênh pix o pa. Nê mê hixi piitã harênh o pa. Na htem ã amnhî krã hkôt hkwyjê mã ujarênh anhÿr o pa. Jao xypên kwÿm ri mê ahkre nê mê hã xypên mã àkjer o pa. ã mê kot amnhî nhîpêx anhÿr jao Tirtûm nhÿ hã kãm hprãm xã hkôt mê ahkre hkêt nê. Koja mêmõ Tirtûm nhÿ hã kapêr o mê ahkre hãmri nê amnhî kaxyw kãm hamaxpêr tÿx pê tanhmã mê ahkre hto. Nom ixte amã mê harênh xwÿnhjaja Tirtûm nhÿ hã mê ahkre hkêt jakamã na pa pre inhojarêr nê ã amã mê harênh anê nê mê kuri Epes kamã are.

5 Tã kêr ka arî mê ahkre ho ri mê hkôt apa Ximotre. Nê Kris kôt mê pahkwÿjê mã anê kê mê amnhî kaxyw Jejus kôt hamaxpêr tÿx pê hamaxpêr mex o pa. Jao tanhmã hamaxpêr punuj to hkôt amnhî nhîpêx kêt nê. Nê mê kãm anê kê mê te kãm amnhî tã ma pyrãk o nhãm kãm mê hã ma ho pa. 6 Ixte amã mê hêx xwÿnh jarênh xwÿnhjaja na htem ã mê ahkre anhÿr kêt nê. Na htem htÿx ri amnhî krã hkôt tanhmã mê ahkre hto. 7 Tirtûm kot finat Mojes

mã mẽmoj tâ karôja mẽ kot mar tỳx ã amnhĩ kamnhĩx nẽ ho mẽ ahkre hprãm tâ no ãm hprĩ hã mar kêt nẽ htỳx ri ho mẽ ahkre ho pa. ⁸Tirtũm kot Mojes mã mẽmoj tâ karôja mex. Mẽ kot mar nẽ hkõt amnhĩ nhĩpêx o pa kaxyw na pre.

⁹No na pre mẽ kot tãm amnhĩ nhĩpêx xwỳnhjê mã ã hã karõ anhỳr kêt nẽ. ãm mẽ kot amnhĩ tomnuj xwỳnhjê mã na pre hã karõ.

Mẽ kot mẽ õ pahi kapêr mar kêt xwỳnhjê mã.

Nẽ mẽ kot Tirtũm kapêr nhĩrõp kuhê ho mẽ pa xwỳnhjê mã.

Nẽ Tirtũm ã mẽ hpijaãm kêt xwỳnhjê mã.

Nẽ mẽ kot mẽ hipêêxã nẽ mẽ katorxã hpar xwỳnhjê mã.

¹⁰Nẽ mẽ hprõ kuhpa hã nhãm mẽnijê ho amnhĩkati xwỳnhjê mã.

Nẽ mẽ mjên kuhpa hã nhãm mẽmyjê ho amnhĩkati xwỳnhjê mã.

Nẽ mẽmyjaja kot mẽnijê kuhpa hã kãm amnhĩ kwỳ myjê hkĩnh nẽ mẽ ho amnhĩkati xwỳnhjê mã.

Nẽ mẽnijaja kot mẽmyjê kuhpa hã kãm amnhĩ kwỳ nijê hkĩnh nẽ mẽ ho amnhĩkati xwỳnhjê mã.

Nẽ mẽ kot mẽmoj to ãhkĩnh nẽ nhãm mẽ kãm ho wẽnê o mẽ pa xwỳnhjê mã. Nẽ ri mẽ hêx o mẽ pa xwỳnhjê mã.

Ã mẽ kot Tirtũm kapêr kwỳm ri amnhĩ nhĩpêx anhỳr o mẽ pa xwỳnh piitã mẽ kaxyw na pre Mojes mã mẽmojta ã karõ. Mẽ kãm Jejus prãm kêt xwỳnhjê mã. Mẽ kot mar nẽ tãm amnhĩ nhĩpêx kaxyw. ¹¹Tã pa na pa hte Pahihti kot tanhmã mẽ panê amnhĩ nhĩpêx to hã harênh o ri mẽ hkõt ipxa. Ja kaxyw na pre Tirtũm ixãm. Tirtũmja mex o mex. Tãm na pre ja kaxyw ixãm.

*Tanhmã Pahihti Jejus Kris kot Pawre ho mex to hã harênh
Atre 26.9-18*

¹²Nẽ Pahihti Jejus Kris na hte ixto mex rãhã ho pa. Na hte tanhmã ixto pa ý hã mẽ piitã mẽ kãm tanhmã kot mẽ panê amnhĩ nhĩpêx to hã harênh o ri mẽ hkõt ipxa. Na pre ixte ã amnhĩ nhĩpêx anhỳrja kukamã inhmã ixápênh ã karõ nẽ inhmã:

—E ate amnhĩ kaxyw ixkõt ajamaxpêr mex jakamã kêt ka ma mẽ piitã mẽ hkõt ri mẽ kãm ixkapêr jarênh o ri apa. Anê.

¹³Nom annepêm na pa pre hkõt ijamaxpêr kêt nẽ. ãm axtem nẽ haprý rũnh nẽ ho ixkapêr punuj o ri ipxa. Nẽ hkwỳjê ho ixkrihkrit nẽ mẽ haprý nẽ mẽ htak. Nom kormã amnhĩ kaxyw Kris kõt ijamaxpêr kêt jakamã ixtỳx ã mẽ hipêx anhỳr o ipxa nhũm Pahihti ja hã ixpumu nẽ ixkamã ukapri nẽ mẽ hã tanhmã ixto hkêt nẽ. ¹⁴Nẽ kãm ijapê xaj mẽmoj to ixkutã nojarêt rãhã ho pa nẽ tanhmã ixkrã hto pa ra amnhĩ kaxyw hkõt ijamaxpêr nẽ hkõt amnhĩ xãm. Hãmri nẽ kukwak ri ra inhmã hkwỳjê hkĩnh nẽ hpãnhã mẽ ho mex o ri mẽ hkõt ipxa.

¹⁵Nẽ Jejus Kris ra wrỳk nẽ mẽ pahte amnhĩ tomnuj piitã hpãnhã amnhĩrer kaxyw mẽ panê htyk ã harênhja na pa hte harênh o ri ipxa. ã kot amnhĩ nhĩpêx anhỳrja na mex o mex. Kê mẽ piitã kuma nẽ hã nohtỳx rãhã ho pa.

Kormã ixte hkõt amnhĩ xãm kêt ri na pa pre amnhĩ tomnuj tỳx kumrêx o mẽ piitã mẽ hakrenh ¹⁶nhũm Tirtũm ixpumu nẽ ixkamã ukapri nẽ. Hãmri nẽ amnhĩ kaxyw ixãm. Mẽ piitã mẽ kot ja hã ixpumunh nẽ axpên mã ã ijarênh anhỳr kaxyw. Nẽ ijarênh o:

—Kwa Pawre na pre amnhĩ tomnuj tỳx kumrêx o pa nhũm Jejus Kris ja hã omu nẽ kamã gryk tokyx anhỳr kêt nẽ. Na pre tanhmã hkrã hto nhũm ra tãm amnhĩ nhĩpêx o pa. Kwa pu mẽ urak nẽ amnhĩ kaxyw Jejus kõt pajamaxpêr

ně hkôt amnhĩ xunhwý. Kêr pu mẽ Pawre pyrà ně nhýrmã Tĩrtũm mẽ Kraja wa kuri pamex ně pahťĩr tũm ně papa ho papa.

Anhýr o axpẽn mã ijarẽnh ně ixpyrà ně Jejus kôt amnhĩ xunhwýr kaxyw na pre Tĩrtũm ã ixto mex aně. ¹⁷ Jakamã na pa hte kãm amnhĩ jarẽnh kaxyw ně kãm:

—Pa Tĩrtũm? Nà kapxpix apê Pahi Maati. Ně arãhã ho arãhã ně amex o amex. Mě ixte inhno ho aa apumunh kêt tã kapxpix apê Měinhĩpêexã maati. Tã koja nhýrmã mẽ piitã ã amã amex o amex ã ajarẽnh anhýr o pa. Aně.

*Ximotre kot tanhmã Epes nhõ xwýnhjê jahkre hto hã kãm karõ
Wam Korĩt 5.1-5*

¹⁸ Ně te apê ixkra pyrãk Ximotre. Tã kot paj mẽmoj tã amã karõ ka inhma ně inhmar týx ně. Nà Pahihti Jejus mã ate tanhmã amnhĩ nhĩpêx to ho apa kaxyw na pa prem axãm nhũm Tĩrtũm nhý hã kapêr o mẽ pa xwýnhjaja axãpêh kukamã amã kapêr ně amã:

—E ate ma mẽ kãm Pahihti Jejus jarẽnh o apa kaxyw Tĩrtũm kot axãm jakamã kêr ka ã amnhĩ nhĩpêx anhýr o ri mẽ hkôt apa. Aně.

Tã kot paj ijaxwýja kagãja kamã amã ixkapêr ně mẽmoj tã amã karõ. Ka mar týx ně hkôt amnhĩ nhĩpêx mex pê Tĩrtũm mã amnhĩ nhĩpêx mex o ri apa. Jao aprĩ hã mẽ kãm tanhmã Jejus jarẽnh to ho ri mẽ hkôt apa. ¹⁹ Ně amnhĩ kaxyw Jejus mã ajamaxpêr mex ně. Ně mẽmoj punuj pumu ně amã ho anhýr prãm tã Jejus nhý hã ně amnhĩ to htýx ně ho anhýr kêt ně. Jao tãm amnhĩ nhĩpêx ã amnhĩ pumunh mex o ri apa. Nom kot kaj ja ně amnhĩ to htýx kêt ně tanhmã amnhĩ tomnuj to hãmri ně te ate Pahihti Jejus kaga pyrãk. Na pre pahkwýjaja ã amnhĩ nhĩpêx anhýr o hkaga ně axte kãm hamaxpêr kêt ně. ²⁰ Imẽnew mẽ Aresãnja na pre wa ã amnhĩ nhĩpêx aně ně tanhmã Tĩrtũm o kapêr punuj to. Mýrapé na pa pre Satanasti nhĩhkram wa haxà. Kot tanhmã wa ho nhũm wa kot tee ri amnhĩ tomnujta ã amnhĩ pumunh ně tokyx tãm amnhĩ nhĩpêx ně axte ã amnhĩ nhĩpêx anhýr kêt kaxyw.

2

*Tanhmã mẽ pahte Tĩrtũm mã amnhĩ jarẽnh to hã mẽ pamã karõ
Rukre 11.2-4; Atre 10.34-35; Epes 6.18*

¹ E kot paj hpãnhã tanhmã mẽ pahte Tĩrtũm mã amnhĩ jarẽnh to hã amã karõ Ximotre. Ka inhma ně ixõ ri ho mẽ pahkwýjê jahkre ho ri mẽ hkôt apa. E ja kumrêx kot paj mẽ kaxyw amã hã karõ. Kêr ka mẽ piitã mẽ ho Tĩrtũm wýr ho ri pa. Ně kãm mẽ harê ně mẽ kaxyw mẽmoj tã axãhwýr o ri apa. Kêr kê ama ně tanhmã mẽ ho mex to. Kê mẽ amnhĩ tã omu ně ã kãm kapêr aně ně kãm:

—Pa Tĩrtũm? Nã ãm hãmri na ka ã mẽ ixto mex aně. Amex o amex. Aně.

² Ně mẽ kãm aně kê mẽ õ pahi ně mẽ ho amnhĩptãr xwýnh piitã mẽ ho ahwýr o pa ho:

—Pa Tĩrtũm? Kwa kêr ka mẽ inhõ pahi mẽ mẽ kot mẽ ixto amnhĩptãr xwýnh piitã tanhmã mẽ ho kê mẽ ixto mex o pa. Kêr pa mẽ ijamakêtkati ně ixãmnhĩx ixpa pê amã tanhmã amnhĩ nhĩpêx to ho ri ixpa. Ně ixãmnhĩx mẽ hkôt tãm amnhĩ nhĩpêx. Aně.

³ Kot puj mẽ ã mẽ ho mẽ papytãr xwýnh Tĩrtũmja wýr o papa aně nhũm mẽ pama nhũm ja kãm mex ně.

E kêr ka ã mẽ kãm ja hã karõ aně Ximotre.

*Tirtüm kām mẽmoj prām ā harēnh**Sikün Pêtre 3.9*

⁴ Nē mẽ piitā mẽ kot kapēr mar nē amnhī kaxyw Jejus kôt hamaxpēr nē hkôt amnhī xunhwýrja na Tirtüm kām hprām.

⁵ Ja kaxyw na pre mẽ pahwýr Kra Jejus mẽ nhũm man mẽ pahwýr wrý. Tirtümja tapxipix na kęp Mēpahpām. Nē Kra Jejusja tapxipix na kot Tirtüm mã tām mẽ paxunhwýr mã xwýnh. Ja kaxyw na pre amnhī grõnh kôt wrý mẽ pahpyrà nē ĩ ho ĩ nē kato.

⁶ Hāmri nē gaa nē aptār hāmri nē mẽ pahpiitā mẽ panē ty. Jao Tirtüm mã mẽ pahte amnhī tomnuj piitā hpānhā amnhīrer pa. Tā mẽ pahpiitā mẽ pahte kot ā amnhī nhīpēx anhýr ā harēnh mar nē tokyx hkôt amnhī xunhwýrja na Tirtüm kām hprām.

⁷ Ja kaxyw na pre ixām. Ixte Ijaew kêt xwýnhjê mã Tirtüm kapēr jarēnh o ri mẽ hkôt ixpa kaxyw. Nē Jejus nhý hā tanhmā mẽ kām ixkapēr to ho ri ixpa kaxyw. Nē tanhmā kot mẽ panē amnhī nhīpēx to hā harēnh kaxyw. Ām hāmri na pa ā amnhī jarēnh anē. Īxēx kêt. Na pa hte Ijaew kêt xwýnhjê hkôt ixpa nē ā mẽ kām ixkapēr anē nē mẽ kām:

—E mẽ ate Tirtüm Kra Jejus kôt amnhī xunhwýrja na Tirtüm kām hprām. Jakamā kwa mẽ tokyx amnhī kaxyw hkôt ajamaxpēr nē hkôt amnhī xunhwý. Anē.

Ikrēsti kamā tanhmā mẽ pahte amnhī nhīpēx to hā mẽ pamā karō

⁸ Nē kot kaj mẽ tōhā Tirtüm kapēr mar kaxyw axpēn wýr akuprō. Hāmri nē Tirtüm mã amnhī jarē nom kēr ka mẽ mẽmoj tā axpēn kamā agryk kamā kām amnhī jarēnh kêt nē. Rý mẽmoj tā axpēn mã axākjēr kamā kām amnhī jarēnh kêt nē. Ām tām mẽ ajamaxpēr pix o kām amnhī jarē. Nē tām amnhī nhīpēx kamā kām amnhī jarē. Ja na inhmā hprām. Tā kēr ka ā Epes nhō xwýnhjê mã ja hā akarō anē Ximotre.

*Mēnijaja kot tanhmā amnhī nhīpēx to kaxyw mẽ hā kām karō**Wam Korūt 14.34; Epes 5.22; Xitre 2.3; Wam Pêtre 3.1-7*

⁹ Nē kot paj hpānhā Kris kôt mẽ pahťōxjaja tanhmā kot amnhī nhīpēx to hā mẽ kaxyw amā karō ka inhma. Nā mẽmyjaja kot mẽ omunh nē kām mẽ hkīnh prām xāj kê mẽ htýx ri mẽ noo mã tanhmā amnhī nhīpēx to hkêt nē. Nē ja prām xāj tanhmā é jagjēnh to hkêt nē rý tanhmā ri mrar to hkêt nē. Rý mẽ kām mẽ hkīnh prām xāj òkrexé mex jagjēnh rý mẽ ĩhkra kamā kàx mex jagjēnh nē ri hā mẽ hkôt pa kêt nē. Rý ja kaxyw tanhmā ri amnhī kī jaxwýr to nē ri hā mẽ hkôt pa kêt nē. Rý mẽ é mex jagjê nē mẽ noo mã htýx ri hpijaam kêt o pa hkêt nē. Ké mẽmyjaja kām mẽ hkīnh prām xāj ā htýx ri amnhī nhīpēx anhýr o pa hkêt nē. ¹⁰ Mē kām anē kê mẽ kām Tirtüm mãn kīnh xāj mẽ piitā mẽ kutā mẽmoj to nojarēt o pa.

¹¹ Nē mẽ kām anē kê mẽ Tirtüm kapēr mar kaxyw mẽ pikuprõnh xà hwýr agjê nē akryk Tirtüm kapēr mar o hkrī nē htýx ri axpēn mã kapēr o hkrī kêt nē.

¹² Nē kê mẽ ikrēsti kamā Tirtüm kapēr o mẽmyjê jahkre hkêt nē. Rý kamā mẽmoj tā tanhmā mẽ kām karō hto hkêt nē. Ām akryk Tirtüm kapēr mar o hkrī. ¹³ Mēmo mýrapē koja mẽ ā amnhī nhīpēx anē? Nā na pre Tirtüm my kot wa finat Atāwja kumrēx nhīpēx nē kormā hprō Ewa o hapu nē hipēx. ¹⁴ Nē Atāwja na pre kagā kapēr mar nē hkôt amnhī nhīpēx kêt nē. Prō na pre mar xà hkôt Tirtüm kapēr nhīrōp xa nē tanhmā amnhī tomnuj to. ¹⁵ Mýrapē na

hthem mēnijaja hpjagri ho hikw̄ȳ nhūm mē hkrajaja à ht̄yx kām hapōj. Tā nom koja mē Jejus kōt amnhī xunhw̄ȳ nē ā ixte mē kaxyw amā mēmoj tā karō xà hkōt amnhī nhīp̄ex hāmri nē nh̄ymā mex kumr̄ex nē h̄fir tūm nē pa ho pa. E kēr ka ā mēnijē mā mēmoj tā karō anē Ximotre.

3

Pastō kot tanhmā amnhī nhīp̄ex to kaxyw mē hā kām karō

Xitre 1.5-9

¹ E kot paj hpānhā tanhmā pastō jarēnh to. Koja mēhō kām kēp Kris kw̄ȳjē nhō pastō nē Tirtūm kapēr o mē ahkre hprām nē ām hāmri ā hamaxpēr anē. Ja mex. ² Jakamā koja mēhō kām kēp pastō hprām hāmri nē ā amnhī nhīp̄ex anh̄ȳr o apa.

Koja mē piitā mē noo mā tām ri amnhī nhīp̄ex.

Nē hprō pix t̄anopxar o pa.

Nē mēmoj punuj kutā amnhī to ht̄yx nē.

Nē tām hamaxpēr.

Nē àmnhīx amnhī w̄yr mē piitā mē kuw̄ȳ.

Nē Tirtūm kapēr o mē ahkre mex nē.

³ No kē mē kagōxȳhti japrōr nē ho pipānh o pa hkēt nē.

Nē àhkurē ho pa hkēt nē.

Nē mē piitā mē kamā ukapri ho ri mē hkōt pa. Jao mē kutā nojarēt rāhā ho pa.

Nē amnhīm k̄axpore rax o pikuprōnh prām x̄aj tanhmā amnhī nhīp̄ex to hkēt nē.

⁴⁻⁵ Nē hkrajē jahkre mex o pa nhūm mē kapēr ma nē hkōt amnhī nhīp̄ex.

Nē hā hpijaam kām tām amnhī nhīp̄ex.

Koja mē hkrajē jahkre mex kēt nē hāmri nē māānēn Kris kw̄ȳjē jahkre mex kēt nē. Jakamā nhūm hkrajē mē Kris kw̄ȳjaja tām amnhī nhīp̄ex kēt nē.

⁶⁻⁷ Nē kē mē kot Jejus kōt amnhī xunhw̄ȳr kēt xw̄ȳnhjē noo mā tām amnhī nhīp̄ex rāhā ho pa.

Mē kot ja hā mē omunh nē mē hā hpijaam o pa kaxyw. Nom koja mē tanhmā amnhī tomnuj to nhūm mē tee ri ja hā mē omu nē mē ho kapēr punuj nē. Satanasti kām hprām xà hkōt.

Nē kē mē kot Kris kōt amnhī xunhw̄ȳr nyw xw̄ȳnhjaja kēp pastō hkēt nē.

Koja mē kēp pastō hāmri nē mēmo ar̄igro hā tanhmā hamaxpēr to nē amnhī to rax prām x̄aj tanhmā amnhī to jarkrar to ho pa. Hāmri nhūm Tirtūm tee ri ja hā omu nē te kot Satanasti nhīp̄ex pyrāk o hip̄ex nē tanhmā homnuj to. Ja pymaj kē mē kot Kris kōt amnhī xunhw̄ȳr nyw xw̄ȳnhjaja kēp pastō hkēt nē.

E pastō na hte ā amnhī nhīp̄ex anh̄ȳr o pa kamā Jejus kw̄ȳjē jahkre nē tanhmā mē ho ajuta hto ho mē hkōt pa Ximotre.

Mē kot Kris kōt hk̄w̄ȳjē ho ajuta xw̄ȳnhjē kaxyw mē hā kām karō

Atre 6.1

⁸ Nē kot paj hpānhā amā mē kot Kris kōt hk̄w̄ȳjē ho ajuta xw̄ȳnhjē jarē ka inhma Ximotre. Nā koja mēhō kām Kris kōt hk̄w̄ȳjē ho ajuta hprām hā koja ā amnhī nhīp̄ex anh̄ȳr o pa.

Koja mē ht̄yx ri mēmoj tā mē kām hpēr o pikēnh o pa hkēt nē.

Nē tanhmā mēmoj to hēx to ho pa hkēt nē.

Nē kagōx̄yhti japrôr nē ho pipānh o pa hkêt nē.

Nē amnhīm kâxpore ho pikuprônh nē ho rax prām xâj tanhmā amnhī nhîpêx to hkêt nē.

⁹ Nē kê Tirtûm kapêr piitâ hkôt hamaxpêr o pa. Ra Tirtûm kot mē pamā kapêr piitâ ho amnhîrit jakamā koja Kris kôt hkwyjê ho ajuta xwÿnhjaja kapêr piitâ hkôt hamaxpêr pē hkôt amnhī nhîpêx mex rāhā ho pa.

¹⁰⁻¹³ Nē kê mē amnhī prō pix tãnopxar o pa.

Nē pastô pyrà nē mē hkrajê jahkre mex nhûm mē hkôt ri amnhī nhîpêx mex o pa.

Nē kê mē hprôjaja mjên pyrà nē mē piitâ mē noo mǎ tām ri amnhī nhîpêx.

Nē hkwyjê ho kapêr rÿ mē axpên jakwa kamā ri axpên mǎ mē hixi ho rêr o pa hkêt nē.

Nē mjên pyrà nē mēmoj punuj kutâ amnhī to htÿx o ri pa. Nē amnhī to mex rāhā nē.

E koja mēhō kām Kris kwÿjê ho ajuta ho pa hprām hā koja ā amnhī nhîpêx anhÿr o pa. Nom kêr ka mē kot mē ho ajuta kaxyw mē unhwÿr tokyx anhÿr kêt nē Ximotre. Taxy mē kamā ama nē aprī hā mē kot ri tanhmā amnhī nhîpêx to hā mē omu mǎn. Hāmri nhûm mē piitâ mē mex ā mē harê ka mē hā mē ama nē rī kormā mē kot mē ho ajuta ho pa kaxyw mē unhwÿ. Hāmri nhûm mē amnhī tã omu nē axpên mǎ mex ā harê. Nē amnhī kaxyw Jejus Kris mǎ hamaxpêr mex o pa hā mē omu nē mē hā hpijaam o pa.

Pawre kot Ximotre mǎ amnhī jarênh

¹⁴ Nē inhmā awÿr inhmôr nē apumunh prām Ximotre. Nom kot pa amnhī kukamā ā mēmoj tã amā karō nē hā kagā anê. ¹⁵ Kêr pa tokyx awÿr inhmôr kêt japêr ka ixte amā mēmoj ā kagata kamā harê nē ixkutêp ho mē ahkre ho ri apa. Mē kot mar nē hprī hā mē ô pastô nē mē kot mē ho ajuta ho mē pa xwÿnhjaja kot tanhmā amnhī nhîpêx to hā mē harênh mar kaxyw.

Mē pahpê Kris kwÿjaja mē pahpê Tirtûm kra jakamā na pu htem kapêr kôt ri amnhī nhîpêx nē pakatât kôt mē piitâ mē kām pakapêr o papa. Jao tanhmā mē kām Jejus Kris jarênh to ho ri papa.

Pawre kot Jejus mex o mex ā mē grer jarênh

¹⁶ Nē Jejusja mex o mex. Amnepêm kormā mē pahte harênh mar kêt tã pu prem harênh ma hāmri nē mex o mex ā pagrer o papa. Nē pagrer o:

Kris kêp Mēpahpām tã na pre mē pahwÿr wrÿ nē mē pahpyrà nē ĩ ho ĩ nē kato. Nhûm pre Tirtûm Karôja mex o mex ā harê.

Nhûm Tirtûm kapêr o mē wrÿk xwÿnhjaja omunh o pa.

Nhûm ahpÿnhā pika piitâ hwÿr tanhmā kot mē panê amnhī nhîpêx to hā harênhja anhgřa.

Nhûm hte mē hkwyjaja harênh ma nē amnhī kaxyw hkôt hamaxpêr nē hkôt amnhī xunhwÿ.

Tã nhûm pika kamā âpênh jatur xam kumê nhûm Tirtûm akupÿm amnhī wÿr ho api.

Na pu htem ā Jejus mex o mex ā pagrer anê.

4

*Mē kot Tirtûm kapêr kwÿm ri tanhmā Kris kwÿjê jahkre hto xwÿnhjê jarênh
Matêwre 24.4-13; Korosê 2.16-19; Sikûn Ximotre 3.1-9; Sikûn Pêtre 2.1-3;
Jutre 3-16*

¹ Nê nhÿrmã Jejus akupÿn mẽ pahwÿr wrÿk kaxyw koja pika nhõ xwÿnh kwÿjaja ma hkwyjê mã tanhmã Tirtÿm kapêr o hêx to ho pa. Na pre Tirtÿm Karõ hprÿ hã mẽ hkukamã tanhmã mẽ harênh to. Koja xep Satanasti hkwyjaja Jejus kwÿjê hwÿr mra nê hêx rom tanhmã mẽ kãm kapêr to. Satanasti nhÿ hã mẽ kãm hêx o pa nhÿm mẽ hkwyjaja mẽ kuma nê mẽ hkõt hamaxpêr nê Jejus kaga. Æ koja mẽ Jejus akupÿn mẽ pahwÿr wrÿk kukamã amnhÿ nhÿpêx anê.

² Nê Satanasti nhÿ hã mẽ kãm mẽmoj to hêx xwÿnhjaja ãm Satanasti pix mar o pa jakamã koja mẽ hamaxpêr mex kêt nê. Koja mẽ mẽmoj punuj pumu nê htÿx mex ã hkamnhÿx. ³ Tã koja mẽ Tirtÿm kapêr kwÿm ri ã Jejus kwÿjê mã hêx ho pa anê nê mẽ kãm:

—Kwa kêr ka mẽ axpên mã ri mẽ rer o apa hkêt nê. Tirtÿm kãm ja prãm kêt. Æm ahte ri mẽ papaja na kãm hprãm. Anê.

Nê mẽ kot mẽmoj mex kur ã mẽ omu nê nê mẽ kãm kapêr nê mẽ kãm:

—Kwa na htem ata hkur kêt nê. Tirtÿm pê omnuj kênã kot ka kêt ri aku.

Anhÿr o koja mẽ kãm kapêr o pa. ⁴ Nom Tirtÿm na pre mẽ pamã mẽ apkur xã piitã ho kato. Mẽ paxãmnhÿx mẽ pahte piitã hkur o papa kaxyw. Jakamã mẽ pahpê hkrajaja na pu htem mẽmoj kaga hkêt nê. Na pu htem mẽmoj kur kaxyw nê Tirtÿm mã harê hãmri nê paxãmnhÿx kuku. ⁵ Tirtÿm kot mẽ paxãpkur xã piitã mex ã harênh jakamã na pu htem kãm harênh pê paxãmnhÿx piitã hkur o papa.

Pawre kot mẽmoj tã Ximotre mã karõ

Sikÿn Ximotre 1.6-14; Xitre 2.1-8

⁶ E Ximotre. Ixte mẽmoj tã amã karõta kêr ka ho Kris kõt pahkwÿjê jahkre mex o ri mẽ hkõt apa. Kot kaj ã mẽ ahkre anhÿr jao ra Jejus Kris mã axãpênh mex nê. Na ka pre harênh ma nê hkõt amnhÿ xãm hãmri nê hkõt amnhÿ nhÿpêx mex nê. Tã kêr ka arÿ hkõt amnhÿ nhÿpêx mex rãhã kê mẽ piitã ja hã apumu.

⁷ Nê mẽ ujarênhja kot paj tanhmã amã hã karõ hto. Mẽ panhÿgêt xujarênh kamã mo Tirtÿm jarênh? Amrakati kumrêx. Jakamã kêr ka mẽ hkõt ajamaxpêr o ri apa hkêt nê. Æm Tirtÿm kapêr kõt pix mã ajamaxpêr tÿx rãhã ho ri apa. Tirtÿm kapêrja ãm hãmri na.

⁸ Nê na htem amnhÿ karo hprãm xãj tanhmã amnhÿ karo hto ho pa. Ja mex. Tanhmã kute hkêt. Na htem tanhmã amnhÿ karo hto nê gaa nê ra hkarore nê pa. No kêt mẽ kot Tirtÿm kapêr kõt ri amnhÿ nhÿpêx o paja na mex o mẽ hkarota jakre. Na htem Tirtÿm kapêr kõt ri amnhÿ nhÿpêx hãmri nê mex nê hkÿnh nê pa ho pa. Hãmri nê nhÿrmã kaxkwa kamã Tirtÿm mẽ Kra Jejus wa kuri mex nê htÿr tÿm nê pa ho pa. Ja na mex o mex. ⁹ ãm hãmri ixte amã ja jarênh jakamã kwa kêr ka ja hã anohtÿx nê ri ho apa Ximotre.

¹⁰ Nê Tirtÿmja rãhã ho rãhã. Tã na pu pre amnhÿ kaxyw Kra Jejus kõt pajamaxpêr nê hkõt amnhÿ xãm nhÿm Tirtÿm pahto hkra. Kãm mẽ piitã mẽ ho hkra hprãm jakamã na htem pahpÿrã nê amnhÿ kaxyw Kra hkõt hamaxpêr nê hkõt amnhÿ xunhwÿ nhÿm amnhÿ tã mẽ omunh xã hkõt mẽ ho hkra. Ja kaxyw na pu htem mẽ piitã mẽ kãm Jejus kot tanhmã mẽ panê amnhÿ nhÿpêx to hã harênh rãhã o ri mẽ hkõt papa. Jao Tirtÿm mã paxãpênh mex nê.

¹¹ E kêr ka ã ja ho pahkwÿjê jahkre anhÿr ho ri mẽ hkõt apa. Mẽ kot amar nê akapêr kõt amnhÿ nhÿpêx mex ho pa kaxyw.

¹² Nê kormã anyw tã kêr ka mẽ piitã mẽ noo mã tãm ri akapêr nê tãm amnhÿ nhÿpêx o apa. Mẽ kot Jejus ã tanhmã ato htã arÿ amnhÿ kaxyw kãm ajamaxpêr tÿx nê. Nê mẽ piitã mẽ kutã anojarêt nê ajamaxpêr mex pix o ri apa. Kot kaj

kormã anyw tã ã mẽ noo mã amnhĩ nhĩpêx anê nhũm mẽ hã apumu nê kãm akapêr mar prãm nê. Anyw ã apumunh tã kãm akapêr mar prãm nê.

¹³ Nê kêr ka mẽ ate Tirtũm kapêr mar kaxyw axpên wÿr akuprõ ka arĩ ixkutêp mẽ kãm Tirtũm kapêr tũm ã kagã kamã akapêr rãhã ho apa. Nê aprĩ hã tanhmã ho mẽ ahkre hto nê ho mẽ ahkre mex nê Ximotre.

¹⁴⁻¹⁵ E kêr ka ã amnhĩ nhĩpêx anhÿr o ri mẽ hkõt apa nê amã ho anhÿr kaga hkêt nê. Mẽ piitã mẽ kot ate Jejus mã amnhĩ nhĩpêx mex o amõr ã apumunh kaxyw. Kormã ate mẽ kãm Jejus jarênh o apa hkêt ri na pre pastõ nhÿ hã mẽ kapêr xwÿnhjaja ate Jejus mã tanhmã amnhĩ nhĩpêx to ho apa kaxyw axãm. Hãmri nê anhĩmõk ã mẽ ìhkra jaxwÿ nê axãpênh kukamã tanhmã ajarênh to nê ato Tirtũm wÿ. Hãmri nhũm ate mẽ kãm kapêr jarênh o ri apa kaxyw amã ajamaxpêr o hihtÿx. Tã kêr ka ÿ hã ã kãm amnhĩ nhĩpêx anhÿr rãhã ho ri apa.

¹⁶ Nê kwa kêr ka amnhĩ pumunh mex nê Ximotre. Jao tãm ri amnhĩ nhĩpêx nê akatãt kõt Tirtũm kapêr o mẽ ahkre ho ri mẽ hkõt apa. Kot kaj ã amnhĩ nhĩpêx anê hãmri nhũm mẽ ama nê apyrã nê Jejus kõt amnhĩ xunhwÿ. Hãmri nê pahpyrã nê nhÿrmã Tirtũm wa kuri htĩr tũm nê pa ho pa.

5

Tanhmã mẽ pahte Kris kõt mẽ pahkwÿjê nhĩpêx to kaxyw mẽ pamã karõ Sikũn Ximotre 2.24-25

¹⁻² E kot paj hpãnhã Kris kõt pahkwÿjê hõ kot tanhmã amnhĩ tomnuj to nhũm ate tanhmã ja nê kãm akapêr to hã amã karõ.

Nã koja mẽhõ tanhmã ri amnhĩ tomnuj to ka harênh ma hãmri nê ma hwÿr tẽ nê ja nê tanhmã kãm akapêr to. Nom kêr ka kãm akapêr mã agêt kêt nê. Koja mẽwejjê õ tanhmã amnhĩ tomnuj to ka te kêp anhĩpêêxã rÿ akatorxã pyrãk o kãm akapêr. Jao hã apijaãm o tanhmã kãm akapêr to.

Rÿ koja apyrã nê mẽ nywÿjê hõ tanhmã amnhĩ tomnuj to ka te kêp atõ pyrãk o kãm akapêr.

Rÿ mẽnijê nyw ò amnhĩ tomnuj japêr ka te kêp atõx pyrãk o kãm akapêr. Jao hã apijaãm o kot amnhĩ tomnujja nê tanhmã kãm akapêr to.

E kêr ka mẽ kot amnhĩ tomnuj nê ã mẽ pahkwÿjê mã akapêr anhÿr o apa Ximotre.

Mẽ kêp mẽ mjên htyk xwÿnhjê jarênh Xiakre 1.27

³ Nê kot paj hpãnhã Kris kõt pahkwÿ pẽ mẽ mjên htyk xwÿnhjê jarê. Nã koja mẽhõ nija hkra hkêt nê htãmnhwÿ hkêt nê pa nhũm mjên kêp ty ka mẽ apê Kris kõt hkwyjaja ja hã omu nê mẽmoj to kutã anojarêt rãhã ho ri apa. ⁴ Nom koja ra hkra rÿ ra htãmnhwÿ japêr kê mẽ tãmjaja tanhmã ho ajuta hto ho pa. Kãm õ nê kãm mẽmoj nhõr o pa. Kormã mẽhprĩre ri na pre mẽ õ wõwõ nê mẽ katorxã nê mẽ hipêêxã mẽ hamãr mex pẽ mẽ kãm õ ho pa. Tã ra mẽ àptãr jakamã kê mẽ amnhĩ pyrã nê mẽ hamãr mex pẽ mẽmoj to mẽ kutã nojarêt rãhã ho pa. Ja na Tirtũm kãm hprãm. ã mẽ kot hkwyjê kamã ukapri ho pa jakamã te mẽ kot Tirtũm mã àpênh pyrãk.

⁵ No koja mẽhõ ni ra wejre nê ahte ri pa. Nê hkra nê htãmnhwÿ hkêt nê ri pa. Tã kê ja hã amnhĩ pumu nê Tirtũm kamnãr rom amnhĩ to hwÿr o pa. Nê mẽ piitã mẽ ho hwÿr o pa. Jao tãm hamaxpêr. Ka mẽ apê Kris kõt hkwyjaja ja hã omu hãmri nê mẽ kam nê tanhmã kutã anojarêt to ho ri apa. ⁶ No koja mẽ ã amnhĩ nhĩpêx anhÿr kêt nê. Nê htÿx ri mẽ grer wÿr mra nê hpijaãm kêt o ri

mra ka mē ja hā mē omu nē mē ho ajuta hkēt nē. Na htem ā amnhī nhīpēx anh̄r o pa nē arī ht̄ir tā te ra htyk nē hikw̄y pyrāk.

⁷E kēr ka ā ja hā Kris kōt pahkw̄yĵē mā karō anē. Kē mē ama nē ā mē mjēn htyk xw̄yñhĵē nhīpēx anh̄r o pa. ⁸Nom koja mēhō amnhī kw̄yĵē ho mex kēt japēr. Nē ōrkw̄y kamā hprō nē hkrajaja nē hipēēxā nē katorxā nhūm mē kām mē apkur xā nhōr kēt japēr. Koja mē ā amnhī nhīpēx anh̄r jao Jejus kaga nē te mē kot hkōt amnhī xunhw̄yĵē kēt xw̄yñhĵaja kot amnhī nhīpēx pyrāk o amnhī nhīpēx nom amnhī tomnuj t̄yx o mē hakre.

⁹Nē mē mjēn htyk nē mē hkra nē mē htāmnhw̄y hkēt xw̄yñhĵaja kēr ka mē tanhmā mē ho ajuta hto kaxyw hāmri nē mē hixi piitā hā kagā. Nom kwa kēr ka aprī hā tanhmā mē amnhī nhīpēx to hā mē omu nē rī kormā mē hixi hā kagā.

Koja mēhō kormā mjēn ht̄ir ri tām hipēx nē nhām mēmyĵē ho amnhīkati hkēt nē.

Nē ra hā amgrā pē 60 r̄y ra hā 60 jakre.

¹⁰⁻¹¹Nē tām mē piitā mē hipēx o pa.

Nē hkrajaja kormā ht̄ir ri nhūm mē hamār mex nē mē ahkre mex o pa.

Nē nhām krī hō nhō xw̄yñhĵaja ō krī hw̄yĵē pōj nhūm mē omu nē amnhī nhōrkw̄y hw̄yĵē mē kuw̄y.

Nē mē kēp amrakati xw̄yñhĵē ho mex o pa.

Koja mē ā amnhī nhīpēx anē ka ja hā mē omu nē rī kormā mē ho ajuta kaxyw mē hixi hā kagā. Nom mē hixi hā kagā kaxyw nē mēmoj tā mē hkukja nē mē kām:

—E kot kaj ā amnhī nhīpēx anh̄r o apa hā inh̄mā amnhī jarē pa ama nē rī kormā anhīxi hā kagā.

Kot kaj axte amjēn kēt nē.

Nē tanhmā Kris kōt akw̄yĵē ho mex to ho ri apa.

Nhūm mēhō mēmo myrapē hkaprī nē pa ka ja hā omu nē tanhmā ho ajuta hto.

E kot kaj ā amnhī nhīpēx anh̄r o apa hā amnhī jarē pa ama nē anhīxi hā kagā. Hāmri nhūm Kris kōt akw̄yĵaja amā axāpkur xā nhōr o pa. Anē.

Ā mē kām akapēr anē nhūm mē ama nē amā:

—Ÿ. Ma kot paj ā amnhī nhīpēx anē.

Anh̄r ā amnhī jarē ka mē ama nē mē hixi hā kagā. No kormā mē hā amgrā pē 60 kēt xw̄yñhĵaja kēr ka kormā mē hixi hā kagā hkēt nē. Koja mē tanhmā mē kot amnhī nhīpēx to ho pa hā mē kām karōja ma nē wam tajē pyrā nē amā:

—Ÿ. Ma kot paj ā amnhī nhīpēx anē. Na pa Jejus Kris noo mā ā amnhī jarēnh anē.

Anh̄r ā amnhī jarēnh tā gaa nē ra hkurē hapōj nē ra kot amnhī jarēnh̄ta kw̄yĵē ri tanhmā amnhī nhīpēx to nē axte mjēn. ¹²Ra amnhī jarēnh o:

—Ma kot paj ām Jejus mā pix mā tanhmā amnhī nhīpēx to ho ri ixpa nē axte inh̄mjēn kēt nē.

Anh̄r tā tanhmā hamaxpēr to nē kot amnhī jarēnh kw̄yĵē ri axte mjēn. Jao te Jejus mā amnhī to hēx pyrāk nhūm Tirtūm pē jamnuj. Ja pymaj kēr ka mē kormā mē hā amgrā pē 60 kēt xw̄yñhĵē nhīxi hā kagā hkēt nē. Kormā mē hā amgrā pē 60 kēt xw̄yñhĵaja arī mē hkīnh t̄yx ¹³jakamā kot kaj mē kām mē apkur xā nhōr o apa nhūm mē ja hā amnhī tā mē apumu nē axte amnhīm āpēnh kēt nē. Ām kām kaga nē ht̄yx ri nhām mē hw̄yĵē mra nē nhām mē hw̄yĵē mra. Nē amnhī pumunh mex kēt nē ht̄yx ri axpēn jakwa kamā ri mē hixi ho rēr o pa. Nē nh̄yri mēmoj pumu r̄y tanhmā mēmoj jarēnh mar to hāmri nē

ma ht̄ȳx ri hk̄w̄ȳjê mã harēnh o mra. Koja mẽ ã amnhĩ nhĩp̄êx anh̄ȳr o pa hãmri nhũm mẽ k̄êp̄ Kris kw̄ȳ hk̄êť xw̄ȳnh̄jaja ja hã mẽ omu nê mẽ hk̄ôt mẽ pahp̄ê Kris k̄ôt pahkw̄ȳjê ho kap̄er punuj nê. ¹⁴ ã mẽ kot amnhĩ nhĩp̄êx anh̄ȳr o pa pymaj k̄êr ka kormã mẽ nyw xw̄ȳnh̄jê mã anê k̄ê mẽ mãm̄rĩ axte mjên nê o pa. Hãmri nê hkra nê hkrajê jam̄ar o pa. Ja na inhmã hprãm. Koja mẽ ã amnhĩ nhĩp̄êx anê hãmri nhũm mẽ k̄êp̄ Kris k̄ôt pahkw̄ȳ hk̄êť xw̄ȳnh̄jaja mẽ hk̄ôt tanhmã mẽ pah̄to kap̄er punuj to hk̄êť nê. ¹⁵ Mãn ka ra Kris k̄ôt pahkw̄ȳjê nyw p̄ê mẽ mjên h̄tyk xw̄ȳnh̄ kw̄ȳjaja tanhmã amnhĩ tomnuj to hã mẽ harēnh ma. Na prem Jejus kaga nê Satanasti hk̄ôt amnhĩ nhĩp̄êx o pa.

¹⁶ E k̄êr ka mẽ ã Kris kw̄ȳ p̄ê mjên h̄tyk xw̄ȳnh̄jê nhĩp̄êx o apa anê Ximotre. Nom koja mẽ akw̄ȳ kamã mēh̄õ nh̄õ w̄ôw̄ô mjên r̄ȳ katorxã mjên k̄êp̄ ty k̄ê tãm kãm õ ho pa. K̄êr k̄ê Kris k̄ôt pahkw̄ȳjaja ãm mẽ k̄êp̄ mẽ mjên h̄tyk xw̄ȳnh̄ p̄ê mẽ hkra nê mẽ ht̄amnhw̄ȳ hk̄êť nê ahte ri mẽ pa xw̄ȳnh̄ pixjaja tanhmã mẽ ho ajuta hto ho pa.

Mẽ pahp̄ê Kris k̄ôt pahkw̄ȳjê hkr̄ähtũm kaxyw mẽ pah̄tã kãm karõ

Atre 14.23; Wam Kor̄it̄ 9.7-14; Karatas 6.6; Wam Tesarõn 5.12; Wam P̄être

5.1-4

¹⁷⁻¹⁸ Nê kot paj hp̄ãnhã amã Kris k̄ôt mẽ pahkr̄ähtũmjê jarê. Tirtũm kap̄er ã kagã htũm kot mẽ harēnh kot:

K̄êr ka Tirtũm kap̄er o mẽ ajahkre xw̄ȳnh̄jaja mẽ ahkre pãnhã mẽ kãm amnhĩre. Anê.

Nê mããn̄en mẽ harēnh ã kuxi nê mẽ harēnh o:

Koja akrit amã ãp̄en̄h o pa ka ho mex nê kãm õ mex o apa. Anê.

Ã ja jarēnh kot anh̄ȳr jakamã koja Kris k̄ôt mẽ akr̄ähtũmja Kris mã tanhmã mẽ ato mex to ho pa ka mẽ amnhĩ tã kãm amnhĩrer mex o ri apa. Kot Tirtũm kap̄er o mẽ ajahkre mex jakamã ka mẽ amnhĩ tã kãm amnhĩrer mex nê.

¹⁹ Nê koja mēh̄õ pixi nê mẽ aw̄ȳr t̄ê nê amã Kris k̄ôt mẽ akr̄ähtũm kot tanhmã amnhĩ tomnuj to hã harēnh to ka ama nê ãm ama. Nom koja wa ham̄exkrut r̄ȳ mẽ axkrun̄ep̄xi nê mẽ aw̄ȳr mra nê axp̄en̄ k̄ôt tanhmã harēnh to ka mẽ ama nê ãm hãmri mẽ kot tanhmã kot amnhĩ tomnuj tota k̄ôt ajamaxp̄er.

²⁰ Hãmri nê Kris kw̄ȳjê piitã mẽ noo mã kot amnhĩ tomnuj xw̄ȳnh̄ta mã tanhmã kot amnhĩ tomnuj to nê kãm akap̄er k̄ê axte ã amnhĩ nhĩp̄êx anh̄ȳr k̄êť nê. Mẽ piitã mẽ kot hã amar nê nh̄ȳrmã tanhmã amnhĩ tomnuj to nhũm ate urak̄ nê hã tanhmã mẽ kãm axak̄j̄er to pymaj tanhmã amnhĩ tomnuj to hk̄êť nê.

²¹ E Tirtũm noo mã na pa ã amã mẽ kaxyw mẽmoj tã karõ anê Ximotre. Nê Jejus Kris mẽ Tirtũm kap̄er o mẽ wr̄ȳk xw̄ȳnh̄jê noo mã pa ã amã karõ anê. Jakamã k̄êr ka inhm̄ar t̄ȳx nê hk̄ôt amnhĩ nhĩp̄êx o ri apa. Jao mẽ piitã mẽ hip̄êx o axp̄en̄ pyrak̄. Nom k̄êr ka akr̄amnhw̄ȳ kot tanhmã amnhĩ tomnuj to hã omu nê axtem nê ãm omu nê ajamaxp̄er o:

—Nã k̄êp̄ ixkr̄amnhw̄ȳ k̄enã kot paj k̄êť ja nê tanhmã kãm ixkap̄er to. Pa ho anh̄ȳr k̄êť nê.

Anh̄ȳr o ajamaxp̄er k̄êť nê. Mẽ piitã mẽ hip̄êx o axp̄en̄ pyrak̄.

²² Nê k̄êr ka anojar̄et̄ kãm mẽ kot Tirtũm mã tanhmã amnhĩ nhĩp̄êx to ho mẽ pa kaxyw mẽ unhw̄ȳr k̄êť nê. Apr̄ĩ hã tanhmã mẽ kot amnhĩ nhĩp̄êx ã hã mẽ omu nê mẽ hkapi nê r̄i kormã mẽ unhw̄ȳr r̄ȳ tee ri mẽmoj tã mẽ omu nê mẽ hkaga.

Nê koja mēh̄õ tanhmã amnhĩ tomnuj to ka ja hã omu r̄ȳ harēnh ma hãmri nê urak̄ nê ã amnhĩ nhĩp̄êx anh̄ȳr k̄êť nê. Ar̄ĩ Tirtũm k̄ôt amnhĩ nhĩp̄êx p̄ê tãm

ri amnhĩ nhĩpêx pix o apa. ²³⁻²⁵ Na htem tōhã tanhmã amnhĩ tomnuj to nhũm mēhō ja hã mē omu nē mē harēnh kurê kumrēx. Kris kôt mē hkrāhtũm kormã kot tanhmã hã kām nē hkêt ri nhũm mē ja hã mē omu nē tanhmã mē harēnh to. Nom na htem tōhã hpimxur pê tanhmã amnhĩ tomnuj to nhũm Tirtũm pix ja hã mē omu. Tã koja nhỹrmã mē piitã mē kām ja ho amnhĩrit nhũm mē piitã harēnh ma nē hkôt omu.

Nē mē kot amnhĩ to mex xwýnhjaja haxwýja. Na htem tōhã mē noo mã tanhmã mēhō ho mex to nhũm hkwyjaja ja hã omu nē axpēn mã mex ã mē harē. Nē tōhã hpimxur pê tanhmã mēhō ho mex to nhũm mēhō ja hã omunh kêt nē. Ām Tirtũm pix ã kot amnhĩ nhĩpêx anhỹr ã omu. Tã koja nhỹrmã mē piitã mē kām ja ho amnhĩrit nhũm mē piitã harēnh ma nē hkôt omu.

Nē kwa Ximotre. Axã nē anhōhymnuj nē ri apa jakamã kwa kēr ka gō pix o akōm o apa hkêt nē. Māñnēn wĩhti hkwy ho ixkō kēr ka anhōhy mex japêr.

6

Mē kām mē àpēnh xwýnhjê kaxyw mē hã kām karō

Epes 6.5-9; Korosê 3.22-4.1; Xitre 2.9-10; Wam Pêtre 2.18-25

¹ E kot paj mē akwýjaja mē kām mē àpēnh o mē pa xwýnhjê kaxyw mēmoj tã amã karō. Mē kām anē kē mē ò patrãw ã hpijaam o ri pa. Jao mē kapêr ma nē hkôt kām àpēnh mex nē. Koja mē ã amnhĩ nhĩpêx anē nhũm amnhĩ tã mē omu nē hamaxpêr o:

—Kwa pēr Tirtũm kapêr na mex kumrēx. Inhmã àpēnh xwýnhja na hte hkôt amnhĩ nhĩpêx pê amnhĩ to mex o pa. Pēr ãm hãmri na hte Pawre ho mē ahkre ho pa.

Anhỹr o hamaxpêr. ² Nē koja mē ò patrãw ra Kris kôt amnhĩ xãm japêr ka kãm mē àpēnh xwýnhjê mã anē kē Kris kôt mē kēp mē htō hã mē kām àpēnh mex o ri pa. Nom kē mē urak nē kēp Kris kôt hkwy hã mē omu nē hamaxpêr o:

—Nà Kris kôt ixtō kēnã kot paj kêt ri kapêr kôt amnhĩ nhĩpêx nē kãm ixapēnh mex o ri ixpa.

Anhỹr o hamaxpêr kêt nē. Kē kēp Kris kôt htō hã kãm ho mex prãm xà kãm àpēnh mex o pa.

E kēr ka mē kām mē àpēnh o mē pa xwýnhjê mã ã tanhmã mē àpēnh to ho pa hã karō anē Ximotre.

Tirtũm kapêr kwým ri mē ahkre xwýnhjê jarēnh

Rukre 12.13-21; Xiakre 5.1-6

³ Nē na hte Kris kwý hkêt xwýnh kwýjaja Kris kwýjê mã Tirtũm kapêr o hêx o pa. Nē htýx ri Jejus kapêr kwým ri tanhmã harēnh to ho pa. Ām hãmri na Tirtũm mē Pahihti Jejus Kris wa kapêr tã nhũm htem htýx ri tanhmã ho hêx to ho ri mē hkôt pa. ⁴ Mē kot amnhĩ to rũnh xwýnh ã amnhĩ to jarkrar tã mē àhpumunh týx kêt. Na htem tanhmã Tirtũm kapêr kute hã axpēn mã akir nē mēmoj tã axpēn kãm gryk o pa. Nē axpēn mã kapêr punuj nē mēmoj tã axpēn kamnhix o pa. ⁵ Nē hamaxpêr mex kêt jakamã mēmoj tã axpēn mã àkjêr pix o pa. Na htem ã amnhĩ nhĩpêx anhỹr o Tirtũm kapêr mar týx kêt nē. Hãmri nē htýx ri hamaxpêr nē hamaxpêr o:

—Kot paj Tirtũm kapêr o mē ahkre ho ixpa nhũm mē inhma nē inhmã amnhĩrer mex nē pa ixkãxpore rax nē ri ixpa. Nà kot paj ã amnhĩ nhĩpêx anhỹr o ri ixpa. Ja inhma mex.

Anhỹrja o kãm hikãxpore rũnh prãm o amnhĩ to amnhĩrit o pa.

Kàxpore jarēnh

6-8 E kot paj hpānhā amā tanhmā kàxpore jarēnh to ka inhma Ximotre. Xà na pu htem pakatorxà nhōhy rūm pajapōj nē amnhī kōt kàxpore hkwy jamy nē ho pajapōj? Nà na pu htem pahkēnh nē panhy kamā pajapōj. Tā kot puj mē ja pyrā nē nhŷrmā ty nē mā ho anē nē panhy kamā ma papa. Jakamā kēr pu mē kormā pika ja kamā pahŷr nē papa ri paxāpkur xà nē mē paxē pix tānopxar pē pahkīnh nē ri papa. Pakàxpore rūnh kēt tā na pu htem Tirtūm kamnār rom pahkīnh nē pajamakētkati nē papa. Jao pajamaxpēr o:

—Nà ixkàxpore rax kēt nē ixkukrēx rax kēt tā na hte Jejus ixkōt pa ho pa nē mēmoj to ixkutā nojarēt rāhā ho pa. Jakamā ixkàxpore rax kēt tā ixkīnh nē ijamakētkati nē ixāmnhīx ixpa.

Anhŷr o pajamaxpēr o papa.

9-10 Mē kot amnhīm kàxpore o pikuprōnh rūnh xwŷnhjaja na htem kàxpore pix kukamā hamaxpēr o pa nē gaa nē kàxpore rūnh gryk ā amnhī tomnuj o pa. Na pre mē pahkwŷjaja kàxpore rūnh prām xāj Jejus kaga. Tā ra mē hikàxpore rūnh tā hkīnh nē hamakētkati nē pa hkēt nē. Na htem omnuj nē hkaprī nē pa. Ā na htem mē hikàxpore rūnh xwŷnh kwŷjaja amnhī nhīpēx anhŷr o pa. Jao kàxpore pix kukamā hamaxpēr nē gaa nē ra gryk ā mē kot amnhī to mex xà kaga hpa nē htŷx ri tanhmā amnhī tomnuj to ho pa. Nē tanhmā hkwyjē nhīpēx punuj to. Te tutre kot harōj xānh ā htŷx rapuutj hwŷr gŷēx nē tee ri kām kator prām kaprŷ pyrāk. Ā mē kot amnhī nhīpēx anhŷr o pa jakamā koja nhŷrmā Tirtūm ma mē kot amnhī xà htŷx kamā hamak tūm xà hwŷr mē kurē.

Pawre kot Ximotre mā mēmoj tā karō

Korosē 4.17; Wam Ximotre 4.14; Sikūn Ximotre 2.1-7

11 Nē kwa Ximotre kēr ka mē urāk nē kàxpore rax prām xāj amnhī tomnuj o apa hkēt nē. Ate Tirtūm mā tanhmā amnhī nhīpēx to ho apa xwŷnh jakamā kēr ka kām hprām xà hkōt pix mā amnhī nhīpēx o ri apa. Jao Tirtūm pyrā nē ate amnhī jarēnh xà hkōt amnhī nhīpēx o ri apa. Nē amā Kris kōt akwŷjē hkīnh pē mēmoj to mē kutā anojarēt o ri apa. Nē Kris kōt mē hkwy hkēt xwŷnhjaja kot Kris ā tanhmā ato htā ka arī hkōt amnhī nhīpēx mex nē mē piitā mē ho mex o ri mē hkōt apa. 12 Na ka pre Kris kōt mē pahkwŷjē noo mā tanhmā amnhī jarēnh to. Tirtūm kot amnhī wŷr awŷr nhūm ate Jejus kōt amnhī xām nē amā kām tanhmā amnhī nhīpēx to ho apa hprām ā amnhī jarē nhūm ikrēsti kamā mē piitā ja hā ama. Jakamā kwa kēr ka arī Jejus kōt amnhī nhīpēx mex rāhā ho ri apa. Hāmri nē nhŷrmā Tirtūm mē Kra wa kuri amex kumrēx nē atŷr tūm nē apa ho apa.

13-14 E na pa mēmoj tā amā karō rax ka piitā kamā harē nē mar pa. Tā kēr ka inhmā ja hā tanhmā amnhī jarēnh to. Mēmoj piitā ho htŷr xwŷnh Tirtūm mē Jejus Kris wa noo mā tanhmā ja hā inhmā amnhī jarēnh to. Jejus htyk kaxyw nē àmnhīx kot Pahi Pōn Pirat mā amnhī jarēnh xwŷnhhta noo mā amnhī jarē nē inhmā amnhī jarēnh o:

—Nà kot paj ate mēmoj tā inhmā karō piitā hkōt amnhī nhīpēx rāhā nhūm Pahihti Jejus Kris akupŷn mē pahwŷr wrŷ. Ām hāmri na pa ā amā amnhī jarēnh anē Pawre.

Anhŷr o inhmā amnhī jarē.

Tirtūm mex o mex ā mē grer

15 Nē koja Tirtūm akupŷn mē pahwŷr Jejus mēnh xà hā arīgro jarē hāmri nhūm kot harēnh xàta wŷr pōj nhūm akupŷn mē pahwŷr kumē. Tirtūmja mex

o mex. Tapxipix kēp mēmoj piitā ho amnhīptār xwýnh maati. Nē kēp jar mē ho amnhīptār xwýnh piitā mē ō Pahi Maati.

¹⁶ Nē tapxipix na rāhā ho rāhā nē mex o mex jakamā puhā hirā rax kumrēx. Tā hkīnhā mē pahte amnhī tomnuj xwýnh jakamā kot puj mē puhā hirā raxja kutā hkēt nē. Jao hwýr mē pamrar kēt nē. Nē aa mēhō kot no ho Tirtūm pumunh kēt tā kwa kēr pu mē pahpiitā kām mex o mex nē hihtýx o hihtýx ā harēnh rāhā ho papa.

Axe mē hikàxpore rūnh xwýnhjē jarēnh

Rukre 16.9

¹⁷ Nē kēr ka Kris kwýjē kamā mē hikàxpore rūnh xwýnhjē mā anē kē mē kot amnhī to rūnh kōt amnhī to àmra ho pa hkēt nē. Nē amnhī kaxyw mē hikàxpore rūnh kōt hamaxpēr o pa hkēt nē. Kàxpore na hte hapēx tokyx anē. Mē kām anē kē mē hpānhā amnhī kaxyw Tirtūm kōt mǎn hamaxpēr týx rāhā ho pa. Na hte àmnhīx tanhmā mē pahto mex to ho pa nē mē pahpē ōxy hkēt nē. Jao mē pahwýr na rē nhūm mē pahpur go mex nē pu mē kamā panhō rūnh o papa. Nē mē pamā myyti ho hirā pu mē kukwak ri parīt mex pē mēmoj tā paxápēnh o papa. Ā Tirtūm kot mē pahto mex kot anhýr pu mē kukwak ri pahkīnh nē pajamakētcati nē ri papa. Tā kēr ka mē hikàxpore rūnh xwýnhjē mā anē kē mē amnhī kaxyw kumā pix mā mǎn hamaxpēr rāhā ho pa. ¹⁸ Nē mē kām anē kē mē hikàxpore ho hkwyjē pē ōxy hkēt nē ho tanhmā mē ho mex to ho pa. Nē àmnhīx ho tanhmā mē kēp amrakati xwýnhjē ho ajuta hto ho pa. ¹⁹ Kojā mē ā amnhī nhīpēx anē nhūm Tirtūm ja hā mē omu nē hkīnh nē ō krī kamā mē kutēp mē kām mēmoj mex o akuprō. Jakamā nhūm mē kormā jar hūr nē pa ri mex nē pa nē mǎānēn nhýrmā kaxkwa kamā mex kumrēx o jar pika ja kamā mex nē pata jakre. E kēr ka ā mē hikàxpore rūnh xwýnhjē mā ja hā karō anē Ximotre.

Pawre kot Ximotre mā mēmoj tā karō jatur xā

Korosē 4.17; Wam Ximotre 6.14; Sikūn Ximotre 1.13, 4.5

²⁰ Nē ra Tirtūm kot ate kapēr o mē ahkre ho apa kaxyw axām jakamā kēr ka tām amnhī nhīpēx pē mē ahkre mex rāhā ho ri apa. Jao Tirtūm kapēr o hēx o ri mē ahkre xwýnhjē hkōt apa hkēt nē. Na htem mē kuma nē mē kapēr mex ā mē hkamnhīx nom mē kapēr mex kēt. Jakamā kwa kēr ka mē kot tanhmā mē ahkre hto hā mē ama nē ām mē ama. ²¹ Na pre ra mē pahkwýjaja mē kuma nē mē kapēr gryk ā Jejus kaga.

E ām ja pix. Kē Tirtūm mē apiitā mē akutā nojarēt rāhā ho pa. Ixpē Pawre na pa ā amā ixkapēr ā kagā anē.

Sikūn Ximotre

Pawre kot Ximotre hwÿr wam kagā nē mēnh kôh hō mēnh

Pawre na pre kagāja nhîpêx. Na pre Jejus kwÿr hkêt xwÿnhjaja Jejus ā unê nê krî pē Rôm kamā haxā nhūm arî hkrî ho hkrî. Tā ra mē kot hpîr kaxyw nhūm Ximotre mā kagāja nhîpêx nê hwÿr kumê. Na pre Ximotre Pawre hkôt pa ho pa hā mytwrÿ sohtô nê. Tā hpānhā krî pē Epes kamā arîk nê Tîrtūm kapêr o Jejus kôt hkwyjê jahkre ho ri mē hkôt pa. Jakamā nhūm Pawre kagāja nhîpêx nê kamā kām mēmoj tā karô nê hwÿr kumê. Nê nhÿrmā mē kot Pawre pyrā nê Jejus ā hpîr mā htā tee ri amnhî kukamā hamaxpêr kêt ā kām karô.

Nê mē hkwyjaja kêp Tîrtūm kra hā amnhî jarênh tā nhūm Pawre Tîrtūm kām hprām xā kuhpa hā mē kot tanhmā amnhî nhîpêx to ho pa hā Ximotre mā mē harê. Kot mē harênh mar nê Jejus kwÿjê nê mē omunh mex o pa kaxyw. Nê Ximotre kot Tîrtūm kām hprām xā kot pix mā amnhî nhîpêx o pa hā kām karô. Ā na pre Pawreja Ximotre mā mēmoj tā karô kamā hihtÿx nê hā kagā nê hwÿr mēnh anê. Nê kām:

1 Pa Ximotre? Xā amex? Ixpê Pawre na pa amā ixkapêr nê hā kagā nê awÿr kumê. Ixpê Jejus nhÿ hā hkwyjê jahkre ho ixpa xwÿnh na pa. Tîrtūm na pre ja kaxyw ixām. Tîrtūm Kra Jejus Krisja kot puj mē pahpê hkwyjaja nhÿrmā kukwak ri pamex kumrêx nê pahtîr tūm nê ri papa ho papa.

Pawre kot Ximotre ho Tîrtūm mē Jejus wa hwÿr ā harênh *Atre 16.1-2*

2-3 Te apê ixkra pyrāk Ximotre. Jakamā na pa hte ato Mēpanhîpêxā maati Tîrtūm mē Pahihti Jejus Kris wa hwÿr rāhā ho ri ixpa. Na pa hte mē pakukamā mē panhîgêt pyrā nê tām ijamaxpêr o ixpa pē Tîrtūm mā tanhmā amnhî nhîpêx to ho ri ixpa. Jakamā na pa hte ato Kra Jejus mē wa hwÿr rāhā ho ri ixpa. Arîgro hā nê kamāt kām amā ijamaxpêr nê ato wa kuwÿ nê wa kām:

—Pa Tîrtūm mē Pahihti wa. E ixte ixkra puro Ximotre ho war awÿr kaxyw war amā ijamaxpêr. Na ka hte wa ho mex nhūm war akôt amnhî nhîpêx mex o pa. Te ô wôwô mē katorxā wa kot amnhî nhîpêx pyrāk. Na pa hte kot amnhî nhîpêx o paja mā ijamaxpêr nê ÿ hā ixkînh nê. War ate kamā axukaprî ho ri apa kaxyw na pa ho war awÿ. War ate kutā war anojarêt rāhā ho ri war apa nhūm hamakêtkati nê àmnhîx ri pa ho pa kaxyw. Anê.

Pawre kot Ximotre nhÿ hā hkînh ā harênh

4 Nê na ka pre hte ixkôt ixto ajuta ho ri ixkôt apa htā pa pre nhÿhÿm inhnojarêt nê axtem axâpênh ô hā amā karô hāmri nê Epes kamā are nê ma mō. Ka amā ijapê xāj tee ri ma inhmōr ā ixpumu nê amÿr rax nê. Na pa hte arî ja hā inhnohtÿx nê ri ho ixpa Ximotre. Jao ra ato ama nê. Tā kot puj nhÿrmā axte axpênh pumu nê pahkînh tÿx nê.

5 Nê na pa hte akatorxā Enître mē anhō wôwôre Rojti wa kām ijamaxpêr rāhā ho ri ixpa. Na pre wa kumrêx amnhî kaxyw Jejus kôt hamaxpêr nê hkôt amnhî xām. Tā ka wa hkanrêhā wa urāk nê ā amnhî nhîpêx anê. Ixte ja hā apumunh mex. 6 Na pa pre ate tanhmā Jejus mā amnhî nhîpêx to ho ri apa kaxyw axām kaxyw anhîmōk ā inhîhkra xi nê ato Tîrtūm wÿ. Kot tanhmā akrā

hto nhùm ate Karō nhỹ hã tanhmã amnhĩ nhĩpêx to ho apa kaxyw. Tã kêr ka arĩ ã kãm amnhĩ nhĩpêx anhỹr rãhã ho ri apa. ⁷ Na pu htem Tirtùm Karō nhỹ hã pamã ma ho papa hkêt nê. Na pu htem ý hã pamã mẽ piitã mẽ hkĩnh pê paxãmnhĩx tanhmã mẽ ho ajuta hto ho papa. Nê ý hã kapêr o mẽ ahkre htỳx o ri mẽ hkôt papa. Nê mẽmoj punuj kutã amnhĩ to htỳx rãhã nê. Jao amnhĩ to mex pix nê.

⁸ Jakamã kwa kêr ka amã mẽ kãm Jejus jarênh o apa pymaj tee ri amnhĩ kukamã ajamaxpêr kêt nê. Nê mẽ kot Jejus ã ijaxàr nhùm arĩ ixkrĩ hã ijarênh ma nê mẽ kot ixkuxwar ajaxàr pymaj mẽ kãm Tirtùm kapêr o mẽ ahkre hkukamã tee ri ajamaxpêr kêt nê. Mẽ kot ã anhĩpêx anhỹr mã tã kêr ka amnhĩ kamã akahak kêt nê. Âm Tirtùm nhỹ hã hihtỳx xà ho amnhĩ to htỳx nê ixpyrà nê ma mẽ kãm Jejus kot mẽ panê tanhmã amnhĩ nhĩpêx to hã harênh to rãhã ho ri mẽ hkôt apa. Mẽ kot tanhmã hã anhĩpêx to htãã. ⁹ Na pu htem Jejus kôt amnhĩ xunhwỹ nhùm Tirtùm ja hã mẽ pahpumu nê Jejus kukwak ri amnhĩ katut kôt mẽ pahte amnhĩ tomnuy piitã rênh pa nê mẽ pahto hkra. Hãmri nê mẽ pahte hkôt pix mã amnhĩ nhĩpêx o papa kaxyw mẽ paxunhwỹ. Âm Jejus pix kukwak ri na hte mẽ pahto hkra nê ã mẽmoj to mẽ pakutã nojarêt rãhã ho pa anê. No na hte mẽ pahte amnhĩ to mex ã mẽ pahpumunh kôt mẽ pahto hkra hkêt nê. Amnepêem kormã mẽmoj piitã hkêt ri na pre mẽ pakukamã hamaxpêr o:

—Koja mẽ nhỹrmã Ixkra Jejus Kris kôt amnhĩ xunhwỹ pa ja hã mẽ omu nê Ixkra kukwak ri mẽ ho mex nê. Anê.

¹⁰ Tã kormã mẽ pahte amnhĩ tã ã kot mẽ pajarênh anhỹrja mar kêt jakamã na pre Jejus mẽ pahwỳr wrỳ nê tanhmã mẽ pahto mex to. Na pre ty nhùm Tirtùm akupỳm ho htĩr. Jakamã na pu htem ra amnhĩ kaxyw hkôt pajamaxpêr nê hkôt amnhĩ xunhwỹ hãmri nê nhỹrmã mẽ pahtyk tã nhùm Tirtùm kot Kra Jejus nhĩpêx pyrà nê akupỳm mẽ pahto mẽ pahtĩr pu mẽ Jejus kukwak ri wa kuri pamex nê pahtĩr tùm nê papa ho papa. Jakamã na pu htem mẽ pamã pahtyk pyma ho papa hkêt nê.

¹¹ Amnepêem na pre Tirtùm ixãm nê tanhmã inhmã ixàpênh ã karō hto nê inhmã:

—E Pawre kêr ka Jejus nhỹ hã ma hkwyjê jahkre ho ri mẽ hkôt apa. Nê ixkapêr o mẽ ahkre mex nê. Kêr ka ã amnhĩ nhĩpêx anhỹr rãhã ho ri mẽ hkôt apa. Anê.

¹² Tã ã kot inhmã kapêr anhỹr nhùm ixte kapêr kôt amnhĩ nhĩpêx o ixpaja mỳrapê na htem Jejus ã tanhmã inhĩpêx kati hto ho pa. Pa hte ixpunuj nê amnhĩ xà htỳx kamã ijamak o ri Jejus mã tanhmã amnhĩ nhĩpêx to ho ri mẽ hkôt ixpa. Tã nom tee ri ja hã amnhĩ pumu nê amnhĩ kamã ixpijaam nê ixkaprĩ hkêt nê. Ixte amnhĩ kaxyw hkôt ijamaxpêr xwỳnhja na ixte tanhmã kot amnhĩ nhĩpêx to hã omunh mex jakamã kot paj ty nhùm mẽ arĩ inhmỳr pê Tirtùm kapêr mar o pa. Mẽ kot ja hã ixpir tã koja mẽ apê Kris kôt ixkwỳjaja inhmỳr pê arĩ mẽ kãm harênh o apa. Koja mẽ ã axpên mỳr pê amnhĩ nhĩpêx anhỹr o pa rãhã nhùm Pahihiti Jejus akupỳn mẽ pahwỳr wrỳ.

¹³ Kwa Ximotre. Ra ixte amã mẽmoj tã karō rax jakamã kêr ka mar tỳx nê hkôt amnhĩ nhĩpêx rãhã o ri apa. Jao Jejus Kris nhỹ hã mẽ piitã mẽ noo mã amnhĩ kaxyw kãm ajamaxpêr tỳx rãhã nê. Nê mẽ piitã mẽ ho mex o ri apa.

¹⁴ Ate mẽ kãm tanhmã Jejus jarênh to ho ri apaja âm hãmri na. Tã koja mẽhō htỳx ri tanhmã ho kapêr punuj to rỳ axtem nê tanhmã harênh to ka ja hã ama

nē nē kām akapēr kām axiht̄x nē. Tirtūm Karō ra kot akarō hw̄yr àr jakamā kēr ka ỹ hā ā Jejus jarēnhja jamār mex o ri apa anē.

Pawre kot tanhmā amnhī jarēnh to

Sikūn Ximotre 4.16-18

¹⁵ Nē mǎn ka pre ra pika pē As kamā Kris kw̄y kot ixkaga hā mē harēnh ma. Na pre Pijerti mē Emosti mē mē ohtō nē tanhmā hamaxpēr to nē ixto ajuta hkēt nē. ¹⁶⁻¹⁸ Ām Onēsipti pix na pre mē kurom ijarēnh ma nē man ixw̄yr Rōm w̄yr mō nē ijapēr o ri mē hkōt mra nē ixw̄yr kato. Hāmri nē xatā ixw̄yr mra nē tanhmā ixto mex to. Jao akup̄ym ijamaxpēr o hiht̄x. Ixpē prēs nē ixkrī htā kēp ixkrāmnhw̄y hā amnhī jarēnh ā hpijaam kēt nē. Nē amnepēm kormā krī pē Epes kamā ixpa ri na pre māānēn tanhmā ixto mex to ho pa. Tā ā kot inhīpēx mex anh̄yr o pa jakamā na pa hte ho Pahihti Jejus w̄y nē kām:

—Pa Pahihti? Onēsipti o na pa aw̄y. Kot ixto mex rāhā ho pa jakamā kwa kēr ka ixtā omu nē kutā anojarēt rāhā ho apa. Nē ōrkw̄y kamā hk̄w̄yja māānēn tanhmā mē ho mex to. Hāmri nē nh̄ymā akup̄yn mē ixw̄yr wr̄y nē ixtā kamā axukaprī hā tanhmā ho mex to. Anē.

2

Mē pahte Jejus kōt amnhī nhīpēx pix prām ā mē pamā karō

Wam Ximotre 6.11-16

¹ E Ximotre. Jejus Kris kot mēmoj to mē pakutā nojarēt rāhā jakamā kwa kēr ka ỹ hā amnhī to ht̄x nē kām tanhmā amnhī nhīpēx to ho apa hā amnhī kamā akahak o ri apa hkēt nē. ² Ra ate pa tanhmā Tirtūm kapēr o mē ahkre htoja mar jakamā kēr ka amnhī xō ri ā Jejus kōt mē pahkw̄jē jahkre ho apa anē. Mē kot amar nē pahpyrān axpēn xō ri ho axpēn jahkre ho pa kaxyw.

³⁻⁴ Sōrdat na htem mē hkrāhtūm kām prām xā hkōt tanhmā amnhī nhīpēx to. Jao tanhmā kute htā kapēr ma nē hkōt amnhī nhīpēx. Tanhmān ā r̄y kām prām r̄y tanhmā omnuj to htā kutā amnhī to ht̄x nē mē hkrāhtūm kōt amnhī nhīpēx. Na htem amnhī xāpēnh kukamā tee ri hamaxpēr o pa hkēt nē. Ām mē hkrāhtūm kapēr kōt pix mā amnhī nhīpēx o pa hprām. Tā kēr ka mē urāk nē Pahihti Jejus kōt amnhī nhīpēx rāhā ho ri apa hprām. Mē kot hā tanhmā atomnuj to htāā.

⁵ Nē mē hprōt t̄yx xw̄ynhjaja na htem hk̄w̄jē pē amnhī to wa hprām xàj ām ja pix kukamā hamaxpēr. Hāmri nē hprōt t̄yx prām xàj mēmoj kot mē ho hirerek kēt nē amnhī jagri ht̄x nē. Hāmri nē hprōt t̄yx o hk̄w̄jē jakre nē amnhī to wa nē pōj nē kot amnhī to wa hā mēmoj to kǎnja. Tā kēr ka mē urāk nē amā Pahihti Jejus kot amnhī nhīpēx kōt pix mā amā amnhī nhīpēx prām.

⁶ Nē pur kām mē àpēnh xw̄ynhjaja na htem mē hpur kām àpēnh pix tǎnopxar o pa nē àpēnh rūnh nē. Kām kaga hkēt kām àpēnh o pa. Tā àpēnh rūnhja kukwak ri ihpur kām ō rūnh nē ho apkur mex o pa. Nom koja mē kām kaga nē àpēnh mex kēt nē hāmri nē ō grire nē apkur mex kēt nē. Tā kēr ka pur kām mē àpēnh rūnh xw̄ynhjē pyrà nē Pahihti Jejus mā amnhī nhīpēx mex o apa. Nē mē urāk nē amā kaga hkēt kām axàpēnh pix tǎnopxar o ri apa.

⁷ E na pa ā ajahkre anē Ximotre. Tā kēr ka ixte ajahkreja ma nē kām ajamaxpēr rāhā nē. Koja Pahihti tanhmā akrā hto ka aprī hā mar t̄yx nē.

⁸ Nē kēr ka Pahihti Jejus Kris mā ajamaxpēr rāhā ho ri apa. Na pre katorxā hkōt kēp Pahi finat Tawī kanrēhā htāmnhw̄y hā mē pahpyrà nē ī ho ī nē kato nē panhō pika kamā pa ho pa. Tā nhūm prem kupī nhūm amnhī xā ht̄x kamā hamak kām ty. Hāmri nhūm Tirtūm akup̄ym ho h̄tir nhūm akup̄ym h̄tir o h̄tir.

Ǻ na pre hte harēnh anhyr rāhā ho ri mē hkōt ixpa. ⁹ Mýrapē na prem ijaxà pa arī jar ixkrī ho ixkrī. Na htem ixte amnhī tomnuj xwýnh pyrāk o inhīpēx nē axte ixte Jejus kapēr jarēnh o ixpa pymaj ijaxà. Tā ā mē kot inhīpēx anhyr tā na hte Kris kōt pahtōjaja arī xpānhā mē kām harēnh o ri pa. Koja mē tee ri kām Jejus jarēnh o hapēx prām kaprý. ¹⁰ Jakamā kwār mē māmri ā inhīpēx anē. Koja mē arī Jejus kot tanhmā mē panē amnhī nhīpēx toja mar o pa nhūm mē hkwyjaja hkōt amnhī xunhwý nē nhýrmā pahpyrà nē kēp Jejus Kris kwý hā Tirtūm mē wa kuri mex nē htír tūm nē pa ho pa.

Kris kwý kot tanhmā amnhī tā grer to hā mē harēnh

- ¹¹ Na pu htem mē pahpē Kris kwý hā ā amnhī tā pagrer anē: Mē kot Kris ā mē panhīmex tā kot puj mē akupým pahtír nē kuri pamex nē pahtír tūm nē papa ho papa.
- ¹² Mē kot tanhmā Kris ā mē pahtomnuj to htā kot puj mē arī hkōt amnhī nhīpēx o papa rāhā ty nē nhýrmā ĩhko hā mē ho amnhīptār o papa. Nom kot puj mē amnhī kamā pakahak pē mē pahpē Jejus kwý hkēt ā amnhī jarē hā koja Jejus amnhī xwar mē pahpē hkwy hkēt ā mē pajarē.
- ¹³ Nē mē pahte amnhī kaxyw Jejus kōt pajamaxpēr kēē tā tanhmā amnhī jarēnh to xā hkōt tanhmā amnhī nhīpēx to.
- Aa kot mēmoj tā amnhī jarēnh kuhpa hā ri tanhmā amnhī nhīpēx to hkēt. Anē.

*Mē kot Tirtūm kapēr o mē ahkre mex xwýnhjē jarēnh
Wam Pētre 3.15-16*

¹⁴ E Ximotre. Ixte ā mēmoj tā amā karō anhyrja kēr ka ho mē ahkre rāhā ho ri mē hkōt apa. Kē mē ama nē kām hamaxpēr rāhā nē.

Nē mē kām anē kē mē Tirtūm kapēr o mē ahkre mex o ri pa nē kapēr ā tanhmā axpēn mā ākjer to hkēt nē. Koja mē hā axpēn mā akir hāmri nē amnhī to mex kēt nē. Hāmri nhūm mē kot mē kapēr mar xwýnhjaja ja hā mē omu nē tee ri Tirtūm kapēr kukamā hamaxpēr nē hkōt amnhī nhīpēx mex kēt nē.

¹⁵ Nē na htem mē kām mē àpēnh mex xwýnhjaja mē ō patrāw kapēr ma nē hkōt mēmoj tā àpēnh mex nē. Nhūm ō patrāwja hwýr mra nē àpēnh ā omu. Hāmri nhūm amnhī wýr omu nē àmnhix noo mā apē. Kām àpēnh mex jakamā amnhī kamā kām uma hkēt nē. Ja pyrà nē kēr ka Tirtūm noo mā kām amnhī nhīpēx mex rāhā nē aprī hā kapēr o mē ahkre mex o ri mē hkōt apa. Kē ā ate amnhī nhīpēx anhyr ā apumu nē anhyr hā hkīnh nē. Ka àpēnh xwýnhhta pyrà nē amnhī kamā amā uma hkēt nē noo mā kām amnhī nhīpēx mex o ri apa.

¹⁶ No mē kot Tirtūm kapēr o hēx o mē pa xwýnhjaja kēr ka mē hkōt ri apa hkēt nē. Nē mē kapēr mar nē ri mē hkōt axām hkēt nē. Na htem mē kapēr ma nē mē hkōt amnhī nhīpēx o pa nē kām Tirtūm kapēr mar prām kēt nē. Nē gaa nē te kēp mar pumaj amnhī jamak pro pyrāk o amnhī nhīpēx. ¹⁷ Týx ri tanhmā mē ahkre hto xāja te kot mē hkāny aa mex kēt nē ra omnuj týx o mōrja pyrāk. Jao mē kot mē kapēr mar o mē pa xwýnhjaja mē mar pē ra mē hkōt amnhī tomnuj týx o mō. Na hte ra Imēnew mē Pijertija wa ā htýx ri amnhī krā hkōt mē ahkre anhyr o pa. ¹⁸ Nē Tirtūm o hēx o mē hkōt pa nē nhýrmā akupým mē pahto mē pahtír kēt ā harēnh o pa. Hāmri nhūm mē amnhī tā wa kuma nē tee ri amnhī kukamā hamaxpēr pē Jejus kaga nē axte amnhī kaxyw hkōt hamaxpēr kēt nē. Nom wa jakerja kot anhyr kēt. ¹⁹ Kēt Tirtūm kapērja ām hāmri na. Kot mēmoj to hēx kēt jakamā na pu htem amnhī kaxyw hkōt pajamaxpēr kaprý hkēt nē. Kapēr ā kaga htūm kot tanhmā mē pahpē hkrajē jarēnh to nē harēnh kot:

Tirtūm na kot hkrajê piitā omunh mex rāhā ho pa xwỳnh.
 Anhỳr o mẽ pajarēnh. Nē mẽ pamā mẽmoj tã karō kot:
 Kê mẽ kot Jejus kôt amnhĩ xunhwỳr xwỳnhjaja amnhĩ tomnuj o pa hkêt nē.
 Anē.

Tirtūm krajaja te kệp prat mex pyrāk ā mẽ harēnh

²⁰ Nē mẽ hikāxpore rūnh xwỳnhjaja mẽ õ xijere nē mẽ õ prat sohtōō. Prat kwỳ muxre nē hkwỳ omnajre. Prat pynajre na htem māmri kamā apku no prat muxreja ām mẽmoj mex pix kaxyw na htem mẽsti hã haxwỳ nē kamā apku. Kasamēt ā rỳ mẽ hkra krā hkēnh ā mẽ hkĩnh nhũm htem mẽsti hã haxwỳ nē kamā apku. ²¹ Tã mẽ kot Tirtūm kapēr o hêx o mẽ pa xwỳnhjê hkôt hamaxpēr kêt nē mẽ hkôt amnhĩ tomnuj kêt xwỳnhjaja te mẽ kot prat muxre pyrāk. Na htem tām amnhĩ nhĩpêx nē tanhmã hamaxpēr punuj to ho pa hkêt nē. Hāmri nhũm Tirtūm ja hã mẽ omu nē mẽ ý hã hkĩnh nē. Hāmri nē te mẽ kot prat muxre jaxwỳr nē kamā apkur pyrā nē mẽ kot kām tanhmã amnhĩ nhĩpêx to ho pa kaxyw mẽ unhwỳ.

Mẽ pahte tām amnhĩ nhĩpêx ā mẽ pamā karō

²² Nē mẽ àptār nyw jamaxpēr punujja kêt ka te ate hamỳnh nē amnhĩ katut kôt rēnh par pyrāk o hipêx Ximotre. Jao axte ho ajamaxpēr o ri apa hkêt nē. Nom mẽ hamaxpēr mexja kêt ka hamỳ nē amnhĩ krā him hagjê nē ho ajamaxpēr rāhā ho ri apa. Jao tām amnhĩ nhĩpêx nē amnhĩ kaxyw Tirtūm kôt ajamaxpēr rāhā nē. Nē amā mẽ kệp Kris kôt akwỳjê hkĩnh pē tanhmã mẽ ho ajuta hto ho ri mẽ hkôt apa. Jao mẽmoj to mẽ kutā anojarēt rāhā nē. Na hte ā Pahihiti Jejus kôt amnhĩ nhĩpêx xwỳnhjaja amnhĩ nhĩpêx anhỳr o pa.

²³ Nē kêt ka mẽ kot htỳx ri amnhĩ krā hkôt mẽ ahkre ho mẽ pa xwỳnhjê hkôt apa hkêt nē. Te ate mẽ kệp awry hã ri apa pyrā nē mẽ kapēr ma nē ām ama. Na htem mẽ kapēr mar o pa nē ra hã axpēn mã tanhmã àkjêr to ho pa. Jakamā kwarĩ mẽ hkôt ri apa hkêt nē. ²⁴ Mẽ pahte Tirtūm mã amnhĩ nhĩpêx o papa xwỳnhjaja na pu htem mẽ kurom mẽmoj tã axpēn mã paxàkjêr o ri papa hkêt nē. Na pu htem ām mẽ piitā mẽ kamā paxukapri pē mẽ ho mex nē mẽ kamā pagryk tokyx anhỳr kêt nē. Nē Tirtūm kapēr o mẽ ahkre mex nē. Na hte ā mẽ pahte Tirtūm mã tanhmã amnhĩ nhĩpêx to xwỳnhjaja amnhĩ nhĩpêx o papa anē.

²⁵⁻²⁶ Jakamā koja mẽhō ate Tirtūm kapēr o mẽ ahkreja ma nē tanhmã ho amā kapēr to ka ama nē amnhĩ tã tanhmã kām akapēr punuj to hkêt nē. Ām kamā axukapri ho tanhmã hã kām akapēr mex to. Na hte Satanasti te kot amnhĩm mẽ unēnh pyrāk o mẽ hipêx nē tanhmã mẽ kām Tirtūm kapēr o hêx to nhũm mẽ kuma nē hkôt hamaxpēr nē kapēr kôt amnhĩ nhĩpêx. Tã kot kaj mẽ kamā axukapri ho mẽ kām akapēr mex nē nhũm Tirtūm tanhmã mẽ hkrā hto nhũm mẽ ama nē hkôt amnhĩ xunhwỳr japēr. Te Tirtūm kot Satanasti pē amnhĩm mẽ utār pyrāk. Jakamā nhũm mẽ hpānhã Tirtūm kapēr mex ā harē nē harēnh o:

—Nà pēr ām hāmri na Tirtūm kapērja. Ām mex o mex. Anē.

3

Jejus akupỳn wrỳk kukamā mẽ kot amnhĩ tomnuj xwỳnhjê jarēnh

Matêwre 24.4-13; Korosê 2.16-19; Wam Ximotre 4.1-5; Sikūn Pêtre 2.1-3; Jutre 3-16

¹ Nē Jejus akupỳn mẽ pahwỳr wrỳk xwỳj ri mẽ kot tanhmã amnhĩ nhĩpêx toja kot paj hpānhã ixpri hã amā harē ka inhmar tỳx nē Ximotre. Koja Jejus

akupÿn mẽ pahwÿr nojarêt pu mẽ pahpê hkwÿjaja pahpunuj nê papa. ² Nê Kris kwÿ hkêt xwÿnhjaja koja mẽ amnhî pix kukamã hamaxpêr o pa.

Jao hikàxpore rax o pikuprõnh pix kukamã hamaxpêr pê hkwÿjê pê õxÿ htÿx o pa.

Nê mẽmoj tâ amnhî to jarkrar o pa.

Nê tanhmã hkwÿjê japrÿ hto ho pa.

Nê mẽ hipêêxà nê mẽ katorxà hã hpijaam kêt o pa.

Nê Tirtùm ã hpijaam kêt o pa.

Nhùm mẽhõ tanhmã mẽ ho mex to nhùm mẽ amnhî tâ mẽ omu nê ãm mẽ omu nê amnhî tâ tanhmã mẽ kãm nê hkêt nê. Rÿ mẽ kãm: “Nà ãm hãmri na ka ã ixto mex anê. Nà ja mex.” Anhÿr o mẽ kãm kapêr kêt nê.

³ Mẽ ukaprî hkêt jakamã koja mẽhõ tanhmã mẽ homnuj to nhùm amnhî tâ mẽ omu nê kamã gryk kurê kumrêx nê aa gryk o hapêx kêt nê.

Nê amnhî tâ tanhmã hkwÿjê ho hêx to ho pa.

Nê htÿx ri kãm hprãm xà hkôt tanhmã amnhî tomnuj to.

Nê oprê ho pijapu pix kukamã hamaxpêr.

Nê axtem nê kãm mẽmoj mex pumunh prãm rÿ mẽmoj mex mar prãm kêt nê.

⁴ Nê mẽhõ ho hkràmnhwÿ htã axtem nê mẽ kãm mẽ hkurê xwÿnhjê nhîhkram haxã.

Nê hamaxpêr mex kêt o tanhmã amnhî tomnuj to rãhã ho ri pa.

Nê amnhî to rûnh o mẽ piitã mẽ hakrenh par ã amnhî to jarkrar o ri pa.

Nê amnhî krã hkôt kãm amnhî nhîpêx prãm xà hkôt amnhî nhîpêx o pa nê kãm Tirtùm kãm prãm xà hkôt amnhî nhîpêx prãm kêt nê.

⁵ Hãmri nê mẽ kêp hkra hã amnhî jarênh o pa htã aa hkôt amnhî nhîpêx kêt. Æ Tirtùm kra hkêt xwÿnhjaja amnhî nhîpêx kot anhÿr jakamã kwa kêr ka ã mẽ hkôt apa hkêt nê Ximotre.

⁶⁻⁷ Na htem hêx rom hkwÿjê nhõrkwÿ hwÿr agjê nê kamã tanhmã mẽnijê mã hêx to. Mẽ kot mẽ mar nê tanhmã amnhî tomnuj to hãmri nê ja hã amnhî pumu nê tee ri amnhî kukamã hamaxpêr kaxyw. Nê mẽ kãm mẽ kapêr nyw mar prãm tâ nhãm mẽ kapêr ma nê nhãm mẽ kapêr mar nê aa Tirtùm kapêr mar nê amnhî kaxyw hkôt hamaxpêr kêt nê. Jakamã nhùm mẽ kot amnhî tomnuj xwÿnhjaja hêx rom mẽ hwÿr mra nê mẽ õrkwÿ hwÿr agjê nê tanhmã mẽ kãm mẽmoj to hêx to. ⁸ Te kot amnepêm finat Jãnre mẽ finat Jãmtija wa kot amnhî nhîpêxta pyrãk. Na pre finat Mojestija Tirtùm nhÿ hã tanhmã mẽ ahkre hto ho pa nhùm Jãnre mẽ Jãmti wa kãm mar prãm kêt nê. Nê tanhmã ja nê hkwÿjê mã kapêr to ho pa. Tã ã mẽ kot amnhî tomnuj anhÿr o mẽ pa xwÿnhjaja na htem wa urãk nê kãm Tirtùm kapêr mar prãm kêt nê kapêr nê tanhmã hkwÿjê mã kapêr to ho pa. Nhùm mẽ hamaxpêr mex kêt jakamã ãm mẽmoj punuj pix kukamã hamaxpêr nê mẽ kuma nê amnhî kaxyw Jejus kôt hamaxpêr kêt nê. ⁹ Tã nom koja mẽ hkwÿjaja tokyx hprî hã mẽ kot mẽmoj to hêx ã mẽ omu hãmri nê axte mẽ hkôt hamaxpêr kêt nê nhùm mẽ rî amnhî pumu. Te amnepêm mẽ kot hprî hã Jãnre mẽ Jãmti wa kot tanhmã amnhî tomnuj to hã wa omunhta pyrãk.

Mẽ pahte Jejus ã pahpunuj tâ hkaga hkêt ã mẽ pamã karõ

Ate 13.50–14.7, 14.19-22

¹⁰ E Ximotre. Ate ixkôt apa ryy jakamã ra ate tanhmã ixte amnhî nhîpêx ho xpa hã ixpumunh mex.

Ixte tanhmã Tirtùm kapêr o mẽ ahkre hto ho ixpaja.

Nê inhmã mẽmoj to anhÿr prãm xwÿnhja.

Nē ixte amnhī kaxyw Kris kōt ijamaxpērja.

Nē inhgryk tokyx anhÿr kētja.

Nē ixte tanhmā Kris kōt ixkwÿjê ho mex to ho ri ixpaja.

Nē ixpunuj nē ixpa htā arī Kris kōt amnhī nhīpêx mex o ixpaja.

Ā ixte amnhī nhīpêx anhÿr o ixpaja ate ixpumunh mex.

¹¹ Na pa pre krī pē āxiok nē Ikōn nē Ristija kamā mē kām Jejus jarēnh o ixpa nhūm mē hkwyjaja Jejus ā tanhmā inhīpêx to pa amnhī xā htÿx kamā ijamak o ri mē hkōt ixpa. Tā nhūm Pahihti Kris xatā mē kēp ixpytā pa itÿr pē mē ĩhkra rūm ijapōx o ixpa. ¹² Na hte Kris kwÿ hkēt xwÿnhjaja mē pahte Kris kōt amnhī nhīpêx o papa hā mē pahtomnuj o pa.

¹³ Nē mē kot Tirtūm kapēr o hêx o mē pa xwÿnhjaja koja arī mē kēp Kris kwÿ hā amnhī to hêx pē mē nokupyr. Nē mē kām Tirtūm kapēr o hêx o pa. Jao ra mē tāmjaja amnhī nokupyr o pa nē amnhī tomnuj tÿx kumrêx.

Pawre kot tanhmā Tirtūm kapēr ā kagā jarēnh to

Rōmān 15.4; Sikūn Pētre 1.19-21

¹⁴⁻¹⁵ No ka Ximotre. Amnepēm aprīre rūm na pa pre mē ixohtō nē Tirtūm kapēr o ajahkre ho ixpa. Akatorxā nē anhō wōwōre nē pa nē Kris kwÿjaja pa prem ho ajahkre rāhā ho akōt ixpa ka mē inhmar tÿx nē amnhī kaxyw Jejus kōt ajamaxpēr. Jakamā kwa kēr ka arī hkōt ajamaxpēr mex rāhā ho ri apa. Tirtūm kapērja na htem mar pē amnhī kaxyw Jejus Kris kōt hamaxpēr nē hkōt amnhī xunhwÿ nhūm Tirtūm ja hā mē omunh xā hkōt mē ho hkra. ¹⁶ Tirtūm kapēr ā kagāja Tirtūm kapēr na. Na htem ho mē ahkre ho pa. Koja mēhō hkwyīm ri tanhmā amnhī tomnuj to nē kapēr ma nē tee ri amnhī tomnujja kukamā hamaxpēr o ra hkaprī nē. Rÿ tanhmā amnhī tomnuj to htā kapēr ā kagā kamā kapēr nē Tirtūm kot ā kot amnhī tomnuj anhÿrja nē mē pamā kapēr ā harēnh ma nē amnhī tomnujta kaga kurē kumrêx. Rÿ kamā kapēr nē Tirtūm kot tanhmā mē pahte amnhī to mex to hā mē pamā karō kamā harē nē kuma. Hāmri nē ŷ hā hkōt amnhī nhīpêx mex rāhā nē. Ā na hte Tirtūm kapēr kagāja mē kot mar nē hkōt amnhī nhīpêx xwÿnhjê ho mex anē. ¹⁷ Na hte mē kot Tirtūm mā amnhī nhīpêx o mē pa xwÿnhjaja kamā harē nē hkōt amnhī nhīpêx mex pē mē piitā mē ho mex nē ho mē ahkre mex rāhā ho pa.

4

Pawre kot mēmoj tā Ximotre mā karō

Korosē 4.5-6

¹ Nē koja nhÿrmā Jejus Krisja akupÿn mē pahwÿr wrÿ hāmri nē mē pahpiitā tanhmā mē pajarēnh to. Ra mē htyk xwÿnhjaja nē arī mē pahtÿr xwÿnhjaja nhūm tanhmā mē pahte amnhī nhīpêx to ho papa hā mē pahpumunh kōt tanhmā mē pajarēnh to. Jao Tirtūm mē wa kuri mē pahtÿr tūm nē papa ho papa hā mē pajarē rÿ wa kuri pahtÿr tūm nē papa hkēt ā mē pajarē. Jakamā kwa Ximotre kot paj Tirtūm mē Jejus Krisja wa noo mā mēmoj tā amā karō ka inhmar tÿx nē. ²⁻⁴ Koja nhÿrmā mē kēp Tirtūm kra hkēt xwÿnhjaja axte kām Tirtūm kapēr mar prām kēt nē nhām mē kapēr pix mar prām o ri pa. Jao amnhī kukamā hamaxpēr o:

—Nā inhmā Tirtūm kapēr mar prām kēt. Kot mēmoj piitā nē mē hkurē kēnā. Kot paj hpānhā mēhō kot mēmoj nē mē hkurē hkēt xwÿnhjê kapēr pix mar o ri ixpa. Nā kot paj anē. Ja na inhmā hprām. Nom kot paj axte Tirtūm kapēr mar kēt nē.

Anhÿr jao kapër kaga në hpänhã htÿx ri nhãm mẽ ujarënh pix ma në hkôt hamaxpër. Koja mẽ ã amnhĩ nhĩpëx anhÿr o pa. Jakamã kwa kër ka arĩ mẽ kãm Jejus kot tanhmã mẽ panê amnhĩ nhĩpëx to hã harënh rãhã ho ri mẽ hkôt apa Ximotre. Mẽ kãm mar prãm kêt tã mãmrĩ ri mẽ kãm harê. Nê nhÿri mẽhõ pumu në kãm harê. Mẽ kãm mar prãm xwÿnhjê mã harê në mẽ kãm mar prãm kêt xwÿnhjaja ka mãânên mẽ kãm harê. Nhũm mẽhõ tanhmã amnhĩ tomnuj to ka hã omu në tanhmã nê kãm akapër to kê hkaga tokyx anê në akupÿm tãm amnhĩ nhĩpëx. Rÿ nhũm mẽhõ tãm amnhĩ nhĩpëx o pa ka ja hã omu në hã kãm akapër në kãm:

—Ăm hãmri na ka hte Tĩrtũm kôt amnhĩ nhĩpëx mex nê. Anê.

Hãmri nê anojarêt kêt kãm mẽ kãm Tĩrtũm kapër o mẽ ahkre rãhã ho ri apa. ⁵ Nê tãm ri amnhĩ nhĩpëx rãhã nê. Mẽ kot Jejus ã tanhmã anhĩpëx to htã kër ka ÿ hã amnhĩ to htÿx nê arĩ mẽ kãm kapër jarënh o ri mẽ hkôt apa. Jao Tĩrtũm mã amnhĩ nhĩpëx mex rãhã nê. Kër ka ã mẽ hkôt amnhĩ nhĩpëx anhÿr o ri apa Ximotre.

Pawre kot ra htyk kaxyw ã amnhĩ jarënh

Atre 20.17-35

⁶ Nê mẽ kot ixpĩr xã hã arĩgroja ra hwÿr ahtêp o mō. Kot paj pěr tokyx ty. Amnepem na prem Tĩrtũm mã mẽmoj nhõr kaxyw nê mẽ hkõm xã kamã mẽmo kagõja py nê mẽ kot Tĩrtũm mã mẽmoj nhõr xã hã mẽstija ã hkapĩr pa nhũm hapëx. Tã te ixpê mẽ hkõm xã kamã mẽmo kagõ pikapĩrta pyrãk. Kot paj tokyx ty nê jar ijapëx. ⁷ Na pa ra Pahihti Jejus mã amnhĩ nhĩpëx mex o ri ixpa. Mẽ kot tanhmã hã ixtomnuj to htã pa hkaga hkêt nê arĩ hkôt amnhĩ nhĩpëx mex rãhã ra ixtyk kaxyw. ⁸ Ixte Pahihti kãm hprãm xã hkôt amnhĩ nhĩpëx mex o ri ixpa jakamã koja amnhĩ tã tanhmã ixto mex to. Nom paxpĩx ixto mex kêt nê. Na hte ãm hãmri tãm mẽ pahpiitã mẽ panhĩpëx. Jakamã nhÿrmã kot mẽ piitã tanhmã mẽ harënh to xã hã arĩgrota ã koja mẽ pahkĩnh pê mẽ pahte amnhĩ wÿr kamã pajamak o papa xwÿnh piitã mẽ pamã mã mẽmoj mex gō.

Pawre kot amnhĩ wÿr Ximotre hwÿr

⁹ Kwa na pa ra ato ijamak tÿx nê Ximotre. Kwa kër ka amnhĩm anojarêt nê tokyx tanhmã amnhĩ to hpa nê man ixwÿr mō.

¹⁰ Na pre ra Kresëx ma Karatas wÿr mō nhũm Xitre ma pika pê Tawmas wÿr mō. Nhũm Tẽmti ra tanhmã hamaxpër to nê àpênh gryk ã ixkaga nê ma akupÿm Tesarõn wÿr mō. ¹¹ ãm Rukre pix na arĩ ixkõt pa jakamã kër ka anojarêt hãmri nê ahte amõr kêt nê. Makre mã anê kê man akõt ixwÿr mō nê tanhmã ixto ajuta hto ho pa.

¹² Nê Xikitre na pa pre ra Epes wÿr kumê.

¹³ Nê Torõt kãm Kapti nhõrkwÿ kamã ixte kry pê inhõ kamĩs pa hkà ryti rer jakamã kër ka anojarêt nê inhmã apy nê man inhmã o mō. Nê inhõ kagãta ka mãânên inhmã amÿ nê o mō. Nê mẽmo mry kã hã ixte mẽmoj tã kagãta ka mãânên apy nê mãn inhmã o mō. E kër ka anojarêt nê ixkurexja jagmÿ nê ixwÿr ho mō.

Tanhmã Aresãnti kot Pawre nhĩpëx to hã harënh

¹⁴⁻¹⁵ Nê na pre kàx o mẽmoj nhĩpëx xwÿnh Aresãntija ixtomnuj nê. Pa pre mẽ kãm Tĩrtũm kapër o mẽ ahkre ho ri mẽ hkôt ixpa nhũm tee ri inhma nê kãm mar prãm kêt nê. Hãmri nê ixkutã amnhĩ xãm nê inhĩpëx kati nê. Nom koja Pahihti Jejus ixtã tanhmã ho. Kwa kër ka amnhĩ nê omunh mex nê Ximotre.

Pahihti Jejus kot Pawre mã hamaxpër o hihtÿx ã harënh

¹⁶ Nē pahi kot mē mar xà hā ixkre kamā wam ixte mē kām amnhī jarēnhā ā na pre mēhō ixyr pē mē kām tanhmā ijarēnh to hkēt nē. Na prem piitā mē umaj ixkaga hpa. Nom kwār mē māmrī ā amnhī nhīpēx anē. Tirtūm kot ixtā tanhmā mē hoja na inhmā hprām kēt. ¹⁷ ām Pahihti Jejusja pix na pre mē kurom ixkaga hkēt nē. Na pre ixto ixihtyx nē pa ŷ hā mē kām tanhmā mē panē kot amnhī nhīpēx to hā harēnh pa. Nhūm Ijaew kēt xwýnh kot inhmar o hkrī xwýnhjaja ixujarēnh mar o hkrī nhūm Tirtūm inhnē tanhmā mē ho nhūm mē xpir kēt nē. ¹⁸ Koja Pahihti mē kutā ixto ixihtyx rāhā nē mēmo arīgro hā amnhī wýr ixto api. Pa Tirtūm mē wa kuri inhmex kumrēx nē ixtír tūm nē ixpa ho ixpa. Pahihti mex o mex jakamā kēr pu mē kām mex o mex ā harēnh rāhā ho papa nē aa jam panhūrer kēt nē.

Pawre kot tanhmā hkrāmhwýjē jarēnh to

¹⁹ Nē kēr ka Prisire mē mjēn Akir wa kām ijarē. Nē Onēsipti hprō nē hkrajaja ka määnēn mē kām ijarē. ²⁰ No Eras kormā Korīt kām pa. Nē Toropti na pre à nē pa Mīrēt kām kure nhūm ixkōt mōr kēt nē.

²¹ Kwa kēr ka amnhīm anojarēt nē amgrà pē man tokyx ixwýr mō Ximotre. Nē ota Epti mē Prutēhti mē Rīnre mē Krawreja awýr hpēr mē. Nē jar Kris kōt pahkwýjē piitā awýr hpēr mē.

²² E kē Pahihti Jejus ato mex rāhā nē mē apiitā mē akutā nojarēt rāhā ho pa.

Tā ām ja pix. Ixpē Pawre na pa awýr kagàja nhīpēx nē kumē.

Xitre Pawre kot Xitre hwÿr kagà nê mênh

Pawre na pre kagàja nhîpêx. Kêp Jesus nhÿ hã hkrajê jahkre ho pa xwÿnhjê hõ na pre. Nhùm pre Xitre Pawre hkôt pa hã mytwrÿ sohtë nê. Tã kêp Jesus kôt hkwyjê nhõ pastô kaxyw gô hipôk pê Kret ã arîk nê Tirtùm kapêr o mê ahkre ho mê hkôt pa. Jakamã nhùm Pawre kãm kagàja nhîpêx nê kamã kãm mêmôj tã karô. Tirtùm kapêr o mê hêx xwÿnhjaja tanhmã kot ja nê mê hkurê to hã kãm karô. Nê mê kot Tirtùm kapêr o mê ahkre mex pix xwÿnhjaja Jesus kwÿjê kaxyw kot mê rênh ã kãm karô. Nê Jesus kwÿjaja kot axpên to mex o pa hã kot mê kãm karô kaxyw kagàja kamã mê kaxyw kãm hã kagà. ã na pre Pawre Xitre mã mêmôj tã karô nê hã kagà nê hwÿr mênh anê. Nê kãm:

¹ Pa Xitre? Xà amex? Ixpê Pawre na pa awÿr kagà nhîpêx nê kumê. Na pa hte Tirtùm mã tanhmã amnhî nhîpêx to ho ixpa. Nê ixpê Jesus Kris nhÿ hã hkrajê jahkre o ixpa xwÿnh jakamã na pa hte mê kot amnhî kaxyw hkôt hamaxpêr tÿx kaxyw tanhmã mê kãm ixkapêr to ho ri ixpa. Nê mê kot hprî hã mar kaxyw Tirtùm kapêr o mê ahkre mex nê. ² Mê kot inhmar nê nhÿrmã htyk nê ma Tirtùm mê Jesus wa hwÿr ãpir nê wa kuri htîr tùm nê pa ho pa hã amnhî kukamã hamaxpêr kaxyw. Amnepêm na pre Tirtùm ã mê pahpê hkrajê hkukamã mê pajarênh anê. Nê ãm hãmri ã mê pajarênh anê. Na hte mêmôj tã amnhî to hêx kêt nê. ³ Tã ra mê pakukamã mê pamã mêmôj to amnhîrit nê inhmã kapêr o:

—E Pawre kêr ka ma mê hpiitã mê hkôt ri apa nê mê kãm ixkapêr jarê nê mê kãm: “Kot kaj mê amnhî kaxyw Tirtùm Kra hkôt ajamaxpêr nê hkôt amnhî xunhwÿ nhùm Tirtùm ja hã mê apumu nê mê ato hkra. Ka mê nhÿrmã atyk tã nhùm amnhî wÿr mê ato api ka mê wa kuri amex kumrêx nê atîr tùm nê apa ho apa.” Anhÿr o mê kãm ixkapêr jarênh o ri mê hkôt apa Pawre.

⁴ Anhÿr o inhmã kapêr tã pa ã amã ixkapêr nê hã kagà anê Xitre. Pajamê pahte amnhî kaxyw Jesus kôt pajamaxpêr nê hkôt amnhî xãm jakamã te apê ixkra pyrâk. Jakamã na pa hte ato Mëpanhîpêêxã maati Tirtùm mê mê papytâr xwÿnh Jesus Krisja wa hwÿr rãhã ho ri ixpa nê wa kãm:

—Pa Tirtùm mê Pahihti wa. Nà Xitre ho na pa wa awÿ. Kwa kêr ka wa kutã anojarêt rãhã ho ri apa. Kê wa akukwak ri hamakêtkati nê àmnhîx pa ho pa. Anê.

*Kris kwÿ hkrãhtÿmjaja kot tanhmã amnhî nhîpêx to kaxyw mê hã kãm karô
Wam Ximotre 3.1-13*

⁵ Nê na pa pre Kret rùm inhnojarêt hãmri nê amã axàpênh ã karô nê Kret kãm are nê man mô. Na pa pre amã:

—E kêr ka jar arîk nê mê kãm ixkapêr jarênh jatur xàm mênh o mê hkôt apa. Nê Kris kôt pahkwÿjê mã mê hkrãhtÿmjê xunhwÿ. Kret kãm krî piitã hkôt. Na pa pre ixprî hã tanhmã amã mê harênh to. Tã kêr ka ate inhmar xà hkôt mê hkwyjê kapi nê mê unhwÿ. Koja mê ã amnhî nhîpêx anhÿr o pa ka ja hã mê omu nê mê unhwÿ.

⁶ Koja mê tãm amnhî nhîpêx o pa nhùm mê piitã axpên mã mê mex ã mê harê. Nê mê hprô pix tânopxar o pa nê kuhpa hã nhãm mênijê ho amnhîkati hkêt nê.

Nē kē mē hkrajaja hipēêxà pyrà nē amnhī kaxyw Jejus kôt hamaxpēr o pa. Jao hipēêxà nē katorxà wa kapēr ma nē wa hkôt amnhī nhīpêx. No ri htýx ri amnhī tomnuj o pa hkêt nē.

Anhÿr o na pa pre mē hā amā karō. ⁷ Jejus kôt pahkwýjê hkrāhtümjaja kot Tirtüm nhÿ hā hkrajê mā kapēr mex o pa jakamā na htem tām amnhī nhīpêx o pa.

Nē amnhī pix kukamā hamaxpēr o pa hkêt nē.

Nē gryk tokyx anhÿr kêt nē.

Nē kagôxyhti japrôr nē ho pipānh o pa hkêt nē.

Nē oprê ho pa hkêt nē.

Nē kâxpore rûnh prām xâj hêx rom tanhmā amnhī nhīpêx to hkêt nē.

Na htem ā amnhī nhīpêx anhÿr hkêt nē.

⁸ Ām àmnhīx amnhī nhôrkwÿ hwÿr mē hwÿr o pa.

Nē mē piitā mē kutā nojarêt rāhā nē.

Nē tām hamaxpēr nē tām mē piitā mē hipêx o pa.

Nē amnhī tomnuj pymaj amnhī to htýx pē Tirtüm kôt amnhī nhīpêx mex rāhā ho pa.

⁹ Nē mē kot Tirtüm kapēr mar tÿx jakamā kē mē arī hā nohtÿx nē mar tÿx xà hkôt amnhī xô ri ho hkwÿjê jahkre mex o pa.

Nē ho mē piitā mē hamaxpēr o hihtÿx o pa.

Nhüm mēhō Tirtüm kapēr kwÿm ri tanhmā ujarēnh to nhüm hā kuma nē hprī hā kām tanhmā harēnh to kē mar mex nē.

E Xitre. Na hte ā Jejus kwÿjê hkrāhtümjaja amnhī nhīpêx anhÿr o pa. Jakamā kēr ka aprī hā Kret kām Jejus kôt pahkwÿjê kapi nē mē kot tanhmā amnhī nhīpêx to ho pa hā mē omu. Nhüm mēhō ā amnhī nhīpêx anē ka ja hā omu hāmri nē kēp Jejus kwÿjê hkrāhtüm kaxyw ām.

Kret nhō xwÿnhjaja kot tanhmā amnhī tomnuj to hā mē harēnh

Xitre 3.9-11

¹⁰ Nē atar Kret kām na hte mē ohtō nē kām mē ō pahi kapēr mar prām kêt nē htýx ri tanhmā Kris kwÿjê mā kapēr to ho pa. Na hte Ijaew kwÿjaja ā amnhī nhīpêx anhÿr o pa. Jao Ijaew kêt xwÿnh kot Jejus kôt amnhī xunhwÿr xwÿnhjê mā kām:

—Kwa mē ixpyrà nē mē ixpê Ijaewjê kot amnhī nhīpêx kôt mām amnhī nhīpêx kêt wehe.

¹¹ Anhÿr o mē kām kapēr jakamā kwa kēr ka ā mē kapēr anhÿrja nē mē kām akapēr kām axihtÿx nē. Na htem hpijaam kêt o hikâxpore hprām xâj ā mē kām kapēr anhÿr o pa. Jao mē hamaxpēr o ahkà nhüm mē kuma nē tee ri hamaxpēr. ¹² Na pre ra mē hkwÿjê hō tanhmā mē harēnh to. Mē ahkre xwÿnhjê hōja mē harēnh o:

—Kret nhō xwÿnhjaja na htem hêx pix o pa. Nē oprê nē kām kaga nē apkur xà pix kukamā hamaxpēr o pa. Anē.

¹³ ām hāmri ā mē harēnh kot anhÿr. Ā mē kot amnhī nhīpêx anhÿr jakamā kwa mē kot amnhī nhīpêxja nē mē kām akapēr kām axihtÿx o ri mē hkôt apa Xitre. Kē mē ā amnhī nhīpêx anhÿr kêt nē. ¹⁴ Nē kē mē axte Ijaewjê xujarēnh nē mē kot amnhī nhīpêx kôt amnhī nhīpêx kêt nē. Ā mē kot amnhī nhīpêx o pa hā mē kām karō xwÿnhjaja na prem Tirtüm kapēr kaga hpa. ¹⁵ Mē kot Jejus kôt amnhī xunhwÿr xwÿnhjaja tām mē hamaxpēr o pa jakamā na htem Tirtüm kot mēmoj piitā ho kator xwÿnh pumu nē piitā mex ā harē. No mē kēp

Jejus kwý hkêt xwýnhjaja na htem hamaxpër punuj pix o pa. Nê mẽmoj mex pumu nê mex kêt ã harê. Mex tâ nhũm mex kêt ã harênh o pa. ¹⁶ Nê mẽ kêp Tirtũm kra hã amnhĩ jarênh tâ amnhĩ tomnuj pix o pa. Jao kêp hkra hã amnhĩ jarênh o hêx nê kapêr kwým ri amnhĩ nhĩpêx pix o pa. Nhũm Tirtũm tee ri ja hã mẽ omu nê kãm mẽ hkĩnh kêt nê. Tirtũm mã mẽ kot amnhĩ to mex kwý mẽ hã jêt kêt kumrêx.

2

¹ E Xitre kot paj tanhmã ate mẽ ahkre hto hã amã karõ ka inhma nê amnhĩ xô ri mẽ kãm hã karõ ho ri apa.

Mẽmy wejjaja kot tanhmã amnhĩ nhĩpêx to kaxyw mẽ hã kãm karõ

² Nê kêr ka mẽmy wejjê mã anê kê mẽ amnhĩ to àptâr mex nê pa.

Nê pipãnh nê ri pa hkêt nê.

Nê mẽ gryk kaxyw htýx ri hkwyjê hã hpêr o pikênh kêt nê.

Kê mẽ tãm hamaxpêr nê tãm amnhĩ nhĩpêx o pa.

Nê amnhĩ kaxyw Jejus kôt hamaxpêr týx rãhã nê.

Nhũm mẽ hkwyjaja kot mẽmoj tâ tanhmã mẽ homnuj to htã kê mẽ arĩ tãm amnhĩ nhĩpêx o pa nê amnhĩ tâ tanhmã mẽ ho hkêt nê.

E kêr ka ã mẽmy wejjê mã ja hã akarõ anê.

Mêni wejjaja kot tanhmã amnhĩ nhĩpêx to kaxyw mẽ hã kãm karõ

Wam Korĩt 14.34-35; Wam Ximotre 2.9-15, 3.11; Wam Pêtre 3.1-6

³⁻⁴ Nê mẽni wejjê mã anê kê mẽ kãm Jejus kĩnh xaj tãm ri amnhĩ nhĩpêx o pa.

Jao axpên jakwa kamã nhãm mẽ hixi ho rêr o pa hkêt nê.

Nê kagõxyhti ho pipãnh o pa hkêt nê.

Nê mẽ kãm anê kê mẽni xàptâr nywjê jahkre mex o pa. Mẽ kot mẽ mar nê mẽ urak nê tãm amnhĩ nhĩpêx kaxyw. Jao mẽ kãm mẽ mjên nê mẽ hkrajê japê hã mẽ kãm mẽmoj to anhỹr o mẽ kutã nojarêr rãhã ho pa.

Kêr ka ã mẽni wejjê mã akapêr anê.

Mêni xàptâr nywjaja kot tanhmã amnhĩ nhĩpêx to kaxyw mẽ hã kãm karõ

⁵ Nê mẽni xàptâr nywjê mã anê kê mẽ tãm hamaxpêr pê tãm amnhĩ nhĩpêx o pa.

Nê mẽ òrkwý kamã àpênh mex o pa.

Nê mẽ mjên kapêr ma nê hkôt amnhĩ nhĩpêx.

E. ã mẽni xàptâr nywjê mã karõ anê. Koja mẽ ã amnhĩ nhĩpêx anhỹr o pa hãmri nhũm mẽ piitã mẽ kot amnhĩ nhĩpêx ã mẽ omu nê mẽ harênh o:

—Tirtũm kapêrja mex kumrêx. Mẽ kot hkôt amnhĩ nhĩpêx o mẽ pa xwýnhjaja na htem tãm amnhĩ nhĩpêx mex o pa. Anê.

Mẽmy xàptâr nywjaja kot tanhmã amnhĩ nhĩpêx to kaxyw mẽ hã kãm karõ

Wam Ximotre 4.12; Sıkũn Ximotre 2.22; Wam Pêtre 5.5

⁶ Nê kêr ka mẽmy xàptâr nywjê mã anê kê mẽ mẽmoj punuj pê amnhĩ to htýx o pa. Mẽ hamaxpêr punuj nê mẽ kot tanhmã amnhĩ tomnuj to pê amnhĩ to htýx o pa.

⁷ Nê kêr ka ajaxwýja tãm amnhĩ nhĩpêx rãhã ho ri mẽ hkôt apa Xitre. Mẽ kot ja hã apumunh nê akôt amnhĩ nhĩpêx o pa kaxyw. Nom kêr ka tanhmã mẽ ahkre hto hkwyãm ri tanhmã amnhĩ nhĩpêx to hkêt nê. ãm Tirtũm ã apijaãm o akatãt kôt mẽ kãm kapêr o mẽ ahkre pê tãm amnhĩ nhĩpêx o ri apa.

⁸ Nê kêr ka tã amapêr rãhã ho ri apa. Kêr kê mê kãm mê pahkurê xwýnhjaja ja hã ama nê amnhĩ kamã hpijaam hãmri nê apê Kris kwý hã tanhmã ato kapêr punuj to hkêt japêr.

Mê kãm mê àpênh xwýnhjaja kot tanhmã amnhĩ nhĩpêx to kaxyw mê hã kãm karõ

Epes 6.5-8; Korosê 3.22-25; Wam Ximotre 6.1-2; Wam Pêtre 2.18-25

⁹ Nê kêr ka mê kãm mê àpênh o mê pa xwýnhjê mã anê kê mê õ patrãw kãm hprãm xà hkôt amnhĩ nhĩpêx o pa.

Jao mê kapêr ma nê hkôt amnhĩ nhĩpêx mex nê.

Nê amnhĩ tã tanhmã mê kãm kapêr punuj to hkêt nê.

¹⁰ Nê kê mê kêp mẽmoj to àhkĩnh kêt nê.

Nê tãm mê hipêx rãhã nê.

Nê kãm hkukrêx jamãr mex o pa.

Koja mê ã amnhĩ nhĩpêx anhÿr o pa nhũm mê õ patrãw amnhĩ tã mê omu nê mê ý hã hkĩnh nê pa. Hãmri nê hamaxpêr o:

—Hêxta waa nê. Inhmã àpênh xwýnhhta na hte inhmã àpênh mex o pa. Na hte ixkukrêx nê ixkrit jamãr mex nê ixpê mẽmoj to àhkĩnh kêt nê. Nã mê kot Tirtũm kapêr kôt amnhĩ nhĩpêx o mê pa xwýnhjaja na htem tãm amnhĩ nhĩpêx o pa. Pêr Tirtũm kapêr ãm hãmri na. ãm mex o mex. Anê.

E Xitre kêr ka mê kãm mê àpênh xwýnhjê mã ã mê kot amnhĩ nhĩpêx anhÿr ã karõ.

Tanhmã Jejus kãm mê pajapê xaj amnhĩ nhĩpêx to hã harênh

Epes 2.8-10; Wam Tesarõn 1.9-10

¹¹ Nê Tirtũm kot mẽmoj to mê pakutã nojarêt rãhã ho pa jakamã na hte mê pahte Kra hkôt amnhĩ xunhwÿr xwýnhjê ho hkra pu mê nhÿrmã wa kuri pahtrũm nê papa ho papa. ¹² Na hte ã mê pamã kapêr o amnhĩrit anê nê mẽ pamã:

—E kêr ka mê apê ixkra hã tãm amnhĩ nhĩpêx rãhã ho ri apa nê axte tanhmã amnhĩ tomnuj to nê tanhmã ajamaxpêr punuj to hkêt nê. Mê ate amnhĩ tomnuj pè amnhĩ to htÿx nê ixkapêr kôt pix mã ri amnhĩ nhĩpêx rãhã nê. Anê.

¹³ Na pu htem ã amnhĩ nhĩpêx anhÿr o papa jao pahkĩnh nê mẽ papytãr xwýnh Jejus Kris jamãr o papa. Koja nhÿrmã mẽ panhõ Tirtũm xihtrÿx xwýnhja akupÿn mẽ pahwÿr kumê pu mê mex o mex ã omu.

¹⁴ Na pre Jejus amnhĩ grõnh kôt mẽ pahwÿr wrÿ nê mẽ pahpiitã mẽ pahte amnhĩ tomnuj pãnhã amnhĩrer kaxyw htyk o Tirtũm mã amnhĩrer pa. Mẽmo kaxyw na pre ã mê panê amnhĩ nhĩpêx anê? Nã mê pahpê hkwyja na kãm hprãm. Nê mẽ pahte tãm ri Tirtũm kapêr kôt amnhĩ nhĩpêx o papaja na kãm hprãm. Nê mẽ pahte urak nê mẽ piitã mẽ kutã panojarêt rãhã ho papaja na kãm hprãm. Jakamã na pre ã mê panê amnhĩ nhĩpêx anê.

¹⁵ E Xitre. Ixte mẽmoj tã amã karõja kêr ka ho Kris kwýjê jahkre mex o apa kê mẽ ama nê kapêr kôt amnhĩ nhĩpêx o pa. Nhũm mẽhõ tanhmã amnhĩ tomnuj to ka hã omu nê Tirtũm nhÿ hã tanhmã nê kãm akapêr to kê axte hkêt nê. Tã mãn ka inhma. Kêr ka ã Kris kwýjê jahkre mex o apa anê.

3

Tanhmã Kris kwý kot amnhĩ nhĩpêx to hã mê kãm karõ

Rõmãn 13.1-10; Epes 2.1-10

¹ Nê kêr ka Kris kôt akwýjê mã anê kê mẽ ho amnhĩptàr xwýnhjê kapêr ma nê mẽ hkôt amnhĩ nhĩpêx o pa. Nê mẽmoj to mẽ kutã nojarêr rãhã ho pa.

² Nê mẽ kãm anê kê mẽ tanhmã hkwýjê mã kapêr punuj to ho pa hkêt nê. Rý mẽmoj mã mẽ kãm àkjêr kêt nê. Kê mẽ tãm mẽ hipêx nê mẽ kamã ukapri pê mẽ ho mex rãhã ho pa. Na hte ã Kris kwýjaja axpên nhĩpêx o pa anê. ³ Kormã mẽ pahte hkôt amnhĩ xunhwýr kêt ri na pu prem ã amnhĩ nhĩpêx anhýr kêt nê. Na pu prem Tirtùm mã pajamaxpêr kêt nê kapêr kôt ri amnhĩ nhĩpêx hkêt nê. Nê amnhĩ tomnuj pix kukamã pajamaxpêr o ri papa. Nê amnhĩ pix kukamã pajamaxpêr. Jao mẽ pamã pam amnhĩ nhĩpêx prãm xà kôt pix mã tanhmã amnhĩ nhĩpêx to ho ri papa. Nê axpên tomnuj nê. Nê axpên kãm pagryk rãhã ho papa. ã mẽ pahte amnhĩ nhĩpêx anhýr ho papa jakamã nhùm pre mẽ piita kãm mẽ pahkính kêt nê. Pu mẽ pajaxwýja pamã mẽ hkính kêt nê.

*Tanhmã Tirtùm kot mẽ pahto mex to hã harênh
Rômãn 5.6-8; Epes 2.4-10*

⁴ Tã pu prem Tirtùm kêp mẽ papytãr xwýnh ã harênh ma. Kot tanhmã mẽ panê amnhĩ nhĩpêx to hã harênh ma nê mex o mex nê mẽ pakamã ukapri hã harênh ma. ⁵⁻⁶ Hãmri nê amnhĩ kaxyw hkôt pajamaxpêr nê hkôt amnhĩ xunhwý nhùm amnhĩ mã mẽ pahpumu nê mẽ pahto hkra. Nom mẽ pahte tanhmã amnhĩ to mex to hã mẽ pahpumunh kôt mẽ pahto hkra hkêt nê. Mẽ pahte tanhmã amnhĩ to mex tore hã. Na pre mẽ pakamã ukapri nê ã mẽ papytãr anê. Tã tanhmã na pre mẽ papytãr to wehe? Nã na pre Jejus Kris kukwak ri te kot mẽ pane mẽ pahte amnhĩ tomnuj piita kuhõnh par pyrãk o mẽ panhĩpêx. Hãmri nê mẽ pahwýr amnhĩ Karõ rê nhùm mẽ pahwýr agjê nê mẽ pamã mẽ pahte amnhĩ nhĩpêx nyw gõ. ã na pre Tirtùm Jejus Kris kot mẽ panê htyk kukwak ri mẽ pahto mex rax anê hãmri nê mẽ pahwýr amnhĩ Karõ rênh anê. ⁷ Tã mẽmo kaxyw na pre ã mẽ pahto mex anê? Nã kãm mẽ pajapê jakamã na pre ã mẽ panhĩpêx anê. Mẽ pahte amnhĩ tomnuj xwýnh mã mẽ kãm mẽ pajapê htýx nê kãm tanhmã mẽ pahto hprãm kêt nê. Nê mẽ pahwýr Kra Jejus mẽ nhùm wrý nê mẽ pahte amnhĩ tomnuj pãnhã mẽ panê ty. Jakamã mẽ pahte amnhĩ kaxyw hkôt pajamaxpêr nê hkôt amnhĩ xunhwýr xwýnhjaja Jejus kukwak ri mẽ pahpê Tirtùm kraa. ã na pre Jejus mẽ pahto mex anê. Jakamã kot puj mẽ nhýrmã Tirtùm mẽ wa kuri pahtr tùm nê pamex nê papa ho papa. Koja wa nhýrmã ã mẽ pahto mex anê.

⁸ ãm hãmri na pa amã ã ja jarênh anê Xitre. Jakamã kwa kêr ka inhma nê inhmar týx nê. Nê ho amnhĩ kaxyw Tirtùm kôt mẽ hamaxpêr xwýnhjê jahkre mex o ri apa. Kê mẽ amar xà hkôt tãm ri amnhĩ nhĩpêx o pa.

⁹ Nê mẽ kot htýx ri mẽmoj mã axpên mã àkjêr o mẽ pa xwýnhjaja kêr ka mẽ hkôt apa hkêt nê. Nê mẽ hukamã mẽ higêt kôt apa hkêt nê. Rý finat Mojes kot Tirtùm nhý hã kapêr ã axpên mã mẽ àkjêr xwýnhjê hkôt apa hkêt nê. Na htem ã ri axpên mã àkjêr anhýr o pa nê tãm amnhĩ nhĩpêx kêt nê.

¹⁰ Nê koja mẽ akwýjê hõ amnhĩ krã hkôt tanhmã hkwýjê mã kapêr to nhùm mẽ kuma nê hã axpên mã akir nê axpên pê pikjêr kaxyw. Ka ja hã omu nê ã kapêr anhýrja nê kãm akapêr kê axte hkêt nê. Hãmri nhùm ama nê ãm ama nê arĩ ã mẽ kãm kapêr anhýr japêr ka axte nê kãm akapêr. Tã ra ate nê kãm akapêr o axkrut mã nhùm arĩ ã kapêr anhýr o axkrunêpxi japêr ka ja hã omu hãmri nê mẽ amnhĩ nê hano kê axte mẽ apê Kris kwýjê hkôt ri pa hkêt nê. ¹¹ ã mẽ kot amnhĩ nhĩpêx anhýr o mẽ pa xwýnhjaja na mẽ ra Jejus wýr pry kaga

ně htỳx ri tanhmã amnhĩ tomnuj to ho pa. Ně ã amnhĩ nhĩpêx anhỹr o pa jao kệp Kris kwỳ hkêt ã amnhĩ to amnhĩrĩt.

Pawre kot kagà jatur xà kamã tanhmã Xitre mã kapêr to

¹² Ně kot paj tokyx ma Nĩkop wỳr mỗ. Kêr pa tokyx hwỳr pỏj nẻ amgrà pẻ krĩ nhỗ xwỳnhjẻ hkỏt ixpa. Jakamã kot paj tokyx ma awỳr Atẻmti rỳ Xikitre mẻ. Kẻ mỗ nẻ awỳr pỏj ka tokyx tanhmã amnhĩ to hpa nẻ man ixwỳr mỗ pu mẻ Nĩkop kamã axpẻn pumu.

¹³ Nẻ ota mẻ akuri Apor mẻ axiwỏkat Jẻntija. Kỏja wa mẻmo arĩgro hã ma krĩ hỏ hwỳr nojarẻt ka wa kãm mẻ apkur xà hkwỳ gỏ kẻ wa ma y kãm mỏr kẻt nẻ.

¹⁴ Nẻ kẻr ka Kris kwỳjẻ mã anẻ kẻ mẻ arĩ ỏrkwỳ pix kãm hkrĩ ho hkrĩ hkẻt nẻ. Kẻ mẻ tanhmã axpẻn to mex to ho axpẻn kỏt pa. Nhữm mẻhỏ kẻp amrakati kẻ mẻ tanhmã ho ajuta hto. Mẻ kãm anẻ kẻ mẻ ã axpẻn nhĩpẻx anhỹr o pa.

¹⁵ Nẻ ota jar Kris kỏt pahkwỳjẻ piitã awỳr hpẻr mẻ Xitre. Nẻ kẻr ka atar Kris kỏt mẻ pahkrỏmnhwỳjẻ mã mẻ ijarẻ.

E ãm ja pix. Kẻ Pahihti Jejus mẻ akutã nojarẻt rãhã ho pa. Ixpẻ Pawre na pa amã ã ixkapẻr nẻ hã kagà nẻ awỳr mẻnh anẻ.

Piremõ Pawre kot Piremõ hwÿr kagà nẽ mẽn̄h

Pawre na pre kagàja nhĩpêx nẽ hkràmnhwÿ Piremõ hwÿr kumẽ. Na pre Piremõja amnhĩm kãm àpênh xwÿnh Onesti japrõ. Kàxpore ho haprõ nhũm amari kãm àpênh o pa. Tã tanhmã hamaxpêr to nẽ hkaga nẽ ma umaj krĩ hõ hwÿr hprõt nẽ tẽn amũxu nẽ kamã pa ho pa. Hãmri nẽ Pawre pumu nẽ kãm amnhĩ jarẽ. Pawre arĩ kêp prês nẽ hkrĩ ho hkrĩ nhũm Onesti omu nẽ kãm amnhĩ jarẽ. Hãmri nhũm Pawre kãm Jejus jarẽ nhũm kuma nẽ hkõt amnhĩ xãm kurẽ kumrêx. Hãmri nhũm Pawre ja hã omu nẽ hkràmnhwÿ Piremõ mã kagà nhĩpêx nẽ kamã Onesti xyr pẽ kãm kapêr. Hãmri nẽ hipêx pa nẽ Onesti mã kugõ nẽ ma akupÿm õ patrãw Piremõ wÿr kumẽ nhũm ma mõ. Nhũm Pawre kagàja kamã kãm kapêr nẽ kãm:

¹ Pa ixkràmnhwÿ Piremõ? Xà amex? Ixpê Pawre na pa awÿr kagà nhĩpêx nẽ kumẽ. Apê Kris kõt ixtõ hã inhmã akĩnh. Na ka hte ixpyrà nẽ Kris mã tanhmã amnhĩ nhĩpêx to ho apa. Ta ot pa awÿr kagàja kamã ixpêr mẽ. ² Amã nẽ anhõrkwÿ kamã Tirtũm kapêr mar kaxyw mẽ kêp Jejus kwÿ hã mẽ pikuprõnh xwÿnhjẽ hwÿr. Nẽ Kris kõt pahtõx Apti mẽ Akip wa hwÿr kumẽ. Akipja na hte mẽ pahpyrà nẽ Pahihti Jejus mã tanhmã amnhĩ nhĩpêx to ho pa.

³ Na pa hte mẽ ato Mẽpanhĩpêexà maati Tirtũm mẽ Pahihti Jejus Kris wa hwÿr rãhã ho ri ixpa. Kot mẽmoj to mẽ akutã nojarêt rãhã nhũm wa ÿ hã mẽ ajamakêtkati nẽ axãmnhĩx apa ho apa kaxyw.

Pawre kot Piremõ nhÿ hã hkĩnh ã harênh

⁴⁻⁵ Na pa pre ajarênh ma Piremõ. Na htem xatã tanhmã inhmã ajarênh to nẽ ajarênh o:

—Hêxta waa nẽ. Piremõ na hte amnhĩ kaxyw Pahihti Jejus Kris kõt hamaxpêr tÿx nẽ kãm mẽ ixpê Kris kõt hkwyjê piitã hkĩnh pẽ tanhmã mẽ ixto mex to ho ri mẽ ixkõt pa.

Anhÿr o inhmã ajarê pa mẽ kuma nẽ anhÿ hã ixkĩnh nẽ ato Tirtũm wÿr rãhã ho ixpa nẽ ato hwÿr o:

—Pa Tirtũm. Na xep hte Piremõ kãm akĩnh tÿx nẽ akwyjê ho mex rãhã ho pa. ãm hãmri na hte ã mẽ hipêx anhÿr o pa. ⁶ Na xep mẽ piitã mẽ kãm tanhmã Jejus kot mẽ inhnẽ amnhĩ nhĩpêx to hã harênh o ri mẽ hkõt pa. Jakamã kër ka tanhmã mẽ kot mar xwÿnhjẽ hkrã hto kê mẽhprĩ hã mar tÿx nẽ Kris kot tanhmã mẽ ho mex to hã amnhĩ tã omu.

Anhÿr o ato kuwÿ. ⁷ Ate Kris kwÿjê ho mex o apa jakamã te ate pa ixto mex pyràk Piremõ. Na htem anhÿ hã hkĩnh nẽ pa. Pa ijaxwÿja ajarênh ma nẽ anhÿ hã ixkĩnh tÿx nẽ jar mẽ hagjênh xà kamã ixkrĩ.

Piremõ kot Onesti kamã ukapri hã Pawre kot kãm karõ Rõmãn 15.7; Epes 4.31

⁸ Nã ixte amã mẽmoj jarênhja tanhmã kute hkêt. Kot paj ãm amã mẽmoj jarẽ nẽ hã awÿ. Nom kot paj Kris nhÿ hã amã tanhmã hã karõ hto hkêt nẽ. ⁹ Kot paj ãm pahte axpên to pahkràmnhwÿ hã hã awÿ. Ra ixwej tÿx nẽ Kris ã arĩ mẽ hagjênh xà kamã ixkrĩ htã mẽmoj tã awÿ ka inhma nẽ inhmã ho anhÿr japêr ko.

¹⁰ E amã àpênh xwÿnh Onestija na ixte amã harênh kaxyw. Na pre man ixwÿr mõ. Ixpê prês nẽ ixkrĩ nhũm ixwÿr mõ. Pa omu nẽ kãm Jejus jarẽ

nhũm inhma nẽ pahpyrà nẽ amnhĩ kaxyw hkõt hamaxpër nẽ hkõt amnhĩ xãm. Jakamã te kęp ixkra pyrãk. Hãmri nẽ ixto ajuta mex o pa. ¹¹ Xep kormã Jejus kõt amnhĩ xãm kêt ri na pre amã àpênh mex kêt nẽ. Nẽ kãm kaga nẽ htýx ri tanhmã àpênh to ho pa. Tã ra Jejus kõt amnhĩ xãm hãmri nẽ katãt kõt inhmã àpênh mex o pa. Nẽ ixto ajuta mex nẽ. Koja akupým amã apê hãmri nẽ amã àpênh mex nẽ.

¹² Jakamã ot pa akupým awýr kumẽ ixkrãmnhwý. Nom inhmã hapê jakamã koja ma akupým mõ pa ho ama nẽ. Tã kot paj akupým awýr kumẽ. ¹³ Kot jar ixri arĩk nẽ apãnhã tanhmã ixto ajuta hto ho paja na inhmã hprãm. ¹⁴ Jakamã kot kaj amã akupýn ixwýr mênh prãm nẽ mãmri ixwýr amẽ. Nom ixte ja pumunh kêt. Kam nẽ amã hprãm xã hkõt tanhmã kãm akapër to. Kãm anê kê akuri arĩk nẽ amã àpênh o pa rý akupýn ixwýr amẽ. ¹⁵ Nom konên. Mãn akupým awýr mõi nẽ kęp Kris kõt akwý hã amã àpênh mex kaxyw na pre Tirtũm ixwýr kumẽ nhũm ixwýr mõi nẽ ixri Jejus kõt amnhĩ xãm nẽ ixri pa hã mytwrý hkwy hapêx pa akupým awýr kumẽ. ¹⁶ Nom ra kęp amã àpênh xwýnh pix kêt mãânên kęp Kris kõt atõõ. Jakamã kot kaj wa atar axpên kõt Pahihti Jejus kõt tãm amnhĩ nhĩpêx o ri apa. Nom mãânên kęp ixkrãmnhwý mex ã inhmã hapêê. ¹⁷ Jakamã kot kaj ixpê Kris kõt akrãmnhwý hã ijarê hã kot kaj mãânên inhmã ho mex o apa.

¹⁸ Nẽ wam amã àpênh o pata ã mãn pre apê mêmoj to ahkĩ rý akãxpore hkwy ho ahkĩnh japêr. Tã pa kot paj hpãnhã amã amnhĩre. Ka inhmã tanhmã kãxpore jarênh to pa amã amnhĩre. ¹⁹ Ixpê Pawre kot paj tanhmã kot ato tewên toja pãnhã amã amnhĩre. E pa amnhĩ nhĩhkra ho ã amã amnhĩ jarênh ã kaga anê. Nom ajaxwýja na ka tanhmã ixto tewên to Piremõ. Na pa pre amã Jejus kot mẽ panê htyk ã harê ka pre inhmar xã hkõt hkõt amnhĩ xãm. Jao ixpyrà nẽ atĩr tũm nẽ apa ho apa mã xwýnhnta pãnhã te ate ixto tewên pyrãk.

²⁰ E kwa ixkrãmnhwý. Ixpyrà nẽ apê Kris kwý jakamã kër ka ixkamã axukapri hã inhmã Onesti ho mex nẽ. Kër pa ja hã ajarênh ma nẽ ixkĩnh nẽ tãm ijamaxpër. ²¹ Nã ra ixte apumunh mex kênã. Kot kaj ixte hã awýrta kõt hipêx. Ja kaxyw na pa amã kagãja nhĩpêx nẽ awýr kumẽ. Nom kot kaj ãm ja pix ho anhýr kêt nẽ. Kot kaj ixte hã awýrja kõt amnhĩ krã hkõt tanhmã ho mex to. Nã kot kaj ho anê.

Pawre kãm Piremõ hwýr mõi nẽ omunh prãm ã harênh

²² Nẽ Tirtũm kot mẽ awýr inhmênh kaxyw mẽ ate ixto hwýr o apa jakamã koja apu tokyx ma mẽ awýr inhmẽ. Jakamã kwa kër ka ixkutêp tanhmã mêmoj to mex to. Kër pa mêmõ arĩgro hã mõi awýr põi ka ra ixkutêp tanhmã amnhĩ to hpa nẽ ãm ixpix kãm ajamak o apa.

²³ Nẽ ota Epasja awýr hpêr mẽ. Na hte ixpyrà nẽ Jejus Kris ã mẽ hagjênh xã kamã kęp prês nẽ hkrĩ ho hkrĩ. ²⁴ Nẽ Makre nẽ Aristak nẽ Tẽmti nẽ Rukre mẽ awýr hpêr mẽ. Na htem ixpyrà nẽ Kris mã tanhmã amnhĩ nhĩpêx to ho pa nom ixrom mẽ kęp prês kêt.

²⁵ E kê Pahihti Jejus Krisja akutã nojarêt rãhã ho pa. Ta ãm ja pix. Ixpê Pawre na pa amã kaga nẽ awýr kumẽ.

Eprêw Ijaew hwÿr kagà

Kagà ja na pre Ijaew ò amnhî kwÿjê mã hipêx nom mẽ pahte hipêx xwÿnh nhîxi mar kêt. Na pre tanhmã hamaxpêr to nê amnhî nhîxi hã kagà hkêt nê. Apu Pawre rÿ apu axtem mēhōja na pre hipêx. Ijaew kwÿjaja uräk nê Jejus kôt amnhî xunhwÿr xwÿnhjê mã na pre hipêx nê mẽ hwÿr kumê. Ijaewjaja mẽ hixi hō pē Eprêw. Jakamã nhũm kagà nhîpêx xwÿnhja mẽ hwÿr hipêx nê kumê. Nê kamã mẽ kãm mẽmoj jarēnh rax nê tanhmã Jejus jarēnh to.

Nê mẽ hwÿjaja hwÿjê hkĩnhã kãm Jejus prãm kêt jakamã na prem hkaga nê mẽ kot amnhî nhîpêx tũm o ujanâr prãm xaj tanhmã mẽ homnuj to ho pa. Jakamã nhũm kagà nhîpêx xwÿnhja tanhmã ja hã mẽ kãm kapêr to.

Nê na pre tanhmã Tirtũm nhōrkwÿ kaakre hã kagà hto. Nê kaxkwa kamã òrkwÿ mexja nhũm tanhmã hã kagà hto nê mex o òrkwÿ kaakre jakrenh ã harê.

Nê mẽ kot Jejus ã amnhî xà htÿx kamã hamak o pa htã mẽ kot tee ri ja hã amnhî pumunh nê Jejus kaga nê mẽ hkurê kamã hihtÿx nê. Æ mēhōja mẽ kãm kapêr anê nê hã kagà nê mẽ hwÿr kumê. Nê mẽ kãm kapêr o:

1 Pa Kris kôt ixkwÿjaja? Xà mẽ amex? E ot pa mẽ amã kagà nhîpêx nê mẽ awÿr kumê. Amnepêm Tirtũm na pre mẽ panhīgētjê hwÿr ÿ hã kapêr jarēnh o ri mẽ pa xwÿnhjê rē nhũm mẽ xatã mẽ kãm kapêr jarēnh o ri mẽ hkôt pa. Ahpÿnhã tanhmã mẽ kãm kapêr to ho amnhîrit o mẽ hkôt pa. Nhũm Tirtũm xatã mẽ hkanrēhã mẽ hkra nê mẽ htãmnhwÿjê hwÿr mẽ hwÿjê rē nhũm mẽ kãm kapêr jarēnh o ri mẽ hkôt pa. Nom mẽ kãm kapêr piitã harēnh kurê kumrēx kêt nê. Na prem ãm hwÿ pix jarê. Tã nhũm hpãnhã mẽ hwÿjaja wantajē mÿr pē mẽ hwÿr mra nê axte mẽ kãm hwÿ jarēnh o ri pa. Jao ra mẽ kãm harēnh jatur xãm mēnh o mō. ²⁻³ Tã nhũm Tirtũm Kraja mẽ pahwÿr wrÿ nê mẽ pamã kapêr jarēnh jatur xãm kumê. Kêp Tirtũm Kra jakamã te kot amnhî nhîpêx pyrã nê pa. Uräk nê mex o mex. Nê wa hihtÿx xaja tipxi. Nê wa àhpumunh tÿxja mããñēn tipxi. Jakamã mẽ pahte pano ho Tirtũm pumunh kêt tã Jejus pumunh pē te mẽ pahte Tirtũm pumunh pyräk. Uräk nê kot amnhî to rax o mẽ pahpiitã mẽ pajakrenh par. Amnepêm kormã mẽmoj kêt ri nhũm Jejus Tirtũm kukwak ri mẽmoj piitã ho kator pa. Tã koja Tirtũm nhÿrmã kãm mẽmoj piitã òr pa. Kaxkwa kamã mẽmoj piitã nê jar pika piitã hkôt nhũm kãm piitã òr pa.

Nê Jejus xàhpumunh xà pix kukwak ri na mẽmoja arÿ rãhãã. Na pre mẽ panê mẽ pahte amnhî tomnuj piitã hpãnhã amnhîrer par kaxyw mẽ panê ty. Hãmri akupÿm htÿr hãmri nê ma akupÿm kaxkwa hwÿr api. Tirtũm xihtÿx o hihtÿx xwÿnhja wÿr akupÿm api. Nê ò krÿ kamã upók rũm pahi maati hkrÿ xà hã kuri hkrÿ ho hkrÿ. Nê ìhkò hã mẽ pahto amnhîptâr rãhã ho hkrÿ.

Jejus mẽ Tirtũm kapêr o mẽ wrÿk xwÿnhjê jarēnh

4-5 Nê Jejus kot amnhî to rax o Tirtũm kapêr o mẽ wrÿk xwÿnhjê jakrenh jakamã na pre ã Tirtũm kãm kapêr anê nê kãm:
Na ka amnhî to rax o mẽ kot ixkapêr o mẽ wrÿk xwÿnhjê jakre.
Mê kot inhmã tanhmã amnhî nhîpêx to ho mẽ pa xwÿnh na mẽ.
No mẽ kurom apê Ixkra kumrēx jakamã amex o ate mẽmoj piitã hakrenh par.

Nê apê pika nhõ xwýnhjê hwýr ixte amênh mã xwýnh na ka. Nà apê Ixkra kumrêx.

Kot paj jarâhã ixpê anhîpêêxã hã mē piitã mē kãm amnhî to amnhîrit. Pa na ixpê anhîpêêxã.

Anhýr o Kra Jejus mã kapêr. Na pre kapêr o mē wrýk xwýnhjê mã ã kapêr anhýr kêt nê. Jejus mã pix mã ã kapêr anê.

⁶Nê koja nhýrmã akupýn mē pahwýr Kra mēnh kaxyw hãmri nê kapêr o mē wrýk xwýnhjê mã kãm:

E ota Ixkrata. Ixkra kumrêx na. Kot amnhî to rax o mē piitã mē hakrenh par. Jakamã kêr ka mē apiitã kutã arôrôk nê kãm mex o mex ã harê.

Anhýr o mē kãm kapêr. ⁷Nê kapêr o mē wrýk xwýnhjê na pre axtem tanhmã mē harênh to nê mē harênh o:

Ixkapêr o mē wrýk xwýnhjaja na pa hte nhýhým mē kurê nhüm htem inhmar xã hkôt ma nhýhým mra nê inhmã tanhmã amnhî nhîpêx to.

Te ixte ma nhýhým kôk nê kuwyja mēnh nhüm ixkapêr kôt nhýhým mörja pyrãk.

Anhýr o mē harê. ⁸No ã Krata jarênh anhýr kêt nê. Na pre tanhmã kãm kapêr to nê amnhî pyrã nê kêp Tirtüm ã harê nê kãm:

Pa Tirtüm? E ka kot kaj mē ho amnhîptãr rãhã ho akrî. Nê akatãt kôt mē ho amnhîptã.

⁹Koja mē tãm amnhî nhîpêx ka ja hã mē omu nhüm ja amã mex nê.

No koja mē tanhmã amnhî tomnuj to ka ja hã mē omu nhüm ja apê omnuj nê. Mē kot tanhmã amnhî tomnuj to ho paja na omnuj týx.

Tã ate inhmã hprãm xã hkôt amnhî nhîpêx jakamã na pa mē kaxyw axãm ka akînh kãm mē ho amnhîptã.

Ixpê anhõ Tirtüm na pa ã amã ixkapêr anê. Anê.

¹⁰Hãmri nê kãm:

Pa Pahihti. Nà amnepê m kormã mēmoj kêt ri na ka pre ixkukwak ri pika nê kaxkwa ho akato. ãm hãmri na ka pre ã amnhî nhîpêx anê.

¹¹Tã nom koja nhýrmã hamê wa hapêx pa. ãm kaxipix kot kaj kurom arî arãhãã nê aa ajapêx kêt nê.

Kaxkwa nê pika koja wa nhýrmã te ixkre hã pô htüm kot amnhî nhîpêx pyrãk.

¹²Kot kaj wa hipêx o te mē kot ixkre nê pô htüm mã hikranh par nê hpãnhã hã nyw janhôr pyrãk.

Jao pika nê kaxkwa htüm o ajapêx pa nê hpãnhã nyw nhîpêx. Kaxkwa nyw nhîpêx nê pika nyw nhîpêx.

Nom kot kaj pika nê kaxkwa tũmta pyrã nê aa awej nê axirerek kêt nê.

Kot kaj arî anyw nê axihtýx rãhã apa ho apa nê aa ajapêx kêt nê. Arãhã atür tũm nê apa ho apa xwýnh na ka.

¹³E jar inhîhkô hã nhý nê inhmã mē ho amnhîptãr o akrî.

Kot paj mē kãm akurê xwýnhjê pynênh pa nê man awýr mē o mra nê anhîhkram mē haxãr pa. Anê.

ã na pre Tirtümja Kra Jejus mã kapêr anê. No kapêr o mē wrýk xwýnhjê mã ã kapêr anhýr kêt nê.

¹⁴E kot paj hpãnhã ixprî hã mē amã Tirtüm kapêr o mē wrýk xwýnhjê jarê ka mē inhma. Tirtüm mã na htem tanhmã amnhî nhîpêx to ho pa. Na hte nhýrmã kuri mē htür tũm nê mē pa mã xwýnhjê hwýr mē kurê nhüm mē ma mē hwýr wrý nê tanhmã mē ho ajuta hto ho pa. Na htem ã amnhî nhîpêx anhýr o pa.

2

Mê pahte Jejus kaga hkêt â mê pamā karō

¹ Tā ā Tirtūmja Kra kot amnhī to rax o kapēr o mê wrÿk xwÿnhjê jakrenh ā harēnh kot anhÿr jakamā kwa kêr pu mê kapēr mar tÿx rāhā nē hkôt pix mā amnhī nhīpêx o papa. Kot pu mê ho anhÿr kêt hāmri nē gaa nē hkaga. ² Na pre Tirtūm kapēr o mê wrÿk xwÿnhjaja amnepê mā mê panhīgêjtjê hwÿr wrÿ nē Tirtūm nhÿ hā mê kot tanhmā amnhī nhīpêx to ho pa hā mê kām karō nē ma akupÿm api. Nē katāt kôt ri mê kām Tirtūm kapēr jarēnh o pa. Hāmri nhūm mê kot hkôt amnhī nhīpêx nē mar mex xwÿnhjaja nhūm mēmoj mê kām mex nē. No nhūm mê kot mar nē ām mar xwÿnhjaja koja mēmoj mê kēp omnuj nē. ³ Koja nhÿrmā mēmoj mê kēp omnuj tÿx kumrêx nhūm mê tee ri amnhī tā omu nē tee ri kēp amnhīptār prām kaprÿ nē mex kêt nē pa. Nom mê kot Tirtūm kapēr mar tÿx xwÿnhjaja koja mēmoj mê kām mex o mex. Koja Tirtūm amnhī katut kôt mê kot amnhī tomnuj rēnh pa nē axte kām hamaxpēr kêt nhūm mê kuri htir tūm nē mex rāhā nē pa ho pa. Na pre Pahihti Jejus mê kot kapēr mar o kuhê xwÿnhjê kumrêx mā ā ja jarēnh anē nē mê kām:

—Nā kot kaj mê amnhī kaxyw inhmā ajamaxpēr nhūm Tirtūm ixtā mê apumu nē mê anē mê ate amnhī tomnuj piitā ho hapêx pa nē axte kām hamaxpēr kêt nē. Anē.

Hāmri nhūm mê kot kapēr mar nē hkôt mê pa ho mê pa nē xwÿnhjaja mar tÿx nē amnhī xō ri mê pamā harēnh o ri pa. Nē mê pamā:

—Nā ām hāmri. Nā ā ja jarēnh kot anhÿr. Anē.

⁴ Hāmri nē mê pamā aa mê pahte mēmoj pumunh kêt kwÿ ho anhÿr o ri mê pahkôt pa. Tirtūm Karō kot ja kaxyw mê ho mê āhpumunh tÿx jakamā nhūm mê ŷ hā ahpÿnhā tanhmā mê pamā amnhī nhīpêx to ho pa. Mê pahte ja hā mê omunh nē kamā pano puma kaxyw. Nē ā mê pajamaxpēr anē nē pajamaxpēr o:

—Nā ām hāmri na mê pamā ā Jejus jarēnh anē nē ŷ hā ā amnhī nhīpêx anhÿr o pa.

Anhÿr o pajamaxpēr kaxyw na prem ā mê pahkôt amnhī nhīpêx anhÿr o pa.

Mê pahpê Jejus tō nē htōx ā mê pajarēnh

Juāw 1.14; Rōmān 8.3-4; Piripos 2.5-11; Korosē 2.9; Wam Juāw 4.2

⁵ Nē na pre Tirtūm amnhī kukamā tanhmā amnhī jarēnh to nē nhÿrmā kot akupÿm mēmoj piitā ho nyw nē tām mēmoj piitā ho amnhīptār o pa hā amnhī jarē. No na pre kapēr o mê wrÿk xwÿnhjê mā ā mê kot amnhī nhīpêx anhÿr ā mê kām karō hkêt nē. Koja jajaja mê pahto amnhīptār o pa hkêt nē. ⁶ Tirtūm kapēr ā kaga htūm kot ja jarēnh kot:

Kwa Tirtūm. Nā ām hāmri na ka hte pika ja kamā ri mê ixpa xwÿnhjê jamār mex rāhā ho apa.

Akīnhā amarī ri mê ixpa xwÿnh tā amā mê ijapêê.

Nē mê ixkutā anojarêt rāhā ho apa.

⁷ Na ka hte tanhmā mê inhīpêx to pa mê te mê ixpê akapēr o mê wrÿk xwÿnhjê pyrāk.

Jao mê urāk nē akukwak ri mê inhmex nē ixpa ho ixpa.

Mê uràn mê ixāhpumunh nē ixihitÿx kêt tā mê inhmex nē ixpa.

⁸ Na ka pre ra ate mēmoj to akator xwÿnh piitā mê inhīhkram haxà.

Nā ām hāmri na ka pre ā mê inhīpêx anē Tirtūm. Amex o amex. Anē.

Na pre ra mēmoj piitãã mē panhîhkram haxà. Pika nē kaxkwa nē kapēr o mē wrÿk xwÿnhjaja nē mēkarõmnuti nē kot mēmoj piitãã hipêxja nhûm mē panhîhkram haxâr pa. Mē pahte îhkô hã ho amnhîptâr o papa kaxyw. No na pu mē kormã piitã ho amnhîptâr kêt nē. ⁹ No kêt Jejusja na Tîrtûm mē pakurom îhkram mēmoj piitã haxâr par kumrêx. Kormã pika ja kamã ri pare ri na pre tanhmã amnhî nhîpêx to nē Tîrtûm kapēr o mē wrÿk xwÿnhjê hkînhã te amnhî to grire pyrã nē amnhî xà htÿx kamã hamak kãm ty. Tîrtûm kãm mē pahto mex prãm xaj ã mē pahpiitã mē panê htyk anê. Tã nhûm Tîrtûm akupÿm ho htîr nē akupÿm amnhî wÿr ho api nē kêp Pahi Maati mex o mex ã harê. Na pre ã Jejusja mē panê amnhî nhîpêx anê nhûm Tîrtûm ja hã omu nē kukwak ri mē pahto mex nē.

¹⁰ Nē Tîrtûm kot mēmoj piitã ho kator jakamã mēmoj piitã õ na. Na pre mē pakukamã hamaxpêr o:

—Inhmã ixkra xohtô hprãm. Kot paj nhÿrmã man amnhî wÿr mē ho api kê mē ixri mex rãhã nē pa ho pa. Nã kot paj ã mē hipêx anê. Nē Îxkra Jejus koja kêp mē õ Pahihti. Koja mē urak nē mēmoj punuj pumunh o pa hãmri nē ã htÿx kamã hamak o kêp mē õ Pahihti mã tãm. Anê.

¹¹ Na hte Jejus mē panê mē pahte amnhî tomnuj rê nē hpãnhã mē pamã mē pahte amnhî nhîpêx nyw jagjê nhûm Tîrtûm ja hã mē pahpumunh kôt mē pahto hkra. Kêp Jejus Nhîpêxã nē kêp Mēpanhîpêxã maati jakamã nhûm Jejusja mē pahpê htô nē mē pahpê htõx ã mē pajarê nē mē panhÿ hã hkînh nē.

¹² Tîrtûm kapêr ã kagã htûm ã mē pajarênh kot anhÿr. Kamã Jejusja Mēpanhîpêxã maati mã mē pajarênh kot:

Koja ixtô nē ixtõxjaja akapêr mar kaxyw axpên wÿr akuprô pa ma mē hkôt mra nē mē kãm akapêr jarê nē mē îhkô hã amex ã gre. Anê.

¹³ Hãmri nē kãm:

Kot paj amnhî kaxyw akôt pix mã ijamaxpêr mex o ri ixpa. Anê.
Hãmri nē hpãnhã kãm:

Ot pa akrajê hkôt ri ixpa ho ixpa.

Ka na ka pre mē kêp ixtô nē ixtõx kaxyw inhmã mē agô.

Koja mē ixpyrà nē amnhî kaxyw amã hamaxpêr rãhã ho pa Tîrtûm. Anê.

¹⁴ Nē mē pahpê pika nhõ xwÿnhjaja na pu htem ãm ri panhî pix ã papa. Nē panhî kamã pahkamrô hã ri papa. Jakamã na pre Jejus kot mē panê htyk kaxyw mē pahwÿr wrÿ nē mē pahpyrà nē ï ho mē pakamã kato. Tã mēmo kaxyw na pre ï ho ï nē mē pahkôt pa? Nã ï ho htyk o Satanasti pê hihtÿx xà ho hapêx par kaxyw na pre ã amnhî nhîpêx anê. Satanasti kêp mē kot amnhî tomnuj xwÿnhjê hpãm nē kêp mē htyk xwÿnhjê hpãm. ¹⁵ Jakamã na hte kot mē pahtã îhkra pikamÿr pyrãk o mē panhîpêx pu mē ÿ hã pamã pahtyk pyma nē ri papa. Tã ra Jejus kot mē pahwÿr wrÿk nē te kêp mē papytâr pyrãk o mē panhîpêx jakamã pu mē tee ri pahtyk kukamã pajamaxpêr o ri pamã ma ho pa pa hkêt nē.

¹⁶ Nē Tîrtûm kapêr o mē wrÿk xwÿnhjê ho mex kaxyw na pre Jejus pika hwÿr wrÿk kêt nē. Mē panhîgêt finat Apraãw pyrã nē mē panhî ho panhî xwÿnhjê ho mex kaxyw na pre wrÿ. ¹⁷ Ijaew nhõ patreja ja na pre htem mē kot amnhî tomnuj mÿrapê mē hpãnhã Tîrtûm mã mry hwÿy pa nē hkamrô kapî nē mē ho Tîrtûm wÿ. Kot hã mē omunh nē mē mex ã mē harênh kaxyw. Tã nhûm Jejus wrÿ nē mēmo mryta pyrã nē ã mē panê hkamrô pikapîr anê. Kaxyw na pre mē pahtô maati ja mē pahwÿr ï ho ï nē wrÿ nē mē pahpyrà nē

ni nhôhy rûm kato. Jao kêp mē pahto Tirtûm wÿr xwÿnh maati. Na pre Tirtûm kām hprām xà hkôt mē panē mē pahte amnhī tomnuj pānhā amnhīrer pa. Tā kot mē pahpyrà nē mēmoj punuj pumunh nē amnhī xà htÿx kamā hamak o pa jakamā kêp mē pakamā ukapri xwÿnh ā pixi mex na. ¹⁸ Kormā htyk kêt ri na pre mē pahpyrà nē omnuj nē ri pa. Nhûm mēkarōmnuti nhô pahi kot tanhmā amnhī tomnuj to hprām xaj tee ri hkôt kām ahkrox o pa hkapyrÿ nhûm hkôt amnhī nhîpêx kêt nē amnhī nē ho axtem nē. Jakamā koja Satanastija urāk nē tanhmā mē panhîpêx to nhûm Jejus mē pahtā omu nē amnhī pyrà nē tanhmā kêp mē panhîpêx to pu mē ŷ hā kutā amnhī to htÿx nē papa.

3

Jejus kot amnhī to rax o Mojes jakrenh ā harēnh Juāw 1.17-18

¹ E ixkrāmnhwÿjaja. Ra Tirtûm kot mē pahte kapêr mar nē tām amnhī nhîpêx o ri papa kaxyw mē pahto hkra jakamā kwa kêr ka mē Jejus kot tanhmā mē pamā amnhī nhîpêx toja mā ajamaxpêr rāhā ho ri apa. Na pre Tirtûm mē pahwÿr kumē nhûm mē pahwÿr wrÿ nē Tirtûm kapêr o mē pajahkre ho ri mē pahkôt pa. Nē te kêp mē panhō patre pyrà nē mē pahto Tirtûm wÿr o pa. ² Na pre Tirtûm finat Mojes kwÿ kaxyw Mojesja xām nhûm kām hprām xà hkôt tanhmā mē hipêx to ho pa. Tā nhûm hpānhā mē pakaxyw Kra Jejusja xām nhûm Mojes pyrà nē Tirtûm kām hprām xà hkôt pix mā tanhmā mē panhîpêx to ho pa. Hamē na pre wa Tirtûm jamaxpêr xà hkôt tanhmā kām mē panhîpêx to ho pa.

³ Koja mēhō amnhīm ixkre mex nhîpêx nē hipêx pa nhûm hkwyjaja hwÿr mra nē omu nē mex kumrêx ā harē. Nom kot hipêx xwÿnhnta āhpumunh xà hkôt hipêx jakamā tām na mex o kot ixkreta jakrenh. Ja pyrà nē finat Mojes kot amnhī to rax tā nhûm Jejus kot amnhī to rax o kot hakrenh. Mojes te kêp ixkre nhîpêxta pyràk no Jejus te kêp ixkre nhîpêx xwÿnhnta pyràk jakamā kot amnhī to rax o kot Mojes jakrenh.

⁴ Nē mē kot ahpÿnhā amnhī krā hkôt tanhmā ixkre nhîpêx to jakamā kot hipêx xwÿnhnta na mex o ixkreja jakrenh. Tā ja pyrà nē Tirtûm kot mēmoj piitā hō kator jakamā kot amnhī to rax o kot mēmoj piitā ho kator xwÿnh jakrenh par.

⁵ Nē finat Mojes na pre hte Tirtûm kām hprām xà hkôt tanhmā amnhī nhîpêx to ho pa. Nē ma kām hkwyjê piitā hkôt mē kām kapêr jarēnh o ri pa. Tirtûm tanhmā kot mē kām kapêr tota kukamā nhûm mē kām harēnh o mē hkôt pa. No ām Tirtûm mā tanhmā amnhī nhîpêx to ho hpa xwÿnh pix na pre.

⁶ Nē Kris haxwÿja na pre hte Tirtûm kām hprām xà hkôt tanhmā amnhī nhîpêx to ho pa. Nom Mojes rom kêp Tirtûm Kra kumrêx jakamā kurom kêp mē panhō Pahihti kumrêx. Tā kwa kêr pu mē kām hprām xà hkôt pix mā tanhmā kām amnhī nhîpêx to ho ri papa. Mē kot hā tanhmā mē panhîpêx to htā pu mē ŷ hā mē kutā amnhī to htÿx nē papa nē pajamaxpêr o:

—Na ixpunuj nē ixpa htā kot paj ixpunuj rāhā ixpa ho ixpa hkêt nē. Koja nhÿrmā Tirtûm ixto mex kumrêx pa axte tanhmā ixpunuj to nē ixpa hkêt nē. Hêxta waa nē. Nà ja inhā hprām tÿx kumrêx.

Anhÿr o amnhī kukamā pajamaxpêr o papa.

*Mē pahte Tirtûm kaga hkêt ā mē pamā karō
Wam Korî 10.1-11; Jutre 5*

7-8 Amnepê m na pre mēhōja tanhmā Tirtūm Karō nh̄y hā kapêr to nē kapêr o:

E kēr ka mē Tirtūm kapêr mar t̄yx o apa.

No ama nē ām ama nē ri hā apa hkêt nē. R̄y kapêr pē akrā hiht̄yx o apa hkêt nē.

Mē akukamā mē anhīgētjaja na prem ā amnhī nh̄pêx anē nē Tirtūm kapêr pē hkrā hiht̄yx o pa. Kapôt ā Mojes kôt mē pata ā na prem kām Tirtūm kapêr mar prām kêt nē. Nē tee ri amnhī kukamā hamaxpêr nē akup̄ym Ejit w̄yr hkrā nē axpên mā: “Kwa na pu mē ra pahpunuj t̄yx nē papa nh̄um Tirtūm ām ja hā mē pahpumu nē tanhmā mē pahto mex to hkêt nē. Mān ra mē pahkaga nā? E kwa pu mē awjanā nē ma akup̄ym Ejit w̄yr mān pa.” Anē.

9-10 Na prem ā axpên mā kapêr anh̄y r o ri pa hā amgrā pē 40.

Tirtūm xatā kot tanhmā mē ho mex to nh̄um mē kot amnhī tā omunh tā ām omu nē ht̄yx ri amnhī hkrā hkôt pa.

Nh̄um tee ri amnhī tā mē omu nē mē kamā gryk nē.

Hāmri nē hamaxpêr o: “Nā pēr mē hamaxpêr kot mē hā hkw̄y jēt kêt kumrēx.

Te mē hamak kre hkêt pyrā nē ixkapêr mar kêt nē.” Anh̄y r o hamaxpêr.

11 Hāmri nē mē kām: “E mē inhma. Ā mē ate amnhī nh̄pêx anh̄yrja m̄yrapē kot kaj mē ma ixte mē amā pika mex nh̄or mā xw̄ynhta w̄yr apa hkêt nē.” Anh̄y r o mē kām kapêr. Anē.

Ā mēhōja Tirtūm Karō nh̄y hā te Tirtūm tām kot mē kām kapêr pyrāk o mē harēnh anē. 12 Jakamā kwa mē okora ixkrāmnhw̄yjaja. Kēr ka mē amnhī to mex o apa. Tirtūm kēp Mēpahpām ā pixi mex tā kot kaj mē tanhmā ajamaxpêr punuj to r̄y amnhī kaxyw hkôt ajamaxpêr kêt hāmri nē te ate amnhī katut kôt ām pyrāk o hipêx nē hkaga. Kwa mē ā amnhī nh̄pêx anh̄y r kêt nē. 13 Kêt mē Kris kôt axpên to axiht̄yx o ri apa. Nē apkati mē ā axpên nh̄pêx anh̄y r rāhā nē. Kot kaj mē anh̄y r kêt hāmri nē mē amā Tirtūm kapêr mar prām kêt ā amnhī to amnhīrit. Jao tanhmā amnhī tomnuj to ho ri apa nē at̄yx ajamaxpêr o: —Nā ixte ā amnhī tomnuj anh̄y r tā nh̄um Tirtūm ja hā ixpumu nē ām hā ixpumu.

Anh̄y r o ajamaxpêr japêr. R̄y mē ajamaxpêr o:

—Nā na pa hte ā amnhī tomnuj anē nh̄um Tirtūm ja hā ixpumu nh̄um ja kām mex nē.

Anh̄y r o ajamaxpêr japêr. 14 Kwa mē ri ā ajamaxpêr anh̄y r kêt nē. Amnepē mā mē pahte Kris kôt amnhī xunhw̄yr nh̄um kot mē pahto hkrata ā na pu prem amnhī kaxyw hkôt pajamaxpêr o papa. Tā kēr pu mē arī ā amnhī nh̄pêx anh̄y r t̄yx o papa rāhā ty. 15 Tirtūm kapêr ā kagā ht̄um kot ja jarēnh kot:

E kēr ka mē Tirtūm kapêr ma nē mar t̄yx nē.

No ama nē ām mar nē ri hā apa hkêt nē.

R̄y mē kot hkaga xw̄ynh̄jē pyrā nē kēp akrā hiht̄yx kêt nē. Anē.

16 Mē panhīgētjaja na prem Mojes kôt pika pē Ejit rūm kato nē hk̄inh nē ma kapôt ā kormā pika mex w̄yr pa. Nom Tirtūm kapêr mar nē hkôt amnhī nh̄pêx rāhā hkêt nē. Na prem kuma nē hkôt amnhī nh̄pêx o hā apkati grēre htā ra mēmoj nh̄y hā omnuj nē pa hā amnhī pumu nē tee ri amnhī kukamā hamaxpêr. 17 Jao xatā kapêr nh̄rōp kuhē nē amnhī hkrā hkôt pix mā amnhī nh̄pêx o pa ho ra hā amgrā pē 40. Hāmri nh̄um tee ri amnhī tā mē omu nh̄um ja kēp omnuj nē. Jakamā nh̄um mē piitā kapôt ā ri pa nē gaa nē pikaprār pa.

18 Mē kot kapêr mar kêt jakamā nh̄um mē kām:

—Nà ã më ate amnhĩ nhĩpêx anhÿr o ri apaja mÿrapê kot kaj më ixte më amã më amex nhõr mã xwÿnhnta wÿr apa hkêt nê. Anê.

¹⁹ Tã më kot amnhĩ kaxyw Tirtùm kôt hamaxpêr o pa hkêt jakamã na prem pika mexta wÿr hpõx kêt rãhã pikaprãr pa. Nhũm më hkra nê më htãmnhwÿjê pixjaja na prem më mÿr pê hwÿr pøj nê kamã pa.

4

Më pahte Tirtùm kukwak ri pajamakêtkati nê ri papa hã më pajarênh

¹ Më pahte Tirtùm kukwak ri pajamakêtkati nê ri papa ho papaja Tirtùm kãm hprãm jakamã kwa kër pu më amnhĩ pumunh mex o papa. Nê wam më panhigêt rom Tirtùm kapêr mar tÿx nê hkôt mãn kêt ri amnhĩ nhĩpêx mex rãhã nê. Kër pu më kurom më pajamak kãm amnhĩ krit xà hã pika mexta wÿr pøj. ² Më kot më pahpyrà nê Tirtùm kapêr mar mex tã na htem amnhĩ kaxyw hkôt hamaxpêr kêt nê. Te më kot mar kêt pyrãk. ³ ãm më kot amnhĩ kaxyw Kris mã hamaxpêr xwÿnh pixjaja na htem kukwak ri hamakêtkati nê ri pa ho pa. Amnepê mã mëmoj piitã hkêt ri na pre Tirtùm mëmoj piitã ho kator pa hãmri nhũm apkati nhũm axte mëmoj tã àpênh kêt nê. ãm õ krĩ kamã arĩ hamakêtkati nê hkòkòt o hkrĩ. Tã më pahte urãk nê pajamakêtkati nê papa ho papaja na kãm hprãm. No wam ri më pa xwÿnhjaja më kot amnhĩ tomnuj mÿrapê na pre Tirtùm më kot urã nê hamakêtkati nê paja nê më hkurê. Kapêr ã kagã htùm kot harênh kot:

Na pre Tirtùm tee ri amnhĩ tã më kot hipêx ã më omu nhũm ja kêp omnuj nê. Hãmri nhũm më kãm: “Nà kot kaj më ixkukwak ri axãmnhix ajamakêtkati nê apa hkêt nê.” Anê.

⁴ Nê kot harênh kot:

Na pre Tirtùm àpênh ã arĩgro kêp 6 hãmri nhũm arĩgro pê 7ta ã nhũm axte mëmoj tã àpênh kêt nê. Na pre arĩ hkòkòt o nhÿ.

Arĩgro pê 7 ã arĩ hamakêtkati nê hkòkòt o nhÿ. Anê.

⁵ Nê më kot kapêr mar nê ãm mar xwÿnhjê jarênh kot:

Kot kaj më aa ixkukwak ri axãmnhix nê ajamakêtkati nê apa hkêt nê. Anê.

⁶ Më panhigêtjaja kot amnhĩ kaxyw Tirtùm kôt hamaxpêr kêt jakamã na prem hamakêtkati nê ri pa hkêt nê. Tã më papajaja na Tirtùm arĩ kãm më paxãmnhix nê pajamakêtkati nê papa hprãm. ⁷ Amnepêm Ijaew Tirtùm kôt hamaxpêr kêt jakamã na prem kapôt ã pikaprãr pa. Hãmri nhũm amgrã sohtò nê hapêx nhũm Tirtùm më hkanrêhã më htãmnhwÿjê hõ pê finat Tawija mã kapêr nhũm kuma nê më pamã tanhmã kapêr tota ã kagã nê hã kagã kot:

Kwa kër ka ixkapêr ma nê mar tÿx nê.

No më anhigêtjê pyrà nê akrà hihtÿx ho inhma nê ãm inhmar kêt nê. Anê.

Na pa pre ra më amã ã ja jarênh anê. ⁸ Na pre finat Jojueja finat Mojes mÿr pê ma pika pê Kanaã hwÿr më hkanrêhã më hkrajê o pa nê hwÿr më o pøj. Tã nhũm prem Jojue kukwak ri hamakêtkati nê pa ho pa hkêt nê. Kêp ãm kukwak ri ã amnhĩ nhĩpêx anhÿr ronhÿx Tirtùm axte më kãm më hamakêtkati nê më hamak kãm amnhĩ krit nê më pata hkukamã harênh kêt nê. ⁹ Nom më pahte kukwak ri pajamakêtkati nê pajamak kãm amnhĩ krit nê ri papa ho papaja na Tirtùm arĩ kãm hprãm. ¹⁰ Na pre arĩgro pê 6ja ã mëmoj piitã ho kator pa nhũm apkati nhũm hamakêtkati nê hkòkòt o nhÿ. Tã kot puj më pahpê hkrajaja amnhĩ to kuwÿ nhũm tanhmã më pahkrã hto pu më kukwak ri urãk nê paxãmnhix nê pajamakêtkati nê papa ho papa. Te Tirtùm àpênh pa nhũm

apkati nhũm hamakêtkati nê hkôkôt o Ƴrta pyràk. ¹¹ Jakamã kwa kêr pu mê amnhĩ to kuwý kê ã mê panhĩpêx anê pu mê uràk nê ã amnhĩ nhĩpêx anhÿr rãhã ho papa. Nom kot pu mê pahkwý Ijaewjê pyrà nê kapêr kwým amnhĩ nhĩpêx o papa hãmri nê mê urã nê paxãmnhĩx pajamakêtkati nê papa hkêt nê.

Tĩrtũm kapêr te kot wapo xwa gix pyràk ã harênh

¹² Nê Tĩrtũm kapêrja te ì ho tanhmã kot mêmoj to kaxyw hihtÿx pyràk. Nê te wapo xwa gix pyràk. Koja mêhõ õ wapo xwa mex nê ho mêmoj jakãr mex nê. Ho mry hi jakãr mex pê kaxwÿnh kãm hi kanhĩn o amnhĩrĩt. Ja pyrà nê na hte Tĩrtũm kapêr mê pajamaxpêr o amnhĩrĩt nê mex ã harê rÿ omnuj ã harê.

¹³ Nê na htem Tĩrtũm pê mêmoj to pimxur kêt nê. Na hte hprĩ hã mêmoj piitã omunh pa. Nê mê pajamaxpêr kôt mê pahpumunh pa. Na pu htem ã kot mêmoj piitã omunh par anhÿr xwÿnhja noo mã tanhmã amnhĩ nhĩpêx to rãhã ho papa.

Jejus kêp mê panhõ patre maati hã harênh
Eprêw 10.19-25; Wam Juãw 2.1-2

¹⁴ Nê Ijaew nhõ patrejaja na pre htem Tĩrtũm mã amnhĩ jarênh xã hã ixkre hwÿr agjê nê kamã mê ho Tĩrtũm wÿr o pa. Ja pyrà nê na pre ra Jejus Tĩrtũm nhõ krĩ hwÿr api nê kamã mê pahto hwÿr o hkrĩ. Kêp Kra kumrêx jakamã kêp mê pahto Tĩrtũm wÿr xwÿnh maati. Jakamã kwa kêr pu mê amnhĩ kaxyw hkôt pajamaxpêr tÿx rãhã ho papa. ¹⁵ Satanasti na pre te kot mê panhĩpêx pyràk o Jejus nhĩpêx. Nê tee ri kot tanhmã kãm kapêr to nhũm kot mar nê tanhmã amnhĩ tomnuj to hprãm xãj ãm ri kãm ahkrox kaprÿ nhũm kutã amnhĩ to htÿx nê hkôt amnhĩ nhĩpêx kêt nê. Tã kot Satanasti kot amnhĩ nhĩpêx ã omunh mex jakamã na hte kêp mê pahpãmopxar mex o pa. Kot mê paxirerek kôt mê pahpumunh mex. ¹⁶ Jakamã kwa kêr pu mê amnhĩ tã kamã pahpijaãm kêt kãm paxãmnhĩx ri amnhĩ to hwÿr o papa. Kêp mê pakutã nojarêt xwÿnh nê kêp mê pakamã ukaprĩ xwÿnh jakamã kêr pu mê tee ri mêmoj tã amnhĩ pumu nê amnhĩ to hwÿr kurê kumrêx. Hãmri nê ÿ hã paxãmnhĩx nê pajamakêtkati nê ri papa.

5

¹ Nê mê panhõ patre maati Jejusja Tĩrtũm na pre mê pakaxyw ãm. Kêp mê pahkwý hã mê pakaxyw ãm nhũm hte mê pahto Tĩrtũm wÿr o pa. Nê kãm mê pahkĩnh xã nhõr o pa. Kot ja hã mê pahpumunh nê mê pahte kapêr kwým tanhmã amnhĩ nhĩpêx to ho papa hã mê pakamã gryk o hapêx tokyx anhÿr kaxyw.

² Mê panhĩgêjtjaja na pre htem mê õ patre maati hwÿr mra nê kãm tanhmã amnhĩ tomnuj to hã amnhĩ jarê nhũm mê kuma nê mê kamã ukaprĩ nê. Mê urã nê kormã kot Tĩrtũm kôt amnhĩ nhĩpêx totuj anhÿr jakamã na pre mê kot tanhmã amnhĩ jarênh toja ma nê mê kamã ukaprĩ nê. ³ Hãmri nê mê hpãnhã Tĩrtũm mã mêmoj gõ nê mããnên amnhĩ pãnhã kãm mêmoj gõ. Mê uràk nê kot amnhĩ tomnuj o paja mÿrapê amnhĩ pãnhã kãm mêmoj gõ. ⁴ No na pre hte patrejaja amnhĩ krã hkôt kêp patre maati kaxyw amnhĩ xunhwÿr kêt nê. Tĩrtũm kot mê kaxyw mê unhwÿr jakamã na pre mê kaxyw finat Arãwja xãm nhũm kêp mê õ patre maati hã mê ho Tĩrtũm wÿr o pa.

⁵ Nê Kris haxwÿja kêp mê panhõ pahi maati hã tãm kot amnhĩ xãm kêt. Tĩrtũm na pre mê pakaxyw ãm nê tanhmã kãm kapêr to nê kãm: Nã apê Ixkra na ka.

Kot paj jarâhâ ixpê Anhîpêêxâ hâ mē kām amnhî jarê. Anê.

⁶ Nê hpânâ kām:

Kot kaj Mekijetek pyrâ nê apê patre maati hâ mē ho ixwÿr râhâ ho ri apa. Anê.

⁷ Jejus kormâ pika ja kamâ pa ri na pre amnhî to Tîrtûm wÿr râhâ ho pa. Tôhâ hkaprî nê tee ri mēmoj tâ amnhî pumu nê amnhî to kuwÿ. Nê tee ri mē kot hpîrta kukamâ hamaxpêr nê mÿr kām amnhî to kuwÿ. Kop apu Tîrtûm kām mē kot kêp hpîr prâm kêt ronhÿx pre tanhmâ nê mē kām hkurê xwÿnhjê ho nhûm mē hpîr kêt nê. Jakamâ nhûm pre â amnhî to hwÿr anê. No âm Tîrtûm kām prâm xâ hkôt kām amnhî nhîpêx prâm jakamâ nhûm kuma no âm tanhmâ nê mē ho hkêt nhûm prem kupî. ⁸ Kêp Tîrtûm Kra kumrêx tâ amnhî xâ htÿx kām hamak kām ty. Jao Tîrtûm kām hprâm xâ hkôt amnhî nhîpêx â amnhî pumunh mex nê. ⁹ Na pre amnhî xâ htÿx kām hamak o amnhî mex o amnhî mex â mē kām amnhî to amnhîrît. Jakamâ na hte mē kot kapêr kôt ri amnhî nhîpêx o mē pa xwÿnhjê mâ mē kot amnhî nhîpêx nyw jagjê nê nhÿrmâ Tîrtûm mē wa kuri mē htÿr tûm nê mē pa mâ xwÿnhjê hâ mē harê. ¹⁰ Jakamâ na pre Tîrtûm Mekijetek pyrâ nê kêp patre maati kaxyw âm.

Mê pahte Kris kaga nê mē pahkurê

Wam Korî 3.1-2, 13.11, 14.20; Epes 4.11-16

¹¹ Nê Jejus kêp mē pahto Tîrtûm wÿr xwÿnh maati hâ harênhja inhmâ ixprî hâ mē amâ harênh par prâm tâ ka mē kormâ inhmar tÿx kêt nê. Pa tee ri ixprî hâ mē amâ harênh kaprÿ. Te mē amâ mar prâm kêt o amôr pyrâk. ¹² Amnepê mâ mē ate Kris kôt amnhî xunhwÿr nê kapêr mar tÿx tâ kormâ nhâm amnhî xô ri ho amnhî kwÿjê jahkre ho ri apa hkêt nê. Te mē ate hâ ano hkêt pyrâk jakamâ na pa hte arî mē amâ kapêr kot amnhîrît mex xwÿnh kwÿ ho mē ajahkre ho pa. No kot amnhîrît mex kêt xwÿnh o mē ajahkre hkêt nê. Te mē hkarâre kot amnhî nhîpêx pyrâk o na ka htem amnhî nhîpêx o apa. Na hte mē hkarâre mēo mex kur kêt nê. Âm kormâ katorxâ hkâ pix kaô. Ja pyrâ nê âm Tîrtûm kapêr kot amnhîrît mex xwÿnhnta pix na ka mē mar tÿx o apa nom kapêr kot amnhîrît mex kêt xwÿnhja ka mē mar mex kêt nê.

¹³ Nê mē hkarâre kormâ Tîrtûm kapêr mar kêt jakamâ na htem kormâ mēmoj mex nê mēmoj punuj pumunh kêt nê. Tâ te mē ate mē kot amnhî nhîpêx pyrâk.

¹⁴ Mē kot Tîrtûm kapêr mar mex xwÿnhjaja na htem hprî hâ kapêr piitâ mar tÿx nê. Kot amnhîrît mex xwÿnhnta mar tÿx nê määnên kot amnhîrît mex kêt xwÿnhja nhûm mēhpri hâ piitâ mar tÿx nê. Te ho mē âptâr kot mēo mex kur o pata pyrâk. Jao ra mē âptâr jamaxpêr o hamaxpêr o ri pa nê hamaxpêr o:

—Kot paj tâm amnhî nhîpêx o ri ixpa nhûm ja inhmâ mex nê. Nom kot paj axtem tanhmâ amnhî tomnuj to nhûm ja ixpê omnuj nê. Jakamâ kot paj tâm amnhî nhîpêx pix o ri ixpa nhûm Tîrtûm mâ ja mex nê. Anê.

6

¹⁻² Na pu prem ra Tîrtûm kapêr kot amnhîrît mex xwÿnhnta kwÿ ma. Tām na ja:

Kris kot mē panê tanhmâ amnhî nhîpêx to hâ harênhja.

Nê mē pahte amnhî tomnuj kaga hâ kot mē pamâ karôja.

Nê amnhî kaxyw Tîrtûm kôt mē pajamaxpêr â mē pamâ karôja.

Nê mē pahpê Tîrtûm kra hâ amnhî to amnhîrît kaxyw mē kot mē pahkrâ kumrâr â pamâ karôja.

Nê mē pahte Tirtūm mā tanhmā amnhī nhîpêx to ho papa hkukamā mē kot mē pahkrā hā ihkra jaxwÿr nê mē pahto Tirtūm wÿr ā mē pamā karōja.

Nê mē pahtyk nê akupÿm mē pahțır ā mē pajarēnhja.

Nê Tirtūm kot nhÿrmā mē kot amnhī xā htÿx kām hamak tūm xā hwÿr mē kēp hkra hkēt xwÿnhjē janorja.

Mēmoja piitā pu mē ra harēnh mar tÿx nē. Prī hā kot amnhīrīt mex. Tā kwa kēr pu mē hpānhā hijuk ri kot amnhīrīt mex kēt xwÿnh kwÿ ma. Jao mē pahpē Tirtūm kra xāptār mex nē ri papa. ³ Jakamā kwa kēr pu mē kot amnhīrīt mex xwÿnh kumrēx kwÿ ma nē hpānhā hijuk ri kot amnhīrīt mex kēt xwÿnh kwÿ ma. Nē axpēn mā harēnh rāhā ho ri papa. Nā koja Tirtūm kām ja prām pu mē ā amnhī nhîpêx anhÿr rāhā o ri papa.

⁴⁻⁶ Na pre ra mē pahkwÿjaja Kris kaga nē htÿx ri amnhī nhîpêx o pa. Mē kot kapēr mar tÿx tā axtem nē hkaga jakamā koja mē axte kapēr mar kēt nē. Ra mē kām mar prām kēt. Kot puj mē tee ri axte mē kām harēnh o papa kaprÿ. Na prem hprī hā kuma. Tirtūm kām mē ho hkra hprām ā harēnhja nhūm prem hprī hā kuma nē kām mar prām nē hkōt amnhī xunhwÿ. Hāmri nhūm Tirtūm Karō te mē panhîpêx pyrā nē mē hkarō mā agjē nē mē kot amnhī to mex o pa kaxyw tanhmā mē hkrā hto nhūm prem ÿ hā tanhmā kām amnhī nhîpêx to ho pa. Nē kām Tirtūm kapēr mar prām nē. Nē axpēn mā mex o mex ā harēnh o pa. Nē aa mē kot mēmoj pumunh kēt kwÿ pumu nē axpēn mā harēnh o:

—Nā Krisja ām hāmri āhpumunh tÿx o āhpumunh tÿx. Kōja nhÿrmā akupÿn mē pahwÿr wrÿ nē axte mē pamā āhpumunh tÿx o amnhīrīt pu mē omu.

Anhÿr o kapēr tā tanhmā hamaxpēr to nē hkaga. Jakamā te mē kot axte Tirtūm pē Krata pī hā nhôr nē hpīr pyrāk. Nē te mē piitā mē noo mā tanhmā haprÿ hto nē tanhmā kām kapēr punuj to pyrāk. Jakamā kot pu mē tee ri akupÿn tām mē unhwÿr prām kaprÿ.

⁷ Na hte Tirtūm mē pahto mex rāhā ho pa. Jao mē pamā mē pahpur ā na rē pu mē kamā panhō rūnh nē. Jakamā mē kot amnhī kaxyw Kris kōt hamaxpēr nē hkōt amnhī xunhwÿr prām xwÿnhjaja te mē hpur mex nē kamā mēmoj ô rūnh pyrāk. Nē urāk nē amnhī to mex o pa. ⁸ Nom koja mē hpur kām mēmoj nhîgrōt mex kēt japēr. Kamā mrōnhī nē kahpare nē mēmoj punuj pix hapōj nhūm mē tee ri omu nē hkaga kurē kumrēx. Tā mē kot Kris kaga xwÿnhjaja te pur punuj kot amnhī nhîpêxta pyrāk nhūm Tirtūm te kēp pur nhō dōn pyrāk. Jao tee ri amnhī tā mē kot amnhī nhîpêx ā mē omu nē mē hkaga kurē kumrēx nē ma mē kot amnhī xā htÿx kām hamak tūm xā pē kuwyta wÿr mē rēnh pa.

⁹ E ixkrāmnhwÿjaja. Inhmā mē akīnh jakamā na pa ā mē amā mē kot Kris kaga xwÿnhjē jarēnh anē. Nom te mē ate mē urāk kēt. Kris kōt mē ate amnhī xunhwÿr xwÿnh mex na ka mē. Ra mē ate hkōt amnhī xunhwÿr tÿx jakamā te mē apē pur mexta pyrāk. ¹⁰ Na ka htem Kris kōt mē akwÿjē ho mex o ri apa. Te mē amā amnhī tā ma pyrāk o axpēn nhîpêx o ri apa nhūm Tirtūm ja hā mē apumu. Tā koja tanhmā ja hā mē ato mex to. Kot tām mē panhîpêx o pa jakamā koja tanhmā mē ate axpēn nhîpêx mex tota ā tanhmā mē ato mex to.

¹¹ Tā kēr ka mē arī ā axpēn nhîpêx anhÿr o ri apa rāhā ty kē nhÿrmā ja hā mē ato mex nē. Ā mē ate amnhī nhîpêx anhÿr o apaja na inhmā hprām tÿx kumrēx. ¹² Kot kaj mē ā amnhī nhîpêx anē hāmri nē amā kaga nē apa hkēt nē. Nē amnhī nhîpêx o te Tirtūm kra hkwy htyk xwÿnhjaja kormā hțır ri kot amnhī nhîpêxta pyrāk. Na prem amnhī kaxyw Tirtūm mā hamaxpēr tÿx rāhā ho pa. Kot mē ho mex ā mē hā amnhī jarēnhja nhūm prem amnhī tā kamā hamak

râhã ho pa. Tã amnhĩ tã kamã hamak o pa ry rax râhã ty nhũm Tĩrtũm ra kot mē hã amnhĩ jarēnh xã hkõt mē ho mex nē. Tã kēr ka mē urāk nē ã amnhĩ nhĩpēx anhỹr o ri apa râhã ty. ¹³⁻¹⁵ ã na pre finat Apraãwja amnhĩ nhĩpēx anē. Kormã hkra hkēt tã nhũm Tĩrtũm kãm hkra nē kanrēhã htãmnhwýjē hkukamã tanhmã mē harēnh to nē kãm:

—Pa Apraãw. E inhma. Kot paj aprõ mē war ato mex nē. Kot kaj war akra hãmri nē gaa nhũm akanrēhã war atãmnhwýjaja ohtõ rax kumrēx. ãm hãmri na pa ã mē hkukamã amã mē harēnh anē. Kot paj amã amnhĩ jarēnh xã hkõt ã anhĩpēx anē. Ixpē mē anhĩpēx xwýnh na pa ã amã amnhĩ jarēnh anē. Anē.

Tã ã kãm wa hkra jarēnh anhỹr tã nhũm wa tokyx hkra hkēt nē. Nom tee ri ja hã amnhĩ pumu nē Tĩrtũm kot wa kãm hēx ã hkamnhĩx kēt nē. ãm hkamnãr rom ã hamaxpēr anē nē hamaxpēr o:

—Nã kot paj wa nhỹrmã ixkra. Tĩrtũm tãm kot wa inhmã wa ixkra jarēnh kēnã. Anē.

Tã nhũm amgrã xohtõ rax kumrēx nē hapēx nhũm wa hkra. Nhũm axte amgrã hkwy hapēx nhũm wa hkanrēhã htãmnhwý hkwy. Ra Tĩrtũm kot mē hkukamã Apraãw mã mē harēnh xã hkõt. Tĩrtũmja hihtýx o hihtýx nē àhpumunh o àhpumunh jakamã na pre amnhĩ jarēnh xã hkõt ã wa kãm wa hkra nē wa htãmnhwýjē nhõr anē. Kot ra wa kãm hã amnhĩ jarēnh xã hkõt. No ri nhãm mēhõ nhĩxi jarēnh kõt wa kãm wa hkra jarēnh kēt nē. Mēhõ kot we hihtýx o hihtýx o Tĩrtũm jakre nhũm we ri hixi jarēnh kõt ã wa kãm mē harēnh anē? Amrakati kumrēx. Jakamã na pre wa kãm amnhĩ jarēnh o:

—Nã ixãhpumunh xã hkõt na pa ã war amã war akra jarēnh anē. Anē.

¹⁶ No pika ja kamã na htem ã amnhĩ jarēnh anhỹr kēt nē. Na htem mēhõ mã tanhmã mēmoj tã amnhĩ jarēnh to kaxyw nē mēhõ hihtýx o kot hakrenh xwýnh nhĩxi jarēnh kõt amnhĩ jarē. Nē amnhĩ jarēnh o:

—Nã ixte jahti noo mã ã amã amnhĩ jarēnh anhỹr jakamã ãm hãmri na pa ã amnhĩ jarēnh anē. Anē.

Kot hã amnhĩ to hēx nhũm hihtýx o kot hakrenh xwýnhnta kot hã harēnh mar nē hã tanhmã homnuj to pymaj na htem ã mē hixi jarēnh kõt mēmoj tã amnhĩ jarēnh anē. Hãmri nē kot tanhmã hã ho pymaj ra kot amnhĩ jarēnh xã hkõt tanhmã mēmoj nhĩpēx to. ¹⁷ Nom Tĩrtũm na hte urāk nē nhãm mēhõ nhĩxi jarēnh kõt ri mēmoj tã amnhĩ jarēnh kēt nē. Na hte tãm amnhĩ jarēnh xã hkõt mēmoj to anē nē aa hã amnhĩ to hēx kēt nē. Na pre mē pahpē hkrajē mã kãm:

—Kot paj nhỹrmã mē ato mex rax nē. ãm hãmri na pa mē amã amnhĩ jarē. Ixte amnhĩ pumunh xã hkõt na pa ã mē amã amnhĩ jarēnh anē. Anē.

Mē pahte ãm hãmri kot amnhĩ jarēnhja mar nē amnhĩ to hēx kēt ã omunh kurē kumrēx kaxyw. Koja Tĩrtũm mēmoj tã ã amnhĩ jarēnh anē hãmri nē hijuk ri axtem hpãnhã tanhmã amnhĩ jarēnh to hkēt nē. ¹⁸ Jakamã koja nhỹrmã ma amnhĩ wýr mē pahto àpir ã amnhĩ jarē hãmri nē ãm hãmri amnhĩ jarē nē amnhĩ jarēnh o:

—Nã ãm hãmri ixte amnhĩ pumunh xã hkõt na pa mē amã ja hã amnhĩ jarē. Anē.

Koja ã amnhĩ jarēnh anē hãmri nē hijuk ri axte hpãnhã tanhmã mēmoj jarēnh to hkēt nē. Ra kot ã amnhĩ jarēnh anhỹrja koja arĩ râhã nē. Jakamã e kwa kēr ka mē tee ri amnhĩ kukamã ajamaxpēr o ri apa hkēt nē. Ra mē pamex nē ri papa kaxyw Tĩrtũm kõt amnhĩ xunhwýr jakamã kēr pu mē arĩ kot mē pahto mex rax xã hã arĩgrota jamãr râhã ho ri papa.

¹⁹ Na hte kanôre ho htÿx xàja kanôre ho htÿx nhùm ma gô hkôt pa hkêt nê. Ja pyrà nê kot puj mē Tirtūm kot mē pahto mex xà kamā pajamak o papa hāmri nê hkaga hkêt nê.

Amnepê mā na pre hte mē panhō patre maati ja Tirtūm mā amnhī jarēnh xà hā ixkre hwÿr agjē nê hkôt ā kupêxê ho hitom maati hwÿr agjē nê kamā mē ho Tirtūm wÿr o kuhê. Tā nhùm Jejus akupÿm kaxkwa hwÿr api nê Tirtūm ri hkrī hāmri nê patre maati pānhā tām mē pahto hwÿr o hkrī. ²⁰ Na pre ra mē pakukamā kaxkwa hwÿr api nê kamā pa ho pa nê finat Mekijetekja pyrà nê kēp mē panhō patre maati. Tā koja mē pahto Tirtūm wÿr rāhā nê pa ho pa.

7

Patre Mekijetek jarēnh

¹⁻³ E kot paj ixprī hā mē amā tanhmā finat Mekijetekja jarēnh to ka mē inhma. Krī pē Sarē kamā na pre kēp mē ō pahi nê mǎānēn kēp mēō patre. Sarēja mē pakapēr kām kēp: “Mē hamakêtkati nē ri mē pa xwÿnhjē nhō krī.” Jakamā Mekijetekja mē pakapēr kām kēp: “Mē hamakêtkati nē ri mē pa xwÿnhjē nhō pahi.” Nē mǎānēn kēp: “Pahi kot tām amnhī nhîpêx o pa xwÿnh.” Nē Mekijetek nhîpêxā nē katorxā nē higêt nhîxija mē pahte harēnh mar kêt. Nē kator ā arîgro nē htyk ā arîgroja mǎānēn mē pahte harēnh mar kêt. Tirtūm kapēr ā kagā htūm kot tanhmā ja jarēnh to hkêt. Ām Jejus pyrà nê kēp patre hā mē ho Tirtūm wÿr rāhā ho pa xwÿnh pix ā kot harēnh. Ām ja pix na mē pahte harēnh mar. Nē kot amnhī to rax xwÿnh jakamā na pre Apraāw nhÿri omu nē hā hpijaam kaxyw kām hikukrêx kwÿ gō. Na pre hkwyjē mē ra mē urojê kutā amnhī xunhwy nē pijapu nē mē kēp mē ō pahi ho 4 nē mē himex. Nē mē kēp mē hikukrêx kwÿptā nē hamÿ nē ma ō krī hwÿr o mō. Nē kormā pry hā mōr ri Mekijetek kaxpa nhùm amnhī wÿr omu nē kām:

—Pa Apraāw? E kê Tirtūm ato mex nê ka amex nê apa. Anê.

Nhùm amnhī tā kuma nê hkĭnh nê. Hāmri nê kām mē hikukrêx kwÿptār xwÿnhnta hkwy gō nhùm hamÿ nē ma amnhĭm o mō. ⁴ Na pre Apraāw kot amnhī to rax ā omu nē kām mēmoja kwÿ gō. Kēp mē pahpē Ijaew pâr krax jakamā mǎānēn kot amnhī to rax tā Mekijetekja urāk nê kot amnhī to rax ā omu nē kām mēmota kwÿ gō. ⁵ Finat Mojes kot Ijaew mā Tirtūm kapēr jarēnh xà hkôt kām kugō. Na pre mē kām:

—Mē akwÿ pē finat Rewi hkanrēhā htāmnhwÿjaja kēp mē anhō patre jakamā kêr ka mē kām mē akukrêx kwÿ nhōr o ri apa. Kot kaj mē akrit kēp 10 nē kām ho pixi nē agō. Nē mē akāxpore kēp 10 nē kām hō gō. Kêr ka mē ā mē kām mē akukrêx nē mē akrit kwÿ nhōr o apa anê. Nē kêr ka mē kām mēmoj mex pix gō. Mē kēp mē akwÿ na mē. Mē apiitā mē apē Apraāw kanrēhā htāmnhwÿ jakamā kêr ka mē ā mē hipêx anhÿr o apa. Anê.

⁶ Tā Mekijetekja kēp Rewi hkwy hkêt tā nhùm Apraāw amarī ā hipêx anê nē kām pahi htyk xwÿnhjē kukrêxta kwÿ gō. Jao hikukrêxta kamā mēmoj kēp 10 nhùm omu nē kamā kām ho hpÿnh nē kugō. Na pre ā kām mēmoj nhōr anê. Hāmri nhùm amnhĭm hamÿ nē kām:

—Nā ām hāmri koja Tirtūm ato mex rax nê. Anê.

Ra Tirtūm kot Apraāw kanrēhā kām htāmnhwÿ ho ohtō nē mē hukamā mē harēnh jakamā nhùm Mekijetekja ā kām Tirtūm kot ho mex ā harēnh anê. ⁷ Mē kot amnhī to rĭnh o mē hakrenh xwÿnh pixjaja Tirtūm kot mē ho mex kaxyw mē ho āhwÿr o pa jakamā na pre Apraāw o Tirtūm wÿ. Jao kot amnhī to rax

o kot hakrenh ã amnhî to amnhîrît. ⁸ Hãmri nê Rewi hkanrêhã htãmnhwý kot amnhî nhîpêx pyrã nê Apraãw o Tirtûm wý nê kêp mêmojta jamý. Mê urãk nê mêmoj kamã kêp 10ja rûm ho hpýnh nê amnhîm hamý. Nom kot amnhî to rax o Rewi hkanrêhã htãmnhwýjê jakrenh. Tirtûm kapêr ã kagã htûm kot Rewi hkanrêhã htãmnhwýjê htyk par ã mê harênh tã tanhmã Mekijetek htyk ã harênh to hkêt jakamã kot amnhî to rax o kot Rewi hkwyjê jakrenh.

⁹⁻¹⁰ Nê kot pry kamã Apraãw kaxparta ã kormã Rewi kator kêt tã kêp Apraãw kanrêhã htãmnhwý mã xwýnh. Jakamã nhûm Apraãwja Mekijetek mã mê hikukrêxta kwý nhôr jao te Rewi mã ôr pyrãk. Tã nhûm amgrã xohtô nê hapêx nhûm Rewi hkanrêhã htãmnhwýjaja hapôj nê kêp mê ô patre nê ri pa. Jao Mekijetek pyrã nê mê kêp mê hikukrêx kwý jamýnh o ri pa.

¹¹ Nê finat Mojes na pre Ijaewjê mã tanhmã Rewi hkanrêhã htãmnhwýjê jarênh to. Kormã mê hapôx kêt ri nhûm hkwyjê mã tanhmã mê harênh to. Mê kêp patre hã mê harê. Tã nhûm mê hapôj nê hprêk nê mê ho Tirtûm wýr o ri mê hkôt pa. Nom mê kot tãm amnhî nhîpêx o pa kaxyw na prem tanhmã mê hkrã hto hkêt nê. Tanhmã kot mê amnhî to nê ã mê hipêx anê? Jakamã nhûm Tirtûm mê hpãnhã mê pahwýr kýj rûm mêmôja mê nhûm mê pahwýr wrý. Nom kêp Rewi hkanrêhã htãmnhwý hkêt. Nê mãânên kêp Rewi hpãm Arãw kanrêhã htãmnhwý hkêt. Axtem te Mekijetek kot amnhî nhîpêx pyrãk xwýnh na pre. Jejus Krisja. Tãm na pre mê pahwýr wrý hãmri nê tanhmã mê pahkrã hto pu mê ý hã tãm amnhî nhîpêx o papa. ¹² No Mojes kapêr kot Rewi hkanrêhã htãmnhwý pixjaja kêp mê ho Tirtûm wýr xwýnh ã mê harênh. Tã nhûm Krisja mê pahwýr wrý nê mê hpãnhã kêp mê pahto àhwýr o pa xwýnh. Jakamã na pu htem axte Mojes kapêr kôt amnhî nhîpêx kêt nê. Pãnhã Jejus kapêr kôt pix mã amnhî nhîpêx o papa.

¹³⁻¹⁴ Nê Jejus kêp Rewi hkanrêhã htãmnhwý hkêt. Katorxã hkôt kêp Apraãw tãmnhwý Juta hkanrêhã htãmnhwý na pre. Ra mê pahte ja mar mex. Aa Juta hkanrêhã htãmnhwýjaja kêp patre hkêt. Na pre Tirtûm jajê mã mê kot mêmoj nhôr xã hã mêmsti kunihita ã kãm mêmoj nhôr nê hkwyjê ho hwýr ã mê kãm karô hkêt nê. ãm Apraãw tãmnhwý Rewi hkanrêhã htãmnhwýjê mã pix mã na pre ã mê kãm ja hã karô anê. Tã nhûm Jejus wrý nê mê hpãnhã mê pahto hwýr o pa. Mê urãk nê kêp Rewi hkanrêhã htãmnhwý hkêt axtem kêp Juta hkanrêhã htãmnhwý htã Rewi hkwyjê hpãnhã mê pahto Tirtûm wýr o pa.

Mekijetek pyrã nê mê pahto Tirtûm wýr xwýnh jarênh

¹⁵⁻¹⁹ Nê Ijaewja na prem Mojes kapêr mar týx nê hkôt amnhî nhîpêx tã aa amnhî to mex kêt nhûm Tirtûm tee ri ja hã mê omu nê hamaxpêr o:

—Nã Rewi hkanrêhã htãmnhwýjaja kêp mê ô patre nê mê ho ixwýr o pa htã nhûm mê arî htyx ri amnhî tomnuj pix o pa. Jakamã koja mê axte ri mê ho ixwýr o pa hkêt nê. Anê.

Hãmri nê mê pakaxyw mê pahto àhwýr xwýnhja ta nê ãm. Kra Jejusja nhûm kuta nê ãm. Tãm na hte Rewi hkwyjê rom tanhmã mê pahkrã hto pu mê kukwak ri tãm amnhî nhîpêx nê Tirtûm kôt amnhî nhîpêx mex nê. Jao nhýrmã ma mê pahte Tirtûm nhô krî hwýr paxãpirja jamãr o papa.

Jejus na hte Mekijetek pyrã nê kêp mê panhõ patre maati nê mê pahto Tirtûm wýr rãhã ho pa. Kêp Rewi hkanrêhã htãmnhwý hkêt tã Tirtûm pyrã nê kêp htîr tûm nê pa ho pa xwýnh jakamã na pre Tirtûmja mê pakaxyw kuta nê mê pahwýr kumê. Kapêr ã kagã htûm kot harênh kot:

Kot kaj Mekijetek pyrã nê mê ho ixwýr rãhã ho ri apa. Anê.

20-21 No Rewi hkwyjê mã na pre ã kapêr anhÿr kêt nê. ãm Jejus pix mã ã kapêr anê nê kãm:

E kot kaj apê mê ho ixwÿr rãhã o apa xwÿnh. Kot paj nhÿrmã apãnhã axtem mēhõ xãm kêt nê. ãm kapxipix kot kaj mê ho ixwÿr o apa rãhã ho rãhã.

ãm hãmri na pa amã ã ixkapêr anê. Ixpê Pahi Maati hã ã ajarēnh anê.

22 Anhÿr jao Jejus kot amnhĩ to rax o Rewi hkwyjê jakrenh par ã ho amnhĩrĩt. Mē kot Ijaew mã Tĩrtũm kapêr jarēnh nhũm mē kot mar nom hkõt amnhĩ nhĩpêx kêt jakamã nhũm Tĩrtũm mē hpãnhã Jejus xãm. Tapxipix na hte tanhmã mē pahkrã hto pu mē tãm amnhĩ nhĩpêx mex o ri papa. 23 Rewi hkwyjaja na prem axpēn mÿr pē kēp mēõ patre nē ri pa htã htyk pa nē hapêx.

24 Nom Jejusja htĩr tũm nē pa ho pa xwÿnh jakamã koja mē urãk nē aa hapêx kêt. Koja mē pahto Tĩrtũm wÿr rãhã ho pa nē aa jam urer kêt nê. 25 ã Jejus kot amnhĩ nhĩpêx anhÿr jakamã te kēp Tĩrtũm wÿr mē panhõ pry pyrãk. Na pu htem hkõt amnhĩ xunhwÿ nhũm mē panê mē pahte amnhĩ tomnuj piitã rēnh pa nē mē pahpê Tĩrtũm kra hã mē pajarê.

26 Nê ãm hãmri kēp mē pahto Tĩrtũm wÿr xwÿnh maati mex na. Mē pakurom tãm kot amnhĩ nhĩpêx mex o pa nē aa kot tanhmã amnhĩ tomnuj to hkêt. Tã ra Tĩrtũm kot amnhĩ wÿr ho àpir jakamã nhũm ra kuri mē pahto hwÿr rãhã ho pa. 27 Nê kot amnhĩ to rax o wam mēõ patre maatijê jakrenh. Wamtaja na prem hkwyjê pyrã nē amnhĩ tomnuj o pa. Jakamã na prem apkati mē amnhĩ tomnuj pãnhã Tĩrtũm mã mēmoj gõ nē kãm amnhĩ jarê nē amnhĩ to kuwÿ. Hãmri nē rĩ kormã kot nhãm mē hwÿr mē mrar xwÿnhjê mã mē ho anê nē mē hpãnhã Tĩrtũm mã mēmoj nhõr pē mē ho kuwÿ. No kêt Jejusja wam patre maati rom aa kot amnhĩ tomnuj kêt jakamã na pre hte mē urãk nē amnhĩ tomnuj pãnhã Tĩrtũm mã mēmoj nhõr o pa hkêt nê. ãm mē papajaja na pre mē pahte amnhĩ tomnuj pãnhã htyk o kãm amnhĩre. ãm htyk tipxi htã mē pahpiitã mē pahpãnhã amnhĩrer pa. Jakamã koja axte ã amnhĩ nhĩpêx anhÿr kêt nê. Mo kaxyw kot kêt axte mē panê ty?

28 Mojes kapêr kõt na pre Ijaew amnhĩm Rewi hkwyjê xunhwÿ nhũm mē kēp mē õ patre nē ri pa. Tã no nhũm mē urãk nē arĩ amnhĩ tomnuj o pa nhũm Tĩrtũm tee ri mē omũ nē mē hpãnhã mē pakaxyw Krata xãm nē kãm:

—Nã kapxipix mē kurom ate tãm amnhĩ nhĩpêx o apa jakamã kapxipix kot kaj mē hpãnhã mē ho ixwÿr o apa rãhã ho rãhã. Anê.

8

*Jejus kēp mē pahto Tĩrtũm wÿr xwÿnh maati hã harēnh
Rukre 22.20; Sikũn Korĩt 3.6-11*

1 E kot paj axtem tanhmã mē amã mē pahto Tĩrtũm wÿr xwÿnh maatita jarēnh to ka mē inhma. Na hte kaxkwa kamã Tĩrtũm nhĩhkõ hã hkrĩ. ĩhkõ hã kēp Pahi Maati hã hkrĩ xã hã upõk rũm hkrĩ ho hkrĩ. 2 Wam patre maatijaja na prem Tĩrtũm nhõrkwÿ kaãkre wÿr mra nē kamã hitom maati kamã mē ho Tĩrtũm wÿr o pa. Nom nhũm Jejus na hte mē kurom kaxkwa kamã Tĩrtũm nhõrkwÿ mex kãm mē pahto àhwÿr o hkrĩ. Őrkwÿ kaãkreja na prem ĩkra ho hipêx nom kaxkwa kamã Őrkwÿ mexja na pre mēhõ ĩkra ho hipêx kêt nê. Tĩrtũm na pre tanhmã hipêx to nhũm kamã Jejusja mē pahto hwÿr o hkrĩ.

3 Nê mē pahpê Ijaew nhõ patre maatijaja na prem mē ho hwÿr kaxyw nē mē kot amnhĩ tomnuj pãnhã Tĩrtũm mã mēmoj nhõr kõt mē ho kuwÿ. No

Kris na hte ã amnhĩ nhĩpêx anhÿr kêt nê. Ra htyk o kot kãm amnhĩ nhĩ nhõr jakamã na hte wam patre maati pyrà nê xatã kãm mẽmoj nhõr kêt nê.

⁴ Tã na hte arĩ Ijaew Mojes kapêr kôt amnhĩm Rewi hkwy kêp mẽ õ patre kaxyw mẽ unhwÿ nhũm mẽ ho Tĩrtũm wÿr o pa. No Jejus kêp Rewi hkanrêhã htãmnhwÿ hkêt. Katorxã hkôt kêp Juta hkanrêhã htãmnhwÿ jakamã kop apu arĩ jar pika ja kamã htĩr nê pa ronhÿx Ijaew nhõ patre pyrà nê kêp mẽ ho Tĩrtũm wÿr o pa xwÿnh kêt. ãm Rewi hkanrêhã htãmnhwÿ pixjaja na htem mẽ kaxyw kãm mẽmoj gõ nê hkôt mẽ ho kuwÿ. ⁵ Jar na htem arĩ ã amnhĩ nhĩpêx anhÿr o pa nom kaxkwa kamã na htem ã amnhĩ nhĩpêx anhÿr hkêt nê.

Nê jar Tĩrtũm nhõrkwÿ kaãkreja te kot kaxkwa kamã õrkwÿ mexta pyràk. Na pre Mojes õrkwÿ kaãkre nhĩpêx kaxyw nhũm Tĩrtũm tanhmã kãm hã karõ hto nê kãm:

—E jãã hixêt prêk nhĩmõk ã axãmta ã na pa pre amã ixkreta kukamã ixprĩ hã tanhmã mẽ ate hipêx to hã amã karõ. Tã kêr ka ã hipêx anê. Anê.

Hãmri nhũm kuma nê kot kãm hã karõ xã hkôt hipêx. Hãmri nhũm mẽ õ patre maati ixkreja kamã mẽ ho Tĩrtũm wÿr o pa. Na prem ã amnhĩ nhĩpêx anhÿr o pa.

⁶ Tã nhũm ra Tĩrtũm axtem mẽ hpãnhã mẽ pakaxyw Kris xãm nhũm hte mẽ pahto hwÿr mex o wamtajê jakre. Na hte kaxkwa kamã mẽ pahpiitã mẽ pahpumunh mex rãhã ho hkrĩ nê wamtajê rom tanhmã mẽ pahkrã hto pu mẽ tãm amnhĩ nhĩpêx o ri papa. Tĩrtũm kot finat Mojes mã kapêrja mex nê nom axtem na pre. Tã kapêr nyw na mex o kot wam kapêr jakrenh. Kapêr nyw kôt kot puj mẽ pahtÿk tã akupÿm pahtĩr nê nhÿrmã Tĩrtũm mẽ Jejus wa kuri pamex nê pahtĩr tũm nê papa ho papa nê axte pahtÿk kêt nê. ⁷ Kêp apu Tĩrtũm kot Mojes mã kapêr kôt mẽ kot tãm amnhĩ nhĩpêx o pa ronhÿx pre Tĩrtũm axte kapêr nyw ã kagã hkêt nê. ⁸ Nom wam kapêr tũmta na pre mẽ mar tÿx htã arĩ amnhĩ tomnuj rãhã ho pa nhũm tee ri ja hã mẽ omu nê mẽ kãm:

Nã kot paj axte nhÿrmã mẽ apê Ijaew mã axtem tanhmã ixkapêr to.

⁹ Amnepêm mẽ anhĩgêttjê mã na pa pre ixkapêr.

Na pa pre Ejit pê mẽ kator nê mẽ kot tanhmã amnhĩ nhĩpêx to ho pa kaxyw tanhmã hã mẽ kãm karõ hto.

Nom na prem ixkapêr ma nê ãm kuma nê ixkôt amnhĩ nhĩpêx kêt nê. Pa tee ri ja hã mẽ omu hãmri nê mẽ hkaga.

¹⁰ Tã kot paj mẽ apê mẽ hkanrêhã mẽ htãmnhwÿ nywjê mã axtem ixkapêr ka mẽ ixkapêr nywja ma.

Kot paj nhÿrmã tanhmã mẽ akrã hto ka mẽ ixkapêr nyw mar tÿx nê hã ano htÿx nê ho apa.

Nê akĩnh nê apa.

Nê ixkôt ri amnhĩ nhĩpêx mex o apa.

Nê axpên mã ijarênh o: “Nã ãm hãmri Tĩrtũm kêp mẽ panhõ Tĩrtũm na.” Anhÿr o ri axpên mã ijarênh o apa.

Pa amnhĩ tã mẽ ama nê mẽ apumu nê amnhĩ xwar mẽ apê ixkra hã amnhĩm mẽ ajarê.

¹¹ Kot kaj mẽ apiitã ixte amnhĩ nhĩpêx kôt ixpumunh mex o ri apa. Mẽ akãxpore rũnh xwÿnhjaja nê mẽ akãxpore hkryre xwÿnhjaja mẽ apiitã ixpumunh mex jakamã kot kaj mẽ ri axte ixtã tanhmã axpên kukjêr to ho ri apa hkêt nê.

¹² Nê kot paj mẽ ato mex rax o ixpa.

Nê axte tanhmã mẽ ate amnhĩ tomnu hto ho apaja mã ijamaxpêr kêt nê. Anê.
 13 Nê koja mẽmoj ra htũm hãmri nê hapêx tokyx anê. Ja pyrà nê na pre Tĩrtũm mẽ pamã kapêr tũmta jarênh o:

—E kêr ka mẽ axte ixkapêr tũm mar kêt nê. Pãnhã ixkapêr nyw pix mãn mar o apa nê ãm kôt pix mã mãn amnhĩ nhĩpêx rãhã ho ri apa. Anê.

9

Tĩrtũm nhõrkwỹ kaàkre jarênh

¹ Nê amnepêm na pre finat Mojesja mẽ panhĩgêt nê mẽ pahpãmjê mã tanhmã Tĩrtũm nhõrkwỹ kaàkre jarênh to. Tanhmã mẽ kot hipêx to nê kamã tanhmã amnhĩ nhĩpêx to hã mẽ kãm karõ. Nê kamã tanhmã mẽ kot amnhĩ to Tĩrtũm wýr to hã mẽ kãm karõ. Nê tanhmã mẽ hkwyjê ho hwýr toja nhũm pre mããnên mẽ kãm hã karõ. No Tĩrtũm nhõrkwỹ kaàkreja kêp òrkwỹ kumrêx kêt. Æm mẽ kot omunh nê kaxkwa kamã òrkwỹ kumrêx mã hamaxpêr kaxyw na pre. ² Jakamã nhũm prem Mojes kapêr ma nê hipêx. Kamã hitom hamêxkrut. Wam hitom kamã na pre kanê hprêeti xãm nê kutã mести xãm. Nê mести nhĩmõk ã Tĩrtũm mã õ pãwti jaxwý. Mẽ panhõ patre na pre htem Tĩrtũm mã kugõ nê mести ã kãm haxwý hãmri nê hkwyjê ho kuwý. Tã hitom ja na prem kêp Tĩrtũm nhõ hitom mex ã harê.

³⁻⁴ Nê hitom wa hkaêx kãm na pre kupêxê ho hakwakre kahê xàja ajêt. Haturxã kamã hitomja na prem Tĩrtũm nhõ hitom maati hã harê. Tĩrtũm na pre te hirã htýx kãm hwýr wrý nê te kamã hkrĩ pyràk. Nê kamã na pre Tĩrtũm mã mẽhkuxwa xã ho xêt xã hã mès kunĩhtija kuhê. Na prem òr o hipêx nê kamã ãm nhũm kuhê. Nhũm pre hte mẽõ patre hwýr agjê nê kutã kuhê nê mẽ ho Tĩrtũm wý. Nê mès kunĩhti haxwýja hitom maati kamã kuhê. Na prem pí ho hipêx nê òr o hpro nê kamã ãm. Mèstija kaxwýnh kãm na pre htem mẽmoj jagjê.

Tĩrtũm kot Ijaew mã tanhmã mẽ kot amnhĩ nhĩpêx to ho pa hã karõ nê kên po hã mẽ kãm hã kagàja nhũm prem kamã kuxã nhũm hikwý.

Nê mããnên òr o xijereja xã nhũm hikwý. Nê xijere kamã amnepê mã Tĩrtũm kot kaxkwa rũm mẽ hwýr mẽõ rênh kwý hikwý. Mẽõja mẽ kot kãm: “Manã” anhýr xwýnhja na prem hkwy hkawrà nê xijere kamã kugjê hãmri nê mести kamã kuxã.

Nê finat Arãw nhõ kô kot ho amnhĩ kaxpar xã htũmta nhũm prem kamã kuxã. Tĩrtũm kot tanhmã ho nhũm kurũm pixõrà muxre hapõx xwýnhhta nhũm prem mããnên mès kunĩhti kamã kuxã nhũm hikwý.

⁵ Nê himõk ã Tĩrtũm kapêr o wrýk xwýnh wa hkarõ nhĩpêxja wa hamêxkrut nê axpên kutã wa hkõn krã ho hkrĩ. Axpên wýr hara koror nê wa hkrĩ. Patre maati kot omunh nê Tĩrtũm kot mẽ hkõt pa ho paja mã hamaxpêr kaxyw. Nê wa hkaêx kãm ahkaprýja Tĩrtũm kot mẽ nê mẽ kot amnhĩ tomnuj rênh mã hamaxpêr xã na pre.

À Tĩrtũm nhõrkwỹ kaàkre kot anhýr. No kot paj ixprĩ hã mẽ amã piitã harênh par kêt nê. ⁶ Na pre hte mẽõ patre apkati mẽ wam hitom wýr agjê nê kamã Ijaew ho Tĩrtũm wýr o pa. ⁷ No hitom maatija ãm mẽ õ patre maati pix na pre hwýr agjê. Nom apkati mẽ hwýr pa nê gjêx kêt ãm amgrã pýnh kãm hwýr gjêx pýnh nê. Nê hwýr gjêx kaxyw nê mẽmo mry pa nê hkamró ru nê o pa nê hitom maati hwýr ho agjê. Hãmri nê ho mès kunĩhti nhĩmõk kamĩ nê Tĩrtũm mã kãm:

—Pa Tirtûm. E ota mry kamrôta. Më ixpê akwÿjaja më ixte amnhî tomnuj jakamã na pa më amnhî pãnhã mëmo mry nhôkre jakã në kupî në hkamrô ru në man awÿr o mra. Te kot më ixte amnhî tomnuj mÿrapê htyk pyrãk. Jakamã kwa ã më ixte amnhî nhîpêx anhÿrja ã më ixpumunh hkôt më inhnê më ixte amnhî tomnuj rê.

Anhÿr o më amnhî to kuwÿ. ⁸ Nê patre maati pix na pre hitom maati ja wÿr agjê në më ho Tirtûm wÿ. Ijaew na prem ixkre kapem hamâr o kuhê në hwÿr gjêx kêt në. Tirtûm Karô kot hã më kãm karô xã hkôt. Te Tirtûm pê amÿm kuhê pyrãk. Tã na htem jarãhã arî Ijaew kanrêhã më hkra në më htãmnhwÿjaja ã amnhî nhîpêx anhÿr o pa. Jao më higêtjê pyrã në Tirtûm pê amÿm kuhê.

⁹ Më kot arî Tirtûm mã mry hpar në hkamrô ho mëmoj kamîr në amnhî to hwÿr o pa htã na htem arî hamaxpêr punuj pix o pa.

¹⁰ Tirtûm kapêr tûm kot tanhmã mëmoj tã më kãm karô hto.

Na pre tanhmã më apkur xã hã më kãm karô hto nhûm htem pix kur o pa. Nê tanhmã më hkôm xã hã më kãm karô hto nhûm htem pix o hkôm o pa. Nê tanhmã amnhîmnuj to hã tanhmã më kot amnhî kuhôn hto hã karôja nhûm htem hkôt pix mã tanhmã amnhî kuhôn hto ho pa.

Nê tanhmã më kot ri më hikukrêx kuhôn hto hã më kãm karôja nhûm htem kôt pix mã tanhmã kuhôn hto ho pa.

Ã na pre Tirtûm Kris kukamã më kãm mëmoj tã karô rax anê. Kris kutêp pix mã ã më kot amnhî nhîpêx anhÿr kaxyw. No më pahte arî ã amnhî nhîpêx anhÿr kaxyw kêt. Na pre ra Kris më pahwÿr wrÿ në Tirtûm kapêr tûm o hapêx në hpãnhã më pamã kapêr nyw jarê pu më hpãnhã nywta kôt pix mã amnhî nhîpêx o papa. Kapêr nywja mex o mex. Nê mex o wamta jakrenh.

Kris htyk o më pahte amnhî tomnuj pãnhã amnhîrer ã harênh

¹¹ Tã na pre Krisja tãm më pahwÿr wrÿ në kêp më pahto Tirtûm wÿr xwÿnh maati në patre hpãnhã më pahto hwÿr o pa. Nom jar pika ja kamã më kot më ìhkra ho Tirtûm nhôrkwÿ kaàkre nhîpêxta wÿr ãr në kamã më pahto hwÿr kaxyw na pre wrÿk kêt në. Na pre ra akupÿm kaxkwa hwÿr api në kamã ôrkwÿ mex wÿr axã në kamã tanhmã më pahto mex to në tanhmã më pahto Tirtûm wÿr to rãhã ho hkrî. ¹² ã kaxkwa kamã Tirtûm nhô hitom maati ja wÿr ãr tipxi htã më pahpiitã më pahte amnhî tomnuj pãnhã amnhîrer pa. Nom mëmo mry kamrô ho më pahpãnhã amnhîrer kêt në. Môx kamrô rÿ motre kamrô ho më pahpãnhã amnhîrer kêt në. Amnhî kamrô ho na pre më pahpãnhã amnhîre. Tyk në hkamrô pikapîrta o më pahpiitã më pahpãnhã amnhîrer pa.

¹³ Nê amnepêem Ijaew kot Tirtûm kapêr tûm kôt amnhî nhîpêx mex o pa hkêt jakamã nhûm tee ri më omu në më kot amnhî tomnuj o më pa xwÿnh ã më harê. Jakamã na pre mëo patre xatã mry kamrô ho më hkamî. Môx kamrô në motre kamrô ho më hkamî. Na pre môx krare hkwy hpa në ho hxêr në hprã ho hkwyjê kamî. Ã na prem xatã më hipêx anhÿr o pa. Tirtûm kot ja hã më omunh në më mex ã më harênh kaxyw. Nom te më krãhkã pix mex pyrã në më hkrã kaxwÿnh kãm arî hamaxpêr punuj o pa. ¹⁴ ã na prem amnhî nhîpêx anhÿr o pa. Nom Krisja më kurom aa tanhmã amnhî tomnuj to hkêt jakamã na pre më pahte amnhî tomnuj xwÿnhjê në ty. Te më kot amnhî në môx rÿ motre hpar në hkamrô runhta pyrãk o amnhî nhîpêx në më panê Tirtûm mã amnhî gô nhûm pre më kãm hkurê xwÿnhjaja kupî. Na pre Tirtûm Karôja ã kot më panê htyk anhÿr kaxyw tanhmã ho hihtÿx to. Karôja aa hapêx kêt kumrêx

râhâ nê pa ho pa xwÿnh jakamâ na pre Kris tykja kukamâ tanhmâ ho hihtÿx to nhÿm mē panē ty. Tapxipix na mē pahte tām amnhī nhīpêx o papa kaxyw kêp tanhmâ mē pahkrâ hto xwÿnh. Jakamâ na pu htem ra pajamaxpêr nyw o pajamaxpêr o papa nê pajamaxpêr o:

—Na pa pre tee ri inhmâ amnhī krâ hkôt tām amnhī nhīpêx o ixpa hprâm kaprÿ nê ãm amnhī tomnuj pix o ri ixpa. Tâ Kris kot inhnê htyk o hkamrô pikapîr ã harênh ma nê amnhī kaxyw hkôt ijamaxpêr tÿx nê nhÿm amnhī tâ ixpumu nê ixte tām amnhī nhīpêx o ixpa kaxyw ixâm. Jakamâ kot paj ãm Tirtÿm pix mâ kãm tanhmâ amnhī nhīpêx to ho ri ixpa. Tîr râhâ nê pa ho pa xwÿnh jakamâ kot paj nhÿrmâ kuri urâk nê itxîr tÿm nê ixpa ho ixpa. Anê.

¹⁵ Nê amnepê mâ na prem piitâ Tirtÿm kapêr tÿm kôt amnhī nhīpêx mex o pa hkêt nê. Mē kot zatâ hkôt amnhī nhīpêx o pa hã amnhī jarênh tâ hkôt amnhī nhīpêx kêt nê. Jakamâ na pre Kris wrÿ nê mē pahte hkôt amnhī xunhwÿr mâ xwÿnhjê mâ Tirtÿm kapêr nyw jarê nê mē pamâ:

—Kot paj mē anê ty nhÿm Tirtÿm ã ixte amnhī nhīpêx anhÿrja kukwak ri mē ato mex râhâ ho pa. Anê.

Hãmri nê amnhī jarênh xâ hkôt mē pahte amnhī tomnuj piitâ hpânhã amnhîrer kaxyw mē panē ty. ¹⁶⁻¹⁷ Te jar pika ja kamâ mēhō htyk kukamâ hkrajê mâ tanhmâ amnhī jarênh to pyrâk. Na htem htyk kaxyw nê hkrajê mâ:

—Nâ kot paj mēmo arîgro hã ty ka mē inhmÿr pê ixpê ixkukrêx kwÿ o arîk.

Anhÿr o na htem amnhī jarê. Hãmri nê ty nhÿm hkrajaja amnhîm ô mēmoj to arîk pa. Mē hipêxã kukwak ri mē hikukrêx mex nê mÿr pê o pa. No kormã htîr ri nhÿm mē kormã kêp hamÿnh kêt nê. Ja pyrâ nê na pre Tirtÿmja Jejus htyk kukwak ri tanhmâ mē pahto mex to pu mē kukwak ri mē pamex nê pahkînh nê ri papa.

¹⁸ Nê Tirtÿm kapêr tÿm kôt na pre hte mē ô patre mry pa nê ãm hkamrô runh kôt pix mâ mē ho Tirtÿm wrÿ o pa nhÿm amnhī tâ mē omunh xâ hkôt mē kuma nê tanhmâ mē ho mex to.

¹⁹ Na pre finat Mojesja Ijaew mâ Tirtÿm kapêr tÿm piitâ harê nê harênh pa hãmri nê môx ôxpî nê kaxyw motre hōxpî. Hãmri nê xijere kamâ hamê wa hkamrô runh pa nê kamâ gô hkwy ru. Hãmri nê kaxyw mēmo pî hpa hkryre pê “isop” jarênhja kwÿ kukê. Nê kaxyw ôwêhti hkî kamrêkre hkwy hpy nê isop mē ho pihkâr pa nê mry kamrô o go. Hãmri nê ho hkwyjê kamî. Nê ho Tirtÿm kapêr ã kagâ tÿmta kamî. ²⁰⁻²² Hãmri nê ho anhÿr pa nê mē kãm:

—Nâ na Tirtÿmja ixte mry kamrô ho mē akamîr pumunh kôt mē pamâ kapêr o: “E kot kaj mē ixkapêr kôt amnhī nhīpêx o ri apa hã kot paj tanhmâ mē ato mex to râhâ ho ri ixpa ka mē amex nê akînh nê ajamakêtkati nê ri apa. Jakamâ kêr ka mē mry kamrô ho mēmoj piitâ hkamîr pa. Nê ho amnhī kamî. Kêr pa ja hã mē apumu hãmri nê axte tanhmâ mē ate amnhī tomnuj tota mâ ijamaxpêr kêt nê.” Anê. Æ na Tirtÿm mē pamâ kapêr anê. Anê.

Hãmri nê hpânhã mry kamrôta o ôrkwy kaàkre kamî. Nê hkre kamâ mēmoj kuhê xwÿnh piitâ nhÿm ho hkamîr pa. Æ na pre mē ô patre mē mex kaxyw mē hipêx anhÿr o pa. Mē kot tōhã mēmoj to hpÿnhre nê ho hkamîr kêt jakamâ kironhÿx pre mēmoj piitâ ã hipêx anhÿr o pa. Kop apu mē kot mry hpar nê hkamrô runh kêt ronhÿx pre Tirtÿm arî mē kot amnhī tomnuj mâ hamaxpêr râhâ ho pa.

²³ Na prem ã Tirtÿm nhôrkwÿ kaàkre kamâ mēmoj kuhê xwÿnh piitâ mex kaxyw hipêx anê. Te Tirtÿm kot mē pahto mex nhÿm mē pahte nhÿrmâ ma

kaxkwa hwÿr ò krī hwÿr paxàpirta pyrà nè. Nom mē kot mry hpar nè hkamrô runhta kukwak ri mē pamex nè papa hkêt. Ām mēhō kamrô kukwak ri mē pamex xwÿnhhta pix kukwak ri na mē pahpê pahťir tūm nè papa mā xwÿnh. Ja na mex o mry kamrô piitā hakrenh pa. ²⁴ Jejus Krisja pix kukwak ri. Tām na pre patre pyrā nè mē pahto Tirtūm wÿr kaxyw mē ĩhkra ho Tirtūm nhōrkwÿ kaàkre nhĭpêxta wÿr gjêx kêt nè. Ām ixkre kaàkre pix na pre. Na pre kaxkwa kamā Tirtūm nhō krī hwÿr axā. Tā arĭ kamā Tirtūm nhĭhkō hā mē pahto hwÿr rāhā ho hkrĭ.

²⁵ Nē Ijaew nhō patre maati na hte amgrā mē ōrkwÿ kaàkre kamā hitom maati hwÿr gjêx tipxi. Nē amnhĭ kôt mry kamrô ru nè ho agjê. Tirtūm kot hā omunh nè axte mē kot amnhĭ tomnuj mā hamaxpēr hkêt kaxyw. Nom Kris na pre mē urāk nè mēmo mry pa nè Tirtūm mā hkamrô kapĭr kêt nè. Kamrô na pre mē panē axkapĭ. Nom patre pyrā nè amgrā mē ā amnhĭ nhĭpêx anhÿr kêt nè. Na pre htyk o Tirtūm mā amnhĭ nhōr tipxi. ²⁶ Kêp apu patre pyrā nè amgrā mē mē panē htyk o pa ronhÿx ra mē panē htyk xohtō rax kumrêx. Nhÿx pre amnepê mā Tirtūm kot mēmoj piitā ho katorta rūm amgrā mē mē panē htyk o pa ho hkrax. Jao xatā htyk o amgrā xohtō rax kumrêx. Nom ja kot anhÿr kêt. Na pre mē pahwÿr wrÿ nè mē panē htyk tipxi htā htykja o mē pahte amnhĭ tomnuj piitā hpānhā amnhĭrer par kumrêx. Jakamā mo kaxyw koja axte ty?

²⁷ ām pahtyk tipxi htā koja Tirtūm nhÿrmā akupÿm mē pahpiitā mē pahto pahťir nè ahpÿnhā tanhmā mē pajarēnh to nè ahpÿnhā tanhmā mē panhĭpêx to. Kormā mē pahťir ri mē pahte amnhĭ nhĭpêx ā mē pahpumunh xā hkôt tanhmā mē panhĭpêx to. ²⁸ Ja pyrā nè na pre Krisja ām mē panē htyk tipxi htā mē pahto ohtō nè mē panē mē pahte amnhĭ tomnuj piitā rēnh pa. Hāmri nhūm Tirtūm akupÿm ho hťir nè akupÿm amnhĭ wÿr ho api. Tā koja nhÿrmā akupÿn mē pahwÿr wrÿ. Nom axte mē pahte amnhĭ tomnuj pānhā amnhĭ rer kaxyw mē panē htyk kaxyw wrÿk kêt nè. Ra kot mē pahte amnhĭ tomnuj pānhā amnhĭrer kēnā. Koja akupÿn wrÿ nè mē pahte amnhĭ wÿr kamā pajamak o papa xwÿnhjaja ma akupÿm amnhĭ kôt kaxkwa hwÿr mē pahto àpir pa. Ra mē pahtyk tā nhūm akupÿm mē pahto mē pahťir nè ma amnhĭ kôt mē pahto àpir pa pu mē kuri pamex nè pahťir tūm nè papa ho papa.

10

Kris kot mē panē htyk tipxi hā harēnh

¹ Nē arĭ mē kot Tirtūm kapēr tūm kôt amnhĭ nhĭpêx o mē pa xwÿnhjaja kormā hprĭ hā Tirtūm kot tanhmā mē pahto mex to hā harēnh mar tÿx kêt. Na prem kormā hkwy pix ma. Na hte mē ō patreja amgrā mē kànhmā kaxkwa hwÿr mry kamrôta pē nè mē amnhĭ to Tirtūm wÿ. Kot ja hā mē omunh nè axte mē kot amnhĭ tomnuj mā hamaxpēr hkêt kaxyw. Tā ā mē kot amnhĭ nhĭpêx anhÿr tā arĭ Tirtūm kapēr kwÿm amnhĭ nhĭpêx rāhā ² jakamā na prem xatā kām mēmo mry kamrô runh o pa. Kêp apu tām amnhĭ nhĭpêx nè tām ri hamaxpēr ronhÿx arĭ ā amnhĭ nhĭpêx anhÿr o pa hkêt nè. Nē xatā amnhĭ pānhā mry hpar nè hkamrô ho Tirtūm nhōrkwÿ kaàkre kamā mēmoj kamĭr kêt nè. ³ Nom na prem tām amnhĭ nhĭpêx o pa hkêt nè. Mē kot amgrā mē Tirtūm kot mē nè mē kot amnhĭ tomnuj rēnh kaxyw mē kot kām mēmo mry hpar o pa htā no ām hkôt amnhĭ nhĭpêx xwÿnh ā amnhĭ jarēnh kêt nè. Arĭ mē kot amnhĭ tomnuj o pa jakamā na prem mry hparta ā amnhĭ pumu nè tee ri amnhĭ kukamā hamaxpēr o hkaprĭ nè pa. ⁴ Nom na hte mōx kamrô ry

motre kamrôja mē panê mē pahte amnhî tomnuj rênh kêt nê. ⁵⁻⁸ Jakamā na pre Krisja mē pahwÿr nojarêt nê Tîrtûm mā amnhî jarênh o:

Pa Tîrtûm? E kot paj ma mē hwÿr wrÿ.

Mē kot amnhî pānhā amā mry hparta apê hprām nōkati nê amā hkînh kêt.

Ate mē nê mē kot amnhî tomnuj rênh kaxyw mē kot amā mēmo mry hparta amā hprām kêt. Ām ixkukamā na ka pre ā mē kot amnhî nhîpêx anhÿr kaxyw mē kām ja hā karō.

Mē kot mry nhîpêx o te pa ixte mē nê ixtyk nê ixkamrô pikapîr pyrāk o na prem ixkukamā ā amnhî nhîpêx anê.

Jakamā na ka ra mē kaxyw inhmā inhî gō pa mē urāk nê inhî ho inhî.

Tā kot paj ma mē hwÿr wrÿ. Ixte amā hprām xā hkôt pix mā ixte tanhmā amā mnhî nhîpêx to ho ixpa kaxyw. Akapêr ā kagā htûm mē kot hpîr nhûm amarî ixkukamā ijarênh to xā hkôt kot wrÿ nê ā amā amnhî nhîpêx anê. Anê.

Hāmri nê man mē pahwÿr wrÿ. ⁹ Kot Tîrtûm kapêr tûm o hapêx par nê hpānhā tām mē panê htyk kaxyw wrÿ. Jakamā na pre nojarêt nê Tîrtûm mā amnhî jarênh o:

—E ixte amā hprām xā hkôt amnhî nhîpêx kaxyw kot paj ma mē hwÿr wrÿ.

¹⁰ Anhÿr jakamā wrÿ nê Tîrtûm kām hprām xā hkôt mē panê ty. Na pre nhām mēhō mē kām hkurê xwÿnhjê mā ôr nhûm mē kot hpîr nhûm amarî htyk kêt nê. Na pre amnhî grōnh kôt mē kām amnhî gō nhûm prem kupî. Hāmri nhûm htyk o mē pahte hkôt amnhî xunhwÿr xwÿnhjê o Tîrtûm kra. Mē kot xatā mry hparta rom htyk tipxi tā mē pahpiitā mē pahte amnhî tomnuj pānhā amnhîrer pa.

¹¹ Nê mē ô patrejaja na htem apkati mē Tîrtûm nhōrkwÿ kaakre kamā kām tanhmā amnhî nhîpêx to. Nê apkati mē hkwyjê hpānhā mry hkwÿ hpa nê hkamrô ru nê mē ho Tîrtûm wÿ. Tā nom ja hā mē omunh xā hkôt mē nê mē kot amnhî tomnuj rênh kêt nê. ¹² No kêt Kris na pre mē kot xatā mry hpar xwÿnhhta rom ām htyk tipxi htā mē pahte amnhî tomnuj piitā hpānhā amnhîre. Hāmri nê ma akupÿm kaxkwa hwÿr api nê Tîrtûm nhîhkō hā Pahi Maati hkrî xā kamā upōk rûm hkrî ho hkrî. ¹³ Kojā kuri hkrî rāhā nhûm Tîrtûmja îhkram mē kot kutā amnhî xunhwÿr xwÿnhjê jaxār pa. Ja kaxyw na kormā kuri hamār o hkrî. ¹⁴ Ām htyk tipxi htā htykja o mē pahte hkôt amnhî xunhwÿr xwÿnhjê ho Tîrtûm kra pu mē ra hpānhā tām amnhî nhîpêx rāhā ho papa. Nê pajamexpêr mex o ri papa. Tîrtûm kām hprām xā hkôt.

¹⁵ Amnepêm mē kot Tîrtûm nhÿ hā kapêr jarênh o mē pa xwÿnhjaja na prem mē panhîgêjtê mā kapêr o pa. Tîrtûm Karō nhÿ hā mē kām kapêr nê mē kām:

¹⁶ —E na Tîrtûm mē pamā amnhî jarê nê amnhî jarênh o:

Kot paj nhÿrmā axtem ixkapêr nyw o mē amā ixkapêr.

Nê mē akrām hagjê ka mē mar tÿx pē hā ano htÿx nê ho apa.

Ixkapêr tûm na pa pre mē amā kēn pota ā hā kagā.

Nom ixkapêr nyw kot paj axtem mē akrām hagjê.

¹⁷ Nê kot paj axte mē ate amnhî tomnuj mā ijamaxpêr kêt nê.

Anhÿr o mē pamā amnhî jarênh. Anê.

¹⁸ Tā ra axte mē pahte amnhî tomnuj mā hamaxpêr kêt ā kot amnhî jarênh jakamā mo kaxyw kot pu mē arî amnhî pānhā kām mēmo mry hpar nê hkamrô runh o papa? Tā mē pahkwÿjaja na hte arî kām ja ho anhÿr prām o pa. E kwa mē axte ā amnhî nhîpêx anhÿr kêt nê ixkwÿjaja.

*Akupÿm mē pahte amnhî nhîpêx tûm o paxujanār kêt ā mē pamā karō
Matêwre 27.51; Rukre 23.45; Rômān 5.1-2; Epes 3.12; Eprêw 4.14-16*

19-20 E ixkràmnhwỳjaja. Ra Jejus kot mē panē htyk o hkamrô pikapīr jakamā na pu htem arī tee ri amnhī kukamā pajamaxpēr hkēt nē. Tīrtūm axte kot mē pahte amnhī tomnuj mā hamaxpēr kēt jakamā na pu htem paxàmnhīx amnhī to hwỳr o papa. Te paxàmnhīx òrkwỳ kaàkre kamā hitom maati hwỳr pagjēx nē kamā amnhī to hwỳrta pyrāk. Jao ra mē papamjaja amnhī to hwỳr o papa nhūm patre axte mē pahto hwỳr kēt nē. Jejus na pre htyk o mē pamā hitom maati wỳr hakwakre kahèxà hā kupèxèja kôt ā ho axkjē. Jao mē paxàmnhīx hwỳr mē pagjēx kaxyw mē pamā kahè xà mē. ²¹ Tā ra kēp Tīrtūm nhō krī kamā mē pahto hwỳr xwỳnh maati na. Nē mex kumrēx o jar pika ja kamā patre kot mē ho hwỳr o pa xwỳnhhta jakrenh. ²² Jakamā e kwa kēr pu mē māmri paxàmnhīx amnhī to Tīrtūm wỳr o papa. Ra Jejus kot mē panē htyk nhūm mē pahte amnhī kaxyw hkôt pajamaxpēr rāhā ho papa jakamā kēr pu mē axte mē pahpē amnhī tomnuj xwỳnh ā amnhī jarēnh kēt nē. Kēr pu mē nhỳrmā tanhmā pajamaxpēr punuj to rỳ tanhmā amnhī tomnuj to hāmri nē tee ri ja hā amnhī pumu nē pahkaprī kamā amnhī to Tīrtūm wỳr kurē kumrēx. Jejus ra kot mē pahte amnhī tomnuj pānhā amnhīrer par jakamā kot puj mē Tīrtūm mā tanhmā mē pahte amnhī tomnuj to hā amnhī jarē nhūm mē pama nē axte kām hamaxpēr kēt nē. Pu mē te paxwỳr nē pahte amnhī nē pagrā htyk kuhōnh par nē akupỳm pamex pyrāk. Nē axte paxàmnhīx amnhī to Tīrtūm wỳr o papa.

²³ Nē mē kot Kris ā tanhmā mē pahto htā kwa kēr pu mē tee ri amnhī kukamā pajamaxpēr kēt nē. Rỳ pajamaxpēr o:

—Konēn. Koja mē tanhmā hamaxpēr to nē Kris ā ixpī rỳ ko. Pa apu mē kot ixpīr pymaj akupỳm ixte amnhī nhīpèx tūm o awjanā nē akupỳm hkôt amnhī nhīpèx japēr rỳ ko. Anē.

Kwa pu mē tee ri ā pajamaxpēr anhỳr hkēt nē. Pu kēt mē pajamaxpēr o:

—Nà mē kot Kris ā tanhmā ixto htā kot paj aa hkaga hkēt nē. Mē kot hā ixpīr mā tā kot paj hkaga hkēt kumrēx.

Anhỳr ā amnhī jarē. ²⁴ Nē kēr ka mē akwỳjē mā anē kē mē mēmoj to axpēn kutā nojarēt rāhā ho ri axpēn kôt pa. Jao tanhmā axpēn to mex to o ri axpēn kôt pa.

²⁵ Na pre ra mē pahkwỳjaja tanhmā hamaxpēr to nē axte mē pahkôt pikuprōnh nē Tīrtūm kapēr mar o hkrī hkēt nē. No kēr pu mē ho mē urāk kēt nē. Kēr pu mē arī xatā axpēn wỳr akuprō nē mē pahte tee ri amnhī kukamā pajamaxpēr nē axpēn mā pakapēr o papa. Kēt mē panhō Pahihtija ra akupỳn mē pahwỳr wryk kaxyw jakamā kwa kēr pu mē kutēp arī axpēn mā pajamaxpēr mex nhōr pē tām axpēn nhīpèx mex rāhā ho i papa.

²⁶ Mē pahkwỳjaja kot Tīrtūm kapēr mar mex tā na htem kuma nē ām kuma. Kwa kēr ka mē ho mē urāk kēt nē. Kris kot mē panē htyk ā harēnhja mē kot mar mex tā na htem kuma nē ām kuma nē hkaga kumrēx. Jakamā mēhō koja Kris pyrā nē htyk o mē kot amnhī tomnuj pānhā amnhīre? Nā amrakati kumrēx. Ām Jejus pix na pre Tīrtūm ja kaxyw ām. Tapxipix na pre ā mē panē amnhī nhīpèx anē. Tā nhūm mē kot hkagaja mỳrapē koja mē nhỳrmā mē tāmjaja mē kot amnhī tomnuj pānhā amnhīre. ²⁷ Mē kot Tīrtūm kutā amnhī xunhwỳr xwỳnh na mē. Amnepēm na pre Tīrtūm mē kot kutā amnhī xunhwỳr xwỳnhjē kaxyw mē kot amnhī xà htyx kamā hamak tūm xàta nhīpèx. Tā ra mē kot Jejus kaga jakamā koja nhỳrmā na hwỳr mē rēnh pa nhūm mē tee ri kām hwỳr pa hprām kēt kaprỳ. ²⁸ Amnepēm finat Mojesja kormā hfir ri na pre hte mēhō pixi nē kapēr kaga nē akupỳm kot amnhī

nhîpêx tûm o awjanâ nê tanhmâ amnhî tomnuj to nhûm hkwyjaja ja hâ omu. Tanhmân axkrut rÿ axkrunêpxi nê ja hâ omu. Hâmri nê ma Mojes wÿr mra nê axpên kôt kâm tanhmâ kot amnhî tomnuj to hâ harê. Hâmri nhûm harênh ma nê mê kâm hâ amÿnê nhûm tee ri kâm htîr prâm kaprÿ. Mê kot akupÿm amnhî nhîpêx tûm o ujanâr nê amnhî tomnuj o paja mÿrapê na prem mê kupa. Â na pre htem mê hipêx anhÿr o pa.

²⁹ Nê koja mêhō tanhmâ Tirtûm Kra Jejus o kapêr punuj to. Tirtûm kapêr ã kagâ htûm kot ra mê kot kêp Tirtûm Kra hâ harênh mar mex tâ axtem nê tanhmâ ho kapêr punuj to ho pa. Kot mê panê htyk nê hkamrô pikapîr kôt kot mê pahte amnhî tomnuj pânâ amnhîrer ã harênh mar tâ kuma nê ãm kuma nê harênh o:

—Nâ mê pahpyrâ nê kot amnhî tomnuj xwÿnh nhûm mê kot hâ hpîr kênâ. Na pre mê panê htyk kêt nê.

Anhÿr ã harê. Nê Tirtûm Karōja nhûm määnên tanhmâ ho kapêr punuj to. Kêp mê pakutâ nojarêt xwÿnh tâ nhûm axtem nê tanhmâ ho kapêr punuj to. Mÿrapê koja nhÿrmâ Tirtûm tanhmâ homnuj tÿx to. Homnuj tÿx o mê kot Mojes kapêr kaga nhûm mÿrapê kot mê hparta jakre. Jakamâ kwa kêr ka mê ã amnhî nhîpêx anhÿr hkêt nê. ³⁰ Tirtûm kapêr ã kagâ htûm kot ja jarênh kot: Ixpê Tirtûm kot paj mê kot amnhî tomnuj xwÿnhjê homnuj tÿx nê. Anê.

Nê mê kot tãm amnhî nhîpêx xwÿnhjê jarênh kot:

Mê kot amnhî to mex o mê pa xwÿnhjaja kot paj nhÿrmâ mê ho mex rax nê. No mê kot amnhî tomnuj o mê pa xwÿnhjaja kot paj nhÿrmâ mê homnuj tÿx nê. Anê.

Ra mê pahte ã kapêr anhÿr xwÿnhja kot amnhî nhîpêx ã omunh mex. ³¹ Jakamâ kwa mê okora. Kêr ka mê amnhî to mex rãhâ ho ri apa. Tirtûm rãhâ ho rãhâ nê hihtÿx o hihtÿx jakamâ koja mêmoj tâ akamâ gryk ka amex kêt o amex kêt.

³² Nê amnepê mē ate Jejus kôt amnhî xunhwÿr krax kâm na prem Jejus ã mê atomnuj tÿx tâ ka prem mê umaj hkaga hkêt nê. Tã kêr ka mê arî ã amnhî nhîpêx anhÿrja kukamâ mân ajamaxpêr nê hâ anohtÿx rãhâ ho apa. Jao arî ã amnhî nhîpêx anê nê mê umaj Jejus kaga hkêt nê. ³³ Na prem mê piitâ mê noo mã tanhmâ mê amâ kapêr punuj to nê tanhmâ mê anhîpêx to. Nê tōhâ tanhmâ mê akwÿjê homnuj tÿx to ka mê tee ri ja hâ mê omu nê mê kamâ axukapri nê. Nê mê hkôt axkamê nhûm prem mã mê ato anê nê. ³⁴ Na prem mê akwÿjê jagjê ka prem ja hâ mê omu nê ma mê hagjênh xâ hâ ixkre hwÿr mê hwÿr mra nê tanhmâ mê ho mex to. Nhûm prem mê apê mê akukrêx kwÿptâ nê ma amnhîm o pa ka mê ãm amnhî tâ mê omu nê ajamaxpêr o:

—Kwâr mê māmri ma amnhîm hamÿn o pa. Koja nhÿrmâ Tirtûm inhmâ ixkukrêx mex o kot ja jakrenhta kwÿ nhôr rax nê pa amnhîm hamÿ nhûm aa ixpê hapêx kêt nê. Hâmri nhûm axte mêhō aa ixpê utâr kêt nê. Jar mê ixkukrêxta mexti hâ. Anê.

Jao mê kot mê apê utâr tâ ka mê akapri nâ apa hkêt nê. Â amnhî kukamâ ajamaxpêr anhÿr pē akînh nê apa. Âm hāmri na ka prem ã amnhî kukamâ ajamaxpêr anê. ³⁵ Na ka prem mê kutâ amnhî to htÿx kâm ã apa anê. Tã kwa kêr ka mê arî ã amnhî nhîpêx anhÿr o ri apa. Kêr kê nhÿrmâ Tirtûm ja hâ mê ato mex rax nê.

³⁶ Nê kêr ka mê arî amnhî kaxyw Tirtûm mã ajamaxpêr rãhâ ho ri apa. Mê kot Jejus ã tanhmâ mê ato htã ka mê hkaga hkêt nê. Kot kaj mê ã amnhî nhîpêx anhÿr o apa nhûm Tirtûm ja hâ mê apumu nhûm ja kâm mex nê. Hâmri

nhũm ra kot amnhĩ jarēnh xà hkôt nhỹrmã amã mẽmoj mex nhõr rax nē. Jakamã kwa mẽ kot tanhmã mẽ anhĩpēx to hã amnhĩ pumu nē tee ri amnhĩ kukamã ajamaxpēr o ri akaprĩ hkēt nē. Kot kaj mẽ Kris ā apunuj rāhā apa hkēt nē. ³⁷ Tĩrtũm kapēr ā kagà htũm kot Jejus jarēnh kot:

Koja mẽ pahwyr wrỳk mã xwỳnhnta tokyx wrỳ. Na ra wrỳk kaxyw nojarēt. Anē.

³⁸ Nē harēnh kot:

Ixkôt mẽ kot amnhĩ nhĩpēx mex o mẽ pa xwỳnhjaja koja mẽ amnhĩ kaxyw ixkôt hamaxpēr tỳx rāhā nē. Jao nhỹrmã ixri htĩr tũm nē mex rāhā nē pa ho pa.

Nē koja mẽhõ ixkaga pa tee ri kām ixkĩnh kēt ā omu. Anē.

³⁹ No mẽ papajaja te mẽ pahte mẽ kot Jejus kaga nhũm kot amnhĩ tã mẽ homnuj mã xwỳnhjē pyrāk kēt. Arĩ mẽ pahte amnhĩ kaxyw hkôt pajamaxpēr rāhā jakamã koja nhỹrmã amnhĩ wyr mẽ pahto api.

11

*Amnhĩ kaxyw Tĩrtũm kôt mẽ hamaxpēr mex xwỳnhjē jarēnh
Sikũn Pētre 3.5-7*

¹ Nē na htem Kris ā mẽ panhĩpēx kati ho pa pu mẽ pahpunuj rāhā nē ri papa. Te Kris kot mẽ pahto mex kēt pyrāk pu htem mẽmoj punuj pix kām ri papa nē kormã Tĩrtũm kot mẽ pahto mex ā amnhĩ tã omunh kēt nē. Tã ā mẽ pahte anhỹr tã kwa kēr pu mẽ arĩ kapēr kôt amnhĩ nhĩpēx rāhā ho papa. Mẽ pahte pano ho Tĩrtũm pumunh kēt tã kot mẽ pahkôt pa ho pa hã amnhĩ kaxyw kām pajamaxpēr tỳx rāhā ho papa. Jakamã na pu htem am kapēr kôt pix mã amnhĩ nhĩpēx o papa. ² Amnepē mã mẽ pakukamã mẽ panhĩgētjaja na prem no ho Tĩrtũm pumunh kēt tã amnhĩ kaxyw kām hamaxpēr nē kapēr kôt amnhĩ nhĩpēx o pa nhũm amnhĩ tã mẽ omu nhũm ja kām mex nē.

³ Nē mẽ papajaja na pu htem pajaxwỳja mẽ pano ho omunh kēt tã amnhĩm harēnh o:

—Nà amnepēm kormã mẽmoj piitã amrakati ri nhũm Tĩrtũm am kapēr pix o mẽmoj piitã ho kato. Ixte inhno ho ja hã omunh kēt tã kot ā amnhĩ nhĩpēx anhỹr ā amnhĩ jarēnhja jakamã kot paj hkôt ijamaxpēr tỳx rāhā ho ri ixpa. Anē.

⁴ Na pre finat Atāw nhĩpēx nē kaxyw hprõ Ewa nhĩpēx. Hāmri nhũm wa hkra Apewja htõ Kaĩ rom amnhĩ kaxyw Tĩrtũm kôt hamaxpēr tỳx o pa. Jakamã nhũm wa Tĩrtũm mã mẽmoj gõ. Nhũm Apew kot Kaĩ rom Tĩrtũm kām hprãm xà hkôt kām mẽmoj nhõr jakamã nhũm amnhĩ tã omu nē kot amnhĩ to mex xwỳnh ā harē nē kot kām õr xwỳnhnta nhũm mex ā harē. Tã Apew amnepēm htyk tã pu htem arĩ harēnh mar rāhā ho papa nē kām pajamaxpēr o:

—Apew na pre hte amnhĩ kaxyw Tĩrtũm kôt hamaxpēr tỳx rāhā ho pa.

Anhỹr ā kām pajamaxpēr.

⁵ Nē Atāw kanrēhā htãmnhwỳ Enokja na pre haxwỳja amnhĩ kaxyw Tĩrtũm mã hamaxpēr tỳx o pa. Jao hkamnār rom kām hprãm xà hkôt pix mã tanhmã kām amnhĩ nhĩpēx to ho pa nhũm amnhĩ tã omu nē amnhĩm mex ā harē. Jakamã na pre htyk kēt nē. Na pre Tĩrtũm htĩr rāhā ma amnhĩ wyr ho api nhũm hkwyjaja tee ri hapēr o pa. Jakamã na pu htem arĩ xapēn mã Enok kot amnhĩ kaxyw Tĩrtũm kôt hamaxpēr mex o pa hã harēnh o papa. ⁶ Mẽ kot amnhĩ kaxyw Tĩrtũm mã mẽ hamaxpēr kēt xwỳnhjaja na hte Tĩrtũm mẽ mex

ã mē harēnh kêt nē. Tã mē papajaja kêr pu mē Enok pyrã nē amnhî kaxyw kãm pajamaxpēr tÿx rãhã ho papa. Nē pajamaxpēr o:

—Tirtûmjã htîr rãhã ho rãhã. Koja nhÿrmã mē ixte amnhî kaxyw hkôt ijamaxpēr xwÿnhjê ho mex rax nē. Nã koja mē ixto anê.

Anhÿr o mē pajamaxpēr nhûm Tirtûm amnhî tã mē pajamaxpēr ã mē pahpumu nē mē pahte amnhî to mex ã mē pajarê. No mē kot amnhî kaxyw kãm hamaxpēr kêt xwÿnhjaja na hte ã mē harēnh anhÿr kêt nē.

⁷ Nē Enok kanrêhã htãmnhwÿ Noehtija na pre haxwÿja amnhî kaxyw Tirtûm mã hamaxpēr tÿx o pa. Jao hkamnâr rom amnhîm pâr raxja nhîpêx. Na pre ra Tirtûm na rax kukamã tanhmã kãm ujarēnh to. Kormã aa na wrÿk nhûm Noehiti kot omunh kêt tã Tirtûm kapêr ma nē mar xã hkôt amnhîm pâr rax kumrêxtã nhîpêx. Ôrkwÿ kamã hkwÿjê mē mē amnhîm hipêx. No mē kot Tirtûm kapêr mar nē ãm mar xwÿnhjaja na pre Tirtûm gô tãm o mē hanhi nē mē himex pa. Nom Noehtija nhûm kot amnhî to mex xwÿnh ã harê. Kot amnhî kaxyw hkôt hamaxpēr rãhã ho pa jakamã nhûm pre ã mex ã harēnh anê.

⁸ Nē Noehiti kanrêhã htãmnhwÿ Apraãwja na pre haxwÿja amnhî kaxyw Tirtûm mã hamaxpēr tÿx o pa. Na pre Tirtûm kot kãm pika nhôr ã kãm amnhî jarê nē ra kot ma hwÿr mēnh kaxyw. Hãmri nhûm Apraãw kuma nē hkamnâr rom ô pika kaga nē ma pika hõja wÿr pa. Aa kot ma hwÿr môr nē omunh kêt tã Tirtûm kapêr mar xã hkôt ô pika kaga nē ma hwÿr pa ho pa. ⁹ Hãmri nē hwÿr pøj nē omu nhûm Tirtûm kãm:

—E pika ja kot paj nhÿrmã akanrêhã akra nē atãmnhwÿjê mã kugô. Anê.

Hãmri nhûm kuma nē pikaja kamã pa ho pa. Ra kamã axtem mē uro hkwÿjaja ri pa nhûm Tirtûm kormã mē kator kêt ri nhûm mē ô pika hwÿr pøj nē mē kamã pa ho pa. Nom amnhîm ôrkwÿ mex nhîpêx kêt nē. Kormã kêp ô pika kumrêx kêt ã hkamnhîx jakamã ãm mry kã o ixkre nhîpêx nē kamã pa ho pa. Nē nhÿhÿm pa kaxyw nē kugrà nē ma amnhî kôt o pa. Amnhî kaxyw Tirtûm mã hamaxpēr rãhã jakamã ã amnhî nhîpêx anhÿr o pa.

Nē Apraãw kra Ijak nē htãmnhwÿ Jakoja wa Apraãw pyrã nē mry kã ho ôrkwÿ nē ma amnhî kôt o pa. Nhûm Tirtûm kot Apraãw mã kapêr pyrã nē wa kãm wa hkanrêhã wa hkra nē wa htãmnhwÿjê mã pika nhôr ã amnhî kukamã wa kãm amnhî jarê. ¹⁰ Jakamã nhûm Apraãw kormã Tirtûm nhô krî hwÿr àpir xa hã amnhî tã hamâr pê kot ho ô pika mã xwÿnhjê kamã pa ho pa. Kaxkwa hwÿr àpir mã xwÿnhata mex kumrêx. Tirtûm kot hipêx jakamã koja mry kã ho ixkre nhîpêxtã rom aa hapêx kêt nē. Jakamã nhûm Apraãw mē pahpyrã nē ma kot hwÿr àpir xa hã amnhî tã Tirtûm jamâr rãhã ho pa. ¹¹⁻¹² Tã ra hpigêt tÿx nē hkurê hkêt nē pa. Te ra ri htyk kaxyw pa pyrãk. Nhûm hprô Sara haxwÿja hpigêx tÿx nē. Kamrô hkêt ã amgrã xohtô rax kumrêx. Nhûm wa aa hkra hkêt nē pa htã nhûm Tirtûm nhÿrmã wa hkra hã wa kãm awjarê nhûm wa kuma nē amnhî kaxyw hkôt hamaxpēr kurê kumrêx. Nom amnhî tã kuma nē tee ri amnhî kukamã hamaxpēr hkêt nē. Na pre wa kuma nē xepên mã:

—Nã kot puj xep hãmri tã pahkra. Tirtûm kot hã ã pajarēnh anhÿr kênã. Anê.

Tã ã wa kot hkra kaxyw Tirtûm mã hamaxpēr anhÿr jakamã na pre Apraãwja hprô htu. Ra wa hamê hpigêt tÿx kumrêx tã nhûm htu. Nhûm wa hkra Ijakja gaa nē wa kãm kato. Jakamã nhûm wa gaa nē rî wa hkanrêhã wa htãmnhwÿ xohtô rax o ohtô rax. Ohtô ho kaxkwa kamã kanhêti xohtô jakre. Nē ohtô ho gô xujanâr mÿri pikahti grã hkryre jakre. Jakamã nhûm mē tee

ri mē ho kōta hpar mā. Nhūm Apraāw kēp mē hpār krax. ¹³ Tā nhūm Apraāw nē Ijak nē Jakoja mē ri pa tāmtā nē htyk pa nē hapêx. Tirtūm kormā kot mē kām pika jarēnhā nhōr xwýj ri ra htyk pa. Nom kormā mē htír ri tanhmā kām hamaxpēr to nē hamaxpēr o:

—Nà kormā Tirtūm kot mē inhmā pika jarēnhja nhōr kēt tā koja nhýrmā inhmýr pē ixkanrēhā ixkra nē ixtāmnhwýjé mā kugō. Nà koja mē kām kugō. Ra kot hā inhmā amnhī jarēnh kēnā kot kēt mē kām ōr kēt.

Anhýr o kaxyw kām hamaxpēr rāhā ho pa. Jao hkính nē hamaxpēr o:

—Nà inhō kríja axtem na. Na pa hte jar pika ja kamā ri mē hkôt ri ixpa. Te ixpé mē uro pyrà nē ri mē hkôt ixpa nom jar inhō krí hkēt. Inhō krí na kēt axte mā. Anē.

¹⁴⁻¹⁵ Na prem ā ō krí hō hkukamā hamaxpēr anhýr o pa. No ō krí htūmta mē kot hkaga nē pika hō hwýr mōr xwýnhā na prem ā harēnh anhýr kēt nē. Kop apu mē kot amnhīm tām mán jarēnh ronhýx prem awjanā nē ma akupým hwýr pa. Na prem axtem krí hō jarē nē kormā hwýr mōr kēt ā amnhī jarēnh o pa. ¹⁶ Tā nhý krí na prem ā harēnh anē? Nà kaxkwa kamā Tirtūm nhō kríja. Tām na mex kumrēx jakamā nhūm prem kormā hwýr ma āpir xa hā mē pahpyrà nē amnhī tā Tirtūm jamār rāhā ho pa nhūm amnhī tā mē omu nē hkính nē. Nē mē kot tām amnhī nhīpêx ā mē omu nē mē kēp hkra hā mē harēnh ā hpijaam kēt nē. Hāmri nē mē kutêp tanhmā ō krí ho mex to ho pa.

¹⁷⁻¹⁸ Na pre ra tanhmā Apraāw mā hkra Ijakja jarēnh to nē kām:

—Akra Ijak kanrēhā hkra nē htāmnhwýjaja koja mē kēp ixkra. Anē.

Tā ra kot amnhī tā Apraāw kamā hamak kaxyw hkukamā hamaxpēr nē hamaxpēr o:

—Xà we Apraāw kām ixkính týx kumrēx nē kām ixkôt amnhī nhīpêx rāhā ho pa hprām nā? Xà we kām ixkính týx o hkrata jakrenh? E pa kop we ja hā amnhī tā kamā ama nē omu mán. Anē.

Hāmri nē kot hkra hpír nē kām ōr ā kām karō. Hāmri nhūm kuma nē ra kot kām hpír kaxyw. Kot Tirtūm kot amnhī nhīpêx ā omunh mex jakamā hkamnār rom kot kām hpír kaxyw. ¹⁹ Nē hamaxpēr o:

—Nà Tirtūm akupým kot mē ho htír xwýnh kēnā.

Anhýr jakamā kām hkra hpír pima hkēt nē ra kot kām hpír mā tā nhūm Tirtūm amnhī tā omu nē nē kām kapēr nhūm kuma nē hpír kēt nē wa ma akupým ōrkwý hwýr mō. Tā ā kot hkra nhīpêx anhýr jakamā Apraāw mā te Ijak htyk nē akupým htír pyràk.

²⁰ Nē Ijakja na pre haxwýja amnhī kaxyw Tirtūm mā hamaxpēr týx o pa. Jao hkamnār rom amnhī kra wa kām Tirtūm kot wa ho mex kukamā wa kām harē. Kra Jako mē Ejauta wa kām harē nē wa kām:

—E koja nhýrmā Tirtūm inhmýr pē war ato mex rāhā ho pa. Anē.

²¹ Nē Jakoja na pre haxwýja amnhī kaxyw Tirtūm mā hamaxpēr týx o pa. Jao hkamnār rom hkra Juje mā Tirtūm kot mē ho mex kukamā harē. Na pre Jakoja hkra nē htāmnhwý mē hpimràátā hprām xà ma Ejit wýr pa nē kamā pa ho pa. Tā nhūm Jako hpigêt týx nē ra htyk kaxyw. Hāmri nē hkra Juje mē hkra wa mē kām kapēr nē mē kām:

—E na pa tee amnhī kamā ama. Na pa ra ixtyk kaxyw. Nom koja Tirtūm nhýrmā inhmýr pē mē ato mex rax nē. Anē.

Hāmri nē amnhī kaxpar xà hā pī hā amnhī kaxpa nē kànhmā xa nē Tirtūm mā mex o mex ā harē. Hāmri nē akupým nōr xà kamā nōn ty.

²² Nê Jujeja na pre haxwÿja amnhî kaxyw Tîrtûm mǎ hamaxpêr tÿx o pa. Jao htyk kaxyw nê hkamnâr rom hkwÿjê mǎ tanhmǎ amnhî jarênh to. Ra hpigêt nê htyk kaxyw nê hkwÿjê mǎ tanhmǎ amnhî tâ karô hto nê mē kām:

—E na pa ra ixyk kaxyw. Tâ koja Tîrtûm inhmÿr pê nhÿrmǎ Ejit rûm mē akator nê ma akupÿm mē panhō pika hwÿr mē ato pa. Ra kot mē panhîgêt Apaראw mǎ amnhî jarênh xǎ hkôt. Jakamǎ kwa mē inhma. Kêr ka mē akupÿm anojarêt nê ma amnhî kôt ixtǎ kasawja mÿ nê amnhî kôt ixto mô. Hāmri nê mûtar mē panhō pika kamǎ mē anhō krî htǎ ijaxǎ pa jawÿ mē akuri ixtǎ pyka. Anê.

²³ Nê Mojes katorxǎ mē hipêêxǎja na pre wa haxwÿja jajê pyrǎ nê amnhî kaxyw Tîrtûm mǎ hamaxpêr tÿx o pa. Juje hkanrêhǎ htâmnhwÿ na pre wa. Jakamǎ nhûm Ejit nhō pahija tee ri Ijaew xohtō rax kumrêx ā mē omu nhûm ja kêp omnuj nê. Hāmri nhûm mē hkra myjaja mē hapôx kôt mē hamÿnh xwÿnhjaja kot mē hpar ā mē kām karô. Tâ nhûm Mojes kato nhûm hipêêxǎ mē katorxǎja wa omu nhûm muxre nhûm wa tee ri hkukamǎ hamaxpêr. Hāmri nê pahi Paraohti mǎ mē hkra jamÿnh xwÿnh kot wa kêp hpîr pymaj ho pimxur o hǎ mytwrÿ axkrunêpxi. Tîrtûm kamnâr rom wa amnhî tâ kām uma hkêt nê ā kêp hkra ho hpimxur anê.

²⁴ Nê Mojes na pre haxwÿja amnhî kaxyw Tîrtûm mǎ hamaxpêr tÿx o pa. Kormǎ karâre ri na pre Paraohti hkra nija omu nê amnhîm kumÿ nê ho hkra nê amnhî kôt o pa. Râhǎ nhûm âptâr nhûm Ejit nhō xwÿnhjaja kêp pahi Paraohti htâmnhwÿ hǎ axpên mǎ harê. Hāmri nhûm tee ri amnhî tâ mē kuma nê amnhî tâ mē kām aprǎ nê mē kām:

—Kwa mē ā ijarênh anhÿr kêt nê. Ixpê mē akwÿ hkêt. Anê.

²⁵ Am kām Tîrtûm kwÿjê kôt pix mǎ ri pa ho pa hprâm. Nê kām Ejit nhō pahi hkôt amnhî tomnuj prâm kêt nê. Am mē kot amnhî tomnuj pix o paja na mē kām hprâm nê omu ja hǎ mē omu nê tee ri mē hkukamǎ hamaxpêr nê hamaxpêr o:

—Nǎ kot paj mē hkôt ri ixpa hkêt kumrêx. Mē hkînh nê pa htǎ koja mē gaa nê ty nhûm mē hkînhja mē kêp hapêx. Nǎ kot paj Tîrtûm kwÿjê hkôt mǎn ri ixpa ho ixpa. Mē kot Tîrtûm ā mē inhîpêx kati htǎ pa arî mē hkôt ixpa ho ixpa. ²⁶ Inhmǎ Ejit nhō xwÿnhjê hkôt ixkukrêx rax nê ri ixpa hprâm kêt. Kwâr mē māmri Tîrtûm ā tanhmǎ inhîpêx to. Kojǎ mē ā inhîpêx anê pa ixpunuj nê ri ixpa htǎ koja Tîrtûm nhÿrmǎ ixto mex rax nê. Nǎ kot paj Ejit nhō pahihiti hkôt ri ixpa hkêt nê.

Anhÿr jao ra mē pahpyrǎ nê Kris gryk ā mē hkaga. ²⁷ Tâ akupÿm mēō pika hwÿr Ijaewjê ho môr kaxyw nhûm Ejit nhō pahihitija tee ri ja hǎ omu nê kamǎ gryk tÿx nê. No nhûm Mojesja amnhî kaxyw Tîrtûm kôt hamaxpêr tÿx o hkamnâr rom kām mē uma hkêt nê. Nê mē kêp hkwÿjê kator pa nê ma akupÿm mēō pika hwÿr amnhî kôt mē o pa. Tîrtûm kamnâr rom ā mē kêp mē ho kator anê. Aa kot no ho omunh kêt tâ amnhî kaxyw kām hamaxpêr tÿx nê hkamnâr rom mē kator nê hamakêtkati nê mē o pa. ²⁸ Nê hkamnâr rom mē hkînh ā arîgro mē kot kām “Pas” anhÿr xwÿnhhta ho hkra. Kormǎ Ejit rûm kator kêt ri. Nê kaxyw amnhî kwÿjê mǎ hǎ karô nê mē kām:

—E pa mē amǎ Tîrtûm kapêr jarê ka mē inhma. Nǎ kot puj xep mē jarâhǎ ôwêhti hkwÿ pa nê hkamrô ru. Nê hkamrô ho panhōrkwÿ jakwakre hǎ pî kukô. Hāmri nê î kuxôt nê kuku. Kojǎ kamât nhûm mē kot amnhî tomnuj xwÿnhjê pê mē hkra my kot wa piitǎ mē hpar mǎ xwÿnhja mô. Hāmri nê mē pamÿ ri mô nê ā mē pahte mē panhōrkwÿ nhîpêx anhÿrja ā omu nê tanhmǎ

mê pahkrajê ho hkêt nê. Tîrtûmja â mê pahte amnhî nhîpêx anhÿr kaxyw â inhmâ karô anê. Jakamâ e pu mê hkamnâr rom â amnhî nhîpêx anê kê mê pahkrajaja mê pahpê htyk kêt nê. Anê.

Hâmri nê â mê kot Ejit rûm kator xâ hâ arîgrota â mê hkînho o kator krax anê. Mê hkînha na htem kâm “Pas” anê.

²⁹ Nê Ijaewjaja na prem haxwÿja Ejit rûm kormâ Mojes kôt mê pa ri urâk nê amnhî kaxyw Tîrtûm mâ hamaxpêr. Jakamâ na prem ra gô xujanâr pê “Gô Kamrêk” anhÿr xwÿnhja mÿ ri kuhê nhûm Tîrtûm mê kâm ho axkjê. Nê mê kâm hkôt â ho amgrâ nhûm mê hâ hkamnâr rom mex nê rêr pa. No nhûm mê hkôt mê kot mê himex kaxyw mê mrar xwÿnhjaja. Ejit nhô pôristijaja nhûm gôja akupÿm mê hâ axkamur nê mê himex pa.

³⁰⁻³¹ Nê Ijaew kot Mojes mÿr pê Jojue hkôt pa ri mê urâk nê amnhî kaxyw Tîrtûm kôt hamaxpêr o pa. Na prem ra Tîrtûm kot mê kâm pika nhôr xwÿnhnta wÿr pôj nhûm Tîrtûm krî pê Jeriko hwÿr mê kurê. Mê kot kamâ mê pa xwÿnh pê utâr kaxyw mê hwÿr mê kurê. Mêo krî pu hâ kahêja kên tÿx pix o na pre. Nê hprêk rax kumrêx. Nê krî nhô xwÿnhjaja kâm Tîrtûm kapêr mar prâm kêt. Hâmri nhûm Tîrtûm mê hâ Ijaewjê mâ amÿné nê mê kâm:

—E mêo krîja kot paj mê amâ kugô nom kêr ka mê inhmar kumrêx. Kêr ka mê apkati mê mê ô krî hwÿr mra nê kupu hpÿnh o atâ apkati kêp 7 nê rî ma akupÿm mra. Anê.

Hâmri nhûm mê kuma nê mar xâ hkôt ma Jeriko hwÿr mra. Hâmri nê hwÿr pôj nê Tîrtûm kamnâr rom krî puhâ kahêja kupu hpÿnh o hâ apkati kêp 7. Hâmri nhûm apkati pê 7ta â nhûm kên tÿx o kahêja mê kêp amnhî krakra nê rôrôk pa. Nhûm mê mra nê hkôt krî hwÿr agjê nê krî nhô xwÿnhjê nhûmex pa. Nom krî kamâ kuprÿ pê Raapja Ijaew pyrâ nê amnhî kaxyw Tîrtûm mâ hamaxpêr o pa jakamâ nhûm mê kormâ mê himex kaxyw mê hwÿr môr kêt ri amnhî kukamâ mê hkwyjaja kot mê hâ ukapi ho pa kaxyw mê hwÿr mê kurê. Hâmri nhûm Raapja mê kêp amnhî pyrâ nê Tîrtûm kôt hamaxpêr â mê omu nê hkwy kot mê himex pymaj amnhî nhôrkwÿ kamâ mê kêp mê ho amûxu nhûm mê hkâ hkînha pê ma akupÿm hkwyjê wÿr mô. Jakamâ nhûm mê kot mê himex kaxyw mê hwÿr mra hâmri nê amnhî pyrâ nê tanhmâ Raap mê ô fâmii ho hkêt nhûm mê arî htîr nê pa. Mê urâk nê amnhî kaxyw Tîrtûm kôt hamaxpêr o pa hâ omunh xâ hkôt tanhmâ mê ho hkêt nê.

³² â na pre mê kot amnhî kaxyw Tîrtûm kôt mê hamaxpêr xwÿnhjaja Tîrtûm kamnâr rom amnhî nhîpêx anhÿr o pa. Nom jajê pixjaja na prem â amnhî nhîpêx anhÿr hkêt nê. Mâânên Giteâw nê Parak nê Sâsô nê Jepte nê Tawi nê Sâmuew nê Tîrtûm nhÿ hâ mê kapêr o pa xwÿnhjaja. Jajê piitâ na prem wamtajê pyrâ nê amnhî kaxyw Tîrtûm kôt hamaxpêr tÿx râhâ ho pa. Nom kot paj ixprî hâ tanhmâ mê kot hkamnâr rom amnhî nhîpêx o hâ mê harênh kêt nê. Kot pa anê nê tokyx harênh par kêt nê. Mê ohtô rax kumrêx jakamâ na pa âm hkwy pix jarê nê hâ kagâ.

³³ Na prem hkwyjaja Tîrtûm kamnâr rom ma mê kot amnhî tomnuj xwÿnhjê nhô krî hwÿr mra nê mê kêp mê ô pika pytâ. Nê mê hkwyjaja Tîrtûm kamnâr rom mê ho amnhîptâr mex o pa. Nhûm prem kâm Tîrtûm kurê xwÿnhjaja mê hkwyjê pynê nê ahkrehti kamâ mry xoprê hkwy nhîpy mê kurê. Nhûm prem amnhî tâ mê omu nê amnhî kaxyw Tîrtûm mâ hamaxpêr kurê kumrêx nhûm amnhî tâ mê omu mê nê te mry jakwa ho pikamÿr tÿx pyrâk o mê hipêx nhûm âm mê omunh o kuhê nê tanhmâ mê ho hkêt nê. Â na prem Tîrtûm kamnâr rom amnhî nhîpêx anhÿr o pa.

³⁴ Nhũm mē kot kuwy rax kām mē hkwýjê rēnh tā nhũm mē kot amnhī kaxyw Tirtũm mā hamaxpēr t̄yx nhũm amnhī tā mē omu nē mē nē tanhmā kuwy ho nhũm mē hxēt kēt nē. Nhũm pre mē hkwýjaja wapo ho mē hkamnhwýr o mē hkwýjê hpar kaxyw nhũm mē amnhī kaxyw Tirtũm mā hamaxpēr nhũm amnhī tā mē omu nē mē nē tanhmā mē ho nhũm mē amnhī rē nē mē umaj hprôt nē ma mra. Mē hiht̄yx kēt tā Tirtũm kamnār rom ý hā hiht̄yx nē mē kām mē hkurê xwýnhjê ho krihkrit pa nhũm mē ma akupým hapêx.

³⁵ Nē mēni hkwýjaja na prem haxwýja amnhī kaxyw Tirtũm mā hamaxpēr t̄yx o pa. Jao mē hkrajaja mē kēp htyk tā nhũm prem Tirtũm kamnār rom mē ho kuwý nhũm mē kuma nē akupým mē kām mē ho ht̄ir.

Á na prem amnhī kaxyw Tirtũm mā hamaxpēr pē mex nē pa anē. No na pre mē hkwýjaja mē urāk nē amnhī kaxyw kām hamaxpēr t̄yx tā nhũm Tirtũm tokyx mē ho mex kēt nē. Na pre mē kām mē hkurê xwýnhjaja Tirtũm ā mē par kaxyw. Nē mē hkwýjaja Tirtũm ā mē hipêx kati ho pa nhũm mē amnhī xā ht̄yx kām hamak kām ty. Nhũm mē himex kaxyw nē mē kām:

—Kwa mē Tirtũm kaga. Kot kaj mē hkaga pa mē amā inhũre nē mē anhĩmex kēt nē. Anē.

No nhũm mē kuma nē ām mē kuma nē amnhī kaxyw kām hamaxpēr t̄yx pē mē kām:

—Nā mē kam nē māmrī xipī. Inhmā ixyk p̄yima hkēt. Kot paj ty nhũm Tirtũm akupým ixto ixt̄ir pa kuri inh̄mex kumrêx nē ri ixt̄ir tũm nē ixpa ho ixpa.

Anh̄yr o mē kām amnhī jarēnh jakamā hāmri Tirtũm kaga hkēt rāhā nhũm mē himex.

³⁶ Nē mē kām mē hkurê xwýnhjaja na prem Kris ā mē hkwýjê mā hpēr o pikēnh pē mē htak xā ho mē htak rūnh o pa. Nē kàx o mē hkwýjê hpa hpre nē mē hte hpre nhũm mē kēp prēs nē hkrī ho hkrī.

³⁷⁻³⁸ Nhũm prem kēn rūnh o mē hkwýjê htak o mē kupa. Nē mē hayr o mē hkwýjê pa. Nē mē hkamnhwýr o mē hkwýjê pa. Á na prem Kris kôt mē hamaxpēr ā mē omunh xā hkôt mē hipêx anh̄yr o pa. Jakamā na pre mē hkwýjaja mē umaj mēō krī rūm hapôj nē ma hprôt nē mra. Nē te mē ō krī hkēt pyrā nē kapôt ā kēp amrakati nē ri pa. Mē ê hkēt nē ōwēhti hkā ho ê nē ri hā pa. Nē motre kà ho amnhī pre nē ri hā pa. Nē kēn prêk ā api nē kre kamā hpimxur o pa. Nē pika hkre kamā hpimxur o pa. Nhũm mē kām mē hkurê xwýnhjaja te mē kēp ahpunu nē mē kēp ahkro pyrāk o mē hipêx nē xapēn mā mē harēnh o:

—Nā mē mexti hā. Kwa pu mē piitā mē himex paa ri.

Anh̄yr o mē harēnh tā nhũm Tirtũm mē urāk nē ā mē harēnh anh̄yr kēt nē. Na pre mē mex kumrêx ā mē harē. Nē nh̄yrmā kuri mē mex nē pa ho pa hkukamā mē harē.

³⁹ ā na prem Tirtũm kamnār rom mē kām mē hkurê xwýnhjê kutā amnhī to ht̄yx kām htyk o pa anē. Nhũm Tirtũm ja hā mē omu nē hkīnh nē kām mē hapé ht̄yx nē. No nhũm mē kormā ht̄ir ri amnhĩm Tirtũm kot mē ho mex xā jamýnh kēt rāhā ty. ⁴⁰ Tā mo na pre Tirtũm kormā mē ht̄ir ri hkwýjê pyrā nē mē ho mex kēt nē? Nā na pre kormā mē hkukamā hamaxpēr o:

—Nā kot paj kormā mē ho mex kēt nē. Kot pa mē inh̄y pē mē kot ixkôt amnhī xunhwýr mā xwýnhjê jamār grire mán. Kēr pa inh̄o krī kamā mē ho ixpimràatā mē ho mex rax kumrêx. Nā kot paj ā mē ho mex anē. Ja na kēt inhmā mex o kormā mē ht̄ir ri ixte mē ho mexta jakrenh. Anē.

Jao ra ã mē papajaja mē pakukamã hamaxpēr anē.

12

*Mē pahte Jejus pyrà nē mēmoj kutã amnhĩ to htỳx ã mē pamã karõ
Piripos 3.12-21*

¹ Na pre mē pakukamã mē panhĩgēt kwỳjaja amnhĩ kaxyw Tirtũm mã hamaxpēr pē ã amnhĩ xà htỳx kamã hamak o pa anē. Tã te ra mē kot kỳj rũm kaxkwa rũm mē pahpumunh nē tanhmã mē pamã kapēr to pyrà nē mē pamã kapēr o:

—E mē inhma mē ixkanrēhã mē ixtãmnhwỳjaja. Na pa prem ã Tirtũm kamnãr rom amnhĩ nhĩpēx o ixpa anē. Mē kot ja hã mē inhĩpēx kati htã pa prem Jejus kaga hkēt nē. Tã kēr ka mē ixpyrà nē ã mē kãm mē akurē xwỳnhjē kutã amnhĩ to htỳx anē. Nē mē ixpyrà nē amnhĩ kaxyw Tirtũm kôt pix mã ajamaxpēr tỳx rãhã ho ri apa. Anē.

Jakamã kwa kēr pu mē urak nē ã amnhĩ nhĩpēx anhỹr rãhã ho mãn ri papa. Te mē hprõt xwỳnhjaja kot amnhĩ nhĩpēx pyràk o amnhĩ nhĩpēx. Na htem hprõt tỳx kaxyw mēmoj pytĩ jamỳnh nē ho hprõt hkēt nē. Na htem y kamã hprõt o hprõt tỳx nē wam hkwỳjē mã wa nē mra. Ja pyrà nē kēr pu mē pahte Tirtũm kapēr kôt amnhĩ nhĩpēx mex o papa kaxyw tanhmã mē pahte amnhĩ tomnuj to hã amnhĩ pumu nē hkaga kurē kumrēx. Mē pahte amnhĩ tomnuj o papa xãja te mex pyràk no ãm mex kēt. Te ho mē hprõt xwỳnh kot axtem nē mēmoj pytĩ mỳnh nē tee ri ho hprõt tỳxta pyràk. Kot puj mē tanhmã amnhĩ tomnuj to ho papa nē Tirtũm kapēr kôt amnhĩ nhĩpēx mex kēt nē. Jakamã kwa kēr pu mē Tirtũm kapēr gryk ã amnhĩ tomnuj nē amnhĩ to htỳx rãhã ho papa. Te ho mē hprõt nē nhỹri mē àhuk xà pix kukamã hamaxpēr rãhã hprõt tỳx xwỳnhnta pyrà nē ãm Jejus mã pajamaxpēr tỳx rãhã ho papa.

² E kot paj mē amã Jejus kot tanhmã mē panē amnhĩ nhĩpēx toja jarē ka mē inhma. Nã kot mē panē mē pahte amnhĩ tomnuj pãnhã amnhĩr kaxyw htyk nhũm mē pahte hkõt amnhĩ xunhwỳr jakamã na hte mē pamã pajamaxpēr nyw gõ pu mē amnhĩ kaxyw hkõt pajamaxpēr ho ri papa. Na pre mē kãm hkurē xwỳnhjaja kot pĩ kahpa hã nhõr nē hpĩr mã nhũm mē kutã mē kãm amnhĩ to htỳx nē arĩ mē kãm xa nhũm prem kupĩ. Tã tee ri amnhĩ kukamã hamaxpēr o Tirtũm kaga hkēt nē. Na pre hamaxpēr o:

—Nã kwãr mē mãmri xipĩ. Kot paj ty nhũm Inhĩpēxã akupỹm ixto ixtĩr pa kuri inhmex kumrēx nē ixtĩr tum nē ixpa ho ixpa. Anē.

Tã na ra kaxkwa kamã Tirtũm xupók rũm mex nē hkrĩ ho hkrĩ. ³ Jakamã kwa kēr pu mē kot ã mē panē amnhĩ nhĩpēx anhỹrja mã pajamaxpēr rãhã ho ri papa. Mē kot hipēx kati htã nhũm mē kutã amnhĩ to htỳx nē xa. Tã kēr pu mē urak nē mē kãm mē pahkurē xwỳnhjē kutã amnhĩ to htỳx rãhã ri papa. Jao tee ri amnhĩ kukamã pajamaxpēr o mē umaj Tirtũm kaga hkēt nē.

⁴ Na ka htem ma mē kot amnhĩ tomnuj xwỳnhjē hwỳr mra nē mē kot amnhĩ tomnuj kaga kaxyw tanhmã mē kãm akapēr to nhũm mē ja hã mē ama nhũm ja mē kēp omnuj nhũm mē amnhĩ tã tanhmã mē atomnuj to. Nom wam mē kot mē pahkwỳjē nhĩpēxta pyrà nē kormã mē atõxpĩr kēt nē.

*Tirtũm kot tanhmã hkrajē nhĩpēx to hã harēnh
Juãw 15.1-2; Eprêw 5.7-8; Xiakre 1.2-4*

⁵ Nē mãn ka mē arĩ Tirtũm kapēr ã kagã htũm kwỳ hã ano htỳx japēr. Mē pahpē Tirtũm krajē mã kapēr jarēnh kot:

Koja Pahi Maati tanhmã mē ate amnhĩ tomnuj to nē mē amã kapēr ka mē ama nē mar t̄yx nē mēmojta kaga kurē kumrēx. No mē ama nē tee ri kot nē akurē xw̄ynhta kukamã ajamaxpēr o ri akapri o axtem nē Tirtūm kaga hkēt nē. Ama nē kot amã mēmoj nē kapēr xw̄ynhta kaga kurē kumrēx.

⁶ Na hte Tirtūm kām mē pajapē hã tanhmã mē pahte amnhĩ tomnuj to hã mē pahpumu nē hã tanhmã mē panhĩpēx to. Tām mē pahte amnhĩ nhĩpēx o papa kaxyw. Kot mē pahpē hkra hã mē pajarēnh jakamã na hte ã mē pahte tām amnhĩ nhĩpēx o papa kaxyw mē panhĩpēx anē. Anē.

⁷ Jakamã kot kaj mē tanhmã amnhĩ tomnuj toja m̄yrapē tanhmã apunuj kute nē ri apa htã no ãm tee ri amnhĩ kukamã ajamaxpēr hkēt nē. Kēt mē ãm ajamaxpēr o:

—Nã ixte tām amnhĩ nhĩpēx kaxyw na Tirtūm ã inhĩpēx anē. Ixpē hkra hã ixte amnhĩ to mex o ixpa prãm x̄aj ã inhĩpēx anē.

Anh̄yr o m̄an kēt ajamaxpēr. Na hte mē hipēēxã mē hkra kot amnhĩ to mex kaxyw ã mē hipēx anē. Tã Tirtūm na hte mē urak nē ã mē panhĩpēx anē. ⁸ No koja mēhō hkra kot tanhmã amnhĩ tomnuj to hã omu nē ãm omu nē hã tanhmã ho hkēt nē. Hã koja hkraja te hipēēxã hkēt nē hã awrãre nē ri pa pyrak. Tã mē pahpē Tirtūm krajaja kot puj mē tanhmã amnhĩ tomnuj to nhūm ja hã mē pahpumu nē hã tanhmã mē pahto. Nom mē kēp hkra hkēt xw̄ynhjaja nhūm hte ja hã mē omu nē ãm hã mē omu nē hã kormã tanhmã mē hipēx to hkēt nē.

⁹ Nē na hte mē panhĩpēēxã mēmoj tã mē pamã karō pu htem kuma nē hkōt amnhĩ nhĩpēx. Ja mex. Nom kaxkwa kamã Mēpahpãm maati ja mē pahte mar nē hkōt amnhĩ nhĩpēx ja na kēt mex kumrēx. Kot puj mē ã amnhĩ nhĩpēx anē nē nh̄yrmã kuri pamex nē pahtir tūm nē papa ho papa.

¹⁰ Nē mēhpr̄ire na htem hamaakro nhūm mē hipēēxã tanhmã hã mē ho. Hã mē hkaprēpr̄ek r̄y hã mē kām akir. Amnhĩ krã hkōt tanhmã mē hipēx to. Mē kot ja hã amnhĩ pumunh nē axte hkēt kaxyw. Ja mex. Tã mē papajaja. Mē pahpē Tirtūm kra na pu htem tōhã tanhmã amnhĩ tomnuj to nhūm mē pahpumu nē tanhmã hã mē pahto. Mē pahte amnhĩ pumunh nē axte hkēt kaxyw. Urak nē amnhĩ to mex pix o papa kaxyw. ¹¹ Na hte mēmoj tã tanhmã mē panhĩpēx to pu mē tee ri amnhĩ pumu nē pahkapri nē pahk̄inh kēt nē ri papa. Nom kot puj mē tokyx tanhmã amnhĩ tomnuj tota kaga nē akup̄ym Tirtūm kōt tām amnhĩ nhĩpēx o papa nē akup̄ym pahk̄inh nē pajamakētkati nē ri papa.

Mē pahte Tirtūm kaga hkēt ã mē pamã karō

¹² Jakamã e kwa kēr ka mē amnhĩ to ht̄yx nē apa. Mē kot Kris ã tanhmã mē anhĩpēx to htãã. ãm Tirtūm kot pix mã amnhĩ nhĩpēx mex pē ak̄inh nē apa. ¹³ Kēr kē Kris kōt atōjē hō tee ri mēmoj tã amnhĩ pumunh kōt ra Tirtūm kaga kaxyw tã ã mē ate amnhĩ nhĩpēx anh̄yr ã mē apumu nē mē apyrã nē akup̄ym hkōt amnhĩ xãm t̄yx nē hkaga hkēt nē.

¹⁴ Nē kēr ka mē tām ri axpēn nhĩpēx o ri apa. Jao axpēn kōt ajamakētkati nē ri apa nē amnhĩ to mex pix kukamã ajamaxpēr. No kot kaj mē anh̄yr kēt nē nh̄yrmã mē panhō Pahi Maati hw̄yr ax̄apir nē kuri amex nē apa hkēt nē.

¹⁵ Na hte Tirtūm mē pahto mex nē mēmoj to mē pakutã nojarēt rãhã o pa. Jakamã kwa kēr ka mē hkaga hkēt nē. Nē tanhmã ri ajamaxpēr punuj to ho ri apa hkēt nē. Kot ka mē ã amnhĩ nhĩpēx anē nhūm Kris kōt mē pahkw̄yjaja ja hã mē apumu nē mē apyrã nē tanhmã amnhĩ tomnuj.

¹⁶ Nê kêr ka mê axpën kãm apijaàm kêt o ri apa hkêt nê. Nê te finat Ejau kot amnhî nhîpêx pyrâk o ri apa hkêt nê. Na pre Tirtûm â hpijaàm kêt nê hkwyjê kamâ hpijaàm kêt o pa. Nê Tirtûm mâ hamaxpêr kêt kumrêx. Kêp Ijak kra kot wa jakamâ koja nhÿrmâ hipêêxâ mÿr pê kêp hikukrêx nê ô pika piitâ ho ârik pa. Hâmri nhûm hipêêxâ kot ho Tirtûm wÿr nhûm kot ho mex kaxyw mâ tâ nhûm axtem nê mêmo arîgro hâ kãm prâm xaj kot kêp mêmoj to ârik mâ xwÿnhata htô Jako mâ hkaga hpa. Mânkwrÿtre gôj kãm âm prâm xaj kãm hkaga hpa. Jakamâ nhûm Jako hpânhâ te kêp Ijak kra kot wa pyrâ nê mÿr pê ô mêmoj piitâ ho ârik mâ. ¹⁷ Gaa nhûm Ejau tee ri â amnhî nhîpêx anhÿrja mâ hamaxpêr o hkaprî nê. Nê tee ri kãm Jako kot akupÿm kãm mêmojta nhôr prâm kaprÿ. Nê mur nê hâ hipêêxâ wÿ no nhûm axte kãm mêmoj nhôr kêt nê. Nhûm kot ho Tirtûm wÿr kaxyw tee ri amnhî to kuwÿ no nhûm kuma nê âm kuma nê kãm ho anhÿr kêt nê.

¹⁸ Nê amnepê mâ Tirtûm kot mê panhîgêxjê mâ kapêr kaxyw na prem hixêt prêk pê Sinai jarênhja wÿr akuprô nê hparpê kuhê. Hâmri nhûm hixêt nhîmôk â kuwy hpôk rax kumrêx. Nê kuwy mÿr ri kakrâ htyk ajêt. Nê kôk âpêr tÿx nê. Nhûm Ijaewjaja hixêt krax â omu nê kãm maa ho httert o kuhê. ¹⁹⁻²¹ Hâmri nhûm mêhõ pifti kakô nhûm Tirtûm hixêt nê mê kãm kapêr nê mê kãm:

—E mê inhma. Kêr ka mê hixêt â axâpir kêt nê. Kot kaj mê atô hâ api rÿ mê akrit ô hâ api ka mê ja hâ omu nê kaxyw kên rûnh kwÿ jamÿ nê ho htak o apî. Anê.

Hâmri nhûm mê piitâ tee ri kuma nê kãm ma htÿx kumrêx nê amnhî nê kãm:

—Kwa hâmri Tirtûm. Axte mê inhmâ mêmoj jarênh kêt nê. Mojes pix mâ mân mê ixkaxyw tanhmâ kãm akapêr to. Anê.

Jakamâ nhûm Mojes Tirtûm mâ amnhî jarênh nê kapêr mar kaxyw hixêtja â api. Kãm ma nê httert râhâ mô nê hâ api. ²² Nom mê kãm ma ho Tirtûm mâ amnhî jarênh tâ mê papajaja na pu htem mê krom paxâmhîx kãm amnhî jarênh o papa. Na pu htem kãm amnhî jarênh kaxyw nê hixêt prêk â paxâpir kêt nê. Te ra mê pahte ma kaxkwa hwÿr ô krî hwÿr paxâpir nê pano ho omunh pê kãm amnhî jarênh pyrâk. Ô krîja mex o mex. Kamâ kapêr o mê wrÿk xwÿnhjaja ohtô o ohtô. Na htem kamâ hkînh râhâ ho pa ho pa.

²³ Nê ô krî hwÿr na hte hkra xâpir xwÿnhjaja ri pa. Nê mê papajaja na pu htem kãm amnhî jarênh kaxyw nê te kaxkwa kamâ kuri pakuhê nê kãm amnhî jarênh pyrâk o amnhî nhîpêx. Te mê pahpê hkra kot wa pyrâk jakamâ mê pamâ uma hkêt. Nhûm pre Tirtûm ra ô kagâ kamâ mê pakutêp amnhîm mê panhîxi hâ kagâ hpa. Na hte mêmoj piitâ hamâr o hkrî. Nê krîja kamâ amnepêm kormâ Kris kot mê pahwÿr wrÿk kêt ri nhûm ra amnhî kaxyw Tirtûm kôt hamaxpêr mex xwÿnhjaja haxwÿja ra kamâ ri pa. Ra Tirtûm kot mê ho hkra jakamâ nhûm mê kuri ri pa ho pa. ²⁴ Nê Jejus haxwÿja kamâ pa ho pa. Na pre mê panê htyk nê hkamrô pikapîrja o mê pahte amnhî tomnuj pânâ amnhîre. Jakamâ na pu htem hkôt amnhî xunhwÿ nhûm mê pahto hkra pu mê paxâmhîx ri Tirtûm mâ amnhî jarênh nê amnhî to hwÿr o papa.

Amnepêm na pre Tirtûm tee ri Kaî kot htô Apew pîr nê hkamrô pikapîrja â omu nê hamaxpêr o:

—Nâ â kot amnhî nhîpêx anhÿr jakamâ kot paj hâ homnuj tÿx nê. Anê.

Tâ ra hpânhâ Jejus kot mê panê htyk nê hkamrô pikapîrja â omu nê ra axtem hamaxpêr o:

—Nà ãm hãmri na Ixkraja mē nē ty. Jakamã mē kot hkôt amnhĩ xunhwÿr xwÿnhjaja kot pa Ixkra kukwak ri mē kot amnhĩ tomnuj mÿrapê tanhmã mē ho hkêt nē.

Anhÿr o mē pakukamã hamaxpêr. Æ hamaxpêr anhÿrja mex o mex.

²⁵ Na pre Mojes Tirtũm nhÿ hã mē panhĩgêxjê mã xatã mē kãm Tirtũm kapêr jarênh o ri pa nhũm mē kuma nē hkôt amnhĩ nhĩpêx o pa. Tã gaa nē ra hã nohkêt pa nē akupÿm mē kot amnhĩ nhĩpêx tũm o awjanã nhũm Tirtũm tee ri ja hã mē omu nē mÿrapê tanhmã mē hipêx to. Tã nhũm Kraja kaxkwa rũm mē pahwÿr wrÿ nē mē pamã kapêr. Jakamã kwa mē okora kêr pu mē panhĩgêtjê pyrã nē mē pahte amnhĩ nhĩpêx tũm o paxujanãr kêt nē. Kot puj mē anē nhũm Tirtũm ja hã mē pahpumu nē mē urak nē ja hã tanhmã mē panhĩpêx to.

²⁶ Amnepêm Tirtũm kot hixêt prêk pê Sinai kamã mē kãm kapêrja. Na pre kapêr tÿx o pika ho àk nhũm htertet tÿx nē. Tã koja nhÿrmã axte pika ho àk nē kaxkwa ho àk nhũm wa hamê htertet tÿx kumrêx. Koja axte ho anhÿr ho pixi nē axte ho anhÿr kêt nē. ²⁷ Tã nhÿrmã axte mēmoj to àk ã amnhĩ jarênh jakamã koja mēmoj to kator xwÿnhnta piitã ho àk. Nē mē pahte panhĩhkra ho mēmoj nhĩpêx xwÿnhja nhũm ho àk nhũm htertet tÿx kãm hpigrãnh pa nē hapêx. Nhũm mēmoj htertet nē hpigrãnh kêt xwÿnh pixjaja arĩ rãhã ho rãhã.

²⁸ No Tirtũm nhõ krĩ koja htertet nē hapêx kêt nē. Nē mē papajaja mē pahpê hkra jakamã te ra kuri õ krĩ kamã ri mē papa pyrãk. Jakamã kot puj nē mē urak nē papajêx kêt nē. Jakamã e kwa kêr pu mē amnhĩ tã Tirtũm mã mex o mex ã harênh nē hã pahpijaãm rãhã ho papa. Nē tanhmã amnhĩ tomnuj to hã amnhĩ pumu nē Tirtũm pumaj mēmojta kaga kurê kumrêx. Æ mē pahte amnhĩ nhĩpêx anhÿr o papaja na Tirtũm kãm hprãm. ²⁹ Hihtÿx o hihtÿx jakamã koja mēmoj tã akamã gryk kot kaj amex kêt o amex kêt.

13

Mē pahte Tirtũm kãm hprãm xã hkôt amnhĩ nhĩpêx ã mē pamã karõ

Rõmãn 12.1-2; Epes 4.1-3; Korosê 1.10-11; Wam Tesarõn 4.1-12; Wam Pêtre 2.11-12; Wam Juãw 3.17-18

¹ Nē e kwa Kris kôt ixtõxjaja. Kêr pu mē arĩ Kris kôt pahkwÿjê ho mex o mãn axpên kôt ri papa. Nē kêr pu mē tanhmã pahpunuj to hã amnhĩ pumunh tã axpên to mex mã panhÿrer kêt nē. Æ axpên nhĩpêx anhÿr rãhã ho papa.

² Nē amnepê mã na pre mēmojaja nhÿhÿnh mra nē mē panhĩgêtjê hõ hwÿr pøj. Hãmri nhũm mē omu nē htÿx axtem krĩ hõ nhõ xwÿnh ã mē hkamnhĩx tã no nhũm mē kêp Tirtũm kapêr o mē wrÿk xwÿnh kwÿ na prem. Hãmri nhũm amnhĩ nhõrkwÿ hwÿr mē kuwÿ nhũm mē ma hkôt mra nē kuri pøj nē kutã apku. Jakamã kwa koja nhÿhÿnh krĩ hõ rũm mēmojaja ma mē awÿr mõ ka mē omu nē axãmnhĩx amnhĩ nhõrkwÿ hwÿr mē hwÿr kurê kumrêx kē mē ari pøj. Æ mē hipêx anhÿr o apa hãmri nē nhÿrmã mē panhĩgêtja pyrã nē amnhĩ wÿr Tirtũm kapêr o mē wrÿk xwÿnhjê hõ hwÿr japêr. Mē urak nē ja hã mē omunh kêt tã atÿx amnhĩ wÿr mē awÿ nhũm ja mē amã mex o mex.

³ Nē kêr ka mē ra mē kot Jejus ã mē akwÿjê pynênh nē mē hagjênh xwÿnhjê mã ajamaxpêr rãhã ho ri apa nē mē ho ajamakêtkati hkêt nē. Te mē kajaja mē thkõ hã mē hagjênh xã kamã apunuj nē akri pyrãk o mē kãm ajamaxpêr o ri apa. Jao mē kamã axukapri ho mē hwÿr mra nē mē kãm mēmoj nhõr o ri apa.

⁴ Nê mê kot axpên to hprôja na mex. Nom kêr ka mê amyjaja âm aprô pix tânopxar o ri apa. Nê mê anijaja mê ajaxwýja amjên pix tânopxar o ri apa. No mê hkuprýjê hwýr mê mrar xwýnhjaja nê nhâm mê kêp mê hprô ho amnhíkati xwýnhjaja nê nhâm mê kêp mê mjên o amnhíkati xwýnhjaja koja Tirtüm ja hã mê omu nê mê homnuj tÿx kumrêx.

⁵⁻⁶ Nê kêr ka mê akâxpore rûnh kêt â amnhî pumu nê tee ri amnhî kukamã ajamaxpêr o akapri hkêt nê. Na pre Tirtüm mê pamã kapêr o: Kot paj akôt ri ixpa rãhã ho ixpa nê aa arer rÿ akaga hkêt kumrêx.

Anhÿr jakamã kot kaj mê akâxpore grire htã akapri nê apa hkêt nê. Aa Tirtüm kot mê pahkaga hkêt â amnhî jarênh jakamã mêmoj kot pu wem omu nê pamã nhâm ri mê uma ho papa? Tirtüm kot mê pahkôt pa ho pa kênã. Jakamã na pu htem pajamaxpêr o:

Nà Pahi Maatija ra kot ixkôt pa ho pa xwýnh jakamã mêmo kot pa hkêt ri inhmã uma ho ixpa?

Mêmo kot kêt ri tanhmã kêp ixto?

Anhÿr o pajamaxpêr o papa. ⁷ Nê mê kot Kris mã mê ajamãr o mê pa xwýnh ra mê htyk xwýnhjaja ka mê arî mê kot tanhmã amnhî nhîpêx to ho paja mã ajamaxpêr rãhã ho ri apa. Na prem Tirtüm kapêr o mê ajahkre mex nê. Nê tãm ri amnhî nhîpêx o ri mê akôt pa. Nê amnhî kaxyw Tirtüm kôt pix mã hamaxpêr rãhã ty. Tã kêr ka mê urak nê â amnhî nhîpêx anhÿr o ri apa rãhã ty.

⁸ Nê Jejus Krisja arî rãhãã. Nê amnepê mã kot amnhî nhîpêxja mãânên arî rãhãã. Aa kot amnhî nhîpêxja nhîjuk ri axtem tanhmã amnhî nhîpêx to hkêt.

⁹ Nê kwa kêr ka mê Tirtüm kôt amnhî nhîpêx rãhã ho ri apa. Na hte kapêr o hêx xwýnhjaja mê awÿr mra nê mê amã:

—Amnepêm mê ate Tirtüm kot mê amex â mê ajarênh kaxyw mê ate kãm mêmo mry nhôr nê akupÿm hamÿnh nê hkur o apa htã ra ja ho anhÿr kaga. Kwa mê ja ho awjanã nê axte â amnhî nhîpêx anhÿr o ri apa. Kê Tirtüm ja hã mê apumunh kôt mê amex â mê ajarê.

Anhÿr o mê amã kapêr. Nom xã na hte Tirtüm â mê pahte amnhî nhîpêx anhÿr â mê pahpumunh kôt mê pamex â mê pajarê? Xã na htem mêmo mê apkur xã hkur pê amnhî kaxyw Jejus kôt hamaxpêr tÿx o pa? Nà na htem anhÿr kêt nê. Na pu htem mêmoj kur kôt pamã Tirtüm kînh kêt nê. Kêt mê paxâpkur xãja mê panhî pix o hihtÿx kaxyw na. Na hte Jejus kôt mê pahto paxihtÿx kêt nê. Âm Tirtüm kot amarî kãm mê pajapê nê mêmoj to mê pakutã nojarêt jakamã na pu htem ja hã amnhî pumu nê amnhî kaxyw hkôt pajamaxpêr tÿx o papa.

¹⁰ Tirtümja Jejus kot mê panê htyk â omunh xã hkôt ra kot mê pamex â mê pajarênh jakamã mo kaxyw kot pu mê axte kot mê pamex â mê pajarênh kaxyw kãm mêmo mry gô nê hkwÿ hku? Kojã mêhõ akupÿm Tirtüm kapêr tÿm o ujanãr jao Jejus kot nê htyk nê hkamrô pikapîrja kaga. ¹¹ Amnepêm na pre patre maatijaja tôhã mê kãm mêmo mry hpar xwýnh hkamrô ru nê guhkrax kãm kuru nê hamÿ nê ma o mra nê Tirtüm nhôrkwÿ kaàkre hwÿr hitom maati hwÿr ho agjê. Tirtüm kot mê omunh nê axte mê kot amnhî tomnuj mã hamaxpêr kêt kaxyw. Hãmri nhùm hpãnhã î mÿ nê krî pê ho kato nê ma o mra nê nhÿri amÿm hkwyjê hkãx â ho hxêp na. Tirtüm kapêr tÿm kôt na prem â amnhî nhîpêx anhÿr o pa. ¹² Tã ja pyrã nê na prem ma krî pê amÿm Jejus o tẽ nê kupî nhùm hkamrô axkapî. Kot mê pahte amnhî tomnuj pãnhã amnhîrer nê mê pahto mê pahpê Tirtüm kra kaxyw â htyk nê hkamrô pikapîr

anê. ¹³ Na prem Tirtûm kapêr tûm gryk ã Jejus kaga nê pôristijê mã anê nhûm mē ma krī pê ho kato nê o tē nê kupī. Tã kēr pu mē jajê rom Jejus gryk ã mãn Tirtûm kapêr tûm kaga. Kwār mē mãmrī Jejus pyrà nê Tirtûm ã tanhmã mē pahto nê amnhī nê nhỹhỹm mē pajano. ¹⁴ Kêt jar mē papapxàja kēp mē papapxà kumrêx kêt. Nê jar mē panhō krīja kēp mē panhō krī kumrêx kêt. Mē pamã te kot pô nhĩrõnh o ixkre pix pyràk. No kêt mē panhō krī kumrêx koja jar mē panhō krī rom aa hapêx kêt nê. Tã tãm na pu mē kormã ma hwÿr papa kaxyw arī amnhī tã Tirtûm jamãr o papa.

¹⁵ Nê na htem Ijaew arī ohtô nê amnhī pãnhã Tirtûm mã mry hpar ho pa. Nom mē papajaja kot puj mē axte ã amnhī nhĩpêx anhÿr hkêt nê. Kot puj mē ãm Jejus kukwak ri Tirtûm mã mex o mex ã harênh rãhã ho mãn papa. Jao te mē pahte kãm hkĩnh xã nhõr pyràk o amnhī nhĩpêx.

¹⁶ Nê kēr pu mē arī axpēn to mex o ri axpēn kôt papa. Nê kê mēhõ kēp amrakati japêr ka ja hã omu nê amnhī kutã kãm anhõ mēmoj kwÿ. ã kot puj mē axpēn nhĩpêx anhÿr rãhã ho ri axpēn kôt papa. Kot puj mē anê nê te mē pahte Tirtûm mã hkĩnh xã nhõr pyràk o amnhī nhĩpêx. ã mē pahte amnhī nhĩpêx anhÿrja na mex o mex.

¹⁷ Nê kēr ka mē Kris kôt mē akrãhtũmjê kapêr ma nê mē hkôt amnhī nhĩpêx mex nê. Na htem Tirtûm mã mē ajamãr o ri mē akôt pa. Koja mē nhỹrmã mē kot tanhmã mē anhĩpêx to hã Tirtûm mã amnhī jarê. Jakamã mē kãm mē ato ajuta prãm. Tã kēr ka mē kapêr ma nê mē hkôt ri amnhī nhĩpêx mex o ri apa. Kēr kê mē amnhī tã mē apumu nê hkĩnh nê. No kot kaj mē ama nê ãm mē ama nhũm mē tee ri amnhī tã mē apumu nê hkaprī nê. Jao tee ri kot tanhmã mē ato ajuta mēx to hkukamã hamaxpêr.

¹⁸ Nê kwa kēr ka mē ixto Tirtûm wÿr rãhã ho apa. Inhmã Tirtûm noo mã tanhmã amnhī tomnuj to hprãm kêt. ãm inhmã amnhī to mex pix o ri ixpa hprãm.

¹⁹ Nê kēr ka mē ixto awÿ kê tokyx akupÿm mē awÿr inhmê. Na pa ra inhmã mē apumunh prãm tÿx nê.

Kagã nhĩpêx xwÿnh kot tanhmã mē ho Tirtûm wÿr to hã harênh

Epes 3.14-19; Piriapos 1.0-11; Wam Tesarõn 3.9-13, 5.23; Sikũn Tesarõn 1.11-12, 2.16-17

²⁰ Nê mē panhō Pahihti Jejus Krisja na hte mē panhĩpêx o te ôwêhti jamãr xwÿnh kot hkrit jamãr pyràk o pa. Jakamã kēp mē pajamãr xwÿnh maati mex na. Na pre mē panê ty nhũm Tirtûm akupÿm mē pamã ho htĩr nê mē pamã harênh o:

—E ra Ixkra kot mē anê htyk jakamã kēr ka mē ãm ixkapêr nyw kôt pix mã ri amnhī nhĩpêx o ri apa. Kot kaj mē ã amnhī nhĩpêx anê hãmri nê nhỹrmã ty pa akupÿm mē ato mē atĩr ka mē ixri atĩr tũm nê apa ho apa. Anê.

Tirtûm kēp mē pahto mē pajamakêtkati nê ri mē papa xwÿnh na. ²¹ Tã na pa hte tanhmã mē ato hwÿr to ho ixpa nê mē ato hwÿr o:

—Pa Tirtûm. E kwa tanhmã ixkwÿjê ho mex to kê mē kãm akapêr kôt pix mã amnhī nhĩpêx o pa hprãm. Nê mē kãm tãm amnhī nhĩpêx o pa hprãm. Nê kê Jejus haxwÿja tanhmã mē ho mex to kê mē war amã hprãm xã hkôt pix mã war amã tanhmã ri amnhī nhĩpêx to ho pa. Anê.

E kēr pu mē arī Jejus Kris mã mex o mex ã harênh rãhã ho papa.

Kagã jatur xã kamã mēmoj jarênh

²² E Kris kôt ixkrãmnhwÿjaja. Nã na pa ã mē amã kagã nhĩpêx anê. Jejus kôt mē ato mē axihtÿx kaxyw. No na pa ho ry nê hipêx kêt nê. Ixte ho grire nê

hipêx jakamã kwa kêr ka mẽ kamã harẽ nõ mar tỳx nõ hkõt amnhĩ nhĩpêx mex o ri apa.

²³Nõ mãn ka mẽ ra Ximotre jarẽnh mar japêr. Na pre Kris ã mẽ haghjênh xà kamã hkrĩ hã apkati xohtô nõ. Tã nhũm xep mẽ ra kator. Tã koja kormã mẽ awỳr inhmõr xwỳj ri man ixwỳr mõ nõ hpõx japêr kot paj ma amnhĩ kõt mẽ awỳr o mõ ka mẽ omu.

²⁴Nõ kêr ka mẽ kot Kris mã mẽ ajamãr xwỳnhjê mã ijarẽ. Nõ atar Tĩrtũm krajê piitã mẽ kãm ijarẽ.

Nõ ota jar Tĩrtũm kra hkwỳja piitã mẽ awỳr hpêr mẽ.

²⁵E kê Tĩrtũm mẽ apiitã mẽ ato mex o pa. Tã ãm ja pix. Na pa ã mẽ amã hã kagà ho anẽ. Na hapêx.

Xiakre

Xiakre kot Jejus kôt hkwyjê piitã hwÿr kagã nê mēnh

Xiakre na pre kagãja nhîpêx. Kêp Jejus tô nê kêp Jerujarê kamã mê kot Jejus kôt amnhî xunhwÿr xwÿnhjê nhô pastô na pre. Nê kêp Ijaew. Jakamã na pre hkwyjê mã kagãja nhîpêx nê krî piitã hkôt urãk nê Jejus kôt mê kot amnhî xunhwÿr xwÿnhjê hwÿr kurê. Jejus ã mê kãm mê hkurê xwÿnhjaja na prem mê hipêx kati nhũm mê amnhî xà htÿx kamã hamak o pa. Jakamã nhũm Xiakre kot mê hamaxpêr o mê hihtÿx kaxyw kagãja nhîpêx nê mê hwÿr kurê nê mê kãm:

¹ Pa ixkwÿjaja. Xà mê amex? E ixpê Xiakre na pa. Ixte Tirtũm mê Pahihti Jejus Kris wa kãm tanhmã amnhî nhîpêx to xwÿnh na pa. Jakamã kot paj kagãja nhîpêx nê pika piitã hkôt mê apiitã mê awÿr kurê. Mê apê Tirtũm krajê hwÿr.

*Mê pahpunuj tâ mê pahte amnhî kaxyw Tirtũm kôt pajamaxpêr
Rukre 6.20-23; Rômãn 5.3-5; Korosê 1.11; Wam Pêtre 4.12-19*

²⁻³ E ixkwÿjaja. Kêr ka mê atô tanhmã amnhî to rÿ tanhmã apunuj to. Rÿ mēhō tanhmã Jejus ã mê anhîpêx to. Tã kêr ka mê ja hã amnhî pumu nê tee ri amnhî kukamã ajamaxpêr o ri akaprî hkêt nê. Arî akînh kãm amnhî kaxyw Tirtũm kôt ajamaxpêr tÿx rãhã ho ri apa. Kot kaj mê ã amnhî nhîpêx anê nê gaa nê rî mēmoj punuj pê Jejus kôt amnhî xunhwÿr tÿx nê. Jakamã kwa kêr ka mê tanhmã apunuj to hã amnhî pumu nê ã mê ate amnhî nhîpêx anhÿrja kukamã ajamaxpêr pê akînh nê ri apa. ⁴ Nom kêr ka mê tee ri tanhmã apunuj to hã amnhî pumu nê akaprî xaj Tirtũm kaga hkêt nê. ãm amnhî kaxyw hkôt ajamaxpêr tÿx rãhã ho ri apa. Kot kaj mê ã amnhî nhîpêx anê nê gaa nê Tirtũm noo mã tãm amnhî nhîpêx mex o ri apa. Nê kãm hprãm xà hkôt pix mã amnhî nhîpêx o apa.

*Mê pahte tanhmã amnhî kute hã amnhî pumunh kôt amnhî to Tirtũm wÿr ã
mê pamã karō*

Matêwre 21.18-22

⁵ Nê kêr ka mê mēmoj mÿrapê tanhmã apunuj to hãmri nê tee ri ja hã amã Tirtũm mã ajamaxpêr tÿx prãm nhũm apê ja hihtÿx japêr. Rÿ mēmoj tanhmã apê amnhî nhîpêx to ka tee ri hukkamã ajamaxpêr japêr. Kêr ka mê ã ajamaxpêr anhÿr japêr hãmri nê amnhî to Tirtũm wÿr kurê kumrêx. Kot amã ajamaxpêr mex nhôr nhũm ate ÿ hã tãm ajamaxpêr kaxyw amnhî to awÿ. Kot kaj mê ã amnhî to hwÿr anê nhũm amnhî tâ mê ama nê mēmojta kutã tanhmã ato axihtÿx to kurê kumrêx ka ÿ hã hkôt ajamaxpêr tÿx mex o ri apa. Jao tanhmã akute htã akînh nê ajamakêtkati nê ri apa. Koja Tirtũm tee ri amã mēmoj kôt ajamaxpêr tÿx prãm kaprÿ hã apumu nê hã amã ãkjêr kêt nê. Koja ate amnhî to hwÿrta ma nê tanhmã ato mex to. ⁶ Nom kêr ka mê amnhî to hwÿr kãm tee ri amnhî kukamã ajamaxpêr kati hkêt nê. Rÿ ajamaxpêr o: —Koonên. Koja apu Tirtũm inhmã ja ho anhÿr japêr.

Anhÿr o tee ri amnhî kukamã ajamaxpêr kati hkêt nê. ãm akînh kãm tanhmã ate amnhî to hwÿr toja kukamã ajamaxpêr o:

—Nã koja inhmã ho anê. Ixte amnhî kaxyw kãm ijamaxpêr nê amnhî to hwÿr xà hkôt koja inhmã tanhmã amnhî nhîpêx to.

Anhÿr o hkamnàr rom ã amnhĩ kukamã ajamaxpër anë.

Nom kot kaj mẽ tanhmã amnhĩ to hwÿr to nẽ tee ri amnhĩ kukamã ajamaxpër kati nẽ hkõt ajamaxpër tÿx kêt nẽ. Nẽ te kòk nhãm àpèr nẽ nhãm àpèrta pyrã nẽ nhãm ri ajamaxpër nẽ nhãm ri ajamaxpërja o hkõt ajamaxpër kêt nẽ. Kot kaj mẽ ã amnhĩ nhĩpèx anë nhũm Tìrtùm tee ri ja hã mẽ apumu nhũm ja kãm mex kêt nẽ. ⁷⁻⁸ ã mẽ hamaxpër anhÿr xwÿnhjaja na htem nhãm hamaxpër nẽ nhãm hamaxpër jao hamaxpër mex kêt nẽ. Jakamã kot kaj mẽ ã ajamaxpër anhÿr o amnhĩ to Tìrtùm wÿ hãmri nẽ ãm amnhĩ to hwÿr kaprÿ. Koja ama nẽ ãm ama. Nom kot kaj mẽ tanhmã akute hã amnhĩ kaxyw hkõt ajamaxpër tÿx pè amnhĩ to awÿ. Nẽ tee ri amnhĩ kukamã ajamaxpër kati hkõt kãm tanhmã amnhĩ to hwÿr to nhũm amnhĩ tã ama nẽ hkĩnh nẽ tanhmã amã mẽmoj nhĩpèx to. Mẽ ate hã axàhwÿr xà hkõt tanhmã mẽ amã mẽmoj nhĩpèx to.

*Mẽ kèp amrakati xwÿnh mẽ mẽ kot amnhĩ to rũnh xwÿnhjè jarènh
Eprêw 13.5-6; Wam Pètre 1.24-25*

⁹ Nẽ kwa mẽ akàxpore hkèt xwÿnhjaja. Jar mẽ apè amrakati htã mẽ apè Tìrtùm kra na ka mẽ. Jakamã kèr ka mẽ akàxpore rũnh kêt tã mẽ apè Tìrtùm kra hã amnhĩ pumunh kòt ajamakètkati nẽ nẽ akĩnh nẽ apa.

¹⁰⁻¹¹ Nẽ mẽ akàxpore rũnh xwÿnhjaja. Mẽ akàxpore rũnh nẽ mẽ akukrèx rũnh tã kot kaj mẽ nhÿrmã ty nẽ piitã rer pa nẽ mẽ kèp amrakati xwÿnhjè pyrã nẽ anhÿ kamã Tìrtùm kuri akrĩ nhũm tanhmã mẽ ajarènh to. Te mẽ apè mẽmo pixòrà kot amnhĩ nhĩpèx pyrãk. Na hte kwÿhtã axpèn pè axpòt nẽ muxre nẽ mex nẽ harir. Tã gaa nẽ rĩ hã myt xàhpanh mẽ nhũm ra nhòore. Nẽ gaa nẽ ra grã pa nẽ ròròk nẽ hapèx. Tã kot kaj mẽ nhÿrmã uràk nẽ ty nẽ akukrèx rer pa. Jakamã kwa kèr ka mẽ akàxpore rũnh pumunh kòt akĩnh nẽ ri apa hkèt nẽ. Kèt ãm mẽ apè Tìrtùm kra hã mãn amnhĩ pumunh kòt akĩnh nẽ apa.

Mẽ pahpunuj kòt pagryk nẽ mẽ pahkurè

¹² Nẽ kot kaj mẽ atò tanhmã apunuj to htã arĩ amnhĩ kaxyw Tìrtùm mã ajamaxpër tÿx rãhã ho ri apa. No tanhmã apunuj to hã amnhĩ pumu nẽ hkaga hkèt nẽ. Rÿ kot tanhmã ato xwÿnhhta kèr ka mẽ amnhĩ tã kamã agryk nẽ tanhmã ho hkèt nẽ. ãm Jejus kòt pix mã amnhĩ nhĩpèx rãhã ho ri apa. Kèr kè Tìrtùm amã hkĩnh ã amnhĩ tã apumu nẽ amex ã ajarè. Ka nhÿrmã kuri amex kumrèx nẽ atĩr tùm nẽ apa ho apa. Ra kot mẽ pakukamã mẽ pahtã amnhĩ jarènh xà hkõt. Jakamã kèr ka mẽ tanhmã apunuj to htã ã amnhĩ kukamã ajamaxpër anhÿr pè akĩnh nẽ apa.

¹³ Nẽ Tìrtùm aa kãm tanhmã amnhĩ tomnuj to hprãm kèt. Nẽ mẽ papajaja mẽ pahte tanhmã amnhĩ tomnuj to kaxyw na hte mẽ pamã tanhmã àmnènh to rÿ mẽ pamã mẽ pajamaxpër punuj jagjènh kèt nẽ. Jakamã kot ka mẽ atò amã tanhmã amnhĩ tomnuj to hprãm tã kwa kèr ka Tìrtùm tãm kot ja kaxyw mẽ akrãm mẽ ajamaxpër punuj jagjènh to hã hkamnhix kèt nẽ. ¹⁴⁻¹⁵ Mẽ papamjaja na pu htem pajamaxpër punuj xà hkõt tanhmã amnhĩ tomnuj to. No Tìrtùm Karò na hte mẽ pamã mẽ pajamaxpër punuj jagjènh kèt nẽ. Mẽ papamjaja na pu htem pajamaxpër punuj nẽ gaa nẽ ra hkòt tanhmã amnhĩ tomnuj to. Hãmri nẽ gaa nẽ ã amnhĩ nhĩpèx anhÿr rãhã ho ri papa. Mẽ kot amnhĩ tomnuj o mẽ pa xwÿnhjaja koja mẽ nhÿrmã ty hãmri nẽ Tìrtùm mẽ Kra wa kuri htĩr tùm nẽ pa ho pa hkèt nẽ.

*Tìrtùm kot tanhmã mẽ pahto mex to hã harènh
Xiakre 3.17-18; Sikũn Pètre 1.3-4*

¹⁶ Nē e ixkwýjaja. Tirtūm kot mē pahte amnhī tomnuj prām xàj mē pamā mē pajamxpēr punuj jagjēnh kēt jakamā kwa kēr ka mē ā ajamxpēr anhýr kēt nē. ¹⁷ Na hte mē pahto mex pix o pa. Na pre myyti ho kato. Kapēr pix o ho kato. Nē mytwýre ho kato. Nē kanhēti ho kato. Ja piitā ho kato nhūm mē pamā hirā mex o harir. Na hte mytwýre tōhā hirā mex o pa. Nē gaa nē nyw kaxyw nē kamāt kō. Nē gaa nē nyw mē nhūm akupým hirā. Ā na hte amnhī nhīpēx anhýr o pa. No Tirtūmja ā kot anhýr kēt. Kot amnhī nhīpēxja ām rāhā ho rāhā. Na hte mē pahto mex pix o pa. No tōhā tanhmā mē pahto mex to nhūm jāā nhūm tanhmā mē pahptomnuj to hkēt nē. ¹⁸ Tā kapēr pix o kot ā mēmoj to kator kot anhýr. Nē mē pamā kapēr o amnhīrit. Kām mē pahto hkra hprām xàj mē pamā Jesus kot tanhmā mē panē amnhī nhīpēx toja nhūm pre mē pamā ho amnhīrit. Na pu prem kuma nē hkōt amnhī xunhwý nhūm amnhī tā mē pahpumu nē mē pahto hkra. Mē pahpē Ijaew kumrēxjaja na pre mē pahto hkra.

*Mē pagryk o papa nē mē pahkurē
Rōmān 12.17-21; Epes 4.25-5.2*

¹⁹ E ixkwýjaja. Kwa mē ixkapēr ma nē hā anohtýx nē ho apa. Koja mēhō Tirtūm kapēr o mē ajahkre kaxyw mē awýr mō nē mē amā kapēr jarē ka mē mar týx nē. Koja mē ate tanhmā amnhī tomnuj to nē mē amā kapēr ka mē amnhī tā ama nē kamā agryk kēt nē. ²⁰ Mē gryk o mē pa xwýnhjaja na htem Tirtūm kapēr kōt ri amnhī nhīpēx kēt nē. ²¹ Jakamā kwa kēr ka mē axte amnhī tomnuj rý ajamxpēr punuj o ri apa hkēt nē. Na htem ohtō nē ā amnhī nhīpēx anhýr o pa nom kēr ka mē kurom Tirtūm kapēr mán amnhī krā him haxrà týx nē. Kapēr o mē ajahkre xwýnhjaja na htem ho mē ajahkre mex o pa. Tā kēr ka mē ama nē amā hkōt amnhī nhīpēx prām rāhā ho ri apa. Na pu htem Tirtūm kapēr ma nē hkōt amnhī nhīpēx o papa hāmri nē nhýrmā Tirtūm mē Kra wa kuri pahtír tūm nē pa mex nē papa ho papa.

*Mē pahte Tirtūm kapēr kōt amnhī nhīpēx ā mē pamā karō
Matēwre 7.24-27; Wam Juāw 2.3-6*

²² Nē kwa mē okora. Kēr ka mē ām Tirtūm kapēr ma nē ām mar kēt nē. Māānēn hkōt amnhī nhīpēx rāhā ho ri apa. Kot kaj mē ama nē ām ama nē hkōt amnhī nhīpēx kēt nē hāmri nē apē Tirtūm kra hā amnhī jarēnh kapry. Jao nhýrmā Tirtūm mē Kra wa kuri atír tūm nē apa hkēt nē. ²³⁻²⁴ Te ho mēhō kot amnhī pumunh xā hpyr nē kamā amnhī pumunh nē amnhī krā hkī jaē rý amnhī kuk tyk pumunh pyrāk. Tā te kot ām ja hā amnhī pumunh nē kot amnhī to mex kēt rāhā akupým amnhī pumunh xā xir nē ma htem nē axte amnhī kuk tyk rý amnhī krā kī jaērta mā hamaxpēr kēt pyrāk. Mē kot Tirtūm kapēr mar nē ām mar nē hkōt amnhī nhīpēx kēt xwýnhjaja te kot ja jarēnh pyrāk. ²⁵ Tā kēr ka mē ā amnhī nhīpēx anhýr kēt nē. Mē ate Tirtūm kapēr kōt amnhī nhīpēx o apa kaxyw xatā kamā harē nē mar týx o apa. Jao hkōt amnhī nhīpēx mex o apa. Tirtūm kot mē pahte tanhmā amnhī nhīpēx to ho papa hā mē pamā karō xāja ām hāmri na. Na htem hkōt amnhī nhīpēx nhūm Tirtūm ja hā mē omu nē mē ho mex nē nhūm mē amnhīx hamakētcati nē hkōt amnhī nhīpēx o pa. ²⁶ Nom koja mēhō kēp Tirtūm kra hā amnhī jarēnh tā htýx ri kapēr punuj o ri pa hāmri nē ām kēp hkra hā amnhī jarēnh kapry. Mē pahpē Tirtūm krajaja na pu htem ā pakapēr anhýr kēt nē. ²⁷ Axtem mē pahte amnhī nhīpēx. Na pu htem mē hā awrā rý mē kēp mē mjēn tyk xwýnhjē ho mex nē mē hā pahpēr o pahpikēnh o papa hkēt nē. Nē tanhmā mē kute hā mē omu

nē mē ho ajuta ho papa. Ā na pu htem pahpê Tirtūm krajaja amnhī nhīpêx anhÿr o papa nhūm Mēpanhīpēêxà Maati Tirtūm ja hā mē pahpumu nē hkīnh nē. No na pu htem mē kot amnhī tomnuj o mē pa xwÿnhjê hkôt ri amnhī nhīpêx kêt nē ām Tirtūm kapêr xà kôt pix mā amnhī nhīpêx nhūm amnhī tā mē pahpumu nē hkīnh nē.

2

*Mē pahte mē piitā mē hipêx o axpēn pyrāk ā mē pamā karō
Rōmān 2.11; Korosē 3.25*

¹ E ixkwÿjaja. Pahihiti Jejus Krisja mex o mex. Tā ra mē ate hkôt amnhī xunhwÿr jakamā kwa kēr ka mē apê hkwÿ hā mē piitā tām mē hipêx o apa. Nē mē hipêx o axpēn pyrāk. ² Jakamā kot kaj mē nhÿrmā Tirtūm kapêr mar kaxyw axpēn wÿr akuprō nhūm hikàxpore rax xwÿnhnta mē akôt axà. Ê mex nē ôr o ĩhkra kamā kàx hāmri nē mē akôt axà. Nhūm hkôt mēhō pē amrakati xwÿnhja tē nē axà. Nom wamta kīnhā kēp amrakati nē ê omnajti nē pikaxônhti. Hāmri nē hikàxpore rax xwÿnhnta hkôt mē awÿr tēn axà. ³ Tā tanhmā kot kaj wem ri wa hipêx to? Xà kot kaj mē wa hipêx o axpēn pyrāk nà? Nà xà kot kaj mē ā wa hipêx anē nē wam àr xwÿnhnta ê mex ā omunh xà hkôt kām kadēre hō gō nē kām:

—E ota kadēre. Māmri hā nhÿ. Anē.

Hāmri nē ê pynajti xwÿnhnta pumu nē axtem nē kām:

—E atar pikap nhÿ.

Anhÿr o ahpÿnhā wa kām akapêr? ⁴ Kot kaj mē ahpÿnhā ā wa hipêx anē nē amnhī tomnuj nē. Wam àr xwÿnhnta ka kām akapêr mex nē tanhmā ho mex to. No hkôt hōta omnajti hā omunh xà hkôt te kamā anhōkre kahak pyrāk o hipêx. Kot kaj mē ā ahpÿnhā wa hipêx anē nhūm Tirtūm tee ri ja hā mē apumu nhūm ja kēp omnuj nē. ⁵ Kwa mē inhma ixkwÿjaja. Mē kēp amrakati xwÿnhjaja mē hikàxpore hkêt tā na hte mē hkwÿjaja amnhī kaxyw Tirtūm kôt hamaxpêr nē hkôt amnhī xunhwÿr nhūm amnhī tā mē omu nē kot mē panhīpêx pyrā nē mē ho hkra. Jakamā jar mē kēp amrakati htā na htem amnhī kaxyw Tirtūm kôt hamaxpêr tÿx rāhā ho pa. Jakamā koja mē nhÿrmā kuri htÿr tūm nē mex kumrêx nē pa ho pa. Mē kām Tirtūm kīnh o mē pa xwÿnh piitā koja mē nhÿrmā ā mex nē ri pa anē. ⁶ Nom kot kaj mē ahpÿnhā mē hipêx nē amnhī tomnuj nē. E pa mēmoj tā mē akukja. Mēmojaja na htem tanhmā mē ato hêx to? Nē mēmojaja na htem juisti mā tanhmā mē ato kapêr punuj to? Xà mē kēp amrakati xwÿnhjaja? Nà mē tām kêt. Mē hikàxpore rūnh xwÿnhjaja na htem ā mē anhīpêx anhÿr o pa. ⁷ Nē ra mē ate hkôt amnhī xunhwÿr xwÿnhja nhūm mē axtem nē tanhmā mē apê ho kapêr to ho pa. Tā ka htem mē kēp amrakati xwÿnhjê rom mē kām akapêr mex nē mē kām kadēre mex gō nhūm mē hā hkrī. ⁸ Tirtūm kapêr ā kagà htūm kot ja jarēnh kot: Kēr ka mē piitā mē hipêx o te ka amā amnhī tā ma pyrāk. Anē.

Ā kot mē pamā karō kot anhÿr. Kapêrja mex kumrêx. Kot puj mē ā axpēn nhīpêx anhÿr jao Tirtūm kām hprām xà hkôt amnhī nhīpêx mex nē. ⁹ Nom kot puj mē ā amnhī nhīpêx anhÿr kêt nē ahpÿnhā tanhmā mē hikàxpore rūnh xwÿnhjê ho mex to nē ahpÿnhā tanhmā mē kēp amrakati xwÿnhjê nhīpêx to japêr. Hā kot puj mē Tirtūm kapêr htūmta nhīrōp pakuhê nē amnhī tomnuj nē. ¹⁰ Kot pu mē kapêr tūm piitā hkôt ri amnhī nhīpêx mex o ri papa htā ām pixire nē hirōp pakuhê. Jao te pahte kapêr piitā hirōp pakuhê pyrāk. ¹¹ Na pre Tirtūm mē pahte mē pahprō pix tānopxar o papa hā mē pamā karō. Nē

mē pamjēn pix tānopxar o papa hā mē pamā karō. Nē mē pahte axpēn par nē mē pahkurē. Jakamā kot puj mē pahprō pix tānopxar mex o ri papa japēr. Nē mē pamjēn pix tānopxar mex o ri papa japēr tā tanhmā pajamexpēr to nē pahkwjējē hōxpī. Jao te Tirtūm kapēr tūm piitā hirōp pakuhē hpar pyrāk o amnhī nhīpēx.

¹²⁻¹³ Koja nhǎrmā Tirtūm mē pahtūr ri tanhmā axpēn nhīpēx to ho papa hā mē pahpumunh kōt tanhmā mē pajarēnh to. Mē pamā axpēn kīnh ā axpēn to mex o papa hā mē pahpumunh kōt mē pajarē rǎy mē pamā axpēn kīnh kēt ā axpēn nhīpēx o papa hā mē pahpumunh kōt mē pajarē. Jakamā mē kamā mē ukapri kēt xwǎnhjaja koja nhǎrmā ja hā mē omu nē mē urāk nē mē kamā ukapri hkēt nē. Nom mē kamā mē ukapri ho mē pa xwǎnhjaja koja ja hā mē omu nē mē urāk nē mē kamā ukapri nē mē nē mē kot amnhī tomnuj o ri axpēn kōt apa. Jakamā kwa kēr ka mē amnhī to mex nē tām axpēn nhīpēx o ri axpēn kōt apa. Nē axpēn mā akapēr mex nē axpēn kamā axukapri pix kukamā ajamexpēr o apa.

Amnhī kaxyw Tirtūm kōt mē hamaxpēr xwǎnhjē jarēnh
Rukre 3.8-14

¹⁴ Nē kwa ixkwǎjaja. Koja mēhō kot amnhī kaxyw Jejus kōt hamaxpēr nē hkōt amnhī xām ā amnhī jarēnh tā hkōt ri amnhī nhīpēx kēt nē. Hā koja nhǎrmā ty hāmri nē tanhmā kot we amnhī to nē Tirtūm mē Jejus wa kuri hūr tūm nē pa ho pa? Nā koja anhǎr kēt nē. Kēp hkra hā amnhī jarēnh tā hkōt amnhī nhīpēx kēt jakamā koja nhǎrmā wa hwǎr āpir kēt nē.

¹⁵ Nē xā koja mēhō kēp amrakati nē ri pa. Nē ē pynajre pix jagjē nē ri hā pa. Nē ō hkēt nē ri kām prām nē pa. ¹⁶ Ka mē ja hā omu nē tanhmā kām akapēr to nē kām:

—Kwa ā amnhī nhīpēx anhǎr kēt nē. Anhōrkwǎ hwǎr tēn axē mex japēr nē axā nē amnhīm mēmoj japēr nē aku. Koja Tirtūm ato mex rax nē.

Anhǎr o kām akapēr tā kām mēmoj nhōr kēt nē. Tā xā koja we ama nē amar xā hkōt ē mex jagjē nē apkur mex o ri pa? Nā kot ka mē ā kām akapēr anē nē ho ajuta hkēt nē nhūm arī kām prām nē ē hkēt nē omnuy nē ri pa. Na htem mē kapēr pix o mē ho mex kēt nē. Kot kaj mē ā kām akapēr anē nē ām kām mēmoj tā karō kaprǎy. ¹⁷ Ja pyrā nē koja mēhō ra amnhī kaxyw Jejus kōt hamaxpēr nē hkōt amnhī xām ā amnhī jarēnh tā kapēr kōt ri amnhī nhīpēx kēt japēr. Hā koja ām kēp hkra hā amnhī jarēnh kaprǎy.

¹⁸ Nē kot kaj mē atō ā ajamexpēr anē nē ajamexpēr o:

—Nā Jejus kwǎjaja na htem ahpǎnhā tanhmā amnhī nhīpēx to ho pa. Na hte mē hkwǎjaja amnhī kaxyw Jejus kōt hamaxpēr tǎx pix o ri pa. Nē mē hkwǎjaja tanhmā hkwyjē ho mex to ho ri pa. Ā na htem ahpǎnhā tanhmā amnhī nhīpēx anhǎr to ho pa. Anē.

Kwa mē ri ā ajamexpēr anhǎr kēt nē. Mē hkwyjē ho mex o mē pa xwǎnhjaja na htem Tirtūm hkōt hamaxpēr pē mǎānēn hkōt amnhī nhīpēx nē hkwyjē ho mex o pa. Koja mēhō amnhī kaxyw Jejus kōt hamaxpēr hā koja mǎānēn hkōt amnhī nhīpēx pē tanhmā hkwyjē ho mex to ho pa. Na htem amnhī kaxyw hkōt hamaxpēr pix o pa hkēt nē. Na htem mǎānēn hkōt mē piitā mē ho mex o ri pa.

¹⁹ Na ka hte mē akwǎjaja ā ajamexpēr anē nē ajamexpēr o:

—Nā Tirtūmja pyxi mex o pyxi mex. Tā kot paj jam ijamexpēr rāhā ho ri ixpa nē ra ixpē hkra hā ri ixpa. Nom kot paj kapēr kōt amnhī nhīpēx o ri ixpa hkēt nē.

Anhÿr o ajamaxpër nê ã ajamaxpër anhÿr kaprÿ.

Nê ãm hãmri na ka htem Tirtÿm pyxi mex o pyxi mex ã harê. Nom na htem jam hamaxpër kôt pix mã kêp hkra hkêt nê. Mëkarõmmutijaja na htem haxwÿja Tirtÿm pyxi mex o pyxi mex kôt hamaxpër tâ mẽ kêp hkra hkêt. Na htem ã hamaxpër anhÿr pê kãm uma ho pa. ²⁰ ã mẽ ajamaxpër anhÿrja mex kêt. Kõja mẽhõ amnhÿ kaxyw Tirtÿm kôt hamaxpër ã amnhÿ jarênh tâ hkôt amnhÿ nhÿpêx o pa hkêt japêr. Hãmri nê ãm amnhÿ kaxyw hkôt hamaxpër ã amnhÿ jarênh hkapyrÿ. E kot paj ixprÿ hã mẽ amã ja jarê ka mẽ inhma. ²¹ Mẽ panhÿgêt finat Apraãw na pre amnhÿ kaxyw Tirtÿm mã hamaxpër nê hkôt ri amnhÿ nhÿpêx mex o pa. Tã nhÿm amnhÿ tâ kamã hamak kaxyw hkra Ijak ã kuwÿ nhÿm kuma nê ra kot kãm hpÿr nê õr kaxyw nhÿm Tirtÿm amnhÿ tâ omu nê amnhÿm mex ã harê. Hãmri nê kot hkra hpÿr nê mẽ kam kapêr. ²² Ra kot amnhÿ kaxyw hkôt hamaxpër nê hkôt amnhÿ xãm jakamã mãânênh hkôt amnhÿ nhÿpêx nê ra kot kãm hkra nhõr kaxyw Tirtÿm amnhÿ tâ omu nê amnhÿm mex ã harê. Na pre ã finat Apraãw Tirtÿm kapêr kôt amnhÿ nhÿpêx mex anhÿr o pa. Jao amnhÿ kaxyw hkôt hamaxpër mex ã amnhÿ to amnhÿrit.

²³ Nê kormã Apraãw wa hkra hkêt ri nhÿm Tirtÿm wa kãm hkra jarê nhÿm kuma nê hkra hkukamã amnhÿ kaxyw Tirtÿm kôt hamaxpër tÿx o pa nhÿm amnhÿ tâ omu nê mex ã harê. Nê kêp hkrãmnhwÿ hã harê. Kapêr ã kagã htÿm kot ja jarênh kot:

Na pre Apraãw hkra hkukamã amnhÿ kaxyw Tirtÿm kôt hamaxpër tÿx nhÿm amnhÿ tâ omu nê amnhÿm mex ã harê. Anê.

²⁴ ã na pre finat Apraãwja hkra kaxyw Tirtÿm kôt hamaxpër anhÿrja o ra hkôt amnhÿ nhÿpêx nê ra kot kãm hpÿr kaxyw. Nom kop apu amnhÿ kaxyw hkôt hamaxpêr pix nê hkôt amnhÿ nhÿpêx kêt ronhÿx pre Tirtÿm tee ri amnhÿ tâ omu nê amnhÿm mex ã harênh kêt nê. Na htem amnhÿ kaxyw Tirtÿm mã hamaxpêr nê mãânênh hkôt ri amnhÿ nhÿpêx mex o pa nhÿm amnhÿ tâ mẽ omu nê amnhÿm mẽ mex ã mẽ harê. ²⁵ Mẽhõ ni kuprÿ finat Raapja na pre ã amnhÿ nhÿpêx anê nê amnhÿ kaxyw Tirtÿm kôt hamaxpêr pê tanhmã hkôt amnhÿ nhÿpêx to ho pa. Na pre Ijaew myja wa hamêxkrut nê ma Raap nhõ krÿ hwÿr wa tê. Mẽ hã ukapi nê kot mẽ hkurê kaxàr kaxyw mẽ hwÿr wa tê. Hãmri nhÿm Raap Tirtÿm kot wa mẽnh ã wa omunh kurê kumrêx nê pòristi kot tanhmã wa ho pymaj amnhÿ nhõrkwÿ kamã mẽ kêp wa ho amÿxu nê wa nê mẽ kãm tanhmã hêx to. Nê hpãnhã nhãm pry hõ hkôt akupÿm wa kumê nhÿm wa hkã hkÿnh pê ma akupÿm mex nê tê. Hãmri nhÿm Tirtÿm wa hã Raap pumu nê amnhÿm mex ã harê.

²⁶ Tã kot kaj mẽ atõ amnhÿ kaxyw Tirtÿm kôt ajamaxpêr ã amnhÿ jarênh tâ hkôt amnhÿ nhÿpêx kêt japêr. Hãmri nê apê hkra hã amnhÿ jarênh kaprÿ. Te ra mẽhõ htyk nê nõr tâ nhÿm mẽ kot arÿ htÿr ã harênh kaprÿta pyrãk.

3

Mẽ kot Tirtÿm kapêr o mẽ ahkre xwÿnhjê jarênh

¹ Nê kwa Kris kôt ixkwÿjaja. Mẽ axohtõ nê mẽ amã Tirtÿm kapêr o mẽ ahkre hprãm tâ kormã ja kaxyw mẽ apiitã mẽ amex kêt. Mẽ ixte Tirtÿm kapêr o mẽ ajahkre xwÿnhjaja kot paj mẽ tanhmã amnhÿ tomnuj to japêr nhÿm Tirtÿm ja hã mẽ ixpumu nhÿm ja kêp omnuj nê. Mẽ ixte kapêr o mẽ ajahkre ho mẽ ixpa kênã kot pa hkêt mẽ ri tanhmã amnhÿ tomnuj to ho ri ixpa. Jakamã kot kaj mẽ Tirtÿm kapêr piitã hkôt ri amnhÿ nhÿpêx mex nê rÿ kormã ho akwÿjê jahkre ho ri apa.

² Nē mē pahpiitā na pu htem tōhā mē pajakwa ho tanhmā amnhī tomnuj to. Mēmoj tā axpēn kām pagryk nē tanhmā mē kām pakapēr punuj to. Nom koja mēhō tanhmā kapēr punuj toja nē amnhī to ht̄ȳx nē hāmri nē tām amnhī nh̄p̄êx o pa.

Mē pajakwa jarēnh

Epes 4.29

³ Na htem nh̄yh̄ym kawar o juk kaxyw hakwam kàx jagjê nē kām nh̄yh̄ym o htēm prām xà hkôt ma nh̄yh̄ym ho juk o tē. Kàxja hkryre nh̄um kawar rùnh tā no nh̄um kām ma nh̄yh̄ym ho m̄rar prām xà hkôt ho juk o mra.

⁴ Nē gō xujanār kām p̄ar rùnhta rùnhtā tā na hte kòk àp̄er t̄yx nē ma nh̄yh̄ym o pa. Nē pī ho p̄ar o juk xàta hkryre htā ma nh̄yh̄ym ho juk o mō. Nh̄yh̄ym p̄ar o m̄rar xw̄ynh kām o m̄or prām xà hkôt o mō.

⁵ Ja pyrà nē mē pajakwa hkryre htā na htem ho kapēr o tanhmā mē hipêx to ho pa. Tōhā ho kapēr mex nē nh̄um mē kuma nē hk̄inh nē. Nē tōhā ho kapēr punuj nē nh̄um mē tee ri mē kapēr ā mē kuma nē hkap̄rī nē r̄y kapēr xw̄ynhta kamā gryk nē. Mē pajakwa hkryreja te kot kuwy jakrax kryre pyràk. Kot ka kuwy jakrax grire ho tē nē nh̄yri p̄oti kamā amē nh̄um kòk ho ap̄e nh̄um hp̄ok rax tokyx anē. Hāmri nē ma pà ho hkaxàr par o mō nē ho hkaxàr pa. ⁶ Mē pajakwaja mā kot anh̄y. Kot kaj at̄yx ri tanhmā ho akapēr punuj to nh̄um mē ama nē axpēn mā anh̄ixi ho krī nh̄p̄êx ka amex kêt nē apa. R̄y ka at̄yx ri ajakwa ho tanhmā akw̄yjê ho akapēr to nh̄um mē tee ri amnhī tā ama nē hkap̄rī nē r̄y akamā gryk nē. Satanasti nh̄y hā na htem ā mē hakwa ho kapēr punuj anē.

⁷ Na htem tōhā mēmo mry xoprê pynê nē tanhmā ho nē ra ho kām ma hkêt. Kagā r̄y hagrôre r̄y àati r̄y gōx kām mēmo mryja nh̄um htem unē nē tanhmā ho nh̄um kām ma hkêt nē mē hkôt pa ho pa. Nom na htem mry piitā ā hipêx anh̄y kêt nē. ⁸ Tā mē pajakwa te mē kot tee ri mēmo mry ho kām ma hkêt kap̄r̄y xw̄ynhta pyràk. Na pu htem amnhī krā hkôt pajakwa ho pakapēr mex pix kêt nē. Tanhmā kot puj mē pakapēr punuj kêt kaxyw amnhī jakwa hto? Mē pakapēr punuj te kot kagā xoprê kot mē hkam̄nar nē ò wenēn o mē hp̄arta pyràk. ⁹⁻¹⁰ Na pu htem tōhā pajakwa ho tām pakapēr nē tōhā pakapēr punuj nē. Nē tōhā Pahī Maati Tirt̄um mā mex o mex ā harēnh tā ra axtem nē tanhmā mēhō jap̄r̄y hto. Tirt̄um kot mē pahto amnhī pyrà nē mē panh̄p̄êx tā pu htem axtem nē tanhmā axpēn jap̄r̄y hto ho ri papa. Jao te pahte Tirt̄um jap̄r̄y pyràk. Kwa ixkw̄yjaja. Kêr pu mē pahpê Tirt̄um krajaja ā pakapēr punuj anh̄y hkêt nē. Ām mē pajakwa ho mēmoj mex pix jarēnh o ri papa.

¹¹⁻¹² Xà koja pà kamā hinore pyxi htā kamā gō xành nē m̄āānēn kamā gō xenh n̄okati? Nà koja anh̄y kêt nē. Na hte kamā gō mex pix nē r̄y kamā gō xenh n̄okati pix nē.

Nē xà koja jàxò hp̄ar ā rārāj harir? R̄y ahkrò xò hā m̄ankw̄r̄ytre harir? Nà na hte ahp̄ynhā hp̄ar ā harir. Ja pyrà nē kêr pu mē pahpê Tirt̄um krajaja pajakwa ho pakapēr punuj pē ho papikam̄ȳr t̄yx nē. Nē te hinore kamā gō mex pixta pyrà nē ēmoj mex pix jarēnh o ri papa. No mē pajakwa nh̄ikjê ho tām pakapēr nē hikjê ho pakapēr punuj kêt nē. Ām pakapēr mex pix o pakapēr o ri papa. Kwa kêr pu mē ā amnhī nh̄p̄êx anh̄y rāhā ho papa.

Tirt̄um kôt mē àhpumunh xw̄ynhjê jarēnh

Wam Korit̄ 2.6-16

¹³ Nē kwa mē axàhpumunh t̄yx xw̄ynhjaja kêr ka mē amnhī to mex o ri apa. Nē mē piitā tām mē hipêx mex nē mē amā axpēn japê hā axpēn to ajuta mex o

ri apa. Tirtüm kapër xà hkôt. Kot kaj mẽ ã amnhĩ nhĩpêx anê nê axàhpumunh mex ã amnhĩ to amnhĩrit. ¹⁴ Nom kot ka mẽ mẽmoj tã axpên kamã agryk o ri apa. Rỳ amnhĩ pix kukamã ajamaxpêr o ri apa hãmri nê ãm ate Tirtüm kapêr kôt amnhĩ nhĩpêx ã amnhĩ jarênh kaprỳ. ¹⁵ ã mẽ kot amnhĩ nhĩpêx anhÿr xwỳnhjaja na htem Tirtüm kôt amnhĩ nhĩpêx kêt nê. Mẽ kêp Tirtüm kra hkêt xwỳnh pixjaja na htem ã amnhĩ nhĩpêx anhÿr o pa. Jao mẽkarõmnuti kot amnhĩ nhĩpêx kôt pix mã amnhĩ nhĩpêx o pa. ¹⁶ Axpên kamã mẽ gryk o mẽ pa xwỳnhjaja na htem amnhĩ pix kukamã hamaxpêr jao tanhmã amnhĩ tomnuj to ho pa. Nê amnhĩ tã mẽ kamã mẽ gryk xwỳnhjê homnuj o pa. Tã ã mẽ pahte amnhĩ nhĩpêx anhÿr pumaj kwa kêr pu mẽ mẽmoj tã axpên kamã pagryk o ri papa hkêt nê. ¹⁷ Mẽ kot Tirtüm kôt amnhĩ nhĩpêx xwỳnhjaja na htem jajê rom tãm axpên nhĩpêx rãhã o pa.

Nê axpên kamã ukaprí pix o ri axpên kôt pa.

Nê tãm hamaxpêr o pa.

Nê mẽ piitã mẽ hipêx o axpên pyrãk.

Nê axpên tã hpjaam o ri pa.

Nê tanhmã ri axpên no kupyr to hkêt nê.

Nê ri oprê ho pa hkêt nê.

Nê mẽ axpên kamã òkre kahak kêt nê.

Nê mẽ piitã mẽ ho mex o axpên pyrãk.

Nê tãm mẽ piitã mẽ hipêx rãhã nê.

Ã na htem Tirtüm kôt mẽ kot amnhĩ nhĩpêx xwỳnhjaja amnhĩ nhĩpêx anhÿr o pa. ¹⁸ Kot puj mẽ ã amnhĩ nhĩpêx anê nê pajamakêtkati nê paxãmnhix pahkĩnh nê ri papa. Nhũm nhÿri mẽhõ wa axpên kãm gryk pu mẽ wa omu rỳ wa harênh ma hãmri nê mẽ pahõt ma wa hwÿr tẽ nê wa kãm pakapêr nê tãm akupÿm wa ãm. Hãmri nhũm wa ra mẽ pahpyra nê tãm amnhĩ nhĩpêx pẽ hamakêtkati nê wa ri pa. ãmnhix ri hkĩnh nê wa ri pa.

4

Mẽ kot amnhĩ pix kukamã mẽ hamaxpêr xwỳnhjê jarênh

Matêwre 20.20-28; Juãw 16.24

¹ Nê kwa mon ka hte mẽ akwỳjaja axpên mã akapêr mã agêt o axpên kãm agryk pix o apa? Na ka htem ã amnhĩ nhĩpêx anhÿr o amnhĩ pix kukamã ajamaxpêr. Nê mẽ amã amnhĩ jamaxpêr kôt pix mã ri amnhĩ nhĩpêx prãm. No Tirtüm kãm hprãm xà hkôt amnhĩ nhĩpêx prãm kêt nê. ² Na ka htem nhÿri mẽmoj pumu nê tee ri ho amã anhõ hprãm kaprỳ. Nê amã ho anhõ hprãm xãj õ xwỳnhnta pĩr nê kêp utar mã.

Nê na ka htem tanhmã axpên kukrêx kute hã omu nê amã ho anhõ hprãm nê hã õ xwỳnhnta mẽ wa axpu. No mẽ amã hprãm xwỳnhnta mẽ ate hõ hã Tirtüm wÿr ronhÿx ra mẽ ama nê mẽ amã hõ gõ. Tã mẽ ate hã axàhwÿr kêt jakamã nhũm mẽ amã òr kêt nê.

³ Rỳ ka mẽ tõiã mẽmoj tã awÿ nhũm kot mẽ amar tã mẽ amã òr kêt nê. Kot mẽ amã òr nhũm mẽ ate ho anhõxÿ ho apa pymaj na hte tõiã mẽ amã mẽ ate hã axàhwÿr xwỳnhnta nhõr kêt nê.

⁴ Kormã mẽ ate hkôt amnhĩ nhĩpêx mex kêt. Te mẽni hõ ra mjên tã nhãm kot mẽhõ my ho amnhĩkati pyrãk o na ka htem amnhĩ nhĩpêx o apa. Jao mẽ amã mẽ apê Tirtüm kra hprãm tã axtem nê mẽ kãm hprãm kêt xwỳnhjê hkôt amnhĩ nhĩpêx o ri apa nê mẽ urak nê tanhmã amnhĩ tomnuj to ho ri apa. Nê mẽ ate amnhĩ tomnuj gryk ã mẽ amã Tirtüm prãm kêt ã amnhĩ to amnhĩrit.

⁵ Tirtüm kapēr ā kagā htüm kot tanhmā Karō jarēnh to nē harēnh kot:
Na pre Tirtüm mē pahwÿr amnhī Karō rē nhūm mē pahwÿr wrÿ nē mē
pakamā agjē nē mē pahkōt pa ho pa. Mē pahte hkōt pix mā amnhī
nhīpēx o papaja na kām hprām. Anē.

Ām hāmri ā harēnh kot anhÿr jakamā kwa kêr ka mē harēnh ma nē kām
ajamaxpēr tÿx rāhā ho ri apa.

⁶ Na hte Tirtüm mēmoj to mē pakutā nojarēt rāhā pu mē ŷ hā tām amnhī
nhīpēx o ri papa. Kapēr ā kagā kot ja jarēnh kot:

Mē kām Tirtüm kōt amnhī nhīpēx prām kēt xwÿnhjaja na hte Tirtüm amnhī tā
mē omu nē mē kutā amnhī xunhwÿ.

No mē kām hkōt ri amnhī nhīpēx prām xwÿnhjaja na hte amnhī tā mē omu
nē mē ho mex o pa nhūm htem hihtÿx xā nhÿ hā mē kām hprām kēt
xwÿnhjē hkōt ri amnhī nhīpēx kēt nē. Anē.

⁷ Jakamā kwa kêr ka mē Tirtüm kapēr kōt pix mā mǎn ri amnhī nhīpēx o ri
apa. Kêr kê Satanasti tanhmā mē ate amnhī tomnuj to hprām xāj tanhmā mē
ato ka mē Tirtüm Karō nhÿ hā ām ama nē hkōt amnhī nhīpēx kēt nē. Nhūm
tee ri amā āhkrox kaprÿ nē akaga nē ma tē.

⁸ Nē kot kaj mē Tirtüm kapēr kōt pix mā ri amnhī nhīpēx o apa nhūm amnhī
tā mē apumu nē te kot mē apa hā mē ajamÿnh nē mē ato pa pyrāk o mē
anhīpēx. Jao mē ato mex o ri mē akōt pa ho pa. Nē mē atānopxar rāhā ka
mē ajamakētkati nē akīnh nē ri apa.

Nē kêr ka mē tanhmā amnhī tomnuj to hāmri nē tee ri ja hā amnhī pumu nē
hkaga kurē kumrēx nē axte ā amnhī nhīpēx anhÿr kēt nē. Rÿ ka mē tanhmā
ajamaxpēr punuj to hāmri nē ja hā amnhī pumu nē hkaga nē hpānhā tām
ajamaxpēr pix o ri apa. Mē apē Tirtüm kra hā kêr ka mē ām hkōt pix mā ri
tām amnhī nhīpēx o ri apa.

*Mē pahte amnhī tomnuj ā tanhmā amnhī nhīpēx to hā mē pamā karō
Wam Juāw 1.5-10*

⁹ Nē kêr ka mē tee ri ate tanhmā amnhī tomnuj to hā amnhī pumu nē
akaprī xāj mur nē akīnh kēt nē. Nē akaprī xāj amÿr rax nē. ¹⁰ Hāmri nē Tirtüm
mā amnhī jarēnh o:

—Pa Tirtüm. Na pa ā amnhī tomnuj anē. Nom kot paj axte hkēt nē. Ām
inhmā akapēr kōt pix mā ri amnhī nhīpēx prām.

Anhÿr o kām akapēr kê mē ama nē mē ate amnhī tomnujta ā tanhmā mē
ato hkēt nē. Ām mē ato mex nē ka mē akupÿm ajamakētkati nē axāmnhīx akīnh
nē ri apa.

Mē pahte xepēn to pakapēr nē mē pahkurē

Matēwre 7.1-5; Rōmān 2.1-3, 14.10-13; Wam Korīt 4.5

¹¹ E ixkwÿjaja. Kwa kêr ka mē anhīō kot tanhmā amnhī tomnuj to hā omu
nē tanhmā ho akapēr punuj to hkēt nē. Tirtüm kapēr ā kagā htüm kot ja nē
mē pahkurē kamā hihtÿx jakamā kot ka mē ri ā amnhī nhīpēx anē nē te ate
Tirtüm kapēr tūm kwÿ omnuj ā harēnh pyrāk. Rÿ te axāhpumunh tÿx o ate
Tirtüm jakrenh ā amnhī to jarkrar pyrāk. Jao kapēr kōt amnhī nhīpēx kēt nē.
Na htem Tirtüm kapēr ā kagā htüm kwÿ mex ā harē nē hkwy omnuj ā harēnh
kēt nē. Piitā mex kēnā.

¹² Nē Tirtümja tapxipix na kēp mē pahto amnhīptār xwÿnh maati. Nē
tapxipix na hte mē pahte tanhmā amnhī nhīpēx to hā mē pahpumunh hkōt
tanhmā mē pajarēnh to. Mē pahte amnhī to mex xwÿnh ā mē pajarē rÿ mē

pahte amnhĩ tomnuj xwỳnh ã mẽ pajarẽ. Ẽm tapxipix kot ã mẽ pajarẽnh kot anhỹr xwỳnh. Tã ka mẽ axtem nẽ kapẽr kwỳm ri tanhmã akwỳjẽ ho akapẽr punuj to ho ri apa.

*Mẽ pahte Tĩrtũm mã pajamaxpẽr pẽ kãm amnhĩ jarẽnh ã mẽ pamã karõ
Rukre 12.13-21*

¹³ E kwa mẽ inhma ixkwỳjaja. Na ka hte mẽ akwỳjaja tanhmã amnhĩ kukamã ajamaxpẽr to nẽ akwỳjẽ mã amnhĩ jarẽnh o:

—Koja apkati pa ma krĩ hõ hwỳr mõ nẽ kamã mẽ kãm ixápẽnh o ixpa hã ixtã amgrã pyxi nẽ hpãnhã kàxpore jamỳnh rax nẽ man akupỳn mõ.

Anhỹr o amnhĩ jarẽ. ¹⁴ Kwa mẽ ã amnhĩ kukamã amnhĩ jarẽnh anhỹr kêt nẽ. Mẽ pahtõ mẽ pahte amnhĩ kukamã paxãhpumunh mex? Amrakati kẽnã. Kot ka mẽ ã amnhĩ kukamã amnhĩ jarẽnh anhỹr tã kormã ã amnhĩ nhĩpẽx anhỹr kêt ri tanhmã amnhĩ to nẽ ty. Rỳ tanhmã amnhĩ to nẽ axã hãmri nẽ nhỹhỹm amõr kêt nẽ. Te mẽ pahpẽ namẽ pyrãk na pu htem ri papa nẽ tanhmã amnhĩ to nẽ ty nẽ pajapẽx tokyx anẽ. ¹⁵ Jakamã mẽ ã amnhĩ kukamã amnhĩ jarẽnh anhỹr kêt nẽ. Kêt amnhĩ jarẽnh o:

—Koja Tĩrtũm kãm ja prãm koja apkati pa ã amnhĩ nhĩpẽx anẽ nẽ ã amnhĩ nhĩpẽx anẽ.

Anhỹr o Tĩrtũm kamnàr o tanhmã amnhĩ kukamã amnhĩ jarẽnh to. ¹⁶ No mẽ ate amnhĩ krã hkõt amnhĩ kukamã amnhĩ jarẽnh ta Tĩrtũm jamaxpẽr xã hkõt kêt. Ẽm amnhĩ krã hkõt mẽ ate amnhĩ kukamã amnhĩ jarẽnh kẽnã. Ẽ mẽ ate amnhĩ jarẽnh anhỹrja mex kêt.

¹⁷ Nẽ mẽ kot tãm amnhĩ nhĩpẽxja kot kaj mẽ ate mar mex tã hkõt amnhĩ nhĩpẽx kêt japẽr hãmri nẽ amnhĩ tomnuj o apa.

5

Mẽ hikàxpore rũnh xwỳnhjẽ jarẽnh

Rukre 12.13-21; Wam Ximotre 6.9-10; Apokarij 18.14

¹ Nẽ kwa mẽ akàxpore rũnh xwỳnhjaja. Mẽ inhma nẽ inhmar tỳx nẽ. Nhỹrmã mẽ amex kêt jakamã kwa mẽ tee ri amnhĩ kukamã ajamaxpẽr o ra akapĩ nẽ amỳr o apa kurẽ kumrẽx. ² Tĩrtũm noo mã mẽ akàxpore te ra mẽ apẽ hapẽx par pyrãk. Te ra mẽ anhỹ kamã mẽ ate amnhĩ tomnuj xwỳnh ã kutã akrĩ pyrãk. ³ Mẽ ate mẽ akukrẽx nẽ mẽ akàxpore ho apikuprõnh rũnh tã ka htem mẽ akwỳjẽ pẽ ho anhõxỳ ho ri apa. Mỳrapẽ koja nhỹrmã tanhmã mẽ apẽ amnhĩ to nẽ omnu pa ka mẽ ho apikuprõnh rax kaprỳ. Hãmri nẽ mẽ ate amnhĩ tomnuj mỳrapẽ Tĩrtũm mẽ Kra wa kuri atĩr tũm nẽ apa ho apa hkêt nẽ. Ẽm kuwy kamã mẽ amnhĩ xã htỳx kamã ajamak rãhã ho ri apa. ⁴ Na ka htem apur kãm mẽ àpẽnh xwỳnhjẽ mã amnhĩr kêt nẽ. Nhũm mẽ tee ri amnhĩ tã mẽ ajamã hãmri nẽ mẽ atã amnhĩ to Pahi Maati Tĩrtũm xihitỳx xwỳnh ta wỳr o pa nhũm mẽ atã mẽ kuma. ⁵ Mẽ akĩnhã mẽ kẽp amrakati htã ka htem ãm ja hã mẽ omu nẽ mẽ àpẽnh pãnhã mẽ kãm amnhĩr kêt nẽ amnhĩ pix kukamã ajamaxpẽr. Nẽ amã prãm xã hpix kukamã amnhĩm mẽmoj japrõr pẽ akĩnh o ri apa. Jaõ te mẽ apẽ mõx htwỳm nhũm mẽ kot hpĩr nẽ hkrẽr mã mex ã harẽnh xwỳnh ta pyrãk. Mỳrapẽ kot kaj mẽ mõxta pyrã nẽ nhỹrmã ty hãmri nẽ Tĩrtũm mẽ Kra wa kuri atĩr tũm nẽ apa ho apa hkêt nẽ. ⁶ Nom ja pix kêt. Na ka htem mẽ anhõ krĩ kamã mẽ anhõ pahi mã tanhmã akwỳjẽ ho axẽx to ho ri apa. Mẽ kot tanhmã atomnuj to hkêt tã ka mẽ kãm mẽ ho axẽx rũnh nẽ. Tã koja nhỹrmã Tĩrtũm mẽ hã tanhmã mẽ ato rax kumrẽx ka mẽ rĩ amnhĩ pumu.

Mē pahte Jejus kutêp amnhî kaxyw kām pajamaxpêr o papa hā mē pamā karō

Sikūn Pêtre 3.1-13

⁷ E ixkwýjaja. Koja mēhō tanhmā mē atomnuj to htā ka mē arī amnhî kaxyw Jejus mā ajamaxpêr rāhā ho ri apa. Pê akupýn hpôx xā hā arīgro jamār rāhā nē. Te pur nhō dōn kot amnhî nhîpêx pyrāk. Koja hpur kām ahkre nē ahkre hpa hāmri nē arī hamār o pa nē kām nojarêt kêt nē hā na wrýk jamār o pa. Jao hamakêtkati nē ô jamār rāhā ho pa. ⁸ Tā kēr ka mē urāk nē arī Pahihti akupýn hpôx xā hā arīgro jamār rāhā ho ri apa. Koja tokyx akupýn mē pahwýr wrý. Jakamā kēr ka mē kutêp mē kot mē atomnuj xwýnhjê kutā amnhî to htýx nē ri apa. Nom tee ri amnhî kukamā ajamaxpêr o Jejus kaga hkêt nē. Arī hamār pê akīnh nē ajamakêtkati nē ri apa. Koja akupýn mē pahwýr wrý nē mē pahto mex rax kumrêx.

⁹ Nē kēr ka mē axpên to akapêr o ri apa hkêt nē. Kot ka mē ā amnhî nhîpêx anē nhūm Tirtūm mē ama nē tanhmā mē ajarēnh to. Kot mē pahpumunh xā hkôt tanhmā mē pajarēnh to xwýnh na. Tā ra tanhmā kot mē pahpiitā mē pajarēnh to xā hā arīgroja ra ahtêp o mō.

¹⁰ E ixkwýjaja. Kēr ka mē wam mē kot Tirtūm nhý hā kapêr jarēnh xwýnhjaja kot amnhî nhîpêx mā ajamaxpêr rāhā nē. Na prem Tirtūm nhý hā mē kām kapêr o ri mē hkôt pa nhūm mē hkwýjaja ja hā tanhmā mē hipêx to nhūm mē amnhî xā htýx kamā hamak rāhā ho pa. Tā tee ri amnhî kukamā hamaxpêr pê Tirtūm kaga hkêt nē. Na prem arī ý hā kapêr jarēnh rāhā ho ri mē hkôt pa. Tā kēr ka mē kot amnhî nhîpêx pyrāk o amnhî nhîpêx nē Tirtūm kaga hkêt nē. ¹¹ Na prem amnhî xā htýx kamā hamak o pa rāhā ý hāmri nē Tirtūm kuri mex nē hkīnh nē pa ho pa. Ra mē ate finat Johti jarēnh mar mex. Na pre omnuj týx nē pa htā amnhî tā Pahi Maati Tirtūm kamā gryk nē hkaga hkêt nē. Hāmri nhūm amnhî tā omu nē gaa nē ho mex rax nē nhūm akupým mex kumrêx nē pa. Pahi Maatija ukapri ho ukapri nē mex o mex jakamā na pre ā Johti ho mex anē. Tā koja ho mexta pyra nē ā mē pahto mex anē.

Mē pahte tanhmā amnhî nhîpêx to hā mē pamā karō

Matêwre 5.33-37, 18.15; Rōmān 12.15; Karatas 6.1-2; Jutre 22-23

¹² E ixkwýjaja. Pa mē amā mēmoj jarē ka mē inhma nē inhmar týx nē. Kēr ka mē mēmoj tā amnhî jarēnh kaxyw hāmri nē akatāt kôt amnhî jarēnh kurē kumrêx. Nē amnhî jarēnh o: “Nā kot paj ja ho anē.” Anē. Rý amnhî jarēnh o: “Nā kwarī pa ja ho anhýr kêt nē.” Anhýr o amnhî jarēnh kurē kumrêx. Kē mē akwýjaja ām hāmri mē ate amnhî jarēnh ā mē apumunh kurē kumrêx nē axê ā mē akamnhix kêt nē. Mē apê Tirtūm kra kēnā kot ka kêt mē ri axtem nē amnhî jarēnh o axêx.

¹³ Nē koja mē anhîō mēmoj tā tanhmā amnhî to nē omnuj nē. Ka mē ja hā omu nē kām anē kē amnhî kaxyw Tirtūm mā hamaxpêr pê amnhî to hwýr rāhā ho pa. Rý koja hkīnh nē ri pa ka mē ja hā omu nē kām anē kē hkīnh kām mex o mex ā grer o pa. ¹⁴ Rý koja ā nē nō ka mē ja hā omu nē kām anē kē amnhî wýr pastō nhý hā mē kapêr xwýnh kwýjê hā karō. Kē mē hwýr mra nē Jejus nhý hā mēmo twým kwý ho hkukō nē ho Tirtūm wý. ¹⁵ Kē mē ā mē ā xwýnhjê hwýr mrrar nē mē ho Tirtūm wýr o pa anē. Koja mē ho kuwý nhūm nē kuma nē akupým mē ho mex. Nhūm mē tanhmā amnhî tomnuj to japêr kē mē ja hā amnhî jarē kē Tirtūm mē kuma nē ja hā tanhmā mē ho hkêt nē. ¹⁶ Jakamā kēr ka mē atō tanhmā amnhî tomnuj to nē tee ri ja hā amnhî pumu hāmri nē tokyx akwýjê mā amnhî jarē kē mē tokyx ato Tirtūm wý. Kē atā mē

kuma nē tanhmā akrā hto ka axte ā amnhī nhīpēx anhŷr kēt nē. Nē ra amex nē apa.

Nē koja mēhō Tīrtūm kōt pix mā amnhī nhīpēx mex rāhā ho pa. Hāmri nē mēmoj tā kuwŷ nhūm kuma nē kām tanhmā mēmoj to. ¹⁷ Te finat Eris kot mēmoj tā hwŷr nhūm kot mar nē kām ho anhŷrta pyrāk. Erisja kēp mē panhīō na pre. Tā na pre hkwyjaja amnhī tomnuj pix o pa nhūm tee ri mē omu nē mē hā na wrŷk kēt kaxyw ho Tīrtūm wŷr kām hihtŷx nē. Hāmri nhūm kuma nē kām ho anē nhūm na wrŷk kēt ry rax kumrēx. Hā amgrā axkrunēpxi nē hkōt mytwrŷ kēp 6. Mē kot amnhī tomnuj tŷx o paja mŷrapē. ¹⁸ Tā nhūm Eris axte mē ho kuwŷ nhūm axte mē hwŷr na rē nhūm akupŷm katāt kōt wrŷk mex nē. Nhūm akupŷm mē hpur kām mē ōja mē kām mex nē akupŷm mē kām ō rūnh nē. Tā ā Tīrtūm kot Eris mar nē kām mēmoj nhīpēx anhŷrja pyrā nē koja mē pama nē mē pamā mēmoj tanhmā ho.

¹⁹ Nē e mē inhma ixkwŷjaja. Koja mēhō Tīrtūm kapēr mar tŷx nē te kēp hkra pyrāk o amnhī nhīpēx. Tā tanhmā hamaxpēr to nē kapēr kaga nē htŷx ri amnhī tomnuj pix o pa. Ka mē ja hā omu nē hwŷr mra nē kot amnhī tomnuj nē kām akapēr kām axihtŷx kē tokyx hkaga nē akupŷm Tīrtūm kōt amnhī xām tŷx nē ām hkōt pix mā amnhī nhīpēx. ²⁰ Koja amnhī tā mē ama nē Tīrtūm kōt amnhī xām tŷx nhūm amnhī tā omu nē kot tanhmā amnhī tomnuj tota ho hamakētcati nē amnhī katut kōt kurē nhūm nhŷrmā kuri htŷr tūm nē mex nē pa ho pa. Koja amnhī tomnuj tŷx o pa htā hkaga hpa nhūm Tīrtūm ja hā omu nē hā tanhmā ho hkēt nē axte tanhmā kot amnhī tomnuj tota mā hamaxpēr kēt nē.

Tā ām ja pix. Ixpē Xiakre na pa ā mē awŷr kagā nhīpēx nē mēnh anē.

Wam Pêtre

Simâw Pêtre kot Jejus kôt hkwyjê hwÿr kagà nê mênh

Simâw Pêtre na pre kagàja nhîpêx. Kêp tep pynênh o pa xwÿnh tâ hpânâ kêp Jejus nhÿ hâ hkrajê jahkre ho pa xwÿnh. Nê krî pê Jerujarê kamâ kêp Jejus krajê nhô pastô. Na pre krî piitâ hkôt Jejus â mê kâm mê hkurê xwÿnhjaja tanhmâ hâ mê hipêx to nhÿm Pêtre mê harênh ma nê mê hamaxpêr o hihtÿx kaxyw mê kâm kagàja nhîpêx nê krî piitâ hkôt mê hwÿr kurê. Mê kot kamâ harênh nê mar nê amnhî kamâ kahak kêt nê arî Tirtûm kôt amnhî nhîpêx mex o pa kaxyw. Nê Jejus â mê kot amnhî xâ htÿx kamâ hamak tâ nhÿrmâ kaxkwa kamâ mex nê pa ho pa hâ mê kâm awjarê. Â mê kâm mêmoj jarê nê hâ kagà anê. Nê mê kâm:

¹ Pa mê ate Jejus kôt amnhî xunhwÿr nhÿm Tirtûm kot mê ato hkra xwÿnhjaja. Xâ mê amex? Ot pa mê awÿr kagà nhîpêx nê kumê. Ixpê Simâw Pêtre na pa. Ixte Jejus nhÿ hâ hkrajê jahkre ho mê ixpa xwÿnhjê hô na pa mê awÿr kagà nê kumê.

Na xep pre Kris â mê kâm mê pahkurê xwÿnhjaja tanhmâ mê anhîpêx to ka mê panhõ pika rûm mê umaj anhrâ nê ma ahpÿnhâ krî hkôt ri apa.

Ja o mê akwÿjaja ma pika pê Pôt kamâ krî hkwyjê hkôt apa.

Nê mê akwÿjaja pika pê Karatas wÿr apa.

Nê mê akwÿjaja pika pê Kapatos wÿr apa.

Nê mê akwÿjaja pika pê As wÿr apa.

Nê mê akwÿjaja Pitîn wÿr apa.

Â ahpÿnhâ pika hkôt mê apigrânh par anê. Tâ ot pa mê awÿr kagà nhîpêx nê mê apiitâ mê awÿr kurê. Mê apÿnh nê mê ate kamâ harênh nê ixkapêr mar kaxyw. ² Na pre Mêpahpâm Tirtûmja amnhÿm mê pahte amnhî kaxyw kâm pajamxpêr xwÿnhjê rê nê mê pahtâ amnhî jarênh o:

—Kot paj jajê ho ixkra. Na pre ra Ixkra Jejus Kris ixpê mê nê ty nê htyk o hkamrô axkapî nhÿm mê harênh ma nê hkôt amnhî xunhwÿ. Tâ nhÿm Ixkarô mê hkarô mâ agjê nhÿm mê ra inhmâ hprâm xâ kôt pix mâ ri inhmâ tanhmâ amnhî nhîpêx to ho pa.

Anhÿr o mê pahtâ amnhî jarênh. Tâ kê mê akutâ nojarêr râhâ ho ri mê akôt pa ka mê ÿ hâ axâmnhîx ajamakêtkati nê akînh nê ri apa.

Mê pahte amnhî kukamâ pajamxpêr pê pahkînh o papa hâ mê pamâ karô Rukre 12.32-34; Rômân 8.18-25; Sikûn Korî 4.16-18

³ Nê na pre mê panhõ Pahihtî Jejus Krisja ty nhÿm Hipêêxâ Tirtûm akupÿm ho htîr. Tâ kot mê pakutâ nojarêr râhâ ho pa jakamâ na pre mê pahpê hkrajê mâ mê pajamxpêr nyw jagjê pu mê ÿ hâ pahte amnhî nhîpêx nyw o amnhî nhîpêx o papa. Hâmri nê Jejus akupÿm htîrja mâ pajamxpêr nê amnhî kukamâ pajamxpêr o:

—Kot paj nhÿrmâ ty nhÿm Tirtûm kot Jejus nhîpêx pyrà nê akupÿm ixto ixtîr pa wa kuri ixtîr tûm nê inhmex kumrêx râhâ ixpa ho ixpa. Nâ koja â inhîpêx anê.

Anhÿr o pajamxpêr jakamâ kwa kêr pu mê Tirtûm mâ mex o mex â mân harênh râhâ ho papa. ⁴ Na ra mê pakutêp ô krî kamâ mêmoj piitâ ho mex nê. Ô krî kamâ mêmoj kot omnu nê hapêx kêt jakamâ na pu htem amnhî tâ hamâr râhâ ho papa.

⁵ Nē mē kot Kris ā mē atomnuj mýrapê na ka mē amnhî xà htýx kamā ajamak o ri apa nom arî amnhî kaxyw Tirtüm mā ajamaxpêr rāhā ho ri apa. Hihtýx o hihtýx jakamā koja mē pahkôt pa ho pa nē mē pamā pajamaxpêr o hihtýx rāhā nhūm nhýrmā Jejus akupým mē pahwýr wrý. Hāmri pu mē hkôt ri amnhî nhîpêx mex rāhā ho ri papa. Ra Tirtüm kot mē pakukamā mē pajarēnh xā hkôt. ⁶ Jar mē pahte arî amnhî xà htýx kām pajamak o papa htā na pu htem Tirtüm nhýrmā kot mē pahto mexta kukamā pajamaxpêr hāmri nē tee ri amnhî kukamā pajamaxpêr kêt nē. Mē pahpê mē pahpunuj tūm nē ri papa ho papa mā xwýnh kêt. ⁷ Na hte Tirtüm mē panhîpêx o te mē kot ôr nhîpêx pyrāk. Na htem hprî hā tanhmā ôr kute hā omu. Kêp ôr kumrêx ā omu rý mēmoj mē ho pihkār ā omunh kaxyw kuwy kamā kurê. Nhūm piitā ôr nē pigānh pa japêr nhūm mē omu nē harēnh o:

—Nā ām hāmri. Kêp ôr kumrêx nē mēmoj mē ho pihkār kêt. Anê.

Na hte Tirtüm ā mē panhîpêx anê. Jakamā mē pahpê Jejus kôt amnhî nhîpêx o mē papa xwýnhjaja mē pahte tōhā tanhmā pahpunuj to htā no nhūm mē panê ja rēnh kêt nē. Na hte amnhî tā mē pahpumu nē hamaxpêr o:

—Kot paj kormā ja hā mē hamā nē tokyx akupým mē ho mex kêt nē. Koja mē omnuj nē pa htā tee ri amnhî kukamā hamaxpêr nē ixkaga hkêt nē arî amnhî kaxyw ixkôt hamaxpêr rāhā ho pa. Hāmri nhūm mē hkwyjaja ja hā mē omu nē mē kêp ixkra hā mē omunh kurê kumrêx. Te mē kot hprî hā ôr pumunh nē kêp ôr kumrêx ā omunhta pyrāk. Anê.

Jakamā kēr pu mē arî amnhî kaxyw hkôt pajamaxpêr rāhā ho papa. Mēmo mýrapê mē pahpunuj nē ri papa htā arî hkôt pajamaxpêr rāhā nhūm Jejus nhýrmā akupýn mē pahwýr wrý. Hāmri nhūm Tirtüm mē pahpumu nē mē pamā:

—Nā ām hāmri na ka prem amnhî kaxyw ixpix mā ajamaxpêr rāhā ho ri apa. Mē kot ixtā tanhmā mē atomnuj to nhūm mē ate amnhî xà htýx kamā ajamak o apa htā aa ixkaga hkêt nē arî amnhî kaxyw inhmā ajamaxpêr rāhā ho ri apa. Nā ām hāmri mē ate amnhî to mex kumrêx xwýnh na ka mē. Kot paj mē piitā mē kām ja hā mē ajarê.

Anhýr o mē pamā kapêr.

Nē ôr o mē hikukrêxja mex tā koja arî mex rāhā hkêt nē. Koja mēhō kām tanhmā homnu hto hprām nē homnu hpa. No mē papajaja kot puj mē arî amnhî kaxyw Tirtüm mā pajamaxpêr rāhā ho papa hāmri nē ôrta pyrā nē pajapêx kêt nē. Kurom mē pamex tūm nē aa pajapêx kêt nē papa ho papa.

⁸⁻⁹ Nē Jejusja aa mē ate ano ho omunh kêt tā na ka htem kām mē ajapê htýx nē kot mē panê tanhmā amnhî nhîpêx to hā harēnh ma nē mē amā hkīnh nē. Nē amnhî kaxyw hkôt ajamaxpêr mex rāhā ho ri apa. Jakamā na pre Tirtüm ja hā mē apumu nē mē ato hkra nē mē apê ô krî kamā wa kuri amex nē apa mā xwýnh ā mē ajarê. Ja kaxyw na pu prem amnhî kaxyw hkôt pajamaxpêr rāhā jao pahkīnh nē ri papa. Nē tee ri tanhmā amnhî kīnh týx ā amnhî jarēnh to hkukamā pajamaxpêr. Kormā aa ā mē pahkīnh anhýr kêt tā mē pahkīnh týx nē ri papa.

¹⁰ Nē Tirtüm kot mē pahto mex pē mē panê mē pahte amnhî tomnuj rēnh par nhūm kuri mē pahtrî tūm nē mē papa hā mē pajarēnhja. Annepê mā Tirtüm nhý hā kapêr jarēnh o ri mē pa xwýnhjaja na pre mē pakukamā ā mē pajarēnh anhýrja ma nē tee ri hamaxpêr nē tee ri hā axpēn kujjêr o ri axpēn kôt pa. Nom hprî hā mar mex kêt nē. Tā arî ri mē pakukamā hkwyjê mā ja hā mē pajarēnh o ri pa.

¹¹ Na pre Tirtûm Karôja Kris tyk kukamã mê kãm ã mê pajarênh anhÿr o amnhîrît. Kormã Kris kaxkwa kamã pa ri. Kormã wrÿk nê katorxã nhôxãhkre rûm kator kêt ri nhûm pre hkukamã mê kãm tanhmã ho amnhîrît to. Mê kot hpîr nhûm kot amnhî xã htÿx kãm hamak kãm mê panê htykja ã hkukamã mê kãm harênh o amnhîrît. Nhûm Tirtûm kot akupÿm ho htîr nê kãm mex o mex ã harênhja nhûm hkukamã mê kãm harênh o amnhîrît. No ãm hprî hã mê kãm mêhõ nhîxi hkôt harênh kêt jakamã nhûm prem harênh ma nê tee ri hkukamã ri hamaxpêr nê tee ri hã axpên kukjêr o ri axpên kôt pa. Nê hã axpên kukjêr o:

—Kwa mêhõ koja we ã amnhî nhîpêx anê? Xã koja tokyx ã amnhî nhîpêx anê nã kormã?

Anhÿr o hã axpên kukjêr o ri pa. ¹² Hãmri nhûm Tirtûm axte mê kãm Jejus jarênh kwÿ ho amnhîrît nê mê kãm:

—Nã mê anoo mã koja ã amnhî nhîpêx anhÿr hkêt nê. Mê amÿr pé mê akanrêhã mê akra nê mê atãmnhwÿjê noo mã koja kato nê mê hkôt ã amnhî nhîpêx anhÿr o pa. Anê.

Mê papamjaja mê panoo mã kator nê ã kot amnhî nhîpêx anhÿr o paja o ã mê kãm ho amnhîrît anê.

Amnepêm Tirtûm nhÿ hã kapêr o ri mê pa xwÿnhjaja nê jarãhã mê ixte Jejus nhÿ hã mê ahkre ho ri ixpa xwÿnhjaja mê ixkapêr ãm pixii. Na pa htem wantajê pyrà nê Tirtûm Karô nhÿ hã ãhpumunh tÿx xã ho mê amã tanhmã Jejus jarênh to ho ri mê akôt ixpa. Nhûm hte Tirtûm kapêr o mê wrÿk xwÿnhjaja mê ixkapêr ma nê tee ri hamaxpêr o mê pahpyrà nê kãm hprî hã harênh mar par prãm nê.

*Mê pahte Tirtûm pyrà nê tãm amnhî nhîpêx ã mê pamã karô
Epes 4.1-3; Korosê 1.10-12; Sikûn Pêtre 3.10-13; Wam Juãw 3.1-6*

¹³ E kwa Kris kôt ixtô nê ixtôxjaja. Kêr ka mê Jejus kutêp mëmoj punuj kutã amnhî to htÿx rãhã ho ri apa. Nê Tirtûm mã amnhî nhîpêx mex rãhã nê. Pê tãm ajamaxpêr nê tãm amnhî nhîpêx o apa. Nê mê ã ajamaxpêr anhÿr o:

—Nã koja nhÿrmã Jejus akupÿn mê ixwÿr wrÿ hãmri nhûm Tirtûm ixto mex rax nê. Nã koja ã inhîpêx anê. Anê.

¹⁴ Nê kêr ka mê Tirtûm kapêr kôt pix mã mãn ri amnhî nhîpêx mex rãhã ho ri apa. Te mêhprîre kot mê hipêexã kapêr mar nê hkôt amnhî nhîpêx pyràk. Kormã mê ate Kris kôt amnhî xunhwÿr kêt ri na ka prem ate amnhî nhîpêx tûm kôt ri tanhmã amnhî tomnuj to ho ri apa. ¹⁵ Tã kêr ka mê hpãnhã amnhî to mex o mãn ajamaxpêr o apa nê Tirtûm pyrà nê amnhî tomnuj o apa hkêt nê. Tirtûmja kot amnhî to mex pix o pa xwÿnh na. ¹⁶ Kapêr ã kagã htûm kot ja jarênh kot:

Kêr ka mê ixpyrà nê amnhî to mex pix o ri apa. Anê.

¹⁷ Tã koja nhÿrmã kêp Mêpahpãm maati hã hprî hã mê pahte amnhî nhîpêx ã mê pahpumunh hkôt tanhmã mê pajarênh to. Tãm mê pahte amnhî nhîpêx kôt mê pajarê rÿ mê pahte amnhî tomnuj kôt mê pajarê. Hãmri nê ahpÿnhã mê panhîpêx. Mê pahto mex nê rÿ mê pahtomnuj nê. Jakamã kwa pu mê nhÿrmã kot tanhmã mê pahtomnuj to pymaj hkôt pix mã amnhî nhîpêx o ri pa rãhã nê.

¹⁸ Nê kormã mê pahte Jejus kôt amnhî xunhwÿr kêt ri na pu prem mê panhîgêt pyrà nê pahtÿx ri amnhî tomnuj o ri papa. Tã nhûm Krisja te amnhîm mê pajaprôr pyràk o mê panhîpêx. Mê pahte hpãnhã kapêr kôt pix mã amnhî nhîpêx o papa kaxyw. No mëmoj to na pre mê pahpãnhã amnhîre?

Nà ra mẽ pahte ja jarênh mar tỳx. Na pre kàxpore ho mẽ pahpãnhã amnhìrer kêt nê. Rỳ ôr o mẽ hikukrêx ã ohtô ho mẽ pahpãnhã amnhìrer kêt nê. Rỳ prat o mẽ hikukrêx ã ohtô ho mẽ pahpãnhã amnhìrer kêt nê. Jajaja hapêx tokyx anhỳr mã xwỳnh na. ¹⁹ Na pre ã mẽ hpãnhã amnhìrer anê nê tãm mẽ panê ty nê htyk o amnhì nhì ho mẽ pahpãnhã amnhìrer pa. Nhũm hkamrô axkapĩ. Te amnepê mã mẽ panhìgêť kot amnhì pãnhã Tĩrtũm mã ôwêhti hkrare hpar nhũm hkamrô pikapĩrta pyràk. ôwêhti krare mexre pix na prem kãm kupa. Mex nê tanhmã kute hkêť xwỳnh pix. Tã Krisja aa tanhmã amnhì tomnuj to hkêť kumrêx nê mẽ panê ty nê htyk o Tĩrtũm mã mẽ pahte amnhì tomnuj piitã hpãnhã amnhìrer pa. ²⁰ Amnepê mã kormã mẽmoj kêt ri na pre Tĩrtũm kot ã mẽ pahpãnhã amnhìrer anhỳr kaxyw mẽ pakukamã kuta nê ãm. Tã nhũm amgrã ohtô nê hapêx nhũm mẽ pahwỳr kumê nhũm man mẽ pahwỳr wrỳ. Kot ã mẽ pahpãnhã amnhì nhìpêx anhỳr kaxyw. ²¹ Tã nhũm prem kupĩ nhũm Tĩrtũm akupỳm ho htĩr nê mex o mex ã harê. Mẽ pahte ja hã harênh mar kôt amnhì kaxyw Tĩrtũm pix mã pajamaxpêr o ri papa kaxyw. Nê mẽ pahte amnhì wỳr Jejus jamãr rãhã ho ri papa kaxyw.

²² Tã pu prem ra kot ã mẽ panê amnhì nhìpêx anhỳr ã harênh ma nê mẽ pahte amnhì tomnuj kaga nê hkôt amnhì xunhwỳ. Jao amnhì to mex pix o ri papa. Nê mẽ pamã Kris kôt mẽ pahkwỳjê hkĩnh o papa. Tã kwa kêr pu mẽ arĩ pamã axpên kĩnh tỳx rãhã ho papa.

Te mẽ pakatorxã rũm mẽ pajapôx pyràk o axte mẽ pajapôx ã mẽ pajarênh Juãw 3.1-21

²³ Nê na pu prem mẽ pakatorxã nhôxàhkre rũm mẽ pajapôx pyrã nê axte mẽ pajapôx pyràk o amnhì nhìpêx. Jao ra mẽ pahpê Tĩrtũm kra nê ri papa. Na hte mẽ pakatorxã nê mẽ panhìpêêxãja wa ri pa nê gaa nê mẽ pahpê ty. No kêt Mẽpanhìpêêxã maati Tĩrtũmja wa kurom rãhã ho rãhã. Tã ra mẽ pahte amnhì kaxyw kapêr kôt pajamaxpêr o pahpê hkra jakamã kot puj mẽ uràk nê nhỳrmã pahťĩr tũm nê papa rãhã ho papa.

Nê Tĩrtũm kapêrja Tĩrtũm pyrã nê rãhãã. Koja aa hapêx kêt nê. ²⁴ Kapêr ã kagã htũm kot ja jarênh kot:

Pika piitã hkôt mẽ pa xwỳnhjaja te mẽ kot pōti grã pyràk.

Nê mẽ kot amnhì to mex xãja te kot kapôt ã pixôrã pyràk.

Na hte pōti tokyx grã nê hapêx.

Nê pixôrãja haxwỳja arĩgro htỳx mẽ nhũm grã tokyx anê nê rarak pa nê hapêx.

²⁵ No Tĩrtũm kapêr koja pōti mẽ pixôrãta wa kurom aa hapêx kêt nê. Koja arĩ rãhã ho rãhã. Anê.

Tã kapêrja tãm na htem mẽ pamã kamã harê pu mẽ pahpiitã mar o papa.

2

Mẽ pahte Tĩrtũm kot amnhì nhìpêx kôt amnhì nhìpêx ã mẽ pamã karô Rômãn 12.2; Wam Korĩť 3.16-17; Epes 2.19-22

¹ Nê kwa kêr pu mẽ axte tanhmã amnhì tomnuj to ho ri papa hkêť nê.

Rỳ tanhmã axpên mã paxêx to hkêť nê.

Nê paxêx rom tanhmã ri axpên nokupyr to hkêť nê.

Nê mẽmoj tã axpên kãm pagryk kêt nê.

Nê tanhmã axpên japrỳ hto hkêť nê.

Kêr pu mẽ ã amnhì nhìpêx anhỳr o papa hkêť kumrêx.

² Mẽ hkarare na htem ãm kãm pijaôr pix prãm. Nê gaa nê htỳxre nê ra hprêk o mô. Tã kêr ka mẽ pijaôr pix prãm xwỳnhjê pyrã nê amã Tĩrtũm kapêr mar nê

hkôt pix mã amnhĩ nhĩpêx o apa hprãm. Jao mar tỳx pê ra hkôt amnhĩ nhĩpêx mex o mō nê gaa nê hkôt amnhĩ nhĩpêx mex o apa. Te mē karãre pijaôr nê gaa nê ra hprêk o mōrta pyrãk. ³ Ra mē ate Jejus kot mē pahto mex ã omunh mex kênã.

⁴ Nê na htem kên o ixkre nhĩpêx kaxyw hãmri nê hkwy kawrà nê ri hkapi. Nhũm hō mex kêt nhũm mē tee ri omu nê nhãm kumê. Tã ja pyrã nê na pre mē pahkwỳjaja tee ri Kris pumu nê htỳx mex kêt ã hkamnhĩx nê te mē kot kên mênhta pyrãk o hipêx nê hkaga. No nhũm Tĩrtũmja amnhĩm Kris mex o mex ã harê. Te ho mēhō kot kên mex kêt ã hkamnhĩx nê mēnh nhũm mēhō kot mex ã omunh nê amnhĩm mỳnhhta pyrãk. Nom Krisja kên rom kêp htĩr tũm nê pa xwỳnh jakamã nhũm pre Tĩrtũm mē pakaxyw ãm pu prem hkôt amnhĩ xunhwỳ.

⁵ Nê Tĩrtũm na hte nhỹrmã mē pahťĩr tũm nê wa kuri mē papa mã xwỳnh ã mē pajarê. Te mē pahpê kên nhũm Tĩrtũm te kot amnhĩ Karō mã mē pahto ixkre nhĩpêx pyrãk. Jakamã na hte Jejus Kris tanhmã mē pahkrã hto pu mē Tĩrtũm kôt amnhĩ nhĩpêx mex rãhã ho ri papa. Nê tanhmã kãm amnhĩ nhĩpêx mex to nhũm ja hã mē pahpumu nê hkĩnh nê.

⁶ Tĩrtũm kapêr ã kagã htũm kot tanhmã Kris jarênh to. Nê hã kuxi nê tanhmã harênh to. Te kêp kên pyrãk ã harê nê harênh kot: Kot paj nhỹrmã Ijaew wỳr mēhō mē nhũm mē hkôt pa ho pa. Koja te kêp kên o inhōrkwỳ nhĩpêx kaxyw kên maati mex kumrêxta pyrãk. Koja amnhĩ kaxyw hkôt mē hamaxpêr xwỳnhjaja nhỹrmã ma inhō krĩ hwỳr api nê hkĩnh nê mex rãhã nê pa ho pa. Anê.

⁷ Tã ra amnhĩ kaxyw hkôt mē pajamaxpêr xwỳnhjaja. Kên pyrãk xwỳnh pê Jejusja na mē pamã mex o mex. No mē kot hkaga xwỳnhjaja na htem hamaxpêr punuj xwỳnh ã hkamnhĩx nê hkaga nê kãm hkĩnh kêt nê. Tĩrtũm kapêr ã kagã htũm kot mē harênh kot:

Na prem kên o amnhĩm òrkwỳ nhĩpêx kaxyw hkawrà ho pa nê kên maatija pumu nê htỳx omnuj ã hkamnhĩx nê hkaga.

Mê kot hkaga htã nhũm Tĩrtũm mē kurom mex o kot kên piitã hakrenh par ã omunh kurê kumrêx. Anê.

⁸ Nê mããnênh harênh kot:

Koja mē kapêr mar kêt kumrêx.

Te pry kamã kên nōr nhũm mē kot nhãm pry nê mēnh kaxyw hkamnãr o amnhĩ par krã hi kukênh pyrãk o koja mē amnhĩ nhĩpêx. Anê.

Mê kot Kris kapêr mar tã hkôt amnhĩ xunhwỳr kêt jakamã te ho mē kot amnhĩ nê kên kamnãr o amnhĩ par krã hi kukênh pyrãk o koja mē amnhĩ nhĩpêx. Jakamã koja nhỹrmã Tĩrtũmja ja hã tanhmã mē ho htỳx kumrêx. Ra kot amnhĩ kukamã mē kãm amnhĩ jarênh xã hkôt. ⁹ No mē papajaja na pre Tĩrtũm jajê rom amnhĩ kôt mē paxunhwỳ. Nhỹrmã ò krĩ kamã mē papa ho papa kaxyw. Nê mē pahte mex o mex ã harênh kaxyw. Na pu htem Ijaew nhō patre pyrã nê Pahi Maati Tĩrtũm mã tanhmã amnhĩ nhĩpêx to ho papa. Nom kormã mē pahte Kris kôt amnhĩ xunhwỳr kêt ri te mē pahpê kamãt kô kamã mē pahťỳx ri mē papa xwỳnh pyrãk. Tã Jejus kôt amnhĩ xunhwỳ nê hpãnãhã te mē pahpê hirã mex kãm ri mē papa xwỳnh pyrã nê tãm amnhĩ nhĩpêx rãhã ho papa. Ra mē pahpê Tĩrtũm kra jakamã na pu htem amnhĩ to mex rãhã ho ri papa. Nê Mēpahpãm maati Tĩrtũm mã tanhmã amnhĩ nhĩpêx to ho ri papa. Te mē kot mē ho ãhwỳr xwỳnhjaja kot kãm amnhĩ nhĩpêx o pata pyrãk. Æ na pre Tĩrtũm mē pahte amnhĩ nhĩpêx anhỹr o papa kaxyw mē panhĩpêx.

¹⁰ Amnepêm kormã mẽ pahpê hkra hkêt ri na pre mēhō mẽ pakamã ukapři hkêt kumrêx pu htem pahpunuj nê ri papa. Tã Jejus kôt amnhĩ xunhwý nhũm Tirtũm mẽ pahto hkra pu mẽ pahpê hkra hã ri papa nhũm mẽ pakamã ukapři rãhã ho mẽ pahkôt pa.

Mẽ pahpê Tirtũm mã tanhmã amnhĩ nhĩpêx to xwýnh ã mẽ pajarênh Rômãn 13.1-7; Xitre 3.1

¹¹ E ixkrãmnhwýjaja. Ra mẽ pahpê Tirtũm kra jakamã mẽ pahpê ô krĩ nhõ xwýnh. Te mẽ pahpê jar pika nhõ xwýnh kêt pyrãk jakamã kwa kêr pu mẽ arĩ mẽ pahte amnhĩ nhĩpêx tũm o amnhĩ nhĩpêx kêt nê. Nê mẽ pajamaxpêr tũm o pajamaxpêr kêt nê. Ra axtem mẽ pajamaxpêr nyw nê axtem mẽ pahte amnhĩ nhĩpêx nyw kênã. Mẽ pahte amnhĩ nhĩpêx tũmja te kãm akupyĩm mẽ pahte hkôt amnhĩ to paxujanãr prãm pyrãk. Mẽ pahte axte hkôt amnhĩ nhĩpêx o ri papa kaxyw. Tã nom kêr pu mẽ anhýr kêt nê. ¹² E kwa kêr ka mẽ anhõ krĩ kamã akwý kot Kris kôt amnhĩ xunhwýr kêt xwýnhjê noo mã tãm ri amnhĩ nhĩpêx o ri apa. Mẽ kot Kris ã tanhmã mẽ anhĩpêx to rý tanhmã hã mẽ ato kapêr punuj to htãã. Kot kaj mẽ ã mẽ hkôt amnhĩ nhĩpêx anhýr o ri apa hãmri nhũm mẽ tee ri mẽ apumu nê hamaxpêr o:

—Kwa mẽ ixte mẽ kot amnhĩ tomnuj xwýnh ã mẽ harênh tã mẽ kot amnhĩ to mex pix xwýnh na mẽ. Anê.

Hãmri nê nhýrmã mẽ pahpyrà nê Tirtũm kôt amnhĩ xunhwý nê kãm mex o mex ã harê nê kãm:

—Kwa Tirtũm. Na pre hte akrajaja anhý hã amnhĩ to mex rãhã nê pa ho pa pa ja hã mẽ omu. Nã xep amex o amex Tirtũm. Anê.

¹³ Nê mẽ apê Pahihti Jejus Kris kôt amnhĩ nhĩpêx xwýnh jakamã kêr ka mẽ anhõ krĩ kamã mẽ anhõ pahihti kapêr ma nê kapêr kôt mãn amnhĩ nhĩpêx mex o ri apa. Nê mẽ anhõ pika kamã mẽ anhõ prêjitênja ka mẽ kapêr ma nê hkôt amnhĩ nhĩpêx. Mẽ kot mẽ ato amnhĩptãr xwýnhjaja ka mẽ piitã mẽ kapêr ma nê mẽ kapêr kôt pix mã amnhĩ nhĩpêx rãhã ho ri apa. ¹⁴ Nê mẽ anhõ pahi nhý hã mẽ kapêr o mẽ pa xwýnhjaja na htem mẽ akaxyw mẽ unhwý. Mẽ kot amnhĩ tomnuj xwýnhjaja nhũm tanhmã mẽ kot mẽ ho kaxyw. Nê tãm mẽ kot amnhĩ nhĩpêx o ri mẽ pa xwýnhjaja nhũm mẽ kot mẽ ô pahi mã mex ã mẽ harênh kaxyw. ¹⁵ Tã kêr ka mẽ kapêr ma nê mẽ hkôt tãm amnhĩ nhĩpêx rãhã ho ri apa. Hãmri nhũm mẽ ato kapêr punuj xwýnhjaja ja hã mẽ apumu nê axte tanhmã mẽ ato kapêr to hkêt nê. ã mẽ ate amnhĩ nhĩpêx anhýr o apaja na Tirtũm kãm hprãm.

¹⁶ Nê mẽ pahpê Tirtũm kra jakamã na pu htem paxãmnhĩx kãm tanhmã amnhĩ nhĩpêx to ho ri papa. Nom kêr pu mẽ pahpê hkra hã pahtýx ri amnhĩ nhĩpêx kêt nê.

¹⁷ Nê kêr ka mẽ piitã mẽ ho mex o ri apa.

Nê mẽ ato amnhĩptãr xwýnhjê ho mex nê mẽ hã apijaãm rãhã ho ri apa.

Nê mẽ apê Kris kôt mẽ ate axpên to mẽ atõ nê mẽ atõxjê hã amã axpên kĩnh pê axpên to mex nê.

Nê Tirtũm ã apijaãm rãhã nê.

Mẽ kãm mẽ apênh xwýnhjaja kot tanhmã amnhĩ nhĩpêx to hã mẽ kãm karõ Epes 6.5-8; Korosê 3.22-25; Wam Ximotre 6.1-2; Xitre 2.9-10

¹⁸ Nê mẽ apê mẽ kãm mẽ axapênh xwýnhjaja kêr ka mẽ anhõ patrãw kapêr ma nê hkôt ri amnhĩ nhĩpêx. Kot mẽ ato mex o pa rý mẽ atomnuj o pa htã ka mẽ arĩ mẽ hã apijaãm pê hkôt ri amnhĩ nhĩpêx. ¹⁹ Tanhmã kot mẽ anhĩpêx

punuj to htã ka mẽ arĩ kãm axàpênh mex rãhã nê. Kêr kê Tĩrtũm ja hã mẽ apumu nê mẽ ato mex nê ka mẽ ajamakêtkati nê axãmnhĩx ri kãm axàpênh o apa. ²⁰ Nom kot kaj tanhmã amnhĩ tomnuj to nhũm anhõ patrãw ja hã apumu nê hã atak ka amnhĩ xã htỹx kamã ama nê rĩ amnhĩ pumu. No kot kaj akatã kôt kãm axàpênh mex tã nhũm amarĩ atak japêr tã kêr ka amnhĩ tã kamã agryk kêt nê. Arĩ kãm amnhĩ to htỹx kamã kãm xa nê amnhĩ tã tanhmã ho hkêt nê. Hãmri nhũm Tĩrtũm ja hã apumu nê ato mex nê. ²¹ Amnepêm na pre mẽ pahte hkôt amnhĩ xunhwýr xwýnhjaja Kris pyrà nê mẽ paxã htỹx kamã pajamak o papa hkukamã ja hã mẽ pahpumunh mex. Na pre Kris mẽ pakaxyw amnhĩ xã htỹx kãm hamak tỹx tã amnhĩ to htỹx nê mẽ kãm xa. Tã kêr pu amnhĩ xã htỹx kamã pajamak tã ý hã urãk nê amnhĩ to htỹx nê papa. ²² Krisja aa tanhmã amnhĩ tomnuj to hkêt nê pa ho pa. Nê aa mẽmoj tã amnhĩ to hêx o pa hkêt. ²³ Mẽ kot kãm kapêr punuj tã nhũm amnhĩ tã tanhmã mẽ kãm nê hkêt nê. Nê mẽ kãm kapêr punuj kêt nê. Nhũm prem homnuj tỹx kumrêx nhũm amnhĩ xã htỹx kamã hamak tã amnhĩ tã mẽ kãm ãkjêr nê tanhmã mẽ haprý hto hkêt nê. Na pre ãm hamaxpêr o: “Nã Tĩrtũm kot ixtã mẽ omunh mex kênã. Koja nhýrmã mẽ piitã tanhmã mẽ kot amnhĩ nhĩpêx to hã mẽ omunh xã hkôt tanhmã mẽ hipêx to. Tãm koja ãhpumunh tỹx xã hkôt tanhmã ixtã mẽ harênh to. Mẽ kurom ãhpumunh tỹx o ãhpumunh tỹx xwýnh kênã.” Anê.

²⁴ Kris na pre te kawã kamã mẽ pahte amnhĩ tomnuj piitã gjênh nê ho nýt nê htur rãhã pĩ kahpa hã mẽ panê htyk pyràk o amnhĩ nhĩpêx. Mẽ pahte axte tanhmã amnhĩ tomnuj to hkêt prãm xãj. Pãnhã mẽ pahte amnhĩ to mex pix o ri papa kaxyw. Tã ã kot amnhĩ xã htỹx kãm hamak anhýr o jêt jakamã kot puj mẽ pahte hkôt amnhĩ xunhwýr xwýnhjaja aa mẽ pahte amnhĩ tomnuj pãnhã amnhĩrer kêt nê. Ra Jejus htyk o kot mẽ panê amnhĩrer par kênã.

²⁵ Na pu pre te mẽ pahpê ôwêhti pikunor pyrà nê pahptỹx ri papa. Tanhmã amnhĩ tomnuj to rãhã ho ri papa. Tã nhũm Kris te kot ôwêhti jamãr xwýnh kot ôwêhti pikunor mã katorta pyràk o mẽ panhĩpêx. Pu mẽ hkôt amnhĩ xunhwý nê hkôt amnhĩ nhĩpêx mex o ri papa. Jao hkôt papa ho papa.

3

*Mẽ mjên mẽ mẽ hprõ kot tanhmã axpên nhĩpêx to hã mẽ kãm karõ
Wam Korõt 7; Epes 5.22-25; Korosê 3.18-19; Wam Ximotre 2.9-15*

¹ Nê kêr ka mẽ anijaja mẽ amjên kapêr ma nê hkôt amnhĩ nhĩpêx. Akĩnhã kormã kot Tĩrtũm kôt amnhĩ nhĩpêx kêt japêr tã arĩ kapêr ma nê hkôt amnhĩ nhĩpêx mex o ri apa. Kê mẽ ate amnhĩ nhĩpêx ã mẽ apumu nê mẽ apyrã nê Kris kôt amnhĩ xunhwýr japêr. Mẽ kãm Tĩrtũm kapêr mar prãm kêt tã koja mẽ ã mẽ ate amnhĩ nhĩpêx anhýr ã mẽ apumunh kôt mẽ apyrã nê amnhĩ kaxyw hkôt hamaxpêr japêr. ² Na htem mẽ ate Tĩrtũm kapêr kôt tãm ri amnhĩ nhĩpêx o apa hã mẽ apumunh o ri mẽ akôt pa.

³ Jakamã kêr ka mẽ anijaja amnhĩ mex pix kukamã ajamaxpêr o ri apa hkêt nê. Rý ajamaxpêr o:

—Ma kot paj mẽ hkuxwaxã ho amnhĩ krã hkĩ kuxwa mex nê inhõkrexê mex jagjê nê ri hã mra. Nê kupêxê mex kwý japrõ nê ho amnhĩm ixê mex nhĩpêx hãmri nê hagjê nê ri hã mra. Kot paj ã amnhĩ nhĩpêx anê nhũm mẽ piitã ja hã ixpumu nê kãm ixkĩnh nê inhmex ã ijarê. Ma kot paj ã amnhĩ nhĩpêx anê.

Anhýr o ri amnhĩ kukamã ajamaxpêr kêt nê. ⁴ Tĩrtũm na hte ã mẽ pahte amnhĩ nhĩpêx anhýr ã mẽ pahpumu nê ãm hã mẽ pahpumu. Mẽ òkrexê nê

mē ê mex na hte hapêx tokyx anê. No mē panhōpinhà kaxwýnh kām tām ri mē pajamaxpêr nê pakamā amnhīkrit nê papaja. Kot kaj mē ā amnhī nhīpêx anhÿr o ri apa hāmri nhūm Tirtūm ja hā mē apumu nhūm ja kām mex nê. ⁵ Amnepê mā mē pakukamā mē panhō wōwō nê mē panājaja. Mē hkwy kot Tirtūm kōt amnhī nhīpêx xwýnhjaja na prem ā amnhī nhīpêx anhÿr o pa. Mē kot mjên kōt amnhī nhīpêx o pa jakamā na prem amnhī tā mē omu nê mē ho mex nê kām mē hapê nê. ⁶ Mē panhō wōwō finat Saraja na pre ā amnhī nhīpêx anhÿr o pa. Jao mjên Apraāw kapêr ma nê hkōt amnhī nhīpêx. Nê kēp ō pahī hā harê nê hkōt pix mā amnhī nhīpêx o ri pa. Tā kot kaj mē urāk nê amnhī to htÿx nê ā amnhī nhīpêx anhÿr o apa. Hāmri nê amnhī tā amā amjên puma hkêt nê apa nê te apê Sara hkra pyrāk.

⁷ Nê mē amyjaja kēr ka mē tām mē aprō nhīpêx o ri mē hkōt apa. Mē akīnhā mē hihtÿx kêt jakamā mē kamā axukapri rāhā ho ri mē hkōt apa. War ajamē war apê Jejus kukwak ri war atūr tūm nê apa mā xwýnh jakamā kēr ka mē ho mex rāhā ho ri mē hkōt apa. Tirtūm kām war ajamē war ajapê jakamā kot kaj mē ā mē hipêx anhÿr o ri apa hāmri nê ra axāmnhix mēmoj tā amnhī to Tirtūm wÿ nhūm mē amar kurê kumrêx.

Tirtūm krajaja kot amnhī xà htÿx kamā hamak ā mē harēnh Rōmān 12.9-21; Korosē 1.10; Wam Tesarōn 5.14-15

⁸ E Kris kōt ixkrāmnhwÿjaja. Nā ixkapêr jatur xà na ja. Kēr ka mē ri axpēn kōt ajamaxpêr mex pē axpēn to mex rāhā ho ri apa. Nê mē ate Kris kōt axpēn to atō nê atōx ā amā axpēn kīnh o ri apa. Jao axpēn kamā axukapri nê mēmoj to axpēn kutā anojarēt rāhā nê. ⁹ Na pu prem Jejus kōt amnhī xunhwÿ nhūm Tirtūm mē pahō hkra nê mē pahō mex ā amnhī jarê. Tā koja mēhō tanhmā mē anhīpêx to rÿ tanhmā mē ato kapêr punuj to. Nom kēr ka mē ama nê amnhī tā tanhmā ho rÿ tanhmā ho akapêr punuj to hkêt nê. Ām te Tirtūm kot mē panhīpêx pyrāk o mē hipêx nê mē ho mex pix o ri mē hkōt apa. Ja na Tirtūm kām hprām. ¹⁰ Kapêr ā kagā htūm kot ja jarēnh kot: Kot kaj mē amā amex nê akīnh nê ri apa hprām hā kot kaj mē ā amnhī nhīpêx anê:

Kot kaj mē ri akapêr punuj o ri apa hkêt nê.
Nê mēmoj tā amnhī to axêx o ri apa hkêt nê.

¹¹ Nê te mē ate amnhī katut kōt ate amnhī tomnuj rēnh o apa pyrā nê hpānhā amnhī to mex pix o ri apa.

Nê mē amā tām axpēn nhīpêx pix prām o ri axpēn kōt apa.
Nê mē amā ajamakêtkati nê axpēn kōt apa hprām rāhā ho ri apa.

¹² Na hte Tirtūmja ā mē kot amnhī nhīpêx anhÿr o pa xwýnhjē jamār mex rāhā ho pa.

Nhūm mē tanhmā amnhī to hwÿr to nhūm mē mar kurê kumrêx.

No mē kot amnhī tomnuj o mē pa xwýnhjaja na hte mē kutā amnhī xām nê ām mē omu nê mē ho mex kêt nê. Anê.

Tirtūm kapêr ā kagā htūm kot ā mē harēnh kot anhÿr.

¹³ Nê kot kaj mē amā amnhī to mex pix o apa hprām nhūm mēhō ja hā tanhmā mē atomnuj to hkêt nê. ¹⁴ No kot kaj mē amnhī to mex pix o apa htā nhūm mēhō ja hā apumu nê tanhmā hamaxpêr to nê atomnuj ka amnhī xà htÿx kamā ajamakêtkati. Tā koja Tirtūm nhÿrmā ja hā tanhmā mē ato mex to. Jakamā kwa kēr ka mē tee ri mēhō kot tanhmā mē atomnuj to hkukamā ajamaxpêr pē amā mē uma ho ri apa hkêt nê. Nê tee ri amnhī kukamā ajamaxpêr o akapri nê ri apa hkêt nê. ¹⁵ Ām amnhī kaxyw Kris mā mām

ajamaxpêr tÿx rãhã nê mê panhõ Pahihti hã apijaam rãhã ho ri apa. Nhũm mēhõ ja hã mê apumu nê tanhmã hã mê akukjêr to nê mê amã:

—Kwa mēmo kaxyw na ka pre Kris kôt amnhĩ xãm nê hkôt ri amnhĩ nhĩpêx o apa? Anê.

Ka mê ama hãmri nê aprĩ hã kãm amnhĩ jarēnh kurê kumrêx. ¹⁶ Nom kêr ka mê akapêr mã aprĩ kamã kãm amnhĩ jarê. Tirtũm kapêr kôt amnhĩ nhĩpêx o apa hã mê kãm amnhĩ jarê. Kojã mê Kris ã mê ato kapêr punuj ry hã mê atã hpêr o axkê nê pikunhar japêr ka mê ãm amnhĩ tã mê ama nê ãm mê ama. Kwãr mê mãmrĩ ã mê anhĩpêx anê. Kêr ka mê amnhĩ tã mê omu nê arĩ amnhĩ to mex rãhã ho ri apa. Kêr kê mê tee ri amnhĩ tã mê apumu nê hpijaam nê.

¹⁷ Nê koja mê akwÿjaja mê ate Tirtũm kapêr kôt amnhĩ nhĩpêx mex o apa hã mê apumu nê hã tanhmã mê anhĩpêx to htã kêr ka mê arĩ Tirtũm kôt amnhĩ nhĩpêx o ri apa. Ja na kãm hprãm. Nom kot kaj mê tanhmã amnhĩ tomnuj to nhũm mê ja hã mê apumu nê pahihti mã mê ajarê nhũm kuma nê ja hã tanhmã mê amã ãkjêr to ka mê ra apijaam nê.

¹⁸ Nê Krisja na pre mê panê ty. ãm htyk tipxi tã mê pahpiitã mê pahpãnhã amnhĩre. Mê pakurom aa kot tanhmã amnhĩ tomnuj to hkêt tã mê pahte amnhĩ tomnuj piitã hpãnhã amnhĩrer pa. Mê pahte hkôt amnhĩ xunhwÿr nê nhÿrmã ma Tirtũm nhõ krĩ hwÿr paxãpir nê kamã pahtrĩ tũm nê papa ho papa kaxyw. Mê kot hpĩr tã nhũm Tirtũm akupÿm hõ htĩr nhũm htĩr o htĩr. ¹⁹⁻²⁰ Nom kormã akupÿm htĩr kêt ri na pre hkarõ pix o mê htyk xwÿnhjê hwÿr mō. Ahpunu kamã mê hkarõ kêp prês nê hkrĩ xwÿnhjê hwÿr mō nê mê kot Noehti kapêr mar nê hkôt amnhĩ nhĩpêx kêt nhũm gō htãm kot mê hanhir par xwÿnhjê mã kapêr. Tirtũm kot nhÿrmã mê kot amnhĩ tomnuj mÿrapê kuwy maati wÿr mê rēnh ã mê hkukamã mê kãm awjarê. Amnepêm kormã Noehti kot pãr raxta nhĩpêx o kuhê ri na prem kãm Tirtũm kapêr mar prãm kêt nê. Nhũm amnhĩ tã mê omu nê mê kamã gryk tokyx anhÿr kêt nê. Arĩ amnhĩ tã mê hamãr o pa. Mê kot hkôt amnhĩ xunhwÿr nê hkôt amnhĩ nhĩpêx prãm xaj arĩ mê hamãr ry ho pa. No ãm tee ri mê hamãr kaprÿ nhũm mê amnhĩ kaxyw hkôt hamaxpêr kêt nê htÿx ri amnhĩ tomnuj o pa. Mê ãm grêre nê Noehti kapêr ma nê gō htãm pymaj hkôt pãr raxta wÿr agjê. ãm mê kêp 8 pix nê hwÿr agjê nhũm gō htãm mê hanhir kêt nê. Tirtũm na pre mê nê omunh mex nê. No mê kot amnhĩ tomnuj xwÿnhjaja nhũm gō htãmja mê hanhir o mê himex pa. Nhũm mê kêp 8ja pix arĩ htĩr nê mex nê pãr raxta kamã gō krãhkã hã mex rãhã pa.

²¹ Gō tãmja kêp hprĩ hã mê pahte Jejus kôt amnhĩ xunhwÿr ã mê pahto amnhĩrit xã na. Mê pahte amnhĩ nhĩpêx tũm kaga nê hpãnhã amnhĩ nhĩpêx nyw o amnhĩ nhĩpêx o papa hã mê pahto amnhĩrit xã. Jakamã na htem mê pahkrã kumrã. Nom mê kot mê panê mê pagrã kugrãnh kaxyw kêt ra mê pahte Jejus kôt amnhĩ xunhwÿr ã amnhĩ to amnhĩrit kaxyw na htem mê pahkrã kumrã. Ra mê pahte Tirtũm kapêr kôt amnhĩ nhĩpêx o papa hã amnhĩ to amnhĩrit kaxyw. Pu mê ra mê pahte amnhĩ nhĩpêx nyw o amnhĩ nhĩpêx ã amnhĩ to amnhĩrit. Te mê pahte gōx kãm mê pahte amnhĩ tomnuj rer par pyrã nê hpãnhã amnhĩ nhĩpêx nyw o amnhĩ nhĩpêx o papa.

²² Nê na pre Jejus akupÿm htĩr nê ma akupÿm Tirtũm nhõ krĩ hwÿr api nê Tirtũm nhĩhkõ hã pahihti hã mê hkrĩ xã kamã hkrĩ ho hkrĩ. Hãmri nê ra Tirtũm kapêr o mê wrÿk xwÿnh nê pahi piitã mê ho amnhĩptãr o hkrĩ.

4

*Mê pahte amnhî nhîpêx nyw o amnhî nhîpêx â mê pamã karô
Epes 4.17-24; Korosê 3.1-11*

1 Nê na prem Kris pî nhûm amnhî xà htÿx kãm hamak kãm htyk kaxyw tâ arî mê kãm xa. Ra kot amnhî xà hkukamã amnhî tâ mê omunh tâ tee ri amnhî kukamã hamaxpêr o amnhî tâ tanhmã ri mê kot hpîr mã xwÿnhjê homnuj to hkêt nê. Arî mê kãm xa nhûm prem kupî. Tã kêr pu mê uråk nê â amnhî nhîpêx anhÿr o ri papa. Mê kot hã tanhmã mê panhîpêx to htã pu mê uråk nê amnhî xà htÿx kãm pajamak tâ tanhmã amnhî tâ mê ho hkêt nê. Na hte ra mê htyk nê mê hikwÿ xwÿnhjaja axte amnhî tomnuj kêt nê. Tã kêr pu mê uråk nê axte tanhmã amnhî tomnuj to ho ri papa hkêt nê. ² Jakamã kêr pu mê axte mê pahte amnhî nhîpêx tûm kôt amnhî nhîpêx o papa hkêt nê. Nê mê pajamaxpêr tûm kôt axte pajamaxpêr o papa hkêt nê. Âm Tîrtûm kãm hprãm xã hkôt pix mã tanhmã amnhî nhîpêx to ho papa rãhã ty.

³ Amnepê m kormã mê pahte Jesus kôt amnhî xunhwÿr kêt ri na pu prem mê kêp Tîrtûm kra hkêt xwÿnhjê hkôt amnhî nhîpêx.

Jao nhãm mênijê pumu nê mê kamã pahpijaãm kêt hprãm.

Nê pahpipãnh o ri papa.

Nê mê pahpipãnh kaxyw axpên wÿr akuprô nê mênijê kamã pahpijaãm kêt.

Nê sãnti hwÿr pahkônkrã ho pahkrî nê kãm amnhî jagrer.

⁴ Tã Kris kôt amnhî xunhwÿr hãmri nê mê pahte amnhî nhîpêx nyw o amnhî nhîpêx o papa. Hãmri nhûm arî mê kot amnhî nhîpêx tûm o amnhî nhîpêx xwÿnhjaja tee ri ja hã mê pahpumu nê hêx rom amnhî kôt mê pamã tanhmã ri àhkrox to ho pa. Pu mê axte mê hkôt amnhî nhîpêx kêt nhûm mê tee ri ja hã mê pahpumu nê mê pakamã gryk kato nê tanhmã mê pahto kapêr punuj to. ⁵ Tã koja Tîrtûm nhÿrmã amnhî wÿr mê hã karô nhûm mê ma hwÿr mra nê kutã hkrî. Nê kormã mê htîr ri tanhmã mê kot amnhî nhîpêx to ho pa hã kãm amnhî jarênh pa. Hãmri nhûm mê kot amnhî nhîpêx â tanhmã mê hipêx to. Koja mê pahpiitã tanhmã mê pajarênh to. Mê htyk xwÿnhjaja nê kormã mê pahtîr nê mê papa xwÿnhjaja nhûm mê pahpiitã tanhmã mê pajarênh to.

⁶ Na pre Jesus ty hãmri nê kormã akupÿm htîr kêt rãhã hkarô pix o ma amex wÿr tê nê kamã mê htîr ri amnhî kaxyw Tîrtûm mã hamaxpêr xwÿnhjê mã awjarê. Na prem mê kot amnhî tomnuj mÿrapê ra wej nê ty nê arî amex kãm ri pa. Jakamã nhûm Jesusja hkarô ho ma mê hwÿr tê nê mê kãm:

—E na pa ra mê ate amnhî tomnuj pãnhã amnhîrer pa. Tã kormã mê atîr ri mê ate amnhî kaxyw Tîrtûm kôt ajamaxpêr jakamã kot kaj mê ma hwÿr api nê wa ixkuri wa ixpyrà nê atîr tûm nê amex nê apa ho apa. Anê.

*Mê pahpê Kris kwÿ hã tanhmã mê pahte axpên nhîpêx to hã mê pamã karô
Rômãn 12.6-8; Wam Korî 12.1-11*

⁷ Nê koja tokamã mê panhõ pikaja mê pahpê hapêx nê kamã mêmoj piitã hapêx pa. Jakamã kwa kêr ka mê ate amnhî nhîpêx â amnhî pumunh mex o apa.

Nê mê atÿx ri ajamaxpêr ri apa hkêt nê.

Nê mêmoj punuj nê amnhî to htÿx o ri apa ho ajamaxpêr nyw pix o amnhî to Tîrtûm wÿr rãhã ho ri apa.

⁸ Nê kwa kêr ka mê kãm axpên kînh o ri axpên kôt apa. Ja na mex o mex. Kot kaj mê â axpên nhîpêx anê nhûm Kris kôt atô rÿ atôxjê hõ tanhmã atomnuj to japêr ka amnhî tâ omu nê âm omu. Amã hkînh o âm amnhî tâ omu. Jao axte kot tanhmã atoja mã ajamaxpêr kêt nê.

⁹ Nê kêr ka mê axàmnhîx ajamakêtkati nê amnhî nhôrkwÿ hwÿr axpên wÿ nê axpên to mex o ri apa. Nom kêr ka mê agryk kãm amnhî wÿr mê hwÿr kêt nê. ¹⁰ Na pre ra Tirtûm mê pahpê hkra hã ahpÿnhã tanhmã mê pamã mêmoj tâ karô hto nê ã mê pahte amnhî nhîpêx anhÿr o papa kaxyw mê pahto mê paxihtÿx. Mê pahte ahpÿnhã tanhmã axpên to mex to ho ri axpên kôt papa kaxyw. Tã kêr ka mê ra kot mêmoj tâ mê amã karô hkôt axpên nhîpêx o ri axpên kôt apa. ¹¹ Koja ma mê ate akwÿjê mã kapêr jarênh o ri apa kaxyw mê amã karô ka mê ama nê akatât kôt ÿ hã mê kãm harênh mex o ri mê hkôt apa. Rÿ tanhmã axpên to ajuta hto ho ri apa kaxyw mê axunhwÿr japêr ka mê amnhî tâ omu nê hkamnâr rom mê ho ajuta mex rãhã ho ri apa. Mê apiitã Jejus nhÿ hã ã amnhî nhîpêx anhÿr o ri apa. Kêr kê Jejus kôt mê akwÿjjaja amnhî tâ mê apumu nê mê anhÿ hã Tirtûm mã mex o mex ã harê.

Jejus kwÿjjaja kot amnhî xã htÿx kamã hamak o pa hã mê harênh

Rukre 6.20-23; Juãw 16.1-4; Sikûn Tesarôn 1.3-12; Sikûn Ximotre 3.13; Eprêw 12.3; Xiakre 1.2-4

¹² E Kris kôt ixkràmnhwÿjjaja. Koja Kris kwÿ kêt xwÿnhjaja Kris ã tanhmã mê anhîpêx to nom kwa kêr ka mê tee ri amnhî kukamã ajamxpêr o akapri nê apa hkêt nê. Kêt mê akînh rãhã axpên kôt ri apa. Na htem ã mê pahpê Kris kwÿjê nhîpêx anhÿr o pa. Jakamã kwa mê amnhî tâ mê omu nê tee ri amnhî kukamã ajamxpêr kêt nê. ¹³ Mê arî akînh nê ri apa. Mê kot Kris pyrà nê mê panhîpêx punuj tãã. Kêr kê Jejus nhÿrmã akupÿn mê pahwÿr wrÿ pu mê omu nê pahkînh tÿx o pahkînh tÿx. ¹⁴ Kwãr mê mãmrî mê pahpê Kris kwÿ hã tanhmã mê panhîpêx to. Na htem ã Tirtûm Karô kot mê pahkarô mã gjêx xwÿnhjê nhîpêx o pa anê.

¹⁵ Nê mê apê Kris kwÿ jakamã kwa kêr ka mê amnhî to mex rãhã o ri apa. Jao mê hpar o ri apa hkêt nê.

Nê ri axãhkînh o ri apa hkêt nê.

Nê nhãm mê hkaêx mã agjêx o ri apa hkêt nê.

Nê tanhmã mê homnuj to ho ri apa hkêt nê.

Kot kaj mê ã amnhî nhîpêx anhÿr o ri apa nhÿm mê anhô pahihti ja hã tanhmã mê ato ka mê amnhî kamã apijaãm tÿx nê. ¹⁶ Nom koja mê apê Kris kwÿ hã tanhmã mê anhîpêx to ka mê ja hã amnhî tâ mê omu nê amnhî kamã apijaãm kêt nê. ãm Tirtûm pix mã amnhî jarê nê kãm:

—Pa Tirtûm. Ixpê akra Kris kwÿ hã na mê ã ixtomnuj anê. Nom ixpê akra jakamã kwãr mê mãmrî tanhmã inhîpêx to. Amex o amex o ate ixto akra jakamã kwãr mê mãmrî ã inhîpêx anhÿr o pa. Anê.

¹⁷ Nê koja Tirtûm tokyx mê pahpiitã tanhmã mê pahte amnhî nhîpêx to hã mê pahpumu nê tanhmã mê panhîpêx to. Mê pahpê hkrajaja koja tanhmã mê pahte amnhî nhîpêx to hã tanhmã mê pahto mex to. Hãmri nê hpãnhã mê kêp hkra hkêt xwÿnhjê ho hapu nê tanhmã mê hipêx to. Mê kot amnhî kaxyw hkôt hamaxpêr kêt jakamã nhÿm mê pahkînhã tanhmã mê homnuj tÿx to. ¹⁸ Kapêr ã kagã htÿm kot ja hã mê pajarênh kot:

Mê kot Tirtûm kapêr kôt amnhî to mex xwÿnhjaja na htem àmnhîx amnhî xã htÿx kamã hamak o pa kamã ty nhÿm Tirtûm ma ô krî hwÿr amnhî wÿr mê ho àpir kurê kumrêx.

Nom mê kot amnhî tomnuj xwÿnhjaja koja mê hkînhã amnhî xã htÿx kamã hamak rãhã nê pa ho pa nê aa mex kêt nê. Anê.

¹⁹ Tã koja Tirtûm kãm ja prãm japêr kwãr mẽ mãmri Kris ã tanhmã mẽ pahptomnuj to. Nom kêr pu mẽ Tirtûm kamnâr rom amnhĩ to mex pix o ri papa. Kêp mẽ panhĩpêx xwýnh maati jakamã ra kot amnhĩ jarênh xã hkôt koja tanhmã ri mẽ pamã amnhĩ nhĩpêx to ho pa.

5

*Tirtûm krajaja kot tanhmã amnhĩ nhĩpêx to hã mẽ kãm karõ
Atre 20.28-31*

¹ E kot paj hpãnhã mẽ apê Kris kwý hkrãhtûmjê mã ixkapêr ka mẽ inhma. Ijaxwýja ixpê mẽ akrãhtûmjê hõ na pa. Na pa pre mẽ akurom Kris htyk kãm omu. Nom kot puj mẽ nhýrmã pahpimràatã mex o mex ã omu nê urak nê mẽ pamex nê ri papa ho papa. ²⁻³ Jakamã e Kris kôt mẽ hkrãhtûmjaja kêr ka mẽ atar Kris kôt pahkwýjê jamãr mex nê. Ra Tirtûm kot mẽ ate kãm hkwyjê jamãr kaxyw mẽ axunhwýr jakamã kêr ka mẽ omunh mex rãhã ho mẽ hkôt ri apa. Te ho ôwêhti jamãr xwýnh kot ôwêhti jamãr mexta pyrãk. Te mẽ kêp Tirtûm krit ôwêhti nhũm mẽ ate kãm mẽ hamãr o apa xwýnh pyrã nê kãm mẽ omunh mex rãhã ho ri mẽ hkôt apa. Nê akĩnh pê tanhmã ri mẽ ho ajuta hto ho ri mẽ hkôt apa. Ja na Tirtûm kãm hprãm. Nom kêr ka mẽ ano hkã karôt kãm mẽ ho ajuta hkêt nê. Rý kãxpore hprãm xãj mẽ kãm tanhmã amnhĩ nhĩpêx to hkêt nê. ãm amarĩ tanhmã mẽ kutã anojarêt to pix kukamã ajamaxpêr o ri mẽ hkôt apa.

Nê kêr ka mẽ kãm mẽmoj tã karõ kamã axihtýx kêt nê. Mẽ akapêr mã aprĩ kamã mẽ kãm mẽmoj jarê kê mẽ amnhĩ tã mẽ apumu nê mẽ apyrã nê ã axpên nhĩpêx anhýr o pa.

⁴ E kêr ka mẽ ã Kris kôt mẽ akwýjê jamãr mex pê mẽ hipêx o apa anê. Hãmri nhũm mẽ pajamãr xwýnh maatija ja hã mẽ apumu nê nhýrmã akupýn mẽ pahwýr wrý nê mẽ ato mex rax nê.

⁵ Nê e mẽ amy xãptãr nywjaja. Kêr ka mẽ Kris kôt mẽ akrãhtûmjê kapêr ma nê mẽ hkôt ri amnhĩ nhĩpêx mex o ri apa.

Nê kwa kêr ka mẽ apiitã axpên nhĩpêx o te anhĩõ kot amnhĩ to rax o ajakrenh pyrãk. Tirtûm kapêr ã kagã htũm kot ja jarênh kot:

Mẽ kot amnhĩ to jarkrar o ri mẽ pa xwýnhjaja na hte Tirtûm mẽ kutã amnhĩ xunhwý.

No mẽ kot amnhĩ to hkryre nê axpên tã hpijaãm o mẽ pa xwýnhjaja na hte mẽ ho mex o pa.

⁶ Anhýr ã mẽ harênh jakamã kwa kêr ka mẽ Tirtûm ã apijaãm rãhã ho ri apa ixkwýjaja. Nê axpên mã ri amnhĩ to jarkrar o ri apa hkêt nê. Kêr kê Tirtûm xihýtýx xwýnhja ja hã mẽ apumu hãmri nê nhýrmã kot mẽ pahto mex xã hã arĩgroja kato nhũm mẽ ate amnhĩ to mex xwýnh ã mẽ ajarê nê mẽ ato mex rax nê.

⁷ Nê kêr ka mẽ tee ri amnhĩ kukamã ajamaxpêr pê akaprĩ ho ri apa hkêt nê. ãm te mẽ ate Tirtûm mã akaprĩ nhõr pyrãk o amnhĩ nhĩpêx nê axãmnhĩx akĩnh nê akaprĩ hkêt nê apa. Tirtûm kêp mẽ pajamãr xwýnh maati kênã kot ka kêt mẽ ri akaprĩ nê ri apa.

⁸ Nê kwa mẽ okora. Kêr ka mẽ amnhĩ nê kot mẽ pakutã amnhĩ xunhwýr xwýnh maati Satanastija pumunh mex rãhã ho ri apa. Na hte mẽ panhĩpêx o te ropkror kot akunĩ kamã mry ho krihkrit o ri mrrar pyrãk o mẽ panhĩpêx. Jao mẽ pahte Kris kaga hprãm xãj apkati mẽ tanhmã nê mẽ pahto ho ri mẽ pahkôt pa. ⁹ Na hte ã pika piitã hkôt Kris kôt mẽ pahtõ nê mẽ pahtõxjê nhĩpêx

anhÿr o pa nhÿm mē pahpyrà nē amnhÿ xà htÿx kamã hamak o pa pê omnuj nē pa. Jakamã kwa kēr ka mē Kris kôt amnhÿ xunhwÿr tÿx nē kutã amnhÿ to htÿx rãhã ho ri apa. ¹⁰ Tÿrtÿm kãm mē pajapê jakamã na hte mēmoj to mē pakutã nojarêr rãhã ho ri pa. Na pre mē pamex nē nhÿrmã mē pahte kuri tãm amnhÿ nhÿpêx o papa mã xwÿnh ã mē pajarê. Kris kukwak ri ã mē pajarênh anhÿr jakamã mē ate jar Kris ã apunuj nē ri apa htã kot kaj mē kÿrtpêm ã amnhÿ nhÿpêx anhÿr ry hkêr nē. Koja Tÿrtÿm mē akrã kamã mē ajamaxpêr xihtÿx jagjê ka mē akupÿm amex nē axihtÿx pê ate amnhÿ nhÿpêx nyw o amnhÿ nhÿpêx rãhã ho ri apa.

¹¹ Tÿrtÿmja hihtÿx o hihtÿx nē àhpumunh o àhpumunh. Nē hihtÿx xà nē àhpumunh xà koja aa kēp hirerek nē hapêx kêt kumrêx. ãm hãmri na mē kot harênh kot anhÿrja.

Pêtre kapêr jatur xà

¹² Nē ota Kris kôt mē pahtô Sirastija na inhmã mē akaxyw kagãja nhÿpêx pa mē awÿr mēnh kaxyw. Na pa hte kãm ixkapêr nhÿm inhma nē inhmã hã kagã. Na hte Kris kapêr kôt amnhÿ nhÿpêx rãhã ho ri pa. Tã inhmã kagãja nhÿpêx. Mē ate kamã harênh nē mar nē tãm ajamaxpêr kaxyw. Nē Tÿrtÿm kãm mē ajapê nē kot mēmoj to mē akutã nojarêr ã mē ate kamã harênh kaxyw. Tã kēr ka mē kãm mē ajapê hã amnhÿ tã harênh ma nē kapêr kôt pix mã amnhÿ nhÿpêx mex rãhã ho ri apa. Mē akwÿjjaja kot tanhmã hã mē ato htãã.

¹³ Nē ota jar Papirôn kamã Kris kôt mē pahtô nē mē pahtôxjaja mē awÿr hpêr mē. Tÿrtÿm kot mē pahpyrà nē mē ho hkra jakamã mē kēp mē atô nē mē atôx ã mē awÿr hpêr mē. Nē Xiakre mããnen mē awÿr hpêr mē. Te kēp ixkra pyràk.

¹⁴ Nē kēr ka mē nhÿri apê Kris kwÿ hã axpēn pumu nē mē axpēn to atô nē atôx ã axpēn mã akapêr mex kurê kumrêx.

E kē Tÿrtÿm mē apê Kris kwÿ hã mē amã mē ajamakêtkati nē mē apa xà gô ka mē axãmnhÿx ajamakêtkati nē amex nē ri apa ho apa.

Tã ãm ja pix. Ixpê Simãw Pêtre na pa ã mē awÿr kagã nē mēnh anê.

Sikûn Pêtre

Simãw Pêtre kot Jejus kôt hkwyjê hwÿr wam kagà nê mênh kôt hõ mênh

Simãw Pêtre na pre kagàja nhîpêx. Jejus nhÿ hã hkrajê jahkre ho mê pa xwÿnhjê hõ na pre. Mê kêp Jejus kra hkêt xwÿnhjaja ra kot Jejus ã hpîr kaxyw nhÿm pre kagàja nhîpêx nê krî piitã hkôt Jejus kwÿjê hwÿr kurê nê kamã hprî hã mê kãm mêmoj tâ karô. Mê kot arî Tîrtûm kot amnhî nhîpêx kôt amnhî nhîpêx rãhã ho pa hã mê kãm karô. Nê hamaxpêr o mê hamaxpêr rãhã ho pa hã mê kãm karô.

Nê mê hkwy kot Tîrtûm kôt amnhî nhîpêx ã amnhî jarênh tâ hkôt amnhî nhîpêx kêt xwÿnhjaja nhÿm pre tanhmã mê harênh to. Æ na pre mê kãm mêmoj jarênh nê hã kagà nê krî piitã hkôt mê hwÿr rênh anê. Nê mê kãm:

1 Pa Kris kôt ixtô nê ixtôxjaja. Xà mê amex? Ot pa mê awÿr kagà nhîpêx nê krî piitã hkôt mê awÿr kurê. Ixpê Simãw Pêtre na pa wam ixte kagà nhîpêx nê mê awÿr mênh tâ axte hõ nhîpêx. Ixte Jejus Kris nhÿ hã mê ajahkre ho ixpa xwÿnh ã mê amã hipêx nê kumê. Na pa hte Jejus mã amnhî nhîpêx mex o ri ixpa.

Nê mê papytâr xwÿnh Jejus Krisja Tîrtûm pyrã nê mex o mex. Nê wa kot amnhî nhîpêxja mex o mex. Jakamã na pre wa tanhmã mê pahkrã hto pu mê amnhî kaxyw wa hkôt pajamaxpêr tÿx rãhã ho ri papa. Na ka htem ixpyrà nê ã amnhî nhîpêx anê. Tã pa mê amã kagàja nhîpêx.

2 Nã Tîrtûm mê mê panhõ Pahihti Jejus wa kot amnhî nhîpêxja na ka mê ra harênh mar tÿx nê. Wa kot tanhmã amnhî nhîpêx to nê tanhmã wa hamaxpêr toja ka mê mar tÿx nê wa hkôt pix mã amnhî nhîpêx. Tã kêr ka mê arî ã amnhî nhîpêx anhÿr rãhã ho ri apa. Jao axamnhîx ajamakêtkati nê akînh nê apa ho apa. Na pa hte ã mê ato Tîrtûm mê Pahihti Jejus Kris wa hwÿr o ri ixpa anê. Na hte Tîrtûm mê ato mex nê mê akutã nojarêt rãhã ho pa.

Tîrtûm kot mê pahto mex o pa hã harênh

Epes 2.12-13; Wam Tesarôn 1.2-4; Sikûn Pêtre 3.18

3 Nê Tîrtûmja àhpumunh tÿx o àhpumunh tÿx jakamã na pu htem hkôt amnhî xunhwÿ nhÿm amnhî tâ mê pahpumu nê mê pamã àhpumunh tÿx xà hkwy gõ. Hãmri pu mê ra urak nê amnhî to mex nê tãm amnhî nhîpêx o ri papa. Tã kot puj mê nhÿrmã ma ò krî hwÿr api. 4 Na pre mê pakukamã amnhî jarênh o:

—Kot paj nhÿrmã ixkrajê mã ixte amnhî nhîpêx mex kwÿ gõ nhÿm mê inhÿ hã ho tãm ri amnhî nhîpêx mex o pa. Nê ixpyrà nê hamaxpêr mex o pa.

Anhÿr jao te ra mê pamã hkînh xà mex kwÿ nhõr pyrak o mê panhîpêx. Nê te ra kot mê pahkrãm hamaxpêr mex jagjênh nê mê pamã kot amnhî nhîpêx mex jagjênh pyrak. Mêmo kaxyw na pre ã mê panhîpêx mex anê? Nã urak nê tãm mê pahte amnhî nhîpêx mex rãhã o ri papa kaxyw. Jao mê pahte mê kêp hkwy hkêt xwÿnhjê hkôt amnhî nhîpêx kêt nê. Nê mê hamaxpêr punuj o pajamaxpêr kêt nê. Nê hpãnhã mê pahte Tîrtûm kôt pix mã amnhî nhîpêx rãhã ho pa. Æ mê pahte amnhî nhîpêx anhÿrja na mex o mex. 5 Tã ã Tîrtûm kot mê panhîpêx mex anhÿr jakamã kwa kêr ka mê kapêr mar tÿx nê hkôt pix mã amnhî nhîpêx mex o ri apa. Jao amnhî kaxyw hkôt ajamaxpêr rãhã nê. Kot kaj mê ã amã amnhî nhîpêx anhÿr o apa hprãm hã kot kaj mê mãânêh

amā tām amnhī nhīpêx o apa hprām. Nē mē amā Tīrtūm kapêr piitā mar prām o ri apa. ⁶ Hāmri nē piitā mar pa nē mēmoj punuj piitā nē amnhī to htýx nē. Nhūm mē kēp Kris kwý hkêt xwýnhjaja Kris ā tanhmā mē anhipêx to htā ka mē ām amnhī tā mē omu nē mē umaj mē amā Kris kaga hprām kêt nē. Nē mē amā Tīrtūm mā amnhī jarēnh rāhā ho apa hprām. Nē mē amā kapêr mar rāhā ho apa hprām.

⁷ Nē mē amā Kris kôt mē atō nē mē atōxjê ho mex pix o ri apa hprām. Jao te mē amā amnhī tā ma pyrāk o mē piitā mē hipêx o ri mē hkôt apa.

⁸ E kēr ka mē ā amnhī nhīpêx anhýr o ri apa. Kot ka mē ā amnhī nhīpêx anē nē mē panhō Pahihti Jejus Kris kôt amnhī nhīpêx mex o mō. Hāmri nhūm mē akwýjaja mē apumu nē mē apē Kris kwý hā mē ajarēnh kurē kumrêx.

⁹ No kot ka mē atō ixkapêr mar tā hkôt amnhī nhīpêx kêt nē hāmri te Tīrtūm kot anē ate amnhī tomnuj rēnh par mā ajamaxpêr kêt pyrāk. ¹⁰⁻¹¹ No na ka htem ā amnhī nhīpêx anhýr kêt nē. Ra mē ate Pahihti Jejus Kris kôt amnhī nhīpêx mex jakamā na htem ja hā mē apumu nē Tīrtūm kot mē ato hkra hā mē ajarēnh kurē kumrêx. Kot kaj mē ā hkôt amnhī nhīpêx anhýr o apa nē mēmo arīgro hā apunuj nē apa htā Jejus kaga hkêt nē. Hāmri nē nhýrmā ma Tīrtūm nhō krī hwýr api nhūm mē apumu nē mē ato mex rax nē. Hāmri ka mē ō krī kamā mē panhō Pahihti Jejus Kris wa kuri atír kêt nē amex nē apa ho apa.

¹² Nē na ka mē ra Tīrtūm kot amnhī nhīpêx mar týx nē amnhī krā kamā kot amnhī nhīpêx mā ajamaxpêr týx o ri apa. Tā nom kot paj arī mē amā ja jarēnh rāhā ho ri ixpa. ¹³ Kormā ixtír ri kot paj xatā mē amā harēnh o amnhīrīt. Ja na kêt inhmā hprām. Mē ate nhýrmā tanhmā ri ajamaxpêr to nē hkaga pumaj. ¹⁴ Na pre mē panhō Pahihti Jejus Krisja inhmā tokyx itxyk ā ijarē. Kot paj xep kritpēm ri ixtír nē ixpa hkêt nē. ¹⁵ Jakamā na pa kormā ixtír ri ā mē amā kaga nhīpêx anē. Mē ate inhmýr pē arī omunh nē kamā harēnh nē Tīrtūm kot amnhī nhīpêx mā ajamaxpêr týx rāhā ho ri apa kaxyw.

Pêtre kot no ho Jejus pumunh ā amnhī jarēnh

Matêwre 17.1-5; Makre 9.1-8; Sikūn Ximotre 3.16-17

¹⁶ Nē na pa pre ra tanhmā mē amā mē panhō Pahihti Jejus Krisja jarēnh to. Hihtýx o hihtýx ā harē nē āhpumunh týx o āhpumunh týx ā harē. Nē nhýrmā akupýn mē pahwýr wrýk ā harē. No na pa pre amnhī krā hkôt ā harēnh anhýr kêt nē. Na pa pre inhno ho Jejus hihtýx o hihtýx ā omunh o hkôt ixpa nē ixte omunh xā hkôt ā mē amā harēnh anē. ¹⁷⁻¹⁸ Amnepê mā kormā ixkwýjê mē mē ixte arī hkôt ixpa ri pa prem hkôt hixêt prêk nhīmōk wýr api. Pa nē kaxyw Xiakre nē Juāw mē pa mē hkôt xipimràatā hixêt ā api nē himōk ā ixkuhē. Hāmri nhūm Tīrtūm tanhmā Jejus to nhūm hirā htýx kām xa. Hāmri nhūm Mēpahpām Tīrtūmja mē inhmā kapêr. Kaxkwa kamā hirā htýx rax rūm mē inhmā kapêr o:

—E ota Ixkrata xa. Inhmā hapê ho inhmā hapê. Anē.

Tā ra ixte mar xā hkôt pa amnhī xō ri mē amā harē nē hā kagā. ¹⁹ Na pa prem ā hixêt prêk nhīmōk ā Jejus pumunh nē Tīrtūm kot tanhmā harēnh to hā mar anē. Hāmri nē ijamaxpêr o:

—Nā ām hāmri na pre amnepēm Tīrtūm nhý hā kapêr jarēnh o mē pa xwýnhjaja Jejus kukamā ā harēnh anhýr o pa. Anē.

Mē kot tanhmā Jejus kukamā harēnh toja te kot kamāt kō kamā kanē hpōk nhīrā hkryre pyrāk. Tā koja nhýrmā akupýn wrý hāmri nē te myt kator nē hirā mex nhūm mē pahte mēmoj pumunh mex pyrāk. Jakamā kwa kēr pu mē kot

tanhmã Jejus kukamã harênh toja mar tÿx rãhã nhùm nhÿrmã te myt kator pyrã nê akupÿn mẽ pahwÿr wrÿ. ²⁰ Tÿrtÿm kapêr ã kagã htÿm kot tanhmã ÿ hã kapêr jarênh xwÿnhjê jarênh to. Mẽ kot mẽmoj kukamã ujarênh ã mẽ harê. Nê Jejus kukamã tanhmã ujarênh to hã mẽ harê. ã mẽ kot mẽmoj kukamã harênh kot anhÿr. Nom na pu htem amnhĩ krã hkôt ã mẽ ujarênh anhÿrja mar tÿx kêt nê. Koja Tÿrtÿm Karô hprĩ hã mẽ pamã ho amnhĩrit pu mẽ rĩ kormã pahprĩ hã mar tÿx nê. ²¹ Na pre ÿ hã kapêr jarênh o mẽ pa xwÿnhjaja amnhĩ krã hkôt hkwyjê mã ujarênh o pa hkêt nê. Tÿrtÿm Karô na pre tanhmã mẽ hkrã hto nhùm mẽ ÿ hã hkwyjê mã tanhmã harênh to ho pa nê ÿ hã mẽ pamã hã kagã.

2

Tÿrtÿm kapêr jarênh o hêx xwÿnhjê jarênh

Korosê 2.16-17; Wam Ximotre 4.1-5; Sikùn Ximotre 3.1-9; Jutre 3-16

¹ Nê amnepêm na pre Ijaew kwÿjaja te mẽ kêp Tÿrtÿm nhÿ hã kapêr jarênh xwÿnh pyrãk. Nom Tÿrtÿm kapêr kwÿm ri hkwyjê mã tanhmã ho hêx to ho pa. Tã koja nhÿrmã mẽmojaja mẽ urãk nê mẽ awÿr mra nê ã mẽ amã Tÿrtÿm kapêr o hêx o pa anê. Nê kapêr kwÿm ri tanhmã mẽ ajahkre hto ho mẽ amã hêx o mẽ akôt pa. Mẽ ate mẽ mar nê amnhĩ nhĩpêx nyw kaga nê hpãnhã mẽ kot amnhĩ tomnuj kôt apa hprãm xaj nhùm mẽ hêx rom tanhmã mẽ ajahkre hto ho pa. Pahihti Jejus kot mẽ nê htyk tã nhùm mẽ hkôt amnhĩ nhĩpêx kêt nê axtem nê ri kapêr o hêx o pa. Mÿrapê koja Tÿrtÿm tokyx mẽ kot amnhĩ xã htÿx kamã hamak tÿm xã hwÿr mẽ rênh pa.

² Koja mẽ ohôtô nê mẽ kapêr ma nê kãm mẽ mar prãm nê. Nê mẽ hkôt hamaxpêr nê mẽ hkôt amnhĩ nhĩpêx o pa. Jao ra hpjiaam kêt nê mẽ hkôt htÿx ri tanhmã amnhĩ tomnuj to ho ri pa. Tã ã mẽ kot Tÿrtÿm kapêr o mẽ hêx xwÿnhjê mar nê mẽ hkôt amnhĩ nhĩpêx anhÿr jakamã koja mẽ kãm Tÿrtÿm kapêr mar prãm xwÿnhjaja mẽ kot amnhĩ nhĩpêx ã mẽ omu nê Tÿrtÿm kapêrja mex kêt ã harênh japêr. ³ Tÿrtÿm kapêr o mẽ hêx o mẽ pa xwÿnhjaja na htem kãxpore pix prãm xaj mẽ awÿr mra nê tanhmã mẽ amã kapêr jarênh o hêx to ho pa nhùm Tÿrtÿm ja hã mẽ omunh rãhã ho hkrĩ. Na hte nhÿhÿm mrapêr kêt nê rÿ htÿx ôt o hikwÿy hkêt nê. Na hte arĩ mẽ kot amnhĩ nhĩpêx ã mẽ omunh rãhã ho hkrĩ. Tã koja nhÿrmã ma mẽ kot amnhĩ xã htÿx kamã hamak tÿm xãta hwÿr mẽ kurê nhùm mẽ ma hwÿr hapêx pa.

⁴ Nê amnepê mã kaxkwa kamã Tÿrtÿm kapêr o mẽ wrÿk xwÿnh kwÿjaja na prem axtem nê Tÿrtÿm kapêr nhĩrôp kuhê nhùm tee ri amnhĩ tã mẽ omu hãmri nê amnhĩ nê mẽ kator pa. Mẽ kamã ukapri hkêt nê amnhĩ nê mẽ kator pa hãmri nê mẽ kot amnhĩ xã htÿx kamã hamak tÿm xãta wÿr mẽ hano. Nhùm prem ma hwÿr pa nê ahkre xupÿm kãm kamãt kô kamã arĩ hkrĩ ho hkrĩ. Tÿrtÿm kot mẽ piitã tanhmã mẽ harênh to xã hã arĩgroja jamãr o hkrĩ. Nê tee ri kãm hapôx prãm kapÿr ho hkrĩ.

⁵ Nê amnepêm pika kamã ri mẽ pa xwÿnhjaja na prem haxwÿja piitã amnhĩ tomnuj pix o ri pa. Jakamã nhùm Tÿrtÿm ja hã mẽ omu nê mẽ kamã ukapri hkêt nê. Nê mẽ hwÿr na rax mẽ. Mẽ kãm kapêr mar prãm kêt jakamã nhùm mẽ hwÿr kumê nhùm wrÿk rax kumrêx nê mẽ hanhir pa nê mẽ himex. ãm Noehti mẽ hkwyjê pê 7 pixjaja nhùm mẽ kurom htÿr nê hkã hkãnh nê mẽ mex nê pa. Noehti kormã na xwÿj ri kot mẽ kãm Tÿrtÿm kapêr jarênh o ri mẽ hkôt pa htã nhùm mẽ kuma nê ãm kuma. Mÿrapê na prem piitã pikaprãr pa.

6 Nē Sotō mē Gomo wa kamā mē pa xwýnhjaja haxwýja na prem amnhī tomnuj týx kumrēx o pa nhūm Tīrtūm wamtajē pyrā nē mē kamā ukaprī hkēt nē. Na pre kaxkwa rūm mē hipy mēmo hpōk kwý rē nē ho mē ho hapēx pa. Tā mēmo kaxyw na pre ā mē hipēx anē? Nā mē piitā mē kot mē harēnh mar nē hamaxpēr o:

—Na hte ā Tīrtūm mē kot amnhī tomnuj xwýnhjē nhīpēx anē.

Anhūr o hamaxpēr kaxyw na pre ā mē hipēx anē. ⁷⁻⁸ Nom Rohtija na pre Tīrtūm Sotō nē kator jakamā nhūm htyk kēt nē. Na pre hkwyjē rom tām amnhī nhīpēx tā mē kot amnhī tomnuj týx xwýnhjē nhō krī kamā ōrkwy nē ri pa. Nē apkati mē tee ri mē kot amnhī nhīpēx ā mē omu nē mē ŷ hā hkaprī nē tee ri mē hkukamā hamaxpēr o pa. No nhūm mē amnhī tomnuj ā amnhī pumunh nē tokyx tām amnhī nhīpēx kēt nē. Nē apkati mē tanhmā amnhī tomnuj to nē kapēr punuj o pa nhūm Rohti tee ri mē omu nē hkaprī htýx nē pa. ⁹ Tā nhūm Tīrtūm mē himex kaxyw nē mē nē kator nē mē himex pa. Na hte ā Tīrtūm mēmoj punuj pē mē kot amnhī kaxyw kām hamaxpēr nē hkōt amnhī nhīpēx xwýnhjē pytār anē. No mē kot amnhī tomnuj xwýnhjaja na hte axtem mē hipēx. Tā koja nhūr mā mē pahpiitā tanhmā mē pajarēnh to xā hā arīgro kato nhūm ma mē kot amnhī xā htýx kamā hamak tūm xā wýr mē rēnh pa. Ām tapxipix kot ā mē hipēx anhūr kaxyw āhpumunh týx. ¹⁰ Tā mē hpijaām kēt kām amnhī tomnuj o mē pa xwýnhjaja nē mē kot Tīrtūm kapēr mar nē ām mar xwýnhjaja koja nhūr mā mē homnuj týx nē.

Nē Tīrtūm kapēr o hēx o ri mē pa xwýnhjaja na htem amnhī to jarkrar pix o pa. Nē Tīrtūm kapēr o mē wrýk xwýnhjē hā hpijaām kēt nē. Nē axtem nē mē ho kapēr punuj pē tanhmā mē haprý hto ho pa. ¹¹ Tā nhūm htem amnhī tā mē kuma nē ām mē kuma. Mē kurom mē hihtýx kumrēx tā no ām amnhī tā Tīrtūm mā tanhmā mē ho kapēr to hkēt nē.

¹² Nē mry xoprē na hte htýx ri pa ho pa. Tā Tīrtūm kapēr o mē hēx o mē pa xwýnhjaja htem mry xoprēta pyrā nē htýx ri hamaxpēr mex kēt o pa. Jao hprī hā mēmoj mar kēt tā htýx ri hijuk ri hijuk ri tanhmā mēmoj jarēnh to.

Nē mry xoprēja htýx pa nhūm mē kot hparja pyrā nē mē kot Tīrtūm kapēr o hēx o mē pa xwýnhjaja koja Tīrtūm nhūr mā kuwy hwýr mē ho hapēx nē kamā mē rēnh pa.

¹³ Nē koja nhūr mā Tīrtūm mē kot tanhmā mē ama hēx to ho pa hā mē omunh xā hkōt mē homnuj týx nē. Na htem hpijaām kēt nē mē piitā mē noo mā tanhmā amnhī tomnuj to ho pa. Kamāt kām nē arīgro hā. Nē mē kām tanhmā amnhī nhīpēx to hprām xā hkōt pix mā amnhī tomnuj o pa.

Na htem te mē kēp Kris kōt mē atōjē pyrā nē mē akōt Tīrtūm kapēr mar xā hā ixkre hwýr agjē nē mē anhīhkō hā mē kot Jejus tyk mā hamaxpēr kaxyw pāwti hkwy hku. Nom htýx hkur o hkrī nē htyk mā hamaxpēr kēt nē. Kām Jejus kīnh kēt tā hēx rom hpijaām kēt kām mē anhīhkō hā htýx ri hkur o hkrī.

¹⁴ Nē nhūr i krī hwýr pōj nē mēnijē pumu nē kām mē hkīnh nē. Ra mē mjēn ri pa htā nhūm mē kām mē ho amnhīkati hprām nē mē kamā hpijaām kēt o ri pa.

Nē kormā mē kot Kris kōt amnhī xunhwýr tohtuj anhūr xwýnhjē hwýr mra nē hēx rom tanhmā mē kām kapēr to pē mē no kupyr o ri mē hkōt pa. Mē kot mē mar nē Kris kaga nē mē hkōt ri amnhī nhīpēx prām xāj ā mē hipēx anhūr o pa.

Na htem hikāxpore rūnh o pikuprōnh pix kukamā hamaxpēr o ra ho ōxý nē.

Â na htem amnhî nhîpêx anhÿr o pa. Tã ra Tirtûm kot mê homnuj tÿx kaxyw mê hã amnhî jarê. ¹⁵⁻¹⁶ Te mê kot kamàt kô kamã pryjuk ã hpikunor nê htÿx ri pa pyrãk o na htem amnhî nhîpêx nê kãm Tirtûm kapêr mar prãm kêt nê amnhî tomnuj pix o pa.

Amnepê m Peo hkra Paraãwta kêp Tirtûm nhÿ hã kapêr jarênh o pa xwÿnh tã axtem nê kãxpore rax prãm xãj tanhmã amnhî tomnuj to kaxyw. Nhûm Tirtûm tee ri ja hã omu nê Paraãw krit jumê nreja tanhmã hakwa hto nhûm kãm kapêr. Jumê nre kapêr kêt tã nhûm Tirtûm tanhmã hakwa hto nhûm kãm kapêr nê tanhmã kot amnhî tomnuj to kaxywta ã kãm akir nhûm amnhî tã kuma hãmri nê ã amnhî nhîpêx anhÿr kêt nê. Tã mê kot Tirtûm kapêr o mê hêx ho mê pa xwÿnhjaja na htem Paraãw pyrã nê kãxpore rax prãm xãj tanhmã amnhî tomnuj to pix prãm. ¹⁷ Te hino ra grã nhûm mê tee ri kamã gô japêr pyrãk o na htem amnhî nhîpêx. Rÿ te kakrã hapôx nhûm mê kot omunh nê na wrÿk ã hkamnhix kaprÿ pyrãk. Tã ra Tirtûm mê kaxyw kamàt kô htÿx pê mê kot amnhî xã htÿx kamã hamak tûm xãta o mê nê. ¹⁸ Na htem htÿx ri amnhî tomnuj o pa hã mê amã amnhî to jarkrar o ri pa. Jakamã nhûm mêhõ ra amnhî tomnuj kaga kaxyw nhûm mê tee ri ja hã omu nê kot ã amnhî nhîpêx anhÿr pymaj tanhmã nê kãm kapêr to nê mê kãm:

—Kwa ixte amnhî tomnuj o ixpa htã nhûm Tirtûm ja hã ixpumu nê ãm ixpumu nê arî inhmex ã ijarê. Na pa hte mê hkuprÿjê hwÿr mra nhûm ja hã ixpumu nê ãm ixpumu nê hã tanhmã ixto hkêt nê. Jakamã kwa mê ixpyrà nê arî ã amnhî nhîpêx anhÿr o ri apa. Koa Tirtûm tanhmã hã ato hkêt nê. Anê.

Hãmri nhûm mê tee ri kuma nê ra hamaxpêr kati nê. ¹⁹ Na htem mê kãm kapêr o:

—Kwa mê ixpyrà nê mãmrî amã tanhmã amnhî tomnuj to hprãm xã hkôt amnhî nhîpêx o ri apa. Mêhõ kot kêt ja nê tanhmã amã kapêr to? Anê.

Mê kot amnhî tomnuj xãja te kêp mê õ patrãw pyrãk jakamã na htem ãm kôt pix mã amnhî nhîpêx o pa. Jakamã kot pu mê tanhmã amnhî tomnuj to. Nê gaa nê axte. Nê gaa nê ra ho amnhî pyrãk. Hãmri nê tee ri pamã hkaga hprãm kaprÿ nhûm te kêp mê panhõ patrãw pyrãk o mê panhîpêx pu mê ãm kôt pix mã ri amnhî nhîpêx o ri papa.

²⁰ Nê koja mêhõ ra Tirtûm kapêr ma. Nê mê panhõ Pahihti Jejus Kris jarênhja nhûm hprî hã kuma. Kêp mê pahte amnhî tomnuj pê mê papytãr xwÿnh ã harênh ma. Tã nhûm mê kot Tirtûm kapêr o mê hêx xwÿnhjaja hwÿr mra nê tanhmã kãm ho hêx to nhûm mê kuma nê kot amnhî nhîpêx tûm o awjanã. Jao amnhî tomnuj tÿx o kormã kot Tirtûm kapêr mar kêt ri kot amnhî tomnujta jakre. ²¹ Kêp ãm aa kot Tirtûm kapêr mar kêt rãhã htyk ronhÿx ja kãm mex nê. Nom ra kot mar mex tã ãm kuma nê hkaga jakamã koja mex kêt kumrêx. ²² Mê kot ã mê kot amnhî nhîpêx anhÿr ã mê harênh kot:

Rop na hte õjãr nê akupÿm õjãrta ku.

Nê hagrõ na htem unê nê hkumrã nhûm muxre. Tã nhûm mê kãm ure nhûm akupÿm hprõt nê mra nê akupÿm gyw o amnhî tomnu pa. Anê.

Tã mê kot Tirtûm kapêr o mê hêx xwÿnhjê mar nê mê hkôt amnhî nhîpêx xwÿnhjaja te mê kot rop mê hagrõ wa kot amnhî nhîpêxta pyrã nê Tirtûm kapêr kaga nê akupÿm mê kot amnhî nhîpêx tûm o awjanã nê htÿx ri amnhî nhîpêx o pa.

3

Tirtûm kot pika ho hapêx kaxyw kormã amnhî tâ mê pajamâr â harênh Matêwre 24.29-31; Xiakre 5.7-11; Apokarip 19.11-16, 21.1-8

¹ E Kris kôt ixkràmnhwýjaja. Na pa pre ra wam kagata nhîpêx nê mê awýr kurê. Tã ra axte hkôt ja nhîpêx. Hamê wa kamã na pa mê amã Tirtûm kot tanhmã amnhî nhîpêx to hã harê. Nê Jejus Kris nhýrmã akupýn mê pahwýr wrýk ã harê. Mê ate mar nê tãm amnhî nhîpêx nê tãm ajamaxpêr o kutêp mê apa kaxyw.

² Amnepê mã Tirtûm nhý hã kapêr jarênh o ri mê pa xwýnhjaja na prem Tirtûm kot nhýrmã mê pahwýr mêhõ mênh mã xwýnhhta jarênh o pa. Kot nhýrmã mê pahwýr wrýk nê mê pahto amnhîptâr o pa hã harênh o pa. Tã kër ka mê kapêr ma nê hã ano htýx nê hkôt ajamaxpêr týx rãhã ho ri apa. Nê Jejus kot mê awýr mê rênh xwýnhjaja ka mê kapêr ma. Mê kot mê amã mêmoj jarênh o mê pa xwýnhjaja na htem tanhmã mê amã Pahihti Kris jarênh to ho ri mê akôt pa. Nê tanhmã kot mê panê amnhî nhîpêx to hã harê. Tã kër ka mê kapêr ma nê hã ano htýx nê kãm ajamaxpêr týx rãhã ho ri apa.

³ Nê kwa mê inhma. Nhýrmã Kris akupýn mê pahwýr wrýk xwýj ri koja mê kot amnhî tomnuj týx xwýnhjaja mê awýr mra. Mê hpijaam kêt o pa xwýnh jakamã koja mê tanhmã mê akamã amnhî tomnuj to ho pa. Nê mê apê Kris kwý hã mê apumu nê mê atã hpêr o pikênh o pa. ⁴ Nê htýx ri Kris ã mê akukja nê mê amã:

—Kwa no Krisja? Amnepêm akupýn wrýk nê mêmoj piitã tanhmã hipêx to hã amnhî jarênh tâ arî Tirtûm kot mêmoj to kator krax rûm mêmoj amarî rãhã. Ra mê panhîgêjtaja pikaprâr par tâ nhûm kormã akupýn wrýk kêt nê. Kot mê pamã amnhî to hêx kênã. Mo kaxyw koja kêt akupýn mê pahwýr wrý? Kot mê pamã amnhî to hêx kênã. Anê.

⁵⁻⁶ Nom ã mê kot harênh anhýrja kot anhýr kêt. Tirtûm kot mêmoj to kator krax rûm mêmoj amarî rãhã hã mê kot harênhja kot anhýr kêt. Na pre Tirtûm kapêr pix o kaxkwa nê pika ho kato. Nhûm gô hkwýja kapêr mar xã hkôt pika hã amnhî jahkre. Nhûm hpãnhã panhî nhîpêx. Tã no nhûm mê kapêr mar kêt kumrêx. Nê mê kot amnhî tomnuj týx mýrapê na pre Tirtûm gô ho mê himex pa. Jao mê hwýr na rax mê nhûm mê hanhir o mê ho hapêx. No nhûm mê kot Jejus wrýk ã hpêr o pikênh xwýnhhtaja kãm ã mê harênh anhýrja mar prãm kêt. Ra mê kot mar tâ kãm mar prãm kêt nê arî mêmoj piitã rãhã hã ri harênh o pa. ⁷ Pika nê kaxkwaja arî rãhã htã koja Tirtûm nhýrmã mê pahpiitã mê pahte tanhmã amnhî nhîpêx to hã mê pahpumunh kôt tanhmã mê pajarênh to. Nê mê kot amnhî xã htýx kamã hamak tûm xã hwýr mê kot amnhî tomnuj xwýnhjê rênh pa. Hãmri nhûm rî kormã kaxkwa nê pikaja wa pôr nhûm himök ã mêmoj piitã hkaxàr pa nê hapêx.

⁸ Nê amgrã pê 1.000ja mê pamã amgrã sohtô rax kumrêx no Tirtûm mã te arîgro pixire pyræk. ⁹ Tã ra kot mê pamã tokyx Jejus akupýn wrýk ã harênh tâ nhûm kormã wrýk kêt jakamã nhûm htem tóhã tee ri hamãr o pa nê hamaxpêr o:

—Hêxta waa nê. Tirtûm kot tokyx akupýn mê pahwýr Jejus mênh ã amnhî jarênh tâ tokyx mênh kêt nê.

Anhýr o harênh tâ no ãm kot anhýr kêt. Na kormã amnhî tâ mê kot amnhî tomnuj xwýnhjê jamãr o pa. Mê kot amnhî tomnuj kaga nê hkôt amnhî xunhwýr prãm xãj kormã amnhî tâ mê hamã. Kãm mê kot amnhî xã htýx kamã hamak tûm xãta wýr mêhõ ho pixire nê môr prãm kêt jakamã na

kormã amnhî tâ mẽ hamã. ¹⁰ Tã koja nhÿrmã mẽ panhõ Pahihtija akupÿn mẽ pahwÿr wrÿ. Te mẽ àhkînh xwÿnh kot amnhî nhÿpêx pyrãk o mẽ pajaêr pê akupÿn wrÿ. Pu mẽ pahtÿx ri tanhmã paxãpênh to ho ri papa nê akupÿn wrÿk ã hkamnhîx kêt rãhã nhÿm mẽ pajaêr pê akupÿn wrÿ. Hãmri nê ma akupÿm amnhî kôt mẽ pahte hkôt amnhî xunhwÿr xwÿnhjê ho ãpir par kurê kumrêx. Hãmri nhÿm rî kormã kaxkwa kaxãr o hkrihkrit tÿx kãm hapêx pa. Nê kanhêti mẽ myt nê mytwÿrre kaxãr pa. Nê pikaja nê mãânên kamã mẽmoj piitã kaxãr pa. ¹¹⁻¹² Koja nhÿrmã ã mẽmoj hapêx par anê. Jakamã kwa kêr pu mẽ Jejus kutêp tãm ri amnhî nhÿpêx rãhã ho ri papa. Nê Tirtÿm kapêr kôt pix mã amnhî nhÿpêx rãhã nê. Nê kãm hprãm xã hkôt tanhmã kãm amnhî nhÿpêx to ho ri papa. Kêr kê Jejus akupÿn wrÿ nê ã mẽ pahte amnhî nhÿpêx anhÿr ã mẽ pahpumu. Koja wrÿ nhÿm rî kormã kaxkwa nê pikaja wa kaxãr pa. Nhÿm kuwy mÿri kaxkwa kamã mẽmoj harir xwÿnhja xêr nê ôr pa nê hapêx. ¹³ Tã kwãr mãmrî mẽmoj ã amnhî nhÿpêx anê. Koja Tirtÿm axte mẽmoj mex nhÿpêx. Na pre amnhî kukamã ja jarênh o:

Kot paj axte pika nê kaxkwa hõ nhÿpêx nhÿm mex o mex. Nhÿm mẽ kot amnhî kaxyw Jejus mã hamaxpêr nê hkôt amnhî xunhwÿr nhÿm ixte mẽ mex ã mẽ harênh xwÿnh pixjaja koja mẽ pika nywja kamã mex nê pa ho pa. Anê.

¹⁴ Jakamã kwa ixkrãmnhwÿjaja. Kêr ka mẽ Kris kutêp kapêr kôt amnhî nhÿpêx mex rãhã ho ri apa. Jao kutêp ajamakêtkati nê axãmnhîx axpên kôt apa. Kêr ka mẽ nhÿrmã amnhî wÿr omu nê tee ri amnhî kukamã ajamaxpêr kêt nê. Ate tãm amnhî nhÿpêx o apa hã amnhî pumu nê akînh nê amnhî wÿr omunh o akuhê.

¹⁵ Nom arî Jejus kãm mẽ pahkwÿjê ho hkra hprãm jakamã na kormã amnhî tâ mẽ hamã nê tokyx akupÿn wrÿk kêt nê. Na pre Jejus kôt mẽ pahtõ Pawre Tirtÿm nhÿ hã ã mẽ pamã ja hã kagã anê. Pawreja ixkrãmnhwÿ mex na.

¹⁶ Na hte mẽ pakaxyw kagã nhÿpêx nê kamã mẽ pahte Jejus kutêp tãm amnhî nhÿpêx o papa hã mẽ pamã karõ. Na hte tõhã mẽmoj tã kagã pu mẽ kamã harê nê tee ri pahprî hã mar mã no ãm mar mex kêt nê. Hãmri nhÿm Tirtÿm kapêr o mẽ hêx o mẽ pa xwÿnhtaja haxwÿja kuma hãmri nê amnhî krã hkôt hijuk ri tanhmã ho hêx to. Te mẽ kot hprî hã mar nê harênh pyrãk nom hprî hã mar kêt nê. Á na htem Tirtÿm kapêr ã kagã piitã ho hêx o pa anê. Mÿrapê koja mẽ nhÿrmã amnhî xã kamã hamak tÿx kumrêx.

¹⁷ Tã e Kris kôt ixkrãmnhwÿjaja. Ra mẽ ate mẽ harênh mar jakamã kwa mẽ okora. Mẽ amnhî nê mẽ omunh mex nê mẽ hkôt amnhî nhÿpêx kêt nê. Kot kaj mẽ anê nê Tirtÿm kôt amnhî nhÿpêx mex kêt nê. ¹⁸ Na ka htem mẽ papytãr xwÿnh Pahihti Jejus Kris kôt ri amnhî nhÿpêx o apa. Tã kêr ka mẽ arî hkôt amnhî nhÿpêx mex rãhã ho ri apa. Nê hkôt amnhî xunhwÿr tÿx nê. Kêr kê amnhî tâ mẽ apumu nê mẽmoj to mẽ akutã nojarêt nê. Krisja mex o mex nê hihtÿx o hihtÿx. Tã kêr pu mẽ kãm mex o mex ã mãn harênh rãhã ho ri papa.

Tã ãm ja pix. Ixpê Simãw Pêtre na pa ã mẽ amã ja hã kagã nê mẽ awÿr mẽnh anê.

Wam Juãw

Juãw kot Jejus kôt hkwyjê hwÿr kagà nê mēnh

Juãw na pre kagàja nhîpêx. Na pre kagà hkwy nhîpêx rax nê. Na pre määnên Juãw kot tanhmã Jejus kot amnhî nhîpêx to ho pa ã kagà nê Apokarip nê Sikûn Juãw nê Hapuhã Juãw nhûm pre ja piitã Tirtûm nhÿ hã hã kagà.

Juãwja Jejus nhÿ hã hkrajê jahkre ho mē pa xwÿnhjê hõ na pre. Nê kēp Xiakre htõ na pre. Tã ra hpigêt tÿx nê kagàja nhîpêx. Urak nê mē kot Tirtûm kôt amnhî xunhwÿr xwÿnhjê mã hipêx. Mē kot kamã harēnh nê mar nê kãm axpēn kînh o pa kaxyw. Nê mē kot amnhî tomnuj ã amnhî pumunh kôt tanhmã amnhî nhîpêx to hã mē kãm karõ nê hã kagà. Æ na pre Juãw mē kãm mēmoj jarēnh nê hã kagà anê nê mē hwÿr kumê. Nê mē kãm:

*Jejus kēp Tirtûm kapêr o amnhîrît xwÿnh ã harēnh
Juãw 1.1-4; Eprêw 1.1-4*

¹ Pa ixpyrà nê mē ate Jejus kôt amnhî xunhwÿr xwÿnhjaja? Xà mē amex? E ot pa mē amã kagàja nhîpêx nê mē awÿr kumê. Ixte mē amã Tirtûm kapêr o amnhîrît xwÿnh jarēnh kaxyw. Amnepê mã kormã mēmoj amrakati ri nhûm pre ra rãhã ri pa ho pa. Æm kukwak ri pix mã na pu htem Tirtûm mē wa kuri pahûr tûm nê papa ho papa mã xwÿnh. Tã ÿ hã mē ixte kapêr o mē ajahkre ho ri mē ixpa xwÿnhjaja na pa prem ixpiitã kormã akupÿm kaxkwa hwÿr àpir kêt ri inhno ho omunh o ri hkôt ixpa. Nê mē ijamak o kapêr mar o ri hkôt ixpa. Nê mē inhîkra ho hkupēnh o ri hkôt ixpa. ² Na pre kaxkwa kamã Hipêêxã hkôt ri pa ho pa htã amnê pika hwÿr mē pahwÿr wrÿ. Hãmri nê jar mē pakamã kato pa pre mē ixkwÿjaja omu. Tã mē ixte omunh xà hkôt na pa htem amnhî xõ ri tanhmã mē amã harēnh to. Koja nhÿrmã akupÿm mē pahto mē pahûr pu mē kuri pahûr tûm nê pamex nê papa ho papa. ³ Na pa prem tanhmã kapêr to hã mar o ri hkôt ixpa. Nê kot tanhmã mē kãm amnhî nhîpêx to hã omunh o ri hkôt ixpa. Ta kagàja kamã amnhî xõ ri ixprî hã mē amã harē nê hã kagà. Mē ate ixpyrà nê aprî hã kot tanhmã amnhî nhîpêx to ho pa hã harēnh mar kaxyw. Jao mē pahpiitã te ixkre tipxi kamã mē papa pyrãk o amnhî nhîpêx o papa nê axpēn kôt pajamaxpêr o ri papa. Jao Mēpanhîpêêxã Maati mē Kra Jejus Kris wa hkôt amnhî nhîpêx mex o ri papa. ⁴ Tã pa mē amã kagàja nhîpêx nê mē awÿr kumê. Mē ate kamã harēnh nê mar hãmri nê mē ixpyrà nê ajamakêtkati nê akînh nê ri apa kaxyw.

*Tirtûm mex o mex ã harēnh
Juãw 8.12; Epes 5.3-21; Wam Tesarõn 5.5; Eprêw 4.14-16, 9.11-14*

⁵ Nê Jejus kot tanhmã mē inhmã Tirtûm jarēnh toja kot paj amnhî xõ ri mē amã hã kagà. Nà Tirtûm kot amnhî nhîpêxja mex o mex. Aa kot tanhmã amnhî tomnuj to hkêt. Mex o mex jakamã na hte tanhmã mē kot amnhî tomnuj to mã amnhî jagjênh kêt. Æm kot amnhî to mex o kot amnhî to mex rãhã nê pa ho pa xwÿnh na. ⁶ Kot mē pahte amnhî tomnuj kêt ã mē pamã karõ jakamã kot puj mē pahpê hkra hã amnhî jarēnh tã amnhî tomnuj pix o ri papa nê ãm pahpê hkra hã amnhî jarēnh kaprÿ nê amnhî to paxêx. Tirtûm krajaja na htem amnhî tomnuj o pa hkêt nê. ⁷ Nom kot puj mē hkôt amnhî nhîpêx nê urak nê tãm ri amnhî nhîpêx o papa. Nê kapêr kôt ri amnhî nhîpêx. Hãmri nê te ixkre tipxi kamã ri Tirtûm mē Kra Jejus Kris wa hkôt axpēn to

papa pyræk o amnhĩ nhĩpêx. Na pre Jejus mẽ panê ty nê hkamrô axkapĩ. Jao mẽ pahte hkôt amnhĩ xunhwÿr xwÿnhjaja mẽ panê mẽ pahte amnhĩ tomnuj piitã hpãnhã amnhĩrer pa. Jakamã ãm kukwak ri pix mã na pu htem tãm amnhĩ nhĩpêx o ri papa.

Mẽ pahpiitã mẽ pahte amnhĩ tomnuj xwÿnh ã mẽ pajarênh

⁸ Nê mẽ pahte tõiã tanhmã amnhĩ tomnuj to jakamã kot puj mẽ aa pahte amnhĩ tomnuj kêt ã amnhĩ jarê hãmri nê ã amnhĩ jarênh anhÿr o paxêx. Tirtũm kot mẽ pahpiitã mẽ pahte amnhĩ tomnuj ã mẽ pahpumunh xwÿnh kênã.

*Mẽ pahte amnhĩ tomnuj nê tanhmã amnhĩ nhĩpêx to hã mẽ pamã karõ
Xiakre 4.9-10*

⁹ Nê mẽ pahpê Tirtũm krajaja na pu htem tanhmã amnhĩ tomnuj to hãmri nê tee ri ja hã amnhĩ pumu nê pahkaprĩ nê. Nê tokyx amnhĩ to Tirtũm wÿ. Hãmri nhũm mẽ pama nê Jejus kukwak ri tanhmã hã mẽ pahto hkêt nê. ãm amnhĩ katut kôt tanhmã mẽ pahte amnhĩ tomnuj tota rê nê axte kãm hamaxpêr kêt nê. Ra kot mẽ pahtã amnhĩ jarênh xà hkôt. Na hte Tirtũm amnhĩ jarênh xà hkôt tanhmã amnhĩ nhĩpêx to. Tã ra kot mẽ pahpê hkrajaja mẽ pahte amnhĩ tomnuj piitã amnhĩ katut kôt rênh par ã amnhĩ jarênh jakamã na pre ã mẽ panhĩpêx anê. Na hte mẽmoj tã tanhmã amnhĩ jarênh to hãmri nhũm apkati nhũm ihkjê ho kumê nê axtem tanhmã mẽmoj jarênh to hkêt nê. ¹⁰ Ra kot mẽ pahpiitã mẽ pahte amnhĩ tomnuj xwÿnh ã mẽ pajarênh jakamã kot puj mẽ pahtõ ã mẽ pajarênh anhÿrja ma nê hkôt pajamaxpêr kêt japêr. Rÿ kuma nê ãm kuma nê pajamaxpêr o:

—Nà ixte tanhmã amnhĩ tomnuj tore hã.

Anhÿr o amnhĩ jarê. Hãmri nê te ate Tirtũm hêx xwÿnh ã harênh pyræk. Jao amã kapêr mar prãm kêt ã amnhĩ to amnhĩrĩt.

2

*Jejus kêp mẽ paxyr pê Tirtũm mã kapêr xwÿnh ã harênh
Wam Ximotre 2.5; Eprêw 9.11-14*

¹⁻² E mẽ ate amnhĩ tomnuj o apa hkêt kaxyw na pa ã mẽ amã ixkapêr nê hã kagã anê. Mẽ ate kamã harênh nê mar hãmri nê tanhmã amnhĩ tomnuj to hkêt kaxyw. Jejus Kris na pre mẽ pahpiitã mẽ pahte amnhĩ tomnuj pãnhã amnhĩrer kaxyw mẽ panê ty. Jakamã kot puj mẽ pahpê hkrajaja tanhmã amnhĩ tomnuj to nhũm ja hã mẽ pahpumu nê te kêp mẽ paxyr pê Tirtũm mã kapêr xwÿnh pyræk o amnhĩ nhĩpêx. Mẽ pakuroom aa kot amnhĩ tomnuj kêt jakamã na hte mẽ paxyr pê Tirtũm mã kapêr nhũm kuma. Hãmri nê kukwak ri pix mã mẽ pahte tanhmã amnhĩ tomnuj to piitã amnhĩ katut kôt rênh pa nê axte kãm hamaxpêr kêt nê.

Tirtũm krajaja kot Tirtũm kôt amnhĩ nhĩpêx ã mẽ kãm karõ

³ Nê na pu htem Tirtũm kôt ri amnhĩ nhĩpêx o papa hã amnhĩ pumunh kôt pahpê hkra hã amnhĩ pumunh mex nê. ⁴ Nom koja mẽhõ kêp hkra hã amnhĩ jarênh tã hkôt amnhĩ nhĩpêx kêt nê ãm kêp hkra hã amnhĩ to hêx. ⁵ Na htem Tirtũm kapêr kôt amnhĩ nhĩpêx o pa pê kãm hkĩnh tÿx ã amnhĩ to amnhĩrĩt. Nê kêp hkra hã amnhĩ to amnhĩrĩt mex o pa. ⁶ Jakamã kêt ka mẽ apê Jejus Kris kwÿ hã amnhĩ jarênh xwÿnhjaja hkôt pix mã amnhĩ nhĩpêx mex o ri apa.

*Mê pamã axpên kînh ã mê pamã karõ
Juãw 13.34-35; Wam Juãw 3.14-18*

⁷ E Kris kôt ixkrãmnhwýjaja. Inhmã mê akînh jakamã na pa ã mê amã mëmoj jarênh nê hã kagã anê. Kot paj mê amã mëmoj nyw jarênh kêt nê. Ra mê ate mëmoj mar xwýnhhta kot paj axte mê amã harê. Mê pamã axpên kînh nê tãm axpên nhîpêx o papa hã Tîrtüm kot mê pamã karõta. Ra mê ate mar tã kot paj axte mê amã harê nê hã kagã. ⁸ Wam Tîrtüm kot mê pamã axpên kînh ã mê pamã karõja kormã Jejus kot mê panê htyk hkêt ri kot mê pamã hã karõta na. Tã ra Jejus kãm mê pajapê xaj mê panê htyk jakamã na pa axte ã mê ate axpên nhîpêx anhÿr o apa hã mê amã karõ nê hã kagã. Mê ate Kris pyrã nê amã axpên kînh xaj tanhmã axpên kutã anojarêt to ho ri apa kaxyw. Nom kormã mê pahte Jejus kôt amnhî xunhwÿr kêt ri na pu prem ã axpên nhîpêx anhÿr kêt nê. Tã hkôt amnhî xunhwÿr hãmri nê ã axpên to mex o papa anê. ⁹⁻¹¹ Tã koja mëhõ kot Jejus kôt amnhî nhîpêx ã amnhî jarênh tã kãm hkwyjê hkînh kãm àmnhîx ri mê kutã nojarêt o pa hkêt nê. Hãmri nê kot Jejus kôt amnhî nhîpêx ã amnhî jarênh ã amnhî to hêx. Jao te htÿx ri kamãt kó kamã pa pyrãk. No koja mëhõ kãm hkwyjê hkînh kãm mê kutã nojarêt o pa nê mãânên Jejus kôt amnhî nhîpêx mex o pa. Jao te hirã kamã ri pa pyrãk. Jakamã tanhmã hkwyjê homnuj to ho pa hkêt nê mê piitã mê ho mex o axpên pyrãk o pa.

Juãw kot mê piitã ahpÿnhã tanhmã mê kãm kapêr to

¹²⁻¹⁴ E kot pa ahpÿnhã tanhmã mê amã ixkapêr to nê hã kagã. Mê apiitã te mê apê ixkra pyrãk. Na ka prem Jejus kôt amnhî xunhwÿr nhüm Tîrtüm ja hã mê apumu nê Kra kukwak ri mê ate amnhî tomnuj piitã amnhî katut kôt rênh pa nê axte kãm hamaxpêr kêt nê. Jakamã ra mê ate Tîrtüm kêp Mêpanhîpêêxã Maati hã omunh mex.

Nê mê ate Jejus kôt amnhî xunhwÿr ã amgrã xohtô xwýnhjaja. Amnepêm amrakati ri Jejus ra rãhã ri pa ho pa xwýnhja kôt mê ate amnhî xunhwÿr xwýnhjaja kot paj mê amã tanhmã ixkapêr to nê hã kagã.

Nê mê akwýjaja ham Jejus kôt mê ate amnhî xunhwÿr xwýnhjaja ra mê ate Tîrtüm kapêr mã ajamaxpêr rãhã ho ri apa. Jakamã na hte Satanasti mê ate amnhî tomnuj prãm xaj tee ri tanhmã mê akrã hto ka mê Jejus nhÿ hã kutã amnhî to htÿx pê hkôt amnhî nhîpêx kêt nê.

*Mê kot amnhî tomnuj xwýnhjaja tanhmã kot amnhî nhîpêx to
Matêwre 6.24; Eprêw 11.24-26; Xiakre 4.4*

¹⁵ Nê kër ka mê amã Tîrtüm kôt amnhî nhîpêx prãm xaj mê kot amnhî tomnuj xwýnhjê hkôt amnhî nhîpêx kêt nê. Nê mê hamaxpêr punuj xwýnhjê hkôt ri amnhî nhîpêx kêt nê. Kot kaj mê hkôt amnhî nhîpêx hãmri nê amã Tîrtüm kînh kêt ã amnhî to amnhîrit. ¹⁶ Mê kot amnhî tomnuj xwýnhjaja na htem mëmoj punuj mã hamaxpêr nê hkôt tanhmã amnhî tomnuj to. Nê mëmoj pumu nê ra kãm ho õ hprãm nom Tîrtüm pê ja omnuj ã hkamnhîx kêt nê. Rÿ tanhmã mëhõ kot amnhî tomnuj to hã omu nê hkôt kãm amnhî nhîpêx prãm. Nê tanhmã amnhî to jarkrar to ho ri pa. Æ na hte mê kot amnhî tomnuj xwýnhjaja amnhî nhîpêx anhÿr o pa. Mê kot amnhî nhîpêxja Mêpanhîpêêxã Tîrtüm kãm hprãm kêt. ¹⁷ Koja nhÿrmã mê kot tanhmã amnhî tomnuj toja piitã hapêx pa. Nê mê hamaxpêr punujja mãânên nhÿrmã hapêx pa. Nê mê kot amnhî tomnuj o mê pa xwýnhjaja koja mê amnhî xà htÿx kamã hamak rãhã ho pa ho pa. No Tîrtüm kôt mê kot amnhî nhîpêx o mê pa xwýnhjaja koja mê kurom kuri htîr tüm nê mex nê hkînh nê pa ho pa.

*Kãm Kris kurê xwÿnh maati jarênh**Wam Juãw 4.1-6; Sikÿn Juãw 7-11*

¹⁸ E Kris kôt ixkwÿjaja. Kris akupÿn mẽ pahwÿr wrÿk kukamã koja mẽmoj tanhmã amnhÿ nhÿpêx to. Na pre ra Kris kôt mẽ panhÿõja mẽ pamã ã harênh anê nõ harênh o:

—Koja mẽ panhõ Pahihti Kris akupÿn mẽ pahwÿr wrÿk kaxyw hãmri nhÿm kêp Kris ã amnhÿ to hêx xwÿnh maati kumrêx nhÿhÿnh kato. Hãmri nõ hêx rom te Kris pyrã nõ tanhmã mẽ kãm kapêr to nõ tanhmã mẽ hipêx to ho pa nhÿm rÿ kormã Kris akupÿn mẽ pahwÿr wrÿ. Anê.

Na pre hkukamã ã harênh anê ka mẽ harênh ma. Tã ra mẽ kêp Kris ã amnhÿ to hêx xwÿnhjaja ohtõ nõ mra nõ kãm hkurê xwÿnh maatita kukamã tanhmã amnhÿ nhÿpêx to pẽ mẽ kãm amnhÿ to hêx o pa. Jakamã na pa ixprÿ hã mẽ amã tanhmã mẽ harênh to. Koja tokyx kêp Kris ã amnhÿ to hêx xwÿnh maatita nhÿhÿnh mẽ pahwÿr kato. ¹⁹ Na pre hkwÿjaja mẽ pahpê Kris kwÿjê hkôt ri pa htã mẽ pahkÿnhã kêp Kris kwÿ hkêt. Kêp hkwÿ ronhÿx arÿ mẽ pahkôt Kris kôt amnhÿ nhÿpêx o pa. Nom axtem nõ àhpumunh tÿx pyrã nõ mẽ pahkaga nõ htÿx tanhmã amnhÿ tomnuj to ho pa. Jao kêp Jejus kwÿ hkêt ã amnhÿ to amnhÿrÿt.

²⁰ No kêt mẽ pahpê Tÿrtÿm krajaja na pre Jejus mẽ pahwÿr Karõ rê nhÿm mẽ pahkarõ mã agjê nõ mẽ pahkrãm kapêr mex jagjê. Jakamã na pu mẽ mẽ kêp Kris kwÿ hkêt xwÿnhjê rom Tÿrtÿm kapêr mar mex nõ.

²¹ Xà mẽ ate Tÿrtÿm kapêr ã kagã pumunh kêt kôt na pa ã mẽ amã ixkapêr nõ hã kagã anê? Nã ra mẽ ate omunh nõ mar mex kênã. Tã mẽ ate mẽ kot tanhmã Jejus o hêx to xwÿnhjê pumunh mex nõ mẽ harênh mar mex kaxyw na pa ã mẽ awÿr kagã nhÿpêx nõ mẽnh anê. Kêr kê mẽ mẽmo arÿgro hã mẽ awÿr agjê nõ tanhmã mẽ amã Jejus o hêx to ka mẽ aprÿ hã mẽ omunh mex kurê kumrêx. ²² Tanhmã na htem Jejus o hêx to? E kot paj ixprÿ hã mẽ amã tanhmã mẽ harênh to ka mẽ inhma. Nã koja mẽhõ mẽ amã tanhmã harênh to nõ harênh o:

—Nã Jejus kêp Tÿrtÿm Kra hkêt. Tÿrtÿm kot mẽ pahwÿr mẽnh kêt tã ka htem atÿx kapêr kôt ri amnhÿ nhÿpêx o ri apa. Kwa kêt mẽ ixkapêr kôt mãn ri amnhÿ nhÿpêx o ri apa.

Anhÿr o mẽ amã kapêr ka mẽ ama nõ kãm Kris mẽ Tÿrtÿm wa hkÿnh kêt xwÿnh ã omunh kurê kumrêx. ²³ Koja mẽhõ Tÿrtÿm Kra Jejus kaga nõ mãânên Hipêêxã kaga. No koja mẽhõ Tÿrtÿm Kra hkôt amnhÿ xãm nõ mãânên Hipêêxã hkôt amnhÿ xãm.

Mẽ pahte Kris kaga pymaj tanhmã amnhÿ nhÿpêx to hã mẽ pamã karõ

²⁴ Amnepêm mẽ ate Jejus kôt amnhÿ xunhwÿrta ã na ka prem kêp Tÿrtÿm Kra hã Tÿrtÿm kot mẽ pahwÿr mẽnh xwÿnh ã harênh ma. Tã kêr ka mẽ arÿ amnhÿ kaxyw hkôt ajamaxpêr nõ hkôt pix mã amnhÿ nhÿpêx o ri apa. Kot kaj mẽ anê nõ Mẽpanhÿpêêxã Maati mẽ Kra wa hkôt amnhÿ nhÿpêx mex o apa rãhã ty. ²⁵ Hãmri nõ wa kuri atÿr tÿm nõ amex kumrêx nõ apa ho apa. Ra Jejus kot ja jarênh xã hkôt.

²⁶ Na pa ã mẽ amã ixkapêr nõ hã kagã anê. Mẽ aprÿ hã mẽ amã Jejus o hêx xwÿnhjê kapêr mar nõ mẽ kot mẽ amã hêx kôt mẽ omunh mex kaxyw. ²⁷ Tÿrtÿm Karõ na pre mẽ akarõ mã gjêx pa nõ mẽ amã Tÿrtÿm kapêr piitã o amnhÿrÿt mex o mẽ akôt pa. Jakamã mẽmo kaxyw kot kaj mẽ Tÿrtÿm kapêr o hêx xwÿnhjaja kot tanhmã harênh toja ma? Ra Tÿrtÿm Karõ kot mẽ amã ho amnhÿrÿt o mẽ ajahkre mex o pa kênã kot ka kêt mẽ nhãm mẽ kapêr ma. Na hte Tÿrtÿm Karõja mẽ urã nõ Tÿrtÿm kapêr ho hêx kêt nõ. Âm katat kôt kot ho

amnhĩrĩt mex jakamã kwa kêr ka mẽ mar tỳx nẽ hkõt ri amnhĩ nhĩpêx mex rãhã ho ri apa.

*Mẽ pahte tãm ri amnhĩ nhĩpêx ã mẽ pamã karõ
Juãw 14.25-26, 15.1-8*

²⁸ E Jejus kõt ixkrajaja. Kêr ka mẽ arĩ Kris kõt amnhĩ nhĩpêx mex rãhã ho ri apa. Kê nhỹrmã akupÿn mẽ pahwÿr wrÿk o tẽ ka mẽ amnhĩ wÿr omu nẽ akĩnh nẽ. Nẽ akĩnh kãm axãmnhĩx kutã mra nẽ hkaxpa nẽ amnhĩ kamã amã uma hkêt nẽ. Rÿ mẽmoj tã amnhĩ tã apijaam kêt nẽ. ãm axãmnhĩx akĩnh nẽ ma kutã mra. ²⁹ Krisja mex o mex jakamã na pu htem uràk nẽ amnhĩ to mex o ri papa. Mẽ pahte amnhĩ to mex o papa xwÿnhjaja uràk nẽ mẽ pahpê Tĩrtũm kra na pu mẽ.

3

*Tĩrtũm krajê hkukamã tanhmã mẽ harẽnh to
Rõmãn 8.18; Sikũn Korĩt 3.18; Sikũn Pêtre 3.11-14*

¹ Nẽ Mẽpanhĩpêxã Maati kãm mẽ pajapê htỳx kumrêx jakamã na pre mẽ pahte hkõt amnhĩ xunhwÿr ã mẽ pahpumunh kõt mẽ pahpê hkra hã mẽ pajarê pu mẽ pahpê hkra nẽ ri papa. Ja na mẽ pamã mex o mex. Nom mẽ kot hkõt amnhĩ xunhwÿr kêt xwÿnhjaja kot hprĩ hã ja hã mẽ pahpumunh kêt jakamã na htem mẽ pahte tãm amnhĩ nhĩpêx ã mẽ pahpumu nẽ tee ri hamaxpêr.

² E Kris kõt ixkwÿjaja. Ra mẽ pahpê Tĩrtũm kra htã kormã mẽ pahte amnhĩ kukamã mẽ pahprĩ hã ja hã amnhĩ pumunh mex kêt. Kojã nhỹrmã Jejus akupÿn mẽ pahwÿr wrÿ pu mẽ pano ho tanhmã kute hã omunh mex nẽ. Hãmri nẽ tã te kot amnhĩ nhĩpêx pyrãk o amnhĩ nhĩpêx mex o papa. Ra mẽ pahte ja mar mex. ³ ã mẽ pahte amnhĩ kukamã pajamaxpêr anhÿr o papa xwÿnhjaja na pu htem kormã amnhĩ wÿr Jejus kamã pajamak o papa. Pê uràk nẽ mẽmoj punuj mã pajamaxpêr kêt o papa. Nẽ uràk nẽ tanhmã amnhĩ tomnuj to hkêt nẽ.

Tĩrtũm krajaja kot amnhĩ tomnuj o pa hkêt ã mẽ kãm karõ

⁴ Nẽ mẽ kot amnhĩ tomnuj o mẽ pa xwÿnhjaja na htem Tĩrtũm kapêr kwÿm ri amnhĩ nhĩpêx o pa. Tã kot puj mẽ tanhmã amnhĩ tomnuj to hãmri nẽ mẽ uràk nẽ kapêr kwÿm ri amnhĩ nhĩpêx. ⁵ No Jejus na pre mẽ pahte amnhĩ tomnuj pãnhã amnhĩrer kaxyw mẽ pahwÿr wrÿ. Aa kot amnhĩ tomnuj kêt jakamã tapxipix kot mẽ pahpãnhã amnhĩrer mã tãm. Ra mẽ pahte ja jarẽnh mar mex. ⁶ Jakamã mẽ pahpê hkwyjaja na pu htem ri pahtỳx tanhmã amnhĩ tomnuj to ho papa hkêt nẽ. ã mẽ kot amnhĩ nhĩpêx anhÿr xwÿnhjaja kêp hkwy hkêt. ⁷ Nom kojã mẽhõ Kris pyrã nẽ tãm amnhĩ nhĩpêx o pa hãmri nẽ kêp Tĩrtũm kraa. Jakamã kwa kojã mẽhõ Tĩrtũm kapêr kwÿm ri tanhmã mẽ amã kapêr to ka mẽ ama nẽ ãm ama. ⁸ Mẽ kot amnhĩ tomnuj o mẽ pa xwÿnhjaja na htem Satanasti hkõt ã amnhĩ nhĩpêx anhÿr o pa. Satanastija Tĩrtũm kot mẽmoj to kator krax rũm nhũm ã kot amnhĩ tomnuj anhÿr o pa xwÿnh na. Tã ã kot amnhĩ nhĩpêx anhÿr o paja o hapêx par kaxyw na pre Tĩrtũm Kra Jejusja amnẽ pika hwÿr wrÿ.

⁹ Nom mẽ papajaja mẽ pahpê Tĩrtũm kra na pu mẽ. Na pre mẽ pahwÿr amnhĩ Karõ rẽ nhũm mẽ pahkarõ mã gjêx pa nẽ mẽ pahkõt pa ho pa. Jakamã tanhmã kot puj wem amnhĩ to nẽ Satanasti pyrã nẽ pahtỳx ri amnhĩ tomnuj o papa? Nã kot puj mẽ ã amnhĩ nhĩpêx anhÿr kêt nẽ. ¹⁰ Kojã mẽhõ tãm amnhĩ

nhîpêx kêt nê hãmri nê mãânên hkwyjê kamã ukaprî hkêt nê. Hãmri nê ã amnhî nhîpêx anhÿr o kêp Tirtûm kra hkêt ã amnhî to amnhîrît. ãm kêp Satanasti hkra hã amnhî to amnhîrît kurê kumrêx.

*Mê pamã axpên kînh o te Jejus kãm mê pahkînh pyrãk ã mê pamã karô
Matêwre 22.39; Rukre 10.25-37; Juãw 13.31-35*

¹¹Nê kêt ka mê arî amã axpên kînh pê tãm axpên nhîpêx o ri apa rãhã nê. Te amnepê mã mê ate Jejus kôt amnhî xunhwÿr ã arîgrota ã mê kot mê amã ja hã karô pyrã nê. ¹²No mê ri finat Kaî kot amnhî nhîpêx pyrãk o amnhî nhîpêx kêt nê. Kêp Satanasti hkra jakamã na pre htôja pî. Kurom kot tãm amnhî nhîpêx ã omu nê kamã gryk nê kupî. ¹³Tã koja mê kêp Tirtûm kra hkêt xwÿnhjaja Kaî pyrãk nê kêp mê aprãm nôkati nom kêt ka mê amnhî tã mê omu nê tee ri amnhî pykamã ajamaxpêr kêt nê. ¹⁴Kormã mê pahte Jejus kôt amnhî xunhwÿr kêt ri na pu prem mê urãk nê amnhî tomnuj o papa. Jao mê pahpê kuwy hwÿr papa mã xwÿnh. Tã mê pahte Jejus kôt amnhî xunhwÿr jakamã ra pahpê Tirtûm mê Kra wa kuri pahtîr tûm nê papa mã xwÿnh. Jakamã na pu htem mê kêp hkra hkêt xwÿnhjê kurom pamã mê piitã mê hkînh o tanhmã mê ho mex to ho papa. Mê kãm amnhî kwÿjê hkînh kêt xwÿnhjaja arî mê kêp kuwy hwÿr mê pa mã xwÿnh na mê. Ra mê pahte ja jarênh mar mex. ¹⁵Mê kãm mê hpar prãm o mê pa xwÿnhjaja koja nhÿrmã Tirtûm mê Kra wa kuri htîr tûm nê pa ho pa hkêt nê. Ra mê pahte mãânên ja mar mex. Jakamã kwa mê amã akwÿjê hprãm nôkati ho ri mê apa xwÿnhjaja. Tirtûm noo mã te ra mê ate mê hpar pyrãk jakamã kot kaj mê arî ã amnhî nhîpêx anhÿr o ri apa hãmri nê nhÿrmã Tirtûm nhô krî hwÿr axãpir kêt nê.

¹⁶⁻¹⁸E ixkwÿjaja. Kwa kêt pu mê pajakwa pix o pamã axpên kînh ã amnhî jarênh kêt nê. Mãânên axpên kutã panojarêto o ri papa. Nê tanhmã axpên to mex to. Tanhmã na pre Jejus kãm mê pajapê hã amnhî nhîpêx to? Nã na pre kãm mê pamex prãm xaj mê panê ty. Kãm amnhî tã ma hkêt kãm mê pakamã ukaprî xaj mê panê ty. Tã kêt pu mê urãk nê pahkwÿjê kamã paxukaprî ho mê kutã panojarêto rãhã ho papa. Jao mê paxãpkur xã hã panhõ pumu nê nhÿri pahkwÿjê hõ pumu nhûm kêp amrakati. Pu mê tee ri ja hã omu hãmri nê kãm mê panhõta kwÿ gô. Kot pu mê ã amnhî nhîpêx anhÿr kêt nê hãmri nê pamã Tirtûm kînh ã amnhî jarênh kaprÿ. ¹⁹Nê kot puj mê ã axpên to mex o papa anê nê ra pahte Tirtûm kôt amnhî nhîpêx mex ã amnhî to amnhîrît. Hãmri nê ra paxãmnhîx kãm tanhmã amnhî jarênh to ho papa. Amnhî kamã pamã uma hkêt nê paxãmnhîx pajamakêtkati nê kãm tanhmã amnhî jarênh to.

Mê paxãmnhîx amnhî to Tirtûm wÿr ã mê pamã karô

²⁰Nê kot puj mê mêmo arîgro hã tanhmã amnhî tomnuj to hãmri nê tee ri ja hã amnhî pumu nê amnhî kamã pagryk nê. Na hte Tirtûm tanhmã mê pahte amnhî tomnuj to hã mê pahpumu nom arî kãm mê pajapêê. Mê parom àhpumunh o àhpumunh jakamã kot mê pahte amnhî tomnuj prãm kêt ã mê pahpumunh mex. ²¹Jakamã puj mê ã kãm pajamaxpêr anê nê amnhî kamã pamã uma hkêt kãm paxãmnhîx tanhmã ri amnhî to hwÿr to ho ri papa. ²²Kot puj mê hkôt amnhî nhîpêx o papa rãhã nê mêmoj tã kuwÿ. Nê kãm hprãm xã hkôt amnhî nhîpêx o papa hã amnhî pumunh kôt mêmoj tã kuwÿ. Hãmri nhûm mê pama nê tanhmã mê pamã mêmoj to rÿ mê pamã mêmoj gô.

Te ixkre pixi kamã mê pahtipxi pyrãk ã mê pamã karô

²³ Nê tanhmã mê pahte amnhĩ nhĩpêx to ho papa hã na hte Tĩrtũm mê pamã karõ? Nã mê pahte amnhĩ kaxyw Kra Jejus Kris kõt pajamexpêr nê hkõt amnhĩ nhĩpêx o papa hã na hte mê pamã karõ. Nê kapêr xã hkõt pamã expên kĩnh o mẽmoj to expên kutã panojarêto o papa hã na hte mê pamã karõ. Na hte ã mê pahte amnhĩ nhĩpêx anhÿr ã mê pamã karõ anê. ²⁴ Jakamã kot puj mê kapêr xã hkõt expên nhĩpêx o papa nê te ixkre tipxi kamã mê pahte expên kõt Tĩrtũm kõt ri papa pyrãk. Ra kot mê pahwÿr Karõ rênh nhũm kot mê pahkarõ mã gjêx jakamã na hte mê pahkõt pa ho pa hã amnhĩ to amnhĩrĩt.

4

*Mê kot Kris kapêr jarênh ã amnhĩ to hêx xwÿnhjê jarênh
Wam Korĩt 12.1-3; Wam Juãw 2.18-26; Sikũn Juãw 7-11*

¹⁻³ Nê koja mẽhõ Tĩrtũm kapêr o mẽ ajahkre kaxyw mẽ amã tanhmã Jejus Kris jarênh to nê ãm hãmri harê nê harênh o:

—Na pre Tĩrtũm Kra Jejus mẽ pahwÿr wrÿ nê ĩ ho ĩ ho mẽ pakamã kato. Tĩrtũm tãm na pre mẽ pahwÿr kumê nhũm wrÿ.

Anhÿr o mẽ amã harê ka mẽ ama nê kapêr kõt ajamexpêr kurê kumrêx. ãm hãmri na hte Tĩrtũm Karõ nhÿ ã harênh anê. No koja Jejus kêp Tĩrtũm Kra hkêt ã harê ka mẽ ama nê ãm ama nê hkõt ajamexpêr kêt nê. Kãm Kris kurê xwÿnh maati nhÿ hã kapêr xwÿnhjaja na hte ã harênh anhÿr o pa. Na ka prem ra kãm Kris kurê xwÿnh maatija tokyx hpõx ã harênh ma. Tã na ra ÿ hã kapêr xwÿnhjaja ohtõ nê pika piitã hkõt mẽ hkõt pa nê te Tĩrtũm Karõ nhÿ hã mẽ kãm kapêr pyrãk o amnhĩ nhĩpêx o pa. Nom ãm amnhĩ to hêx o pa. Jakamã e kwa ixkwÿjaja. Koja mẽhõ mẽ awÿr mra nê tanhmã mẽ amã Tĩrtũm kapêr jarênh to ka mẽ aprĩ hã ama nê rĩ kormã kêp Tĩrtũm nhÿ hã kapêr jarênh xwÿnh ã harê rÿ kot amnhĩ to hêx xwÿnh ã harê.

⁴ Kêt mẽ papajaja jajê rom mẽ pahpê Tĩrtũm kra na pu mẽ. Nê Tĩrtũm Karõ kot ra mẽ pahkarõ mã gjêx xwÿnhhta hihtÿx o jajê piitã mẽ hakrenh. Jakamã na pu htem ÿ hã mẽ kutã amnhĩ to htÿx o papa nhũm mẽ tee ri tanhmã mẽ pamã Jejus o hêx to kaprÿ. Pu mẽ kuma nê ãm mẽ kuma. ⁵ Mê kêp Tĩrtũm kra hkêt jakamã na htem hkõt amnhĩ nhĩpêx kêt nê. Mê kot amnhĩ nhĩpêxja axtem na. Jakamã na htem Tĩrtũm kapêr kwÿm ri tanhmã hkra hkêt xwÿnhjê mã kapêr to ho pa nhũm mẽ kuma nê kãm mẽ mar prãm nê. ⁶ Nom mẽ ixte Tĩrtũm kapêr o mẽ ajahkre xwÿnhjaja na pa htem mẽ kurom Tĩrtũm nhÿ hã ixkatat kõt ãm hãmri mẽ amã kapêr jarênh o ri ixpa. Jakamã ka mẽ apê hkra hã mẽ amã mẽ inhmar prãm nê. No mẽ kêp hkra hkêt xwÿnhjaja kãm mẽ inhmar prãm kêt.

Na pu htem pahprĩ hã mẽ kapêr ã mẽ kuma nê rĩ kormã tanhmã mẽ harênh to. Tĩrtũm nhÿ hã kapêr ã mẽ harê rÿ kãm hkurê xwÿnh maati nhÿ hã kapêr ã mẽ harê.

*Tĩrtũm kãm mẽ pajapê hã tanhmã amnhĩ nhĩpêx to hã harênh
Juãw 3.16-21; Rõmãn 5.5-9, 8.35-37*

⁷ E ixkwÿjaja. Na hte Tĩrtũm tanhmã mẽ pahpê hkrajê ho pu mẽ pamã expên kĩnh nê. Jakamã kêp pu mẽ ã expên nhĩpêx anhÿr jao expên to mex pix nê. ã Tĩrtũm kot mẽ panhĩpêx anhÿr jakamã kêp pu mẽ pahpê hkrajaja ÿ hã ã expên nhĩpêx anhÿr o ri papa.

⁸ Koja mẽhõ Tĩrtũm kĩnhã kãm mẽ hkwÿjê hkĩnh kêt hãmri nê mẽ kamã ukaprĩ hkêt o pa. Hãmri nê kêp Tĩrtũm kra hkêt ã amnhĩ to amnhĩrĩt mex nê.

9-10 Tirtũm kãm mẽ pajapê ht̃x kumrêx. Kormã mẽ pamã hkĩnh kêt ri nhũm kumrêx amnhĩ rom kãm mẽ pajapê ho pa. Nê kãm mẽ pajapê xaj mẽ pahw̃yr Kra pyxita mẽ. Mẽ pahte amnhĩ tomnuj pãnhã kot mẽ panê htyk kaxyw. Mẽ pahte kukwak ri amnhĩ nhĩpêx nyw o amnhĩ nhĩpêx nê nh̃yrmã wa kuri pah̃tĩr tũm nê pamex nê papa ho papa kaxyw. ã na pre Tirtũm mẽ pahw̃yr Kra mẽnh anh̃ỹr o kãm mẽ pajapê hã amnhĩ to amnhĩrit.

11 E ixkw̃yjaja. Tirtũm kãm mẽ pajapê ht̃x jakamã kwa kêr pu mẽ urak nê pamã axpên kĩnh o papa. Nê axpên kamã paxukapri nê. 12 Aa mẽ pah̃to pahte pano ho Tirtũm pumunh kêt tã na hte mẽ pakamã pa ho pa. Pu mẽ kãm mẽ pajapêta pyrà nê ỹ hã pamã axpên kĩnh o papa. 13 Na pre mẽ pahw̃yr Karõ rē nhũm mẽ pahkarõ mã agjê pu mẽ ỹ hã kot amnhĩ nhĩpêx o amnhĩ nhĩpêx o papa.

14 Nê mẽ ixpê Jejus nh̃ỹ hã mẽ ajahkre xw̃ỹnhjaja. Mẽ ixte kot amnhĩ nhĩpêx nê kot mẽmoj tanhmã ho hã omunh o ri hkôt ixpa jakamã na pa htem ma mẽ piitã mẽ kãm harēnh o ri mẽ hkôt ixpa. Nê mẽ kãm harēnh o:

—Tirtũm na pre mẽ pahw̃yr Kraja mẽ. Kot mẽ pahpiitã mẽ panê htyk kaxyw mẽ pahw̃yr kumẽ. Anẽ.

15 Mẽ kot Jejus kêp Tirtũm Kra hã harēnh o pa xw̃ỹnhjaja na hte Tirtũm mẽ kamã pa ho pa nhũm htem ỹ hã ã Kra jarēnh anh̃ỹr o pa.

16 Na pu mẽ ra pah̃pri hã Tirtũm kãm mẽ pajapê hã amnhĩ tã omu. Kãm mẽ pajapê ht̃x kumrêx ã amnhĩ tã omu. Jakamã kot puj mẽ urak nê ỹ hã pamã mẽ piitã mẽ hkĩnh o papa. Tirtũm mẽ mẽ pah̃tipxi nê ri papa kēnã.

Mẽ kãm axpên kĩnh xw̃ỹnhjaja kãm Tirtũm puma hkêt ã mẽ harēnh

17 Nê kot puj mẽ pamã axpên kĩnh o papa nê mãânēn Kris kôt amnhĩ nhĩpêx ho papa. Hãmri nhũm nh̃ỹrmã Tirtũm kot Kra mẽ wa kuri mẽ h̃tĩr tũm nê mẽ pa ho mẽ pa mã xw̃ỹnhjê nh̃ixi jarēnh kaxyw pu mẽ tee ri amnhĩ kukamã pajamaxpêr kêt nê. Ra amnhĩ nh̃ixi jarēnh ma nê pahkĩnh nê.

18 Nê koja mẽhõ kãm hkwỹjê hkĩnh kêt nê tanhmã hõ homnuj to. Hãmri nê kot amnhĩ tã tanhmã ho pymaj kãm uma ho hw̃yr m̃rar kêt nê. No koja kãm hkwỹjê hkĩnh nê tanhmã mẽ ho mex to ho pa nê kãm mẽ uma hkêt nê.

19 Tirtũm kumrêx na pre kãm mẽ pajapê nê mẽ pakukamã tanhmã mẽ pah̃to mex to. Tã pu mẽ ra amnhĩ pyrà nê pamã hkĩnh o papa. Nê pamã mẽ piitã mẽ hkĩnh o papa.

20 Nê koja mẽhõ kãm Tirtũm kĩnh ã amnhĩ jarēnh tã kãm hkwỹjê hõ h̃p̃rãm nõkati hãmri nê ra kãm Tirtũm p̃rãm kêt ã amnhĩ to amnhĩrit. Kot kaj mẽ ano ho akwỹjê pumunh o apa xw̃ỹnh̃ta amã hkĩnh kēê tã tanhmã kot ka we amnhĩ to nê ate ano ho Tirtũm pumunh kēêta amã hkĩnh ã amnhĩ jarē? Nã ka ã amnhĩ jarēnh anh̃ỹr o amnhĩ to axêx. 21 Na pre Tirtũm mẽ pamã kapêr o amnhĩrit o:

Kot kaj mẽ amã ixkĩnh hã kot kaj mẽ mãânēn amã akwỹjê hkĩnh o mẽ ho mex o ri apa. Anẽ.

5

Tirtũm nh̃ỹ hã mẽ pamã axpên kĩnh ã mẽ pamã karõ

1 Nê Tirtũm kot mẽ pahw̃yr Jejus mẽnh ã harēnhja. Koja mẽhõ kuma nê amnhĩ kaxyw hkôt hamaxpêr nê Jejus kôt amnhĩ xãm hã koja Tirtũm ja hã omu nê ho hkra.

Nē koja mēhō kām Tirtūm kīnh hā koja māānēn kām hkwyjê hkīnh o pa. ²Ja pyrà nē kot puj mē pamā Tirtūm kīnh nē kapēr kôt amnhī nhīpêx. Hāmri nē māānēn pamā krajē piitā mē hkīnh ho papa.

³Nē kot puj mē pamā Tirtūm kīnh nē nhūm kapērja mē pahpê hihty× kêt nē. Pu mē pamā Tirtūm kīnh ā kapēr kôt amnhī nhīpêx mex o ri papa.

⁴⁻⁵Na pu prem amnhī kaxyw Tirtūm Kra Jejus kôt pajamxpēr nē hkôt amnhī xunhwý nhūm Tirtūm ja hā mē pahpumu nē mē pahto hkra pu mē ý hā amnhī nhīpêx nyw o amnhī nhīpêx o papa. No ri tanhmā amnhī tomnuj to ho ri papa hkêt nē.

*Mēmoj axkrunēpxi nē kot Jejus kēp Tirtūm Kra hā ho amnhīrīt
Juāw 1.32-34, 3.36, 5.31, 15.26*

⁶Nē Jejus pix na pre Tirtūm mē pakaxyw ām nhūm kēp Kra hā mē pahwýr wrý. Hāmri nhūm Juāw Paxisja pyhti kamā hkrā kumrā. Kēp Tirtūm Kra hā hkrā kumrā. Tā nhūm Tirtūm kapēr kôt ma tanhmā amnhī nhīpêx to ho pa. Nē ri hkwyjê mā kapēr jarēnh o ri mē hkôt pa. Tā nhūm mē kupī nhūm kēp Tirtūm Kra hā pī kahpa hā ajêt nē ty nē hkamrō axkapī. Ā mē panē amnhī nhīpêx anē nhūm Tirtūm Karōja kēp Kra hā mē pamā ho amnhīrīt. Ām hāmri na hte ā tanhmā mēmoj to amnhīrīt to anē. Mēmoj to hêx kêt jakamā na pre Jejus kēp Tirtūm Kra hā mē pamā ho amnhīrīt.

⁷Nē kēp Tirtūm Kra hā mē pamā mēmoj to axkrunēpxi nē ho amnhīrīt.

⁸Tirtūm Karō na pre kēp Kra hā mē pamā ho amnhīrīt pu prem kēp Kra hā omu. Nē Juāw Paxis kot hkrā kumrārta ā pu mē māānēn kēp Tirtūm Kra hā kot ho amnhīrītja ā omu. Nē māānēn kēp Tirtūm Kra hā pī kahpa hā jêt nē htyk nē hkamrō pikapīrta ā mē pamā ho amnhīrīt pu mē kēp Kra hā omu. E mē pamā mēmoj to axkrunēpxi nē Jejus kēp Tirtūm Kra hā kot ho amnhīrīt xwýnh na jajaja.

⁹Nē na pu htem jar pahkwýjaja kot axpēn mar xà hā ixkre kamā mē kapēr ma nē mē hkôt pajamxpēr. Tā koja Tirtūm tanhmā mē pamā mēmoj to amnhīrīt to pu mē hkôt pajamxpēr kurē kumrêx. Kēp Tirtūm kēnā kot pu kêt mē kapēr prā nē hkôt pajamxpēr kêt. Tām na pre mē pamā Jejus kēp Kra hā ā ho amnhīrīt anē. ¹⁰Jakamā mē pahte Tirtūm Kra hkôt amnhī xunhwýr xwýnhjaja na pu prem Jejus kēp Kra hā harēnh ma nē hkôt pajamxpēr kurē kumrêx. No mē kēp hkra hkêt xwýnhjaja na htem Tirtūm kot kēp Kra hā harēnh ma nē ām kuma nē amnhī kaxyw hkôt hamaxpēr kêt nē. Jao te Tirtūm kēp Hipêêxā hā amnhī to hêx pyràk ā harē.

¹¹E kot paj ixprī hā mē amā tanhmā ja jarēnh to ka mē inhma. Na na pre Tirtūm Krata mē pahpiitā panē ty. Jakamā kot puj mē pahte hkôt amnhī xunhwýr xwýnhjaja nhýrmā ty nhūm Tirtūm akupým mē pahto mē pahtír. Pu mē wa kuri pamex nē pahtír tūm nē papa ho papa. ¹²Mē pahpê Jejus kwýjaja kot puj mē ā pahtír tūm nē papa anē. No mē kēp hkwyjê hkêt xwýnhjaja koja mē nhýrmā ty nē mē pahpyrà nē wa hwýr āpir kêt nē.

¹³Na ka prem ixpyrà nē amnhī kaxyw Tirtūm Kra hkôt ajamxpēr nē hkôt amnhī xunhwý. Tā pa ā mē amā kagàja nhīpêx anē. Mē ate kamā harēnh nē mē pahte nhýrmā Tirtūm mē Kra wa hwýr mē paxāpir ā mē pajarēnhja mar nē amnhī kaxyw hkôt ajamxpēr o ri apa kaxyw nē kapēr prā o ri apa hkêt nē.

*Mē pahte paxāmhīx mēmoj tā Tirtūm wýr ā mē pajarēnh
Juāw 14.13-14*

¹⁴ Nē mẽ pahpê Tirtūm krajaja na pu htem paxàmnhĩx pajamakêtkati nē mẽmoj tã tanhmã hwÿr to ho papa. Kot puj mẽ kãm hprãm xà hkôt mẽmoj tã kuwÿ nhũm mẽ pama. ¹⁵ Na pu htem mẽmoj tã kuwÿ nhũm mẽ pamar mex nē mẽ pahte mẽmoj tã hwÿr xà hkôt tanhmã mẽ pamã mẽmoj nhõr to rÿ tanhmã mẽmoj to. Ra mẽ pahte ja mar mex.

Tirtūm kot tanhmã hkra hkêt xwÿnhjê nhĩpêx to hã harēnh

Rukre 22.31-32

¹⁶⁻¹⁷ Nē koja Kris kôt mẽ anhĩõ tanhmã amnhĩ tomnuj to ka mẽ atõ tee ri ja hã omu nē ho Tirtūm wÿ. Ho awÿ kê nē tanhmã kot amnhĩ tomnuj tota o hapêx nē ja nē ho htÿx kê axte ã amnhĩ nhĩpêx anhÿr kêt nē. Kot puj mẽ pahtõ tanhmã amnhĩ tomnuj to nhũm Tirtūm tee ri ja hã mẽ pahpumu nhũm ja kêp omnuj nē. Tã kot puj mẽ amnhĩ tomnujta kaga nhũm ja hã mẽ pahpumunh kôt tanhmã hã mẽ pahto hkêt nē. Ām mẽ kot amnhĩ nhĩpêx pixi koja ho hamakêtkati hkêt nē. Koja mēhõ Tirtūm kaga ho hkaga nē aa hkôt amnhĩ xãm kêt nē. Hãmri nhũm tee ri amnhĩ tã omu nhũm ja kêp omnuj tÿx kumrêx. Jakamã koja aa ho hkra hkêt nē. Nē aa kot hkaga ho hamakêtkati hkêt nē pa ho pa. Jakamã koja hkaga xwÿnhhta nhÿrmã ty nē kuri htĩr tũm nē pa ho pa hkêt nē.

¹⁸ Nē mẽ pahpê Tirtūm krajaja na pu htem amnhĩ tomnuj o papa hkêt nē. Tirtūm Kra Jesus kot ja pymaj mẽ panê Satanasti pumunh mex jakamã nhũm tee ri mẽ pahte tanhmã amnhĩ tomnuj to hprãm xaj mẽ pano kupyry kapry ho ri pa. Ra mẽ pahte ja mar mex. ¹⁹ Mẽ pahpê Tirtūm kra na pu mẽ. No mẽ kêp hkra hkêt xwÿnhjaja Satanasti kot amnhĩ tã mẽ ho htÿx pyrãk o mẽ hipêx jakamã nhũm htem tanhmã amnhĩ tomnuj to ho pa. Mẽ pahte ja mar mex.

²⁰ Nē mããnēn ja mẽ pahte mar mex. Na pre Tirtūm Kra mẽ pahwÿr wrÿ nē mẽ pamã tanhmã Tirtūm o amnhĩrit to ho pa. Tapxipix kêp Mẽpahpãm ã mẽ pamã ho amnhĩrit. Tã Jesus kukwak ri mẽ pahpê Tirtūm kra jakamã kot puj mẽ nhÿrmã wa kuri pahĩr tũm nē pa mex nē papa ho papa.

²¹ E Kris kôt ixkwÿjaja. Kêr ka mẽ Tirtūm kapêr kôt pix mã mãn ri amnhĩ nhĩpêx o ri apa rãhã nē. No nhãm mẽ kot Tirtūm kapêr kwÿm ri mẽ amã kapêr o hêx xwÿnhjê kapêr ma nē ãm mẽ ama nē mẽ hkôt amnhĩ nhĩpêx hkêt nē.

Tã ãm ja pix. Ixpê Juāw na pa krĩ piitã hkôt mẽ amã kaga nhĩpêx nē kurē.

Sikũn Juāw

Juāw kot Jejus kôt hkwýjê hwýr wam kagà nê mēnh kôt hō mēnh

Juāw na pre kagàja nhípêx. Jejus nhý hã hkrajê jahkre ho ri pa xwýnhjê hō na pre. Jakamã na pre hkrĩ hō kamã Kris kôt htõx mē õ fãmii mã kagàja nhípêx nê mē hwýr kumê. Na pre hte Tirtũm kapêr o mē hêx o pa xwýnhjê hō mē õ krĩ hwýr mra nhũm Juāw krãmnhwý nita omu nê htýx kot mē ahkre mex ã hkamnhĩx. Hãmri nê kot Tirtũm kapêr o hkwýjê jahkre kaxyw amnhĩ nhõrkwý hwýr kuwý. Hãmri nhũm Juāw tee ri harēnh ma nê kãm kagàja nhípêx nê kamã kot amnhĩ wýr hwýr nê kãm kapêr nê hprĩ hã kãm tanhmã mē kot Tirtũm o hêx to ho pa hã tanhmã mē harēnh to. Kot kamã harēnh nê mē harēnh mar hãmri nê mē axkãm hamak rom nê ri pa kaxyw. ã na pre Juāwja hkrãmnhwý ni mē hkwýjê mã mēmoj jarēnh nê hã kagà nê mē hwýr mēnh anê. Nê mē kãm:

¹ Pa Jejus kôt ixtõx. Xà mē amex? E ot pa mē amã kagà nhípêx nê mē awýr kumê. Akrajaja nê apê mē hkatorxà mē mē ato ixpimràatã mē awýr kumê. Ixpê Juāw pigétre na pa. Inhmã mē akĩnh nom papxpix inhmã mē akĩnh kêt. Mē pahpyrà nê mē kot Tirtũm kôt amnhĩ xunhwýr xwýnhjaja haxwýja kãm mē akĩnh. ² Mē pahte Tirtũm kapêr kôt ri amnhĩ nhípêx rãhã ho ri papa jakamã na pu htem pamã axpēn kĩnh o ri papa.

³ Na pa hte mē pahto Mēpanhĩpêêxã maati Tirtũm wýr o ixpa nê kãm:

—Pa Tirtũm. Ot pa mē amnhĩ to awý. Akra Jejus Kris mē mē amnhĩ to war awý. Kêr ka wa mē ixkamã axukapri nê mē ixkutã war anojarêt rãhã ho ri apa. Nê tanhmã mē ixkrã hto pa mē ixãmnhĩx ijamakêtkati nê ixkĩnh nê mē inhmã axpēn kĩnh nê axpēn to mex o ri axpēn kôt ixpa. Nê tãm ri amnhĩ nhípêx. Anê.

*Mē pamã axpēn kĩnh kãm axpēn to mex ã mē pamã karõ
Juāw 13.34-35; Wam Juāw 2.7-9, 3.14-18*

⁴ Nê na pa pre akra hkwýjê pumu nhũm mē inhmã amnhĩ jarê pa mē kuma nê mē ý hã ixkĩnh nê. Na xep prem Tirtũm kôt amnhĩ xunhwý nê hkôt ri amnhĩ nhípêx mex o pa. Mē kot Mēpanhĩpêêxã Maati Tirtũm kapêr ã kagà hkôt amnhĩ nhípêx ã inhmã amnhĩ jarê pa mē kuma nê ixkĩnh nê. ⁵⁻⁶ Jakamã na pa ã amã ixkapêr nê hã kagà anê. E kwa Kris kôt ixtõx. Kêr pu mē pamã axpēn kĩnh o ri papa hã mēmoj to axpēn kutã panojarêt rãhã ho ri papa. ã ixujarēnh anhýrja nyw kêt. Amnepê mã mē ate Jejus kôt amnhĩ xunhwýr ã arĩgrotã ã na prem ã mē amã karõ anê. Tã kêr pu mē arĩ pamã axpēn kĩnh pē Tirtũm kapêr piitã hkôt amnhĩ nhípêx mex o ri papa. Kapêr ã kagà kot ã mē pahte amnhĩ nhípêx anhýr ã mē pamã karõ.

*Tirtũm kapêr o mē hêx xwýnhjê jarēnh
Rõmãn 16.17-18; Wam Ximotre 5.22; Wam Juāw 2.18-26, 4.1*

⁷ Nê mē kot Tirtũm kapêr o hêx o ri mē pa xwýnhjaja na mē ra ma krĩ piitã hkôt mē kãm tanhmã ho hêx to ho pa nê mē kãm:

—Jejus kêp Tirtũm Kra hkêt ãm mē panhĩõ na pre. Na pre Tirtũm mē pahwýr mēnh kêt nê. ãm mē panhĩõ rũm na pre kato.

Anh̄yr o mē kām ho hēx o pa. Kām Kris kurê xw̄ynh maatija nh̄y hā na htem ā ri ho hēx o pa anē. ⁸ Jakamā kwa mē amnh̄i nē mē omunh mex nē mē ama nē ām mē ama. Kot kaj mē kapēr ma nē mē hkôt ajamaxpēr hāmri nē mē ixte Tirtūm kapēr o mē ajahkreta kaga. Kwa mē arī mē ate amnh̄i nh̄ipēx nyw pix o mān amnh̄i nh̄ipēx rāhā o ri apa. Nē arī mē amā axpēn kīnh kām tanhmā xpēn to ajuta hto rāhā ho ri apa. Kēr kē Tirtūm ja hā mē apumu nē nh̄ymā mē ato mex nē. ⁹ Nom kot kaj mē nhām mē kapēr punujja kôt amnh̄i nh̄ipēx nē Kris kôt amnh̄i nh̄ipēx kēt nē nhūm Tirtūm mē akôt pa hkēt nē. Nom kot ka mē arī Kris kôt amnh̄i nh̄ipēx mex nē hāmri nhūm Tirtūm mē Kra Jejusja wa mē akôt ri pa ho pa rāhā nē. ¹⁰ Jakamā koja ā Tirtūm kapēr ā kagā kuhpa hā Jejus o hēx xw̄ynhjaja mēmo arīgro hā mē anhō krī hw̄yr pōj ka mē omu nē amnh̄i nhōrkw̄y hw̄yr mē hw̄yr kēt nē. Nē tanhmā mē kām akapēr to hkēt nē. ām ri mē hkàx ā ri mra. ¹¹ No kot kaj mē ā mē hipēx anh̄yr kēt nē mē hw̄yr mra nē mē mar o akuhē hāmri nē te mē ate mē hkôt amnh̄i nh̄ipēx o amnh̄i nh̄ipēx pyrāk. Ja pumaj kēr ka mē nh̄yri mē omu nē mē htēp kēt kumrēx.

Kagà jatur xà

Hapuhā Juāw 13-15

¹² E Kris kôt ixtōx. Ixkapēr jatur xà na ja. Ixkapēr ā kagāja ām hakotre nom inhmā mē amā ixkapēr ry hprām. Jakamā kot paj mēmo arīgro hā ma mē aw̄yr mō pu mē axpēn pumu nē pahkīnh nē. Pa rī kormā mē amā ixkapēr jatur xām kumē ka mē aprī hā inhma.

¹³ Nē ota jar Kris kôt atōx krajaja aw̄yr hpēr mē.

E ixpē Juāw pigētre na pa ā aw̄yr kagāja nh̄ipēx nē mēnh anē.

Hapuhã Juãw

Juãw kot Jesus kôt hkwýjê hwýr kagà nê mênh o axkrut kôt hõ mênh

Juãw na pre mãânên kagàja nhípêx. Jesus nhý hã hkrajê jahkre ho mē pa xwýnhjê hõ na pre. Tã hkràmnhwý Gajore mã kagàja nhípêx nê hwýr kumē. Na pre Jesus kwýjaja ma krī piitã hkôt mē kãm Jesus kapêr jarênh o ri mē hkôt pa. Jao Gajore nhõ krī hwýr pøj nhũm Gajore mē hpõx ã mē harênh ma nê amnhĩ nhõrkwý hwýr mē kuwý. Jakamã nhũm pre htem ma õ krī hwýr pa hãmri nê kuri pøj. Nhũm Juãw ã Gajore kot amnhĩ nhípêx anhýr ã harênh ma nê hkĩnh nê hwýr kagàja nhípêx nê kumē. Nê kamã kãm mēhõ pē Xotre kot tanhmã amnhĩ tomnuj to ho pa hã harē. ã na pre Juãwja Gajore mã mēmoj jarênh nê hã kagà nê hwýr mênh anē. Nê kãm:

¹ Pa ixkràmnhwý Gajore? Xà amex? E ot pa awýr kagàja nhípêx nê kumē. Apê ixkràmnhwý mex na ka. Inhmã akĩnh.

²⁻³ Na pre ra Kris kôt pahtõ hkwýjaja ixwýr pøj nê tanhmã inhmã ajarênh to. Na ka xep hte Tirtũm kôt amnhĩ nhípêx mex rãhã ho ri apa. Pa ajarênh ma nê anhý hã ixkĩnh nê. Nê ato Tirtũm wýr o ixpa. Kot ato mex nhũm amex nê ajamakêtkati nê apa ho apa kaxyw. Nê axà hkêt nê amex nê ri apa kaxyw.

⁴ Ixte Tirtũm kapêr o mē ajahkre o ri ixpa jakamã te mē apê ixkra pyrãk. Tã pa tanhmã ate mē pahkwýjê nhípêx to ho apa hã ajarênh ma nê ixkĩnh nê.

*Gajore kot tanhmã Jesus kôt hkwýjê ho mex to hã harênh
Wam Korũt 16.10-11*

⁵ E ixkràmnhwý. Na ka xep hte Jesus kôt pahtõjê ho mex o ri apa. Aa ate mē omunh kêt tã nhũm htem ma anhõ krī hwýr pa ka mē omu nê apê Jesus kôt mē htõ hã mē ho mex nê. ãm hãmri na ka hte ã mē hipêx anhýr o ri apa Gajore. ⁶ Na pre ra mē hkwýjaja akupýn ixwýr pøj nê mē ixpê Kris kwýjê mã amnhĩ tã ajarē. Amã mē hkĩnh nê ate tanhmã mē ho mex to hã ajarē. Nhũm prem nojarêk ta xep pre mē kãm pry hã mē apkur xà hã mēmoj gõ nhũm mē inhmã ajarē. Nã ãm hãmri na ka hte ã mē ho mex o apa anē. ã ate mē hipêx anhýr o apata ã na hte Tirtũm apumu nê hkĩnh nê. ⁷ Na htem krī piitã hkôt mē kãm Kris kot tanhmã mē panê amnhĩ nhípêx to hã harênh kaxyw ma mē hwýr pa. Nom mē apkur xà hprãm xaj mē kot Kris kôt amnhĩ xunhwýr kêt xwýnhjê hwýr pa hkêt nê. ⁸ Jakamã kwa kër pu mē papajaja mē pahpê Jesus kôt mē htõ hã mē kãm mēõ hkwý nhõr o papa. Kot puj mē ã mē ho ajuta anē nê te mē pajaxwýja mē ãhkõ hã ri mē kãm Kris jarênh o ri papa pyrãk.

*Xotre kãm Juãw kapêr mar prãm kêt ã harênh
Matêwre 20.25-28, 23.1-12*

⁹ Nê ra ixte anhõ krī kamã mē apê Kris kwýjê mã kagà nê mênh nhũm mē ate kamã harênhta. Na xep pre Xotreja kuma nê ãm kuma. Kêp mē akrãhtũm prãm xaj kãm ixkapêr mar prãm kêt nê. ¹⁰ Na xep hte tanhmã ixto hêx to ho pa. Nom papxipix ixto hêx kêt nê. Mãânên Kris kôt mē pahtõjaja nhýhýnh krī hõ rũm mē awýr pan pøj nhũm xep tanhmã mē amã mē ho hêx to. Nê mē hpõx ã mē omu nom amnhĩ nhõrkwý hwýr mē hwýr kêt nê. Tã ka mē kurom amnhĩ nhõrkwý hwýr mē awý nhũm xep tee ri ja hã mē apumu nê mē akamã gryk nê mē hã mē amã akir nê Tirtũm mã amnhĩ jarênh xà hã ixkre nê mē

ajano. Na xep hte ā amnhī nhīpêx anhÿr o pa. Jakamā kot paj nhÿrmā ma mẽ awÿr mō hāmri nē mẽ apiitā mẽ anoo mā hā kām akir. Tanhmā kot mẽ ixto hêx to nē tanhmā kot amnhī tomnuj to hā kām akir ka mẽ apiitā hā inhma.

Mẽ pahte mẽ kot amnhī tomnuj xwÿnhjê hkôt amnhī nhīpêx kêt ā mẽ pamā karō

Rukre 6.45; Rōmān 12.9

¹¹ E kwa ixkrāmnhwÿ. Kêr ka ā Xotre kot amnhī tomnuj o pa anhÿrja kôt amnhī nhīpêx kêt nē. Mẽ kot amnhī tomnuj o mẽ pa xwÿnhjaja na htem Tirtūm kôt amnhī nhīpêx kêt nē. No kêt mẽ kot amnhī to mex o ri mẽ pa xwÿnhjaja na mẽ kêp Tirtūm kra jakamā kêr ka mẽ ā mẽ kot amnhī nhīpêx anhÿr xwÿnhjê kôt pix mā amnhī nhīpêx.

Temêtre jarēnh

¹² Nē Temêtre na hte tām ri amnhī nhīpêx nē ām hāmri Tirtūm kapêr o mẽ ahkre mex nē nhūm mẽ piitā xepēn mā mex ā harē. Pa hte ijaxwÿja mẽ kām mex ā harēnh o ri mẽ hkôt ixpa ka htem inhma. ām hāmri na pa hte tanhmā harēnh to ho ri ixpa.

Kagà jatur xà

Sikūn Juāw 12-13

¹³ E kagàja kamā na pa ām ja pix jarē nē hā kagà nē awÿr kumē Gajore. Na pa kormā harēnh jatur xà mēnh kêt nē. ¹⁴ Nom kot paj tokyx ma awÿr mō hāmri nē ri kormā amā hatur xām kumē.

E kê Tirtūm akutā nojarêt rāhā ho pa.

Nē ota jar Kris kôt akrāmnhwÿjaja awÿr hpêr mẽ. Nē kêr ka atar Kris kôt ixkrāmnhwÿjê mẽ ijarē.

Tā ām ja pix. Ixpê Juāw pigêtre na pa ā awÿr kagà nhīpêx nē mēnh anē.

Jutre

Jutre kot Jejus kôt hkwyjê piitã hwyr kagã nê mēnh

Jutre na pre kagãja nhîpêx. Xiakre pyrà nê kêp Jejus tō na pre. Tã kagãja nhîpêx nê krî piitã hkôt Jejus kôt hkwyjê hwyr kurê. Na pre mē hkwyjêja kêp Jejus kwý hã amnhî jarênh tã axtem nê tanhmã amnhî tomnuj to ho pa. Jakamã nhũm Jutre kagãja kamã Jejus kwýjê mã hprî hã tanhmã mē harênh to nê mē kot mē hkôt amnhî nhîpêx nê mē kãm kapêr kãm hihtýx nê. Nê mē kãm:

¹ Pa Jejus kôt ixtō nê ixtōxjaja. Xà mē amex? E ot pa mē amã kagã nhîpêx nê mē awyr kurê. Tirtũm kot ixpyrà nê amnhî kaxyw mē axunhwyr xwýnhjê hwyr. Mēpanhîpêxã Maati Tirtũm kãm mē pahpiitã mē pajapê jakamã na hte Kra Jejus Kris mē wa mē pahtãnopxar mex rãhã ho pa.

Ixpê Jutre na pa hte Jejus Kris mã tanhmã amnhî nhîpêx to ho ri ixpa. Nê ixpê Xiakre htō na pa.

² Na pa hte mē ato Tirtũm wýr ho ixpa nê kãm:

—Pa Tirtũm. Kwa mē kot Akra Jejus kôt amnhî xunhwyr xwýnhjê pumu nê amã mē hapê hã mē kamã axukaprî rãhã ho apa. Kê mē kamã amnhî krit nê amnhîx hamakêtkati nê ri tanhmã amnhî nhîpêx to ho pa. Nê mē kãm xepên kînh o ri xepên kôt pa. Anê.

Mê kot Tirtũm kapêr o hêx xwýnhjê jarênh

Wam Ximotre 1.18-20, 6.12

³ E ixkrãmnhwýjaja. Nã inhmã mē akînh. Na pa pre jãã mē amã kagã hkwyjê nhîpêx kaxyw. Mē pahte Jejus Kris kukwak ri amnhî nhîpêx nyw ã tanhmã mē pajarênh to nê hã kagã kaxyw tã kormã harênh kêt nê. Kot paj axtem mēmoj jarê. Na pre Tirtũm mē pamã kot amnhî nhîpêx o amnhîrit pa. Nê kapêr o amnhîrit pa. Mē pahte mar nê hkôt amnhî nhîpêx kaxyw. Jakamã kër pu mē kapêr mar týx nê amnhî krã hi kamã haxàr týx nê hã papa. Nom koja mēhō kapêr kuhpa hã tanhmã mē amã kapêr o hêx to ka mē ama nê amã.

⁴ Na xep ra kapêr o mē hêx xwýnhjaja mē akôt pa nê mē apyrã nê Jejus kôt amnhî xunhwyr ã amnhî jarê nom amnhî to hêx. Ka xep mē aprî hã mē hêx ã mē omunh kêt nê mē kêp Jejus kôt mē atō hã mē hkamnhîx nê atýx amnhî nhōrkwy hwýr mē awý. Nom mē kot Tirtũm kapêr o hêx pix kaxyw na htem mē akôt pa nê mē amã kapêr o:

—Tirtũm kãm mē pajapê htýx kumrêx nê mē pakutã nojarêt ho pa jakamã kwa kër pu mē mãmrî nhãm mēnijê ho amnhîkati ho papa. Koja ja hã mē pahpumu nê tanhmã hã mē pahto hkêt nê. Kãm mē pajapê kênã kot kêt hã tanhmã mē pahto. No kêt Jejus Krisja mē ate kêp mē panhō Pahihti hã harê nom kêp mē panhō patrãw rý kêp mē panhō Pahihti hkêt. Anê.

À Tirtũm kapêr kuhpa hã mē amã harênh anhýr o pa. Tirtũm kapêr ã kagã htũm kot amnepêm mē hukamã tanhmã mē harênh to nê mē harênh kot:

À mē kapêr anhýr o paja mýrapê koja mē mex kêt nê pa. Koja Tirtũm mē homnuj týx kumrêx.

Anhýr o kot mē harênh. Tã pa mē amã ixprî hã mē harê nê hã kagã. Mē ate inhmar nê amnhî nê mē omunh mex kaxyw.

*Tirtūm kot tanhmā mē kot amnhī tomnuj xwŷnhjē nhīpēx to hā harēnh
Sikūn Pētre 2.1-17; Sikūn Ximotre 3.1-9*

⁵ Nē amnepē mā mē panhīgētjaja kormā Ejit kamā mē pa ri nhūm Tirtūm Ejit nhō xwŷnhjē rūm mē kator pa. Hāmri nhūm mē hkwŷjaja tanhmā hamaxpēr to nē axtem nē amnhī kaxyw hkōt hamaxpēr kēt nē. Nhūm tee ri amnhī tā mē omu nē ā mē kot amnhī nhīpēx anhŷr xwŷnhjē nhīmex pa. Ra mē ate mē harēnh mar mex tā pa axte mē amā mē harē.

⁶ Nē Tirtūm kapēr o mē wrŷk xwŷnh kwŷjaja. Na prem Tirtūm nhŷ hā kapēr o pa htā tanhmā hamaxpēr punuj to nē ra kām ja ho anhŷr prām nōkati nē Tirtūm kaga. Jakamā nhūm mē hā amŷnē nhūm mē unē nē kàx o mē hkaxpre pa. Nē nhŷri pika kaxwŷnh kām kamāt kō htyk kām mē kurē nhūm mē arī kamā hkrī ho hkrī. Nom koja nhŷrmā Tirtūm kot tanhmā mē pahpiitā mē pajarēnh to xā hā arīgro kato nhūm mē rī kormā hapōx pa. Hāmri nē kot amnhī tomnuj mŷrapē ma mē kot amnhī xā htŷx kamā hamak tūm xāta wŷr ma hapēx.

⁷ Nē krī pē Sotō nē Komo nhō xwŷnhjaja na prem haxwŷja kām Tirtūm kapēr kōt amnhī nhīpēx prām kēt nē. Nē krīja wa hpuhā krī hkwŷ kamā ri mē pa xwŷnhjaja haxwŷja mē urāk nē nē kām kapēr mar prām kēt nē. Na prem amnhī tomnuj tŷx rāhā ho pa. Nē axtem nē axpēn pē ri mē hprō ho amnhīkati ho pa. Nē mēmy hkwŷjaja ri axtem nē axpēn to amnhīkati ho pa. Hāmri nhūm Tirtūm tee ri mē kot amnhī nhīpēxja ā omu nē mē hipy kuwy hpōk kwŷ rē nhūm mē amnhī wŷr omu nē kām ma xàj tee ri hprōt kaprŷ. Nē hprōt kaxyw ōrkwŷ rūm hapōj nē hxēt pa nē hapēx. Na hte ā Tirtūm mē kot amnhī tomnuj o mē pa xwŷnhjē nhīpēx anē. Jakamā koja nhŷrmā kuwy hpōk rāhā xwŷnhhta wŷr mē piitā mē rēnh pa nhūm mē kamā amnhī xā htŷx kamā hamak rāhā ho pa ho pa nē aa ā hapēx kēt nē. Nē ā htŷx rāhā papa ho pa. Tā mē pahte Sotō mē Komo nhō xwŷnhjē jarēnh mar nē mē pahte amnhī tomnuj kaga kurē kumrēx kaxyw na pre Tirtūm ā mē pamā mē harēnh o amnhīrīt anē.

*Mē hpijaàm kēt xwŷnhjē jarēnh
Sikūn Pētre 2.10*

⁸ Nē mē kot Tirtūm kapēr o pihkār xwŷnhjaja na htem ā mē kot amnhī nhīpēx anhŷr xwŷnhjē pyrā nē amnhī tomnuj tŷx pix o ri pa. Jakamā na htem tanhmā hpimtir punuj to hāmri nē hkrā hapōj nē hpimtir xā hkōt tanhmā amnhī tomnuj to. Jao hkwŷjē kamā hpijaàm kēt o pa. Rŷ mēnijē hō rŷ mēmyjē hō nhūm mē axpēn kām hpijaàm kēt o pa. Rŷ Tirtūm kapēr o mē wrŷk xwŷnhjē ho kapēr punuj nē. Kapēr mā gēt o tanhmā mē ho kapēr punuj to. ā na htem hpimtir punuj xā hkōt amnhī tomnuj o pa anē. ⁹ Tirtūm kapēr o mē wrŷk xwŷnh krāhtūm Mikewja. Kēp mē hkrāhtūm tā aa mē kām kapēr mā gēt kēt nē. Na pre Mojes ty nhūm Mikew ra ma hwŷr tēn wrŷ. Nē kuri Satanasti pumu hāmri nē Mojes nhī nē tanhmā kām kapēr to. Nom kapēr mā gēt o kām kapēr kēt nē. ām kapēr mā hprī ho kām kapēr nē kām:

—Kwa ām omu kē nō. Kot kaj tanhmā ho nhūm Tirtūm apumu nē hā tanhmā hā ato. Anē.

¹⁰⁻¹¹ Nom ixte mē amā mē hpimtir punuj jarēnh xwŷnhjaja. Mē kot Tirtūm kapēr o pihkār xwŷnhjaja kot hprī hā Tirtūm kot amnhī nhīpēx ā harēnh mar kēt jakamā na htem htŷx ri ho kapēr o haprŷ ho pa. Te ho mry oprēja hamaxpēr kēt nē htŷx ri amnhī nhīpēx o pa pyrāk. Nom koja nhŷrmā Tirtūm mē homnuj tŷx nē.

Te mẽ kot finat Kaĩ kot amnhĩ tō hpĩr xwỳnh kot amnhĩ nhĩpêxta pyràk. Nē te mẽ kot finat Paraāw kot amnhĩ nhĩpêx pyrà nē kàxpore rũnh prām xàj Tĩrtũm kapēr kuhpa hã tanhmã amnhĩ nhĩpêx to ho pa. Nē te mẽ kot finat Kore kot amnhĩ nhĩpêx pyrà nē Tĩrtũm kot mẽ kaxyw mẽ õ pahi xãm xwỳnhnta kutã amnhĩ xunhwỳ. Mỳrapê koja mẽ jajê pyrà nē kuwy hpòk rãhã xwỳnhnta wỳr ma hapêx pa.

¹² Na ka htem apê Jejus kwỳ hã axpên wỳr akuprõ. Nē tōhã mẽ apê hkwy hã amã axpên kĩnh ã axàpkur kaxyw axpên wỳr akuprõ. Nhũm ixte mẽ amã mẽ harēnh xwỳnhjaja mẽ akõt agjé nē mẽ akutã apku. Jakamã kwa mẽ o kora mẽ amnhĩ nē mẽ omunh mex nē. Mẽ hipêx o te mẽ ate mẽ axàpkur xã hã mẽ anhõ kamã kēnre pumunh nē hanhir nē rēnh pyrà nē amnhĩ nhĩhkõ hã mẽ pumu nē amnhĩ nē hanor kurê kumrêx. Na htem hpjiaam kêt kãm amnhĩ pix kukamã hamaxpēr pē apkur rũnh o pa.

Te na wrỳk kaxyw htyk rax nē mōr nhũm mẽ kot omunh nē wrỳk ã hkamnhĩx tã nhũm kòk kot nhãm mēnh nhũm wrỳk kēeta pyràk o na htem amnhĩ nhĩpêx. Jao te mẽ kot ãm hãmri mẽ amã Tĩrtũm kapēr jarēnh mex pyràk tã mẽ amã ho hêx.

Nē te mẽ kēp mẽmo pĩ hpàr ra ô mã tãm tã ãm htỳx rã nē aa ô hkêt nhũm mẽ kot krãhyr nē mēnh nhũm grã parta pyràk.

¹³ Nē te mẽ kēp gō xujanãr kot amnhĩ nhĩpêx pyràk. Na hte gō xujanãrja hakax wỳr kapê nē mra nhũm hamrõ kỳxpê amgrã kamã arĩk nhũm gō awjanã nē ma akupỳm hipòk wỳr mra. Ja pyràk na htem ma nhỹhỹm mra nē mẽ kãm mẽmoj jarê nē nhãm mra nē mẽ kãm mẽmoj jarê nē ma akupỳm mẽ kurũm mra. Nhũm mẽ mar xã hkõt amnhĩ tomnuj rãhã ho pa.

Nē te mẽ kot kaxkwa hã kanhēre nhỹhỹm htēm nhũm mẽ kot nhỹhỹm htēm xã hkõt omunh kēeta pyràk. Jakamã koja Tĩrtũm nhỹrmã kamãt kõ kamã mẽ rēnh pa nhũm mẽ aa hapòx kêt nē.

*Mẽ kot amnhĩ tomnuj xwỳnhjê hkukamã mẽ harēnh
Apokarip 20.11-15*

¹⁴ Nē na pre finat Enokja amnepê mã ã mẽ kot amnhĩ tomnuj anhỹr xwỳnhjê hkukamã tanhmã mẽ harēnh to. Mẽ kot Tĩrtũm kapēr o pihkàr o ri mẽ pa xwỳnhjaja nhũm mẽ hkukamã mẽ harê. Enokja finat Atãw kanrēhã htãmnhwỳ na pre. Tã ã mẽ kot amnhĩ tomnuj anhỹr xwỳnhjê hkukamã mẽ harēnh o:

Koja nhỹrmã Pahihtija man pika hwỳr akupỳn wrỳ. Kapēr o mẽ wrỳk xwỳnh xohtõ rax mẽ mẽ hpimràatã akupỳn wrỳ.

¹⁵ Hãmri nē mẽ pahpiitã kormã mẽ pahĩr ri mẽ pahte tanhmã amnhĩ nhĩpêx to ho papa hã mẽ pahpumunh xã hkõt tanhmã mẽ pajarēnh to. Hãmri nē mẽ kot Tĩrtũm kapēr o hêx o pa xwỳnhjê pumu nē tanhmã mẽ harēnh to nē mẽ harēnh o: “Jajaja na pre mẽ kãm Inhĩpêexã Tĩrtũm prãm kêt nē ri kapēr kwỳm pix mã amnhĩ nhĩpêx o pa. Nē kapēr punuj o pa. Æ na prem amnhĩ nhĩpêx anhỹr rãhã ho pa.” Anhỹr o mẽ harê nē amnhĩ nē kuwy hwỳr mẽ kurê nhũm mẽ amnhĩ xã htỳx kãm hamak o pa rãhã nē pa ho pa. Anê.

Æ na pre finat Enokja mẽ hkukamã mẽ harēnh anê. ¹⁶ Æm hãmri na mẽ harê. Tã na hte arĩ mẽ hkwyjaja ã amnhĩ nhĩpêx anê. Nẽ hamaxpēr mex kêt nē. Na htem nhãm tanhmã mẽ ho kapēr punuj to pix kukamã hamaxpēr. Nē amnhĩ krã hkõt htỳx ri tanhmã amnhĩ tomnuj to ho pa. Nē amnhĩ to jarkrar rãhã nē. Nē hêx rom mẽ kēp mẽmoj jamỳnh kaxyw tanhmã mẽ kãm hêx to.

¹⁷ E Kris kôt ixkràmnhwỳjaja. Koja mẽ ã mẽ amã Tirtũm kapēr o hêx anhỹr o mẽ akôt pa ka mẽ ama nê ãm mẽ ama nê mẽ kapēr mar kêt nê. ãm mẽ panhõ Pahihti Jejus Kris nhỹ hã mẽ ajahkre o mẽ pa xwỳnhjaja kot tanhmã mẽ amã mẽ harênh toja mã mãn kêt ajamaxpēr tỳx rãhã o ri apa. ¹⁸ Na prem mẽ amã mẽ harênh o:

—Jejus akupỹn wrỳk xwỳj ri koja mẽmojaja mẽ awỹr mran pỏj. Nom mẽ kot Jejus kapēr kwỳm amnhĩ krã hkôt tanhmã amnhĩ nhĩpêx to xwỳnhjaja koja mẽ. Hãmri nê mẽ apê Jejus kwỳ hã mẽ apumu nê mẽ atã akunha nê mẽ atã hpêr o axkê nê Tirtũm ã hpêr o axkê nê kapêr ã kagã hã hpêr o axkê. Anê.

¹⁹ ã mẽ kot amnhĩ nhĩpêx anhỹr xwỳnhjaja mẽ pahpê Jejus kwỳjaja mẽ pahte xpêñ kutã amnhĩ xunhwỳrja na mẽ kãm hprãm. Mẽ kamã Tirtũm Karõ gjêx kêt jakamã mẽ kãm amnhĩ krã hkôt pix mã tanhmã amnhĩ tomnuj to ho pa hprãm.

Mẽ pahte Kris akupỹn wrỳk jamãr pê tanhmã amnhĩ nhĩpêx to hã mẽ pamã karõ

Matêwre 24.45-51; Rukre 12.25-40; Karatas 6.1-2; Xiakre 5.19-20; Sikũn Pêtre 3.12-15

²⁰ Kwa mẽ apê Jejus kôt ixtõ nê ixtõxjaja kêr ka mẽ ã mẽ kot amnhĩ nhĩpêx anhỹr o mẽ pa xwỳnhjê rom apkati mẽ amnhĩ kaxyw Jejus pix mã mãn ajamaxpêr rãhã ho ri apa. Te mẽ kot mẽ hakre hã ra ãptar nê amnhĩ krãm mẽ hakre xã jagjênh tỳxta pyrãk.

Jao Tirtũm kapêr mar tỳx nê hkôt amnhĩ nhĩpêx mex o ri apa.

Nê Karõ nhỹ hã amnhĩ to hwỳr rãhã nê.

²¹ Nê Tirtũm kãm mẽ pajapê hã kãm ajamaxpêr rãhã ho ri apa.

Nê Pahihti Jejus Kris kãm mẽ pajapê hã kãm ajamaxpêr tỳx rãhã ho apa.

Koja nhỹrmã kãm mẽ pajapê hã akupỹn mẽ pahwỳr wrỳ nê tanhmã mẽ pahto mex to pu mẽ kuri pahtĩr tũm nê pahkĩnh nê papa ho papa. Tã kêr pu mẽ arĩ akupỹn mẽ pahwỳr wrỳk xã hã arĩgro jamãr rãhã ho papa.

²² Nê mẽ pahkwỳjaja kormã mẽ kot Jejus kôt amnhĩ xunhwỳr tỳx kêt xwỳnhjaja kêr ka mẽ kamã axukaprĩ nê aprĩ hã mẽ kãm Tirtũm kapêr jarênh o ri mẽ hkôt apa. ²³ Na pre ra mẽ hkwỳjaja mẽ kot Tirtũm kapêr o pihkãr xwỳnhjê kapêr ma nê mẽ hkôt amnhĩ nhĩpêx. Jakamã kêr ka mẽ ja hã mẽ omu nê te mẽ ate kuwy hpôk rũnh nê mẽ hpa hã mẽ hamỳnh nê nhãm mẽ rênh pyrãk o mẽ hipêx. Jao mẽ kot nhỹrmã Tirtũm kapêr o pihkãr xwỳnhjê hkôt kuwy hpôk rũnhnta wỳr pa pymaj mẽ nê mẽ kãm akapêr kãm axihtỳx o ri mẽ hkôt apa. Kê mẽ ama nê mẽ hkaga nê mẽ hkôt ri amnhĩ nhĩpêx kêt nê.

Nê htỳx ri mẽ kot amnhĩ tomnuj o mẽ pa xwỳnhjaja kêr ka mẽ kamã axukaprĩ ho ri apa nê mẽ kamã agryk tokyx anhỹr kêt nê. Xatã mẽ kãm Tirtũm kapêr jarênh rãhã ho ri mẽ hkôt apa. Nom kwa mẽ okora kêr ka mẽ kot amnhĩ nhĩpêx o amnhĩ nhĩpêx o ri apa hkêt nê. Kwarĩ ho kwarĩ.

Jutre kot Tirtũm mã mex o mex ã harênh

Wam Pêtre 1.5-7

²⁴ Nê kêr pu mẽ Tirtũm mã amnhĩ jarênh kaxyw nê ã kãm amnhĩ jarênh anê nê kãm:

—Pa Tirtũm. Nã ãm hãmri na ka hte amnhĩ kôt mẽ ixunhwỳr tỳx nê pa mẽ akaga hkêt nê akôt amnhĩ nhĩpêx rãhã ho ri ixpa. Kot kaj nhỹrmã amnhĩ wỳr mẽ ixto api pa mẽ Akra mẽ war akuri axte tanhmã amnhĩ tomnuj to hkêt nê. Nê amnhĩ to mex pê anhĩrã htỳx rax kãm ixpa. Jao ixkĩnh tỳx nê ixpa ho ixpa.

25 —Apê mẽ inhõ Tĩrtũm ã apyxi mex kumrẽx na ka. Na ka pre Pahihti Jejus Kris kukwak ri mẽ ixpiitã mẽ ixte amnhĩ tomnuj pê mẽ ixpytã. Nẽ na ka hte anhĩrã htỳx rax rãhã ri apa. Nẽ amex o amex nẽ axihtỳx o axihtỳx nẽ axàhpumunh o axàhpumunh. Nẽ apê mẽ inhõ Pahi Maati hã apyxi mex na ka. Amnepê mã kormã mẽmoj kêt ri ka pre ã amnhĩ nhĩpêx anhỹr o apa rãhã nẽ. Tã arĩ ã ate amnhĩ nhĩpêx anhỹr ho apa ho rãhãã. Nẽ kot kaj apkati mẽ ã ate amnhĩ nhĩpêx anhỹr ho rãhãã. ã ate amnhĩ nhĩpêx anhỹr o apa ho rãhã ho rãhã. Tã ãm ja pix na hapêx. Anẽ.

E kêr pu mẽ ã Tĩrtũm mã mex o mex ã harẽnh anhỹr o papa.

Ãm ja pix. Ixpê Jutre na pa mẽ awỳr kagàja nhĩpêx nẽ kumẽ.

Apokarip

Juãw kot Jejus nhÿ hã mēmoj kukamã harēnh

Juãw na pre mē pamã kagaja nhÿpêx. Juãw Paxis kêt axtem Jejus nhÿ hã hkrajê jahkre ho mē pa xwÿnhjê hô pê Juãw na pre hipêx. Na pre Jejus ã mē kãm hkurê xwÿnhjaja unê nê ma gô hipôk pê Patos wÿr kumê nhÿm kêp près nê gô hipôk kãm pa ho pa nê aa kurÿm kator kêt rãhã ty.

Jakamã kormã htÿr ri nhÿm Tÿrtÿm kapêr o wrÿk xwÿnhjê hô gô hipôkja wÿr wrÿ nê kãm mēmoj kukamã awjarê nhÿm kuma nê hkôt mēmoj pumu. Te hpintir kãm mēmoj pumunh pyrãk. Hãmri nê omu nê kuma nê amnhÿ xô ri mē pamã hã kagã. Na pre mēmoj to axkrunêpxi nê hã kagã. Mē kot Jejus kutã amnhÿ xunhwÿr xwÿnhjaja kot Jejus ã tanhmã kêp hkwÿjê to ho pa nhÿm mē hkwÿjaja pikaprãr ã kagã. Nê Jejus kêp Pahi Maati hã kot nhÿrmã mē kot Tÿrtÿm kutã amnhÿ xunhwÿr xwÿnh piitã ma mē kot amnhÿ xã htÿx kamã hamak tÿm xã hwÿr mē rēnh par ã kagã. Nê Tÿrtÿm kot nhÿrmã hkrajê ho mex kumrêx ã nhÿm mããnēn hã kagã. Hãmri nê mē pamã hã kagã o:

1-2 E kot paj mē amã awjarê nê hã kagã. Ixpê Juãw ixte Tÿrtÿm mã tanhmã amnhÿ anhÿpêx to ho ixpa xwÿnh kot paj mēmoj jarê nê hã kagã. Na pre Tÿrtÿmja Jejus mã mēmoj kukamã tanhmã ujarēnh to ho ra kãm ho amnhÿrit pa. Kot amnhÿ xô ri mē pahte hkôt amnhÿ xunhwÿr xwÿnhjê mã harēnh kaxyw. Hãmri nhÿm kuma nê kot amnhÿ xô ri inhmã ujarēnh kaxyw man ixwÿr kapêr o wrÿk xwÿnh mē nhÿm man ixwÿr wrÿ nê ô ri inhmã mēmoj to amnhÿrit pa. ãm hãmri ã inhmã mēmoj to amnhÿrit anê. Tã kot paj amnhÿ xwar mē apê Jejus kôt ri mē apa xwÿnhjê mã harê nê hã kagã. Mē ate mar nê axkãm ajamak rom nê ri apa kaxyw. Nã ixte hã kagã mã xwÿnhja koja tanhmã amnhÿ to nê tokyx mē pahwÿr wrÿ. ³ Jakamã kwa kêr ka mē aprÿ hã kagãja kamã harê nê ama nê hkôt pix mã amnhÿ nhÿpêx nê mē piitã mē kãm kamã harēnh o ri mē hkôt apa. Kot kaj mē ã amnhÿ nhÿpêx anê nhÿm Tÿrtÿm ja hã mē ato mex ka mē akÿnh nê apa ho apa. Nê mē kot mē axujarēnh mar nê hkôt amnhÿ nhÿpêx xwÿnhjaja koja Tÿrtÿm ja hã mē omu nê mē ho mex nê nhÿm mē apyrã nê hkÿnh nê pa ho pa.

Juãw kot krÿ pê 7 kôt Jejus kwÿjê hwÿr kagã rēnh

4 E ixpê Juãw kot paj atar pika pê As kamã krÿ pê 7 piitã hkôt mē apê Jejus kwÿ hã axpēn wÿr mē apikuprōnh xwÿnhjê hwÿr kagã nê kurê ka mē kamã harê nê ama.

Na pa hte mē ato Tÿrtÿm wÿr rãhã ho ri ixpa. Nê mē ato hwÿr o:

—Pa htē. Kwa kêr ka pika pê As kamã akrajê ho mex nê mēmoj to mē kutã anojarêr rãhã ho apa. Kê mē hamakêtkati nê àmnhÿx ri pa ho pa. Ja na inhmã hprãm. Anê.

Tÿrtÿmja rãhã ho rãhã. Amnepēm kormã mēmoj kêt ri nhÿm pre ra rãhã ho rãhã. Nê koja nhÿrmã mēmoj akupÿm hapêx par tã nhÿm Tÿrtÿm aa hapêx kêt kumrêx. Koja arÿ rãhã ho rãhã. Na hte kaxkwa kamã kot mē pahto amnhÿptãr ã hkrÿ xã kamã mē papytãr rãhã ho hkrÿ.

Nê Tÿrtÿm Karō te kot Tÿrtÿm kot mē pahto amnhÿptãr xã hã hkrÿ xã kapem kanê maati pixi kamã kwrÿt pê 7 xãm xwÿnhhta pyrãk. Na hte Tÿrtÿm nhÿhkô hã hkrÿ ho hkrÿ. Tã kê mē ato mex rãhã ho pa.

⁵ Nē Jejusja na pre hte Tirtūm kapēr o mē ahkre mex o pa nē aa hkaga hkēt nē. Tā nhūm prem axtem nē kupī. Hāmri nhūm Tirtūm akupŷm ho htīr. Jejus kumrēx ho htīr nhūm htīr o htīr. Nē kēp pika piitā hkôt pahi piitā nhō Pahihti. Kām mē pajapē htŷx jakamā na pre mē panē ty nē hkamrōja te mē panē hpikapīr pyrāk o amnhī nhīpēx. Nē htyk o mē pahte amnhī tomnuj pānhā amnhīre. Jao te mē pahte amnhī tomnuj pē mē papytār par pyrāk o mē panhīpēx. ⁶ Nē na pre mē pahpē patre nē mē piitā mē ho Hipêêxà Tirtūm wŷr o papa kaxyw mē paxunhwŷ. Nē kēp mē panhō Pahi Maati hā kām hprām xā hkôt mē pahte kām tanhmā amnhī nhīpēx to ho papa kaxyw mē paxunhwŷ. Jakamā kwa kēr pu mē kām mex o mex nē hihtŷx o hihtŷx ā mān harēnh rāhā ho papa.

⁷ Nē koja tokyx akupŷn mē pahwŷr kakrā kamā wrŷ pu mē pahpiitā wrŷk kām omu. Nhūm mē kot hpīr xwŷnhjaja tee ri amnhī wŷr omu. Nē pika piitā hkôt ri mē pa xwŷnhjaja omu nē mē kot amnhī tomnuj jakamā tee ri amnhī kukamā hamaxpēr o kām ma htŷx kumrēx. Hāmri nē kām ma xāj mur nē htertēt o kuhē. Koja nhŷrmā Jejus akupŷn wrŷ nhūm mē amnhī wŷr omu nē ā amnhī nhīpēx anē.

⁸ Nē Tirtūm na hihtŷx o hihtŷx nē àhpumunh o àhpumunh. Nē aa kot mēhō ni rūm kator kēt. Na hte amnhī jarēnh o:

—Ixrāhā ixpa xwŷnh na pa. Amnepē mā kormā mēmoj piitā hkēt ri pa pre ra ixrāhā ri ixpa ho ixpa. Nē koja nhŷrmā mēmoj akupŷm hapēx tā pa arī ixrāhā. Anē.

Juāw kot Jejus akupŷm htīr ā omunh

⁹ Nē ixpē Jejus kôt mē atō Juāw na pa hte mē apyrā nē Jejus kôt amnhī nhīpēx nhūm hte mē kām Jejus kurē xwŷnhjaja mē apyrā nē hā inhīpēx kati ho pa. Mē pahte hkôt ri amnhī nhīpēx o papa jakamā na htem hā mē pahomnuj tŷx rāhā ho pa. Tā pu htem ŷ hā mē kutā amnhī to htŷx nē arī hkôt amnhī nhīpēx. Jakamā na pa pre Tirtūm kapēr o mē ajahkre rāhā ho ri mē akôt ixpa. Nē Jejus kēp mē panhō Pahihti hā mē amā harē. Mŷrapē na prem hā ixpynē nē man amnē ixto tē nē jar gō hipōk pē Patos kām inhmē pa kamā ixpē prés nē ixpa ho ixpa.

¹⁰ Tā nhūm tōmīk pa Tirtūm mā amnhī jarēnh o nhŷ. Hāmri nhūm Karō tanhmā ixkrā hto pa te ixpimtir kām mēmoj pumunh pyrā nē amnhī katut kôt mēhō kapēr ma. Te kot pifti kakōr tŷx pyrāk pa kuma. ¹¹ Hāmri nhūm inhmā kapēr nē inhmā:

—Pa Juāw? E kot paj amā mēmoj to amnhīrīt ka omu nē akwŷjē mā hā kagā. Nē hā kagā hpa hāmri nē ahpŷnhā krī hkwy hkôt mē kēp ixkwŷ hā axpēn wŷr mē pikuprōnh xwŷnhjē hwŷr arē. Mē kot kamā harēnh nē mar nē axkām hamak rom nē ri pa kaxyw. Epes wŷr nē Emīnā hwŷr nē Pekamō hwŷr nē Xijaxir wŷr nē Satre hwŷr nē Pirate hwŷr nē Raxisej wŷr. Krī pē 7ja piitā hwŷr ixkapēr ā kagā nē mē hwŷr arē kē mē apyrā nē mēmoj jarēnhja ma. Anē.

¹² Hāmri pa ixte mēhōja pumunh kaxyw ho ijakēx nē kanē hkwy pumu. Kanē kēp 7 nē piitā ōr o.

¹³ Nē kanē nhīpōk ri mēhōja te panhī pyrā nē pahi hā ē mex kām xa. ēja hpar kōn kōt hitep nhūm xa. Nē pahi hā mē hinō hpre xā ho amnhī nhīnō hpre nē xa. Hinō pre xāja ōr pix o. ¹⁴ Nē hkrā hkī te kaxāt nhī jaka pyrā nē hakaajre. Nē no te kuwy hpōk pyrā nē hkarŷr tŷx nē. ¹⁵ Nē hpar te mēmo kàx karŷr tŷx pyrāk. Nē kapēr te gō hprōt tŷx koko pyrāk. ¹⁶ Na pre upōk rūm kanhēti ho 7 nē hamŷ nē o xa. Nē hakwa rūm wapo pōm kato nē akutā wa gixre nē ajēt.

Nē hkuk kamā hirā htỳx kumrēx. Te myt kot mē pano hā harir nhūm gēk tỳx pyrāk. Ā mēhōja kot anhỳr.

¹⁷ Pa tee ri tanhmā kute hā omu nē inhmā ma htỳx kumrēx nē umaj tēm nē hpar pē te ixyk pyrā nē nō. Hāmri nhūm ixtā upōk rūm ĩhkraja xi nē inhmā kapēr nē inhmā:

—Kwa amā ixpuma hkēt nē. Pa na pa. Amnepē mā kormā mēmoj kator kēt ri pa pre raa. Nē ixrāhāā. Koja nhỹrmā mēmoj akupỹm hapēx pa arī ixrāhā xpa ho xpa.

¹⁸ —Na pa pre ty tā akupỹm ixtĩr. Nē ixtĩr o ixtĩr. Kam ixpumu. Kot paj axte ixyk kēt nē. Ixpē mēhtykjē hpām jakamā papxipix na pa hte mē htỳk ā arĩgro jarē nhūm mē hā ty nē ma mēhtykjē papxā hwỳr ma pa.

¹⁹ —E kēr ka ate mēmoj pumunh xwỳnhta pumunh tỳx nē akwỳjē mā hā kagā. Nē mēmoj kormā kot amnhĩ nhĩpēx kēt nhūm ate omunh mā xwỳnhta ka inhỹ hā mē kām hā kagā. Mē kot kamā harēnh nē mar tỳx kaxyw.

²⁰ —Nē kot paj axte ixprī hā ate mēmoj pumunh xwỳnhta jarē ka inhma. Nā kanē pē 7ta te mē kot krī hkwy pē 7 kamā mē kēp ixkwỳ hā axpēn wỳr mē pikuprōnh xwỳnhjē pyrāk. Nē inhĩkra kamā kanhēti pē 7ta te kēp inhmā mē kot mē hamār xwỳnhjē pyrāk. Anē.

2

Epes kamā Jejus kwỳjē hwỳr kagā

¹ Nhūm Jejus arī inhmā kapēr nē inhmā:

—E kēr ka krī pē Epes kamā ixkwỳjē jamār xwỳnh wỳr kagā nē amē. Nē kagāja kamā mē kām ixkapēr jarē nē mē kām:

Pa Epes kamā ixkapēr mar kaxyw axpēn wỳr apikuprōnh xwỳnhjaja. Ot pa mē awỳr ixpēr mē. Ixpē ixupōk o kanhēti ho 7 nē hamỳnh nē ho ixām xwỳnhta na pa. Nē ixpē ôr o kanē pē 7 nhĩpōk ri ixpa xwỳnhta na pa ā mē awỳr ixpēr mēnh anē.

² Na pa hte tanhmā mē ate amnhĩ nhĩpēx to ho apa hā mē apumunh mex o xpa. Na ka htem inhmā amnhĩ nhĩpēx mex nē pa ja hā mē apumu. Mē kot ixtā mē anhĩpēx kati htā ka mē kutā amnhĩ to htỳx nē ixkaga hkēt nē. Nē mē kot amnhĩ tomnuj xwỳnhjē hkōt amnhĩ nhĩpēx o ri apa hkēt nē. Nhūm ixte mē awỳr mē rēnh ā amnhĩ to hēx xwỳnhjaja mē awỳr pan pōj ka mē aprī hā mē kot amnhĩ to hēx ā mē omu. Hāmri nē tee ri mē kot amnhĩ nhĩpēx ā mē omu nē amnhĩ nē mē hanor kurē kumrēx. Ām hāmri na ka htem ā mē hipēx anē.

³ Nē mē kām ixkurē xwỳnhjaja kot tanhmā ixtā mē atomnuj tỳx to htā ka mē kutā amnhĩ to htỳx nē aa ixkaga hkēt nē. Nē ixkōt amnhĩ nhĩpēx mex rāhā ho ri apa. Ām hāmri na ka htem ā amnhĩ nhĩpēx anhỹr o ri apa.

⁴ Ām mēmoj pixi na ixpē omnuj. Amnepē mā kormā mē ate ixkōt amnhĩ xunhwỳr nyw ri na ka prem amā axpēn kĩnh nē axpēn to mex o ri apa. Nē mē amā axpēn tā ma ho te mē amā amnhĩ tā ma pyrāk o axpēn nhĩpēx. Tā tanhmā ajamxpēr to nē axte ā axpēn nhĩpēx anhỹr kēt nē. Jao te mē amā ixkĩnh kēt pyrāk o amnhĩ nhĩpēx. Pa tee ri ja hā mē apumu nhūm ja inhmā mex kēt nē.

⁵ Kwa mē tokyx ja hā amnhĩ pumu nē akupỹm mē ate ixkōt amnhĩ xunhwỳr nyw ri mē ate axpēn nhĩpēxta o akupỹm axpēn nhĩpēx o apa. Kot kaj mē anhỹr kēt kot paj te mē apē mē anhō kanē hpyr nē kapōt ā mēnh

pyrək o mē anhīpêx ka mē ri apa nē gaa nē apikaprār pa. Tā mēhō koja mē amyr pē mē anhō krī kamā mē kām ijarēnh o pa?

⁶ Nē mē kēp Nikoraw nhō xwýnhjaja na ka htem mē kot tanhmā amnhī tomnuj to hā mē omu nē ixpyrā nē apē ja hprām nōkati nē mē hkôt ri amnhī nhīpêx kêt nē. Pa ja hā mē apumu nē ixkīnh nē.

⁷ Tā ixte mē amā ixkapēr jatür xà na ja. Kot kaj mē amā ixkapēr mar prām hā kot kaj mē ā Tirtūm mē wa Ixkarō nhý hā ixte mē amā ixkapēr anhýrja ma nē kām ajamexpēr tỳx rāhā ho ri apa.

Tirtūm nhō krī kamā mēmo pí hpār kuhê xwýnh. Mē kot ô hkur nē axte htyk kêt nē pa ho pa mā xwýnhta. Kot kaj mē ate amnhī tomnuj nē amnhī to htỳx nē arī inhmā hprām xà hkôt amnhī nhīpêx rāhā ty pa akupým mē ato mē atūr nē ma pí hpārta wýr mē arē. Ka mē ma hwýr mra nē ô hō hta nē akrē nē axte atyk kêt kumrêx nē apa ho apa.

E ām ja pix na hapêx. Anē.

—E Juāw. Kér ka Epes kamā ixkwýjê jamār o pa xwýnhta wýr ā ixkapēr ā kagā anē nē mē hwýr amē. Anē.

Hāmri pa kuma nē ô ri mē kām hā kagā hpa.

Emīnā kamā Jejus kwýjê hwýr kagā

⁸ Hāmri nhūm hpānhā Emīnā nhō xwýnhjê kaxyw inhmā kapēr nē inhmā:

—Nē hpānhā Emīnā kamā ixkwýjê jamār xwýnh wýr kagā nē mē hwýr amē. Nē mē kām ixkapēr jarē nē nē mē kām:

Pa Emīnā kamā ixkapēr mar kaxyw expēn wýr mē apikuprōnh xwýnhjaja. Ot pa mē awýr ixpēr mē. Ixrāhā ho ixrāhā ixpa xwýnhta na pa. Amnepēm kormā mēmoj piitā hkêt ri na pa pre ixrāhā nē ri ixpa. Koja nhýrmā mēmoj akupým hapêx pa arī ixrāhā ho ixrāhā nē ri ixpa. Na pa pre ty no ām akupým ixtūr o ixtūr. Tā pa ā mē awýr ixpēr mēnh anē.

⁹ Nā na pa hte mē ate tanhmā amnhī nhīpêx to ho apa hā mē apumunh rāhā ho ixpa. Na hte mē kām ixkurê xwýnhjaja ixtā mē atomnuj to ka mē apē amrakati nē ri apa. Nom mē ate tām amnhī nhīpêx jakamā te mē apē mē hikukrêx rūnh kumrêx xwýnhjê kot amnhī nhīpêx pyrā nē ixkukwak ri akīnh rāhā ri apa. Na hte mē kēp Ijaew ā amnhī to hêx xwýnhjaja mē ato kapēr punuj rūnh o pa. Mē kot Tirtūm kôt amnhī nhīpêx ā amnhī jarēnh tā no ām hkôt amnhī nhīpêx kêt nē. Ām Satanasti kôt pix mā na htem amnhī nhīpêx o pa.

¹⁰ Tā mē kām ixkurê xwýnhjaja kot ixtā mē atomnuj tỳx o pa htā kēr ka mē amnhī tā mē omu nē tee ri amnhī kukamā ajamexpēr kêt nē. Nē arī mē kutā amnhī to htỳx nē. Koja Satanasti mē akwýjê pynē nē mē ajagjê. Hāmri nē mē ate ixkaga hprām xāj tanhmā mē anhīpêx kati hto ka mē hagjēnh xà kamā amnhī xà htỳx kamā ajamak o atā arīgro pē 10. Nom kēr ka mē kutā amnhī to htỳx nē ixkaga hkêt nē. Mē kot mē apar mā tā ka mē kutā amnhī to htỳx nē. Kot kaj mē aa ixkaga hkêt nē ixkôt ri amnhī nhīpêx rāhā ty pa akupým mē ato mē atūr nē ma amnhī wýr mē ato api. Hāmri ka mē Tirtūm mē wa ixri amex nē atūr tūm nē apa ho apa nē axte atyk kêt nē apa.

¹¹ E ixkrajaja. Kot kaj mē amā ixkapēr mar prām hā kot kaj mē ā Tirtūm mē wa Ixkarō nhý hā ixte mē amā ixkapērja anhýr ma nē kām ajamexpēr tỳx rāhā ho ri apa. Kot kaj mē ate amnhī tomnuj nē amnhī to htỳx nē inhmā hprām xà hkôt pix mā amnhī nhīpêx rāhā ty. Hā kot paj akupým mē ato mē atūr ka mē ma kuwyta wýr apa hkêt nē.

E. Ām ja pix. Na hapêx. Anê.

—E Juāw. Kêr ka Emīnā kamā ā ixkrajê mā ixkapêr ā kaga anê. Anê.
Hāmri pa kuma nê ô ri mē kām hā kagà.

Pekamō kamā Jejus kwýjê hwýr kagà

Sikūn Korīt 6.14–7.1

¹² Nhūm Jejus arī inhmā kapêr nê hpānhā inhmā:

—E hpānhā Pekamō kamā ixkrajê jamār o pa xwýnhja wýr kagà nê mē hwýr amê. Nê mē kām ixkapêr jarê nê mē kām:

Pa Pekamō kamā ixkapêr mar kaxyw axpên wýr mē apikuprōnh xwýnhjaja. Ot pa mē awýr ixpêr mē. Ixpê ijakwa rŭm pōm wapo akutā wa gix nê kator nê ām xwýnhhta na pa mē awýr ixpêr mē.

¹³ Na pa hte mē anhō krī nhō xwýnhjaja kot tanhmā amnhī tomnuj to ho pa hā mē omunh mex nê. Mē kot Satanasti kôt pix mā ri amnhī nhīpêx o pa jakamā mē anhō krī te kêp Satanasti nhō krī pyrāk. Āxipas kot mē hkôt mē kām ixkapêr o mē ahkre ho pa nê aa hkaga hkêt tā nhūm prem axtem nê ixtā kupī. Ka mē ja hā mē omunh tā mē umaj ixkaga hkêt nê arī ixkôt amnhī nhīpêx rāhā ho ri apa. Ām hāmri na ka htem ā amnhī nhīpêx anê.

¹⁴ Mēmoj pixi na ixpê omnuj. Na hte mē akwýjaja axtem nê Paraāw kapêr kôt amnhī nhīpêx o pa. Na pre Paraāwja Parak mā tanhmā kapêr to ho pa. Nom ixkapêr kôt kêt ixkapêr kuhpa hā tanhmā mē kām kapêr to nê mē kām: “Mē māmri ma sānti hā mē hkīnh mā xwýnhjê hkôt mra nê sānti hā apku nê hā akīnh. Nê mē urāk nê axpên pē axpên prō ho amnhīkati nê axpên pē ri axpên mjên o amnhīkati nê mē ā ri amnhī nhīpêx anhýr o ri apa. Ja mex kēnā.” Anhýr o mē anhīgêt mā kapêr o pa nhūm mē kuma nê mē hkôt amnhī nhīpêx. Tā ka mē akwýjaja mē urāk nê ā amnhī nhīpêx anhýr o apa. Kwa ja mex kêt.

¹⁵ Na hte mē akwýjaja Nikorawjê kapêr kôt ixkapêr kuhpa hā tanhmā amnhī nhīpêx to ho pa. Ja māānēn mex kêt. ¹⁶ Tā ra mē akwýjaja ā amnhī tomnuj anhýr o pa ka mē ja hā mē omu nê ām mē omu nê né tanhmā mē kām akapêr to hkêt nê. Kwa mē ate ā amnhī nhīpêx anhýr xwýnhjaja. Kêr ka mē tokyx ja kaga nê akupým ixkôt ri amnhī nhīpêx mex nê. Kot kaj mē anhýr kêt kot paj tokyx mē awýr wrý nê te ijakwa rŭm pōm wapo kator xwýnhhta o mē hkanhwýr pyrāk o mē anhīpêx. Nom ixkapêr xihýt看 pix o tanhmā mē anhīpêx to.

¹⁷ E kot kaj mē amā ixkapêr mar prām hā kot kaj mē ā Tirtūm mē wa Ixkarō nhý hā ixte mē amā ixkapêr anhýrja ma nê kām ajamaxpêr týx rāhā ho ri apa.

Nê kot kaj mē ate amnhī tomnuj nê amnhī to htýx nê inhmā hprām xà hkôt amnhī nhīpêx rāhā ty. Hā kot paj akupým mē ato mē atūr hāmri nê ra pam mē amā mē anhō ka mē hkur o apa. Te amnepēm Ijaew kapôt ā pa nhūm ixte mē hwýr “manā” anhýr xwýnhhta rēnh nhūm mē kot hkur o pata pyrāk. Nom ixte mē amā mē anhōja na hpimxur. Ām papxipix na pa hte mē kām ôr o ipxa.

Nê kot paj mē atā mē anhīxi nyw rē. Jao kēn jakare hkwy hā ahpýnhā mē anhīxi nyw jaxwy nê mē amā kugō. Ka mē hamý nê kapxipix amnhī nhīxi nyw pumunh o apa.

E ām ja pix. Na hapêx. Anê.

—E Juāw. Kêr ka Pekamō kamā ixkrajê hwÿr ã ixkapêr anhÿr ã kaga nê mê hwÿr amê. Anê.

Hāmri pa kuma nê ô ri mê kām hā kaga.

Xijaxir kamā Jejus kwÿjê hwÿr kaga
Jutre 3-23

¹⁸ Nhūm Jejus arī inhmā kapêr nê inhmā:

—E hpānhā Xijaxir kamā ixkwÿjê jamār xwÿnh wÿr kaga nê amê nê mê kām ixkapêr jarê nê mê kām:

Pa Xijaxir kamā ixkapêr mar kaxyw mê apikuprōnh xwÿnhjaja. E ot pa mê awÿr ixpêr mê. Ixpê Tirtūm Kra na pa. Ixpê inhno te kot kuwy hpōk karÿr tÿx pyrāk xwÿnhnta na pa. Nê ixpê ixpar te kot kàx karÿr tÿx pyrāk xwÿnhnta na pa mê awÿr ixpêr mê.

¹⁹ Na pa hte mê ate amnhī nhīpêx kôt mê apumunh mex o ri ixpa. Na ka htem amnhī kaxyw inhmā ajamexpêr pê inhmā amnhī to mex o ri apa. Mê akwÿ kot ixtā tanhmā mê anhīpêx to htā ka mê umaj aa ixkaga hkêt nê. Nê arī amā ixkīnh tÿx kām tanhmā amnhī nhīpêx to ho ri apa. Nê axpên to mex nê ixkôt pix mā amnhī nhīpêx o ri apa. Jao ra ixkôt amnhī nhīpêx mex o wam mê ate ixkôt amnhī nhīpêxta jakre. Nā ja inhmā mex kumrêx.

²⁰ ām mēmoj pixi na ixpê omnuj. Mê akôt niti ri pa xwÿnh Jejawewtita. Kêp Tirtūm nhÿ hā kapêr jarênh o pa xwÿnh ã amnhī to hêx xwÿnhnta. Na hte ixkapêr kupa hā tanhmā mê ajahkre hto ka htem ama nê nê tanhmā kām nê hkêt nê. Na hte mê amā: “Xê mê māmrī ri mê hkuprÿjê hwÿr mra nê mê ho amnhīkati. Nê axpên pê mê aprō nê mê amjên o amnhīkati. Nê mê kot sânti hā mê hkīnh nê hā apkur xwÿnhjê hkôt mra nê mê hkôt amnhī nhīpêx. Tirtūm kām ja mex kēnā.” Anhÿr o mê amā kapêr o pa. Nê inhmā ja mex ā ijarê nom inhmā ja mex kêt. Tā ra mê akwÿjaja kapêr ma nê hkôt amnhī nhīpêx ka mê ja hā mê omunh tā amnhī nê nitita janor kêt nê nhūm arī ri mê amā hêx o ri mê akôt pa. ²¹ Ra kot ã amnhī nhīpêx anhÿr o mê akôt pa ry rax kumrêx tā pa kormā ja hā tanhmā ho hkêt nê kormā amnhī tā hamā. Kot ã amnhī nhīpêx anhÿr kaga kaxyw na pa kormā hamār o ri ixpa. No nhūm aa hkaga hkêt nê.

²² Mÿrapê kot paj tokyx tanhmā ho nhūm amnhī xā htÿx kamā hamak o hikwÿ. Tā mê kot kapêr mar nê hkôt amnhī nhīpêx xwÿnhjaja kot amnhī tomnuj ā amnhī pumu nê hkaga hkêt hā kot paj mā mê ho anê nê. Māānēn tanhmā mê homnuj to nhūm mê nitita pyrā nê amnhī xā htÿx kamā hamak o hikwÿ.

²³ Nê nitita kot paj kêp hkrajê nhīmex pa. Ka mê apê ixkrajaja ja hā ixpumu nê ixte mê apiitā ahpÿnhā tanhmā mê ajamexpêr to hkôt mê apumunh ā ixpumu. Nê ixte ahpÿnhā mê apiitā tanhmā mê ate amnhī nhīpêx to ho apa hā mê apumunh xā hkôt tanhmā mê anhīpêx to hā ixpumu.

²⁴ Na hte mê akwÿjaja akwÿjê rom nita kapêr ma nê ām kuma nê hkôt amnhī nhīpêx kêt nê. Nê mê kapêrja mê kot kām: “Satanasti kapêr pimxur” anhÿr xwÿnhnta kôt nhūm mê amnhī nhīpêx kêt nê. Na htem ixkôt pix mā amnhī nhīpêx mex o ri pa. Tā ã mê ate ixkôt amnhī nhīpêx anhÿr o apa xwÿnhjaja kot paj mê amā ja pix ã karō ka mê inhma. ²⁵ Kêr ka mê arī ixkôt pix mā amnhī nhīpêx o ri apa rāhā pa akupÿn mê awÿr wrÿ. Ām ja pix ã kot paj mê amā karō.

²⁶ Nē kot kaj mē ate amnhī tomnuj nē amnhī to ht̄y_x nē arī inhmā hprām xà hkôt amnhī nhīpêx rāhā ty. Hāmri pa ja hā mē apumu nē nh̄ymā mē ate krī hkwȳ hkôt mē pa xw̄ynh̄jē ho amnhīptār o apa kaxyw mē axunhw̄y. Ka mē apē mē ō pahihiti nē inhmā mē ho amnhīptār o ri apa.

²⁷ Na pre Inhīpêxā ixte pika piitā hkôt ri mē pa xw̄ynh̄jē ho amnhīptār kaxyw ixām.

Tā kot paj nh̄ymā amnhī pyrā nē mē kaxyw mē axunhw̄y ka mē inhmā mē hamār o apa.

Nhūm mēhō ixkapēr kw̄ym ri tanhmā amnhī nhīpêx to ka mē ja hā omu nē hā tanhmā ho. Te mē kot poti punuj m̄ynh nē mēnh nē hkrakrak pyrāk.

²⁸ Kot paj ā mē ate mē hipêx anh̄yr o apa kaxyw mē axunhw̄y. No ām ja pix kêt. Kot paj te ixte mē amā kanhēti hō nh̄ō pyrāk o mē anhīpêx. Arīgro hkôt kanhēti no hp̄ok rax japōx xw̄ynhta kot paj te ixte mē amā ōr pyrāk ka mē ixri at̄r tūm nē apa ho apa.

²⁹ E ixkrajaja. Kot kaj mē amā ixkapēr mar prām hā kot kaj mē ā Tirtūm mē wa Ixkarō nh̄y hā ixte mē amā ixkapēr anh̄yrja ma nē kām ajamaxpēr t̄yx rāhā ho ri apa. Anē.

—E Juāw. Kēr ka ā Xijaxir kamā ixkrajē kaxyw ixkapēr ā kagā nē mē hw̄yr mēnh anē. Anē.

Hāmri pa kuma nē ō ri mē kām hipêx nē mē hw̄yr kumē.

3

Satre kamā Jejus kw̄yjē hw̄yr kagā

Rukre 12.35-40

¹ Nhūm Jejus arī inhmā kapēr nē inhmā:

—E hpānhā Satre kamā ixkw̄yjē jamār xw̄ynh w̄yr kagā nē mē kām ixkapēr jarē nē mē kām:

Pa Satre kamā ixkrajaja. E ot pa mē aw̄yr ixpēr mē. Ixpē inhīhkra ho kanhēti pē 7 jam̄ynh nē xām xw̄ynhta na pa. Nē ixpē inhīhkra ho Tirtūm Karō ām pyxi htā te kamā kēp 7 jam̄ynh nē ho ixām xw̄ynhta na pa mē amā ixkapēr.

Na pa hte mē ate tanhmā ri amnhī nhīpêx to hā mē apumunh rāhā ho ipa. Mē piitā kot axpēn mā mē ate ixkôt amnhī nhīpêx ā mē ajarēnh tā ā mē ate amnhī nhīpêx anh̄yr kêt. Na ka htem ixkuhpa hā pix mā amnhī nhīpêx o apa. Jakamā te inhmā ra mē atyk nē mē anhīkw̄y pyrāk.

² Na ka htem ām akrānh mā ixkôt ri amnhī nhīpêx nom Tirtūm mē wa ixkôt amnhī nhīpêx mex kêt nē. Ra Tirtūm mē wa ixte ja hā mē apumunh mex. Mē ate kormā wa inhnoo mā tām ri amnhī nhīpêx kêt jakamā kwa mē tokyx ja hā amnhī pumu nē ate amnhī tomnuj mā anhūre nē wa ixkôt amnhī xunhw̄yr t̄yx nē.

³ Kēr ka mē amnepē mā kormā mē ate ixkôt amnhī nhīpêx nyw ri mē kot ixkapēr o tanhmā mē ajahkre htoja mā ajamaxpēr nē amnhī tomnuj mā anhūre. Nē ixkapēr kôt pix mā mān amnhī nhīpêx o ri apa. Kot kaj mē anh̄yr kêt kot paj nh̄ymā mē ajaēr pē akup̄yn mē aw̄yr wr̄y nē ja hā tanhmā mē ato.

⁴ ām mē agrēre nē amā ixkôt amnhī nhīpêx prām. Jao tām ri amnhī nhīpêx nē mē kot amnhī tomnuj xw̄ynh̄jē hkôt amnhī nhīpêx kêt nē. Te mē axē jakare kamā apa nē tanhmā amnhī pē htyk to hkêt pyrāk. Tā kot kaj mē nh̄ymā ixri mē axē jakare kamā apa ho apa. Ra mē ate ja ho anh̄yr mā tām kēnā. Ja na Tirtūm kām hprām.

⁵ Nē krī piitā hkôt mē ate amnhī tomnuj nē amnhī to ht̄yx nē inhmā hprām xà hkôt amnhī nhīpêx rāhā atyk xw̄ynh piitā kot ka mē nh̄yrmā Tirtūm mē wa ixri amex nē at̄ir tūm nē apa ho apa. Ra mē hixija Mēpahpām Maati nhō kagā kamā na. Kamā mē at̄ir o mē at̄ir mā xw̄ynhjē nh̄ixi piitā hā kagā. Kot paj kagāta kamā aa mē anh̄ixi grānh kêt nē. Hāmri nē Inhīpêxā mē kapēr o mē wr̄yk xw̄ynhjē mā mē ajarēn o: “E mē jajē pumu. Ixkw̄y na mē.” Anh̄y r o mē kām mē ajarē.

⁶ E ixkw̄yjaja. Kot kaj mē amā ixkapēr mar prām hā kot kaj mē ā Tirtūm mē wa Ixkarō nh̄y hā ixte mē amā ixkapēr anh̄y rja ma nē kām ajamexpēr t̄yx rāhā ho ri apa.

Tā ām ja pix. Na hapêx. Anē.

—E Juāw. Kēr ka ā Satrejē mā ixkapēr ā kagā nē mē hw̄y r mēnh anē. Anē. Hāmri pa kuma nē ô ri mē kām hā kagā.

*Pirate kamā Jesus kw̄yjē hw̄y r kagā
Wam Tesarōn 2.13-16*

⁷ Nhūm Jesus arī inhmā kapēr nē inhmā:

—E hpānhā Pirate kamā ixkw̄yjē jamār xw̄ynh hw̄y r kagā nhīpêx nē amē nē mē kām ixkapēr jarē nē mē kām kām:

Pa Pirate kamā mē ate ixkapēr mar kaxyw mē apikuprōnh xw̄ynhjaja. E ot pa mē aw̄y r ixpēr mē. Inhmex o inhmex xw̄ynh na pa. Aa ixêx kêt nē ixpa xw̄ynh. Amnepē mā na pre mēhōja pahi Tawī mā ôrkw̄y mex ā saf jamār o pa. Tā pa hte urāk nē Inhīpêxā Tirtūm nhō krī hw̄y r mē gjêx xà hā saf jamy nē ho ixpa. Ām papxipix inhō saf jakamā papxipix na pa hte mē ate ixkôt amnhī xunhw̄y r xw̄ynhjaja mē agjêx kaxyw mē amā kahê xà rē nē ixkra hkêt xw̄ynhjē pē kahê. Kot paj mē apē ixkrajē mā kahê xà rē ka mē hw̄y r agjē. Hāmri pa mē atā kahê nhūm ixkra hkêt xw̄ynhjaja tee ri kām mē akôt gjêx prām kapr̄y.

⁸ Na pa hte tanhmā mē ate amnhī nhīpêx to ho apa hā mē apumunh mex o ri ixpa. Mē agrêre htā na ka htem ixkapēr kôt amnhī nhīpêx mex nē aa ixkagā hkêt nē. Jakamā kot paj te ixte mē amā Tirtūm nhō hakwakre kahê xà mēnh pyrāk o mē anhīpêx ka mē axāmnh̄ix ajamakêtkati nē ma mē kām Tirtūm kapēr o mē ahkre ho ri mē hkôt apa. Nhūm mē hkwȳjaja tee ri ā mē ate amnhī nhīpêx anh̄y rja nē mē amā kapēr kapr̄y ka mē arī ho mē ahkre ho ri mē hkôt apa.

⁹ Nē mē anhō krī kamā mē akwȳjaja na prem ra Satanasti hkôt amnhī xunhw̄y nē hêx rom mē amā amnhī to hêx nē mē amā: “E mē ixpē Ijaew mex jakamā kwa mē ixkapēr ma nē mē ixkôt amnhī nhīpêx.” Anh̄y r o mē amā karō htā no ām mē kot Satanasti hkôt amnhī nhīpêx xw̄ynh na mē. Tā kot paj nh̄yrmā tanhmā mē homnuj to nhūm mē tee ri amnhī pumu nē akup̄ym mē aw̄y r mra nē mē akutā hkōnkrā ho rôrōk nē hkrī nē mē amā: “Nā mē kajaja na ka pēr mē ixrom Jesus kôt amnhī nhīpêx. Mān kām mē ajapêē.” Anē.

¹⁰ Mē kot ixtā mē atomnuj t̄yx nhūm mē ate amnhī xà ht̄yx kamā ajamak tā aa mē umaj ixkaga hkêt nē. Nē arī ixte mē amā mēmoj tā karō xà hkôt mē kutā amnhī to ht̄yx rāhā arī ixkôt ri amnhī nhīpêx o apa. Jakamā mē kot nh̄yrmā mē kām ixkurē xw̄ynhjaja pika piitā hkôt tanhmā mē homnuj t̄yx to nhūm mē amnhī xà ht̄yx kamā ama. Tā kot paj mē anē mē omunh mex nē nhūm mē tanhmā mē ato hkêt nē ka mē amex nē ri apa ho apa.

¹¹ E kot paj tokyx akupÿn mẽ awÿr wrÿ nẽ mẽ ate ixkõt pix mã amnhĩ nhĩpêx ã mẽ ato mex rax kumrêx. Jakamã kwa mẽ mãmrĩ ã amnhĩ nhĩpêx anhÿr o inhmã hprãm xà hkõt pix mã amnhĩ nhĩpêx rãhã ty. Kot ka mẽ anhÿr kêt kot pa mẽ amã mẽmoj mex nhõr kêt nẽ.

¹² Nẽ kot kaj mẽ kot amnhĩ tomnuj xwÿnhjê kutã amnhĩ to htÿx nẽ inhmã hprãm xà hkõt pix mã amnhĩ nhĩpêx rãhã ty. Hã kot paj amnhĩ kõt mẽ ato mẽ axihtÿx nẽ ka mẽ aa ixkaga hkêt nẽ. Nẽ kot paj nhÿhÿnh mẽ atã mẽ inhĩxi ho axkrunêpxi nẽ haxwÿ. Inhĩpêêxã nhĩxi nẽ inhĩxi nyw nẽ Inhĩpêêxã nhõ krĩ nhĩxija kot paj nhÿhÿnh mẽ atã haxwÿ. Tĩrtũm nhõ krĩ mẽ kot kãm: “Jerujarê nyw” anhÿr xwÿnhhta koja nhÿrmã tanhmã amnhĩ to nẽ ra kaxkwa rũm pika wÿr wrÿ.

¹³ E ixkwÿjaja. Kot kaj mẽ amã ixkapêr mar prãm hã kot kaj mẽ ã Tĩrtũm mẽ wa Ixkarõ nhÿ hã ixte mẽ amã ixkapêr anhÿrja ma nẽ kãm ajamaxpêr tÿx rãhã ho ri apa.

Tã ãm ja pix. Na ra hapêx. Anẽ.

—E Juãw. Kêr ka ã Pirate kamã ixkrajê mã ixkapêr ã kaga anẽ. Anẽ.

Hãmri pa kuma nẽ ô ri mẽ kãm hã kagã.

Raxisej kamã Jejus kwÿjê hwÿr kagã

¹⁴ Nhũm pre Jejus arĩ inhmã kapêr nẽ inhmã:

—E hpãnhã krĩ pê Raxisej kamã ixkrajê jamãr xwÿnh wÿr kagã nhĩpêx nẽ amẽ. Nẽ mẽ kãm ixkapêr jarênh o:

Pa Raxisej kamã ixkrajaja. Ot pa mẽ awÿr ixpêr mẽ. ãm hãmri ixkapêr o ixpa nẽ aa ixêx kêt xwÿnhhta na pa. Jakamã ãm hãmri na pa hte Tĩrtũm kapêr o mẽ ajahkre o ixpa nẽ aa ja kaga hkêt nẽ. Pa na ixpê mẽmoj piitã hpãr krax.

¹⁵⁻¹⁶ Na pa hte mẽ ate tanhmã amnhĩ nhĩpêx to ho apa hã mẽ apumunh rãhã ho ixpa. Kop apu mẽ ate ixkõt amnhĩ nhĩpêx mex ronhÿx pa ja hã mẽ apumu nẽ ixkĩnh nẽ. Nom mẽ ate ã amnhĩ nhĩpêx anhÿr kêt. No mããnhẽn aa ixkaga hkêt nẽ. Na ka htem ri atÿx amnhĩ krã hkõt pix mã tanhmã amnhĩ nhĩpêx to ho apa nhũm ja ixpê omnuj nẽ. Kot kaj mẽ arĩ ã amnhĩ nhĩpêx anhÿr o apa pa hpãnhã amnhĩ nẽ mẽ akurê. Te mẽ kot gõ xenh nõkati janhir nẽ tee hkakinh nẽ akupÿm hkapĩr pyrãk.

¹⁷ Mẽ ate inhmã hprãm xà hkõt amnhĩ nhĩpêx ã amnhĩ jarênh tã ã amnhĩ nhĩpêx anhÿr kêt nẽ. Nẽ ixkapêr mar tÿx nẽ amnhĩ kaxyw inhmã ajamaxpêr mex kêt nẽ.

¹⁸ Kwa mẽ tokyx ja hã amnhĩ pumu nẽ akupÿm ixkõt amnhĩ xunhwÿr tÿx nẽ. Kêr pa ja hã mẽ apumu nẽ amnhĩ katut kõt mẽ ate amnhĩ tomnuj rê nẽ tanhmã mẽ akrã hto ka mẽ inhnoo mã tãm amnhĩ nhĩpêx mex o ri apa. Hãmri pa mẽ amã tanhmã amnhĩ to amnhĩrĩt to ka mẽ aprĩ hã ixte amnhĩ nhĩpêx ã ixpumunh mex nẽ ixkõt amnhĩ nhĩpêx mex rãhã o ri apa.

¹⁹ Xà inhmã mẽ ajapê hkêt ã na pa ã mẽ amã ixkapêr anê? Nã inhmã mẽ apiitã mẽ ajapê htÿx kênã. Nom inhmã mẽ ajapê htã ka htem ixkõt amnhĩ nhĩpêx kêt nẽ. Na pa tee ri amnhĩ tã mẽ apumu nẽ ja hã tanhmã mẽ atomnuj tÿx to. Tokyx mẽ ate amnhĩ tomnuj mã anhÿrer nẽ hpãnhã tãm amnhĩ nhĩpêx kaxyw. Jakamã kwa mẽ tokyx ate amnhĩ tomnuj kaga nẽ akupÿm amnhĩ kaxyw inhmã ajamaxpêr ho ri apa.

²⁰ Na htem hkwÿjê nhõrkwÿ hwÿr gjêx kaxyw hakwa krem kãm àkjêr o kuhê nhũm mẽ kuma nẽ mẽ kãm anẽ nhũm mẽ hwÿr agjê. Nẽ mẽ ixkre hkre kamã axpên mã kapêr o hkrĩ rÿ axpên mã kapêr pê mẽmoj to hkõm o

hkrī. Ja pyrā nē ot pa mē ajamār o ixpa. Mē ate inhmā anhÿr nhūm ixte mē akōt ixpa ho ixpa nhūm mē pahte expēn to mex o papa kaxyw.

²¹ Kormā mē kot ixpīr kēt ri na pa pre mē kot amnhī tomnuj xwÿnhjē kutā amnhī to htÿx o ixpa. Amnhī to htÿx nē ri ixpa kamā ixtyk jakamā nhūm Inhīpēēxā akupÿm ixto ixtīr nē akupÿm amnhī wÿr ixto api. Hāmri nē amnhī nhīhkō hā mē ho amnhīptār ā hkrī xā kamā inhÿr pa ixkrī ho ixkrī nē īhkō hā mē piitā mē ho amnhīptār o ixkrī. Tā kot kaj mē atō ixpyrā nē ate amnhī tomnuj nē amnhī to htÿx nē. Nē inhmā hprām xā hkōt pix mā amnhī nhīpēx rāhā ty. Hā kot paj amnhī pyrā nē wa ixte mē ato amnhīptār ā ixkrī xāja kamā amnhī nhīhkō hā mē akri ka mē wa inhīhkō hā wa inhmā mē ho amnhīptār o akri.

²² E ixkwÿjaja. Kot kaj mē amā ixkapēr mar prām hā kot kaj mē ā Tirtūm mē wa Ixkarō nhÿ hā ixte mē amā ixkapēr anhÿrja ma nē kām ajamexpēr tÿx rāhā ho ri apa.

Tā ām ja pix. Na hapēx. Anē.

—E Juāw. Kēr ka Raxisej kamā ixkrajē mā ixkapēr ā kagā nē mē hwÿr amē. Nē kagāja piitā krī hkwy kamā ahpÿnhā ixkwÿjē hwÿr arē kē mē kamā harē nē ixkapēr ma. Anē.

Nhūm pre ā Jejus inhmā kapēr anē. Pa kuma nē ô ri mē piitā mē kām hā kagā hpa.

4

Tirtūm kot mē ho amnhīptār ā hkrī xā jarēnh

¹ Tā pa axte mēmoj pumu nhūm kaxkwa hwÿr mē gjēx xā hā hakwakreja amnhī kahē xā mē pa omu. Hāmri nhūm axte mēhō kapēr tÿx xwÿnhhta. Te kot pifti kakōr tÿx pyrāk xwÿnhhta axte inhmā kapēr nē inhmā:

—E amnē ixwÿr api pa mēmoj nhÿrmā kot tanhmā amnhī nhīpēx to hkukamā amā ho amnhīrīt ka omu. Anē.

² Hāmri nhūm Tirtūm Karō tanhmā ixto nē ixto api pa kaxkwa kamā mēmoj pumunh o xa. Tirtūm kot mē ho amnhīptār ā hkrī xā maatita pa pre omu. Nhūm kamā mēhōja nhÿ. ³ Kuk kamā hirā htÿx kumrēx. Te mēmo kēn kamrēk karÿr jaxēnh tÿx pyrāk. Nē kot mē ho amnhīptār ā hkrī xā puhā mǎxwÿxti grāgrēja kām hipōk nē harir pa omunh o xa.

⁴ Nhūm hkrī xā maati puhā mē ho amnhīptār o hkrī xā kēp 24. Kamā mē aptār tūmjaja hkrī. Mē piitā ôr o mē ahkā htu nē ē jakare nē hkrī.

⁵ Nē Tirtūm hkrī xā maatija rūm na katōtōk nē hkrakrak nē haxēnh japā nē hikwÿ. Nē hkrī xā kapem kanē maati pixi kamā kwrÿt pē 7ja pōk rāhā ho kuhē. Kanēja te Tirtūm Karō pyrāk.

⁶ Nē hkrī xā kapem mēmo te gō rax pyrākja hkarÿr jaxēnh tÿx kumrēx nē nō. Te ho kǎx karÿr jaxēnh tÿx pyrā nē hkarÿyre. Nē hkrī xā puhā mēmoj tīr nē kuhē pē kwat kuhē. Nē ôkwa nē katut piitā hkōt no. Ām no xohtō rax kumrēx. Na pre ā mēmoj kēp kwatja no xohtō anē pa omu.

⁷ Wamta te kot mry pē rēawti pyrāk. Nē hkōt ja te kot mōx myti pyrāk. Nē hapu hā hkuk te panhī hkuk pyrāk. No hapu hā ja te kot àanhāhti htor kaxyw hara koror pyrāk.

⁸ Nē piitā hara kēp 6. Nē ī piitā kamā no. Nhūm prem Tirtūm mā mex o mex ā grer rāhā ho kuhē nē aa pinhkrēnh kēt nē. Nē kām grer o:

Amex o amex Tirtūm.
Nē axihtÿx o axihtÿx.

Nē aa ate amnhī tomnuj kēt kumrēx.
 Amnepē mā kormā mēmoj kēt ri ka ra arāhā ri apa. Tā arī arāhā ri apa
 xwŷnh na ka. Kot kaj aa ajapēx kēt nē.
 ām hāmri na ka hte mē ixto mex rāhā ho apa.

Nē amex o amex Tirtūm. Anē.

9-10 Nhūm prem xatā mē ho amnhīptār hkrī xā kamā hkrī xwŷnhja mē kot kām
 “Rāhā pa xwŷnh” anhŷr xwŷnhnta mā ā grer anhŷr o kuhē. Kām mex o mex ā
 grer pē tanhmā kot mē ho mex to hā harē. Hāmri nhūm mē àptār tūm pē 24jaja
 mǎānēn kutā hkōn krā ho rōrōk nē hipō hpa nē hkrī. Nē amnhī krā rūm ōr o
 mē ahkājā kwry nē hpar pē haxwŷ. Kēp mē ō Pahi Maati hā hā hpijaām kaxyw
 wantajē pyrā nē mex o mex ā harēnh o hkrī nē kām:

11 ām hāmri na pa htem amex o amex ā ajarē Tirtūm
 Apē mē inhō Pahi Maati na ka.

Nē apē mē inhō Tirtūm na ka.

Na ka pre mēmoj piitā ho akato. Axāhpumunh tŷx nē ajamaxpēr tŷx o mēmoj
 piitā amā hprām xā hkōt ho akator pa.

Jakamā na pa htem ā amex o amex ā ajarēnh anē. Mē ixrom axihtŷx mex
 kumrēx na ka hte apa Tirtūm. Anē.

5

*Mē pahte amnhī tomnuj pānhā amnhīrer xwŷnh jarēnh
 Juāw 1.29; Piripos 2.5-11*

1 Tā pa pre arī te kaxkwa kamā mēmoj pumu. Mē ho amnhīptār ā hkrī xā
 maatita kamā hkrī xwŷnh nhīhkra kamā kagā pa omunh o xa. Upōk rūm omu.
 No ām axtem kagā kaxkep na pre. Nē akutā hā kagā nē menh ē ho ho htŷx
 xāja kēp 7.

2 Hāmri nhūm Tirtūm kapēr o wrŷk xwŷnh xihŷtŷx xwŷnhja kapēr tŷx kām
 kapēr o:

—E mē atō na ate kagā mŷj pyr nē ho htŷx xā hpōt mā tām? Anē.

3 Hāmri nē tee ri mē piitā mē hkapi nom nhūm ja kaxyw mēhō amrakati
 kumrēx. Kaxkwa kamā amrakati nē pika kamā mǎānēn amrakati nē pika
 hkrak ri amrakati. Nhŷri mēhō kot kagā kaxkepta pyr nē hpōt nē omunh mā
 tām xwŷnhja amrakati ho amrakati.

4 Nhūm tee ri mēhō japēr nom mēhō pumunh kēt nē. Pa tee ri ja hā omu nē
 ixkaprī htŷx nē inhmŷr o xa.

5 Hāmri nhūm pahi hōja ixpumu nē inhmā:

—Kwa amŷr kēt nē. E mēhō mŷj pumu. Juta kanrēhā htāmnhwŷ xihŷtŷx
 xwŷnhnta. Pahi Tawi kanrēhā htāmnhwŷ te kēp mry pē rēāw xihŷtŷx pyrāk o
 hihŷtŷx xwŷnh mŷj pumu. Kot mē kām hkurē xwŷnhjē kutā amnhī to htŷx nē
 mēmoj punuj piitā ho hapēx kaxyw mā xwŷnh jakamā tapxipix na kot kagāta
 hpyr nē ho htŷx xā hpōt par mā tām. E ka omu. Anē.

6 Hāmri pa kuma nē hwŷr rīt nē Jejusja pumu. Kot mē pahte amnhī tomnuj
 pānhā amnhīrer xwŷnhnta mē ho amnhīptār o hkrī xā maati kapem xa. Mēmoj
 htŷr pē kwat mē àptār tūm pē 24jē nhīpōk ri xa. Mē kām hkurē xwŷnhjaja kot
 hpih nhūm ra akupŷm htŷr nē xa. Nom ra axtem nē xa. āhpumunh tŷxja te kot
 pahi xāhpumunh pyrāk. Nē hpār kēp 7. Nē no mǎānēn kēp 7. Noja te Tirtūm
 Karō pyrā nē kēp pika piitā hkōt pa xwŷnh. Ā Jejusja axtem nē ām anē pa
 omu.

7 Hāmri nhūm mē pahto amnhīptār o hkrī xwýnhhta wýr tē nē ĩhkra kamā kēp kagà kaxkepta py.

8 Hāmri nhūm mē hūr pē kwat mē mē àptār tūmjaja hpar pē hkōn krā ho rôrōk nē hkrī hpa nē hipō nē hkrī. Piitā wiorāwti jamý nē ôr o xijere kamā mēhkuxwa xà jamý nē o hkrī. Nhūm Tirtūm krajaja Tirtūm mā tanhmā amnhī jarēnh to nhūm mē mar o hkrī. Te xijere kamā mēhkuxwa xà hpār o hkrī pyrā nē mē kuma.

9-10 Jakamā nhūm mē hkōn krā ho hkrī xwýnhjaja mē pahte amnhī tomnuj pānhā amnhīrer xwýnhhta kutā kām greer o hkrī. Mē greer nyw o kām gre nē kām:

Na prem apī ka atyk o mē piitā mē kot amnhī tomnuj pānhā amnhīrer pa.

Ahpýnhā pika piitā hkôt mē urojē piitā hpānhā amnhīrer pa.

Nē ahpýnhā ri mē kapēr xwýnh kwýjē piitā mē hpānhā amnhīrer pa. Atyk o mē kot amnhī tomnuj piitā hpānhā amnhīrer pa.

Jakamā nhūm mē kot akôt amnhī xunhwýr xwýnhjaja kēp Tirtūm kra nē ri pa. Ka ra mē panhō Tirtūm mā mē kēp patre kaxyw mē unhwý nhūm htem pika piitā hkôt mē ho amnhīptār o pa.

Tā atyk o ate pika piitā hkôt mē hpānhā amnhīrer jakamā kapxipix na ate kagāta pyr nē ho htýx xà hpôt mā tām. Anē.

11 Hāmri nhūm Tirtūm kapēr o mē wrýk xwýnhjaja nhýhýnh hapôj nē kuhê. Mē ohtô rax o ohtô rax. Ohtô rax o mē pajamaxpēr jakrenh. Hāmri nē Tirtūm kot mē ho amnhīptār ā hkrī xà maatija wýr mra nē kām hipôk pa. Nē mēmoj tūr nē kuhê xwýnhjē mē mē àptār tūmjē mā hipôk pa nē mē pahte amnhī tomnuj pānhā amnhīrer xwýnhhta mā kapēr.

12 Kàx pē kām kapēr nē kām:

Ām hāmri na pa htem amex o amex ā inhgrer o ixkuhê.

Mē ixrom axihtýx o axihtýx.

Nē mēmoj piitā anhōō.

Nē ate mēmoj piitā hkukamā axàhpumunh par.

Nē amex o amex jakamā na pa htem amā amex pix ā inhgrer o ri ixpa. Anē.

13 Tā nhūm mēmoj piitā Tirtūm mē Jejus wa kām wa mex o wa mex ā harē. Pika hkôt panhī nē mry nē àk nē mēmoj piitāā. Nē pika hkrak ri nē gō hkrak ri mēmoj piitāā. Nē mē htykjaja. Nhūm mē piitā wa kām wa mex o wa mex ā wa harē nē wa kām:

E ate mē ixto amnhīptār ā akrī xà kamā akrī xwýnh mē kot mē ixte amnhī tomnuj pānhā amnhīrer xwýnh mē war amex o wa amex.

Nē war axihtýx o war axihtýx.

Nē war axàhpumunh o war axàhpumunh.

Na pa htem ā war ajarēnh anhýr rāhā ixpa ho ixpa. Anē.

14 Hāmri nhūm mēmoj tūr pē kwatjaja mē kuma nē mē kām:

—Nā ām hāmri na ka mē ā wa harēnh anē.

Wa mex o wa mex kumrēx. Anē.

Hāmri nhūm mē àptār tūmjaja Tirtūm mē Jejus wa hpar pē hkōn krā ho rôrōk nē hkrī hpa nē haxwýja wa kām wa mex o wa mex ā wa harē.

6

Kagà ho htýx xà pé 7 jarēnh

Matēwre 24.3-14; Sikūn Tesarōn 2.3; Wam Juāw 2.18

1 Tã pa arĩ kaxkwa kamã mẽ pahte amnhĩ tomnuj pãnhã amnhĩrer xwýnh kot tanhmã amnhĩ nhĩpêx to hã omunh o xa. Nhũm kagã kaxkepta py nẽ wam ho htýx xã pôt. Hãmri nhũm mẽmo tĩr pê kwatjê hõja kapêr týx kumrêx. Te na katôtôk týx pyrãk o mẽhõj mã kapêr nẽ kãm:

—E amnẽ mẽ ixwýr tẽ. Anẽ.

2 Hãmri nhũm kawar jakajre nhỹhỹnh hwýr hpôx o tẽ. Nhũm mẽhõja õ kuxê mý nẽ hã nhỹ nẽ tẽ. Hãmri nhũm nhãm mẽhõja hwýr tẽ nẽ kãm pahĩ hã mẽ ahkã htu. Hãmri nẽ kãm tanhmã kapêr to nhũm kuma nẽ mẽ kot kãm Tĩrtũm mẽ Jejus wa kurê xwýnhjê nhĩmex par kaxyw hakêx nẽ ma pika hwýr tẽn wrý.

3 Hãmri nhũm mẽ pahte amnhĩ tomnuj pãnhã amnhĩrer xwýnhja wam kagã ho htýx xãta kôt axte ja pôt. Hãmri nhũm mẽmoj tĩr pê kwatjê hõja axtem mẽhõj mã kapêr nẽ kãm:

—E amnẽ mẽ ixwýr tẽ. Anẽ.

4 Hãmri nhũm kawar kamrêk mẽ hwýr hpôx o tẽ. Nhũm mẽhõ hã nhỹ nẽ tẽ. Nhũm nhãm mẽhõja kãm wapo gõ nẽ ma pika hwýr htẽm nẽ wrýk kaxyw hano. Kot hwýr wrýk nẽ pikap mẽ pa xwýnhjê kurê huk kaxyw. Mẽ kot axpẽn par kaxyw ma mẽ hwýr kumẽ. Hãmri nhũm kuma nẽ wapota py nẽ hakêx nẽ ma mẽ hwýr tẽn wrý.

5 Hãmri nhũm mẽ pahte amnhĩ tomnuj pãnhã amnhĩrer xwýnhja kagã ho htýx xã hõ pôt. Na pre ra ho axkrut nẽ hpôt tã hpãnhã axte hkôt ja pôt. Hãmri nhũm mẽmoj tĩr pê 4jê hõta mẽhõj mã kapêr nẽ kãm:

—E amnẽ mẽ ixwýr tẽ. Anẽ

Hãmri nhũm kawar tykre mẽ hwýr hpôx o tẽ. Nhũm hã ýr xwýnhja mẽmoj to peja xã hã parãs mý nẽ o tẽ.

6 Hãmri nhũm mẽ htĩr pê kwatjê rũm mẽhõja kãm kapêr nẽ kãm:

—E kêr ka ma pika hwýr mẽ hwýr tẽn wrý nẽ mẽ kãm myt pyxi kamã mẽ àpẽn pãnhã mẽ kãm mẽmoj to hkryre nẽ anhõ parãsta kamã ho peja nẽ mẽ kãm õr o apa. Nom mẽ apkur xã hã orti nẽ wĩhti ka mẽ kêp tanhmã ho hkêt nẽ. Anẽ.

Hãmri nhũm kuma nẽ hakêx nẽ ma tẽn mẽ hwýr wrý.

7 Tã nhũm mẽ pahte amnhĩ tomnuj pãnhã amnhĩrer xwýnhja axte kagã ho htýx xã hõ hpôt. Na pre ra ho axkrunêpxi nẽ hpôt tã hpãnhã axte hkôt ja pôt. Hãmri nhũm mẽmoj tĩr pê kwatjê hõja kapêr kot hitep xwýnhja mẽhõj mã kãm:

—E amnẽ mẽ ixwýr tẽ. Anẽ.

8 Hãmri nhũm kawar rãràãre mẽ hwýr hpôx o tẽ. Nhũm mẽhõ hã nhỹ nẽ tẽ. Hã ýr xwýnh nhĩxi na pre kêp “Mẽhtyk” anẽ. Hãmri nhũm mẽhõja kãm kapêr nẽ kãm:

—E ma pika hwýr wrý nẽ tanhmã mẽ ho kê mẽ ohtõ nẽ tanhmã amnhĩ to nẽ axkaprã. Kê mẽ hkwyjaja pijapu kamã axpẽn pa nẽ mẽ hkwyjaja prãm xãj ty nẽ mẽ hkwyjaja tanhmã à htýx kute kamã ty. Nẽ mẽmo nury xoprêja mẽ hkwyjê pa. E ma mẽ hwýr wrý nẽ tanhmã mẽ ho ho apa. Anẽ.

Hãmri nhũm kuma nẽ hakêx nẽ ma pika hwýr tẽn wrý. Hãmri nhũm mẽ htykjê papxãja tanhmã amnhĩ to nẽ te kot hã jêt nẽ ma hkôt mör nẽ pika hwýr wrýk pyrãk pa pre arĩ omunh o xa.

9 Hãmri nhũm mẽ pahte amnhĩ tomnuj pãnhã amnhĩrer xwýnhja axte kagã ho htýx xã hõ hpôt. Na pre ra ho kwat nẽ hpôt tã hpãnhã axte ja pôt. Hãmri nẽ hpôtja kôt pa ra mẽ kot Tĩrtũm mã mẽmoj nhõr xã hã mẽsti pumu. Nẽ hkrak ri mẽ hkarõjê pumu. Mẽ kot hkwyjê hkôt ri mẽ kãm Tĩrtũm kapêr jarênh nẽ Jejus kêp mẽ õ Pahĩti hã harênh o pa nhũm mẽ kot hã mẽ hpar xwýnhjê karõja pa

pre mẽ omu. Nhũm mẽ mẽsti hkrak ri amnhĩ to Tĩrtũm wỳr o hkrĩ. ¹⁰ Kỳx pẽ kãm kapẽr nẽ kãm:

—Ăm hãmri amex o amex Pahi Maati. Aa ate mẽmoj tã tanhmã amnhĩ to axẽx to hkêt kumrẽx. Kwa xà kot kaj tokyx pika hkôt mẽ kot mẽ inhĩmex xwỳnhjaja tanhmã mẽ ixtã mẽ ho nà? Anẽ.

¹¹ Hãmri nhũm mẽhõja mẽ hwỳr tẽ nẽ mẽ kãm mẽ ẽ jakajre gõ nhũm mẽ hagjẽ. Hãmri nhũm mẽ kãm:

—E mẽ mamrĩ atar akòkôt o akrĩ. Koja Tĩrtũm kormã tanhmã mẽ kot mẽ atomnuj xwỳnhjẽ ho hkêt nẽ. Kẽ mẽ axte mẽ apyrã nẽ mẽ akwỳjẽ nhĩmex mãn. Koja mẽ Tĩrtũm jamaxpẽr xà hkôt axte mẽ akwỳjẽ pa nhũm rĩ kormã mẽ ato hpimràatã tanhmã mẽ atã mẽ hipẽx to. Jakamã ẽ mẽ atar kutêp mãmri akòkôt o akrĩ. Anẽ.

¹² Hãmri nhũm mẽ pahte amnhĩ tomnuj pãnhã amnhĩrer xwỳnhhta axte kagã ho htỳx xà hõ hpôt pa omu. Na pre ra ho 5 nẽ hpôt tã hpãnhã hkôt axte ja pôt. Hãmri nhũm pika htetet tỳx kumrẽx. Nẽ myyti ahtyk nẽ mytwrỳre te kẽp mẽ hkamrô kamrẽk tỳx pyrã nẽ ajẽt.

¹³ Nẽ kanhẽti tanhmã amnhĩ to nẽ axrẽ nẽ pikap rôròk pa. Te kòk xàpẽr tỳx nẽ kot pàrerekre kormã ràx tã kot kãm hikranh par pyrã nẽ piitã rẽnh pa nhũm rôròk.

¹⁴ Hãmri nhũm kaxkwaja te kagã kaxkep pyrã nẽ amnhĩ to kaxkep o tẽ. Nẽ pika piitã hkôt kẽn prẽk nẽ hixẽt prẽk maati piitã te hkrĩ xà rũm hapòx nẽ mrrar nẽ nhãm hkrĩ pyrãk. Nhũm gõ hipòk piitã haxwỳja te hikwỳ xà rũm hapòx nẽ mrrar nẽ nhãm hikwỳ pyrãk. Pika htetet tỳx nhỹ hã ã mẽmoj amnhĩ nhĩpẽx anẽ. ¹⁵ Hãmri nhũm pika hkôt mẽ piitã tee ri mẽmoj ã amnhĩ nhĩpẽx anhỹr ã omu nẽ kãm ma nẽ htetet tỳx kumrẽx. Mẽ ho amnhĩptar xwỳnhjaja nẽ pòristi krãhtũmjaja nẽ mẽ kot amnhĩ to rũnh xwỳnhjaja nẽ mẽ hihtỳx xwỳnhjaja nẽ mẽ kãm mẽ àpẽn xwỳnhjaja nẽ amnhĩ mã mẽ àpẽn xwỳnhjaja. Ăm piitã mẽmoj ã kot amnhĩ nhĩpẽx anhỹr ã omu nẽ tee ri amnhĩ kukamã hamaxpẽr nẽ kãm ma ho kãm ma. Hãmri nẽ hpimxur kaxyw ma kẽn prẽk kre japẽr o hprôt nẽ mra. ¹⁶⁻¹⁷ Hãmri nẽ amnhĩ to kẽn prẽk wỳ nẽ kãm:

—Kwa na ra mẽ ixto amnhĩptar ã hkrĩ xà maati kamã hkrĩ xwỳnh mẽ kot mẽ ixte amnhĩ tomnuj pãnhã amnhĩrer xwỳnhhta wa mẽ ixkamã gryk tỳx kumrẽx. Ra wa kot tanhmã mẽ ixtomnuj to xà hã arĩgrota kato. Koja wa mẽ ixtomnuj tỳx nẽ pa mẽ kutã hkêt nẽ. Kwa tokyx mẽ inhĩpy arôròk nẽ wa kẽp mẽ ixto amũxu. Anẽ.

7

Mẽ kot Tĩrtũm mã hkrajẽ kagã

Apokarip 9.4

¹ Tã pa arĩ kaxkwa kamã mẽmoj pumu. Nhũm Tĩrtũm kapẽr o mẽ wrỳk xwỳnh pẽ kwatja piitã ahpỳnhã pika nhũtep xà hkôt kòk jatur xà hã hamỳ nẽ ho kuhẽ. Pika piitã hkôt kòk hpinhkrẽn par nẽ àpẽr kêt nẽ gõ xujanãr kòt àpẽr kêt kaxyw hatur xà hã hamỳ nẽ ho kuhẽ. Nẽ pã piitã hkôt àpẽr nẽ tanhmã pĩ hkwỳ ho pymaj nhũm mẽ ã amnhĩ nhĩpẽx anẽ nẽ hatur xà hã hamỳ nẽ ho kuhẽ. ² Na pre ra Tĩrtũm ja hã mẽ kãm karõ nẽ mẽ kãm:

—E kër ka mẽ ma pika hwỳr wrỳ nẽ pika nẽ gõ xujanãrja tanhmã wa homnu hto. Anẽ.

Hãmri nhũm mẽ kuma nẽ hwỳr wrỳ nẽ kormã nẽ kòk ho htỳx. Hãmri nhũm Tĩrtũm kapẽr o wrỳk xwỳnhjẽ hõja myt japòx xà rũm mẽ hwỳr hpòx o tẽ. Nẽ

ihkra kamā mẽ kot Tirtũm kra hã mẽ hixi jarẽnh xà hã kagàta py nẽ o tẽ. Hãmri nẽ kàx pẽ mẽ kot pika mẽ gô xujanâr homnu mã xwỳnhjẽ mã kapẽr nẽ mẽ kãm:

³—Kwa taxy pa Tirtũm krajẽ nhõkrã kagà hpa mãn. Kêr ka mẽ omu nẽ mẽ tapxipixjaja tanhmã mẽ ho hkêt nẽ. Anẽ.

⁴⁻⁸ Hãmri nẽ mẽ hkagà pa. Ahpỳnhã Ijaew pigràn h xwỳnhjaja mẽ ho ohtô rax kumrẽx nẽ tanhmã mẽ hkagà hto. Pa tanhmã mẽ kute hã mẽ harẽnh ma nhũm xep mẽ ohtô rax kumrẽx.

Juta kamā mẽ kêp 12.000.

Nẽ Rupẽ kamā mẽ kêp 12.000.

Nẽ Gax kamā mẽ kêp 12.000.

Nẽ As kamā mẽ kêp 12.000.

Nẽ Natari kamā mẽ kêp 12.000.

Nẽ Manase kamā mẽ kêp 12.000.

Nẽ Simeãw kamā mẽ kêp 12.000.

Nẽ Rewi kamā mẽ kêp 12.000.

Nẽ Isaka kamā mẽ kêp 12.000.

Nẽ Jepurõ kamā mẽ kêp 12.000.

Nẽ Juje kamā mẽ kêp 12.000.

Nẽ Pẽjamĩ kamā mẽ kêp 12.000.

Ã mẽ ohtô rax kot anhỹr. Hãmri nẽ mẽ piitã mẽ pikamỳr par kãm mẽ kêp 144.000. Piitã kêp Apraãw kanrẽhã htãmnhwỳ na pre mẽ. Tã ã axpẽn kaxyw mẽ ohtô rax kumrẽx kot anhỹr tã nhũm mẽ hkagà pa.

Tirtũm kra hkwỳjẽ jarẽnh

Apokarip 14.1-5

⁹ Tã pa axtem mẽmoj pumu. Nhũm mẽ ohtô rax nẽ Tirtũm nhõ krĩ kamã kuhẽ. Ahpỳnhã ri pika piitã hkôt mẽ urojaja. Nẽ ahpỳnhã ri mẽ kapẽr xwỳnhjaja nhũm prem pika piitã kurũm kot mẽ ho amnhĩptar ã hkrĩ xà maatija kamã hkrĩ xwỳnh pẽ Tirtũm mẽ mẽ pahte amnhĩ tomnuj pãnhã amnhĩer xwỳnhja wa kutã kuhẽ. Mẽ ohtô rax kumrẽx jakamã pa tee ri mẽ piitã mẽ ho kôta hpar prãm kaprỳ. Nẽ piitã ê jakare kamã kuhẽ. Nẽ hkĩnh nẽ hkĩnh xàj pò hkwỳ jamỳ nẽ ho àpêr o kuhẽ. ¹⁰ Hãmri nẽ kỳx pẽẽ Tirtũm mẽ Jesus wa kãm kapẽr nẽ wa kãm:

Hêxta waa nẽ. War amex o war amex Pahi Maati.

Na ka pre Akra Jesus kukwak ri mẽ ixte amnhĩ tomnuj ã tanhmã mẽ ixto hkêt nẽ.

War ajamẽ mẽ ixkamã axukapri rãhã ho apa xwỳnh na ka wa.

Jakamã pa mẽ inhmex nẽ war awỳr api nẽ war akuri inhmex nẽ ijamakêtkati nẽ ixpa ho ixpa.

Ãm hãmri na ka hte wa mẽ ixto mex rax kumrẽx o apa. War amex o war amex. Anẽ.

¹¹ Hãmri nhũm Tirtũm kapẽr o mẽ wrỳk xwỳnhjaja Tirtũm krĩ xà mã hipòk nẽ hkõn krã ho rôròk nẽ hkrĩ hpa. Nẽ mẽ àptar tũmjẽ mẽ mẽ hũr nẽ kuhẽ xwỳnhjaja mẽ ìhkõ hã kãm hipòk nẽ wam tajẽ pyrak nẽ hkõn krã ho rôròk nẽ hkrĩ. Hãmri nẽ mẽ ohtô kot Tirtũm mẽ Jesus wa kãm kapẽr ã mẽ kuma hãmri nẽ Tirtũm ã hpjiaam kaxyw hpar pẽ htu mỳr pẽ hikwỳ hpa nẽ kãm mex o mex ã harẽ nẽ kãm:

¹² “Ãm hãmri na mẽ ã ajarẽnh anẽ Tirtũm. Amex o amex.

Na ka hte mẽ ixto mex o apa.

Mě ixrom axàhpumunh o axàhpumunh.

Ně mẽ ixrom axihtỳx o axihtỳx.

Jakamã na ka hte mẽ xpiitã mẽ ixto mex kumrẽx rãhã ho apa.

À ate anhyr rãhã o rãhã jakamã na pa htem amã amex o amex ã ajarẽnh rãhã ho xpa.” Anẽ.

¹³ Hãmri pa mẽ omunh o ixãm rôm nhũm mẽ àptàr tũmjê hõja ixwỳr tẽ nẽ mẽ è jaka kamã mẽ hkĩnh xàj pò jamỳnh nẽ ho kuhê xwỳnhjê hã ixkukja nẽ inhmã:

—E mãn ate mẽ è jakare kamã mẽ kuhê xwỳnh mũjê pumunh nà? Tanhmã na prem amnhĩ nhĩpêx to nẽ amnẽ api? Xà ate mẽ omunh? Anẽ.

¹⁴ Hãmri pa kuma nẽ kãm:

—Nà ixte mẽ omunh kêt. Kêt ka na ixrom ate mẽ omunh. Anẽ.

Hãmri nhũm inhmã mẽ harẽnh o:

—Nà na pre mẽ hkwỳjaja Jejus ã mẽ homnuj tỳx kumrẽx nẽ mẽ kupa. Tã mẽ kệp Jejus kwỳ jakamã na pre mẽ nẽ mẽ kot amnhĩ tomnuj o hapêx nẽ te amnhĩ kamrô ho mẽ nẽ mẽ kot amnhĩ tomnuj piitã kuhõnh par pyrãk o mẽ hipêx. Jakamã nhũm mẽ è jaka kamã mex nẽ hkĩnh tỳx nẽ pa.

¹⁵ Nẽ Tĩrtũm kot mẽ pahto amnhĩptàr ã hkrĩ xà maati kutã kãm mex o mex ã harẽnh rãhã ho kuhê.

Na hte mẽ ho mex rãhã ho pa. Mẽ hkôt pa ho pa jakamã koja mẽmoj tanhmã kệp mẽ ho hkêt nẽ.

¹⁶⁻¹⁷ Nẽ mẽ pahte amnhĩ tomnuj pãnhã amnhĩrer xwỳnh kot Tĩrtũm krĩ xà maati kamã ãm xwỳnhhta na hte mẽ hamãr mex rãhã ho mẽ hkôt pa.

Te mẽ kot mẽ hkrĩ jamãr mex pyrãk.

Nẽ te mẽ kot mẽ hkrĩ kôm o pa nhũm htĩr nẽ pa pyrãk.

Koja mẽ kuri htĩr tũm nẽ hkôt pa ho pa.

Nẽ axte kãm prãm kêt nẽ.

Nẽ axte kãm kôr kêt nẽ.

Nhũm arĩgro htỳjaja axte mẽ hkà ho hxêt kêt nẽ.

Koja Tĩrtũm te mẽ kot mẽ hkra no kagô nhĩnhĩnh par pyrãk o mẽ hipêx nhũm mẽ axte hkaprĩ nẽ mỳr o pa hkêt nẽ.

Pãnhã hkĩnh nẽ mex rãhã kuri pa ho pa. Anẽ.

8

Kagã kaxkep o htỳx xà kot hitep jarẽnh

¹ Tã pa arĩ kaxkwa kamã mẽmoj pumu nhũm mẽ pahte amnhĩ tomnuj pãnhã amnhĩrer xwỳnhja kagã kaxkep o htỳx xà kot hitepta pôt. Hãmri nhũm kaxkwa kamã mẽmoj piitã hpinhkrẽnh pa nhũm mẽhõ kapêr kêt kumrẽx. Nẽ hpinhkrẽnh par o ra hã ahtũm ry mex nẽ.

² Hãmri nhũm Tĩrtũm kutã kapêr o wrỳk xwỳnh pê 7 nẽ mẽ kuhê xwỳnhjaja. Nhũm kapêr o wrỳk xwỳnhjê hõja mẽ hwỳr tẽ nẽ mẽ piitã mẽ kãm pifti gô.

³⁻⁴ Hãmri nhũm kapêr o wrỳk xwỳnhjê hõja ôr o xijere py nẽ Tĩrtũm mã mẽhkuxwa xà ho xêt xà hã mės kunĩhti hwỳr o tẽ. Mẽ ho amnhĩptàr ã hkrĩ xà maati kutã ôr o mễstija wỳr o tẽ nẽ kuri o xa. Hãmri nhũm mẽ kãm kamã mẽhkuxwa xà hkwỳ runh rax nẽ nhũm mễsti hã ho xêt o xa. Rôm nhũm Tĩrtũm krajaja Tĩrtũm mã tanhmã amnhĩ jarẽnh to. Jakamã nhũm mẽhkuxwa xà xêt kũm mẽ mẽ kot Tĩrtũm mã amnhĩ jarẽnh xaja mẽ nhũm ahkã nẽ Tĩrtũm kapêr o wrỳk xwỳnh nhĩhkra kamã xijere rũm Tĩrtũm kutã kax mã àpir o pa.

⁵ Hāmri nhūm kapēr o wryk xwýnhja xijere kamā kuwy hpôk kwý ho nýt nē ahpār mā pika hwýr kumē nhūm ma tē nē pikap tēm nhūm pika htetet týt nē kamā na katôtök nē haxēnh nē hkrakrak.

Mē kot pifti kakôr ā mē harēnh

⁶ Hāmri nhūm Tirtūm kapēr o wryk xwýnh pē 7 kot pifti jamýnh xwýnhjaja ra kot pafti kakôr mā.

⁷ Jakamā nhūm wamta ô pifti kakô nhūm na mē te kot jēr krā jakot pyrāk xwýnh mē kuwy te kot mēmo kamrô kamrêk pyrāk xwýnhhta pikap rôrôk pa. Nē nhýhýnh pika hkwy ho rax nē ho kaxàr pa. Nē pôti nē akunī hkwy ho rax kumrêx nē ho kaxàr pa. ⁸ Hāmri nhūm wam ām xwýnh nhýjuk ri ām xwýnhja ô pifti kakô nhūm mēmoj te kēn krā hprêk pôk pyrā nē kaxkwa rūm ahpār mā tē nē gô xujanār nhīkjē kamā hpôk rāhā tēn mrô. Hāmri nhūm gô nhīkjē kamā gôja mēmo hkamrô hā amnhī jahkre hpa. ⁹ Jakamā nhūm gôx kām mēmoj htír nē ri mrar xwýnhjaja pikaprār pa. Nē gôx kām pâr gô krāhkā hā pa xwýnhja haxwýja gjêx pa. Nē pâr kām mē pa xwýnhjaja haxwýja hagjē nē pikaprār pa. No nhūm gô mex kām pâr kām mē pa xwýnhjaja mē kurom arī htír nē.

¹⁰ Tā nhūm wam ām xwýnhhta wa hijuk ri ām xwýnhja ô pifti kakô. Hāmri nhūm kanhēti rax kumrêxja axta nē hpôk o ma ahpār mā tēn pikap tēm nē pyhti nē hino hkwy ho ohtô nē homnu hpa. ¹¹ Kanhēti nhīxi pē na pre “mēmoj xy xā” anhýr jakamā nhūm tēm nē pyhti nē hino hkwy ho ohtô nē homnu pa. Nhūm prem hwýr mra nē hkwy janhi nē ho ixkô nhūm ý nē nhūm mē ohtô nē ho ixkô nē axkaprā.

¹² Hāmri nhūm hpānhā Tirtūm kapēr o wryk xwýnhjē hōja ô pifti kakô. Na pre ra ho axkrunēpxi nē hkakôr tā hpānhā ra axte hō ja kakô. Hāmri nhūm mēhōja tē nē myyti kura nhūm hkwy ahtyk nē hirā hkēt nē. Nhūm mytwrýre nē kanhēti mā ho anē nē myyti pyrā nē hkwy ahtyk nē hirā hkēt nē harir. Jakamā nhūm kamāt kām hirā mex kēt nē. Nē arīgro hā myytija haxwýja hirā mex kēt nē.

¹³ Hāmri pa kaxkwa kamā àanhàhti pumu nhūm kýt pē ri htor o pa pē tanhmā kapēr to nē kapēr o:

—Hēxta waa nē. Kormā kot pifti kakôr xwýnhjaja axkrunēpxi nē kormā hkakôr kēt nē. Kojā mē tokyx hkakô nhūm pika hkôt ri mē pa xwýnhjaja amnhī xā htýt kamā hamak týt o pa. Na pa tee ri mē hkukamā ijamaxpēr nē inhmā mē hkaprī htýt nē. Hēxta waa nē. Kojā mē omnuj týt kumrêx. Anē.

9

¹ Tā pa axte mēmoj pumu. Nhūm Tirtūm kapēr o wryk xwýnhjē hō ô pifti kakô. Na prem ra ho kwat nē hkakôr tā hpānhā axte hōja ja kakô. Hāmri nhūm kanhēti hō axta nē pikap tēm kurē kumrêx nhūm mēhōja omu nē hwýr tē nē kām mēmoj tā saf gô. Satanasti jagjēnh xā hā ahkre xupým o htýt xā hā safja nhūm kanhēti mā kugô.

² Hāmri nhūm kupy nē ahkrehtita wýr o tē nē kahē xā mē nhūm kurūm kuwy hkūm hapôx rax nē. Nē ma kàx mā àpir o pa nē myyti hpro hpa nhūm kamāt kô rax kumrêx.

³⁻¹¹ Nē kuwy hkūmja rūm mēmoj te krit pyrāk xwýnh kwýjaja pikap rôrôk nē kuhē. Te kot krit pyrāk tā mē hkuk te panhī hkuk pyrāk. Nē mē hkrā hkī te mēnijē hkrā hkī japjē pyrāk. Nē ôr o mē ahkà jagjē. Nē mē wa japjē htýt kumrêx. Te réawti xwa japjē pyrāk. Nē kàx o mē hinô hkà. Nhūm mē htor o hara hkoko htýt o mra. Te ho kawar xohtô pijapu kaxyw kot mē hkjēnh

xà kamã mẽ htur nê mẽ hkjênh o hprôt nhũm hkoko htỳx pyrãk. Nê mẽ hkamnhwỳr o pa kaxyw mẽ hanhya te kot makre janhy pyrãk. Ǻ kriitija kot anhỳr. Nê te nhỹhỹm oprê kaxyw nojarê t nê mẽ hkrit kawar hã hikukrêx mex rênh pyrãk. Mêo pahija ahkre xupỳmta kamã kêp mẽ hkrãhtũm. Ijaew kapêr kãm hixi pê “Apatô.” No Gres kapêr kãm kêp “Aporiãw.” No mẽ pakapêr kãm kêp “mê hpar o pa xwỳnh.” Hãmri nhũm Tĩrtũm kriiti mã kapêr nê mẽ kãm:

—E kêr ka mẽ ma pika piitã hkôt te makre kot amnhĩ nhĩpêx pyrã nê ri mẽ hkôt mẽ hkamnhwỳr o apa. Ǻ amnhĩ nhĩpêx anhỳr o mẽ atã mytwrỳ pê sĩk. No ãm kêr ka mẽ hpar kumrêx kêt nê. Ǻm mẽ kot amnhĩ xà htỳx kãm hamak pix kaxyw tanhmã mẽ ho ho apa. Te makre kot mẽ hkamnhwỳr nhũm à htỳx kumrêxta pyrãk. No mẽ ate mẽ hkamnhwỳr nhũm mẽ hkamnhwỳr xàja koja à htỳx o makre kot mẽ hkamnhwỳr jakre. Nom ra mẽ kot Tĩrtũm kra hã mẽ hkagã xwỳnhjaja kêr ka mẽ omu nê ãm mẽ omu nê tanhmã mẽ ho hkêt nê. Mê kêp ixkwỳ na mẽ. Nê pô nê prãt ka mẽ ãm omu nê tanhmã ho hkêt nê. Ǻm mẽ kot panhĩ nhôkrã kagã hkêt xwỳnh pixjaja ka ã mẽ hipêx anhỳr o ri mẽ hkôt apa. Nom kêr ka mẽ hpar kêt nê. Kê mẽ tee ri amnhĩ xà hã maj kãm tokyx htyk nê hapêx prãm hkaprỳ ho pa. E ma mẽ hwỳr mra nê ã mẽ hipêx anhỳr o ri apa. Anê.

Hãmri nhũm mẽ kuma nê ma mẽ hwỳr mra.

¹² Na ra pika hkôt wam mẽ homnu xà pyxi nê hapêx. No ãm arĩ hamêxkrut.

¹³ Jakamã nhũm Tĩrtũm kapêr o wrỳk xwỳnhjê hõja axte ô pifti kakô. Na prem ra ho sĩk nê hkakôr tã axte hkôt hõja hkakô. Nhũm Tĩrtũm kutã ôr o mêsti rũm mêhõja tanhmã kapêr to. Mêsti janhã rũm kapêr. ¹⁴ Pifti kakôr xwỳnhhta mã kapêr nê kãm:

—E na ra mẽ kot mẽ hkwỳjê nhĩmex ã arĩgrota kato. Jakamã kêr ka ma pyhti pê Erax wỳr wrỳ nê gô mỳ ri Satanasti mã mẽ ãpênh xwỳnh pê kwatja pumu. Na prem ra mẽ hpa hpre nhũm mẽ gô mỳr ri arĩ hkrĩ ho hkrĩ. Ka mẽ omu nê mẽ kãm mẽ hpa hpre xà hpôt pa kê mẽ ma mẽ hkôt ri mẽ hpar o pa. Anê.

¹⁵ Na pre ra Tĩrtũm mẽ kot mẽ hkwỳjê nhĩmex o pa kaxyw mẽ kurê nê gô mỳ ri mẽ unhwỳ nhũm mẽ kormã mẽ hpar xà hã arĩgro jamãr o hkrĩ. Jakamã nhũm ã pifti kakôr xwỳnhhta mã mẽ harênh anê nhũm kuma nê ma tê nê mẽ hwỳr wrỳ nê mẽ kãm mẽ hpa hpre xà hpôt pa. Hãmri nhũm mẽ ma pika piitã hkôt ri mẽ hpar o mẽ hkôt pa. Nê mẽ ho ohtô rax kumrêx nê mẽ himex. ¹⁶ Nê ma amnhĩ kôt pôristi ho ohtô rax nê o pa. Piitã kawar ã hkrĩ nê mẽ hkôt hprôt nê hkoko ho mra. Mê kêp 200.000.000 hã mẽ harê pa mẽ harênh ma. Mê ohtô rax o mẽ ohtô rax.

¹⁷ Na pa pre arĩ te ixpimtir kãm mẽ omunh pyrãk. Nhũm kawar ã mẽ hkrĩ xwỳnhjaja. Mê hinô kãja axtem kãx o. Nê hkamrêkja te kuwy hpôk kamrêk pyrãk. Nê rãrãrja te mẽ hkurôt kane xà pê êsôf rãrãr pyrãk. Nê kakrã htyk. Ǻ kãx o mẽ hinô hkã kot anhỳr. Nê mẽ hkrit kawarti hkrãja te rêãwti krã pyrãk. Nê mẽ hakwa rũm kuwy hpôk mẽ êsôfti mẽ kuwy hkũm axpên kôt hapôx o pa. ¹⁸⁻¹⁹ Nê kawarti jamy axtem te kêp kagã xoprê hkrã pyrãk nhũm mẽ hamy ho mẽ hkamnhar o mẽ kupa. Nê mẽ hakwa rũm kuwy hkũm mẽ kuwy hpôk mẽ êsôfti hapôx xwỳnhhta mã mẽ ho anê nê. Jakamã nhũm kawartijaja mẽ hkôt ri hamy mẽ hakwa ho mẽ hpar o pa nê mẽ ohtô rax kumrêx nê mẽ himex.

²⁰⁻²¹ Tã nom nhũm arĩ mẽ htĩr nê ri mẽ pa xwỳnhjaja. Mê kot mẽ hkwỳjê hpar kêt xwỳnhjaja hãmri ja hã mẽ omunh tã arĩ amnhĩ tomnuj o pa nê kãm urer kêt nê. Arĩ tanhmã amnhĩ tomnuj to ho pa. Axpên pê hprô nê mjên o

amnhikati nê axpên pê ahkî. Nê axpên par o ri pa nê tanhmã axpên xy hto ho pa. Â htÿx ri amnhî nhîpêx anhÿr o pa nê kãm urer kêt nê. Âm Satanasti hkôt pix mã ri amnhî nhîpêx o pa. Nê amnhîm sânti hkwy nhîpêx. Pî ho hipêx nê kâx o hipêx nê kên o hipêx. Nê hipêx pa nê amnhî to hwÿr o pa. Nom mo kot mē mar kaxyw sânti jamak kre? Nê kot mē omunh kaxyw mo no? Nê ri mrar nê mē ho utâr kaxyw mo hte? Na htem arî â amnhî to hwÿr kaprÿ anhÿr o pa.

10

Kagã kaxkep grire jarênh

¹ Tã pa arî mēmoj pumu. Nhûm axte Tirtûm kapêr o wrÿk xwÿnh xihtÿxjê hõja pika hwÿr wrÿk o tē. Nê êja kakrã ho na pre. Nê hkrã mÿ ri mãxwÿxti ajêt. Nê hkuk te myt no kamã hirã htÿx pyrãk. Nê akutã hte kamã te kuwy hpök pyrãk. ² Nê ïhkra kamã kagã kaxkep grire ra pipôt nhûm ma o tē nê o wrÿ nê o xa. Nê gô xujanãr kãm upök rûm hte xãm nê kÿx pê amgrã kamã apke rûm hte xãm nê o xa pa ixprî hã omu.

³ Hãmri nhûm kâx pêe amÿra. Te rêaw hkâr tÿx pyrãk. Nhûm hpãnhã kaxkwa kamã mēhõja kãm kapêr. Te na katôtök o 7 wês pyrãk pa ixprî hã tanhmã kapêr to hã kuma. ⁴ Hãmri nê ra mē amã â kagã kaxyw nhûm mē ja nê inhmã kapêr nê inhmã:

—Kwa nã kwarî ja kot kaj hã kagã hkêt nê. Âm ja pix kot kaj akwÿjê mã hã kagã hkêt nê. Âm kapxipix mãn ama nê ri hã apa.

Anhÿr jakamã pa mē amã hã kagã hkêt nê. Âm papxipix kuma nê ri hã ixpa.

⁵ Tã nhûm Tirtûm kapêr o wrÿk xwÿnh kot gô xujanãr kãm upök rûm hte xãm nê apke amgrã kamã am xwÿnhnta hãmri Tirtûm nhÿ hã kapêr kaxyw nê kãnhmã ïhkra pê. ⁶⁻⁷ Tirtûm pê kaxkwa nê pika nê gô xujanãr o kator nê kamã kot mēmoj piitã ho kator xwÿnhja. Nê hÿr rãhã nê pa ho pa xwÿnhja. Nhûm ÿ hã kapêr nê kapêr o:

—E hãmri. Amnepê mã na pre Tirtûm ÿ hã mē kãm kapêr o ri mē pa xwÿnhjê mã tanhmã amnhî kukamã amnhî jarênh to. Tanhmã kot pika piitã hkôt mē pa xwÿnhjê nhîpêx to hã amnhî jarê. Nê mēmo arigro hã mē kot amnhî tomnuj mÿrapê tanhmã kot mē hipêx to hã mē hkukamã mē hã amnhî jarê. Tã ra â mē hipêx anhÿr xã hã arigro kato. Jakamã koja kapêr o wrÿk xwÿnh kot hitepta ô pifti kakô hãmri nhûm mēmoja â amnhî nhîpêx anhÿr kurê kumrêx. Âm hãmri na pa mē amã ja jarê. Anê.

⁸ Pa mar o ixãm rôm nhûm wam inhmã kapêr xwÿnhnta axte inhmã kapêr nê inhmã:

—E ma pika hwÿr wrÿ nê gô xujanãr kãm upök rûm hte xãm nê amgrã kamã apke rûm hte xãm xwÿnhnta wÿr tē nê kêp kagã kaxkep grire pipôt xwÿnhnta py. Anê.

⁹ Hãmri pa kuma nê ma hwÿr wrÿ nê hã kuwy nhûm inhmã kugô nê inhmã: —E mî. Apy nê akrê. ànhre. Te kot menh xãnh pyrãk. Nom kot kaj akrê nê anhõhy xã. Nom mãmrî apy nê akrê. E mî. Anê.

¹⁰ Hãmri pa kêp kupy nê hkaki nhûm ànhre. Pa hkrêr pa hãmri nê inhõhy xã kurê kumrêx.

¹¹ Hãmri nhûm kot inhmã òr xwÿnhnta inhmã:

—Nã am hãmri na ka apy nê akrê. Jakamã kêr ka ano ho ate mēmoj piitã omunh xwÿnhja nê ajamak o ate mēmoj mar xwÿnhja nê ate tanhmã Tirtûm

kapêr mar toja ka piitã hã kagã hpa. Hãmri nê ate omunh xã hkôt akwÿjê mã piitã harênh o apa. Mê kot nhÿrmã Tirtùm kot tanhmã mê piitã mê hipêx to hã harênh mar kaxyw. Ahpÿnhã ri pika piitã hkôt mê urojê piitã koja nhÿrmã ã mê hipêx anê. Ahpÿnhã ri mê kapêr xwÿnh piitã. Nê mê ô pahijaja. Æm mê piitã koja nhÿrmã ã mê hipêx anê. Anê.

11

Tirtùm nhÿ hã kapêr xwÿnh pijakrut wa harênh

¹ Tã nhÿm mēhōj inhmã mēmoj to mīdi xã hã pī ryre gō nē inhmã:

—E ja py nê Jerujarê hwÿr wrÿ nê kamã Tirtùm mã amnhĩ jarênh xã hã ixkreja o mīdi. Nê ixkre kamã amnepê mē kot amnhĩ tomnuj pãnhã Tirtùm mã ôwêhti nhōr xã hã mēstita mã ho anê nê ho mīdi. Nê ixkre kamã mē kot Tirtùm mã amnhĩ jarênh o mē hkrĩ xwÿnhjaja ka aprĩ hã mē ho kōta.

² —No ixkre kapem pikaja ka ho mīdi hkêt nê. Ra Tirtùm kot mē kot amnhĩ tomnuj xwÿnhjê mã hkaga jakamã koja mē htÿx ri kãm hprãm xã hkôt tanhmã homnu hto ho pa. Nê Jerujarê piitã hkôt ri homnu ho paja ã hã amgrã axkrunêpxi nê hkôt mytwrÿ kêp 6.

³ —Koja Tirtùm ma ÿ hã kapêr xwÿnh ho hamêxkrut nê mê hwÿr wa kumê nhÿm wa ma mê hwÿr wrÿ nê mê kãm Tirtùm kapêr jarênh o ri mê hkôt pa. Hãmri nê tee ri mê kot tanhmã amnhĩ tomnuj to hã mē omu nê hkaprĩ nê. Hãmri nê wa hkaprĩ xàj xak punure kaxô nê haxã nê mê kãm Tirtùm kapêr jarênh o ri wa pa hã amgrã axkrunêpxi nê hkôt mytwrÿ kêp 6. Jakamã e. Pÿja py nê ma mê hwÿr wrÿ nê ixkreta o mīdi. Anê.

⁴ Wa pijakrut wa kot Tirtùm nhÿ hã kapêr jarênh o wa pa xwÿnhnta wa. Na htem wa kot amnhĩ nhĩpêx ã wa harênh ma nê mēmo pī hpàr pē oriwêhti kot tanhmã amnhĩ nhĩpêx toja mã hamaxpêr kurê kumrêx. Nê amnepê m Tirtùm nhÿ hã kapêr o pa xwÿnh pē Jakaris kot kanê hpôk xãmta mã mãânên hamaxpêr. Oriwêhti xōja htwÿm rax kumrêx nhÿm htem htwÿm opôj nê ho kanê ho nyt nê hpôk nê kÿx pē unhwÿ nhÿm mê piitã hirã kamã rīt mex o ri mra. Nê kanê hpôk mexja te kot Tirtùm kapêr pyrãk. Nê kanê xãm xãja te kot Tirtùm nhÿ hã kapêr jarênh o wa pa xwÿnhnta wa urãk. Nê oriwêhtija haxwÿja te kot wa urãk. Ra Tirtùm Karô kot wa hkarô mã ãr jakamã na hte wa hprĩ hã mê kãm Tirtùm kapêr jarênh o pa nhÿm mē kot mar xwÿnhjaja te kanê nhĩrã kamã ri rīt mex nê ri pa pyrã nê hprĩ hã mar tÿx nê.

⁵ Tã koja mēhō tanhmã wa hipêx to kaxyw wa hwÿr tē nhÿm wa hakwa rÿm kuwy hpôk kato nê kot tanhmã wa ho mã xwÿnhnta o hxêt o kupĩ.

⁶ Nê koja wa Tirtùm xãhpumunh tÿx xã ho tanhmã ri mê hã mēmoj nhĩpêx to pē mê kãm kapêr jarênh o ri mê hkôt pa. Jao tanhmã na hto nhÿm mê hã wrÿk kêt ry nê. Rÿ tanhmã mê kêp gô hto nhÿm mê hkamrô hã mê kêp amnhĩ jahkre. Koja wa ã Tirtùm nhÿ hã mê kêp mēmoj nhĩpêx anhÿr ho wa pa. Nê xatã wa kãm hprãm xã hkôt tanhmã mēmoj tomnu hto. ⁷ Nê mê kãm kapêr o pa pē ã mê hipêx anhÿr o wa hã amgrã axkrunêpxi nê hkôt mytwrÿ kêp 6 nê rĩ kormã ho hapêx. Hãmri nhÿm ahkre xupÿm rÿm Satanasti nhō kōwenatōja kato nê ma wa hwÿr tē nê nhÿri pry kahti ri wa unê nê wa kupĩ nhÿm wa pry kamã ty nê nō. ⁸ Hãmri nhÿm mē wa haxãr kêt nê nhÿm wa arĩ pry kamã nō. Krĩ kapem na prem pĩ kahpa hã Jesus nhō nê kupĩ. Krĩ nhō xwÿnhjaja mē kot amnhĩ tomnuj tÿx xwÿnh na mē. Te ho amnepê m krĩ pē Sotô mē pika pē Ejit kamã mē kot amnhĩ tomnuj xwÿnhjê kot amnhĩ nhĩpêx pyrãk. ⁹ Jakamã nhÿm mē kot wa haxãr nê axpên kurê nhÿm wa pry kamã arĩ ty nê nō nhÿm

mē piitā wa hwỳr mra nē wa omu. Nē ahpÿnhã krī piitā hkôt mē pa xwÿnhjaja tanhmã amnhī to nē ja hã wa omu. Ahpÿnhã ri pika piitā hkôt mē urojaja. Nē ahpÿnhã ri mē kapēr xwÿnh piitā. Hãmri arī ahpÿnhã mē ò krī kamã pa htã tanhmã amnhī to nē wa htyk ã wa omunh ã hã apkati axkrunēpxi nē hkôt hã myt ahpa. ¹⁰ Kojã mē wa htyk ã wa omu hãmri nē hkĩnh nē. Nē hkĩnh xàj xpēn mã hkĩnh xà nhõr o pa. Wa kot kormã htĩr ri tanhmã mē homnuj to ho ri mē hkôt paja mã hamaxpēr nē wa htyk ã wa omu nē hkĩnh tÿx nē.

¹¹ Tã koja wa htyk ã apkati axkrunēpxi nē hkôt hã myt ahpa hãmri nhũm Tirtũm wa kamã htÿyxã rē nē akupÿm wa ho wa htĩr nhũm wa kãnhmã xa nē ri mra. Hãmri nhũm mē kot wa omunh xwÿnhjaja tee ri hã wa omu nē kãm wa uma htÿx kumrēx. ãm kãm wa uma ho kãm wa uma.

¹² Hãmri nhũm kaxkwa kamã mēhõja wa kãm kapēr nē wa kãm:

—E war amnē mē ixwÿr war api. Anē.

Hãmri nhũm wa kuma nē ma kakrã kamã àpir o mō. Nhũm mē kãm wa hkurē xwÿnhjaja tee ri wa àpir ã wa omu.

¹³ Hãmri nhũm pika httert tÿx nē. Nē krī kamã ixkre ohtò nē grãnh pa nē mē hkwy nhĩmex rax nē nhũm mē ohtò rax kumrēx nē axkaprã. Mē kēp 7.000 nē pikaprãr pa. Hãmri nhũm arī mē htĩr nē ri mē pa xwÿnhjaja tee ri mē omu nē kãm ma xàj httert tÿx nē xpēn mã:

—Kwa Tirtũm mãn ã mē panhĩpēx anē. Hihtÿx o hihtÿx jakamã kaxkwa rũm ã mē panhĩpēx anē pu mē pahpiitã pano ho ixkre pigrãnh ã omu. Anē.

¹⁴ E na ra amnhī xà htÿx kamã hamak xàja hamēxkrut nē hapēx. Tã no ãm arī mē kaxyw pyxi nē arĩk.

Mē kot pifti kot hitep kakôr ã harēnh

Apokarip 4.8, 5.9-14, 7.9-12, 14.2-5, 15.3-4, 19.1-2

¹⁵ Tã nhũm Tirtũm kapēr o wrÿk xwÿnh kot hitepja ò pifti kakò nhũm kaxkwa kamã mē pa xwÿnhjaja kãx pē kapēr o:

E ãm hãmri. Na ra Mēpahpãm Maati mē Jejus Krisja wa kēp krī piitã hkôt mē piitã mē ò Pahihti na wa.

Koja Mēpahpãm Maatija kēp Pahi Maati rãhã nē pa ho pa xwÿnh. Anē.

¹⁶ Hãmri nhũm mē àptàr tũm pē 24jaja. Tirtũm kot mē pahto amnhĩptàr o hkrĩ xà mã hipòk nē mē hkrĩ xwÿnhjaja. Hãmri ã mē kapēr anhÿrja ma nē Tirtũm ã hpjaam kaxyw hpar pē rōròk pa nē htu mÿr pē hikwÿ. Hãmri nē kãm mex o mex ã harē nē kãm:

¹⁷ Pa Pahi Maati Tirtũm. Nã ãm hãmri mē ixrom axãhpumunh o axãhpumunh nē axihtÿx o axihtÿx.

Amnepē mã kormã mēmoj kēt ri na ka pre arãhã apa ho apa.

Tã arī arãhã apa ho apa.

ãm hãmri apē mē ixpiitã mē ixto amnhĩptàr xwÿnh. Nã ãm hãmri amex o amex.

¹⁸ Kot kaj tokyx mē piitã tanhmã mē kot amnhī nhĩpēx to ho pa hã mē omunh xà hkôt tanhmã mē harēnh to.

Nē ra mē htyk xwÿnhjaja kot kaj mē piitã akupÿm mē ho mē htĩr pa nhũm mē pika rũm hapòx pa nē ma mra nē arī mē htĩr xwÿnhjē nhĩhkò hã akutã hkrĩ pa.

Ka mē piitã mē omu nē tanhmã mē kot amnhī nhĩpēx to ho pa hã mē omunh hkôt tanhmã mē harēnh to.

Mē kot amnhī tomnuj xwŷnhjaja kot kaj ma mē kot amnhī xà htỳx kamā hamak o pa htũm xà hwŷr amnhī nē mē arē nhũm mē ma hwŷr hapêx. Hāmri nē tee ri amnhī kukamā hamaxpêr nē gryk tỳx kumrêx.

Ka hpānhā mē kot akôt amnhī xunhwŷr nē akapêr kôt amnhī nhîpêx o mē pa xwŷnh piitā mē omu nē tanhmā mē ho mex to.

Mē kot amnhī to rūnh xwŷnhjaja nē mē kot amnhī to hkryre xwŷnhjaja.

Nē amnepêm mē kot anhy hā mē kapêr o mē pa xwŷnhjaja.

Akrajē piitā kot atā hpijaam xwŷnhjaja kot kaj kormā mē htũr ri tanhmā amnhī to mex hā mē omunh xà hkôt tanhmā mē ho mex to.

Ā kot kaj tokyx mē piitā ahpŷnhā mē omunh xà hkôt mē hipêx anē. Anē.

¹⁹ Hāmri nhũm kaxkwa kamā Tĩrtũm nhõrkwŷ hā hakwakre kahê xà amnhī mē pa kamā ôr o mēs kunih̄tita pumu. Pu nhũm na hkatõtøk nē haxênh nē hkrakrak nē na mē te kot jêr krā hakotre pyrāk xwŷnhja pikap rôrøk rax nē. Nē pika httertet tỳx o httertet tỳx pa arī omunh o xa.

12

Mēhō ni mē kagāmnuti wa harēnh

¹ Tā pa axte mēmoj pumu. Kaxkwa kamā aa mē pahte mēmoj pumunh kêt xwŷnhja pa omu. Nhũm mēhō nija xê te myt no mā hirā htỳx pyrāk. Nē hpar nhõkwa kamā mytwrŷre ajêt. Nē kanhêti ho 12 o mē ahkà tu nē o xa. ² Na ra htujarō nē hpijagri kaxyw ôhy xà nē amnhī kamnhêr o xa.

³ Tā pa axte mēmoj pumu. Aa mē pahte mēmoj ā kot anhyr pumunh kêt xwŷnh ôja pa omu. Kagāmnuti nom âm axtem hka kamrêk tỳx kumrêx. Nē rax kumrêx. Nē hkrā kêp 7. Nē hkrā piitā kamā ôr o pahi hā mē ahkà htu nē o nō. Nē hkrā kamā pâr kêp 10.

⁴ Tā nhũm hamy ho apêr o kaxkwa kamā kanhêti ho ohtō nē pikap kurê. Hāmri nē ôhy xà nē amnhī kamnhêr o âm xwŷnhhta wŷr tē nē hkra kator nhũm kot kêp krêr kaxyw kutā hamār o nō.

⁵ Hāmri nhũm hkra kato nē myre. Hihtỳx o hihtỳx ā kot pika piitā hkôt mē piitā mē ho amnhîptâr mā xwŷnh na pre. Nhũm kagāmnutija kot kêp utâr nē hkrêr mā tā nhũm Tĩrtũm kapêr o wrŷk xwŷnhjê hõja hwŷr wrŷ nē kêp kumŷ nē ma Tĩrtũm wŷr kaxkwa kamā kot mē pahto amnhîptâr ā hkrī xà maatija wŷr ho api.

⁶ Hāmri nhũm kagāmnuti tee ri ma kot kêp o mōr ā omu nē hpānhā nita o apkjê nē kot tanhmā ho kaxyw nhũm amnhī tā omu nē umaj hprôt nē ma tē nē nhŷri kapôt ā amũxu. Ra Tĩrtũm kot hkukamā kām hpimxur xà nhîpêx xà hwŷr hprôt nē ma tē nē kamā kêp amũxu. Nhũm Tĩrtũmja nē kagā pumunh mex nhũm kêp hpimxur mex ā angrà axkrunêpxi nē hkôt hā mytwrŷ kêp 6.

Mē kot kaxkwa kamā mēkarōmnuti kurê kaxâr ā mē harēnh

⁷ Tā nhũm mē ra kaxkwa kamā kurê kaxâr kaxyw. Kagāmnuti mē hkwyjaja nhũm mē ra Tĩrtũm kurê kaxâr kaxyw kutā amnhī xunhwŷ. Jakamā nhũm Tĩrtũm kapêr o mē wrŷk xwŷnhjê hkrāhtũm Mikewja ma mē hwŷr amnhī kôt hkwyjê o mra nē mē pijapu ho kuhê.

⁸ Hāmri nhũm kagāmnuti tee mē kutā amnhī to htỳx kaprŷ nhũm Tĩrtũm kapêr o mē wrŷk xwŷnhjaja amnhī nē mē ho axtem nē kaxkwa rũm mē kator o mē kator.

⁹ Satanasti pê kagâmnutita kagâ kot ni kator ewa mâ hêx xwýnh na pre. Nê hêx rom tanhmâ hêx to ho pa xwýnh. Jakamâ nhùm Mikew mê hkwyjaja hkwyjê mê mê ho hpimràâtâ amnhî nê pikap mê rênh pa.

¹⁰ Hâmri nhùm kaxkwa kamâ mēhōja axte kâxpê kapēr nê kapēr o: E âm hāmri. Na ra Tirtūm hihtýx o hihtýx o mê panê mēmoj punuj piitâ ho hapêx par kumrêx.

Na pre hte Satanasti pê mēkarōmnutija xatâ hwýr mra nê kām tanhmâ Jejus kwýjê ho kapēr punuj to ho pa.

Tâ koja axte mê ho kapēr kêt kumrêx. Ra Tirtūm kot amnhî nê kator o kator nhùm ra ma mōr kēnā.

Koja Tirtūm pika piitâ hkôt mê ho amnhîptâr xwýnhjê japôx pa nê hpānhâ mê kaxyw Kra Krisja xām nhùm pika piitâ hkôt mê ho amnhîptâr rāhā ho pa.

Nā âm hāmri. Ja mex o mex.

¹¹ Na pre Jejus kôt mê pahtō nê mê pahtōxjaja mēkarōmnuti kutâ amnhî to htýx nê pa. No âm amnhî nhý hā ā kutâ amnhî nhîpêx anhýr kêt.

Mê pahte amnhî tomnuj pānhâ amnhîrer xwýnhnta na pre ty nê hkamrô ho mê kuhô nê mê nê mê kot amnhî tomnuj o hapêx.

Jakamâ nhùm prem kukwak ri Satanasti kutâ amnhî to htýx rāhā pa.

Nhùm mê kot Jejus ā mê himex par kaxyw tâ nhùm mê kām htyk pyma hkêt nê. Âm Jejus kôt arī amnhî to htýx nê mê hkôt pa rāhā nê.

Jaο arī mê kām Jejus kot mê panê tanhmâ amnhî nhîpêx to hā harēnh o ri mê hkôt pa.

¹² Tâ Tirtūm ra kot mê panê mēmoj punuj o hapêx par jakamâ kwa kaxkwa kamâ mê apa xwýnhjaja kēr ka mê akīnh nê apa.

Nom gō xujanār kām nê pika kamâ mê pa xwýnhjaja hêxta waa nê. Koja mê mex kêt nê.

Nê ra Mikew mê hkwyjaja kot amnhî nê kaxkwa rüm mēkarōmnuti mê hkwyjê kator nê pikap mê rênh par jakamâ nhùm Satanastija gryk týx kumrêx.

Tirtūm kot ma mê kot amnhî xà htýx kamâ hamak o pa tūm xàta wýr mēnh xà hā arīgro hwýr amgrà grêre nhùm tee ri amnhî kukamâ hamaxpēr nê gryk týx o gryk týx. Anê.

¹³ Hâmri nhùm kagâmnutija mê kot amnhî nê kaxkwa rüm kator ā amnhî pumu nê gryk týx nê. Nê gryk xà ma akupým ni kot hkra myre ho pijagri xwýnhnta wýr tē nê tanhmâ ho kaxyw hkôt ho krihkrit.

¹⁴⁻¹⁶ Hâmri nhùm Tirtūm kapēr o mê wrýk xwýnhjê hōja omu nê nija mâ àanhāhti jara gō. Kot kagâmnuti pê ho htor nê ma nhýri hpimxur xà wýr htēm kaxyw. Nê kormā htor kaxyw nhùm kagâmnuti omu nê kot gō ho hanhîr kaxyw hkôt hakwa rüm gō kapī nhùm hpikapîr rax kumrêx. Te pyhti hprôt týx pyrāk. Hâmri nhùm Tirtūm omu nê nija nê tanhmâ pika hto nhùm kām axkjê nhùm gō hprôt nê kamâ pikapîr pa. Jakamâ nhùm mex pê àanhāhti jara ho to nê ma kapôt ā pimxur xà hwýr ma tē. Nê kamâ pa hā amgrà axkrunēpxi nê hkôt mytwrý kēp 6 nhùm prem hamār mex rāhā ho pa.

¹⁷ Hâmri nhùm kagâmnuti tee ri kām hpîr prām kaprý nê gryk týx kumrêx. Hâmri nê ma ni hkwyjê hwýr mō. Mê kot Tirtūm mê Jejus wa hkôt amnhî nhîpêx o mê pa xwýnhjê hwýr tanhmâ mê homnuj to kaxyw ma mê hwýr mō. Hâmri nê tanhmâ kot mê ho kaxyw gō xujanār my ri nō.

13

*Satanasti nhõ kôwenatô wa kot gô xujanâr rûm kator ã wa harênh
Sikûn Tesarôn 2.3-5*

¹ Tã pa axte mêmoj pumu. Nhûm gô xujanâr rûm Satanasti nhõ kôwenatôjê hõja te mrymnuti pyrã nê ãpir o mô. Kagãmnuti pyrã nê hkrã kêp 7. Nê urãk nê hpãr kêp 10. Nê hpãr piitã kamã pahi hã mē ahkã. Nê ahkã piitã hã axtem tanhmã Tirtûm o kapêr punuj to nê tanhmã haprÿ hto hã kagãja hikwÿ.

² Nê hkã te kêp ropkrorti kã pyrãk. Nê hakwa te kot rêãwti jakwa pyrãk. Nê ìhkra te kot pãati nhìhkra pyrãk. Jakamã na pre kagãmnuti nhÿ hã hihtÿx o kêp pahi hã pika nhõ xwÿnhjê ho amnhÿptâr o pa.

³ Nê hkrã hõ te mē kot hayr o hpÿr nhûm ra akupÿm htÿr nê arÿ hayr xã wakre rã nyw pyrãk. Jakamã nhûm pika kamã mē pa xwÿnhjaja amnhÿ jaêr pē omu nê kamã no pyma nê. Hãmri nê hkôt amnhÿ nhÿpêx o pa.

⁴ Hãmri nê kagãmnuti kot tanhmã mrymnuti ho nhûm ÿ hã mē ho amnhÿptâr jakamã nhûm mē piitã hamē wa hã hpijaam kaxyw wa kãm wa mex o wa mex ã wa harênh o pa. Nê mrymnuti hã axpên mã:

—Hêxta waa nê. Mē pahô na mē pahte mrymnutita pyrã nê ã mē pahte amnhÿ nhÿpêx kot anhÿr? Mē pahô kot pu kutã xa nê paxihtÿx o hkurê kapa? Nã amrakati kumrêx. Anê.

⁵⁻⁶ Hãmri nhûm Satanasti tanhmã mrymnuti ho nhûm kapêr o ri mē hkôt pa nê mē ho amnhÿptâr o hã amgrã axkrunêpxi nê hkôt mytwrÿ kêp 6. No ãm axtem nê Tirtûm o kapêr punuj o ri mē hkôt pa. Nê ri tanhmã haprÿ hto nê ô krÿja mex kêt ã harênh o ri mē hkôt pa.

⁷ Hãmri nhûm Satanasti ra kot mē hkurê kaxãr kaxyw kãm anê nhûm axtem nê Tirtûm pē hkrajê kutã amnhÿ xãm nê mē hwÿr hprôt nê tanhmã hpijapu hto ho pa nê mē ho axtem nê mē ho krihkrit pa nê ahpÿnhã ri pika piitã hkôt mē uro hkwyjê ho amnhÿptâr o pa. Nê ahpÿnhã mē kapêr xwÿnh piitã mē ho amnhÿptã.

⁸ Jakamã nhûm mē ohtô rax kumrêx nê mrymnuti hkôt amnhÿ nhÿpêx. Nê kutã hkôn krã ho rôrôk nê hkrÿ nê kãm mex o mex ã harê. No ãm mē piitã hkêt. Kot mē pahte amnhÿ tomnuj pãnhã amnhÿrer xwÿnh kôt ra mē kot amnhÿ xunhwÿr xwÿnhjaja tapxipixjaja na prem hkôt amnhÿ xunhwÿr kêt nê. Amnepê mã kormã amrakati ri Tirtûm mē Jesus wa ô kagã kamã mē htÿr tûm nê mē pa mã xwÿnh nhÿxi xwÿnh pixjaja na prem mrymnuti pumu nê hkwyjê rom hprÿ hã kot amnhÿ nhÿpêx ã omunh kurê kumrêx nê hkôt amnhÿ nhÿpêx kêt nê.

⁹ E ka mē atô axumar kaxyw ajamak kre hã kot kaj ixujarênh piitã ama nê kãm ajamaxpêr tÿx rãhã ho apa.

¹⁰ Jakamã kwa Tirtûm kôt ixkwÿjaja. Kwãr mē mãmrÿ mē apynê nê mē ajagjê. Nê kwãr mē mãmrÿ wapo ho mē ajayr o mē apa.

Nom kêr ka mē umaj ixkaga hkêt nê. Ixkaga hkêt o ixkaga hkêt.

Mê ãm ixkôt pix mã amnhÿ nhÿpêx o ri apa rãhã ty.

*Pika rûm mrymnuti hõ kator ã harênh
Makre 13.22*

¹¹ Tã pa mrymnuti hõ pumu. Nom wamta pyrã nê gô xujanâr rûm kator kêt axtem pika rûm kato. Nê ôwêhti hkrare pyrã nê hpãr pijakrutre. Nê te ho kagãmnuti kapêr tÿx pyrã nê kapêr tÿx kumrêx o pa.

¹² Gô xujanâr rûm mrymnuti xãpir xwÿnhhta nhÿ hã pika nhõ xwÿnhjê mã kapêr tÿx nê mē kãm:

—E pika piitã hkôt mẽ apa xwýnhjaja mẽ inhma. Kêr ka mẽ kot hkrã hõ jayr o hpîr nhùm akupým htîr xwýnhnta kôt pix mã amnhî nhîpêx rãhã ho ri apa. Nẽ kãm mex o mex ã harênh rãhã nẽ.

Anhÿr o mẽ kãm kapêr. ¹³ Hãmri nẽ Satanasti nhÿ hã mẽ kãm aa mẽ kot mẽmoj pumunh kêt kwý ho anhÿr o pa. Jao kaxkwa rùm tanhmã mẽ kãm kuwy ho wrýk to nhùm pikap rôrôk nhùm mẽ amnhî jaer pẽ omu nẽ kamã no pyrna nẽ. ¹⁴ ã ri mẽ noo mã mẽ kãm amnhî nhîpêx anhÿr o ri mẽ hkôt pa. Gõ xujanãr rùm mrymnutija noo mã ã hêx rom amnhî nhîpêx anhÿr o mẽ no kupyrr o pa nhùm mẽ omu nẽ hkôt amnhî nhîpêx. Hãmri nhùm mẽ kãm mẽmoj tã karõ nẽ mẽ kãm:

—E wam mrymnutita. Mẽ kot hkrã hõ jayr o hpîr nhùm akupým htîr xwýnhnta kêr ka mẽ kãm hkarõ nhîpêx nẽ ho mẽ anhõ sãnti. Kẽ mẽ piitã hwÿr mra nẽ kutã hkõn krã ho rôrôk nẽ hkrî nẽ amnhî to kuwy nẽ kãm mex o mex ã harẽ.

Anhÿr o mẽ kãm hã karõ. ¹⁵ Hãmri nhùm mẽ kuma nẽ mar xã hkôt hipêx nẽ ãm nhùm xa. Hãmri nhùm mrymnuti kot hitepta omu nẽ hwÿr tẽ nẽ tanhmã ho nhùm ra kapêr nẽ mẽ kãm:

—E kêr ka mẽ kot inhmex ã ijarênh kêt xwýnhjê pynê nẽ mẽ himex pa. Anẽ.

¹⁶ Hãmri nhùm pika rùm mrymnuti kator xwýnhnta haxwÿja mẽ kãm kapêr nẽ mẽ kãm:

—E koja ixkwÿjaja inhÿ hã mẽ apiitã mẽ apê ixkwý hã mẽ akagã. Mẽ ate amnhî to rûnh xwýnhjaja nẽ mẽ ate amnhî to hkryre xwýnhjaja. Nẽ amari mẽ kãm mẽ axapênh xwýnhjaja nẽ amnhî mã mẽ axapênh xwýnhjaja. Nẽ mẽ akãxpore rûnh xwýnhjaja nẽ mẽ apê amrakati xwýnhjaja. Kojã mẽ apiitã mẽ akagã hpa. Mẽ akwý nhõkrã kagã nẽ mẽ akwý xupôk rùm mẽ anhîhkra katut kagã.

¹⁷ —Gõ xujanãr rùm mrymnutita nhîxi kot paj mẽ atã hipêx. Rÿ hixi hã nùm nhîpêx. Hãmri ka mẽ axãpkur xã japrôr kaxyw nhÿhÿm mra nhùm mẽ atã hixita pumu nẽ rî kormã mẽ amã mẽmoj kwý ho wênê ka mẽ amnhîm haprô nẽ ho axãpkur o ri apa. Nẽ mẽ ate mẽmoj to wênê xwýnhjaja koja mẽ apê mẽmoj japrôr kaxyw mẽ awÿr mra ka mẽ tee ri nhÿhÿnh mẽ hã hixi japêr hãmri nẽ mẽ kãm mẽmoj to wênê hkêt nẽ. ãm nhÿhÿnh mẽ atã hixi hã kagãta pumunh pix kukwak ri kot kaj mẽ awjaprô rÿ mẽmoj to wênê. Anẽ.

¹⁸ E kwa kêr ka mẽ ixte mẽmoj pumunh nẽ mẽ amã hã kagãta pumu nẽ ama nẽ kãm ajamaxpêr tÿx o apa. Mrymnutita nhîxi na kêp nùm. Nùmja kêp 666. E kaj mẽ akrã hi mex xwýnhjaja kot kaj mẽ aprî hã ja mar tÿx kuré kumrêx.

14

Tirtum mex ã mẽ grer Apokarip 7.1-8

¹ Tã pa axte mẽmoj pumu. Nhùm mẽ pahte amnhî tomnuj pãnhã amnhîrer xwýnhja hixêt pẽ Siãwja nhîmök ã xa. Nẽ puhã mẽ ohtô rax kumrêx nẽ kuhê. Mẽ ohtô ho mẽ ohtô. Piitã kamã mẽ kêp 144.000. Nẽ piitã ôkrã hã mẽ pahte amnhî tomnuj pãnhã amnhîrer xwýnh mẽ Hipêêxa wa hixi jaxwÿr pa mẽ omu.

² Nhùm mẽ kaxkwa kamã grer o kuhê. Mẽ grerja mex o mex. Te kot gõ hprôt tÿx hkoko htÿx pyrãk. Nẽ te na katõtök tÿx pyrãk. Nẽ te wiorãw môr xwýnhjaja kot hkakrênh mex pyrãk pa mẽ mar o xa.

3 Nē mē grer xwýnhjaja. Jejus puhā mē ohtô rax kumrēx nē mē kuhē xwýnhjaja na prem Tirtūm kot mē ho amnhīptār ā hkrī xàta kuri grer o kuhē. Nē mēmoj tīr pē kwat xwýnhjē mē mē àptār tūm pē 24jē kuri grer o kuhē. Mē grer nyw o gre. Ām mē tapxipixjaja mē kot mē grer nywja mar. Ra mē kēp Tirtūm kra hā mē kot mē ôkrā hā Tirtūm mē Kra Jejus wa hixi ā kagā nhūm Tirtūm kot ra mrymnuti mē hōta wa kēp mē utār nē amnhī wýr mē ho àpir xwýnh na pre mē. Ām mē tapxipixjaja mē grer nywja ma nē wa kām ho grer o kuhē.

4-5 Na prem tām amnhī nhīpēx nē Tirtūm kōt amnhī nhīpēx rāhā ho pa. Te mē kot amnhī prō pix tānopxar rāhā ho pata pyrāk. Nē ri tanhmā hēx to rý tanhmā ri amnhī tomnuj to ho pa hkēt nē. Ām tām ri amnhī nhīpēx mex o pa. Mē kēp Tirtūm mē mē pahte amnhī tomnuj pānhā amnhīrer xwýnh kwý jakamā na prem mē pahte amnhī tomnuj pānhā amnhīrer xwýnhhta kōt pix mā amnhī nhīpēx o pa. Jakamā na prem mrymnuti kutā rôrōk nē kām mex o mex ā harēnh kēt nē. Tā mē kumrēxjaja Tirtūm mē Kra wa kuri wa kām grer o kuhē.

Tirtūm kapēr o wrýk xwýnh pijakrunēpxi jarēnh

6 Tā pa axte Tirtūm kapēr o wrýk xwýnhjē hō pumu nhūm kýx pē ri htor o pa. Ahpýnhā ri pika piitā hkōt mē uro hkwyjē hkōt. Na ahpýnhā ri mē kapēr xwýnhjē piitā mē hkōt mē kām Tirtūm kot tanhmā mē hipēx to hā harēnh kaxyw. Ahpýnhā mē kapēr xwýnh piitā mē kām harēnh o pa. Nē htor o pa pē kýx pē mē kām kapēr nē mē kām:

7 “E na ra Tirtūm mē ate amnhī tomnuj mýrapē tanhmā mē ato kaxyw. Jakamā kwa mē tokyx hā apijaam kaxyw akōn krā ho arôrōk nē akrī nē kām mex o mex ā harē. Kēp mēmoj piitā ho kator xwýnh na. Na pre kaxkwa ho kato nē pika ho kato nē gō xujanār o kato nē hino ho kato nē mēmoj piitā ho kator pa. Jakamā kwa kēr ka mē tapxipix ā mān apijaam nē kām mex o mex hā harēnh rāhā ho apa.”

Anhýr o mē kām kapēr. 8 Hāmri nhūm hōja wamta kōt tē nē urāk nē kýx pē mē kām kapēr o:

—Koja Tirtūm tokyx Papirōn grānh pa. Na hte krī nhō xwýnhjaja amnhī tomnuj pix rāhā ho pa. Mē kot amnhī nhīpēx te mē kot kagōxyhti ho hkōm nē amnhī mē mē piitā mē kām ōr nē ho mē ho pipānh pyrāk. Na htem mēnijē piitā ho amnhīkati o pa. Nē amnhī kwýjē pē mē hprō ho amnhīkati. Nē amnhī mē pika piitā hkōt mē pa xwýnhjē mā anhýr o pa. Mē kot mē urāk nē ā amnhī nhīpēx anhýr o pa kaxyw mē kām anhýr o pa. Ja mýrapē na ra Tirtūm kot tanhmā mē ho kaxyw mē hā amnhī jarē. Anē.

9 Tā nhūm wa hkōt hōja tē nē wa urāk nē kàx pē pika nhō xwýnhjē mā kapēr nē mē kām:

—E mē ate mrymnuti kutā akōn krā ho arôrōk nē akrī nē kām mex ā harēnh xwýnhjaja. Nē mē ate karō nhīpēx nē kutā akōn krā ho akrī nē kām mex ā harēnh xwýnhjaja. Nē mē anhōkrā nē mē anhīhkra hā hixi hā kagā xwýnhjaja.

10-11 —Tirtūm na tee ja hā mē apumu nē mē akamā gryk týx kumrēx. Mē ate kapēr kuhpa hā mrymnuti hkōt amnhī xunhwýr jakamā nhūm mē akamā gryk týx o mē akamā gryk týx. Jakamā koja kuwy hpōk rāhā ho rāhā xwýnhhta kamā mē arēnh aa pa mē amnhī xā htýx kamā ajamak rāhā apa ho apa. Koja kuwy hpōkja aa hapēx kēt nē kurūm kàx mā hkūm àpir o pa rāhā nē. Koja ā mē ate amnhī tomnuj o mē apa xwýnhjē nhīpēx anē ka mē kamā apa ho apa nē aa kurūm ajapōx kēt nē kamā amnhī xā htýx kām ajamak rāhā apa ho

apa. Arĩgro hãn kamàt kãm arĩ ã amnhĩ nhĩpêx anhÿr rãhã apa ho apa. Mẽ ate gój rùm mrymnuti mẽ hkarõ ho sãnti wa kutã akõn krã ho arõrõk nẽ akrĩ nẽ wa kãm wa mex ã wa harẽnhja mÿrapê kot kaj mẽ ã amnhĩ nhĩpêx anẽ. Kot mẽ pahte amnhĩ tomnuj pãnhã amnhĩrer xwÿnh mẽ Tirtùm kapêr o mẽ wrÿk xwÿnhjê noo mã kot kaj mẽ ã amnhĩ nhĩpêx anhÿr o apa.

¹² Anhÿr o mẽ kãm kapêr jakamã kwa kër pu mẽ pahte Tirtùm kõt amnhĩ xunhwÿr xwÿnhjaja mẽ hkukamã mẽ harẽnhja ma nẽ Tirtùm kapêr kõt pix mã amnhĩ nhĩpêx rãhã ho ri papa. Mẽ kot tanhmã hã mẽ pahto htã pu mẽ hkaga hkêt nẽ amnhĩ kaxyw Jejus kõt pajamaxpêr tÿx rãhã nẽ. Hãmri nẽ nhÿrmã mẽ kuroom ma õ krĩ hwÿr api nẽ kamã pamex kumrêx nẽ papa ho papa.

Mẽ kêp Jejus kwÿ hã mẽ htyk xwÿnhjê jarênh

Wam Tesarõn 4.16

¹³ Tã nhũm kaxkwa kamã mẽhõja axte inhmã kapêr nẽ inhmã:

E Juãw. Kêr ka ã akwÿjê mã mẽmoj tã kagã anẽ nẽ mẽ kãm hã kagã ho: “E mẽ ate Tirtùm kõt ri amnhĩ nhĩpêx xwÿnhjaja. Mẽ kot Tirtùm ã mẽ apar nhũm mẽ atyk tã koja amnhĩ tã mẽ ato mex rax kumrêx.” Anhÿr o mẽ kãm hã kagã.

Anhÿr o inhmã kapêr. Hãmri nhũm Tirtùm Karõja kuma nẽ kãm:

—Nã ãm hãmri na ka ã mẽ harẽnh anẽ. Ra Tirtùm kot amnhĩ tã mẽ omunh rãhã ho pa. Mẽ kot kõt pix mã amnhĩ nhĩpêx o pa pẽ mẽ kãm mẽ hkurê xwÿnhjê kutã amnhĩ to htÿx rãhã htykja nhũm Tirtùm kot amnhĩ tã mẽ omunh mex. Koja mẽ ho mex kumrêx. Mẽ kot Jejus ã mẽ hpar tã koja mẽ ho mex rax nẽ nhũm mẽ kuri mex rãhã nẽ pa ho pa nhũm mẽhõ axte tanhmã mẽ ho hkêt nẽ. Anẽ.

Tirtùm kot tanhmã mẽ kãm hkĩnh xwÿnhjê nhĩpêx to

¹⁴ Tã pa axte mẽmoj pumu. Kaxkwa kamã kakrã jakajre pumu. Nẽ kamã mẽhõj te panhĩ pyrã nẽ nhÿ. Nhũm õr o pahi hã mẽ ahkã htu nẽ kuteere xwagixre py nẽ o nhÿ.

¹⁵ Hãmri nhũm kaxkwa kamã Tirtùm kapêr o mẽ wrÿk xwÿnhjê hõja Tirtùm mã amnhĩ jarênh xã hã ixkre rùm kato nẽ kakrã jaka kamã ÿr xwÿnhnta mã kapêr. Kãx pẽ kãm kapêr nẽ kãm:

—E pika nhõ xwÿnhjaja te mẽ hpur kãm mẽmo hy ra hkamrêk nẽ hikênh mã mex pyrãk. Jakamã anhõ kuteere ata py nẽ ma mẽ hkõt tanhmã ri mẽ ho ho ri mẽ hkõt apa. Te mẽ kot mẽmo hy nhĩkênh o ri pa pyrãk o mẽ hipêx nẽ ma ho mẽ himex o ri apa. Anẽ.

¹⁶ Hãmri nhũm kuma nẽ pika piitã mÿri õ kuteere ho apê nẽ te mẽmo hy jakãr pyrãk o mẽ hipêx.

¹⁷ Hãmri nhũm axte Tirtùm mã amnhĩ jarênh xã hã ixkre rùm kapêr o mẽ wrÿkjê hõja kato. Ìhkra kamã kuteere xwa gixre py nẽ o xa. ¹⁸ Hãmri nhũm axte hõja ixkre rùm kẽ hkõt kato nẽ hkukamã kator xwÿnhnta mã kapêr. Kãx pẽ kãm kapêr nẽ kãm:

—E na ra Tirtùm tanhmã mẽ kot amnhĩ tomnuj to hã tanhmã mẽ hipêx to kaxyw. Te mẽ kêp mẽ hpur kãm mẽmo xõ pẽ uwa ra hkamrêk nẽ rênh mã tãm pyrãk. Jakamã ma pika hwÿr mẽ hwÿr wrÿ nẽ mẽ hkõt ri anhõ kuteere ho mẽ himex o ri apa. Anẽ.

¹⁹ Hãmri nhũm kuma nẽ ma pika hwÿr wrÿ nẽ mẽ hipêx o te mẽ kot uwa xõ rênh nẽ prês kãm hkapĩr nẽ kagõ janênh pyrã nẽ mẽ hkõt ri kuteere ho mẽ hpar o pa. Tirtùm ra mẽ kamã gryk tÿx o mẽ kamã gryk tÿx jakamã nhũm ã mẽ hkõt mẽ hipêx anhÿr o ri pa.

²⁰ Jakamā nhūm mē hkamrō hpikapīr rax kumrēx o uwa kagô jakre. Te ho pyhti hprōt o nōr pyrāk. Jao upým o 2 met nē hkôt ho mēj met. Nom hprōt xā hkôt ry rax o ry rax. Ho 300 kirōm. Nhūm ā mē kamrō hprōt rax anē.

15

Tīrtūm mex ā mē grer

¹ Tā pa axte kaxkwa kamā mēmoj pumu. Hāmri nē amnhī jaēr pē omu nē tee ri hkukamā ijamaxpēr. Aa mē pahte mēmoj ā kot anhyr pumunh kēt xwýnh pa pre omu. Nhūm Tīrtūm kapēr o mē wrýk xwýnh pē 7jaja ahpýnhā pika hkôt mē kot amnhī tomnuj xwýnhjē homnuj kaxyw akuprō nē kuhē. Ām jajē pixjaja koja Tīrtūm nhý hā axte tanhmā mē homnuj to nē ho anhyr pa hāmri nhūm ra ja hapēx o hapēx.

² Jakamā pa axte Tīrtūm kapem gō rax pumu. Te kot kax karýr jaxēnh mē kuwy hpōk o pihkār pyrāk xwýnhja hprōt o nō. Nhūm Tīrtūm kra hkwyjaja gō mý ri ohtō rax kumrēx nē kuhē. Na pre ra mrymnutija tee ri amnhī kôt mē rēnh mā nē tee ri mē hā amnhī nhīxi hā kagā hprām kaprý nom nhūm mē hkaga nē Jesus kôt amnhī nhīpēx rāhā ho pa. Nē mrymnuti karō ho sānti mā mex ā harēnh kēt rāhā ty nē kaxkwa hwýr api. Jakamā nhūm Tīrtūm amnhī tā mē omu nē mē kām wiorāwti hkwy gō nhūm mē piitā hamý nē gō rax mý ri ho kuhē.

³ Hāmri nē Tīrtūm mā tanhmā amnhī to ho pa xwýnh pē Mojes mē mē pahte amnhī tomnuj pānhā amnhīrer xwýnhhta wa kot Tīrtūm mā grerta nhūm mē Tīrtūm mā ho grer o kuhē nē grer o:

E Pahi Maati Tīrtūm. Na pa mē ra inhmex pē awýr ixàpir pa.

Ām hāmri na ka hte tanhmā amnhī nhīpēx to ho ri apa.

Aa tanhmā axēx to hkēt.

Nē mē ixrom axihtýx o axihtýx.

Nē mē ixrom axāhpumunh o axāhpumunh.

Jakamā na ka hte mē inhmā aa mē ixte mēmoj pumunh kēt kwý ho anhyr o apa.

Pika piitā hkôt ahpýnhā mē ho amnhīptār xwýnhjē nhō Pahi Maati na ka.

Nē ate tām amnhī nhīpēx xwýnh na ka.

⁴ Jakamā na htem piitā atā hpijaàm o pa.

Nē amā mē kapēr xàptār pix o amā kapēr.

Nē amā amex o amex ā ajarēnh rāhā nē. Ām hāmri mē ixrom kapxpix amex o amex.

Jakamā koja ahpýnhā pika piitā hkôt akrajē piitā ate tām amnhī nhīpēx nē tām mē piitā tanhmā mē harēnh to hā ajarēnh ma nē awýr mra nē akutā hkōn krā ho rôrōk nē hkrī nē amā amex o amex ā ajarē. Anē.

Mē homnu xā hā xijere jamýnh xwýnh jarēnh

⁵ Tā na pa axte mēmoj pumu. Kaxkwa kamā Tīrtūm nhōrkwy hā hitom xā piitā amnhī kahē xā rē nē kuhē pa omu. Nē ixkre kamā ō hitom mex maati haxwýja amnhī kahē xā mē nē xa.

⁶ Hāmri nhūm ixkreja rūm Tīrtūm kapēr o mē wrýk xwýnh pē 7jaja hapōj nē kuhē. Mē ē hakajre nē hirā htýx kumrēx. Nē mē hinō pre xāja ōr pix o. Nē piitā Tīrtūm mā tanhmā kot mē homnuj to xā hā xijere pē 7ta jamýnh kaxyw kuhē.

⁷ Hāmri nhūm mēmoj tīr pē kwatjē ōja mē kām xijere hkwy jamý nē mē hwýr o tē. Xijere kēp 7 nē piitā ōr o. Nhūm hamý nē Tīrtūm kapēr o mē wrýk

xwýnhhtajê hwýr o tē nē ho mē hipêx nhûm mē ahpýnhã hamý. Xijere kamã Tirtûm gryk xã jamý nē o kuhê.

⁸ Pu nhûm Tirtûm rûm kuwy hkûm hapôj. Tirtûm mex nē hihtýx xwýnhhta rûm hapôx rax o ixkreta kunor pa nhûm mē tee ri hwýr gjêx prãm kaprý.

16

Xijere kamã mē homnu xã pé 7 jarênh

¹ Tã pa arí mēmoj pumu nhûm Tirtûm nhôrkwy kamã mēhõja kapêr o wrýk xwýnh pé 7jê mã kãx pé kapêr nē mē kãm:

—E na pa ra mē kot ixkapêr kwým ri amnhĩ nhĩpêx xwýnhjê pumu nhûm ixpê ja omnuj týx o ixpê omnuj týx. Jakamã e mē anhõ xijereta jamý nē ma pika hwýr mē hwýr wrý nē axpên pãnhã mē hã xijere kamã mē homnu xã kapĩ. E mē tokyx ma mē hwýr wrý. Anê.

² Hãmri nhûm mē kuma nē axpên pãnhã mē hwýr wrý. Nhûm wamta kumrêx pika piitã hkôt mē homnu xãta kapĩ. Pu nhûm mē kot mrymnuti mē õ sãnti wa kãm mex ã harênh nē amnhĩ tã wa hixi jaxwýr xwýnh piitã hkãnhy hpa nē à htýx kumrêx nē ri pa.

³ Hãmri nhûm wamta kôt hõja õ xijere py nē gô xujanãr kãm hkapĩr pa nhûm gô te mē htykjê kamrô pyrã nē kamã mēmo mry htyyxã rênh xwýnh piitã pikaprãr pa.

⁴ Tã ra xijere kapĩr xwýnh o axkrut nē õ xijere kapĩ hãmri nhûm hkôt hõta õ xijere py nē hpãnhã gô hkryre piitã hkôt hkapĩr pa. Pyhti nē ri hino piitã hkôt hkapĩr pa nhûm piitã gô xujanãr pyrã nē mē hkamrô hã amnhĩ jahkre hpa.

⁵ Hãmri nhûm axtem Tirtûm kapêr o mē wrýk xwýnhjê hõ kot kãm gô piitã hamãr xwýnhhta ja hã omu nē Tirtûm mã kãm:

Pa amex rãhã apa ho apa xwýnh. Nē arãhã apa ho apa xwýnh. Nã ãm hãmri na ka ã mē kêp gõta nhĩpêx anê.

⁶ Na prem mē kot akôt amnhĩ nhĩpêx xwýnhjê mē mē kãm ri akapêr jarênh xwýnhjê hpar o pa nhûm mē hkamrô hpikapĩr rax nē.

Tã ka ra mē hã mē kêp mē hkõm xã homnu hpa nhûm mē kêp mē hkamrô ã amnhĩ jahkre nhûm mē tee ri ho hkõm mã. Nã ãm hãmri na ka ã mē kêp gô nhĩpêx anê Tirtûm. Anê.

⁷ Hãmri nhûm mē kot Tirtûm mã mēmoj nhõr xã hã mēsti hpar pé hkrĩ xwýnhjê hõja kuma nē kãm:

Nã ãm hãmri na ã ajarênh anê Tirtûm.

Ãm hãmri na ka ã akrajê hã mē hipêx anê.

Ra ate mē hã amnhĩ jarênh xã hkôt na ka hte tanhmã mē hipêx to.

Nã apê mē inhõ Tirtûm Maati na ka. Mē ixrom axihtýx o axihtýx nē axãhpumunh o axãhpumunh. Anê.

⁸ Tã ra axkrunêpxi nē õ xijere kapĩ. Jakamã nhûm mē hpãnhã hõja õ xijere o tē nē myyti hã hkapĩr pa nhûm hkagro htýx nē pika hkôt mē pa xwýnhjê hkã ho hxêt o pa.

⁹ Kagro htýx o hkagro htýx jakamã mē hkã ho hxêt nhûm mē kamã hkã kajê hpa. Hãmri nē tee ri amnhĩ pumu nē hamaxpêr o:

—Nã Tirtûmtija na ã mē pahtomnuj týx anê. Anê.

Hãmri nē kamã gryk týx nē haprý nē tanhmã ho kapêr punuj to ho pa. Nom mē kot amnhĩ tomnuj kaga nē kãm mex o mex ã harênh kêt nē arĩ tanhmã amnhĩ tomnuj to ho pa.

10 Nhũm ra kêp kwat nê ò xijere kamã mêmojja kapĩ. Jakamã nhũm ra hpãnhã hõja ò xijere o tẽ nê gõj rũm mrymnuti kot mẽ ho amnhĩptãr xã hã hkrĩ xã hã hkapĩr pa. Jakamã nhũm ra kot mẽ ho amnhĩptãr xã hã pikaja kamã kamãt kô htyk par kumrêx. Hãmri nhũm mrymnuti mẽ hkõt mẽ kot amnhĩ nhĩpêx xwýnhjê hã kamãt kô hpã nhũm mẽ amnhĩ xã htýx ã maj amnhĩ nham o axpên kamnhar týx kumrêx. 11 Nê ã Tĩrtũm kot mẽ hipêx anhỹr ã amnhĩ tã omu nê kamã gryk týx nê tanhmã ho kapêr punuj to ho pa. No ãm kot amnhĩ tomnuj xwýnh ã amnhĩ pumunh nê kot amnhĩ tomnuj kaga hkêt nê.

12 Nhũm prem ra kêp sĩk nê ò xijere kamã mêmoj kapĩ. Jakamã nhũm hpãnhã hõja ò xijere kamã mêmojta o tẽ nê pyhti pẽ Erax kamã hkapĩr pa nhũm gõja grã pa nê te kêp pry pyrã nê nõ. Jakamã nhũm myt japõx xã rũm nê ho amnhĩptãr xwýnhjaja nê põristijaja hãmri pijapu kaxyw Jerujarê hwýr nojarêt nê hã hwýr pa.

13 Tã nhũm kagãmnuti mẽ ý hã mẽ kãm hêx o pa xwýnh mẽ mrymnutita wa mẽ hakwa rũm mêmoj te priti pyrã nê hapõx o pa. No ãm priti hkêt mẽ kêp Satanasti mã mẽ ãpênh xwýnh kwýy.

14 Jakamã na prem pika piitã hkõt mẽ kot aa mêmoj pumunh kêt kwý ho anhỹr o hêx rom mẽ no kupyw o mẽ hkõt pa. Tã pika piitã hkõt mẽ ho amnhĩptãr xwýnhjê mẽ ho pikuprõnh kaxyw mẽ hapêr o pa. Mẽ kot Tĩrtũm xihtýx o hihtýx kurê kaxãr kaxyw mẽ pijapu xã hã arĩgro kukamã mẽ ho pikuprõnh o pa.

Jejus kot amnhĩ kwýjê mã kapêr ã harênh

15 Tã nhũm Jejus pika hkõt hkrãjaja arĩ mẽ htĩr nê pa xwýnhjê mã kapêr nê mẽ kãm:

E mẽ inhma ixkwýjaja. Akupým ixte mẽ awýr ixwrýk xã hã arĩgroja ã kot paj te mẽ ãhkĩnh xwýnh kot amnhĩ nhĩpêx pyrã nê mẽ ajaêr pẽ mẽ awýr wrý. Jakamã kêr ka mẽ amnhĩ wýr ijamãr rãhã ho apa. Kêr pa akupýn wrý ka mẽ amnhĩ wýr ixpumu nê akĩnh nê amnhĩ kamã mã ixpuma hkêt nê. Anê.

Mẽ kot axpên kurê kaxãr kaxyw mẽ pikuprõnh ã mẽ harênh

16 Tã nhũm Satanasti hkwyjaja pika piitã hkõt mẽ ho amnhĩptãr xwýnhjê ho pikuprõnh pa nê mẽ hkurê kaxãr kaxyw ma Ijaew kot kãm “Amaketõ” jarênhja wýr mra.

17 Hãmri nhũm Tĩrtũm kapêr o mẽ wrýk xwýnh pẽ 7 kot hitepta ò xijere py nê kãx mã kamã mêmoj kapĩr pa. Jakamã nhũm Tĩrtũm nhõrkwy kamã mẽ ho amnhĩptãr ã hkrĩ xã rũm Tĩrtũm kãx pẽ kapêr o:

—E hãmri. Na pa ra mẽ kot amnhĩ tomnuj mýrapê tanhmã mẽ ho jatur xãm mênh kaxyw. Anê.

18 Pu nhũm na hkatõtõk nê hkrakrak nê haxênh nhũm pika httertet týx nê. Aa mẽ kot pika httertet týx kot anhỹr ã omunh kêt kumrêx.

19 Jakamã nhũm Papirõnja kajê axkrunêpxi. Papirõn nhõ xwýnhjaja kot amnhĩ tomnuj týx o paja mýrapê nhũm Tĩrtũm ã mẽ hipêx anê. Nê pika httertet o pika piitã hkõt krĩ grãnh pa. 20 Nhũm gõ hipõk piitã gõja hã axkamur nhũm hapêx pa. Nê kên prêk nê hkrã hixêr rõrõk nê hpigrãnh pa. Pika httertet týx kumrêx jakamã ã mêmoj amnhĩ nhĩpêx anê. 21 Nê na mẽ pẽ jêr krã jakootija mẽ piitã mẽ hipy rõrõk. No ãm hkrã hkryre hkêt hkrã rũnh kumrêx. ãm hpýnh nê kamã kêp 40 kir nê mẽ hã rõrõk nhũm mẽ tee ri amnhĩ tã ã omu nê Tĩrtũm kamã gryk týx nê hapýr nê ho kapêr punuj nê.

17

Tirtūm kra hkêt xwÿnhjê jarênh

1 Tã pa pre kê axte mëmoj pumu. Nhūm kot xijere jamÿnh xwÿnhjê hōja ixwÿr tē nē inhmã:

—E ma ixkôt tē nē mëmoj pumu. Anē.

Hāmri pa kuma nē ma hkôt tē nhūm inhmã:

—Nã ahpÿnhã gô rax mÿri krī nhō xwÿnhjaja te ho ni hkuprÿ gô mÿ ri ÿr nē kãm mëmjé piitã hkĭnh o ÿr xwÿnhhta pyrãk. Na htem urãk nē Tirtūm kapēr kôt ri amnhĭ nhĭpêx kêt nē. Ām htÿx ri tanhmã amnhĭ tomnuj to ho pa. Jakamã koja Tirtūm tanhmã më homnuj tÿx to nē më ho hapêx. ² Krī piitã hkôt më ho amnhĭptār xwÿnhjaja na hte ma më ô krī hwÿr mra nē te më kot më hkuprÿjê ho amnhĭkati pyrãk o amnhĭ nhĭpêx. Nē te pipãnh nē htÿx ri amnhĭ nhĭpêx pyrãk o amnhĭ nhĭpêx o pa. Nhūm krī nhō xwÿnhjaja më urãk nē amnhĭ krã hkôt pix mã tanhmã amnhĭ tomnuj to ho ri pa. E ma ixkôt tē nē ja hã më omu. Anē.

³⁻⁴ Hāmri nhūm Tirtūm Karō tanhmã ixto nhūm kapēr o wrÿk xwÿnhja ma kapôt wÿr ixto mō pa kapôt ā mrymnuti hkrã kēp 7 nē kamã hpār kēp 10 xwÿnhhta pumu nhūm hkamrêeti nē xa. Nē ĩ piitã hã tanhmã Tirtūm o kapēr punuj to hã kagã. Nhūm katut ā mëhō ni kuprÿta nhÿ. Mē ho amnhĭptār xwÿnh ā më ê kakrã htyk nē hkamrêk o hkukār jaxã nē hã nhÿ. Nē ôr o ôkrexê. Nē ôr o hinwÿÿxê nē ĩhkra kamã kàx. Ām ôr pix o hikukrêx. Nē kēn mex karÿr pix o amnhĭ jamrêx. Nē ôr o kopti hō py nē hã nhÿ. Kopti kamã ni kuprÿ kot amnhĭ tomnuj xã. Ām kot më kēp më mjên o amnhĭkati ho pa xã pix nhūm kupy nē o nhÿ.

⁵ Nē ôkrã hã amnhĭ nhĭxi hã kagã kot:

Inhĭxi pimxur pē PAPIRŌN RAXTI.

Nē ixpê më kēp më mjênjê ho amnhĭkati ho më pa xwÿnhjê nã na pa.

Nē ixpê më kot axpēn prō ho amnhĭkati o më pa xwÿnhjê nã na pa.

Nē ixpê më kot Tirtūm nē më kãm hêx o ri më pa xwÿnhjê nã na pa.

Nē ixpê më kot Tirtūm kapēr kôt amnhĭ nhĭpêx o pa hkêt xwÿnhjê nã na pa.

Anhÿr o ôkrã hã amnhĭ nhĭxi hã kagã kot anhÿr. ⁶ Nhūm axpã nē nhÿ pa omu. No ām kagōÿhti ho hpiãnh kêt. Mē kot Jejus kôt amnhĭ xunhwÿr nē ri më kãm Jejus kēp më ô pahiti hã harênh xwÿnhjê kamnhwÿr o më hpar nhūm më hkamrô pikapĭr xwÿnhjê kamrô ho na pre axpã nē nhÿ. Pa ā kot amnhĭ nhĭpêx anhÿr ā omu nē tee ri ijamaxpēr.

⁷ Hāmri nhūm Tirtūm kapēr o wrÿk xwÿnhja inhmã:

—Kwa mon ka ri ja pumu nē tee ri ajamaxpēr? E kot paj ixprĭ hã amã harê ka inhma. Niti më hã ÿr xwÿnh pē mrymnutita. Krã pē 7 nē kamã hpār pē 10 xwÿnhhta kot paj ixprĭ hã amã hamē wa harê ka wa harênh ka.

⁸ —Nã mrymnutija na pre htĭr nē ri pa ta tÿ ny nē ahkre xupÿmti kamã hikwÿ. Nom koja akupÿm htĭr nē kurūm kato nhūm më piitã omu nē ahpÿnhã tanhmã hamaxpēr to. Amnepēm kormã amrakati ri Tirtūm kot ô kagã kamã më htĭr tūm nē më pa mã xwÿnhjê nhĭxi jaxwÿr xwÿnhjaja koja kator ā omu nē ām omu nē tanhmã hamaxpēr to hkêt nē. No më kot Jejus kôt amnhĭ xunhwÿr kêt xwÿnhjaja koja më amnhĭ jaēr pē akupÿm kator ā omu nē tee ri hkukamã hamaxpēr. Hāmri nē axpēn mã: “Kwa amnepēm htyk tã ra tanhmã amnhĭ to nē akupÿm htĭr nē api nē mō.” Anhÿr o axpēn mã harê. Hāmri nhūm kato nē ma tē nhūm Tirtūm tã ho hapêx kumrêx nhūm hapêx o hapêx.

9—Kwa inhma nē jam ajamexpēr tỳx nē. Mrymnuti krā pē 7ta te kēp hixēt prēk pē 7 pyrā nē hā ỳr xwỳnh ni kuprỳta te hixēt prēk pē 7ta ā ỳr pyrāk.

10—Nē mrymnuti hkrā pē 7ja te kēp mē ho amnhĩptār xwỳnh pē 7 pyrāk. Nhũm mē ho amnhĩptār xwỳnhjaja te mē kēp 5 nē ra htyk pyrāk nhũm hkôt hōja arī mē ho amnhĩptār o pa. No kot hitepta kormā. Nom koja mē ho amnhĩptār ry hkēt nē.

11—Mrymnuti htīr nē pa htā htyk nē ra akupỳm htīr nē àpir xwỳnhnta koja hkrā hitepta pānhā mē ho amnhĩptār o pa. Jakamā te mē ho amnhĩptār xwỳnh pē 7jē hō pyrāk. Koja hkrā pē 7ja mē ho amnhĩptā nē gaa nē htyk mē nhũm hpānhā mrymnutita hpānhā mē ho amnhĩptā. Hāmri nhũm rī kormā Tirtũm tā mē ho hapēx par kumrēx.

12—Nē ate mrymnuti hkrā kamā pār pē 10 pumunh xwỳnhnta te mē kēp mē ho amnhĩptār xwỳnh pē 10 pyrāk. No àm jaja na kormā mē ho amnhĩptār kēt nē. Koja mē nhỹrmā anhĩpē mrymnuti nhỹ hā ahpỳnhā ri mē ho amnhĩptār o pa nom mē ho amnhĩptār japijē hkēt nē. 13 Koja mē tanhmā ja hā axpēn mar to hāmri nē mrymnuti mā anē nhũm mē hpānhā mē piitā mē ho amnhĩptā.

14—Nē mē ho amnhĩptār xwỳnh pē 10jaja koja mē pahte amnhĩ tomnuj pānhā amnhĩrer xwỳnh kurē kaxār kaxyw hwỳr mra nē kutā pijapu ho kuhē. No àm tee ri kām tanhmā ho hprām hkapyr nhũm mē ho axtem nē amnhĩ tā mē himex pa. Hihtỳx o hihtỳx o kot mē ho hpimràatā mē hakrenh par. Nē kēp pika piitā hkôt mē ho amnhĩptār xwỳnhjē nhō Pahihti. Tām na pre amnhĩ wỳr mē kot hkôt amnhĩ nhĩpēx o mē pa xwỳnhjē wỳ nhũm htem amnhĩ kaxyw hkôt hamaxpēr mex rāhā ho pa. 15—Nē krī pē Papirōn kapem gō xohtō mỳ ri ni kuprỳ hkrī xwỳnhnta. Gō xohtōja te kēp ahpỳnhā ri pika piitā hkôt mē uro hkwy pyrāk. Nē te ahpỳnhā ri mē kapēr xwỳnh kwỳ pyrāk.

16—Nē mrymnuti hpār pē 10ta kēp mē ho amnhĩptār xwỳnh pē 10 pyrāk. Jakamā koja mē kām ni kuprỳta prām nōkati nē kamā gryk tỳx kumrēx. Hāmri nē hwỳr mra nē kēp hikukrēx piitā utā nē kēp ē hkwrỳnh pa nhũm hkēnh mex nē xa. Hāmri nhũm mē kupī nē i hkrēr pa nē kuwy kamā hi rē nhũm kaxār pa nē hapēx.

17—Na pre pahi pē 10jaja mrymnuti hkôt amnhĩ xunhwỳ nhũm Tirtũm àm ja hā mē omu nē tanhmā nē mē kām nē hkēt nē. Jakamā koja mē àm hkôt pix mā amnhĩ nhĩpēx o pa rāhā nhũm Tirtũm mē ho hapēx. Nē mē ò krī mē mē ho hpimràatā mē ho hapēx pa. Hāmri nē mē ho hapēx o mē ho hapēx.

18—Nē ate mēhō ni kuprỳ pumunh xwỳnhnta te kēp krī rax pē Papirōn nhō xwỳnhjē pyrāk. Nē mē ho amnhĩptār xwỳnhja pika piitā hkôt mē ho amnhĩptār xwỳnhjē hkrāhtũm na. Anē.

À Tirtũm kapēr o mē wrỳk xwỳnhja inhmā mē harēnh anē. Pa kuma nē ò ri mē amā hā kagā. Mē ate kamā harēnh nē aprī hā mar tỳx kaxyw.

18

Tirtũm kot Papirōn grānh par ā harēnh

1 Tā pa kē axte mēmoj pumu. Nhũm axte Tirtũm kapēr o mē wrỳk xwỳnhjē hōja kaxkwa rũm ahpar mā wrỳk o tē. Tirtũm nhỹ hā hihtỳx nē kamā hirā rax kumrēx o pika piitā hkôt mē kām hirā pa. 2 Nē ahpar mā tēn wrỳ nē kàx pē kapēr o:

E koja Papirōnja pigrānh pa nē hpānhā kēp Satanasti mā mē àpēnh xwỳnhjē papxā nē kēp nhônhti papxā. Hāmri nē aa kamā mēmoj mex kēt kumrēx.

3 Krī nhõ xwỳnhjaja na htem Tĩrtũm kapěr kõt amnhĩ nhĩpêx kêt nê amnhĩ krā hkõt kām prām xà hkõt pix mǎ tanhmǎ amnhĩ tomnuj to ho pa. Te mēhõ pipānh nê htỳx ri amnhĩ nhĩpêx o pa pyrāk.

Nhũm krĩ piitǎ hkõt mē ho amnhĩptār xwỳnhjaja mē hwỳr mra nê mēnijê ho amnhĩkati ho pa.

Nê krĩ nhõ xwỳnhjaja mēmoj pumu nê kām hkĩnh nê haprôr kurê kumrêx o pa nê aa ujaarôr o hapêx kêt nê.

Jakamǎ na hte krĩ hkwy nhõ xwỳnhjaja mē hwỳr mēmoj to pa nê xatǎ mē kām ho wēnê nê mē kukwak ri mē hikàxpore rũnh nê pa.

Anhỳr o kapěr. 4 Hāmri nhũm Tĩrtũm Papirõn kamǎ hkrajê mǎ kapěr nê mē kām:

E mē tokyx mē kot ri htỳx amnhĩ nhĩpêx xwỳnhjê nhõ krĩta rũm ajapôj ixkrajaja.

Kot kaj mē anhỳr kêt nê ra mē hkõt amnhĩ nhĩpêx pa mē ato apimràatǎ mē ate amnhĩ tomnuj ǎ mē atomnuj tỳx nê.

5 Krĩ nhõ xwỳnhjaja na htem amnhĩ tomnuj rũnh o pa.

Mē kot amnhĩ tomnuj xà te mē kot kēn katutxõ nhũm hprêk rax o kot kaxkwa kanhwỳr kaxyw pyrāk.

Na pa hte ǎ mē kot amnhĩ nhĩpêx anhỳr ǎ mē omunh rǎhǎ ho ri ixpa. Jakamǎ kwa ixkrajaja mē tokyx mē kurũm ajapôj.

Anhỳr o hkrajê mǎ kapěr. Hāmri nê kapěr o mē wrỳk xwỳnhjê mǎ kām:

6 E kwa mē ma mē hwỳr wrỳ nê tanhmǎ ixkrajê hǎ mē ho.

No ǎm kēr ka mē tanhmǎ mē ho htỳx o mē kot ra tanhmǎ ixpê ixkrajê nhĩpêx tota jakre.

Kê mē tanhmǎ ixpê mē ho grire htǎ ka mē hǎ tanhmǎ mē ho htỳx kumrêx o mē kot mē hipêxta jakre.

7 Krĩ nhõ xwỳnhjaja na prem mex nê pa.

Nê mē hikukrêx rũnh nê hkĩnh nê pa.

Nê tanhmǎ amnhĩ to jarkrar to ho ri pa nê amnhĩ jarênh o:

“Ot pa mē te pahi ni kot amnhĩ nhĩpêxta pyrǎ nê ixkrĩ xà mex pix kām ixkrĩ pyrāk.

Nê te Tĩrtũm kot amnhĩ nhĩpêx pyrāk o na pa htem amnhĩ nhĩpêx o ri ixpa.

Nê mē ixkĩnh nê mē inhmex rǎhǎ ri ixpa.

ǎ mē ixte amnhĩ nhĩpêx anhỳr xwỳnh na pa mē.”

Anhỳr ǎ amnhĩ to jarkrar o pa.

Tǎ kēr ka mē tanhmǎ mē homnuj to kê mē mexta pǎnhǎ omnuj tỳx nê pa.

Nê kê mē hkaprĩ nê amnhĩ xà htỳx kām hamak rǎhǎ nê pa ho pa.

8 E kê mē ǎ amnhĩ nhĩpêx anhỳr o pa.

Jakamǎ koja mē arĩgro hpỳnh kām mē hkwyjaja hpikaprār rũnh nê nhũm arĩ mē htĩr xwỳnhjaja omnuj nê pa.

Nê tee ri amnhĩ pumu nê hkaprĩ xǎj mỳr o pa.

Nê amnhĩ xà htỳx kām hamak o pa.

Nê tee ri amnhĩ nhĩpêx o pa.

Nê kām prām nê pa rǎhǎ ty nhũm kuwy mē ho hkaxār pa.

Ixpê Pahi Maati Tĩrtũm kot paj ixihtỳx kām ǎ mē hipêx anê. Anê.

9 Hāmri nhũm krĩ piitǎ kurũm mē ho amnhĩptār xwỳnhjaja. Mē kot mē hwỳr mra nê mē hkuprỳjê ho amnhĩkati nê mē urāk nê mēmoj pumunh nê haprôr rǎhǎ ho pa xwỳnhjaja tee ri krĩ kaxār nê kàx mǎ kuwy hkũm àpir o paja pumu nê hkaprĩ nê mỳr o kuhê.

10 Nē Tīrtūm kot mē ho hapêx par ā mē omu nē kām ma ht̄yx kumrêx. Am̄ym mē omunh o kuhê nē tee ri amnhī kukamā hamaxpēr nē htertēt t̄yx nē. Nē m̄yr kām kapēr o:

Hêxta waa nē Papirōn nhō xw̄ynhjaja.

Mē amex nē axiht̄yx mex nē apa ht̄a nhūm Tīrtūm mē anh̄imex pa. Hêxta waa nē. Anē.

11 Nē mē hw̄yr m̄rar nē mē kām mēmoj to wēnê ho mē pa xw̄ynhjaja haxw̄yja krī pumu nē tee ri amnhī kukamā hamaxpēr nē hkaprī nē m̄yr o kuhê. Nh̄yri koja mē tokyx axte mēmoj to wēnê? Mē kēp mēmoj japrōr rūnh xw̄ynhjaja hkaxār par kumrêx kēnā.

12 Na prem mēmoj piitā ho pa nē mē kām ho wēnê. Mēmoj mex piitā. ôr o mē hkukrêx nē prat o mē hkukrêx nē kēn jaxēnh ā k̄axpore xohtōô. Nē kupêxê mex. Kakrā htyk nē hkamrêk nē hkroore nē hā hapjê. Nē mēmo pī kuxware nē pī ht̄yx nē kēn jakār nē k̄ax o ri mēmo nh̄ipêxja nhūm prem mē kām ho wēnê ho pa. 13 Nē mēmo htw̄ym nē mē hkuxwa xā. Nē mē ô ho anh xā nē mē ô kuxwa xā nē xw̄ygrā nē harôj. Nē mōx nē ôwēhti nē kawar nē kaxyw kawarti hkjēnh xā hā karrotre. Nē nh̄yh̄nh krī hō kamā panhī hkwȳ pynē nē mē hw̄yr mē o pa nē mē kām mē ho wēnê nhūm mē amarī mē hkôt ri âpēnh rūnh o pa. Na prem ā mē kām mēmoj to wēnê anh̄yr o pa. Tā ra mē kot mē haprōr xw̄ynh mē mē pimràatā hapêx pa.

14 Jakamā nhūm mē tee ri mē hkukamā hamaxpēr nē te kot mē kām kapēr pyrā nē mē kām:

Hêxta waa nē. Mē amā mēmoj prām nē amnhīm haprōr xw̄ynhta na mē apê hapêx par kumrêx.

Nē mē ak̄axpore rūnh nē mē akukrêx rūnhhta mē mē apimràatā ajapêx pa. Kot kaj mē axte tanhmā amnhī nh̄ipêx to ho apa hkēt nē. Anē.

15 Hāmri nē am̄ym ri Tīrtūm kot tanhmā mē hipêx to hā mē omu nē kām ma xāj mur nē htertēt o kuhê.

16 Nē m̄yr kām kapēr o:

Hêxta waa nē. Na pre htem ê mex pix jagjê nē ri hā mra. Kakrā htykre nē hkamrêkre.

Nē mē hikukrêx mex o amnhī jamrêx nē ri hā mra.

Nē ôr nē kēn mex ā ohtō xw̄ynh o amnhī jamrêx nē ri hā mra.

17 Tā ra hapêx par kumrêx. Anē.

Hāmri nhūm gō xujanār kām p̄ar nhō dōn nē mē kot mē kām p̄ar o ri m̄rar xw̄ynhjaja nē mē kot kamā tep pynēnh xā ho tep pynēnh o ri mē pa xw̄ynhjaja nē p̄ar kām amarī mē pa xw̄ynhjaja hāmri mē hw̄yr mra nē wamtajê pyrā nē tee ri am̄ym ri mē ô krī pumu nē m̄yr o kuhê. 18 Nē kurūm kuwy hkūm xāpir o pa hā omu nē tee ri mē hkukamā hamaxpēr nē axpēn mā:

Hêxta waa nē. Krī m̄j na pre mex o mex. Mex o krī piitā hakrenh par ht̄a hapêx pa. Anē.

19 Hāmri nē mur nē hkaprī xāj pika hkwȳ jam̄y nē ho amnhī kamī nē m̄yr kām kapēr o:

Hêxta waa nē. Krī m̄j na pre rax o rax.

Nhūm pre nh̄yh̄nh p̄ar kām mēmoj to wēnê ho pa xw̄ynhjaja mē hw̄yr mēmoj to pa nē mē kām ho wēnê nē mē hkukwak ri hik̄axpore rūnh nē ri pa.

Tā hāmri mē hapêx pa. Anē.

20 Hāmri nhūm Tīrtūmja krajê piitā mē kām kapēr nē mē kām:

E ixpê Tīrtūm na pa ā mē hipêx anē.

Mē kot mē apē ixkrajaja tanhmā mē atomnuj to ho paja mýrapē na pa mē atā
ā mē hipêx anē.

Jakamā e kaxkwa kamā mē apē ixri mē apa xwýnhjaja.

Nē mē ate inhý hā ri mē kām ixkapēr jarēnh o mē apa xwýnhjaja.

Nē Jejus nhý hā mē akapēr o ri mē apa xwýnhjaja. Mē apiitā mē apē ixkra na
ka mē.

E mē amnhī tā ja pumu nē akīnh nē axpēn mā apikunhar o akuhē. Pa na pa
mē atā ā mē ho ijapêx anē. Anē.

²¹ Tā nhūm kapēr o mē wryk xwýnhjē hōja hihtýx o kēn rax kumrēxja mý nē o
tē nē gō xujanār kamā kām gēt nē kumē nhūm mrō nē akunok. Hāmri nhūm
kapēr o:

E krīta koja Tirtūm te ho ixte gōx kām kēn mēnh nhūm mrōr nē hpikunor pyrāk
o hipêx nhūm hapêx par kumrēx.

²²⁻²⁴ Na pre hte krīja kamā mē kot ri mē kām mēmoj to wēnē xwýnhjaja amnhī
to rūnh o krī piitā hkôt mē hakrenh pa.

Nē krī nhō xwýnhjaja na prem pika piitā hkôt hēx rom tanhmā mē no kupyr
to ho ri pa. Jakamā ra mēmoj to wēnē xwýnhjē pyrā nē mē hikukrēx
rūnh gryk ā Tirtūm kaga.

No ām ja pix kēt. Tirtūm krajē mē Tirtūm nhý hā kapēr o mē pa xwýnhjaja na
prem mē himex rax nē. Hāmri nhūm krī piitā kamā mē pa xwýnhjaja
mē kot mē hipêx ā mē omu nē mē urāk nē ā mē hipêx anhýr o pa.

Tā Papirōn nhō xwýnhjaja kot mē hipêx anhýrja mýrapē koja Tirtūm mē himex
par kumrēx.

Jakamā koja mē axte hkīnh nē hkīnh xàj ri grer kēt nē.

Nē axte hkīnh nē grer kām hakwa kōr o ri pa kēt nē.

Nē axte ri wiorāw kakrēnh hkēt nē.

Nē axte ri amnhīm kawà hyr o hkrī hkēt nē.

Nē axte harōj kahuk o kuhē hkēt nē.

Nē axte mē ōrkwý kamā kanē hpōk kēt nē.

Nē axte axpēn mā ri hkrajē rer o ri pa hkēt nē. Koja ā mēmoj kot anhýr piitā
hapêx pa. Anē.

19

Mē kot Tirtūm mex ā mē harēnh

¹ Tā pa kē axte mēmoj pumu. Nē kaxkwa kamā mē kapēr ma nhūm mē ohtō
rax kumrēx nē tanhmā axpēn mā kapēr to. Nē anhīpē kàx pē kapēr týx nē
kapēr o:

E pu mē pahpiitā Tirtūm mā mex o mex ā harē.

Tapxipix na hihtýx o hihtýx.

Nē tapxipix na àhpumunh o àhpumunh.

Nē tapxipix na mex o mex.

Tapxipix na mex o kot mēmoj piitā hakrenh par.

Ra kot mēmoj punuj pē mē papytār par jakamā kēp mē papytār xwýnh ā pixi
mex na.

² Na hte amnhī jarēnh xà hkôt tanhmā mēmoj to ho pa.

Nē amnhī to hēx kēt nē.

Tā ām hāmri na ā Papirōn nhō xwýnhjē nhīpêx anē.

Na prem mē kām Tirtūm kapēr jarēnh o mē pa xwýnhjē nhīmex rax kumrēx.

Nē krī piitā hkôt ri pa nē amnhī kôt mē kurē nhūm mē kuma nē mē hkôt
amnhī tomnuj o pa.

Nhũm Tĩrtũm tee ri hã mẽ omu nẽ ã hkrajẽ hã mẽ hipêx kati anẽ. ãm hãmri na ã mẽ hipêx anẽ.

Anhỹr o axpẽn mã harẽ. ³Hãmri nẽ xatã axpẽn mã:

Nã ãm hãmri na ã mẽ panhõ Tĩrtũmja mẽ hipêx anẽ nhũm mẽ kurũm kuwy hkũm kãx mã ãpir o pa.

Koja krĩ nhõ xwỹnhjaja amnhĩ xã htỹx kamã hamak rãhã ho pa nẽ aa à htỹx hapêx kêt.

E pu mẽ hã Tĩrtũm mã mex o mex ã harẽ. Anẽ.

⁴Hãmri nhũm mẽ ãptãr tũm pẽ 24 mẽ mẽmoj tĩr pẽ kwatjaja hãmri Tĩrtũm kot mẽ ho amnhĩptãr ã hkrĩ xã maati kutã rôrôk nẽ kãm hipõ hpa. Hãmri nẽ ã mẽ kapër anhỹr xwỹnhjẽ mã kapër nẽ kãm:

Nã ãm hãmri na ka mẽ ã Tĩrtũm mex ã harẽnh anẽ. E pu mẽ pahpiitã kãm mex o mex ã harẽ. Anẽ.

⁵Hãmri nhũm mẽhõja Tĩrtũm krĩ xã maati kamã kapër o:

E mẽ axte Tĩrtũm mã mex o mex ã harẽ.

Mẽ ate Mẽpahpãm kõt amnhĩ nhĩpêx o mẽ apa xwỹnhjaja.

Nẽ mẽ apẽ mẽ ho amnhĩptãr xwỹnhjaja nẽ amari ri mẽ apa xwỹnhjaja nẽ mẽ apiitã mẽ ate Tĩrtũm ã apijaãm o mẽ apa xwỹnhjaja kãm mex o mex ã harẽ. Anẽ.

Kot mẽ pahpãnhã amnhĩrer xwỹnh mẽ hkwyjẽ jarẽnh

⁶Tã pa tanhmã mẽ kapër to hã mẽ kuma nhũm mẽ kãx pẽ kapër tỹx nẽ. Te mẽ ohtõ rax kumrẽx kapër pyrãk. Nẽ te gõ koko htỹx rỹ na katõtõk tỹx pyrãk. Hãmri nẽ mẽ kapër o:

E na ra Tĩrtũm kęp mẽmoj piitã ho amnhĩptãr xwỹnh.

Nẽ kęp mẽ panhõ Pahi Maati.

Nẽ hihtỹx o hihtỹx nẽ ãhpumunh o ãhpumunh.

E pu mẽ kãm mex o mex ã mãn harẽ.

⁷⁻⁸Nẽ hã pahkĩnh nẽ.

Nẽ kãm hihtỹx o hihtỹx ã harẽ.

Te mẽ kot axpẽn mã mẽ rer xwỹnh kot amnhĩ nhĩpêx pyrãk.

Ja o mẽ pahte amnhĩ tomnuj pãnhã amnhĩrer xwỹnhhta te kęp myja pyrãk.

Nẽ mẽ kot hkõt amnhĩ nhĩpêx xwỹnh piitã te mẽ kęp nija pyrãk.

Nẽ te mẽ kot axpẽn mã wa rer nhũm wa kot axpẽn kõt pa ho pa pyrãk o koja mẽ amnhĩ nhĩpêx.

Nẽ te mẽ kot mjẽn mã xwỹnh mã ê mex jakare nhõr nhũm kot hagiẽnh pyrãk. Nẽ ê mexja te mẽ kot tãm amnhĩ nhĩpêx xã pyrãk. Anẽ.

⁹Hãmri nhũm Tĩrtũm kapër o wrỹk xwỹnhja inhmã:

—E Juãw. Pa amã mẽmoj jarẽ ka mar tỹx nẽ akwỹjẽ mã hã kagã. Tĩrtũm kapër kwỹ kot paj amã harẽ. Kęp Tĩrtũm kapër jakamã ãm hãmri na. Na hte mẽmoj jarẽnh o hẽx kêt nẽ. E kapër ã kagã ho:

Na htem axpẽn mã mẽ rer kaxyw nẽ amnhĩ wỹr hkwyjẽ wỹ nhũm mẽ hwỹr mra nẽ wa hã hkĩnh nẽ apkur mex nẽ.

Ja pyrã nẽ Tĩrtũm kot amnhĩ wỹr mẽ hwỹr xwỹnhjaja koja mẽ nhỹrmã mẽ pahte amnhĩ tomnuj pãnhã amnhĩrer xwỹnhhta wỹr api nẽ ã amnhĩ nhĩpêx anẽ nẽ hkĩnh nẽ apkur mex nẽ.

Hãmri nhũm Tĩrtũm mẽ ho mex rax kumrẽx. Anẽ.

—E kër ka ã akwỹjẽ mã ja hã kagã anẽ Juãw. Anẽ.

Hãmri pa kuma nẽ kagã ja kamã mẽ amã hã kagã. ¹⁰Hãmri nẽ hã kagã hpa nẽ ra ixtẽ kãm mex o mex ã harẽnh kaxyw kutã ixkõn krã ho tẽm nẽ nhỹ nhũm tee ri amnhĩ tã ixpumu nẽ inhmã:

—Kwa ã ri inhîpêx anhÿr kêt nê. Apyrà nê ixte Jejus mã tanhmã amnhî nhîpêx to xwÿnh kênã. Jejusja apyrã nê kêp inhõ pahihtu na. Jejus kapêr na prem hkukamã mê kot Tîrtûm nhÿ hã kapêr o mê pa xwÿnhhaja hã kagã nê mê kãm harênh o pa. Jakamã kwa pu mê Tîrtûm pix kutã mãn pahkôn krã ho parôrôk nê pahkrî nê kãm mex o mex ã harê. Anê.

Kawar jaka hã ÿr xwÿnh jarênh

11-16 Tã pa kê axte mêmoj pumu. Nhûm kaxkwa axkjê nhûm kamã kawar jakajre xa nhûm mēhōja hã nhÿ. Hixi na pre kêp “Aa kot Tîrtûm kaga hkêt xwÿnh.” Anê nê hixi hō na pre kêp: “Tîrtûm kôt pix mã amnhî nhîpêx o pa xwÿnh.” Anê. ã hixi kot anhÿr jakamã na hte katãt kôt ahpÿnhã mê kot amnhî nhîpêx ã mê omunh xã hkôt tanhmã mê harênh to. Mê kot amnhî to mex ã mê omunh xã hkôt tanhmã mê hkwÿjê jarênh to nê mê kot amnhî tomnuj ã mê omunh xã hkôt ahpÿnhã tanhmã hkwÿjê jarênh to. Na pre mê kot tanhmã hkwÿjê nhîpêx to ho pa xwÿnhjê kutã amnhî xunhwÿ nê mê hã tanhmã mê ho. ã na pre kawar ã ÿr xwÿnhhaja amnhî nhîpêx anhÿr o pa.

Nê no te kot kuwy hpôk pyrãk jakamã hprî hã mêmoj piitã omu nhûm mêmoj kêp hpimxur kêt nê. Nê kêp pahî hã mê ahkã ho ohtõ nê kutu. Nê nhÿhÿnh ï hã hixi hō hã kagã nom ãm tapxipix kot amnhî tã amnhî nhÿxija pumunh. Na pre ra amnhî kamrô ho ê xy hpa nê xa. Nê hixi hō pê:

TÎRTÛM KAPÊR O AMNHÎRÎT XWÿNH

Nê ê ryti hã hixi hō hã kagã. Nê ihkjê hã ãm tãm. Hã kagã jarênh kot:

Ixpê mê ho amnhîptãr xwÿnh piitã mê õ Pahi Maati na pa.

Nê hakwa rûm wapo xwa gixre pôm katon ajêt. Kot ho tanhmã mê kot Tîrtûm mê wa kutã amnhî xunhwÿr xwÿnhjê nhîpêx to kaxyw. Jakamã ra mê piitã mê ho pikuprõnh pa nê mê hipêx o te mê kot prês kãm uwa xõ kagõ janênh pyrãk nhûm mê hkamrô hpikapîr rax kumrêx. Tîrtûm xihtÿx xwÿnh kot mê kamã gryk tÿx jakamã nhûm ã kãm mê hipêx anê. Mê kot amnhî tomnuj o paja mÿrapê.

Nhûm õ pôristi piitã urãk nê kawar jakare hã hkrî nê hkôt ri pa. Mê ê jaka muxre jagê nê hã ma hkôt ri pa.

17-18 Tã pa axte Tîrtûm kapêr o mê wrÿk xwÿnh õja pumu nhûm myyti kutã xa nê kãx pê nhônhti mã kapêr nê mê kãm:

—E mê amnê mê ixwÿr wrÿ nê Tîrtûm ã akînh nê mê htyk nê mê hikwÿ xwÿnhjê hã atu nê aku. Mê ho amnhîptãr xwÿnhhaja nê pôristijaja nê mê hkrãhtûm nê kawar nê kawar ã mê hkrî nê ri mrar xwÿnhhaja nê mê kot amnhî to rûnh xwÿnhhaja nê mê kot amnhî to hkryre xwÿnhhaja. Nê mê kãm mê ãpênh xwÿnhhaja nê amnhî mã ri mê ãpênh xwÿnhhaja. ãm mê htyk nê mê hikwÿ xwÿnh mÿj piitã mãmri mê hwÿr wrÿ nê mê hã atu nê mê aku. E mê tokyx nhônhti. Anê.

19 Tã nhûm mrymnuti nê krî piitã hkôt mê õ pahî nê mê õ pôristijaja piitã xpênh wÿr akuprõ. Wam kawar jakare hã ÿr nê htêm xwÿnh mê õ pôristijê hwÿr hprôt nê mê hkurê kaxãr kaxyw xpênh mar kaxyw akuprõ.

20-21 Hãmri nê mê hwÿr mra nê mê hkurê kapa. No ãm tee ri amnhî nhîpêx nê tee ri kãm tanhmã mê ho hprãm hkapyr nhûm wam kawar jakare hã ÿr nê htêm xwÿnhã hakwa rûm wapo xwagixre kator o mê himex pa. Hãmri nhûm mê hkwÿjê pyrãn htyk pa nê hikwÿ. Nhûm nhônhti mê omu nê mê hwÿr wrÿk o mra nê mê kuku hãmri nê kãm mê hkur kaga nê mê hkaga. No nhûm mrymnuti nê ÿ hã mê kãm hêx o pa xwÿnhã wa nhûm mê axtem nê htîr rãhã

wa unê nê ma wa o tê nê êsôf o kuwy maati kamã wa kumê. Hãmri nhùm wa kamã htír tùm nê hxêr rãhã nê pa ho pa nê aa htyk kêt nê.

20

Mê kot Satanasti hpa hpre hã mê harênh Wam Korit 15.20-28

¹ Tã pa kê axte mêmoj pumu. Nhùm Tirtùm kapêr o mê wrÿk xwÿnhjê hõja kaxkwa rùm wrÿ nê ahkre xupÿmti hpro xã ho htÿx xã hã safja py nê kãx pytÿhti ho mê hpre xãja ô py. ²⁻³ Hãmri nê kagãnuti pê hêx xwÿnh maati Satanastija pynê. Amnepê m Atãw mê Ewa wa kãm hêx xwÿnhhta pynê nê kãx pytÿ o hpa hpre nê hte hpre hãmri nê ahkre xupÿmti nhÿtom xã mê nê kamã kumê. Hãmri nê akupÿm hpro xã ho hpro nê saf o hã ho htÿx. Kot pika piitã hkôt mê kãm hêx o pa pymaj ã hipêx anê. Koja tokyx kator kêt ry rax kumrêx. Koja kamã arÿ hkrÿ hã amgrã sohtô nê. Hã amgrã pê 1.000 nhùm rÿ kormã Tirtùm akupÿm kator nhùm kato nê ri pa. Nom pa hkrãnrê.

⁴ Tã pa mê htyk nê akupÿm mê htír xwÿnh kwÿjê pumu. Kormã mê htír ri na prem Tirtùm kapêr kôt pix mã amnhÿ nhÿpêx o pa. Nê Jejus kêp mê ô pahihtÿ hã harênh rãhã ho pa. Aa mê kot mrymnuti kutã hkônkrã ho rôrôk nê kãm mex ã harênh kêt. Nhùm prem tee mê ôkrã hã nê mê ÿhkra katut ã mrymnuti nhÿxi nhÿpêx kaxyw nom nhùm prem hkaga kamã hÿhtÿx nhùm prem kãm mê hkurê xwÿnhjaja tee ri ja hã mê omu nê mê mut jakãr o mê kupa. Hãmri nhùm Tirtùm akupÿm mê ho mê htír nê mê kot mê ho amnhÿptãr ã hkrÿ xã kamã mê hkrÿ. Jejus nhÿhkô hã mê hkrÿ hã amgrã pê 1.000 kaxyw. ⁵ Mê kumrêx na pre Tirtùm akupÿm mê ho mê htír nhùm mê hkwyjaja mê hkÿnh ã arÿ ty nê hikwÿ hã amgrã pê 1.000 jakre nhùm rÿ kormã akupÿm mê ho mê htír.

⁶ Wam akupÿm mê htír xwÿnhjaja kêp Tirtùm kra jakamã koja mê Tirtùm kra hkêt xwÿnhjê kurom hkÿnh nê pa ho pa. Nê mê kurom mê kot amnhÿ xã htÿx kamã hamak o pa htÿm xã wÿr pa hkêt nê. Nê mê kurom Tirtùm mê Kra Jejus Kris wa kuri mex kumrêx nê wa kãm tanhmã ri amnhÿ nhÿpêx to ho pa. Nê Jejus nhÿhkô hã mê ho amnhÿptãr o pa hã amgrã pê 1.000.

Tirtùm kot kuwy hwÿr Satanasti mênh ã harênh

⁷ Tã koja amgrã pê 1.000 hapêx nhùm rÿ kormã Tirtùm kapêr o wrÿk xwÿnhja akupÿm ahkre xupÿm wÿr tẽ nê Satanasti mã kahê xã mê nhùm kato. ⁸ Hãmri nê kê axte pika piitã hkôt tanhmã mê kãm hêx to ho ri pa. Gorti nhõ xwÿnhjê mã nê Makok nhõ xwÿnhjê mã nê krÿ piitã hkôt Tirtùm nê tanhmã mê kãm hêx to ho mê hkôt pa. Hãmri nê mê kot Tirtùm krajê kutã amnhÿ xunhwÿr nê mê hkurê kaxãr kaxyw amnhÿ kwÿjê ho akuprõ nhùm mê ohtô rax kumrêx nê axpên wÿr akuprõ. Te pikahti grã sohtô pyrãk.

⁹ Hãmri nê ma Tirtùm krajê nhÿmex par kaxyw mê hwÿr mra nê mê ô krÿ mã hipôk pa nê kuhê. Mê ô krÿja Tirtùm mã mex tã nhùm mê kot kêp grãnh par kaxyw ma hwÿr mra. Hãmri nhùm kaxkwa rùm kuwy hpôkja mê haêr pê mê hã rôrôk nê mê ho hxêt pa.

¹⁰ No mê kãm hêx xwÿnh maati Satanastita nhùm Tirtùm kapêr o wrÿk xwÿnhja axte unê nê ma êsôf o kuwy maatita wÿr o tê nê kamã kumê. Ra mê kot kamã mrymnuti wa kot Tirtùm nê mê nokupy o pa xwÿnh wa mênh tã wa hkôt Satanasti mã ho anê nê kamã kumê nhùm kamã pa ho pa. Koja mê aa kator kêt kumrêx. Nê arÿ kamã amnhÿ xã htÿx kamã hamak rãhã nê pa ho pa.

*Tirtüm kot ahpyñhã tanhmã mẽ piitã mẽ harënh to kaxyw
Matêwre 25.31-46; Juãw 5.25-29*

¹¹ Tã pa axte mẽmoj pumu nhũm kaxkwa mẽ pikaja wa ra hapêx pa. Pa Tirtüm kot tanhmã mẽ piitã mẽ harënh to hã hkrĩ xà raxja pumu. Nhũm hakajre nhũm Tirtüm kamã nhỹ.

¹²⁻¹³ Hãmri nhũm ra mẽ htyk nẽ mẽ hikwỹ xwýnh piitã akupỹm hapôx pa nẽ Tirtüm kot tanhmã mẽ harënh to hã hkrĩ xàta kutã hkrĩ pa. Mẽ piitãã. Mẽ kot amnhĩ to rũnh xwýnhjaja nẽ mẽ kot amnhĩ to hkryre xwýnhjaja nẽ mẽ ho amnhĩptãr xwýnhjaja nẽ gô xujanãr kãm mẽ mrôr nẽ mẽ htyk xwýnhjaja. Ra mẽ htyk nhũm mẽ kot mẽ hagjênh xwýnhjaja piitã mẽ htykjê papxã rùm hapôx pa nẽ Tirtüm kutã ohtô ho ohtô nẽ hkrĩ. Hãmri nhũm Tirtüm ô kagã py nẽ kamã mẽ piitã mẽ hixi japêr. Kagã kamã ra mẽ hkukamã mẽ htĩr tũm nẽ mẽ pa ho mẽ pa mã xwýnhjê nhĩxi japêr. Nẽ kagã hõ kamã mẽ htĩr ri tanhmã mẽ kot amnhĩ nhĩpêx to ho pa hã mẽ piitã mẽ hã kagãja. Nhũm kupy nẽ kamã tanhmã mẽ harënh to nẽ hkôt hprĩ hã mẽ piitã mẽ omunh pa nẽ rĩ kormã ahpyñhã tanhmã mẽ harënh to.

¹⁴⁻¹⁵ Hãmri nẽ mẽ htĩr tũm nẽ mẽ pa mã xwýnhjê nhĩxi hã kagãja kamã tee ri mẽ hkwyjê nhĩxi japêr nhũm kamã amrakati. Jakamã nhũm mẽ ma kuwy maatita wýr mẽ o mra nẽ kamã mẽ rënh pa. Te axte mẽ htyk nhũm mẽ kot kuwy kamã mẽ hagjênh pyràk nhũm mẽ kamã rôrôk nẽ tee ri amnhĩ xà htýx kamã hamak rãhã nẽ pa ho pa nẽ aa kator kêt kumrêx.

21

*Pika mẽ kaxkwa wa nyw jarënh
Sikũn Pêtre 3.8-13*

¹ Tã pa axte mẽmoj pumu. Nhũm Tirtüm ra pika mẽ kaxkwa nyw wa ho kato. Ra pika nẽ kaxkwa nẽ gô xujanãr tũmja hapêx pa nhũm kaxkwa mẽ pika nyw wa ho kato. Nom axte gô xujanãr o kator kêt nẽ.

² Hãmri nhũm Tirtüm nhõ krĩ mex pê Jerujarê nywja tanhmã amnhĩ to nẽ pika nyw wýr wrýk o mõ. Krĩja mex kumrêx. Mex o mex. Te mjên mã xwýnhjê mex jaxãr nẽ amnhĩ to muxre nẽ mjên wýr htêm pyrà nẽ pika nyw wýr mex kumrêx nẽ wrýk o mõ.

³ Hãmri nhũm Tirtüm kot mẽ ho amnhĩptãr ã hkrĩ xà maatiya kamã mēhõja kapêr o:

—Nã ãm hãmri. Na ra Tirtüm hkrajê hkôt pa ho pa. Pika nyw kamã mẽ hkôt pa ho pa nhũm mẽ tã no ho omu nẽ hkôt pa ho pa rãhã nẽ. Nã ãm hãmri. Ja mex o mex.

⁴—Koja hkrajaja hkôt pa ho pa nẽ axte htyk kêt kumrêx. Nhũm Tirtüm mẽ nẽ mẽ no kagô nhĩnhĩnh pa nhũm mẽ axte hkaprĩ nẽ mýr kêt nẽ. Nẽ ri axte amnhĩ xã kamã hamak kêt nẽ. Nẽ axte ri tanhmã omnu hto hkêt nẽ. Ra mẽ hkaprĩ nẽ ã nẽ mýr o pata hapêx par kumrêx nhũm hpãnhã mẽmoj nyw pix. Anê.

⁵ Hãmri nhũm Tirtüm tãm tanhmã inhmã kapêr to. Krĩ xà maati kamã ýr xwýnhhta tãm inhmã kapêr o:

—E na pa ra akupỹm mẽmoj piitã ho nyw pa. Jakamã e Juãw. ãm hãmri na pa ã amnhĩ kukamã amã mẽmoj jarënh anê. Ixêx kêt. Jakamã kër ka akwýjê mã piitã hã kagã hpa. Kê mẽ kamã harê nẽ tokyx kuma nẽ hkôt hamaxpêr rãhã ho pa.

6—Ra ixte amnhĩ kukamã mẽmoj mã ijamaxpēr xwỳnhja na pa ra ho anhỹr pa. Ixpê mẽmoj piitã ho anhỹr o hkrax xwỳnh nê mããnēn ixpê mẽmoj piitã ho ijapêx par xwỳnh. Nê ixrãhã ixpa xwỳnh. Amnepēm kormã mẽmoj kator kêt ri na pa pre ixrãhã ixpa. Nê ot pa arĩ ixrãhã ixpa. Tã mẽ kãm kôr nê kãm gô hkwȳ ho hkôm hprãm xwỳnhjê pyrã nê mẽ kãm ixpix prãm xwỳnhjaja kot paj te mẽ kãm inhô hino rũm gô hkwȳ nhôr nhũm mẽ kot ho hkôm pyrãk o mẽ hipêx. Hãmri nhũm mẽ htũr tũm nê ixri pa ho pa nê axte htyk kêt nê. Kot paj ã mẽ hipêx mex anê.

7—Mê ate tanhmã amnhĩ tomnuj to nê amnhĩ to htỳx nê ixkôt pix mã amnhĩ nhĩpêx o mẽ apa rãhã mẽ atyk xwỳnhjaja kot paj ã mẽ anhĩpêx mex anê. Ka mẽ apê ixkra hã amex nê ixkôt ri apa rãhã ho apa. Pa ixpê mẽ anhô Tĩrtũm ã tanhmã mẽ ato mex to rãhã ho ixpa.

8—No mẽ kot amnhĩ kaxyw ixkôt hamaxpēr kêt xwỳnhjaja. Nê mẽ kot amnhĩ tomnuj xwỳnhjaja nê mẽ kot ri mẽ hpar prãm xwỳnhjaja. Nê mẽ kot nhãm ri mẽnĩjê ho amnhĩkati xwỳnhjaja. Nê wajagajaja. Nê mẽ kot amnhĩ to sãnti hwỳr o pa xwỳnhjaja. Nê ri mẽ hêx nhi xwỳnhjaja. ã mẽ kot amnhĩ nhĩpêx anhỹr xwỳnh piitã koja mẽ apê ixkrajê hkĩnhã ma kuwy maati wỳr hapêx par kumrêx. Te axte mẽ htyk pyrãk nom koja mẽ axte htyk kêt nê. Anê.

Jerujarê nyw jarênh

Sikũn Korĩt 6.16; Karatas 4.26; Eprêw 12.22-24

9 Tã nhũm mẽ kot xijere pê 7 kamã Tĩrtũm gryk xà jamỳnh xwỳnhjê hõja hãmri ixwỳr tẽ nê inhmã:

—E ma ixkôt tẽ nê mẽmoj pumu. Na ra krĩ nywja pika nyw wỳr wrỳk o mō. Te mjên mã xwỳnh ê mex jaxàr nê amnhĩ to muxre nê mjên wỳr htēm pyrã nê mex kumrêx nê kaxkwa rũm pika nyw wỳr wrỳk o mō. Nê kot ho mjên mã xwỳnhnta te mẽ pahte amnhĩ tomnuj pãnhã amnhĩrer xwỳnhnta pyrãk. E tokyx tẽ nê omu. Anê.

10 Hãmri nhũm Tĩrtũm Karō tanhmã ixto pa ma kot inhmã kapêr xwỳnhnta kôt tẽ nhũm ma ixto mō nê kên krã hprêeti hwỳr ixto api nê himök ã ixãm. Pa Tĩrtũm nhô krĩ mex pê Jerujarê nywja pumunh o xa. Nhũm mex o mex. ãm hãmri te mjên mã xwỳnh kot ê mex jaxàr nê amnhĩ to muxre nê mjên wỳr htēm pyrã nê ahpar mã wrỳk o mō pa ixprĩ hã omu.

11 Na pre rax o rax nê mex o mex. Tĩrtũm kamã pa ho pa jakamã nhũm kamã hirã htỳx kumrêx. Te kên mex ã kãxpore xohtô jaxênh mex tỳx pyrãk.

12-13 Nê krĩ puhã kahêja hprêk rax nê. Nê hwỳr mẽ gjêx xà kêp 12. Na pre myt japôx xà rũm axkrunêpxi. Nê myt gjêx xà rũm haxwỳja axkrunêpxi. Nê akutã kahpa hkôt haxwỳja axkrunêpxi. Nê ahpỹnhã hakwakre hã Tĩrtũm kapêr o wrỳk xwỳnhjaja hamãr o kuhê. Nê hakwa kre piitã hã Ijaew pê ahpỹnhã mẽ pikjêr kãm mẽ kêp 12jaja mẽ hixi hã kagã.

14 Nê kahê xunhwỳr xà hkukamã kên pytyrja ahpỹnhã kêp 12. Kên pytyrta ã na mẽ kot Jejus nhỹ hã mẽ ahkre o mẽ pa xwỳnh maati pê 12jê nhĩxi hikwỳ.

15 Tã nhũm kot ixto mōr nê inhmã mẽmoj jahkre xwỳnhnta ôr o mẽmo pĩ py nê kot ho krĩ ho mĩdi kaxyw xa. Nê ho kahê piitã ho mĩdi kaxyw. Nê mẽ gjêx xàja ho mĩdi kaxyw.

16-17 Hãmri nê ho mĩdi hpa. Krĩja ry nê kahpa piitã axpên pyrãk. Nê hprêk piitã mããnēn axpên pyrãk. Kamã mẽmoj piitã ahpỹnhã kêp 2.200 kirôm. No puhã kahêja hprêk o 64 met pix nê.

18 Nē kahēja kēn jaxēnh pix o kot amnhī nhīpēx jakamā mex o mex. Nē hkarýr týx kumrēx. Nē kahē hkre kamā krī kamā ahpýnhā ri ixkreja ôr pix o kot amnhī nhīpēx. Nē piitā hkarýr týx.

19-20 Nē kahē xunhwýr xà hkukamā kēn pytyrta ahpýnhā ri kēn mex pix o kot amnhī nhīpēx. Piitā mex kumrēx nē hkarýrti.

Wamta kawax pē grāgrāre.

Nē hkôt ja kawax pē grāgrā kakrā htyk.

Nē hkôt ja kakrā htyk.

Nē hkôt hōja grāgrā karýr.

Nē hkôt ja hkamrēk pihkarti.

Nē hkôt ja grāgrā kakrā htyk.

Nē hkôt ja hkamrēk týx kumrēx.

Nē hkôt ja rārāare.

Nē hkôt ja grāgrā mē pihkār.

Nē hkôt ja rārār mē pihkār.

Nē hkôt ja grāgrā karýyre.

Nē hkôt ja kakrā htyk pihkār.

Ā kēn pytyr mex kot anhýr.

21 Nē mē gjēx xà hā hakwakre kahē xà pē 12ja mēmo kēn jakooti rūnh kumrēx pix o. Nē krī kahti hkôt pry nhīkwý xwýnhja ām ôr pix o. Nē hkarýyre.

22 Pa pre tee ri krī kamā Tirtūm mā amnhī jarēnh xà hā ixkre japēr nhūm amrakati. Mo kaxyw koja mē axte ixkreja hwýr mra? Ra Pahi Maati Tirtūm xihtýx xwýnh mē mē pahte amnhī tomnuj pānhā amnhīrer xwýnhnta ra hkrajē kamā pa ho pa kēnā kot kēt mē axte ri ixkreta o presija. Koja mē kām wa mex ā wa kām harēnh prām nē nhýri tām wa hwýr mra nē ā wa kām kapēr anē. Te mē pahte pahi hwýr pamrar nē kām pakapērtā pyrā nē wa hwýr mra nē wa kām kapēr.

23 Nē koja krīja kamā myyti nē mytwrýre hkēt. Mo kaxyw kot kēt myyti nē mytwrýreja arī ri hirā ho pa? Krī kamā Tirtūm pa ho pa jakamā kamā hirā mex kumrēx. Nē mē pahte amnhī tomnuj pānhā amnhīrer xwýnhnta haxwýja kamā pa ho pa. Te kēp kanē hpôk rax kumrēx pyrā nē hirā mex o pa. Kot hirā mex o kot myyti jakrenh. Ā Tirtūm mē Kra wa krīja kamā pa ho pa jakamā nhūm mē axte myyti ho presija hkēt nē.

24 Koja krī nhō xwýnhjaja hirā mex pix kām ri pa ho pa nē tām ri amnhī nhīpēx o ri pa. Tā koja mē ho amnhīptār xwýnhjaja Tirtūm wýr mra nē amnhī rom kām mex o mex ā harē nē kām:

—Na pre mē ixkwýjaja mē ixpē mē ho amnhīptār xwýnh ā axpēn mā mē inhmex nē mē ixāhpumunh ā ri axpēn mā mē ijarē. Nom mē ixrom amex o amex nē axāhpumunh o axāhpumunh. Jakamā ām hāmri na htem amā amex o amex ā ajarē Tirtūm. Anē.

25 Nē krī hwýr hakwakre koja amnhī kahē xà rēnh rāhā kuhē nē aa amnhī kahē hkēt nē. Jar mē panhō pika kamā na hte kamāt kaxyw nhūm htem amnhī tā hakwakre kahē hpa. No mo kaxyw koja mē axte pika nywja kamā ā amnhī nhīpēx anē? Koja kamāt kēt nē hirā rāhā ho rāhā jakamā nhūm mē amnhī tā kahē hkēt rāhā nē pa ho pa.

26 Nē koja mē piitā Tirtūm wýr mra nē kām mex o mex ā harē nē kām:

—Pa Tirtūm. Héxta waa nē. Anhō krīja mex kumrēx. Mex o mex. Nē mē ixrom amex o amex nē axihtýx o axihtýx. Nē mē ixrom axāhpumunh o axāhpumunh. Ām hāmri na ka ra mē ixpē akrajē kamā apa ho apa Tirtūm. Anē.

²⁷ Nē koja mēmoj punuj krīja wŷr gjêx kêt kumrêx. Mē hpijaam kêt xwŷnhjaja nē ri mē hêx xwŷnhjaja hwŷr gjêx kêt nē. Ām mē pahte amnhī tomnuj pānhā amnhīrer xwŷnhnta nhō kagā kamā Tirtūm ri mē htīr tūm nē mē pa mā xwŷnhjê nhīxi nhīpêx xwŷnh pixjaja koja mē hwŷr agjê nē kamā pa ho pa.

22

¹⁻² Tā pa pre axte mēmoj pumu. Nhūm Tirtūm kapêr o wrŷk xwŷnhja axte inhmā mēmoj jahkre. Nhūm Tirtūm mē kot mē pahpānhā amnhīrer xwŷnhja wa kot mē ho amnhīptār ā hkrī xā maati rūm pyhti hprōt. Krī kahti hkôt pry pohti nōr xwŷnhnta kahti hkôt hprōt o nō. Pyhti kamā gōja na htem ho ixkō nē htīr tūm nē pa ho pa. Gō karŷyŷre. Nhūm mēmo pi hpār muxre xwŷnhja akutā hijê nē xa. Pī xōja na htem kuwō nē htīr tūm nē pa ho pa. Na hte apkati mē ô rāhā nē kuhê. Nē axtem hōja mē piitā mē mex nē ā hkêt kaxyw na hōja.

³ Amnepêm na pre Tirtūm Atāw mā kapêr nē kām:

—Ate amnhī tomnuj mŷrapê kot paj tanhmā pika homnu hto nhūm apê mex kêt nē. Ka kamā apur nē kamā axāpênh rūnh o apa rāhā nē rī kormā kamā axāpkur o ri apa. Apê jamnuj tā kot kaj mē ā amnhī nhīpêx anhŷr o apa rāhā ty. Anê.

Tā ra Tirtūm nhō krī nyw kamā mē omnuj xāja amrakati kumrêx. Nē Tirtūm mē kot mē pahpānhā amnhīrer xwŷnhnta wa ô krī kamā pa ho pa jakamā mē pahte kamā mē papa xwŷnhjaja kot puj mē wa kām tanhmā amnhī nhīpêx to ho ri papa.

⁴ Kot puj mē tā pano ho Tirtūm pumunh o papa. Hāmri nhūm te mē pahpiitā mē panhōkrā hā amnhī nhīxi nhīpêx pyrāk o mē panhīpêx.

⁵ Nē kot puj mē Pahi Maati Tirtūm nhīrā kamā ri papa nē axte myyti nhīrā ho presija hkêt nē. Koja kamāt hapêx pa pu mē axte kanê ho presija hkêt nē. Nē Jeus nhīhkō hā hirā kamā mēmoj to amnhīptār rāhā ho papa.

*Jeus tokyx akupŷn wrŷk ā harênh
Apokarip 1.1-3*

⁶ Tā nhūm Tirtūm kapêr o mē wrŷk xwŷnh kot ixto mōr xwŷnhnta axte inhmā kapêr nē inhmā:

—E nā ām hāmri na ixte amā mēmoj piitā harênh xwŷnhja. Ām hāmri na. Jakamā kwa kēr ka arī hā ano htŷx rāhā ho apa. Amnepêm Tirtūmja ŷ hā mē kapêr o pa xwŷnhjê mā tanhmā kapêr o amnhīrit to. Kot tanhmā amnhī nhīpêx to hkukamā mē kām ho amnhīrit nhūm prem kuma nē ô ri ma hkwyjê mā harênh o ri mē hkôt pa. Tā ra mē hpānhā pa mē awŷr inhmē. Mē ate Tirtūm mā tanhmā amnhī to ho apa xwŷnhjê mā ixte ja jarênh kaxyw Pahihti Tirtūmja mē awŷr inhmē pa wrŷ. Nā koja mēmoj tokyx ā amnhī nhīpêx anê.
⁷ Na pre Jeus mē amā amnhī jarênh o: “Kot paj tokyx akupŷm mē awŷr wrŷ. Tā mē ate ijarênh ā kagā kamā harênh nē mar nē amnhī kaxyw hkôt ajamaxpêr nē hkôt amnhī nhīpêx xwŷnhjaja kot kaj mē akīnh nē ri apa.” Anhŷr o amnhī jarê. Anê.

⁸ Nā ixpê Juāw na pa pre ā inhno ho mēmoj pumunh anê. Hāmri nē omunh pa nē Tirtūm kapêr o wrŷk xwŷnh kot inhmā harênh xwŷnhnta kutā ixkōn krā ho ixtēm nē inhŷr kaxyw. Nom nhūm amnhī nē inhmā kapêr kām hihtŷx nē inhmā:

⁹ —Kwa nā ri ā inhīpêx anhŷr kêt nē. Ām Tirtūm pix kutā na pu htem ā amnhī nhīpêx anê. Apyrā nē ixpê Jeus kwŷ kênā. Na pa hte apyrā nē ŷ hā

tanhmā amnhī nhīpêx to ho ixpa. Nê mē apyrà nê kapêr ā kagà hkôt pix mā amnhī nhīpêx. Na pu htem axpên kutā pahkôn krā ho parôrôk kêt nê. Ām Tirtûm pix kutā na pu htem ā amnhī nhīpêx anê.

10 —E ā ate mēmoj pumunh nê mar anhÿr xwÿnhja koja tokyx ā amnhī nhīpêx anê. Jakamā kwa kêr ka akwÿjê pê ho apimxur kêt nê. Piitā hā kagà hpa kê mē kamā harê nê kuma nê mēmoj kot ā amnhī nhīpêx anhÿr mā xwÿnhhta piitā hkukamā harênh ma. Koya tokyx mēmoj ā amnhī nhīpêx anê.

11 —Jakamā kwār mē māmri piitā tanhmā kām amnhī nhīpêx to ho pa hprām xā hkôt amnhī nhīpêx o pa. Kwār mē mē kot amnhī tomnuj xwÿnhjaja ā amnhī anhīpêx anhÿr o pa. Nê kwār mē kot tanhmā kapêr punuj to xwÿnhjaja māmri ā amnhī nhīpêx anhÿr o pa. Nê kwār mē kot tām amnhī nhīpêx o ri mē pa xwÿnhjaja māmri Tirtûm kôt pix mā ri tām amnhī nhīpêx o pa. Anê.

Nhûm pre ā kaxkwa hwÿr ixto āpir xwÿnhhta inhmā kapêr anê.

12 Hāmri nhûm hpānhā Jejus tām inhmā kapêr nê inhmā:

—E kot paj tokyx akupÿm mē awÿr wrÿ. Nê akupÿm pôj hāmri nê mē kot amnhī tomnuj o mē pa xwÿnhjaja pa ja mÿrapê ma mē kot amnhī xā htÿx kamā hamak tûm xāta wÿr mē rēnh pa. No mē kot ixkôt amnhī nhīpêx xwÿnhjaja kot paj akupÿn inhô krī hwÿr amnhī kôt mē ho api.

13 —Nê ixrāhāā xwÿnh na pa. Amnepê mā kormā mēmoj kêt ri na pa pre ra ixrāhāā. Nê koja nhÿrmā mēmoj piitā akupÿm hapêx pa arī ixrāhā nê ixpa ho ixpa.

14 —Nê Tirtûm kot mē anê mē ate amnhī tomnuj kuhônĥ par xwÿnhjaja kot kaj mē amex kumrêx nê apa ho apa. Nê akīnh nê ajamakêtkati nê ri atÿx apa ho apa. Te ho mē kot amnhī xê kahônĥ nê mex jagjēnh nê ri hā pata pyrāk. Koya Tirtûm mē amā anê ka mē ajamakêtkati nê ô krī hwÿr agjê nê kamā ri amex kumrêx nê ri apa ho apa. Nê kamā mēmo pī xô mē kot kur nê htîr tûm nê pa mā xwÿnhhta wÿr mra nê amnhîm ô rê nê hkur o ri apa. Ra mē ate Jejus kôt amnhī xunhwÿr jakamā kot kaj mē axāmnĥix hwÿr mra nê amnhîm hkwy rê nê hkur o ri apa. Kot kaj mē ā amnhī nhīpêx anê.

15 —Nom mē kot amnhī tomnuj o mē pa xwÿnhjaja koja mē akīnhā inhô krī hwÿr gjêx kêt nê. Mē kot ri mē y ho mē pa xwÿnhjaja. Nê mē kot nhām ri mēnijê ho amnhīkati ho mē pa xwÿnhjaja. Nê mē kot ri mē hpar o mē pa xwÿnhjaja. Nê mē kot ri sānti nhīpêx o te Tirtûm nhīpêx pyrāk o mē pa xwÿnhjaja. Nê mē kām ri hêx prām o ri mē pa xwÿnhjaja. Koya mē akīnhā inhô krī hwÿr pa hkêt nê.

16 —E Juāw. Nā ixpê Jejus na pa awÿr ixkapêr o mē wrÿk xwÿnhhta mē. Kot ixkwÿjê kaxyw amā ixkapêr jarēnh kaxyw. Ixpê Tawi pâr krax na pa. Te ixpê arġro hkôt kanhêti hpôk rax kot arġro ho môr ā ho amnhîrît xwÿnhhta pyrāk. Anê.

Nhûm pre ā Jejus inhmā kapêr anê. 17 Tirtûm Karô mē Jejus kwÿjjaja na htem ā Jejus kot amnhī jarēnh anhÿrja ma nê hkīnh nê. Nê kām kapêr o:

—Hêxta waa nê. Kwa amnhîm anojarêt nê tokyx akupÿn mē ixwÿr wrÿ Pahiht. Pa mē tokyx ā amnhī nhīpêx anhÿr o ri war akôt ixpa. Anê.

Nê mē ate ja mar xwÿnhjaja kêr ka mē urāk nê ā kām akapêr anê.

Nê te mē amā kôr nê ri mē apa pyrāk xwÿnhjaja kêr ka mē te Jejus wÿr amrar nê ô gô ho akôm pyrā nê hkôt amnhī xunhwÿ. Te Jejus amarī mē pamā ô gô nhôr pyrāk o mē panhīpêx pu mē hkôt amnhī xunhwÿ nê ra pahpê pahtr tûm nê papa mā xwÿnh. Hāmri nê amnhī pānhā tanhmā kām amnhîrer to hkêt nê.

Nhÿrmā mēmoj nyw par ā harēnh jatur xā

¹⁸ E ixpê Juãw na pa Jejus nhỹ hã mẽ amã mẽmoj tanhmã kot amnhĩ nhĩpêx to hkukamã ã mẽ amã hã kagà anê. Tã kwa mẽ o kora. Kêr ka mẽ atõ amnhĩ krã hkõt ri ajamaxpêr o te ho ja pyrã nê hijuk ri axte mẽmoj nhĩpêx kêt nê. ãm kwarĩ ho kwarĩ. Kot ka mẽ atõ anê nhũm Tirtũm ja hã apumu nê kagãja kamã tanhmã mẽ hipêx kati hto xãta o tanhmã anhĩpêx to ka arĩ amnhĩ pumu.

¹⁹ Rỹ ka mẽ atõ kagã kamã harê nê ama nê tanhmã ajamaxpêr to nê ajamaxpêr o:

—Nà ja kot anhỹr kêt. Na mẽ ãm harênh o hêx. Kot paj kuma nê ãm kuma.

Anhỹr o ajamaxpêr japêr. Hãmri nhũm Tirtũm amnhĩ tã ama nê kagã mexta kamã kot tanhmã mẽ ho mex toja o ato mex kêt nê. Ka õ krĩ hwýr axãpir nê mẽmo pĩ xô mẽ kot hkur nê htĩr tũm nê pa kaxyw mã xwýnhnta ka amnhĩm hõ hyr nê hkrêr kêt nê. Jakamã e kwa mẽ o kora. Kêr ka mẽ kagãta kamã ã mẽmoj kot amnhĩ nhĩpêx anhỹr mã xwýnhnta jarênh ma nê aprĩ hã piitã hkõt ajamaxpêr tỹx rãhã ho ri apa.

²⁰ E Jejus kot inhmã mẽmoj kukamã tanhmã ujarênh to xwýnhnta na pre inhmã amnhĩ jarênh o: “Kot paj tokyx akupỹn mẽ awýr wrý.” Anê. ãm hãmri na pre ã amnhĩ jarênh anê. Kojã tokyx akupỹn mẽ pahwýr wrý hãmri nhũm mẽmoj piitã mex o mex.

Jakamã kwa kêr ka amnhĩm anojarêr nê tokyx akupỹn mẽ ixwýr wrý Pahihti Jejus.

²¹ Nê ixpyrà nê mẽ apê Tirtũm krajaja na pa hte mẽ ato Pahihti Jejus wýr rãhã ho ri ixpa nê kãm:

—Kwa akwýjê pumu nê mẽ kutã anojarêr rãhã ho ri apa Pahihti. Anê.

E mẽ ujarênhja na hapêx. Ixpê Juãw na pa Jejus kot inhmã tanhmã ujarênh toja pa amnhĩ xô ri mẽ amã hã kagã hpa. E na hapêx.